


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022
383a4e22-34cd-505f-9cc2-2f9921e7aa9f

Contents

Matêwre	1
Makre	94
Rukre	147
Juãw	244
Atre	313
Rômãn	395
Wam Korît	442
Sikũn Korît	485
Karatas	512
Epes	528
Piripos	543
Korosẽ	553
Wam Tesarõn	563
Sikũn Tesarõn	571
Wam Ximotre	576
Sikũn Ximotre	588
Xitre	596
Piremõ	601
Eprêw	603
Xiakre	636
Wam Pêtre	647
Sikũn Pêtre	659
Wam Juãw	666
Sikũn Juãw	676
Hapuhã Juãw	678
Jutre	680
Apokarip	684

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mē pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mē panhõ pahшти mex o mex ã harê nê hã kagà. ã na pre Matêwre mē pamã Jejus jarê nê hã kagà anê.

Apraãw kanrêhã hkra nê htãmnhwýjê nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja.

Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mē htôjaja.

³ Nê Juta hkra na pre wa kêp Pere nê Jera.

Nê Pere mē Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahшти Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê

Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mē htôjaja.

Kormã mē htĩr ri na pre Papirõn nhõ xwýnhjaja kot mē hkurê kaxàr kaxyw mē hwýr hprõt nê mē unê. Ijaew piitã unênh pa nê ma akupyãm mē õ pyka hwýr mē ho hapêx nhũm mē hpãnhã Papirõn kamã pa ho pa. Jakamã nhũm Josis mē hkra Jekonĩs mē htôjaja mē hipêêxà pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: "Tĩrtũm kot mē pakaxyw ãm xwýnh" anhỹr xwýnhhta na pre.

¹⁷ Nhũm Apraãw kanrêhã axte axpên kanrêhã mē àptàr nywjaja Tawija wýr kêp 14. Nê Tawi nhĩrõ pê Papirõn hwýr mē hapêx kêt ri axpên kanrêhã mē àptàr nywjaja mããnhên kêp 14.

Nê ra Papirôn kamã mẽ pa nhîrô pê axpên kanrêhã Jejus pê Tîrtûm kot mẽ pakaxyw ãm xwýnhhta wýr mãânên kêp 14. ã na pre Jejus Kris xwýj ri higêtjê nhîxi anê.

Jejus Kris kator

Rukre 1.26-38, 2.1-7

¹⁸ Tã ã mẽ hixi jarênh kot anhýr kanrêhã na pre ã Jejus Kris kator anê. Nhùm pre kormã Jujeja Marir o hprô kaxyw. Nom kormã ho hprô hkêt ri nhùm htujarô. Kormã hkukrit tã nhùm Tîrtûm Karô tanhmã ho nhùm htujarô.

¹⁹ Hãmri nhùm Jujeja harênh ma nê tee ri hamaxpêr nê htýx nhãm mêmhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nà pa mãn ixte htüre hã. Nhãm mêmhõ ra kot ã hipêx anhýr kênã. Nà kot paj ho ixprô hkêt nê. Nom kot paj ixkwýjê mã ã kot amnhî nhîpêx anhýr o amnhîrit kêt nê. Kot paj anê nhùm mẽ kuma nê ho kapêr punuj nhùm amnhî kamã hpijaàm týx nê. Ja pymaj kot paj ixkatat kôt hkaga kurê kumrêx. Nom ixkwýjê hkàx ã hkaga. Anê.

²⁰ Nê ã hamaxpêr anhýrja o ra gôr nê nõ. Nhùm Tîrtûm kapêr o mẽ wrýk xwýnhjê hõ hwýr wrý nê hwýr axàn kuri xa. Hãmri nê kãm:

—Pa Juje? E ot pa awýr tẽ. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêmhõ kot apê tanhmã ho hkêt. Tîrtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa.

²¹ Koja hkrare kato nê myre nê hprêk. Hãmri nê mẽ kot hkôt amnhî xunhwýr xwýnhjaja mẽ kot amnhî tomnuj piitã pê mẽ utar pa. Jakamã koja kato ka wa hã hixi mẽ nhùm kêp Jejus. Anê.

Nhùm pre ã Tîrtûm kapêr o mẽ wrýk xwýnhjaja kãm kapêr anê. Ijaew kapêr kãm Jejus jarênhja te kêp “Tîrtûm kêp mẽ papytâr xwýnh” anhýr pyrâk. Jakamã nhùm Tîrtûm kapêr o mẽ

wrýk xwýnhjaja Juje ôt kãm ã kãm Marir jarênh anê.

²²⁻²³ Nom kormã ã kãm kapêr anhýr xwýj ri na pre ra Tîrtûm nhý hã kapêr xwýnhjê hõja kukamã tanhmã harênh to nê hã kagà. Nê hã kagà ho:

E mẽ inhma nê inhmar týx nê ho apa. Koja nhýrmã pyka já kamã mêmhõ kormã hkukrit tã htujarô. Nê hkra kato nê myre. Nhùm mẽ omu nê hã hixi mẽ nhùm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tîrtûm mẽ pahkôt pa ho pa” anhýr jarênhhta pyrâk. Jakamã nhùm pre Tîrtûm nhý hã kapêr xwýnhjaja Jejus kukamã ã harênh anê nê hã kagà.

²⁴ Jakamã nhùm Tîrtûm kapêr o mẽ wrýk xwýnhjaja Juje mã kapêr par mẽ nhùm hkrâkato. Hãmri nê kot kãm ujarênh xá hkôt Marir o hprô.

²⁵ Nom kormã tanhmã ho hkêt nê ri o pa rãhã nhùm hkrareja kato. Hãmri nhùm wa hã hixi mẽ nhùm kêp Jejus nê mãânên kêp Emanuew.

2

Kanhêti ho studa xwýnhjê jarênh

¹ Nhùm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhõ xwýnhjê ho amnhîptâr o pa ri nhùm õ pika kamã kato. Hãmri nhùm Tîrtûmja kaxkwa kamã Kra kator jarênh xá hã kanhêti raxta õ nhõ nhùm pika hõ kamã kanhêti ho studa xwýnhjaja omu. Kanhêtiija pumu nê hkînh nê axpên mã:

—Kwa ga mẽ kanhêti raxti mûj pumu. Mãn ra Ijaew nhõ pahi nywta kato nhùm kanhêti mûj kêp ho amnhîrit xá hã ajêt. Kwa pu mẽ ma hapêr o mõ nê nhýri tokyx omu nã.

Anê hãmri nê amnhî to pikuprôn pa nê ma hapêr o pa. Ma myt gjêx xá hwýr hapêr o pa hã apkati xohtô nê. Hãmri nê ra Ijaew nhõ pika hwýr pøj nê krî pê Jerujarê hwýr hapêr o mõ. Pahi Eroxo nhõ krîja wýr nhùm mẽ hapêr o mõ hãmri nê kamã pøj nê mẽ hkrare nywta ã krî nhõ xwýnhjê kukjêr o mõ

² nê mē kām:

—Pa? Ot pa mē apê Ijaew nhō pahi nywreta pumunh kaxyw mō. Ham kator xwýnhhta. Mē inhō pika kamã na pa prem kaxkwa hkrax rŭm kot ho amnhîrît xà hã kanhêti raxta pumu. Hãmri nê nhÿri pahi nywre pumunh nê kutã mē ixkôn krã ho ixtêm nê ixkrî nê kãm mex o mex ã harênh kaxyw nêtãnh mē inhō krî rŭm hapêr o mō. Kwa mē inhmã harê. Nhÿri na? Na pa mē inhmã omunh prãm tÿx kumrêx.

Anhÿr o hã mē hkukjêr o mōr jakamã nhŭm mē piitã pahi nywja jarênh ma nê axpên mã harênh o hprôt.

³ Nhŭm pahi Eroxja harênh ma nê tee ri amnhî kukamã hamaxpêr. Pahi nyw kot mē ho amnhîptâr ã hkamnhîx nhŭm já kêp omnuj tÿx nê. Nhŭm krî nhō xwýnhjaja ã hamaxpêr anhÿr ã omu nê tee ri amnhî kukamã hamaxpêr o ra kãm ma nê.

⁴ Hãmri nhŭm pahi Eroxja amnhî wÿr hkwyjê hã karō. Mē õ patre krãhtŭmjaja nê Tirtŭm kapêr tŭm o mē ahkre ho mē pa xwýnhjaja nhŭm amnhî wÿr mē hã karō nê Tirtŭm kot nhÿrmã mē hwÿr mēnh mã xwýnhhta ã mē hkukjêr kaxyw. Nê mē kãm:

—E Tirtŭm kot nhÿrmã mē pahwÿr mēnh mã xwýnhhta ã na pa mē akukjêr kaxyw mē ato akuprō. Kwa mē atō inhmã harê. Koja nhÿrmã kator kaxyw nê nhÿri koja we kato? Xà jar mē panhō krî kamã nà? Xà nhÿri krî hō kamã? Anê.

⁵ Hãmri nhŭm mē kuma nê kãm:

—Nà mē panhō pika pê Jutej kamã koja xep kato. Krî pê Perêj kamãã. Na pre Tirtŭm nhÿ hã kapêr o mē pa xwýnhja ra hkukamã mē panhîgêjtê mã tanhmã harênh to nê hã kagã. Nê hã kagã ho:

⁶ Pa Perêj nhō xwýnhjaja? E mē anhō krî grire htã kamã koja nhÿrmã mē panhō Pahi Maatija kato. Koja mē pahpê Ijaewjê piitã mē pahto amnhîptâr mex o pa. Jakamã mē anhō krî grire htã koja Ijaew piitã axpên mã mex ã harênh o pa.

Ã na pre Tirtŭm kot mē pahwÿr mēnh mã xwýnhhta kukamã mē kãm harê nê hã kagã anê. Anê.

⁷ Hãmri nhŭm pahi Erox tee ri ã harênh anhÿrja ma hãmri nê amnhî wÿr mē kot hã àhkukjêr o mōr xwýnhjê hã karō. Nom nhÿri Ijaew kàx ã. Hãmri nhŭm mē ma hwÿr mra nê agjê nhŭm mē omu nê pahi nywta ã mē hkukja nê mē kãm:

—E mē aprî hã inhmã pahi kator nywta jarê. Tanhmã na pre ra mē ate kanhêti pumunh ã mytwrÿ kute? Xà ham na ka prem omu nà amnepê mã? E mē aprî hã tanhmã inhmã harênh to. Anê.

Hãmri nhŭm mē ihōja kãm:

—Nà na ra hã amgrà axkrut kaxyw. Na pa prem omu hãmri nê inhnojarêr nê man ixpa ho ixpa ry rax nê mē awÿr pōj. Anê.

⁸ Nhŭm mē kuma nê mē kãm:

—Tÿ. Nom jar amrakati. Perêj kamã na xep kato. E mē mãmri ma hwÿr mō nê kamã hapêr. Hãmri nê nhÿri omu nê akupÿn ixwÿr mō nê inhmã harê. Pa ijaxwÿja ma hwÿr mō nê omu nê mē apyrã nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mē kãm kapêr anê. Kot nhÿri harênh mar nê hã àmnênh nhŭm mē kot hpîr kaxyw nhŭm hêx rom ã kãm omunh prãm tÿx ã amnhî jarênh anê.

⁹⁻¹⁰ Jakamã nhŭm mē kuma hãmri nê kato nê ma Perêj wÿr mōr kurê kumrêx. Hãmri nê kormã mē õ pika kamã mē pa ri kanhêti ho studa xwýnhhta nhŭm mē axte amnhî kukamã omu nê hkînh nê. Nhŭm ma Perêj wÿr mē hkukamã mō nhŭm mē omunh pê ma hkôt pa rãhã hwÿr pōj. Nhŭm kanhêtika pahi nywre nhōrkwÿ mÿri ajêr.

¹¹ Jakamã nhŭm mē ma hkôt mra nê ixkreja wÿr pōj nê kapem xa. Hãmri nê mē kãm kapêr nê mē hwÿr agjê nê Jejus mē katorxàja wa omu. Hãmri nê Jejus kutã hkôn krã ho hkrî hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhÿrmã axàptàr hãmri nê apê mē inhô Pahi Maati. Nà ãm hãmri na pa mē apumu nê ixkĩnh nê. Anê.

Hãmri nê ahpÿnhã kãm hkĩnh xà gô. Kãm ôr kwÿ gô nê kãm mēhkuxwa xà hkwy gô nê kãm te kot rãmre kuxware pyrãk pē mĩraja nhũm mē kãm hkwy gô. Mē hkĩnh xà hã kàxpore xohtô nhũm prem kãm ôr pa.

¹² Hãmri nê ra akupÿm Jerujarê kamã pahi Eroxo wÿr nojarêt. Nhũm kamãt nhũm mē gôr nê hikwÿ hãmri nê ra amÿti. Nhũm Tĩrtũm mē hpimtir kãm mē kãm kapêr nê mē kãm:

—Pa? E mē inhma. Kêr ka mē akupÿm pahi Eroxo wÿr amrar nê kãm mē hkrata jarênh kêt nê. ãm kwarĩ ho kwarĩ. Nê kêr ka mē pry hõ hã mân ma mē anhõ pika hwÿr akupÿm apa ho apa.

Anhÿr o mē kãm kapêr jakamã nhũm apkati nhũm mē kãnhmã hkrĩ hãmri nê Tĩrtũm kot mē kãm hã karõ xà hkôt ma akupÿm mē õ pika hwÿr pa kurê kumrêx nê akupÿm pahi Eroxo wÿr mrrar kêt nê.

Juje mē hprõ wa kot Eroxo pymaj ma Jejus o mör

Apokarip 12.1-6, 12.13-18

¹³ Tã nhũm kanhêti ho studa xwÿnhjaja ma akupÿm hapêx hãmri nhũm Tĩrtũm axte Marir mjên Juje hwÿr kapêr o mē wrÿk xwÿnhjê hõ mē. Nhũm kê axte hpimtir kãm hwÿr wrÿ nê kãm kapêr nê kãm:

—Pa Juje. E kwa kãnhmã nhÿ. Na ra pahi Eroxa aprõ pē hkrata ã amÿnê. Kojã tokyx pôristi hkwyjaja mē anhõ krĩ hwÿr pøj nê war apê hpĩr kaxyw ri hapêr. Jakamã kwa wa tokyx akato nê ma pika pē Ejit wÿr amör kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kãnhmã nhÿ nê Marir mra nê war amnhĩ to akuprõ nê ra nojarêt. Hãmri nê krĩja pē Jejus o kato nê ma o mör kurê kumrêx. Wa mör ryy nê hãmri nê Ejit wÿr pøj nê kamã pa ho pa.

¹⁵⁻²⁰ Rôm nhũm pahi Eroxo tee ri amnhĩ wÿr kanhêti ho studa xwÿnhjê kamã hamak o pa nom nhũm mē akupÿm hwÿr mrrar kêt nê. Jakamã nhũm mē kamã gryk nê hamaxpêr o:

—Tk. Kwa nã. Na mē ãm inhmã hêx nê akupÿn ixwÿr mrrar nê nhÿri inhmã pahi nywta jarênh kêt nê. Nà kwãr mē mãmri ã inhĩpêx anê. Mē kot ixpê ho hpimxuure kaxyw ã. Nà kot paj mē kêp kupĩ nhũm mē rĩ amnhĩ pumu. Na xep prem kanhêti kot harênh xãja pumunh ã ra hã amgrã pyxi nê hkôt mytwrÿ kêp 6. Jakamã mân mē hkrata ra hã amgrã axkrut kaxyw. Nà na pa ra ijamaxpêr. Kot paj Perêj kamã mē hkra myjaja ra mē hã amgrã axkrut xwÿnhjaja nê kormã mē hã amgrã axkrut kêt xwÿnh piitã mē himex pa. Jao ra mē kamã pahi nywta pĩ. Nà ixte hpĩr mã kênã. Kojã hprêk nê ixpãnhã Ijaew o amnhĩptãr kêt nê.

Anhÿr o hamaxpêr hãmri nê amnhĩ wÿr õ pôristi hkwyjê hã karõ nê mē kãm mē hkrajê hã amÿnê nê mē kãm:

—E kêr ka mē ma Perêj wÿr mra nê kamã mē kêp mē hkra myrejaja ra mē hã amgrã axkrut xwÿnhjê nhĩmex pa. Nê kormã mē hã amgrã axkrut kêt xwÿnhjaja mãânên mē himex par kumrêx. Nê Perêj pu hã ri krĩ hkryre hkôt mãânên ri ajapøj nê ã mē himex par anê. Anê.

Hãmri nhũm mē kuma nê ma mē hwÿr mrrar kurê kumrêx. Hãmri nê Perêj wÿr pøj nê mē kêp mē hkra myre piitã mē himex pa. Jakamã nhũm mē katorxã nê mē hipêêxãjaja tee ri mē hkra htyk xwÿnhjê pumu nê hkaprĩ htÿx nê mÿr rũnh nê. Nom na pre Tĩrtũm nhÿ hã kapêr jarênh o mē pa xwÿnh finat Jeremĩstija ra amnepêm ã mē kot amnhĩ nhĩpêx anhÿrja kukamã mē panhĩgêtjê mã mē harê nê hã kagã. Na pre mē kãm Ijaew kurê xwÿnhjê pynênh nê ma mē õ pika hwÿr mē ho hapêx par kaxyw. Hãmri nhũm mē panã Rrakewja te ra kot tee ri ja hã mē omunh nê tanhmã amnhĩ nhĩpêx to pyrãk nhũm

Jeremîstija tanhmã Ijaewjê jarênh to nê hã kagà. Nê hã kagà ho:

Amnepê m Perêj kamã na pre mê panã Rrakewja hpijagri ho nôrja ã ra htyk kaxyw nê tee ri hkra kator mã xwýnhta kukamã hamaxpêr nê mýr o nõ. Nhũm hkwýjaja tee ri akupým tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwý nijaja ra urak nê tee ri mê hkrare ho hamak xaj mýr o pa. Mê kot mê kêp utar nê mê himex par jakamã nhũm mê tee ri mê ho hamak xaj mýr o pa. Anê.

Nhũm pre finat Jeremîsja mê hkukamã ã mê harê nê mê hã kagà anê. Tã ra jarãhã mēni piitã Rrakew pyrà nê hkrajê o hamak xaj mýr o pa.

Wa kot akupým wa õ pika hwýr Jêjus o mör

Juãw 7.41-42

Tã nhũm mytwrý grêre nê hapêx nhũm pahi Ero x ty. Jakamã nhũm kamãt nhũm Jujeja gôr nê nõ. Nê kê õt kãm axte amýti. Nhũm Tirtũm kapêr o mē wrýk xwýnhja axte hwýr wrý nê kãm:

–Pa Juje? E na ra Marir pê hkra pír mã xwýnhta ty. Jakamã kwa wa mãmrí ma akupým mō. Ma akupým mē apê Ijaewjê nhõ pika hwýr axãmnhix aprõ mē hkrata wa o mō.

Anhýr o kãm kapêr. Na pre ra amnepê m Tirtũm nhý hã kapêr o mē pa xwýnhjê hõja ja kukamã mē panhigêjtjê mã ja jarê nê hã kagà. Nê hã kagà kot: “Ixpê Tirtũm kot paj nhýrmã Ejit rũm ma akupým õ pika hwýr ixkrata wa mē kumê.” Anhýr o kot hkukamã harênh nê hã kagà.

²¹ Jakamã nhũm Tirtũm kapêr o mē wrýk xwýnhja ã Juje mã karõ anê hãmri nhũm kuma nê ma akupým wa o mō. Ma akupým mē õ pika hwýr wa o mō.

²² Tã ra akupým hpõx kaxyw htêp o mō. Hãmri nê pahi Ero x kra Akêrawja ra hipêêxà mýr pê kot Jutej kamã

mê ho amnhiptar hã harênh ma. Hãmri nê tee ri mē amnhí kukamã hamaxpêr nê kãm mē hwýr wa o mör pyma nê.

Tã nhũm kamãt nhũm Juje ra gôr nê nõ nê kê axte amýti. Nhũm kê axte Tirtũm kapêr o mē wrýk xwýnhja hwýr wrý nê akupým õ pika hkwý pê Jutej wýr mör nê wa mē hkurê nê kãm:

–Pa Juje? E kêr ka Jutej wýr wa mē amör kêt nê. Pãnhã nhãm mē anhõ pika hõ hwýr mãn mō nê kamã ri apa.

Anê nhũm kuma nê hpãnhã wa mē ma mē õ pika hkwý pê Garirej wýr wa mē juk nê ma mō.

²³ Nê kamã pøj nê krí pê Najare hwýr mō nê kamã amnhim õrkwý nhípêx nê kamã wa mē pa ho pa. Nhũm pre ra amnepê m Tirtũm nhý hã kapêr o mē pa xwýnhjê hõja ra ã mē kot amnhí nhípêx anhýrja kukamã mē panhigêjtjê mã mē harê nê hã kagà. Nê hã kagà kot:

Tirtũm kot mē pahwýr mēnh mã xwýnhta koja kêp Najare nhõ xwýnh. Anê.

3

Juãw Paxis kot Tirtũm kapêr jarênh o pa

Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhí nhípêx anê. Nê pika pê Jutej kamã mē kãm Tirtũm kapêr jarênh o pa. No ãm krím pa hkêt nê. ãm mē hpu hã krí pê amým ri kapôt ã ri mē kãm Tirtũm kapêr jarênh o pa.

²⁻³ Tirtũm nhý hã kapêr o pa xwýnh finat Ijais ra kot Juãw kukamã mē panhigêjtjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhýrmã mēhõ mōn pøj. Kapôt ã mōn pøj nê mē kãm tanhmã mēmoj tã karõ hto ho ri pa. Nê mē kãm: “Koja Tirtũm tokyx mē pahwýr mē panhõ Pahitija mē nhũm wrý nhũm mē piitã omu. Jakamã kwa mē tokyx kutêp tãm amnhí nhípêx o ri

apa. Te mē kot mēhō kutēp pry ho mexta pyrā nē amnhī nhī ho tām amnhī nhīpēx nē tām ajamaxpēr mex o ri apa. Kēr ka mē Pahiti kutēp ā amnhī nhīpēx anhēr o ri apa.” Anhēr o koja mē kām ujarēnh o pa. Anē.

Na pre finat Ijaisja Juāw Paxis kukamā ā mē kām harēnh anē nē hā kagā. Tā nhūm hā kagā xāja kōt nhūm Juāw Paxisja mōn pōj. Hāmri nē Ijais kot hkukamā harēnh xā hkōt kapōt ā ri mē kām ujarēnh o pa nhūm mē kām mar prām xwýnhjaja ma hwýr mra. Nhūm mē kām kapēr nē mē kām:

—E koja Tirtūm tokyx kot mē pakaxyw ām xwýnhja o amnhīrit. Jakamā kwa mē tokyx kutēp amā amnhī tomnuj kaga hprām xāj tām amnhī nhīpēx o apa.

Anhēr o Jejus kutēp mē kām kapēr o pa.

⁴ Juāw Paxisja hikàxpore hkēt jakamā na pre é mex kēt nē pa. Ām mēmo mry pē kamer kī ho amnhīm ē nhīpēx nē hagiē nē hā pa. Nē mēmo mry hkā ho amnhī pre nē ri pa. Nē mēō mex kur kēt nē ām krit ku nē menh ôr o ri pa.

⁵ Jakamā nhūm kapōt ā ri mē kām Tirtūm kapēr jarēnh o pa nhūm mē kot mar kaxyw ma hwýr mra. Pika pē Jutej kamā ri mē pa xwýnhjaja. Nē Jutej kamā krī pē Jerujarē nhō xwýnhjaja. Nē pyhti pē Jotāw mýri mē pa xwýnhjaja. Nhūm prem piitā harēnh ma nē kot mar kaxyw ma hwýr mra.

⁶ Hāmri nē kapēr ma nē Tirtūm noo mā mē kot amnhī tomnuj xwýnh ā kām amnhī jarē. Mē kot amnhī tomnuj kaga nē tam amnhī nhīpēx o pa hprām xāj ā kām amnhī jarēnh anē. Nhūm Tirtūm kaxkwa kamā hkrī htā mē kuma nē amnhī katut kōt mē kot amnhī tomnuj rēnh pa nē axte kām hamaxpēr kēt nē. Jakamā nhūm pre Juāw Paxisja Tirtūm mā gōx kām mē hkrā kumrār pa. Pyhti pē Jotāw kamā mē hkrā kumrā.

⁷ Tā nhūm Parijew mē Satusew nhō xwýnhjaja mǎānēn mē hkōt ma Juāw

Paxis wýr mra. Mē urāk nē mē kēp Ijaew jakamā haxwýja Juāw Paxis kot mē hkrā kumrār kaxyw ma hwýr mra. No ām hkwýjē hkīnhā mē kot amnhī tomnuj kaga hprām xāj kām amnhī jarēnh kēt nē. Ām amnhī krā hkōt hkwýjē hkōt hwýr mra nē amnhī to kuma. Nom nhūm Juāw Paxisja ra hprī hā ā mē hamaxpēr anhērja kōt mē omunh mex nē. Jakamā mē kām:

—Tk kwa nà. Kormā mē ate amnhī tomnuj pix o ri apa kēnā. Xā kot paj mē ate amnhī tomnuj o apa rāhā mē akrā kumrā nhūm Tirtūm ja hā mē apumu nhūm ja kām mex nē? Nà koja já kām mex kēt nē. Koja ja mýrapē nhýrmā tanhmā mē atomnuj tỳx to ka mē tee ri umaj apimxur prām kaprý.

⁸ Na htem amnhī tomnuj kaga nē tām amnhī nhīpēx nē tam axpēn nhīpēx. Jakamā e kwa mē ā amnhī nhīpēx o apa anē pa rī kormā mē akrā kumrā.

⁹ Na ka htem atỳx ri ajamaxpēr o: “Mē ixpē finat Apraāw kanrēhā htāmnhwý hkwý na pa mē. Jakamā koja Tirtūm ja hā mē ixpumu hāmri nē mē ixte amnhī tomnuj o ixpa tā nhūm ja hā tanhmā mē ixto hkēt nē. Koja mē ixto mex nē.” Anhēr o atỳx ri amnhī kukamā ajamaxpēr. Nom ja kot anhēr kēt. Mē apē Apraāw kanrēhā htāmnhwý htā mē ate urāk nē tām amnhī nhīpēxre hā. Kot kaj mē apē htāmnhwý htā amnhī tomnuj o ri apa hāmri nē Tirtūm noo mā te mē apē pikap kēnre nhīkwý pix pyrāk.

¹⁰ Na ra Tirtūm mē ate amnhī tomnuj mýrapē tanhmā mē ato kaxyw. Te ho mēhō nhō mēmo hpār ô hkēt nhūm kot tee ri omunh nē krāhyr nē kuwy kamā mēnh nē ho kaxār par pyrāk o koja mē anhīpēx. Jao amnhī nē kuwy hwýr mē arē ka mē kamā amnhī xā htỳx kamā ajamak rāhā ho ri apa. Anē.

Nhūm pre ā Juāw Paxisja Parijew mē Satusew nhō xwýnhjē mā kapēr anē.

¹¹ Hāmri nē hpānhā axte mē kot mar kaxyw hwýr mē mrrar xwýnhjē mā kapēr nē mē kām:

—E ra mẽ ate amnhĩ tomnuj kaga xwýnhjaja. Na pa Tirtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tirtũm kot mẽ pakaxyw âm mã xwýnhhta tãm mẽ pahwýr pôj. àhpumunh tỳx o kot ijakrenh par jakamã na pa hte âm kukwak ri ixpa nẽ amnhĩ tã hã ixpijaam o ri ixpa. Koja mẽ awýr Tirtũm Karõ rẽ nhũm mẽ akarõ mã agjê. Ka mẽ ý hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwýnhjaja koja Tirtũm kot mẽ pahwýr mẽnũ xwýnhja ja hã mẽ omu nẽ mẽ hipêx o te kuwy kot mẽmoj to kaxàr par pyrãk o mẽ hipêx.

¹² —Na htem pur kãm harôj nhĩkẽ nẽ ho grã nẽ hpãnhã kahtwý. Nẽ kahuk pa hãmri nẽ hkapĩ nhũm kôk apê nẽ pryhka ho htor pa. Nhũm mẽ hpãnhã hy ho pa nẽ ixkre kamã gôj kãm unhwý. Ja pyrã nẽ koja tokyx Tirtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex rãhã nẽ pa ho pa. No mẽ kot amnhĩ tomnuj rãhã ho mẽ pa xwýnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wýr pa nẽ kamã amnhĩ xà htỳx kamã hamak rãhã nẽ pa ho pa.

Anhýr o mẽ kãm kapêr.

Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nẽ ma Juãw Paxis wýr mõi. Juãw kot pyhti pê Jotãw kamã hkrã kumrãr kaxyw ma hwýr mõi. Hãmri nẽ omu nẽ kãm:

—Pa. E ot pa awýr amnhĩ to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:
—Kwa nã. Aa ate amnhĩ tomnure hã kot pa kêt ri akrã kumrã. Nã ka kot kaj ixkrã kumrã. Anẽ.

¹⁵ Hãmri nhũm kãm:

—Kwa nã. Mãmri ixkrã kumrã Juãw Paxis. Tirtũm kãm ja prãm kênã kot ka kêt ri axtem nẽ ixkaga. Kot puj mẽ Tirtũm kãm hprãm xà hkôt tanhmã amnhĩ nhĩpêx to ho ri papa. Anẽ.

Hãmri nhũm kuma nẽ kãm:

—Tõe. Nã kot paj akrã kumrã. Anẽ.

¹⁶ Hãmri nẽ pyhti hwýr o wrý nẽ kamã hkrã kumrã. Hãmri nẽ wa akupým api nẽ gô mý ri âm rãhã nhũm kaxkwa axkjê. Hãmri nhũm kurũm Tirtũm Karõja Jejus wýr te tuuti pyrã nẽ ahpar mã hwýr wrýk o tẽ nẽ ikre hã xa. Nhũm Jejus arĩ amnhĩ wýr wrýk o htẽm kãm omunh o xa.

¹⁷ Hãmri nhũm Tirtũm kaxkwa rũm kãm kapêr nẽ kãm:

Pa? E apê ixkra mex na ka. Âm hãmri na ka hte ixkanrêhã ã amnhĩ nhĩpêx mex anẽ. Inhmã ajapê kamã na ka ri apa ho apa. Anẽ.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnẽn Eprêw 2.18, 4.15

¹ Tã nhũm Jejus Tirtũm Karõ nhỹ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa.

² Ri pa hã apkati xohtô nẽ. Ra hã arĩgro pê 40. Nẽ kormã apkur kêt jakamã ra kãm prãm tỳx kumrêx nẽ ri pa.

³ Hãmri nhũm Satanastija nhỹhýnh hwýr tẽ nẽ hêx rom kãm kapêr nẽ kãm:

—Pa. E kwa mãn ka ra amã prãm tỳx nẽ nã? Nom xep apê Tirtũm Kra jakamã apê mẽmoj hihtỳx kêt. Tirtũm pyrã nẽ axàhpumunh o axàhpumunh kênã. Jakamã kwa kên nhĩkwý mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihỳx. E kwa tokyx kãm akapêr. Anẽ.

⁴ Hãmri nhũm kuma nẽ kãm:

—Tk. Nã kot paj amar xà hkôt ã ri amnhĩ nhĩpêx anhýr kêt nẽ. Koja Tirtũm kãm inhmã mẽmoj nhõr prãm nẽ inhmã mẽmoj gõ pa rĩ kormã kukrê. Kapêr ã kagà htũm kot ja jarênh kot:

Na htem mẽ apkur xà pix kukwak ri htĩr nẽ pa hkêt nẽ. Na htem mãânẽn Tĩrtũm kapẽr ma nẽ hkôt amnhĩ nhĩpêx nẽ htĩr nẽ pa. Anẽ.

—Ã kapẽr ã kagà kamã kot harẽn h kot anhỹr jakamã kot paj akapẽr kôt ri ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Hãmri nhũm Satanastija tee ri kuma hãmri nẽ hpãnhã ma Jerujarẽ hwỹr o mõi. Nẽ Tĩrtũm mã amnhĩ jarẽn h xà hã ixkre hprêk nhĩmõk wỹr ho api nẽ kũxpê hatur xà hã ãm nhũm xa. Hãmri nẽ amnhĩ parpê kên rũnh nhĩkwỹ xwỹnhja pumunh o xa nhũm Satanasti kãm:

⁶ —E apê Tĩrtũm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Koja Anhĩpêxàja apumunh mex nẽ ka tanhmã amnhĩ to hkêt nẽ. Kapẽr ã kagà htũm kot harẽn h kot:

Tĩrtũm koja kapẽr o wrỹk xwỹnh kwỹjê mã ajarẽ ka ajarĩ nẽ ahpar mã tẽ nhũm mẽ kũxpê amỹ nhũm mẽmoj akà hyr kêt nẽ. Anẽ.

—Ã kapẽr ã kagà htũm kot ajarẽn h anhỹr jakamã e tokyx ajarĩ. Anẽ.

⁷ Hãmri nhũm Jesus kuma nẽ kãm:

—Tk kot paj ri ate inhmã karõ xàja kôt ã amnhĩ nhĩpêx anhỹr kêt nẽ. Koja Tĩrtũm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nẽ. Tĩrtũm kapẽr ã kagà htũm kot ja jarẽn h kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarẽn h kôt tanhmã amnhĩ nhĩpêx to hkêt nẽ. Anẽ.

—Ã kot ja nẽ kapẽr kot anhỹr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tĩrtũm tãm kot inhmã ã ixte amnhĩ nhĩpêx anhỹr ã karõre hã. Anẽ.

⁸ Hãmri nhũm Satanasti tee ri kuma nẽ hpãnhã ma nhỹri kên prêêti hwỹr o tẽ nẽ himõk ã axte o xa. Hãmri nẽ kãm pika piitã ahkre hpa. Nẽ mẽ hikukrêx piitã nhũm kãm ahkre ho xa. Kàxpore nẽ mẽmoj mex piitã nhũm kãm ahkre nhũm Jesus piitã omunh o xa.

⁹ Hãmri nhũm kê Satanasti axte kãm:

—E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nẽ inhmã inhmex o inhmex ã ijarẽ pa ama nẽ amã piitã õr pa. Ka kam mẽmoj piitã ho anhõ nẽ ho amnhĩptâr o apa. Jakamã e kwa tokyx. Anẽ.

¹⁰ Hãmri nhũm kuma nẽ axte kãm kapẽr nẽ kãm:

—Tk kwa ma nhỹhỹm tẽ Satanasti. Kot paj ri amã amex o amex ã ajarẽn h kêt kumrêx. Tĩrtũm kapẽr ã kagà htũm kot ja nẽ kapẽr kãm hihtỹx kênã. Kapẽr kot:

Kêr ka mẽ ixkapẽr pix ma nẽ ixkutã pix mã akõnkrã ho akrĩ nẽ inhmã inhmex o inhmex ã ijarẽ. Kêr ka mẽ ã amnhĩ nhĩpêx anhỹr o ri apa.

—Anhỹr o kot hã karõ jakamã kot paj amã amex o amex ã ajarẽn h kêt kumrêx. Anẽ.

¹¹ Hãmri nhũm tee ri amnhĩ tã kuma hãmri nẽ ma tẽ. Tee ri kãm kapẽr kaprỹja ã amnhĩ pumu hãmri nẽ hkaga nẽ ma tẽ. Hãmri nhũm Tĩrtũm kapẽr o mẽ wrỹk xwỹnhjaja Jesus wỹr wrỹ nẽ tanhmã ho mex to nẽ kãm õ nhũm kukrê nẽ akupỹm hihtỹx.

*Jesus kot Garirej kamã kapẽr o pa
Makre 1.14-15; Rukre 4.14-15*

¹² Tã nhũm Juãw Paxisja mẽmoj tã pahi Eroxo mã akir nhũm amnhĩ tã kuma nẽ gryk xàj haxà nhũm hkrĩ ho hkrĩ. Hãmri nhũm Jesusja harẽn h ma nẽ ma akupỹm Garirej kamã krĩ pẽ Najare hwỹr ma akupỹm tẽ.

¹³ Hãmri nẽ ra pøj nom kamã ri pa hkêt nẽ. Nẽ hpãnhã kurũm kato nẽ ma krĩ pẽ Kapanaũ hwỹr tẽ. Gõ rax pẽ Garirej mỹri na pre. Pika hkwy pẽ Jepurõ mẽ Natari wa mẽ kamã na pre nhũm Jesus ma hwỹr tẽ. Hãmri nẽ kamã pa.

¹⁴ Nhũm ra amnepêm Tĩrtũm nhỹ hã kapẽr jarẽn h o mẽ pa xwỹnh finat Ijaisja Jesus kukamã ra mẽ panhĩgêtjê mã ã kot amnhĩ nhĩpêx anhỹr ã harẽ nẽ hã kagà. Jesus kot ã mẽ hwỹr mõi

anhÿrja kukamã nhũm pre harẽ nẽ hã kagã.

¹⁵ Pika hkwy kamã mẽ pa xwÿnhjaja nhũm pre mẽ hkukamã mẽ harẽnh mex nẽ. Nẽ pika pê Garirej kamã mẽ pa xwÿnhjaja nhũm pre mãânẽn mẽ hkukamã mẽ harẽ. Nẽ pyhti pê Jotãw mẽ gô xujanãr wa hkaêx kãm pika piitã kamã mẽ pa xwÿnhjaja. Nẽ krĩ pê Garirej kamã mẽ kêp Ijaew kêt xwÿnhjaja nhũm pre mãânẽn mẽ harẽ. ã na pre finat Ijaisja mẽ hkukamã Tirtũm nhÿ hã mẽ piitã mẽ harẽ nẽ hã kagã anẽ. Jejus kot ma mẽ hwÿr mörja kukamã nhũm ra hprĩ hã harẽ nẽ hã kagã. Nẽ hã kagãja o:

¹⁶ E. Kot paj mẽ amã mẽmoj mex jarẽ ka mẽ inhma. Mẽ ate Tirtũm pumunh kêt jakamã te mẽ ate kamãt kô kamã ri apa pyrãk. Tã koja Tirtũm mẽ amã amnhĩ to amnhĩrit ka mẽ hpãnhã te mẽ ate hirã kamã ri apa pyrãk o amnhĩ nhĩpêx nẽ ra hkôt amnhĩ xunhwÿ.

Anhÿr o mẽ hkukamã mẽ harẽ nẽ hã kagã.

¹⁷ Tã nhũm ra kot hkukamã mẽ kãm ujarẽnh xã hkôt nhũm Jejusja mẽ hwÿr mō nẽ mẽ kãm Tirtũm kapër jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mẽhō jarẽnh pyrãk o mẽ kãm amnhĩ jarẽ nẽ mẽ kãm:

—E na ra Tirtũmja kot mẽ akaxyw ãm xwÿnhhta mẽ nhũm mẽ awÿr wrÿ. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpêx anhÿr kaga nẽ hpãnhã Tirtũm kôt mãn amnhĩ nhĩpêx o ri apa.

Anhÿr o mẽ kãm kapër o pa pê mẽ ahkre ho ri mẽ hkôt pa.

Jejus kot amnhĩ wÿr tep pynênh xwÿnhjê hwÿr

Makre 1.16-20; Rukre 5.1-11

¹⁸ Tã nhũm Jejus ma gô rax pê Garirej mÿ ri pa nẽ gōx kãm ja wa omu. Simãw Pêtre mẽ htō Andreja nhũm wa gōx kãm kryhti rēnh o wa xa. Hãmri nhũm Jejus wa hwÿr tẽ nẽ

wa omu nẽ amnhĩ kôt wa kuwÿ nẽ wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarẽnh o ri apa. Mẽ kot war amar nẽ ra ixkôt amnhĩ xunhwÿr kaxyw. Anẽ.

²⁰ Hãmri nhũm wa kuma nẽ kryhti re nẽ wa ma hkôt htēm kurê kumrêx.

²¹ Hãmri nhũm mẽ ma nhãm axte mō nẽ ra jajê hwÿr kato. Jepetew mẽ hkra Xiakre mẽ Juãwja nhũm wa mẽ hwÿr kato. Nhũm mẽ õ pãr kãm kryhti ho mex o wa mẽ nhÿ. Hãmri nhũm mẽ hwÿr mra nhũm Jejus amnhĩ kôt ja wa kuwÿ nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

²² Hãmri nhũm wa kuma nẽ hipêêxã mã amnhĩ jarẽ nẽ ma hkôt pa ho pa kurê kumrêx.

Jejus kot tanhmã amnhĩ nhĩpêx to Rukre 6.17-19

²³ Tã nhũm Jejus Garirej kamã Ijaew mã Tirtũm kapër jarẽnh o pa. Na pre hte Tirtũm kapër o mẽ ahkre xã hã ixkre hwÿr agjê nẽ kamã mẽ kãm Tirtũm kapër jarẽnh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tirtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm ja hã mẽ apumu nẽ mẽ ato hkra kurê kumrêx. Anẽ.

Hãmri nẽ akupÿm mẽ kãm mẽ à xwÿnhjê ho mex. Ahpÿnhã tanhmã mẽ à kute xwÿnhjaja nhũm akupÿm mẽ ho mex o pa.

²⁴ Jakamã nhũm mẽ piitã pikaja kamã ri axpën mã harẽnh o hprôt. Nẽ pika pê Sir kôt mãânẽn ma ri axpën mã harẽnh o hprôt. Nhũm mẽ piitã harẽnh ma nẽ ma hwÿr mẽ à xwÿnhjê ho mra. Ahpÿnhã ri tanhmã mẽ à kute xwÿnhjaja. Mẽ à htÿx xwÿnhjaja. Nẽ mẽ ï kamã mẽ htyk xwÿnhjaja. Nẽ mẽ hkrã pipãnh xwÿnhjaja. Nẽ mẽkarōmnuti kot Satanasti nhÿ hã tanhmã ri mẽ ho xwÿnhjaja. Nhũm prem mẽ hamÿ nẽ ma Jejus wÿr mẽ o mra nhũm mẽ omu nẽ akupÿm mẽ ho mex pa.

25 Jakamã nhũm mẽ ohtô nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkjê rũm mẽ pa xwýnhjaja. Nhũm mẽ ã ohtô nê ma Jejus kôt omunh o pa anê.

5

Jejus kot tanhmã mẽ ahkre hto Rukre 6.20-23

¹ Nhũm Jejus amnhĩ kôt ri mẽ kot omunh o mẽ pa xwýnhjê pumu hãmri nê mẽ ahkre kaxyw ma tẽ nê hixêt ã api nê himök ã nhỹ. Hãmri nhũm mẽ ma hkôt mra nê pu hã hkrĩ pa.

² Hãmri nhũm mẽ ahkre nê mẽ kãm:
³ E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhmã ajamaxpêr to nê ajamaxpêr o: “Koja Tĩrtũm inhĩhkô hã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỹr o ajamaxpêr. Hãmri nhũm Tĩrtũm ã ajamaxpêr anhỹr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mẽ atõ tanhmã amnhĩ tomnuj to. Hãmri nê tee ri ja hã amnhĩ pumu nê api-jaàm nê akaprĩ nê. Nê akaprĩ xàj amỳr o nhỹ. Amỳr rax nê. Hãmri nhũm Tĩrtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê ka ajamakêtkati nê axãmnhĩx akĩnh nê ri apa.

⁵ Nê kot ka mẽ atõ agryk tokyx anhỹr kêt nê. Nê kritpêm amnhĩ tã amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axãmnhĩx akĩnh nê ri apa.

⁶ Nê kot ka mẽ atõ amã Tĩrtũm kãm hprãm xà hkôt amnhĩ nhĩpêx o ri apa hprãm nê. Nhũm amnhĩ tã apumu nhũm ja kãm

mex nê. Hãmri nhũm ato mex nê tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati nê axãmnhĩx akĩnh nê ri apa.

⁷ Nê mẽ kamã mẽ axukaprĩ ho ri apa xwýnhjaja na hte Tĩrtũm ja hã mẽ apumu nhũm ja kãm mex nê. Jakamã na hte mẽ hã mẽ apyrã nê mẽ akamã ukaprĩ ho pa. Jao mẽ ato mex nê ka mẽ ajamakêtkati nê axãmnhĩx akĩnh nê ri apa.

⁸ Nê kot ka mẽ atõ ã ajamaxpêr anê nê ajamaxpêr o: “Nà kot paj ãm Tĩrtũm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhỹr o ajamaxpêr. Hãmri nhũm Tĩrtũm amnhĩ tã mẽ apumu nê mẽ ato mex nê. Ka mẽ ajamakêtkati nê axãmnhĩx akĩnh nê ri apa. Nê nhỹrmã Tĩrtũm wỳr api nê kuri amex rãhã apa ho apa.

⁹ Nê kot ka mẽ atõ mēhõ wa kot axpên kutã amnhĩ xãm xwýnhhta axpên tã wa omu nê wa kot tanhmã axpên nhĩpêx tota nê tanhmã wa kãm akapêr to nê akupỳm tãm wa ãm. Hãmri nhũm Tĩrtũm ja hã apumu nhũm ja kãm mex nê. Nê apê hkra hã ajarê ka ajamakêtkati nê axãmnhĩx akĩnh nê ri apa.

¹⁰ Nê koja mēhõ mẽ ate Tĩrtũm kapêr mar xà hkôt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axãmnhĩx akĩnh nê ri apa.

¹¹⁻¹² –Kwār mẽ mãmri ixtã mẽ ato kapêr rỳ mẽ ato hêx rỳ tanhmã ri mẽ atomnuj to. Kwār mẽ mãmri ã mẽ anhĩpêx anê. Nom kêt ka mẽ arĩ amnhĩ kaxyw inhmã ajamaxpêr tỳx rãhã pê ajamakêtkati nê axãmnhĩx akĩnh nê ri apa. Kwār mẽ mãmri ixtã ã mẽ anhĩpêx anê nê mẽ amex kêt ã mẽ

ajarê. Amnepê m na prem ã Tirtûm nhÿ hã kapêr jarênh xwÿnhjê nhÿpêx anê. Jakamã koja mê uràk nê ã mê anhÿpêx anê. Hãmri nhÿm Tirtûm ja hã mê apumu nê amnhÿm mê amex ã mê ajarê. Hãmri nê nhÿrmã kaxkwa kamã wa inhõ krÿ kamã mê ato mex nê. Jakamã kêr ka mê ã amnhÿ kukamã ajamaxpêr anhÿr pê mãmri akÿnh nê ajamakêtkati nê axãmnhÿx ri apa. Kwãr mê mãmri ã wa ixtã mê anhÿpêx anê. Anê.

Jejus krajaja te kot kaxwa mê kanê hpôk wa uràk

Makre 9.49-50; Rukre 13.34-35

¹³ Nhÿm Jejus arÿ mê kãm kapêr nê mê kãm:

—Nê mê ate ixkôt amnhÿ xunhwÿr xwÿnhjaja te mê ate kaxwa pyrãk. Kaxwaja mê apkur xà ho ành mã mex. No koja mêhõ tèn kamã pika hkwÿ mê nê ho ahkà. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mê kot hkapÿr pix kaxyw koja mex. Ja pyrã nê kot ka mê atõ ate inhmã tanhmã amnhÿ nhÿpêx to ho apa hã amnhÿ jarênh tã gaa nê rÿ amã ixkôt amnhÿ nhÿpêx prãm kêt nê. Hãmri nê ra te apê kaxwa mê pika pihkarta pyrãk. Kwa mê ixujarênh ma nê kãm ajamaxpêr tÿx rãhã ho ri apa.

¹⁴⁻¹⁶ —Nê te mê ate kanê hpôk pyrãk. Nê te mê ate hixêt prêk nhÿmõk ã krÿ xãm pyrãk. Koja krÿja hixêt prêeti nhÿmõk ã xa nhÿm mê piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pê mêmoy nhÿmõk ã unhwÿ nhÿm mê piitã mê kãm hirã nhÿm mê hirã kamã mêmoy pumunh mex nê. Ja pyrã nê kot kaj mê tãm amnhÿ nhÿpêx o ri apa nhÿm mê piitã ja hã mê apumunh kôt ra kaxkwa kamã Tirtûm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

¹⁷ Nhÿm Jejus arÿ mê kãm kapêr nê mê kãm:

—Nê amnepê m Mojes kot Tirtûm nhÿ hã Ijaewjê mã tanhmã mê kot amnhÿ nhÿpêx to hã mê kãm karõja. Nê amnepê m Tirtûm nhÿ hã kapêr jarênh o mê pa xwÿnhjê kapêrja. Ixte mê kapêr o ijapêx kaxyw na pa pre mê awÿr ixwÿrÿk kêt nê. Jakamã kwa mê ri ã axpên mã ijarênh anhÿr kêt nê. Kêt ixprÿ hã ixte mê amã mê kapêr jarênh nhÿm mê ate mar mex kaxyw na pa pre kaxkwa rÿm mê awÿr wrÿ.

¹⁸ —Tirtûm kapêr ã kagà htÿm kot mêmoy jarênhja. Koja ujarênh xà hkôt mêmoy tanhmã amnhÿ to hpar mê nhÿm rÿ kormã kaxkwa mê pika wa hapêx pa nhÿm kapêr ã kagàja mãânên hapêx. Nom nhÿm Tirtûm kapêr koja mêmoyja pyrã nê aa hapêx kêt nê. Koja rãhã ho rãhã nê aa ihkê ho tanhmã mênh to hkêt nê. ãm hãmri na pa ã mê amã harênh anê.

¹⁹ —Nê kot ka mê atõ Tirtûm kapêr o pixire nê hirôp xa. Hãmri nê ra amnhÿ pyrã nê anhÿõ mã ja hã amÿnê. Apyrã nê kot hirôp ãm kaxyw ka kãm hã amÿnê. Kot kaj ã amnhÿ nhÿpêx anê hãmri nê apê Tirtûm kra hkêt ã amnhÿ to amnhÿrÿt. Nom kot ka kêt mê tãm amnhÿ nhÿpêx o ri apa. Nê amnhÿ pyrã nê tãm mê kot amnhÿ nhÿpêx kaxyw mê kãm akapêr o ri apa hãmri nhÿm Tirtûm ja hã apumu nê ato hkra nê ato mex nê.

²⁰ —No Parijew nhõ xwÿnhjaja nê Tirtûm kapêr tÿm o mê ahkre ho mê pa xwÿnhjaja. Mê kot Tirtûm kapêr kôt amnhÿ nhÿpêx mex ã amnhÿ jarênh tã no ãm hkôt ã amnhÿ nhÿpêx anhÿr kêt nê. Jakamã kot kaj mê hkôt amnhÿ nhÿpêx o ri apa hãmri nê mê uràk nê nhÿrmã Tirtûm mê wa inhõ krÿ kamã apa hkêt nê. Anê.

Mê gryk o mê pa xwÿnhjê jarênh

Rukre 12.58-59; mãânên Rõmãn 12.19; Epes 4.26; Wam Ximotre 2.8; Xiakre 1.19-20

²¹ Nhÿm Jejus arÿ mê kãm kapêr nê mê kãm:

—Nê amnepê m na prem mê panhÿgêjtê mã Tirtûm kapêr kwÿ jarênh o pa nê mê kãm:

Kêr ka mē axpēn par kêt nē. Kot kaj mē mēhōx pī nhūm mē ja mýrapê atomnuj nē. Nē ma mē anhō pahihtī hwýr ato tē nhūm mýrapê tanhmā ato rý hkôt apī. Anē.

Ām hāmri na prem mē kām ja jarē.

²² Tā kot paj ixprī hā mē amā tanhmā harēnh to ka mē inhma. Kot kaj mē mēmoj tā anhīō kamā agryk. Hāmri nhūm Tirtūm tee ri ja hā apumu nhūm ja kām mex kêt nē. Jakamā koja mē anhō pahihtī tanhmā ja hā mē ato japêr hā koja ja mex nē. Rý kot kaj mē tanhmā mēhō japry hto. Ho hagrô rý ho rop. Mýrapê kop apu akwý kot apynēnh nē anhō pahihtī hwýr ato htēm nē ĩhkram ajaxàr ronhýx ja inhma mex nē. Rý kot kaj mē tanhmā anhīō mā akapêr punuj to nē kām: “Tk. Ate ho warêhti hā. Te apê hagrô pyrāk kēnā.” Anhýr o kām akapêr. Tā kop apu Tirtūm ra ā akapêr anhýrja mýrapê mē kot amnhī xà htýx kamā hamak tūm xàta wýr amēnh ronhýx ja inhma mex nē. Ja pumaj kwa kêt ka mē ā axpēn mā akapêr anhýr kêt nē. Kêt mē axpēn mā tām akapêr pix o ri axpēn kôt apa.

²³ —Nē kêt ka mē tanhmā ate anhīō nhīpêx hto kamā Tirtūm mā mex o mex ā harēnh kêt nē. Kêt ka mē kām amnhī jarēnh o akrī hāmri nē ra mēhō kot mēmoj tā akamā gryk xwýnh mā ajamaxpêr japêr.

²⁴ Hāmri nē akato nē ma hwýr atēm kurē kumrēx nē wa tām axpēn mā akapêr nē tām akupým axpēn xām. Hāmri nē rī kormā ma akupým tē nē Tirtūm mā amnhī jarēnh jatur xàm amē nē kām mex o mex ā harē. Kêt ka mē ā amnhī nhīpêx anhýr o ri apa.

²⁵⁻²⁶ —Na htem tanhmā axpēn nhīpêx to hāmri nē kot tanhmā war axpēn to xwýnhjē hōja ma ō pahi hwýr tē nē kām tanhmā kot ho xwýnhhta jarēnh kaxyw nojarêt. Hāmri nhūm ra kamā gryk xwýnhhta kot pahi mā harēnh kaxyw nojarêt ā harēnh ma nē tee ri amnhī kukamā hamaxpêr nē ma hwýr tē nē wa akupým tām axpēn xām. Na htem ā amnhī nhīpêx

anē. Pahi kot wa harēnh mar nē tanhmā axpēn tā wa ho pymaj na htem ā amnhī nhīpêx anē nē tokyx tām akupým axpēn xunhwý. No koja mē anhýr kêt nhūm pahija wa harēnh ma nē wa kot tanhmā axpēn to xwýnhhta ō jaxà nhūm tee ri kām kator prām. Hāmri nē tanhmā amnhī to nē ra amnhī pānhā kām amnhīrer pa nhūm pahihtija rī kormā pôristi mā anē nhūm kām ure nhūm kato. Ja pyrā nē kêt ka mē Tirtūm tanhmā kot mē anhīpêx to pymaj tokyx mē ate amnhī tomnuj kaga nē hkôt amnhī nhīpêx rāhā ho ri apa. Anē.

Tanhmā mē pahte mē pahprōjē nhīpêx to

Matêwre 19.3-9; Makre 9.43-47, 10.2-9; määnēn Rukre 16.18

²⁷ Nhūm Jejus arī mē kām kapêr nē mē kām:

—Nē na pre finat Mojesja mē panhīgêjtē mā Tirtūm kapêr tūm kwý jarē nē mē kām: “Kêt ka mē amnhī prō pix tånopxar o ri apa. No mē kuhpa hā nhām mēhō ho amnhīkati ho ri apa hkêt nē.” Anē. Ām hāmri na pre mē kām ja hā karō.

²⁸ Tā kot paj ixprī hā mē amā tanhmā harēnh to ka mē inhma. Kot kaj mē nhām mēhō pumu nē amā ho amnhīkati hprām mā ajamaxpêr. Jao te ra ate ho amnhīkati pyrāk o amnhī nhīpêx. Kormā ate ho amnhīkati hkêt tā ra hkukamā ajamaxpêr jakamā te ra ate ho amnhīkati pyrāk o amnhī nhīpêx.

²⁹ ā mē hamaxpêr punuj anhýr xwýnhjaja koja mē nhýrmā ma mē kot amnhī xà htýx kamā hamak tūm xàta wýr ma mra nē kamā pa rāhā ho pa. Jakamā kêt ka mē nhām mēhō pumu nē amā hkīnh japêr hāmri nē te ate ano kaxàr nē mēnh nē axte ate omunh kêt pyrāk o amnhī nhīpêx. Jao hkàx ā rīt nē ma nhýhým atēm kurē kumrēx.

³⁰ —Nē kot kaj mē anhīhkra ho tanhmā amnhī tomnuj to kaxyw. Hāmri nē tee ri ja hā amnhī pumu nē te ate amnhī nhīhkra krāhyr nē mēnh pyrāk o amnhī nhīpêx nē tanhmā

amnhî tomnuj to hkêt nê. Mê îhkra ho mê kot tanhmã amnhî tomnuj to ho mê pa xwÿnhjaja koja mê nhÿrmã ma mê kot amnhî xà htÿx kamã hamak tûm xàta wÿr ma mra nê kamã pa rãhã ho pa. Anê.

Mê pahte axpên kaga hkêt

³¹ Nhûm Jejus arî mê kãm kapêr nê mê kãm:

—Nê na pre finat Mojes mê panhîgêjtê mã Tirtûm kapêr tûm kwÿ jarê nê mê kãm: “Kot kaj mê atô aprô kaga kaxyw hãmri nê ate hkaga hã amnhî jarênh ã kagã nhîpêx nê kãm agô nê rî kormã hkaga.” Anê. Æm hãmri na pre ã mê kãm Tirtûm kapêr tûm jarênh anê.

³² Tã kot paj ixprî hã mê amã tanhmã harênh to ka mê inhma. Kêr ka mê atÿx ri amã hprãm xà hkôt aprô kaga hkêt nê. Nom koja aprô akuhpa hã nhãm mêhõ ho amnhîkati ka harênh ma hãmri nê amã ja hã hkaga hprãm nê mãmrî kam nê hkaga. Ja tanhmã kute hkêt. Nom koja ã amnhî nhîpêx anhÿr kêt tã ka amnhî krã hkôt hkaga. Hãmri nhûm mêhõ apãnhã ho hprô nê o pa. Hãmri nê ra kot apê aprô ho amnhîkati ho pa pyrãk o hipêx. Nê nija haxwÿja. Te arî kêp aprô htã akuhpa hã nhãm myja o amnhîkati o pa pyrãk o amnhî nhîpêx. Anê.

Tãm mê pakapêr ã Jejus kot mê pamã karô

Xiakre 5.12

³³ Nhûm Jejus arî mê kãm kapêr nê mê kãm:

—Nê na pre finat Mojes mê panhîgêjtê nê pahpãmjê mã Tirtûm kapêr tûm jarênh o: “Kêr ka mê Tirtûm mã mêmoj to anhÿr ã amnhî jarê hãmri nê amnhî jarênh xà hkôt kãm tanhmã amnhî nhîpêx to. Nom kêr ka mê atÿx ri kãm tanhmã amnhî jarênh to ho amnhî to axêx kêt nê. Æm akatãt kêt mê ate amnhî jarênh to xà hkôt kãm tanhmã mêmoj to.” Anê. Æm hãmri na pre mê kãm ja jarê.

³⁴ Tã kot paj ixprî hã mê amã tanhmã harênh to ka mê inhma. Kêr ka mêhõ mã tanhmã amnhî jarênh

to. Tirtûm mã pix mã amnhî jarênh kêt nhãm mêhõ mã mãânên tanhmã amnhî jarênh to. Nê akatãt kêt kãm amnhî jarê. Na ka htem mê kot mê axêx kêt kêt mê apumunh kaxyw mêmoj nhîxi jarênh kêt amnhî jarê. Nom kêr ka mê axte ã mêmo nhîxi hã amnhî jarênh anhÿr kêt nê. Mêmoj tã amnhî jarê nê akatãt kêt amnhî jarênh kurê kumrêx. No mê kot axêx kêt kêt apumunh kaxyw mêmoj nhîxi hkôt amnhî jarênh kêt nê. Tanhmãan kaxkwa nhîxi jarênh kêt mêmoj tã amnhî jarênh kêt nê. Kaxkwa kêp Tirtûm krî xà maati kênã kot ka kêt mê axtem nê atÿx ri amnhî kaxyw hixi jarê.

³⁵ Rÿ mê kot axêx kêt kêt apumunh kaxyw pika nhîxi jarênh kêt nê. Pika kêp Tirtûm par xãm xà kênã kot ka kêt mê atÿx ri amnhî kaxyw tanhmã hixi jarênh to. Nê krî pê Jerujarêja mãânên kêr ka mê ri amnhî kaxyw tanhmã hixi jarênh to hkêt nê. Koja nhÿrmã Tirtûm mê awÿr Jerujarê hwÿr ixpê pahi maati hã inhmê pa kamã mê ato amnhîptãr o ixkrî. Jakamã kêr ka mê ri atÿx amnhî kaxyw tanhmã hixi jarênh to ho ri apa hkêt nê.

³⁶ —Nê kêr ka mê kot axêx kêt kêt apumunh kaxyw mê ri tanhmã amnhî krã hkî jarênh to hkêt nê. Kot kaj mê anê nê ãm tanhmã hã harênh to kaprÿ. Xà kot kaj mê ajamaxpêr pix o tanhmã amnhî krã hkî hto? Nà kot kaj mê ho anhÿr kêt nê. Jakamã mê ri atÿx tanhmã harênh to hkêt nê.

Nê mê atÿx ri mêmo nhîxi jarênh kêt mêmoj tã amnhî jarênh o apa hkêt nê.

³⁷ Æm akatãt kêt tãm amnhî jarênh kurê kumrêx. Jao mê kãm: “Tÿ. Nà kot paj ho anê.” Anhÿr o mêmoj tanhmã ho. Rÿ mê kãm: “Nà kot paj ho anhÿr kêt nê.” Anhÿr o mêmoj tanhmã ho hkêt nê. Æm akatãt kêt tanhmã mêmoj tã amnhî jarênh to xà hkôt ho anhÿr kurê kumrêx. Mê kot Satanasti hkôt amnhî nhîpêx o mê pa xwÿnh pixjaja na htem hêx rom mêmoj nhîxi jarênh kêt tanhmã amnhî jarênh to ho pa. Anê.

Mê pahte tanhmã axpên nhîpêx to hã Jejus kot mê pamã karõ

Rukre 6.27-30, 23.34; mãänën Atre 7.60; Römãn 12.14

³⁸ Nhũm Jejusja arĩ mê kãm kapêr nê mê kãm:

—Na prem amnepêm mê panhîgêjtê mã Tirtũm kapêr tũm jarênh o: “Koja mēhõ apê ano katõk nê hkapa hã koja mê anhõ pahija atã mã ho anê nê kêp no kapa. Rỳ koja mēhõ apê axwa hõ hkwỳr hã koja atã mã ho anê nê atã kêp wa hõ hkwỳr.” Anhỳr o mê kãm hã karõ. ãm hãmri na prem ã ja jarênh anê.

³⁹ Tã kot paj ixprĩ hã mê amã tanhmã ja jarênh to ka mê inhma. Koja mēhõ tanhmã mê anhîpêx to ka mê ãm amnhĩ tã omu nê tanhmã amnhĩ tã ho hkêr nê. Koja anhînep akura ka ãm omu nê tanhmã amnhĩ tã ho hkêr nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhîpêx nhũm ja amã mex nê. No amnhĩ tã tanhmã ho hkêr nê.

⁴⁰ —Nê koja mēhõ anhînhõkã hã awỳ nhũm mê anhõ pahija amã anê ka mãmrĩ kãm agõ nê tanhmã hã kãm nê hkêr nê. Te ate hkõt kry pê kãm anhînhõkã hpakã ry jagiênh xwỳnhhta nhõr pyrãk o amnhĩ nhîpêx. Nom kêr ka mê kamã agryk kamã kãm õr kêt nê.

⁴¹ —Nê koja mēhõ ate kãm jênh tur nê hkõt ho amõr ryy kaxyw amã kapêr ka mãmrĩ kãm ho anê. Nê kot amã nhỹri hã karõ xàja wỳr o pøj nom kamã kãm õr kêt nê. Kãm ho hakrenh ryy nê rĩ kormã akupỹm kãm agõ.

⁴² —Nê koja mēhõ õ mēmoj kêt nê awỳr tẽ nê mēmoj tã awỳr ka mãmrĩ kãm agõ. Rỳ nhũm awỳr tẽ nê apê mēmoj to ãpresta kaxyw ka mãmrĩ kãm ho ãpresta. Kêr ka mê ã axpên nhîpêx anhỳr o ri apa. Anê.

Mê pamã axpên kĩnh ã Jejus kot mê pamã karõ

Rukre 6.32-36; mãänën Römãn 12.14

⁴³ Nhũm Jejus arĩ mê kãm kapêr nê mê kãm:

—Nê na prem amnhĩ krã hkõt axtem nê tanhmã mê panhîgêjtê mã

mēmoj jarênh to nê mê kãm: “Kêr ka mê amã mê akrãmnhwỳjê pix kĩnh nê tanhmã mê ho mex to. No kêt mê kot tanhmã mê ato xwỳnhjaja kêr ka mê mãmrĩ mê kamã axàhkurê ho ri apa.” Anhỳr o mê kãm karõ.

⁴⁴ Nom pa kot paj mê amã Tirtũm kot tanhmã ja hã karõ hto hã harê ka mê inhma. Kêr ka mê kot tanhmã ri mê atomnuj to xwỳnhjaja amnhĩ tã tanhmã mê ho hkêr nê. ãm tanhmã mê ho mex to pix hkukamã mãn ajamaxpêr. Nê mê ho Tirtũm wỳr pix kukamã mãn ajamaxpêr.

⁴⁵ Na hte ã kaxkwa kamã Mēpahpãm Tirtũmja amnhĩ nhîpêx anhỳr o pa. Mê kot amnhĩ tomnuj xwỳnhjaja nê mê kot amnhĩ to mex xwỳnhjaja nhũm hte mê ho hpimràatã mê ho mex o axpên pyrãk. Jao hamê wa hwỳr na rê nê hamê wa hwỳr myyti rê nhũm hamê wa kãm hirã ho pa. Jakamã kêr ka mê urãk nê mê piitã tãm mê hipêx o axpên pyrãk. Mê kot amnhĩ tomnuj xwỳnhjê mê ho kot amnhĩ to mex xwỳnhjê mê ho apimràatã mê ho mex o axpên pyrãk.

⁴⁶ —Nê xat kaj mê amã mê piitã mê ho mex prãm kêt nê ãm mê kot mê ato mex xwỳnh pixjaja ka mê amã mê ho mex prãm nhũm Tirtũm ja hã mê apumu nhũm ja kãm mex nê nã? Nã koja kãm mex kêt nê. Koja mēhõ ato mex kêt tã kêr ka ãm amnhĩ rom ho mex nê. Nhũm Tirtũm ja hã apumu nê amnhĩm amex ã ajarê. Mê kot amnhĩ tomnuj xwỳnhjaja na htem ãm mê kot mê ho mex xwỳnh pixjaja nhũm mê amnhĩ xwar mê ho mex. No tãm mê kot amnhĩ nhîpêx xwỳnhjaja na htem mê piitã mê ho mex o axpên pyrãk. Mê kot tãm amnhĩ nhîpêx xwỳnhjaja nê mê kot amnhĩ tomnuj xwỳnhjaja nhũm mê ho hpimràatã mê ho mex o axpên pyrãk.

⁴⁷ —Nê na hte mê hkwỳjaja ãm amnhĩ kwỳjê pix mã kapêr mex o pa. Nom mê piitã tãm mê hipêx kêt nê. Nom kêr ka mê ã amnhĩ nhîpêx anhỳr kêt nê. Kêr ka mê kurom mê piitã tãm mê hipêx o axpên pyrãk. Mê akwỳjê mê mê akwỳ hkêr xwỳnhjaja ka mê

hipêx o axpên pyrâk. Nê tãm mē kãm akapêr o axpên pyrâk.

⁴⁸ Kaxkwa kamã Měpahpãm Tirtũm pyrã nê mē kot amnhĩ tomnuj xwýnhjê mē mē kot amnhĩ to mex xwýnhjaja mē ho apimràatã mē ho mex o axpên pyrâk. Na hte ã Tirtũmja mē panhĩpêx anê. Anê.

6

Mě pahte mē kêp amrakati xwýnhjê ho mex rãhã hã mē pamã karõ

¹⁻² Nhũm Jejus arĩ mē kãm kapêr nê mē kãm:

—Nê na htem mē piitã hkwýjê noo mã tanhmã mē kêp amrakati xwýnhjê ho mex to. Nom kãm mē hkaprĩ kamã tanhmã mē ho mex to hkêt nê. ãm hkwýjaja kot ja hã mē omunh nê mē mex ã mē harênh pix kaxyw na htem krĩ hkôt ri mē kêp amrakati xwýnh piitã mē ho mex o pa. Nê mē pikuprõnh xà hã ixkre kamã kuhê nê tanhmã mē ho mex to. Mě hkwýjaja kot ja hã mē omunh nê amnhĩm mē mex ã mē ho jarkrar kaxyw. Jakamã koja nhỹrmã Tirtũmja axte ja hã mē kãm mēmoj mex nhõr kêt nê. Ra jar mē hkwýjaja kot ja hã mē omunh nê amnhĩm mē mex ã mē harênh kênã. Jakamã kwa kêr ka mē ho mē uràk kêt nê. Nê tanhmã mēhõ ho mex to kaxyw nê akwýjê no kuhpa hã mē hkàx ã tanhmã mē ho mex to. No kot kaj mē noo mã tanhmã mē ho mex to. Mě kot hã apumunh nê ato jarkrar kaxyw tanhmã mē ho mex to nhũm kaxkwa kamã Měpahpãmja ja hã apumu nê mē hã tanhmã ato mex to hkêt nê. Koja ãm hã apumu.

³ —Ja pymaj kêr ka mē mē kêp amrakati xwýnhjê mã mēmoj nhõr kaxyw hãmri nê mē piitã mē no hkàx ã tanhmã mē ho mex to. Hãmri nê nhãm ri ja hã mē kãm amnhĩ to jarkrar kêt nê. Aprõ mã rý akrajê mã rý akrãmnhwý mã hã amnhĩ jarênh kêt nê.

⁴ Kot kaj mē no hkàx ã tanhmã ho mex to no nhũm Tirtũm tapxipix apumunh o nhỹ. Hãmri nê ja hã ato mex rax nê ka amex nê apa. Anê.

Tanhmã mē pahte Tirtũm mã amnhĩ jarênh to hã mē pamã karõ

Rukre 11.1-13, 18.9-14

⁵ Nhũm Jejus arĩ mē kãm kapêr nê mē kãm:

—Nê mãänên ja. Na htem hakwa pix o amnhĩ mex ã amnhĩ jarênh xwýnhjaja Tirtũm mã amnhĩ jarênh kaxyw nê mē kot Tirtũm kapêr o mē ahkre xà hã ixkreja wýr agjê. Nê mē piitã mē noo mã kãm tanhmã amnhĩ jarênh to. Rý gáp kuhê nê mē piitã mē noo mã kãm amnhĩ jarê. Tã mēmo kaxyw na htem mē noo mã Tirtũm mã amnhĩ jarê? Nà ãm mē kot ja hã mē omunh nê mē mex ã mē ho jarkrar pix kaxyw. Nê mē harênh o: “E müjti pumu. Na hte apkati mē ã Tirtũm mã amnhĩ jarênh anê. Kot amnhĩ to mex xwýnh mãn.” Anhỹr ã harênh kaxyw. Tã ra mē piitã mē kot ja hã omunh nê amnhĩm mex ã ho jarkrar jakamã koja Tirtũm axte ja hã tanhmã ho mex to hkêt nê. Ra pika ja kamã mē kot mē omunh nê mē mex ã mē harênh kênã.

⁶ No mē kajaja. Kêr ka mē uràk nê ã amnhĩ nhĩpêx anhỹr kêt nê. ãm Tirtũm mã amnhĩ jarênh kaxyw nê akwýjê no hkàx ã hitom wýr agjê nê hitom kãm ahte kãm amnhĩ jarê. Hãmri nhũm Tirtũm tapxipix ja hã mē apumu. Mě amã amnhĩ to amnhĩrĩt kêt tã mē apumu. Hãmri nê mē ato mex nê.

⁷ —Nê mē kêp Tirtũm kra hkêt xwýnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhũm inhmar japêr.” Anhỹr o hamaxpêr jakamã xatã kãm amnhĩ jarê. No ãm htýx ã hamaxpêr anhỹr kaprý.

⁸ Jakamã kwa kêr ka mē ho mē uràk kêt nê. Tirtũm ra kot mē ate mēmoj tã hwýr xàta ra ja kukamã kot omunh mex kênã kot ka kêt mē xatã hã hwýr o akuhê.

⁹ —Nê kêr ka mē kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rý kãm amnhĩ jarênh o:

Pa Mëinhîpêêxà maati pê kaxkwa kamã ri apa xwÿnh? Amex o amex Tirtûm.

10 Apê mẽ ijamãr mex xwÿnh maati na ka.

Na hte kaxkwa kamã mẽ kot ri amã tanhmã amnhî nhîpêx to ho mẽ pa xwÿnhjaja akôt pix mã amnhî nhîpêx o ri pa. Tã ijaxwÿja inhmã mẽ uràk nê akôt pix mã amnhî nhîpêx o ri ixpa hprãm.

11 Nê kwa jarãhã mẽ inhmã mẽmoj gô pa mẽ akukwak ri ho apku.

12 Na pa hte tãhã amnhî tomnuj nê Tirtûm. Nom mẽ kot tanhmã ixtomnuj to xwÿnhjaja na pa hte ãm mẽ omu nê amnhî tã tanhmã mẽ ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhî nhîpêx anhÿr jakamã kwa ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

13 Nê kot paj nhÿrmã tanhmã amnhî tomnuj to kaxyw ka ja hã ixpumu nê ixte ã amnhî nhîpêx anhÿrja nê ixto htÿx nê pa tanhmã amnhî tomnuj to hkêt nê. ãm mẽmoj punuj pê ixpytàr rãhã ho apa Tirtûm. Tã ãm ja pix na hapêx. Anê.

—E kër ka mẽ ã Tirtûm mã amnhî jarênh anê. Anê.

14 —Nê koja mẽhõ tanhmã anhîpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mëpahpãm maatija ja hã apumu nê apyrã nê tanhmã ate amnhî tomnuj to ho hamakêtkati nê axte kãm hamaxpêr kêt nê.

15 Nom kot kaj mẽ ã amnhî nhîpêx anhÿr kêt nê. Nê tanhmã mẽ kot mẽ atota ã anohtÿx rãhã ho apa hãmri nhũm Mëpahpãm maatija mẽ apyrã nê mẽ ate tanhmã amnhî tomnuj to ho hamakêtkati hkêt nê. ãm hã nohtÿx rãhã ho pa ho pa. Anê.

Tanhmã mẽ pahte Tirtûm mã mex o mex ã harênh to

Rukre 18.11-12

16 Nhũm Jejus arĩ mẽ kãm kapêr nê mẽ kãm:

—Nê mẽ kot amnhî to jarkrar xwÿnhjaja na htem Tirtûm mã amnhî jarênh kaxyw hãmri nê tãhã ho apkur kêt rãhã kãm amnhî jarênh jakamã hkuk kaprĩ nê hkwyjê hkôt pa. Tã mo kaxyw na htem ã mẽ noo mã amnhî nhîpêx anê? ãm mẽ apkur kêt rãhã Tirtûm mã amnhî jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tirtûm nhÿrmã ja hã tanhmã mẽ ho mex to hkêt nê. Jakamã kwa kër ka mẽ ho mẽ uràk kêt nê.

17 Kër ka mẽ tãhã Tirtûm mã amnhî jarênh ryy kaxyw axàpkur kaga hãmri nê amnhî krã kahõ nê amnhî jaxwÿr mux nê akuk kĩnh nê ri akwyjê hkôt apa.

18 Hãmri nê nhÿri mẽ hkàx ã ahte kãm amnhî jarê nê kãm mex o mex ã harê. Kot kaj mẽ ã mẽ hkàx ã amnhî nhîpêx anê nhũm mẽ akwyjaja mẽ axàpkur kaga hã mẽ apumunh kêt nê. Nhũm Tirtûm pix ja hã mẽ apumu. Hãmri nê nhÿrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mãânên Sikûn Ximotre 4.8; Wam Pêtre 1.4; Eprêw 10.34

19 Nhũm Jejus arĩ mẽ kãm kapêr nê mẽ kãm:

—Nê mãânên ja. Kër ka mẽ jar pika ja kamã akukrêx rũnh o apa hkêt nê. Kêt jar mẽ hikukrêx koja kritpêm mex kêt nê. Kot kaj mẽ ho akuprõ nhũm amnhõre apê homnu rÿ paratre apê homnu. Nê kàx o mẽ akukrêx nhũm haxwÿja apê omnu rÿ nhũm mẽhõ apê hkwy ho ahkĩ.

20 Jakamã kër ka mẽ akukrêx rũnh o apa hkêt nê. Kaxkwa kamã Tirtûm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kër ka mẽ amã nhÿrmã kaxkwa kamã akukrêx mex prãm xàj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukaprĩ nê. Nê

Tĩrtũm kõt ri amnhĩ nhĩpêx mex nê. Hãmri nhũm ã mẽ ate amnhĩ nhĩpêx anhỹr ã mẽ apumu nê mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhõre nê mo paratre? Nê kamã mo mẽ ahkĩnh xwỳnh? ãm kamã amrakati kumrêx.

²¹ Kot kaj mẽ jar akukrêx rũnh hãmri nê ãm tanhmã apê homnu hto pix kukamã ajamxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamxpêr rãhã ho ra akĩnh nê ri apa.

²² —Nê kot kaj mẽ ixkapêr ma nê ixkõt amnhĩ nhĩpêx hãmri nê tãm amnhĩ nhĩpêx. Nê tãm axpên hipêx. Jao te hirã kamã arĩt mex pyrãk o amnhĩ nhĩpêx.

²³ No koja mẽhõ ixkapêr ma nê ãm kuma nê ixkwỳm ri amnhĩ nhĩpêx o pa. Hãmri nê te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nê kãm ajamxpêr tỳx rãhã ho ri apa.

²⁴ —Nê kot kaj apyxi nê anhõ patrãw hamêxkrut hãmri nê arĩgro pyxi hã hamê wa kãm axàpênh o amỹkry hkêt nê. Kot kaj anê nê hõ gryk ã ihõ kaga. Ja pyrã nê kot kaj mẽ jar akàxpore nê akukrêx pix mã ajamxpêr nê amã hapê ho akwỳjê pê ho anhõxỳ ho ri apa. Nê gryk ã Tĩrtũm kãm hprãm xà hkõt tanhmã ho mẽ ho mex to hkêt nê. Jakamã kwa kêr ka mẽ Tĩrtũm pix mã mãn ajamxpêr rãhã nê. Jao akàxpore nê akukrêx pix kukamã ajamxpêr o ri apa hkêt nê. Anê.

Mẽ pahte tee ri amnhĩ kukamã pajamxpêr kêt ã mẽ pamã karõ

Rukre 12.22-31; mããnên Piripos 4.6; Wam Pêtre 5.7

²⁵ Nhũm Jesus arĩ mẽ kãm kapêr nê mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamxpêr kêt nê. Tanhmãn axàpkur xà rỳ axê ka mẽ tee ri hkukamã ajamxpêr kêt nê. Mẽmoj piitã hkukamã tee ri ajamxpêr o ri apa hkêt nê. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ

kukwak ri atĩr nê apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhĩpêx xwỳnh jakamã mããnên kêp mẽ amã mẽ anhõ xwỳnh. Nê kêp mẽ amã mẽ axê nhõr xwỳnh.

²⁶ —Mãn ka htem kuwênhre pumu. Na hte tee ri amnhĩ xàpkur xà hkukamã hamxpêr o hkaprĩ nê ri pa hkêt nê. Mẽ anhĩpêx mã maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja uràk nê mẽ amã mẽ anhõ rãhã ho pa.

²⁷ —Nê xà kot kaj mẽ kritpêr atĩr prãm xà ja pix kukamã ajamxpêr rãhã nê ra ajamxpêr kêt kritpêr atĩr nê apa? Nà kot kaj mẽ anhỹr kêt nê.

²⁸ —Mãn ka htem akunĩ kamã pixôrã pumu. Na hte tee ri tanhmã kute hkukamã hamxpêr o ra hkaprĩ nê harir kêt nê.

²⁹ Tã nom muxre nê harir ka mẽ omu. Te ho amnepêr pahihĩ Sarumãw xê mex pyrãk nom mex o hakre.

³⁰ Pixôrãreja koja mẽmo arĩgro hã htĩr nê mux nê harir tã mẽmo arĩgro hã ra grã pa nê hapêx. Kêp pixôrã pix nê hapêx tokyx anhỹr tã nhũm Tĩrtũm ho mex nê nhũm mux nê harir. No mẽ kajaja na hte mẽ ato mex o pixôrã ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamxpêr o ri akaprĩ nê apa? Kot kaj mẽ ã ajamxpêr anhỹr jao kormã amnhĩ kaxyw Tĩrtũm mã ajamxpêr tỳx kêt nê.

³¹ —Kwa mẽ tee ri axàpkur xà hkukamã ajamxpêr o ri akaprĩ hkêt nê. Nê tee ri amnhĩ kukamã tanhmã ajamxpêr to ho ri akaprĩ hkêt nê.

³² Mẽ kot Tĩrtũm kõt amnhĩ xunhwỳr kêt xwỳnhjaja na htem ã ri hamxpêr anhỹr o pa. Tã nom kêr ka mẽ ho mẽ uràk kêt nê. Tĩrtũm ra kot mẽ panhõ mẽmoj kêt kêt mẽ pahpumunh mex kênã.

³³ Jakamã kêr ka mẽ hkõt ri tanhmã amnhĩ nhĩpêx to rãhã ho ri apa. Nê amã ja pix tãnopxar prãm. Hãmri

nhũm Tirtũm amnhĩ tã mẽ apumu nẽ apkati mẽ mẽ amã mẽmoj nhõr o pa.

³⁴ —Jakamã kwa kêr ka mẽ tee ri amnhĩ kukamã ajamexpër o akapri nẽ apa hkêt nẽ. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamexpër kêt nẽ. Kê apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajamexpër. Tirtũm kot mẽ pahpumunh mex o pa rãhã kênã. Anẽ.

7

Mẽ pahte axpên to pakapër punuj kêt ã kot mẽ pamã karõ

Rukre 6.37-38, 6.41-42; mãânên Rõmãn 2.1-3; Wam Korõt 4.5; Xiakre 4.11-12

¹ Nhũm Jejus arĩ mẽ kãm kapër nẽ mẽ kãm:

—Nẽ kêr ka mẽ atỳx ri amnhĩ krã hkõt tanhmã akwỳjê hõ kot amnhĩ tomnuj to hã harênh kêt nẽ. Kot kaj mẽ ã harênh anẽ nhũm Tirtũm ja hã mẽ apumu nẽ mẽ kajaja ã mẽ ajarênh anẽ.

² Na hte tanhmã mẽ pahte axpên nhĩpêx to hã mẽ pahpumunh kõt tanhmã mẽ panhĩpêx to.

³⁻⁵ Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nẽ hã kãm kapër tokyx anhỹr kêt nẽ. Akumrêx ate tanhmã amnhĩ tomnuj to hã amnhĩ pumu nẽ hk-aga hãmri nẽ rĩ kormã ate mẽmoj tã omunh xwỳnhhta wỳr tẽ nẽ hã tanhmã kãm akapër to. Kêr ka mẽ ã amnhĩ nhĩpêx anhỹr o ri apa.

—Nẽ xà koja mẽ akwỳjê hõ tanhmã amnhĩ tomnuj to grire. Ka ate amnhĩ tomnuj tỳx o hakrenh tã ã kot amnhĩ nhĩpêx anhỹr ã omu nẽ hã kãm akir nhũm amã ja mex nẽ nã? Nã koja amã ja mex kêt nẽ. Kot ka akumrêx ate tanhmã amnhĩ tomnuj tota kaga hãmri nẽ rĩ kormã anhĩõ tanhmã kot amnhĩ tomnuj to grireta nẽ kãm akapër nhũm ja amã mex nẽ.

⁶ —Nẽ xà na htem mẽ apkur xà mex jamỳ nẽ rop mã kurẽ? Nã na htem anhỹr kêt nẽ. Ja pyrã nẽ kêr ka mẽ kot

Tirtũm kaga xwỳnhjê mã kapër jarênh o ri apa hkêt nẽ. Anẽ.

Mẽ pahte mẽmoj to presija hã amnhĩ to Tirtũm wỳr

Makre 11.24; Rukre 11.5-13; Juãw 14.13-14; mãânên Wam Tesarõn 5.17; Xiakre 1.5-8, 4.1-3

⁷⁻¹¹ Nhũm Jejus arĩ mẽ kãm kapër nẽ mẽ kãm:

—Nẽ xà kot we akraja kãm prãm nẽ tep ã awỳ ka axtem nẽ kagã hõ py nẽ kãm agõ? Rỳ nhũm krãhyre gre hã awỳ ka axtem nẽ makre hõ py nẽ kãm agõ? Nã na ka htem ã mẽ hipêx anhỹr kêt. Na ka htem kot mẽmoj tã mẽ awỳr xà hkõt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tirtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htỳx kõt na hte mẽ amã mẽmoj mex nhõr o pa. Jakamã kot ka mẽ mẽmoj tã awỳ nhũm mẽ ama nẽ mẽ ate mẽmoj tã hwỳr xàta kõt amã kugõ. ãm xatã mẽ ate hã axàhwỳr o ri apaja nhũm mẽ amã hprãm xwỳnhhta gõ. ãm mẽmoj tã hwỳr rãhã ho ri apa nhũm mẽ ama nẽ mẽ amã mẽmoj tanhmã hipêx to. Te ho mẽhõ kãm tep xành nẽ teprênhxà hpyr nẽ xatã gõx kãm rênh o ãm pyrã nẽ xatã mẽmoj tã awỳ. Hãmri nhũm mẽ ama nẽ mẽ amã hprãm xwỳnhhta gõ. Te tep kanhêr xwỳnhhta jatã kot tep kanhêr pyrãk. Jao mẽ amã mẽmoj prãm xwỳnhhta gõ.

¹² —Nẽ mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx mẽ kêp anhõxỳ hkêt nẽ tãm mẽ hipêx. Kot kaj mẽ ã axpên nhĩpêx anẽ nẽ finat Mojes mẽ Tirtũm nhỹ hã mẽ kapër o mẽ pa xwỳnhjê xujarênh xà hkõt axpên nhĩpêx mex o ri apa. Anẽ.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhũm Jejus arĩ mẽ kãm kapër nẽ mẽ kãm:

–Tirtûm kapêrja mē kēp hihtỳx jakamā na htem ohtō nē hkôt amnhī xunhwỳr kêt nē. Na htem ām hpỳnhre nē hkôt amnhī xunhwỳ nē hkôt amnhī nhīpêx. Jakamā te Tirtûm nhō krī hwỳr pry grireta ā hpỳnhre nē pa pyrāk. No nhūm Satanasti hkôt mē kot amnhī xunhwỳr xwỳnhjaja na htem Satanasti kôt pix mā tanhmā amnhī tomnuj to hprām. Mē kām mex jakamā nhūm mē amnhī nhīpêx o te pry krepak rax ā axpēn kôt mē ohtō nē pa pyrāk o amnhī nhīpêx. Axtem kuwy hwỳr pry krepakja nōr tā nhūm mē htỳx kuwyja wỳr amnhī to pa. Jakamā Tirtûm kapêrja mē apē hihtỳx tā kēr ka mē māmri hkôt amnhī xunhwỳ. Jao Tirtûm nhō krī hwỳr pry grireta ā mām apa. Anē.

Mē kot amnhī to hêx xwỳnhjê jarēnh Rukre 6.43-44; māmānēn Xiakre 3.9-12; Wam Juāw 3.10, 4.4-6

¹⁵ Nhūm Jejus arī mē kām kapêr nē mē kām:

–E kwa mē o kora. Mē akwỳjaja kot kēp Tirtûm nhỹ hā kapêr jarēnh xwỳnh ā amnhī jarēnh tā na htem ja hā amnhī to hêx. Nhūm htem kām mē kapêr mar prām nē. Te mē kapêr mex pyrāk tā no nhūm htem ām mē kām amnhī to hêx pix o ri mē hkôt pa. Mē kot mar nē axtem nē Tirtûm kapêr kwỳm tanhmā amnhī nhīpêx to kaxyw nhūm htem hêx rom tanhmā mē kām kapêr to. Jakamā kwa mē o kora. Mē axkām ajamak rom nē amnhī nē mē omunh mex nē.

¹⁶ Kēr ka aprī hā mē piitā mē kot tanhmā amnhī nhīpêx to hā mē omu nē rī kormā tanhmā mē harēnh to. Mē hamaxpêr punuj xwỳnhjaja kēp Tirtûm nhỹ hā kapêr jarēnh xwỳnh kêt. No koja mē tām hamaxpêr nē tām amnhī nhīpêx ka ja hā mē omu nē mē kēp Tirtûm nhỹ hā kapêr jarēnh xwỳnh ā mē omunh kurē kumrêx. Na htem hprī hā mē kot tanhmā amnhī nhīpêx to ho pa hā mē omu nē rī kormā tanhmā mē harēnh to.

¹⁷ Na htem hamaxpêr punuj hāmri nē hkôt tanhmā amnhī tomnuj to. Nom koja mēhō hamaxpêr mex nē

hāmri nē hkôt tām amnhī nhīpêx mex o pa.

¹⁸ Na htem tanhmā hamaxpêr to xā hkôt tanhmā amnhī nhīpêx to ho pa.

¹⁹ –Nē koja mēhō o pī hpār ô hkêt japêr nhūm tee ri omu hāmri nē krāhta nē kuwym kumē. Ja pyrā nē koja mēhō tanhmā amnhī tomnuj to ho pa nhūm Tirtûm tee ri ja hā omu hāmri nē ā kot amnhī nhīpêx anhỳr o paja mỳrapê kuwy hwỳr kumē.

²⁰ Jakamā kot kaj mē tanhmā mē kot amnhī nhīpêx to ho pa hā akwỳjê pumu nē ra aprī hā tanhmā mē kute hā mē omunh kurē kumrêx. Mē kēp Tirtûm nhỹ hā kapêr xwỳnh ā mē omu rỳ mē kēp hkwỳm ri kapêr xwỳnh ā mē omu. Anē.

Mē kot Tirtûm nhō krī hwỳr gjêx mā xwỳnhjê jarēnh

Rukre 13.25-27; māmānēn Sikūn Korīt 13.5; Wam Juāw 2.3-6

²¹⁻²³ Nhūm Jejus arī mē kām kapêr nē mē kām:

–Nē Inhīpêxà Tirtûm mē wa inhō krīja wỳr koja mē piitā gjêx kêt nē. Ām mē kot kapêr kôt amnhī nhīpêx o mē pa xwỳnh pixjaja koja mē nhỹrmā ma hwỳr agjê. Na hte mē hkwỳjaja ixto “Pahihti” anhỳr ā ijarēnh tā no ām ixkôt ri amnhī nhīpêx kêt nē. Jakamā koja mē nhỹrmā wa inhō krī hwỳr àpir kêt nē. Kot paj nhỹrmā mē piitā mē htīr ri tanhmā mē kot amnhī nhīpêx to ho pa hā mē omunh xā hkôt tanhmā mē harēnh to. Mē mex ā mē hkwỳjê jarē nē mē kot amnhī tomnuj ā mē hkwỳjê jarē. Hāmri nhūm mē hkwỳ kot ixkôt amnhī nhīpêx o pa hkêt xwỳnhjaja kuwyta wỳr ma pa pymaj tee ri amnhī kukamā hamaxpêr hāmri nē tanhmā inhmā amnhī jarēnh to nē inhmā: “Kwa Jejus. Xà ate ixpumunh kêt? Na pa pre amnepêm ixtīr ri pikap ixpare ri anhỹ hā aa mē kot mēmoj pumunh kêt kwỳ ho anhỳr rax nē. Nē ixkwỳjê nē mēkarōmnuti jano nē mē kām akapêr jarēnh o ri ixpa. Kwa xà ate ja hā ixpumunh kêt?” Anhỳr o inhmā amnhī jarē.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwỹ hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwỹnh na ka mẽ. E mẽ ma kuwy hwỹr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwỹnh pixjaja ma Tĩrtũm mẽ wa inhõ krĩ hwỹr gjêx pa. Anê.

Ixkre pijakrut jarênh

Rukre 6.46-49; mããnên Xiakre 1.22-25; Wam Juãw 2.3-6

²⁴ Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwỹnhjaja te mẽ kot ixujarênh ja pyrãk. Mẽ kot amnhĩ nhĩpêx o te mẽhõ kot amnhĩ kukamã hamaxpêr mex nê aptỹx kãm amnhĩm òrkwỹ nhĩpêxja pyrãk.

²⁵ Kojã mẽhõ aptỹx kãm amnhĩm hipêx nhũm mẽmo arĩgro hã na wrỹk rax nê gô htãm rax nê hanhi no nhũm arĩ ãm tỹx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ ãm tỹxta pyrãk.

²⁶⁻²⁷ —No mẽ kot ixkapêr mar nê ãm mar xwỹnhjaja. Te mẽ kot mẽhõ kot amnhĩ kukamã hamaxpêr mex kêt nê htỹx mõi nê gô mỹri gyw rerek kãm amnhĩm òrkwỹ nhĩpêx pyrãk. Kojã mẽmo arĩgro hã òrkwỹ hã kòk xapêr tỹx nê na wrỹk rax nê. Nê gô htãm nê hanhi nê kêp grãnh pa. Jakamã kojã mẽhõ ixkôt amnhĩ nhĩpêx kêt nê te kot ã kot amnhĩ nhĩpêx anhỹr xwỹnhhta pyrãk. Jakamã kwa mẽ ixkapêr mar tỹx nê hkôt amnhĩ nhĩpêx rãhã ho ri apa. Te mẽhõ aptỹx kãm òrkwỹ xãm xwỹnhhta pyrãk. Anê.

²⁸ Nhũm pre Jejusja ã mẽ kãm ujarênh ry anê nhũm mẽ amnhĩ jaêr

pê kot tanhmã mẽ ahkre htoja mar o hkri.

²⁹ Hãmri nê axpên mã harênh o:

—Hêxta waa nê. ãm hãmri na ã mẽ pamã kapêr anê. àhpumunh tỹx kôt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwỹnhjê kurom àhpumunh tỹx kumrêx. Anê.

8

Kà nhy hkro xapêr o pa xwỹnh jarênh

Makre 1.40-45; Rukre 5.12-16

¹ Tã nhũm Jejus mẽ kãm kapêr pa hãmri nê hixêt prêêta rũm akupỹn wrỹ nê ma tẽ nhũm mẽ ohtõ nê ma hkôt mra.

² Hãmri nhũm mẽhõ my hkà nhy hkro xapêr o pa xwỹnhja omu nê hwỹr tẽ. Hãmri nê kutã hkõnkrã ho tẽm nê hipõ nê nhỹ nê amnhĩ to kuwy nê kãm:

—Pa Pahiti. E ot pa awỹr amnhĩ to tẽ. Akupỹm ate mẽ ixto mex kaxyw axàhpumunh tỹx jakamã kot ka amã akupỹm ixto mex prãm nê mãmrĩ ixto mex. Anê.

³ Hãmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupỹm akà mex. Anê.

Hãmri nhũm hkà akupỹm mex kurê kumrêx.

⁴ Hãmri nhũm Jejus kãm:

—E kêr ka amnhĩ tã mẽ kãm tanhmã ijarênh to hkêt rãhã ma patre hwỹr tẽ kê akupỹm akà mex ã apumu. Hãmri ka hpãnhã amnepêm finat Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupỹm akà mex ã apumu. Anê.

Pôristi krãhtũm mã àpênh xwỹnh jarênh

Rukre 7.1-10

⁵ Tã nhũm Jejus ma krĩ pê Kapanãũ hwỹr mõi. Hãmri nê hwỹr pøj nhũm Rõm nhõ xwỹnh pê pôristi krãhtũmja omu nê hwỹr tẽ. Kêp Ijaew kêt tã hwỹr tẽ. Na pre kãm àpênh xwỹnh kêp à htỹx nê nõ nhũm omu nê tee ri

hkukamã hamaxpêr. Hãmri nê Jejus ra ò krî hwÿr hpôx ã omu nê hwÿr tē nê kãm harē nê kãm:

⁶—Pa Jejus? E ot pa awÿr tē. Inhmã àpênh xwÿnhja na ixpê à htÿx nê. Ra ï kamã htyk pa nê nõ. O mÿj inhörkwÿ kamã nõ. Anē.

⁷Nhÿm Jejus kuma nê kãm:

—Tÿ? Tôe. Nà pa ma akôt tē nê akupÿm amã ho mex. Anē.

⁸⁻⁹Hãmri nhÿm tee ri kuma nê kãm:
—Kwa akĩnhã ixpê Ijaew kêt jakamã ixte amnhÿ kuk ã ixpijaàm. Æm ja rÿm mãn akapêr pix o akupÿm inhmã ho mex nà? Ixpê mē hkrãhtÿm na pa hte inhö pôristi mã mēmoj tã karö nhÿm mē inhmar xà hkôt inhmã mēmoj tanhmã ho. Na pa hte mē kãm: “E mē ma mra nē ã amnhÿ nhÿpêx anē.” Anē nhÿm htem inhma nē ma mrar kurē kumrêx. Rÿ pa mē kãm: “E mē amnē ixwÿr mra nē ã amnhÿ nhÿpêx anē.” Anē nhÿm mē inhma nē ixwÿr mra. No kêt ixrom axàhpumunh tÿx kôt na ka hte mē àja mã akapêr nhÿm ama nē mē kêp hapôx nē ma mrar kurē kumrêx. Jakamã kwa Æm ja rÿm akapêr pix o akupÿm inhmã ho mex nà? Anē.

¹⁰Hãmri nhÿm Jejus amnhÿ jaêr pē kot kãm ã kapêr anhÿrta ma nē hkĩnh nē. Hãmri nē hã hkôt ri mē mör xwÿnhjê mã kãm:

—Kwa xà na ka mēmyja kapêr ma? Mē pahkĩnh ã kêp Ijaew kêt tã mē arom amnhÿ kaxyw inhmã hamaxpêr tÿx nē. Aa mē atö uràk nē ã amnhÿ kaxyw inhmã ajamaxpêr tÿx anhÿr kêt tã nhÿm mē arom kãm àpênh xwÿnh kaxyw ã inhmã hamaxpêr tÿx anē.

¹¹Nà koja nhÿrmã mē hkwÿjaja kêp Ijaew kêt tã ohtö nē pika piitã kurÿm ma Tÿrtÿm mē wa inhö krî hwÿr api nē hwÿr agjê. Nē wa ixkuri wa inhö krî kamã Ijaew pàr krax pē Apraãw nē Ijak nē Jako mē pimràatã pa ho pa. Mē kêp Ijaew kêt tã mē ïhkô hã apkur mex o hkrî nhÿm Tÿrtÿm mē ho mex rax o pa.

¹²No pēr mē apē Ijaew kwÿjaja kot kaj mē hkôt hwÿr agjêx kêt nē. Tÿrtÿm kãm hwÿr mē agjêx prãm tã ka mē

axtem nē hkaga. Jakamã kot kaj mē ma kamàt kô xihtÿx rax wÿr ajapêx nē mē kêp awry rax nē mē kot amnhÿ xà htÿx kamã hamak tÿm xàta kamã apa ho apa. Hãmri nē tee ri mē ixwÿr agjêx prãm kaprÿ nē akaprÿ xàj mur nē amnhÿ kamã agryk tÿx nē. No Æm tee ri amnhÿ kamã agryk kaprÿ. Mē ate Tÿrtÿm kapêr kaga nē hkôt amnhÿ xunhwÿr kêt jakamã kot kaj mē nhÿrmã ã amnhÿ nhÿpêx anē. Anē.

¹³Nhÿm pre ã Jejusja mē kãm kapêr anē. Hãmri nē pôristi krãhtÿmta mã kãm:

—E mãmrÿ ma akupÿm tē nē amã àpênh xwÿnhhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tē nē omu.

Anhÿr o kãm kapêr rôm nhÿm ra akupÿm kãm mex kurē kumrêx.

Jejus kot ahpÿnhã mē à xwÿnhjê ho mex

Makre 1.29-31; Rukre 4.38-41

¹⁴Tã nhÿm Jejus ma Simãw Pêtre nhörkwÿ hwÿr tē nē hwÿr axà. Nhÿm Simãw Pêtre xupãnhgêx ra à nē hkà kagro htÿx nē nõ.

¹⁵Hãmri nhÿm Jejus hwÿr axà nē omu nē ïhkra hã kupy nhÿm hkà hakry nē akupÿm hihtÿx kurē kumrêx. Jakamã kãnhmã nhÿ nē mē kãm mēö hã àpênh o ri mra.

¹⁶Tã nhÿm ra awjakry. Ra kamàtre ho mö nhÿm mē piitã Jejus wÿr mē à xwÿnhjê ho mra. Nē mēkarömnuti kot mē hwÿr gjêx xwÿnhjaja nhÿm mē hwÿr mē o mra. Hãmri nhÿm mē omu nē akupÿm mē piitã mē ho mex. Mē à xwÿnhjê ho mex nē mē hkwÿjê nē mēkarömnuti jano. Æm kapêr pix o mē nē mē hano nhÿm mē kêp hapôj nē ma hapêx.

¹⁷Na pre ra Tÿrtÿm nhÿ hã kapêr xwÿnh finat Ijaisja ã amnhÿ nhÿpêx anhÿrja kukamã amnepê mē kãm harênh o:

Tÿrtÿm kot mē pahwÿr mēnh mã xwÿnhja koja nhÿrmã wrÿ nē mē panê mē paxà piitã rēnh pa nē akupÿm mē pahto mex pa. Anē.

Na pre ã finat Ijaisja Jejus kukamã harênh anê. Tã nhũm wrỳ nê kot harênh xà hkôt ã amnhĩ nhĩpêx anhÿr o pa.

Wa kãm Jejus kôt amnhĩ xãm prãm xwÿnh wa harênh

Rukre 9.57-62

¹⁸ Tã nhũm Jejus amnhĩ pu hã rĩt nê tee ri hwÿr mē mrar xwÿnhjê pumu hãmri nê hkôt mē pa ho mē pa xwÿnhjê mã kãm:

—E ma pu mē pàr mã agjê nê ma xarmã mō. Anê.

¹⁹ Hãmri nhũm mē nojarêr rôm nhũm Tĩrtũm kapêr tũm o mē ahkre xwÿnhjê hō Jejus wÿr tē nê kãm:

—Pa mē ijahkre xwÿnh? E pa ma akôt ri ixpa ho ixpa nà. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwÿ. Nê kuwênhre pĩ nhĩmōk ã hikwÿ. No pa ixpê Tĩrtũm kot mē awÿr inhmênh xwÿnh tã mry hkĩnhã inhōrkwÿ hkêt. Na pa hte amarĩ nhãm krĩ hwÿr ixpa nê nhãm hō hwÿr ixpa. Tã xà kot ka ixpyrà nê ã amnhĩ nhĩpêx anhÿr o ri apa nà? Anê.

²¹ Hãmri nhũm pãnhã hōja hwÿr tē. Ra mē kot hkôt amnhĩ xunhwÿr xwÿnhjê hōja hwÿr tē nê kãm:

—Pa Pahĩti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Kojã nhÿrmã inhĩpêxà tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

²² Hãmri nhũm kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mēmoj inhnê ano kupyr rỳ apê àmnàr kêt nê. Kwãr mē htĩr tũm nê mē pa hkêt mã xwÿnhjaja mãn axwakre kamã amã anhĩpêxà jamãr o pa nê haxà. Anê.

Jejus kot kôk o pinhkrênh jarênh

Makre 4.35-41; Rukre 8.22-25

²³ Tã nhũm mē ra xarmã nojarêr nhũm Jejus mē hkôt mē pa ho mē pa xwÿnhjaja pàr wÿr agjê hãmri nê himô raxja ã ma xarmã mō.

²⁴ Hãmri nhũm Jejus ra ôtxwa nê ra gōr nê nō. Puh nhũm naja hkoko ho mō nê kôk xapêr tÿx kumrêx. Nhũm gô kànhmã harĩ nê axpên tak tÿx nê. Xatã axpên tak nê pàr kre kamã axkapĩ nhũm ra àr o mō. Hãmri nhũm mē tee ri omu nê kãm ma htÿx kumrêx. Nê tee ri amnhĩ nhĩpêx. No nhũm Jejusja htÿx gōr nê nō.

²⁵ Hãmri nhũm mē hwÿr hprôt nê kumra nê kãm:

—Kwa Pahĩti. Kot puj mē jarãhã pahtyk pa. Kwa tokyx kànhmã nhÿ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrākato nê kànhmã nhÿ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gōja tãm nōr kurê kumrêx. Hãmri nhũm Jejusja hkôt mē pa ho mē pa xwÿnhjê hwÿr apkjê nê mē kãm:

—Hêxta waa nê. Kwa pêr ãm kormã te mē ate amnhĩ kaxyw Tĩrtũm mē wa inhmã ajamaxpêr tÿx kêt pyrãk. Hã na ka mē amã ma xàj tee ri amnhĩ kukamã ajamaxpêr. Anê.

²⁷ Hãmri nhũm mē amnhĩ jaêr pē ã kot amnhĩ nhĩpêx anhÿrja ã omu nê tee ri hamaxpêr nê axpên pumunh pē omunh o kuhê. Hãmri nê axpên mã:

—Kokÿÿ. Pêr Jejus kêp mē panhĩō hkêt. Mē pahtō kot pu we te kot amnhĩ nhĩpêx pyrã nê kôk mã pakapêr nhũm hpinhkrênh kurê kumrêx? Nà Jejusja mē pakurom àhpumunh tÿx o àhpumunh tÿx. Anê.

Jejus kot wa nê mēkarōmnuti janor

Makre 5.1-20; Rukre 8.26-39

²⁸ Tã nhũm mē ra himô rax pē Garirejja ã rê nê pika pē Geras wÿr pōj nê kamã mō. Hãmri nhũm ra mēhō myja wa hamêxkrut nê mē kutã tē. Ra mēkarōmnuti kot hamē wa hwÿr gjêx xwÿnhja wa. Mēkarōmnuti xohtō kot tanhmã wa ho jakamã nhũm wa oprê htÿx nê hihtÿx rax nê wa pa. Jakamã nhũm mē piitã kãm wa uma nê amnhĩ nê mē htykjê jagjênh xà hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tē nê amnhĩ wÿr omu hãmri

nê amnhî nê tanhmã kãm kapêr to. Nom mêkarõmnuti nhỹ hã àmra kamã kãm kapêr nê kãm:

²⁹—Pa Tirtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixto hkêt nê. Ate tanhmã mẽ ixtomnu hto hã arĩgrota kormã katoore hã. Anẽ.

³⁰Nhũm ra krĩ nhõ xwỳnhjê hkrit hagrô ohtô nê ri mẽ hpum pa.

³¹Nhũm mêkarõmnuti mẽ omu hãmri nê amnhî to Jejus wỳr nê kãm:

—Kwa kot ka jahti wa nê mẽ ijapôx japêr nê mẽ kot amnhî xà htỳx kamã hamak tũm xàta wỳr mẽ ixrênh kêt nê. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagiê nà? Anẽ.

³²Hãmri nhũm mẽ kuma nê mẽ kãm:

—Tõe mẽ tãm mẽ hwỳr mãn mra. Anẽ.

Hãmri nhũm mẽ kuma nê myta wa kêp hapôj nê hagrô hwỳr mrar kurê kumrêx nê hpãnhã kãm gjêx pa. Hãmri nhũm hagrôta mêkarõmnuti pymaj amỹra nê ma hprôt nê himô hã hixêt prêk ã axpum rôrôk nê gôx kãm mrô nê pikaprâr pa.

³³Hãmri nhũm hagrô jamâr o ri mẽ pa xwỳnhjaja tee ri omu hãmri nê ma akupỹm krĩm hprôt nê mẽ kãm awjarê. Nê myta wa akupỹm tãm hkrã hã harênh o hprôt.

³⁴Hãmri nhũm krĩ nhõ xwỳnhjaja tee ri mẽ hkrit jarênh ma nê ma piitã Jejus wỳr mra nê hkaxpa. Hãmri nê amnhî nê kãm:

—E kwa mẽ ma amrar kurê kumrêx. Anẽ.

Hãmri nhũm mẽ kuma nê awjanã nê ma akupỹm pan rê.

9

ĩ kamã htyk xwỳnh jarênh

Makre 2.1-12; Rukre 5.17-26; Juãw 10.37-38

¹Nhũm Jejus mẽ hkôt mẽ pa ho mẽ pa xwỳnhjaja awjanã nê ma akupỹm pâr wỳr mra nê gjêx pa nê akupỹm xarmã rê nê akupỹm Jejus nhõ krĩ hwỳr mō.

²Hãmri nê hwỳr pôj nhũm krĩ nhõ xwỳnh kwỳjaja mẽ omu nê ã kamã

htyk xwỳnhja mỳ nê Jejus wỳr o tẽ. Nõr xà kamã nõr rãhã nhũm mẽ hã hije nê kumỳ nê hwỳr o tẽ. Hãmri nhũm amnhî tã mẽ omu. Ra mẽ kot hkrãmnhwỳta kaxyw kãm hamaxpêr tỳx ã mẽ omu nê ã kamã htyk xwỳnhhta mã kapêr nê kãm:

—Pa? Kwa tee ri amnhî kukamã ajamaxpêr kêt nê. Na pa ra apê tanhmã ate amnhî tomnuj to ho ijapêx pa. Kot paj axte kãm ijamaxpêr kêt nê. Anẽ.

³Hãmri nhũm Tirtũm kapêr tũm o mẽ ahkre xwỳnhjaja tee ri ã kot kãm kapêr anhỹrja ã kuma nê axpên mã:

—Tk. Kwa mēhõ myti mũj kêp Tirtũm kêt tã te ri kot amnhî nhĩpêx pyrãk ã amnhî nhĩpêx. Tirtũm pix na kot mẽ nê mẽ kot amnhî tomnuj o hapêx xwỳnh. Anẽ.

⁴Hãmri nhũm Jejus amnhî tã mẽ kuma nê mẽ kãm:

—Kwa mẽ ã ajamaxpêr anhỹr kêt nê.

⁵Ixte mẽ nê mẽ kot amnhî tomnuj o ijapêx par ã amnhî jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nê. Nom kot paj mẽ anoo mã akupỹm ã kamã htyk xwỳnhhta o mex ka mẽ apiitã hã ixpumu hãmri nê ixkôt ajamaxpêr kurê kumrêx. Ixpê Tirtũm kot mẽ awỳr inhmēnh xwỳnhhta na pa. Ixte mẽ anê mẽ ate amnhî tomnuj rēnh kaxyw na pre mẽ awỳr inhmē pa mẽ awỳr wrỳ.

⁶Tã mẽ ate ja hã ixpumunh kaxyw kot paj mẽ anoo mã ja ho mex.

Anhỹr o mẽ kãm amnhî jarê hãmri nê ã kamã htyk xwỳnhhta mã kãm:

—E kãnhmã xa nê anõr xàta py nê ma akupỹm anhõrkwỹ hwỳr tẽ. Anẽ.

⁷Puh nhũm kãnhmã ãm kurê kumrêx nê nõr xà py nê mẽ noo mã kato nê ma akupỹm õrkwỹ hwỳr tẽ.

⁸Hãmri nhũm mẽ piitã no hapôx rũnh nê omunh o kuhê nê kamã no puma htỳx nê. Nê tee ri omu nê axpên mã:

—Kokỹỹ. Kwa aa mẽ pahte ã mēhõ kot amnhî nhĩpêx anhỹr ã omunh kêt tã jarãhã ja pumu.

Anhÿr o Jejus jarê hāmri nê ÿ hā Tirtūm mā mex o mex ā harê.

*Jejus kot amnhĩ kôt Matêwre hwÿr
Makre 2.13-17; Rukre 5.27-32*

⁹Tā nhūm Jejus mē kēp kato nē hkôt mē pa xwÿnhjê mē nhūm mē ma mō. Hāmri nē pa ixpê Matêwre ixpumu. Ixte Rōm kām mē ho amnhĩptār xwÿnh mā krī nhō xwÿnhjê pē kàxpore hkwÿ jamÿnh xwÿnh na pa pre. Nom mē kot ho tewēn kryre htā ixte amnhīm hkwÿ ho ixārīk prām xāj na pa pre hte mē kām ho rūnh nē harê. Jakamā nhūm mē piitā kām ixkīnh kêt nē. Tā pa pre mē kēp kàxpore jamÿnh xā hā ixkre kamā mē kēp hamÿnh o nhÿ nhūm Jejus mē hkwÿjaja ijānh mra nē ixpumu nē amnhĩ kôt ixwÿ nē inhmā:

—Pa? E axàpēnh̄ta kaga nē hpānhā amnē mē ixkôt mǎn tē nē ixkôt mǎn ri apa ho apa. Anē.

Hāmri pa kuma nē ixàpēnh̄ kaga nē ma hkôt tē. Nē hpānhā hkôt ixpa ho ixpa.

¹⁰Hāmri nē mēmo arīgro hā amnhĩ nhōrkwÿ hwÿr Jejus nē hkôt mē pa ho pa xwÿnhjaja mē ixkrāmnhwÿ hkwÿjê hwÿ. Nhūm mē piitā mra nē inhōrkwÿ hwÿr agjê nē ixkutā apkur o hkrī. Nē ixpyrà nē Rōm nhō pahi mā mē kēp kàxpore hkwÿ jamÿnh xwÿnh kwÿ haxwÿja ixwÿr mra nē mē ixkutā apkur o hkrī.

¹¹Hāmri nhūm Parijew nhō xwÿnhjaja mra nē inhōrkwÿ kapem mē ixàpkur ā mē ixpumu. Nē tee ri mē ixkaêx ā Jejus pumu hāmri nē hkôt mē pa ho mē pa xwÿnhjê hwÿr agjê nē mē ixtā mē kām akir nē mē kām:

—Kwa mē kot jajê kutā apkur kêt tā mē akrāhtūmja axtem nē mē kutā apkur o nhÿ. Kwa nà mē kot amnhĩ tomnuj xwÿnh kēnā. Jejus kot amnhĩ to mex ronhÿx mē kutā apkur kêt nē. Anē.

¹²Hāmri nhūm Jejus amnhĩ tā ā mē kapēr anhÿrja ma nē mē kām:

—Tk. Nà ixte tām mē unhwÿr kaxyw na pa mē kutā ixàpkur o nhÿ. Xà na hte tōtōja mē mex xwÿnhjê hwÿr mra nē mē hkane? Nà ām mē

à xwÿnhjê pix wÿr na hte mra nē tanhmā mē hkane hto. Ra mē ate ja pumunh mex. Tā ja pyrà nē na pa pre mē kot amnhĩ to mex xwÿnhjê hwÿr ixwÿr kêt nē. Mē kot amnhĩ tomnuj xwÿnhjê pix wÿr na pa pre wrÿ. Ixte tām mē unhwÿr kaxyw mē hwÿr wrÿ nē ā jajê kutā ixàpkur o inhÿr anē.

¹³Ga mē ma mra nē Tirtūm kapēr ā kagà htūm kot ja jarēnhja kamā harē nē ama. Harēnh̄ kot:

Na ka htem inhmā tanhmā amnhĩ jarēnh to kaxyw hāmri nē inhmā mēmoj gō nē tanhmā ixto mex to. Nom kēr ka mē ām ja pix ho anhÿr kêt nē. Mē māānēn mē piitā tanhmā mē ho mex to ho ri apa. Anē.

—Ā Tirtūm kapēr ā kagà htūm kot ja jarēnh̄ kot anhÿr. Tā ja pyrà nē na pa pre mē kot amnhĩ tomnuj xwÿnhjê hwÿr wrÿ nē mē kamā ixukaprī ho ixpa. Mē kot amnhĩ tomnuj kaga nē hpānhā tām amnhĩ nhīpēx kaxyw na pa pre ā mē hwÿr ixwÿr anē. Tā ka mē ri atÿx amnhĩ krā hkôt ā ixto akapēr anē. Anē.

*Mē kot mēmoj tā Jejus kukjêr
Makre 2.18-20; Rukre 5.33-35*

¹⁴Tā nhūm Juāw Paxis kôt mē pa xwÿnhjaja Jejus wÿr mra nē mēmoj tā hkukja nē kām:

—Pa? E ot pa mē awÿr mra. Kwa mē inhmā mēmoj jarê. Na pa htem tōhā Parijew nhō xwÿnhjê pyrà nē ixàpkur kêt kām Tirtūm mā amnhĩ jarê. Tā nom akôt mē pa ho mē pa xwÿnhjaja na htem àmnhix apkur o pa kamā kām amnhĩ jarēnh o pa. Kwa mo na htem mē ixpyrà nē tōhā apkur kêt kamā kām amnhĩ jarēnh kêt nē? Anē.

¹⁵Hāmri nhūm mē kuma nē mē kām:

—Nà mo kaxyw kot kêt mē apkur kêt rāhā kām amnhĩ jarê? Mē hkaprīre hā. Mē kot ixkôt pa ho pa hā amnhĩ pumunh jakamā na htem hkīnh nē ixkôt pa. Kormā ixte mē kamā ixpa kēnā kot kêt mē apkur kêt rāhā Tirtūm mā tanhmā amnhĩ jarēnh to. Xà na htem hkrāmnhwÿ hā hkīnh kaxyw hā akuprō nē hkaprī

nê apkur kêt o kamàt nê mÿr o hkrî? Nà na htem anhÿr kêt nê. Na htem hã akuprô nê hkînh nê hã apkur rûnh nê. Ja pyrà nê na hte ixkôt mē pa ho mē pa xwÿnhjaja ixkôt kormã àmnhîx hkînh nê apkati mē apkur o pa. Nom koja mē kãm ixkurê xwÿnhjaja nhÿrmã tanhmã ixto hãmri nhÿm mē hkaprî htÿx nê rî kormã tōhã apkur kêt rãhã Tirtÿm mã amnhî jarē. Anē.

*Mē pahte Jejus kôt amnhî nhîpêx
Makre 2.21-22; Rukre 5.36-39*

¹⁶ Nhÿm Jejus mē piitã mē kãm kapêr nê mē kãm:

–Mē kot amnhî tomnuj xwÿnhjaja ra mē kot amnhî nhîpêx tÿm o amnhî pyrãk jakamã na htem tanhmã mē kot amnhî nhîpêx nyw tota kaga.

¹⁷ Tã ixte amnhî nhîpêx nywja te kot mē ate amnhî nhîpêx tÿm pyrãk kêt jakamã na ka htem ixkapêr ma nê àm ama. Kwa mē inhma nê mē ate amnhî nhîpêx tÿmja gryk ã ixkaga hkêt nê. Anē.

Mē hkra htyk nê mēhō ni kamrô wa harēnh

Makre 5.21-43; Rukre 8.40-56

¹⁸ Nhÿm pre ã Jejus mē kãm kapêr anhÿr o xa. Rôm nhÿm mēō pahihtija tē nē mar o xa. Hãmri nê hamaxpêr o:

–Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anē. E pa hwÿr tē nē ixkrare ho kuwÿ. Anē.

Hãmri nê hwÿr tē nē kutã hkōnkrã ho nhÿ nê kãm:

–Pa akupÿm mē ixto mex xwÿnh? E ot pa awÿr tē. Kwa ma ixkôt tē nē inhma ixkra nire pumu nē tanhmã inhma ho kê akupÿm inhma htîr. Na ham ixpê ty pa kaxyw amã ijamaxpêr nē man awÿr tē. Anē.

¹⁹ Hãmri nhÿm kuma nê kãm:

–Tōe. Nà kot paj ma akôt tē. Anē.

Hãmri nê ma hkôt tē. Mē ixpê hkôt ixpa ho ixpa xwÿnhjê mē pa mē ma hkôt mō.

²⁰⁻²¹ Nhÿm mēhō ni kamrô rãhã ho pa xwÿnhja ma mē ixkôt tē. Na pre hte hkamrô hkryre rãhã ho pa hã amgrã pē 12 nê tee ri kãm amnhî mex prãm o

pa. Jakamã Jejus jarēnh ma nê amnhî kaxyw kãm hamaxpêr kurê kumrêx nê hamaxpêr o:

–Ma pa kop ma hwÿr tē nê kêp ê nhîrê pix kupênh tã akupÿm inhmex japêr. Anē.

Hãmri nê ma mē ohtôjê kaêx kôt hwÿr tē. Nê katut kôt tē nê kêp ê nhîrê kupê.

²² Hãmri nhÿm Jejus ho hakêx nê amnhî tã omu nê kãm:

–Pa? Kwa tee ri amnhî kukamã ajamaxpêr kêt nê. Ate amnhî kaxyw inhma ajamaxpêr tÿx jakamã na ka ra akupÿm amex. E mãmri aja-makêtkati nê ri apa. Anē.

Hãmri nhÿm akupÿm mex nê hkînh tÿx nê ma akupÿm tē.

²³ Hãmri pa mē ma htyk xwÿnh nhîpêêxà hkôt mra nê òrkwÿ hwÿr agjê nê mē pikuprōnh xwÿnhjê pumu. Nhÿm mē ra mē hã htu rax nê. Nê omÿj ri kaprî xàj pifti kakôr o hkrî nê omÿj ri mur. Kãx pē mur nê amnhî tak o hkrî.

²⁴ Hãmri nhÿm Jejus mē hwÿr axà nê mē omu. Nê ra kot my hkrata htyk ã omunh tã kuri mē mÿr o mē hkrî xwÿnhjê mã kapêr nê mē kãm ãm ôt nê nōr ã harē nê mē kãm:

–Pa? Kwa mon ka mē ri akaprî nê amÿr o akrî? E mē ma mra. Na wa hkrata wa kêp htyk kêt nê. Na ãm gōr nê nō. Anē.

Hãmri nhÿm mē kot ra htyk ã omunh mex jakamã kuma nê ãm kuma. Nhÿm mē hkwÿja axtem nê ri xpênh mã hã hpêr o pikênh o hkrî.

²⁵ Hãmri nhÿm kapôt mã mē hano nhÿm mē hapôj nê kapôt ã kuhê. Hãmri nhÿm Jejusja htyk xwÿnhhta wÿr axà nê hpa hã kupy nê kãnhmã ãm nhÿm akupÿm htîr nê kãnhmã ãm kurê kumrêx.

²⁶ Hãmri nhÿm mē piitã akupÿm htîr kãm omu nê ma ri krî piitã hkôt ri mē kãm harēnh o hprôt.

Wa nohkre xwÿnh wa harēnh

Matêwre 20.29-34

²⁷ Tã nhÿm Jejus kato nê ma tē. Pa mē hkôt ixpa ho ixpa xwÿnhjaja ma hkôt mō. Hãmri nhÿm wa myja wa

hamëxkrut. Hamë wa nohkre xwÿnh wa Jejus jarënh ma nê hã ajêt nê hkôt rôrôk o mô. Nê xatã amnhĩ to hwÿr o hkôt rôrôk o mô nê kãm:

–Pa Jejus? E Tirtũm kot mē ixkaxyw axãm jakamã kwa wa ixpumu nê wa ixkamã axukaprĩ kêt wehe. Anê.

²⁸ Hãmri nhũm wa kuma nê wa hkukamã nhÿri ixkrem axà nhũm wa hkôt axà nê xa nhũm wa omu nê wa kãm:

–Pa? E xàn ka wa ra amnhĩ kaxyw inhmã ajamaxpêr tÿx nê nà? Anê.

Hãmri nhũm wa kãm:

–Tÿ. Wa ixte amnhĩ kaxyw amã ijamaxpêr tÿx kênã. Anê.

²⁹ Hãmri nhũm wa kuma nê hamë wa no hã ãhkra xi nê wa kãm:

–Tôe. Nà war ate tanhmã amnhĩ kaxyw inhmã ajamaxpêr to xà hkôt kot paj war anhÿpêx. Anê.

³⁰ Hãmri nhũm wa akupÿm rÿt mex kurê kumrêx. Hãmri nê akupÿm kato nê ma htêm kaxyw nhũm wa kãm:

–E kêr ka wa nhãm mē kãm ixte war ato mex ã ijarënh kêt nê. ãm kwarĩ ho kwarĩ.

³¹ Anhÿr tã no nhũm wa kuma nê ãm kuma nê wa ma tē nê krĩ pu hã mē piitã mē kãm ri war amnhĩ tã harënh o mra.

Kapêr kêt xwÿnh jarënh

³² Tã nhũm Jejus ma axte nhÿhÿm mē ixto mô. Hãmri nhũm mēhõ my mēkarõmnuti kot hwÿr àr nê tanhmã ho nhũm kapêr kêt nê pa xwÿnhja nhũm mē Jejus wÿr o tē.

³³ Hãmri nhũm omu nê nê mēkarõmnuti jano nê kãm:

–E kêp akato nê ma tē. Anê.

Hãmri nhũm kuma nê kurũm kato nhũm akupÿm kapêr mex kurê kumrêx. Hãmri nhũm mē kot hã omunh xwÿnhjaja tee ri kot mēkarõmnuti janor ã omu nê kamã no puma nê. Nê axpên mã:

–Kokÿÿ. Aa mē pahte ã mēhõ kot anhÿr pumunh kêt kumrêx tã na pu mē jarãhã ja pumu. Anê.

³⁴ Nom nhũm mē hkwÿ pē Parijew nhõ xwÿnhjaja axtem nê hã mē kãm kapêr o:

–Tk. Kot amnhĩ krã hkôt mē hanor kêt kênã. Mēkarõmnuti nhõ pahi nhÿ hã kot mē nê mē hanor kênã. Anê.

Jejus kêp mē pakamã ukaprĩ xwÿnh Makre 6.34; Rukre 10.2-3; Juãw 4.35

³⁵ Tã nhũm Jejusja krĩ ho ohtô nê hkôt ri mē kãm Tirtũm kapêr jarënh o pa. Pa mē hkôt ixpa. Na pre hte nhÿri krĩ hwÿr pøj nê mē kot Tirtũm kapêr o mē ahkre xà hã ixkre hwÿr mra nê hwÿr agjê nê mē pikuprõnh xwÿnhjê jahkre. Nê mē kãm:

–E mē inhma. Tirtũm kãm mē api-itã mē ato hkra hprãm. Jakamã kwa mē ate amnhĩ tomnuj kaga hprãm xà hkôt amnhĩ xunhwÿ nê kapêr kôt amnhĩ nhÿpêx. Jao amnhĩ nhÿpêx nyw o amnhĩ nhÿpêx o ri apa.

Anhÿr o mē kãm kapêr. Hãmri nê ahpÿnhã ri tanhmã mē à kute xwÿnhjê ho mex. Nhũm mē ohtô nê hkôt mar o pa.

³⁶ Hãmri nhũm mē omu nê kãm mē hkaprĩ nê. Na prem tee ri amnhĩ kukamã hamaxpêr o pa jao ra hkaprĩ nê. Nhũm Jejus ja hã mē omu nê hamaxpêr o:

–Hêxta waa nê. Na mē mex kêt nê pa. Te mē kêp ôwêhti jamãr xwÿnh kêt kot amnhĩ nhÿpêx pyrãk o htÿx ri pa. Mēhõ koja kãm mē hkaprĩ nê tanhmã mē ho mex to ho pa? Anê.

Hãmri nê mē kamã ukaprĩ nê.

³⁷ Hãmri nê mē hã mē ixpê hkôt ixpa ho ixpa xwÿnhjê mã kapêr nê mē inhmã:

–Nà na mē kormã ohtô rax nê Tirtũm kapêr mar kêt nê. No ãm kormã mē ate mē kãm kapêr jarënh o apa kaxyw mē agrêre. Te pur rax kãm ra harôj kamrêk par nê ãm tã no ãm kaxyw hikënh xwÿnhjaja grêre pyrãk.

³⁸ Jakamã kwa mē ho Tirtũm wÿ kē axte mē kaxyw mē akwÿjê rê kē mē apyrã nê ma mē hkôt ri mē kãm kapêr jarënh o pa. Anê.

10

Jejus kot mē ho 12 nê mē rënh Makre 3.13-19; Rukre 6.12-16

1-4 Tã nhũm Jejusja hkôt mẽ ixpa ho mẽ ixpa xwýnhjê ho 12 nê mẽ ixrê. Mẽ ixte ma krĩ piitã hwýr inhm̄rã nê ý hã mẽ ahkre nê tanhmã mẽ à kute xwýnhjê ho mex o ixpa kaxyw. Nê ý hã mẽ nê mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhýr.

Pêtre kumrêx na pre kuta. Hixi hõ pê Simãw.

Nê hkôt htõ Andreja ta.

Nê hkôt Jepetew kra Xiakreja ta.

Nê hkôt Xiakre htõ Juãwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhũm pre mẽ hkôt ixta.

Ixpê pahĩ nhỹ hã kãm mẽ kêp ixujamýnh xwýnhjê tã nhũm pre jajê hkôt ixta.

Nê ixkôt Apew kra Xiakre hõja ta.

Nê hkôt Tatewja ta.

Nê hkôt Simãw Jeroxja ta.

Nê hkôt Jut Kariotja ta.

Kormã kot mẽ kãm Jejus kurê xwýnhjê nhĩhkram õr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

ã mẽ ixte ý hã mẽ ahkre o ixpa kaxyw mẽ ixrênh xwýnhjê nhĩxi kot anhýr.

Jejus kot mẽ kêp 12jê mã mẽ àpênh ã karõ

Makre 6.7-13; Rukre 9.1-6, 10.1-12, 10.14; mãânêh Atre 13.50-51, 18.6

⁵ Hãmri nhũm Jejus mẽ ixrênh pa nê ma mẽ hwýr mẽ ixrênh kaxyw tanhmã mẽ inhmã kapêr to nê mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwýnhjê nhõ pika hwýr apa hkêt nê. Rý mẽ kêp Samar nhõ krĩ hwýr ka mẽ apa hkêt nê.

⁶ ãm mẽ pahpê Ijaew nhõ krĩ kôt pix mã mãn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nê htýx ri mex kêt nê pa pyrãk.

⁷ Jakamã kêr ka mẽ ma mẽ hwýr apa nê ã mẽ hkôt ri mẽ kãm akapêr

o apa anê nê mẽ kãm: “E kot kaj mẽ ate amnhĩ tomnuj kaga nê Tĩrtũm kôt amnhĩ xunhwý hãmri nhũm amnhĩ tã mẽ apumu nê mẽ ato hkra. Jakamã e kwa mẽ tokyx hkôt amnhĩ xunhwý.” Anê. Kêr ka mẽ ã mẽ kãm akapêr anhýr o ri mẽ hkôt apa.

⁸ Hãmri nê akupým mẽ à xwýnhjê ho mex o ri apa. Nê mẽ htyk xwýnhjaja ka mẽ akupým mẽ ho htĩr o ri apa. Nê mẽ hkãnhy rũnh xwýnhjaja ka mẽ akupým mẽ ho mex o ri apa. Nê mẽ kamã mẽkarõmnuti xwýnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anê. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kaxpore hã axãhwýr kêt nê.

⁹⁻¹⁰ —Nê kêr ka mẽ ma mẽ hwýr apa kaxyw anojarêh hãmri nê amnhĩ kôt akukrêx rũnh o apa hkêt nê. ãm anhỹ kamã mẽ hwýr apa. Nê akaxpore ho rax nê ho apa hkêt nê. Rý akawã kamã axê hkwy rý aparkã hõ xar nê ho amõr kêt nê. Rý kô hõ py nê ri ho apa hkêt nê. ãm anhõ mrykã pix jamý nê ma ho apa. Kêr kê mẽ ate Tĩrtũm kapêr o mẽ ahkre nê mẽ ho mex xwýnhjaja mãn amnhĩ pãnhã mẽ amã mẽ axãpkur xã gõ ka mẽ kutã axãpkur o ri mẽ hkôt apa.

¹¹ —Nê kêr ka mẽ nhýri krĩ hwýr ajapõj nê kamã mẽhõ kot amnhĩ to mex xwýnhjê japêr. Nê ra omu hãmri nê kuri mãn põj nê hkôt apikamênh tãmtã kurũm akupým ajapõj nê ma nhãm krĩ hõ hwýr mra.

¹² —Nê kêr ka mẽ mẽhõ nhõrkwy hwýr põj nê mẽ kãm: “E ot pa mẽ awýr mõ. Nã koja Tĩrtũmja mẽ ato mex nê.” Anhýr o mẽ kãm akapêr.

¹³ Koja mẽ ama nê amnhĩ wýr awýr ka mẽ amnhĩ tã mẽ omu nê mẽ kãm: “E koja Tĩrtũm mẽ ato mex nê ka mẽ ajamakêtkati nê ri axãmnhĩx apa.” Anhýr o mẽ kãm akapêr. No koja mẽ amnhĩ nhõrkwy nê mẽ akurê nhũm Tĩrtũm ja hã mẽ omu nê mẽ ho mex kêt nê.

14 —Nê koja nhÿri krî hõ kamã mē akaga nē akapēr mar kêt japēr. Ka mē tee ri amnhî tâ mē kamã ama hãmri nē tokyx mē kurũm ajapôj nē ma akupÿm apa. Nē akupÿm ano-jarêt nē mē noo mã akuhê nē amnhî par ã awjagrô kapî nē ma apa. Mē kot Tîrtũm kaga hã amnhî pumunh kaxyw ka mē ã mē noo mã amnhî nhîpêx anê. Hãmri nē ma nhÿhÿm hpãnhã apa.

15 Koja nhÿrmã Tîrtũm mē kot amnhî tomnuj mÿrapê tanhmã mē ho. Na pre ã Sotô mē Komo nhõ xwÿnhjê nhîpêx anê. Na prem amnhî tomnuj tÿx nē nhũm Tîrtũm tee ri ja hã mē omu nē tanhmã hã mē homnuj tÿx to. Tã jar mē kãm ixkapēr mar prãm kêt nē mē kot ixkaga xwÿnhjaja koja ja hã mē omu nē kot Sotô mē Komo nhõ xwÿnhjê nhîpêx o mē hipêx. No ãm tanhmã mē ho htÿx o mē hakre. Anê.

Nhũm pre Jejus ã mē inhmã mē ixápênh ã karô anê.

Jejus kot mē kêp 12jê hkukamã mē harênh

Makre 13.9-13; Rukre 12.11-12, mãânênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

16 Nhũm Jejus arî kot mē ixrênh xwÿnhjê mã kapēr nē mē inhmã:

—E kot paj ma mē hwÿr mē arê. Ma mē ate Tîrtũm kapēr o mē ahkre ho ri mē hkôt apa kaxyw. Jakamã kot kaj mē te ôwêhti kot mry xoprê hwÿr amnhî to mrar nhũm kot hkwy hpar pyrãk o amnhî nhîpêx. Koja mē hkwyjaja mē ate mē ahkre ma nhũm ja mē kêp omnuj nē nhũm mē hã tanhmã mē anhîpêx to. Tã nom kêr ka mē tee ri amnhî kukamã ajamxpêr nē amã mē uma hkêt nê.

17 —E kwa mē o kora. Kêr ka mē ma mē hwÿr mra nē amnhî nê mē htãnopxar o ri apa. Koja mē hkwyjaja mē akapêr ma nê kêp mē aprãm nôkati. Nê mē apynê nē ma mē utàr xwÿnhjê hwÿr mē ato mra nē mē kãm tanhmã mē ato hêx to. Hãmri nhũm mē mar xã hkôt mē atak. Tîrtũm

kapêr o mē ahkre xã hã ixkre kamã koja mē ã mē anhîpêx anê.

18 —Nê koja mē ixtã tanhmã mē ato kaxyw mē apynê nē ma mē ô pahi hwÿr mē ato mra nē tanhmã kãm mē ato hêx to. Nom kwãr mē mamrî ã mē anhîpêx anê. Koja mē ato anê ka mē kutã akrî nē mē kãm Tîrtũm kapêr jarê. Ijaewjê mã nê mē kêp Ijaew kêt xwÿnhjê mã.

19 —Nê koja mē ma mē ô pahi hwÿr mē ato mra nê ã mē anhîpêx anê nom kêr ka mē tee ri tanhmã mē kãm amnhî jarênh to hkukamã ajamxpêr kêt nê. Koja Tîrtũm Karô tãm tanhmã mē akrã hto ka mē ô ri mē kãm akapêr mex nê.

20 Nê kot kaj mē amnhî krã hkôt ri mē kãm akapêr kêt nê. Tîrtũm Karô nhÿ hã kot kaj mē ô ri mē kãm tanhmã axujarênh to.

21-22 —Nê koja mē hkwyjaja ixtã mē akamã gryk nê. Nê mē atã ãmnênh pix o pa. Nê mē kot mē apar kaxyw mē akwyjê hã amÿnê. Koja mē anhîpêxã hkwyjaja mē apê mē hkra hã amÿnê. Nhũm mē akra hkwyjaja mē apê mē hipêxã hã amÿnê. Nhũm mē atô hkwyjaja mē apê mē htô hã amÿnê. Nhũm mē akatorxajaja mē atã amÿnê. Hãmri nhũm mē apa. No ãm kwãr mē mãmri ã mē anhîpêx anê. ã mē kot mē anhîpêx anhÿr tâ kêr ka mē tee ri amnhî kukamã ajamxpêr pê ixkaga hkêt nê. Mē ãm amnhî to htÿx rãhã ty. Hãmri nê akaxwÿnhja ma Tîrtũm mē wa inhõ krî hwÿr axãpir kurê kumrêx nê wa ixkuri akupÿm amex nê atîr tũm nê apa ho apa.

23 —Nê koja mē nhÿri krî hkwy kamã ixtã tanhmã mē anhîpêx hto ka mē mãmri mē kurũm ajapôj nē ma nhÿhÿm krî hõ hwÿr apa. Nê hpãnhã kamã mē kãm ri ijarênh o mē hkôt apa. Kot kaj mē kormã Ijaewjê nhõ krî piitã hwÿr apa hkêt ri pa akupÿn mē awÿr wry. Kwa kêr ka mē ixkapêr mã ajamxpêr tÿx rãhã ri apa.

24-25 —Mê ate ixkôt apa ho apa xwÿnh na ka mē. No pa na ixpê mē ajahkre xwÿnh. Jakamã koja mē kot tanhmã inhîpêx to ho mãânênh mē

anhîpêx. Koja mē nhÿrmã tanhmã inhîpêx to nē mã ixkôt mē ato anē nē. Mē pahte amnhî nhîpêxja kot axpên pyrâk. Jakamã koja mē ixpê Satanasti hã ijarē nē mãânēn tanhmã mē ajarēnh punuj to ho pa. Mē pahte amnhî nhîpêxja kot axpên pyrâk jakamã koja mē panhîpêx o axpên pyrâk.

²⁶ —Tã nom kêr ka mē tee ri amnhî kukamã ajamaxpêr pê amã mē uma ho apa hkêt nē. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mē hamaxpêr piitã amnhîrît pa. Nē mēmoj piitã ra hpimxur mex tã koja nhÿrmã amnhîrît par kumrêx.

²⁷ —Nē koja nhÿrmã mē piitã ixte amnhî nhîpêx kôt ixpumu. Na pa ra mē hkàx ã mē amã ixujarēnh rax nē. Tã kêr ka mē ma mē piitã mē kãm harēnh o ri apa. Nē ra ixte mē hkàx ã ahte ixte mē amã mēmoj jarēnh ta ka mē hpãnhã ma mē kãm harēnh o ri apa kê mē apyrà nē harēnh ma.

²⁸ —E kêr ka mē amã mē kot tanhmã mē ato mã xwÿnhjê puma ho apa hkêt nē. Mē kot mē apar mã tã koja mē ãm mē akrãhkà pix pa nom tanhmã mē akaxwÿnh to hkêt nē. Tîrtũmja tapxipix na hte mē hkrãhkà nē mē hkaxwÿnh mē ho pimràatã kot amnhî xà htÿx kamã hamak tũm xàta wÿr mē rēnh pumunh. Tã kot hwÿr mē arēnh pymaj kêr ka mē amã kapêr kwÿm ri tanhmã amnhî nhîpêx to puma ho ri apa.

²⁹⁻³¹ —Nē Tîrtũm kot mē pahto hapêx par pumunh tã mãânēn kot mē pajamãr mex. Mãn ka htem kuwênhre pumu. Na hte Tîrtũm kuwênhre jamãr mex o pa. Mē piitã mē kot ãm omunh tã nom nhũm Tîrtũm mē kurom hamãr mex pê mē htãnopxar rãhã ho pa. Tã kãm mē pajapê htÿx o kot kuwênhre jakrenh jakamã kwa mē tee ri amnhî kukamã ajamaxpêr o ri akaprî nē apa hkêt nē. Koja Tîrtũm mē pahtãnopxar rãhã ho pa. Kot mē panhî piitã omunh par. Nē ahpÿnhã tanhmã mē pahkrã hkî

kute hkôt mē pahpumunh par. Tã kot mē pahtãnopxar rãhã jakamã mo kaxyw kot kaj kêt mē ri amã mē uma ho apa? Anē.

Mē pahte Jejus kôt amnhî xunhwÿr rÿ mē pahte hkaga jarēnh

³² Nhũm Jejus arî kot mē hwÿr mē ixrēnh xwÿnhjê mã kapêr nē mē inhmã:

—E kwa mē mãmrî akwÿjê mã mē apê ixkwÿ hã amnhî jarēnh o ri apa nē amã mē uma xàj tee ri amnhî nhîpêx kêt nē. Kot kaj mē kãm ra ate ixkôt amnhî xunhwÿr ã amnhî jarē. Pa ja hã mē apumu hãmri nē mē apyrà nē kaxkwa kamã Inhîpêêxã mã ra ate ixkôt amnhî xunhwÿr ã mē ajarē.

³³ Nom kot kaj mē kot ixtã tanhmã mē ato pymaj apê ixkwÿ hã amnhî jarēnh kêt nē. Pa ja hã mē apumu hãmri nē nhÿrmã amnhî xwar Inhîpêêxã mã mē apê ixkwÿ hkêt ã mē ajarē. Jakamã kwa mē mãmrî mē kãm apê ixkwÿ hã amnhî jarēnh o ri mē hkôt apa kê mē ama nē amnhî kaxyw inhmã hamaxpêr japêr. Anē.

Mē kãm Jejus ã hkwyjê kurê xwÿnhjaja

Makre 8.34-35; Rukre 9.24, mãânēn Rukre 12.51-53, 14.26-27; Apokarip 12.11

³⁴ Nhũm Jejus arî kot mē hwÿr mē ixrēnh xwÿnhjê mã kapêr nē mē inhmã:

—Ra mē awÿr ixwrÿk tã koja mē piitã ixkukwak ri hamakêtkati nē amnhîx ri pa hkêt nē. Kormã. Koja mē akwÿjjaja ixkapêr ma nē mē apyrà nē amnhî kaxyw ixkôt hamaxpêr. Nhũm mē akwÿjjaja axtem nē kuma nē ãm kuma. Hãmri nē ixtã tanhmã mē atomnuj to ho pa ka mē amnhî xà htÿx kamã ajamak o ri apa.

³⁵ —Koja mē akrajaja ixtã mē apê mē hipêêxã nē mē katorxã kutã amnhî xunhwÿ. Nhũm mē wÿjjaja ixtã mē umregêxjê kutã amnhî xunhwÿ.

³⁶ —Koja mē ã mē akwÿjjaja ixtã mē akutã amnhî xunhwÿr anē. Mē

anhôrkwÿ kamã mẽ akukwak ri pa htã ixtã mẽ akutã amnhĩ xunhwÿ.

³⁷ —Nẽ mẽ amã mẽ anhĩpêêxà nẽ mẽ akatorxà japêê. Nẽ mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nẽ apê ixkwÿ mã tãm kêt.

³⁸ Rÿ nhũm mẽ nhÿrmã ixtã mẽ apar kaxyw ka mẽ tee ri amnhĩ kukamã ajamaxpêr nẽ mẽ kot mẽ apar pymaj ixkaga hã kot kaj apê ixkwÿ mã tãm kêt nẽ.

³⁹ Koja mẽ nhÿrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwÿnhjaja. Koja mẽ ixpyrà nẽ ixtã mẽ apar mã tã kwa kêt ka mẽ amã atyk pymaj ixkaga hkêt nẽ. Kwâr mẽ mãmrĩ tanhmã ixtã mẽ ato. Kot kaj mẽ nhÿrmã Tirtũm mẽ wa ixri axte amnhĩ xà kamã ajamak kêt nẽ atĩr tũm nẽ amex rãhã apa ho apa. Nom kot kaj mẽ jar amã amex nẽ apa hprãm xà ixkaga hãmri nẽ nhÿrmã wa ixri atĩr tũm nẽ apa ho apa hkêt nẽ. Anẽ.

Mẽ kot Jejus krajê ho mex xwÿnhjê jarênh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwÿr mẽ ixrênh xwÿnhjê mã kapêr nẽ mẽ inhmã:

—E koja mēhō nhÿri mẽ apumu nẽ mẽ apê ixkra hã tanhmã mẽ ato mex to nẽ te pa kot ixto mex pyræk. Nẽ kot kaj mẽ tanhmã pa ixto mex to nẽ te Tirtũm o mex pyræk.

⁴¹ —Nẽ kot ka mẽ nhÿri Tirtũm nhÿ hã mẽ kãm kapêr jarênh xwÿnhjê hõ tanhmã ho mex to nhũm Tirtũm hã apumu nẽ nhÿrmã hã ato mex nẽ. Rÿ ka mẽ mēhō kot Tirtũm kôt amnhĩ nhĩpêx xwÿnhjê hõ pumu nẽ tanhmã ho mex to. Nhũm Tirtũm hã apumu nẽ mãânên hã ato mex nẽ. Te ate mēhō ho mexta pyrã nẽ mãânên ato mex nẽ.

⁴² Nhũm mēhō nhÿri mẽ kot ixkôt kormã amnhĩ xãm nyw nẽ kormã àhpumunh tohtuj anhÿr xwÿnhjê hõ pumu. Nẽ kãm kôr ã omu nẽ hamaxpêr o: “Kwa Jejus kôt ri pa xwÿnh mũj kãm kôr. Kormã kot Jejus

kôt amnhĩ xãm tÿx kêt tã kêp hkwyÿ. E kot paj kãm gô hkwy kê ho ixkô.” Anẽ hãmri nẽ kãm hkwy nhũm ho ixkô. Hãmri nhũm Tirtũm hã omu nhũm kot kãm gô pix nhôr nhũm kot ho hkôm tã nhũm ja hã ho mex rax nẽ. Anẽ.

Nhũm pre ã Jejus kot mẽ hwÿr mẽ ixrênh xwÿnhjê mã kapêr ry rax anẽ. Mẽ ixpê 12jê mã ã kapêr anẽ.

11

Juãw Paxis kot Jejus jarênh mar Rukre 7.18-23, 7.5, mãânên Rukre 4.16-21

¹ Tã nhũm Jejus ra kot mẽ hwÿr mẽ ixrênh xwÿnhjê mã kapêr pa hãmri nẽ kato nẽ ma krĩ pu hã krĩ hkwyjê hkôt ri pa. Nẽ mẽ kãm Tirtũm kapêr jarênh o ri mẽ hkôt pa.

² Nhũm Juãw Paxisja arĩ kêp prês nẽ mẽ hãgênh xà kamã hkrĩ. Nhũm pre hte hkôt mẽ pa ho mẽ pa xwÿnhjaja hwÿr mra nẽ kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nẽ tee ri hkukamã hamaxpêr. Hãmri nẽ hkôt mẽ pa xwÿnh wa ho axkrut nẽ wa kuta

³ nẽ hwÿr wa kumẽ nẽ wa kãm:

—Kwa wa ma Jejus wÿr tẽ nẽ hkukja nẽ kãm: “Xà ka na pre Tirtũm mẽ ixwÿr amẽ nà? Xà kormã axtem mēhō na pa mẽ ri hamãr o ri ixpa?” Anhÿr o hkukja hãmri nẽ tanhmã kot amnhĩ jarênh to hã ama nẽ man akupÿn ixwÿr tẽ nẽ inhmã harê. Anẽ.

⁴ Hãmri nhũm wa kuma nẽ ma hwÿr tẽ. Nhũm Jejus kormã tanhmã mẽ à kute xwÿnhjê ho mex o xa. Mẽ nohkre xwÿnhjaja nhũm akupÿm mẽ ho mex. Nẽ mēkarōmnuti kot mẽ hwÿr gjêx xwÿnhjaja nhũm mẽ nẽ mẽ hanor o ãm rãhã nhũm Juãw kôt wa pa xwÿnh ta wa hwÿr tẽn pøj. Nẽ kormã mẽ hã omunh o wa xa. Hãmri nẽ kãm Juãw Paxis kapêr jarê nhũm wa kuma nẽ wa kãm:

—Tÿ. Nà ãm hãmri na ja hã ijarê. Ixpê mẽ ate ixkamã ajamak o apa xwÿnh ta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽ nẽ aprĩ hã kãm ijarê.

5 Na pa hte akupÿm mẽ nohkre xwÿnhjê ho mex. Nê mẽ hkànhy xwÿnhjaja pa akupÿm mẽ hkà ho mex. Nê mẽ hyk o mẽ pa xwÿnhjaja pa akupÿm mẽ hte ho mex. Nê mẽ htyk xwÿnhjaja pa akupÿm mẽ ho mẽ htîr. Nê mẽ kêp amrakati nê ri mẽ pa xwÿnhjaja pa mẽ kãm mẽmoj mex jarênh o ri mẽ hkôt ixpa. ã na pa hte mẽ hipêx anhÿr o ri ixpa. Jakamã e wa ma akupÿm Juãw wÿr tẽ nê ã kãm ijarênh anê.

6 Kê ijarênh ma nê ixkôt hamaxpêr tÿx nê tee ri ixkukamã hamaxpêr kêt nê. Koja ã amnhî nhîpêx anê nê hamakêtkati nê ri pa. E wa tokyx ma akupÿm tẽ nê kãm ã ijarênh anê. Anê.

Jejus kot tanhmã Juãw Paxis jarênh to

Rukre 7.24-35

7-9 Nhũm pre ã Jejus Juãw Paxis kôt wa pa ho wa pa xwÿnhja wa kãm amnhî jarênh anê nê akupÿm hwÿr wa kumê nhũm wa ma akupÿm hwÿr tẽ. Hãmri nhũm Jejus mẽ kot mar o kuhê xwÿnhjê mã tanhmã Juãw Paxisja jarênh to nê mẽ kãm:

—Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaàm kãm tanhmã kapêr to hã mar kaxyw na ka prem hwÿr amrar kêt nê. Tirtũm nhÿ hã kapêr o pa jakamã na ka prem ate mar kaxyw ma hwÿr mra. Tirtũm nhÿ hã ixkukamã ijarênh o pa xwÿnh na. Ixpê Tirtũm kot mẽ akaxyw ixãm xwÿnh ã na hte ijarênh o pa. Nê hprî hã tanhmã mẽ amã ijarênh to. Jakamã kapêrja mex o kot wam Tirtũm nhÿ hã kapêr jarênh xwÿnhjê kapêr piitã hakrenh par.

10 Tirtũm kapêr ã kagà htũm kot Juãw kukamã tanhmã harênh to nê harênh kot:

Kot paj Ixkra hkukamã ma mẽ hwÿr harênh xwÿnhja mẽ nhũm ma ri kutêp mẽ kãm harênh o pa. Mẽ kot mar nê kutêp tãm amnhî nhîpêx o pa kaxyw.

—Anhÿr o Tirtũm Juãw Paxis kukamã harê nhũm prem hã kagà. Tã nhũm ixkukamã mẽ awÿr kumê.

11 Juãw Paxisja na mex kumrêx. Na pre hprî hã ixkukamã tanhmã ijarênh to ho pa. Tã nom ixkôt mẽ pa ho mẽ pa xwÿnhjê hkînhã na pre ixkôt pa ho pa hkêt nê. Jakamã ixkôt mẽ pa ho mẽ pa xwÿnhjaja kot ixkôt hprî hã ixkapêr mar o pa jakamã na mẽ mex o mẽ kot Juãw Paxisja jakrenh. Anê.

12-13 —Na pre finat Mojes kumrêx mẽ kãm Tirtũm kapêr kwÿ hã kagà. Tã nhũm hpãnhã Tirtũm nhÿ hã kapêr jarênh xwÿnhjaja Mojes mÿr pê hkwy hã kagà. Nhũm prem kamã harê nê kuma nê hkôt amnhî nhîpêx o pa. Hãmri nhũm Juãw Paxisja mẽ mÿrpê kato nê tãm Tirtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nê inhma nê ixkôt amnhî xunhwÿ nê kãm ixkapêr kôt pix mã amnhî nhîpêx o ri pa hprãm nê.

14 —Amnepêm na pre Tirtũm nhÿ hã kapêr jarênh xwÿnhjaja mēhōja kukamã tanhmã harênh to ho pa. Nê mẽ kãm harênh o: “Koja nhÿrmã mēhō te Eris kot amnhî nhîpêx pyrāk o amnhî nhîpêx nê mẽ awÿr mō. Nê mẽ amã Tirtũm kot mẽ awÿr mēnh mã xwÿnhja jarênh o pa ka mẽ ama.” Anhÿr o mẽ kãm mēhō jarê. Tã kot paj mẽ amã kot hkukamã harênh xwÿnhhta nhîxi jarê ka mẽ inhma. Nã Juãw Paxisja kukamã na prem ã harênh anhÿr o pa.

15 —E kot pa mẽ amã mẽ piitã htÿx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma.

16 Te mēhprîre kot amnhî nhîpêx pyrāk o na htem amnhî nhîpêx. Mēhprîrejaja na htem mẽ ōrkwÿ kapem mẽmoj to amnhîkati nê tee ri hkwyjê kot amnhî nhîpêx pumu nê mẽ kãm:

17 Kwa na pa mẽ amã gre htã ka mẽ ixkutã anhōkrepōx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akaprî nê amÿr kêt nê. Kwa mẽ ri ã amnhî nhîpêx anhÿr kêt nê. Anê.

—Mēhprîjaja na htem ã axpên mã kapêr anê. Tã te mẽ ate mẽ urāk.

Tirtûm kot mê awÿr ÿ hã kapêr jarênh xwÿnhjê rênh tâ ka mê te mêhprîre kot amnhî nhîpêx pyrâ nê mê ama nê ãm mê ama nê mê hkôt amnhî nhîpêx kêt nê.

¹⁸ —Juãw Paxis na pre mê awÿr mō nê ixkînhã apkur mex o ri pa hkêt nê. Nê ixkînhã ã wîhti ho hkôm kêt nê. Ka mê ja hã omu nê hkaga nê atÿx ri Satanasti nhÿ hã tanhmã kot amnhî nhîpêx to hã hkamnhîx. Hãmri nê mêhprîre kot amnhî nhîpêx ta pyrâ nê hkôt amnhî nhîpêx kêt nê.

¹⁹ Tã hãmri pa hpãnhã mê awÿr mō nê Juãw Paxis rom apkati mê ixàpkur mex o ri mê akôt ixpa. Nê kurom mê akutã wîhti hkwy ho ixkôm o ri ixpa. Tã ka mê ja hã ixpumu nê atÿx ri ixàpkur rûnh nê ixpipãnh o ri ixpa hã ixkamnhîx nê ã axpên mã ixto akapêr anê. Nê mê kot amnhî tomnuj xwÿnhjê hkôt ri ixpa xwÿnhã axpên mã ijarê. ã na ka htem axpên mã ijarênh anê. Jao te mê ate Juãw Paxis nhîpêx pyrâ nê ixkaga nê ixkôt amnhî nhîpêx kêt nê. Na hte ã htÿx ri tanhmã mê hamaxpêr to ho mê pa xwÿnhjaja amnhî nhîpêx anê. No tãm ri mê hamaxpêr xwÿnhjaja na htem ahpÿnhã wa ixte amnhî nhîpêx ã wa ixpumu nê axpên mã wa ijarênh o: “Nà ahpÿnhã wa kot amnhî nhîpêx tâ no ãm hamê Tirtûm nhÿ hã kapêr mex o pa. E pu mê wa uràk nê Tirtûm kôt amnhî xunhwÿ.” Anhÿr o axpên mã wa ijarê. Anê.

Mê kot Tirtûm kôt mê hamaxpêr kêt xwÿnhjê jarênh

Rukre 10.13-15

²⁰ Na pre hte Jejus krî piitã hkôt pa nê krî nhõ xwÿnhjê mã kapêr nê mê kot amnhî tomnuj ã mê kãm kapêr. Korajî mê Pese nhõ xwÿnhjê kumrêx mã kapêr nê mê kãm:

²¹⁻²² —E mê inhma. Amnepê m krî pé Sitō mê Xir wa kamã mê pa xwÿnhjaja na prem tanhmã amnhî tomnuj tÿx to ho pa nhũm Tirtûm tee ri ja hã mê omu nê mê kot amnhî tomnujta ã tanhmã mê ho. Tã kwa mê o kora Korajî mê Pesêj nhõ xwÿnhjaja. Ra ixte mê amã aa

mê ate mêmoj pumunh kêt kwÿ ho anhÿr rax tâ ka mê omu nê ãm omu nê amnhî tomnuj kaga hkêt nê. Arî tanhmã amnhî tomnuj to ho ri apa. Mÿrapê kot kaj mê amex kêt nê. Kop apu Sitō rÿ Xir kamã mãn ixte mê kãm aa mê kot mêmoj pumunh kêt kwÿ ho anhÿr o ri ixpa ronhÿx mê omu nê mê arom amnhî kaxyw ixkôt hamaxpêr tÿx kurê kumrêx. Nê tee ri kot tanhmã kot amnhî tomnuj to hã amnhî pumu nê hkaprî nê hkaga hpa. No mê kajaja na pa hte tee ri mê amã aa mê ate mêmoj punuj kêt kwÿ ho anhÿr o ixpa kaprÿ. Ka mê ja hã ixpumu nê ãm ixpumu nê amnhî tomnuj kaga hkêt nê. Jakamã koja nhÿrmã Tirtûm tanhmã mê atomnuj tÿx to. Nê tanhmã Sitō mê Xir wa kamã mê pa xwÿnhjê jarênh to nhũm mê kot amnhî tomnuj mÿrapê amnhî xà htÿx kamã hamak rãhã ho pa. No mê kajaja mê ate amnhî tomnuj tÿx o mê hakrenh jakamã koja Tirtûm mê hkînhã mê atomnuj tÿx kumrêx. Ka mê amnhî xà htÿx kamã ajamak rãhã ho ri apa kãm ga. Anê.

²³⁻²⁴ Nhũm pre ã Jejus mê kãm kapêr anê. Nê hpãnhã Kapanaũ nhõ xwÿnhjê mã kapêr nê mê kãm:

—No mê apê Kapanaũ nhõ xwÿnhjaja. Kot kaj mê ajaxwÿja mê uràk nê amex kêt nê. Ra ixte mê amã aa mê ate mêmoj pumunh kêt kwÿ ho anhÿr rax nhũm mê ate hã ixpumunh tâ amnhî tomnuj kaga hkêt tâ Tirtûm mê wa inhõ krî hwÿr akrà. No ãm hwÿr akrà kaprÿ. Kot kaj mê atō hwÿr axàpir kêt nê. Kop apu Sotō nhõ xwÿnhjaja mãn kot ã ixte amnhî nhîpêx anhÿr ã ixpumunh ronhÿx mê ra kot amnhî tomnuj kaga nê ixkôt amnhî xunhwÿr kurê kumrêx. No mê kajaja na ka mê ã amnhî nhîpêx anhÿr kêt nê. Jakamã kot kaj mê nhÿrmã ma kuwy maatita wÿr ajapêx pa kãm ga. Anê.

Jejus kot ô Papaj mã amnhî jarênh

Rukre 10.21-22

²⁵⁻²⁶ Tã nhũm Jejus Tirtûm mã amnhî jarê nê kãm:

—Pa Papaj? Nà apê mē inhō Pahi Maati na ka. Pikap ri mē pa xwýnhjaja nē kaxkwa kamã mē pa xwýnhjaja apê mē ixpiitã mē inhō Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mē àhpumunh tỳx ã mē kot amnhĩ to jarkrar xwýnhjê mã axàhpumunh tỳx o amnhĩrĩt kêt nē. ãm mē àhpumunh kêt ã mē kot amnhĩ jarēnh xwýnhjê pix mã na ka hte axàhpumunh tỳx o amnhĩrĩt nhũm mē tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mē piitã mē hipêx anhỹr o ri apa Papaj. Jakamã mē kot amnhĩ to hkryre xwýnh pixjaja na htem hprĩ hã ate amnhĩ nhĩpêx kôt apumunh o pa. Anē.

Nhũm pre ã Jejus Tĩrtũm mã amnhĩ jarēnh anē.

²⁷ Hãmri nē hpãnhã mē kot mar o kuhê xwýnhjê mã kapêr nē mē kãm:

—Nà na pre ra Inhĩpêêxàja inhĩhkra kamã mēmoj piitã hagjēnh pa. Ixte kãm ho amnhĩptàr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mē pa xwýnhjaja na mē kot ja hã ixpumunh kêt. Nē papxipix na ixte Inhĩpêêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anē nē inhãm hprãm xà hkôt mē hkwýjê mã ho amnhĩrĩt o ri ixpa. Jakamã nhũm mē ixpyrà nē Inhĩpêêxà kot tanhmã amnhĩ nhĩpêx to ho pa hkôt omu.

²⁸⁻³⁰ —Nē tee ri amnhĩ kukamã mē ajamaxpêr o ri apa xwýnhjaja te mē ate mēmoj pytĩ rax tur nē ahte ho apa pyrãk. Kwa mē ixkôt amnhĩ xunhwý nē ixte amnhĩ nhĩpêx ã ixpumu. Ixte mē akamã ixukaprĩ xwýnh na pa. Na pa hte mē akutã inhnojãrêt rãhã ho ixpa. Jakamã kot kaj mē ixkôt amnhĩ xunhwý pa te ixte mē anê mēmoj pytĩ ho ixwrýk pyrãk o mē anhĩpêx nē tãm mē axunhwý ka mē tãm ajamaxpêr nē tãm amnhĩ nhĩpêx o ri apa. Mo kaxyw koja ixkôt mē kot amnhĩ nhĩpêx o pa xwýnhjaja tee ri amnhĩ kukamã hamaxpêr o pa? Nà

na htem ixkamnàr rom hamakêtkati nē àmnhĩx ri pa ho pa. Anē.

12

*Jejus kêp arĩgromnu hpãm
Makre 2.23-28; Rukre 6.1-5*

¹ Tã nhũm Ijaew nhō arĩgromnu pē sapja kato. Hãmri nhũm Jejus mē hkôt ri mē ixpa ho mē ixpa xwýnhjê mē pa mē ma mē hpur kôt ri nhỹhỹm ri ixpa. Hãmri nē ra mē inhãm prãm nē mēmo hy te kot harōj pyrãk xwýnhja kwý rê nē kugrà nē ma Jejus kôt hkanhar o mō. Mē ixpê Ijaew na pa htem axpên pur kãm ã amnhĩ nhĩpêx anhỹr o ixpa.

² Hãmri nhũm mē ixkwý pē Parijew nhō xwýnhjaja kãm mēmoj tã Jejus o kapêr prãm jakamã ã mē ixte amnhĩ nhĩpêx anhỹr ã mē ixpumu nē mē ixtã Jejus kukjêr kurê kumrêx nē kãm:

—Kwa Tĩrtũm kapêr tũm kot mē panhō arĩgromnu hã mē pahte mē hpur kãm mēmoj nhĩkēnh nē mē pahkurê htã nhũm ri akôt mē pa ho mē pa xwýnhjaja axtem nē ã amnhĩ nhĩpêx anhỹr o ri akôt pa. Mēmo hyta rê nē akôt hkanhar o pa. Kwa mē kãm anê kê mē ã amnhĩ nhĩpêx anhỹr kêt nē. Na htem arĩgromnu hã mēmoj tã àpēnh kêt kēnã. Anē.

³⁻⁴ Hãmri nhũm mē kuma nē hprĩ hã mē kãm Tĩrtũm kapêr jarē nē mē kãm:

—Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harēnh nē mar kêt nē? Na pre hkôt ri mē pa xwýnhjê mē nhũm mē prãm xàj Tĩrtũm mã amnhĩ jarēnh xà hã ixkre hwýr agjê. Hãmri nhũm mē ò patre maatija mē kãm prãm tỳx ã mē omu nē kãm mē hkaprĩ nē mē kãm mēmoj gō. Mē kot Tĩrtũm noo mã pãwti jaxwýr xwýnhhta gō nhũm mē kuku. Tĩrtũm kapêr ã kagà htũm kot ja nē mē hkurê htã nhũm mē kãm prãm tỳx ã mē omu nē mē kamã ukaprĩ xàj mē kãm kugō. ãm mē ò patre pix kot ja hkur kaxyw tã nhũm mē kãm kugō nhũm mē kuku. Tã nom nhũm Tĩrtũm ja hã mē omu nhũm ja kêp omnuj kêt nē. Kot mē kamã ukaprĩ nē mē kãm òr ã omu nhũm ja kãm mex nē.

5 —Mê panhõ arĩgromnu htã na hte patrejaja arĩ hã Tĩrtũm mã amnhĩ jarẽnh xà hã ixkre kamã àpênh o pa. Tĩrtũm kapêr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nê. Kumã mẽ àpênh xwýnh kênã.

6 ãm hãmri na pa mẽ amã ja jarẽ. Tĩrtũm mã amnhĩ jarẽnh xà hã ixkreta mex tã nom ixpê Tĩrtũm Kra jakamã inhmex o ixte ixkreta jakrenh.

7 Tĩrtũm kapêr ã kagà htũm kot ja harẽnh kot:

Kêr ka mẽ inhmã amnhĩ jarẽnh kaxyw nê ãm inhmã mẽmoj nhõr pix pê inhmã amnhĩ jarẽnh kêt nê. Mẽ mãânên mẽ kamã axukaprĩ o ri apa pê inhmã amnhĩ jarẽ. Ja na kêt inhmã hprãm.

—Ã harẽnh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwýnhjê kot mẽmo hy rênh nê hkanhar o mõi ã mẽ omu nê ri tanhmã mẽ ho akapêr to hkêt nê. ãm mẽ kãm prãm ã mẽ omu nê mẽ kamã axukaprĩ nê.

8 —Kêt pa na pre Tĩrtũm mẽ akaxyw ixãm nê mẽ awýr inhmẽ. Jakamã paxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ. Kwa mẽ jajê pumu nê mẽ kamã axukaprĩ kêt wehe. Kwãr mẽ mãmrĩ mẽmo hyta rê nê hkanhar o ixkôt mõi. Anê.

*ĩhkra grà xwýnh jarẽnh
Makre 3.1-6; Rukre 6.6-11*

9 Nhũm pre ã Jejus Parijew nhõ xwýnhjê mã kapêr anê hãmri nê Tĩrtũm kapêr o mẽ ahkre xà hã ixkre hwýr tẽ nê axà.

10 Nhũm Parijew nhõ xwýnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mẽhõ my ãhkra grà xwýnhja mẽ pikuprõnh xwýnhjê nhĩhkõ hã nhỹ nhũm Parijew nhõ xwýnhjaja omu nê axpên mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex

nà? Koja ho anê nê Tĩrtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarẽ. Xà na htem arĩgromnu hã akupým mẽ ho mex nhũm Tĩrtũm kãm ja mex nê nã? Anê.

11 Hãmri nhũm mẽ hamaxpêr kôt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit õwêhti ahkrehti kamã tẽm ka omu nê ãm omu nê arĩgro mex jamãr pê ho axàpir kêt nê? Nã kot kaj mẽ tee ri omu nê ho axàpir kurê kumrêx.

12 Arĩgromnu hã mẽ ho mexja ja mex kênã. Tĩrtũm mã mẽ pahpê panhija na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ hã tanhmã axpên to mex to ho papa. Ja na Tĩrtũm kãm hprãm.

Anhỹr o mẽ kãm kapêr.

13 Hãmri nê hpãnhã myta mã:

—E anhĩhkra katàt. Anê.

Hãmri nhũm ãhkra katàt nê mex kurê kumrêx.

14 Hãmri nhũm Parijew nhõ xwýnhjaja tee ri ja hã omu nê Jejus kamã gryk nê. Arĩgromnu pê sap ã kot ho mex jakamã nhũm mẽ kamã gryk tỳx nê. Hãmri nê ma mra nê hapõj nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhỹrja myrapê tanhmã kot puj wem ho? ã kapêr anhỹrja o te mẽ papamjaja mẽ pahte hkĩnhã mẽ kamã paxukaprĩ kêt pyrãk ã mẽ pajarê. Koja mẽ pahkwýjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhỹr o axpên kukjêr o kuhê.

*Jesus kêp Tĩrtũm kot mẽ pahwýr
mênh xwýnh ã harẽnh*

Makre 3.7-12

15 Hãmri nhũm Jejus amnhĩ tã Parijew nhõ xwýnhjê jamaxpêr kôt mẽ omu hãmri nê mẽ kêp kato nê hpãnhã ma nhỹhým krĩ hõ hwýr ma tẽ. Nhũm mẽ ohtõ nê omu nê ma hkôt mra

nhùm mē omu nē akupÿm mē kām mē à xwÿnh piitā ho mex.

¹⁶ Hāmri nē mē kām:

—E na pa akupÿm mē ato mex. Nom kêr ka mē amnhî tâ ixto axàmra ho ri apa hkêt nē. Ixpê Tîrtûm Kra hā mē kām ijarēnh kêt nē. Ām kwarī kumrēx.

Anhÿr o mē kām kapēr.

¹⁷ Na pre ra amnepēm Tîrtûm nhÿ hā kapēr xwÿnh finat Ijaisja Jejus kukamā mē kām tanhmā harēnh to nē hā kagà. Te Tîrtûm tām kapēr pyrāk o harē nē hā kagà. Nē hā kagà ho:

¹⁸ Ota ixkôt amnhî nhîpêx o pa xwÿnhhta xa. Pa na pa amnhî kaxyw âm. Inhmā hapêê. Na pa hte tanhmā kot amnhî nhîpêx to ho pa hā omu nē ixkînh tÿx nē. Kot paj hwÿr amnhî karō mē nhùm hwÿr axà nhùm ma ŷ hā pika piitā hkôt mē piitā mē kām ijarēnh o ri mē hkôt pa. Mē kot hprî hā ixte tanhmā amnhî nhîpêx to nē tanhmā ijamaxpēr to hā ixpumunh kaxyw.

¹⁹ Nom koja ri amnhî to àmra o pa hkêt nē. Rÿ kām amnhî to rax prām o mē kām tanhmā amnhî nhîpêx to ho pa hkêt nē.

²⁰ âm kapēr xukaprî pix o koja mē hirerek xwÿnhjê mā kapēr o pa. Nē mē kot tee ri amnhî nhîpêx ā amnhî pumunh xwÿnhjê kamā ukaprî o pa. Nē mē kot htÿx ri amnhî nhîpêx o mē pa xwÿnhjê kutā nojarêt rāhā ho pa jakamā nhùm mē hpānhā tām amnhî nhîpêx o pa. Koja ā amnhî nhîpêx anhÿr o ri mē hkôt pa rāhā ra akupÿm mēmoj piitā tām haxwÿr pa.

²¹ ā kot amnhî nhîpêx anhÿr o pa jakamā koja pika piitā hkôt mē pa xwÿnh kwÿjaja kukwak ri amnhî kaxyw Tîrtûm kôt hamaxpēr nē hkôt amnhî xunhwÿ. Anē.

Na pre ā finat Ijaisja Tîrtûm nhÿ hā kormā Jejus wrÿk nē kator kêt ri tanhmā kot amnhî nhîpêx to ho pa hkukamā harēnh nē hā kagà anē. Tā

nhùm mē hwÿr wrÿ nē ā mē hkôt amnhî nhîpêx anhÿr o pa.

*Jejus mē mēkarōmnuti wa harēnh
Makre 3.20-30; Rukre 11.14-23,
11.31-32, 12.10*

²² Tā nhùm prem Jejus wÿr mēhō myja o mō. Mēkarōmnuti kot hwÿr àr nē ho nohkre nē ho kapēr kêt xwÿnhhta nhùm mē hwÿr o mō. Hāmri nhùm omu nē nē mēkarōmnuti jano nē akupÿm ho mex kurē kumrēx nhùm akupÿm rît mex nē akupÿm kapēr mex nē.

²³ Hāmri nhùm mē amnhî jaêr pē omu nē kamā no puma nē hā axpēn kukjêr o:

—Kokÿÿ. Jejus na hte âm mē ho mex o mē ho mex o pa. Mān kêp Tîrtûm kot mē pahwÿr mēnh mā xwÿnhhta na nà? ā na hte ā amnhî nhîpêx anhÿr o pa. Mān kêp pahi finat Tawi kanrēhā tāmnhwÿta na nà? Anē.

²⁴ Nom nhùm Parijew nhō xwÿnhjaja ā Jejus kot amnhî nhîpêx anhÿr ā omu nē kêp mēkarōmnuti hkwÿ hā hkamnhîx. Jakamā mē kot hā axpēr kukjêr ā mē kuma nē mē kām:

—Tk pēr hinhu nhîkôôti nhÿ hā na hte mē nē amnhî kwÿjê japôx o pa. Anē.

Hinhu nhîkôôti nhÿxi hō pē Satanasti nhùm prem ā Satanasti nhÿ hā Jejus kot amnhî nhîpêx ā hkamnhîx anē.

²⁵ Nhùm ra mē hamaxpēr kôt mē omunh mex jakamā mē kām:

—Kwa mē inhma mē ate ixpê Satanasti hkwÿ hā ixkamnhîx xwÿnhjaja. Koja pika nhō xwÿnhjaja axpēn kutā amnhî xunhwÿ nē axpu hāmri nē angrā nē ma ahpÿnhā ri pa. Hāmri nē amnhî krā hkôt ri tanhmā amnhî nhîpêx to ho pa. Jakamā nhùm mē ō pahija mē hamār kêt nē. Nē koja krî nhō xwÿnhjaja. Rÿ mē kot axpēn to hkwÿ xwÿnhjaja mēmoj tā axpēn kām gryk nē axpēn kutā amnhî xunhwÿ. Hāmri nē ahpÿnhā awry hā pa nhùm mē ō pahija tee ri kām mē hamār prām kaprÿ. Mo mē hkwÿjaja kot ri

mê hamâr o pa? No koja pahija tâm amnhî nê amnhî kwÿjê janor kêt nê.

²⁶ Tã ja pyrã nê ixte Satanasti nhÿ hã tanhmã amnhî nhîpêx to ho ri ixpa ronhÿx pa ri mê nê amnhî kwÿjê janor kêt nê.

²⁷ —No mê akwÿjaja? Xà Satanasti nhÿ hã na htem mê nê mêkarõmnuti japôx o pa? Kêp apu pa ixte ÿ hã mê nê amnhî kwÿjê japôx ronhÿx mê akwÿjaja ixpyrà nê ÿ hã mê nê amnhî kwÿjê japôx o pa. Nà Tîrtûm nhÿ hã mê ixte mê nê mê hapôx o ixpa kênã. Jakamã mê ate ã ijarênh anhÿrja mex kêt.

²⁸ Tîrtûm Karõ nhÿ hã ixte mê nê mê hapôx jakamã kwa mê ja hã ixpumu nê ixte mê ato amnhîptâr kaxyw Tîrtûm kot mê awÿr inhmênh kôt ixpumu kêt wehe. Pa na ka htem ijamâr o apa.

²⁹ —Satanastija àhpumunh tÿx jakamã na htem tee ri kêp hkôt mê kot amnhî xunhwÿr xwÿnhjê pytâr kaxyw nhÿm mê nê mê omunh mex nê. Tã nom ixàhpumunh tÿx o ixte Satanasti jakrenh par jakamã na pa hte kêp mê utã nhÿm mê hpãnhã ixkôt ri amnhî nhîpêx.

³⁰ —Ra mê amã ixkapêr mar prãm tâ nom kormã ixkôt amnhî xunhwÿr kêt nê. Kwa wem ma amnhî to amõr gri nê tokyx ixkôt amnhî xunhwÿr kêt wehe. Kot kaj mê anhÿr kêt hãmri nê mê apê ixkutã amnhî xunhwÿr xwÿnh pyrãk o amnhî nhîpêx.

³¹⁻³² —Nê koja mēhō ixkapêr ma nê kãm ixprãm kêt nhÿm Tîrtûm ixtã omu nom tokyx tanhmã ixtã ho hkôt nê. Koja kormã amnhî tâ hamã. Karõ kot axte kãm ijarênh o amnhîrît nhÿm jatã kot mar nê kãm ixprãm nê ixkôt amnhî xãm prãm xaj nhÿm kormã amnhî tâ hamã. Nom koja Karõ xatã mê kãm tanhmã ixto amnhîrît to htã nhÿm mê kuma nê ãm kuma nê te mê kêp amnhî jamak pro pyrãk. Jao ra Karõ hã hpijaãm kêt o amnhî nhîpêx. Mÿrapê koja Tîrtûm nhÿrmã amnhî xwar te kêp amnhî jamak pro pyrãk o mê hipêx nhÿm mê tee kãm amnhî kaprî kaprÿ. Hãmri nê amnhî xà htÿx

kamã hamak o pa xatã wÿr ma pa nê kamã pa rãhã nê pa ho pa. Anê.

Mê pajamaxpêr xà hkôt tanhmã ri mê pakapêr to

Rukre 6.43-45

³³ Nhÿm Jejus arî Parijew nhõ xwÿnhjê mã kapêr nê mê kãm:

—Nê kot kaj mê atõ anhõ mēmo pâr nhÿm amã ô mex nê. Ô rax nê. Ka omu nê akînh nê amnhîm mex ã harê. No koja apê ô hkêt ka tee ri omu nê mex kêt ã harê. Na htem ã amnhîm mēmo xô hpâr pumunh kôt tanhmã kute hã harênh anê. Ja pyrã nê na htem tanhmã mê kot amnhî nhîpêx to hã mê omunh kôt tanhmã mê harênh to. Mê kot amnhî tomnuj xwÿnh ã mê harê rÿ mê kot amnhî to mex xwÿnh ã mê harê.

³⁴⁻³⁵ —Nê koja mēhō hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htÿx ri tanhmã amnhî tomnuj to ho pa. Na htem ahpÿnhã amnhî jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tâm ajamaxpêr o tâm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa.

³⁶⁻³⁷ Koja nhÿrmã Tîrtûm mê piitã tanhmã mê kapêr to hã mê mar xà hkôt tanhmã mê harênh to. Jakamã mê akapêr mex o mê apa xwÿnhjaja koja mê amex ã mê ajarê. Nom mê atÿx ri akapêr punuj o mê apa xwÿnhjaja koja mê amex kêt ã mê ajarê. Hãmri nê mê akapêr punuj o apaja mÿrapê mê atomnuj tÿx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhÿm Tîrtûm kapêr tÿm o mê ahkre xwÿnh mê Parijew nhõ xwÿnh kwÿjaja mēmoj tâ Jejus wÿ nê kãm:

—Kwa Pahihti. Mê inhmã aa mê ixte mēmoj pumunh kêt õ ho anê. Kot paj mê omu hãmri nê Tîrtûm kot mê ixwÿr amênh ã apumunh kurê

kumrêx. Jakamã e mẽ inhmã mẽmoj to anê nà. Anê.

³⁹ Hãmri nhũm mẽ kuma nê mẽ kãm:

—Tk. Pêr ãm mẽ ajamexpêr punuj pix o na ka htem apa. Ixpê Tirtũm kot mẽ awyr inhmênh xwýnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt ò ho anhÿr kaxyw hã ixwý. Nà pa mẽ amã ho anhÿr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

⁴⁰ —Tirtũm nhÿ hã kapêr xwýnh Jõhtija amnepêm na pre tep rax kumrêxja htĩr rãhã kukrê. Nhũm òxàhkre kamã htĩr nê hkrĩ hã apkati axkrunêpxi hãmri nê htĩr rãhã òxàhkre rũm kato. Tã ixpê Tirtũm kot mẽ awyr inhmênh xwýnh kot paj nhÿrmã kên kre kamã ixtyk nê inhnôr ã apkati axkrunêpxi. Jõhti hkĩnhã ixtyk kumrêx nê inhnôr ã apkati axkrunêpxi hãmri nhũm Tirtũm akupÿm ixto ixtĩr.

⁴¹ —Nê koja nhÿrmã Tirtũm akupÿm mẽ htyk nê mẽ hikwÿ xwýnh piitã akupÿm mẽ ho htĩr hãmri nhũm mẽ piitã Inhĩpêxã mẽ wa ixkutã hkrĩ pa wa tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwýnhjê hã mẽ hkwyjê jarê nê wa ixkuri mẽ pa ho mẽ pa hkêt xwýnhjê jarê. Mẽ piitã ã ahpÿnhã mẽ harênh anê. Amarĩ mẽ pa xwýnhjaja nê mẽ ò pahijaja. Jakamã nhũm Nĩnĩwe nhõ xwýnhjaja tanhmã wa inhmã mẽ ajarênh to. Jõhti kot mẽ hwÿr mõi nê mẽ kãm Tirtũm kapêr jarênh o pa xwýnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwÿr mõi nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwÿr kurê kumrêx Tirtũm. No or war akutã mẽ hkrĩ xwýnh kwý ata mẽ na pre Akra Jejus tãm mẽ hwÿr mõi nê mẽ kãm kapêr o ri mẽ hkõt pa nhũm prem mar tã mẽ ixkĩnhã mẽ kot amnhĩ tomnuj kaga nê hkõt amnhĩ xunhwÿr kêt

nê. Mẽ ixkurom mẽ kot Akra mar tã amnhĩ kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama nê ra mẽ amã ma nê. Nom ãm mẽ amã ma kaprÿ.

⁴² —Nê sur kãm mẽ ò pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harênh ma hãmri nê inhmã mar prãm xaj ma awry hã ò pika hwÿr mõi nê omu nê kapêr ma. Hãmri nê ma akupÿm inhõ pika hwÿr mõi nê ixkwÿjê mã àhpumunh tÿx ã harênh o ri ixpa. Tã Akra Jejus na kot àhpumunh tÿx o pahi Sarumãw jakrenh tã or war akutã mẽ hkrĩ xwýnh kwý ata mẽ. Mẽ kot kapêr mar tã ixkĩnhã kãm mar prãm kêt. Na prem kuma nê ãm kuma.” Anhÿr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ. Nom ãm amnhĩ kamã agryk kaprÿ. Anê.

Mêkarõmnuti kot tanhmã mẽhõ hto hã harênh

Rukre 11.24-26

⁴³ Nhũm Jejus arĩ Parijew nhõ xwýnhjê mẽ Tirtũm kapêr tũm o mẽ ahkre xwýnhjê mã kapêr nê mẽ kãm:

—Te mẽ ate ixte mẽhõ nê mẽkarõmnuti japôx xwýnhhta pyrãk. Nhũm te kêp kator nê ma htêm pyrãk. Nê nhÿri amgrã kamã ri pa pyrãk. Koja ja kêp omnuj nhũm tee ri kamã nhÿri hkõt xà japêr o pa. Nom tee ri hapêr o pa kaprÿ.

⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwýnhhta wÿr tẽ nê axà nê kamã mãn ri ixpa.”

⁴⁵ Anhÿr o hamaxpêr hãmri nê ma akupÿm hwÿr tẽ. Nom kormã akupÿm hwÿr àr kêt ri nhũm kamã amrakati nê ri pa. Jakamã nhũm akupÿm hwÿr axà. Nom ahte hwÿr àr kêt nê. Amnhĩ kõt hkwyjê ho 7 nê hwÿr mẽ ho gjêx pa. Mẽ kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja na omnuj tÿx

o kot wamta jakrenh jakamã nhũm mē kot hwÿr gjêx xwÿnhnta mē ÿ hã ra amnhĩ tomnuj tÿx nē oprê htÿx o pa. Wam pyxire kot hwÿr àrta nhÿ hã nhũm amnhĩ tomnuj o ri pa nom kawax pē oprê. Tã nhũm ra axte hwÿr mē ohtô nē gjêxta nhÿ hã hãmri oprê htÿx kumrêx. Ja pyrã nē kot kaj mē tokyx ixkôt amnhĩ xunhwÿr kêt nē hãmri nē amnhĩ tomnuj tÿx pix o ri apa. Anê.

Jejus kot tanhmã hkwÿjê jarênh to hã harênh

⁴⁶ Nhũm Jejus arĩ mē ahkre ho nhÿ. Rôm nhũm katorxã nē htôjaja nhÿhÿnh hwÿr môn pôj. Nom kormã hwÿr gjêx kêt nē. Mē kot hã hturax jakamã nhũm mē tee ri hwÿr gjêx kaxyw kormã kapôt ã hã mē omunh o kuhê.

⁴⁷ Hãmri nhũm mēhõja kapôt ã mē omu nē Jejus mã mē harê nē kãm:

—Kwa Pahihtĩ. Ota akatorxã mē atôjaja awÿr môn pôj nē tee àr kaxyw. O mÿj mē kapôt ã kuhê. Anê.

⁴⁸⁻⁵⁰ Hãmri nhũm kuma nē kãm:

—Tõe. Nã kot pa ixkato nē mē omu. Inhmã mē hapêê. Nom kot kaj mē atô Tirtũm kapêr ma nē hkôt amnhĩ xãm nē hkôt amnhĩ nhĩpêx. Hã kot kaj te apê ixtô rÿ ixkatorxã pyrãk o pu mē axpên nhĩpêx o ri papa. Pa inhmã ixkatorxã nē ixtôjê japê pyrã nē mãânên inhmã mē ajapê nē. Anê.

13

Mêmo hy hkre xwÿnh jarênh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mē kãm kapêr pa nē ixkre rũm kato nē ma himô rax wÿr tē nē gô mÿri mē kãm ujarênh kaxyw nhÿ. Pa mē ixpê hkôt mē ixpa ho ixpa xwÿnhjaja ma hkôt mra.

²⁻³ Hãmri nē gôta wÿr pôj nē mÿri ixkrĩ. Nhũm mē Jejus ã hturax nē nhũm tee ri mē omunh o nhÿ. Hãmri nē hamaxpêr nē kãnhmã xa nē tē nē pãr krem axã nē pãr kre kamã mütũm awry rũm mē ahkre ho nhÿ nhũm mē piitã omunh nē mar mex o hkrĩ. Nhũm mē kãm ujarênh o mē ahkre

ho nhÿ. Nom mē kãm tãm ujarênh kêt nē. Mē kot Tirtũm kapêr mar nē tanhmã hkôt amnhĩ nhĩpêx to ho paja nhũm hã kuxi nē mē kãm harênh o nhÿ nhũm mē amgrã kamã kÿx pē mar o hkrĩ. Nhũm mē kãm:

⁴ —E mē inhma. Kojã mēhõ ma pur mã mō nē pur kãm mēmo hy ho ukapêr o ri pa. Nom nhũm hy piitã amex kãm rôrôk kêt nē. Kojã hkwÿja ahpÿnhã nhÿri rôrôk. Kwÿ aptÿx kãm rôrôk nhũm kuwênhre omu nē hwÿr mra nē hkrêr pa.

⁵ —Nē kojã kên kãm hkwÿ rôrôk nē ra higrôt kutã nojarêt nē higrôt pa. Nom nhũm kamã aptÿx nē kêp pika hkryre.

⁶ Jakamã nhũm higrôt nhũm hã myt ahpa nē arĩgro htÿx mē nhũm grã pa. Harê hkryre jakamã grã pa.

⁷ —Nē kojã mrônhĩ kamã hkwÿ rôrôk nē higrôt tã no nhũm utãja kêp amÿtã nhũm ô hkêt nē.

⁸ —No kêt hirã kamã pika mex kãm rôrôk xwÿnhja hirã kamã rôrôk jakamã higrôt mex nē piitã ô rũnh nē. Kamã ô hkwÿ kêp 30 nē kamã hkwÿ kêp 60 nē kamã hkwÿ kêp 100. ã mē ujarênh kot anhÿr.

⁹ Kwa kêr ka mē ixujarênhja ma nē kãm ajamaxpêr tÿx rãhã ho apa. Anê.

Mêmo kaxyw Jejus kot mē ujarênh o mē ahkre

Makre 4.10-25; Rukre 8.9-15

¹⁰ Hãmri pa mē ixpê Jejus kôt mē ixpa ho ixpa xwÿnhjaja Jejus kot mē kãm ã ujarênh anhÿrja ã kuma nē tee ri hkukamã ijamaxpêr. Hãmri nē hã hkukja nē kãm:

—Kwa axujarênhnta na pa mē ixprĩ hã hkôt mēmoj pumunh kêt nē. Mon ka hte ãm mē ujarênh pix o mē ahkre? Anê.

¹¹ Hãmri nhũm mē inhmã:

—Tõe. Nã kot paj mē amã harê. Tirtũm kãm mē ate aprĩ hã mar prãm jakamã kot paj ixprĩ hã mē amã harê. Mē kot amnhĩ tomnuj kaga nhũm Tirtũm kot ja hã mē omunh nē mē ho hkra. Ja na pa harê. No mÿjjaja mē akĩnhã kãm ja mar prãm kêt jakamã

na htem ixujarênhja ma nê ãm kuma nê htÿx ri pa.

12 —No kêt mē kajaja na ka mē ixkôt ri apa ho apa. Nê xatã ixkapēr mar o apa jakamã na ka mē aprī hã ixkapēr ma. Tã mē ate ixkôt amnhī nhīpêx o apa jakamã na pa tanhmã mē akrã hto ka mē aprī hã mar mex o mō. No mē kot ixkapēr mar nê ãm mar xwÿnhjaja na mē akīnhã inhmar tÿx kêt nê. Jakamã nhūm Tirtūm tanhmã mē hkrã hto nhūm mē hã no hkêt tokyx anê htÿx ri pa.

13 “Ixte mē kãm aa mē kot mēmoj pumunh kêt kwÿ ho anhÿr rax tã nhūm mē omu nê ãm omu. Nê ixte amnhī nhīpêxja nhūm mē kãm hkīnh kêt nê. Nê mē kot ixkapēr mar tã ãm inhma nê kãm hprī hã inhmar prãm kêt nê.”

—Jakamã na pa hte ã mē kãm mēmoj te ho tãm pyrã nê harê no ãm hã haxwÿ nê mē kãm ixujarênh anê.

14-15 —Na pre ra Tirtūm nhÿ hã kapēr o pa xwÿnh Ijaisja amnepēm mē hkukamã tanhmã mē harênh to nê hã kagã. Mē kot inhmar nê ãm inhmar xwÿnhjê jarê nê tanhmã mē hkukamã mē harênh to nê mē harênh o:

Koja mē ujarênh mex mar pymaj amnhī jamak pro nê amnhī no hpro nê hkôt hamaxpēr kêt nê. Jakamã koja mē kãm mē kot amnhī nhīpêx mex prãm kêt nê harênhja ma nê ãm kuma. Nê omu nê ãm omu. Mē kãm hprãm kêt jakamã koja mē ã amnhī nhīpêx anê. ã mē kot amnhī nhīpêx anhÿr kêt ronhÿx mē ra Tirtūm kapēr ma nê hkôt amnhī xunhwÿ. Hãmri nhūm amnhī tã mē omu nê mē nê mē kot amnhī tomnuj rênh pa. Hãmri nhūm mē hkôt amnhī nhīpêx mex nê kapēr mar mex o pa. Tã no nhūm mē ã amnhī nhīpêx anhÿr kêt nê. Anê.

—ã Ijaisja mē hkukamã mē harê nê mē hã kagã anê.

16 —No kêt mē kajaja na ka htem ano ho ixte tanhmã amnhī nhīpêx to ho ixpa hã ixpumunh o ixkôt apa. Nê mē ajamak o ixkapēr mar o ri ixkôt apa.

17 Amnepēm mē akukamã pahijaja nê Tirtūm nhÿ hã mē kãm kapēr o ri mē pa xwÿnhjaja na prem kãm ixpumunh prãm tÿx o pa. Nê mē kãm ixkapēr mar prãm tÿx o pa. No ãm mē akīnhã ixpumunh nê ixkapēr mar kêt rãhã htyk pa. Kormã ixwryk nê jar ixkator kêt jakamã na prem arī htir nê pa ri ixpumunh kêt rãhã ra htyk pa. ãm mē kapxipixjaja na ka mē mÿr pē ixte amnhī nhīpêx ã ixpumunh nê ixkapēr mar o ixkôt apa. Tã mē kurom mē ate ano ho ixpumunh nê ajamak o ixkapēr mar o ixkôt apa jakamã kwa mē ja hã amnhī pumu nê tãm amnhī nhīpêx o ri apa pē akīnh nê ri apa. Anê.

Nhūm pre ã Jejus mē ixpê hkôt ixpa ho ixpa xwÿnhjê mã kapēr anê.

*Jejus kot hprī hã mēmo hy jarênh
Makre 4.13-20; Rukre 8.11-15*

18 Hãmri nhūm Jejus mē ixpê hkôt ixpa ho ixpa xwÿnhjê mã hprī hã mē ujarênhja jarê nê mē inhmã:

—E kot paj ixprī hã mē amã mēmo hy ho ukapēr xwÿnh ã ixujarênhja jarê ka mē inhma. Nã mēmo hyta te kēp Tirtūm kapēr pyrãk. Nê ahpÿnhã mēmo hy rôrok ã pikata te kēp mē apē panhī ahpÿnhã mē ate Tirtūm kapēr mar nê ahpÿnhã hkôt tanhmã amnhī nhīpêx tota pyrãk.

19 Jakamã mē kot mar xwÿnh kwÿjaja te mē kot aptÿx kãm hy rôrok nhūm kuwênh kot hwÿr mrar nê hkrēr par xwÿnhja pyrãk. Jao Tirtūm kapēr ma no nhūm Satanasti te kuwênh kot hy krēr parta pyrã nê mē kot mar nê amnhī kaxyw hkôt hamaxpēr nê hkôt amnhī xunhwÿr pymaj hãmri ra tanhmã kapērja nê mē hkrã hto. Jakamã nhūm mē kuma nom ho hamakêtkati tokyx anê nê axte kãm hamaxpēr kêt nê pa.

20 —Nê mē kot mar xwÿnh kwÿjaja te mē kot kēnre kamã hy hkwÿ rôrok

nê higrôt nê grà par tokyx anhÿr xwÿnhhta pyràk. Jao Tirtùm kapër ma nê hkÿnh nê. Nê kãm mar prãm nê.

²¹ Tã nhùm mēhō Tirtùm nê tanhmã mē kãm kapër to nhùm mē kuma nê Tirtùm kaga. Te mēmo hy higrôt nom ra grà par tokyx anhÿrta pyràk.

²² —Nê mē kot mar xwÿnh kwÿjaja te mrōnhĩ kamã hy hkwÿ rôrōk nê higrôt nhùm mrōnhĩ kot kēp àmnàr xwÿnhhta pyràk. Jao mē kãm Tirtùm kapër mar prãm tã määnēn kãm mē hikukrēx rŭnh nê mē hikàxpore rŭnh prãm. Hãmri nê ãm ja pix kukamã hamaxpēr o pa. Nê ja gryk ã axte Tirtùm kapër mã hamaxpēr nê hkôt amnhĩ nhĩpēx kêt nê.

²³ —Nê mē kot mar xwÿnh kwÿjaja te hirã kamã pika mex kãm hy hkwÿ rôrōk nê higrôt nê ô rŭnhhta pyràk. Jao ixkapēr ma nê amnhĩ krã him hagiēnh tÿx nê. Nê ixkôt ri amnhĩ nhĩpēx mex rãhã ho pa. Jakamã te mēmo hy ô rŭnh nê ô mex pyràk o amnhĩ nhĩpēx. E ã ixujarēnhja kot anhÿr. Anē.

Harôj kaàkre jarēnh

Matêwre 13.36-43; Makre 4.26-29

²⁴ Nhùm Jejus axte mē kot mar o hkrĩ xwÿnhjē mã awjarē nom hprĩ hã mē kãm ujarēnh kêt nê. Axte mē kãm mēmoj tã kuxi nê awjarē nê mē kãm:

—Nà nhÿrmã Tirtùm mē kot kormã htĩr ri tanhmã amnhĩ nhĩpēx to ho pa hã mē omunh xà hkôt ahpÿnhã tanhmã mē harēnh toja te mē ujarēnh ja pyràk. Koja mēhō harôj y mex o ukapēr kaxyw ma hpur mã mō. Hãmri nê hkre hpa nê ma akupÿm mō.

²⁵ Tã nhùm kamàt nhùm ra gōr nê nō. Hãmri nhùm kãm hkurē xwÿnhja ma kēp ihpur wÿr tē nê harôj mexta nhĩpy axtem nê kēp harôj kaàkre hkre. Harôj kaàkreja te kot harôj mex pyràk nom mē kot hkur kêt. Tã nhùm kēp harôj y mex nhĩpy hkre hpa hãmri nê ma akupÿm tē.

²⁶ —Tã nhùm hamē higrôt nê anhĩpē ô.

²⁷ Nhùm kãm mē àpēnh xwÿnhjaja tee ri harôj mex kaēx ã harôj kaàkreta

pumu nê hpur nhō dōn wÿr tē nê kãm harē nê kãm: “Kwa ate harôj mex pix kre htã pēr hkaēx ã harôj kaàkre määnēn kato. Kwa tanhmã na pre amnhĩ to nê hkaēx ã kato?” Anē.

²⁸ Hãmri nhùm tee ri mē kuma nê mē kãm: “Nà mēhō kãm ixkurē xwÿnh na pre ã inhĩpēx anē.” Anē hãmri nhùm kãm mē àpēnh xwÿnhhta kãm: “Kwa xà kot paj mē tokyx ma hwÿr mra nê nê harēnh pa nê kurē nà?” Anē.

²⁹ Nhùm mē kãm: “Nà kot kaj mē anē nê harôj mexta mē ho apimràatã ixpē harēnh pa.

³⁰ Kwār māmri harôj mex mē hpimràatã ô hpa măn. Ka mē rĩ ma hwÿr mra nê harôj kaàkre kumrēx jarēnh pa nê axpēn tã harē ho ê nê ma o mra nê hpōk. Hãmri nê rĩ kormã hpãnhã harôj mex jakà nê ho akuprō nê ô ho mra nê ixkre kamã haxwÿ.” Anē. ã mē ujarēnh kot anhÿr.

Anhÿr o mē kãm kapēr.

Jejus te kot mēmo hy hkryre pyràk ã harēnh

Makre 4.30-32; Rukre 13.18-19

³¹⁻³² Hãmri nhùm Jejus arĩ mē kãm amnhĩ tã kuxi nê ujarēnh o nhÿ. Nê tanhmã mē kãm amnhĩ tã ujarēnh to nê mē kãm:

—Nà Tirtùm kot mē awÿr ixte mē ato amnhĩptàr kaxyw inhmēnh ã ijarēnhja. Te ixte mēmo hy pixire nhùm mē kot hkre nhùm higrôt pyràk. Koja gaa nê hprēk. Hãmri nê hpa angrã nhùm kuwēnhre hwÿr mra nê hōptĩ kamã amnhĩm haē nhĩpēx nê kamã hikwÿ. Tã kot paj nhÿrmã mēmo hy jarēnhhta pyrã nê ixpyxi htã pika piitã hkôt mē ho amnhĩptã nê mē omunh mex rãhã ho ixpa. Anē.

Jejus te kot pãwti kaxkrit xà pyràk ã harēnh

Rukre 13.20-21

³³ Nhùm Jejus arĩ mē kãm amnhĩ tã kuxi nê ujarēnh o nhÿ nê mē kãm:

—E kot pa hpãnhã mē amã tanhmã pãwti kaxkrit xà jarēnh to ka mē inhma. Na hte mēnijaja pãwti nhĩpēx kaxyw hãmri nê kaxkrit xà hkwÿ ho grire nê kupy nê trik xôm mē ho ahkà.

Hāmri nê ho pāwti nhîpêx. Kaxkrit xàja grire htā pāwti piitā ho kaxkrit mex nê. Tā ja pyrā nê ixpyxi htā koja mē nhÿrmā pika piitā hkôt ixkôt amnhî nhîpêx mex o pa.

Anhÿr o mē kām amnhî jarê.

Jejus kot mē ujarênh pix kām mē ahkre hā harênh

Makre 4.33-34

³⁴ Na pre ā Jejusja mē ujarênh o mē ahkre ho pa anê. Ām mē ujarênh pix o mē ahkre ho pa. Te tām ujarênh pyrāk no ām mēmoj tā haxwÿ rÿ amnhî tā haxwÿ nê mē kām tanhmā amnhî jarênh to.

³⁵ ā kot mē ahkre ho pa anhÿr kukamā na pre ra amnepēm Tirtūm nhÿ hā kapēr o mē pa xwÿnhjê hōja harê nê hā kagā. Te Jejus tām tanhmā amnhî jarênh to pyrāk o hkukamā harê nê hā kagā nê hā hkagā ho:

Kot paj mē kām ixujarênh pix kām mē ahkre ho ri ixpa. Mēmoj te ho tām pyrā nê harê nom mēmoj tā haxwÿ nê tanhmā mē kām ixujarênh to. Nê aa mē kot mēmoj mar kêt xwÿnh kwÿ kot paj mē kām harê kê mē kuma. Anê.

Jejus kot hprî hā harôj kaàkre jarênh
Matêwre 13.24-30, 13.47-50

³⁶ Tā nhūm Jejus mē kām ujarênh pa nê mē kure nê ma tēn ixkrem axā. Hāmri pa mē ixpê hkôt ixpa ho ixpa xwÿnhjaja ma hkôt mra nê ixkrem agjê. Hāmri nê harôj kaàkre hā ujarênhhta ā hkukja nê kām:

—Kwa aprî hā mē inhmā harôj kaàkre jarênhhta jarê nā. Na pa mē kormā ixprî hā mar mex kêt nê. Anê.

³⁷ Hāmri nhūm mē inhmā:

—Tôe pa ixprî hā mē amā harê. Ām paa.

Ixpê Tirtūm kot mē awÿr inhmēnh xwÿnh te ixte mēmo hy mex o ukapēr xwÿnhhta pyrāk.

³⁸ Nê purta te kēp pika piitā pyrāk. Nê harôj mexta te ra mē ate ixkôt amnhî xunhwÿr nê ixkôt amnhî nhîpêx o apa xwÿnhjê pyrāk.

Nê harôj kaàkreta te mē kot Satanasti hkôt amnhî nhîpêx o mē pa xwÿnhjê pyrāk.

³⁹ Nê kot harôj kaàkre hkre xwÿnhhta te Satanasti pyrāk.

Nê harôj jakār xā hā arĭgrota te Tirtūm kot ahpÿnhā tanhmā mē harênh to xā hā arĭgrota pyrāk.

Nê mē kot harôj jakār xwÿnhjaja te Tirtūm kapēr o wrÿk xwÿnhjê pyrāk.

⁴⁰ Mē ujarênhja kamā na prem harôj kaàkre kumrêx jarê nê hā hpôk jarê. Ja pyrā nê koja nhÿrmā Tirtūm kot ahpÿnhā tanhmā mē harênh to xā hā arĭgrota ā hāmri ā mē kot amnhî tomnuj o mē pa xwÿnhjê nhîpêx anê.

⁴¹ —Kot paj nhÿrmā kām mē piitā mē ho amnhiptār kaxyw hāmri nê kapēr o mē wrÿk xwÿnhjê mā anê nhūm mē ma mran wrÿ nê mē kot amnhî tomnuj xwÿnhjê pix o akuprō. Nê mē kot nhām mē hkwÿjê kot mē urāk nê tanhmā amnhî tomnuj to ho pa kaxyw mē kām anhÿr xwÿnhjaja nhūm mē määnēn mē ho akuprō.

⁴² Hāmri nê mē ho pikuprōnh pa nê te mē kot harôj kaàkreta nhîpêx pyrā nê kuwy kamā mē rēnh pa. Hāmri nhūm mē kamā amnhî xā htÿx kamā hamak rāhā nê pa ho pa. Nê amnhî xā htÿx ā maj tee ri mÿr rāhā ho pa. Nê tee ri amnhî xā hā maj amnhî nham o axpēn kamnhar tÿx kaprÿ.

⁴³ —No ixkôt mē kot amnhî nhîpêx xwÿnhjaja koja mē mē kurom mex kumrêx nê pa. Kot paj mē ho mex rax nê nhūm mē mex rāhā nê pa ho pa. Tirtūm kot kormā pika nyw nhîpêx mā xwÿnhhta kamā nhūm mē mex kumrêx nê pa ho pa. E kê ka mē ixujarênhja ma nê kām ajamaxpēr tÿx rāhā ho apa. Anê.

Mē hikukrêx mex o hpimxur jarênh
Piripos 3.7

⁴⁴ Nhūm Jejus arĭ mē ixpiitā mē inhmā tanhmā ujarênh to. Nom hprî hā ujarênh kêt nê. Kê axte mēmoj tā kuxi nê mē inhmā tanhmā ujarênh to nê mē inhmā:

—Mê ate ixkôt amnhĩ xunhwÿr xwÿnhjaja te mê apê mê hikukrêx mex ã pika japrôr xwÿnhhta pyrâk. Koja mēhō mê hikukrêx mex jamÿ nē o tē nē nhÿri amnhĩm ho amũxu. Kaxyw kakwÿ nē kamã hagjê nē hity hpa nē ma akupÿm tē. Hãmri nhũm jãã nhũm mēhō tēn kãm kato. Hã pikata kakwÿ nē kãm kato nē omu nē hkĩnh nē. Nē hamaxpēr o: “E pa ma tē nē inhōrkwÿ kamã ixkukrêx piitã ho wēnê hpa nē hpãnhã kàxpore jamÿ nē ho amnhĩm mê hikukrêx mex ã pika japrô nē amnhĩm mēmoj mexta o ixàrik pa.” Anhÿr o hamaxpēr nē akupÿm hity hpa nē ma akupÿm tē. Hãmri nē mēmoj mexta gryk ã õ mēmoj piitã ho wēnê hpa. Hikukrêx nē òrkwÿ nhũm piitã ho wēnê hpa. Hãmri nē hpãnhã kàxpore jamÿ nē ma o tē nē amnhĩm pikata japrô. Hãmri nē ma akupÿm hwÿr tē nē kamã mê hikukrêx mexta kwÿrÿnh pa nē ho õ kumrêx.

—Tã te mê ate mēhō kot ã amnhĩ nhĩpêx anhÿr xwÿnhhta pyrâk. Na ka mê urâk nē inhgryk ã amnhĩ tomnuj kaga hpa nē hpãnhã ixkôt amnhĩ nhĩpêx. Te mēhō kot mēmo mê hikukrêx mex gryk ã hikukrêx tũm piitã kaga hpar nē mê hikukrêx mex o hpimxur xà hã pikata japrôr pyrâk. Anē.

Mēhō kot kēn jaxênh japrôr jarēnh

⁴⁵ Nhũm Jejus arĩ mê inhmã awjarē nē mê inhmã:

—Nē ja. Na htem kãm hkĩnh nē hamakêtkati nē ri hpa hprãm xàj Tĩrtũm kôt amnhĩ xunhwÿr nē hkôt ri amnhĩ nhĩpêx rãhã ho pa. Te mēhō my kãm kēn jaxênh mex prãm nē ma ri hapêr o pa xwÿnhhta pyrâk.

⁴⁶ Nē ra nhÿri omu nē ma tē nē prēs ã mê hkukja. Nhũm mê kãm hã ho ohtô nē harē nhũm ma akupÿm tē nē kãm ho õ hprãm xàj hikukrêx piitã ho wēnê hpa. Hãmri nē kàxpore jamÿ nē o tē nē amnhĩm ho haprô. Kēn jaxênh mexta pix gryk ã hikukrêx piitã ho wēnê hpa nē hpãnhã ho amnhĩm haprô.

—Tã ja pyrã nē na ka htem amex nē ajamakêtkati nē axãmnhĩx ri apa

hprãm xàj ixkôt amnhĩ xunhwÿr nē ixkôt pix mã amnhĩ nhĩpêx o apa. Anē.

Kryhti jarēnh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mê inhmã awjarē nē mê inhmã:

—E Tĩrtũm kot nhÿrmã tanhmã mê harēnh to xà hã arĩgro kot paj ixprĩ hã tanhmã mê amã harēnh to. Te ho mēmyjaja kot himô kamã kryhti rēnh pyrâk. Koja mê gôx kãm kumē nē akupÿm ho api nhũm kamã tep ohtô nē. Nhũm omu nē kÿx pē amgrã kamã hkapĩ nē ahpÿnhã ri tanhmã kamã kute kawrà. Nē kamã mex kawrà nē kawà kamã kugjê nē mê kot hkur kêtja nhũm nhãm kurē.

⁴⁹ Ja pyrã nē Tĩrtũm kot ahpÿnhã ri tanhmã mê kot amnhĩ nhĩpêx to hã mê omunh xà hkôt tanhmã mê hipêx to kaxyw arĩgrota ã ã mê hipêx anē. Koja kapêr o mê wrÿk xwÿnhjaja mê kot hkôt amnhĩ xunhwÿr xwÿnhjê nē mê kot amnhĩ tomnuj o mê pa xwÿnhjê kawrà hpa.

⁵⁰ Nē te mê kot tep mex nē tep punu kawrà nē nhãm rēnhhta pyrâk o mê hipêx nē ma kuwy hwÿr mê o mra nē kamã mê kurē. Nhũm mê tee ri amnhĩ xà htÿx ã maj amÿra nē tee ri amnhĩ nhĩpêx kaprÿ. Anē.

Nhũm pre ã Jejusja axte mê ixpê hkôt mê ixpa ho mê ixpa xwÿnhjê mã ujarēnh anē.

⁵¹ Hãmri nē mê inhmã:

—E xàn ka mê atã aprĩ hã ixu-jarēnhhta ma nà?

Anē pa mê kãm:

—Tÿ. Nà na pa mê atã ixprĩ hã mar mex nē. Anē.

⁵² Hãmri nhũm mê inhmã:

—Tôe. Nà ãm hãmri. Na ka xep mê ra ixte mê ahkre nywta mar mex nē. Nē mê akwÿjaja mããnen Tĩrtũm kapêr tũm mar mex nē. Te mê apê mēhō apkur xà rax pyrã nē ma ho mê piitã mê hipêx o ri mê hkôt paja pyrâk. Ja pyrã nē kêr ka mê ma mê piitã mê hkôt Tĩrtũm mê wa ixkapêr o mê ahkre ho ri mê hkôt apa. Anē.

Najare nhõ xwýnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ ã Jejus mẽ inhmã ujarênh par anê.

⁵⁴ Hãmri nê ma akupým Najare hwýr mõ nê Tirtũm kapêr o mẽ ahkre xà hã ixkre hwýr tẽ nê axà nê mẽ ahkre ho nhỹ. Nhũm mẽ amnhĩ jaêr pê tanhmã kot mẽ ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mẽ panhĩõ htã tanhmã kot we amnhĩ to nê ã àhpumunh tỳx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwý ho anhỹr o pa?

⁵⁵⁻⁵⁶ Na pre mẽ panoo mã hprêk nhũm mẽ pahte pahprĩ hã hkwýjê pumunh. Kêp pĩ kuprãr xwýnh Juje mẽ hprõ Marir wa hkraa. Nê kêp Xiakre nê Juje nê Simãw nê Jut mẽ htõõ. Nê htõxjaja jar mẽ pakamã pa nhũm mẽ pahte mẽ piitã mẽ omunh mex kênã kot kêt we mẽ kurom ã àhpumunh tỳx anê. Anê.

⁵⁷ Hãmri nê kamã gryk nê hkaga. Hãmri nhũm tee ri amnhĩ tã mẽ omu nê mẽ kãm:

—Nã Tirtũm nhỹ hã kapêr jarênh o mẽ pa xwýnhjaja na htem krĩ hkwý kamã kãm mẽ mar prãm nê. Nom õ krĩ kamã mẽ kot karãre rũm hprêk kãm omunh xwýnhjaja na htem kuma nê ãm kuma. Anê.

⁵⁸ Tã mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwý ho anhỹr rax prãm. No ãm mẽ kãm mẽmoj to grêre nê ho anê.

14

Mẽ kot Juãw Paxis pĩr ã mẽ harênh
Makre 6.14-29; Rukre 9.7-9

¹ Tã nhũm pika pê Garirej kamã mẽõ pahihiti Erox Jejus jarênh ma

² nê tee ri hkukamã hamaxpêr nê hã õ pôristi mã kapêr nê mẽ kãm:

—Kwa pêr Juãw Paxis na nã? Ra ixte hã ixãmnhênh nhũm mẽ kot hpĩr tã mãn tanhmã amnhĩ to nê akupým htĩr. Nã pêr tãm kênã. Jakamã na hte aa mẽ

kot mẽmoj pumunh kêt kwý ho anhỹr o pa. Anê.

³⁻⁵ Na pre ra Erox htõ pê hprõptàn ho hprõ. Tõ arĩ htĩr tã nhũm axtem nê kêp utà nê ho hprõ. Hãmri nhũm Juãw Paxisja harênh ma nê hã kãm akir nê kãm:

—Kwa Eroxis kêp atõ hprõ kênã na ka kêt axtem nê kêp utà nê ho aprõ. Kwa ja omnuj tỳx o omnuj tỳx. Anê.

Hãmri nhũm amnhĩ tã kuma nê kamã gryk nê kot hpĩr kaxyw. Tã nom nhũm Ijaew kot axpên mã kêp Tirtũm nhỹ hã kapêr jarênh xwýnh ã harênh jakamã nhũm mẽ umaj hpĩr kêt nê. ãm ho prês nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mẽ hã akuprõ nê hã hkĩnh. Hãmri nhũm hprõ nyw kra niti mẽ hwýr axà nê ahte mẽ hipòk ri mẽ kãm gre. Mẽ kot omunh nê kamã hkurê kaxyw nhũm mẽ noo mã hpi-jaàm kêt nê mẽ kãm grer o xa. Hãmri nhũm pahi Erox omu nhũm ja kãm mex nê nhũm hkĩnh nê kamã nopyma nê.

⁷ Hãmri nê kãm:

—Nã ãm hãmri na ka ã mẽ inhmã amnhĩ nhĩpêx anê. Jakamã kwa mãmri mẽmoj tã ixwý. Amã mẽmoj prãm xà hkôt hã ixwý kot paj amã kugõ. ãm hãmri na pa amã anê. E mẽmoj na amã hprãm? Anê.

⁸ Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwýr o tẽ nê inhmã agõ. Anê.

Ra katorxà kot kaxyw kãm karõ jakamã nhũm ã hã hwýr anê.

⁹ Hãmri nhũm Eroxia tee ri kuma nhũm ja kêp omnuj nê. Nom ra mẽ pikuprõnh rax xwýnhjê nhĩpòk ri mẽ noo mã kot kãm: “E mãmri amã mẽmoj prãm xà hkôt hã ixwý pa amã kugõ.” Anhỹr jakamã kãm kot kêp nê hprãm kêt nê. Hãmri nê Juãw Paxis wýr õ pôristi hkwýr rê

¹⁰ nhũm mẽ ma mẽ hagjênh xàta wýr mra nê unê nê mut krãhta.

¹¹ Hãmri nê hkrã mý nê pasiiti kamã kuxà nê ma akupým nita wýr

o tē nē kām kugō nhūm kumy nē ma katorxà hwÿr o tē nē kām kugō.

¹² Hāmri nhūm Juāw Paxis kōt mē pa xwÿnhjaja tee ri mē kot hpīr ā harēnh ma nē ma hwÿr mra nē kumy nē ma o mōn haxà. Hāmri nē ma Jejus wÿr mra nē kām harē.

Jejus kot mē ho ohtō nē mē kām mē ō hā harēnh

Makre 6.30-44; Rukre 9.10-17; Juāw 6.1-14

¹³ Hāmri nhūm Jejus Juāw Paxis jarēnh ma nē hkaprī nē. Nē ma himō nhīkjē hwÿr kapōt ā mōr kaxyw pàr krem axà nē ma mō. Pa mē hkōt ixpa ho ixpa xwÿnhjaja ma hkōt mra. Hāmri nhūm krī hkwy kamā mē pa xwÿnhjaja harēnh ma nē ohtō nē ma mē inhīkrep pikap mra. Nē ra amnhī to wa nē mē inhmōr xàja wÿr pōj nē mē ixkutēp hkrī.

¹⁴ Jakamā pa mē mō nē mē hwÿr pōj nē mē omu. Hāmri nhūm Jejus mē omu nē kām mē hkaprī nē mē kām mē à xwÿnhjē ho mex pa.

¹⁵ Tā nhūm ra myt àr kaxyw pa mē hkōt ixpa ho ixpa xwÿnhjaja tee ri mē omu nē Jejus wÿr mra nē kām:

—Kwa na ra amÿkry htÿx nē. Amnhī nē mē hano kê mē ma nhÿri krī hkwy hwÿr mra nē tokyx amnhīm mēmoj japrō nē kuku. Mo jar mē apkur xà hā mēō? Jar akunī pix kēnā. Anē.

¹⁶ Hāmri nhūm mē inhma nē mē inhmā:

—Nà kot paj mē hanor kêt nē. Mē kajaja kot kaj mē kām ō nhūm mē apku. Anē.

¹⁷⁻²¹ No nhūm mē ohtō rax kumrēx. Mēmyjaja kēp 5.000. Nē kaxyw mē hprō nē mē hkrajaja. Jakamā nhūm Jejus ā mē inhmā kapēr anē pa mē tee ri mē hkukamā ijamaxpēr nē kām:

—Kwa nà mē panhōja raxti hā. Mē panhō pāwti kēp sīk pix. Nē kaxyw tep gràja pijakrutre kēnā kot kêt mē piitā mē hipêx. Nà xà kot paj mē ma mra nē nhÿri mē kām mē mēmoj japrō nhūm mē kuku? Anē.

Hāmri nhūm mē inhmā:

—Nà pu mē kām mēmoj japrōr kêt nē. Kot puj mē kām mē panhōta o

anhgrà. E mē kām anē kê mē ahpÿnhā ri hije nē hkrī hpa. Anē.

Hāmri pa mē kuma nē mē kām anē nhūm mē piitā hkrī hpa. Hāmri nhūm Jejus pāwti mē tepja jamy nē kaxkwa hwÿr rīt nē ho Tirtūm wÿ nē kām:

—Pa Papaj? Nà apē mē inhmā mē inhō ho apa xwÿnh jakamā amex o amex. Anē.

Hāmri nē mē kām ho hkry hpa nē hkōt mē ixpa ho mē ixpa xwÿnhjē mā kugō pa mē ō ri ho mē hipêx pa. Nhūm mē piitā apkur o hkrī. Mēōja grire htā nhūm Jejus tanhmā mē kām ho rax to nhūm mē ohtō rax kumrēx tā piitā kuku nē ho ōhy htū hpa nhūm arī mēō jakrēx prā. Hāmri pa mē akupÿm hakrēx o akuprō nē ho kawà ho 12 nē ho nyt pa.

Jejus kot gō krāhkà hā ām nē htēm ā harēnh

Makre 6.45-52; Juāw 6.15-21

²²⁻²³ Tā nhūm Jejus mē ixpē hkōt ixpa ho ixpa xwÿnhjē mā anē pa mē akupÿm pàr mā agjē nē ma xarmā hkukamā mō. Hāmri nhūm mē kot mar o kuhē xwÿnhjē jano nhūm mē ma akupÿm hapêx. Hāmri nhūm Jejus kot Tirtūm mā amnhī jarēnh kaxyw ahte tē nē hixēt ā api nē himōk ā kām amnhī jarēnh o nhÿ.

Gaa nhūm ra kamàt nhūm arī ahte hixēt nhīmōk ā nhÿ.

²⁴ Rôm pa mē pàr kām mē inhmōr xwÿnhjaja kormā himō nhīpōk ri mō. Pu nhūm kōk xàpēr tÿx mē ixkaxpa. Nē gō axpēn tak tÿx nē pa mē tee ri rrēmti ho gō rēnh nhīpêx nē tee ri axpēn pumu.

²⁵ Tā nhūm krāhyre kà nhūm Jejus man mē ixkōt gō krāhkà hā xan tē

²⁶ pa mē amnhī wÿr omu. No nhūm kormā hirā mex kêt jakamā pa mē ixprī hā omunh mex kêt nē. Hāmri nē tee ri omu nē mēkarō hā hkamnhīx nē umaj ixàmra rax nē.

²⁷ Hāmri nhūm mē inhmā kapēr nē mē inhmā:

—Tk. Kwa mē amā ma hkêt nē. Pa na pa mē akōt tē. Anē.

²⁸ Hāmri nhūm Simāw Pētre kuma nē kām:

—Kwa xà ka na ka tē? Tōe apê mē inhō Pahihti jakamā kwa amnhī wÿr ixwÿ pa apyrà nē gō krāhkà hā xa nē awÿr tē nà? Anē.

²⁹ Hāmri nhūm kām:

—Tōe mamrī amnē ixwÿr tē. Anē.

Hāmri nhūm kuma nē pàr rūm kato nē hwÿr tē. Uràk nē gō krāhkà hā hwÿr tē.

³⁰ Hāmri nē kormā htêp o htēm mē kōk xàpêrta kamā ama nē tee ri amnhī kukamā hamaxpêr pē ra àr o mō. Hāmri nē àmra kamā Jesus mā amnhī to akir nē kām:

—Kwa tokyx ixto api Pahihti. Anē.

³¹ Hāmri nhūm hpa hā kupy nē ho àpir kurê kumrēx nē kām:

—Kwa pēr àm kormā ate amnhī kaxyw inhmā ajamxpêr tÿx kêt. Mon ka we ixkamnàr rom māmri man ixwÿr atēmre hkêt nē? Anē.

³² Hāmri nhūm wa akupÿn mē ixwÿr tē nē wa axà. Hāmri nhūm kōk katāt kōt pinhkrēnh pa nhūm gō tām nōr kurê kumrēx.

³³ Hāmri pa mē Jesus kot à amnhī nhīpêx anhÿrja à omu hāmri nē kām mex o mex à harē nē kām:

—Kwa àm hāmri na hte amnhī pē Tirtūm Kra hā amnhī jarē. Nà apê Kra kēnā. Anē.

Jenējare kamā Jesus kot akupÿm mē ho mex à harēnh

Makre 6.53-56

³⁴ Tā pa mē ra himô hā rē nē Jenējare hwÿr pōj.

³⁵ Hāmri nē ma kapê hā ri ixpa. Hāmri nhūm pika nhō xwÿnh kwÿjaja Jesus pumu nē mē piitā mē kām harēnh o hprôt nē ahpÿnhā hwÿr nhÿhÿnh mē à xwÿnhjê hā karō. Nhūm mē man mē ixwÿr mē o mra

³⁶ nē mē ho Jesus wÿ nē kām:

—Pa? Kwa kê mē à xwÿnhjaja akupÿm mex kaxyw apê axê kupê nà? Anē.

Hāmri nhūm mē kām:

—Tōe. Kwār mē māmri mran hkupê. Anē.

Hāmri nhūm mē kuma nē axpēn pānhā hwÿr mra nē kēp ê pix kupēnh tā ra akupÿm mex nē ma akupÿm mra.

15

Parijew nhō xwÿnh mē Tirtūm kapêr tūm o mē ahkre xwÿnhjê jarēnh

Makre 7.1-13

¹ Tā nhūm Parijew nhō xwÿnh mē Tirtūm kapêr tūm o mē ahkre ho mē pa xwÿnhjaja Jerujarē rūm ma Jesus wÿr mra. Na htem mē ixkukamā mē inhīgêjtjê pyrà nē apkur kaxyw nē amnhī nhīhkra kuhōnh ryy nē. Amnhī nhīhkra htyk pix kuhōnh nē hkrī hkêt nē àm amnhī nhīhkra kuhōnh japjêê nē. Nē ò prat kuhōnh japjêê nē kormā apkur kaxyw hkrī. Tirtūm kot ja hā mē omunh nē mē mex à mē harēnh à amnhī kamnhīx jakamā na pre à amnhī nhīpêx anhÿr o pa. Jakamā nhūm mē ma Jesus wÿr mra.

² Hāmri nē omu nē kām:

—Pa Jesus? E kwa mē inhmā mēmoj jarē. Amnepēm mē panhīgêjtjê na prem apkur kaxyw nē amnhī nhīhkra kuhōnh japjê nē rī kormā apku. Tā pa htem arī ijaxwÿja à amnhī nhīpêx anē. No akôt mē pa ho mē pa xwÿnhjaja na htem mē ixpyrà nē à amnhī nhīpêx anhÿr kêt nē. Kwa mo na htem amnhī nhīhkra tyk kuhōnh tokyx anē nē hkrī nē apku? Anē.

³ Hāmri nhūm mē kuma nē mē kām:

—Tk. Na ka htem àm mē panhīgêjtjê hkôt pix mā amnhī nhīpêx o apa no Tirtūm kapêr kōt amnhī nhīpêx kêt nē.

⁴ Tirtūm na pre mēmoj tā mē pamā karō ho:

Kêr ka mē anhīpêêxà nē mē akatorxà wa hā apijaàm nē mē ho ajuta rāhā ho ri apa. Kot kaj mē à amnhī nhīpêx anhÿr kêt nē tanhmā mē kām akapêr punuj to ho ri apa. Hā koja mē akwÿjaja ja mÿrapê mē apa. Anē.

—Na pre à Tirtūmja mē pamā karō anē.

⁵ No mē kajaja na ka htem à akwÿjê mā karō anhÿr kêt nē. Àm kapêrja kwÿm na ka htem mē kām karō nē mē kām:

Kot kaj mē mēmo arīgro hā akàxpore japêr nom kêr ka mē ho tanhmā akatorxà rÿ anhīpêêxà

ho ajuta hto kaxyw wa kãm hwý nhõr kêt nê. ãm ho ate wa ho ajuta hkêt ã wa kãm amnhĩ jarê hãmri nê Tĩrtũm mã amnhĩ jarênh xà hã ixkre hwýr o tẽ nê mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex nê. Kêr ka mẽ ã amnhĩ nhĩpêx anhýr o ri apa.

—Anhýr o na ka htem mẽ kãm karõ ho ri apa.

⁶ Nom Tĩrtũm kapêr tũm kot ã ja jarênh anhýr kêt. ãm amnhĩ krã hkõt na ka htem ã mẽ kãm karõ punuj o ri apa anê. Te mẽ akapêrja mex o kot Tĩrtũm kapêr jakrenh pyrãk.

⁷ Mẽ ate Tĩrtũm kõt amnhĩ nhĩpêx ã amnhĩ jarênh tã ãm amnhĩ to axêx nê hkõt amnhĩ nhĩpêx kêt nê. Na pre Tĩrtũm amnepêm mẽ akukamã tanhmã mẽ ajarênh to. Nhũm ý hã mẽ kãm kapêr jarênh xwýnh Ijaisja ô ri mẽ kãm mẽ ajarê nê hã kagã. Te Tĩrtũm tãm kot mẽ ajarênh pyrãk.

⁸ Na pre mẽ akukamã mẽ ajarênh o: Mẽ kãm ixkĩnh ã mẽ kot amnhĩ jarênh tã mẽ kãm ixkĩnh kêt. Na htem kãm ixprãm ã amnhĩ jarênh kaprý.

⁹ Mẽ kot ixkuhpa hã amnhĩ krã hkõt mẽmoj tã hkwýjê mã karõ ho pa jakamã na htem kot ixkõt amnhĩ nhĩpêx o pa hã amnhĩ jarênh kaprý. Anê.

—Na pre ã Ijaisja Tĩrtũm nhý hã mẽ akukamã mẽ ajarê nê mẽ atã kagã anê. Anê.

Nhũm pre ã Jejus Parijew nhõ xwýnhjê mẽ Tĩrtũm kapêr tũm o mẽ ahkre xwýnhjê mã kapêr anê.

Mẽmoj kot mẽ pahtomnu hã harênh Makre 7.14-23

¹⁰ Tã nhũm Jejus amnhĩ wýr mẽ kot mar o kuhê xwýnhjê hwý nê axte mẽ kãm kapêr nê mẽ kãm:

—E mẽ inhma nê inhmar tỳx nê.

¹¹ Na hte Tĩrtũm kapêr tũm o mẽ ahkre xwýnhjaja amnhĩ krã hkõt mẽ

ate amnhĩ nhĩkra kuhõnh japiê hã mẽ amã karõ ho pa. Nê amnhĩ krã hkõt mẽ axàpkur xà hã tanhmã mẽ amã karõ hto ho pa. Tĩrtũm kot ja hã mẽ apumunh kõt mẽ amex ã mẽ ajarênh kaxyw ã mẽmoj tã mẽ amã karõ anê. Nom na hte Tĩrtũm tanhmã mẽ kot amnhĩ nhĩkra kuhõnh to hã mẽ omunh xà hkõt tanhmã mẽ harênh to hkêt nê. Rý mẽ axàpkur xà pumunh kõt mẽ mex ã mẽ ajarênh kêt nê. Ja tanhmã kãm kute hkêt. Na hte ã mẽ kot amnhĩ nhĩpêx anhýr ã mẽ omunh xà hkõt mẽ mex ã mẽ harênh rý mẽ mex kêt ã mẽ harênh kêt nê. Na hte mẽmoj kur ã mẽ omu nê ãm mẽ omu nê hã tanhmã mẽ harênh to hkêt nê. ãm mẽ kapêr punuj rý mẽ kapêr mex ã mẽ mar kõt pix mã na hte tanhmã mẽ harênh to. Anê.

¹² Nhũm pre ã Jejus mẽ kãm kapêr anê pa mẽ hkõt mẽ ixpa ho mẽ ixpa xwýnhjaja kuma hãmri nê hwýr mra nê kãm:

—Kwa na ka ã mẽ kãm akapêr anê nhũm Parijew nhõ xwýnhjaja tee ri ama nhũm ja mẽ kêp omnuy nê. Anê.

¹³⁻¹⁴ Hãmri nhũm mẽ inhma nê tanhmã mẽ inhmã Parijew nhõ xwýnhjê jarênh to nê hprĩ hã mẽ hkukamã mẽ harênh o:

—Tk. Kwãr mãmrĩ mẽ kêp omnuy. Mẽ kot Tĩrtũm kapêr tũm o mẽ ahkre ho pa htã na htem hkõt amnhĩ nhĩpêx kêt. Jakamã te mẽ nohkre xwýnh kot amnhĩ nhĩpêx pyrãk. Kojã mēhõ nohkre htã amnhĩ kõt nhýhým nohkre hõ ho mõ hãmri nê wa hamẽ pry pumunh kêt nê htỳx mõ hãmri nê nhýri ahkrehti kamã tēm. Tã Parijew nhõ xwýnhjaja te kot wam htēm xwýnhhta pyrãk nhũm mẽ kot mẽ mar xwýnhjaja te kot wam htēm xwýnh kõt hõ htēmta pyrãk. Jakamã Parijew nhõ xwýnhjaja mẽ kot mẽ mar o pa xwýnhjê mẽ koja mẽ hpimràatã nhýrmã te ahkrehti kamã rôrøk par pyrãk o amnhĩ nhĩpêx nê mex kêt nê pa ho pa. Kojã kaxkwa kamã inhõ Papaj nhýrmã amnhĩ nê mẽ hanor pa.

—Inhõ Papaj te kêp mẽmo hy hkre ho pa xwýnhhta pyrãk. Na htem mẽmo hy hkre nhũm higrõt hapôj nê higrõt

mex nê. Hâmri nhûm mẽ hwÿr mra nê omu nê nê mẽmoj nhĩgrôt punuj jarê nê kurê. Ja pyrâ nê koja nhÿrmã inhô Papaj amnhĩ nê Parijew nhô xwÿnhjê janor pa nhûm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhûm pre ã Jejus mẽ ixte hkôt ixpa ho ixpa xwÿnhjê mã hprĩ hã Parijew nhô xwÿnhjê hkukamã ã mẽ harênh anê pa mẽ mar o ixkrĩ.

¹⁵ Hâmri nhûm Simãw Pêtre tee ri Tirtûm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hâmri nhûm kuma nê hprĩ hã mẽ inhmã awjarê nê mẽ inhmã:

—Kwa xàn ka mẽ kormã aprĩ hã ja mar kêt nê?

¹⁷ E pa ixprĩ hã mẽ amã harê ka mẽ inhma. Nà na htem mẽmoj ku nhûm hte mẽ hkrã hi hwÿr gjêx kêt nê. Na hte mẽ ôhy pix wÿr agjê nê gaa nê nhãm hapôj nê hapêx. Na htem mẽ apkur xàja ku nê ÿ hã tanhmã amnhĩ tomnu hto hkêt nê. Jakamã na hte Tirtûm ja hã mẽ omunh xà hkôt tanhmã mẽ harênh to hkêt nê.

¹⁸ ãm mẽ hkrã kamã mẽ hamaxpêr punuj pix nhÿ hã mẽ kot tanhmã amnhĩ tomnuj to jakamã na hte Tirtûm mẽ hamaxpêr ã mẽ omunh xà hkôt tanhmã mẽ harênh to.

¹⁹ Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprô ho amnhĩkati nê mẽ hkuprÿ hwÿr mra nê mẽ ho amnhĩkati. Nê tanhmã ri axpên tomnuj to ho pa.

²⁰ Mẽ hamaxpêr punuj nhÿ hã na htem ã amnhĩ nhĩpêx anhÿr o pa. No na hte Tirtûm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwÿnh ã

mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukapri hã harênh

Makre 7.24-30

²¹ Tã nhûm Jejus mẽ inhmã kapêr pa hãmri nê mẽ inhmã anê pa mẽ ma hkôt mō. Ma Xir mẽ Sitōja wa pu hã ri ixpa.

²² Nhûm mẽhõ nija omu nê hwÿr tē. Mẽ ixkĩnhã kêp Ijaew kêt tã hwÿr tē. Kanaã nhô xwÿnh na pre. Tã Jejus wÿr tē nê kãm:

—Ka Pahihti Jejus? Apê Tirtûm kot mẽ ixwÿr amênh xwÿnh jakamã xê ixujarênh ma nê ixkamã axukapri hkêt wehe. Na mẽkarōmnutija tanhmã ixpê ixkra ho nhûm ixpê omnuj tÿx kumrêx. Anê.

²³ Hãmri nhûm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwÿnhjaja kãm:

—Kwa hano kê ma akupÿm tēē ri. Na ãm ri mẽ pahkôt xatã hkrata jarênh pix o ri pa. Anê.

²⁴ Nom nhûm kot amnhĩ tã kamã hamak kaxyw tanhmã mẽ inhmã hã kapêr to nê mẽ inhmã:

—Nà ãm Ijaewjê pix wÿr na pre Tirtûm inhmē. Te mẽ kêp ôwêhti pikunor pyrâk o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmē. Na kormã inhmã tanhmã nhãm mẽ hkwyjê jarênh to hkêt nê. Anê.

²⁵ Hãmri nhûm nitita tee ri amnhĩ tã kuma nê hwÿr tē nê kutã hkônkrã ho htēm nê nhÿ nê kãm:

—Xê ma we ixkamã axukapri hkêt wehe. Anê.

²⁶ Hãmri nhûm kãm:

—Nà kormã. Na pre Tirtûm mẽ kêp Ijaewjê pix wÿr inhmē. Jakamã na pa kormã nhãm tanhmã mẽ akwyjê ho mex to hkêt nê. Anê.

²⁷ Hãmri nhûm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

²⁸ Hãmri nhûm kuma nê kãm:

—Nà ãm hãmri na ka ã akra kaxyw inhmã ajamaxpêr tÿx anê. Jakamã

kot paj nê mēkarōmnutita jano. Koja axte tanhmā apê ho hkêt kumrêx.

Anhÿr o kām kapêrja rôm nhÿm hkraja akupÿm mex kurê kumrêx.

Jejus kot mē à xwÿnhjê ho ohtô nê mē ho mex ã harênh

Makre 7.31-37

²⁹ Tã nhÿm Jejus mē inhmā anê pa mē ixrohã krÿja pē ixkato nê ma himô rax pē Garirej wÿr mō. Nê nhÿri gô mÿri hixêt wÿr mō nê hã api nê ixkrÿ.

³⁰ Hãmri nhÿm mē ohtô nê ma mē ixkôt mra. Nê mē à xwÿnhjaja nhÿm mē hamÿ nê Jejus wÿr mē o mra. Na prem ohtô rax kumrêx. Ra ri mē pa hkêt xwÿnhjaja nê mē nohkre xwÿnhjaja nê mē hyk o mē pa xwÿnhjaja. Nê mē kapêr kêt xwÿnhjaja nê ahpÿnhã ri tanhmā mē à kute xwÿnhjaja nhÿm mē hamÿ nê ma Jejus wÿr mē o mra nê kutã mē haxwÿ. Hãmri nhÿm mē omu nê ahpÿnhã akupÿm mē ho mex pa.

³¹ Jakamã na pre mē kapêr kêt xwÿnhjaja akupÿm kapêr mex nê. Nê ri mē pa hkêt xwÿnhjaja akupÿm mrar mex nê. Nê mē hyk o mē pa xwÿnhjaja akupÿm tãm ri mra. Nê mē nohkre xwÿnhjaja akupÿm rÿt mex nê. ã ahpÿnhã akupÿm mex par anê. Hãmri nhÿm mē kot hwÿr mē hamÿnh nê Jejus wÿr mē o mrar xwÿnhjaja amnhÿ jaêr pē akupÿm mē mex ã mē omu nê mē kamã no puma nê hkÿnh nê. Hãmri nê Tÿrtÿm mã mex o mex ã harê nê expên mã harênh o:

—Nà ãm hãmri mē panhō Tÿrtÿmjã ãm mex o mex. Anê.

Jejus kot mē ho 4.000 nê mē kām mē ò hã harênh

Makre 8.1-10

³² Tã nhÿm Jejus mē ixte hkôt ixpa ho ixpa xwÿnhjaja amnhÿ wÿr mē ixwÿ nê mē ixkôt mē mrar xwÿnhjê jahkre nê mē inhmã:

—E. Ka mē rÿ kam jajê pumu. Na pa ra inhmã mē hkaprÿ nê. Na mē pahkôt ri pa hã apkati axkrunêpxi nhÿm ra mē kêp mēōja hapêx pa. Koja mē apkur kêt rãhã ma akupÿm mē ò krÿ hwÿr pa hãmri nê pry hã hirot nê rôrôk o pa. Mē ò krÿ hwÿr awryy. Anê.

³³ Nhÿm pre ã mē inhmã mē harênh anê pa mē tee ri kuma hãmri nê kām:

—Kwa nom nhÿri kot pu mē kām mēmoj japró nhÿm mē tokyx kuku? Ja kapôt pix kênã. Nê mē ohtô griiã. Anê.

³⁴ Hãmri nhÿm mē inhmã:

—No mē panhō pãwtita? Tanhmã na arÿ kute nê hikwÿ? Anê.

Hãmri pa mē kām:

—Nà ãm kêp 7 pix. Nê kaxyw tep kwÿ no ãm grêre. Kot mē ho dare kaxyw ã. Anê.

³⁵ Hãmri nhÿm mē inhma nê mē ixkôt mē mrar xwÿnhjê mã anê nhÿm mē hkrÿ pa.

³⁶ Hãmri nhÿm pãwti mē tep grêreta jamÿ nê ho Tÿrtÿm wÿ nê kām:

—Pa Papaj. Nà apê mē inhmã mē inhō ho apa xwÿnh jakamã amex o amex. ãm amex kumrêx. Anê.

Hãmri nê mē kām mēmojta o hkry hpa nê mē inhmã kugō pa mē ô ri ho xa nê ho mē hipêx pa.

³⁷⁻³⁸ Hãmri nhÿm mē piitã apku nê ôhy htu hpa. Nhÿm prem mēmyjaja kêp 4.000 nê kaxyw mēnijaja nê mēhprÿjaja. Mē ohtô rax kumrêx tã nhÿm Jejus mēō ho mē hipêx pa. Hãmri pa mē hakrêx o akuprō nê ho kawà ho 7 nê ho nÿt.

³⁹ Hãmri nhÿm Jejus ma akupÿm mē ò krÿ hwÿr mē hano pa mē pãr krem agjê hãmri nê ma ijaxwÿja mō. Ma pika pē Makatã hwÿr mō.

16

Parijew nhō xwÿnh kwÿ kot aa mē kot mēmoj pumunh kêt ò ho anhÿr ã Jejus wÿr ã mē harênh

¹ Tã pa mē ra hwÿr pōj nhÿm Parijew mē Satusew nhō xwÿnhjaja Jejus pumu nê hwÿr mra. Nê hêx rom kot kamã hamak kaxyw hwÿr mra nê kām:

—Pa Jejus? E kwa mē inhmã aa mē ixte mēmoj pumunh kêt ò ho anê nà? Pa mē ate ho anhÿr ã apumu nê Tÿrtÿm kot mē ixwÿr amênh ã akôt ija-maxpêr kurê kumrêx. E kwa tokyx. Anê.

2-3 Hāmri nhūm mē kuma nē mē kām:

—Tk. Nà kot paj mē amā ho anhÿr kêt nē. Mē ate hā ixpumunh nē ixkôt ajamaxpēere kaxyw ā. Na ka htem kaxkwa kamā kakrā pumu nē axpēn mā na wrÿk ā harē. Nē kaxkwa mex pumu nē axpēn mā amgrā hā harē. Tā ixte tanhmā mē amā mēmoj nhÿpēx to hā ixpumu nom Tirtūm kot mē awÿr inhmēnh xwÿnh ā ixkôt ajamaxpēr kêt nē.

4 ām mē ajamaxpēr punuj pix o na ka htem ri ajamaxpēr o apa. Ixpē Tirtūm kot mē awÿr inhmēnh xwÿnh tā ka mē ja hā ixkôt ajamaxpēr kêt nē. Tā mē ate aa mēmoj pumunh kêt kwÿ ixte mē amā ho anhÿr kaxyw ka mē inhmā hā karō. Nà kot paj mē amā ho anhÿr kêt nē. Kormā. Kot paj ām nhÿrmā te amnepēm Jōhti kot amnhÿ nhÿpēx pyrāk o amnhÿ nhÿpēx. E ja pix kot paj mē amā harē. Nom kot paj mē amā aa mē ate mēmoj pumunh kêt ō ho anhÿr kêt nē. Anē.

Nhūm pre ā Jejus mē kām kapēr anē hāmri pa mē ixrohā mē kēp ixkato nē ma ixpa.

Jejus kot hkôt mē pa xwÿnhjê jahkre hā harēnh

Makre 8.14-21

5 Tā pa mē Jejus mē ixrohā ma mō nē pàr mā agjē nē ma xarmā akupÿm rē nē hikjē hā mō. Hāmri nē tee ri mē ixàpkur xà japēr nē axpēn mā:

—Kwa na pu mē panhō pāwti ho pajamakētkati nē kure. Anē.

6 Hāmri nhūm Jejus mē inhma nē tanhmā mē inhmā Parijew mē Satusew nhō xwÿnhjē jarēnh to. Nom pāwti hā kuxi nē mē inhmā mē harē nē mē inhmā:

—Kwa mē o kora. Kēr ka mē Parijew mē Satusew nhō xwÿnhjē mē kēp pāw kaxkrit xà hkwy hpyr kêt nē. Anē.

7 Hāmri pa mē tee ri kuma nē ixprÿ hā mar mex kêt nē. Nē arÿ kapēta ā axpēn kukjēr o hkôt mō nē axpēn mā:

—Kwa mē pahte mē panhō pāwti rer jakamā mǎn mē pahte mē ō pāw

kaxkrit xà kwÿ hpyr nē mē pahkurē nà? Anē.

8 Hāmri nhūm mē inhma nē mē inhmā:

—Hêxta waa nē. Mon ka mē ām axpēn mā mē panhō pāwti hkêt pix jarēnh o mō? Pēr kormā mē ate amnhÿ kaxyw inhmā ajamaxpēr tÿx kêt.

9 Jāā ixte mē anoo mā pāwti kēp 5 pix tā nhūm ixte ho mē kēp 5.000tājē nhÿpēx par. Nhūm mē kot hkur nē ho ōhy htu hpar nhūm mē ate mēō jakrēx o apikuprōnh par nē ho kawā ho 12 nē ho hipu.

10 Nē ham pāwti kēp 7 o mē kēp 4.000 nhÿpēx par nhūm mē kot hkur nē ho ōhy htu hpar nhūm mē ate mēō jakrēx o apikuprōnh raxja.

11 Ra ixte mē anoo mā ja ho anhÿr o axkrut tā ka mē ra hā ano hkêt nē arÿ axpēn mā mē paxàpkur xà pix jarēnh o ixkôt mō. Nà mē paxàpkur xàja na pa harēnh kêt nē. Parijew mē Satusew nhō xwÿnhjē nhō pāwti kaxkrit xà pix na pa hā kuxi nē mē amā tanhmā harēnh to. Anē.

12 Nhūm pre ā mē inhmā kapēr anē hāmri pa mē atā kuma nē kām:

—Nà na pa xep mē hāmri tā ama. Xep mē ixte Parijew mē Satusew nhō xwÿnhjē kapēr kôt amnhÿ nhÿpēx nē na ka mē ixkurē nē ā mē harēnh anē. Anē.

Jejus kot amnhÿ tā hkôt mē pa xwÿnhjê kukjēr ā harēnh

Makre 8.27-30; Rukre 9.18-21

13 Tā pa mē axte Jejus kôt mō nē pika pē Sejarej Piripos kamā kormā mō nhūm Jejus amnhÿ tā mē ixkukja nē mē inhmā:

—E mē inhmā mēmoj jarē. Tanhmā na hte mē akwÿjaja axpēn mā ijarēnh to wehe? Anē.

14 Hāmri pa mē kām:

—Nà na htem ahpyñhā tanhmā ajarēnh to. Na hte kamā mē hkwyjaja ajarēnh o finat Juāw Paxis ā ajarē. Nhūm kamā mē hkwyjaja ato finat Eris ā ajarē nhūm mē hkwyjaja tōhā apē Tirtūm nhÿ hā akapēr o apa xwÿnhjē hō akupÿm atÿr ā ajarē. Nē tōhā finat Jeremÿstija rÿ axtem hō hā

ajarê. Æ na htem ahpÿnhã axpên mã ajarênh anê. Anê.

¹⁵ Hãmri nhũm mẽ inhma nê mẽ inhmã:

—No mẽ kajaja? Ixpê mēhõ hã na ka htem axpên mã ijarê? Anê.

¹⁶ Hãmri nhũm Simãw Pêtre kãm:

—Nà apê Tirtũm kot mẽ ixkaxyw axãm nê mẽ ixwÿr amēnh xwÿnh na ka. Nê apê mẽ ixpiitã mẽ inhõ Pahi Maati na ka. Æ na pa htem axpên mã ajarênh anê. Anê.

¹⁷ Hãmri nhũm kuma nê kãm:

—Nà ãm hãmri na ka ã ijarênh anê Simãw Pêtre. Nom amnhĩ krã hkôt na ka ã ijarênh anhÿr kêt nê. Tirtũm tãm kot amã ixto amnhĩrĩt xà hkôt na ka ã ijarênh anê.

¹⁸ Nà akumrêx na ka ã ijarênh anê.

Tã koja mẽ apyrà nê nhÿrmã mẽ kot ixkôt amnhĩ xunhwÿr xwÿnhjaja ma hkwyjê mã ja hã ijarênh o ri krĩ piitã hkôt pa. Hãmri nhũm mẽ hkwyjaja mẽ kuma nê mẽ apyrà nê ixkôt amnhĩ xunhwÿ. Hãmri nhũm mẽ kēp ixprãm nōkati xwÿnhjaja tee ri tanhmã mẽ kot ijarênh toja ma nê ã ijarênh anhÿrja nê mẽ kãm kapēr tã nom ho hkapyrÿ. Æ koja ixkôt mẽ kot amnhĩ xunhwÿr xwÿnhjaja mẽ kãm ijarênh o pa anê. Jao te mẽ apê kēn nhũm ixte mẽ ato amnhĩm inhōrkwy nhĩpêx pyrāk. Tã akumrêx ate ã ijarênh kot anhÿr jakamã kot paj te ixte akumrêx amÿnh nê ato ixtēm nê inhōrkwy nhĩpêx kaxyw amnhĩm akumrêx axãm pyrāk o anhĩpêx Simãw Pêtre.

¹⁹ —E kēn ka ma inhÿ hã tanhmã mẽ piitã mẽ kãm ijarênh to ho ri apa. Mẽ kot hprĩ hã amar kaxyw. Koja mẽ hkwyjaja ama nê amnhĩ kaxyw ixkôt hamaxpēr nê ixkôt amnhĩ xunhwÿ. Ka ja hã mẽ omu nê mẽ kãm: “E ra mẽ ate Jejus kôt amnhĩ xunhwÿr jakamã kot ka mẽ nhÿrmã ty nê ma kaxkwa hwÿr api nê Tirtũm mẽ wa kuri amex kumrêx nê atĩr tũm nê apa ho apa.” Anhÿr o mẽ kãm ijarênh o apa. No mẽ kot akapēr mar nê ãm mar nê ixkôt amnhĩ xunhwÿr kêt xwÿnhjaja ka mẽ kãm: “No mẽ kajaja mẽ ate Jejus kôt amnhĩ xunhwÿr kêt

jakamã kot kaj mẽ nhÿrmã Tirtũm mẽ Krata wa kuri atĩr tũm nê apa ho apa hkêt nê.” Anhÿr o ã inhÿ hã mẽ kãm akapēr anhÿr o ri mẽ hkôt apa. Jao te ate kaxkwa hwÿr saf pyr nê Tirtũm krajê mã kahê xà rēnh nê Tirtũm kra hkêt xwÿnhjê pē kahê pyrāk o amnhĩ nhĩpêx o apa. Anê.

Nhũm pre ã Jejus Simãw Pêtre mã kapēr anê.

²⁰ Hãmri nê hpānhã mẽ ixpiitã mẽ inhmã kapēr nê mẽ inhmã:

—E. Kwa kēn ka mẽ kormã mẽ piitã mẽ kãm Tirtũm kot mẽ awÿr inhmēnh ã mẽ kãm ijarênh o ri apa hkêt nê. Kormã. Anê.

Jejus kot amnhĩ kukamã amnhĩ jarênh ã harēnh

Makre 8.31-33; Rukre 9.22

²¹ Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarênh to nê mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwÿjaja kãm hprĩ hã ijarênh mar nê ixpumunh prãm kêt. Ijaew krãhtũmjaja nê Tirtũm kapēr tũm o mẽ ahkre xwÿnhjaja nê patre krãhtũmjaja. Mẽ kãm hprĩ hã ixpumunh nê kãm ixkapēr mar prãm kêt jakamã kot paj tokyx ma Jerujarē hwÿr mō nhũm mẽ kamã ixpynē nê ixtak rax nê ixpĩ. Nom kot paj ixtyk ã apkati axkrunēpxi nhũm Tirtũm akupÿm ixto ixtĩr. Anê.

²² Hãmri nhũm Simãw Pêtre tee ri kot ã mẽ kãm amnhĩ jarênh anhÿrja ã kuma nê hwÿr tē nê hpa hã kupy nê mẽ ixpê ho kato nê mẽ ixkàx ã o xa. Nê ã kot amnhĩ jarênh anhÿrja nê kãm kapēr nê kãm:

—Kwa nà Pahihti. Ri ã amnhĩ jarênh anhÿr kêt nê. Mo kot kêt mẽ ri axtem nê ã anhĩpêx anê? Anê.

²³ Hãmri nhũm kuma nê hwÿr apkjê nê omu nê kãm:

—Tk. Te apê Satanasti kapēr pyrāk o na ka ã inhmã akapēr anê. Kot kaj ã akapēr anê hãmri nê ixkôt apa hkêt nê. Tirtũm kãm hprãm xà hkôt na ã mẽ kot inhĩpêx anhÿr kaxyw kēnã. Tã ka Tirtũm jamaxpēr o ajamaxpēr kêt nê amnhĩ jamaxpēr o ã inhmã akapēr

anê. Te apê ixpê axamnâr xwýnh pyrâk o amnhĩ nhĩpêx. Anê.

Jejus krajaja kot tanhmã amnhĩ nhĩpêx to hã mẽ harênh

Makre 8.34-9.1; Rukre 9.23-27; Juãw 12.24-26; mãânên Rômãn 15.1; Wam Korît 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapêr anê hãmri nê hpãnhã mẽ ixpê hkôt ixpa ho ixpa xwýnh piitã mẽ inhmã kapêr nê mẽ inhmã:

—E kot kaj mẽ ixkôt amnhĩ xunhwýr ã amnhĩ jarê hãmri nê mãânên amnhĩ jarênh o: “Jejus kêp inhõ Pahihiti jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwýjaja tanhmã hã inhĩpêx hto.” Anhýr o amnhĩ jarê.

²⁵ —Koja mẽ ixtã mẽ atõx pĩ rý tanhmã mẽ atõ hto ka ty. Tã nom koja akaxwýnh ma ixwýr àpir kurê kumrêx. Hãmri ka ixkuri atĩr tũm nê amex rãhã nê apa ho apa. Nom kot kaj mẽ jar atĩr prãm xàj ixkaga hãmri nê inhõ krĩ hwýr axàpir kêt nê.

²⁶ —Nê koja mēhõ hikukrêx rax gryk ã Tĩrtũm kaga. Tã nhýrmã ty hãmri nê amnhĩ kôt hikukrêx õ hpyr nê o mör kêt nê. Koja tee ri kuwy hwýr mör pymaj amnhĩ nê hikukrêx rax o amnhĩ pãnhã amnhĩrer prãm kaprý. Tanhmã koja amnhĩ to nê Tĩrtũm mã amnhĩre nê ma õ krĩ hwýr api? Koja ã amnhĩ nhĩpêx anhýr kêt nê.

²⁷ —Nê ixpê Tĩrtũm kot mẽ awýr inhmēnh xwýnh kot paj nhýrmã kaxkwa rũm akupýn mẽ awýr wrý nhũm Tĩrtũm kapêr o mẽ wrýk xwýnhjaja man ixkôt wrý. Hãmri pa inhõ Papaj nhý hã ixte mẽ piitã tanhmã mẽ kot amnhĩ nhĩpêx to hã mẽ omunh xà hkôt ahpýnhã tanhmã mẽ harênh to.

²⁸ ãm hãmri na pa ã mẽ amã amnhĩ jarênh anê. Kot paj nhýrmã akupýn ixte mẽ ato amnhĩptâr kaxyw man mẽ awýr wrý. Tã kot kaj mẽ akwýjaja akupýn ixwrýyta kukamã tokyx ixte

tanhmã ixte amnhĩ nhĩpêx to hã ixpumu. Anê.

17

Jejus kot hixêt prêk nhĩmök ã hirã kamã ãm ã harênh

Makre 9.2-13; Rukre 9.28-36; mãânên Sikũn Pêtre 1.16-18

¹ Tã nhũm semãnja hapêx nhũm Jejus ma nhýri hixêt prêk wýr mō. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kôt wa mẽ o mō. Nhũm wa mẽ mō nê hixêt prêk ã api nê himök ã kuhê.

² Hãmri nhũm Jejus xep ra axtem nê xa. Axtem hkuk nhĩrã htýx nê xa. Te myyti nhĩrã htýx pyrâk. Nê ê haka htýx kumrêx.

³ Hãmri nhũm xep ja wa kaxkwa rũm hwýr wrý nê kuri kãm kapêr o xa. Mojes mẽ Erisja wa nhũm hwýr wrý nê kuri xa. Tĩrtũm annepêm amnhĩ wýr wa ho àpir tã wa akupýn wrý nê Jejus mã kapêr o xa.

⁴ Hãmri nhũm Jejus kôt mẽ mör xwýnhjaja wa mẽ omu nhũm Simãw Pêtre tanhmã hamaxpêr to nê Jejus wýr tẽ nê kãm:

—Kwa Pahihiti. Nã ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nã?

Anhýr o kãm kapêr. Nom amnhĩ krã hkôt ã kapêr anê.

⁵ Hãmri nê kormã ã kãm kapêr anhýr rôm nhũm ra kakrã jaka htýxja wrý nê wa mẽ hkunor pa nhũm wa mẽ kamã kuhê. Nhũm kakrã kamã Tĩrtũm mẽ kãm kapêr nê mẽ kãm:

—E ota Ixkra xa. Inhmã hapê ho inhmã hapê. E kêt ka mẽ kapêr mar týx rãhã ho ri apa. Anê.

⁶ Hãmri nhũm mẽ tee ri kuma nê kãm ma htýx nê umaj pikap rôrök nê htu mýrpê hikwý.

⁷ Hãmri nhũm Jejus mẽ hwýr tẽ nê mẽ hã ãhkra jaxwý nê mẽ kãm:

—E mẽ kãnhmã akuhê nê amã ma hkêt nê. Anê.

⁸ Hāmri nhūm mē kuma nē kànhmā rīt nē Jejus pix pumu nhūm ahte xa nhūm kuri wa âm xwýnhhta wa ra ma akupým api.

⁹ Hāmri nhūm mē kormā akupým hixêt nhīmōk rūm mē ixwýr wrýk o mō nhūm Jejus mē kām:

—E kêr ka mē ham ate mēmoj pumunh xwýnhhta kormā nhām mē kām harēnh kêt nē. Kot paj nhýrmā ty nē akupým ixtír ka mē rī kormā mē kām ja hā ijarēnh o ri apa. Anē.

¹⁰ Hāmri nhūm mē kormā akupým mē ixwýr wrýk o mō nhūm mē Jejus mā:

—Kwa mē inhmā mēmoj jarē. Na htem Tirtūm kapēr tūm o mē ijahkre xwýnhjaja mē inhmā: “Eris kumrēx koja Tirtūm mē pahwýr kumē nhūm Krisja kormā hapu hā wrý.” Anē. Na htem ā mē inhmā war ajarēnh anē. Tā ka ra wrý nom kormā akukamā Erisja wrýk kêt. Anē.

¹¹ Hāmri nhūm mē kām:

—Nā âm hāmri na prem ā wa ijarēnh anē. Na pre ra ixkukamā te Eris kot amnhī nhīpēx pyrāk xwýnhhta tē nē ixkutēp mē kām ijarēnh o pa.

¹² Tā nom nhūm mē ja hā omunh kêt nē. Na prem axtem nē kām hprām xà hkôt tanhmā hipēx to nē kupī. Tā koja mē nhýrmā ā hipēx anhýr pyrāk o inhīpēx. Anē.

¹³ Hāmri nhūm mē ra hprī hā kuma nē xapēn mā:

—Kwa Juāw Paxis pimràata na ā mē pamā harēnh anē. Tapxipix na pre te Eris kot amnhī nhīpēx pyrāk o amnhī nhīpēx o pa. Tā tām na mē pamā harē. Anē.

Jejus kot mēhō hkra nē mēkarōmnuti kator ā harēnh

Makre 9.14-29; Rukre 9.37-43

¹⁴ Tā nhūm mē ra akupým ahpar mā man mē ixwýr hpōx o mō nhūm mē ohtō rax nē Jejus kutēp kuhē. Hāmri nhūm mēhō myja mē omu nē mē kutā tē nē mē hkaxpa nē Jejus kutā hkōn krā ho tēm nē nhý nē hkra ho kuwý nē kām:

¹⁵ —Pa Jejus. Kwa inhmā ixkra kamā axukaprī nē. Na hte

mēkarōmnutija xatā tanhmā ixpē ho nhūm hte ý hā mra nē rôrôk nē tōhā kuwý kamā rôrôk nē tōhā gōx kām mran mrō nē ixpē homnuj týx nē.

¹⁶ Tā pa akôt mē pa ho mē pa xwýnhjê hwýr o tē nom nhūm mē kot inhmā ho mex kaxyw tee ri tanhmā ho hkaprý. Kwa xà kot kaj akupým inhmā ho mex nà? Anē.

¹⁷ Hāmri nhūm kuma nē mē ixte hkôt ixpa ho ixpa xwýnhjê mā kapēr nē mē inhmā:

—Hêxta waa nē. Ra mē ate ixte Tirtūm nhý hā mē ho mex ā ixpumunh o ixkôt apa ryy htā kormā ixpyrà nē ā mē hipēx anhýr kêt nē. Nā kormā mē kaxyw Tirtūm kôt mē ajamxpēr týx kêt jakamā na ka mē tee mē ho mex kaxyw. Anē.

Hāmri nē myta mā kām:

—E amnē ixwýr akrata o tē pa omu. Anē.

¹⁸ Hāmri nhūm kuma nē hwýr o tē nhūm omu nē nē mēkarōmnutija kator nhūm akupým mex kurē kumrēx.

¹⁹ Hāmri pa mē ixte Jejus kôt ixpa ho ixpa xwýnhjaja ja hā omu mē hkàx ā amnhī tā hkukja nē kām:

—Kwa na pa mē axwakre kamā tee ri nē hanor prām kaprý. Kwa mon pa mē apyrà nē nē hanor nhūm kator nē ma htēm kêt nē? Anē.

²⁰⁻²¹ Hāmri nhūm mē inhmā:

—Nā kormā mē ate mē kaxyw Tirtūm kôt ajamxpēr týx kêt. Nom kot ka mē kaxyw hkôt ajamxpēr týx hāmri nē hkôt amnhī nhīpēx kukwak ri mēmoj tā awý nhūm mē ama nē mē ate mēmoj tā axàhwýr xà hkôt mē amā tanhmā mēmoj nhīpēx to. Te mē ate pī hpàr mūj mā akapēr nē kām: “Kwa amnhī jaré nē ma tē nē gō xujanār kām mán mrō.” Anhýr nhūm kot amar nē amar xà hkôt ā amnhī nhīpēx anhýr kurē kumrēx pyrāk. Ja pyrà nē kot kaj mē amnhī kaxyw Tirtūm kôt ajamxpēr týx kukwak ri mēmoj tā awý nhūm mē ama nē mē amā mēmoj tanhmā ho rý mē amā mēmoj gō. Anē.

Jejus kot htyk kukamā amnhī jarēnh ā harēnh

Makre 9.30-32; Rukre 9.43-45

22-23 Tã hãmri pa mẽ Jejus kôt ma mõ nẽ nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarẽnh to nẽ mẽ inhmã:

—Nà koja mẽ tokyx mẽ kãm ixtã amÿnẽ nhũm mẽ ixpĩ. Mẽ kot ixpĩr tã kot paj ixtyk ã apkati axkrunẽpxi nhũm Tĩrtũm akupÿm ixto ixtĩr. Anẽ.

Hãmri pa mẽ tee ri ã kot amnhĩ jarẽnh anhÿrja ã kuma nẽ ixkaprĩ htyx kumrẽx.

Jejus kot Tĩrtũm nhõrkwÿ hwÿr àr Rõmãn 13.5-7; Wam Korõt 10.32-11.1

24 Tã pa mẽ Jejus kôt ma mõ nẽ ra Kapanau hwÿr pøj. Hãmri nhũm mẽ kot Tĩrtũm mã amnhĩ jarẽnh xà hã ixkre ho mex kaxyw mẽ kêp kàxpore hkwÿ jamÿnh xwÿnhjaja mẽ ixpumu nẽ mẽ ixwÿr mra nẽ Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwÿjê pyrã nẽ Tĩrtũm mã amnhĩ jarẽnh xà hã ixkre ho mex kaxyw kàxpore hkwÿ nhõr kêt nẽ nã? Anẽ.

25 Hãmri nhũm mẽ kuma nẽ mẽ kãm:

—Tÿ kot mẽ kãm òr o pa kênã. Anẽ.

Hãmri nẽ ma mẽ ixkôt tẽ nẽ mẽ ixkôt mẽhõ nhõrkwÿ hwÿr axà. Hãmri nẽ kot Jejus mã mẽ harẽnh mã tã nhũm ra hamaxpêr ã omu nẽ kumrẽx kãm kapêr nẽ kãm:

—Kwa inhmã mẽmoj jarẽ Simãw Pêtre. Xà na hte pahi hkrajaja ò papaj mã kàxpore hkwÿ nhõr o pa nã? Xà na hte ãm hkra hkêt xwÿnh pixjaja kãm hkwÿ nhõr o pa? Anẽ.

26 Hãmri nhũm kuma nẽ mẽ kãm:

—Nà mẽ kêp hkra hkêt xwÿnh pixjaja na hte kãm òr o pa. Anẽ.

Hãmri nhũm Jejus kãm:

—Tÿ. Nã ãm hãmri na ka ja jarẽ. Na hte pahi hkrajaja ò papaj mã kàxpore nhõr kêt nẽ. Mẽ kêp hkra kênã. Tã ixpê Tĩrtũm Kra jakamã mo kaxyw kot pa kêt òrkwÿ hwÿr inhgÿx kaxyw kãm kàxpore hkwÿ gõ?

27 Tã nom kot paj òr kêt nhũm kàxpore hkwÿ jamÿnh xwÿnhjaja tee ri

ja hã ixpumu nẽ axpên mã ixte amnhĩ tomnuj xwÿnh ã ijarẽ. Jakamã e ma gõnhmã tẽ nẽ tep ò kanhê. Hãmri nẽ ho api nẽ apy nẽ hakwa jakjê nẽ kamã kàxpore htyxre pumu. Nẽ apy nẽ man o tẽ nẽ pahpãnhã kàxpore jamÿnh xwÿnhhta mã agõ. Anẽ.

Nhũm pre ã Jejus Simãw Pêtre mã karõ anẽ nhũm kuma nẽ ma hwÿr tẽ nẽ kot kãm karõ xà hkôt ã amnhĩ nhĩpêx anẽ.

18

Mẽ kot amnhĩ to rũnh xwÿnhjê jarẽnh

Makre 9.33-37; Rukre 9.46-48; mããñen Piripos 2.3-7; Wam Pêtre 3.4, 5.5-6

1 Tã mẽ ixte Jejus kôt ixpa ho ixpa xwÿnhjaja amnhĩ kukamã ijamaxpêr nẽ amnhĩ tã Jejus kukja nẽ kãm:

—Kwa mẽ inhmã mẽmoj jarẽ Pahihiti. Nhÿrmã mẽ ixpê pahi nẽ anhĩhkô hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwÿjê jakre? Anẽ.

2 Hãmri nhũm mẽ inhma nẽ amnhĩ wÿr mẽhprĩre hõ mã hpa ho apê nhũm hwÿr tẽ nẽ mẽ ixkuri xa.

3 Hãmri nhũm Jejus omu nẽ hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyrãk o amnhĩ nhĩpêx. Te mẽhprĩre kot amnhĩ nhĩpêx pyrãk. Kot kaj mẽ ã amnhĩ nhĩpêx anhÿr o apa hkêt hãmri nẽ nhÿrmã inhĩhkô hã mẽ ho amnhĩptàr kêt nẽ.

4 Jakamã kot kaj mẽ amã nhÿrmã inhĩhkô hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nẽ amã amnhĩ to rũnh prãm kêt nẽ apa.

5 —Nẽ kêr ka mẽ apê pahi kot amnhĩ nhĩpêx pyrãk o tanhmã amnhĩ jarẽnh to ho apa hkêt nẽ. ãm te amarĩ ri mẽ apa pyrãk o amnhĩ nhĩpêx. Jao nhÿri mẽhprĩjê hõ pumu nẽ kamã axukaprĩ nẽ kãm mẽmoj tanhmã ho rÿ mẽmoj gõ. Hãmri nẽ te pa ate tanhmã ixto mex to pyrãk o amnhĩ nhĩpêx.

Kot kaj mẽ ã amnhĩ nhĩpêx anhÿr o apa hãmri nhũm Tĩrtũm ja hã mẽ apumu mẽ mẽ ate amnhĩ to rũnh kêt tã mẽ ate amnhĩ to rũnh xwÿnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhÿr o ri apa. Anê.

Mẽ kot amnhĩ tomnuj xwÿnhjê hkukamã mẽ harênh

⁶ Nhũm Jejus arĩ mẽ inhmã mẽhprĩ jarê mẽ mẽ inhmã:

—Nê mẽhprĩre na htem amnhĩ kaxyw ixkôt hamaxpêr o pa. Tã koja mẽhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xaj tanhmã mẽ kãm kapêr to ho pa. Hãmri nhũm mẽ kuma mẽ mẽ kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri mẽ kot inhnê tanhmã kãm kapêr to xwÿnhhta pumu mẽ homnuj tÿx nê. Te mẽ kot mẽhõ pynênh mẽ mut ã kên pytĩ hõ nhôr mẽ ma o htêm mẽ gô xupÿm kãm mẽnh pyræk o hipêx. Te ho ja pyræk no ãm homnuj tÿx o hakre.

⁷ —Nê koja mẽhõ inhnê tanhmã mẽ kot ixkôt amnhĩ xunhwÿr xwÿnhjê hõ mã kapêr to. Kot tanhmã amnhĩ tomnuj to hprãm xaj tanhmã kãm kapêr to. Rÿ kot ixkaga hprãm xaj tanhmã kãm kapêr to. Hãmri nhũm kuma mẽ mar xà hkôt ixkapêr kwÿm tanhmã amnhĩ tomnuj to. Tã koja Tĩrtũmja ja hã omu mẽ mãânên kot inhnê kêp àmnàr xwÿnhhta pumu mẽ ã inhnê kãm kapêr anhÿrja mÿrapê homnuj tÿx kumrêx.

⁸⁻⁹ —E kwa mẽ okora. Kot kaj mẽ anhĩhkra ho tanhmã amnhĩ tomnuj to rÿ apar o tanhmã amnhĩ tomnuj to. Hã kêt ka mẽ axte ã amnhĩ nhĩpêx anhÿr pymaj te mẽ ate amnhĩ pê krãhyr mẽ mẽnh pyræk o amnhĩ nhĩpêx mẽ axte ã amnhĩ tomnuj anhÿr kêt mẽ. Rÿ ka mẽ ano ho mẽmoj punuj pumu. Hã kêt ka kãm ajamaxpêr pix o apa pymaj te mẽ ate amnhĩ pê ano katøk mẽ kaxàr mẽ mẽnh pyræk o amnhĩ nhĩpêx mẽ nhãm arĩt kurê kumrêx. Kêt ka mẽ ã amnhĩ nhĩpêx anhÿr o ri apa. Hãmri mẽ nhÿrmã ty

nê ma Tĩrtũm nhõ krĩ hwÿr api. No kot ka mẽ arĩ akutã ano mẽ arĩ akutã apar mẽ arĩ akutã anhĩhkra rãhã ri apa htã ho amnhĩ tomnuj o apa. Hãmri mẽ nhÿrmã ty mẽ ate amnhĩ tomnuj mÿrapê ma mẽ kot amnhĩ xà htÿx kamã hamak tũm xà hwÿr ma mō.

¹⁰⁻¹¹ —Nê kêt ka mẽ mẽhprĩrejê kamã axukapri rãhã ho apa. Na hte kaxkwa kamã Tĩrtũm kapêr o mẽ wÿk xwÿnh kwÿjaja Tĩrtũm mã mẽ hamãr mex o pa. Tã koja mẽhõ tanhmã kêp hõ hto nhũm mẽ hã omu mẽ ma tẽ mẽ Tĩrtũm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhũm Jejus arĩ mẽ inhmã kapêr mẽ mẽ inhmã:

—E pa mẽ amã awjarê ka mẽ ixu-jarênh ma. Nã koja mẽhõ my hkrit ôwêhti xohtô mẽ. Nê apkati mẽ ma hamãr o pa. Hãmri nhũm pyxire mẽ tanhmã amnhĩ to mẽ kêp akunok. Kwÿ kaga mẽ ma nhÿhÿm ahte tẽ mẽ kêp akunok. Hãmri nhũm mytita ma akupÿm o mōr kaxyw hkwy ho pikuprõnh pa hãmri mẽ tee ri hkwy kaêx ã pikunor xwÿnhhta japêr nom nhÿri omunh kêt mẽ. Hãmri mẽ tee ri hkukamã hamaxpêr mẽ ma hkwy ho mō mẽ nhÿri kure. Kutêp apkur kaxyw nhÿri kure hãmri mẽ ma akupÿm pikunor xwÿnhhta japêr o tẽ.

¹³ Hãmri mẽ hapêr rÿy mẽ nhÿri hwÿr kato mẽ omu mẽ hkĩnh mẽ. Hãmri mẽ kutu mẽ ma akupÿm o tẽ. Na hte pikunor kêt xwÿnhjê nhÿ hã hkĩnh tã pikunor xwÿnhhta mã kato mẽ hkĩnh tÿx mẽ. Krit xohtô htã nom ãm kãm ho pixi mẽ ho hpikunor prãm kêt. ã mẽ ujarênh kot anhÿr.

¹⁴ Ja pyrã mẽ Tĩrtũm kãm mẽhõ pyxi mẽ nhÿrmã ma kuwy wÿr mōr prãm kêt kumrêx. Mẽ piitã mẽ kot hkôt amnhĩ xunhwÿrja na kãm hprãm. Anê.

Jejus kôt mẽ pahtôjê hõ kot mẽ pah-tomnuj jarênh

¹⁵ Nhũm Jejus arĩ mẽ inhmã kapêr mẽ mẽ inhmã:

—Nê ja. Koja ixkôt mê atô rý mê atôx tanhmã atomnuj to. Hã kêr ka ma hwýr tẽ nê kot tanhmã anhîpêx to hã amnhî tâ kãm akapêr. Nom kêr ka mê nhãm mêhõ mã harênh kêt nê. Âm tanhmã kot ato xwýnhhta pix wýr tẽ nê kumê war axpên mã akapêr nê war axpên ma. Nhũm ama nê akupým tâm anhîpêx hã kêr ka akupým te ixkôt kêp atô rý atôx pyrãk o ka wa axpên nhîpêx nê axte jam ajamaxpêr kêt nê.

¹⁶ Nom koja ama nê âm ama rý tanhmã ato hkêt ã amnhî jarênh japêr. Hã kêr ka ma akupým tẽ nê akupým amnhî kôt Kris kôt atô rý atôx o axkrut rý mê ho axkrunêpxi nê amnhî kôt hwýr mê o mra kê mê axpên tâ war ama. Amnepêm Tirtüm kapêr ã kagã htüm kot ja jarênh o:

Kêr ka mê atô tanhmã axpên nhîpêx to. Hãmri nê hã axpên mã akapêr kaxyw nê amnhî kôt akwýjê ho axkrut rý ho axkrunêpxi nê akupým hwýr mê o mra kê mê axpên tâ war ama. Anê.

—Ã Tirtüm kapêr ã kagã htüm kot ja jarênh kot anhýr.

¹⁷ Jakamã kêr ka mê amnhî kôt akupým kot tanhmã ato xwýnhhta wýr mê o mra kê mê atã kuma. Hãmri nhũm arĩ mê kãm kot tanhmã ato hkêt ã amnhî jarê ka tee ri amnhî tâ omu nê ikrêsti hwýr tẽ nê Kris kwý hã mê pikuprõnh xwýnhjê mã harê. Kê mê ama hãmri nê ja hã axte kot tanhmã ato xwýnhhta mã kapêr. Nhũm mê mar kêt nê arĩ kot tanhmã ato hkêt ã amnhî jarê ka mê amnhî nê hanor kurê kumrêx. Hãmri nê te kêp Kris kôt mê atô rý mê atôx kêt pyrãk o hipêx.

¹⁸ —Nê koja mêhõ ixkôt amnhî xãm nê Inhîpêxã Tirtüm kôt ri amnhî nhîpêx o pa. Ka mê ja hã omu nê inhý hã tanhmã kãm akapêr to nê kãm: “E ra ate Jejus kôt amnhî xãm jakamã kot kaj nhýrmã Tirtüm mê wa kuri amex kumrêx nê atir tũm nê apa ho apa.” Anhýr o kãm akapêr. Nom mê kot ixkôt amnhî xunhwýr kêt xwýnhjaja ka mê ã mê kãm akapêr anhýr kêt nê. Âm inhý hã mê kãm: “No mê kajaja

mê ate Jejus kôt amnhî xunhwýr kêt jakamã kot kaj mê Tirtüm mê Krata wa kuri atir tũm nê amex nê apa hkêt nê.” Anê. Kêr ka mê inhý hã ã ahpýnhã tanhmã mê kãm akapêr to ho apa anê.

¹⁹⁻²⁰ —Nê kot kaj mê Tirtüm mã amnhî jarênh kaxyw te axkrutre rý axkrunêpxire htã axpên wýr akuprõ nom mê kapxipixjaja apikuprõnh kêt nê. Kot paj mê akaêx ã mê anhîhkô hã mê amar o xa. Mê ate ano ho ixpumunh kêt tâ pa wa mê anhîhkô hã mê amar o xa. Jakamã kot kaj mê axpên wýr akuprõ nê mêmoj tâ Tirtüm wý nhũm kaxkwa kamã ja hã mê ama. Nê mê ate hã axàhwýr xwýnhhta nhũm mê amã tanhmã ho. Kêr ka mê ã ixkamnar rom axãmnhix amnhî to Inhîpêxã hwýr anê. Anê.

Nhũm pre ã Jejus mê inhmã kapêr anê.

Mê pahte tanhmã axpên nhîpêx to hã mê pamã karõ

Matêwre 6.14-15; Rukre 17.3-4; mããnên Epes 4.32; Korosê 3.13

²¹ Tã nhũm Simãw Pêtre Jejus wýr tẽ nê mêmoj tâ hkukja nê kãm:

—Kwa inhmã mêmoj jarê Pahшти. Xã koja akôt ixtõ rý ixtõx tanhmã inhîpêx to pa amnhî tâ omu nê âm omu nê amnhî tâ tanhmã ho hkêt nê. Nhũm axte tanhmã ixto nê axte tanhmã ixto ho 6 tâ pa âm amnhî tâ omu nê amnhî tâ tanhmã ho hkêt nê. Âm ho ijamakêtkati nê axte kãm ijamaxpêr kêt nê. ã amnhî tâ hipêx anhýr o 7 nhũm ja amã mex nê nã? Anê.

²² Hãmri nhũm kãm:

—Nã kot kaj ã amnhî tâ hipêx anhýr o 7 pix kêt nê. Koja mêhõ xatã tanhmã ato rãhã nê ka amnhî tâ omu nê ajaxwýja amnhî tâ xatã tanhmã ho hkêt nê. Âm amnhî tâ omu nê âm omu nê tâm hipêx rãhã ho ri apa. Mãmrĩ ho anhýr o apa rãhã nê aa jam anhürer kêt nê.

²³ —E kot paj ixprĩ hã mê amã tanhmã ja jarênh to ka mê inhma. Tirtüm na hte xatã mê ate tanhmã amnhî tomnuj to hã mê apumu nê mê anê rênh o pa. Te kot pahi kot ã

hkwÿjê nhîpêx anhÿr pyrâk. Koja mē ò pahija kām mē àpênh xwÿnhjaja kot kêp kàxpore ho ìpresta hã mē omunh kaxyw nhÿ.

²⁴ Hãmri nhÿm mē hwÿr ja ho tē nē kutã ãm. Ra kot kêp hikàxpore ho ìpresta rax xwÿnhja.

²⁵ Tã no ãm aa akupÿm kãm òr kêt nē ra kêp ho hapêx pa. Hãmri nhÿm pahija tee ri amnhÿ tã omu nē hkwÿjê mã hã amÿnê nē mē kãm: “E. Mē ma o tē nē hprô nē hkrajaja nē òrkwÿ nē hikukrêx mērohã ho wênê hpa nē hpãnhã kàxpore py nē man inhmã o tē. Kot ixpê ixkàxpore ho ìpresta nē akupÿm inhmã òr kêt mÿrapê.” Anê.

²⁶ –Hãmri nhÿm kot ho ìpresta xwÿnhhta tee ri amnhÿ tã kuma nē kutã hkônkrã ho nhÿ nē amnhÿ to hwÿr kãm hihtÿx nē kãm: “Kwa nã ri ixto anhÿr kêt nē pahшти. Ixkamã axukaprÿ nē hkêt wehe. Nã kot paj akupÿm amã kugõ kãm ga.” Anê.

²⁷ –Hãmri nhÿm amnhÿ tã kuma nē kãm hkaprÿ nē. Hãmri nē kãm: “Tôe. Nã kot paj ã anhîpêx anhÿr kêt nē. Kot paj anhõ kôt kaxôn pa nē kumê ka mãmri ma ajamakêtkati nē axãmnhÿx apa.” Anê.

²⁸ Nhÿm ã kãm kapêr anê nhÿm kuma nē hkÿnh nē. Hãmri nē ma tē nē kato nē ixkre kapem pôristi hõ pumu. Na pre ra kêp kàxpore hkwÿ ho grire nē ho ìpresta nhÿm kato nē omu. Hãmri nē hwÿr tē nē amnhÿ kÿnhã òkre hã kumÿ nē kãm: “Kwa tokyx akupÿm ate ixpê kàxpore ho ìpresta pãnhã inhmã agõ.” Anê.

²⁹ Hãmri nhÿm tee ri amnhÿ tã omu nē ra ham kot pahi kutã amnhÿ nhîpêxta pyrã nē kutã hkônkrã ho nhÿ nē kãm: “Kwa nã. Kwa ri ixto anhÿr kêt nē. Nã kot paj hpãnhã amã kugõ. Kwa ixkamã axukaprÿ nē hkêt wehe.”

³⁰ Anhÿr tã nom nhÿm kuma nē ãm kuma nē hã amÿnê. Hã hkwÿjê mã amÿnê nē mē kãm: “E mē ma jahti ho tē nē haxà. Koja kot ixpê kàxpore ho ìpresta pãnhã inhmã kugõ nē rÿ kormã kato nē rÿ amnhÿ pumu.” Anê. Hãmri nhÿm mē kuma nē ma o tē nē haxà.

³¹ –Hãmri nhÿm hkwÿjaja tee ri mar o kuhê nhÿm mē kêp ja omnuj nē nhÿm mē pahi hwÿr agjê nē kãm harê.

³² Hãmri nhÿm tee ri harênh ma nē kamã gryk tÿx nē akupÿm amnhÿ wÿr hã karõ nhÿm akupÿm hwÿr axà nhÿm kãm: “Tk. Kwa na ka pre amnhÿ tomnuj tÿx nē. Ate amnhÿ to ixwÿr nhÿm inhmã akaprÿ nē ixte anhõ kôt kaxôn nē mēnh tã

³³ ka amnhÿ kÿnhã anhîõta kamã axukaprÿ hkêt nē ri ã hipêx anê.” Anê.

³⁴ Hãmri nē kamã gryk nē hã ò pôristi mã amÿnê nhÿm mē ma o tē nē haxà. Mē kot mē hagiênh xà hã ixkre kamã apkati mē tanhmã mē kot hipêx to kaxyw nhÿm mē kãm hã amÿnê. Tanhmã mē kot hipêx to rãhã nhÿm kot akupÿm kàxpore raxta nhõr par nē rÿ kormã kator kaxyw nhÿm mē ma o tēn haxà. ã mē ujarênh kot anhÿr. Anê.

³⁵ Nhÿm pre ã Jejus mē ixte hkôt ixpa ho ixpa xwÿnhjê mã kapêr anê. Hãmri nē mē inhmã:

–Ja pyrã nē koja ixkôt mē atõ rÿ mē atõx tanhmã mē atomnuj to ka mē amnhÿ tã omu nē ãm omu nē ho ajamakêtkati kurê kumrêx nē axte kãm ajamaxpêr kêt nē. Te pahi kot mēhõ nhõ kôt kaxôn par nē axte kãm hamaxpêr kêeta pyrâk. No kot kaj mē ã amnhÿ nhîpêx anhÿr kêt nhÿm kaxkwa kamã inhõ Papaj ja hã mē apumu nē te ho pahi tee ri kot amnhÿ tomnuj xwÿnhhta kot amnhÿ nhîpêx ã omunh nē hã àmpênh nhÿm mē kot apkati mē tanhmã omnuj tota pyrâk o mē anhîpêx. Anê.

19

Jejus kot mē pahte axpên kaga nê mē pahkurê

Matêwre 5.31-32; Makre 10.1-12; Rukre 16.18; mãânên Wam Korît 7.10-16

¹ Tã nhÿm Jejus mē inhmã kapêr pa nē mē inhmã anê pa mē ixrohã Garirej rÿm ixkato nē pyhti pê Jotãw hã rê nē hpãnhã ihkjê hã ri ixpa. Pika pê Jutej kamã.

² Hãmri nhÿm mē ohtô nē Jejus pumu nē man mē ixwÿr mra nhÿm

mê omu nê mê kãm akupÿm mê à xwÿnhjê ho mex.

³ Hãmri nhùm Parijew nhõ xwÿnh kwÿjaja hwÿr mra. Hêx rom kot kamã hamak nê tanhmã ho kapêr punuj to kaxyw hwÿr mra nê kãm:

—Pa? Kwa mê inhmã mëmoj jarê. Tanhmã na pre amnepê m finat Mojesja mê pahte mê pahprõ kaga hã mê panhîgêjtê mã karõ hto? Xà kot mê pahprõ pahkwÿm ri tanhmã amnhî nhîpêx to pu mê hkaga nhùm ja Tirtùm mã mex nê nà? Anê.

⁴ Hãmri nhùm mê kãm:

—Nà na ka mê aprî hã Mojes kot tanhmã ja jarênh to mar mex kêt nê. Ja kot anhÿr kêt. Amnepê mëmoj piitã hkrax kãm na pre Tirtùm my nê nija wa hipêx. Axpên kaxyw wa hipêx.

⁵ Hãmri nê wa hkukamã tanhmã wa kot amnhî nhîpêx to hã wa harê nê wa harênh o:

Koja mëmyjaja hprõ kaxyw hãmri nê gryk ã katorxà mê hipêêxà wa hkaga nê ãm hprõ kôt pix mã pa ho pa. Te wa tipxi nê ri wa pa pyrãk o amnhî nhîpêx. Anê.

—Na pre ã Mojes Tirtùm nhÿ hã mê kãm ja jarênh anê.

⁶ Jakamã koja te wa tipxi nê ri wa pa pyrãk o axpên nhîpêx o pa. Tirtùm tãm kot axpên mã wa õr kênã kot kêt wa axtem nê ri htÿx ri hamaxpêr nê axpên kaga. Anê.

⁷ Hãmri nhùm mê kuma nê kãm:

—Tÿ. Nom finat Mojes na pre mê pakukamã mê panhîgêjtê mã ã ja hã karõ anê nê mê kãm:

Kot kaj mê aprõ kaga kaxyw hãmri nê ra kêp aprõ hkêt ã hã kaga nhîpêx nê kãm agõ nê amnhî nê hano kê ma tê.

—Anhÿr o na pre mê kãm hã karõ. Tã ka na ka mê ixte axpên kaga hkêt ã mê inhmã karõ. Anê.

⁸ Hãmri nhùm mê kuma nê mê kãm:

—Tÿ no ãm mê kãm Tirtùm kapêr kôt amnhî nhîpêx prãm kêt jakamã na pre ã mê kãm ja jarênh anê. No amnepê mëmoj piitã hkrax kãm na prem ã amnhî nhîpêx anhÿr o pa hkêt nê.

⁹ Jakamã kêr ka mê aprõ kaga hkêt nê apa. Kot kaj mê hkaga nê hpãnhã nhãm mëhõ ho aprõ nhùm Tirtùm noo mã te ate wam aprõ kamã nhãm aprõ nyw o amnhîkati pyrãk. Tirtùm pê ja omnuj tÿx nê. Rÿ koja mëhõ hprõ kaga ka hpãnhã ho aprõ nhùm Tirtùm noo mã te ate wam mjên pê ho amnhîkati pyrãk. Ja mãânên Tirtùm pê omnuj tÿx nê. Anê.

Nhùm pre ã Parijew nhõ xwÿnhjê mã kapêr anê.

¹⁰ Hãmri pa mê ixte hkôt ixpa ho ixpa xwÿnhjaja ã kapêr anhÿrja ã kuma nê kãm:

—Xà na hte mê mjên ra kãm mê hprõ hkînh kêt tã hkaga hkêt nê arî hkôt pa ho pa nhùm hte Tirtùm mã ja mex nê nà? Jakamã kwa xà kot paj mê nhÿrmã ixprõ kaga pymaj ixprõ hkêt kumrêx nê ixpa ho ixpa nhùm ja mê inhmã mex nê nà? Anê.

¹¹ Hãmri nhùm mê inhmã:

—Nà ãm hãmri na ka mê ja jarê. No mê ate harênhja na mê piitã mê kãm mex kêt. Koja Tirtùm tãm amã aprõ hkêt ã ajarê ka rî aprõ hkêt nê ahte ajamakêtkati nê ri apa.

¹² Na htem piitã hprõ nê pa hkêt nê. Na hte kamã tanhmã mê kute xwÿnhjaja kormã hprîre ri tanhmã kute mÿrapê kãm hprõ hprãm kêt nê pa.

Nê kamã tanhmã mê ho mÿrapê nhùm mê hkurê hkêt nê hprõ hkêt nê pa.

Nê kamã mê kãm Tirtùm mã tanhmã amnhî to ho pa pix prãm xaj kãm hprõ hprãm kêt nê pa.

Tã kot kaj mê jajê pyrã nê ã amnhî nhîpêx anhÿr prãm nê rî kam nê aprõ hkêt nê apa. Anê.

Jejus kot amnhî nê mëhprîjê janor kêt ã harênh

Makre 10.13-16; Rukre 18.15-17

¹³ Tã nhùm Ijaew kwÿjaja Jejus pumu nê hwÿr mê hkrarejê jamÿ nê mê o mra. Kot mê hã ìhkra jaxwÿr nê mê ho Tirtùm wÿr kaxyw hwÿr mê o mra. Hãmri pa mê ixte hkôt ixpa ho ixpa xwÿnhjaja tee ri mê omu nê

tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wÿr mẽ o mra? Kormã mẽ ràxre kênã. Kwa mẽ ma akupÿm mẽ o mra nà? Anê.

¹⁴ Hãmri nhũm Jejus mẽ inhma nê mẽ inhmã:

—Kwa nà mẽ ri inhnê mẽhprÿjê kurê hkêt nê. Kwâr mẽ mãmri ixwÿr mẽ o mra. Anê.

Hãmri nê amnhÿ wÿr mẽ mẽ kãm hpa ho apê nhũm mẽ hwÿr mẽ o mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkÿnh nê ri pa. Nê mẽ kãm amnhÿ to rÿnh prãm kêt nê. Tã Tÿrtũm kôt mẽ kot amnhÿ nhÿpêx o mẽ pa xwÿnhjaja te mẽ kot jajê pyrãa nê kãm amnhÿ to rÿnh prãm kêt nê pa. Anê.

¹⁵ Hãmri nê mẽ hã ïhkra jaxwÿ nê mẽ ho Tÿrtũm wÿ hãmri nê mẽ inhmã anê pa mẽ ma axte mẽ kurũm mō.

Kàxpore rÿnh xwÿnh jarênh

Makre 10.17-22; Rukre 18.18-23; mãânên Rômân 3.19-20; Wam Ximotre 6.6; Xiakre 2.10

¹⁶ Tã nhũm Ijaew òja Jejus wÿr tẽ nê kãm:

—Pa mẽ ijahkre xwÿnh? Kwa inhmã mẽmoj jarê. Tanhmã kot pa nhÿrmã Tÿrtũm ri ixtÿr tũm nê ixpa ho ixpa kaxyw amnhÿ nhÿpêx to wehe? Anê.

¹⁷ Hãmri nhũm kãm:

—Tk. Ra Tÿrtũm kot nhÿrmã mẽ atÿr tũm nê apa kaxyw mẽmoj tã mẽ amã karō nhũm ate mar mex kênã kot ka kêt ri axte ja hã ixkukja. Nà Tÿrtũmja mex o mex jakamã kot kaj amã kuri atÿr tũm nê apa hprãm hã kot kaj kapêr kôt amnhÿ nhÿpêx no ri apa. Anê.

¹⁸ Hãmri nhũm kãm:

—No nhÿ kapêr kôt kot paj amnhÿ nhÿpêx o ri ixpa wehe? Anê.

Hãmri nhũm kãm:

—Na pre mẽ amã mẽmoj tã karō ho: Kêr ka mẽ axpên par kêt nê.

Nê nhãm mẽ hprō ho amnhÿkati hkêt nê.

Nê mẽ kêp axàhkÿnh kêt nê.

Nê tanhmã mẽ ho axêx to hkêt nê.

¹⁹ Nê anhÿpêxã mẽ akatorxã wa hã apijaãm nê wa ho mex pê wa kutã anojarêt o ri apa.

Nê amã akwÿjê hã ma ho te ka amã amnhÿ tã ma pyrãk o mẽ hipêx. Jao tãm mẽ hipêx o ri apa.

E kot kaj amã nhÿrmã Tÿrtũm kuri atÿr tũm nê apa hprãm hã kêr ka ã amnhÿ nhÿpêx anhÿr o ri apa. Anê.

²⁰ Hãmri nhũm kuma nê kãm:

—Ku nhũm. Ra ã ixte amnhÿ nhÿpêx anhÿr o ri ixpa kênã. Nom te kormã ixtÿr tũm nê ixpa kaxyw ixte tãm kêt pyrãk. Kwa axte inhmã mẽmoj jarê nà? Anê.

²¹ Hãmri nhũm kãm:

—Nà kormã mẽmoj pyxi nê arÿk. Na ka amã akukrêx rax prãm tÿx o amã Tÿrtũm prãm jakre. Jakamã ma akupÿm tẽ nê akukrêx rax o wênê hpa nê hpãnhã kàxpore jamÿ nê ma mẽ kêp amrakati xwÿnhjê mã òr pa. Hãmri nê rÿ akupÿn ixwÿr tẽ nê rÿ ixkôt apa ho apa. Anê.

²² Hãmri nhũm kuma nê tee ri amnhÿ kukamã hamaxpêr. Kãm hikukrêx rax japê nê kãm kamã ïhkra karo hprãm kêt nê. Hãmri nê tee ri Jejus kot ã kãm hã karō anhÿrja ma nhũm ja kêp omnuy nê nhũm ma akupÿm htêm kurê kumrêx.

²³ Hãmri nhũm Jejus tee ri omu nê mẽ inhmã:

—Hêxta waa nê. Kojã mẽ hikukrêx rÿnh xwÿnhjaja ohtō nê kãm mẽ hikukrêx japê xàj Tÿrtũm mẽ wa ixri htÿr tũm nê pa ho pa hkêt nê. Wa ixte amnhÿ nhÿpêxja mẽ kêp hihtÿx.

²⁴ Mẽ kãm hikukrêx rÿnh mã ïhkra karo hprãm kêt rãhã tee ri kãm Tÿrtũm kôt amnhÿ nhÿpêx prãm kaprÿ. Te ho mẽhō kot menh kagō hã hkre nê kãm kagō katōk prãm kêt rãhã kãm guhkrax kãm àr prãm kaprÿta pyrãk. Anê.

Nhũm pre ã Jejus mẽ inhmã kapêr anê.

²⁵ Hãmri pa mẽ kuma nê tee ri amnhÿ kukamã ijamaxpêr nê kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot

paj mẽ ixpiitã nhỹrmã war ari ixtĩr tũm nẽ ixpa ho ixpa hkêt nẽ nã? Anẽ.

²⁶ Hãmri nhũm mẽ inhmã:

—Nã kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nẽ. Jao ra mẽ apê Tĩrtũm mẽ wa ixri atĩr tũm nẽ mẽ apa ho mẽ apa mã xwỳnh. Anẽ.

²⁷ Hãmri nhũm Simãw Pêtre kãm:

—Kwa no we mẽ pajaja Pahihtĩ? Na pa prem agryk ã mẽmoj piitã hkaga hpa nẽ akôt ixpa ho ixpa. Jakamã kot paj mẽ nhỹrmã war ari ixtĩr tũm nẽ ixpa ho ixpa nã? Anẽ.

²⁸ Hãmri nhũm kuma nẽ mẽ ixpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri nẽ ixte mẽ ho amnhĩptãr o ixkrĩ xà maati kamã nhỹ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwỳnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpỳnhã tanhmã inhmã mẽ harênh to. Mẽ mex ã mẽ harê rỳ mẽ mex kêt ã mẽ harê. Kot kaj mẽ ã inhmã mẽ harênh anẽ. ãm hãmri na pa mẽ amã ixkapêr anẽ.

²⁹ —Nẽ ka mẽ atõ inhmã tanhmã amnhĩ nhĩpêx to ho apa kaxyw akwỳjê re nẽ ma inhmã mẽmoj to anhỹr o ri apa. Tanhmãnh anhõrkwỳrỳ atõ rỳ atõx re. Rỳ aprõ nẽ akrajê re. Rỳ akatorxã mẽ anhĩpêxã war are. Rỳ akukrêx piitã rer pa hãmri nẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nẽ mẽ ato mex rax nẽ. Hãmri ka mẽ ma mẽ hkôt apa nẽ mẽ kãm ixkapêr jarênh o apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx nẽ mẽ ato mex o pa. Hãmri ka mẽ nhỹrmã ty nẽ ma Tĩrtũm mẽ wa inhõ krĩ hwỳr api nẽ wa ixkuri amex kumrêx nẽ atĩr tũm nẽ apa ho apa.

³⁰ Nom kwa kêr ka mẽ amnhĩ tã ja ma nẽ amnhĩ to rũnh xwỳnh ã amnhĩ kamnhĩx kêt nẽ. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

20

Jejus kot nhỹrmã hkrajê ho mex ã harênh

Rõmãn 9.14-16

¹ Nhũm Jejus arĩ mẽ ixte hkôt ixpa ho ixpa xwỳnhjê mã awjarê nẽ mẽ inhmã:

—Nẽ kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyrãk o mẽ anhĩpêx. Koja pur nhõ dõnja ihpur kãm mẽmo xõ ra hkã hpa nhũm omu hãmri nẽ kaxyw mẽ ãpênh xwỳnhjê japêr kaxyw ma gãm tẽ. Nẽ gáp xa nẽ mẽ kãm akir nhũm mẽ hã akuprõ.

² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axãpênh o amỹkry pa hpãnhã mẽ kot apkati pixi hã mẽ ãpênh pãnhã mẽ kãm amnhĩrer xãja kôt mẽ amã amnhĩre.” Anẽ hãmri nhũm mẽ kuma nẽ kãm: “Tõe. Nã kot paj mẽ amã apê.” Anẽ nhũm pur wỳr mẽ kurê nhũm mẽ ma kãm ãpênh mã mra.

³ —Tã nhũm arĩ kỳx mã myt tẽ nhũm pur nhõ dõn akupỹm gãm tẽ nhũm mẽ hkwỳja arĩ kuhê.

⁴ Nhũm tee ri mẽ omu nẽ mẽ kãm: “Kwa mon ka mẽ axãpênh kêt nẽ arĩ akuhê? E. Mẽ ma wamtajê hkôt mra nẽ inhmã apê pa hpãnhã mẽ amã amnhĩrer mex nẽ.” Anẽ.

⁵ Hãmri nhũm mẽ kuma nẽ ma mẽ hkôt mra. Tã nhũm ra myt kaxkwa nhĩpõk ri ajêt nhũm hpur nhõ dõnja mã hkwỳjê ho anẽ nẽ. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gãm tẽ nẽ mã mẽ ho anẽ nẽ axte mẽ hkôt jajê rẽ.

⁶ —Tã nhũm ra myt grire nhũm ma akupỹm kêwe gãm tẽ nẽ jajê pumu

nhũm kê wem arĩ gáp kuhê. Hãmri nhũm tee ri mẽ omu nê mẽ kãm: “Kwa mon ka mẽ axápênh kêt nê atỳx gáp akuhê ho akuhê?” Anê.

⁷ Hãmri nhũm mẽ kãm: “Nà mẽhõ kot mẽ inhmã mẽ ixápênh ã karõre hã.” Anê. Hãmri nhũm mẽ kãm: “Tõe. Mẽ ma mẽ hkõt ixpur wỳr mra nê inhmã mãn apê.” Anê hãmri nhũm mẽ kuma nê ma hkwỳjê hkõt mra.

⁸ –Tã nhũm ra kamàt. Hãmri nhũm hpur nhõ dõnja kãm àpênh xwỳnhjê krãhtũm wỳr tẽ nê kãm: “E. Ma mẽ hwỳr tẽ nê mẽ kãm anê kê mẽ àpênh kaga nê man akõt mra ka inhmã mẽ kãm amnhĩre. Nom kêr ka hapu hã mẽ mõi xwỳnhjê kumrêx mã amnhĩre nê wam mẽ mõi xwỳnhjê ho hapu nê mẽ kãm amnhĩre.” Anê. Hãmri nhũm kãm: “Tõe. Nà kot paj mẽ ho anê.” Anê.

⁹ Hãmri nê ã mẽ kãm amnhĩrer anê. Hapu hã mẽ mrar xwỳnhjê kumrêx mã amnhĩre. Te mẽ kot kwỳhtã àpênh o amỳkry pyræk o nhũm hpãnhã mẽ kãm amnhĩre.

¹⁰ Hãmri nhũm wam mẽ mrar xwỳnhjaja ja hã mẽ omu nê hkĩnh nê. Hãmri nê htỳx hamaxpêr o: “Nà kot paj xep kàxpore jamỳnh rax o mẽ hakre. Ixápênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpênh pyræk. Ra pur nhõ dõn kot kãm hã karõ xà hkõt.

¹¹ Hãmri nhũm mẽ hamỳ nê tee ri hkre kamã omu nê we ra hpur nhõ dõnja kamã gryk nê.

¹² Hãmri nê hwỳr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwỳhtã ixápênh rax o kamàt. Arĩgro htỳx kãm ixápênh o ixãm o ixtã kamàt tã ka pêr ãm mẽ inhmã amnhĩrer o axpênh pyræk. Kwa na ka mẽ ixtomnuj nê.” Anê.

¹³ Hãmri nhũm mẽ kuma nê mẽ kãm: “Tk. Nà na pa mẽ atomnuj kêt nê. Na pa kwỳhtã tanhmã mẽ amã amnhĩrer to xà jarê ka mẽ inhma nhũm ja mẽ amã mex nê ka mẽ ma hwỳr axápênh mã mra.

¹⁴ Kwa mẽ akàxpore jamỳ nê ma mra. ãm pa inhmã hprãm xà hkõt na pa ã mẽ amã amnhĩrer anê.

¹⁵ Ixkàxpore jakamã kot paj nhãm inhmã mẽhõ mã õr prãm xà hkõt kãm kugõ. Tã ka mẽ ã mẽ hã ixkamã agryk anê. E mẽ akàxporeja mỳ nê ma mra.” Anê. Nhũm ã hpur nhõ dõn mẽ kãm kapêr anê. ã mẽ ujarênh kot anhỳr. Anê.

¹⁶ Nhũm pre ã Jejus mẽ inhmã ujarênh anê nê mẽ inhmã:

–Ja pyrã nê wam mẽ ate ixkõt amnhĩ xunhwỳr xwỳnhjaja nê hapu hã mẽ kot kormã ixkõt amnhĩ xunhwỳr mã xwỳnhjaja kot paj nhỳrmã mẽ apiitã mẽ ato mex kumrêx o axpênh pyræk. Anê.

Jejus kot htyk kukamã amnhĩ jarênh

Makre 10.32-34; Rukre 18.31-34

¹⁷ Tã nhũm Jejus mẽ inhmã anê pa mẽ ixrohã ma Jerujarê hwỳr mõi. Mẽ ohtõjê hkõt mõi. Hãmri nhũm Jejus mẽ ixpê 12jê mã anê nê mẽ ixkwỳjê hkax ã mẽ inhmã kapêr kaxyw ahte hapu hã mẽ ixto mõi.

¹⁸ Hãmri nê mẽ inhmã amnhĩ kukamã tanhmã amnhĩ jarênh to nê mẽ inhmã:

–E na pu mẽ ra Jerujarê hwỳr mõi. Kamã koja mẽ pahkwỳjaja inhĩpêx kati nê. Koja mẽ patre krãhtũmjê mẽ Mojes kapêr o mẽ ahkre xwỳnhjê nhĩhkram ijaxà nhũm mẽ kot ixpĩr kaxyw ixtã amỳnê.

¹⁹ Koja mẽ kãm ixkurê xwỳnhjaja ixpynê nê Rõm nhõ xwỳnhjê nhõ põristijê hwỳr ixto tẽ nê mẽ kãm tanhmã ixto hêx to. Hãmri nhũm mẽ kuma nê mẽ mar xà hkõt tanhmã inhĩpêx to. Nhũm mẽ hkwỳjaja ixtã hpêr o axkê nê ixtã akunha nhũm mẽ hkwỳjaja ixto kapêr punuj nê tanhmã ijapry hto nê ixtak. Hãmri nê ma ixto tẽ nê pĩ kahpa hã inhõ nê ixpĩ. ã koja mẽ inhĩpêx anê. Nom kot paj ixtyk ã ixtã apkati axkrunêpxi nhũm Tĩrtũm akupỳm ixto ixtĩr. Anê.

Xiakre mẽ Juãw wa katorxà kot wa ho Jejus wỳr ã harênh

Makre 10.35-45; mããnnênh Rõmãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰Tã nhũm Jepetew prōja amnhĩ kôt Jejus wỳr hkra Xiakre mẽ Juãwja wa o tẽ. Kot wa ho Jejus wỳr kaxyw hwỳr wa o tẽ. Mẽ ixpyrà nẽ wa kot Jejus kôt pa ho pa xwỳnhjê hõ na pre wa nhũm wa katorxàja Jejus wỳr wa o tẽ. Hãmri nẽ kutã hkõnkrã ho tẽm nẽ nhỹ

²¹nhũm kãm:

—Pa mo na? Anẽ.

Hãmri nhũm kãm:

—Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhĩjê nẽ wa kêp anhõ kôwenatô nẽ akutã anhĩjê nẽ wa ato nhỹ. Ja prãm xàj na pa ã wa ho awỳr anẽ. Anẽ.

²²Hãmri nhũm kuma nẽ Xiakre mẽ Juãw wa omu nẽ wa kãm:

—Nà na war akatorxàja htỳx ã war ato ixwỳr anẽ. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kãm ijamak kãm ty. Anẽ.

²³Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkôt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkô hã nhỹ. No pa kot paj amnhĩ kaxyw mẽhõ jarênh kêt nẽ.

Anhỹr o wa kãm kapêr.

²⁴Hãmri pa mẽ ixte wa uràk nẽ Jejus kôt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpên mã ixkapêr o:

—Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptàr kêt kumrêx. Anẽ.

²⁵Nhũm Jejus mẽ inhma nẽ amnhĩ wỳr mẽ ixpiitã mẽ inhmã hpa ho apê nẽ mẽ inhmã:

—E mẽ amnẽ ixwỳr axkamẽ pa mẽ amã awjarẽ mãn. Anẽ.

Hãmri pa mẽ hwỳr axkamẽ nhũm mẽ inhmã:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa.

²⁶⁻²⁷Tã no mẽ kajaja. Kêr ka mẽ ho mẽ uràk kêt nẽ. ãm te amarĩ ri mẽ apa pyràk o axpên nhĩpêx o ri apa. Nẽ te mẽ apê mẽ kãm axàpênh xwỳnh pyràk o amnhĩ nhĩpêx o ri mẽ hkôt apa. No kêr ka mẽ ho amnhĩptàr mã ajamxpêr o ri apa hkêt nẽ.

²⁸Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwryk kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkôt amnhĩ xunhwỳr xwỳnhjê nẽ ixtyk kaxyw na pa pre wrỳ. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹Tã pa mẽ Jejus kôt kormã Jeru-jarẽ hwỳr ra Jeriko htêp o mõ. Hãmri nẽ kurũm ixkaton mõ nhũm mẽ ohtô nẽ mẽ ixkôt mra.

³⁰Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtô nẽ Jejus kôt mẽ mrar xwỳnhjê mrar ma nẽ mẽ kãm:

—Kwa mo na? Mẽmoj wỳr na ka mẽ axohtô nẽ mra? Anẽ.

Hãmri nhũm mẽ wa kãm:

—Nà Jejus pẽ Najare nhõ xwỳnhhta kôt na pa mẽ mra. Anẽ.

Hãmri nhũm wa mẽ kuma hãmri nẽ kax pẽ Jejus mã kapêr nẽ kãm:

—Pa Pahшти? E apê mẽ inhõ Pahшти mex na ka. Te apê amnepêem anhĩgêt pahшти Tawita pyràk. Jakamã kwa

wa ixkamã axukapri nê akupÿm wa ixto mex. Anê.

³¹ Hãmri nhũm Jejus kôt mē mōr xwÿnhjaja wa kuma nê wa kãm:

—Tk. Kwa war akapêr kêt nê nhÿ nà. Anê.

Tã no nhũm wa ãm mē kuma nê xatã amnhĩ to kuwÿ. Kax pē amnhĩ to kuwÿ.

³² Hãmri nhũm Jejus wa kuma nê xa nê wa omu nê wa kãm:

—Pa mo na? Tanhmã kot pa wa ato? Anê.

³³ Hãmri nhũm wa kãm:

—Nà akupÿm wa inhmã wa ixrit mex prãm. Anê.

³⁴ Hãmri nhũm kãm wa hkapri nê wa no htok nhũm wa akupÿm rit mex kurê kumrêx. Hãmri nê rit mex ã amnhĩ pumu nê hkĩnh tÿx nê ma Jejus kôt hkwÿjê hkôt mō.

21

Jejus kot Jerujarê hwÿr àr ã harênh Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarê hwÿr kormã mō. Pa mē hkôt mō nê ra Petake hwÿr ixãhtêp o mō. Hixêt pē Oriwêhti kahti ri na pre krĩja xa. Jakamã pa mē wa hwÿr ixãhtêp o mō nhũm Jejus mē ixte hkôt ixpa ho ixpa xwÿnhjê wa ho axkrut nê amnhĩ kukamã wa kumê.

² Nê wa kãm:

—E wa ma krĩ mũj wÿr mē ixkukamã wa tē. Nê wa hwÿr axà nê nhÿri jumênre mē hkra wa kãm ê nê wa ãm xwÿnh wa omu hãmri nê kãm ê xà hpôt nê man akupÿn amnê hamê wa o tē.

³ Kojã mēhō ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nà mē panhō Pahihiti na hã karō pa wa hwÿr tē.” Anhÿr o wa kãm ijarê. Hãmri nhũm war ama nê war amã òr kurê kumrêx. E wa ma hwÿr tē. Anê.

⁴ Tirtũm kapêr ã kagà htũm ra kot ja kukamã harênh. Na pre ra Tirtũm nhÿ hã kapêr xwÿnhjê hō ja jarê nê hã kagà ho:

⁵ Pa Jerujarê nhō xwÿnhjaja. Kwa mē tee ri amnhĩ kukamã ajamaxpêr ho amã ma hkêt nê. Ota mē anhō pahi nywta ra jumênre hã nhÿ nê mē awÿr hpôx o tē. Te kot amnhĩ to grire xwÿnh pyrãk o amnhĩ nhĩpêx nê tē.

⁶ Anhÿr o kot hkukamã harênh jakamã nhũm Jejus amnhĩ kukamã ja wa kumê hãmri nhũm wa ma hwÿr htêm kurê kumrêx.

⁷ Nê krĩta wÿr pøj nhũm Jejus kot wa kãm harênh xà hkôt nhũm wa jumênreta pumu. Hãmri nê hamê wa kãm ê xà hpôt nê ma Jejus wÿr wa o tē. Hãmri nê kaxyw amnhĩ xê hkwÿ hkwÿr nê kãm ho jumênre nywta kō kahty. Nê kãm ho htÿx nê o xa nhũm Jejus hã nhÿ nê hã mō.

⁸ Kormã Jerujarê hwÿr hixêt ã àpir o mō. Nhũm mē kot omunh o kuhê xwÿnhjaja hkĩnh nê ma hkukamã pry ho mex kaxyw amnhĩ xê hkwÿptyr ho mō. Nê pō hkwÿ jakà nê utyr o mō.

⁹ Nhũm mē hkwÿjaja Jejus kukamã mra nhũm mē hkwÿjaja hapu hã hkôt mra. Nê piitã kax pē Tirtũm mex o mex ã harênh o hkôt mō nê harênh o:

Ota Tirtũm kot mē pahwÿr mēnh xwÿnhhta ra pøj. ãm hãmri na mē pahwÿr wrÿ. Ja na mex kumrêx. Kêp mē panhō Pahihiti mex na. ãm hãmri na pre Tirtũm mē pahwÿr kumê. Tirtũm mex kumrêx. ãm mex o mex.

Anhÿr o Jejus kôt Jerujarê hwÿr harênh o mō. Kot mē ho amnhĩptar kurê kumrêx ã hkamnhix jakamã hkĩnh nê hkôt ã harênh anhÿr o mō.

¹⁰ Hãmri nhũm krĩ nhō xwÿnhjaja tee ri mē kuma nê axpên mã:

—Kwa mēhō na we hpôx o mō nhũm mē ã hkôt harênh anhÿr o mō? Anê.

¹¹ Hãmri nhũm Jejus kôt mē mrar xwÿnhjaja mē kuma nê mē kãm:

—Nà Tirtũm nhÿ hã kapêr jarênh xwÿnh pē Jejus na. Kêp Garirej kamã krĩ pē Najare nhō xwÿnhhta na. Anê.

Jejus kot Tirtûm nhôrkwÿ hwÿr àr ã harênh

Makre 11.15-19; Rukre 19.45-48; Juãw 2.13-22

12-13 Tã hãmri nhũm Jejus Jerujarê wÿr axà nê jumênre rũm wrÿ nê ma Tirtûm mã amnhĩ jarênh xà hã ixkre hwÿr tẽ nê axà. Hãmri nê tee ri mē kot tanhmã ixkre kamã amnhĩ nhĩpêx to hã mē omunh o xa. Nhũm mē axtem nê môx nê ôwêhti nê tuuti ho wênê ho kuhê. Mē kot haprôr nê Tirtûm mã amnhĩ jarênh kaxyw kãm hpar nê ôr kaxyw mē kãm ho wênê ho kuhê. Nom axtem nê mē kãm hã ohtô rax kãm mē kãm ho wênê. Hãmri nhũm Jejus mē hwÿr axà nê tee ri mē omu nhũm ja kêp omnuj tÿx kumrêx. Hãmri nhũm mē hwÿr tẽ nê mē kot kàxpore ho pinhpanh xwÿnhjê pê mē ô mêsti rênh pa. Nê mē kot tuuti ho wênê xwÿnhjê pê hkrĩ xà hkujate nê rênh pa. Hãmri nê mē kãm:

—Tk. Kwa Tirtûm kapêr ã kagà htũm kot ixkreja jarênh kot:

Inhôrkwÿja ãm mē ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mē axtem nê kamã ã amnhĩ nhĩpêx anê. E kwa mē ajapôx tokyx anê. Anê.

Hãmri nê mē kator pa nhũm mē ma hapêx.

14 Hãmri nhũm mē no hkre xwÿnhjaja nê mē hyk o mē pa xwÿnhjaja mra nê agjê nê Jejus kutã kuhê nhũm mē omu nê akupÿm mē ho mex.

15-16 Hãmri nhũm mēhprĩ hkwyjaja hwÿr mra nê kuri kãm mex o mex ã gre nê kãm grer o:

Amex kumrêx Pahшти.

Tirtûm na pre mē ixwÿr amê.

Kot kaj te anhĩgêt Tawi pyrã nê mē ixto amnhĩptãr o apa.

Anhÿr o kãm grer o kuhê. Hãmri nhũm patre krãhtũm mē Tirtûm kapêr tũm o mē ahkre ho mē pa xwÿnhjaja tee ri ã mē grer anhÿr ã mē kuma. Nê tee ri Jejus kot mē no hkre xwÿnhjê mē mē hyk o mē pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mēhprĩjaja mē grer kãm ã ajarênh anê ka mē mar kêt nê? Mē grerja mexti hã. Anê.

Hãmri nhũm mē kãm:

—Tÿ ixte mē mar kênã. Tirtûm kãm hprãm xà hkôt na mē ã inhmã inhmex o inhmex ã ixtã grer anê. Tirtûm kapêr ã kagà htũm kot ã mē hkukamã harênh kot anhÿr. Mē harênh kot:

Koja mēhprĩjaja Pahшти mã mex o mex ã grer o kuhê.

Anhÿr o kot mē hkukamã harênh kênã. Tã mãn ka mē kormã kamã harênh kêt jakamã na ka mē ja jarênh mar kêt nê. Kwãr mē mãmrĩ ã inhmex ã grer anê.

17 Anhÿr o mē kãm kapêr hãmri nê mē inhmã anê pa mē ixkreta rũm ijapôj nê ma akupÿm Petãn wÿr mra nê kamã amnhĩm hikra.

Jejus kot mēmo hpãr mã kapêr ã harênh

Makre 11.12-14; mããnnê Xiakre 1.6

18 Tã nhũm kwÿhtã nhũm Jejus kãnhmã nhÿ nê mē inhmã anê pa mē ixrohã ma akupÿm Jerujarê hwÿr mra. Hãmri nê kormã mō nhũm Jejus pry kahti ri ra kãm prãm nê.

19 Hãmri nê mēmo pĩ pê fikêhti jarênhja pumu nê kot ô hkwy rênh nê hkrêr kaxyw hwÿr mât. Hãmri nê tee ri ô japêr nhũm ô hkêt nê ãm hô hpix harir. Hãmri nhũm tee ri omu nê kãm:

—E kot kaj axte axô hkêt kumrêx.

Anhÿrja o nhũm grã par kurê kumrêx.

20 Hãmri pa mē ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhĩ nhĩpêx to nê grã kurê kumrêx? Anê.

21 Nhũm mē inhmã:

—Nã kot kaj mē ixpyrã nê fikêhti kot tanhmã amnhĩ nhĩpêx to kaxyw Tirtûm mã ajamaxpêr tÿx nê nhũm amã hprãm xà hkôt amã tanhmã hipêx to. Nom kêr ka mē ajamaxpêr kati ho tee ri hkukamã ajamaxpêr kêt nê. ãm kaxyw Tirtûm kôt ajamaxpêr tÿx nê nhũm mē amã tanhmã mēmoj nhĩpêx to. ãm hãmri na pa mē amã ja jarê. No ãm ja pix kêt. Kot kaj mē

määnên hixêt mûj mã akapêr nê kãm: “E anhÿr xàta rûm akato nê ma tẽ nê gô rax kãm mrõ.” Anê nhũm amar xà hkôt ã amnhĩ nhĩpêx anê.

²² —Nê kot kaj mẽ mẽmoj tã Tĩrtũm wÿ nê kaxyw kãm ajamaxpêr tÿx kãm hã awÿ nhũm amã mẽmoj prãm xwÿnhãtã gõ. Anê.

Mêhõ nhÿ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhũm arĩgro hõ hã nhũm Jejus kêwe axte Tĩrtũm mã amnhĩ jarênh xà hã ixkreja wÿr axà nê kamã mẽ ahkre ho nhÿ. Mẽ kãm tanhmã mẽ kot amnhĩ nhĩpêx to nê nhÿrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhÿ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwÿr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarê. Mêhõ nhÿ hã na ka hte ã amnhĩ nhĩpêx anhÿr o apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nã? Anê.

²⁴ Hãmri nhũm mẽ kãm:

—Nã kot pa ixkumrêx mẽmoj tã mẽ akukja. Kã mẽ inhma nê tanhmã inhmã harênh to pa rĩ kormã mẽ amã amnhĩ jarê.

²⁵⁻²⁶ Finat Juãw Paxis ã kot paj mẽ akukja. Mêhõ nhÿ hã na pre hte mẽ hkrã kumrãr o pa? Xà amnhĩ krã hkôt nã? Xà Tĩrtũm nhÿ hã? E mẽ atõ inhmã ja jarê. Anê.

Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr pê axpên pumunh o kuhê nê axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwÿnhjaja na htem kêp Tĩrtũm nhÿ hã kapêr jarênh xwÿnh ã harê. Tã kot puj mẽ kãm kot amnhĩ krã hkôt kot mẽ hkrã kumrãr ã harê nhũm mẽ tee ri mẽ pama nê mẽ pakamã gryk tÿx nê. Nê mẽ paxêx rom ã mẽ pahte kãm pakapêr anhÿr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhÿ hã kot

mẽ hkrã kumrãr ã harê hãmri nhũm mẽ pamã: “Kwa ã kot anhÿr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprÿ o kuhê.

²⁷ Hãmri nê kãm:

—Konên. Mẽ ixte mêhõ nhÿ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tôe kot pa xep ijaxwÿja mẽ amã tanhmã amnhĩ jarênh to hkêt nê. Ijaxwÿja ixte mêhõ nhÿ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anê.

Mêhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm:

—E pa mẽ amã awjarê ka mẽ inhma. Kojã mêhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã pur kãm apê.” Anê.

²⁹ Hãmri nhũm kuma nê pur mã htêm kaga nê hitôt nê. Tãã no ãm hã ahtũmre nê tanhmã hamaxpêr to hãmri nê ma hwÿr tẽ nê kamã ãpênh o xa.

³⁰ Hãmri nhũm wa hipêêxãja hpãnhã hkra kot hapu hwÿr tẽ nê mã kãm kapêr anê nê kãm: “E kêr ka ajaxwÿja atõ hkôt tẽ nê wa inhmã apê.” Anê nhũm kuma nê kãm: “Tôe. Nã kot paj ma tẽ.” Anhÿr tã no ãm hõta kĩnhã htêm kêt nê.

³¹ —Jakamã e. Nhÿ hkra na pre hipêêxã kapêr ma nê hkôt amnhĩ nhĩpêx nê kapêr nhĩrôp ãm kêt nê? Xà kot waja nã? Xà kot haputa? E mẽ atõ tanhmã inhmã wa harênh to. Anê.

Hãmri nhũm mẽ kuma nê kãm:

—Nà kot wata. Kot wata na hitôt tâ tanhmã hamaxpêr to nê ma tẽ nê kãm apê. Anê.

Hãmri nhũm mẽ kãm:

—Tỳ ãm hãmri na ka harê. No mẽ kajaja te mẽ ate hkra kot haputa kot amnhĩ nhĩpêx pyræk. Mẽ ate Tirtũm kapêr kôt amnhĩ nhĩpêx o apa hã amnhĩ jarênh tâ hkwým ri amnhĩ nhĩpêx o apa. Te mẽ ate kot hapu kot hipêêxã mã àpênh ã amnhĩ jarênh tâ kãm àpênh kêeta pyræk. No kêt mẽ kot amnhĩ tomnuj o mẽ pa xwýnh kwýjaja na mẽ arom Tirtũm kapêr ma nê hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwýr pa kaxyw ra tãm nê. ãm hãmri na pa mẽ amã ixkapêr.

³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nê ãm ama nê aa kapêr kôt amnhĩ nhĩpêx kêt nê. Nom mẽ kot amnhĩ tomnuj o mẽ pa xwýnh kwýjaja mẽ arom kuma nê Tirtũm kôt amnhĩ nhĩpêx. Ka mẽ ja hã mẽ omu nê ãm mẽ omu nê mẽ uræk nê ã amnhĩ nhĩpêx anhýr kêt nê. Anê.

*Mẽ àpênh punu xwýnhjê jarênh
Makre 12.1-12; Rukre 20.9-18*

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tâ kuxi nê mẽ kãm awjarê nê mẽ kãm:

—Koja mēhõ mẽ kot kãm pur kãm àpênh kaxyw hkwýjê mã karõ nhũm mẽ ma hwýr mra nê kamã mẽmo hy hkre nê hkre pa. Hãmri nhũm hpur nhõ dõn nhỹhỹm nojarêr nê kãm mẽ àpênh xwýnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamýnh pa nê ho axkjê. Nê ixkutêp inhmã inhõ jaxwý nê mãmrĩ anhõ tanhmã ho hprãm xà hkôt tanhmã ho.”

—Anhýr o mẽ kãm kapêr hãmri nê ma nhỹhỹm mẽ.

³⁴ Tã nhũm ra pur kãm mẽmoj hkã pa nom nhũm hpur nhõ dõn arĩ krĩ

hõ kamã hã ujahkre ho ri pa htã kuri kãm àpênh xwýnhjê ho axkrunêpxi nê akupým mẽ hwýr mẽ kurê. Mẽ kot mẽ kãm hkwý nhõr nhũm mẽ ma kot kãm o mõr kaxyw nhũm ma mẽ hwýr mẽ kurê.

³⁵ Nhũm mẽ ma hwýr mẽ. Mõõ nê ra hwýr pøj nhũm mẽ amnhĩ wýr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hõja nhũm mẽ kên o htak hãmri nê amnhĩ nê wa hano nhũm wa ma akupým ý kamã mẽ.

³⁶ Hãmri nhũm mẽ õ patrãwja tee ri wa omu nê hamaxpêr o: “Kwa nà na mẽ ixpê inhmã mẽ àpênh xwýnhjê homnuj tỳx nê. Nà kot paj axte mẽ hwýr mẽ hkwýjê rê. Nom hpãnhã mẽ ho ohtô nê mẽ kurê. Kê mẽ ohtô nê mẽ hwýr mẽ mẽ mẽ inhmã inhõ hkwý jamý nê man ixwýr o mẽ.”

—Anhýr o hamaxpêr hãmri nê mẽ hwýr jajê rê nhũm mẽ ma akupým mẽ hwýr mẽ. Nhũm mẽ amnhĩ wýr mẽ ohtô hã nê mã mẽ ho anê nê mẽ hipêx kati nê nhũm mẽ ý kamã ma õ patrãwja wýr akupým mẽ.

³⁷ Hãmri nhũm tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htỳx tâ kot paj mẽ hwýr kumê kê ma mẽ hwýr mẽ. Hãmri nhũm mẽ kêp ixkra hã omu nê tanhmã ixpê ho hkêt nê. Nê tâ inhmã kãm inhõja kwý gõ.” Anê.

—Hãmri nê mẽ hwýr kumê nhũm ma mẽ.

³⁸ Tã hãmri ra mẽ hwýr hpõx o mẽ nhũm mẽ amým amnhĩ wýr omu nê kêp hkra hã omu nê axtem nê hã axpên mã amýnê nê axpên mã: “E onêj hpur nhõ dõn krata tẽ. Koja nhỹrmã õ papaj mýr pê amnhĩm hpur ã pykata pytã nê ho õ. Jakamã kwa pu mẽ hpĩr kurê kumrêx nê kêp hpur ho arĩk nê ho panhõ. E tokyj pu mẽ kupĩ ri.” Anê.

³⁹ —Hãmri nhũm ra tẽ nê mẽ hwýr pøj nhũm mẽ unê nê hpur nê ho kato nê mã ho anê nê kupĩ. ã mẽ ujarênh kot anhýr. Anê.

⁴⁰ Nhũm pre ã Jejus mẽ kãm ujarēnh anē. Hãmri nē hã mẽ hkukja nē mẽ kãm:

–E koja pur nhõ dõnja hkra jarēnh ma hãmri nē tãm mẽ hwỳr mō hãmri nē tanhmã mẽ hipêx to wehe? Anē.

⁴¹ Hãmri nhũm mẽ kãm:

–Nà koja ma akupỹm mẽ hwỳr mō hãmri nē mẽ homnuj tỳx nē mẽ himex pa. Hãmri nē hpãnhã nhãm hpur ã mẽmojjê rē nhũm mẽ tã katàt kôt kãm àpēnh o pa. Anē.

⁴² Hãmri nhũm Jejus mẽ kãm:

–Tỳ ãm hãmri na ka ã mẽ harēnh anē. Kot mẽ ho anhỹr mã tãm kēnã. Mãn ka prem ra Tĩrtũm kapēr ã kagà htũm kot tanhmã ja jarēnh toja ma? Harēnh kot:

Mẽ kot kēn o amnhĩm òrkwỹ nhĩpêx kaxyw nē kēn maati pumu nē htỳx omnuj ã hkamnhĩx nē hkagata. Mẽ kot hkaga htã nhũm Tĩrtũm mẽ kurom mex o kot kēn piitã hakrenh par ã omunh kurê kumrêx. Tĩrtũm kot kēn maati mex ã harēnh xwỳnhhta mẽ pamã mex o mex.

Ã Tĩrtũm kapēr ã kagà htũm kot ja jarēnh kot anhỹr.

⁴³ Ja pyrã nē na pre ra Tĩrtũm amnhĩ kaxyw mẽ apê Ijaew xunhwỳ. Mẽ apê hkra nē hkôt mẽ ate amnhĩ nhĩpêx kaxyw amnhĩ kaxyw mẽ axunhwỳ. Tã ka mẽ axtem nē hkaga. Te mẽ kot kēn maati pumunh nē mex kêt ã hkamnhĩx nē hkagata pyrãk. Jakamã koja mẽ apãnhã Ijaew kêt xwỳnh kwỳjê xunhwỳ nhũm mẽ arom hkôt amnhĩ nhĩpêx mex o pa. Jao ra mẽ kêp hkra nē. Anē.

⁴⁴ Nhũm pre ã Jejus mẽ kãm te kêp kēn maati pyrãk o mẽ kãm amnhĩ jarēnh anē. Hãmri nē axte amnhĩ tã kuxi nē mẽ kãm axte kēn jarēnh pyrãk ã amnhĩ jarē nē mẽ kãm:

–Nà kot kaj mẽ atõ ixkaga hãmri nē te mēhõ htỳx htēm nē kēn pumunh kêt nē hã htêk nē tēm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã ajamaxpēr to nē ixkaga nhũm te kēn maati kot anhĩpy tēm

nē axôm par pyrãk o anhĩpêx ka mẽ amex kêt kumrêx. Anē.

⁴⁵ Nhũm pre ã mẽ kãm ujarēnh kãm mẽ harēnh anē. Hãmri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma

⁴⁶ nhũm ja mẽ kêp omnuj tỳx jakamã nhũm mẽ kãm unēnh nē haxàr prãm nē. No mẽ ãm amnhĩ tã kãm mẽ kot mar o kuhê xwỳnhjê puma nē. Mẽ kurom Jejus kêp Tĩrtũm nhỹ hã kapēr xwỳnh ã hkamnhĩx jakamã nhũm mẽ kãm mẽ uma nē. Hãmri nē kormã tanhmã ho hkêt nē.

22

Pahi kot hkra hprõ kaxyw hkwỳjê hwỳr ã harēnh

Rukre 14.15-24; mããnhn Wam Korõt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mẽ kãm awjarē. Ijaew kot Tĩrtũm kaga hã mẽ kãm hã kuxi nē awjarē nē mẽ kãm:

–E pa mẽ amã ahpỹnhã mẽ kot Tĩrtũm kapēr mar nē tanhmã amnhĩ nhĩpêx to xwỳnhjê jarē ka mẽ inhma. Te mẽ kot pahiti kot hkra hprõ kaxyw nhũm kot amnhĩ wỳr hkwỳjê hwỳr nhũm mẽ kot harēnh mar nē ahpỹnhã tanhmã amnhĩ nhĩpêx to xwỳnhjaja kot amnhĩ nhĩpêx pyrãk. Koja pahitija hkra hã hkĩnh nē hã apkur mex kaxyw amnhĩ wỳr hkwỳjê hã karõ.

³ Hãmri nhũm kãm mẽ àpēnh xwỳnhjaja ra kot amnhĩ wỳr mẽ hã karõ xwỳnhjê hwỳr mra nē mẽ kãm nojarêt nhũm mẽ kuma nē ãm mẽ kuma nē axtem nē mẽ kêp hitõt nē. Hãmri nhũm mẽ tee ri mẽ kuma nē akupỹm tē nē pahiti mã mẽ harē.

⁴ –Hãmri nhũm tee ri amnhĩ tã mẽ harēnh ma nē hpãnhã mẽ hwỳr axtem kãm àpēnh xwỳnh kwỳjê rē nhũm mẽ ma mẽ hwỳr mra nē mẽ kãm: “Pa. E kwa mẽ tokyx. Na ra pahiti mẽ akutêp mẽõ nhĩpêx pa. Na mẽ môx kwỳ hpa nē ho àr mex nē. Nē mẽ akutêp mẽmoj nhĩpêx par jakamã e kwa mẽ tokyx nã.” Anē.

⁵ ã mẽ kãm kapēr anhỹr tã nhũm mẽ kuma nē ãm mẽ kuma nē ma ahpỹnhã

nhÿhÿm mra. Nhÿm ja ma àpênh mã mra nhÿm ja ma ihpur kãm àpênh mã ma tẽ nhÿm ja ma nhÿhÿm mẽmo to wênê ho tẽ.

⁶ Nhÿm mẽ hkwyjaja mẽ kãm ujarênh xwÿnhjê pynê nẽ mẽ htak o mẽ kupa.

⁷ –Hãmri nhÿm pahitija mẽ harênh ma nẽ àhkurê nẽ. Hãmri nẽ mẽ hwÿr pôristi hkwy rê nhÿm mẽ ma mẽ hwÿr mra nẽ mẽ unê nẽ mẽ kupa nẽ mẽ ò krĩ hã hpòk pa.

⁸ Hãmri nhÿm pahiti kãm mẽ àpênh xwÿnh kwÿjê mã kãm: “Kwa ra ixte mẽ kutêp mẽõ mex kwÿ xunhwÿr tã nhÿm mẽ ixwÿr mrar kêt nẽ. Ixtÿx ho mẽ mex ã mẽ hkamnhÿx nẽ amnhÿ wÿr mẽ hã karõ no mẽ mex kêt. Mẽ kot mẽ ixkutã apkur mã tãm kêt.

⁹ E kwa mẽ ma krĩ hkôt axtem mẽ hkwyjê japêr o mra. Nẽ nhÿri mẽhõ pumu nẽ kãm awjarê kê man ixwÿr tẽ nẽ ixkra hã hkĩnh nẽ mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ –Hãmri nhÿm mẽ kuma nẽ ma mẽ hapêr o mra nẽ mẽ piitã mẽ kãm anhÿr o mra. Nhÿm mẽ kuma nẽ wam tajê rom ma mẽ hkôt mrar kurê kumrêx. Mẽ kot amnhÿ to mex xwÿnhjaja nẽ mẽ kot amnhÿ tomnuj xwÿnhjaja hãmri piitã ma mẽ hkôt mra. Hãmri nẽ ixkreja wÿr mra nẽ hwÿr gjêx kaxyw nhÿm mẽ kãm mẽ ê mex gõ nhÿm mẽ hagjê hãmri nẽ kormã mẽ apkur xà hã ixkre hwÿr agjê nẽ ho nÿt pa.

¹¹ Hãmri nhÿm pahitija mẽ hwÿr axà nẽ mẽ piitã mẽ omu. Nhÿm ja pixi nẽ axtem nẽ hkwyjê hkĩnhã mẽ kot kãm ê mex nhõrja jaxàr kêt rãhã axà nẽ apkur o nhÿ.

¹² Hãmri nhÿm tee ri ja hã omu nẽ hwÿr tẽ nẽ kãm: “Pa. Tk. Kwa na htem ixkrem gjêx kaxyw nẽ mẽ kot mẽ kãm mẽ ê mex nhõr jagjê nẽ rĩ kormã hwÿr agjê nẽ apku. Tã mon ka akwyjê hkĩnhã haxàr kaga? Kwa na htem ã amnhÿ nhÿpêx anhÿr kêt nẽ.” Anhÿr o kãm kapêr nom nhÿm kuma nẽ ãm kuma nẽ tanhmã kutã kãm nẽ hkêt nẽ. ãm htÿx apkur o nhÿ.

¹³ Jakamã nhÿm tee ri omu hãmri nẽ hã mẽ kot kãm àpênh xwÿnhjê mã amÿnê nẽ mẽ kãm: “E mẽ hwÿr tẽ nẽ unê nẽ hpa nẽ hte hpre nẽ ma o tẽ nẽ kamàt kò kamã amê. Kê tee ri mur nẽ amnhÿ xà htÿx kamã hamak o amnhÿ nham o axpên kamnhar tÿx kaprÿ ho nõ nẽ rĩ amnhÿ pumu.” Anê. Hãmri nhÿm mẽ kuma nẽ kãm ho anê. ã mẽ ujarênh kot anhÿr. Anê.

¹⁴ Nhÿm pre Jejus ã mẽ kãm ujarênh anê hãmri nẽ mẽ kãm:

–Nà Tirtÿm kot pahitita pyrã nẽ amnhÿ wÿr mẽ ho ohtô nẽ mẽ hwÿr tã na hte mẽ piitã hkôt amnhÿ xunhwÿr kêt nẽ. Jakamã na hte ãm mẽ ho grêre nẽ amnhÿ wÿr mẽ ho api. Anê.

Parijew nhõ xwÿnh kot Jejus kamã hamak ã mẽ harênh

Makre 12.13-17; Rukre 20.20-26; mãânênh Rõmã 12.1, 13.7

¹⁵⁻¹⁶ Tã nhÿm Parijew nhõ xwÿnhjaja ã Jejus kot mẽ kãm ujarênh anhÿrja ma hãmri nẽ kurÿm kato nẽ tanhmã hkukamã axpên mã hã àmnênh to. Hãmri nẽ hwÿr mẽ hkwyjê mẽ Erox kôt mẽ pa xwÿnh kwÿjê rê. Hêx rom mẽ kot mẽmoj tã hkukjêr kaxyw hwÿr mẽ kurê nhÿm mẽ ma hwÿr mra nẽ omu nẽ kãm:

–Kwa Jejus. Nà ãm hãmri na ka hte Tirtÿm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa.

¹⁷ E kwa mẽ inhmã mẽmoj jarê. Rõm nhõ pahiti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm òr kêt nẽ? E kwa mẽ inhmã tanhmã ja jarênh to. Anê.

¹⁸ Nhÿm prem ã hêx rom àhkukjêr anhÿr tã no nhÿm ra mẽ hamaxpêr ã mẽ omu nẽ mẽ kãm:

–Tk. Kwa mon ka mẽ ã axêx rom ja hã ixkukjêr anê?

¹⁹⁻²⁰ E mẽ atõ inhmã kàxpore htÿxre hõ gõ pa omu. Anê.

Hãmri nhÿm mẽ kãm ja gõ nhÿm kupy nẽ kãnhmã mẽ kãm kupê nẽ mẽ kãm:

—E mēhō nhīxi nē mēhō karō na ja hã? Anē.

²¹ Hāmri nhūm mē kām:

—Pahi Sesti karō nē hixi na hã. Anē.

Hāmri nhūm mē kuma nē mē kām:

—Tỳ. Tô kēr ka mē māmri kām hkwỳ nhōr o apa. Hã hkarō nē hã hixi. Tãm kot hipêx xwỳnh jakamã ò na. No mē kajaja na pre Tirtūm mē anhīpêx nhūm mē apê ò jakamã kwa kēr ka mē kapēr kôt pix mã ri amnhī nhīpêx o ri apa. Anē.

²² Hāmri nhūm mē amnhī jaēr pē ã kot kàxpore jarēnh anhỹrja ma nē axte kām tanhmã nē hkêt nē. Hāmri nē akryk omu hāmri nē ma akupỳm mra.

Akupỳm mē htĩr ã mē harēnh

Makre 12.18-27; Rukre 20.27-40; Juãw 5.21, 6.39-40; mãânēn Wam Korit 6.14, 15.12-28; Wam Tesarõn 4.13-18

²³ Tã nhūm Satusew nhō xwỳnh kwỳjaja mē kot akupỳm mē htĩr kêt ã mē hkamnhīx kêt xwỳnhjaja na pre mē. Na pre htem mē htyk nē mē hapêx kumrêx ã mē hkamnhīx jakamã axpēn mã tanhmã Jesus jarēnh to nē axpēn mã:

—E kwa pu mē hwỳr mra nē mēmoj xihtỳx ã hkukja. Kê mē pama nē tee ri tanhmã mē pamã kapēr to hkukamã hamaxpēr kaprỳ. Kê mē piitã ja hã omu nē àhpumunh kêt ã omunh kurê kumrêx. E tokyx pu mē hwỳr.

Anhỹr jakamã Parijew nhō xwỳnhjê pyrã nē hêx rom ma hwỳr mra nē hkukja nē kām:

²⁴ —Pa Jesus? Kwa mē inhmã mēmoj jarē. Na pre finat Mojesja Tirtūm nhỹ hã ã mē panhīgêttjê mã karō anē. Mē hkra hkêt rãhã mē pa nē mē htyk xwỳnhjaja nhūm mē harēnh o:

Koja mēhō hprō nē kamã hkra hkêt rãhã pan ty. Hã koja hkôt htōja hpãnhã hprō ho hprō nē kamã hkra. Hāmri nhūm kato nē te kêp htō htyk xwỳnhhta hkra pyrãk. Anē.

Ã na pre Mojesja Tirtūm nhỹ hã mē kām karō anē.

²⁵ Jakamã kwa ga mē ixujarēnh ma. Koja mē kot axpēn to htō xwỳnhjaja kêp 7. Nhūm kot waja hāmri hprō nē

wa pa nhūm kamã hkra hkêt rãhã ty. Nhūm hkôt htōja hpãnhã ho hprō

²⁶ nē wa axpēn to pa. Nhūm mãânēn kamã hkra hkêt rãhã ty. Nhūm htō hōta haxwỳja hpãnhã tãm o hprō nē we wa axpēn to pa grire nhūm haxwỳja kamã hkra hkêt rãhã ty. Hāmri nhūm htō hkwỳjaja ni pyxi nē axpēn pãnhã ho hprō hpa no mēhō kamã hkra hkêt rãhã htyk pa.

²⁷ Hāmri nhūm mē hprōta mē hkôt amnhī to hitep nē ty.

²⁸ Tã Tirtūm kot akupỳm nhỹrmã mē ho htĩr ronhỹx nhỹ nhỹx kêp nija mjên kumrêx? Ra piitã kot ho hprō kênã. E mē inhmã ja jarē. Anē.

²⁹⁻³⁰ Hāmri nhūm Jesus mē kuma nē mē kām:

—Nã kaxkwa kamã mē kot amnhī nhīpêxja axtem na. Mē htĩr ri mē kot Tirtūm kôt amnhī xunhwỳr xwỳnhjaja na htem ty hāmri nē Tirtūm nhō krĩ kamã axte kām hprō hprãm kêt nē pa. Jakamã hprō hkêt nē pa. Rỳ ni japêr nē mjên kêt nē pa. Nom ri kām mjên rỳ hprō hprãm kêt nē pa. Hāmri nē Tirtūm kapēr o mē wrỳk xwỳnhjê pyrã nē axte htyk kêt nē. ãm htĩr tũm rãhã nē pa ho pa. Pêr mē ate Tirtūm kapêr ã kagã htũm mar mex kêt jakamã na ka mē ã ja hã ixkukjêr anē. Tirtūm àhpumunh tỳx o àhpumunh tỳx jakamã kumã mē ate mēmoj tã ixkukjêr xwỳnhhta na tanhmã kêp kute hkêt. Ra ja kukamã àhpumunh tỳx kênã.

³¹⁻³² —Nom mē ate akupỳm mē htĩr kêt ã mē hkamnhīxja kot paj ixprĩ hã mē amã harē. Amnepê m na pre Tirtūm pĩ hpôkja kamã tanhmã Mojes mã kapêr to. Mãn ra mē ate mar. Na pre kām:

Ixpê Apraãw nhō Tirtūm na pa. Nē mãânēn ixpê Apraãw kra Ijak mē htãmnhwỳ Jako wa ò Tirtūm na pa.

Anhỹr o Mojes mã amnhī jarē nhūm kuma nē hã kagã. Kêp apu arĩ mē htyk rãhã nhỹx pre ã mē harēnh anhỹr kêt nē. Nhỹx pre mē harēnh o: “Amnepê m Apraãw nē hkra nē htãmnhwỳ mē htĩr ri ixpê mē ò Tirtūm

na pa pre.” Anhÿr o nhÿx pre mē harē. Nom na pre ã amnhÿ jarēnh anhÿr kêt nē. Mē pamā te Apraãwja mē htyk nē mē hapêx pyrāk. Nom nhÿm prem ra Tÿrtÿm ri ra akupÿm htÿr nē mex nē pa ho pa. Tã ka htem Tÿrtÿm kapêr kwÿm ri akupÿm mē htÿr kêt ã mē harēnh o apa.

Anhÿr o Satusew nhō xwÿnhjê mã kapêr.

³³ Hãmri nhÿm mē kot mar o kuhê xwÿnhjaja amnhÿ jaêr pē kot mē ahkreja ma.

Tÿrtÿm kapêr maati jarēnh

Matêwre 10.37; Makre 12.28-34; Rukre 10.25-28; mãânēn Wam Juãw 5.3

³⁴ Tã nhÿm Parijew nhō xwÿnhjaja Satusew nhō xwÿnhjê jarēnh ma. Mē kot tee ri kãm hamaxpêr o Jejus jakrenh prãm kaprÿ mã mē harēnhja ma hãmri nē axpên wÿr akuprō nē Jejus wÿr mra. Kot mē urāk nē hêx rom àhkukjêr nē hamaxpêr o hakrenh kaxyw hwÿr mra.

³⁵ Hōja kêp Tÿrtÿm kapêr tÿm o mē ahkre o mē pa xwÿnh jakamã hêx rom kamã hamak kaxyw kãm kapêr nē kãm:

³⁶ —Kwa Jejus. Ot pa mē awÿr mra. Kwa mē inhmã mēmoj jarē. Na pre Tÿrtÿm ahpÿnhã mēmoj to 10 nē mã mē pamã karō. Mē pahte hkôt amnhÿ nhÿpêx kaxyw mã mē pamã karō. Tã nhÿ kapêr na mex o kot hkwy jakrenh wehe? Anē.

³⁷ Hãmri nhÿm kuma nē mē kãm:
—Nà kot mē pamã mã karō kot:
Kêr ka mē anhÿ piitã ho amã Tÿrtÿm kÿnh tÿx o apa. Mē amã hkÿnh tÿx o mēmoj piitã hakrenh par o apa.

³⁸ E Tÿrtÿm kot mē pamã mã karō ja na mex o piitã hakrenh par.

³⁹ Nē hkôt ja:

Kêr ka mē amã akwÿjê mã ma ho te ka amã amnhÿ mã ma pyrāk. Jao ra tãm mē hipêx.

⁴⁰ ã Tÿrtÿm kapêr ã kagã htÿm kot mē pamã mã karō kot anhÿr. ã mē pahte amnhÿ nhÿpêx anhÿr o papaja na Tÿrtÿm kãm hprãm tÿx kumrêx. Kot kaj mē ja wa hkôt amnhÿ nhÿpêx rãhã

ho ri apa nē mãânēn ra Tÿrtÿm kot mē pamã mēmoj mã karō xwÿnh piitã hkôt amnhÿ nhÿpêx. Ja na pre Mojes mē Tÿrtÿm nhÿ mã kapêr xwÿnhjaja amnepêr Tÿrtÿm nhÿ mã mē panhÿgêjtê mã mã karō ho pa. Anē.

Jejus kot amnhÿ mã mē hkukjêr ã harēnh

Makre 12.35-37; Rukre 20.41-44; mãânēn Rômãn 1.3-4

⁴¹ Nhÿm Parijew nhō xwÿnhjaja arÿ Jejus mar o kuhê nhÿm amnhÿ mã tanhmã mē hkukjêr to. Nom te nhãm mēhō mã mē hkukjêr pyrāk o mē hkukja nē mē kãm:

⁴² —E mē inhmã mēmoj jarē. Tanhmã na ka htem axpên mã Tÿrtÿm kot mē akaxyw ãm mã xwÿnhja jarēnh to? Kêp mēhō kanrêhã htãmnhwÿ koja wehe? Anē.

Hãmri nhÿm mē kãm:
—Nà koja kato nē kêp pahi finat Tawi kanrêhã htãmnhwÿ koja.

⁴³ Anē nhÿm Jejus mē kuma nē mē kãm:

—Tÿ. ãm hãmri na ka mē harē. No mo na htem axpên mã kêp pahi Tawi hkanrêhã htãmnhwÿ pix ã harē nē mãânēn kêp ò pahihiti mã harēnh kêt nē? Tawi na pre Tÿrtÿm Karō nhÿ mã tanhmã harēnh to nē harēnh o:

⁴⁴ Na pre Tÿrtÿm inhō Pahihiti mã ã kapêr anē nē kãm: “E amnē ixwÿr tē nē inhÿhkô mã nhÿ nē inhmã mē ho amnhÿptar o akrÿ. Kot paj mē kot kãm akurê xwÿnh piitã mē unênh pa nē awÿr mē o mra nē anhÿhkram mē haxar pa.” Anhÿr o pre kãm kapêr.

⁴⁵ ã Tawija Tÿrtÿm kot Kris mã kapêr jarēnh nē kêp ò pahi mã kagã anē. Mē kajaja na ka htem ãm kêp Tawi tãmnhwÿ pix ã axpên mã harēnh o ri apa. No kêt Tawija na pre kêp ò Pahihiti mã harēnh o pa. Anē.

⁴⁶ Hãmri nhÿm mē kuma nē tee ri kot tanhmã kutã kãm kapêr to hkukamã hamaxpêr nē axte mēmoj mã hkukjêr kêt nē. Tanhmã kot mē amnhÿ to nē hamaxpêr o hakre? Na prem tee ri kãm hamaxpêr o hakrenh

prãm kaprÿ. Jejus mëmoj piitã hkuamã àhpumunh tÿx o àhpumunh tÿx.

23

Jejus kot tanhmã Parijew nhõ xwÿnhjê jarënh to

Makre 12.38-40; Rukre 11.43-46, 20.45-47

¹ Tã nhũm Jejus më ixte hkôt ixpa ho ixpa xwÿnhjê më më kot mar o kuhê xwÿnhjê mã kapër nê më inhmã tanhmã Parijew nhõ xwÿnh më Mojes kapër o më ahkre xwÿnhjê jarënh to nê më inhmã:

² —Nã Parijew nhõ xwÿnh më Tirtũm kapër tũm o më ahkre xwÿnhjaja na htem hprĩ hã Tirtũm kapër ã kagã htũm mar mex nê.

³ Jakamã kêr ka më mar tÿx nê më kot ho më ajahkre kôt amnhĩ nhĩpêx. No më kot amnhĩ nhĩpêxja kêr ka më hkôt amnhĩ nhĩpêx kêt nê. Më kot Tirtũm kapër tũm o më ajahkre htã hkôt amnhĩ nhĩpêx kêt nê.

⁴ Te më kot mëhõ kot më katut ã më kãm më jênh pytĩ janhôr tã no ãm më kuxwar hkwȳ htur kêt kot amnhĩ nhĩpêx pyrãk o na htem amnhĩ nhĩpêx o pa. Jao më amã mëmoj tã karõ nê më amã: “E kêr ka më ã amnhĩ nhĩpêx anê nê ã amnhĩ nhĩpêx anê.” Anhÿr pix o më amã kapër o pa. Nom më tãmjaja amnhĩ kapër kôt amnhĩ nhĩpêx kêt nê.

⁵ —Na htem hkwȳjê kot më omunh nê më kot amnhĩ to mex ã më harënh kaxyw më noo mã tanhmã amnhĩ nhĩpêx to. Nê më më noo mã më ê mex pix kãm pa. Nê amnhĩm Tirtũm kapër ã kagã htũm kwÿ hã kagã nê amnhĩ nhõkrã hã hanhõ nê amnhĩ pa hã hanhõ nê hã pa. Më kot hã nohtÿx rãhã hã më hkamnhĩx kaxyw nhũm htem ã amnhĩ nhĩpêx anhÿr o pa. Nê më kãm më piitã më kot amnhĩm më rũnh ã më harënh o paja nhũm htem kãm hprãm.

⁶ —Nê më pahpê Ijaewjê nhõ Tirtũm kapër o më ahkre xà hã ixkre kamã më kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. Nê

mëmoj tã më apkur xà mex ã arĩgro hã nhũm htem ma më apkur xà hã ixkre hwÿr akuprõ nhũm më kot amnhĩ to rũnh xwÿnhjê hkrĩ xà mex pix kamã kãm hkrĩ hprãm.

⁷ Nê nhÿri pry hã mra nhũm më kot më omunh nê më kêp më ahkre xwÿnh maati hã më hã hpijaàm kãm tanhmã më kãm kapër mex toja nhũm htem kãm hprãm. ã na hte Parijew nhõ xwÿnh më Tirtũm kapër tũm o më ajahkre xwÿnhjaja hêx rom më anoo mã amnhĩ nhĩpêx anhÿr o pa.

⁸⁻¹⁰ —No më kajaja. Kêr ka më ho më urãk kêt nê. Kê më axpên mã më ajarënh o: “Pahi Maati” anhÿr o më ajarënh kêt nê. Rÿ më ajarënh o: “më ijahkre xwÿnh maati” anhÿr o axpên mã më ajarënh hkêt nê. Kêt paxipix na pre Tirtũm më akaxyw ixãm jakamã paxipix na ixpê më anhõ Pahi Maati. Nê paxipix na ixpê më ajahkre xwÿnh maati. No më kajaja ixkôt më apê axpên to atõx nê atõ na ka më.

—Nê kêr ka më ri axpên jarënh o: “Mêpahpãm” anhÿr kêt nê. Kêt kaxkwa kamã na Mêpahpãmja.

¹¹⁻¹² —Nê kot ka më amnhĩ to rax prãm xãj tanhmã amnhĩ to jarkrar to ho apa htã no nhũm akwȳjaja ama nê ãm ama nê akôt hamaxpêr kêt nê. No kot kaj më piitã më kutã tanhmã anojarêt to ho apa nhũm më amnhĩ tã më apumu nê axpên mã më amex ã më ajarê. Jakamã kot kaj më amã më piitã më kot më amex ã më ajarënh prãm hãmri nê ri më piitã më kãm tanhmã amnhĩ nhĩpêx to pê më kutã anojarêt rãhã ho ri apa. Anê.

Jejus kot më hkwȳjê mã kapër tÿx ã harënh

Makre 12.40; Rukre 11.39-52, 20.45-47

¹³⁻¹⁴ Tã nhũm Jejus hpãnhã Parijew nhõ xwÿnh më Tirtũm kapër tũm o më ahkre ho më pa xwÿnhjê mã kapër. Nê më kãm kapër kãm hihtÿx nê më kãm:

—E më apê Parijew nhõ xwÿnh më Tirtũm kapër tũm o më ahkre xwÿnhjaja. E më inhma. Kot kaj më amex kêt nê. Më apê më no

kupyr xwÿnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêt. Nẽ nhỹrmã atyk nẽ mẽ amã õ krĩ hwÿr axàpir prãm kêt. Nẽ akwÿjaja kot hwÿr àpir pymaj na ka htem akwÿjê nẽ tanhmã mẽ kãm axêx to ho apa. Mẽ kot mẽ apyrà nẽ Tĩrtũm kapêr kwÿm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwÿr kahêxà kahê htÿx pyræk o apa.

15 –Nẽ mẽ akwÿjaja kot mẽ akôt amnhĩ xunhwÿr nẽ mẽ akôt amnhĩ nhĩpêx prãm xàj na ka htem ma awry hã nhỹhÿm tanhmã mẽ kãm ri axujarênh to ho ri apa. Jakamã nhũm mēhõ mẽ ama nẽ mẽ akôt amnhĩ xãm hãmri nẽ ra amnhĩ tomnuj tÿx o mẽ ajakre. Jakamã koja mẽ nhỹrmã mẽ apyrà nẽ ma mẽ kot amnhĩ xà htÿx kamã hamak tũm xàta wÿr pa. Jakamã kwa mẽ o kora. Kot kaj mẽ amex kêt nẽ.

16 –Hêxta waa nẽ. Mẽ apê Parijew nhõ xwÿnhjê mẽ mẽ apê Tĩrtũm kapêr tũm o mẽ ahkre xwÿnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamÿnh prãm xàj atÿx ri tanhmã mẽ ahkre hto ho apa nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nẽ Tĩrtũm mã amnhĩ jarênh xà hã ixkre nhĩxi jarênh kôt mēhõ mã amnhĩ jarê nhũm ama nẽ hamaxpêr o: ‘Ko. Apu ãm hãmri na inhmã amnhĩ jarê rÿ ko na apu ãm amnhĩ to hêx.’ Anhÿr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwÿ gõ hãmri nẽ ate mẽ kãm õr xàta jarênh kôt ãm hãmri mẽmoj tã mēhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwÿ nhõr kôt ã amnhĩ jarênh anê. Jakamã na amnhĩ to hêx kêt nẽ.’” Anhÿr o hamaxpêr. Na ka htem ã mẽ ahkre ho apa anê.

17 Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex

o ixkre ho mex kaxyw kàxpore nhõrta jakrenh. Tã ka htem axtem nẽ mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nẽ aa paxêx kêt rãhã ho papaja na Tĩrtũm kãm hprãm.

18 –Nẽ na ka htem mẽ kêp mẽ hikukrêx jamÿnh prãm xàj ã atÿx ri mẽ ahkre anê nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nẽ Tĩrtũm mã mẽmoj nhõr xà hã mēstija jarênh kôt mēhõ mã tanhmã amnhĩ jarênh to. Hãmri nhũm mẽ ama nẽ hamaxpêr o: ‘Nà ãm hãmri na inhmã amnhĩ jarê rÿ ko na apu ãm inhmã amnhĩ to hêx.’ Anhÿr o hamaxpêr. Nom kot kaj mẽ Tĩrtũm mã mẽmoj nhõr xà hã mēstija ã kãm mẽmoj xi. Hãmri nẽ ra mẽ ate kãm õr xàta jarênh kôt ãm hãmri mẽmoj tã mēhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhÿr jakamã na amnhĩ to hêx kêt nẽ.’ Anhÿr o hamaxpêr.” Anê. Na ka htem ã mẽ ahkre anê.

19 Mẽ ajamaxpêr kêt xwÿnh na ka mẽ. Tĩrtũm mã mẽmoj nhõr xà hã mēstija na mex o mẽ kot hã kãm mẽmoj nhõrta jakrenh. Tã na ka htem axtem nẽ mẽ kot hã kãm mẽmoj nhõrta mex o mēsti jakrenh ã harê.

20 Nom Tĩrtũm mã mēsti mẽ mẽ kot hã kãm mẽmoj nhõrta te kot axpên pyræk jakamã kot kaj mẽ mēstija jarênh kôt mẽmoj tã amnhĩ jarê nẽ mãânên mẽ ate hã Tĩrtũm mã mẽmoj xirja jarênh kôt amnhĩ jarê. Hamê wa kot axpên pyræk jakamã hamê wa harênh pê amnhĩ to axêx kêt nẽ. Jakamã kêr ka mẽ mẽmoj tã amnhĩ jarênh kaxyw nẽ hamê wa harênh kôt ãm hãmri mẽmoj tã amnhĩ jarê nẽ ho axêx kêt nẽ.

21 Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nẽ Tĩrtũm mã amnhĩ jarênh xà hã ixkre hkôt hã amnhĩ jarê nẽ mãânên Tĩrtũm kêp ixkre hpãm kôt hã

amnhĩ jarẽ. Jakamã kêr ka mẽ hamẽ wa harẽnh pê amnhĩ to axêx kêt nẽ.

22 —Nẽ kot kaj mẽ ãm hãmri amnhĩ jarẽnh ã mẽmoj tâ amnhĩ jarẽnh kaxyw nẽ kaxkwa jarẽnh kôt amnhĩ jarẽnhja o mãânẽn kaxyw kaxkwa kamã Tĩrtũm krĩ xà maati hkôt amnhĩ jarẽ. Nẽ mãânẽn Tĩrtũm kôt amnhĩ jarẽ. Jakamã kwa hamẽ wa harẽnh pê amnhĩ to axêx kêt nẽ.

23 —Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Na ka htem Tĩrtũm kapêr piitã hkôt amnhĩ nhĩpêx kêt nẽ ãm hkwy kôt pix mã amnhĩ nhĩpêx o ri apa. Na ka htem ãm kapêr o hpỳnhre nẽ hkôt amnhĩ nhĩpêx ã amnhĩ pumu nẽ ate amnhĩ to mex xwỳnh ã amnhĩ jarẽnh o apa. No Tĩrtũm kãm hprãm xà piitã hkôt amnhĩ nhĩpêx kêt nẽ. Mẽ ate tãm mẽ hipêx nẽ mẽ ho mex nẽ mẽ kamã axukapri hã kot mẽ amã karõja. Nẽ mẽ amã Tĩrtũm kĩnh ã kapêr kôt amnhĩ nhĩpêx hã karõja ra mẽ ate mar tâ hkôt amnhĩ nhĩpêx kêt nẽ. Mẽ ate kapêr piitã hkôt amnhĩ nhĩpêx ronhỹx ja mẽ amã mex o mex.

24 Mẽ ate ãm kapêr o hpỳnh nẽ hkôt amnhĩ nhĩpêx jakamã te mẽ ate atỳx ri tanhmã axàpkur to ho mẽ akrĩ pyrãk. Jao te mẽ axàpkur xà hã mẽõ kamã pure pumunh nẽ nẽ hanhir nẽ rẽnũh tâ mãânẽn kamã kẽn rax pumunh tâ nẽ hanhir nẽ rẽnũh kêt rãhã hkur pyrãk. Jao Tĩrtũm kapêr o hpỳnhre nẽ hkôt amnhĩ nhĩpêx no piitã hkôt amnhĩ nhĩpêx kêt nẽ. Pẽr mẽ ajamxpêr kêt tâ na ka htem atỳx mẽ ahkre ho ri apa.

25 —Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Nã mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tâ mex ã harẽnh nẽ kamã apkur pyrãk o na ka mẽ. Jao ãm mẽ akrãhkã rũm pix mã mẽ amex. Nẽ mẽ noo mã

te mẽ amex pyrãk no mẽ anhõxãhkre kaxwỳnh kãm mẽ ajamxpêrja mex kêt. Mẽ akapêr prãm nẽ mẽ axàhkurẽ nẽ mẽ anhõxỳy.

26 Mẽ ajamxpêr mex kêt kênã. Kwa kêr ka mẽ tãm ajamxpêr o tãm akwỳjê nhĩpêx o ri apa. Nẽ axãmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nẽ amnhĩm mẽ amex ã mẽ ajarẽ. No na ka htem amã mẽ amnhĩ to mex prãm xà ãm tee ri amnhĩ kuhõnh japjê kaprỳ.

27 —Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre ho mẽ apa xwỳnhjaja kot kaj mẽ amex kêt nẽ. Te mẽ ate mẽ htykjê jagjênh xà pyrãk. Na htem mẽ hagjênh xà ho mex o pa nom kamã mẽ hi nẽ ahpunuj pix.

28 Ja pyrã nẽ ã mẽ ate amnhĩ nhĩpêx anhỹr. Kapôt rũm mẽ anhĩja na mex. Te mẽ ate mẽ ho mex o apa pyrãk o na ka htem amnhĩ nhĩpêx nhũm mẽ ãm akrãhkã pix pumu nom ãm mẽ akrã hi kaxwỳnh kãm mẽ ajamxpêr punuj rãhã hã mẽ apumunh kêt nẽ. Mẽ ate tanhmã mẽ no kupyw to pix kukamã ajamxpêr jakamã te mẽ ate mẽ htykjê jagjênh xà pyrãk.

29-30 —Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Na ka htem ma mẽ hã pika hwỳr apa nẽ Tĩrtũm nhỹ hã kapêr o mẽ pa xwỳnhjê hã pika ho mex. Nẽ mẽ kot amnhĩ to mex xwỳnhjê hã pika ho mex. Nẽ axpẽn mã mẽ harẽnh o: “Hêxta waa nẽ. Na pre amnepêm mẽ pakukamã mẽ panhĩgêjtaja Tĩrtũm nhỹ hã mẽ kãm kapêr xwỳnhjê homnuj nẽ mẽ kupa. No kêt mẽ papajaja mẽ kamã ri papa ronhỹx pu prem mẽ urãk nẽ ã mẽ hipêx anhỹr kêt nẽ.” Anhỹr o axpẽn mã mẽ hkapri ho ri apa.

31-32 Nom ãm amnhĩ to axêx. Mẽ ate ã amnhĩ nhĩpêx anhỹr o apa kênã. ã mẽ ate amnhĩ nhĩpêx anhỹr jao ra

apê mē hkanrēhā mē hkra kumrēx ā amnhī to amnhīrīt mex o apa.

³³ Te mē ate kagā xoprê kot mē hkamnhar nē mē homnuj tỳx pyrāk jakamā koja Tirtūm nhỹrmā ma mē kot amnhī xà htỳx kamā hamak tūm xàta wỳr mē ajano ka mē ma hwỳr ajapêx. Hāmri nē tee ri amā ajapôx prām kaprỳ nē rī amnhī pumu.

³⁴ –Kot paj nhỹrmā ma mē awỳr inhỹ hā ixkapêr jarēnh o mē pa xwỳnh kwỳ rē. Nē inhỹ hā mē àhpumunh xwỳnh kwỳ rē. Nē ixkapêr o mē ahkre xwỳnh kwỳ rē. Nom kot kaj mē âm mē kapêr ma nē apê mē hprām nōkati nē tanhmā mē homnuj tỳx to ho apa. Nē ixpê mē hkwỳjê hpar o apa. Jao pī kahpa hā mē hanhōr o mē hkwỳjê hpa. Nhūm mē hkwỳjaja Tirtūm kapêr o mē ahkre xà hā ixkre kamā mē ahkre ho hkrī ka mē omu nē mē unē nē ixkreja kamā mē htak. Hāmri nhūm mē apymaj nhām ahpỳnhā krī hkwỳ hwỳr hprōt nē mra. Ā kot kaj mē inhỹ hā ixkapêr jarēnh xwỳnhjê nhīpêx anhỹr o apa.

³⁵⁻³⁶ Na prem ra mē himex rax nē. Amnepēm panhī kator krax rūm Atāw kra Apewta na pre Tirtūm nhỹ hā kapêr o pa nhūm htōja kām mar prām kêt nē kupī. Tā nhūm Tirtūm axte mē hwỳr y hā kapêr o mē pa xwỳnh kwỳjê rē nhūm prem mā mē ho anē nē mē hkwỳjê nhīmex. Nhūm pre xatā mē hwỳr mē hkwỳjê rē nhūm mē xatā mē kupa. Apew rūm Parakis kra Jakaris wỳr na prem mē himex rūnh nē. Hāmri nhūm prem Tirtūm mā amnhī jarēnh xà hā ixkre kamā Jakarisja pī. Tā mē kajaja mē ate mē urāk nē mē amā Tirtūm kapêr mar prām kêt nē mē urāk nē amā Tirtūm nhỹ hā kapêr xwỳnhjê nhīmex prām nē. Ā mē ate mē anhīgêjtê pyrā nē mē hipêx anhỹr mỳrapê koja Tirtūm mē apê mē hkanrēhā mē hkra nē mē htàmnhwỳjaja mē ato hpimràatā tanhmā mē ato htỳx to ka mē amnhī xà htỳx kamā ajamak rāhā ho ri apa. Anē.

Jejus kām Jerujarē nhō xwỳnhjê japê

htỳx ā harēnh

Rukre 13.34-35; mǎānēn Rōmān 11.25-27

³⁷ Hāmri nhūm Jejus te ra kot Jerujarē nhō xwỳnhjê pumunh nē mē kām kapêr pyrāk o tanhmā kapêr to ho xa. Nē mē kām:

–Hêxta waa nē Jerujarē nhō xwỳnhjaja. Tirtūm kot xatā mē awỳr y hā kapêr jarēnh xwỳnhjê rēnh nhūm mē kot mē akôt mē amā kapêr jarēnh o pa htā ka mē kapêr mar kêt kumrēx. Nē axtem nē kēn o mē htak o mē himex o apa. Ā na ka htem amnhī tomnuj o apa anē. Tā nom arī inhmā mē ajamār o ri ixpa hprām. Te ho krāhyre kot nore hpro nē ho hikwỳ pyrāk o na pa inhmā mē anhīpêx prām nē. Nom mē amā ixprām nōkati nē mē ate ixkaga kumrēx.

³⁸ Mỳrapê koja Tirtūm mē anhō krī jamār kêt nē.

³⁹ Kot paj tokyx ty nē mē apiitā mē are nē ma akupỹm api ka mē axte ixpumunh kêt nē. Âm akupỹn ixwryk xà hā arīgrota pix ā koja mē akwỳjaja mē amỳrpê krī ja kamā ixpōx ā ixpumu. Hāmri nē mē akurom ixpumu nē hkĩnh tỳx nē. Nē tā ixkôt amnhī xunhwỳr kurê kumrēx. Hāmri nē axpēn mā ijarēnh o:

Ota Tirtūm kot mē pahwỳr mēnh xwỳnhhta wrỳ. Nā âm hāmri na mē pahwỳr wrỳ. Ja mex o mex. Koja mē ā axpēn mā ijarēnh anē. Anē.

24

Jejus kot mē pakukamā mēmōj jarēnh

Makre 13.1-13; Rukre 21.5-19; mǎānēn Wam Ximotre 4.1-3; Sikūn Ximotre 3.1-9; Apokarip 6.1-17

¹ Tā nhūm Jejus Tirtūm mā amnhī jarēnh xà hā ixkre rūm kato nē ma tē. Pa mē ixte hkôt ixpa ho ixpa xwỳnhjaja kormā ixkreja pumunh o ixkuhê nē kām harē nē kām:

–Kwa Pahihtī. Hêxta waa nē. Ixkreja âm mex kumrēx. Anē.

Hāmri nhūm mē inhmā:

² –Tỳ mex nom koja nhỹrmā mē kām Tirtūm kurê xwỳnhjaja grānh pa.

Koja arĩ kên õ axkrutre nê axpên mÿnh nê nõr kêt nê. Koja piitã angrã nê ahpÿnhã ri hikwÿ. Anê.

³ Hãmri pa mẽ kuma nê tee ri hkukamã ijamaxpêr. Hãmri nhũm Jesus ma tẽ nê hixêt pê Oriwêhti hã api nê hã nhÿ pa mẽ ma hkôt mra nê mẽ kot ã ixkre nhĩpêx anhÿrta ã hkukja nê kãm:

—Kwa xà ãm hãmri koja mẽ ã ixkreta nhĩpêx anê? Kwa mẽ inhmã aprĩ hã harê. Xà koja mẽ nhÿrmã ho anê nã? Xà koja mẽ tokyx ho anê? Nê akupÿn mẽ ixwÿr awrÿk nhũm mẽmoj piitã hapêxja. Kwa mẽmo koja we wÿj ri tanhmã amnhĩ nhĩpêx to wehe? Anê.

⁴ Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhÿ nê mẽ inhmã:

—Nã nhÿrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harê ka mẽ inhma. Nã koja mẽ ohtô nê mẽ awÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o mẽ akôt pa.

⁵ Nê mẽ amã amnhĩ jarênh o: “E Tirtũm na pre mẽ awÿr inhmẽ. Ixpê kaxkwa rũm ixwrÿk xwÿnhnta na pa.” Anhÿr o mẽ akôt mẽ amã amnhĩ to hêx o pa. Jao ohtô nê mẽ nokupyr o pa.

⁶ —Nê koja mẽ nhÿri awry hã axpên par o pa nê mẽ atã axpên par o pa. Nom kêr ka mẽ harênh ma nê ri tokyx mẽmoj piitã hapêx ã hkamnhĩx kêt nê. Kormã mẽmoj piitã hapêx xà hã arĩgroja kormã.

⁷ Koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja pika hõ nhõ xwÿnhjê kutã kuhê nê pijapu ho kuhê. Jao ra axpên par o pa. Hãmri nhũm nhÿri pika hkwy htertet tÿx kumrêx. Nê mẽ hpur kãm mẽõja hapêx nhũm mẽ kãm prãm tÿx nê pa. Jakamã nhũm mẽ ohtô nê prãm xaj axkaprã.

⁸ Nom ja kormã mẽmoj hapêx kaxyw krax pix na. Te ho mênijê hõ

hpijagri kaxyw nê kormã kawax pê õhy xà pyrãk.

⁹ —Nê koja mẽ piitã ixkôt mẽ akamã gryk nê kãm mẽ akurê htÿx o pa. Nê mẽ awÿr mra nê ixtã mẽ apynê nê mẽ atomnuj tÿx nê mẽ apa.

¹⁰ Jakamã koja mẽ kot ixkôt amnhĩ xunhwÿr xwÿnh kwÿjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tã amÿnê nê axpên kãm gryk o pa.

¹¹ Nhũm nhÿri mẽ hkwyjaja Tirtũm nhÿ hã kapêr jarênh xwÿnh ã amnhĩ to hêx o pa. Jao mẽ ohtô nê mẽ nokupyr o pa.

¹² Koja mẽ ã amnhĩ nhĩpêx anhÿrja o ra piitã kãm axpên kamã ukaprĩ hkêt o pa.

¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htÿx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx.

¹⁴ —Nê kot kaj mẽ apê ixkwÿjaja ma krĩ piitã hkôt Tirtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwÿr nhũm Tirtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupÿn mẽ awÿr wrÿ. Anê.

Mẽ pahtomnuj tÿx xwÿnh maati hã harênh

Makre 13.14-23; Rukre 21.20-24; mãänên Sikũn Tesarõn 2.3-4

¹⁵ Nhũm Jesus arĩ mẽmoj kukamã mẽ inhmã kapêr nê mẽ inhmã:

—Amnepêm Tirtũm nhÿ hã kapêr xwÿnh finat Tãniewja na pre tanhmã mẽ atomnuj tÿx xwÿnh maatija jarênh to. Tã koja nhÿrmã ra kot harênh xà hkôt axtem nê Tirtũm mã amnhĩ jarênh xà hã ixkre hwÿr axã nê Tirtũm xãm xà kamã xa. Ka mẽ ja hã omu hãmri nê mẽ kot krĩ grãnh par ã hkamnhĩx kurê kumrêx.

¹⁶ Koja ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja kaj mẽ omu

hãmri nê mẽ kot mẽ apar pymaj aprôt nê ma amrar kurê kumrêx.

17 Rỳ ka mẽ anhõrkwỹ hkrãmnhên o akrĩ japêr nê amỹm amnhĩ wỳr mẽ omu nê akukrêx wỳr axàr nê hõ hpyr mã ajamaxpêr kêt nê. ãm wrỳ nê aprôt nê ma atêm kurê kumrêx.

18 Rỳ ka mẽ apur kãm axàpênh o apa japêr nê amỹm mẽ omu hãmri nê akupỹm anhõrkwỹ hwỳr axê jamỹnh kaxyw atêm kêt nê. ãm mẽ umaj aprôt nê ma atêm kurê kumrêx.

19 —No mẽ htujarô nê mẽ hkra karàre xwỳnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê mẽ umaj hprôt tỳx? Nà pika ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

20 —Nê kwa kêt ka mẽ amnhĩ to Tĩrtũm wỳ kê ã mẽ kot amnhĩ nhĩpêx anhỹr xà hã arĩgroja na wrỳk pê ã amnhĩ nhĩpêx anhỹr kêt nê. Rỳ mẽ hkôt xà hã arĩgro pê sap ã ã amnhĩ nhĩpêx anhỹr kêt nê.

21 —Nê ã mẽ kot amnhĩ nhĩpêx anhỹr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepêm Tĩrtũm kot pika ho kator krax rũm amnê mẽ pa xwỳnhjaja kormã aa kot ã amnhĩ xà htỳx kamã hamak anhỹr kêt tã arĩgroja ã koja mẽ amnhĩ xà htỳx kumrêx kamã ama. Hãmri nê axte pika ja kamã ã amnhĩ xà htỳx kumrêx kamã hamak anhỹr kêt nê.

22 Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwỳ ho gri hkêt ronhỹx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xàj mẽ amã ho gri.

23-24 —Tã ã mẽmoj kot amnhĩ nhĩpêx anhỹr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupỹn wrỳ. Kwa mẽ hwỳr mra nê omu.” Anê. Rỳ mẽ amã: “Krisja krĩ mũj kamã na raa. Kwa mẽ ma hwỳr mra nê omu.” Anhỹr o mẽ amã ixto hêx o pa. Rỳ mẽ awỳr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmẽ pa

wrỳ.” Anê. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mõn pøj.” Anhỹr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỹr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nê mẽ gryk ã ixkaga hprãm xàj koja mẽ ã mẽ anoo mã amnhĩ nhĩpêx anhỹr o pa. Nom ãm ã amnhĩ nhĩpêx anhỹr kaprỳ ka mẽ ixkaga hkêt nê.

25 —E kwa mẽ inhmar tỳx nê. Na pa ra ixprĩ hã ã mẽ kot amnhĩ nhĩpêx anhỹrja kukamã ã mẽ amã mẽmoj jarênh anê. Tã kêt ka mẽ amnhĩ nê ã mẽ kot amnhĩ to hêx anhỹr o mẽ pa xwỳnhjê pumunh mex o apa nê axkãm ajamak rom.

26 Rỳ koja mẽ tanhmã mẽ amã ixto hêx to nê mẽ amã: “Ota Tĩrtũm kot mẽ pahwỳr mênh xwỳnhhta kapôt ã mõn pøj. E mẽ tokyx ma hwỳr mra nê omu.” Anhỹr o mẽ amã ijarê ka mẽ ama nê ãm mẽ ama nê hwỳr amrar kêt nê. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nê omu.” Anê no ka mẽ ãm mẽ ama nê ãm mẽ ama nê hwỳr agjêx kêt nê.

27 Kot paj nhỹrmã akupỹn mẽ awỳr ixwrỳk kaxyw hãmri nê ixpimxur kãm ixwrỳk kêt nê. Koja pika piitã hkôt mẽ pa xwỳnhjaja anhĩpê ixwrỳk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu.

28 Te nhỹri mẽmoj kro nê nør nhũm nhõnhti kot omunh nê hã htor nê hpinhpanh nhũm mẽ piitã hã omunh pyrãk o kot paj amnhĩ nhĩpêx. Anê.

Jejus akupỹn wrỳk xwỳj ri mẽmoj kukamã harênh

Makre 13.24-31; Rukre 21.25-33; mãânên Wam Tesarõn 4.16-17

29 Nhũm Jejus arĩ mẽ ixte hkôt ixpa ho ixpa xwỳnhjê mã kapêr nê mẽ inhmã:

—Nê kot paj akupỹn mẽ awỳr inhnojarêt nhũm rĩ Tĩrtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harênh to nê harênh kot:

Koja Tirtûm kaxkwa ho àk nhùm kanhêti piitã rôrôk pa nhùm myyti ahtyk nhùm mytwrÿre urak nê axte hpôk kêt nê. Anê.

³⁰ Koja ã mëmoj amnhî nhîpêx anhÿr pa hãmri pa kaxkwa hã më amã mëmoj nhô. Hãmri nhùm pika piitã hkôt ri më pa xwÿnhjaja piitã omu nê tee ri amnhî kukamã hamaxpêr o hkaprî nê mÿr rax kumrêx. No më kajaja kot kaj më omu hãmri nê akupÿn më awÿr ixwrÿk nê më ato amnhîptâr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm më awÿr wrÿ.

³¹ Hãmri nê Tirtûm kapêr o më wrÿk xwÿnh maati mã anê nhùm pifti kakô hãmri nhùm hkwyjaja kuma nê ma më awÿr pika piitã hkôt anhgrã nê ma mra nê inhmã më ato akuprô. Ixte amnhî kaxyw më axunhwÿr xwÿnhjê o akuprô nê man akupÿn ixwrÿr më ato hapêx. Anê.

*Jejus kot mëmo pâr o ejêp jarênh
Makre 13.28-31; Rukre 21.29-33*

³² Nhùm Jejus arî më inhmã kapêr nê më inhmã:

—E ka më pî hpâr mÿj pumu. Na hte mëmo mytwrÿ hã rã nhùm më omu nê ô hkukamã hamaxpêr kurê kumrêx.

³³ Ja pyrã nê koja ã ixte mëmoj jarênh anhÿr xwÿnhja amnhî nhîpêx par më ka më omu nê akupÿn më awÿr ixwrÿk mã ajamaxpêr kurê kumrêx. Kot paj te ra më anhôrkwÿ kapem ixãm pyrãk o amnhî nhîpêx.

³⁴ Nom akupÿn ixwrÿk kêt ri koja ã më kot mëmoj kot amnhî nhîpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nê koja nhÿrmã pika nê kaxkwa wa hapêx pa. Tã no ãm ixkapêrja koja wa urak nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Më pahte akupÿn Jejus wrÿk xà hã arîgro pumunh kêt ã më pajarênh

Makre 13.32-37; Rukre 12.37, 17.26-30, 17.34-36; mãânên Wam Tesarôn 5.2

³⁶ Nhùm Jejus arî më inhmã kapêr nê më inhmã:

—Nê ixte akupÿn më awÿr ixwrÿk xà hã arîgroja më ate omunh kêt. Nê kaxkwa kamã Tirtûm kapêr o më wrÿk xwÿnhjaja haxwÿja kot ja pumunh kêt. Nê ijaxwÿja ixpê Tirtûm Kra htã ixte ja hã amnhî pumunh kêt. ãm inhô Papaj pix na kot ja pumunh.

³⁷ —Nê kot paj nhÿrmã man akupÿn më awÿr wrÿ. Akupÿn më awÿr ixwrÿk xà hã arîgrota ã koja më htÿx ri amnhî tomnuj o pa. Te amnepêm Nohti kormã htîr ri më pa xwÿnhjaja kot htÿx ri amnhî tomnuj o pata pyrãk.

³⁸ Na pre htem amnhî kaxyw Tirtûm mã hamaxpêr kêt nê. ãm jar më kot amnhî nhîpêx pix kukamã hamaxpêr kôt pix mã amnhî nhîpêx o pa. Rôm nhùm Noehtija gô htãm pymaj pâr rax nhîpêxta mã axã.

³⁹ Nhùm më ja hã omu nê ãm omu nê tanhmã ri amnhî kukamã hamaxpêr to hkêt nê. Hãmri nhùm naja më haêr pê wrÿ nê wrÿk rax o më hanhir pa. Tã akupÿn ixwrÿk xà hã arîgroja ã koja më htÿx ri ã amnhî nhîpêx anhÿr o paja o pa më haêr pê naja pyrã nê akupÿn wrÿ.

⁴⁰ —E kot paj më amã nhÿrmã akupÿn ixwrÿk nê tanhmã më anhîpêx to hã amnhî jarê. Te kot ja pyrãk. Koja mëmyjê hõ wa hamêxkrut nê hpur kãm àpênh o xa. Nhùm hõja ra ixkôt amnhî xãm nhùm hõja ixkôt amnhî xãm kêt japêr. Hãmri pa amnhî wÿr ra kot ixkôt amnhî xãm xwÿnhnta o api nhùm kot ixkôt amnhî xãm kêt xwÿnhnta hpur kãm ahte arî xa. Hãmri nê tee ri hkrãmnhwÿ japêr rît o xa.

⁴¹ Rÿ nhùm mênijê wa hamêxkrut nê harôj kahuk o xa. Nhùm hõja ra ixkôt amnhî xãm nhùm hõja ixkôt amnhî xãm kêt japêr. Hãmri pa amnhî wÿr kot ixkôt amnhî xãm xwÿnhnta ho api nhùm kot ixkôt amnhî xãm kêt xwÿnhnta tee ri hkrãmnhwÿ japêr rît o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã më anhîpêx anê.

42 Tã mẽ ate akupÿn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa.

43 Na htem htÿx ri nhÿri tanhmã amnhĩ nhĩpêx to ho pa nhũm mẽ kêp àhkĩnh xwÿnh mẽ òrkwÿ hwÿr agjê mẽ mẽ kêp ahkĩ.

44 Tã mẽ ate akupÿn ixwryk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ òrkwÿ nhõ dõn kot amnhĩ nhĩpêx pyrà mẽ atÿx ri tanhmã amnhĩ tomnuj to ho apa hkêt mẽ. Ixkutêp axkãm ajamak rom mẽ ri apa. Jao tãm ixkutêp amnhĩ nhĩpêx rãhã ho ri apa. Anẽ.

Mẽ kãm mẽ àpênh mex xwÿnhjê jarênh

Rukre 12.41-48

45 Nhũm Jejus arĩ mẽ inhmã kapêr mẽ mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm ò patrãw àpênh ã omu hãmri mẽ ma nhÿhÿm mõi kaxyw mẽ ìhkram mẽmoj piitã haxàr pa mẽ kãm: “E kêr ka ixwakre kamã inhmã inhõrkwÿ tânopxar mẽ mẽ. Nẽ inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri mẽ kato mẽ ma nhÿhÿm mõi.

46 Hãmri nhũm kot kãm àpênh mex xwÿnhja wakre kamã kãm àpênh mex o pa. Jakamã nhũm ò patrãw akupÿn hpôx o mõi nhũm amnhĩ wÿr harênh ma mẽ hkĩnh mẽ. Nẽ tee ri amnhĩ kukamã hamaxpêr o kãm uma hkêt mẽ. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt mẽ.

47 Jakamã nhũm ò patrãwja akupÿn pøj mẽ kot kãm àpênh mex ã omu mẽ hkĩnh mẽ. Hãmri mẽ kot kãm ò mẽmoj piitã hamãr o pa kaxyw ìhkram haxàr pa.

48 No koja axtem mẽ wakre kamã kãm àpênh mex kêt japêr. Nẽ hamaxpêr o: “Tk. Nã koja tokyx akupÿn mõi kêt mẽ.” Anhÿr o hkamnhix.

49 Hãmri mẽ wakre kamã kãm mẽ àpênh xwÿnhjê htak mẽ pipãnh pix o

pa. Nẽ kãm kagôxÿhti xành xwÿnhjê kôt pix mã pa.

50 Hãmri nhũm ò patrãwja haêr pè akupÿn pøj mẽ tee ri ja hã omu.

51 Hãmri mẽ kamã gryk tÿx mẽ tanhmã homnuj htÿx to mẽ kãm mẽ àpênh punuj xwÿnhjê mẽ mẽ ho hpimràatã amnhĩ nẽ mẽ kator pa. Hãmri mẽ mẽ kot kapêr kwÿm amnhĩ nhĩpêx xwÿnhjê mẽ mẽ ho hpimràatã tanhmã mẽ homnuj to mẽ amnhĩ nẽ mẽ kator. Hãmri nhũm mẽ tee ri amnhĩ kukamã hamaxpêr mẽ mur mẽ tee ri amnhĩ nhĩpêx. Tã kêr ka mẽ ixwakre kamã ho mẽ urak kêt mẽ. Mẽ kurom ixwakre kamã ixkapêr kôt amnhĩ nhĩpêx mex rãhã ho ri apa. Anẽ.

25

Kormã mẽ mjên kêt xwÿnhjê ho 10 mẽ mẽ harênh

Wam Tesarõn 5.1-3

1 Nhũm Jejus arĩ mẽ inhmã kapêr mẽ mẽ inhmã:

—Nẽ mẽ ate Tirtũm kôt amnhĩ nhĩpêx o mẽ apa xwÿnhjaja kêr ka mẽ akupÿn amnhĩ wÿr ixkãm ajamak rom mẽ ri apa. Nom mẽ kêp Tirtũm prãm nõkati xwÿnhjaja koja mẽ akĩnhã ãm htÿx tanhmã amnhĩ to pix kukamã hamaxpêr o pa. Te kormã mẽ mjên kêt xwÿnhjaja kot amnhĩ nhĩpêxta pyràk. E pa mẽ amã tanhmã mẽ harênh to ka mẽ inhma. Kojã kormã mẽ mjên kêt xwÿnhjê kêt 10jaja ma hkrãmnhwÿ mjên mã xwÿnhjê kutã pry hã mra. Amnhĩ kôt kanê jamÿ mẽ o mra mẽ kutêp pry nhĩkrep hkrĩ.

2-4 Nhũm mẽ kêp 5jaja hkwyjê rom amnhĩ kukamã hamaxpêr mẽ mẽ kanê kaxyw amnhĩ kôt orti hkwy ho mõi. No nhũm mẽ kêp 5 mẽ mẽ hkĩnhã ãm htÿx kanê pix jamÿ mẽ o mra.

5 Hãmri mẽ mẽ mjên mã xwÿnhjê kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ mẽ gaa mẽ ra òtxwa mẽ gaa mẽ hikwÿ mẽ ra òt pa.

6 —Tã nhũm kôt ã kamàt hãmri nhũm mjên mã xwÿnhjê hpôx o tẽ. Hãmri nhũm kot hkukamã harênh xwÿnhjê mẽ òt o mẽ hikwÿ xwÿnhjê

mã amýra nê mẽ kãm: “Kwa mẽ hãmri. Ota mjên mã xwýnhta tẽ. Mẽ tokyx kànhmã akrĩ pu mẽ kutã mra.” Anẽ.

⁷ Hãmri nhũm mẽ hkrã hapôj nê kanê hpôk.

⁸ Nom nhũm mẽ hkwýjê hkĩnhã õ kanê kaxyw orti ho pa hkêt xwýnhjaja ra mẽ kêp mẽ kanêja hkaprý hpa nhũm mẽ tee ri kot hpôk kaxyw. Hãmri nê orti hkwý hã hkwýjê hwý nê mẽ kãm: “Xê mẽ inhmã orti ho inhõ kanê go.” Anẽ.

⁹ Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhýri amnhĩm hkwý japrô mẽ.” Anẽ.

¹⁰ Hãmri nhũm mẽ tee ri mẽ kuma nê ma amnhĩm hkwý japrô mã ma mra.

—Rôm nhũm mjên mã xwýnhta mẽ hãnh tẽ nhũm kanê kamã arĩ mẽ orti xwýnhjaja omu nê hã jêt kurê kumrêx. Hãmri nê ma hkôt môn mẽ pikuprõnh xã hã ixkreja wýr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xã hã oreja ra hwýr hpôx jakamã nhũm mẽ hã kahê.

¹¹ —Tã nhũm ma mẽ kot orti japrô mã mrrar xwýnhjaja hãmri amnhĩ to hapu nê mra nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xã mẽ pa mẽ awýr agjê.” Anẽ.

¹² Hãmri nhũm hprõ mã xwýnhta mẽ kuma nê mẽ kãm: “Tk. Nã ixte mẽ apumunhre hã kot pa kêt mẽ amã kahê xã mẽ. Kwa mẽ ma akupým mra.” Anẽ. ã mẽ ujarênh kot anhýr. Anẽ.

¹³ Nhũm pre ã Jejus mẽ inhmã ujarênh anẽ. Hãmri nê mẽ inhmã:

—E kêr ka mẽ te kot amnhĩ kôt orti hkwý ho mõi xwýnhjaja kot amnhĩ nhĩpêx pyrãk. Mẽ ate akupýn ixwrýk xã hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anẽ.

*Mẽ kãm mẽ àpênh xwýnhjê jarênh
Rukre 19.11-27*

¹⁴ Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xã hkôt kot paj mẽ amã amnhĩre. Te mẽhõ my kot kãm mẽ àpênh xwýnhjê nhĩpêx pyrãk. Kojã nhýhým nojarêt nê kãm mẽ àpênh xwýnhjê mã hikukrêx piitã hkaga hpa. Örkwý nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa.

¹⁵ Hãmri nê ahpýnhã mẽ kãm kàxpore hkwý gõ. Mẽ kot kutêp kãm tanhmã ho rũnh to kaxyw ahpýnhã mẽ kãm õr pa. Kot kàxpore pumunh mex xwýnhja mã nhũm ho 5.000 nê kugõ. Nê kot hkôt kax pê omunh xwýnhja mã nhũm ho 2.000 nê kugõ. Nê kormã kot omunh týt kêt xwýnhja mã nhũm ãm ho 1.000 pix nê kugõ. Hãmri nê mẽ kãm amnhĩ jarê nê ma nhýhým mõi.

¹⁶ Hãmri nhũm kot ho 5.000 nê hamýnh xwýnhja kàxporeta py nê ma o mõi kurê kumrêx nê tanhmã ho àpênh to ho mõi kãm ra hipy axte ho 5.000 nê kumê.

¹⁷ Nhũm kot ho 2.000 nê hamýnh xwýnhja mããnên tanhmã ho àpênh to ho mõi kamã ra hipy axte ho 2.000 nê kumê.

¹⁸ Nom nhũm kot ho 1.000 pix nê hpýr xwýnhja wa hkĩnh ã axtem nê ma o tẽ nê kãm kakwý nê kamã haxã nê hity hpa nê ma akupým tẽ.

¹⁹ —Tã nhũm mẽ õ patrãwja akupýn mõi pøj nê mẽ kãm: “E mẽ amnê ixwýr mra nê ixte mẽ amã kàxpore ho ixpigrãnh xwýnhta jarê. Tanhmã na ka prem ixkutêp inhmã hipêx to?” Anẽ.

²⁰ Hãmri nhũm kot ho 5.000 nê hpýr xwýnhta kumrêx hwýr tẽ nê kãm: “E ota akàxporeta. Ate inhmã ho 5.000 pix nê õr tã pa amã ho rax nê amã hipy axte ho 5.000 nê kumê nhũm ho axkamur nê ra ho 10.000. Tã ota.” Anhýr o kãm kapêr hãmri nê kãm kugõ

²¹ nhũm amnhĩm hamý nê omu nê hkĩnh nê. Hãmri nê kãm: “Nã ãm hãmri na ka inhmã ho anê. Ixte amã ho

5.000 pix nê òr tã ka ra inhmã ho rax jakamã kot kaj apê inhmã mẽ àpênh xwýnhjê hkrãhtũm. E amnê ixwýr axà pu mẽ apku nê pahkĩnh.” Anê.

²² –Hãmri nhũm hpãnhã kot ho 2.000 nê hpyr xwýnhhta hwýr tẽ nê ò patrãwta mã kãm: “E ota akàxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumê. Tã ota.” Anê.

²³ Hãmri nhũm kuma nê amnhĩm hamý nê omu nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ àpênh xwýnhjê hkrãhtũm. E amnê ajaxwýja ixwýr axà pu mẽ apku nê pahkĩnh.” Anê.

²⁴ –Tã nhũm kot ho 1.000 pix nê hpyr xwýnhhta hapu hã wa hkôt tẽ. Hãmri nê ò patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa.

²⁵ Jakamã na pa inhmã apyma nê. Nê akàxporeta py nê ma o tẽ nê kaxyw kre nê kamã haxà. Tã ka akupýn mõn pøj pa ajarênh ma hãmri nê hkapa nê mañ akupýn amã o tẽ. Tã ota anhõ 1.000ta.” Anê.

²⁶⁻²⁷ Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anhýr tã na ka ixte amã kàxpore nhõrta pyr nê ma ho atêm. Nê mẽ kot mẽ kêp kàxpore jamýnh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwýnh.” Anê.

²⁸⁻³⁰ Hãmri nê kêp kàxporeta py nê nhãm jam kugõ nê kãm: “E amý nê o tẽ nê kot inhmã ho 10.000 nê òr xwýnhhta mã agõ. Hãmri nê jahti pynê nê ma o tẽ nê kamàt kô kamã amê. Apênh mexti hã. Koja tee amýra nê amnhĩ xà htýx kamã hamak xàj tee ri amnhĩ nham o axpên kamnhar týx kaprý nê rĩ amnhĩ pumu.” Anhýr o kãm kapêr nhũm kuma nê hpa hã

kupy nê ma o tẽ. Hãmri nhũm mẽ ò patrãwja mẽ àpênh xwýnhjê mã kãm: “E mẽ ate ixwakre kamã mẽ axàpênh mex xwýnhjaja kot paj ã mẽ ato mex rax anê ka mẽ akĩnh nê. Nom mẽ kot inhmã mẽ àpênh mex kêt xwýnhjaja kot paj mẽ kêp mẽõ mẽmojta jamý nê nhãm mẽhõm kugõ nhũm hkaprĩ nê.” Anê. ã mẽ ujarênh kot anhýr. Anê.

Jejus kot nhýrmã mẽ piitã tanhmã mẽ harênh to hã harênh
Matêwre 13.35-43, 13.47-50;
mããnêñ Apokarip 20.11-15

³¹ Nhũm Jejus arĩ mẽ inhmã kapêr nê mẽ inhmã:

–Nê kot paj nhýrmã akupýn mẽ awýr wrý nhũm Tirtũm kapêr o mẽ wrýk xwýnh piitã man ixkôt wrý. Kot paj wrý nê ixpê pahi maati hã ixkrĩ xà maati kamã inhmex nê nhý.

³²⁻³³ Hãmri nê Tirtũm kapêr o mẽ wrýk xwýnhjê mã anê nhũm mẽ ma krĩ piitã hkôt mẽ apiitã mẽ ato pikuprõnh pa nê akupýn ixwýr mẽ ato hapêx. Pa mẽ apumu nê tanhmã mẽ axunhwýr to. Te ôwêhti jamãr o pa xwýnh kot ôwêhti kaêx ã motre pumunh nê nhãm nê motre xunhwýr parta pyrãk.

³⁴ Hãmri nê ixupõk rũm mẽ ate ixkôt amnhĩ xunhwýr xwýnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj piitã hkêt ri na pa pre Inhĩpêêxã mẽ wa mẽ akukamã tanhmã ijamaxpêr to nê mẽ amã mẽmoj mex xunhwýr rũnh nê.

³⁵ Tã ka prem ajapøj hãmri nê ixkôt amnhĩ xunhwý nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mẽmoj gõ pa kuku.

Nê na pa pre inhmã kôr nê ixpa ka prem ja hã ixpumu nê inhmã gõ pa ho ixkõ nê akupým ixihtýx.

Nê aa mẽ ate ixpumunh kêt tã ka prem nhýri ixpumu nê amnhĩ nhõrkwý hwýr ixwý.

36 Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhĩkwỹ ka prem ixwỳr mra nê ixkane nê tanhmã ixto mex to pa akupỹm inhmex.

Nhũm prem ijaxà pa mẽ hagjênh xà kamã ixkrĩ ka prem ixwỳr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê.” Anê.

37 —Kot paj ã mẽ ate tãm amnhĩ nhĩpêx xwỳnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xà mẽ pajaja na pa prem ã ato mex anê? Nà mẽ ixte ã anhĩpêx anhỹr kãm amnhĩ pumunh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gô ka aku? Nê nhỹri na ka pre amã kôr nê apa pa prem amã gô hkwỳ ka ho ixkõ?”

38 Nê nhỹri na pa prem apumu nê amnhĩ nhõrkwỹ hwỳr awỳ? Rỳ ka pre axê pynajti nê apa pa prem amã inhĩnôhkà gô ka hagjê?

39 Nê nhỹri na ka pre axà nê anhĩkwỹ pa prem apumu nê akane? Nê nhỹri na prem ajaxà pa mẽ hagjênh xàja wỳr mra nê kamã tanhmã ato mex to? Nà mẽ pa hkêt.” Anhỹr o amnhĩ tã ixkukja.

40 Hãmri pa mẽ amã: “Nà mẽ kêp amrakati xwỳnhjaja na pre htem pa pyræk. Tã ka prem mẽ kamã axukapri hã tanhmã mẽ kutã anojarêt to ho ri apa jao te pa tanhmã ixto mex to ho apa pyræk. ãm hãmri na ka prem ã mẽ ho mex anhỹr o ri apa.” Anê. Kot paj ã mẽ ate amnhĩ to mex xwỳnhjê mã ixkapêr anê.

41 —Hãmri nê hpãnhã apke rũm mẽ kot ixkôt amnhĩ xunhwỳr kêt xwỳnhjê mã tanhmã ixkapêr to nê mẽ kãm: “No mẽ kajaja kot paj ixupôk rũm mẽ unhwỳr xwỳnhtajê hkĩnhã mẽ ato mex kêt nê. Amnepêm na pre Tĩrtũmja Satanasti mẽ mẽ kot

tanhmã kãm amnhĩ nhĩpêx to ho mẽ pa xwỳnhjê mẽ mẽ ho hpimràatã mẽ kaxyw kuwy rax kumrêxja nhĩpêx. Mẽ kot amnhĩ tomnuj tỳx mỳrapê nhỹrmã kamã amnhĩ xà htỳx kamã hamak rãhã nê pa ho pa kaxyw. Tã kot kaj mẽ ajaxwỳja ma mẽ hkôt hwỳr ajapêx. Mẽ apê Satanasti hkôt mẽ ate amnhĩ nhĩpêx o apa xwỳnh jakamã kot kaj mẽ uràn ma hwỳr ajapêx pa.

42 Aa mẽ ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mẽmoj nhõr kêt nê. Nê inhmã kôr nê ixpa hã ixpumu nom inhmã gô hkwỳ hkêt nê.

43 Nê nhỹri ahte ixpa hã ixpumu nom amnhĩ nhõrkwỹ hwỳr ixwỳr kêt nê. Nê ixê pynajre nê ixpa hã ixpumu nom inhmã axê nhõr kêt nê. Nê ixà nê inhĩkwỹ hã ixpumu nom ixkane hkêt nê. Nê mẽ kot ijaxàr nhũm arĩ ixkrĩ hã ixpumu nom ixwỳr amrar nê tanhmã ixto mex to hkêt nê. ã mẽ ate inhĩpêx anhỹr o apa jakamã e mẽ ma kuwy hwỳr apa kurê kumrêx.” Anê. Kot paj ã mẽ kãm ixkapêr anê.

44 Hãmri nhũm mẽ tee ri inhma nê amnhĩ tã ixkukja nê inhmã: “Kwa nà ã mẽ ijarênh anhỹr kêt nê. Aa mẽ ixte ã anhĩpêx anhỹre hã. Nhỹri na pa prem tanhmã akute hã apumu? Nà aa mẽ ixte nhỹri ã ate amnhĩ nhĩpêx anhỹr ã apumunhre hã.” Anê.

45 —Koja mẽ ã inhmã amnhĩ tã aprãr anhỹr kaprỳ. Kot paj mẽ kãm: “Nà na ka pre htem mẽ kêp amrakati xwỳnhjê pumu nê ãm mẽ omunh o ri apa nê mẽ kamã axukapri hkêt nê. ã mẽ hipêx anhỹr jao te pa ã inhĩpêx anhỹr pyræk. Jakamã kwa mẽ tokyx ma kuwy hwỳr ajapêx kurê kumrêx.” Anê. Kot paj ã kuwy hwỳr mẽ hanor anê.

46 Hãmri nê hwỳr mẽ rênh pa nhũm mẽ ma hwỳr hapêx nê kamã amnhĩ xà htỳx kãm hamak rãhã nê pa ho pa nê aa kator kêt kumrêx. No kêt mẽ ate tãm amnhĩ nhĩpêx o mẽ apa xwỳnhjaja kot kaj mẽ kurom ma Tĩrtũm mẽ wa inhõ krĩ hwỳr api nê kamã amex nê atĩr tũm nê apa ho pa. Kot paj ã ahpỹnhã mẽ apiitã mẽ anhĩpêx anê.

Aně.

Nhũm pre ã Jejus akupÿn wrÿk ã amnhĩ kukamã mẽ inhmã ujarěnh aně. Hãmri ně mẽ inhmã ujarěnh pa.

26

Mě kot Jejus ã àmněnh ã amnhĩ jarěnh

Makre 14.1-2; Rukre 22.1-2; Juãw 11.45-53

¹ Tã nhũm Jejus mẽ ixte hkôt ixpa ho ixpa xwÿnhjě mẽ ujarěnh pa ně mẽ inhmã:

² –E kot puj mẽ axte pahtã apkati axkrut hãmri nhũm arĩgro pẽ Pas kato. Jakamã koja mẽ piitã amnepẽm Tirtũm kot Ejit nhõ xwÿnhjě pẽ mẽ pakukamã mẽ panhĩgětjě kator mẽ hamaxpěr ně hã hkĩnh kaxyw Jeru-jarě hwÿr akuprõ. Kamã koja mẽ ixpyně ně pĩ kahpa hã inhõ ně ixpĩ. Koja mẽ tokyx ã inhĩpěx aně. Aně.

Nhũm pre ã amnhĩ kukamã mẽ inhmã amnhĩ jarěnh aně.

³ Rõm nhũm Jeru-jarě kamã patre krãhtũmjě mẽ Ijaew pigětjaja patre maati Kajpasja nhõrkwÿ kamã axpẽn wÿr akuprõ.

⁴⁻⁵ Ra mẽ kãm Jejus pĩr prãm tã mẽ kãm mẽ kot hkôt kapěr mar o pa xwÿnhjě pyma ně. Hãmri ně tee ri hamaxpěr ně axpẽn mã:

–Hěxta waa ně. Tanhmã kot puj wem ho ně kupĩ? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx ně. Pu mẽ hã axpu ně hã tanhmã axpẽn to. Jakamã kwa pu mẽ kormã tanhmã ho hkět ně.

Anhÿr o axpẽn ma.

Měhõ ni kot Jejus krã gregrer ã harěnh

Makre 14.3-9; Rukre 7.36-50; Juãw 12.1-8

⁶ Tã nhũm Jejus kormã krĩ pẽ Petãn kamã Simãw nhõrkwÿ kamã apkur o nhÿ. Simãwja na pre hkà kro xapěr tÿx o pa nhũm Jejus ra arĩgro hõ hã akupÿm hkà ho mex. Hãmri ně akupÿm õ krĩ hwÿr põj ně õrkwÿ hwÿr tẽ nẽ kuri apkur o nhÿ.

⁷ Hãmri nhũm mẽhõ nija hpõx ã omu ně hamaxpěr o:

–Ma koja pěr Jejusja pa hã apkati grẽre hãmri ně ty. An pa ma hwÿr tẽ ně mẽhkuxwa xà ho hkuxwa.

Aně hãmri ně kẽn jaka ho kàx kãm mẽhkuxwa xàja nhũm kumÿ ně ma hwÿr o tẽ. Hãmri ně ho hkrã gregrer ně hã hkapĩr pa ně ho hkuxwa hpa. Měhkuxwa xà hã kàxpore xohtõ rax tã nhũm ã hã hkapĩr par aně.

⁸ Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipěx anhÿr ã omu ně axpẽn mã:

–Tk. Kwa na hã mẽhkuxwa xàta kapĩr pa.

⁹ Kop apu ma kot o htẽm ně ho wẽnẽ ně hpãnhã kàxpore ho rax kumrěx ně hamÿnh ně ho mẽ kęp amrakati xwÿnhjě nhĩpěx par o nhÿx ja kãm mex ně. Kwa mo na we ã amnhĩ nhĩpěx anhÿr kět ně? Aně.

¹⁰ Hãmri nhũm Jejus amnhĩ tã mẽ inhma ně mẽ inhmã:

–Kwa kot ixto mex kaxyw kẽnã na ka mẽ axtem ně ixtã kãm akir.

¹¹ Mě kęp amrakati xwÿnhjaja koja mẽ arĩ mẽ akôt pa rãhã ně. Ka mẽ amã mẽmo arĩgro hã tanhmã mẽ ho ajuta hto hprãm ně tanhmã mẽ ho ajuta hto ně mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkět ně. Kot paj tokyx mẽ apiitã mẽ are.

¹² Ixtyk nhũm mẽ kot ijaxàr kukamã na ã ixkuxwa aně. ãm hãmri na ã inhĩpěx aně.

¹³ ãm hãmri na pa mẽ amã kot ã inhĩpěx anhÿrja jarě. Koja mẽ krĩ piitã hkôt axpẽn mã ijarěnh ã kagà kamã ijarěnh o pa ně kamã nija kot ã inhĩpěx anhÿr kamã harě ně kuma. Aně.

Jut Kariot kot mẽ kãm Jejus ã àmněnh

Makre 14.10-11; Rukre 22.3-6

¹⁴ Tã nhũm Jut Kariotja. Kęp mẽ ixpẽ Jejus kôt ixpa ho ixpa xwÿnh pẽ 12 hõ htã ra tanhmã hamaxpěr to ně axtem ně Satanasti nhÿ hã ma patre krãhtũmjě hwÿr tẽ ně tanhmã Jejus o mẽ mar to ně mẽ kãm:

15 —E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anẽ.

Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

Anẽ hãmri nẽ kãm kàxpore ho 30 nẽ òr kurê kumrêx nhũm hamÿ nẽ hkĩnh nẽ kato nẽ ma tẽ.

16 Hãmri nẽ mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nẽ ma mẽ hwÿr o htêm kaxyw.

Jejus kot hkôt mẽ pa xwÿnhjê kutã apkur

Makre 14.12-21; Rukre 22.7-13; Juãw 13.21-30

17 Tã nhũm mẽ hkĩnh pẽ Pasja kato. Amnepêm kormã Ejit kãm mẽ pa ri na pre mẽ inhĩgêjtjaja ôwêhti hkrare hkwy hpa nẽ ho anẽ nẽ kuku. Tĩrtũm kot ja hã mẽ omunh nẽ Ejit nhõ xwÿnhjê nẽ mẽ kator kaxyw nhũm prem ã amnhĩ nhĩpêx anẽ. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrã mẽ arĩgro pẽ Pasja ã axpên wÿr akuprõ nẽ jam ijamaxpêr pẽ mẽ urak nẽ ôwêhti hkrare hkwy pa nẽ pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nẽ Jejus wÿr tẽ nẽ amnhĩ tã hkukja nẽ kãm:

—Kwa nhÿri kot paj we wa tẽ nẽ mẽ akutêp Pas ã mẽ panhõ hã apê? Anẽ.

18 Hãmri nhũm wa kãm:

—Nà wa mãmri ma Jerujarêja wÿr wa tẽ. Nẽ krĩm axà nẽ mẽhõ myti pumunh kurê kumrêx nẽ kãm: “E Jejus na wa inhmẽ pa wa awÿr tẽ. Na awÿr hpêr mênh o: ‘E na pa ra inhnojarêt. Jakamã nhÿri kot paj we ixkôt ri mẽ pa ho mẽ pa xwÿnhjê mẽ Pas ã axpên kutã apku?’ Anhÿr o awÿr hpêr mẽ.” Anẽ. E wa ã kãm akapêr anẽ kê war ama nẽ war amã òrkwÿ nhĩmõk ã ixkre rax ò jahkre. Kamã ra kaxyw mẽ paxàpkur xà hã mẽmoj piitã. Ka wa omu hãmri nẽ mãmri mẽ ixkutêp kamã mẽmoj tã apê. Anẽ.

19 Hãmri nhũm wa kuma nẽ ma Jerujarê hwÿr tẽ. Nẽ hwÿr axà hãmri nẽ ra kot wa kãm mẽmoj jarênh xà

hkôt mẽmoj piitã omu hãmri nẽ mẽ ixkutêp mẽõ hã àpênh o wa xa.

20 Tã nhũm kamàt pa mẽ Jejusja kôt ixkreta wÿr ixpôx pa nẽ hwÿr agjê nẽ ixàpkur kaxyw ixkrĩ. Mẽ ixte Jejus kôt ixpa ho ixpa xwÿnhjê pẽ 12jaja pa mẽ ixpiitã Jejus kutã ixàpkur o ixkrĩ.

21 Hãmri nhũm Jejus tanhmã mẽ inhĩ jarênh to nẽ mẽ inhmã:

—E pa mẽ amã mẽmoj jarê ka mẽ inhma. Kot kaj mẽ atõ mẽ kãm ixkurê xwÿnhjê nhĩhkram ijaxà. Anẽ.

22 Hãmri pa mẽ tee ri kuma nẽ ixkaprĩ htÿx nẽ. Hãmri nẽ axpên pãnhã amnhĩ tã hkukja nẽ kãm:

—Kwa xà pa? Nà pa hkêt. Kot paj ã anhĩpêx anhÿr kêt kumrêx Pahiti.

Anhÿr o axpên pãnhã kãm amnhĩ tã aprã.

23 Hãmri nhũm mẽ inhmã:

—Nà ãm hãmri na pa mẽ amã ixkapêr. Mẽ ate ixkutã guhkrax kãm anhõ pãwti ho mry kagô nhek o akrĩ xwÿnhjê hõ kot kaj mẽ kãm ixtã amÿnê.

24 Tĩrtũm kapêr ã kagà htũm ra kot ixkukamã harênh xà hkôt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwÿnhta hêxta waa nẽ. ã kot amnhĩ nhĩpêx anhÿrja mÿrapê koja amnhĩ xà htÿx kãm hamak rax kumrêx. Kop apu aa ò mãmãj nhõxà hkre rũm kator kêt ronhÿx ja kãm mex nẽ. Anẽ.

25 Hãmri nhũm Jut Kariot kot mẽ kãm hã àmnênh mã xwÿnhta hãmri amnhĩ tã kuma nẽ kãm:

—Kwa xà we pa Jejus? Xà pa kot paj ã anhĩpêx anẽ? Kwa nà pa hkêt. Anẽ.

Hãmri nhũm kãm:

—Tÿ. Ka ã ate inhĩpêx anhÿr mã kênã. Anẽ.

Jejus kot amnhĩ kamrõ pikapĩr kukamã harênh

Makre 14.22-26; Rukre 22.14-23; mãânên Wam Korĩt 11.23-26

26 Tã nhũm Jejus pãwti hõ py nẽ Tĩrtũm mã harê nẽ mẽ inhmã ho hkry nẽ ho mẽ inhĩpêx pa nẽ mẽ inhmã:

—E na pa ã mẽ amã pãwti ho hkry nẽ mẽ amã òr anẽ. Ja pyrã nẽ koja mẽ ã inhĩpêx anẽ nẽ te ixto hkry hpar

pyràk o inhîpêx pa amnhî xà htÿx kamã ijamak kãm ty. Nom mê anê kot paj ty. E mê mãmri aku.

Anhÿr o mê inhmã amnhî jarê pa mê kuma nê kot mê inhmã ho hkry xwÿnhja ku.

²⁷⁻²⁸ Hãmri nhÿm hpãnhã kop py nê mã ho anê nê Tirtÿm mã harê nê mê inhmã kugô nê mê inhmã:

—Mê kot ixpîr xà hã arîgroja ã koja ixkamrô axkapî. Nom koja mê amarî ixpîr nhÿm amarî ixkamrô hpikapîr kêt nê. Æm paa. Pa kot paj mê anê mê îhkram amnhîjaxà nhÿm mê ã inhîpêx anê nê ixpî. Koja ixkamrô axkapî nhÿm Tirtÿm omu nê ixkukwak ri mê ate ixkôt amnhî xunhwÿr xwÿnhjê nê mê ate amnhî tomnuj piitã te amnhî katut kôt rênh par pyràk o hipêx nê mê ato hkra. Ra amnepêm kot ã amnhî jarênh anhÿr xà hkôt. Jakamã e mê ixkamrô pikapîr mã ajamaxpêr pê wîhti ho akôm o axpên nhîpêx.

²⁹ Æm hãmri na pa ã mê amã amnhî jarênh anê. Kot paj axte wîhti ho ixkôm kêt rãhã nhÿm nhÿrmã inhô Papaj akupÿn mê awÿr inhmê. Hãmri pu mê akupÿn ixwÿrÿk xà hã arîgrota ã pahkînh rax kumrêx. No Æm axtem tanhmã hã pahkînh to. Anê.

Nhÿm pre ã Jejus mê inhmã amnhî jarênh anê. Pa mê axpên pãnhã kopta py nê wîta kwÿ ho ixkô.

³⁰ Hãmri nê mê ixpiitã ho ixkôm pa nê Tirtÿm mã mex ã gre. Hãmri nê ijapôj nê hixêt prêk pê Oriwêhti hwÿr mã mra.

Jejus kot Simãw Pêtre mã kapêr ã harênh

Makre 14.27-31; Rukre 22.31-34; Juãw 13.36-38

³¹ Tã nhÿm Jejus tanhmã mê ixte hkôt ixpa ho ixpa xwÿnhjê jarênh to nê mê inhmã:

—E Tirtÿm kapêr ã kagà htÿmta kot tanhmã mê akukamã mê ajarênh to nê mê ajarênh kot:

Kot paj ôwêhti jamãr o pa xwÿnhja pî hãmri nhÿm ôwêhti hpigràn pa nê ma anhgrà nê ri mra.

Anhÿr o kot mê ajarênh. Te ho mê apê ôwêhti pyrà nê ã mê ajarênh anê.

Tã kamàt ja kamã koja mê tanhmã inhîpêx to ka mê ixtã mê omu nê mê umaj ôwêhti pyrà nê apiitã ixkaga hpa nê ma aprôt nê mra.

³² Nê mê kot ixpîr tã kot paj akupÿm ixtîr. Hãmri nê ma akupÿm mê akukamã pika pê Garirej wÿr mō. Kamã kot puj mê axte axpên pumu. Anê.

³³ Hãmri nhÿm Simãw Pêtre tee ri tanhmã mê kot amnhî nhîpêx to hkukamã amnhî jarênhja ma nê hkaprî nê kãm:

—Tk. Nà kot paj ã amnhî nhîpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hãmri nhÿm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mê umaj ate ixkôt apa hkêt ã mê kãm amnhî tã axaprãr o axkrunêpxi kãm ga. Kwa jam ajamaxpêr tÿx nê. Anê.

³⁵ Hãmri nhÿm tee ri kuma nê axte kãm:

—Kwa nà. Mê kot ajaxàr nê apîr tã kot paj arî akôt ri ixpa nhÿm mê pahto amÿrà nê tanhmã panhîpêx to. Nà kot paj aa akaga hkêt nê.

Anhÿr o kãm amnhî jarê. Pa mê ijaxwÿja ã kãm amnhî jarênh anê.

*Jejus kot Tirtÿm mã amnhî jarênh
Makre 14.32-42; Rukre 22.39-46*

³⁶ Tã nhÿm Jejus mê inhmã anê pa mê ma nhÿri mê kot kãm “Gesêm” anhÿr xwÿnhja wÿr mra. Hãmri nhÿm mê inhmã:

—E mê jar ixkutêp akrî. Pa ma mÿtÿm tē nê Tirtÿm mã amnhî jarê măn. Anê.

³⁷ Hãmri nê mê ixkwÿjê ho axkrunêpxi nê amnhî kôt mê kuwÿ. Simãw Pêtre nê Jepetew kra pijakrut pê Xiakre nê Juãwja wa nhÿm amnhî kôt mê kuwÿ nhÿm mê ma hkôt mra. Hãmri nhÿm Jejus tee ri mê kot tanhmã hipêx tota kukamã hamaxpêr o hkaprî nê amnhî kamã kahak tÿx nê.

³⁸ Hãmri nê mê kãm:

—Hêxta waa nê. Na pa tee ri amnhî xà htÿx kamã ijamakja kukamã ijamaxpêr nê amnhî kamã ixkahak tÿx o ra ixkaprî nê. Te ixkaprî kot ixpîr o môr pyrâk. Jakamã e mē jar anohtÿx nê ixto Tîrtûm wÿr o akrî kê tanhmã ixto pa mē kot tanhmã ixtoja kutã ixihtÿx nê. Anê.

³⁹ Hâmri nê mē kurûm htēm grire nê Tîrtûm mã amnhî jarēnh kaxyw htu mÿr pê tēm nê pikap nô nê kām:

—Kwa Papaj. Hêxta waa nê. Inhmã amnhî xà htÿx kām ijamak prãm kêt kumrêx. Na pa tee ri amnhî kukamã ijamaxpêr nê amnhî kamã ixkahak tÿx nê. Jakamã kot kaj amã inhnê ja ho ajapêx prãm nê māmri inhnê ho ajapêx nhûm mē kām ixkurê xwÿnhjaja tanhmã ixto hkêt nê. Rÿ ko. Kot kaj amã mē kot tanhmã ixto hprãm kê mē māmri tanhmã inhîpêx to. Nom pam inhmã hprãm xà hkôt kêt. Anê.

⁴⁰ Hâmri nê kànhmã xa nê akupÿm Simãw Pêtreja mē hwÿr tē nē tee ri mē omu nhûm mē ra ôt pa nê hikwÿ. Nhûm mē omu nê Simãw Pêtre mã kām:

—Kwa Simãw Pêtre. E mē hāmri akrã hapôj. Kwa wem anohtÿx grire

⁴¹ nê ixkutêp amnhî to Inhō Papaj wÿr o akrî kê mē ixkôt tanhmã mē ato htã ka mē amã mē uma xàj ixkaga hkêt nê arî mē kutã amnhî to htÿx nê akuhê. ã mē amã mē ate amnhî nhîpêx anhÿr prãm nom kormã mē amã maa.

⁴² Anhÿr o mē kām kapêr hāmri nê akupÿm tē nē axte Tîrtûm mã amnhî jarē nê kām:

—Kwa Papaj. Nà inhmã amnhî xà htÿx kām ijamak prãm kêt. Na pa amnhî kukamã ijamaxpêr nê amnhî kamã ixkahak tÿx kumrêx. Jakamã kot kaj amã inhnê ja ho ajapêx prãm nê māmri inhnê ho ajapêx kê mē kām ixkurê xwÿnhjaja tanhmã ixto hkêt nê. Nom ko. Kot kaj amã mē kot tanhmã ixto hprãm kê mē māmri tanhmã inhîpêx to. Nom pam inhmã ja prãm xà hkôt kêt. Anê.

⁴³ Hâmri nê kànhmã xa nê Simãw Pêtreja mē hwÿr akupÿm tē. Nê mē

omu nhûm kê mē axte gôr nê hikwÿ. Ra mē ôt xwa htÿx nê axte gôr nê hikwÿ. Nhûm Jejus tē nē tee ri mē omunh o xa

⁴⁴ nom axte tanhmã mē kām nê hkêt nê. ãm awjanã nê akupÿm tē nê kê wam kot Tîrtûm mã amnhî jarēnh xà hkôt axte kām amnhî jarē.

⁴⁵⁻⁴⁶ Hâmri nê akupÿm mē hwÿr tē nē mē kām:

—Kwa xàn ka mē arî gôr nê anhîkwÿ? E mē tokyx akrã hapôj. Na mē ra mē kot ixwÿr mrar nê ixpynênh mã. Kojã mē tokyx ixkutã mē kot amnhî xunhwÿr xwÿnhjaja mē kām ixtã amÿnê. Ota ra kot ixtã mē kām àmnênh xwÿnhhta tē. E mē tokyx kànhmã akrî pu mē kutã mra. Anê.

Mē kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhûm Jejus mē kām kapêr o ãm rãhã nhûm Jut Kariot pê mē inhîõja hwÿr tē. Nê amnhî kôt mē ohtô nê hwÿr mē o tē nhûm mē wapohti nê kô jamÿ nê hkôt o mra. Patre krãhtûm mē Ijaew krãhtûmjaja kot Jejus wÿr mē rēnh xwÿnhjaja nhûm mē man hkôt Jejus wÿr mra.

⁴⁸ Na pre ra Jut Kariot amnhî kukamã mē kām amnhî jarēnh o:

—Kot paj ixkumrêx hwÿr tē ka mē ixkôt hapu hã mra. Kot paj hwÿr tē nê kām ixkapêr nê kahti hkôt kumÿ. Ka mē hã ixpumu nê hwÿr mra nê unênh kurê kumrêx. Ixte kahti hkôt mÿnh xwÿnhhta kot kaj mē unê. Anê.

⁴⁹ Hâmri nê Jejus wÿr tē nê kām:

—Pa Jejus? Xàn ka kormã anhôt kêt nê xa?

Anê nê kahti hkôt kumÿ.

⁵⁰ Hâmri nhûm amnhî tã omu nê kām:

—Kwa Jut. Ate tanhmã ixto kaxyw mã xwÿnh jakamã e kam nê māmri tanhmã ixto. Anê.

Hâmri nhûm Jut kôt mē mrar xwÿnhjaja Jut kot kahti hkôt mÿnh ã omu nê hwÿr mra nê unênh kurê kumrêx.

⁵¹ Hâmri nhûm mē inhîõja tee ri ja hã mē omu nê ò wapo kapa nê patre

maati mã àpênh xwýnh kot mẽ hkôt htêm xwýnhhta mã ho apê. Nê kot ho hkrã nhîpôn mã tâ kuhpaw nê upôk rûm hamak nhîkjê pix krãhta.

⁵² Hãmri nhũm Jejus omu nê nê kãm kapêr nê kãm:

—Kwa akupým awapota hkàm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa.

⁵³ Xà kot paj amnhĩ to Tĩrtũm wý nhũm ãm inhma nê tanhmã jajê pê ixpytãr to hkêt nê? Nà kot paj amnhĩ to kuwý nhũm ixwýr kapêr o mẽ wrýk xwýnhjê rênh kurê kumrêx nhũm mẽ ohtô rax kumrêx nê wrý nê mẽ kêp ixpytã.

⁵⁴ Nom kot paj ã amnhĩ to hwýr anhýr kêt nê. Tĩrtũm kapêr ã kagà htũm kot amnepêm ixkukamã ã mẽ kot inhîpêx anhýr ã mẽ harênh jakamã kwãr mẽ mãmrĩ Tĩrtũm kãm hprãm xà hkôt ã inhîpêx anê. Anê.

⁵⁵ Hãmri nê hpãnhã mẽ kot unênh xwýnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tâ jarãhã te ixte amnhĩ tomnuj xwýnh pyrãk o inhîpêx nê ixwýr wapohti nê kô hã akapên nê ixwýr tẽ.

⁵⁶ Tã nom ra Tĩrtũm kapêr ã kagà htũm kamã Tĩrtũm nhỹ hã mẽ kapêr xwýnh kot mẽ akukamã mẽ ajarênh nê mẽ atã kagà xà hkôt na ka mẽ ri ã inhîpêx anê. Anê.

Nhũm pre ã Jejusja amnhĩ tâ mẽ kãm kapêr anê. Hãmri pa mẽ ixte hkôt ixpa ho ixpa xwýnhjaja mẽ omu nê tee ri amnhĩ kukamã ijamxpêr nê mẽ umaj ixprôt nê anhgrã nê ma inhmrar kurê kumrêx.

Mẽ kot patre maati hwýr Jejus o môr ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwýnhjaja ra patre maati Kajpas nhôrkwý hwýr akuprô nê Jejus kutêp

hkrĩ. Hãmri nhũm mẽ kot unênh xwýnhjaja ma mẽ hwýr o tẽ.

⁵⁸ Hãmri nê mẽ hwýr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kítare hwýr axà nê pôristi nhîhkô hã nhỹ. Hãmri nê tee ri Jejus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhô Pahihti nhîpêx to? E pa jar amým tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juistijaja kãm Jejus pĩr prãm týx nê. Jakamã na prem Ijaew wa ho hamêxkrut nê axpên kôt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprôn h xwýnhjê kapi.

⁶⁰ Jakamã nhũm prem axpên pãnhã mẽ hwýr mra nê tanhmã ho hêx to. Nom axpên kôt harênh kêt nê. ãm ahpýnhã tanhmã ri harênh to nom wahô wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũmja wa mẽ hwýr tẽ nê axpên kôt harê nê mẽ kãm:

⁶¹ —Nà na pre tanhmã Tĩrtũm mã amnhĩ jarênh xà hã ixkre jarênh to nê harênh o: “Kot paj nhỹrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupým hipêx pa. Ja kaxyw ixãhpumunh týx.” Anhýr o na amnhĩ jarê pa wa kuma.

⁶² Anhýr o mẽ kãm ho hêx. Hãmri nhũm patre maatija wa kuma nê kãnhmã xa nê Jejus mã kapêr nê kãm:

—Kwa xà ãm hãmri na wa ã ajarênh anê nà? Xàn ka pre ã amnhĩ jarênh anê? E mẽ inhmã tanhmã amnhĩ jarênh to. Anê.

⁶³ Nom nhũm amarĩ mẽ kãm xa nê mẽ kãm tanhmã nê hkêt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mẽ inhmã tanhmã amnhĩ jarênh to. Tĩrtũm noo mã amã ixkapêr jakamã kêr ka akatãt kôt mẽ inhmã amnhĩ jarê nê amnhĩ to axêx kêt nê. Xà apê Tĩrtũm Kra? Xà ka na pre Tĩrtũm mẽ ixkaxyw axãm?

Kwa akatàt kôt mẽ inhmã amnhĩ jarẽ. Anẽ.

⁶⁴ Hãmri nhũm tã hprĩ hã mẽ kãm amnhĩ jarẽ nẽ mẽ kãm:

–Tỳ. Nà ãm hãmri na ka ã ijarẽnh anẽ. Ixpê Tĩrtũm kot mẽ akaxyw ixãm xwỳnhhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỹn kakrã kamã mẽ awỳr wrỳ. Hãmri nẽ Tĩrtũm xàhpumunh o àhpumunh xwỳnhhta nhĩhkô hã nhỹ hãmri nẽ pam tanhmã mẽ ajarẽnh to ka mẽ amnhĩ tã ixpumu nẽ inhma. Anẽ.

⁶⁵ Hãmri nhũm patre maatija tee ri ã kot amnhĩ jarẽnh anhỹr ã kuma nẽ kamã gryk tỳx nẽ. Hãmri nẽ gryk xàj kệp patre maati hã ê kapa nẽ hkaxôn pa nẽ kumẽ nẽ hkwỳjê mã kãm:

–Tk. Kwa mo kaxyw kot puj mẽ axte ri tanhmã kot amnhĩ tomnuj to hã harẽnh xwỳnh õ japêr? Tãm kot amnhĩ pê Tĩrtũm Kra hã amnhĩ jarẽnh ã amnhĩ to hêx nhũm mẽ pahte mar kênã.

⁶⁶ Jakamã e kwa tanhmã kot puj mẽ hipêx to? Anẽ.

Hãmri nhũm mẽ kãm:

–Nà ã kot amnhĩ jarẽnh anhỹr mỳrapê koja ty. Ra htyk mã tãm kênã. Anẽ.

⁶⁷ Hãmri nẽ tanhmã hipêx kati hto. Mẽ hkwỳjaja hkuk kuhtô nẽ ãhkra ho htak nhũm mẽ hkwỳjaja ãhkra hpo ho htak nẽ hã hpêr o axkẽ nẽ kãm:

⁶⁸ –E apê Tĩrtũm Kra hã ate amnhĩ jarẽnh jakamã mãn uràk nẽ axàhpumunh tỳx. Jakamã e mẽ kot atak xwỳnhhta nhĩxi jarẽ pa mẽ ama. Anẽ.

Simãw Pêtre kot Jejus kôt pa hkêt ã amnhĩ jarẽnh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kítare kamã nhỹ. Hãmri nhũm mẽ kãm àpênh xwỳnh nitita omu nẽ hprĩ hã omunh kurê kumrêx. Hãmri nẽ kãm:

–Xê pêr apê Jejus kôt mẽ pa xwỳnhjê hõ na ka. Anẽ.

⁷⁰ Hãmri nhũm tee ri amnhĩ tã kuma nẽ kãm mẽ uma xàj mẽ kãm amnhĩ tã aprã nẽ kãm:

–Tk. Kokỹ. Ixte mễhõ my ata pumunhre hã. Anẽ.

⁷¹ Hãmri nẽ mẽ umaj kànhmã xa nẽ tẽ nẽ kítare hwỳr hakwakrem ahte mẽ hkàx ã xa. Tã nhũm hpãnhã hõja omu nẽ hã mẽ kãm:

–Xê ma pêr ãm hãmri na mẽ harẽ. Kêp Jejus kôt ri mẽ pa xwỳnhjê hõ na pêr. Anẽ.

⁷² Hãmri nhũm amnhĩ tã kuma nẽ kãm:

–Tk. Nà mẽ ri ã amnhĩ krã hkôt ri ixto axêx anhỹr kêt nẽ. Ixte aa mễhõta pumunh kêt kumrêx. Anẽ.

⁷³ Tã nhũm mẽ hkwỳjaja hwỳr mra nẽ kãm kapêr nhũm tanhmã mẽ kãm kapêr to nhũm mẽ kuma nẽ kãm:

–Kwa pêr ãm hãmri na mẽ ajarẽ. Apê Jejus kwỳ na ka. War akapêr kot axpên pyràk kênã. Anẽ.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtỳx nẽ mẽ kãm:

–Kwa nà. Na pa Tĩrtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràk ixpê Garirej nhõ xwỳnhre hã. Ixte mễhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx.

⁷⁵ Hãmri nhũm Simãw Pêtre kuma nẽ ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harẽnhhta mã hamaxpêr kurê kumrêx. Hãmri nẽ kànhmã hakry hpar o tẽ nẽ hkaprĩ htỳx kumrêx nẽ kítare pê kato nẽ tẽ nẽ awry hã xa nẽ mỳr rax nẽ.

27

Mẽ kot pahшти Pirat wỳr Jejus o htêm ã mẽ harẽnh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mỗr mẽ nhũm mẽ hkrãhtũmjê mẽ patre

krähtümjaja axpën wÿr pikuprõnh pa. Hāmri nē Jejus ā axpën mar o hkrī nē axpën mā:

—Nà kot puj mē hā amÿnē kē mē kupī. Kēp Tīrtūm Kra hā kot amnhī jarēnh o amnhī to hēx kēnā. Anē.

² Hāmri nē mēō pōristijē mā anē nhūm mē hpa hpre hpa nē ma pahihiti Pirat wÿr o tē. Pirat kēp Rōm nhō pahihiti nhÿ hā mē ixpē Ijaewjē ho amnhīptār jakamā nhūm mē ma hwÿr o tē nē ĩhkram haxà.

*Jut Kariot kot amnhī pīr ā harēnh
Atre 1.15-19*

³ Rōm nhūm Jut Kariot tee ri mē kot Jejus pīr kaxyw mē harēnh ma nē hkaprī nē. Ra kot mē kām hā àmnēnh tā mē kot hpīr kaxyw ā mē harēnh ma nē tee ri amnhī kukamā hamaxpēr o hkaprī htÿx nē. Hāmri nē hamaxpēr o:

—Hēxta waa nē. Mo na pa pre ri axtem nē ā amnhī nhīpēx anē? Nà na pa pre amnhī tomnuj tÿx kumrēx. Anē.

Hāmri nē ra mē kot kām kàxpore ho 30 nē ōrta jamÿ nē ma akupÿm patre krähtümjē mē Ijaew pigētjē hwÿr o tē. Hāmri nē mē kot Tīrtūm mā amnhī jarēnh xà hā ixkreja wÿr mē hwÿr axà

⁴ nē nhÿri mē omu nē mē hwÿr tē nē mē kām:

—E ota mē akàxporeta. Na pa ā mē amā Jejus ā ixàmnēnh anhÿrja o amnhī tomnuj tÿx nē. Kot tām amnhī nhīpēx o pa htā pa axtem nē ā mē amā hā ixàmnēnh anē. Jakamā e mī. Mē akupÿm akàxporeta jamÿ. Kot paj amnhīm hamÿnh kēt nē. Anē.

Hāmri nhūm mē tee ri kuma nē kām:

—Kokÿ. Nom ka na ka pre mē ixwÿr tē nē ho mē inhmar kēnā. Anē.

⁵⁻⁷ Hāmri nhūm tee ri mē kuma hāmri nē pikap kàxpore rēnh pa nē ma tē nē kato. Hāmri nē hkaprī htÿx kumrēx nē hamaxpēr o:

—Kwa tanhmā kot pa we amnhī to? Nà kot paj amnhī pī. Anē.

Hāmri nē krī pē kato nē ma mē kot pika kakwÿnh nē ho amnhīm poti nhīpēx xà hā pika hwÿr tē hāmri nē amnhī mut mā ē nē ho amnhī

pī. Hāmri nhūm patre krähtümjaja harēnh ma nē tee ri kot kàxpore rēnh ta kawrà nē hā axpën kukja nē axpën mā:

—Kwa tanhmā kot puj wem ja ho? Jut kot mē pamā Jejus ā àmnēnh nhūm mē pahte hpīr xà hā kàxpore na. Jakamā kot puj mē ho Tīrtūm mā amnhī jarēnh xà hā ixkre ho mex kēt nē. Finat Mojes kot ja nē mē panhīgētjē kurē jakamā na htem mē hpar xà hā kàxpore ho ixkreta ho mex kēt nē. Jakamā kwa tanhmā kot puj mē ho? Anē.

Hāmri nhūm ja mē kām:

—E na pa ra ijamaxpēr. Pu mē ho Jut kot amnhī pīr xà hā pikata japrō hāmri nē kamā jar mē kēp mē pahkwÿ hkēt htyk xwÿnhjē jagjēnh o papa. Anē.

Hāmri nhūm mē kuma nhūm ja mē kām mex nē. Jakamā nhūm arīgro hō hā nhūm mē ma hwÿr mra nē haprō.

⁸ Hāmri nē hā hixi mē nhūm kēp “mē hkamrō pikapīr xà kamā pika”. Mē kot Jejus pīr xà hā kàxpore ho haprōr jakamā nhūm prem ā hā hixi mēnh anē. Nhūm htem arī axpën mā ā hixi jarēnh anhÿr o pa.

⁹⁻¹⁰ Nhūm pre ra amnepēm Tīrtūm nhÿ hā kapēr o pa xwÿnh finat Jeremīsti mē hkukamā hprī hā ja jarē nē hā kagà. Nē hā kagà o:

Koja Ijaew nhō patrejaja mēhō kot mē kām mēhō my hā àmnēnh pānhā kām kàxpore ho 30 nē ōr xwÿnhja jamÿ. Hāmri nē ma o tē nē nhÿri mē kot amnhīm pika kakwÿnh nē ho poti nhīpēx o pa xà hā pika hkwy japrō. Ra Tīrtūm kot inhmā mē harēnh xà hkōt koja mē ā amnhī nhīpēx anē. Anē.

ā finat Jeremīsti kot Tīrtūm nhÿ hā mē hkukamā mē harēnh nē hā kagà anhÿr xàja kōt nhūm prem ā amnhī nhīpēx anē.

*Pahihiti Pirat kot Jejus kukjēr ā
harēnh*

*Makre 15.2-5; Rukre 23.3-5; Juāw
18.33-38*

11 Rôm nhũm mē pahihti Pirat wÿr Jejus o tē nē hwÿr ho axà nē kutā ãm nhũm xa nhũm Piratja omu nē kām:

—E. Kwa inhmā amnhĩ jarē. Xà apē Ijaew nhō pahi na ka nà? Xà ka na htem amnhĩ wÿr ajamār o pa? Anē.

Hāmri nhũm kām:

—Tÿ. Nà ãm hāmri na ka ijarē. Anē.

12 Hāmri nhũm mē hkrāhtũmjê mē patre krāhtũmjaja pahihti Pirat mā tanhmā ho kapēr punuj to. Nhũm amnhĩ tã mē kuma nom tanhmā kām amnhĩ tã àprār to hkēt nē.

13 Jakamā nhũm pahihti Pirat tee ri ja hã omu nē kām:

—Kwa xà na ka ã mē kot ato kapēr anhÿrja mar kêt nē nà?

14 Anhÿr tã nom nhũm Jejus akryk xa nē axte tanhmā kām nē hkēt nē. Hāmri nhũm Pirat tee ri kot ã amnhĩ nhĩpêx anhÿr ã omu nē hamaxpēr o:

—Kokÿÿ. Mē kot ho kapēr punuj tã nhũm ãm mē kuma nē te kām mē uma hkēt pyrà nē tanhmā inhmā amnhĩ tã àprār to hkēt nē. Anē.

Pirat kot Jejus pÿr kaxyw hã àmnênh ã harênh

Makre 15.6-15; Rukre 23.13-26; Juãw 18.39-19.16

15-21 Tã nhũm Pirat kormã mē kot axpên mar xà hã ixkre kamã ÿr rãhã nhũm hprōja hwÿr hpēr mē nē kām:

—Xê tanhmã mē kām Jejusja ã axàmnênh to hkēt nē. Na pa kamàt ja kamã hkôt amÿti nē tee ri hkukamã ijamaxpēr. Kot amnhĩ to mex xwÿnh na. Aa tanhmã kot amnhĩ tomnuj to hkēt jakamã xê tanhmã mē kām hã axàmnênh to hkēt nē. Kwarĩ. Anē.

Hāmri nhũm Piratja kuma nē hamaxpēr o:

—Nà ixte Ijaew krāhtũmjê pumunh tũm. Ijaew kwÿjaja kām Jejus kÿnh nhũm mē hkrāhtũmjaja kot mē hã Jejus kamã gryk nē. Jakamã ixte tanhmã mē kām hã ixàmnênh to kaxyw na mē ã ixwÿr o htēm anē. Anē.

Na htem Pas nhō arĭgrota hapôx mē nhũm pre htem Ijaew o amnhĩptār xwÿnhja mē kām mē hagjênh xà kamã hkrĩ xwÿnhjê ho hpÿnh nē mē hapôj. Mē kām hprãm xà hkôt nhũm mē kām

mē hapôj nhũm mē akupÿm kapôt ã hamakêtkati nē amnhĩx pa. Jakamã nhũm ra mē hagjênh xà kamã mēhō my pē Parapasja hkrĩ. Na pre tanhmã amnhĩ tomnuj to nhũm mē mÿrapê unê nē haxà. Jakamã nhũm Ijaewjaja mē ho amnhĩptār xwÿnh Pirat wÿr akuprō nē kuhê nhũm mē kām:

—E kot paj jarãhã mē amã mē hagjênh xà kamã mē hkrĩ xwÿnhjê hō mã inhÿre kê àmnhĩx kato nē ri pa. Nhÿ kot paj mē amã kām inhÿre? Xà Parapas nà? Xà mē akwÿ kot amnhĩm ho mē anhō pahihti Jejus pē Tirtũm kot mē akaxyw ãm xwÿnhhta kot paj mē amã kām inhÿre? Nhÿ wehe? E mē inhmã nhÿ jarē. Anē.

Pirat na pre mē inhō patre krāhtũmjê pumunh mex nē. Ijaew kām Jejus kapēr mar prãm tÿx ã nhũm mē hã kamã gryk tÿx nē hwÿr o mrarja kôt nhũm mē omunh mex nē. Jakamã ã hã mē hkukjêr anē. Hāmri nhũm mēhpigêt mē patre krāhtũmjaja kuma hāmri nē mē pikuprōnh nē mē kuhê xwÿnhjê mã kām:

—Kwa mē kām anē kê mē pamã Parapas mã mãn ure nē mãmri Jejus Kris pĩ. E kwa mē tokyx kām anē kê Parapas mã ure. Anē.

Hāmri nhũm mē mē kuma nē pahihti Pirat mã kām:

—Nà mē inhmã Parapas mã mãn anhÿre. Anē.

22 Hāmri nhũm tee ri mē kuma nē mē kām:

—Kwa no mē ate Jejus pē Tirtũm kot mē akaxyw ãm xwÿnh ã harênh xwÿnhhta? Tanhmã kot paj hipêx to? Anē.

Hāmri nhũm mē kām:

—Apĩ ri. Tokyx pĩ kahpa hã anhô kê ty. Anē.

23 Hāmri nhũm tee ri mē kuma nē mē kām:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhō nhũm ty. Anē.

Hāmri nhũm mē xatã àmra kamã kām:

—Kwa pĩ kahpa hã mãn anhô kê ty. Kwa tokyx ã mē inhmã hipêx anē. Anē.

24 Hāmri nhūm tee ri ja nê tanhmā mē kām kapēr to no nhūm mē mar kêt nê. Nhūm tee ri mē àmra mar o xa. Hāmri nê kām Jejus pīr prām kêt jakamā amnhīm gô hkwỳ janhi nê mē piitā mē noo mā amnhī nhīhkra kuhōnh o xa. Mē kot hā omunh xà hkôt kām hpīr prām kêt ā omunh kaxyw. Hāmri nê mē kām:

—E na pa mē anoo mā ā amnhī nhīhkra kuhōnh anē ka mē ja hā ixpumu. Nà inhmā hpīr prām kêt. Tanhmā kot amnhī tomnuj tore hā. Mē kaxipixjaja mē amā hpīr hprām jakamā mē kam nê tanhmā ho. No pa kot paj tanhmā ho hkêt nê. Ām kwarī ho kwarī. Anē.

25 Hāmri nhūm mē kuma nê kām:

—Tôe. Nà ām hāmri. Kot paj mē pamjaja amnhī tā htykja nhô. Nê mē ixkra nê mē ixtāmnhwýjê mē amnhī to ixpimràatā amnhī tā kunhō. Kê Tirtūm kām tanhmā hā mē ixtō hto hprām nê mamrī tanhmā hā mē ixtō hto. Anē.

26 Hāmri nhūm mē kuma nê mē kām hprām xà hkôt mē kām Jejus ā amýnê nê mē kām Parapas mā ure. Ra Parapas kot pahi Pirat pê õ pôristi kutā amnhī xām nê kêp hōxpīrja mýrapê nhūm mē kot unênh nê haxār tā Ijaew kām hprām xà hkôt akupým kām ure. Hāmri nê õ pôristijê mā anê nhūm mē Jejus tak. Nê htak rax nê hāmri nhūm Pirat mē kām hā amýnê nhūm mē kot pī kahpa hā nhôr o hpīr kaxyw ma o tē.

Pôristi kot Jejus ā hpēr o pikēnh ā harēnh

Makre 15.16-20; Juāw 19.2-3

27 Tā nhūm pôristijaja mē kot pī kahpa hā Jejus nhôr kaxyw ma o tē nê pahшти Pirat nhôrkwý kamā ixkre hō hwýr ho axà. Nhūm pôristi ohtô nê hwýr akuprô nê hā pēr o pikēnh kaxyw axpēn mā:

—E kwa tokyj pu mē kām pahi xê jaxà ri. Kêp pahi hā kot amnhī jarēnh kēnā. Anē.

28 Hāmri nê kêp ê kapa nê hpānhā kêp pahi hā mē ê kamrêk mexja py nê kām haxà.

29 Nê kām pahi hā mē ahkà nhīpêx nê hkrām haxà. Nom axtem akunī kamā mēmo mrô nhī te kot ronh kanêre pyrāk xwýnhja nhūm mē hikāx nê hkrām haxà. Nê kām pahi hā kô gô nhūm kupy nê o xa. Hāmri nhūm mē ho anhýr pa nê kutā hkôn krā ho rôrôk nê hkrī hpa nê hā pēr o pikēnh kamā kām:

—E ām hāmri. Apê Ijaew nhô pahi punuti na ka. Anē.

30 Hāmri nê kànhmā kuhê nê hkuk kuhtô nê kêp kô pytā nê xatā ho hkrāx pê htak. Nhūm prem ā pēr o pikēnh kām hipêx anē.

31 Hāmri nê kêp pahi hā ê kapa nê akupým kām ê jaxà nê mē kot pī kahpa hā nhôr kaxyw ho kato nê ma o tē.

Pôristi kot pī kahpa hā Jejus nhôr ā harēnh

Makre 15.22-32; Rukre 23.27-43; Juāw 19.17-25

32 Nhūm pôristijaja Jejus o kato nê ma kapôt mā o tē. Nê kām pī kahpa pytija gô nhūm kumý nê mē hkôt o hkwý. Nom ra hirok týx nê nhūm mē tee ri ja hā omu nê mēhō kot ho ajuta kaxyw mē kot omunh xwýnhjê kapi ho xa. Hāmri nê Sirēn nhô xwýnh Simāw kà htyk pumu nê unê nê kām kot Jejus o ajuta kaxyw hā karō nhūm hwýr tē nê kêp pī kahpata mý nê hkôt kām kumý nê o tē.

33 Hāmri nhūm mē kēn nhīxêt te kot mē hkrā hi pyrāk xwýnhhta wýr mē o pôj. Mē kapēr kām na prem hixêtja jarēnh o: “Korkot.” No mē pakapēr kām Korkot jarēnhja kêp “mē hkrā hi xà” nhūm mē ma hwýr Jejus o pôj.

34 Hāmri nê mē kot pī kahpa hā nhôr kaxyw nhūm à htýx kumrêx kamā hamak pymaj kām mēmo mē hkanexàja gô. Wīhti mē mēmo mry ma xà ho pihkār nhūm mē kām hkwý gô. Nom nhūm hkaki nê mē kot amnhī xà htýx kamā hamak kêt xà hā omunh kurê kumrêx nê hkaga. Nhūm mē tee ri ja hā omu hāmri nê kêp ê kapa nê kumê nê pī kahpa hā kuxi nê prek o ĩhkra nê hpar o htýx

pa. Hāmri nê kànhmã pĩ jarĩ nê ahkre kamã ãm nê ho htýx nhũm kýxpê ajêt.

³⁵ Hāmri nhũm pōristi hkwyjaja axpēn mã ê hkwy ho pigrànkh kaxyw hã kēnre ho jōka.

³⁶ Hāmri nê ho anhỹr pa nê pikap Jejus jamãr o hkrĩ.

³⁷ Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mýri pĩ kahpa hã hanhō. Jakamã na prem tapti hō py nê tanhmã Jejus ã kagà hto nê hã kagà ho:

IJA EW NHŌ PAHI NA JA
HIXI PÊ JEJUS

Hāmri nê hwýr ho api nê mýri kunhō. ã Jejus kot amnhĩ jarēnh anhỹrja mýrapê na prem kupĩ.

³⁸ Hāmri nhũm mẽ hpãnhã wa àhkĩnh xwýnh wa ho axkrut nê mãânēn pĩ kahpa hã wa kunhō. Nê akutã ho Jejus nhĩjê nhũm war ajêt.

³⁹ Tã nhũm pry hã mẽ mrar xwýnhjaja Jejus pumu nê hã hpēr o pikēnh o mra nê kãm:

⁴⁰ —Kwa ka na ka pre ate Tĩrtũm mã amnhĩ jarēnh xà hã ixkre grànkh par nê atã apkati axkrunēpxi nê akupým hipēx par ã amnhĩ jarē. Nê apê Tĩrtũm Kra hã amnhĩ jarē. Nê axãhpumunh o axãhpumunh jakamã e kwa amnhĩ kapa nê wrý pa mẽ ja hã apumu. Kwa tokyx. Anē.

⁴¹ Nê patre krãhtũmjê mẽ Tĩrtũm kapēr tũm o mẽ ahkre o mẽ pa xwýnh mẽ mẽ hkrãhtũmjaja piitã hwýr mra nê hã hpēr o axkē.

⁴² Nê axpēn mã harēnh o:

—E jahti na xep pre mẽ kamã ukaprĩ ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrýk kêt nê. Kwa pu mẽ arĩ pakuhê nê kot amnhĩ kaxàr nê wrýk kãm omu. Kojã wrý pu mẽ omu nê kēp mẽ panhō pahĩti hã hkôt paja-maxpēr kurê kumrēx. E tokyx wrý Jejus. Pa mẽ awrýk kãm apumu. Nã kot kaj awrýk rax nê.

⁴³ Na hte amnhĩ kaxyw Tĩrtũm mã hamaxpēr o pa. Nê kēp Kra hã amnhĩ jarēnh o pa. Jakamã e. Kê Tĩrtũm tãm

hwýr tē nê kēp Kra hã akupým mẽ pahpê utà. Anē.

⁴⁴ Hāmri nhũm wa kot akutã hijê nê jêt xwýnhhta wa haxwýja mẽ mar xà hkôt mã ho kapēr anē.

Jejus tyk ã harēnh

Makre 15.33-41; Rukre 23.44-49; Juãw 19.28-30; mãânēn Eprêw 10.19-20

⁴⁵ Tã nhũm kaxkwa nhĩpōk ri myt ýr mẽ nhũm te kamàt pyrãk nhũm kamàt kō rax kumrēx. Jao hã awry mẽ nhũm ra akupým myt katēr o mō.

⁴⁶ Hāmri nhũm Jejus kapēr kãm hitýx nê àmra htýx kãm Tĩrtũm mã kapēr nê kãm:

—Inhō Tĩrtũm inhō Tĩrtũm. Kwa mon ka ixkaga? Anē.

Nom kapēr kamã kãm kapēr o:

—Eri Eri. Rãmã sapatanĩ. Anē.

⁴⁷ Hāmri nhũm mẽ kot mar xwýnhjaja kot Eri jarēnh ã kuma nê htýx ho finat Eris mã kapēr ã hkamnhĩx.

⁴⁸ Nhũm Jejus par pē guhkrax kãm wĩhti punure xa. Jakamã nhũm mẽ ã kapēr anhỹr ã kuma nhũm mēhō kãm hkaprĩ nê. Hāmri nê mẽmo rerek py nê o tē nê kaxyw pĩ rytija py nê ho hkanhwý. Nê akupým o tē nê ho wĩhti nhek nê Jejus kot hkaôr kaxyw kãm kupē.

⁴⁹ Hāmri nhũm hkwyjaja tee ri ja hã omu nê nê kãm kapēr nê kãm:

—Tk. Kwa nhãm xa. Pu mẽ kop Eris jamã mãn. Kojã hwýr tē nê ho wrýk japēr. Anē.

⁵⁰ Hāmri nhũm kamàt kō mẽ nhũm Jejus ra htyk kaxyw nê axte àmra htýx nê hãmri nê ty.

⁵¹ Tykja kôt nhũm Tĩrtũm mã amnhĩ jarēnh xà hã ixkre kamã hakwakre hã kupēxēja kýj rùm ahpãr mã axkjê nê amnhĩ kahê xà mēnh kurê kumrēx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwýr xwýnhjê mã Tĩrtũm wýr pry jakwa kre kahê xà mēnh pyrãk o ã amnhĩ nhĩpēx anē. Nhũm pika htertēt týx kumrēx o kēn rũnh kwý ohtô nê hkrakrak pa.

⁵² Hāmri nhũm mẽ htyk ã pika kamã mẽ htykjê nhōrkwy ho ohtô nê mẽ

hã axkjê nhũm mẽ hikwỹ xwỳnhjaja akupỹm htĩr nẽ hapôj nẽ kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nẽ akupỹm htĩr nẽ hapôj nẽ kuhê.

⁵³ Nom kormã nhỹhỹm mrrar kêt nẽ. Arĩ mẽ hã pika nhĩpy Jejus akupỹm htĩr ã hamãr o kuhê. Tã nhũm Jejus apkati hõ hã akupỹm htĩr ã arĩgrota ã nhũm mẽ rĩ kormã ma Jerujarê hwỳr mra nẽ hwỳr agjê nhũm mẽ ohtô nẽ akupỹm mẽ htĩr ã mẽ omu.

⁵⁴ Nhũm kormã Jejus htyk o môrta ã nhũm pôristi krãhtũm mẽ pôristi hkwyjaja hãmri hparpê hamãr o kuhê nẽ htyk kãm omu. Nẽ pika htertet kamã ama nẽ mẽmoj kot tanhmã amnhĩ nhĩpêx toja pumu nẽ tee ri hamaxpêr nẽ kãm ma htỳx kumrêx. Hãmri nẽ axpên mã:

—Hêxta waa nẽ. Pêr ãm hãmri na pre htyk xwỳnhta amnhĩ jarê. Kêp Tĩrtũm Kra kênã. Tã pu mẽ amarĩ pahỳx kupĩ. Anẽ.

⁵⁵⁻⁵⁶ Nhũm pre mênijaja ohtô nẽ amỹm Jejus tyk kãm omunh o kuhê. Marir Matarên nẽ Xiakre mẽ Juje wa katorxã Marir nẽ Xiakre hõ mẽ Juãw wa katorxãja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wỳr mõ.

*Mẽ kot Jejus jaxàr ã harênh
Makre 15.42-47; Rukre 23.50-56;
Juãw 19.38-42*

⁵⁷ Tã nhũm ra myt grire nhũm krĩ pê Arimatej rũm hikàxpore rax xwỳnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrỳk nẽ haxàr prãm nẽ.

⁵⁸ Hãmri nẽ ma pahi Pirat wỳr tẽ nẽ ã hã kuwỳ nẽ kãm:

—E ot pa awỳr tẽ. Kwa inhmã htyk xwỳnhta gõ pa ma o tẽ nẽ haxà nà? Anẽ.

Hãmri nhũm kuma nẽ kãm harê nhũm ma o tẽ nẽ haxà.

⁵⁹ Kaxyw kupêxê mex õ py nẽ ho hkupu pa

⁶⁰ nẽ ma o tẽ nẽ õ kên kre kamã haxà. Na pre htyk kukamã kên kre

kakwỳ nhũm mẽ kot kormã kamã mẽhõ jaxàr kêt tã kamã na pre Jejus jaxà. Hãmri nẽ hã kên rax õ xãm nẽ ho hitom nẽ ma akupỹm tẽ.

⁶¹ Nhũm Marir Matarên mẽ Marir õja wa kên kreta kapem omunh o wa nhỹ.

Pôristi kot kên kre jamãr o kuhê ã harênh

⁶² Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwỳnhjê mẽ patre krãhtũmjaja ma pahi Pirat wỳr mra nẽ kãm:

⁶³ —Kwa pahihti. Nà amnhĩ to hêx o pa xwỳnhta na pre kormã htĩr nẽ pa ri tanhmã amnhĩ jarênh to ho pa. Nẽ nhỹrmã ty nẽ htyk ã apkati axkrunêpxi pix nẽ akupỹm htĩr ã amnhĩ jarê.

⁶⁴ Jakamã kwa hwỳr anhõ pôristi hkwy rê kê mẽ ma hwỳr mra nẽ hamãr mex o apkati axkrunêpxi. Kot ka anhỹr kêt nhũm hkôt mẽ pa ho mẽ pa xwỳnhjaja ma hwỳr mra nẽ ho ahkĩ nẽ ma o mra nẽ nhỹri haxà nẽ mẽ piitã mẽ kãm ra akupỹm htĩr ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mẽ kot axte ã harênh anhỹrja koja omnuj tỳx o tãm kot ã amnhĩ jarênh anhỹrja jakre. Anẽ.

⁶⁵ Hãmri nhũm mẽ kuma nẽ mẽ kãm:

—Tõe. Nà koja mẽ ho anẽ. E mẽ ma hwỳr amnhĩ kôt pôristi hkwy ho mra kê mẽ hakwakre kahê xà jamãr mex o kuhê. Anẽ.

⁶⁶ Hãmri nhũm mẽ kuma nẽ ma hwỳr mra nẽ hakwakre hã kên raxta o htỳx pa. Nẽ mẽhõ kot omunh nẽ kahê mẽnh pymaj menh ê ho hkukõ. Hãmri nẽ ho anhỹr pa nẽ pôristi mã kãm:

—E Kêr ka mẽ jar kuri hamãr mex o akuhê. Kê mẽhõ tẽ nẽ tanhmã ho hkêt nẽ. Anẽ.

28

*Jejus akupỹm htĩr ã harênh
Makre 16.1-8; Rukre 24.1-12; Juãw
20.1-10*

1 Tã nhũm apkati nhũm tòmĩk. Hãmri nhũm Marir Matarēn mẽ Marir òja kwỳhtã kànhmã nhỹ nẽ ma akupỹm kẽn kreta wỳr wa tẽ.

2 Puh nhũm pika htertet tỳx nẽ nhũm Tirtũm kapēr o mẽ wrỳk xwỳnhja kẽn kre wỳr wrỳ nẽ nhãm hakwakre nẽ kẽn raxta mẽ nẽ hã nhỹ.

3 Hirã htỳx kãm nhỹ. Te na jaxênh pyrãk. Nẽ ê haka htỳx kumrẽx.

4 Nhũm pôristijaja tee ri omu nẽ kãm ma htỳx nẽ htertet nẽ umaj pikap rôròk pa nẽ te htyk pyrã nẽ hikwỹ.

5 Hãmri nhũm wa nita kẽn kre hwỳr pòj nẽ tee ri Tirtũm kapēr o mẽ wrỳk xwỳnhja pumu. Nhũm wa kãm:

—Kwa wa amã ma hkêt nẽ. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwỳnhja.

6 Nom jar amrakati. Na ra akupỹm htĩr nẽ kato nẽ ma tẽ. E wa kam nẽ amnẽ axã nẽ nôr xã kaprỳ pumu. Anẽ.

Hãmri nhũm wa kuma nẽ tee ri kẽn kre kamã Jejus japêr nhũm kamã amrakati.

7 Hãmri nhũm Tirtũm kapēr o wrỳk xwỳnh wa kãm:

—E wa tokyx ma akupỹm tẽ nẽ hkôt mẽ pa ho mẽ pa xwỳnhjê mã harẽ. Koja ma Jejus mẽ akukamã akupỹm Garirej wỳr mō. Garirej kamã kot kaj mẽ axte axpẽn pumu. Ra kot mẽ amã amnhĩ jarēnh xã hkôt. E kwa wa tokyx ma akupỹm mẽ hwỳr tẽ. Anẽ.

8 Hãmri nhũm wa kuma nẽ ma akupỹm hprôt nẽ htēm kurê kumrẽx. Kãm ma htã hkĩnh nẽ. Nẽ ma Jejus kôt mẽ pa ho mẽ pa xwỳnhjê mã ujarēnh kaxyw ma mẽ hwỳr hprôt nẽ wa tẽ.

9 Pu nhũm ra Jejus tãm wa kutã tẽ nẽ wa hkaxpa. Hãmri nẽ wa haêr pẽ wa kãm kapēr nẽ wa kãm:

—Pa? Nhỹhỹm na ka wa tẽ? Anẽ.

Hãmri nhũm wa omu nẽ hkĩnh tỳx kumrẽx nẽ hwỳr hprôt nẽ hpar pẽ hkõn krã ho tēm nẽ akutã hpar ã kumỳ nẽ kãm mex o mex ã harẽ nẽ kãm:

—Hêxta gàu nẽ. Ma amex kumrẽx. Amex o amex. Anẽ.

10 Hãmri nhũm wa kãm:

—E war amã ma hkêt nẽ. Mamrĩ ma tẽ nẽ ixkôt mẽ pa ho mẽ pa xwỳnhjê mã ijarẽ kê mẽ ma Garirej wỳr mra. Kamã kot paj mẽ axte axpẽn pumu. Anẽ.

Pôristi kot kàxpore hprãm xaj Jejus o hêx ã harēnh

11 Rôm nhũm pôristi hkwỳjaja akupỹm tãm hkrã hãmri nẽ ma kẽn kreta rũm akupỹm krĩm mra. Hãmri nẽ patre krãhtũmjê hwỳr mra nẽ mẽ kãm ujarēnh pa.

12 Hãmri nhũm mẽ tee ri mẽ kuma nẽ mẽhpigêtjê ho akuprô nẽ mẽ hã axpẽn mar o hkrĩ. Hãmri nẽ axpẽn mar pa nẽ pôristi mã amnhĩrer rax nẽ mẽ kãm:

13 —E mẽ amnhĩm kàxpore jamỳ nẽ ma ri ã mẽ kãm amnhĩ jarēnh anhỹr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kẽn kre kapem ixtỳx gôr nẽ inhĩkwỹ nhũm Jejus kôt mẽ pa ho mẽ pa xwỳnhjaja mra nẽ mẽ ixpê ì ho ahkĩ nẽ ma o mra.” Anhỹr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã.

14 Koja pahiti Piratja mẽ anhôt ã mẽ ajarēnh ma nẽ hã tanhmã mẽ ato kaxyw hã kot paj mẽ axy pẽ tanhmã kãm ixkapēr to nhũm tanhmã mẽ ato hkêt nẽ. Jakamã e. Mẽ tee ri amnhĩ kukamã ajamaxpêr kêt nẽ. Mẽ mãmrĩ ma mra nẽ ã mẽ kãm axujarēnh anhỹr o ri apa. Anẽ.

15 Hãmri nhũm mẽ kuma nẽ mẽ kot amnhĩ to hêxta pãnhã kàxpore jamỳ nẽ ma mẽ mar xã hkôt mẽ piitã mẽ kãm Jejus kôt mẽ pa xwỳnhjê ho hêx o pa. Tã na htem arĩ jarãhã Ijaewjaja ã axpẽn mã mẽ harēnh anhỹr rãhã ho pa.

Jejus kot hkôt mẽ pa ho mẽ pa xwỳnhjê mã mẽ àpênh ã karō

Makre 16.14-18; Rukre 24.36-49; Juãw 20.19-23; Atre 1.6-8

16 Tã pa mẽ ixte Jejus kôt ixpa ho ixpa xwỳnh pẽ 11jaja hãmri akupỹm Jejus htĩr ã harēnh ma hãmri nẽ ma Garirej wỳr mra. Nhỹri Jejus kot mẽ inhãm mẽmemo hixêt prêk jarēnhja wỳr.

¹⁷ Nê ra hwÿr ixpôx o mrar mē Jejus pumu. Tã nom nhũm mē ixkwÿjaja tee ri omu nê htÿx ho nhãm mēhõ hã hkamnhĩx. No kêt mē pajaja na pa prem ixprĩ hã omunh kurê kumrêx nê ixkĩnh tÿx nê. Nê ixkĩnh nê hwÿr ixprôt nê kãm:

–Pa Jejus? Hêxta waa nê. Amex o amex. Anê.

¹⁸ Hãmri nhũm mē inhmã:

–E na pre Tĩrtũm ã inhmã kapêr anê nê inhmã: “E kêr ka amnhĩ nhÿ hã mēmoj piitã tanhmã ho ho apa. Kaxkwa kamã nê pika kamã. Mamrĩ nhÿhÿm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mē akaxyw ã inhmã kapêr anê.

¹⁹ –Jakamã e. Kêr ka mē ma pika piitã hkôt ri mē kãm ijarênh o ri apa. Kê mē ixte mē nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwÿ nê ixkôt ri amnhĩ nhĩpêx o pa. Nê kêr ka mē ja hã mē omu nê Tĩrtũm mē wa inhmã mē hkrã kumrã. Wa ixkarõ nhÿ hã mē hkrã kumrã. Mē kot wa inhÿ hã pix mã tanhmã amnhĩ nhĩpêx to ho pa kaxyw.

²⁰ –Nê mē kãm anê kê mē ixkapêr piitã hkôt amnhĩ nhĩpêx rãhã ho pa. E kêr ka mē ma mē kãm ã ijarênh anhÿr o ri mē hkôt apa. Kot paj mē anhĩhkô hã ri ixpa rãhã nhũm nhÿrmã pikaja hapêx o hapêx. Anê.

Na pre ã Jejus mē inhmã mē ixápênh ã karõ anê.

Matêwre kot Jejus jarênh nê hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mããnên hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar

xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tĩrtũm tokyx mẽ pahwỳr mẽ panhõ Pahihtĩ mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mẽhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihtĩ nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katàt nhũm ra katàt mux nê nõi pyræk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ã hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtô nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xà na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ

ně. Hāmri ně ra inhmā amnhĩ tomnuj kaga ně tām amnhĩ nhĩpêx prām ně.

Anhỹr ã amnhĩ jarě. Hāmri nhũm Tĩrtũmja kaxkwa kamā hkrĩ htā mẽ kuma ně amnhĩ katut kôt mẽ kot amnhĩ tomnuj piitā rěnh pa ně axte kām hamaxpěr kêt ně. Jakamā nhũm Juāw Paxis gôx kām mẽ hkrā kumrā. Pyhti pē Jotāw kamā.

⁶ Juāw Paxisja hikàxpore hkêt jakamā na pre ê mex kêt ně pa. Ām mẽmo mry pē kamer kĩ ho amnhĩm ê nhĩpêx ně hagjê ně hã pa. Ně mẽmo mry hkà ho amnhĩ pre ně ri pa. Ně mẽõ mex kur kêt ně ãm krit ku ně menh ôr o ri pa.

⁷ Hāmri ně mẽ kām tanhmā Jejus jarěnh to ho pa ně mẽ kām:

—E mẽ inhma. Koja tokyx Tĩrtũm kot mẽ pakaxyw ãm xwýnhhta mẽ pahwýr wrý. Ahpumunh tỳx o kot ijakrenh jakamā na pa hte ãm kukwak ri ixpa ně amnhĩ tã hã xpijaàm rãhã ho ri ixpa. Te ixkràm ã xpijaàm o amnhĩ nhĩpêx pyrāk.

⁸ Na pa hte gô pix o Tĩrtũm mã mẽ akrã kumrār o ri ixpa. Nom mẽ pahwýr wrýk mã xwýnhja koja mẽ awýr Tĩrtũm Karō rě nhũm mẽ akaxwýnh mã agjê. Ka mẽ ý hã tãm ri amnhĩ nhĩpêx rãhã ho ri apa. Aně.

Juāw Paxis kot Jejus krã kumrār ã harěnh

Matêwre 3.13-17; Rukre 3.21-22; Juāw 1.32-34

⁹ Tã nhũm Jejusja tãm Juāw Paxis wýr tẽ. Garirej kamā krĩ pē Najare rũm ma hwýr tẽn pôj. Hāmri nhũm Juāwja hkrã hkumrã. Pyhti pē Jotāw kamā hkrã kumrã.

¹⁰ Hāmri ně wa gôj rũm api ně mýr ri kaxkwa pumunh o xa. Nhũm kaxkwa axkjê nhũm kurũm Tĩrtũm Karō te tuuti pyrã ně Jejus wýr wrýk o tẽ ně ĩkre hã xa nhũm amnhĩ tã omunh o xa.

¹¹ Hāmri nhũm Tĩrtũm kaxkwa rũm kām kapěr ně kām:

E apê Ixkra mex na ka. Ām hāmri na ka hte ixkanrěhã amnhĩ nhĩpêx mex o apa. Inhmã ajapê kamā na ka ri apa ho apa. Aně.

Jejus kot Satanasti kaga hã harěnh Matêwre 4.1-11; Rukre 4.1-13; mããněnh Eprêw 2.18, 4.15

¹² Tã nhũm Tĩrtũm Karōja ma kapôt mã Jejus o mō

¹³ nhũm kapôt ã mry xoprê kaêx ã ri mrar o hã arĩgro pē 40. Hāmri nhũm Satanasti omu ně ma hwýr tẽ ně ri hkôt pa. Kapôt ã ri hkôt hêx rom tanhmã kām kapěr to nhũm kot mar ně hkôt amnhĩ xãm prãm xaj ma hkôt pa. Nom nhũm Jejus hkaga kumrêx nhũm tee ri ho anhỹr kaprý ně ma akupým tẽ. Hāmri nhũm Tĩrtũm kapěr o mẽ wrýk xwýnhjaja Jejus wýr wrý ně tanhmã ho mex to.

Jejus kot Tĩrtũm mã àpěnh krax ã harěnh

Matêwre 4.12-17; Rukre 4.14-15

¹⁴ Nhũm pre ra mẽ ixpê Ijaew o amnhĩptār xwýnh pē Eroxja Juāw Paxis kot mẽmoj tã kām àkjêr mýrapê nhũm pre ra unê ně haxà. Tã kot haxār jakành pē nhũm Jejus ma akupým pyka pē Garirej wýr mō ně kamā mẽ kām Tĩrtũm kapěr jarěnh o pa. Ně Tĩrtũm kot mẽ hwýr mẽnh ã amnhĩ jarěnh o pa. Nom te nhãm mẽhõ jarěnh pyrāk o amnhĩ jarě

¹⁵ ně mẽ kām:

—E na Tĩrtũm kām mẽ ato hkra hprãm ně. Jakamā na ra kot mẽ awýr ãm xwýnhhta mẽ nhũm mẽ awýr wrý. Kwa mẽ tokyx kapěrja ma ně amnhĩ kaxyw hkôt ajamaxpěr. Hāmri ně ate amnhĩ tomnuj kaga ně Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx aně nhũm Tĩrtũm amnhĩ tã mẽ apumu ně mẽ ato hkra. Aně.

Jejus kot amnhĩ kôt tep pyněnh xwýnh wa hwýr ã harěnh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamā gô rax pē Garirej mýri mō. Hāmri ně Simāw mẽ htõ Andreja wa hwýr kato ně wa omu. Wa kot tep pyněnh xwýnh jakamā na pre wa gôx kām kryhti rěnh o xa nhũm Jejus wa hãnh tẽ ně wa omu.

¹⁷ Hāmri ně amnhĩ kôt wa kuwý ně wa kām:

—E war amnē ixkôt tē nē ixkôt mǎn apa. War apē tep kanhēr rax o ri apa xwýnh tâ kēr ka war axàpênhta kaga nē hpānhā ixkôt apa ho apa. Kot paj tanhmā war akrā hto ka wa tep pynēnh pānhā ma ri mē hkôt mē kām ixkapēr jarēnh o ri apa. Mē ohtô nē mē kot war amar nē Tirtūm kôt amnhī xunhwýr kaxyw. Jao kot kaj te war ate tep kanhēr rax nē Tirtūm mā ōr pyrāk o amnhī nhīpēx.

Anhýr o wa kām kapēr.

18 Hāmri nhūm wa kuma nē kryhti kaga nē ma hkôt pa ho pa kurē kumrēx.

19 Hāmri nē mē gō mýri mō nē Jepetew kra Xiakre mē htō Juāw wa hwýr kato nē wa omu. Nhūm wa kormā hipêêxà nhīhkô hā pàr kām kryhti ho mex o wa nhý nhūm Jejus wa mē hwýr kato nē wa omu nē amnhī kôt wa kuwý.

20 Hāmri nhūm wa kuma nē ma hkôt pa ho pa. Pàr kre kamā mē kām àpēnh xwýnhjē ri hipêêxà re nē ma Jejus kôt pa ho pa.

Jejus kot mēhō nē mēkarōmnuti janor ā harēnh

Rukre 4.31-37

21 Hāmri nhūm Jejus mē hkôt mē pa ho mē pa xwýnhjaja ma krī pē Kapanaū hwýr mō hāmri nē hwýr pōj. Hāmri nhūm mē ixpē Ijaewjē nhō arīgromnu pē sap kato nhūm Jejus ma Tirtūm kapēr o mē ahkre xà hā ixkre hwýr tē nē hwýr axà. Hāmri nē kamā mē kot Tirtūm kapēr mar kaxyw axpēn wýr mē pikuprōnh xwýnhjē jahkre ho nhý.

22 Nē mē ahkre mex nhūm mē kuma nē tee ri hamaxpēr nē axpēn mā:

—Hêxta waa nē. Pēr ām hāmri na ā mē pamā mēmoj jarēnh anē. Tirtūm kapēr tūm o mē ahkre xwýnhjē rom àhpumunh tỳx kôt na hprī hā mē pajahkre mex nē. Anē.

23 Hāmri nhūm mēhō myja mē hwýr axà. Na pre ra mēkarōmnuti hwýr axà nhūm ý hā amnhī tomnuj o pa. Hāmri nē mē hwýr axà nē Jejus pumu nē kām kapēr. Nom tām kapēr kêt nē.

Mēkarōmnuti nhý hā kām kapēr. Kàx pē kām kapēr nē kām:

24 —Pa Jejus? Kwa tanhmā mē ixto hkêt nē. Ixte apumunh mex. Apē Najare nhō xwýnh tâ mǎānēn apē Tirtūm kot mē ixwýr amēnh xwýnh maati na ka. Tirtūm rūm na ka pre mē ixwýr wrý. Kwa xà kot kaj mē ixto ajapēx nà? Anē.

25 Hāmri nhūm kām:

—Tk. Kwa anhīkrē nē myta kurūm akator kurē kumrēx. Anē.

26 Hāmri nhūm kuma nē àmra htỳx kām myja o àk tỳx nē kēp kato nē ma tē nhūm akupým mex.

27 Hāmri nhūm mē piitā omu nē kamā no puma nē. Hāmri nē xatā axpēn mā harēnh o pa nē axpēn mā:

—Kokýý. Jejus na pre àhpumunh tỳx kôt mēkarōmnuti jano nhūm kuma nē mē kurūm hapôx kurē kumrēx. Anē.

28 Hāmri nhūm Garirej kamā mē piitā ri axpēn mā harēnh o pa.

Jejus kot akupým Simāw xupānhgêx o mex ā harēnh

Matêwre 8.14-15; Rukre 4.38-39

29 Tā nhūm Jejus Xiakre mē Juāw mērohā Tirtūm kapēr o mē ahkre xà hā ixkre rūm kato nē ma Simāw mē Andre wa ōrkwý hwýr mō.

30 Hāmri nē mē hwýr agjē. Nhūm Simāw xupānhgêxja ra à nē hkà kagro htỳx nē nō nhūm Jejus mē hwýr axà nhūm mē kām harē.

31 Hāmri nhūm mē kuma nē hwýr axà nē omu nē hpa hā kupy nē kànhmā ýr nhūm hkà hakry nē akupým mex kurē kumrēx. Hāmri nē kànhmā xa nē tē nē mē kām mēmoj nhīpēx nhūm mē hkur o hkrī.

Jejus kot akupým mē hkwýjē ho mex ā harēnh

Matêwre 8.16-17; Rukre 4.40-41

32-33 Tā nhūm myt axà nhūm mē ohtô nē Simāw mē Andre wa ōrkwý hwýr mra nē hakwakrem Jejus ā akuprō. Nē amnhī kôt mē à xwýnhjē ho mra. Nē mēkarōmnuti kot mē hwýr gjēx xwýnhjaja nhūm mē hwýr mē o mra.

34 Hāmri nhūm Jejus mē omu nē akupým ahpýnhā mē piitā mē ho

mex pa. Nê mêkarõmnutija nhũm mẽ kurũm mẽ hapôj. Mêkarõmnuti kot kêp Tĩrtũm Kra hã omunh tã no nhũm kapêr nê mẽ hkurê nê mẽ hano nhũm mẽ kapêr kêt rãhã mẽ kurũm hapôj nê ma mra.

Jejus kot Tĩrtũm mã amnhĩ jarênh ã harênh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nê tẽ nê kato. Hãmri nê ma kapôt ã ahte nhỹhỹm tẽ nê nhỹri Tĩrtũm mã amnhĩ jarênh o nhỹ.

³⁶ Hãmri nhũm Simãw Pêtre mẽ hkwyjaja hkrã hapôj nê tee ri ixkre kamã hapêr. Hãmri nê hapôj nê ma hpri jakop o mō.

³⁷ Hãmri nê hwyr kato nê omu nê kãm:

—Pa. Kwa na mẽ piitã tee ri ajapêr. Anẽ.

³⁸ Hãmri nhũm mẽ kãm:

—Tō ma pu mẽ mō. Nom kot puj mẽ akupỹm mẽ hwyr pamōr kêt nê. Kot puj mẽ hpãnhã nhãm krĩ hkwy hkõt mãn ri pajapôj. Pa kamã mẽ kãm Tĩrtũm kapêr jarê mãn. Ja kaxyw na pre mẽ awyr inhmẽ. Krĩ piitã hkõt mẽ pa xwynthjaja kot kapêr mar kaxyw. Anẽ.

³⁹ Hãmri nê mẽ ma axte Garirej kamã krĩ hkwy hkõt pa. Nê krĩ piitã hkõt Tĩrtũm kapêr o mẽ ahkre xã hã ixkre kamã mẽ kãm Tĩrtũm kapêr jarênh o pa. Nê mẽ kurũm mẽkarõmnuti japōx o pa.

Jejus kot akupỹm mēhō hkãmnu ho mex ã harênh

Matêwre 8.1-4; Rukre 5.12-16

⁴⁰ Tã nhũm mēhō hkã hkro xapêr tỹx xwynthja Jejus wyr tẽ. Hãmri nê hã hpijaam kaxyw kutã hkõnkrã ho tẽm nê nhỹ nê kãm:

—Pa Pahihti. E ot pa awyr amnhĩ to tẽ. Akupỹm ate mẽ ixto mex kaxyw axãhpumunh tỹx jakamã kot ka akupỹm amã ixto mex prãm nê mãmri akupỹm ixto mex. Anẽ.

⁴¹ Hãmri nhũm kuma nê kamã ukapri nê hã ihkra xi nê kãm:

—Nã kot paj ato mex. E akupỹm akã mex.

⁴² Anhỹrja kôt nhũm akupỹm hkã mex kurê kumrêx.

⁴³⁻⁴⁴ Hãmri nhũm Jejus kãm kapêr kãm hihtỹx nê hano nê kãm:

—E kêr ka amnhĩ tã akwýjê mã tanhmã ijarênh to hkêt rãhã ma patre hwyr tẽ kê akupỹm akã mex ã apumu. Hãmri ka amnepem Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpêx to hã karõ xwynthta ka kãm ho anẽ. Kê mẽ piitã akupỹm akã mex ã apumu. Anẽ.

⁴⁵ Hãmri nhũm kuma nê ma tẽ. Nom axtem nê ma mẽ piitã mẽ kãm amnhĩ jarênh o ri mra. Jejus kot kãm karõ xã kuhpa hã ma mẽ kãm amnhĩ jarênh o ri mra. Jakamã nhũm mẽ kuma nê piitã nhỹhỹnh Jejus wyr mra. Mẽ ohtō rax kumrêx nê hwyr mra nhũm tee ri mẽ noo mã nhỹri krĩm pa mã. Hãmri nê ãm krĩ pu hã ri pa htã nom nhũm mẽ arĩ ohtō nê hwyr mra.

2

Jejus kot akupỹm ã kamã htyk xwynth o mex ã harênh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nê hkõt mẽ pa ho mẽ pa xwynthjê mērohã ma akupỹm Kapanau wyr mō. Hãmri nê hwyr pōj nhũm mẽ piitã nhỹri mēhō nhōrkwy kamã hpōx kôt harênh ma nê hã akuprō.

² Ra hã pikuprōnh rax nê ixkre nhĩtom pa. Nhũm mẽ hkwyjaja kapôt ã kuhê nhũm Jejus Tĩrtũm kapêr o mẽ ahkre ho nhỹ.

³ Hãmri nhũm mēmyjaja kêp kwat nê ã kamã htyk xwynthja mý nê Jejus kot ho mex kaxyw hwyr o tẽ.

⁴ Hãmri nê tee ri hã mẽ pikuprōnh rax xwynthjê pumu nê nhỹhỹnh kot hwyr o àr kaxyw tee ri amnhĩ kukamã ho ukapi ho pa. Hãmri nê hamaxpêr nê ixkre nhĩmōk po hwyr ho api nê himōk kwý grã nê hkõt ã kamã htyk xwynthta nōr xã mērohã hkõt Jejus wyr haxã.

⁵ Hãmri nhũm mẽ kot kaxyw kãm hamaxpêr tỹx ã mẽ omu nê ã kamã htyk xwynthta mã kapêr nê kãm:

—Pa? Kwa tee ri amnhĩ kukamã ajamaxpër kêt nê. Na pa ra anê ate amnhĩ tomnuj piitã ho ijapêx. Kot paj axte kãm ijamaxpër kêt nê. Anê.

⁶ Hãmri nhũm Tĩrtũm kapër tũm o mẽ ahkre xwýnhjaja tee ri ã kapër anhÿrja ã kuma nê hamaxpër o:

⁷ —Tk. Kwa pěr mēhõ myti mũj kęp Tĩrtũm kêt tã te kapër pyrãk o amnhĩ nhĩpêx nê mẽ nê mẽ kot amnhĩ tomnuj o hapêx ã amnhĩ jarê. Tĩrtũm pix kot mẽ nê mẽ kot amnhĩ tomnuj o hapêx kênã. Anê.

⁸ Nom nhũm Jejus mẽ hamaxpër kôt mẽ omunh mex nê. Mẽ kot Tĩrtũm pix kot mẽ nê mẽ kot amnhĩ tomnuj rênh nê akupÿm mẽ ã xwýnhjê ho mex kôt mẽ hamaxpërja nhũm mẽ omunh mex nê mẽ kãm:

—Kwa mẽ ã ajamaxpër anhÿr kêt nê.

⁹ Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate mẽ ano ho ja kôt ixpumunh kêt jakamã na ka htem ja hã ixkôt ajamaxpër kêt nê. Nom kot paj mẽ anoo mã akupÿm myja o mex. Ka mẽ ja hã ixpumu hãmri nê ixkôt ajamaxpër kurê kumrêx.

¹⁰ Ixpê Tĩrtũm kot mẽ awÿr inhmēnh xwýnh na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmē pa wrÿ. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹ Anhÿr o mẽ kãm kapër hãmri nê ï kamã htyk xwýnhhta mã kapër nê kãm:

—E kãnhmã xa nê anõr xà mÿ nê ma akupÿm anhõrkwÿ hwÿr tẽ. Anê.

¹² Hãmri nhũm kuma nê kãnhmã ãm kurê kumrêx. Hãmri nê akupÿm mex ã amnhĩ pumu nê hkĩnh tÿx nê nõr xà mÿ nê mẽ noo mã kato nê ma akupÿm õrkwÿ hwÿr tẽ. Hãmri nhũm mẽ kot omunh xwýnhjaja amnhĩ jaêr pẽ omu nê no hapõx kaxyw nê hkôt omunh o kuhê nê kamã no puma htÿx nê. Nê tee ri omu nê axpẽn mã:

—Hêxta waa nê. Aa mẽ pahte ã mēhõ kot amnhĩ nhĩpêx anhÿr ã omunh kêt kumrêx tã jarãhã ja pumu. Nà Tĩrtũmja ãm mex o mex. Anê.

Jejus kot amnhĩ wÿr Rewi hwÿr ã harênh

Matêwre 9.9-13; Rukre 5.27-32

¹³ Hãmri nhũm Jejus mẽ ma mra nê akupÿm gõ rax pẽ Garirej wÿr mra nê gõ mÿ ri pa. Hãmri nhũm mẽ piitã omu nê hwÿr mra nê hã akuprõ nhũm Tĩrtũm kapër o mẽ ahkre ho nhÿ.

¹⁴ Hãmri nê mẽ kure nê axte hkôt mẽ pa ho mẽ pa xwýnhjê mērohã ma axte mra nê nhÿri Apew kra Rewija pumu. Rõm kãm mẽ õ pahihtĩ mã amnhĩ kwÿjê pẽ kãxpore hkwy jamÿnh xwýnh na pre. Jakamã nhũm àpēnh o nhÿ nhũm Jejus hãnh tẽ nê omu nê amnhĩ kôt kuwÿ nê kãm:

—Pa? E kwa axàpēnhhta kaga nê hpãnhã amnē mẽ ixkôt mãn ri apa ho apa. Anê.

Hãmri nhũm kuma nê àpēnh kaga nê ma hkôt mõ nê hkôt pa ho pa.

¹⁵ Hãmri nhũm mēmo arĩgro hã nhũm Rewi nhõ mẽ apkur xà hã mẽõ rax nê. Jakamã nhũm amnhĩ nhõrkwÿ hwÿr hkrãmnhwÿjaja nê Jejus mẽ hkôt mẽ pa ho mẽ pa xwýnhjê hwÿ. Hãmri nhũm mẽ ma hkôt mra nê õrkwÿ hwÿr agjê nê kuri apkur o hkrĩ. Nê mããnhē mẽ kęp Rõm nhõ pahi mã mẽ kęp kãxpore hkwy jamÿnh xwýnh kwÿ nê mẽ ohtõ nê mẽ kutã apkur o hkrĩ.

¹⁶ Hãmri nhũm Tĩrtũm kapër tũm o mẽ ahkre xwýnh kwÿ pẽ Parijew nhõ xwýnhjaja mra nê mẽ apkur ã mẽ omu. Nê tee ri mẽ hkaêx ã Jejus pumu nê hkôt mẽ pa ho mẽ pa xwýnhjê hwÿr agjê nê hã mẽ kãm akir nê mẽ kãm:

—Kwa na htem mẽ kot amnhĩ tomnuj xwýnhjê kutã apkur kêt tã ka mẽ Jejus mẽ apimràatã axtem nê mẽ kutã axàpkur o akrĩ. Mẽ ate amnhĩ to mex ronhÿx ka mẽ kutã axàpkur kêt nê. Anê.

¹⁷ Hãmri nhũm Jejus amnhĩ tã mẽ kapër ma nê mẽ kãm:

—Tk. Ixte tãm mẽ unhwÿr kaxyw ixte mẽ kutã ixàpkur o inhÿr kênã. Xà na hte tõtõ mẽ mex xwýnhjê hwÿr mra nê mẽ hkane? Nà na hte ãm mẽ ã xwýnhjê pix kane ho pa. Ra mẽ ate ja pumunh mex. Ja pyrã nê na pa pre mẽ kot amnhĩ to mex xwýnhjê hwÿr

ixwryk kêt nê. ãm mẽ kot amnhĩ tomnuj xwýnhjê pix wýr na pa pre wrý. Ixte tãm mẽ unhwýr kaxyw mẽ hwýr wrý nê jajê kutã ixàpkur o nhỹ. Mẽ ate amnhĩ tomnuj mã anhũrer nê hpãnhã tãm amnhĩ nhĩpêx o apa kaxyw na pa pre mẽ awýr wrý nê mẽ akamã ixukapri ho ri mẽ akôt ixpa. Tã ka mẽ atýx ã ixte mẽ kutã ixàpkur anhýrja ã ixto akapêr anê. Anê.

Mẽ kot Tirtũm mã amnhĩ jarênh kaxyw mẽõ kaga hã mẽ harênh

Matêwre 9.14-17; Rukre 5.33-39

¹⁸ Juãw Paxis kôt mẽ pa xwýnhjê mẽ Parijew nhõ xwýnhjaja na prem tõhã Tirtũm mã amnhĩ jarênh kaxyw nê apkur kêt rãhã kamã kãm amnhĩ jarê. Nom nhũm Jejus kôt mẽ pa ho mẽ pa xwýnhjaja na prem kãm amnhĩ jarênh prãm nê apkur kãm amnhĩx kãm amnhĩ jarênh o pa. Jakamã nhũm Ijaew kwýjaja tee ri ja hã mẽ omu nê Jejus wýr mra nê mẽ hã hkukja nê kãm:

—Pa? Kwa aprĩ hã mẽ inhmã mẽmoj jarê. Na hte Parijew nhõ xwýnhjê mẽ Juãw Paxis kôt mẽ pa xwýnhjaja tõhã Tirtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwýnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ urak nê tõhã apkur kêt rãhã kãm amnhĩ jarênh kêt nê? Anê.

¹⁹ Hãmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anê? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã na htem hkĩnh nê pa. Kormã ixte mẽ hkôt ixpa kênã kot kêt mẽ Tirtũm mã kapêr kaxyw nê ho apkur kêt kamã kãm amnhĩ jarê. Xà na htem hkrãmnhwý hã hkĩnh kaxyw hã akuprõ nê hkaprĩ nê apkur kêt nê mýr o hkrĩ? Nà na htem hã akuprõ nê hkĩnh nê apkur rũnh nê. Ja pyrã nê na hte ixkôt mẽ pa ho mẽ pa xwýnhjaja ixkôt kormã àmnhĩx hkĩnh nê apkati mẽ apkur kãm kãm amnhĩ jarênh o pa.

²⁰ Nom koja mẽ kãm ixkurê xwýnhjaja nhỹrmã tanhmã ixto hãmri nhũm mẽ rĩ kormã hkaprĩ htýx kãm ho apkur kêt rãhã Tirtũm mã amnhĩ jarê. Anê.

Nhũm pre ã Jejus mẽ kãm hkôt ri mẽ pa ho mẽ pa xwýnhjê jarênh anê hãmri nê axte mẽ kãm kapêr nê mẽ kãm:

²¹⁻²² —Mẽ kot amnhĩ tomnuj xwýnhjaja mẽ kot amnhĩ nhĩpêx tũm o amnhĩ pyrak jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrak kêt jakamã na ka htem inhma nê ãm inhma. Kwa mẽ inhma nê mẽ ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarênh

Matêwre 12.1-8; Rukre 6.1-5

²³ Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwýnhjaja ma nhỹhým mõ. Ma mẽ hpur kahti hkôt nhỹhým mõ nhũm hkôt mẽ pa ho mẽ pa xwýnhjaja ra kãm prãm nê. Hãmri nê prãm xaj purta kamã amnhĩm mẽmo hy te kot harøj pyrak xwýnhhta kwý rê nê ma Jejus kôt hkanhar o mõ. Mẽ ixpê Ijaewjaja na pa htem axpên pur kãm ixpa nê ã amnhĩ nhĩpêx anê.

²⁴ Hãmri nhũm Parijew nhõ xwýnhjaja mẽ hkôt mra nê tee ri ja hã mẽ omu nê Jejus wýr mra nê mẽ hã kãm akir nê kãm:

—Kwa jarãhã sap tã akôt mẽ pa ho mẽ pa xwýnhjaja mẽmo hy hkwý rê nê akôt hkanhar o pa. Tirtũm kapêr ã kagã htũm kot mẽ panhõ arĩgromnu hã mẽ pahte mẽmoj nhĩkênh nê mẽ pahkurê kênã. Kwa mẽ kãm anê kê mẽ ã amnhĩ nhĩpêx anhýr kêt nê. Anê.

²⁵⁻²⁶ Hãmri nhũm Jejus mẽ kuma nê hprĩ hã mẽ kãm Tirtũm kapêr tũm jarê nê mẽ kãm:

—Kwa xàn ka mẽ kormã Tirtũm kapêr ã kagã htũm kamã pahi Tawi kot tanhmã amnhĩ nhĩpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mẽ pa xwýnhjê mẽ prãm xaj

Tirtũm mã amnhĩ jarēnh xà hã ixkre hwýr agjê. Hãmri nhũm Apiatar mẽ kãm prãm tỳx ã mẽ omu nẽ mẽ kamã ukaprĩ nẽ mẽ kãm mẽmoj gõ. Mẽ kot Tirtũm noo mã pãwti jaxwýr xwýnhta nhũm mẽ kãm kugõ nhũm mẽ kuku. Tirtũm kapēr ã kagà htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugõ. Patre pix kot ja hkur kaxyw tã nhũm mẽ kãm kugõ nhũm mẽ kuku. Tã nom nhũm Tirtũm ja hã mẽ omu nhũm ja kēp omnuj kêt nẽ. Patre kot mẽ kamã ukaprĩ nẽ mẽ kãm òr nhũm ja hã omu nhũm ja kãm mex nẽ. Anẽ.

Hãmri nẽ mẽ kãm:

²⁷ —Na pre Tirtũm panhĩ kumrēx o kato nẽ kormã mẽ hkòkòt nẽ Tirtũm mã hamaxpēr o hkrĩ kaxyw arĩgromnu ho kato. No na pre arĩgromnu kumrēx o kato nẽ hpãnhã kaxyw panhĩ ho kator kêt nẽ.

²⁸ Tã pa na pre Tirtũm mẽ akaxyw ixãm nẽ mẽ awýr inhmẽ. Jakamã paxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwār mẽ mãmri mẽmojta rê nẽ ixkòt hkanhar o mō. Anẽ.

3

Jejus kot akupým ìhkra grà xwýnh o mex ã harēnh

Matēwre 12.9-14; Rukre 6.6-11

¹ Tã nhũm mẽ ixpê Ijaewjê nhõ arĩgromnu pē sapja axte kato. Hãmri nhũm Jejus Tirtũm kapēr o mẽ ahkre xà hã ixkreja wýr tẽ nẽ axà nẽ kamã Tirtũm kapēr o mẽ ahkre ho nhỹ. Nhũm mẽhõ my ìhkra grà xwýnhja mẽ ìhkõ hã mar o nhỹ.

² Nhũm Parijew nhõ xwýnhjaja kãm mẽ hkrãhtũmjê mã Jejus o kapēr prãm jakamã htãnopxar o kuhê nẽ axpēn mã:

—E kwa pu mẽ jar pakuhê nẽ kot tanhmã amnhĩ nhĩpêx to hã omu. Xà koja jarãhã ìhkra grà xwýnh mũj o mex nà? Jarãhã arĩgromnu kēnã kot kêt kãm ìhkra ho mex. Koja ho anẽ nẽ ra Tirtũm kapēr tũm nhĩrôp xa. E pu mẽ xa nẽ hã omu. Anẽ.

³ Hãmri nhũm Jejus ìhkra grà xwýnhta pumu nẽ kãm:

—Pa? E kãnhmã xa nẽ amnẽ ixwýr tẽ. Anẽ.

Hãmri nhũm kãnhmã xa nẽ hwýr tẽ nẽ mẽ piitã mẽ noo mã xa.

⁴ Hãmri nhũm Jejus mẽ kot omunh o hkrĩ xwýnhjê hwýr rĩt nẽ arĩgromnu hã tanhmã mẽ kot amnhĩ nhĩpêx to hã mẽ hkukja nẽ mẽ kãm:

—E mẽ inhma. Tanhmã na htem arĩgromnu hã axpēn nhĩpêx to wehe? Xà kot ka mẽ arĩgromnu hã axà htỳx nẽ amex prãm xàj ma mẽhõ hwýr amnhĩ to tẽ nhũm apumu nẽ apkatim arĩgro mex jamār pē akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuj to nẽ akupým amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarē. Tanhmã na pre finat Mojesja Tirtũm nhỹ hã arĩgromnu hã mẽ pahte axpēn nhĩpêx ã mẽ pamã karõ hto? Xà kot puj mẽ hã axpēn kãm paxukaprĩ rỳ hã mẽ pamã axpēn kurê ho papa? Xà kot puj mẽ hã mẽmoj punuj pē mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarē. Anẽ.

Ra kot hprĩ hã mẽ hamaxpēr ã mẽ omunh mex nẽ ã hēx rom mẽ hkukjēr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pē omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ.

⁵ Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ìhkra grà xwýnhja mã kãm:

—Tk. Mẽ kot tanhmã inhmã ujarēnh tore hã. E anhĩhkra katāt. Anẽ.

Hãmri nhũm ìhkra katāt nẽ akupým mex kurê kumrēx.

⁶ Hãmri nhũm Parijew nhõ xwýnhjaja tee ri ã Jejus kapēr anhỹrja ã kuma nẽ kot sap ã akupým myta o mex ã omu nẽ kamã gryk tỳx nẽ. Nẽ hapôj nẽ ma pahi Eroxo kêt mẽ pa

xwÿnhjê hwÿr mra nê mē kām harē nē tanhmā hā axpēn kukjêr to nē axpēn mā:

—Kwa tanhmā kot puj mē ho? Na ā kapēr anhÿrja o mē pahto kapēr punuj nē. Te hkĩnhā mē papamjaja mē kamā paxukapri hkēt pyrāk ā mē pajarē. Koja mē pahkwÿjaja kuma hāmri nē mē pahte amnhĩ nhĩpêx kaga nē amnhĩ kaxyw hkôt pix mā hamaxpēr o pa. Ja pymaj kwa tanhmā kot puj mē ho? Anē.

Mē ohtô nē kot Jejus kapēr mar kaxyw hwÿr mra ā mē harēnh

Matêwre 4.23-25; Rukre 6.17-19

⁷⁻⁸ Tā nhũm Jejus mē hkôt mē pa ho mē pa xwÿnhjê mērohā ma akupÿm gô rax wÿr mō nhũm mē ohtô nē omu nē ma hkôt mra. Pyka pê Garirej mē Jutej wa kurũm nē krĩ pê Jerujarē rūm nē pyka pê Itumêj rūm nē pyhti pê Jotāw nhĩkjê hā krĩ hkwy rūm nē krĩ hkwy pê Xir mē Sitō wa pu hā krĩ hkwy rūm ohtô nē ma hwÿr mra. Na prem ra harēnh ma nē nhÿhÿm mōr ā omu nē axpēn mā harēnh o:

—E kwa tokyj pu mē ma hwÿr mē à xwÿnhjê o mō kê akupÿm mē ho mex. Anē.

Hāmri nē hwÿr mē o mra nē hā pikuprōnh rax nē.

⁹⁻¹⁰ Hāmri nhũm Jejus akupÿm mē à xwÿnhjê ho mex. Gô mÿri xa nē tanhmā mē ho mex to. Jakamā nhũm mē axte ohtô nē hwÿr mra nē piitā kot htok nē akupÿm mex kaxyw hwÿr axpēn nhĩgā. Hāmri nhũm tee ri amnhĩ wÿr mē omu nē hkôt mē pa ho mē pa xwÿnhjê mā:

—Kwa mē ma mra nē amnē kanôre jêt mÿj kjênh o tē nē jar inhmā anhô. Kê mē ixtā axpēn nhĩgānh o ijanênh japēr pa hwÿr axà nē amÿm mē ho hpÿnh nē akupÿm mē ho mex. Anē.

Hāmri nhũm mē kuma nē ma mra nē kām ja o tē nē kunhō.

¹¹ Na pre mēkarōmnuti hkwyja mē hkwyjê hwÿr agjê. Jakamā nhũm mē Jejus pumu nē mēkarōmnuti nhÿ hā kēp Tirtũm Kra hā omunh kurê kumrêx. Hāmri nē hā hpijaàm kaxyw

kutā hkōnkrā ho hkrĩ nē mēkarōmnuti nhÿ hā kām kapēr nē kām:

—Kwa apê Tirtũm Kra na ka. Anē.

¹² Hāmri nhũm tee ri amnhĩ tā mē kuma. Kām mēkarōmnuti ā kot harēnh anhÿr prām kêt nē. Ām mē piitā mē kot kapēr mar nē kot amnhĩ nhĩpêx ā omunh pê kēp Tirtũm Kra hā omunhja na kām hprām. Jakamā nhũm mēkarōmnuti ā harēnh anē nhũm ja nē mē kām kapēr nē mē kām:

—Tk kwa nà kēp ka mē tanhmā ijarēnh to hkēt nē. Anē.

Jejus kot amnhĩ kaxyw mē kēp 12 rēnh ā harēnh

Matêwre 10.1-4; Rukre 6.12-16

¹³ Tā nhũm Jejus hkôt mē pa ho mē pa xwÿnh kwÿjê mā kām:

—E pu mē ma mō nē krāhakÿx mÿj ā api. Anē.

Hāmri nē mē ma hwÿr mō nē hā api

¹⁴ nhũm Jejus amnhĩ kaxyw mē ho 12 nē mē kurê. Mē kot ma ŷ hā Tirtũm kapēr o mē ahkre

¹⁵ nē ŷ hā mē nē mēkarōmnuti janor o pa kaxyw.

¹⁶ ā mē hixi kot anhÿr.

Na pre ja kēp Simāw no nhũm Jejus hpānhā hā hixi hō mē nhũm hpānhā määnēn kēp Pêtre.

¹⁷ Nē hkôt Jepetew kra Xiakre mē htō Juāwja wa kuta.

Hāmri nē kot Simāw nhĩpêx pyrā nē wa hā hixi hō mē nhũm wa hpānhā määnēn kēp Poanes. Wa kot amnhĩ prēprêk jakamā nhũm ā wa hā hixi mēnh anē.

¹⁸ Nē hō pê Andreja ta.

Nē hkôt Andre htō Firiptija ta.

Nē hkôt Patoromewja ta.

Nē hkôt Matêwreja ta.

Nē hkôt Tomasja ta.

Nē hkôt Arpêw kra Xiakreja ta.

Nē hkôt Tatewja ta.

Nē hkôt Simāw ōja ta.

Simāwja na pre kām mē ixpê Ijaewjê nhō pika pê Ijaew kĩnh tÿx nē. Jakamā na pre kām nhām pika hō nhō pahi kot mē ho amnhĩptār prām kêt nē pa.

¹⁹ Nē hkôt Jut Kariotja ta.

Kormã kot mẽ kãm Jejus kurê
xwýnhjê nhĩhkram òr mã nhũm
Jejus kot amnhĩ kukamã
omunh mex tã mẽ hkôt amnhĩ
kaxyw kuta.

Ã mẽ kot ý hã mẽ ahkre o pa kaxyw
mẽ rênh xwýnhjê nhĩxi kot anhỹr.

Jejus mẽ mẽkarõmnuti wa harênh
Matêwre 12.22-32; Rukre 11.14-23,
12.10; Juãw 10.19-21

²⁰ Hãmri nhũm Jejus hkôt mẽ pa ho
mẽ pa xwýnh kwýjê rênh pa nê ma
amnhĩ kôt mẽhõ nhõrkwy hwýr mẽ o
mõ. Na prem apkur kêt ry rax nê ra
kãm prãm týx nê nhũm ma mẽ apkur
kaxyw amnhĩ kôt mẽ o mõ. Hãmri
nhũm axte mẽ à xwýnhjaja mẽ omu
nê Jejus wýr pikuprõnh rax nhũm mẽ
tokyx apkur kêt nê.

²¹ Hãmri nhũm Jejus katorxà nê
htõjaja tee ri mẽ apkur kêt ã mẽ
harênh ma nê axpên mã:

—Kwa mãn ãm ra tanhmã hkrã
amnhĩ to nã? Hã na mẽ kot omunh
kaxyw hã hpikuprõnh rax jakamã
nhũm kormã apkur kêt nê. E tokyx pu
mẽ ma hwýr mra nê omu nê mẽ kêp
utà nê akupýn amnhĩ kôt o mõ. Anê.

²² Rôm nhũm Tirtũm kapêr tũm o
mẽ ahkre xwýnhjaja Jerujarê rũm Je-
jus wýr mõn pøj. Hãmri nê tanhmã
ho kapêr punuj to. Kêp mẽkarõmnuti
hkwý hã hkamnhĩx jakamã harênh o:

—Tk pêr hinhu nhĩkõõti nhỹ hã na
hte mẽ nê amnhĩ kwýjê japõx o pa.
Anê.

Hinhu nhĩkõõti nhĩxi hõ pê Sa-
tanasti nhũm prem ý hã Jejus kot
amnhĩ nhĩpêx o pa hã hkamnhĩx.

²³ Hãmri nhũm amnhĩ tã mẽ omu nê
amnhĩ wýr mẽ kãm hpa ho apê nê mẽ
kãm amnhĩ jarê. Nom amnhĩ tã kuxi
nê mẽ kãm mẽmoj jarê nê mẽ kãm:

—Kwa mẽ inhma mẽ ate ixpê
Satanasti hkwý hã ixkamnhĩx
xwýnhjaja. Xà na hte Satanasti mẽ nê
amnhĩ kwýjê janor o pa? Nà na hte ã
amnhĩ nhĩpêx anhỹr kêt nê.

²⁴ Na hte pika nhõ xwýnhjaja axpên
kutã amnhĩ xunhwý nê axpu hãmri
nê anhrà nê ma ahpýnhã ri pa nê
amnhĩ krã hkôt ri tanhmã amnhĩ to

ho ri pa. Jakamã nhũm mẽ õ pahija
mẽ hamãr o pa hkêt nê.

²⁵ Nê krĩ nhõ xwýnhjaja haxwýja.
Mẽ kot axpên to hkwý xwýnhjaja koja
mêmoj tã axpên kãm gryk nê axpên
kutã amnhĩ xunhwý hãmri nê anhrà
nê ahpýnhã pa hãmri nhũm mẽ õ pahi
tee ri kãm mẽ hamãr o pa hprãm. Mo
hkwýjaja kot kêt ri mẽ hamãr o pa?
Nom tãm kot amnhĩ nê mẽ hanoore
hã. Mẽ tãmjaja na prem axpên kãm
gryk nê anhrà nê ahpýnhã pa.

²⁶ Tã ja pyrã nê ixte Satanasti
nhỹ hã tanhmã amnhĩ nhĩpêx to
ho ixpa ronhỹx pa ri mẽ kurũm
amnhĩ kwýjê japõx o ri ixpa hkêt nê.
Mẽkarõmnutijaja kêp Satanasti hkwý
kênã. Koja Satanasti ixte mẽ kurũm
mẽ hapõx kaxyw tanhmã inhmã nê
hkêt nê.

²⁷ àhpumunh týx jakamã na hte mẽ
kot hkôt amnhĩ xunhwýr xwýnhjê
pumunh týx o pa nhũm mẽhõ tee ri
kêp mẽ utàr kaxyw. Tã ixàhpumunh
týx o ixte hakrenh jakamã ixte kêp mẽ
utàrja inhmã tanhmã kute hkêt. Na
pa hte kêp mẽ utà nhũm mẽ hpãnhã
ixkôt amnhĩ nhĩpêx o pa nhũm Sa-
tanasti tee ri mẽ hã ixpumunh o pa
kaprý.

²⁸ —Ãm hãmri na pa mẽ amã
ixkapêr. Kot kaj mẽ tanhmã amnhĩ
tomnuj to ho apa. Nê amnhĩ tomnuj
týx kumrêx rãhã ho apa. Rý tanhmã
akapêr punuj to ho apa. Rý tanhmã
Tirtũm o akapêr punuj to ho apa. Tã
tee ri ja hã amnhĩ pumu nê akaprĩ
nê ã ate amnhĩ nhĩpêx anhỹrja kaga
nê Tirtũm kôt amnhĩ xunhwý. Hãmri
nhũm amnhĩ tã mẽ apumu nê amnhĩ
katut kôt mẽ ate amnhĩ tomnuj nê
mẽ akapêr punuj rênh pa nê axte kãm
hamaxpêr kêt nê. Koja ho hapêx par
kumrêx.

²⁹ Nom koja Tirtũm Karõ xatã mẽ
amã ixto amnhĩrit tã ka mẽ ama
nê ãm ama nê te kêp amnhĩ ja-
mak pro pyrãk o amnhĩ nhĩpêx. Jao
Tirtũm Karõ hã apijaãm kêt ã amnhĩ
to amnhĩrit. Ja mýrapê koja Tirtũm
nhỹrmã amnhĩxwar te mẽ apê amnhĩ
jamak pro pyrãk o mẽ anhĩpêx ka

mê tee ri kãm amnhĩ kaprĩ kaprÿ. Hãmri nê mê kot amnhĩ xà htÿx kamã hamak o pa htÿm xà wÿr ma apa nê kamã apa rãhã apa ho apa. Anê.

³⁰ Mê kot Satanasti nhÿ hã mê nê mêkarõmnuti janor o pa hã hkamnhĩx jakamã nhÿm pre Jejus ã mê kãm kapêr anê.

Jejus katorxà mê htõjê jarênh

Matêwre 12.46-50; Rukre 8.19-21; mãânên Eprêw 2.11-12

³¹ Rôm nhÿm Jejus katorxà mê htõjaja hwÿr mra no ãm kormã hwÿr gjêx kêt nê. Mê kot hã htu rax jakamã nhÿm mê tee ri hwÿr gjêx kaxyw kormã kapôt ã kuhê. Hãmri nê mê kot mar o kuhê xwÿnhjê hõ mã kapêr nê kãm:

—Kwa ma tẽn Jejus mã mê ijarê kê mê ixwÿr kato. Anê.

³² Rôm nhÿm ixkre kamã mê hkrĩ xwÿnhjaja mê omu nê Jejus mã mê harê nê kãm:

—Kwa Pahihti. Ota akatorxà mê atõjaja awÿr mra nê pøj nê tee ri awÿr gjêx mã nê kormã kapôt ã kuhê nê atã karõ. Anê.

³³⁻³⁵ Hãmri nhÿm mê kuma nê mê kãm:

—Tõe pa ixkato nê mê omu. Inhmã mê hapêê. Nom kot kaj mê atõ Tirtÿm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rÿ ixkatorxà kot amnhĩ nhĩpêx pyrãk o pu mê axpên nhĩpêx. Pa te inhmã mê hapê pyrã nê inhmã mê ajapê nê. Anê.

4

Mêmo hy hkre xwÿnh jarênh

Matêwre 13.1-9; Rukre 8.4-8

¹ Tã nhÿm Jejus axte gõ jakax ã mê ahkre ho nhÿ. Hãmri nhÿm mê axte hã htu rax jakamã nhÿm tee ri mê omu hãmri nê pãr krem axà nê gõx kãm amÿm mê ahkre ho nhÿ. Nhÿm mê piitã kÿxpê omunh nê mar mex o kuhê.

² Hãmri nhÿm mê ahkre ho nhÿ. Nom mê ujarênh pix kãm mê ahkre. Mê kot Tirtÿm kapêr mar nê tanhmã hkôt amnhĩ nhĩpêx to ho paja nhÿm

hã kuxi nê mê kãm hã ujarênh o nhÿ nê mê kãm:

³ —E mê inhma. Koja mēhõ ma pur mã mõ nê pur kãm mēmo hy ho ukapêr o pa nom nhÿm hy piitã amex kãm rôrôk kêt nê. Koja ahpÿnhã rôrôk.

⁴ Koja hkwÿ aptÿx kãm rôrôk nhÿm kuwênhre omu nê hwÿr mra nê hkrêr pa.

⁵⁻⁶ Nê koja kên kãm hkwÿ rôrôk hãmri nê higrôt kutã nojarêr nê higrôt pa. Nom nhÿm kamã aptÿx nê kamã kêp pika hkryre jakamã nhÿm higrôt nhÿm hã myt apha nê arĩgro htÿx mê nhÿm grã pa. Harê hkryre jakamã grã pa.

⁷ Nê koja hkwÿ mrõnhĩ kamã rôrôk nê higrôt tã no nhÿm utĩja kêp amÿtã nhÿm ô hkêt nê.

⁸ —No koja hirã kamã pika mex kãm hkwÿ rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwÿ kêp 30 nê kamã hkwÿ kêp 60 nê kamã hkwÿ kêp 100. ã mê ujarênh kot anhÿr.

⁹ Kwa mê ama nê kãm ajamaxpêr tÿx rãhã ho ri apa. Anê.

Jejus kot hprĩ hã mêmo hy jarênh

Matêwre 13.10-23; Rukre 8.9-15

¹⁰ Hãmri nhÿm mê Jejus xujarênh mar pa nê anhgrã nê ma akupÿm mra nhÿm hkôt mê pa ho pa xwÿnh pê 12 mê hkwÿjaja pix Jejus ri arĩk. Hãmri nê ujarênhã ã hkukja nê kãm:

—Kwa mon ka hte ã mê kãm axujarênh anê Pahihti? Na pa mê ixprĩ hã amar mex kêt nê. Anê.

¹¹⁻¹² Hãmri nhÿm mê kãm:

—Nã kot paj ixprĩ hã mê amã harê. Tirtÿm kãm mê ate aprĩ hã mar prãm jakamã kot paj ixprĩ hã tanhmã mê amã harênh to. Nã mê kot amnhĩ tomnu kaga nhÿm Tirtÿm kot ja hã mê omunh xà hkôt mê ho hkra hã harênhja na pa hte mê kãm harê. No mÿjjaja mê akĩnhã mê kãm mar prãm kêt jakamã na pa hte mê kãm mēmoj tã haxwÿ nê awjarê nhÿm mê ãm ixujarênh pix ma.

Na htem kuma nê ãm kuma nê htÿx ri hã pa. No kêp apu mê kãm hprĩ hã mar prãm ronhÿx mê

ra hprĩ hã kuma nẽ Tĩrtũm kõt amnhĩ xunhwỳ nhũm amnhĩ tã mẽ omu nẽ mẽ kot amnhĩ tomnuj o hapêx. Nom mẽ kãm mar prãm kêt. Anẽ.

13 Tã mẽ ate aprĩ hã ixujarẽnhja mar mex kêt jakamã tanhmã kot kaj mẽ amnhĩ to nẽ ixujarẽnh piitã ama? E kot paj ixprĩ hã mẽ amã mẽmo hyta jarẽ ka mẽ inhma.

14 –Nà mẽmo hyta te kêp Tĩrtũm kapêr pyræk. Nẽ ahpỹnhã rôrøk xà hã pikata te kêp ahpỹnhã mẽ kot Tĩrtũm kapêr mar xwỳnhjê kot mar nẽ ahpỹnhã tanhmã amnhĩ nhĩpêx to pyræk.

15 Jakamã mẽ kot mar xwỳnh kwỳjaja hte kot aptỳx kãm hkwỳ rôrøk nhũm kuwênh kot hwỳr mrar nẽ hkrêr par xwỳnhhta pyræk. Jakamã na htem Tĩrtũm kapêr ma nom nhũm Satanasti te kuwênh kot hy hkrêr parta pyræk o mẽ hipêx. Nẽ mẽ kot amnhĩ kaxyw hkõt hamaxpêr nẽ hkõt amnhĩ xunhwỳr pymaj tanhmã nẽ mẽ hkrã hto. Jakamã nhũm mẽ Tĩrtũm kapêr ma nom ho hamakêtkati tokyx anẽ nẽ axte kãm hamaxpêr kêt nẽ.

16 –Nẽ mẽ kot mar xwỳnh kwỳjaja te kot kênre kamã hkwỳ rôrøk nẽ higrõt nhũm te hã myt apha nhũm grà par tokyx anhỳr xwỳnhhta pyræk. Na htem Tĩrtũm kapêr ma nẽ hkĩnh nẽ. Nẽ kãm mar prãm nẽ. Te hy higrõt tokyx anhỳrta pyræk.

17 Tã nhũm mẽhõ tẽ nẽ Tĩrtũm nẽ tanhmã mẽ kãm kapêr to nhũm mẽ kuma nẽ hkaga. Rỳ nhũm mẽ Tĩrtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrõt nẽ grà par tokyx anhỳrta pyræk.

18 –Nẽ mẽ kot mar xwỳnh kwỳjaja te kot mrõnhĩ kamã hkwỳ rôrøk nẽ higrõt nhũm mrõnhĩ kot kêp àmnàr xwỳnhhta pyræk. Nẽ mẽ kãm Tĩrtũm kapêr mar prãm nẽ.

19 Nom mãănẽn kãm hikukrêx rax nẽ hikàxpore rax prãm jakamã ãm ja pix kukamã hamaxpêr o ri pa. Jao ra gryk ã axte Tĩrtũm kapêr mã

hamaxpêr nẽ hkõt amnhĩ nhĩpêx kêt nẽ. Te mrõnhĩ kot higrõt pê àmnàr nhũm ô hkêeta pyræk.

20 –No mẽ kot mar xwỳnh kwỳjaja te hirã kamã pika mex kãm hy hkwỳ rôrøk nẽ higrõt nẽ ô raxta pyræk. Na htem ixkapêr ma nẽ amnhĩ krã him hagjênh tỳx nẽ. Nẽ ixkõt ri amnhĩ nhĩpêx mex rãhã ho ri pa. Te mẽmo hy hkre kamã ô hkwỳja kêp 30 nẽ kamã kêp 60 nẽ kamã kêp 100ta pyrã nẽ Tĩrtũm kapêr kõt amnhĩ nhĩpêx mex rãhã ho pa. E ã ixujarẽnhja kot anhỳr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

21 Nhũm Jejus arĩ hkõt mẽ pa ho pa xwỳnhjê jahkre nẽ mẽ kãm:

–Xà na htem kanê hpøk nẽ poti ho hpro rỳ hitom kãm par krak ri unhwỳ? Nà na htem hpøk hãmri nẽ kỳx pê mẽmoj nhĩmøk ã unhwỳ.

22 Ja pyrã nẽ mẽ piitã kot hkwỳjê pê tanhmã hamaxpêr punuj to ho hpimxur prãm tã tee ri kot ho hpimxur prãm kaprỳ. Koja nhỹrmã mẽ hamaxpêr piitã amnhĩ to amnhĩrit pa. Nẽ mẽmoj piitã ra hpimxur mex tã koja nhỹrmã amnhĩ to amnhĩrit pa. Te mẽ kot kanê hpøk nẽ kỳx pê unhwỳr nhũm amnhĩrit mex pyræk. Ja pyrã nẽ na pa hte Tĩrtũm kapêr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa.

23 Kwa mẽ ixujarẽnhja ma nẽ kãm ajamaxpêr tỳx rãhã ho ri apa. Anẽ.

Nhũm pre ã Jejus mẽ kãm kapêr anẽ.

24 Hãmri nẽ mẽ kãm:

–Nẽ kêr ka mẽ axpên kãm axukaprĩ ho ri tanhmã axpên to mex to ho ri apa. Kêr kê Tĩrtũm ja hã mẽ apumu nẽ mẽ apyrã nẽ mẽ akamã ukaprĩ pê mẽ ato mex o pa.

25 Koja mẽhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt pa ja hã omu nẽ hã ho mex kêt nẽ.

—Ně koja mēhō kām ixkapēr mar prām nom kormā hprī hā mar mex kêt tā arī mar o pa nē gaa nē mar tỳx o mō. No koja kuma nē ãm kuma hāmri nē gaa nē hā no hkêt. Anē.

Pur kām mēmo hy hkre xwýnh jarēnh Matêwre 13.24-30

²⁶ Nhũm Jejus arī hkôt mē pa ho mē pa xwýnhjê jahkre ho nhỹ nē mē kām:

—E pa mē amā tanhmā mē kot ixkapēr mar tỳx xwýnhjê jarēnh to ka mē inhma. Koja mēhō ixkapēr mar tỳx nē ra hkôt ri amnhĩ nhĩpêx o pa. Hāmri nē hamaxpēr nyw o hamaxpēr o pa nē amnhĩ nhĩpêx nyw o amnhĩ nhĩpêx o pa. Te mē hpur kām mēhō kot mēmo hy hkre xwýnh kot amnhĩ nhĩpêx pyrāk. Na hte hyja kre ho pa.

²⁷ Hāmri nē hkre hpa nē kamāt mē ôt o hikwỹ nē arĩgro mē mēmoj tā àpênh o pa. Rāhā nhũm mēmo hyja arī hikwỹ ho hikwỹ hkêt nē. Koja amnhĩ nhĩpêx ô ho amnhĩ nhĩpêx nē higrôt kato nē hprêk. Kre xwýnh kot tanhmā kot amnhĩ nhĩpêx to hā omunh kêt tā nhũm kām hprêk.

²⁸ —Na hte hpōm hapôx o pa nē higrôt o pyka kahte. Hāmri nē hprêk nē hô axpôt nē gaa nē hpānhā ô. Hāmri nē hkamrêk pa nē xa.

²⁹ Hāmri nē mē kot hikēnh mā mex nē nhũm kot hkre xwýnhhta omu nē amnhĩm hamýnh pa. Tā mē kot ixkapēr mar mex xwýnhjaja te mēmo hy ra higrôt kator nē hprêk nē hô pipôt nē ô xwýnhhta pyrāk. Nē urāk nē amnhĩ nhĩpêx ô ho amnhĩ nhĩpêx o pa. Anē.

Jejus te kot mēmo hy pyrāk ã kot amnhĩ jarēnh

Matêwre 13.31-32; Rukre 13.18-19

³⁰⁻³² Nhũm Jejus arī mē ahkre ho nhỹ nē mē kām:

—Tĩrtũm kot mē awýr ixte mē ato amnhĩptār kaxyw inhmēnh ã ijarēnhja. Te ixte mēmo hy pixire pyrāk. Koja mēhō mēmo hy hô pixire nē hkre nhũm ra higrôt. Nē gaa nē hprêk. Hāmri nē hpa angrā nhũm kuwēnhre hwýr mra nē hōptĩ kamā amnhĩm haē nhĩpêx. Mēmo hyta grire

htā nhũm hkre nhũm higrôt nē ã amnhĩ nhĩpêx anē. Tā kot paj nhỹrmā urà nē ixpyxi htā kot paj pika piitā hkôt mē ho amnhĩptā nē mē omunh mex rāhā ho ri ixpa. Anē.

— ã na pre Jejusja hkôt mē pa ho mē pa xwýnhjê mā amnhĩ tā kuxi nē ujarēnh anē.

³³ Mē kām ujarēnh kām mē ahkre ho pa. Te nhām mēmoj jarēnh pyrā nē amnhĩ tā haxwý nē harē. Mē kot tanhmā mar to hā mē omunh xà hkôt tanhmā mē kām ujarēnh to.

³⁴ Na pre ãm ujarēnh pix kām mē kām kapēr mar prām kêt xwýnhjê mā amnhĩ jarēnh rāhā ho pa. No mē kot hkôt pa ho pa xwýnhjê mā nhũm hprī hā ujarēnh jarē nhũm mēhprī hā mar mex nē.

Jejus kot kôk o pinhkrēnh ã harēnh Matêwre 8.23-27; Rukre 8.22-25

³⁵ Tā nhũm amýkry nhũm Jejus arī pàr kre kamā nhỹ. Hāmri nē hkôt mē pa ho mē pa xwýnhjê mā kām: “E pu mē ma xarmā mō.”

³⁶ Anē hāmri nē mē kot mar o hkrī xwýnhjê re nē pàr mā agjê nē ma xarmā mō. Garirej rũm kato nē ma xarmā pika hō hwýr mō. Nhũm pàr kwýja ma mē hkôt mō.

³⁷⁻³⁸ Nhũm Jejus ra ôttxwa nē tē nē pàr kre kamā hkrā japar xà hā hkrā xi nē ra ôt tỳx nē nō. Nhũm kôk àpêr tỳx nē nhũm gô kànhmā harĩ nē axpên tak. Ra ri xatā axpên tak nē pàr kre kamā axkapĩ nhũm ra mē kêp àr o mō. Hāmri nhũm mē tee ri amnhĩ nhĩpêx nē tee ri amnhĩ kukamā hamaxpēr nē Jejus wýr hprôt nē kumra nē kām:

—Kwa kànhmā nhỹ Pahiti. Kot puj mē jarāhā pahtyk pa. Anē.

³⁹ Hāmri nhũm hkrākato nē kànhmā nhỹ nē kôk mē gôta pumu nē wa kām kapēr o:

—E kwa wa anhĩkrê. Anē.

Hāmri nhũm gô mē kôk hpinhkrēnh kurê kumrêx.

⁴⁰ Hāmri nhũm Jejus hkôt mē pa ho mē pa xwýnhjê mā kām:

—Hêxta waa nē. Kormā mē ate amnhĩ kaxyw Tĩrtũm mē wa inhmā ajamaxpēr tỳx kêt. Hā na ka mē ri

amã ma nê tee ri amnhĩ kukamã aja-maxpêr. Anê.

⁴¹ Hãmri nhũm mẽ amnhĩ jaêr pê ã kot amnhĩ nhĩpêx anhÿr ã omu nê tee ri axpên pumunh pê omunh o kuhê. Hãmri nê axpên mã:

—Kokÿÿ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrã nê kôk mã pakapêr nhũm anhĩkrê? Nã mẽ pakurom àhpumunh tÿx o àhpumunh tÿx. Anê.

5

Jejus kot mēhō nē mēkarōmnuti janor ã jarēnh

Matêwre 8.28-33; Rukre 8.26-34

¹ Tã nhũm Jejus mẽ hkôt mẽ pa ho mẽ pa xwÿnhjê mẽrohã mõ nê xarmã Geras wÿr pôj.

²⁻⁴ Hãmri nê pàr rũm hapôj nhũm mēhō myja Jejus pumu nê hwÿr tē. Mēkarōmnuti kot hwÿr àr nhũm ÿ hã oprê htÿx kumrêx. Hãmri nê hkwyjê hkàx ã kapôt ã mẽ hã pika kamã ri hkênh nê pa ho pa. Nhũm mẽ xatã kàx o hte hpre nê hpa hpre htã no nhũm kurê.

⁵ Nê kamàt kãm nê arĩgro hã àmra htÿx o mrrar pê kên o amnhĩ tak o mra. Mẽ hã pyka kamã nê kapôt ã hixêt ã amnhĩ tak tÿx rãhã ho mra.

⁶ Tã amÿm Jejus pumu nê hwÿr hprôt nê hã hpijaàm kaxyw kutã hkôn krã ho tēm nê hparpê nhÿ.

⁷⁻⁸ Hãmri nhũm omu nê nê mēkarōmnuti mã kapêr nê kãm:

—Kwa kurũm akato nê ma tē. Anê.

Hãmri nhũm kuma nê tanhmã myta o nhũm tãm mēkarōmnuti nhÿ hã Jejus mã kapêr nê àmra kamã kãm:

—Pa Tĩrtũm Kra Jejus? Mo kaxyw na ka ixwÿr tē? Kwa tanhmã ixto hkêt nê nã?

⁹⁻¹⁰ Anê nhũm kãm:

—Tanhmã na anhĩxi te? Anê.

Nhũm kãm:

—Nã ixpê Mēohtōhti. Mēkarōmnuti ohtō nê kot ixwÿr gjêx jakamã na htem ã inhĩxi jarēnh anê. Kwa nê mẽ ijanor kêt nê nã? Anê.

¹¹⁻¹² Hãmri nhũm mēkarōmnuti tãm amnhĩ to kuwÿ nê kãm:

—Kwa kêr ka jahti nê mẽ ijapôx japêr nê mẽ kot amnhĩ xà htÿx kamã hamak o mẽ pa htũm xàta wÿr mẽ ixrênh kêt nê. Hagrô hkwy mũj wÿr mãn mẽ ixrê pa mẽ hpãnhã hwÿr mãn hagjê? Anê.

¹³ Hãmri nhũm mẽ kãm:

—Tôe. Mẽ tãm hwÿr mra. Anê.

Hãmri nhũm mẽmyta pê hapôx pa nê ma hagrô hwÿr mrrar kurê kumrêx nê mẽ kãm gjêx pa nhũm myja akupÿm tãm hkrã. No nhũm hagrôja mēkarōmnuti pymaj amÿra nê axkahkũm nê hprôt nê himô hã krã hixêt ã axpum rôrôk nê gôx kãm mrô nê hpikaprãr pa. Ohtô rax kumrêx. Kêp 2.000 tã hpikaprãr pa.

¹⁴ Hãmri nhũm hagrô jamãr o ri mẽ pa xwÿnhjaja tee ri ja hã omu nê ma mẽ ô patrãw wÿr akupÿm mẽ piitã mẽ kãm harênh o hprôt nê mra. Hãmri nê mẽ kãm ujarênh pa.

¹⁵⁻¹⁶ Nhũm mẽ tee ri mẽ kuma nê ma Jejus wÿr mra nê hkaxpa nê kuri myta pumu. Nhũm ra akupÿm tãm hkrã nê ê kamã tãm amnhĩ nhĩpêx nê nhÿ. Nhũm mẽ kot hã omunh xwÿnhjaja mẽ kãm ujarênh pa nhũm mẽ kuma nê myta pumu hãmri nê tee ri amnhĩ kukamã hamaxpêr o kãm Jejus puma nê.

¹⁷ Hãmri nê amnhĩ nê kãm kapêr nê kãm:

—Kwa mẽmo kaxyw na ka mẽ ixwÿr rê? Mẽ ma akupÿm amrar tokyx anê. Anê.

¹⁸ Hãmri nhũm mẽ kuma nê akupÿm pàr wÿr agjê nhũm akupÿm mex xwÿnhhta tee ri ja hã mẽ omu nê mẽ hkôt hkrã.

¹⁹ No nhũm Jejus kãm:

—Nã kot kaj mẽ ixkôt amör kêt nê. Ma akupÿm anhõ krĩ hwÿr mãn tē nê mẽ kãm Tĩrtũm kot akupÿm ato mex ã amnhĩ jarēnh o ri mẽ hkôt apa. Anê.

²⁰ Hãmri nhũm kuma nê ma akupÿm tē. Hãmri nê ô pyka pê Tekap kãm mẽ kãm Jejus kot tanhmã ho mex to hã harênh ri mẽ hkôt pa nhũm mẽ amnhĩ jaêr pê kuma nê tee ri hkukamã hamaxpêr.

Jejus kot akupÿm mēhō ho mex nē akupÿm mēhō ho htîr ã harēnh

Matêwre 9.18-26; Rukre 8.40-56

²¹ Tã nhũm Jejus mē hkôt mē pa ho pa xwÿnhjê mērohã akupÿm xarmã mō nē rê. Hãmri nē pâr nhô nē api nē gô mÿri kuhê nhũm pika nhô xwÿnhjaja Jejus pumu nē hã pikuprõnh rax nē.

²²⁻²³ Hãmri nhũm mēhō my pē Jajtija hwÿr tē nē kutã hkõnkrã ho htēm nē nhÿ. Kêp Tirtũm kapêr o mē ahkre xà hã ixkre jamãr xwÿnh maati na pre. Nhũm hkra nija kêp à htÿx nē htyk kaxyw nē nõ. Kormã nyw. Kormã hã amgrà pē 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nē ma Jejus wÿr tē nē hpar pē hkõn krã ho tēm nē ho hwÿr kãm hihtÿx nē kãm:

—Pa akupÿm mē ixto mex xwÿnh maati. E awÿr na pa tē. Na ra ixkra ixpê htyk kaxyw. Pa tee ri omu nē kaxyw amã ijamaxpêr nē awÿr tē. Jakamã kwa ma ixkôt inhõrkwÿ hwÿr tē nē inhmã omu nē hã anhÿhkra xi nē akupÿm inhmã ho mex. Anē.

²⁴ Hãmri nhũm kuma nē ma hkôt tē. Nhũm mē ohtô nē axpên nhigãnh nē axpên kujahêk o wa hkôt mra.

²⁵ Nhũm mēhō nija haxwÿja wa hkôt tē. Na pre hte hkamrô hkryre rãhã ho pa hã ra hã amgrà kêp 12.

²⁶ Nē tõtô mã amnhÿrer rax nē nhũm mē tee ri kot ho mex kaxyw nom xatã hkane kaprÿ. Hãmri nhũm ra hikãxpore kêp hapêx nhũm arÿ ãm rãhã nē pa.

²⁷⁻²⁸ Hãmri nē tee ri amnhÿ kukamã hamaxpêr nē Jejus jarēnh ma nē hamaxpêr o:

—Ma kot paj ma hwÿr tē nē kêp ê pix kupênh tã akupÿm inhmex japêr. Ma kot paj ho anē.

Anhÿr o hamaxpêr hãmri nē ma mē hkôt hwÿr htēm kurê kumrêx. Nhũm mē ohtô raxja kaêx ã mē hkôt hwÿr tē. Hãmri nē katut kôt kêp ê nhÿrê kupê.

²⁹ ãm ê pix kupênh tã akupÿm mex ã amnhÿ pumunh kurê kumrêx.

³⁰ Hãmri nhũm Jejus kot kêp ê kupênh ã amnhÿ tã omu nē hêx rom

xa nē mē ho hakêx nē amnhÿ tã mē kãm kapêr nē mē kãm:

—Kwa mē atõ na ka ri amnhÿ kaxyw inhmã ajamaxpêr tÿx pē ixpê ixê kupê? Anē.

Hãmri nhũm mē piitã kuma nē tee ri axpên pumu nē kãm amnhÿ tã aprã.

³¹ Hãmri nhũm hkôt mē pa ho pa xwÿnhjaja kãm:

—Mê kot apê amnàr griã kot ka kêt ri mēhō kot apê hkupênh xwÿnh ã ri mē hkukja. Kwa mãn ãm mēhō amarÿ apê hkupê. Anē.

³² Hãmri nhũm mē kãm:

—Nà na amarÿ ixpê hkupênh kêt nē. Na amnhÿ kaxyw inhmã hamaxpêr tÿx pē ixpê hkupê. Tã na ixãhpumunh tÿx xà ho akupÿm mex. Nom ra ixte mēhō kot ixpê hkupênh xwÿnhhta pumunh jakamã na pa ixêx rom ã amnhÿ tã ri mē hkukjêr anē. E kwa mē atõ inhmã amnhÿ jarê. Anē.

³³ Hãmri nhũm nija kuma nē tee ri kêp kot amnhÿ to hpimxur prãm. Hãmri nē hpijaãm nē hwÿr htertet o tē nē kutã hkõn krã ho tēm nē nhÿ nē kãm amnhÿ jarê nē kãm:

—Ma pa na pa inhmã inhmex prãm xà apê axê kupê. Tã na pa akupÿm inhmex. Anē.

³⁴ Hãmri nhũm kuma nē kãm:

—Tÿ. Nà ate amnhÿ kaxyw inhmã ajamaxpêr tÿx kôt ã ate amnhÿ nhÿpêx anhÿr jakamã na ka akupÿm amex. Kot kaj axte akamrô rãhã ho ri apa hkêt nē. E mãmrÿ ajamakêtkati nē ma akupÿm anhõrkwÿ hwÿr tē. Anē.

Hãmri nhũm kuma nē hkÿnh nē ma akupÿm tē.

³⁵ Rôm nhũm Jajti mã mē àpênh xwÿnhjaja õrkwÿ rÿm ma õ patrãw kutã mra nē wa hkaxpa nē Jajti mã kãm:

—Kwa na ra akra apê ty. Mo kaxyw kot ka kêt amnhÿ kôt Jejus o mō? Kwãr mãmrÿ ma akupÿm awjanã nē tē. Anē.

³⁶ Hãmri nhũm Jejus mē kuma nē Jajti mã kãm:

—Kwa tee ri akra hkukamã ajamaxpêr kêt nē. ãm kaxyw inhmã mãn ajamaxpêr tÿx rãhã nē. Anē.

³⁷⁻⁴⁰ Hāmri nhūm mẽ axte mō nē mẽ òrkwỹ hwỳr pōj nē mẽ omu. Nhūm mẽ ra hã hturax nē mỳr o hkrĩ. Hāmri nhūm Jejus mẽ hwỳr axà nē mẽ omu nē kot mẽ hkra htyk kumrẽx ã omunh tã mẽ kãm:

—Kwa mẽ hāmri amỳr kêt nē. Na nireta htyk kêt nē. Na ãm gōr nē nō. Anē.

Hāmri nhūm mẽ kot ra htyk ã omunh mex jakamã kuma nē ãm kuma nē axtem nē ri axpẽn mã hã hpēr o axkẽ. Hāmri nhūm Jejus mẽ hanor pa nē hitom kãm htyk xwỳnh wỳr àr kaxyw nē amnhĩ kôt Juãw nē Xiakre nē Simãw Pêtre nē kaxyw htyk xwỳnh katorxà nē hipêêxà pix amnhĩ kôt mẽ ho axà.

⁴¹ Hāmri nē htyk xwỳnhhta wỳr tẽ nē hpa hã kupy nē kãm kapēr nē kãm:

—Pa? E kwa kànhmã nhỹ. Anē.

Nom amnhĩ kapēr kãm harẽ nē kãm:

—Tarit kũm. Anē.

⁴² Hāmri nhūm kànhmã ỹr kurẽ kumrẽx nē kànhmã xa nē ri mra. Na pre ra hprêk nē ty. Na ra hã amgrà kệp 12 tã ty nhūm Jejus akupỹm ho htĩr nē kànhmã ỹr nhūm kànhmã xa nē ri mra.

⁴³ Hāmri nhūm kuri omunh xwỳnhjaja amnhĩ jaêr pê omu nē kamã no puma nē hkĩnh tỳx kumrẽx. Hāmri nhūm Jejus katorxà mẽ hipêêxàja wa kãm:

—E mãn ra kãm prãm nē. Wa tokyx kãm mẽmoj japêr kê kukrẽ. Nom kêr ka wa inhmar kumrẽx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nē. ãm kwarĩ ho kwarĩ. Anē.

6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhūm Jejus ma ò krĩ pê Najare hwỳr ma akupỹm mō nhūm hkôt mẽ pa ho mẽ pa xwỳnhjaja ma hkôt mō.

² Hāmri nē hwỳr pōj. Nhūm mẽ ò arĩgromnu pê sap kator jakamã nhūm Jejus ma Tĩrtũm kapēr o mẽ ahkre xà

hã ixkre hwỳr tẽ. Hāmri nē kamã mẽ ahkre ho nhỹ nhūm mẽ amnhĩ jaêr pê kapēr mex ã kuma nē tee ri axpẽn pumunh pê hamaxpêr o hkrĩ. Jejus kệp mẽ hkwy hã hkamnhĩx nom nhūm mẽ kurom ãhpumunh tỳx nē kapēr mex jakamã nhūm mẽ kuma nē tee ri hamaxpêr o hkrĩ. Hāmri nē axpẽn mã:

³ —Kwa kệp mẽ panhĩõ htã tanhmã kot we amnhĩ to nē ã ãhpumunh tỳx kôt mẽ pamã kapēr anē nē ri mẽ kãm aa mẽ kot mẽmoj pumunh kêt kwỳ ho anhỹr o pa? Mẽ panoo mã na pre hprêk. Kệp pĩ kuprãr xwỳnh Juje mẽ hprõ Marir wa hkra na. Nē htõ Xiakre nē Juje nē Simãw nē Jutja ra mẽ pahte mẽ kệp htõ hã omunh mex. Nē htõxjaja jar mẽ pakamã pa nhūm mẽ pahte mẽ omunh mex kênã kot kêt we mẽ kurom ã ãhpumunh tỳx anē. Anē.

Anhỹr o axpẽn mã harẽ. Hāmri nē kamã gryk nē hkaga

⁴⁻⁶ nhūm tee ri amnhĩ tã mẽ omu nē hamaxpêr o:

—Hêxta waa nē. Mẽ kãm amnhĩ kaxyw ixkôt hamaxpêr prãm kêt kumrẽx. Anē.

Hāmri nē mẽ kãm:

—Nà Tĩrtũm nhỹ hã kapēr jarênh o mẽ pa xwỳnhjaja na htem krĩ hkwy kamã kãm mẽ mar prãm nē. Nom ò krĩ kamã mẽ kot karãre rũm hprêk o mōr kãm omunh xwỳnhjaja na htem kuma nē ãm kuma. Anē.

Hāmri nhūm mẽ kot amnhĩ kaxyw hkôt hamaxpêr kêt jakamã nhūm tee ri mẽ kãm aa mẽ kot mẽmoj pumunh kêt kwỳ ho anhỹr rax prãm kaprỳ. Nē ãm mẽ à xwỳnhjê ho grêre nē mẽ hã ãhkra jaxwỳ nē akupỹm mẽ ho mex. Hāmri nē mẽ kurũm kato nē ma krĩ hkwy hkôt ri Tĩrtũm kapēr o mẽ ahkre ho pa.

Jejus kot mẽmoj tã mẽ kệp 12jê mã karõ hã harênh

Matêwre 10.5-15; Rukre 9.1-6, 10.1-12; mããnên Atre 13.50-51, 18.6

⁷ Tã nhūm Jejus amnhĩ wỳr mẽ kot ỹ hã mẽ ahkre ho pa xwỳnh pê 12jê hwỳ. Ra kot amnhĩ kaxyw mẽ rênh xwỳnhhtaja nhūm amnhĩ wỳr mẽ

kuwỳ. Hāmri nē axpēn kaxyw mẽ ho axkrut nē mẽ kurê nē mẽ kām mẽ àpēnh ã karō nē ma mẽ hkwỳjê hwỳr mẽ kurê. Nē mẽ kām:

—E kêr ka mẽ ma mẽ pahkwỳjê hwỳr mra nē inhỹ hã Tĩrtũm kapēr jarēnh o ri mẽ hkôt apa. Nē mẽ kurũm mẽkarõmnuti japõx o ri mẽ hkôt apa.

⁸⁻⁹ Nom kêr ka mẽ amnhĩ kôt akukrêx rax nē ri apa hkêt nē. Nē kawà htu nē ho ri apa hkêt nē. Nē amnhĩ kôt axàpkur xà ho ri apa hkêt nē. Rỳ akàxpore rax nē ri ho apa hkêt nē. ãm mẽ anhõ Kamis nē mẽ apar kà ho pixire nē agjê nē ri hã apa. Nē mẽ amnhĩ kaxpar xà hã mẽ anhõ kô pix o apa. Mẽ ã anhỹ kamã mẽ hkôt ri apa anê.

¹⁰ —Nê kêr ka mẽ nhỹri krĩ hõ hwỳr pøj. Nē apõx xà kamã mẽhõ nhõrkwỳ kamã hkôt ri apikamēnh tãmtã kurũm akupỹm ajapøj nē ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nē nhãm mẽ hwỳr amrar kêt nē.

¹¹ —Nê koja mẽ nhỹri mẽ akapēr kaga ka mẽ tee ri amnhĩ tã mẽ kamã ama hāmri nē tokyx mẽ kurũm ajapøj nē ma apa. Nē anojarêt nē mẽ noo mã akuhê nē amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrã nē mẽ hkaga hã omunh kaxyw ka mẽ ã mẽ noo mã amnhĩ nhĩpêx anê. Hāmri nē hpãnhã ma nhỹhỹm apa.

¹² Anhỹr o mẽ kãm mẽ àpēnh ã karō. Nhũm mẽ kuma nē hapøj nē ma mẽ hkwỳjê hkôt pa. Ma krĩ piitã hkôt Tĩrtũm kapēr o mẽ ahkre ho ri mẽ hkôt pa nē mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kôt mãn amnhĩ xunhwỳ. Anê.

¹³ Hāmri nē mẽ nê mẽkarõmnuti jano. Nē akupỹm mẽ à xwỳnhjê ho mex kaxyw mẽmo htwỳm o mẽ hkrã gregrer nē Jejus nhỹ hã akupỹm mẽ ho mex.

Mẽ kot Juãw Paxis pĩr ã mẽ harēnh Matêwre 14.1-12; Rukre 9.7-9

¹⁴ Tã nhũm mẽ piitã Jejus jarēnh ma nē axpēn mã tanhmã harēnh to ho pa.

Nom ahpỳnhã tanhmã harēnh to. Na prem kamã harēnh o:

—Nà Juãw Paxis pimràata na. Pēr akupỹm htĩr jakamã na hte ã mẽ kot aa mẽmoj pumunh kêt kwỳ ho anhỹr o pa. Anê.

¹⁵ Nê kamã axtem harēnh o:

—Nà tãm kêt. Pēr finat Eris na. Anê.

Nê kamã axtem harēnh o:

—Nà tãm kêt. Pēr Tĩrtũm nhỹ hã kapēr jarēnh xwỳnhjê hõ na. Te kot amnepê mã mẽ kot Tĩrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyrãk o kot amnhĩ nhĩpêx kênã.

Anhỹr o ahpỳnhã harê.

¹⁶ Hāmri nhũm Ijaew o amnhĩptar xwỳnh pē Erox ãxipasja mẽ kot ã harēnh anhỹr ã mẽ kuma nē Juãw Paxis mã hamaxpēr kurê kumrêx. Hāmri nē mẽ kãm:

—Nà pēr Juãw Paxista na. Ixte mẽ kãm hã ixàmnēnh nhũm mẽ kot inhmã mut krãhyr xwỳnhhta mãn ra tanhmã amnhĩ to nē akupỹm htĩr. Anê.

¹⁷⁻²⁰ Na pre ra pahi Erox ãxipasja htõ Pirip pē hprõ Eroxis pytã nē ho hprõ nhũm hkra niti mẽ wa hwỳr ahpa. Hāmri nhũm Juãw Paxisja tee ri ja hã pahihiti Erox ãxipasja pumu nē hã kãm akir nē kãm:

—Tk. Kwa Tĩrtũm kêp ja omnuj. Ra kot ja nê mẽ pahkurê htã ka axtem nē ã amnhĩ nhĩpêx anê.

Anhỹr jakamã nhũm hprõ Eroxisja amnhĩ tã kuma nē kamã gryk tỳx nē. Nê kãm hpĩr prãm nē. No nhũm pahi Erox ãxipas kãm hpĩr prãm kêt nē. Juãw Paxis kot Tĩrtũm kôt amnhĩ nhĩpêx nhũm kot hã omunh mex jakamã kãm hpĩr prãm kêt nē. Juãw na pre hte xatã kãm Tĩrtũm kapēr jarēnh o pa. Nhũm pahihiti Erox ãxipasja kormã hprĩ hã mar mex kêt tã hã hpijaam nē kãm mar prãm nē. Nom nhũm hprõ kãm hpĩr prãm jakamã nhũm kêp mẽ kãm hã amỳnê nhũm mẽ ma o tē nē haxà nhũm mex nē mẽ hagjēnh xà kamã hkrĩ ho krĩ.

²¹⁻²⁴ Tã nhũm jãã nhũm pahi Erox ãxipas kator ã arĩgro kato nhũm mẽ piitã hwỳr mra nē hã akuprõ nē hã hkĩnh nē hã apkur o hkrĩ. Õ

kôwenatôjaja nê hkràmnhwỳjaja nê krī hkwỳ kamā mẽõ pahijaja nhũm mẽ ohtô nê hã akuprõ nê hã hkĩnh. Hãmri nhũm hprõ Eroxis kra nitija mẽ hwỳr axà nê mẽ kãm gre. Mẽ kot omunh nê kamā hkurẽ pix kaxyw mẽ noo mã hpijaam kêt nê ã mẽ kãm grer anê. Hãmri nhũm pahi Erox omu nhũm ja kãm mex nê nhũm mẽ piitã hkĩnh nê kamā nopyma nê. Nê grer kãm hpijaam kêt nê tanhmã mẽ kãm grer to nhũm mẽ omu nê kamā no pyma nê. Hãmri nhũm pahi Erox ãxipasja kãm:

—Nà ãm hãmri. Na ka mẽ inhmã agrer mex nê. Jakamã kwa mãmri mẽmoj tã ixwỳ. Amã mẽmoj prãm xà hkôt inhmã mẽmoj jarẽ pa amã kugõ. ãm hãmri na pa amã amnhĩ jarẽ. Na pa Tirtũm noo mã ã amã amnhĩ jarẽnh anê. Ka mamrĩ ixkukrêx mex kwỳ hã ixwỳ pu axpẽn mã ho axkjê. E mẽmo na amã hprãm? Anê.

Hãmri nhũm kuma nê ma katorxà hwỳr tẽ nê kãm harẽ nê kãm:

—Xê mẽmoj tã kot paj we kuwỳ? Anê.

Hãmri nhũm kuma nê hamaxpêr o:

—Ma ãm hãmri koja mẽ tã jarãhã inhmã Juãw Paxis pĩ. Anê.

Hãmri nê hkrata mã kãm:

—Ma Juãw Paxis krã hã kot kaj awỳ kêt mẽ amã kugõ ka man ixwỳr o tẽ. Anê.

²⁵ Hãmri nhũm kuma nê akupỹm pahi hwỳr axà nê kãm:

—Ma Juãw Paxis krã kot kaj inhmã agõ. Pasiiti kamã axà nê inhmã agõ pa ma amnhĩm o ixtẽm kurê kumrêx. ãm ja pix na inhmã hprãm. Anê.

²⁶ Hãmri nhũm tee ri kuma nê hkaprĩ nê. Nê hamaxpêr o:

—Hêxta waa nê. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarẽnh nhũm ixte kãm õr ã amnhĩ jarẽnh nhũm mẽ piitã mẽ kot inhmar jakamã tanhmã kot pa we amnhĩ to nê kêp nê? Nà pa nê hkêt nê. Anê.

²⁷ Hãmri nê õ pôristijê mã kãm:

—E mẽ ma Juãw Paxis wỳr mra nê mut krãhta nê pasiiti kamã hkrã xà nê akupỹn o tẽ nê kãm agõ. Anê.

Hãmri nhũm mẽ kuma nê ma mẽ hagjẽnh xà hwỳr mra nê Juãw wỳr axà hãmri nê mut krãhta.

²⁸ Hãmri nê pasiiti kamã hkrã xà nê akupỹm o tẽ nê kot hã hwỳr xwỳnh mã kugõ nhũm kumỳ nê ma katorxà hwỳr o tẽ nê kãm kugõ.

²⁹ Hãmri nhũm Juãw Paxis kôt mẽ pa ho mẽ pa xwỳnhjaja tee ri harẽnh ma nê hkaprĩ htỳx nê. Hãmri nê pahi Erox ãxipas wỳr mra nê ã hã kuwỳ nhũm mẽ kãm kugõ nhũm mẽ kumỳ nê ma o mra nê kên kre kamã haxà.

Jejus kot mẽ ho 5.000 nê mẽ kãm õ hã harẽnh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỹn Jejus wỳr mõn pøj nê kãm amnhĩ jarẽ. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhĩ jarẽnh pa.

³¹ Tã nhũm mẽ piitã axpẽn pãnhã kot Jejus mar kaxyw mẽ hwỳr mra nhũm mẽ kormã apkur kêt nê. Jakamã nhũm Jejus hkôt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mõ nê nhỹri pahkrĩ nê pakôkôt nê apku.

³² Anê hãmri nhũm mẽ gõx kãm kanôre wỳr agjê nê ma ahte xarmã awrã kaprỳ hwỳr mõ.

³³ Nhũm krĩ hkwỳ nhõ xwỳnhjaja mẽ omu hãmri nê nhỹhỹm mẽ mõr xà hã mẽ omunh kurê kumrêx. Hãmri nê krĩ hkwỳ rũm ma mẽ ãhkrep mra nê mẽ kãm amnhĩ to wa nê pøj nê mẽ kutêp hkrĩ.

³⁴ Hãmri nhũm mẽ mõ nê mẽ hwỳr pøj nê kre kura nê kanôre nhõ. Hãmri nhũm Jejus mẽ hwỳr api nê mẽ omu nê hamaxpêr o:

—Hêxta waa nê. Na mẽ omnu nê pa. Te mẽ kêp ôwêhti jamãr xwỳnh kêt nê htỳx ri pa xwỳnh kot amnhĩ nhĩpêx pyrãk. Mẽhõ kot mẽ kamã ukaprĩ nê tanhmã mẽ ho mex to ho pa? Anê.

Hāmri nē mē kamā ukapri nē xa nē Tirtūm kapēr o mē ahkre rax nē.

³⁵⁻³⁶ Tā nhūm myt àr kaxyw nhūm hkôt mē kot pa ho pa xwýnhjaja hwýr mra nē kām:

—Kwa hāmri na ra amýkry htýx nē. Mē hano kê mē ma nhýri krī hkwy hwýr mra nē tokyx amnhīm mēmoj japrô nē kuku nē hikwy nē gôr. Mo jar kapôt ã mē apkur xà? Anē.

³⁷ Hāmri nhūm mē kuma nē mē kām:

—Kwa nà mē kamjaja mē kām mēmoj gô kê mē kuku. Anē.

Hāmri nhūm mē kuma nē tee ri hamaxpēr nē kām:

—Kwa mo mē kaxyw mē pakàxpore rax? Kot pu mē pakàxpore ho 200 nē ho mē kām mēmoj japrôr tã nom nhūm mē ãm ho hkryre nē kuku nē ho ôhy htú hkêt nē. Mē ohtô rax kumrêx kênã. Anē.

³⁸ Hāmri nhūm mē kām:

—Nà kot puj mē kām mēmoj japrôr kêt nē. No mē panhō pãwtita? Tanhmã na arī kute? E mē atô tē nē omu nē akupýn tē nē inhmã harē. Anē.

Hāmri nhūm ja ma tē nē omu nē akupýn tē nē kām:

—Nà pãwti ãm kêp 5 pix. Nē kaxyw tep ãm pijakrutre. Anē.

³⁹ Hāmri nhūm Jejus kuma nē mē kām:

—Tôe. Mē kām anē kê mē ahpýnhã ri hije nē hkrī. Anē.

⁴⁰ Hāmri nhūm mē piitã ahpýnhã kêp 50 nē hije nē hkrī hpa.

⁴¹ Nhūm Jejus pãwti mē tepta jamý nē kãnhmã kaxkwa hwýr rít nē Tirtūm mã kupē nē kãm harē nē kãm:

—Pa Papaj? Nà ka na apē mē inhmã mē inhô ho apa xwýnh jakamã amex o amex. Anē.

Hāmri nē mē kãm ho hkry hpa nē hkôt mē pa ho mē pa xwýnhjê mã kugô nhūm mē ô ri ho mra nē ho mē hipêx pa. Pãwti mē tepta nhūm mē ho mē hipêx pa.

⁴²⁻⁴⁴ Nhūm mē piitã apkur mex nē. Mēõja mē kêp grire htã nhūm Jejus tanhmã mē kãm ho rax to nhūm mē ohtô rax tã piitã kuku nē ho ôhy htú

hpa. Mēmyjaja kêp 5.000 nē kaxyw mē hprô nē mē hkrajaja nhūm mēõja ho mē hipêx pa nhūm arī hakrêx prã. Jakamã nhūm Jejus kôt mē pa ho mē pa xwýnhjaja akupým hakrêx o pikuprônh pa nē ho kawà o 12 nē ho nyt.

Jejus kot gô krãhkã hã htēm ã harênh

Matêwre 14.22-33; Juãw 6.15-21

⁴⁵⁻⁴⁶ Tã nhūm Jejus hkôt mē pa ho mē pa xwýnhjê mã kãm:

—E mē kanôre mã axà nē ma akupým ixkukamã krī pé Petsěj wýr rē. Pa jajê jano hāmri nē ma tē nē nhýri Tirtūm mã amnhĩ jarē nē rĩ ma mē akôt tē. Anē.

Hāmri nhūm mē kuma nē kanôre mã gjêx pa nē ma mō nhūm Jejus mē kot mar xwýnhjê janor pa nē ma hixêt prêk ã api nē Tirtūm mã amnhĩ jarênh o nhý.

⁴⁷ Tã nhūm kamàt nhūm arī ahte kýxpê nhý. Nhūm hkôt mē pa ho mē pa xwýnhjaja kormã kanôre kamã mō.

⁴⁸ Hāmri nhūm Jejus amým mē omu nhūm kôk ra mē kutã àpêr týx kumrêx nhūm mē tee ri amnhĩ nhĩpêx nē tee ri rrêmti ho gô rênh nhĩpêx o hkrī.

Tã nhūm ra krãhyre kã nhūm Jejus Tirtūm mã amnhĩ jarênh pa nē kãnhmã xa nē ma mē hkôt tē. Nom kanôre kamã htēm kêt nē gô krãhkã hã xa nē mē hwýr hpar o tē.

⁴⁹⁻⁵⁰ Hāmri nē mē hwýr kato nē mē kamã hamak kaxyw hêx rom kot mē hakrenh mã. Nhūm mē amnhĩ wýr omu nē mēkarô hã hkamnhĩx nē tee ri amnhĩ kukamã hamaxpēr nē umaj htertet nē àmra rax nē. Hāmri nhūm mē kãm:

—Tk. Kwa mē amã ma hkêt nē. Pa na pa mē akôt tē. Anē.

⁵¹ Hāmri nē mē hwýr kanôre hkrem axà nhūm kôk xàpêr týxta hapêx. Hāmri nhūm mē Jejus kamã no puma nē tee ri hamaxpēr nē axpên mã:

—Kokýý. Tanhmã na we amnhĩ to nē gô krãhkã hã hpar o man mē pahkôt tē mē pahwýr àr mē nhūm kôk hapêx par kurê kumrêx. Anē.

Hāmri nē tee ri kot ã amnhĩ nhĩpêx anhýrja kukamã hamaxpēr o hkrī.

⁵² Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrã nẽ àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nẽ gô krãhkã hã htẽm nẽ kôk o pinhkrẽnh ã omu nẽ tee ri ã kot amnhĩ nhĩpêx anhỹrja kukamã hamaxpẽr.

Kenẽjare kamã Jejus kot akupỹm mẽ ho mex ã harẽnh

Matêwre 14.34-36

⁵³ Tã nhũm mẽ xarmã rê nẽ krĩ pẽ Jenẽjare hwỹr pøj. Hãmri nẽ kanõre nhõ

⁵⁴ nẽ api nẽ kuhê nhũm krĩ nhõ xwỹnhjaja Jejus pumunh kurê kumrẽx nẽ axpẽn mã:

–Kwa pẽr Jejusta na mõ. Nà tãm kẽnã. Anẽ.

⁵⁵ Hãmri nẽ hkĩnh nẽ ma kape hã mẽ à xwỹnhjê hkõt mrar kurê kumrẽx nẽ mẽ harir xà rãhã mẽ hamỹ nẽ akupỹm Jejus wỹr mẽ o mra. Nhỹri hpõx xà kamã omu nẽ hwỹr mẽ o mra.

⁵⁶ Na pre htem ã Jejus nhĩpêx anẽ. Jakamã nhũm hte ma nhỹhỹm mra. Krĩ rũnh kõt mra nẽ krĩ hkryre hkõt mra nhũm mẽ omu nẽ hwỹr mẽ à xwỹnhjê ho mra nẽ mẽ ho kuwỹ nẽ kãm:

–Pa? Kwa kê jajaja akupỹm mex kaxyw apê axê pix kupê nà? Anẽ.

Hãmri nhũm mẽ kãm:

–Tõe. Nà kwãr mẽ mãmrĩ hkupê. Anẽ.

Hãmri nẽ mẽ kot kęp ê kupẽn xwỹnh piitã akupỹm mex pa.

7

Mẽ higêt hkõt mẽ kot amnhĩ nhĩpêx xwỹnhjê jarẽnh

Matêwre 5.21-48, 15.1-20

¹⁻⁴ Tã nhũm Mojes kapẽr o mẽ ahkre o mẽ pa xwỹnh kwỹjaja Jerujarẽ rũm Jejus wỹr mõ. Hãmri nẽ hã akuprõ nẽ hkõt mẽ pa ho mẽ pa xwỹnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapẽr kõt ri tanhmã amnhĩ nhĩpêx to ho pa. Jakamã mẽ urak nẽ apkur kaxyw nẽ xatã amnhĩ nhĩhkra kuhõnh japjê nẽ rĩ kormã apku. No

mẽ amnhĩ nhĩhkra grã pix kuhõnh nẽ hkrĩ nẽ apkur kêt nẽ. Kuhõnh japjê nẽ kormã hkrĩ nẽ apku. Tĩrtũm kot ja hã mẽ omunh nẽ amnhĩm mẽ mex ã mẽ harẽnh ã amnhĩ kamnhĩx jakamã na prem ã amnhĩ nhĩpêx anhỹr o pa. Nẽ nhỹri amnhĩm mẽõ hkwỹ japrõ nẽ akupỹm õrkwỹ hwỹr o mra nẽ haxwỹ nẽ mẽ higêt pyrã nẽ wỹr japjê rũnh kumrẽx nẽ rĩ kormã apku. Nẽ mẽ urak nẽ poti nẽ gøj nẽ papêre hkre kahõnh japjê rũnh nẽ rĩ kormã kamã õ nhĩpêx. Mẽ higêt pyrã nẽ ã amnhĩ nhĩpêx anhỹr o pa. Tĩrtũm kot ja hã mẽ omunh nẽ amnhĩm mẽ mex ã mẽ harẽnh prãm xàj. Nom nhũm Jejus kõt mẽ pa xwỹnhjaja na prem ã amnhĩ nhĩpêx anhỹr kêt nẽ. Na prem apkur kaxyw nẽ katat kõt amnhĩ nhĩhkra kuhõ nẽ àmnhĩx apkur o hkrĩ. Jakamã nhũm Parijew nhõ xwỹnh mẽ Tĩrtũm kapẽr tũm o mẽ ahkre xwỹnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukja nẽ kãm:

⁵ –Pa Jejus? Kwa mẽ inhmã mẽmoj jarẽ. Amnepêm mẽ panhĩgêtjaja na pre htem apkur kaxyw nẽ amnhĩ nhĩhkra kuhõnh japjê rũnh kumrẽx nẽ arĩ kormã hkrĩn apku. Jakamã na pa htem mẽ urak nẽ ã amnhĩ nhĩpêx anẽ. No akõt mẽ pa ho mẽ pa xwỹnhjaja na htem ho mẽ ixpyrã kêt nẽ. Kwa mo na htem ã amnhĩ nhĩpêx anhỹr kêt nẽ? Anẽ.

⁶ Hãmri nhũm mẽ kuma nẽ mẽ kãm amnepêm Tĩrtũm nhỹ hã kapẽr xwỹnh pẽ Ijais kapẽr jarẽ nẽ mẽ kãm:

–Nà ãm hãmri na pre finat Ijaisja amnepêm tanhmã mẽ ajarẽnh to. Te Tĩrtũm tãm kapẽr pyrãk o mẽ ajarẽ nẽ mẽ ajarẽnh o:

Mẽ kãm ixkĩnh ã amnhĩ jarẽnh tã mẽ kãm ixkĩnh kêt. Na htem ãm kãm ixprãm ã amnhĩ jarẽnh kaprỹ.

⁷ Mẽ kot ixkapẽr kuhpa hã amnhĩ krã hkõt mẽmoj tã hkwỹjê mã karõ ho pa jakamã na htem ãm kot ixkõt amnhĩ nhĩpêx ã amnhĩ jarẽnh kaprỹ. Anẽ.

Ã na pre mẽ ajarẽnh anẽ.

8-9 ãm hãmri na pre mẽ ajarẽ. Na ka htem mẽ panhĩgêt kapër kôt pix mã amnhĩ nhĩpêx o apaja gryk ã ra Tĩrtũm kapër kaga hpa. Te mẽ akapër mex o kot Tĩrtũm kapër jakrenh pyræk.

¹⁰ Na pre finat Mojes Tĩrtũm nhỹ hã mẽmoj tã mẽ pamã karõ ho:

Ker ka mẽ anhĩpêxà nẽ mẽ akatorxà wa hã apijaàm o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapër punuj to hãmri nhũm mẽ akwỹjaja ja mỳrapê mẽ apa. Anẽ.

Na pre ã finat Mojesja Tĩrtũm nhỹ hã mẽ pamã karõ anẽ.

¹¹ No mẽ kajaja na ka mẽ axtem nẽ tanhmã akwỹjê mã ja hã karõ hto nẽ mẽ kãm: “Kot kaj mẽ mẽmo arĩgro hã akãxpore hkwy nom anhĩpêxà ho ajuta kaxyw kãm hkwy nhõr kêt nẽ. ãm wa kãm ate ho ajuta kêt ã amnhĩ jarẽ hãmri nẽ Tĩrtũm mã amnhĩ jarẽnh xà hã ixkre hwỳr mãn o tẽ nẽ mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nhũm ja kãm mex nẽ. E kër ka mẽ ã amnhĩ nhĩpêx anhỹr o ri apa.” Anhỹr o na ka htem akwỹjê mã karõ.

¹² Jao mẽ kot mẽ hipêxà nẽ mẽ katorxà ho ajuta nẽ mẽ hkurê.

¹³ Te mẽ amã mẽ panhĩgêt kapër mex o kot Tĩrtũm kapër jakrenh pyræk o na ka htem amnhĩ nhĩpêx. Jao te Tĩrtũm kapër mex kêt pyræk o hipêx nẽ mar kêt nẽ apa. ã na ka htem Tĩrtũm kapër kuhpa hã amnhĩ nhĩpêx anhỹr o ri apa. Anẽ.

Mẽ pajamaxpër punuj kôt mẽ pah-tomnu hã harẽnh

Matêwre 15.10-20

¹⁴ Tã nhũm Jejus Parijew nhõ xwỹnhjê mẽ hkwyjê mã kapër pa hãmri nẽ amnhĩ wỳr ra mẽ kot mar o kuhê xwỹnhjê mã hpa ho apê nẽ mẽ kãm:

—E pa mẽ amã mẽmoj jarẽ ka mẽ inhma nẽ inhmar mex nẽ.

¹⁵⁻¹⁶ Na hte Tĩrtũm kapër tũm o mẽ ahkre xwỹnhjaja amnhĩ krã hkôt mẽ

ate amnhĩ nhĩkra kuhõnh japijê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tĩrtũm kot ja hã mẽ apumunh kôt amnhĩm mẽ amex ã mẽ ajarẽnh kaxyw nhũm htem ã mẽmoj tã mẽ amã karõ anẽ. Nom na hte Tĩrtũm tanhmã mẽ panhĩkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxàpkur xà hã mẽ pahpumu nẽ ãm hã mẽ pahpumu. Ja kãm tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harẽnh rỳ mẽ mex kêt ã mẽ harẽnh kêt nẽ. Rỳ mẽ hakwa ho mẽmoj kur ã mẽ omunh xà hkôt tanhmã mẽ harẽnh to hkêt nẽ. ãm mẽ hakwa ho tanhmã kapër to pix ã mẽ mar kôt na hte tanhmã mẽ harẽnh to.

Anhỹr o mẽ kãm kapër.

¹⁷ Hãmri nẽ mẽ kot mar o kuhê xwỹnhjê re nẽ hkôt mẽ pa ho mẽ pa xwỹnhjê mẽ mẽ amnhĩm hikranh xà hã ixkre hwỳr agjê. Hãmri nhũm hkôt mẽ pa ho mẽ pa xwỹnhjaja tee ri Jejus kot tanhmã mẽ hakwa jarẽnh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarẽnh anẽ? Anẽ.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nà mẽ apkur xà na hte mẽ hkrã hi kamã mẽ hamaxpër wỳr gjêx kêt nẽ.

¹⁹ Na hte ãm mẽ õhy pix wỳr agjê nẽ gaa nẽ nhãm hapõj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tĩrtũm mẽ apkur xà hã mẽ omunh xà hkôt tanhmã mẽ harẽnh to hkêt nẽ. Anẽ.

Nhũm pre ã mẽ kãm kapër anhỹr o mẽ paxàpkur xà piitã mex ã harẽ. Jakamã na hte Tĩrtũm krajaja ãmnhĩx mẽmoj piitã hkur o pa nẽ kãm mẽmoj kur puma hkêt nẽ. Jakamã nhũm Jejus ã mẽ kãm kapër anẽ nẽ mẽ kãm:

²⁰ —Mẽ hkrã hi kamã mẽ hamaxpër punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpër to ho

pa hã mẽ omunh xà hkôt tanhmã mẽ harënh to. Nom mẽ kot mẽmoj kur ã mẽ omunh xà hkôt rỳ mẽ ìhkra kuhõnh japjê hã mẽ omunh xà hkôt tanhmã mẽ harënh to hkêt nê. Ja tanhmã kêp kute hkêt.

21-22 Nom koja mẽhõ hamaxpêr punuj nê ra hkôt tanhmã amnhĩ tomnuj to.

Jaο axpên kamã hpijaam kêt nê.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỳ ho amnhĩkati.

Rỳ ri axpên pê õxỳ.

Rỳ tanhmã hkwyjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyri o ri pa.

Rỳ mẽmoj tã amnhĩ to jarkrar o pa.

Rỳ axpên kukrêx pumu nê kãm ho õ hprãm xàj hã õ xwỳnhhta kamã gryk.

Rỳ htyx ri tanhmã amnhĩ nhĩpêx to.

Mẽ hamaxpêr punuj jakamã na htem ã ri amnhĩ nhĩpêx anhỹr o pa.

23 Tã ã mẽ kot amnhĩ nhĩpêx anhỹr ã mẽ omunh xà hkôt na hte Tirtũm mẽ kot amnhĩ tomnuj xwỳnh hã mẽ harê. Anê.

Mẽhõ kot hkra kaxyw Jejus mã hamaxpêr ã harënh

Matêwre 5.21-28

24 Tã nhũm Jejus mẽ hkôt mẽ pa ho mẽ pa xwỳnhjaja nhỹhỹm nojarêt hãmri nê krĩ rũm hapôj nê ma krĩ pê Xir pu hã ri pa. Hãmri nhũm Jejus hkwyjê mã:

—E kwa pu mẽ tokyx ixkre mũj wỳr mỗ mẽ kuri pôj nê kamã amnhĩm hikra. Pu mẽ pahpôx tokyx anê kê krĩ nhõ xwỳnhjaja mẽ pahpôx ã mẽ pahpumunh kêt nê.

Anhỹr tã nom nhũm mẽ piitã mẽ harënh ma nê mẽ hã akuprõ.

25-26 Nhũm mẽhõ ni haxwỳja Jejus hpôx ã harënh ma nê ma hwỳr tẽ. Nom kêp Ijaew kêt axtem Gres nhõ xwỳnh na pre. Pika pê Sir kamã krĩ mẽ kot kãm “Wênĩs” anhỹr xwỳnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nê ra Jejus hpôx ã harënh ma nê ma hwỳr

tẽ. Hãmri nê hwỳr axà nê hparpê hkõnkrã ho htem nê nhỹ nê kãm:

—Xê Pahihti. Inhmã ixkra nê mẽkarõmnuti jano kê ma tẽ kê akupỹm inhmã mex. Anê.

27 Hãmri nhũm kãm:

—Nà kormã. Na pre Tirtũm taxy kormã Ijaewjê pix wỳr inhmẽ. Jakamã na pa kormã nhãm mẽ akwyjê hõ tanhmã mẽ ato mex to hkêt nê. Anê.

28 Hãmri nhũm tee ri amnhĩ tã kuma nê kãm:

—Ma ãm hãmri na ka ja jarê. Ixpê Ijaew kêt tã nom mẽ kuxwar we ixto mex grire kêt wehe. Anê.

29 Hãmri nhũm kãm:

—Nà ãm hãmri na ka ã akra kaxyw inhmã ajamaxpêr tỳx anê. Jakamã kot paj nê mẽkarõmnutita jano. Koja axte tanhmã apê ho hkêt nê. E ma akupỹm hwỳr tẽ nê omu. Anê.

30 Hãmri nhũm kuma nê ma akupỹm õrkwỹ hwỳr tẽ nê omu. Nhũm ra mẽkarõmnutija kêp kato nê ma tẽ nhũm akupỹm tãm hkrã nê hkĩnh nê par kãm hkõkôt o nõ.

Hamak kro nê kapêr krok xwỳnh jarënh

Matêwre 15.29-31

31 Tã nhũm Jejus mẽ hkôt mẽ pa ho mẽ pa xwỳnhjaja krĩ pê Xir rũm hapôj nê akupỹm gô rax pê Garirej wỳr ma mra. Pyka pê Sitõ jakre nê mỗ nê pyka pê Tekap jakre.

32 Hãmri nê kormã hpôx o mỗr rôm nhũm mẽ amnhĩ wỳr Jejus pumu nê hwỳr mẽhõ myja o tẽ. Kapêr krok nê umar kêt xwỳnhhta nhũm mẽ wỳr o tẽ nê kãm:

—Pa? Ot pa mẽ awỳr ixkrãmnhwỳta o tẽ. Kwa hã anhĩhkra xi kê akupỹm mẽ inhmã mex. Anê.

33 Hãmri nhũm omu nê hpa hã kupyri nê mẽ kêp o kato nê nhỹri mẽ hkàx ã o xa. Nê akutã hamak kre kupê nê argôx mẽ nê ho õhto htok.

34 Hãmri nê kaxkwa hwỳr rĩt nê htyk xà mênh tỳx nê kãm kapêr. Mẽ pakapêr kãm kãm: “E ajamak katêr nê anhõhto kaxkrit.” Anê. Nom kapêr kãm kãm: “Epata.” Anê.

³⁵ Hāmri nhūm hamak katêr nê òhto kaxkrit kurê kumrêx nê tām kapêr nê tām ama.

³⁶⁻³⁷ Hāmri nhūm mē kot omunh xwýnhjaja amnhĩ jaêr pē Jejus kot ho mex ã omu nê kamã no puma nê. Hāmri nhūm mē kãm:

—Kwa kêr ka mē akwýjê mã ja hã ijarênh kêt nê.

Anhÿr tã no nhūm mē kuma nê ãm kuma nê ma mē piitã mē kãm harênh o ri hprôt nê mē kãm:

—Kwa Jejus na mex o mex. Na hte mē ho mex o pa nhūm mē umar kêt xwýnhjaja akupÿm tãm ama nhūm mē kapêr kêt xwýnhjaja akupÿm tãm kapêr. ãm hāmri na hte ã mē hipêx anhÿr o pa. Nã ãm mex o mex. Anê.

8

Jejus kot mē ho 4.000 nê mē kãm mē ò hã harênh

Matêwre 15.32-39

¹⁻² Tã nhūm arĩgro hõ hã nhūm mē ohtô nê nhÿri kapôt ã Jejus ã htu rax nê kot mē ahkre mar o kuhê hã apkati axkrunêpxi. Nhūm mē apkur xà hã mēõja ra mē kêp hapêx. Hāmri nhūm Jejus ja hã mē omu hāmri nê hkôt mē pa ho mē pa xwýnhjê mã akir nê mē kãm hpa ho apê nê mē kãm:

—E mē amnê ixwÿr mra nê ixkapêr ma. Anê.

Nhūm mē hwÿr mra nê kuhê nhūm mē kãm:

—Kwa na pa inhmã mē kot inhmar o kuhê xwýnhjê kaprĩ nê. Na mē ra mē pahkôt ri pa hã apkati axkrunêpxi nhūm mē apkur xà hã mēõja mē kêp hapêx.

³ Mē ò krĩ hwÿr awry jakamã koja mē mēmoj kur kêt rãhã ma akupÿm pa hāmri nê pry hã hrot nê rôrôk o pa. Hāmri pa inhmã mē hkaprĩ nê. Anê

⁴ Hāmri nhūm mē kuma nê axte tee ri hamaxpêr nê kãm:

—Kwa nã nhÿhÿnh kot puj kêt mē kãm mēmoj to mra? Jar ãm kapôt pix kênã. Anê.

Hāmri nhūm mē kãm:

⁵ —Nã tanhmã na mē anhõ pãwtija kute? Anê.

Nhūm mē kãm:

—ãm kêp 7 pix. Nê kaxyw tep kwÿ no ãm grêre. Anê.

⁶ Hāmri nhūm mē kuma nê mē kot mar o kuhê xwýnhjê mã anê nhūm mē kuma nê hkrĩ pa. Hāmri nhūm pãwti jamÿ nê ho Tĩrtũm wÿ nê kãm:

—Pa Papaj. Nã ka na apê mē inhmã mē inhõ ho apa xwýnh. Jakamã amex o amex. ãm amex kumrêx. Anê.

Hāmri nê mē kãm ho hkry pa nê hkôt mē pa ho mē pa xwýnhjê mã kugõ nhūm mē ho mē hipêx pa.

⁷ Nhūm hpãnhã tepta py nê mã ho anê nê ho Tĩrtũm wÿ. Hāmri nê hkôt mē pa ho mē pa xwýnhjê mã kugõ nhūm mē mã ho anê nê hamÿ nê ho mē hipêx pa.

⁸⁻⁹ Hāmri nhūm mē ohtô rax kumrêx tã piitã apku nê òhy htu pa. Mēmyjaja kêp 4.000 nê kaxyw mē hprõjaja nê mē hkrajaja. Tã nhūm Jejus mē apkur xàja o mē hipêx pa. Nhūm hkôt mē pa ho mē pa xwýnhjaja hakrêx o akuprõ nê ho kawà ho 7 nê ho nÿt. Hāmri nhūm Jejus ma akupÿm mē ò krĩ hwÿr mē kot mar xwýnhjê jano nhūm mē ma akupÿm hapêx.

¹⁰ Hāmri nhūm Jejus hkôt mē pa ho mē pa xwýnhjê mē ro hã kanôre hkrem agjê nê mē hkwÿm ma Tamanut wÿr mō.

Parijew nhõ xwýnh kwÿ kot mēmoj tã Jejus kamã hamak ã mē harênh

Matêwre 12.38-42, 16.1-4; Rukre 12.54-59

¹¹ Tã nhūm mē Tamanut wÿr põj nhūm Parijew nhõ xwýnh kwÿjaja Jejus pumu nê ma hwÿr mra nê mēmoj tã kuwÿ nê kãm:

—Pa. Ot pa mē awÿr mra. Kwa mē inhmã aa mē ixte mēmoj pumunh kêt ò ho anê. Pa mē ja hã apumu nê Tĩrtũm kot mē ixwÿr amênh ã akôt ija-maxpêr kurê kumrêx. E tokyx. Anê.

Kot tee ri mē kãm mēmoj to anhÿr kaxyw nê ho anhÿr kêt nhūm mē kot hã omunh nê ma hkwÿjê mã ho kapêr punuj kaxyw nhūm mē ã hêx rom kãm kapêr anê.

¹² Nhūm ra kãm mē kot amnhĩ kaxyw hkôt hamaxpêr kêt kãm ã kapêr anhÿr mar kaga nê. Hāmri nê

tee ri amnhĩ tã mẽ hamaxpēr ã mẽ omu nẽ htyk xà mēnh tỳx nẽ mẽ kãm:

—Hêxta waa nẽ. Mẽ ajamaxpēr punuj pix o na ka htem ri ajamaxpēr o apa. Ixpê Tirtũm kot mẽ awỳr inhmēnh xwỳnh tã ka mẽ ja hã ixkõt ajamaxpēr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ãm omu nẽ ixkõt ajamaxpēr kêt nẽ. Nà kot paj mẽ amã mẽmoj to anhỳr kêt nẽ. Anẽ.

¹³ Hãmri nẽ mẽ kure nẽ hkõt mẽ pa ho mẽ pa xwỳnhjê mẽrohã ma mra nẽ akupỹm kanôre hkrem agjê nẽ ma xarmã mỗ.

Jejus kõt mẽ pa xwỳnhjaja kot hprĩ hã omunh kêt ã mẽ harēnh

Matêwre 16.5-12; mããnēn Makre 6.52

¹⁴ Tã nhũm mẽ kormã kanôre kamã xarmã mỗr rôm nhũm Jejus kõt mẽ pa ho mẽ pa xwỳnhjaja tee ri mẽ apkur xà japēr nẽ axpēn mã:

—Kwa hêxta waa nẽ. Na pu mẽ panhõ pãwti re nẽ amnhĩ kõt o pamỗr kêt nẽ. Nẽ ãm pixire nẽ o mỗ. Anẽ.

¹⁵ Hãmri nhũm Jejus tee ri mẽ kuma nẽ tanhmã hã mẽ kãm kapēr to. Nom mẽmoj tã kuxi nẽ mẽ kãm awjarē nẽ mẽ kãm:

—Kwa oko kêr ka mẽ amnhĩ nê Parijew nhõ xwỳnh mẽ Pahi Erox nhõ pãw kaxkrit xà pumunh mex nẽ. Anẽ.

¹⁶ Hãmri nhũm mẽ kuma nẽ tee ri kapērja kukamã hamaxpēr pê hã axpēn kujêr o hkrĩ nẽ axpēn mã:

—Kwa mo na ri ã mẽ pamã pãw kaxkrit xà jarēnh anẽ? Mãn mẽ panhõ pãwti hkêt ã mẽ pahpumu hã na ri ã harēnh anẽ nà? Anẽ.

¹⁷ Hãmri nhũm Jejus mẽ kapēr ã mẽ kuma nẽ mẽ kãm:

—Kwa mon ka wem ãm xatã axpēn mã mẽ panhõ pãwti hkêt jarēnh pix o mỗ? Xàn pa hte mẽ apyrà nẽ tee ri mẽ paxàpkur xà hkêt kukamã ijamaxpēr o ixpa? Nà inhmã ja tanhmã kute hkêt.

¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapēr mar mex tã aprĩ hã mar tỳx kêt. Kwa wem ixte amnhĩ nhĩpêx mã

ajamaxpēr tỳx nẽ. E mẽ inhmã mẽmoj jarē.

¹⁹ Jãã ixte mẽ kêp 5.000 mã pãwti kêp 5 nhĩrēnhta. Tanhmã na ka prem hakrêx o akuprõ nẽ ho kawà ho nýt to? E mẽ atõ inhmã harē. Anẽ

Hãmri nhũm ja kãm: “Na pa prem ho kawà ho 12 nẽ ho nýt.” Anẽ.

²⁰ Nhũm kuma nẽ mẽ kãm:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrēnhta. Tanhmã na ka prem hakrêx ho akuprõ nẽ ho kawà ho nýt to? Anẽ.

Nhũm ja kãm: “Na pa prem ho 7.” Anẽ.

²¹ Hãmri nhũm kuma nẽ mẽ kãm:

—Tỳ ra ixte mẽ anoo mã ã ja ho anhỳr o axkrut tã ka mẽ ra hã ano hkêt nẽ arĩ axpēn mã mẽ panhõ pãwti hkêt pix jarēnh o ixkõt mỗ. Kormã mẽ ate ixàhpumunh tỳx ã ixpumunh kêt. Anẽ.

Jejus kot akupỹm nohkre xwỳnh o mex ã harēnh

Juãw 9.1-7

²² Tã nhũm mẽ ma krĩ pê Pesêj wỳr mỗ nẽ ra hwỳr pøj. Hãmri nhũm krĩ nhõ xwỳnh kwỳjaja mẽ omu nẽ Jejus wỳr mēhõ myja o tẽ. Ra nohkre nẽ rĩt kêt nẽ pa xwỳnhja nhũm mẽ hpa hã kupyn hwỳr o tẽ. Hãmri nẽ ho kuwỳ nẽ kãm:

—Pa Pahihti? Ot pa mẽ awỳr ja ho tẽ. Kwa hã anhĩhkra xi nẽ akupỹm mẽ inhmã no ho mex. Anẽ.

²³ Hãmri nhũm mẽ kuma nẽ nohkre xwỳnhta pumu nẽ hpa hã kupy nẽ o tẽ nẽ krĩ pê ho kato nẽ nhỹri mẽ hkàx ã o xa. Hãmri nẽ no hã argôx mẽ nẽ hã ìhkra xi nẽ kãm:

—E mãn ka mẽmoj pumu nà? Anẽ.

²⁴ Hãmri nhũm kuma nẽ hkrãkato nẽ ri rĩt hãmri nẽ kãm:

—Tỳ na pa mẽmoj pumu. Nom ixprĩ hã omunh mex kêt nẽ. Te mẽmo pi hpar kwỳ ri mrar pyræk. Anẽ.

²⁵ Hãmri nhũm axte no hã ìhkra xi nhũm tã rĩt mex nẽ. Ri hprĩ hã mẽmoj piitã omunh mex nẽ.

²⁶ Hãmri nhũm Jejus akupỹm òrkwỳ hwỳr kumẽ nẽ kãm:

—E kêr ka kape hã ri amrar kêt nê. ãm ma ma akupÿm anhörkwÿ hwÿr atêm kurê kumrêx. Anê.

Jejus kot amnhĩ tã hkôt mẽ pa xwÿnhjê kukjêr ã harênh

Matêwre 16.13-20; Rukre 9.18-21

²⁷ Tã hãmri nhũm Jejus ma hkôt mẽ pa ho mẽ pa xwÿnhjê mẽ mẽ ma mõ. Ma krĩ pê Sejarej Pìripos pu hã krĩ hkwy hkôt mõ. Nê kormã pry hã mõ nhũm Jejus amnhĩ tã hkôt mẽ pa ho mẽ pa xwÿnhjê kukja nê mẽ kãm:

—Kwa mẽ inhmã mẽmoj jarê. Tanhmã na htem ahpÿnhã ri axpên mã ijarênh to wehe? Anê.

²⁸ Hãmri nhũm mẽ kãm:

—Nã na htem ahpÿnhã tanhmã ajarênh to. Na hte kamã mẽ hkwyjaja axpên mã ato finat Juãw Paxis ã ajarê. Nê kamã mẽ hkwyjaja ato finat Eris ã ajarê nê mẽ hkwyjaja apê Tirtũm nhÿ hã kapêr o pa xwÿnh ra htyk xwÿnhjê hõ hã ajarê. ã na htem ahpÿnhã axpên mã ajarênh anhÿr o pa. Anê.

²⁹ Hãmri nhũm mẽ kuma nê mẽ kãm:

—No we mẽ kajaja? Ixpê mẽhõ hã na ka htem axpên mã ijarê? Anê.

Hãmri nhũm Simãw Pêtre kãm:

—Nã mẽ pajaja na pa htem apê Tirtũm kot mẽ ixkaxyw axãm nê mẽ ixwÿr amênh xwÿnh ã ajarê. Nê apê mẽ ixpiitã mẽ inhõ Pahi Maati hã ajarê. ã na pa htem axpên mã ajarênh anê. Anê.

³⁰ Hãmri nhũm kuma nê mẽ kãm:

—Nã ãm hãmri na ka htem ã ijarênh anê. ã ixte anhÿr. Kwa nom kwa kêr ka mẽ inhma. Kêr ka mẽ kormã ã akwyjê mã ijarênh anhÿr kêt nê. Anê.

Jejus kot amnhĩ kukamã amnhĩ jarênh ã harênh

Matêwre 16.21-23; Rukre 9.22

³¹ Tã nhũm Jejus amnhĩ kukamã hkôt mẽ pa ho mẽ pa xwÿnhjê mã tanhmã amnhĩ jarênh to nê mẽ kãm:

—Nã ra mẽ ate Tirtũm kot mẽ akaxyw ixãm ã ixpumunh mex. No mẽ pahkwÿjaja kãm ja hã ijarênh mar nê ixpumunh prãm kêt. Ijaew krãhtũmjê mẽ Tirtũm kapêr tũm o mẽ ahkre o mẽ pa xwÿnhjê mẽ

patre krãhtũmjaja na mẽ kãm ja hã ixpumunh prãm kêt. Jakamã koja mẽ nhÿrmã ixpynê nê ixtak rax nê ixpĩ. Nom kot paj ixtyk ã ixtã apkati axkrunêpxi hãmri nhũm Tirtũm akupÿm ixto ixtĩr. Anê.

³² Hãmri nhũm mẽ kot hpĩr ã amnhĩ jarênh ma nê tee ri hkukamã hamaxpêr. Hãmri nhũm Simãw Pêtreja hwÿr tẽ nê hkwyjê pê ho kato nê mẽ hkãx ã o xa nê kãm:

—Kwa nã Pahihti. Koja Tirtũm anê mẽ omunh mex nê nhũm mẽ ã anhĩpêx anhÿr kêt nê. Kwa ri ã kapêr anhÿr kêt nê. Anê.

³³ Hãmri nhũm kuma nê hwÿr apkjê nê pu hã hkôt mẽ pa ho mẽ pa xwÿnh piitã omu. Hãmri nê mẽ hamak mã Simãw Pêtre mã kapêr nê kãm:

—Tk. Kwa na ka ã inhmã akapêr anhÿrja o te Satanasti nhÿ hã akapêr pyrãk. Tirtũm nhÿ hã na ka ã inhmã akapêr anhÿr kêt nê. ãm jar mẽ kãm Tirtũm kapêr mar prãm kêt xwÿnhjê jamaxpêr o na ka ajamaxpêr nê ã inhmã akapêr anê. No Tirtũm jamaxpêr o ajamaxpêr kêt nê. Anê.

Jejus krajaja tanhmã kot amnhĩ nhĩpêx hto hã mẽ harênh

Matêwre 6.24-28; Rukre 9.23-27; Juãw 12.24-26; mããnênh Apokarip 2.10, 12.11

³⁴ Tã nhũm Jejus amnhĩ wÿr mẽ kot mar o kuhê xwÿnhjê mẽ hkôt mẽ pa ho mẽ pa xwÿnhjê mã anê nhũm mẽ hwÿr axkamê nê kuhê. Hãmri nhũm tanhmã mẽ ahkre hto nê mẽ kãm:

—E mẽ inhma. Kot kaj mẽ ixkôt amnhĩ xunhwÿr ã amnhĩ jarê hã kot kaj mẽ mããnênh amnhĩ jarênh o: “Jejus kêp inhõ Pahihti jakamã kot paj ãm kapêr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhÿr o amnhĩ jarê.

³⁵ —Koja mẽ ixtã mẽ atõx pĩ rÿ ixtã tanhmã mẽ ato ka ty. Ate tanhmã ijarênh to ho apa hã nhũm mẽ apĩ. Tã nom koja akaxwÿnh ma inhõ krĩ hwÿr àpir kurê kumrêx nê kamã atĩr tũm nê amex rãhã nê apa ho apa.

Nom kot kaj mẽ jar atĩr prãm xàj ixk-aga hãmri nẽ hwỳr axàpir kêt nẽ.

36-37 —Nẽ koja mẽhõ hikukrêx gryk ã Tĩrtũm kaga. Hãmri nẽ nhỹrmã ty nẽ ỹ kamã kuwy hwỳr ma mõ nẽ amnhĩ kõt kukrêx õ hpyr nẽ o mõr kêt nẽ. Koja tee ri kuwy hwỳr mõr py-maj amnhĩ nẽ hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwỳr api? Koja ã amnhĩ nhĩpêx anhỹr kêt nẽ.

38 —Nẽ koja mẽhõ ixte mẽ ahkre hã inhma nhũm ja kêp omnuj japêr. Nhũm kot mẽ kãm ixprãm nõkati xwỳnhjê hkõt pa gryk ã ixkaga. Hã kot paj nhỹrmã mẽ ato amnhĩptàr kaxyw akupỹn wrỳ nẽ amnhĩ xwar kot ixk-aga xwỳnhta kaga. ãm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptàr kaxyw akupỹn wrỳ nhũm kapêr o mẽ wrỳk xwỳnhjaja man ixkõt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

1 Nhũm Jejus arĩ mẽ kãm kapêr nẽ mẽ kãm:

—ãm hãmri na pa mẽ amã amnhĩ jarẽ. Kot paj nhỹrmã akupỹn ixte mẽ ato amnhĩptàr kaxyw mẽ awỳr wrỳ kãm ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

*Jejus hirã htỳx kãm ãm ã harênh
Matêwre 17.1-9; Rukre 9.28-36;
mããnẽn Sikũn Pêtre 1.16-18*

2 Tã nhũm arĩgro kêp 6 nẽ hapêx nhũm Jejus ma nhỹri hixêt prêk wỳr tẽ. Nẽ Simãw Pêtre nẽ Xiakre nẽ Juãwja nhũm ma amnhĩ kõt wa mẽ o mõ. Nhũm wa mẽ ahte mõ nẽ hixêt prêk ã api nẽ himõk ã kuhê. Hãmri nhũm Jejus axtem nẽ xa.

3 Ra ê haka htỳx kumrêx nẽ xa.

4 Hãmri nhũm ja wa kaxkwa rũm hwỳr wrỳ nẽ kuri kãm kapêr. Finat Mojes mẽ finat Erisja wa wrỳ nẽ kuri kãm kapêr o xa. Tĩrtũm amnepêm

amnhĩ wỳr wa ho àpir tã nhũm wa akupỹn wrỳ nẽ kãm kapêr.

5-6 Nhũm wa mẽ mex kumrêx nẽ hirã htỳx kãm kuhê nhũm Jejus kõt mẽ mõr xwỳnhjaja wa mẽ omu nẽ mẽ kamã no pyma nẽ. Nẽ tee ri mẽ kãm tanhmã kapêr to hkukamã hamaxpêr. Hãmri nhũm Simãw Pêtre hamaxpêr nẽ Jejus mã kãm:

—Kwa Pahihti. Nã ãm hãmri na pu mẽ amnẽ mõ. Kwa pu mẽ kritpêm jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunêpxi nẽ hipêx. Amã nẽ Mojes mã nẽ Eris mã hõ nhĩpêx ka mẽ kamã akrĩ. Kwa xàt pa mẽ amã ho anẽ nã? Anẽ.

7 Hãmri nhũm kakrã jaka htỳx wrỳ nẽ wa mẽ hkunor pa nhũm wa mẽ kamã kuhê. Hãmri nhũm kakrã kamã Tĩrtũm mẽ kãm kapêr nẽ mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapêr mar tỳx rãhã ho ri apa. Anẽ.

8 Hãmri nhũm mẽ kuma nẽ amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupỹm api nhũm mẽ ãm Jejus pix pumu.

9 Hãmri nhũm mẽ ma akupỹm hkwyjê hwỳr wrỳk o mõ nhũm Jejus mẽ kãm:

—Kwa kêr ka mẽ ham mẽ ate mẽmoj pumunh xwỳnhta kormã nhãm mẽ kãm harênh kêt nẽ. Koja mẽ mẽmo arĩgro hã ixpĩ hãmri nhũm Tĩrtũm akupỹm ixto ixtĩr ka mẽ rĩ kormã mẽ kãm ja hã ijarênh o ri apa.

10 Anẽ hãmri nhũm mẽ kuma nẽ mẽ kãm harênh kêt nẽ. ãm axpên mã pix mã harê nẽ kot akupỹm htĩr ã amnhĩ jarênhja ã axpên kukjêr o pa nẽ axpên mã:

—Kwa mo na ri ã akupỹm htĩr ã amnhĩ jarênh anẽ? Tanhmã kot we amnhĩ to nẽ htyk tã akupỹm htĩr? Anẽ.

Hãmri nẽ tee ri hkukamã hamaxpêr o hkõt pa.

Juãw Paxis te kot Eris pyrãk ã harênh

Matêwre 11.13-15, 17.10-13

11 Hãmri nhũm mẽ kormã ahpar mã wrỳk o mõr mẽ nhũm Jejus kõt mẽ

mõr xwýnhjaja mëmoj tã hkukja nê kãm:

—Kwa më inhmã mëmoj jarê. Na hte Tirtũm kapêr tũm o më ahkre xwýnhjaja më inhmã: “Eris kumrêx koja Tirtũm më pahwýr kumê nhũm Krisja hapu hã wrý.” Anê. Na htem ã më inhmã war ajarênh anê. Tã ka na ka ra wrý nom nhũm kormã Erisja akukamã wrýk kêt nê. Anê.

¹²⁻¹³ Hãmri nhũm më kãm:

—Nà ãm hãmri na htem më amã ã ja jarênh anê. Na pre ra ixkukamã te kot Eris kot amnhĩ nhĩpêx pyrãk xwýnhhta tẽ nê ixkutêp më kãm ijarênh o pa. Nom më kot ixkukamã ijarênh xwýnh ã omunh kêt jakamã na prem axtem nê kãm tanhmã hipêx to hprãm xà hkôt tanhmã hipêx kati hton kupĩ. Tã koja më ã hipêx anhýr pyrã nê mã ixto anê nê inhĩpêx kati nê tokyx më kãm ixprãm kêt xwýnhjaja ixpynê nê ixpĩ pa amnhĩ xà htýx kamã ijamak kãm ty. Tirtũm kapêr ã kagã htũm kot wa ijamê wa ixkukamã wa ijarênh xà hkôt. Anê.

Jejus kot mëhõ hkra nê mëkarõmnuti janor ã harênh

Matêwre 17.14-21; Rukre 9.37-43

¹⁴ Hãmri nhũm Jejus nê Simãw Pêtre nê Xiakre nê Juãwja më akupým hkwyjê hwýr hpôx o mra nê amnhĩ kukamã hkwyjê pumu nhũm më ohtô nê më hã akuprõ nê më kãm kapêr. Nhũm Tirtũm kapêr tũm o më ahkre ho më pa xwýnhjaja mëmoj tã më hkukjêr o kuhê.

¹⁵ Jakamã nhũm Jejus më hwýr hpôx o tẽ nhũm më pikuprõnh xwýnhjaja amnhĩ wýr omu nê hkĩnh nê. Hãmri nê kutã hprõt nê kãm:

—Pa. Nà ãm hãmri na ka akupým më ixwýr tẽ. Anê.

¹⁶ Hãmri nhũm më kãm:

—Kwa mëmoj tã na ka më axpên mã axàkjêr o akuhê? Anê.

¹⁷⁻¹⁸ Hãmri nhũm mëhõ myja kãm:

—Nà ixkra hã na pa më axpên mã ixkapêr. Na pre mëkarõmnuti ixpê hwýr axà nê tanhmã ixpê ho nhũm kapêr kêt nê pa. Nhũm hte xatã tanhmã ixpê ho nhũm pykap amnhĩ

rê nê hakwa jamrô ho hikwý. Hãmri nê à htýx kamã ama nê amnhĩ nham o axpên kamnhar týx kumrêx pê htýx pa nê hikwý nê ixpê omnuj týx nê. Na hte ã mëkarõmnuti nhỹ hã amnhĩ nhĩpêx anhýr o pa. Jakamã na pa ate inhmã ho mex kaxyw man o tẽ nê tee ri ajapêr. Hãmri nê ho akôt më pa ho më pa xwýnhjê hwý nhũm më kot inhmã ho mex kaxyw tee ri tanhmã ho hkaprý. Anê.

¹⁹ Hãmri nhũm Jejus kuma nê hkôt më pa ho më pa xwýnhjê mã kãm:

—Hêxta waa nê. Ra më ate Tirtũm nhỹ hã ixte më ho mex ã ixpumunh ryy htã ixpyrà nê ã amnhĩ nhĩpêx anhýr kêt nê. Mãn ka më kormã kaxyw Tirtũm kôt ajamaxpêr týx kêt nê. E amnê ixwýr akra ho tẽ pa omu. Anê.

²⁰ Hãmri nhũm më hwýr o tẽ nhũm mëkarõmnuti Jejus pumu nê tanhmã hkrata o htýx to nhũm pykap tẽm nê hakwa jamrô nê amnhĩ rênh o nõ.

²¹ Nhũm Jejus omu nê hipêxã mã:

—Kwa tanhmã na ra kot amnhĩ nhĩpêx ã mytwrý kute? Anê.

Nhũm kãm:

—Nà hprĩre rũm na hte ã amnhĩ nhĩpêx anhýr o pa.

²² Na hte mëkarõmnuti xatã ixpê hpĩr kaxyw kuwy kamã kurê nê gôx kãm kurê. Kwa kot ka ate ho mex kukamã axàhpumunh japêr nê wa ixkamã axukapri nê akupým inhmã ho mex. Anê.

²³ Hãmri nhũm Jejus kãm:

—Xàn ka tee ri ixte ho mex kaxyw ixkukamã ajamaxpêr? Nà ixte mëmoj piitã ho anhýr kaxyw ixàhpumunh týx kênã. Kot ka më atõ mëmoj tã amnhĩ kaxyw ixkôt ajamaxpêr týx hã kot paj amã ho anê. Anê.

²⁴ Hãmri nhũm kuma nê kãm hkra mex prãm týx xàj kapêr týx nê kãm:

—Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr týx rãhã ho ri ixpa Pahihti. Anê.

²⁵ Rôm nhũm më ohtô rax nê hwýr kormã mra nhũm Jejus amnhĩ wýr më omu hãmri nê mëkarõmnutija mã

kapër kurê kumrêx. Nê kãm kapër kãm hihtỳx nê kãm:

—Pa mẽkarõmnuti. E apê mẽ ho mẽ kapër kêt nê mẽ umar kêt o apa xwỳnh ã pa amã ixkapër ka inhma. Kêr ka mẽ hkrata pê akato nê ma amõr o mõi nê axte tanhmã ho hkêt nê. Anê.

²⁶ Hãmri nhũm tee ri kot kãm karõja ma nê gryk xàj xatã amỹra nê mẽ hkrata o htỳx kumrêx nhũm htertettỳx o nõ. Hãmri nhũm kêp kato nê ma tẽ nhũm te htyk pyrã nê nõ nhũm mẽ tee ri omu nê ra htyk ã hkamnhĩx.

²⁷ Hãmri nhũm Jejus hpa hã kupy nê kãnhmã ãm nhũm akupỳm mex nê kãnhmã xa nê ri mra. Nê tãm kapër o mra nê umar mex nê.

²⁸ Tã nhũm Jejus hkõt mẽ pa ho mẽ pa xwỳnhjê mẽrohã ma akupỳm amnhĩm hikranh xà hã ixkreja wỳr mra nê hwỳr agjê nê hkrĩ. Hãmri nhũm Jejus kõt mẽ pa ho mẽ pa xwỳnhjaja amnhĩ tã hkukja nê kãm:

—Kwa mẽ inhmã mẽmoj jarẽ Pahihti. Na pa mẽ tee ri axwakre kamã mẽ hkrata nê mẽkarõmnuti janor kaprỳ. Kwa mon pa mẽ apyrã nê ja ho anhỳr mex kêt nê? Anê.

²⁹ Hãmri nhũm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhỳr kêt nê. Na htem ho Tĩrtũm wỳr tỳx nê rĩ kormã hano. Anê.

Jejus kot htyk kukamã amnhĩ jarẽnh

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkõt ri mẽ pa ho pa xwỳnhjê mẽ krĩja rũm hapõj nê ma nhãm mõi. Nê ma pyka pê Garirej kahti hkõt mõi. Nom mẽ piitã mẽ hkàx ã mõi. Jejus kormã kot amnhĩ tã tanhmã hkõt mẽ pa ho mẽ pa xwỳnhjê jahkre hto ho pa jakamã kãm mẽ hkàx ã mẽ o pa hprãm nê. Hãmri nê amnhĩ kukamã mẽ kãm tanhmã amnhĩ jarẽnh to nê mẽ kãm:

—E kot paj mẽ amã tanhmã amnhĩ jarẽnh to ka mẽ inhma nê inhmar tỳx nê. Koja mẽ kãm ixprãm kêt xwỳnhjaja tokyx mẽ kãm ixtã amỹnê

nhũm mẽ ixpĩ. Kot paj ixtyk ã ixtã apkati axkrunẽpxi hãmri nhũm Tĩrtũm akupỳm ixto ixtĩr. Kwa kêr ka mẽ ja ma nê hã anohtỳx nê ho apa. Anê.

³² Hãmri nhũm mẽ tee ri ã kot amnhĩ jarẽnh anhỳrja ma nê axpẽn mã:

—Kwa mo na ri ã mẽ pamã amnhĩ jarẽnh anê? Nà kêp mẽ panhõ Pahi Maati hã kot amnhĩ jarẽnh kênã kot kêt mẽhõ kupĩ.

Anhỳr o axpẽn mã harẽnh o hkõt mõi. Hãmri nê ã kot amnhĩ jarẽnh anhỳr mar prãm kêt jakamã hprĩ hã tanhmã hkukjêr to hkêt nê. ãm akryk hkõt mar o mõi.

Mẽ kot amnhĩ to rũnh xwỳnh jarẽnh Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkõt mẽ pa ho pa xwỳnhjaja kormã ma krĩ pê Kapanau hwỳr mõi nhũm hkõt mẽ pa ho mẽ pa xwỳnh pê 12jaja tanhmã amnhĩ kukamã hamaxpêr to hãmri nê axpẽn mã:

—Kwa mẽ pahtõ kot puj we nhỹrmã pahpê pahi nê mẽ ho amnhĩptar rax o ri pahkwỳjê jakre?

Anhỳr o axpẽn kukjêr o Jejus kõt mõi. Nê axpẽn mã: “Nà pa.” Nhũm mẽ hkwyjaja: “Nà kêt pa.” Anhỳr o hkõt mõi. Hãmri nhũm Jejus mẽ mar o mõi. Hãmri nhũm mẽ mõi nê nhỹri amnhĩm hikranh xà hã ixkre hwỳr põj nê hwỳr agjê nhũm mẽ kãm:

—Kwa mẽmoj tã na ka mẽ pry hã amnhĩ jarẽnh o mõi? Anê.

Hãmri nhũm mẽ tee ri kuma nê hpijaam nê. Nê kãm tanhmã amnhĩ jarẽnh to hkêt nê.

³⁵ Jakamã nhũm Jejus nhỹ nê mẽ kãm anê nhũm mẽ kuri hkrĩ pa nhũm mẽ kot mẽ kãm mẽ ho amnhĩptar rax prãmta ã mẽ kãm kapër nê mẽ kãm:

—E mẽ inhma. Ka mẽ atõ amã mẽ ho amnhĩptar rax prãm. Hã kêr ka te apê mẽ piitã mẽ kãm amarĩ axapênh xwỳnh pyrãk o amnhĩ nhĩpêx o mẽ hkõt apa. Jao mẽmoj to mẽ kutã anojarêt rãhã nê. Anê.

³⁶ Hãmri nê amnhĩ wỳr mẽhprĩre hõ mã hpa ho apê nhũm hwỳr tẽ nhũm

kumý nê o nhỹ nê hã mē kãm kapêr nê mē kãm:

³⁷ —E mē inhma. Kêr ka mē apê pahi pyræk o tanhmã amnhĩ jarênh to ho ri apa hkêt nê. ãm te amarĩ ri mē apa pyræk o amnhĩ nhĩpêx o ri apa. Jao nhỹri mēhprĩre hõ pumu nê kamã axukaprĩ nê kãm mēmoj tanhmã ho rý kãm mēmoj gõ. Hãmri nê ã amnhĩ nhĩpêx anhỹr o te pa ate tanhmã ixto mex to pyræk o amnhĩ nhĩpêx. Nê kot ka mē atõ pa tanhmã ixto mex to nê te ate Tĩrtũm o mex pyræk o amnhĩ nhĩpêx. E kêr ka mē amã amnhĩ to rũnh prãm nê ã amnhĩ nhĩpêx anhỹr o ri apa. Anê.

³⁸ Hãmri nhũm Juãw nhỹhỹnh tēn mē hwýr axà nê Jejus mã:

—Kwa Pahiti. O mũj mēhõ kēp mē pahkwý hkêt tã anhỹ hã mē nê mēkarõmnuti janor o pa. Pa mē tee ri ja hã omu nê kēp mē pahkwý hkêt jakamã pa mē ã kot amnhĩ nhĩpêx anhỹrja nê kãm ixkapêr. Anê.

³⁹⁻⁴⁰ Hãmri nhũm kuma nê kãm:

—Kwa nà nê tanhmã kãm nê hkêt nê. Koja mēhõ inhỹ hã aa mē kot mēmoj pumunh kêt kwý ho anê hãmri nê kēp mē panhĩõ nê ri mē pahkwým tanhmã mē ahkre hto ho pa hkêt nê. Ra mē pahkõt kot amnhĩ nhĩpêx mã kēnã. Jakamã kwa mē ja nê tanhmã kãm nê hkêt nê. Kwãr mãmrĩ ã amnhĩ nhĩpêx anê. Ja mex kēnã.

⁴¹ —Koja mēhõ nhỹri mē atõ amã kôr ã apumu nê hamaxpêr o: “Kwa Jejus kõt ri pa xwýnh mũj kãm kôr. E pa kãm gõ hkwý kê ho ixkõ.” Anhỹr o hamaxpêr nê apê ixkwý hã amã gõ hkwý ka ho ixkõ. Nhũm ãm kot amã gõ pix nhõr nhũm ate ho akõm tã nhũm Tĩrtũm atã omu nê ho mex rax nê. Anê.

Mē pahte amnhĩ tomnuj pymaj tanhmã amnhĩ nhĩpêx to hã mē pa-jarênh

Matêwre 18.6-9; Rukre 17.1-2

⁴² Nhũm Jejus arĩ hkêt mē pa ho mē pa xwýnhjê mã kapêr nê mē kãm:

—Nê mē kot ixkõt amnhĩ xunhwýr tohtuj anhỹr xwýnhjaja. Koja mēhõ ma mē hwýr tē nê inhnê mē kãm

kapêr. Mē kot mē mar nê tanhmã amnhĩ tomnuj to hprãm xaj hêx rom mē kãm kapêr nhũm mē mar xà hkõt tanhmã amnhĩ tomnuj to. Hã koja Tĩrtũm ja hã omu nê kot inhnê tanhmã kãm nê xwýnhta pumu nê homnuj týt nê. Te mē kot mēhõ pynênh nê mut ã kēn pytĩ hõ nhõr nê ma o htēm nê gõ xupým rax kãm mēnh pyræk o hipêx. Te ho ja pyræk no ãm homnuj týt o hakre.

⁴³⁻⁴⁷ —E kwa mē o kora. Kot kaj mē anhĩkra rý apar o tanhmã amnhĩ tomnuj to. Hã kêr ka mē axte ã amnhĩ nhĩpêx anhỹr pymaj te ate amnhĩ pē anhĩkra rý apar krãhyr nê mēnh pyræk o amnhĩ nhĩpêx nê axte ã amnhĩ tomnuj anhỹr kêt nê. Rý ka mē ano ho mēmoj punuj pumu. Hãmri nê kãm ajamaxpêr pix o apa pymaj te ate amnhĩ pē ano katõk nê mēnh pyræk o amnhĩ nhĩpêx nê nhãm arĩt kurê kumrêx. Kêr ka mē ã amnhĩ nhĩpêx o apa rãhã nê. Hãmri nê nhỹrmã ty nê ma Tĩrtũm mē wa inhõ krĩ hwýr api. No kot ka mē arĩ akutã ano nê arĩ akutã apar nê arĩ akutã anhĩkra rãhã ri mrar tã tõhã tanhmã ho amnhĩ tomnuj to. Hãmri nê nhỹrmã ty nê ma mē kot amnhĩ xà htýt kamã hamak tũm xà pē kuwy maatita wýr ma apa.

⁴⁸ Kuwyja kamã na htem mē kot amnhĩ tomnuj mýrapê amnhĩ xà htýt kamã hamak rãhã ho pa ho pa hãmri nê aa hapõx kêt nê.

⁴⁹ ã koja mē kot amnhĩ tomnuj o mē pa xwýnh piitã amnhĩ nhĩpêx anhỹr rãhã nê pa ho pa.

⁵⁰ Jakamã kwa kêr ka mē axpēn to mex rãhã ho ri apa. Nom axpēn kãm agryk nê tanhmã axpēn nhĩpêx to ho ri apa hkêt nê. Anê.

Nhũm pre ã Jejus hkõt ri mē pa ho mē pa xwýnhjê jahkre anê.

10

Mē pahte axpēn kaga nê Jejus kot mē pahkurê

Matêwre 5.31-32, 19.1-12; Rukre 16.18; mãnēn Wam Korit 7.10-16

¹ Tã nhũm Jejus mẽ hkôt mẽ pa ho pa xwýnh mẽrohã ma pyka pê Jutej wýr mõ. Hãmri nẽ pyhti pê Jotãw ã rê nẽ hpãnhã ma xarmã mõ. Nhũm mẽ axte mẽ hã akuprõ nhũm kê Jejus axte mẽ ahkre ho xa.

² Hãmri nhũm Parijew nhõ xwýnh kwýjaja hwýr mra. Mẽ kot hêx rom kamã hamak nẽ mar nẽ tanhmã ho kapër punuj to kaxyw hwýr mra nẽ kãm:

—Pa. Ot pa mẽ mẽmoj tã akukjêr kaxyw awýr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhîgêjtê mã karõ hto? Xà koja mẽ pahprõ mẽ pakapër hkwým tanhmã amnhĩ nhîpêx to pu mẽ mýrapê hkaga nhũm Tirtũm ja hã mẽ pahpumu nhũm ja kãm mex nẽ nà? Anẽ.

³ Hãmri nhũm mẽ kãm:

—Tanhmã na pre Mojes Tirtũm nhỹ hã ja hã mẽ amã karõ hto? Anẽ.

⁴ Nhũm mẽ kãm:

—Nà na pre harênh o:

Kêr ka mẽ aprõ kaga kaxyw hãmri nẽ ate hkaga hã amnhĩ jarênh ã kagã nẽ kãm agõ nẽ rĩ kormã hkaga. Anẽ.

Na pre ã mẽ inhmã ja hã karõ anẽ. Anẽ.

⁵ Hãmri nhũm mẽ kãm:

—Tý nom mẽ kãm Tirtũm kapër kôt amnhĩ nhîpêx prãm kêt jakamã na pre ã mẽ kãm ja jarênh anẽ.

⁶ Amnepêm mẽmoj piitã hkrax kãm na prem axpên kaga hkêt nẽ. Na pre Tirtũm wam myja nhîpêx nẽ hpãnhã kãm hprõ nhîpêx. Axpên kaxyw wa hipêx.

⁷ Jakamã na hte mẽmyjaja hprõ kaxyw nẽ gryk ã katorxã nẽ hipêxã wa hkaga nẽ ãm hprõ kôt pix mã pa ho pa.

⁸ Te wa tipxi nẽ ri wa pa pyrãk o axpên nhîpêx o pa.

⁹ Tirtũm tãm kot axpên mã wa õr kênã kot kêt mẽhõ wa kot axpên kaga kaxyw tanhmã wa hipêx to rý tanhmã wa kãm kapër to. Anẽ.

Nhũm pre ã Jejus mẽ kãm kapër anẽ.

¹⁰ Hãmri nẽ hkôt mẽ pa ho mẽ pa xwýnhjê mẽ akupým ixkrem agjê nhũm mẽ kãm:

—Kwa aprĩ hã mẽ inhmã mẽ kot axpên kaga hã mẽ harênhta jarẽ pa mẽ ixprĩ hã kuma nà. Anẽ.

Hãmri nhũm mẽ kãm:

¹¹ —Nà kot kaj mẽ aprõ kaga nẽ hpãnhã nhãm mẽhõ ho aprõ nhũm Tirtũm noo mã te ate wam aprõ kamã nhãm aprõ nyw o amnhĩkati pyrãk. Tirtũm pê ja omnuj týx nẽ. Rý koja mẽhõ hprõ kaga ka hpãnhã ho aprõ nhũm Tirtũm noo mã te ate wam mjên pê ho amnhĩkati pyrãk. Ja mãânên Tirtũm pê omnuj týx nẽ.

¹² —Nẽ mẽnijaja. Koja mẽhõ ni ra mjên kaga nẽ hpãnhã nhãm mẽhõ ho mjên. Ja mex kêt. Mjên krax kêp mjên kumrêx kênã kot kêt hkaga nẽ hpãnhã nhãm hõ ho mjên. Koja anẽ nhũm Tirtũm noo mã te kot wam mjên kamã nhãm hõ ho amnhĩkati pyrãk nhũm Tirtũm pê ja omnuj týx nẽ. Anẽ.

Jejus kot amnhĩ nẽ mẽhprĩjê janor kêt ã harênh

Matêwre 19.13-15; Rukre 18.15-17

¹³ Tã nhũm Ijaew kwýjaja Jejus wýr mẽ hkrarejê jamý nẽ mẽ o mra. Kot mẽ hã ãhkra jaxwýr nẽ mẽ ho Tirtũm wýr kaxyw hwýr mẽ o mra. Hãmri nhũm hkôt mẽ pa ho pa xwýnhjaja tee ri ja hã mẽ omu nẽ mẽ kãm:

—Kwa mo kaxyw na ka mẽ Jejus wýr mẽ o mra? Kormã mẽ rãxre kênã. Mẽ ma akupým mẽ o mra nà? Anẽ.

¹⁴ Hãmri nhũm Jejus ja hã mẽ kuma nẽ mẽ kãm:

—Kwa nã kwãr mẽ mãmrĩ ixwýr mẽ o mra. Mẽ ri inhnê mẽhprĩjê kurê hkêt nẽ. Anẽ.

Hãmri nẽ mẽ kãm hpa ho apê nhũm mẽ hwýr mẽ o mra nhũm mẽ kuri kuhê. Hãmri nhũm mẽ hã hkôt mẽ pa ho mẽ pa xwýnhjê mã kãm:

—E mẽ jarejê pumu. Na htem hamakêtkati nẽ hkĩnh nẽ ri pare. Mẽ kãm amnhĩ to rũnh prãm kêt nẽ ri pare. Tã Tirtũm kôt mẽ kot amnhĩ nhîpêx o ri mẽ pa xwýnhjaja na htem mẽ urãk nẽ kãm amnhĩ to rũnh prãm kêt nẽ ri pa.

15 —Na hte jarejaja hipêêxà nê katorxà wa kapêr ma nê wa hkôt ri amnhĩ nhĩpêx o ri pare. Tã ixpê Tĩrtũm kot mē awỳr inhmēnh xwỳnh na pa. Kot ka mē amã ixkôt amnhĩ xunhwỳr prãm hã kot kaj mē jarejê kot amnhĩ nhĩpêx pyræk o amnhĩ nhĩpêx. Jao ixkapêr ma nê ixkôt ri amnhĩ nhĩpêx mex o ri apa. Anê.

16 Hãmri nê mēhprĩrejê jamỳ nê mē hã ìhkra jaxwỳ nê mē ho Tĩrtũm wỳ nê kãm:

—Pa Papaj. E kêr ka jarejê ho mex rãhã nê kê mē mex nê pa. Anê.

Hikàxpore rax xwỳnh jarēnh

Matêwre 19.16-22; Rukre 18.18-23; mããnēn Wam Ximotre 6.6-10; Xiakre 5.1-6

17 Tã nhũm Jejus mē hkôt mē pa ho pa xwỳnhjaja nhỹri pry hã mō nhũm Ijaew krãhtũmja omu nê hwỳr tē nē mēmoj tã hkukja nē kãm:

—Pa mē ijahkre xwỳnh maati? E kwa inhmã mēmoj jarē. Nhỹrmã Tĩrtũm ri ixtĩr tũm nē ixpa hprãm xàj mēmo kot pa we ho anhỹr o ri ixpa? Ate amnhĩ to mex pix o ri apa xwỳnh jakamã kwa inhmã tanhmã ja jarēnh to. Anê.

18 Hãmri nhũm kãm:

—Xà ate ixpê Tĩrtũm kwỳ hã ixpumunh kôt na ka ixte uræk nē amnhĩ to mex xwỳnh ã ijarē? Tĩrtũm pix na kot amnhĩ to mex rãhã xwỳnh jakamã kot kaj ã ijarēnh anê nē ixpê Tĩrtũm Kra hã ijarē. Jao uræk nē ixte amnhĩ to mex xwỳnh ã ijarē. Nà xàn ka ãm atỳx ri amnhĩ krã hkôt ã ijarēnh anê?

19 —Tĩrtũm mex o mex jakamã kot kaj amã nhỹrmã kuri atĩr tũm nē apa hprãm hãmri nē ra kot mēmoj tã mē amã karō xà hkôt amnhĩ nhĩpêx o ri apa. Ra ate mar mex kēnã. Na pre mē amã:

Kêr ka mē axàhkĩnh o ri apa hkêt nê. Nê mē hpar kêt nê.

Nê tanhmã axêx kêt nê.

Nê axêx rom tanhmã mē nokupyr to hkêt nê.

Nê mē kêt mē hprō ho amnhĩkati hkêt nê.

Nê anhĩpêêxà mē akatorxà wa hã apijaàm nê wa ho mex pē wa kutã anojarêt rãhã ho ri apa.

E kot kaj amã nhỹrmã Tĩrtũm kuri atĩr tũm nē apa hprãm hã kot kaj ã amnhĩ nhĩpêx anhỹr o ri apa. Anê.

20 Hãmri nhũm kuma nê kãm:

—Kwa ixprĩre ri ra ã ixte amnhĩ nhĩpêx anhỹr o ri ixpa kēnã. Nom te ixtĩr tũm nē ixpa kaxyw ixte kormã tãm kêt pyræk. Anê.

21 Hãmri nhũm kuma nê hprĩ hã omu nê kãm hapê nê. Hãmri nê kãm:

—Nà kormã mēmoj pyxire nê arĩk. Na ka amã akukrêx rax kĩnh tỳx o Tĩrtũm jakre. Jakamã kêr ka ma akupỹm anhōrkwy hwỳr tē nē akukrêx rax o wēnê hpa. Nê kàxpore jamỳ hãmri nê ma mē kêt amrakati xwỳnhjê mã òr o ri apa. Hãmri nê akupỹn tē nē arĩ ri ixkôt apa ho apa. Anê.

22 Hãmri nhũm kuma nê tee ri hikukrêx rax kukamã hamaxpêr. Kãm hapê jakamã kãm kãm ìhkra karo hprãm kêt nê. Hãmri nê tee ri Jejus kot ã kãm hã karō anhỹrja ma nhũm ja kãm mex kêt nhũm awjanã nê hkaprĩ nê ma akupỹm tē.

23 Hãmri nhũm Jejus tee ri omu nê hkôt mē pa ho mē pa xwỳnhjê mã kãm:

—Hêxta waa nê. Kojã mē hikukrêx rũnh xwỳnhjaja ohtô nê kãm mē hikukrêx japê xàj Tĩrtũm mē wa ixri htĩr tũm nē pa ho pa hkêt nê. Wa ixte amnhĩ nhĩpêxja mē kêt hihtỳx. Anê.

24 Hãmri nhũm mē tee ri kapêrja ma nhũm Jejus mē hamaxpêr kôt mē omunh mex jakamã axte tanhmã mē kãm harēnh to nê mē kãm:

—Nà Tĩrtũm mē wa ixte amnhĩ nhĩpêxja na mē hikàxpore rũnh xwỳnhjaja pē ja hihtỳx.

25 Mē kãm hikukrêx rax mã ìhkra karo hprãm kêt rãhã tee kãm Tĩrtũm kôt amnhĩ nhĩpêx prãm kaprỳ. Te ho mēhō kot menh kagô hã hkre nê kãm kagô katōk prãm kêt rãhã kãm guhkrax kãm àr prãm kaprỳta pyræk. Anê.

26 Hãmri nhũm mē kuma nê tee ri amnhĩ kukamã hamaxpêr nê kãm:

—Kwa no mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm nẽ ixpa ho ixpa hkêt nẽ? Anẽ.

²⁷ Hãmri nhũm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japê mã anhũrer kêt nẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nẽ. Jao ra mẽ apê Tĩrtũm mẽ wa ixri atĩr tũm nẽ mẽ apa ho mẽ apa mã xwỳnh. Anẽ.

²⁸ Hãmri nhũm Simãw Pêtre kãm:

—Kwa Pahшти na pa prem agryk ã mẽmoj piitã hkaga hpa nẽ akôt ixpa ho ixpa. Jakamã xà kot paj mẽ nhỹrmã war ari ixtĩr tũm nẽ ixpa ho ixpa kêt nẽ nà? Anẽ.

²⁹ Hãmri nhũm kuma nẽ hkôt mẽ pa ho pa xwỳnh piitã mẽ kãm:

—Nà ka mẽ atõ inhmã tanhmã amnhĩ to ho apa kaxyw akwỳjê re nẽ ma inhmã tanhmã amnhĩ nhĩpêx to ho ri apa. Anhõrkwỹ re rỳ atõ rỳ atõx rỳ aprõ nẽ akrajê re. Rỳ akatorxà nẽ anhĩpêxà wa are. Rỳ akukrêx piitã rer pa hãmri nẽ ma ixkapêr o mẽ piitã mẽ ahkre ho ri mẽ hkôt apa.

³⁰ Hã kot paj amnhĩ tã mẽ apumu nẽ mẽ ato mex rax nẽ. Hãmri ka mẽ ma mẽ kãm ixkapêr jarênh o mẽ hkôt apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrak o mẽ anhĩpêx. Jao tanhmã mẽ ato mex to ho pa.

—Nẽ koja mẽ kãm ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tĩrtũm mẽ wa inhõ krĩ hwỳr api nẽ wa ixkuri amex nẽ atĩr tũm nẽ apa ho apa.

³¹ Nom kêr ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nẽ. Mẽ kot amnhĩ to rũnh xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nẽ mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhũm Jejus hkôt ri mẽ pa ho mẽ pa xwỳnhjê mã kapêr pa hãmri nẽ ma Jerujarê hwỳr mẽ o mõ. Ra kamã kãm hkurê xwỳnhjaja kot hpĩr ã amnhĩ jarênh tã ma hwỳr mẽ o mõ. Jakamã nhũm mẽ tee ri hkukamã hamaxpêr o hkôt mõ. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kêp 12ta o mõ nẽ hkwỳjê hkàx ã amnhĩ kukamã tanhmã mẽ kãm amnhĩ jarênh to ho mõ nẽ mẽ kãm:

³³ —E na pu mẽ ra Jerujarê hwỳr mõ. Kot puj mẽ hwỳr pøj nhũm mẽ kãm ixkurê xwỳnhjaja patre krãhtũmjê mẽ Tĩrtũm kapêr tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tĩrtũm kapêr kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỹnê

³⁴ nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpêr o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argõx rê nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixtyk ã ixtã apkati axkrunêpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harênh

Matêwre 20.20-28; Rukre 22.24-30; mããnên Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpêr to nẽ Jejus mã kãm:

—Kwa mẽ ijahkre xwỳnh. Pa wa amã mẽmoj jarê ka wa inhmã “y” anẽ nà? Anẽ.

Hãmri nhũm wa kãm:

³⁶ —Ko wa mamrĩ inhmã mẽmoj jarê pa wa ama mãn. Anẽ.

³⁷ Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjê. Nẽ wa papxipix ixpê anhõ kôwenatõ nẽ akutã anhĩjê nẽ ato nhỹ. Ja na pa wa inhmã hprãm. Anẽ.

³⁸ Hãmri nhũm wa kãm:

—Nà na ka wa ãm atỳx ri ã amnhĩ to ixwỳr aně. Koja mẽ tokyx ixpĩ pa amnhĩ xà htỳx kamã ijamak rax ně ty. Tã xà koja mẽ ixpyrà ně ã war anhĩpěx aně ka wa ixpyrà ně amnhĩ xà htỳx kamã ajamak rax kãm ty nà? Aně.

³⁹ Hãmri nhũm wa kãm:

—Tỳ. Nà kot pa wa ijaxwỳja aně ně apyrà ně amnhĩ xà htỳx kamã ijamak kãm ty. Aně.

Hãmri nhũm wa kãm:

—Nà ãm hãmri na ka wa ja hã amnhĩ jarě. War ate ixpyrà ně ixkôt amnhĩ xà htỳx kãm ajamak kãm atyk mã kênã.

⁴⁰ Tã nom war ate amnhĩ to ixwỳrta ã kot paj tanhmã war amã ně hkêt ně. Inhõ Papaj tãm koja ja kaxyw mēhõ japēr nhũm inhĩhkõ hã nhỹ. No pa kot paj ri ja kaxyw mẽ atõ rēnh kêt ně. Aně.

⁴¹ Hãmri nhũm wa uràk ně Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma ně wa kamã gryk ně.

⁴² Jakamã nhũm Jejus mẽ piitã mẽ ho akuprõ ně mẽ kãm:

—E mẽ inhma. Na hte Ijaew kêt xwỳnhjê nhõ pahitijaja ã amnhĩ nhĩpěx anhỹr o ri pa ně amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ ně kãm mẽ àpēnh xwỳnhjê pix mã mẽmo mẽ àpēnh ã karõ ho hkrĩ. Na htem ã amnhĩ nhĩpěx aně. Ně mẽ kot amnhĩm mex ã harēnh prãm xàj tanhmã mẽ ho mex to ho pa.

⁴³⁻⁴⁵ Tã no mẽ kajaja kêr ka mẽ atõ amã amnhĩ to rax prãm hãmri ně ho mẽ kot amnhĩ nhĩpěx pyràk kêt ně. Mě piitã mẽ kutã anojarēt rãhã ho ri apa. Kêt paa. Mě ate inhmã axàpēnh o apa kaxyw na pa pre mẽ awỳr ixwryk kêt ně. ãm pa ixte tanhmã mẽ amã amnhĩ nhĩpěx to ho ixpa kaxyw na pa pre mẽ awỳr wrỳ. Mě ate nhỹrmã kuwy wỳr apa pymaj mẽ aně ixtyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kêr ka ixpyrà ně akwỳjê kutã anojarēt rãhã ho ri apa. Hãmri

ně inhmã te ate amnhĩ to rax o amnhĩ nhĩpěx pyràk o amnhĩ nhĩpěx. Aně.

Jejus kot akupỳm Paximew o mex ã harēnh

Matêwre 20.29-34; Rukre 18.35

⁴⁶ Tã nhũm Jejus mẽ hkôt mẽ pa ho mẽ pa xwỳnhjaja kormã Jerujarě hwỳr mōr ri ra krĩ pē Jeriko hkôt mō. Hãmri nhũm mẽ ohtō ně mẽ hã ajēt ně mẽ hkôt mō. Nhũm mēhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ.

⁴⁷ Hãmri nhũm Jejus mẽ hkwỳjaja hwỳr htēp o mō nhũm amnhĩ wỳr mẽ kuma ně mẽ kot Jejus nhĩxi jarēnh o mōr ã kuma hãmri ně kàx pē kãm kapēr ně amnhĩ to kuwỳ ně kãm:

—Pa Jejus? Nà apē mẽ inhõ Pahititi mex kumrēx na ka. Te apē amnepēm anhĩgēt pahititi Tawi kot amnhĩ nhĩpěx pyràk. Jakamã kwa we ixkamã axukaprĩ ně akupỳm ixto mex kêt wehe. Ixte amnhĩ kaxyw akôt ijamaxpēr xwỳnh na pa. Aně.

⁴⁸ Hãmri nhũm Jejus kukamã mẽ mrar xwỳnhjaja kuma ně kãm:

—Tk. Kwa akapēr kêt ně nhỹ nà. Aně.

Tã nom nhũm ãm mẽ kuma ně xatã amnhĩ to kuwỳ. Kỳx pē amnhĩ to kuwỳ ně axte kãm:

—Kwa ixkamã axukaprĩ ně akupỳm ixto mex Pahititi. Aně.

⁴⁹ Hãmri nhũm Jejus kuma ně xa ně hkôt mẽ pa ho mẽ pa xwỳnhjê mã kãm:

—E mẽ atõ hwỳr tē ně hpa hã apy ně amně ixwỳr o tē. Aně.

Hãmri nhũm mẽ kuma ně nohkre xwỳnhhta mã kapēr ně kãm:

—E tee ri amnhĩ kukamã ajamaxpēr kêt ně. Na atã karõ. E tokyx kànhmã xa. Aně.

⁵⁰ Hãmri nhũm mẽ kuma ně hkĩnh tỳx ně. Ně kànhmã harĩ ně amnhĩ nē õ kajaati mẽ ně hwỳr htēm kurē kumrēx.

⁵¹ Hãmri nhũm Jejus kãm:

—Pa mo na? Tanhmã kot pa ato? Aně.

Hãmri nhũm kãm:

—Nà akupÿm inhmã ixrît mex prãm Pahihti.

⁵² Anë nhũm kãm:

—Tõe. Nà ra ate amnhĩ kaxyw inhmã ajamaxpêr tÿx jakamã kot kaj akupÿm arît mex kurê kumrêx. E mãmri ma akupÿm tẽ. Anë.

Nhũm akupÿm rît mex ã amnhĩ pumu nẽ hkĩnh o hkĩnh. Hãmri nẽ Jejus ã ajêt nẽ ma hkôt hkĩnh nẽ tẽ.

11

*Jejus kot Jerujarê hwÿr àr ã harênh
Matêwre 21.1-11; Rukre 10.28-40;
Juãw 12.12-19*

¹ Tã nhũm Jejus mẽ hkôt mẽ pa ho mẽ pa xwÿnhjê mẽ kormã Jerujarê hwÿr mō. Hãmri nẽ krĩ pê Petake mẽ hō pê Petãn wÿr ahtêp o mō. Hixêt pê Oriwêhti kahti ri na pre krĩja wa xa. Jakamã nhũm Jejus hkôt mẽ pa ho mẽ pa xwÿnh wa ho axkrut nẽ mẽ amnhĩ kukamã wa kumẽ

² nẽ wa kãm:

—E wa ma krĩ mũj wÿr mẽ ixkukamã wa tẽ. Hãmri nẽ hwÿr pōj nẽ nhÿri jumênre nyw mã ê nẽ ãm xwÿnhhta pumu. Kormã mẽ kot hã hkrĩ hkêt kumrêx xwÿnhhta.

³ Ka wa omu nẽ kãm ê xà hpôt nẽ man akupÿn ixwÿr o tẽ. Kojã mẽhō war apumu nẽ hã tanhmã war amã kapêr to ka wa ã kãm ijarênh anë nẽ kãm: “Nà mẽ panhō Pahihti na hã karō pa wa hwÿr tẽ.” Anhÿr o kãm ijarê. E wa ma hwÿr tẽ. Anë.

⁴ Hãmri nhũm wa kuma nẽ ma hwÿr htêm kurê kumrêx nẽ hwÿr pōj. Nhũm Jejus kot wa kãm hã karō xà hkôt jumênre nywreta pumu.

⁵ Hãmri nẽ kãm ê xà hpôt o xa nhũm kuri mẽ kuhê xwÿnhjaja tee ri hã wa omu nẽ wa kãm:

—Kwa mo kaxyw na ka wa kãm ê xà hpôt o xa? Kwa kot ka wa mẽ ixpê ho ahkĩ nà? Anë.

⁶ Hãmri nhũm wa mẽ kãm:

—Nà mẽ panhō Pahihti na wa inhmã hã karō pa wa hwÿr tẽ. Wa ixte ma hwÿr o ixtêm kaxyw. Anë.

Hãmri nhũm mẽ wa kãm:

—Tÿ? Tõe wa mãmri ma kãm o tẽ. Anë.

⁷ Hãmri nhũm wa ma akupÿm Jejus wÿr o tẽ. Hãmri nẽ kaxyw amnhĩ xê hkwy hkwrÿ nẽ kãm ho hkô kahty hpa nẽ kãm ho htÿx nẽ o xa nhũm Jejus hã nhÿ nẽ mō.

⁸ Nẽ kormã Jerujarê hwÿr hixêt ã àpir o mō. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwy hkwrÿ nẽ ho kãm uty. Nhũm mẽ hkwyjaja nhÿri pō hkwy jakà nẽ o mra nẽ hkukamã kãm uty.

⁹⁻¹⁰ Nhũm mẽ hixêt ã api nẽ ahpar mã wrÿk o mō nhũm mẽ piitã kàx pê Tirtũm mex o mex ã harênh o hkôt mō. Nhũm mẽ hkwyjaja kukamã mra nhũm mẽ hkwyjaja hapu hã mra nhũm prem piitã hkôt Tirtũm mex o mex ã harênh o mō. Nẽ harênh o:

E ota Tirtũm kot mẽ pahwÿr mēnh xwÿnhhta ra pōj. Nà ãm hãmri na mẽ pahwÿr wrÿ. Ja mex kumrêx.

Kêp mẽ panhō Pahihti mex na. Kojã mẽ panhigêt pahi Tawi pyrã nẽ mẽ pahto amnhiptã nẽ mẽ pahto mex o pa.

Ãm hãmri na Tirtũm mẽ pahwÿr kumẽ.

Tirtũm mex kumrêx. Ãm mex o mex. Kukwak ri pix mã na pu htem pajamakêtkati nẽ paxãmnhix papa rãhã ho papa.

Anhÿr o Jejus kôt harênh o mō. Kot mẽ ho amnhiptar kurê kumrêx ã hkamnhix nẽ hkĩnh nẽ ã hkôt kapêr anhÿr o mō.

¹¹ Jao ra Jerujarê hwÿr pōj nhũm Jejus Tirtũm mã amnhĩ jarênh xà hã ixkre hwÿr tẽn axà. Nom nhũm ra amÿkry htÿx jakamã nhũm hwÿr axà nẽ ãm hkre pumunh o xa hãmri nẽ akupÿm kato nẽ hkôt mẽ pa ho mẽ pa xwÿnh pê 12jê mẽ nhũm mẽ ma akupÿm Petãn wÿr mra.

*Jejus kot pĩ hpàr pê fikêhti mã kapêr
ã harênh*

Matêwre 21.18-22

¹² Tã nhũm apkati nhũm Jejus mẽ hkôt mẽ pa ho pa xwÿnhjê mẽrohã

Petân rûm hapôj nê ma akupÿm Jeru-
jarê hwÿr mra. Nhûm Jejus ra kãm
prãm nê mō.

¹³ Hãmri nê amÿm mēmo pĩ
hpàr hôptĩ rax pê fikêhti pumu nê
hamaxpêr o:

—E pa hwÿr tē nê ô hkwÿr rē nê
kuwō mãn. Anē.

Hãmri nê hwÿr tē. Nhûm kormã
ô kaxyw ô mytwrÿ kator kêt jakamã
nhûm ô hkêt nê âm hô pix nê xa.

¹⁴ Hãmri nhûm hwÿr tē nê tee ri ô
japêr nê âm hô pix pumu. Hãmri nê
tee ri omu nê kãm:

—E kot kaj axte axô hkêt kumrêx.

Anhÿr o kãm kapêr nhûm hkôt mē
pa ho mē pa xwÿnhjaja hã kuma.

*Jejus kot Tirtûm nhõrkwÿ hwÿr àr ã
harênh*

*Matêwre 21.12-17; Rukre 19.45-46;
Juãw 3.13-22*

¹⁵⁻¹⁷ Tã nhûm Jejus mē hkôt mē pa
ho mē pa xwÿnhjaja Jerujarê hwÿr
agjê nê Tirtûm mã amnhĩ jarênh xà
hã ixkre hwÿr agjê. Nhûm Jejus tee
ri kamã mē kuhê xwÿnhjê pumu.
Nhûm mē ra ixkre kamã axtem nê
môx nê ôwêhti nê tuuti ho wênê ho
kuhê. Ixkre hwÿr mrar xwÿnhjaja kot
haprôr nê Tirtûm mã amnhĩ jarênh
kaxyw kãm hpar nê ôr kaxyw mē kãm
ho wênê. Nom axtem nê hã ohtô
rax kãm mē kãm ho wênê nhûm mē
hkwÿjaja mē kãm mē hikàxpore ho
anhĩpa. Hãmri nhûm Jejus mē hwÿr
axà nê tee ri mē kot ã amnhĩ nhĩpêx
anhÿr ã mē omu nê mē kãm akir nê
mē kãm:

—Tk. Kwa Tirtûm kapêr ã kagã
htûm kot ôrkwÿ jarênh kot:

Inhõrkwÿja âm pika piitã hkôt mē pi-
itã kot inhmã amnhĩ jarênh xà
hã ixkre pix kaxyw na.

Anhÿr o kot harênh tã ka mē axtem nê
kamã ã amnhĩ nhĩpêx anhÿr o akuhê.
E kwa mē ma mra nê ajapôx tokyx
anê. Anê.

Nhûm pre ã mē kãm kapêr anhÿr
pê mē ahkre hãmri nê ixkreja nê mē
kator pa.

¹⁸ Hãmri nhûm patre krãhtûmjê
mē Tirtûm kapêr tûm o mē ahkre
xwÿnhjaja tee ri ã mē hipêx anhÿr

ã omu nê kapêr ma nê kamã gryk
tÿx nê. Hãmri nê mē kot hã àmnênh
kaxyw tanhmã axpên mar to nê
axpên mã:

—Tk. Kwa na mē ohtô nê kãm mar
prãm nê. Kojã mē anê nê gryk ã mē
pahkaga nê axte mē pakapêr mar kêt
nê. Kwa pu mē kupĩ ri. E tanhmã kot
puj mē ho nê kupĩ? Anê.

¹⁹ Tã nhûm myt axà nhûm Jejus
mē hkôt mē pa ho pa xwÿnhjaja Jeru-
jarê rûm hapôj nê ma nhÿri amnhĩm
hikranh kaxyw mra.

*Mē pahte tanhmã mēmoj tã Tirtûm
wÿr to hã mē pamã karõ*

*Matêwre 6.14-15, 17.20; Makre
11.13; Juãw 14.13; mãânênh Xiakre 1.6;
Wam Juãw 3.22*

²⁰ Tã nhûm apkati nhûm Jejus mē
hkôt mē pa ho mē pa xwÿnhjaja Jeru-
jarê hwÿr akupÿm mra. Hãmri nê axte
pĩ hpàr pê fikêhtita pumu. Jejus ra
kot kãm kapêr xwÿnhhta pumu nhûm
ra grã pa nê xa.

²¹ Hãmri nhûm Simãw Pêtre Jejus
kot tanhmã pĩ mã kapêr toja mã
hamaxpêr nê hã kãm:

—Kwa mē ijahkre xwÿnh. Ga mēmoj
mÿj pumu. Jãã ate fikêhti mã akapêr
xwÿnhhta na grã par kumrêx nê xa.
Anê.

²²⁻²³ Hãmri nhûm kuma nê mē piitã
mē kãm:

—Tÿ nã âm hãmri na pa mē amã
ixkapêr. Kot kaj mē mēmo kaxyw
Tirtûm mã ajamaxpêr tÿx pê mēmoj
tã awÿ nhûm ama nê amã hprãm xà
hkôt tanhmã amã hipêx to. Ka mē
amnhĩ kaxyw Tirtûm mã ajamaxpêr
tÿx pê hixêt mÿj mã akapêr nê kãm: “E
xa nê ma tē nê gô xujanãr kãm mrõ.”
Anhÿr o kãm akapêr nhûm amar xà
hkôt ã amnhĩ nhĩpêx anê nê tēn kamã
mrõ.

²⁴ Kot kaj mē mēmoj tã Tirtûm wÿ nê
kaxyw âm pix mã ajamaxpêr tÿx nê
nhûm amã ho anê.

²⁵⁻²⁶ —Nê kot kaj mē Tirtûm mã
amnhĩ jarênh kaxyw nê ra mēhõ kot
tanhmã ato mã ajamaxpêr. Hãmri
nê ja ho ajamakêtkati kurê kumrêx
nê axte kãm ajamaxpêr kêt nê. Âm

mëmoj nyw pix mã ajamaxpër o tãm amnhĩ nhĩpêx o apa. Hãmri nhũm Tĩrtũm kaxkwa rũm ja hã apumu nẽ apyrà nẽ ate tanhmã amnhĩ tomnuj to ho hamakêtkati nẽ axte kãm hamaxpër kêt nẽ. Anẽ.

Mêhõ kapër kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupÿm Jerujarẽ hwÿr agjê nhũm Jejus kê axte Tĩrtũm mã amnhĩ jarênh xà hã ixkre hwÿr axà. Nhũm hkôt mẽ pa ho mẽ pa xwÿnhjaja hkôt hwÿr mra nẽ hkôt agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapêr tũm o mẽ ahkre xwÿnh mẽ mẽ õ patre krãhtũmjaja Jejus pumu nẽ hwÿr mra nẽ hêx rom tanhmã kãm kapêr to. Na pre ra Jejus ixkreja nẽ mẽmoj to wênê xwÿnh mẽ kãxpore o mẽ hpinhpanh xwÿnhjê jano nhũm mẽ tee ri ja hã omu nẽ kamã gryk tÿx nẽ. Jakamã nhũm akupÿn mẽ hwÿr axà nhũm mẽ axte omu nẽ hwÿr mrar kurê kumrêx

²⁸ nẽ kãm:

–Kwa mẽ inhmã amnhĩ jarẽ. Mêhõ nhỹ hã na ka hte ã amnhĩ nhĩpêx anhÿr o ri apa? Mêhõ na pre mẽ ixwÿr amê ka pre mõi? Nà xà amnhĩ krã hkôt na ka hte ã amnhĩ nhĩpêx anhÿr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jejus kot tanhmã mẽ hamaxpër to hkôt mẽ omunh mex jakamã mẽ kãm:

–Nà kot pa ixkumrêx mẽmoj tã mẽ akukja. Ka mẽ inhmã harê pa rĩ kormã mẽ amã tanhmã amnhĩ jarênh to.

³⁰ Finat Juãw Paxisja ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harê. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harênh to hkukamã hamaxpër nẽ axpên mã:

–Kwa tanhmã kot puj mẽ kãm ja jarênh to? Mẽ kot mar o kuhê xwÿnhjaja na htem Juãw Paxis kêp Tĩrtũm nhỹ hã kapêr jarênh xwÿnh

ã axpên mã harênh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapêr anhÿr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pama nẽ mẽ pamã: “Kwa ã kot anhÿr kênã na ka prem kapêr mar tã ixkôt amnhĩ xunhwÿr kêt nẽ?” Anẽ. Nà kot puj pêr mẽ kãm tanhmã harênh to hkôt nẽ. Kot puj mẽ ãm kãm aa te mẽ pahte ja jarênh mar kêt pyrãk o harê. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprÿ ho kuhê.

³³ Hãmri nẽ Jejus mã kãm:

–Konên. Mẽ ixte mẽhõ nhỹ hã kapêr o pa hã omunhre hã. Anẽ.

Hãmri nhũm mẽ kuma nẽ mẽ kãm:

–Tk. Tõe kot pa xep ijaxwÿja mẽ amã tanhmã amnhĩ jarênh to hkôt nẽ. Ijaxwÿja ixte mẽhõ nhỹ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anẽ.

12

Mẽ àpênh punuj xwÿnhjê jarênh

Matêwre 21.33-46; Rukre 20.9-18

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapêr tũm o mẽ ahkre xwÿnhjê mã kapêr o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarênh to. No ãm hã kuxi nẽ mẽ kãm awjarê nẽ mẽ kãm:

–Koja mẽhõ hpur ã hkwÿjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwÿr mra nẽ kamã mẽmo hy hkre nẽ hkre pa. Hãmri nẽ pu hã kahê hpa nẽ pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nẽ hipêx pa nhũm mẽõ patrãwja awry hã krĩ hõ hwÿr nojarêr nẽ mẽ kãm tanhmã hpur jarênh to nẽ mẽ kãm: “E or ixpurta nõ. Kê kamã mẽmoj kã hpa ka mẽ mãmrĩ kamã awjamÿ nẽ ho

axkjê. Hāmri nê ixkutêp inhô jaxwý nê māmri anhô tanhmã ho hprãm xã hkôt tanhmã ho.”

—Anhÿr o mẽ kãm kapêr hāmri nê ma mō.

² Tã nhũm ra pur kãm mẽmoj hkã pa. Nhũm hpur nhô dõn arĩ krĩ hõ kamã hã ujahkre ho pa htã kuri kãm àpênh xwýnhjê hõja nhũm akupÿm mẽ hwÿr kumê. Mẽ kot kãm õ hkwy nhõr nhũm ma kot kãm o mõr kaxyw ma mẽ hwÿr kumê nhũm ma akupÿm mẽ hwÿr mō. Mõõ nê ra mẽ hwÿr pøj.

³ Hāmri nhũm mẽ omu nê axtem nê homnuj nê. Nê unê nê htak nê akupÿm hano nhũm ÿ kamã ma akupÿm mō.

⁴ Hāmri nhũm õ patrãwja tee ri omu nê hpãnhã ja mẽ nhũm ma mẽ hwÿr mō. Mõõ nê mẽ hwÿr pøj. Hāmri nhũm kê wem omu nê mã ho anê nê. Unê nê htak nê hkrãx pẽ htak nê akupÿm hano nhũm wanta pyrã nê ma akupÿm ÿ kamã mō.

⁵ Hāmri nhũm axpên pãnhã kãm mẽ àpênh xwýnh kwýjê rẽ nhũm mẽ axpên pãnhã ma mẽ hwÿr pa. Ma mẽ hwÿr pa nê pøj nhũm mẽ te ho wantajê mẽ hipêx pyrã nê mẽ hkwyjê pynê nê htak rax nê mẽ hano nê mẽ hkwyjê pa.

⁶ Nhũm mẽ õ patrãw mẽ harênh ma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj we amnhĩ nhĩpêx to nê inhõta kwý jamý? Nã kot paj mẽ hwÿr ixkrajã mẽ. Inhmã hapê htã kot paj mẽ hwÿr kumê kê ma mẽ hwÿr mō. Hāmri nhũm mẽ kêp ixkra hã omu nê tanhmã ixpê ho hkêt nê. Nê jatã inhmã kãm inhõja kwý gõ nhũm man ixwÿr o tẽ. Nã kot paj anê.”

—Anhÿr o hamaxpêr hāmri nê ma mẽ hwÿr hkrajã mẽ nhũm ma mẽ hwÿr mō.

⁷ —Tã mẽ hwÿr hpõx o mō nhũm mẽ amÿm amnhĩ wÿr omu nê kêp hkra hã omunh kurê kumrêx nê hã axpên mã amÿnê nê axpên mã: “E. Nã onêj hpur nhõ dõn krata tẽ. Koja nhÿrmã õ papaj mÿrpê amnhĩm pur ã pyka pytà nê ho õ. Jakamã e pu mẽ kupĩ nê kêp hpur

ho arĩk nê ho panhõ. E kwa tokyj pu mẽ kupĩ ri.” Anê.

⁸ —Rõm nhũm ra mẽ hwÿr hpõx o tẽ nê ra pøj nhũm mẽ unê nê pur nê ho kato nê ahkã kamã kupĩ. ã mẽ ujarênh kot anhÿr. Anê.

⁹ Nhũm pre ã Jejus Ijaew krãhtũmjê mã ujarênh anê. Hāmri nê hã tanhmã mẽ hkukjêr to nê mẽ kãm:

—E mẽ inhmã mẽmoj jarê. Koja pur nhõ dõnja tee ri mẽ kot hkra hpĩr ã harênh ma hāmri nê tãm mẽ hwÿr mō hāmri nê tanhmã mẽ hipêx to wehe? Nã koja ma mẽ hwÿr mō nê mẽ himex pa hāmri nê hpãnhã nhãm hpurta ã mẽmojjê rẽ.

¹⁰ Mãn ka prem ra Tĩrtũm kapêr ã kagã htũm kot ja jarênh ma nã? Harênh kot:

Na prem kên o amnhĩm õrkwÿ nhĩpêx kaxyw hāmri nê kên maati pumu nê htÿx omnuj ã hkamnhĩx nê hkaga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

¹¹ ãm hāmri na pre ã mex ã omunh anê. Anê.

ã Tĩrtũm kapêr ã kagã htũm kot harênh kot anhÿr. Anê.

¹² Nhũm pre ã Jejus mẽ kãm ujarênh kãm mẽ harênh anê nhũm mẽ amnhĩ tã kuma. Tĩrtũm kapêr tũm o mẽ ahkre xwýnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kên maati kaga xwýnhjê jarênh o te mẽ tãm harênh pyrãkja ma nhũm ja mẽ kêp omnuj nê. Jakamã nhũm mẽ kãm unênh nê haxãr prãm nê. Nom amnhĩ tã kãm mẽ kot mar o kuhê xwýnhjê puma nê.

¹³ Jakamã na prem ma mra nê hapøj hāmri nê Jejus wÿr Parijew nhõ xwýnh mẽ pahĩ Erox kôt mẽ pa xwýnh kwýjê rẽ. Mẽ kot hêx rom mẽmoj tã hkukjêr nhũm kot mẽ mar nê tanhmã Rõm nhõ xwýnhjê nhõ pahĩ Sesti kapêr kuhpa hã ri tanhmã mẽ kãm nê nhũm mẽ kot mar kaxyw.

¹⁴ Jakamã nhũm mẽ ma hwÿr mra nê hêx rom kãm kapêr nê kãm:

—Kwa Jejus? Nà ãm hãmri na ka hte Tirtũm kapër o mẽ ahkre mex nẽ. Na ka hte mẽ kamã akahak o apa hkêt nẽ. Nẽ mẽ kot tee ri mẽ kot tanhmã ato kapër punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarẽ. Rõm nhõ pahihtĩ kot mẽ pahpẽ Ijaew mẽ pahte kãm kãxpore hkwy nhõr ã mẽ pamã karõta. Kwa xà ja amã mex nã? Xà kot pu mẽ kãm kugõ? Xà kot pu mẽ kãm õr kêt nẽ? E kwa mẽ inhmã harẽ. Anẽ.

¹⁵ Nhũm prem ã hẽx rom ja hã hkukjêr anhỹr tã no nhũm Jejus mẽ hamaxpër ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kãxpore htỹxre hõ gõ pa omu. Anẽ.

¹⁶ Hãmri nhũm ja kãm ja gõ nhũm kupy nẽ kãnhmã kupẽ nẽ mẽ mẽ kãm:

—E mẽhõ nhĩxi nẽ mẽhõ karõ na hã? Anẽ.

Anẽ nhũm mẽ mẽ kãm:

—Pahi Sesti karõ nẽ hixi na hã.

¹⁷ Anẽ nhũm mẽ mẽ kãm:

—Tỹ. Tõ kër ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwỹnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kër ka mẽ kapër kõt pix mã ri amnhĩ nhĩpêx o ri apa. Anẽ.

Nhũm pre ã mẽ mẽ kãm kapër anẽ nhũm mẽ piitã mar o kuhê. Nhũm mẽ kot hẽx rom hkukjêr xwỹnhjaja amnhĩ jaêr pẽ ã kãxpore jarẽnh anhỹrja ã kuma nẽ axpẽn mã:

—Kwa mẽ paxêx rom mẽ pahte hã hkukjêr tã nhũm ãm hãmri mẽ pakutã mẽ pamã harẽ. Kwa tanhmã kot puj wem hkukjêr to nhũm pahi Sesti kapër kwỹm ri mẽ pamã mẽmoj jarẽ? Anẽ.

Hãmri nẽ tee ri tanhmã hkukjêr to hkukamã hamaxpër o kuhê.

*Akupỹm mẽ htĩr xwỹnhjê jarẽnh
Matêwre 22.23-33; Rukre 20.27-40;
Juãw 6.21, 6.38-40; mããnẽn Wam Korĩt
6.14, 15.12-28; Wam Tesarõn 4.13-18*

¹⁸ Tã nhũm Satusew nhõ xwỹnh kwỹjaja. Mẽ kot akupỹm mẽ htĩr mã hamaxpër kêt xwỹnhjaja na pre mẽ.

Tã mẽ kot mẽ htyk nẽ mẽ hapêx ã mẽ hkamnhĩx jakamã na prem axpẽn mã Jejus jarẽnh o:

—E kwa pu mẽ ma hwỹr mra nẽ mẽmoj xihtỹx ã hkukja kẽ mẽ pama nẽ tee ri tanhmã mẽ pamã kapër to hkukamã hamaxpër. Hãmri nhũm mẽ piitã ja hã omu nẽ ãhpumunh kêt ã omunh kurê kumrẽx. E tokyx ma pu mẽ hwỹr. Anẽ.

Hãmri nẽ ma hwỹr mra nẽ Parijew nhõ xwỹnhjê pyrã nẽ hẽx rom kãm:

¹⁹ —Pa Jejus? Kwa mẽ inhmã mẽmoj jarẽ. Na pre finat Mojesja Tirtũm nhỹ hã ã mẽ panhĩgêtjê mã karõ anẽ. Mẽ hkra hkêt rãhã mẽ pa nẽ mẽ htyk xwỹnhjaja nhũm mẽ harẽnh o:

Koja mẽhõ hprõ hãmri nẽ kamã hkra hkêt rãhã pa nẽ ty. Hã koja hkõt htõja hpãnhã hprõ o hprõ nẽ kamã hkra. Hãmri nhũm kato nẽ te kêp htõ htyk xwỹnhhta hkra pyrãk. Anẽ.

Na pre ã Mojes Tirtũm nhỹ hã ja hã mẽ mẽ kãm karõ anẽ.

²⁰ Jakamã kwa ga mẽ ixujarẽnh ma. Koja mẽmojjaja mẽ kot axpẽn to htõ xwỹnhjaja kêp 7. Nhũm kot waja hprõ. Nẽ wa pa nhũm myja kormã hprõ kamã hkra hkêt rãhã ty.

²¹ Nhũm hkõt htõ hõta hpãnhã hprõ ho hprõ nẽ wa axpẽn to pa. Nhũm haxwỹja kamã hkra hkêt rãhã ty. Nhũm hkõt htõ hõta haxwỹja ho hprõ nẽ wa axpẽn to pa grire nhũm wamta wa urãk nẽ kamã hkra hkêt rãhã ty.

²² Hãmri nhũm htõ hkwyjaja piitã nija pyxi nẽ axpẽn pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkõt amnhĩ to hitep nẽ ty.

²³ Tã Tirtũm kot akupỹm nhỹrmã mẽ ho htĩr ronhỹx nhỹ nhỹx kêp nija mjên kumrẽx? Ra piitã kot ho hprõ kẽnã. E kwa mẽ inhmã ja jarẽ. Anẽ.

²⁴ Hãmri nhũm Jejus ã mẽ ujarẽnh anhỹrja ma nẽ mẽ mẽ kãm:

—Tk. Nã mẽ ate Tirtũm kapër ã kaga htũm mar mex kêt. Nẽ mẽ aprĩ hã tanhmã Tirtũm kute hã omunh kêt jakamã na ka mẽ ã atỹx ja hã ixkukjêr anẽ.

²⁵ Kormã mẽ htîr ri mẽ kot Tîrtûm kôt amnhî xunhwÿr xwÿnhjaja na htem ty hãmri nê Tîrtûm nhõ krî kamã axte kãm hprõ hprãm kêt pa. Rÿ ni japêr nê kãm mjên prãm kêt nê pa. Hãmri nê Tîrtûm kapêr o mẽ wryk xwÿnhjê pyrã nê axte htyk kêt nê. Âm htîr tûm rãhã nê pa ho pa.

²⁶—Nom mẽ ate akupÿm mẽ htîr kêt ã mẽ hkamnhîxja kot paj ixprî hã mẽ amã harê. Amnepêm na pre Tîrtûm pî hpõk kamã tanhmã Mojes mã kapêr to. Mãn ra mẽ ate mar. Na pre kãm: Ixpê Apraãw nhõ Tîrtûm na pa. Nê mãänên ixpê Apraãw kra Ijak mẽ htãmnhwÿ Jako wa õ Tîrtûm na pa.

Anhÿr o Mojes mã amnhî jarê nhùm kuma nê hã kagà.

²⁷ Kêp apu arî mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêm Apraãw nê hkra nê htãmnhwÿ mẽ htîr ri ixpê mẽ õ Tîrtûm na pa pre.” Anhÿr o nhÿx pre mẽ harê. Nom na pre ã amnhî jarênh anhÿr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhùm prem ra Tîrtûm ri akupÿm htîr nê mex nê pa ho pa. Tã ka htem Tîrtûm kapêr kwÿm ri akupÿm mẽ htîr kêt ã mẽ harênh o apa. Anê.

*Tîrtûm kapêr maati jarênh
Matêwre 10.37, 22.34-40; Rukre
10.25-27; mãänên Wam Juãw 2.15, 5.3;
Apokarip 2.4*

²⁸ Tã nhùm Tîrtûm kapêr tûm o mẽ ahkre xwÿnhjê hõ mẽ hwÿr tẽ nê mẽ kot axpên mã kapêr ã mẽ omunh o xa. Hãmri nê Jejus kot tanhmã Satusew nhõ xwÿnhjê mã kapêr mex toja ma nê kãm:

—Nà ãm hãmri na ka ã mẽ kãm ja jarênh anê Pahhti. Kwa inhmã mẽmoj jarê. Na pre Tîrtûm ahpÿnhã mẽmoj to 10 nê mẽ pamã hã karõ. Mẽ pahte hkôt amnhî nhîpêx o ri papa kaxyw hã mẽ pamã karõ. Tã nhÿ kapêr na mex o kot hkwyjê jahkrenh wehe? Anê.

²⁹ Hãmri nhùm kãm:
—Nà Tîrtûm kapêr xohtõ. Kapêr piitã hkôt mẽ pahte amnhî nhîpêx o

papaja na kãm hprãm. No pixi na mẽ pahte hkôt amnhî nhîpêx o papaja nhùm kãm hprãm tÿx o kot hkwy jakrenh. Kapêr mex maati na ja. Na pre kapêr o:

E mẽ apê Ijaew nhõ xwÿnhjaja. Ixpê mẽ anhõ Tîrtûm ã ixpîxi mex na pa.

³⁰ Jakamã kêr ka mẽ amã ixkînh tÿx o mẽmoj piitã hakrenh pa. Jao mẽ anhî piitã ho amã ixkînh tÿx kumrêx o ri apa.

³¹ Anhÿr o na pre mẽ pamã karõ. Nê hkôt ja:

Kêr ka mẽ nhãm mẽ hipêx o te ka amã amnhî tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tîrtûm kãm mẽ pahte hkôt amnhî nhîpêx o ri papa hprãm tÿx nê. Anê.

³² Hãmri nhùm kuma nê kãm:
—Nà ãm hãmri na ka ja jarê Mëjahkre xwÿnh. Tîrtûm pyxi mex kênã.

³³ Amnepêm na pre htem kãm amnhî jarênh kaxyw nê kãm mẽmoj gõ nê rî kormã tanhmã kãm amnhî jarênh to. Tã nom kot puj mẽ ã ate harênhhta kôt amnhî nhîpêx anhÿr o papa jao mẽ panhî piitã pamã Tîrtûm kînh. Nê mẽ pamã hkînh o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhî tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhî nhîpêx anê nhùm Tîrtûm kãm ja mex o mẽ pahte kãm mẽmoj nhõrta jakre.

Anhÿr o kãm kapêr.

³⁴ Hamaxpêr mex pê ã Jejus mã kapêr anê nhùm kuma nê kãm:

—Nà ãm hãmri na ka ja jarê. Na ka ra mẽ kot Tîrtûm kôt amnhî nhîpêx o amnhî nhîpêx nyw pumunh mex o mõ. Nà te ate tokyx hkôt amnhî xãm kaxyw pyrãk. Anê.

Hãmri nhùm mẽ kãm hkurê xwÿnhjaja tee ri wa kot axpên mã kapêr mar o kuhê nê axte kãm mẽmoj tã hkukjêr puma nê. Ra tee ri mẽ kot hêx rom mẽmoj tã hkukjêr kapry

jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mãânên Rômãn 1.3-4

³⁵ Hãmri nhũm Jejus arĩ Tĩrtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mēhõ hã mẽ hkukjêr pyrãk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tĩrtũm kapêr tũm o mẽ ajakre xwýnhjaja na htem tanhmã mẽ amã Tĩrtũm kot mẽ akaxyw ãm mã xwýnh jarênh to nê mẽ amã harênh o: “Koja kêp pahi finat Tawi kanrêhã htãmnhwý koja.” Anhÿr o kot mẽ amã harê. ãm kêp kanrêhã htãmnhwý pix ã mẽ amã harênh o pa. No na pre pahi Tawija kêp kanrêhã htãmnhwý hã harê nê mãânên kêp õ pahihti hã harê. Tã nom nhũm Tĩrtũm kapêr tũm o mẽ ajakre xwýnhjaja na htem urã nê kêp pahihti hã mẽ amã harênh kêt nê. ãm kêp kanrêhã htãmnhwý pix ã harê. Kwa mo na htem Tawi pyrã nê kêp õ pahi hã harênh kêt nê?

³⁶ Na pre Tawi tãm Tĩrtũm kapêr tũm kwý hã kagã nê tanhmã Tĩrtũm kot mẽ akaxyw ãm mã xwýnhja jarênh to. Tĩrtũm Karõ nhÿ hã tanhmã harênh to. Tĩrtũm mex ã mẽ grer xãja kwý hã kagã nê hã kagã ho:

Tĩrtũm na pre inhõ Pahihti mã ã kapêr anê nê kãm: “E amnê ixwýr tẽ nê inhĩkõ hã nhÿ nê inhmã mẽ ho amnhĩptãr o akrĩ. Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxãr pa.” Anhÿr o pre kãm kapêr. Anê.

³⁷ —Na pre ã Tawi Tĩrtũm kot Kris mã kapêr jarênh nê kêp õ pahi hã kagã anê. Tã nom Tĩrtũm kapêr tũm o mẽ ajakre xwýnhjaja na htem kêp Tawi htãmnhwý pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê

xwýnhjaja kuma nê hkĩnh nê. Nê kãm axte mar prãm nê.

³⁸ Hãmri nhũm arĩ mẽ ahkre ho nhÿ nê mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ omu nê mẽ kot amnhĩ nhĩpêx kôt amnhĩ nhĩpêx kêt nê. Na htem piitã mẽ hã hpijaãm kaxyw ê mex pix kãm ri pa. Nê mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm.

³⁹ Nê Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix kamã na mẽ kãm hkrĩ hprãm. Nê mẽmoj tã mẽ apkur xà hã arĩgro hã ma hkwýjê hkôt mẽ apkur xà hã ixkre hwýr akuprõ nê kãm mẽ kot amnhĩ to rũnh xwýnhjê hkrĩ xà mex pix kamã hkrĩ hprãm.

⁴⁰ —Nê mẽ kot mẽ mjên htyk xwýnhjê ho mex o pa hã amnhĩ jarênh tã amnhĩ to hêx. Nê na htem axtem nê mẽ nokupyr kaxyw mẽ hwýr mra nê mẽ kãm: “E ot pa awýr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mẽ kêp mẽ òrkwy pytà nê amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nê. Nê te tãm amnhĩ nhĩpêx pyrã nê Tĩrtũm mã amnhĩ jarênh japjêê ho kuhê. Te mẽ kot Tĩrtũm mã ãm hãmri amnhĩ jarênh pyrãk tã hkwýjaja kot ja hã mẽ omunh pix kaxyw nhũm mẽ ã kãm amnhĩ jarênh anê. Mýrapê koja mẽ mex kêt nê. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhÿr o mẽ pa xwýnhjê kôt amnhĩ nhĩpêx o ri apa hkêt nê. ãm kwarĩ ho kwarĩ. Anê.

Kêp mjên htyk xwýnh jarênh

Rukre 21.1-4

⁴¹ Nhũm Jejus arĩ Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikãxpore hkwý nhõr o pa. Nhũm mẽ hikãxpore rũnh xwýnhjaja hwýr agjê

ně kàxpore gjênh xà kamã hkwỳ ho rax nê hagjê nê ma akupỳm mra.

⁴² Tã nhũm mēhō ni pē mjên htyk xwỳnhja haxwỳja hwỳr axà. Kêp am-rakati kumrêx. Nê hikàxpore tỳxre âm pijakrutre htã kàxpore rũnh xwỳnhjê hpãnhã ixkreta wỳr tē. Nê kãm Tĩrtũm kĩnh xàj kàxpore gjênh xà kamã hamē kumē hãmri nê kato nê ma akupỳm tē.

⁴³ Hãmri nhũm Jejus amỳm ã kot amnhĩ nhĩpêx anhỳr ã omunh o xa nhũm ja kãm mex nê. Hãmri nê hkôt mē pa ho mē pa xwỳnhjê mã harē nê mē kãm:

—E măn ka mēnire htēm mũj pumu. Na pre mjên kêp ty nhũm kêp am-rakati nê hikàxpore grire htã amnhĩ pē òr pa. Kwỳjê rom kãm Tĩrtũm kĩnh xàj amnhĩ pē òr pa. Apkur xà hã hikàxpore na.

⁴⁴ Kêt mē hkwỳjaja na hte hikàxpore hkwỳ pix o mra nê gjênh xà kamã hagjê nom arĩ mē hikàxpore rũnh. No nija na mē urak nê kãm hikàxpore japê hkêt nê. Nê ho õxỳ hkêt nê àmnhĩx piitã o tē nê òr pa. Anē.

13

Jejus kot nhỹrmã mēmoj piitã ho hapêx ã harênh

Matêwre 24.1-14; Rukre 21.5-9, 21.17-19; mãânên Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mē pa ho mē pa xwỳnhjaja arĩ Tĩrtũm mã amnhĩ jarênh xà hã ixkre kaxwỳnh pumunh o kuhê nê hã Jejus mã:

—Hêxta waa nê. Ixkreja mex kumrêx Pahĩti. Kēn rũnh o mē kot hipêx jakamã mex o mex. Nê mē kot ri Tĩrtũm mã hkĩnh xà nhõr nêj haxwỳja piitã mex kumrêx. Anē.

² Hãmri nhũm mē kãm:

—Nà mex tã koja nhỹrmã mē kãm Tĩrtũm kurê xwỳnhjaja grãnh pa. Koja arĩ kēn axkrutre axpēn mỳnh nê nõr kêt kumrêx. Koja piitã anhgrã nê ahpỳnhã ri hikwỳ.

Anhỳr o mē kãm kapēr.

³ Hãmri nê ixkreja rũm kato nê ma tē nê hixêt pē Oriwêhti hã api nê hã nhỹ. Tĩrtũm nhõrkwỳ kutã hixêtja

nhũm hã api nê hã nhỹ. Hãmri nhũm Simãw Pêtre mē Xiakre mē Juãw mē Andreja ma hkôt mra. Ahte hkôt mra nê mē kot Tĩrtũm mã amnhĩ jarênh xà hã ixkre grãnh par ã hkukja nê kãm:

⁴ —Kwa xà âm hãmri koja mē ã ixkreja nhĩpêx anē? E aprĩ hã mē inhmã harē. Xà koja mē nhỹrmã ku-grã nà xà koja mē tokyx ho anē? Kwa mēmo koja we wỳj ri tanhmã amnhĩ nhĩpêx to? Anē.

⁵⁻⁶ Hãmri nhũm mē kãm:

—Nà kot paj mē amã harē. Nom nhỹrmã mēmoj piitã hapêx kaxyw tanhmã amnhĩ nhĩpêx to kumrêx kot paj mē amã harē ka mē inhma. Koja mē ohtô nê mē apê ixkwỳjê hwỳr mra nê hêx rom te pa ixte amnhĩ nhĩpêx pyrak o amnhĩ nhĩpêx o pa. Nê tanhmã mē amã amnhĩ jarênh to nê mē amã: “E pa na pre Tĩrtũm mē awỳr inhmē. Ixpê kaxkwa rũm ixwryk xwỳnhhta na pa.” Anhỳr o mē akôt mē amã amnhĩ to hêx o pa. Nê mē amã: “E na pa mē ato amnhĩptar kaxyw mē awỳr wry.” Anhỳr o mē amã amnhĩ jarē. Nom kêr ka mē ama nê âm mē ama. Mē kot amnhĩ to hêx xwỳnh na mē. Kormã akupỳn ixpôx xà hã arĩgroja kormã.

⁷ —Nê koja mē nhỹri awry hã axpēn par o pa. Nê mē atãã axpēn par o pa. Nom kêr ka mē harênh ma nê ri tee ri tokyx mēmoj piitã hapêx ã hkamnhĩx kêt nê. Mēmoj piitã hapêx xà hã arĩgroja kormã.

⁸ —Nê koja mēmoj piitã hapêx kaxyw nhũm ahpỳnhã ri pika piitã hkôt mē pa xwỳnh piitã pika hõ nhõ xwỳnhjê kutã amnhĩ xunhwỳ nê axpu nê axpēn pa.

—Nê koja pika piitã hkôt tanhmã mē à kuteja mē hamỳ nhũm mē amnhĩ xà htỳx kãm hamak o pa. Nhũm nhỹri pika htertet tỳx nê. Nê nhỹhỹnh pika hkwỳ kamã mē pa xwỳnhjaja prãm xàj pikaprãr pa. Tã nom kormã mē kot amnhĩ xà htỳx kãm hamak xà hkrapix na ja. Te mēnijaja pijagri kaxyw nê kormã õhy xà hpỳnh pyrak. Koja mēmoj piitã hapêx kaxyw nê ã amnhĩ nhĩpêx anē.

9 —E pa hpānhā mẽ kot Tirtūm mā amnhī jarēnh xà hā ixkre grānh par xwỳj ri mẽmoj tanhmā kot hkukamā amnhī nhīpêx to hā hā harē. Mẽ ate hā ixkukjêr xwỳnhhta kot paj mẽ amā harē. Nà koja mẽ kām ixkurê xwỳnhjaja mẽ awỳr mra nẽ ixtā mẽ apynê nẽ mẽ atomnuj nẽ. Nẽ ma mẽ pikuprōnh xà hā ixkre hwỳr mẽ ato mra nẽ kamā mẽ kām mẽ ato kapêr punuj nẽ nhũm mẽ kuma nẽ ma mẽ ato mra nẽ mẽ ajagjê. Mẽ ate ixkôt apa ho apa xwỳnh ã ã mẽ anhīpêx anê. Nẽ mẽ õ pahшти hwỳr mẽ ato mra nẽ mẽ kām tanhmā mẽ ato kapêr punuj to.

10 Tã nom kwa kêr ka mẽ kutā akuhê nẽ māmri tām mẽ kām ijarēnh o akuhê.

11 Nom kêr ka mẽ kām amnhī jarēnh kukamā tee ri ajamaxpêr o ri amā mẽ uma hkêt nẽ akuhê. Rỳ mẽ ajamaxpêr o: “Hêxta waa nẽ. Mẽ kot ixkukjêr ã arīgrota ã tanhmā kot pa we ri mẽ kām amnhī jarēnh to?” Anhỳr o tee ri amnhī kukamā ajamaxpêr kêt nẽ. Koja Tirtūm Karō tanhmā mẽ akrā hto ka mẽ ý hā akatāt kôt tanhmā mẽ kām amnhī jarēnh to.

12 —Nẽ mẽ atō nẽ mẽ anhīpêxà nẽ mẽ akrajaja koja mẽ ixtā mẽ atā amỳnê nẽ ma pahỉ hwỳr mẽ ato mra nẽ kām mẽ ajarê nhũm mẽ kuma nẽ mẽ ajagjê nẽ mẽ akwỳjê pa.

13 Koja mẽ piitā ixkôt mẽ akamā gryk nẽ ã kām mẽ akurê ho pa anê. Nom mẽ kot ã mẽ anhīpêx anhỳr mã tã kêr ka mẽ amnhī to htỳx nẽ ixk-aga hkêt nẽ. Mẽ kot mẽ apar tã ka mẽ kaxkwa kamā akupỳm atĩr kurê kumrêx. Hāmri nẽ mẽ kurom Tirtūm mẽ wa ixri atĩr tũm nẽ amex rāhā nẽ apa ho apa. Mẽ kot tanhmā mẽ ato htā mẽ apê akupỳm kaxkwa kamā atĩr tũm nẽ apa mã xwỳnh jakamā kwa tee ri amnhī kukamā ajamaxpêr o ri apa hkêt nẽ. Anê.

Mẽ pahomnuj tỳx xwỳnh maati hā harēnh

Matêwre 24.15-28; Rukre 21.20-24; mãănênh Sikũn Tesarõn 2.3-4; Apokarip 13.11-17

14-16 Nhũm Jejus arĩ mẽ kām kapêr nẽ mẽ kām:

—Nẽ koja nhỹrmā kot mẽ atomnuj tỳx kumrêx xwỳnh maatija axtem nẽ Tirtūm mã amnhī jarēnh xà hā ixkreja kamā amnhī xām. Hāmri ka mẽ ja hā omu nẽ mẽ kot krĩ grānh par mã ajamaxpêr kurê kumrêx. Koja ã amnhī nhīpêx anê ka mẽ amỳm amnhī wỳr mẽ omu hāmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamā mẽ apa xwỳnhjaja mẽ omu hāmri nẽ mẽ kot mẽ apar py-maj ma aprôt nẽ amrar kurê kumrêx. Hixêr prêk wỳr ajapôj nẽ aprôt nẽ ma mra. Nẽ jar Jerujarê nhõ xwỳnhjaja kê mẽ umaj haxwỳja hapôj nẽ ma hprôt nẽ ma mrar o mra. Nẽ kapôt ã ri mẽ pa xwỳnhjaja kê mẽ ê jamỳnh kaxyw akupỳm krĩ hwỳr gjêx kêt nẽ. Âm ma mẽ umaj hprôt nẽ mrar o mrar kurê kumrêx.

17 —Nẽ mẽ htujarô xwỳnhjaja nẽ mẽ hkra karāre xwỳnhjaja. Jajê pê koja mẽmoj omnuj tỳx nẽ. Tanhmā kot wem amnhī to nẽ hprôt tỳx? Nà pika ja kamā koja mẽ mex kêt nẽ. Mẽ kot amnhī tomnuj mỳrapê koja Tirtūm tanhmā mẽ homnuj tỳx to.

18-19 —Koja ã mẽmoj amnhī nhīpêx anê hāmri nhũm mẽ piitā amnhī xà htỳx kām hamak rũnh o pa. Tirtūm kot mẽ piitā mẽ ho kator krax rũm amnê mẽ pa xwỳnhjaja na mẽ kormā à htỳx kamā hamak rũnh kêt nẽ. Kormā amnhī xà kamā hamak kryre. No nhỹrmā mẽ hprôt xà hā arīgrota ã koja mẽ amnhī xà htỳx kamā hamak rax kumrêx.

—Tã akupỳn ixte mẽ awỳr ixwrỳk xà hā arīgrota ã kot pa mẽmoj punuj o ijapêx pa ka mẽ axte ã mẽmoj kot anhỳr pumunh kêt nẽ. Nom kormā akupỳn ixwrỳk xwỳj ri kot kaj mẽ amnhī xà htỳx kamā ajamak o apa. Jakamā kêr ka mẽ ã amnhī nhīpêx anhỳrja kukamā amnhī to Tirtūm wỳ nẽ kām: “Pa Tirtūm. Kwa kê mẽmoj ã amnhī nhīpêx anhỳr kaxyw hāmri kê amgrà pê ã amnhī nhīpêx anê. Koja na pê ã amnhī nhīpêx anê nhũm omnuj tỳx nẽ.” Anhỳr o amnhī to awỳ.

20 —Mê hprôt xà hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkwy grà nê mẽ akukamã mẽ amã ho grêre. Koja mẽ akamã ukapri xaj ã mẽ anê hipêx anê.

21 —Nê koja ã mẽmoj amnhĩ nhĩpêx anhĩr kaxyw hãmri nhũm mẽ hêx o mẽ pa xwỹnhjaja ma mẽ awỹr mra nê hêx rom tanhmã mẽ amã kapêr to nê mẽ amã: “E ota ra Tĩrtũm kot mẽ pakaxyw ãm xwỹnhhta pøj. Kwa mẽ tokyx hwỹr mra nê omu nê hkôt ri apa.” Anhĩr o mẽ amã hêx. Hãmri nhũm mẽ hkwyjaja tee ri mẽ kuma nê mẽ amã: “Nà tãm kêt. Jar mẽ ixkamã na. E mẽ tokyx amnê hwỹr mãn mra nê omu.” Anhĩr o mẽ amã hêx o pa. Nom kêr ka mẽ ama nê ãm mẽ ama nê mẽ hkôt amrar kêt nê.

22-23 —E kwa mẽ inhma. Na pa ra ixpri hã mẽmoj kot ã amnhĩ nhĩpêx anhĩrja kukamã mẽ amã tanhmã harênh to. Tã kêr ka mẽ axkãm ajamak rom nê ri apa. Koja mẽ kot amnhĩ to hêx xwỹnhjaja axpên pãnhã mẽ awỹr mra nê mẽ amã kêp Tĩrtũm kot mẽ akaxyw ãm xwỹnh ã amnhĩ to hêx. Nê mẽ hkwyjaja kêp Tĩrtũm nhĩ hã kapêr jarênh xwỹnh ã amnhĩ to hêx. Hãmri nê aa mẽ kot mẽmoj pumunh kêt kwỹ ho anhĩr o pa. Te Tĩrtũm nhĩ hã kot ho anhĩr pyrãk nom hêx rom mẽ apê Tĩrtũm kot amnhĩm mẽ arênh xwỹnhjê nokupyr kaxyw ã amnhĩ nhĩpêx anhĩr o pa. Anê.

Akupỹn Jejus wrỹk xà hã arĩgro jarênh

Matêwre 24.29-31; Rukre 21.25-28; mããnên Sikũn Pêtre 3.10; Apokarip 1.7, 19.11-16

24-25 Nhũm Jejus arĩ mẽ kãm kapêr nê mẽ kãm:

—Tã koja mẽ kot amnhĩ xà htỹx kamã hamak xà hã arĩgrota hapêx nhũm Tĩrtũm ã mẽmoj nhĩpêx anê.

Koja kaxkwa ho àk tỹx nê nhũm myyti ahtyk.

Nhũm mytwrỹre axte hirã hkêt nê.

Nhũm kanhêti piitã axrê nê rôrôk pa.

26 Hãmri pa man akupỹn pika hwỹr wrỹ nhũm mẽ piitã ixwrỹk kãm ixpumu. Kakrã kamã kot paj ixihtỹx o inhĩrã rax kãm akupỹn mẽ awỹr wrỹ.

27 Hãmri nê ma krĩ piitã hwỹr Tĩrtũm kapêr o mẽ wrỹk xwỹnhjê rê nhũm mẽ ma mra nê amnepêm ixte amnhĩ kaxyw mẽ axunhwỹr xwỹnh piitã ho akuprô nê akupỹn ixwỹr mẽ ho mra. Anê.

Jejus kot mẽmo pi hpar ã ejêp jarênh

28 Nhũm Jejus arĩ mẽ kãm kapêr nê mẽ kãm:

—E ka mẽ pi hpar mũj pumu. Na hte mẽmo mytwrỹ hã rã nhũm mẽ omu nê ô hkukamã hamaxpêr kurê kumrêx.

29 Ja pyrã nê koja mẽmoj ã amnhĩ nhĩpêx anhĩr mẽ ka mẽ akupỹn mẽ awỹr ixwrỹk mã ajamaxpêr kurê kumrêx.

30 Koja akupỹn ixpôx kêt ri ã mẽ kot mẽmoj kot amnhĩ nhĩpêx anhĩr pumunh xwỹnhjaja kormã piitã htyk par kêt ri pa akupỹn mẽ awỹr wrỹ.

31 —Nê koja nhỹrmã pika nê kaxkwa wa hapêx pa. Tã no ãm ixkapêr koja wa urãk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupỹn Jejus wrỹk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40; mããnên Atre 1.9-11; Wam Tesarôn 5.2; Sikũn Pêtre 3

32 Nhũm Jejus arĩ mẽ kãm kapêr nê mẽ kãm:

—Nom akupỹn ixwrỹk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wrỹk xwỹnhjaja kot ja pumunh kêt. Nê pa ixpê Tĩrtũm Kra htã ijaxwỹja ixte ja hã amnhĩ pumunh kêt. ãm Mêpahpãm maatija tapxipix kot ja pumunh.

33 —Tã mẽ ate akupỹn ixwrỹk xà hã arĩgro pumunh kêt jakamã kwa kêr ka mẽ axkãm ajamak rom nê ri apa. Nê apkati mẽ amnhĩ wỹr ijapêr arĩt rãhã ho ri apa.

34-35 —E pa tanhmã mẽ amã akupỹn ixwrỹk xà hã arĩgro jarênh to ka mẽ

inhma. Koja mēhō nhỹhỹm nojarēt hāmri nē kām mē àpēnh xwýnhjê mã mē àpēnh ã karō nē ōrkwỹ jamār xwýnh mã tanhmã kām karō hto. Hāmri nē ōrkwỹ kahê xà jamār xwýnh mã kām: “E kêr ka ixwakre kamã ijapêr arīt rãhã ho ri apa.” Anē hāmri nē ma nhỹhỹm mō. Tã mē kot ijapêr rīt rãhã ho mē pa xwýnhjaja te kot ixkre kahê xà jamār xwýnh kot amnhĩ nhĩpêx pyræk. Ō patrãwja akupỹn hpôx xà mã arĩgro mã omunh kêt jakamã na hte kahê xà jamār rãhã ho pa. Koja apu axpêr kamàt nhũm akupỹn hpôx japêr. Rỳ kôt ã kamàt rỳ krãhyre kã nhũm akupỹn hpôx japêr. Rỳ kwýhtyk nhũm akupỹn hpôx japêr. Tã uræk nē mē ate akupỹn ixwrỹk xà mã arĩgro pumunh kêt jakamã kêr ka mã ijamār rãhã ho ri apa. Jao ixkutêp inhmã tanhmã amnhĩ nhĩpêx to rãhã nē. Ra ixte mē amã mã karō xà hkôt.

³⁶ Kop ixkre kahê xà jamār xwýnhjaja tee ri ō patrãw kamã ama hāmri nē ra ōtxwa nē htỹx ōt o ỹr rôm nhũm haêr pē hwýr hpôx ronhỹx ja kêp mex kêt nē. Ja pyrã nē kêr ka mã ixkutêp ixkôt amnhĩ nhĩpêx rãhã ho ri apa. Nom tee ri amnhĩ wýr ixkãm ama hāmri nē axte inhmã ajamaxpêr kêt pē atỹx ri tanhmã amnhĩ tomnuj to ho apa hkêt nē.

³⁷ —E ixte mē amã mēmoj jarēnhja na pa hte ixkwýjê piitã mē kãm harē. Jakamã kwa kêr ka mã akupỹn ixwrỹk ã ijapêr arīt rãhã ho ri apa. Anē.

Nhũm pre ã Jejus amnhĩ kukamã mē kãm ujarēnh anē.

14

Mē kot Jejus pĩr kukamã hamaxpêr ã mē harēnh

Matêwre 26.1-5; Rukre 22.1-2; Juãw 11.45-53

¹ Tã nhũm Ijaew hkĩnhã ã arĩgro pē Pas wýr apkati axkrut. Pas ã na hte mē ixpê Ijaewjaja amnepêm Tĩrtũm kot pika pē Ejit pē mē inhĩgêt nē mē ixpãmjê kator mã ijamaxpêr kaxyw axpēn wýr akuprō nē mã ixkĩnh. Na pa htem arĩgroja mã: “Pas” anē. Nē

harēnh o: “Mē pahte pãw kaxkrit kêt kur ã arĩgro” anē.

² Jakamã nhũm mē inhō patre krãhtũmjê mē Tĩrtũm kapêr tũm o mē ahkre xwýnhjaja kãm Jejus pĩr prãm nē. Nom mē kãm hkôt kapêr mar o mē pa xwýnhjê puma nē. Nē tee ri mã amnhĩ jahkre nē axpēn mã:

—Hêxta waa nē. Tanhmã kot puj wem ho nē kupĩ? Kot puj mē pahkĩnh kãm tanhmã ho nhũm mē hkĩnh xwýnhjaja mã mē pahpumu nē mē pakamã gryk tỹx nē. Pu mã mã axpu nē mã tanhmã axpēn to. Jakamã kwa pu mã kormã tanhmã ho hkêt nē. Anē.

Mēhō ni kot Jejus krã gregrer ã harēnh

Matêwre 26.6-13; Rukre 7.36-50; Juãw 12.1-8

³ Rôm nhũm Jejus Simãw nhōrkwỹ kamã kormã apkur o nhỹ. Krĩ pē Petãn kamã. Simãwja na pre hkà kro xàpêr tỹx o pa nhũm Jejus akupỹn ho mex. Jakamã akupỹm ō krĩ hwýr pōj nē kutã apkur o nhỹ. Hāmri nhũm mēhō nija harēnh ma nē mē hkuxwa xà mã kãx ō py nē ma hwýr o tē. Nē mē hwýr axà nē nhỹhỹnh kãx kahte nē mē hkuxwa xà ho hkrã gregrer pa.

⁴ Hāmri nhũm mē apkur o hkrĩ xwýnhjaja tee ri ã kot amnhĩ nhĩpêx anhỹr ã omu nē kamã gryk nē. Nē axpēn mã:

—Tk. Kwa nã na mã mē hkuxwa xàta kapĩr par kumrêx.

⁵ Kop apu ma o htēm nē ho wēnē nē hpãnhã kãxpore ho rax kumrêx nē hamýnh nē ho mã kêp amrakati xwýnhjê nhĩpêx par nhỹx ja kãm mex nē. Mo na ri ã amnhĩ nhĩpêx anhỹr kêt nē?

Anē nē mã kãm akir.

⁶ Hāmri nhũm Jejus mã kuma nē mã kãm:

—Tk. Kwa mã kãm axàkjêr kêt nē. ãm hāmri na ã inhĩpêx anē.

⁷ Mē kêp amrakati xwýnhjaja koja mã arĩ mã akôt pa rãhã nē. Ka mã mã mēmo arĩgro mã mã ho ajuta hprãm nē tanhmã mã ho ajuta hto nē mã mã mēmoj gō. No pa kot paj ri mã

akôt ixpa ka mẽ ixto mex ry ho apa hkêt nê. Kot paj tokyx mẽ are.

⁸ Ixtyk nhũm mẽ kot ijaxàr kukamã na ã ixkrã gregrer anê. Æm hãmri na ã inhĩpêx anê.

⁹ Æm hãmri na pa mẽ amã ja jarê. Koja mẽ krĩ piitã hkôt axpên mã ixte tanhmã mẽ anê amnhĩ nhĩpêx to hã ijarênh o pa nê mãânên kot ã inhĩpêx anhỹrja mãânên harênh o pa. Nhũm mẽ piitã kot tanhmã ixto mex to hã harênh ma. Anê.

Jut Kariot kot mẽ kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

¹⁰ Tã nhũm Jut Kariotja. Jejus kôt mẽ pa ho mẽ pa xwýnh pê 12 hõ na pre. Tã axtem nê Satanasti nhỹ hã ma patre krãhtũmjê hwýr tẽ nê axtem nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nà? Anê.

¹¹ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre. Anê.

Hãmri nhũm mẽ kuma nê kato nê ma tẽ nê Jejus pynênh kaxyw htãnopxar o hkôt ri pa.

Jejus kot ý hã kapêr o mẽ pa xwýnhjê kutã apkur ã harênh

Matêwre 26.17-19; Rukre 22.7-13

¹² Tã nhũm arĩgro pê Pas kato. Amnepêm mẽ inhĩgêjtjaja na prem ôwêhti hkrare hkwý pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwýnhjê nhĩhkra nê mẽ kator kaxyw na prem ã amnhĩ nhĩpêx anê. Jakamã na pa htem arĩ mẽ ixpê mẽ hkanrêhã mẽ htãmnhwýjaja Pas ã axpên wýr akuprõ nê jam ijamaxpêr pê mẽ urak nê ôwêhti hkrare hkwý hpa nê pãwti kaxkrit kêt kãm kuku.

Jakamã nhũm Jejus kôt mẽ pa ho pa xwýnh pê 12jaja Pas ã mẽ apkur xà hã Jejus kukja nê kãm:

—Kwa nhỹri kot paj mẽ akutêp Pas ã mẽ panhõ hã apê? Anê.

¹³ Hãmri nhũm mẽ kuma nê ja wa ho axkrut nê mẽ amnhĩ kukamã wa kumê nê wa kãm:

—E wa ma Jerujarê hwýr wa tẽ. Nê hwýr axà nê mēhõ myja pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ ka wa omu nê hã ajêt nê ma ôrkwý hwýr hkôt tẽ.

¹⁴ Hãmri nê ixkre nhõ dõn pumu nê kãm: “E Jejus na wa inhmẽ pa wa awýr tẽ. Na awýr pêr mēnh o: ‘Nhỹri kot paj we ixkôt ri mẽ pa ho pa xwýnhjê mẽ Pas ã axpên kutã apku?’ Anhỹr o na awýr pêr mẽ.”

¹⁵ —Wa ã kãm akapêr anê kê war ama nê war amã ôrkwý nhĩmõk ã ixkre rax õ jahkre. Ra kamã kaxyw mẽ paxàpkur xà hã mẽmoj piitãã. Ka wa omu nê mãmrĩ kamã mẽ ixkutêp mẽ panhõ hã apê. Anê.

¹⁶ Hãmri nhũm wa kuma nê ma hwýr tẽ. Nê krĩm axà nê ra kot wa kãm mẽmoj jarênh xà hkôt mẽmoj piitã omu nê mẽ kutêp mẽ kãm mẽõ hã àpênh o wa xa.

Jejus kot mēhõ kot mẽ kãm hã àmnênh ã harênh

Matêwre 26.20-25; Rukre 22.21-23; Juãw 13.21-30

¹⁷ Tã nhũm kamãtre nhũm Jejus mẽ hkôt mẽ pa ho pa xwýnhjaja wa hkôt mõi.

¹⁸ Hãmri nê kýxpê ixkreja wýr api nê hwýr agjê nê apkur kaxyw hkrĩ hpa nê kormã apkur o hkrĩ nhũm Jejus mẽ kãm:

—E pa mẽ amã mẽmoj jarê ka mẽ inhma nê amnhĩ krãm haxàr tỳx nê. Kot kaj mẽ ixkutã axàpkur o akrĩ xwýnhjê hõ mẽ kãm ixkurê xwýnhjê mã ixtã amýnê. Anê.

¹⁹ Hãmri nhũm mẽ tee ri kuma nê hkaprĩ htỳx nê. Nê axpên pãnhã amnhĩ tã hkukja nê kãm:

—Kwa xà pa kot paj ã anhĩpêx anê? Nà pa hkêt. Anê.

²⁰ Hãmri nhũm mẽ kãm:

—Nà mẽ apê 12jê hõ kot kaj ã inhĩpêx anê. Mẽ ate ixkutã guhkrax kãm anhõ pãwti ho mry kagõ nhek o akrĩ xwýnhjê hõ kot kaj ixtã amýnê.

²¹ Tĩrtũm kapêr ã kagà htũm kot ixkukamã harênh xà hkôt koja mẽ tanhmã ixto rax nê ixpĩ. Nom kot

mê kãm ixtã àmnênh mã xwýnhhta hêxta waa nê. ã kot amnhĩ nhĩpêx anhÿrja mÿrapê koja amnhĩ xà htÿx kãm hamak rax kumrêx. Kop apu aa ô mãmãj nhõxà hkre rûm kator kêt ronhÿx ja kãm mex nê.

²² Anê nê kormã mê apkur o hkri rôm nhũm pãwti hõ py nê ho Tirtũm wÿ. Hãmri nê mê kãm ho hkry nê mê piitã mê kãm ôr pa nê mê kãm:

—E na pa mê amã pãwti ho hkry nê mê amã kugõ. Ja pyrã nê koja mê ã inhĩpêx anê nê te ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom mê anê kot paj ty. E mê mãmri aku. Anê.

²³⁻²⁴ Nê hpãnhã wĩhti hã kop py nê mã ho anê nê Tirtũm mã harê. Hãmri nê mê kãm kugõ nê mê kãm:

—E mê kot ixpĩr xà hã arĩgrota ã koja ixkamrô axkapĩ. Nom koja mê amarĩ ixpĩr nhũm amarĩ hpikapĩr kêt nê. ãm paa. Pa kot paj mê anê mê ãhkram amnhĩ jaxà nhũm mê ã inhĩpêx anê. Koja ixkamrô axkapĩ nhũm Tirtũm omu nê ixkukwak ri mê anê mê ate amnhĩ tomnuj piitã amnhĩ katut kôt rênh pa nê mê ato hkra. Ra amnepêm kot ja hã amnhĩ jarênh xà hkôt. Jakamã e. Mê axpên pãnhã ixkamrô pikapĩr mã ajamaxpêr pê ixte mê amã kop kãm wĩhti nhõrta o akõm o axpên nhĩpêx. Anê.

Nhũm pre ã mê kãm amnhĩ jarênh anê nhũm mê piitã ho hkõm o axpên nhĩpêx.

²⁵ Hãmri nhũm mê kãm:

—ãm hãmri na pa mê amã amnhĩ jarê. Kot paj axte wĩhti ho ixkõm kêt rãhã nhÿrmã Inhõ Papaj akupÿn mê awÿr inhmê. Hãmri pu mê rĩ kormã akupÿn ixpõx xà hã arĩgrota ã pahkĩnh nê. Nom axtem tanhmã hã pahkĩnh to. Anê.

²⁶ Nhũm pre ã mê kãm kapêr anê hãmri nhũm mê Tirtũm mã mex o mex ã gre hãmri nê hapõx pa nê ma hixêt pê Oriwêhti hwÿr mra.

Jejus kot Simãw Pêtre hkukamã tanhmã harênh to

Matêwre 26.31-35; Rukre 22.31-34; Juãw 13.36-38

²⁷ Tã nhũm Jejus hkôt mê pa ho pa xwýnhjê hkukamã tanhmã mê kãm ujarênh to nê mê kãm:

—E mê inhmã. Tirtũm kapêr ã kagã htũm kot ã mê pajarênh kot anhÿr.

Kot paj ôwêhti jamãr o pa xwýnhja pĩ hãmri nhũm ôwêhti hpigrãnh pa nê ma anhrã nê ri mra.

Anhÿr o te ixpê ôwêhti jamãr xwýnh nhũm mê apê ôwêhti pyrãk ã mê pajarênh. Tã kot puj mê ã amnhĩ nhĩpêx anê.

²⁸ Mê kot ixpĩr tã koja Tirtũm akupÿm ixto ixtĩr. Pa akupÿm ixtĩr nê ma mê akukamã pika pê Garirej wÿr mõ. Kamã kot puj mê axte axpên pumu. Anê.

²⁹ Hãmri nhũm Simãw Pêtre tee ri mê amnhĩ tã kuma nê kãm:

—Kwa nã. Ri ã mê ijarênh anhÿr kêt nê Pahihti. Kot paj akaga hkêt nê. Jajaja koja anhrã nê hprôt nê ma mrar japêr no pa kot paj anhÿr kêt nê. Anê.

³⁰ Hãmri nhũm kãm:

—Nã kot kaj anê Simãw Pêtre. Koja apkati hkôt krãhyre hkãr kêt ri ka ra mê umaj ate ixkôt apa hkêt ã mê kãm amnhĩ tã axãprãr o axkrunêpxi kãm ga. Kwa jam ajamaxpêr tÿx nê. Anê.

³¹ Hãmri nhũm tee ri amnhĩ tã kuma kãm amnhĩ tã àprãr kãm hihtÿx nê kãm:

—Tk. Kwa nã. Kot paj ã amnhĩ nhĩpêx anhÿr kêt nê. Koja mê tee akôt ixpĩr mã tã no pa ãm aa akaga hkêt kumrêx. Kot paj akôt ixpa ho ixpa rãhã nê. Anê.

Hãmri nhũm hkôt mê pa ho mê pa xwýnh kwÿjê piitã ã kãm amnhĩ jarênh anê.

Jejus kot Tirtũm mã amnhĩ jarênh Matêwre 26.36-46; Rukre 22.39-46

³² Tã nhũm Jejus ma nhÿri mê kot kãm “Gesêm” anhÿr xwýnhja wÿr hkôt mê pa ho pa xwýnhjê ho mõ. Hãmri nê mê kãm:

—E mê jar ixkutêp akrĩ. Pa ma mütũm tẽ nê Tirtũm mã amnhĩ jarê mãn. Anê.

³³ Hãmri nê amnhĩ kôt mê ho axkrunêpxi nê mê o mõ. Simãw Pêtre

mē Jepetew kra pijakrut pē Xiakre nē Juāwja nhūm amnhī kōt mē o mō.

³⁴ Hāmri nē amnhī kukamā mē kām hkurē xwýnhjaja kot tanhmā hipêx tota kukamā hamaxpēr o ra amnhī kamā kahak tỳx o ra hkaprī nē. Hāmri nē hkōt mē mrar xwýnhjê mā kām:

—Hêxta waa nē. Na pa tee ri amnhī xà htỳx kamā ijamakja kukamā ijamaxpēr nē amnhī kamā ixkahak tỳx o ixkaprī nē. Te ra ixkaprīja kot ixpīr o mōr pyrāk. Jakamā e mē jar anohtỳx nē ixto Tirtūm wỳr o akrī kē tanhmā ixto pa mē kot tanhmā ixtoja kutā ixihtỳx nē. Anē.

³⁵ Hāmri nē mē kurūm htēm grire nē amnhī kamā kahak o Tirtūm mā amnhī jarēnh kaxyw htu mỳr pē htēm nē pikap nō nē kām:

³⁶ —Kwa Papaj. Hêxta waa nē. Inhmā amnhī xà htỳx kām ijamak prām kēt kumrēx. Na pa tee ri amnhī kukamā ijamaxpēr nē amnhī kamā ixkahak tỳx nē. Jakamā kot kaj amā inhnē ja ho ajapêx prām nē māmri ho ajapêx nhūm mē kām ixkurē xwýnhjaja tanhmā ixto hkēt nē. Rỳko. Kot kaj amā mē kot tanhmā ixto hprām kē mē māmri tanhmā inhīpêx to. Nom pam inhmā hprām xà hkōt kēt.

³⁷ Anhỳr o Tirtūm mā amnhī jarē hāmri nē kànhmā xa nē akupỳm Simāw Pêtreja mē hwỳr tē nē mē omu nhūm mē ra htỳx gōr nē hikwỳ. Hāmri nhūm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapōj. Kwa wem anohtỳx grire nē ixkutêp amnhī to Inhō Papaj wỳr o akrī

³⁸ kē mē ixkōt tanhmā mē ato htā ka mē amā mē uma xāj ixkaga hkēt nē arī mē kutā amnhī to htỳx nē akuhē. Āmē amā mē ate amnhī nhīpêx anhỳr prām nom kormā mē amā maa. Anē.

³⁹ Hāmri nē akupỳm tē nē axte Tirtūm mā tanhmā amnhī jarēnh to.

⁴⁰ Nē akupỳm mē hwỳr tē nē mē omu nhūm mē axte ôt pa nē hikwỳ. Nhūm tē nē tee ri mē omu hāmri nē

tanhmā mē kām nē hkēt nē. Ām awjanā nē ma akupỳm tē nē axte Tirtūm mā amnhī jarē.

⁴¹⁻⁴² Hāmri nē akupỳm mē hwỳr tē nē mē kām:

—Kwa xàn ka mē arī gōr nē anhīkwỳ? E mē tokyx akrā hapōj. Na mē ra ixwỳr mrar nē kot ixpynēnh mā. Koja mē tokyx ixkutā mē kot amnhī xunhwỳr xwýnhjaja mē kām ixtā amỳnē. Ota ra kot ixtā mē kām àmnēnh xwýnhta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh Matêwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkōt mē pa ho mē pa xwýnhjê hō htā nhūm ra amnhī kōt mē ohtō nē Jejus wỳr mē o tē nhūm mē wapohti nē kō jamỳ nē hkōt o mra. Patre krāhtūm mē Ijaew krāhtūmjê mē Tirtūm kapēr tūm o mē ahkre xwýnhjaja ra Jut kōt mē kurē nhūm mē man hkōt Jejusja wỳr mra.

⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhỳri mē pahte unēnh mā xwýnhta pumu nē hwỳr tē nē kahti hkōt kumỳ nē tanhmā kām ixkapēr to. Ka mē ixpumu nē hwỳr tē nē unē nē ma akupỳm o tē.

Anē hāmri nē ma hwỳr mē o tē.

⁴⁵ Nē Jejusja pumu nē hwỳr tē nē kām: “Pa mē ijahkre xwýnh.” Anē hāmri nē kahti hkōt kumỳ.

⁴⁶ Hāmri nhūm hkōt mē mrar xwýnhjaja omu nē Jejus wỳr mra nē unēnh kurē kumrēx.

⁴⁷ Hāmri nhūm Jejus kōt mē pa ho mē pa xwýnhjaja tee ri ja hā mē omu nhūm hōja ō wapo kapa nē patre maati mā àpēnh xwýnh kot mē hkōt htēm xwýnhta mā wapo ho apē. Nē kot ho hkrā nhīpōnh mā tā kuhpaw nē upōk rūm hamak nhīkjê krāhta.

⁴⁸⁻⁴⁹ Hāmri nhūm Jejus amnhī tā mē kot unēnh xwýnhjê mā kām:

—Kwa na pa pre apkati mē Tirtūm mā amnhī jarēnh xà hā ixkre kamā mē kām ixujarēnh o ixpa ka prem

tokyx ixpynênh kêt nê. Tã jarãhã te ixte amnhĩ tomnuj xwýnh pyrà nê ixwýr wapohti nê kô hã akapên nê ixwýr atêm rax nê. Nom ra mẽ ate tanhmã ixto kaxyw arıgro kator jakamã mẽ mãmrĩ tanhmã amã ixto hprãm xà hkôt tanhmã ixto. Tĩrtũm kapêr ã kagà htũm kot mẽ akukamã ã mẽ ate inhĩpêx anhýr ã mẽ ajarênh xà hkôt. Anê.

⁵⁰ Hãmri nhũm hkôt mẽ pa ho mẽ pa xwýnhjaja tee ri mẽ kot unênh ã mẽ omu hãmri nê mẽ umaj Jejus kaga nê ma hprôt pa nhũm ahte mẽ kuri xa.

⁵¹⁻⁵² Hãmri nhũm mẽ ma o tẽ. Nhũm kormã mēhō nyw xwýnhja tee ri ja hã mẽ omu nê ma Jejus kôt tẽ. Nhũm mẽ amnhĩ kôt omu nê kot unênh kaxyw kahty xà hã kupy nhũm mẽ umaj mẽ ãhkra kamã kahty xàja re nê ma hkênh nê hprôt nê tẽn akunok.

Ijaew nhõ patre maati kot Jejus kujêr ã harênh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhũm mẽ ma mẽ õ patre maati nhõrkwý hwýr Jejus o tẽ. Hãmri nhũm patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwýnhjaja òrkwý hwýr Jejus ã akuprõ.

⁵⁴ Hãmri nhũm Simãw Pêtre mẽ hkôt tẽ nê mẽ hkôt patre maati nhõ kítare hwýr axà nê amým hã mẽ omunh o xa. Nhũm ra pòristijaja kítare kamã amnhĩm kuto nê hã ànhunh o hkrĩ nhũm mẽ hwýr tẽ nê mẽ ãhkô hã ànhunh o nhý.

⁵⁵⁻⁵⁶ Rôm nhũm ixkre kamã mẽ pikuprõnh xwýnhjaja tee ri Jejus ã krĩ nhõ xwýnhjê kukja nê mẽ kãm:

—E mẽ atõ na ka pre Jejus kot tanhmã amnhĩ tomnuj to hã omu? Mẽ atõ mẽ inhmã harê pa mẽ ama nê Rôm nhõ xwýnhjê nhĩhkram haxà kê mẽ pamã kupĩ. Anê.

Hãmri nhũm mẽ axpên pãnhã tanhmã harênh to. Tanhmã kot amnhĩ tomnuj to hã harênh to htã nom ri ho hêx jakamã axpên kwým ri tanhmã ri harênh to nhũm mẽ tee ri mẽ kuma nê mẽ kãm:

—Tk. Kwa mẽ axpên kwým ri tanhmã harênh to hkêt nê. Axpên kôt

mãn ri tanhmã mẽ inhmã harênh to. Anê.

⁵⁷ Hãmri nhũm mẽ hkwýjaja kãnhmã kuhê nê axpên kôt tanhmã ho hêx to nê mẽ kãm:

⁵⁸ —Nà kot paj mẽ amã tanhmã kot amnhĩ nhĩpêx to hã harê. Na pa prem ã kapêr anhýr ã kuma. Na pre tanhmã Tĩrtũm mã amnhĩ jarênh xà hã ixkreta jarênh to nê harênh o: “Kot paj ixkreja grãnh pa hãmri nê ixtã apkati axkrunêpxi nê akupým hipêx. Nom kot paj amnhĩ nhĩhkra ho hipêx kêt nê.” Anhýr ã ã amnhĩ jarênh anê pa mẽ kuma.

⁵⁹ Anhýr o harênh tã nom axpên kôt harênh kêt nê. Arĩ axpên kwým ri harê.

⁶⁰ Hãmri nhũm mẽõ patre maati tee ri mẽ kot tanhmã ho kapêr toja ma nê mẽ aptàr tũmjê noo mã kãnhmã xa nê Jejus mã kãm:

—E na ka ra mẽ kot ã ajarênh anhýrja ma. Xà kot kaj tanhmã mẽ inhmã amnhĩ tã axàprãr to hkêt nê? Xà ãm hãmri na mẽ ajarê? E kwa mẽ inhmã tanhmã amnhĩ jarênh to. Anê.

⁶¹ No nhũm akryk xa nê tanhmã kãm nê hkêt nê. Hãmri nhũm tee ri ã kot amnhĩ nhĩpêx anhýr ã omu nê axte kãm:

—Kwa mẽ inhmã amnhĩ jarê. Xà apê Tĩrtũm Kra na ka? Xà ka na apê Tĩrtũm kot mẽ ixwýr amênh xwýnh na ka? Anê.

⁶² Hãmri nhũm tã kãm amnhĩ jarê nê mẽ kãm:

—Tý. Ixpê tãmta na pa. Ra mẽ ate jarãhã tanhmã ijarênh to kaxyw apikuprõnh tã nom kot paj nhýrmã mẽ kamjaja tanhmã mẽ ajarênh to ka mẽ amnhĩ tã ixpumu. Kot kaj mẽ Tĩrtũm kot mẽ ato amnhĩptàr xà kutã akrĩ hãmri pa hwýr tẽ nê ãhkô hã nhý. Kakrã kamã kot paj hwýr tẽ nê ãhkô hã nhý hãmri nê ý hã tanhmã mẽ ajarênh to ka mẽ amnhĩ tã ixpumu. Anê.

⁶³⁻⁶⁴ Hãmri nhũm tee ri ã kot amnhĩ jarênh anhýrja ã kuma nê gryk xàj amnhĩ xê kaxô nê mẽ aptàr tũmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harênh xwýnhjê hõ japêr? Ra tãm kot amnhĩ pê Tĩrtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anê.

Hãmri nhũm mẽ kãm:

—Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rõm nhõ pahшти hwýr o tẽ kê mẽ pamã hã amýnê kê mẽ kupĩ. Anê.

⁶⁵ Hãmri nhũm mẽ hipêx kati rax nê. Nê hkuk kuhtô nê hpãnhã no hpro nê hta k nê kãm:

—E mẽ kot atak xwýnhjê nhĩxi jarê. Apê Tĩrtũm Kra hã ate amnhĩ jarênh jakamã mãn urak nê axãhpumunh týx. Jakamã e mẽ hixi jarê. Anê.

Nhũm prem ã hipêx anê hãmri nê pôristijê nhĩhkram haxà nhũm mẽ hta k rax o kuhê.

Simãw Pêtre kot Jejus kôt pa hkêt ã kot amnhĩ jarênh

Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷ Rõm nhũm Simãw Pêtre arĩ kĩtare kamã mẽ ãhkô hã ànhunh o nhỹ. Hãmri nhũm mẽõ patre maati mã àpênh xwýnh nitita mẽ hwýr kato nê xa. Hãmri nê hirã kamã hprĩ hã Simãw Pêtre pumu nê omunh mex kurê kumrêx nê kãm:

—Xê pêr apê Najare nhõ xwýnh Jejus kôt mẽ pa ho mẽ pa xwýnhjê hõ na ka. Anê.

⁶⁸ Hãmri nhũm tee ri kuma nê ra kãm ma nê. Nê kãm amnhĩ tã aprã nê kãm:

—Tk. Kokỹ. Ixte mẽhõ my ata pumunhre hã. Anê.

Hãmri nê kãnhmã xa nê ma tẽ nê kĩtare hwýr kahê hkôt ã mẽ hkax ã ahte xa nhũm krãhyre kà.

⁶⁹ Nê gaa nhũm hpãnhã mẽ kãm àpênh xwýnhjê hõja omu nê hã mẽ kãm:

—Xê ma ãm hãmri na harê. Kôt ri mẽ pa xwýnhjê hõ na pêr. Anê.

⁷⁰ Hãmri nhũm amnhĩ tã kuma nê kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nê. Aa ixte mẽhõ ata pumunh kêt kumrêx. Anê.

Hãmri nhũm mẽ hkwýja gaa nê kê axte hprĩ hã omu nê kãm:

—Kwa ãm hãmri na mẽ ajarê. Apê Jejus hkwý na ka. Ajaxwýja apê Garirej nhõ xwýnh kênã. Anê.

⁷¹ Hãmri nhũm tee ri mẽ kuma nê kãm ma htyx nê. Hãmri nê mẽ kãm:

—Kwa nà. Na pa Tĩrtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràn ixpê Garirej nhõ xwýnhre hã. Ixte mẽhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwýnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunêpxi.

⁷² Hãmri nhũm axte krãhyre kà. Jao ra hkàr o axkrut. Hãmri nhũm Simãw Pêtre kuma nê Jejus kot ra hkukamã ã amnhĩ nhĩpêx anhỹr ã harênhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunêpxi hã harênhja mã hamaxpêr. Hãmri nê ra kãnhmã hakry hpar o tẽ nê hkaprĩ htyx kumrêx. Hãmri nê tee ri amnhĩ kukamã hamaxpêr nê amnhĩ mã:

—Hêxta waa nê. ãm hãmri na pre Jejus ijarê. Tã pa kot ijarênh xà hkôt ã amnhĩ nhĩpêx anê. Kwa mo na pa axtem nê ã mẽ kãm amnhĩ to ixêx anê?

Anê hãmri nê hkaprĩ xaj mýr rax nê.

15

Pirat kot Jejus kukjêr ã harênh

Matêwre 27.1-2, 27.11-14; Rukre 23.1-5; Juãw 18.28-38

¹ Tã nhũm myt kato nhũm mẽ axte Jejus ã axpên wýr akuprõ. Patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ pi-itã hã akuprõ. Hãmri nê pôristi mã anê nhũm mẽ Jejus pa hpre nhũm mẽ ma Rõm nhõ xwýnhjê nhõ pahi Pirat wýr o tẽ. Piratja na pre hte Rõm nhõ xwýnhjê nhõ pahi Sesti nhỹ hã Ijaew o amnhĩptar o pa nhũm prem ma hwýr o tẽ.

² Hāmri nē kutā ām nē tanhmā kām harēnh to nē kām:

—E ot pa mē awÿr jahti ho tē. Na hte mē inhmā hēx rūnh o pa. Mē ixte Pahihti Sesti kapēr kwÿm ri amnhī nhīpēx prām xāj tanhmā mē inhmā hēx to. Nē axtem nē mē ixte Sesti mā kàxpore hkwÿ nhōr kêt ã mē inhmā karō. Nē Tirtūm kot mē ixkaxyw kēp mē inhō pahi hā ãm ã amnhī jarēnh o pa. Na hte ã mē inhmā amnhī to hēx anhÿr o pa. Anē.

Hāmri nhūm Pirat mē kuma nē Jesus pumu nē tanhmā hkukjēr to nē kām:

—E inhmā amnhī jarē. Xà ãm hāmri na mē ã ajarēnh anē nà? Xà apē Ijaew nhō pahi na ka? Xà ka na htem amnhī wÿr akām hamak o pa? Anē.

Hāmri nhūm kām:

—Tÿ. Nà ãm hāmri na ka ã ijarēnh anē. Anē.

³ Hāmri nhūm patre krāhtūmjaja tanhmā kām ho kapēr to.

⁴ Nhūm mē kuma nē axte hkukja nē kām:

—Kwa na mē ã ajarēnh anē ka mē ama nē ãm mē ama nē inhmā tanhmā amnhī tā axāprār to hkêt nē. Anē.

⁵ Nom nhūm Jesus ãm akryk xa nē tanhmā axte kām nē hkêt nē. Jakamā nhūm Pirat tee ri omunh pē hamaxpēr o nhÿ.

Pirat kot Jesus pÿr ã àmnēnh ã harēnh Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arīgro pē Pasja ã Ijaewjaja kām hprām xà hkôt mē hāgĵēnh xwÿnhjē ho hpÿnh nē mē kām ure.

⁷⁻¹⁰ Jakamā nhūm Ijaew kwÿjaja hwÿr mra nē kām:

—Pa. Kwa xà kot kaj jarāhā mē inhmā mē hāgĵēnh xwÿnhjē hō mā anhÿre nà? Anē.

Hāmri nhūm mē kuma nē hamaxpēr o:

—E paj Jesus ã mē kuma nē kām inhÿre. Mē piitā mē kām kapēr mar prām nhūm mēō patre krāhtūmjaja pix kot mē hkôt kamā gryk nē ã ixwÿr o mrrar anhÿr kēnā. Anē.

Hāmri nē mē kām:

—Tÿ. Nà kot paj mē amā hōm inhÿre. Kwa xà kot pa mē amā mē anhō “pahihti” jarēnhja mā inhÿre nà? Anē.

¹¹ Hāmri nhūm patre krāhtūmjaja tee ri kuma nē mē kām:

—Kwa mē kām anē kē Parapas mā mǎn ure. Anē.

Hāmri nhūm mē kuma nē Pirat mā kām:

—Nà Jesus mā anhÿrer kêt nē. Parapas mā mǎn anhÿre. Anē.

¹² Hāmri nhūm mē kām:

—No mē ate mē anhō pahi hā harēnh xwÿnhnta? Tanhmā kot paj ho? Anē.

¹³ Hāmri nhūm mē àmra kamā kām hā amÿnē nē kām:

—Kwa pī kahpa hā anhō kē ty. Anē.

¹⁴ Hāmri nhūm tee ri mē kuma nē mē kām:

—Tk. Kwa nà. Tanhmā kot amnhī tomnuj tore hā kot pa ã hipēx anē.

Anhÿr tā nhūm mē xatā anhīpē kām kapēr kām hihtÿx nē kām:

—Kwa pī kahpa hā mǎn anhō kē ty. Tokyx ã mē inhmā hipēx anē.

Anhÿr o kuhē. Kàx pē kām anhÿr o kuhē.

¹⁵ Nhūm tee ri mē kuma hāmri nē mē kām hprām xà hkôt mē kām Parapas mā ure. Nē pōristi hkwÿjē mā Jesus ã amÿnē nē mē kām:

—Tōe. Mē mamrī hwÿr tē nē htak hāmri nē kapôt ã mē hpar xà hā pika hwÿr o tē nē pī kahpa hā anhō. Anē.

Mē kot Jesus tak ã mē harēnh Matêwre 27.27-32; Juãw 19.2-3

¹⁶ Tā nhūm pōristijaja akupÿm ixkreja wÿr Jesus o axà nē amnhī wÿr hkwÿjē hā karō nhūm mē hwÿr agjē nē Jesus ã akuprō.

¹⁷ Hāmri nē kēp pahi hā hpēr o pikēnh kaxyw kām pahi hā mē ahkà nhīpēx nē hkrām haxà. Nom axtem nē akunī kamā mēmo mrō nhī te kot ronh kanēre pyrāk xwÿnhja nhūm mē kām hikāx nē hkrām haxà. Hāmri nē kēp ē kapa nē pahi hā mē ē kamrēk ò py nē kām haxà.

¹⁸ Hāmri nē kām:

—E apē Ijaewjē nhō pahi na ka. Anē.

19 Hāmri nē xatā axpēn pānhā hwÿr mra nē pī ho hkrāx pē htak nē hkuk kuhtō nē hā hpēr o pikēnh pē hā hpi-jaàm pyrā nē kutā hkōn krā ho hkrī.

20 Hāmri nē kēp pahi xē kapa nē akupÿm kām ê jaxà nē pī kahpa hā nhôr kaxyw ma o kato nē o tē.

21 Nom nhūm ra hirot tÿx nē nhūm mē tee ri omu hāmri nē mēhō kot ho ajuta kaxyw mē kot hkôt omunh o mōr xwÿnhjê kapi ho xa. Hāmri nē Sirēn nhō xwÿnh Simāw hkà htykreja pumu. Aresān mē Rupti wa hipêxà na pre. Nhūm htÿx hamakêtkati nē mē kutā krīm tē. Hāmri nhūm mē haē nē unē nē kām Jejus o ajuta kaxyw hā karō nhūm kām pī kahpaja mÿ nē mē hkôt o tē.

Mē kot pī kahpa hā Jejus nhôr ā mē harēnh

Matêwre 27.33-44; Rukre 23.33-43; Juāw 19.17-27

22 Nhūm mē ra kēn nhīxēt te kot mē hkrā hi pyrāk xwÿnhja wÿr Jejus o pōj. Mē kot kām “Korkot” anhÿr xwÿnhja wÿr. Mē pakapēr kām na htem Korkotja jarēnh o: “Mē hkrā hi xà” anē. Jakamā nhūm mē ra hwÿr o pōj.

23 Hāmri nē kot pī kahpa hā nhôr kaxyw wīhti hkwÿ ho mē mēmo mēhkanexà pē mīra ho ahkà. Kot ho kōm nē amnhī xà htÿx kām hamak kêt kaxyw hipêx nē kām kugō nom nhūm hkaga nē ho hkōm kêt nē.

24-26 Hāmri nhūm myt kaxkwa nhīpōk wÿr tē nhūm mē pī kahpata ā Jejus xi nē prek o ĩhkra ho htÿx nē hpar o htÿx. Nē hpānhā kaxyw kakwÿ nē kànhmā pī kahpa jarī nē kre kamā ām nē hity hpa. Nhūm Jejus kÿx pē amnhī xà htÿx kumrēx kamā hamak o ajēt. Nhūm pôristi hōja tē nē tapti hō py nē hā kagā ho:

IJA EWJÊ NHÔ PAHI NA JA
Hāmri nē Jejus wÿr ho api nē mÿ ri kunhō. Hāmri nhūm hparpē pôristi hkwÿja axpēn mā ê hkwÿ ho hpigrānh kaxyw hā kēnre ho jōka ho hkrī.

27-28 Tā nhūm mē wa kot amnhī tomnuj xwÿnh wa ho axkrut nē mā wa ho anē nē. Nē pī kahpa hā prek

o wa ĩhkra ho htÿx nē wa hpar o htÿx hāmri nē akutā ho Jejus nhījê nhūm wa ajēt.

29 Hāmri nhūm mē kot omunh mā mrar xwÿnhjaja Jejus pumu nē hā hpēr o pikēnh punuj nē hkrā ho apē nē kām:

—Kwa na ka pre ate Tirtūm mā amnhī jarēnh xà hā ixkre grānh par nē atā apkati axkrunēpxi nē akupÿm hipêx par ā amnhī jarēnh o apa. Nē axāhpumunh o axāhpumunh ā amnhī jarēnh o apa.

30 Jakamā e kwa amnhī kapa nē wrÿ pa mē ja hā apumu. E kwa tokyx. Anē.

31 Nē patre krāhtūmjê mē Tirtūm kapēr tūm o mē ahkre xwÿnhjaja piitā hwÿr mra nē hā hpēr o pikēnh o kuhē. Nē axpēn mā kapēr o:

—E jahti na xep pre mē kamā ukapri ho pa nē tanhmā mē ho ajuta hto ho pa. Tā tām tanhmā amnhī to nē wrÿk kêt nē.

32 Kwa pu mē arī pakuhē nē kot amnhī kaxàr nē wrÿk kām omu. Kojā wrÿ pu mē omu nē kēp mē panhō pahihti hā hkôt pajamaxpēr kurē kumrēx. E tokyx wrÿ Jejus pa mē awrÿk kām apumu. Nā kot kaj awrÿk rax nē. Anē.

Hāmri nhūm akutā wa kot hijê nē jēt xwÿnh wa haxwÿja kām kapēr punuj o ajēt.

Jejus htyk ā harēnh

Matêwre 27.45-46; Rukre 23.44-49; Juāw 19.28-30

33 Tā nhūm ra kaxkwa nhīpōk ri myt nhÿr mē nhūm te kamāt pyrāk. Nhūm kamāt kô rax kumrēx o ra hā awry mē nhūm akupÿm myt katêr o mō.

34 Hāmri nhūm Jejus àmra kamā Tirtūm mā kapēr nē kām:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kām kapēr o:

—Eri Eri rāmā sapatani. Anē.

35 Hāmri nhūm mē kot mar o kuhē xwÿnhjaja kot Eri hā harēnh ma nē htÿx ho finat Eris mā kapēr ā hkamnhix.

³⁶ Hāmri nhūm ja hprōt nē mēmo rereeti py nē pī ho hkanhwỳ nē o tē nē ho wīhti nhek nē Jejus wỳr o tē nē kot hkaôr kaxyw kām kupē. Hāmri nē hkwỳjē mā kām:

—E hāmri pu mē jar hkàx ã pakuhê nē Eris jamã măn. Kojã kuma nē hwỳr tē nē o wrỳ nà? Anē.

³⁷ Nom nhūm Jejus ra htyk kaxyw nē àmra htỳx nē ty.

³⁸ Hāmri nhūm Tĩrtũm mã amnhĩ jarēnh xà hã ixkre kamã hakwakre hã kupēxēja axkjê nē amnhĩ kahê xà mēnh kurê kumrēx. Utĩ rax tã kỳj rũm ahpar mã axkjê nē amnhĩ kahê xà mē. Te Jejus htyk o mē pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xà mēnh pyrāk o ã amnhĩ kaxônh anē.

³⁹ Nhūm pôristi krãhtũmjê hõja Jejus parpê kutã htyk kãm omunh o xa. Hāmri nē tee ri omu nē hamaxpēr o:

—Hêxta waa nē. ãm hāmri na pre hte kēp Tĩrtũm Kra hã amnhĩ jarēnh o pa. Tã pa mē amarĩ kupĩ. Anē.

⁴⁰⁻⁴¹ Rôm nhūm mēni kwỳjaja amỳm htyk kãm omunh o kuhê. Na pre htem Garirej kamã Jejus mē hkôt mē pa ho mē pa xwỳnhjê mã mē apkur xà hã àpēnh o mē hkôt pa nē mē hkôt Jerujarē hwỳr mō. Marir Matarēn nē Xiakre mē Jojes wa katorxà Marirja. Nē Sarome. Nē mãânēn mēni hkwỳjaja nhūm mē amỳm Jejus htyk kãm omunh o kuhê.

Mē kot Jejus jaxàr ã harēnh

Matêwre 27.57-61; Rukre 23.50-56; Juãw 19.38-42

⁴² Nhūm prem arĩgro pē sêsta hã Jejus pĩ nhūm ra amỳkry htỳx nē. Sap kukamã na pre htem Ijaewjaja amnhĩm apkur xà hã mēõ nhĩpêx pa nhūm sap kato nhūm mēmoj to anhỳr kêt nē.

⁴³ Jakamã nhūm Juje hõ pē Ari-matej nhõ xwỳnhja. Kēp Ijaewjê nhõ juisti hõ na pre. Nhūm mē piitã kãm hkĩnh nē axpēn mã mex o mex ã harēnh o pa. Na pre Tĩrtũm kot mē pahwỳr Jejus mēnh kôt hamaxpēr o

pa. Tã Jejus htyk ã omu hāmri nē hamaxpēr o:

—E pa ma pahi Pirat wỳr tē nē Jejus nhĩ hã kuwỳ. Inhmã uma htã kot paj ma hwỳr tē nē hã kuwỳ kē inhmã kugõ pa ma o tē nē tokyx haxà. Kot paj ho anhỳr tokyx anhỳr kêt nhūm mē panhõ arĩgromnu pē sapja wỳr ra myt axà hāmri pa haxàr kêt nē.

Anhỳr o hamaxpēr nē ma Pirat wỳr tē nē hã kuwỳ.

⁴⁴ Hāmri nhūm amnhĩ jaêr pē ra htyk ã harēnh ma nē amnhĩ wỳr pôristi krãhtũmjê hõ hã karõ nē hã hkukja nē kãm:

—Kwa xà na ra Jejus ty? Anē.

Hāmri nhūm kãm:

—Tỳ na ra ty. Anē.

⁴⁵ Hāmri nhūm kuma nē Juje mã kãm:

—Tõe. Mamrĩ ma o tē nē haxà. Anē.

⁴⁶ Hāmri nhūm kuma nē akupỳm Jejus wỳr tē nē pôristi mã anē nhūm mē kãm ho wrỳ. Nhūm kumỳ nē kupēxê ho hkupu hpa nē o tē nē kēn kre kakwỳnh kãm haxà. Hāmri nē kēn rax o hitom mex nē ma akupỳm krĩm tē.

⁴⁷ Nhūm Marir Matarēn mē Juje katorxà Marir õja wa ma hkôt tē nē kot haxàr kãm omunh o xa. Kot mē hkuxwa xà ho gregrer kêt rãhã haxàr kãm omu.

16

Jejus akupỳm htĩr ã harēnh

Matêwre 28.1-10; Rukre 24.1-12; Juãw 20.1-10

¹⁻² Tã nhūm apkati. Nom nhūm ra mē inhõ arĩgromnu pē sap kator jakamã nhūm mē kormã akupỳm kēnkreta wỳr mrar kêt nē. Hāmri arĩgro mex jamãr pē kôkôt o hkrĩ. Hāmri nhūm axte apkati nhūm tômĩk nhūm ra mē inhõ arĩgromnu hapêx nhūm Marir Matarēn mē Sarome mē Xiakre katorxà Marirja mē ma akupỳm kēnkreta wỳr mra. Kormã kwỳhtãã. Kormã myt kator o mōr mē nhūm mē kãnhmã hkrĩ hāmri nē mē kot Jejus gregrer kaxyw mē hkuxwa xà hkwỳ jamỳ nē ma hwỳr o mra.

³ Hāmri nē kormā mōr ri tee ri amnhī kukamā hamaxpēr nē axpēn mā:

—Xê gāà nē. Mēhō koja mē pamā nhām kēnkre nē hitom raxta xām pu mē Jejus wūr agjē nē gregrer? Utī rax kumrēx kēnā. Anē.

⁴ Hāmri nē hwūr pōj nē omu nhūm ra hitom xāja kàx ā nō nhūm mē tee ri omu. Utī rax tā ra kàx ā nō.

⁵ Hāmri nhūm mē kēnkre hwūr agjē nē upōk rūm mēhō nyw pumu. Nhūm ē jakajre kamā nhī nhūm mē amnhī jāer pē omu nē tee ri hamaxpēr.

⁶ Hāmri nhūm mē kām:
—Kwa mē amā ma hkēt nē. Mē ate Najare nhō xwūnh pē Jejus pumunh kaxyw na ka mē mra. Mē kot pī kahpa hā nhōr xwūnhta. Nom jar amrakati. Na ra Tirtūm akupŷm ho htīr. E mē kam nē amnē agjē nē ano ho nōr xà kaprŷ pumu

⁷ nē tokyx ma akupŷm mra nē hkōt mē pa ho pa xwūnhjē mā harē. Koja ma Jejus mē akukamā akupŷm Garirej wūr mō. Garirej kamā kot kaj mē axte axpēn pumu. Ra kot mē amā amnhī jarēnh xà hkōt. Kwa mē tokyx ma akupŷm mē hwūr mra. Nē kwa kē Simāw Pētreja harēnh mar mex nē. Anē.

⁸ Hāmri nhūm mē kuma nē awjanā nē ma akupŷm hprōt. Nē tee ri hamaxpēr nē kām ma xāj htertēt tŷx jakamā kormā nhām mēhō mā harēnh kēt nē.

Jejus kot Marir Matarēn wūr kator ā harēnh

Juāw 20.11-18

⁹ Nhūm semān nyw mā àr xà hā arīgro pē tōmīkja ā nhūm Jejus akupŷm htīr. Hāmri nē Marir Matarēn kumrēx wūr kato. Kot nē mēkarōmnuti ho 7 nē nē hanor xwūnhta kumrēx wūr kato.

¹⁰ Hāmri nhūm akupŷm htīr kām omu nē hkīnh tŷx kumrēx. Nē ma akupŷm tē nē Jejus krāmnhwŷjē mā harē. Nhūm mē hkaprī nē mŷr o hkrī nhūm mē hwūr axà nē mē omu nē mē kām:

¹¹ —Xê mē amŷr kēt nē. Na ra Jejus akupŷm htīr nē ham ixwūr kato pa

inhno ho omu. Xê mē hāmri axte amŷr kēt nē.

Anhŷr tā nom nhūm mē htŷx ho amnhī krā hkōt kot ri ā harēnh anhŷr ā hkamnhīx jakamā kuma nē ām kuma.

Jejus kot hkŷjē hwūr kator ā harēnh

Rukre 24.13-35

¹² Tā nhūm Jejus axte ja wa hwūr kato. Kōt mē pa ho pa xwūnh wa ho axkrut nē wa hwūr kato. Na pre wa Jerujarē rūm kato nē akupŷm wa ō krī hwūr mōr mē nhūm wa hwūr kato. Nom axtem tanhmā amnhī nhīpēx to nē wa hwūr kator jakamā nhūm wa tokyx hprī hā kēp Jejus ā omunh kēt nē.

¹³ Tā kēp Jejus ā omu hāmri nē akupŷm Jerujarē hwūr mō nē hkŷjē mā harēnh kurē kumrēx. Nom nhūm mē wa kuma nē ām wa kuma nē akupŷm htīr kōt hamaxpēr kēt nē.

Jejus kot hkŷjē mā mēmoj tā karō hā harēnh

Matēwre 28.18-20; Rukre 24.44-49; Juāw 20.19-23; määnēn Atre 1.6-8

¹⁴ Tā nhūm Jejus tā hkōt mē pa ho mē pa xwūnh pē 11 wūr kato nhūm mē kamā no puma nē hkīnh tŷx nē omunh o kuhē. Hāmri nhūm mē kām:
—Kwa hēxta waa nē. Marir Matarēn mē akwŷta mē kot akupŷm ixtīr kām ixpumunh nē mē amā ijarēnh tā ka mē ama nē ām mē ama. Pēr ām mē akrā hihtŷx jakamā na ka mē ama nē mē hkōt ajamaxpēr kēt nē. Anē.

¹⁵ Hāmri nē mē kot tanhmā kām amnhī nhīpēx to ho pa hā mē kām karō nē mē kām:

—E kēr ka mē ma krī piitā hkōt mē kām ijarēnh o ri mē hkōt apa. Ixte tanhmā mē nē amnhī nhīpēx toja ka mē aprī hā mē kām ijarēnh o ri mē hkōt apa.

¹⁶ Nē mē kot mē akapēr mar nē amnhī kaxyw ixkōt hamaxpēr xwūnhjaja kēr ka mē hkrā kumrā nhūm mē nhŷrmā Tirtūm mē wa ixri htīr tūm nē mex rāhā nē pa ho pa. No mē kot amnhī kaxyw ixkōt hamaxpēr kēt xwūnhjaja koja Tirtūm nhŷrmā

amnhĩ nê mẽ hano nhũm mẽ ma kuwy hwỳr pa.

¹⁷ –Nê amnhĩ kaxyw ixkôt mẽ ajamaxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tã inhỹ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nê.

¹⁸ Nê kot kaj mẽ nhỹri atỳx kagã xoprê hõ hpyr tã no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwỳ ho akôm tã no nhũm tanhmã mẽ ato hkêt nê. Nê inhỹ hã mẽ à xwỳnhjê hã mẽ anhĩhkra jaxwỳ nhũm mẽ akupỹm mex. Kot kaj mẽ amnhĩ kaxyw ixkôt mẽ ajamaxpêr xwỳnhjaja ã inhỹ hã amnhĩ nhĩpêx anhỹr o ri apa. Anê.

Jejus kot akupỹm kaxkwa hwỳr àpir ã harênh

Rukre 24.50-53; mããnênh Atre 1.6-11

¹⁹ Tã nhũm mẽ panhõ Pahihti Jejusja hkôt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỹm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upôk rũm nhỹ. Kot ãhkô hã mẽmoj piitã ho amnhĩptàr kaxyw hkrĩ ho hkrĩ.

²⁰ Hãmri nhũm hkôt mẽ pa ho pa xwỳnhjaja ma akupỹm àpir kãm omu hãmri nê anhgrà nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ãhkô hã pa ho pa. Nhũm mẽ ma ý hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

–Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ý hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapêr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jesus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jesus kôt hamaxpêr. Na pre kêp tôtô nê mẽ hkane ho pa. Nê Jesus nhỹ hã kapêr o pa xwýnhjê hõ pé Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jesus kot amnhĩ nhĩpêx to ho pa hã harê nê hã kagà.

Nê Jesus kêp Tirtũm nhỹ hã kapêr o pa xwýnh ã harê. Nê mẽ pahpyrà nê ĩ ho ĩ hã harê. Nê kêp mẽ pakamã ukaprĩ xwýnh ã harê. Nê kêp mẽ pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jesus jarê nê hã kagà anê. Nê mãânên mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jesus jarênh kaxyw. Na prem ra ohtô nê jar mẽ pahkôt Jesus kot amnhĩ nhĩpêx o pa hã kagà rax nê.

² Jesus nhỹ hã Tirtũm kapêr jahkre ho mẽ pa xwýnhjaja na prem Jesus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhĩpêx to ho pa hã kagà.

³ Tã pa mẽ harênh ma nê ijamaxpêr o:

—E kot paj ijaxwýja Jesus kot amnhĩ nhĩpêx kwý hã kagà. Nà kot paj ho anê.

Anhỹr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar tỳx nê

mẽ kot amã harênh xwýnhjê hkôt aja-maxpêr tỳx o apa. ãm hãmri na prem mẽ amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã urak nê kêp mẽ apê Ijaew nhõ patre na pre. Pahihti Eroxja kormã kot mẽ anhõ pika kamã mẽ ho amnhĩptar ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htàmnhwý.

⁶ Nê wa hamê na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx tỳx nê.

⁸ Jakamã nhũm Jakaris ma mẽ kot Tirtũm mã amnhĩ jarênh xà hã ixkre hwýr tẽ. Kwýjê pyrà nê kot Tirtũm mã tanhmã amnhĩ nhĩpêx to kaxyw ma mẽ hpãnhã hwýr tẽ nê axà.

⁹⁻¹⁰ Hãmri nê kamã Tirtũm mã amnhĩ jarênh pé kãm mẽ hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarênh o kuhê.

¹¹ Pu nhũm kaxkwa rũm Tirtũm kapêr o mẽ wrýk xwýnhja wrý nê Jakaris kutã xa. Mẽ hkuxwa xà ho xêt xà hã mêt kunĩhti xupok rũm xa.

¹² Hãmri nhũm amnhĩ jaêr pé amnhĩ kutã omu nê akryk omunh o xa.

¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mẽ nhũm kêp Juãw.

¹⁴ Koja kato ka wa omu nê akĩnh tỳx kumrêx. Nhũm akwýjaja haxwýja ohtô nê war akra jarênh ma nê war anhỹ hã hkĩnh nê.

15 Koja kormã akra kator kêt ri nhũm Tĩrtũm Karõja hkarõ hwỳr axà. Hãmri nhũm kato nẽ gaa nẽ hprêk nẽ Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mẽmoj to wĩhti ho hkõm kêt nẽ pa. Nẽ kagôxyhti ho hkõm kêt nẽ pa. ãm kwarĩ ho kwarĩ.

16 Koja hprêk hãmri nẽ mẽ apê Ijaew mã Tĩrtũm kapêr jarênh o mẽ hkôt pa. Nhũm mẽ ohtô nẽ kuma nẽ kot amnhĩ tomnuj kaga nẽ Tĩrtũm kôt amnhĩ xunhwỳ nẽ hkôt amnhĩ nhĩpêx mex o pa.

17 –Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harênh o pa. Te Tĩrtũm nhỹ hã kapêr jarênh xwỳnh finat Eris kot amnhĩ nhĩpêx pyrak o koja amnhĩ nhĩpêx. Nẽ urak nẽ Tĩrtũm Karõ nhỹ hã mẽ amã Tĩrtũm kapêr jarênh o mẽ akôt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kôt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kôt amnhĩ nhĩpêx anẽ. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anẽ.

18 Nhũm pre ã Tĩrtũm kapêr o wrỳk xwỳnh Jakaris mã hkrata jarênh anẽ. Hãmri nhũm tee ri kuma nẽ kãm:

–Kwa xà we ãm hãmri na ka ã inh mã ixkra jarênh anẽ nà? Ra ixprõ mẽ wa ijamẽ wa ixpigêx tỳx kênã kot pa kêt wa ixkra. Anẽ.

19 Hãmri nhũm kãm:

–Nà ãm hãmri na pa ã amã harênh anẽ. Ixpê Gapriew na pa ã awỳr ixwrỳk nẽ Tĩrtũm nhỹ hã amã harênh anẽ. Ixte Tĩrtũm nhĩhkô hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nẽ ã amã akra jarênh anẽ.

20 Tã ate ixkôt ajamaxpêr kêt jakamã kot kaj axte axumar kêt nẽ akapêr kêt rãhã nhũm akra kato. Koja kato ka rĩ kormã akupỹm akapêr nẽ akupỹm ama. Ate ixkôt ajamaxpêr

kêt jakamã kot kaj ã amnhĩ nhĩpêx anẽ nẽ rĩ amnhĩ pumu. ãm hãmri na pa ã amã ixkapêr anẽ. Anẽ.

Nhũm pre ã Tĩrtũm kapêr o wrỳk xwỳnhja Jakaris mã kapêr anẽ. Jakamã nhũm tokyx ixkre rũm kator kêt nẽ.

21 Hãmri nhũm ixkre kapem mẽ kuhê xwỳnhjaja tee ri kamã ama nẽ axpên mã:

–Tk. Kwa mo na we ri hitom kãm ho anhỹr kãm unẽ nẽ tokyx kator kêt? Anẽ.

22 Tã nhũm akupỹn mẽ hwỳr kato. Nẽ tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nẽ tee ri hkukamã hamaxpêr nẽ axpên mã:

–Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anẽ nà? Anẽ.

23 Hãmri nhũm Jakaris ixkre kamã mẽmoj tã àpênh pa hãmri nẽ ma akupỹm òrkwỹ hwỳr tẽ.

24-25 Tã nhũm hprõ Ijapewja htujarô. Hãmri nẽ amnhĩ tujarô hã amnhĩ pumu nẽ hkĩnh tỳx nẽ. Nẽ hamaxpêr o:

–Hêxta gàa nẽ. Ma ãm hãmri na pa pre ixkra hkêt nẽ amnhĩ kamã ixpijaàm o ri ixpa. Tã ra ixtujarô. Kot paj wa axte ri amnhĩ kamã ixpijaàm kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrêx. Anẽ.

Nhũm pre ã hamaxpêr anẽ hãmri nẽ arĩ òrkwỹ kamã hkrĩ ho hkrĩ. Aa nhỹhỹm kator nẽ mõi kêt rãhã hã mytwrỳ kêp 5.

Tĩrtũm kapêr o wrỳk xwỳnh kot Marir mã hkra jarênh

Matêwre 1.18-21

26 Tã nhũm Ijapew ra htujarô hã mytwrỳ kêp 6 nhũm Tĩrtũm axte kapêr o wrỳk xwỳnh pê Gapriewja mẽ. Nhỹri Garirej kamã krĩ pê Najare hwỳr kumẽ nhũm ma hwỳr wrỳ.

27 Mẽhõ pê Marir wỳr wrỳ. Nhũm ra Juje ho mjên kaxyw. No ãm kormã

hkukrit rāhā ho mjên kaxyw. Jujeja Marir pyrā nē kēp pahi finat Tawi kanrēhā htāmnhwý na pre.

²⁸ Jakamā nhūm Gapriew Marir wýr wrý nē kām:

—Pa Marir? E ot pa amā Tirtūm kapēr jarēnh kaxyw awýr wrý. Kot akôt pa ho pa jakamā koja ato mex rax kumrēx. Anē.

²⁹ Hāmri nhūm amnhī tā kuma nē tee ri hamaxpēr nē hamaxpēr o:

—Xē mēmo na we ri ā inhmā kapēr anē? Tanhmā koja we Tirtūmja ixto mex rax to? Anē.

³⁰ Hāmri nhūm Gapriew kām:

—Kwa tee ri amnhī kukamā ajamaxpēr kēt nē. Tirtūm kām ajapē.

³¹ Kot kaj atujarō nhūm akra kato nē myre. Ka hā hixi mē nhūm kēp Jejus.

³²⁻³³ Koja Tirtūm amā ho mex rax nē. Nē koja mē piitā mē kām kēp amnhī Kra hā ho amnhīrit. Nē mē apē Ijaew o amnhīptār kaxyw koja mē akaxyw ām nhūm higēt pahi Tawi pyrā nē mē ato amnhīptār o pa. Mē ate amnhī wýr kamā ajamak o apa xwýnhta koja. Tirtūm kām hprām xā hkôt koja mē ato amnhīptār rāhā ho pa. Anē.

³⁴ Nhūm pre ā kām kapēr anē nhūm amnhī tā kuma nē tee ri amnhī kukamā hamaxpēr hāmri nē kām:

—Xē gāà nē. Tanhmā kot pa kēt we amnhī to nē ixtujarō? Kormā ixkukrit nē mo kormā inhmjên? Mē. Xā Juje kot ixkamā hkra hkukamā na ka ā ri inhmā axujarēnh anē? Anē.

³⁵ Hāmri nhūm kām:

—Nā koja Tirtūm Karō tām tanhmā ato ka ý hā tanhmā amnhī to hkēt tā atujarō. Jakamā koja akra kēp Tirtūm Kraa.

³⁶⁻³⁷ Na ra haxwýja anā Ijapewja htujarō. Ra hpigēx týx nē aa hkra hkēt nhūm hkwyýjaja kot axpēn mā ōhy kamā hkra hkēt kumrēx ā harēnh o pa htā ra htujarō. Tirtūm kot tanhmā mē ho nhūm mē htujarō tanhmā kēp kute hkēt. Jakamā nhūm tanhmā ho nhūm mjên tām htu nhūm ra htujarō hā mytwrý kēp 6. Tirtūm tām kot mēmoj

piitā tanhmā ho kaxyw àhpumunh xihtýx. Jakamā koja urāk nē mā ato anē nē ka kormā akukrit tā atujarō. Anē.

³⁸ Nhūm pre ā Gapriew Marir mā kapēr anē nhūm amnhī tā kuma nē kām:

—Ko. Kē māmri kām tanhmā ixto hprām xā hkôt māmri tanhmā inhīpēx to. Inhmā Tirtūm kapēr kôt amnhī nhīpēx prām. Kē māmri kām tanhmā ixto hprām xā hkôt tanhmā inhīpēx to.

Anē nhūm kuma nē ma akupým api.

Marir kot Ijapew wýr mōr ā harēnh Rukre 11.27

³⁹⁻⁴⁰ Tā nhūm Marir amnhī tujarō hā amnhī pumu nē nā Ijapew wýr hkrā kurē kumrēx. Hāmri nē nojarēt nē ō krī rūm kato nē ma hwýr mō. Ma Ijapew papxā hwýr mō. Ijapew nhō krīja pika pé Jutej kamā nhýri hixēt kamā na pre. Nhūm ma hwýr mō hāmri nē hwýr pōj nē Ijapew wýr axā nē omu nē kām:

—Ka? Xā wa amex? Anē.

⁴¹ Hāmri nhūm kuma nē kām:

—Ý ma wa inhmex na pa wa ixpa.

Anhýrja kôt nhūm ōhy kamā hkraja haxwýja te kot Marir kapēr mar nē amnhī nhīpēx pyrāk o htu kamā àxōnh týx o nō. Hāmri nhūm Ijapew Tirtūm Karō nhý hā tanhmā Marir mā kapēr to.

⁴² Kax pé kām kapēr nē kām:

—Xē gāà nē. Ra Tirtūm kot ato mex jakamā na ka akīnh rax o mē inhni hkwyýjē jakrenh pa. Anhōhy kamā akraja koja Tirtūm amā ho mex rax nē.

⁴³ Xē mon ka ā ixto mex nē ixwýr amōr anē? Apē inhō Pahihti katorxā htā ixto mex nē ā ixwýr amōr anē. Hēxta gāà nē. Ām hāmri na ka ixwýr mō Marir.

⁴⁴ Na ka ixwýr mōn pōj nē inhmā akapēr hāmri nhūm ixto kamā ixkrare akapēr ma nē hkīnh xāj ixto kamā ixkamnār týx o nō.

⁴⁵ Na ka pre Tirtūm kapēr o wrýk xwýnh kot amā kapērja ma nē hkôt ajamaxpēr týx nē. Jakamā kot kaj

Tĩrtũm nhỹ hã akĩnh nẽ ajamakêtkati
nẽ amex nẽ ri apa. Anẽ.

*Marir kot Tĩrtũm mã mex o mex ã
grer ã harẽnh*

Rukre 6.20-26

⁴⁶ Hãmri nhũm Marir Ijapew kot ã
kãm kapêr anhỹrja ma nẽ kãm Tĩrtũm
mex o mex ã gre nẽ grer o:

Tĩrtũm na mex o mex.

⁴⁷ Kêp ixkaprĩ xwỹnh na.

Kêp ixkaprĩ xwỹnh jakamã na pa
inhmex nẽ ixkĩnh nẽ ri ixpa.

⁴⁸⁻⁴⁹ Ixte amnhĩ to grire nhũm ja hã
ixpumu nẽ ixkamã ukaprĩ nẽ
ixto mex rax kumrẽx.

Jakamã koja mẽ piitã axpẽn
kanrêhã axpẽn mã ijarẽnh rãhã
ho pa. Tĩrtũm kot tanhmã ixto
mex to hã ijarẽnh rãhã ho pa.

Tĩrtũm na mex o mex nẽ hihtỹx o
hihtỹx. Tã na ã inhĩpêx anẽ.

⁵⁰ Ma na hte ã amnhĩ nhĩpêx anẽ
nẽ axpẽn kanrêhã mẽ kot hã
hpijaãm xwỹnhjê pumu nẽ mẽ
kutã nojarêt rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipêx mex anhỹr o
pa.

⁵¹ Nẽ hihtỹx o hihtỹx jakamã na hte
mẽ kot amnhĩ to jarkrar o ri
mẽ pa xwỹnhjaja tanhmã mẽ
ho nhũm mẽ axkaprã.

⁵² Nẽ pahшти hkwỹ kot kapêr mar nẽ
ãm mar xwỹnhjaja.

Na hte amnhĩ tã mẽ omu nẽ
mẽ ãpênh nẽ mẽ hapôj nẽ
mẽ hpãnhã mẽ kot amnhĩ to
hkryre xwỹnh kwỹ jagjê.

⁵³ Na hte mẽ kãm kapêr kôt amnhĩ
nhĩpêx prãm xwỹnhjê ho mex o
pa nhũm mẽ mex nẽ pa.

No mẽ kãm hprãm kêt xwỹnhjaja
nhũm tanhmã mẽ ho mex to
hkêt nẽ.

⁵⁴⁻⁵⁵ ãm hãmri na pre amnepê mã mẽ
panhĩgêt mã amnhĩ jarẽnh xã
hkôt mẽ pahpê Apraãw rũm
axpẽn kanrêhã hkrajaja mẽ
pahto mex o pa.

Mẽ pahpê Ijaew mẽ pahte kãm
tanhmã amnhĩ nhĩpêx to ho

papa nhũm kãm mẽ pajapê xã
mẽ pahto mex rãhã ho pa.

Nẽ mẽ pakamã ukaprĩ rãhã ho pa.
Anẽ.

Nhũm pre ã Marir Ijapew mã Tĩrtũm
mex o mex ã grer anẽ.

⁵⁶ Hãmri nẽ ri hkôt pa hã mytwrỹ
axkrunêpxi nẽ ma akupỹm õ krĩ hwỹr
mõ.

Juãw Paxis kator ã harẽnh

⁵⁷ Tã nhũm Ijapew hpijagri kaxyw
õhy xã nhũm hkrare kato nẽ myre.

⁵⁸ Hãmri nhũm omu nẽ hkĩnh tỹx
nẽ. Hãmri nhũm hkwỹjaja Tĩrtũm kot
wa kamã ukaprĩ hã wa kãm wa hkra
myre nhõr ã harẽnh ma nẽ wa ÿ hã
hkĩnh nẽ.

⁵⁹ Tã nhũm wa hkraja ra hã arĩgro
pê 8 nhũm mẽ hkwỹjaja kot my
kwrỹt kã krãhyr kaxyw hwỹr akuprõ.
Tĩrtũm kot mẽ kãm hã karõ xã
hkôt nhũm mẽ kot kãm õr ã amnhĩ
to amnhĩrĩt kaxyw ã hipêx anhỹr
kaxyw. Na htem ã mẽ kêp Ijaew krajê
piitã mẽ hipêx anẽ. Jakamã nhũm
prem ã hipêx anẽ hãmri nẽ hpãnhã
tanhmã kot hã hixi mẽnh to kaxyw
ri hã axpẽn kukja. Hãmri nẽ hipêêxã
hkôt kot hã Jakaris mẽnh kaxyw.

⁶⁰ Hãmri nhũm katorxã tee ri axpẽn
tã mẽ kuma nẽ mẽ kãm:

—Ma koja kêp Jakaris kêt nẽ. Koja
kêp Juãw. Anẽ.

⁶¹ Hãmri nhũm mẽ tee ri kuma nẽ
kãm:

—Kokỹ. Mo jar mẽ pahtõ pê Juãw
kot kêt ri kêp Juãw? Jar amrakati kênã
kot ka kêt wa ri ã hã hixi rẽnh anẽ.
Anẽ.

⁶² Hãmri nẽ hixi hã hipêêxã kukja.
Nom nhũm arĩ umar kêt nẽ kapêr kêt
jakamã nhũm mẽ tanhmã ri kãm mẽ
ĩhkra nhĩpêx to.

⁶³ Hãmri nhũm ãhkra ho kagã hã
ahwỹ nhũm mẽ kãm ja gõ nhũm kupy
nẽ hã mẽ kãm hixi nhĩpêx. Nhũm
mẽ kupy nẽ omu hãmri nẽ hixi pê
Juãw kôt omu. Hãmri nẽ tee ri hixija
kukamã hamaxpêr.

⁶⁴ Rôm nhũm Jakaris akupỹm ama
nẽ kapêr mex kurê kumrẽx nẽ Tĩrtũm
mã mex o mex ã harẽnh o xa.

65-66 Hāmri nhūm mẽ omu nē ma mẽ piitā mẽ kām wa hkra jarēnh o ri axpēn kôt hprôt. Pika pē Jutej kamā hixēt kape hā krī hkôt nhūm mẽ ri mẽ piitā mẽ kām harēnh o hprôt. Tirtūm kot wa hkra kôt tãnopxar o pa nē ho mex ã harēnh o hprôt. Hāmri nhūm mẽ kuma nē tee ri hkukamā hamaxpēr nē axpēn mã:

—Hêxta waa nē. Tirtūm tãm na xep hte jare hkôt ri pa ho pa. Jakamā koja nhỹrmã hprêk hāmri nē tanhmã koja we amnhĩ nhĩpêx to ho pa wehee? Anē.

Jakaris kot Tirtūm nhỹ hã kapēr ã harēnh

67 Hāmri nhūm Jakaris Tirtūm Karō nhỹ hã Tirtūm mex o mex ã harēnh o xa. Tirtūm kot mẽ kêp Ijaew o mex ã harē nē mẽ kām:

68 Hêxta waa nē. Nà Tirtūmjia mex o mex. Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamā nhūm hte Tirtūm mẽ pahpê hkrajê kamā ukaprĩ nē mẽ pahto mex o pa.

E kwa pu mẽ kām mex o mex ã harēnh rãhã nē.

69 Ra kot mẽ pahwỳr mẽ pahkaprĩ xwỳnh pē mẽ panhō pahihtĩ mēnh mã. Ja kaxyw ãhpumunh xihtỳx o hihtỳx jakamā na pre ra mẽ pahwỳr mēnh ã amnhĩ jarē.

Koja kêp amnepêm Tirtūm mã tanhmã amnhĩ nhĩpêx to ho pa xwỳnh Tawija hkanrêhã htãmnhwỳ.

70 Amnepêm Tirtūm nhỹ hã kapēr xwỳnhjaja na prem mẽ kām Tirtūm kapēr jarēnh o pa nē mẽ kām:

71 “Koja Tirtūm mẽ panê mẽ kām mẽ pahkurê xwỳnhjê pumunh mex o pa.” Anē.

72 Tirtūm ra kot mẽ pahpãmjê mã amnhĩ jarēnh xà hkôt kām mẽ pakamã ukaprĩ rãhã ho pa hprãm.

Koja aa ja ho anhỹr o hamakêtkati hkêt nē.

73-75 Na pre ra mẽ pahpãm Apraãw mã mẽ pakukamã ã mẽ pahtã amnhĩ jarēnh anē nē kām: “Kot paj mẽ anê mẽ kām mẽ akurê xwỳnhjê pumunh mex nē mẽ ãhkra nē mẽ ato ixkato. Jakamã kot kaj mẽ amnhĩ kamã amã mẽ uma hkêt nē axãmnhĩx ri ajamakêtkati nē mẽ kamã apa. Nē kot kaj mẽ mãmrĩ axãmnhĩx ri inhmã tanhmã amnhĩ nhĩpêx to ho ri apa rãhã nē. Nē ixkôt amnhĩ nhĩpêx o ri apa rãhã ty.” Anhỹr o na pre Tirtūm mẽ pakukamã mẽ pahtã amnhĩ jarē. Anē.

Nhūm pre ã Jakaris mẽ kām Tirtūm kapēr jarēnh anē. Hāmri nē hkrareja my nē o xa nē kām:

76 —No ka Xugitre. Kot kaj aprêk hāmri nē apê Tirtūm maati nhỹ hã kapēr jarēnh o apa xwỳnh. Jakamã kot kaj Pahihti hkukamã mẽ piitã mẽ kām harēnh o ri mẽ hkôt apa. Mẽ kot amar nē kutêp tãm amnhĩ nhĩpêx kaxyw.

77 —Tirtūm kot mẽ nē mẽ kot amnhĩ tomnuj rēnh nē mẽ ho hkra hã harēnhja kot kaj mẽ hkôt mẽ kām harēnh o ri apa.

78 —Na hte Tirtūm mẽ pakamã ukaprĩ ho pa nē mẽ pakamã gryk tokyx anhỹr kêt nē. Jakamã koja mẽ pahwỳr mẽ pahkaprĩ xwỳnhja mẽ. Kormã mẽ pahwỳr wrỳk kêt jakamã te mẽ pahte kamãt kô kamã tee ri mẽ paxãhkupênh o ri papa xwỳnh pyrãk.

—Nom koja mẽ pahwỳr wrỳkja o te ra myt kator nē mẽ pamã hirã nē mẽmoj to amnhĩrĩt mex pyrãk o mẽ panhĩpêx. Ja kaxyw koja Tirtūm mẽ pahwỳr mẽ pahkaprĩ xwỳnhja mẽ nhūm man mẽ pahwỳr wrỳ nē mẽ pamã mẽ pahtyk puma xwỳnhjê mã Tirtūm kapēr o amnhĩrĩt o pa. Mẽ pahte mar nē ra pajamakêtkati nē paxãmnhĩx ri papa nē pahtyk kaxyw.

79 —Mẽ kām mẽ htyk puma xwỳnhjaja te kamãt kô kamã ri pa pyrãk. Tã koja mẽ pahkaprĩ xwỳnhja wrỳ hāmri nē tanhmã mẽ hkrã hto nhūm mẽ te arĩgro hã ri mẽ pa xwỳnh

kot amnhĩ nhĩpêx pyræk o amnhĩ nhĩpêx. Jao hamakêtkati nê axte kãm htyk pyma hkêt nê ri pa. Anê.

Nhũm pre ã Jakaris Tirtũm Karõ nhỹ hã hkrare mã kapêr anê.

⁸⁰ Tã nhũm Juãwja gaa nê aptâr. Nê Tirtũm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa.

Ã na pre Juãw kator nê amnhĩ nhĩpêx anhỹr o pa anê. Na pre kato nê hã mytwrỹ grêre hãmri nhũm Jejusja hkôt kato.

2

Jejus kator ã harênh

Matêwre 1.18-25

¹⁻² Na pre ã Jejus kator anê. Nhũm pre Rôm nhõ xwýnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwýja kot pika pê Sir kamã mẽ ho amnhĩptâr ri nhũm pahi Sesti Akus kot mẽ ho kôta kaxyw. Jakamã kãm ãpênh xwýnhjê mã kapêr nê mẽ kãm:

—E kêr ka mẽ ho kôta kaxyw nê mẽ piitã mẽ hixi hã kagã hpa. Anê.

³ Hãmri nhũm mẽ piitã ã kot mẽ hipêx anhỹr ã amnhĩ tã harênh ma hãmri nê mẽ kot mẽ hixi hã kagã kaxyw piitã akupỹm papxã hwýr ma hapêx.

⁴ Nhũm pre Marir mjên Juje haxwýja ma krĩ pê Perěj wýr mõ. Garirej kamã õ krĩ pê Najare rũm kato nê ma hwýr mõ. Pika pê Jutej kamã na Perějja. Kamã na pre Juje nhĩgêt Tawija kato.

⁵ Nhũm Juje kêp kanrêhã htãmnhwý jakamã na pre ma akupỹm hwýr mẽ hkwyjê hkôt mõ. Nê ma amnhĩ kôt kot ho hprõ mã xwýnh Marir o mõ. Arĩ htujarõ rax rãhã nhũm ma amnhĩ kôt o mõ.

⁶ Nhũm wa mõõ hãmri nê hwýr pøj. Nhũm Marir hpijagri xã hã mytwrỹ mã ãr jakamã nhũm kamãt nhũm õhy xã.

⁷ Nom nhũm Perěj wýr mẽ hpôx nyw xwýnhjaja ra ixkre piitã ho nýt

pa nhũm wa tee ri hpijagri kaxyw amnhĩ to ukapi ho pa. Hãmri nê nhỹri môx nhõrkwyõ punajre hwýr axã nhũm Marir kamã hpijagri. Nhũm hkra kato nê myre. Kra kot wa na pre. Hãmri nhũm kumý nê kupêxê ho hkupu hpa nê môx xãpkur xã hã kôsti kaprỹ kamã kuxi nhũm hamakêtkati nê gõr nê nõ.

ôwêhti jamãr xwýnhjê jarênh

⁸ Rôm nhũm ôwêhti jamãr o mẽ pa xwýnhjaja kapôt ã ri hkrit ôwêhti jamãr o pa. Nhũm ra kamãt nhũm mẽ hamãr o hkrĩ.

⁹ Pu nhũm kaxkwa rũm Tirtũm kapêr o wrỹk xwýnhja wrỹ nê mẽ mýri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhũm Tirtũm tãm ã mẽ hipêx anê. Hãmri nhũm mẽ tee ri jawý Tirtũm kapêr o wrỹk xwýnhja pumu nê kãm ma htyx nê akryk omunh o hkrĩ.

¹⁰ Hãmri nhũm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awýr wrỹ. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Kojã mẽ piitã ja jarênh ma nê mẽ apyrã nê hkĩnh nê pa.

¹¹ Na ra ham mẽ akamã ukaprĩ xwýnhhta kato. Pahi Tawi nhõ krĩ mẽ mẽ anhõ krĩ pê Perěj kamã. Kêp mẽ apiitã mẽ anhõ pahihti na. Mẽ ate amnhĩ wýr kamã ajamak o apa xwýnh pê Kris na. Tãm na ham kato.

¹² E pa ixprĩ hã mẽ amã tanhmã harênh to ka mẽ inhma. Na kato nhũm katorxã kupêxê ho kupu hpa nê kôsti kamã kuxi nhũm nõ. Kwa mẽ tokyx ma hwýr mra nê kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hãmri nhũm hkwyjaja wamta kôt ohtôõ nê mẽ hwýr wrỹ nê puhã harir. Hãmri nê Tirtũm mã mex o mex ã grer o harir.

¹⁴ Nê hã grer o:

Tirtũm maati na mex o mex.

Jakamã mẽ kãm hprãm xã kôt pix mã amnhĩ nhĩpêx o mẽ pa xwýnhjaja kojã amnhĩ tã mẽ

omu nê tanhmã mẽ ho nhũm mẽ hamakêtkati nê àmnhĩx hkĩnh nê pa ho pa.

15 Anhÿr o grer o harir hãmri nê ma akupÿm kaxkwa hwÿr àpir pa nê akunok. Hãmri nhũm ôwêhti jamãr xwÿnhjaja mẽ kapêr ma nê ma akupÿm àpir ã mẽ omu nê axpên mã:

—E tokyx pu mẽ krĩm nê Tĩrtũm kot mẽ pamã ho amnhĩrĩt xwÿnhhta japêr nê tokyx nhÿri omu. Kwa ma pu mẽ tokyx hwÿr nê omu. Anê.

16 Hãmri nhũm mẽ ma hwÿr mra. Hãmri nê krĩm agjê nê môx nhõrkwÿ wÿr agjê nê mẽ hkrareta pumu. Nhũm kôsti kamã nõ nhũm mẽ omu nê kuri Marir mẽ Juje wa omu.

17 Hãmri nê akupÿm hapôj nê ma mẽ piitã mẽ hkôt ri mẽ kãm harênh o pa. Ra Tĩrtũm kapêr o wrÿk xwÿnh kot mẽ kãm harênh xàja kôt nhũm mẽ ma mẽ kãm harênh o ri mẽ hkôt pa.

18 Nhũm mẽ amnhĩ jaêr pê mẽ kot harênh ma nê tee ri hkukamã hamaxpêr.

19 Nom nhũm Marir mẽ kot kãm hkrax rũm tanhmã hkra jarênh to xàta kukamã pix mã hamaxpêr rãhã ho pa.

20 Jakamã nhũm ôwêhti jamãr xwÿnhjaja ma akupÿm hkrit wÿr mra. Tĩrtũm kapêr o wrÿk xwÿnh ra kot mẽ kãm ujarênh xà hkôt nhũm mẽ kot Jejus pumunh jakamã ma akupÿm hkĩnh nê Tĩrtũm mã mex o mex ã harênh pê hã grer o akupÿm mra.

Mẽ kot Jejus ã hixi mẽnh ã harênh Matêwre 1.21; Rukre 1.31

21 Tã nhũm wa hkrareta ra hã arĩgro pê 8 nhũm mẽ hwÿr akuprõ nê kãm my kwÿt kà krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tĩrtũm mã õr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarô hkêr ri Tĩrtũm kapêr o wrÿk xwÿnh kot hkukamã kãm hixi jarênh xàja kôt nhũm mẽ hã hixi mẽ nhũm hixi kêp Jejus.

Mẽ kot Tĩrtũm mã Jejus nhõr pyrãk o hipêx

22-24 Tã nhũm Marir hpijagri ho hapêx. Jakamã nhũm Juje ma krĩ pê Jerujarê hwÿr mẽ kot Tĩrtũm mã amnhĩ jarênh xà hã ixkre hwÿr amnhĩ kôt o mō. Na pre ra finat Mojes amnepêm Tĩrtũm nhÿ hã mẽ hkukamã mẽ hpãmjê mã ja hã karō. Nê mẽ kãm hã karō ho:

Koja mẽ aprõ hpijagri. Hãmri nê hpijagri ho hapêx ka mẽ ma Tĩrtũm mã amnhĩ jarênh xà hã ixkre hwÿr o mra nê hpãnhã Tĩrtũm mã mẽmoj gō. Kãm tutre ho gō rÿ kãm tuuti hõ ho axkrut nê agō kê patre hamÿ nê kãm kupa. Kot ja hã omunh nê hpijagri xwÿnhhta akupÿm mex ã harênh kaxyw.

Anhÿr o kot mẽ kãm ja hã karō jakamã nhũm wa ma ã amnhĩ nhĩpêx anhÿr kaxyw hwÿr mō. Nê amnhĩ kôt Jejus mÿ nê o mō. Tĩrtũm kot mẽ kãm ja hã karō nhũm mẽ kot hã kagã xà hkôt. Na pre ra finat Mojes mẽ kãm ja jarê nê mẽ kãm:

Kot kaj mẽ akra my kot wa hãmri nê te mẽ ate Tĩrtũm mã õr kaxyw hipêx pyrãk o hipêx. Kê tãm amnhĩ nhĩpêx o pa nê ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarê hwÿr nojarêr nê amnhĩ kôt Jejus mÿ nê ma amnhĩ kôt o mō.

Simeãw kot Jejus kukamã harênh

25-26 Rôm nhũm Jerujarê kamã Simeãwja. Tĩrtũm Karō nhÿ hã kot tanhmã amnhĩ to mex to ho pa xwÿnh na pre. Na pre hte Tĩrtũm kapêr kôt pix mã tãm amnhĩ nhĩpêx o pa. Jakamã nhũm pre ra Tĩrtũm Karō ã kãm kapêr anê nê kãm:

—E inhma Simeãw. Kot kaj atĩr rãhã nhÿrmã Tĩrtũm kot mẽ akaxyw ãm mã xwÿnhja ka ano ho omu nê rĩ kormã ty.

Anhÿr o kãm kapêr jakamã nhũm kuma nê hkĩnh nê ãm pix kamã hamak o pa. Mẽ kêp Ijaew wÿr wrÿk nê mẽ ho mex mã xwÿnhhta pix kamã hamak rãhã ho pa.

²⁷ Jakamã nhũm Jejus katorxà mẽ hipêêxà purota wa Tirtũm mã amnhĩ jarẽnh xà hã ixkreja wỳr Jejus o axà nẽ kormã o xa. Finat Mojes kot mẽ kãm hã karõ xà hkõt. Hãmri nhũm Tirtũm Karõ mẽ hwỳr Simeãwja mẽ nhũm ma mẽ hwỳr tẽ nẽ axà.

²⁸ Hãmri nẽ wa hkrata pumu nẽ hkĩnh tỳx nẽ. Hãmri nẽ wa kệp kumỳ nẽ o xa nẽ hã Tirtũm mã mex o mex ã harẽ nẽ kãm:

²⁹⁻³² Pa Pahi Maati. E ot pa ixte amã tanhmã amnhĩ nhĩpêx to ho ixpa xwỳnh ã amnhĩ jarẽ.

Nà ãm hãmri na ka pre ã inhmã jare hkukamã harẽnh anẽ. Tã ate inhmã harẽnh xà hkõt pa ra inhno ho omu. Kệp mẽ ixkamã ukaprĩ xwỳnh ã omu. Nẽ kệp ate mẽ ixwỳr mẽnũh xwỳnh ã omu.

Nà koja te arĩgro hã myt hirã nẽ mẽmoj piitã ho amnhĩrit mex pyrãk o koja mẽ inhĩpêx o pa. Jakamã koja hprêk hãmri nẽ ma Ijaew kêt xwỳnhjê mã apê Tirtũm ã akapêr o amnhĩrit o pa nhũm mẽhprĩ hã ajarẽnh ma. Nẽ mẽ ixpê Ijaew kot paj mẽ ijaxwỳja kuma nẽ hã xpijaam o ri ixpa.

Jakamã kot paj ixamnhĩx ri tanhmã amnhĩ nhĩpêx to ho ri ixpa nẽ ixamnhĩx ty. Ra ixte inhno ho ate inhmã harẽnh xwỳnhhta pumunh kẽnã. Anẽ.

³³ Nhũm pre ã Simeãw Jejus jarẽnh anẽ. Nhũm katorxà mẽ hipêêxà purota wa amnhĩ jaer pẽ kot ã harẽnh anhỹrja mar o xa.

³⁴⁻³⁵ Hãmri nhũm Simeãw wa ho Tirtũm wỳ nẽ kãm:

—E Tirtũm. Kêr ka ja wa ho mex nẽ. Wa ho mex o wa ho mex rãhã ho apa. Anẽ.

Hãmri nẽ Marir mã kapêr nẽ kãm:

—Nà ãm hãmri na pre Tirtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nẽ ma Tirtũm kapêr o mẽ piitã mẽ ahkre ho ri mẽ hkõt pa. Nhũm mẽ kuma hãmri nẽ ahpỹnhã tanhmã hamaxpêr to xà hkõt tanhmã hipêx

to. Jakamã nhũm mẽ hkwỳjaja kuma nẽ hkõt amnhĩ xunhwỳ nẽ hkõt amnhĩ nhĩpêx o pa. Jao tãm hipêx o pa. No nhũm mẽ hkwỳjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipêx to. Jakamã kot kaj tee ri ja hã mẽ omu nẽ akaprĩ htỳx nẽ. Te mẽ kot wapo ho akanhwỳr nẽ akamã ho kaxkep nhũm apê omnuj tỳx pyrãk o kot kaj amnhĩ kamã ama nẽ mẽ omu. Anẽ.

ãnti kot Jejus pumunh ã harẽnh

Wam Ximotre 5.5

³⁶⁻³⁸ Rôm nhũm mẽhõ ni pẽ ãntija mẽ hwỳr axà nẽ Jejus pumu. ãntija Panuew kra na pre. Nẽ Ase hkwy na pre. Ni htã kệp Tirtũm nhỹ hã kapêr jarẽnh o pa xwỳnh. Na pre ra mjên no ãm kormã mjên nẽ pa hã amgrà pẽ 7 pix nhũm pre kệp ty. Hãmri nhũm axte mjên kêt nẽ pa rãhã ra hpigêx tỳx nẽ. Ra hã amgrà pẽ 84. Na pre hte Tirtũm mã amnhĩ jarẽnh xà hã ixkre hwỳr pa nẽ kãm amnhĩ jarẽnh rãhã ho pa. Nẽ kot kãm amnhĩ jarẽnh kaxyw nẽ apkur kêt rãhã kãm amnhĩ jarẽ. Nẽ arĩgro hã hwỳr pa nẽ kamãt kãm hwỳr pa. Á na pre hte amnhĩ nhĩpêx anhỹr rãhã ho pa anẽ. Jakamã mẽ hwỳr axà nẽ Jejus pumu nẽ hkĩnh nẽ. Hãmri nẽ hã Tirtũm mã mex o mex ã harẽ nẽ kãm:

—Hêxta gàà nẽ Tirtũm. ãm hãmri na ka mẽ ixwỳr Jejus mẽ. Ma amex o amex. Anẽ.

Hãmri nẽ Ijaew kot amnhĩ wỳr mẽ kamã ukaprĩ xwỳnh kamã hamak xwỳnhjê mã ra Jejus kator ã harẽnh o ri mẽ hkõt pa.

Marir mẽ Juje wa kot akupỹm Najare hwỳr mõi ã wa harẽnh

Matêwre 2.19-23

³⁹ Tã nhũm Marir mẽ Juje wa Tirtũm kapêr ã kagà htũm kõt Tirtũm mã amnhĩ jarẽnh xà hã ixkre kamã tanhmã amnhĩ nhĩpêx to hpa hãmri nẽ kato nẽ ma akupỹm mõi. Ma Garirej kamã õ krĩ pẽ Najare hwỳr wa ma akupỹm mõi.

⁴⁰ Tã nhũm wa hkrata ra wa kãm hprêkre ho mõi. Nẽ mex nẽ àhpumunh tỳx nẽ. Tirtũm kot tãnopxar nẽ mẽmoj

to kutã nojarêt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japêr ã wa harênh

Rukre 4.22

⁴¹ Nhũm pre hte Marir mẽ Juje wa amgrã mẽ hkwýjê hkôt ma Jerujarê hwýr pa. Mẽ kot arĩgro pé Pas ã hkĩnh kaxyw. Pas ã na hte mẽ kêp Ijaew amnepêm Tĩrtũm kot pika pé Ejit rũm mẽ hpãmjê katorja mã hamaxpêr kaxyw axpên wýr akuprõ nẽ hã hkĩnh. Jakamã nhũm wa ma mẽ hkôt hã hkĩnh kaxyw Jerujarê hwýr hkwýjê hkôt mõ.

⁴² Nhũm ra Jejus hprêk o mõ. Ra hã amgrã pé 12 jakamã nhũm wa ma amnhĩ kôt o mõ.

⁴³⁻⁴⁴ Tã nhũm mẽ hkĩnh pa hãmri nẽ akupým nojarêt nhũm Marir mẽ Juje wa ma hkwýjê hkôt akupým mõ. Nhũm Jejus Jerujarê kamã ahte arĩk nẽ akupým wa hkôt mõr kêt nẽ. Nhũm wa htýx wam ma hkwýjê hkôt htêm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkôt mõr o mõr ã ra hã kamãt. Hãmri nẽ mẽ kot amnhĩm hikranh xãja wýr mẽ hkôt pøj nẽ tee ri mẽ hkaêx ã hkra japêr o ri mra nom omunh kêt nẽ.

⁴⁵ Jakamã nhũm apkati nhũm wa awjanã nẽ ma akupým Jerujarê hwýr mõ nẽ kamã hapêr o ri pa.

⁴⁶ Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tĩrtũm mã amnhĩ jarênh xã hã ixkreja wýr hapêr o mõ nẽ hwýr axã. Hãmri nẽ omunh kurê kumrêx. Nhũm arĩ mẽ kot Tĩrtũm kapêr tũm o mẽ ahkre xwýnhjê mar o mẽ kutã nhỹ. Nẽ mẽmoj tã ri mẽ hkukja nẽ tanhmã mẽ kãm ujarênh to.

⁴⁷ Nhũm mẽ kot mar xwýnhjaja tee ri kapêr ã kuma nẽ àhpumunh týx ã omu hãmri nẽ akryk mar o hkrĩ.

⁴⁸ Hãmri nhũm Marir mẽ Juje mẽ hwýr axã nẽ mẽ kuri wa hkraja pumunh kurê kumrêx. Hãmri nhũm katorxãja hwýr tẽ nẽ kãm:

—Xê Jejus. Mon ka axtem nẽ ã ri amnhĩ nhĩpêx anẽ nẽ akupým wa ixkôt amõr kêt nẽ? Na pa wa mõ nẽ mẽ pahkwýjê hkôt pøj nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

⁴⁹ Hãmri nhũm amnhĩ tã wa kuma nẽ wa kãm:

—Tý. Nom Inhĩpêêxã nhõrkwý kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

⁵⁰ Hãmri nhũm wa kuma nẽ ã kot amnhĩ jarênh anhýrja kukamã tee ri hamaxpêr.

⁵¹ Hãmri nẽ mẽ ma akupým mõ nẽ Najare hwýr pøj nẽ kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxãja hkra x rũm mẽ kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptãr o mõ. Nẽ àhpumunh týx nẽ. Nhũm mẽ piitã ã kot amnhĩ nhĩpêx anhýr ã omu nẽ kãm hkĩnh nẽ. Nhũm Tĩrtũm haxwýja kãm hapê nẽ.

3

Juãw Paxis kot Tĩrtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihtĩ Tipeja mẽ ho amnhĩptãr o pa. Na pre ra mẽ ho amnhĩptãr ã amgrã pé 15. Nhũm Põn Piratja pahihtĩ Xipe mã pika pé Ijaew nhõ xwýnhjê ho amnhĩptã. Nhũm Eroxa kãm pika pé Garirej nhõ xwýnhjê ho amnhĩptã. Nhũm Erox tõ Firipja kãm pika pé Iturej nẽ hõ pé Takonĩt wa kamã mẽ pa xwýnhjê ho amnhĩptã. Nhũm Risãnja kãm pika pé Apirên kamã mẽ ho amnhĩptã. Nhũm Anas mẽ Kajpasja wa kêp Ijaew nhõ patre maati.

Rõm nhũm Jejus mẽ Jakaris kra Juãwja wa ra hamẽ anhĩpê àptãr. Jakamã nhũm Tĩrtũm tanhmã Juãw mã kapêr to. Kormã kapôt ã ri pa ri nhũm kãm kapêr nẽ kãm tanhmã kot

amnhĩ nhĩpêx to ho pa hã kãm karõ nê kãm:

—Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anê.

³ Hãmri nhũm kuma nê ma ri mẽ kãm kapêr jarênh o pa. Pyhti pê Jotãw mÿri mẽ piitã mẽ kãm harênh o ri pa nê hpãnhã ihkjê hã ri mẽ pa xwÿnhjê mã harênh o ri pa. Nê mẽ kãm:

—E kwa mẽ tokyx amã amnhĩ tomnuj kaga hprãm xaj tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuj o hapêx pa. Pa mẽ piitã mẽ kot mẽ apê Tirtũm kra hã mẽ apumunh kaxyw mẽ akrã kumrã.

Anhÿr o mẽ kãm kapêr o ri pa.

⁴⁻⁵ Na pre ra amnepêm mẽ hkukamã Tirtũm nhÿ hã kapêr o pa xwÿnh Ijais ra Juãw kukamã kot tanhmã amnhĩ nhĩpêx to hã harê nê hã kagã. Nê hã kagã ho:

Koja nhÿrmã mēhō mōn pōj. Kapôt ã mōn pōj nê mẽ kãm ujarênh o ri pa. Nê mẽ kãm ujarênh o: “E mẽ inhma. Koja Tirtũm tokyx mẽ pahwÿr mẽ panhō pahihtĩ mẽ nhũm wrÿ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mēhō kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm axpên nhĩpêx. Pahihtita kutêp. Mẽ pahte amnhĩ nhĩpêx te kot pry nhĩnur pyrãk nhũm mẽ tee ri kot kãm hã mrar mex prãm kaprÿ pyrãk. Hinur nê krã hakÿx nê pry juk pyrãk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nê tãm amnhĩ nhĩpêx. Nê tãm axpên nhĩpêx. Hãmri nê te mẽ kot pry nhĩnur o mex nê ho katat nhũm katat muux nê nōr pyrãk o kot kaj mẽ amnhĩ nhĩpêx. Pahihtĩ nywta kutêp. Kwa kêr ka mẽ ã amnhĩ nhĩpêx anê.

⁶ Kot kaj mẽ anê nhũm mẽ ohtô nê ja hã mẽ apumu hãmri nê mẽ apyrã Tirtũm kot mẽ ho hkra

kaxyw amnhĩ to kuwÿ.” Anhÿr o mẽ kãm ujarênh o pa. Anê.

Nhũm pre ã finat Ijaisja Juãw Paxis kukamã mẽ kãm ujarênh anhÿr o pa.

⁷ Jakamã nhũm àptãr nê Ijais kot ra hkukamã harênh xà hkôt ma Tirtũm kapêr o mẽ ahkre ho pa. Nhũm prem kuma hãmri nê kot mẽ hkrã kumrã kaxyw hwÿr amnhĩ to mra. Nhũm mẽ omu nê tanhmã mẽ ahkre hto. Nê mẽ kãm kapêr kãm hihtÿx nê mẽ kãm:

—Tk. Kwa kormã. Mẽ ate amnhĩ tomnuj pix o ri apa xwÿnh kênã. Xà kot paj mẽ ate amnhĩ tomnuj rãhã mẽ akrã kumrã nhũm Tirtũm ja hã mẽ apumu nhũm ja kãm mex nã? Nã koja ja kãm mex kêt nê. Koja ja mÿrapê nhÿrmã tanhmã mẽ anhĩpêx to ka mẽ tee ri umaj apimxur prãm kaprÿ.

⁸ —Na htem amnhĩ tomnuj kaga nê hpãnhã tãm amnhĩ nhĩpêx. Nê tãm ri axpên nhĩpêx. Jakamã e kwa mẽ ã amnhĩ nhĩpêx anhÿr o apa. No na ka htem atÿx ri ajamaxpêr o: “Mẽ ixpê finat Apraãw kanrêhã htãmnhwÿ jakamã koja Tirtũm ja hã mẽ ixpumu hãmri nê mẽ ixte amnhĩ tomnuj mÿrapê tanhmã mẽ ixto hkêt nê. Koja ãm mẽ ixto mex rãhã nê.” Anhÿr o atÿx ri amnhĩ kukamã ajamaxpêr o apa. Nom ja kot anhÿr kêt. Mẽ apê Apraãw kanrêhã htãmnhwÿ htã urak nê tãm amnhĩ nhĩpêx o apare hã. Kot ka mẽ apê kanrêhã htãmnhwÿ htã amnhĩ tomnuj o ri apa hãmri nê Tirtũm noo mã te mẽ apê pikap kênre nhĩkwÿ pix pyrãk.

⁹ —Na ra Tirtũm kot mẽ ate amnhĩ tomnuj mÿrapê tanhmã mẽ ato kaxyw. Koja mẽ anhĩpêx o te mēhō nhō mẽmoj pãr ô hkêt nhũm kot tee ri omunh hãmri nê krãhyr nê kuwy kamã mẽnh nê ho xêt par pyrãk o mẽ anhĩpêx. Jao amnhĩ nê kuwy hwÿr mẽ arênh pa ka mẽ kamã amnhĩ xà htÿx kamã ajamak rãhã ho ri apa. Anê.

Nhũm pre ã Juãw Paxisja mẽ kãm kapêr anê.

¹⁰ Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa xô wehe? Xà koja ã mẽ inhĩpêx anê? Kwa tanhmã kot paj mẽ

kot ã mē inhīpêx anhÿr pymaj amnhī nhīpêx to wehe? Anē.

¹¹ Hāmri nhūm mē kām:

—Nà kēr ka mē axpēn kām axukapri ho ri apa. Nē mē kēp amrakati xwÿnhjē mā amnhī kutā mēmoj nhōr o ri apa. Nē mē anhīnōhkā axkrut nē mēhō hinōkā hkēt xwÿnhjē mā ho pyxi nē agō nē pyxi nē ho arīk. Nē mē axàpkur xà ho anhōxÿ ho apa hkēt nē. Ām axāmnhīx ri mē kēp amrakati xwÿnhjē mā amnhī kutā mē kām mēmoj to hkryre nē agō. E kēr ka mē ã axpēn nhīpêx anhÿr o ri apa. Anē.

¹² Hāmri nhūm Rōm kām mē ò pahīhti mā mē piitā mē kēp kàxpore hkwy jamÿnh xwÿnhjaja mē urāk nē hwÿr mra. Kot mē urāk nē mē hkrā kumrār kaxyw hwÿr mra nē kām:

—No we mē pajaja? Tanhmā kot paj wem amnhī nhīpêx to? Anē.

¹³ Hāmri nhūm mē kām:

—Nà mē kajaja kēr ka mē Rōm nhō pahī kot mē amā mē ate mē kēp kàxpore hkwy jamÿnh jarēnh xà hkōt pix mā hamÿnh o ri apa. No mē atÿx ri amnhī krā hkōt amnhīm hkwy jamÿnh prām xāj mē kām hkre kamā ho rūnh nē mē kām harēnh o ri apa hkēt nē. Anē.

¹⁴ Hāmri nhūm hpānhā pōristi hkwyjaja hwÿr mra nē kām:

—Kwa no we mē pajaja? Tanhmā kot paj wem ri amnhī nhīpêx to ho ixa? Anē.

Hāmri nhūm mē kām:

—Nà kēr ka mē anhō pahīhti kot mē axàpēnh pānhā mē amā kàxpore nhōrta pix jamÿ nē ajamakētkati nē axāmnhīx ri ho amnhīm axujaprōr o ri apa. No mē akwyjaja kām apyama nē mē amā kàxpore nhōr prām xāj ri mē kām tanhmā amnhī pyma hto ho ri apa hkēt nē. E kēr ka mē ã amnhī nhīpêx anhÿr o ri apa. Anē.

Juāw Paxis kot tanhmā Jejus jarēnh to hā harēnh

Matēwre 3.11-12; Makre 1.7-8; Juāw 1.19-28; määnēn Atre 19.4

¹⁵ Nhūm pre ã Juāw Paxisja mē kām kapēr anē. Nhūm mē kuma nē htÿx

kēp Tirtūm kot mē pakaxyw ām mā xwÿnhta ã hkamnhīx.

¹⁶ Hāmri nhūm amnhī tā ã mē hamaxpēr anhÿr ã mē omu hāmri nē mē kām amnhī tā aprā nē mē kām:

—Nà pa hkēt. Na pa hte ām Tirtūm mā gō pix o mē hkrā kumrār o ri ixa. No koja tokyx ixpānhā Tirtūm kot mē pakaxyw ām xwÿnhta tām mē pahwÿr pōj. àhpumunh tÿx o kot ijakrenh jakamā na pa hte ām kukwak ri ixa nē hā ixiijaam o ri ixa. Tirtūm kot mē pakaxyw ām xwÿnhta koja mē awÿr Karō rē nhūm mē akaxwÿnh mā agjē ka mē ÿ hā tām ri amnhī nhīpêx rāhā ho ri apa. Nom kormā mē kot tām amnhī nhīpêx hkēt xwÿnhjaja koja ja hā mē omu hāmri nē mē hipêx o te kuwy kot mēmoj to kaxār par pyrāk o mē hipêx.

¹⁷ —Na htem pur kām harōj nhīkē nē ho grā nē hpānhā kahtwÿ. Nē kahuk pa hāmri nē hkapī nhūm kōk apē nē pryhka ho htor nē ho hapêx pa. Nhūm mē hy ho pa nē ixkre kamā gōj kām unhwÿ. Ja pyrā nē koja tokyx Tirtūm mē piitā mē kot tanhmā amnhī nhīpêx to ho pa hā mē omunh xà hkōt mē ho axkjē. Mē kot tām amnhī nhīpêx o mē pa xwÿnhjaja koja ma amnhī wÿr mē ho apī nhūm mē kuri mex nē hkīnh rāhā nē pa ho pa. No mē kot amnhī tomnuj xwÿnhjaja koja mē hkīnhā tanhmā mē hipêx to nhūm mē ma kuwy raxja wÿr pa nē kamā amnhī xà htÿx kamā hamak rāhā nē pa ho pa. Anē.

¹⁸ Nhūm pre ã Juāw Paxis Tirtūm kapēr o mē ahkre anhÿr o pa.

Juāw Paxis kot Jejus krā kumrār ã harēnh

Matēwre 3.13-17; Makre 1.9-11

¹⁹ Tā nhūm Ijaew nhō pahī Eroxa ra htō hprō pē Eroxis pytà nē ho hprō nhūm Juāw Paxisja harēnh ma nē ma hwÿr tē nē hā kām akir. No ām ja pix ã kām àkjēr kēt nē. Määnēn tanhmā kot amnhī tomnuj tÿx to ho pa hā kām akir.

²⁰ Nhūm amnhī tā kuma nē kamā gryk tÿx nē amnhī tā mē kām hā

amñnê nhũm prem unê nê haxà. Jao amnhĩ tomnuj tỳx nê.

²¹ Nom kormã mẽ kot haxàr kêt ri nhũm Juãw Paxis Ijaew kwỳjê krã kumrãr o xa. Rôm nhũm Jejusja hãmri tãm nhỹhỹnh hwỳr tẽ nê kot hkrã kumrãr kaxyw kãm anê nhũm kuma nê hkrã kumrã. Hãmri nhũm Jejus gôj rùm api nê kormã gô my ri Tĩrtũm mã amnhĩ jarênh o xa.

²² Pu nhũm kaxkwa axkjê nhũm kurũm Tĩrtũm Karõ te tuuti pyrà nê hwỳr wrỳk o tẽ nê ìkre hã xa. Hãmri nhũm kaxkwa rùm Tĩrtũm kãm kapêr nê kãm:

Pa? E apê Ixkra mex na ka. ãm hãmri na ka hte ixkanrêhã amnhĩ nhĩpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhĩxi hã harênh

Matêwre 1.1-17

²³ Tã nhũm Jejus Tĩrtũm mã kapêr o mẽ ahkre ho pa hkrax. Na pre ra hã amgrà pê 30 hãmri nê kãm ho hkrax.

E kot paj hpãnhã amã Jejus kukamã hpãmjê nhĩxi jarê Teopre. Ijaew-jaja na prem htỳx ho Juje kêp Jejus nhĩpêxà kumrêx ã hkamnhĩx nom kêp hipêxà kumrêx kêt ãm kêp hipêxà puro na pre.

Jejus kêp Eri htãmnhwỳ na pre.

²⁴ Nê Eri kêp Matat kra na pre.

Nê Matat kêp Rewi hkra na pre.

Nê Rewi kêp Mewki hkra na pre.

Nê Mewki kêp Jãnaj kra na pre.

Nê Jãnaj kêp axtem Juje hõ hkra na pre.

²⁵ Nê Juje kêp Matatis kra na pre.

Nê Matatis kêp Amõs kra na pre.

Nê Amõs kêp Naũ hkra na pre.

Nê Naũ kêp Eri hkra na pre.

Nê Eri kêp Nakai hkra na pre.

²⁶ Nê Nakai kêp Mate hkra na pre.

Nê Mate kêp axtem Matatis õ hkra na pre.

Nê Matatis kêp Semeĩ hkra na pre.

Nê Semeĩ kêp Juje hõ hkra na pre.

Nê Juje kêp Jotre hkra na pre.

²⁷ Nê Jotre kêp Joanãn kra na pre.

Nê Joanãn kêp Rej kra na pre.

Nê Rej kêp Joropape hkra na pre.

Nê Joropape kêp Saraxi kra na pre.

Nê Saraxi kêp Neri hkra na pre.

²⁸ Nê Neri kêp axtem Mewki hõ hkra na pre.

Nê Mewki kêp Axi hkra na pre.

Nê Axi kêp Kojã hkra na pre.

Nê Kojã kêp Ematã hkra na pre.

Nê Ematã kêp Erti hkra na pre.

²⁹ Nê Erti kêp Jojue hkra na pre.

Nê Jojue kêp Eries kra na pre.

Nê Eries kêp Jorĩ hkra na pre.

Nê Jorĩ kêp Matat hkra na pre.

Nê Matat kêp axtem Rewi hõ hkra na pre.

³⁰ Nê Rewi kêp Simeãw kra na pre.

Nê Simeãw kêp Juta hkra na pre.

Nê Juta kêp axtem Juje hõ hkra na pre.

Nê Juje kêp Janã hkra na pre.

Nê Janã kêp Eriakĩ hkra na pre.

³¹ Nê Eriakĩ kêp Merea hkra na pre.

Nê Merea kêp Mena hkra na pre.

Nê Mena kêp Matata hkra na pre.

Nê Matata kêp Natã hkra na pre.

Nê Natã kêp Tawi hkra na pre.

³² Nê Tawi kêp Jese hkra na pre.

Nê Jese kêp Opex kra na pre.

Nê Opex kêp Poas kra na pre.

Nê Poas kêp Sarã hkra na pre.

Nê Sarã kêp Nasõ hkra na pre.

³³ Nê Nasõ kêp Amĩnatap kra na pre.

Nê Amĩnatap kêp Amĩ hkra na pre.

Nê Amĩ kêp Ari hkra na pre.

Nê Ari kêp Erõ hkra na pre.

Nê Erõ kêp Pere hkra na pre.

Nê Pere kêp Juta hkra na pre.

³⁴ Nê Juta kêp Jako hkra na pre.

Nê Jako kêp Ijak kra na pre.

Nê Ijak kêp Apraãw kra na pre.

Nê Apraãw kêp Tera hkra na pre.

Nê Tera kêp Nako hkra na pre.

³⁵ Nê Nako kêp Jeruk kra na pre.

Nê Jeruk kêp Rakau hkra na pre.

Nê Rakau kêp Parek kra na pre.

Nê Parek kêp Epti hkra na pre.

Nê Epti kêp axtem Sara hõ hkra na pre.

³⁶ Nê Sara kêp Kajnã hkra na pre.

Nê Kajnã kêp Apaxat kra na pre.

Nê Apaxat kêp Sẽre hkra na pre.

Nê Sẽre kêp Noehti hkra na pre.

Nê Noehti kêp Ramek kra na pre.

³⁷ Nē Ramek kēp Metujarē hkra na pre.

Nē Metujarē kēp Enok kra na pre.

Nē Enok kēp Jarate hkra na pre.

Nē Jarate kēp Marerer kra na pre.

Nē Marerer kēp axtem Kajnā hō hkra na pre.

Nē Kajnā kēp Enos kra na pre.

³⁸ Nē Enos kēp Set kra na pre.

Nē Set kēp Atāw kra na pre.

Nē Atāw kēp Tirtūm kra na pre.

Tirtūm kot wam my pē Atāwja

pika ho hipêx jakamā te kēp hkra pyrāk.

Ā Jejus kukamā hpāmje nhīxi kot anhÿr.

4

Satanasti kot amnhī tā Jejus kamā hamak ā harēnh

Matêwre 4.1-11, 16.23; Makre 1.12-13, 8.33; määnēn Eprêw 2.18, 4.15

¹ Tā nhūm Jejus pyhti pē Jotāw rūm akupÿm ma mō. Hāmri nē Tirtūm Karō nhÿ hā mēmoj kutā amnhī to htÿx nē. Jakamā nhūm nhÿhÿm ma kapôt wÿr o mō

² nhūm Satanasti omu nē ma hwÿr tē nē ri hkôt pa. Kapôt ā ri hkôt hēx rom tanhmā kām nē ho pa. Kot mar nē Tirtūm kapēr nhîrôp ām prām xāj ma hkôt tanhmā kām kapēr to ho pa. Hāmri nē hkôt pa o hā arĭgro pē 40 nhūm Jejus kormā apkur kêt o hā arĭgro pē 40 nē hapêx nhūm ra kām prām tÿx nē.

³ Hāmri nhūm Satanasti kām:

—Kwa măn ka ra amā prām tÿx kumrēx nà? Nom xep apē Tirtūm Kra jakamā mēmoj tanhmā apē kute hkêt. Kwa kēn nhĭkwÿ mÿj mā anē kē amā pāwti hā amnhī jahkre ka aku nē tokyx ho amnhī xihtÿx. E kwa tokyx kām anē. Anē.

⁴ Hāmri nhūm kuma nē kām:

—Tk. Nā kot paj akapēr mar xā hkôt tanhmā amnhī nhĭpêx to hkêt nē. Kōja Tirtūm kām inhmā mēmoj nhōr prām nē inhmā mēmoj gō pa arĭ kormā kukrē. Kapēr ā kagā htūm kot ja jarēnh kot:

Na htem mē apkur xā pix kukwak ri htĭr nē pa hkêt nē. Na htem määnēn Tirtūm kapēr mar xā hkôt tanhmā ri amnhī nhĭpêx to ho pa ho htĭr nē mex nē pa. Anē.

Ā kapēr ā kagā kot ja jarēnh kot anhÿr jakamā kot paj amar xā hkôt ā ri amnhī nhĭpêx anhÿr kêt nē. Ām kwarĭ ho kwarĭ. Anē.

⁵ Nhūm pre ā Jejus Satanasti mā kapēr anē nhūm tee ri kuma hāmri nē hpānhā ma nhÿhÿm o mō nē nhÿri kÿx pē mēmoj prēēti nhĭmōk ā o xa. Hāmri nē kām pika piitā ahkre ho xa. Nē kām mē hikukrēx piitā ahkre. Kāxpore nē mēmoj piitā nhūm kām ahkre hpa nhūm anhĭpê omunh o xa.

⁶ Hāmri nhūm Satanasti kām:

—E măn ka kam ri mēmoj mÿj piitā omu. Piitā inhō na. Inhmā na pre Tirtūm piitā ōr pa. Kot paj inhmā mēhō mā ōr prām nē kām kugō.

⁷ Tā amā kot paj kugō. Jakamā e. Kwa tokyx ixkutā tēm nē inhmā inhmex o inhmex ā ijarē pa ama nē rĭ amā piitā ōr pa. E tokyx. Anē.

⁸ Hāmri nhūm kuma nē kām:

—Tk. Kot paj amā amex o amex ā ajarēnh kêt kumrēx. Ām kwarĭ ho kwarĭ. Amexti hā. Tirtūm kapēr ā kagā htūm kot ja nē kapēr kām hihtÿx kēnā. Kapēr kot:

Kēr ka mē ixkapēr pix ma. Nē ixkutā pix mā măn akōnkrā ho akrĭ nē inhmā inhmex o inhmex ā ijarēnh o rĭ apa. Kēr ka mē ā amnhī nhĭpêx anhÿr o rĭ apa.

Anhÿr o kot harēnh jakamā kot paj ri amā amex o amex ā ajarēnh kêt nē Satanasti. Anē.

⁹ Nhūm pre ā Jejus amnhī nē kām kapēr anē. Hāmri nhūm tee ri kuma nē hpānhā ma krĭ pē Jerujarē hwÿr o mō. Nē mē kot Tirtūm mā amnhī jarēnh xā hā ixkre hprēk nhĭmōk wÿr ho api nē kÿxpê hatur xā hā ām nhūm xa. Nhūm amnhī parpē kēn rūnh nhĭkwÿ pumunh o xa. Hāmri nhūm Satanasti kām:

—E apē Tirtūm Kra jakamā kwa ja rūm ahpar mā ajarĭ nē ma tē nē pikap

tēm. Koja Anhîpêêxà apumunh mex nê ka tanhmã amnhî to hkêt nê.

¹⁰⁻¹¹ Kapêr ã kagà htùm kot ja jarênh kot:

Tîrtùm koja kapêr o wrÿk xwÿnh mã ajarê ka ajarî nê ahpar mã tē nhùm mē kÿx pê amÿ nhùm mēmoj akà hyr kêt nê.

Ã kapêr ã kagà kamã ajarênh kot anhÿr jakamã e tokÿx ajarî nê ma tēn pikap ahto. Anê.

¹² Hâmri nhùm kuma nê kê axte amnhî tã kãm kapêr nê kãm:

–Tk. Kwa nà. Kot pa ri amar xà hkôt ã amnhî nhîpêx anhÿr kêt nê. Koja Tîrtùm tãm inhmã ijarî hã karô pa rî mar xà hkôt ijarî no kot pa ri amar xà hkôt ijarî hkêt nê. Tîrtùm kapêr ã kagà htùm kot ja jarênh kot:

Kêr ka mē amnhî krã hkôt amnhî tã ixkamã ajamak kaxyw inhîxi jarênh kôt tanhmã amnhî nhîpêx to hkêt nê.

Ã ja nê kapêr kot anhÿr jakamã ãm kwarî ho kwarî. Kot paj ri amar xà hkôt ã amnhî nhîpêx anhÿr kêt nê. Tãm kot inhmã ijarî hã karôre hã. Anê.

¹³ Nhùm pre ã Jejus Satanasti mã kapêr anê hãmri nhùm tee ri mēmoj piitã ho mar kaprÿ hãmri nê hkaga nê ma nhÿhÿm tē. Hãmri nê kot nhÿrmã axte hwÿr htēm nê kot mēmoj punuj o mar kaxyw kormã amnhîm hamâr o ri pa.

Jejus kot Tîrtùm kapêr o mē ahkre ho hkrax ã harênh

Matêwre 4.12-17; Makre 4.14-15

¹⁴ Tã nhùm Jejus ma akupÿm Garirej wÿr mō. Nê Tîrtùm Karô nhÿ hã àhpumunh tÿx nê hkwyjê mã kapêr jarênh o ri pa. Nhùm mē kuma nê piitã pikaja kamã axpēn mã tanhmã harênh to.

¹⁵ Na pre hte mē kot Tîrtùm kapêr o mē ahkre xà hã ixkre hwÿr agjê nê kamã mē ahkre ho hkrî. Nhùm mē piitã kuma nê kãm mar prãm nê. Hãmri nê axpēn mã mex ã harênh o ri pa.

Najare kamã mē kot Jejus kaga hã mē harênh

Matêwre 13.53-58; Makre 6.1-6; Juãw 1.11

¹⁶ Tã nhùm Jejus ma akupÿm krî kamã àptàr xàja wÿr ma mō. Najare hwÿr. Hãmri nê kamã pōj.

Nhùm Ijaew nhō arîgromnu pê sap kato nhùm Jejus ma mē hkôt Tîrtùm kapêr o mē ahkre xà hã ixkre hwÿr tē. Hãmri nê hwÿr axà nê mē kuri nhÿ. Hãmri nê kamã mē kãm Tîrtùm kapêr ã kagà htùm kamã harênh kaxyw kànhmã xa

¹⁷ nhùm mē omu nê kãm ja gō. Finat Ijais pê Tîrtùm nhÿ hã kapêr xwÿnh kot Tîrtùm kapêr kwÿ hã kagàja nhùm mē kãm kugō. Hãmri nhùm kupy nê kamã kormã Tîrtùm kot tanhmã mēmoj jarênh to hō japêr o xa. Nê kãm kato hãmri nê mē kãm kamã harê. Nom amnhî tã kamã mē kãm harênh o xa nê mē kãm:

¹⁸ Na pre ra Tîrtùm Karôja ixto ixàhpumunh tÿx nê mē kêp amrakati xwÿnhjê hwÿr inhmē pa ra mō. Ixte mē kãm mēmoj mex jarênh o ixpa kaxyw. Nê Satanasti kot amnhî kôt mē unhwÿr xwÿnhjê hwÿr nhùm pre mãânēn inhmē. Ixte mē nê Satanasti japôx o ixpa kaxyw. Nê mē kot hprî hã Tîrtùm kapêr mar kêt xwÿnhjê hwÿr nhùm pre mãânēn inhmē. Ixprî hã ixte mē kãm kapêr jarênh o ri mē hkôt ixpa kaxyw. Nê mē kot amnhî tomnuj o mē pa xwÿnhjê hwÿr nhùm pre mãânēn inhmē. Ixte mē nê mē kot amnhî tomnuj rênh pa nhùm mē hamakêtkati nê àmnhîx ri pa kaxyw. ã na pre Tîrtùm jajê piitã hwÿr inhmēnh anê pa ra man mōn pōj.

¹⁹ Nê amgrà ja kêp Tîrtùm kot mē ato mex xà hã amgràja nhùm ixte mē amã harênh o ixpa kaxyw na pre inhmē pa mōn pōj. Anê.

²⁰ Nhùm pre ã Jejus Tîrtùm kapêr ã kagà htùm kamã mē kãm amnhî jarênh anê. Hãmri nê akupÿm mē kãm kagàja gō nê ho mē ahkre kaxyw

akupÿm nhÿ nhÿm mē piitā omunh pē mar o hkrī.

²¹ Hāmri nhÿm mē kām tanhmā amnhī jarēnh to nē mē kām:

—E ra Ijais kot ā ixkukamā ijarēnh anhÿr xā hkôt na pa mē awÿr wrÿ nē mē anoo mā ā amnhī nhÿpēx anhÿr o hkrax. Anē.

²² Hāmri nhÿm mē amnhī jaēr pē ā kot amnhī jarēnh anhÿr ā kuma. Nē tee ri kuma nē axpēn pumunh pē hamaxpēr o hkrī. Jejus mē kurom āhpumunh tÿx nē kapēr mex tā nhÿm mē ām kēp amnhī kwÿ pix ā hkamnhÿx kām hihtÿx nē. Hāmri nē axpēn mā:

—Tk. Kwa kēp Juje hkra pix kēnā koja we ri ā amnhī jarēnh anē. Anē.

²³ Hāmri nhÿm amnhī tā mē kuma nē mē kām:

—Nā na ka mē ixte amnhī jarēnh ma nom ixkôt ajamaxpēr kēt nē. Jakamā axpēn mā ijarēnh o: “Tk. Kēp mē pahkaprī xwÿnh ro nhÿx jar mē panhō krī kamā aa mē pahte mēmoj pumunh kēt kwÿ tanhmā mē pamā hipēx to pu mē hā omu. Te ra kot krī pē Kapanau kamā mē kām mēmoj kwÿ ho anhÿrta pyrāk. Pu mē omu nē hkôt pajamaxpēr kurē kumrēx.” Anhÿr o ri axpēn mā ijarē.

²⁴ Koja nhām krī hō kamā mēhō kēp Tirtūm kapēr jarēnh xwÿnh ā amnhī jarē ka mē harēnh ma nē amā ma hwÿr amrar nē mar prām nē. No kēt jar mē panhō krī kamā ixpē mē anhÿō hā ā amnhī jarēnh anē ka mē amā inhmar prām kēt nē.

²⁵ —Kwa mē inhma. Amnepēm ko-
rmā finat Eris htīr ri na pre mē hā na wrÿk kēt ry rax nē. Jao hā am-
grā axkrunēpxi nē hkôt mytwrÿ pē 6. Nhÿm mē ō hkēt nē pa. Ra mē kēp mēmoj grā pa nē hapēx nhÿm mē kām prām tÿx kumrēx nē pa. Nhÿm mē kēp mē mjēn tyk xwÿnhjaja kām prām xāj hiroto o pa.

²⁶ Tā nom Tirtūm mē ho mex kaxyw mē hwÿr Eris mēnh kēt nē. Erisja mē urāk nē kēp Ijaew tā nhÿm Tirtūm kot mē ho ajuta kaxyw mē hwÿr mēnh kēt nē. Mē kot amnhī kaxyw Tirtūm

kôt hamaxpēr kēt jakamā nhÿm mē hwÿr mēnh kēt nē. Axtem Ijaew kēt xwÿnhjē hō hwÿr na pre kumē. Nhām Sitō kamā krī pē Sarep kamā mjēn htyk xwÿnhhta wÿr. Tokyx kot tanhmā ho mex to kaxyw. Jakamā nhÿm ma hwÿr mō nē tanhmā kām kapēr to nhÿm kuma nē amnhī kaxyw Tirtūm kôt hamaxpēr kurē kumrēx.

²⁷ —Nē finat Eriasti haxwÿja. Eris pyrā nē kēp Tirtūm nhÿ hā kapēr o pa xwÿnh tā amnhī kwÿ pē Ijaew tanhmā mē ho ajuta hto hkēt nē. Na prem ohtō nē hkā nhy nē hkro xapēr o pa. Jao ra omnuj tÿx nē. Tā nhÿm Tirtūm kot akupÿm mē ho mex kaxyw mē hwÿr Eriasti mēnh kēt nē. Amnhī kaxyw mē kot hkôt hamaxpēere hā. Ām Sir nhō xwÿnh Namāja pix na pre Tirtūm Eriasti mā anē nhÿm akupÿm ho mex. Kēp Ijaew kēt tā nhÿm akupÿm ho mex. Tā ja pyrā nē na pa ām mē kot amnhī kaxyw ixkôt hamaxpēr pix xwÿnhjē mā tanhmā amnhī nhÿpēx to ho ri ixpa. No mē ate amnhī kaxyw ixkôt ajamaxpēr kēt xwÿnhjē mā tanhmā ri amnhī nhÿpēx to hkēt nē. Anē.

Nhÿm pre ā Jejus mē kām amnhī jarēnh anē.

²⁸ Hāmri nhÿm mē kuma nē kamā gryk tÿx nē axpēn mā hā amÿnē nē axpēn mā:

—Tk. Kwa pu mē ixkre nē kator nē ma o tē nē kupī ri. Anē.

²⁹ Hāmri nē kaxyw kànhmā kuhē hpa nē hwÿr hprôt nē unē. Mē kot ma o htēm nē hixēt prēk jatur xā hā hkujaêk nhÿm ahpar mā tēn htēm nē htyk kaxyw. Mē ō krīja hixēt prēk nhīmōk ā na pre. Jakamā nhÿm prem unē nē hatur xāta wÿr o tē.

³⁰ Tā nom nhÿm tanhmā amnhī nhÿpēx to nē mē kēp akunok nē hpānhā nhām ma tē nhÿm mē tee ri hapēr nom nhÿri omunh kēt nē.

*Jejus kot mēhō nē mēkarōmnuti ka-
to ā harēnh*

Makre 1.21-28

³¹ Tā nhÿm Jejus ma akupÿm Garirej kamā krī pē Kapanau hwÿr mō. Nhÿm mē ō arġromnu pē sap

kato nhũm ma mẽ kot Tirtũm kapẽr o mẽ ahkre xà hã ixkre hwỳr tẽ nẽ mẽ ahkre ho nhỹ.

³² Hãmri nhũm mẽ kot mar o hkrĩ xwỳnhjaja kuma nẽ kãm mar prãm nẽ. Nẽ axpẽn mã:

–Hêxta waa nẽ. ãm hãmri na ã mẽ pamã kapẽr anẽ. Ahpumunh tỳx xà hkõt na hte ãm hãmri mẽ pamã awjarẽ. Anẽ.

³³ Nhũm mẽhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nẽ mẽ ãhkõ hã Jejus mar o nhỹ nẽ ra àmra kamã tanhmã kãm kapẽr to. Nom nhũm tãm kãm kapẽr kêt ãm kamã mẽkarõmnutija kãm kapẽr.

³⁴ Nẽ kãm:

–Pa? Jejus pẽ Najare nhõ xwỳnh? Nà ate mẽ ixto ajapêx par kaxyw na ka mẽ ixwỳr mõ. Ra ixte apumunh mex kênã. Apê Tirtũm kot mẽ ixwỳr amẽn h xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõ? Anẽ.

³⁵ Hãmri nhũm kuma nẽ mẽkarõmnuti kot kãm ã kapẽr anhỹr ã omunh kurẽ kumrẽx. Jakamã kutã kãm kapẽr nẽ kãm:

–Tk. Kwa anhĩkrẽ nẽ kęp akato. Anẽ.

Hãmri nhũm kuma nẽ myta o pika kura nẽ kęp kato nẽ ma tẽ. ãm ho pika kuranh pix nhũm nõ. Hãmri nẽ akupỹm kãnhmã nhỹ nẽ akupỹm mex.

³⁶ Hãmri nhũm mẽ piitã omu nẽ kamã no pyrna nẽ. Hãmri nẽ axpẽn mã:

–Kokỹỹ. Na hte Jejus amnhĩ krã hkõt àhpumunh tỳx xà hkõt mẽkarõmnuti mã kapẽr nẽ mẽ hano nhũm htem kuma nẽ mẽ kęp hapõx kurẽ kumrẽx. Anẽ.

³⁷ Hãmri nhũm mẽ mẽõ pika kamã piitã ri axpẽn mã harẽnh o pa.

Jejus kot Simãw Pẽtre xupãnhgêx o mex ã harẽnh

Matêwre 8.14-15; Makre 1.29-31

³⁸ Tã nhũm Jejus Tirtũm kapẽr o mẽ ahkre xàja rũm kato nẽ ma Simãw Pẽtre nhõrkwỹ hwỳr tẽ. Nẽ mẽ hwỳr

axà nhũm Simãw Pẽtre omu nẽ kãm upãnhgêx tanhmã kute hã harẽ nẽ kãm:

–Kwa Pahihti. Tẽ nẽ inhmã ixupãnhgêx pumu. Na hkà kagro htỳx nẽ amnhĩ to àpêr o nõ. Kwa tẽn inhmã omu. Anẽ.

Hãmri nhũm kãm:

–Tõe. Nà kot paj amã omu. Anẽ.

³⁹ Hãmri nẽ hwỳr tẽn kuri xa nẽ kãm:

–Pa? E kwa akà hakry. Anẽ.

Hãmri nhũm kuma nẽ hkà hakry nẽ akupỹm hihtỳx kurẽ kumrẽx. Hãmri nẽ kãnhmã nhỹ nẽ mẽ kãm mẽõ hã àpẽn h o ri mra.

Jejus kot mẽ ho ohtõ nẽ mẽ ho mex ã harẽnh

Matêwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jejus wỳr ahpỹnhã ri mẽ à xwỳnhjẽ ho mra. Nhũm amnhĩ wỳr mẽ omu hãmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa.

⁴¹ Nhũm ra mẽkarõmnuti mẽ hkwyjẽ hwỳr agjẽ nhũm mẽ kurũm mẽ hano nhũm mẽ tee ri amnhĩ tã omu nẽ mẽ kęp hapõx kurẽ kumrẽx. Hãmri nẽ mẽ kęp hapõx kaxyw nẽ àmra kamã kãm kapẽr nẽ kãm:

–Kwa tanhmã kot pa wem amnhĩ nẽ ato? Hêxta waa nẽ. Apê Tirtũm Kra hã axàhpumunh tỳx kênã.

Anhỹr o kãm kapẽr. ãm hãmri na prem ã harẽnh anẽ. Kęp Tirtũm kot mẽ pakaxyw ãm xwỳnh kênã. No nhũm Ijaew nhõ pahijaja kot mẽ kapẽr mar nẽ kęp mẽkarõmnuti hkwy hã hkamnhĩx pymaj nhũm Jejus amnhĩ nẽ mẽ kãm kapẽr nẽ mẽ kãm:

–Kwa mẽ ri ã ijarẽnh anhỹr kêt nẽ.

Anhỹr o mẽ kãm kapẽr hãmri nẽ mẽ hano nhũm mẽ hapõj nẽ ma mra.

Mẽmo kaxyw Tirtũm kot mẽ pahwỳr Jejus mẽnh ã harẽnh

Makre 1.35-39

⁴² Tã nhũm apkati nẽ myt kator grire nhũm Jejus kot Tirtũm mã amnhĩ jarẽnh kaxyw kãnhmã nhỹ nẽ kato nẽ ma nhỹhỹm kapõt mã tẽ. Hãmri nhũm krĩ nhõ xwỳnhjaja hkrã

hapôj nê tee ri hapêr nê ma hkôt hpri jakop o mō. Nê nhÿri hwÿr kato nê omu hāmri nê ma nhÿhÿm mōr nê kurê nê kām:

—Kwa Jejus. Kêr ka tokyx ma nhÿhÿm amōr kêt nê. Kritpê mē ixkôt axkamē mān. Anê.

⁴³ Hāmri nhÿm mē kuma nê amnhÿ tã mē kām:

—Nà kot paj kritpê mē akôt ix-pikamēnh kêt nê. Kot paj ma krÿ piitã hkôt ri Tÿrtÿm kapêr o mē ahkre ho ri mē hkôt ixpa. Tÿrtÿm kot tanhmã mē ho hkra hto hã harēnhja kot paj mē hkôt ri mē kām harēnh o ri ixpa. Ja kaxyw na pre Tÿrtÿm mē awÿr inhmē. Anê.

⁴⁴ Nhÿm pre ã mē kām amnhÿ jarēnh anê. Hāmri nê mē kêp kato nê ma Ijaew nhō pika piitã hkôt Tÿrtÿm kapêr o mē ahkre ho ri pa. Ijaew nhō Tÿrtÿm kapêr o mē ahkre xã hã ixkre kamã mē piitã ho mē ahkre ho ri pa.

5

Jejus kot amnhÿ kôt mē hkwÿjê hwÿr ã harēnh

Matêwre 4.18-22; Makre 1.16-20

¹ Tã nhÿm Jejus ma gô rax pê Jenêjare hwÿr mō. Hāmri nê hwÿr pôj nê gô mÿri Tÿrtÿm kapêr o mē ahkre ho xa nhÿm mē ohtô nê pu hã mar o kuhê. Nê kot hprÿ hã mar nê hkôt omunh kaxyw hã axpên nhÿgãnh o kuhê.

² Hāmri nhÿm tee ri amnhÿ tã mē omu nê amnhÿ pu hã hakêx nê rÿt nê gôx kām pâr kaprÿ hamêxkrut nê jêtja wa omu. Nhÿm ò dôn wa gôx kām kryhti kuhōnh o xa. Nhÿm pâr hamê hkaprÿ nê ajêt nhÿm Jejus omu.

³ Hāmri nê hwÿr tē nê hōm axà nê ò dôn pê Simãwja mã anê nhÿm hkôt axà nê kii mē kêp pârja amÿm kunhō nhÿm ajêt. Hāmri nhÿm pâr kre rÿm amÿm mē ahkre ho nhÿ nhÿm mē piitã omu nê mar mex o kuhê.

⁴ Tã nhÿm mē ahkre hpa nê Simãw mã kām:

—E gô xupÿm wÿr anhō pâr o axkamē nê axte anhō kryhti mē nê ho amnhÿm tep kwÿmnê. Anê.

⁵ Hāmri nhÿm tee ri kuma nê kām:

—Kwa na pa mē ra kamât kām tee rēnh o apkati nê ho hōmnēnh kêt tã ka ri inhmã anê. Nom kot paj amar xã hkôt kop kumē. Anê.

⁶ Hāmri nê upÿm wÿr pâr o axkamē nê htō Andre mē wa axte kryhti mē. Nê ãm mēnh tipxi htã ho tep pynēnh rax kumrêx. Jakamã nhÿm kryhtija ra pikaxōnh kaxyw.

⁷ Hāmri nhÿm wa tee ri ho anê nê amnhÿ wÿr pâr ò ho mrrar xwÿnhta wa kām akir. Jepetew kra Juãw mē Xiakreja wa nhÿm wa amnhÿ wÿr wa kām akir nhÿm wa hwÿr pâr ò ho tē hāmri nê mē kryhti hã hije nê pâr wÿr ho api. Hāmri nê pârta hamē tep o ho nyt pa nê hamē ho hipu mex nê. Jao nhÿx gōnh mã wa axà.

⁸⁻¹⁰ Hāmri nhÿm mē amnhÿ jaêr pê tep xohtô raxta pumu nê kamã no puma nê. Hāmri nhÿm Simãwja Jejus kutã hkōn krã ho tēm nê hipô nê nhÿ nê hã hpijaàm kamã kām kapêr nê kām:

—Kwa Pahihti. Kii tamÿ axkamē. Akÿnhã ixte amnhÿ tomnuj tÿx xwÿnh na pa. Anê.

Hāmri nhÿm kuma nê ãm kuma nê kām:

—Kwa nà tee ri amnhÿ kukamã ajamaxpêr kêt nê. Kot kaj jarãhã hpãnhã tãm amnhÿ nhÿpêx o apa. Na ka ra tep pynēnh rÿnh o apa. Tã kot kaj ja kaga nê hpãnhã ma ri mē hkôt Tÿrtÿm kapêr o mē ahkre ho ri apa. Kojã mē ohtô nê ama nê Tÿrtÿm kôt amnhÿ xunhwÿ nê hkôt amnhÿ nhÿpêx o pa. Jakamã kot kaj te ate tep pynēnh rÿnh nê Tÿrtÿm mã òr pyrãk o amnhÿ nhÿpêx o apa. Anê.

Nhÿm pre ã Jejus Simãw mã kapêr anê.

¹¹ Hāmri nhÿm mē gô jakàx ã pâr janhōr tÿx nê kamã hikukrêx piitã hkaga hpa nê ma Jejus kôt pa ho pa.

Jejus kot hkà nhy kro tÿx xwÿnh o mex ã harēnh

Matêwre 8.1-4; Makre 1.40-45

¹² Tã nhÿm Jejus ma krÿ hō hwÿr mō. Hāmri nhÿm mēhō my hkà nhy hkro htÿx xwÿnhja omu nê hwÿr tē nê hã hpijaàm kaxyw kutã hkōnkrã ho nhÿ nê kām:

–Pa Pahihti. E ot pa awÿr amnhĩ to tẽ. Kwa akupÿm ate mẽ ixto mex kaxyw axàhpumunh tÿx jakamã kot ka akupÿm amã ixto mex prãm nẽ mãmrĩ akupÿm ixto mex. Anẽ.

¹³ Hãmri nhũm kuma nẽ hkà punuti hã ìhkra xi. Amnhĩ kamã kahak kêt nẽ hã ìhkra xi nẽ kãm:

–Nà kot paj ato mex. E akupÿm akà mex kurê kumrẽx.

Anhÿrja kôt hãmri nhũm hkàja akupÿm mex pa.

¹⁴ Hãmri nhũm Jejus kãm:

–E kër ka amnhĩ tã akwÿjê mã tanhmã ijarẽnh to hkêt rãhã ma patre hwÿr tẽ kè akupÿm akà mex ã apumu. Hãmri ka amnepêm Mojes kot mẽ ate akupÿm amex ã Tirtũm mã tanhmã amnhĩ nhĩpêx to hã karõta ka kãm ho anẽ. Kè mẽ mẽ piitã akupÿm akà mex ã apumu. Anẽ.

Hãmri nhũm kuma nẽ kãm:

–Tõe. Nà kot paj anẽ. Anẽ.

Hãmri nẽ ma hwÿr htẽm kurê kumrẽx.

¹⁵ Hãmri nhũm mẽ piitã axpẽn mã Jejus jarẽnh o ri hprõt nhũm mẽ kot kapër mar kaxyw ma hwÿr mra. Nẽ mẽ à xwÿnhjaja nhũm kot mẽ ho mex kaxyw nhũm mẽ hwÿr amnhĩ to mra.

¹⁶ Jakamã nhũm pre hte Jejus tõhã mẽ kèp hapôj nẽ ahte ma kapôt ã Tirtũm mã amnhĩ jarẽnh kaxyw mra. Nẽ kãm amnhĩ jarẽnh pa hãmri nẽ ma akupÿm mẽ hwÿr mra.

Jejus kot ã kamã htyk xwÿnh o mex ã harẽnh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtũm kapër o Ijaew jahkre ho pa. Jakamã nhÿri mẽhõ nhõrkwy kamã ho mẽ ahkre ho xa nhũm Parijew nhõ xwÿnhjê mẽ Tirtũm kapër tũm o mẽ ahkre ho mẽ pa xwÿnhjaja kot mar kaxyw ma hwÿr mra. Na pre ra Garirej rũm mẽ hkwÿjaja ma hwÿr mra. Nẽ pika pè Jutej rũm mẽ hkwÿ haxwÿja ma hwÿr mra. Nẽ krĩ pè Jerujarẽ rũm. Æ na prem ohtõ nẽ krĩ piitã kurũm kot mar kaxyw hwÿr akuprõ nhũm mẽ ahkre anẽ. Nẽ Tirtũm kot ho àhpumunh

tÿx jakamã nhũm ÿ hã akupÿm mẽ à xwÿnhjê ho mex.

¹⁸ Hãmri nhũm hkwÿjaja ã kamã htyk xwÿnh mÿ nẽ Jejus wÿr o tẽ. Nõr xà kamã nõr rãhã nhũm mẽ hã hije nẽ hwÿr o tẽ. Hãmri nẽ tee ri kot hwÿr ho àr kaxyw ri mẽ hkupu ho pa.

¹⁹ Nom nhũm mẽ ra ixkre ho nÿt rax jakamã nhũm mẽ tee ri amnhĩ kukamã ho ukapi ho ri pa. Hãmri nẽ ra hamaxpër nẽ ixkre nhĩmõk po hwÿr ho api nẽ ixkre nhĩmõk kwÿ grã nẽ hkôt ã kamã htyk xwÿnhhta jaxã. Nõr xà kamã nõr rãhã Jejus wÿr haxã nẽ mẽ hipòk ri ho wrÿ nẽ kutã kuxi nhũm nõ.

²⁰ Hãmri nhũm Jejus amnhĩ tã mẽ kot kaxyw kãm hamaxpër tÿx ã mẽ omunh mex nẽ. Hãmri nẽ ã kamã htyk xwÿnhhta mã kapër nẽ kãm:

–Pa? E na pa ra anẽ tanhmã ate amnhĩ tomnuj to ho apaja o ijapêx pa. Kot paj axte kãm ijamaxpër kêt nẽ. Anẽ.

²¹ Hãmri nhũm Parijew nhõ xwÿnhjê mẽ Tirtũm kapër tũm o mẽ ahkre ho mẽ pa xwÿnhjaja tee ri kot ã kãm kapër anhÿrja ã kuma nẽ axpẽn mã:

–Tk. Kwa kèp Tirtũm kêt tã te ri kot amnhĩ nhĩpêx pyrãk o ri mẽ nẽ mẽ kot amnhĩ tomnuj o hapêx ã amnhĩ jarẽnh o kuhê. Tirtũm pix na kot mẽ nẽ mẽ kot amnhĩ tomnuj o hapêx xwÿnh kênã. Anẽ.

²² Nhũm mẽ ã axpẽn mã Jejus jarẽnh anẽ nhũm amnhĩ tã mẽ kuma nẽ mẽ hamaxpër kôt mẽ omunh mex nẽ. Jakamã mẽ kãm:

–Kwa mẽ ã ajamaxpër anhÿr kêt nẽ.

²³ Ixte mẽ nẽ mẽ kot amnhĩ tomnuj o ijapêx par ã amnhĩ jarẽnh tã mẽ ate ja kôt ixpumunh kêt jakamã na ka mẽ ixkôt ajamaxpër kêt nẽ. Nom kot paj mẽ anoo mã akupÿm ã kamã htyk xwÿnhhta o mex ka mẽ apiitã ja hã ixpumu hãmri nẽ ixkôt ajamaxpër kurê kumrẽx.

²⁴ Ixpê Tirtũm kot mẽ awÿr inhmẽnh xwÿnhhta na pa. Ixte mẽ anẽ mẽ ate amnhĩ tomnuj rênh kaxyw na pre mẽ awÿr inhmẽ pa mẽ awÿr wrÿ.

Tã mẽ ate ja kôt ixpumunh kaxyw kot paj mẽ anoo mã myja o mex. Anẽ.

Hãmri nẽ hpãnhã ì kamã htyk xwýnhja mã kapër nẽ kãm:

—E kànhmã xa nẽ anõr xà py nẽ ma akupým anhõrkwý hwýr tẽ. Anẽ.

²⁵ Nhũm kànhmã ãm kurê kumrẽx. Hãmri nẽ amnhĩ pumu nẽ hkĩnh tỳx nẽ nõr xà py nẽ mẽ noo mã kato nẽ akupým õrkwý hwýr ma Tĩrtũm mã mex o mex ã harẽnh o tẽ.

²⁶ Hãmri nhũm mẽ amnhĩ jaêr pẽ omu. Nẽ no hapõx kaxyw hkõt omunh o kuhê nẽ kamã no puma nẽ. Nẽ tee ri omu hãmri nẽ axpẽn mã:

—Kokýy. Aa mẽ pahte ã mẽhõ kot amnhĩ nhĩpêx anhýr ã omunh kêt tã na pu mẽ jarãhã ja pumu. Anẽ.

Hãmri nẽ Tĩrtũm mã mex o mex ã harẽnh o kuhê.

Jejus kot amnhĩ kôt Rewi hwýr ã harẽnh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkõt mẽ pa ho mẽ pa xwýnhjê mẽrohã ma nhýhým mõi. Hãmri nẽ nhýri Rewi pumu. Rewi nhĩxi hõ pẽ na Matêwre. Rõm kãm mẽ õ pahihtĩ mã amnhĩ kwýjê pẽ kàxpore hkwy jamýnh xwýnh na pre. Jakamã nhũm ujamýnh xã hã ixkre kamã mẽ kęp hkwy jamýnh o nhý nhũm Jejus mẽ hkõt mẽ pa o mẽ pa xwýnhjaja hãnh mra. Hãmri nhũm Jejus ãpênh ã omu nẽ amnhĩ kôt kuwý nẽ kãm:

—Pa? E kwa axápênhhta kaga nẽ hpãnhã amnẽ mẽ ixkõt mãn tẽ. Nẽ ixkõt mãn ri apa ho apa. Anẽ.

²⁸ Hãmri nhũm kuma nẽ ãpênh kaga hpa nẽ ma hkõt mõi nẽ hkõt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xã hã mẽõ rax nẽ. Jakamã nhũm amnhĩ nhõrkwý hwýr hkrãmnhwýjaja nẽ Jejus mẽ hkõt mẽ pa ho mẽ pa xwýnhjê hwý. Mẽ kot kutã apkur kaxyw nhũm amnhĩ kôt mẽ kuwý nhũm mẽ ma hkõt mra nẽ õrkwý hwýr agjê nẽ apkur o hkrĩ. Nẽ mẽ kęp Rõm nhõ pahĩ mã mẽ kęp kàxpore hkwy jamýnh xwýnh kwýjaja nẽ mẽ ohtõ nẽ hwýr akuprõ nẽ axpẽn kutã apkur o hkrĩ.

³⁰ Hãmri nhũm Parijew nhõ xwýnhjê mẽ Tĩrtũm kapër tũm o mẽ ahkre ho mẽ pa xwýnh kwýjaja mra nẽ mẽ apkur ã mẽ omu nẽ tee ri mẽ hkaêx ã Jejus pumu hãmri nẽ Jejus kôt mẽ pa ho mẽ pa xwýnhjê hwýr agjê nẽ hã mẽ kãm akir nẽ mẽ kãm:

—Kwa mẽ kot amnhĩ tomnuj ho mẽ pa xwýnhjê kutã mẽ apkur kêt tã ka mẽ apytãr xwýnhja mẽ apimràatã axtem nẽ mẽ kutã axàpkur o akrĩ. Kwa mẽ ate amnhĩ to mex ronhýx ka mẽ kutã axàpkur kêt nẽ. Anẽ.

³¹ Hãmri nhũm Jejus amnhĩ tã mẽ kapër ã mẽ kuma nẽ mẽ kãm:

—Tk. Nà ixte tãm mẽ unhwýr kaxyw na pa mẽ kutã ixàpkur o nhý. Xà na hte tõtõja mẽ mex xwýnhjê hwýr mra nẽ mẽ hkane? Nà ãm mẽ à xwýnhjê pix wýr na htem mra. Ra mẽ ate ja pumunh mex kênã. Ja pyrã nẽ na pa pre mẽ kot amnhĩ to mex xwýnhjê hwýr ixwryk kêt nẽ. Mẽ kot amnhĩ tomnuj xwýnhjê pix wýr na pa pre wry. Ixte tãm mẽ unhwýr kaxyw na pa pre mẽ hwýr wry nẽ ã jajê kutã ixàpkur o inhýr anẽ.

³² ãm mẽ kot amnhĩ tomnuj xwýnhjê hwýr na pa pre wry nẽ mẽ kamã ixukaprĩ ho ri ixpa. Mẽ kot amnhĩ tomnuj mã urer nẽ hpãnhã tãm amnhĩ nhĩpêx o pa kaxyw na pa pre mẽ hwýr wry. Tã ka mẽ atýx ã ri mẽ ixto akapër anẽ. Anẽ.

Mẽ hpãmjaja kot amnhĩ nhĩpêx gryk ã Jejus kaga hã mẽ harẽnh

Matêwre 9.14-17; Makre 2.18-22

³³ Tã nhũm Ijaew kwýjaja Jejus wýr mra nẽ kãm:

—Pa? E ot pa mẽ awýr mra. Kwa aprĩ hã mẽ inhmã mẽmoj jarẽ. Na hte Parijew nhõ xwýnhjê mẽ Juãw kôt mẽ pa xwýnhjaja tõiã Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. No akõt mẽ pa ho mẽ pa xwýnhjaja na htem ãmnhix apkur o pa kamã kãm amnhĩ jarẽ. Kwa mo na htem mẽ urak nẽ tõiã apkur kêt ri kãm amnhĩ jarẽnh hkêt nẽ? Anẽ.

³⁴ Hãmri nhũm mẽ kuma nẽ mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kênã. Mẽ kot ixkõt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. Xà na htem hkrãmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkõt mẽ pa ho mẽ pa xwỳnhjaja ixkõt kormã àmnhĩx ri hkĩnh nẽ apkati mẽ apkur o pa.

³⁵ Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỳx kãm apkur kêt ri tanhmã amnhĩ nhĩpêx to. Anẽ.

³⁶ Nhũm pre ã Jejus mẽ kãm hkõt ri mẽ pa ho mẽ pa xwỳnhjê jarẽnh anẽ hãmri nẽ mẽ kãm:

—Nà mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga.

³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nẽ ãm inhma. Kwa mẽ ixkapêr ma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

6

*Jejus kêp arĩgromnu hpãm ã harẽnh
Matêwre 12.1-8; Makre 2.23-28*

¹ Tã nhũm Ijaew nhõ arĩgromnu pẽ sapja axte kato. Hãmri nhũm Jejus mẽ hkõt ri mẽ pa ho mẽ pa xwỳnhjê mẽ ma mẽ hpur kõt ri nhỹhỹm ri pa. Hãmri nhũm hkõt mẽ pa ho mẽ pa xwỳnhjaja ra kãm prãm nẽ mra hãmri nẽ prãm xàj mẽmo hy te kot harõj pyrãk xwỳnhta kwỳ rê nẽ kugrà nẽ ma Jejus kõt hkanhar o mõ. Ijaew kot amnhĩ nhĩpêx xà hkõt.

² Hãmri nhũm Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukjêr kurê kumrêx nẽ kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nẽ mẽ pahkurê htã nhũm ri akõt mẽ pa ho mẽ pa xwỳnhjaja axtem nẽ mẽmo hyta kwỳ rê nẽ akõt hkanhar o mõ. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã ã amnhĩ nhĩpêx anhỹr kêt nẽ. Anẽ.

³⁻⁴ Hãmri nhũm Jejus mẽ kuma nẽ hprĩ hã mẽ kãm Tĩrtũm kapêr tũm jarẽ nẽ mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harẽnh nẽ mar kêt nẽ? Na pre Tawija hkõt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarẽnh xà hã ixkre wỳr agjê nhũm patre maatija mẽ kãm prãm tỳx ã mẽ omu nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhta nhũm mẽ kãm kugõ nhũm mẽ kuku. Tĩrtũm kapêr ã kagà htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukaprĩ nẽ mẽ kãm õr nhũm mẽ hã omu nhũm ja kãm mex nẽ.

⁵ Tã pa na pre Tĩrtũm mẽ akaxyw ixãm nẽ mẽ awỳr inhmênh jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anẽ.

*Jejus kot ãkra grã xwỳnh o mex ã
harẽnh*

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pẽ sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nẽ axà nẽ Tĩrtũm kapêr o mẽ ahkre ho nhỹ. Nhũm mẽhõ myja upõk rũm ãkra grã xwỳnhja mẽ ãkõ hã mar o nhỹ.

⁷ Nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjê

mã Jejus o kapër prãm xàj htãnopxar o kuhê. Nê ìhkra grà xwýnhhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra ho mex. Koja anê nê Tĩrtũm kapër kwým ri amnhĩ nhĩpêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wýr myta mã hpa ho apê nê kãm:

—Pa? E kãnhmã xa nê amnê ixwýr tẽ. Anê.

Hãmri nhũm kuma nê kãnhmã xa nê hwýr tẽ.

⁹ Hãmri nhũm Jejus amnhĩ pu hã ri mẽ ho hakêx nê mẽ kot mar o hkrĩ xwýnhjê pumu nê mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htýx nê nõ hãmri nê amnhĩ mex prãm xàj ma mẽhõ hwýr amnhĩ to tẽ. Hãmri nhũm ãm apumu nê apkatim arĩgro mex jamãr pê akane hkêt ka ty nhũm ja amã mex nê nà? Rý nhũm tanhmã atomnuj to nê akupým amnhĩ nê ajano nhũm ja amã mex nê nà? Nà koja ã anhĩpêx anê nhũm ja amã mex kêt nê. Na ka htem ã amnhĩ nhĩpêx anhýr o apa hkêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpên nhĩpêx ã karõ hto? Xà kot puj mẽ axpên kãm paxukapri ho papa nà? Kot puj mẽ pamã axpên kurê ho papa? Xà kot puj mẽ hã mẽmoj punuj pê axpên pytã nà? Xà kot puj mẽ hã axpên pytãr pymaj arĩgro mex jamã? E mẽ atõ inhmã ja jarê. Anê.

Nhũm pre ã mẽ hkukjêr anê.

¹⁰ Mẽ hamaxpêr ã mẽ omunh mex pê ã mẽ hkukjêr anhýr o xa. Nom nhũm arĩ mẽhõ tanhmã kutã kãm nê hkêt nê. ãm akryk mar pê omunh o hkrĩ. Mẽ kot tanhmã kãm nê nhũm ta pãnhã tanhmã kot mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrĩ. Hãmri

nhũm Jejus tee ri mẽ omu hãmri nê myta mã kãm:

—Tk. Mẽ kot tanhmã inhmã kapêr tore hã. E anhĩhkra katat. Anê.

Hãmri nhũm ìhkra katat nê akupým mex kurê kumrêx.

¹¹ Hãmri nhũm mẽ kãm Jejus kurê xwýnhjaja tee ri ja hã omu nê kamã gryk týt nê. Arĩgromnu hã kot ho mex jakamã nhũm mẽ kamã gryk týt nê. Nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhýr mýrapê tanhmã kot puj wem ho? Na ã kapêr anhýrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwýjê kamã paxukapri hkêt pyrãk ã mẽ pajarê. Koja mẽ pahkwýjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wýr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwýhtã nhũm amnhĩ kôt kot ri mẽ o pa xwýnhjê hwý nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwýjê hwýr mẽ arê ka mẽ ma inhỹ hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhỹ hã mẽ ahkre ho apa xwýnh. Anê.

¹⁴ Kot amnhĩ kaxyw mẽ rênh xwýnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Ně hkôt Simāw Jeroxja ta.

¹⁶ Ně hkôt Xiakre hō hkra Jutja ta.

Ně hkôt Jut Kariot ta.

Jut Kariotja na pre kormã kot mē kãm Jejus kurê xwýnhjê nhĩhkram ōr mã. Nhũm kot amnhĩ kukamã omunh mex tã mē hkôt amnhĩ kaxyw kuta.

Ā mē kot Jejus nhỹ hã mē ahkre o pa kaxyw mē rēnh xwýnhjê nhĩxi kot anhỹr.

Jejus xapēnh ā harēnh

Matēwre 4.23-25

¹⁷ Tã nhũm Jejus akupỹm ŷ hã mē ahkre ho pa xwýnhjê mē hãmri hixēt prēeta kurũm wrý nē nhỹri hinur kãm kuhê. Hãmri nhũm nhỹhỹnh mē kot mar mã xwýnhjaja hã akuprō. Kôt mē pa ho mē pa xwýnh kwýjaja nē nhỹhỹnh krĩ hkwý rũm mē hkwýjaja. Pika pē Jutej kurũm mē hkwýjaja. Nē krĩ pē Jerujarē kurũm mē hkwýjaja. Nē gō mý ri Xir mē Sitōja wa kamã mē pa xwýnh kwýjaja. Ām ahpýnhã ri nhỹhỹnh krĩ hkwý rũm mē kot mar mã xwýnhjaja hã pikuprōnh rax nē.

¹⁸⁻¹⁹ Mē kot kapēr mar nhũm kot akupỹm mē ho mex kaxyw nhũm prem ma hwýr amnhĩ to pa. Mē hkwýjaja tanhmã ri à kute. Nhũm mē hkwýjaja mēkarōmnuti kot mē hwýr gjêx xwýnhjaja nhũm mē piitã ma hwýr amnhĩ to pa. Na prem ra amnhĩ kaxyw kãm hamaxpēr o:

–E pa ma hwýr tē nē ām hkupēnh pix tã akupỹm inhmex japēr. Anē.

Hãmri nē ma hwýr mra nhũm mē omu nē Tirtũm xãhpumunh tỳx o akupỹm mē ho mex pa.

Jejus kot hkôt mē pa ho mē pa xwýnhjê jahkre hã harēnh

Matēwre 5.1-12

²⁰ Tã nhũm Jejus hkôt mē pa ho mē pa xwýnhjê jahkre nē mē kãm:

E kot kaj mē atō amnhĩ kaxyw tanhmã inhmã ajamaxpēr to nē ajamaxpēr o: “Nà ixkukrêx rax kêt tã na hte Tirtũm ixkôt pa ho pa. Kojã ixkôt pa hkêt pa ixtỳx ri tanhmã amnhĩ nhĩpêx to ho ri ixpa rãhã nē. Tirtũmja

mex kumrêx o kot mē hikukrêx raxta jakrenh par.” Anhỹr o ajamaxpēr. Hãmri nhũm Tirtũm ã ajamaxpēr anhỹr ã apumu nhũm ja kãm mex nē. Hãmri nhũm apê hkra hã ato mex nē atãnopxar o akôt pa ka ajamakêtkati nē akĩnh nē axãmnhĩx ri apa.

²¹ Ně kot kaj mē atō amã Tirtũm kãm hprãm xà hkôt tanhmã amnhĩ nhĩpêx to ho ri apa hprãm tỳx nē. Nhũm amnhĩ tã apumu nhũm ja kãm mex nē nhũm ato mex nē. Nē tanhmã ato ka hkôt pix mã amnhĩ to mex o ri apa nē ajamakêtkati nē akĩnh nē axãmnhĩx ri apa.

Ně kot kaj mē tanhmã amnhĩ tomnuj to. Hãmri nē tee ri ja hã amnhĩ pumu nē ajamaxpēr. Nē api-jaãm nē akaprĩ xãj amýr o nhỹ. Amýr rax nē. Hãmri nhũm Tirtũm ja hã apumu nhũm ja kãm mex nē. Jakamã nhũm anē akaprĩ hta nē ato mex nē. Ka ajamakêtkati nē akĩnh nē axãmnhĩx ri apa.

²²⁻²³ Nē kwār mē mãmri ixtã tanhmã mē ato kapēr punuj to nē tanhmã mē ato hêx to nē tanhmã ri mē atomnuj to ho pa. Kwār mē mãmri ã mē anhĩpêx anhỹr o pa. Ka mē ãm inhmã pix mã ajamaxpēr rãhã ho apa pē ajamakêtkati nē axãmnhĩx ri apa. Kwār mē mãmri ã mē anhĩpêx anē nē mē amex kêt ã mē ajarēnh o pa. Amnepēm na pre Tirtũm nhỹ hã kapēr xwýnhjaja nhũm prem ã mē hipêx anē. Jakamã kojã mē urak nē ã mē anhĩpêx anhỹr o pa. Nhũm Tirtũm ja hã mē apumu nē amnhĩm mē amex ã mē ajarē. Hãmri nē nhỹrmã kaxkwa kamã wa inhō krĩ kamã mē ato mex rax nē. Ka mē akĩnh nē ajamakêtkati nē axãmnhĩx ri apa. Jakamã kwār mē mãmri pika jakamã ã ixtã mē anhĩpêx anē. Anē.

Jejus kot arĩ mẽ kot mar xwỳnhjê jahkre hã harẽnh

Xiakre 5.1-5

²⁴ Nhũm Jejus nhãm hkôt mẽ pa ho mẽ pa xwỳnhjê nhĩhkô hã mẽ kot Tĩrtũm kôt amnhĩ nhĩpêx o pa hkêt xwỳnhjê hwỳr apkjê. Nẽ mẽ omu nẽ tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nẽ mẽ kãm:

E kwa mẽ o kora mẽ akukrêx rũnh xwỳnhjaja. Na ka htem ãm akukrêx rũnh pix mã ajamaxpêr o ri apa nẽ gryk ã Tĩrtũm mã ajamaxpêr o apa hkêt nẽ. Jao mẽ amã kapêr mar prãm kêt nẽ. Nẽ ãm akukrêx rũnh mã ajamaxpêr pê akĩnh nẽ ri apikunhar o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

²⁵ Nẽ mẽ amã Tĩrtũm kôt ri amnhĩ nhĩpêx prãm kêt xwỳnhjaja. Kot kaj mẽ nhỹrmã akaprĩ htỳx kãm tee ri amnhĩ to hwỳr kaprỳ kãm ga. Koja mẽ amar kêt nẽ.

Nẽ mẽ atỳx ri mẽ ate tanhmã amnhĩ tomnuj to hkukamã ajamaxpêr nẽ apikunhar pê amnhĩ tomnuj o apa xwỳnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mỳrapê mẽ kot amnhĩ xà htỳx kamã hamak o pa htũm xà hwỳr ma apa. Hãmri nẽ kamã akaprĩ xàj amỳr rãhã ho ri apa. Jakamã kwa mẽ o kora mẽ amã Tĩrtũm prãm kêt xwỳnhjaja. Kêr ka mẽ ixkapêr ma nẽ axkãm ajamak rom nẽ ri apa.

²⁶ Amnepêm mẽ pakukamã mẽ pa xwỳnhjaja na prem Tĩrtũm kapêr o hkwỳjê jahkre ho pa. Nom axtem nẽ hkwỳm ri tanhmã mẽ kãm ho hêx to nhũm mẽ kuma nhũm ja mẽ kãm mex nẽ nhũm mẽ amnhĩm mẽ mex ã mẽ harẽ. No ãm mẽ mex kêt. Tã mẽ kajaja. Mẽ kot mẽ urak nẽ axpên mã mẽ amex ã mẽ ajarẽnh tã Tĩrtũm mã mẽ

amex kêt. Jakamã kot kaj mẽ amex kêt nẽ. Anẽ.

Mẽ kãm mẽ pahkurê xwỳnhjê jarẽnh Matêwre 5.38-48; Rukre 23.34; mããnẽn Atre 7.60; Rõmãn 12.14

²⁷ Hãmri nhũm Jejus hpãnhã mẽ pi-itã mẽ ahkre nẽ mẽ kãm:

—E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkêt nẽ. ãm mẽ ho mex pix o ri apa hkukamã mã ajamaxpêr.

²⁸ —Nẽ mẽ kot mẽ ato kapêr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkêt nẽ. ãm tãm mẽ kãm akapêr pê mẽ kãm akapêr mex o ri apa. Nẽ mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nẽ mẽ ho Tĩrtũm wỳr pix kukamã mã ajamaxpêr.

²⁹ —Nẽ koja mẽhõ anhĩnep akura ka ãm omu nẽ tanhmã amnhĩ tã ho hkêt nẽ. Te ate kãm ihkjê pêr nhũm kot ihkjê kamã akuranh pyrak o amnhĩ nhĩpêx nhũm ja amã mex nẽ. No kêr ka mẽ amnhĩ tã tanhmã mẽ ho hkêt nẽ.

—Nẽ koja mẽhõ apê anhĩnôhkà py ka tanhmã hã kãm nẽ hkêt nẽ. Kwãr mãmrĩ apê kupy. Ka mããnẽn te ate kry pê anhĩnôhkà hpakà ry jagjênh xwỳnhhta anhĩnôhkà hkôt kãm òr pyrak o hipêx. Nom kamã agryk kãm kãm òr kêt nẽ.

³⁰ —Nẽ koja mẽhõ kêp amrakati kumrêx nẽ awỳr tẽ nẽ mẽmoj tã awỳ. Ka anhõ mẽmoj japêr nẽ mãmrĩ kãm mẽmoj gõ. Kêp anhõxỳ hkêt kamã kãm mẽmoj gõ. Rỳ koja mẽhõ apê mẽmoj to ahkĩ ka axàhkurê hkêt nẽ. Nẽ tanhmã hã ho hkêt nẽ.

³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx ri anhõxỳ hkêt nẽ tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nẽ ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà koja Tĩrtũm ja hã mẽ apumu nhũm ja kãm

mex nê? Nà koja kãm mex kêt nê. Koja mēhō mē ato mex kêt tã ka mē amnhĩ rom ho mex nê nhũm Tĩrtũm ja hã mē apumu hãmri nê mē amex ã mē ajarē. Mē kot amnhĩ tomnuj o mē pa xwýnhjaja na htem ãm mē kot mē ho mex xwýnhjê pixjaja nhũm htem amnhĩ xwar mē ho mex o pa. No tãm mē kot amnhĩ nhĩpêx o mē pa xwýnhjaja na htem mē piitã mē ho mex o pa. Mē kot tãm amnhĩ nhĩpêx xwýnhjaja nê mē kot amnhĩ tomnuj xwýnhjaja nhũm mē ho hpimràatã mē ho mex o axpên pyrãk o pa.

33-36 —Nê mē kot amnhĩ tomnuj xwýnhjaja na htem ãm mē kot mē ho mex xwýnh pixjaja nhũm htem amnhĩ xwar mē ho mex o pa. No mē kajaja. Kêr ka mē mãmri mē piitã mē kamã axukaprĩ pix nê. Jao axãmnhĩx ri mē piitã mē kãm mēmoj nhõr o ri apa. Nhũm Tĩrtũm ja hã mē apumu nê ja hã mē ato mex nê.

—Jakamã kêr ka mē amarĩ mē kãm akurê xwýnhjê ho mex nê. Nê mē kamã axukaprĩ nê. Nê mē piitã mē kãm mēmoj nhõr o ri apa. Kê nhỹrmã Tĩrtũm maati mē hã mē amã mēmoj nhõr rax nê. Nê mē ate kot amnhĩ nhĩpêx kôt amnhĩ nhĩpêx xwýnh ã mē ajarē. Tĩrtũm na hte mē kot amnhĩ tomnuj xwýnhjê kamã ukaprĩ ho pa. Jakamã kêr ka mē urãk nê ã mē hipêx anhỹr o ri apa. E kêr ka mē ã axpên nhĩpêx anhỹr rãhã nê. Anê.

Mē pahte axpên to pakapêr punuj kêt ã mē pamã karõ

Matêwre 7.1-5; mããnên Rõmãn 2.1-3, 14.1; Wam Korõt 4.5; Xiakre 4.11-12

37 Nhũm Jejus arĩ mē ahkre nê mē kãm:

—Nê kêr ka mē atỳx ri amnhĩ krã hkôt tanhmã mē kot amnhĩ tomnuj to hã tanhmã axpên jarênh to ho ri apa hkêt nê. Kêr kê Tĩrtũm mē apyrã nê ã mē ajarênh anhỹr kêt nê.

—Nê kêr ka mē tanhmã mēhō kot ra atomnuj tota mã ajamaxpêr rãhã hkêt nê. ãm ho ajamakêtkati tokyx anê nê axte kãm ajamaxpêr kêt nê. Kêr kê Tĩrtũm ja hã mē apumu nê mē

apyrã nê axte tanhmã mē ate amnhĩ tomnuj to mã hamaxpêr kêt nê.

38 —Nê kêr ka mē axpên kamã axukaprĩ pê tanhmã axpên to mex to ho ri apa. Kêr kê Tĩrtũm ja hã mē apumu nê mē apyrã nê mē akamã ukaprĩ pê tanhmã mē ato mex to ho pa. Na hte mē pahte axpên kamã paxukaprĩ hã mē pahpumunh xà hkôt tanhmã mē pakamã ukaprĩ to.

39 —Nom kêr ka mē atỳx ri tanhmã axpên to akapêr to hkêt nê. Mē ate aprĩ hã axpên jamaxpêr kôt axpên pumunhre hã. Jakamã kot kaj mē atỳx ri mēhō ho akapêr punuj hãmri nê te mē nohkre xwýnhjê hō kot mēmoj pumunh kêt tãã te kot no ho omunh nê tanhmã harênh to pyrãk o amnhĩ nhĩpêx.

40 Tĩrtũmja tapxipix na kot mē pajamaxpêr kôt mē pahpumunh par. Mē axãhpumunh tỳx o mē pahte hakrenh kêt jakamã kwa kêr ka mē ãm hkôt pix mã amnhĩ nhĩpêx o ri apa. Kot kaj mē ã amnhĩ nhĩpêx anê hãmri nê gaa nê urãk nê mē piitã mē kamã axukaprĩ pix o ri apa.

41-42 Jao mēhō kot tanhmã amnhĩ tomnuj to hã omu hãmri nê tanhmã hã kãm nê tokyx anhỹr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã mēhōta hwỳr tẽ nê kot tanhmã amnhĩ tomnuj to hã kãm akapêr to. Anê.

Mē pajamaxpêr xà hkôt mē pakapêr ã mē pajarênh

Matêwre 7.16-20, 12.33-37

43-45 Nhũm Jejus arĩ mē ahkre nê mē kãm:

—Nê koja mēmo pĩ hpàr mex nê ô mex nê. Nom koja pãr punuj hãmri nê ômnuj nê.

—Nê na htem mēmo xô pumu nê hkôt tanhmã pãr kute hã omu. No na htem rãrãj pumu nê kêp akunĩ kamã mrõnhĩ xô hã hkamnhĩx kêt nê. Na htem mēmo xỳ hpàr pumu nê ô xànhre hã hkamnhĩx kêt nê. Ja pyrã nê koja mēhō hamaxpêr punuj nê mããnên hakwa ho kapêr punuj pix

ně. Ně htỳx tanhmã amnhĩ tomnuj to ho ri pa. Nom koja hamaxpěr mex ně hãmri ně mǎãñnēn hakwa ho kapěr mex o pa. Na htem ahpỳnhã amnhĩ jamaxpěr xà hkôt tanhmã hakwa ho kapěr to ho ri pa. Aně.

Ixkre pijakrut jarēnh

Matêwre 7.24-27; mǎãñnēn Xiakre 1.22-25; Wam Juãw 2.3-6

⁴⁶ Nhũm Jejus arĩ mẽ hkôt mẽ pa ho pa xwỳnhjê jahkre ho nhỹ nẽ mẽ kãm:

—Ně kot kaj mẽ ixpê mẽ anhõ pahihiti hã ijarē hã kot kaj mẽ ixkapěr kôt amnhĩ nhĩpêx rãhã ho ri apa.

⁴⁷ —E pa mẽ amã ixprĩ hã mẽ kot ixkôt amnhĩ nhĩpêx xwỳnhjê kot amnhĩ nhĩpêx jarē ka mẽ aprĩ hã inhma.

⁴⁸ Mě kot amnhĩ nhĩpêxja te mēhõ hamaxpěr mex pē aptỳx kãm amnhĩm òrkwỹ nhĩpêx pyræk. Koja aptỳx kãm òrkwỹ nhĩpêx nhũm mẽmo arĩgro hã na wrỳk rax nẽ. Ně gô htàm rax nẽ hanhi nom nhũm arĩ ãm tỳx nẽ xa. Tã kot kaj mẽ ixkôt amnhĩ nhĩpêx ã kot kaj mẽ te ixkre jarēnhja pyræk. Jao amex nẽ ajamakêtkati nẽ ri apa. Te gô htàm kot ixkre janhir tã nhũm ãm tỳxta pyræk.

⁴⁹ Nom koja mēhõ hamaxpěr mex kêt nẽ htỳx mō nẽ gô mỳri gyw rerek kãm amnhĩm òrkwỹ nhĩpêx. Hãmri nhũm mẽmo arĩgro hã na wrỳk rax nẽ. Ně hã gô htàm rax nẽ òrkwỹ janhi nẽ kệp grành pa. Tã koja mēhõ ixkôt amnhĩ nhĩpêx kêt nẽ te ho mēhõ kot gô mỳri gyw rerek kãm ixkre nhĩpêxta pyræk. Jao mex kêt nẽ pa. Jakamã kwa mẽ ixkapěr mar tỳx nẽ te gô htàm kot ixkre janhir nẽ grành parta pyræk o amnhĩ nhĩpêx o apa hkêt nẽ. Aně.

7

Jejus kot mēhõ mã àpēnh xwỳnh o mex ã harēnh

Matêwre 8.5-13

¹ Tã nhũm Jejus mẽ kãm ujarēnh pa hãmri nẽ ma akupỳm Kapanaũ hwỳr mō.

² Ně mōõ nẽ ra hwỳr pōj. Nhũm krĩ kamã pōristi krãhtũm mã àpēnh xwỳnhja à htỳx nẽ nō. Ra htyk kaxyw

ně nō nhũm ò patrãw tee ri omu nẽ kãm hapê jakamã tee ri hkukamã hamaxpěr o hkaprĩ nẽ.

³ Hãmri nẽ Jejus pōx ã harēnh ma nẽ hwỳr Ijaew pigêt kwỳjê rē nẽ mẽ kãm:

—Kwa mẽ ma Jejus wỳr mra nẽ kãm ijarē kêt tokyx man ixwỳr tẽ nẽ inhmã àpēnh xwỳnhta o mex. Aně.

⁴⁻⁵ Hãmri nhũm mẽ kuma nẽ ma hwỳr mra nẽ omu nẽ kãm:

—Pa. Na pōristi krãhtũm na awỳr mẽ inhmẽ pa mẽ mra. Mẽ pahkĩnhã kệp Ijaew kêt tã kãm mẽ pahkĩnh nẽ. Tãm na pre mẽ inhõ krĩ kamã mẽ inhmã Tĩrtũm kapěr o mẽ ahkre xà hã ixkreja nhĩpêx. Tã na kãm àpēnh xwỳnhta kệp à htỳx nẽ nō nhũm apōx hã ajarēnh ma nẽ man awỳr mẽ inhmẽ. Kwa ma hwỳr tẽ nẽ kãm ho mex nà? Aně.

⁶ Hãmri nhũm mẽ kuma nẽ mẽ kãm:

—Tõe. Ma pu mẽ hwỳr. Aně.

Hãmri nẽ ma mẽ hkôt tẽ. Hãmri nẽ kormã òrkwỹ htêp o htēm mẽ nhũm axte kutã hkrãmnhwỳ hkwy rē nhũm mẽ ma kutã mra. Hãmri nẽ mra nẽ mẽ hkaxpa nẽ Jejus pumu nẽ kãm:

—Pa? Kwa na pōristi krãhtũmta ã awỳr karõ aně. Na mẽ inhmã: “E kêt ka mẽ mra nẽ nhỹri Jejus kaxpa nẽ kãm awjarē kêt ãm ata rũm kapěr pix o inhmã à xwỳnhta o mex. Kĩnh ã ixpê Ijaew kêt jakamã ixte amnhĩ kuk ã ixpijaàm tỳx. Jakamã kot paj pam hwỳr ixtēm kêt nẽ. Kwa kãm aně kêt ata rũm kapěr pix o inhmã akupỳm ho mex.

⁷⁻⁸ Ixpê mẽ hkrãhtũm jakamã na pa hte inhõ pōristi mã mẽmoj tã karõ nhũm mẽ inhmar xà hkôt inhmã mẽmoj tanhmã hipêx to. Na pa hte mẽ kãm: ‘E mẽ ma mra nẽ ã amnhĩ nhĩpêx aně.’ Aně nhũm mẽ inhma nẽ ma mrrar kurê kumrêx. Rỳ pa mẽ kãm: ‘E mẽ amnẽ ixwỳr mra nẽ ã amnhĩ nhĩpêx aně.’ Aně nhũm mẽ inhma nẽ ixwỳr mra. No kêt Jejus na hte ixrom tanhmã mẽ à kuteja mã kapěr nhũm kuma nẽ mẽ kệp hapôj nẽ ma mrrar kurê kumrêx. Jakamã koja ata rũm kapěr pix o inhmã ho mex.” Anhỹr o awỳr karõ. Jakamã na pa mẽ akutã

mra nê akaxpa nê ã amã kapêr jarênh anê. Anê.

⁹ Hãmri nhũm Jejus amnhĩ jaêr pê mẽ kapêr ma nê hkĩnh nê. Hãmri nê hkôt mẽ kot mar o pa xwỳnhjê mã kãm:

—Kwa xà na ka mẽ ã kot ixwỳr karõ xwỳnh jamaxpêr anhỳrta ã ama? Mẽ pahkĩnhã kêp Ijaew kêt tâ mẽ arom amnhĩ kaxyw inhmã hamaxpêr tỳx nê. Aa mẽ atõ urak nê ate amnhĩ kaxyw ã inhmã ajamaxpêr tỳx anhỳr kêt tâ nhũm mẽ arom kãm àpênh xwỳnh kaxyw inhmã hamaxpêr tỳx nê. Anê.

¹⁰ Nhũm pre ã mẽ kãm kapêr anê hãmri nhũm pòristi krãhtũm krãmnhwỳjaja kuma nê awjanã nê ma akupỳm hkrãhtũm nhõrkwỳja wỳr mra. Nhũm ra Jejus kãm àpênh xwỳnhhta akupỳm ho mex nhũm mex nê ri mra. Hãmri nhũm mẽ akupỳm pøj nê akupỳm mex ã omu.

Jejus kot akupỳm mēhõ hkra ho htĩr ã harēnh

Juãw 11.1-46

¹¹ Tã nhũm Jejus ma krĩ pê Naĩ hwỳr hkôt mẽ pa ho mẽ pa xwỳnhjê mẽrohã mõi nhũm mẽ ohtõ nê mẽ hkôt mra.

¹² Nhũm mẽ ra Naĩ hwỳr hpõx o mõi. Nê hwỳr agjê. Axpêr kãm agjê nê mõi nhũm kêp mjên htyk xwỳnhja mẽ kutã tẽ. Nhũm hkra myja ham kêp ty. Kra pyxi htã kêp ty nhũm mẽ kasãw kamã kuxà nê kumỳ nê kot haxàr kaxyw o mõi nhũm katorxà mẽ hkôt mỳr o mõi. Nhũm krĩ nhõ xwỳnh kwỳjaja ma hkôt mõi. Piitã hkaprĩ nê hkôt mỳr o mõi.

¹³ Tã nhũm Jejus mẽ hkwỳja mẽ mõi nê mẽ hkaxpa nê katorxà mỳr ã omu nhũm Jejus kãm hkaprĩ nê. Hãmri nê xa nê kãm:

—Pa? Kwa amỳr kêt nê. Anê.

¹⁴ Hãmri nê kasãwta wỳr tẽ nê hã ãhkra xi nhũm mẽ kot mỳnh xwỳnhjaja omu nê amarĩ kãm o xa. Hãmri nhũm htyk xwỳnhhta mã kapêr nê kãm:

—E kwa kãnhmã nhỹ. Anê.

¹⁵ Pu nhũm kãnhmã ỳr kurê kumrêx. Nê kapêr o nhỹ. Hãmri nhũm Jejus nita mã kãm:

—E ota akrata. Na akupỳm amã htĩr. Anê.

Hãmri nhũm akupỳm htĩr ã omu nê hkĩnh tỳx kumrêx.

¹⁶ Hãmri nhũm mẽ kot omunh xwỳnhjaja amnhĩ jaêr pê akupỳm hkra htĩr kãm omu nê ỳ hã haxwỳja hkĩnh nê. Nê Tĩrtũm mã mex o mex ã harê nê axpên mã:

—Kwa ãm hãmri na Tĩrtũm ã mẽ panhĩpêx anê nê mẽ pahwỳr ỳ hã kapêr jarênh xwỳnhhta mẽ nhũm mẽ pahwỳr mõi. Tĩrtũm mẽ pakamã ukaprĩ jakamã na ã mẽ panhĩpêx anê. Nã ãm hãmri na ã mẽ panhĩpêx anê. Anê.

¹⁷ Hãmri nê piitã ma pikaja rũm mẽ kãm harênh o hprõt nhũm mẽ piitã harênh ma.

Juãw Paxis tee ri Jejus kukamã hamaxpêr ã harēnh

Matêwre 11.2-6, 11.22; Rukre 4.16-21

¹⁸ Rôm nhũm Juãw Paxisja kêp prês nê hkrĩ nhũm hte hkôt mẽ pa xwỳnhjaja hwỳr mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwỳnh wa ho axkrut nê wa kuta

¹⁹ nê Jejus wỳr wa kumê nê wa kãm: —Kwa wa ma hwỳr tẽ nê hkukja. Nê kãm: “Xà ka na pre Tĩrtũm mẽ ixwỳr amê nã? Nã xà kormã axtem hõ na pa mẽ kormã amnhĩ wỳr hamãr o ri ixpa?” Anê. E wa ma hwỳr tẽ nê ã hkukjêr anê nê tanhmã kot amnhĩ jarênh to hã ama hãmri nê man akupỳn tẽ nê inhmã harê. Anê.

²⁰⁻²¹ Hãmri nhũm wa kuma nê ma hwỳr tẽ. Nhũm Jejus kormã mẽ ho mex o xa. Mẽ nohkre xwỳnhjaja nhũm akupỳm mẽ no ho mex. Nê mẽkarõmnuti kot mẽ hwỳr gjêx xwỳnhjaja nhũm mẽ nê mẽ hapõx o ãm rãhã nhũm wa ra hwỳr tẽ nê kormã hã mẽ omunh o xa. Hãmri nê kãm Juãw Paxis kapêr jarê.

²² Hãmri nhũm wa kuma nê wa kãm: —Tỳ. Nã ãm hãmri na ja hã ijarê. Ixpê mẽ ate ixkamã ajamak o apa xwỳnhhta na pa. Jakamã e. Wa kam

ně tanhmã ixte amnhĩ nhĩpêx to hã ixpumu hãmri nẽ ma akupỹm hwỳr tẽ nẽ aprĩ hã kãm ijarẽ. Mẽ nohkre xwỳnhjaja na pa akupỹm mẽ no ho mex. Nẽ mẽ hkànhy xwỳnhjaja pa akupỹm mẽ hkà ho mex. Nẽ mẽ hyk o mẽ pa xwỳnhjaja pa akupỹm mẽ ho mex. Nẽ mẽ htyk xwỳnhjaja pa akupỹm mẽ ho htĩr. Nẽ mẽ kệp amrakati nẽ ri mẽ pa xwỳnhjê mã mẽmoj mex jarẽnh o ri ixpa. Na pa hte ã mẽ ho mex o ri mẽ hkôt ixpa anẽ. Jakamã e kwa wa ma akupỹm hwỳr tẽ nẽ ã kãm ijarẽnh anẽ.

²³ Kê ijarẽnh ma nẽ arĩ amnhĩ kaxyw ixkôt hamaxpêr tỳx rãhã nẽ. Kojã ã amnhĩ nhĩpêx anẽ nẽ hamakêtkati nẽ ri pa. Nẽ tee ri ijarẽnh kukamã hamaxpêr kêt nẽ. E wa tokyx ma akupỹm hwỳr tẽ nẽ ã kãm ijarẽnh anẽ. Anẽ.

Jejus kot Juãw Paxis mex ã harẽnh Matêwre 11.7-19

²⁴⁻²⁵ Nhũm pre ã Jejus wa kãm amnhĩ jarẽnh anẽ nhũm wa kuma nẽ ma akupỹm Juãw Paxis wỳr tẽ. Hãmri nhũm Jejus mẽ kot mar o kuhê xwỳnhjê mã tanhmã Juãw Paxis jarẽnh to nẽ mẽ kãm:

—Na ka prem kapôt ã mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapêr to hã mar kaxyw hwỳr amrar kêt nẽ.

²⁶ Kệp Tĩrtũm nhỹ hã kapêr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarẽnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarẽnh o pa. Nẽ hprĩ hã tanhmã mẽ amã ijarẽnh to. Jakamã na kapêr mex o kot wam Tĩrtũm nhỹ hã kapêr jarẽnh o mẽ pa xwỳnhjê kapêr jakrenh.

²⁷ Tĩrtũm kapêr ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwỳr harẽnh o pa xwỳnh mẽ kê ma ri hkukamã mẽ kãm harẽnh o ri pa. Kê mẽ kuma nẽ kutêp tãm amnhĩ nhĩpêx.

Anhỹr o Tĩrtũm Juãw Paxis kukamã harẽ nhũm mẽ hã kagà. Tã nhũm mẽ awỳr kumẽ.

²⁸ Juãwja mex kumrêx. Na pre hprĩ hã ixkukamã tanhmã ijarẽnh to ho pa. Nom ixkôt mẽ pa ho mẽ pa xwỳnhjê hkĩnhã ixkôt pa ho pa hkêt ãm ixkukamã ijarẽnh o pa. Jakamã ixkôt mẽ pa ho mẽ pa xwỳnhjaja na mex o kot Juãw Paxisja jakrenh. Mẽ kot ixkôt hprĩ hã inhmar o pa jakamã mẽ mex o kot hakrenh. Anẽ.

²⁹ Nhũm pre ã Jejus mẽ kãm Juãw Paxis jarẽnh anẽ. Mẽ kot Juãw mar o kuhê xwỳnh kwỳjaja na pre htem tanhmã amnhĩ tomnuj to ho pa. Tã Juãw kot mẽ kãm Tĩrtũm kapêr jarẽnh ma nẽ axpên mã Tĩrtũm mex ã harẽ. Nẽ axpên mã:

—Nà ãm hãmri. Tĩrtũm kapêr na mex kumrêx. Anẽ.

Hãmri nẽ amnhĩ tomnuj kaga nẽ Tĩrtũm kôt amnhĩ xunhwỳ. Jakamã nhũm Juãw Paxis Tĩrtũm mã mẽ hkrã kumrã.

³⁰ No nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nẽ. Mẽ kot Tĩrtũm kapêr kaga jakamã na pre htem Jejus kapêr ma nẽ ãm kuma.

³¹ Hãmri nhũm Jejus mẽ kãm:

—E pa mẽ amã mẽ piitã htỳx ri hamaxpêr ã tanhmã mẽ harẽnh to ka mẽ kot amnhĩ nhĩpêx ã mẽ harẽnh ma.

³² Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỹ kapem hije nẽ mẽmoj to amnhĩkati ho hkrĩ. Nẽ tee ri hkwyjê kot amnhĩ nhĩpêx pumu nẽ mẽ kãm:

Kwa na pa mẽ amã gre htã ka mẽ ixkutã anhõkrepôx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprí nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ.

Anhỹr o axpên mã kapêr. Tã te mẽ ate mẽ urãk. Tĩrtũm kot mẽ awỳr ã hã kapêr xwỳnhjê rẽnh tã ka mẽ te mẽhprĩre kot amnhĩ nhĩpêxta pyrã

ně mẽ ama ãm mẽ ama ně mẽ hkôt amnhĩ nhĩpêx kêt ně.

³³ —Juãw Paxis na pre mẽ awỳr mō ně ixpyrà ně apkur mex o ri pa hkêt ně. Nễ ixpyrà ně wĩhti ho hkôm kêt ně pa. Tã ka mẽ ja hã omu ně hkaga ně atỳx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx ně ri harênh o ri apa. Hãmri ně mẽhprĩre kot amnhĩ nhĩpêx pyrà ně hkôt amnhĩ nhĩpêx kêt ně.

³⁴ Tã pa Juãw pãnhã mẽ awỳr mō. Nễ kurom apkatĩ mẽ ixàpkur mex o ri ixpa. Nễ kurom wĩhti hkwȳ ho ixkôm o ri ixpa. Ka mẽ ja hã ixpumu ně atỳx ri ixàpkur rũnh ně ixpipãnh o ri ixpa hã ixkamnhĩx ně ã axpẽn mã ixto akapêr anhỹr o ri apa. Nễ mẽ kot amnhĩ tomnuj xwỳnhjê hkôt ri ixpa hã axpẽn mã ijarênh o ri apa. ã na ka htem axpẽn mã ijarênh anễ. Jao te mẽ ate Juãw Paxis nhĩpêx pyrà ně ixkaga ně ixkôt amnhĩ nhĩpêx kêt ně. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anhỹr o ri pa.

³⁵ —No tãm ri mẽ hamaxpêr o mẽ pa xwỳnhjaja na htem ahpỹnhã Juãw mẽ wa ixte amnhĩ nhĩpêx ã wa ixpumu ně axpẽn mã wa ijarênh o: “Nà ahpỹnhã wa kot amnhĩ nhĩpêx tã wa hamễ ãm hãmri Tĩrtũm nhỹ hã kapêr jarênh mex o pa. E pu mẽ wa uràk ně Tĩrtũm kôt amnhĩ xunhwỳ.” Anhỹr o axpẽn mã wa ijarênh o pa. Anễ.

Parijew nhõ xwỳnh pê Simãwre jarênh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwỳnh pê Simãwreja amnhĩ nhõrkwỹ hwỳr Jejus mẽ hkôt mẽ pa ho pa xwỳnhjê mẽ kuwỳ. Mễ kot kutã apkur kaxyw amnhĩ wỳr mẽ kuwỳ nhũm mẽ òrkwỹ hwỳr mra ně mẽ hwỳr agjê ně apkur kaxyw hkrĩ.

³⁷ Hãmri nhũm mẽhõ nija mẽ hwỳr axà. Na pre hte amnhĩ tomnuj pix o pa. Hãmri ně Jejus ò krĩ hwỳr

hpòx ně Simãwre nhõrkwỹ kamã apkur ã harênh ma ně ma hwỳr tễ. Mễ hkuxwaxà hã à py ně ma hwỳr o tễ.

³⁸ Hãmri ně hwỳr axà ně Jejus pumu ně hwỳr tễ ně pum xa. Nễ tee ri tanhmã kot amnhĩ tomnuj to ho paja mã hamaxpêr ně hpijaam ně hkaprĩ ně mỳr o xa. Hãmri ně Jejus kutã hkôn krã ho tễm ně nhỹ ně no kagô ho hpar go. Hãmri ně amnhĩ krã kĩ ho hpar grà ně kupã hãmri ně hpãnhã mẽ hkuxwa xà ho kuxwa. Kãm hkĩnh xàj ã hipêx anễ.

³⁹ Hãmri nhũm Simãwre tee ri ja hã omu ně hamaxpêr o:

—Tk. Kwa jahti kot amnhĩ tomnuj pix o pa xwỳnh tã mẽ ixwỳr axà ně ã Jejus nhĩpêx anễ nhũm amnhĩ ně hanor kêt ně. Kêp ãm hãmri Tĩrtũm nhỹ hã kapêr jarênh o pa xwỳnh ronhỹx ja hã omu ně amnhĩ nê hanor kurê kumrêx. Anễ.

⁴⁰ Hãmri nhũm Jejus amnhĩ tã hamaxpêr ã omu ně hêx rom kãm kapêr ně kãm:

—E Simãwre. Pa amã awjarê ka inhma. Anễ.

Hãmri nhũm kãm:

—Tôe. Mex. Mãmrĩ inhmã awjarê pa ama. Anễ.

⁴¹ Hãmri nhũm kãm:

—Nà koja mẽhõ my wa hamêxkrut. Nhũm hõja mẽhõ pê kàxpore ho rax kumrêx ně ho ìpresta. Nhũm hõja ãm kêp ho grire ně ho ìpresta. Hãmri ně wa hamễ kàxpore ho hapêx pa.

⁴² Hãmri ně akupỹm kot kêp ho ìpresta xwỳnhhta mã hpãnhã òr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ìpresta xwỳnhhta wa hwỳr tễ ně wa kãm: “Kwa wa tee ri amnhĩ kukamã ajamaxpêr kêt ně. Na pa ra war ate ixto tewên ã kagàta kaxôn pa nhũm ja hapêx. Kot paj axte kãm ijamaxpêr kêt ně. Jakamã wa mãmrĩ ajamakêtkati ně axãmnhĩx ri apa.” Anhỹr o wa kãm kapêr. ã mẽ ujarênh kot anhỹr. Anễ.

Nhũm pre ã Jejus Simãwre mã ujarẽnh anẽ. Hãmri nẽ hã hkukja nẽ kãm:

—E nhỹ myja koja we kãm ho tewẽn xwỳnhhta kĩnh tỳx nẽ wehe? Anẽ.

⁴³ Hãmri nhũm kãm:

—Nà kot kệp ho rax nẽ ho ãpresta xwỳnhhta koja kãm hkĩnh tỳx o hõta jakre. Anẽ.

Hãmri nhũm kãm:

—Tỳ. Nà ãm hãmri na ka ã harẽnh anẽ.

⁴⁴ Tã mãn ka ni kot ã inhĩpêx anhỹr xwỳnhhta pumu. Na ka amnhĩ nhõrkwỹ hwỳr ixwỳ pa axà nom ka inhmã gô hkwy pa ho amnhĩ par kuhõnh kêt nẽ. Tã nhũm nija arom ã inhĩpêx anẽ nẽ no kagô ho ixpar kuhõ nẽ amnhĩ krã kĩ ho grà ho nhỹ.

⁴⁵ —Nẽ anhõrkwỹ hwỳr ixarta ã ka ixkahti hkõt inhmýnh nẽ ixpãr kêt nẽ. Tã kêt nija arom xatã ixpar pãr o nhỹ.

⁴⁶ Nẽ ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhỹ. Mẽhkukwaxà hã kãxpore xohtô htã nhũm àmnhĩx ho ixpar kuxwa ho nhỹ.

⁴⁷ ãm hãmri na pa amã ja jarẽ. Nija kot amnhĩ tomnuj tỳx tã pa ra nẽ kot amnhĩ tomnuj o ijapêx pa. Ra kot amnhĩ tomnuj tỳx xwỳnh ã amnhĩ pumunh jakamã na amnhĩ kaxyw inhmã hamaxpêr pẽ kãm ixkĩnh nẽ ã inhĩpêx anẽ. No ka na ka hte uràk nẽ amnhĩ tomnuj tỳx o apa htã uràk nẽ tee ri ja hã amnhĩ pumunh kêt nẽ. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh grire. Anẽ.

Nhũm pre ã Jejus Simãwre mã kapêr anẽ.

⁴⁸⁻⁵⁰ Hãmri nẽ nija mã kapêr nẽ kãm:

—E kãnhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kõt rẽnh pa. Kot paj axte kãm ijamaxpêr kêt nẽ. Jakamã mãmrĩ ma ajamakêtkati nẽ axãmnhĩx anhõrkwỹ hwỳr tẽ. Anẽ.

Hãmri nhũm mẽ kot axpẽn kutã apkur xwỳnhjaja tee ri kot kãm kapêr anhỹrja ã kuma nhũm ja mẽ kãm mex

kêt nẽ. Jakamã nhũm mẽ ri axpẽn mã harẽnh o:

—Tk. Kwa mẽhõ na hte ri kot Tĩrtũm kot amnhĩ nhĩpêx pyrãk o amnhĩ nhĩpêx nẽ mẽ kot amnhĩ tomnuj o hapêx ã amnhĩ jarẽnh o we ri pahti? Anẽ.

8

Mẽnijê hkwy kot Jejus kõt pa hã mẽ harẽnh

Makre 15.40-41, 16.9

¹ Tã nhũm Jejus ma mẽ piitã mẽ kãm Tĩrtũm kapêr o mẽ ahkre ho ri mẽ hkõt pa. Krĩ rũnh kamã nẽ krĩ hkryre kamã. Mẽ kot amnhĩ tomnuj kaga nẽ Tĩrtũm kõt amnhĩ xunhwỳr nhũm kot amnhĩ tã mẽ omunh nẽ mẽ ho hkra kaxyw nhũm ri mẽ hkõt mẽ kãm harẽnh o pa. Nhũm ã hã mẽ ahkre ho mẽ pa xwỳnh pẽ 12jaja ma hkõt ri pa.

² Nẽ mẽni hkwyjaja. Na pre ra Jejus mẽ hkwyjê nẽ mẽkarõmnuti japõj. Nẽ mẽ hkwyjaja tanhmã mẽ à kute xwỳnhjaja nhũm akupỹm mẽ ho mex. Xwỳnhjaja nhũm prem haxwỳja ma hkõt ri pa. Hõ pẽ na pre Marir Matarẽn nhũm pre ra Jejus nẽ mẽkarõmnuti ho 7 nẽ hapõj.

³ Nẽ Joanã. Joanã mjên Kujahiti na pre kệp pahiti Erox mã mẽ àpẽn xwỳnhjê krãhtũm. Nẽ Sujãnre. Nẽ kaxyw mẽnijê ohtô nẽ Jejus kõt tanhmã mẽ ho ajuta hto ho mẽ hkõt pa. Jao mẽ hikãxpore ho mẽmoj japrõ nẽ ho mẽ kãm mẽ õ nhĩpêx o ri mẽ hkõt pa.

Mẽmo hy hkre xwỳnh

Matêwre 13.1-9; Makre 4.1-9

⁴ Tã nhũm mẽ ra krĩ piitã rũm Jejus wỳr akuprõ. Jakamã nhũm mẽ ohtô rax kumrêx nhũm Jejus mẽ kãm ujarẽnh o nhỹ. No ãm hprĩ hã ujarẽnh kêt nẽ. Mẽ kot Tĩrtũm kapêr mar nẽ tanhmã hkõt amnhĩ nhĩpêx to nhũm hã kuxi nẽ mẽ kãm hã ujarẽnh o nhỹ.

⁵ Nẽ mẽ kãm:

—E mẽ inhma. Koja mẽhõ ma pur mã mõ nẽ pur kãm mẽmo hy ho ukapêr o ri pa. Nom nhũm piitã amex kãm rôrõk kêt nẽ. Kwỳ ahpỹnhã nhỹri rôrõk. Hãmri nhũm hkwy aptỳx kãm

rôrok nhùm kuwênhre omu nê hwÿr mra nê hkrêr pa.

⁶ —Nê kên kãm hy hkwÿ rôrok nê higrôt kutã nojarêt nê higrôt pa. No nhùm kamã aptÿx nê kamã kêp pika hkryre jakamã nhùm higrôt nhùm hã myt apha nê arïgro htÿx mẽ nhùm grã pa. Kamã kên nhùm amgo mex kêt jakamã nhùm grã pa.

⁷ —Nê mrônhĩ kamã rôrok xwÿnhja haxwÿja higrôt tã no nhùm utĩ kêp amyta nhùm ô hkêt nê.

⁸ —No hirã kamã pika mex kãm rôrok xwÿnhja. Hãmri hirã kamã rôrok nê higrôt mex nê piitã ô rax nê. Piitã kamã ô kêp 100. Å mẽ ujarênh kot anhÿr. E kwa mẽ ixujarênh ma nê kãm ajamxpêr tÿx rãhã ho ri apa. Anê.

⁹ Nhùm pre ã Jejus mẽ kãm ujarênh anê. Hãmri nhùm hkôt mẽ pa ho mẽ pa xwÿnhjaja kuma nê tee ri hkukamã hamxpêr nê kãm:

—Kwa na pa mẽ ixprĩ hã axujarênh kôt mẽmoj pumunh kêt nê. Aprĩ hã mẽ inhmã tanhmã harênh to pa mẽ ixprĩ hã kuma nà? Anê.

¹⁰ Hãmri nhùm mẽ kãm:

—Tõe. Nà kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhùm Tirtũm kot ja hã mẽ omunh nê mẽ ho hkra. Ja na pa harê.

—No mũjjaja na mẽ akĩnhã kãm mar prãm nõkati. Jakamã na htem ixujarênh ma nê ãm kuma nê htÿx ri pa. Anê.

*Jejus kot prĩ hã mẽmo hy jarênh
Matêwre 13.18-23; Makre 4.13-20*

¹¹ Hãmri nhùm Jejus hkôt mẽ pa ho mẽ pa xwÿnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarênh ta jarê ka mẽ inhma.

—Nà mẽmo hyta te kêp Tirtũm kapêr pyrãk. Nê ahpÿnhã hy rôrok ã pikata te kêp ahpÿnhã mẽ kot Tirtũm kapêr mar xwÿnhjê kot amnhĩ nhĩpêx pyrãk.

¹² Mẽ kot mar xwÿnh kwÿjjaja te kot aptÿx kãm hy rôrok nhùm kuwênh kot hwÿr mrar nê hkrêr par xwÿnh ta

pyrãk. Jao Tirtũm kapêr ma nhùm Satanasti te kuwênh kot hy hkrêr parta pyrã nê mẽ kot amnhĩ kaxyw Tirtũm kapêr kôt hamaxpêr nê hkôt amnhĩ xunhwÿr pymaj tanhmã nê mẽ hkrã hto. Jakamã nhùm mẽ kapêr ma nom ho hamakêtkati tokyx anê nê axte kãm hamaxpêr nê hkôt amnhĩ nhĩpêx kêt nê.

¹³ —Nê mẽ kot mar xwÿnh kwÿjjaja te kot kênre kamã hkwÿ rôrok nê higrôt nê grã par tokyx anhÿr xwÿnh ta pyrãk. Jao Tirtũm kapêr ma nê hkĩnh nê. Nê kãm mar prãm nê. Tã nhùm mẽhõ tẽ nê Tirtũm nê tanhmã kãm kapêr to nhùm mẽ kuma nê Tirtũm kaga. Te mẽmo hy higrôt nê grã par tokyx anhÿr ta pyrãk.

¹⁴ —Nê mẽ kot mar xwÿnh kwÿjjaja te kot mrônhĩ kamã hkwÿ rôrok nê higrôt nhùm mrônhĩ kot kêp ãmnar xwÿnh ta pyrãk. Jao kãm Tirtũm kapêr mar prãm nê. No ãm mãânên kãm hikukrêx rax nê hikãxpore rax prãm xaj ãm ja pix mã hamaxpêr o pa. Nê gaa nê ra gryk ã axte Tirtũm kapêr mã hamaxpêr nê hkôt amnhĩ nhĩpêx kêt nê.

¹⁵ —Nê mẽ kot mar xwÿnh kwÿjjaja te hirã kamã pika mex kãm hy hkwÿ rôrok nê higrôt nê ô raxta pyrãk. Nê ixkapêr ma nê amnhĩ krã him hagjênh tÿx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyrãk. E. Å ixujarênh kot anhÿr. Anê.

Kanê mẽ guhkrax wa harênh

Makre 4.21-25

¹⁶ Nhùm Jejus arĩ mẽ kãm ujarênh o nhÿ nê mẽ kãm:

—E mẽ inhma. Xà na htem kanê hpôk hãmri nê guhkrax o hpro rÿ par krak ri unhwÿ? Nà na htem ã hipêx anhÿr kêt nê. Na htem hpôk nê kÿxpê kuhê xà kamã unhwÿ nhùm hirã mex o kuhê. Nhùm htem ixkrem agjê nê hirã kamã mẽmoj pumunh mex nê. Ja pyrã nê na pa hte mẽ ate inhmar tÿx kaxyw ixprĩ hã mẽ amã awjarê.

¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ

apê hpimxur pyrək tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpók kãm aprĩ hã mẽmoj pumunh mexta pyrək.

¹⁸ Jakamã kër ka mẽ ixkapêr mar tỳx nê hkôt ajamaxpêr rãhã ho ri apa. Jao ixkapêr piitã mar tỳx nê. Nom kot ka mẽ mar tỳx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxà mẽ htõjê jarênh to hã harênh

Matêwre 12.46-50; Makre 3.31-35; mããnênh Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxà nê htõjaja nhỹhỹnh hwỳr mơn pøj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw nê kormã kapôt ã kuhê.

²⁰ Hãmri nhũm mẽhõja mẽ omu nê Jejus mã mẽ harê nê kãm:

—Kwa Pahшти. Ota ra akatorxà mẽ atõjaja awỳr pøj nê tee ri awỳr gjêx mã. O mũj mẽ kormã kapôt ã kuhê. Anê.

²¹ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rỳ ixkatorxà kot amnhĩ nhĩpêx pyrək o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

Jejus kot kòk mã kapêr ã harênh

Matêwre 8.23-27; Makre 4.35-41

²² Tã nhũm apkati hõ hã nhũm Jejus himô rax ã rêr kaxyw nojarêr nê hkôt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mõ. Anê.

Hãmri nê mẽ pàr mã gjêx pa nê ma xarmã mõ. Garirej rũm kato nê ma xarmã pika hõ hwỳr kormã mõ.

²³ Nhũm ra Jejus õtxwa nê pàr kre kamã gõr nê nõ. Pu nhũm kòk àpêr tỳx nê nhũm gò axpên tak tỳx nê kãnhmã harĩ. Nê pàr kre kamã pikapĩr rax nhũm pàrta mẽ kãm àr o mõ nhũm mẽ

tee ri amnhĩ nhĩpêx. No nhũm Jejus arĩ htỳx gõr nê nõ.

²⁴ Hãmri nhũm mẽ tee ri amnhĩ kukamã hamaxpêr nê kumra nê kãm:

—Kwa Pahшти kãnhmã nhỹ. Kot puj mẽ jarãhã pahtyk pa. Anê.

Hãmri nhũm kãnhmã nhỹ nê kòk mã kapêr nê kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gò tãm nõr kurê kumrêx.

²⁵ Hãmri nhũm Jejus hkwyjê hwỳr apkjê nê mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyrək. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nê no hawênh rũnh nê tee ri axpên pumunh pê hamaxpêr o kuhê nê axpên mã:

—Kokỹỹ. Jejus kêp mẽ panhiõ hkêt. Mẽ pahtõ kot pu we te kot amnhĩ nhĩpêx pyrã nê we kòk mã pakapêr nhũm we pama anhĩkrê? Nà Jejus mẽ parom àhpumunh tỳx o àhpumunh tỳx. Jakamã na ã anê. Anê.

Jejus kot mẽhõ nê mẽkarõmnuti kator ã harênh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩhkjê hã na pre pika pê Garirej. Nê Garirej nhĩhkjê hã na Gerasja. Jakamã nhũm mẽ ra hwỳr rê.

²⁷⁻²⁹ Hãmri nê pàr kre rũm hapõj nê api nê mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ ý hã oprê htỳx nê hkênh nê ri mra. Nê õrkwỹ kamã hkrĩ hkêt nê. ãm ri kapôt ã pa ho pa. Mẽ htykjê hã pika kamã kên kre kaêx kòt ri pa. Na pre ra krĩ nhõ xwỳnhjaja xatã tee ri unê nê hkaxpre. Tee ri kàx o ri hkaxpre htã no nhũm amnhĩ nê rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapõj nê api nhũm mẽ omu nê mẽ kutã tẽ nê Jejus kaxpa. Nhũm amnhĩ wỳr omu nê nê tanhmã mẽkarõmnuti mã kapêr to. Hãmri nhũm my xoprêja hwỳr tẽ nê kutã hkõn krã ho

tēm nē nhỹ. Hāmri nē kàxpêê amnhĩ tã kãm kapêr. Nom tãm kapêr kêt nē. Mēkarōmnuti nhỹ hã kãm kapêr nē kãm:

—Pa Tirtũm Kra Jejus? Kwa mo kaxyw na ka mē ixwỳr tē? Kwa tanhmã mē ixto hkêt nē. Anē.

³⁰ Hāmri nhũm mē kãm:

—Kwa tanhmã na mē anhĩxi kute? Anē.

Nhũm mē kãm:

—Nà mē ixpê Mēohtôhti. Anē.

Mēkarōmnuti ra kot hwỳr ohtô nē gjêx jakamã na prem ã kãm amnhĩ nhĩxi jarênh anē.

³¹⁻³² Hāmri nē Jejus mã:

—Kwa jahti nē mē ijapôj nē mē kot amnhĩ xà htỳx kamã hamak tũm xà hwỳr mē ixrênh kêt nē. Hagrô hkwy mũj wỳr mãn mē ixrê pa mē hpãnhã hwỳr mãn hagjê nà? Anē.

Hagrôja kii mē kêp amỳm hixêt ã ri apkur o pa nhũm mē ã Jejus mã mē hwỳr amnhĩ to hwỳr anē. Hāmri nhũm mē kãm:

—Tôe. Tô mē tãm hwỳr mãn mra. Anē.

³³ Hāmri nhũm mē kuma nē myta pê hapôj nē ma hagrôja wỳr mrar kurê kumrêx nē mē kãm gjêx pa. Hāmri nhũm myja akupỹm tãm hkrã. No nhũm hagrôja mēkarōmnuti py-maj amỹra nē axkahkũm nē hprôt nē himô hã krã hixêt ã axpum rôrôk nē gôx kãm mrô nē pikaprãr pa.

³⁴ Hāmri nhũm hagrô jamãr xwỳnhjaja tee ri omu hãmri nē ma mē ô patrãw wỳr akupỹm mē piitã mē kãm harênh o hprôt nē mra.

³⁵⁻³⁶ Nhũm mē tee ri mē kuma hãmri nē ma kot Jejus pumunh mã hwỳr mra nē hkaxpa. Nē kuri myta pumu nhũm ra akupỹm tãm hkrã nē tãm amnhĩ nhĩpêx nē ê kamã mex nē nhỹ. Nhũm mē kot hã omunh xwỳnhjaja mē kãm ujarênh pa. Nhũm mē kuma nē tee ri amnhĩ kukamã hamaxpêr o ra kãm ma nē.

³⁷⁻³⁹ Hāmri nē amnhĩ nē Jejus mã kapêr nē kãm:

—E kwa mē tokyj ma akupỹm am-rar kurê kumrêx. Anē.

Hāmri nhũm mē kuma nē awjanã nē ma akupỹm pàr wỳr mra nē agjê. Nhũm akupỹm mex xwỳnhhta mē hkôt hkrã nom nhũm Jejus kãm:

—Nà kot kaj mē ixkôt amôr kêt nē. Ma akupỹm anhô krĩ hwỳr mãn tē nē Tirtũm kot tanhmã akupỹm ato mex to hã mē kãm amnhĩ jarênh o ri mē hkôt apa. Anē.

Hāmri nhũm kuma nē ma akupỹm krĩm tē nē ri mē kãm Jejus kot tanhmã ho mex to hã harênh ri mē hkôt pa.

Jejus kot wa ho axkrut nē wa ho mex ã harênh

Matêwre 9.18-26; Makre 5.21-43

⁴⁰ Tã nhũm Jejus mē ma akupỹm xarmã mō nē rē nē mē kutêp mē pikuprõnh xwỳnhjê pumu. Nhũm mē ra amnhĩ wỳr mē omu nē mē kutêp gô jakàx ã pikuprõnh rax nē. Jakamã nhũm mē mē hwỳr pôj nhũm mē amnhĩ wỳr Jejus pumu nē hkĩnh nē.

⁴¹⁻⁴² Hāmri nhũm Jajti ma hwỳr tē. Ijaew nhõ Tirtũm kapêr o mē ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pê 12. Tã ra kêp à htỳx nē htyk kaxyw nē nō. Hāmri nhũm hipêêxaja tee ri omu hãmri nē Jejus wỳr tē nē kutã hkõnkrã ho tēm nē nhỹ nē ho kuwỳ nē kãm:

—Pa akupỹm mē ixto mex xwỳnh maati. E awỳr na pa tē. Na ra ixkra ixpê htyk kaxyw. Pa tee ri omu nē kaxyw amã ijamaxpêr nē awỳr tē. Kwa ma ixkôt inhõrkwy hwỳr tē nē inhmã omu nē tokyx inhmã ho mex nà? Anē.

Hāmri nhũm kuma nē ma hkôt tē. Nhũm mē ohtô nē wa hkôt pry hã mra nē axpên nhĩgã nē axpên kujahêk o hkôt mra.

⁴³ Hāmri nhũm mēhõ nija haxwỳja wa hkôt tē. Na pre hte hkamrô hkrye rãhã ho pa hã ra amgrà kêp 12. Nhũm tôtô tee ri kot ho mex kaxyw hkane kaprý ho pa.

⁴⁴ Jakamã nhũm tee ri amnhĩ kukamã hamaxpêr hãmri nē Jejus jarênh ma nē ma mē hkôt hwỳr htēm kurê kumrêx. Nom nhũm mē ohtô rax nē hkôt mõr jakamã nhũm mē hkaêx kôt hwỳr tē nē hkatut kôt kêp

ê nhîrê kupê. Hāmri nê ãm kêp ê pix kupênh tâ akupÿm mex.

⁴⁵ Hāmri nhūm Jejus kot kêp ê kupênh ã amnhî tâ omunh tâ hêx rom mẽ ho hakêx nê mẽ omu nê mẽ kām:

—Kwa mẽ atō na ka ri amnhî kaxyw inhmã ajamaxpêr tÿx pê ixpê ixê kupê? Anê.

Hāmri nhūm mẽ piitã tee ri axpên pumu nê kām amnhî tâ aprã. Hāmri nhūm Simãw Pêtre kām:

—Mê kot apê amnâr griã kot ka kêt ri mēhō kot apê hkupênh xwÿnh ã ri mẽ hkukja. Kwa măn ãm mēhō amarĩ apê hkupê. Anê.

⁴⁶ Hāmri nhūm kām:

—Nã mēhōja amarĩ hkupênh kêt nê. Na amnhî kaxyw inhmã hamaxpêr tÿx pê ixpê hkupê. Tã ixàhpumunh tÿx xàja kôt na akupÿm mex. Nom ixte mēhō kot ixpê hkupênh xwÿnhja pumunh jakamã na pa ixêx rom ã amnhî tâ ri mẽ hkukjêr anê. Kwa mẽ atō inhmã amnhî jarê. Anê.

⁴⁷ Hāmri nhūm mēhō nita kuma nê tee ri kêp kot amnhî to hpimxur prãm kaprÿ. Hāmri nê hpijaãm kām hwÿr htertet o tē nê kutã hkôn krã ho tēm nê nhÿ nê kām amnhî jarê nê kām:

—Ma pa na pa inhmã inhmex prãm xàj apê axê kupê. Tã na pa akupÿm inhmex. Anê.

⁴⁸ Hāmri nhūm Jejus kuma nê kām:

—Tôe. Nã ra ate amnhî kaxyw inhmã ajamaxpêr tÿx kôt ate ã amnhî nhîpêx anhÿr jakamã na ka akupÿm amex. E māmri ajamakêtkati nê ma akupÿm tē. Anê.

Hāmri nhūm kuma nê hkÿnh nê ma akupÿm tē.

⁴⁹ Rôm nhūm Jajti mã àpênh xwÿnhjê hō òrkwÿ rûm ma ò patrãw kutã tē nê wa hkaxpa nê Jajti mã kām:

—Kwa na ra apê akra ty. Jakamã mo kaxyw kot ka kêt amnhî kôt hwÿr Jejus o mō? Kwār māmri ma akupÿm tē. Anê.

⁵⁰ Hāmri nhūm Jejus kuma nê Jajti mã kām:

—Kwa tee ri akra hkukamã ajamaxpêr kêt nê. Kaxyw inhmã măn ajamaxpêr tÿx nê. Koja te ra apê htyk tâ koja akupÿm amã htir. Anê.

⁵¹⁻⁵³ Hāmri nhūm mẽ mō nê òrkwÿ hwÿr pōj nê hwÿr axà nê mẽ omu nhūm mẽ ra htyk xwÿnhnta ã htu rax nê. Nê omÿj ri mur. Hāmri nhūm Jejus mẽ hwÿr axà nê mẽ mÿr ã mẽ omu nê mẽ kām:

—Kwa mẽ hāmri amÿr kêt nê. Na nireta mẽ apê htyk kêt na ãm gōr nê nō. Anê.

Hāmri nhūm ra mẽ kot htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhūm Jejus htyk xwÿnhnta wÿr hitom wÿr àr kaxyw nê amnhî kôt Juãw nê Xiakre nê Pêtre nê kaxyw htyk xwÿnh katorxà nê hipêêxàja. Jajê pix na pre amnhî kôt mẽ ho agjê.

⁵⁴ Hāmri nê htyk xwÿnhnta wÿr tē nê hpa hã kupy nê kām:

—Pa? Kwa tokyx kànhmã nhÿ. Anê.

⁵⁵ Hāmri nhūm akupÿm htir nê kànhmã ÿr kurê kumrêx. Hāmri nhūm Jejus mẽ kām:

—E kwa mẽ tokyx kām mẽmoj japêr kê kukrê. Măn ra kãm prãm nê. Anê.

⁵⁶ Hāmri nhūm katorxà mẽ hipêêxà wa amnhî jaêr pê akupÿm htir kãm omu nê kamã no puma ho hkÿnh tÿx nê. Hāmri nhūm Jejus wa kām:

—E wa inhma. Kêr ka wa akupÿm ixte war amã ho htir ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

9

Jejus kot mẽ ho 12 nê ahpÿnhã mẽ rēnh ã harēnh

Matêwre 10.1, 10.5-15; Makre 6.7-13; Rukre 10.1-12; mããñēn Atre 13.49-50, 18.6

¹⁻² Tã nhūm Jejus hkôt mẽ pa ho mẽ pa xwÿnh pê 12jê mã kapêr nê mẽ kām:

—E mẽ amnê ixwÿr mra nê ixkapêr ma. Na pa ra mẽ amã ixàhpumunh tÿx xà hkwy gō. Jakamã kêr ka mẽ inhÿ hã ma ri akwÿjê hkôt tanhmã mẽ ho mex to ho ri mẽ hkôt apa. Mē à xwÿnhjê ho mex o ri mẽ hkôt apa. Nê mẽ hkwyjê nê mẽkarōmnuti japōj. Nê mẽ piitã mẽ kām anê kê mẽ tokyx

Tirtũm kôt amnhĩ xunhwỳ kē mẽ ho hkra.

³ Nom kēr ka mẽ amnhĩ kôt akukrêx ho ohtô nē ri ho apa hkêt nē. Nē amnhĩ kaxpar xà hã kô ho apa hkêt nē. Nē kawà htur nē ho apa hkêt nē. Nē amnhĩ kôt axàpkur xà hã anhõ ho apa hkêt nē. Rỳ akàxpore rax nē ho apa hkêt nē. ãm mẽ anhõ kamĩs ho pixi nē haxà nē ri hã apa. Nē anhỹ kamã ã ri mẽ hkôt apa anē. Kē mẽ kot mẽ akapēr mar xwỳnhjaja tãm mãn mẽ amã mẽ anhõ ho pa.

⁴ —Nē kēr ka mẽ nhỹri krĩ hõ hwỳr pøj nē apõx xà kamã mẽhõ nhõrkwỹ kamã hkôt ri apikamēnh tãmtã kurũm akupỹm ajapøj nē ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nē nhãm mẽ hwỳr amrar kêt nē.

⁵ —Nē koja mẽ nhỹri mẽ akapēr kaga ka mẽ amnhĩ tã mẽ kamã ama nē tokyx mẽ kurũm ajapøj nē ma nhãm apa. Nē anojarêt nē mẽ noo mã akuhê nē amnhĩ par ã awjagrô kapĩ. Mẽ kot Tirtũm kaga hã amnhĩ pumunh nhũm Tirtũm kot amnhĩ pyrã nē mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anē. Hãmri nē ma hpãnhã krĩ hõ hwỳr apa. Anē.

⁶ Nhũm pre ã Jejus mẽ kãm mẽ àpēnh ã karõ anē. Nhũm mẽ kuma hãmri nē hapøj nē ma mẽ hkôt pa. Ma krĩ piitã hkôt akupỹm mẽ à xwỳnhjê ho mex nē Tirtũm kapēr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpēr ã harēnh

Matêwre 14.1-12; Makre 6.14-29

⁷⁻⁸ Hãmri nhũm pika pē Garirej kamã mẽ piitã Jejus jarēnh ma nē ahpỹnhã ri tanhmã axpēn mã harēnh to. Mẽ hkwyjaja kēp finat Juãw Paxis akupỹm htĩr ã ri harē. Nhũm mẽ hkwyjaja amnepēm mẽ hkukamã Tirtũm nhỹ hã kapēr jarēnh xwỳnhjê hõ ra akupỹm htĩr ã harē. Nhũm mẽ hkwyjaja kēp finat Eris ã axpēn mã harē. Jakamã nhũm pahшти Eroxja mẽ kot ahpỹnhã tanhmã ri harēnh toja ma nē tee ri hkukamã hamaxpēr.

⁹ Nē hamaxpēr o:

—Kwa mẽhõ na hte we ri ã amnhĩ nhĩpêx anhỹr o pa wehe? Nà finat Juãw Paxis kêt. Ra ixte amnepēm hã ixàmnhēnh nhũm mẽ kot inhmã mut krãhyr nē hpĩr kēnã. Kwa mẽhõ na hte we ri ã amnhĩ nhĩpêx anē?

Anhỹr o hamaxpēr hãmri nē kãm omunh prãm nē.

Jejus kot mẽ ho ohtô nē mẽ kãm mẽ õ hã harēnh

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhỹ hã kapēr o mẽ pa xwỳnhjaja akupỹn hwỳr mran pøj nē mẽ kot ri tanhmã amnhĩ nhĩpêx to ho pa hã kãm amnhĩ jarē. Hãmri nhũm mẽ kuma nē ma krĩ pē Pesěj wỳr kormã mẽ o mō.

¹¹ Hãmri nhũm krĩ hkwy nhõ xwỳnhjaja ra ma mẽ mōr ã mẽ harēnh ma nē ohtô nē ma mẽ hkôt mra nē nhỹri mẽ hkôt pøj. Nhũm Jejus amnhĩ kôt mẽ omu hãmri nē tanhmã mẽ ho mex to ho xa. Kôt mẽ à nē mẽ pa xwỳnhjaja nhũm akupỹm mẽ ho mex. Hãmri nē Tirtũm kapēr o mẽ ahkre nē mẽ kãm:

—E kot kaj mẽ atõ amã amnhĩ tomnuj kaga hprãm xàj Tirtũm kôt amnhĩ xãm nhũm amnhĩ tã apumu nē ato hkra. Hãmri ka ajamakêtkati nē amex nē axàmnhĩx ri apa.

Anhỹr o mẽ kãm kapēr pē mẽ ahkre ho xa.

¹² Tã nhũm myt àr kaxyw nhũm Jejus nhỹ hã mẽ ahkre ho mẽ pa xwỳnh pē 12jaja hwỳr mra nē kãm:

—Kwa na ra kamàt o mō. Mẽ hano kē mẽ amnhĩ to krĩ hõ japēr nē tokyx amnhĩm mẽmoj japrô nē kuku nē hikwỹ nē gõr. Mo mẽ panhõ? ãm jar kapôt pix kēnã. Anē.

¹³⁻¹⁴ Hãmri nhũm mẽ kuma nē mẽ kãm:

—Kwa ka mẽ kamjaja mẽ kãm mẽmoj gõ kē mẽ kuku. Anē.

Nhũm mẽ ohtô rax nē mẽ hkôt mra. Memyjaja kēp 5.000 nē kaxyw mẽ hprõ nē mẽ hkrajaja. Jakamã nhũm mẽ kēp 12jaja Jejus kot ã mẽ kãm kapēr anhỹrja ma nē tee ri mẽ hkukamã hamaxpēr nē kãm:

—Kwa nà mo mẽ panhõ rax? Mẽ panhõ pãwti kệp sîk nẽ kaxyw tep grà axkrutre kênã kot kêt we mẽ piitã mẽ hipêx pa. Xà kot paj mẽ ma mra nẽ nhÿri mẽ kãm mẽ apkur xà japrõ nhũm mẽ kuku? Anẽ.

Hãmri nhũm mẽ kãm:

—Nà pu mẽ kãm mẽmoj japrõr kêt nẽ. Mẽ panhõta kot puj mẽ kãm ho anhrà. E mẽ kãm anẽ kẽ mẽ ahpÿnhã ri hije nẽ hkrĩ nẽ apku. Anẽ.

¹⁵ Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa.

¹⁶ Hãmri nhũm Jejus pãwti mẽ tepta jamÿ nẽ kànhmã kaxkwa hwÿr rît nẽ kànhmã kupẽ nẽ Tirtũm mã harẽ nẽ kãm:

—Pa Papaj? Apê mẽ inhmã mẽ inhõ xwÿnh jakamã amex o amex. Anẽ.

Hãmri nẽ mẽ kãm ho hkry hpa nẽ hkõt mẽ pa ho mẽ pa xwÿnhjê mã kugõ nhũm mẽ ô ri ho xa nẽ ho mẽ hipêx par kumrêx.

¹⁷ Nhũm mẽ piitã apkur mex o hkrĩ. Mẽõja mẽ kệp grire htã nhũm Jejus tanhmã mẽ kãm ho rax to nhũm mẽ ohtõ rax tã piitã kuku nẽ ho õhy htu hpa. Nhũm arĩ mẽõ jakrêx prã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nẽ ho kawà ho 12 nẽ ho nÿt pa.

Jejus kot amnhĩ tã hkõt mẽ pa xwÿnhjê kukjêr ã harênh

Matêwre 16.13-19; Makre 8.27-29

¹⁸ Tã nhũm arĩgro hõ mã nhũm Jejus nhÿri ahte Tirtũm mã amnhĩ jarênh o nhÿ nhũm hkõt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nẽ amnhĩ tã tanhmã mẽ hkukjêr to nẽ mẽ kãm:

—Kwa mẽ inhmã mẽmoj jarê. Tanhmã na htem ahpÿnhã axpên mã ijarênh to wehe? Anẽ.

¹⁹ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõhã apê Tirtũm nhÿ mã kapêr jarênh xwÿnhjê hõ ra akupÿm htĩr ã ajarê. ã na htem ahpÿnhã ajarênh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpê mẽhõ mã na ka htem ixkamnhix? Anẽ.

Hãmri nhũm Simãw Pêtre kãm:

—Nà mẽ pajaja na pa htem apê Tirtũm kot mẽ ixkaxyw axãm nẽ mẽ ixwÿr amênh xwÿnh ã ajarê. Nẽ apê mẽ ixpiitã mẽ inhõ Pahi Maati mã ajarê. ã na pa htem ajarênh anẽ. Anẽ.

²¹ Hãmri nhũm kuma nẽ mẽ kãm:

—Tÿ. Nà ãm hãmri na ka htem ã ijarênh anẽ. ã ixte anhÿr kênã. Nom kêt ka mẽ inhmar kumrêx. Kêt ka mẽ kormã ã akwÿjê mã ijarênh anhÿr o ri apa hkêt nẽ. Anẽ.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĩ hkõt mẽ pa ho pa xwÿnhjê mã kapêr nẽ hprĩ mã tanhmã mẽ kãm amnhĩ jarênh to nẽ mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja mã ixpumunh mex. No mẽ pahkwÿjaja na mẽ akĩnhã mẽ kãm ja mã ijarênh mar nẽ ja mã ixpumunh prãm kêt. Ijaew pigêtjaja nẽ Tirtũm kapêr tũm o mẽ ahkre o mẽ pa xwÿnhjaja nẽ patre krãhtũmjaja mẽ kãm ja mã ixpumunh prãm kêt. Jakamã koja mẽ nhÿrmã ixpynê nẽ ixtak rax nẽ. Hãmri nẽ ixpĩ. Nom kot paj ixtyk ã apkati axkrunêpxi nhũm Tirtũm akupÿm ixto ixtĩr. Anẽ.

Jejus krajaja tanhmã kot amnhĩ nhĩpêx to mã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mãânên Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkõt mẽ pa ho mẽ pa xwÿnhjê mã amnhĩ jarênh anẽ hãmri nẽ hpãnhã mẽ kot mar o kuhê xwÿnh piitã mẽ kãm kapêr nẽ mẽ kãm:

—E kot ka mẽ atõ ate ixkõt amnhĩ xãm ã amnhĩ jarê hãmri nẽ mãânên ã amnhĩ jarênh anẽ nẽ amnhĩ jarênh o: “Jejus kệp inhõ Pahihti jakamã kot paj kapêr kõt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã

hã inhĩpêx to.” Anhỹr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rý tanhmã mẽ atõ hto ka ty. Tã koja akaxwýnh ma inhõ krĩ mex wýr àpir kurê kumrêx. Hãmri nê kamã atĩr tũm nê amex rãhã apa ho apa. Nom kot kaj mẽ jar atĩr prãm xaj ixkaga hãmri nê hwýr axàpir kêt nê.

²⁵ —Nê koja mēhõ hikukrêx rax gryk ã Tĩrtũm kaga. Hã koja nhỹrmã ty nê ý kamã kuwy hwýr ma mō nê amnhĩ kôt hikukrêx õ hpyr nê o mōr kêt nê. Koja tee ri kuwy hwýr mōr py-maj amnhĩ nê hikukrêx rax o amnhĩ pãnhã amnhĩrer prãm kaprý.

²⁶ —Nê koja mēhõ ixte mẽ ahkre hã inhma nhũm ja kēp omnuj nhũm ixkaga japêr. Hã kot paj nhỹrmã akupýn mẽ ato amnhĩptãr kaxyw akupýn wrý nê amnhĩ xwar kot ixkaga xwýnhhta kaga. ãm hãmri na pa ã mẽ amã amnhĩ jarênh anê. Kot paj nhỹrmã man akupýn inhõ Papaj nhỹ hã ixte mẽ ho amnhĩptãr kaxyw akupýn wrý. Nhũm kapêr o mẽ wrýk xwýnhhaja man ixkôt wrý. Pa mẽ wrý hãmri nê mẽ kot ixkaga xwýnhhaja pa amnhĩ pyrã nê mẽ hkaga.

²⁷ ãm hãmri na pa ã mẽ amã amnhĩ jarênh anê. Kot paj nhỹrmã akupýn ixte mẽ ato amnhĩptãr kaxyw mẽ awýr wrý. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kēn prēk nhũmōk ã hirã kamã ãm ã harēnh

Matēwre 17.1-8; Makre 9.2-8; mããnēn Sikũn Pētre 1.16-18

²⁸ Tã nhũm semãnja hapêx nhũm Jejus Simãw Pētre nê Xiakre nê Juãw wa mẽ kãm kapêr nê mẽ kãm:

—E pu mẽ ma hixêt prēk mũj wýr mō nê hwýr api nê himōk ã Tĩrtũm mã amnhĩ jarê. Anê.

Hãmri nê ma amnhĩ kôt hwýr mẽ o mō nê hwýr mẽ ho api.

²⁹⁻³² Hãmri nhũm Jejus Tĩrtũm mã amnhĩ jarênh o xa. Nom nhũm hkôt hixêt wýr mẽ mōr xwýnhhaja õtxwa

htýx nê ra gōr nê hikwý. Pu nhũm Jejus axtem hkuk nê xa. Nê ê haka htýx nê xa. Hãmri nhũm ja wa kaxkwa rũm wrý nê kuri kãm kapêr o xa. Finat Mojes mẽ finat Erisja wa kuri kãm kapêr o xa. Na pre ra amnepēm Tĩrtũm amnhĩ wýr wa ho api. Tã nhũm wa ra akupýn wrý nê Jejus mã kapêr o xa. Mẽ hpimràatã hirã htýx kãm axpēn mã kapêr o kuhê. Jejus kormã krĩ pē Jerujarē kapem mẽ kot hpĩr kêt ri nhũm wa mẽ axpēn mã htyk kukamã harēnh o kuhê. Nhũm wa kãm:

—Nà Tĩrtũm jamaxpēr xà hkôt kot kaj ã amnhĩ nhĩpêx anê.

Anhỹr o Jejus tyk kukamã kãm hamaxpēr o hihtýx o wa xa.

Rôm nhũm mẽ õt xwýnhhaja hkrã hapôj nê tee ri Jejus pumu. Nhũm mex kumrêx nê hirã htýx kãm xa nhũm mẽ omu nê kuri wa ãm xwýnhhta wa omu.

³³ Hãmri nhũm Mojes mẽ Eris wa ra akupým nojarêt nhũm Simãw Pētre tee ri ja hã wa omu nê Jejus mã kãm:

—Kwa Pahĩti. Nà ãm hãmri na pu mẽ amnē mō. Kwa pu mẽ kritpēm jar axkamē nê tokyx panojarêt kêt nê. Pa mẽ amã pô nhĩrõnh o axkrunēpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nà? Anê.

Nhũm amnhĩ krã hkôt ã kãm kapêr anê.

³⁴ Hãmri nê kormã kãm kapêr rôm nhũm kakrã jaka týxja wrý nê mẽ hkunor nhũm wa mẽ kamã kuhê. Hãmri nhũm Simãw Pētre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê.

³⁵ Hãmri nhũm kakrã kamã Tĩrtũm mẽ kãm kapêr nê mẽ kãm:

—E ota Ixkra xa. Mẽ ate kamã ajamak o apa xwýnhhta na. Inhmã hapêê. Kêr ka mẽ ãm tapxipix kapêr mar týx o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwýnhhta wa ra ma akupým api nhũm mẽ Jejus pix pumu.

Mê tapxipixjaja na prem ã Jejus kot amnhĩ nhĩpêx anhỹr ã omu nom taxy kormã nhãm hkwyjê mã harênh kêt nê. ãm axpên pix mã harênh pê hkukamã hamaxpêr o ri Jejus kôt pa.

Jejus kot mēhō nē mēkarōmnuti janor ã harēnh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupỹm ahparmã hkwyjê hwyr wrýk o mō. Nê mẽ hwyr hpóx o mō nhũm mẽ ra mẽ kutêp pikuprōnh rax nê kuhê.

³⁸ Hãmri nhũm mēhō myja amnhĩ wyr mẽ omu nê mẽ kutã tē nē mẽ hkaxpa nê Jejus pumu nê kãm:

—Pa Jejus. Kwa ixkamã axukapri nê inhmã ixkra ho mex. ãm ixpê pyxire.

³⁹ Na hte mēkarōmnuti xatã ixpê tanhmã ho nhũm ý hã amỹra nê mra nê rôrôk nê hakwa jamrô ho hikwỹ nhũm tokyx kãm urer kêt nê. Nhũm ra ixpê homnuj tỳx nê.

⁴⁰ Hãmri pa akôt mẽ pa ho mẽ pa xwýnhjê hwyr o tē nhũm mẽ kot inhmã ho mex kaxyw tee ri tanhmã ho hkapyrý. Anê.

⁴¹ Hãmri nhũm kuma nê hkôt mẽ pa ho pa xwýnhjê mã kãm:

—Hêxta waa nê. Na ka mẽ ra ixte Tirtũm nhỹ hã mẽ ho mex ã ixpumunh o ixkôt apa ryy tã kormã ixpyrà nê ã mẽ hipêx anhỹr kêt nê. Mãn ka mẽ kormã mẽ kaxyw Tirtũm kôt ajamaxpêr tỳx kêt nê. Anê.

Hãmri nê myta mã kãm:

—E amnê ixwyr akra ho tē pa inhno ho omu. Anê.

⁴² Hãmri nhũm hwyr o tē nhũm mēkarōmnuti axte kêp ho pika kura nhũm amỹra nê tēm nê nō. Hãmri nhũm Jejus omu nê nê mēkarōmnuti kator nhũm akupỹm mex nê kãnhmã nhỹ. Hãmri nhũm akupỹm hipêxã mã kugō.

⁴³ Hãmri nhũm mẽ amnhĩ jaêr pê Jejus kot ã hipêx anhỹrja ã omu nê ri axpên mã harênh o:

—Kokỹỹ. Hêxta waa nê. Pêr ãm Tirtũmja ãm àhpumunh o àhpumunh. Anê.

Jejus kot htyk kukamã amnhĩ jarēnh

Matêwre 17.22-23; Makre 9.30-32

⁴⁴ Hãmri nhũm Jejus hkôt mẽ pa ho mẽ pa xwýnhjê mã kãm:

—E kot paj mẽ amã tanhmã amnhĩ jarēnh to ka mẽ inhmar tỳx nê. Na pa pre mẽ ate aa mẽmoj pumunh kêt kwý ho anhỹr o ixpa pix kaxyw mẽ awyr ixwryk kêt nê. Kojã mẽ tokyx mẽ kãm ixtã amỹnê nhũm mẽ ixpĩ. E kwa kêt ka mẽ ja ma nê hã anohtỳx nê ho apa. Anê.

⁴⁵ Hãmri nhũm mẽ tee ri kot ã amnhĩ jarēnh anhỹrja ma nê axpên mã:

—Kwa mo na pêr ri ã amnhĩ jarēnh anê? Kêp mẽ panhō Pahi Maati hã kot amnhĩ jarēnh kênã kot kêt mēhō kupĩ.

Anhỹr o axpên mã ri harênh o kuhê. Hãmri nê mẽ kãm ã kot amnhĩ jarēnh anhỹrja mar prãm kêt jakamã hprĩ hã tanhmã hã hkukjêr to hkêt nê. ãm akryk mar o kuhê.

Mê kot amnhĩ to rũnh xwýnhjê jarēnh

Matêwre 18.1-5; Makre 9.33-37; Rukre 22.24-27; mããnên Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwýnhjaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtō kot puj we nhỹrmã pahpê pahi nê mẽ ho amnhĩptar rax o pahkwý jakre? Anê.

Hãmri nê ja hã axpên kukjêr o Jejus kôt mō nê axpên mã: “Nà pa.” Nhũm mẽ hkwyjã: “Nà kêt pa.” Anhỹr o hkôt mō.

⁴⁷ Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wyr mēhprĩjê mã hpa ho apê nhũm hwyr tē nê kuri xa.

⁴⁸ Hãmri nhũm Jejus hkôt mẽ pa ho pa xwýnhjê mã tanhmã harênh to nê mẽ kãm:

—E mẽ inhma. Kêr ka mẽ apê pahi pyrãk o tanhmã amnhĩ jarēnh to ho ri apa hkêt nê. ãm te amarĩ ri mẽ

apa pyrək o amnhĩ nhĩpêx o ri apa. Jao nhĩri mēhprire hō pumu nē kamā axukapri ho kām mēmoj tanhmā ho rỳ kām mēmoj gō. Hāmri nē te pa ate tanhmā ixto mex to pyrək o amnhĩ nhĩpêx. Nē kot ka mē atō pa tanhmā ixto mex to nē te ate Tirtūm tanhmā ho mex to pyrək o amnhĩ nhĩpêx. Kot kaj mē ā amnhĩ nhĩpêx anhỹr o ri apa nhũm Tirtūm ja hā mē apumu nē mē ate amnhĩ to rūnh kêt tā nhũm tām mē ate amnhĩ to rūnh xwýnh ā mē ajarē. E kot kaj mē amā amnhĩ to rūnh prām nē ā amnhĩ nhĩpêx anhỹr o ri apa. Anē.

Mēhō kot Jejus nhỹ hā tanhmā amnhĩ nhĩpêx to hā harēnh

Makre 9.38-41

⁴⁹ Hāmri nhũm Jejus kôt mē pa ho pa xwýnhjê hō pê Juāwja nhỹhỹnh hwýr hpôx o tē nē kām:

—Kwa Pahihti. O mũj mēhō kēp mē pahkwý hkêt tā anhĩxi jarēnh kôt mē nē mēkarōmnuti janor o pa. Pa mē tee ri kot ā amnhĩ nhĩpêx anhỹr ā omu nē nē kām ixkapēr. Kēp mē pahkwý hkêt kēnā kot kêt ā mē hanor anhỹr o pa. Anē.

⁵⁰ Hāmri nhũm kuma nē kām:

—Kwa nā ja nē tanhmā kām nē hkêt nē. Koja mēhō mē pahkwým ri tanhmā mē ahkre hto hkêt nē hāmri nē kēp mē panhĩōō. Ra mē pahkôt kot amnhĩ nhĩpêx o pa mā kēnā. Jakamā kwa mē ja nē tanhmā kām akapēr to hkêt nē. Kwār māmri ā amnhĩ nhĩpêx anhỹr o ri pa. Ja mex kēnā. Anē.

Samar nhō xwýnhjaja kot Jejus kaga hā mē harēnh

Atre 8.14-15

⁵¹ Hāmri nhũm Jejus akupým kaxkwa hwýr àpir kaxyw ra hwýr apkati grēre ho mōr jakamā nhũm hamaxpēr o:

—E pa ma akupým Jerujarē hwýr mō. Nā kot paj anē. Mē kot kamā tanhmā ixto mā tā kot paj ma akupým mē hwýr mō. Anē.

⁵² Hāmri nē amnhĩ kukamā mē hkwyjê rē nhũm mē ma mē hkukamā Samar nhō krĩ kamā nhỹri mē kot amnhĩm hikranh xà japêr o mō.

⁵³ Nom nhũm Samar nhō xwýnhjaja kēp Jerujarē nhō xwýnhjê hprām nōkati jakamā Jerujarē hwýr mōr ā mē harēnh ma nē amnhĩ nē mē hkurê.

⁵⁴ Hāmri nhũm mē tee ri amnhĩ tā mē kuma nē awjanā nē akupým Jejus wýr mra nē kām mē harē. Hāmri nhũm Juāw mē Xiakre wa mē harēnh ma nē mē kamā gryk nē nē Jejus mā:

—Kwa Pahihti. Nā na mē axtem nē amnhĩ nē mē pahkurê. Jakamā e kwa pu mē kaxkwa rūm mē hipy kuwy hpôk kwý rē kē mē hkaxàr pa nā? Anē.

⁵⁵ Hāmri nhũm wa kuma nē wa kām:

—Tk. Kwa nā wa ajamaxpērja mex kêt. Pu mē ā ri mē hipêx anhỹr kêt nē. Koja Tirtūm kām ja ho anhỹr prām nē rĩ tām tanhmā mē ho. No mē papajaja pu mē ri mē kamā pagryk xàj tanhmā mē hipêx to hkêt nē. Pu mē ā mē hipêx anē nē ra amnhĩ tomnuj tỳx nē. Kwa wa ri ā ajamaxpēr anhỹr kêt nē. Anē.

⁵⁶ Hāmri nē mē ma Samar rūm hapôj nē hpānhā nhām krĩ hō hwýr pa.

Mē hkwyjaja kām Jejus kôt pa hprām ā mē harēnh

Matêwre 8.18-22

⁵⁷ Tā nhũm Jejus mē kormā mōr ri nhũm mēhōja hwýr tē nē kām:

—Pa Jejus? E kot paj ma akôt ixpa ho ixpa. Anē.

⁵⁸ Hāmri nhũm kuma nē kām:

—Ko ka mā. Kam nē rĩ ma ixkôt ri apa ho apa. Nom kêr ka inhmar kumrēx nē rĩ kormā ixkôt apa. Na hte xore pika hkre kamā hikwý xà. Nē kuwēnhre pĩ nhĩmök ā hikwý xà. No pa na Tirtūm kot mē awýr inhmēnh xwýnh tā jajê hkĩnhā inhōrkwy hkêt. Na pa hte âm nhām krĩ hō hwýr ixpa nē nhām ixpa. Tā xà kot kaj ixpyrà nē ā amnhĩ nhĩpêx anhỹr o ri apa nā? Anē.

⁵⁹ Nhũm pre ā kām kapēr anē hāmri nē nhām mēhōja wýr apkjê nē kām:

—Pa? No ka? Xà kot ka ma ixkôt apa ho apa nā? Anē.

Hāmri nhũm kām:

—Tỳ no âm kormā. Koja nhỹrmā inhĩpêxàja tanhmā amnhĩ to nē ty

mãn. Pa haxà hãmri nê rĩ kormã ma akôt ixpa ho ixpa. Anê.

⁶⁰ Hãmri nhũm Jejus kuma nê kãm:
—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mẽmoj ano kupyr rÿ inhnê apê amnàr kêt nê. Kwâr mẽ htĩr tũm nê mẽ pa hkêt mã xwÿnhjaja mã axwakre kamã amã anhĩpêxà jamãr o pa nhũm nhÿrmã ty kê mẽ amã haxà. Ka mãmrĩ ma Tĩrtũm kapêr o mẽ ahkre ho ri mẽ hkôt apa. Kê mẽ ama nê mẽ hkwÿjaja hkôt amnhĩ xunhwÿ nhũm mẽ ho hkra. Anê.

⁶¹ Nhũm pre ã kãm kapêr anê hãmri nhũm nhãm mẽhõ myja haxwÿja hwÿr tẽ nê kãm:

—E. Pa kot pa ma akôt ri ixpa ho ixpa. Nom kormã. Pa ma akupÿm tẽ nê ixkwÿjê mã amnhĩ jarê nê tanhmã amnhĩ to hpa mãn. Hãmri nê mẽmo arĩgro hã rĩ kormã ma akôt ixpa ho ixpa. Anê.

⁶² Hãmri nhũm tee ri kuma nê kãm:
—Kwa nà. Kot kaj ã ajamaxpêr anê hãmri nê ixkôt apa htã te amnhĩ katut kôt arĩt rãhã ho ri apa pyrãk o amnhĩ nhĩpêx. Kwa ã ajamaxpêr anhÿr kêt nê ma ixkôt apa kurê kumrêx. Anê.

10

Jejus kot mẽ hwÿr mẽ kêp 72 rênh ã harênh

Matêwre 10.1, 10.5-15; Makre 6.7-13; Rukre 9.1-6, 9.10-11; mããnên Atre 13.50-51, 18.6

¹ Tã nhũm Jejus axte amnhĩ kaxyw mẽ ho 72 nê mẽ kurê. Hãmri nê mẽ ho axkrut kapên nê ma nhÿhÿm krĩ hkwÿ hkôt amnhĩ kukamã mẽ kurê. Mẽ kot mẽ hkôt ri Tĩrtũm kapêr o mẽ ahkre ho pa kaxyw.

² Hãmri nê mẽ kãm:
—Na mẽ ohtô rax nê kormã Tĩrtũm kapêr mar kêt nê. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nê ãm tã no ãm kaxyw hikênh xwÿnh grêre pyrãk. Jakamã kwa mẽ ho Tĩrtũm wÿ kê axte mẽ kaxyw mẽ hkwÿjê rê.

³ —E kot paj ma mẽ hwÿr mẽ arê. Ma mẽ hkôt mẽ ate Tĩrtũm kapêr o mẽ

ahkre ho ri apa kaxyw. Jakamã kot kaj mẽ te ate ôwêhti kot mry xoprê hwÿr amnhĩ to mrar nhũm kot hkwÿ hpar pyrãk o amnhĩ nhĩpêx. Koja mẽ hkwÿjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nê amã mẽ uma hkêt nê.

⁴ —Nê kêr ka mẽ hwÿr anojarêt nê amnhĩ kôt amrykã rÿ akawà rÿ aparkã hõ ho apa hkêt nê. ãm anhÿ kamã ma mẽ hwÿr apa. Nê mẽ hwÿr mra nhũm mẽ nhÿri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêt kãm kãm akapêr krãnre nê mẽ hakre nê ma krĩm apa.

⁵ —Nê kêr ka mẽ hwÿr pøj nê nhÿri mẽ ôrkwÿ hwÿr agjê nê mẽ kãm: “Xà kot paj mẽ ato Tĩrtũm wÿ kê mẽ ato mex nê ka mẽ ajamakêtkati nê ri apa?” Anê.

⁶ Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ÿ kam nê mãmrĩ mẽ ixto awÿ.” Anê. Hãmri ka mẽ ama nê tanhmã mẽ ho Tĩrtũm wÿr to. No koja mẽ apê ja kaga ka mẽ ho hwÿr kêt nê.

⁷ —Nê kêr ka mẽ nhÿri mẽ ôrkwÿ kamã mẽ hwÿr pøj hãmri nê mẽ hkôt ri apikamênh tãmtã nê akupÿm mẽ kurũm ajapôj nê ma hpãnhã krĩ hõ hwÿr apa. Nê mẽ axãmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tĩrtũm kapêr o mẽ ahkre ho apa kênã. Jakamã kwâr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸ —Nê kêr ka mẽ nhÿri mẽ hwÿr pøj nhũm mẽ ato mex nê. Nê mẽ amã mẽmo mẽ apkur xà gõ ka mẽ mãmrĩ axãmnhĩx aku. Aa kormã mẽ ate mẽmojta kur kêt tã mãmrĩ ajamakêtkati nê aku. No tee ri amnhĩ kukamã tanhmã ajamaxpêr to hkêt nê.

⁹ —Nê kêr ka mẽ ã mẽ kãm akapêr anê nê mẽ kãm: “Tĩrtũm kãm mẽ ato hkra hprãm. Na hte amnhĩ wÿr mẽ awÿ.” Anê hãmri nê akupÿm mẽ kãm

mê à xwýnhjê ho mex. Ā kot kaj mê mê kām amnhĩ nhĩpêx anhÿr o ri mê hkôt apa.

10 –Nê kêr ka mê nhÿri mê hwÿr pôj nhũm mê ãm mê apumu nê amnhĩ nhõrkwÿ hwÿr mê awÿr kêt japêr. Hāmri ka mê tee ri amnhĩ tā mê omu hāmri nê ra ma nhām apa kaxyw.

11 Hāmri nê anojarêr nê mê kām: “E mê inhma. Tĩrtũm kot mê pahwÿr mēnh xwýnhhta na mê awÿr wa inhmê pa wa mê awÿr mō. Wa ixte Tĩrtũm kapêr o mê ajahkre kaxyw. Kām mê ato hkra hprām nhũm wa ixte mê amā harēnh kaxyw na pa pre wa ā mê awÿr inhmōr anē. Tā ka mê harēnh ma nê wa ixkaga. Jakamā kot paj wa jar mê anhō krĩ kamā amnhĩ par kà hā awjagrō kapĩ. Mē ate Tĩrtũm kaga hā amnhĩ pumunh nhũm Tĩrtũm kot amnhĩ pyrā nê mê akaga hā mê ate omunh kaxyw kot paj wa mê anoo mā ā amnhĩ par kà hā awjagrō kapĩr anē. Kot kaj mê nhÿrmā tee ri ā amnhĩ nhĩpêx anhÿrja mā ajamaxpêr nê akapĩr htyx kumrêx kām ga. Ām hāmri na pa wa mê amā ja jarē.” Anhÿr o mê kām akapêr nê mê kêp ajapôj nê ma hpānhā nhām krĩ hō hwÿr apa kurê kumrêx.

12 –Koja nhÿrmā Tĩrtũm mê kot amnhĩ tomnuj mÿrapê tanhmā mê ho. Na pre ra ā krĩ pē Sotō nhõ xwýnhjê nhĩpêx anē. Na prem amnhĩ tomnuj tÿx o pa nhũm Tĩrtũm tanhmā mê kot amnhĩ tomnuj tÿx ā tanhmā mê ho. Tā jar mê kot kām ixkapêr mar prām kêt nê mê kot ixkaga xwýnhjaja. Koja Tĩrtũm ixtā mê omu nê kot Sotō nhõ xwýnhjê nhĩpêx pyrāk o mê hipêx nom tanhmā mê ho htyx o mê hakre.

–E kêr ka mê ma krĩ hkwy hkôt apa nê ā mê kām akapêr anhÿr o ri apa. Anē.

Mê kot Tĩrtũm kôt hamaxpêr kêt xwýnhjê jarēnh

Matêwre 11.20-24

13-14 Tā nhũm Jejus krĩ hkwy nhõ xwýnhjê mā kapêr o xa nê mê kot amnhĩ tomnuj ā mê kām akir. Krĩ pē

Korajĩ mê Pesêj nhõ xwýnhjê kumrêx mā kapêr nê mê kām:

–E mê inhma. Amnepêr krĩ pē Sitō mê Xir wa kamā mê pa xwýnhjaja na prem tanhmā amnhĩ tomnuj tÿx to ho pa nhũm Tĩrtũm mê omu nê hā mê homnuj tÿx nê. Tā kwa mê o kora Korajĩ mê Pesêj wa kamā mê apa xwýnhjaja. Ra ixte mê amā mê ate mēmoj pumunh kêt o anhÿr rax o ixpa htā ka mê omu nê arĩ amnhĩ tomnuj o ri apa nê tokyx amnhĩ tomnuj kaga hkêt nê. Jakamā kot kaj mê amex kêt nê. Kop apu Sitō rÿ Xir kamā mān ixte mê kām aa mê kot mēmoj pumunh kêt kwÿ ho anhÿr o ri ixpa ronhÿx mê omu nê mê arom amnhĩ kaxyw ixkôt hamaxpêr kurê kumrêx. Nê tee ri tanhmā amnhĩ tomnuj to ho pa hā amnhĩ pumu nê hkapĩr nê ā amnhĩ nhĩpêx anhÿr kaga hpa. No mê kajaja na pa tee ri mê amā tanhmā amnhĩ nhĩpêx to ho ri ixpa kaprÿ. Ka mê ja hā ixpumu nê ãm ixpumu nê amnhĩ tomnuj kaga hkêt nê. Tā koja nhÿrmā Tĩrtũm mê piitā mê kot amnhĩ tomnuj mÿrapê tanhmā mê hipêx to. Hāmri nê tanhmā Sitō mê Xir wa kamā mê pa xwýnhjê jarēnh to nhũm mê kot amnhĩ tomnuj mÿrapê amnhĩ xà htyx kamā hamak o ri pa. No mê kajaja mê ate amnhĩ tomnuj tÿx o mê hakrenh jakamā koja Tĩrtũm mê hkĩnhā mê atomnuj tÿx o mê atomnuj tÿx. Ka mê amnhĩ xà htyx kamā ajamak rāhā ho ri apa ho apa. Anē.

15 Nhũm pre ā Jejus mê kām kapêr anē. Hāmri nê hpānhā Kapanaũ nhõ xwýnhjê mā kapêr nê mê kām:

–No mê apê Kapanaũ nhõ xwýnhjaja. Kot kaj mê ajaxwÿja mê amex kêt nê. Mē ate amnhĩ tomnuj kagare pyrā nê Tĩrtũm nhõ krĩ hwÿr akra ho apa. Nom kot kaj mê atō hwÿr axàpir kêt nê. Kot kaj mê ma kuwy maati hwÿr ajapêx pa kām ga.

16 Anhÿr o mê kām kapêr hāmri nê hpānhā hkôt mê pa ho mê pa xwýnhjê mā kapêr nê mê kām:

–Kot kaj mê Tĩrtũm kapêr o mê ahkre ho ri apa nhũm mēhō ama nê akapêr kôt amnhĩ nhĩpêx. Hā koja

te pa kot ixkôt amnhĩ nhĩpêx pyræk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyræk o amnhĩ nhĩpêx. Jao mãânên Tĩrtũm kaga.

Anê hãmri nhũm mẽ kuma hãmri nê anhrà nê axkrut kapên nê ma ahpũnhã krĩ hkôt anhrà.

Mê hkĩnh nê ri mẽ pa xwũnhjê jarênh Apokarip 3.5

¹⁷ Tã nhũm mẽ kêp 72jaja krĩ hkwy rũm akupũn Jejus wũr pøj. Piitã hkĩnh nê hpôx pa. Hãmri nê kãm:

—Kwa Pahĩti. Na pa prem anhy hã mẽ nê mẽkarõmnuti japôx rax nê. Na pa prem mẽ nê mẽ hano nhũm mẽ ãm mẽ kurũm hapôx kurê kumrêx. Anê.

¹⁸ Hãmri nhũm mẽ kuma nê mẽ kãm:

—Tõe. Ixãhpumunh tũx o ixte Satanasti jakrenh jakamã na ka htem inhũ hã mẽ hano nhũm mẽ tee ri mẽ akutã hihtũx prãm. Hãmri nê te na haxênh prêprêk pyræk o amnhĩ nhĩpêx nê mẽ kurũm hapôx kurê kumrêx pa ja hã mẽ omu.

¹⁹⁻²⁰ Mẽkarõmnuti te kot kagã xoprê rỳ te kot makre pyræk. Tã ra ixte mẽ amã ixãhpumunh tũx xà hkwy nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tũx to hprãm. Tã koja Satanasti tee ri mẽ ate nhũrmã Tĩrtũm mẽ wa ixri atĩr tũm nê apa pymaj tanhmã mẽ ano kupyrr to kaprỳ. Ra Tĩrtũm kot õ kagã kamã mẽ atĩr tũm nê mẽ apa kaxyw mẽ anhĩxi hã kagã kênã. Jakamã kwa mẽ jam ajamaxpêr o akĩnh nê ajamakêtkati nê ri apa. No kêt mẽkarõmnuti kot mẽ akapêr mar nê mẽ kurũm hapôxta ã mẽ omunh xà hkôt pix mã akĩnh nê ri apa hkêt nê. Anê.

Jejus kĩnh kãm kot Hipêêxã mã amnhĩ jarênh

Matêwre 11.25-27

²¹ Tã nhũm Tĩrtũm Karõ tanhmã Jejus to nhũm y hã hkĩnh nê xa. Hãmri nê Tĩrtũm mã kapêr nê kãm:

—Pa Papaj? Nã apê mẽ ixpiitã mẽ inhõ Pahĩ Maati na ka. Pikap ri mẽ pa xwũnhjaja nê kaxkwa kamã mẽ

pa xwũnhjaja apê mẽ ixpiitã mẽ inhõ Pahĩ Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ ãhpumunh tũx ã mẽ kot amnhĩ jarênh xwũnhjê mã axãhpumunh tũx o amnhĩrĩt kêt nê. ãm mẽ ãhpumunh kêt ã mẽ kot amnhĩ jarênh xwũnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkôt ã mẽ piitã mẽ hipêx anhyr o ri apa. Jakamã mẽ kot amnhĩ to hkryre xwũnh pixjaja na htem ate amnhĩ nhĩpêx ã apumunh o pa.

²² —Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwũnhjaja na mẽ kot ja hã ixpumunh kêt. Nê mãânên papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anê nê inhãm hprãm xà hkôt mẽ hkwyjê mã ato amnhĩrĩt o ri ixpa nhũm mẽ ixpyrà nê ate tanhmã amnhĩ nhĩpêx to ho apa hkôt apumu. Anê.

Jejus kôt mẽ pa xwũnhjaja kot hkôt omunh o pa hã mẽ harênh

Matêwre 13.16-17

²³⁻²⁴ Nhũm pre Jejus ã Tĩrtũm mã amnhĩ jarênh anê hãmri nê hpãnhã hkôt mẽ pa ho mẽ pa xwũnhjê mã kapêr nê mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapêr mar o ri ixkôt apa. No amnepêm mẽ akukamã pahijaja nê Tĩrtũm nhỹ hã kapêr jarênh o ri mẽ pa xwũnhjaja kãm ixpumunh prãm tũx o pa htã mẽ akĩnhã ixpumunh kêt rãhã htyk pa. Kormã ixwryk nê jar ixkator kêt jakamã na prem ixpumunh kêt rãhã ty. Nê mẽ kãm ixkapêr mar prãm tã mẽ akĩnhã ixkapêr mar kêt nê. ãm mẽ kapxipixjaja na ka mẽ myr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar jakamã kwa

mê ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xwỳnh jarēnh

Matêwre 22.34-40; Makre 12.28-34; mãânēn Wam Juãw 3.17-18

²⁵ Tã nhũm Tĩrtũm kapēr tũm o mẽ ahkre o mẽ pa xwỳnhja Jejus wỳr tẽ nê hêx rom kot kamã hamak kaxyw kãm:

–Pa? E kwa inhmã mẽmoj jarē. Tanhmã kot paj we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx to wehe? Anê.

²⁶ Hãmri nhũm kãm:

–Tanhmã na ka hte Tĩrtũm kapēr ã kagà htũm kot mẽ htĩr tũm nê pa hã kagà kamã harēnh nê mar to? Anê.

²⁷ Hãmri nhũm kãm:

–Nà harēnh kot:
Kêr ka mẽ anhĩ piitã ho amã Tĩrtũm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyrãk o mẽ hipêx o ri apa. Jao tãm mẽ hipêx o ri apa. Anê.

Ã Tĩrtũm kapēr ã kagà htũm kamã ja jarēnh kot anhỹr. Anê.

²⁸ Hãmri nhũm Jejus kuma nê kãm:

–Tỳ. Nà ãm hãmri na ka harē. Kot kaj ã mẽ hipêx anhỹr o ri apa nê nhỹrmã Tĩrtũm mẽ wa ixri atĩr tũm nê apa ho apa. Anê.

²⁹ Hãmri nhũm kuma nom kãm mẽ piitã mẽ ho mex prãm kêt nê. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

–Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pê Ijaew pixjaja nà? Anê.

³⁰ Hãmri nhũm kuma nê tanhmã kãm ujarēnh to. Nom hã kuxi nê kãm awjarē nê kãm:

–E pa amã awjarē ka inhma. Kojã Ijaew nhõ xwỳnhja ma Jerujarē rũm Jeriko hwỳr ahpar mã ma mō. Mōõ nhũm ra mẽ ahkĩnh xwỳnhjaja kutã mra. Hãmri nê pry kahti ri hwỳr kato nê unê nê htak rax nê. Nê kêp ê hkwrỳnh pa nê ma kurũm hprõt nê

mra nê akunok nhũm mẽ kot htak o hkà rēnh rãhã ra htyk kaxyw nê nō.

³¹ Hãmri nhũm patreja tẽ nê omu. No ãm omunh o hãnh tẽ nê hkupu nê ma tẽ. Uràk nê kêp Ijaew tã ãm omu nê tanhmã ho ajuta hto hkêt nê hãnh omunh o tẽ nê hkupu nê ma tẽ.

³² Hãmri nhũm patre ho ajuta xwỳnhja mãânēn tẽ. Nê patre pyrã nê omu nê ãm omu nê hkupu nê ma tẽ. Uràk nê kêp Ijaew tã omu nê ãm omu nê hkupu nê ma tẽ.

³³ –Tã nhũm Samar nhõ xwỳnhja mãânēn mō. Samar nhõ xwỳnhjê mẽ Ijaew na prem kãm axpēn kĩnh kêt tã nhũm mō nê omu nê kamã ukapri nê. Kêp Ijaew ã omunh tã tee ri omu nê kamã ukapri nê.

³⁴ Hãmri nê hwỳr tẽ nê omu nê kãm mẽ kot htak o hkà rēnh xà kane nê kãm hkupu pa. Hãmri nê kãnhmã ãm nê hkrit jumēnre hã kumẽ nê ma nhỹri mẽ kot amnhĩm hikranh xà hã ixkre hwỳr o mō nê hwỳr o pōj. Hãmri nê omunh mex o apkati.

³⁵ Hãmri nê akupỹm nojarêt nê kãxpore hkwy jamy nê o tẽ nê kot mẽ kãm õ xwỳnhja mã kugõ nê kãm: “E kot paj hãmri ma mō. Ota ixkãxporeta. Kêr ka inhmã à xwỳnhnta tãnopxar mex nê. Nê inhmã omunh mex kê akupỹm mex. Kojã kãxporeja apê grire hã kot paj nhỹrmã akupỹn mō nê axte hkôt amã hkwy gõ.” Anhỹr o kãm kapēr nê ma akupỹm mō. ã mẽ ujarēnh kot anhỹr. Anê.

³⁶ Nhũm pre ã Jejus kãm ujarēnh anê. Hãmri nê kãm:

–E nhỹ na pre kãm mẽ kot htak xwỳnhnta kapri ho te tãm kãm amnhĩ tã ma pyrãk wehe? Anê.

Hãmri nhũm Tĩrtũm kapēr tũm o mẽ ahkre xwỳnhnta kãm:

–Nà kot kamã ukapri xwỳnhnta na pre omu nê kamã ukapri nê ho mex o te tãm kãm amnhĩ tã ma pyrãk o hipêx. Anê.

³⁷ Hãmri nhũm Jejus kãm:

–Tỳ. Nà ãm hãmri na ka harē. Uràk nê kêp Ijaew kêt tã kamã ukapri nê ho mex nê. Tã kêr ka uràk nê ã mẽ piitã mẽ hipêx anhỹr o ri apa. Uràk nê mẽ

kêp akwÿ hkêt tâ mẽ kamã axukapri ho ri apa. Anê.

Jejus kot Matre mẽ Marir wa hwÿr mōr ã harênh

Rukre 12.29-31

³⁸ Tã nhũm Jejus krĩ rũm kato hãmri nê hkôt mẽ pa ho mẽ pa xwÿnhjê mẽ mẽ ma nhãm krĩ hō hwÿr mō. Mōõ nê hwÿr pōj. Hãmri nhũm Matre mẽ omu nê amnhĩ nhōrkwÿ hwÿr mẽ kuwÿ nhũm mẽ ma hwÿr mō nê òrkwÿ hwÿr pōj.

³⁹ Hãmri nhũm Jejus mẽ ahkre ho nhÿ nhũm Matre htōx Marirja arĩ hpar pê mar o nhÿ.

⁴⁰ Hãmri nhũm Matre mẽ hwÿr axã nê omu. Nê tee ri àpênh rax kukamã hamaxpêr nê Jejus wÿr tẽ nê kãm:

—Xê ma Pahihti. Kormã ixàpênh rax tâ nhũm Marir ixto ajuta hkêt nê. ãm akapêr pix mar gryk ã ixkôt htêm nê ixto ajuta hkêt nê. Pa ahte mẽ panhō hã ixàpênh o xa. Xà amã ja mex? Xê kãm anê kê tokyx ixkôt tẽ pa wa hã axkrut nê mẽ panhō hã ixàpênh tokyx anê. Anê.

⁴¹ Hãmri nhũm tee ri kuma nê kãm: —Kwa Matre. Na ka ãm mẽ panhō pix kukamã ri ajamaxpêr nê gryk ã tee ri amnhĩ nhĩpêx.

⁴² ãm hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

11

Mẽ pahte tanhmã Tirtũm mã amnhĩ jarênh to hã mẽ pamã karõ

Matêwre 6.9-13, 7.7-11

¹ Tã nhũm apkati hō hã nhũm Jejus nhÿri Tirtũm mã amnhĩ jarênh o nhÿ. Nê kãm amnhĩ jarênh pa nhũm hkôt mẽ pa ho mẽ pa xwÿnhjaja kot kãm amnhĩ jarênh ã omu nê hwÿr mra nê kãm:

—Kwa Pahihti. Amnhĩ pyrà nê mẽ ixte Tirtũm mã amnhĩ jarênh kaxyw tanhmã mẽ ijahkre hto. Kêr pa mẽ apyrã nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwÿnhjê mã ja jahkre nhũm mẽ kuma nê tãm kãm

amnhĩ jarê. E kwa mẽ inhmã tanhmã ja jahkre hto nã? Anê.

² Hãmri nhũm mẽ kãm:

—Tõe. Nã kêr ka mẽ kãm amnhĩ jarênh kaxyw nê mãmri amnhĩ krã hkôt tanhmã kãm amnhĩ jarênh to. Rÿ kãm amnhĩ jarênh o:

Pa Mẽinhĩpêxã maati? Nã amex o amex Tirtũm.

Apê mẽ ijamãr mex xwÿnh maati na ka.

³ Nê kwa kêr ka apkati mẽ mẽ inhmã mẽmo gō pa mẽ akukwak ri ho ixàpkur o ri ixpa.

⁴ Nê na pa hte tōhã amnhĩ tomnuj nê Tirtũm. Nom mẽ kot tanhmã ixtomnuj to xwÿnhjaja na pa hte ãm mẽ omu nê amnhĩ tã tanhmã mẽ ho hkêt nê. Nê ja ho ijamakêtkati kurê kumrêx. ã na pa hte amnhĩ nhĩpêx anhÿr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhĩ tomnuj to kaxyw japêr ka ja hã ixpumu nê ixte ã amnhĩ nhĩpêx anhÿrja nê ixto htÿx nê pa ja ho anhÿr kêt nê.

E ãm ja pix na hapêx. Anê.

E kêr ka mẽ ã Tirtũm mã amnhĩ jarênh anhÿr o ri apa. Anê.

Mẽ pahte amnhĩ to Tirtũm wÿr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnên Rômã 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkôt mẽ pa ho pa xwÿnhjê jahkre ho nhÿ nê mẽ kãm:

—Nê ja. Koja mẽ akrãmnhwÿjê hō. Nhũm kôt ã kamãt nhũm nhÿhÿnh awÿr mōn pōj. Ka anhō mẽmoj kêt hãmri nê anhÿjuk ri akrãmnhwÿ hwÿr tẽ. Hãmri nhũm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkrãmnhwÿ. Na ka mẽ ra gōr? Kwa kãnhmã nhÿ nê inhmã anhō mẽmoj

japêr. Na ra ham ixkràmnhwÿta môn pøj. Nê kãm prãm tÿx nê mō nom kaxyw inhō hkêt. Kwa kànhmã nhÿ nê inhmã anhō mẽmoj japêr nê inhmã hkwÿ pa ma o tē kē kukrê. ãm inhō hkêt kumrêx. ãm hãmri na pa amã amnhÿ jarê. Kwa tokyj kànhmã nhÿ nê inhmã mẽmoj japêr nà?” Anhÿr o kãm akapêr.

⁷ Hãmri nhÿm ama nom kãm kànhmã ÿr prãm kêt nê. Nê amã: “Tk. Nà ra mē ixte amnhÿ tã kahê hpar nê inhÿkwÿ kênã kot pa kêt kànhmã nhÿ nê amã mẽmoj japêr.” Anê.

⁸ Ka tee ri ama nê xatã kãm: “Kwa ã inhÿpêx anhÿr kêt nê ixkràmnhwÿ. Kwa tokyx.” Anhÿr o xa. Nê xatã kãm anojarêr o xa. Hãmri nhÿm ra kãm amar kaga hãmri nê tã kànhmã nhÿ nê amã ate ho presija xwÿnhhta gō. No ãm kêp akràmnhwÿ hã ate hã axàhwÿr tipxi hã amã òr kêt nê. ãm xatã ate ho presija htÿx xwÿnhja mã hamaxpêr nê tã kànhmã nhÿ nê amã kugō. ã mē ujarênh kot anhÿr.

⁹⁻¹⁰ –Tã kêr ka mē ja pyrã nê amnhÿ to Tÿrtÿm wÿr rãhã ho ri apa nhÿm ama nê ate mẽmoj tã hwÿrta amã kugō. ãm xatã ate hã axàhwÿr o ri apa nhÿm amã kugō. ãm mẽmoj to hwÿr rãhã ho ri apa nhÿm ama hãmri nê amã mẽmoj tanhmã hipêx to. Te ho mēhō kãm tep xành nê gōx kãm xatã tep rênh xà rênh o ãm pyrã nê xatã mẽmoj tã hwÿr o ri apa. Hãmri nhÿm ama nê amã hprãm xwÿnhhta gō. Te ho tep kanhêr xwÿnhhta tã kot tep ò kanhêr pyrãk o anhÿpêx nê amã mẽmoj prãm xwÿnhhta gō. Anê.

Tÿrtÿm kot hkrajê mã mẽmoj mex nhôr ã harênh
Makre 7.9-11

¹¹ Nhÿm Jejus arÿ hkôt mē pa ho mē pa xwÿnhjê jahkre nê mē kãm:

–Nê xà koja akra kãm tep xành nê hã awÿ ka ama nê axtem nê kãm kagã xoprê hō py nê agō?

¹² Rÿ nhÿm krãhyre gre hã awÿ ka axtem nê kãm makre hō py nê agō? Nà na ka htem ã akrajê nhÿpêx anhÿr

kêt nê. Na ka htem mē kot mẽmoj tã àhwÿr xà hkôt kãm mẽmoj gō.

¹³ Mē kamjaja mē ate amnhÿ tomnuj o ri apa htã ka htem akrajê ho mex o ri apa. Tã kaxkwa kamã Tÿrtÿmja na hte mē pahto mex o mē ate mē akrajê ho mexta jakrenh. Kãm mē pajapê htÿx kôt na hte mē pamã mẽmoj mex nhôr o pa. Nê mãânênh amnhÿ Karōja na hte mē pamã kugō. Jakamã kot kaj mē atō Karō hã awÿ nhÿm ama nê awÿr kumê nhÿm wrÿ nê akarō mã axà. ã na hte Tÿrtÿm kãm mē pajapê xaj mē pamã mẽmoj mex nhôr o pa anê. Anê.

Jejus mē Satanasti wa harênh
Matêwre 12.22-32; Makre 3.20-30

¹⁴ Tã nhÿm Jejus nhÿri axte mēhō nê mēkarōmnuti kator. Na pre ra mēkarōmnuti tanhmã ho nhÿm kapêr kêt nê pa. Hãmri nhÿm Jejus omu nê nê kator nhÿm akupÿm kapêr mex nê. Nhÿm mē piitã amnhÿ jaêr pē omu nê no hawênh rÿnh nê omunh o kuhê.

¹⁵ Nom nhÿm mē hkwÿjaja Jejus kot ã hipêx anhÿr ã omu nê htÿx ho kêp mēkarōmnuti hkwÿ hã hkamnhÿx nê axpênh mã harênh o:

–Tk pêr hinhu nhÿkôôti nhÿ hã na hte mē nê amnhÿ kwÿjê japôx o pa. Anê.

Hinhu nhÿkôôti nhÿxi hō pē Satanasti nhÿm prem Satanasti nhÿ hã Jejus kot ã amnhÿ nhÿpêx anhÿr o pa hã hkamnhÿx.

¹⁶ Jakamã nhÿm mē hkwÿjaja hwÿr mra nê kãm:

–Kwa mē inhmã aa mē ixte mẽmoj pumunh kêt ò ho anê. Pa mē omu nê ate Tÿrtÿm nhÿ hã tanhmã amnhÿ nhÿpêx to ho apa hã apumunh kurê kumrêx. Anê.

Nom hêx rom mē kot kamã hamak kaxyw ã kãm kapêr anê.

¹⁷ Nhÿm ra Jejus mē hamaxpêr kôt mē omunh mex jakamã mē kapêr ma nê mē kãm:

–Kwa mē inhma mē ate ixpê Satanasti hkwÿ hã ixkamnhÿx xwÿnhjaja. Koja pika nhō xwÿnhjaja axpênh kutã amnhÿ xunhwÿ nê axpu hãmri nê anhgrã nê ma ahpÿnhã ri pa.

Hāmri nē amnhī krā hkôt ri tanhmā amnhī to ho ri pa. Jakamā nhūm mē ō pahi mē hamār o pa hkêt nē. Rỳ koja krī nhō xwỳnhjaja. Mē kot axpēn to hkwỳ xwỳnhjaja mēmoj tã axpēn kãm gryk nē axpēn kutã amnhī xunhwỳ hāmri nē axpēn pē anhrà nē ahpỳnhã pa hāmri nhūm mē ō pahi tee ri kãm mē hamār o pa hprãm. Mo ō krī kamã mē hkwỳ kot ri mē hamār o pa? No na pre mē ō pahi tãm amnhī nē mē hanor kêt nē.

18 – Tã ja pyrã nē ixte Satanasti nhỹ hã tanhmã amnhī nhĩpêx to ho ixpa ronhỹx pa mē nē amnhī kwỳjê janor o ri ixpa hkêt nē. Nhỹx Satanasti ixte mē nē mē hanor kaxyw tanhmã inhmã nē hkêt nē.

19 – No kêt mē akwỳjaja? Xà Satanasti nhỹ hã na htem mē nē mē hapôx o pa nã? Kêp apu pa ixte y hã mē nē mē hapôx ronhỹx mē akwỳjaja ixpyrã nē y hã mē nē mē hapôx o pa. Nã Tĩrtũm nhỹ hã mē ixte mē nē mē hapôx o mē ixpa kênã. Jakamã ã mē ate ijarēnh anhỹr o apaja mex kêt.

20 Tĩrtũm Karō nhỹ hã ixte mē nē mē hapôx o ri ixpa kênã. Jakamã kwa mē ja hã ixpumu nē Tĩrtũm kot ixte mē ato amnhĩptàr kaxyw mē awỳr inhmēnh kôt ixpumunh kurê kumrêx kêt wehe. Pa na ka htem ixkamã ajamak o apa.

21-22 – Satanastija àhpumunh tỳx jakamã na htem tee ri kêp mē kot hkôt amnhī xunhwỳr xwỳnhjê pytãr kaxyw nhūm mē nē mē omunh mex nē. Nom ixàhpumunh tỳx o ixte Satanasti jakrenh jakamã pa na pa hte kêp mē utã nhūm mē hpãnhã ixkôt ri amnhī nhĩpêx.

23 – Mē amã ixkapêr mar prãm tã na ka mē kormã ixkôt amnhī xunhwỳr kêt nē. Kwa wem ma amnhī to amõr gri nē tokyx ixkôt amnhī xunhwỳr kêt wehe. Kot kaj mē anhỹr kêt nē hāmri nē te mē ate ixkutã amnhī xunhwỳr xwỳnh pyrãk o amnhī nhĩpêx.

24 Mē ate ixkôt amnhī xunhwỳr kêt xwỳnhjaja te mē ate mēhõ nē mēkarõmnuti japôx xwỳnh pyrãk. Nhūm te kêp kator nē ma mō nē

nhỹri amgrã kamã ri pa. Nhūm ja kêp omnuj nhūm tee ri kamã nhỹri hkôkôt xà japêr o pa. Nom tee ri hapêr o pa nē hamaxpêr o: “E kot paj ma akupỹm mē kot nē ixkator xwỳnhhta wỳr tē nē hwỳr axã nē hkôt mãn ixpa.” Anē.

25 Hāmri nē ma akupỹm hwỳr tē. Nom kormã akupỹm hwỳr àr kêt ri nhūm kamã amrakati nē pa.

26 Jakamã nhūm ma akupỹm hwỳr tēn axã. Nom ahte àr kêt nē. Ra amnhī kôt amnhī kwỳjê ho 7 nē hwỳr mē ho agjê. Nē hwỳr gjêx pa. Mē kêp 7jaja nē wamta mē nhūm mē piitã hwỳr gjêx pa. No mē kêp 7jaja omnuj tỳx o kot wamta jakrenh jakamã nhūm mē kot hwỳr gjêx xwỳnhhta mē y hã amnhī tomnuj tỳx o pa. Oprê htỳx nē. Wam pyxire nē kot hwỳr àr nhỹ hã amnhī tomnuj o ri pa nom ãm kawax pē oprê. Tã axte hwỳr mē ohtõ nē gjêxta nhỹ hã oprê htỳx kumrêx. Ja pyrã nē kot kaj mē tokyx ixkôt amnhī xunhwỳr kêt nē hāmri nē ãm amnhī tomnuj tỳx pix o ri apa. Anē.

Mē hkĩnh nē mē pa xwỳnhjê jarēnh

Rukre 8.19-21

27 Nhūm pre ã Jejus mē ahkre anē nhūm mēhõ nija kuma nē kãm:

–Hêxta gãã nē. Mãn akatorxã ã ate amnhī nhĩpêx anhỹr o apa hã apumu nē hkĩnh nē. Anē.

28 Hāmri nhūm kãm:

–Tỳ. Nã kot anhỹr kênã. Nom kot ka mē atõ Tĩrtũm kapêr ma nē hkôt amnhī nhĩpêx hāmri nē akĩnh rax o ixkatorxã kot ixpumunh nē hkĩnhhta jakre. Anē.

Jejus kot tanhmã Jõhti jarēnh to

Matêwre 12.38-42; Makre 8.12

29 Tã nhūm mē ohtõ nē Jejus ã akuprõ nē mēmoj tã kuwỳ nē kãm:

–Pa. Kwa mē inhmã aa mē ixte mēmoj pumunh kêt ō ho anē pa mē omu. Anē.

Hāmri nhūm mē kuma nē mē kãm:

–Tk. Kwa mē ajamxpêr punuj pix o na ka htem ri ajamxpêr o apa. Ixpê Tĩrtũm kot mē awỳr inhmēnh xwỳnh tã ka mē ja hã ixkôt ajamxpêr kêt nē. Tã mē ate aa mēmoj pumunh kêt kwỳ ixte mē amã ho anhỹr kaxyw

hã inhmã karõ. Nà kot paj kormã mẽ amã ho anhÿr kêt nẽ. Kot paj nhÿrmã te amnepêm finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nẽ kormã ja hã ixpumu.

³⁰ Tĩrtũm nhÿ hã kapêr xwÿnh pê Jõhtija amnepêm na pre tep rax kukrẽ. Tã nom nhũm htĩr rãhã õxàhkre rũm kato nhũm mẽ omu nẽ Tĩrtũm kot mẽ hwÿr mẽnh ã omu. Tã kot paj nhÿrmã Jõhti pyrã nẽ tanhmã amnhĩ nhĩpêx to nhũm mẽ ja hã ixpumu nẽ Tĩrtũm kot mẽ awÿr inhmẽnh xwÿnh ã ixpumunh kurê kumrêx.

³¹ —Nẽ koja nhÿrmã Tĩrtũm akupÿm mẽ htyk nẽ mẽ hikwÿ xwÿnh piitã akupÿm mẽ ho htĩr hãmri nhũm mẽ piitã Inhĩpêxã mẽ wa ixkutã hkrĩ. Pa wa mẽ piitã tanhmã mẽ harênh to. Tĩrtũm mẽ wa ixkuri mẽ htĩr tũm nẽ mẽ pa ho mẽ pa mã xwÿnh ã mẽ hkwyjê jarê. Nẽ wa ixkuri mẽ pa ho mẽ pa hkêt xwÿnhjê jarê. Mẽ piitã ã mẽ harênh anê. Amarĩ mẽ pa xwÿnhjaja nẽ mẽ õ pahijaja. Hãmri nhũm sur kãm mẽ õ pahi niti Tĩrtũm mã tanhmã amnhĩ jarênh to hãmri nẽ hpãnhã tanhmã mẽ ajarênh to nẽ kãm mẽ ajarênh o: “Na pa pre inhmã pahi Sarumãw kot anhÿ hã àhpumunh tÿx ã harênh ma hãmri nẽ inhmã mar prãm xàj ma awry hã õ pika hwÿr ixpa nẽ omu nẽ kapêr ma. Hãmri nẽ ma akupÿm inhõ pika hwÿr ixpa nẽ ixkwÿjê mã àhpumunh tÿx ã harênh o ixpa. Tã Akra Jejus na àhpumunh tÿx o pahi Sarumãw jakrenh tã or war akutã mẽ hkrĩ xwÿnh kwÿ mũj na prem kapêr ma no ãm ixkĩnhã kãm mar prãm kêt nẽ. Na prem kuma nẽ ãm kuma.” Anhÿr o wa inhmã mẽ ajarê. Hãmri nẽ ja hã mẽ amã akir ka mẽ tee ri mar o akrĩ nẽ amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwÿnhjaja wa inhmã tanhmã amnhĩ jarênh to. Jõhti kot mẽ hwÿr mõi nẽ mẽ kãm Tĩrtũm kapêr jarênh o pa xwÿnhjaja nhũm mẽ tanhmã wa inhmã amnhĩ jarênh to. Hãmri nẽ pahi nita pyrã nẽ wa inhmã tanhmã

mẽ ajarênh to nẽ wa inhmã: “Na pre Jõhti man mẽ inhõ krĩ hwÿr mõ nẽ mẽ inhmã akapêr jarênh o ri mẽ ixkõt pa. Pa prem kuma nẽ mẽ ixte amnhĩ tomnuj kaga nẽ akõt amnhĩ xunhwÿr kurê kumrêx Tĩrtũm. Nom or war akutã mẽ hkrĩ xwÿnh kwÿ mũj na pre Akra Jejus tãm mẽ hwÿr mõ nẽ mẽ kãm kapêr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nẽ hkõt amnhĩ xunhwÿr kêt nẽ. Mẽ kot Akra mar tã amnhĩ kaxyw kãm hamaxpêr kêt nẽ.” Anhÿr o koja mẽ wa inhmã mẽ ajarê ka mẽ tee ri mẽ ama nẽ amnhĩ kamã agryk tÿx nẽ. Jakamã e kwa ixte mẽ amã ã ixkapêr anhÿrja ma nẽ kãm ajamaxpêr tÿx rãhã ho ri apa. Anê.

Mẽ pajamaxpêr mex te kot kanê hpõk mex pyrãk ã harênh

Matêwre 5.15, 6.22-23

³³ Nhũm Jejus arĩ mẽ ahkre ho nhÿ nẽ mẽ kãm:

—Xà na htem kanê hpõk nẽ poti ho hpro? Nà na htem ho anhÿr kêt nẽ. Na htem hpõk nẽ kÿx pê mẽmoj nhĩmõk ã unhwÿ nhũm mẽ piitã mẽ kãm hirã mex nhũm htem ixkrem agjê nẽ hirã kamã mẽmoj pumunh mex o mra.

³⁴ Ja pyrã nẽ kot ka mẽ atõ ixkapêr ma nẽ ixkõt amnhĩ nhĩpêx nẽ tãm amnhĩ nhĩpêx o ri apa. Nẽ tãm mẽ hipêx o ri apa. Jao te hirã kamã mẽ rĩt mex xwÿnhjaja kot amnhĩ nhĩpêx pyrãk. Nom koja mẽhõ inhma nẽ ãm inhma nẽ ixkwÿm ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwÿnhjaja kot htÿx amnhĩ nhĩpêx o pa pyrãk o amnhĩ nhĩpêx.

³⁵ —E kêr ka mẽ ã amnhĩ nhĩpêx anhÿr pymaj ixkapêr ma nẽ kãm ajamaxpêr tÿx rãhã ho ri apa.

³⁶ Kot kaj mẽ ixkapêr ma nẽ ixkõt amnhĩ nhĩpêx. Hãmri nẽ te mẽ ate kanê hpõk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapêr ma nẽ aprĩ hã ixte tanhmã amnhĩ nhĩpêx to hã ixpumunh mex nẽ. Anê.

Jejus kot tanhmã Parijew nhõ xwýnhjê jarênh to

Matêwre 23.25-26

³⁷ Tã nhũm Jejus ra mẽ ahkre pa. Hãmri nhũm Parijew nhõ xwýnhja hwýr tẽ nẽ kãm:

—Pa. E kwa ma ixkõt tẽ nẽ mẽ ixkutã apku. Anẽ.

Hãmri nhũm kuma nẽ kãm:

—Tõe. Nà kot paj ma akõt tẽ. Anẽ

Hãmri nẽ ma hkõt tẽ nẽ òrkwý hwýr axà nẽ apkur kaxyw mẽ ìhkô hã nhỹ.

³⁸ No ãm mẽ hkukamã mẽ hpãmjê pyrã nẽ amnhĩ nhĩkra kuhõnh ryy hkêt nẽ. ãm amnhĩ nhĩkra htyk pix kuhõnh tokyx anẽ nẽ nhỹ. Nẽ ò prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kõt hwýr xwýnhhta tee ri ja hã omu nẽ hamaxpêr o:

—Tk. Kwa na hte mẽ ixte amnhĩ nhĩpêx kõt amnhĩ nhĩpêx mex kêt nẽ.

³⁹ Anẽ nhũm Jejus amnhĩ tã hamaxpêr ã omu nẽ kãm:

—Nà mẽ apê Parijew nhõ xwýnhjaja te mẽ ate mẽ kot apkur kaxyw prat kre kuhõnh punuj tã mex ã harênh pyrãk o amnhĩ nhĩpêx. Nẽ ãm mẽ akrã hkà rũm pix mã na mẽ amex. Nẽ mẽ noo mã te mẽ amex pyrãk no ãm mẽ anhõxàhkre kaxwýnh kãm mẽ ajamaxpêr mex kêt. ãm mẽ akapêr prãm. Nẽ mẽ axàhkurêê. Nẽ mẽ anhõxyý.

⁴⁰ Mẽ ate atýx ri amnhĩ nhĩpêx o ri mẽ apa xwýnh kênã. Kwa kêr ka mẽ ãm akrãhkà pix rũm amex nẽ ri apa hkêt nẽ. Mẽ mãânên anhõxàhkre kaxwýnh kãm ajamaxpêr mex o ri apa. Nẽ tãm mẽ piitã mẽ hipêx o ri apa.

⁴¹ Kêr ka mẽ tãm ajamaxpêr o tãm mẽ hipêx o ri apa. Nẽ axãmnhĩx ri mẽ kêp amrakati xwýnhjê mã mẽmoj nhõr o ri apa. Kot kaj mẽ ã amnhĩ nhĩpêx anẽ hãmri nhũm Tirtũm ja hã mẽ apumu nẽ amnhĩm mẽ amex ã mẽ ajarê. No na ka htem mẽ amã mẽ amnhĩ to mex prãm xàj tee ri amnhĩ kuhõnh japjê kaprý. Anẽ.

Jejus kot Parijew nhõ xwýnhjaja mex kêt kukamã mẽ harênh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwýnhjê jahkre nẽ mẽ kãm:

—Kwa mẽ okora Parijew nhõ xwýnhjaja. Kot kaj mẽ amex kêt nẽ. Na ka htem Tirtũm kapêr piitã hkõt amnhĩ nhĩpêx o apa hkêt nẽ ãm hkwy kõt pix mã amnhĩ nhĩpêx o ri apa. Nẽ ãm kapêr o hpýnhre nẽ hkõt amnhĩ nhĩpêx hãmri nẽ hã amnhĩ pumu nẽ ate amnhĩ to mex xwýnh ã amnhĩ to jarkrar o ri apa. Nom Tirtũm kãm hprãm xà piitã hkõt amnhĩ nhĩpêx hkêt nẽ. Mẽ ate tãm mẽ piitã mẽ hipêx o ri apa hã kot mẽ amã karõja. Nẽ mẽ amã Tirtũm kĩnh ã kapêr kõt amnhĩ nhĩpêx o ri apa hã karõja mẽ ate mar mex tã hkõt amnhĩ nhĩpêx kêt nẽ. Mẽ ate kapêr piitã hkõt amnhĩ nhĩpêx ronhýx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwýnh ã amnhĩm mẽ ajarênhja na mẽ amã hprãm. Nẽ mẽ piitã mẽ kot amnhĩm mẽ apê mẽ ahkre mex xwýnh maati hã mẽ ajarênhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nẽ. Mẽ kot mẽ akapêr mar nẽ mẽ akõt amnhĩ nhĩpêx xwýnhjaja te mẽ kot htýx ri mẽ hã pika nhĩmõk ã ri mẽ pa xwýnh kot amnhĩ nhĩpêx pyrãk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nẽ htýx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwýnhjê mã mẽ kot amnhĩ nhĩpêx jarênh anẽ.

Jejus kot Tirtũm kapêr tũm o mẽ ahkre xwýnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tirtũm kapêr tũm o mẽ ahkre ho pa xwýnhja kuma nẽ kãnhmã xa nẽ kãm:

—Kwa na ka ã Parijew nhõ xwýnhjê jarênh punuj anhýr jao mãânên ã mẽ

paja jarēnh anē nà? Mē ixte amnhī nhīpēxja ām tipxi kēnā. Anē.

⁴⁶ Hāmri nhūm kām:

–Tỳ. Māānēn mē kajaja. Kwa o kora mē apē Tirtūm kapēr tūm o mē ahkre xwýnhjaja. Kot kaj mē urāk nē amex kēt nē. Na ka htem mē kām mēmoj tā karō ho ri apa nē mē kām: “E kēr ka mē ā amnhī nhīpēx anē nē ā amnhī nhīpēx anē.” Anhýr tā no ām mē kajaja amnhī kapērja kôt amnhī nhīpēx kēt nē. Te mē ate mēhō kot mē katut ā mē kām mē jēnh pytī janhōr tā mē ho ajuta nē hkwý htur kēēta pyrāk o na ka htem amnhī nhīpēx o ri apa.

⁴⁷⁻⁴⁹ —Na pre Tirtūm amnepēm mē pahpāmje hkukamā tanhmā mē harēnh to. āhpumunh tỳx xà hkôt tanhmā mē hkukamā mē harēnh to nē mē harēnh o: “Kot paj ma mē hwýr inhý hā ixkapēr jarēnh xwýnhjē rē. Nom koja mē omu nē ām mē omu nē kēp mē hprām nōkati nē tanhmā mē hipēx to ho pa. Nē ixpē mē hkwýjē hpar o pa. Ā koja mē inhý hā ixkapēr jarēnh xwýnhjē nhīpēx anē.” Anhýr o mē hkukamā mē harē. Tā ā mē harēnh anhýr xà hkôt nhūm prem ā mē hipēx anē nē mē hkwýjē hpa nē mē hkwýjē pynē nē mē hagjē.

—Amnepēm mē akukamā mē kot ā mē hipēx anhýr nhūm mē ate mē ano ho ja hā mē omunh kēt tā ka htem arī mē hā pika ho mex o ri apa. Te mē amā mē hapē nē mē ho ajamak pyrā nē mē hā pika ho mex o ri apa. Nom mē amā mē hapē hā ho mex hkēt nē. Ām ra mē htyk nē hapēx nē mē amā Tirtūm kapēr jarēnh o pa hkētja ā na ka htem akīnh nē ā axēx rom mē hā pika ho mex anhýr o ri apa.

⁵⁰⁻⁵¹ —Na prem Tirtūm nhý hā kapēr jarēnh o mē pa xwýnhjē nhīmex rax nē. Amnepēm panhī kator krax rūm finat Atāw kra finat Apewja na pre Tirtūm nhý hā kapēr o pa nhūm htō kām mar prām kēt nē kupī. Tā nhūm Tirtūm axte mē hwýr ý hā kapēr jarēnh o mē pa xwýnh kwýjē rē nhūm prem mā mē ho anē nē mē hkwýjē nhīmex. Nhūm pre xatā mē hwýr mē hkwýjē rē nhūm mē

xatā mē kupa. Ā Apew rūm finat Jakaris wýr na prem mē himex rax anē. Nē hpānhā Jakarisja nhūm prem Tirtūm mā amnhī jarēnh xà hā ixkre kamā kupī. Tā ka mē ajaxwýja amā Tirtūm kapēr mar prām kēt nē mē urāk nē amā ý hā kapēr jarēnh o mē pa xwýnhjē nhīmex prām. Tā ā mē pahpāmje mē ato hpimràatā mē ate mē hipēx anhýrja mýrapē koja Tirtūm ja hā mē apē mē hkanrēhā mē htāmnhwýjaja tanhmā mē ato htỳx to ka mē amnhī xà htỳx kamā ajamak o ri apa rāhā nē kām ga.

⁵² —Jakamā kwa mē o kora mē apē Tirtūm kapēr tūm o mē ahkre xwýnhjaja. Mē ajaxwýja na ka htem Parijew nhō xwýnhjē pyrā nē Tirtūm kapēr o mē ahkre ho apa. Nē aprī hā mar mex tā no ām amnhī kaxyw hkôt ajamexpēr nē hkôt amnhī nhīpēx kēt nē. Hāmri nē mē kot mē amar o pa xwýnhjē mā atỳx ri tanhmā mē ahkre hto nhūm htem mē ama nē mē apyrā nē amnhī kaxyw Tirtūm kôt hamexpēr nē hkôt amnhī nhīpēx kēt nē. Mē kām hprī hā kapēr mar mex prām tā mē amar xà hkôt mē ate amnhī nhīpēx pyrāk o amnhī nhīpēx o pa. Nom mē kajaja na ka htem mē kām mē hamexpēr mex nhōr kētja mýrapē nhūm htem ā amnhī nhīpēx anhýr o pa. Jakamā kwa mē o kora kot kaj mē amex kēt nē. Anē.

Nhūm pre ā Jejus mē kām kapēr anē.

⁵³⁻⁵⁴ Hāmri nē kato nē ma tē. Nhūm Tirtūm kapēr tūm o mē ahkre ho mē pa xwýnhjē mē Parijew nhō xwýnhjaja hāmri kot tanhmā mē kām kapēr toja ma nē kamā gryk tỳx nē. Jakamā ma hkôt mra. Hēx rom mēmoj tā hkukjēr o hkôt mra. Nē hā hkukjēr kām hihtỳx o hkôt mra. Kot tanhmā mē kām ujarēnh to nhūm mē kot mar nē ra hā àmnēnh kaxyw ma hkôt àhkukjēr o mra.

12

Mē pahte Tirtūm pē mē pajamexpēr punuj o pahpimxur kēt Matēwre 10.26-33

1-3 Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. ãm kormã hkôt mẽ pa ho mẽ pa xwýnhjê kumrêx mã kapêr nê mẽ kãm:

–Mê piitã kãm amnhĩ kwýjê pê hamaxpêr punuj o hpimxur hprãm tã koja nhỹrmã mẽ hamaxpêr piitã amnhĩrít pa. Nê mẽmoj piitã ra hpimxur mex tã koja nhỹrmã piitã amnhĩrít pa. Nê mẽ kot kamàt kô kamã hpimxur pê mẽmoj jarênh tã koja mẽ piitã nhỹrmã kot mẽmoj jarênh ta ma. Nê mẽ kot hitom kãm kawax pê axpên mã mẽmoj punuj jarênh tã koja nhỹrmã mẽ piitã mẽmoj jarênh ta ma. Jakamã kwa kêr ka mẽ tanhmã Parijew nhô xwýnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyrãk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htýx ri tanhmã amnhĩ to hêx to ho pa. Tã kêr ka mẽ urãk nê ã amnhĩ nhĩpêx anhýr kêt nê. Anê.

Mê pahte pahkwýjê pumaj Tirtũm kaga hkêt ã mẽ pamã karõ

Matêwre 10.28-31

⁴ Nhũm Jejus arĩ hkôt mẽ pa ho mẽ pa xwýnhjê mã kapêr nê mẽ kãm:

–E ixkrãmnhwýjaja. Kêr ka mẽ amã akwýjê puma rý nhãm mẽ hkwýjê puma ho ri apa hkêt nê. Koja mẽ apar tã ãm mẽ anhĩ pix pa nom tanhmã mẽ akarõ hto hkêt nê.

⁵ Tirtũmja tapxipix na hte mẽ ì nê mẽ hkarõ ho hpimràatã mẽ kot amnhĩ xà htýx kamã hamak tũm xà hwýr mẽ kurê. Tã kêr ka mẽ ja pumaj Tirtũm kapêr kwým tanhmã ri amnhĩ nhĩpêx to ho apa hkêt nê.

⁶⁻⁷ –Nê Tirtũm kot mẽ pahto hapêx par pumunh tã mããnên kot mẽ pajamãr pumunh mex. Mãn ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nê htãnopxar rãhã ho pa. Nom kãm mẽ pajapê htýx o kuwênhre jakrenh

jakamã kwa mẽ tee ri amnhĩ kukamã ajamaxpêr o ri akaprĩ nê apa hkêt nê. Koja Tirtũm mẽ pahtãnopxar rãhã ho pa. Ra kot tanhmã mẽ pakute hã mẽ pahpumunh par. Nê ahpýnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽhõ puma ho ri apa?

⁸ –Jakamã kwa mẽ mãmrĩ mẽ kãm mẽ apê ixkra hã amnhĩ jarênh o ri apa nê amã mẽ uma xà tee ri amnhĩ nhĩpêx o ri apa hkêt nê. Kot ka mẽ kãm ra mẽ ate ixkôt amnhĩ xunhwýr ã amnhĩ jarê. Pa ja hã mẽ apumu hãmri nê mẽ apyrã nê kaxkwa kamã Tirtũm kapêr o mẽ wryk xwýnhjê mã ra mẽ ate ixkôt amnhĩ xunhwýr ã mẽ ajarê.

⁹ Nom kot ka mẽ kot ixtã tanhmã mẽ ato pymaj apê ixkwý hã amnhĩ jarênh kêt japêr. Pa ja hã mẽ apumu hãmri nê nhỹrmã amnhĩ xwar mẽ kãm mẽ apê ixkwý hkêt ã mẽ ajarê. Jakamã kwa mẽ mãmrĩ mẽ kãm apê ixkwý hã amnhĩ jarênh o ri mẽ hkôt apa kê mẽ ama nê tanhmã inhmã hamaxpêr to.

¹⁰ Koja mẽ ama nê ãm ama nê kãm ixprãm kêt japêr. Hãmri nhũm Tirtũm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrít nhũm mẽ hkwýjaja kot mar nê kãm ixprãm nê ixkôt amnhĩ xunhwýr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixto amnhĩrít tã nhũm mẽ kuma nê ãm kuma nê te mẽ kot kêp amnhĩ jamak pro pyrãk o amnhĩ nhĩpêx o pa. Jao Karõ hã hpijaãm kêt mýrapê koja Tirtũm nhỹrmã amnhĩ xwar te kot mẽ kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nê amnhĩ xà htýx kamã hamak tũm xàta wýr ma pa nê kamã pa ho pa. Jakamã kwa mẽ mãmrĩ mẽ kãm mẽ apê ixkra hã amnhĩ jarênh o ri mẽ hkôt apa nê tanhmã mẽ kãm ijarênh to ho ri apa.

¹¹ Koja mẽ ama nê kãm mẽ amar prãm kêt japêr hãmri nê ixtã mẽ

apynê nê tanhmã mẽ anhipêx to kaxyw. Nê Ijaew nhõ Tirtũm kapêr o mẽ ahkre xà hã ixkre hwÿr mẽ ato mrrar japêr. Rÿ mẽ õ pahi hwÿr mẽ ato mrrar nê tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nê tee ri amnhĩ kukamã ajamaxpêr o amã mẽ uma kêt nê.

12 Koja Tirtũm Karõ ja kaxyw mẽ amã mẽ ajamaxpêr mex gõ hãmri ka mẽ ô ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamaxpêr o ri mẽ amã mẽ uma ho apa hkêt nê. Anê.

Mẽ hikukrêx rũnh pix kukamã hamaxpêr xwÿnhjê jarênh

Wam Ximotre 6.9-10; Xiakre 4.13-17, 5.1-6

13 Nhũm Jejus arĩ mẽ ahkre o xa nhũm mẽ mar o kuhê. Rôm nhũm mēhõ myja hwÿr tẽ nê kãm kapêr nê kãm:

—Pa? Kwa ot pa awÿr amã mẽmoj jarênh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nê hkrit nê hikukrêx nê ãm mẽmoj piitã ho àrĩk par kumrêx. Kwa ma ixkõt tẽ nê kãm anê pa wa amnhĩm ho axkjê nà? Anê.

14 Hãmri nhũm kuma nê kãm:

—Tk. Kokÿ. Na pa pre mẽ amã mẽ mẽmoj to ixpikjêr kaxyw mẽ awÿr ixwÿrk kêt nê. Anê.

15 Hãmri nê mẽ kot mar o kuhê xwÿnh piitã mẽ kãm kapêr nê mẽ kãm:

—Kwa kêr ka mẽ amã anhõ mẽmoj rũnh prãm o ri apa hkêt nê. Na htem mẽmoj rũnh kukwak ri Tirtũm wÿr apir kêt nê. Mẽmojta kêp pika pix nhõ xwÿnh na.

16 Anhÿr o mẽ kãm kapêr hãmri nê mẽ kãm awjarê. Mẽ hkukrêx rax ã kuxi nê mẽ kãm awjarê nê mẽ kãm:

—Nà koja mēhõ õ mẽmoj rax nê. Nê hpur kãm õ rax nê. No ãm õ jaxwÿr xà hã ixkre kêp grire.

17 Hãmri nhũm tee ri hpur kãm õ rax kukamã hamaxpêr nê hamaxpêr o: “Kwa tanhmã kot pa amnhĩ to nê ja piitã nhÿri haxwÿ wehe? Inhmã amarĩ mẽ kêp amrakati xwÿnhjê mã hkwy nhõr prãm kêt. Kot paj ãm

amnhĩm piitã ir pa nê kritpêh hkur o ixpa. Nom ixpê haxwÿr xà hã ixkreja ixpê grire.” Anê.

18 —Hãmri nê hamaxpêr o: “Nà na pa ra ijamaxpêr. Kot paj ixkre grireta grã nê hpãnhã rax õ nhĩpêx. Hãmri nê ixpur kãm inhõta jamÿ nê kamã ir pa. Nê ixapênh xà hã ixkukrêx piitã kamã haxwÿr pa. Nà kot paj ho anê.” Anê.

19 —Hãmri nê ra ixkreja grãnh pa nê hpãnhã rax õ nhĩpêx. Nê hipêx pa hãmri nê kamã hpur kãm òta xir pa. Nê apênh xà hã hikukrêx piitã kamã unhwÿ. Hãmri nê omu nê hkĩnh nê. Nê hamaxpêr o: “Nà hãmri. Kot paj tokyx axte mẽmoj tã ixapênh kêt nê. Ra inhõ rax kumrêx kênã. Kot paj kritpêh ho ixapkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhĩpêx.” Anê.

20 Tã nhũm Tirtũm tee ri ã kot amnhĩ nhĩpêx anhÿr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atÿx ri anhõ rax mẽ akukrêx rax o apikuprõnh kaprÿ. Na ka ãm amnhĩ pix kukamã ajamaxpêr o apa pê ã amnhĩ nhĩpêx anê. Nom kot kaj kamãt ja kamã ty nê anhÿ kamã ma mõi nê amnhĩ kõt anhõ mẽmoj rax õ ho amõr kêt nê. Koja hpãnhã mēhõ amÿr pê ho amnhĩptar pa ka rĩ amnhĩ pumu.” Anê. Nhũm ã Tirtũm kãm kapêr anê. ã mẽ ujarênh kot anhÿr.

21 —Mẽ kot amnhĩ nhõ nê amnhĩ kukamã pix mã hamaxpêr o mẽ pa xwÿnhjaja na htem myja pyrà nê Tirtũm mã hamaxpêr o pa hkêt nê. Jakamã koja mẽ nhÿrmã ty hãmri nê hkukrêx pix kukamã hamaxpêr nê amnhĩ mã pix mã hamaxpêr o paja mÿrapê Tirtũm mẽ wa ixri htĩr tũm nê mex nê pa ho pa hkêt nê. Mẽ kot amnhĩ nhõ pix kukamã hamaxpêr xwÿnhjaja nê amnhĩ kukamã pix mã mẽ hamaxpêr xwÿnhjaja nê mẽ kamã ukaprĩ hkêt xwÿnhjaja mẽ õ mẽmoj rũnh tã koja mẽ nhÿrmã ty hãmri nê amnhĩ kõt hõ ho pixi nê o mõi kêt nê. Koja mẽ mẽmoj piitã rer pa nê ma ÿ kamã ma mõi. Jakamã kwa kêr ka mẽ

jažê pyrà nê anhõ mẽmoj to anhõxy ho ri apa hkêť nê. Anê.

Mê pahte tee ri amnhĩ kukamã pajamxpêť kêt ã mẽ pamã karõ

Matêwre 6.25-34; mããnên Wam Pêťre 1.3-9

²² Tã nhũm Jejus hpãnhã tanhmã hkôt mẽ pa ho mẽ pa xwýnhjê jahkre hto nê mẽ kãm:

—Kwa kêt ka mẽ tee ri amnhĩ kukamã ajamxpêť o ri apa hkêť nê. Amnhĩ xàpkur xà rý axê ka mẽ tee ri hkukamã ajamxpêť kêt nê. Nê mẽ ãm mẽmoj piitã hkukamã tee ri ajamxpêť kêt nê.

²³ Tĩrtũm àhpumunh tỳx o àhpumunh tỳx xwýnh na. Na pre àhpumunh tỳx o mẽ anhĩpêx ka mẽ kukwak ri atĩr nê apa. Tã xà kot mẽ amã mẽ anhõ ho pa hkukamã àhpumunh kêt? Nã ja kukamã àhpumunh xihtỳx kênã. Kêp mẽ anhĩpêx xwýnh jakamã mããnên kêp mẽ amã mẽ anhõ ho pa xwýnh. Nê kêp mẽ amã mẽ axê nhõr o pa xwýnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamxpêť o hkaprĩ nê ri pa hkêť nê. Na hte Tĩrtũm tãm kot kãm õ ho pa. Tã kãm mẽ pajapê htỳx o kuwênhre jakrenh jakamã koja uràk nê mẽ pamã mẽ panhõ mex o pa rãhã nê.

²⁵⁻²⁶ Jakamã kwa kêt ka mẽ mẽmo arĩgro hã axàpkur xà hkryre pumu nê ate amnhĩ pê hkrêť par nê amã prãm o akaprĩ nê apa hkukamã tee ri ajamxpêť kêt nê. ãm Tĩrtũm kamnàrom axãmnhĩx anhõ hkryreta ku nê akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nê akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamxpêť o hkaprĩ nê pa kaprỳ. Jakamã kêt ka mẽ ã ri ajamxpêť anhỹr o akaprĩ nê apa hkêť nê.

²⁷ —Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamxpêť o hkaprĩ nê harir kêt tã muxre nê harir ka mẽ omu. Te ho amnepêťm finat

pahihti Sarumãw xê mex pyràk nom ãm mex o kot hakrenh.

²⁸ —Pixõrãreja arĩgro ja hã htĩr nê muxre nê harir tã koja mẽmo arĩgro hã grà pa nê hapêx. Kêp pixõrã pix nê hapêx tokyx anhỹr tã na hte Tĩrtũm ho mex nê nhũm mux nê harir. Nom mẽ pajaja na hte mẽ pahto mex o pixõrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamxpêť o akaprĩ nê apa? Nã kot kaj mẽ anê nê amnhĩ kaxyw Tĩrtũm mã ajamxpêť tỳx kêt nê.

²⁹ —Kwa mẽ tee ri amnhĩ xàpkur xà hkukamã ajamxpêť rãhã o ri akaprĩ nê apa hkêť nê. Nê mẽ tee ri amnhĩ kukamã tanhmã ajamxpêť to ho ri akaprĩ nê apa hkêť nê.

³⁰ Mê kot Tĩrtũm kôt amnhĩ xunhwỹr kêt xwýnhjaja na htem ã ri hamxpêť anhỹr o hkaprĩ nê pa. Tã kêt ka mẽ ho mẽ uràk kêt nê. Tĩrtũm kot mẽ panhõ mẽmoj kêt kôt mẽ pahpumunh mex kênã.

³¹ Jakamã kêt ka mẽ ãm hkôt ri amnhĩ nhĩpêx rãhã nê. Nê amã ja pix kukamã ajamxpêť o ri apa hprãm. Hãmri nhũm amnhĩ tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakurêx rax jarênh

Matêwre 6.19-21; mããnên Sikũn Ximotre 4.8; Eprêw 10.34; Wam Pêťre 1.4

³² Nhũm Jejus arĩ mẽ kãm kapêť nê mẽ kãm:

—E mẽ ate ixkôt amnhĩ xunhwỹr xwýnhjaja. Ra Tĩrtũm kot mẽ ato hkra jakamã kwa mẽ axãmnhĩx hkamnàrom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nê hkĩnh nê. Koja nhỹrmã kaxkwa kamã õ krĩ hwỹr mẽ ato api ka mẽ kamã wa ixkuri amex nê atĩr tũm nê apa ho apa. Ja na mex o kot jar pika ja kôt mẽ õ mẽmoj rũnh nê pa xwýnhhta jakrenh.

³³ Jakamã kêt ka mẽ axãmnhĩx ri akurêx kwỳ ho wêñê nê hpãnhã kàxpore jamỳ nê mẽ kêp amrakati xwýnhjê mã ho apigrãnh o ri mẽ

hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ àhkĩnh xwýnh koja mẽ apê ho ahkĩ? Nê kamã mo amnhôre kot mẽ apê homnu? Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhôr mã xwýnhhta koja aa apê omnuj nê hapêx kêt kumrêx.

³⁴ Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

³⁵ Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwýnhjê mã tanhmã amnhĩ kukamã amnhĩ jarênh to. Ixtyk nê akupỹm ixtĩr nê ma akupỹm ixàpir hãmri nê mẽmo arĩgro hã akupỹn mẽ awýr ixwrykja na pa pre ra mẽ amã ja hã amnhĩ jarê. Tã kwa kêt ka mẽ ixwakre kamã ixte mẽ amã ã amnhĩ jarênh anhýrja mã ajamxpêr tỳx pê ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwýnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw mã mẽ kot axpên mã wa rer mã xwýnh pumunh mã ma nhỹhỹm tẽ. Hãmri nhũm kãm mẽ àpênh xwýnhjaja arĩ kutêp òrkwỹ kamã hkrĩ. Axkãm hamak rom nê kutêp hkrĩ. Akupỹn htêm nhũm mẽ kot amnhĩ wýr mar nê kãm kahê xà mênh tokyx anhýr kaxyw arĩ kutêp òt kêt nê hkrĩ. Kôt ã kamàt nhũm akupỹn hpôx o htêm rý arĩgro hwýr hpôx o htêm nhũm mẽ kot amnhĩ wýr mar nê kãm kahê xà mênh tokyx anhýr kaxyw kutêp òt kêt nê hkrĩ. Akupỹn hpôx ã omunh hãmri nê

tokyx apkur kaxyw kãm õ nhĩpêx kaxyw. Kêr kê akupỹn pøj nê ã mẽ kot amnhĩ nhĩpêx anhýr ã mẽ omu nê hkĩnh nê. Tã kêr ka mẽ àpênh xwýnhhtajê pyrã nê ixwakre kamã inhmã ajamxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nê. No kot paj akupỹn mẽ awýr wrý hãmri ka mẽ àpênh xwýnhjê pyrã nê inhmã mẽmoj nhôr kêt nê. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêt àhkĩnh pymaj amnhĩ nhõrkwỹ jamãr rãhã ho pa.

⁴⁰ Ja pyrã nê mẽ ate akupỹn ixwryk xà hã arĩgro pumunh kêt jakamã kêr ka mẽ òrkwỹ nhõ dõnta pyrã nê ixkutêp axkãm ajamak rom rãhã nê ri apa. Jao tãm amnhĩ nhĩpêx rãhã nê. Anê.

Mẽ õ patrãw mã mẽ àpênh mex xwýnhjê jarênh

Matêwre 24.45

⁴¹ Nhũm pre ã Jejus hkôt mẽ pa ho pa xwýnhjê jahkre anê. Hãmri nhũm Simãw Pêtre kuma nê kãm:

—Kwa Pahĩti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hãmri nhũm kãm:

—Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwýnh piitã mẽ amã na pa ã ixkapêr anê. Koja mẽ àpênh xwýnhjê hõ õ patrãw mã àpênh mex o pa nhũm amnhĩ tã omu nê ma nhỹhỹm mõi kaxyw nê ìhkram mẽmoj piitã haxàr pa. Hãmri nê kãm: “E kêr ka ixwakre kamã inhmã inhõrkwỹ htãnopxa. Nê mẽ àpênh xwýnhjê mã õ mex kê mẽ apkur mex o pa.” Anê. Koja ã kãm mẽmoj tã karõ anê hãmri nê kato nê ma nhỹhỹm mõi.

⁴³ Hãmri nhũm kãm àpênh mex xwýnhhta wakre kamã kãm àpênh mex o pa. Jakamã nhũm õ patrãw akupỹn hpôx o mõi nhũm amnhĩ wýr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rý tee ri wakre kamã kãm àpênh punuj ã amnhĩ pumu nê tee amnhĩ kukamã

hamaxpër kêt nê. Kot wakre kamã kutêp àpênh mex jakamã akupÿn hpôx ã harênh ma nê hkînh nê.

44 —Jakamã nhũm ò patrãwja akupÿn pøj nê kot kãm àpênh mex ã omu nê haxwÿja hkînh nê. Hãmri nê kot kãm hamãr o pa kaxyw kãm mêmjoj piitã ãhkram haxàr pa.

45 Nom koja kãm àpênh xwÿnhhta axtem nê wakre kamã kãm àpênh mex kêt nê. Nê tokyx akupÿn mör kêt ã hkamnhîx nê wakre kamã kãm mêm àpênh xwÿnhjê htak nê pipãnh pix nê mêm kãm gô xành xwÿnhjê kôt pix mã pa japêr.

46 Hãmri nhũm ò patrãw haêr pè akupÿn pøj nê tee ri ã amnhî nhîpêx anhÿr ã omu. Hãmri nê gryk tÿx nê tanhmã homnuj to. Hãmri nê kãm mêm àpênh punuj xwÿnhjê mêm mêm ho pimràatã amnhî nê mêm hanor pa. Tã kêr ka mêm ixwakre kamã ho mêm urak kêt nê. Mêm kurom ixkapêr kôt tãm amnhî nhîpêx mex rãhã ho ri apa.

47-48 —Nê koja mêmhõ kormã Tirtũm kapêr mar kêt nê htÿx ri tanhmã amnhî tomnuj to ho pa. Hã koja Tirtũm ja hã omu nê nhÿrmã kot amnhî tomnuj o pata mÿrapê tanhmã ho nhũm amnhî xà htÿx kamã hamak tũm xà kamã pa. Nom akrãnhmã amnhî xà kamã hamak o pa. Aa kot Tirtũm kapêr mar kêt jakamã koja ãm akrãnhmã amnhî xà kamã hamak o pa. Nom koja mêmhõ kapêr mar mex tã ãm kuma nê hkôt amnhî nhîpêx kêt nê. Nê xatã hirôp kuhê nê tanhmã amnhî tomnuj to. Hã koja Tirtũm tee ri ja hã omu nê nhÿrmã tanhmã homnuj tÿx to. Hãmri nhũm wamtajê pyrà nê amnhî xà htÿx kamã hamak tũm xàta kamã pa ho pa nom mêm kînhã amnhî xà htÿx kamã hamak rãhã ho pa. Anê.

Jejus kot nhÿrmã mêm kot amnhî tomnuj xà ho hapêx ã harênh

Matêwre 10.34-36

49 Nhũm Jejus arî hkôt mêm pa ho mêm pa xwÿnhjê jahkre nê mêm kãm:

—Nã ixte mêm omnu xà piitã ho ijapêx par nê mêm kot tanhmã amnhî tomnuj to piitã ho ijapêx par kaxyw

na pa pre wrÿ. Tã ra ixte piitã ho ijapêx par o inhmör ronhÿx ja inhmã mex kumrêx. Nom kormã.

50 Kot paj amnhî xà htÿx kãm ijamak rax o mêm kot amnhî tomnuj o ijapêx o hkra. Hãmri nê nhÿrmã ho ijapêx pa. Na pa ra ixtyk kaxyw ixte amnhî kà xà kamã ijamak kukamã ijamaxpêr o ra amnhî kamã ixkahak nê ri ixpa. Tã kot paj ja ho ijapêx pa nê ixkînh tÿx kumrêx. Anê.

Mêm kot Jejus ã axpên kutã amnhî xunhwÿr ã mêm harênh

Matêwre 10.21, 10.34-35

51 Nhũm Jejus arî mêm ahkre nê mêm kãm:

—Nê ra mêm awÿr ixwrÿk tã koja mêm piitã ixkukwak ri hamakêtkati nê àmnhîx ri pa hkêt nê. Kormã. Koja mêm akwÿjaja ixkapêr ma nê mêm apyrã nê amnhî kaxyw ixkôt hamaxpêr. No nhũm mêm akwÿjaja mêm akînhã kuma nê ãm kuma. Hãmri nê ixtã tanhmã mêm anhîpêx to ka mêm ixpyrà nê amnhî xà htÿx kamã ajamak o ri apa.

52 —Nê koja tanhmãnh ixkre pyxi kamã mêmjojaja ohtôn pa. Nhũm war axkrutre nê ixkôt amnhî xunhwÿ nhũm mêm axkrunêpxi nê ixkwÿm ri amnhî nhîpêx nê ixkutã amnhî xunhwÿ.

53 Nhũm mêm hipêêxà hkra my mêm wa ixtã axpên kutã amnhî xunhwÿ. Nhũm mêm katorxà hkra ni mêm wa ixtã axpên kutã amnhî xunhwÿ. Nhũm mêm wÿj umregêx mêm wa haxwÿja ixtã axpên kutã amnhî xunhwÿ. Koja mêm ã ixtã axpên nhîpêx anhÿr o pa. Anê.

Mêm pahte amnhî tomnuj kaga nê Tirtũm kôt amnhî nhîpêx ã mêm pamã karõ

Matêwre 5.25-26, 16.2-4

54 Nhũm Jejus hpãnhã mêm kot hkôt amnhî xunhwÿr kêt xwÿnhjê mã kapêr nê mêm kãm:

—Kwa mêm inhma mêm ate ixkôt amnhî xunhwÿr kêt xwÿnhjaja. Na htem kaxkwa kamã na htyk rax pumu nê na wrÿk mã hamaxpêr kurê kumrêx. Hãmri nhũm na wrÿ.

55 Nê amgrã pè kôk krihkritja nhũm htem kuma nê arîgro htÿx mã

hamaxpêr kurê kumrêx. Hāmri nhūm arīgro ht̄yx nē.

⁵⁶⁻⁵⁷ ã na ka htem aprī hã mēmoj pumunh kôt mēmoj kukamã ajamaxpêr mex o ri apa anē. Nom nhūm Tirtūmja mē ate tanhmã amnhī tomnuj to m̄yrapê tanhmã mē ato kaxyw nhūm mē ate ja hã amnhī pumunh tã tokyx amnhī tomnuj kaga hkêt nē.

⁵⁸⁻⁵⁹ —Na htem tanhmã axpên tomnuj to. Hāmri nhūm kot tanhmã war axpên to xw̄ynhta pahi hw̄yr ht̄em nē kām tanhmã kot ho xw̄ynhta jarēnh kaxyw. Hāmri nhūm kamã gryk xw̄ynhta kot pahi mã harēnh kaxyw ã harēnh ma nē hāmri tokyx hw̄yr tē nē wa tām akup̄ym axpên xām. Na htem ã amnhī nh̄ipêx anē. Pahi kot ja mar nē tanhmã mē ho pymaj na htem ã amnhī nh̄ipêx anē nē tokyx akup̄ym tām axpên xunhw̄y. No koja mē ã amnhī nh̄ipêx anh̄yr kêt nē nhūm pahija mē harēnh ma hāmri nē tanhmã kot hō ho xw̄ynhta pynê nē haxà nhūm tee kām kator prām o hkrī kapr̄y. Hāmri nē tanhmã amnhī to nē amnhī pānhã kām amnhī rer pa nhūm pahihtija kormã mē kām anē nhūm mē kām ure nhūm kato. Ja pyrà nē kêr ka mē Tirtūm tanhmã kot mē anh̄ipêx to pymaj tokyx mē ate amnhī tomnuj kaga nē hkôt amnhī nh̄ipêx rāhã ho ri apa. Anē.

13

¹ Tã nhūm axtem mē hkw̄ȳjaja Jejus w̄yr mra nē kām:

—Pa? Kwa xàn ka ra Garirej nhō xw̄ynh kw̄ȳjê jarēnh ma nà? Na xep prem Jerujarē hw̄yr mra nē ham mē kot Tirtūm mã amnhī jarēnh xà hã ixkre kamã kām amnhī jarēnh kaxyw kormã kām mry hpar o kuhê nhūm xep pahшти Piratja mē harēnh ma nē mē hã am̄ynê nhūm mē ma mē hw̄yr mra nē mē himex pa. Kwa mǎn mē kot amnhī tomnuj t̄yx o mē pajakrenh ã na prem mē himex nà? Anē.

²⁻³ Hāmri nhūm mē kām:

—Nà mē kot amnhī tomnuj t̄yx m̄yrapê mē kot mē himex kêt. Mē apiitã mē ate amnhī tomnuj o axpên pyrāk kênã. Tã kot ka mē amnhī tomnuj kaga nē Tirtūm kôt amnhī xunhw̄yr kêt hã kot ka mē nh̄ymã ty hāmri nē ò krī hw̄yr axàpir kêt nē.

⁴ No Jerujarē kamã ixkre prêkja mē kot kām “Siroe” anh̄yr xw̄ynhta mē ho 18 nē mē hipy htem nē mē himex par xw̄ynhjaja. Xà mē kot amnhī tomnuj t̄yx m̄yrapê na prem ty? Xà mē kot amnhī tomnuj t̄yx o Jerujarē kamã arī mē ht̄ir xw̄ynhjê jakrenh?

⁵ Nà kot anh̄yr kêt. Mē apiitã mē ate amnhī tomnuj o axpên pyrāk. Jakamã kot kaj mē ã amnhī nh̄ipêx anh̄yr kaga nē Tirtūm kôt amnhī nh̄ipêx kêt nē hāmri nē mē urāk nē nh̄ymã ty hāmri nē Tirtūm nhō krī hw̄yr axàpir kêt nē. Jakamã kwa mē ixkapêr ma nē kām ajamaxpêr t̄yx rāhã ho ri apa. Anē.

Tirtūm kot mē pakamã gryk tokyx anh̄yr kêt ã harēnh

Rōmān 2.4; Sikūn Pêtre 3.8-9

⁶ Tã nhūm Jejus kê axte tanhmã mē ahkre hto. Nē Tirtūm kot tanhmã mē panh̄ipêx to hã kuxi nē mē kām awjarē nē mē kām:

—Koja hpur nhō dōn mēmo p̄ar kre nhūm ra hprêk mex nē ô mã tām nē. Tã aa ô hkêt ã ra hã amgrà axkrunēpxi.

⁷ Hāmri nhūm kot hkre xw̄ynhja tee ri omu nē kām àpēnh xw̄ynh w̄yr tē nē kām: “E kwa ma tē nē mēmo p̄ar m̄uj krāhta nē amē. Mex̄ti hã. Ra ô hkêt ã amgrà axkrunēpxi kênã. Koja p̄er aa ô hkêt nē. Mo kaxyw kot kêt ô hkêt tã ô mex xw̄ynh kaêx ã mē kêp àmn̄ar o kuhê? E hw̄yr tē nē krāhta nē amē.” Anē.

⁸⁻⁹ Hāmri nhūm tee ri kot kām hã karōja ma nē kām: “Kwa nà kormã. Pa kop ixamnh̄ix p̄ar krax ã mēmo japōk kw̄ȳ kapī nē kop hamã mǎn. Kê axte hã amgrà pyxi nē hapêx nē ô hkêt pa kormã krāhta nē kumē. Koja amgrà ja kamã amã ô japêr ka omu nē akīnh nē.” Anē. ã mē ujarēnh kot anh̄yr. Anē.

Nhũm Jejus ã mẽ kãm ujarẽnh anẽ. Mẽ kot amnhĩ tomnuj tỳx o pa htã nhũm Tĩrtũm kot pur nhõ dõn mã àpẽn h xwỳnhhta pyrã nẽ mẽ kamã gryk tokyx anhỹr kêt ã nhũm ã hã kuxi nẽ mẽ kãm ujarẽnh anẽ.

Jejus kot arĩgromnu hã mẽhõ ho mex ã harẽnh

Rukre 14.1-6; Juãw 5.16-17

¹⁰ Tã nhũm mẽ õ arĩgromnu pẽ sap kato nhũm Jejus Ijaew pikuprõnh xã hã ixkre hwỳr axà nẽ kamã Tĩrtũm kapẽr o mẽ ahkre ho nhỹ.

¹¹ Nhũm kamã mẽhõ ni hikõt rãhã nẽ pa xwỳnhja nhỹ. Na pre ra amnepẽm mẽkarõmnuti tanhmã ho nhũm katat nẽ ri mrrar kêt kumrẽx. ãm hikõt rãhã nẽ ri pa hã ra hã amgrã pẽ 18.

¹²⁻¹³ Hãmri nhũm Jejus omu nẽ amnhĩ wỳr kãm hpa ho apẽ nhũm hwỳr tẽ nhũm hã ãhkra xi nẽ kãm:

—E na ka ra akupỹm amex.

Anẽ nhũm akupỹm katat nẽ mex kurẽ kumrẽx. Hãmri nẽ amnhĩ pumu nẽ hkĩnh tỳx nẽ Tĩrtũm mã mex o mex ã harẽnh o xa.

¹⁴ Nom nhũm mẽ pikuprõnh xã hã ixkre jamãr xwỳnh maati ja tee ri ja hã omu hãmri nẽ Jejus kamã gryk tỳx nẽ. Mẽ õ arĩgromnu hã akupỹm kot ho mex jakamã nhũm kamã gryk tỳx nẽ. Hãmri nẽ mẽ pikuprõnh xwỳnhjẽ mã kãm:

—Tk. Kwa semãn ã mẽ àpẽn xã hã arĩgro xohtõ. Kêp 6. Kot kaj mẽ mãmrĩ tòmĩk nẽ sikũn nẽ tẽs nẽ kwata nẽ kĩa nẽ sẽsta ja ã ka mẽ apẽ rỳ mãmrĩ Jejus wỳr amnhĩ to mra kẽ akupỹm tanhmã mẽ ato mex to. No sap ã kwari. Sap kêp mẽ pahpẽ Ijaew nhõ arĩgromnu kẽnã. Na pu htem hã paxapẽn kêt nẽ. Jakamã arĩgro ja hã kot akupỹm mẽ ato mexja mex kêt. Anẽ.

¹⁵ Hãmri nhũm Jejus kuma nẽ kãm:

—Kwa xã mẽ kajaja na ka htem sap ã axapẽn kêt nẽ apa? Nà mẽ ate hã axapẽn kẽnã. Xãn ka htem sap ã akrit kawar nẽ akrit moux ma mẽ ho apa nẽ mẽ hkõm kêt nẽ? Nà na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot

sap ã tanhmã amnhĩ toja nẽ mẽ kãm akapẽr?

¹⁶ Ixte ni ho mex xwỳnhhta mẽ pahpyrã nẽ kêp finat Apraãw kagrõt nyw õ na. Nhũm pre Satanasti te kot kãm ê nẽ ri o pa pyrãk o hipêx jakamã nhũm ã hã hikõt nẽ ri paja ã ra hã amgrã kêp 18. Tã pa nẽ te ixte Satanasti ho ixkrihkrit nẽ ixte kêp utar pyrãk o hipêx nẽ akupỹm ho mex. Mo kot pa kêt ri omu nẽ ãm omu nẽ arĩgromnu hã ho mex kêt nẽ? Nà ixte arĩgro piitã hã akupỹm mẽ ho mex o ixpa xwỳnh kẽnã. Anẽ.

¹⁷ Hãmri nhũm mẽ kot kãm kapẽr mar prãm kêt xwỳnhjaja kuma nẽ kamã gryk nẽ. Te ho mẽhprĩjẽ mã mẽ hamaxpẽr nhõr pyrãk o mẽ hipêx pyrãk jakamã nhũm mẽ amnhĩ tã kuma nẽ kamã gryk nẽ. No nhũm mẽ kot ra ã amnhĩ nhĩpêx anhỹr o pa hã omunh xwỳnhjaja ja hã omu nẽ kãm hkĩnh nẽ.

Jejus te kot mẽmo hy pyrãk ã harẽnh Matêwre 13.31-33; Makre 4.30-32

¹⁸⁻¹⁹ Nhũm Jejus arĩ mẽ ahkre nẽ tanhmã mẽ kãm amnhĩ tã ujarẽnh to nẽ mẽ kãm:

—Nẽ Tĩrtũm kot mẽ awỳr ixte mẽ ato amnhĩptar kaxyw inhmẽn ã ijarẽnhja. Te ixte mẽmo hy pixire pyrãk. Na htem hkre nhũm higrõt. Nẽ gaa nẽ rĩ hprêk. Hãmri nẽ pa angrã nhũm kuwẽnhre hwỳr mra nẽ hõ pytĩ kamã amnhĩm haẽ nhĩpêx. Tã kot paj nhỹrmã mẽmo hy jarẽnhhta pyrã nẽ ixpiti htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixpa. Anẽ.

Jejus te kot pãwti kaxkrit xã pyrãk ã harẽnh

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarẽnh kêt nẽ. ãm amnhĩ tã kuxi nẽ mẽ kãm awjarẽ nẽ mẽ kãm:

—E kot pa hpãnhã tanhmã mẽ amã pãwti kaxkrit xã jarẽnh to. Kojã mẽnijẽ hõ ãm hkwy ho grire nẽ kupy nẽ kaxyw mẽmo xõm kãm kumẽ nẽ ho pihkãr pa nẽ ho pãwti nhĩpêx. Nhũm kaxkrit xãja grire htã pãwti piitã ho

kaxkrit mex nê. Ja pyrà nê kot paj ixpyxi htã koja mẽ nhÿrmã pika piitã hkôt ixkôt amnhĩ nhÿpêx mex o pa. Anê.

Nhũm pre ã Jejus mẽ kãm amnhĩ tã pãw kaxkrit xaja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pê Jerujarê hwÿr krĩ hkôt ri mẽ ahkre ho mẽ hkôt ri pa.

²³ Hãmri nhũm mēhō myja hwÿr tē nē mẽmoj tã hkukja nē kãm:

—Pa. Kwa inhmã mẽmoj jarê. Xà koja mẽ ohtô nê nhÿrmã Tirtũm ri htĩr tũm nê papa ho nà koja mẽ grêre? Anê.

²⁴ Hãmri nhũm kuma nê mẽ kot mar o kuhê xwÿnh piitã kãm:

—Nà mẽ kot Tirtũm kôt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xaja ãm pixii nom koja mẽ ohtô nê kãm hkôt wÿr gjêx prãm kêt nê. Na htem te hwÿr mẽ gjêx xà hō japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkôt amnhĩ xunhwÿr tÿx nê ixkôt ri amnhĩ nhÿpêx o ri apa. Na htem ohtô nê kãm ixkôt amnhĩ xunhwÿr prãm kêt nê. Ixte amnhĩ nhÿpêxja mẽ kēp hihtÿx jakamã nhũm htem ixkaga.

²⁵ —Tã koja mẽ nhÿrmã ty nê tee ri kãm Tirtũm wÿr gjêx prãm kaprÿ. Kot paj te mẽ kēp kahê pyrãk o mẽ hipêx nhũm mẽ kapôt ã kuhê nê tee ri amnhĩ tã ixpumu nê inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anê.

²⁶ —Hãmri nhũm mẽ tee ri inhma nê inhmã: “Kwa nà ra ate mẽ ixpumunh mex kênã. Na ka pre mẽ inhō krĩ kamã mẽ ijahkre ho ri apa nê mẽ ixkutã axàpkur o ri apa.” Anê.

²⁷ Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿyêre hã. Jakamã e mẽ ma mra. Mẽ ate amnhĩ tomnuj pix o mẽ apa

xwÿnh jakamã kot kaj mẽ ixwÿr agjêx kêt nê.” Anê. Kot paj ã mẽ kãm ixkapêr anê.

²⁸ —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nê ri mẽ inhmex nê ixpa hã amÿm mẽ ixpumunh o kuhê. Apraãw nê Ijak nê Jako nê Tirtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nê mẽ ixàpkur mex ã mẽ ixpumunh o kuhê. Hãmri nê tee ri mẽ ixwÿr kãm gjêx prãm kaprÿ nê hkaprĩ nê mur nê amnhĩ krã hkĩ jarê nê amnhĩ kà nhê nê amnhĩ kamã gryk tÿx nê. No ãm tee ri amnhĩ kamã gryk kaprÿ. ã koja mẽ amnhĩ nhÿpêx anê.

²⁹ Nom Tirtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nê Tirtũm wÿr agjê nê kuri hkĩnh nê apkur mex o hkrĩ. Mẽ akwÿjaja nê pika piitã kurũm hohtô rax nê axpên wÿr akuprõ nê hwÿr agjê nê kuri apkur mex nê hkĩnh nê pa ho pa.

³⁰ —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjaja mẽ akwÿjê rom Tirtũm ri axpên wÿr akuprõ nê hkĩnh nê axpên kutã apkur mex o hkrĩ. Jakamã kwa kot kaj mẽ urãk nê amã Tirtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nê ixkapêr kôt amnhĩ nhÿpêx mex o ri apa. Anê.

Jejus kãm Jerujarê nhō xwÿnhjê japê hã harênh

Matêwre 23.37-39

³¹ Hãmri nhũm Parijew nhō xwÿnh kwÿjaja Jejus wÿr mra nê kãm:

—Pa. E ot pa mẽ awÿr mra. Kwa kêr ka ma Jerujarê hwÿr amõr kêt nê. Na ra mẽ hkĩnh wÿr pahi Eroxa pøj nê kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nê. Nhãm krĩ hō hwÿr mãn mō. Anê.

³² Hãmri nhũm mẽ kuma nê mẽ kãm:

—Tk. Nà kot pa umaj nhãm krĩ hō hwÿr inhmõr kêt nê. Kot paj ma mẽ hkwÿjê nê mẽkarõmnuti japôx pê mẽ hkwÿjê ho mex o ma hwÿr mō. Pahi

Erox kãm mẽ hpar pix prãm. E mẽ mãmri ma akupỹm hwỳr mra nẽ ã kãm ixkapẽr jarẽnh anẽ. No kot paj umaj nhỹhỹm ixprõt nẽ ixtẽm nẽ kęp ixpimxur kêt nẽ. Ra ixte õ krĩ hwỳr inhnojarêt kẽnã. Anẽ.

³³ Hãmri nẽ mẽ kot mar xwỳnhjê mã amnhĩ jarẽ nẽ mẽ kãm:

–Kot paj tanhmã amnhĩ nhĩpêx to ho ri ixpa rãhã Jerujarẽ hwỳr mõn pøj nẽ kamã ty. Kamã na htem mẽ kot Tĩrtũm nhỹ hã kapẽr jarẽnh xwỳnhjê nhĩmex. Tã hwỳr kot paj mõ. Anẽ.

Nhũm pre ã Jejus mẽ kãm amnhĩ jarẽnh anẽ.

³⁴ Hãmri nẽ te ra kot Jerujarẽ nhõ xwỳnhjê pumunh o ãm nẽ mẽ kãm kapẽr pyrãk o kapẽr nẽ mẽ kãm:

–Hêxta waa nẽ mẽ apê Jerujarẽ nhõ xwỳnhjaja. Tĩrtũmja xatã mẽ awỳr ý hã kapẽr jarẽnh o mẽ pa xwỳnhjê rẽnh tã ka mẽ kapẽr mar kêt nẽ. Nẽ axtem nẽ kẽn o mẽ htak o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỹ pyrãk o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga.

³⁵ Mýrapê koja Tĩrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. ãm akupỹn ixwrỹk xà hã arĩgrota pix ã koja mẽ akwỳjaja mẽ amỳr pẽ krĩ ja hwỳr ixwrỹk kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkõt amnhĩ xunhwỳ nẽ axpẽn mã ijarẽnh o:

E ota Tĩrtũm kot mẽ pahwỳr mẽnh xwỳnhhta pøj. Nà ãm hãmri na mẽ pahwỳr wrỳ. Na mex kumrẽx. Anẽ.

14

Jejus kot axte arĩgromnu hã mẽhõ ho mex ã harẽnh

Rukre 13.10-17

¹ Tã nhũm sap nhũm Jejus ma Parijew nhõ xwỳnhjê krãhtũm kutã apkur kaxyw õrkwỹ hwỳr tẽ. Hãmri nhũm mẽ wa hã htu rax nẽ Jejus

apkur ã tãnopxar o kuhê. Mẽ kot amnhĩ nhĩpêx kwỳm ri tanhmã amnhĩ nhĩpêx to nhũm mẽ kot hã omunh nẽ ra hã àmnênh kaxyw nhũm mẽ kuri htãnopxar o kuhê.

² Nhũm ixkreja kamã mẽhõ my hte hikot xwỳnh mẽ kuri xa.

³ Hãmri nhũm Jejus omu nẽ hã Parijew nhõ xwỳnhjê mẽ Tĩrtũm kapẽr tũm o mẽ ahkre xwỳnhjê kukja nẽ mẽ kãm:

–Kwa mẽ inhmã mẽmoj jarẽ. Jarãhã na mẽ panhõ arĩgromnu pẽ sap. Tanhmã na pre finat Mojesja Tĩrtũm nhỹ hã mẽ pahte sap ã tanhmã amnhĩ nhĩpêx to hã mẽ pamã karõ hto? Xà kot puj mẽ akupỹm mẽ ho mex nà? Kot puj mẽ ãm mẽ omu nẽ akupỹm mẽ ho mex kêt nẽ? E mẽ atõ inhmã ja jarẽ. Anẽ.

⁴ Hãmri nhũm mẽ kuma nẽ tanhmã kutã kãm nẽ hkêt nẽ. ãm akryk mar o kuhê. Mẽ kot tanhmã kãm nẽ nhũm kot ta pãnhã mẽ kãm tanhmã nẽ py-maj nhũm mẽ akryk mar o kuhê nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ãhkra xi nẽ akupỹm ho mex. Hãmri nẽ hano nhũm ma akupỹm mex nẽ hkĩnh nẽ ma tẽ.

⁵ Hãmri nhũm Jejus mẽ kãm:

–E mẽ inhma. Xà koja mẽ akra sap ã mẽ apê ahkrehti xupỹm kãm tẽm ka mẽ ãm omu nẽ arĩgro mex jamãr pẽ tokyx ho axàpir kêt nẽ? Nà kot kaj mẽ ho axàpir kurê kumrẽx. Rỳ koja akrit môx gyw mã axà xat ka mẽ omu nẽ ãm omu nẽ arĩgro mex jamãr pẽ tokyx hkaxàr kêt nẽ? Nà kot kaj mẽ hkaxàr kurê kumrẽx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurê kumrẽx anẽ nẽ ri arĩgro mex jamãr kêt nẽ. Anẽ.

⁶ Nhũm pre ã Jejus mẽ kãm amnhĩ jarẽnh anẽ nhũm mẽ kuma nom kutã kãm mẽmoj jarẽnh kêt nẽ. Ra kot akupỹm ho mex jakamã nhũm mẽ tanhmã hã kãm nẽ hkêt nẽ kuhê.

Mê pahte amnhĩ to hkryre hã mẽ pajarēnh

Matêwre 23.6-14; Rukre 6.32-36; mãânēn Xiakre 4.10; Wam Pêtre 5.5-6

⁷ Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwỳjaja hkwỳjê pê amnhĩ to wa mẽ mẽ hkrĩ xà mex kãm hkrĩ hpa. Hãmri nhũm Jejus ja hã mẽ omunh o xa mẽ axte mẽ kãm mẽmoj jarē. No âm mẽmoj tã kuxi mẽ mẽ kãm awjarē mẽ mẽ kãm:

⁸ —Nà koja mẽ axpēn mã mẽhō rer kaxyw mẽ amnhĩ wỳr mẽ atã karō. Mẽ ate kutã axàpkur kaxyw. Hãmri kēr ka mẽ hwỳr mra mẽ axàpkur kaxyw mẽ kupĩp kãm akrĩ kurê kumrēx. No kot kaj mẽ kēp amnhĩ to wa mẽ mẽ hkrĩ xà mex pytã mẽ hã akrĩ nhũm ra kot amnhĩ to rax xwỳnhjê hōja hapu hã mẽ akôt tēn axà.

⁹ Hãmri nhũm ixkre nhō dōn kot amnhĩ wỳr mẽ awỳr xwỳnhhta mẽ hkrĩ xà mex tã mẽ awỳ mẽ mẽ amã: “Kwa mẽ atō kãnhmã xa mẽ kãm mẽ hkrĩ xà kaprã.” Anē. Hãmri ka nhãm xa mẽ mẽ kãm anhỳr xàta gō. Hãmri mẽ apijaam kãm hpãnhã kupĩp kãm nhỹ.

¹⁰ Ja pymaj kēr ka mẽ kupĩp kãm akrĩ kurê kumrēx. Kê ixkre nhō dōnja tee ri ja hã mẽ apumu mẽ mẽ amã: “Tk. Kwa ixkrãmnhwỳjaja. Mẽ kupĩp kãm akrĩ hkēt mẽ. Kwa mẽ mra mẽ jar mẽ hkrĩ xà mex ã mãn akrĩ.” Anē hãmri nhũm ja mẽ amã mex mẽ. Nhũm mẽ piitã kot mẽ ato mex ã mẽ atã omu ka mẽ ajaxwỳja amnhĩ tã omu mẽ akĩnh mẽ ajamakētkati mẽ akrĩ.

¹¹ —Nẽ koja mẽhō te amnhĩ to rax o hkwỳjê jakrenh pyrãk o amnhĩ nhĩpēx o ri pa hãmri nhũm Tĩrtũm ja hã omu mẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa mẽ rĩ amnhĩ pumu. Nom koja mẽhō amnhĩ to rax o hkwỳjê jakrenh pyrãk o amnhĩ nhĩpēx o ri pa hkēt nhũm Tĩrtũm ja hã omu hãmri mẽ tãm amnhĩm kot amnhĩ to rax xwỳnh ã harē. Anē.

Mẽ pahte mẽ kēp amrakati xwỳnhjê ho mex ã mẽ pamã karō

¹² Nhũm pre ã Jejus mẽ ahkre anē hãmri mẽ hpãnhã mẽ apkur xà hã ixkre nhō dōnja mã kapēr mẽ mẽ kãm:

—Nà na ka hte amnhĩ wỳr akwỳjê pix wỳ. Atōjê hwỳ mẽ akrãmnhwỳjê hwỳ. Nẽ mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhōrkwỳ hwỳr awỳr pix kaxyw na ka hte ã amnhĩ wỳr mẽ hwỳr anē.

¹³ No kēt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigēx tỳx xwỳnhjê mãn wỳ. Nẽ mẽ hirot mẽ ãpēnh kēt xwỳnhjê mãn wỳ. Kēr ka amnhĩ wỳr jajê mãn wỳ kê mẽ awỳr mra mẽ akutã apku.

¹⁴ Mo mẽ kot amnhĩ xwar awỳr kaxyw mẽ ò mẽmoj? Mẽ kēp amrakati. Tã kot kaj mãmrĩ amnhĩ wỳr mẽ awỳ nhũm Tĩrtũm mẽ hã apumu hãmri mẽ nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gō mẽ ato mex mẽ. Hãmri ka akĩnh mẽ. Anē.

Tĩrtũm kutã mẽ paxàpkur xà maati jarēnh

Matêwre 8.11, 25.1-10, 26.29; mãânēn Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkō hã mẽ apkur o mẽ krĩ xwỳnhjê hōja tanhmã Jejus mã kapēr to mẽ mẽ kãm:

—Hēxta waa mẽ. Kot puj mẽ nhỹrmã Tĩrtũm nhō krĩ hwỳr api mẽ mẽ kutã paxàpkur o pahkrĩ mẽ pahkĩnh tỳx kumrēx. Anē.

¹⁶ Hãmri nhũm kuma mẽ mẽ kē axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No âm hã kuxi mẽ tanhmã mẽ kãm ujarēnh to mẽ mẽ kãm:

—Koja mẽhō amnhĩ wỳr mẽ ho ohtō mẽ mẽ kot kutã mẽ apkur mex kaxyw mẽ kwỳ.

¹⁷ Hãmri mẽ mẽ hwỳr kãm ãpēnh xwỳnh mẽ mẽ mẽ kãm: “E ma tē mẽ mẽ kãm awjarē mẽ mẽ tokyx mra pa mẽ apku.” Anē.

18 Hāmri nhūm kuma nē ma mē hwÿr mē kām ujarēnh o tē. Hāmri nē wamta mā anē nhūm kuma hāmri nē hitōt nē kām: “Nà kot paj hwÿr ixtēm kêt nē. Na pa ham amnhīm pika hkwȳ japrō. Jakamā kot paj ma hwÿr tē nē ixprī hā omu mǎn. Kwa kēr ka kām ijarē kē ixte tanhmā hā nē xà hkôt ā ixte amnhī nhīpêx anhÿrja mā hamaxpēr kêt nē.” Anē.

19 –Hāmri nhūm kuma nē hpānhā nhām ja wÿr tē nē kām awjarē nhūm kuma nē haxwÿja hitōt nē kām: “Nà kot paj hwÿr ixtēm kêt nē. Na pa ham amnhīm mōx o 10 nē haprō. Jakamā kot paj ma hwÿr tē nē ixprī hā ri omu mǎn. Kwa kēr ka kām ijarē kē tee ri tanhmā hamaxpēr to hkêt nē. Ixte tanhmā hā nē xà hkôt ā ixte amnhī nhīpêx anhÿr kêt.” Anē.

20 –Hāmri nhūm kuma nē hpānhā ma ihōta wÿr tē nē kām awjarē nhūm kuma nē haxwÿja hitōt nē kām: “Nà kot pa hwÿr ixtēm kêt nē. Na pa kormā ham ixprō. Kormā ixprō nyw nē inhmā rer prām kêt jakamā kot paj ma hwÿr ixtēm kêt nē.” Anē.

21 –Hāmri nhūm kām àpēnh xwÿnhhta tee ri mē kuma nē awjanā nē ma akupÿm tē. Kot ma mē hwÿr mēnh xwÿnhhta wÿr ma akupÿm tē nē kām mē harē. Hāmri nhūm tee ri mē harēnh ma nē mē kamā gryk nē. Hāmri nē hpānhā mē kēp amrakati xwÿnhjē hwÿr kām àpēnh xwÿnhhta mē. Mē hkrā pipānh puro xwÿnhjē hwÿr kumē. Nē mē hpigêx tÿx xwÿnhjē hwÿr kumē. Nē mē hirot nē àpēnh hkêt xwÿnhjē hwÿr kumē nhūm ma mē kām ujarēnh o tē. Hāmri nē amnhī kôt mē kuwÿ nhūm mē kuma nē wamtajē rom hkôt mrar kurē kumrêx. Hāmri nē agjē nē apkur kaxyw mē hkrī xà kamā hkrī hpa.

22 Hāmri nhūm kām àpēnh xwÿnhja ò patrāw wÿr tē nē kām mē harē nē kām: “E ate mē hā karō xàta kôt na mē ra hkrī hpa htā arī mē hkrī xà hkwȳ hkapyr̄.” Anē.

23 –Hāmri nhūm kuma nē kām: “Hēxta waa nē. Kêt am mē hkrī xàta hipu mex ronhÿx pa omu nē ixkīnh nē. No am kormā piitā hipu hkêt. Kwa

ma krī pu hā ri mē hapêr o mra. Nē nhÿri mē hkwȳjê pumu nē mē haprō nē man amnhī kôt mē o mra kē mē hkrīxà ho hipu hpa.

24 No kêt wam ixte amnhī wÿr mē hwÿr xwÿnhhta. Mē hitōt xwÿnhhta kot paj axte amnhī wÿr mē hwÿr kêt nē.” Anē. Ā mē ujarēnh kot anhÿr. Na hte ā Tirtūm amnhī wÿr mē piitā mē hwÿr anē. Anē.

Mē pamā Jejus kīnh tÿx ā mē pamā karō

Matêwre 10.37-38; Makre 8.34; Rukre 9.23-25; Juāw 12.26

25 Tā nhūm Jejus mē òrkwÿ rūm kato nē kormā Jerujarē hwÿr mō nhūm mē hohtō rax nē hkôt mō. Hāmri nhūm Jejus xa nē mē ho hakêx nē mē omu nē mē kām:

26 –E kot ka mē atō amā ixkôt amnhī xām prām nē ā amnhī nhīpêx anē. Nē amā atō nē atōx nē anhīpêx nē akatorxà japê htÿx tā kēr ka amā ixkīnh tÿx o wa mē hakrenh pa. Nē amā aprō nē akrajē japê htÿx tā kēr ka amā ixkīnh tÿx o wa mē piitā mē hakrenh pa. Nē amā ixkīnh tÿx o amā amnhī japê jakre. Kēr ka mē atō ixkôt amnhī xām kaxyw nē ā amnhī nhīpêx anē.

27 –Koja mē ixpī pa mē anē ty. Tā mē ate ixkôt amnhī nhīpêx o mē apa xwÿnhhta. Koja mē ixtā mē apar mā tā kēr ka mē amā ixkīnh tÿx o mē umaj ixkaga hkêt nē. Kwār mē māmri tanhmā ixtā mē ato. Kot kaj mē nhÿrmā Tirtūm mē wa ixri axte amnhī xà kamā ajamak kêt nē atīr tūm nē amex rāhā apa ho apa. Nom kot kaj mē ixkīnhā jar pika ja kamā amā amex nē apa hprām xà ixkaga hāmri nē nhÿrmā wa ixri atīr tūm nē apa hkêt nē. Anē.

Mē pahte amnhī kukamā paja-maxpēr mex ā mē pamā karō

28 Nhūm Jejus arī mē kām kapēr nē mē kām:

–Kwa kēr ka mē ixkôt amnhī xunhwÿr kaxyw nē amnhī kukamā aja-maxpēr mex nē. Na htem amnhīm òrkwÿ rūnh nhīpêx kaxyw hāmri nē hkukamā hamaxpēr mex nē. Nē

kaxyw krax mã kuhê xà hkukamã hamaxpêr. Nê kaxyw kÿx pê kãm hikwÿ xàja kukamã hamaxpêr. Nê ôkwaêja kukamã hamaxpêr. Nê hã pôja kukamã hamaxpêr. Æ na htem amnhim ôrkwÿ rÿnh nhÿpêx kaxyw hkukamã hamaxpêr mex anê.

²⁹ Nom kot kaj mẽ hkukamã ajamaxpêr mex kêt nê ãm kaxyw pÿ ho grêre nê hakà. Rÿ ra hã axápênh rax kurê ra amã ho anhÿr kaga nê hkaga hpa nê hatur xàm mẽnh kêt nê. Hãmri nhÿm mẽ hkwyjaja hãnh mra nê omu nê atã hpêr o axkê.

³⁰ Nê axpên mã ri ajarênh o: “E ga mẽ ixkre mũj pumu. Na pre hipêx xwÿnhja hkurê kãm kaga nê hipêx par kêt nê.” Anhÿr o axpên mã ajarê. Ja pyrã nê kêr ka mẽ ixkôt amnhÿ xunhwÿr kaxyw nê amnhÿ kukamã ajamaxpêr mex nê. Nê ajamaxpêr o: “Nà mẽ kot Jejus ã tanhmã ixto htÿx tã kot paj hkaga hkêt nê. Kot paj hkôt amnhÿ nhÿpêx rãhã ho ri ixpa.” Anhÿr o amnhÿ kukamã ajamaxpêr. Hãmri nê rÿ kormã ixkôt amnhÿ xãm. No kot ka mẽ umaj ixkaga hkukamã ajamaxpêr hãmri nê ixkôt amnhÿ xãm kêt kurê kumrêx.

³¹ —Nê koja krÿ hõ kamã pahшти nhõ pôristi xohtô nê. Nê kutã nhãm krÿ hõ kamã pahшти nhõ pôristija grêre. Tã nhÿm wa hpijapu kaxyw nhÿm krÿ hõ rÿm pahшти nhõ pôristi xohtôja mẽ grêreta wÿr mra. Hãmri nhÿm kutã krÿ hõ kamã mẽ ô pôristi grêre nhõ pahi nhÿ nê tee ri mẽ amnhÿ kukamã hamaxpêr nê hamaxpêr o: “Kwa koja apu krÿ hõ rÿm pôristi xohtô raxja nhÿm inhõ pôristi grêreja mẽ axpên kutã kuhê nê axpu nhÿm mẽ inhnê mẽ himex. Nà inhõ pôristi grêre kênã.” Anhÿr o hamaxpêr.

³² —Hãmri nê pahi hõta wÿr ô kôwenatô mẽ. Kormã krÿ hõ rÿm mẽ hohtôtaja mẽ htêp kêt nhÿm mẽ kutã kumê nhÿm ma mẽ kutã tẽ. Hãmri nê awry hã mẽ hkaxpa nê mẽ ô pahшти mã kãm: “E na mẽ inhõ pahшти akutã inhmê pa tẽ. Na inhmã: ‘Ma tẽ nê mẽ kãm awjarê. Kot puj pêr mẽ papijapu

hkêt nê. Kwarÿ. Kot puj mẽ tãm axpên xunhwÿ.’ Anhÿr o kapêr nê mẽ akutã inhmê pa tẽ.” ã mẽ ujarênh kot anhÿr. Ja pyrã nê na htem mẽmoj kukamã hamaxpêr mex nê rÿ kormã tanhmã amnhÿ nhÿpêx to.

³³ —Tã kêr ka mẽ atõ amã ixkôt amnhÿ xãm prãm hãmri nê pahita pyrã nê amnhÿ kukamã ajamaxpêr tÿx nê rÿ kormã tanhmã amnhÿ nhÿpêx to. Kêr ka ate inhmã tanhmã amnhÿ nhÿpêx to ho apa kaxyw hãmri nê inhgryk ã te ate amã amnhÿ japê hkêt pyrãk o mẽmoj piitã mã anhÿhkra karo pyrãk o amnhÿ nhÿpêx. Hãmri nê rÿ kormã ixkôt amnhÿ xãm.

³⁴⁻³⁵ No kot kaj mẽ amnhÿ kukamã ajamaxpêr kêt nê atÿx ri ixkôt amnhÿ xunhwÿr japêr. Hãmri nê mẽmo arÿgro hã mẽ kot ixtã tanhmã mẽ ato xwÿnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhÿ nhÿpêx. Kaxwaja mẽ apkur xà kamã mex. Na htem amnhim ho ô xành nê kuku. Nom koja mẽhõ kamã pika hkwy mẽ nê ho ahkã hãmri tanhmã kot mẽ ho nê akupÿm ho mex? ãm mẽ kot hkapÿr pix kaxyw koja mex. Ja pyrã nê kot ka mẽ atõ ate inhmã tanhmã amnhÿ nhÿpêx to ho apa hã amnhÿ jarênh tã gaa nê amã ixkôt amnhÿ nhÿpêx prãm nõkati. Hãmri nê ra te ate kaxwa punu kapÿr mã tãmta pyrãk. E kwa mẽ mẽmoj tã ixujarênhja ma nê mẽ urãk nê amnhÿ kukamã ajamaxpêr mex nê. Anê.

15

ôwêhti pikunor jarênh Matêwre 18.12-14

¹ Tã nhÿm mẽ kot pahшти mã hkwyjê pê kãxpore hkwy jamÿnh xwÿnhjê mẽ mẽ kot amnhÿ tomnuj xwÿnhjaja Jejus kapêr mar kaxyw hwÿr mra.

² Hãmri nhÿm Parijew nhõ xwÿnhjê mẽ mẽ kot Tÿrtÿm kapêr tÿm o mẽ ahkre xwÿnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mŭjti axtem nē mē kot amnhĩ tomnuj xwŷnhjaja amnhĩ wŷr mē kuwŷ nē tōhã mē kutã apku. Kwa mē kot amnhĩ tomnuj xwŷnh kēnã kot kêt mē kutã apkur o pa. Anē.

³ Hāmri nhŭm Jejus amnhĩ tã mē kuma nē tanhmã mē kãm kapēr to. Nom hprĩ hã mē kãm kapēr kêt nē. Kê ãm amnhĩ tã kuxi nē mē kãm ôwêhti pikunor jarē nē mē kãm:

⁴ —Koja mēhõ õ ôwêhti xohtõ nē. Nē ma nhŷri hamãr o pa. Hāmri nhŭm pyxire nē hkwŷ kaga nē ma nhŷhŷm ahte tē nē akunok. Hāmri nhŭm õ dõnja ma kot akupŷm piitã o mõr kaxyw hkwŷ ho pikuprõnh pa hāmri nē tee ri hkwŷ kaêx ã pikunor xwŷnhhta japēr. Hāmri nē ma hkwŷ ho mõ nē nhŷri kure. Kot nhŷri kutêp apkur o ri pa kaxyw kure hāmri nē ma akupŷm pikunor xwŷnhhta japēr o tē. Hāmri nē hapēr ryy nē nhŷri hwŷr kato.

⁵ Nē omu nē hkĩnh tŷx nē. Hāmri nē amnhĩ kre hã kumē nē ma akupŷm hkwŷ hwŷr o tē.

⁶ Hāmri nē mē ĩhkõ hã kumē nē hkĩnh nē hkrãmnhwŷjê ho akuprõ nē õrkwŷ htã mē õrkwŷ xwŷnhjê ho akuprõ nē mē kãm: “Kwa na pre ixpê ixkriita õ akunok. Pa pre hapēr kãm ixihitŷx nē kãm ixkato nē omu nē ixkĩnh nē. Jakamã kwa wem mãänēn inhŷ hã akĩnh.” Anē.

—Ã mē ujarēnh kot anhŷr.

⁷ Ja pyrã nē koja mē kot amnhĩ tomnuj tŷx xwŷnhjê hõ tee ri amnhĩ pumu nē kot amnhĩ tomnuj kaga nē Tirtũm kõt amnhĩ xãm. Hāmri nhŭm kaxkwa kamã mē piitã ja hã omu nē hkĩnh tŷx nē. Te ho my kot ôwêhti hpikunor xwŷnh mã kator nē hkĩnh tŷxta pyrãk. Na hte Tirtũm tãm mē kot amnhĩ nhĩpêx o mē pa xwŷnhjê pumu nē hkĩnh nē. Tã koja mēhõ kot amnhĩ tomnuj tŷx tã ã amnhĩ nhĩpêx anhŷrja kaga nē Tirtũm kõt amnhĩ xãm hāmri nhŭm amnhĩ tã omu nē hkĩnh tŷx nē. Jakamã na pa hte mē akurom ã mē kot amnhĩ tomnuj xwŷnhjê hkõt Tirtũm kapēr o mē ahkre rãhã ho ri ixpa. Anē.

Nhŭm pre ã Jejus mē kot tanhmã ho kapēr punuj to xwŷnhjê mã amnhĩ jarēnh anē.

Kàxpore pikunor jarēnh

⁸ Nhŭm Jejus arĩ mē kãm awjarē nē mē kãm:

—Nē ja. Koja mēhõ ni hikàxpore kêp 10. àpênh o arĩgro pē 10 pãnhã kàxpore kêp 10. Tã ho pyxi nē ho akunok. Hāmri nē tee ri hapēr nē hkaprĩ nē. Hāmri nē kanê hpõk nē hitom kapõnh pē hprĩ hã hapēr o ri pa nē kãm kato.

⁹ Hāmri nē kupy nē hkĩnh nē hkrãmnhwŷjê ho akuprõ nē õrkwŷ htã mē õrkwŷ xwŷnhjê ho akuprõ nē mē kãm amnhĩ jarē nē mē kãm: “Xê na pre ixpê ixkàxpore hõta akunok pa tee ri hapēr tã akupŷm kãm ixkato nē kupy nē ixkĩnh nē. Jakamã xê wem inhŷ hã mãänēn akĩnh.” ã mē ujarēnh kot anhŷr.

¹⁰ —Ja pyrã nē koja mē kot amnhĩ tomnuj xwŷnhjê hõ pyxire nē amnhĩ tomnuj kaga nē ixkõt amnhĩ xãm. Hāmri nhŭm kaxkwa kamã mē piitã ja hã omu nē hkĩnh nē. Te mēhõ ni kot kàxpore pikunor xwŷnh mã kator nē hkĩnhhta pyrãk. Anē.

Mē hkra pikunor jarēnh

¹¹ Nhŭm Jejus arĩ mē ahkre ho xa. Tirtũm kãm mē piitã mē hapê htŷx ã mē ahkre ho xa. No kê ãm hã kuxi nē kê we tanhmã mē kãm ujarēnh to nē mē kãm:

—Nē koja mēhõ hkra my wa axkrut.

¹² Hāmri nhŭm kot hapu õ papaj wŷr tē nē kãm: “E papaj. Ot pa awŷr tē. Kot kaj nhŷrmã ty pa wa amŷr pē akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptar kurê kumrêx nã?” Anē. Hāmri nhŭm kuma nē wa kãm hikukrêx o axkjê. Kot wa mã hkwŷ gõ nē kot hapu mã hkwŷ gõ.

¹³ Hāmri nhŭm kot haputa ãm ri hipêêxã hkõt pa hkrãre hāmri nē kot kãm hikukrêx nhõr jamŷnh pa nē ma nhŷhŷm o mõ nē ho wēnê hpa. Hāmri nē hpãnhã kàxpore jamŷ nē ma nhŷhŷm mõ. Nhŷhŷm awry hã pika hõ hwŷr ma mõ. Mõõ hāmri nē krĩ hõ

kamã htỳx ri tanhmã amnhĩ tomnuj to ho ri pa. Hãmri nẽ gaa nẽ ra mẽ hkuprỳjê hã kàxpore ho hapêx pa. Nẽ kagôxyhti hã ho hapêx pa. Nẽ gaa hãmri nẽ hikàxpore hkêt nẽ ri pa.

14 —Rôm nhũm pikaja kamã mẽ hã na wrỳk kêt ry rax nẽ. Nẽ gaa nhũm mẽ hpur kãm mẽ kệp mẽ apkur xà hã mẽõja hapêx pa. Jakamã nhũm mẽ hkra kot haputa kệp amrakati nẽ kãm prãm tỳx nẽ ri pa. Hãmri nẽ tee ri amnhĩ kukamã hamaxpêr.

15 Hãmri nẽ amnhĩ to krĩ nhõ xwỳnhjê mar o ri pa. Kot mẽ kãm tanhmã àpênh to nẽ hpãnhã apkur kaxyw. Hãmri nhũm mẽhõ kot kãm hkrit hagrô jamãr kaxyw hã kumẽ nhũm ma hwỳr tẽ nẽ kãm hamãr o pa. Nom kot kãm hamãr o pata pãnhã àm kãm mẽmoj nhõr kryre nhũm arĩ kãm prãm tỳx kumrêx.

16 Nẽ tee ri kot hagrô kutã òta kur prãm nẽ tee ri omunh o pa.

17 —Nẽ gaa hãmri nẽ tanhmã hamaxpêr to. Nẽ tee ri kot tanhmã amnhĩ tomnuj toja ã amnhĩ pumu nẽ hamaxpêr o: “Hêxta waa nẽ. Mãn mũtar inhõ krĩ kamã inhõ papaj mã mẽ àpênh xwỳnhjaja ixrom apkur mex o pa. àpkur mex nẽ nhũm mẽõ jakrêx prãr rũnh tã pa jar mẽ hkĩnhã prãm xàj ra ixtyk o mõi.

18 Nà kot paj ma akupỹm mõi. Hãmri nẽ inhõ papaj pumu nẽ ã kãm amnhĩ jarênh anẽ nẽ kãm: ‘Kwa Papaj. Na pa pre ixpê akra hã amnhĩ tomnuj tỳx kumrêx nhũm ja apê omnuj nẽ. Nhũm Tirtũm pẽ ja omnuj nẽ.

19 Jakamã na pa ixpê akra hã amã amnhĩ jarênh ã ixpijaàm nẽ. Ixte tãm kêt kumrêx. Jakamã kwa xà kot pa amã mẽmoj tã ixàpênh o ri ixpa ka hpãnhã inhmã inhõ pa apku nã? Anhỹr o kot pa kãm amnhĩ jarẽ. Nà kot paj anẽ.”

20 —Anhỹr o amnhĩ kukamã hamaxpêr hãmri nẽ ma akupỹm mõi. Mõi nẽ ra hpôx o mõi. Nẽ kormã amỹm mõi ri nhũm õ papaj hwỳr rĩt nẽ omu nẽ amnhĩ kra hã omunh kurê kumrêx nẽ hkĩnh nẽ ma kutã hprõt nẽ

tẽ. Omu nẽ kãm hkaprĩ nẽ. Nẽ hwỳr hprõt nẽ hkaxpa nẽ kahti hkôt kumỹ.

21 Hãmri nhũm kãm amnhĩ jarẽ nẽ kãm: “Kwa papaj. Na pa pre amnhĩ tomnuj nẽ nhũm ja apê omnuj nẽ. Nẽ Tirtũm pẽ ja omnuj nẽ. Jakamã ixte ixpê akra hã amã amnhĩ jarênh ã ixpijaàm. Ixte tãm kêt kumrêx.” Anẽ.

22 Nom kormã kãm amnhĩ jarênh par kêt ri nhũm hipêêxà kãm mẽ àpênh xwỳnhjê mã akir nẽ mẽ kãm: “E kwa mẽ atõ ma tẽ nẽ kãm ê mex õ py nẽ akupỹn ixkrata wỳr ho aprõt nẽ kãm haxà. Nẽ hpar kà nẽ ìhkra kamã kàx nẽ amnẽ kãm hamỳ nẽ ho aprõt.

23 Nẽ akupỹm aprõt nẽ môx kra htwỳm mexta õ pumu nẽ unẽ nẽ apĩ. Nẽ mẽ ho anẽ pu mẽ ixkra hã pahkĩnh nẽ apku. E mẽ amnhĩ prêprêk nẽ tokyx ã amnhĩ nhĩpêx anẽ.

24 Na pre ma ixpê mõi o te ixpê htyk pyræk. Tã akupỹn mõi nẽ ixwỳr pøj nẽ te akupỹm inhmã htĩr pyræk. Jakamã e mẽ tokyj.” Anhỹr jakamã nhũm mẽ hã môx kra pĩ nẽ ho anẽ nẽ hkĩnh nẽ hã apkur o hkrĩ.

25 —Rôm nhũm hkra kot wata kormã pur kãm htỳx àpênh o xa. àpênh o ãm tã akupỹn hpôx o tẽ. Hãmri nẽ amnhĩ kukamã mẽ kot ri mẽmoj tatak nẽ mẽ grer ma.

26 Hãmri nẽ tee ri hamaxpêr o tẽ nẽ òrkwỹ hwỳr pøj nẽ kormã kapem xa nẽ mẽ hã mẽ àpênh xwỳnhjê hõ kukja nẽ kãm: “Kwa mẽmoj tã na ka wem ã akĩnh rax anẽ?”

27 Anẽ nhũm kãm: “Nà mẽhõ hkêt. Atõ na akupỹn pøj nhũm anhĩpêêxà omu nẽ hkĩnh tỳx nẽ. Nẽ mẽ inhmã anẽ pa mẽ hã môx kra htwỳm mexja pĩ nẽ hã ho anẽ nẽ hã ixkĩnh nẽ hkur o ixkrĩ.” Anẽ.

28 Hãmri nhũm tee ri htõ jarênh ma nẽ gryk tỳx nẽ. Hãmri nẽ gryk xàj kapem hkuk punuj o mẽ omunh o xa nẽ mẽ hwỳr àr kêt nẽ. Hãmri nhũm hipêêxàja tee ri omu nẽ hwỳr kato nẽ tee ri kot mẽ hwỳr ho àr kaxyw ho anhỹr kaprỳ.

29 Hãmri nhũm kãm: “Tk. Kwa na pa hte amã ixàpênh rũnh rãhã ho ri ixpa hã ra ixtã amgrà xohtõ nẽ. Nẽ aa

akapēr nhīrōp tanhmā ixām to hkēt. Tā ka hte ixpumunh nē akīnh nē ixtā mẽmoj tōx pīr kēt nē.

³⁰ Tā nhūm akra kot haputa apē akukrēx kwỳ jamýnh pa nē ma o mō nē axtem nē mẽ hkuprýjē mā ōr par tā akupýn mō nē pōj. Ka omu nē akīnh nē hā mōx kra twýmta pī. Nà kot paj mẽ awýr ixàr kēt nē.” Anē.

—Hāmri nē gryk tỳx nē xa.

³¹ Hāmri nhūm ō papaj tee ri kuma nē kām: “Kwa nà ri ã akapēr anhýr kēt nē. Inhmā ajapê kēnā. Na ka hte ixkōt apa ho apa rāhā nē. Nē ixkukrēx piitā kēp anhōō.

³² No atōja na pre te ixpē htyk pyrāk tā arī htīr. Nē te pikunor pyrāk tā te ra akupým kator pyrāk jakamā na pa omu nē ixkīnh nē. Nē inhmā hapê ho te mãnēn inhmā ajapê pyrāk.” Anē.

—Ā mẽ ujarēnh kot anhýr. Ja pyrā nē koja mẽhō te kot amnhī tomnuj tỳx o ri pa htā amnhī kaxyw Tīrtūm mã hamaxpēr nē amnhī to kuwỳ nē hkōt amnhī xām. Hāmri nhūm amnhī tā omu nē hkīnh nē. Nē kām hprām nē. No mẽ kajaja. Mē apē Parijew nhō xwýnhjē mẽ Tīrtūm kapēr tūm o mẽ ahkre xwýnhjaja. Na ka htem mẽ kot amnhī tomnuj xwýnhjaja kot Tīrtūm kapēr mar o kuhē hā mẽ omu nē Tīrtūm kīnhā akīnh kēt nē. Nē te hkra kot wata jamaxpēr pyrāk o ajamaxpēr nē tee ri ja hā mẽ omu nē mẽ kamā agryk nē. Nē mẽ amā mẽ hprām nōkati. Anē.

16

Mē panhōxỳ nē Jejus kot mẽ pamā karō

¹ Tā nhūm kē Jejus axte hkōt ri mẽ pa ho mẽ pa xwýnhjē jahkre. No ãm mẽmoj tā kuxi nē mẽ kām tanhmā ujarēnh to nē mẽ kām:

—Nà koja mẽhō hikàxpore rax xwýnhja kām àpēnh xwýnh mã mẽmoj to wēnē ho pa kaxyw ãm. No nhūm kām ho mex kēt nē. Axtem nē kēp amarī mẽ kām mẽmoj to fiat par o mō. Hāmri nhūm ra mẽhō kot ã amnhī nhīpēx anhýr ã omu nē ma ō patrāw wýr tē nē kām harē.

² Hāmri nhūm tee ri harēnh ma nē amnhī wýr hā karō. Hāmri nhūm hwýr tē nē axà nhūm kām: “Pa. Kwa xà ãm hāmri na mẽ inhmā ajarē? Kwa nà mon ka ri axtem nē ã ixpē inhō mẽmoj nhīpēx anē? E inhmā ate mẽ kām ho fiat par xwýnhjē nhīxi hā kagà nē inhmā agō hāmri nē ma tē. Kot ka axte inhmā axàpēnh kēt nē rī amnhī pumu.” Anē.

³ —Hāmri nhūm kuma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj amnhī to? Ixihtỳxre hā kot pa mẽhō mã pur ã apē. Nom inhmā amarī ri ixàhwýr o ri ixpa hprām kēt. Ixte amnhī kuk ã ixpijaàm.” Anē.

⁴ Hāmri nē tanhmā amnhī kukamā hamaxpēr to nē hamaxpēr o: “Nà kot paj amnhī wýr ixte mẽ kām ho fiat xwýnhjē hā karō. Nē mẽ kām mẽ ō kōōta ahpar mã hkamē kē mẽ ãm inhō patrāw mã hkwy PIX gō. Kēr kē mẽ amnhī tā ixpumu nē kām ixkīnh nē. Hāmri nē inhō patrāw kot ixkaga hā ixtā harēnh ma nē ixkamā ukaprī japēr. Hāmri nē amnhī wýr ixwỳ pa ahpýnhā mẽ kutā ixàpkur o ri ixpa nhūm prām ixpīr kēt nē. Nà kot paj anē.” Anē.

⁵ Hāmri nē amnhī wýr mẽ hā karō nhūm mẽ hwýr mra. Nhūm mẽ omu nē ja mã kām: “E tanhmā na ka pre inhō patrāw pē mẽmoj to fiat to? E inhmā harē.” Anē.

⁶ Hāmri nhūm kām: “Na pa pre kēp orti hā à ho 100 nē ho fiat. Ota hā kagàta. Tā pa kormā kām amnhīrer kēt nē.” Anē nhūm kuma nē kām: “Tōe ka inhma. Kot paj amā anhō kōt o gri ka ãm kām ho 50 PIX nē agō pa ixte anhō kōt ho ijapēx par pyrāk o anhīpēx.” Anē.

⁷ Hāmri nē hpānhā nhām ja mã kām: “No ka. Tanhmā na ka pre kēp mẽmoj to fiat to?” Anē nhūm kām: “Na pa pre kēp pāy hā xak o 1.000 nē ho fiat. Tā pa kormā hpānhā kām amnhīrer kēt nē.” Anē nhūm kām: “Tōe. Kot paj hāmri amā anhō kōt o gri ka ãm kām ho 800 PIX nē agō pa ixte anhō kōt ho ijapēx par pyrāk o anhīpēx.” Anē. Nhūm ã mẽ hipēx anē. Hāmri nē

hamaxpêr o: “E. Na pa mē kām mē ō kōt o hkry pa. Koja mē amnhī tā kām ixkīnh japêr.” Anē.

⁸—Hāmri nhūm ō patrāwja ā kot mē hipêx anhÿr ā harēnh ma nē kām: “Tk. Kwa ate pa ixkukamā ajamaxpêr nē inhmā mēmoj to anhÿr mex kêt tā ka amnhī kukamā ajamaxpêr mex pē ā mē hipêx mex anē.” Anē. Ā mē ujarēnh kot anhÿr. Anē.

Nhūm pre ā Jejus mē kām ujarēnh anē. Hāmri nē mē kām:

—Tā ja pyrā nē na hte mē kot Tirtūm kōt amnhī xunhwÿr kêt xwÿnhjaja ām amnhī pix kukamā hamaxpêr mex o pa. Jao amnhī kaxyw pix mā mē piitā tanhmā mē ho mex to ho pa. Mē kot amnhī tā mē omunh nē mē kām mē hkīnh nē amnhī xwar tanhmā mē ho mex to kaxyw nhūm htem ā amnhī nhīpêx anhÿr o pa. Tā mē ate ixkōt amnhī xunhwÿr xwÿnhjaja. Tirtūm kot tanhmā mē ate amnhī kwÿjê ho mex to hā amnhīm mē ajarēnh kaxyw kêt ka mē amnhī mē mē piitā mē hkukamā ajamaxpêr mex nē. Pē tanhmā mē ho mex to ho ri apa. Ā mē ate amnhī nhīpêx anhÿrja na mex. Nom kormā mē ate ā amnhī nhīpêx anhÿr kêt.

⁹—Hêxta waa nē. Mon ka htem mē urāk nē ā axpēn to mex anhÿr kêt nē? Kwa mē àpēnh xwÿnhhta kot amnhī nhīpêx pyrā nē tanhmā axpēn to mex to o ri apa hkêt wehe. Jao akukrêx nē akàxpore ho anhōxÿ hkêt nē. Kêt ka nhÿrmā ty nē Tirtūm wÿr api nhūm ja hā mē ato mex rax nē. Te ho kot ō patrāw mā àpēnh xwÿnhhta kot tanhmā mē ho mex to xwÿnhjê hwÿr mrrar nhūm mē kot amnhī xwar tanhmā ho mex tota pyrāk.

¹⁰⁻¹¹—Na hte Tirtūm tanhmā mē pakute hā mē pahpumunh mex nē. Koja mē amā mēmoj gō ka mē kām hprām xà hkôt ho anhōxÿ hkêt nhūm ja hā mē apumu nē axte mē amā mēmoj gō. Nom hpānhā mē amā ōr rax o wamta jakre nē kugō. Nom kot ka mē ri mēmojta o anhōxÿ ho ri apa nhūm tee ri ja hā mē apumu nē axte mē amā mēmoj nhōr kêt nē. Koja mē

amā mēmoj gō ka mē ho anhōxÿ ho ri apa nhūm ja kêt homnuj nē.

¹²—Nē kot kaj mē jar Tirtūm kot mē amā mēmoj nhōr xwÿnhja ho anhōxÿ ho ri apa. Hā koja nhÿrmā kaxkwa kamā mē amā mēmoj mex nhōr kêt nē.

¹³—Nē kot kaj apyxi nē anhō patrāw hamēxkrut nē arīgro pyxi hā hamē wa kām axàpēnh o amÿkry hkêt nē. Kot kaj anē nē hō gryk ā hō kaga. Ja pyrā nē kot kaj mē jar pika ja kamā akàxpore nē akukrêx pix kukamā ajamaxpêr o ri apa hā kot kaj mē amā hapê htÿx nē mē kêt ho anhōxÿ ho ri apa. Nē akukrêx rax gryk ā Tirtūm kām hprām xà hkôt akukrêx o tanhmā axpēn to ajuta hto ho ri apa hkêt nē. Ja pymaj kwa kêt ka mē ām Tirtūm pix mā mēn ajamaxpêr rāhā ho ri apa. Jao te akukrêx nē akàxpore mā axàmnhix ri anhīhkra karo ho ri apa pyrāk. Anē.

Nhūm pre ā Jejus mē ahkre anē.

¹⁴ Hāmri nhūm Parijew nhō xwÿnhjaja mar o kuhê. Na prem ra mē hikàxpore rax gryk ā Jejus kaga. Jakamā ā kot mē kām kàxpore jarēnh anhÿrja ma nhūm ja mē kêt omnuj nē nhūm mē hā hpêr o pikēnh o kuhê.

¹⁵ Hāmri nhūm amnhī tā mē kuma nē mē kām:

—Nà na ka htem te mē ate tām mē kot amnhī nhīpêx xwÿnh pyrāk o amnhī nhīpêx nom ri mē kām amnhī to axêx o ri apa. No nhūm Tirtūmja kot tanhmā mē ate amnhī nhīpêx to nē tanhmā mē ajamaxpêr to hkôt mē apumunh par. Nē hprī hā mē anhōxÿ hā mē apumu. Te mē ate tām amnhī nhīpêx pyrāk nom mē anhōxÿ kamā na ka htem apa. Mēmoj te mex pyrāk nhūm htem omu nē mex ā hkamnhix. No nhūm Tirtūm àhpumunh tÿx xà hkôt hprī hā mēmojta pumu nhūm kêt omnuj nē. Mē akurom omnuj ā omunh kurê kumrêx. Na hte hprī hā mē ate amnhī nhīpêx ā mē apumu. Anē.

Tirtūm kapêr aa hapêx kêt ā harēnh Matêwre 5.17-18

16 Nhũm Jejus arĩ mẽ ahkre nẽ mẽ kãm:

–Nẽ na pre finat Mojesja kumrẽx mẽ kãm Tĩrtũm kapẽr kwỳ hã kagà. Tã nhũm hpãnhã Tĩrtũm nhỹ hã kapẽr jarẽnh xwỳnh kwỳjaja mããnẽn mẽ kãm hkwỳ hã kagà. Nhũm prem kuma nẽ mẽ hkõt amnhĩ nhĩpẽx o ri pa. Tã nhũm finat Juãw Paxisja mẽ hpãnhã kato nẽ Tĩrtũm kapẽr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtõ nẽ ixkõt amnhĩ xunhwỳ nẽ kãm ixkapẽr kõt pix mã amnhĩ nhĩpẽx o ri pa hprãm nẽ.

17 –Tĩrtũm kapẽr tũmja mex o mex. Kojã aa hapẽx kêt nẽ. Kojã nhỹrmã kaxkwa nẽ pika wa hapẽx pa no nhũm Tĩrtũm kapẽr tũmja aa hapẽx kêt nẽ. Kojã rãhã ho rãhã nẽ aa ihkjẽ ho mẽnh kêt nẽ. Anẽ.

Mẽ pahte axpẽn kaga hkêt ã mẽ pamã karõ

Matêwre 5.31-32, 19.9-12; Makre 10.2-12

18 Nhũm Jejus arĩ mẽ ahkre nẽ mẽ kãm:

–Nẽ kêt ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm hõ ho aprõ nhũm Tĩrtũm noo mã te ate wam aprõ kamã nhãm ho amnhĩkati pyrãk. Nhũm ja kệp omnuj nẽ. Rỳ ka ra mẽhõ kot hprõ kaga xwỳnhhta ka hpãnhã ho aprõ. Nhũm Tĩrtũm noo mã te ate wam mjẽn pẽ ho amnhĩkati pyrãk. Nhũm Tĩrtũm pẽ ja omnuj nẽ. Anẽ.

Hikàxpore rax xwỳnh mẽ kệp amrakati xwỳnh wa harẽnh

Rukre 6.20-26

19 Nhũm Jejus arĩ mẽ ahkre kamã mẽ kãm awjarẽ nẽ mẽ kãm:

–Kojã mẽhõ kàxpore rax xwỳnh ê mex pix kãm ri pa. Nẽ apkati mẽ apkur mex o pa.

20 Nhũm amrakati xwỳnh pẽ Rajareja hkà nhyre nẽ arĩ pry kamã àhwỳr o hkrĩ. Nhũm htem hamỳ nẽ ma o pa nẽ hikàxpore rax xwỳnh nhõrkwỹ jakwakrem haxwỳ.

21 Nhũm õ jakrẽx kwỳ hkrẽr prãm xaj hakwa krem àhwỳr o hkrĩ.

Nhũm rop hwỳr mra nẽ hkà nhy kunhnwỳnh o kuhẽ.

22 –Tã nhũm Rajare ty nhũm Tĩrtũm kapẽr o mẽ wrỳk xwỳnhjaja hwỳr wrỳ nẽ ma akupỳm kaxkwa hwỳr hkarõ ho mẽ nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

–Tã nhũm hikàxpore rax xwỳnhhta mããnẽn hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà.

23 Hãmri nhũm hkarõ ma mẽ kot amnhĩ xà htỳx kamã hamak tũm xà pẽ kuwy maatita wỳr ma mẽ. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kãnhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ.

24 Hãmri nhũm tee ri wa omu nẽ Apraãw mã akapẽr nẽ kãm: “Kwa Apraãw. Kwa we ixkamã axukaprĩ nẽ ixwỳr Rajare mẽ kẽ ixwỳr tẽ nẽ ìhkrakrã ho gõ htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrẽx.” Anẽ.

25 Hãmri nhũm kuma nẽ kãm: “Tk. Nà kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa.

26 Nẽ pahkaẽx kãm ahkaprỳ griã. Jakamã nhỹhỹnh kot kêt awỳr rẽ? Ka ajaxwỳja nhỹhỹnh kot ka kêt mẽ ixwỳr rẽ?” Anẽ.

27 –Nhũm ã kãm kapẽr anẽ nhũm tee ri kuma nẽ kãm: “Kwa tõ ma inhõ krĩ hwỳr mãn amẽ kẽ ma ixkwỳjẽ hwỳr wrỳ.

28 O mũj arĩ inhõ krĩ kamã ixtõ kệp 5 nẽ arĩ htĩr nẽ pa. Kẽ wa mẽ kãm awjarẽ kẽ mẽ amnẽ kuwy hwỳr pa pymaj tokyx amnhĩ tomnuj kaga nẽ Tĩrtũm kõt mãn amnhĩ xunhwỳ nẽ hkõt ri amnhĩ nhĩpẽx o pa.” Anẽ.

29 –Hãmri nhũm Apraãw kãm: “Nà pa mẽ hwỳr mẽnh kêt nẽ. Ra mẽ kuri Tĩrtũm kapẽr jarẽnh xwỳnhjẽ mẽ

Mojes kot Tirtūm kapēr ā kagà kēnā. Kē mē kamā harē nē ja ma nē rī tām tanhmā amnhī nhīpēx to.” Anē.

³⁰ Hāmri nhūm tee ri kuma nē kām: “Kwa nā. Koja mē kagàja mar kēt nē. No kēt Rajare na pre ra htyk tā akupŷm htīr jakamā koja mē hwŷr wrŷ nē mē kām awjarē nhūm mē akupŷm htīr ā omu nē kapēr ma hāmri nē amnhī tomnuj kaga kurē kumrēx. Kwa nā ā ri anhŷr kēt nē mē hwŷr amē hēxta waa nē.” Anē.

³¹ —No nhūm kām: “Nā koja mē Tirtūm kapēr ā kagà mar kēt ā koja mē määnēn Rajare tyk nē akupŷm htīr nē mē hwŷr wrŷk nē kot mē kām tanhmā ujarēnh to hā mar kēt nē. Jakamā kwarī pa mē hwŷr mēnh kēt nē. Kot paj ho anē nē ām ixte mē hwŷr mēnh kaprŷ pyrāk o amnhī nhīpēx.” Anē. Ā mē ujarēnh kot anhŷr. Anē.

17

Mē kot Jejus nē mē no kupyr ā mē harēnh

Matēwre 18.6; Makre 9.42; määnēn Rōmān 1.32; Sikūn Pētre 2.1, 2.18

¹⁻² Tā nhūm Jejus hkôt mē pa ho mē pa xwŷnhjē jahkre ho nhŷ nē mē kām:

—E kot paj mē kot ixkôt amnhī xunhwŷr tohtuj anhŷr xwŷnhjē jarē ka mē inhma. Nā koja mēhō mē hwŷr tē nē inhnē mē kām kapēr. Mē kot mē mar nē amnhī tomnuj prām xāj tanhmā mē kām kapēr to. Hāmri nhūm mē mar xā hkôt tanhmā amnhī tomnuj to. Hā koja Tirtūm ja hā omu nē kot inhnē tanhmā kām nē xwŷnhta pumu nē ja hā homnuj tŷx nē. Te mē kot mēhō pynēnh nē mut ā kēn pytī hō nhōr nē ma o htēm nē gō rax kām mēnh pyrāk o koja hipēx. Te ho ja pyrāk no ām homnuj tŷx o ja jakre. Jakamā kwa mē ixkapēr ma nē kām ajamaxpēr tŷx rāhā ho ri apa. Anē.

Mē pahte amnhī tā tanhmā mēhō hto hkēt ā mē pamā karō

Matēwre 18.21; Makre 11.25-26; määnēn Epes 4.32; Korosē 3.13

³ Nhūm Jejus arī mē ahkre nē mē kām:

—Nē koja ixkôt atōjē hō tanhmā atomnuj to. Ka amnhī tā omu hāmri nē ma hwŷr tē nē ja hā kām akapēr nē kām: “Kwa mon ka axtem nē ri ā inhīpēx anē ixtō? Kwa nā ri ā inhīpēx anhŷr kēt nē.” Anē hāmri nhūm amnhī tā ama nē amā: “Nā na pa tee ri ixte tanhmā atota ā amnhī pumu nē ixkaprī nē. Nā kot paj axte ā ri anhīpēx anhŷr kēt nē. Kwa kēr ka axte tanhmā ja mā ajamaxpēr to hkēt nē. Te ate amnhī katut kôt mēnh pyrāk o hipēx pu akupŷm tām axpēn nhīpēx o papa.” Anē. Koja ā amā kapēr anē ka amnhī tā ama hāmri nē axte tanhmā kot atoja mā ajamaxpēr kēt nē.

⁴ —Koja arīgro pyxi hā xatā tanhmā atomnuj to japēr. Hāmri nē xatā tee ri ja hā amnhī pumu nē awŷr mra nē xatā amnhī tā amā kapēr nē amā: “Pa ot pa awŷr tē. Na pa ra ixkaprī nē. Kwa ixte ā anhīpēx anhŷrja pumu nē ām omu. Kot paj axte hkēt nē.” Anhŷr o xatā amā kapēr. Nē ra axte tanhmā atomnuj to nē kē axte awŷr tē nē ā amnhī tā amā kapēr anē. Nom kēr ka ama nē kamā agryk kēt nē. Ām xatā kām: “Nā kot puj anē nē akupŷm tām axpēn nhīpēx. Kot paj axte tanhmā ate ixtota mā ijamaxpēr kēt nē. Kot puj ja ho pajapēx nē tām axpēn nhīpēx o akupŷm papa.” Anhŷr o kēr ka mē xatā axpēn nhīpēx anhŷr rāhā ho ri apa nē aa jam anhūrer kēt nē. Anē.

Mē pahte mēmoj tā Tirtūm wŷr hā mē pajarēnh

Matēwre 17.20-21, 21.21-22; Makre 11.23

⁵ Tā nhūm Jejus nhŷ hā mē ahkre ho mē pa xwŷnhjaja hāmri kām:

—Kwa Pahihti. Tanhmā mē ixto pa mē amnhī kaxyw Tirtūm kôt ijamaxpēr tŷx rāhā ho ri ixpa. Anē.

⁶ Hāmri nhūm mē kām:

—Nā ra mē ate amnhī kaxyw hkôt ajamaxpēr jakamā na ra amnhī tā mē apumu. Jakamā mē ate hkôt amnhī nhīpēx kukwak ri na ka htem mēmoj tā awŷ nhūm mē ate mēmoj tā hwŷr xā hkôt mē amā tanhmā mēmoj nhīpēx to. Te mē ate pī hpār mŷj mā akapēr

ně kām: “E amnhĩ jarê ně ma tē ně gō xujanār kām mǎn mrō.” Aně nhũm kot amar ně amar xà hkôt ã kot amnhĩ nhĩpêx anhỹrta pyrāk. Ja pyrà ně kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awỳ nhũm mẽ ama ně mẽ amã mẽmoj tanhmã ho. Rỳ mẽ amã mẽmoj gō. Aně.

Te mẽ pahpê Tĩrtũm mǎ paxàpênh xwỳnh pyrāk

⁷ Nhũm Jejus arĩ mẽ ahkre ně mẽ kām:

–Ně ja. Kot kaj mẽ amã mẽ àpênh xwỳnh kwỳjaja nhũm hō amã mẽmoj tã àpênh o pa ě ho anhỹr pa. Hãmri tanhmã kot kaj kām akapêr to wehe? Xà kot kaj kām: “E hãmri axàpênhhta kaga ně tē ně nhỹ ně apku.” Anhỹr o kām akapêr?

⁸ Nà kot kaj kām anhỹr kêt ně. Kot kaj kām: “E kwa tokyx tē ně hpǎnhã inhmã inhō hã apê. Kot pa ixàpkur pa ka ixpǎnhã nhỹ ně apku.” Anhỹr kām akapêr. Kêp amã àpênh xwỳnh jakamã ka ã kām akapêr aně.

⁹ Ja pyrà ně kot puj mẽ Tĩrtũm kot mẽ pamã mẽmoj tã karō xà hkôt tanhmã kām amnhĩ nhĩpêx to ho ri papa. Mě õ patrǎwta pyrà ně kot tanhmã mẽ pamã karō hto xà hkôt pu mẽ amnhĩ nhĩpêx.

–Xà na htem mẽ õ patrǎw mǎ mẽmoj tã àpênh pa hãmri ně hkwỳjê mǎ amnhĩ to jarkrar o ri pa ně mẽ kām: “E ka mẽ ixpumu. Na pa hte inhō patrǎw mǎ ixàpênh mex o mẽ hakre ka mẽ ja hã ixpumu. Hêxta waa ně. Mon pa hte ri axtem ã amnhĩ nhĩpêx aně?” Anhỹr o xà kot kaj mẽ kām amnhĩ to jarkrar o ri apa? Nà na ka htem ã amnhĩ nhĩpêx anhỹr kêt ně.

¹⁰ –Tã pa hte mẽ õ patrǎwta pyrà ně tanhmã mẽ amã mẽmoj tã karō hto ho ixpa. Jakamã kêr ka mẽ inhma ně ixte mẽ amã mẽmoj tã karō xà hkôt tanhmã inhmã amnhĩ nhĩpêx to ho ri apa. Hãmri ně hã amnhĩ to jarkrar pê amnhĩ jarênh o: “Ăm hãmri na pa ã Jejus mǎ amnhĩ nhĩpêx aně. Hêxta waa ně. Ixpê Jejus mǎ tanhmã ixte amnhĩ

nhĩpêx to mex xwỳnh na pa.” Anhỹr o amnhĩ to jarkrar kêt ně. Kêt ãm amnhĩ jarênh o: “Nà ixte kām tanhmã amnhĩ nhĩpêx to ho ixpa xwỳnh pix na pa. Na hte mẽmoj tã inhmã karō pa kuma ně ý hã tanhmã kām amnhĩ nhĩpêx to.” Anhỹr o amnhĩ jarênh o ri apa. No ri amnhĩ krǎ hkôt atỳx tanhmã amnhĩ to jarkrar to ho ri apa hkêt ně. Aně.

Jejus kot mẽ ho 10 ně akupỳm mẽ ho mex ã harênh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarê hwỳr kormã mō.

¹² Ně nhỹri krĩ hō htêp o mōr mẽ nhũm krĩ pu hã ri mẽ pa xwỳnhjaja kêp 10 ně kutã mra. Mě hkànhy hkro htỳx xwỳnhjaja kutã mra ně hkaxpa ně amỳm kuhê ně omu.

¹³ Hãmri ně kām:

–Pa Pahihti. Kwa mẽ ixpumu ně mẽ ixkamã axukaprĩ ně tanhmã mẽ ixto mex to. Aně.

¹⁴ Hãmri nhũm mẽ kām:

–Tõe. Nà kot paj mẽ ato mex. E mẽ mǎmrĩ awjanã ně ma akupỳm mẽ anhō patrejê hwỳr mra kê mẽ akupỳm mẽ akà mex ã mẽ apumu. Aně.

Hãmri nhũm mẽ kuma ně kapêr mar xà hkôt awjanã. Kà nhy rǎhã awjanã ně ma akupỳm patre hwỳr mra. Ně kormã akupỳm hwỳr pry hã mrar rǎhã piitã hkà mex pa.

¹⁵ Hãmri nhũm ãm pyxi ně hkwỳjê rom awjanã ně akupỳm Jejus wỳr Tĩrtũm mǎ mex o mex ã harênh o hwỳr tē.

¹⁶ Hãmri ně Jejus kaxpa ně kutã hkõnkrǎ ho tēm ně nhỹ ně amnhĩ tã kām kot ho mex ã kām amnhĩ jarê. Kwỳjê hkĩnhã kêp Ijaew kêt axtem kêp Samar nhō xwỳnh tã mẽ kurom akupỳn hwỳr tē ně kām mex o mex ã harê.

¹⁷⁻¹⁹ Hãmri nhũm amnhĩ tã kuma ně kām:

–No mẽ akwỳjaja? Ixte mẽ ato 10 ně mẽ ato mex tã ka ãm kapxipix awjanã ně akupỳn ixwỳr tē. Akwỳjê hkĩnhã apê Ijaew kêt tã akupỳm amnhĩ mex

ã amnhĩ pumu hãmri nẽ mẽ kurom awjanã nẽ Tirtũm mã mex o mex ã harẽnh o ixwỳr tẽ. Hêxta waa nẽ. Mo na hte ixkwỳjaja apyrà nẽ amnhĩ kaxyw ixkõt hamaxpêr kêt nẽ? E kãnhmã xa nẽ mãmrĩ ma ajamakêtkati nẽ akĩnh nẽ ma akupỹm tẽ. Anẽ.

Jejus akupỹn wrỳk xà hã arĩgro jarẽnh

Matêwre 24.23-24, 24.37-44; Makre 13.32-37; mãânẽn Wam Tesarõn 5.2-8; Sikũn Pêtre 3.3-10

20-21 Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tirtũm tokyx kot mẽ pahwỳr mẽnh mã xwỳnhhta mẽ nhũm mẽ pahwỳr wrỳ nẽ mẽ pahto amnhĩptàr kurê kumrêx nà kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrà nẽ mẽ kãm:

—Nà ra kot mẽ ho amnhĩptàr o pa kẽnã. Nom nhỹri hkrĩ xà kamã mẽ ho amnhĩptàr o hkrĩ hkêt nẽ. Na htem amnhĩ kaxyw hkõt hamaxpêr nẽ hkõt amnhĩ xunhwỳ hãmri nhũm kêp mẽ õ pahihtĩ hã mẽ ho amnhĩptàr o pa. Nẽ mẽ kãm mẽ hamaxpêr mex gõ nhũm htem hkõt ri hamaxpêr mex o pa. Anẽ.

22 Hãmri nẽ hpãnhã hkõt mẽ pa ho mẽ pa xwỳnhjê mã kapêr. Mẽ kot nhỹrmã tee ri kamã hamak o pa hã mẽ kãm kapêr nẽ mẽ kãm:

—Kot kaj mẽ nhỹrmã tee ri amã tokyx akupỹn ixwỳr nẽ ixte mẽ ato amnhĩptàr prãm xàj tee ri inhmã anojarêr kaprỳ ho ri apa. Nẽ axpẽn mã ri ijarẽnh o: “Hêxta waa nẽ. Mo na we Pahihti tokyx akupỹn mẽ pahwỳr wrỳk kêt nẽ?” Anhỹr o inhmã anojarêr o ri apa pẽ ixkamã ajamak rãhã ho apa.

23 —Nẽ koja mẽ ra akupỹn ixwỳr ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama.

24 Kot paj nhỹrmã akupỹn mẽ awỳr ixwỳr kaxyw nhũm mẽ pika piitã

hkõt akupỹn ixwỳr kãm anhĩpê ixpumu. Te mẽ piitã mẽ kot anhĩpê na jaxênh pumunh pyràk o kot kaj mẽ apiitã ixpumu.

25 Nom kormã jar pika ja kamã ixpa ri koja mẽ ohtõ nẽ ixkaga pa amnhĩ xà htỳx kamã ijamak kãm ty. Hãmri nẽ mẽmo arĩgro hã ma akupỹm kaxkwa hwỳr api. Hãmri nẽ nhỹrmã akupỹn mẽ awỳr wrỳ.

26 —Nà kot paj nhỹrmã man akupỹn mẽ awỳr wrỳ. Akupỹn ixwỳr xà hã arĩgrota ã koja jar pika ja kamã mẽ pa xwỳnhjaja htỳx ri tanhmã amnhĩ tomnuj to ho pa. Te amnepêm finat Nohti htĩr ri mẽ kot htỳx ri tanhmã amnhĩ tomnuj to ho pa pyràk o koja mẽ amnhĩ nhĩpêx o pa.

27 Na prem amnhĩ kaxyw Tirtũm mã hamaxpêr o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kõt pix mã tanhmã ri amnhĩ nhĩpêx to ho pa. Rôm nhũm Nohti gõ htãm pymaj pàr raxja nhĩpêx nẽ kãm axã. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpêr to hkêt nẽ. Tã nhũm nata mẽ haêr pẽ wrỳ. Hãmri nẽ wrỳk rax o ra pika piitã hanhi nhũm mẽ piitã pikaprãr pa.

28 —Akupỹn ixwỳr xà hã arĩgrota ã koja mẽ mãânẽn te amnepêm Sotõ nhõ xwỳnhjaja kot htỳx ri tanhmã amnhĩ tomnuj to pyràk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyràk o koja mẽ amnhĩ nhĩpêx. Na pre hte Sotõ nhõ xwỳnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nẽ ãm kõt pix mã ri amnhĩ nhĩpêx o pa. Nẽ htỳx ri amnhĩ xàpkur xà pix kukamã hamaxpêr. Nẽ mẽ hpur kãm ri àpênh pix kukamã hamaxpêr. Nẽ ri amnhĩ xujaprõr pix kukamã hamaxpêr nẽ axpẽn mã mẽmoj to wẽnê pix kukamã hamaxpêr. Nẽ amnhĩm õrkwỹ nhĩpêx pix kukamã hamaxpêr. ã na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja

o amnhĩ kaxyw Tirtũm mã hamaxpêr o pa hkêt nê.

²⁹ —Tã nhũm Rohti mẽ õ krĩ rũm kator mẽ nhũm Tirtũm krĩ nhõ xwýnhjaja kot amnhĩ tomnuj týx o paja mýrapê mẽ himex pa. Jao kaxkwa rũm mẽ hipy mẽmo hpôk kwý rê nhũm mẽ hkaxàr pa.

³⁰ Tã akupýn mẽ awýr ixwrykja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nê htýx ri amnhĩ tomnuj pix o pa.

³¹ —Nê akupýn ixwryyta ã ka mẽ anhõrkwý nhĩmõk ã hkrãmnênh o akrĩ japêr nê akupýn ixwryk kãm ixpumu. Hãmri nê akukrêx wýr axàr nê hõ hpyr mã ajamaxpêr kêt nê. Rý ka mẽ apur kãm axápênh o akuhê japêr nê akupýn ixwryk kãm ixpumu. Hãmri nê akupým anhõrkwý hwýr atêm mã ajamaxpêr kêt nê. Mo kaxyw kot ka kêt hwýr tẽ? Kêt ãm inhmã mẽ ajapê mã akupýn mẽ awýr ixwryk mã ajamaxpêr o akĩnh nê ixpumunh o akuhê.

³² —Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tirtũm kapêr nhĩrõp xa nê amnhĩ katut kôt Sotõta wýr rĩt hãmri nê ã amnhĩ nhĩpêx anhýrja mýrapê htyk kurê kumrêx. Tã kêr ka mẽ ho urak nê amã akukrêx rax japê xaj ixkôt amõr kaxyw anhõtõt kêt nê.

³³ —Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhýrmã ja piitã mẽ apê hapêx pa. Mẽ ate kãm anhĩkra karo hpar pyrãk o piitã hipêx hãmri nhũm Tirtũm ja mã mẽ apumu nê hpãnhã nhýrmã mẽ amã mẽmoj mex nhõr rax nê.

³⁴ —Nê kot paj kamãt kãm akupýn ixwryk japêr nhũm nhýri mẽhõ ra ixkôt amnhĩ xãm xwýnh mẽ mẽhõ kot ixkôt amnhĩ xãm kêt xwýnh wa par kãm nõr japêr. Hãmri pa amnhĩ wýr ra ixkôt kot amnhĩ xãm xwýnhhta o api nhũm kot ixkôt amnhĩ xãm kêt xwýnhhta arĩ gõr nê nõ.

³⁵ Rý pa arĩgro mã akupýn ixwryk japêr nhũm mẽnijê hõ wa hamêxkrut nê harõj kahuk o ãm japêr. Hãmri pa ra kot ixkôt amnhĩ xãm xwýnhja ho api nhũm kot ixkôt amnhĩ xãm kêt xwýnhja ahte arĩ harõj kahuk o xa. Hãmri nê hamaxpêr mex kêt kumrêx o xa.

³⁶ Rý koja mẽmyjê hõ wa axkrut nê hpur kãm ápênh o ãm japêr. Pu pa amnhĩ wýr kot ixkôt amnhĩ xãm xwýnhhta o api nhũm kot ixkôt amnhĩ xãm kêt xwýnhhta pur kãm ahte arĩ ápênh o xa. Hãmri nê tee ri hkrãmnhwý hkukamã hamaxpêr o xa. Anê.

Nhũm pre ã Jejus hkôt mẽ pa ho mẽ pa xwýnhjê mã amnhĩ jarênh anê.

³⁷ Hãmri nhũm mẽ kuma nê kãm:

—Kwa nhýri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

—Nã koja nhýri mẽmojja ã amnhĩ nhĩpêx anê ka mẽ omunh kurê kumrêx. Te nhýri mẽmoj kro nê nõr nhũm nhõnhti kot omunh nê mã htor nê hpinhĩpanh nhũm mẽ kot mã omunh kurê kumrêxta pyrãk. Anê.

18

Mẽ pahte Tirtũm mã amnhĩ jarênh rãhã ho papa mã mẽ pamã karõ

Rukre 11.5-8; mããnên Wam Tesarõn 5.17

¹ Tã nhũm Jejus hkôt mẽ pa ho mẽ pa xwýnhjê mã mẽmoj mã karõ. Mẽ kot tanhmã Tirtũm mã amnhĩ jarênh to mã mẽ kãm karõ. Mẽ kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No ãm mã kuxi nê tanhmã mẽ kãm mã ujarênh to nê mẽ kãm:

² —Koja nhýri krĩ hõ kamã juistija kãm Tirtũm prãm nõkati. Nê mããnên kãm amnhĩ kwýjê hprãm nõkati htã kêp juisti nê tanhmã mẽ kãm kapêr to ho hkrĩ.

³ Jakamã nhũm mẽhõ ni pê mjên htyk xwýnh. Nhũm hte mẽhõ xatã tanhmã kêp õ mẽmoj to ho pa. Hãmri nhũm tee ri amnhĩ mã omu nê xatã juistita wýr mra nê kãm harê nê kãm: “Xê gàà nê. Na hte pahkwýjê hõja

ixtomnuj rāhā ho pa. Xê ixtā tanhmā kām akapēr to kē tām inhīpêx.” Anê. Nê xatā hwÿr mra nê amnhī to kuwÿ nê xatā hwÿr mra nê amnhī to kuwÿ.

⁴⁻⁵ No nhūm kuma nê âm kuma. Kām hkwÿjê ho ajuta hprām kêt jakamā âm kuma. Tā nhūm xatā hwÿr mra. Gaa nhūm rī kām mar kaga nê. Hāmri nê hamaxpēr o: “Tk. Hêxta waa nê. Jahti na hte xatā ixwÿr mra nê tanhmā inhmā amnhī jarēnh to. Nê âm xatā ixwÿr mra. Nà na pa ra inhmā mar kagyk nê. E pa tokyx tanhmā nê kot tanhmā ho xwÿnhhta mā ixkapēr to. Inhmā Tirtūm puma kamā rÿ inhmā ixkwÿjê kaprī kamā pa tanhmā nê kām nê hkêt tā kot pa anhÿr kêt nhūm amnhī tā inhmā harēnh pix nê pa ra mar kurê ixkrā tātāk nê.” Anhÿr o hamaxpēr. Ā mē ujarēnh kot anhÿr.

⁶—Juisti tām hamaxpēr kêt tā nhūm nija xatā hwÿr mra nê amnhī to hwÿr jakamā nhūm jatā tanhmā ho ajuta hto.

⁷⁻⁸ No kêt Tirtūmja. Xàn ka htem mēmoj tā awÿ nhūm juisti punutita pyrā nê mē ama nê âm mē ama? Nà koja ā amnhī nhīpêx anhÿr kêt nê. Kot ka mēmoj tā kām amnhī jarē nhūm ama nê tanhmā amā mēmoj to rÿ tanhmā amā amnhī nhīpêx to. Juistita rom mē pakamā ukaprī xwÿnh na. Tā kot paj nhÿrmā akupÿn wrÿ nê mē apumu ka mē arī amnhī kaxyw hkôt ajamaxpēr mex pē kām amnhī jarēnh rāhā ho ri apa pa ja hā mē apumu nê ixkīnh tÿx nê. Ja na inhmā hprām. Anê.

Tanhmā mē kot Tirtūm mā amnhī jarēnh to hā mē harēnh

Matêwre 6.5-8; määnēn Wam Pêtre 5.5-6

⁹ Tā nhūm Jejus mē kot amnhī to mex o hkwÿjê jakrenh ā amnhī to jarkrar o ri mē pa xwÿnhjê pumu nê tanhmā mē kām kapēr to. Nom mē kot amnhī to jarkrarta ā kuxi nê mē kām awjarē nê mē kām:

¹⁰ —Koja mēhō wa hamēxkrut nê Tirtūm mā amnhī jarēnh kaxyw wa tē. Ja kēp Parijew nhō xwÿnh nhūm

hōja kēp mē ō pahi mā hkwÿjê pē kàxpore hkwÿ jamÿnh xwÿnh. Nhūm wa Tirtūm mā amnhī jarēnh xà hā ixkre hwÿr wa tēn axà.

¹¹⁻¹² Hāmri nhūm Parijew nhō xwÿnhhta kumrēx tē nê nhÿri mē piitā mē noo mā Tirtūm mā amnhī jarē. Nê amnhī to jarkrar pē kām amnhī jarēnh o: “Pa Tirtūm. E ra ate ixpumunh mex. Na pa hte amnhī to mex pix o ri ixpa. Ra ate ja hā ixpumunh mex. Na pa hte kàxpore hkwÿ jamÿnh xwÿnh nēj rom tām amnhī nhīpêx. Nê semān piitā hā ixàpkur kêt rāhā amā amnhī jarēnh rāhā ho ixtā apkati axkrut. Nom ja pix kêt. Na pa hte määnēn ixàpēnh pānhā kàxpore jamÿ nē mē kot amā tanhmā amnhī nhīpêx to ho pa xwÿnhjê mā hkwÿ nhōr o ixpa. Nê na pa hte ri ixàhkīnh o ri ixpa hkêt nê. Nê nhām mē kēp mē hprō ho amnhīkati ho ri ixpa hkêt nê. Na pa hte mē piitā mē kurom tām amnhī nhīpêx ā amnhī pumu nê ixkīnh tÿx kumrēx. Hêxta waa nê. Mon pa hte ri ā amnhī to mex o ixpa anê?” Anhÿr o Tirtūm mā amnhī to jarkrar pē kām amnhī jarēnh o xa.

¹³ —Hāmri nhūm hpānhā mē kēp kàxpore hkwÿ jamÿnh xwÿnhhta haxwÿja Tirtūm mā amnhī jarē. No âm Parijew nhō xwÿnhhta rom ki hkwÿjê pē awry nē ahte hipō nē kām amnhī jarē. Nê kām amnhī jarēnh pē amnhī tak nê mur nê kām: “Kwa Tirtūm. Na pa hte amnhī tomnuj tÿx o ri ixpa. Nê ixtÿx ri amā prām xà kuhpa hā tanhmā amnhī nhīpêx to. Na pa tee ri ja hā amnhī pumu nê ixkaprī htÿx nê. Ā inhmā amnhī nhīpêx anhÿr o ri ixpa hprām kêt tā pa hte ā amnhī nhīpêx anhÿr o ri ixpa. Kwa xà kot ka ixkamā axukaprī nê amnhī katut kôt ixte amnhī tomnuj rēnh pa Tirtūm?” Anhÿr o kām amnhī jarē.

¹⁴ —Hāmri nhūm Tirtūm hamē wa kot kām amnhī jarēnh ma no âm wamta ma nê âm kuma. No kêt hkôt hōja ma hāmri nê kot kām amnhī tā àhwÿr xà hkôt amnhī katut kôt kot

amnhĩ tomnuj rēnh pa nē ho hkra. Jakamā nhūm mex nē hkīnh nē pa. Ra tām hkrā hāmri nē hkīnh nē ma htēm kurē kumrēx. Ā mē ujarēnh kot anhÿr. Ām hāmri na pa mē amā ja jarē. Koja mēhō Parijew nhō xwÿnhhta pyrā nē kot amnhĩ to mex xwÿnh ā amnhĩ kamnhĩx hāmri nē Tirtūm kot amnhĩ katut kōt kot amnhĩ tomnuj rēnh kaxyw amnhĩ to hwÿr kēt nē. Koja ām kām amnhĩ to jarkrar pix nē. Jakamā koja Tirtūm te kot mar nē ām mar pyrāk o hipēx. No koja mēhō kot kàxpore hkwÿ jamÿnh xwÿnhhta pyrā nē tee ri tanhmā amnhĩ tomnuj to hā amnhĩ pumu nē hkaprĩ nē. Hāmri nē amnhĩ to Tirtūm wÿ nhūm kuma nē tanhmā ho mex to. Anē.

Jejus kot amnhĩ wÿr mēhprĩrejē hwÿr ā harēnh

Matēwre 19.13-15; Makre 10.13-16

¹⁵ Tā nhūm Jejus mē hkōt mē pa ho mē pa xwÿnhjaja arĩ pry hā Jerujarē hwÿr mō nhūm Ijaew kwÿjaja mē omu nē mē hkrare jamÿ nē Jejus wÿr mē o mra. Kot mē hā ĩhkra jaxwÿr nē mē ho Tirtūm wÿr kaxyw. Hāmri nhūm hkōt mē pa ho mē pa xwÿnhjaja tee ri ja hā mē omu nē nē mē kām kapēr nē mē kām:

—Tk. Kwa mē ma akupÿm mē akrata o mra nà? Mo kaxyw na ka mē Jejus wÿr mē o mra? Kormā mē ràxre kēnā. Anē.

¹⁶ Hāmri nhūm amnhĩ tā mē kuma nē mē kām:

—Tk. Kwa nà mē ri inhnē mēhprĩjē kurē hkēt nē. Kwār mē māmri ixwÿr mē o mra. Anē.

Hāmri nē amnhĩ wÿr mē kām hpa ho apē nhūm mē hwÿr mē o mra nhūm mē kuri kuhē. Hāmri nhūm hkōt mē pa ho mē pa xwÿnhjē mā kām:

—E mē jareja mē omu. Na htem hamakētkati nē hkīnh nē ri pare. Nē kām amnhĩ to rūnh prām kēt nē ri pa. Tā Tirtūm kōt mē kot amnhĩ nhĩpēx xwÿnhjaja na htem mē urāk nē kām amnhĩ to rūnh prām kēt nē ri pa.

¹⁷ —Jarejaja na htem hipēêxā nē katorxā wa kapēr ma nē wa hkōt ri amnhĩ nhĩpēx mex o ri pa. Tā ixpē

Tirtūm kot mē awÿr inhmēnh xwÿnh kot ka mē amā ixkōt amnhĩ xunhwÿr prām. Hā kot kaj mē te ho jarejē kot amnhĩ nhĩpēx pyrāk o amnhĩ nhĩpēx. Jao ixkapēr ma nē ixkōt ri tanhmā amnhĩ nhĩpēx mex to ho ri apa. Anē.

Kàxpore rax xwÿnh jarēnh

Matēwre 19.16-30; Makre 10.17-31; mǎānēn Wam Ximotre 6.6

¹⁸ Tā nhūm Ijaew nhō pahihiti hōja Jejus wÿr tē nē kām kapēr nē kām:

—Pa? Mē ijahkre xwÿnh maati? Kwa inhmā mēmoj jarē. Tanhmā kot pa we nhÿrmā Tirtūm ri ixtīr tūm nē ixpa kaxyw amnhĩ nhĩpēx mex to ho ri ixpa wehe? Anē.

¹⁹ Hāmri nhūm kām:

—Xà ate ixpē Tirtūm kwÿ hā ixpumunh kōt na ka ixte urāk nē amnhĩ to mex xwÿnh ā ijarē? Tirtūm pix na kot amnhĩ to mex rāhā xwÿnh jakamā kot kaj ā ijarēnh anhÿr jao ixpē Kra hā ijarē. Nē urāk nē ixte amnhĩ to mex xwÿnh ā ijarē. Nà xàn ka ām atÿx ri amnhĩ krā hkōt ā ijarēnh anē?

²⁰ —Tirtūmja mex o mex xwÿnh jakamā kot kaj amā nhÿrmā kuri atīr tūm nē apa hprām hāmri nē ra kot mēmoj tā mē amā karō xā hkōt amnhĩ nhĩpēx o ri apa. Ra ate mar mex kēnā. Na pre mē amā:

Kēr ka mē axpēn pē axàhkīnh hkēt nē.

Nē mē axpēn par kēt nē.

Nē mē axpēn to axēx o ri apa hkēt nē.

Nē mē axpēn pē aprō ho amnhĩkati hkēt nē.

Nē mē anhĩpēêxā mē akatorxā wa hā apijaàm pē wa kutā anojarēt pix o ri apa.

E kot kaj amā nhÿrmā Tirtūm kuri atīr tūm nē apa hprām hā kēr ka ā amnhĩ nhĩpēx anhÿr o ri apa. Anē.

²¹ Nhūm pre ā Jejus kām kapēr anē nhūm kuma nē kām:

—Kwa ixprīre ri ra ā ixte amnhĩ nhĩpēx anhÿr o ri ixpa kēnā. Nom ixte ixtīr tūm nē ixpa kaxyw kormā ixte tām kēt pyrāk. Anē.

²² Hāmri nhūm Jejus kām:

—Nà kormã mēmoj pyxire nē arīk. Na ka amã akukrêx rax japê htÿx o Tirtũm jakre. Jakamã kêr ka ma akupÿm tē nē akukrêx o wēnē hpa nē hpãnhã kàxpore jamÿ hãmri nē ma mē kēp amrakati xwÿnhjē mã òr pa. Hãmri nē rī akupÿn ixwÿr tē nē ixkòt apa ho apa. Anē.

²³ Hãmri nhũm kuma nē tee ri amnhĩ kukamã hamaxpēr. Kãm kukrêx rax japê nē kãm ìhkra karo hprãm kêt nē. Jakamã tee ri Jejus kot ã kãm hã karō anhÿrja ma nē awjanã nē ma akupÿm tē.

²⁴ Hãmri nhũm tee ri ja hã omu nē hã mē kot mar xwÿnhjē mã kapēr nē mē kãm:

—Hēxta waa nē. Koja mē hikukrêx rũnh xwÿnhjaja ohtō nē kãm mē hikukrêx japê xàj Tirtũm mē wa ixri htĩr tũm nē pa ho papa hkêt nē. Wa ixte amnhĩ nhĩpêxja mē kēp hihtÿx.

²⁵ Na htem kãm hikukrêx rax mã ìhkra karo hprãm kêt rãhã tee ri kãm Tirtũm kòt amnhĩ nhĩpêx prãm kaprÿ. Te ho mēhō kot menh kagō hã hkre nē kãm kagō katōk prãm kêt rãhã kãm guhkrax kãm àr prãm kaprÿta pyrãk. Anē.

Nhũm pre ã Jejus mē kãm kapēr anē.

²⁶ Hãmri nhũm mē kuma nē tee ri amnhĩ kukamã hamaxpēr nē kãm:

—Kwa nom mē ixpiitã mē inhmã mē ixkukrêx japê kēnã. Jakamã xà kot paj mē ixpiitã nhÿrmã war ari ixtĩr tũm nē ixpa ho ixpa hkêt nē nà? Anē.

²⁷ Hãmri nhũm mē kãm:

—Nà kot kaj mē amnhĩ krã hkòt mē amã mē akukrêx japêja mã anhũrer kêt nē. Tirtũm pix na hte ã mē kot amnhĩ nhĩpêx anhÿr kaxyw tanhmã mē hkrã hto nhũm mē kãm mē hikukrêx japê htÿx kêt nē. Jao mē kēp Tirtũm mē wa ixri htĩr tũm nē mē pa ho pa mã xwÿnh. Anē.

²⁸ Hãmri nhũm Simãw Pêtre kãm:

—Kwa Pahihti no mē pajaja? Na pa prem agryk ã mēmoj piitã hkaga hpa nē akòt ixpa ho ixpa. Jakamã kot paj mē nhÿrmã war ari ixtĩr tũm nē ixpa ho ixpa nà? Anē.

²⁹ Hãmri nhũm kãm:

—Tÿ. Nà ka mē atō inhmã tanhmã amnhĩ nhĩpêx to ho apa kaxyw akwÿjê re nē ma inhmã tanhmã amnhĩ nhĩpêx to ho ri apa. Anhōrkwyÿ re rÿ atō rÿ atōx rÿ aprō nē akrajê re. Rÿ akatorxã nē anhĩpêêxã war are. Rÿ akukrêx piitã rer pa hãmri nē ma ixkapēr o mē piitã mē ahkre ho ri mē hkòt apa.

³⁰ Hã kot paj ja hã mē apumu nē mē ato mex rax nē. Hãmri ka mē ma nhÿhÿm apa nē nhÿri mē kãm ixkapēr jarēnh o ri mē hkòt apa nhũm mē kot mē amar xwÿnh kwÿjaja mē ama nē ra kãm mē akĩnh nē. Nē ra mē ate akwÿjê rer par tã nhũm mē tãmjaja te mē apê mē hkra rÿ mē htō rÿ mē htōx pyrãk o mē anhĩpêx nē tanhmã mē ato mex to ho pa. Hãmri ka mē nhÿrmã ty nē ma Tirtũm mē wa inhō krĩ hwÿr api hãmri nē wa ixkuri amex kumrêx nē atĩr tũm nē apa ho apa. Anē.

Nhũm pre ã Jejus Simãw Pêtre mē hkwyÿjê mã kapēr anē.

Jejus kot axte htyk kukamã amnhĩ jarēnh

Matêwre 20.17-19; Makre 10.32-34

³¹ Tã nhũm Jejus mē kot ÿ hã kapēr jarēnh o mē pa xwÿnh pê 12jaja mē hkwyÿjê pê mē ho kato. Nē nhÿri mē hkàx ã mē o xa nē tanhmã mē kãm amnhĩ jarēnh to nē mē kãm:

—Amnepēm Tirtũm nhÿ hã kapēr jarēnh xwÿnhjaja na prem ixkukamã tanhmã mē kot inhĩpêx to hã ijarē nē ixtã kagà. Tã pu mē ra Jerujarē hwÿr mō. Kamã koja mē tanhmã ixto rax nē. Ra mē kot ixkukamã ijarēnh nē ixtã kagà xà hkòt koja mē ixto anē.

³²⁻³³ Koja mē kãm ixkuré xwÿnhjaja ixpynê nē Rōm nhō xwÿnhjê nhō pôristi hwÿr ixto tē nē mē kãm ixto hêx nhũm mē kuma nē mē mar xà hkòt tanhmã inhĩpêx to. Nē mē hkwyÿjaja ixtã hpēr o axkē nē akunha. Nē mē hkwyÿjaja ixto kapēr punuj nē ijaprÿ nē ixtã argōx rē nē ixtak. Hãmri nē ixpĩ. ã koja mē inhĩpêx anē. Nom kot paj ãm ixtyk ã apkati axkrunēpxi nhũm Tirtũmja akupÿm ixto ixtĩr. Anē.

³⁴ Hāmri nhūm mẽ kuma nē tee ri htyk nē akupỹm htĩrja kukamā hamaxpēr no ãm hprĩ hã hkôt hamaxpēr kêt nē.

Jejus kot no hkre xwỹnh o mex ã harēnh

Matêwre 20.29-34; Makre 10.46-52

³⁵ Tã nhūm Jejus mẽ kormã Jerujarē hwýr Jerikoja tēp o mō. Hāmri nhūm pry nhĩhkjê hã no hkre xwỹnhja àhwýr o nhỹ.

³⁶ Hāmri nē amnhĩ wýr mẽ mrar ma. Mẽ ohtô nē Jejus kôt mẽ mrar xwỹnhjê mrar ma nē mẽ kãm:

—Kwa mẽmo ri? Měmoj wýr na ka mẽ axohtô nē mra? Anē.

³⁷ Hāmri nhūm mẽ kãm:

—Nã Jejus pē Najare nhõ xwỹnh kôt na pa mẽ mō. Anē.

³⁸ Hāmri nhūm mẽ kuma nē kàx pē Jejus mã kapēr nē kãm:

—Pa Jejus? Apê mẽ inhõ Pahihti mex na ka. Te apê amnepēm anhĩgēt pahihti Tawi kot amnhĩ nhĩpêx pyrãk. Jakamã kwa ixkamã axukapri nē akupỹm ixto mex kêt wehe. Ixte amnhĩ kaxyw akôt ijamaxpēr xwỹnhjê hõ na pa. Anē.

³⁹ Hāmri nhūm Jejus kukamã mẽ mrar xwỹnhjaja tee ri kuma nē kãm:

—Tk. Kwa akapēr kêt nē nhỹ nã. Anē.

Tã no nhūm ãm mẽ kuma nē xatã amnhĩ to hwýr o nhỹ. Kàx pē kãm kapēr o nhỹ.

⁴⁰ Hāmri nhūm Jejus kuma nē xa nē amnhĩ wýr hã karõ nhūm mẽ hpa hã kupy nē hwýr o tē nhūm kãm:

⁴¹ —Pa mo na? Tanhmã kot pa ato? Anē.

Nhūm kãm:

—Nã akupỹm inhmã ixrĩt mex prãm. Anē.

⁴² Hāmri nhūm kãm:

—Tõe. Nã ra ate amnhĩ kaxyw inhmã ajamaxpēr tỳx jakamã kot kaj akupỹm ri rĩt. Anē.

⁴³ Hāmri nhūm akupỹm rĩt mex kurê kumrêx nē ja hã amnhĩ pumu nē hkĩnh tỳx nē. Hāmri nē ma Jejus kôt Tĩrtũm mã mex o mex ã harēnh o mẽ hkôt tē. Hāmri nhūm mẽ kot hã

omunh xwỹnhjaja haxwýja Tĩrtũm mã mex o mex ã harēnh o Jejus kôt mō.

19

Jakew kãm Jejus pumunh prãm ã harēnh

Rukre 3.8, 3.12-13

¹ Tã nhūm Jejus arĩ Jerujarē hwýr mō nē Jeriko hwýr pøj. Hāmri nē krĩ kahti hkôt pry hã mō.

² Nhūm mẽ ra hkôt htu rax nē hkôt omunh o mō. Jakamã nhūm Jakew pē Rõm nhõ pahi mã kwýjê pē kàxpore hkwy jamỹnh xwỹnhjê krãhtũm xwỹnhja. Na pre hikàxpore rax nē.

³ Tã haxwýja kãm Jejus pumunh prãm nē. Nom ãm hakooti nē hprĩhti jakamã tee ri kot omunh kaxyw amnhĩ nhĩpêx nhūm mẽ kēp àmnãr rax nē.

⁴ Hāmri nhūm ra hamaxpēr nē ma kukamã hprõt nē tē nē nhỹri pry mýri pĩ xãm pumu nē hã api nē kutēp ajēt. Hāmri nhūm Jejus mō nē hapa.

⁵ Nē kãnhmã rĩt nē omu nē kãm:

—Pa Jakew. E kwa tokyx tēn wry pa ma akôt anhõrkwy hwýr tē nē ari amnhĩm hikra. Anē.

⁶ Hāmri nhūm kuma nē hkĩnh nē. Nē wrýk kurê kumrêx nē ma amnhĩ kôt nē o tē.

⁷ Hāmri nhūm mẽ kot omunh o kuhê xwỹnhjaja tee ri ja hã omu nhūm ja mẽ kēp omnuj nē nhūm mẽ axpēn mã harēnh o:

—Tk. Kwa nã. Jakew kot amnhĩ tomnuj xwỹnh tã nhūm Jejus ma hkôt tē nē kuri pøj. Anē.

⁸ Hāmri nhūm wa õrkwy hwýr axã nē nhỹ nhūm Jakew Jejus mã amnhĩ jarēnh o:

—E. Nã ra ixte pahihti mã kàxpore jamỹnh xwỹnhhta na pa pre hte ho prēs jakre nē amnhĩm hamỹnh rax nē. Tã kot paj akupỹm mẽ kãm õr pa. Na pa pre hte mẽ hkwyjê pē ho 10 nē hamý. Tã kot paj hipy ho 40 nē kurê nē akupỹm mẽ kãm ho ixpigrãnh pa. Æ kot paj mẽ hipêx anē. Nē ixkàxpore jakrêx kot paj ho axkjê nē mẽ kēp amrakati xwỹnhjê mã ho ixpigrãnh pa. Anē.

⁹ Hāmri nhūm kuma nhūm ja kām mex nē. Jakamā nhūm kām:

—Nà ãm hāmri. Ate pahkukamā panhīgēt Apraāw pyrā nē jarāhā ate amnhī tomnuj kaga jakamā na ra jarāhā anhōrkwỹ hwýr mē mex xà axà. Kojā Tirtūm jarāhā amnhī katut kōt ate amnhī tomnuj rēnh pa nē axte kām hamaxpēr kēt nē.

¹⁰⁻¹¹ Mē ate amnhī tomnuj xwýnhjē hwýr na pre Tirtūm inhmē pa wrý. Te nhýri mē apikunor nhūm ixte mē ajapēr o ixpa kaxyw Tirtūm kot mē awýr inhmēnh nhūm ixwrýk nē nhýri ixte mē ajapēr o ixpa nē mē amā ixkator nē ixkīnh nē ma akupým hwýr mē ato inhmōrta pyrāk. Anē.

Mē pahte Tirtūm mā tanhmā amnhī nhīpēx to

Matêwre 25.14-30

Hāmri nhūm mē ohtō nē Jejus mar o hkōt Jerujarē hwýr mra. Na prem htýx tanhmā kot amnhī nhīpēx to hā hkamnhīx o hkōt mō nē axpēn mā:

—E ma pu mē hkōt. Kojā Jerujarē hwýr pōj hāmri nē kēp mē pahpē Ijaew nhō pahi nē mē pahto amnhīptār kurē kumrēx. E kwa ma pu mē hkōt. Anē.

¹² Nhūm Jejus mē hamaxpēr kōt mē omunh mex nē. Jakamā kot mē piitā mē ho amnhīptār xà hā arīgro hā mē kām amnhī jarēnh kaxyw. Kormā Jerujarē hwýr ahtēp kēt ri mē kām amnhī jarēnh kaxyw. Nom hprī hā mē kām hā amnhī jarēnh kēt nē. ãm amnhī tā kuxi nē mē kām awjarē nē mē kām:

—Kojā nhýri krī hō kamā mēhō myja. Kot amnhī to rax o hkwýjē jakrenh xwýnhja. Nē krī hō kamā krī piitā hkōt pahi nhō pahihtija hāmri harēnh ma nē amnhī wýr kuwý. Kot ma hwýr mōr nhūm ò krī kamā nē määñēn krī hkwý kamā kēp mē ò pahi kaxyw kot ãm kaxyw nhūm hwýr nojarēt.

¹³ Hāmri nē amnhī wýr kām mē àpēnh xwýnhjē ho 10 nē tanhmā mē hā karō hto. Nhūm mē hwýr mra nhūm mē kām amnhī jarē nē mē piitā

mē kām kàxpore hkwý gō. Ahpýnhā mē kām hpýnh nē kugō nē mē kām: “E ota ixkàxpore hkwýta. Kot kaj mē ixkutēp tanhmā ri inhmā ho rax to. Kēr pa mēmo arīgro hā akupýn mō kē ra ixahā inhmā ho ohtō nē pa hamý.” Anhýr o mē kām kapēr hāmri nē ma mō.

¹⁴ Hāmri nhūm ò krī nhō xwýnhjaja ra kēp mē ò pahi kaxyw harēnh ma nhūm ja mē kēp omnuj nē. Nē mē kām hkīnh kēt jakamā ma krī hō kamā kot mē kaxyw ãm xwýnhta wýr hkwý rē nhūm mē ma hwýr mra nē hwýr pōj. Hāmri nē kot mē kaxyw ãm mā xwýnhta pumu nē kām: “Pa. E ot pa mē awýr mra. Kwa na ka xep ra mē ixkaxyw mē inhīōja xām kaxyw. Kwa nà mē inhmā jahti hkīnhiti hā. Kwa mē ixkaxyw ãm kēt nē nà?” Anhýr o kām kapēr.

¹⁵ —Tā no nhūm ãm mē kuma nē ãm mē kuma nhūm mē awjanā nē mā akupým mra. Hāmri nhūm pahija mē kaxyw mē kām hkīnh kēt xwýnhta xām nhūm ma akupým ò krī hwýr mō. Mōō nē ra pōj hāmri nē amnhī wýr kām mē àpēnh xwýnhjē hā karō nē mē kām: “E no ixte mē amā kàxpore nhōr xwýnhta? Tanhmā na ka prem ixkutēp inhmā ho rax to? E mē inhmā agō pa omu.” Anē.

¹⁶ —Hāmri nhūm wamta kām: “Ota akàxpore ate inhmā òr xwýnhta. Na ka pre inhmā ho pyxi nē agō pa kupy nē ho mēmo hy hkwý japrō nē hkre. Nhūm ò pa mē kām ho wēnē ho ri ixpa nē hpānhā kàxpore jamý nē hipy amā kurē nhūm ra kēp 10. Ota. E amý.” Anē.

¹⁷ —Hāmri nhūm kuma nē hkīnh nē. Hāmri nē kām: “Nà ãm hāmri na ka ã inhmā ho rax anē. Ixte amā ho pyxi nē òr tā ka pre inhmā hamār mex nē nhūm kànhmā axkamē nē ra kēp 10. Tā ra ixpē krī hkwý kamā mē ò pahi jakamā kot ka inhmā krī ho 10 nē inhmā hamār o ri apa. Jakamā kwa māmri amnhīm kàxporeta o arīk.” Anē.

¹⁸ —Hāmri nhūm hpānhā hōja hwýr tē nē kām: “E ota akàxporeta. Na pa pre ho mēmo hy hkwý japrō nē hkre nhūm ò pa mē kām ho wēnē

ně hpānhā kàxpore jamý ně hipy amā kurē nhūm ra kēp 5. Tā ota. E amý.” Anē.

¹⁹ Hāmri nhūm kuma ně kām: “Nā ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 ně ho amnhīptār o apa. E māmri amnhīm kàxporeta o arīk.” Anē.

²⁰⁻²¹ —Hāmri nhūm hpānhā hkôt hōta tē. Nom hkwýjē hkīnhā ō patrāw mā tanhmā kàxpore ho rax to hkēt ně. Ām tanhmā hamaxpēr punuj to ně htýx ri kot kēp ho ōxy ně amnhīm piitā hamýnh par ně akupým kām hkwý nhōr kēt ā hkamnhīx. Jakamā tanhmā kām ho rax to hkēt ně. Ām hkupu ně o tē ně nhýri kutēp kuxi. Hāmri nhūm ō patrāw amnhī wýr hā karō nhūm hwýr tē ně amnhī ně kām kapēr punuj ně kām: “Tk. Ota akàxporeta. Ixte amā tanhmā ho rax tore hā. Ixte amā ho rax ronhýx ka amnhīm piitā hamýnh pa ně akupým inhmā hkwý nhōr kēt ně. Rý ixte tanhmā apē homnuj to ronhýx ka hā inhmā akir. Jakamā na pa tanhmā amā ho rax to hkēt ně. Ām hkupu ně o tē ně ho amūxu nhūm arī akutēp hikwý. Tā ota.” Anhýr o amnhī ně ō patrāw mā kapēr punuj ně.

²²⁻²³ Hāmri nhūm tee ri amnhī tā kuma. Kot amnhī to mex xwýnh ně kām mẽ àpēnh xwýnhjē ho mex o pa xwýnh tā ā kām àpēnh xwýnh kot kām kapēr anhýrja ma ně amnhī tā kamā gryk ně. Hāmri ně kām: “Tk. Kwa xā ā ixte amnhī nhīpēx anhýr? Nā ixte ā amnhī nhīpēx anhýr kēt. Ā ixte amnhī nhīpēx anhýr nhūm amā ixpuma ronhýx ka pre amā ixpuma xāj ixkàxporeta py ně ixwakre kamā amnhī krā hkôt tanhmā inhmā ho rax to. Tā nhýx pa pre ra akupým awýr tē ně hamý. Nā na ka ā ijarēnh anhýr o axēx ně amnhī krā hkôt tanhmā inhmā ho rax to hkēt ně. Mýrapē kot paj atomnuj týx ně ka rī amnhī pumu. Pēr ām ajamaxpēr punuj.”

²⁴ —Nhūm pre ā kām kapēr anē hāmri ně mẽ kot mar o kuhē xwýnhjē mā kām: “E mẽ atō kēp kàxpore py ně wam kot ho 10 ně hamýnh xwýnhnta

mā agō.” Anē.

²⁵ Hāmri nhūm mẽ tee ri kuma nhūm ja mẽ kēp omnuj nhūm mẽ kām: “Kwa nā ra hikàxpore rax kēnā. Ra ate kām ho 10 ně ōr kēnā.” Anē.

²⁶ Hāmri nhūm mẽ kām: “ýý nom tää. Māmri kām agō. Kojā mēhō inhmā àpēnh mex pa amnhī tā omu ně kot inhmā àpēnh mexta pānhā ho mex ně. No kojā inhmā àpēnh mex kēt ně pa tee ri ja hā omu ně ho mex kēt ně. E māmri kām agō.” Anē.

²⁷ Hāmri ně hpānhā mẽ kām: “E hpānhā mẽ kām ixprām nōkati xwýnhjaja. Ixte mẽ ho amnhīptār mā tā mẽ kām ixprām nōkati xwýnhjaja. Mě ma mẽ hwýr mra ně mẽ ho akuprō ně akupým amně ixwýr mẽ o mra ně inhnoo mā mẽ himex pa.” Anē. Ā mẽ ujarēnh kot anhýr. Anē.

Nhūm pre Jejus ā mẽ kām ujarēnh anē. Te tām kēp patrāwta pyrā ně ā amnhī jarēnh anē. Mě kot tanhmā amnhī nhīpēx to ho pa hā mẽ omunh xā hkôt tanhmā mẽ hipēx to hā amnhī jarē.

Jejus kot Jerujarē hwýr àr ā harēnh Matēwre 12.1-11; Makre 11.1-11; Juāw 12.12-19

²⁸ Nhūm Jejus kormā Jerujarē hwýr mō.

²⁹ Hāmri ně ra Petake mẽ Petān wa htēp o mō. Hixēt pē Oriwēhti kahti ri na krī wa xa. Jakamā nhūm Jejus hkôt mẽ pa ho mẽ pa xwýnh wa ho axkrut ně amnhī kukamā wa kumē.

³⁰ Nē wa kām:

—E. Wa ma krī mýj wýr mẽ ixkukamā wa tē. Nē wa hwýr pōj ně nhýri jumēnre nyw mā ē ně ām ata pumu. Kormā mẽ kot hā hkrī hkēt xwýnhnta. Ka wa omu ně kām ē xā hpôt ně man akupým ixwýr o tē.

³¹ Nhūm mēhō ja hā war apumu ně hā tanhmā war amā kapēr to ka wa kām ā ijarēnh anē ně kām: “Mě panhō Pahihtī na hā karō pa wa hwýr tē.” Anhýr o wa kām ijarē. E wa ma hwýr tē. Anē.

³² Hāmri nhūm wa kuma ně ma hwýr htēm kurē kumrēx. Nē wa krīm

pôj nhũm Jejus kot wa kãm harēnh xà hkôt jumēnreta pumu.

³³ Hãmri nē kãm ê xà hpôt o xa nhũm ô dōnjaja mra nē hã wa omu nē wa kãm:

—Tk. Kwa mo kaxyw na ka wa ri mē ixpê mē ixkrit mã ê xà pôť o wa xa? Kwa xà kot kaj wa mē ixpê ho ahkĩ nà? Anē.

³⁴ Hãmri nhũm wa mē kãm:

—Nà mē panhō Pahihti na wa inhmã anē pa wa tē. Wa ixte ma akupỹm kutã ho inhmōr kaxyw. Anē.

Hãmri nhũm mē wa kuma nē wa kãm:

—Tōe. Nà wa mãmri ma kãm o tē. Anē.

³⁵ Hãmri nhũm wa ma akupỹm Jejus wỳr o tē. Hãmri nē kaxyw amnhĩ xē hkwỳ hopôj nē kãm ho hkô kahty nē kãm ho htỳx nē o xa nhũm hã nhỹ nē mō.

³⁶ Kormã Jerujarē hwỳr hixêt ã àpir o mō. Nhũm mē kot omunh o mrar xwỳnhjaja hkĩnh nē ma hkukamã kot pry ho mex kaxyw amnhĩ xē hkwỳptyr o mō.

³⁷ Hãmri nhũm mē hixêt ã api nē kormã ahpar mã wrỳk o mō. Hãmri nhũm Jejus kôt mē pa ho pa xwỳnhjaja kàx pé Tĩrtũm mex o mex ã harēnh o hkôt mō. Ra mē kot hkôt pikamēnh ry nē kot mē kãm aa mēmoj pumunh kêt kwỳ ho anhỳr rax ã omunh jakamã hkĩnh nē nē Tĩrtũm mex o mex ã harēnh o hkôt mō.

³⁸ Nē harēnh o:

E ota Tĩrtũm kot mē pahwỳr mēnh xwỳnhta na ra pôj.

ãm hãmri na mē pahwỳr wrỳ. Na mex kumrēx.

Kêp mē panhō Pahihti mex na. ãm hãmri na pre Tĩrtũm mē pahwỳr kumē.

Tĩrtũmja mex kumrēx. Mex o mex. Kukwak ri pix mã na pu htem pajamakêtkati nē paxãmnhĩx ri papa rãhã ho papa.

Anhỳr o Jejus kôt harēnh o mō. Ra kot mē ho amnhĩptar kurê kumrēx ã hkamnhĩx jakamã hkĩnh nē hkôt ã kapēr o mōr anē.

³⁹ Hãmri nhũm Parijew nhō xwỳnh kwỳjaja mē hkôt mra nē tee ri mē kuma hãmri nē Jejus mã kãm:

—Kwa Jejus. Mē kãm anē kê mē anhĩkrê nà? Anē.

⁴⁰ Hãmri nhũm mē kãm:

—Tk. Nà kot paj mē kãm anhỳr kêt nē. ã mē kapēr anhỳrja na inhmã mar hprãm. Kwãr mē mãmri Tĩrtũm mã mex o mex ã harēnh o ixkôt mō. Kot mē anhỳr kêt nhũm ra pikap kēn nhĩkwỳ xwỳnhja tee ri ja hã mē omu hãmri nē tãm tanhmã amnhĩ nhĩpêx to nē mē hpãnhã tãm Tĩrtũm mã mex o mex ã harēnh o hikwỳ. Jakamã kwãr mē mãmri kapēr anē. Anē.

Jejus tee ri kot Jerujarē hkukamã hamaxpēr ã harēnh
Rukre 23.27-31

⁴¹ Nhũm mē kormã Jerujarē hwỳr hpôx o mō. Kormã hixêt rũm ahpar mã hwỳr wrỳk o mō. Hãmri nhũm Jejus amỳm amnhĩ hkukamã Jerujarē nhō xwỳnhjê pumunh o mō nē mē hkukamã hamaxpēr o hkapri nē. Hãmri nē hkapri xàj mỳr o mō.

⁴² Hãmri nē te kot mē kuri mē omunh o ri pa pê mē kãm kapēr pyrãk o mē kãm kapēr nē mē kãm:

—Hêxta waa nē Jerujarē nhō xwỳnhjaja. Kot kaj mē amex kêt nē. Mē ate amnhĩ kukamã axãhpumunh mex ronhỹx ka mē ra mē kãm mē akurê xwỳnhjê pumaj ixkôt amnhĩ xunhwỳr kurê kumrēx nhũm mē tee ri tanhmã mē ato mã. Ka mē ra ixkukwak ri amex nē ajamakêtkati nē akĩnh nē ri apa ho apa.

⁴³⁻⁴⁴ Tĩrtũm tãm kot mē awỳr inhmēnh tã ka mē amã ixprãm kêt nē. Jakamã koja nhỹrmã mē kãm mē akurê xwỳnhjaja mē awỳr mra nē mē anhō krĩm hipôk pa. Hãmri ka mē amnhĩ wỳr mē omu nē tee ri ajapôx kaxyw nhũm mē awỳr agjê nē mē anhĩmex pa nē mē anhō krĩja grãnh pa. Nē ahpỹnhã ri mē anhōrkwỳ grãnh pa. ã koja mē mēmoj piitã grãnh par anē. Anē.

Jejus kot Tirtūm nhōrkwỹ hwỳr àr ā harēnh

Matêwre 21.12-17; Makre 11.15-19; Juāw 2.13-22

⁴⁵⁻⁴⁶ Tā nhūm Jejus Jerujarē hwỳr axà nē jumēnre rūm wrỳ hāmri nē ma Tirtūm mā amnhĩ jarēnh xà hā ixkreja wỳr tē. Hāmri nē hwỳr axà nē tee ri kamā mẽ pa xwỳnhjē pumunh o xa. Nhūm mẽ ra axtem nē môx nē ôwēhti nē tuuti ho wēnē ho kuhê. Mē kot haprōr nē Tirtūm mā hpar nē kām ôr pē kām amnhĩ jarēnh kaxyw mẽ kām ho wēnē ho kuhê. Nē axtem nē mẽ kām hā ohtō rax kām mẽ kām ho wēnē. Hāmri nhūm Jejus mẽ hwỳr axà nē tee ri mẽ omu mẽ kām akir nē mẽ kām:

—Tk. Kwa nà. Tirtūm kapēr ā kaga htūm kot ôrkwỹ jarēnh kot:

Inhōrkwỹja ām mẽ ate inhmā amnhĩ jarēnh xà hā ixkre pix kaxyw na.

Anhỹr o kot harēnh tã ka mẽ axtem nē kamā ā amnhĩ nhĩpêx anhỹr o apa. E mẽ ajapōj nē ma ajapêx tokyx anē.

Anhỹr o mẽ kām kapēr hāmri nē ixkre nē mẽ kator nhūm mẽ ma hapêx pa.

⁴⁷ Tā nhūm Jejus apkati mẽ Tirtūm mā amnhĩ jarēnh xà hā ixkreja wỳr mra nē kamā mẽ ahkre ho hkrĩ. Hāmri nhūm mẽ ô patre krãhtūm mẽ Tirtūm kapēr tūm o mẽ ahkre xwỳnhjē mẽ mẽ kot amnhĩ to rūnh xwỳnhjaja kot mẽ ahkre ma nhūm ja mẽ kēp omnuy nē nhūm mẽ kām hpĩr prãm nē.

⁴⁸ Nom nhūm amarĩ mẽ pa xwỳnhjaja mẽ kurom kām mar prãm nē akryk mar o kuhê. Jakamā nhūm mẽ tee ri ja hā mẽ omu nē tanhmā mẽ kot hpĩr to hkukamā hā axpēn ma.

20

Mēhō nhỹ hā Jejus kot mẽ ahkre hā harēnh

Matêwre 21.23-27; Makre 11.27-33

¹ Nhūm arĩgro hō hā nhūm Jejus kē axte Tirtūm mā amnhĩ jarēnh xà hā ixkreja wỳr axà nē mẽ ahkre ho nhỹ. Tanhmā mẽ kot amnhĩ nhĩpêx to nē nhỹrmā Tirtūm mẽ wa kuri htĩr tūm nē pa hā mẽ kām kapēr o nhỹ. Hāmri nhūm Ijaew nhō pahijē mẽ mẽ kot

Tirtūm kapēr tūm o mẽ ahkre xwỳnhjē mẽ mẽ ô patre krãhtūmjaja hēx rom mar o kuhê.

² Hāmri nē kām:

—Kwa mẽ inhmā amnhĩ jarē. Mēhō nhỹ hā na ka hte ā amnhĩ nhĩpêx anhỹr o ri apa? Na ka hte akupỹm mẽ ho mex o apa nē tanhmā mẽ ahkre hto ho apa. Xà amnhĩ krã hkôt na ka hte ā amnhĩ nhĩpêx anē nà? Anē.

³ Hāmri nhūm mẽ kām:

—Nà ixkumrēx kot paj mẽmoj tã mẽ akukja. Ka mẽ inhma nē inhmā harē pa rĩ kormā tanhmā mẽ amā amnhĩ jarēnh to.

⁴ Finat Juāw Paxisja ā kot paj mẽ akukja. Mēhō nhỹ hā na pre mẽ hkrã kumrār o pa? Xà amnhĩ krã hkôt nà xà Tirtūm nhỹ hā? E mẽ atō inhmā harē. Anē.

⁵⁻⁶ Hāmri nhūm mẽ kuma nē tee ri kot tanhmā kutã kām harēnh to hkukamā hamaxpēr nē axpēn mã:

—Kwa tanhmā kot puj mẽ kām harēnh to? Jar mẽ kot mar xwỳnhjaja na htem kēp Tirtūm nhỹ hā kapēr jarēnh o pa xwỳnhjē hā harēnh o pa. Tã kot puj mẽ kām kot amnhĩ krã hkôt mẽ hkrã kumrār o pa hā harē nhūm mẽ tee ri mẽ pama nē mẽ pakamā gryk tỳx nē. Nē mẽ paxêx rom mẽ pahte kām pakapēr ā mẽ pahpumunh kurē kumrēx nē kēn o mẽ pahtak o mẽ panhĩmex. Nom kot puj mẽ kām Tirtūm nhỹ hā mẽ hkrã kumrār ā harē nhūm mẽ pamā kapēr o: “ā kot anhỹr kēnā na ka prem kapēr ma nē ra ixkôt amnhĩ xunhwỳr kêt nē?” Anē. Nà kot puj mẽ kām tanhmā harēnh to hkêt nē. Kot puj mẽ ām kām aa te mẽ pahte ja jarēnh mar kêt pyrāk o harē. Anē.

Mē kot tanhmā kām nē nhūm kot ta pãnhā tanhmā mẽ kām nē pymaj nhūm mẽ ām tee ri kām tanhmā nē hprãm kaprỹ o kuhê.

⁷ Hāmri nē kām:

—Konēn. Mē ixte mēhō nhỹ hā kapēr o pa hā omunhre hā. Anē.

⁸ Hāmri nhūm mẽ kuma nē mẽ kām:

—Tk. Tôe kot pa xep ijaxwỳja mẽ amā tanhmā amnhĩ jarēnh to hkêt nē. Ijaxwỳja ixte mēhō nhỹ hā ā

ixte amnhĩ nhĩpêx anhÿr o ri ixpa hã amnhĩ pumunhre hã. Anê.

*Mê àpênh punuj xwÿnhjê jarênh
Matêwre 21.33-46; Makre 12.1-12*

⁹ Nhũm Jejus arĩ Ijaew nhõ pahijê mã kapêr. Nê mê kot tanhmã hipêx to hkukamã mê kãm tanhmã amnhĩ jarênh to. No ãm amnhĩ tã kuxi nê mê kãm awjarê nê mê kãm:

—Koja mēhõ hpur ã hkwÿjê kot kamã kãm àpênh kaxyw mê kãm karõ. Hãmri nhũm mê ma hwÿr mra nê kamã mēmo hy hkre nê hkre pa. Hãmri nhũm ra hpur nhõ dõnja nhÿhÿm nojarêt nê kãm mê àpênh xwÿnhjê mã tanhmã hpur jarênh to nê mê kãm: “E or ixpur nõ. Kê kamã mēmoj hkà hpa ka mê mãmri kamã axujamÿnh pa nê ho axkjê. Nê ixkutêp inhõ jaxwÿ nê mãmri mê anhõ tanhmã ho hprãm xà hkõt tanhmã ho.” Anê.

—Nhũm ã mê kãm kapêr anê hãmri nê ma nhÿhÿm mō.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwÿnhjê hõja nhũm akupÿm mê hwÿr kumê. Mê kot kãm kwÿ nhõr nhũm ma kot kãm o mōr kaxyw ma mê hwÿr kumê nhũm ma mê hwÿr mō. Mōõ nê mê hwÿr pōj nhũm mê omu nê axtem nê unê nê htak nê akupÿm hano nhũm ma akupÿm ÿ kamã mō.

¹¹ Hãmri nê pōj nhũm õ patrãwja tee ri omu nê hpãnhã ja mê nhũm ma mê hwÿr mō. Mōõ nê mê hwÿr pōj nhũm kê wem mã ho anê nê unê nê htak nê akupÿm hano nhũm wamta pyrã nê ma akupÿm ÿ kamã mō.

¹² —Hãmri nhũm kê axte hkõt ja mê nhũm ma mê hwÿr mãânên mō. Ma mê hwÿr mō nê pōj nhũm mê te ho wamta wa hipêx pyrãk o hipêx nê unê nê htak rax nê amnhĩ nê hano nê pur nê kapõt ã kumê. Hãmri nhũm ma akupÿm mãânên ÿ kamã mō.

¹³ Nhũm mê õ patrãw tee ri mê omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj mê hwÿr ixkra mãn

mê. Inhmã hapê htã kot paj mê hwÿr kumê kê ma mê hwÿr mō. Hãmri nhũm mê kêp ixkra hã omu nê tanhmã ixpê ho hkêt nê. Nê tã inhmã kãm inhõja kwÿ gō.” Anhÿr o hamaxpêr hãmri nê ma mê hwÿr kumê nhũm ma mê hwÿr mō.

¹⁴ —Tã ra mê hwÿr hpõx o mō nhũm mê amÿm amnhĩ wÿr omu nê kêp hkra hã omu nê hã axpên mã amÿnê nê axpên mã: “E onêj hpur nhõ dõn krata tē. Koja nhÿrmã õ papaj mÿr pē amnhĩm pur ã pyka pytà nê ho õ. Kwa pu mê hpĩr kurê kumrêx nê kêp hpurja o panhõ. E tokyj pu mê kupĩ ri.” Anê.

¹⁵ —Hãmri nhũm tē nê mê hwÿr pōj nhũm mê unê nê pur nê ho kato nê ma o tē nê kupĩ. ã mê ujarênh kot anhÿr. Anê.

Nhũm pre ã Jejus mê kãm ujarênh anê nê hã tanhmã mê hkukjêr to nê mê kãm:

—E koja hpur nhõ dõnja hkra jarênh ma hãmri nê tãm mê hwÿr mō nê tanhmã mê hipêx to wehe?

¹⁶ Koja ma mê hwÿr mō hãmri nê mê himex pa. Hãmri nê hpãnhã hpur ã nhãm mēmojjê rē nhũm mê tã kãm hamãr mex o pa. Anê.

Nhũm pre ã Jejus mê kãm ujarênh anê hãmri nhũm mê kot mar xwÿnhtaja ujarênh kamã amnhĩ jarênh mar kurê kumrêx. Mê kot Tirtũm kot mê hwÿr rēnh xwÿnhjê kapêr mar kêt nhũm mÿrapê mê kãm mê hkurê xwÿnhjaja kot mê kêp mê õ pika pytàr nê mê himex par ã amnhĩ jarênh ma nhũm ja mê kêp omnuj tÿx nê. Hãmri nê hêx rom Jejus mã kãm:

—Tk. Kwa nà nhÿx pre kêt pur nhõ dõnja ã mê hipêx anhÿr kêt nê. Anê.

¹⁷ Hãmri nhũm mê kuma nê mê omunh o xa. Nê mê omunh pē mê nõ kagàr mã mê kãm kapêr nê mê kãm:

—Nà ã mê hipêx anhÿr mã mê tãm kēnã. Mãn ka prem ra Tirtũm kapêr ã kagà htũm kot ja jarênh ma. Harênh kot:

Mê kot kēn o amnhĩm õrkwÿ nhĩpêx kaxyw nê kēn maati pumu nê

htỳx omnuj ã hkamnhĩx nẽ hkaga.

Mẽ kot hkaga htã Tĩrtũm mẽ kurom mex o kot kẽn piitã hakrenh par ã omunh kurê kumrẽx. Anẽ.

Ã Tĩrtũm kapẽr ã kagà htũm kot mẽ ajarẽnh te mẽ kot kẽn maati punuj ã hkamnhĩx nẽ hkaga xwỳnhjẽ jarẽnh pyrãk o ã mẽ ajarẽnh kot anhỹr. Anẽ.

¹⁸ Nhũm pre ã Jejus mẽ kãm te kẽn kẽn maati pyrãk o mẽ kãm amnhĩ jarẽnh anẽ. Hãmri nẽ axte amnhĩ tã kuxi nẽ mẽ kãm axte kẽn jarẽnhhta pyrã nẽ mẽ kãm:

—Nà kot kaj mẽ atõ ixkaga hãmri nẽ te mẽhõ htỳx htẽm nẽ kẽn pumunh kêt nẽ hã htẽk nẽ tẽm pyrãk o amnhĩ nhĩpẽx. Jao ixkutã amnhĩ xãm. Rỳ ka tanhmã amnhĩ to nẽ ixkaga nhũm te kẽn maati hõ htẽm nẽ kot anhĩpy htẽm nẽ axõm par pyrãk o anhĩpẽx ka amex kêt nẽ. Anẽ.

¹⁹ Nhũm pre ã Jejus mẽ kãm ujarẽnh kãm mẽ harẽnh anẽ. Hãmri nhũm Tĩrtũm kapẽr tũm o mẽ ahkre xwỳnhjẽ mẽ mẽ õ patre krãhtũmjaja kot mẽ kãm kẽn jarẽnh o te mẽ tãm harẽnh pyrãkja ma nhũm ja mẽ kęp omnuj tỳx nẽ. Jakamã nhũm mẽ kãm Jejus pynẽnh nẽ haxàr prãm nẽ. Nom amnhĩ tã kãm mẽ kot mar o kuhê xwỳnhjẽ puma nẽ.

Mẽ kot hẽx rom Jejus kukjêr ã mẽ harẽnh

Matêwre 22.15-22; Makre 12.13-17; mãânẽn Rõmãn 12.1, 13.6-7

²⁰ Hãmri nhũm Tĩrtũm kapẽr tũm o mẽ ahkre xwỳnhjẽ mẽ mẽ õ patre krãhtũmjaja Jejus tãnopxar o kuhê. Hãmri nẽ ra amnhĩ wỳr mẽmy hkwy hã karõ nẽ mẽ kãm:

—E. Mẽ ma Jejus wỳr mra nẽ te mẽ ate hkõt amnhĩ xunhwỳr kaxyw pyrãk o amnhĩ nhĩpẽx nẽ mẽmoj tã ri hkukja. Mẽmoj tã hkukjêr rax nẽ. Kêr kê Rõm nhõ pahi Sesti kapẽr kwỳm ri tanhmã mẽ amã kapẽr to ka mẽ ama nẽ man akupỹn mra nẽ mẽ inhmã harẽnh kurê kumrẽx. Pa mẽ ama nẽ ma hwỳr mra nẽ hã unê nẽ ma Sesti nhỹ hã mẽ pahto amnhĩptàr xwỳnhhta wỳr o tẽ nẽ ãhkram haxà. Anẽ.

²¹ Hãmri nhũm mẽ kuma nẽ mẽ kãm:

—Tõe. Nà kot paj mẽ anẽ. Anẽ.

Hãmri nẽ ma hwỳr mra nẽ hẽx rom kãm kapẽr nẽ kãm:

—Pa Jejus? Nà ãm hãmri na ka hte Tĩrtũm kapẽr o mẽ ahkre mex o ri apa. Na ka hte mẽ kamã akahak kêt nẽ. Nẽ mẽ kot tee ri tanhmã ato kapẽr punuj to htã ka aprĩ hã mẽ ahkre mex o ri apa.

²² Kwa mẽ inhmã mẽmoj jarẽ. Rõm nhõ pahĩti kot mẽ pahte kãm kàxpore hkwy nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nẽ? E kwa mẽ inhmã tanhmã harẽnh to. Anẽ.

²³ Nhũm prem ã hẽx rom kãm kapẽr anhỹr tã nhũm ra mẽ hamaxpẽr ã mẽ omu nẽ mẽ kãm:

²⁴ —E mẽ atõ anhõ kàxpore htỳxre japêr nẽ inhmã hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ omu nẽ kãnhmã mẽ kãm kupẽ nẽ mẽ kãm:

—E mẽhõ nhĩxi nẽ mẽhõ karõ na ja hã? Anẽ.

Hãmri nhũm mẽ kãm:

—Pahi Sesti karõ nẽ hixi na hã kẽnã. Anẽ.

²⁵ Hãmri nhũm mẽ kuma nẽ mẽ kãm:

—Tỳ. Tô kêr ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipẽx xwỳnh jakamã õ na. No mẽ kajaja na pre Tĩrtũm mẽ anhĩpẽx nhũm mẽ apê õ jakamã kwa kêr ka mẽ kapẽr kõt pix mã ri amnhĩ nhĩpẽx o ri apa. Anẽ.

²⁶ Nhũm pre ã Jejus mẽ kãm kapẽr anẽ nhũm mẽ piitã mar o kuhê. Nhũm mẽ kot hẽx rom kãm kapẽr mã xwỳnhjaja amnhĩ jaêr pẽ ã kot kàxpore jarẽnh anhỹrja ma. Hãmri nẽ tee ri axte mẽmoj tã hkukjêr nhũm kot pahi Sesti kwỳm ri kot tanhmã harẽnh to kaxyw ãm tee ri tanhmã hkukjêr to kaprỳ. Hãmri nẽ axte tanhmã kãm nẽ hkêt nẽ ãm akryk omunh pẽ mar o kuhê.

Akupỹm mẽ htĩr jarẽnh

Matêwre 22.23-33; Makre 12.18-27; Juãw 5.21, 6.39; mãânẽn Wam Korit

6.14, 15.12-28; Wam Tesarôn 4.13-18; Apokarip 20.4

27 Tã nhũm Satusew nhõ xwýnh kwýjaja. Mẽ kot akupým mẽ htír mã hamaxpër kêt jakamã mẽ htyk nẽ mẽ hapêx ã mẽ hkamnhĩx. Jakamã na prem tanhmã axpën mã Jejus jarënh to nẽ axpën mã:

—E kwa pu mẽ ma hwýr mra nẽ mẽmoj xihtýx ã hkukja kê mẽ pama nẽ tee ri tanhmã mẽ pamã harënh to hkukamã hamaxpër. Hãmri nhũm mẽ piitã ja hã omu nẽ àhpumunh týx kêt ã omunh kurê kumrêx. E ma pu mẽ hwýr.

Anẽ nẽ ma hwýr mra nẽ Parijew nhõ xwýnhjê pyrã nẽ hêx rom ahkukja nẽ kãm:

28 —Pa Jejus? Kwa mẽ inhmã mẽmoj jarë. Na pre finat Mojesja Tirtũm nhỹ hã mẽ panhigêt mã ã karõ anẽ. Mẽ hkra hkêt rãhã mẽ pa nẽ mẽ htyk xwýnhjaja nhũm mẽ harënh o:

Koja mẽhõ hprõ nẽ kormã kamã hkra hkêt rãhã pa nẽ ty. Hã koja hkôt htõja hpãnhã hprõta o hprõ nẽ kamã hkra. Hãmri nhũm kato nẽ te kệp htõ htyk xwýnhhta hkra pyrãk. Anẽ.

Na pre ã Mojes mẽ kãm karõ anẽ.

29 Jakamã kwa ga mẽ ixujarënh ma. Koja mẽ kot axpën to htõ xwýnhjaja kệp 7. Nhũm kot waja mẽhõ ho hprõ nẽ wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ

30 nẽ wa axpën to pa. Nhũm mãänën ty. Kamã hkra hkêt rãhã ty.

31 —Nhũm htõ hõta. Haxwýja hpãnhã tãm o hprõ nẽ wa axpën to pa grire nhũm haxwýja kamã hkra hkêt rãhã ty. Hãmri nhũm htõ hkwyjaja piitã nija pyxi nẽ axpën pãnhã ho hprõ hpa. No ãm mẽhõ kamã hkra hkêt rãhã ra htyk pa.

32 Hãmri nhũm mẽ hprõta mẽ hkôt amnhĩ to hapu nẽ ty.

33 Tã Tirtũm kot akupým nhỹrmã mẽ ho htír ronhỹx nhỹ nhỹx kệp nija mjên kumrêx? Ra piitã kot ho hprõ kênã. E mẽ inhmã ja jarë. Anẽ.

34 Hãmri nhũm Jejus mẽ kãm:

—Nà kaxkwa kamã mẽ kot amnhĩ nhĩpêxja axtem na. Pika ja kamã na htem pa nẽ àptàr nhũm mẽ axpën mã mẽ kure. Ja mex.

35 No mẽ kot Tirtũm kôt amnhĩ xunhwýr xwýnhjaja na htem ty hãmri nẽ Tirtũm nhõ krĩ kamã kuri axte kãm hprõ hprãm kêt nẽ ri pa. Rý ni japër nẽ kãm mjên prãm kêt nẽ ri pa.

36 Hãmri nẽ Tirtũm kapër o mẽ wryk xwýnhjê pyrã nẽ axte htyk kêt nẽ. ãm htír tũm rãhã nẽ pa ho pa. Tirtũm ra akupým kot mẽ ho htír jakamã koja mẽ kệp hkra nẽ kuri htír tũm nẽ mex nẽ pa ho pa nẽ axte kãm hprõ rý mjên prãm kêt nẽ ri pa.

37 —Nom mẽ ate akupým mẽ htír mã ajamaxpër kêt ã harënhja kot paj mẽ amã harë. Amnepêm na pre Tirtũmja pĩ hpòk kamã Mojes mã kapër nẽ kãm: Ixpê Apraãw nhõ Tirtũm na pa. Nẽ mãänën ixpê Apraãw kra Ijak mẽ htãmnhwý Jako wa õ Tirtũm na pa.

Anhýr o Mojes mã amnhĩ jarë nhũm kuma nẽ hã kagà.

38 Kệp apu arĩ mẽ htyk rãhã nhỹx pre ã mẽ harënh anhýr kêt nẽ. Nhỹx pre mẽ harënh o: “Amnepêm Apraãw nẽ hkra nẽ htãmnhwý mẽ htír ri ixpê mẽ õ Tirtũm na pa pre.” Anhýr o nhỹx pre mẽ harë. Nom na pre ã amnhĩ jarënh anhýr kêt nẽ. Mẽ pamã te Apraãwja mẽ htyk nẽ mẽ hapêx pyrãk. Nom nhũm prem ra Tirtũm ri akupým htír nẽ mex nẽ pa ho pa. Tã ka htem Tirtũm kapër kwým ri akupým mẽ htír kêt ã mẽ harënh o apa. Anẽ.

39 Nhũm pre ã Jejus mẽ kãm kapër anẽ. Hãmri nhũm Tirtũm kapër tũm o mẽ ahkre ho mẽ pa xwýnh kwýjaja kuma nẽ tee ri axte tanhmã kãm nẽ hprãm kaprý nẽ kãm:

—Tý. Nà ãm hãmri na ka ã ja jarënh anẽ. Anẽ.

40 Hãmri nhũm mẽ axte mẽmoj tã hkukjêr kêt nẽ. Tanhmã kot wem amnhĩ to nẽ hamaxpër o hakre? Na prem ãm tee ri kãm hamaxpër o hakrenh prãm kaprý ho kuhê. Jejus

kot mẽmoj piitã hkukamã àhpumunh tỳx o àhpumunh tỳx.

Jejus kệp pahi finat Tawi nhõ Pahihti hã kot amnhĩ jarẽnh

Matêwre 22.41-46; Makre 12.35-37; mãânẽn Rômãn 1.3-4

⁴¹ Tã nhũm Jejus kànhmã xa nẽ amnhĩ tã tanhmã mẽ kot mar o kuhê xwỳnhjê hkukjêr to. Nom te nhãm mẽhõ hã mẽ hkukjêr pyrã nẽ mẽ kãm:

—E kwa mẽ inhmã mẽmoj jarẽ. Tĩrtũm kot mẽ akaxyw ãm mã xwỳnhta ã na pa mẽ akukja. Mo na htem axpẽn mã kệp finat pahi Tawi kanrẽhã htãmnhwỳ pix ã harẽ nẽ mãânẽn kệp õ pahihti hã harẽnh kêt nẽ?

⁴² Na pre Tawi Tĩrtũm kapêr kwỳ hã kagã nẽ tanhmã harẽnh to. Tĩrtũm mex ã mẽ grer xàja kwỳ kamã harẽ nẽ hã kagã nẽ hã kagã ho:

Na pre Tĩrtũm inhõ Pahihti mã ã kapêr anẽ nẽ kãm: “E amnẽ ixwỳr tẽ nẽ inhĩhkõ hã nhỹ nẽ inhmã mẽ ho amnhĩptãr o akrĩ.

⁴³ Kot paj mẽ kot kãm akurê xwỳnh piitã mẽ unẽn pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapêr. Anẽ.

⁴⁴ Na pre ã Tawija Tĩrtũm kot Kris mã kapêr jarẽnh anẽ. Mẽ kajaja na ka htem ãm kệp Tawi kanrẽhã tãmnhwỳ pix ã ri axpẽn mã harẽnh o ri apa. No kêt Tawi na pre kệp õ Pahihti hã harẽnh o pa. Anẽ.

Jejus kot tanhmã Tĩrtũm kapêr tũm o mẽ ahkre xwỳnhjê jarẽnh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapêr anẽ nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwỳnhjê mã kapêr nẽ mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre xwỳnhjê kot amnhĩ nhĩpêx o amnhĩ nhĩpêx kêt nẽ. ãm mẽ omu nẽ ãm mẽ omu nẽ mẽ kot amnhĩ nhĩpêx kõt amnhĩ nhĩpêx o ri apa hkêt nẽ.

⁴⁶ Na htem mẽ piitã mẽ kot mẽ hã hpijaãm kaxyw mẽ ê mex pix kãm ri pa. Nẽ mẽ kãm mẽ piitã mẽ kot

amnhĩm mẽ rũnh xwỳnh ã mẽ harẽnh o mẽ paja na mẽ kãm hprãm. Nẽ mẽ panhõ Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nẽ mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nẽ mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷ —Nẽ mẽ kệp mẽ mjên htyk xwỳnhjê ho ajuta ho pa hã amnhĩ jarẽnh tã ãm amnhĩ to hêx nẽ axtem nẽ mẽ nokupyr pẽ mẽ kệp mẽ hikukrêx piitã ho hapêx par o pa. Nẽ mẽ kệp mẽ òrkwỳ pytà. Nẽ mẽ hêx rom te tãm mẽ kot amnhĩ nhĩpêx pyrã nẽ Tĩrtũm mã amnhĩ jarẽnh japjêê ho kuhê. Mỳrapê koja mẽ mex kêt nẽ. Koja Tĩrtũm tanhmã ja hã mẽ hipêx to rax nẽ. Jakamã kwa kêr ka mẽ ã mẽ kot amnhĩ nhĩpêx anhỹr xwỳnhjê hkõt amnhĩ nhĩpêx o apa hkêt nẽ. ãm kwarĩ ho kwarĩ. Anẽ.

21

Kệp mjên htyk xwỳnh jarẽnh

Makre 12.41-44

¹ Nhũm Jejus kormã Tĩrtũm mã amnhĩ jarẽnh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwỳ nhõr o pa. Jakamã nhũm mẽ hikàxpore rũnh xwỳnhjaja hwỳr agjê nẽ kamã kàxpore gjênh xà kamã hkwỳ gjê nẽ ma akupỹm mra.

² Jakamã nhũm mẽhõ ni pẽ mjên htyk xwỳnh haxwỳja hwỳr axà. Kệp amrakati kumrêx nẽ hikàxpore tỳxre ãm axkrut্রে htã mẽ hpãnhã hwỳr axà. Nẽ kãm Tĩrtũm kĩnh xàj hamẽ kamã kuxà hãmri nẽ kato nẽ ma akupỹm tẽ.

³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nẽ. Hãmri nẽ hkõt mẽ pa ho pa xwỳnhjê mã harẽ nẽ mẽ kãm:

—E mãn ka mênire htẽm mũj pumu. Kệp amrakati nẽ hikàxpore ãm kệp grĩre htã amnhĩ pẽ òr pa. Kwỳjê

rom kām Tirtūm kīnh xāj amnhī pē ōr par kumrēx. Apkur xà hā hikàxpore na. Mē hkwỳjaja na htem hikàxpore hkwỳ ho mra nē kugjē nom arī mē hikàxpore rax. No nhūm nire nēj mē kurom kām hikàxpore japē hkēt nē. Nē ho ōxy hkēt nē àmnhīx piitā Tirtūm mā ōr pa. Anē.

Mē kot amnhī tomnuj xwỳnhjē hkukamā mē harēnh

Matēwre 24.1-2; Makre 13.1-2

⁵ Tā hāmri nhūm Jejus kōt mē pa ho mē pa xwỳnhjaja kormā Tirtūm mā amnhī jarēnh xà hā ixkre kaxwỳnh pumunh o kuhē nē axpēn mā harē nē axpēn mā harēnh o:

—Hēxta waa nē. Ixkreja mex kumrēx. Kēn rūnh o mē kot hipēx jakamā mex o mex. Nē mē kot ri Tirtūm mā hkīnh xà nhōr nēj haxwỳja piitā mex. Anē.

Hāmri nhūm Jejus mē kuma nē mē kām:

⁶ —Nà mex tā koja nhỹrmā mē kām Tirtūm kurē xwỳnhjaja grānh pa. Koja arī kēn ō axkrutre nē axpēn mỳnh nē nōr kēt nē. Koja piitā anhgrā nē ahpỳnhā ri hikwỳ. Anē.

⁷ Nhūm pre ā mē kot hipēx anhỹrja kukamā mē kām mē harēnh anē nhūm mē tee ri hkukamā hamaxpēr nē kām:

—Kwa xà koja mē ā hipēx anē? Kwa mē inhmā aprī hā mē kot ixkre grānh parta jarē. Xà koja mē tokyx ho anē nà xà kormā? Kwa mēmo koja wỳj ri tanhmā amnhī nhīpēx to? Anē.

⁸ Hāmri nhūm mē kām:

—Nà nhỹrmā mēmoj piitā hapēx kaxyw tanhmā amnhī nhīpēx to kumrēx kot paj mē amā harē ka mē inhma. Koja mē ohtō nē mē apē ixkrajē hwỳr mra nē hēx rom te pa ixte amnhī nhīpēx pyrāk o amnhī nhīpēx o pa. Nē tanhmā mē amā amnhī jarēnh to nē amnhī jarēnh o: “E mē ixpumu. Pa na pre Tirtūm mē awỳr inhmē. Ixpē kaxkwa rūm ixwryk xwỳnh na pa.” Anhỹr o mē akōt mē amā amnhī to hēx o pa. Hāmri nē mē amā: “E ot pa ra mē ato amnhīptār kaxyw mē awỳr wrỳ.”

Anhỹr o amnhī jarēnh o mē akōt pa. Nom kēr ka mē ām mē ama nē ām mē ama. Ām mē kot mē amā amnhī to hēx o pa kēnā. Kormā akupỳn ixpōx xà hā arīgrota kormā.

⁹ —Nē koja mē nhỹri awry hā axpēn par o pa. Nē mē atāā axpēn par o pa. Nom kēr ka mē harēnh ma nē ri te ri tokyx mēmoj piitā hapēx kukamā ajamaxpēr kēt nē. Mēmoj piitā hapēx xà hā arīgrota kormā.

¹⁰ Koja mēmoj piitā hapēx kaxyw nhūm ahpỳnhā ri pika piitā hkōt mē pa xwỳnhjaja axpēn kutā amnhī xunhwỳ nē pijapu nē axpēn pa.

¹¹ Nē koja pika piitā hkōt tanhmā ahpỳnhā mē à kute mē hamỳ nhūm mē amnhī xà htỳx kamā hamak o pa.

Nē koja pikaja tertet tỳx nē.

Nē koja mē nhỹri pika hkwỳ kamā prām xāj hpikaprār pa.

Nē koja kaxkwa kamā mēmoj tanhmā amnhī anhīpēx to nhūm pika nhō xwỳnhjaja tee ri omu nē kām ma htỳx kumrēx nē htertēt o kuhē.

Koja mēmoj ā amnhī nhīpēx anē pa rī kormā akupỳn mē awỳr wrỳ nhūm mēmoj piitā hapēx pa. Koja mēmoj ā amnhī nhīpēx anē.

¹² —E Tirtūm mā amnhī jarēnh xà hā ixkre grānh par xwỳj ri mēmoj tanhmā hkukamā kot amnhī nhīpēx to hā mē ate ixkukjēr xwỳnhhta kot paj hpānhā mē amā harē ka mē inhma. Koja mē kām ixkurē xwỳnhjaja mē awỳr mra nē ixtā mē apynē nē tanhmā ixtā mē anhīpēx to. Nē ma mē pikuprōnh xà hā ixkreja wỳr mē ato mra nē kamā mē kām tanhmā mē ato kapēr punuj to. Nhūm mē kuma hāmri nē ma mē ato mra nē mē ajagiē. Mē ate ixkōt apa ho apa jakamā koja mē ā mē anhīpēx anē. Nē mē ō pahiti hwỳr mē ato mra nē mē kām tanhmā mē ato kapēr punuj to.

¹³ Tā kēr ka mē kutā akrī nē axāmnhīx māmri tanhmā mē kām ijarēnh to ho akrī.

¹⁴ —Nom kwa kēr ka mē kām tanhmā amnhī jarēnh to hkukamā

tee ri ajamaxpër o ri mẽ amã mẽ uma hkêt nê. Rỳ mẽ ajamaxpër o: “Hêxta waa nê. Tanhmã koja we mẽ kot ixkukjêr ã arĩgrota ã pa we ri mẽ kãm ixkapër to?” Anhÿr o tee ri amnhĩ kukamã ajamaxpër kêt nê. ãm amnhĩ kaxyw inhmã pix mã ajamaxpër tỳx rãhã nê.

¹⁵ Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama nê axte tanhmã mẽ ato kapër to hkukamã tee ri hamaxpër o kuhê.

¹⁶ –Nê koja mẽ anhĩpêxà nê mẽ akatorxà nê mẽ atõ nê mẽ akrãmnhwÿjaja. Nê kaxyw krĩ hkôt mẽ akwÿjaja ixtã mẽ atã amÿnê nê ma mẽ õ pahi hwÿr mẽ ato mra nhũm mẽ ajagjê nê mẽ akwÿjê pa.

¹⁷ Koja mẽ piitã ixtã mẽ akamã gryk nê kãm mẽ akurê nê.

¹⁸⁻¹⁹ Nom mẽ kot ã mẽ anhĩpêx anhÿr mã tã kêr ka mẽ amnhĩ to htỳx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nê ã mẽ kot mẽ anhĩpêx anhÿr xwÿnhjê rom Tĩrtũm mẽ wa ixri atĩr tũm nê amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nê apa mã xwÿnh jakamã kwa kêr ka mẽ tee ri amnhĩ kukamã ajamaxpër o ri apa hkêt nê.

²⁰ –Koja nhÿrmã nhÿhÿnh pòristi ohtõ nê mra nê Jerujarê hwÿr pøj hãmri nê mẽ kãm hipòk pa nê kuhê. Ka mẽ ja hã mẽ omu nê mẽ kot krĩja grãnh par mã ajamaxpër kurê kumrêx.

²¹ Koja mẽ ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapøj nê ma aprõt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja ka mẽ omu nê mẽ kot mẽ apar pymaj ma aprõt nê amrar kurê kumrêx. Hixêt prêk wÿr ajapøj nê aprõt nê ma mra.

–Nê kê Jerujarê nhõ xwÿnhjaja mẽ umaj haxwÿja hapøj nê ma hprõt nê ma mrar o mra.

–Nê jar kapõt ã ri mẽ pa xwÿnhjaja kê mẽ akupÿm krĩ hwÿr gjêx kêt nê.

ãm ma mẽ umaj hprõt nê mrar kurê kumrêx.

²² –Mẽ kot amnhĩ tomnuj mÿrapê koja Tĩrtũm ã mẽ hwÿr mẽ kãm mẽ hkurê xwÿnhjê rênh anê. Kapër ã kagà htũm ra kot mẽ hkukamã ja jarênh kot anhÿr. Jakamã koja mẽ nhÿrmã mẽ hkukamã mẽ harênh xàja kôt ã mẽ hipêx anê.

²³ –No mẽ htujarõ xwÿnhjaja nê mẽ hkra karàre xwÿnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê hprõt tỳx? Nà pika ja kamã koja mẽ piitã mex kêt nê. Mẽ kot amnhĩ tomnuj mÿrapê koja Tĩrtũm ã mẽ hipêx anê.

²⁴ Koja mẽ nhÿhÿnh krĩ hõ rũm mẽ hwÿr mra nê mẽ unê nê mẽ hkamnhwÿr o mẽ kupa. Nê mẽ hkwyjê pynê nê ma nhÿhÿm ahpÿnhã mẽ õ pika hwÿr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwÿnhjaja Jerujarê o amnhĩptã nê ã mẽ hipêx anê. Nê kamã pa ho pa rãhã nhũm Tĩrtũm nhÿrmã akupÿm nê mẽ kator pa. Tã koja mẽ nê mẽ kator parja o pa ra akupÿn mẽ awÿr inhnojarêt. Anê.

Nhũm pre ã Jejus mẽ kãm mẽ kot Jerujarê grãnh par xwÿnhjê hkukamã harênh anê.

Akupÿn Jejus wrÿk xwÿj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwÿnhjê mã kapër nê mẽ kãm:

–Nê kot paj nhÿrmã akupÿn mẽ awÿr inhnojarêt nhũm kaxkwa kamã kanhêti nê myyti nê mytwrÿre axtem tanhmã ri amnhĩ nhĩpêx to. Nhũm gõ xujanãr haxwÿja hkoko htỳx jao axpên tak tỳx nê. Hãmri nhũm pika piitã hkôt mẽ pa xwÿnhjaja kuma nê omu nê nê kãm ma htỳx nê mur nê htertet nê tee ri amnhĩ kukamã hamaxpër.

²⁶ –Nê koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mẽ pa xwÿnhjaja omu nê tee ri amnhĩ

kukamã hamaxpêr o amnhĩ japrãr pa nê hikwỹ.

27-28 Koja ã mẽmoj amnhĩ nhĩpêx anê ka mẽ ja hã omu nê akupỹn mẽ awỹr inhnojarêr mã ajamaxpêr kurê kumrêx. Hãmri nê mẽ kot ixkôt amnhĩ xunhwỹr kêt xwỹnhjê rom akĩnh kãm ijapêr arĩt o akuhê.

—Nã kot paj akupỹn mẽ awỹr wrỹ. Kakrã kamã hirã htỹx kãm akupỹn ixihtỹx kãm mẽ awỹr wrỹ. Hãmri ka mẽ apiitã pika piitã hkôt ano ho ixpumu. Kot paj ã ixwrỹk anê hãmri nê mẽmoj punuj piitã pê mẽ apytãr pa. Jakamã ka mẽ ã mẽmoj kot amnhĩ nhĩpêx anhỹrja ã omu hãmri nê tokyx ixkôt axãpirta mã ajamaxpêr nê akĩnh tỹx nê. Anê.

29 —E ga mẽ pĩ hpãr mũj pumu.

30 Na hte mẽmo mytwrỹ hã rã nhũm mẽ omu nê ô hkukamã hamaxpêr.

31 Ja pyrã nê koja ã mẽmoj amnhĩ nhĩpêx par anhỹr mẽ ka mẽ omu nê akupỹn mẽ awỹr ixwrỹkja mã ajamaxpêr kurê kumrêx.

32 Koja akupỹn ixpôx kêt ri mẽ kot ã mẽmoj kot amnhĩ nhĩpêx anhỹr pumunh xwỹnhjaja kormã piitã htyk kêt ri pa ra akupỹn wrỹ.

33 —Nê koja nhỹrmã pika nê kaxkwa wa hapêx pa. Tã no ãm ixkapêr koja wa urãk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê.

34-35 —Nê kwa mẽ o kora. Mẽ axkãm ajamak rom. Mẽ kot ixkôt amnhĩ xunhwỹr kêt xwỹnhjaja na htem kãm tanhmã amnhĩ nhĩpêx to hprãm xã hkôt pix mã tanhmã amnhĩ nhĩpêx to ho ri pa. Jao ãm amnhĩ xãpkur xã nê amnhĩ to mex xã nê kãxpore pix kukamã hamaxpêr o pa. Nê htỹx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhỹr o pa rãhã pa ra mẽ haêr pê akupỹn wrỹ nhũm mẽ tee ri ixpumu nê kãm ma htỹx kumrêx. Te tutre htỹx ri harôj kajyr o pa nê rapuuti hwỹr àr nhũm kot haê nê unênh nhũm tee kãm kator prãm pyrãk. Koja mẽ ã amnhĩ nhĩpêx anê. Nom kêr ka mẽ ho mẽ urãk kêt

nê. Æm pa inhmã hprãm xã hkôt pix mã tanhmã inhmã amnhĩ nhĩpêx to rãhã ho ri apa.

36 —Tã kêr ka mẽ ã mẽ kot amnhĩ tomnuj o pa anhỹrja kôt amnhĩ nhĩpêx o apa pymaj amnhĩ to Tĩrtũm wỹr rãhã ho apa. Kê tanhmã mẽ ato hihtỹx to ka mẽ ỹ hã ho mẽ urãk kêt nê. Kêr pa nhỹrmã akupỹn wrỹ ka mẽ ixpumu nê mẽ kurom amnhĩ kamã akahak kêt nê akĩnh tỹx nê man ixwỹr mra. Anê.

Nhũm pre ã Jejus hkôt mẽ pa ho mẽ pa xwỹnhjê jahkre anê.

37 Hãmri nê apkati mẽ Tĩrtũm mã amnhĩ jarênh xã hã ixkre kamã mẽ pikuprõnh xwỹnhjê jahkre ho hkrĩ. Nhũm kamãt nhũm hkôt mẽ pa ho mẽ pa xwỹnhjê mẽ mẽ krĩ rũm hapôj nê ma hixêr prêk pê Oriwêhti hwỹr mra nê kamã amnhĩm hikra nê hikwỹ.

38 Nhũm kwỹhtã nhũm mẽ kãnhmã hkrĩ nê ma akupỹm krĩm mra nê ixkreja wỹr agjê. Hãmri nhũm mẽ piitã hã akuprõ nê kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh Matêwre 26.14-16; Makre 14.1-2; Juãw 11.47-57

1 Tã nhũm Ijaew kĩnhã arĩgro pê Pasja àhtêp o mõ. Pas ã na htem anepêm Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wỹr akuprõ nê hã hkĩnh. Na htem arĩgroja jarênh o: “Pas” anhỹr ã harê. Nê mããnênh harênh o: “Mẽ pahte pãw kaxkrit kêt kur ã arĩgro.” Anhỹr o harê.

2 Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwỹnhjaja ra kãm Jejus pĩr prãm nê. No mẽ kãm hkôt mẽ kot kapêr mar xwỹnhjê puma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mẽ kêp kupĩ? Kot puj mẽ noo mã tanhmã ho nhũm mẽ hã mẽ pakamã gryk tỹx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhỹ hã mẽ ahkre ho pa xwýnh pê 12 hõ na pre. Tã axtem nẽ tanhmã hamaxpêr to nẽ Satanasti nhỹ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwýnh krãhtũmjê hwýr tẽ. Hãmri nẽ tanhmã Jejus o mẽ mar to nẽ mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nã? Anẽ.

⁵ Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nẽ hkĩnh nẽ mẽ kãm:

—Tõe. Nà kot paj mẽ amã ho anẽ. Anẽ.

Hãmri nẽ ma tẽ nẽ kato. Nẽ Jejus pynênh kaxyw htãnopxar o ri hkõt pa. Mẽ kot mar o pa xwýnhjê hkàx ã nhỹri unênh nẽ ma mẽ hwýr o htẽm kaxyw.

Jejus kot ý hã mẽ ahkre xwýnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêp Ijaewjê nhĩgêjtaja na prem ôwêhti hkrare hkwy hpar o pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwýnhjê nhĩkra nê mẽ kator kaxyw nhũm prem ã amnhĩ nhĩpêx anẽ. Jakamã na htem arĩ mẽ kêp mẽ hkanrêhã mẽ htãmnhwýjaja arĩgro pê Pas ã axpên wýr akuprõ nẽ mẽ kãm hamaxpêr pê mẽ urak nẽ ôwêhti hkrare hkwy hpa. Hãmri nẽ pãwti kaxkrit kêt kãm kuku.

⁸ Jakamã nhũm Jejus ý hã mẽ ahkre ho mẽ pa xwýnhjê wa ho axkrut nẽ mẽ amnhĩ kukamã wa kumê. Simãw Pêtre mẽ Juãwja nhũm wa mẽ amnhĩ kukamã wa kumê nẽ wa kãm:

—E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anẽ.

⁹ Hãmri nhũm wa kuma hãmri nẽ kãm:

—Tõe. Nhỹri kot paj we wa tẽ nẽ mẽ akutêp hã apê? Anẽ.

¹⁰ Hãmri nhũm wa kãm:

—Nà wa mãmrĩ ma Jerujarê hwýr wa tẽ. Nẽ hwýr axà nẽ mẽhõ mytita pumunh kurê kumrêx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkõt òrkwý hwýr tẽ.

¹¹ Hãmri nẽ ixkre nhõ dõn pumu nẽ kãm: “E jar na pa wa awýr tẽ. Jejus na wa inhmẽ pa wa awýr tẽ. Na awýr pêr mênh o: ‘Nhỹri kot paj ixkõt ri mẽ pa ho mẽ pa xwýnhjê mẽ axpên kutã Pas ã apku?’ Anẽ. Na ã awýr hpêr mênh anẽ.” Anẽ.

¹² —E ã kãm akapêr anẽ kê war ama nẽ ra war amã òrkwý nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anẽ.

¹³ Hãmri nhũm wa kuma nẽ ma krĩm tẽ. Ma tẽ nẽ hwýr axà hãmri nẽ ra kot wa kãm mẽmoj jarênh xà hkõt mẽmoj piitã omu hãmri nẽ mẽ kutêp mẽõ hã àpênh o wa xa.

¹⁴ Tã nhũm myt axà nhũm mẽ wa hkõt mõ nẽ ixkreta wýr àpir pa. Hãmri nẽ apkur kaxyw hkrĩ hpa nhũm Jejus mẽ ìhkõ hã nhỹ.

¹⁵ Hãmri nẽ mẽ kãm tanhmã amnhĩ jarênh to nẽ mẽ kãm:

—E na pa inhmã Pas ã mẽ anhĩhkõ hã ixàpkur prãm nẽ. Kormã ixte amnhĩ xà htýx kãm ijamak xwýj ri.

¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tĩrtũm akupýn ixte mẽ ato amnhĩptar kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpên kutã paxàpkur rax nẽ. Anẽ.

¹⁷ Nhũm ã mẽ kãm amnhĩ jarênh anẽ nẽ hpãnhã wĩhti py nẽ o xa nẽ Tĩrtũm mã harê nẽ kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwýnhjê pumunh mex nẽ mẽ ìhkra pê mẽ ijapôj. Amex o amex. Anẽ.

Hãmri nẽ hpãnhã hkõt mẽ pa ho mẽ pa xwýnhjê hõ mã kugõ nẽ kãm:

—E mĩ. Apy nẽ mẽ axpên pãnhã hkwy ho ixkõ.

18 ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupỹn mẽ awyr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

19 Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm õr pa nẽ mẽ kãm:

–E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anẽ kot paj ty. Jakamã kêr ka mẽ ixwakre kamã tõhã axpên wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtykja mã ajamxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anẽ.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ.

20 Hãmri nẽ ra hkur pa. Hãmri nhũm Jejus axte kopta py nẽ mẽ kãm:

–Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nẽ. ãm paa. Pa kot paj mẽ anẽ mẽ ãhkram amnhĩ jaxà nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anẽ mẽ ate amnhĩ tomnuj piitã te amnhĩ katut kõt rẽnh par pyrãk o hipêx nẽ mẽ ato hkra. Amnepêm kot ja hã amnhĩ jarẽnh xà hkõt. Jakamã e mẽ ixkamrõ pikapĩrta mã ajamxpêr pẽ wĩhti hkwy ho ixkõ. Anẽ.

Jejus ã mẽ kãm àmnênh xwỳnh jarẽnh
Matêwre 26.21-25; Makre 14.18-21;
Juãw 13.18-19

21 Nhũm Jejus arĩ mẽ kãm kapêr nẽ mẽ kãm:

–Nẽ kot mẽ kãm ixtã àmnênh mã xwỳnhhta na jar mẽ pahkaêx ã mẽ pakutã apkur o nhỹ.

22 Tĩrtũm kãm hprãm xà hkõt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwỳnhhta hêxta waa nẽ. ã kot inhĩpêx anhỹrja

mỳrapê koja amnhĩ xà htỳx kãm hamak rax kumrêx. Anẽ.

23 Nhũm pre ã Jejus mẽ kãm amnhĩ jarẽnh anẽ. Nhũm mẽ kuma nẽ tee ri axpên pumunh o hkrĩ. Hãmri nẽ ri axpên kukja nẽ axpên mã:

–Kwa nà mẽ pahtõ kot pu we ã ri hipêx anẽ? Nà pa hkêt.

Anhỹr o tee ri axpên kukjêr o hkrĩ.

Mẽ pamã amnhĩ to rũnh prãm kêt ã
mẽ pamã karõ

Matêwre 20.20-28; Makre 10.35-45;
mããnên Rõmãn 12.3-5, 12.10, 12.16;
Epes 4.2-4; Piripos 2.3-8; Xiakre 4.1-
10; Wam Pêtre 5.3

24 Tã nhũm Jejus nhỹ hã mẽ ahkre ho mẽ pa xwỳnhjaja axpên mã tanhmã kapêr to ho hkrĩ nẽ axpên mã:

–Kwa mẽ pahtõ kot puj wem nhỹrmã pahpê pahi nẽ mẽ ho amnhĩptar rax o ri papa? Anẽ.

Hãmri nẽ mẽ axpên mã: “Nà pa.” Anẽ nẽ nhãnh axpên mã: “Nà kêt paa.” Anẽ. Hãmri nhũm mẽ nêtãnh axpên mã: “Nà kêt pa kênã.”

25 Anhỹr o axpên mã kapêr o hkrĩ. Hãmri nhũm Jejus tee ri axpên tã mẽ kuma nhũm mẽ ã hamaxpêr anhỹrja kêt omnuj nẽ nhũm mẽ kãm tanhmã hã kapêr to nẽ mẽ kãm:

–E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nẽ mẽ kot amnhĩm mex ã harẽnh kaxyw tanhmã mẽ ho mex to ho pa.

26-27 Tã kêr ka mẽ ho mẽ urak kêt nẽ. Kêt ãm te amarĩ ri mẽ apa xwỳnh pyrãk o axpên nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptar rax kukamã ajamxpêr kêt nẽ.

28 Na prem axpên mã ixto hêx nẽ tanhmã ixto kapêr punuj to htã ka mẽ ama nẽ ãm mẽ ama nẽ arĩ ixkõt ri apa

rāhā nē. Ām hāmri na ka htem arī ixkôt ri apa anē.

²⁹⁻³⁰ Kot paj amnhĩ tā mẽ ato mex rax nē. Na pre ra Tĩrtũm nhỹrmã ixte mẽ ato amnhĩptār o ixkrĩ kaxyw ixãm. Tã ot pa amnhĩ pyrā nē mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptār o apa. Nē mẽ apē ixkrāmnhwỳ hã nhỹrmã ixkutã axãpkur o apa. Anē.

Jejus kot Simãw Pêtre mã kapêr ã harēnh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nē kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nē. Tanhmã kot mẽ akrã hto nhũm mẽ ate mẽ kãm ixkurê xwỳnhjê pumaj ixkaga hã kãm mẽ akamã hamak prãm tỳx nē. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nē mãmĩ tanhmã mẽ kamã ajamak to.” Anē.

³² —Tã ate mẽ umaj ixkaga nē axte ate amnhĩ kaxyw inhmã ajamxpêr kêt pymaj na pa ra ato Inhõ Papaj wỳr kãm ixihitỳx nē Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nē tokyx tãm akupỳm ixkôt amnhĩ xãm tỳx nē. Kêr kê nhỹrmã akwỳjê hõ tanhmã amnhĩ tomnuj to nē tee ri amnhĩ kukamã hamaxpêr ka ja hã omu hãmri nē kãm ate tanhmã amnhĩ tomnuj tota jarē. Kê mẽ ã ate amnhĩ nhĩpêx anhỹr ã ajarēnh ma nē apyrã nē tokyx akupỳm tãm ixkôt amnhĩ xãm tỳx kurê kumrêx. E kêr ka ã akupỳm ixkôt mẽ piitã mẽ hipêx anhỹr o ri apa Simãw Pêtre. Anē.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarēnh anē.

³³ Hãmri nhũm tee ri amnhĩ tā kuma nē kãm:

—Kwa nã Pahihti. Kot paj ri akwỳm tanhmã amnhĩ tomnuj to hkêt nē. Koja mẽ te ajaxã nē apĩ htã kot paj arĩ akôt ri ixpa ho ixpa nhũm mẽ pahto amỹrã nē tanhmã pahto. Anē.

³⁴ Hãmri nhũm kuma nē kãm:

—Nã koja apkati hkôt krãhyre hkār kêt ri ka ra mẽ umaj ate ixkôt apa hkêt ã mẽ kãm amnhĩ tā axãprār o axkrunēpxi kãm ga. Anē.

Jejus kot hkwỳjê mã mẽmoj tā karõ Matêwre 10.5-15; Rukre 9.1-3

³⁵ Hãmri nhũm Jejus arĩ hkôt mẽ pa ho pa xwỳnhjê mã kapêr nē mẽ kãm:

—E wam ixte mẽ hwỳr mẽ arēnhã ã na ka prem amnhĩ kôt aparkã hkwy ho apa hkêt nē. Nē kawã jamãnh nē ho apa hkêt nē. Nē mrykã jamãnh nē amnhĩ kôt ho apa hkêt nē. Ām mẽ anhỹ kamã mẽ hwỳr apa hã na pa pre mẽ amã karõ. Tã xãn ka prem ã mẽ hwỳr apa anē nhũm mẽ amnhĩ wỳr awỳr kêt nē? Nã xã na prem amnhĩ wỳr mẽ awỳr? Anē.

Hãmri nhũm mẽ kãm:

—Tỳ na prem amnhĩ wỳr mẽ ixwỳ. Mẽ ixte amnhĩ kôt mẽmoj to ixpa hkêt tã na pa prem amarĩ mẽ kutã ixãpkur mex o ri mẽ hkôt ixpa. Anē.

³⁶⁻³⁷ Hãmri nhũm mẽ kãm:

—Tõe. Nã mẽ kot mẽ ato mex tã nom koja mẽ hpãnhã axtem hõ ho mẽ anhĩpêx. Jakamã kêr ka mẽ akupỳm mẽ kãm ijarēnh o apa kaxyw anojarêt hãmri nē anhõ mrykã rỳ akawã htu nē ma amnhĩ kôt ho apa. Nē awapo. Kot kaj mẽ awapo hkêt japêr hãmri nē apipro xã ho wēnē nē amnhĩm hõ japrõ nē ma amnhĩ kôt ho apa. E kêr ka mẽ ã amnhĩ nhĩpêx anē.

—Nē Tĩrtũm kapêr ã kagã htũm kot ra ixkukamã tanhmã ijarēnh to nē kot ijarēnh kot:

Koja mẽ hipêx o te mẽ kot amnhĩ tomnuj tỳx xwỳnh nhĩpêx pyrãk. Anē.

Ā mẽ kot inhĩpêx anhỹr kukamã ijarēnh kot anhỹr. Tã na mẽ ra ã inhĩpêx anhỹr kaxyw. Anē.

³⁸ Nhũm pre ã Jejus mẽ kãm kapêr anē nhũm mẽ kuma nē kãm:

—Ota mẽ panhõ wapohti hamēxkrut Pahihti. Anē.

Hãmri nhũm mẽ kãm:

—Tõe. Nã hãmri. Mẽ amnhĩm axi nē ho amnhĩm mẽmoj to anē. Anē.

Jejus kot Tirtũm mã amnhĩ jarẽnh
Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nẽ hixêt pê Oriwêhti hwỳr tẽ nẽ api nhũm hkôt mẽ pa ho mẽ pa xwỳnhjaja ma hkôt mra.

⁴⁰ Hãmri nẽ nhỹri hixêt kahti ri hkrĩ nhũm Jejus mẽ kãm:

—E kwa kêr ka mẽ ixkutêp amnhĩ to Inhõ Papaj wỳr o akrĩ. Kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nẽ. Arĩ mẽ kutã amnhĩ to htỳx nẽ akuhê. Anẽ.

⁴¹ Hãmri nẽ mẽ kurũm htẽm grire nẽ Tirtũm mã amnhĩ jarẽnh kaxyw hkõn krã ho tẽm nẽ nhỹ.

⁴² Hãmri nẽ kãm:

—Kwa Papaj. Nà na pa ra amnhĩ xà htỳx kukamã ijamaxpêr nẽ amnhĩ kamã ixkahak tỳx kumrẽx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nẽ mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt nẽ. Rỳ ko. Kot kaj amã mẽ kot tanhmã ixto hprãm hã kê mẽ mãmri tanhmã inhĩpêx to. Nom pam inhmã hprãm xà hkôt kêt. Anẽ.

Nhũm pre ã Jejus amnhĩ to Hipêêxà Tirtũm wỳr anẽ.

⁴³ Hãmri nhũm kuma nẽ hwỳr kapêr o wrỳk xwỳnhja mẽ nhũm hwỳr wrỳ nẽ kuri xa. Hãmri nẽ õxàhkre kaxwỳnh kãm tanhmã ho hihtỳx to.

⁴⁴ Nhũm kê axte amnhĩ to Hipêêxà hwỳr kãm hihtỳx nẽ. Tee ri amnhĩ kukamã hamaxpêr pê amnhĩ kamã kahak tỳx kumrẽx. Jao hã gô rax nẽ te hkamrô xàhàr pyrãk o pikap ahà.

⁴⁵ Hãmri nẽ kànhmã xa nẽ akupỹm hkôt mẽ pa ho mẽ pa xwỳnhjê hwỳr tẽ nẽ mẽ omu nhũm mẽ ra õt pa nẽ hikwỹ. Mẽ kot tee ri Jejus kot mẽ kãm amnhĩ jarẽnhja kukamã hamaxpêr o hkaprĩ nẽ õt pa nẽ hikwỹ.

⁴⁶ Hãmri nhũm Jejus tẽ nẽ tee ri mẽ omu nẽ mẽ kumra nẽ mẽ kãm:

—Kwa nà. Mẽ ri ã amnhĩ nhĩpêx anhỹr kêt nẽ. Kwa mẽ kànhmã akrĩ nẽ amnhĩ to Inhõ Papaj wỳr kê mẽ ato mẽ axihtỳx. Hãmri nhũm mẽ tanhmã

ixkôt mẽ ato ka mẽ inhỹ hã mẽ kutã amnhĩ to htỳx nẽ akuhê. Anẽ.

Mẽ kot Jejus pynênh ã mẽ harênh
Matêwre 26.47-56; Makre 14.43-50;
Juãw 18.1-11

⁴⁷ Nhũm pre ã Jejus mẽ kãm kapêr anhỹr rôm nhũm hkôt pa ho pa xwỳnh pê Jut Kariotja amnhĩ kôt mẽ kot Jejus pynênh xwỳnhjê ho tẽ. Mẽ ho htẽm rax nẽ. Hãmri nẽ kot Jejus kahti hkôt mỳnh kaxyw hwỳr tẽ

⁴⁸ nhũm amnhĩ tã omu nẽ kãm:

—Kwa Jut. Xà mẽ kahti hkôt mẽ hamỳnh nẽ mẽ hpãr o na htem mẽ kãm mẽ hã amỳnê? Anẽ.

⁴⁹ Hãmri nhũm hkôt mẽ pa ho mẽ pa xwỳnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpêr kurê kumrẽx nẽ Jejus mã:

—Kwa Pahihtĩ. Xà kot paj mẽ panhõ wapohti py nẽ ho mẽ panê mẽ hkwy hpa? Anẽ.

⁵⁰ Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwỳnhja mẽ hkôt tẽ nhũm omu nẽ kãm wapo ho apê. Nẽ kot ho hkrã nhĩpônã mã tã kuhpaw nẽ ho upôk rũm hamak nhĩkjê pix krãhta.

⁵¹ Hãmri nhũm Jejus omu nẽ nẽ kãm kapêr nẽ kãm:

—Kwa nà ri ã amnhĩ nhĩpêx anhỹr kêt nẽ. Amarĩ xa. Anẽ.

Hãmri nẽ hamakja py nẽ akupỹm kãm hamak ã kuxi nẽ ho mex.

⁵²⁻⁵³ Hãmri nẽ mẽ kot unênh mã xwỳnhjê mã tanhmã kapêr to. Mẽ õ patre krãhtũmjê mẽ Tirtũm mã amnhĩ jarẽnh xà hã ixkre jamãr xwỳnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapêr nẽ mẽ kãm:

—Kwa na pa pre apkati mẽ Tirtũm nhõrkwỹ kamã mẽ kãm ixkapêr o ixpa ka prem tokyx ixpynênh kêt tã jarãhã te ixte amnhĩ tomnuj xwỳnh pyrãk o inhĩpêx nẽ ixwỳr wapo nẽ kô hã akapên nẽ ixwỳr ã atẽm rax anẽ. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti

nhỹ hã ã mẽ ate inhĩpêx anhỹr mã kênã. Anẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nẽ ma o tẽ. Ma mẽ õ patre maati nhõrkwỹ hwỹr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ.

⁵⁵ Nhũm mẽ patre maati nhõrkwỹ hwỹr Jejus o axà nẽ hkôt gjêx pa hãmri nhũm Simãw Pêtre kítare hwỹr axà nẽ mẽ kuri xa. Nhũm mẽ kítare kamã amnhĩm kuto nẽ hã ànhunh o hkrĩ nhũm

⁵⁶ mẽ ìhkô hã ànhunh o nhỹ. Hãmri nhũm mẽ kãm àpênh xwỹnh niti hirã kamã hprĩ hã omunh kurê kumrêx nẽ mẽ kãm:

—Xê pêr myti ja kêp Jejus kôt mẽ pa ho mẽ pa xwỹnhjê hõ na. Anẽ.

⁵⁷ Hãmri nhũm tee ri amnhĩ tã kuma nẽ kãm mẽ uma nẽ mẽ kãm amnhĩ tã aprã nẽ kãm:

—Tk. Kokỹ. Ixte mēhõ my ata pumunhre hã. Anẽ.

⁵⁸ Tã nhũm hpãnhã mēhõ myja kãm: —Kwa nã. ãm hãmri na ajarẽ. Apê Jejus kôt ri mẽ pa xwỹnhjê hõ na ka.

Anẽ nhũm kuma nẽ kê axte kãm: —Kwa mẽ ri ã amnhĩ krã hkôt ri ixto axêx anhỹr kêt nẽ. ãm ixte aa mēhõta pumunh kêt kumrêx. Anẽ.

⁵⁹ Tã nhũm ja haxwỳja axte omu nẽ kãm:

—Kwa ãm hãmri na mẽ ajarẽ. Apê Jejus kwỳ hõ na ka. Uràk nẽ te apê Garirej nhõ xwỹnh pyrãk kênã. Anẽ.

⁶⁰ Hãmri nhũm tee ri kuma nẽ mẽ kãm amnhĩ tã aprãr kãm hihtỳx nẽ mẽ kãm:

—Tk. Ixpê Garirej nhõ xwỹnh kêt. ãm ixte mēhõ mũj pumunh kêt kumrêx tã ka mẽ ãm xatã hkôt ixpa ho ixpa xwỹnh ã ixkamnhĩx o akuhê.

Anhỹrja o ra mẽ kãm amnhĩ tã aprãr o axkrunêpxi mẽ nhũm krãhyre kà.

⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nẽ omu. Hãmri nhũm amnhĩ tã no pumu nẽ kot hkukamã kãm ã amnhĩ nhĩpêx anhỹr jarênhja mã hamaxpêr kurê kumrêx.

Krãhyre hkàr kêt ri kot mẽ kãm amnhĩ tã aprãr o axkrunêpxi hã harênhja mã hamaxpêr nẽ kànhmã hakry hpar o tẽ nẽ hkaprĩ htỳx nẽ.

⁶² Hãmri nẽ hkaprĩ xàj kítare pê kato nẽ tẽ nẽ awry hã xa nẽ mỳr rax kumrêx.

Mẽ kot Jejus tak ã mẽ harênh

Matêwre 26.67-68; Makre 14.65

⁶³ Hãmri nhũm mẽ kot Jejus pumunh o kuhê xwỹnhjaja hã hpêr o axkê nẽ htak o kuhê.

⁶⁴ Nẽ no hpro nẽ htak nẽ kãm:

—E atak xwỹnh nhĩxi jarê. Apê Tirtũm Kra hã ate amnhĩ jarênh jakamã mãn uràk nẽ axàhpumunh tỳx. Jakamã e hixi jarê. Anẽ.

⁶⁵ Hãmri nẽ xatã haprỳ nẽ kãm kapêr punuj nẽ.

Mẽ kot mẽ hkrãhtũm wỳr Jejus o htẽm ã mẽ harênh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mõi mẽ nhũm Ijaew nhõ pahijê mẽ patre krãhtũmjê mẽ Tirtũm kapêr tũm o mẽ ahkre xwỹnhjaja axpên wỳr pikuprõnh pa. Hãmri nhũm mẽ ma mẽ hwỹr Jejus o tẽ.

⁶⁷⁻⁶⁸ Nhũm mẽ omu nẽ tanhmã kot amnhĩ jarênh to hã hkukja nẽ kãm:

—Kwa mẽ inhmã amnhĩ jarê. Xà ka na apê Tirtũm kot mẽ ixkaxyw axãm xwỹnhnta? Xà ka kot kaj Rõi nhõ xwỹnhjê pê mẽ ixpytã nẽ mẽ ixto amnhĩptãr o apa? Anẽ.

Hãmri nhũm mẽ kãm:

—Nã kot paj tanhmã mẽ amã amnhĩ jarênh to ka mẽ ixkôt ajamaxpêr kêt nẽ. Ixte ãm hãmri mẽ amã amnhĩ jarênh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harênh to hkêt nẽ. ãm mẽ axêx rom mẽ ate ã ixkukjêr anhỹr kênã.

⁶⁹ Tã nom kot paj tokyx ma akupỹm Inhĩpêxã Tirtũm wỳr api. Hihtỳx o hihtỳx rãhã nẽ pa ho pa xwỹnh na. Jakamã kot paj hwỹr api nhũm amnhĩ nhĩhkô hã inhỹr pa upòk rũm mẽ api-itã mẽ ato amnhĩptãr o ixkrĩ. Hãmri

ně nhÿrmã paa tanhmã mẽ ajarēnh to. Aně.

⁷⁰ Hāmri nhÿm mẽ tee ri kot ã amnhĩ jarēnh anhÿrja ma nē kãm:

–Tk. Kwa akatàt kôt mẽ inhmã amnhĩ jarē nà. Xà apê Tirtũm Kra na ka? Aně.

Hāmri nhÿm mẽ kãm:

–Tÿ ixpê Kra na pa. Aně.

⁷¹ Hāmri nhÿm mẽ tee ri ã amnhĩ jarēnh anhÿrja ã kuma nē axpēn mã:

–Kwa mo kaxyw kot puj mẽ axte mẽ hkwÿjê japēr nhÿm mẽ tanhmã kot amnhĩ tomnuj to hã harē? Tãm kēp Tirtũm Kra hã amnhĩ to hēx nhÿm mẽ pahte pahpiitã mar kēnã. E kwa tokyx pu mẽ ma Rõm nhõ pahihiti hwÿr o tē kē mẽ pamã hã amÿnē nē mẽ pamã kupĩ. Aně.

23

Mě kot pahi Pirat wÿr Jejus o htēm ã mẽ harēnh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhÿm mẽ Jejus o kato nē nhãm Pahihti Pirat wÿr o tē.

² Hāmri nē kutã ãm nē tanhmã kãm ho hēx to nē kãm:

–E ot pa mẽ awÿr jahti ho tē. Na hte mẽ inhmã hēx rÿnh o pa. Mě ixte Pahihti Sesti kapēr kwÿm ri amnhĩ nhÿpēx prãm xaj tanhmã mẽ inhmã mẽmoj tã karõ hto ho pa. Nē axtem nē mẽ ixte Sesti mã kàxpore hkwÿ nhõr kêt ã mẽ inhmã karõ. Nē Tirtũm kot mẽ pakaxyw kēp mẽ panhõ pahi hã ãm xwÿnh ã amnhĩ jarē. ã na hte mẽ inhmã amnhĩ to hēx anhÿr o pa. Aně.

³ Hāmri nhÿm Pirat mẽ kuma nē Jejus pumu nē kãm:

–E kwa inhmã amnhĩ jarē. Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Aně.

Hāmri nhÿm kãm:

–Nã ãm hāmri na ka ã ijarēnh aně. Aně.

⁴ Hāmri nhÿm Pirat tanhmã hkukjêr to nē tee ri kot amnhĩ jarēnh ã kuma hāmri nē patre krãhtũmjê mã kãm:

–Kwa mẽmo mÿrapê kot pa tanhmã mẽ amã hã ixàmnhēnh to? Kot tanhmã

amnhĩ tomnuj tore hã. Nà kot pa kãm inhÿre. Aně.

⁵ Hāmri nhÿm mẽ tee ri kuma nē kot mẽ kãm hã àmnēnh prãm xaj hã kãm kapēr kãm hihtÿx nē. Nē kãm:

–Kwa nà. Na pre hte pika pē Jutej kamã tanhmã mẽ kãm hēx to ho pa. Hāmri nhÿm mẽ ra hã axpēn kutã amnhĩ xunhwÿ nē hã pijapu rÿnh o pa. Tã mãânēn Garirej kamã ã amnhĩ nhÿpēx anhÿr o hkrax nē hpãnhã amnē mẽ pahwÿr ã amnhĩ nhÿpēx anhÿr kaxyw mõr aně. Aně.

Mě kot Eroxo wÿr Jejus o htēm ã mẽ harēnh

Rukre 9.7-9

⁶ Hāmri nhÿm Pahi Pirat mẽ kuma nē mẽ kãm:

–Kwa xà kēp Garirej nhõ xwÿnh na? Aně.

Hāmri nhÿm mẽ kãm:

–Tÿ. Kēp Garirej nhõ xwÿnh kēnã.

⁷ Aně nhÿm mẽ kãm:

–Tõ mẽ ma pahihiti Eroxo ãxipas wÿr mãn o tē. Kēp Garirej nhõ xwÿnhjê nhõ pahi na. Tã ra jar Jerujarē kamã ham pøj. No axtem ixpê Jutej kamã mẽ pa xwÿnhjê nhõ pahi jakamã kwa mẽ ma õ pahita wÿr mãn o tē kē tãm tanhmã mẽ amã ho. Aně.

⁸ Hāmri nhÿm mẽ kuma nē ma pahi Eroxo ãxipas wÿr o tē. Na pre ra Eroxo ãxipasja xatã Jejus jarēnh ma nē kãm omunh prãm nē. Kãm aa kot mẽmoj pumunh kêt õ ho anhÿr ã omunh prãm tÿx jakamã nhÿm mẽ ma hwÿr o tē nhÿm omu nē hkÿnh nē.

⁹ Hāmri nē tee ri mẽmoj tã hkukja no nhÿm akryk xa nē tanhmã kãm nē hkêt nē.

¹⁰ Hāmri nhÿm mẽ õ patre krãhtũmjê mẽ Tirtũm kapēr tũm o mẽ ahkre xwÿnhjaja kãm ho kapēr punuj nē ho hēx kãm hihtÿx nē.

¹¹ Hāmri nhÿm pahi Eroxo ãxipas mẽ kuma hāmri nē õ pôristi mẽ wa kãm kapēr punuj nē hã hpēr o axkē nē tanhmã ri haprÿ to. Hāmri nē hã hpēr o pikēnh kãm kēp pahi hã mẽ ê mexja py nē kãm haxà nē akupÿm pahi Pirat wÿr kumē.

¹² Na pre Pahi Pirat mẽ Pahi Eroxo ãxipasja wa kãm axpēn kÿnh kêt nē.

Tã hãmri nhũm Eroxo ãxipasja tee ri Jejus kot kãm tanhmã amnhĩ jarẽnh to hã mar prãm xaj tee ri hkukamã hamaxpẽr hãmri nẽ Pirat ã hpijaàm kaxyw akupỹm hwỳr kumẽ. Hãmri nhũm amnhĩ tã omu hãmri nẽ wa ra akupỹm kãm axpẽn kĩnh nẽ. Nẽ akupỹm axpẽn mã hpẽr o axkẽ nẽ pikunhar o pa pẽ akupỹm axpẽn to hkrãmnhwỳ.

Pirat kot Jejus pĩr ã àmnênh

Matêwre 27.15-26; Makre 15.6-15; Juãw 18.39-19.16; mãânên Atrẽ 3.13-14

¹³ Tã nhũm Pirat akupỹm amnhĩ wỳr mẽ hã karõ. Ijaew kwỳjaja nẽ mẽ õ pahijaja nẽ mẽ õ patre krãhtũmjaja nhũm akupỹm amnhĩ wỳr mẽ piitã mẽ hã karõ.

¹⁴ Hãmri nhũm mẽ akupỹm hwỳr gjêx pa nẽ kuhê nhũm mẽ kãm:

—E na ka mẽ ixwỳr mytita o tẽ nẽ tanhmã inhmã harẽnh to. Kot mẽ akwỳjê mã tanhmã hêx to ho pa hã harẽ. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarẽnh to hã kuma. Te kot amnhĩ to mex xwỳnh pyrãk. Mẽ ate tanhmã ho akapẽr to htã nom kot anhỳr kêt. Kot amnhĩ to mex xwỳnh na.

¹⁵ Pahi Eroxa ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupỹn ixwỳr kumẽ. Jakamã kwa mẽmo mỳrapê kot paj mẽ amã hã amỳnê nhũm mẽ amã kupĩ? Tanhmã kot amnhĩ tomnuj tore hã.

¹⁶ Kot paj ãm mẽ kãm anẽ kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pẽ Pas ã na pre hte mẽ õ pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỳnh nẽ mẽ kãm ure. Jakamã na pre ã mẽ kãm kapẽr anẽ nẽ kot Jejus tak nẽ kãm urer mã.

¹⁸⁻¹⁹ Nom nhũm mẽ kuma nhũm ja mẽ kêp omnuj nẽ nhũm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pôristi mẽ pahi Piratja mẽ kutã amnhĩ xãm nẽ kêp õ pôristi hõxpĩ. Mỳrapê

na prem ra haxã nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapẽr anẽ.

²⁰ Nom nhũm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mỳrapê kot paj mẽ kãm hã amỳnê nhũm mẽ amã kupĩ?

²¹ Anhỳr tã nhũm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhõ kê ty. Anẽ.

²² Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhũm ty. Nà kot paj ãm mẽ kãm anẽ kê mẽ htak nẽ kãm ure kê ma tẽ. Anẽ.

²³ Hãmri nhũm mẽ xatã hã kãm kapẽr kãm hihtỳx nẽ kãm:

—Kwa nà. Pĩ kahpa hã mãn anhõ kê ty.

Anhỳr o ãm xatã kax pẽ àmra kamã kãm hã amỳnê.

²⁴ Hãmri nhũm Pirat tee ri mẽ kuma hãmri nẽ tã mẽ kãm hprãm xã hkõt mẽ kãm ã amỳnê.

²⁵ Hãmri nẽ mẽ kãm Parapas mã ure. Ra kot pahi Pirat pẽ õ pôristi kutã amnhĩ xãm nẽ kêp hõx pĩr tã nhũm mẽ kãm hprãm xã hkõt akupỹm kãm ure. Hãmri nẽ mẽ ãhkram Jejus jaxã. Mẽ kãm hprãm xã hkõt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harẽnh

Matêwre 27.31-43; Makre 15.21-32; Juãw 19.17-20, 19.27-31; mãânên Atrẽ 7.59-8.1

²⁶ Tã nhũm pôristijaja Jejus o kato nẽ ma kapõt mã o tẽ. Nẽ kãm õ pĩ kahpa gõ nhũm amnhĩ kaxyw kumỳ nẽ o tẽ. Nom mẽ kot htak rax kurê nhũm hirot tỳx nẽ nhũm mẽ ja hã omu nẽ mẽhõ kot ho ajuta kaxyw mẽ hkapi ho xa. Hãmri nẽ Sirên nhõ xwỳnh Simãw hkã htyk pumu. Nhũm pre htỳx hamakêtkati nẽ mẽ kutã krĩm tẽ. Hãmri nhũm mẽ haêr pẽ unê nẽ kãm Jejus o ajuta kaxyw hã karõ nhũm kãm õ pĩ kahpaja mỳ nẽ mẽ hkõt o tẽ.

²⁷ Hāmri nhūm mẽ ohtô nê Jerujarê rūm Jejus kôt mō. Nhūm mẽni hkwyjaja omu nê kām hkaprī xàj mỳr o hkôt mō.

²⁸ Hāmri nhūm mẽ mỳr ã mẽ kuma nê mẽ ho hakēx nê mẽ omu nê mẽ kām:

—Kwa nà Jerujarê nhō xwỳnhjaja. Mẽ amā ixkaprī xàj amỳr kêt nê. Kêt mẽ kamjaja amā amnhī kaprī xàj măn mur. Nê mẽ akrajê kamā axukaprī xàj măn mur.

²⁹ Koja mẽ nhỹrmã mẽ apê mẽ anhō krī granh pa ka mẽ apunuj nê amnhī xà htỳx kamā ajamak o ri apa. Nê tee ri mẽ akrajê hkukamā tanhmã ajamaxpēr to nê ajamaxpēr o: “Hêxta gàa nê. Na ixkrajaja ixpê amnhī xà htỳx kām hamak o pa. Kêp apu mẽ hkra hkêt xwỳnhjê pyrà nê ixkra hkêt nê ixpa ro nhỹx inhmã mex nê. Nhỹx pa ixkĩnh nê.” Anhỹr o kot kaj mẽ nhỹrmã ajamaxpēr nom ã ajamaxpēr anhỹr kaprỳ.

³⁰ —Nê kot kaj mẽ apiitã mẽmo punujta pymaj tee ri amã tokyx atyk nê ajapêx par prām kaprỳ nê axpên mã akapêr o: “Hêxta gàa nê. Kot kên prêk mỳj mẽ panhĩpy rôrôk nê tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpēr anhỹr kaprỳ.

³¹ Nom kêt pa. Aa ixte tanhmã amnhī tomnuj to hkêt tã nhūm mẽ ã inhĩpêx anê. Nom mẽ ate amnhī tomnuj mỳrapê koja mẽ nhỹrmã tanhmã mẽ ato rax o ã mẽ kot inhĩpêx anhỹrja jakrenh pa. Hêxta waa nê. Na pa mẽ akukamã ijamaxpēr nê ixkaprī htỳx nê. Anê.

³² Tã nhūm mẽ ja wa ho hamēxkrut nê tanhmã wa kot amnhī tomnuj toja mỳrapê Jejus kôt wa hpĩr kaxyw hkôt mãânên wa o tẽ.

³³ Jakamã nhūm mẽ ra kên nhĩxêt te kot mẽ hkrã hi pyràk xwỳnhhta wỳr mẽ o pôj. Mẽ kot kām “mẽ hkrã hi xà” anhỹr jarênhja wỳr mẽ o pôj. Hāmri nê Jejus pê ê kapa nê pĩ kahpa hã kuxi nê prek o ãhkra nê hpar o htỳx pa. Hāmri nê kànhmã pĩ kahpa xãm nê ho htỳx nhūm xa. Hāmri nhūm mẽ hpãnhã wa

kot amnhī tomnuj xwỳnhhta mã wa ho anê nê. Nê prek o wa ãhkra nê wa hpar o htỳx pa hāmri nê akutã ho Jejus nhĩjê nê wa ãm nhūm wa ajêt.

³⁴ Hāmri nhūm Jejus kỳx pê amnhī xà htỳx kumrêx kamã hamak o jêt rãhã mẽ ho Tĩrtũm wỳ nê kām:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anê. Jakamã ãm ixtã mẽ omu nê mẽ kamã axukaprī nê. Anê.

Hāmri nhūm hparpê pôristi hkwyjaja axpên mã ê hkwy ho pigrãnh kaxyw hã kênre ho jôka ho hkrĩ.

³⁵ Nhūm mẽ ohtô rax nê Jejus parpê omunh o kuhê. Nhūm mẽ ô pahijaja mẽ noo mã hã hpêr o axkê nê mẽ kām:

—E jahti na pre te kêp mẽ pakaprī xwỳnh ã amnhī jarênh o ri pa. Nê Tĩrtũm kot mẽ pakaxyw ãm xwỳnh ã amnhī jarênh o ri pa. Jakamã e kwa pu mẽ xa nê kot amnhī kaxàr nê wrỳk kãm omu. Anê.

³⁶ Nhūm pôristi mãânên tanhmã hã hpêr o pikênh to. Nê hparpê kãm wĩhti punuti jahkre nê kām:

—Kwa wrỳ nê mẽ ixkutã ja hkwy ho ixkô nà. Anê.

³⁷ Hāmri nê kām:

—E apê Ijaew nhō pahi hã kot kaj amnhī kapa nê akupỹn wrỳ. Kwa tokyx pa mẽ ja hã apumu. Anê.

³⁸ Nhūm pôristija tapti hõ py nê tanhmã hã kagà hto. Nê hã kagà ho:

IJAEW NHÕ PAHI NA JA

Anhỹr o hã kagà hāmri nê Jejus wỳr api nê mỳ ri kunhō.

Wa kot Jejus nhĩjê nê wa jêt xwỳnh wa harênh

Matêwre 27.44; Makre 15.32

³⁹ Hāmri nhūm wa kot ãhkô hã jêt xwỳnhhta ô haxwỳja kãm kapêr punuj nê kām:

—Kwa kot kaj apê Tĩrtũm kot mẽ ixkaxyw axãm xwỳnh hã kot kaj amnhī kapa nê wrỳ. Nê mãânên amnhī kôt wa ixto wrỳ. Anê.

⁴⁰⁻⁴¹ Hāmri nhūm ihõta kuma nê hã kãm akir nê kām:

—Tk. Kwa amarĩ ajêt. Xà amã Tĩrtũm pyma hkêt ã na ka ã kêp Krata

mã akapêr anê? Nà koja kãm wrÿk prãm nê kot wrÿ. No pajamê pahte amnhĩ tomnuj mÿrapê koja mẽ pahpĩ. No tãm kot tanhmã amnhĩ tomnuj to hkêt tâ nhũm mẽ amarĩ ã hipêx anê.

⁴² Anhÿr o kãm kapêr hãmri nê Jejus mã kãm:

—Kwa Jejus. Kêr ka nhÿrmã mẽ ixto amnhĩptà hãmri nê inhmã ajamexpêr nê ixkamã axukaprĩ nê ixto mex nê. Anê.

⁴³ Hãmri nhũm kãm:

—Nà kot kaj jarãhã ma ixkôt kaxkwa hwÿr api nê hpãnhã ixkuri amex nê atĩr tũm nê apa ho apa. ãm hãmri na pa ã amã ixkapêr anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴ Tã nhũm kaxkwa nhĩpôk ri myt nhÿr mẽ nhũm te ra kamàt pyrãk nhũm kamàt kô rax kumrêx. Nê kamàt kô ho ra hã awry nê. Ja mẽ nhũm akupÿm myt katêr o mō.

⁴⁵⁻⁴⁶ Nom nhũm kormã kamàt kôta ã nhũm Jejus ra htyk kaxyw nê àmra kamã Tĩrtũm mã kapêr nê kãm:

—E Papaj. Mãmri ixkarō ho amnhĩptà.

Anhÿrja kôt hãmri ty. Pu nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mênh kurê kumrêx. Utĩ rax tâ kôt ã axkjê nê amnhĩ kahê xà mẽ. Te Jejus htyk o kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mênh pyrãk o ã amnhĩ nhĩpêx anê.

⁴⁷⁻⁴⁹ Hãmri nhũm mẽ piitã mẽmoj ã kot amnhĩ nhĩpêx anhÿr ã omunh o kuhê xwÿnhjaja. Nê kaxyw Jejus krãmnhwÿjaja nhũm mẽ amÿm omunh o kuhê. Nê Garirej rũm mēni kot Jejus kôt mẽ pa ho mẽ pa xwÿnhjaja mãânēn mẽ kuri amÿm hkaprĩ nê omunh o kuhê. Nhũm pôristi krãhtũmjê hōja ã mẽmoj kot amnhĩ nhĩpêx anhÿr ã omu nê tee ri hamaxpêr o:

—Hêxta waa nê. Pêr ãm hãmri na pre hte tãm amnhĩ nhĩpêx o pa. Tã pa mẽ amarĩ mẽ mar xà hkôt ixtÿx kupĩ. Anê.

Nhũm ã hamaxpêr anhÿrja kôt Tĩrtũm mã mex o mex ã harênh o xa. Nhũm amarĩ mẽ kuhê xwÿnhjaja mãânēn mẽmoj ã kot amnhĩ nhĩpêx anhÿrta pumu nê tee ri hkukamã hamaxpêr o ra kãm ma htÿx nê. Hãmri nê awjanã nê ma akupÿm krĩm mrrar kurê kumrêx.

Mê kot Jejus jaxàr ã mẽ harênh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhũm axtem Juje pê Ari-matej nhō xwÿnhja. Arimatejja pika pê Ijaew kamã na. Nhũm Jujeja kot amnhĩ to mex jakamã Tĩrtũm kôt amnhĩ nhĩpêx o pa. Jakamã na pre hkwyjê rom Tĩrtũm kot mẽ pahwÿr Jejus mēnh xwÿnh ã omu nê hkôt hamaxpêr. Kêp Ijaew nhō pahi hō htã hkwyjê hkôt hamaxpêr kêt nê. Jakamã nhũm prem kot Jejus pĩr ã amÿnê nhũm tee ri harênh ma nhũm ja kêp omnuj nê.

⁵² Jakamã nhũm Jejus ty nhũm Juje ma pahi Pirat wÿr tē nê ã hã kuwÿ nê kãm:

—Pa? E ot pa awÿr tē. Kwa inhmã htyk xwÿnhnta gō pa ma o tē nê haxà. Anê.

⁵³ Hãmri nhũm kuma nê kãm kugō nhũm ma o tē nê haxà. Kaxyw kupêxê hō py nê ho hkupu nê ma o tē nê kēn kre kaprÿ kamã haxà. Mē kot kormã kamã mēhō jaxàr kêt nhũm mẽ kamã Jejus jaxà.

⁵⁴ Arĩgro pê sēsta hã nhũm prem kupĩ nhũm myt xàr o mōr mẽ nhũm Juje ma o tē nê haxà. Ijaew kôt xà hã arĩgromnuja wÿr haxà.

⁵⁵ Nhũm Garirej rũm mēni hkwy kot Jejus kôt pa xwÿnhjaja ma hkôt mra nê kot haxàr kãm omu. Mē hkuxwaxà ho gregrer kêt rãhã haxàr kãm omu.

⁵⁶ Hãmri nê ma akupÿm krĩm mra nê kaxyw mẽ hkuxwaxà hkwy ho anê.

Tã nhũm apkati nhũm mẽ ò arĩgromnu pê sap kator jakamã nhũm mẽ kormã akupÿm hwÿr mrrar kêt nê. Hãmri arĩgro mex jamãr pê arĩ hkôkôt o hkrĩ.

24

Jejus akupÿm htÿr jarÿnh

Matêwre 28.1-10; Makre 16.1-8; Juãw 20.1-10

¹ Tã nhÿm apkati nhÿm tãmik. Hãmri nhÿm mÿnijaja kwÿhtã kãnhmã hkrÿ nÿ ma akupÿm kÿn kreta wÿr mÿ hkuxwaxã ho mra.

² Hãmri nÿ hwÿr àhtÿp o mra nhÿm ra hakwakre kahê xã raxta kahê xã hkãx ã xa nhÿm mÿ tee ri omu.

³ Hãmri nÿ kÿn kre wÿr agjê nÿ kamã tee ri Jejus japêr no nhÿm kamã amrakati.

⁴ Nhÿm mÿ tee ri axpÿn pumunh pê hkukamã hamaxpÿr.

Hãmri nhÿm Tÿrtÿm kapêr o wrÿk xwÿnh wa axkrut nÿ mÿ haêr pê mÿ hwÿr kato nÿ wa xa. Wa ê jaka nÿ hirã htÿx kãm wa xa.

⁵ Nhÿm mÿ tee ri wa omu nÿ kãm wa uma htÿx nÿ. Nÿ wa umaj hkõn krã ho rôrok nÿ hkrÿ hpa. Nhÿm wa mÿ omu nÿ mÿ kãm:

—Kwa mon ka mÿ ri mÿ htykjê kamã ra akupÿm htÿr xwÿnhhta japêr o ri apa?

⁶ Jar amrakati. Na ra akupÿm htÿr. Kormã Garirej kamã pa ri kot mÿ amã amnhÿ jarÿnh xã hkõt na ra akupÿm htÿr. Mãn ka mÿ arÿ kot ã mÿ amã amnhÿ jarÿnh anhÿrja ã anohtÿx japêr.

⁷ Mÿ kot unênh nÿ pÿ kahpa hã nhôr nhÿm htyk nÿ htyk ã apkati axkrunÿpxi hãmri nÿ akupÿm htÿr ã kot mÿ amã amnhÿ jarÿnhhta mãn ka mÿ arÿ hã anohtÿx japêr.

⁸ Anhÿr o mÿ kãm kapêr nhÿm mÿ kuma hãmri nÿ ra Jejus kot mÿ kãm ã amnhÿ jarÿnh anhÿrja mã hamaxpÿr kurê kumrÿx.

⁹ Hãmri nÿ awjanã nÿ ma akupÿm krÿm hkÿnh nÿ mra. Nÿ hwÿr pøj nÿ mÿ kot Jejus nhÿ hã mÿ ahkre ho mÿ pa xwÿnhjê mã awjarê. Mÿ kÿp 11 xwÿnhhtajê mÿ kaxyw hkwyjê mã awjarê.

¹⁰ Mÿni kot mÿ kãm ujarÿnh xwÿnhhtajê nhÿxi na pre Marir Matarÿn nhÿm ja kÿp Joanã. Nÿ Xiakre katorxã Marir ôta. Nÿ kaxyw mÿni hõja. Jakamã nhÿm mÿ ma akupÿm Jejus nhÿ hã mÿ ahkre ho

mÿ pa xwÿnhjê hwÿr mra nÿ mÿ kãm awjarê.

¹¹ Nom nhÿm mÿ kuma nÿ ãm mÿ kuma nÿ htÿx ho amnhÿ krã hkõt mÿ kot ri ã harÿnh anhÿr ã mÿ hkamnhÿx nÿ ãm mÿ kuma.

¹² Nhÿm Simãw Pêtre hamaxpÿr hãmri nÿ kãnhmã xa nÿ ma kÿn kreta wÿr hprõt nÿ htÿm kurê kumrÿx. Hãmri nÿ tee ri kÿn kre kaprÿ kamunh o xa nÿ kamã Jejus kupu xã pix pumu nÿ tee ri hkukamã hamaxpÿr hãmri nÿ ma akupÿm tÿ.

Jejus kot Emau hwÿr wa mÿr xwÿnh wa hwÿr kator ã harÿnh

Makre 16.12-13

¹³ Tã nhÿm ra amÿkry ho mÿ nhÿm Jejus kwÿjê hõ wa hamÿxkrut nÿ Jerujarê rÿm kato nÿ ma akupÿm wa ô krÿ pê Emau hwÿr wa mÿ. Jerujarê rÿm Emau hwÿr ahkrãre.

¹⁴ Jakamã nhÿm wa hwÿr pry hã axpÿn mã tanhmã Jejus jarÿnh to ho mÿ. Kÿn kre kamã mÿ kot haxãr nhÿm ra ï pikunorja nhÿm wa axpÿn mã harÿnh o wa mÿ. Nÿ tee ri hkukamã hamaxpÿr o wa mÿ.

¹⁵ Hãmri nhÿm Jejus tãm tÿ nÿ wa hã ajêr nÿ wa hkõt tÿ.

¹⁶ Nom nhÿm wa hprÿ hã omunh kêt nÿ. Tÿx ho nhãm mÿhõ hã hkamnhÿx nÿ wa arÿ axpÿn mã harÿnh o wa mÿ.

¹⁷ Hãmri nhÿm Jejus hÿx rom wa kãm:

—Kwa mÿmon ka wa axpÿn mã harÿnh o wa mÿ? Anê.

Hãmri nhÿm wa hkaprÿ kamã kãm harê.

¹⁸ Ihõ pê Kroptija kãm:

—Kwa xã na ka Jerujarê kamã ri apa htã kamã mÿ kot tanhmã amnhÿ nhÿpÿx toja jarÿnh mar kêt nÿ? Kurÿm amôr kÿnã na ka ri mÿmoj mar kêt nÿ ri apa. Anê.

¹⁹ Hãmri nhÿm wa kãm:

—Nã amrakati ixte mÿmoj maare hã. Kwa mo na wehe? Kwa war aprÿ hã inhmã harê pa kuma. Anê.

Hãmri nhÿm wa kãm:

—Nã mÿ kot mÿ ixpê tanhmã Jejus pê Najare nhõ xwÿnhhta to kÿnã. Kÿp Tÿrtÿm nhÿ hã kapêr jarÿnh o pa

xwýnh na pre. Nê Tirtûm nhỹ hã tanhmã amnhĩ nhĩpêx to ho pa nhũm prem piitã amnhĩm mex ã harê.

20 Tã nhũm mẽ panhõ patre krãhtũmjê mẽ mẽ panhõ pahijaja axtem nê mẽ kãm hã amýnê. Mẽ kot pĩ kahpa hã nhõr nhũm htyk kaxyw mẽ kãm hã amýnê.

21 Pa prem ixtýx ho kêp Tirtûm kot mẽ pahwýr mênh xwýnh ã hkamnhĩx nê kot Rõm nhõ xwýnhjê pê mẽ ixpytãr ã hkamnhĩx tã nhũm prem mẽ ixpê kupĩ. Jãã na prem ã hipêx anê nê kupĩ. Na ra htyk ã apkati axkrunêpxi.

22-23 —Nê jarãhã kwýhtã mênihkwýjaja ma haxàr xà hã kên kre hwýr mra nê xep tee kamã hapêr nê omunh kêt nê. Xep ãm Tirtûm kapêr o wrýk xwýnhja wa ho axkrut nê wa omu nhũm wa xa. Nhũm mẽ kãm ra akupým htĩr ã harê nhũm mẽ akupým mẽ ixwýr mra nê mẽ ijaêr pê mẽ inhmã harê.

24 Hãmri nhũm mẽ ixkwýjaja ma mẽ hpãnhã kên kreta wýr mra nhũm ra mẽ kot harênh xà hkôt tee ri kamã hapêr nom nhũm kamã amrakati kumrêx. Anê.

25 Hãmri nhũm Jejus amnhĩ tã wa kuma nê wa kãm tanhmã amnhĩ jarênh to nê wa kãm:

—Hêxta waa nê. Pêr ãm mẽ ate mẽmoj mã ajamaxpêr týx mex kêt kumrêx. Na pre ra Tirtûm nhỹ hã kapêr jarênh xwýnhjaja Tirtûm kapêr ã kagà htũm kamã ã kot amnhĩ nhĩpêx anhýrja kukamã hprĩ hã harê nê hã kagà. Mẽ akukamã mẽ anhĩgêjtê mã harê nê hã kagà. Tã ka mẽ kormã aprĩ hã mar týx kêt nê.

26 Kêt mẽ anê na Tirtûm kot ãm xwýnhta ty. Tã ra akupým htĩr nê akupým kaxkwa hwýr àpir kaxyw. Kot mẽ ato amnhĩptãr kaxyw ra akupým hwýr àpir mã.

27 Amnepêm na pre finat Mojesja tanhmã hkukamã mẽ anhĩgêjtê mã harênh to nê hã kagà. Nê hprĩ hã harênh o pa. Nhũm hpãnhã Tirtûm nhỹ hã kapêr jarênh o mẽ pa xwýnhjaja ma anê nê mẽ kãm harênh o pa. Anê.

Nhũm pre ã Jejus wa hkôt hprĩ hã wa kãm amnhĩ jarênh anhýr o tẽ. Te ho nhãm mēhõ jarênh pyrãk nom tãm wa kãm amnhĩ jarênh o wa hkôt tẽ. No nhũm kormã wa hprĩ hã kêp Jejus ã omunh kêt nê.

28-29 Nhũm ã wa kãm amnhĩ jarênh anhýr o mõi rãhã nhũm mẽ ra wa õ krĩ hwýr hpõx o mõi. Nhũm ra kamãtre nhũm Jejus te kot wa rer nê nhỹhým ma htẽm kaxyw pyrãk o amnhĩ nhĩpêx nhũm wa tee ri omu nê kãm:

—Kwa xà kot kaj wa ixre nê ma tẽ? Ra kamãt o mõi kênã. Kwa ma wa ixkôt tẽ nê wa inhõrkwy kamã mãn wa ixri pøj. Anê.

Hãmri nhũm wa kuma nê ma wa hkôt tẽ.

30 Nê mẽ wa õrkwy hwýr pøj nê hwýr agjê. Hãmri nê apkur kaxyw hkrĩ nhũm Jejus tãm pãwti py nê Tirtûm mã harê nê hpãnhã ho axkjê nê wa kãm kugõ.

31 Hãmri nhũm wa atã kêp Jejus ã omunh kurê kumrêx. Jao nhũm wa kêp akunok nhũm wa tee ýr xà kamã hapêr nhũm hkaprý mex nê xa.

32 Hãmri nhũm wa tee ri axpên pumu nê ri hkukamã hamaxpêr nê axpên mã:

—Hêxta waa nê. Xep tãm na. Tãm na pahkôt mõi nê pry hã hprĩ hã pamã Tirtûm kapêr ã kagà jarê pu hkôt pahkĩnh nê mar o mõi. Hêxta waa nê. Xep tãm na. Anê.

33-35 Hãmri nê wa kãnhmã xa nê kato nê ujanãr kurê kumrêx. Hãmri nê ma akupým Jerujarê hwýr wa hkwýjê hwýr tẽ. Nê mẽ hwýr pøj nê axà. Nhũm Jejus nhỹ hã mẽ ahkre ho mẽ pa xwýnh pê 11jaja ra axpên wýr akuprõ nê hkrĩ. Mẽ hkwýjê mẽ axpên wýr akuprõ nê axpên mã tanhmã Jejus jarênh to ho hkrĩ. Hãmri nhũm wa mẽ hwýr axà nhũm mẽ wa omu nê wa kãm:

—Kwa na xep ra Jejus akupým htĩr nê Simãw Pêtre hwýr kato. Anê.

Hãmri nhũm wa mẽ kuma nê mẽ kãm:

—Tý na akupým htĩr kênã. Na pa wa ijaxwýja ham omu. Na pry hã

wa ixtã ajêt nê ma wa ixkôt mō nê wa inhōrkwỹ kamã pōj. Hãmri pa mē ixàpkur kaxyw ixkrĩ nhũm pãwti py nê Tĩrtũm mã harê nê ho axkjê nê wa inhmã kugō pa wa ixprĩ hã kêp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwỳjê piitã hwỳr kator ã harênh

Matêwre 28.16-17; Makre 16.14; Juãw 20.19-23

³⁶ Nhũm mē kormã axpên mã Jejus jarênh o hkrĩ rôm nhũm tãm nhỹhỹnh mē hwỳr axà nê xa. Mē haêr pê mē hwỳr nhỹhỹnh axà nê mē kãm:

—Pa? Xàn ka mē arĩ akrĩ? Anê.

³⁷ Hãmri nhũm mē amnhĩ jaêr pê omunh jao kãnhmã hakry hpar o mra. Jao hakryk kãm ma htỳx kãm omunh o hkrĩ.

³⁸ Hãmri nhũm mē kãm:

—Kwa mon ka mē amã ixpyma kamã tee ri ixpumunh o akrĩ? Kwa mē ixkarō hã ixkamnhĩx nê amã ixpyma hkêt nê.

³⁹ Na pa akupỹn inhĩ ho mē awỳr ixkato nê xa. Ga mē inhĩhkra kamã prek tatak xàja pumu. Nê ixpar kãm omu. Kwa mē amã ixpyma hkêt nê. E mē mãmrĩ mra nê anhĩhkra ho ixkupê. Kêp apu ixkarō hpix ronhỹx ka mē inhĩ kupênh kêt nê. Mo mēhkarōja ã? Nà na pa akupỹm ixtĩr nê inhĩ ho mē awỳr ixkato. Anê.

⁴⁰ Hãmri nê mē kãm amnhĩ nhĩhkra hpê nê mē kãm amnhĩ par pê.

⁴¹ Tã nom nhũm mē arĩ akryk omunh o hkrĩ. Mē kot omunh nê hkĩnh tã tee ri omunh o hkrĩ. Hãmri nhũm tee ri ja hã mē omu nê mē kãm:

—E kwa mē inhmã mēmoj japêr pa kukrê. Anê.

⁴² Hãmri nhũm mē kãm tep gōj kãm ãmta gō

⁴³ nhũm kupy nê hkur o nhỹ nhũm mē arĩ hã omunh o hkrĩ. Jao ra akupỹm htĩr ã omunh kurê kumrêx.

Jejus akupỹm nojarêt nê hkwỳjê mã mēmoj tã karō

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵ Hãmri nhũm Jejus hprĩ hã mē kãm Tĩrtũm kapêr ã kagã htũm kot

hkukamã harênh ã amnhĩ jarê nê mē kãm:

—Nà kormã ixtyk kêt ri na pa pre ixprĩ hã mē amã amnhĩ kukamã amnhĩ jarê. Tĩrtũm kapêr ã kagã htũm kot tanhmã mē kot inhĩpêx to hkukamã ijarênhja. Na pre finat Mojes Tĩrtũm nhỹ hã ixkukamã tanhmã ijarênh to. Nê Tĩrtũm nhỹ hã kapêr jarênh o mē pa xwỳnhjaja Mojes mỳr pê haxwỳja ixkukamã tanhmã ijarênh to. Nê Tĩrtũm mex o mex ã mē grer ã kagã xwỳnhjaja haxwỳja ixkukamã tanhmã ijarênh to. Jajê piitã na prem Tĩrtũm kapêr ã kagã htũm kamã ixkukamã ijarê.

⁴⁶ Nê ijarênh o:

Tĩrtũm kot mē pakaxyw ãm xwỳnh pê Krisja koja nhỹrmã ty. Nê htyk o apkati axkrunêpxi nê akupỹm htĩr.

Anhỹr o mē kot ijarênh. Tã pa ra mē kot ixkukamã ijarênh xà hkôt ã mē anê amnhĩ nhĩpêx anê.

⁴⁷ —No ãm Tĩrtũm kapêr ã kagã htũm kot papxipix ixkukamã ijarênh kêt. Kamã mãânên mē kajaja tanhmã mē akukamã mē ajarênh kute. Mē apê ixkôt amnhĩ xunhwỳr xwỳnhjaja ixwakre kamã tanhmã mē ate inhmã amnhĩ nhĩpêx to ho apa hkukamã tanhmã mē ajarênh kute. Nê mē ajarênh kot:

E mē ate ixkôt amnhĩ xunhwỳr xwỳnhjaja. Kêr ka mē ma pika piitã hkôt mē kãm Tĩrtũm kot mē awỳr mênh xwỳnhhta jarênh o ri mē hkôt apa. Mē kot mē amar nê amnhĩ tomnuj kaga nê Tĩrtũm kôt amnhĩ xunhwỳr kaxyw. Kêr kê Tĩrtũm ja hã mē omu nê amnhĩ katut kôt mē kot amnhĩ tomnuj rênh pa. E kêr ka mē ma krĩ piitã hkôt mē kãm ã ja jarênh anhỹr o ri mē hkôt apa. Krĩ pê Jerujarê kumrêx kãm hãmri nê rĩ kormã pu hã krĩ kuhê xwỳnh piitã hkôt ajapōj nê mē kãm harênh o ri apa. Anê.

Ã Tĩrtũm kapêr ã kagã htũm kot mē akukamã mē ajarênh kot anhỹr.

48 Tã kêr ka mẽ ã mẽ kãm tanhmã ijarênh to ho ri apa anê.

49 No ãm kormã. Kêr paj ma akupỹm kaxkwa hwỳr api hãmri nê amnhĩ pãnhã mẽ awỳr Tĩrtũm Karõ rê mãn. Tĩrtũm kot ixte amnhĩ nhĩpêx ã ijarênh xà hkôt kot paj amnhĩ pãnhã mẽ awỳr kurê. Tã kêr ka mẽ kormã krĩ ja kamã kutêp apa. Kêr kê mẽ awỳr wrỳ nê mẽ amã agjê ka mẽ rĩ kormã angrà nê ma ỹ hã mẽ kãm ijarênh o ri mẽ hkôt apa. Anê.

Jejus kot akupỹm kaxkwa hwỳr àpir ã harênh

Makre 16.19-20; mãănêh Atre 1.9-11

50 Tã nhũm Jejus Jerujarê rũm hkôt mẽ pa ho pa xwỳnhjê kator nê ma krĩ pê Petãn wỳr mẽ o mỗ. Nê kormã hwỳr mẽ o mỗr ri nhỹri mẽ o xa nê kãnhmã ìhkra pê nê mẽ ho Tĩrtũm wỳ.

51 ã mẽ ho hwỳr anhỹrja rôm nhũm Tĩrtũm amnhĩ wỳr ho àpir o mỗ nhũm mẽ noo mã ma akupỹm tẽn api.

52 Hãmri nhũm mẽ kãm mex o mex ã harênh pê ma akupỹm àpir kãm omunh o kuhê. Nhũm ma tẽ nê mẽ kêp kakrãm axà nê mẽ kêp akunok. Hãmri nhũm mẽ awjanã nê ma akupỹm Jerujarê hwỳr hkĩnh nê pa.

53 Hãmri nê apkati mẽ Tĩrtũm mã amnhĩ jarênh xà hã ixkre hwỳr agjê nê kamã Tĩrtũm mã mex o mex ã harênh o hkrĩ rãhã nê.

Tã ãm ja pix ixkrãmnhwỳ Teopre. Ixpê Rukre na pa awỳr kagàja nhĩpêx nê kamã Jejus kot tanhmã amnhĩ nhĩpêx to hã harê nê hã kagà nê awỳr kumê.

Juāw Juāw kot tanhmā Jesus kot amnhĩ nhĩpêx to ho pa hã kagà

Juāw na pre kagàja nhĩpêx. Na pre määnên Wam Juāw nê Sikũn Juāw nê Hapuhã Juāw nê Apokarip nhĩpêx. Juāw Paxis kêt axtem Juāw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhỹr o pa hkêt ri na pre kêt tep kanhêr xwýnh. Nê kêt Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêt Tirtũm Kra hã harê nê hã kagà. Nê ãm pix kukwak ri Tirtũm wa kuri mẽ pahtĩr tũm nê mẽ papa ho mẽ papa hã harê nê hã kagà. ã na pre Juāwja mẽ pamã Jesus jarê nê hã kagà anê.

*Jesus te kot Tirtũm pyræk ã harênh
Matêwre 1.23; Juāw 8.12, 8.58,
10.30, 20.28; määnên Atre 10.36; Sikũn
Korĩt 4.4; Piripos 2.6-11; Korosê 1.13-
17, 2.9; Xitre 2.13; Eprêw 1.1-4; Wam
Juāw 1.1-4, 5.20; Apokarip 1.17-18*

¹ Amnepê mã kormã mẽmoj kêt ri nhũm kot Tirtũm kapêr o amnhĩrĩt xwýnhja Tirtũm kôt pa ho pa. Te kêt uræk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ määnên ãm tipxi. ãm wa tipxi rãhã nê pa ho pa.

² Kormã mẽmoj kêt ri na pre Tirtũm kapêr o amnhĩrĩt xwýnhhta Tirtũm kôt ri pa ho pa.

³ Nê Tirtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tirtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

⁴ Nê Tirtũm o amnhĩrĩt xwýnhhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tirtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê.

⁵ Ja kaxyw na pre wrý nê ri mẽ kãm Tirtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

*Juāw Paxis kumrêx kot tanhmã Je-
sus jarênh to hã harênh*

*Matêwre 3.1-3; Makre 1.1-4; Rukre
3.2-6*

⁶ Tã nhũm kormã Jesus mẽ kãm kapêr o pa hkêt ri nhũm Juāw Paxis kumrêx mõ nê hkukamã Tirtũm nhỹ hã mẽ kãm tanhmã harênh to ho pa.

⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamaxpêr kaxyw.

⁸ No Juāw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhhta kukamã mẽ kãm harênh o pa.

⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mēhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhhta. Kojã tokyx mẽ pakamã pøj pu mẽ omu. Kojã pøj nê mẽ piitã mẽ kãm Tirtũm kapêr jarênh o ri pa. Mẽ pahte pahprĩ hã mar mex kaxyw. Anê.

*Tirtũm kot mẽ ho hkra hprãm
xwýnhjê jarênh*

Rômãn 8.14; Karatas 3.26; Epes 1.5

¹⁰ Tã nhũm Jesus man kot mẽmoj piitã ho kator xwýnhhta wýr wrý nê mẽ hkôt ri pa. No nhũm mẽ kot

kêp mēmoj piitā ho kator xwýnh ā omunh kêt jakamā na prem kapēr ma nē ām kuma nē amnhĩ kaxyw hkôt hamaxpēr kêt nē.

¹¹ Na pre wrý nē mē pakamā ĩ ho kato. Kêp mē pahpiitā mē pahto kator xwýnh tã nhũm mē ohtô nē omu nē ām omu nē hkôt amnhĩ nhĩpêx kêt nē.

¹² Na prem ām grêre nē kuma nē amnhĩ kaxyw hkôt hamaxpēr nē hkôt amnhĩ xunhwý. Hāmri nhũm amnhĩ tã mē omu nē mē kām:

—E nà ām hāmri. Ra mē ate amnhĩ kaxyw ixkôt ajamaxpēr nē ixkôt amnhĩ xunhwýr jakamā na ka mē ixkukwak ri apê Tirtũm kraa. Anē.

¹³ Na htem ā kêp Tirtũm kra hprām xàj Jejus kôt amnhĩ xunhwýr anē. No na htem mē katorxà nhõxà hkre rũm hapôx kôt kêp Tirtũm kra hkêt nē. Rý amnhĩ krā hkôt tanhmā amnhĩ nhĩpêx to kukwak ri kêp hkra hkêt nē. Ām Tirtũm tãm kot mē ho hkra pix kukwak ri na htem kêp hkra.

*Jejus wrýk nē ĩ ho kator ā harēnh
Matêwre 1.20; mãänēn Rõmãn 1.2-4; Piripos 2.6-7; Eprêw 2.9, 4.15; Wam Juāw 4.2*

¹⁴ Jakamā na pre Tirtũm o amnhĩrĩt xwýnhhta mē pahwýr wrý nē mē pakamā ĩ ho kato nē mē pakamā pa. Kêp Tirtũm Kra hã pixi mex na pre. Nē kot amnhĩ nhĩpêxja te Tirtũm kot amnhĩ nhĩpêx pyrāk. Urāk nē mex o mex. Nē urāk nē mē pakutā nojarêt xwýnh. Na pre hte katāt kôt Tirtũm kapēr jarēnh o ri mē hkôt pa. Pa prem kuma nē mex o mex ā omu.

¹⁵ Nhũm Juāw Paxis na pre hkukamā mē kām harēnh o ri pa nē mē kām:

—E ra ixte mē amā harēnh o ri ixpa xwýnhhta na ra pøj. Te pa ixte wa nē ixkator pyrāk nom amnepê mã kormā ixkêt ri nhũm htĩr rāhã nē pa ho pa. Ham ĩ ho kator tã kêp Tirtũm Kra jakamā urāk nē rāhã ho rāhã hã pa xwýnh na. Jakamā kot amnhĩ to rax o kot ijakrenh par. Anē.

¹⁶ Nē kêp mē pakutā nojarêt rāhã nē pa ho pa xwýnh jakamā na hte

mē pahto mex rāhã pu mē kukwak ri pamex nē ri papa ho papa.

¹⁷ Na pre finat Mojesja mē panhĩgêjtjê mã Tirtũm kapēr jarēnh o ri mē hkôt pa nē mē kām:

—Na pre Tirtũm mē pahte tãm amnhĩ nhĩpêx o papa hã mē pamā karō. Jakamā kot puj mē kot mē pamā mēmoj tã karō xà hkôt ā amnhĩ nhĩpêx anhýr o papa nē ra tãm amnhĩ nhĩpêx o papa. Anē.

Nhũm pre Mojesja ā mē kām kapēr o pa anē. Hāmri nhũm mē kuma no ām tee ri kām Tirtũm kôt tãm amnhĩ nhĩpêx o pa hprām kaprý. Jakamā nhũm hpānhã Jejus Krisja wrý nē mē pamā kapēr õ ho kapēr o pa nē mē pamā:

—E mē ate Tirtũm kôt amnhĩ nhĩpêx o apa hkêt tã nhũm arĩ kām mē ajapê nē. Nē kām mē ato mex prām. Jakamā kot kaj mē amnhĩ to awý nhũm tanhmā mē akrã hto ka mē ra tãm ri amnhĩ nhĩpêx o apa. Ām hāmri na pa ā mē amā ja jarēnh anē.

Anhýr o mē pamā Tirtũm kapēr jarēnh o pa. Tirtũm kapēr na mex o mex.

¹⁸ Nē aa mē pahtõ mē pahte pano ho Tirtũm pumunh kêt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipêêxàja pyrāk jakamā na pre wrý nē hprĩ hã tanhmā kute hã mē pamā harēnh o pa. Jakamā na pu mē ra pahpiitā Tirtũm kot amnhĩ nhĩpêx ā omu nē mar mex nē.

Juāw Paxis kot mē kām Jejus jarēnh o pa hã harēnh

Matêwre 3.1-12; Makre 1.1-8; Rukre 3.15-17; mãänēn Atre 19.4

¹⁹⁻²⁸ Na pre Juāw Paxis ma hkwýjê hkôt mē kām Jejus jarēnh o pa nhũm mē hkwýjaja kuma nē amnhĩ kaxyw Jejus kôt hamaxpēr nē hkôt amnhĩ xunhwý. Hāmri nhũm Juāw Paxis ja hã mē omu nē Tirtũm mã mē hkrã kumrã. Pyhti pê Jotāw nhĩkjê hã krĩ pê Petān tã ri mē hkrã kumrār o pa. Hāmri nhũm krĩ pê Jerujarē kamā Ijaew krãhtũmjaja harēnh ma nē ma

hwÿr hkwÿjê rē. Mē kot tanhmā hkukjêr to nhūm kot mē kām tanhmā amnhī jarēnh to kaxyw. Jakamā nhūm mēō patre hkwÿjê mē Tirtūm mā amnhī jarēnh xà hā ixkre kamā mē ho ajuta xwÿnh kwÿjê mē Parijew nhō xwÿnh kwÿjê mē nhūm mē ma hwÿr mra. Juāw Paxis wÿr mra nē omu nē kām:

—Pa. E ot pa mē awÿr mra. Kwa mē inhmā amnhī jarē. Apê mē atō na ka we? Xà ka na apê Tirtūm kot mē ixkaxyw axām mā xwÿnhhta na ka nà? Xà ka na pa htem amnhī wÿr akamā ijamak o ixpa? Anē.

Hāmri nhūm mē kuma nē mē kām: “Nà pa hkêt.” Anē hāmri nhūm mē kām:

—Tō mǎn xep apê amnepê mā Tirtūm nhÿ hā kapêr jarēnh xwÿnh pē finat Erisja. Hā na ka tanhmā amnhī to nē akupÿm atīr nē mē ixkôt apa nà? Anē.

Hāmri nhūm mē kām:

—Nà ixpê Eris kêt. Anē.

Hāmri nhūm mē kām:

—Tō mǎn xep apê finat Mojes kot mē kām harēnh o pa xwÿnhhta na ka nà? Anē.

Hāmri nhūm mē kuma nē kê axte mē kām:

—Nà ixpê tām kêt. Anē.

Hāmri nhūm mē tee ri kot ā amnhī tǎ aprār anhÿrja ma nē kām:

—Kwa apê jajê hō hkêt tǎ na ka hte mē hkrā kumrār o ri apa. Kwa nà akatāt kôt mē inhmā amnhī jarē. Pa mē ama nē ma akupÿm mra nē mē kot awÿr mē ixrēnh xwÿnhjê mā tanhmā ajarēnh to. Tanhmā na ka hte mē kām amnhī jarēnh to ho ri apa? E kwa mē inhmā amnhī jarē pa mē ama. Anē.

Hāmri nhūm tǎ hprī hā mē kām amnhī jarē. Amnepê mā mē hkukamā Tirtūm nhÿ hā kapêr jarēnh xwÿnh pē finat Ijais kot hkukamā tanhmā harēnh to nē hā kagà xà hkôt nhūm mē kām amnhī jarē nē mē kām:

—Tōe. Nà kot paj ixprī hā mē amā amnhī jarē ka mē inhma. Amnepê m Tirtūm kapêr jarēnh xwÿnhjê hō pē finat Ijaisja na pre hte mē kām mēhō hkukamā harēnh o ri pa. Mēhō kot

mē panhō Pahihti hkukamā htēm nē kapôt ā kutêp mē kām harēnh o pa xwÿnhhta nhūm pre hkukamā harēnh o ri pa. Nē mē kām harēnh o:

Koja nhÿrmā mēhōja kapôt ā mōn pōj nē mē kām tanhmā ujarēnh to ho ri pa. Nē mē kām ujarēnh o: “E mē inhma. Koja Tirtūm tokyx mē pahwÿr mē panhō Pahihti mē nhūm wrÿ nhūm mē piitā omu. Jakamā kwa mē tokyx kutêp tām amnhī nhÿpêx o ri apa. Te ho mē kot mēhō kutêp pry ho mex pyrāk o amnhī nhÿpêx o ri pa. Jao amnhī nhÿ ho tām amnhī nhÿpêx nē tām axpēn nhÿpêx o ri apa. Pahihtita kutêp.”

—Anhÿr o na pre hte finat Ijaisja kot Pahihti hkukamā harēnh o ri pa xwÿnhhta kukamā harēnh anē. Tǎ paa. Pa na pre Ijaisja ā ixkukamā ijarēnh anhÿr o pa. Pa na pa hte ā Pahihti kutêp mē kām harēnh o ri ixpa anē. Tǎ ā ixte harēnh anhÿr xwÿnhhta na ra mē pakamā pa ka mē kormā ja hā omunh kêt nē. Kukamā na pa hte mē piitā mē kot hkôt amnhī xunhwÿr ā mē omunh kaxyw gō pix o mē hkrā kumrār o ri mē hkôt ixpa. Nom na pre ra mē pahwÿr Tirtūm kot mē pakaxyw ām xwÿnhhta tām mē pahwÿr wrÿ. Àhpumunh tÿx o kot ijakrenh jakamā na pa hte ām kukwak ri ixpa nē amnhī tǎ hā ixpijaàm o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹ Tǎ nhūm apkati nhūm Juāw Paxis amnhī wÿr Jejus pumu nē mē kot mar o kuhê xwÿnhjê mā ìhkra ho ahkre nē mē kām:

—E. Onēj Tirtūm kot mē pakaxyw ām xwÿnhhta tē. Mē pahpê Ijaew na pu htem xatā pahte amnhī tomnuj pānhā amnhÿrer kaxyw Tirtūm mā pahkrit ôwēhti hkra nyw kwÿ hpa nē ho amnhī pānhā kām amnhÿrer o papa. No kêt htēm nēj koja nhÿrmā

kām mẽ pahpiitā mẽ pahte amnhĩ tomnuj pānhā amnhĩrer pa.

³⁰ Na pa pre ra mẽ amā harēnh o: “Te pa ixte wa nẽ ixkator nẽ ixtĩr nẽ ixpa pyrāk. Nom amnepēm kormā ixkēt ri na pre htĩr rāhā nẽ pa ho pa. Nẽ ĩho wrýk nẽ jar kator tā kęp Tĩrtũm Kra jakamā urāk nẽ rāhā nẽ pa ho pa xwýnh na. Jakamā kot amnhĩ to rax o kot ijakrenh par.” Anhýr o pa pre mẽ amā harēnh o ri ixpa ka prem inhma.

³¹ –Ixte mẽ amā ā harēnh anhýr tā ijaxwýja kormā ixte kęp Tĩrtũm Kra hā omunh kēt nẽ ām hkukamā Tĩrtũm nhỹ hā mẽ amā ā harēnh anhýr o ri ixpa. Nẽ hkukamā Tĩrtũm mã mẽ akrā kumrār o ri ixpa. Tā na pa kęp Tĩrtũm Kra hā omu nẽ ā mẽ amā ahkre anẽ ka mẽ omu. Anẽ.

³²⁻³³ Nhũm pre ā Juāw Paxis mẽ kām Jejus jahkre anẽ nẽ mẽ kām:

–Nā Tĩrtũm na pre ixte mẽ akrā kumrār o ixpa kaxyw inhma hā karō. Tā na inhma kot mẽ pakaxyw ām xwýnhta o amnhĩrit nẽ inhma harēnh o: “Koja nhỹrmā Ixkarōja mēhō hwýr wrý nẽ kuri arĩk. Ka ja hā omu nẽ kęp Ixkra hā omunh kurē kumrēx. Kojā amnhĩ xō ri amnhĩ pyrā nẽ mẽ kām Ixkarō nhōr o pa nhũm mẽ hkarō mã agjē.” Anhýr o inhma harē. Tā na pa ra omu. Na pre Tĩrtũm Karō kaxkwa rūm te tuuti pyrā nẽ hwýr wrýk o tẽ nẽ ĩkre hā xa.

³⁴ Pa ā kot hipēx anhýr ā omu nẽ kęp Tĩrtũm Kra hā omunh kurē kumrēx. Jakamā na pa ā mẽ amā ahkre nẽ mẽ amā harēnh anẽ. Anẽ.

Juāw Paxis kôt pa xwýnh wa kot Jejus kôt pa hā wa harēnh

Atre 19.4

³⁵ Tā nhũm apkati nhũm Juāw Paxis axte Jejus pumu. Kot hkôt ri pa ho pa xwýnh mẽ wa nhỹri xa nẽ omunh o xa.

³⁶ Nhũm ra mẽ hānh tẽ nhũm Juāw Paxis omu nẽ hkôt ri pa xwýnh wa kām:

–E oněj Tĩrtũm kot mẽ pakaxyw ām xwýnhta tẽ. Něj koja mẽ pahte amnhĩ tomnuj pānhā amnhĩre. Anẽ.

³⁷ Hāmri nhũm wa kuma nẽ omu nẽ ma hkôt tẽ nẽ hā ajēt.

³⁸ Nhũm wa omu nẽ wa kām: “Pa mo na?” Anẽ nhũm wa kot kęp mẽ ahkre xwýnh ā omunh jakamā kām:

–Nā wa ixte ma akôt ixtēm nẽ nhỹri anhōrkwý pumunh mã na pa wa akôt tẽ. Anẽ.

³⁹ Hāmri nhũm wa kām:

–Tōe. Nā wa kam nẽ rĩ ma ixkôt tẽ. Anẽ.

Hāmri nhũm wa kuma nẽ ma hkôt wa tẽ nẽ ōrkwý hwýr pøj nhũm ra amykry nhũm wa hkôt axā nẽ kuri ýr o kamāt hāmri nẽ kato nẽ ma akupým tẽ.

⁴⁰ Kôt htēm xwýnhjē hōta na pre kęp Andre. Simāw Pêtre htō na pre. Nẽ kaxyw hōja. Wa kumā na pre Juāw Paxis Jejus jahkre nẽ harē nhũm wa ma hkôt tẽ. Tā wa ra akupým wa tẽ.

⁴¹ Hāmri nhũm Andreja htō Simāw wýr tẽ nẽ kām:

–Kwa na pa wa jarāhā Tĩrtũm kot mẽ pakaxyw ām xwýnhta pumu. Ma pu hwýr ka wa ixwar ano ho omu nā. Anẽ.

Ijaew kapēr kām “Tĩrtũm kot mẽ pakaxyw ām xwýnh” anhýrja te kot Gres kapēr kām “Kris” anhýr jarēnh pyrāk. Ijaew na prem ā Jejus jarēnh anẽ nẽ harēnh o: “Tĩrtũm kot mẽ pakaxyw ām xwýnh.” Anhýr o harē.

⁴² Jakamā nhũm ā Andreja htō mã harēnh anẽ nẽ ma akupým hwýr o tẽ. Nẽ wa hwýr pøj nhũm wa omu. Wa kęp Juāw kra hā wa omu hāmri nẽ Simāw mã kapēr nẽ kām:

–Pa Simāw. Nā apē Simāw tā kot paj axte atā anhĩxi hō mẽ. Kot kaj mãānēn apē Septi. Anẽ.

Mẽ pakapēr kām Septija te kęp “kēn” jarēnh pyrāk. No Gres kapēr kām te kęp “Pêtre” jarēnh pyrāk. No Ijaew kapēr kām kęp “Septi.” Jakamā nhũm pre Jejus ā Simāw Pêtre hā hixi mēnh anẽ.

Jejus kot amnhĩ kôt Firipti mẽ Natānaew wa hwýr ā harēnh

⁴³⁻⁴⁴ Tā nhũm apkati nhũm ra Jejus pyka pē Garirej wýr nojarēt nẽ nhỹri Firipti pumu. Firiptija Andre mẽ Simāw Pêtre wa urāk nẽ krĩ pē Pesēj nhō xwýnh na pre. Jakamā nhũm

Jejus nhÿri omu nê amnhÿ kôt kuwÿ nê kãm:

–E kwa ma ri ixkôt apa ho apa. Anê.

⁴⁵ Hãmri nhÿm kuma nê ma tẽ nê nhÿri Natãnaew pumu nhÿm nhÿri pÿ hpar parpê nhÿ nhÿm omu nê kãm:

–Kwa na pa jarãhã finat Mojes kot amnepêm mēhō hã kagà xwÿnhhta pumu. Tÿrtÿm kot mē pakaxyw ãm xwÿnhhta na. Tÿrtÿm nhÿ hã kapēr jarēnh o mē pa xwÿnhjaja kot hkukamã harēnh nê hã kagà xwÿnhhta. Kêp Najare nhō xwÿnh nê mãânēn kêp finat Juje hkra. E kwa tokyx pu hwÿr ka ixkuxwar ano ho omu. Anê.

⁴⁶ Hãmri nhÿm tee ri kot tanhmã harēnh toja ma nê kãm:

–Tk. Kokÿ. Najare nhō xwÿnh piitã kot amnhÿ to mexti hã kot kêt we hō kêp Tÿrtÿm kot mē pakaxyw ãm xwÿnh. Anê.

Hãmri nhÿm kãm:

–Kwa nã ã akapēr anhÿr kêt nê. Ma ixkôt tẽ nê ixpyrà nê ano ho omu mãn. Nê rÿ ã ri akapēr anê. Anê.

Hãmri nhÿm kuma nê ma hkôt tẽ.

⁴⁷ Hãmri nhÿm Jejus amnhÿ wÿr wa omu nê kuri mē kuhê xwÿnhjê mã Natãnaew jarēnh kurê kumrêx nê harēnh o:

–E oněj Ijaew òja mē pahwÿr hpôx o tẽ. ãm hãmri na hte tãm amnhÿ nhÿpêx o pa. Na hte higêt finat Jako kurom hêx rom ri tanhmã mē kãm amnhÿ to hêx to ho pa hkêt nê. Na hte ãm kapēr mex pix o ri kapēr o pa. Anê.

⁴⁸ Hãmri nhÿm tee ri amnhÿ tã kuma nê kãm:

–Kwa mēhō na pre ã amã ijarēnh anê? Aa ixte nhÿri apumunh kêt kumrêx tã ka ri ãm hãmri ã ijarēnh anê. Anê.

Hãmri nhÿm kãm:

–Nã mēhō kot tanhmã inhmã ajarēnh to hkêt. ãm pa na pa hte inhno ho apumunh o ixpa. Kormã Firipti kot awÿr htēm nê amã ijarēnh kêt ri pa ra ixprÿ hã inhno ho apumu. Na ka kormã pÿta parpê nhÿ pa apumu. Anê.

⁴⁹ Hãmri nhÿm tee ri kot hprÿ hã harēnh ã amnhÿ tã kuma nê kãm:

–Kwa mē ijahkre xwÿnh. Pēr ãm hãmri apê Tÿrtÿm Kra kumrêx jakamã na ka ã ijarēnh anê. Xep ka na mē ixte amnhÿ wÿr akãm ijamak o ixpa xwÿnhhta na ka. Nã ka na apê mē ixpê Ijaew nhō Pahihti. Anê.

⁵⁰ Hãmri nhÿm Jejus kuma nê kãm:

–Nã ãm hãmri na ka ixte pÿ hpar pē apumunh ã ajarēnhja ma nê hkôt pix mã ixpê Tÿrtÿm Kra hã ixpumu. Tã kot kaj ja nhÿrô pē axte mēmoj mex o kot ja jakrenh pumu.

⁵¹ Koja nhÿrmã kaxkwa axkjê nhÿm Tÿrtÿm kapēr o mē wÿrk xwÿnhjaja kurÿm axpēn japa ka mē omu. Finat Jako pyrà nê mē omu. Ixte Tÿrtÿm kot mē akaxyw ixãm xwÿnh wÿr koja mē ã wÿrk nê amnhÿ nhÿpêx anê ka ja hã mē omu. Kwa jam ajamaxpēr tÿx rãhã ho apa. Anê.

2

Jejus kot gô ho mē kãm wÿhti nhÿpêx ã harēnh

¹ Tã nhÿm apkati axkrut nê hapêx nhÿm Jejus arÿ Garirej kamã pa. Nhÿm krÿ pē Kanã kamã axpēn mã wahōj wa rer kaxyw nhÿm Jejus katorxã ma mē hwÿr mō.

² Hãmri nhÿm mē amnhÿ wÿr Jejus mē hkôt ri mē ixpa xwÿnhjê wÿ pa mē ijaxwÿja ma mē hwÿr mō nê ra mē hwÿr pøj.

³ Hãmri nê mē hkôt wa hã ixkÿnh nê apku nê wÿhti hkwy ho ixkôm o ixkrÿ. Tã nhÿm ra wÿhti mē kêp hapêx nhÿm Jejus katorxãja harēnh ma nê Jejus mã harē nê kãm:

–Xê Jejus. Na xep ra mē kêp wÿhti hapêx pa. Xat ka tanhmã mē ho ajuta hto mē? Anê.

⁴ Hãmri nhÿm kãm:

–Tôe. Kwa tee ri ajamaxpēr kêt nê. Kot paj tanhmã mē kãm ho. Nom kot paj kormã ixpê Tÿrtÿm kot mē akaxyw ixãm xwÿnh ã pa kormã amnhÿ to amnhÿrÿt kêt nê. Anê.

⁵ Hãmri nhÿm katorxã kuma nê mē kãm mē àpēnh xwÿnhjê hwÿr tẽ nê mē kãm:

–An koja Jejus mē awÿr tẽ nê tanhmã mē amã mēmoj tã karō hto

ka mẽ ama nẽ kãm ho anhÿr kurê kumrêx. Anẽ.

⁶ Nhũm mẽ kuri kẽn o poti kęp 6 nẽ kuhê. Piitã umpÿm rũnh kumrêx. Koja hõ pyxi nẽ nÿt nẽ kamã gô kęp 80 rit nẽ hkwÿ kamã kęp 100 rit. Ijaew na htem apkur kaxyw nẽ amnhĩ nhĩkra kuhõnh japjê rũnh nẽ kormã apku. Nẽ apkur pa nẽ axte amnhĩ nhĩkra kuhõ. ã mẽ kot xatã amnhĩ nhĩkra kuhõnh jakamã nhũm pre htem amnhĩ ri ã poti rũnh kwÿ xunhwÿr anẽ. No nhũm ra hkapyrÿ nẽ kuhê.

⁷ Hãmri nhũm Jejus tẽ nẽ omu mẽ àpênh xwÿnhjê mã kãm:

—E mẽ ma mra nẽ gô ru nẽ ho poti kuhê mÿj piitã ho nÿt pa. Anẽ.

Nhũm mẽ kuma nẽ ma mra nẽ ho nÿt pa.

⁸ Hãmri nhũm mẽ kãm:

—Nã hãmri. Pãnhã hõ kamã gô hkwÿjanhi nẽ o tẽ nẽ mẽ anhõ patrãw mã agô kê hkwÿ ho ixkõ nẽ kamã ama. Anẽ.

Hãmri nhũm mẽ mar xà hkôt kãm hkwÿjanhi nẽ hwÿr o tẽ nẽ kãm kugõ.

⁹⁻¹⁰ Nom nhũm gôja arĩ kęp gô kumrêx kêt nẽ. Jejus kot tanhmã ho jakamã nhũm ra hpãnhã kęp wĩhti. Jakamã nhũm mẽõ patrãw wÿr hkwÿ ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. ãm htÿx ho wĩhti kumrêx ã hkamnhĩx nẽ mex kumrêx ã hkaki. Hãmri nẽ amnhĩ wÿr mjên nyw xwÿnh mã hpa ho apê nhũm hwÿr tẽ nhũm kãm:

—Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkôt omnu ho hapu nẽ mẽ kãm kugõ. Tã ka pêr mẽ axtem nẽ wam mẽ kãm omnu nhõr pa hãmri nẽ kormã mex kumrêxja o hapu nẽ mẽ kãm agõ. Kêt wĩhti ja na mex kumrêx. ãm mex o mex. Anẽ.

Jejus kot gô ho hipêx ã omunh kêt jakamã nhũm ã kãm kapêr anẽ. ãm mẽ àpênh xwÿnh pixjaja na prem ja hã omu.

¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhÿr kêt tã krĩ pê Kanã kamã ã mẽ kãm amnhĩ

nhĩpêx anhÿr o hkraz. Jao amnhĩ to rax o amnhĩ to rax ã mẽ inhmã amnhĩ to amnhĩrĩt. Pa mẽ ixpê hkôt ri ixpa xwÿnhjaja ã kot amnhĩ nhĩpêx anhÿr ã omu hãmri nẽ kęp Tĩrtũm kot mẽ pakaxyw ãm xwÿnh ã omunh kurê kumrêx.

¹² Tã nhũm Jejus hpãnhã ma krĩ pê Kapanaũ hwÿr mõ. Pa mẽ hkôt ri ixpa xwÿnhjaja nẽ katorxà nẽ htõjaja pa mẽ ma ixpiitã hkôt mõ. Hãmri nẽ hwÿr pøj nẽ kamã mẽ hkôt ixpa hã ixtã apkati grêre nẽ ma hpãnhã krĩ hõ hwÿr ixpa.

Jejus kot Tĩrtũm nhõrkwÿ hwÿr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pê Pas ahtêp o mõ. Pasja ã mẽ ixpê Ijaew na pa htem amnepêem Tĩrtũm kot pika pê Ejit rùm mẽ inhĩgêjtê kator mã ija-maxpêr kaxyw axpên wÿr akuprõ nẽ hã ixkĩnh. Jakamã nhũm Jejus ma hkwÿjê hkôt krĩ pê Jerujarê hwÿr mõ. Pa mẽ ixpê hkôt ri ixpa xwÿnhjaja pa mẽ ma hkôt ixpa. Hãmri nẽ hwÿr pøj

¹⁴ nẽ Tĩrtũm mã amnhĩ jarênh xà hã ixkre hwÿr mra nẽ ixkre puhã kahêja wÿr agjê. Nhũm mẽ kamã axtem nẽ mẽmoj to wênê ho kuhê. Mõx o wênê nẽ ôwêhti ho wênê nẽ tutre ho wênê ho kuhê. Mẽ kot haprõr nẽ ho Tĩrtũm mã hkĩnh xà kaxyw mẽ kãm ho wênê. Nẽ kàxpore ho pinhpanh xwÿnhjaja haxwÿja mẽ kuri hkrĩ.

¹⁵ Hãmri pa mẽ Jejus kôt mẽ hwÿr agjê nẽ ja hã mẽ omu hãmri nhũm Jejus pê ja omnuj tÿx nẽ. Jakamã nhũm tee ri mẽ omu hãmri nẽ amnhĩm mry hkà ho mẽ htak xà nhĩpêx nẽ ho ixkreja nẽ mẽ piitã mẽ kator pa. Nẽ mõx nẽ ôwêhti nẽ mẽmoj piitã kator pa. Nẽ kàxpore ho pinhpanh xwÿnhjaja nhũm mẽ kęp mẽ õ mẽsti rênh pa nhũm mẽ hikàxpore pykap rôrõk pa nẽ angrà nẽ hikwÿ.

¹⁶ Hãmri nhũm Jejus tutre ho wênê xwÿnhjê mã kãm:

—Kwa mẽ anhõ tutre jamÿ nẽ tokyx ma mra. Na htem Inhĩpêxà nhõrkwÿ kamã mẽmoj to wênê hkêt nẽ. Kęp mẽ

ujaprôr xà hã ixkre hkêt. E kwa mẽ tokyx ma mra. Anê.

Nhũm pre ã mẽ kãm kapêr anê nhũm mẽ tee ri kuma hãmri nê ma mrar kurê kumrêx.

¹⁷ Pa mẽ hkôt mẽ ixpa ho ixpa xwýnhjaja ã kot mẽ hipêx anhÿr ã omu hãmri nê ra Tirtũm kapêr ã kagà htũm kot ã amnhĩ nhĩpêx anhÿrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhÿr pyrãk o harênh. Nê harênh kot:

Na pa hte Tirtũm nhõrkwÿ ho mex rãhã ho ixpa. Nhũm mẽmoj punuj hwÿr axà pa omu nhũm ja inhmã mex kêt nê.

Anhÿr o kot hkukamã harênh jakamã na pa mẽ ã Jejus kot mẽ hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtũmjaja kot Jejus kukjêr ã mẽ harênh

¹⁸ Tã nhũm Ijaew krãhtũmjaja tee ri Jejus kot ixkreja nê mẽ kator ã omu hãmri nê hwÿr mra nê kãm:

—Pa. Kwa mon ka ri ã Tirtũm mã amnhĩ jarênh xà hã ixkreja nê mẽ kator anê? Mêhõ na we mẽ ixwÿr amê ka ÿ hã ã mẽ hipêx anêhti? Nà xà Tirtũm na mẽ ixwÿr amê? E mẽ inhmã aa mẽ ixte mẽmoj pumunh kêt õ ho anê. Pa mẽ ja hã apumu hãmri nê Tirtũm kot mẽ ixwÿr amênh xwýnh ã apumunh kurê kumrêx. E kwa tokyx mẽ inhmã ho anê. Anê.

¹⁹ Hãmri nhũm mẽ kuma nê mẽ kãm amnhĩ jarê. Nom amnhĩ tã kuxi nê mẽ kãm awjarê nê mẽ kãm:

—Nà kot paj aa mẽ ate mẽmoj pumunh kêt õ ho pixi nê mẽ amã ho anê ka mẽ omu. Tirtũm nhõrkwÿ jaa. Kot kaj mẽ agrà pa ixtã apkati axkrunêpxi nê akupÿm hipêx ka mẽ ja hã ixpumu.

²⁰⁻²² Anhÿr o mẽ kãm kapêr. No ãm ixkreja jarênh kêt nê. Na pre ãm amnhĩ tã kuxi nê ã mẽ kãm kapêr anê. Mẽ kot hpÿr nhũm htyk ã apkati axkrunêpxi nê akupÿm htÿr ã mẽ kãm ã amnhĩ jarênh anê. Te mẽ kot Tirtũm mã amnhĩ jarênh xà hã ixkreta

grãnh nhũm hã apkati axkrunêpxi nê akupÿm kot hipêx parta pyrãk ã hã kuxi nê ã mẽ kãm amnhĩ jarênh anê. Jakamã nhũm mẽhprÿ hã mar mex kêt nê. Æm tee ri kuma nê kãm:

—Tk. Kwa ixkre ja na prem hipêx kaxyw nê hã amgrà xohtõ rax nê hipêx. Hã amgrà pê 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Mẽ kot hprÿ hã mar kêt jakamã na prem ã kãm kapêr anê. Pa mẽ hkôt mẽ ixpa ho ixpa xwýnhjaja ã mẽ kãm kapêr anhÿrja ã kuma nê hã inhnohtÿx rãhã ho ri ixpa. Tã nhũm mẽ kot Jejus pÿr nhũm hã apkati axkrunêpxi nê akupÿm htÿr nhõ arÿgrota ã pa mẽ kot ã amnhĩ jarênh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarênh anê. Mẽ kot hpÿr nhũm htyk ã apkati axkrunêpxi nê akupÿm htÿr ã amnhĩ kukamã amnhĩ jarênh mex nê. Te mẽ kot Tirtũm nhõrkwÿ grãnh par nhũm hã apkati axkrunêpxi nê akupÿm hipêx ã amnhĩ jarênh pyrãk. Æm hãmri na pre amnhĩ kukamã ã amnhĩ jarênh anê. Anê.

Jejus kot mẽ pajamaxpêr kôt mẽ pahpumunh ã harênh

²³ Tã nhũm Jejus mẽ hkôt mẽ ixpa ho ixpa xwýnhjaja arÿ Jerujarê kamã ri ixpa ho ixpa. Nhũm ra arÿgro pê Pasja kato nhũm mẽ piitã hkÿnh kaxyw axpên wÿr akuprõ. Nhũm Jejus mẽ kãm aa mẽ kot mẽmoj pumunh kêt kwÿ ho anhÿr o ri mẽ hkôt pa. Nhũm mẽ omu nhũm mẽ hkwyjaja Tirtũm kot mẽ pakaxyw ãm xwýnh ã hkôt hamaxpêr tã no ãm hkôt hamaxpêr tÿx kêt nê.

²⁴ Jakamã nhũm Jejus amnhĩ tã mẽ hamaxpêr ã mẽ omu nê hamaxpêr o:

—Nà mẽ kot ixkôt hamaxpêr kryre xwýnhjaja koja mẽ hã apkati grêre nê ixto hamakêtkati nê htÿx ri pa. Anê.

²⁵ Jejus kot mẽ pahte pahtÿx ri amnhĩ tomnuj o papa hã mẽ pahpumunh par. Nê pahtÿx ri pajamaxpêr punuj o papa hã mẽ pah-

pumunh par. Jakamā na pre ā mē harēnh anē.

3

Jejus mē Nīkotē wa kot axpēn mā kapēr ā wa harēnh

Juāw 1.12-13; māānēn Wam Pētre 1.23

¹ Tā nhūm Parijew nhō xwỳnhjē ō pé Nīkotē. Māānēn kēp Ijaew krāhtūmjē hō.

² Jakamā na pre Jejus jarēnh ma nē kām omunh prām nē. Hāmri nē hkwȳ pymaj kamàt kām hwỳr tē nē omu nē kām:

—Pa mē ijahkre xwỳnh. E ot pa awỳr tē. Ra mē ixte apumunh mex. Tīrtūm na pre ate mē ijahkre ho apa kaxyw mē ixwỳr amē ka mē ixwỳr wrỳ. Mēhō koja apyrà nē aa mē inhmā mē kot mēmoj pumunh kēt kwỳ ho anhỳr o pa? Nà amrakati kumrēx. Kop apu Tīrtūm kot mē ixwỳr amēnh kēt ronhỳx ka ā amnhī nhīpēx anhỳr kēt nē. Anē.

³ Hāmri nhūm kuma nē tanhmā kām kapēr to. No ām amnhī tā kuxi nē kām awjarē nē kām:

—Na htem piitā mē katorxà nhōxà hkre rūm hapōj. Tā Tīrtūm kām mē piitā axte mē hapōx prām. Jakamā kot kaj mē akator o axkrut kēt nē hāmri nē nhỳrmā Tīrtūm ri atīr tūm nē apa ho apa hkēt nē. Ām hkrajē pix na htem kuri htīr tūm nē pa ho pa. Jakamā kwa jam ajamxpēr tỳx nē ri ho apa. Anē.

⁴ Hāmri nhūm Nīkotēja kuma nē tee ri ā kot kām kapēr anhỳrja kukamā hamaxpēr nē kām:

—Kwa ra ixàptār kēnā kot pa kēt tanhmā amnhī to nē akupỳm ixkatorxà nhōxà hkre hwỳr axà nē axte kurūm ixkato. Anē.

⁵⁻⁷ Hāmri nhūm Jejus kām:

—Nà na hte mē hkrarejaja mē katorxà nhōxà hkre rūm kagō hkôt hapōj hāmri nē kēp katorxà mē hipēêxà wa hkwȳy. Jao wa kot amnhī nhīpēx kôt amnhī nhīpēx o pa. Ja pyrà nē ka mē atō amā apē Tīrtūm kra hprām hā kot kaj amnhī to awỳ nhūm

wa Ixkarōja akarō mā axà hāmri ka ra apē hkraa. Te ra axte akator pyrāk o amnhī nhīpēx. Nē te mē hkra kot katorxà nē hipēêxà wa kot amnhī nhīpēx kôt amnhī nhīpēx o pata pyrà nē apām Tīrtūm kot amnhī nhīpēx kôt amnhī nhīpēx o ri apa. Nom koja Tīrtūm mē wa Ixkarōja akarō mā àr kēt nē ka apē hkra hkēt nē. Jao te axte akator kēt pyrāk o amnhī nhīpēx. Jakamā na pa amā te ate akator pijakrut o amnhī nhīpēx pyrāk o amā ā ja jarēnh anē. Kwa jam ajamxpēr tỳx rāhā ho ri apa. No ama nē tee ri amnhī kukamā ajamxpēr kēt nē.

⁸ —E pa ixprī hā amā ja jarē ka inhma. Na hte kōk kām nhỳhỳm àpēr prām xà hkôt àpēr o pa. Pu mē kamā ama no ām pano ho nhỳhỳnh mōr xà hkôt omunh kēt nē. Nē nhỳhỳm ma mōr xà hkôt omunh kēt nē. Ja pyrà nē na hte Tīrtūm mē wa Ixkarōja mē hkaxwỳnh mā agjē nē mē ho Tīrtūm kra nom nhūm mēhprī hā kot tanhmā mē ho hā amnhī tā omunh kēt nē. Anē.

⁹ Hāmri nhūm Nīkotē ā Jejus kot kām kapēr anhỳr ā kuma nē tee ri hamaxpēr nē kām:

—Kwa na pa ixprī hā amar kēt nē. Anē.

¹⁰ Hāmri nhūm kām:

—Kwa mon ka hte Tīrtūm kapēr tūm o Ijaew jahkre ho apa tā aprī hā ixkapēr mar kēt nē?

¹¹ Ixte mēmoj pumunh xà hkôt ixte mē amā harēnh o ixpa htā ka mē apē Ijaew krāhtūmjaja mē amā ixkapēr mar prām kēt nē. Ā mē ate anhỳr kumrēx. Kwa jam ajamxpēr tỳx nē.

¹² Na pa ra Tīrtūm kot jar tanhmā amnhī nhīpēx to hā harēnh o ixpa htā ka mē ām ama nē ixkôt ajamxpēr kēt nē. Jakamā xà kot pa hpānhā mē amā kaxkwa kamā tanhmā kot amnhī nhīpēx to hā harē ka mē ama nē mar tỳx nē? Nà kot ka mē ama nē ām ama nē hkôt ajamxpēr kēt nē.

¹³ Mēhō na we ra ma kaxkwa hwỳr api nē kamā mēmoj mex pumu nē man akupỳn mē awỳr wrỳ nē mē amā tanhmā harēnh to? Nà amrakati

kumrēx. Ām paxipix ixpê Tirtūm kot mē akaxyw ixām xwýnh na pa pre amnē kurūm mē awýr wrý hāmri nē ixprī hā mē amā tanhmā harēnh to ho ri ixpa.

¹⁴—Amnepēm finat Mojesja kormā kapôt ā mē o pa ri na pre mē kām kax o kagā karōja nhīpēx nē kýxpē mē kām kunhō. Kagā kot mē hkamnhar xwýnhjaja kot hwýr rīt nē omunh nē akupým mex kaxyw mē kām kunhō. Tā ixpê Tirtūm kot mē akaxyw ixām xwýnh kot paj nhýrmā kagā karōta pyrā nē kýx pē pī kahpa hā ajēt.

¹⁵ Ka mē te mē kot kagā karō pumunh nē akupým mexta pyrā nē amnhī kaxyw inhmā ajamaxpēr nē ixkôt amnhī xunhwý hāmri nē nhýrmā Tirtūm mē wa ixri atīr tūm nē amex rāhā nē apa ho apa.

¹⁶—Tirtūm kām pika piitā hkôt mē apiitā mē ajapē htýx. Nē mē ajapē xāj na pre ixpê Kra hā ixpyxi hā mē awýr inhmē. Ka mē atō amnhī kaxyw ixkôt ajamaxpēr nē ixkôt amnhī xām. Hāmri nē nhýrmā atyk tā nhūm Tirtūm akupým ato atīr ka wa ixkuri atīr tūm nē amex rāhā nē apa ho apa. Hāmri nhūm Tirtūm aa amnhī nē nhýhým amēnh kēt kumrēx.

¹⁷ No mē ate amnhī tomnuj mýrapê tanhmā ixte mē anhīpēx to kaxyw na pre mē awýr inhmēnh kēt nē. Ām ixkukwak ri mē atīr tūm nē mē amex rāhā apa ho apa hprām xāj na pre mē awýr inhmē pa mē awýr wrý.

¹⁸ Jakamā kot ka mē atō amnhī kaxyw ixpê Tirtūm Kra hā ixkôt ajamaxpēr nē ixkôt amnhī xām nhūm Tirtūm ixtā apumu nē ate amnhī tomnuj mýrapê tanhmā anhīpēx to hkēt nē. No kēt mē kot ixkôt amnhī xunhwýr kēt xwýnhjaja na Tirtūm ma mē kot amnhī xā htýx kamā hamak tūm xā hwýr mē pa mā xwýnhjê hā mē harē. Mē kot ixkôt amnhī xunhwýr kēt mýrapê. Anē.

Mē kot amnhī tomnuj o hpimxur prām kaprý ā mē harēnh

¹⁹ Nhūm Jejus arī Nīkotē mā kapēr nē kām:

—Na pre Tirtūm amnē pika hwýr mē awýr inhmē. Mē ate amnhī tomnuj xwýnh ā amnhī pumunh kaxyw mē awýr inhmē. Tā nhūm mē ohtō nē amnhī tomnuj gryk ā kām kapēr mar prām kēt nē. Jao ixkaga nē kām ixkapēr mar prām kēt nē.

²⁰ Ra ixprī hā ixte mē kot tanhmā amnhī tomnuj to ho pa hā mē omunh mex jakamā mē kām ixkapēr mar prām kēt. Nē ixte mē kot tanhmā amnhī tomnuj to ho pa hā mē harēnh pymaj ixkôt kām pa hprām hkēt nē.

²¹ No kēt mē kot ixkôt amnhī xunhwýr xwýnhjaja na mē kot amnhī nhīpēx o pa hā hpijaam kēt. Na htem àmnhīx ixkôt amnhī nhīpēx o pa. Jakamā koja mē piitā ja hā mē omu nē Tirtūm kot tanhmā mē hkrā hto nhūm mē ra kām hkôt pix mā amnhī nhīpēx ho pa hprām ā mē omunh kurē kumrēx. Anē.

Nhūm pre ā Jejus Nīkotēja mā kapēr anē.

Juāw Paxis kot Jejus jarēnh o pa hā harēnh

Juāw 1.19-28

²² Tā pa mē ixpê Jejus kôt ri ixpa ho ixpa xwýnhjaja Jejus kôt Jerujarē rūm ijapôj nē pika pē Jutej kwý kamā ixpa. Jejus nhý hā Tirtūm mā mē hkrā kumrār o ri mē hkôt ixpa.

²³ Nhūm finat Juāw Paxis haxwýja mē ixpyrā nē mē hkrā kumrār o pa. Krī pē Sarī htā krī pē Enō mýri pyhti rax jakamā nhūm pre htem hwýr mra nhūm kamā mē hkrā kumrā.

²⁴ Kormā mē kot haxār kēt ri nhūm kamā mē hkrā kumrār o pa.

²⁵ Rôm nhūm Ijaew hōja Juāw Paxis kôt mē pa ho mē pa xwýnhjê hwýr tē nē Juāw Paxis kot mē hkrā kumrār ā tanhmā mē hkukjêr to nhūm mē kuma nē tee ri hā axpēn kukjêr o kuhê.

²⁶ Hāmri nē akupým Juāw Paxis wýr tē nē kām:

—Kwa mē ijahkre xwýnh. Pyhti pē Jotāw nhīkjê hā ate mēhō pumunh nē tanhmā mē inhmā harēnh to xwýnhhta kôt mē pa ho mē pa xwýnhjaja na xep htem apyrā nē mē hkrā kumrār o pa nhūm xep mē ra ohtō nē mē pahkaga

ně mẽ hkôt pa. Kwa xà ja amã mex nà? Aně.

²⁷ Hãmri nhũm mẽ kuma ně mẽ kãm:

–Tỳ ja mex kênã. Tĩrtũm kãm hprãm xà hkôt na htem mẽ hwỳr mra nhũm mẽ ixpãnhã mẽ hkrã kumrã. Nà ja mex.

²⁸ Ixpê Tĩrtũm kot mẽ pakaxyw ãm xwỳnh kêt. Na pa pre ra mẽ amã ja hã amnhĩ jarẽ ka prem inhma. ãm hkukamã na pre Tĩrtũm amnẽ inhmẽ pa mỗ mẽ ã jar ri ixpa aně.

²⁹ –Te ixte mẽ umre kot amnhĩ nhĩpêx pyrãk. Na htem axpẽn mã mẽ rer kaxyw nhũm mẽ umreja myta wỳr tẽ mẽ hpa hã kupy ně ma ni hwỳr o tẽ mẽ axpẽn mã wa kure. Hãmri nhũm hpãnhã mễhõja axpẽn tã wa hakre. Nhũm umreja wa kuri hkĩnh ně mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra ně kapêr ma pa mẽ harẻnh ma ně ixkĩnh ně.

³⁰ Na htem mẽ umre hã hkĩnh kêt ně. Mjẻn nyw xwỳnhja ã na htem hkĩnh. Tã ja pyrã ně koja mẽ axte ixte mẽ kãm Jesus jarẻnh mar kaxyw ixwỳr mrrar kêt ně. ãm hwỳr koja mẽ hpãnhã mra ně tãm mar o kuhê. Ja mex kumrẻx.

³¹ Jesus kẻp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẻ papajaja mẽ pahpẻ pika nhõ xwỳnh jakamã Jesus kĩnhã mẽ pahte mẽmoj piitã omunh tohtuj anhỳr. Nẻ pika nhõ xwỳnhjẻ jamaxpẻr pix o pajamaxpẻr o ri papa.

³² –Na hte Jesus mẽ kãm kaxkwa kamã kot mẽmoj pumunh xwỳnh kwỳjẻ jarẻnh o pa. Nẻ kamã kot mẽmoj mar xwỳnh kwỳ jarẻnh tã nhũm mẽ ohtỏ mẽ kuma ně ãm kuma.

³³ No mẽ kot mar ně amnhĩ kaxyw hkôt hamaxpẻr xwỳnhjaja na htem kuma ně axpẽn mã harẻnh o: “Nà ãm hãmri na ã Tĩrtũm kapẻr jarẻnh anẻ. Nà Tĩrtũm kapẻr mex kumrẻx.” Anhỳr o axpẽn mã harẻ.

³⁴ –Tĩrtũm na pre mẽ pahwỳr Jesus mẽ nhũm amnẽ mẽ pahwỳr wrỳ ně

Tĩrtũm Karỏ nhỹ hã mẽ pamã kapẻr jarẻnh o ri mẽ pahkôt pa.

³⁵ Tĩrtũm kãm Krata japẻ htỳx kumrẻx jakamã na pre ãhkram mẽmoj piitã haxỏr pa nhũm urỏk ně hihtỳx o hihtỳx ně mẽmoj piitã ho amnhĩptỏr o pa.

³⁶ Jakamã mẽ kot amnhĩ kaxyw hkôt hamaxpẻr ně hkôt amnhĩ xunhwỳr xwỳnhjaja koja mẽ nhỹrmã wa kuri htẻr tũm ně mex rỏhã ně pa ho pa. No mẽ kot hkaga xwỳnhjaja koja mẽ ã amnhĩ nhĩpẻx anhỳr kêt ně. Koja Tĩrtũm mẽ kot amnhĩ xà htỳx kamã hamak tũm xỏta wỳr mẽ rẻnh pa. Anẻ.

4

¹ Tã nhũm Parijew nhõ xwỳnhjaja Jesus jarẻnh ma. Nẻ hkôt mẽ pa xwỳnhjaja ohtỏ rax o Juāw Paxis kôt mẽ pa xwỳnhjẻ jakrenh ã mẽ harẻnh ma. Nẻ Jesus kot mẽ hkrã kumrỏr rax o Juāw Paxis jakrenh ã harẻnh ma.

² Nom Jesus na pre mẽ hkrã kumrỏr kêt ně. ãm mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrỏr o ri ixpa.

³ Jakamã nhũm Jesus amnhĩ tã Parijew nhõ xwỳnhjẻ jarẻnh ma hãmri ně mẽ kẻp kato ně hpãnhã ma akupỳm Garirej wỳr mỗ pa mẽ ma hkôt ixpa.

Mẻhỏ ni kot amnhĩ nhĩpẻx nyw o amnhĩ nhĩpẻx ã harẻnh

Juāw 7.37-39; mảnẻn Apokarip 22.1, 22.17

⁴ Tã pa mẽ mỗ mẽ kormã pyka pẻ Samar mã axỏ mẽ hkôt ixpa.

⁵ Hãmri ně krẻ pẻ Sika hwỳr ixpỏx o mỗ. Amnepẻm finat Jako kot hkra Juje mã pyka nhỏr xwỳnh tã krẻja xa pa mẽ ra hwỳr ixpỏx o mỗ.

⁶ Nẻ amnepẻm Jako kot gỏm kakwỳnhhta wỳr pỏj. Nhũm ra kaxkwa nhĩpỏk ri myt nhỹr mẽ nhũm Jesus ra mrrar ryy kurẻ hkẻngrỏ mẽ. Hãmri ně gỏm kakwỳnh mỳ ri tẻm mẽ hkỏkỏt o nhỹ.

⁷⁻⁸ Hãmri pa mẽ kure ně mẽ ixỏpkur xỏ japrỏr kaxyw ma krẻm ijapẻx.

Rôm nhũm Samar nhõ xwỳnh nija amnhĩm gô runh mã tẽ nhũm Jejus omu nẽ kãm:

—Kwa inhmã anhõ gôta kwỳ pa ho ixkõ. Anẽ.

⁹ Nhũm amnhĩ jaer pê amnhĩ tã kuma. Ijaew na pre htem Samar nhõ xwỳnhjẽ kutã apkur rỳ mẽ hkõt ri pa rỳ mẽ ho mjên kêt nẽ. Rỳ mẽ kutã hkõm kêt nẽ. Tã nhũm Jejus ã gô hã nija wỳr anẽ nhũm tee ri amnhĩ tã kuma nẽ kãm:

—Xê pẽr apê Ijaew tã axtem nẽ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anẽ.

¹⁰ Hãmri nhũm kuma nẽ kãm amnhĩ jarẽ. No ãm amnhĩ tã kuxi nẽ kãm kapẽr nẽ kãm:

—Nà aprĩ hã ate ixpumunh ro nhỹx ka kam gô hã ixwỳ pa amã hkwỳ. Inhõ gô na axte mã. Tĩrtũm kãm amarĩ mẽ amã õr prãm. Na htem ho ixkõ hãmri nẽ mex nẽ htĩr tũm nẽ pa ho pa. Anẽ.

¹¹ Hãmri nhũm tee ri kot ã õ gô jarẽnh anhỹrja ã kuma nẽ htỳx ho gôm kakwỳnh kamã gô hã hkamnhĩx nẽ tee ri hkukamã hamaxpẽr nẽ kãm:

—Xê tanhmã kot ka kêt amnhĩ to nẽ inhmã gôta kwỳ janhi? Mo kaxyw anhõ gô janhir xà? Gôm kakwỳnhata upỳm rax kẽnã kot ka kêt tanhmã amnhĩ to nẽ hkwỳ janhi. Nhỹhỹnh kot ka anhõ gô jarẽnh xwỳnhata kwỳ janhi pa ho ixkõ hãmri nẽ ixtĩr tũm nẽ ixpa ho ixpa?

¹² Mẽ inhõ gôm kakwỳnhja amnepê mã mẽ panhĩgêt finat Jako nhõ gôm kakwỳnh na pre. Jako hkwỳjaja na prem hkakwỳ nhũm kamã gô kato nhũm pre htem hanhi nẽ ho hkõm o pa. Nẽ hkrajaja nẽ hkrit piitã ho hkõm o pa. Jakamã na pre mẽ ixpê hkanrẽhã htãmnhwỳjẽ mã hkaga. Tã xep axtem anhõ gô. Mẽ kot ho hkõm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anẽ.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa.

¹⁴ No ixte amã gô jarẽnh xwỳnhata kot ka hkwỳ ho ixkõ hãmri nẽ axte amã kôr kêt kumrẽx nẽ apa. Nhũm te akaxwỳnh kãm hinore hprõt pyrãk o ka amnhĩ nhĩpêx. Hãmri nẽ te hinore kamã gôja aa grã hkêt pyrã nẽ aa ajapêx kêt kumrẽx. Nhỹrmã atyk tã akupỳm atĩr nẽ atĩr tũm nẽ amex rãhã apa ho apa. Anẽ.

¹⁵ Nhũm nija kuma hãmri nẽ kãm:

—Xôwehe? Xê tô tokyx inhmã anhõ gôta kwỳ. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhĩm gô janhir mã inhmrar kêt nẽ. Xê tokyx inhmã hkwỳ mẽ? Anẽ.

Tỳx gô kumrẽx ã hkamnhĩx nẽ ã hã àhwỳr anẽ.

¹⁶ Hãmri nhũm kãm:

—Tô ma akupỳm krĩm tẽ nẽ amjên japrô nẽ man akupỳn ixwỳr wa tẽ. Anẽ.

¹⁷ Hãmri nhũm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

—Tỳ. Nà ãm hãmri na ka ã amnhĩ jarẽnh anẽ.

¹⁸ Na ka pre ra amjên kệp 5. Nẽ my mẽ ri war apa xwỳnh ata te kệp amjên pyrãk nom kệp amjên kumrẽx kêt. Anẽ.

¹⁹ Hãmri nhũm amnhĩ jaer pê kot ã kãm kapẽr anhỹrja ma hãmri nẽ kãm:

—Xê pẽr aprĩ hã ate ixpumunh par pyrãk. Mãn apê Tĩrtũm nhỹ hã kapẽr jarẽnh o mẽ pa xwỳnhjẽ hõ mãn ka mẽ?

²⁰ Xê inhmã mẽmoj jarẽ. Nhỹhỹm kot paj wem axpẽn kôt mra nẽ Tĩrtũm mã mex o mex ã harẽ? Amnepê mã mẽ panhĩgêtjaja na prem hixêt mũj nhĩmõk ã api nẽ hã kãm amnhĩ jarẽ nẽ kãm mex o mex ã harẽ. No mẽ apê Ijaew na ka htem krĩ pê Jerujarẽ pix kãm mẽ ixte axpẽn kôt mrrar nẽ ã amnhĩ nhĩpêx anhỹr ã mẽ inhmã karõ. Xà hixêt nhĩmõk ã mẽ ixte kãm amnhĩ jarẽnhja xà apê omnuj mẽ? Ma xà apê omnuj kêt? Anẽ.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarẽ pix kãm rỳ hixêt mũj nhĩmõk pix

ã axpën wÿr akuprô nê Tirtûm mã amnhĩ jarënh kêt nê.

²² Mê apê Samar nhô xwÿnhjaja mẽ ate Tirtûm mã mex o mex ã harënh o apa htã aprĩ hã kot amnhĩ nhĩpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nê tanhmã hamaxpêr to hã omunh mex. Mẽ inhĩõ kukwak ri koja Tirtûm mẽ kot hkôt amnhĩ xunhwÿr xwÿnh piitã nê mẽ kot amnhĩ tomnuj rënh pa.

²³ Tã koja mẽ piitã Mëpahpãm Tirtûm mã mex o mex ã harënh kaxyw nhÿhÿm pa hkêt nê. Koja mẽ nhÿri pa xà kamã mẽ õpinh xà kaxwÿnh kãm ã kãm amnhĩ jarënh anhÿr o pa. Ja na Tirtûm kãm hprãm. No nhÿhÿm mrar nê nhÿri kuhê xà pix kamã kãm amnhĩ jarënhja nhũm kãm hprãm kêt nê.

²⁴ —Nê Tirtûmja mẽ pahpyrà nê ï hkêt jakamã na te kaxkwa nê pika piitã hkôt pa ho pa. Jakamã na htem nhÿri pa nê õpinh xà kaxwÿnh kãm amnhĩ kaxyw kãm hamaxpêr nê kãm mex o mex ã harê nhũm ra amnhĩ tã mẽ kuma. Á mẽ kot amnhĩ nhĩpêx anhÿrja na kãm hprãm. Anê.

²⁵ Nhũm pre ã Jejus nija mã kapêr anê nhũm kuma nê kãm:

—Ma koja xep nhÿrmã Tirtûm kot mẽ pakaxyw ãm mã xwÿnh pê Krisja mẽ pahwÿr wrÿ hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapêr xwÿnhja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷ Nhũm pre ã kãm amnhĩ jarënh anhÿrja rôm pa mẽ ixte hkôt ri mẽ ixpa ho ixpa xwÿnhjaja ra ixujaprôr pa nê akupÿn hwÿr ixpôx o mra. Hãmri nê amnhĩ jaêr pê kot Samar nhô xwÿnh nita mã kapêr ã omu nê tee ri hkukamã ijamaxpêr nom tanhmã hã hkukjêr to hkêt nê. Nija kêp Samar nhô xwÿnh tã nhũm àmnhix kãm kapêr o nhÿ. Pa mẽ omu nê ãm omu nê tanhmã hã kãm nê hkêt nê.

²⁸ Hãmri nhũm nita gôm kakwÿnh mÿr ri õ poti re nê ma akupÿm krĩm tẽ nê hkwÿjê mã awjarê.

²⁹ Nê mẽ kãm:

—Xê mẽ tokyx ma ixkôt gôm kakwÿnh wÿr mra nê mÿ ri mēhō my mÿj pumu. Tirtûm kot mẽ pahwÿr mēnh mã xwÿnhhta na. Aa kot nhÿri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapêr ã ama. Anê.

³⁰ Hãmri nhũm mẽ kuma nê ma hkôt Jejus wÿr mrar kurê kumrêx.

³¹ Rôm pa mẽ ixte Jejus kôt ri ixpa ho ixpa xwÿnhjaja tee ri mẽ ixàpkur xà ho Jejus ma nê kãm:

—E ota mẽ panhōta. Kwa mẽmoj py nê aku măn.

³² Anhÿr tã nhũm mẽ inhma nê tanhmã mẽ inhmã amnhĩ jarënh to. Nom amnhĩ tã kuxi nê amnhĩ jarê nê mẽ inhmã:

—Nà kormã. Inhōja axtem na. Mẽ ate inhōja pumunh kêt. Anê.

³³ Hãmri pa mẽ kuma nê tee ri hã axpën kukja nê axpën mã:

—Kwa măn ra mēhō mẽ paxwakre kamã kãm mẽmoj to tẽ nhũm kukrê nà? Anê.

³⁴ Hãmri nhũm mẽ inhma nê mẽ inhmã:

—Nà mēhō kot kêt ri inhmã mẽmoj to mra pa kuku? Kot paj kot mẽ awÿr inhmēnh xwÿnhhta mã tanhmã amnhĩ nhĩpêx to hãmri nê te ra ixàpkur mex nê hã ixihÿx mex pyrək o amnhĩ nhĩpêx. Tã kot paj ã kãm amnhĩ nhĩpêx anhÿr o ri ixpa rãhã ho ijapêx pa. Jao te ixàpkur rax pyrək.

³⁵ Anhÿr o mẽ inhmã amnhĩ jarê. Hãmri nê ra Samar nhô xwÿnhjaja mẽ ixwÿr mrar ã mẽ omu nê mẽ inhmã tanhmã mẽ harënh to nom mẽ hã kuxi nê mẽ harê nê mẽ harënh o:

—Kot kaj mẽ axte mẽ atã mytwrÿ kêp 4 hãmri nhũm ra mẽ apur kãm mẽ anhōja hamÿnh mã tãm nê. Nom kormã. E ka mẽ pahwÿr mẽ mrar xwÿnh nêj pumu. Ra mẽ kot amnhĩ kaxyw ixkôt hamaxpêr nê ixkôt amnhĩ xunhwÿr mã tãm jakamã te mẽ apur kãm

ra mẽ anhõ jamýnh mã tãm pyræk. Jakamã ka mẽ atõ ma mẽ hwýr mõi mẽ mẽ kot amnhĩ kaxyw ixkõt hamaxpêr mẽ ixkõt amnhĩ xunhwýr kaxyw mẽ kãm ijarê. Hãmri mẽ te ate ixpur kãm inhmã inhõ jamýnh xwýnh pyræk o amnhĩ nhĩpêx.

³⁶ —Jakamã koja mẽhõ kumrêx mẽ hwýr tẽ mẽ mẽ kãm Tĩrtũm kapêr jarê hãmri mẽ te kêp õ pahi mã hpur kãm ahkre ho pa pyræk. Nhũm mẽ kot mar xwýnhjaja kuma nom kormã hprĩ hã mar týx kêt mẽ. Tã kot kaj mẽ atõ wamta kõt mẽ hwýr tẽ mẽ mẽ kot ixkõt amnhĩ xunhwýr kaxyw aprĩ hã mẽ kãm ijarênh o mẽ hkõt apa hãmri mẽ te apê mẽ anhõ pahi mã hpur kãm axujamýnh xwýnh pyræk. Hãmri nhũm mẽ hkwýjaja mẽ ama mẽ ixkõt amnhĩ xunhwý mẽ ixkõt ri amnhĩ nhĩpêx o pa. Hã koja nhỹrmã mẽ apyrã mẽ Tĩrtũm mẽ wa ixri mex rãhã mẽ htĩrtũm mẽ pa ho pa. Ka mẽ amnhĩ tã mẽ omu mẽ akĩnh mẽ apa. Te mẽ kot mẽ hpur kãm ahkre xwýnhjaja mẽ mẽ kot hamýnh xwýnhjaja mẽõ rũnh pumunh mẽ hkĩnhhta pyræk.

³⁷ —Na htem tõhã ã mẽ pur kãm mẽ ãpênh xwýnhjê jarênh anê mẽ mẽ harênh o: “Axtem mẽ ahkre xwýnhjaja mẽ axtem mẽ kot hamýnh xwýnhjaja.” Anê. Tã te mẽ ate mẽ ujarênh ja pyræk.

³⁸ Na pa pre ra ma mẽ hwýr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar mẽ amnhĩ kaxyw ixkõt hamaxpêr mẽ ixkõt amnhĩ xunhwýr kaxyw. Nom mẽ kajaja na ka prem akumrêx mẽ hwýr amrar mẽ mẽ kãm ijarênh kêt mẽ. Tĩrtũm kapêr jarênh o mẽ pa xwýnhjaja na prem kumrêx mẽ hwýr mra mẽ ixkukamã mẽ kãm ijarênh o ri mẽ hkõt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkõt amnhĩ xunhwýr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamýnh xwýnh kot amnhĩ nhĩpêxta pyræk. Anê.

Mẽ hkwy kot amnhĩ nhĩpêx nyw o

amnhĩ nhĩpêx ã mẽ harênh

Sikũn Korĩt 5.17; Wam Juāw 4.14

³⁹ Rõm nhũm Samar nhõ xwýnh kwýjaja nija kot mẽ kãm amnhĩ jarênh ma hãmri mẽ uræk mẽ amnhĩ kaxyw Jejus kõt hamaxpêr. Na pre ra amnhĩ tã tanhmã mẽ kãm Jejus jarênh to mẽ mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma mẽ uræk mẽ amnhĩ kaxyw hkõt hamaxpêr kurê kumrêx.

⁴⁰ Hãmri mẽ man mẽ ixwýr mra mẽ Jejus pumu mẽ amnhĩ wýr kuwý mẽ kãm:

—Pa. E kwa mẽ tokyx anojarêt kêt mẽ. Mẽ ma mẽ ixkõt mẽ inhõ krĩ hwýr mõi mẽ mẽ ixkõt ri apa grire mẽ arĩ ma mõi. Anê.

Hãmri nhũm mẽ kuma mẽ mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkõt mõi mẽ mẽ õ krĩ kamã mẽ hkõt ri ixpa hã apkati axkrut.

⁴¹ Nhũm Jejus mẽ kãm Tĩrtũm kapêr jarênh o ri mẽ hkõt pa nhũm mẽ axte ohtõ mẽ kuma mẽ nita pyrã mẽ hkõt amnhĩ xunhwý.

⁴² Hãmri mẽ nita wýr mra mẽ kãm:

—E nã ãm hãmri. Akumrêx na ka mẽ inhmã Jejus o amnhĩrit. Pa mẽ akõt ma hwýr mra mẽ mẽ pam omu mẽ kapêr ã kuma. Jao apyrã mẽ amnhĩ kaxyw hkõt ijamaxpêr mẽ hkõt amnhĩ xunhwý. Pêr ãm hãmri kêp pyka piitã hkõt mẽ pahte amnhĩ tomnuj pãnhã amnhĩrer mã xwýnhhta na. Anê.

Garirej nhõ xwýnhjaja kot Jejus pumunh ã mẽ harênh

Matêwre 13.57

⁴³ Tã pa mẽ Jejus kõt Samar rũm ixkato mẽ ma pika pê Garirej wýr mõi. Kamã Jejus nhõ krĩ pê Najare htã pa mẽ hwýr inhmõr kêt mẽ.

⁴⁴ Na pre ra Jejus mẽ inhmã tanhmã õ krĩ nhõ xwýnhjê jarênh to mẽ mẽ harênh o:

—Tĩrtũm nhỹ hã kapêr jarênh o mẽ pa xwýnhjaja na htem amnhĩ nhõ krĩ kamã mẽ kãm Tĩrtũm kapêr jarênh

o pa nhũm mẽ kuma nẽ ãm kuma. Jakamã kot paj Najare hwÿr inhmõr kêt nẽ. Mẽ kãm ixkapër mar prãmre hã.

⁴⁵ Anhÿr jakamã na pa prem hwÿr inhmõr kêt nẽ. Pãnhã nhãm krĩ hõ hwÿr mõi nẽ hwÿr pøj hãmri nhũm mẽ amnhĩ wÿr Jejus pumu nẽ hkĩnh nẽ. Na prem ra krĩ pẽ Jerujarẽ kamã arĩgro pẽ Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wÿr omu nẽ hkĩnh nẽ.

Jejus kot mēhō hkra ho mex ã harēnh

⁴⁶ Tã pa mẽ kormã Garirej kamã ixpa nẽ akupÿm krĩ pẽ Kanã hwÿr mõi. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupÿm mẽ hwÿr mõi. Nhũm mẽõ pahi nhõ kôwenatõjê hõ hkra myja kęp à htÿx nẽ nõ. Nom Kanã kamã hkêt axtem krĩ hõ pẽ Kapanaũ kamã.

⁴⁷ Jakamã nhũm hipêêxàja tee ri hkra pumu hãmri nẽ ra Jejus kot Jutej rũm Kanã hwÿr hpõx ã harēnh ma nẽ hkra kaxyw kãm hamaxpër nẽ ma hwÿr mõi kurê kumrêx. Hãmri nẽ nhÿri omu nẽ hwÿr tẽ nẽ kãm kapër kãm hihtÿx nẽ kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukapri nẽ ma ixkõt mõi nẽ akupÿm inhmã ho mex. Anẽ.

⁴⁸ Hãmri nhũm kuma nẽ kãm:

—Kwa pēr ãm ixte mẽ amã aa mẽ ate mẽmoj pumunh kêt kwÿ ho anhÿr ã ixpumunh kõt pix mã na ka htem amnhĩ kaxyw ixkõt ajamaxpër. Nom amarĩ amnhĩ kaxyw ixkõt ajamaxpër kêt nẽ. Anẽ.

⁴⁹ Hãmri nhũm tee ri kuma nẽ kãm:

—Kwa tokyx. Kot kaj tokyx ixkõt amõr kêt koja ixpê ty. Anẽ.

⁵⁰ Hãmri nhũm kãm:

—Nà koja apê htyk kêt nẽ. Ra ixte akupÿm amã ho mex kênã. Mãmri ma akupÿm mõi nẽ tokyx omu. Na ra akupÿm amã mex. Anẽ.

Hãmri nhũm kuma nẽ kaxyw hkõt hamaxpër kurê kumrêx nẽ ma akupÿm hwÿr mõi. Nẽ mõi o apkati.

⁵¹ Nẽ kormã õ krĩ hwÿr hpõx o mõi ri nhũm ra kãm mẽ àpênh xwÿnhjaja

kutã mra nẽ nhÿri pry hã hkaxpa nẽ kãm:

—Pa. Kwa na ra akra hkà hakry nẽ akupÿm amã mex. Anẽ.

⁵² Hãmri nhũm mẽ kuma nẽ hkĩnh tÿx nẽ. Nẽ mẽ kãm:

—Kwa xõ wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jãã na pre kaxkwa nhĩpõk ri myt nhÿ nhũm hkà hakry nẽ akupÿm amã mex kurê kumrêx. Anẽ.

⁵³ Hãmri nhũm mẽ kuma nẽ mẽ kãm:

—Hêxta waa nẽ. Kwa pēr ãm hãmri Jejus kot inhmã akupÿm mex ã harēnh xà hã ore kamã na pre akupÿm inhmã mex. Nà ãm hãmri. Anẽ.

Hãmri nẽ amnhĩ kaxyw Jejus kõt hamaxpër kurê kumrêx. Nhũm õrkwÿ kamã ri mẽ pa xwÿnhjaja uràk nẽ amnhĩ kaxyw hkõt hamaxpër.

⁵⁴ Nhũm Jejus ã kãm hkra ho mex anẽ. Na pre ra pika pẽ Garirej kamã mẽ kot mẽmoj pumunh kêt õ ho anhÿr o tipxi nẽ mẽ kãm gõ pix o wĩhti nhĩpêx. Tã ra pyka pẽ Jutej rũm akupÿm mẽ hwÿr mõi nẽ ã akupÿm mẽ hkrata o mex anẽ.

5

Jejus kot himô mỳ ri akupÿm mēhō ho mex ã harēnh

Juãw 7.23, 10.30-33

¹ Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwÿr akuprõ nhũm Jejus haxwÿja ma hwÿr mõi. Pa mẽ hkõt mẽ ixpa ho mẽ ixpa xwÿnhjaja ma hkõt mõi.

² Jerujarẽ kamã na himõja hikwÿ. Nhÿhÿnh mẽ kot krĩ hwÿr õwêhti ho gjêx xà htã hikwÿ. Himõja nhĩxi pẽ na Petes. Nẽ pu hã mẽ à xwÿnhjê nhĩkwÿ xà hã ixkre kęp 5.

³ Piitã kamã na pre hte tanhmã mẽ à kute xwÿnhjaja hikwÿ. Mẽ nohkre xwÿnhjaja nẽ mẽ hyk o mẽ pa xwÿnhjaja nẽ mẽ ì kamã mẽ htyk xwÿnhjaja. ãm ahpÿnhã tanhmã mẽ à kute xwÿnhjaja ixkre hkwyja kamã akupÿm mex prãm xàj hikwÿ.

⁴ Na pre hte Tirtūm kapēr o mẽ wrỳk xwỳnhja tōhā himō hwỳr wrỳ nē gō xok. Hāmri nhūm mẽ à xwỳnhjê hō kot amnhĩ to wa nē kumrēx hwỳr wrỳk nē kamā mrōr xwỳnhja akupỹm mex. Kwỳjê rom akupỹm mex kurê kumrēx. Jakamā nhūm pre hte mẽ à xwỳnhjaja akupỹm mex prām xàj gō xok jamār o hikwỹ.

⁵ Jakamā nhūm mẽhō myja ixkre hō kamā hikwỹ. Te omnuy nē arĩ hikwỹ hā amgrà xohtō rax nē. Ra hā amgrà kēp 38.

⁶ Jakamā nhūm Jejus mẽ hwỳr tē nē omu. Nē hprĩ hā omu nē hamaxpēr o:

—Kwa mũj na hte omnuy nē ri pa hkêt ã amgrà xohtō rax nē. E pa akupỹm ho mex.

Anhỹr o hamaxpēr hāmri nē kām:

—Pa. E kwa inhmā amnhĩ jarē. Xà amā akupỹm amex prām? Anē.

⁷ Hāmri nhūm kuma nē kām:

—Ku nhūm. Inhmā tokyx akupỹm inhmex prām tỳx kumrēx kēnā. No mẽhō kot tokyx inhmỳ nē mẽ kēp ixto wa nē ixkumrēx gō xok kamā inhmōr? Na pa tee ri ixkumrēx hwỳr ixtēm nē inhmā inhmōr prām nhūm mẽ xatā ixpē amnhĩ to wa nē mra nē kamā mrō. Anē.

⁸ Hāmri nhūm Jejus kām:

—Tỳ? Tōe. E na ka akupỹm amex. E kànhmā xa nē akupĩp py nē ma akupỹm anhōrkwỹ hwỳr tē. Anē.

⁹ Hāmri nhūm kuma nē ra akupỹm mex nē kànhmā xa nē ri mra. Nē hkĩnh tỳx nē hikupĩp py nē ma akupỹm ōrkwỹ hwỳr tē. Ijaew nhō arĩgromnu pē sap ã nhūm Jejus kot akupỹm ho mex

¹⁰ nhūm ma akupỹm pry hā hikupĩp py nē o tē. Nhūm Ijaew nhō pahi hkwỹja nhỹhỹnh mra nē tee ri kot sap ã hpyr nē o htēm ã omu nē kām:

—Tk. Kwa mẽ pahpē Ijaew na pu htem mẽ panhō arĩgromnu hā paxápēnh kêt nē. Finat Mojes kot ja nē mẽ pahkurê htā ka axtem nē akupĩpta py nē nhỹhỹm o tē. Anē.

¹¹ Hāmri nhūm mẽ kuma nē mẽ kām:

—Tỳ. Kot anhỹr tã kot ixto mex xwỳnhja na ã inhmā kapēr anē pa mar xà hkôt kupy nē akupỹm inhōrkwỹ hwỳr tē. Anē.

¹² Hāmri nhūm mẽ tee ri kuma nē kām:

—Kwa mẽhō na we ã ri amā karō anē? Anē.

¹³ Nhūm kormā kot Jejus nhĩxi mar kêt jakamā kot mẽ kām ahkre kaxyw hakēx nē tee ri hkwỳjê kaēx ã hapēr rīt o xa. Nom nhūm mẽ ohtō nē pry hā mrar jakamā nhūm tee ri hapēr nhūm Jejus ra ma nhỹhỹm tē.

¹⁴ Tã nhūm hā ahtūmre nhūm Jejus Tirtūm mã amnhĩ jarēnh xà hā ixkre hwỳr tē nē axà nē kot ho mex xwỳnhja pumu nē kām:

—Pa. E na ka ra akupỹm amex. Nom kwa kêr ka axte tanhmā amnhĩ tomnuy to ho ri apa hkêt nē. Kot kaj axte ã amnhĩ nhĩpēx anē hāmri nē apunuy tỳx o wam ate apunujta jakre kām ga. Anē.

¹⁵ Hāmri nhūm kuma nē ma tē nē kato. Nē ma mẽ ō pahijê hwỳr tē nē mẽ kām:

—E na pa ra kot ixto mex xwỳnhja nhĩxi ma. Xep kēp Jejus. Anē.

¹⁶ Hāmri nhūm mẽ hixi ma nē hā tanhmā axpēn mã ho kapēr punuj to. Mē ō arĩgromnu hā kot mẽ ho mex o pa jakamā nhūm mẽ axpēn jakwa kamā ri hixi ho rê nē nhỹri omu nē tanhmā hā kām àkjêr to.

¹⁷ Hāmri nhūm amnhĩ tã mẽ kuma nē mẽ kām:

—Ku nhūm. Inhĩpēxà Tirtūm na hte apkati mẽ tanhmā mẽ pahto mex to ho pa. Jakamā pa hte uràk nē ã mẽ ho mex rāhā ho ri ixpa anē nē aa mēmo arĩgro hā ja ho anhỹr kaga hkêt nē.

¹⁸ Anhỹr o mẽ kām amnhĩ jarē nhūm mẽ kuma nē kamā gryk tỳx nē. Nom mẽ ō arĩgromnu hā kot mẽ ho mexja pix mỳrapē kamā gryk kêt. Māānēn Tirtūm kēp hipēxà hā harēnhja mỳrapē nhūm prem kamā gryk tỳx kumrēx nē axpēn mã:

—Tk. Kwa na ã amnhĩ jarēnh anhỹr jao te kēp Tirtūm pyràk ã amnhĩ jarē. E kwa pu mẽ kupĩ ri. Anē.

Tirtūm Kra kot Hipêêxà nhỹ hã amnhĩ nhĩpêx ã harênh

Juāw 14.10-13

¹⁹ Hāmri nhũm Jejus axte mẽ kêp Ijaew nhõ pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nê. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tỳx nê ho apa.

²⁰ —Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrít. Ixte omunh nê uràk nê ÿ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nê. Kot paj mãânên mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nê ixkamã ano puma ho apa.

²¹ —Nê Inhĩpêêxà kot akupỹm mẽ htyk xwỳnhjê ho htĩr jakamã kot paj uràk nê akupỹm mẽ htyk xwỳnhjê ho htĩr o ri ixpa. Anê.

Mẽ htĩr tũm nê mẽ pa mã xwỳnhjê jarênh

Juāw 3.16-17, 3.36, 6.27, 6.40, 6.60, 10.28, 17.2-3; Rômãn 6.23; Karatas 6.8; Xitre 1.2; Wam Juāw 2.25, 5.11-13

²² Nhũm Jejus arĩ mẽ kêp Ijaew nhõ pahijê mã kapêr nê mẽ kãm:

—Koja nhỹrmã Inhĩpêêxàja mẽ htĩr tũm nê mẽ pa ho mẽ pa mã xwỳnhjê jarênh kêt nê. Ja kaxyw na pre pa ixãm.

²³ Tã mẽ piitã mẽ kot ja hã ixpumunh nê ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrã nê pa ixtã hpijaàm o pa kaxyw. Jakamã koja mẽhõ ixtã hpijaàm kêt nê hãmri nê mãânên Inhĩpêêxà hã hpijaàm kêt ã amnhĩ to amnhĩrít. Tãm kot mẽ awỹr inhmênh kênã.

²⁴ Jakamã koja mẽhõ ixkapêr ma nê amnhĩ kaxyw kot mẽ awỹr inhmênh xwỳnhnta kôt hamaxpêr nê ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã

hamak o pa htũm xàta wỳr mõi kêt nê. Koja Inhĩpêêxà akupỹm ho htĩr nhũm wa ixri htĩr tũm nê mex kumrêx nê pa ho pa. Jakamã koja mẽhõ ixkôt amnhĩ xãm hãmri nê ra kêp wa ixri htĩr tũm nê pa ho pa mã xwỳnh. Kwa mẽ jam ajamaxpêr tỳx rãhã ho apa.

²⁵ —No mẽ kãm ixkapêr mar prãm kêt xwỳnhjaja kêp Inhĩpêêxà mẽ wa ixri mẽ htĩr tũm nê mẽ pa mã xwỳnh kêt. Tã ixpê Tirtūm Kra jakamã koja mẽ ixkapêr ma nê ixkôt amnhĩ xunhwỳ. Hã kot paj amnhĩ tã mẽ omu nê mẽ htĩr tũm nê mẽ pa mã xwỳnh ã mẽ harê nhũm mẽ àmnhĩx ri hkĩnh nê pa ho pa. Kwa mẽ jam ajamaxpêr tỳx rãhã ho apa.

²⁶ —Nê Inhĩpêêxà tãm kêp mẽ ho mẽ htĩr xwỳnh. Tã ixpê Kra jakamã na pre amnhĩ pyrã nê ja kaxyw ixãm.

²⁷ —Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atĩr tũm nê apa ho apa mã xwỳnhjê hã mẽ ajarênh rỳ wa ixri mẽ atĩr tũm nê apa hkêt mã xwỳnhjê hã mẽ ajarênh kaxyw.

²⁸⁻³⁰ Jakamã kot paj nhỹrmã ra mẽ htyk nê mẽ hikwỹ xwỳnh piitã mẽ kãm ixkapêr nhũm mẽ inhma. Koja mẽ ixkapêr ma hãmri nê akupỹm htĩr nê pika rũm hapôx pa. Hãmri nhũm mẽ kot kormã htĩr ri Tirtūm kapêr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhũm mẽ kot amnhĩ to mex xwỳnhjaja. Ra mẽ kot Tirtūm kôt amnhĩ nhĩpêx jakamã koja mẽ ma Tirtūm mẽ wa ixwỳr api nê wa ixri mex nê hkĩnh rãhã htĩr tũm nê pa ho pa.

—Kot paj ja kaxyw tanhmã mẽ apiitã mẽ ajarênh to. Nom kot paj amnhĩ krã hkôt inhmã hprãm xà hkôt tanhmã mẽ ajarênh to hkêt nê. Kot paj Inhĩpêêxà kot mẽ awỹr inhmênh xwỳnhnta nhỹ hã àhpumunh tỳx xà hkôt tanhmã mẽ ajarênh to. Jao ãm hãmri mẽ ajarê. Kwa mẽ jam ajamaxpêr tỳx nê. No ã ixte mẽ amã amnhĩ jarênh

anhÿrja ma nē tee ri ajamxpēr kêt nē. Anē.

Mē kot Jejus kēp Tirtūm Kra hã harēnh xwÿnhjê jarēnh

Juāw 8.18; Wam Juāw 5.6-8

³¹ Nhūm Jejus arī mē kēp Ijaew nhō pahijê mã kapēr nē mē kãm:

—E na pa ra tanhmã mē amã amnhĩ jarēnh to. Nom kop ãm papxipix ixte ã amnhĩ jarēnh anhÿr ronhÿx ka mē inhma nē ajamxpēr o: “Ko. Na apu ãm hãmri ã mē inhmã amnhĩ jarēnh anē rÿ apu ãm amnhĩ to hêx.” Anhÿr o ajamxpēr.

³² Nom papxipix na pa hte ã amnhĩ jarēnh anhÿr kêt nē. Inhĩpêêxã haxwÿja na hte ã ijarēnh anē. Nē ãm hãmri na hte tanhmã ijarēnh to ho pa. Tirtūmjã hêx kêt.

³³ No mē amã pika nhō xwÿnhjê pix kapēr mar prãm jakamã na ka prem finat Juāw Paxisja wÿr akwÿjê rē nhūm mē ma hwÿr mra nē ixtã hkukja nhūm mē kãm tanhmã ijarēnh to. Nē hprĩ hã mē kãm ijarē.

³⁴ No mē apê pika nhō xwÿnhjaja mē ate axpēn mã tanhmã ijarēnh toja na ixpê tanhmã kute hkêt. Kojã mēhō tanhmã ixto kapēr punuj to rÿ tanhmã ijarēnh mex to pa amnhĩ jarēnh ma nē tee ri amnhĩ kukamã ijamxpēr o ixkaprĩ hkêt nē. Tã nom Juāw Paxis kapērja mē amã mex jakamã na pa ã mē amã harēnh anē. Ka mē ra kot tanhmã ijarēnh toja ma nē amnhĩ kaxyw ixkôt ajamxpēr nē ixkôt amnhĩ xunhwÿ nē nhÿrmã ty nē ma mē kot amnhĩ xã htÿx kamã hamak tūm xãta wÿr apa hkêt nē.

³⁵ —Juāw Paxis na pre te kanê hpôk mex nē mēmoj to amnhĩrīt mex pyrã nē mē amã Tirtūm kapēr o amnhĩrīt mex o pa. Ka prem te maripôtre kot kanê hã htu pyrã nē hwÿr akuprō nē mar o akuhê. Nom hkôt ajamxpēr tÿx kêt nē.

³⁶ Na pre hprĩ hã mē amã ijarēnh o ri pa.

—Tã pa pam mē awÿr wrÿ nē Inhĩpêêxã nhÿ hã mē akamã aa mē ate mēmoj pumunh kêt kwÿ ho anhÿr

o ri ixpa. Mē ate ja hã ixpumunh nē Inhĩpêêxã tãm kot mē awÿr inhmēnh kôt ixpumunh kaxyw.

³⁷ —Nē Inhĩpêêxãja mãânēn ixpê Kra hã mē amã ixto amnhĩrīt. Ra mē anhōpinh xã kaxwÿnh kãm kot mē amã ixto amnhĩrīt tã ka mē ama nē ãm ama nē ixkôt ajamxpēr kêt nē.

³⁸ Mē amã mē ate hkôt amnhĩ nhĩpêx o apa hprãm kêt. Mē ate kapēr mar tÿx ronhÿx ka mē ixkapēr ma nē amnhĩ kaxyw ixkôt ajamxpēr kurê kumrêx. Ixpê Tirtūm kot mē awÿr inhmēnh xwÿnh kênã.

³⁹ —Nē Tirtūm kapēr ã kagã htūm haxwÿja kot tanhmã ijarēnh to. Ka htem wa ixri atĩr tūm nē apa ho apa hprãm xàj kamã harēnh rãhã ho ri apa. Nē kot tanhmã pa ijarēnh to htã ka mē ixkapēr ma nē amnhĩ kaxyw ixkôt ajamxpēr kêt nē. Anē.

Ijaew nhō pahijaja kot Jejus kaga hã mē harēnh

⁴⁰ Nhūm Jejus arī mē kēp Ijaew nhō pahijê mã kapēr nē mē kãm:

—Nē pa na ixte Inhĩpêêxã mē wa ixri ixte mē ho mē htĩr tūm nē mē pa mã xwÿnh ã mē harēnh tã ka mē amnhĩ kaxyw ixkôt ajamxpēr kêt nē.

⁴¹ Nom mē ate inhmex ã ijarēnh kêt tã ja ixpê tanhmã kute hkêt. ãm Inhĩpêêxã pix kot inhmex ã ijarēnhja na inhmã hprãm.

⁴² Ra ixte mē apumunh mex. Mē amã Tirtūm kĩnh kêt.

⁴³ Tãm kot mē awÿr inhmēnh tã ka mē ixpumu nē ixkaga nē ixkôt amnhĩ nhĩpêx kêt nē. Nom kojã mēhō amnhĩ krã hkôt mē awÿr tē nē tanhmã mē ajahkre hto ka mē ama nē hkôt amnhĩ nhĩpêx kurê kumrêx.

⁴⁴ —ãm pika nhō xwÿnh pixjaja kot mē amex ã mē ajarēnhja na mē amã hprãm. No Tirtūm kot amnhĩm mē amex ã mē ajarēnhja mē amã hprãm ã mē ate amnhĩ jarēnh tã mē amã ja prãm kêt. Jakamã na ka htem ixkaga kumrêx.

⁴⁵⁻⁴⁶ Tã nom kot paj pam nhÿrmã Tirtūm mã mē apê ixkwÿ hkêt ã mē ajarēnh kêt nē. Mo kaxyw kot pa kêt ri ã kãm mē ajarēnh anē? Finat

Mojes tām koja ja hã kãm mẽ ajarẽ. Na ka htem tanhmã ajamaxpẽr to nẽ ajamaxpẽr o: “Kot paj finat Mojes kot mẽ inhmã tanhmã kapẽr to hkõt amnhĩ nhĩpêx o ri ixpa hãmri nẽ nhỹrmã Tĩrtũm ri ixtĩr tũm nẽ inhmex nẽ ixpa ho ixpa.” Anhỹr o ajamaxpẽr nom hkõt amnhĩ nhĩpêx kêt nẽ. Mojes na pre hte pa ijarẽnh o pa. Tã mẽ ate kapẽr kõt amnhĩ nhĩpêx ronhỹx ka mẽ amnhĩ kaxyw ixkõt ajamaxpẽr nẽ ixkõt amnhĩ xunhwý. No mẽ ate ixkaga jakamã koja Mojes tãm Tĩrtũm mã mẽ apê ixkwý hkêt ã mẽ ajarẽ.

⁴⁷ Mẽ ate Mojes kapẽr kõt amnhĩ nhĩpêx kêt jakamã kot kaj mẽ mããnen ixkõt amnhĩ nhĩpêx hkêt nẽ. Anẽ.

Nhũm pre ã Jejus Ijaew nhõ pahijẽ mã kapẽr anẽ.

6

Jejus kot mẽ ho 5.000 nẽ mẽ kãm mẽ ò hã harẽnh

Matêwre 14.13-21; Makre 6.30-44; Rukre 9.10-17

¹⁻⁴ Tã nhũm ra arĩgro pẽ Pas ahtêp o mõ. Pasja ã mẽ ixpẽ Ijaewjaja na pa htem axpẽn wýr akuprõ nẽ hã ôwêhti hkra nyw kwý pa nẽ ĩ hkur o ixkrĩ. Amnepêm Tĩrtũm kot pika pẽ Ejit rũm mẽ inhĩgêjtjê kator kaxyw nhũm prem nojarêt nẽ ã hkwy hpar nẽ ĩ hkur anẽ. Tã arĩ mẽ ixpẽ mẽ hkanrêhã mẽ htãmnhwýjaja jam ijamaxpẽr pẽ ixkĩnh kaxyw ã amnhĩ nhĩpêx anẽ. Jakamã nhũm Jejus pãr krem axà nẽ ma himô pẽ Garirej ã rêr kaxyw ma xarmã mõ nẽ rê. Himôja nhĩxi hõ pẽ na Tipe nhũm hã xarmã mõ nẽ rê. Pa mẽ hkõt ixpa ho ixpa xwýnhjaja ma hkõt ixpa.

Hãmri nhũm pika nhõ xwýnh kwýjaja Jejus ma mõr kãm omu hãmri nẽ ma gô kape hã pikap mẽ inhĩhkrep mra. Na pre ra Jejus mẽ kamã mẽ ã xwýnhjê ohtô nẽ akupým mẽ ho mex nhũm mẽ axte omu hãmri nẽ ma mẽ inhĩhkrep gô mý ri hpar o pa.

Tã pa mẽ xarmã rê nẽ pãr rũm ijapôj nẽ gô mý ri kýxpê ixkrĩ hpa.

⁵ Hãmri nhũm mẽ inhĩhkrep mẽ mrar xwýnhjaja mẽ ixwýr hpôx o mra

nhũm Jejus amnhĩ wýr mẽ omu nẽ mẽ inhĩ ò pẽ Firipti mã kapẽr nẽ kãm:

—Kwa Firip. Mẽmoj kot puj mẽ pahwýr mẽ mõr nẽjjẽ mã ho anẽ nhũm mẽ kuku? Tanhmã kot puj mẽ amnhĩ to nẽ nhỹri mẽ kãm mẽmoj japrô nhũm mẽ kuku? Anẽ.

⁶ Ra tãm kot tanhmã mẽ kãm ò hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anẽ.

⁷ Hãmri nhũm kuma nẽ tee ri mẽ hkukamã hamaxpẽr nẽ kãm:

—Konẽn. Mẽ ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nẽ ho mẽ kãm mẽmoj japrôr tã nhũm mẽ ãm ho hkryre nẽ kuku nẽ ho ôhy htu hkêt nẽ. Mẽ ohtô rax o mẽ ohtô rax kênã. Anẽ.

⁸⁻⁹ Hãmri nhũm mẽ inhĩôja kuma nẽ Jejus wýr tẽ nẽ kãm kapẽr. Simãw Pêtre htõ Andreja hwýr tẽ nẽ kãm:

—E ota mẽhõ hkrata amnhĩ kõt ò hkwy ho mõ. No ãm grire. Na pãwti kêp 5 nẽ kaxyw ò tep axkrutre. No mẽ ohtô gri ã kot kêt mẽ hipêx pa. Anẽ.

¹⁰ Hãmri nhũm kuma nẽ hkõt mẽ ixpa ho mẽ ixpa xwýnhjê mã kapẽr nẽ mẽ inhmã:

—Tõe. Nã hãmri. E mẽ kãm anẽ kẽ mẽ hkrĩ pa. Anẽ.

Hãmri pa mẽ kãm anẽ nhũm mẽ põ kamã hkrĩ hpa. Na prem ohtô kumrêx. Mẽmyjê pixjaja kêp 5.000. Nẽ kaxyw mẽ hprõ nẽ mẽ hkrajaja. Na prem ohtô ho ohtô. Tã piitã hkrĩ pa.

¹¹⁻¹² Hãmri nhũm Jejus mẽhõ hkrata pẽ ò pãwti jamý nẽ o xa nẽ Tĩrtũm mã harẽ nẽ kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anẽ.

Hãmri nẽ mẽ inhmã pãwtija gõ pa mẽ ô ri mẽ hkrĩ xwýnhjê mã ôr o mra nẽ ho mẽ piitã mẽ hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm ôr o mra nẽ ho mẽ piitã mẽ hipêx pa. Nhũm Jejus hpãnhã tep axkrutreta py nẽ mã ho anẽ nẽ Tĩrtũm mã harẽ hãmri nẽ amnhĩ xô ri mẽ inhmã kugõ pa mẽ mã ho anẽ nẽ. Te ho pãwti nhĩpêx pyrã nẽ ho mẽ

piitā mẽ hipêx. Hāmri pa mẽ ixpiitā apku nê inhōhy htu nhũm arĩ mẽõ jakrêx kwỳ hprã. Hāmri nhũm Jejus mẽ inhmã:

—E kwa mẽ hkôt mra nê mẽõ jakrêx o akuprõ kê omnu hkêt nê. Anê.

¹³ Hāmri pa mẽ kuma nê ho akuprõ nê kawà o 12 nê ho nýt. Pãwti hkryreja âm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nýt pa.

¹⁴ Hāmri nhũm mẽ inhĩhkrep mẽ mōr xwýnhjaja amnhĩ jaêr pê Jejus kot mẽ kãm mẽõ ho rax ã omu nê ri axpên mã harênh o:

—Kokỹỹ. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwỳr wrỳ nà?

¹⁵ Kwa pu mẽ kãm pakapêr kãm paxihtỳx nê ma akupỹm amnhĩ kôt o mō nê amnhĩ kaxyw âm kê mẽ pahto amnhĩptàr o pa. Anê.

Hāmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhỹri hixêt õ hwỳr tẽ.

Jejus kot gô krãhkã hã htêm ã harênh

Matêwre 14.22-27; Makre 6.45-52

¹⁶ Tã nhũm ra kamàtre pa mẽ Jejus kôt ri ixpa ho ixpa xwýnhjaja ma akupỹm himô hwỳr mra.

¹⁷ Nhũm kormã Jejus mẽ ixwỳr akupỹn htêm kêt jakamã pa mẽ tee ri kamã ama hāmri nê akupỹm pàr mã axà nê ma akupỹm Kapanaũ hwỳr xarmã ixrêr o mō.

¹⁸ Pu nhũm ra kôk àpêr tỳx nhũm gô xatã kãnhmã harĩ nê axpên wỳr mra nê axpên tak tỳx nê.

¹⁹ Pa mẽ kormã gô nhĩpôk ri mō. Nê tee ri rrêmti ho gô rênh nhĩpêx kaprỳ nom kormã ixrêr kêt nê. Nê kormã inhmōr o ixtã 5 kirôm pix nê. Hāmri nhũm ra Jejus gô krãhkã hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarõ hã hkamnhĩx nê mẽ inhmã uma htỳx kumrêx.

²⁰ Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²¹ Hāmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harênh

²² Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwýnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwýnhjaja pix mẽ õ pàr kãm ma akupỹm xarmã mō nom nhũm Jejusja mẽ hkôt htêm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

²³ Rôm nhũm Tipe rũm pàr kwỳja mẽ hwỳr pôj. Jejus kot mẽ apkur xà ho Tirtũm wỳr nê mẽ kãm ho rax xà hã pikata wỳr nhũm mōn pôj.

²⁴ Hāmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwýnhjê japêr hāmri nê axpên mã:

—E kwa pu mẽ ma mẽ hkôt xarmã mō nê Kapanaũ kamã mẽ hapêr. Anê.

Hāmri nê mẽ kãm amnhĩ jarê nê mẽ õ pàr kwỳ hwỳr agjê nê ma mẽ hkôt xarmã mōn rê.

²⁵ Hāmri nê ra mẽ ixwỳr rê nê mẽ ixkôt pôj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwýnh. Kwa na pa prem tee ri xarpê ajapêr hāmri nê man akôt mōn rê. Kwa tanhmã na ka pre we amnhĩ to nê man tẽn rê? Anê.

²⁶ Hāmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? Âm jãã mẽ ate ixkutã axàpkur nê anhōhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tirtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kēp kaxkwa rūm mē paxàpkur xà maati pyràk ã kot amnhĩ jarēnh

²⁷ Nhũm Jējus arĩ hwỳr mē mrar xwỳnhjē mā kapēr nē mē kām:

—Kwa kē ka mē ri axàpkur xà pix kukamā ajamaxpēr o ri apa hkēt nē. Na htem mē apkur xà kukwak ri Tĩrtũm mē wa ixri htĩr tũm nē pa ho pa hkēt nē. No kot kaj mē amnhĩ kaxyw pa ixkôt ajamaxpēr nē ixkôt amnhĩ xunhwỳ. Hã kot kaj mē ixkukwak ri nhỹrmã atĩr tũm nē wa ixri amex nē apa ho apa. Te ixpē mē kot mē apkur xà hkur nē ý hã htĩr tũm nē pa ho pa xwỳnh pyràk. Ja kaxyw na pre Inhĩpēêxã Tĩrtũm mē awỳr papxipix inhmē pa mē awỳr wrỳ. Anē.

²⁸ Hãmri nhũm mē kuma nē kām:

—Kwa tanhmã kot paj wem amnhĩ nhĩpēx to nhũm Tĩrtũm hã mē ixpumu nē mē ixto mex nē? Anē.

²⁹ Hãmri nhũm mē kuma nē axte mē kām amnhĩ jarē nē mē kām:

—Nà kot kaj mē amnhĩ kaxyw pa Tĩrtũm kot mē awỳr inhmēnh xwỳnh kôt ajamaxpēr hãmri nhũm ixtã mē apumu nē tanhmã mē akrã hto ka mē ajamakētkati nē axàmnhĩx akĩnh nē tanhmã amnhĩ nhĩpēx to ho ri apa. Anē.

³⁰ Hãmri nhũm mē kuma nē kām:

—Tōe. Kwa axte mē inhmã aa mē ixte mēmoj pumunh kēt ò ho anē. Pa mē ja hã apumu nē amnhĩ kaxyw akôt ijamaxpēr kurē kumrēx. E mēmo kot ka mē inhmã ho anē? Kwa tokyx mē inhmã axte mēmoj tanhmã ho pa mē omu.

³¹ Amnepēm finat Mojes pyrà kot kapôt ã mē panhĩgētjē ho pa ri na pre hte apkati mē mē kām mēō mē kot kām “manã” anhỹr xwỳnhhta gō nhũm pre htem hkur o pa. Tĩrtũm kapēr ã kagà htũm kot ja jarēnh kot:

Na pre kaxkwa rūm mē hwỳr mē apkur xà rē nhũm mē hkur o pa.

Anhỹr o kot harēnh. Tã kot kaj Mojes nē apkati mē mē inhmã mē inhō ho ri apa pa mē ja hã apumu nē rĩ kormã amnhĩ kaxyw akôt ijamaxpēr japēr. Anē.

³² Hãmri nhũm mē kām:

—Xà Mojes na pre hte mē kām kaxkwa rūm mē apkur xà rēnh o pa? Nà tãm kēt. Inhĩpēêxã na pre hte mē hwỳr kurē nhũm mē hkawrà nē kuku nē kukwak ri hihtỳx nē htĩr nē pa. Tã nhũm ra mē awỳr hpãnhã pa ixpē Kra hã inhmē. Kwa mē ixkapēr ma nē amnhĩ krãm haxàr tỳx nē.

³³ Na pre Tĩrtũm inhĩpēx o te amnepēm kot mē hwỳr kaxkwa rūm mē apkur xà rēnhhta pyrà nē amnē pika hwỳr inhmē. Jakamã te ixpē kaxkwa rūm mē apkur xà maati wrỳk xwỳnhhta pyràk. Mē ate amnhĩ kaxyw ixkôt ajamaxpēr nē ixkôt amnhĩ xunhwỳr hãmri nē ixkukwak ri wa ixri atĩr tũm nē apa ho apa kaxyw. Anē.

³⁴ Nhũm pre ã Jējus mē kām amnhĩ jarēnh anē nhũm mē kuma nom hprĩ hã mar mex kēt nē. ãm htỳx ho axtem mē apkur xà mex pix ã harēnh ã hkamnhĩx nē kām:

—Kwa tô mē inhmã mē apkur xà maatita kwỳ gō pa mē apkati mē hkur o ri ixpa. Anē.

³⁵ Hãmri nhũm mē kuma nē amnhĩ tã mē kām:

—Nà mē apkur xà kumrēxja ãm paa. Te ixpē mē apkur xà maati pyràk. Jakamã kot kaj mē atō amnhĩ kaxyw ixkôt ajamaxpēr nē ixkôt amnhĩ nhĩpēx o apa hã kot kaj mē akĩnh nē apa. Te ra axàpkur nē anhōhy htu nē akĩnh o ri apa pyràk. Jao amnhĩ tã ixpumu nē akĩnh nē ajamakētkati nē ri apa.

³⁶ —Ra mē ate ixpumunh mex tã kormã amnhĩ kaxyw ixkôt ajamaxpēr kēt nē. Kwa mē ixkapēr ma nē amnhĩ krãm haxàr tỳx nē.

³⁷ Tĩrtũm kot inhmã mē òr mã xwỳnhjaja koja mē ixpumu nē amnhĩ kaxyw ixkôt hamaxpēr mex kurē kumrēx. ã mē kot amnhĩ nhĩpēx anhỹr xwỳnhjaja kot paj aa amnhĩ nē mē hanor kēt nē.

³⁸ —Nē ixte amnhĩ krã hkôt kaxkwa rūm ixwrỳk nē inhmã hprãm xà hkôt tanhmã amnhĩ nhĩpēx to ho ixpa kaxyw na pa pre ixwrỳk kēt nē. Inhĩpēêxã kot mē awỳr inhmēnh jakamã kām hprãm xà hkôt pix mã na

pa hte tanhmā amnhĩ nhĩpêx to ho ri ixa.

³⁹ —Tā mo na hte Inhĩpêêxà kām hprām? Nà kot inhmā mẽ õr mā xwýnh piitā nhỹrmā wa ixkuri htĩr tũm mẽ mex mẽ pa ho paja na kām hprām. Jakamā nhỹrmā akupỹm mẽ htĩr ã arĩgrota ã ixte akupỹm mẽ ho htĩr nhũm ixte ãm pixire mẽ ho ix-pikunor kêtja na kām hprām.

⁴⁰ —Tā kot ka mẽ atõ ixpê Tĩrtũm Kra hã ixpumu mẽ amnhĩ kaxyw ixkõt ajamaxpêr mẽ ixkõt amnhĩ xãm. Hã kot kaj nhỹrmā atyk tā pa akupỹm mẽ atĩr xà hã arĩgrota ã akupỹm ato atĩr ka wa ixkuri atĩr tũm mẽ amex mẽ apa ho apa. Ja na Inhĩpêêxàja kām hprām. Anẽ.

Nhũm pre ã Jejus mẽ kām amnhĩ jarẽnh anẽ.

⁴¹ Hãmri nhũm Ijaew nhõ pahijaja mẽ kuri mar o kuhê mẽ tee ri kêp kaxkwa rũm mẽ apkur xà maati pyræk ã amnhĩ jarẽnh ma nhũm ja mẽ kām mex kêt nhũm mẽ kamã gryk mẽ.

⁴² Jakamā axpên mã ri harẽnh o:

—Tk. Kwa mo na ri ã amnhĩ jarẽnh anẽ? Kêp mẽ panhiõ kênã kot kêt ri kêp kaxkwa nhõ xwýnh ã amnhĩ jarẽ. Kêp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem mẽ kêp kaxkwa nhõ xwýnh ã amnhĩ jarẽ. Anẽ.

⁴³ Hãmri nhũm amnhĩ tā mẽ kuma mẽ mẽ kām:

—Kwa mẽ ã ijarẽnh anhỹr kêt mẽ.

⁴⁴ Koja Inhĩpêêxà kot mẽ awýr inhmẽnh xwýnhhta tanhmā mẽ hkrã hto nhũm mẽ rĩ kormã amnhĩ tā ja hã ixpumu mẽ amnhĩ kaxyw ixkõt hamaxpêr. Tã ã mẽ kot amnhĩ nhĩpêx anhỹr xwýnhhaja koja mẽ nhỹrmā htyk tā pa akupỹm mẽ ho mẽ htĩr nhũm mẽ wa ixri htĩr tũm mẽ mex kumrêx mẽ pa ho pa.

⁴⁵ —Amnepêm Tĩrtũm kapêr jarẽnh o mẽ pa xwýnhhaja na prem ã ja jarẽnh anhỹr o:

Koja Tĩrtũm mẽ hkrã kaxwýnh kām tanhmā mẽ kām kapêr o amnhĩrĩt to ho pa.

Anhỹr o harẽnh. Jakamā mẽ kot Tĩrtũm kapêr mar mẽ hkõt amnhĩ nhĩpêx xwýnhhaja koja mẽ mããnẽn amnhĩ kaxyw pa ixkõt hamaxpêr mẽ ixkõt ri amnhĩ nhĩpêx o pa.

⁴⁶ —Nẽ mẽ apê pika nhõ xwýnhjê hõ aa mẽ ate ixkĩnhã ano ho Inhĩpêêxà pumunh kêt. ãm papxipix na ixte omunh. Kurũm na pa pre mẽ awýr wrý.

⁴⁷ Tã kot ka mẽ atõ amnhĩ kaxyw ixkõt ajamaxpêr. Hã kot kaj nhỹrmā wa ixkuri atĩr tũm mẽ amex mẽ apa ho apa. Kwa mẽ jam ajamaxpêr tỳx mẽ.

⁴⁸ —Nẽ ixpê mẽ axàpkurxà maati jakamā pa na ixpê akupỹm mẽ ho mẽ htĩr xwýnh.

⁴⁹ Amnepêm mẽ panhĩgêjtaja kormã kapôt ã mẽ pa ri mẽ kot “manã” anhỹr xwýnhhta kur o ri pata ã na prem kukwak ri htĩr tũm mẽ pa ho pa hkêt mẽ. Na prem ri pa mẽ gaa mẽ rĩ hpigêt mẽ htyk pa.

⁵⁰ Axtem kaxkwa rũm mẽ apkur xà maati jarẽnh xwýnhhta pix kukwak ri na htem nhỹrmā htyk tā akupỹm htĩr mẽ wa ixri htĩr tũm mẽ mex mẽ pa ho pa.

⁵¹ ãm paa. Pa na htem inhĩ hkwy hkrẽ hãmri mẽ wa ixri htĩr tũm mẽ mex mẽ pa ho pa. Na pa pre ra amnhĩ grõnh kõt mẽ awýr wrý. Jakamā ka mẽ atõ inhĩ hkwy hkrẽ hãmri mẽ nhỹrmā atyk tā pa akupỹm ato atĩr ka Tĩrtũm mẽ wa ixri atĩr tũm mẽ amex mẽ apa ho apa. Anẽ.

⁵² Nhũm pre ã Jejus Ijaew mã amnhĩ jarẽnh anẽ. No ãm mẽ kām amnhĩ tā kuxi mẽ amnhĩ jarẽ. Jakamā nhũm mẽ tee ri kuma hãmri mẽ tanhmā hã axpên mã kapêr to. Mẽ kot hprĩ hã mar kêt mẽ ãm mẽ kot ã hkwy hkrêrja pix jarẽnh mar jakamā tee ri hamaxpêr mẽ axpên mã:

—Kwa tanhmā kot kêt we amnhĩ to mẽ mẽ pamã amnhĩ nhĩ hkwy gõ pu mẽ kuku? Anẽ.

⁵³⁻⁵⁴ Hãmri nhũm amnhĩ tā mẽ kuma mẽ mẽ kām:

—Nà mẽ kot inhĩ hkwy hkrêr mẽ ixkamrô hkwy ho hkõm xwýnh pixjaja koja mẽ nhỹrmā Tĩrtũm mẽ wa ixri htĩr tũm mẽ pa ho pa. Ixte akupỹm

mē ho mē htīr xà hã arīgrota ã kot paj mē ho mē htīr nhūm mē wa ixri htīr tūm nē mex nē pa ho pa. No kot kaj mē inhī hkwỳ hkrēr kêt nē ixkamrô hkwỳ ho akôm kêt hāmri nē wa ixri atīr tūm nē amex nē apa ho apa hkêt nē. Kwa mē jam ajamaxpēr tỳx rāhã nē.

⁵⁵ Kêt inhīja kēp mē apkur xà maati na. Nē ixkamrôja kēp mē hkôm xà maati na. Jakamã na htem inhī hkwỳ hkrē nē ixkamrô hkwỳ ho ixkô nē ra kēp wa ixri mē htīr tūm nē mē pa ho mē pa mã xwỳnh.

⁵⁶ Jakamã kot ka mē atō inhī hkwỳ hkrē nē ixkamrô hkwỳ ho ixkô. Hāmri pa amnhī tã apumu nē akarô mã axà ka te apê pa pyrāk o amnhī nhīpêx o apa.

⁵⁷ Inhīpêxà kot mē awỳr inhmēnh xwỳnhhta kukwak ri na pa hte ixtīr tūm nē ixpa ho ixpa. Tã ja pyrã nē kot kaj mē inhī hkwỳ hkrē hāmri nē ixkukwak ri wa ixri atīr tūm nē apa ho apa mã xwỳnh.

⁵⁸ —Jakamã na pa ã mē amã ixpê kaxkwa rūm mē axàpkur xà maati hã amnhī jarēnh anē. Amnepēm mē panhīgêjtaja na pre htem kapôt ã mēōta kur o pa hāmri nē gaa nē hpigêt nē htyk pa. No kêt pa koja mē inhī hkwỳ hkrē hāmri nē mē kurom wa ixri htīr tūm nē mex nē pa ho pa. Anē.

⁵⁹ Nhūm pre ã Jejus mē kãm amnhī jarēnh anē. Kormã Kapanau kamã Tīrtūm kapēr o mē ahkre xà hã ixkre kamã ã mē ahkre anhỳr o xa.

Mē ohtô nē mē kot Jejus kaga hã mē harēnh

Sikūn Korīt 3.6; Sikūn Pêtre 3.16

⁶⁰ Hāmri nhūm mē kot Jejus kôt mar o mē pa xwỳnhjaja ohtô nē ã kapēr anhỳrja ma nē tee ri amnhī kukamã hamaxpēr nē hã axpēn mã:

—Tk. Kwa pēr kapērja ãm ri katii. Mēhō koja we kuma nē hkôt hamaxpēr nē hkamrô nē ĩ kur o ri hkôt pa? Nà mē piitã mē kãm ja mexti hã. Anē.

⁶¹ Hāmri nhūm amnhī tã mē kuma nē mē kãm:

—Kwa xà ixkapērja mē apê omnuj?

⁶² Nà kot paj nhỹrmã ma akupỹm kaxkwa hwỳr api. Ixpê Tīrtūm kot mē akaxyw ixãm xwỳnh ã ma akupỹm hwỳr api. Hāmri ka mē ã ixte amnhī nhīpêx anhỳr ã ixpumu nē rī kormã ixkôt amnhī xunhwỳr japēr.

⁶³ Na htem mēmoj kur kukwak ri kēp Tīrtūm mē wa ixri htīr tūm nē pa ho pa xwỳnh kêt nē. Rỳ amnhī krã hkôt tanhmã amnhī nhīpêx to ho kēp wa ixri htīr tūm nē pa ho pa mã xwỳnh kêt nē. Tīrtūm mē wa Ixkarô tãm na hte mē hkarô mã agjê nē mē ho Tīrtūm wa ixkuri mē htīr tūm nē mē pa ho mē pa mã xwỳnh. Tã ỳ hã na pa ã mē amã ixkapēr anē. Nom mē amã amnhī tã kuxi nē amnhī jarē. Tã kot kaj mē ixkapēr ma nē ixkôt amnhī nhīpêx. Hã kot kaj mē nhỹrmã wa ixri atīr tūm nē amex nē apa ho apa.

⁶⁴⁻⁶⁵ No mē akwỳjaja na ka mē ixkapēr ma nē ãm ama nē ixkôt ajamaxpēr kêt nē. Jakamã na pa ã mē amã ixkapēr anē nē mē amã: “Koja Inhīpêxàja tanhmã mē akrã hto ka mē rī kormã amnhī tã ixpumu nē amnhī kaxyw ixkôt ajamaxpēr.” Anhỳr o mē amã ixkapēr. Anē.

Nhūm ã Jejus mē kãm kapēr anē. Ra kot mē hkukamã mē omunh mex. Ra kot amnhī kaxyw mē kot hkôt hamaxpēr mã xwỳnhjê pumunh nē mãñnēn mē kamã kot mēō pahi nhīhkram haxâr mã xwỳnhja nhūm mãñnēn ra kot amnhī kukamã omunh mex. Jakamã nhūm ã mē kãm kapēr anē.

⁶⁶ Hāmri nhūm mē kot hkôt kapēr mar o mē pa xwỳnh kwỳjaja tee ri kuma hāmri nē hkaga nē axte hkôt pa hkêt nē.

⁶⁷ Hāmri nhūm tee ri mē kot hkaga nē ma mē mrar ã mē omu nē mē ixpê hkôt ixpa ho ixpa xwỳnh pē 12jê mã kapēr nē mē inhmã:

—Pa? No mē kajaja. Xà kot kaj mē urāk nē ixkaga nē ma akupỹm mra nã? Anē.

⁶⁸ Hāmri nhūm Simãw Pêtre kãm: —Nà kot paj mē akaga hkêt nē. Kapxipix na htem amnhī kaxyw akôt hamaxpēr jao kēp Tīrtūm mē war akuri htīr tūm nē pa ho pa mã xwỳnh.

⁶⁹ Ka na pre Tirtūm mẽ ixwỳr amẽ. Jakamã na pa mẽ amnhĩ kaxyw akõt ijamaxpẽr o ri ixpa. Nà kot paj mẽ aa akaga hkõt nẽ. Anẽ.

⁷⁰ Hãmri nhũm kuma nẽ kãm:
—Nà ixte amnhĩ kaxyw mẽ apê 12jê rênh tã na ka mẽ atõ akwỳjê hkĩnhã axtem nẽ Satanasti hkõt amnhĩ xãm. Anẽ.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anẽ. Mẽ inhĩ õ na pre. Nẽ kệp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anẽ.

7

Jejus tøjaja kot mẽ hkĩnh wỳr amnhĩ kõt hwỳr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nẽ kormã akupỹm Jutej wỳr mõi kêt nẽ. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nẽ.

² Tã mẽ ixpê Ijaew mẽ ixte ixkre hkryre nhĩpêx nẽ hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wỳr axpên wỳr akuprõ nẽ ahpỹnhã ri amnhĩm ixkre hkryre nhĩpêx nẽ kamã ixkrĩ.

³ Jakamã nhũm Jejus tøjaja hwỳr mra nẽ kãm nojarêt nẽ amnhĩ kõt kuwỳ nẽ kãm:

—E kwa tokyx pu mẽ pahkwỳjê hkõt. Ka mẽ kãm aa mẽ kot mẽmoj pumunh kêt kwỳ ho anhỹr o ri mẽ hkõt apa kê mẽ kãm akapẽr mar prãm xwỳnhjaja ja hã apumu.

⁴ Na ka hte jar te apimxur pyræk o amnhĩ nhĩpêx. E kwa tokyx ma pu mẽ hkõt. Anẽ.

⁵ Katorxà hkõt mẽ kệp Jejus tõi htã kormã amnhĩ kaxyw hkõt hamaxpẽr kêt jakamã na prem ã kãm kapẽr anẽ.

⁶ Hãmri nhũm mẽ kãm:
—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ

hkõt amrar prãm nẽ mãmri ma mẽ hkõt mra.

⁷ Koja mẽ apumu nẽ kãm mẽ akurê hkõt nẽ. Nẽ mẽ akamã gryk kêt ka mẽ ri tanhmã amnhĩ nhĩpêx to ho mẽ hkõt apa. No pa kot paj mẽ hwỳr mõi nẽ mẽ kãm mẽ kot amnhĩ tomnuj o pa hã mẽ harênh o ri mẽ hkõt ixpa nhũm mẽ tee ri amnhĩ tã inhma nẽ ixkamã gryk nẽ.

⁸ Jakamã mẽ mãmri ma mẽ hkõt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹ Anẽ nhũm mẽ tee ri kuma hãmri nẽ kure nẽ ma mẽ hkwyjê hkõt Jutej wỳr mõi. Nhũm Jejus kormã Garirej kamã ri pa hã apkati grêre.

¹⁰ Hãmri nẽ kormã ma hapu hã mẽ hkõt mõi. Pa mẽ hkõt ri ixpa ho ixpa xwỳnhjaja ma hkõt ixpa.

Mẽ kot ahpỹnhã tanhmã Jejus jarênh to hã mẽ harênh

Juāw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nẽ hã axpên kukjêr o mra nẽ axpên mã:

—Kwa nok? Nhỹri mãn we? Anẽ.

¹² Nhũm Ijaew piitã tanhmã axpên mã Jejus jarênh to ho pa. Nẽ kamã mẽ hkwyjaja harênh o:

—Nà kot amnhĩ to mex o pa xwỳnh na.

Anhỹr o harênh o pa. Nẽ kamã mẽ hkwyjaja axtem nẽ harê nẽ harênh o:

—Tk. Kot mẽ no kupyrr o pa xwỳnh kênã. Anẽ.

¹³ Nom mẽ õ pahi pymaj mẽ piitã mẽ nom tanhmã harênh to hkêt nẽ. ãm axpên mã pix mã tanhmã harênh to ho pa.

Jejus kot mẽ hkĩnh xwỳnhjê jahkre hã harênh

Makre 3.22; Juāw 5.16

¹⁴ Tã pa mẽ mẽ hwỳr pøj. Jejus mẽ pa mẽ hkõt ixpa ho ixpa xwỳnhjaja mẽ hwỳr pøj. Kormã mẽ hkĩnhja hapêx kêt ri. Hãmri pa mẽ Jejus kõt Tirtūm mã amnhĩ jarênh xà hã ixkreja wỳr

mra nê agjê nhũm Jejus mē ahkre ho nhỹ.

¹⁵ Hāmri nhũm mē inhõ pahijaja tee ri kot tanhmã mē ahkre hto hã kuma nê hã axpên kukja nê axpên mã:

—Kwa mē pahkĩnhã kot Tĩrtũm kapêr o istuda hkêt tã ã mē ahkre anê. Anê.

¹⁶ Hāmri nhũm amnhĩ tã mē kuma nê mē kãm:

—Nà na pa hte amnhĩ krã hkôt tanhmã ri mē ajahkre hto hkêt nê. ãm kot mē awyr inhmēnh xwýnhnta nhỹ hã na pa hte ã mē ajahkre anhỹr o ri mē akôt ixpa.

¹⁷ Tã kot kaj mē amã Tĩrtũm kãm hprãm xà hkôt amnhĩ nhĩpêx prãm hã kot kaj mē ixte ỹ hã ixkapêr ã ixpumunh kurê kumrêx.

¹⁸ Amnhĩ krã hkôt mē kãm kapêr o ri mē pa xwýnhjaja na htem mē kot mē mar nê mē hã hpijaàm pix kaxyw tanhmã mē kãm kapêr to ho ri pa. No kêt pa na mē ate ixkapêr mar nê kot mē awyr inhmēnh xwýnhnta ã apijaàm pix kaxyw na pa hte tanhmã mē amã ixkapêr to ho ri ixpa. Jakamã ãm hãmri na pa hte mē amã ixkapêr o ri ixpa.

¹⁹ —Finat Mojes na pre mē panhĩgêjtaja kot tanhmã amnhĩ nhĩpêx to ho pa nhũm Tĩrtũm kot mē kãm hã karõ jarēnh o ri mē hkôt pa htã ka mē hkôt amnhĩ nhĩpêx kêt nê. Tã ixte hkôt amnhĩ nhĩpêx kêt ã ixto axêx nê mē ate ixpĩr kaxyw ixtã amnhĩ jarēnh ri apa. Anê.

²⁰ Hāmri nhũm mē ã Jejus kot mē kãm kapêr anhỹrja ma nê hêx rom kãm:

—Kwa mē ixtõ na pa apĩr mã ka ri ã mē ijarēnh anê? Amrakati kênã. Kwa mãn ka akrã axpã nà? Hã na ka ã ri akapêr anê. Anê.

²¹ Hāmri nhũm mē kãm:

—Nà ixte mē pahkôt xà hã arĩgro hã akupỹm mēhõ myta ho mex jakamã na ka prem ja hã ixpumu nhũm ja mē apê omnuj nê. Nê te ixte mē pahkôt xà hã arĩgro hã ixpijaàm kêt xwýnhnta pyràk ã ijarê.

²² Nom na ka htem ixpyrà nê mē panhõ arĩgromnu hã mēmoj tã axapênh o ri apa. E pa mē amã mēmoj jarê ka mē inhma. Na pre finat Mojes mē pamã mē pahte mē pahkra myre pē my kwryt kà jakàr ã mē pamã karõ. Kukamã higêjtaja kot kãm ja hã karõ xà hkôt. Jakamã na htem mē hkra myre hapôj nê hã semãn pyxi nê hapêx nhũm mē kêp mēmy hkwrýt kà jakà.

²³ Mē pahkôt xà hã arĩgro hã hõ kator tãã nhũm mē hã semãn pyxi nê mē panhõ arĩgromnu hõ hã kêp my kwryt kà hkwy krãhta. Mojes kot Tĩrtũm nhỹ hã ja hã mē pamã karõ xà hkôt. Jao mē panhõ arĩgromnu hã apê. Tã pa pre mē apyrà nê arĩgromnu hã ixapênh pē akupỹm mēhõ myta ho mex ka mē ja hã ixpumu nê axtem nê ixtýx ri ixte amnhĩ nhĩpêx o ixpa xwýnh ã ijarê nê mē ate ixpĩr kaxyw ã amnhĩ jarê.

²⁴ Kwa mē amnhĩ krã hkôt tanhmã mē harēnh to ho ri apa hkêt nê. ãm mē kot tanhmã amnhĩ nhĩpêx to ho pa hã mē omu nê ajamaxpêr o: “Kwa xà we Tĩrtũm kãm ja mex nà?” Anhỹr o mãn kêt mē ajamaxpêr nê rĩ kormã tanhmã mē harēnh to. Anê.

²⁵ Hāmri nhũm Jerujarê nhõ xwýnh kwýjaja ja hã kuma nê tee ri hkukamã hamaxpêr. Hāmri nê hã axpên kukja nê axpên mã:

—Kwa xà tãm na mē panhõ pahijaja mē kot hpĩr kaxyw hã amýnê?

²⁶ Ota jar mē pakamã ri pa htã nhũm mē ãm omu nê kãm tanhmã nê hkêt nê. Mãn mē ãm hãmri kêp Kris ã hkamnhix jakamã kapêr ma nê ãm kuma nê kêp Kris ã tanhmã ho hkêt nê. Anê.

²⁷ Hāmri nhũm mēhõja kuma nê kãm:

—Tk. Nà kêp Tĩrtũm kot mē pahwýr mēnh xwýnhre hã. Kêp Najare nhõ xwýnh kênã. Mē pahte hipêêxã mē katorxà wa omunh mex. No kêt Tĩrtũm kot mē pahwýr mēnh mã xwýnhnta koja xep mē pahwýr kato pu mē nhỹhýnh htēm xà hkôt omunh kêt nê. Anê.

²⁸ Rôm nhũm Jejus arĩ Tĩrtũm mã amnhĩ jarēnh xà hã ixkreja kamã mẽ ahkre ho nhỹ. Jakamã mẽ kot axpēn mã harēnh ã amnhĩ tã mẽ kuma nē mẽ kãm:

—Xà mẽ ate aprĩ hã ixpumunh nē nhỹhỹnh ixtēm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awȳr inhmōr kêt nē. Na pre mēhō mẽ awȳr inhmē. Nom kot mẽ awȳr inhmēnh xwỳnhja kormã mẽ ate omunh kêt.

²⁹ Ām papxipix na ixte omunh. Kurũm ixwrȳk xwỳnh na pa. Kot mẽ awȳr inhmēnh nhũm kurũm ixwrȳk jakamã ixte ixprĩ hã omunh par. Anē.

³⁰ Hãmri nhũm mẽ hkwȳjaja tee ri ã kot amnhĩ jarēnh anhỹrja ma nē ri axpēn mã harēnh o:

—Kwa Tĩrtũm kot mẽ pahwỳr mēnh ã kot amnhĩ to hēx kēnã. E kwa pu mẽ ã kot amnhĩ to hēx anhỹr ja ã unē nē haxà nà?

Anhỹr o axpēn mã hã amỹnē. Nom kormã mẽ kot unēnh nē haxàr xà hã arĩgroja kormã kator kêt jakamã nhũm Tĩrtũmja nē mẽ omunh mex nē nhũm mẽ ãm kãm unēnh prãm kaprỹ.

³¹ No nhũm mẽ hkwȳja mẽ kurom kuma nē kēp Tĩrtũm kot mẽ pakaxyw ãm xwỳnh ã omunh kurē kumrēx nē amnhĩ kaxyw hkôt hamaxpēr. Hãmri nē axpēn mã harēnh o:

—Kwa mãn kēp Tĩrtũm kot mẽ pahwỳr mēnh mã xwỳnhhta mãn nà? Mē pahtō kot pu uràk nē aa mẽ kãm mẽ kot mēmoj pumunh kêt o anhỹr rax o ri papa? Amrakati kumrēx. Nà pēr tãm kēnã. Anē.

Pôristi hkwȳ kot Jejus pynēnh kaxyw ã mẽ harēnh

³² Nhũm prem ã axpēn mã Jejus jarēnh anhỹr o kuhê hãmri nhũm Parijew nhō xwỳnhjaja hã mẽ kuma. Hãmri nē patre krãhtũmjê mẽ mẽ ma Jejus wỳr mẽō pôristi hkwȳ rē nē mẽ kãm:

—E mẽ ma Jejus wỳr mra nē unē nē man akupỹn o tē. Anē.

³³ Hãmri nhũm mẽ kuma nē ma hwỳr mra nē omu nom tokyx unēnh kêt nē. Kormã kapēr ã mar o kuhê.

Nhũm Jejus arĩ mẽ kãm kapēr o xa nē mẽ kãm:

—Nà kot paj jar mẽ akôt ri ixpa hã mytwrȳ grêre hãmri nē ma akupỹm kot mẽ awȳr inhmēnh xwỳnhhta wỳr api.

³⁴ Ka mẽ tee ri jar ijapēr o ri apa nom nhỹri ixpumunh kêt nē. Nē ma inhmōr xàta wỳr kot kaj mẽ atō ma ixkôt amōr kêt nē. Anē.

³⁵ Hãmri nhũm mẽ tee ri ã kot amnhĩ jarēnh anhỹrja ma nē axpēn mã:

—Kwa nhỹhỹm koja we ma mō pu mẽ hkôt papa hkêt nē? Mãn mẽ pahkwỳjaja kot Gresjê kamã mẽ pa xwỳnhjê hwỳr koja ma mō nē hpãnhã mẽ hkôt mẽ ahkre ho pa nà? Hã na ã mẽ pamã amnhĩ jarēnh anē?

³⁶ Mo na ri mẽ pahte tee ri hapēr o papa hã mẽ pajarē nē mẽ pahte hkôt pamrar kêt ã mẽ pajarē? Anē.

Tĩrtũm Karō te kēp gô nyw pyràk ã harēnh

Juāw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapēx kaxyw hitep xà hã arĩgro maatija kato. Jakamã nhũm Jejus kànhmã xa nē kỳxpê mẽ hpikuprōnh xwỳnhjê mã kapēr nē mẽ kãm:

—E te mẽ amã kôr o apa pyràk xwỳnhjaja. Mē amnē ixwỳr akuprō. Kot kaj mẽ amnhĩ kaxyw ixkôt ajamaxpēr pa tanhmã mẽ ato ka mẽ apē Tĩrtũm mẽ wa ixri atĩr tũm nē apa ho apa mã xwỳnh.

³⁸ —Kot kaj mẽ ja hã amnhĩ pumu hãmri nē ma mẽ kãm ixkapēr jarēnh o ri mẽ hkôt apa. Te mẽ kãm kôr nhũm mẽ ate mẽ kãm gô hkwȳ nhũm mẽ kot ho hkôm pyràk o mẽ hipēx o ri mẽ hkôt apa. Hãmri nhũm mẽ ama nē mẽ apyrà nē amnhĩ kaxyw ixkôt hamaxpēr. Pa ixte tanhmã mẽ atoja pyrà nē tanhmã mẽ ho nhũm mẽ apyrà nē kēp wa ixri htĩr tũm nē pa ho pa mã xwỳnh. Anē.

³⁹ Nhũm pre ã Jejus mẽ kãm kapēr anē. No ãm hã kuxi nē mẽ kãm kapēr nē hprĩ hã harēnh kêt nē. Tĩrtũm Karō kot nhỹrmã mẽ kot amnhĩ kaxyw Jejus mã hamaxpēr xwỳnhjê karō

mã gjêxja nhũm ã mẽ kãm hã kuxi nê harênh anê. No kormã akupỹm kaxkwa hwỳr àpir nê mex o mex nê hkrĩ hkêt jakamã kormã mẽ hwỳr Karõ rênh kêt nê.

Mẽ kot ahpỹnhã tanhmã Jejus jarênh to hã mẽ harênh

Juāw 7.11-13, 7.25, 10.19-21

⁴⁰ Hãmri nhũm mẽ kot Jejus mar o hkrĩ xwỳnhjaja ã kapêr anhỹrja ã kuma nê ahpỹnhã tanhmã harênh to nê harênh o:

—Kwa finat Mojes pyrã nê kêp Tĩrtũm nhỹ hã kapêr jarênh o pa xwỳnh na nã? Anê.

⁴¹ Nhũm kamã mẽ hkwỳjaja mẽ kãm:

—Nã Tĩrtũm kot mẽ pakaxyw ãm xwỳnhhta na. Anê.

Nhũm kamã mẽ hkwỳjaja ja hã mẽ kuma nê mẽ kãm:

—Tk. Nã kêp Garirej nhõ xwỳnh kênã kot kêt Tĩrtũm mẽ pakaxyw ãm.

⁴² Tĩrtũm kapêr ã kagã htũm kot kêp Garirej nhõ xwỳnh ã harênh kêt. Kêp Pahi Tawi hkanrêhã hkagrõt nyw jakamã koja urak nê Jutej kamã krĩ pê Perêj kamã kato. Jao koja urak nê kêp Jutej nhõ xwỳnh.

Anhỹr o ri xypên mã harê. Mẽ kot htỹx Jejus pika pê Garirej kamã kator ã hkamnhĩx jakamã ã xypên mã harênh anê. Nom pika pê Jutej kamã na pre kato. Krĩ pê Perêj kamã. Tã no nhũm mẽ hkwỳjaja ja hã mar kêt jakamã kêp Tĩrtũm kot mẽ pahwỳr mênh xwỳnh kêt ã hkamnhĩx.

⁴³ Jakamã nhũm mẽ ã ahpỹnhã xypên mã harênh anê.

⁴⁴ Nhũm mẽ hkwỳjaja ra kot unênh kaxyw tã tokyx unênh kêt nê.

Pôristi kot Jejus pynênh kêt ã mẽ harênh

Matêwre 7.28-29

⁴⁵ Tã nhũm patre nhõ pôristijaja. Mẽ kot Jejus pynênh mã hwỳr mrar tã hãmri ã kapêr anhỹrja ã kuma nê tee ri hamaxpêr nê unênh kêt nê. Nê awjanã nê ahte y kamã ma akupỹm patre krãhtũmjê mẽ Parijew nhõ xwỳnhjê hwỳr mra. Hãmri nhũm mẽ omu nê mẽ kãm:

—Pa nok? Tanhmã na ka mẽ amnhĩ to nê unênh nê ho amôr kêt nê? Anê.

⁴⁶ Hãmri nhũm mẽ kãm:

—Nã na pa mẽ unênh kêt nê. Kapêr mex kênã. Te kot mẽ pakapêr pyrãk kêt jakamã pa mẽ tee ri kapêr ã kuma nê unênh kêt nê. Anê.

⁴⁷ Hãmri nhũm Parijew nhõ xwỳnhjaja mẽ kuma nê mẽ kãm:

—Tk. Kwa mãn ka mẽ ra mẽ urak nê tanhmã kot amnhĩ to hêx toja ma nê hkôt ajamaxpêr nã?

⁴⁸ Mẽ ixpê Parijew nhõ xwỳnhjaja nê mẽ panhõ pahijaja na pa htem hkôt ijamaxpêr kêt nê.

⁴⁹ No kêt mẽ kot mar nê hkôt hamaxpêr xwỳnhhtijaja na htem mẽ ixkĩnhã finat Mojes kapêr mar kêt nê. ãm Jejus kapêr pix na htem kuma nê hkôt hamaxpêr. Mỳrapê koja Tĩrtũm tanhmã mẽ homnuj tỹx to nhũm mẽ rĩ amnhĩ pumu. Anê.

Nĩkotê kot Jejus xyr pê kapêr ã harênh

Juāw 3.1-21

⁵⁰ Hãmri nhũm Nĩkotêja mẽ mar o xa. Mẽ urak nê kêp Parijew nhõ xwỳnh tã na pre ra kamãt õ hã Jejus wỳr tẽ nê kãm kapêr. Jakamã tee ri hã mẽ kapêr ma hãmri nê yr pê mẽ kãm kapêr nê mẽ kãm:

⁵¹ —Tk. Kwa kormã mẽ pahte pahprĩ hã kapêr mar nê tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtê mã ja jarênh o:

Kêr ka mẽ aprĩ hã mẽ kapêr ã mẽ ama nê mẽ kot amnhĩ nhĩpêx ã mẽ omu nê rĩ kormã tanhmã mẽ harênh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anê.

⁵² Hãmri nhũm mẽ tee ri kuma nê kãm:

—Tk. Kwa xà we urak nê apê Garirej nhõ xwỳnh hã na ka ã yr pê akapêr anê? Xà Tĩrtũm kapêr ã kagã htũm kot Garirej nhõ xwỳnhjê hõ kêp y hã kapêr jarênh o pa xwỳnh ã harênh? Nã ã kot harênh anhỹr kêt. Anê.

⁵³ Nhũm mẽ ã Nĩkotẽ mã kapêr anê hãmri nê anhrà nê Tĩrtũm nhõrkwỹ rũm hapôj nê ma akupỹm õrkwỹ hwỳr àhkurê ho mra.

8

Mêhõ ni kot nhãm mẽ mjên o amnhĩkati hã harênh Xiakre 2.10-13

¹ Tã nhũm Jejus Tĩrtũm nhõrkwỹ kamã mẽ ahkre hpa hãmri nê kato nê ma hixêt prêk pê Oriwêhti hwỳr tẽ. Hãmri nê hã api nê nhỹri nõ nê ra gõr.

² Tã nhũm apkati nê myt kator o mõi mẽ nhũm kãnhmã nhỹ nê akupỹm wrỹ nê Tĩrtũm mã amnhĩ jarênh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwỳnhjaja omu nê hã htu rax nê nhũm tanhmã mẽ ahkre hto ho nhỹ.

³ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja hwỳr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja hã omu nê unê nê hpa hã kupy nê ma Jejus wỳr hkjênh o mõi. Hãmri nê mẽ kot mar o kuhê xwỳnhjê kutã ãm nhũm xa.

⁴ Hãmri nhũm mẽ Jejus mã:

—E ot pa mẽ awỳr jahti ho tẽ ka omu. Na ham mêhõ pê mjên o amnhĩkati ho nõ. Pa mẽ ja hã omu nê unê nê man awỳr o tẽ.

⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjê mã ja jarênh o:

Koja mênijê hõ axtem nê nhãm mêhõ pê mjên o amnhĩkati ho nõ ka mẽ ja hã omu nê apiitã ahpỹnhã kên rũnh jamỹ nê ho htak o apĩ.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarê. Anê.

⁶ Nhũm mẽ ã hêx rom nija ã Jejus kujêr anê. Kot mẽ kot hpĩr nê mẽ kãm kapêr nhũm mẽ kot hã mar nê mẽ hkrãhtũmjê hwỳr mõi nê kãm kot Mojes kapêr kwỳm ri mẽ ahkre hã

harênh kaxyw nhũm mẽ hêx rom ã hkukjêr anê. Hãmri nhũm mẽ kuma nê tanhmã hã mẽ kãm nê hkêt nê. ãm htỳx hikõt nê ãhkrakrã ho pyka kagà ho nhỹ.

⁷ Nhũm mẽ tee ri omu nê axte hã hkukja nhũm kãnhmã xa nê mẽ kãm:

—Tõe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nê kam nê rĩ kaxyw kên õ py nê akumrêx ho hkura. Kê akwỳjaja rĩ kormã akõt hkwyj jamỹ nê ho htak. Anê.

⁸ Hãmri nê akupỹm hikõt nê pyka kagà ho nhỹ.

⁹ Hãmri nhũm mẽ tee ri kapêrja kõt kuma hãmri nê mẽ kot mar o kuhê xwỳnhjê rũm anhrà nê ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapêr anhỹrja ma nê anhrà nê ma akupỹm hpỹnh nê axpên kõt mrrar o xa. Mêhpigêt kumrêx nê hpãnhã mẽ nywjaja nhũm mẽ hpỹnh nê ma axpên kõt mrrar o ãm kãm hapêx. Nhũm Jejus mênija pix wa ahte mẽ kot mar xwỳnhjê kutã wa arĩk.

¹⁰ Hãmri nhũm Jejus kãnhmã xa nê nita mã kapêr nê kãm:

—Pa? No mẽ kot ato kapêr xwỳnhhta mẽ? Xà na mêhõ kên o akuranh kêt nê? Anê.

¹¹ Nhũm kãm: “Ma amrakati.” Anê nhũm kãm:

—Tõe. Nà kot paj ijaxwỳja tanhmã ato hkêt nê. E mamrĩ ma akupỹm anhõrkwỹ hwỳr tẽ. No ãm kêr ka axte ã amnhĩ nhĩpêx anhỹr kêt nê. ãm kwarĩ ho kwarĩ. Anê.

Jejus kot hprĩ hã amnhĩ jarênh Juāw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwỹ hwỳr tẽ nê kamã mẽ ahkre ho nhỹ nê mẽ kãm:

—Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nê nhũm mẽ kamã rĩt mex o pa. Jao kamát kô kamã ri pa hkêt nê. Ja pyrã nê na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã aja-maxpêr nê ixkõt amnhĩ xãm hãmri nê

tanhmã amnhĩ tomnuj to ho apa hkêt nê. Ām Tĩrtũm kãm hprãm xà kôt pix mã tanhmã ri amnhĩ nhĩpêx to ho ri apa. Jao te ate kanê hpôk nhĩrã kamã arĩt mex pyrã nê apê wa ixri atĩr tũm nê apa ho apa mã xwỳnh. Anê.

13 Hãmri nhũm Parijew nhõ xwỳnhjaja tee ri ã kapêr anhỹr ã kuma nê kãm:

—Tk. Kapxipix na ka ã amnhĩ jarênh anê. Mêhõ kot ã ate amnhĩ jarênh anhỹrja kôt kot mẽ inhmã ajarênhre hã. Jakamã kot paj mẽ ama nê ãm ama. Anê.

14 Hãmri nhũm mẽ kãm:

—Nà mẽhõ kot ã ijarênh anhỹr kêt tã no ãm hãmri na pa mẽ amã amnhĩ jarê. Ixêx kêt. Mẽ arom ixte nhỹhỹnh ixwryk xà hã amnhĩ pumunh mex. Nê mẽ arom ma akupỹm nhỹhỹm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarênh anê.

15 Na ka htem amnhĩ krã hkôt tanhmã ri ijarênh to. No pa na pa kormã amnhĩ xwar tanhmã mẽ ajarênh to hkêt nê.

16 Ixte tanhmã mẽ ajarênh to ronhỹx pa ãm hãmri mẽ ajarê. Nhỹx pa ãm papxipix amnhĩ krã hkôt tanhmã mẽ ajarênh to hkêt nê. Nhỹx mãânên Inhĩpêêxà pê kot mẽ awyr inhmênh xwỳnhhta inhĩhkô hã pa wa ãm hãmri axpên kôt tanhmã mẽ ajarênh to. Mẽ ate amnhĩ to mex ã mẽ ajarê rỳ mẽ ate amnhĩ tomnuj ã mẽ ajarê.

17 Tĩrtũm kapêr ã kagà htũm kot ja jarênh kot:

Koja mẽhõ wa hamêxkrut nê tanhmã mẽmoj jarênh to nê ãm axpên kôt harênh o htipxi. Hã kot kaj mẽ wa ama nê ãm hãmri wa kot harênh kôt ajamaxpêr kurê kumrêx.

18 Anhỹr o kot harênh. Tã pa ã amnhĩ jarênh anê nhũm Inhĩpêêxà kot mẽ awyr inhmênh xwỳnhhta mãânên ã ijarênh anê. Wa ixpijakrut tã ã wa ixte axpên kôt amnhĩ jarênh anhỹr jakamã kwa mẽ ixte tanhmã amnhĩ jarênh toja ma nê ixkôt ajamaxpêr kêt wehe. Anê.

19 Nhũm pre ã Jejus mẽ kãm kapêr anê. Hãmri nhũm mẽ kuma nê kãm:

—No nhỹri na we anhĩpêêxà ja? Anê.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhỹx ka mẽ mãânên aprĩ hã Inhĩpêêxà pumunh mex kurê kumrêx. Nom mẽ ate ixpumunh mex kêt jakamã na ka mẽ mãânên omunh mex kêt nê. Anê.

20 Nhũm pre ã Jejus mẽ kãm kapêr anê. Arĩ Tĩrtũm mã amnhĩ jarênh xà hã ixkreja kamã mẽ ahkre ho xa. Mẽ kot kãxpore gjênh xà kuri mẽ ahkre ho xa. Nhũm mẽ kãm hkurê xwỳnhjaja tee ri kot tanhmã mẽ ahkre htoja ma nê kãm unênh nê haxàr prãm nê. Nom kormã mẽ kot ã hipêx anhỹr ã arĩgro kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unênh prãm kaprỳ.

21 Hãmri nhũm Jejus arĩ mẽ kãm kapêr o xa nê mẽ kãm:

—Nà kot paj nhỹrmã mẽ arũm ixkato nê ma akupỹm api. Ka mẽ tee ri ijapêr nom nhỹri ixpumunh kêt nê. Hãmri nê mẽ ate amnhĩ tomnuj o apa rãhã ty nê mẽ atõ ixwyr axàpir kêt nê. Anê.

22 Hãmri nhũm Ijaew nhõ pahijaja tee ri ã kapêr anhỹrja ã kuma nê axpên mã hã hpêr o pikênh o kuhê nê axpên mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarênh anê nà? Anê.

23 Hãmri nhũm amnhĩ tã mẽ kuma nê mẽ kãm:

—Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamã mẽ pajamaxpêr kot axpên pyrãk kêt.

24 Kot kaj mẽ ixpê kaxkwa rũm ixwryk xwỳnh ã ixpumu nê amnhĩ kaxyw inhmã ajamaxpêr nê ixkôt amnhĩ xunhwyr kêt hã kot kaj mẽ ate amnhĩ tomnuj o apa rãhã nhỹrmã atyk o mẽ kamjaja Tĩrtũm mã amnhĩ pãnhã amnhĩre. Anê.

25 Nhũm Jejus ã mẽ inhõ pahijê hkukamã mẽ kot amnhĩ nhĩpêx

jarēnh anē nhūm mē tee ri amnhī tā kuma nē kām:

—Kwa mē atō na ka we ri ā mē inhmā akapēr anē? Anē.

Hāmri nhūm mē kām:

—Nà ra ixte mē amā amnhī jarēnh kēnā. Xàn ka mē kormā aprī hā inhmar kēt nē?

²⁶ Kot paj nhǎrmā mē amā mē ate amnhī tomnuj piitā ho amnhīrīt pa. Na pa kot mē awýr inhmēnh xwýnhhta pix xō ri tanhmā mē amā ixkapēr to ho ri ixpa. Ām hāmri na hte tanhmā mēmoj jarēnh to. Na hte hēx kēt nē. Anē.

²⁷ Nhūm pre ā Jejus mē kām Hipêêxà kot mē hwýr mēnh ā harēnh anhýr tā no nhūm mē Hipêêxà kēp Tirtūm ā hkôt hamaxpēr kēt nē.

²⁸ Jakamā nhūm mē kām:

—Nà koja mē nhǎrmā pī kahpa hā inhō ka mē rī kormā aprī hā ixpē Tirtūm rūm mē awýr ixwryk xwýnh ā ixpumu. Nē ixte amnhī krā hkôt ixkapēr o ri ixpa hkēt ā ixpumu. Nē ām Inhīpêêxà xō ri ixprī hā ixkapēr o ri ixpa hā ixpumu.

²⁹ Ixte kām hprām xā hkôt pix mā tanhmā ri amnhī nhīpêx to ho ri ixpa jakamā na hte ixtānopxar mex o ixkôt pa ho pa. Koja aa ixkaga hkēt nē. Anē.

³⁰ Hāmri nhūm mē hkwyja kuma nē hkwyjê rom kapēr kôt hamaxpēr

³¹ nhūm amnhī tā mē omu nē mē kām:

—Nà ām hāmri na ka mē tā ixkôt ajamaxpēr. Tā kēr ka mē ixkôt amnhī xunhwý nē ixkapēr kôt pix mā ri amnhī nhīpêx mex o ri apa. Hāmri pa ja hā mē apumu nē mē apê ixkwý kumrêx ā mē ajarē.

³² Ām hāmri na pa hte ā ixkapēr anhýr o ri ixpa. Tā kot kaj mē ixkôt ri amnhī nhīpêx o ri apa hāmri nē aprī hā inhmar týx nē. Nom na hte kormā mēmoj kot amnhī tā mē ato htýx pyrāk o mē anhīpêx ka mē tee ri amnhī krā hkôt kām anhūrer prām kaprý. Tā kot kaj mē ixkôt amnhī xunhwý nē ixkôt ri amnhī nhīpêx hāmri nē Tirtūm nhý hā tām amnhī nhīpêx. Jao ý hā ate amnhī tomnuj mā anhūre. Anē.

³³ Nhūm pre ā Jejus mē kām kapēr anē hāmri nhūm mē tee ri kuma nē kām:

—Kwa mē ixpê mē pahpàr krax finat Apraāw kanrêhā htāmnhwý kēnā. Na pre mēmoj te kot amnhī tā ho htýx pyrāk o hipêx kēt nē. Jakamā mēmo kot we mē ixpê hkanrêhā htāmnhwýjê ho htýx ka we ri ā mē ijarēnh anē? Nà amrakati kēnā. Tā kwa mon ka ā mē ijarēnh anē? Anē.

³⁴ Hāmri nhūm Jejus hprī hā mē kām awjarē nē mē kām:

—Kwa mē ixkapēr ma nē amnhī krām haxàr týx nē. Nà mē kot amnhī tomnuj o mē pa xwýnhjaja te mē kot amnhī tomnuj tām ri kot amnhī tā mē ho htýx pyrāk o mē hipêx. Jakamā nhūm mē urer kēt rāhā nē pa ho pa. Nē ā amnhī nhīpêx anhýr rāhā ho pa.

³⁵ Jakamā ixkīnhā mē kēp Tirtūm kwý hkēt. No pa na ixpê Tirtūm Kra jakamā māānēn ixpê hkwy na pa.

³⁶ Tā mē kajaja. Kot kaj mē ixpê Tirtūm Kra hā ixkôt amnhī xunhwý hā kot pa tanhmā mē ato ka mē ixpyrà nē apê wa ixkwýy. Hāmri nhūm mē ate amnhī tomnuj te kot mē amā urer pyrāk o mē anhīpêx ka mē ra wa ixkôt amnhī nhīpêx o ri apa. Anē.

Mē kēp Tirtūm kra hkēt xwýnhjê jarēnh

³⁷ Nhūm Jejus arī mē kām kapēr nē mē kām:

—Nà ām hāmri na ka mē apê finat Apraāw kanrêhā htāmnhwý hā amnhī jarē. Nom mē apê hkanrêhā htāmnhwý htā urāk nē amnhī kaxyw Tirtūm kôt ajamaxpēr kēt nē. Jakamā na ka htem ixkapēr ma nē ām ama nē ixkaga. Nē axtem nē ixpīr mā. Kop apu Apraāw arī mē akamā pa ronhýx ā inhīpêx anhýr kēt nē.

³⁸ Na pa hte Inhīpêêxà hkôt pix mā ri amnhī nhīpêx o ri ixpa. No mē kajaja axtem nē mē ate nhām mē kapēr kôt amnhī nhīpêx jakamā na ka htem ixkīnhā Inhīpêêxà hkôt amnhī nhīpêx kēt nē. Anē.

³⁹ Hāmri nhūm mē tee ri amnhī tā kuma nē kām:

—Tk. Kwa mon ka ã mẽ ijarēnh anē? Mẽ ixte Apraāw kôt amnhĩ nhĩpêx o ri ixpa kênã. Anē.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ uràk nē Inhĩpêêxà kapêr kôt amnhĩ nhĩpêx.

⁴⁰ No na ka mẽ ra axtem nē ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarēnh to ho ri ixpa htã ka mẽ ra axtem nē ixpĩr mã. Kwa xà na pre Apraāwja ã mẽ hipêx anhỹr o pa? Nà na pre ã mẽ hipêx anhỹr kêt nē.

⁴¹ Mẽ ate hkôt amnhĩ nhĩpêx xwỹnhhta axtem na. Kêp Apraāw kêt. Nē mãânēn kêp Tĩrtũm kêt. Anē.

Hãmri nhũm mẽ tee ri kuma nē kãm:

—Tk. Kwa nà ã mẽ ijarēnh anhỹr kêt nē. Mẽ ixte Apraāw kôt amnhĩ nhĩpêx xwỹnh kênã. Tã ka ri axtem nē ã mẽ ijarēnh anē. Mẽhõ hkôt kot pa kêt wem ri axtem amnhĩ nhĩpêx o ri ixpa? Anē.

⁴² Hãmri nhũm mẽ kãm:

—Nà mẽ ate Apraāw kôt amnhĩ nhĩpêx ronhỹx ka mẽ ixpumu nē uràk nē amã ixprãm nē. Apraāw kot hkôt amnhĩ nhĩpêx o pa xwỹnhhta tãm kot mẽ awỹr inhmēnh nhũm mẽ awỹr ixwryk kênã. Na pa pre amnhĩ krã hkôt man mẽ awỹr ixwryk kêt nē. Tãm na pre mẽ awỹr inhmē pa wry.

⁴³ Kwa mon ka mẽ aprĩ hã ixkapêr mar mex kêt nē? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nē aprĩ hã mar mex kêt nē.

⁴⁴ Mẽ ate hkôt amnhĩ nhĩpêx xwỹnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỹnhjê hpãm maati na. Nē kêp mẽ kãm hêx o pa xwỹnhjê pãm maati na. ã kot amnhĩ nhĩpêx kot anhỹr. Nē kãm mẽ kapêr mex mar prãm kêt o pa. Nē ãm hêx pix o pa jakamã kêp mẽ hêx xwỹnhjê pãm. ã kot amnhĩ nhĩpêx anhỹr xwỹnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja

mẽ apê hêx nhi xwỹnh maatija hkra jakamã mẽ amã ixkapêr mar prãm kêt.

⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỹnh na pa. Nē tãm ixkapêr o ri ixpa xwỹnh tã ka mẽ inhma nē ãm inhma nē ixkôt ajamaxpêr kêt nē. Kwa mon ka mẽ ja hã ixpumunh nē ixkôt ajamaxpêr nē ixkôt amnhĩ xunhwỹr kêt nē?

⁴⁷ Tĩrtũm krajaja na htem kapêr mar tỹx nē hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anē.

Mẽ kot Jejus kêp Satanasti hkwy hã harēnh

⁴⁸ Hãmri nhũm mẽ ã Jejus kot mẽ harēnh anhỹrja ma nē kamã gryk tỹx kumrêx. Hãmri nē kãm:

—Tk. Kwa ate amnhĩ tomnuj o apa xwỹnhhti kênã. Ra Satanasti hkwy pê mẽkarõmnuti tanhmã kot akrã hto jakamã na ka ã mẽ inhmã akapêr anē. Anē.

⁴⁹ Hãmri nhũm mẽ kãm:

—Nà mẽkarõmnuti kot tanhmã ixto hkêt. Na pa hte Inhĩpêêxà hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mãânēn pa ixtã apijaàm kêt nē.

⁵⁰ Na pa hte amnhĩ krã hkôt mẽ piitã mẽ kot ixtã hpijaàm prãm xaj tanhmã mẽ kãm ixkapêr to hkêt nē. No mẽ piitã mẽ kot ixtã hpijaàm o paja na Inhĩpêêxà kãm hprãm. Tã koja nhỹrmã amnhĩ nē ixtã mẽ hpijaàm kêt xwỹnhjaja mẽ kot amnhĩ xà htỹx kamã hamak tũm xàta wỹr mẽ rēnh pa.

⁵¹ —Nē kot ka mẽ atõ wa ixkapêr ma nē ixkôt amnhĩ nhĩpêx. Hã kot kaj wa ixri atĩr tũm nē apa ho apa. Kwa mẽ ixkapêr ma nē amnhĩ krãm haxar tỹx nē. Anē.

Nhũm pre ã Jejus Ijaew nhõ pahijê mã kapêr anē.

⁵² Nhũm mẽ kuma nē kãm:

—Kwa pêr ãm hãmri na ka hte Satanasti nhỹ hã ã mẽ htĩr tũm nē mẽ pa ho pa hã mẽ harēnh anhỹr o ri axêx o ri apa. Finat Apraāw na pre

ri paa nê ty. Tã mẽ kot Tĩrtũm nhỹ hã kapêr jarênh o mẽ pa xwỳnhjaja na prem uràk nê ri paa nê mãnên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwỳnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa.

⁵³ Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhỹ hã kapêr jarênh xwỳnhjaja mãnên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã ixpijaàm pix prãm xàj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhỹr kaprỹ. Kot paj mẽ ri akapêr mar kêt nê. Anê.

⁵⁴ Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaàm hprãm xàj tanhmã mẽ amã ixkapêr to hkêt nê. Kot paj anê nê ãm ixtỹx ã amnhĩ nhĩpêx anhỹr kaprỹ. No Inhĩpêêxà tãm kãm mẽ apiitã mẽ ate ixtã apijaàm o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỳnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mẽ amã ixêx o ri ixpa hã ijarê.

⁵⁵ Mẽ ate Inhĩpêêxà hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa.

⁵⁶ Amnepêm mẽ pahpàr krax Apraãwja na pre mẽ awỹr ixwryk kukamã ijarênh ma nê mẽ arom inhỹ hã hkĩnh tỹx nê pa. Anê.

Nhũm pre ã Jejus mẽ kãm amnhĩ jarênh anê.

⁵⁷ Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã.

Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tỹx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nê ate mẽ omunh nê mẽ harênh pyràk. Kwa akatàt kôt mẽ inhmã awjarê. Anê.

Jejus kêp rãhã ho rãhã xwỳnh ã harênh

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỹx nê. Anê.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỹx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwỳnh ã amnhĩ jarê? Tĩrtũm pix na rãhã ho rãhã pa xwỳnh. Anê.

Hãmri nê kamã gryk xàj kên rũnh kwỳ kawrà ho ri hprôt nê kot ho htak o hpĩr kaxyw. Nom nhũm ra amnhĩ tã mẽ omu nê mẽ kêp akunok nê Tĩrtũm mã amnhĩ jarênh xà hã ixkreja rũm kato nê ma tẽ.

9

Jejus kot no hkre xwỳnh o mex ã harênh

Makre 8.22-26

¹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwỳnhjaja ma hkôt mra. Hãmri nê nhỹri no hkre xwỳnh pumu. Katorxà nhõxà hkre rũm na pre no hkre nê kato. Hãmri nê ra hprêk nê hpriy kamã àhwỹr o hkrĩ.

² Tã hãmri pa mẽ mra nê omu nê hã Jejus kukja nê kãm:

—Kwa mẽmoj mỳrapê na pre we myti nêj no hkre nê kato? Xà tãm kot tanhmã amnhĩ tomnuj to mỳrapê nà? Xà katorxà rỹ hipêêxà kot amnhĩ

tomnuj mýrapê na pre ã no hkre nê kator anê? Anê.

³ Hāmri nhũm mẽ inhmã:

—Nà mēhō kot tanhmã amnhĩ tomnuj to mýrapê no hkre nê kator kêt. Ām Tĩrtũm kot ho mex nhũm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa.

⁴ Na htem arĩgro hã mẽmoj tã apê nhũm kamàt nhũm mẽ kãm ure nê àpênh kêt nê. Ja pyrà nê na pu htem kormã pahĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hāmri nê axte jar ã amnhĩ nhĩpêx anhỹr kêt nê. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa.

⁵ Na pa hte ã kãm amnhĩ nhĩpêx anhỹr jao te kanê hirã mex pyrà nê ixprĩ hã mẽ kãm Tĩrtũm kot amnhĩ nhĩpêx o amnhĩrit mex o ri ixpa. Anê.

⁶ Nhũm pre ã Jesus mẽ inhmã amnhĩ jarênh anê. Hāmri nê kot nohkre xwýnhhta no o mex kaxyw hikôt nê argôx mẽ nê ho gyw kwý nhĩpêx nê kãnhmã xa nê ho no kukô.

⁷ Hāmri nê kãm:

—E ma gô gjênh xà pê Siroe hwýr tē nê kamã amnhĩ no kuhō. Anê.

Mẽ pakapêr kãm Siroeja mẽ kot kãm: “Nhỹhỹm mēnh xwýnh” anhỹr jarênh pyràk. Tã nhũm Jesus hwýr kumẽ nhũm ma hwýr tē. Hāmri nê kamã amnhĩ no hã gyw kuhōnh pa jao rĩt mex kurê kumrêx. Hāmri nê rĩt mex ã amnhĩ pumu nê hkĩnh tỳx nê ma akupỹm òrkwỹ hwýr tē.

⁸ Hāmri nhũm òrkwỹ kuri mẽ òrkwỹ xwýnhjaja nê mẽ kot pry kamã ahwýr o hkrĩ hã omunh xwýnhjaja amnhĩ jaêr pē ra rĩt mex ã omu nê tee ri hã axpēn kukja nê axpēn mã:

—Kwa pēr pry kamã àhwýr o hkrĩ xwýnhhta na nà? Anê.

⁹ Hāmri nhũm kamã mẽ hkwýjaja mẽ kãm:

—Tỳ. Tãm na. Anê.

Nhũm kamã mẽ hkwýjaja mẽ kãm:

—Nà tãm kêt. Axtem mēhō na. Te kot uràk nom tãm kêt. Anê.

Anhỹr o ri axpēn mã harê. Tã nhũm tãm mẽ kãm amnhĩ jarê nê mẽ kãm:

—Tỳ pa kēnã. Pa na pa pre hte inhno hkre nê ri ixpa htã ra ixrĩt mex. Anê.

¹⁰ Hāmri nhũm mẽ tee ri kuma nê kãm:

—Kwa no tanhmã na ka we amnhĩ to nê ra arĩt mex?

¹¹ Anê nhũm mẽ kãm:

—Nà mẽ kot kãm “Jesus” anhỹr xwýnhhta na ixwýr tē nê ixkaxyw gyw kwý kagō nê ho inhno kukô. Hāmri nê mẽ kot gô mã: “Siroe” anhỹr xwýnhhta kamã ixte amnhĩ no kuhōnh kaxyw hwýr inhmã anê pa ma hwýr tē nê kamã amnhĩ no kuhō nê ixrĩt mex kurê kumrêx. Anê.

¹² Hāmri nhũm mẽ kuma nê kãm:

—No nhỹhỹm na ato mex xwýnhhta ma tē? Anê.

Hāmri nhũm mẽ kãm:

—Konên. Ixte nhỹhỹm htēm xà hkôt omunhre hã. Anê.

¹³ Hāmri nhũm mẽ kuma nê ma Par-ijew nhō xwýnhjê hwýr o mō nê mẽ kãm harê.

¹⁴ Nê mẽ kãm:

—E ot pa mẽ awýr jahti ho tē. Na xep Jesusja jarãhã akupỹm kãm no ho mex. Mẽ panhō arĩgromnu htã nhũm hã no ho mex. Anê.

¹⁵ Hāmri nhũm mẽ tee ri mẽ kuma nê myta pumu nê kãm:

—E mẽ inhmã amnhĩ jarê. Tanhmã na ka pre we amnhĩ to nê anohkre nê akrĩ htã ra ano mex nê? Anê.

Hāmri nhũm mẽ kãm:

—Nà na pre Jesus gyw o inhno kukô nê inhmã anê pa gô ho amnhĩ no kuhō nê ixrĩt kurê kumrêx. Anê.

¹⁶ Hāmri nhũm mẽ kuma nê tee ri Jesus ã axpēn kukjêr o kuhê nê axpēn mã harênh o:

—Kwa mẽ panhō arĩgromnu hã kot ho mex jakamã kēp Tĩrtũm rũm mẽ pahwýr wrýk xwýnh kêt. Ām kot amnhĩ tomnuj xwýnh kēnã. Anê.

Nhũm mẽ hkwýjaja harênh o:

—Kwa nà. Kot amnhĩ tomnuj xwýnh ronhỹx àhpumunh tỳx kôt no ho mex kêt nê. Anê.

¹⁷ Hāmri nê hpãnhã no mex xwýnhhta mã kãm:

—No ka? Ate kot ano ho mex xwýnh ã amnhĩ tã harēnh jakamã mēhõ hã na ka hkamnhĩx? Mēhõ na wehe? Anē.

Hāmri nhũm mẽ kãm:

—Konēn. Mãn kēp Tĩrtũm kapēr jarēnh o ri mẽ pa xwýnh mãn. Hã na ã inhno ho mex anē. Anē.

¹⁸ Hāmri nhũm mẽ tee ri kuma nē expēn mã:

—Kwa pēr aa nohkre hkēt kēnã. Na pre ãm amnhĩ to hēx o pa. E kwa pu mẽ amnhĩ wýr katorxà nē hipēêxà wa hã karõ kê wa man tē nē tanhmã mẽ pamã harēnh to. Anē.

Hāmri nē wa hã karõ

¹⁹ nhũm wa mẽ hwýr tēn axà nhũm mẽ wa kãm:

—Pa. E mẽ inhmã mẽmoj jarē. Xà we wa akrata na ãm ja nà? Xà tãm na ka hte wa nohkre nē kator ã harē? Kwa tanhmã na we amnhĩ to nē ra rīt mex? Anē.

²⁰ Hāmri nhũm wa mẽ kãm:

—Ýy wa ixkra kēnã. Na pre wa ixpē nohkre nē kato.

²¹ Tã ra tanhmã amnhĩ to nē ra rīt mex. No wa ixte kot ho mex xwýnhhta pumunh kēt. Kwa mẽ tãm mãn hkukja nē ama. Ra àptār kēnã. Kē tãm mãn mẽ amã tanhmã amnhĩ jarēnh to ka mẽ ama.

²² Anhýr o mẽ kãm wa hkrata jarē. No ãm wa kãm mẽ uma nē ã mẽ kãm kapēr anē nē mẽ kãm Jejus nhĩxi jarēnh kēt nē. Na pre Parijew nhõ xwýnhjaja ra Jejus nē mẽ kãm kapēr nē mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harē hāmri nē axte Tĩrtũm kapēr o mẽ ahkre xà hã ixkreja wýr agjēx kēt kumrēx nē rĩ amnhĩ pumu.

²³ Anhýr o nē mẽ hkurē jakamã nhũm wa mẽ umaj ã mẽ kãm hkra jarēnh anē nē kot ho mex xwýnh nhĩxi jarēnh kēt nē.

²⁴ Hāmri nhũm mẽ axte amnhĩ wýr no mex xwýnhhta ã karõ nē kãm:

—Kwa akatàt kôt mẽ inhmã amnhĩ jarē. Ate kot ano ho mex ã harēnh xwýnhhta na kot amnhĩ tomnuj pix o pa xwýnh kēnã kot kēt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarē nē axēx kēt nē. Anē.

²⁵ Hāmri nhũm mẽ kãm:

—Ko ixte ja hã omunh kēt. ãm ja pix na ixte omunh. Na pa pre inhno hkre nē ri ixpa htã ra ixrīt mex nē. Anē.

²⁶ Hāmri nhũm mẽ tee ri kot amnhĩ jarēnhja ã kuma nē kãm:

—No tanhmã na we mytita amnhĩ to nē amã ano ho mex? Anē.

²⁷ Hāmri nhũm tee ri axte mẽ kot hã hkukjēr ã mẽ kuma nē mẽ kãm:

—Kwa ra ixte mẽ amã ãm hāmri amnhĩ jarēnh griã. Tã ka mẽ inhma nē ãm inhma nē arĩ hã ixkukja. Mãn ka mẽ amã hkôt amnhĩ xunhwýr prãm hã na ka mẽ aprĩ hã ixkukja nà? Mē ate kot amnhĩ nhĩpēx ã aprĩ hã harēnh mar nē hkôt amnhĩ xunhwýr prãm xàj na ka mẽ aprĩ hã amã harēnh prãm nē. Anē.

²⁸ Hāmri nhũm mẽ tee ri kuma nē kamã gryk nē. Nē hã kãm akir nē kãm:

—Tk. Ka na ka hte kapēr kôt amnhĩ nhĩpēx. No kēt mẽ pajaja na pa htem finat Mojes kapēr kôt pix mã amnhĩ nhĩpēx.

²⁹ Mojes mã na pre hte Tĩrtũm kapēr o pa. Jakamã pa htem ãm hkôt pix mã amnhĩ nhĩpēx o ri ixpa. No ate kot ano ho mex ã harēnh xwýnhhta mẽ ixte omunh kēt. Nē mēhõ nhỹ hã kot tanhmã amnhĩ nhĩpēx to ho pa xwýnhja mẽ ixte omunh kēt. Anē.

³⁰ Hāmri nhũm tee ri mẽ kuma nē mẽ kãm:

—Kwa kot inhmã inhno ho mex nhũm ra ixrīt mex tã ka mẽ tee ri hkukamã ajamaxpēr nē mēhõ nhỹ hã kot ã amnhĩ nhĩpēx anhýr o pa hã omunh kēt ã amnhĩ jarē.

³¹ Mē pahte Tĩrtũm kot amnhĩ nhĩpēx ã omunh mex. Koja mēhõ kot amnhĩ tomnuj xwýnh mẽmoj tã kuwý nhũm kuma nē ãm kuma. No kēt mẽ kot hkôt ri amnhĩ nhĩpēx xwýnhjaja. Nē mẽ kot kãm mex o mex ã harēnh xwýnhjaja na htem mẽmoj tã kuwý nhũm mẽ kuma nē mẽ kãm tanhmã mẽmoj nhĩpēx to rý mẽ kãm mẽmoj gõ.

³² Tã aa mẽ pahte mēhõ kot mẽ no ho mex ã harēnh mar kēt tã nhũm ã Jejus inhmã inhno ho mex anē.

³³ Kēp Tĩrtũm kwý hkēt ronhýx pre inhno ho mex kēt nē. Anē.

³⁴ Hāmri nhūm mẽ kuma hāmri nē kām:

—Tk. Kwa pēr âm akator kôt ate amnhĩ tomnuj o ri apa htã na ka ã mẽ inhmã akapēr anē. Kwa ixkreja rŭm akato nē ma atēm kurê kumrêx.

Anhÿr o kãm kapēr hāmri nē mẽ amnhĩ nē hano nhūm kato nē ma tē.

³⁵ Tã nhūm Jejus ra mẽ kot amnhĩ nē hanor ã harēnh ma nē ma hapēr o tē nē nhÿri omu. Hāmri nē amnhĩ tã hkukja nom te nhām mēhō hã hkukjêr pyrã nē kãm:

—Pa? Xàn ka ra Tĩrtũm kot mẽ awÿr mēnh xwÿnhnta amnhĩ kaxyw hkôt ajamaxpēr nà? Anē.

³⁶ Hāmri nhūm kormã kot no ho omunh kêt jakamã kēp Jejus ã omunh kêt nē. Na pre kormã no hkre nē âm kapēr pix ma. Tã ra akupÿm rĩt mex nom kormã no ho omunh kêt nē. Jakamã nhūm Jejus hwÿr tē nē ã kãm kapēr anē nhūm omu nē kormã kēp Jejus ã omunh kêt nē kãm:

—Tÿ kot kaj inhmã ahkre pa omu nē hkôt amnhĩ xãm kurê kumrêx. Anē.

³⁷ Hāmri nhūm kãm:

—Kwa paa. Ixte amã ixkapēr xwÿnhnta pa na pa. Anē.

³⁸ Hāmri nhūm kãm:

—Kwa xōwehe Pahihti? Nà kot paj amnhĩ kaxyw akôt pix mã ijamaxpēr nē akôt pix mã amnhĩ nhĩpêx o ri ixpa. Anē.

Hāmri nē kutã hkõn krã ho tēm nē nhÿ nē kãm mex o mex ã harēnh o nhÿ.

³⁹ Hāmri nhūm Jejus kãm:

—Nà ixte mẽ apiitã tanhmã mẽ ajarēnh to kaxyw na pa pre kaxkwa rŭm man mẽ awÿr wrÿ. Ahpÿnhã mẽ amã ixprãm xwÿnhjê jarēnh nē ahpÿnhã mẽ kãm ixprãm kêt xwÿnhjê jarēnh kaxyw. Mẽ kãm ixprãm kêt xwÿnhjaja kot hprĩ hã Tĩrtũm kapēr mar mex kêt tã na htem htÿx ri kot mar mex ã amnhĩ jarēnh o pa. Jakamã te mẽ nohkre xwÿnhjaja kot amnhĩ nhĩpêx pyrãk. Nom koja mẽ Tĩrtũm kapēr ma nē ixkôt amnhĩ xunhwÿr japēr. Hāmri nē te ra rĩt mex

pyrãk o amnhĩ nhĩpêx. Jao ra hprĩ hã Tĩrtũm kapēr mar mex o pa. Anē.

⁴⁰ Nhūm pre ã Jejus kãm kapēr anē. Nhūm Parijew nhō xwÿnh kwÿjaja kot kuri mar o kuhê xwÿnhjaja ã kapēr anhÿr ã kuma nē amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarēnh anē? Xà mẽ ixte ixprĩ hã Tĩrtũm kapēr mar mex kêt ã na ka mẽ ijarē nà? Anē.

⁴¹ Hāmri nhūm mẽ kãm:

—ÿÿ kop apu mẽ ate aprĩ hã kapēr mar mex kêt ã amnhĩ jarēnh ronhÿx ja mẽ amã mex nē. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tÿx nē. Na hte Tĩrtũm ja hã mẽ apumu nē amnhĩm mẽ ate amnhĩ tomnuj xwÿnh ã mẽ ajarē. Anē.

10

ôwêhti jarēnh

Matêwre 9.36, 12.11-12; Rukre 15.3-7

¹ Nhūm Jejus arĩ Ijaew mã kapēr nē mẽ kãm:

—E pa mẽ amã awjarē ka mẽ inhma nē amnhĩ krã him haxàr tÿx nē ho apa. Mẽ hkrit ôwêhti kot paj mẽ amã harē ka mẽ inhma. Na hte ôwêhti jamãr o pa xwÿnhjaja ôwêhti apkur kaxyw mẽ o pa hāmri nhūm kamãt nhūm akupÿm kahê hwÿr mẽ o pa. Kahê jakwakreja âm pixii. Tã koja mēhō kahê xà hkôt hwÿr àr kêt nē axtem nē tē nē nhÿhÿnh kahê hã api nē ôwêhti hwÿr àr japēr nhūm mẽ omu nē kot hkwȳ ho àhkĩnh ã omunh kurê kumrêx.

² —No ôwêhti jamãr o pa xwÿnhja na hte mẽ kurom katãt kôt kahê jakwakre rŭm ôwêhti hwÿr agjê.

³ Nhūm kahê xà jamãr xwÿnhja amnhĩ wÿr omu nē kãm kahê xà rēnh kurê kumrêx nhūm axà. Na hte apkati mẽ ma nhÿhÿm apkur kaxyw mẽ o pa. Nē nojarêt nē mẽ kãm akir. Ahpÿnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hāmri nhūm mẽ kuma nē hwÿr mra nē hã pikuprõnh pa nhūm mẽ

ho hapôj nê ma nhÿhÿm ri mē apkur kaxyw mē o pa.

⁴ Ma mē apkur kaxyw nhÿhÿm mē o pa. Nhÿm ôwêhti ra kot kapêr mar mex jakamā ma amnhÿx ri hkôt apkur o pa.

⁵ —Na hte hamār o pa xwÿnh pix kapêr ma nê hkôt pa nê nhām mēhō hkôt ri pa hkêt nê. Kot kapêr mar kêt jakamā tee ri kuma nê umaj axkakhÿm nê hprôt nê ma mra. Na hte ôwêhti ā amnhÿ nhÿpêx anê. Anê.

Jejus te kêp ôwêhti gjênh xà hā hakwakre pyrāk

⁶ Nhÿm pre ā Jejus mē kām ujarênh anê. Nê ujarênhja kamā amnhÿ kwÿjê jarê nê mǎānênh tām amnhÿ jarê. Nom mē amnhÿ tǎ kuxi nê mē kām amnhÿ jarênh o te ho ôwêhti jarênh pyrāk nhÿm mē tee ri kuma nê mar mex kêt nê.

⁷ Jakamā nhÿm axte mē kām awjarê nê mē kām:

—E pa ixprÿ hā mē amā ixujarênhja jarê ka mē inhma. Te ixpê ôwêhti jagjênh xà hā hakwakre pyrāk. Kwa mē ja ma nê amnhÿ krā him haxàr tÿx nê.

⁸ Na pre ra ixkukamā mē ohtô nê te ām hāmri mē amā Tÿrtÿm kapêr jarênh pyrāk o mē akôt ri pa. Nom mē amā hêx o pa. Te mē kot ôwêhti o àhkÿnh xwÿnhja kot amnhÿ nhÿpêx pyrāk. Nom na hte ôwêhtija ām hamār xwÿnh pix kapêr ma nê nhām mēhō kapêr mar kêt nê. Ja pyrā nê mē kot ixkôt amnhÿ xunhwÿr xwÿnhja na htem Tÿrtÿm kapêr o hêx o mē pa xwÿnhjê ma nê ām mē kuma nê mē hkôt amnhÿ nhÿpêx kêt nê. Na htem ām ixkapêr pix ma nê ixkôt pix mǎ amnhÿ nhÿpêx o pa.

⁹⁻¹⁰ —Te ixpê ôwêhti gjênh xà hā hakwakre pyrāk. Na hte ôwêhti mēmoj punuj pymaj kahê hwÿr agjê nê kamā mex nê kuhê. Nê kurÿm hapôj nê ma apkur o pa. Ja pyrā nê mē kot ixkôt amnhÿ xunhwÿr xwÿnhja koja mē ixkukwak ri hkÿnh nê mex nê hamakêtkati nê pa ho pa. Nê nhÿrmǎ Tÿrtÿm mē wa ixri htÿr tÿm nê pa ho

pa. Ja kaxyw na pa pre man mē awÿr pika hwÿr wrÿ.

—No ôwêhti ho àhkÿnh xwÿnhja na htem amnhÿm ho ahkÿ nê kupa nê ma amnhÿm o pa. Tǎ mē kot Tÿrtÿm kapêr o hêx o mē pa xwÿnhja te mē kot jajaja kot amnhÿ nhÿpêx pyrāk. Anê.

Jejus te kêp ôwêhti jamār xwÿnh pyrāk

Eprêw 13.20; Apokarip 7.17

¹¹ —Nê ôwêhti jamār mex xwÿnhja koja nhÿri mēhō kêp ôwêhti hōxpÿr kaxyw hwÿr htêm ā omu nê wa hā axpu. Nhÿm ho àhkÿnh mǎ xwÿnhja ôwêhti jamār xwÿnh pÿ nhÿm ôwêhti nê ty. Tǎ ixkwÿjaja hamakêtkati nê mex nê pa kaxyw na pa pre amnhÿ grônh kôt mē hwÿr wrÿ. Jakamā kot paj te ôwêhti jamār xwÿnh kot amnhÿ nhÿpêx pyrāk o amnhÿ nhÿpêx.

¹²⁻¹³ —Nê na htem tōhā ôwêhti jamār xwÿnh nhÿhÿm pa kaxyw nê mēhō mǎ amnhÿre nhÿm wakre kamā kām hkrit jamār o pa. Kǎxpore pix prām xàj kām hamār o pa. Jakamā koja nhÿhÿnh mry xoprê ra hwÿr kato nhÿm amnhÿ wÿr omu nê umaj ôwêhti re nê ma hprôt nê tē. Kām ôwêhti japê hkêt ām kām htÿr pix prām xàj ôwêhti mǎ hamaxpêr kêt nê rer pa nê ma tē. Nhÿm mry xoprêta ôwêhti hwÿr hprôt nê hkwy pynê nhÿm hkwy umaj axkakhÿm nê hprôt nê ma mra. No kêt pa na te ixte ôwêhti mǎ hamaxpêr kêt nê kot rer nê ma hprôt nê htêm xwÿnhja pyrāk kêt. Kot paj aa ixkwÿjê rer kêt nê. Kot paj mē hkôt ixpa ho ixpa rāhā nê.

¹⁴⁻¹⁵ —Te ixte ôwêhti jamār xwÿnh mex pyrāk jakamā na pa hte urāk nê ahpÿnhā mē kot ixkôt amnhÿ xunhwÿr xwÿnhjê pumunh mex o ri mē hkôt ixpa. Te mē kêp ixkrit ôwêhti pyrāk nhÿm te ixpê mē hamār mex o ri mē hkôt ixpa nê aa mē rer kêt xwÿnhja pyrāk.

—Nê mē kot ixkôt amnhÿ xunhwÿr xwÿnhja ra mē ixte amnhÿ nhÿpêx kôt axpên pumunh mex. Nê mē inhmǎ axpên japêê. Te Inhÿpêêxā mē wa inhmǎ axpên japê pyrāk. Tǎ

kot paj nhǎrmā mẽ nê tanhmā amnhǐ nhǐpêx to.

16 —Mẽ kot ixkôt amnhǐ xunhwỳr xwỳnhjaja piitā kêp Ijaew pix kêt. Koja Ijaew kêt xwỳnh kwỳjaja mãânên ixkapêr ma nê ixkôt amnhǐ xunhwỳ nê ixkôt amnhǐ nhǐpêx. Jao ra te kêp ixkrit ôwêhti pyrāk. Tā kot paj mẽ ho ixpimràà tā mẽ ho tipxi nê mẽ hamār o ri mẽ hkôt ixpa.

17 —Nê mẽ kot ixkôt amnhǐ nhǐpêx o mẽ pa xwỳnhjaja mẽ mex kaxyw na pa pre amnhǐ grôn kôt mẽ hwỳr wrý. Jakamā kot paj nhǎrmā mẽ nê ty. Tā inhmā mẽ nê ixtyk puma hkêt jakamā na Inhǐpêxà kām ijapêê. Koja akupým ixto ixtǐr.

18 Kop apu inhmā mẽ nê ixtyk prām kêt ronhỹx mẽ kām ixkurê xwỳnhjaja tee ri kām ixpǐr prām kaprý. Nom ixte mẽ kot ixkôt amnhǐ nhǐpêx xwỳnhjê nê amnhǐ grôn kôt mẽ hwỳr ixwrýk kênā. Jakamā kot paj arǐ mẽ kām amnhǐ grôn kôt amnhǐ gō nê arǐ mẽ kām xa nhũm mẽ ixpǐ. Nom kot paj akupým ixtǐr. Mêhō koja tanhmā ixto nê ixpǐr o ixpǐ? Nà koja mêhō ixpǐr o ixpǐr kêt nê. Inhǐpêxà nhỹ hā kot paj nhǎrmā ã amnhǐ nhǐpêx anê nê akupým ixtǐr. Anê.

Nhũm pre ã Jejus mẽ kām amnhǐ jarênh anê.

19 Hāmri nhũm Ijaew tee ri ã kot amnhǐ jarênh anhỹr ã kuma nê kê axte axpên kwým ri tanhmā harênh to ho kuhê.

20 Nê kamā mẽ hkwỳjaja harênh o:

—Tk. Kwa mẽ mar kêt nê. Satanasti nhỹ hā na hte htýx ri ã mẽ pamā amnhǐ jarênh anhỹr o pa. Anê.

21 Hāmri nhũm mẽ hkwỳjaja mẽ kuma nê mẽ kām:

—Nà kot anhỹr kêt. Xà na htem Satanasti nhỹ hā ã kapêr mex anê nê ã mẽ no hkre xwỳnhjê ho mex anê? Nà kot anhỹr kêt. Satanastija ukapriê hā. Anê.

*Ijaew nhō pahijaja kot Jejus kaga hā mẽ harênh
Juāw 5.18, 8.59*

22 Tā nhũm ra amgrà hapêx pa mẽ ixpê Ijaew akupým krǐ pê Jeru-jarê kamā axpên wỳr akuprō. Axte mẽ ixte mẽ ixkính kaxyw axpên wỳr akuprō. Amnepêm mẽ inhǐgêjtaja kot akupým Tǐrtũm mã amnhǐ jarênh xà hā ixkre ho mex pa nê ho Tǐrtũm wỳr mã hamaxpêr nê hā ixkính ã arǐgroja ã pa mẽ hwỳr akuprō.

23 Hāmri nhũm Jejus ma mẽ ixkôt Tǐrtũm mã amnhǐ jarênh xà hā ixkreta wỳr tē no ãm hwỳr àr kêt nê. ãm ixkre hpu hā kahê xà kape hā ri pa. Mẽ kot kām: “Pahi finat Sarumāw pa xà” anhỹr xwỳnhhta kamā ri pa.

24 Hāmri nhũm kê ra mẽ inhō pahijaja omu nê hā akuprō nê hêx rom kām kapêr nê kām:

—Kwa tokyx aprǐ hā mẽ inhmā amnhǐ jarê. Xà apê Tǐrtũm Kra na ka nà? Xà ka na pre Tǐrtũm mẽ ixkaxyw axām? Kwa aprǐ hā mẽ inhmā amnhǐ jarê pa mẽ ama. Mon ka hte aprǐ hā mẽ inhmā amnhǐ jarênh kêt nê? Na pa mẽ tee ri ate amnhǐ nhǐpêx ã apumu nê akukamā ijamaxpêr rũnh kumrêx o ri ixpa. Xà ãm hāmri apê Tǐrtũm kot mẽ ixkaxyw axām xwỳnhhta na ka? Anê.

25 Hāmri nhũm mẽ kām:

—Tk. Ra ixte mẽ amā amnhǐ jarênh xohtô htā ka mẽ inhma nê ãm inhma. Na pa hte xatā Inhǐpêxà nhỹ hā mẽ amā mẽ ate aa mẽmoj pumunh kêt kwỳ ho anhỹr o ri ixpa ka mẽ ja hā ixpumu nê ãm ixpumu nê ixkôt ajamaxpêr kêt nê.

26 Mẽ apê ixkwỳ hkêt jakamā na ka mẽ ixkôt ajamaxpêr kêt nê. Te mẽ apê ixkrit ôwêhti pyrāk kêt.

27 Ixkwỳjaja na te ho ôwêhti kot hamār xwỳnh kapêr mar nê hkôt ri pata pyrā nê ixkapêr ma nê ixkôt amnhǐ nhǐpêx o pa. Ixpê mẽ ò pahihiti hā mẽ kot ixpumunh mex jakamā na htem ixkôt amnhǐ nhǐpêx mex o pa. Ixte ja hā mẽ omunh mex nê.

28 Koja mẽ nhǎrmā htyk tā no ãm ixkukwak ri akupým htǐr hāmri nê Tǐrtũm mẽ wa ixri htǐr tũm nê pa ho pa nê aa hapêx kêt nhũm mêhō ixpê mẽ utār kêt nê. Te inhǐhkra hpo nhǐpôk

ri mẽ hkrĩ nhũm te mẽ hã inhĩkra pikamýr pyrək nhũm mẽmoj tee ri ixpê tanhmã mẽ ho hprãm kaprý.

²⁹⁻³⁰ Inhĩpêêxà tãm kot inhmã mẽ òr kênã. Hihtýx o kot mẽ piitã mẽ hakrenh par jakamã koja mẽ inhĩkra po nhĩpòk ri hkrĩ nẽ mãnẽn Inhĩpêêxà nhĩkra hpo nhĩpòk ri hkrĩ. Te ixpê Inhĩpêêxà Tĩrtũm pyrək jakamã mẽhõ kot wa ixpê wa inhĩkra rũm mẽ utà? Nà amrakati kumrẽx.

Anhýr o mẽ kãm amnhĩ jarẽ.

³¹ Hãmri nhũm mẽ te kệp Tĩrtũm pyrək ã amnhĩ jarẽnh ã kuma nẽ kamã gryk týt nẽ. Hãmri nẽ kot kẽn o htak kaxyw ra kaxyw hkwy kawrà ho ri hprõt.

³² Hãmri nhũm amnhĩ tã mẽ omu nẽ mẽ kãm:

—Kwa ra ixte Inhĩpêêxà nhỹ hã mẽ amã aa mẽ ate mẽmoj pumunh kêt kwý ho anhýr rax o ixpa. Jao tanhmã mẽ ho mex to pix o ri ixpa. Tã ka mẽ axtem nẽ ã inhĩpêx anhýr kaxyw. Anẽ.

³³ Hãmri nhũm mẽ kãm:

—Nà ã ate amnhĩ nhĩpêx anhýr ja mýrapê hkêt. Kêt apê mẽ inhĩõ htã ri axtem nẽ te apê Tĩrtũm pyrək ã amnhĩ jarẽnhja mýrapê na pa mẽ kẽn o atak kaxyw. Na pu htem ã amnhĩ jarẽnh anhýr o papa hkêt nẽ. Anẽ

³⁴ Hãmri nhũm mẽ kãm:

—No ãm hãmri ixte ã amnhĩ jarẽnh anhýr kênã. Tanhmã na Tĩrtũm kapêr ã kagà htũm kot ja jarẽnh to wehe? Na pre Tĩrtũm Ijaew nhõ pahijê mã kapêr nẽ mẽ kãm:

E mẽ ate inhỹ hã mẽ ho amnhĩptàr jakamã te mẽ apê pa ixpê Tĩrtũm pyrək.

Anhýr o kot mẽ harẽnh.

³⁵ ãm hãmri na Tĩrtũm kapêrja. Tãm kot ã mẽ harẽnh kot anhýr. Mẽ kot ý hã mẽ kãm kapêr jakamã te mẽ kệp urək ã mẽ harẽnh anhýr kênã.

³⁶ Tã tãm kot ã mẽ harẽnh anhýr tã hpãnhã mẽ akaxyw pa ixpê Kra hã ixãm nẽ mẽ awýr inhmẽnh nhũm ixwryk nẽ ixpê Kra hã amnhĩ jarẽnh tã ka mẽ ja hã inhma nẽ ãm inhma nẽ ixkõt ajamaxpêr kêt nẽ. Kwa mon

ka mẽ ja hã ixpumunh nẽ ixkõt ajamaxpêr kêt nẽ?

³⁷ Kot paj Inhĩpêêxà mẽ wa ixàhpumunh kõt mẽ amã aa mẽ ate mẽmoj pumunh kêt kwý ho anhýr kêt ka mẽ ja hã ixpumu nẽ mẽ rĩ kam nẽ mãmrĩ ixkõt ajamaxpêr kêt nẽ.

³⁸ Mẽ amã ixkapêr mar prãm kêt tã kwa ixte Tĩrtũm pyrək nẽ aa mẽ ate mẽmoj pumunh kêt kwý ho anhýr ã ixpumu nẽ Inhĩpêêxà mẽ wa ixte amnhĩ nhĩpêx tipxi hkõt ajamaxpêr. Anẽ.

³⁹ Hãmri nhũm mẽ kuma nhũm ja mẽ kệp omnuj týt nẽ. Te kot Tĩrtũm pyrək ã amnhĩ jarẽnhja nhũm mẽ kệp omnuj nẽ. Jakamã nhũm mẽ ra kot unênh nẽ ixkre rũm ho kator nẽ kapôt ã mẽnh nẽ kẽn ho htak kaxyw nhũm kê axte mẽ kệp akunok nẽ ma nhỹhỹm tẽ.

Jejus kot Jotãw nhĩhkjê hã ri pa hã harẽnh

⁴⁰ Tã nhũm Jejus ma tẽ nẽ pyhti pẽ Jotãw ã rê. Pa mẽ hkõt ri ixpa ho ixpa xwýnhjaja ma hkõt mõ. Finat Juāw Paxis kot Tĩrtũm mã wam mẽ hkrã kumrãr o pa xàta wýr.

⁴¹ Hãmri nhũm mẽ ohtô nẽ mẽ ixwýr mra nẽ Jejus kapêr ma nẽ kot tanhmã amnhĩ nhĩpêx to hã omunh o kuhê. Hãmri nẽ hã tanhmã axpẽn mã kapêr to nẽ axpẽn mã:

—Kwa ãm hãmri na pre finat Juāw Paxisja mẽ pamã Jejus jarẽnh o pa. Aa kot mẽ pamã mẽ pahte mẽmoj pumunh kêt kwý ho anhýr kêt tã ãm xatã hkukamã mẽ pamã harẽnh o pa. Kệp Tĩrtũm Kra hã Juāw rom hihtýx o hihtýx ã harẽnh o pa. Nẽ Tĩrtũm kot mẽ pakaxyw ãm xwýnh ã nhũm mẽ pamã harẽnh o pa. Nà ãm hãmri na pre ã mẽ pamã harẽnh anẽ. Anẽ.

⁴² Hãmri nhũm mẽ ohtô nẽ amnhĩ kaxyw Jejus kõt hamaxpêr nẽ hkõt amnhĩ xunhwý.

11

*Rajare htyk jarẽnh
Juāw 5.21-29, 6.40*

¹ Rôm nhũm krĩ pẽ Petãn kamã mẽhõ my pẽ Rajareja ra à htýt nẽ nõ.

Na pre htōx wa hamēxkrut. Hō kēp Matre nhūm hō kēp Marir.

² Marir na pre kormã arĩgro hō hã kot Jejus o mex kaxyw mẽ hkuxwaxà ho hkuxwa nē amnhĩ kĩ ho hpar pōnh kaxyw. Nom kormã. Jakamã nhūm wa hkamyja wa kēp à htỳx nē nō.

³ Hãmri nhūm wa tee ri hkukamã hamaxpēr nē ma krĩ hō hwỳr Jejus wỳr mẽhō mẽ nhūm ma hwỳr tē. Nē hwỳr pōj nē omu nē kãm:

—Pa Pahihti. E ot pa awỳr tē. Na ra amã akràmnhwỳ japê htỳx xwỳnhta à htỳx nē nō nhūm htōx wa tee ri hkukamã hamaxpēr nē awỳr inhmē pa tē. Kwa tokyx pu ma hwỳr tē ka akupỹm wa kãm ho mex nà? Anē.

⁴ Hãmri nhūm kuma nē kãm:

—Nà à htỳx nē nōr tã koja akupỹm mex. Mẽ kot akupỹm mex ã harēnh mar hãmri nē Tĩrtũm mẽ wa ixtã hpi-jaàm nē wa ixihỳx o wa ixihỳx ã wa ixpumunh kaxyw na ã à htỳx nē nōr anē. Nē pa ixpê Tĩrtũm Kra hã akupỹm ho mex ã ixpumunh nē ixkôt hamaxpēr kaxyw na ã à htỳx nē nōr anē. Anē.

⁵ Na pre Jejus kãm Rajare mẽ htōx wa mẽ hapê nē.

⁶ Tã à htỳx ã harēnh ma nē hwỳr mōr tokyx anhỳr kêt nē. Pa mẽ arĩ amnhĩm hikranh xà kamã ri ixpaja o ixtã axte apkati axkrut.

⁷ Hãmri nhūm rĩ kormã hwỳr no-jarêt nē mẽ inhmã:

—E ma pu mẽ jarãhã akupỹm Jutej kamã Rajare hwỳr mō nē omu. Anē.

⁸ Hãmri pa mẽ tee ri ja hã kuma nē kãm:

—Kwa ham mẽ panhō pahijaja kot kēn o atak o apĩr mã tã ka ra akupỹm mẽ hwỳr akrã. Kwa pu mẽ hwỳr pamōr kêt nē nà? Anē.

⁹ Hãmri nhūm mẽ inhmã:

—Nà koja mẽ kormã tanhmã ixto hkêt nē. Kormã ixte Tĩrtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex nē ixpa pyrã nē kormã Tĩrtũm kot mẽmoj tã inhmã karō xà hkôt pix mã tanhmã amnhĩ nhĩpêx to ho ri ixpa.

¹⁰ Tã kot paj hatur xàm kumē nhūm te myt àr nhūm ra kamàt kô pyrãk nhūm mẽ rĩ kormã tanhmã ixto nē ixpĩ. Jakamã e ma pu mẽ hwỳr. Koja mẽ tokyx tanhmã ixto hkêt nē. Anē.

¹¹ Hãmri nē mẽ inhmã Rajare jarēnh o:

—Na mẽ pahkràmnhwỳ Rajareta ra gōr nē nō. Tã kot puj mẽ ma hwỳr mō pa kumra. Anē.

¹²⁻¹³ Ra htyk ã omunh tã ã mẽ inhmã harēnh anē. Pa mẽ kuma nē ixỳx ho ãm ôt nē nōr ã hkamnhix nē kãm:

—Kwa mãn ra akupỹm amnhĩ kãm hamak o mōr jakamã na ra amnhĩ krit nē gōr nē nō. Kwa pu mẽ awjanã nē hwỳr pamōr kêt nē nà? Anē.

¹⁴ Hãmri nhūm mẽ inhma nē hprĩ hã mẽ inhmã harē nē mẽ inhmã:

—Nà na pre ty.

¹⁵ Nom kormã à nē hikwỳta ã na pa hwỳr inhmōr kêt nē. Tã kot paj ma hwỳr mō nē hã mẽ amã ixãhpumunh tỳx ã amnhĩ to amnhĩrĩt. Ka mẽ ja hã ixpumu nē amnhĩ kaxyw ixkôt ajamaxpēr tỳx o ri apa. ã mẽ ate amnhĩ nhĩpêx anhỳr kaxyw na pa kormã à nē nōr ã hwỳr inhmōr kêt nē. E ma pu mẽ hwỳr. Anē.

¹⁶ Hãmri nhūm mẽ inhĩo pē Tomas pihpohti tee ri ã kapēr anhỳrja ã kuma nē mẽ inhmã:

—Tōe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anē.

¹⁷ Tã pa mẽ ma hkôt mẽ hwỳr mō nē ra Rajare nhō krĩ hwỳr ixpōx o mō hãmri nē harēnh ma. Ra htyk nhūm mẽ kot haxàr ã arĩgro pē kwat ã harēnh ma.

¹⁸⁻¹⁹ Nhūm Matre mẽ Marir wa hkamy ho hamak xàj arĩ mỳr o hkrĩ. Jakamã nhūm Ijaew kwỳjaja Jerujarē rũm ma wa hwỳr mra. Mẽ kot wa kãm kapēr nhūm tokyx akupỹm tãm wa hkrã kaxyw nhūm mẽ wa hwỳr mra. Wa ò krĩ pē Petãnja Jerujarē hwỳr ãm 3 kirōm pix jakamã nhūm mẽ ma wa hwỳr mra nē wa kuri wa kãm kapēr o hkrĩ.

²⁰ Rôm nhūm Matre Jejus hpōx o mōr ã harēnh ma nē kãnhmã xa nē

man mẽ ixkutā tē. No nhũm Marir arĩ mỳr o nhỹ nē hkôt htēm kêt nē.

²¹ Hāmri nhũm Matre mẽ ixkutā tē nē mẽ ixkaxpa nē Jejus pumu nē mỳr kamā kām kapēr nē kām:

—Hêxta gàà nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nē. Xê mon ka pre we tokyx mẽ ixwỳr atēmre hkêt nē?

²² Tã na pa arĩ akôt ijamaxpēr tỳx nē. Kot kaj mẽmoj tã tanhmã Tĩrtũm wỳr to nhũm ama nē tanhmã amã mẽmoj to. Ra ixte ja hã apumunh mex kênã. Anē.

²³ Hāmri nhũm Jejus kuma nē kām:
—Kwa tee ri ajamaxpēr nē akapri hkêt nē. Koja akamy akupỹm war amã htĩr kām ga. Anē.

²⁴ Hāmri nhũm kuma nē kām:
—Ma koja anē. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anē.

Kamy akupỹm htĩr ã harēnh mar tã Jejus kot akupỹm ho htĩr tokyx anhỹr ã hkamnhĩx kêt nē ã kām kapēr anē.

²⁵⁻²⁶ Jakamã nhũm kām:
—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpēr nē ixkôt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nē mex nē pa ho pa. Xà ate ja kaxyw ixkôt ajamaxpēr tỳx nà? Anē.

²⁷ Hāmri nhũm Matre kuma nē kām:
—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anē.

Hāmri nhũm Jejus kām:
—Nà ãm hāmri na ka ã ijarēnh anē. E ma akupỹm tē nē atõx mã anē kêt tokyx man ixwỳr tē pa omu. Anē.

²⁸ Hāmri nhũm kuma nē ma akupỹm tē. Hāmri nē Marir wỳr axà nē kām Jejus jarē. Kôt mẽ hkrĩ xwỳnhjê hkàx ã kām harē nē kām:

—An xê hāmri amỳr kêt nē. Na ra mẽ pajahkre xwỳnhhta hpôx o mõi nē mũtar nhỹ nē atã karõ. Anē.

²⁹ Hāmri nhũm kuma nē kànhmã xa nē ma mẽ ixwỳr htēm kurê kumrêx.

³⁰ Hāmri pa mẽ kormã krĩm ixpôx kêt nē. Arĩ Matreja Jejus wỳr htēm xà kamã arĩ ixkrĩ.

³¹ Jakamã nhũm Matre ma tē nē Marir mã Jejus jarē nhũm kato nē man mẽ ixwỳr tē. Hāmri nhũm Jerujarē rũm wa hwỳr mẽ mrar xwỳnhjaja omu nē htỳx kot hkamy hã pika pumunh nē mỳr kaxyw htēm ã hkamnhĩx nē man hkôt mra.

³² Hāmri nhũm Marir mẽ hkukamã mẽ ixwỳr tē nē Jejus pumu nē hpar pê tēm nē kām kapēr pê hipô nē mỳr o nhỹ. Nē kām:

—Hêxta gàà nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nē. Hô mon ka pre we tokyx man mẽ ixwỳr atēmre hkêt nē? Anē.

³³ Hāmri nhũm Jejus kuma nē mỳr ã omu. Nē hkôt mẽ mrar xwỳnhjaja mẽ mỳr ã mẽ omu nē kām mẽ hkapri nē.

³⁴ Hāmri nē mẽ kām:
—Nhỹri na ka prem haxà? E mẽ hwỳr ixto tē pa omu. Anē.

Hāmri nhũm mẽ kuma nē ma hã pyka hwỳr mẽ ixto mõi

³⁵ nhũm Jejus mẽ uràk nē hwỳr mỳr o tē

³⁶ nhũm mẽ ja hã omu nē axpēn mã:
—Kwa mãn kām hapê htỳx. Hã na ho ama nē hwỳr mỳr o tē. Anē.

³⁷ Nom nhũm mẽ hkwyjaja axtem nē mẽ kām:

—Tk. Ra kot no hkre xwỳnhhta o mex tã mo na we tokyx man kormã htĩr ri hwỳr htēm nē omunh nē akupỹm ho mex kêt nē? Anē.

Jejus kot akupỹm Rajare ho htĩr ã harēnh

³⁸ Tã pa mẽ ra kēn kre kamã mẽ kot Rajare jaxàr xàta wỳr ixpôx o mõi nhũm Jejus hkapri nē hwỳr tē nē omu. Nhũm prem ra kēn rax o hitom

³⁹ nhũm omu nē mẽ kām:
—E mẽ akwyjaja nhãm inhmã nē kahê xà mẽ. Anē.

Hāmri nhũm Matre kuma nē tee ri hamaxpēr nē kām:

—Xê ma Jejus. Mẽ ri ã anhỹr kêt nē. Ra htyk ã arĩgro kēp 4 kênã. Mã ra hkatõk nē hkro htỳx kumrêx. Anē.

⁴⁰ Hāmri nhũm kuma nē kām:

—Kwa ri ã ajamaxpēr anhÿr kêt nê Matre. Na pa ra amã ixkapēr nê amã ixkapēr o: “Kot kaj amnhĩ kaxyw ixkôt ajamaxpēr tÿx nê. Hã kot kaj Tirtũm mē wa ixihÿtÿx o wa ixihÿtÿx xàja pumu.” Anhÿr o amã ixkapēr. Jakamã kwa ja kaxyw Tirtũm mē wa ixkôt mãn ajamaxpēr tÿx nê hkêt wehe. Anê.

Hãmri nhũm kuma nê kãm:

—Ma ãm hãmri na ka inhmã akapēr. Ma kot paj kaxyw war amã ijamaxpēr tÿx nê. Anê.

⁴¹ Rôm nhũm mē kãm nhãm kēn jakwa kre kahê xà mē. Hãmri nhũm Jejus Tirtũm mã amnhĩ jarēnh kaxyw kãnhmã kaxkwa hwÿr rīt nê kãm:

—Pa Papaj. Nà na pa hte tanhmã mēmoj tã awÿr to ka inhma nê tanhmã inhmã mēmoj nhĩpêx to. Amex o amex Papaj.

⁴² Na ka hte ã inhmã amnhĩ nhĩpêx anê. Tã pa jajê noo mã ã amã ixkapēr anê. Ate inhmar nê tanhmã Rajare hto nhũm mē kot ja hã ixpumunh nê ixte anhÿ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nê ka ate mē hwÿr inhmēnh ã apumunh kaxyw. Anê.

⁴³ Nhũm pre ã Tirtũm mã kapēr anê. Hãmri nê kÿx pē Rajare mã kapēr nê kãm:

—Pa Rajare. Kwa tokyx kãnhmã nhÿ nê amnē mē ixwÿr tē nê akato. Anê.

⁴⁴ Puh nhũm akupÿm htĩr nê hkupu xà rãhã tē nē mē ixwÿr kato nē xa. Arĩ hkuk nē ĩhkra nē hpar kupu rãhã mē ixwÿr kato nē xa. Hãmri nhũm Jejus mē kãm:

—Kwa mē atō nē kupu xà hpôt kē ma akupÿm ōrkwÿ hwÿr tē. Anê.

⁴⁵ Hãmri nhũm mē kot Marir mē Matre wa hwÿr mrar xwÿnh kwÿjaja ã Jejus kot Rajare nhĩpêx anhÿr ã omu nê amnhĩ kaxyw hkôt hamaxpēr nê hkôt amnhĩ xunhwÿr kurē kumrēx.

⁴⁶ Nom nhũm mē hkwÿjaja axtem nê omu nhũm ja mē kēp omnuj nê. Jakamã nhũm mē ma Parijew nhō xwÿnhjē hwÿr mra nē mē kãm harē.

*Mē kot Jejus pĩr ã amnhĩ grōnh
Matēwre 26.1-5; Makre 14.1-2;
Rukre 22.1-2*

⁴⁷ Hãmri nhũm Parijew nhō xwÿnhjaja tee ri Jejus kot akupÿm Rajare ho htĩr ã harēnh ma hãmri nê patre krãhtũmjē mē amnhĩ wÿr mē inhō juisti ho akuprō nē axpēn mã Jejus o kapēr punuj pē hã axpēn mar o hkrĩ. Hãmri nhũm mēhō mē kãm:

—Kwa tanhmã kot puj mē ho? Na ra mē kãm mēmoj pumunh kêt kwÿ ho anhÿr rax o pa.

⁴⁸ Kot puj mē ãm omu nê tanhmã ho hkêt nhũm mē pahkwÿjaja kot ã amnhĩ nhĩpêx anhÿr ã omu nê htÿx ãm hãmri ã kot amnhĩ nhĩpêx anhÿr ã hkamnhĩx. Hãmri nê amnhĩ kaxyw hkôt hamaxpēr nê hkôt amnhĩ xunhwÿ. Jao ra amnhĩ kaxyw kēp mē ō pahihtĩ hã ãm. Koja mē ã amnhĩ nhĩpêx anê nhũm Rôm kamã pahihtija mē kot kator nê hpãnhã Jejus xãm ã harēnh ma. Hãmri nê gryk xàj mē pahwÿr ō pōristi hkwÿ rē nhũm mē pahwÿr mra nē mē panhĩmex pa nê Tirtũm nhōrkwÿ grãnh pa. Kwa tanhmã kot puj wem tokyx amnhĩ nê ho? Anê.

⁴⁹ Hãmri nhũm Kajpas mē kãm kapēr. Kajpasja na pre amgrãja kamã kēp mēō patre nhō pahi maati. Jakamã mē kãm:

—Nà na pa ra ijamaxpēr. Kwa mē inhma.

⁵⁰ Nà kot puj mē hpĩr tokyx anê kē tapxipix ty pu mē arĩ mÿrpē pahpiitã pajamakētkati nē ri papa. Anê.

⁵¹ Nhũm pre ã mē kãm kapēr anê. Nom amnhĩ krã hkôt ã mē kãm kapēr anhÿr kêt nē. Arĩ kēp mēō patre krãhtũmjē nhō pahi maati jakamã Tirtũm nhÿ hã Jejus kot Ijaew nē tykja kukamã ã harēnh anê. Nom ja hã amnhĩ pumunh kêt nē.

⁵² Na pre Jejus mē ixpē Ijaew pix nē htyk kêt nē. Krĩ piitã hkôt Tirtũm krajē nē na pre ty. Mē piitã mē kot axpēn to hkwÿ nē ri axpēn to pa kaxyw na pre mē nē ty.

⁵³ Hãmri nhũm ã Kajpas mē kãm kapēr anê nhũm mē inhō pahijaja

kuma nhũm ja mẽ kãm mex nê. Jakamã nhũm mẽ kot tanhmã Jejus ã àmnênh to nhũm mẽ kot mẽ kãm tanhmã hpĩr to kaxyw ã axpên mar anhỹr o pa.

⁵⁴ Jakamã nhũm Jejus axte mẽ noo mã ri pa hkêt nê. Hãmri ma krĩ pê Epraĩ hwỳr ma mō. Pa mẽ hkôt ixpa ho ixpa xwỳnhjaja ma hkôt ixpa. Epraĩa kapôt ã krĩ na pre. Jakamã pa mẽ ma hwỳr mō hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mō. Amnepêm finat Mojes kot Ejit rũm mẽ panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwỳr akuprō. Na pa pre htem hwỳr pōj nê kamã Tĩrtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtô nê ma Jerujarê hwỳr pa. Nê kãm Jejus pumunh prãm xaj Tĩrtũm mã amnhĩ jarênh xà hã ixkre wỳr mra nê hwỳr agjê nê kamã hapêr nê axpên mã:

—Kwa nok? Xà koja mẽ hpakĩnh wỳr mōr kêt nê nà? Anê.

Nhũm Parijew nhõ xwỳnhjê mẽ mẽ inhõ patre krãhtũmjaja haxwỳja hapêr o kuhê. Nom mẽ kot axtem nê unê nê haxàr kaxyw. Jakamã mẽ kãm hã karō nê mẽ kãm:

—E kêr ka mẽ nhỹri Jejus pumu nê man mẽ ixwỳr mra nê mẽ inhmã harênh kurê kumrêx. Anê.

12

Marir kot Jejus kuxwa hã harênh Matêwre 26.6-13; Makre 14.3-9; Rukre 7.36-50

¹ Tã nhũm ra Pas wỳr apkati grêre. Ra hwỳr apkati kêp 6. Jakamã pa mẽ ma akupỹm krĩ pê Petãn wỳr Jejus kôt mō. Jejus kot akupỹm Rajare ho htĩr xwỳnhta mẽ õ krĩ hwỳr pa mẽ akupỹm mō nê Rajare nhõrkwỹ hwỳr pōj nê mẽ hwỳr agjê.

² Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o

nhỹ. Nhũm htõx Matre mẽ inhmã mẽõ ho pa nê mēsti hã unhwỳr o xa.

³ Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkôt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx.

⁴ Hãmri nhũm mẽ inhõ pê Jut Kariotja. Kot kormã mẽ ìhkram Jejus nhõr mã xwỳnhta tee ri ã kot amnhĩ nhĩpêx anhỹr ã omu nhũm ja kêp omnuj nê

⁵ nhũm mẽ inhmã:

—Tk. Kwa pêr mẽ hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htêm nê ho wênê nê hpãnhã kàxpore ho rax nê hpyr nê ho mẽ kêp amrakati xwỳnhjê nhĩpêx kêt nê? Kot ho wênê ronhỹx hpãnhã kàxpore ho rax kumrêx nê kupy nê ho mẽmoj japrôr rax o rax. Tã axtem nê amarĩ Jejus par ã hkapĩr pa. Anê.

⁶ Te kãm mẽ kêp amrakati xwỳnhjê japê pyrak tã kãm mẽ hapê hkêt. Âm hêx rom ã kapêr anê. Na pre hte mẽ inhmã mẽ ixkàxpore jamý nê mẽ ixkôt mẽ inhmã hamãr o pa. Nom tōhã axtem nê mẽ ixpê hkwỳ ho ahkĩ nê ho amnhĩm mẽmoj japrô. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê.

⁷ Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê.

⁸ Na hte mẽ kêp amrakati xwỳnhjaja mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê rĩ mẽ ho ajuta nê mẽ kãm

mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitā mē are. Jakamā ām hāmri na ā inhîpêx anē. Anē.

Patre krāhtūmjaja kot Rajare hā àmnênh ā harênh

⁹ Rôm nhūm Jerujarē nhō xwýnhjaja ra Jejus Petān wýr hpôx ā harênh ma nē kot omunh mā ma hwýr mra. No ām tapxipix pumunh mā hwýr mrar kêt nē. Māānên kot akupým ho htír xwýnhta pumunh mā nhūm mē ma hwýr mra.

¹⁰⁻¹¹ Na pre ra Ijaew ohtô nē Jejus kot akupým Rajare ho htír ā harênh ma hāmri nē mē inhō patre kaga nē Jejus kôt amnhî xunhwý. Jakamā nhūm patre krāhtūmjaja tee ri ja hā mē omu nē axpên mā:

—Nà kot puj mē Jejus pix pír kêt nē. Kot puj mē māānên hkôt Rajare pí hāmri nhūm wa hixi hamē mē kêp hapêx japêr. Anē.

Jejus kot Jerujarē hwýr àr ā harênh Matêwre 21.1-11; Makre 11.1-11; Rukre 19.28-40

¹² Tā nhūm apkati nhūm Ijaew Jerujarē kamā mē hkînhja kryx nē Jejus ra mē hwýr àhtêp o mōr ā harênh ma.

¹³ Hāmri nē axpên mā:

—Kwa ma pu mē mō nē pô hkwy jakà nē kutā ho mra. Anē.

Hāmri nē hkwy jakà nē hamý nē ma kutā ho mra. Hāmri nē ra hkaxpa nē omu nē hkînh nē. Nē kām:

Pa. Nà ām hāmri na ka mē ixwýr mō. Tirtūm na pre mē ixwýr amē ka ā amōr anē.

Tirtūmja mex o mex. Ām hāmri na pre mē ixwýr amē.

Kot kaj mē inhō pahi hpānhā mē ixto amnhîptār o ri apa. Anē.

¹⁴ Hāmri nhūm Jejus nhýri jumênre pumu nē hwýr tē nē hā nhý nhūm mē pimràatā ma akupým Jerujarē hwýr mō. Tirtūm kapêr ā kagà htūm ra kot ja jarênh kot:

¹⁵ Pa Jerujarē nhō xwýnhjaja. Kwa mē tee ri amnhî kukamā aja-maxpêr ho amā ma hkêt nē.

Ota mē anhō pahi nyw ra mē awýr jumênre hā nhý nē hpôx o tē.

Anē.

¹⁶ No Jejus kôt mē ixpa ho mē ixpa xwýnhjaja pa mē ā kot amnhî nhîpêx anhýrja ā omu nē tee ri hkukamā ija-maxpêr nē axpên mā:

—Kwa mo na ri ā amnhî nhîpêx anē nē jumênre hā nhý nē mē hkôt mō? Anē.

Tā nhūm arîgro hō hā ty nē akupým kaxkwa hwýr api pa prem hā omu hāmri nē kormā Tirtūm kapêr ā kagà htūm kot hkukamā ā harênh kot anhýrja mā ijamaxpêr kurê kumrêx. Hāmri nē axpên mā harênh o:

—Kwa ām hāmri na Tirtūm kapêr ā kagà htūm kot ra ā Kraja jumênre hā ýr nē mē hkôt mōr ā hkukamā kot harênh anhýrta. Anē.

¹⁷ Hāmri nhūm Jejus kot Rajare mā kapêr pē akupým ho htír ā omunh xwýnhjaja arî nhām mē hkwyjê mā ujarênh o pa.

¹⁸ Nhūm mē kuma nē ma Jejus wýr omunh mā mra.

¹⁹ Hāmri nhūm Parijew nhō xwýnhjaja tee ri ja hā mē omu nē axpên mā:

—Kwa na pu mē tee ri Jejus nē mē kām pakapêr kapry nhūm mē pamar kêt nē ra piitā hkôt amnhî nhîpêx o pa. Kwa nà. Anē.

Ijaew kêt xwýnhjê jarênh

²⁰ Tā nhūm ra Gres kwýjaja Ijaew kôt hkînh kaxyw ma Jerujarē hwýr mē hkôt mra nē mē îhkô hā Tirtūm mā mex o mex ā harênh o hkôt mra.

²¹ Jakamā nhūm mē nhýri mē inhîo pē Firipti pumu nē hwýr mra. Firipti kêp pyka pē Garirej kamā krî pē Pesêj nhō xwýnh nhūm Gres nhō xwýnhjaja omu nē hwýr mra nē kām:

—Pa. Kwa na pa mē inhmā Jejus pumunh prām nē. Tanhmā kot pa wem amnhî to nē omu nē kām ixkapêr? Anē.

²² Hāmri nhūm mē kuma nē ma Andre hwýr mē o mra nē kām mē harē. Hāmri nē wa ma Jejus wýr mē o mra nē kām mē harē nē kām:

—Pa Pahihti. Ota Gres nhō xwýnhjaja kām apumunh prām nē

awÿr mō. Mē pahkīnhā mē kēp Ijaew kêt tā mē kām apumunh prām nē. Anē.

Jejus kot amnhī kukamā amnhī jarēnh

Matêwre 16.24-28; mǎānēn Apokarip 2.10, 12.11

²³ Hāmri nhūm Jejus mē omu nē mē kām tanhmā amnhī jarēnh to. Kot mē ohtō nē mē nē htyk nhūm mē kukwak ri Tirtūm wa kuri htīr tūm nē pa ho pa hā mē kām amnhī jarē nē mē kām:

—Nà na ra ixyk ā arīgro hwÿr apkati grēre. Ixpē Tirtūm kot mē akaxyw ixām xwÿnh jakamā kot paj mē apiitā mē anē ty hāmri nē akupÿm ixtīr nē ma kaxkwa hwÿr akupÿm api.

²⁴ Mē axohtō nē nhÿrmā Tirtūm mē wa ixri atīr tūm nē apa ho apa kaxyw kot paj ā amnhī nhīpēx anē. Kwa mē ā ixte amnhī jarēnh anhÿrja ma nē mē amnhī krām haxār tÿx nē ri hā apa. Te ixte mēmo hy kot amnhī nhīpēx pyrāk. Na htem pikap haggē nhūm te htyk pyrā nē pika kaxwÿnh kām hikwÿ. Tā gaa nē higrōt nē hprēk nē ô. Nē ô rax kumrēx. Hyja pyxire nē hikwÿ htā kamā ô rax kumrēx. Nom koja mē hkre hkêt nē nhūm ô hkêt nē. Na hte ā mēmo hyja amnhī nhīpēx anē. Ja pyrā nē kot paj mē anē ixyk kêt nē te mē kot mēmo hy hkre hkêt nhūm hprēk nē ô hkēeta pyrāk ka mē ixkukwak ri Tirtūm mē wa ixri atīr tūm nē apa hkêt nē. Jakamā kot paj mē anē ty nhūm mē ijaxā. Hāmri pa akupÿm ixtīr ka mē axohtō nē ixkukwak ri wa ixri atīr tūm nē apa ho apa.

²⁵ —Nē koja mē ixpī pa mē anē ty. Tā mē ate ixkôt amnhī nhīpēx o apa xwÿnhjaja. Koja mē ixtā mē apar mā tā kwa kē ka mē atyk pymaj ixkaga hkêt nē. Kwār mē māmri tanhmā ixtā mē ato ka mē nhÿrmā Tirtūm mē wa ixri axte amnhī xā kamā ajamak kêt kumrēx nē atīr tūm nē amex nē apa ho apa. No kot kaj mē ixkīnhā jar amā amex pix prām hāmri nē nhÿrmā wa ixri atīr tūm nē apa hkêt nē.

²⁶ Kot kaj mē ā ixkôt amnhī nhīpēx anhÿr o ri apa hāmri nhūm mē kot inhīpēx pyrāk o mē anhīpēx. Hāmri

ka mē nhÿrmā ma ixkôt kaxkwa hwÿr api nē kamā ixri atīr tūm nē apa ho apa. Hāmri nhūm Inhīpēxā ixtā mē apumu nē mē ato mex kumrēx. Anē.

Tirtūm kot Jejus mā kapēr ā harēnh Matêwre 3.17, 17.5

²⁷ Tā nhūm Jejus tee ri amnhī kukamā htyk mā hamaxpēr nē hkaprī htÿx nē. Nē hkôt mē ixpa ho mē ixpa xwÿnhjē mā amnhī jarē nē mē inhmā:

—Héxta waa nē. Na pa tee ri amnhī kukamā ijamaxpēr. Nē tee ri amnhī xā htÿx kamā ijamak kukamā ijamaxpēr pē ra amnhī kamā ixkahak nē. Nom ixte pika piitā hkôt mē kot ixkôt amnhī xunhwÿr xwÿnhjē nē ixyk kaxyw ixwryk kēnā. Jakamā kot paj Inhīpēxā kot mē kēp ixpytār kaxyw tanhmā amnhī to hwÿr to hkêt nē. Anē.

²⁸ Hāmri nē hpānhā Hipēxā mā kapēr nē kām:

—Pa Papaj. Ām mēmoj pixi na inhmā hprām. Kē mē piitā ixkukwak ri amex o amex ā apumu. Ja na kêt inhmā hprām tÿx kumrēx.

Anhÿr o Tirtūm mā amnhī jarē. Hāmri nhūm kuma nē kaxkwa rūm kām kapēr. Kÿxpē kām kapēr nē kām:

—Nà na pa pre ra ā mē kām amnhī to amnhīrīt anē nhūm mē ja hā ixpumu. Tā kot paj axte akukwak ri amnhī to amnhīrīt nhūm mē piitā axte inhmex o inhmex ā ixpumu. Anē.

²⁹ Nhūm pre ā Tirtūm Jejus mā kapēr anē. Hāmri nhūm mē kot mē ixkuri mar o kuhē xwÿnhjaja kuma no ām hprī hā kot kām tanhmā kapēr toja mar mex kêt nē. Nē htÿx ho ām mēmoj tā hkamnhīx. Jakamā nhūm mē hkwÿjaja axpēn mā:

—Kwa mo na wehe? Na mǎn katōtōk nā? Anē.

Nhūm mē hkwÿjaja mē kām:

—Nà na katōtōk kêt. Tirtūm kapēr o wryk xwÿnh mǎn tanhmā kām kapēr to. Anē.

³⁰ Hāmri nhūm Jejus mē kām:

—Nà Tirtūm tām na inhmā kapēr. Nom pa ixte mar kaxyw inhmā kapēr

kêt nê. Mě kajaja mẽ ate ixtā mar kaxyw na kÿx pê ã inhmā kapêr anê. Anê.

Hāmri nê mẽ kām:

³¹ —E hāmri. Kot paj tokyx mẽ apiitā mẽ ate amnhĩ tomnuj pānhā amnhĩrer kaxyw tanhmā amnhĩ nhĩpêx to. Jao mǎānēn Satanasti pê hihtÿx xà ho ijpapêx.

³² Koja mẽ pĩ kahpa hā inhô pa kÿxpê ajêt. Tirtũm kot mẽ awÿr inhmēnh tā nhũm mẽ ã inhĩpêx anê pa ty. Jakamā koja pika piitā hkôt mẽ ohtô nê ixkôt amnhĩ xunhwÿ nê amnhĩ kaxyw inhmā hamaxpêr rāhā ho pa. Anê.

³³ Mě ixte tanhmā htyk to hā harēnh mar kaxyw nhũm pre ã mẽ inhmā amnhĩ jarēnh anê.

³⁴ Hāmri nhũm mẽ kot mẽ ixkuri mar o kuhê xwÿnhjaja tee ri kot htyk ã amnhĩ jarēnhja ma nê kām:

—Kwa mẽ ixte amnhĩ wÿr kamā ijamak o ixpa xwÿnhja htĩr tũm nê pa ho pa xwÿnh na. Tirtũm kapêr ã kagà htũm kot ã harēnh kot anhÿr tā ka ã ri mẽ kot apĩr nhũm atyk ã amnhĩ jarēnh anê. Ate Tirtũm kot mẽ ixwÿr amēnh xwÿnh ã amnhĩ jarēnh tā ã ri atyk ã amnhĩ jarēnh anê. Kwa xà apê mẽ ixte amnhĩ wÿr kamā ijamak o ixpa xwÿnh kêt? Anê.

³⁵ Hāmri nhũm mẽ kuma nê amnhĩ tā mẽ kām:

—Tÿ ixpê tām kēnā. Tā kot paj tokyx mẽ are. Jakamā kêr ka mẽ ixte arĩ mẽ akamā ixpa ri ixkôt amnhĩ xunhwÿ nê amnhĩ kaxyw ixkôt ajamaxpêr o ri apa. Te ixpê kanê hpôk pyrāk jakamā na pa hte mẽ kām Tirtũm kapêr o mẽ ahkre o ri ixpa. Nom kot paj kritpēm mẽ akôt ixpa ry hkêt nê. Jakamā kwa kêr ka mẽ tokyx te mẽ kot kanê hpôk nhĩrā kamā ri mẽ pa xwÿnh kot amnhĩ nhĩpêx pyrā nê Tirtũm kôt amnhĩ nhĩpêx o ri apa. Kormā mẽ akôt ixpa ri. Kot paj tokyx ma mō nhũm te ra kamāt kô pyrāk. Na hte kamāt kô kamā mẽ pa xwÿnhjaja tee ri rĩt mex mǎ nom rĩt mex kêt nê. Nê mẽmoj pumunh mex kêt nê.

³⁶ Jakamā kwa mẽ tokyx ixte arĩ mẽ akamā ixpa ri amnhĩ kaxyw inhmā ajamaxpêr nê ixkôt amnhĩ xunhwÿ. Te ixpê kanê hpôk nhũm kamā mẽ arĩt mex pyrāk. Jao ixpyrà nê te mẽ apê kanê hpôk nhĩrā mex pyrāk o amnhĩ nhĩpêx. Nê ixpyrà nê tām ri amnhĩ nhĩpêx o apa. Anê.

Nhũm pre ã mẽ kām kapêr anê hāmri pa mẽ kêp ixkato nê ma nhām mō.

Mě hkwÿjaja kot Jejus kôt hamaxpêr kêt ã mẽ harēnh

³⁷ Na pre hte Jejus mẽ noo mǎ mẽ kot aa mẽmoj pumunh kêt kwÿ ho anhÿr rax o pa. Tā nom nhũm mẽ ohtô nê hā omu nê ãm hā omu nê kêp Tirtũm kot mẽ pahwÿr mēnh xwÿnh ã hkôt hamaxpêr kêt nê.

³⁸ Nom ra mẽ hkukamā Tirtũm nhÿ hā kapêr jarēnh o pa xwÿnh pê finat Ijaisja mẽ hkukamā ja hā mẽ harē nê hā kagà. Nê hā kagàja o:

Pa Pahi Maati. Nà ra ixte mẽ kām ajarēnh o ixpa ryy htā no nhũm mẽ inhma nê ãm inhma. Nê mẽ kot axihtÿx o axihtÿx ã ajarēnh mar tā no ãm ajarēnh ma nê amnhĩ kaxyw akôt hamaxpêr kêt nê. Anê.

³⁹ Mě kām Tirtũm kapêr mar prām kêt jakamā na prem mǎānēn Jejus kêp Tirtũm kot mẽ pahwÿr mēnh xwÿnh hkôt hamaxpêr kêt nê. Nhũm pre finat Ijaisja axte mẽ hkukamā ja hā mẽ harē nê mẽ hā kagà. Nê hā kagà ho:

⁴⁰ Na pre Tirtũmja tanhmā amnhĩ nê mẽ hkrā hto nhũm mẽ hkôt hamaxpêr kêt nê.

Ra mẽ kot hihtÿx o hihtÿx ã omunh tā omu nê ãm omu.

Nê mẽ kot kapêr mar tā amnhĩ tomnuj kaga hkêt nê.

Nê Tirtũm kot mẽ nê mẽ kot amnhĩ tomnuj o hapêx prām xāj hkôt amnhĩ xunhwÿr kêt nê. Anê.

⁴¹ Kormā Jejus mẽ hwÿr wrÿk kêt ri nhũm finat Ijaisja hpimtir kām kot amnhĩ to rax kumrêx ã omu nê hkukamā ã harēnh nê hā kagà anê.

⁴² Hāmri nhũm Ijaew krāhtũm kwÿjaja hkwÿjê rom amnhĩ kaxyw

Jejus kôt hamaxpēr nē hkôt amnhī xunhwỳ. Tã Parijew nhõ xwỳnhjaja kot ã mẽ kot amnhī nhĩpêx anhỹr ã mẽ harēnh mar pymaj ja hã amnhī to amnhĩrīt kêt nē. Mẽ kot Tĩrtũm kapēr o mẽ ahkre xà hã ixkreja nē mẽ kator pymaj nhũm mẽ kãm amnhī to amnhĩrīt kêt nē.

⁴³ Na prem hamaxpēr o:

—Nà kot paj ja hã amnhī to amnhĩrīt nhũm mẽ amnhī nē ixtomnuj nē. Hãmri nē amnhī pyrà nē axpēn mã inhmex ã ijarēnh kêt nē.

Anhỹr o mẽ umaj amnhī kukamã hamaxpēr o pa. Nom Tĩrtũm tãm kot amnhĩm mẽ mex ã mẽ harēnhja nhũm mẽ hkukamã hamaxpēr kêt nē.

Jejus kot Hipêêxà nhỹ hã kapēr ã harēnh

⁴⁴ Nhũm Jejus axte mẽ kãm kapēr nē kỳx pē kapēr nē mẽ kãm:

—Nà koja mẽhõ amnhī kaxyw ixkôt hamaxpēr hãmri nē ixkôt pix mã hamaxpēr kêt nē. Mããnēn amnhī kaxyw kot mẽ awỳr inhmēnh xwỳnhja kôt hamaxpēr.

⁴⁵ Wa ixte amnhī nhĩpêxja te tipxi pyræk jakamã koja mẽ tanhmã ixte amnhī nhĩpêx to hã ixpumu nē te kot Tĩrtũm kot amnhī nhĩpêx ã omunh pyræk.

⁴⁶ —Nē te ixpê kanê hpôk nhũm inhĩrã kamã mẽ apa pyræk kaxyw na pre Inhĩpêêxà mẽ awỳr inhmē pa mẽ awỳr wrỳ. Ixte kapēr o mẽ ajahkre ho ri mẽ akôt ixpa kaxyw. Jakamã koja mẽhõ amnhī kaxyw ixkôt hamaxpēr nē ixkôt amnhī xãm hãmri nē te kanê hpôk nhĩrã kamã rīt mex o pa pyræk o amnhī nhĩpêx. Jao amnhī nhĩpêx nyw o amnhī nhĩpêx o pa.

⁴⁷⁻⁴⁸ No mẽ kot ixkapēr mar nē ãm mar xwỳnhjaja te mããnēn Inhĩpêêxà kapēr mar nē ãm mar pyræk. Mỳrapê koja mẽ nhỹrmã ma kuwy hwỳr pa nē mẽ kot amnhī tomnuj mỳrapê kamã pa ho pa. Tã no ã mẽ ate amnhī nhĩpêx anhỹr o ri mẽ apa kaxyw na pa pre mẽ awỳr ixwrỳk kêt nē. Ixte mẽ ate amnhī tomnuj pãnhã amnhĩrer par kaxyw na pa pre mẽ awỳr wrỳ.

⁴⁹ —Nē na pa hte amnhī krã hkôt tanhmã ri mẽ amã ixkapēr to ho ri ixpa hkêt nē. ãm kot mẽ awỳr inhmēnh xwỳnhja nhỹ hã na pa hte tanhmã mẽ amã ixkapēr to ho ri mẽ akôt ixpa.

⁵⁰ Tã mẽ kot Tĩrtũm kapēr mar nē amnhī kaxyw hkôt hamaxpēr xwỳnhjaja koja mẽ nhỹrmã wa ixri htĩr tũm nē mex nē pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapēr to ho ri ixpa. Anē.

13

Jejus kot hkwỳjê hpar kuhõnh ã harēnh

Rukre 22.24-27

¹ Tã nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpēn wỳr akuprõ nē hã ôwêhti hkra nyw pa nē ho anē nē hkur o ixkrĩ. Amnepêm Tĩrtũm kot pika pē Ejit rũm mẽ inhĩgêxjê kator kaxyw nhũm mẽ nojarêt nē ã hkwỳ hpar nē ho anhỹr nē hkwỳ hkurta pyræk. Na prem nojarêt nē mẽ hkra my kot wa mẽ kêp htyk pumaj ôwêhti hkra nyw kwỳ hpa nē ho anē nē ã hku. Jakamã nhũm arĩ mẽ ixpê mẽ hkanrêhã mẽ htãmnhwỳjaja ã mẽ kot amnhī nhĩpêx anhỹrja mã ijamaxpēr nē hã ixkĩnh kaxyw mẽ uræk nē hkwỳ hpa nē kuku. Jakamã nhũm ra Pas ahtêp nhũm Jejus amnhī kukamã tanhmã hamaxpēr to kurê kumrêx. Ra ma akupỳm Hipêêxà hwỳr àpir xà hã arĩgro hwỳr apkati grêre. Jakamã nhũm akupỳm nojarêt ã amnhī pumu nē kãm mẽ pahte hkôt amnhī xunhwỳr xwỳnhjê japê jakamã kãm mẽ pajapê rãhã mẽ panê htyk mã.

² Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mããnēn mẽ ixkutã apkur o nhỹ. Kêp mẽ ixkwỳ htã nhũm pre Satanasti tanhmã hkrã hto nhũm ra axtem nē kot mẽ kãm Jejus kurê xwỳnhjê nhĩhkram haxàr kaxyw.

³⁻⁴ Tã pa mẽ kormã axpēn kutã ixàpkur kaxyw ixkrĩ hpa nhũm Jejus

kànhmã xa nê hinôkà kapa nê toajti py nê ho amnhĩ krax pre. Kot amnhĩ to rax ã amnhĩ pumunh tâ ja hã amnhĩ to jarkrar pê tanhmã ri mē inhnoo mã amnhĩ nhĩpêx to ho pa hkêt. Kêp mē inhõ pahi htã te kêp mē inhmã àpênh xwýnh pyræk o amnhĩ nhĩpêx o pa.

⁵ Jakamã toajti py nê ho amnhĩ krax pre nê pasiiti hõ py nê kamã gô hkwy ru nê ho mē ixpar kuhõ nê toajti o mē ixpar grà ho mō.

⁶ ã mē inhĩpêx anhÿr o mō. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tâ omu nê kãm:

–Tk. Kwa apê inhmã axàpênh xwýnh kêt kênã kot ka kêt ri axtem nê ixpar kuhõ Pahihti. Apê mē inhõ Pahi kênã kot ka kêt ã mē inhĩpêx anê. Anê.

⁷ Hãmri nhũm kãm:

–Kwa nà. Kormã ate ja hã amnhĩ tâ ixpumunh mex kêt. Nom kot kaj nhÿrmã aprĩ hã amnhĩ tâ ixpumu. Anê.

⁸ Hãmri nhũm kãm:

–Nà nom kot kaj ãm ixpar kuhõnh kêt nê. Kwarĩ. Anê.

Hãmri nhũm Jejus kãm:

–Tõe. Kot paj apar kuhõnh kêt nê ka te apê ixkwý hkêt pyræk. Anê.

⁹ Hãmri nhũm tee ri kuma nê kãm:

–Tõe mamrĩ ixpar kuhõ. Nom ixpar pix kuhõnh kêt nê. Mãânên inhĩhkra kuhõ nê ixkuk kuhõ. Inhmã ixte apyræk prãm týx kumrêx kênã. Anê.

¹⁰ Hãmri nhũm Jejus kãm:

–Nà amÿkry hkôt mē wÿr xwýnhjaja na htem mex nê axte wÿr kêt rãhã hikwÿ. Na htem ãm amnhĩ par pix kuhõ nê hikwÿ. Ja pyrã nê Tĩrtũm kot mē anê mē ate amnhĩ tomnuj ho hapêx par xwýnhjaja te amÿkry hwÿr mē axwÿr nê amex pyræk. Ka mē te mē kot amnhĩ par pix kuhõnh ta pyrã nê axte tanhmã amnhĩ tomnuj to hãmri nê Tĩrtũm mã amnhĩ jarênh kurê kumrêx kê anê amnhĩ katut kôt ate amnhĩ tomnujta mē nê ho hapêx. Na pre ra mē anê mē ate amnhĩ tomnuj o hapêx. No ãm mē apiitã hkêt. Ota arĩ mē anhĩõja pyxire nê arĩ

amnhĩ tomnuj rãhã ri pa. Jakamã te wÿr kêt nê arĩ grã htyk rax kãm ri pa pyræk. Anê.

¹¹ Nhũm pre ã Jejus mē inhmã kapêr anê. Ra kot hprĩ hã mē kot kãm hkurê xwýnhjê mã òr mã xwýnhja pumunh jakamã te wÿr kêt nê arĩ grã htyk rax kãm ri pa pyræk ã ã harênh anê.

¹² Tã mē ixpar kuhõnh pa nê akupÿm hinôkà py nê haxà nê nhÿ hãmri nê mē inhmã:

–E mēmo kaxyw na pa we ã mē apar kuhõnh anê? Kot paj ixprĩ hã mē amã amnhĩ jarê ka mē inhma.

¹³⁻¹⁴ Na ka htem ixto “mē ijahkre xwýnh” nê ixto “pahihti” anhÿr o ijarênh o ri apa. ãm hãmri na ka htem ã axpên mã ijarênh anê. Ixpê mē ajahkre xwýnh nê mãânên ixpê mē anhõ pahihti htã inhmã mē ate tanhmã axpên nhĩpêx to ho apa hprãm xàj na pa ã mē apar kuhõnh anê. Tã kêr ka mē ixpyrà nê tanhmã axpên to mex to ho ri apa.

¹⁵ Jao amnhĩ kuxwar axpên to mex pê mēmoj to axpên kutã anojarêt rãhã ho ri apa.

¹⁶ Kwa mē ixkapêr ma nê kãm amnhĩ krãm haxàr týx rãhã ho ri apa. Mē ate amnhĩ to rax o ijakrenh kêt. Te ixpê mē anhõ patrãw nhũm mē ate inhmã tanhmã amnhĩ nhĩpêx to ho apa xwýnh pyræk. Nê te ixte mēmoj tâ mē amã karõ nhũm mē ate inhmar nê inhmã tanhmã mēmoj nhĩpêx to pyræk. Tã te ixpê mē anhõ patrãw pyræk tâ pa ã mē apar kuhõnh anê. Ka mē amnhĩ tâ ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhÿr o ajamxpêr o ri apa hkêt nê.

¹⁷ –E na pa ã mē amã ixujarênh anê. Kot kaj mē inhma nê ixujarênh kôt ã axpên nhĩpêx anhÿr o ri apa. Hã kot kaj mē akĩnh nê ri apa. Anê.

Jejus kot amnhĩ tā hã àmnênh xwỳnh o amnhĩrĩt ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mẽ inhmã kapêr nẽ mẽ inhmã:

—Kot kaj mẽ apiitã mẽ akĩnh nẽ apa hkêt nẽ. Ixte mẽ arênh xwỳnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapêr ã kagã htũm kot harênh kot:

Ixkutã apkur o ỹr xwỳnhjê hõ koja axtem nẽ mẽ kot kãm ixkurê xwỳnhjê nhĩhkram ijaxà. Kêp ixkõt pa ho pa xwỳnh tã koja axtem nẽ ã inhĩpêx anẽ.

Anhỹr o kot harênh. Tã koja tokyx ã inhĩpêx anẽ.

¹⁹ Nom kormã kot ã inhĩpêx anhỹr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarênhta mã ajamxpêr nẽ ixpê Tĩrtũm rũm mẽ awỳr ixwỳr xwỳnh kõt ajamxpêr tỳx kurê kumrêx.

²⁰ —Kwa mẽ ixkapêr ma nẽ amnhĩ krã kamã kãm ajamxpêr tỳx o ri apa. Koja mẽhõ ixte mẽ hwỳr mẽ arênh xwỳnhjê hã tanhmã mẽ ato mex to. Hãmri nẽ te pa kot tanhmã ixto mex to pyrãk. Nẽ koja mẽhõ tanhmã pa ixto mex to nẽ mãânên te kot mẽ awỳr inhmênh xwỳnhhta tanhmã ho mex to pyrãk. Anẽ.

²¹ Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamxpêr nẽ hkaprĩ nẽ mẽ inhmã:

—Hêxta waa nẽ. Nà kot kaj mẽ atõ mẽ kot kãm ixkurê xwỳnhjê nhĩhkram ijaxà. Kwa mẽ amnhĩ krã kamã ixkapêrja mã ajamxpêr tỳx nẽ. Anẽ.

²² Hãmri pa mẽ amnhĩ tã kuma nẽ tee ri axpên pumunh o ixkrĩ.

²³ Ixpê Juāw na pa pre ixpê Jejus krãmnhwỳ mex ã ìhkô hã ixãpkur o inhỹr

²⁴ nhũm Simãw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nã? Anẽ.

²⁵ Hãmri pa kuma nẽ Jejus mã kãm:

—Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagõ nhek nẽ kot mẽ ìhkram ijaxàr mã xwỳnhhta mã kugõ ka mẽ hkõt omu. Anẽ.

Hãmri nẽ kupy nẽ ho mry kagõ nhek nẽ Simãw Kariot kra Jut Kariotja mã kugõ nhũm kupy.

²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr nẽ kãm:

—E kwa tokyx nã. Anẽ.

²⁸⁻³⁰ Hãmri nhũm kuma nẽ kato nẽ ma kamãt kô kamã htêm kurê kumrêx. Hãmri pa mẽ ixãpkur o ixkrĩ xwỳnhjaja Jejus kot ã kãm kapêr anhỹrja ã kuma nẽ tee ri hkukamã ijamxpêr. Hãmri nẽ kot ma mẽ hkĩnh ã mẽõ hkwy japrôr kaxyw ma htêm ã hkamnhĩx. Nhũm mẽ ixkwỳjaja axtem Jejus kot mẽ kêp amrakati xwỳnhjê mã mẽmoj nhõr ã kãm karõ nhũm ma mẽ hwỳr htêm ã hkamnhĩx. Kêp mẽ inhmã mẽ ixkãxpore jamãr o pa xwỳnh jakamã pa mẽ ã ixtỳx mẽmoj tã hkamnhĩx anẽ.

Jejus akupỹm nojarêt nẽ mẽ kãm mẽmoj tã karõ hã harênh

Matêwre 22.39-40; mãânên Wam Juāw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwỳja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri nẽ ma akupỹm api. Kot kaj mẽ tee ri jar ijarêr o ri apa nom nhỹri ixpumunh kêt nẽ. Nẽ kormã tokyx ma ixkõt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpên kĩnh o ri

apa. Te pa inhmã mẽ ajapê pyræk o axpên nhîpêx rãhã ho ri apa.

³⁵ Kot kaj mẽ ã amnhî nhîpêx anê nhũm mẽ akwỳjaja ja hã mẽ apumu nê mẽ apê ixkwỳ hã mẽ apumunh kurê kumrêx. Anê.

Simãw Pêtre kot Jejus ã amnhî to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer nê ma nhỹhỹm mõi ã amnhî jarênh anê hãmri nhũm Simãw Pêtre tee ri kot amnhî jarênh ma nê kãm:

—Kwa Pahihti. Nhỹhỹm kot kaj kêt mõi pa mẽ akôt ixpa hkêt nê? Anê.

Hãmri nhũm kãm:

—Nã ma inhmõi xàta wỳr kot kaj mẽ kormã ma ixkôt apa hkêt nê. Nom kot kaj mẽ nhỹrmã ma ixkôt apa. Anê.

³⁷ Hãmri nhũm Simãw Pêtre kãm:

—Kwa mo kot pa mẽ omu nê tokyx ma akôt inhmrar kêt nê? Inhmã akôt ixtyk puma hkêt kênã. Kwãr mẽ mãmri atã ixpĩ. Inhmã ajapê htỳx kumrêx kênã. Anê.

³⁸ Hãmri nhũm Jejus kãm:

—Xà ãm hãmri na ka ã inhmã amnhî jarênh anê Simãw Pêtre? Xà amã ixkôt atyk puma hkêt? Kwa o kora. Kojã apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhî tã axaprãr o axkrunêpxi kãm ga. Kwa amnhî krã kamã ixkapêrja mã aja-maxpêr tỳx nê. Anê.

14

Jejus kot Tirtũm nhõ krĩ jarênh

Eprêw 11.16

¹ Nhũm Jejus arĩ mẽ inhmã kapêr nê mẽ inhmã:

—Kwa ã ixte mẽ amã amnhî jarênh anhỹrja ma nê tee ri amnhî kukamã ajamaxpêr nê akaprĩ hkêt nê. Arĩ amnhî kaxyw Tirtũm mẽ wa inhmã ajamaxpêr tỳx rãhã ho ri apa.

² Inhîpêxà nhõ krĩ kamã ixkre xohtô. ãm hãmri na pa ã mẽ amã harênh anê. Tã kot paj ma akupỹm hwỳr api nê mẽ akutêp mã amã mẽ anhõrkwỳ ho mex.

³ Hãmri nê ho mex pa nê rĩ man akupỹn mẽ awỳr wrỳ. Hãmri nê ma

akupỹm amnhî kôt mẽ ato ixàpir pa ka mẽ Tirtũm mẽ wa ixkôt apa rãhã apa ho apa. Jakamã kwa mẽ ri akaprĩ nê apa hkêt nê. Anê.

Jejus te kêp Tirtũm wỳr pry pyræk Epes 2.18

⁴ —Nê ma nhỹhỹm inhmõi xàta ra mẽ ate harênh mar mex. Nê hwỳr pryja mããnên mẽ ate harênh mar mex. Anê.

⁵ Hãmri nhũm Tomas tee ri kuma nê kãm:

—Kwa mẽ ixte nhỹhỹm amõi xàta pumunhre hã kot pa kêt mẽ hwỳr pryja pumu. Anê.

⁶ Hãmri nhũm kãm:

—Kwa paa. Te ixpê Inhîpêxà hwỳr pry pyræk. Na htem amnhî kaxyw inhmã hamaxpêr nê ixkôt amnhî xunhwỳ hãmri nê nhỹrmã ixkukwak ri pix mã ma Inhîpêxà mẽ wa inhõ krĩ hwỳr api. Ixkukwak ri pix mã na htem hprĩ hã Tirtũm kapêr ma. Nê ixkukwak ri pix mã na htem wa ixri htĩr tũm nê pa ho pa.

⁷ Kot kaj mẽ aprĩ hã ixpumu nê mããnên te aprĩ hã Inhîpêxà pumunh pyræk. Tã ra mẽ ate tanhmã ixte amnhî nhîpêx to hã ixpumunh mex jakamã mããnên te ra mẽ ate Inhîpêxà kot amnhî nhîpêx ã omunh mex pyræk. Anê.

Jejus mẽ Tirtũm wa kot amnhî nhîpêx tipxi hã wa harênh

Juāw 1.1, 10.30; Piripos 2.6; Korosê 2.9

⁸ Nhũm Jejus ã mẽ inhmã kapêr anê nhũm Firipti kuma nê kãm:

—Kwa nom mẽ inhmã inhno ho Anhîpêxà pumunh prãm. Kot pa mẽ omu nê ixkĩnh tỳx kumrêx. Anê.

⁹ Hãmri nhũm Jejus kãm:

—Kwa na pa pre ra mẽ akôt ri ixpa ryy nê. Ka mẽ aprĩ hã ixpumunh mex nê. Kêt ra mẽ kot ixpumunh mex xwỳnhjaja te mẽ kot mããnên Inhîpêxàja nõ ho omunh mex pyræk.

¹⁰ Wa ixte amnhî nhîpêxja ãm tipxi. Xà ate kormã amnhî krã hi mã ixkapêr jaxàr tỳx kêt? Inhîpêxà mẽ wa ixte amnhî nhîpêxja ãm tipxi. Nê kot axpên pyræk. Jakamã na pa hte

amnhĩ krā hkôt ri tanhmā amnhĩ nhĩpêx to ho ri ixpa hkêt nê. Ām Inhĩpêêxà nhỹ hã na pa hte ri tanhmā mẽ amã ixkapêr to ho ri ixpa. Nê hihtỳx xà ho tanhmā amnhĩ nhĩpêx to ho ri ixpa. Ka mẽ ja hã ixpumu nê te ano ho Inhĩpêêxà pumunh pyrāk.

11 Kwa mẽ ixkapêr ma nê hkôt ajamaxpêr tỳx nê. Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyrāk. Rỳ ka mẽ tee ri ja kukamã ajamaxpêr japêr hãmri nê ixte aa mẽ ate mẽmoj pumunh kêt kwỳ ho anhỹr ã mãn ixpumu nê ja hã wa ixte amnhĩ nhĩpêx tipxi kôt ajamaxpêr.

12 –Kwa mẽ ixkapêr ma nê amnhĩ krā kamã amnhĩ krām haxàr tỳx nê. Mẽ ate amnhĩ kaxyw ixkôt ajamaxpêr xwỳnhjaja kot kaj mẽ ixte tanhmā amnhĩ nhĩpêx to ho ixpa hã ixpumu nê ixkôt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nê kuri ixpa ho ixpa. Ka mẽ ixwakre kamã ixihitỳx xà ho tanhmā mẽ akwỳjê mã amnhĩ nhĩpêx to ho ri apa.

13 –Nê kot kaj mẽ apê ixkwỳ hã tanhmā mẽmoj tã ixwỳr to pa mẽ ama nê mẽ amã tanhmā mẽmoj nhĩpêx to. Mẽ kot omunh nê Inhĩpêêxà mex o mex ã omunh kurê kumrêx kaxyw.

14 Nà kot kaj mẽ apê ixkwỳ hã mẽmoj tã ixwỳ pa mẽ ama nê mẽ amã tanhmā mẽmoj to. Anê.

Jejus kot mẽ pahwỳr Tĩrtũm mẽ wa Karō rênh ã kot amnhĩ jarênh

Juāw 7.37-39, 16.7-17; Atre 2.1-4; mããnên Rômãn 5.5; Wam Korit 12.7-11; Epes 3.16; Wam Juāw 2.27

15 Nhũm Jejus arĩ mẽ inhmã kapêr nê mẽ inhmã:

–Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

16 –Kot paj akupỹm kaxkwa hwỳr api hãmri nê mẽ ato Inhĩpêêxà wỳ nhũm inhma nê mẽ awỳr kot mẽ ato ajuta xwỳnh maatita rê nhũm man mẽ awỳr wrỳ nê mẽ akaxwỳnh mã

agjê. Hãmri nê mẽ akôt tanhmā mẽ ato ajuta hto ho pa rãhã ho pa.

17 Wa Ixkarō koja mẽ awỳr kurê nhũm mẽ amã agjê. Hãmri nê hprĩ hã mẽ amã Tĩrtũm kapêr o amnhĩrit o mẽ akôt pa ka mẽ aprĩ hã mar mex nê. No mẽ kêp Tĩrtũm kra hkêt xwỳnhjaja koja hprĩ hã wa Ixkarō jarênh mar kêt nê. Mẽ kot wa ixkôt amnhĩ xunhwỳr kêt jakamã koja mẽ hkarō mã gjêx kêt nê. Ām mẽ ate ixkôt amnhĩ nhĩpêx o apa xwỳnhjê pix wỳr koja wrỳ nê mẽ awỳr agjê nê mẽ akamã pa ho pa.

18 –Nê ixte mẽ arer nê ma inhmōr mã tã kot kaj mẽ te mẽ hã awrãre pyrã nê ahte atỳx ri apa pyrāk kêt nê. Kot paj te pa akupỹn mẽ awỳr ixwryk pyrã nê mẽ awỳr wa Ixkarō rê nhũm mẽ akãm agjê nê mẽ akamã pa ho pa.

19 –Nê koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt nê. No mẽ papajaja kot puj mẽ tokyx axte nhỹri axpên pumu.

–Nê kot paj akupỹm ixtĩr hãmri nê ixtĩr tũm nê ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm nê apa ho apa.

20 –Tã koja wa Ixkarō mẽ awỳr wrỳ nê mẽ akarō mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyrāk o ka mẽ hã wa ixpumu. Nê mããnên mẽ papajaja te ra mẽ pahtipxi nê ri mẽ papa pyrāk ka mẽ hã amnhĩ pumunh mex kurê kumrêx.

21 –Nê mẽ kãm ixkĩnh xwỳnhjaja na htem ixkapêr ma nê hkôt amnhĩ nhĩpêx o pa. Jakamã nhũm Tĩrtũm ixtã mẽ omu nê kãm mẽ hapê htỳx nê. Pa mããnên amnhĩ tã mẽ omu nê inhmã mẽ hapê htỳx nê. Jakamã kot paj mẽ kãm amnhĩ to amnhĩrit nhũm te mẽ kot no ho ixpumunh pyrāk. Anê.

Nhũm pre ã Jejus hkôt mẽ ixpa ho mẽ ixpa xwỳnhjê mã amnhĩ jarênh anê.

22 Hãmri nhũm Jutre hōja. Jut Kariot kêt axtem Jutre hōja Jejus axte kot mẽ

inhmā pix mā kot amnhĩ to amnhĩrīt ā harēnhja ma nē kām:

—Kwa aprī hā mē inhmā mēmoj jarē mē ijahkre xwýnh. Mon ka mē kēp akwý hkēt xwýnhjê mā axte amnhĩ to amnhĩrīt kēt ā amnhĩ jarē? Nē ām mē papxipix mā amnhĩ to amnhĩrīt ā amnhĩ jarē? Anē.

²³ Hāmri nhūm kām:

—Nā mē amā ixkīnh xwýnhjaja na ka htem ixkapēr ma nē hkôt amnhĩ nhīpêx. Nhūm Inhīpêêxà ja hā mē apumu nē ixtā kām mē ajapê htýx nē. Hāmri pa wa mē akôt ixpa ho ixpa. Jao mē amā amnhĩ to amnhĩrīt mex o ixpa.

²⁴ Na pa hte amnhĩ krā hkôt ri mē kām ixkapēr o ixpa hkēt nē. Ām Inhīpêêxà nhỹ hā na pa hte mē kām ixkapēr o ri ixpa. Kot mē awýr inhmēnh xwýnhhta nhỹ hā. Tā nhūm mē kām inhmar prām kēt jakamā na pa hte wa mē kām mē apyrà nē amnhĩ to amnhĩrīt o ixpa hkēt nē.

²⁵ —E na pa kormā ixte mē akôt ri ixpa ri ā mē amā amnhĩ jarēnh anē.

²⁶ Tā koja Inhīpêêxà ixpānhā mē awýr wa Ixkarō rē. Ixte hā mē amā ixahwýr xà hkôt. Hāmri nhūm man mē awýr wrý nē mē akaxwýnh mā agjê nē mē akôt ri tanhmā mē ato ajuta hto ho pa. Nē ra ixte ā mē amā ixkapēr anhýrja koja hprī hā mē amā ho amnhĩrīt mex nē. Ka mē amnhĩ krā kamā kām ajamaxpēr nē hā ano htýx nē ho apa. Anē.

Jejus kēp mē pajamakêtkati nhōr xwýnh

Rōmān 5.1; Karatas 5.22; Piripos 4.7; Korosē 3.15

²⁷ Nhūm Jejus arī mē inhmā kapēr nē mē inhmā:

—Nē mē kēp ixkwý hkēt xwýnhjaja na htem tee ri amnhĩ kukamā hamaxpēr o ri pa. Jao hkaprī nē pa. No pa na pa hte mē kurom ijamakêtkati nē ixkīnh nē ri ixpa ho ixpa. Tā kot paj tanhmā mē ato ka mē ixpyrà nē ajamakêtkati nē axàmnhĩx akīnh nē ri apa. Jakamā kwa mē ixte amnhĩ jarēnh ma nē tee ri amnhĩ

kukamā ajamaxpēr o amā ma ho ri apa hkēt nē.

²⁸ —Na pa pre ra mē amā ma ixàpir nē nhýrmā man akupýn mē awýr ixwrýk ā mē amā amnhĩ jarē. Tā na pa ra ma akupým Inhīpêêxà hwýr ixàpir mā. Kot amnhĩ to rax o kot ijakrenh. Kot paj akupým hwýr api nē kuri inhmex nē ixpa ho ixpa. Tā ka mē amā ixkīnh hā kot kaj mē ma akupým hwýr ixàpir ā ijarēnh ma nē inhỹ hā akīnh nē.

²⁹ —Kormā ma akupým ixàpir kēt ri na pa ā mē amā amnhĩ kukamā amnhĩ jarēnh anē. Kēr pa mēmo arīgro hā ma akupým api ka mē ja hā ixpumu nē ajamaxpēr o: “Nā ām hāmri na pre mē inhmā amnhĩ kukamā akupým Hipêêxà hwýr àpir ā amnhĩ jarē.” Anhýr o ajamaxpēr. Jao ixkôt ajamaxpēr týx rāhā ho ri apa.

³⁰ —Kot paj tokyx axte tanhmā mē amā ixkapēr to hkēt nē. Mē kēp ixkwý hkēt xwýnhjê nhō pahiti Satanastija na ra kot tanhmā ixto kaxyw. Nom koja tee ri tanhmā kām ixto hprām kaprý. Kurom ixihtýx o ixihtýx o ixte hakrenh par jakamā koja tanhmā ixto hkēt nē.

³¹ Kwār kām tanhmā ixto hprām xà hkôt tanhmā ixto pa omu. Inhmā Inhīpêêxà hkôt ixte amnhĩ nhīpêx prām jakamā kot paj jahti mā arī xa nhūm te tanhmā kot ixto pyrāk o inhīpêx nom tanhmā ixto hkēt nē. Mē ate inhmā Inhīpêêxà japê htýx ā ixpumunh kaxyw kot paj ā mē anoo mā amnhĩ nhīpêx anē. Nē mē ate ixte kām tanhmā amnhĩ nhīpêx to ho ri ixpa rāhā mē kot ixpīr ā ixpumunh kaxyw. E hāmri. Ma pu mē mō nē amnhĩ to Tirtūm wý. Anē.

Nhūm pre ā Jejus hkôt mē ixpa ho mē ixpa xwýnhjê mā kapēr anē. Pa mē kuma nē kànhmā ixkuhê nē inhnojarēt nhūm axte mē inhmā aw-jarē.

15

*Jejus te kēp mēmo krô pyrāk
Karatas 2.20; Wam Juāw 2.28*

1 Nhūm Jejus arī mẽ inhmā kapēr nẽ mẽ inhmā:

—Nà te ixpê mẽmo pĩ pê “uwa” anhÿr xwÿnhhta kahkô maati pyrāk. Nẽ Inhĩpêêxàja te kot uwa hkre nẽ hamār o pa xwÿnhhta pyrāk.

2 Nẽ mẽ kot ixkôt amnhĩ xunhwÿr xwÿnhjaja te mẽ kot uwa kahkô rŭm krô pyrāk. Na hte mẽ hkwÿjaja htÿx ri kêp ixkwÿ hã amnhĩ jarēnh ã amnhĩ to hêx. Jao te kot krôja rã htã ô hkêt pyrāk. Koja rã htã ô hkêt nẽ nhūm kot hamār xwÿnhja tee ri omu nẽ kahkô nẽ krãhta nẽ kumẽ. No koja ô mex nẽ nhūm omu nẽ hkĩnh nẽ. Hãmri nẽ rã nẽ ô rax kaxyw tanhmã ho mex to. Tã na hte Tĩrtŭm uwa krô jamār xwÿnhhta pyrà nẽ ã mẽ ate ixkôt amnhĩ xunhwÿr xwÿnhjê nhĩpêx anẽ.

3 No mẽ kajaja na ka prem mẽ kot ixkwÿ hã amnhĩ to hêx xwÿnhjê rom ixkapēr mar tÿx nẽ. Nẽ amnhĩ kaxyw inhmā ajamxpēr nẽ ixkôt amnhĩ nhĩpêx mex o apa. Jao te mẽ ate krô rã nẽ ô rŭnh pyrāk o amnhĩ nhĩpêx.

4 —Na hte krôja amnhĩ krã hkôt ô hkêt nẽ. ãm kahkô pix kukwak ri na hte rã nẽ ô. Ja pyrà nẽ kot kaj mẽ ixkukwak ri pix mã inhmā hprãm xà hkôt ri tanhmã amnhĩ nhĩpêx to ho apa. Jakamã kwa kêt ka mẽ ixkapēr pix mãn mar o apa pa mẽ akôt ixpa ho ixpa.

5 Te ixpê kahkô nhūm te mẽ apê krô pyrāk jakamã kot kaj mẽ inhmā hprãm xà hkôt tanhmã amnhĩ nhĩpêx to ho ri apa nẽ te krô rã nẽ ô rŭnh pyrāk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nẽ te krô grà nẽ ô hkêt pyrāk o amnhĩ nhĩpêx.

6 Na hte uwa krô nhõ dõnja nhÿri hã krô grà pumu hãmri nẽ kahkô nẽ hakà nẽ ma o mra nẽ kuwy kamã kurẽ nẽ ho hxêt pa. Ja pyrà nẽ mẽ kot htÿx ri ixkôt amnhĩ xunhwÿr ã amnhĩ jarēnh xwÿnhjaja koja mẽ nhÿrmã amnhĩ xà htÿx kamã hamak rãhã ho pa.

7 —Tã no mẽ kajaja. Kêt ka mẽ ixkapēr kôt pix mã amnhĩ nhĩpêx rãhã ho ri apa. Te mẽ pahtipxi nẽ ri

papa pyrāk o amnhĩ nhĩpêx. Hãmri nẽ mãmrĩ amã hprãm xà hkôt mẽmoj tã Tĩrtŭm wÿ nhūm ama nẽ amã mẽmoj tã ate hwÿr xàta kôt kugõ.

8 Kot kaj mẽ Inhĩpêêxà mẽ wa ixkapēr kôt amnhĩ nhĩpêx o ri apa nhūm mẽ piitã ja hã mẽ apumu nẽ hamaxpēr o: “Hêxta waa nẽ. Jajaja na htem Tĩrtŭm kot amnhĩ nhĩpêx o amnhĩ nhĩpêx o pa. Mãn Tĩrtŭmja mex o mex.” Anhÿr o hamaxpēr.

9 —Nẽ na pa hte Inhĩpêêxà kãm ijapê pyrāk o inhmā mẽ ajapê nẽ. Tã kêt ka mẽ amarĩ inhmā mẽ ajapê hã ri ixkôt amnhĩ nhĩpêx mex o apa.

10 Na pa hte ãm Inhĩpêêxà kapēr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nẽ ri ixpa. Tã kêt ka mẽ ixpyrà nẽ ixkapēr kôt pix mã tanhmã amnhĩ nhĩpêx to ho ri apa. Nẽ ixpyrà nẽ inhmā mẽ ajapê hã amnhĩ pumu nẽ akĩnh nẽ ri apa.

11 —E na pa ã mẽ amã ixkapēr anẽ. Mẽ ate inhmar nẽ ixpyrà nẽ axãmnhĩx ajamakêtkati nẽ akĩnh nẽ ri apa kaxyw. Tã kêt ka mẽ ã amnhĩ nhĩpêx anẽ nẽ te pa ixte ã amnhĩ nhĩpêx anhÿr pyrāk. Anẽ.

Jejus kot mẽ pamã axpên kĩnh tÿx ã mẽ pamã karõ

12 Nhūm Jejus arī mẽ inhmā kapēr nẽ mẽ inhmā:

—E kêt ka mẽ te inhmā mẽ ajapê pyrāk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa.

13 Koja mēhõ kãm hkrãmnhwÿ japê htÿx nẽ nhūm ra mēhõ mẽmo mÿrapê kot kêp hpĩr mã nhūm tee ri hã omu nẽ nẽ kãm amnhĩ mẽ nhūm kupĩ. Hãmri nhūm mẽ ja hã omu nẽ kãm hkrãmnhwÿ japê htÿx ã nẽ htyk ã axpên mã harẽ.

14-15 —E kot paj axte mẽ apê inhmā mẽ axapēnh xwÿnh ã mẽ ajarēnh kêt nẽ. Na hte mẽ õ patrãwjaja hprĩ hã kãm mẽ apēnh xwÿnhjê mã amnhĩ jarēnh kêt nẽ. Na htem ãm mẽ apēnh pix ã mẽ kurẽ. Nom mẽ kajaja mẽ ate ixkapēr mar nẽ hkôt pix mã amnhĩ

nhīpêx jakamã kot paj hpãnhã mẽ apê ixkràmnhwý hã mẽ ajarê. Na htem axpên to hkràmnhwý nê ma nhýhým pa kaxyw nê tanhmã amnhĩ kukamã hkràmnhwý mã amnhĩ jarênh to. Tã mẽ apê ixkràmnhwý jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mãânên Inhīpêêxà xô ri mẽ amã mẽmoj piitã ho amnhĩrīt o mẽ akôt ixpa.

16 —Nê mẽ kajaja na ka prem ixpê mẽ akràmnhwý kaxyw ixãm kêt nê. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhīpêx to ho apa kaxyw. Te uwa krô ô rũnh nê aa grà hkêeta pyræk. Jakamã kot kaj mẽ mẽmoj tã Inhīpêêxà wý nhũm mẽ ama nê mẽ ate mẽmoj tã hwýr xà hkôt amã kugõ.

17 —E. Kwa kêr ka mẽ amã axpên kĩnh nê tanhmã axpên to ajuta hto ho axpên mã mẽmoj kutã anojarêt pix o mãn kêt ri apa. Nà ja na kêt inhmã hprãm. Anê.

Mẽ kot Jejus kwýjê kamã gryk xwýnhjê jarênh

Matêwre 10.22; mãânên Juāw 7.7, 17.14; Wam Juāw 3.13

18 —Nê koja ixkwý hkêt xwýnhjaja kãm mẽ aprãm nõkati. Tã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Ixkumrêx na prem kãm ixprãm nõkati. Tã koja mẽ mã ixtã mẽ ato anê nê kãm mẽ aprãm kêt nê.

19 Mẽ apê mẽ hkwý ronhýx mẽ amnhĩ tã mẽ apumu nê kãm mẽ ajapê nê. Nom apê mẽ hkwý hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nê kãm mẽ akĩnh kêt o kãm mẽ akurê nê.

20 Koja mẽ ixtã hpijaàm kêt nê nê mãânên mẽ atã hpijaàm kêt nê. Nê mẽ anhīpêx o te mẽ kot pa ixpê mẽ anhõ patrãw nhīpêx pyræk. Ka mẽ ixpyrà nê amnhĩ xà htýx kãm ajamak o ri apa. Na pa pre ra mẽ amã ja jarê. Nom koja mẽ akwýjaja jajê rom te ra mẽ kot ixkapêr mar nê hkôt amnhĩ nhīpêxta pyrà nê mãânên mẽ akapêr ma nê

hkôt amnhĩ nhīpêx o pa. Kwa kêr ka mẽ ixkapêrja mã mãn ajamaxpêr týx rãhã ho ri apa.

21 —Koja mẽ ixtã tanhmã mẽ anhīpêx to. Mẽ kot Tĩrtũm kapêr kôt amnhĩ nhīpêx kêt jakamã koja mẽ ã ixtã mẽ anhīpêx anê. Tĩrtũm kot mẽ awýr inhmênh kôt hamaxpêr kêt nê ã mẽ anhīpêx anê.

22 Ixwryk nê mẽ kãm Tĩrtũm kapêr jarênh o ri ixpa htã nhũm mẽ inhma nê ãm inhma nê ixkôt amnhĩ nhīpêx kêt nê. Jakamã koja mẽ kot amnhĩ tomnuj xwýnh ã amnhĩ to hpimxur kêt nê.

23 —Nê koja mēhõ kēp ixprãm nõkati nê mãânên te kēp Inhīpêêxà prãm nõkati pyræk.

24 Na pa pre mẽ piitã mẽ hkôt aa mẽ kot mẽmoj pumunh kêt kwý ho anhýr o ri mẽ hkôt ixpa nhũm mẽ hã ixpumu. ãm papxipix na pa pre ã amnhĩ nhīpêx anhýr o ri mẽ hkôt ixpa nhũm mẽ hã ixpumu. Kēp ãm mẽ kot ja hã ixpumunh kêt ronhýx prem axpên mã ijarênh o: “Tk. Mẽ pahte mēhõja nhýhýnh mẽ pahwýr hpõx ã omunhre hã kot puj kêt mẽ ri hã pahpijaàm o ri papa.” Anhýr o nhýx prem axpên mã ijarê. Tã ra mẽ kot ja hã ixpumunh mex tã axtem nê Inhīpêêxà mẽ wa mẽ kãm wa ixkurê nê. Jao mẽ kot amnhĩ tomnuj xwýnh ã amnhĩ to hpimxur kêt nê.

25 No Tĩrtũm kapêr ã kagà htũm kot mẽ hkukamã mẽ harênh nê mẽ hã kagà nê kot mẽ hã kagà kot:

Mẽmo tanhmã kute mýrapê na htem kãm ixkurê? Nà ãm amarĩ na htem kãm ixkurê ho pa. Anê.

Tã ã ixtã kagà kot anhýr xà hkôt na htem ã kãm ixkurê anê. Jakamã koja mẽ mãânên ixtã kãm mẽ akurê nê. Nom kêr ka mẽ arĩ mẽ kãm ixkapêr jarênh o ri mẽ hkôt apa nê tee ri amnhĩ kukamã ajamaxpêr kêt nê.

26 —Nê tokyx ma akupým Inhīpêêxà hwýr ixàpir mã tã kot paj hwýr pøj nê aa mẽ ato ijamakêtkati hkêt nê. Kot paj amnhĩ pãnhã mẽ awýr wa Ixkarõ rê. Mẽ kot kãm: “Mẽ kutã nojarêt xwýnh maati” anhýr xwýnhhta kot paj

mē awȳr kurē nhūm ixpānhā mē awȳr wrȳ nē mē amā agjē nē hprī hā mē amā Tirtūm mē wa ixto amnhīrīt o ri mē akōt pa.

²⁷ Kot kaj mē ama hāmri nē ma mē piitā mē hkōt ri mē kām ixkapēr jarēnh o ri apa. Na pa pre ra mē kām Tirtūm kapēr jarēnh ryy ho mē hkōt ri ixpa ka mē ixkōt ri inhmar o apa ry nē. Jakamā kēr ka mē ixwakre kamā arī mē kām ixkapēr jarēnh o ri mē hkōt ri apa. Anē.

16

¹ Nhūm Jejus arī mē inhmā kapēr nē mē inhmā:

—Nē mē kot nhỹrmā ixtā tanhmā mē anhīpēx to nhūm mē ate tee ri amnhī kukamā ajamaxpēr nē mē umaj ixkaga pymaj na pa hte ā mē amā ixprī hā mēmoj jarēnh ry anē.

² Kot kaj mē kām ixkapēr jarēnh o ri apa nhūm mē hkwýjaja tee ri mē ama nhūm ja mē kēp omnuj nē. Nhūm mē Tirtūm kapēr o mē ahkre xā hā ixkreja rūm amnhī nē mē ajano nē mē akwýjē hpar o pa. Hāmri nē hamaxpēr o: “E pu mē axte mē hkwýjē pynē nē mē kupa. Tirtūm kām ja mex kēnā.” Anhỹr o htýx hamaxpēr o pa.

³ Mē kot hprī hā Inhīpēxā mē wa ixkapēr mar mex kēt nē ā htýx wa inhmā ja mex ā wa ijarēnh anē.

⁴ Nom mē ate ixkōt amnhī xunhwýrta krax kām na pa pre ā mē amā mē harēnh anhỹr kēt nē. Arī mē akōt ixpa kēnā. Kot ka mē ixkōt apa rāhā amā mē uma hkēt nē. Tā pa ra akupým inhnojarēt nē ā mē amā mē harēnh anē. Jakamā koja mē nhỹrmā ā mē anhīpēx anē ka mē amnhī tā mē omu nē ra ixte mē akukamā ā mē harēnh anhỹrja mā ajamaxpēr kurē kumrēx nē tee ri amnhī kukamā ajamaxpēr kēt nē. E kwa ixkapērja mǎn mē amnhī krā him haxār týx nē ri hā apa. Anē.

Jejus mē Tirtūm wa hkarō jarēnh

⁵⁻⁶ Nhūm Jejus arī mē inhmā kapēr nē mē inhmā:

—E na pa ra kot mē awȳr inhmēnh xwýnhhta wýr ra akupým inhnojarēt ka mē ixte amnhī jarēnh ā inhma nē akaprī nē. Nē tee ri amnhī kukamā ajamaxpēr tā mē atō aprī hā ma inhmōr xā ā ixkukjēr kēt nē. Rý inhmā: “Kwa mo kaxyw kot kaj kēt mē ixre nē ma akupým mō? Xā we ja amā mex?” Anhỹr o mē atō ixkukjēr kēt nē.

⁷ Kēt ma akupým ixàpirja mē amā mex kumrēx. Kop ām akupým ixàpir kēt ronhỹx mē amā mēmoj kutā nojarēt xwýnhhta ixpānhā mē awȳr wrȳk kēt nē. Tā kot paj ma akupým api nē amnhī pānhā mē awȳr kurē. Jakamā kwa mē ja ma nē tām ajamaxpēr o ri apa.

⁸ Koja ixpānhā mē awȳr wrȳ hāmri nē mē kēp ixkwý hkēt xwýnhjē mā mēmoj to axkrunēpxi nē ho amnhīrīt. Koja mē kām mē kot tanhmā amnhī tomnuj to xā ho amnhīrīt. Nē mǎānēn mē kām tanhmā mē kot amnhī to mex to xā ho amnhīrīt. Nē mǎānēn Tirtūm kot nhỹrmā mē kot amnhī tomnuj mýrapē tanhmā mē homnuj to xàta nhūm mǎānēn mē kām ho amnhīrīt. Koja mē kām ja piitā ho amnhīrīt.

⁹ —Jakamā koja mē ja kukamā tanhmā hamaxpēr to nē hamaxpēr o: “Kwa kot paj xep amnhī tomnuj kaga nē amnhī kaxyw Tirtūm Kra Jejus mā ijamaxpēr nē hkōt amnhī xām kēt nhūm Tirtūm nhỹrmā ixte amnhī tomnuj mýrapē tanhmā ixto.

¹⁰ Nā kot paj hkōt amnhī xām hāmri nē ra urāk nē Tirtūm kapēr kōt tām ri amnhī nhīpēx o ixpa. Na pre Jejus tām ri amnhī nhīpēx o pa nhūm Tirtūm amnhī wýr ho api pa mē axte jar nhỹri omunh kēt nē.

¹¹ Na xep Tirtūm nhỹrmā kot ma kuwy hwýr mē kēp Jejus kwý hkēt xwýnhjē nhō pahī maatija mēnh ā ra amnhī kukamā hā amnhī jarē. Jakamā kwa arī ixpē hkwý jakamā kot paj tokyx Jejus kōt amnhī xām kēt nhūm hkōt kuwy hwýr inhmē.” Anhỹr o hamaxpēr. Koja ā wa Ixkarōja mē kēp ixkwý hkēt xwýnhjē mā mēmoj to amnhīrīt mex anē.

12—Ně na pa kormã mẽ amã mẽmoj piitã ho amnhĩrĩt kêt nẽ. Kormã mẽ ate aprĩ hã mẽmoj pumunh nẽ mar mã tãm kêt.

13 Tã koja ixpãnhã wa Ixkarõ mẽ awỳr wrỳ nẽ mẽ akarõ mã agjê hãmri nẽ hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akõt pa ho pa. Nom koja amnhĩ krã hkõt tanhmã mẽ amã ho amnhĩrĩt to hkêt nẽ. Koja ãm Tĩrtũm pix xõ ri mẽ amã ho amnhĩrĩt o mẽ akõt pa. Jao hprĩ hã mẽ amã ixkõt mẽ ate amnhĩ nhĩpêx nyw o mẽ amã amnhĩrĩt o mẽ akõt pa. A koja hprĩ hã ra ixte mẽ amã ixujarẽnh xà hkõt axte mẽ amã mẽmoj to amnhĩrĩt mex o pa anẽ.

14—Ně koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akõt pa.

15 Inhipeexa mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrĩt anẽ. Jao ra wa ijamẽ wa ixkapêr o amnhĩrĩt mex o pa. Koja ã wa mẽ apê ixkwỳ hã mẽ ato mex o pa anẽ. Anẽ.

Mẽ kot akupỹm Jejus tĩr ã omunh ã mẽ harẽnh

16 Nhũm Jejus arĩ mẽ inhmã kapêr nẽ mẽ inhmã:

—Ně kot paj tokyx mẽ ano pẽ akunok ka mẽ axte amnhĩ kaêx ã ixpumunh kêt nẽ. Nom kwa kêr ka mẽ tee ri ixkapêrja kukamã ajamaxpêr kêt nẽ. Kot paj ixtã apkati grêre ka mẽ axte ixpumu. Anẽ.

17-18 Nhũm pre ã Jejus hkõt mẽ ixpa ho mẽ ixpa xwỳnhjê mã kapêr anẽ. Pa mẽ tee ri ã kapêr anhỹr ã kuma nẽ expên mã:

—Kwa mo na ri ã amnhĩ jarẽnh anẽ? Nẽ tokyx mẽ pano pẽ pikunor tã hã apkati grêre nhũm axte mẽ pahte omunh ã amnhĩ jarẽ nẽ akupỹm Hipêexa hwỳr àpir ã amnhĩ jarẽ. Pêr kapêrja ãm ri katii. Anẽ.

19 Nhũm amnhĩ tã mẽ inhma nẽ mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nẽ?

20 Kot paj ty nhũm mẽ kêp ixkwỳ hkêt xwỳnhjaja ijarẽnh ma nẽ hkĩnh

nẽ. No mẽ kajaja kot kaj mẽ akapri nẽ amỳr o apa. Nẽ gaa nẽ akupỹm akĩnh nẽ. Kwa mẽ ixkapêrja ma nẽ kãm ajamaxpêr tỳx o apa.

21 Te mẽ ate mẽ hpijagri xwỳnh kot amnhĩ nhĩpêx pyrak. Na htem õhy xà nẽ gaa nẽ ra õhy xà htỳx nẽ. Nẽ hkĩnh kêt nẽ tee ri amnhĩ nhĩpêx o hikwỳ. Tã gaa nẽ hpijagri nhũm hkrare kato nhũm omu nẽ akupỹm hkĩnh nẽ axte õhy xà htỳx mã hamaxpêr kêt nẽ.

22 Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nẽ ri apa. Tã kot paj akupỹm tokyx ixtĩr nẽ axte mẽ awỳr ixkato ka mẽ ixpumu nẽ akĩnh nẽ. Hãmri nẽ akĩnh rãhã ri apa ho apa. Nhũm mẽhõ mẽ apumu nẽ tee ri tanhmã mẽ akĩnh nẽ mẽ ato kaprỳ ka mẽ arĩ akĩnh rãhã ri apa ho apa.

23—Ně ixte akupỹm kaxkwa hwỳr ixàpir nẽ amnhĩ pãnhã mẽ awỳr wa Ixkarõ rẽnh nhũm mẽ awỳr wrỳk nẽ hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nẽ. Anẽ.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juāw 14.13-14

Nhũm Jejus arĩ mẽ inhmã kapêr nẽ mẽ inhmã:

—E kwa mẽ ã ixkapêr anhỹrja ma nẽ amnhĩ krã kamã kãm ajamaxpêr tỳx nẽ ho apa. Kot kaj mẽ apê ixkwỳ hã mẽmoj tã Inhipeexa wỳ nhũm mẽ ama nẽ mẽ ate hã axàhwỳr xà hkõt mẽ amã mẽmoj tanhmã ho rỳ mẽ amã mẽmoj gõ.

24 Na ka mẽ kormã apê ixkwỳ hã mẽmoj tã axàhwỳr kêt nẽ. Tã kêr ka mẽ amã mẽmoj tã hwỳr prãm nẽ mãmri mẽmoj tã hwỳr o apa. Kê mẽ ama hãmri nẽ tanhmã mẽ amã mẽmoj nhĩpêx to ka mẽ amnhĩ tã omu nẽ akĩnh nẽ.

25—Ně na pa pre mẽ amã mẽmoj jarẽnh kaxyw nẽ mẽmoj tã haxwỳ nẽ mẽ amã ixujarẽnh rax nẽ. Nom kot paj axte ã mẽ amã ri ixujarẽnh anhỹr kêt nẽ. Kot paj tã ixpri hã mẽ amã tanhmã Inhipeexa jarẽnh to ka mẽ aprĩ hã mar mex kurê kumrêx.

26 Hāmri nē mē kamjaja mē apē ixcwý hã tanhmã amnhĩ to hwýr to ho apa. Jakamã mo kaxyw kot pa kêt axte tanhmã mē ato hwýr to? Kot kaj mē kamjaja amnhĩ to hwýr jakamã arĩ ixte mē ato hwýr kaxyw ixto pre-sija hkêt nē.

27 —Na ka mē ra amã ijapê nē. Nē ixte Inhĩpêêxà rŭm mē awýr ixwryk ã ixpumu. Jakamã nhŭm Inhĩpêêxãja ixtã mãânên kãm mē ajapê nē. Tã kot kaj mē kamjaja mēmoj tã amnhĩ to hwýr o apa nhŭm mē ama nē kãm mē ajapê htýx kãm mē amã mēmoj gō.

28 —Na pa pre Inhĩpêêxà rŭm amnē mē awýr wrý. Hāmri nē kãm hprãm xà hkôt tanhmã amnhĩ nhĩpêx to hpar o mō nē ra akupým hwýr inhnojarêt kaxyw. Anē.

Nhŭm pre ã Jejus mē inhmã amnhĩ jarēnh anē.

29 Pa mē tã ixprĩ hã mar mex nē. Hāmri nē kãm:

—Tý. Nà na pa mē tã ixprĩ hã ate amnhĩ jarēnh ma. Ka amnhĩ tã haxwýr nē axujarēnh kêt jakamã pa mē tã ixprĩ hã amar mex nē.

30 Pêr ãm ate mēmoj piitã omunh par xwýnh na ka. Jakamã ate mē ijamaxpêr piitã hkôt aprĩ hã mē ixpumunh par kumrêx kênã kot ka tanhmã mē ijamaxpêr to hã mē ixkukja. ãm hāmri na ka Tĩrtŭm rŭm awryk ã amnhĩ jarē. Anē.

31 Hāmri nhŭm mē inhma nē mē inhmã:

—Xà ãm hāmri na ka mē ixkôt ajamaxpêr týx nē?

32 Kwa mē o kora. Kot kaj mē tokyx mē umaj ixre nē anhrã nē ma ahpýnhã mē anhō krĩ hwýr mra. Mē kot ixkôt tanhmã mē anhĩmex to pymaj kot kaj mē ã amnhĩ nhĩpêx anē kãm ga. Kot paj ahte mē kãm ixãm pyrãk o amnhĩ nhĩpêx nom ahte ixãm kêt nē. Inhĩpêêxà aa kot ixrere hã.

33 —E ixkukwak ri mē ajamakêtkati nē axãmnhĩx mē apa kaxyw na pa ã mē amã ixkapêr anē. Nom mē kêp ixkwý hkêt xwýnhjaja koja nhỹrmã ixtã mē atomnuj týx o pa. Tã kêr ka mē amã mē uma nē tee ri amnhĩ

kukamã ajamaxpêr o ri apa hkêt nē. Nhỹrmã ixte mēmoj punuj piitã ho ijapêx par ã arĩgrota ã kot paj mē atã mē ho ijapêx par kumrêx. Anē.

17

Jejus kot amnhĩ to Tĩrtŭm wýr ã harēnh

Rômãn 8.34; Eprêw 7.25

¹ Tã nhŭm Jejus mē inhmã kapêr pa nē hpãnhã kaxkwa hwýr rĩt nē Tĩrtŭm mã amnhĩ jarē nē kãm:

“Pa Papaj. E na pa ra amã hprãm xà hkôt tanhmã amã amnhĩ nhĩpêx to hpar o mō nē akupým awýr inhnojarêt kaxyw. Jakamã kot kaj ixpê Akra hã ma akupým amnhĩ wýr ixto api. Mē kot ja hã ixpumunh nē amã amex o amex ã ajarēnh o pa kaxyw.

² Na ra pyka piitã hkôt ri mē pa xwýnh kwýjaja amnhĩ kaxyw ixkôt hamaxpêr nē ixkôt amnhĩ xunhwý nom ka na ka pre inhmã mē agō. Ixte mē htĩr tŭm nē mē pa mã xwýnh ã mē harēnh kaxyw. Jakamã koja mē nhỹrmã ixkukwak ri pakuri htĩr tŭm nē pa ho pa.

³ Na mē ra ixkapêr mar mex nē. Nē ixpê Jejus Kris pê ate mē hwýr inhmēnh xwýnhja kôt hamaxpêr mex nē. Nē apê Tĩrtŭm ã ãm apyxi mex ã mãânên akôt hamaxpêr mex nē. Nē amex o amex ã akôt hamaxpêr nē kãm akĩnh nē. Jakamã koja mē nhỹrmã pakuri htĩr tŭm nē pa ho pa. Nà koja mē anē.

⁴ Amnepê m amnē pyka ja hwýr inhnojarêt nhŭm ate tanhmã ixte amnhĩ nhĩpêx to hã inhmã karõta na pa ra hatur xãm mēnh kaxyw. Na pa xatã mē kãm akapêr jarēnh o ri mē hkôt ixpa. Jao ra mē kãm apê Pahi Maati hã apixi mex ã ajarē nē amex o amex nē axãhpumunh o axãhpumunh ã mē kãm ajarēnh o ri ixpa.

⁵ Jakamã e Papaj. Kêr ka tokyx ixpê akra hã ma akupým amnhĩ wýr ixto api. Pa akupým awýr pōj nē te

amnepēm akuri ixpaja pyrà nē axte akuri ixpa ho ixpa.” Anē.

Jejus kot hkwỳjê ho Tĩrtũm wỳr ã harēnh

Nhũm Jejus arĩ Tĩrtũm mã kapēr nē kãm:

⁶ “E Papaj. Nà ra ate pyka hkôt inhmã mẽ õr xwỳnhjaja na pa ra mẽ kãm akapēr jarēnh ryy ho ri mẽ hkôt ixpa nhũm mẽ akapēr kôt pix mã amnhĩ nhĩpêx o pa.

⁷ Tã ixte anhy hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex.

⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpēr mex nē. Nē ate mẽ hwỳr inhmēnh nhũm mẽ hwỳr ixwrykja ã mẽ kot ixpumunh mex.

⁹⁻¹⁰ Tã ot pa mẽ ho awỳr o xa. Nom na pa mẽ kêp ixkwỳ hkêt xwỳnhjê ho awỳr kêt nē. ãm ate inhmã mẽ õr xwỳnhjê pix o na pa awỳ. Mẽ kêp akra jakamã mãânēn mẽ kêp ixkraa. Jakamã na htem pamã pamex o pamex ã pajarēnh o ri pa.

¹¹ Axihytỳx o axihytỳx jakamã na ka pre amnhĩ xwar inhmã axihytỳx xà hkwỳ gō pa te ixte axihytỳx pyrāk. Tã na pa ra akupỳm awỳr inhnojarêt kaxyw. Kot paj jar pyka hkôt ri ixpa ry hkêt nē. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nē kê mẽ inhỹ hã tãm ri amnhĩ nhĩpêx o pa. Nē pahpyrà nē te ixkre tipxi kamã mẽ htipxi nē mẽ pa pyrāk o axpēn kôt pa.

¹² Kormã mẽ kamã ixpata ã ate inhmã axihytỳx xà hkwỳ nhōrta o pa mẽ htānopxar mex o ri mẽ hkôt ixpa. Jakamã nhũm mẽ ri ixkôt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nē hapêx. No ãm ra akapēr ã kagà kot hkukamã ã kot amnhĩ nhĩpêx anhyr ã harēnh xàja kôt koja ã amnhĩ nhĩpêx anē nē hapêx.

¹³ Tã na pa ra akupỳm awỳr inhnojarêt kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkôt ri ixpa ri. Mẽ kot inhmar nē ixpyrà nē hkĩnh nē hamakêtkati nē ri pa kaxyw.

¹⁴ Na pa pre ra mẽ kãm akapēr jarēnh ry nē nhũm mẽ ixpyrà nē akôt pix mã amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwỳnhjaja tee ri ja hã mẽ omu nē axtem nē kãm mẽ hkurê nē. Nom mẽ kêp mẽ hkwỳ hkêt jakamã na htem ã mẽ kamã gryk anē.

¹⁵ Tã na pa ã mẽ ho awỳr anhyr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nē. Koja mẽ arĩ mẽ hkôt ri pa. Nom mẽ urāk nē amnhĩ tomnuj o pa pumaj na pa ã mẽ ho awỳr anē.

¹⁶ Mẽ kêp mẽ hkwỳ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyrāk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nē. ãm pahkôt pix mã amnhĩ nhĩpêx o pa.

¹⁷ Akapēr pix na mex o mex jakamã koja mẽ hkôt amnhĩ nhĩpêx o pa nē gaa nē te pahte amnhĩ nhĩpêx pyrāk o amnhĩ nhĩpêx.

¹⁸ Na ka pre amnē mẽ hwỳr inhmē pa pre ixte mẽ kãm akapēr jarēnh o ri ixpa kaxyw mẽ hwỳr wry. Nē amnhĩ pyrà nē mẽ kot akapēr jarēnh o mẽ hkôt pa kaxyw pa mẽ kurê nē ma mẽ hwỳr mẽ kurê.

¹⁹ Inhmã mẽ hapê jakamã kot paj amnhĩ grōnh kôt nhãm mẽ kot axpēn mã ri inhgrōnh o pa xwỳnhjê mã amnhĩ gō. Amã hprãm xà hkôt. Ixkwỳjaja kot ja hã ixpumunh nē ixpyrà nē amã hprãm xà hkôt pix mã tanhmã amnhĩ nhĩpêx to ho pa kaxyw.” Anē.

Jejus kot hkrajê piitã ho Tĩrtũm wỳr

²⁰ Nhũm Jejus arĩ Tĩrtũm mã amnhĩ jarē nē kãm:

“Tā na pa ā jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Măănên mẽ ô ri nhÿrmă mẽ kot ixkôt amnhĩ xunhwÿr mă xwÿnhjaja na pa mẽ ho ixpimràa tă mẽ ho awÿr.

²¹ Kê mẽ pahpyrà nê te hamaxpêr tipxi pyrà nê ri axpên to pa. Nê pahte amnhĩ nhĩpêx kôt pix mă amnhĩ nhĩpêx o pa. Koja mẽ ā amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtă mẽ omu nê ate mẽ hwÿr inhmên ģ apumunh kurê kumrêx.

²² Nê koja mẽ ixkukwak ri panhÿ ģ te pahpyrà nê hamaxpêr tipxi nê ri pa pyràk o amnhĩ nhĩpêx o pa.

²³ Na pa htem te ixkre tipxi kamă mẽ ixtipxi pyràk o axpên nhĩpêx o ri ixpa. Te pahte axpên nhĩpêxta pyràk. Tă koja mẽ ixwakre kamă ā axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja ģă mẽ omu nê hamaxpêr o: ‘Nà pêr ģm ģămri na pre Tirtũm tăm mẽ pahwÿr Jejus mẽ. Kăm hapê htÿx tă mẽ pahwÿr kumê nhũm wrÿ nê amnhĩ xwar kăm hkwyjê japê nê.’ Anhÿr o koja axpên mă pajarênh o pa.

²⁴ Amnepêm amrakati ri pa pre amă ijapê ģă ri ixpa. Tă ot pa jajê ho awÿ. Ka na ka pre inhmă mẽ agô. Tă ma awÿr inhmôr mă xăta wÿr na pa inhmă mẽ àpir prăm nê. Koja mẽ nhÿrmă ma pahwÿr api pu mẽ pahpiită pahpimràată pamă axpên japê ģă ri papa ho papa.

²⁵ E Papaj. Amex o amex tă mẽ kêp ixkwÿ hkêt xwÿnhjaja na kormă ate mẽ hwÿr inhmên xwÿnh ģ ixkôt hamaxpêr kêt nê. Nom mẽ kot ixkôt amnhĩ xunhwÿr xwÿnhjaja na mẽ kurom ja ģă ixkôt hamaxpêr mex nê.

²⁶ Na pa ra ixprĩ ģă mẽ kăm akapêr o amnhĩrit o ri ixpa. Tă kot paj axte mẽ kăm akapêr kwÿ jarê. Amă ijapêta pyrà nê mẽ kăm axpên kĩnh ģ axpên to pa kaxyw na pa mẽ kăm ģă karô. Kot paj inhĩ ģă mẽ hkôt ixpa hkêt tă koja Pahkarôja

mê hwÿr wrÿ nê mẽ hkarô mă agjê nê te pa mẽ hkôt ixpa pyràk o mẽ hipêx. Ja na pa inhmă hprăm. Tă koja anê. Jakamă na pa ā mẽ ho awÿr anê. Tă ģm ja pix Papaj.” Anê. Nhũm pre ā Jejus ô Papaj mă mẽ inhnoo mă amnhĩ jarênh anê pa mẽ ixpiită ģă kuma.

18

*Mê kot Jejus pynên ģă mẽ harênh
Matêwre 26.47-56; Makre 14.43-50;
Rukre 22.47-53*

¹ Tă nhũm Jejus mẽ ixto Hipêêxă hwÿr pa. ģămri nê ixkreja rũm ma tē nê Jerujarē rũm kato nê ma gô pē Kirô hwÿr tē pa mẽ hkôt ixpa ho ixpa xwÿnhjaja ma hkôt mra. Nê gô ģă rē nê hikjê ģă mẽ kot mẽmo pĩ hkô hkre xwÿnhja wÿr mra nê parpê ixkrĩ hpa.

² Na pre hte Jejus xată hwÿr amnhĩ kôt mẽ ixto pa ho kuhê. Jakamă nhũm Jut Kariot kot mẽ kăm ôr mă xwÿnhhta ra kot hwÿr mẽ ixpa ho ixkuhé xăta pumunh mex.

³ Jakamă pa mẽ hwÿr pôj nê ixkrĩ hpa nhũm mẽ mẽ ixwÿr mra. Jut Kariot mẽ pôristijaja. Rôm nhô xwÿnhjê nhô pôristijê mẽ patre nhô pôristijaja nhũm mẽ mẽ ixwÿr Jut Kariot kôt mra. Ijaew nhô pahjê nhÿ ģă mẽ ixwÿr mra. Piită wapohti jamÿ nê pô hpôk nê kanê jamÿ nê mẽ ixwÿr hpôk o kato.

⁴⁻⁵ ģămri nhũm Jejus amnhĩ wÿr mẽ omu nê kănhmă xa nê ma mẽ kută tē. Jut Kariot kot mẽ kăm ôr kaxyw nhũm amnhĩ tă omunh mex jakamă amnhĩ wÿr mẽ omu nê ma mẽ kută tē. ģămri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kăm:

—Pa. Mějmoj japêr na ka mẽ pô hpôk o ri apa? Anê.

ģămri nhũm mẽ kăm:

—Nà Jejus pē Najare nhô xwÿnh japêr o na pa mẽ ri ixpa. Anê.

ģămri nhũm mẽ kăm:

—Tÿ ot pa xa. Pa na ixpê Jejus. Anê.

⁶ ģămri nhũm mẽ kuma nê tee ri axpên pumu nê umaj katê ho axkamê

ně kuhê. Nom katê ho pikamênh o ra rôrôk pa ně hikwÿ.

⁷ Hāmri ně kànhmã kuhê hpa nhũm Jejus axte mẽ kãm:

—Kwa mẽ inhmã amnhĩ jarê. Mêhõ japêr o na ka mẽ apa? Anê.

Hāmri nhũm mẽ kãm:

—Jejus pê Najare nhõ xwÿnhhta japêr o na mẽ ri ixpa kênã. Anê.

⁸ Hāmri nhũm mẽ kãm:

—Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwÿnhhtaja tanhmã mẽ ho hkêt nê. Kê mẽ māmri anhrã nê ma mra.

⁹ Anhÿr o mẽ inhnê mẽ kãm kapêr. Na pre ra ham Hipêêxã mã mẽ ixtã kãm amnhĩ jarê nê kãm:

—Kormã mẽ kamã ixpa ri ate inhmã ixihtÿx xã nhôrta o na pa mẽ htãnopxar mex o ri mẽ hkôt ixpa.

Anhÿr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwÿnhjê mã kapêr anê.

Simãw Pêtre kot mēhõ pê hamak krāhyr ã harēnh

Matêwre 26.51-54; Makre 14.47; Rukre 22.49-51

¹⁰ Hāmri nhũm Simãw Pêtre tee ri Jejus ã mẽ omu hāmri nê õ wapo kapa ně jam ho apê nê ho hamak nhĩkjê krãhta. Mawti jamak krãhta. Mawtija mẽõ patre mã apênh xwÿnhjê hõ na pre nhũm Simãw Pêtre hamak krãhta.

¹¹ Hāmri nhũm Jejus ja hã omu nê nê kãm kapêr nê kãm:

—Tk. Kwa nã amarĩ xa nê akupÿm awapota hkãm haxã. Ixte mẽ anê amnhĩ xã htÿx kamã ijamak kaxyw na pa pre Inhĩpêêxã rũm amnê mẽ awÿr pika hwÿr wrÿ. Kêt inhmã kãm hprãm xã hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwär mẽ māmri tanhmã kãm ixto hprãm xã hkôt māmri tanhmã ixto. Anê.

Mẽ kot Anas wÿr Jejus o htēm ã mẽ harēnh

Matêwre 26.57-58; Makre 14.53-54; Rukre 22.54

¹² Tã nhũm pôristi mẽ mẽ hkrãhtũm nê mẽõ patre nhõ pôristijaja Jejus pynê nê hpa hpre hpa

¹³ nê ma Anas wÿr o tẽ. Anasja Kajpas piinhõ na pre. Nhũm Kajpas kormã amgrãja ã Anas pyrã nê kêp mẽõ patre maati.

¹⁴ Jakamã na pre ra Ijaew nhõ pahijê mã Jejus jarênh o:

—Nã kot puj mẽ Jejus pÿr tokyx anê. Kê tapxipix ty pu mẽ arĩ mÿrpê pahpiitã pajamakêtkati nê ri papa. Anê.

Jakamã nhũm mẽ Jejus pynê nê kormã ma patre maati hwÿr o tẽ.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpê Juāw mẽ ixkrãmnhwÿ Simãw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwÿ hwÿr Jejus o axã. Nhũm patre maati kot ixpumunh jakamã nhũm kãm apênh xwÿnhja ixpumu nê inhmã anê pa mẽ hkôt axã.

¹⁶ Nom nhũm Simãw Pêtre arĩ kapôt ã hakwa krem xa. Hāmri pa omu nê akupÿm hwÿr tẽ nê mēhõ niti kot hakwa kre jamär o ãm xwÿnhja mã anê nhũm kãm kahê xã mẽ nhũm mẽ ixkôt axã.

¹⁷ Hāmri nhũm nita hprĩ hã omu nê kãm:

—Xêê. Pêr apê mẽ kot unênh nê o mör mÿj kôt ri mẽ pa xwÿnhjê hõ na ka mê? Anê.

Hāmri nhũm kuma nê kãm:

—Tk. Nã ixte mẽhõ myti ata pumunhre hã. Anê.

¹⁸ Hāmri nhũm ra kôt ã kamãt nê ra kryy nê nhũm mẽ apênh xwÿnh kwÿ mẽ mẽõ patre nhõ pôristi hkwyÿjaja amnhĩm kuto nê hã ànhunh o kuhê. Nhũm Simãw Pêtre mẽ omu nê mẽ hwÿr tẽ nê mẽ ìhkô hã ànhunh o xa.

Patre maati kot Jejus kukjêr ã harēnh

Matêwre 26.59-66; Makre 14.55-64; Rukre 22.66-71

¹⁹ Rôm nhũm Anasja hêx rom tanhmã Jejus kukjêr to nê kãm:

—E kwa inhmā amnhī jarē. Tanhmā na ka hte we akôt mē pa ho mē pa xwýnhjê jahkre hto ho apa wehe? Anē.

²⁰ Hāmri nhūm amnhī tā kām:

—Nà na pa hte mē piitā mē noo mā ri mē kām ixkapēr o ixpa. Tirtūm kapēr o mē ahkre xà hā ixkre kamā nē Tirtūm mā amnhī jarēnh xà hā ixkre kamā pa hte mē piitā mē noo mā ri mē kām tanhmā ixkapēr to ho ri ixpa. Na pa hte nhÿri ixpimxur pê ri mē kām tanhmā ixkapēr to ho ri ixpa hkêt nē.

²¹ Tā ka ixtā mē kot inhmar o kuhê xwýnhjaja tanhmā ixtā mē hkukjêr to hkêt nē. Ām papxipix ri ixkukja. Kwa ixtā mē hkukja kê mē kot tanhmā ixkapēr mar to xà hkôt tanhmā amā ijarēnh to nà? Anē.

²² Hāmri nhūm patre nhō pôristi hōja kuma nē hwÿr tē nē kām:

—Tk. Kwa na htem ā patre maati mā kapēr anhÿr kêt nē. Na htem hā hpijaam o kām kapēr. Tā na ka axtem nē ri ā kām akapēr anē. Anē.

Hāmri nē hinep hkura.

²³ Hāmri nhūm Jejus amnhī tā omu nē kām:

—Kwa kot pa tanhmā mē amā amnhī to ixêx to ka mē hā inhma nē rī kormā tanhmā axpên mā ixto akapēr to rÿ hā ixtak. Nom ām hāmri ixte mē amā amnhī jarēnh tā ka axtem nē ri inhñep ixtak. Anē.

²⁴ Hāmri nhūm Anas tanhmā mar to hpa hāmri nē umre Kajpas wÿr kumē. Na pre Kajpasja kormā hitom kām ri tanhmā amnhī nhÿpêx to ho nhÿ nhūm Anas mē kām anē nhūm mē kuma nē hwÿr Jejus o tē nē ho axà. Arī hpa hpre rāhā hwÿr o tē nē ho axà nhūm xa nē kām amnhī jarē.

Simāw Pêtre kot axte Jejus kôt pa hkêt ā amnhī tā aprār ā harēnh

Matêwre 26.71-75; Makre 14.69-72; Rukre 22.58-62

²⁵ Nhūm Simāw Pêtre arī mē ìhkô hā ànhunh o xa nhūm mēhōja kām kapēr nē kām:

—Kwa pēr apê Jejus kôt ri mē pa xwýnhjê hō na ka. Anē.

Hāmri nhūm kuma nē kām:

—Tk. Kokÿ ixte mēhō nēj pumunhre hā. Anē.

²⁶ Hāmri nhūm hpānhā mēo patre maati mā àpēnh xwýnhja määnēn omu. Simāw Pêtre kot kēp hamak krāhyr xwýnhta kwÿ na pre. Jakamā nhūm hprī hā omunh mex kurê kumrêx nē kām:

—Kwa nà ka na ka mÿtar pī hkôta kamā mē ìhkô hā xa pa apumu. Anē.

²⁷ Hāmri nhūm tee ri kuma nē axte mē kām amnhī tā aprār kām hihtÿx nē. Jao ra mē kām amnhī tā aprār o axkrunēpxija mē nhūm krāhyre hkàr kurê kumrêx. Ra Jejus kot hkukamā harēnh xà hkôt kēp hkwȳ hkêt ā amnhī tā aprār o axkrunēpxi.

Jejus kot Pirat mā amnhī jarēnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hāmri nhūm mē ixpê Ijaew hkrāhtūmjaja ra Kajpas rūm Jejus o kato nē ma Pirat wÿr o tē. Piratja na pre te Rōmjê nhō pahi pê Sesti mā mē ixpê Ijaew jamār o pa nhūm mē ma hwÿr o tē. Nhūm ra myt kator grire nhūm mē hwÿr o tē nē òrkwÿ kapem o xa. Pirat kēp Ijaew kêt jakamā nhūm mē òrkwÿ hwÿr gjêx kêt nē kapôt ā kuhê. Na hte Ijaew kormā Pas ā hkīnh hāmri nē nhām mē kēp Ijaew kêt xwýnhjê nhōrkwÿ hwÿr gjêx kêt nē. Kojā mē hwÿr agjê nē amnhī tomnu nē Pas ā apkur kêt nē. Jakamā nhūm mē Pirat wÿr Jejus o tē no ām hwÿr o àr kêt nē. Ām ixkre kapem o xa.

²⁹ Hāmri nhūm Pirat mē hwÿr kato nē omu nē hā mē hkukja nē mē kām:

—Kwa tanhmā na we amnhī tomnuj to ka mē ixwÿr o tē? Anē.

³⁰ Hāmri nhūm mē kām:

—Nà kot amnhī tomnuj o pa xwýnh kēnā. Jakamā na pa mē awÿr o tē. Ate tanhmā kot amnhī tomnuj to hā harēnh mar nē mÿrapê tanhmā ho kaxyw. Anē.

³¹ Hāmri nhūm mē kuma nē mē kām:

—Tk. Kwa mē kamjaja ma amnhī kôt o tē nē amnhī krā hkôt tanhmā ho. Mē ate tanhmā kot amnhī nhÿpêx to hā omunh xà hkôt. Anē.

Hāmri nhūm mē tee ri kuma nē kām:

—Kwa amnepēm mē ixpê Ijaewjaja na pa pre htem kēn o mē kot amnhī tomnuj xwýnhjê tak o mē kupa. Tã na ra Rõm nhõ pahihtija mē pamjaja mē ixte mē hpar nê mē ixkurê. Tapxipix kām mē hpar ã àmnēnh prām. Jakamã kot kaj ý hã mē inhmã tanhmã hã axàmnēnh to kê mē kupī. Ra ja kaxyw mē kot mē ixkaxyw axãm kēnã. Anē.

³² Rõm nhõ xwýnhjaja na htem mē kot amnhī tomnuj xwýnhjê hpar kaxyw nē pī kahpa hã mē hanhõ nē mē kupa. Nhūm Jejus amnhī kukamã tanhmã mē kot hpīr to hã mē omunh mex jakamã ra hpri hã mē inhmã mē kot tanhmã hipêx to hã mē harê. Jakamã nhūm pre ã Ijaew Pirat kot mē kām hpīr prām xaj ã kām kapêr kām xihtýx anē.

³³ Hāmri nhūm mē kuma nē akupým òrkwy hwýr axà nē amnhī wýr Jejus ã karõ nhūm hwýr axà nhūm kām:

—E kwa inhmã amnhī jarê. Xà apê Ijaew nhõ pahi na ka? Xà ka na htem amnhī wýr akãm hamak o pa? Anē.

³⁴⁻³⁶ Hāmri nhūm kām:

—Tý ãm hāmri na ka ã ijarēnh anē. Nom jar pika ja kamã ixpê mēõ pahi hkêt. Axtem ixpê mēõ pahi na pa. Mo kaxyw na ka ã ixkukjêr anē? Xà na pre mēhõ ixte mē anhõ pahi Sesti kutã ixãm ã amã ijarê ka ama nē tee ri ixkukamã ajamxpêr? Nà xà ãm hāmri amã Tirtūm kot Ijaew wýr inhmēnh ã ixpumunh prām? Mo kaxyw na ka ã ixkukjêr anē? Anē.

Hāmri nhūm tee ri kuma nē kām:

—Tk. Mo kot pa kêt ri axtem nē Tirtūm kot Ijaew wýr amēnh ã akukja? Mē apyrà nē ixpê Ijaew kêt kēnã. Mē kot ixwýr ato htēm xwýnhjaja na mē ã ate amnhī jarēnh anhýr ã ajarēnh anē. Nà mē akwýjê mē mē anhõ patre krãhtūmjaja na mē ã inhmã ajarēnh anē. Jakamã e aprī hã inhmã amnhī jarê. Tanhmã na ka we amnhī tomnuj to nhūm mē ixwýr ato tē? Anē.

Hāmri nhūm kuma nē kê axte kām:

—Nà ixpê pyka ja kamã mē õ pahi hkêt. Kop ãm ixpê pyka ja kôt mē õ pahi ronhýx ra ixkôt ri mē pa xwýnhjaja tanhmã ixtã mē ato. Nom jar ixpê mē õ pahi hkêt. ãm axtem ixpê mē õ pahi na pa. ãm hāmri na pa ã amã amnhī jarēnh anē. Anē.

³⁷ Nhūm ã kām amnhī jarēnh anē hāmri nhūm tee ri kuma nē kām:

—Xà apê mē õ pahi hõ na ka? Anē.

Hāmri nhūm kām:

—Tý. Nà ãm hāmri na ka ã ijarēnh anē. Na pa pre amnē pikaja wýr wry nē jar mē akamã ixkato nē mē akamã ixaptàr. Ixte tanhmã mē kām ixkapêr to ho ri ixpa kaxyw na pa pre wry nē mē akamã ixpa nē ãm hāmri mē kām ixkapêr o ri ixpa. Na pa hte tãm ixkapêr o ri ixpa. Tã mē kot ixkapêr mar nē ixkôt ri amnhī nhípêx o mē pa xwýnhjaja na htem ixpê mē õ pahihiti hã ijarēnh o pa. Anē.

³⁸ Hāmri nhūm Pirat kot tãm kām kapêr ã amnhī jarēnhja ã kuma nē kām:

—Tk. Aa ixte pika ja kamã mēhõ pumunh nhūm tãm kapêr o pare hã. Anē.

Hāmri nē kapêr ã kuma nē tee ri hkukamã hamaxpêr. Hāmri nē akupým Ijaew wýr ho kato nē mē kutã o xa nē mē kām:

—Kwa tanhmã kot amnhī tomnuj tore hã.

³⁹ E mē inhma. Na pa hte amgrà mē arıgro pē Pas kãm mē amã mē hagjēnh xà rüm mē akwýjê ho hpýnh nē mē hapôj nhūm mē hamakêtkati nē amnhix ri pa. Ka mē ja hã omu nē Pas ã akīnh nē. Jakamã e. Pa mē amã mē anhõ “pahihiti” jarēnhja mã inhüre. E na pa ra kãm inhüre. Anē.

⁴⁰ Hāmri nhūm mē tee ri ã kapêr anhýr ã kuma nhūm ja mē kêp omnuj týx nē. Nhūm mē hã kàxpê gryk kamã kãm kapêr kãm hihtýx nē kām:

—Tk. Kwa nà kãm anhürer kêt nē. Kêt Parapas mã mãn anhüre. Anē.

Parapasja na pre hte tanhmã amnhī tomnuj týx to ho ri pa nhūm prem mýrapê unê nē haxà. Tã nhūm mē axtem nē Pirat kot kãm urer prãm xaj Jejus kaga.

19

Mē kot Jejus tak ā mē harēnh
Matêwre 27.27-31; Makre 15.16-21;
Rukre 23.20-25

¹ Tã nhũm Pirat akupỹm ōrkwỹ hwỳr Jejus o axà nē ō pōristijê mã hã amỹnê nhũm mē hwỳr mra nē htak o kuhê.

² Hãmri nē kēp pahi hã hpēr o pikēnh kaxyw kãm pahi hã mē ahkà nhĩpêx nē hkrãm haxà. Nom ax-tem mēmo mrōnhĩ te kot ronh kanêre pyrāk xwỳnhja nhũm mē hikãx nē hkrãm haxà. Nē kēp pahi hã mē ê kamrêk py nē kãm haxà.

³ Hãmri nē xatã hwỳr mra nē hinep htak nē hã hpēr o pikēnh o xa nē kãm:
 –E apê Ijaew nhõ pahi punuti na ka. Anê.

⁴ Hãmri nhũm Piratja akupỹm Ijaew wỳr kato nē mē kãm:

–E koja inhõ pōristi akupỹm mē awỳr ho kato ka mē omu. Na pa tee ri kot tanhmã amnhĩ tomnuj to hã hkukja. Pēr tanhmã kot amnhĩ tomnuj to hkêt kênã. Anê.

⁵ Hãmri nhũm Jejus kato nē arĩ pahi hã àhkà tu nē ê kamrêk jaxà nē o xa nhũm Pirat mē kãm:

–E kwa mē omu nē kamã axukapri hkêt wehe. Anê.

⁶ Hãmri nhũm patre krãhtũmjê mē mēõ pōristijaja tee ri ja hã kuma nhũm ja mē kēp omnuj nē. Hãmri nē hã kãm kapēr kãm hihtỹx nē kãm:

–Tk. Kwa nà pĩ kahpa hã mãn anhõ. Kê pĩ kahpa hã mãn ajêt nē ty. Anê.

Hãmri nhũm tee ri hã mē kuma nē mē kãm:

–Nà mē kam nē ma amnhĩm o tē nē mē kam amnhĩm ho anê. No pa kot paj ho anhỹr kêt nē. Mo mỳrapê kot pa kêt hã amỹnê nhũm mē kupĩ? Nà kwarĩ kot pa ho anhỹr kêt nē. Anê.

⁷ Hãmri nhũm mē tee ri kuma nē kãm:

–Kwa kēp Tirtũm Kra hã amnhĩ jarēnh kênã. Mē inhĩgêtjaja na prem ã mē ixte amnhĩ jarēnh anhỹrja nē mē inhmã kapēr pa htem ã amnhĩ jarēnh anhỹr kêt nē. Koja mēhõ ã ri amnhĩ

jarēnh anê nhũm mē ja mỳrapê kupĩ. Anê.

⁸ Hãmri nhũm Pirat tee ri Jejus kēp Tirtũm Kra hã amnhĩ jarēnhja ma nē kãm uma nē kãm tanhmã ho hprãm kêt nē.

⁹ Hãmri nē akupỹm ōrkwỹ hwỳr ho axà nē axte hkukja nē kãm:

–Kwa aprĩ hã inhmã amnhĩ jarē. Nhỹhỹnh na ka pre mē ixwỳr mō? Anê.

Nom nhũm axte tanhmã kãm nē hkêt nē. Am arĩ akryk mar o xa.

¹⁰ Nhũm tee ri omu hãmri nē kãm:

–Kwa xà ate ixpumunh kêt? Inhỹ hã na htem mē kupa nē inhỹ hã akupỹm mē hapôj. Tã ka pēr aprĩ hã inhmã tanhmã amnhĩ jarēnh to hkêt nē ri akryk akuhê. Anê.

¹¹ Hãmri nhũm Jejus kãm:

–Nom Tirtũm nhỹ hã pix mã na ka hte ã amnhĩ nhĩpêx anê. Kēp ãm Tirtũm kãm ja prãm kêt ronhỹx ka tee ri tanhmã amã ixto hprãm hkapyrỹ. Tãm kot mē ixkaxyw axãm kênã. Tã mē kot awỳr inhmēnh nē ri ixtyk ã ijarēnh xwỳnh pē Ijaew nhõ pahijaja. Ra mē kot ixkaga jakamã na mē ã amã ijarēnh anê. Jakamã mē kot amnhĩ tomnuj tỹx o ajakrenh. Anê.

¹² Hãmri nhũm Piratja tee ri ã kapēr anhỹr ã kuma nē kot kãm urer prãm nē. Hãmri nē akupỹm Ijaew wỳr kato nē hã mē kãm kapēr nhũm mē tee ri kot kãm urer kaxyw ã amnhĩ jarēnhja ma nē kãm ja prãm kêt kumrêx. Jakamã kàxpê nē kãm kapēr nē kãm:

–Kwa nà ra kēp mē inhõ pahi hã kot amnhĩ to hêx kênã. Kot mēhõ ã ri amnhĩ jarēnh anê nhũm Rõm kamã mē panhõ pahi Sestija ja hã harēnh ma nē kamã gryk tỹx nē. Tã kot kaj kãm anhũre nhũm ajarēnh ma nē akamã gryk nē. Anê.

¹³ Hãmri nhũm tee ri mē kuma hãmri nē ma pahi kot tanhmã mē harēnh to xà hã kên pota wỳr ma tē nē hã nhỹ. Mē ixpê Ijaew kapēr kãm mē ixte kãm: “Kapata” jarēnh xwỳnhnta wỳr kot tanhmã Jejus jarēnh to kaxyw ma hwỳr tē nē hã nhỹ nhũm mē hwỳr o tē.

14 Hāmri nhūm ra arīgro pē sēsta. Mē ixpē Ijaewjaja mē ixte Pas ã amnhī tomnuj mýrapē mry hkwy hpar nē Tirtūm kôt pix mā amnhī nhīpêx ã amnhī jarēnh xà hã arīgroja kato. Jakamã nhūm kaxkwa nhīpôk ri myt nhỹ nhūm Piratja mē kot Jejus kator ã harēnh prām xàj arī mē kãm ho mē ò pahi hã harē nē mē kãm:

—E ota mē anhō Pahihtita. Anē.

15 Hāmri nhūm mē tee ri ã harēnh anhýrja ã kuma nē kãm:

—Kwa apī ri. Ma o tē nē pī kahpa hã anhō kê tokyx ty.

Anē nhūm tee ri mē kuma nē mē kãm:

—Kwa nà. Kêp mē anhō pahi kēnã kot paj kêt ri axtem nē mē apê kupī. Anē.

Hāmri nhūm mē kãm:

—Nà kêp mē inhō pahi hkêt. Pahi Sesti pix na kêp mē inhō pahi. Anē.

Mē kãm Sesti hkĩnh kêt tã ã kãm Jejus htyk prām xàj ri harēnh anē.

16 Hāmri nhūm Pirat tee ri ja hã mē kuma nē tã Jejus ã pôristi mã karō nē mē kãm:

—E mē māmri ma o tē nē pī kahpa hã anhō kê ty. Anē.

Hāmri nhūm mē kuma nē ma o tē.

Mē kot pī kahpa hã Jejus nhôr ã mē harēnh

Matêwre 27.32-44; Makre 15.21-32; Rukre 23.26-43

17 Hāmri nhūm pôristija Jejus mã ò pī kahpa gō nhūm kutu nē ma mē hkôt hkjēnh o mō. Nhūm mē krī rūm ho kato nē ma hixêt prêk wýr o tē. Hixêt prêkja mē kot harēnh o: “Korkot” anē. No mē ixpē Ijaewjê kapēr kãm na pa pre htem harēnh o “Mē hkrã hi xà” anhýr xwýnhta wýr nhūm mē ma o tē nē hã ho api.

18 Hāmri nē pikap pī kahpa xi nē hã Jejus xi nhūm hã nõ nhūm mē prek o ìhkra ho htýx nē hpar o htýx. Hāmri nē kaxyw hkakwý nē hkakwýnh pa nē kamã pī kahpata xãm nē hity hpa nhūm Jejus kýx pē ajêt. Hāmri nhūm mē mãänēn wa ho hamēxkrut nē pī kahpa hã wa kunhō nhūm wa kuri ajêt. Wa kot tanhmã amnhī tomnuj

to xwýnhja wa ho akutã Jejus nhījē nhūm wa uràk nē kýxpê ajêt.

19 Hāmri nhūm Piratja ò pôristi mã anē nhūm mē tap ò py nē hã tanhmã kagà hto nē kagà ho:

IJAEW NHÕ PAHI JEJUS NA JA

KÊP NAJARE NHÕ XWÝNH

20 Nom mē ixpē Ijaew kapēr pix kãm hã kagà hkêt nē. Mãänēn Gresjê kapēr kãm nē Raxijê kapēr kãm nhūm mē mãänēn hã kagà nē Jejus mýri kunhō. Hāmri nhūm Ijaew kwýjaja Jerujarē rūm hwýr mra nē mē kot ã hã kagà nhīpêx anhýrta pumu nē kamã harē. Jerujarēja hixêt prêta wýr jawý jakamã nhūm mē kurūm ohtô nē hwýr mra nē omunh o kuhê.

21 Hāmri nhūm patre hkrãhtūmjaja tee ri ã Jejus jarēnh anhýr ã kagàta pumu nhūm ja mē kêp omnuj nē. Jakamã nhūm mē ma Pirat wýr mra nē kãm:

—Kwa mon ka ri hã mē kãm anē nhūm mē axtem nē ã ri kagà nhīpêx anē? Kwa nà kêp mē inhō pahi hkêt. ãm htýx ri kot ã kot amnhī jarēnh anhýr o pa kēnã. Kwa hã kagàja o anhīpa nē hpãnhã hã kagà ho: “Kêp Ijaew nhõ pahi hã kot amnhī to hêx xwýnh.” Anhýr o hpãnhã hã hipêx nē anhō nà? Anē.

22 Hāmri nhūm mē kuma nē mē kãm:

—Tk. Nà pa ho ixpinhpanh kêt nē. Ra ixte hã kagà hpar kēnã. Anē.

Pôristijaja kot axpēn mã Jejus xê ho pigrãnh

Matêwre 27.35-36, 27.55-56; Makre 15.24; Rukre 23.34

23 Hāmri nhūm pôristijaja kot axpēn mã Jejus xê o pigrãnh kaxyw amnhī tã haxwýr o tē. Mē kêp 4 no nhūm Jejus xê kêp 5 jakamã nhūm mē amnhī kôt ho 4 nē haxwý nhūm pyxi nē hprã. ê rytita. Na pre hipêx muxre. Nhýhýnh hkayr xà pumunh kêt kumrêx.

24 Jakamã nhūm mē omu nē kãm hkĩnh nē. Hāmri nhūm hõ kot amnhīm hpyr nē ho arīk kaxyw nhūm mē hã kēnre ho jôka. Na pre ra Tirtūm kapēr ã kagà htūm kot mē hkukamã ja hã mē harēnh nē mē harēnh kot:

Na prem axpēn mā ixê o anhrà nê hã
kēnre ho jôka ho hkrī.

Anhÿr o kot mē hkukamã mē harēnh.
Tã nhũm mē ra hkôt ã amnhĩ nhĩpêx
anhÿr o hkrī.

*Jejus kot Juāw nhĩhkram katorxà
jaxà ã harēnh*

²⁵ Nhũm Jejus par pē katorxà xa.
Nē htōx nē Kropti hprō Marir nē
Marir Matarēn mē nhũm mē Jejus
katorxà nhĩhkô hã Jejus pumunh o
kuhê. Nhũm amnhĩ tã mē omu

²⁶ nē mē kuri pa ixpê Juāw pumu.
Hãmri nē kēp ixkrãmnhwÿ mex ã ixtã
katorxà mã kapēr nē kãm:

–E ota Juāwta. Koja ixpãnhã te kēp
akra pyrãk o anhĩpêx nē tanhmã ato
ajuta hto ho pa. Anē.

²⁷ Hãmri nē hpãnhã pa inhmã kapēr
nē inhmã:

–E Juāw. Kêr ka te kēp akatorxà
pyrãk o inhmã hipêx mex o ri apa.

Anhÿr jakamã pa kuma nē kot
inhmã hã karō xà hkôt inhörkwÿ
hwÿr haxà nē amnhĩ kôt ri ho ixpa.

Jejus htyk ã harēnh

*Matêwre 27.45-56; Makre 15.33-41;
Rukre 23.44-49*

²⁸ Tã nhũm Jejus ra amnhĩ pumu
hãmri nē hamaxpēr o:

–Nà Inhĩpêxà kot mēmoj tã inhmã
karōta na pa ra kãm ho anhÿr o hitep
xà xir kaxyw. Anē.

Hãmri nē kãm kôr ã amnhĩ jarē.
Nom ra hkukamã Tĩrtũm kapēr ã
kagà htũm kot htyk kaxyw nē kãm
kôr kukamã harēnh jakamã nhũm ã
amnhĩ jarēnh anē nē kapēr o:

Nà na pa ra inhmã kôr nē. Anē.

²⁹ Nhũm hpar pē guhkrax kãm wĩhti
punureta ãm jakamã nhũm mē ã kot
amnhĩ jarēnh anhÿrja ma nē kaxyw
mēmo rerek py nē o tē nē kaxyw pĩ
ryti hō py nē ho hkanhwÿ. Nē akupÿn
o tē nē ho wĩhti mã haxà nē kãm kupē.

³⁰ Nhũm hkaô nē hkaôr pa hãmri nē
kapēr o:

E nã hãmri na pa ra mē piitã mē kot
amnhĩ tomnuj pãnhã amnhĩrer
pa. Jao ra Inhĩpêxà kãm
hprãm xà hkôt kãm tanhmã

amnhĩ nhĩpêx to jatur xãm
kumē.

Anhÿr o amnhĩ jarēnhja kôt ahpar mã
hkrã nē ty.

*Mē kot kô xwa ho Jejus kamnhwÿr
ã harēnh*

Wam Juāw 5.6-8

³¹ Nhũm ra sêsta nhũm apkati nhũm
mē inhō arĩgromnu pē sap kaxyw.
Sapja ã na hte mē ixpê Ijaew mē
ixkĩnh pē Pas ã ixkĩnh rũnh o ixpa.
Nhũm mē kãm sap ã arĩ mē htyk nē
mē harir xwÿnhjê pumunh prãm kêt
jakamã nhũm Ijaew krãhtũmjaja ma
Pirat wÿr mra nē kãm:

–Kwa pôristi mã anē kē mē tokyx
mē hte hi kukē kē mē htyk tokyx anē.
Kē mē tokyx mē o wrÿ nē ma mē o
mra nē mē hagiê. Kormã sap kêt ri.
Anē.

³² Hãmri nhũm mē kuma nē ò
pôristijê mã anē nhũm mē ma mē
hwÿr mra nē akutã wa kot Jejus nhĩjê
nē jêt xwÿnhhta wa kumrêx wa hte hi
hkwÿr.

³³ Hãmri nē hpãnhã Jejus wÿr tē nē
omu nhũm ra htyk mex nē ajêt nhũm
mē ja hã omu nē kēp hte hi hkwÿnh
kêt nē.

³⁴ Nhũm pôristi hōja kô xwa py nē
ho ihkjê rũm hkanhwÿ nhũm hkamrô
mē ĩ kagô ahkà nē hprôt nhũm mē
hkwÿja omunh o kuhê.

³⁵ Nē ixpê Juāw na pa pre ijaxwÿja
mē ĩhkô hã xa nē ja hã omunh jakamã
pa ã mē amã hã kagà anē. ãm hãmri
na pa mē amã harē nē hã kagà. Mē
ate kamã harēnh nē harēnh mar nē
hkôt ajamaxpēr kaxyw.

³⁶ Na pre ra Tĩrtũm kapēr ã kagà
htũm kamã ra hkukamã tanhmã kot
mē pahwÿr mēnh xwÿnhhta jarēnh to
nē hã kagà. Nē hã kagà kot:

Koja mē nhÿhÿnh hi hkwÿnh kêt nē.
Anē.

Tã nhũm mē ra hã kagàja kôt ã hipêx
anē nē kēp hi hkwÿnh kêt nē.

³⁷ Nē Tĩrtũm kapēr ã kagà htũmja
mããnhēn ja hã harēnh kot:

Mē kot hpĩr nē hkanhwÿr xwÿnhja
koja mē hpar pē omunh o
kuhê. Anē.

Tirtūm kapēr ā kagà htūm kamā ā
Jejus tyk kukamā harēnh kot anhÿr.

Mē kot Jejus jaxàr ā mē harēnh
Matêwre 27.57-61; Makre 15.42-47;
Rukre 23.50-56

³⁸ Tā nhūm Juje pē Arimatej nhō
xwÿnhja Jejus ra htyk ā omu nē ma
Pirat wÿr tē nē hā kām kapēr. Kot
ma o mōr nē tokyx haxàr kaxyw. Na
pre ra Jejus kōt amnhī xām nom Ijaew
krāhtūmjē pymaj mē kām amnhī to
amnhīrīt kēt nē. Jakamā nhūm ma
Pirat wÿr tē nē hā kām kapēr nē kām:

—Pa e ot pa awÿr tē. Ixte mēmoj
tā amā ixkapēr kaxyw. Kot kaj apu
inhmā “y” anhÿr japēr. Kwa xà kot pa
ma Jejus o mō nē haxà? Anē.

Hāmri nhūm kuma nē kām: “Nà
māmri ho anē.” Anē hāmri nhūm ma
hwÿr tē nē ho wrÿ nē kumÿ nē ma
haxàr mā o mō.

³⁹ Nhūm Nikotēja ma hkōt tē. Am-
nepē mā kot kamāt kām Jejus wÿr
htēm nē wa axpēn mā kapēr o ÿr
xwÿnhja. Jakamā ma Juje hkōt tē. Nē
amnhī kōt mē hkuxwa xà hkwy ho
mō. Ām ho mōr rax kumrēx. Ho 34
kir nē kutu nē o mō. Mē hkuxwa xàja
na pre mē kot mēmo kuxwa xà mā
“mīra” nē “aroe” anhÿr jarēnhja nhūm
kaxyw hkwy jakà nē ho ahkà nē ho
mē hkuxwa xà nhīpēx. Hāmri nē kutu
nē ma Juje kot Jejus jaxàr nhūm kot ho
hkuxwa kaxyw hkōt o mō.

⁴⁰ Hāmri nhūm wa ho kupēxē
kukōnh pa nē ho Jejus kupu. Mē
ixpē Ijaew mē ixte mē htykjē jagjēnh
kaxyw ā mē hipēx anhÿr xà hkōt
nhūm wa ā hipēx anē nē haxà.

⁴¹ Nhūm ra mē kot pī kahpa hā nhōr
xà tā mē kot mēmo pī ho pa nē hkre
xwÿnh kwÿ kuhē. Nē kamā kēn kre
nyw. Kormā mē kot kamā mē htykjē
hō jaxàr kēt xwÿnhja.

⁴² Jakamā nhūm wa omu nē axpēn
mā:

—E kwa pu hwÿr Jejus o tē nē kamā
mān tokyx haxà. Kēr pu kormā sap
kēt ri ra tanhmā amnhī to hpa. Anē.

Hāmri nē hwÿr kumÿ nē o tē nē
kamā haxà nē hā hitom pa hāmri nē
ma akupÿm krīm wa tē.

20

Jejus akupÿm htīr ā harēnh
Matêwre 28.1-10; Makre 16.1-8;
Rukre 24.1-12

¹ Tā nhūm sap tē nē hapêx nē
hpānhā semān nyw krax xà pē tōmīk.
Hāmri nhūm Marir Matarēn kwÿhtā
kānhmā nhÿ. Kormā myt kator kēt ri
kānhmā nhÿ nē ma kēn kreta wÿr tē.
Nē hwÿr pōj nē tee ri hitom xà hā kēn
rax pumu. Nhūm ra nhām hakwa kre
kuhpa hā ri hikwÿ nhūm omu nē tee
ri hkukamā hamaxpēr pē omunh o
xa.

² Hāmri nē awjanā nē ma akupÿm
hprōt nē nhÿri Simāw Pêtre nē pa ixpē
Jejus krāmnhwÿ mex ā wa ixpumu nē
hkaprī kamā wa inhmā harē nē wa
inhmā:

—Xē na pēr mē pahpē mē panhō
Pahihti kapa nē nhÿhÿm ma o tē. Xē
nhÿhÿm mǎn pre wem o tē? Anē.

³ Hāmri pa wa kuma nē hwÿr ixprōt
kurē kumrēx.

⁴ Hāmri pa Simāw Pêtre mā wa nē
ixkumrēx hwÿr pōj.

⁵ Nom kormā kēn kre hwÿr ixàr
kēt ri kormā hakwa krem inhīkōt nē
kaxwÿnh kām nōr xà kamā Jejus japēr
ixrīt o xa. Nhūm kupēxē nhīrē pix nō
pa omu.

⁶ Hāmri nhūm Simāw Pêtre ixkōt tē
nē ixrom krem àr kurē kumrēx nē
kupēxē nhīrēta pumu.

⁷ Nē hkrā kupu xà pumu nhūm ax-
tem hkrā muxre nē ahte nō.

⁸ Hāmri pa hkōt axà nē nōr xà kaprÿ
pumu nē ijamaxpēr o:

—Hēxta waa nē. Nà mān akupÿm
htīr. Hā na nōr xà hkaprÿ mex nē. Nà
mān akupÿm htīr kām ga. Anē.

⁹ Ra Tirtūm kapēr ā kagà htūm kot
ja kukamā akupÿm htīr ā harēnh tā pa
wa kormā ixprī hā ja hā omunh kēt
nē. Tā kēn kre kaprÿ pumu nē kām
ijamaxpēr kurē kumrēx.

¹⁰ Hāmri nē wa ixkato nē awjanā nē
ma akupÿm wa ixkwÿjē hwÿr wa tē.

Jejus kot Marir Matarēn wÿr kator
ā harēnh
Makre 16.9-11

¹¹ No nhũm Marir Matarēnja arī kēn kre kapem hkaprī nē mỳr o xa. Nē mỳr pē hikôt nē kēn kre kamu

¹² nē kamā Tirtũm kapēr o wrỳk xwỳnh wa ho axkrut nē wa omu. Nhũm wa ê jakajre kamā wa nhỹ. Nhũm hōja hkrām nhỹ nhũm hōja htem nhỹ.

¹³ Hāmri nē wa Marir Matarēn mā kapēr nē kām:

—Kwa mon ka ri omu nē amỳr o xa?

Anē.

Nhũm kām:

—Xê nhũm. Na prem ma nhỹhỹm mē ixpê mē inhō Pahihtija mỳ nē ma o tē nē hpānhā nhỹri kuxi. Anē.

¹⁴ Rôm nhũm Jejus tām tē nē hkatut kôt xa nhũm Marir Matarēn ho hakēx nē omu nom hprī hā omunh kêt nē. Omu nē htỳx ho axtem mēhō hā hkamnhĩx.

¹⁵ Hāmri nhũm kām:

—Kwa mon ka ri amỳr o xa? Mēhō na ka ri hapēr arīt pē amỳr o xa? Anē.

Hāmri nhũm kuma nē htỳx ho pĩ hkre jamār xwỳnh ã hkamnhĩx nē kām:

—Xê xà ka na ka mē ixpê mē inhō Pahihtija ho ahkĩ nē ma o tē nē nhỹri axi mē? Xê ka japēr nē akatāt kôt inhmā harē. Nhỹri inhmā nōr xà jarē pa ma hwỳr tē nē kumỳ nē man akupỳn o tē nē akupỳm kēn kre kamā kuxi. Anē.

¹⁶ Hāmri nhũm Jejus kām hixi jarē nē kām:

—Kwa Marir Matarēn. Amnē ixpumu nē arī ã akapēr anē nà. Anē.

Hāmri nhũm jatā hprī hā kuma nē ho hakēx nē amnhĩ jaēr pē hprī hā omu nē kām:

—Xê Pahihtija. Xep ka na ka. Hêxta gài nē. Anē.

Nom mē ixpê Ijaew kapēr kām Pahita jarēnh o: “Raponĩ” anē. Nhũm ã kām kapēr anē hāmri nē axte ma nhỹhỹm kēp htēm pymaj hpa hā kupy.

¹⁷ Hāmri nhũm kām:

—Kwa inhmā anhũre. Na pa kormā ma akupỳm Inhĩpêxà hwỳr ixàpir kêt nē. E tokyx ma akupỳm tē nē ixtō nē ixtōxjê mã ijarē. Na ka prem apê ixkràmnhwỳ pix tã ra mē apê ixtō nē ixtōx na ka mē. Jakamā ma

akupỳm mē hwỳr tē nē mē kām ijarē. Nē mē kām: “Na Jejus mē awỳr pēr mēnh o: ‘Kot paj tokyx ma akupỳm Inhĩpêxà Tirtũm wỳr api. Nom kēp pa Inhĩpêxà pix kêt mãânēn kēp mē Anhĩpêxà na. Nē mãânēn kēp mē anhō Tirtũm na.’ Anhỹr o mē awỳr pēr mē.” Anē. E ma akupỳm mē hwỳr tē nē tokyx ã mē kām ijarēnh anē. Anē.

¹⁸ Hāmri nhũm kuma nē ma akupỳm mē ixwỳr tē nē mē inhmā awjarē nē mē inhmā:

—Xê na pa ham mē panhō Pahihtija pumu. Na akupỳm mē pamā htĩr. Anē.

Hāmri nē mē inhmā kot tanhmā kām kapēr to hā harē pa mē kuma nē tee ri hkukamā ijamaxpēr.

Jejus kot hkwỳjê hwỳr kator ã harēnh

Rukre 24.36-43

¹⁹ Tã nhũm tòmĩk nē kamàt pa mē Jejus kôt ixpa ho ixpa xwỳnhjaja axpēn wỳr akuprō hāmri nē Ijaew krãhtũmjê pymaj hakwakre kahē hpa nē axpēn mã ixkapēr o ixkrĩ. Nhũm Jejus mē ijaēr pē nhỹhỹnh mē ixwỳr axà nē mē ixkuri xa nē mē inhmā:

—Pa. Xà kormā mē anhōt kêt? Anē.

²⁰ Hāmri nē mē inhmā amnhĩ nhĩhkra kamā prek tatak xà jahkre nē hakỳx kôt mē kot hkanhwỳr xàja nhũm mē inhmā hahkre. Pa mē akupỳm htĩr kām omu nē ixkĩnh tỳx kumrēx.

²¹ Hāmri nhũm mē inhmā:

—E kwa kēr ka mē tee ri amnhĩ kukamā ajamaxpēr o amā ma ho ri apa hkêt nē. Na pre Inhĩpêxàja mē awỳr inhmē pa pre wrỳ. Tã kot paj amnhĩ pyrà nē mē piitã mē hwỳr mē arē. Anē.

²² Hāmri nē mē ixkaxyw htyyxà mē nē mē inhmā Tirtũm mē wa Karō jarē nē mē inhmā:

—E koja Tirtũm mē wa Ixkarōja wrỳ nē mē akarō mã gjêx pa.

²³ Ka mē y hā ma mē piitã mē hwỳr apa nē mē kām Tirtũm kapēr jarēnh o ri mē hkôt apa. Nē nhỹri mēhō pumu nē inhỹ hā kām: “Kot kaj Tirtũm kôt amnhĩ xãm nhũm amnhĩ tã apumu nē anē ate amnhĩ tomnuj rēnh pa.” Anē. Ka mē ã kām akapēr anē nhũm

mē ama nē hkôt amnhĩ xām nhũm Tirtũm amnhĩ tā omu nē nē kot amnhĩ tomnuj rēnh pa. Nom koja mē ama nē ām mē ama nē hkôt amnhĩ xām kêt japēr ka mē inhỹ hā kām: “Nà kot kaj Tirtũm kôt amnhĩ xām kêt nē nhũm anē ate amnhĩ tomnuj rēnh kêt nē.” Anhỹr o kām akapēr nhũm Tirtũm ho anē nē nē rēnh kêt nē. E kēr ka mē ā inhỹ hā amnhĩ nhĩpēx anhỹr o ri apa. Anē.

Nhũm pre ā Jejus mē inhmā kapēr anē hāmri nē kato nē ma nhỹhỹm tē.

Jejus kot Tomas mā kapēr ā harēnh Matēwre 28.17

²⁴No nhũm mē inhĩō pē Tomas pihpohtita kormā mē ixkĩnhā akupỹm Jejus htĩr kām omunh kêt nē. Na pre ma kape hā tē nhũm wakre kamā mē ixwỹr axà nē mē inhmā kapēr hāmri nē ma nhỹhỹm tē. Jakamā nhũm Tomas akupỹn mē ixwỹr tē nē axà pa mē kām harē nhũm tee ri mē inhma nē mē ixkôt hamaxpēr kêt nē.

²⁵Nē mē inhmā:

—Nà kot pa ĩhkra kamā prek tatak xà pumu nē kamā inhĩhkra hkrā jaxà. Nē hakỳx kôt hkanhwỹr xàta pa mā ho anē nē omu nē kamā inhĩhkra hkrā jaxà nē rĩ kormā akupỹm htĩr kôt ijamaxpēr. Anē.

²⁶Tā nhũm semān pyxi nē hapēx pa mē axte axpēn wỹr akuprō nē axte Ijaew krāhtũmjē pymaj amnhĩ tā kahē htỳx nē ixkrĩ. Nhũm Tomas tā mē ixkuri nhỹ. Hāmri nhũm Jejus axte nhỹhỹnh mē ixwỹr axà nē mē inhmā:

—Pa. Na ka mē rĩ akrĩ. Anē.

²⁷Hāmri nē Tomas pumu nē hwỹr tē nē kām ĩhkra pē nē kām:

—E ota inhĩhkra kamā prek tatak xàta. Māmri kamā inhĩhkra hkrā jaxà. Nē hpānhā ijakỳx kôt mē kot ixkanhwỹr xà kamā mā ho anē nē haxà nē akupỹm ixtĩr kôt ixpumunh kurē kumrēx. Anē.

²⁸Hāmri nhũm kuma nē kām:

—Nà pēr ām hāmri apē inhō Pahihtĩ Tirtũm na ka. Anē.

²⁹Hāmri nhũm kām:

—Tỳ. Ām ano ho ixpumunh kôt pix mā na ka ixkôt ajamaxpēr. Tā no ām koja mē nhỹrmā mē amỹr pē mē pa xwỹnhjaja mē akĩnhā mē no

ho ixpumunh kêt tā akupỹm ixtĩr ā ijarēnh mar pix tā ixkôt hamaxpēr. Ja na mex kumrēx. Anē.

Juāw kot tanhmā amnhĩ jarēnh to hā harēnh

Rômān 15.4; Wam Juāw 5.13

³⁰Na pre Jejus kormā mē ixto pa ri mē inhnōo mā mēmoj tanhmā hipēx to rax nē nom kot paj kagàja kamā piitā hā kagà hpar kêt nē.

³¹Ām hkwȳ pix na pa mē amā hā kagà. Mē ate mē ixpyrà nē omunh nē kēp Tirtũm Kra hā kot mē pakaxyw ām xwỹnh ā omunh nē hkôt amnhĩ xunhwỹr kaxyw na pa ā mē amā harēnh nē hā kagà anē. Tā kot kaj mē amnhĩ kaxyw hkôt ajamaxpēr nē hkôt amnhĩ xunhwỹ hāmri nē nhỹrmā atyk tā nhũm akupỹm mē ato mē atĩr ka mē ixpyrà nē kuri amex nē atĩr tũm nē apa ho apa. Tā pa ā mē amā mēmoj piitā harēnh nē hā kagà anē.

21

Jejus kot hkwȳjē hwỹr kator ā harēnh

Matēwre 26.32, 28.7, 28.10

¹Tā nhũm Jejus axte hkôt mē ixpa ho mē ixpa xwỹnh kwỳjē hwỹr kato. Himō pē Tipeja mỳri.

²Pa mē ixpē 7 nē axpēn wỹr akuprō. Na pre Simāw Pētre nē Tomas pihpohti nē Natānaew. Natānaewja Garirej kamā krĩ pē Kanā nhō xwỹnh na pre. Nē wa pa wa ixpē Jepetew krata wa nē wa inhĩō wa pijakruuta wa. Pa prem wa mē nhỹri axpēn wỹr akuprō.

³Hāmri nhũm Simāw Pētre mē inhmā:

—E pa jarāhā ma tep wỹr tē nē hkwȳmnē. Anē.

Pa mē kuma nē kām:

—Tōe. Nà pa mē ijaxwỳja ma akôt mō. Anē.

Hāmri nē mē ma himō rax pē Tipeja wỹr mō nē kanōre mā agjē nē gōx kām kryhti rēnh o ixkuhē. Nom tee ri ho tep ōmnēnh kaxyw rēnh o ixkuhē nē hōmnēnh kêt nē ixtā apkati nhũm tep amrakati kumrēx.

⁴ Tã nhũm myt kato nhũm Jejus gô mÿri xa. Pa mẽ ixpiitã omu no ãm ixprĩ hã kêp Jejus ã omunh kêt nê. Tã no nhũm tãm xa.

⁵ Hãmri nê mẽ inhmã kapêr nê mẽ inhmã:

—Pa. E măn ka mẽ ra tep kwÿmnênh rax nê nà? Anê.

Hãmri pa mẽ kãm:

—Tk. Nà mo tep? Amrakati kumrêx kênã. Anê.

⁶ Hãmri nhũm mẽ inhmã;

—Xô wehe? Tôe. Axte mẽ axupôk rÿm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utĩ rax nê. Pa mẽ tee ri ixte ho ixàpir kaxyw ri hkukjê.

⁷ Hãmri pa kêp Jejus ã omunh kurê kumrêx nê Simãw Pêtre mã kãm:

—Kwa pêr mẽ panhõ Pahihtita na. Anê.

Hãmri nhũm inhma nê hkĩnh tÿx nê akupÿm hinôkà jaxà nê gôx kãm mrõ nê ma hwÿr ho nana ho tẽ.

⁸ Hãmri pa mẽ hkôt kanôre kamã kryhti kjênh o mō. Ra amgrà hwÿr amgrire. Wÿr 100 met pix jakamã pa mẽ hwÿr ixpôx tokyx anê.

⁹ Nê pàr o hkre kura nê kuxi nê ijapôx pa nê Jejus wÿr ixprôt nê mra. Nhũm ra mẽ ixkutêp kuto nê par nhĩpêx nê nhÿhÿnh tep kwÿ par kãm haxwÿ nê ho àr o nhÿ. Nê kaxyw pãwti nê amnhĩ ri haxwÿ nê o nhÿ.

¹⁰ Hãmri nê mẽ ixpumu nê mẽ inhmã:

—E mẽ amnê anhõ tep o mra pu mẽ hkuxôt nê kuku. Anê.

¹¹ Hãmri nhũm Simãw Pêtre akupÿm pàr wÿr tẽ nê kryhti ho htÿx xà hpôt nê amgrà hwÿr hkjênh o mō. Kamã tep rÿnh pix. Nê ohtô nê. Kamã kêp 153 nê hikwÿ htã nhũm nhÿhÿnh kryhti hkwy pikaxônh kêt nê.

¹² Hãmri nhũm Jejus mẽ inhmã:

—E kwa mẽ tokyx mra pu mẽ apku. Anê.

Hãmri pa mẽ kuma nê hwÿr mra nê ixkrĩ pa. Hãmri nê tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhÿr ã omu nê kêp mẽ inhõ Pahihti hkôt

omunh kurê kumrêx jakamã hixi hã hkukjêr kêt nê. ãm akryk omunh o ixkrĩ.

¹³ Hãmri nhũm mẽ inhmã pãwti ho hkry pa. Nê hpãnhã tep jamÿ nê mã ho anê nê ho hkry pa nê ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupÿm htĩr kãm ra ahpÿnhã mẽ ixwÿr hapôx o axkrunêpxi.

Jejus kot akupÿm tãm Simãw Pêtre xãm

Atre 20.28-31; Wam Pêtre 5.1-4

¹⁵ Tã pa mẽ ra ixàpkur pa nê kànhmã ixkuhê nê gô mÿ ri mra. Hãmri nhũm Jejus Juāw hkra Simãw Pêtre mã tanhmã kapêr to. Nom ixpê Juāw nhũm kêp ixkra hkêt axtem Juāw õ hkra na pre. Jakamã nhũm Jejus kãm kapêr nê kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anê.

Hãmri nhũm kuma nê kãm:

—Tÿ inhmã ajapê htÿx kênã Pahihti. Ra ate ja hã amnhĩ tã ixpumunh mex. Inhmã ajapêê. Anê.

Hãmri nhũm kuma nê kãm:

—Tôe. Nà kêt ka inhmã mẽ kot ixkôt amnhĩ xunhwÿr xwÿnhjê jahkre mex o ri mẽ hkôt apa. Te ho ôwêhti hkrare jamãr xwÿnh kot hamãr mex o ri hkôt pata pyræk. Anê.

Hãmri nhũm kãm:

—Tôe. Nà kot paj amã mẽ ho anê. Anê.

¹⁶ Tã nhũm hã ahtÿmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anê.

Hãmri nhũm kãm:

—Tÿ. Ra ate inhmã ajapê hã ixpumunh kênã. Anê.

Hãmri nhũm kê axte kãm:

—Tôe. Kêt ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot ôwêhti jamãr mex o hkôt pa xwÿnh kot amnhĩ nhĩpêx pyræk. Anê.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hãmri nhũm hã ahtũmre nhũm kê axte kãm:

—Kwa Simāw. Xà we âm hãmri na ka inhmã amnhĩ jarê? Xà we amã ijapê htỳx kumrêx nà? Anê.

Hãmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hãmri nê kãm:

—Kwa Pahihti. Ate mêmoj piitã omunh par. Nê ate inhmã ajapê htỳx ã ixpumunh par kênã. Anê.

Hãmri nhũm kê axte kãm:

—Tôe. Kêr ka inhmã mê kot ixkôt amnhĩ xunhwỳr mã xwỳnhjê jahkre mex o ri mê hkôt apa. Te ho ôwêhti jamãr xwỳnh kot hamãr mex o ri pata pyrãk. Anê.

Hãmri nhũm kãm:

—Nà kot paj amã mê ho anê Pahihti. Anê.

Simāw Pêtre tanhmã htyk to hkukamã harênh

¹⁸ Nhũm Jejus arĩ Simāw Pêtre mã kapêr nê kãm tanhmã htyk to hkukamã harênh to nê kãm:

—Kwa ixkapêr ma nê amnhĩ krã him haxàr tỳx nê hã apa Simāw Pêtre. Nà kormã anyw ri na ka pre hte ma nhỹhỹm apa kaxyw nê anojarêr hãmri nê anhĩnôhkà mex jagjê nê ma nhỹhỹm amã apa hprãm xà hkôt ri apa. Tã kot kaj apigêr nhũm mê apynê nê akahti hpre nê apa hpre nê ma nhỹhỹm ato mō ka mê kãm amnhĩ gō nê amnhĩ nê tanhmã mê kãm nê hkêt nê. Amã mê hkôt amōr prãm kêt tã mãmri mê kãm amnhĩ gō kê mê ma nhỹhỹm ato mō.

¹⁹ Tã kêr ka arĩ ixkôt amnhĩ xãm tỳx nê atĩr prãm xàj mê umaj axte ixkaga hkêt nê. Hãmri nhũm mê apĩ nê tanhmã atyk to hã apumu nê amã Tĩrtũm kĩnh ã apumunh mex kurê kumrêx. Hãmri nê atã Pahi Maati Tĩrtũm mex o mex ã harê. Anê.

Nhũm pre ã Jejus Simāw Pêtre tyk kukamã kãm ujarênh anê. Hãmri nê kãm:

—E kêr ka ixte amnhĩ to htỳx nê amarĩ mê kãm ixãm nhũm mê kot ixpĩrja pyrã nê ã amnhĩ nhĩpêx anê. Anê.

Hãmri nhũm kuma nê kãm:

—Tôe. Nà kot paj hãmri tã ã amnhĩ nhĩpêx anê Pahihti. Anê.

Juāw tyk kukamã tanhmã harênh to hkêt ã harênh

²⁰ Nhũm pre ã Jejus Simāw Pêtre mã tanhmã htyk to hkukamã harênh anê. Hãmri nhũm kuma nê ixpê Juāw ã ixto hakêx nê ixpê Jejus krãmnhwỳ mex ã ixpumu. Kormã Jejus htyk kêt ri kamãt kãm mê ixàpkur o ixkrĩta ã na pa pre ãhkô hã ixàpkur o nhỹ nê kot mê kãm ôr mã xwỳnhhta nhĩxi hã hkukja.

²¹ Jakamã nhũm Simāw Pêtre ixto hakêx nê ixpumu nê ixtã Jejus kukja nê kãm:

—Kwa no pêr pahkôt mōr mũj? Tanhmã koja we htyk to? Anê.

Hãmri nhũm kãm:

²² —Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupỹn ixwryk prãm nhũm arĩ pa nê htyk kêt rãhã pa akupỹn wrỳ. Kêr ka ri htyk kukamã tee ri tanhmã ajamaxpêr to hkêt nê. Âm ixkôt pix mã ate amnhĩ nhĩpêx tỳx pix kukamã mãn ajamaxpêr o ri apa.

²³ Anhỹr o kãm ijarênh jakamã nhũm mê ixkwỳjaja kot ã ijarênh anhỹrja ã kuma ma nê htỳx nhỹrmã ixtyk kêt ã ixkamnhĩx. Nê gaa nê rĩ piitã axpên mã ã ijarênh anhỹr o pa. Nom na pre ã ijarênh anhỹr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupỹn ixwryk prãm nhũm arĩ pa nê htyk kêt rãhã pa akupỹn wrỳ.

Anhỹr o ijarê. Nom âm hãmri ixtyk kêt rãhã nhũm akupỹn wrỳk ã ijarênh kêt nê.

Juāw kot Jejus kot tanhmã amnhĩ to hã kagà hpar kêt ã kot amnhĩ jarênh

Juāw 20.30-31

²⁴ E na pa mê amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwỳnhjê hō na pa âm hãmri ã hã kagà anê. Ka mê kamã harê nê ama nê âm hãmri ixte kagà nhĩpêx kêt ixpumunh mex kurê kumrêx.

²⁵ No na pre Jejus ãm ja pix o anhÿr o pa hkêr nê. Na pa ãm mē amã hkwÿ pix jarê nê hã kagà. Na pre tanhmã ri mēmoj to rax kumrêx o ri pa. Nom kêp ãm ixte kot tanhmã ri amnhÿ nhÿpêx to piitã hã kagà hpar ronhÿx hã kagàja katutxô rax kumrêx. Jao te ra kaxkwa htêp o mör pyræk.

Tã ãm ja pix. Na hapêx.

Atre
Jejus nhỹ hã mẽ ahkre ho
mẽ pa xwýnhjaja kot
tanhmã amnhĩ nhĩpêx to
ho pa hã mẽ harênh

Rukre na pre kagàja nhĩpêx. Na pre kêp tôtô nê hkwýjê kane ho pa. Nê Jejus nhỹ hã mẽ ahkre ho pa xwýnh pê Pawre kôt pa ho pa. Hãmri nê hamaxpêr nê hkràmnhwý Teopre mã kagàja nhĩpêx nê hwýr kumê. Nê kagàja kamã Jejus nhỹ hã mẽ ahkre ho mẽ pa xwýnh maatiijaja kot Jejus mýr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwý pê Parijew nhõ xwýnhjaja nê mẽ hkwý pê Satusew nhõ xwýnhjaja kot Tirtùm kapêr ã kagà htùm kamã harênh nê mar nê hkôt amnhĩ nhĩpêx tã Tirtùm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtùm Kra hkêt ã hkamnhĩx jakamã na prem kãm mẽ kot hkôt amnhĩ xunhwýr xwýnhjê kurê nê. Tã nhùm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwýnh kwýjaja mẽ urak nê kêp Ijaew tã mẽ kurom Jejus hkôt amnhĩ xunhwý nhùm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhùm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhùm Rukre ã mẽ kot amnhĩ nhĩpêx anhýrja piitã hã kagà nê Teopre hwýr kumê. Nê kãm mẽ harênh o:

Tirtùm Karõ jarênh
Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awýr kagà nhĩpêx nê kumê. Nà wam ixte awýr kagà nhĩpêx nê

mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awýr kumê.

²⁻⁴ Kormã akupým kaxkwa hwýr àpir xwýj ri na pre ý hã mẽ ahkre ho pa kaxyw hkôt mẽ pa xwýnh kwýjê rê. Tã nhùm mẽ kãm hkurê xwýnhjaja kupĩ nhùm amnhĩ xà htỳx kãm hamak rax kãm ty. Hãmri nhùm Tirtùm akupým ho htír. Nom nhùm ma akupým kaxkwa hwýr àpir kurê kumrêx kêt nê. Na pre xatã mẽ kot ý hã mẽ ahkre ho mẽ pa xwýnh maatiijê hwýr hapôj nhùm mẽ akupým htír kãm omu. Na pre hte nhýri mẽ hwýr hapôj nê tanhmã mẽ ahkre hto nê mẽ kãm:

—Na pre Tirtùm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwý.

Anhýr o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtùm Karõ nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhým apa hkêt nê. Kê Inhĩpêxà Tirtùm mẽ awýr amnhĩ Karõ rê mãn. Ra ixte mẽ amã harênh xà hkôt koja mẽ awýr kurê nhùm mẽ awýr wrý nê mẽ akarõ mã agjê ka mẽ rĩ kormã anhrà nê ma nhỹhým krĩ hkôt ri mẽ kãm kapêr jarênh o ri mẽ hkôt apa.

⁵—Juãw Paxis na pre hte Tirtùm mã gôx kãm mẽ hkrã kumrãr o pa. Tã koja Tirtùm tokyx mẽ awýr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awýr kurê. Koja hã apkati grêre nhùm mẽ awýr kurê nhùm ixpãnhã mẽ awýr wrý nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rùm ajapôj nê ma mẽ kãm Tirtùm kapêr jarênh o ri mẽ hkôt apa. Anê.

Jejus akupým kaxkwa hwýr àpir ã
harênh
Makre 16.19; Rukre 24.50

⁶ Tã nhũm mẽ axte akuprõ. Jejus nẽ ÿ hã mẽ ahkre ho mẽ pa xwýnh maatijaja nhũm mẽ hixêt pê Oriwêhti nhĩmõk ã axte axpẽn wýr akuprõ. Hãmri nhũm mẽ amnhĩ tã Jejus kukja nẽ kãm:

—Kwa Pahihti mẽ inhmã mẽmoj jarẽ. Xà kot kaj tokyx apê Tĩrtũm kot mẽ ixwýr amẽn xwýnh ã amnhĩ jarẽ nẽ Rõm nhõ xwýnhjê nẽ mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anẽ.

⁷ Hãmri nhũm mẽ kãm:

—Nà Inhĩpêxà pix na ã mẽmoj kot anhýrja kukamã àhpumunh. Tapxipix na kot mẽmoj tanhmã ho hã arĩgro nẽ mẽmoj tanhmã ho hã mytwrý pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarẽnh ma?

⁸ Nà kot paj ãm mẽ amã mẽmoj to pyxire nẽ hkukamã harẽ. Koja Tĩrtũm tokyx mẽ awýr amnhĩ Karõ rẽ nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkõt anhrã nẽ ma mẽ kãm ixkapêr jarẽnh o ri mẽ hkõt apa. Jar Jerujarẽ kamã nẽ pika pê Jutej kõt nẽ nhãm pika pê Samar kamã nẽ pika piitã hkõt mẽ kãm ijarẽnh o ri mẽ hkõt apa. ã mẽ ate amnhĩ nhĩpêx anhýr pix kukamã kot paj mẽ amã harẽ. Anẽ.

⁹ Nhũm pre ã Jejus mẽ kãm kapêr anẽ hãmri nẽ mẽ kêp kãnhmã àpir o tẽ nẽ mẽ noo mã ma kaxkwa hwýr àpir o tẽ nẽ kakrãm axà nẽ mẽ kêp akunok.

¹⁰ Hãmri nhũm mẽ tee ri hapêr o kuhê rãhã nhũm mẽhõ myja wa axkrut nẽ mẽ hwýr wrý nẽ mẽ kutã wa xa. Wa ê hakaj nẽ wa xa.

¹¹ Hãmri nẽ mẽ kãm:

—Pa Garirej nhõ xwýnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupým amnhĩ wýr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nẽ. Koja nhýrmã man akupýn mẽ awýr wrý. Te mẽ arũm kaxkwa hwýr àpirja pyrã nẽ akupýn mẽ awýr wrý ka mẽ omu. Anẽ.

Akupým Jerujarẽ hwýr mẽ mrar ã mẽ harẽnh

Rukre 24.52

¹² Tã nhũm Jejus nhý hã mẽ ahkre ho mẽ pa xwýnh maatijaja wa kuma nẽ awjanã nẽ ma akupým krĩm mra. Hixêt pê Oriwêhti rũm ma akupým Jerujarẽ hwýr mra. Wýr jawý nhũm mẽ akupým hpõx tokyx anẽ.

¹³ Hãmri nẽ akupým kýx pê ixkreja wýr api nẽ agjê. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pê Apew kraja nẽ

Simãw Jerox nẽ

Jut pê Xiakre hkraja.

Mẽ piitã Jejus nhý hã mẽ ahkre ho mẽ pa xwýnh maatijaja na pre mẽ.

¹⁴ Nẽ mãñnẽn mẽ hkõt mẽ hkwyjaja. Jejus katorxà Marir nẽ Jejus tøjaja nẽ Jejus kot tanhmã mẽni ho mex to xwýnh kwýjaja nhũm prem kýx pê ixkreja wýr Jejus nhý hã mẽ ahkre ho mẽ pa xwýnh maatijê hkõt gjêx pa. Hãmri nẽ xatã axpẽn wýr akuprõ nẽ Tĩrtũm mã amnhĩ jarẽnh o hkrĩ.

Tĩrtũm kot Jut Kariot pãnhã mẽhõ xãm ã harẽnh

Matêwre 27.3-10; Juãw 15.27

¹⁵⁻¹⁹ Tã nhũm mẽ kot Jejus kõt amnhĩ xunhwýr xwýnhjaja ra kêp 120. Jakamã nhũm mẽmo arĩgro hã axpẽn wýr akuprõ nẽ hkrĩ. Nhũm Simãw Pêtre kãnhmã xa nẽ tanhmã mẽ kãm Jut Kariot jarẽnh to nẽ mẽ kãm:

—E Jejus kõt ixtõ nẽ ixtõxjaja. Pa mẽ amã tanhmã finat Jut Kariot jarẽnh to ka mẽ inhma. Na pre axtem nẽ mẽ pahkwýjê mã Jejus ã amýnê nẽ hpãnhã kãxpore hkwy jamý nẽ o tẽ nẽ ho amnhĩm pyka hkwy japrõ. Tã tanhmã amnhĩ to nẽ nhýri õ pyka kamã tẽm nẽ amnhĩ tu katõk nẽ hkrêx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwýnhjaja harẽnh ma nẽ pykaja ã hixi mẽ nhũm kêp “pyka

kamrôhti.” No mẽ pahpê Ijaew kapêr kãm kêp “Ajetãm.” Amnepêm na pre Tirtũm Karõ finat Tawi mã Jut Kariot kukamã tanhmã harênh to. Kormã kator nê kot tanhmã amnhĩ to hkêt tã nhũm ra hkukamã omu nê Tawi mã harê. Kot axtem nê mẽ kãm Jejus ã àmnênhja nhũm hkukamã omu nê Tawi mã harê nhũm kuma nê ô ri hã kagã. Tã nhũm kot hkukamã hã kagã hkôt nhũm ã Jejus nhĩpêx anê. Jut Kariotja mẽ panhĩõ na pre. Na pre Jejus mẽ pahpyrà nê amnhĩm kuta. Mẽ pahpyrà nê ý hã kapêr jarênh o pa kaxyw. Tã nhũm axtem nê ã hipêx anê.

²⁰ Nom na pre Tawi kot Tirtũm mex ã grer ã kagã kot ra hkukamã tanhmã harênh to. Kagã hkwy pê Sam kamã kot harênh kot:

Kot amnhĩ tomnuj xwýnhhta nhõrkwy koja hkaprýn kuhê ho kuhê nhũm mēhõj mýr pê kamã pa hkêt kumrêx. Koja ãm arĩ hkaprýn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mēhõ mýr pê ho amnhĩptã nê hpãnhã Jejus nhĩ hã mẽ ahkre ho pa. Anê.

Ã Tirtũm kapêr ã kagã htũm kot Jut Kariot kukamã harênh kot anhýr.

²¹ Jakamã e ixkwýjaja. Kot puj mẽ hpãnhã mẽ atõ xãm ka Jut mýr pê mẽ pahpê Jejus nhĩ hã mẽ ahkre ho ixpa xwýnhjê hkôt Jejus akupým htĩr ã harênh o apa.

²² E mẽ atõ na ka pre mẽ ixpyràn finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xà hkrax rũm ka mẽ ixkôt ri omunh o ri apa? Nê htyk kãm omu nê akupým htĩr kãm omu nê ma akupým kaxkwa hwýr àpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhýr ã omunh par o ri hkôt apa? ã mẽ ate kot amnhĩ nhĩpêx anhýr ã omunh o apa xwýnhjê hõ kot paj mẽ ata ka Jut Kariot mýr pê mẽ ixpyràn ma mẽ kãm Jejus akupým htĩr ã harênh o ri apa. Anê.

²³ Nhũm pre ã Simãw Pêtre mẽ kãm kapêr anê. Hãmri nhũm mẽ kuma

nê axpên pumunh o hkrĩ hãmri nê Maxitre mẽ Jujere wa kãm hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi.

²⁴⁻²⁵ Hãmri nhũm mẽ wa hã Tirtũm kukja nê kãm:

—Pa Tirtũm? Nà na pre finat Jut Kariotja Jejus kaga nê ty nê kot amnhĩ tomnuj mýrapê ma mẽ kot amnhĩ xà htýx kamã hamak tũm xàta wýr ma mō. Tã ot pa mẽ ixte mēhõ kot mýr pê mẽ ixpyrà nê Jejus nhĩ hã mẽ ahkre ho pa kaxyw mēhõ hã akukjêr kaxyw akuprõ. Ate mẽ xpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tirtũm. Ate mẽ ija-maxpêr kôt mẽ ixpumunh par nê mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kên pijakrutja ã wa hixi xi nê ho àk nê hõ py. Hãmri ka amã hprãm xwýnhhta ta. Kêr pa mẽ kên pumunh kêt rãhã hõ py nê hã hixi pumu nê amã hprãm xwýnhhta kôt omunh kurê kumrêx. Anê.

²⁶ Nhũm prem ã Tirtũm mã kapêr anê hãmri nê kênja o axkamur nê ho àk nê omunh kêt rãhã ja py nê omu nhũm hã Maxitre nhĩxi nõ. Jakamã nhũm Jejus nhĩ hã mẽ ahkre ho mẽ pa xwýnh maatiijaja amnhĩ kôt kumê nhũm mẽ akupým kêp 12.

2

Tirtũm Karõ kot mẽ hwýr wrýk ã harênh

Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pê Pêtekos kato nhũm mẽ kot Jejus kôt amnhĩ xunhwýr xwýnhjaja nhỹri axpên wýr akuprõ nê hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpên wýr akuprõ nê hã hkĩnh. Jakamã nhũm mẽ kot Jejus kôt amnhĩ xunhwýr xwýnhjaja haxwýja axpên wýr akuprõ.

² Hãmri nê kaxkwa kamã mẽmoj ma. Nhũm mẽmoj te kôk xàpêr týx krihkrit pyrãk o mẽ hwýr wrýk o mẽ

ně mẽ pikuprõnh xà hã ixkreja wỳr axà nhũm mẽ piitã kuma.

³ Hãmri nhũm mẽmoj te kuwy jakrax pyrækja ahpỳnhã mẽ hwỳr anhrà nẽ mẽ hkrã nhĩmõk ã hikwỳ.

⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptàr kaxyw mẽ hkarõm gjêx pa nhũm mẽ ý hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỳnhã mẽ kapêr kwỳ ho Tĩrtũm mã mex o mex ã harê. Na pre Ijaew kwỳjaja ahpỳnhã pyka hõ kamã ri mẽ hkõt pa nẽ mẽ kapêr ma nẽ ho kapêr o pa. Tã akupỳm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprõt nẽ ahpỳnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harênh to ho:

–Kokỳỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỳnhã ri mẽ pakapêr o kapêr. Ahpỳnhã mẽ pakapêr nẽ ahpỳnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat

nẽ Met

nẽ Erãw

nẽ Mēsopotãm

nẽ Jutej

nẽ Kapatos

nẽ Põt

nẽ As

nẽ Prik

nẽ Pãpir

nẽ Ejit

nẽ Sirẽn wỳr Ripja

nẽ krĩ pẽ Rõm

nẽ gõ hipõk pẽ Kret

nẽ Arap.

Nẽ mẽ pahkwỳjaja mẽ pahpê Ijaew kumrêx

nẽ mẽ pahkwỳjaja amarĩ ri amnhĩ to Ijaew.

Ãm ahpỳnhã mẽ panhõ pyka nẽ ahpỳnhã ri mẽ pakapêr.

–Tã pu mẽ ahpỳnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harênhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harênh anẽ nẽ tee ri mẽ omunh o kuhê. Amnhĩ jaêr pẽ amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

–Kokỳỹ. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwỳjaja axtem nẽ ri mẽ hã hpêr o axkê nẽ axpẽn mã:

–Tk. Ãm mẽ pipãnh ã ã ri mẽ kot amnhĩ nhĩpêx anhỳr kênã. Anẽ.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr anhỳrja ma hãmri nẽ kỳx pẽ mẽ kãm kapêr nẽ mẽ kãm:

–E Jerujarẽ nhõ xwỳnhjaja nẽ mẽ apê ixkwỳ Ijaew. Pa mẽ amã mẽmoj jarẽ ka mẽ inhma nẽ inhmar tỳx nẽ.

¹⁵ Na ka mẽ atỳx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpõk wỳr htêm kênã. Na hte Ijaew kwỳhtã kagõxyhti ho hkõm kêt nẽ.

¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhỳrja kukamã mẽ ijarẽ nhũm ý hã kapêr o pa xwỳnh finat Joew mẽ ixkukamã hã kagà. Nẽ hã kagà ho:

¹⁷ Koja nhỹrmã mẽmoj piitã hapêx kaxyw pa mẽ piitã mẽ hwỳr Ixkarõ rẽ nhũm ma mẽ hwỳr wrỳ nẽ mẽ hkarõ mã agjê. Hãmri nhũm mẽ hkanrêhã mẽ hkra xàptàr nywjaja ma mẽ kãm ixkapêr jarênh o ri mẽ hkõt pa. Kõja mẽ hpimtir kãm amnhĩ kukamã mẽmoj pumu. Nẽ mẽhpigêtjaja haxwỳja. Kot paj mẽ hpimtir kãm tanhmã mẽ kãm ixkapêr to.

¹⁸ Nẽ kot paj mẽ kot ixkõt ri tanhmã amnhĩ nhĩpêx to ho mẽ pa xwỳnhjê hwỳr Ixkarõ rẽ nhũm mẽ ý hã ma mẽ kãm tanhmã ixkapêr jarênh to ho ri mẽ hkõt pa.

- 19 Kot paj kaxkwa kamã nê pyka kamã aa mẽ kot mẽmoj pumunh kêt kwỳ ho anê nhũm mẽ amnhĩ jaêr pê omu. Jao nhỹri mẽ hkamrô pumu nê kuwy pumu nê kuwy hkũm pumu hãmri nê tee ri amnhĩ kukamã hamaxpêr.
- 20 Nê koja myyti ahtyk nhũm mytwrýre haxwýja te mry kamrô pyræk. Pahihti Jejus akupỹn hpôx xà hã arĩgro xwýj ri koja mẽmoj ã amnhĩ nhĩpêx anê. Akupỹn hpôx xà hã arĩgro koja mex kumrêx.
- 21 Tã koja mēhō mẽmoj kot ã amnhĩ nhĩpêx anhỹr ã omu nê amnhĩ kaxyw inhmã hamaxpêr nê amnhĩ to ixwý pa kuma nê ho ixkra nê mẽmoj punujta pê utà. Anê.

Na pre ã Tĩrtũm kapêr anê nhũm finat Joewja mẽ pamã hã kagà.

22 E pa mẽ amã tanhmã Jejus jarênh to ka mẽ inhma. Nà Najare nhõ xwýnh na pre. Mẽ pahte Tĩrtũm nhỹ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwýr kumê nhũm ý hã mẽ panoo mã tanhmã amnhĩ nhĩpêx to ho pa. Nê aa mẽ pahte mẽmoj pumunh kêt kwỳ ho anhỹr o pa pu prem hã omu.

23 –Tã ka prem tanhmã kaxyw ajamaxpêr punuj to nê apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwýr kumê ka mẽ axtem nê apĩ. Jao mẽ kot htýx ri amnhĩ nhĩpêx o mẽ pa xwýnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amýnê nhũm mẽ ã mẽ amã hprãm xà hkôt hipêx anê nê mẽ amã kupĩ.

24 –Tã nhũm Tĩrtũm akupỹm ho htĩr nhũm akupỹm htĩr o htĩr nhũm mẽ htykja tee ri kot amnhĩ kôt mēnh prãm kaprý.

25 Amnepêm na pre finat Tawija Jejus akupỹm htĩr kukamã harê. Te Jejus tãm kapêr pyræk o kapêr nê kapêr o:

Na hte Pahi Maati ixkôt pa ho pa rãhã nê. Kot inhĩhkô hã ixtãnopxar o pa jakamã kot paj inhmã ma hkêt nê ri ixãmnhĩx ijamakêtkati nê ri ixpa.

26-27 Pa Tĩrtũm? Nà kot paj nhỹrmã ixtyk tã arĩ amnhĩ wýr akãm ama. Kot kaj mẽ htykjê kamã ixkarõ rer kêt nê. Ixte akapêr kôt amnhĩ nhĩpêx mex o ri ixpa jakamã koja inhĩ kormã omnu nê hkro hkêt ri ka akupỹm ixto ixtĩr. Jakamã na pa inhmã ixtyk puma hkêt nê ixkĩnh nê ijamakêtkati nê ri ixpa. Nê amnhĩ kĩnh jarênh rãhã ho ri ixpa.

28 Na ka pre akupỹm ixto ixtĩr ã amnhĩ jarê pa ixtĩr tũm nê ixpa ho ixpa kaxyw. Tã ate ixkôt ri apa rãhã jakamã pa ixkĩnh nê ri ixpa. Anê.

29 ã na pre mẽ panhĩgêt finat Pahi Tawija Jejus htyk nê akupỹm htĩr kukamã harênh anê. No tãm amnhĩ jarênh kêt nê. Tawija na pre ty nhũm mẽ haxà nhũm htem arĩ haxàr xà hã pika ho mex o pa. Tã tãm ã kot amnhĩ jarênh anhỹr ro nhỹx akupỹm htĩr nhũm mẽ arĩ haxàr xà kaprý ho mex o pa hkêt nê.

30 Pahi Tawi kêp Tĩrtũm nhỹ hã kapêr jarênh o pa xwýnh jakamã nhũm Tĩrtũm kãm hkanrêhã htãmnhwý Jejusja kukamã harê nê kãm:

Koja nhỹrmã akanrêhã atãmnhwýjê hõ amýr pê apyrà nê mẽ ho amnhĩptàr o pa. ãm hãmri na pa amã ja jarê. Anê.

31 Nhũm pre ã Tĩrtũm Tawi mã mẽ pakaxyw ãm mã xwýnhhta jarênh anê nhũm kuma. Nê mar týx jakamã hkukamã htyk nê akupỹm htĩr ã harê nê hã kagà. Nê hã kagà ho:

Koja Tĩrtũm mẽ htykjê kamã hkarõ rer kêt nê nhũm aa ã omnu nê hkro kêt. Anê.

ã na pre finat Tawija Jejus Kris kukamã harê nê hã kagà anê.

32 Kot harênh xwýnh Jejusja tãm na pre Tĩrtũm akupỹm ho htĩr pa mẽ pamjaja akupỹm htĩr kãm omu.

Hāmri nē mẽ ixte omunh xà hkôt à mẽ amā harēnh anē. Anē.

Nhũm pre ã Simāw Pêtre mẽ kām Jejus jarēnh anē. Hāmri nē mẽ kām:

³³ –Na pre Tirtũm akupỹm amnhĩ wỳr Kra Jejus o api. Hāmri nē kām anē nhũm ìhkô hã mẽmoj piitã ho amnhĩptàr o hkrĩ. Hāmri nhũm Tirtũm kot kām amnhĩ jarēnh xà hkôt kām amnhĩ Karô gõ. Tã nhũm ra amnhĩ pyrà nē mẽ ixwỳr kurē nhũm jarãhã mẽ ixwỳr te kuwy jakrax pyrà nē mẽ ixwỳr wrỳ nē mẽ ixkarô hwỳr gjêx pa. Hāmri pa mẽ ý hã ahpỹnhã mẽ akapêr o ixkapêr ka mẽ inhma. Tã mẽ akwỳjaja axtem nē mẽ xpipãnh ã mẽ ixkamnhĩx.

³⁴ No finat Tawija na pre tãm kaxkwa hwỳr àpir ã amnhĩ jarēnh kêt nē. Jejus kot ì ho kaxkwa hwỳr àpirja na pre harē nē harēnh o:

Na pre Tirtũm inhõ Pahihti mã kapêr nē kām:

³⁵ “E jar inhĩhkô hã nhỹ.

Pa amā mẽ kām akurē xwỳnhjê gõ ka mẽ ho amnhĩptàr o akrĩ.” Anē.

Ã na pre finat Tawija Tirtũm kapêr jarēnh anē. Nom tãm ì rãhã kaxkwa hwỳr àpir ã amnhĩjarēnh kêt nē. Pahihti Jejus na pre ã hã harēnh anē.

³⁶ Jakamã kwa ixkwỳ Ijaew. Mẽ inhma nē inhmar tỳx nē. Mẽ ate Jejus ã axàmnēnh nhũm mẽ kot mẽ amā pĩ kahpa hã hpĩr xwỳnhnta. Tãm na pre Tirtũmja kệp mẽ panhõ Pahihti kaxyw ãm. Nē kệp mẽ papytãr xwỳnh kaxyw mẽ pakaxyw ãm. Anē.

³⁷ Nhũm pre ã Simāw Pêtre mẽ kām ujarēnh anhỹr o xa. Hāmri nhũm mẽ tee ri ujarēnhja ma nē hkaprĩ nē. Nē tee ri amnhĩ kukamã hamaxpêr nē hamaxpêr o:

–Hêxta waa nē. Pêr ãm hāmri na pre Jejus mẽ pamã amnhĩ jarēnh tã pu prem amnhĩ kaxyw hkôt paja-maxpêr kêt nē axtem nē kupĩ. Anē.

Hāmri nē amnhĩ tã mẽ hkukja nē Simāw Pêtre mã:

–Kwa ã kot anhỹr jakamã tanhmã kot paj mẽ amnhĩ nhĩpêx to? Anē.

³⁸ Hāmri nhũm mẽ kām:

–Nà kêt ka mẽ tee ri ate amnhĩ tomnuj mã ajamaxpêr nē akaprĩ nē.

Hāmri nē Jejus Kris kôt amnhĩ xunhwỳ. Pa mẽ ja hã mẽ apumu nē Jejus nhỹ hã mẽ akrã kumrã. Hāmri nhũm Tirtũm ja hã mẽ apumu nē te amnhĩ katut kôt mẽ ate amnhĩ tomnuj piitã rēnh par pyrà nē axte kām hamaxpêr kêt nē. Hāmri nē mẽ ixkuxwar mẽ awỳr amnhĩ Karô rē.

³⁹ Kām mẽ awỳr rēnh prãm. Mẽ amā nē mẽ akanrēhã mẽ akra nē mẽ atàmnhwỳjê mã nē mẽ kot kormã Tirtũm kapêr mar kêt xwỳnhjê mã. ãm mẽ kot amnhĩ to hwỳr xwỳnh piitã nhũm kām mẽ hwỳr rēnh prãm. Anē.

⁴⁰ Nhũm pre ã Simāw Pêtre mẽ kām ujarēnh anē. Mẽ kām kapêr xihtỳx o kapêr ry nē. Hāmri nē mẽ kām:

–Koja nhỹrmã Tirtũm mẽ kot tanhmã amnhĩ tomnuj to ho mẽ pa xwỳnhjaja tanhmã mẽ homnuj tỳx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nē. Anē.

⁴¹ Hāmri nhũm mẽ hkwỳjaja kapêr mar tỳx nē amnhĩ kaxyw Jejus kôt hamaxpêr nē hkôt amnhĩ xunhwỳ. Mẽ ohtô rax nē hkôt amnhĩ xunhwỳ. Mẽ kệp 3.000 nē hkôt amnhĩ xunhwỳ. Hāmri nhũm mẽ kot Jejus nhỹ hã kapêr jarēnh o mẽ pa xwỳnhjaja mẽ hkrã kumrãr pa. Mẽ kệp Jejus kwỳ hã amnhĩ to amnhĩrit kaxyw mẽ hkrã kumrãr pa.

⁴² Hāmri nhũm mẽ ra mẽ kot Jejus kôt amnhĩ nhĩpêx xwỳnhjê hkôt amnhĩ nhĩpêx o pa nhũm Jejus nhỹ hã mẽ ahkre xwỳnh maatijaja apkati mẽ Jejus kapêr o mẽ ahkre nhũm mẽ mar tỳx nē ra Jejus kôt amnhĩ nhĩpêx mex o mō. Nē gaa nē hkôt amnhĩ nhĩpêx mex o pa. Mẽ kām kapêr mar prãm tỳx jakamã na pre htem axpên wỳr akuprô nē axpên kutã apku nē Tirtũm mã amnhĩ jarēnh o hkrĩ. Nē mẽ kām axpên to mex pix prãm o axpên kôt pa ho pa.

Jejus kwỳ kot tanhmã amnhĩ nhĩpêx to hã mẽ harēnh
Atre 4.32-35

⁴³ Tã nhũm Jejus nhỹ hã mẽ ahkre ho mẽ pa xwỳnh maatijaja xatã Tirtũm nhỹ hã aa mẽ kot mẽmoj

pumunh kêt kwỳ ho anhỹr o ri krĩ nhõ xwỳnhjê hkõt pa nhũm mẽ piitã ja hã mẽ omu. Amnhĩ jaêr pê mẽ omu nẽ mẽ kamã no pyma ho tee ri tanhmã Tĩrtũm mã hamaxpêr to.

⁴⁴ Nhũm mẽ kot Jejus kõt amnhĩ xunhwỳr xwỳnh piitã mẽmoj to axpên kutã nojarêr o pa. Jao axpên pê ri mẽmoj to õxy hkêt nẽ pa.

⁴⁵ Jakamã nhũm mẽhõ kêp amrakati nhũm mẽ ja hã omu hãmri nẽ õ pyka hkwy ho wênê rỳ mẽ hikukrêx kwỳ ho wênê nẽ kàxpore jamỳ nẽ ma o mra nẽ mẽ kãm kugõ. Na pre hte ã mẽ kot Jejus kõt amnhĩ xunhwỳr xwỳnhjaja axpên nhĩpêx anhỹr o pa.

⁴⁶ Hãmri nẽ apkati mẽ Tĩrtũm mã amnhĩ jarênh xã hã ixkre hwỳr mra nẽ kãm mex o mex ã harê. Nẽ hamakêtkati nẽ amnhĩx ri hkĩnh kãm axpên nhõrkwy hkõt ri apkur o pa.

⁴⁷ Pê Tĩrtũm mã mex o mex ã harênh o ri axpên kõt pa. ã mẽ kot amnhĩ nhĩpêx anhỹr o pa jakamã nhũm krĩ nhõ xwỳnh piitã kãm mẽ hkĩnh nẽ. Nẽ mẽ hkwyjaja apkati mẽ mẽ hwỳr mra nẽ mẽ hkõt axkamẽ nẽ mẽ urak nẽ Jejus kõt amnhĩ xunhwỳ nhũm Tĩrtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mỗ.

3

Te grà xwỳnh jarênh

Juãw 14.12-14; Atre 14.8-10

¹ Tã nhũm apkati hõ hã nhũm Simãw Pêtre mẽ Juãw wa ma Tĩrtũm mã amnhĩ jarênh xã hã ixkre hwỳr wa tẽ. Na pre hte myt àhpanh grire nhũm mẽ piitã kot Tĩrtũm mã amnhĩ jarênh kaxyw hwỳr mra. Jakamã nhũm Simãw Pêtre mẽ Juãw wa haxwỳja ma hwỳr wa mra.

² Nhũm mẽhõja hakwakrem hkrĩ. Katorxã nhõxã hkre rũm hte grà nẽ kator xwỳnhta. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkràmnhwỳjaja apkati mẽ hamỳ nẽ ma o pa nẽ Tĩrtũm mã amnhĩ jarênh xã hã ixkre jakwakrem hkrĩ nhũm mẽ hwỳr o hkrĩ. Hakwakreja mẽ kot kãm: “Mẽ gjêx xã

mex” anhỹr xwỳnhta kapem hwỳr mẽ mrar xwỳnhjê hwỳr o hkrĩ.

³ Tã nhũm Simãw Pêtre mẽ Juãw wa tẽ nẽ ixkreja wỳr wa àr o tẽ nhũm hte grà xwỳnhta wa omu nẽ kàxpore hã wa kuwỳ

⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htỳx ho wa kot kãm kàxpore hkwy nhõr ã wa hkamnhĩx nẽ wa omu

⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xã ho tanhmã anhĩpêx to. E pa Jejus Kris pê Najare nhõ xwỳnhta nhỹ hã amã ixkapêr jakamã tokyx kànhmã xa nẽ ri mra. Anẽ.

⁷ Hãmri nẽ upôk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra.

⁸ Hãmri nẽ hte mex ã amnhĩ pumu nẽ hkĩnh tỳx nẽ. Nẽ hkĩnh xàj ma wa hkõt harĩ ho tẽ nẽ wa hkõt ixkrem axã. Tĩrtũm mã mex o mex ã harênh pê harĩ ho wa hkõt tẽn axã.

⁹ Hãmri nhũm mẽ piitã amnhĩ jaêr pê akupỹm mex ã omu nẽ kamã no pyma nẽ.

¹⁰ Nẽ axpên mã:

—Kokỹỹ mũjti na pre hte mẽ gjêx xã mex kamã mẽ hwỳr rãhã ho hkrĩ htã nhũm Tĩrtũm tanhmã ho nhũm kànhmã xa nẽ ri mrar mex kurê kumrêx. Hêxta waa nẽ. Anẽ.

Simãw Pêtre kot mẽ kãm ujarênh

Rukre 24.46-47; Atre 2.14-36

¹¹ Hãmri nhũm hte mex xwỳnhja Simãw Pêtre mẽ Juãw wa hkõt ixkre hwỳr axã nẽ wa kuri xa. Nhũm mẽ piitã amnhĩ jaêr pê harênh ma nẽ hwỳr hprõt nẽ agjê nẽ omu. Mẽ kot ixkre nhĩkjê jarênh o: “Pahi Sarumãw nhõ” anhỹr xwỳnh jarênhja wỳr nhũm mẽ hprõt nẽ hte mex xwỳnhta kamã no pyma ho kuhê. Nẽ kuri Simãw Pêtre mẽ Juãw wa omu nẽ axpên mã wa harênh o:

—Hêxta waa nẽ. Tanhmã na we wa amnhĩ to nẽ akupỹm kãm hte ho mex nhũm ri mra?

Anẽ nẽ wa kamã no pyma nẽ.

12 Hāmri nhūm Simāw Pêtre mē kuma nē mē kām:

—Pa ixkwỳjaja. Kwa mēmo na ka mē ri mē ixkamā ano pyma ho akuhê? Xà wa ixàhpumunh tỳx xà ho na pa wa ho mex? Nà ja kot anhỳr kêt. Rỳ xà wa ixte Tirtūm kôt amnhĩ nhĩpêx mex o ixpaja o na pa wa ho mex? Nà mãnên ja kot anhỳr kêt.

13-17 Mē ate omunh xwỳnhta Jejus tām kot ho mex kênã. Kot amnhĩ kaxyw kām hamaxpêr tỳx jakamā nhūm akupỹm ho mex ka mē omu.

—Finat Apraãw nē Ijak nē Jako mē hkwyjaja kot hkôt amnhĩ nhĩpêx o pa xwỳnh pê Tirtūmja. Tām na pre akupỹm Kra Jejus o htĩr nē mex o mex ã harê. Mē ate hã axàmnên nhūm mē kot hpĩr xwỳnhta. Pahihti Pirat kot kām urer kaxyw tã ka mē nê kām akapêr kām axihtỳx nē. Nom Jejus tām kot amnhĩ nhĩpêx o pa xwỳnh na pre. Na pre hte amnhĩ nhĩpêx mex rãhã ho pa htã ka mē axtem nē hkaga. Nhūm pahihti Pirat mē ate kot kām urer kêt ã axihtỳx nhūm kām urer kêt nē õ pôristi mã kugõ nhūm mē amã kupĩ. Mē kajaja mē amã hprãm xà hkôt mē amã kupĩ. Tirtūm kot mē pahwỳr mênh tã ka mē axtem nē apĩ.

—Nom mē ate kêp Tirtūm Kra hã omunh kêt jakamã na ka prem ã hipêx anê. Mē kot mē ato amnhĩptar xwỳnhjê mē na ka prem amarĩ apĩ. Na prem mē axàmnên xà hkôt mē amã pĩ kahpa hã kunhõ nē ã hpĩr anê. Kêp akupỹm mē pahto mē pahťĩr xwỳnh tã ka prem axtem nē apĩ. No nhūm Tirtūm akupỹm ho htĩr pa prem akupỹm htĩr kām omu.

18 —Amnepê m Tirtūm nhỹ hã kapêr jarênh o mē pa xwỳnhjaja na prem Tirtūm kot mē pakaxyw ãm xwỳnhja kukamã tanhmã harênh to nē hã kagã nē mē kām harênh o pa. Kot amnhĩ xà htỳx kām hamak kām htykja kukamã nhūm pre htem harênh o pa. Tã ã Tirtūm kot kukamã harênh anhỳr xàja kôt ka mē ã hipêx anê nē apĩ.

19 —Jakamã kwa mē tee ri mē ate amnhĩ tomnuj ã amnhĩ pumu nē tokyx hkaga. Hāmri nē amnhĩ to

Tirtūm wỳ kê mē anê mē ate amnhĩ tomnuj piitã amnhĩ katut kôt rênh pa.

20 Hāmri nē mē ato mex nē ka mē kukwak ri akĩnh nē ajamakêtkati nē axàmnhĩx ri apa. Koja nhỹrmã akupỹn mē pahwỳr Jejus mē. Ra kot mē pakaxyw ãm kênã.

21 —Nom koja tokyx akupỹn wrỳk kêt nē. Koja kormã kaxkwa kamã pa rãhã nhūm Tirtūm akupỹm kot mēmoj piitã ho mex par mē nhūm rĩ kormã akupỹn mē pahwỳr wrỳ. Amnepê m Tirtūm nhỹ hã kapêr jarênh o pa xwỳnhjaja kot ja kukamã harênh nē hã kagã xà hkôt.

22 —Na pre finat Mojes haxwỳja Tirtūm nhỹ hã mē pahpãmjê mã tanhmã ja jarênh to nē harênh o:

Koja nhỹrmã mē panhõ Pahi Maati Tirtūmja te kot ra mē akaxyw pa ixãmja pyrã nē axte mē panhĩõ xãm. Mē panhĩõ koja. Koja nhỹrmã inhmỳr pê mõi põi nē mē amã Tirtūm kapêr jarênh o pa. Ka mē kapêr ma nē mar tỳx nē kapêr kôt amnhĩ nhĩpêx o ri apa.

23 Koja mēhõ kuma nē ãm kuma nē hkôt amnhĩ nhĩpêx kêt nē nhūm Tirtūm tee ri ja hã omu nē kêp hkra hkêt ã harênh kurê kumrêx. Anê.

24 ã na pre finat Mojesja mē kām Jejus kukamã ujarênh anê. No ãm tapxipix na pre ã harênh anhỳr kêt nē. Tirtūm nhỹ hã mē kapêr o mē pa xwỳnh piitã na prem ã mē kām harênh anhỳr o pa. Kot harênh o pa xwỳnh kot wa finat Sãmuewja nē hkôt mē hkwyjê piitã ã Jejus kukamã hkwyjê mã harênh anhỳr o pa.

25 —Tã mē pahpê mē hkamrõ hkwy na pu mē. Mē pahpê mē hkanrêhã mē htãmnhwỳy. Mē pakaxyw na pre Tirtūm ã mē kām kapêr anê. Nê Kraja kukamã finat Apraãw mã kām:

Koja nhỹrmã akanrêhã atãmnhwỳjê hõ pyka piitã hkôt mē piitã mē ho mex o pa nhūm mē kukwak ri mex kumrêx nē ri pa. Anê.

26 ã kot Kra hkukamã harênh anhỳr tã mē pakumrêxjê hwỳr na pre kumê.

Kot mē pahto mex nhūm mē pahte amnhī tomnuj kaga kaxyw nhūm mē pahpē Ijaew kumrēxjē hwÿr kumē. Anē.

Nhūm pre ã Simāw Pêtreja hte grà xwÿnh pumunh o mē kuhé xwÿnhjē mā ujarēnh anē.

4

Simāw Pêtre mē Juāw wa kot mē àptār tūmjē mā kapēr ã wa harēnh

Rukre 21.12-13

¹⁻⁴ Nhūm Simāw Pêtre mē Juāw wa arī mē kām Tirtūm kapēr jarēnh o wa xa nē mē kām:

–Nà na pre Jejus ty nhūm Tirtūm akupÿm ho htír. Tã kot akupÿm ho htír jakamã koja nhÿrmã uràk nē akupÿm mē htyk xwÿnh piitã mē ho htír pa. Anē.

Hāmri nhūm mē kot wa mar o kuhé xwÿnh kwÿjaja wa kuma nē wa hkôt hamaxpēr nē wa urà nē Jejus kôt amnhī xunhwÿ. Jakamã nhūm ra mē kot Jejus kôt amnhī xunhwÿr xwÿnhjaja ohtô rax kumrēx. Ra mē kēp 5.000.

Hāmri nhūm axtem mē hkwÿjaja wa hwÿr mra nē wa mar o kuhé. Mē ò patre nhō pôristi krãhtūm mē Satusew nhō xwÿnh kwÿjē mē nhūm mē ma Simāw Pêtre mē Juāw wa hwÿr mra nē tee ri wa kot mē ahkre hã wa mar o kuhé. Nē mē kām akupÿm mē htír jarēnhja ma nē wa kamã gryk nē. Satusew nhō xwÿnhjaja na pre htem akupÿm mē htír kôt hamaxpēr kêt jakamã nhūm wa akupÿm mē htír jarē nhūm mē tee ri wa kuma nē hamaxpēr punuj nē wa kamã gryk kato. Hāmri nē wa hã amÿnē nhūm mē wa unē nē ma wa o tē nē mē hagiēnh xà kamã wa haxà. Ra myt grire nhūm mē wa haxà. Wa kot mē hagiēnh xà kamã hã apkati nhūm rī kormã mē kot ujarēnh ã tanhmã wa ho kaxyw.

⁵⁻⁶ Tã nhūm apkati nhūm mē ohtô nē wa ujarēnh ã wa mar kaxyw Jeru-jarē kamã axpēn wÿr akuprō. Ijaew pigêtjaja nē mē àptār tūm kwÿjaja. Nē mē kot finat Mojes kapēr o mē ahkre ho mē pa xwÿnhjaja. Nē mē ò patre

maati Anas mē hkwÿja. Nē Ijaew nhō juisti Kajpas mē Juāw ò mē Aresãnja. Nhūm mē kot Simāw Pêtre mē Juāw wa mar kaxyw axpēn wÿr akuprō.

⁷ Hāmri nē wa hã karō nhūm pôristi wa hwÿr tē nē wa haprô nē ma mē hwÿr wa o tē nē wa ho axà nē mē kutã wa ÿr nhūm wa nhÿ. Hāmri nhūm mē wa omu nē wa kām:

–E mē inhmã amnhī jarē. Mēhō xàhpumunh xà ho na ka pre wa hte grà xwÿnhhta ho mex? Mēhō na pre hwÿr war amē ka wa ho mex? Anē.

⁸ Hāmri nhūm Simāw Pêtre mē kām awjarē. Tirtūm Karō kot kām hamaxpēr o hihtÿx jakamã nhūm ÿ hã Ijaew pigêtjē mē mē àptār tūmjē mā awjarē nē mē kām:

⁹ –Tôe mēhō kot ho mex xwÿnhja ã mē ate wa ixkukjêr

¹⁰ jakamã kot paj mē amã harē ka mē ixte harēnhja ma. Wa ixpyrà nē mē apē Ijaew kēr ka mē wa ixkapēr mar tÿx nē. Jejus Kris pē Najare nhō xwÿnhhta. Mē ate hpír nhūm Tirtūm kot akupÿm ho htír xwÿnhhta. Tãm na pre àhpumunh tÿx o akupÿm hte grà xwÿnhhta o mex. ÿ hã ixte kaxyw kām ixkapēr nhūm tãm akupÿm ho mex.

¹¹ Tirtūm kot mex o mex ã harēnh nē mē pakaxyw ãm tã ka prem axtem nē hkaga. Nom Tirtūm kapēr ã kagà htūm kot ra mē akukamã ã mē ate amnhī nhÿpēx anhÿr ã mē ajarēnh nē mē ajarēnh kot:

Mē kot kēn o amnhīm òrkwÿ nhÿpēx kaxyw nē nhÿri kēn maati pumu nē htÿx omnuj ã hkamnhix nē hkaga. Mē kot hkaga htã nhūm Tirtūm mē kurom mex o kot kēn piitã hakrenh par ã omunh kurē kumrēx.

Anhÿr o kot mē ajarēnh. Te mē ate kēn maati kaga xwÿnh ã mē ajarēnh pyràk. Tã ka mē ã mē kot mē akukamã mē ajarēnh anhÿrja kôt te mē ate kēn maati kaga pyrà nē Jejus kaga nē apī. Tirtūm kot amnhīm mex o mex ã omunh nē harēnh tã ka prem axtem nē hkaga.

12 Tapxipix na hte mẽ panê mẽ pahte amnhĩ tomnuj rê. Mẽhõ koja uràk nẽ àhpumunh tỳx o mẽ panê kurê? Mẽhõ koja ahpỳnhã pyka piitã hkôt uràk nẽ ã mẽ panhĩpêx mex anê? Nà ãm amrakati kumrêx. ãm Jejus pix. Tapxipix na pre Tĩrtũm ja kaxyw ãm jakamã tapxipix na kêp mẽ pahkaprĩ xwỳnh maati. Anê.

13 Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nẽ axpên mã:

—Kwa wa kãm mẽ pahpyma wa hã hkwỳ jêt kêt kumrêx. Te ri wa htỳx ri wa pa pyràk tã wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anê nà? Anê.

14 Hãmri nẽ tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nẽ Simãw Pêtre wa kuri mex nẽ ãm nhũm mẽ kot no ho omunh jakamã wa kãm àkjêr kêt nẽ.

15 Hãmri nẽ wa kãm anê nhũm wa mẽ kêp kato nẽ kapôt ã xa nhũm mẽ tanhmã wa kãm nẽ kaxyw wa hã axpên ma nẽ axpên mã:

16 —Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupỳm hte grà xwỳnh ta mex ã wa omunh kênã kot puj kêt mẽ kãm wa kot ho mex hkêt ã wa harê.

17 Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karõ anê. Anê.

18 Nhũm mẽ wa hã axpên mar pa hãmri nẽ akupỳn wa hã karõ nhũm wa akupỳn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nẽ. ãm kwarĩ ho kwarĩ. Anê.

19 Hãmri nhũm wa tee ri mẽ kuma nẽ mẽ kãm:

—Nà Tĩrtũm tãm kot ja hã wa inhmã karõ kênã kot pa kêt wa mẽ akapêr ma nẽ harênh o ixpa hkêt nẽ.

20 Na pa pre wa Jejus kôt ri ixpa nẽ xatã kot tanhmã amnhĩ nhĩpêx to hã omunh o hkôt ixpa. Nẽ xatã tanhmã mẽ ahkre hto hã mar o hkôt ixpa. Nẽ akupỳm htĩr kãm omu. Jakamã tanhmã kot pa wa amnhĩ to nẽ mẽ kãm ja jarênh kêt nẽ? Nà kot pa wa mẽ akapêr mar xà hkôt ã amnhĩ nhĩpêx anhỳr hkêt nẽ. Anê.

21-22 Hãmri nhũm mẽ kuma nẽ tee ri mẽ kot tanhmã wa ho kaxyw. Te grà xwỳnh ta hte grà nẽ hkrĩ ho hã amgrà pê 40 tã ra akupỳm mex nhũm mẽ piitã ja hã omu nẽ hã axpên mã Tĩrtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nẽ kãm mẽ uma nẽ. Hãmri nẽ mẽ umaj tanhmã Simãw Pêtre mẽ Juãw wa ho hkêt nẽ. ãm axte wa kot Jejus jarênh o pa nê wa kãm kapêr kãm hihtỳx nẽ wa hano nhũm wa ma tẽ.

Mẽ kot amnhĩ to Tĩrtũm wỳr ã mẽ harênh

Matêwre 18.19-20

23 Tã nhũm Simãw Pêtre mẽ Juãw wa ma akupỳm Jejus kôt htõ nẽ htõxjê hwỳr wa tẽ nẽ mẽ kãm amnhĩ jarê. Nẽ patre krãhtũmjê mẽ mẽ àptàr tũmjaja kot Jejus kapêr jarênh nê wa hkurê kamã hihtỳxja nhũm amnhĩ tã mẽ kãm mẽ harê.

24 Hãmri nhũm mẽ wa kuma nẽ amnhĩ to Tĩrtũm wỳr kurê kumrêx nẽ kãm:

—Pa Pahi Maati? Nà mẽmoj piitã ho akator xwỳnh ta na ka. Na ka pre kaxkwa ho akato nẽ pyka ho akato nẽ gô xujanãr o akato. Hãmri nẽ kamã mẽmoj piitã ho akator pa.

25-26 Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nẽ Akarõ nhỹ hã akapêr kwỳ jarê nẽ hã kagà. Nẽ kagàja kamã mẽ kot Pahihti Jejus kutã amnhĩ xunhwỳr xwỳnhjê jarê nẽ mẽ hã kagà. Mẽ hkukamã mẽ hã kagà nẽ mẽ hã kagà ho:

Mẽmo mỳrapê na prem Ijaew kêt xwỳnhjaja Tĩrtũm kutã amnhĩ xunhwỳ?

Nẽ Ijaew haxwỳja. Mẽmo mỳrapê na prem htỳx ri hamaxpêr o ri pa?

Ně pyka piitã hkôt pahijaja na prem Pahi Maati kutã amnhĩ xunhwÿr pa.

Ně kot mẽ pakaxyw ãm xwÿnh Jejus Krisja nhũm mẽ mãânên kutã amnhĩ xunhwÿr pa.

Ně mẽ kot hpĩr kaxyw mẽ kãm hã amÿnê.

Kwa mẽmo mÿrapê na prem axtem ně ã amnhĩ nhĩpêx anê? Anê.

Ã na pre finat Tawija Akarõ nhÿ hã mẽ harê ně hã kagã anê Tĩrtũm.

²⁷ ãm hãmri na pre mẽ hkukamã mẽ hã kagã. Ra mẽ kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprõ. Pahi Erox ně pahi Põn Pirat ně mẽ ixkwÿjaja ně mẽ kêp Ijaew kêt xwÿnhjaja axpên wÿr akuprõ ně Akra Jejus kutã amnhĩ xunhwÿr ně mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem ně kutã amnhĩ xunhwÿr.

²⁸ –Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to ně hpĩrta kukamã ka pre hã mẽ omu. Tã mẽ ixwÿr amê nhũm prem kupĩ. No ãm ajamaxpêr xã hkôt.

²⁹ –Tã ka mẽ omu. Na mẽ Jejus ã mẽ ixkamã gryk tÿx ně tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt ně mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt ně ixãmnhix ri ixkĩnh ně ri ixpa. Nễ anhÿ hã mẽ kutã amnhĩ to htÿx ně arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰ –Akra Jejus mex o mex jakamã kot paj mẽ àhpumunh tÿx xã ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nễ mẽ kot aa mẽmoj pumunh kêt kwÿ ho anê. Kê mẽ omu ně axàhpumunh o axàhpumunh

ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tĩrtũm wÿr anê. Puh nhũm ixkreja mẽ kãm htertet tÿx ně nhũm Tĩrtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt ně. ãm amnhĩ to htÿx ně mẽ kãm Tĩrtũm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhĩpêx to hã mẽ harênh

Atre 2.42-47

³²⁻³³ Nhũm Jejus nhÿ hã mẽ ahkre ho mẽ pa xwÿnh maatijaja. Na pre Tĩrtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harênh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwÿr xwÿnh piitã mẽ kutã nojarêr rãhã ho pa nhũm mẽ ra ohtô rax ně. Nễ mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyrãk. Nễ axpên pẽ mẽmoj to õxÿ hkêt ně. Na pre htem axpên mã mẽ hikukrêx ně mẽ apkur xã jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nã ãm inhõ pix na.” Anhÿr o harênh kêt ně.

³⁴⁻³⁵ Na pre htem tõhã õ ixkre hõ ho wênê. Rÿ õ pyka hkwÿ ho wênê ně kãxpore jamÿ ně ma o mra ně Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ ně mẽ kêp amrakati xwÿnhjê mã ho angrã. Hãmri nhũm mẽ amnhĩm hamÿ ně ho amnhĩm awjaprõ. Jakamã na pre hte mẽ hkwÿjaja kãm prãm ně ri pa rÿ ê hkêt ně ri pa hkêt ně.

³⁶⁻³⁷ Jujere na pre ã amnhĩ nhĩpêx anê ně mẽ kaxyw õ pika hkwÿ ho wênê. Hãmri ně kãxpore py ně o tẽ ně Jejus nhÿ hã mẽ ahkre xwÿnh maatijê mã kugõ. Jujereja Ijaew nhõ patre ho ajuta xwÿnh na pre. Gõ hipòk pẽ Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o

mē hihtỳx o pa xwỳnh” anhỳr pyràk. Jakamã nhũm ò pika hkwỳ ho wēnē nē kàxpore py nē o tē nē Jejus nhỹ hã mē ahkre xwỳnhjē mã kugõ nhũm mē kupy nē mē kēp amrakati xwỳnhjē mã ho anhrà.

5

Ananĩs mē Sapire wa kot amnhĩ to hēx ã wa harēnh Karatas 6.7; Eprēw 10.26-31

¹ Tã nhũm Ananĩs mē hprõ Sapire wa Jujere jarēnh ma nē uràk nē ò pyka hkwỳ ho wēnē.

² Hãmri nē kàxpore py. Nom na pre wa ra hã axpēn ma. Jakamã nhũm Ananĩs Jujere kĩnhã kàxpore hkwỳ pix py nē o tē nē Jejus nhỹ hã mē ahkre xwỳnh maatijē mã kugõ. Nom katàt kòt mē kãm òr ã amnhĩ jarēnh kêt nē. Kot kàxpore ho pikjēr nē amnhĩm hkwỳ ho àrĩk ã amnhĩ jarēnh kêt nē. ãm mē kãm amnhĩ jarēnh o hēx. Te piitã òr par pyràk o amnhĩ nhĩpēx nē mē kãm:

—E ota ixkàxporeta. Na pa wa inhõ pika hkwỳ ho wēnē nē kàxpore hpy nē hpãnhã Jujere pyrã nē man mē awỳr piitã o tē. Anē.

³ Hãmri nhũm Simãw Pētre ra ã kot amnhĩ nhĩpēx anhỳr ã omu hãmri nē kãm:

—Tk. Kwa mon ka axtem nē Satanasti kapēr ma nē hkòt amnhĩ nhĩpēx nē te akàxpore piitã òr pyràk ã amnhĩ to axēx anē? Te ate piitã òr pyràk tã no ãm hkwỳ pix gõ. Hēxta waa nē. Na ka axtem nē Tĩrtũm Karõ mã akàxpore nhõr par o axēx.

⁴ Anhõ pyka kēnã. Nē hpãnhã kàxporeja anhõ kēnã. Kot kaj amã tanhmã ho hprãm xà hkòt mãmrĩ tanhmã ho. Amã piitã ho axàrĩk prãm nē mãmrĩ piitã ho arĩk. Rỳ amã hkwỳ hpix nhõr prãm nē mãmrĩ hkwỳ pix gõ. No ri ate òr par pyràk o amnhĩ to axēx kêt nē. Te ate mē inhmã pix mã axēx pyràk nom mē inhmã pix mã hkêt. Na ka mãänēn te Tĩrtũm mã axēx pyràk. Anē.

⁵⁻⁶ Nhũm pre ã Simãw Pētre Ananĩs mã kapēr anē nhũm kuma nē pykap

tēm nē htyk kurē kumrēx. Hãmri nhũm mē àptàr nywjaja hwỳr tē nē kupēxē ho hkupu nē kumỳ nē ma o tē nē haxà. Hãmri nhũm mē kot ã kot amnhĩ nhĩpēx anhỳr ã harēnh mar xwỳnhjaja tee ri harēnh ma nē kãm ma htỳx nē.

⁷ Tã nhũm ra hã ahtũm nē. Ra hã 3 ore nē hapēx nhũm Ananĩs prõ Sapireja htỳx hamakêtcati nē mē hwỳr tē nē axà. Kormã mjēn htyk ã harēnh mar kêt nē hamakêtcati nē hkĩnh nē mē hwỳr tē nē axà.

⁸ Hãmri nhũm Simãw Pētre omu nē hēx rom hkukja nē kãm:

—Pa? E kwa inhmã mēmoj jarē. Tanhmã na prem war anhõ pykaja pãnhã war amã amnhĩrer to? Xà ãm hãmri na amjēn mē inhmã harē nà? Anē.

Hãmri nhũm kuma nē mjēn pyrã nē kãm ho hēx nē kãm:

—ỖỖ. ãm hãmri kot amã harēnh kēnã. Anē.

⁹ Hãmri nhũm Simãw Pētre tee ri kuma nē kãm:

—Tk. Hēxta waa nē. Kwa mon ka war ajamē war akàxpore ho te Tĩrtũm mã axēx pyràk? Mãn ka wa ajamaxpēr o: “Koja Tĩrtũm ja hã wa ixpumu nē ãm hã wa ixpumu nē tanhmã hã wa ixto hkêt nē.” Anhỳr o mãn ka wa ajamaxpēr nà? Nom na ka wa ãm kãm axēx kaprỳ. Onēj ra mē kot amjēn jaxàr xwỳnhjaja akupỳn hpòx o mra. Koja mē anhĩpēx o te hipēx pyrã nē mãänēn ato tē nē ajaxà ka rĩ amnhĩ pumu.

¹⁰ Anē nhũm kuma nē mjēn pyrã nē pykap tēm nē htyk kurē kumrēx. Hãmri nhũm mē kot mjēn jaxàr xwỳnhjaja mra nē mē hwỳr agjē nē omu nhũm ra htyk mex nē nõ nhũm mē kumỳ nē ma o tē nē mjēn nhĩhkõ hã haxà.

¹¹ Hãmri nhũm mē piitã wa harēnh ma nē kãm ma htỳx nē. Mē kot Jejus kòt amnhĩ xunhwỳr xwỳnhjē mē amarĩ ri mē pa xwỳnhjaja nhũm mē tee ri wa hkukamã hamaxpēr o kãm ma htỳx kumrēx.

Mē kot aa mēmoj pumunh kêt kwý ho anhýr ã mē harēnh

Makre 16.17-20; Atre 19.11-12

12-14 Na pre hte Jejus kôt mē kot amnhĩ xunhwýr xwýnhjaja xatã Tĩrtũm mã amnhĩ jarēnh xà hã ixkre hwýr akuprõ. Mē kot ixkre nhĩkjê mã: “Pahi Sarumãw nhõ” anhýr xwýnh jarēnhja wýr nhũm pre htem akuprõ. Nhũm mē piitã kãm mē hkĩnh nē mē ohtõ nē mē hkôt akuprõ nē mē uràk nē Jejus kôt amnhĩ xunhwý. Mēnijaja nē mēmyjaja. No nhũm mē hkwýja Ananĩs mē Sapire wa kot amnhĩ nhĩpêxja mã hamaxpēr nē kãm mē hkôt mrar puma nē. Kãm mē hkĩnh tã kãm mē hkôt mrar puma nē.

Nhũm pre hte Jejus nhỹ hã mē ahkre ho mē pa xwýnhjaja aa mē kot mēmoj pumunh kêt kwý ho anhýr o ri mē piitã mē hkôt pa.

15 Jakamã nhũm pre htem mē à xwýnhjê jamý nē ma mē hwýr mē o mra nē Simãw Pētre kutēp pry kamã mē haxwý nē mē kãm:

—E mē jar anhĩkwý. Kê Simãw Pētre ja kôt mē ajãnh tē nē mē akupēnh o akupým mē ato mex rý nhũm hkarõ pix mē atã harir ka mē akupým amex japēr.

Anhýr o mē kãm kapēr hãmri nhũm mē kupĩp kãm kutēp hikwý.

16 Nē Jerujarē pu hã krĩ hkwý kamã. Mē à xwýnhjaja nē mēkarõmnuti kot tanhmã mē ho xwýnhjaja nhũm pre htem mē hamý nē ma mē ĩhkrep mē o mra nhũm mē piitã akupým mex pa.

Mē kot Jejus kwýjê jagjēnh ã mē harēnh

Rukre 21.12-15; Juãw 15.26-27; Atre 4.1-22

17 Tã nhũm mē õ patre maati mē hkrãmnhwý Satusew nhõ xwýnhjaja tee ri akupým mē mex ã mē harēnh ma nē axpēn mã:

—Tk. Kwa na mē ra ohtõ nē Jejus gryk ã mē pahte mē ahkre kaga nē ãm hkôt pix mã ri amnhĩ nhĩpêx o pa. Anē.

Hãmri nē Jejus nhỹ hã mē ahkre maati xwýnhjê kamã gryk nē ra tanhmã mē ho kaxyw.

18 Hãmri mē uné nē mē hagjê nhũm mē hagjēnh xà kamã hkrĩ hpa.

19 Tã nhũm kamãt nhũm Tĩrtũm kapēr o mē wrýk xwýnhja ma mē hagjēnh xà hwýr mē hwýr wrý nē mē hwýr axà nē mē kãm hakwakre kahê xà mē nē mē kator pa. Hãmri nē mē kãm:

20 —E mē ma akupým Tĩrtũm mã amnhĩ jarēnh xà hã ixkre hwýr mra nē axte mē kãm awjarē. Tanhmã mē kot amnhĩ nhĩpêx to nē Jejus kôt amnhĩ nhĩpêx nyw o amnhĩ nhĩpêx ã mē kãm hã karõ kê mē ama. Anē.

21 Hãmri nhũm mē kuma nē ma akupým hwýr hapêx kurê kumrēx. Nhũm myt kator o mör mē nhũm mē hwýr agjê nē mē kãm Tĩrtũm kapēr jarēnh o kuhê.

Tã nhũm mēõ patre maati mē hkôt ri mē pa xwýnhjaja amnhĩ wýr mē àptàr tũm xwýnhjê hwý nhũm mē piitã axpēn wýr pikuprõnh pa. Hãmri nē htýx arĩ Jejus kwýjaja mē hagjēnh xà kamã mē hkrĩ hã mē hkamnhĩx nē amnhĩ wýr mē hã karõ.

22 Nhũm pōristijaja ma kot mē haprõr kaxyw mē hagjēnh xà hã ixkre hwýr mra nē tee ri kamã mē hapēr nhũm mē kamã amrakati. Hãmri nhũm mē akupým mē pikuprõnh xwýnhjê hwýr hprõt nē mē kãm:

23 —Nà na pōristi hkwýjaja arĩ hakwakrem ixkre jamãr mex nhũm hakwakre arĩ kahê htýx nē xa. Tã pa mē hwýr agjê nē tee ri hkre kamã mē hapēr nhũm mē kamã amrakati kumrēx. Anē.

24 Hãmri nhũm mē kuma nē tee ri hamaxpēr.

25 Rôm nhũm ja mē hwýr tēn axàn mē kãm:

—Kwa jãã mē ate mē hagjēnh xwýnhjaja na mē axte Tĩrtũm mã amnhĩ jarēnh xà hã ixkre kamã mē ahkre ho kuhê pa ham mē omu nē mē kurũm tē. Anē.

26 Hãmri nhũm patre nhõ pōristi krãhtũmja kuma nē mē hwýr pōristi hkwýr rē nhũm mē ma mē hwýr mra

ně mẽ hwỳr agjê nê kê axte mẽ unê nê akupỹm mẽ o mra. Nom tanhmã mẽ ho hkêt nê. Mẽ kot hkôt ri mẽ pikamênh xwýnhjê pymaj mẽ ho mex nê mẽ o mō. Nê mẽ hã axpên mã:

—Nà kot puj mẽ tanhmã mẽ ho nhũm mẽ ja hã mẽ pahpumu nê kên o mẽ pahkapê nê tanhmã amnhĩ to nê hã mẽ panhĩmex. Anê.

²⁷ Hãmri nê mẽ ho mex nê akupỹm mẽ o mōn mẽ hwỳr mẽ ho agjê nê mẽ pikuprōnh xwýnhjê kutã mẽ hkrĩ. Hãmri nhũm mẽō patre maatija mẽ kãm:

²⁸ —Kwa ra mẽ ixte Jejus kapêr jarênh nê mẽ akurê htã ka xep mẽ ãm mẽ inhma nê arĩ mẽ kãm harênh o ri apa. Nê jar Jerujarê kamã mẽ piitã mẽ kãm harê. Nê mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anê.

²⁹ Hãmri nhũm Simãw Pêtre mẽ kuma nê mẽ amnhĩ tã mẽ kãm kapêr nê mẽ kãm:

—Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karō pa mẽ ama nê ãm mẽ ama nê ãm Tĩrtũm kapêr pix ma nê hkôt ri amnhĩ nhĩpêx.

³⁰ Amnepêm mẽ panhĩgêjtaja na prem Tĩrtũm kôt pix mã amnhĩ nhĩpêx o pa. Tã ka prem axtem nê kêp mẽ kãm Kra Jejus ã amýnê nhũm mẽ pĩ kahpa hã kunhō nê kupĩ. Nom nhũm Tĩrtũm akupỹm ho htĩr

³¹ nê kêp mẽ panhō Pahĩti hã harê. Nê kêp mẽ pahkaprĩ xwýnh mex ã harê. Hãmri nê ra amnhĩ ri ỹr nhũm ãhkô hã mẽmoj piitã ho amnhĩptar o hkrĩ. Nhũm kãm: “Koja Ijaew mẽ kot amnhĩ tomnuj kaga nê akôt amnhĩ xunhwý pa ja hã mẽ omu nê amnhĩ katut kôt mẽ kot amnhĩ tomnuj rênh pa nê mẽ ho ixkra.” Anê.

³² Tã mẽ pajaja mẽ ixte Jejus htyk nê akupỹm htĩr ã omunh mex jakamã na pa hte Tĩrtũm Karō nhỹ hã ã mẽ amã harênh anê. Karōja na pre Tĩrtũm mẽ ixte hkôt amnhĩ nhĩpêx xwýnhjê hwỳr kurê nhũm mẽ ixwỳr wrý nê mẽ ixkarō mã agjê. Tã ỹ hã na pa htem ri ã harênh anhỹr o ri mẽ akôt ixpa. Anê.

³³ Hãmri nhũm mẽ kuma nê mẽ kamã gryk tỳx nê. Nê mẽ kãm mẽ himex prãm nê mẽ kãm mẽ hã amýnê.

³⁴ Hãmri nhũm Kamariewtija tee ri ja hã mẽ omu hãmri nê kãnhmã xa nê Jejus nhỹ hã mẽ ahkre xwýnh maatijê xyr pê hkwýjê mã kapêr. Parijew nhõ xwýnh na pre. Nê kêp Tĩrtũm kapêr ã kagà htũm o mẽ ahkre ho pa xwýnhjê hõ na pre. Nhũm mẽ piitã kãm hkĩnh nê. Jakamã nhũm kãnhmã xa nê pōristi mã anê nhũm mẽ amnhĩ nê Jejus nhỹ hã mẽ ahkre ho mẽ pa xwýnhjê kator nhũm mẽ kapôt ã kuhê.

³⁵ Hãmri nhũm Kamariewtija mẽ nê tanhmã mẽ kãm kapêr to nê mẽ kãm:

—E ixkwýjaja. Kwa kêr pu mẽ tanhmã mẽ ho hkukamã pajamaxpêr mex nê.

³⁶ Mãn arĩ mẽ ate finat Tetastija jarênh ã anohtỳx nê ho apa japêr. Mytwrý hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkôt ri mẽ pa xwýnhjaja ohtō nê. Mẽ kêp 400. Tã nhũm prem mẽ kêp Tetasti pĩ nhũm hkôt ri mẽ pa xwýnhjaja axpên pê angrà nê ma hapêx.

³⁷ —Tã nhũm mẽ kot mẽ piitã mẽ ho kōta xà hã arĩgroja ã nhũm Garirej nhõ xwýnh pê finat Jut haxwýja hkôt mẽ pa xwýnhjaja ohtō nê. Tã nhũm mẽ mãânên mẽ kêp kupĩ nhũm hkôt ri mẽ pa xwýnhjaja haxwýja axpên pê angrà nê ma hapêx.

³⁸ —Jakamã kwa pu mẽ tanhmã jajê ho hkêt nê. Pu mẽ ãm mẽ omu. Koja mẽ amnhĩ krã hkôt ã ujarênh anhỹr o pa japêr hã koja Tetasti mẽ Jut wa hkôt pa xwýnhjê pyrã nê tokyx axpên pê angrà nhũm Jejus jarênh o paja hapêx o hapêx.

³⁹ Nom koja mẽ ãm hãmri Tĩrtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwỳr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwýnh maatijê xyr pê hkwýjê mã kapêr anê.

⁴⁰ Hāmri nhūm mẽ kuma nẽ kām:
 –Tỳ nà ãm hāmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ.

Hāmri nẽ akupÿn mẽ hã karõ nhūm mẽ akupÿn mẽ hwÿr agjê. Hāmri nhūm mẽ pōristi mã mẽ hã amÿnê nhūm mẽ htak. Hāmri nhūm mẽ àptàr tūmrejaja mẽ kām:

–E mẽ māmri ma akupÿm mra. Nom kêr ka mẽ axte mẽ kām Jejus kapêr jarênh o ri apa hkêt kumrêx. Anẽ.

⁴¹ Hāmri nhūm mẽ kām ure nhūm mẽ ma mra. Kĩnh nẽ ma mra nẽ axpên mã:

–Nà kwār mẽ Jejus ã mẽ pahtak nẽ tanhmã hã mẽ pahto. Kwār mẽ māmri ã hã mẽ pahto anẽ. Kot pu mẽ hkaga hkêt nẽ. Ra Tirtūm kot ja hã mẽ pahpumunh mex kênã.

Anhÿr o axpên mã kapêr o axpên jamaxpêr o hihtÿx mex o pa.

⁴² Hāmri nẽ arĩ apkati mẽ hkwÿjê mã Jejus kapêr jarênh o mẽ ahkre ho mẽ hkôt pa. Tirtūm mã amnhĩ jarênh xà hã ixkre kamã nẽ nhām mẽ òrkwÿ kamã ri mẽ ahkre ho pa. Tirtūm kot mẽ pakaxyw Jejus xãm ã mẽ kām harênh o ri mẽ hkôt pa.

6

Mẽ kêp mẽ mjên htyk xwÿnhjê jarênh Wam Ximotre 3.8-9

¹ Tã nhūm mẽ kot Jejus kôt amnhĩ xunhwÿr xwÿnhjaja ohtô rax kumrêx o mō. Mẽ piitã kêp Ijaew no nhūm mẽ hkwÿjaja axtem Gres kapêr o kapêr nhūm mẽ hkwÿjaja Ijaew kapêr o kapêr. Na pre hte Ijaew kapêr o kapêr xwÿnhjaja apkati mẽ mẽ kêp mẽ mjên htyk xwÿnhjê mã mẽõ ho pa. No ãm mẽ piitã mẽ hipêx o axpên pyræk kêt jakamã nhūm Gres kapêr o mẽ kapêr xwÿnhjaja tee ri ã mẽ kot amnhĩ nhĩpêx anhÿr ã mẽ omu nẽ mẽ kamã gryk nẽ. Hāmri nẽ mẽ kām:

–Kwa na ka htem amnhĩ kamã mẽ kêp mẽ mjên htyk xwÿnhjê mã mẽõ ho rũnh nẽ agō. No mẽ ixkamã jajê mã na ka htem ãm ho hkryre nẽ agō. Kwa mẽ ri ã mẽ hipêx anhÿr kêt nẽ. Mẽ hipêx o axpên pyræk nà. Anẽ.

² Hāmri nhūm Jejus nhÿ hã mẽ ahkre xwÿnh maatijaja mẽ hã mẽ kapêr ma hāmri nẽ mẽ piitã mẽ ho akuprõ nẽ mẽ kām:

–Kwa kêr ka mẽ ja hã axpên mã axàkjêr kêt nẽ. E pu mẽ kot mẽ kêp mẽ mjên htyk xwÿnhjê mã ò ho pa kaxyw mẽ akwÿjê rê. No mẽ pajaja kot paj ja ho anhÿr o ri ixpa hkêt nẽ. Kot pa mẽ anẽ nẽ Jejus kapêr o ri mẽ ajahkre hkêt nẽ nhūm ja mex kêt nẽ. Jakamã mẽ atõ kot kaj mẽ akatàt kôt mẽ kām mẽ ò ho apa?

³ E mẽ amnhĩ kamã mẽ ho 7 nẽ mẽ arê pu mẽ kêp mẽ mjên tyk xwÿnhjê mã ò ho pa kaxyw mẽ unhwÿ.

Tãm mẽ hamaxpêr xwÿnhjaja.

Nẽ mẽ ate axpên mã mẽ mex ã mẽ harênh xwÿnhjaja.

Nẽ Tirtūm Karõ nhÿ hã mẽ kot amnhĩ nhĩpêx o mẽ pa xwÿnhjaja.

Ã mẽ kot amnhĩ nhĩpêx anhÿr xwÿnhjaja ka mẽ ho 7 nẽ arê pu mẽ kaxyw mẽ unhwÿ.

⁴ Nom mẽ pajaja kot paj mẽ akôt arĩ mẽ amã Tirtūm kapêr jarênh o ri mẽ ajahkre pix tãnopxar o ri ixpa. Anẽ.

⁵ Hāmri nhūm mẽ kuma nhūm ja mẽ kām mex nẽ. Nhūm mẽ ma mra nẽ axpên mã hkwÿjê nhĩxi jarê hāmri nẽ mẽ ho 7 nẽ mẽ kurê. Á mẽ hixi kot anhÿr.

Estewãw. Estewãwja na pre Jejus kôt amnhĩ nhĩpêx mex o pa.

Tirtūm Karõ kaxwÿnh mã àr nẽ ho amnhĩptàr jakamã nhūm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nĩkanõ

nẽ Timã

nẽ Parmēnti

nẽ Nĩkoraw. Nĩkorawja krĩ pē ãxiok nhõ xwÿnh na pre. Kêp Ijaew kêt tã kām Tirtūm kĩnh o pa. Tã ra mããnēn Kra Jejus kôt amnhĩ xãm.

⁶ Jakamã nhūm mẽ mẽ kêp 7tajê rê nẽ Jejus nhÿ hã mẽ ahkre xwÿnh maatijê hwÿr mẽ o mra. Hāmri nhūm mẽ omu nẽ mẽ àpênh ã mẽ unhwÿr kaxyw mẽ hã ìhkra jaxwÿ nẽ mẽ ho Tirtūm wÿ. Hāmri nhūm mẽ kêp mẽ mjên htyk

xwýnhjê mã mẽ õ ho pa nê mẽ piitã mẽ hipêx o axpên pyræk.

⁷ Tã nhũm mẽ ra ohtô rax nê Tirtũm kapêr ma nê hkôt amnhĩ nhĩpêx o pa. Jakamã nhũm Jerujarê kamã mẽ kot Jejus kôt amnhĩ xunhwýr xwýnhjaja ra ohtô rax kumrêx. Nê mẽ õ patre hkwý haxwýja ohtô nê mẽ uræk nê amnhĩ kaxyw hkôt hamaxpêr nê hkôt amnhĩ xunhwý.

Mẽ kot Estewãw pynênh ã mẽ harênh

Rukre 21.14-15

⁸ Tã nhũm Estewãwja. Kot mẽ kêp mẽ mjên htyk xwýnhjê mã mẽ õ ho pa xwýnhjê hõja. Tirtũm kot kutã nojarêt mex jakamã na pre hte ý hã àhpumunh týx o aa mẽmoj pumunh kêt kwý ho anhýr o ri mẽ hkôt pa.

⁹ Hãmri nhũm Ijaew kwýjaja tee ri ja hã omu nhũm ja mẽ kêp omnuj týx nê nhũm mẽ hã kãm akir. Uræk nê mẽ kêp Ijaew nê Jerujarê kamã ri mẽ hkôt pa htã ahpýnhã mẽ õ pyka. Mẽ kot kãm “Ripetat” xwýnh kwý na pre mẽ. Nê ahpýnhã mẽ õ krĩ.

Mẽ hkwýjaja kêp Sirên nhõ xwýnh.

Nê mẽ hkwýjaja kêp Aresãn nhõ xwýnh.

Nê mẽ hkwýjaja kêp Siris nhõ xwýnh.

Nê mẽ hkwýjaja kêp As nhõ xwýnh. Ahpýnhã mẽõ pika nê mẽ õ krĩ htã na prem Jerujarê kamã ri axpên kôt pa ho pa. Tã Estewãw kot ã amnhĩ nhĩpêx anhýr o pa hã omu nhũm ja mẽ kêp omnuj týx nê nhũm mẽ hã kãm akir.

¹⁰ No nhũm Tirtũm Karõ nhỹ hã hamaxpêr týx o mẽ kãm kapêr nhũm mẽ kuma nê tee ri kutã tanhmã kãm nê hprãm kaprý.

¹¹ Hãmri nê ma mra nê tanhmã ho hêx to kaxyw amnhĩ kwýjê rê nê mẽ kãm hã amýnê nê mẽ kãm:

—E kêr ka mẽ krĩ nhõ xwýnhjê mã Estewãw o axêx nê tanhmã mẽ kãm ho akapêr punuj to ho ri mẽ hkôt apa. Kê mẽ ama nê kamã gryk kato. Kot kaj mẽ ã amnhĩ nhĩpêx anê pa mẽ hpãnhã mẽ amã amnhĩre. Anê.

Hãmri nhũm mẽ kuma nê ma mra nê hapôj nê ma krĩ nhõ xwýnhjê mã

tanhmã ho hêx to ho ri mẽ hkôt pa nê mẽ kãm:

—E mẽ amnê akuprõ nê mẽ inhma. Kwa kêr ka mẽ Estewãwti kapêr mar kêt nê. Na hte finat Mojes mẽ Tirtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anê.

¹² Hãmri nhũm mẽ kuma. Krĩ nhõ xwýnhjê mẽ nê mẽ aptar tũmrejê mẽ Tirtũm kapêr tũm o mẽ ahkre ho mẽ pa xwýnhjaja nhũm mẽ tee ri mẽ kot Estewãw o hêxja ma nê kamã gryk nê. Hãmri nê ma hwýr mra nê unê nê ma mẽ õ juisti hwýr o tẽ.

¹³ Hãmri nhũm mẽ kãm ho hêx xwýnhjaja mẽ hkôt mra nê juisti mã tanhmã ho hêx to nê mẽ kãm:

—E jahti na hte finat Mojes kot Tirtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nê Tirtũm mã amnhĩ jarênh xã hã ixkreja nhũm tanhmã ho hêx to pa mẽ kuma.

¹⁴ Na hte mẽ kãm: “Koja nhỹrmã Jejus pê Najare nhõ xwýnh Tirtũm mã amnhĩ jarênh xã hã ixkreja grãnh pa kãm ga.” Anhýr o mẽ kãm hêx o pa. Nê Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anê.

¹⁵ Nhũm prem ã mẽõ juisti mã Estewãw o hêx anê. Hãmri nhũm mẽ kuma nê Estewãw wýr rít nê hkuk pumu nhũm te kot Tirtũm kapêr o mẽ wrýk xwýnhjê kuk nhĩrã rax pyrã nê xa nhũm mẽ tee ri omu nê kamã no pyma nê.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nê kãm:

—E mẽ inhma amnhĩ jarê. Xã ãm hãmri na mẽ ri ã ajarênh anê nà? Anê.

² Hãmri nhũm kuma nê mẽ piitã mẽ kãm kapêr. Mẽ kãm kapêr ryy nê mẽ kãm:

—Tõe kot paj mẽ amã mẽ panhĩgêt finat Apraãw tanhmã harênh to ka mẽ inhma. Amnepêm na pre Tirtũm maatija Apraãw wýr kato. Kormã

pyka pê Mēsopotām kamā pa ri. Kormā kot ma krī pê Arā hwÿr mōr kêt ri nhũm hwÿr kato nē kām:

³ “E kêt ka mẽ anhō krī pê akato nē akwÿjê re nē ma mō. Kot paj ma nhÿhÿm hpānhā pyka hō hwÿr mẽ ato mō.” Anē.

⁴ —Hāmri nhũm kuma nē amnhĩ to akuprō nē ma mō. Ō pyka pê Katej pê kato nē ma krī pê Arā hwÿr mō nē hpānhā kamā pa. Tā nhũm hipêêxà Terahti kêt ty nhũm Tirtũm amnē jar mẽ panhō pyka hwÿr kumē. Jar mẽ papaxà hwÿr kumē.

⁵ —Nom nhũm kormā kām pykaja nhōr kêt nē. Kormā kām hkwÿ ho grire nē ōr kêt nē. Na pre âm kām:

E kot paj nhÿrmā amā pykaja gō. Amā nē akanrēhā akra nē atāmnhwÿjê mã kugō ka mẽ kamā ri apa ho apa.

Anhÿr o kām mẽ panhō pika pê Kanaāja jarē. Apraāw kormā hkra hkêt ri nhũm ā kām kapêr anē.

⁶ Hāmri nē kām:

Koja akanrēhā atāmnhwÿjaja nhÿrmā ma nhÿhÿm pyka hō hwÿr pa nē hpānhā kamā pa. Mē ō pyka kamā pa hkêt tā nhām pyka hō kamā pa hāmri nē pika nhō xwÿnhjê mã àpênh rũnh o pa nhũm pyka nhō xwÿnhjaja mẽ hipêx kati rũnh o pa. Nē mẽ àpênh ā mẽ kām amnhĩrer kêt nē. Âm mẽ homnuj o pa hā amgrà xohtō rax kumrêx. Nhũm mẽ hā amgrà pê 400.

⁷ Nom kot paj mẽ hā mẽ homnuj tÿx nē. Akanrēhā atāmnhwÿjê hā mẽ homnuj tÿx nē nhũm mẽ rĩ kormā mẽ kurũm kato nē man akupÿn pa nē jar pōj. Hāmri nē jar inhmā inhmex o inhmex ā ijarēnh rāhā ho pa. Anē.

⁸ Hāmri nē kām:

E pu axpên ma. Koja ka nē akanrēhā akra nē atāmnhwÿjaja ka mẽ ixkôt ri amnhĩ nhĩpêx o apa hā kot paj mẽ ato ixkra. Tā koja ja amā mex japêr hā kêt ka mẽ amnhĩ my kwrÿt kà hkwÿ jakà. Nē koja mẽ akrajaja hapōj nē

my ka mẽ mã mẽ ho anē nē mẽ kêt mẽmy kwrÿt kà hkwÿ jakà. Mẽ piitā mẽ kot mẽ apê ixkra hā mẽ apumunh kaxyw kot kaj mẽ ā amnhĩ nhĩpêx anē.

Anhÿr o Apraāw mã kapêr nhũm kuma nē mar xà hkôt hkra Ijak my kwrÿt kà hkwÿ krāhta. Kormā hkaràre ri. Kormā hā arĩgro pê 8 pix ri nhũm kêt hkwÿ krāhta.

—Tā nhũm Ijak hprêk nē hprō nē hkra. Hāmri nē mã hkra Jako ho anē nē. Nhũm Jako hprêk nē mã hkra pê 12jê ho anē nē mẽ piitā mẽmy kwrÿt kà hkwÿ jakàr pa. Ā na pre mẽ pahpàr kraxjaja amnhĩ nhĩpêx anhÿr o pa.

⁹ —Jako hkrajê hō na pre kêt Juje. Nhũm Juje htōjaja hipêêxà hkôt kamā gryk nē axtem nē mẽ urojê mã ho wênê nhũm mẽ kêt haprō nē ma pyka pê Ejit wÿr o mō. Amarĩ Ejit nhō xwÿnhjê mã àpênh o pa kaxyw. Tā no nhũm Tirtũm arĩ tãnopxar rāhā ho hkôt pa.

¹⁰ Hāmri nē Ejit kām mẽ kot homnuj xwÿnhjê nhĩhkra rũm hkapa nē tanhmā hkrā hto nhũm àhpumunh tÿx nē hamaxpêr mex nē. Jakamā nhũm Ejit nhō xwÿnhjê nhō pahi Paraohitja omu nē kām hkĩnh nē. Kot tām amnhĩ nhĩpêx nē àhpumunh tÿx kôt omu nē kām hkĩnh nē. Hāmri nē amnhĩ ri kumē nhũm ihkō hā àpênh o pa. Kām ōrkwÿ pumu nē Ejit nhō xwÿnhjê ho amnhĩptàr o pa.

¹¹ —Rôm nhũm mẽ hpur kām mẽmoj nhĩgrôt mex kêt nē nhũm mẽ kêt mẽ apkur xà hā mẽ ōja ra ri mẽ kêt kryre. Ejit kamā nē jar Kanaā kamā nhũm mẽ apkur xà hā mẽ ōja mẽ kêt hapêx par o mō. Nhũm mẽ piitā prām xàj ra hiire nē kām prām tÿx o pa nhũm mẽ panhĩgêtjaja hāmri prām xàj tee ri amnhĩ xàpkur xà hā mẽmoj japêr.

¹² —Tā nhũm Jakoja Ejit kām arĩ mẽ apkur xà hā mẽ ō rax ā harēnh ma nē ma hwÿr hkra hkwÿjê rē. Mẽ panhĩgêtjaja nhũm ma mẽ hwÿr mẽ kurē nhũm mẽ ma mẽ hwÿr mra. Hāmri nē mẽ hwÿr pōj nē mẽ kêt mẽmo hy hkwÿ japrō nē ma akupÿm o

mra. Wam mẽ mōrta ã mẽ kêp mẽmoj japrô nê ma akupÿm o mra.

13 –Tã nhũm mẽ kêp mẽmo hy japrôr xwÿnhja hapêx nhũm mẽ axte akupÿm mẽ hwÿr mra. Hãmri nhũm mẽ htô Juje mẽ kãm amnhĩ to amnhĩrit nê kêp mẽ htô hã mẽ kãm amnhĩ jarê. Mẽ kot ra htyk ã hkamnhĩx tã nhũm mẽ kãm amnhĩ jarê. Hãmri nhũm Paraohiti mẽ kêp Juje htô hã mẽ harênh ma.

14 –Tã nhũm Juje amnhĩ wÿr hipêêxà Jako mẽ htãmnhwÿjaja mẽ hã karô nhũm mẽ piitã ma Ejit wÿr hapêx. Mẽ kêp 75 nê ma Ejit kamã Juje hwÿr hapêx hãmri nê kamã pa ho pa.

15 –Ã kot anhÿr jakamã nhũm Jakoja ma Ejit wÿr mō nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa.

16 Hãmri nhũm mẽ hkanrêhã mẽ hkrajaja mẽ hamÿ nê ma akupÿm Kanaã hwÿr krĩ pê Sikê hwÿr mẽ o pa nê kamã mẽ hagjê. Na pre mẽ hkukamã finat Apraãw kot Amōr krajê pê kênkre japrô nê kamã hprô jaxà. Jakamã nhũm prem mÿr pê ma hwÿr mẽ o pa nê kamã mẽ hagjê hãmri nê ma akupÿm Ejit wÿr pa.

17 –Tã gaa nê rĩ ohtô rax kumrêx o mō. Mẽ panhĩgêjtaja ohtô rax kumrêx o mō. Hãmri nhũm Tirtũm kot Apraãw mã mẽ õ pyka jarênh xwÿnhja nhũm kot mẽ kãm òr kaxyw.

18 No nhũm Ejit nhõ pahi kot Juje ho mex xwÿnhja na pre ra ty nhũm axtem hpãnhã hōja mẽ ho amnhĩptàr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mÿr pê harênh mar kêt nê.

19 Hãmri nê hkwyjê homnuj o pa. Tanhmã mẽ panhĩgêjtê nhĩpêx to ho pa. Nê mẽ kãm mẽ hkra my hapôx xwÿnhjê hã amÿnê. Mẽ hapôx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amÿnê.

20 –Rôm nhũm finat Mojesja kato. Nê mexre. Hãmri nhũm katorxà Ejit nhõ xwÿnhjê kot kêp hpĩr pymaj

òrkwy kamã ri mẽ kêp ho hpimxur o pa hã mytwrÿ axkrunêpxi.

21 –Tã nhũm ra htÿxre nhũm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpĩr pymaj kumÿnê ma o tẽ nê kaxyw à nhĩpêx nê nhÿri gô nhĩpôk ri pō kamã ho amũxu. Tã nhũm Paraohiti hkra nija ra gôx mã wÿr mã tẽ nê ra omu hãmri nê amnhĩm kumÿnê ma o tẽ nê ho hkra.

22 Jakamã nhũm Mojes Ejit nhõ xwÿnhjê kamã hprêk. Hãmri nê mẽ àhpumunh xà hã kagà pumunh pa. Nê hihtÿx nê mẽ kãm kapêr kãm hihtÿx mex o pa.

23 –Tã hãmri ra hã amgrà pê 40 nê hapêx nhũm Mojes hamaxpêr nê ra kãm amnhĩ kwÿ pê Ijaewjê pumunh prãm nê ma mẽ hwÿr tẽ.

24-25 Hãmri nê htêm kôt ja wa omu. Nhũm Ejit nhõ xwÿnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwÿr tẽ nê ixkwÿ mÿj ã Ejit nhõ xwÿnhja pĩ kê ixkwÿjaja ja hã ixpumu nê Tirtũm kot mẽ hwÿr inhmênh ã ixpumu. Ixte Ejit nhõ xwÿnhjê nê mẽ kator kaxyw mẽ ja hã ixpumunh kurê kumrêx.”

–Anhÿr o hamaxpêr hãmri nê wa hwÿr tẽ nê amnhĩōja nê Ejit nhõ xwÿnh pĩ. Tã no nhũm hkwyjaja kot hpĩr ã harênh mar tã tanhmã amnhĩ kaxyw kãm hamaxpêr to hkêt nê.

26 Nhũm apkati nhũm mēhōja war axkrut nê axte pijapu ho wa xa. Hamê wa kêp Ijaew. Jakamã nhũm Mojes akupÿm mẽ hwÿr tẽ nê tee ri axpên tã wa omu nhũm ja kêp omnuj nê. Hãmri nhũm wa hwÿr tẽ nê axpên nê wa kãm kapêr nê wa kãm: “Pa? Kwa war ajamê war apê Ijaew kênã na ka wa ri axtem nê ã axpên nhĩpêx anê.” Anê.

27 Hãmri nhũm kot amnhĩ kaxyw hkryx xwÿnhja kuma nê nhãm amnhĩ nê hkujate nê kãm: “Tk. Kwa xà apê mẽ inhō pahi hã na ka ã wa inhmã akapêr anê? Nà apê mẽ inhō pahi hkêt kênã.

28 Kot kaj inhĩpêx o te ate Ejit nhõ xwÿnhja nhĩpêx pyrã nê wa ixtō hpĩr

kêt nê.” Anê.

²⁹ —Hāmri nhūm tee ri kuma nê ra kām ma nê Ejit rūm kator kurê kumrêx nê ma pyka pê Mijiã hwÿr mō nê kamã hpãnhã pa. Kamã hprō nê hkra. Nhūm hkra myja wa hamêxkrut.

³⁰ —Tã nhūm Mijiã kamã pa hã axte hã amgrà pê 40. Hāmri nê mēmo arīgro hã kapôt ã krã hakÿx pê Sinai kape hã ri pa nhūm Tirtūm kām kapêr. Nom nhūm Mojes omunh kêt nê. Ām utī kaok kamã kuwy hpôk pix pumu.

³¹ Amnhĩ jaêr pê ã kot amnhĩ nhĩpêx anhÿr ã omu hāmri nê amnhĩ tã hprī hã omunh kaxyw hwÿr tē nhūm Tirtūm kām:

³² Pa Mojes? E ixpê Tirtūm na pa. Ixpê akukamã anhīgêt Apraãw nhō Tirtūm na pa. Nê ixpê Apraãw kra Ijak mē htãmnhwÿy Jako wa ô Tirtūm na pa. Anê.

Hāmri nhūm tee ri kuma nê kām ma xāj htertēt tÿx nê. Hāmri nê umaj axte pī hpôkja wÿr rīt kêt nê. Ām nhām hkrã nê rīt o xa.

³³ Hāmri nhūm Tirtūm kām: E kwa ixpê Tirtūm maati hã ixtã api-jaam ã aparkã kapa nê apar kēnh nê xa.

³⁴ Na pa ra ixkra Ijaewjaja Ejit kām mē omu. Na ra Ejit nhō xwÿnhjaja ixpê mē homnuj tÿx kumrêx rãhã ho pa nhūm mē amnhĩ xà hã maj tee ri amnhĩ nhĩpêx. Pa ja hã mē omu nê inhmã mē hkaprī nê. Jakamã kot paj Ejit nhō xwÿnhjê nhĩhkra rūm mē kator pa. E ka kot paj mē hwÿr amē ka ma akupÿm mē hwÿr mō nê mē kurūm mē kator.

Anhÿr o kām mē kaxyw karō.

³⁵ Ra Ijaew kot Mojes hkaga tã nhūm mē kaxyw ãm nê ma akupÿm kot mē hwÿr mēnh kaxyw. Na prem ra omu nê hkaga. Te mē ate Jejus kagaja pyrã nê hkaga. Jakamã nhūm pijapu xwÿnhhta tee ri amnhĩ tã omu nê kamã gryk nê amnhĩ nê kām kapêr nê kām: “Tk. Kwa xà apê mē inhō pahi hã na ka ã wa inhmã akapêr anê? Nà apê mē inhō pahi kêt.” Anhÿr tã nhūm

Tirtūm mē kaxyw tãm xãm. Kot mē ho amnhĩptār nê Ejit nhō xwÿnhjê rūm mē kator kaxyw. Ja kaxyw na pre pī hpôk kamã kām kapêr nê mē kaxyw ãm.

³⁶ —Jakamã nhūm Mojes ma akupÿm Ejit wÿr mō nê mē kurūm hkwyjê kator nê ma mē o pa. Na pre mē ho mex nê Tirtūm nhÿ hã mē kām aa mē kot mēmoj pumunh kêt kwÿ ho anhÿr o ri mē o pa. Ejit kamã nê mãânēn mē kot gō xujanār mã: “Gō kamrêk” anhÿr xwÿnhhta kamã. Nê kapôt ã mē kām ã amnhĩ nhĩpêx anhÿr o mē o pa. Nê kapôt ã ri mē o pa ho ra hã amgrà pê 40.

³⁷ —Tã tãm na pre mē panhīgêjtê mã mēhō hkukamã mē kām tanhmã harēnh to nê mē kām harēnh o: “Koja Tirtūm nhÿrmã te ra mē akaxyw pa ixãm pyrã nê inhmÿr pê mē panhĩo xãm. ŷ hã mē amã kapêr jarēnh o pa kaxyw nhūm nhÿrmã mē akaxyw ãm ka mē omu.”

—Anhÿr o ã Jejus kukamã harēnh anê.

³⁸ Na pre Mojes kapôt ã mē panhīgêjtê ho pa nhūm mē krã hakÿx pê Sinaija wÿr pa. Mē panhīgêjtêja hāmri hwÿr pa nhūm Tirtūm kapêr o mē wrÿk xwÿnhja mē kaxyw Mojes mã kapêr nhūm ô ri mē kām awjarē nê hã kagã. Mē kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhūm mē kām Tirtūm kapêr jarēnh o pa. Nê mē pajaxwÿja. Mē pahte hkôt amnhĩ nhĩpêx nyw o amnhĩ nhĩpêx o papa kaxyw na pre mē pamã hã kagã.

³⁹ Tã no nhūm mē panhīgêjtêja Mojes ma nê ãm kuma nê hkaga kumrêx nê akupÿm Ejit wÿr hkra.

⁴⁰ Jakamã nhūm Mojes kormã nhÿri mē kaxyw Tirtūm mã kapêr o ãm rôm nhūm mē wakre kamã htō Arãw wÿr mra nê kām: “Kwa Mojes ra kot tanhmã amnhĩ to kēnã. Kot Ejit rūm mē pakator nê mē pahto mōr tã ra nhÿri arīk nê tanhmã amnhĩ to. Jakamã e. Kwa hpãnhã mē inhmã mēmo karō nhĩpêx pu mē ho panhō

sânti kê tãm ma akupÿm Ejit wÿr mẽ pahto pa.” Anê.

⁴¹ —Hãmri nhũm mẽ kuma nê mẽ kãm kàx o môx krare karõ ho sânti nhĩpêx nê mẽ kãm ãm. Hãmri nhũm mẽ axtem nê te ho Tĩrtũm nhĩpêx pyræk o hipêx nê kãm ôwêhti hkwÿ pa nê kãm haxwÿ nê hã apku. Hãmri nê ã amnhĩ nhĩpêx anhÿr ã amnhĩ pumu nê hkĩnh nê.

⁴² Hãmri nhũm Tĩrtũm tee ri ja hã mẽ omu nhũm ja kêp omnuj tÿx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwrÿre nê kanhêti karõ nhĩpêx nê te mẽ kot Tĩrtũm nhĩpêx pyræk o hipêx o pa. Hãmri nê amnhĩ kaxyw kumã pix mã hamaxpêr o pa hã amgrà xohôtô nê. Tã nhũm Tĩrtũm nhÿ hã kapêr jarênh o mẽ pa xwÿnhjaja tanhmã mẽ kãm kapêr to nê mẽ hã kagà. Te Tĩrtũm tãm mẽ kãm kapêr pyræk o mẽ kãm kapêr nê hã kagà kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrà pê 40ta ã. Xà we inhmã na ka prem akrit kwÿ hpar o apa?

⁴³ Nà inhmã hkêt. Na ka prem axtem nê ri amnhĩ krã hkôt amnhĩm mẽmo karõ nhĩpêx nê hipêx o te mẽ ate pa inhĩpêx pyræk. Pê kãm akrit kwÿ hpar nê òr o ri apa.

Mẽ anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwÿnhja ka pre htem à kamã amnhĩ kôt ho apa.

Nê amnhĩm kanhêti karõ nhĩpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhÿrja mÿrapê kot paj pãnhã nhÿhÿm mẽ arê.

Koja mẽ akutã amnhĩ xunhwÿr xwÿnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axapênh rũnh o ri apa kãm ga. Anê.

Ã na pre Tĩrtũm mẽ panhĩgêjtê mã kapêr anê nhũm ÿ hã kapêr jarênh o pa xwÿnhja mẽ kãm hã kagà.

⁴⁴ —Tã nhũm mẽ panhĩgêjtaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapêr xà hã ixkreja nhũm prem amnhĩ kôt ri o pa. Mẽ kot kãm “Tĩrtũm nhõrkwÿ kaàkre” anhÿr xwÿnhja. Tĩrtũm kot mẽ kãm hã karõ xà hkôt nhũm mẽ hipêx nê amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkôt hipêx nê amnhĩ kôt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wÿr Mojes mÿr pê mẽ o pa. Hãmri nê hwÿr mẽ o pøj nhũm Tĩrtũm mẽ nê mẽ kot ra kamã mẽ pa ho mẽ pa xwÿnhjê japøj nhũm mẽ pãnhã kamã pa ho pa. Nê amnhĩ kôt Tĩrtũm nhõrkwÿ kaàkreta o pa. Rãhã nhũm finat Tawija mẽ hpãnhã mẽ ho amnhĩptã.

⁴⁶ Na pre Tĩrtũm Tawi kot tanhmã amnhĩ nhĩpêx to ho pa hã omu nê kãm hapê nê. Jakamã nhũm Tawi kãm kapêr nê kãm: “Pa Tĩrtũm? Kwa xà kot paj amã ixkre mex ò nhĩpêx nà? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhÿr tã no nhũm Tĩrtũm kormã kãm ja prãm kêt nê.

⁴⁷ Jakamã nhũm Tawi hkra Sarumãwja hipêêxà mÿr pê hpãnhã kêp mẽ ò pahi nê kãm hipêx.

⁴⁸ Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwÿnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhÿ hã kapêr jarênh o pa xwÿnhja Tĩrtũm kot tanhmã mẽ pajamãr to ho pa hã kagà nê hã kagà ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to nê mẽ ìhkra ho mẽ kot inhmã ixkre nhĩpêxta wÿr axà nê kamã ixpa ho ixpa?

50 Nà ixte mēmoj piitā ho ixkator xwýnh kēnā kot pa kêt ā amnhī nhīpêx anē. Anē.

Nhūm pre ā Tirtūm amnhī tā mē kām kapēr anē nhūm ý hā kapēr jarēnh xwýnhja ô ri mē pamā hā kagā.

51 —E kwa mē inhma ixkwýjaja. Mē akrā hihtýx kumrēx jakamā mē amā Tirtūm kapēr mar prām kêt. Na ka htem mē panhīgêjtjê pyrā nē amnhī nē Tirtūm Karō kaga nē kapēr mar kêt nē.

52 Na pre hte Tirtūm nhỹ hā kapēr o mē pa xwýnhjaja mē panhīgêjtjê hwýr mra nē mē kām kapēr jarēnh o ri mē hkôt pa. Tā nhūm mē hkaga nē mē hipêx kati ho pa. Na pre htem Jejus wrýk kukamā mē kām: “E koja nhỹrmā kot Tirtūm kapēr mar nē hkôt amnhī nhīpêx mex rāhā xwýnh maatija mē pahwýr wrý.” Anhýr o mē kām harēnh o pa. Tā no nhūm mē kām ja mar prām kêt jakamā axtem nē hā mē hpar o pa. Mē kot mē kām Jejus jarēnh o mē pa xwýnhjê hpar o pa. Tā nhūm tām mē pahwýr wrý ka mē omu nē mē kot amnhī nhīpêxta pyrā nē hā amýnē nhūm prem mē amā kupī.

53 —Tirtūm kapēr o mē wrýk xwýnhjaja kot Tirtūm nhỹ hā tanhmā mē pahte amnhī nhīpêx to ho papa hā mē pamā karō nhūm mē ate mar tā mē apê hprām nōkati. Nē ama nē ām ama nē hkôt amnhī nhīpêx o ri apa hkêt nē. Anē.

Mē kot Estewāw pīr ā mē harēnh Rukre 21.16-19, 23.34; Atre 22.20

54 Hāmri nhūm juistijaja tee ri Estewāw xujarēnh ma nē kamā gryk týx nē kām kapēr punuj nē.

55 Nom nhūm Tirtūm Karōja tanhmā hkrā hto nhūm kām mē uma hkêt nē. Hāmri nē kànhmā rīt nē kaxkwa pumunh o xa nē kamā Tirtūm rūm hirā rax pumu. Nhūm Jejus Tirtūm nhīhkô hā xa nhūm omu nē hkīnh nē mē kām:

56 —Kokýy. Na kaxkwa axkjê nhūm kamā Tirtūm nhỹ pa omu. Nhūm kuri kot mē pahwýr mēnh xwýnh Jejusja xa. Hêxta waa nē. Nà na pa jarāhā wa omu nē ixkīnh týx kumrēx. Anē.

57 Hāmri nhūm mē kuma nē kamā gryk týx nē. Hāmri nē kām mar prām kêt nē kēp amnhī jamak pro. Hāmri nē gryk xàj àmra htýx nē hwýr hprôt

58 nē unē nē krī pē ho kato nē ma o tē nē nhỹri o xa. Hāmri nē kēn o htak o hpīr kaxyw amnhī nhīnôkà hkwrý nē mēhō my pē Sawti mā kugō nhūm mē kām hamý. Hāmri nhūm mē kēn rūnh kwý jamý nē o mra nē Estewāw wýr rēnh prêprêk o kuhê. Nē ho ī kamā htak nē hkrāx pē htak.

59 Hāmri nhūm ra htyk kaxyw nē Jejus mā amnhī jarē nē kām:

—Pa Pahihti Jejus? E koja ixkarō awýr api ka ixto amnhīptā. Anē.

60 Hāmri nē hkôn krā ho tēm nē nhỹ nē axte kām amnhī jarē nē mē kot hpīr xwýnhjê nē kām kapēr nē kām:

—Kwa Pahihti. Mē kot ixpīr tā kwa tanhmā ixtā mē ho hkêt nē.

Anhýr o mē nē Jejus mā kapērja kôt ra ty.

8

Mē kot Estewāw jaxàr ā mē harēnh Atre 22.4, 26.9-11

1-2 Hāmri nhūm mē kot Jejus kôt amnhī nhīpêx xwýnhjaja Estewāw wýr mra nē htyk kām omu nē hkaprī nē. Nē mur nē kumý nē ma o mō nē haxā. Nom nhūm Sawtija mē kot hpīr ā omu nhūm ja kām mex nē.

Sawti kot Jejus kwýjê nhīpêx kati ho pa hā harēnh

Atre 1.8

Tā nhūm Jerujarē kamā Ijaewjaja mē kot Jejus kôt amnhī xunhwýr xwýnhjê homnuj týx o pa. Hāmri nhūm mē tee ri amnhī kukamā hamaxpēr nē mē hkwýjaja mē umaj hapôj nē ma pika hkwý hkôt hpigrành pa. Mē hkwýjaja Jutej wýr ma pa nhūm mē hkwýjaja Samar hwýr ma pa. Ā na prem mē umaj nhỹhým hpigrành par anē. Ām Jejus nhỹ hā mē ahkre xwýnh maati pixjaja na prem Jerujarē kamā arīk nē nhỹhým mōr kêt nē. Simāw Pêtre nē Juāw nē Xiakre nē Andre nē Firipti nē Patoromew nē Matêwre nē Makre nē Tomas nē

Hāmri nhūm wa mẽ harēnh ma mẽ himōk ā wa ĩhkra jaxwȳr o ri mẽ hkōt mra. Ja kōt nhūm Tĩrtūm Karō mẽ hwȳr wrȳn mẽ mẽ hkarō mā gjēx pa.

18-19 Hāmri nhūm wajaga Simāwja mẽ amnhĩ tā wa omunh o xa mẽ hamaxpēr o:

—Kokȳy. Kwa wa kot mẽ hā ĩhkra jaxwȳrja kōt na hte Tĩrtūm Karō mẽ hkarō mā agjē. Hēxta waa mẽ. Inhmā ā mẽ hipēx anhȳr o ri ixpa hprām tȳx. E pa ixkàxpore hkwȳ jamȳ mẽ o tē mẽ wa kām kugō kē wa tanhmā ixto pa wa urāk mẽ ā mẽ hipēx anhȳr o ri ixpa. Nà kot paj anē. Anē.

Hāmri mẽ wa hwȳr tē mẽ wa kām:

—E ota ixkàxporeta. Kwa amnhĩm apy mẽ hpānhā tanhmā ixto pa war apyrà mẽ mẽ hā inhĩhkra jaxwȳr o ri mẽ hkōt ixpa kē Tĩrtūm Karōja mẽ hkarō mā agjē. Inhmā ja ho anhȳr prām tȳx. Anē.

20-23 Hāmri nhūm wa tee ri ā kapēr anhȳrja ā omu nhūm Pētre kām:

—Tk. Kwa ajamaxpērja mex kēt. Xà na htem kàxpore ho Tĩrtūm mā amnhĩrer pē y hā mẽ ho hwȳr o pa nhūm Karō mẽ hwȳr agjē? Nà na htem kàxpore ho Tĩrtūm Karō japrōr kēt mẽ. Kot kaj wa ixpyrà mẽ ā mẽ hipēx anhȳr kēt mẽ. Ajamaxpērja mexre hā. Kormā ate Tĩrtūm kōt amnhĩ xām tȳx kēt jakamā na ka atȳx ā ri ajamaxpēr anē.

—Na ka ā wa ixte Tĩrtūm nhỹ hā mẽ hipēx anhȳr ā wa ixpumu mẽ amā wa ixpyrà mẽ ā mẽ hipēx anhȳr o ri apa hprām xāj ajamaxpēr punuj mẽ. Nhūm ajamaxpēr punuj te kot apa hā apyr ka tee ate kēp amnhĩ kjēnh pyrāk. Kwa tokyx ajamaxpēr punuj ā amnhĩ pumu mẽ akaprĩ mẽ tokyx hkaga. Hāmri mẽ amnhĩ to Tĩrtūm wȳ kē amnhĩ katut kōt ajamaxpēr punujja mẽ ka axte ā ajamaxpēr anhȳr kēt mẽ. Ā mẽ hamaxpēr punuj anhȳr xwȳnhjaja koja mẽ nhỹrmā ma kuwy hwȳr pa. Anē.

24 Hāmri nhūm tee ri amnhĩ tā kuma mẽ hkaprĩ mẽ wa kām:

—Kwa xà wehe? Tô tokyx ixto Tĩrtūm wȳ kē ā ijamaxpēr anhȳrja mȳrapē hwȳr inhmēnh kēt mẽ. Anē.

25 Tā nhūm Simāw Pētre mẽ Juāw wa Samar nhō xwȳnhjē mā Pahihti Jejus kapēr jarēnh pē ho mẽ ahkre hāmri mẽ ma akupȳm Jerujarē hwȳr mō. Ma pyka pē Samar hkōt mẽ kām Jejus kapēr jarēnh o ma akupȳm mō.

Firipti mẽ Exiop nhō xwȳnh wa harēnh

Ijais 53.7-8

26 Hāmri nhūm Firipti arĩ Samar kamā arĩk. Hāmri nhūm Tĩrtūm kapēr o mẽ wrȳk xwȳnhja hwȳr wrȳn mẽ kām:

—Pa? E ot pa awȳr wrȳn mẽ tē. Nà kēr ka tokyx akato mẽ ma mō mẽ Jerujarē rũm kànhmā Kas wȳr pry kahpēr ta mẽ hā juk mẽ ma hā mō. Kapōt ā pry nōrta kahpēr ta mẽ hā mō. E kwa tokyj.

Anhȳr o kām kapēr hāmri mẽ ma akupȳm tē mẽ kaxkwa hwȳr api.

27 Hāmri nhūm Firipti kuma mẽ kato mẽ ma hwȳr mōr kurē kumrēx. Mōh hāmri mẽ pryja kahpēr ta mẽ hā mō.

Hāmri nhūm ra mēhō myja mō. Exiop nhō xwȳnh na pre. Exiop kamā mẽhō pahi na pre niti. Hixi pē na pre Kātatre. Nhūm pry hā mōr xwȳnhja kēp kām kàxpore jamār o pa xwȳnh. Exiop kamā te kēp mẽ õ kōwenatō pyrāk. Tā kot Tĩrtūm mā mex o mex ā harēnh kaxyw ma Jerujarē hwȳr mō.

28 Hāmri mẽ akupȳm Exiop wȳr kormā mẽ. Ō pàr kām nhỹ mẽ Tĩrtūm kapēr ā kagà htūm kamā kapēr o mō. Tĩrtūm nhỹ hā kapēr o pa xwȳnh pē Ijais kot Tĩrtūm kapēr ā kagà htūmja nhūm kamā kapēr o mō.

29 Hāmri nhūm Tĩrtūm Karō Firipti mā harē mẽ kām:

—E mēhō mȳj wȳr aprōt mẽ tē mẽ hā ajēt mẽ ma hkōt tē. Anē.

30 Hāmri nhūm kuma mẽ ma hwȳr hprōt mẽ hā ajēt mẽ kot kagà kamā kapēr ā kuma. Ijais kot Tĩrtūm kapēr ā kagà htūm kamā kapēr ā kuma mẽ kām:

—Pa? Mān ka aprĩ hā ate kamā akapēr xwȳnhhta ma nà? Anē.

31 Hāmri nhūm kām:

—Nà ixte maare hã. Mëhõ kot hprĩ hã inhmã harẽ pa ixprĩ hã kuma? Xàt ka ixwỳr api nẽ ixri nhỹ nẽ aprĩ hã inhmã harẽnh o ixkõt mõi nã? Anẽ.

Hãmri nhũm kuma nẽ hwỳr api nẽ ìhkõ hã nhỹ nẽ kagàta pumunh o nhỹ.

³² Nhũm hã kagà kot:

Na htem ôwêhti par kaxyw nhũm amarĩ mẽ kãm akryk kuhẽ.

Nẽ mẽ kot kêp hkĩ jakàr kaxyw nhũm ma anẽ nẽ amarĩ mẽ kãm akryk kuhẽ.

Tã na pre mëhõja ôwêhti kot amnhĩ nhĩpêx pyrãk o amnhĩ nhĩpêx.

Jakamã nhũm mẽ kot tanhmã hipêx to htã no nhũm arĩ mẽ kãm akryk xa. Amnhĩ nẽ tanhmã mẽ kãm kapêr punuj to hkêt nẽ.

Ãm arĩ mẽ kãm xa.

³³ Na prem homnuj tỳx nẽ ri hipêx kati rax nẽ.

Aa kot tanhmã amnhĩ tomnuj to hkêt kumrêx tã nhũm mẽ ã hipêx anẽ nhũm mëhõ yr pẽ tanhmã nẽ mẽ kãm kapêr to hkêt nhũm prem kupĩ.

Nhũm amnhĩ kanrêhã hkra hkêt rãhã ty. Jakamã kot puj mẽ hkrajê nhĩxi mar kêt nẽ. Kra hkêt rãhã htyk kênã. Anẽ.

³⁴ Nhũm pre ã Exiop nhõ xwỳnh Tĩrtũm kapêr ã kagà htũm kamã harẽnh anẽ. Hãmri nẽ tee ri ã kot mëhõ jarẽnh anhỹrja kukamã hamaxpêr nẽ hã Firipti kukja nẽ kãm:

—Kwa aprĩ hã inhmã mëhõja jarẽ. Mëhõ na prem ã hipêx rax anẽ? Xà kot kagà xwỳnhhta na prem ã hipêx anẽ nã xà nhãm mëhõ na prem ã hipêx anẽ? E kwa aprĩ hã inhmã harẽ pa ã mẽ kot hipêx anhỹr xwỳnh kõt omu. Anẽ.

³⁵ Hãmri nhũm kãm:

—Tõe kot paj amã harẽ. Nà Jejus na prem ã hipêx anẽ nhũm prem hã kagà. Anẽ.

Hãmri nẽ hprĩ hã kãm kot kamã harẽnh xwỳnhhta jarẽ. Jejus kot tanhmã mẽ panẽ amnhĩ nhĩpêx toja nhũm hprĩ hã kãm harẽnh o hkõt mõi.

³⁶ Hãmri nhũm wa kormã mõi nẽ pry htã himõ hãnh mõi nhũm Exiop nhõ xwỳnh omu nẽ Firipti mã kãm:

—E mỳj gõ mỳj nõ. Xà kot kaj kamã ixkrã kumrã nã? Anẽ.

³⁷ Nhũm kãm:

—Nà kot kaj amnhĩ kaxyw Jejus Kris kõt ajamaxpêr nẽ hkõt amnhĩ xãm hã kot paj akrã kumrãr kurẽ kumrêx. Anẽ.

Hãmri nhũm kãm:

—Tỳ. Kêp Tĩrtũm Kra kênã kot paj kêt amnhĩ kaxyw hkõt ijamaxpêr kêt. Anẽ.

³⁸ Hãmri nẽ pàr o mrrar xwỳnh mã anẽ nhũm pàr o nõ nhũm wa kato nẽ himõ hwỳr wrỳ nhũm Firipti hkrã kumrã. Kot Jejus kõt amnhĩ xãm ã hkrã kumrã.

³⁹ Hãmri nẽ wa akupỹm api nhũm Tĩrtũm Karõ Firipti mỳ nẽ ma nhỹhỹm o mõi nhũm Exiop nhõ xwỳnhja axte omunh kêt nẽ. Hãmri nẽ ma akupỹm papxà hwỳr mõi. Ra kot Jejus kõt amnhĩ xãm jakamã hkĩnh nẽ ma akupỹm mõi.

⁴⁰ Rôm nhũm Firipti krĩ pẽ Ajõt kamã pøj. Tĩrtũm Karõ kot Exiop nhõ xwỳnh pẽ kator nẽ tanhmã ho nẽ Ajõt wỳr o mõi hãmri nẽ kamã kumẽ. Hãmri nhũm mẽ kãm Jejus kot tanhmã mẽ panẽ amnhĩ nhĩpêx to hã harẽnh pẽ ma krĩ hõ hwỳr mẽ kãm ujarẽnh anhỹr o pa rãhã krĩ pẽ Sejarej wỳr mõi nẽ pøj.

9

Sawti kot Jejus kõt amnhĩ xãm ã harẽnh

Atre 22.6-11, 26.12-18

¹ Rôm nhũm Sawtija xatã Jerujarẽ kamã Pahihti Jejus kõt mẽ kot amnhĩ xunhwỳr xwỳnhjaja tanhmã mẽ homnuj tỳx to ho ri mẽ hkõt pa. Kãm mẽ himex par prãm jakamã na pre hte ã amnhĩ nhĩpêx anhỹr pix o pa. Tã ra hamaxpêr nẽ ma patre maati hwỳr tẽ nẽ mẽ hã amnhĩ jarẽ nẽ kãm:

² —E ot pa awỳr tẽ. Kwa inhmã kagà nhĩpêx pa kupy nẽ ma krĩ pẽ Tamas kãm mẽ pahpẽ Ijaew xàptàr tũmrejê hwỳr o mõi nẽ mẽ kãm kugõ. Kê mẽ kamã harẽ nẽ omu hãmri nẽ hkõt inhĩhkra kamã Jejus kõt mẽ kot amnhĩ nhĩpêx xwỳnhjê jagjê. Mënijaja nẽ mẽmyjaja. Hãmri pa mẽ unẽ nẽ

man akupÿn awÿr mẽ o mō ka mẽ omu nē kam tanhmā mẽ hipêx to. Anē.

Hāmri nhũm kuma nhũm ja kām mex nē. Hāmri nhũm kām kagà nhĩpêx nē kugō nhũm kupy nē hkôt mẽ pa xwÿnhjê mẽ ro hā ma Tamas wÿr mẽ hwÿr mōr kurê kumrêx.

³ Mōō mẽ ra hpôx o mōr mẽ nhũm puh kaxkwa rũm hirā rax kumrêx wrÿ nē hā ajêt nhũm hipôk ri xa.

⁴ Hāmri nē tee ri omu nē kām ma xàj pykap tēm nē akryk nō. Hāmri nhũm kaxkwa rũm mēhō kām kapêr nē kām:

—Pa Sawti? Hêxta waa nē. Kwa mon ka hte ixtomnuj tÿx o ri apa? Anē.

⁵ Hāmri nhũm amnhĩ jaêr pê kuma nē kām:

—Kwa mẽ atō na ka ã inhmā akapêr anē pahihiti? Anē.

Hāmri nhũm kām:

—Kwa nhũm ixpê Jejus ixte amā ixkapêr kênā. Pa na ka hte ixpê ixkôt mẽ kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrāk.

⁶ Nom kot kaj axte ã amnhĩ nhĩpêx anhÿr kêt kumrêx. E kànhmā xa nē māmri ma krĩ hwÿr tē. Kot kaj hwÿr pōj nhũm mēhō awÿr tē nē mēmoj tã amā karō ka ama nē hkôt amnhĩ nhĩpêx. Anē.

⁷ Nhũm pre ã Jejus Sawti mã kapêr anē. Nhũm hkôt mẽ pa xwÿnhjaja mēmoja ma no ãm hprĩ mar nē mēmoj pumunh kêt nē. Hāmri nē tee ri hamaxpêr nē kām ma xàj akryk kapêr kêt kumrêx nē kuhê.

⁸ Hāmri nhũm Sawti kànhmā xa nom rĩt kêt nē tee ri rĩt mã nhũm mẽ hpa hā kupy nē ma krĩm o mō.

⁹ Nē Tamas wÿr o pōj nē nhÿri mēhō nhōrkwÿ hwÿr ho axà nhũm kamā nohkre nē arĩ hkrĩ. Tee ri amnhĩ kukamā hamaxpêr o hkrĩ. Nē apkur kêt nē hkôm kêt o ra hā apkati axkrunêpxi.

¹⁰ Tamas kamā na pre mēhō my pê Ananĩsja pa. Kot Jejus kôt amnhĩ xunhwÿr xwÿnhjê hō na pre. Jakamā nhũm Jejus hwÿr kato nē kām kapêr.

Te hpimtir kām hwÿr kator nē kām kapêr pyrà nē kām:

—Pa Ananĩs? Anē.

Nhũm kām:

—ÿ? Ot pa xa. Mo na Pahihiti? Anē.

¹¹ Nhũm Jejus kām:

—E kêr ka akato nē ma mẽ kot kām: “Pry katàt” anhÿr xwÿnhhta wÿr tē. Hāmri nē kamā Jut nhōrkwÿ japêr. Kamā na Tas nhō xwÿnh pê Sawtija hkrĩ. Na no hkre nē inhmā amnhĩ jarênh o hkrĩ. Ka hwÿr axà nē omu.

¹² Ate hwÿr atēm nē inhÿ hā hā anhĩhkra xir nhũm akupÿm rĩt mex kaxyw na ato amÿti. Jakamā e ma hwÿr tē nē ã hipêx anē. Anē.

¹³ Hāmri nhũm Ananĩs tee ri kuma nē kām Sawti puma ho amnhĩ kamā kahak nē. Hāmri nē kām:

—Kwa nà Pahihiti. Tãm na xep hte Jerujarê kamā mẽ kot amnhĩ kaxyw akôt mẽ hamaxpêr xwÿnhjê nhĩpêx kati ho pa. Pa ra mẽ hā harênh ma.

¹⁴ Tã na xep ra jar Tamas wÿr pōj. Patre krãhtũm kapêr nhÿ hā kot mẽ ixpê akôt amnhĩ xunhwÿr xwÿnhjê pynênh nē ma akupÿm hwÿr mẽ ixto mōr kaxyw. Tãn ka ri hwÿr ijano. Kwa nà ri ixto anhÿr kêt nē Pahihiti. Anē.

¹⁵ Nhũm Jejus kām:

—Nà māmri ma hwÿr tē. Ra ixte amnhĩ kaxyw ãm kênā. Jakamā koja ã mẽ anhĩpêx anhÿrta hpãnhā ma mẽ piitã mẽ kām ixkapêr jarênh o pa. Mẽ apê Ijaew mã nē mẽ anhō pahi hkwÿjê mã nē mẽ kêp Ijaew kêt xwÿnhjê mã. Koja mẽ piitã mẽ kām ixkapêr jarênh mex o ri mẽ hkôt pa.

¹⁶ Koja mẽ ixtã homnuj tÿx nē nhũm amnhĩ xà htÿx kamā hamak o pa. Nom kot paj ixprĩ hā mẽ kot tanhmā ixtã hipêx to hkukamā kām ixujarênh pa nhũm amnhĩ kukamā amnhĩ jarênh ma. E tokyx māmri ma axãmnhix hwÿr tē. Anē.

¹⁷ Hāmri nhũm kuma nē kato nē ma Sawti hwÿr htēm kurê kumrêx. Hāmri nē ixkre hwÿr axà nē omu nē hkrã hā ìhkra xi nē kām:

—Pa Jejus kôt ixtō Sawti? E na Pahihiti Jejus awÿr inhmē pa awÿr tē. Pry kahti ri kot awÿr kator xwÿnhhta.

Tã akupÿm arît nhÿm Tÿrtÿm Karõ kot akarõ mã àr kaxyw na awÿr inhmẽ pa tẽ. Anẽ.

¹⁸ Hãmri nhÿm mẽmoj te tep kà pyrækja Sawti no rÿm hapôj nẽ rôrôk nhÿm akupÿm rît mex kurẽ kumrẽx. Hãmri nẽ kànhmã xa nhÿm Ananÿs hkrã kumrã. Ra amnhÿ kaxyw Jejus kôt hamaxpër ã hkrã kumrã.

¹⁹ Hãmri nhÿm nhÿ nẽ apku nẽ akupÿm hihtÿx.

Sawti kot Tamas kamã Jejus kapër jarẽnh

Sikÿn Korÿt 11.22-23

Nhÿm Sawti Tamas kãm mẽ kot Jejus kôt amnhÿ xunhwÿr xwÿnhjê hkôt amnhÿ xãm nẽ mẽ hkôt ri pa nẽ tokÿx ma akupÿm mör kêt nẽ.

²⁰ Kormã mẽ hkôt ri pa nẽ Ijaew nhõ Tÿrtÿm kapër o mẽ ahkre xà hã ixkre hwÿr mra nẽ kamã mẽ kãm Jejus kapër jarẽ. Kêp Tÿrtÿm Kra hã harẽnh o kuhê.

²¹ Hãmri nhÿm mẽ amnhÿ jaêr pê ã harẽnh anhÿrja ma nẽ tee ri hamaxpër nẽ axpën mã:

–Kokÿÿ. Kwa tãm na xep pre Jerujarẽ kamã amnhÿ kaxyw Jejus kôt mẽ kot amnhÿ xunhwÿr xwÿnhjê homnuj tÿx o pa. Tã xep jar kot mẽ hkwyjê pynênh nẽ ma mẽ o mör nẽ Jerujarẽ kamã patre krãhtÿmjê mã mẽ õr kaxyw na pre man mẽ pahwÿr mō. Tã ra tanhmã hamaxpër to nẽ axtem nẽ mẽ pamã Jejus kapër jarẽnh o mẽ pajahkre ho pa. Anẽ.

²² Hãmri nhÿm Sawti arÿ Tamas kãm Ijaew mã tanhmã Jejus jarẽnh to kamã hihtÿx o mẽ hkôt pa nẽ mẽ kãm:

–Nà Jejus Krisja na pre Tÿrtÿm mẽ pakaxyw ãm nẽ mẽ pahwÿr kumẽ. ãm hãmri na pa mẽ amã ja jarẽ. Anẽ.

Hãmri nhÿm mẽ kuma nẽ tee ri kutã tanhmã kapër to hkukamã hamaxpër.

²³ Tã ra hã apkati xohtô nẽ nhÿm Tamas kãm Ijaew kwÿjaja kot Sawti pÿr kaxyw hã axpën ma.

²⁴ Hãmri nhÿm mẽhõja hã ama nẽ Sawti hwÿr tẽ nẽ kãm mẽ harẽ nẽ kãm:

–Kwa Sawti kêr ka axkãm ajamak rom. Na mẽ pahkwÿjaja atã amÿnê. Na mẽ ra krÿ puhã kahê xà hã hakwakre piitã hamãr ho kuhê. Kot kaj nhÿhÿm akato nhÿm mẽ apumu nẽ apynê nẽ apÿ. Anẽ.

²⁵ Jakamã nhÿm kamãt nhÿm Sawti hkôt ri mẽ pa xwÿnhjaja kawà rax õ mÿ nẽ hwÿr o tẽ nẽ kãm ãm nhÿm hwÿr axà nẽ nhÿ. Hãmri nhÿm mẽ hkagrÿ nẽ kên o krÿ puhã kahêja nhÿrô pê ho wrÿ nhÿm mẽ kêp kato nẽ ma mō.

Sawti kot Jejus kwÿjê hkôt pikamênh ã harẽnh

Karatas 1.15-24

²⁶ Tã nhÿm Sawti krÿ pê Tamas rÿm kato nẽ ma akupÿm Jerujarẽ hwÿr mō hãmri nẽ hwÿr pøj. Hãmri nẽ mẽ kot Jejus kôt amnhÿ xunhwÿr xwÿnhjê hkôt amnhÿ jarẽnh kaxyw mẽ hwÿr tẽ. Hãmri nhÿm mẽ tee ri amnhÿ wÿr omu nẽ kot Jejus kôt amnhÿ xãm ã amnhÿ to hêx ã hkamnhÿx hãmri nẽ amnhÿ kamã kahak o amnhÿ nẽ hkurê nẽ mẽ piitã kãm uma nẽ.

²⁷ ãm Panãpe pix ãm hãmri kot Jejus kôt amnhÿ xãm kôt hamaxpër. Hãmri nẽ ma hwÿr tẽ nẽ haprô nẽ ma Jejus nhÿ hã mẽ ahkre xwÿnh maatijê hwÿr o tẽ nẽ yr pê mẽ kãm kapër nẽ mẽ kãm:

–Kwa ãm hãmri na Sawti amnhÿ jarẽ. Na ra mẽ pahpyrà nẽ Jejus kôt amnhÿ xãm. Na xep pre Tamas wÿr pry hã kormã mō nhÿm xep Pahihti Jejus hwÿr kato nẽ kaxkwa rÿm kãm kapër nhÿm kuma nẽ hkôt amnhÿ xãm. Jakamã nhÿm xep ra axtem kot amnhÿ nhÿpêx nyw o Tamas nhõ xwÿnhjê mã Jejus kapër jarẽnh o ri mẽ hkôt pa. Ra amnhÿ kamã kãm mẽ uma hkêt nẽ ãmnhÿx ri mẽ kãm harẽnh o ri mẽ hkôt pa. Anẽ.

²⁸ Hãmri nhÿm mẽ kuma nẽ amnhÿ kôt Sawti mẽ nhÿm mẽ hkôt ri pa. Hãmri nẽ Jerujarẽ kamã mẽ piitã mẽ kãm Jejus kapër jarẽnh o pa. Kãm Jejus kôt amnhÿ xunhwÿr kêt xwÿnhjê pÿma hkêt nẽ ãmnhÿx ri mẽ kãm kapër jarẽnh o ri mẽ hkôt pa.

²⁹ Nẽ Ijaew kwÿ pê Gresjê kapër o mẽ kapër xwÿnhjê mã nhÿm xatã mẽ

kãm Jejus jarënh o ri mẽ hkôt pa. Kêp Tirtũm kot mẽ pakaxyw ãm xwýnh ã harënh rãhã ho ri mẽ hkôt pa. No nhũm mẽ kãm mar prãm kêt nẽ ra kot Jejus ã hpĩr mã.

³⁰ Hãmri nhũm mẽ kot Jejus kôt amnhĩ xunhwýr xwýnh kwýjaja mẽ harënh ma nẽ mẽ kêp ho kato nẽ ma krĩ pê Sejarej wýr o mõi. Hãmri nẽ kurũm ma akupým õ krĩ pê Tas wýr kumẽ nhũm ma akupým mõi.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurẽ xwýnhjaja axte Jejus ã tanhmã hkwýjê hto hkêt nhũm mẽ piitã hamakêtkati nẽ ãmnhĩx ri pa. Pika pê Jutej kamã nẽ Garirej kamã nẽ Samar kamã nhũm mẽ piitã hamakêtkati nẽ ãmnhĩx ri pa. Hãmri nẽ Tirtũm mã mex o mex ã harënh o ri pa. Nhũm Tirtũm Karõ tanhmã mẽ hkrã hto nhũm mẽ ra kapër kôt amnhĩ nhĩpêx mex o mõi. Hãmri nhũm mẽ ohtõ rax nẽ mẽ urak nẽ Jejus kôt amnhĩ xunhwý nẽ hkwýjê hkôt axkamẽ.

Enejti akupým mex ã harënh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwýr xwýnhjê mã Tirtũm kapër jarënh o mẽ ahkre kaxyw ma krĩ piitã hkôt pa. Jakamã krĩ pê Rit wýr mõi

³³ nẽ hwýr pøj nẽ kamã Enejti pumu. Nhũm ã kamã htyk pa nẽ kupĩp kãm hikwý rãhã mã amgrã pê 8.

³⁴ Hãmri nhũm Simãw Pêtre omu nẽ Jejus nhỹ mã kãm kapër nẽ kãm:

—Pa Enejti? E na Jejus Kris akupým ato mex. Jakamã e kãnhmã xa nẽ akupĩpta py. Anẽ.

Hãmri nhũm akupým mex nẽ kãnhmã xa nẽ amnhĩ pumu nẽ hkĩnh o hkĩnh.

³⁵ Hãmri nhũm krĩja kamã nẽ krĩ hõ pê Sarõ kamã mẽ piitã harënh ma nẽ mẽ kot amnhĩ tomnuj kaga hpa nẽ hpãnhã Jejus kôt amnhĩ xunhwý nẽ hkôt amnhĩ nhĩpêx o pa.

Tapitre akupým htĩr ã harënh

Rukre 8.49-56; Atre 20.7-12

³⁶ Nhũm Tapitreja krĩ pê Jope kamã na pre pa. Gres kapër kãm hixi pê

Nokre. Mẽ kapër kãm Nokreja te kêp “karà” anhýr jarënh pyrak. Na pre ra Tapitre pê Nokreja Jejus kôt amnhĩ xãm nẽ mẽ piitã mẽ ho mex o ri mẽ hkôt pa. Nẽ mẽ kêp amrakati xwýnhjê kamã ukaprĩ ho ri mẽmoj to mẽ kutã nojarêt o ri mẽ hkôt pa.

³⁷ Tã ra à htýx nẽ hãmri ty. Hãmri nhũm mẽ tee ri omu nẽ hkaprĩ nẽ mýr rax nẽ. Nẽ kumý nẽ kuhõ hãmri nẽ kormã haxar kêt ri kýx pê ixkre kamã kuxi nẽ kuri mýr o hkrĩ.

³⁸ Nhũm Simãw Pêtre kormã krĩ hõ pê Rit kamã ri pa. Rit rũm Jope hwýr jawý jakamã nhũm Jope kamã mẽ kot Jejus kôt amnhĩ xunhwýr xwýnhjaja Simãw Pêtre jarënh ma hãmri nẽ hwýr ja wa ho hamêxkrut nẽ wa kumẽ. Nhũm wa ma hwýr tẽ nẽ hwýr pøj nẽ omu nẽ kãm:

—Pa? E jar na pa wa awýr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxar kêt ri ma wa ixkôt hwýr tẽn omu nã? Anẽ.

³⁹ Hãmri nhũm wa kuma nẽ ma wa hkôt htẽm kurẽ kumrêx. Hãmri nẽ Jope hwýr pøj nẽ mẽ hwýr tẽ nhũm mẽ kýx pê htyk nẽ nõr xwýnhja wýr ho api nhũm hwýr axã. Nhũm kuri mẽ kêp mẽ mjên htyk xwýnhjaja hkaprĩ nẽ mýr o hkrĩ. Hãmri nhũm Simãw Pêtre mẽ hwýr axã nhũm mẽ omu nẽ kãm Tapitre kormã htĩr ri kot tanhmã mẽ ho mex to mã harẽ. Nẽ mẽ ê hkwý jamý nẽ kãm kupẽ nẽ kãm:

—Ga ja pumu. Tyk xwýnhhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpê ty. Hêxta gãa nẽ. Na pa mẽ ixkaprĩ htýx kumrêx. Anẽ.

⁴⁰ Hãmri nhũm mẽ kuma nẽ mẽ kator pa hãmri nẽ htyk xwýnhhta ri hkõn krã ho nhỹ nẽ ho Tirtũm wý. Hãmri nẽ htyk xwýnhhta mã kapër nẽ kãm:

—Pa Tapitre? E kwa kãnhmã nhỹ. Anẽ.

Pu nhũm no amra nẽ Simãw Pêtre pumu nẽ kãnhmã nhỹ.

⁴¹ Hãmri nhũm hpa mã kupy nẽ kãnhmã ãm nẽ kapôt ã mẽ kuhẽ xwýnhjê mã anẽ nhũm mẽ akupým wa hwýr agjê nhũm mẽ kãm:

—E ota. Na Tirtūm akupŷm mẽ amã ho htĩr. Anẽ.

Hãmri nhũm mẽ amnhĩ jaêr pê omu nẽ hkĩnh tỳx nẽ.

⁴² Hãmri nhũm Jope kamã mẽ piitã harênh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ.

⁴³ Hãmri nhũm Simãw Pêtre Jope kamã ri pa hã apkati xohtô nẽ tokyx mẽ kurūm kato nẽ ma krĩ hõ hwỳr mōr kêt nẽ. Na pre mry kà ho mẽmoj nhĩpêx o pa xwỳnh pê Simãw ri pōj nẽ kuri pa hã apkati xohtô nẽ.

10

Konêre kot Simãw Pêtre hã karō hã harênh

Rukre 7.1-10

¹ Tã nhũm Ijaew kêt xwỳnh Konêre. Kêp Rōmjê nhõ pōristi krãhtūm na pre. Ō pōristija pika pê Itar nhõ xwỳnh na pre mẽ nhũm Konêre kêp mẽ hkrãhtūm. Krĩ pê Sejarej kamã.

² Konêreja kot amnhĩ to mex o pa xwỳnh na pre. Kêp Ijaew kêt tã na pre hte ōrkwỳ kamã hkwyjê mẽ Tirtūm ã hpijaam nẽ kãm mex o mex ã harênh o pa. Apkati mẽ kãm amnhĩ jarẽ. Nẽ mẽ kêp amrakati xwỳnhjê mã kàxpore hkwy nhõr o pa.

³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nẽ kaxkwa kamã Tirtūm kapêr o wrỳk xwỳnh pumu. Nhũm hwỳr wrỳ nẽ tanhmã kãm kapêr to nẽ kãm:

—Pa Konêre? Anẽ.

⁴ Nhũm tee ri omu nẽ kãm ma htỳx kumrêx. Hãmri nẽ kãm:

—Mo na? Anẽ.

Hãmri nhũm kãm:

—Nã ate amnhĩ to Tirtūm wỳr o apaja nhũm ra amnhĩ tã ama nhũm ja kãm mex nẽ. Nẽ ate mẽ kêp amrakati xwỳnhjê mã kàxpore hkwy nhõr o apaja nhũm ja mãănênh kãm mex nẽ.

⁵—Jakamã e inhma. Kêr ka ma Jope hwỳr amã mẽ àpênh xwỳnh kwỳ rê kê mẽ ma hwỳr mra nẽ kamã mẽhõ pê Simãw Pêtre japrô nẽ man akupŷn awỳr o mō.

⁶ Simãw kot mry kà ho mẽmoj nhĩpêx o pa xwỳnhhta nhõrkwỳ kamã na hte pa. Ōrkwỳja gô mỳ ri na. E hwỳr mẽ arẽ kê mẽ ma hwỳr mō nẽ haprô nẽ man awỳr o mō kê amã mẽmoj mex jarẽ ka ama. Anẽ.

⁷ Nhũm pre ã Tirtūm kapêr o wrỳk xwỳnhja Konêre mã kapêr anẽ hãmri nẽ kato nẽ ma akupŷm api. Hãmri nhũm kot mar xà hkôt jajê rê nẽ Simãw Pêtre hwỳr mẽ kurẽ. Kãm àpênh xwỳnhjê ho hamêxkrut nẽ kaxyw ò pōristi hõ. Pōristija na pre hte Konêre pyrã nẽ Tirtūm ã hpijaam o pa.

⁸ Jakamã nhũm mẽ kurê nẽ mẽ kãm kapêr hãmri nẽ ma Jope hwỳr Simãw Pêtre hwỳr mẽ kurẽ nhũm mẽ kato nẽ ma hwỳr mō.

⁹ Hãmri nhũm apkati nhũm kaxkwa nhĩpôk ri myt nhỹ nhũm mẽ hwỳr hpôx o mō.

Simãw Pêtre tanhmã hpimtir to hã harênh

Atre 11.5; Karatas 2.11-21

Rôm nhũm Simãw Pêtre kot Tirtūm mã amnhĩ jarênh kaxyw ixkre nhĩmôk ã api nẽ himôk po hã kãm amnhĩ jarênh o nhỹ.

¹⁰ Hãmri nẽ ra kãm prãm nẽ nom nhũm mẽ kormã kãm ò hã àpênh jakamã nhũm arĩ ixkre nhĩmôk ã Tirtūm mã amnhĩ jarẽ.

Hãmri nẽ Konêre pyrã nẽ te hpimtir kãm kot mẽmoj pumunh pyrã nẽ mẽmoj pumu nhũm Tirtūm Konêre hkukamã tanhmã kãm mẽmoj to amnhĩrĩt to. No ãm hã kuxi nẽ kãm harênh jakamã nhũm Simãw Pêtre te hpimtir kãm kot mẽmoj pumunh pyrã nẽ mẽmoj pumu.

¹¹ Nhũm kaxkwa katêr nhũm kurūm mẽmoj te kot mẽ hpipro xà pyrãk xwỳnhja pyka hwỳr wrỳk o mō. Nẽ hatur xà piitã axpên tã akuprô nẽ ajêt nẽ wrỳk o mō nhũm omu.

¹² Mẽ hpipro xàta kamã mẽmo mry piitã hikwỳ. Mẽmo mry hpar o ri pa xwỳnhjaja nẽ htu mỳr pê ri pa xwỳnhjaja nẽ mẽmo àk kỳx pê htor o ri mrar xwỳnh piitã mẽ hpipro xàja kamã hikwỳ nhũm omu.

¹³ Hāmri nhūm Tirtūm kām:

—Pa Simāw Pêtre? Mãn ka ra amā prām nē nà? E kànhmā xa nē axàmnhix māmri mryta ò kapi nē apī nē ho anē nē aku. Piitā mẽ ate hkur mã mex. Anē.

¹⁴ Hāmri nhūm tee ri kuma nē kām:

—Kwa nà Pahi Maati. Mẽ ixpê Ijaew mẽ ixte mry piitā hkur kêt. ãm hkwỳ pix na pa htem kuku. No mry jaja aa mẽ ixte hõ hkwỳ hkrēr kêt. Anē.

¹⁵ Hāmri nhūm Tirtūm kām:

—Nà kot anhỹr tã kot paj pam amā mẽmoj jarê ka kamā anhõkre kahak kêt nē. Māmri amnhĩm hõ kapi nē apī nē ho anē nē axàmnhix hkwỳ hkre. Anē.

¹⁶ Nhūm pre ã kām mry hã karõ anhỹr o axkrunẽpxi. Simāw Pêtre kot māmri Ijaew kêt xwỳnhjê hkôt pa nē àmnhix ri mẽ kutã apkur nhūm Tirtūm kām ja mex nhūm kot hã amnhĩ pumunh kaxyw nhūm ã kām harēnh anhỹr o axkrunẽpxi. Hāmri nhūm mẽ hpiipro xàja ma akupỹm kaxkwa hwỳr àpir o mõi nē akunok.

¹⁷ Hāmri nhūm Pêtre te hkrākator pyrak jao tee ri hpimtir kukamã hamaxpêr o nhỹ nē hamaxpêr o:

—Kwa mo kaxyw na Tirtūm ã inhmã ja hã karõ anē? Anē.

Rôm nhūm Konêre kot hwỳr mẽ rēnh xwỳnhjaja ra hwỳr hpõx o mõi. Ijaew kêt xwỳnhjtaja Simāw nhõrkwỹ hã mẽ hkukjêr o mõi nē hwỳr pøj nē hakwakrem kuhê.

¹⁸ Hāmri nē òrkwỹ nhõ xwỳnhjê mã kām:

—Pa na ka mẽ arĩ akrĩ? E Simāw Pêtre hwỳr na pa mẽ mõi. Xà jar na hte pa nà? Anē.

Hāmri nhūm mẽ kām: —Tỳ. Omũj kỳx pẽ ixkre nhĩmõk ã na nhỹ. Anē.

¹⁹ Nhūm Simāw Pêtre arĩ kot mẽmoj pumunhta kukamã hamaxpêr o nhỹ nhūm Tirtūm Karõ kām mẽ hpõx xwỳnhjê jarê nē kām:

—E Simāw Pêtre. Ota Ijaew kêt xwỳnhjaja axkrunẽpxi nē ajapêr o mõi nē ra anhõrkwỹ hwỳr pøj.

²⁰ Mẽ hwỳr wrỳ nē mẽ kot amā mẽmoj jarēnh ma nē māmri axàmnhix

ma mẽ hkôt mõi. Tanhmã ajamaxpêr to hkêt nē. Pa na pa awỳr mẽ kumẽ nhūm mẽ mõi. Anē.

²¹ Hāmri nhūm kuma nē mẽ hwỳr wrỳ nē mẽ omu nē mẽ kām:

—Pa? Xà pa na ka mẽ ijapêr o mõi? E ot pa xa. Kam nē mẽ inhmã mẽmoj jarê pa mẽ ama. Mẽmo kaxyw na ka mẽ ixwỳr mõi? Anē.

²² Hāmri nhūm mẽ kām:

—Nà mẽ inhõ patrãw Konêre na awỳr mẽ inhmẽ pa mẽ mõi. Na hte tãm amnhĩ nhĩpêx o pa. Nē Tirtūm ã hpi-jaam nē kām mex o mex ã harēnh o pa. Nhūm mẽ inhõ krĩ kamã Ijaew kām hkĩnh nē. Tã na Tirtūm kapêr o wrỳk xwỳnhja ham hwỳr wrỳ nē kām ajarê. Kot amnhĩ wỳr atã karõ nhūm ate hwỳr amõr nē kām axujarēnh kaxyw kām ajarēnh jakamã nhūm mẽ ixte ajaprõr kaxyw awỳr mẽ inhmẽ pa mẽ man awỳr mõi. Anē.

²³ Hāmri nhūm mẽ kuma nē mẽ kām:

—Tõe nà na pa mẽ ama. E mẽ agjê nē akrĩ nē jar mẽ ixri nõ kê apkati pu mẽ rĩ ma akupỹm mõi. Anē.

Hāmri nhūm mẽ kuma nē mẽ hwỳr agjê.

Tã nhūm apkati nhūm mẽ akupỹm nojarêt nhūm Simāw Pêtre ma mẽ hkôt mõi. Nhūm Jope kamã mẽ kot Jejus kôt amnhĩ xunhwỳr xwỳnh kwỳjjaja ma mẽ hkôt mõi. Nhūm mẽ mõi o kamàt.

²⁴ Hāmri nhūm apkati nhūm mẽ Sejarej wỳr hpõx o mõi. Nhūm ra Konêre mẽ kutêp amnhĩ wỳr hkwỳjê ho akuprõ nhūm mẽ Simāw Pêtre kutêp òrkwỹ kamã akuprõ nē hkrĩ.

²⁵ Hāmri nhūm mẽ hwỳr pøj nē mẽ hwỳr àr kaxyw nhūm Konêre amnhĩ wỳr omu nē kànhmã xa nē kutã tẽ nē hpar pẽ hkõnkrã ho tẽm nē nhỹ.

²⁶ Hāmri nhūm tee ri ja hã omu nē pa hã kupy nē kànhmã ãm nē kām:

—Kwa kànhmã xa. Ixpê Tirtūm kêt tã ka ri ã inhĩpêx anē. Anē.

²⁷ Hāmri nē hkôt òrkwỹ hwỳr axà nē kutêp mẽ pikuprõnh xwỳnhjê pumu nē mẽ kām:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ

nhîpêx ã mẽ ixpumunh mex. Na pa htem mẽ apê axtem nhõ xwýnhjê hkôt ri ixpa hkêt nê. Nê mẽ anhõrkwý hwýr inhgjêx kêt nê. Tã ham Tirtũm inhmã mẽ ixte ã amnhî nhîpêx anhýr o ixpaja nê ixkurê nê inhmã: “Kot paj pam mẽ hkwýjaja mex ã mẽ harê ka mẽ kamã anhõkre kahak kêt nê.”

²⁹ –Anhýr jakamã ka xep pre ixtã karõ pa inhîtõt kêt nê man mẽ awýr inhmõr kurê kumrêx. E mẽ inhmã mẽmoj jarê pa mẽ ama. Mẽmo kaxyw na ka mẽ ixtã karõ? Anê.

³⁰ Hãmri nhũm Konêre kãm:

–Nã jãã na pa pre jar inhõrkwý kamã Tirtũm mã amnhî jarênh o nhý. Ra myt xàpanh grire pa kãm amnhî jarê. Hãmri nhũm Tirtũm kapêr o wrýk xwýnh ixwýr wrý nê hirã rax kãm xa.

³¹ Hãmri nê inhmã: “Pa Konêre? E na hte Tirtũm ate kãm amnhî jarênh ta mar o hkrî. Nê ate mẽ kêp amrakati xwýnhjê ho mex o apaja nhũm hã apumũ.

³² Jakamã e ma Jope hwýr amã mẽ àpênh xwýnh kwý rê kê mẽ ma hwýr mõ nê kamã Simãw Pêtre japrõ nê man akupýn awýr o mõ. Mry kã ho mẽmoj nhîpêx o pa xwýnh Simãw nhõrkwý kamã na hte pa. Õrkwýja gõ mýri na.” Anê.

³³ –Ã kot inhmã kapêr anhýr jakamã na pa kuma hãmri nê awýr jajê rênh kurê kumrêx. Tã ka mẽ hkôt man mẽ ixwýr mõ nê ã apõx anê. ãm hãmri na ka mẽ hkôt mõ. Mẽ apê Ijaew kot amnhî nhîpêx kuhpa hã amnhî nhîpêx nê axãmnhîx man mẽ ixwýr mõ. Tã ot pa mẽ Tirtũm noo mã ixkrî. Kam nê mãmrî ý hã mẽ inhmã mẽmoj jarê pa mẽ ama. Anê.

Simãw Pêtre kot Konêre mã ujarênh

³⁴ Hãmri nhũm Simãw Pêtre Konêre kot kãm amnhî jarênhja ma nê mẽ kãm awjarê nê mẽ kãm:

–Nã ãm hãmri na Tirtũm mẽ akukamã tanhmã inhmã kapêr to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nê mẽ panhîpêx o axpên pyrãk.

³⁵ Kojã ahpýnhã pyka piitã hkôt mẽhõ mẽ ixpyrà nê kêp Ijaew kêt tãã hkôt amnhî xãm nê hã hpijaàm pê kãm mex o mex ã harê nê tãm amnhî nhîpêx. Hãmri nhũm Tirtũm ja hã omu nhũm ja kãm mex nê.

³⁶ –Na pre ra mẽ ixpê Ijaew mã tanhmã Kra Jejus Kris jarênh to. Jejus kot mẽ panê htyk kukwak ri na hte mẽ ixte hkôt amnhî xunhwýr xwýnhjê ho hkra. Tã ra mããnên ã mẽ apê Ijaew kêt xwýnhjê mã ã amnhî jarênh anê nê Jejus htyk kukwak ri mẽ ate mẽ ixpyrà nê hkôt amnhî xunhwýr xwýnhjê ho hkra. Jakamã Jejus Krisja kêp mẽ pahpiitã mẽ panhõ Pahiht.

³⁷⁻³⁸ –Mãn ka prem ra harênh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harê nê mẽ hkrã kumrãr o pa. Mẽ piitã mẽ kot amnhî tomnuj kaga nê Tirtũm kôt amnhî xunhwýr ã mẽ omunh xà hkôt mẽ hkrã kumrã. Jejusja krî pê Najare kamã na pre hprêk. Tã hwýr na pre Tirtũm amnhî Karõ mẽ nhũm wrý nê hkarõ mã axà nê hkôt pa ho pa. Jakamã nhũm àhpumunh o àhpumunh nê ma krî piitã hkôt tanhmã mẽ ho mex to ho ri mẽ hkôt pa. Pika pê Garirej kumrêx kamã mẽ piitã ri mẽ kãm Tirtũm kapêr jarênh o pa. Nê mẽkarõmnuti kot Satanasti nhý hã tanhmã mẽ ho xwýnhjaja nhũm mẽ nê mẽkarõmnuti japõx o pa. ã na pre Tirtũm nhý hã amnhî nhîpêx anhýr o pa.

³⁹ –Tã Jejus nhý hã hkrajê jahkre ho mẽ ixpa xwýnhjaja na pa prem kot ri tanhmã amnhî to ho pa hã omunh par o ri hkôt ixpa. Mẽ ixpê Ijaew nhõ pyka kamã nê mẽ inhõ krî pê Jerujarê kamã kot ri tanhmã amnhî nhîpêx to ho paja pa prem piitã omunh o hkôt ri ixpa. Tã nhũm prem axtem nê mẽ ixpê pĩ kahpa hã kunhõ nê kupĩ.

⁴⁰ Hãmri nhũm htyk o apkati axkrunêpxi nhũm Tirtũm akupým ho htír nê akupým mẽ ixwýr kumê pa prem akupým htír kãm omu.

⁴¹ No nhùm mē piitā akupÿm htír kām omunh kêt nē. Ām mē ixwÿr pix na pre kato nē mē ixkutā apku pa mē papxipixjaja akupÿm htír ā omu. Hāmri nhùm Tirtūm mē ixte ma mē piitā mē kām akupÿm htír ā harēnh o ri ixpa kaxyw mē ixrē.

⁴²⁻⁴³ Amnepēm Tirtūm nhÿ hā kapēr jarēnh o mē pa xwÿnhjaja na prem Jejus kukamā tanhmā hā kagā hto nē mē kām harēnh o pa. Nē mē kām:

Koja nhÿrmā mēhōja man mē pahwÿr wrÿ nē mē panē tanhmā amnhÿ nhÿpêx to. Ka mē atō amnhÿ kaxyw hkôt ajamaxpēr nē hkôt amnhÿ xām hā koja Tirtūm ja hā apumu nē mēhō kot tanhmā mē panē amnhÿ nhÿpêx to xwÿnhhta kukwak ri amnhÿ katut kôt ate amnhÿ tomnuj rēnh pa nē axte kām hamaxpēr kêt nē. Anē.

Na pre Tirtūm nhÿ hā kapēr jarēnh o mē pa xwÿnhjaja Jejus kukamā ā harēnh nē hā kagā anē. Tā koja Jejus nhÿrmā akupÿn wrÿ hāmri nē mē htyk xwÿnhjē nē arī mē htír xwÿnhjē mē pahto pimràatā tanhmā mē pajarēnh to. Mē pahte tanhmā amnhÿ nhÿpêx to ho papa hā mē pahpumunh kôt tanhmā mē pajarēnh to. Hāmri nē Tirtūm mē wa kuri mē pahtír tūm nē mē papa ho papa mā xwÿnhjē jarē nē māānēn wa kuri mē htír tūm kêt xwÿnhjē jarē. Mē pahpiitā tanhmā mē pajarēnh to kaxyw na pre Tirtūm mē pakaxyw Jejus xām. Tā ā kot mē pajarēnh anhÿrja kukamā na pre mē ixte mē amā tanhmā harēnh to ho ixpa kaxyw mē awÿr mē ixrē. Mē ate kapēr mar nē tokyx Jejus kôt amnhÿ xunhwÿr kaxyw. Anē.

⁴⁴ Nhùm Simāw Pêtre ā mē kām ujarēnh anhÿr rōm nhùm Tirtūm mē kot mar o hkrī xwÿnhjē hwÿr amnhÿ Karō rē nhùm mē hwÿr wrÿ nē mē hkarō mā gjêx pa.

⁴⁵⁻⁴⁶ Hāmri nhùm mē Tirtūm mā mex o mex ā harēnh o hkrī. No ām mē kapēr kām harēnh kêt nē. Mē kapēr kwÿ hō ho kām mex o mex ā harē. Aa mē kot mē kapēr mar kêt tā ra ho kapēr mex nē. Jakamā nhùm

Jope rūm mē kot Simāw Pêtre hkôt mē mōr xwÿnhjaja. Ijaew kwÿ kot ra Jejus kôt amnhÿ xunhwÿr xwÿnhjaja amnhÿ jaer pē ja hā mē omu nē axpēn mā:

—Hêxta waa nē. Mē kēp Ijaew kêt tā nhùm Tirtūm kot mē panhÿpêx pahpyrà nē mē hwÿr amnhÿ Karō rē nhùm mē hwÿr wrÿ nē mē kām agjê. Nā ām hāmri na mē pahpyrà nē ā mē hipêx anē. Anē.

Hāmri nhùm Simāw Pêtre mē kuma nē mē kām:

⁴⁷ —Kwa pu mē hkrā kumrār kurē kumrêx. Ra Tirtūm Karō kot mē pahpyrà nē mē hkarō mā gjêx kēnā kot kêt mēhō mē nē tanhmā mē pahpê àmnar to. Ra mē kot mē pahpyrà nē Jejus kôt amnhÿ xunhwÿr kēnā. Anē.

⁴⁸ Hāmri nē Konēre mē hkwÿjê mā kām:

—E kot paj mē ate Jejus Kris kôt amnhÿ xunhwÿr ā mē akrā kumrā. Anē.

Hāmri nē mē hkrā kumrār pa nhùm mē Simāw Pêtre mā kām:

—Kwa kormā anojarēt kêt nē. Kritpēm ri mē ixkôt ri apa hā atā apkati grēre nē kormā ma akupÿm mō. Anē.

Hāmri nhùm mē kuma nē mē hkôt ri pa hā apkati grēre hāmri nē nojarēt nē ma akupÿm mō.

11

Simāw Pêtre kot hkwÿjê mā Konēre jarēnh

Atre 10.1-48

¹⁻² Hāmri nhùm Simāw Pêtre ma akupÿm mō. Jutej kamā krī pē Jeru-jarē wÿr ma akupÿm mō hāmri nē pōj. Hāmri nhùm Jutej kamā Jejus nhÿ hā mē ahkre xwÿnh maatijê mē mē kot Jejus kôt amnhÿ xunhwÿr xwÿnhjaja Ijaew kêt xwÿnhjē jarēnh ma. Konēre mē hkwÿ kot mē urāk nē Jejus kôt amnhÿ xunhwÿr ā mē harēnh ma. Jakamā nhùm Simāw Pêtre akupÿm mē hwÿr pōj nhùm mē omu nē mē hā àhkukjêr kurē kumrêx. Hāmri nhùm mē hkwÿjaja mē hā kām akir nē kām:

³ —Kwa mē pahpê Ijaew pyrà nē mē kot amnhÿ my kwÿrÿt kà jakār kêt tā ka

mëmo hwÿr më hwÿr mõ më kuri pôj nê më kutã apku. Anê.

⁴ Hãmri nhũm Pêtre tee ri më kuma hãmri nê hprĩ hã më kãm amnhĩ jarê. Nê tanhmã Tĩrtũm kot kãm Ijaew kêt xwÿnhjê jarênh to hã më kãm harê nê më kãm:

⁵ —Kwa më ã ri ajamaxpêr anhÿr kêt nê. E pa më amã amnhĩ jarê ka më inhma mãn. Nà na pa pre jãã Jope kamã Tĩrtũm mã amnhĩ jarênh o nhÿ nê te ixpimtir kãm mëmoj pumunh pyrãk. Nhũm mëmojja te më hpiipro xà pyrã nê kaxkwa rũm ixwÿr wrÿk o mõ pa ixprĩ hã omu.

⁶ Nhũm kamã mry piitãã. Mry xopre nê mry xuwapô nê mry hpar o ri pa xwÿnhjaja nê mry htu mÿr pê ri pa xwÿnhjaja nê àk. Nê më pahte hkur xwÿnhjaja nê më pahte hkur kêt xwÿnhjaja.

⁷ Kamã mry piitã pa omu. Hãmri nhũm Tĩrtũm inhmã: “Pa Simãw Pêtre? Mãn ka ra amã prãm nê nã? E kãnhmã xa nê axãmnhĩx mãmri mryta ô kapi nê apĩ nê ho anê nê aku. Piitã më ate hkur mã mex.” Anê.

⁸ —Pa tee ri kuma nê kãm: “Kwa Pahi Maati. Më ixpê Ijaewjaja më ixte mryja piitã hkur kêt. ãm hkwÿ hpix na pa htem kuku. No ja hkwÿ aa më ixte hõ hkwÿ hkrêr kêt.” Anê.

⁹ Nhũm inhmã: “Nà nom kot anhÿr tãã. Kot paj pam amã mëmoj jarê ka kamã anhökre kahak kêt nê. Jakamã e mãmri amnhĩm hõ kapi nê apĩ nê ho anê nê axãmnhĩx hkwÿ hkrê.” Anê.

¹⁰ —Na pre ã Ijaew kêt xwÿnhjê hwÿr inhmör kukamã inhmã karõ ho axkrunêpxi anê. Nom hã kuxi nê inhmã më pahte mry kur kêeta jarê. Hãmri nhũm më hpiipro xàja ma akupÿm kaxkwa hwÿr apĩ nê kakrãm axã nê akunok.

¹¹ Hãmri nhũm Ijaew kêt xwÿnhjaja më ixwÿr axkrunêpxi nê mra nê pôj. Konêreja Sejarej rũm ixwÿr më rênh xwÿnhjaja nhũm më mra nê ixwÿr pôj.

¹² Hãmri nhũm Tĩrtũm Karõ ma më hkôt inhmê. Më kêp Ijaew kêt tã nhũm ixãmnhĩx ma më hkôt ixpa kaxyw më hkôt inhmê pa ma më hkôt

mõ. Nhũm Jope kamã më kot Jejus kôt amnhĩ xunhwÿr xwÿnh kwÿjaja kêp 6ja ma më ixkôt mõ. Pa më mõ nê Sejarej kamã Konêreja wÿr pôj.

¹³ Hãmri nhũm më ixpumu nê më inhmã amnhĩ jarê. Tĩrtũm kapêr o wrÿk xwÿnh kot hwÿr wrÿk nê ôrkwy hwÿr àr nê tanhmã kãm kapêr toja nhũm inhmã harê. Na xep pre kãm: “E kêr ka ma Jope hwÿr amã më àpênh xwÿnh kwÿjê rê kê më ma hwÿr mõ. Hãmri nê kamã Simãw Pêtre japrô nê man akupÿn awÿr o mõ kê tanhmã më amã ujarênh to.

¹⁴ Koja më amã tanhmã më apê Tĩrtũm kra hprãm xàj tanhmã më ate amnhĩ nhĩpêx to hã më amã karõ ka më ama nê mar tÿx nê hkôt amnhĩ nhĩpêx. Ka më anhörkwÿ kamã akwÿjê më apimràatã ama nê mar tÿx nê. Hãmri nê kot më amã hã karõ xà hkôt amnhĩ nhĩpêx nhũm Jejus më ate amnhĩ tomnuj pê më apytàr pa.” Anê.

—Na xep pre ã Tĩrtũm kapêr o wrÿk xwÿnhja kãm ijarênh anê. Jakamã nhũm ixwÿr jajê rê pa ma më hkôt mõ.

¹⁵ Hãmri nê kormã më kãm tanhmã Jejus jarênh to. Tanhmã kot më panê amnhĩ nhĩpêx to hã harê. Nê kormã më kãm ixujarênh o ixãm rôm nhũm Tĩrtũm Karõ te wam kot më panhĩpêxta pyrã nê më hwÿr wrÿ nê më hkarõ mã gjêx pa.

¹⁶ Pa ja hã më omu nê Pahihti Jejus kot akupÿm kaxkwa hwÿr nojarêt nê tanhmã më pamã kapêr tota mã ijamaxpêr kurê kumrêx. Na pre më pamã: “Finat Juãw Paxis na pre hte gô ho më hkrã kumrãr o pa. Tã koja Tĩrtũm ta hpãnhã më awÿr amnhĩ Karõ rê nhũm më akarõ mã agjê.” Anê.

—ã na pre Pahihti Jejus akupÿm nojarêt nê më pamã kapêr anê. Jakamã pa ã kot më hipêx anhÿr ã më omu nê ã kapêr anhÿrja mã ijamaxpêr kurê kumrêx.

¹⁷ Na pu prem Pahihti Jejus Kris kôt amnhĩ xunhwÿr nhũm Tĩrtũm ja hã më pahpumu nê më pahwÿr amnhĩ

Karõ rē. Tã te kot mẽ panhĩpēxta pyrà nē mãănēn Ijaew kêt xwỳnhjtajê hwỳr kurē nhũm mẽ hkarõ mã agjê. Mẽ kệp Ijaew kêt tã nhũm mẽ pahpyrà nē mẽ hwỳr kurē nhũm mẽ hkarõ mã agjê. Tĩrtũm tãm kot amnhĩ krã hkôt mẽ hwỳr rēnh kēnã kot pa kêt mẽ nē tanhmã kệp ixàmnr to. Anē.

¹⁸ Nhũm pre ã Simãw Pētre mẽ kãm amnhĩ jarēnh anē nhũm mẽ kuma nē tãm hamaxpēr nē hkĩnh nē. Nē axte mẽ hã tanhmã kãm nē hkêt nē. ãm mẽ hã Tĩrtũm mã mex o mex ã harē. Hãmri nē axpēn mã:

—Nà ãm hãmri. Mẽ kệp Ijaew kêt tã na prem Jejus kôt amnhĩ xunhwỳ nhũm Tĩrtũm kot mẽ panhĩpēxta pyrà nē amnhĩ katut kôt mẽ kot amnhĩ tomnuj rēnh pa. Nhỹrmã wa hkuri mẽ pahpyrà nē htĩr tũm nē pa ho pa kaxyw nhũm ã mẽ hipēx anē. Nà ãm hãmri na ã kot mẽ panhĩpēx pyrà nē mẽ hipēx anē. Anē.

ãxiok kamã Jejus kwỳ jarēnh
Atre 4.36-37

¹⁹ Tã ra mẽ kot kēn o Estewãw kapēr o hpĩr xwỳj ri mẽ kot ã hipēx anhỹrta pyrà nē mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwyjaja mẽ umaj ma ahpỹnhã krĩ hkwy hkôt pi-granh pa. Wēnĩs wỳr nē Sipre hwỳr nē ãxiok hwỳr nhũm mẽ ma ahpỹnhã krĩ hkwy hkôt angrã nē kamã pa ho pa. Nē mẽ kãm tanhmã Pahihti Jejus kot mẽ panē amnhĩ nhĩpēx to hã harēnh o ri mẽ hkôt pa. No ãm kormã Ijaew pix mã harēnh o pa.

²⁰ Tã hãmri nhũm mẽ hkwyjaja Sipre mẽ Sirēn rũm ãxiok hwỳr pan pøj. Hãmri nē kamã mẽ kệp Ijaew kêt xwỳnhjê mã Pahihti Jejus kot amnhĩ nhĩpēx jarēnh o pa. ã mẽ kot amnhĩ nhĩpēx anhỹr jakamã na mẽ ra ahpỹnhã ri mẽ kãm harēnh o ri pa. Ijaew mã nē mãănēn Ijaew kêt xwỳnhjê mã

²¹ nhũm mẽ ma mẽ hkôt ri Pahihti Jejus nhỹ hã mẽ kãm kapēr jarēnh o ri mẽ hkôt pa. Hãmri nhũm mẽ ohtô nē amnhĩ nhĩpēx tũm kaga hpa

nē hpãnhã amnhĩ kaxyw Jejus kôt hamaxpēr nē hkôt amnhĩ xunhwỳ.

²² Hãmri nhũm Jerujarē kamã Jejus kwỳjaja mẽ harēnh ma nē mẽ hwỳr Panãpe mẽ. ãxiok hwỳr mẽ hwỳr kumē. Ma mẽ hwỳr mōr nē Jejus kôt mẽ hamaxpēr o hihtỳx kaxyw.

²³ Hãmri nhũm ma mẽ hwỳr mō nē mẽ hwỳr pøj nē mẽ omu. Tĩrtũm kot mẽ ho mex ã mẽ omu hãmri nē mẽ ý hã hkĩnh nē. Nē mẽ kãm:

—Nà ãm hãmri na ka mẽ ra Jejus kôt amnhĩ xunhwỳ nē hkôt amnhĩ nhĩpēx mex o ri apa. Tã kêt ka mẽ ãm kapēr kôt pix mã ri amnhĩ nhĩpēx rãhã ho ri apa nē aa hkaga hkêt nē. Anē.

²⁴ Panãpeja na pre tãm amnhĩ nhĩpēx o pa. Nē amnhĩ kaxyw Jejus kôt pix mã hamaxpēr mex o pa. Nē Tĩrtũm Karõ hkôt amnhĩ nhĩpēx rãhã jakamã na pre hte ý hã mẽ kãm Pahihti Jejus kot mẽ panē tanhmã amnhĩ nhĩpēx to hã harēnh o ri mẽ hkôt pa. Hãmri nhũm mẽ kuma nē ohtô nē Jejus kôt amnhĩ xunhwỳ.

²⁵ Tã nhũm Panãpe ãxiok rũm kato nē kot Sawti japrôr kaxyw ma krĩ pē Tas hwỳr mō.

²⁶ Hãmri nē hwỳr pøj nē Sawti pumu nē haprô nē ma akupỹm amnhĩ kôt ãxiok hwỳr o mō. Hãmri nē kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrã pyxi nē hapēx. Nē mẽ ho ohtô nē ri mẽ kãm Jejus kapēr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpēx xwỳnhjê pumu nē mẽ hã mẽ hixi rē nē mẽ harēnh o: “Kris tō nē htõxjaja” anhỹr o mẽ harē. ãxiok kumrēx kãm na prem ã mẽ kot Jejus kôt amnhĩ xunhwỳr xwỳnhjê jarēnh anē. Jakamã nhũm mẽ piitã ã mẽ harēnh anhỹr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapēr jarēnh xwỳnh kwỳjaja mẽ hwỳr mran pøj. Jerujarē rũm mẽ hwỳr mran pøj.

²⁸ Hãmri nhũm mẽ piitã mẽ kot mẽ kapēr mar kaxyw mẽ hwỳr akuprô.

Jakamã nhũm hõ pê Akapôja kànhmã xa nẽ tanhmã mẽ kãm ujarẽnh to. Tĩrtũm Karõ nhỹ hã mẽmoj kukamã mẽ kãm awjarẽ nẽ mẽ kãm:

–Kwa okora kër ka mẽ axkãm ajamak rom. Koja tokyx pika piitã hkõt mẽ apkur xà hã mẽõja mẽ kệp hkryre nẽ mẽ piitã mẽ hipêx kêt nẽ. Anẽ.

Tã nhũm gaa nẽ ujarẽnh xàja kõt mẽmoj ã amnhĩ nhĩpêx anẽ. Kormã Pahĩti Krawti kot mẽ ho amnhĩptãr ri nhũm mẽmoj ã amnhĩ nhĩpêx anẽ. No nhũm kormã ã amnhĩ nhĩpêx anhỹr kêt ri nhũm Akapôja kukamã ã mẽ kãm ujarẽnh anẽ.

²⁹ Hãmri nhũm mẽ kuma nẽ tee ri Jutej kamã Jejus kõt mẽ hkwyjê hkukamã hamaxpêr nẽ axpẽn mã:

–E kwa pu mẽ Jutej kamã Jejus kõt mẽ pahtõ nẽ pahtõxjê mã pahkàxpore hkwy gõ kê mẽ ho amnhĩm awjaprõ nẽ hkur o pa. Anẽ.

Hãmri nẽ mẽ kaxyw kàxpore hkwy ho akuprõ. Nhũm mẽ hikàxpore hkryre xwýnhjaja ãm mẽ kãm ho hkryre nẽ kugõ nhũm mẽ hikàxpore rũnh xwýnhja mẽ kãm ho rũnh nẽ kugõ.

³⁰ Jakamã nhũm mẽ ho hpikuprõnh pa nẽ Panãpe mẽ Sawti wa kot mẽ hwýr o mõi nẽ mẽ kãm õr kaxyw wa kãm kugõ. Hãmri nhũm wa hamý nẽ ma Jutej kamã Jerujarẽ hwýr mẽ hwýr o mõi. Hãmri nẽ hwýr pøj nẽ mẽ kot Jejus kapêr o mẽ ahkre xwýnhjê mã kugõ. Hãmri nhũm mẽ kãm Jejus kõt mẽ htõ nẽ htõxjê mã o angrã nhũm mẽ hamý nẽ hkĩnh nẽ ho amnhĩm awjaprõ.

12

Mẽ kot Simãw Pêtre pynênh nẽ haxàr ã mẽ harênh

Matêwre 18.19-20

¹ Tã nhũm mẽ õ pahi Eroxa õ pòristi mã Kris kwýjê hã amýnê nhũm mẽ mẽ hipêx kati nẽ nhũm mẽ amnhĩ xà htýx kamã hamak o pa.

² Juãw tõi Xiakreja nhũm mẽ pahi Erox nhỹ hã unê nẽ hkanhwýr o kupĩ.

³ Hãmri nhũm Ijaew kãm ja mex jakamã nhũm pahi Erox hpãnhã mẽ

kãm Simãw Pêtre hã amýnê nhũm unê nẽ haxà. Mẽ kot pãwti kaxkrit kêt kur ã mẽ hkĩnh xà hã arĩgro pê Pasja ã nhũm prem unê.

⁴ Na pre Erox Simãw Pêtre hkukamã hamaxpêr o:

–Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anẽ.

Hãmri nhũm pòristi kot Simãw Pêtre jamãr xwýnhjaja kệp 16. Nhũm mẽ axpẽn pãnhã kệp 4 kapẽn nẽ hamãr rãhã ho kuhê.

⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kõt htõ nẽ htõxjaja harênh ma nẽ tee ri hkukamã hamaxpêr hãmri nẽ axpẽn wýr akuprõ nẽ ho Tĩrtũm wýr rãhã ho hkrĩ.

Tĩrtũm kapêr o wryk xwýnh kot Simãw Pêtre kator ã harênh

⁶ Tã nhũm ra mẽ hkĩnh hapêx nhũm kamãt. Hãmri nhũm pahi Erox kot tanhmã Simãw Pêtre ho xà hã arĩgroja wýr nhũm kamãt nhũm pòristijaja arĩ mẽ hagjênh xà kamã hamãr mex o kuhê. Nhũm kuri wa hamẽxkrut nẽ akutã hijê nẽ hamãr o nõ. Kax o akutã kãm ê nẽ wa ho nõ nhũm wa hkaêx kãm htýx gõi nẽ nõ. Nhũm ja wa hakwa krem mããnên hamãr o xa.

⁷ Puh nhũm Tĩrtũm kapêr o wryk xwýnhjê hõja mẽ hwýr axà nẽ wryhtak rax kãm xa. Hãmri nẽ Simãw Pêtre grêk nẽ kumra nẽ kãm:

–Pa Simãw Pêtre? E kwa tokyj kànhmã xa pu mõi. Anẽ.

Hãmri nhũm hkrãkato nẽ omu nẽ kànhmã ãm kurê kumrêx nhũm kaxprexà hã kàxja axrê nẽ pykap rôrôk nẽ hikwý. No nhũm kuri pòristi wa nõr xwýnhta wa mar kêt nẽ. Wa arĩ õt týt nẽ nõ.

⁸ Hãmri nhũm Tĩrtũm kapêr o wryk xwýnhja Simãw Pêtre mã:

–E tokyx anhõ kamĩs jaxà nẽ amnê ixkõt tẽ pu pakato nẽ ma tẽ. Anẽ.

⁹ Hãmri nhũm kamĩs nẽ hparkà jaxà nẽ ma hkõt tẽ. No ãm kormã amnhĩ pumunh mex kêt nẽ. Te hpimtir kãm ã kot amnhĩ nhĩpêx anhỹr pyrãk ã amnhĩ kamnhĩx.

¹⁰ Hãmri nhũm wa hakwakrem pòristi wa kot hamãr o wa ãm xwýnhja

hãnh wa tẽ nẽ wa hakre nẽ hpãnhã ihõja wa hãnh wa tẽ no nhũm mẽ õt tỳx nẽ hkrĩ nẽ wa omunh kêt nẽ. Nhũm wa hakwakre nhĩtep xà hkõt wa tẽn kato nẽ hpãnhã krĩ nẽ kahê xà hã hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nẽ pry hã tẽ. Ja kõt nhũm Tĩrtũm kapêr o wryk xwỳnhja akunok nhũm Simãw Pêtre axte omunh kêt nẽ.

¹¹ Hãmri nẽ hprĩ hã amnhĩ pumunh kurê kumrêx nẽ hamaxpêr o:

—Kwa te ixpimtir kãm ã ixte amnhĩ nhĩpêx anhỹr pyrãk tã xep ixpimtir kêt. Tĩrtũm na ixwỳr kapêr o wryk xwỳnhja mẽ nhũm ixwỳr wry nẽ mẽ kêp ixkator. Pahi Erox ra kot ixpĩr nhũm ixkwỳ Ijaew kãm ja prãm tã nhũm mẽ kêp ixkator. Nà ãm hãmri na Tĩrtũm ã mẽ kêp ixkator anẽ. Anẽ.

¹² Hãmri nẽ Marir nhõrkwỹ hwỳr htẽm kurê kumrêx. Juãw Makre katorxà Marirja nhũm õrkwỹ hwỳr tẽ nhũm mẽ ra kamã hpikuprõnh rax nẽ ho Tĩrtũm wỳr o hkrĩ nhũm tãm mẽ hwỳr tẽ.

¹³ Hãmri nẽ kormã kapõt ã hakwa krem mẽ kãm kahê xà tatak o xa nhũm ixkre kamã mẽ kãm àpênh xwỳnh Rotreja kuma nẽ hwỳr tẽ.

¹⁴ Hãmri nhũm kãm kapêr nhũm amnhĩ jaêr pẽ kuma nẽ hkĩnh nẽ. Nẽ kormã kãm kahê xà mẽnh kêt ri ma akupỹm tẽ nẽ mẽ kot ho Tĩrtũm wỳr xwỳnhjê hwỳr axà nẽ mẽ kãm:

—Xê pêr Simãw Pêtre na tẽ nẽ kapõt ã hakwakrem xa nẽ inhmã kapêr.

¹⁵ Hãmri nhũm mẽ tee ri kuma nẽ kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atỳx ã akapêr anẽ. Anẽ.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harẽ. Mẽ kam nẽ mra nẽ omu. Anẽ.

Nom nhũm mẽ kuma nẽ ãm kuma nẽ kãm:

—Nà tãm kêt. Kaxkwa rũm Tĩrtũm mã hamãr o pa xwỳnh mãm amã kapêr nom tãm kêt. Anẽ.

¹⁶ Rõm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaêr pẽ omu nẽ hkĩnh nẽ.

¹⁷ Hãmri nhũm kãnhmã mẽ kãm ìhkra hpê nẽ mẽ ho hpinhkrênh pa nẽ mẽ kãm:

—Nà Tĩrtũm na ixwỳr kapêr o wryk xwỳnhja mẽ nhũm ixwỳr wry nẽ pôristi pẽ ixkator. Anẽ.

Hãmri nẽ mẽ kãm:

—E kêr ka mẽ Xiakre nẽ Jejus kõt mẽ pahtõ nẽ pahtõxjê mã ijarẽ kê mẽ ijarênh mar kurê kumrêx. Nom kot paj ixkato nẽ ma krĩ hõ hwỳr mõ. Anẽ.

Hãmri nẽ mẽ kêp kato nẽ ma mõ.

¹⁸ Tã nhũm apkati nhũm pôristi kot hamãr o hkrĩ xwỳnhjaja hkrã hapõj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpêr o kãm ma htỳx kumrêx nẽ axpên mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anẽ.

¹⁹ Hãmri nhũm pahi Erox hpikunor ã harênh ma nẽ axtem pôristi hkwyjê mã anẽ nhũm mẽ mra nẽ tee ri mẽ hagjênh xà kamã hapêr nom nhỹri omunh kêt nẽ. Hãmri nhũm Erox mẽ kot hamãr xwỳnhjê kamã gryk tỳx kumrêx nẽ amnhĩ wỳr mẽ hã karõ nẽ mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhĩmex ka mẽ rĩ amnhĩ pumu. Anẽ.

Hãmri nhũm mẽ tee ri kãm amnhĩ tã àprãr kaprỹ nhũm mẽ hã amỹnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Sejarej wỳr mõ nẽ hpãnhã kamã pa ho pa.

Pahi Erox tanhmã htyk to hã harênh

Wam Pêtre 1.24-25

²⁰ Krĩ pẽ Xir mẽ Sito wa kamã mẽ pa xwỳnhjaja na pre htem pahi Erox nhõ pyka hwỳr pa nẽ mẽ kêp amnhĩm apkur xà hã mẽõ japrõr o pa. Tã nhũm Erox kot mẽmoj mỳrapê mẽ

kamã gryk jakamã nhũm mẽ tee ri mẽ kệp ujaprôr kaxyw mẽ hwỳr mra nom nhũm mẽ kãm mẽmoj kwỳ ho wẽnê hkêt nê. Hãmri nhũm mẽ tee ri amnhĩ kukamã hamaxpêr nê pahi Erox nhõ kôwenatô Pratôja wỳr mra nê kãm:

—E awỳr na pa mẽ mra. Kwa mẽ ixyr pê pahi Erox mã tanhmã akapêr to kê ama nê mẽ ixkamã gryk kêt nê. Pa mẽ axte mẽ awỳr mra nê mẽ apê mẽmoj kwỳ japrôr o ri ixpa. Anê.

²¹ Hãmri nhũm mẽ kuma nê hwỳr tẽ nê mẽ yr pê tanhmã kãm kapêr to nhũm kuma hãmri nê kot tanhmã mẽ kãm kapêr to kaxyw mẽ kãm arĩgro hta.

Tã nhũm ra kot arĩgro hyr xwỳnhata kato nhũm Erox kệp pahi hã ê mex jaxà nê tẽ nê kệp pahi hã mẽ hkrĩ xà kamã nhỹ nê tanhmã mẽ kãm kapêr to.

²² Mẽ kãm kapêr ryy nê. Hãmri nhũm mẽ kuma nê hêx rom kãm mex o mex ã harê. Nê kỳx pêê axpên mã harê nê harênh o:

—Kwa pahi Erox kệp mẽ panhĩõ hkêt. Pêr kaxkwa rũm Mẽpahpãm na pre mẽ pahwỳr wrỳ nê ã mẽ pamã kapêr mex anê. Anê.

Hãmri nê te kệp Tĩrtũm pyràk o hipêx nê kãm mex o mex ã harê. Nom hêx rom ã harênh anê. Kot mẽ mar nê kãm mẽ hkĩnh nê akupỳm mẽ kãm mẽmoj to wẽnê hprãm xàj nhũm mẽ hêx rom ã axpên mã mex ã harênh anê.

²³ Hãmri nhũm mẽ kuma nhũm ja kãm mex nê nhũm hkĩnh nê mẽ mar o nhỹ nê kệp Tĩrtũm pyràk ã harênhja nê tanhmã mẽ kãm nê hkêt nê. Jakamã nhũm tee ri amnhĩ tã omu nê hwỳr kapêr o wrỳk xwỳnhjê hõ mẽ nhũm hwỳr wrỳ nê tanhmã ho nhũm õhy kamã kutôj rax nê htyk tokyx anê.

Panãpe mẽ Sawti wa akupỳm ãxiok hwỳr mõi ã wa harênh

Atre 11.27-30

²⁴ Tã nhũm mẽ ra ohtô nê Tĩrtũm Kra Jesus kot tanhmã mẽ panê amnhĩ nhĩpêx to hã harênh ma nê hkôt amnhĩ xunhwỳ.

²⁵ Hãmri nhũm Panãpe mẽ Sawti wa ra Kris kôt htõ nê htõxjê mã kàxporeta

jamỳ nê ma Jerujarê hwỳr o mõi nê mẽ kãm kugõ. Hãmri nê ma akupỳm ãxiok hwỳr nojarêr nê war amnhĩ kôt Juãw Makre o mõi. Hãmri nê mẽ ma mõi nê akupỳm mẽ hwỳr põi.

13

Tĩrtũm kot Panãpe mẽ Sawti wa hyr Atre 9.15-16; Rõmãn 1.1

¹ ãxiok kamã Kris kôt mẽ kot axpên to htõjaja kot Tĩrtũm nhỹ hã kapêr o mẽ ahkre ho pa xwỳnhjê nhĩxi ã kot anhỳr. Na pre Panãpe nê Sawti nê Simeãw kà htykre nê Rusti pê Sirên nhõ xwỳnh nê pahi Erox kràmnhwỳ Mãnahêja.

² Jakamã nhũm prem mẽmo arĩgro hã axpên wỳr akuprõ nê Tĩrtũm mã mex o mex ã harênh kaxyw apkur kêt rãhã kãm amnhĩ jarênh o hkrĩ. Hãmri nhũm Tĩrtũm Karõ mẽ kãm tanhmã kapêr o amnhĩrit to nê mẽ kãm:

—E kêr ka mẽ Panãpe mẽ Sawti war ata nê wa kot inhmã tanhmã amnhĩ nhĩpêx to ho pa kaxyw wa ãm. Anê.

³ Hãmri nhũm mẽ kuma nê wa hyr kurê kumrêx nê wa himõk ã mẽ ãhkra jaxwỳ nê wa ho Tĩrtũm wỳ. Hãmri nê wa kot Tĩrtũm mã tanhmã amnhĩ nhĩpêx to ho pa kaxyw wa kumê nhũm wa ma mõi.

Wajaga kot Jesus nê hkràmnhwỳ kurê hã harênh
Atre 8.9-24

⁴⁻⁵ Tã nhũm Tĩrtũm Karõ krĩ pê Serêw wỳr Panãpe mẽ Sawti wa kumê nhũm wa ma hwỳr mõi. Nê amnhĩ kôt Juãw Makre ho mõi. Kot tanhmã wa ho ajuta hto ho wa hkôt pa kaxyw. Hãmri nê wa mẽ mõi nê Serêw wỳr põi nê pàr krem axà nê ma gõ hipõk pê Sipre hwỳr mõi. Hãmri nê gõ hipõk ã krĩ pê Saramĩn wỳr põi nê Ijaew nhõ Tĩrtũm kapêr o mẽ ahkre xà hã ixkre hwỳr tẽ nê kamã Jesus kot mẽ panê tanhmã amnhĩ nhĩpêx to hã mẽ kãm harênh o wa xa.

⁶⁻⁸ Tã nhũm mẽ krĩja rũm kato nê hpãnãhã gõ hipõk kôt mõi nê hatur xà kamã krĩ pê Papos wỳr põi. Hãmri nê kamã wajaga Pajesus pumu. Gresjê kapêr kãm hixi pê Erĩm. Erĩm haxwỳja

kêp Ijaew. Na pre hte hêx rom te kêp Tirtûm nhỹ hã kapêr jarênh o pa xwýnh pyræk o amnhĩ nhĩpêx nê ma mē kãm ujarênh o ri mē hkôt pa. No ãm mē kãm amnhĩ to hêx o pa. Gô hipôkja ã pahi Sejupaw hkràmnhwý na pre. Pahi Sejupawja àhpumunh tỳx jakamã na pre Panãpe mē Sawti wa harênh ma nê kãm wa kapêr mar prãm nê wa kot kãm Tirtûm kapêr jarênh kaxyw amnhĩ wýr wa kuwý. Nom nhũm hkràmnhwý wa-jaga Erĩmja kãm wa hkĩnh kêt nê wa nê kãm kapêr kãm hihtỳx nê kãm:

—Kwa nà wa kapêr mar kêt nê. Kot kaj war ama nê wa uræk nê amnhĩ kaxyw Jejus kôt ajamaxpêr nê hkôt amnhĩ xãm. Kwarĩ wa kapêr mar kêt nê. Anê.

⁹ Hãmri nhũm Sawti ra axtem pãnhã hixi. Ra hpãnhã kêp Pawre. Nhũm Tirtûm Karõ ra hkarõ mã àr jakamã nhũm ÿ hã wajagata pumu nê wa nê hkràmnhwý mã kapêr ã kãm akir nê kãm:

¹⁰ —Tk. Kwa pêr apê Satanasti hkwý hã na ka ã wa inhnê kãm akapêr anê. Na ka hte mēmoj punuj pix kukamã ajamaxpêr nê mēmoj mex nê mē no kupyw o apa. Tirtûm kapêr mex kumrêx tã ka axtem nê nê mē hkurê ho ri apa.

¹¹ ã ate amnhĩ nhĩpêx anhỹrja mýrapê koja Tirtûm tanhmã ato ka ano hkre nê arĩt kêt o atã apkati xohtõ nê kãm ga. Anê.

Hãmri nhũm no hkre kurê kumrêx nê tee ri rĩt kaxyw no pikrar pýnh o xa nom mēmoj pumunh kêt nê. Hãmri nê mēhõ kot hpa hã hpyr nê òrkwỹ hwýr ho mör kaxyw ri amnhĩ pu hã mē hapêr pênh o xa.

¹² Hãmri nhũm hkràmnhwý pahitija tee ri ja hã omu nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Hãmri nê Pawre mē Panãpe wa kot tanhmã Tirtûm kapêr jarênh to hã wa kuma nê hamaxpêr o:

—Hêxta waa nê. Aa ixte ã mēhõ kapêr kot anhỹr mar kêt tã pa jarãhã

kuma. Nà ãm hãmri na Jejus jarênhja. Anê.

Pawre mē Panãpe ãxiok õ hwýr wa mör ã wa harênh

Atre 15.38

¹³ Tã nhũm Pawre mē Panãpe mē Juãw Makre wa mē krĩ pê Papos rùm kato nê hpãnhã ma pyka hõ hwýr mō. Pàr kãm ma pyka pê Pãpir wýr mō nê kamã krĩ pê Perke hwýr pøj. Hãmri nhũm Juãw Makre tanhmã hamaxpêr to nê tee ri axte wa hkôt mör kukamã hamaxpêr hãmri nê wa hkaga nê awjanã nê ma akupým Jerujarê hwýr ahte mō.

¹⁴ Jakamã nhũm Pawre mē Panãpe wa ahte Perke rùm kato nê hamũ pika pê Pisit kãm krĩ pê ãxiok wýr mō nê hwýr pøj. Nhũm Ijaew nhõ arĩgromnu pê sap kato nhũm wa Tirtûm kapêr o mē ahkre xà hã ixkre hwýr wa tẽ nê hwýr axà nê nhỹ.

¹⁵ Hãmri nhũm mēhõ mē kãm Tirtûm kapêr ã kagà htũm kwý kamã harênh o xa. Mojes mē Tirtûm nhỹ hã kapêr o mē pa xwýnh kot kapêr ã kagà hkwý kamã nhũm mē kãm kamã harênh o xa. Hãmri nê kamã harênh pa nhũm mē ahkre xwýnhjaja Pawreja wa omu nê wa hwýr mēhõ mē nhũm wa hwýr tẽ nê wa kãm:

—E na mē ijahkre xwýnhjaja war ate mē inhmã axujarênh prãm nê mãmri mē inhmã mēmoj jarênh kaxyw nhũm mē war atã anê. Anê.

¹⁶ Hãmri nhũm wa kuma nhũm Pawre kãnhmã xa nê mē hpinhkrênh kaxyw mē kãm kãnhmã ìhkra nhũm mē omu nê hpinhkrênh pa nhũm mē kãm awjarê. Amnhĩ kwý pê Ijaewjê mē mē kêp Ijaew kêt xwýnhjê kãm Tirtûm kĩnh xwýnhjê mã nhũm mē kãm awjarê. Nê mē kãm kapêr ryy nê. Tirtûm kot tanhmã mē hkukamã Ijaew nhĩgêt nê pãmjê nhĩpêx to hã mē kãm awjarê nê mē kãm:

—E kot paj mē amã awjarê ka mē inhma.

¹⁷ Nà mē ixpê Ijaew nhõ Tirtûmja amnepêm na pre mē ixpê Ijaew pãmjê rê. Kormã Ejit kãm mē pa ri nhũm amnhĩ kaxyw mē kurê nê mē ho ohtõ

rax kumrêx. Hâmri nê mẽ kaxyw hihtỳx jakamã Ejit rûm mẽ kator pa.

¹⁸ Hâmri nê mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htỳx ri tanhmã amnhĩ nhĩpêx to ho pa htã nhũm mẽ kamã ukapri ryy ho mẽ hkôt pa.

¹⁹⁻²⁰ Na pre mẽ kãm pyka pê Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpyñhã axpên kaxyw mẽõ krĩ pê 7ja nhũm mẽ kãm mẽ ho hapêx pa. Hâmri nê hpãnhã mẽ inhĩgêjtê mã pykaja o hpigrành pa. Mẽ ixpê Ijaew nhĩgêjtê mã ho hpigrành pa nhũm mẽ kamã pa hã amgrà xohtô nê. Hã amgrà pê 450. Tã nhũm Tirtũm hpãnhã mẽ kãm juisti hkwy rê nê mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptã nê mẽ o pa. Kêp Tirtũm nhỹ hã kapêr jarênh o pa xwỳnhjê hõ nhũm Tirtũm mẽ kaxyw ãm.

²¹ –Tã nhũm mẽ ixpãmjaja axpên ma nê ra te krĩ hkwy kamã mẽ uràk nê mẽõ pahi kot Sãmuew pãnhã mẽ ho amnhĩptãr o pa hprãm xàj amnhĩ to Tirtũm wỳ nê kãm: “Pa Tirtũm. Kwa mẽ ixkaxyw pahi hõ xãm kê mẽ ixto amnhĩptãr o pa nã. Ja na mẽ inhmã hprãm tỳx kumrêx.”

–Anhỹr o amnhĩ to hwỳr jakamã nhũm mẽ kuma nê mẽ kaxyw Sawti xãm. Kisti hkra na pre. Nê mẽ inhĩgêjtê Pêjamĩ kanrêhã htãmnhwỳ na pre. Hâmri nhũm Tirtũm mẽ kaxyw ãm nhũm kêp mẽõ pahi nê mẽ ho amnhĩptãr o pa hã amgrà pê 40.

²² Tã nhũm Tirtũm kator nê hpãnhã mẽ kaxyw Tawi xãm. Hâmri nê harênh o: “Nà Jese hkra Tawija na hte inhmã hprãm xà hkôt amnhĩ nhĩpêx mex o pa.” Anê.

²³ –Tã Jejus kêp Tawi hkanrêhã htãmnhwỳ na pre. Kukamã na pre Tirtũm mẽ ixpê Ijaew nhĩgêjtê mã harê nê harênh o: “Koja nhỹrmã Tawi hkanrêhã htãmnhwỳjê hõ mẽ ate amnhĩ tomnuj pê mẽ apytã.” Anhỹr o hkukamã mẽ kãm harê.

²⁴ No nhũm kormã Jejus kot mẽ ixpê Ijaewjê mã amnhĩ to amnhĩrit kêt ri

nhũm Juãw Paxis kumrêx hkukamã mẽ ixwỳr mō nê mẽ inhmã Tirtũm kapêr jarênh o ri mẽ ixkôt pa. Nê mẽ ixte amnhĩ tomnuj kaga nê hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karō ho pa.

²⁵ –Tã mẽ kãm kapêr o pa ryy nê ra hatur xãm mênh kaxyw nê amnhĩ tã tanhmã mẽ inhmã kapêr to nê mẽ inhmã: “Na ka mẽ ixpumu nê atỳx Tirtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwỳnhhta kukamã na pa pre mō. Tãm kot amnhĩ to rax o ijakrenh. Nê kot amnhĩ to mex o kot ijakrenh. Jakamã na pa hte ãm kukwak ri ixpa nê amnhĩ tã hã ixpijaàm o ixpa.” Anê.

–Na pre ã Juãw Paxisja mẽ inhmã Jejus jarênh anhỹr o pa.

²⁶ –Tã kwa mẽ inhma mẽ apê Apraãw kanrêhã htãmnhwỳjaja nê mẽ apê Ijaew kêt xwỳnh kãm Tirtũm kĩnh xwỳnhjaja. E mẽ apiitã ixkapêr ma nê kãm ajamaxpêr tỳx rãhã ho ri apa. Nã mẽ pahpiitã mẽ pakaxyw na Tirtũm kapêrja. Kot mẽ pahte amnhĩ tomnuj pê mẽ papytãr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nê hkôt amnhĩ nhĩpêxja na Tirtũm kãm hprãm.

²⁷ Nom Jerujarê nhõ xwỳnhjê mẽ mẽ ãptãr tũmrejaja na prem Jejus kêp Tirtũm kot mẽ pakaxyw ãm xwỳnh ã harênh mar tã hkôt hamaxpêr kêt nê. Na pre htem mẽ inhõ arĩgromnu pê sap ã akuprō nê axpên mã Tirtũm kapêr ã kagã htũm kamã ujarênh o hkrĩ. Kagãja kamã Tirtũm nhỹ hã mẽ kapêr o mẽ pa xwỳnhjaja kot hprĩ hã Jejus jarênh nê hã kagã nhũm mẽ kot mar tã hprĩ hã mar tỳx kêt nê. Jakamã na prem axtem nê mẽ kãm hã amỹnê. Tirtũm nhỹ hã kapêr jarênh xwỳnhjaja kot mẽ hkukamã mẽ harênh xãja kôt nhũm mẽ kot hpĩr kaxyw mẽ kãm hã amỹnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat

wỳ. Kot mẽ kãm hã àmnênh nhũm ò pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tĩrtũm kapêr ã kagà htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwỳnhjaja pĩ kahpa nê ho wrỳ nê ma o tẽ nê kên kre kamã haxà.

³⁰ Tã nhũm Tĩrtũm akupỹm ho htĩr

³¹ nhũm xatã hkôt mẽ pa ho pa xwỳnhjê hwỳr hapôj. Kormã htyk kêt ri ra Garirej rũm Jerujarê hwỳr hkôt mẽ pa ho mẽ pa xwỳnhjê hwỳr xatã mẽ hwỳr hapôx o pa. Jao hã arĩgro xohtô nê nhũm prem piitã omu. Tã mẽ tãmjaja na htem mẽ ixpê Ijaew mã harênh o pa.

³²⁻³³ –Amnepê m Tĩrtũm na pre mẽ ixpê Ijaew nhĩgêjtê mã tanhmã Kra Jejus jarênh to. Kormã mẽ pahwỳr wrỳk kêt ri tanhmã mẽ kãm harênh to. Jakamã ra kot hkukamã harênh xà hkôt nhũm pre mẽ pahwỳr wrỳ nê tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awỳr mō. Amnepê m finat Tawi na pre Tĩrtũm kapêr kwỳ hã kagà. Tĩrtũm mex ã mẽ grer xà pê Sam 2ja kamã hã kagà. Te Tĩrtũm tãm Jejus mã kapêr pyrãk o hã kagà nê hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrĩt. Anê.

Nhũm pre ã Tĩrtũm Jejus mã kapêr anê nhũm Tawi ô ri mẽ pamã hã kagà.

³⁴ –Amnepê m na pre Tĩrtũm tanhmã Kra Jejus kukamã harênh to. Mẽ kot hpĩr nhũm kot akupỹm ho htĩr kukamã hã amnhĩ jarê. ĩ hkro pymaj kot mẽ htykjê pê hkaxàr nê akupỹm ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt.

Anhỹr o hkukamã harênh xà hkôt akupỹm ho htĩr nhũm axte htyk kêt ã harê.

³⁵ –Nê kagàja nhãm hô hõ kot tanhmã Jejus jarênh kute. Te Jejus tãm Tĩrtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tĩrtũm kapêr ã kagà htũm kot ã Jejus jarênh kot anhỹr.

³⁶ Nom ã Tawi jarênh anhỹr kêt nê. Tawi na pre Tĩrtũm kapêr kôt amnhĩ nhĩpêx mex o pa hãmri nê ty nhũm prem mẽ panhĩgêjtê nhĩhkô hã haxà hãmri nhũm ĩ hkro nê hapêx.

³⁷ –Tã no Jejusja Tĩrtũm kot akupỹm ho htĩr jakamã nhũm Tawi pyrãn ĩ hkro nê hapêx kêt nê.

³⁸ –E mẽ inhmar tỳx nê ixkwỳjaja. Kra Jejus pix kukwak na hte Tĩrtũm amnhĩ katut kôt mẽ pahte amnhĩ tomnuj rê.

³⁹ Jakamã kot kaj mẽ ãm Mojes kapêr kôt pix mã ri amnhĩ nhĩpêx nhũm Tĩrtũm tee ri ja hã mẽ apumu nê amnhĩ katut kôt mẽ ate amnhĩ tomnuj rênh kêt nê. Jejusja tapxipix na pre htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa.

⁴⁰⁻⁴¹ Amnepê m na pre Tĩrtũm kapêr nhỹ hã kapêr xwỳnhjê hõja mẽ kãm Tĩrtũm kapêr jarê nê hã kagà. Te Tĩrtũm tãm mẽ kot kapêr ã hpêr o pikênh xwỳnhjê mã kapêr pyrã nê mẽ kãm:

E kot paj aa mẽ ate mẽmoj pumunh kêt ò ho anê.

Nhũm mẽhõ mẽ amã harê ka mẽ harênh ma nê ãm ama.

Nhũm mẽ kot omunh mex xwỳnhjê hõ kot hpĩr hã mẽ amã harênh tã ka mẽ ãm ama nê hkôt aja-maxpêr kêt nê.

Hãmri nê tee ri tanhmã kãm aja-maxpêr to ho ri apa. Anê.

Ã Tĩrtũm mẽ kãm kapêr anhỹr jakamã kwa mẽ o kora. Apu mẽ kajaja na pre ã mẽ ajarênh anê rỳ ko. Anê.

⁴² Nhũm pre ã Pawre mẽ kãm ujarênh ryy anê. Hãmri nê Panãpe mẽ wa ixkreta rũm kator kaxyw nhũm mẽ kot mar o hkrĩ xwỳnhjaja tee ri ma

wa mōr ã wa omu nē ma wa hkôt mra nē wa kām:

–Kwa war axujarēnhja na mex kumrēx. Mē inhmā axte mar prām. Xà koja axte sap kato ka wa akupÿn mē ixwÿr wa tē nē axte mē inhmā awjarē? Anē.

Hāmri nhūm wa mē kām:

–Tōe. Nà kot paj war anē. Anē.

⁴³ Hāmri nē wa ma tē nhūm mē hkwyjaja ma wa hkôt mra. Ijaew kwÿjaja nē Ijaew kêt xwÿnh kām Tirtūm kīnh xwÿnhjaja nhūm mē ma wa hkôt mra. Hāmri nhūm wa pry hã mē kām kapēr o mō. Tirtūm kot mē kutã nojarēt rãhã ho pa nhūm mē kot amnhĩ tã omunh nē hkôt amnhĩ nhĩpêx tÿx rãhã ho pa nē hkaga hkêt ã mē kām kapēr o mō.

⁴⁴ Tã nhūm axte sap nhūm krĩ nhō xwÿnh piitã axte Tirtūm kapēr mar kaxyw ixkre wÿr akuprō. Ijaewjaja nē Ijaew kêt xwÿnhjaja.

⁴⁵ Hāmri nhūm Ijaew kwÿjaja tee ri mē amnhĩ wÿr Ijaew kêt xwÿnhjê pumu nē mē hã Pawre mē Panãpe wa kamã gryk nē. Mē kām Ijaew kêt xwÿnhjaja kot Tirtūm kapēr mar prām kêt jakamã mē hã wa kamã gryk nē. Hāmri nē Pawre kapēr ma nē xatã kām kapēr punuj nē kām:

–Tk. Kwa na ka Tirtūm kapēr jarēnh o axêx. Ja kot anhÿr kêt. Anē.

⁴⁶ Nom nhūm wa kām mē uma hkêt nē. Wa ãm Tirtūm Karō nhÿ hã amnhĩ to htÿx nē wa mē kām kapēr. Nē amnhĩ tã tanhmã mē kām kapēr to nē mē kām:

–Nà wa ixpyrà nē mē apê Ijaew jakamã na pa mē akumrēxjê mã Tirtūm kot mē pakaxyw Jejus xãm ã harē. Tã ka mē ama nē ãm ama nē te mē ate hkaga pyrà nē ã wa inhmã akapēr anē nē wa ixte kapēr o ixêx ã wa ijarē. Pēr ãm mē ate mē amã Tirtūm mē Kra wa kuri mē atīr tūm nē mē apa hprãm kêt. Jakamã kot paj wa mē apê ixkato nē hpãnhã ma Ijaew kêt xwÿnhjê mã Jejus kapēr jarēnh o ri mē hkôt ixpa.

⁴⁷ Tirtūm kapēr ã kagã htūm ã kot mē ixte amnhĩ nhĩpêx anhÿrja kukamã mē ijarē nē mē ijarēnh o:

Mē ate Ijaew kêt xwÿnhjê mã ixkapēr jarēnh o ri apa kaxyw na pa pre mē kaxyw mē arê.

Jakamã koja pyka piitã hkôt mē pa xwÿnhjaja ohtô nē mē akapēr ma nē ixkra hkôt amnhĩ xunhwÿ.

Koja mē ã amnhĩ nhĩpêx anē pa ja hã mē omu nē mē ho ixkra. Anē.

Tirtūm kot ã ja kukamã mē ijarēnh anhÿr jakamã kot paj wa mē apê ixkato nē mē apãnhã ma Ijaew kêt xwÿnhjê mã Tirtūm kapēr jarēnh o ri mē hkôt ixpa. Anē.

⁴⁸ Hāmri nhūm Ijaew kêt xwÿnhjaja amnhĩ tã wa kapērja ma nē hkīnh nē Tirtūm kapēr mex o mex ã harē. Hāmri nhūm ra Tirtūm kot nhÿrmã amnhĩ ri mē htīr tūm nē mē pa ho mē pa kaxyw mē rēnh xwÿnhjaja amnhĩ kaxyw Pahihti Jejus kôt hamaxpēr nē hkôt amnhĩ xunhwÿ.

⁴⁹ Tã nhūm pika pē ãxiok kamã mē piitã Tirtūm kapēr jarēnh ma.

⁵⁰ Nom nhūm Ijaew xaptãr tūmrejaja kām Pawre mē Panãpe wa hkīnh kêt jakamã na prem krĩ hkôt mē kot amnhĩ to rūnh xwÿnhjê mã wa ho kapēr punuj o pa. Mē õ pahi mē mēni kot amnhĩ to rūnh xwÿnhjaja nhūm mē kām tanhmã wa ho kapēr to nhūm mē kuma nē mē hkôt hamaxpēr. Mēnijaja kām Tirtūm prãm tã amnhĩ kaxyw Jejus kôt hamaxpēr kêt jakamã tanhmã mē kot Pawre mē Panãpe wa ho hêx toja ma nē hkôt hamaxpēr nē wa kamã gryk nē. Jakamã nhūm mē ohtô nē tanhmã wa hipêx to nē amnhĩ nē wa hano.

⁵¹ Hāmri nhūm wa mē kêp kato nē xa nē mē kot Tirtūm kapēr kaga hã amnhĩ pumunh kaxyw mē noo mã wa hparkã kapa nē nē awjagrô kapĩ nē ma wa tē. Hāmri nē ma krĩ pē Ikõn wÿr hpãnhã wa mō.

⁵² Hāmri nhūm ãxiok kamã mē kot Jejus kôt amnhĩ xunhwÿr xwÿnhjaja hkīnh nē ri pa. Tirtūm Karō kot mē hkarõ mã gjêx jakamã nhūm mē hkīnh nē ri pa ho pa.

14

Pawre mē Panāpe wa kot Ikōn wūr mōr ā wa harēnh

Matēwre 10.34-35

¹ Hāmri nhūm Pawre mē Panāpeja wa āxiok rūm kato nē hpānhā ma krī pē Ikōn wūr wa mō. Hāmri nē hwūr pōj nē Ijaew nhō Tirtūm kapēr o mē ahkre xà hā ixkre hwūr wa tē nē kamā mē kām Jejus jarēnh o nhỹ. Mē kām harēnh kām hihtỳx jakamā nhūm mē hkwỳjaja wa kuma nē amnhĩ kaxyw hkôt hamaxpēr nē hkôt amnhĩ xunhwỳ. Ijaew kwỳjaja nē mē kēp Ijaew kēt xwỳnh kwỳjaja nhūm mē ohtô nē Jejus kôt amnhĩ xunhwỳ.

² Tā nhūm mē hkwỳjaja kām Jejus jarēnh mar prām kēt nē. Hāmri nē kato nē ma Ijaew kēt xwỳnh kwỳjē hwūr mra nē tanhmā mē kām Pawre mē Panāpe wa ho hēx to nē wa ho kapēr punuj nē nhūm mē mar xà hkôt wa kamā gryk nē.

³ Nom nhūm wa tokyx kator nē ma mōr kēt nē arĩ Tirtūm Karō nhỹ hā amnhĩ to htỳx nē mē kām Tirtūm kapēr jarēnh o ri mē hkôt pa. Nē kēp mē kutā nojarēt xwỳnh ā harēnh o pa. Nē ỹ hā mē kām aa mē kot mēmoj pumunh kēt kwỳ ho anhỹr o ri mē hkôt pa. Jakamā nhūm mē hkwỳjaja ja hā wa omu nē wa kapēr ma nē hamaxpēr o:

—Kwa ām hāmri na wa Tirtūm kēp mē pakamā ukapri xwỳnh ā harē. Pēr ỹ hā wa kot ā amnhĩ nhĩpēx anhỹr o pa kēnā. Anē.

⁴ Hāmri nhūm Ijaew kēt xwỳnh kwỳjaja wa hkôt hamaxpēr nē wa hkôt amnhĩ xunhwỳ. No nhūm mē hkwỳjaja wa hkôt hamaxpēr kēt nē. Ra mē kot Ijaew kwỳ kot tanhmā wa ho kapēr punuj toja ma nē mē hkôt hamaxpēr jakamā nhūm krī nhō xwỳnhjaja axpēn kwỳm ri tanhmā wa hkôt hamaxpēr to ho pa. Jao axpēn kwỳm ri wa hkôt hamaxpēr o pa.

⁵ Tā nhūm wa hkôt hamaxpēr kēt xwỳnhjaja axpēn wūr akuprō nē wa hā amỳnē. Ijaew kwỳjaja nē Ijaew kēt

xwỳnh kwỳjaja nē mē ō pahijaja nhūm mē kot kēn o wa htak o wa hpĩr kaxyw wa hā amỳnē.

⁶ Hāmri nhūm wa amnhĩ tā ama nē mē kēp kato nē hpānhā ma pika hō hwūr mō. Ma Rikōn kām krī hkwỳ hwūr hpānhā mō. Risti wūr nē Tepe wūr nē pu hā krī hkwỳ hwūr wa mō.

⁷ Wa mō nē pōj nē ma mē kām Jejus kot tanhmā mē panē amnhĩ nhĩpēx to hā harēnh o ri mē hkôt pa.

Te grà xwỳnh jarēnh

Atre 3.1-10

⁸ Nhūm Risti kamā mēhō my hte grà nē hkrĩ xwỳnhja. Katorxà nhōxà kre rūm hte grà nē kator jakamā ri pa hkēt nē arĩ hkrĩ xà kamā hkrĩ ho hkrĩ.

⁹ Jakamā nhūm Pawre mē kām ujarēnh o xa nhūm kuri mar o nhỹ. Hāmri nē hamaxpēr o:

—Nà pēr Tirtūm àhpumunh o àhpumunh. Mān kot ixto mex kaxyw àhpumunh tỳx. Nà koja ixto mex. Anē.

Hāmri nhūm Pawre ā hamaxpēr anhỹr ā omu

¹⁰ nē kàx pē kām kapēr nē kām:

—E kwa kànhmā xa. Anē.

Hāmri nhūm kuma nē kànhmā ām kurē kumrēx nē ri mra. Nē amnhĩ te kamā hamak o ri mra nē hkĩnh tỳx kumrēx.

¹¹ Hāmri nhūm kuri mē kuhē xwỳnhjaja Pawre kot ā hipēx anhỹrja ā omu nē htỳx wa kēp kaxkwa kamā mēhpām ā wa hkamnhĩx nē hkĩnh nē axpēn mā:

—Kwa pēr mēpahpām na wa. Mēpahpām Jupti mē Mēkurtija na wa panhĩ hā amnhĩ jahkre nē mē pahwūr wrỳ. Nà ām hāmri na wa mē pahwūr wrỳ. Anē.

Nom mē kapēr pē Rikaôn o axpēn mā kapēr jakamā nhūm Pawre mē Panāpe wa mē mar kēt nē. Wa kot mē kapēr mar kēt jakamā ā mē kot wa harēnh anhỹrja mar kēt nē htỳx wa xa.

¹² Nhūm mē ā wa kēp mēhpām ā wa harēnh anē nē hkĩnh tỳx nē. Panāpeja nhūm prem kēp mē hpām Jupti hā hkamnhĩx no Pawreja nhūm prem kēp mēhpām Mēkurti hā hkamnhĩx. Pawreja Mēkurti pyrà nē kapēr

japjê rûnh jakamã nhũm mẽ kêp hã hkamnhĩx.

¹³ Na prem krĩ htã mēhpãm Juptija mã amnhĩ jarēnh xà hã ixkre nhĩpêx nê hkarõ nhĩpêx. Hãmri nê hwỳr akuprõ nê kãm mex o mex ã harē nê amnhĩ to hwỳr o pa. Jakamã nhũm Jupti nhõ patrejaja Pawre mẽ Panãpe wa kêp mēhpãm ã wa harēnh ma hãmri nê wa hã hkwỳjê mã kãm:

—Kwa pu mẽ wa kãm môx kwỳ hpa nê pixôrà hkwỳ rê. Hãmri nê wa kãm wa mex o wa mex ã wa harē nê wa kêp mēpahpãm ã amnhĩ to wa kuwỳ. Wa kêp mēpahpãm kênã. Anê.

Hãmri nê ra ã wa hipêx anhỹr kaxyw

¹⁴ nhũm wa tee ri mẽ kot amnhĩ nhĩpêx ã mẽ omu nhũm ja wa kêp omnuj tỳx nê. Jakamã nhũm wa amnhĩ pê hinôkà kaxônh pa nê mẽ kutã hprôt nê ã mẽ kot wa hipêx anhỹrja nê mẽ kãm kapêr kãm hihtỳx nê.

¹⁵ Nê mẽ kãm:

—Kwa mẽ ri ã wa inhĩpêx anhỹr kêt nê. Wa ixpê mēapãm kêt kênã kot ka kêt mẽ ã wa inhĩpêx anê. Nom mēapãmja na ka htem ãm amnhĩ to hwỳr kaprỳ nê kãm mex o mex ã harēnh kaprỳ o ri apa. Tã mẽ ate ã amnhĩ nhĩpêx anhỹr kaga nê hpãnhã Tĩrtũm kôt amnhĩ xunhwỳr nê amnhĩ to pix wỳr o apa kaxyw na pa pre wa mẽ awỳr mō nê pøj. Tĩrtũmja mẽ ate mẽ apãm jarēnhhta rom htĩr o htĩr. Na pre mẽmoj piitã ho kato. Kaxkwa ho kato nê pyka ho kato nê gô xujanãr o kato. Nê kamã ri mẽmoj piitã ho kator pa.

¹⁶ —Amnepêm mẽ pa xwỳnhjaja na pre htem amnhĩ krã hkôt pix mã tanhmã ri amnhĩ nhĩpêx to ho pa nhũm Tĩrtũm ja hã mẽ omu nê ãm mẽ omu nê tanhmã mẽ ho hkêt nê.

¹⁷ Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwỳr na rē nhũm mẽ pahpur go mex nê. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rûnh nê. Pu htem hamỳ nê ho paxàpkur mex nê pahkĩnh nê ri papa. Tĩrtũm pix kukwak ri na pu

htem ã amnhĩ nhĩpêx anhỹr o ri papa. Anê.

¹⁸ Nhũm pre ã Pawre mẽ kot wa kãm môx parja nê mẽ kãm kapêr kãm hihtỳx anê. No nhũm mẽ kuma nê ãm kuma nê wa kãm mry hkwỳ hpar kaxyw wa hã hihtỳx nê. Jakamã kritpêm nhỹx prem wa kãm hkwỳ pa. Tã tanhmã hamaxpêr to nê hkaga nê wa kãm hpar kêt nê.

Mẽ kot Pawre pĩr ã àmnēnh ã mẽ harēnh

Sikũn Ximotre 3.10-11

¹⁹ Tã nhũm Ijaew kwỳjaja mẽ hwỳr mran pøj. Krĩ pê ãxiok mẽ Ikõn rũm ma mẽ hwỳr mran pøj nê mẽ kãm Pawre ho hêx o mẽ hkôt pa nhũm mẽ kuma nê axtem nê Pawre kamã gryk kato. Hãmri nê mẽ kot hpĩr kaxyw kên runh kwỳ jamỳ nê ho htak prēprêk o kuhê. Hãmri nhũm amnhĩ xà htỳx kamã ama nê tēm nê akryk nõ nhũm mẽ omu nê htỳx ho ra htyk ã hkamnhĩx. Hãmri nê hwỳr tē nê hpa hã kupy nê ma hkjēnh o mō nê krĩ pum kumē nê ma akupỹm mra.

²⁰ Hãmri nhũm Jejus kôt mẽ kot axpên to htõjaja tee ri ã mẽ kot hipêx anhỹr ã omu nê hkaprĩ htỳx nê hwỳr hprôt nê omu nê mỳr o kuhê. Hãmri nhũm te htyk pyrã nê nõr tã Jejus nhỹ hã akupỹm hihtỳx mex nê kãnhmã nhỹ hãmri nê ma akupỹm mẽ hkôt krĩm tē.

Tã nhũm apkati nhũm Panãpe mẽ wa krĩja rũm kato nê ma wa mō. Pãnhã ma krĩ pê Tepe hwỳr wa mō.

Pawre mẽ Panãpe akupỹm ãxiok wỳr wa mōr ã wa harēnh

²¹⁻²² Tã nhũm wa ma Tepe hwỳr mō nê pøj. Hãmri nê kamã mẽ kãm Jejus tanhmã kot mẽ panê amnhĩ nhĩpêx to hã harēnh o ri mẽ hkôt wa pa nhũm mẽ wa kuma nê ohtô nê Jejus kôt amnhĩ xunhwỳ.

Tã nhũm wa kato nê awjanã nê ma akupỹm pika pê Pisit wỳr wa mō. Nê kamã krĩ hkwỳ hkôt ri ra mẽ kot Jejus kôt amnhĩ xunhwỳr xwỳnhjê jahkre ho ri mẽ hkôt pa. Krĩ pê Risti nê Ikõn nê ãxiokja kôt. Nê mẽ ahkre kamã

Jejus kôt mẽ ho mẽ hihtỳx o wa pa nẽ mẽ kãm:

—E ra mẽ ate Jejus kôt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nẽ hã tanhmã mẽ anhĩpêx to. Tã kêr ka mẽ ãm amnhĩ tã mẽ omu nẽ ãm mẽ omu nẽ Jejus kaga hkêt nẽ. Nẽ arĩ hkôt amnhĩ nhĩpêx mex o ri apa rãhã nhỹrmã ma õ krĩ hwỳr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

²³ Hãmri nẽ ahpỹnhã krĩ piitã hkôt ri mẽ kot pastô nhỹ hã mẽ ahkre kaxyw mẽ hkwyjê rê nẽ mẽ kaxyw mẽ unhwỳ nẽ mẽ ho Tĩrtũm wỳ. àpkur kêt rãhã mẽ ho kuwỳ nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkôt apa. Anẽ.

Hãmri nẽ wa mẽ kêp kato nẽ ma hpãnhã nhỹhỹm wa mỗ.

²⁴ Pyka pê Pisit kamã mỗ nẽ hpãnhã nhãm pyka pê Pãpir kôt mỗ. Wa ma mẽ kãm tanhmã Jejus kapêr jarênh to ho mẽ hkôt mỗ.

²⁵ Hãmri nẽ krĩ pê Perke hwỳr wa pøj nẽ kamã mẽ kãm Jejus kot tanhmã amnhĩ nhĩpêx to hã harê hãmri nẽ mẽ kurũm kato nẽ axte mỗ. Pãnhã ma krĩ pê Atari hwỳr wa mỗ.

²⁶ Hãmri nẽ hwỳr pøj nẽ hpãnhã kurũm akupỹm ãxiok wỳr wa mỗ. Pàr rax kãm ma akupỹm mỗ. ãxiokja kamã na pre wa nojarêt nhũm Jejus kôt wa htõ nẽ wa htõxjaja wa ho Tĩrtũm wỳ nẽ ma krĩ hkwyjê hwỳr wa kumẽ. Wa kot ma mẽ hkôt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumẽ. Jakamã nhũm wa ra ja ho anhỹr pa nẽ akupỹm mẽ hwỳr wa mỗ.

²⁷ Hãmri nẽ wa akupỹm pøj nẽ Jejus kôt mẽ kot axpên to htõ nẽ htõxjê ho akuprõ nẽ mẽ kãm amnhĩ jarê nẽ mẽ kãm:

—Nà ãm hãmri na pa wa ra ixkãhkĩnh pê akupỹn mẽ awỳr pøj. Na pre Tĩrtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ỹ hã Ijaew kêt xwỳnhjê mã Jejus

jarênh o ixpa nhũm mẽ hkwyjaja wa inhma nẽ hkôt amnhĩ xunhwỳ.

²⁸ Anhỹr o wa mẽ kãm kapêr hãmri nẽ wa tokyx ma nhỹhỹm krĩ hõ hwỳr axte mỗr kêt nẽ. War arĩ ãxiok kamã Jejus kôt wa htõ nẽ htõxjê hkôt ri pa.

15

Jerujarê kamã Jejus kwỳ hpikuprõnh ã mẽ harênh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwỳjaja ãxiok wỳr Jejus kwỳ pê Ijaew kêt xwỳnhjê hwỳr mỗn pøj. Pika pê Jutej rũm mẽ hwỳr pøj nẽ tanhmã mẽ ahkre hto ho pa. Nom axtem nẽ Tĩrtũm kapêr kuhpa hã mẽ ahkre nẽ mẽ kãm:

—Kot ka mẽ amã Jejus kôt amnhĩ xunhwỳr prãm hãmri nẽ mẽ ixpyrà nẽ finat Mojes kot mẽ pamã karõ xà hkôt amnhĩ my kwỳrýt kà kwỳ jakà nẽ rĩ kormã hkôt amnhĩ xunhwỳ. Kot kaj mẽ ã amnhĩ nhĩpêx anhỹr kêt nẽ nhũm Tĩrtũm tee ri ja hã mẽ apumu nẽ amnhĩ katut kôt mẽ ate amnhĩ tomnuj rênh nẽ mẽ ato hkra hkêt nẽ. Anẽ.

² Hãmri nhũm Pawre mẽ Panãpe tee ri mẽ kapêr anhỹrja ma nhũm wa kêp ja omnuj tỳx nẽ. Hãmri nhũm wa mẽ kãm:

—Tk. Kwa kot anhỹr kêt. Na hte Tĩrtũm mẽ pahte amnhĩ my kwỳrýt kà jakà ã mẽ pahpumunh kôt mẽ pahto hkra hkêt nẽ. Anẽ.

Hãmri nẽ tee ri mẽ kapêrja nê mẽ kãm kapêr no nhũm mẽ ãm wa kuma nẽ wa hkôt hamaxpêr kêt nẽ. Nẽ arĩ ã mẽ ahkre anhỹr o mẽ hkôt pa. Jakamã nhũm mẽ ja hã axpên mã kapêr rax nẽ. Hãmri nhũm Jejus kwỳ pê Ijaew kêt xwỳnhjaja amnhĩ tã Pawre mẽ Panãpe wa hkukja nẽ wa kãm:

—Kwa xà kot paj mẽ apyrà nẽ amnhĩ my kwỳrýt kà jakà nhũm Tĩrtũm kãm ja mex nẽ nà? Kwa wa ma akupỹm Jerujarê hwỳr mỗ nẽ ja hã Jejus nhỹ hã mẽ ahkre xwỳnhjê maati jê mẽ mẽ kot Jejus kwỳ jahkre xwỳnhjê kukja nẽ hã mẽ ama. Nẽ ota mẽ ixkwỳjaja koja ma war akôt mra. Kê

mě tanhmã mẽ amã ja jarēnh to ka mẽ ama nē man akupÿn mẽ ixwÿr mra nē tanhmã mẽ inhmã mẽ kapēr jarēnh to. Anē.

Hāmri nhũm wa mẽ kãm: “Tôe. Nà kot paj mẽ anē.” Anē.

³ Hāmri nē wa mẽ ma Jerujarē hwÿr mō. Ma pyka pē Wēnīs mẽ Samar hkôt ma hwÿr mō. Hāmri nē nhÿri Jejus kôt mẽ htō nē htōxjē pumu nē mẽ kãm Ijaew kêt xwÿnhjē jarē. Mě hkwÿjaja mẽ urak nē Jejus kôt amnhĩ xunhwÿr ã mẽ harēnh o mō. Hāmri nhũm mẽ harēnh ma nē mẽ ÿ hã hkĩnh nē.

⁴ Hāmri nhũm mẽ ra Jerujarē hwÿr Jejus kôt mẽ htōjē hwÿr mōn pōj. Hāmri nē mẽ ahkre xwÿnhjē mẽ Jejus nhÿ hã mẽ ahkre xwÿnh maatijē pumu nhũm mẽ haxwÿja amnhĩ wÿr mẽ omu nē hkĩnh nē. Nē tanhmã mẽ ho mex to nē mẽ kãm kapēr mex nē. Hāmri nhũm Pawre mẽ Panāpe wa mẽ kãm amnhĩ jarē. Tĩrtũm kot wa ĩhkô hã wa hkôt pa nhũm wa ÿ hã kot Ijaew kêt xwÿnhjē mã kapēr o pa nhũm mẽ hkwÿja kot wa mar nē Jejus kôt amnhĩ xunhwÿr ã nhũm wa mẽ kãm amnhĩ jarē.

⁵ Nhũm Jejus kwÿjē kamã mẽ kēp Parijew nhō xwÿnh kwÿjaja. Mě kēp Parijew tã hkwÿjē rom Jejus kôt amnhĩ xunhwÿ. Jakamã nhũm mẽ tee ri Pawre mẽ Panāpe wa kot Ijaew kêt xwÿnhjē jarēnh ma nē kãnhmã kuhē nē wa kãm:

—Kwa kē mẽ pahpyrà nē amnhĩ my kwÿt kà jakà nē finat Mojes kot Tĩrtũm nhÿ hã mẽ pamã mẽmoj tã karō hkôt amnhĩ nhĩpêx o pa. No kot mẽ ã amnhĩ nhĩpêx anhÿr kêt nhũm ja mẽ pahpê omnuy nē. Anē.

⁶ Hāmri nhũm Jejus nhÿ hã mẽ ahkre xwÿnh maatijē mẽ mẽ hkwÿjē jahkre xwÿnhjaja mẽ kuma nē hapōj nē nhÿri akuprō. Ijaew kêt xwÿnh kot Jejus kôt amnhĩ xunhwÿr xwÿnhjaja kot tanhmã amnhĩ nhĩpêx to hã axpēn mar kaxyw nhÿri akuprō.

⁷ Hāmri nē mẽ hã axpēn mar ryy nē. Hāmri nhũm Simãw Pētre tã kãnhmã xa nē mẽ kãm:

—Nà na pre Tĩrtũm mẽ pahkapi nē Ijaew kêt xwÿnhjē kaxyw pa ixta. Ixta mẽ kãm Jejus kot tanhmã mẽ panē amnhĩ nhĩpêx to hã harēnh o ri mẽ hkôt ixpa nhũm mẽ kot inhmar nē hkôt amnhĩ xunhwÿr kaxyw nhũm mẽ kaxyw ixta. Ra mẽ ate ja hã ixpumunh mex.

⁸⁻⁹ Tĩrtũm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrã nē mãânēn Ijaew kêt xwÿnhjē nhĩpêx. Mě kot mẽ pahpyrà nē amnhĩ kaxyw Jejus kôt hamaxpēr jakamã nhũm Tĩrtũm te ra mẽ panhĩpêx pyrã nē amnhĩ katut kôt mẽ kot amnhĩ tomnuj rē nē mẽ ho hkra. Hāmri nē mẽ hwÿr amnhĩ Karō rē nhũm mẽ hkarō mã agjē. Tĩrtũm tãm kot amnhĩm mẽ rēnh kēnã.

¹⁰ —Tã xà mẽ pahpê Ijaew na pu htem wam Tĩrtũm kot finat Mojes mã kapēr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nē. Nē mẽ panhĩgētjaja na xep prem haxwÿja hkôt amnhĩ nhĩpêx mex o pa hkêt nē. Mě pahpiitã mẽ pahpê hihtÿx kēnã. Tã Ijaew kêt xwÿnhjaja kot hkôt amnhĩ nhĩpêx o pa hã ka mẽ ra mẽ kãm karō kaxyw. Kwa kot kaj mẽ anē nhũm Tĩrtũm tee ri ja hã mẽ apumu nhũm ja kēp omnuy nē. Kãm ja prãm kêt.

¹¹ Kwa mẽ ã mẽ kãm hã karō anhÿr kêt nē. Mě panhō pahihtĩ Jejus na hte mẽ pahpiitã mẽ pakutã nojarēt o axpēn pyrãk. Jakamã Ijaew kêt xwÿnhjaja nē mẽ pahpê Ijaewjaja kot puj mẽ amnhĩ kaxyw hkôt pajamaxpēr nē hkôt amnhĩ xunhwÿ. Hāmri nhũm Tĩrtũm ja hã mẽ pahpumu nē mẽ panhĩpêx o axpēn pyrã nē Jejus kukwak ri amnhĩ katut kôt mẽ pahte amnhĩ tomnuj rē nē mẽ pahto hkra. No na hte mẽ pahte amnhĩ my kwÿt kà jakà rÿ finat Mojes kapēr kôt amnhĩ nhĩpêx ã mẽ pahpumunh kôt mẽ pahto hkra hkêt nē. Anē.

¹² Nhũm pre ã Simãw Pētre mẽ kãm kapēr anē. Hāmri nhũm hpãnhã Panāpe mẽ Pawreja mẽ kãm amnhĩ jarē. Tĩrtũm kot tanhmã wa ho nhũm

wa kot Ijaew kêt xwýnhjê hwýr wa mör ã amnhĩ jarẽ. Nẽ Tĩrtũm nhỹ hã mẽ kãm aa mẽ kot mẽmoj pumunh kêt kwý ho anhỹr o ri mẽ hkôt pa hã mẽ kãm amnhĩ jarẽ nhũm mẽ piitã akryk wa mar o hkrĩ nẽ wa ujarẽnhta hkukamã hamaxpër.

¹³ Hãmri nhũm Simãw Pêtre mẽ Panãpe wa mẽ kãm ujarẽnh pa hãmri nhũm Xiakre wa hpãnhã kãnhmã xa nẽ mẽ kãm kãnhmã ãhkra pẽ nẽ mẽ kãm:

¹⁴ –E pa ijaxwýja mẽ amã ixkapër ka mẽ inhma. Nã na pu mẽ ra Simãw Pêtre kapër ma. Tĩrtũm kot wam amnhĩ kaxyw Ijaew kêt xwýnh kwýjê rênh ã mẽ harẽnhja pu mẽ ra kuma.

¹⁵ ãm hãmri na ã mẽ harẽnh anẽ. Amnepêm Tĩrtũm kapër nhỹ hã mẽ kapër o mẽ pa xwýnhjaja na prem ra ja kukamã Tĩrtũm kot tanhmã mẽ hipêx to hã amnhĩ jarẽnh kukamã hã kagã. Te ho tãm kot kãm kapër pyrã nẽ hã kagã ho:

¹⁶ Amnepêm finat Tawija na pre hte inhmã amnhĩ kwýjê ho amnhĩptãr o pa.

Mẽ kệp Ijaewjaja nhũm pre inhmã mẽ ho amnhĩptãr o pa.

Hãmri nhũm mẽ gaa nẽ axpën pẽ an-hgrã nẽ ahpýnhã ri pa.

Tã ixpê Tĩrtũm kot paj nhỹrmã ma mẽ hwýr wrý nẽ axte mẽ ho akuprõ nẽ tãm mẽ unhwýr pa.

¹⁷ Jakamã Ijaewjê kukwak ri koja Ijaew kêt xwýnh kwýjaja mãnhẽn ixkôt amnhĩ xunhwý.

Pa te ixte Ijaewjê nhĩpêx pyrã nẽ mẽ ho ixkra.

¹⁸ ã mẽ hkukamã ijamaxpër anhỹr xã hkôt.

¹⁹ Anhỹr o mẽ harẽnh jakamã nhũm ra mẽ hkwyjaja mẽ higêt kot amnhĩ nhĩpêx kaga hpa nẽ hpãnhã Tĩrtũm kôt amnhĩ xunhwý. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkêt nẽ. Ja pix na mex.

²⁰ ãm ja pix kot puj mẽ kãm hã karõ nẽ hã kagã nẽ mẽ hwýr kumẽ:

Mẽ kot sãnti hã mẽ õ hkur nẽ kot puj mẽ hkurê.

Nẽ mẽ kot mẽmo mry hpar nẽ hkamrõ runh kêt rãhã hkur nẽ mẽ hkurê.

Nẽ mẽ kot mẽmo mry kamrõ kur nẽ mãnhẽn mẽ hkurê.

Nẽ mẽmyjaja kot amnhĩ prõ pix tãnopxar ã mẽ kãm karõ.

Nẽ mẽnijaja haxwýja kot amnhĩ mjên pix tãnopxar ã mẽ kãm karõ.

–ãm ja pix kot puj mẽ kãm hã kagã nẽ mẽ kãm hã karõ.

²¹ Mẽ panhĩgêtjê mã finat Mojes kot ã mẽ kãm karõ anhỹrja na htem arĩ krĩ piitã hkôt ã mẽ kãm hã karõ anẽ. Mẽ panhõ arĩgromnu pẽ sap ã na htem arĩ ri Tĩrtũm kapër o mẽ ahkre xã hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwýnhjê hwýr kagã mênh ã mẽ harẽnh

Karatas 5.1

²² Hãmri nhũm mẽ Xiakre kapër mar o hkrĩ. Jejus nhỹ hã mẽ ahkre ho mẽ pa xwýnh maatijaja nẽ mẽ kot hkwyjê jahkre xwýnhjaja nẽ Kris kwýjê piitã Xiakre kapër ma nhũm ja mẽ kãm mex nẽ. Jakamã nhũm mẽ axpën mã:

–Tõe. Nã ãm hãmri na Xiakre ã Ijaew kêt xwýnhjê jarẽnh anẽ. Nã ja mex. Pu mẽ ã ãxiok nhõ xwýnhjê mã ja hã kagã anẽ hãmri nẽ mẽ hwýr kumẽ. Koja Pawre mẽ Panãpeja wa kupy nẽ ma akupým mẽ hwýr o mõ nẽ mẽ kãm kugõ. E mẽ pahtõ kot puj mẽ ma wa hkôt mẽ hwýr mõ? Anẽ.

Hãmri nhũm mẽ kuma nẽ Siras mẽ Jut Pasapas wa kuta. Jejus kôt mẽ kot axpën to htõ nẽ htõxjaja kot axpën mã hamẽ wa kot amnhĩ to mex xwýnh ã wa harẽnh jakamã nhũm mẽ ma Pawre mẽ Panãpe wa hkôt mör kaxyw wa kuta.

²³ Hãmri nẽ ãxiok kamã Kris kwý pẽ Ijaew kêt xwýnhjê kaxyw kagã nhĩpêx nẽ kamã ã mẽ kãm kapër anẽ nẽ mẽ kãm:

Pa? ãxiok mẽ Sir mẽ Siris kamã Ijaew kêt xwýnhjaja? Xã mẽ amex? Mẽ ixpê Jejus kôt mẽ atõjaja na pa mẽ awýr kagãja nhĩpêx nẽ mẽ awýr kumẽ. Mẽ ixpê Jejus kôt mẽ kot amnhĩ xunhwýr xwýnhjê jahkre ho

ixpa xwýnhjaja nê Jejus nhÿ hã mē ahkre ho mē pa xwýnh maatijaja pa mē awÿr kumē.

²⁴ Na xep ra ja rŭm mē ixkwÿjaja ma mē awÿr mō nē mēmoj tã tanhmã mē amã karō hto. Mē ate amnhÿ my kwÿrÿt kà jakàr nē amnepēm mē inhġġt Mojes kapēr kôt amnhÿ nhġpêx o apa hã mē amã karō. Ka xep mē tee ri ja kukamã ajamaxpēr. No mē pajaja na pa prem mē awÿr mē rēnh kêt nē. Ām amnhÿ krã hkôt na prem mē awÿr mō nē ã mē amã ja hã karō anē.

²⁵ Tã pa tee ri mē harēnh ma nhŭm ja mē ixpē omnuj tÿx nē. Jakamã na pa mē jar akuprō nē mē akaxyw mē inhġōja wa kuta. Wa kot ma Panãpe mē Pawre wa hkôt mē awÿr wa mōr nē mē amã mē ixkapēr jarēnh kaxyw. Panãpe mē Pawreja mē inhmã wa hapē htÿx.

²⁶ Na hte mē amã Pahihti Jejus Kris kapēr jarēnh o pa kaxyw wa amnhÿ grōnh kôt mē amã harēnh o pa.

²⁷ Tã pa mē akupÿm mē awÿr wa kumē nē wa hkôt mē pahtō Jut mē Siras wa kumē. Mē ixte mē amã kagã kamã mē ixkapērja nhŭm wa kot hprġ hã mē amã harēnh kaxyw pa mē wa hkôt mē awÿr wa kumē.

²⁸⁻²⁹ E ja pix nē kot paj mē akurê: Kêr ka mē sãnti hã mē ō hkur kêt nē.

Nē mēmo mry kamrô kur kêt nē. Jao mēmo mry pa nē hkamrô runh kêt rãhã hkur kêt nē. Kamrô runh pa nē rġ kormã tanhmã ho nē aku.

Nē kêr ka mē amyjaja amnhÿ prō pix tãnopxar o apa.

Nē mē anijaja ajaxwÿja amnhÿ mjên pix tãnopxar o apa.

E ãm ja pix kot paj mē amã hã karō. Tġrtŭm Karō kãm ja mex. Nē mē inhmã mãânēn ja mex. Kot kaj mē ã amnhÿ nhġpêx anhÿr o ri apa nē amex nē apa.

Tã ãm ja pix. Mē ixpē Jejus kwÿjê jahkre xwýnhjê mē Jejus nhÿ hã mē ahkre xwýnh maatijê mē pa mē mē awÿr kagãja nhġpêx nē kumē. E kêr ka mē amex nē akġnh nē ri axpēn

kôt apa. Ām ja pix na hapêx. Anē. Nhŭm prem ã kagã kamã mē kãm mēmoj tã karō anē.

³⁰ Hãmri nē Jut wa mē kãm kugō nē ma ãxiok wÿr wa mē kumē nhŭm wa mē ma akupÿm hwÿr o mō. Jut nē Siras nē Pawre nē Panãpeja nhŭm wa mē ma akupÿm mē hwÿr o mē mō. Mōō hãmri nē mē hwÿr pōj. Hãmri nē Jejus kwÿjê ho akuprō nē mē kãm kagãja gō

³¹ nhŭm mē kupy nē kamã harē nē kuma. Kamã mē kot mē kãm mēmoj tã karō kamã harē nē kuma nē ŷ hã hkġnh nē akupÿm tãm hamaxpēr.

³² Jut mē Siras wa kêp Tġrtŭm nhÿ hã kapēr o pa xwýnh na pre wa. Jakamã na prem mē hwÿr mōn pōj hãmri mē kãm tanhmã ujarēnh to ho pa. Mē kot Jejus kôt pix mã hamaxpēr o pa kaxyw mē kãm ujarēnh o pa nē mē kãm:

—E kêr ka mē mãmrġ Jejus kôt amnhÿ nhġpêx mex rãhã ho ri apa nē aa hkaga hkêt nē. Anē.

³³ Hãmri nē mē hkôt ri pa hã apkati xohtō nē. Hãmri nē wa akupÿm Jeru-jarē hwÿr nojarêr nē mē kãm amnhÿ jarē nhŭm mē wa kuma nē wa kãm:

—Tôe. Nà wa mãmrġ ma akupÿm mō. Kojã Tġrtŭm war apumunh mex nē ka wa ma akupÿm amex nē akã hkġnh pê akwÿjê hwÿr akato. Anē.

³⁴ Hãmri nhŭm wa nojarêr tã nhŭm Siras tanhmã hamaxpēr to nē hitôt nē mē kuri arġk nhŭm Jut Pasapas pix ma akupÿm hkwÿjê kot mē hwÿr wa mēnh xwýnhjê hwÿr mō.

³⁵ Hãmri nhŭm Pawre mē Panãpe wa Siras pyrã nē kormã ãxiok kamã pa. Hãmri nē Jejus kôt mē htō hkwÿjê mē pimràatã mē ahkre ho pa. Tġrtŭm kapēr o mē hkôt mē ahkre ho pa.

Pawre mē Panãpe wa kot axpēn pē pikjêr ã wa harēnh

Atre 13.13; Korosē 4.10

³⁶ Hãmri nhŭm Pawre mē Panãpe war arġ mē hkôt ri pa hã apkati xohtō nē. Tã nhŭm Pawre hamaxpēr nē Panãpe mã:

—Kwa ma pu ma akupÿm ra pahte krī hkwȳ hkôt mẽ kām Jejus jarēnh o papa xwÿnhjê hkôt akupÿm mō. Pu ma mẽ hwÿr mō nē Jejus kôt pahtō nē pahtōxjê kot tanhmā ri amnhĩ nhĩpêx to hã mẽ omu. Anē.

³⁷ Hāmri nhũm kuma nē kām:

—Tōe. Nà pu ma mō. Nom kêr pu ma amnhĩ kôt Juāw Makre ho mō kê axte pahto ajuta ho pahkôt mō. Anē.

³⁸ Hāmri nhũm Pawre tee ri kuma nhũm ja kêp omnuj nē nhũm kām:

—Tk. Kwa na pre pahkôt pa htā Pāpir kamā tanhmā hamaxpêr to nē pahkaga nē ma akupÿm Jerujarē hwÿr mō. Jakamā kwarĩ koja axte pahkôt mōr kêt nē. Anē.

³⁹ Hāmri nhũm Panāpe tee ri hã hihtÿx no nhũm kêp hkaga kumrêx. Jakamā nhũm wa ja hã axpên pê axkjê nē ma ahpÿnhã mō. Nhũm Panāpe amnhĩ kôt Juāw Makre ho mō nē wa ma pàr kām gô hipôk pê Sipre hwÿr wa mō.

⁴⁰ Nhũm Pawre axtem amnhĩ kôt Siras wÿ nē ma wa mō. Hāmri nē wa nojarêt nhũm Jejus kôt wa htōjaja wa ho Tirtũm wÿ nē kām:

—Pa Tirtũm. E koja Pawre mẽ Siras wa ma krī hkwȳ hkôt mẽ kām akapêr jarēnh o ri wa pa. Jakamā kêr ka wa htānopxar o ri wa hkôt apa. Anē.

Hāmri nhũm wa kato nē ma krī hkôt ri Jejus kapêr o mẽ ahkre ho wa pa.

⁴¹ Wa ma pyka pê Sir mẽ Siris kôt Jejus kôt mẽ htō nē mẽ htōxjê pumunh nē Jejus kôt mẽ ho mẽ hihtÿx o wa pa kaxyw.

16

Ximotre kot Pawre mẽ Siras wa hkôt ri pa hã harēnh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupÿm krī pê Tepe hwÿr wa mō nē hwÿr pøj nē hpānhã kurũm ma Risti hwÿr mō. Hāmri nē wa hwÿr pøj nē kamā Ximotre pumu. Ximotre na pre ra katorxà pyrà nē Jejus kôt amnhĩ xãm nhũm mẽ kot Jejus kôt axpên to htō xwÿnhjaja kām hapê nē. Nē kot

Jejus kapêr kôt amnhĩ nhĩpêx mex o pa hã axpên mã harê.

Krī pê Risti mẽ Ikõn kamā nhũm prem ã axpên mã Ximotre jarēnh anhÿr o pa. Jakamā nhũm Pawre mẽ Siras wa mō nē mẽ hwÿr pøj nē Ximotre kot amnhĩ nhĩpêx ã omu nhũm Pawre kām war amnhĩ kôt o mōr prām nē. Nom Ximotre hkamrô pihkàr na pre. Katorxà kêp Ijaew nhũm hipêêxà kêp Gres jakamā nhũm ã Ximotre hkamrô pihkàr anē. Nhũm Ijaew kot katorxà hkôt kêp Ijaew ã omunh jakamā nhũm Pawre hamaxpêr nē mẽ kaxyw kêp my kwÿrèt kà krãhta nē arĩ kormã mẽ hwÿr amnhĩ kôt o mō.

⁴ Hāmri nē mẽ ma krī hkwȳ hkôt mō. Mōõ nē Ijaew kêt xwÿnhjaja ra kot amnhĩ kaxyw Jejus kôt hamaxpêr xwÿnhjê jahkre ho mẽ hkôt pa. Ra Jerujarē kām mẽ kot Jejus kwÿjê jahkre ho pa xwÿnhjê mẽ Jejus nhÿ hã mẽ ahkre xwÿnh maatijaja mẽ kot mẽ kām mẽmoj tã karõta nhũm mẽ ma mẽ kām harēnh o ri mẽ hkôt pa.

⁵ Hāmri nhũm mẽ kuma nē ra Jejus kôt amnhĩ nhĩpêx mex o mō. Hāmri nhũm apkati mẽ krī nhõ xwÿnh kwÿjaja mẽ uràk nē Jejus kôt amnhĩ xunhwÿ. Jakamā nhũm mẽ ra ohtō rax o mō.

Pawre tanhmã hpimtir to hã harēnh

Rômãn 15.18-21

⁶ Tã nhũm Pawre mẽ Siras mẽ Ximotre mẽ ma pyka pê As wÿr nojarêt. Mẽ kot mẽ kām tanhmã Jejus jarēnh to ho pa kaxyw mẽ hwÿr nojarêt tã nhũm Tirtũm Karõ kormã mẽ nē mẽ hkurê. Jakamā nhũm mẽ hpānhã ma pyka hkwȳ pê Prik mẽ Karatas wa hkôt pa. Ixpê Rukre na pa pre mẽ hã ajêt nē ma mẽ hkôt ixpa ho ixpa.

⁷ Hāmri nē mẽ pyka pê Mĩs ã mō nē hpānhã ma Pitĩn wÿr inhmōr mã tã no nhũm Tirtũm Karõ axte kê mẽ nē mẽ ixkurê.

⁸ Jakamā pa mẽ arĩ Mĩs jakàr ã mō nē gô xujanâr mÿ ri krī pê Tõx wÿr pøj.

⁹ Tã nhũm kamàt pa mẽ ixpiitã gõr nē inhĩkwÿ nhũm Pawre tanhmã

hpimtir to. Nhũm xep pika pē Masetōn nhō xwýnhja mẽ amnhĩ wýr hwýr kãm hihtýx o xa nhũm hprĩ hã omu nē kapēr ma. Nhũm xep pre kãm:

—Pa Pawre? Kwa amnē Masetōn wýr mẽ ixwýr mō nē tanhmã mẽ ijakre hto. Anē.

¹⁰ Hãmri nhũm Pawre hkrākato nē mẽ inhmã hpimtir jarē. Pa mẽ kuma nē axpēn mã:

—Tô kwa tokyx pu mẽ hwýr. Tirtũm kot mẽ hwýr mẽ parēnh kēnã. E pu mẽ ma mẽ hwýr mō nē mẽ kãm Jejus jarēnh o mẽ ahkre. Anē.

Hãmri nē amnhĩ to akuprō nē mẽ hwýr inhnojarēt kurē kumrēx.

Ritre kot Jejus kôt amnhĩ xãm ã harēnh

Piripos 1.1

¹¹ Hãmri pa mẽ ma Masetōn wýr mō. Tôx rũm ma pàr kãm hwýr mō. Hãmri nē gō nhĩpók pē Samōtas wýr pōj nhũm mẽ hã pàr nhō. Hãmri nhũm apkati pa mẽ axte mō nē Masetōn kamã krĩ pē Nēap wýr pōj.

¹² Hãmri nē pàr rũm ijaarōj nē hpānhã kurũm hamũ krĩ pē Piripos wýr ixpar o mō. Piriposja Masetōn kamã krĩ maati na. Rõm nhō xwýnhjaja na prem ho kato. Jakamã pa prem ma hwýr mō nē pōj nē tokyx axte kurũm nhýhým inhmõr kêt nē.

¹³ Hãmri nhũm sap kato pa mẽ axpēn mã:

—Kwa pyhti mýri mãn hte Ijaewjaja axpēn wýr akuprō nē Tirtũm mã amnhĩ jarēnh o hkrĩ nã. E kwa pu mẽ hwýr nē gō mýri mẽ hapēr o ri papa. Anē.

Hãmri nē ma hwýr mra nē mẽ hapēr o ri ixpa nhũm ãm mẽni pixjaja axpēn wýr akuprō. Pa mẽ omu nē mẽ kuri ixkrĩ nē mẽ kãm Jejus kapēr jarēnh o mẽ ahkre o ixkrĩ.

¹⁴ Nhũm mẽ kot mẽ inhmar o hkrĩ xwýnhjê hō pē Ritreja. Krĩ pē Xijaxir nhō xwýnh na pre. Nē kēp kupēxê mex o wēnê xwýnh. Na pre hte kãm Tirtũm prãm o pa. Jakamã nhũm Pawre kot mẽ ahkre ho ýrja rôm nhũm Pahшти Jejus tanhmã Ritre hkrã hto

nhũm hprĩ hã Pawre kapēr mar týx nē.

¹⁵ Hãmri nē amnhĩ kaxyw Jejus kôt hamaxpēr nē hkôt amnhĩ xãm kurē kumrēx. Ōrkwý kamã hkwýjê mẽ nhũm mẽ hkôt amnhĩ xunhwýr pa. Jakamã pa mẽ kēp Jejus kwý hã mẽ hkrã kumrã. Mẽ piitã mẽ kot mẽ kēp Tirtũm kra hã mẽ omunh kaxyw. Hãmri nhũm Ritre amnhĩ kôt mẽ ixwý nē mẽ inhmã:

—An kot kaj mẽ ixte Jejus kôt amnhĩ xãm týx ã ixpumu hã kot kaj mẽ ma ixkôt mō nē hpānhã inhõrkwý kamã pōj nē apa. Anē.

Pa mẽ kuma nē ma hkôt mō.

Mẽ kot Pawre mẽ Siras wa haxàr ã mẽ harēnh

Makre 1.23-26, 1.34

¹⁶ Tã nhũm arĩgro hō hã pa mẽ Tirtũm mã amnhĩ jarēnh kaxyw axte pyhti mýri mẽ pikuprõnh xàja wýr mō. Hãmri nē pry kamã mẽ kãm àpēnh xwýnh nija pumu. Ra mẽkarõmnuti kot tanhmã hkrã hto nhũm ý hã àhpumunh týx xwýnhja. Nhũm hte mẽkarõmnuti nhý hã mẽ kãm mẽmo hkukamã tanhmã ujarēnh to ho pa. Jakamã nhũm õ patrãwjaja kukwak ri ujamýnh rũnh pē hkĩnh nē pa.

¹⁷ Jakamã pa mẽ mō nhũm nija mẽ ixpumu nē mẽ ixtã ajêt nē ma mẽ ixkôt mō. Hãmri nē mẽ kãm mẽ ijarēnh o mẽ ixkôt mō nē mẽ kãm:

—Xê mẽ mran jajê pumu. Na htem Tirtũm maati mã tanhmã amnhĩ nhĩpēx mex to ho pa. Tirtũm kot mẽ ate amnhĩ tomnuj pē tanhmã mẽ apytàr to hã mẽ amã ujarēnh kaxyw na mẽ awýr mra. Anē.

¹⁸ Nē ãm xatã mẽ kãm mẽ ijarēnh o mẽ ixkôt paja o ra hã apkati xohtô nē. Tã nhũm Pawre ra kãm mar kaga nē nē mẽkarõmnuti mã kapēr nē kãm:

—Tk. Kwa kēp akato nē ma tē. Pa Jejus Kris nhý hã amã ixkapēr ka inhma nē kēp akato nē ma atēm kurē kumrēx. Anē.

Hãmri nhũm kuma nē kēp kato nhũm akupým tãm hkrã.

¹⁹ Jakamã nhũm õ patrãwjaja tee ri ja hã omu nē gryk týx nē axpēn mã:

—Kwa ra mēkarōmnutijaja kēp kator jakamā koja axte mēmoj kukamā tanhmā ujarēnh to hkēt nē. Pu mē kukwak ri axte paxujamýnh kēt nē. Anē.

Hāmri nē Pawre mē Siras wa kamā gryk týx nē. Hāmri nē wa unē nē ma mē kot axpēn mar xà hā ixkre hwýr wa hkjēnh o tē

²⁰ nē mē kot mē ho amnhĩptār xwýnhjē mā tanhmā wa ho hēx to nē mē kām:

—Kwa mē amnē Ijaewja wa omu. Na hte wa mē panhō krī kamā hēx pix o pa nhūm mē tee ri wa kapēr ma nē wa kamā gryk týx nē.

²¹ Mē ixte amnhĩ nhĩpēx te kot axpēn pyrāk kēt tā nhūm wa mē kot amnhĩ nhĩpēx o mē pajahkre kaxyw nhỹhýnh mē pahwýr mō. Nom mē pahpē Rōm nhō xwýnhjaja axtem mē pahte amnhĩ nhĩpēx kēnā kot pu kēt wa kuma nē wa kapēr kōt amnhĩ nhĩpēx. Anē.

²² Hāmri nhūm mē kuma nē piitā wa kamā gryk týx nē. Hāmri nhūm mē ho amnhĩptār xwýnhjaja wa kēp wa ê kaxōnh o hkapa nē wa hā mē ō pōristi mā amýnē nē mē kām:

—E mē ma wa o tē nē mē htak xà ho wa htak. Anē.

²³ Hāmri nhūm mē kuma nē ma wa o tē nē wa htak rax nē. Hāmri nē wa haxà nē mē hagjēnh xà jamār xwýnh mā kām:

—E kēp ka ja wa omunh mex nē kē wa kator kēt nē. Anē.

²⁴ Hāmri nhūm mē kuma nē wa o tē nē ixkre jatur xà kamā wa haxà nē wa kator pymaj hamē wa htem pī jaxà nē ho htýx nhūm wa arī hte týx nē nhỹ.

²⁵ Tā nhūm kamàt. Nē kōt ā kamàt nhūm wa Tirtūm mā amnhĩ jarē nē mex o mex ā wa grer o wa nhỹ nhūm wa urāk nē mē hagjēnh xwýnhjaja wa mar o hkrī.

²⁶ Puh nhūm pyka mē kām htertēt týx nē nhūm mē hā ixkreja amnhĩ to àpēr týx nē amnhĩ kahē xà rēnh pa. Nhūm mē hagjēnh xwýnhjē kaxpre xà piitā mē nē pirēnh pa.

²⁷ Hāmri nhūm mē hamār o kuhē xwýnhja pika tertēt kamā ama nē

hkrākato. Hāmri nē mē hā ixkre jakwakre kahē xà rēnh parja pumu nē mē hagjēnh xwýnhjaja hapôx par ā mē hkamnhĩx nē tee ri amnhĩ kukamā hamaxpēr. Hāmri nē pahi kot mē hā hpīr pymaj ō wapo kapa nē ra tām kot ho amnhĩ pīr kaxyw.

²⁸ Hāmri nhūm Pawre tee ri ja hā omu nē kàx pē kām amýra nē kām:

—Kwa amnhĩ pīr kēt nē. Ot pa mē arī ixpiitā ixkuhē. Na pa mē ixtō ixkator nē ixprōt kēt nē. Anē.

²⁹ Hāmri nhūm kuma nē kanē hā ahwý nē kuwy nē mē hwýr axà nē mē piitā mē omu. Hāmri nē Pawre mē Sirasja wa omu nē wa hwýr kām ma ho htertēt o tē. Hāmri nē wa hā hpijaàm kaxyw wa kutā tēm nē hkōnkrā ho nhỹ.

³⁰ Hāmri nē kànhmā xa nē wa ho kato nē ixkre kapem wa o xa nē wa kām:

—Kwa tanhmā kot pa amnhĩ nhĩpēx to kē Tirtūm war apyrà nē ixte amnhĩ tomnuj pē ixpytā? Anē.

³¹ Hāmri nhūm wa kām:

—Nà kot kaj amnhĩ kaxyw Jejus Kris kōt ajamaxpēr nē hkōt amnhĩ xām nhūm Tirtūm ja hā apumu nē amnhĩ katut kōt ate amnhĩ tomnuj piitā rēnh pa. Nhūm anhōrkwý kamā akwýjaja apyrà nē Jejus kōt amnhĩ xunhwý nhūm ā mē hipēx anē. Anē.

³² Hāmri nē wa ma hkōt ōrkwý hwýr tē nē hprī hā mē kām Tirtūm kapēr jarē nhūm mē wa mar o hkrī.

³³ Hāmri nhūm mē hagjēnh xà jamār xwýnhja wa kām wa htak xà kuhō. Kormā kamàt kō hkwy kamā wa kām kuhō nē hkane. Hāmri nhūm wa mē kot Jejus kōt amnhĩ xunhwýr par ā mē omu nē mē hkrā kumrā. Mē hamār xwýnh mē hkwyjē mē hkrā kumrār pa.

³⁴ Hāmri nhūm mē kot amnhĩ kaxyw Tirtūm kōt hamaxpēr jakamā piitā hkīnh nē. Hāmri nhūm mē hamār xwýnhja ōrkwý hwýr Pawre mē Siras wa o tē nē wa kām ō nhūm wa apku nhūm ma akupým mē hagjēnh xà hwýr wa o tē nē akupým wa haxà.

*Mê kot Pawre mê Siras wa kãm urer
ã mê harênh*

Atre 22.25-29

³⁵ Hãmri nhũm apkati nhũm krĩ pytâr xwýnhjaja mê õ pôristi mã anê nhũm mê hagiênh jamâr xwýnh wýr tẽ nê kãm:

—E na mê papytâr xwýnhjaja ate Pawre mê Siras wa kãm anhũrer nhũm wa mãmrĩ ma akupým htêm kaxyw hã karõ. Anê.

³⁶ Hãmri nhũm mê kuma nê wa hwýr axà nê wa kãm:

—E na krĩ pytâr xwýnhjaja ixte war akator kaxyw war atã inhmã karõ. Jakamã e wa mãmrĩ axàmnhĩx ma mõi. Anê.

³⁷ Hãmri nhũm Pawre kãm:

—Nà wa ixte tanhmã amnhĩ tomnuj to hkêt tã nhũm mê kot wa ixpynênh nê wa ixtak. Wa ijaxwýja wa ixpê Rõm nhõ xwýnh tã nhũm prem axtem nê mê piitã mê noo mã wa ixtak nê wa ijaxà. Mê kot amarĩ Rõm nhõ xwýnh tak nê mê hagiênh kêt tã nhũm mê ã mê noo mã ã wa inhĩpêx anê. Kormã wa ixte tanhmã amnhĩ tã ixaprâr to hkêt tã nhũm mê ã wa inhĩpêx anê. Jakamã kwarĩ kot kaj mê no hkàx ã wa ixkator kêt nê. Kê mê kot wa ijaxâr xwýnhjaja tãm man mra nê wa ixkator pa war arĩ ma mõi. Anê.

³⁸ Hãmri nhũm pôristija kuma nê ma akupým mê hwýr mra nê mê kãm wa kapêr jarê. Hãmri nhũm mê tee ri mê urân wa kêp Rõm nhõ xwýnh ã wa harênh ma nê kãm ma htýx nê.

³⁹ Hãmri nê ma wa hwýr tẽ nê wa hwýr axà nê wa kãm:

—Pa? E mãmrĩ war akato nê axàmnhĩx ma mõi. Na pa prem war anhĩpêx kati rax nê. Tã kêr ka wa axte ja mã ajamaxpêr hkêt nê. Kê ja ãm jar mê pakamã hapêx. Anê.

Hãmri nê wa kator nê wa kãm:

—E kwa wa mê inhõ krĩ pê akato nê ma nhýhým mõi. Anê.

⁴⁰ Hãmri nhũm wa kuma nê kato nê ma akupým Ritre nhõrkwy hwýr wa tẽ. Hãmri nê Jejus kôt wa mê htõjê pumu nê wa mê kãm amnhĩ jarê nê mê kãm:

—E kot paj hãmri wa mã mõi. Nom kêr ka mê arĩ Jejus Kris kôt amnhĩ

nhĩpêx mex rãhã ho ri apa nê aa hk-aga hkêt nê. Anê.

Hãmri nê wa mê kurũm kato nê ma krĩ hõ hwýr wa mõi.

17

*Tesarõn kamã mê kot wa kamã
gryk ã mê harênh*

Wam Tesarõn 1.1, 2.13-14

¹⁻² Tã nhũm Pawre mê Sirasja wa ma krĩ hkwý hkôt pa. Piripos rũm ma Apiporip mê Apõrõn kôt wa mõi hãmri nê ra Tesarõn wýr wa pøj. Na pre hte Pawre nhýri pøj nê Ijaew nhõ Tĩrtũm kapêr o mê ahkre xà hã ixkre hwýr agjê nê kamã mê kãm Jejus kapêr jarênh o kuhê. Jakamã nhũm wa mõi nê Tesarõn wýr pøj nê ixkre hwýr mê hwýr tẽ nê mê kãm ujarênh o xa. Nê mê kãm ujarênh o hã arĩgromnu pê sap o axkrunêpxi.

³ Nê hprĩ hã mê kãm tanhmã Tĩrtũm kapêr jarênh to nê mê kãm:

—Nà Tĩrtũm kapêr ã kagà htũm kot mê pakaxyw ãm xwýnh jarênh. Amnhĩ xà htýx kamã hamak kãm htyk hãmri nê akupým htĩr ã nhũm kot hkukamã harênh. Tã na pre Jejusja ã amnhĩ nhĩpêx anê. Tãm kêp Krisja. Tĩrtũm kot mê pakaxyw ãm xwýnhhta na. Anê.

⁴ Hãmri nhũm mê hkwýja kuma nê wa hkôt hamaxpêr nê wa urak nê Jejus kôt amnhĩ xunhwý. Ijaew kwýjê nê Ijaew kêt xwýnh kwýjaja nê mēni kot amnhĩ to rũnh xwýnh kwýjaja nhũm mê ohtõ nê amnhĩ kaxyw Jejus kôt hamaxpêr nê hkôt amnhĩ xunhwý.

⁵ Tã nhũm Ijaew kwýjaja tee ri hkwý kot wa hkôt amnhĩ xunhwýr ã mê omu nê mê hã Pawre mê Siras wa kamã gryk týx nê. Hãmri nê ma mra nê wa kaxyw mê kot amnhĩ tomnuj týx xwýnh kwýjê ho akuprõ nê mê kãm wa hã amýnê. Jakamã nhũm mê ma kapêr punuj pê wa hapêr o ri mra nhũm mê piitã mê omu nê mê kuma. Hãmri nhũm mê wa hapêr o ra Jasãw nhõrkwy hwýr mra. Nê mê kot Pawre mê Siras pynênh nê ma mê

utàr xwýnhjê hwýr wa o htêm kaxyw mē kēp kahê xà mē nē mē hwýr agjê.

⁶ Hāmri nē tee ri ōrkwý kamā wa hapêr nhūm wa kamā amrakati. Jakamā nhūm mē Jasāw mē kot Jejus kôt axpēn to htō xwýnh kwýjê pynê nē ma mē kot mē ho amnhīptār xwýnhjê hwýr mē o mra. Hāmri nē mē kām tanhmā Pawre mē Siras wa ho hêx to. Ām kapêr punuj kām kàx pē mē kām wa harē nē mē kām:

—Kwa na hte Pawre mē Siras wa pyka piitā hkôt mē kām ri mēmoj to hêx o pa. Tā wa ra mē panhō krī hwýr pōj nē jar mē pamā ri tanhmā hêx to ho ri mē pahkôt pa.

⁷ Jasāw nhōrkwý kamā na pre wa pōj nhūm amnhī wýr wa kuwý. Na hte wa hkôt mē hamaxpêr xwýnhjaja pahihiti Sesti kapêr kwým ri kuhpa hā kapêr o pa nē axtem nē mēō pahī pē “Jesús” anhýr xwýnhja kapêr kôt amnhī nhīpêx o pa. Anē.

⁸ Hāmri nhūm mē kot mē ho amnhīptār xwýnhjê mē krī nhō xwýnhjaja mē kuma nē gryk týt kumrêx.

⁹ Hāmri nē Jasāw mā kām:

—E kot paj mē apê mē akàxpore hkwý jamý. Ka mē ajapōj nē ma mē panê Pawre mē Siras wa hano nhūm wa kato nē ma mō pa rī akupým mē amā kugō. Anē.

Hāmri nē mē kēp mē hikàxpore hkwý jamý.

Pawre mē Siras kot Perej wýr mōr ā wa harēnh

¹⁰ Tā nhūm ra kamāt nhūm mē kot Jejus kôt axpēn to htōjaja hāmri Pawre mē Sirasja wa ma krī pē Perej wýr wa kumê. Hāmri nhūm wa kato nē ma hwýr mō nē hwýr pōj. Hāmri nē Ijaew nhō Tirtūm kapêr o mē ahkre xà hā ixkre hwýr htêm kurê kumrêx nē wa axà.

¹¹ Perej kamā Ijaew na pre te mē kot Tesarōn kamā Ijaew pyrāk kêt nē. Mē kurom mē kām Tirtūm kapêr mar prām nē. Jakamā nhūm pre Pawre mē Siras Tirtūm kapêr o mē ahkre ho pa. Apkati mē mē ahkre mex o pa nhūm mē wa kuma nē hkīnh nē. Nē Tirtūm kapêr ā kagà htūm kamā wa kot mē

ahkreta japêr nē kamā omu nē axpēn mā wa harēnh o:

—Nà ām hāmri na wa ā Tirtūm kapêr o mē pajahkre anē. Tirtūm kapêr ā kagà htūm hkôt na hte wa mē pajahkre. Anē.

¹² Hāmri nē ohtō nē Jejus kôt amnhī xunhwý. Ijaew kwý nē Ijaew kêt xwýnh kwý nē mēni kot amnhī to rūnh xwýnhjaja nhūm mē ohtō nē Jejus kôt amnhī xunhwý.

¹³ Tā nhūm Tesarōn kām Ijaewjaja Pawre jarēnh ma. Kot Perej nhō xwýnhjê mā Tirtūm kapêr jarēnh o pa hā harēnh ma. Hāmri nē ma mē hwýr mra nē mē kām tanhmā ho hêx to nhūm krī nhō xwýnhjaja mē kuma nē ra Pawre kamā gryk týt nē.

¹⁴ Jakamā nhūm Jejus kôt mē htōjaja mē harēnh ma nē mē umaj Pawre kator nē ma gō xujanār wýr o mō. No nhūm Siras mē Ximotre wa Perej kamā mē kuri arīk.

¹⁵ Hāmri nhūm mē hkwýjaja ma Pawre o mō. Ma krī pē Atenas wýr o mō. Hāmri nē hwýr o pōj nē kamā kure. Hāmri nē ra akupým Perej wýr nojarêt nhūm Pawre mē kām:

—E kêr ka mē ma akupým mō nē Siras mē Ximotre wa kām ijarê kê war amnhīm nojarêt nē tokyx man ixkôt wa mō. Anē.

Pawre kot Atenas nhō xwýnhjê mā kapêr ā harēnh

Rōmān 1.18-20

¹⁶ Tā nhūm Pawreja kormā Atenas kamā pa. Siras mē Ximotre wa kamā hamak o ri kormā kamā mē kot amnhī nhīpêx ā mē omunh o pa. Na pre Atenas nhō xwýnhjaja sânti ho ohtō rax nē mē ō krī kamā unhwý nhūm Pawre ri omunh o ri kuhê ho pa. Na pre htem ahpýnhā mēmo karō nhīpêxja o te Tirtūm nhīpêx pyrā nē kutā hkōn krā ho rôrōk nē hkrī nē kām mex o mex ā harēnh o pa. Hāmri nhūm Pawre tee ri ja hā mē omunh o ri mē hkôt pa nē hkaprī nē.

¹⁷ Hāmri nē ma amnhī kwýjê nhō Tirtūm kapêr o mē ahkre xà hā ixkre hwýr pa nē kamā mē ahkre ho kuhê. Ijaewjê mē Ijaew kêt xwýnh

kot Tirtũm ã hpijaàm xwýnhjê mã nhũm Tirtũm kapêr jarênh o kuhê. Nê apkati mẽ mẽ kot mẽmoj to wênê xà hwýr mra nê mẽ ujaarêr xwýnhjê mã Tirtũm kapêr jarênh o kuhê.

¹⁸ Hãmri nhũm mẽ mar o pa. Atenas nhõ xwýnhjaja na prem axpên kôt amnhĩ nhĩpêx o pa hkêt nê. Mẽ hkwýjaja kêp Epikure hkôt amnhĩ nhĩpêx xwýnh. Nê mẽ hkwýjaja axtem kêp Etok kôt amnhĩ nhĩpêx xwýnh. Hãmri nhũm Pawre mẽ kãm Jejus kot tanhmã mẽ panê amnhĩ nhĩpêx to hã harênh o pa nê akupým htĩr ã harênh o pa. Hãmri nhũm mẽ tee ri kuma nê hã axpên kukjêr o kuhê nê axpên mã:

–Tk. Kwa mo na hte myti ata harênh o pa? Anê.

Nhũm mẽ hkwýja mẽ kãm:

–Ko. Axtem mẽpahpãm õ na hte tanhmã harênh to. Anê.

¹⁹⁻²¹ Atenas nhõ xwýnhjê mẽ axtem krĩ hõ nhõ xwýnhjaja na prem kãm mẽ ujarênh nyw mar prãm nê. Jakamã nhũm prem mẽmoj jarênh nyw ma hãmri nê ãm axpên mã harênh pix o ri pa. Tã ra Pawre xujarênh nyw ma nê ma amnhĩ kôt mẽ kot axpên mar xà hã ixkre hwýr o tẽ. Ixkre pê Areopja wýr nhũm prem amnhĩ kôt o tẽ nê kãm:

–E kwa aprĩ hã mẽ inhmã ate mẽmo jarênh nywta jarê pa mẽ ama. Mẽ inhmã mar prãm. Anê.

²² Hãmri nhũm mẽ kuma nê mẽ kãm ujarênh o xa. Mẽ kot axpên mar xà hã ixkre kamã Atenas nhõ xwýnhjê mã awjarê nê mẽ kãm:

–E nà na ka htem anhõ mẽmo karõ nhĩpêx xohtõta ã apijaàm pê kãm amnhĩ jagrer o ri apa. Pa hte ja hã mẽ apumunh o mẽ akôt ixpa.

²³ Na pa ra mẽ anhõ sãnti piitã hkôt omunh o ri ixpa nê o mũj hõ kuhê xà kapryja wýr ixkato. Nhũm himõk ã mẽmo karõ nhĩpêx amrakati nom ã hã kagà kot:

MÊPAHPÂM PUMUNH KÊT KUHÊ XÀ
NA JA

Ã mẽ ate hã kagà kot anhýr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarênh

mar mex. Tã kot paj mẽ amã harê ka mẽ inhma.

²⁴ –Mẽpahpãm mẽ ate omunh kêt ã amnhĩ jarênhhta Tirtũm na. Tãm na pre pyka ho kato nê kamã mẽmoj piitã ho kator pa. Gõ ho kato nê mry ho kato nê panhĩ ho kato. ãm mẽmoj piitã ho kator par kumrêx. Na hte pika kamã nê kaxkwa kamã mẽmoj piitã ho amnhĩptar mex rãhã ho pa. Jakamã mẽmo kaxyw kot puj mẽ jar kãm õrkwý nhĩpêx? Tãm kêp mẽmoj piitã ho kator xwýnh jakamã kot mẽmoj to presija hkêt.

²⁵ Kêp mẽmoj piitã hpãm jakamã mẽmoj piitã õ na. Jakamã tanhmã kot pu wem amnhĩ to nê kãm mẽmoj gõ? Tãm kot mẽmoj piitã ho kator nê ho htĩr nê kot mẽmoj piitã õr kênã kot puj kêt mẽ amnhĩ pyrà nê kãm mẽmoj gõ.

²⁶ Na pre mẽ pahkukamã ahpýnhã mẽ pahpiitã mẽ papapxà jarê nê mẽ pakator hã arĩgro jarê. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpàr krax.

²⁷ –Tã mẽmo kaxyw na pre ã Tirtũm mẽ panhĩpêx mex anê? Nà ãm mẽ pahte amnhĩ kaxyw hkôt pajamaxpêr nê hkôt amnhĩ xunhwýr kaxyw na pre mẽ panhĩpêx. Ja mẽ pahpê hihtýx kêt. Koja mẽhõ kãm Tirtũm prãm nhũm amnhĩ tã omunh kurê kumrêx.

²⁸ –Nê Tirtũm pix kukwak ri na pu htem pahpãm nê tanhmã amnhĩ nhĩpêx to ho ri papa. Mẽ akwý kot kagà jahkre xwýnhja na pre ja hã kagà nê hã kagà ho: “Mẽ pahpê mẽpahpãm kra na pu htem papa.” Anê. ã hã kagà kot anhýr.

²⁹ –Tã ka prem amnhĩm mẽmo karõ nhĩpêx. õr o hkwý nhĩpêx nê prat o hkwý nhĩpêx nê kên o hkwý nhĩpêx. Hãmri nê hipêx pa nê ho mẽpahpãm ã harê nê ri hã apijaàm o apa. No mẽ ãm amnhĩ krã hkôt mẽ ate hipêx. Tirtũm te kot ja pyràk kêt.

³⁰ –Amnepêm mẽ pa xwýnhjaja na prem mẽ apyrà nê ã mẽmoj nhĩpêx anhýr o pa nhũm Tirtũm ja hã mẽ

omu nê ãm mẽ omu nê hã tanhmã mẽ hipêx to hkêt nê. Kormã mẽ kot kapêr mar kêt jakamã nhũm pre ja hã mẽ omu nê ãm mẽ omu. Tã na ra mẽ pahte mẽmo karô nhĩpêx o mẽpahpãm nê mẽ pamã kapêr. Mẽ pahte hpãnhã amnhĩ kaxyw ãm kôt pix mã paja-maxpêr o papaja na kãm hprãm.

³¹ Koja nhỹrmã tanhmã mẽ pahte amnhĩ nhĩpêx to ho papa hã mẽ pah-pumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwýnhjê jarê nê amnhĩ ri mẽ pa hkêt xwýnhjê jarê. Na pre ra ã mẽ harênh anhỹr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupỹm ho htĩr. Nê akupỹm ho htĩr jao kot nhỹrmã kãm tanhmã mẽ pajarênh to xwýnh ã ho amnhĩrit. Anê.

³² Nhũm pre ã Pawre mẽ kãm Tĩrtũm kapêr jarênh anê nhũm mẽ mar o kuhê. Kot mẽ kãm Jejus tyk nê akupỹm htĩr ã harê nhũm mẽ mar o kuhê. Nhũm mẽ hkwyjaja kuma nê ãm kuma nê axtem nê ri hã akunha. Nom nhũm mẽ hkwyjaja mẽ kurom mar tỳx nê Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nê. Anê.

³³ Hãmri nhũm Pawre akupỹm nhỹri hpôx xà hã ixkre hwýr ma tê.

³⁴ Hãmri nhũm Xiônĩs pê Areop kãm mẽ kãm kapêr xwýnh nê mẽhõ ni pê Tãmaris nê mẽ hkwyjaja kapêr mar tỳx nê amnhĩ kaxyw Jejus kôt hamaxpêr nê hkôt amnhĩ xunhwý. Hãmri nê Pawre kôt pa.

18

Pawre Korĩt wýr mõi ã harênh Wam Korĩt 1.1-3

¹ Tã nhũm Pawre krĩ pê Atenas rũm kato nê ma krĩ pê Korĩt wýr mõi nê pøj.

² Hãmri nê nhỹri Akirti pumu. Haxwýja kêp Ijaew. Krĩ pê Põt kamã na pre kato. Tã ma pyka pê Itar wýr mõi nê Itar kamã krĩ pê Rõm kamã hpãnhã pa. Pa ho pa htã nhũm mẽ õ pahihtĩ Krawti tanhmã hamaxpêr

to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korĩt wýr mõi. Hãmri nê hwýr pøj nê kamã pa ho pa. Jakamã nhũm Pawre Korĩt wýr pøj nê wa omu

³ nê wa kuri pøj nê wa hkôt ri pa. Nê Siras mẽ Ximotre wa kamã hamak pê wa ãhkô hã ãpênh o pa. Wa urak nê kupêxê pytĩ ho ixkre nhĩpêx nê ho wênê ho ri wa hkôt pa.

⁴ Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwýr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwýnhjê mã nhũm mẽ kãm ujarênh o hkrĩ. Nê mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wýr mõi pøj. Jakamã nhũm Pawre axte ixkre nhĩpêx ã ãpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tĩrtũm kot mẽ pakaxyw ãm xwýnh ã harênh o ri mẽ hkôt pa. Xatã mẽ kãm ujarênh o pa.

⁶ Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmrĩ ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tĩrtũm kapêr kaga kênã. Nà kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anê.

Hãmri nê kãnhmã xa nê hinôkã kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê.

⁷ Hãmri nê ixkre rũm kato nê hijuk ri Ijaew kêt xwýnh pê Xijutre nhõrkwy hwýr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpêr rãhã ho pa.

8 Tã nhũm Ijaew ò pê Kriptija hkwýjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhõ Tirtũm kapêr o mẽ ahkre xà hã ixkre kamã mẽ ahkre xwýnh na pre. Jakamã òrkwý kamã hkwýjê mẽ mẽ hpimràatã Pahihti Jejus kôt amnhĩ xunhwýr pa. Nê krĩja kamã ra Ijaew kêt xwýnh ohtô nê Kripti pyrã nê amnhĩ kaxyw Jejus kôt hamaxpêr nê hkôt amnhĩ xunhwý. Jakamã nhũm Pawre mẽ kêp Jejus kwý hã mẽ piitã mẽ hkrã kumrã.

9 Tã nhũm kamàt nhũm Pawre gõr nê nõ nê amýti nhũm kêwe Pahihti Jejus axte hwýr kato nê kãm kapêr nê kãm:

—Pa Pawre? E kwa kêr ka mãmrĩ axãmnhĩx ri atar mẽ kãm ijarênh rãhã ho ri apa nê amnhĩ kamã akahak o ri mẽ hkôt apa hkêt nê.

10 Kot paj atãnopxa nhũm mẽhõ tanhmã ato hkêt nê. Krĩ ja kamã koja mẽ ohtô nê ixkôt amnhĩ xunhwý. Anê.

11 Nhũm pre ã Pahihti Jejus Pawre hpimtir kãm kãm kapêr anê. Jakamã nhũm Korĩt kãm arĩ ri mẽ hkôt pa ryy nê. Arĩ mẽ hkôt pa hã amgrã pyxi nê hkôt mytwrý kêp 6. Jao Tirtũm kapêr o mẽ ahkre ho ri mẽ hkôt pa.

12 Tã nhũm Korĩt nhõ xwýnhjê nhõ pika pê Gres kamã mẽ ho amnhĩptãr xwýnh nyw Gartija. Korĩt kãm pa jakamã nhũm Ijaew xàptãr tũmrejaja Pawre pynê nê ma hwýr o tẽ nê kãm tanhmã ho hêx to.

13 Jakamã nhũm Ijaew pikuprõnh xà hã ixkre kamã mẽ kãm kapêr xwýnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwým ri mẽ ahkre ho pa. Jao mẽ ixte axtem nê tanhmã Tirtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

14 Hãmri nhũm ra Pawre kot Garti mã amnhĩ jarênh mã tã nhũm Garti amnhĩ to wa nê hã mẽ kãm kapêr nê mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhýx pa arĩ mẽ ama nê tanhmã mẽ amã hipêx to.

15 No xep ãm kot mẽ axàptãr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mýrapê na ka mẽ kamã agryk nê ã inhmã ho akapêr anê. Nà kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xà hkôt tanhmã ho. Anê.

16 Hãmri nê amnhĩ nê mẽ hano.

17 Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarênh to htã nhũm kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupým ãxiok wýr mõi ã harênh

18 Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htõjê mã amnhĩ jarê nê mẽ kãm:

—E kot paj ma akupým pika pê Sir wýr mõi. Anê.

Hãmri nê mẽ kêp kato nê ma hwýr mõi. Nê ma amnhĩ kôt Akirti mẽ hprõ Prisire wa o mõi. Mõi nê krĩ pê Sênkrej wýr põi. Nhũm Pawre amnhĩ kukamã mẽmoj tã tanhmã Tirtũm mã amnhĩ jarênh to nê amnhĩ jarênh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anê. Hãmri nê mẽ pãr wýr agjê nê Sênkrej rũm kato nê ma Sir wýr mõi.

19-21 Mõi nê krĩ pê Epes wýr põi. Hãmri nhũm Pawre mẽ hkwýjaja pãr rũm hapõi nê krĩ hwýr agjê nê Ijaew nhõ Tirtũm kapêr o mẽ ahkre xà hã ixkre hwýr mra nê hwýr agjê nhũm Pawre mẽ kãm Tirtũm kapêr jarênh o nhý. Hãmri nhũm mẽ kuma nê kãm mar prãm nê. Nê kãm:

—Kwa anojarêt kêt nê. Kritpêm mẽ ixkôt ri apa ryre nê Tirtũm kapêr o mẽ ijahkre. Mẽ inhmã ja mar prãm.

Anhÿr tâ no nhÿm mē kām:

—Nà kot paj ma mō. Nom koja Tirtÿm nhÿrmā akupÿn mē awÿr inhmē pa man akupÿn mē awÿr mō nē axte kapēr o mē ajahkre. Anē.

Hāmri nē ma mō. Ma Epes rÿm pàr kām mō. Nom nhÿm Akirti mē Prisireja wa Epes kamā arĭk nē hpānhā kamā pa ho pa.

²² Tā nhÿm Pawre krĭ pē Sejarej wÿr pōj. Hāmri nē hpānhā kurÿm ma akupÿm Jerujarē hwÿr mō. Kot Jejus kōt htōjē pumunh mā ma mē hwÿr mō. Hāmri nē mē hwÿr pōj nē mē omu nē tanhmā mē kām amnhĭ jarēnh to nē mē kēp kato nē ma akupÿm āxiok wÿr mō.

²³ Hāmri nē hwÿr pōj nē kamā mē hkōt ri pa rÿy nē mē kurÿm kato nē hpānhā ma akupÿm pyka pē Prik mē Karatas wa hwÿr mō. Nē kamā mē kot Jejus kōt amnhĭ xunhwÿr xwÿnhjē jahkre ho pa. Mē kot Jejus kōt amnhĭ nhĭpēx tÿx rāhā ho pa kaxyw mē hkōt mē ahkre mex o ri mē hkōt pa.

Apor kot Epes kām Tirtÿm kapēr jarēnh

Epes 1.1-2; Wam Korĭt 3.6-9

²⁴ Tā nhÿm Epes wÿr Ijaew ō pē Aporja mō nē hwÿr pōj. Krĭ pē Aresān kamā na pre kato. Na pre hte amnhĭ kaxyw Tirtÿm kōt pix mā hamaxpēr nē kapēr ā kagā htÿm mar tÿx nē. Jakamā mē kām harēnh mex o pa nhÿm mē piitā kām mar prām nē.

²⁵ Nom kormā Jejus jarēnh jatur xà mar kēt jakamā ām mē kām hkrax pix jarēnh o pa. Juāw Paxis kot tanhmā mē ahkre htoja nhÿm mar tÿx nē. Nē tanhmā kot mē hkrā kumrār to ho paja nhÿm määnēn mar tÿx nē. Jakamā na pre hte mē kām ja pix jarēnh o pa. No Jejus kēp Tirtÿm kot mē pahwÿr mēnh xwÿnh ā harēnhja nhÿm kormā mar kēt nē. Tā Epes wÿr mō nē pōj.

²⁶ Hāmri nē Ijaew nhō Tirtÿm kapēr o mē ahkre xà hā ixkre hwÿr axà nē kamā mē kām ujarēnh o nhÿ. Amnhĭ kamā kahak kēt nē amnhĭx ri mē kām ujarēnh mex nē. Hāmri nhÿm Prisire

mē Akirti wa kot mē kām ujarēnh ā kuma nē war axpēn mā:

—Kwa mān kormā Jejus jarēnh piitā mar kēt. E pu amnhĭ kōt panhōrkwÿ hwÿr o tē nē pahprĭ hā kām harēnh jatur xām kumē kē hprĭ hā mar pa. Anē.

Hāmri nē war amnhĭ kōt kuwÿ nē hprĭ hā kām ujarēnh jatur xām kumē nhÿm hprĭ hā harēnh piitā mar tÿx nē.

²⁷ Tā ra pyka pē Gres wÿr nojarēt nē Jejus kōt htōjē mā amnhĭ jarē nhÿm mē kuma nhÿm ja mē kām mex nē. Hāmri nē Gres kamā Jejus kōt mē htōjē mā kagā nhĭpēx. Apor kot mē hwÿr amnhĭ kōt o mōr nē mē kām ōr nhÿm mē kot omunh nē kamā harēnh nē ho mex kaxyw mē kām hipēx. Hāmri nē hipēx pa nē kām kugō nhÿm kupy nē mē kurÿm kato nē ma mē hwÿr mō. Hāmri nē mē hwÿr pōj. Gres nhō xwÿnh kwÿjaja na prem ra Jejus kōt amnhĭ xunhwÿ. Tirtÿm kot mē kutā nojarēt jakamā nhÿm mē ra hkōt amnhĭ xunhwÿ. Jakamā nhÿm Apor mē hwÿr pōj hāmri nē mē ĩhkō hā tanhmā mē ho ajuta hto ho pa.

²⁸ Nē xatā Ijaew mā tanhmā Jejus jarēnh to kamā hihtÿx o mē hkōt pa nē mē kām:

—Nà Jejusja tām na pre Tirtÿm mē pakaxyw ām. Tirtÿm kapēr ā kagā htÿm kamā ā harēnh kot anhÿr. Anē.

19

Pawre akupÿm Epes wÿr mōr ā harēnh

Rukre 3.15-16

¹ Tā nhÿm Apor kormā Korĭt kām pa ri nhÿm Pawre ma akupÿm Epes wÿr mō. Ma krāhakÿx kōt akupÿm hwÿr mō. Hāmri nē hwÿr pōj nē mē kot Jejus kōt amnhĭ nhĭpēx o mē pa xwÿnhjē pumu. Nhÿm mē kormā Jejus jarēnh jatur xà mar kēt nē.

² Jakamā nhÿm Pawre mē hwÿr mō nē mē omu nē Tirtÿm Karō hā mē hkukja nē mē kām:

—Kwa mē ate Jejus kōt amnhĭ xunhwÿr xà hā arĭgrota ā xà na pre Tirtÿm Karō mē akarō mā agjē? Anē.

Hāmri nhÿm mē kuma nē kām:

–Nà mẽ ixte Tĩrtũm Karõ jarẽnh mar kêt. Anẽ.

³ Hãmri nhũm mẽ kãm:

–No mẽmoj kôt na prem mẽ akrã kumrã? Anẽ.

Nhũm mẽ kãm:

–Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

⁴ Hãmri nhũm Pawre mẽ kãm:

–Nà Juãw Paxis na pre Ijaew mã kapër o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapër o pa. Nẽ mẽ kãm Jejus jarẽnh o: “Koja tokyx mẽhõ ixkôt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamaxpër nẽ hkôt amnhĩ xunhwỳ.” Anẽ. Tã Jejusja na pre ã mẽ kãm harẽnh anhỹr o pa. Anẽ.

⁵ Nhũm pre ã Pawre mẽ kãm Juãw Paxis mẽ Jejus wa harẽnh anẽ nẽ hpãnhã Jejus nhỹ hã mẽ hkrã kumrã.

⁶ Hãmri nẽ hpãnhã mẽ hã ìhkra jaxwỳ nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa. Hãmri nhũm mẽ ÿ hã ahpỹnhã axtem mẽ kapër kwỳ ho kapër nẽ ÿ hã Tĩrtũm mex o mex ã harẽnh o kuhê.

⁷ Æ mẽ kot amnhĩ nhĩpêx anhỹr xwỳnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapër o mẽ ahkre xà hã ixkre hwỳr mrrar ã mytwrỳ axkrunêpxi. Amnhĩ kamã kahak kêt nẽ hprĩ hã Ijaew mã hprĩ hã Jejus jarẽ nẽ mẽ kãm:

–E pa mẽ amã Jejus jarẽ ka mẽ inhma. Nà Tĩrtũm kot mẽ pahwỳr mẽnh xwỳnhhta na. Nẽ mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpër nẽ hkôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra. Anẽ.

Hãmri nhũm mẽ hkwyjaja kuma nẽ hkôt hamaxpër kurê kumrêx.

⁹ Nom nhũm mẽ hkwyjaja kuma nẽ ãm kuma nẽ Jejus o kapër punuj nẽ. Mẽ piitã mẽ noo mã kuhê nẽ ho kapër punuj tỳx nẽ. Nhũm Pawre tee ri ja

mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỳnhja wỳr hpãnhã mõ. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre.

¹⁰ Jao hã amgrà axkrut. Jakamã nhũm pyka pê As kamã mẽ piitã Pahihti Jejus jarẽnh ma. Ijaew nẽ Ijaew kêt xwỳnhjaja nhũm mẽ piitã harẽnh ma.

Wajaga hkwy jarẽnh

¹¹ Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa.

¹² Jakamã nhũm pre htem hwỳr mra nẽ kêp ê hkwy jamỳ nẽ ma mẽ à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mãânẽn mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrrar kurê kumrêx nhũm mẽ akupỹm tãm hkrã.

¹³⁻¹⁴ Tã nhũm mẽõ patre maati Sewahtija hkra my kêp 7 nẽ piitã kêp wajaga. Hãmri nẽ mẽ kãm Pawre pyrã nẽ mẽ nẽ mẽkarõmnuti japôx o pa hprãm nẽ. Jakamã kormã Jejus kôt amnhĩ xunhwỳr kêt tã mẽ kot ÿ hã Pawre pyrã nẽ mẽhõ nẽ hkwy janor kaxyw nẽ kãm:

–E Pawre kot Jejus jarẽnh o ri pa xwỳnhhta nhỹ hã kot paj amã ixkapër. Jakamã e kwa tokyx myta rũm akato nẽ ma tẽ. Anẽ.

¹⁵ Hãmri nhũm mẽkarõmnutija mẽ kuma nẽ ãm mẽ kuma nẽ mẽ kãm:

–Tk. Mẽ apê Jejus mẽ Pawre wa hkwy hkêt tã mẽ nẽ ã mẽ inhma akapër anhỹr o apa. Nà Jejus mẽ hkwy pixjaja na htem Tĩrtũm nhỹ hã mẽ kêp mẽ ijapôx o pa. Mẽ apê mẽ hkwy hkêt kênã. Nà pa ixkatoore kaxyw ã. Anẽ.

¹⁶ Hãmri nhũm mẽkarõmnuti kot tanhmã ho xwỳnhhta mẽkarõmnuti nhỹ hã wajagajê pynê nẽ mẽ hta rax o kêp mẽ ê kaxõnh pa nhũm mẽ tee ri

amnhĩ nhĩpêx. Hãmri nê hkênh nê òrkwỹ rùm hapôj nê ma umaj hprôt nê mra.

¹⁷ Hãmri nhũm Epes kamã mẽ piitã ã kot mẽ hipêx anhỹr ã mẽ harênh ma nê tee ri hamaxpêr nê kãm ma nê. Ijaew nê Ijaew kêt xwýnhjaja nhũm mẽ piitã tee ri kãm hamaxpêr o pa. Nê Pahihti Jejus mã mex o mex ã harê.

¹⁸ Jakamã nhũm mẽ kot Jejus kôt amnhĩ xunhwýr nyw xwýnhjaja piitã tanhmã amnhĩ jarênh to. Nê mẽ hkwyjaja amnhĩ jarênh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kôt amnhĩ xãm hãmri nê axte ã amnhĩ nhĩpêx anhỹr kêt nê. Anê.

Nhũm mẽ hkwyjaja kêp wajaga htã mẽ uràk nê Jejus kôt amnhĩ xunhwý hãmri nê amnhĩ jarênh o:

—Nà ijaxwýja kormã Jejus kôt amnhĩ xãm kêt ri na pa pre hte nê mẽ no kupyri nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx anhỹr kêt nê. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anê.

¹⁹ Hãmri mẽ õ wajaga xàhpumunh xà hã kagà jamý nê ma o mra nê kaxyw kuto nê kamã rênh pa nê mẽ piitã mẽ noo mã ho xê pa. Wajaga xàhpumunh xà hã kagàja ã kàxpore xohtô rax kumrêx tã nhũm mẽ Jejus gryk ã hamý nê o mra nê ho hxê pa nhũm hapêx.

²⁰ Hãmri nhũm krĩ nhõ xwýnhjaja ã mẽ kot amnhĩ nhĩpêx anhỹr ã mẽ omu nê ohtô rax nê mẽ uràk nê Jejus kôt amnhĩ xunhwý.

Pawre kot Rôm wýr hkrà hã harênh Rômã 1.13-15, 15.22-29

²¹ Tã nhũm Pawre ra akupým Jeru jarê hwýr nojarê nê hamaxpêr o:

—E kot paj ixkato nê hpãnhã ma Masetôn mẽ Gres wa hkôt ma akupým Jeru jarê hwýr mō. Ma mẽ kot Jejus kôt amnhĩ xunhwýr xwýnhjê pumunh o mẽ hkôt mō. Hãmri nê Jeru jarê hwýr pōj nê kamã tanhmã

amnhĩ to hpa hãmri nê hpãnhã ma Rôm wýr mō. Anê.

²² Hãmri nê hkôt ho ajuta ho wa pa xwýnh Ximotre mẽ Eras wa kãm amnhĩ jarê nê wa kãm:

—E kêr ka wa ma ixkukamã Masetôn wýr wa mō. Kot paj kormã jar As kamã ixpa grire hãmri nê ma war akôt mō pu mẽ hamũ ma Jeru jarê hwýr mō. Anê.

Hãmri nhũm wa kuma nê kato nê ma hkukamã Masetôn wýr mō.

Mẽ kot sãnti hã Pawre mã àkjêr ã mẽ harênh

Sikũn Korĩt 1.8-9

²³ Rôm nhũm Epes nhõ xwýnhjaja tee ri Pawre kot tanhmã Pahihti Jejus jarênh to hã kuma nhũm ja mẽ kêp omnuj nê. Nhũm mẽ Jejus ã kamã gryk tỳx nê.

²⁴ Na prem amnhĩ kaxyw Tĩrtũm kôt hamaxpêr kêt nê. Na prem axtem sãnti ho mẽ hpãm nê amnhĩ to hwýr pê hã hpijaàm nê kãm mex o mex ã harênh o pa. Mẽ õ sãntija ni Xiãre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwýr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãre nhõrkwỹ karõ hkryre hkwy nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ àpênh xwýnhjê mẽ nhũm mẽ kot haprôr xwýnhjê kukwak ri kàxpore jamýnh rũnh o pa.

²⁵ —Jakamã nhũm Pawre mẽ hwýr mō nê pōj nê mẽ kãm Měpahpãm Tĩrtũm jarênh o ri mẽ hkôt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mẽ kot uràk nê Xiãre nhõrkwỹ karõ hkryre nhĩpêx nê ho wênê ho pa xwýnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãre nhõrkwỹ karõ hkryre pãnhã kàxpore jamýnh rũnh o papa.

²⁶ Tã mãn ka mẽ ra ham hpõx xwýnh Pawreja pumu nê kapêr ma. Na hte jar mẽ panhõ krĩ kamã nê As piitã hkôt mẽ kãm mẽpanã Xiãre karõ nê mẽ kãm kapêr o pa. Xep mẽ

pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtô nê kuma nê ra hkôt hamaxpêr.

27 —Kwa ja mex kêt. Kojã mẽ kapêr ma nê hkôt amnhĩ nhĩpêx hãmri nê axte mẽ pahte ixkre karõ hkryre nhĩpêx xwýnhhta japrôr kêt nê. Hãmri nê mẽ paxápênh o kapêr punuj nê. No âm ja pix omnuj kêt. Kojã mẽpanã Xiânre mã amnhĩ jarênh xà hã ixkreja kaga hpa. Nê haxwýja karõja kaga. Mẽ piitã kãm hapê kênã. As kamã nê pyka piitã hkôt mẽ piitã kãm hapê nê hwýr mra nê amnhĩ to hwýr o pa. Kêp mẽpanã mex kumrêx tã kojã mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

28 Hãmri nhũm mẽ tee ri ã kapêr anhýr ã kuma nê Pawre kamã gryk tỳx kumrêx. Nê gryk xàj kàx pêê kapêr nê xatã kapêr tỳx kãm kapêr punuj nê. Nê kapêr o:

—Xiânre na mex kumrêx. Kêp mẽ pahpê Epes nhõ xwýnhjê nã maati na.

Anhýr o kàxpêê kapêr o kuhê.

29 Hãmri nhũm krĩ nhõ xwýnh pitã mẽ kuma nê mẽ hwýr hprôt nê haxwýja gryk nê kàxpêê mẽ hkôt ã harênh anhýr o kuhê. Hãmri nê gryk xàj Pawre hkôt ri wa pa xwýnhja wa unê nê ma mẽ kot axpên mar xà hã ixkre hwýr wa hkjênh o tẽ. Masetõn nhõ xwýnh wa kêp Gajore mẽ Aristakja nhũm mẽ wa unê.

30 Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprôt nê mẽ kãm tanhmã kapêr to kaxyw nom nhũm mẽ kot Jesus kôt amnhĩ xunhwýr xwýnhjaja ja nê kãm kapêr kãm hihtỳx nê.

31 Hãmri nhũm As kamã mẽ kot mẽ ho amnhĩptar xwýnh kwýjaja ã mẽ kot amnhĩ nhĩpêx anhýr ã mẽ omu nê Pawre hwýr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwýr hpêr mẽ nê mẽ hkôt htêm nê hkurê kamã hihtỳx nê.

32 Rôm nhũm mẽ piitã mẽ kot axpên mar xà hã ixkre hwýr pikuprõnh pa nê kàx pê kapêr punuj o kuhê. Nom axpên kôt kapêr kêt nê. Âm axpên kwým ri kàx pê tanhmã kapêr punuj to ho. Nhũm mẽ hkwyjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê.

33 Nhũm Ijaew kwýjaja tee ri ja hã mẽ omu nê axpên mã:

—Tk. Kwa okora. Kojã mẽ nã Xiânre hã gryk hãmri nê tanhmã mẽ pahpê Ijaew to nà? Anê.

Hãmri nê hamaxpêr nê mẽ hwýr amnhĩõ pê Aresanja mẽ nê kãm:

—Kwa ma mẽ hwýr tẽ nê mẽ kãm tanhmã mẽ pahtã axaprãr to. Pawre kêp mẽ pahkwý htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwýr tẽ nê xa nê tee ri kot mẽ ho hpinhkrênh kaxyw kànhmã mẽ kãm ìhkra pêr kaprỳ.

34 Nhũm mẽ omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

—Mẽpanã Xiânreja mex o mex. Kêp mẽ pahpê Epes nhõ xwýnhjê nã mex na. Anê.

35 Tã nhũm mẽ õ pahi nhõ kôwenatõ jatã tanhmã Epes nhõ xwýnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhĩkrê. Mẽ piitã kot Xiânre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwýnh ã mẽ kot mẽ pahpumunh mex. Nê kaxkwa rùm karõ kot mẽ pahwýr tẽm nhũm mẽ pahpê hamãr o papa xwýnh ã nhũm mẽ kot mẽ pahpumunh mex.

36 Jakamã mẽhõ kot kêt we mẽ pahpê hamãr xwýnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapêr anhýr kêt nê.

37 No mẽ ate wa unênh nê amnhĩ kôt wa ho atêm xwýnhhta wa. Wa kot tanhmã mẽpanã Xiânre ho kapêr punuj to rỳ kêp õ ixkre kamã àhkĩnh

kêt tã ka mẽ amarĩ wa unê nê amnê amnhĩ kôt wa o tẽ.

³⁸ —Kwa kê Temêt mẽ hkwyjaja kãm tanhmã wa ho kapêr to hprãm nê ma pahшти hwyr wa o tẽ nê kumã mân tanhmã wa ho kapêr to. Mẽmoj tã axpên mã mẽ kapêr xà hã arĩgrota ãã.

³⁹ Rỳ ka mẽ amã mẽmoj jarênh prãm nê arĩgroja ã mân rĩ kormã mẽmoj jarê.

⁴⁰ No jarãhã mẽ ate amnhĩ nhĩpêxja te mẽ ate pahшти kutã amnhĩ xunhwyr nê ho akapêr punuj pyrãk. Koja Rôm nhõ xwýnhjê nhõ pahi mẽ ajarênh ma hãmri nê mẽ ate kamã agryk ã amnhĩ kamnhĩx. Hãmri nê mẽ atã ixkukja pa tanhmã kãm mẽ ajarênh to? Mẽhõ nhỹ hã na ka mẽ ã apikuprõnh nê amnhĩ nhĩpêx anê? Nà amnhĩ krã hkôt na ka mẽ akuprõ nê ã amnhĩ nhĩpêx anê. Anê.

⁴¹ Hãmri nê mẽ kãm kapêr pa nê mẽ hano nhũm mẽ anhrã nê ma akupým õrkwỹ hwyr hapêx.

20

Pawre ma Masetõn mẽ Gres wa hwyr mõi ã harênh

¹ Hãmri nhũm Pawre ra nojarêt. Jerujarê hwyr mõi mã nom kormã pika pê Masetõn kumrêx wyr mõi nê kurũm ma akupým Jerujarê hwyr mõi mã. Hãmri nê nojarêt nê mẽ kot Jejus kôt amnhĩ xunhwyr xwýnhjê ho akuprõ nê mẽ kãm amnhĩ jarê nê mẽ kãm:

—E kot paj ma mõi. Nom kêr ka mẽ arĩ ixwakre kamã Tirtũm kapêr kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê mẽ kãm:

—E mẽ mãmrĩ ixwa kre kamã axãmnhĩx ajamakêtkati nê ri apa. Anê.

Hãmri nê kato nê ma Masetõn wyr mõi.

² Nê hwyr põi nê kamã krĩ hkwy hkôt mõi nê nhỹri mẽ kot Jejus kôt amnhĩ xunhwyr xwýnhjê pumu nê Tirtũm kapêr o mẽ ahkre. Mẽ kot hkôt amnhĩ nhĩpêx mex nê kãm hprãm xà hkôt pix mã amnhĩ nhĩpêx kaxyw mẽ kãm kapêr o ri mẽ hkôt pa. Hãmri nê

kato nê ma mõi nê pyka pê Gres wyr põi.

³ Nê kamã mẽ hkôt pa hã mytwrỹ axkrunêpxi hãmri nê akupým pyka pê Sir wyr nojarêt. Nê ma pãr kãm hwyr mõi kaxyw nê amnhĩ tã Sir kamã Ijaew kwỹ kot tanhmã harênh to hã amnhĩ jarênh ma. Na prem ra hã axpên mã amýnê nê axpên mã:

—E koja amnê mẽ pahwyr mõi pu mẽ nhỹri omu nê hpĩr kurê kumrêx. Anê.

Hãmri nhũm Pawre amnhĩ tã mẽ kapêr ma nê pãr kaga nê mẽ hwyr mõi kêt nê. Hãmri nê awjanã nê Jerujarê hwyr Masetõn kamã pa.

⁴ Nhũm Jejus kôt htõ hkwyjaja ma hkôt mõi. ã mẽ hixi kot anhr.

Perej nhõ xwýnh Sopatõja. Piro hkra na pre.

Nê Tesarõn nhõ xwýnh Aristak mẽ Sikũn wa.

Nê Tepe nhõ xwýnh Gajoreja.

Nê As nhõ xwýnh Xikitre mẽ Torow wa.

Nê Ximotreja.

Jajaja na prem ma Pawre hkôt Jerujarê hwyr mõi.

⁵ Nê pa ixpê Rukre ixte mẽ amã ja jarênh nê hã kagã xwýnhja na pa axte Pawre hã ajêt nê hkôt mõi. Jakamã nhũm jajaja piitã ma wa ixkukamã Tôx wyr mõi nê kamã wa ixkãm hamak o pa.

⁶ Tã pa wa ma krĩ pê Piripos rũm ixkato nê pãr kãm ma mẽ hkôt mõi. Arĩgro pê Pas jakãnh mê ma mẽ hkôt mõi.

Tã wa ixtã arĩgro pê 5 nê mẽ hkôt Tôx wyr põi nê kamã mẽ omu nê mẽ hkôt ixpa hã ixtã ã semã.

Pawre kot akupým Exik o htĩr ã harênh

Juãw 5.21; Atre 9.36-43

⁷ Tã nhũm sap nê kamãt pa mẽ kot Jejus kôt amnhĩ xunhwyr xwýnhjê hkôt akuprõ nê axpên kutã apku nhũm Pawre mẽ kãm kapêr. Ra apkati hkôt mẽ inhnojarêt kaxyw jakamã nhũm mẽ kãm Tirtũm kapêr jarênh ryy nê. Ra kôt ã kamãt nhũm arĩ mẽ kãm harênh o nhỹ.

8-9 Ixkre hprêk axpên nhĩpy axkrunêpxi nhĩtep xà kamã na pa prem akuprô nê mar o ixkrĩ. Ixkreja kamã kanê ohtô nê hpôk o harir. Jakamã nhũm Pawre arĩ mẽ kãm ujarênh o nhỹ nhũm mēhō xàptâr nyw Exikja ra ôtxwa htỳx nê mẽ ixkuri ôť o nhỹ. Janere hã ôť o nhỹ. Tã ra gôr nê janere pê kato nê ahparmã tē nê pykap tēm. Pa mẽ tee ri omu nê ahparmã hwỳr ixprôt nê wrỳ nê omu nhũm htyk mex nê nō. Kỳj rúm ahpar mã htēm ryy jakamã htyk mex nê nō. Hãmri nhũm hkwyjaja tee ri omu nê hkaprĩ htỳx nê kumỳ nê mỳr o hkrĩ.

10 Hãmri nhũm Pawre mẽ ixkôt wrỳ nê hwỳr tē nê htyk ã omu nê kumỳ nê mẽ kãm:

—E mẽ amỳr kêt nê. Ra htyk tã koja Tĩrtũm akupỹm mẽ pamã ho htĩr.

Anhỹrja kôt nhũm akupỹm htĩr.

11-12 Hãmri nhũm mẽ akupỹm htĩr ã omu nê hkĩnh tỳx kumrêx. Hãmri pa mẽ akupỹm kỳx pê ixkre hwỳr api nhũm Pawre mẽ inhmã pãwti hkwy nhĩrê nê mẽ inhmã kugō pa mẽ Jesus kot mẽ panê htyk mã ijamaxpêr pê kuku. Hãmri nhũm Pawre axte mẽ kãm kapêr o ỳr rãhã nhũm myt kato pa mẽ kêp anhrã nê ma ixa.

Pawre Mĩrêt wỳr mōr ã harênh

13 Hãmri pa mẽ inhnojarêt nhũm Pawre mẽ ixte hkôt mẽ inhmōr xwỳnhjê mã:

—E kêr ka mẽ ma pàr kãm ixkukamã mō. Kot paj ahte ma kỳx pê mẽ akôt ixpar o Asôt wỳr mō. Hãmri nê hwỳr pōj nê mẽ anhō pàr mã axà pu mẽ ma pahpimràatã ma hamũ mō. Anê.

14 Hãmri pa mẽ kuma nê ma mō nê mẽmo arĩgro hã Asôt kamã axpên wỳr pōj. Hãmri nhũm Pawre mẽ ixkôt pàr wỳr axà pa mẽ ma krĩ pê Mĩtirên wỳr mō.

15 Nê hwỳr pōj nê kurũm kormã mō nhũm apkati pa mẽ gō hipôk pê Kiw jakrenh o mō. Nê hakre nê mō nhũm apkati pa mẽ gō hipôk pê Sãm wỳr pōj nê hã pàr nhō. Hãmri nhũm apkati pa mẽ axte mō nê Mĩrêt wỳr pōj.

16 Nom nhũm ra Pawre nojarêt nê. Kãm tokyx As rúm kator nê Jerujarê hwỳr mōr nê tokyx hpôx prãm nê. Kãm mẽ hkĩnh pê Pêtekos xwỳj ri hwỳr hpôx prãm jakamã nojarêt tỳx pa mẽ Epes wỳr inhmōr kêt nê.

Pawre kot Epes kamã Kris kwỳjê mã amnhĩ jarênh

17 Tã pa mẽ Mĩrêt wỳr pōj nhũm Pawre amnhĩ wỳr Epes wỳr Jesus kwỳ jahkre ho mẽ pa xwỳnhjê hã karō.

18 Hãmri nhũm mẽ man mẽ ixwỳr mō nhũm Pawre mẽ omu nê mẽ kãm amnhĩ jarê nê mẽ kãm:

—Nà ixte mẽ amã amnhĩ jarênh kaxyw na pa mẽ atã karō. Ra mẽ ate tanhmã ixte amnhĩ nhĩpêx to hã ixpumunh mex. Wam mẽ awỳr As wỳr ixpôxta ã ka prem aprĩ hã ixpumunh mex nê.

19 Na pa pre mẽ akôt ri mẽ amã tanhmã amnhĩ nhĩpêx to ho ri ixa. Te ixpê mẽ amã ixàpênh xwỳnh pyrãk. Nê Pahihti Jesus mã tanhmã amnhĩ nhĩpêx to ho ri mẽ akôt ixa. Nê ixkwỳ Ijaew kwỳ kot Jesus kapêr kaga hã mẽ omu nê ixkaprĩ nê inhmỳr o ixa. Nhũm prem Jesus ã ixtomnuj pa amnhĩ xà htỳx kamã ijamak o ri mẽ hkôt ixa.

20 Nom arĩ ri Tĩrtũm kapêr o mẽ ajahkre ho ri mẽ akôt ixa rãhã nê aa hkaga hkêt nê. Mẽ anhōrkwy kamã nê mẽ ahkre xà hã ixkre kamã. Mẽ ate tãm amnhĩ nhĩpêx prãm xàj pa pre ã mẽ ajahkre mex anhỹr rãhã ho ri mẽ akôt ixa.

21 —Nê mẽ ixpê Ijaewjê mẽ mẽ apê Ijaew kêt xwỳnhjê mẽ pa pre mẽ ajahkre ho axpên pyrãk. Mẽ apiitã mẽ ate amnhĩ tomnuj kaga nê hpãnhã Tĩrtũm kôt amnhĩ nhĩpêx kaxyw. Nê amnhĩ kaxyw mẽ panhō Pahihti Jesus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixa.

22 —Tã ra Tĩrtũm Karō kot akupỹm Jerujarê hwỳr inhmênh jakamã pa kormã hwỳr mō. Kot paj hwỳr pōj nhũm krĩ nhō xwỳnhjaja Jesus ã ixtomnuj nê nom tanhmã mẽ kot ixtoja kukamã ixte ixprĩ hã ixàhpumunh kêt.

23 Ja pix na ixte omunh. Na pa hte nhÿri pøj nhÿm htem Jejus ã ixpynê nê mẽ hagjênh xà kamã ijagjê nê tanhmã inhÿpêx to. Tÿrtÿm Karõ na pre ra ã mẽ kot inhÿpêx anhÿrja kukamã inhmã mẽ harê. Jakamã ixte amnhÿ kukamã amnhÿ tã ixàhpumunh mex. Kot paj xep akupÿm Jerujarê hwÿr pøj nhÿm mẽ ixpumu nê Jejus ã tanhmã inhÿpêx to.

24 Tã no pa amnhÿ kamã ixkahak kêt o inhmã mẽ uma hkêt nê. Koja mẽ kãm ixpÿr prãm nê mãmri xpi. Inhmã ixtyk pyma hkêt. ãm mẽmoj pixi na inhmã hprãm. Ra Pahiti Jejus kot mẽmoj tã inhmã karõ xaja na inhmã kormã ixtÿr ri hatur xàm mẽnh prãm. Tÿrtÿm kãm mẽ pajapê hã kot mẽ pahto mex prãm xaj mẽ pahwÿr Kra Jejus mẽnh nhÿm mẽ panê tanhmã amnhÿ nhÿpêx to hã harênhja na inhmã mẽ piitã mẽ kãm harênh jatur xàm mẽnh prãm.

25 –Tã e ixkrãmnhwÿjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhÿ nhÿpêx mex rãhã ho ri apa kaxyw. Tã kot puj pêr mẽ axte axpên pumunh kêt nê.

26-27 –Na pa pre ra mẽ amã Tÿrtÿm kapêr piitã harênh pa. Mẽ ate mar tÿx nê hkôt pix mã amnhÿ nhÿpêx o apa kaxyw. Jakamã koja mẽ anhõ krÿ nhõ xwÿnhjê hõ amnhÿ kaxyw Jejus kôt hamaxpêr prãm kêt nê rÿ tãm. Kwãr mãmri kot amnhÿ tomnuj kamã ty nê arÿ tãm amnhÿ pumu no ãm kê amnhÿ tã tanhmã inhmã nê hkêt nê.

28 –E mẽ ate Kris kwÿ jahkre ho apa xwÿnhjaja. Kêr ka mẽ amnhÿ pumunh mex o ri apa. Nê mẽ kot Jejus kôt amnhÿ xunhwÿr xwÿnhjê jamãr mex o ri apa. Ja kaxyw na pre Tÿrtÿm Karõ mẽ kaxyw mẽ axunhwÿ. Tÿrtÿm Kra Jejus kot htyk o Tÿrtÿm mã mẽ pahte amnhÿ tomnuj piitã hpãnhã amnhÿrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwÿnh kot ôwêhti jamãr mex o ri pata pyrãk.

29 –Kot paj ma mõ nhÿm mẽmojjaja ixpãnhã mẽ awÿr pøj nê mẽ ate Jejus

kaga hprãm xaj tanhmã mẽ amã hêx to ho ri mẽ akôt pa.

30 Nê mẽ akwÿjaja mẽ urà nê tanhmã hamaxpêr punuj to nê mẽ ate Jejus kaga hprãm xaj hêx rom tanhmã mẽ amã kapêr to ho ri mẽ akôt pa.

31 Jakamã kwa mẽ o kora. Kêr ka mẽ axkãm ajamak rom nê ri apa. Kê jajaja nhÿrmã ã mẽ amã kapêr anê ka mẽ ama nê mẽ hkôt ajamaxpêr kêt nê. Mẽ ate mẽ mar nê mẽ hkôt ajamaxpêr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunêpxi. Arÿgro hã nê kamãt kãm mẽ ajahkre rÿnh o ri ixpa. Nê mẽ ate mẽ amã mẽ hêx xwÿnhjê hkôt amnhÿ xunhwÿr pymaj mẽ ajahkre pê te inhmÿr pyrãk o ri mẽ akôt ixpa.

32 –E kot paj Tÿrtÿm nhÿhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêr rãhã ho pa. Hãmri ka mẽ ãm hkôt pix mã amnhÿ nhÿpêx. Jao Jejus kaga hkêt nê. Hãmri nhÿm nhÿrmã Tÿrtÿm mẽ pahpê hkrajê piitã tanhmã mẽ pahto mex to.

33 –Na pa pre mẽ akôt ixpa ry htã no ãm aa mẽmoj tã mẽ awÿr kêt nê. Mẽ axê hkwy hã mẽ awÿr rÿ mẽ akãxpore hã mẽ awÿr o ri ixpa hkêt nê.

34 Na pa pre amnhÿ pa kukwak ri amnhÿm ixujaprôr pê ixãpkur o ri mẽ akôt ixpa. Nê ixkôt mẽ pa xwÿnhjê mã ixujaprôr o ri ixpa. Ra mẽ ate ja hã ixpumunh mex.

35 –Tã mẽmo kaxyw na pa pre ã mẽ akôt amnhÿ nhÿpêx anhÿr o ri ixpa? Nã mẽ ate ja hã ixpumunh nê ixpyrà nê ã amnhÿ nhÿpêx anhÿr o ri apa kaxyw. Nê ixpyrà nê tanhmã mẽ kute xwÿnhjê ho ajuta hto ho ri mẽ apa kaxyw. Na pre Pahiti Jejus ja jarênh o: “Koja mẽhõ amã mẽmoj gõ ka amnhÿm apy nê akÿnh nê. Nom kot kaj kam nhãm mẽhõ mã mẽmoj gõ hãmri nê akÿnh tÿx o ate mẽhõ mã mẽmoj nhõrta jakre.” Anê.

36 Na pre ã Pawre mẽ kãm ujarênh anhÿr pa hãmri pa mẽ ra inhnojarêr. Hãmri nhÿm mẽ piitã hkõnkrã ho hkrÿ pa nhÿm Pawre mẽ ho Tÿrtÿm wÿ.

37-38 Hāmri nhūm mē piitā kām Pawre hkĩnh tỳx jakamā mỳr rax o kuhê. Tee ri kot axte mē kot axpēn pumunh kêt ã mē kām amnhĩ jarēnhja ma nē hkaprĩ htỳx nē. Nē hkaprĩ xàj kahti hkôt hamỳ nē mur. Hāmri nē ma Jerujarē hwỳr hkujaèk kaxyw mē ixkôt pàr wỳr hkaprĩ nē mē ixkôt mỳr o mō.

21

Pawre kot Jerujarē hwỳr hpôx ã harēnh

¹ Tã pa mē gô mỳri Jejus kôt mē ixtôjê re nē pàr krem agjê nē axte mō. Ma gô hipôk pē Kosti hwỳr ixkatat kôt mō nē hã ajêt. Hāmri nhūm apkati pa mē axte hamũ mō nē hpãnhã gô hipôk pē Roxti hwỳr mō nē hwỳr pôj nē hã pàr xi. Hāmri nē hpãnhã axte krĩ pē Patar wỳr mō.

² Hāmri nē hwỳr pôj nē pàr rùm ijapôj nē pàr õ pumu. Nhūm ra pyka pē Wēnĩs wỳr nojarêt pa mē hwỳr agjê nē ma kamã axte mō.

³ Mōo nē amỳm amnhĩ kukamã gô hipôk pē Sipre pumu. Hāmri nē upôk rùm hakrenh mã mō nē pyka pē Sir wỳr mō nē kamã Xir hwỳr pôj nē hã pàr nhô. Pàr pãm kot krĩ kamã pàr kukrêx rer kaxyw pa mē kormã hã ajêt nē tokyx axte nhãm inhmôr kêt nē.

⁴ Hāmri pa mē kutêp api nē krĩ kamã mē kot Jejus kôt axpēn to htô nē htôx xwỳnhjê japêr o mō. Hāmri nē nhỹri mē omu nē mē hkôt ri ixpa ho ixtã ù semãn. Nhūm prem Tĩrtũm Karô nhỹ hã Pawre mã kapêr nē kãm:

—Kwa Pawre mē inhma. Kot ka Jerujarē hwỳr pôj nhūm xep mē kãm akurê xwỳnhjaja tanhmã anhĩpêx to. Tĩrtũm Karô na ã akukamã mē inhmã ajarēnh anê. Jakamã kwa hwỳr amôr kêt nē. Na pa mē tee ri akukamã ijamaxpêr. Anê.

⁵ Hāmri nhūm amnhĩ tã mē kuma nē ãm mē kuma nē Jerujarē wỳr hkrã kamã hihtỳx nē. Jakamã nhūm semãn hapêx pa mē axte inhnojarêt. Axte Jerujarē hwỳr kormã inhmôr kaxyw inhnojarêt. Nhūm Jejus kôt mē ixtôjaja mē kot mē ixkujaèk kaxyw

piitã pàr wỳr mē ixkôt mō. Mē hprô nē mē hkrajê mē nhūm mē pimràatã mē ixkôt mō. Hāmri pa mē pàr wỳr pôj nē gô mỳ ri ixpiitã ixkônkrã ho ixkrĩ hpa nē amnhĩ to Tĩrtũm wỳ.

⁶ Hāmri nē mē kãm amnhĩ jarēnh pa nē mē noo mã pàr krem agjê nē ma axte mō nhūm mē awjanã nē ma akupỳm ôrkwỹ hwỳr hapêx. Hāmri pa mē kurũm kormã ma Jerujarē hwỳr mō.

⁷ Mōo nē krĩ pē Poremax wỳr pôj nē hã ajêt. Hāmri nē pàr rùm ijapôj nē axte krĩ kamã Jejus kôt mē ixtô nē mē ixtôjê japêr o mō nē nhỹri mē omu nē mē kuri amnhĩm hikra.

⁸ Tã nhūm apkati pa mē axte mō. Pãnhã ma krĩ pē Sejarej wỳr mō. Hāmri nē hwỳr pôj nē Firipti kuri pôj. Firiptija kormã nyw ri mē kot Jerujarē kamã mē mjên htyk xwỳnhjê mã mē apkur xà nhôr ho pa kaxyw mē ho 7 nē mē unhwỳr xwỳnhhtajê hõ na pre. Tã hpãnhã kêp Tĩrtũm kapêr jarēnh o pa xwỳnh.

⁹ Nhūm hkra nijaja kêp kwat. Piitã mjên kêt nē hkukrit rãhã pa. Mē kêp Tĩrtũm nhỹ hã kapêr o mē pa xwỳnh na pre mē. Jakamã pa mē mē kuri pôj.

¹⁰ Hāmri nē mē hkôt ri ixpa hã ixtã apkati grêre nhūm Akapô Jutej rùm man mē ixwỳr môn pôj. Kêp Tĩrtũm nhỹ hã kapêr jarēnh o pa xwỳnh na pre.

¹¹ Hāmri nē mē ixwỳr pôj nē Pawre pumu nē hkukamã kot tanhmã harēnh to kaxyw hwỳr tēn kêp hprexã kapa nē ho amnhĩ te hpre nē ho amnhĩ pa hpre nē xa. Hāmri nē mē inhnoo mã Tĩrtũm Karô nhỹ hã mē kot tanhmã hipêx to hkukamã kãm awjarê nē kãm:

—E kot kaj Jerujarē hwỳr pôj nhūm Ijaew xaptãr tũmjaja apumu nē ã anhĩpêx anê nē apa hpre nē ate hpre hãmri nē Ijaew kêt xwỳnhjê nhĩhkram ajaxã. Koja mē ã anhĩpêx anê. Anê.

¹² Hāmri pa mē tee ri ã ujarēnh anhỹrja ma nē Pawre kamã ixkahak tỳx nē ixkaprĩ nē inhmỳr o ixkrĩ. Nē xatã kot mē hwỳr môr nē kãm ixkapêr kãm ixihtỳx nē kãm:

—Kwa mẽ ixkapër ma Pawre. Mẽ hwỳr amõr kêt o mẽ hwỳr amõr kêt. Anẽ.

¹³ Hãmri nhũm mẽ inhmã:

—Tk. Kwa mẽ amỳr kêt nẽ. Na pa mẽ apumu nẽ ixkaprĩ nẽ. Nà kot paj ma mẽ hwỳr mõi. Kwãr mẽ mãmri Pahihtĩ Jejus ã tanhmã ixto rỳ hã ixpĩ. Ixte amnhĩ kamã ixkahak kêt. Anẽ.

¹⁴ Hãmri pa mẽ tee ri mẽ hwỳr mõi nẽ hkurê kaprỳ nẽ kãm:

—Tõe. Nà kam nẽ Tĩrtũm kãm hprãm xà hkõt mãmri mẽ hwỳr mõi rỳ mẽ hwỳr amõr kêt nẽ. Anẽ.

¹⁵ Tã pa mẽ ra inhnojarêt nẽ amnhĩ to ixpikuprõnh pa nẽ ma Pawre hkõt Jerujarẽ hwỳr tã ma mõi.

¹⁶ Hãmri nhũm Sejarej kamã Jejus kõt mẽ ixtõ hkwỳjaja ma mẽ ixkõt mõi. Pa mẽ mõi nẽ Jerujarẽ hwỳr pøj. Hãmri nhũm mẽ ixkõt mẽ mõi xwỳnhjaja mẽ ixto mõi nẽ Mẽnasõ nhõrkwỳ hwỳr mẽ ixto pøj. Mẽnasõja Sipre kamã na pre kato. Tã hpãnhã Jerujarẽ hwỳr ahpa nẽ kamã ri pa ho pa. Na pre ra Jejus kõt amnhĩ xãm ã hã amgrà xohtõ nẽ. Tã pa mẽ kuri pøj.

*Pawre mẽ Xiakre wa harẽnh
Atre 15.3-21; Wam Korĩt 9.19-22,
10.32-33*

¹⁷ Tã pa mẽ Jerujarẽ hwỳr pøj nhũm Jejus kõt mẽ ixtõjaja mẽ ixpumu nẽ hkĩnh nẽ.

¹⁸ Hãmri nhũm apkati pa mẽ ma Pawre hkõt Xiakre hwỳr mõi. Nhũm mẽ kot Tĩrtũm kapër o mẽ ahkre xwỳnh piitã ra kuri akuprõ nẽ mẽ ixkutêp hkrĩ.

¹⁹ Jakamã nhũm Pawre mẽ hwỳr axà nẽ mẽ kãm tanhmã amnhĩ nhĩpêx to ho pa hã amnhĩ jarẽ nẽ mẽ kãm:

—Pa na ka mẽ rĩ akrĩ. E ot pa axte mẽ apumunh mã mõi. Ixte mẽ amã amnhĩ jarẽnh ã amnhĩ jarẽnh kaxyw. Nà na pa pre ma Ijaew kêt xwỳnhjê hkõt ixpa nẽ mẽ kãm Jejus kot mẽ panẽ tanhmã amnhĩ nhĩpêx to jarẽnh o ri mẽ hkõt ixpa. Nhũm Tĩrtũm inhĩhkõ hã ixkutã nojarêt mex jakamã nhũm prem inhma nẽ ohtõ rax nẽ mẽ pahpyrà nẽ Jejus kõt amnhĩ xunhwỳ. Anẽ.

²⁰⁻²⁵ Hãmri nhũm mẽ Ijaew kêt xwỳnh kwỳjaja kot Jejus kõt amnhĩ xunhwỳr ã mẽ harẽnh ma nẽ mẽ ã hã hkĩnh nẽ mẽ hã Tĩrtũm mã mex o mex ã harẽ. Hãmri nẽ Pawre mã kãm:

—Nà na pa prem ra mẽ harẽnh ma. Hãmri nẽ mẽ kãm kagà nhĩpêx nẽ mẽmoj tã mẽ kãm karõ nẽ mẽ hwỳr kumẽ. Mẽ kot omunh nẽ kamã harẽnh nẽ hkõt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nẽ mẽ hkurê.

Nẽ mry kamrõ hkur nẽ mẽ hkurê.

Nẽ mẽmo mry hpar nẽ hkamrõ runh kêt rãhã hkur nẽ mẽ hkurê.

Nẽ mẽ kot amnhĩ prõ pix tânopxar kaxyw mẽ kãm hã karõ.

Nẽ mẽnijaja kot amnhĩ mjên pix tânopxar kaxyw mẽ kãm hã karõ.

Nẽ nhãm mẽ kot axpẽn to amnhĩkati nẽ mẽ hkurê.

Ã na pa prem ja hã kagà nẽ mẽ hwỳr mẽnh anẽ. Jakamã e mẽ inhma. Na ra mẽ pahpê Ijaew kwỳjaja ohtõ rax kumrêx nẽ mẽ pahpyrà nẽ Jejus kõt amnhĩ xunhwỳ. Mãn ka pre mẽ harẽnh ma. Na htem Jejus kõt amnhĩ nhĩpêx o pa jao mããnẽn Tĩrtũm nhỹ hã Mojes kapër kõt amnhĩ nhĩpêx mex o pa. Tã nhỹri mẽ kot tanhmã ato hêx to hã ajarẽnh ma. Na ka xep hte Ijaew kêt xwỳnhjê nhõ krĩ kamã pøj hãmri nẽ mẽ õ krĩ kamã Ijaew kwỳjê pumu nẽ mẽmoj nẽ tanhmã mẽ kãm akapër to ho ri apa. Nom Ijaew kêt xwỳnhjê mã ka xep hte ã mẽmoj nẽ akapër anhỹr kêt nẽ. ãm Ijaew mã pix mã ka xep hte mẽ kot finat Mojes kapër kõt amnhĩ nhĩpêx nẽ mẽ hkurê ho ri apa. Nẽ mẽ panhĩgêt kot amnhĩ nhĩpêx kuhpa hã mẽ kot mẽ hkra my kwryt kà jakàr nẽ ka xep hte mẽ hkurê ho ri apa. Nẽ mẽ kot mẽ panhĩgêt kõt amnhĩ nhĩpêx nẽ ka xep hte mããnẽn mẽ hkurê ho ri apa. Mẽ kêp Ijaew tã ka xep pre hte ã mẽmoj nẽ mẽ hkurê anhỹr ho ri apa. Na prem jar ã Ijaewjê mã ato hêx o pa anẽ nhũm mẽ kuma nẽ mẽ hkõt hamaxpêr kurê kumrêx. Jao ra ate

mê pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mê kot apôx ã ajarênh mar jakamã tanhmã kot kaj we mê kãm amnhĩ tã axaprãr to? Nê tanhmã kot kaj we mê noo mã amnhĩ nhĩpêx to kê mê arĩ mê pahte amnhĩ nhĩpêx kôt ate amnhĩ nhĩpêx o apa hã apumu? E na pa mê ra ijamaxpêr. Kot ka ã amnhĩ nhĩpêx anê. Na ra jar mê pahkwỳjaja kêp kwat nê Tĩrtũm mã tanhmã amnhĩ jarênh to jatur xãm mênh kaxyw amnhĩ krã hkênh mã. Jakamã e kêr ka ma mê hkôt tẽ nê mê urak nê amnhĩ krã hkênh nê kam nê mê ate amnhĩ krã kênhta pãnhã amnhĩre. Kot kaj ã mê hkôt amnhĩ nhĩpêx anê hãmri nhũm mê pahkwỳjaja arĩ mê pahte amnhĩ nhĩpêx o ate amnhĩ nhĩpêx o apa hã apumu nê mê kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mê kuma nê mê kãm:

—Tôe. Nã ãm hãmri na ka mê inhmã awjarê. Nã kot paj ã amnhĩ nhĩpêx anê. Anê.

Jakamã nhũm apkati nhũm ma mê kêp 4tajê o mō nê mê mex kaxyw tanhmã amnhĩ nhĩpêx to. Hãmri nê Tĩrtũm mã amnhĩ jarênh xã hã ixkre hwỳr mra nê agjê nê mê õ patre mã mê amnhĩ jarê nê kãm:

—E ot pa mê awỳr mra. Na pa prem ra mêmōj tã tanhmã Tĩrtũm mã amnhĩ jarênh to. Tã kot paj mê axte ixtã ù semãn hãmri nê hatur xãm mênh kaxyw akupỳn awỳr mra nê amã mêmōj gō ka mê inhmã Tĩrtũm mã agō nê hkôt kãm mê ijarê. Nê pa kot paj mê ixpiitã hpãnhã amã amnhĩre. Anê.

*Mê kot Pawre pynênh ã mê harênh
Atre 24.12*

²⁷ Tã nhũm semãnja hapêx kaxyw nhũm pika pê As rũm Ijaew kwỳjaja ma mra nê Tĩrtũm mã amnhĩ jarênh xã hã ixkre hwỳr agjê. Hãmri nê kamã Pawre pumu nê kamã gryk tỳx nê hwỳr hprôt nê unê nê tanhmã hkwyjê mã ho hêx to nê ho kapêr punuj nê. Nê mê kãm:

²⁸ —E mê amnê mra nê jahti pumu. Na hte krĩ piitã hkôt ri mê pahkwỳjê mã tanhmã ri hêx to ho pa. Tĩrtũm nhỹ hã finat Mojes kapêr nhũm mê kãm ho kapêr punuj o pa. Nê mê pahte Tĩrtũm mã amnhĩ jarênh xã hã ixkreja nhũm hte mããnênh tanhmã mê kãm ho kapêr punuj to. Mê pahpyrà nê kêp Ijaew tã mê pahpê hkwy ho kapêr o pa. Tã ra axtem nê amnhĩ kôt Tĩrtũm nhõ ixkre hwỳr Ijaew kêt xwỳnh kwỳjê ho agjê. Mê kot hwỳr gjêx kêt kumrêx tã nhũm axtem nê amnhĩ kôt mê ho agjê. Anê.

²⁹ Na pre krĩja kamã Ijaew kêt xwỳnh Topĩja Pawre hkôt pa nhũm mê omu. Kêp Epes nhõ xwỳnh nhũm mê kot pry ã Pawre hkôt pa hã omu. Tã hã ahtũm nê Tĩrtũm mã amnhĩ jarênh xã hã ixkre kamã Pawre pumu nê htỳx amnhĩ kôt Topĩ ho àr ã hkamnhĩx nê ã mê kãm harênh anê.

³⁰ Hãmri nhũm mê kuma nê Pawre kamã gryk tỳx nê. Nê hwỳr hprôt nê unê nê ixkre rũm ho kato nê kêp hakwa kre kahê.

³¹⁻³² Hãmri nê ma o tẽ nê htak rax nê. Ra mê kot htak o hpĩr mã tã nhũm mēhōja pōristi krāhtũm wỳr hprôt nê kãm awjarê nê kãm:

—Kwa o mỳj mê ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nê pōristi hkwyjê mã anê nê mê ma mê hwỳr hprôt kurê kumrêx. Nhũm mê arĩ Pawre htak tã amnhĩ wỳr mê omu nê mê umaj kãm ure.

³³ Hãmri nhũm pōristi krāhtũm Pawre hã amỳnê nhũm pōristijaja unê nê kax o mê hkaxprexã ho axkrut nê ho hkaxpre pa. Hãmri nhũm mê hkrāhtũm Pawre hã mê hkukja nê mê kãm:

—Kwa mê atō inhmã jahti jarê. Tanhmã na hixi te? Tanhmã na we amnhĩ tomnuj to hã na ka mê ã hipêx anê? Anê.

³⁴ Hãmri nhũm mê kuma nê piitã anhĩpê kaxpê kãm tanhmã harênh to. Nom axpên kwỳm tanhmã ri kãm harênh to. Hãmri nhũm tee ri hprĩ hã kot mê mar kaxyw hãmri nê pōristi

mã anê nhũm mẽ kêp Pawre ho kato nê ma mẽ àpênh xà hã ixkre hwỳr o tẽ.

³⁵⁻³⁶ Hãmri nhũm Ijaew kwỳ ohtô nê pry hã axpênh nhĩgãnh o hkôt mra. Nê gryk xàj kapêr punuj tỳx o mẽ hkôt mō nê kàx pê pōristi mã kapêr nê mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pōristija tee ri mẽ kuma hãmri nê mẽ kot tanhmã ho pymaj kumỳ nê kỳx pê mẽ kêp kupê nê o mō. Jao ixkreja wỳr mẽ àpir xà hã ho àpir o mō.

³⁷ Nê kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarê ka inhma. Anê.

Mẽ kapêr o kãm kapêr hãmri nhũm amnhĩ jaêr pê kuma nê kãm:

—Kwa xà na ka mẽ ixpyrà nê Gresjê kapêr o akapêr?

³⁸ Na pa ixtỳx apê Ejit nhõ xwỳnh pê mẽ hpar o apa xwỳnhta ã akamnhĩx. Ham na pre mẽ inhõ pahшти kutã amnhĩ xãm nê kot hkurê kaxàr kaxyw mẽ ho ajuta xwỳnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anê.

³⁹ Hãmri nhũm Pawre kãm:

—Nà ixpê Ejit nhõ xwỳnhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwỳnh nêj mã ixkapêr nà? Anê.

⁴⁰ Hãmri nhũm kãm:

—Tõe. Kam nê mãmrĩ tanhmã mẽ kãm akapêr to. Anê.

Hãmri nhũm mẽ àpir xàta ã kỳx pê mẽ mỳri xa nê kànhmã mẽ kãm ìhkra pẽ nhũm mẽ omu nê hpinhkrênh pa nhũm mẽ kãm amnhĩ jarê.

22

Pawre kot kãm hkurê xwỳnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapêr o mẽ kãm kapêr nê mẽ kãm:

—E ixkwỳjaja. Pa mẽ amã amnhĩ jarê ka mẽ inhma. Anê.

Hãmri nhũm kot mẽ kapêr o kapêr ma nê hpinhkrênh pa nê akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwỳja ixpê Ijaew. Pyka pê Siris kamã krĩ pê Tas kamã na pa pre ixkato no ãm jar Jerujarê kamã na pa pre ixàptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtjê mã kapêrja nhũm pre hprĩ hã ho ijahkre ho pa. Na pa pre mẽ apyrà nê inhmã Tĩrtũm kôt amnhĩ nhĩpêx prãm nê.

⁴ —Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nê nhỹri mẽ kãm ixkato nê mẽ unê. Mẽmyjê pynê nê mẽnijê pynê. Hãmri nê mẽ kot mẽ hpar kaxyw mẽ hagiênh o ri ixpa.

⁵ Na pa pre ã mẽ hipêx o ri ixpa anê. Mẽ panhõ patre maati nê mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nê inhmã kugõ pa kupy nê ma mẽ hwỳr o mō. Ixte mẽ õ krĩ kamã Jejus kwỳjê pynênh par nê man akupỳn Jerujarê hwỳr mẽ ho inhmōr nhũm mẽ kot tanhmã mẽ ho kaxyw.

⁶ —Tã ra myt apha pa mẽ hwỳr ixàhtêp o mō. Puh nhũm kaxkwa rũm hirã rax kumrêxja ixwỳr wrỳ nê ixtã ajêt pa hipòk ri xa.

⁷ Hãmri nê umaj pykap tẽm nhũm mẽhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê.

⁸ Hãmri pa kãm: “Kwa mẽ atõ na ka ri ã inhmã akapêr anê pahшти?” Anê nhũm inhmã: “Ixpê Najare nhõ xwỳnh Jejus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyrãk.”

⁹ —Anhỹr o inhmã kapêr nhũm ixkôt mẽ pa xwỳnhjaja kuma no ãm hprĩ hã mar mex kêt nê. ãm hirã raxta pix pumu.

¹⁰ Tã pa kãm: “No tanhmã kot pa we amnhĩ to Pahшти?” Anê nhũm inhmã: “E kànhmã xa nê mãmrĩ ma Tamas wỳr mō. Kot kaj hwỳr pøj nhũm mẽhõ

awÿr tē nē mēmoj tā amā karō ka ama nē hkôt amnhĩ nhĩpêx.” Anē.

¹¹ —Nhũm pre ã inhmā kapēr anē. Hāmri pa hirā rax pumunh o ixām kurē ra inhno hkre nē ixrīt kêt nhũm ixkôt mē pa xwÿnhjaja ixpa hā ixpy nē ma Tamas wÿr ixto mō nē ixto pōj.

¹² —Tā nhũm Tamas nhō xwÿnh pē ãnānīsti ixwÿr tē. Na pre hte Tirtūm kapēr ã kagā htūm kôt amnhĩ nhĩpêx mex nhũm Tamas kamā Ijaew piitā kām hkīnh nē axpēn mā mex ã harē.

¹³ Jakamā nhũm ixwÿr tē nē inhmā: “Pa Jejus kôt ixtō Sawti? E akupÿm rīt.” Anhÿrja kôt pa akupÿm ixrīt mex kurē kumrēx nē omu.

¹⁴ Hāmri nhũm inhmā: “Nà mē panhīgētjē nhō Tirtūm na amnhĩ kaxyw ata. Ate kapēr mar nē hkôt tanhmā amnhĩ nhĩpêx to ho apa kaxyw. Nē ate kaxkwa kamā Kra mex pumunh nē kapēr mar kaxyw. Tā ka xep ham hirā rax kamā omu nē kapēr mā.

¹⁵ Jakamā kēr ka ma mē piitā mē kām ate omunh xwÿnhja jarēnh o ari mē hkôt apa. Nē mē kām kapēr jarēnh o mē ahkre ho ri apa.

¹⁶ E tokyx kànhmā xa nē Jejus mā amnhĩ jarē nē hkôt amnhĩ xām kê anē ate amnhĩ tomnuj rēnh pa. Hāmri pa apē hkwÿ hā akrā kumrā ka ma mē kām kapēr jarēnh o ri apa.” Anē.

—Nhũm pre ã ãnānīsti inhmā kapēr anē.

¹⁷ —Tā pa man akupÿn jar Jerujarē hwÿr mē awÿr mō. Hāmri nē jar Tirtūm mā amnhĩ jarēnh xā hā ixkre kamā kām amnhĩ jarēnh o ixām rōm axte mēmoj pumu.

¹⁸ Nhũm Jejus axte ixwÿr kato nē xa nē inhmā kapēr nē inhmā: “E inhma. Jerujarē nhō xwÿnhjaja kām ixkapēr mar prām kêt jakamā kot kaj mē kām ixkapēr jarē nhũm mē amar kêt nē. Jakamā kwa tokyx akato nē hpānhā ma nhÿhÿm mō.” Anē.

—Hāmri pa tee ri ã kapēr anhÿrja ã kuma nē kām:

¹⁹ “Kwa nà koja mē inhma Pahihti. Ra mē kot ixte amnhĩ nhĩpêx ã ixpumunh mex. Ixte amnhĩ nhĩpêx tūmta kôt mē kot ixpumunh mex.

Na pa pre hte krī piitā hkôt mra nē Tirtūm kapēr o mē ahkre xā hā ixkre kamā mē kot akôt amnhĩ kaxyw hamaxpēr xwÿnhjē pyné nē mē htak nē mē hagjēnh xā kamā mē hagjē nhũm mē kot ja hā ixpumunh mex.

²⁰ Nhũm mē kot akapēr jarēnh o pa xwÿnh Estewāw pīrta pa pre hā mē omu nhũm ja inhmā mex pa mē kām mē hinôkà jamÿnh o hā mē omunh o xa. Na pa pre ã amnhĩ nhĩpêx anhÿr o ri ixpa. Tā hpānhā akôt amnhĩ xām hāmri nē akôt amnhĩ nhĩpêx o ri ixpa. Jakamā koja mē ixte amnhĩ nhĩpêx nyw ã ijarēnh ma nē kām ixkapēr mar prām nē.” Anē.

²¹ —Pa pre ã Jejus mā amnhĩ jarēnh anē nhũm inhmā: “Nà. Kēr ka māmri krīja rūm akato nē ma nhÿhÿm mō. Kot paj hpānhā ma Ijaew kêt xwÿnhjē hwÿr amē ka hpānhā ma mē hwÿr mō nē mē hkôt mē kām ixkapēr jarēnh o ri apa.” Anē.

²² Nhũm pre Pawre ã amnhĩ hkwÿjē mā amnhĩ jarēnh anē nhũm mē arī mar o kuhē rāhā Ijaew kêt xwÿnhjē jarēnh ma nē kamā gryk tÿx nē. Ijaew kêt xwÿnhjaja kot mē urāk nē Tirtūm kapēr marja nhũm mē kām hprām kêt jakamā nhũm Pawre ã mē harēnh anē nhũm mē kuma nē kamā gryk tÿx kumrēx. Nē gryk xāj kapēr punuj nē kapēr o:

—Kwa mē māmri apīhti ri. Ām hpīr mā htāmti kēnā. Anē.

²³ Hāmri nē gryk xāj amnhĩ nhĩnôkà hkwÿr nē ho apē nē pyka jamÿ nē kànhmā ri ho ahkapē.

Pawre kot pôristi krāhtūm mā amnhĩ jarēnh

Atre 16.35-39

²⁴ Hāmri nhũm pôristi krāhtūmja tee ri ã mē kot amnhĩ nhĩpêx anhÿr ã mē omu nē mē kapēr ma nē pôristijē mā kapēr nē mē kām:

—Kwa tanhmā na we jahti amnhĩ tomnuj to nhũm mē ã kamā gryk tÿx anē? E mē tokyx ixkre hwÿr ho axā nē mē htak xā ho htak kê mē pamā tanhmā amnhĩ jarēnh to. Anē.

²⁵ Hāmri nhũm mē kuma nē ho axā nē htak kaxyw kormā hpre ho

xa. Hāmri nhūm pōristi krāhtūm nhō kōwenatōja mē hkôt axà nē hā mē omunh o xa nhūm Pawre omu nē amnhī tā kām kapēr nē kām:

—Kwa kormā ixte tanhmā mē amā amnhī jarēnh to hkêt tā ka mē ixtak kaxyw. Ixpê Ijaew tā määnēn ixpê Rōm nhō xwýnh kēnā. Xà na htem ā Rōm nhō xwýnhjê nhīpêx anē? Anē.

²⁶ Hāmri nhūm tee ri ā amnhī jarēnh anhýrja ā kuma nē pōristi krāhtūmja wýr hprôt nē kām:

—Kwa taxy pu mē tanhmā ho hkêt nē. Xep kēp Rōm nhō xwýnh kēnā. Anē.

²⁷ Hāmri nhūm tee ri kuma nē Pawre hwýr axà nē kām:

—Kwa xà ām hāmri na ka amnhī jarē? Xà apê Rōm nhō xwýnh na ka? Anē.

Hāmri nhūm kām:

—Tý. Ām hāmri ixte mē amā amnhī jarēnh kēnā. Ixpê Rōm nhō xwýnh na pa. Anē.

²⁸ Hāmri nhūm kām:

—Kwa pa na pa pre amnhī to Rōm nhō xwýnh prām xāj amnhī pānhā mē kām amnhīrer rax nē. Anē.

Nhūm Pawre kām:

—Tý nom pa na pa pre amnhī pānhā mē kām amnhīrer kêt nē. Inhīpêxà hkôt ixpê Rōm nhō xwýnh na pa. Anē.

²⁹ Hāmri nhūm mē kuma nē tee ri hamaxpēr o kām ma nē. Nē kām ma ho hkaga kurê kumrêx. Nhūm mē hkrāhtūm nhō pahija määnēn kām ma nē. Kēp Rōm nhō xwýnh tā nhūm mē axtem nē kot unēnh nē kàx o hkaxpreja mā hamaxpēr nē kām ma nē. Na htem ā Rōm nhō xwýnhjê nhīpêx anhýr kêt nē. Na htem tanhmā mē hkukjêr to nē hprī hā mē kuma nē rī kormā tanhmā mē hipêx to.

Pawre kot Ijaew xàptàr tūmrejê mā amnhī jarēnh

Matêwre 23.27-28

³⁰ Tā nhūm apkati nhūm pōristi krāhtūmja Ijaew kwý ho akuprō. Mēō patre maati nē patre krāhtūmjaja nē mē àptàr tūmrejaja nhūm kot mē kām tanhmā Pawre jarēnh to kaxyw mē ho hpikuprōnh pa. Hāmri nē Pawre

pê hkaxpre xà rê nē ma mē hwýr o tē nē mē kutā ýr.

23

¹ Hāmri nhūm mē omu nē mē kām amnhī jarē nē mē kām:

—E ixkwýjaja. Pa mē amā amnhī jarē ka mē inhma. Na pa hte Tirtūm nom tām amnhī nhīpêx o ixpa nē mē pahpê Ijaew mē pahte amnhī nhīpêx kwým ri tanhmā amnhī nhīpêx to hkêt nē. Anē.

² Hāmri nhūm mē ō patre maati ānānīsti kuma nē kamā gryk nē. Axtem ānānīsti hō na pre. Hāmri nē ā Pawre kot amnhī jarēnh anhýrja ā kuma nē kamā gryk nē. Hāmri nē mē kot mar o kuhê xwýnhjê mā kām:

—Kwa mē atō hakwap hkurahti ri. Tām kot amnhī nhīpêxti hā. Na ām mē pamā amnhī to hêx o xa. Anē.

³ Hāmri nhūm Pawre kuma nē hwýr rīt nē omu nē kām:

—Nà ka koja Tirtūm akura kām ga. Te ate finat Mojes kot ý hā kapēr kôt amnhī nhīpêx pyrāk tā ri axtem nē ri mē kot ijakwap ixkuranh kaxyw ri mē kām ixtā amýnê. Anē.

⁴ Hāmri nhūm kuri mē kuhê xwýnhja tee ri ā kām kapēr anhýrja ā kuma nē kām:

—Kwa kēp patre maati kēnā kot ka kêt ri ā kām akapēr anē. Anē.

⁵ Hāmri nhūm amnhī jaêr pê ja hā kuma nē kām:

—Kwa ixte ja hā omunh kêt jakamā na pa ā ixtýx kām ixkapēr anē. Ixte kēp patre maati hā omunh ronhýx pa ā kām ixkapēr anhýr kêt nē. Tirtūm kapēr ā kagà htūm kot ja nē mē pamā kapēr kēnā. Mē pahte tanhmā mē panhō pahi ho pakapēr punuj to nē mē pamā kapēr. Tā pa ām ixtýx ā kām ixkapēr anē. Anē.

⁶⁻⁸ Hāmri nē hprī hā mē kot mar o hkrī xwýnhjê pumu. Nhūm mē kamā Satusew nhō xwýnh kwý nē Parijew nhō xwýnh kwý. Satusew mē Parijew nhō xwýnhjaja na htem axpēn kwým ri tanhmā mē htykjê jarēnh to. Satusew nhō xwýnhjaja na htem mē htyk nē mē hkarō mē ro hā mē hapêx o mē hapêx ā mē hkamnhix.

Nē Tirtūm kapēr o mē wrýk xwýnh kêt ã mē harēnh o pa. No Parijew-jaja na hte mē kurom mē htyk nē akupým mē htír ã mē hkamnhīx nē Tirtūm kapēr o mē wrýk xwýnh ã mē hkamnhīx. Nhūm Pawre kot ja hã mē omunh jakamã tanhmã hamaxpēr to hãmri nē mē kãm kapēr. Na pre Parijew nhõ xwýnhjê pyrà nē mē htyk nē akupým mē htír kôt hamaxpēr nē Tirtūm kapēr o mē wrýk xwýnh kôt hamaxpēr. Jakamã mē omu nē kàx pē mē kãm kapēr nē mē kãm:

—Nà ijaxwýja ixpê Parijew nhõ xwýnh. Nhūm inhīpêxà haxwýja kēp Parijew nhõ xwýnh. Jakamã na pa hte mē apê Parijew nhõ xwýnhjê pyrà nē mē htyk nē akupým mē htír kôt ijamaxpēr. Tã ãm ja pix mýrapê na ka mē ixpynê nē ã inhīpêx anê. Anê.

Hãmri nhūm Parijew mē Satusew nhõ xwýnhjaja kuma nē ja hã axpēn kãm gryk nē. Nē hã axpēn mã akir.

⁹Hãmri nē ra axpēn mã àkjêr rax nē. Hãmri nhūm Parijew kwý pē Mojese kapēr o mē ahkre ho mē pa xwýnhjaja kãnhmã kuhê nē mē kãm Pawre hã aprār kãm hihtýx nē mē kãm:

—Kwa pēr tanhmã kot amnhī tomnuj tore hã. Mãn ãm hpimtir kãm na pre ã ri kaxkwa kamã mēmoj mar anê. Rý apu Tirtūm kapēr o wrýk xwýnh kãm tanhmã kapēr to nhūm pre Tamas wýr pry kamã mar o xa rý ko. Anê.

¹⁰Hãmri nhūm Satusew nhõ xwýnhjaja tee ri Tirtūm kapēr o mē wrýk xwýnh kot kãm kapēr ã harēnhja ma nē hã axpēn mã àkjêr rax nē. Hãmri nhūm pôristi krãhtūmja tee ri mē kot axpēn mã àkjêr ã mē omu hãmri nē pôristi mã kãm:

—Kwa mē Pawre hwýr tē nē mē kēp utà nē ma akupým o tē nē haxà. Kot ka mē ho anhýr kêt nhūm mē tanhmã hamaxpēr to nē gryk xàj axpēn nhīhkra kamã hkaxôn pa. Anê.

Hãmri nhūm mē kuma nē hwýr tē nē mē kēp utà nē akupým o tē nē ixkre hwýr ho axà.

Jejus kot Pawre jamaxpēr o hihtýx ã harēnh

Atre 18.9-10

¹¹Tã nhūm kamàt nhūm Jejus tãm Pawre hwýr kato nē kãm:

—Pa Pawre? Kwa tee ri amnhī kukamã ajamaxpēr o amnhī kamã akahak kêt nē. Kot kaj te ra ate jar Jerujarē kamã mē kãm ijarēnhhta pyrà nē ma krī pē Rôm wýr mō nē krī nhõ xwýnhjê mã ijarē. Anê.

Mē kot Pawre hã àmnēnh ã mē harēnh

Sikūn Ximotre 4.18

¹²⁻¹³Tã nhūm apkati nhūm Ijaew kwýjaja axpēn wýr akuprō. Mēmyjaja kēp 40 nē axte hkôt mē hkwyýjaja axpēn wýr akuprō. Mē kot Pawre pír kaxyw hã axpēn mar kaxyw hã akuprō nē hã axpēn mã amýnê nē axpēn mã:

—Tôe. Nà kot puj mē hpír kaxyw amnhī jagri htýx o paxàpkur kêt rãhã kupī nē rī kormã apku nē ixkō. Nà kot puj mē ho anê. Ra Tirtūm noo mã mē pahte ja hã amnhī jarēnh kēnã. Anê.

¹⁴Hãmri nē mē ma mē õ patre krãhtūmjê mē mē àptàr tūmrejê hwýr mra nē mē kãm hã amnhī jarē nē mē kãm:

—Ot pa mē amã amnhī jarēnh mã mra. Nà kot paj mē tã Pawre pī. Kot paj mē kormã hpír kêt ri ixàpkur kêt rãhã kupī. Ra mē ixte Tirtūm noo mã ja hã amnhī jarēnh xà hkôt.

¹⁵Jakamã e mē inhma. Kêr ka mē axêx rom pôristi krãhtūm mã anê kē apkati kē man mē awýr Pawre ho tē. Te mē ate aprī hã hkukjêr kaxyw pyrãk o kãm axêx. Kojã mē kormã mē awýr ho hpôx kêt ri pa mē unên kupī. Anê.

¹⁶Hãmri nhūm Pawre tãmnhwý mē kot ã hã amnhī jarēnh anhýrja ma hãmri nē ma pôristi xàpēnh xà hã ixkrej wýr Pawre hwýr hprôt nē kãm mē harē.

¹⁷Hãmri nhūm kuma nē amnhī wýr pôristi krãhtūm nhý hã mē hamãr xwýnh ã karõ nē kãm:

—Kwa ma mē akrãhtūm wýr ixtãmnhwýta o tē kē kãm mēmoj jarē nà? Anê.

¹⁸ Hāmri nhūm kuma nē ma hwÿr o tē nē kām:

–E Pawre na inhmā anē pa awÿr htàmnhwÿ ho tē. Kot tanhmā amā ujarēnh to kaxyw. Anē.

¹⁹ Hāmri nhūm omu nē hpa hā kupy nē o tē nē ahte mē hkàx ā o xa nē kām:

–E māmri inhmā mēmoj jarē pa ama. Mēmo na ka te inhmā harēnh kaxyw? Anē.

²⁰⁻²¹ Hāmri nhūm kām:

–Nà Ijaew xàptār tūmrejaja na mē kot inhġēt Pawre pīr kaxyw hā amnhī jarē pa amā harēnh o tē. Koja xep mē hā awÿ. Xep apkati nhūm ate ma mē hwÿr mē hkukjēr xà hā ixkre hwÿr ho amōr nhūm mē kot hprī hā kot amnhī nhīpēx ā hkukjēr kaxyw. Nom koja mē ām amā amnhī to hēx. Koja xep mē kēp 40 nē pry kamā kutēp amūxu nē kuhē. Na mē ra hā axpēn mar pa nē axpēn mā: “Kot puj mē paxàpkur kēt rāhā Pawre pī nē rī kormā apku nē ixkō.” Anhÿr o amnhī jarē pa mē kuma. Jakamā na mē kormā ate mē hwÿr mēnh kaxyw akām ama. Kwa mē hwÿr ho amōr kēt nē. Anē.

²² Hāmri nhūm kuma nē kām:

–Tōe. Nà na pa ra ama. Māmri ma akupÿm tē. Nom kēr ka inhmar kumrēx. Kēr ka nhām mēhō mā ja jarēnh kēt kumrēx. Ām kwarī ho kwarī. Anē.

Hāmri nhūm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ā mē harēnh

²³⁻²⁴ Tā nhūm pōristi krāhtūmja amnhī wÿr ÿ hā pōristi jamār o mē pa xwÿnh wa ho hamēxkrut nē wa hā karō nē wa kām:

–E wa inhma. Koja kōt ā kamāt ka wa ma krī pē Sejarej wÿr Pawre ho mō kē hkà hkīnh pē pahihiti Peris wÿr pōj.

Nē amnhī kōt pōristi ho 200 nē o mō. Nē kē mē kēp 70 nē kawar ā hkrī nē mē akōt mō.

Nē kē mē kēp 200 nē wapo jamÿ nē mē akōt o mō.

Kē mē ā ohtō rax anē.

Nē Pawre kot kawar ā ÿr nē mōr kaxyw ka mē kām hō ho mō.

E kēr ka mē ā axohtō nē hkōt amōr anē kē hkà hkīnh pē pahihiti Peris wÿr pōj. Anē.

²⁵ Hāmri nē pahihiti Peris mā kagà nhīpēx nē kamā kām Pawre jarē nē kām:

²⁶ Pa pahihiti Peris? Xà amex? Ixpē Kraw Risas na pa awÿr kagà mē.

²⁷ E ot pa awÿr Ijaew pē Pawre mē. Na pre hkwÿja kot hpīr kaxyw unēnh tā pa määnēn kēp Rōm nhō xwÿnh ā harēnh ma hāmri nē hwÿr inhō pōristi rē nhūm mē hwÿr hprōt nē mē kēp utà.

²⁸ Hāmri nē Ijaew xàptār tūmrejē hwÿr o tē. Mē kot inhmā tanhmā kot amnhī tomnuj to hā harēnh kaxyw.

²⁹ Tanhmā kot amnhī tomnuj to nhūm mē kot haxàr rÿ hpīr ronhÿx ja mex nē. No xep ām kot mē higētjē kot amnhī nhīpēx kōt amnhī nhīpēx kēt pix mÿrapē na mē kamā gryk.

³⁰ Tā pa mē kot hpīr kaxyw hā mē harēnh ma nē mē umaj awÿr kumē. Hāmri nē kamā mē gryk xwÿnhjē mā ajarē. Jakamā koja mē mēmo arġgro hā awÿr pōj nē tanhmā kot amnhī nhīpēx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpē Kraw Risas na pa awÿr kagàja mē. Tā mǎn ka arī ixte amā harēnhja ma. Anē.

³¹ Tā nhūm kamāt nhūm mē hkrāhtūm kot mē kām karō xà hkōt nhūm pōristijaja ma Pawre o mō. Hāmri nē krī pē āxipat wÿr pōj nē kamā amnhīm hikra.

³² Nhūm apkati nhūm mē kot mē hkōt pykap mōr xwÿnhjaja mē ō pahī kot mē kām hā karō xà hkōt awjanā nē ma akupÿm mō nhūm kawar ā mē mōr xwÿnh pixjaja ma Pawre ho mō.

³³ Hāmri nē mō nē Sejarej wÿr pōj nē pahihiti Peris nhīhkram Pawre jaxà nē kām kagàja gō nē awjanā nē ma akupÿm hapēx.

³⁴ Hāmri nhūm Perisa kagàja py nē omu. Nē omunh pa nē Pawre mā kām:

–E inhmã amnhĩ jarẽ. Tanhmã na anhõ pyka hixi te? Anẽ.

Nhũm kãm:

–Kêp Siris. Anẽ.

³⁵ Nhũm kãm:

–Tõe. Kê mẽ kot ato kapêr xwýnhjaja pøj pa kormã ixprĩ hã mẽ kot tanhmã ajarẽnh to ma mãn. Anẽ.

Hãmri nẽ õ pòristi mã anẽ nhũm mẽ ma Pawre o tẽ. Ma pahi Eroxo htyk xwýnh nhõrkwy hwýr o tẽ nẽ kamã haxà nhũm hkrĩ ho hkrĩ.

24

Ijaew kot tanhmã Pawre ho kapêr punuj to hã mẽ harẽnh

Rukre 21.12-13; Atre 25.7

¹ Tã nhũm arĩgro kêp 5 nẽ hapêx nhũm Ijaew kwýjaja Sejarej wýr pøj. Mẽ õ patre maati ãnãñisti nẽ Tetur nẽ kaxyw mẽ ãptâr tũmrejaja nhũm mẽ ma hwýr mõ nẽ pøj. Tetur kêp axiwokat ã mẽ yr pẽ kapêr xwýnh jakamã nhũm mẽ kot tanhmã Pawre o kapêr punuj to kaxyw pahi Peris wýr amnhĩ kôt o mõ.

² Hãmri nhũm mẽ amnhĩ wýr Pawre hã karõ nhũm pòristi haprõ nẽ mẽ hwýr o tẽn ho axà. Hãmri nhũm Teturja pahiti Peris mã Pawre kot tanhmã amnhĩ tomnuj to hã harẽ nẽ kãm:

–E pahiti inhma. Nà na ka hte tãm mẽ inhĩpêx nẽ mẽ ixto mex o apa. Jakamã nhũm hte nhãm pika hkwý nhõ xwýnhjaja mẽ ixkurê kaxàr kaxyw mẽ ixwýr hprõt kêt nẽ. Pa htem ixpiitã akukwak ri ijamakêtkati nẽ ixãmnhĩx inhmex nẽ ixpa.

³ Nẽ mẽ ixkĩnh rãhã ho ixpa. Hêxta waa nẽ. Mẽ ixpiitã inhmã akĩnh.

⁴ E kot paj amã awjarẽ ka inhma. Kot paj ixujarẽnh o hakotre ka inhma nẽ tokyx ma akupým tẽ.

⁵ Nà Pawre na hte amnhĩ tomnuj pix o pa. Kêp Jejus pẽ Najare nhõ xwýnhhta kôt amnhĩ nhĩpêx o mẽ pa xwýnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa.

⁶ Jãã na pre Tĩrtũm mã amnhĩ jarẽnh xà hã ixkre hwýr amnhĩ kôt mẽ kêp Ijaew kêt xwýnh kwýjê ho agjê nẽ mẽ ixpê ixkreja omnu kaxyw mã tã pa mẽ omu nẽ unẽ.

⁷ Tã nhũm pòristi krãhtũm Risasja mẽ ixpê utà

⁸ nẽ awýr mẽ ixte tanhmã amã harẽnh to xwýnhjê rẽ. Tã ot pa mẽ ixkrĩ. Nẽ ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarẽnh to ka ama nẽ ixte amã harẽnh xà hkôt tanhmã mar to. Anẽ.

⁹ Hãmri nhũm Ijaew hkwý haxwýja kãm:

–Nà ãm hãmri na ã amã harẽnh anẽ pahiti. Anẽ.

Pawre kot pahiti mã amnhĩ jarẽnh Rukre 21.14-19

¹⁰ Hãmri nhũm pahiti Peris Pawre mã anẽ nhũm kot kãm amnhĩ tã ãprãr kaxyw kãnhmã xa nẽ kãm:

–Nà na ka ra inhõ pyka kamã mẽ ixto amnhĩptâr mex o atã amgrã xoh-tõ nẽ pahiti. Jakamã na pa pre ate ixkapêr mar kaxyw ã ajarẽnh ma nẽ ixkĩnh nẽ.

¹¹ –E kot paj amã amnhĩ jarẽ ka inhma. Ham na pa pre Jerujarẽ hwýr mõ nẽ pøj. Na pa hwýr ixpõx ã ixtã arĩgro pẽ 12 pix. Kam nẽ ixtã ixkwýjê kukja nẽ mẽ ama. Ixte Tĩrtũm mã amnhĩ jarẽnh xà hã ixkre kamã Tĩrtũm mã mex o mex ã harẽnh kaxyw na pa pre hwýr mõ.

¹² No na pa pre nhỹri axpên kaxyw tanhmã ri mẽ hkryx to hkêt nẽ. Nẽ mẽ ixte Tĩrtũm mã amnhĩ jarẽnh xà hã ixkre kamã rý kapêr o mẽ ahkre xà hã ixkre kamã rý nhỹri pry kamã tanhmã axpên kaxyw ri mẽ hkryx to hkêt nẽ. ãm amrakati ho amrakati.

¹³ Mẽ kot ã ri ijarẽnh anhỹrja amrakati kumrêx. Mẽhõ kot ã ixte amnhĩ nhĩpêx anhỹr ã ixpumunh kêt tã na htem amnhĩ krã hkôt amã ijarẽnh o hêx.

¹⁴ Na htem mẽ ixte Jejus kôt amnhĩ nhĩpêx xwýnhjaja mẽ ixte amnhĩ nhĩpêx mex kêt ã mẽ ijarẽ nom kot anhỹr kêt. ãm mẽ inhĩgêjtê nhõ

Tirtüm kapër nywja kôt na pa hte amnhĩ nhĩpêx mex o ri ixpa rãhã nê. Nhũm ixkwýjaja htýx axtem kapër ô hkôt ixte amnhĩ nhĩpêx o ixpa hã ixkamnhĩx no ãm kapër ô hkêt. Ijaxwýja na pa hte mẽ uràk nê finat Mojes kapër ã kagà mar o ixpa. Nê Tirtüm nhỹ hã mẽ kapër o mẽ pa xwýnh kot kapër ã kagàja pa hte mẽ uràk nê hkôt amnhĩ nhĩpêx mex o ri ixpa.

¹⁵ Nê mẽ uràk nê Tirtüm kot nhỹrmã akupým mẽ ho htĩr kôt pa hte ijaxwýja ijamxpër týt nê. Mẽ htyk xwýnh piitã. Mẽ kot amnhĩ to mex xwýnhjê mẽ mẽ kot amnhĩ tomnuj xwýnhjê mẽ mẽ ho hpimràatã akupým mẽ ho htĩrja kôt pa hte mẽ uràk nê ijamxpër týt o ri ixpa.

¹⁶ Jakamã na pa hte tãm amnhĩ nhĩpêx rãhã nê. Tirtüm noo mã nê mẽ piitã mẽ noo mã tãm ri amnhĩ nhĩpêx mex rãhã nê.

¹⁷ —Tã na pa pre pyka hkwý hkôt ri ixpa hã ixtã amgrã sohtô nê. Hãmri nê ma akupým Jerujarẽ hwýr ixkwýjê hwýr mõ. Amarĩ ixte mẽ kãm kàxpore hkwý nhõr kaxyw pa akupým mẽ hwýr mõ. Nê mãânên Tirtüm mã mẽmoj nhõr kaxyw.

¹⁸ Hãmri nê mẽ ixte amnhĩ nhĩpêx xà hkôt pa mẽ amnhĩ to mex pa nê ma tẽn Tirtüm mã amnhĩ jarênh xà hã ixkre hwýr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nê. Rý tanhmã ixkapër punuj to hkêt nê. Na pa prem ãm inhgrêre nê akryk ixkuhê nhũm mẽ ixpumu.

¹⁹ Pika pê As rũm Ijaew kwýjaja na prem ixkre kamã ixpumu. Nar mẽ tãmjaja mãn awýr mra nê tanhmã amã ijarênh to.

²⁰ —Nê jar mẽ kot ixto kapër xwýnhjaja. Na pa pre mẽ àptàr tũmrejê mã amnhĩ jarênh pa nhũm mẽ inhma nê tanhmã inhma nê hkêt nê. Kam nê ja hã mẽ hkukja nê mẽ ama.

²¹ Rý ko. Kojã apu mẽ amã ãm ja pix ã ijarênh japêr. Na pa pre mẽ kãm ixkapër nê mẽ kãm: “Na pa hte

mẽ htyk nê akupým mẽ htĩr kôt ijamxpër týt nê. Tã ja pix mýrapê na ka prem ixpynê nê ã inhĩpêx anê.” Anhýr o mẽ kãm ixujarênh jakamã nhũm apu mẽ hkwýjaja kêp ja omnuj nê. Jakamã kojã apu mẽ amã ja hã ijarênh japêr. Nom ja pix jarê. Anê.

Ã na pre Pawreja pahi Peris mã amnhĩ jarênh anê.

Peris mẽ hprõ wa kot Pawre mar ã wa harênh

²² Tã nhũm pahiti Peris kot mẽ kot Jesus kôt amnhĩ xunhwýr xwýnhjê kot amnhĩ nhĩpêx ã mẽ omunh mex jakamã hãmri Pawre mar pa nê ho kapër xwýnhjê mã kãm:

—Nã hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mõ nê pøj pa wa ixprĩ hã mẽ ate tanhmã harênh toja ma nê rĩ kormã tanhmã Pawre jarênh to. Anê.

²³ Hãmri nê hpãnhã pôristi pytãr xwýnh mã Pawre jarê nê kãm:

—E mẽ ma akupým ixkre hwýr o tẽ nê kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nê kê hkrãmnhwýjaja mãmrĩ hwýr mẽmoj to mra kê kuku. Anê.

Hãmri nhũm mẽ kuma nê ma o tẽ nê akupým ixkre hwýr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwýr tẽ. Prõ haxwýja kêp Ijaew. Hixi pê na pre Turujire. Jakamã nhũm wa ma Pawre nhõrkwý hwýr wa tẽ. Nhũm Peris Pawre hã karõ nhũm kato nê wa hwýr tẽ nê wa kãm awjarê. Tanhmã wa kot amnhĩ to nê amnhĩ kaxyw Jesus Kris kôt hamxpër nê hkôt amnhĩ xãm prãm xàj hprĩ hã wa kãm harê.

²⁵ Nê wa kãm:

—Nã na htem Jesus Kris kôt amnhĩ nhĩpêx nê tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhýr kêt nê. Nê arĩ Jesus kot amnhĩ nhĩpêx kôt amnhĩ nhĩpêx o pa. Kojã Tirtüm nhỹrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarênh to. Mẽ pahte

tãm amnhĩ nhĩpêx xwÿnh ã mẽ pajarê rÿ mẽ pahte amnhĩ tomnuj xwÿnh ã mẽ pajarê. Anê.

Nhũm pre ã Pawre Peris mẽ Turujire wa kãm kapêr anê. Hãmri nhũm Peris tee ri ujarênhja ma nê kãm ma nê. Kot amnhĩ tomnuj o pa xwÿnh ã amnhĩ pumu nê ã kãm kapêr anhÿrja mar pyma nê. Hãmri nê Pawre mã kãm:

—E hãmri. Nà na pa wa ra ama. Mamrĩ ma akupÿm tẽn axà. Kot paj mẽmo arĩgro hã mẽmoj to anhÿr kêt nê axte amnhĩ wÿr atã karõ ka axte tanhmã wa inhmã axujarênh to. Anê.

²⁶ Nê htÿx hamaxpêr o:

—Nà kot paj mẽmo arĩgro hã axte amnhĩ wÿr hã karõ kê ixwÿr tẽn nê ixte kator prãm xaj inhmã amnhĩrer japêr. Anê.

Hãmri nê xatã amnhĩ wÿr hã karõ htã no nhũm aa kot kator kaxyw tanhmã kãm nê hkêt nê.

²⁷ Tã nhũm amgrà axkrut nê hapêx nhũm Pos Pesti pahi Peristi hpãnhã kêp mẽ õ pahi nê mẽ ho amnhĩptã. Jakamã nhũm Peris akupÿm õ krĩ hwÿr nojarêt nê Pawre mã ãhkra karo hkêt rãhã ma mõ. Na pre hamaxpêr o:

—Nà kot paj Pawre kator nhũm Ijaew ja hã ijarênh ma nê ixkamã gryk nê. Nà kwãr mẽ hagjênh xà hã ixkre kamã hkrĩ ho hkrĩ. Kot paj kator kêt nê. Anê.

Hãmri nê kãm ãhkra karo hkêt rãhã ma akupÿm õ krĩ hwÿr mõ. Jakamã nhũm Pawre arĩ ixkre kamã kêp prês nê hkrĩ ho hkrĩ.

25

Pawre Rõm wÿr hkrã ã harênh

¹ Tã nhũm pahi nyw Pos Pesti krĩ pê Sejarej wÿr mõn pøj. Hãmri nê kamã ri pa hã apkati axkrunêpxi pix nê ma Jerujarê hwÿr mõ.

² Hãmri nê hwÿr pøj nhũm Ijaew kwÿjaja omu nê hwÿr mra nê kãm Pawre ho kapêr nê hã hwÿr kurê kumrêx. Mẽõ patre krãhtũmjê mẽ Ijaew xaptãr tũmrejaja nhũm mẽ hwÿr mra nê kãm:

³ —Pa pahiti? E ot pa mẽ awÿr mra. Kwa xà kot ka Pawre hã karõ kê man awÿr mõ ka jar kot tanhmã amnhĩ tomnuj to hã hkukja nê ama? Anê.

No ãm hêx rom ã hã kãm kapêr anê. Kot hã karõ nhũm mẽ kot pry hã hpĩr kaxyw nhũm mẽ hêx rom ã kãm kapêr anê.

⁴ Hãmri nhũm mẽ kuma nê mẽ kãm:

—Tk. Kwa ra Sejarej kamã kêp prês nê hkrĩ kênã kot pa kêt amnhĩ wÿr hã karõ. Kot pa tokyx ma akupÿm hwÿr mõ.

⁵ Jakamã kêr ka mẽ axaptãr tũmjaja ma ixkõt mra. Hãmri nê Sejarej kamã inhmã tanhmã kot amnhĩ tomnuj to hã harênh to pa mẽ ama nê rĩ kormã tanhmã harênh to. Anê.

⁶ Hãmri nê mẽ kamã pa hã apkati grêre nê ma akupÿm Sejarej wÿr mõ. Hãmri nê hwÿr pøj nhũm apkati nhũm mẽ hkukjêr xà hã ixkre hwÿr tẽn nê mẽ kot mẽ mar xà hã mẽ hkrĩ xà kamã nhÿ nê amnhĩ wÿr Pawre hã karõ.

⁷ Nhũm mẽ hwÿr o tẽn nê ÿr nhũm hkwy kot Jerujarê rũm mẽ mõr xwÿnhjaja kãm hipok nê pahi Pos Pesti mã tanhmã ho kapêr to nê ho kapêr punuj tÿx nê. Kot tanhmã amnhĩ tomnuj to ho pa hã ho kapêr o kuhê. Nom mẽ kot ã kot amnhĩ nhĩpêx anhÿr ã omunh kêt tã ãm amnhĩ hkrã hkõt ri tanhmã ho hêx to.

⁸ Jakamã nhũm Pawre tee ri amnhĩ tã mẽ kot ho hêxja ma nê kãnhmã xa nê Pos Pesti mã amnhĩ tã aprã nê mẽ kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tĩrtũm nhÿ hã kapêr nhĩrõp ixãm nê hkwy m ri tanhmã amnhĩ nhĩpêx to hkêt nê. Nê mẽ ixte Tĩrtũm mã amnhĩ jarênh xà hã ixkre kamã ri tanhmã ixtÿx ri amnhĩ nhĩpêx to hkêt. Nê pahiti Sesti kapêrja pa pre hirõp ixãm nê tanhmã amnhĩ tomnuj to hkêt nê. Aa ixte ã amnhĩ nhĩpêx anhÿr kêt kumrêx. Anê.

⁹ Hãmri nhũm Pos Pesti kuma nê tanhmã hkukamã hamaxpêr to nê hamaxpêr o:

–Kwa nhÿ krÿ kamã kot pa we Pawre kot inhmã tanhmã amnhÿ jarënh toja ma nhÿm Ijaew ja hã kãm ixkÿnh japêr? Nà mẽõ krÿ pê Jerujarë hwÿr kot paj akupÿm mẽ hwÿr o mẽ nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

–E xà kot puj ma akupÿm Jerujarë hwÿr mẽ pa kamã axte mẽ kot ajarënh ma nê tanhmã ajarënh to nà? Anê.

¹⁰ Hãmri nhÿm kãm:

–Nà jar ixte pahiti Sesti nhÿ hã mẽ kot mẽ hkukjêr xà hã ixkre kamã inhÿr nê amnhÿ jarënh kênã. Jar na htem mẽ hkukja nê tanhmã ri mẽ mar to. Na pa pre tanhmã ixkwÿjê ho hkêr nê. Mẽmo kaxyw kot pa akupÿm mẽ hwÿr mẽ nê axte mẽ kãm amnhÿ jarë?

¹¹ Kop apu pa tanhmã ixte amnhÿ tomnuj to ronhÿx mẽ mãmri ja hã ixpÿ pa mẽ kêp tanhmã ri amnhÿ to hkêr nê. Nom mẽ kot ixto hêx pix o ã ijarënh anhÿr kênã. Jakamã mẽmo mÿrapê kot kaj mẽ ïhkram ijaxà? E Rôm kãm pahi maati Sesti hwÿr mãn inhmẽ pa kumã mãn amnhÿ jarë. Anê.

Pahi Sesti kêp pyka piitã hkôt mẽ ho amnhÿptar xwÿnh maati jakamã nhÿm Pawre kot mar kaxyw hwÿr hkrã.

¹² Hãmri nhÿm Pos Pesti kuma nê ma tẽ nê hã õ kôwenatôjê ma. Hãmri nê hã axpên mar pa nê akupÿm hwÿr tẽ nê kãm:

–Tôe. Nà kot paj pahi maati Sesti wÿr amê. Ra hwÿr akrã kênã. Anê.

Pos Pesti kot Akrip mã Pawre jarënh

¹³ Tã nhÿm apkati grêre nê hapêx nhÿm pahi hõ pê Akripja ma Pos Pesti hwÿr mẽ. Tõx Perênÿ mẽ wa mẽ.

¹⁴ Hãmri nê wa hwÿr pøj nê kuri wa pa hã apkati grêre nhÿm Pos Pesti wa kãm Pawre jarë nê wa kãm:

–E pa war amã mẽhõ jarë. Na pre pahi Perisja mẽ hagjênh xà kamã mẽhõ jaxà nê kormã kator kêt ri

nhÿm mẽ àpênh nê kator pa hpãnhã àpênh o amnhÿptã.

¹⁵ Tã ra ma Jerujarë hwÿr mẽ nhÿm Ijaew nhõ patre krãhtÿmjê mẽ mẽ àptar tÿmrejaja inhmã ho kapêr punuj rax nê. Nê ixte mẽ kãm hpÿr kaxyw inhmã hã àmnênh kãm hihtÿx nê.

¹⁶ Nom pa mẽ kêp ja kaga nê mẽ kãm: “Nà mẽ ixpê Rôm nhõ xwÿnhjaja na pa htem ã mẽ hipêx anhÿr kêt nê. Na pa htem mẽ kot ho kapêr xwÿnh noo mã tanhmã hkukjêr to nhÿm tanhmã amnhÿ tã àprãr to pa htem kuma nê rÿ kormã tanhmã mẽ ho. No na pa htem kormã mẽ kot tanhmã amnhÿjarënh to hkêr ri tanhmã mẽ ho hkêr nê.” Anê.

¹⁷ –Jakamã nhÿm prem kaxyw Se-jarej wÿr pøj nhÿm apkati pa hã mẽ hkukjêr kurê kumrêx. Nê mẽ kot mẽ hkukjêr xà hã mẽ hkrÿ xà kamã nhÿ nê ixte hkukjêr kaxyw amnhÿ wÿr Pawre hã karõ.

¹⁸ Na pa pre ijamaxpêr o: “Mãn pre tanhmã amnhÿ tomnuj tÿx to hã na mẽ inhmã harënh kaxyw.”

¹⁹ Anhÿr ã hkamnhÿx tã te kot amnhÿ to mex xwÿnh pyrãk. ãm kot mẽ hkôt amnhÿ nhÿpêx kêt pix ã nhÿm mẽ inhmã harë. Nê kaxyw mẽhõ htyk xwÿnh jarë. Mẽ kot kãm “Jesus” anhÿr xwÿnhja na xep hte mẽ kãm akupÿm htÿr ã harënh o pa. ãm ja pix na prem inhmã harë.

²⁰ Pa tee ri ixte nhÿri ixprÿ hã tanhmã mẽ kot harënh to hã mẽ mar kaxyw hkukamã ijamaxpêr. Hãmri nê hã Pawre kukja nê kãm: “Xà kot puj ma akupÿm Jerujarë hwÿr mẽ pa axte akwÿ kot tanhmã ajarënh to ma nê rÿ kormã tanhmã ajarënh to nà?”

²¹ Anhÿr tã no nhÿm akupÿm Jerujarë hwÿr mör kaga kumrêx nê amnhÿm Rôm kãm pahi maati Sesti jarë. Ixte ma hwÿr mẽnh nhÿm kot kãm amnhÿ jarënh nhÿm kot mar nê tãm tanhmã harënh to kaxyw. Jakamã pa kormã ixte hwÿr mẽnh kaxyw amnhÿ xa hã akupÿm mẽ hagjênh xà kamã haxà nhÿm arÿ hkrÿ ho hkrÿ. Anê.

²² Hãmri nhÿm Akrip kuma nê kãm:

—Xôwehe? Kwa na pa inhmã tanhmã kapër to mar prãm nê. Anê.

Hãmri nhũm kãm:

—Tôe. Nà kê apkati pa hã karõ ka tanhmã kapër mar to. Anê.

²³ Jakamã nhũm apkati nhũm Akrip mẽ htõx Perênĩs wa pahi hã mẽ ê mex jagjê nê ma mẽ hkukjêr xà hã ixkre hwýr wa tẽ. Pôristi krãhtũm kwýjê mẽ Sejarej kamã mẽ kot amnhĩ to rũnh xwýnh kwýjê mẽ nhũm mẽ hwýr akuprõ. Nhũm mẽ piitã Akrip mẽ htõx wa kêp pahi hã wa ê mex ã wa omu nê wa kamã no pyma nê. Hãmri nhũm Pos Pesti Pawre hã karõ nhũm mẽ haprõ nê ma mẽ hwýr o tẽ.

²⁴ Hãmri nhũm Pos Pesti omu nê Akrip mẽ htõx mẽ mẽ kot mar o hkrĩ xwýnhjê mã kãm:

—E pahihti Akrip mẽ mẽ apikuprõnh xwýnhjaja. Ota Pawre xa. Jerujarê kamã nê jar Sejarej kamã na pre hkwýjaja inhmã ho kapër rax nê. Hãmri nê ixte hpĩr kaxyw inhmã hã àmnênh kãm hihtýx nê.

²⁵ Nom mẽmoj mýrapê kot pa kêt kupĩ? Tã nhũm amnhĩm pahi maati Sesti jarê pa ma hwýr mẽnh kaxyw.

²⁶⁻²⁷ Nom na htem amarĩ pahi maati Sesti hwýr mẽ rênh kêt nê. Na htem kãm mẽ kot tanhmã amnhĩ tomnuj to hã kagà nê hwýr kagà mẽ ro hã mẽ kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyrãk. Jakamã na pa mẽ awýr o tẽ. Mẽ ate kapër mar nê kot tanhmã amnhĩ tomnuj to hã inhmã harênh nhũm ixte hã kagà nê pahi Sesti hwýr mẽnh kaxyw. Jakamã e mẽ kam nê hkukja nê ama nê tanhmã mar to. Anê.

26

Pawre kot pahihti Akrip mã amnhĩ jarênh

Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarênh toja ma nê Pawre mã kãm:

—E mãmrĩ mẽ inhmã amnhĩ jarê pa mẽ ama. Anê.

Hãmri nhũm kuma nê kãm amnhĩ jarênh kaxyw kãnhmã kãm ìhkra pê nê kãm:

²⁻³ —Hêxta waa nê. Nà na pa amã amnhĩ jarênh kaxyw nê ixkĩnh nê pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nê mẽ ixte tanhmã amnhĩ nhĩpêx to hã mẽ ixte axpên kukjêrta ate hã mẽ ixpumunh mex. Jakamã na pa amã amnhĩ jarênh kaxyw nê ixkĩnh nê. E tokyx anojarêt kêt nê inhma. Pa amã ixujarênh jatur xàm kumê ka aprĩ hã inhma.

⁴ Nà ixkwýjaja ra mẽ kot ixte amnhĩ nhĩpêx ã ixpumunh mex. Ixprĩre rũm ixpapxã kamã nê mãânên Jerujarê kamã ixte tanhmã amnhĩ nhĩpêx to ho ixpaja mẽ kot hã ixpumunh mex.

⁵ Ixpê mẽ hkwýr pê Parijew nhõ xwýnh kwýjê hã mẽ kot ixpumunh. Koja mẽ apu ja hã amã ijarênh japêr rý ko. Mẽ ixpê Parijew nhõ xwýnhjaja na pa htem amnepêm finat Mojes kot Tĩrtũm nhỹ hã mẽ inhĩgêjtê mã mẽmoj tã karõ xà hkôt amnhĩ nhĩpêx mex o ixkwýjê jakre.

⁶ —Amnepêm na pre Tĩrtũm mẽ inhĩgêjtê mã tanhmã amnhĩ jarênh to. Kot nhỹrmã mẽ piitã akupým mẽ ho htĩr ã amnhĩ jarê. Tã ixte ja kôt ijamaxpêr pix mýrapê na prem kot hã amã ixto kapêr kaxyw awýr ixto mõ.

⁷ Mẽ ixpê Ijaew nhĩgêjtê piitã na prem Tĩrtũm kapêr kôt hamaxpêr o ri pa. Kot nhỹrmã akupým mẽ ho htĩr ã amnhĩ jarênh kôt hamaxpêr týx o pa. Amnepêm finat Jako mẽ hkra pê 12jaja na prem hkôt hamaxpêr. Nê ixpê mẽ hkanrêhã mẽ htãmnhwý na pa hte ijaxwýja ja kôt ijamaxpêr týx rãhã ho ri ixpa. Tã ãm mẽmoj pixi mýrapê na ixkwýjaja ã amã ixto kapêr punuj anê.

⁸ Mẽ kot ixpyrà nê ja kôt hamaxpêr ã amnhĩ jarênh tã nhũm pre Tĩrtũm akupým Kra Jejus o htĩr nom nhũm mẽ ixkĩnhã ja kôt hamaxpêr kêt. Nom Tĩrtũm kêp akupým mẽ pahto pahĩr xwýnh kênã.

⁹ —Amnepêm kormã Jejus kôt ijamaxpêr kêt ri na pa pre ijaxwýja mẽ

uràk nê akupÿm htîr kôt ijamaxpêr kêt nê. Nê ixtÿx ijamaxpêr o: “Kot paj Jejus pê Najare nhô xwÿnh kôt mē kot amnhî xunhwÿr xwÿnhjê nhîpêx kati ho ixpa nhûm Tîrtûm ja hã ixpumu nhûm ja kãm mex nê.”

10 –Anhÿr jakamã pa pre hte tanhmã mē homnuj tÿx to ho ri ixpa. Jao Jerujarê kamã mē inhô patre krãhtûmjê nhÿ hã mē unê nê mē hagjênh xà kamã mē hagjênh o ixpa nhûm mē kot mē himex kaxyw mē hã inhmã amnhî jarê nhûm ja inhmã mex nê. Pa mē harênh ma nê ixkînh nê.

11 Pa pre hte xatã tanhmã mē hipêx to nê mē kot Jejus kaga hprãm xàj mē hipêx kati rûnh nê. Tîrtûm kapêr o mē ahkre xà hã ixkre piitã kamã pa pre hte ã mē hipêx anê. Nê mē kamã inhgryk tÿx jakamã ma krî hkwyê hkôt mē hapêr o ri ixpa. ã na pa pre mē hipêx anhÿr o ri ixpa.

12 –Tã axte ixte mē hkwyêjê pynênh nê mē hagjênh kaxyw ma Tamas wÿr mō. Mē inhô patre krãhtûmjê nhÿ hã ma mē hwÿr mō.

13 Hãmri nhûm ra kaxkwa nhîpôk ri myt nhÿ pa kormã pry hã inhmôr ri kaxkwa rûm mēmo nhîrãja pumu. Nhûm hirã htÿx o myt jakre nê ixtã ajêt pa ixkôt ri mē pa xwÿnhjê mē hipôk ri ixkuhê.

14 Hãmri nê mē inhmã ma xàj pykap ixrôrôk pa nhûm kaxkwa rûm mēhōj inhmã kapêr. Mē ixpê Ijaew kapêr o kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tÿx o ri apa? Nom na ka tee ri ã amnhî nhîpêx anhÿr kaprÿ.” Anê.

15 Hãmri pa tee ri kuma nê kãm: “Kwa mē atō na ka ã inhmã akapêr anê?” Anê.

–Hãmri nhûm inhmã: “Ixpê Jejus na pa amã ixkapêr. Pa na ka hte ixpê ixkôt mē kot amnhî xunhwÿr xwÿnhjê homnuj tÿx o apa ho te pa ixtomnuj tÿx pyræk.

16 E kànhmã xa. Ate inhmã tanhmã amnhî nhîpêx to ho apa kaxyw na pa amã amnhî to amnhîrît. Jarãhã ate ixpumunh xà hkôt ate mē kãm ma

ijarênh nê mē kãm ixkapêr jarênh o mē ahkre ho ri mē hkôt apa kaxyw na pa amnhî kaxyw ata. Kot paj nhÿrmã axte awÿr ixkato nê tanhmã amã ixkapêr to ka inhma nê ma mē kãm ixkapêr jarênh o ri mē hkôt apa. Ja kaxyw na pa amnhîm ata.” Anhÿr o inhmã kapêr.

17 Hãmri nê inhmã: “E kot paj Ijaew mē Ijaew kêt xwÿnhjê hwÿr amê nê anê mē omunh mex nê nhûm mēhō apîr kêt nê.

18 Kêr ka ma mē hkôt mē kãm ixkapêr jarênh o ri apa kê mēhprî hã kuma. Mē kot amnhî tomnuj kaga nê amnhî kaxyw ixkôt hamaxpêr nê ixkôt amnhî xunhwÿr kaxyw. Hãmri nhûm Tîrtûm ja hã mē omu nê ixkukwak ri amnhî katut kôt mē kot amnhî tomnuj piitã rênh pa nê axte kãm hamaxpêr kêt nê. Hãmri nê mē ho hkra. Kojã mē ã amnhî nhîpêx anê hãmri nê axte Satanasti nhÿ hã tanhmã amnhî nhîpêx to hkôt nê. Pãnhã Tîrtûm kôt pix mã amnhî nhîpêx o pa.” Anê.

19 –ã na pre Pahihti Jejus inhmã kapêr anê. Tã kot kaxkwa rûm inhmã ixapênh jarênh ã karōja pa pre mar tÿx nê hkôt amnhî nhîpêx rãhã ho ri ixpa pahi Akrip.

20 Jakamã na pa pre ma mē hkôt mē kãm kapêr jarênh o ri ixpa. Tamas kumrêx hwÿr nê hpãnhã Jerujarê hwÿr nê hpãnhã pika pê Jutej piitã hkôt Ijaew mã kapêr jarênh o ri ixpa. Tã hpãnhã Ijaew kêt xwÿnhjê mã harê. Na pa hte mē kãm ixkapêr o: “Kwa mē ate amnhî tomnuj kaga nê hpãnhã Tîrtûm kôt amnhî xunhwÿ. Hãmri nê hkôt pix mã amnhî nhîpêx o ri apa. Mē piitã mē kot apê hkwyê hã mē apumunh kaxyw.” Anê.

21 –ãm ja pix mÿrapê na pre ixkwÿjaja ixpynê. Tîrtûm mã amnhî jarênh xà hã ixkre kamã ixpynê nê ra mē kot ixpîr kaxyw.

22-23 Nom na hte Tîrtûm ixtãnopxa nê ixto ixihitÿx mex rãhã ho pa pa arî mē kãm harênh o ri ixpa. Mē kot amnhî to rûnh xwÿnhjê mã nê mē kêp amrakati xwÿnhjê mã nê mē

piitã mē kãm harēnh o ri ixpa. Finat Mojes mē Tirtũm nhỹ hã kapēr jarēnh o mē pa xwýnhjaja kot ra hkukamã tanhmã harēnh to xà hkôt pa hte mē kãm harēnh o ri ixpa. Nē mē kãm: “Tirtũm kot mē pakaxyw ãm xwýnhhta na pre amnhĩ xà htỹx kamã hamak kãm ty. Tã nhũm Tirtũm akupỹm ho htĩr. Kumrēx na pre akupỹm ho htĩr jakamã kumrēx na pre tanhmã mē kãm kapēr to ho ri mē hkôt pa. Mē kot amnhĩ kaxyw hkôt hamaxpēr nē hkôt amnhĩ xunhwýr xwýnh piitã uràk nē nhỹrmã Tirtũm mē wa õ krĩ kamã htĩr tũm nē pa ho pa hprãm xàj mē harēnh o pa. Mē ixpē Ijaew nē mãñnēn mē apē Ijaew kêt xwýnhjaja nhũm pre ã mē pajarēnh anē.” Anhỹr o pa hte mē kãm harēnh o ri mē hkôt ixpa pahi Akrip. Anē.

²⁴ Nhũm Pawre kormã kot mē kãm amnhĩ jarēnh par kêt ri nhũm Pos Pesti tee ri tanhmã Jejus jarēnh to hã kuma nē kàx pē kãm kapēr nē kãm:

—Kwa na ka akrã axpã nà? Pēr ate kagà pumunh tỹx kurē akrã pipãnh pyràk o ri atỹx ã ri mē inhmã axu-jarēnh anē. Anē.

²⁵ Hãmri nhũm kãm:

—Nà ixkrã pipãnh kêt. ãm hãmri na pa mē amã awjarē.

²⁶ Jerujarē kamã na prem Jejus pĩ nhũm mē piitã omu. Tã nhũm akupỹm htĩr hãmri nē hpimxur pē ri pa hkêt nē. Na pre mē ohtô nē akupỹm htĩr kãm omu. Pahi Akrip ra kot ja mar mex jakamã na pa ixãmnhĩx ã mē amã harēnh anē.

²⁷ Anhỹr o kãm kapēr hãmri nē pahi Akrip wýr rĩt nē kãm:

—Kwa pahi Akrip. Xà Tirtũm nhỹ hã kapēr jarēnh o mē pa xwýnhjaja kot Jejus kukamã tanhmã harēnh toja kôt na ka hte ajamaxpēr? Nà ra hkôt ajamaxpēr kēnã. Ra ixte ajamaxpēr kôt apumunh mex. Anē.

²⁸ Hãmri nhũm tee ri kuma nē kãm:

—Tk. Kwa xà kot kaj ã inhmã akapēr anē pa ama nē apyrà nē amnhĩ kaxyw Jejus kôt ijamaxpēr? Nà na ka ixte ã ate Jejus jarēnh

anhỹrja kôt ijamaxpēr ã ixkamnhĩx kaprỹ. Anē.

²⁹ Hãmri nhũm Pawre kãm:

—Ko. Kot kaj ixpyrà nē amnhĩ kaxyw hkôt ajamaxpēr pa ixkĩnh nē. Nom kaxipix kêt. Mē apiitã mē ate inhmar o akrĩ xwýnhjaja mãñnēn. Mē ate mē ixpyrà nē Jejus kôt amnhĩ xunhwýr na inhmã hprãm. ãm ixpyrà nē mē apē prēs pix na inhmã hprãm kêt. Anē.

³⁰ Hãmri nhũm pahi Akrip nē htõx Perēnĩs nē pahi Pox Pesti nē mē hkôt mē mör xwýnhjaja kãnhmã kuhē nē ma mrar kaxyw.

³¹ Nē nojarēt nē Pawre hã axpēn mã:

—Kwa tanhmã kot amnhĩ tomnuj to hkêt kēnã kot kêt mē haxà rỹ kupĩ. Anē.

³² Hãmri nhũm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwýr hkrã hkêt ronhỹx pu mē ra kator. Anē.

27

Mē kot Rõm wýr Pawre mēnh ã mē harēnh

Atre 23.11, 25.12

¹ Tã nhũm mē pyka pē Itar wýr pahi maati Sesti hwýr Pawre mēnh kaxyw. Itar kamã mē õ krĩ maati na pre kēp Rõm. Jakamã nhũm Pawre mē mē kot mē hãgēnh xà kamã mē hkrĩ xwýnh mē ho hpimràatã ma mē o mra nē pôristi krãhtũm Jurti nhĩhkram mē haxàr pa. Kot ma Rõm wýr mē o mör kaxyw. Jurtija kēp Itar kamã mē õ pahi maati hã pôristi krãhtũm nhũm prem ma mē kãm mē o mör kaxyw ãhkram mē hãgēnh pa. Ixpē Rukre na pa pre inhmã Pawre hkôt inhmör prãm nē mē hã ajēt nē mē hkôt mō.

² Tã pa mē ra inhnojarēt nhũm Aris-tak haxwýja ma mē ixkôt mō. Pyka pē Masetõn nhõ xwýnh na pre. Õ krĩ pē na pre Tesarõn. Jakamã nhũm ma wa ixkôt mō. Hãmri nhũm pãrja nojarēt. Atamĩx rũm pãr nhũm ra As wýr nojarēt pa mē hwýr inhgiêx pa nē ma kamã mō.

³ Hāmri nhūm apkati pa mẽ krī pē Sito hwỳr pōj nē hã pàr xi. Nhūm pōristi krāhtūm Jurtija Pawre ho mex jakamã pa mẽ Sito hwỳr pōj nhūm Pawre mã anē pa mẽ ixkato nē ma ixkràmnhwỳjê hwỳr mra nē mẽ kutã apku nē ma akupỳm pàr wỳr mra.

⁴ Tã pa mẽ axte mō. Nom nhūm kōk mẽ ixkutã àpêr tỳx jakamã pa mẽ umaj juk nē gō hipōk kupu ho mō. Gō hipōk pē Sipreja pa mẽ upōk rūm ma hkupu ho mō nhūm mẽ inhnê kōk pē àmnàr mex nē.

⁵ Hāmri pa mẽ mōō nē pyka pē Siris mẽ Pãpir wa hakrenh o mō nē pyka pē Ris kamã Mira hwỳr pōj nē hã pàr xi nē ijapōx pa.

⁶ Hāmri nhūm pōristi krāhtūmja Aresãnrir rūm pàr pumu nhūm ra Itar wỳr nojarêt. Pa mẽ hwỳr inhgjêx kurê kumrêx hāmri nē ma kamã axte mō.

⁷ Hāmri nhūm pàrja kōk kutã tee ri mōr prêprêk kaxyw nē ãm amnhĩm hprĩ nē mōr ã apkati xohtô nē pa mẽ tokyx ixpōx kêt nē. Tã Sito hwỳr ixàhtêp o mō nom nhūm kōk mẽ ixkutã hihtỳx rax kumrêx. Jakamã pa mẽ juk nē gō hipōk pē Kret jatur xà jahpa nē ma kape hã mō nhūm mẽ inhnê kōk pē àmnàr mex nē. Hāmri pa mẽ ma Sarmōn jakrenh o mō

⁸ nhūm pàr kōk kutã amnhĩm hprĩ nē kape hã mō. Pa mẽ mō nē jatã Rasej tã pàr nhĩkwỹ xà mex wỳr pōj nē kamã pàr xi.

⁹ Nom pàr kot amnhĩm hprĩ nē mōr jakamã nhūm ra kōk xàpêr tỳx nē kamã kry htỳx ã mytwrỳ mẽ ixtã kato. Mytwrỳja ã mẽ kot kōk xàpêr tỳx pymaj nhỹhỹm pàr kãm mrar kêt. Jakamã nhūm Pawre tokyx mẽ inhmōr nê pàr nhõ xwỳnhjê mã kapêr kãm hihtỳx nē mẽ kãm:

¹⁰ –Kwa pu mẽ jar kōk xàpêr tỳx jamãr o ri papa nà. Kê kōk mẽ kry htỳxja hapêx pu mẽ rĩ kormã axte mō. Kot puj mẽ anhỹr kêt nē kōk xàpêr tỳx kãm mō nhūm nhỹri pàrja mẽ pahpê axà nhūm gō mẽ apê mẽ akukrêx o hapêx pa. Pu mẽ pajaxwỳja axkaprã.

¹¹ Anhỹr o mẽ kãm kapêr tã no nhūm mẽ kuma nē ãm kuma. Pàr

pãm mẽ pàr o mrar xwỳnh wa nojarêt tỳx nē kapêr ma nē ãm kuma. Nhūm pōristi krāhtūm wa nojarêt ã wa kuma nē haxwỳja Pawre mar kêt nē.

¹² Nhūm mẽ kot pàr nhĩkwỹ xà mex jarênhja mẽ kot mex ã harênh tã mẽ kêp omnuj nē. Hã na wrỳk nē kōk xàpêr tỳx nhūm mẽ kêp omnuj tỳx nē. Jakamã nhūm mẽ piitã Pawre rom ra nojarêt nē. Mẽ kãm tokyx krī pē Wẽnĩs wỳr hpōx prãm jakamã nojarêt tỳx nē. Gō hipōk pē Kret kamã na Wẽnĩsja. Nē kamã kōk xàpêr tỳx kêt jakamã nhūm mẽ hwỳr nojarêt nē axpên mã:

–E kwa pu mẽ tokyx Wẽnĩs wỳr mō nē kamã mãn kōk xàpêr tỳx japêx jamãr o papa. Anê.

Hāmri nē piitã hwỳr nojarêt.

Kōk kot pàr o àpêr tỳx ã harênh

¹³ Tã nhūm kahpa hkôt kōk xàpêrja katat kôt kawax pē apê nhūm mẽ kamã ama nē axpên mã:

–E hāmri. Tokyx pu mẽ mō. Anê.

Jakamã pa mẽ pàr o htỳx xà ho api nē axte mō. Ma gō hipōk pē Kret jakãr ã mō.

¹⁴ Puh nhūm na wrỳ nē kōk àpêr tỳx kumrêx. Mẽ kot kãm “kōk xàpêr tỳx maati” anhỹr xwỳnhja gō hipōk rūm mẽ ixto àpêr tỳx kumrêx o mō.

¹⁵ Hāmri nē mẽ ixkutã àpêr tỳx nhūm pàr tee ri kutã hkarôt. Pa mẽ kormã Wẽnĩs wỳr ixpōx kêt ri ra ho awjanã nhūm amnhĩ krã hkôt kōk kôt mō.

¹⁶⁻¹⁷ Hāmri nē mō nē gō hipōk pē Krawtijahpa nē hakàr ã mō nhūm mẽ inhnê kōk pē amýtã nhūm amnhĩm hprĩ nē kawax pē apê. Hāmri pa mẽ pàr krare kot mẽ ixkôt mōr xwỳnhja pa mẽ kumỳ nē pàr rax kãm kumê. Ra kamã gō rax tã pa mẽ ixkarôt tỳx nē nê hkapĩr pa nē ho api nē pàr rax kãm kumê nē ho htỳx. Hāmri nē hpãnhã kōk xàpêr tỳx pymaj pàr rax kaxpre hpa. Hāmri nē kōk kot pykahti grã maati pē Sirteja wỳr pàr mênh nhūm kot amnhĩ to pykahti xãm o htêm pymaj nhūm mẽ kot ho mrar xà

hã kupêxê rax o wrÿ nhũm pàr amnhĩ krã hkôt ma kôk kôt mō.

18 Tã nhũm apkati nhũm kôk arĩ mẽ ixpê pàr o àpêr tÿx nê arĩ na wrÿk rax rãhã nê. Jakamã pa mẽ pàr àr pymaj nê mẽ hikukrêx kwÿ gôx kãm rênh pa. Kaxkritre nê àr kêt kaxyw.

19 Tã nhũm apkati pa mẽ hpãnhã pàr kre kamã ri nê hikukrêx kwÿ rê nê gôx kãm kurê.

20 Nhũm kôk arĩ àpêr tÿx kumrêx ã apkati xohtô nê. Nê na wrÿk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

21 Hãmri nê mẽ inhmã ma xàj ixàpkur kêt ryy nê. Hãmri nhũm Pawre tee ri ja hã mẽ ixpumu nê pàr nhô xwÿnh wa kãm kapêr nê wa kãm:

—Kwa na pa pre tee ri Kret kãm man mẽ pamōr nê war amã ixkapêr. Kop apu mūtãr mãn mẽ kuri arĩ ri mẽ hkôt mẽ papa ronhÿx pu mẽ pajamakêtkati nê paxãmnhĩx ri papa. Tã nhÿx pu mẽ ri mẽ hikukrêxja gôx kãm rênh par kêt nê.

22 Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtō pahtyk kêt nê. ãm pãrja pix koja axà nê hapêx.

23 Ixpê Tirtũm krajê hō na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamãt ja kamã ixwÿr kapêr o wrÿk xwÿnhjê hō mẽ nhũm ixwÿr wrÿ nê inhmã awjarê

24 nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akã hkĩnh pê ma Itar kamã Rōm wÿr mō nê pōj nê pahĩ maati Sesti pumu nê kãm amnhĩ jarê. Jakamã koja Tirtũm akôt mẽ mōr xwÿnh piitã omunh mex nê ka mẽ atō tanhmã amnhĩ to hkêt nê.” Anê.

25 —ã kot inhmã kapêr anhÿr jakamã kwa mẽ amnhĩ to htÿx nê tee ri amnhĩ kukamã ajamaxpêr kêt nê. Tirtũm kapêr o wrÿk xwÿnh kot inhmã ujarênh xà hkôt koja Tirtũm ã

mẽ panhĩpêx anê. Ixte ja hã omunh mex kênã.

26 Koja xep kôkja nhÿri gô hipôk ã pàr krakrak pa. Nom mẽ papajaja kot puj mẽ pahkã hkĩnh pê hwÿr pahpôx pa. Anê.

27 Tã pa mẽ mōō nê ã inhmōr anhÿrja ã ixtã semãn axkrut nê ra gô rax pê Ariax kôt axà. Kamãt kãm hkôt axà nhũm kôkja arĩ pàr o apêr tÿx rãhã ho mō. Hãmri nhũm kôt ã kamãt nhũm pàr o mrrar xwÿnhja ra pàr kot pykahti grã htêp ã hkãmnhĩx.

28 Jakamã nhũm mẽ gô xupÿm pumunh xà ho gô pumu nhũm upÿm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gô kokwe htêp o mōr ã omu.

29 Hãmri nê kot kêr kuranh nê hã pikrakrak pymaj katê rũm ho htÿx xà ho 4 nê gôx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ.

30 Hãmri nhũm pàr kãm mẽ àpênh xwÿnhjaja tanhmã hamaxpêr to nê hêx rom pàr krare ho wrÿk o tẽ. Mẽ kot mẽ ixrer nê ahte xarmã mōr nê rêr nê tokyx gô hipôk wÿr hpôx kaxyw. No ãm hêx rom te mẽ kot axte pàr krã rũm ho htÿx xà hō mênh kaxyw pyrãk o amnhĩ nhĩpêx nê kaxyw ho wrÿk o tẽ.

31 Nom nhũm Pawre mẽ hamaxpêr ã mẽ omu hãmri nê pōristi mẽ mẽ hkrãhtũm mã mẽ harê nê mẽ kãm:

—Kwa koja mũjjaja mẽ pare nê ahte pàr krare kamã xarmã mōn rê ka mẽ apikaprãr pa kãm ga. Anê.

32 Hãmri nhũm mẽ tee ri kuma nê mẽ hwÿr hprôt nê mẽ kêp pàr krare pê hkaxpre xà jakã nhũm gôx kãm tẽm nê ma gô hkôt hkaprÿn mō.

33 Tã hãmri nhũm ra myt kator o mō nhũm Pawre akupÿm mẽ piitã mẽ ho mẽ hamaxpêr o hihtÿx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nê axàpkur kêt o atã semãn axkrut.

34 E pu mẽ mẽmoj krê nê ho amnhĩ xihtÿx. Kot puj mẽ pahtō pahtyk kêt

ně. Ām hāmri na pa mẽ amā ixkapēr.
Aně.

³⁵ Hāmri ně mẽmoj py ně mẽ noo mã
Tirtũm mã harě ně hkur o xa

³⁶ nhũm mẽ ja hã omunh xà hkôt
akupỹm tãm hamaxpēr o mō. Hāmri
ně amnhĩm mẽõ hkwy jamỳ ně kumě
kuku.

³⁷ Pār kãm mẽ inhmōr xwỳnhjaja na
pa prem ixpê 276.

³⁸ Tã pa mẽ ra ixàpkur pa. Hāmri
ně pār kaxkrit kaxyw mẽ apkur xà hã
mẽmoj y jakrêxja gôx kãm hkapĩr pa.

Pār mẽ kêp pikrakrak ã harěnh

³⁹ Tã nhũm ra myt kator mex ně
nhũm mẽ amnhĩ kukamã gô hipôk
pumu ně axpẽn mã:

—Kwa nhỹ pika na mũj wehe? Aně.

Hāmri ně nhỹri hakàx ã amnhĩm
nōr xà mex pumu ně hwỳr pār o mōr
kaxyw hã axpẽn ma.

⁴⁰ Hāmri ně kaxyw pār o htỳx xà
jakà nhũm axrê ně gôx kãm rôrôk pa.
Ně pĩ ho pār o juk xà nhõ xê xàja nhũm
mẽ mãnẽn krãhta. Hāmri ně akupỹm
mrar xà hã kupêxê nhõ nhũm kôk ho
hikot ně ma gô jakàx wỳr o mō.

⁴¹ Nom nhũm pār kormã hakàx pê
awry hã mōr ri amnhĩ to kokwe kura
ně pyka nhĩmôk ã nō nhũm mẽ tee ri
kot hkaxàr ně akupỹm gô xupỹm mã
mẽn h kaxyw. Nom nhũm gô kot pār
nhĩxô htak tỳx kurê nhũm mẽ ixpê
pikrakrak par o mō.

⁴² Jakamã nhũm pōristijaja tee ri
omu hāmri ně ra mẽ kêp prêsjê nhĩmex
kaxyw. Mẽ kot gôx kãm rôrôk ně gô
hipôk wỳr hpa ho nana ně mẽ kêp
pikunor pymaj kot mẽ himex kaxyw.

⁴³ Nom nhũm mẽ hkrãhtũmja kãm
Pawre pĩr prãm kêt jakamã ja nê mẽ
hkurê ně mẽ inhmã:

—E mẽ ate apa ho gô rěnh mex
xwỳnhjaja. Akumrêx mra ně mrõ ně
ho nana ho mra ně rê.

⁴⁴ No mẽ ate apa ho nana punuj
xwỳnhjaja kêt ka mẽ tapti rỳ pār
kukrêx õ mỳ ně hã ajêt ně hã ma mōn
rê. Aně.

Hāmri pa mẽ ã amnhĩ nhĩpêx aně ně
ixpiitã ixkà hkĩnh pê ixrêr pa.

28

*Gô hipôk pê Maw kamã mẽ pa hã
mẽ harěnh*

Makre 16.17-18

¹ Tã pa mẽ ixpiitã ixkà hkĩnh pê
ixrêr pa. Nhũm gô hipôk ã mẽ pa
xwỳnhjaja mẽ inhmã gô hipôk nhĩxi
jarê nhũm xep kêp Maw.

² Nhũm Maw nhõ xwỳnhjaja mẽ ixto
mex ně. Nhũm axte na wrỳk rax
ně nhũm kry htỳx kumrêx nhũm mẽ
ixkamã ukapĩr ně mẽ inhmã kuto ně
mẽ inhmã kapêr mex ně.

³ Hāmri nhũm Pawre kuwy kaxyw
ri pĩ kawrà ho mra ně kuwy hwỳr o tẽ
ně hã haxwỳr o xa. Hāmri nhũm kagã
xoprê õ wẽnên xihtỳxja kuwy kagro
pymaj pĩ rũm kato ně ãhkra hã kunha
ně hã àpêr o ajêt.

⁴⁻⁵ Hāmri nhũm Pawre omu ně
amnhĩ nê ho apê ně kuwy kamã
kumě nhũm kamã tẽm ně xêt pa.
Hāmri nhũm gô hipôk nhõ xwỳnhjaja
tee ri ja hã omu ně axpẽn mã:

—Kwa ga mẽmyti mũj pumu. Mãn
kêp mẽ hpar o pa xwỳnh na. Hã na
kagã õ wẽnên xihtỳxta kunha. Nà koja
ty ně rĩ amnhĩ pumu. Ra hkà hkĩnh
pê gô rũm mẽ pahwỳr rêt tã koja tã ty
kãm ga. Aně.

⁶ Hāmri nhũm mẽ tee ri kot tanhmã
amnhĩ to hã hkamnhĩx ně hamãr o
kuhê. à htỳx ně ãhkra hikot rỳ htyk
kurê kumrêx ã hkamnhĩx tã nhũm
tanhmã amnhĩ kamã hamak to hkêt
ně. Ām htỳx ri hkĩnh ně kapêr ně
hpikunhar o ri mra. Hāmri nhũm mẽ
tee ri omu ně axpẽn mã:

—Kwa tanhmã kot amnhĩ tore hã.
Kêp mẽ hpar o pa xwỳnh kêt. Mãn kêt
kaxkwa kamã mẽpahpãmjê hõ nà? Hã
na kagã kunha nhũm tanhĩ to hkêt ně.
Aně.

⁷ Nhũm gô hipôk ã mẽ õ pahшти pê
Puptija. Ōrkwỹ hã jawỳ jakamã nhũm
amnhĩ kôt mẽ ixwỳ pa mẽ ma hkôt
mō ně kuri hkôt ixpa ho ixtã apkati
axkrunêpxi nhũm mẽ ixto mex ně.

⁸ Nhũm ra Pupti nhĩpêxà kêp à ně
nō. Kà kagro htỳx ně haôk. Hāmri
nhũm Pawre hwỳr tẽ ně omu ně

hã ihkra xi nẽ ho Tirtũm wỳ nhũm akupỹm ho mex kurê kumrẽx.

⁹Hãmri nhũm gô hipôk nhõ xwỳnhja harẽnh ma nẽ Pawre hwỳr mẽ à xwỳnh piitã o mra nhũm mẽ omu nẽ Tirtũm nhỹ hã akupỹm mẽ ho mex pa.

¹⁰⁻¹¹Hãmri nhũm gô hipôk nhõ xwỳnhjaja mẽ ixto mex rax nẽ.

Pawre axte Rõm wỳr nojarêt ã harẽnh

Rõmãn 1.10-12, 15.30-32

Tã pa mẽ gô hipôta kamã ixpa hã mytwrỳ axkrunẽpxi. Hãmri nhũm kôk xàpêr tỳxta hapêx pa mẽ axte inhnojarêt nẽ ma mỗ. Pàr õ kamã hpãnhã mỗ. Aresãnrir rũm pàrja pa mẽ hpãnhã kamã mỗ. Mẽ kot kãm “sãnti pihpo” anhỹr xwỳnhhta kamã. Na pre gô hipôk kamã haxwỳja kôk xàpêr tỳx hapêx jamãr xa hã hikwỳ htã ra axte nojarêt. Hãmri nhũm gô hipôk nhõ xwỳnhja ma mẽ inhmõr xà hã mẽ inhmã mẽ ixàpkur xà hkwỳ nhõr rax nẽ. Hãmri pa mẽ pàr wỳr inhgiẽx pa nẽ ma kamã mỗ.

¹²Mỗõ nẽ Sirakus wỳr pøj nẽ hã pàr xi. Hãmri nẽ krĩja kamã mẽ ixtã apkati axkrunẽpxi nẽ axte mỗ.

¹³Mỗõ hãmri nẽ Rekre hwỳr pøj nẽ hã pàr xi. Hãmri nẽ kamã mẽ ixtã apkati. Nhũm ra kahpa hkôt kôkja kawax pẽ àpêr mex jakamã pa mẽ ma hkôt mỗ. Nẽ mẽ ixtã apkati axkrut nẽ Potew wỳr pøj nẽ hã pàr xi.

¹⁴Hãmri nẽ pàr rũm ijapøj nẽ krĩ kamã Jesus kôt mẽ ixtõ nẽ htõx kwỳjẽ pumu nhũm mẽ amnhĩ wỳr mẽ ixwỳ. Pa mẽ ma mẽ hkôt mra nẽ mẽ hkôt ri ixpa hã ixtã ù semãn. Hãmri nẽ ma Rõm wỳr hpãnhã ixpar o mỗ.

¹⁵Hãmri nẽ kormã amỳm inhmõr ri nhũm Rõm kãm Jesus kôt mẽ ixtõ nẽ ixtõxjaja mẽ ijarẽnh ma nẽ man mẽ ixkutã mra. Ma krĩ pẽ Prasxi Apja mẽ “Wẽn Pijakrunẽpxi” anhỹr xwỳnh jarẽnhja wa hwỳr mẽ ixkutã mra. Hãmri pa mẽ axpẽn kaxpa nhũm Pawre mẽ omu nẽ hkĩnh nẽ. Nẽ mẽ hã Tirtũm mã amnhĩ jarẽ nẽ kãm:

—Pa Tirtũm? Nà ãm hãmri na ka mẽ ixkutã jajẽ rẽ. Na pa mẽ omu nẽ

ixkĩnh nẽ. Nà amex o amex Tirtũm. Anẽ.

¹⁶Hãmri pa mẽ ma mẽ hkôt Rõm wỳr mỗ nẽ pøj. Jatã Itar kãm Rõm wỳr pøj. Hãmri nhũm pôristi krãhtũm Pawre mã:

—E kot paj mẽ hagjẽnh xà kamã ajaxàr kêt nẽ. Kot kaj amã nhỹri ixkre kamã apa hprãm nẽ mamrĩ kamã apa. Nom koja pôristi hõ akôt pa ho pa.

Anhỹr jakamã nhũm nhỹri ixkre kamã pahiti Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harẽnh

Atre 17.5-6

¹⁷Tã nhũm Pawre Rõm kamã hã apkati axkrunẽpxi nẽ amnhĩ wỳr Ijaew xàptàr tũmrejê hwỳ nhũm mẽ hã akuprõ nhũm mẽ kãm amnhĩ jarẽ nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Nà na pa pre mẽ panhĩgêtjê kapêr nhĩrõp tanhmã ixãm to hkêt nẽ rỳ ixte tanhmã mẽ pahkwỳjẽ hõ hto hkêt tã nhũm mẽ pahkwỳjaja amarĩ ixpynẽ. Jerujarẽ kamã ixpynẽ nẽ Rõm nhõ xwỳnhjẽ nhĩhkram ijaxà.

¹⁸Hãmri nhũm mẽ ixte amnhĩ nhĩpêx ã ixkukja nẽ tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mẽ kãm ixkator prãm nẽ.

¹⁹Nom nhũm mẽ pahkwỳjaja kãm ja mex kêt jakamã pa pre jar pahi maati Sesti kot ixte kãm amnhĩ jarẽnh ã inhmar kaxyw amnhĩm harẽ nẽ man hwỳr mỗ. Kot paj tanhmã kãm mẽ pahkwỳjẽ ho ixkapêr punuj to hkêt nẽ. ãm ixte amnhĩ tã tanhmã mar to hpix kaxyw na pa hwỳr mỗ.

²⁰—Tã pa amnhĩ wỳr mẽ awỳ. Ixte mẽ amã amnhĩ jarẽnh kaxyw. Mẽ pahkaprĩ xwỳnhhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkôt ijamaxpêr pix mỳrapê na prem ã kàx o ixkaxpre anẽ. Anẽ.

²¹Hãmri nhũm mẽ kuma nẽ kãm:
—Nà jar tanhmã ajarẽnh kute hkêt. Na pre Jutej kamã mẽ pahkwỳjaja

tanhmã ajarēnh to hã kagà nẽ mẽ ixwỳr mēnh kêt nẽ. Nẽ ham mẽ kurũm mẽ hpôx xwỳnhjaja na prem tanhmã mẽ inhmã ajarēnh to hkêt nẽ.

²² No na xep hte pyka piitã hkôt mẽ kãm mẽ ate Jejus kôt amnhĩ xunhwỳr xwỳnhjê kurê nẽ. Na pa pre mẽ ajarēnh ma nẽ mẽ inhmã axujarēnh mar prãm nẽ. Anẽ.

²³ Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nẽ nhũm mẽ kãm awjarê. Mẽ kãm ujarēnh ry nẽ. Nẽ ho kamàt. Nẽ mẽ kãm:

—Nà mẽ pahte amnhĩ wỳr kamã pajamak o papa xwỳnh Jejusja. Kot kaj mẽ atõ amnhĩ kaxyw hkôt ajamexpēr nẽ hkôt amnhĩ xãm nhũm Tĩrtũm ja hã apumu nẽ ato hkra. Anẽ.

Nhũm pre ã mẽ kãm kapēr anẽ. Nẽ finat Mojes kot Tĩrtũm nhỹ hã Jejus kukamã tanhmã hã kagà htoja nhũm mẽ kãm harê. Nẽ Tĩrtũm nhỹ hã kapēr jarēnh o mẽ pa xwỳnhjaja kot tanhmã hã kagà htoja nhũm mẽ kãm harê.

²⁴ Hãmri nhũm mẽ hkwỳjaja kuma nẽ hkôt hamaxpēr nẽ amnhĩ kaxyw Jejus kôt hamaxpēr nẽ hkôt amnhĩ xunhwỳ. No nhũm mẽ hkwỳjaja kuma nẽ ãm kuma nẽ kãm axte mar prãm kêt nẽ.

²⁵⁻²⁹ Jakamã kànhmã kuhê nẽ nojarêt nhũm Pawre mẽ kãm:

—Nà amnepēm na pre Tĩrtũm finat Ijaisti mã tanhmã kapēr to. ỹ hã kot mẽ panhĩgêjtjê mã tanhmã kapēr jarēnh to kaxyw. Tĩrtũm Karõ nhỹ hã kot mẽ kãm kapēr nẽ tanhmã mẽ harēnh to kaxyw. Te Tĩrtũm tãm mẽ kãm kapēr pyræk mẽ kãm kapēr. Nẽ ãm hãmri tanhmã mẽ pahkwỳjê jarēnh to. Na pre mẽ kãm:

E Ijaisti. Kêr ka ma akwỳjê hkôt ri mẽ kãm tanhmã ixkapēr jarēnh to ho ri apa.

Nẽ mẽ kãm: “Kot kaj mẽ ajamak o axumar tỳx tã aprĩ hã ixkapēr mar kêt nẽ.

Nẽ mẽ ano ho arĩt tỳx tã aprĩ hã ixte amnhĩ nhĩpêx ã ixpumunh kêt nẽ.

Mẽ amã ixkapēr mar prãm kêt jakamã te mẽ ate mar pymaj amnhĩ jamak pro pyræk o amnhĩ nhĩpêx o ri apa.

Nẽ mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyræk o amnhĩ nhĩpêx o ri apa.

Jao amnhĩ kaxyw ixkôt ajamexpēr kêt nẽ.

Kop mẽ amã ixkapēr mar prãm ronhỹx ka mẽ aprĩ hã inhmar tỳx nẽ.

Nẽ aprĩ hã ixte amnhĩ nhĩpêx ã ixpumunh mex nẽ.

Jao amnhĩ tomnuj kaga hpa nẽ ixkôt amnhĩ xunhwỳ.

Pa ja hã mẽ apumu nẽ mẽ ato mex nẽ.

Tã ka mẽ ã amnhĩ nhĩpêx anhỹr kêt nẽ.” Anhỹr o kêr ka mẽ kãm ixkapēr jarēnh o ri mẽ hkôt apa Ijaisti. Anẽ.

Na pre ã Tĩrtũm mẽ panhĩgêjtjê kaxyw Ijaisti mã kapēr anẽ nhũm ô ri mẽ kãm ujarēnh o pa nẽ mẽ pamã hã kagà. Jakamã kwa mẽ okora. Kêr ka mẽ jajê pyræk nẽ ã amnhĩ nhĩpêx anhỹr hkêt nẽ. Kwa mẽ inhma nẽ inhmar tỳx nẽ. Ijaew kêt xwỳnhjaja kot kapēr marja na ra Tĩrtũm kãm hprãm nẽ. Jakamã koja mẽ hwỳr mẽ kot kapēr jarēnh o mẽ pa xwỳnh kwỳjê rẽ nhũm mẽ hkôt mẽ kãm ujarēnh o pa nhũm mẽ kuma nẽ mẽ akurom kãm mar prãm nẽ. Anẽ.

Hãmri nhũm mẽ kuma nẽ hapôx pa nẽ ma akupỹm axpên mã tanhmã kapēr jarēnh to ho mra.

³⁰ Hãmri nhũm pahi maati Sesti tokyx amnhĩ wỳr Pawre hwỳ nẽ tanhmã mar to hkêt nhũm õrkwỹ kamã kêp prês nẽ pa ho hã amgrã axkrut. Nẽ tãm õrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nẽ hwỳr mra nhũm amnhĩ wỳr mẽ omu nẽ hkĩnh nẽ.

³¹ Na pre hte amnhĩ wỳr mẽ kuwỳ
nẽ mẽ kãm Tĩrtũm kapẽr jarẽnh o hkrĩ.
Mẽ kot Tĩrtũm Kra Pahihti Jejus Kris
kõt amnhĩ xunhwỳr nhũm Tĩrtũm kot
ja hã mẽ omunh nẽ amnhĩ katut kõt
mẽ kot amnhĩ tomnuj rẽnh par nẽ
mẽ ho hkra hã mẽ kãm ujarẽnh o
hkrĩ. Nẽ mẽ kot hkõt amnhĩ xunhwỳr
xwỳnhjê jahkre. Tanhmã mẽ kot Jejus
kõt amnhĩ nhĩpêx mex to ho pa hã mẽ
kãm karõ ho hkrĩ. Hãmri nhũm mẽhõ
ja nê tanhmã kãm kapẽr to hkêt nẽ.

Tã ãm ja pix Teopre. Ixpê Rukre
na pa awỳr kagàja nhĩpêx nẽ kumẽ.
Nẽ kamã amã tanhmã mẽ pahkwỳjê
jarẽnh to. Tã ãm ja pix na hapêx.

Rõmãn Pawre kot Rõm kãm Jejus kõt hkwyjê hwÿr kagà nê mẽn

Kagà ja na pre Pawre hipêx. Kêp Jejus nhÿ hã mẽ ahkre ho pa xwÿnh na pre. Na pre hte mry kà ho ixkre nhÿpêx nê mẽ kãm ho wẽnê ho mẽ hkõt pa pê mẽ piitã mẽ kãm Tirtũm kapêr jarênh o pa. Tã krÿ pê Rõm kamã mẽ kot Jejus kõt amnhÿ xunhwÿr xwÿnhjê hwÿr kagàja nhÿpêx nê mẽ hwÿr kumê. Kormã ma mẽ hwÿr mõi nê mẽ omunh kêt ri.

Nê Jejus kêp Tirtũm mã tanhmã mẽ pajarênh to xwÿnh ã nhũm pre mẽ kãm harê nê hã kagà. Jejus kot mẽ pahte amnhÿ tomnuj pãnhã mẽ panê htyk jakamã na hte Tirtũm mẽ pahte hkõt amnhÿ xunhwÿr ã mẽ pahpumu nê Jejus kukwak ri mẽ pahte amnhÿ to mex xwÿnh ã mẽ pajarê.

Nê Tirtũm Karõ nhÿ hã mẽ kot amnhÿ nhÿpêx nyw nê hamaxpêr nyw o pa hã nhũm Pawre mẽ kãm karõ nê hã kagà. ã na pre mẽ kãm mẽmoj jarê nê hã kagà anê. Nê hã kagà ho:

¹ Pa Rõm nhõ xwÿnhjaja? Xà mẽ amex? E ot pa mẽ awÿr kagà nhÿpêx nê kumê. Tirtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mẽ awÿr kagà nhÿpêx nê mẽnh anê. Ixte Jejus nhÿ hã mẽ ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mẽ awÿr kagà nhÿpêx nê mẽnh anê.

² Amnepêm na pre Tirtũm nhÿ hã kapêr jarênh o ri mẽ pa xwÿnhjaja mẽ pakukamã mẽ panhÿgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkõt pa nê mẽ kãm:

—Koja nhÿrmã Tirtũm mẽ pahpiitã mẽ panê tanhmã kot amnhÿ nhÿpêx to

mã xwÿnh mẽ nhũm mẽ hpiitã hprÿ hã harênh ma nê omu. Anê.

Nhũm prem ã Jejus kukamã mẽ kãm harênh anhÿr o ri mẽ hkõt pa. Tirtũm kapêr ã kagà htũm kamã harênh xà hkõt tanhmã mẽ kãm harênh to.

³ Tirtũm Kra Jejus Krisja na pre mẽ kãm harênh o ri mẽ hkõt pa. Mẽ panhõ Pahihti na. Kêp Tirtũm Kra htã na pre mẽ pahpyrà nê ã ho amnhÿ nhÿpêx nê wrÿ nê katorxà nhõxà hkre rũm kato. Jakamã kêp Tirtũm Kra pix kêt mãânên katorxà hkõt kêp higêt Tawi hkanrêhã htãmnhwÿ.

⁴ Kêp Tirtũm Kra htã nhũm prem axtem nê tanhmã hamaxpêr to nê kupÿ. Nom nhũm Tirtũm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jesús kêp Tirtũm Kraa. Mẽ kot kêp hpÿr tá nhũm akupÿm ho htÿr. Jakamã nhũm Tirtũm pyrà nê hihtÿx o hihtÿx. Anê.

⁵ Tã ã Tirtũm kot Kra nhÿpêx anhÿrja ri na mãânên pa ixto mex nê mẽ akaxyw ixãm. Jakamã na pa hte ma krÿ piitã hkõt mẽ kãm tanhmã Jejus Kris jarênh to ho ri mẽ hkõt ixpa. Ijaew mã nê Ijaew kêt xwÿnhjê mã. Mẽ kot harênh mar nê amnhÿ kaxyw kãm hamaxpêr nê kapêr kõt pix mã amnhÿ nhÿpêx mex kaxyw.

⁶⁻⁷ Nê mẽ apê Rõm nhõ xwÿnhjaja. Na ka prem Jejus kõt amnhÿ xunhwÿ nhũm Tirtũm ja hã mẽ apumu nê mẽ ato hkra nê mẽ apê Jejus mẽ wa hkwy hã mẽ ajarê. Mẽ ate hkõt amnhÿ nhÿpêx kaxyw nhũm pre ã mẽ ajarênh anê.

Tã ot pa kagà nhÿpêx nê mẽ awÿr mẽnh kaxyw. Tirtũm kot mẽ ato hkra xwÿnhjê hwÿr. Tirtũm kãm mẽ ajapêê.

Na pa hte mẽ ato mẽ panhÿpêêxã maati Tirtũm mẽ Pahihti Jejus Kris wa hwÿr rãhã ri ixpa. Nê mẽ ato wa hwÿr o:

—Kwa kêr ka wa Rõm kamã war akrajê pumunh mex nê mẽ kutã anojarê rãhã nê. Kê mẽ hamakêtkati nê àmnhÿx ri tanhmã amnhÿ nhÿpêx to ho ri pa. Anê.

Pawre kot Rôm nhõ xwýnhjê pumunh prãm ã amnhĩ jarênh

Atre 28.15-16; Rômân 15.22-29

⁸ Nê na ka prem amnhĩ kaxyw Jejus Kris mã ajamaxpêr nê hkôt amnhĩ xunhwý nhũm krĩ piitã hkôt mẽ pa xwýnhjaja mẽ ajarênh ma. Nê mẽ ate amnhĩ nhĩpêx nyw ã mẽ ajarênh ma nê axpên mã tanhmã mẽ ajarênh to ho pa. Nê mẽ ajarênh o:

—Kwa na xep Rôm kãm mẽ hkwýjaja amnhĩ kaxyw Jejus mã hamaxpêr týx nê. Nê hkôt amnhĩ nhĩpêx mex rãhã ho ri pa. Anê.

Pa ã mẽ kot mẽ ajarênh anhýrja ma nê ixkĩnh týx nê. Nê Tirtũm mã mẽ anhý hã ixkĩnh ã amnhĩ jarênh o ri ixpa.

⁹ Na pa hte mẽ ato hwýr rãhã ho ri ixpa. Nê nhýri mẽ kãm Tirtũm Kra Jejus kapêr jarênh o ri ixpa nê mẽ amã ijamaxpêr nê mẽ ato kuwý. Nê tanhmã Tirtũm mã amnhĩ nhĩpêx to ho ixpa pẽ mẽ amã ijamaxpêr nê mẽ ato kuwý. Tirtũm kot ja hã ixpumunh mex.

¹⁰ Na pa hte tanhmã kãm amnhĩ jarênh to kaxyw nê mẽ akaxyw amnhĩ to kuma nê kãm:

—Pa Tirtũm? Na pa ra inhmã ma Rôm wýr inhmõr nê kamã akôt ixkwýjê pumunh prãm týx kumrêx. Xà kot ka tokyx mẽ hwýr inhmẽ nà? Anê.

¹¹ Na pa ra inhmã mẽ awýr inhmõr prãm týx nê. Na pre Tirtũm Karõ tanhmã ixkrã hto pa ý hã kapêr ã kagà mar týx nê. Nê hkôt mẽmoj mex pumunh rax nê. Tã ra inhmã ma mẽ awýr inhmõr nê amnhĩ xõ ri mẽ amã harênh prãm nê. Mẽ ate inhmar nê aprĩ hã Jejus Kris kôt amnhĩ xunhwýr týx nê hkôt amnhĩ nhĩpêx mex rãhã ho ri apa kaxyw.

¹² Kot paj nhýrmã ma mẽ awýr mõi. Nê mẽ awýr pøj pu mẽ axpên pumu nê pahkĩnh nê. Mẽ pahte amnhĩ kaxyw Jejus Kris mã pajamaxpêr mex o papa hã axpên pumu nê pahkĩnh nê. Nê mẽ pahpiitã hkôt amnhĩ nhĩpêx mex o ri papa.

¹³ E ixkwýjaja. Xatã ixte mẽ awýr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhýrmã ma mẽ awýr mõi. Mẽ ate ja hã inhmar kaxyw na pa ã Tirtũm noo mã mẽ amã amnhĩ jarênh anê. Na pa pre krĩ hkwý kamã mẽ apê Ijaew kêt xwýnh kwýjê hwýr ixpa. Nê mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkôt ixpa. Nhũm mẽ hkwýjaja inhma nê hkôt amnhĩ xunhwý. Ja kaxyw na pa inhmã ma mẽ anhõ krĩ hwýr inhmõr prãm nê. Mẽ akwýjaja kot ixkapêr mar nê mẽ apyrà nê Jejus kôt amnhĩ xunhwýr kaxyw.

¹⁴ Na pre ra Tirtũm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwýnhjê kaxyw. Mẽ kãm ma ho mẽ pa xwýnhjê mẽ mẽ kãm ma hkêt o mẽ pa xwýnhjê mã. Nê mẽ kot kagà pumunh xwýnhjê mẽ mẽ kot kagà pumunh kêt xwýnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa kaxyw.

¹⁵ Jakamã na pa ra inhmã mẽ apê Rôm nhõ xwýnhjê hwýr inhmõr prãm nê. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nê mẽ pahpyrà nê Jejus kôt amnhĩ xunhwýr kaxyw.

Jejus kot mẽ panê htyk ã harênh Sikũn Ximotre 1.6-12

¹⁶ Nê Jejus kot mẽ panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm Tirtũm ja hã mẽ omu nê mẽ nê mẽ kot amnhĩ tomnuj o hapêx pa nê mẽ ho hkra. Nom mẽ ixpê Ijaew nhõ xwýnhjê pix kêt. Mãânên mẽ apê Ijaew kêt xwýnhjaja nhũm kãm mẽ pajapê ho axpên pyrãk. Jakamã na pu htem Jejus kôt amnhĩ xunhwý nhũm Tirtũm ja hã mẽ pahpumu nê mẽ pahto hkra. Ja kaxyw àhpumunh týx o àhpumunh týx.

17 Æm mẽ kot amnhĩ kaxyw Jejus mã hamaxpêr xwýnh pixjaja na hte mẽ ho hkra. Kapêr ã kagà htùm kot tanhmã ja jarênh to nê harênh kot:

Na hte Tirtùm mẽ kot amnhĩ kaxyw Kra mã hamaxpêr ã mẽ omunh xà hkôt mẽ ho hkra nhùm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mê pahpiitã mẽ pahte amnhĩ tomnuj xwýnh ã mẽ pajarênh
Atre 14.15, 17.22-29; Apokarip 9.20-21

18 Nê mẽ kot amnhĩ tomnuj o ri mẽ pa xwýnhjaja na hte Tirtùm axtem tanhmã mẽ harênh to. Na htem Tirtùm kapêr ma nom amnhĩ tomnuj gryk ã ãm kuma. Nê mẽ hkwýjaja kot kapêr mar pymaj kapêr ô ho mẽ kêp àmnàr rãhã ho ri pa nhùm Tirtùm ja hã mẽ omu nhùm ja kêp omnuj nê.

19-20 Te mẽ kot Tirtùm kot amnhĩ nhĩpêx ã omunh kêt pyræk o amnhĩ nhĩpêx tã mẽ kot omunh mex. Tirtùm kot mẽmoj to kator krax rùm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tirtùm ã omunh mex nê. Nê kêp mẽmoj piitã ho kator xwýnh ã omunh mex nê. Nê mex o mex ã omu nê hihtýx o hihtýx hã omu. Tirtùm kot amnhĩ nhĩpêx kot amnhĩrit mex nhùm mẽ kot omunh mex tã hkôt amnhĩ xunhwýr kêt nê. Nê axtem nê hamaxpêr o:

–Tk. Tirtùm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhùm Tirtùm tee ri ja hã mẽ omu nhùm ja kêp omnuj týx nê.

21 Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rý arĩ hamaxpêr japêr nê kãm:

–Nà Tirtùm. Æm hãmri amex kumrêx. Æm amex o amex. Apê

Tirtùm ã ãm apixi mex kumrêx na ka. Æm hãmri na ka hte mẽ ixto mex o apa.

Anhýr o amnhĩ kaxyw kãm kapêr kêt nê. Nê ãm htýx tanhmã hamaxpêr punuj to pix o ri pa. Te kamàt kô kamã ri mẽ pa xwýnhjê kot amnhĩ nhĩpêx pyræk nê mẽmoj mex pumunh kêt nê.

22 Mẽ kot àhpumunh týx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpêr kêt pyræk o amnhĩ nhĩpêx.

23 Jakamã na htem amnhĩm mẽmo karõ nhĩpêx. Mẽmo htyk mã xwýnhjê hõ karõ nhĩpêx. Tanhmãn panhĩ karõ rý mẽmo mry karõ rý mẽmo kuwênh karõ. Rý mẽmo kagã karõ nhĩpêx. Hãmri nê ho ô sãnti nê te ri ho Tirtùm nhĩpêx pyræk o hipêx. Jao hpar pê hkôn krã ho rôrøk nê amnhĩ to kuwý nê kãm amnhĩ jagrer pê kãm mex o mex ã harê. Tirtùmja sãnti rom htír o htír tã nhùm mẽ axtem nê sãnti gryk ã hkaga nê ã amnhĩ nhĩpêx o pa anê.

24 Jakamã nhùm tee ri ã mẽ kot amnhĩ nhĩpêx anhýr ã mẽ omu nê amnhĩ pyræk nê mẽ hkaga nê ãm mẽ omu. Jakamã nhùm mẽ ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã hpijaàm kêt to. Æ na htem htýx ri amnhĩ tomnuj anhýr o pa.

25 Tirtùm kapêrja ãm hãmri htã nhùm mẽ axtem nê te amnhĩ pumrênh pyræk o hipêx nê kãm hamaxpêr kêt nê. Nê hpãnhã ri mẽ hêx xwýnhjê kapêr pix ma nhùm ja te mẽ kãm mex pyræk. Na htem ã amnhĩ nhĩpêx anê hãmri nê axtem nê Tirtùm kot mẽmoj nhĩpêx pix parpê rôrøk nê amnhĩm mex o mex ã harê. Nom kot hipêx xwýnh Tirtùm parpê mãn ã amnhĩ nhĩpêx anhýr kêt nê. Nom kot mẽmoj nhĩpêx xwýnhhta mex o mex jakamã koja mẽ kot hkôt amnhĩ nhĩpêx xwýnhjaja jajê rom kãm mex o mex ã harênh tùm rãhã ho ri pa.

26 No mẽ kot amnhĩ tomnuj xwýnhjaja na hte Tirtùm amnhĩ pyræk nê mẽ hkaga nhùm mẽ htýx amnhĩ krã hkôt ri tanhmã amnhĩ tomnuj to ho ri pa. Jao mẽni hkwýjaja axtem

ně axpën gryk ã mjên kaga në axpën nhĩõ ho mjên.

²⁷ Nhũm mẽmy hkwyjaja mãânên axtem në amnhĩ kwýjê my gryk ã hprõ kaga në axpën nhĩõ ho hprõ. Na htem ã axpën kamã hpijaàm kêt o pa anê. Mýrapê koja mẽ à pix kãm amnhĩ xà htýx kamã hamak o pa.

²⁸ Na htem amnhĩ tomnuj gryk ã Tĩrtũm mã hamaxpêr kêt nhũm tee ri amnhĩ tã mẽ omu në hamaxpêr o:

–Mẽ kãm amnhĩ tomnuj pix prãm jakamã kwâr mẽ mãmrĩ ã amnhĩ nhĩpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htýx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri në mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpën tomnuj pix prãm.

Nê mẽmoj tã axpën kãm gryk pix prãm.

Nê mẽ kãm axpën par pix prãm.

Nê mẽmoj tã ri kãm axpën mã àkjêr prãm.

Nê mẽmoj tã kãm axpën mã hêx prãm.

Nê kãm axpën kaxyw tanhmã hamaxpêr punuj to pix prãm.

Nê kãm tanhmã axpën to kapêr punuj to pix prãm.

³⁰ Nê kãm mẽmoj tã axpën to hêx pix prãm.

Nê kãm Tĩrtũm prãm kêt o ri pa.

Nê mẽmoj tã axpën mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr. Nhũm mẽ katorxà në mẽ hipêêxà tee ri ja nê tanhmã mẽ kãm kapêr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhýr o ri mẽ pa xwýnhjaja na hte Tĩrtũm kãm mẽmoj mex nhũm mẽ kêp omnuj në nhũm Tĩrtũm kêp mẽmoj omnuj nhũm mẽ kãm mex nê. Nê axpën mã mẽmoj tanhmã ho hã amnhĩ jarênh tã ho

anhýr kêt nê. Nê axpën kãm ukaprĩ ho ri pa hkêt nê.

³² Tĩrtũm kapêr ã kagà htũm kot tanhmã mẽ hkukamã mẽ harênh to në mẽ harênh kot:

ã mẽ kot amnhĩ nhĩpêx anhýr o ri mẽ pa xwýnhjaja koja mẽ nhýrmã ty hãmri në amnhĩ xà htýx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar týt tã aa amnhĩ tomnuj kaga hkêt nê. Arĩ ã amnhĩ nhĩpêx anhýr o pa rãhã nê. Nhũm mẽ hkwyjaja mẽ kot amnhĩ tomnuj ã mẽ omu në mẽ urak nê ã amnhĩ nhĩpêx anhýr o ri mẽ hkôt pa nhũm mẽ amnhĩ pyrã nê mẽ omu në hkĩnh nê. Na htem ã amnhĩ nhĩpêx anhýrja gryk ã Tĩrtũm kaga nhũm tee ri amnhĩ tã mẽ omu në amnhĩ pyrã nê mẽ hkaga nê ãm mẽ omu. Jakamã nhũm mẽ amnhĩ tomnuj týt pix rãhã ho pa.

2

Mẽ kot amnhĩ tomnuj xwýnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atõ ã mẽ kot amnhĩ tomnuj anhýr xwýnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

–Tk. Mẽ kot amnhĩ tomnuj pix o ri pa xwýnh kênã. No pa na ã ixte amnhĩ nhĩpêx anhýr o ri ixpa hkêt. Mẽ kurom ixte tãm amnhĩ nhĩpêx o ri ixpa xwýnh na pa.

Anhýr o amnhĩ jarê. Kwa nà mẽ ã ajamaxpêr anhýr kêt nê. Mẽ pajaxwýja na pu htem tõhã mẽ urak nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyrak.

² Tĩrtũm kapêr ã kagà htũm kot mẽ kot amnhĩ tomnuj o ri mẽ pa xwýnhjê jarênh kot:

Mẽ kot amnhĩ tomnuj mýrapê koja mẽ nhýrmã amnhĩ xà htýx kamã hamak rãhã ho ri pa. Anê.

ãm hãmri ã mẽ harênh kot anhýr.

3 Mãn ka mẽ atõ tanhmã amnhĩ kukamã ajamaxpêr to nê ajamaxpêr o:

–Nà koja Tirtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rê. No pa koja hwỳr inhmênh kêt nê. Anê.

Kwa mẽ ã ajamaxpêr anhỹr kêt nê. Kot ka mẽ ã amnhĩ kukamã ajamaxpêr anhỹr tã tõiã mẽ uràk nê tanhmã amnhĩ tomnuj to. Jakamã koja Tirtũm mẽ uràk nê hã tanhmã mẽ ato.

4 Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamaxpêr o:

–Ixte amnhĩ tomnuj xwỳnh tã na hte Tirtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukapri xwỳnh jakamã na hte gryk tokyx anhỹr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhũrer kêt nê. Tirtũm kot ja hã tanhmã ixtore kaxyw hã.

Anhỹr o ajamaxpêr. No ãm ja kot anhỹr kêt. Na hte Tirtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

5 Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nê gaa nê ra anhỹr kumrêx. Nhũm Tirtũm tee ri ja hã mẽ apumu nhũm ja kêp omnuj tỳx o mõi. Jakamã koja nhỹrmã tanhmã mẽ ajarênh to nê gryk tỳx kãm tanhmã mẽ atomnuj tỳx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpỳnhã tanhmã mẽ panhĩpêx to.

6 Koja nhỹrmã mẽ pahpiitã kormã mẽ pahpũr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwỳnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwỳnhjaja nhũm mẽ homnuj nê.

Koja nhỹrmã mẽ pahpiitã mẽ pahto hpimràatã ã mẽ panhĩpêx anê.

7 Mẽ kot hkôt tãm ri amnhĩ nhĩpêx o pa pê kãm Tirtũm kot amnhĩm mẽ mex ã mẽ harênh prãm xwỳnhjaja koja nhỹrmã amnhĩm mẽ mex ã mẽ harê. Hãmri nhũm mẽ kuri htĩr tũm nê hkĩnh nê mex kumrêx nê pa ho pa.

8 Nom mẽ kot amnhĩ mã pix mã ri hamaxpêr o ri mẽ pa xwỳnhjaja. Nê mẽ kot tanhmã amnhĩ tomnuj to gryk ã Tirtũm kapêr kaga xwỳnhjaja koja kãm mẽ hkĩnh kêt nê tanhmã mẽ homnuj tỳx to.

9 Mẽ kot amnhĩ tomnuj xwỳnh piitã koja mẽ nhỹrmã amnhĩ xà htỳx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwỳnhjaja nhũm mẽ amnhĩ xà htỳx kamã hamak rãhã nê pa ho pa. Mẽ kot amnhĩ tomnuj tỳx o paja mỳrapê.

10 No kêt tãm mẽ kot amnhĩ nhĩpêx xwỳnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwỳnhjê hã mẽ harê. Nê tanhmã mẽ ho mex to nhũm mẽ kamã amnhĩ krit nê pa ho pa. Hamakêtkati nê hkĩnh nê ãmnhĩx ri pa ho pa. Ijaew kwỳ kumrêxjaja nê mããnên Ijaew kêt xwỳnh kwỳjaja nhũm mẽ mex nê hamakêtkati nê hkĩnh nê ãmnhĩx ri pa ho pa.

11 Koja Tirtũm nhỹrmã ahpỳnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwỳnhjaja nhũm ã mẽ pahpiitã mẽ panhĩpêx anê.

12 Amnepêm na pre finat Mojes mã tanhmã kapêr to nhũm kuma nê ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tỳx jakamã koja mẽ ixtõ ra kapêr mar tỳx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhỹrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumê. Kot kapêr mar tỳx tã hkôt amnhĩ nhĩpêx kêt mỳrapê nhũm ã hipêx anê. No kêt mẽ apê Ijaew kêt xwỳnhjaja

mê ixkînhã mê ari Tîrtûm kapêr ã kagà hkêt jakamã koja mê ate kapêr nhîrôp mê akuhê hã mê apumunh kôt tanhmã mê anhîpêx to hkêt nê. Koja hpânhã mê ate tanhmã amnhî tomnuj to ho apa mýrapê mê kot amnhî xà htýx kamã hamak o pa tûm xàta wýr mê arê.

¹³ Na hte mê kot kapêr mar ã mê omunh xà hkôt amnhîm mê kot amnhî to mex xwýnh ã mê harênh kêt nê. ãm mê kot kapêr kôt amnhî nhîpêx ã mê omunh xà hkôt pix mã na hte amnhîm mê kot amnhî to mex xwýnh ã mê harê.

¹⁴ No mê hkwyjaja kormã kot kapêr mar kêt tâ te ra mê kot mar mex pyrâk o amnhî nhîpêx. Jao amnhî krã hkôt tãm ri amnhî nhîpêx kurê kumrêx. Te kot Ijaew pyrã nê Tîrtûm kapêr mar týx nê hkôt amnhî nhîpêx o ri pata pyrâk.

¹⁵ Na htem amnhî krã hkôt tanhmã amnhî nhîpêx mex to. Te Tîrtûm kapêr kot mê hkrãm gjêx pyrâk o amnhî nhîpêx o pa. Jakamã tee ri tanhmã amnhî tomnuj to hã amnhî pumu nê hkaprî nê. Nê tãm amnhî nhîpêx ã amnhî pumu nê hkînh nê.

¹⁶ Tã koja nhýrmã Tîrtûm Jejus Kris mã anê nhùm kuma hãmri nê mê piitã kormã mê htîr ri tanhmã mê kot amnhî nhîpêx to hã mê omunh xà hkôt tanhmã mê harênh to. Nê mê hamaxpêr kôt mê omunh mex xà hkôt tanhmã mê harênh to. Mê papajaja mê pahte axpên jamaxpêr kôt axpên pumunh kêt tâ Jejus kot mê pajamaxpêr kôt mê pahpumunh par.

Tã na pa hte mê kãm Jejus kot tanhmã amnhî nhîpêx to hã harênh o ixpa pê ã mê kãm ixujarênh anhýr o ri ixpa.

Pawre kot hkwyjê mã kapêr

Rômân 3.19-20

¹⁷ Nê ixpyrà nê mê apê Ijaew kwýjaja na ka mê axtem nê Ijaew kêt xwýnhjê mã tanhmã amnhî to jarkrar o ri apa nê mê kãm:

—Nà mê ixpê Ijaew ri Tîrtûm kapêr ã kagà jakamã ãm mê papxipixjaja na hte Tîrtûm amnhîm mê inhmex ã mê

ijarê. Nê ãm mê papxipixjaja na hte mê ixto hkra.

¹⁸ Nê mê papxipixjaja na mê ixte Tîrtûm kãm hprãm xà hkôt mêmoj pumunh par nê mê kot amnhî to mex xà pumunh par nê mê kot amnhî tomnuj xà pumunh par. Mê apê Ijaew kêt xwýnhjê rom mê ixte mêmoj piitã omunh par kumrêx. Anê.

¹⁹⁻²⁰ Nê amnhî jarênh o:

—Nà te mê ixpê mê nohkre xwýnhjê pa hã mê hamýnh nê ri mê ho ixpa xwýnh pyrâk. Jakamã Ijaew kêt xwýnh pê htýx ri mê pa xwýnhjaja na pa htem mê kãm Tîrtûm kapêr tûm o mê ahkre mex o ri ixpa. Kormã mê kot hprî hã mar kêt jakamã na pa htem ho mê ahkre ho ri mê hkôt ixpa. Mê kurom mê ixte mar par kênã.

²¹ Anhýr ã amnhî jarênh nê mê ate kapêr o mê ahkre ho apa htã hkôt amnhî nhîpêx kêt nê.

Nê mê ate mê kot axpên pê àhkînh nê mê hkurê htã no ãm mê kamjaja axpên pê axàhkînh o ri apa.

²² Nê mê amã sãnti hkînh kêt ã amnhî jarênh tâ axtem nê hwýr agjê nê hpar pê kàxpore nhîkwý xwýnh o axàhkînh o ri apa.

Nê mê kot axpên prô ho amnhîkati nê mê hkurê ho apa htã mê kamjaja ã ri amnhî nhîpêx anhýr o ri apa.

²³ Nê mê ate Tîrtûm kapêr ã kagà mex o mex ã harênh tâ hkôt amnhî nhîpêx hkêt nê. Jakamã nhùm mê akwýjaja ja hã mê apumu nê mê apyrã nê Tîrtûm ã hpijaàm kêt o pa.

²⁴ Tîrtûm kapêr ã kagà htûm kot tanhmã mê ate amnhî nhîpêx ã mê ajarênh to nê mê ajarênh kot:

Mê kêp Ijaew kêt xwýnhjaja na htem Ijaew kot htýx ri amnhî nhîpêx o ri mê pa hã mê omu nê mê ý hã tanhmã Tîrtûm o kapêr punuj to ho ri pa. Anê.

²⁵ Mê pahpê Ijaew na pu htem mê pahkrajaja mê hapôx kôt kormã mê hkryre ri pu htem mê kêp mêmy kwryt kà jakà. Finat Mojes kot Tîrtûm nhý hã mê panhîgêjtê mã hã karô xà

hkôt na pu htem ã mẽ hipêx anê. Mẽ pahte Tirtũm mã mẽ pahkrajê nhõr ã amnhĩ to amnhĩrĩt kaxyw. Jakamã na pu htem arĩ Mojes kapêr kôt ã mẽ hipêx anê nhũm Tirtũm kãm ja mex nê. Nom kot pu mẽ kapêr kwým ri tanhmã amnhĩ nhĩpêx to ho papa nhũm ja kêp omnuj týx nê hãmri pu mẽ tee ri mẽ pahkrajê my kwýt kà jakàr kaprý. Na hte Tirtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pẽ mẽmy kwýt kà jakàrja nhũm kãm mex nê.

²⁶ Ijaew kêt xwýnhjaja kot ã mẽ hkrajê nhĩpêx anhỹr kêt tã ra mẽ hkwýjaja Tirtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwýt kà jakàr pyrãk o amnhĩ nhĩpêx. Jakamã nhũm Tirtũm ja hã mẽ omu nê mẽ kãm:

—Nà ãm hãmri. Mẽ ate amnhĩ my kwýt kà jakàr kêt tã mẽ apê ixkra na ka mẽ. Anê.

²⁷ Mẽ kot amnhĩ jakàr kêt tã Tirtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwýnh ã mẽ harê. Mẽ kot amnhĩ jakàr kêt tãã.

No mẽ kajaja mẽ ate Tirtũm nhỹ hã Mojes kapêr ã kagà mar týx tã hkôt amnhĩ nhĩpêx kêt nê. Ja mýrapê koja ja hã mẽ apumu nê Ijaew kêt xwýnhjê kĩnhã mẽ ate amnhĩ tomnuj xwýnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwýnh ã mẽ ajarê.

²⁸ Nê kot ka mẽ atõ tanhmã amnhĩ to jarkrar to nê amnhĩ jarênh o:

—Nà ixpê Ijaew jakamã na hte Tirtũm mẽ kot inhmy kwýt kà krãhyr kôt ixto kraa. Anê.

Nom xà na hte Tirtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htýx ã amnhĩ to jarkrar anhỹr kaprý ho pa.

²⁹ Nê Tirtũm Karõ kot mẽ hkarõ mã gjêx xwýnhjaja kêp Tirtũm kra jakamã na htem Tirtũm kãm hprãm xà hkôt

amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rý htýx hamaxpêr o:

—Nà kot paj Mojes kapêr ã kagà hkôt amnhĩ nhĩpêx nhũm Tirtũm ja hã ixpumu nê amnhĩm inhmx ã ijarê nê ixto hkra.

Anhỹr o hamaxpêr kêt nê. Na htem hamaxpêr o:

—Nà ra Tirtũm Karõ kot ixkarõm àr jakamã ixpê hkra nhũm amnhĩm inhmx ã ijarê. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwýjaja amnhĩm inhmx kêt ã ijarê. Anê.

Kêr ka mẽ ã ajamaxpêr anhỹr o ri pa. ã mẽ hamaxpêr anhỹr na mex o mex.

3

¹ Nê mãn ka mẽ ra tee ri tanhmã amnhĩ kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêr hkêt nê? Mẽ kêp Ijaew kêt xwýnhjaja kot amnhĩ jakàr kêt tã nhũm Tirtũm mẽ pahpyrà nê mẽ ho hkra. Anê.

Kwa mẽ ã ri ajamaxpêr anhỹr kêt nê.

² Mẽ pahpê Ijaew na pre Tirtũm Ijaew kêt xwýnhjê rom mẽ pahto mex rax nê. Na pre amnepê mã mẽ panhigêt mã tanhmã kapêr to. Mẽ pahpiitã mẽ pahte mar nê hkôt amnhĩ nhĩpêx kaxyw. Nom Ijaew kêt xwýnhjê nhigêt mã ã kapêr anhỹr kêt nê. ãm mẽ pahpê Ijaew nhigêt pix mã kapêr. Jakamã mẽ pahpê Ijaew mã ja mex kumrêx.

³ Nom kot kaj mẽ atõ ja ma nê ajamaxpêr o:

—Nà Tirtũm kot mẽ ixto mex mã mẽ ixtã amnhĩ jarênh tã no nhũm xep mẽ inhigêt kwýjaja hkôt amnhĩ nhĩpêx kêt nê. Na xep prem kapêr kwým ri amnhĩ tomnuj o pa. Jakamã ko. Koja Tirtũm mẽ ixpê mẽ hkanrêhã mẽ htãmnhwýjaja tanhmã mẽ ixto mex to japêr ko. Anê.

⁴ Kwa mẽ ri ã ajamaxpêr anhỹr kêt nê. Tirtũm na hte mẽ pahpiitã mẽ pakuum mẽmoj tã amnhĩ jarênh o

hêx kêt nê. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anê. Kapêr ã kagà htũm kot mēhō tanhmã Tĩrtũm mã kapêr to nê harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa.

Jakamã na htem ãm axpên mã axêx ã akapêr ã ajarênh kaprỳ. Anhỹr o harê.

⁵ No kot ka mẽ atõ atỳx ajamaxpêr nê ajamaxpêr o:

–Xà koja Tĩrtũm tanhmã mẽ ixte amnhĩ tomnuj to hã mẽ ixpumu nê gryk? Nà koja gryk kêt nê. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nê ixrom Tĩrtũm tapxipix kot amnhĩ to mex o pa xwỳnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhĩpêx xwỳnh ã harê. Hãmri nhũm Tĩrtũm amnhĩ tã ixpumu nê tanhmã ixto hkêt nê. Kojã tanhmã ixto japêr hãmri nê ixpyrà nê amnhĩ tomnuj nê. Anê.

Kot kaj mẽ ã ajamaxpêr anê nê ãm amnhĩ krã hkôt ã ajamaxpêr anhỹr kaprỳ. Nom ã ajamaxpêr anhỹrja Tĩrtũm jamaxpêr kôt kêt.

⁶ Kwa mẽ ri ã ajamaxpêr punuj anhỹr kêt nê. Tĩrtũm kot mẽ pahpyrà nê aa kot amnhĩ tomnujre hã. Kop ãm mẽ pahpyrà nê tanhmã kot amnhĩ tomnuj to ronhỹx tanhmã kot we amnhĩ to nê mẽ pahte amnhĩ tomnuj xwỳnh ã mẽ pajarê? Nhỹx mẽ pahpyrà nê ã amnhĩ jarênh anê. Nà ã mẽ ajamaxpêr anhỹrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

–E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nê ixrom Tĩrtũm pix mã mãn kot amnhĩ to mex ã harê. Nê ãm pix mã mãn hêx kêt xwỳnh ã harê. Hãmri nhũm Tĩrtũm amnhĩ tã ixpumu nê mẽ ã mẽ kot harênh anhỹrja ma nhũm ja kãm mex nê nhũm hkĩnh nê. Jakamã ixêx o ri ixpaja ã tanhmã ixto hkêt nê. Ra

mẽ kot ixrom tãm kot amnhĩ nhĩpêx o pa xwỳnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nê. Kêr kê mẽ ja hã ixpumu nê ixrom Tĩrtũm tapxipix kot amnhĩ to mex xwỳnh ã harê.

Anhỹr o ajamaxpêr nom mẽ ajamaxpêrja kot anhỹr kêt. Na hte akwỳjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. ã mẽ ajamaxpêr anhỹr o ri apa xwỳnhjaja koja Tĩrtũm mẽ atomnuj tỳx nê kãm ga.

Mẽ mẽ pahte amnhĩ tomnuj xwỳnh ã mẽ pajarênh

Wam Korĩt 6.9; Karatas 3.22; Xitre 3.3

⁹ Tã tanhmã kot puj mẽ pahpê Ijaew amnhĩ jarênh to? Xà kot pu mẽ pahte amnhĩ to mex o Ijaew kêt xwỳnhjê jakrenh ã amnhĩ jarê? Nà mẽ pahte ã amnhĩ nhĩpêx anhỹyre hã. Mẽ pahpê Ijaew nê Ijaew kêt xwỳnhjaja. Mẽ pahpiitã mẽ pahte amnhĩ tomnuj o axpên pyrãk. Na pa pre ra mẽ amã ja jarê.

¹⁰ Tĩrtũm kapêr ã kagà htũm kot ja jarênh kot:

Mēhō na we aa kot amnhĩ tomnuj kêt kumrêx nê pa?

¹¹ Nê mēhō na we kot mẽmoj mex piitã omunh par?

Nê mēhō na kãm Tĩrtũm prãm?

¹² Nà amrakati kumrêx. Na mẽ ra piitã hkaga hpa.

Nê kapêr kwỳm ri tanhmã amnhĩ tomnuj to ho pa.

ãm mēhō pyxire nê amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nê hkro punuj pyrãk.

Na htem ãm ri hêx pix kukamã ri hamaxpêr o pa. Tanhmã mẽ hêx to xàja te kêp kagã xoprê nhō wenên xihtỳx pyrãk.

¹⁴ Nê na htem mẽ piitã mẽmoj nhĩxi ho ri axpên mã mẽ hixi jarênh

o pa. Nê ri tanhmã axpên japyr
hto ho pa.

15 Nê tanhmã kapër mã gêt kãm mẽ
kãm kapër to.

16 Nê tanhmã mẽ hkwýjê homnuj
to. Jakamã nhũm mẽ piitã ri
hkaprĩ nê mex kêt nê pa.

17 Nhũm htem ãm axpên mã mẽ gryk
xà pix o kapër o pa.

18 Nê Tĩrtũm ã hpijaàm kêt o pa. Na
htem kapër ma nê ãm kuma nê
kãm hkĩnh kêt o pa.

Ã na htem amnhĩ nhĩpêx anhỹr rãhã
ho pa. Anê.

Ã Tĩrtũm kapër ã kagà htũm kot mẽ
pajarênh anhỹr.

19 Mẽ pahpê Ijaew ra mẽ pahte ja
jarênh mar tỳx. Tĩrtũm kapër ã kagà
htũm kwý na. Na hte ã mẽ kot
amnhĩ tomnuj xwýnhjê jarênh anê.
Nê mãânên mẽ papajaja. Mẽ pahpê
Ijaew na hte ã mẽ pajarênh anê. No
ãm mẽ papaxipix hkêt. Krĩ piitã
hkôt ri mẽ pa xwýnhjaja nhũm ã mẽ
harênh kot anhỹr. Ijaew kêt xwýnhjaja
nê mẽ pahpê Ijaew. Mẽ pahpiitã mẽ
pahte amnhĩ tomnuj xwýnh jakamã
mẽmo kaxyw kot pu mẽ pahte amnhĩ
tomnuj kêt ã ri amnhĩ to jarkrar o
papa? Kot puj mẽ ã amnhĩ jarênh
anhỹr kaprý. Jakamã koja Tĩrtũm
mẽ pahpiitã mẽ pahte amnhĩ tomnuj
mýrapê tanhmã mẽ panhĩpêx to.

20 Mẽ pahtõ koja mẽ pahte kapër kôt
pix mã amnhĩ nhĩpêx o papa hã mẽ
pajarê? Nê mẽ pahtõ mã koja mẽ
pamã kapër nê mẽ pamã:

—Nà na ka hte akatàt kôt ixkapër
kôt pix mã amnhĩ nhĩpêx mex nê. ãm
hãmri na ka hte ã amnhĩ nhĩpêx anhỹr
o apa.

Anhỹr o mẽ pahtõ mã kot we ã
kapër anê? Nà aa kot mẽ pahtõ mã
kapër anhỹr kêt. Na pu htem ãm
kapër ma nê tee ri amnhĩ kukamã
pajamaxpêr. Mẽ pahte amnhĩ tomnuj
ã amnhĩ pumunh kaxyw na pre mẽ
pamã kapër ã kagà htũmja gõ. Mẽ
pahtõ mẽ pahte kapër ã kagà hkôt
amnhĩ nhĩpêx mex o papa hkêt kênã

kot kêt ri amnhĩm mẽ pahte amnhĩ to
mex xwýnh ã mẽ pajarê.

*Tanhmã Tĩrtũm kot mẽ pahto hkra
to hã harênh*

*Atre 17.30-31; Karatas 2.16-21;
Piripos 3.7-9; Xitre 3.5; Xiakre 2.10*

21 Nê na hte Tĩrtũm mẽ pahte kapër
kôt amnhĩ nhĩpêx ã mẽ pahpumunh
kôt amnhĩm mẽ pahte amnhĩ to mex
xwýnh ã mẽ pajarênh kêt nê. Jakamã
mêhõ kukwak ri koja we ã mẽ pa-
jarênh anê? Nà nhãm mêhõ kot tãm
amnhĩ nhĩpêx rãhã ho pa hã omunh
pix kukwak ri koja ã mẽ pajarênh
anê. Tã mêhõ kukwak ri kot ã mẽ
pajarênh anhỹr xwýnhhta na pre ra mẽ
pamã ho amnhĩrit. Amnepêm Tĩrtũm
kapër ã kagà htũm kamã na pre mêhõ
hkukamã tanhmã harênh to. Nê
Tĩrtũm nhỹ hã mẽ kapër jarênh o pa
xwýnhjaja haxwýja kukamã tanhmã
harênh to ho pa.

22 Jejus Krisja na prem hkukamã
harênh o pa. Tãm na pu htem
hkôt amnhĩ xunhwýnê amnhĩ kaxyw
kãm pajamaxpêr rãhã ho papa nhũm
Tĩrtũm ja pix ã mẽ pahpumunh kôt
amnhĩm mẽ pahte amnhĩ to mex
xwýnh ã mẽ pajarê. Mẽ kot Jejus
kôt amnhĩ xunhwýr xwýnh piitãã.
Mẽ ixpê Ijaew nê mẽ apê Ijaew kêt
xwýnhjaja. Mẽ pahpiitã mẽ pahte
axpên pyrãk jakamã kot puj mẽ pahtõ
Jejus kôt amnhĩ xãm nhũm Tĩrtũm
Kra Jejus kot amnhĩ to mex pix o pa
kukwak ri mẽ pahpumu nê amnhĩm
pajarênh o:

—Nà ãm hãmri. Ra kot ixkra Jejus
kôt amnhĩ xãm jakamã ra inhmã te Je-
jus kot amnhĩ nhĩpêx pyrã nê amnhĩ
to mex o pa. Anê.

23 No mẽ pahtõ na mẽ pahte Tĩrtũm
mẽ Jejus wa urãk nê amnhĩ nhĩpêx
mex rãhã ho ri papa? Nà amrakati
kumrêx. Mẽ pahpiitã mẽ pahte
amnhĩ tomnuj xwýnh kênã.

24 Tã Tĩrtũm kot mẽmoj tã mẽ
pakutã nojarêr rãhã jakamã na hte
Jejus Kris kukwak ri amarĩ amnhĩm
mẽ pahte amnhĩ to mex xwýnh ã
mẽ pajarênh o pa. Mẽ pahte Jejus
kôt amnhĩ xunhwýr xwýnh piitãã

nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwýnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê.

²⁵⁻²⁶ Na pre mẽ pahwýr Jejus mẽ nhũm mẽ pahwýr wrý nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkõt pajamaxpêr nhũm Tĩrtũm ja hã mẽ pahpumu nê Kra kukwak ri amnhĩ katut kõt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepê m kormã Jejus wrýk nê mẽ panê htyk kêt ri mẽ pa xwýnhjaja. Tanhmã na pre Tĩrtũm mẽ kot hkõt amnhĩ xunhwýr xwýnhjê nhĩpêx to? Kormã Jejus mẽ panê htyk kêt ri mẽ pa xwýnhjaja tanhmã na pre mẽ hipêx to? Nà na pre mẽ hkwyjaja amnhĩ kaxyw Tĩrtũm kõt hamaxpêr nê hkõt amnhĩ xunhwý nhũm amnhĩ tã mẽ omu nê amnhĩm mẽ harênh o:

—Nà ãm hãmri. Koja nhýrmã Ixkra ma mẽ hwýr wrý nê mẽ nê ty nê htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nê. Anê.

Tã nhũm Jejus tãm mẽ pahwýr wrý nê mẽ pahpiitã mẽ panê ty. Jakamã nhũm Tĩrtũm ra mẽ pahte hkõt amnhĩ xunhwýr xwýnhjaja Kra kukwak ri amnhĩ katut kõt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhýr kêt nê. ãm Jejus tyk pix kukwak ri na hte ã mẽ panhĩpêx anê. ãm hãmri na hte ã mẽ panhĩpêx mex anê. Na hte tãm mẽ panhĩpêx rãhã ho pa.

²⁷ Jakamã kot puj mẽ ã pajamaxpêr anê nê pajamaxpêr o:

—Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhýr o pajamaxpêr kêt nê. Koja mēhõ ã hamaxpêr anê nê ãm amnhĩ

jarênh o hêx. Na hte Tĩrtũm mẽ pahte amnhĩ to mex ã mẽ pahpumunh kõt amnhĩm mẽ pahte amnhĩ to mex xwýnh ã mẽ pajarênh kêt nê. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nê hkõt amnhĩ xunhwý nhũm ja hã mẽ pahpumu nê rĩ kormã amnhĩm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprĩ hã inhma. Mẽmoj pumunh kõt na hte Tĩrtũm mẽ pahte amnhĩ to mex xwýnh ã mẽ pajarênh wehe? Xà mẽ pahte kapêr tũm kõt amnhĩ nhĩpêx o ri papa hã mẽ pahpumunh kõt? Nà na hte ja hã mẽ pahpumunh kõt ã mẽ pajarênh anhýr kêt nê. Mẽ pahte hkõt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kõt pajamaxpêr nê hkõt amnhĩ xunhwýr ã mẽ pahpumunh kõt pix mã na hte mẽ pahte amnhĩ to mex xwýnh ã mẽ pajarê. Ja pix ã mẽ pahpumunh kõt na hte ã mẽ pajarênh anê.

²⁹ Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nê mãânên kêp mẽ apê Ijaew kêt xwýnhjê nhõ Tĩrtũm.

³⁰ Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyrãk. Jakamã na hte mẽ kot amnhĩ kaxyw Jejus kõt hamaxpêr o mẽ pa xwýnhjê pumu nê mẽ kot amnhĩ to mex xwýnh ã mẽ harê. Mẽ ixpê Ijaew nê mãânên mẽ apê Ijaew kêt xwýnhjaja.

³¹ Tã koja mēhõ htýx hamaxpêr o:

—Nà ixte amnhĩ kaxyw Jejus kõt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kõt amnhĩ nhĩpêx kêt nê. Kot paj ãm amnhĩ krã hkõt amnhĩ nhĩpêx o ri ixpa. Ra Tĩrtũm kot ixto hkra kênã.

Anhýr o ajamaxpêr japêr. Kwa mẽ ã ri ajamaxpêr anhýr kêt nê. Na htem amnhĩ kaxyw Jejus kõt hamaxpêr hãmri nê kãm hkõt amnhĩ nhĩpêx prãm rãhã nê pa ho pa.

4

Apraãw kot amnhĩ kaxyw Tĩrtũm kõt hamaxpěr

Karatas 3.6-18; Xiakre 2.23

¹ Nẽ mẽ panhĩgêt finat Apraãwja kệp mẽ pahpê Ijaew pàr krax. Tã mẽmoj tã na pre Tĩrtũm omu nẽ kot amnhĩ to mex xwỳnh ã harê?

² Xà kot kãm tanhmã amnhĩ nhĩpêx to hã karõ xà hkõt amnhĩ nhĩpêx mex ã omunh xà hkõt nhũm pre ã harênh anê? Nà ja kõt kêt. Kop apu ja kõt ã kot harênh anhỹr ronhỹx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapěr kõt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ.

³ Tã mẽmoj tã omunh xà hkõt na pre Tĩrtũm amnhĩm mex ã harê? Nà Tĩrtũm kapěr ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kõt hamaxpěr nẽ hkõt amnhĩ xãm nhũm amnhĩ tã omu nẽ amnhĩm mex ã harê. Anê.

⁴ Mẽ õ patrãwjaja na htem kãm mẽ àpênh xwỳnhjaja àpênh mex ã mẽ omunh xà hkõt mẽ kãm amnhĩre.

⁵ No Tĩrtũm na hte ã mẽ panhĩpêx anhỹr kêt nẽ. Na hte mẽ pahte tãm amnhĩ nhĩpêx ã mẽ pahpumunh kõt amnhĩm mẽ pahte amnhĩ to mex xwỳnh ã mẽ pajarênh kêt nẽ. ãm mẽ pahte amnhĩ kaxyw Kra Jejus kõt pajamaxpěr nẽ hkõt amnhĩ xunhwỳr ã mẽ pahpumunh kõt pix mã na hte amnhĩm ã mẽ pajarênh anê. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kõt pajamaxpěr xwỳnh pixjaja na hte ã mẽ pajarênh anê.

⁶ Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kõt mẽ apumunh kõt na pa ã mẽ ajarênh anhỹr kêt nẽ. ãm mẽ ate amnhĩ kaxyw Ixkra mẽ wa ixkõt ajamaxpěr

nẽ wa ixkõt amnhĩ xunhwỳr ã mẽ apumunh kõt na pa hte ã mẽ ajarênh anê. Anê.

Pu mẽ ã kot pamã kapěr anhỹr ã amnhĩ tã kuma nẽ pahkĩnh nẽ. Pahi finat Tawi na pre haxwỳja ja jarênh o:

⁷ Na hte Tĩrtũm amnhĩ katut kõt mẽ pahte amnhĩ tomnuj piitã rênh pa nẽ axte kãm hamaxpěr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸ Nẽ amnhĩ kukamã pajamaxpěr o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hãmri nẽ amnhĩ to Tĩrtũm wỳ nhũm inhma nẽ ixte amnhĩ tomnuj o hapêx pa nẽ axte kãm hamaxpěr kêt nẽ.

Nà ãm hãmri. Ja mex kumrêx.” Anê.

⁹ Tã mẽ kot ja hã amnhĩ pumunh nẽ hkĩnh xwỳnhjaja mẽmojaja na mẽ? Xà mẽ kot amnhĩ my kwỳrýt kà jakàr xwỳnh pix kwỳjaja na pre pahi Tawija ã mẽ harênh anê nà? Nà mẽ tapxipixjaja kêt. Mããnên mẽ kot amnhĩ jakàr kêt xwỳnh kwỳjaja. Tanhmã na pre ra Tĩrtũm kapěr ã kagà htũm kot finat Apraãw jarênh to? Na pre harênh o:

Na pre Apraãw amnhĩ kaxyw Tĩrtũm kõt hamaxpěr nẽ hkõt amnhĩ xãm nhũm amnhĩ tã omu nẽ amnhĩm mex ã harê. Anê.

¹⁰ Xà Apraãw ra kot amnhĩ my kwỳrýt kà krãhyr nhĩrô pê na pre Tĩrtũm amnhĩm mex ã harê? Nà kormã kot amnhĩ krãhyr kêt ri na pre ã harênh anê.

¹¹ Kormã kot amnhĩ krãhyr kêt ri kãm kapěr nẽ kãm:

—E ate amnhĩ kaxyw inhmã ajamaxpěr nẽ ixkõt amnhĩ xãm ã ixte apumunh kõt na pa amnhĩm amex ã ajarê.

Anhỹr o kãm kapěr hãmri nẽ rĩ kormã kãm tanhmã amnhĩ krãhyr to hã kãm karõ nhũm kuma nẽ mar xà hkõt amnhĩ my kwỳrýt kà hkwỳ krãhta. Kot Tĩrtũm mã amnhĩ nhõr ã amnhĩ to amnhĩrít kaxyw ã amnhĩ nhĩpêx anê.

Nom kormã amnhĩ krãhyr kêt ri na pre Tirtũm amnhĩm mex ã harẽ. Tã Ijaew kêt xwýnhjaja kot amnhĩ jakàr kêt tã mẽ hkwyjaja Apraãw pyrà nẽ amnhĩ kaxyw Tirtũm mã hamaxpêr nẽ kãm amnhĩ nhõr jakamã Apraãw te kêp mẽ hpàr krax maati pyrãk.

¹² Nẽ mãânên mẽ pahpê Ijaew. Kot puj mẽ pahtõ amnhĩ kaxyw Tirtũm kôt pajamaxpêr nhũm amnhĩ tã mẽ pahpumu nẽ mẽ pamex ã mẽ pajarẽ. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhÿr kêt nẽ. ãm Apraãw pyrà nẽ amnhĩ kaxyw Tirtũm kôt pajamaxpêr pix ã mẽ pahpumunh kôt na hte mẽ pamex ã mẽ pajarẽ. Kormã Apraãw kot amnhĩ my kwryt kã krãhyr kêt ri ra kot amnhĩ kaxyw Tirtũm mã hamaxpêr jakamã kêp mẽ pahpê Ijaew mẽ pahte urãk nẽ amnhĩ kaxyw Tirtũm mã pajamaxpêr xwýnhjê hpàr krax maati. Ijaew kêt xwýnhjê pyrà nẽ kêp mẽ pahpàr krax maati.

Tirtũm kot Apraãw mã mẽmoj mex jarênh

Karatas 3.22

¹³ Amnepêm na pre Tirtũm Apraãw mã tanhmã kapêr to nẽ kãm:

—E koja nhÿrmã akanrêhã akra nẽ atãmnhwýjaja amÿrpê apyrã nẽ krĩ piitã hkôt mẽ kêp mẽ õ pahi. Anẽ.

Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapêr anẽ? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nẽ ã kãm kapêr anẽ? Nà kot anhÿr kêt. Mẽ pahtõ kot pu we Tirtũm kapêr xà hkôt pix mã amnhĩ nhĩpêx mex rãhã ho ri papa? Mẽ pahpê hihtÿx kênã. ãm kot amnhĩ kaxyw Tirtũm kôt hamaxpêr nhũm kot amnhĩ tã omunh nẽ amnhĩm mex ã harênh kôt pix mã na pre ã kãm kapêr anẽ.

¹⁴ Kop apu kot kãm tanhmã kapêr to nẽ kãm:

—E Apraãw. Kot kaj ixkapêr piitã ama nẽ hkôt amnhĩ nhĩpêx mex rãhã ho ri apa. Hã koja nhÿrmã akanrêhã

akra nẽ atãmnhwýjaja kêp krĩ piitã hkôt mẽõ pahihti.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhÿr ronhÿx pre kuma nẽ tee ri amnhĩ kukamã hamaxpêr nẽ hamaxpêr o:

—Kwa nã. Ra ixte Tirtũm kôt amnhĩ xãm tã tanhmã kot pa amnhĩ to nẽ kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nẽ ixtãmnhwýjaja kêp mẽ õ pahi hkêt nẽ pa. Hêxta waa nẽ.

¹⁵ Koja Tirtũm ixte kapêr kwÿm ri tanhmã ixte amnhĩ tomnuj to hã ixpumu nẽ tanhmã ixtomnuj to. No mēhõ kot we kapêr piitã hkôt amnhĩ nhĩpêx mex rãhã ho pa? Nã amrakati kumrêx.

Anhÿr o nhÿx pre hamaxpêr.

¹⁶ No na pre Tirtũm ã kãm kapêr anhÿr kêt nẽ. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nẽ ixkôt amnhĩ xãm jakamã kot paj amarĩ ato mex nẽ. Anẽ.

Tirtũm na hte mẽmoj tã amnhĩ jarênh o amnhĩ to hêx kêt nẽ. Na hte mẽmoj tã amnhĩ jarênh xà hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrà nẽ amnhĩ kaxyw hkôt pajamaxpêr xwýnh piitã mẽ pahto mex nẽ.

Nẽ xà na pre ã mẽ pamã kapêr anẽ nẽ mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nẽ.

Anhÿr o mẽ pamã kapêr? Nã na pre ã mẽ pamã kapêr anhÿr kêt nẽ. Na pre mẽ pamã:

—Kot kaj mẽ finat Apraãw pyrà nẽ amnhĩ kaxyw ixkôt ajamaxpêr nẽ ixkôt amnhĩ xunhwÿ há kot paj mẽ ato mex nẽ.

Anhÿr o mẽ pamã kapêr. Tã Apraãw kumrêx kot mẽ pakukamã amnhĩ kaxyw hkôt hamaxpêr jakamã te kêp

mê pahpiitâ mê pahte urâk nê â amnhî nhîpêx anhÿr xwÿnhjê pâr krax maati pyrâk.

¹⁷ Amnepêm na pre Tîrtûm tanhmâ Apraâw mâ kapêr to. Kot tanhmâ kâm kapêr toja Tîrtûm kapêr â kagâ htûm kamâ na. Na pre kâm:

Kot kaj apê ahpÿnhâ ri mê urojê hpâr krax. Anê.

Kormâ Apraâw kra hkêt tâ nhûm hkra hkukamâ â kâm kapêr anê. Hâmri nhûm kuma nê hkôt hamaxpêr kurê kumrêx nê hamaxpêr o:

–Hêxta waa nê. Ra ixprô mê wa ijamê wa ixpigêt tÿx nê wa ixkra hkêt kumrêx. Kot paj wa tanhmâ amnhî to nê tokyx ty. Tâ ra Tîrtûm kot ixkra nê ixtâmnhwÿjê hkukamâ â inhmâ mê harênh anhÿr kênâ. Jakamâ kot pa xep wa ixpigêt tÿx tâ tanhmâ amnhî to nê ixkra. Nâ kot pa xep wa anê. Nê koja ixkraja tanhmâ amnhî to nê ixpê htyk japêr tâ koja Tîrtûm akupÿm inhmâ ho htîr. Nâ koja inhmâ ho anê. Ra kot inhmâ ixkra nê ixkanrêhâ ixtâmnhwÿ xohtô jarênh kênâ. Anê.

¹⁸⁻¹⁹ Na pre ra hpigêt tÿx nê. Ra hâ amgrâ pê 100 nê hkurê kêt nê pa. Nhûm hprô mãânên hpigêx tÿx nê. Nê ôhy kamâ hkra hkêt kumrêx. Kormâ wa hkra hkêt tâ nhûm Tîrtûm Apraâw mâ hkra nê htâmnhwÿ xohtô hâ harê. Nê kêp mê urojê xohtôjê pâr krax â kâm harê. Hâmri nhûm kuma nê amnhî kaxyw hkôt hamaxpêr tÿx kurê kumrêx.

²⁰ Nê â amnhî nhîpêx anhÿr râhâ ho pa. Na pre war amnhî kra hâ amnhî jarênh ma nê tee ri amnhî kukamâ hamaxpêr kêt nê. Âm Tîrtûm tãm kot wa kâm wa hkra jarênh pix mã hamaxpêr pê amnhî kaxyw kâm hamaxpêr tÿx o ri wa pa. Nê hamaxpêr o:

–Nâ ra wa ixpigêt tÿx kumrêx tâ koja xep Tîrtûm wa inhmâ wa ixkra hõ gô. Nâ koja wa inhmâ kugô. Hêxta waa nê. Âm hâmri Tîrtûmja mex o mex.

²¹ Nâ kot wa inhmâ wa ixkra jarênh xâ hkôt koja wa inhmâ kugô. Ja kaxyw àhpumunh o àhpumunh. Tîrtûmja hêx kêt. Anê.

²² Hâmri nhûm Tîrtûm â hamaxpêr anhÿr â omu nê amnhîm mex â harê. Nê kot kâm amnhî jarênh xâ hkôt wa kâm wa hkraja gô.

²³ Nom na pre amnhîm Apraâwja pix mex â harênh kêt nê.

²⁴ Kot puj mê pahtô urâk nê amnhî kaxyw hkôt pajamaxpêr nhûm amnhî tâ mê pahpumu nê ra kot Apraâw jarênh ta pyrâ nê amnhîm mê pamex â mê pajarê. Na pre mê panhõ Pahihti Jejus ty nhûm Tîrtûm akupÿm ho htîr. Tâ mê papajaja na pu prem amnhî kaxyw Jejus kôt pajamaxpêr nhûm Tîrtûm ja hâ mê pahpumunh kôt mê pahte amnhî to mex xwÿnh â mê pajarê.

²⁵ Na pre mê pahwÿr Kra Jejus mê nhûm mê pahwÿr wrÿ. Tâ nhûm mê axtem nê kupî nom nhûm amarî htyk kêt nê. Na pre htyk o mê pahte amnhî tomnuj pânâ amnhîrer pa. Ja kaxyw na pre Tîrtûm mê pahwÿr kumê. Jakamâ nhûm prem kupî nhûm akupÿm ho htîr. Tâ mêmo kaxyw na pre Tîrtûm â mê pahwÿr Kraja mênh nhûm mê panê htyk anê nhûm akupÿm ho htîr? âm kot kukwak ri amnhîm mê pahte amnhî kaxyw hkôt pajamaxpêr xwÿnhjaja mê pahte amnhî to mex xwÿnh â mê pajarênh pix kaxyw.

5

Tîrtûm kot mê pahto hkwÿ hâ harênh

Matêwre 5.12; Sikûn Korîit 4.8, 5.18-21; Xiakre 1.2-4; Wam Pêtre 4.12, 5.9

¹ Nê na pu prem amnhî tomnuj o ri papa nhûm Tîrtûm ja hâ mê pahpumu nhûm ja kêp omnuj nê. Jakamâ nhûm Jejus amnhî grônh kôt wrÿ nê mê panê ty. Nhûm Tîrtûm htykja kukwak ri mê pahto hkwÿ. Mê pahte amnhî kaxyw hkôt pajamaxpêr nê hkôt amnhî xunhwÿr â mê pahpumu hâmri nê â mê panhîpêx anê pu mê ra pahpê hkwÿ hâ papa.

² Na pre Jejus Tîrtûm mã mê pajarênh o:

—E jajê pumu. Na mẽ ra amnhĩ kaxyw pamã hamaxpêr nê pahkôt amnhĩ xunhwỳ. Anê.

Hãmri nhũm kuma nê mẽ pahto mex nê mẽ pakutã nojarêt rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwỳnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nê papa nê pajamaxpêr o:

—Hêxta waa nê. Kot paj nhỹrmã inhno ho Tĩrtũm mex o mex ã omu nê kuri ixpa ho ixpa. Nà ãm hãmri. Inhmã omunh prãm tỳx kumrêx. Anê.

³⁻⁴ Nê na htem Jejus ã mẽ pah-tomnuj nê pu mẽ pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwỳr tỳx o kormã mō. Nê mẽ umaj hkaga hkêt nê. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nê ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pah-pumu nhũm ja kãm mex nê. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpêr tỳx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprỳ hkêt nê. Ra kot mẽ pamã amnhĩ Karō nhōr nhũm kot mẽ pahkarō mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprỳ. Na hte Karōja mẽ pahkarō kamã mẽ pamã Tĩrtũm kapêr jarênh o amnhĩrĩt nê kãm mẽ pajapê htỳx ã harênh o amnhĩrĩt rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprỳ. Mêhō kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja

ã ma mẽ hwỳr wrỳ. Ixte mẽ nê atyk kaxyw agrōnh kôt mẽ hwỳr amênh jakamã kot kaj wrỳ nê mẽ kãm ixkapêr jarênh o ri mẽ hkôt apa. Rãhã nhũm mẽ hkwỳjaja apĩ ka mẽ piitã mẽ nê ty. Anê.

Hãmri nhũm kuma nê kãm:

—Tôe. Nà kot paj amã hprãm xà hkôt ã amnhĩ nhĩpêx anê. Anê.

Hãmri nê man amnhĩ grōnh kôt mẽ pahwỳr wrỳ.

⁷⁻⁸ Xà koja mêhō kãm axpên japê xàj axpên nê ty nà? Xà kot mêhō tãm kot amnhĩ nhĩpêx xwỳnh tã nhũm mẽ kot hpĩr kaxyw nhũm hkrãmnhwỳja kãm hapê nê. Nê nê amnhĩ grōnh kôt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mêhō hkrãmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwỳr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwỳr mênh anê.

⁹ Na pre ty nhũm hkamrô hkwỳ axkapĩ nhũm Tĩrtũm ja hã omunh xà hkôt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htỳx kamã hamak tũm xàta wỳr mẽ parênh kêt nê. Mẽ pahpê hkwỳ kênã kot kêt hwỳr mẽ parê.

¹⁰ Nom kormã mẽ pahpê hkwỳ hkêt ri na pu prem te ra kutã amnhĩ xunhwỳr pyrak o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nê ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa urak nê wa kuri pahtĩr tũm nê pamex kumrêx nê papa ho papa.

¹¹ Nê mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhỹr kêt nê. Mẽ pahpê Tĩrtũm krãmnhwỳ jakamã na pu htem mããnên pahkĩnh nê ri papa.

Pahihti Jejus Kris kot mẽ panê htyk ã omunh xà hkôt na pre Tirtũm mẽ pahte hkôt amnhĩ xunhwÿr xwÿnhjê ho hkwy jakamã na pu htem pahkĩnh nê pajamakêtkati nê ri papa.

*Atãw mẽ Kris wa harênh
Wam Korõt 15.20-22, 45-49*

12-13 Nê amnepêm na pre Tirtũm finat Mojes mã tanhmã kapêr to. Hãmri nhũm kuma nê Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nê mẽ kãm hã hkagã. Mẽ kot kamã harênh nê mar nê Tirtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj mã karõja ma nê tanhmã axpên mã kapêr to nê axpên mã:

–Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mẽ pahpiitã mẽ pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkra. Mÿrapê na pre htĩr tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mẽ papa xwÿnhjaja na pu htem uràk nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tirtũm kot mẽ pahtã Atãw mã kapêr xà hkôt.

14-19 Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mẽ kot amnhĩ tomnuj mÿrapê ty. Atãw pyrã nê Tirtũm kot mẽmo xõ nê hkurê xwÿnhhta krêr kêt mã uràk nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mẽ pahpiitã mẽ pamã Tirtũm kapêr nhĩrôp ãm nê amnhĩ tomnuj o hkra anê nê mẽmo xõta krê. Jao te mẽ pahpiitã mẽ pahte uràk nê kumê hkur pyrãk o mẽ panhĩpêx. Mÿrapê nhũm htem arĩ pika piitã hkôt hapôj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tirtũm Atãw kot tanhmã amnhĩ

tomnuj to hã omunh xà hkôt mẽ pakukamã hamaxpêr o:

–Nã koja mẽ Atãw pyrã nê amnhĩ tomnuj o ri pa. Mÿrapê kot paj ma mẽ kot amnhĩ xà htÿx kamã hamak tũm xàta wÿr mẽ rênh pa. Anê.

Tã Jejus Kris mẽ Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Uràk nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwÿjê pyrã nê uràk nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwÿr xwÿnhjaja na hte Tirtũm ja hã mẽ pahpumunh kôt mẽ pahto hkra. Kot puj mẽ nhÿrmã pahtyk mã nhũm akupÿm mẽ pahto mẽ pahtĩr pu mẽ wa kuri pahtĩr tũm nê papa ho papa.

Atãw kot Tirtũm kapêr nhĩrôp ãm jakamã na hte Tirtũm mẽ pahpiitã mẽ pahte amnhĩ tomnuj xwÿnh ã mẽ pajarê. Nom nhũm Jejus Atãw rom kot Tirtũm kapêr mar nê hkôt amnhĩ nhĩpêx rãhã jakamã na hte Tirtũm mẽ pahte hkôt amnhĩ xunhwÿr xwÿnhjaja amnhĩm mẽ pahte amnhĩ to mex xwÿnh ã mẽ pajarê.

Nhũm Atãw kot Jejus kĩnhã Tirtũm kapêr nhĩrôp ãm mÿrapê na hte mÿr pê mẽ pa xwÿnhjaja ohtõ nê pa nê gaa nê Atãw pyrã nê htyk pa. Hãmri nê kormã htĩr ri amnhĩ to mex o pa hkêt mÿrapê ma mẽ kot amnhĩ xà htÿx kamã hamak tũm xàta wÿr ma hapêx. Tã nhũm Tirtũmja mex o mex jakamã na hte Jejus Kris mẽ wa mẽ pakamã ukaprĩnê. Jakamã na pre mẽ pahwÿr Jejus mẽ nhũm mẽ pahwÿr wrÿ hãmri nê htyk o mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhĩpêx anhÿr kukwak ri mẽ pahte hkôt amnhĩ xunhwÿr xwÿnhjaja amarĩ tanhmã mẽ pahto

mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarẽ. Tã nhũm Jejus mẽ pakamã ukaprĩ nẽ mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamexpẽr xwýnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anẽ.

Nẽ Atãw kot amnhĩ tomnuj mýrapê na htem piitã ri pa nẽ tanhmã amnhĩ to nẽ ty rý ri pa nẽ gaa nẽ wejre nẽ ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwýr xwýnhjê kutã nojarêr rãhã nẽ mẽ pakukamã hamaxpẽr o:

—Nã mẽ kot Ixkra hkôt amnhĩ xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwý nhũm mẽ nhýrmã wa ixri mex nẽ htĩr tũm nẽ pa ho pa. Anẽ.

20-21 Nẽ na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nẽ mẽ kot kapêr mar nẽ hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nẽ amnhĩ xô ri mẽ kãm hã kagã nẽ mẽ kãm harênh o ri mẽ hkôt pa. No nhũm prem kapêr ma nẽ ãm kuma nẽ hkwým pix mã ri tanhmã amnhĩ tomnuj to ho pa. Nẽ pika piitã hkôt ja arĩ rãhãã. Ja mýrapê koja mẽ nhýrmã ty nẽ ma mẽ kot amnhĩ xà htýx kamã hamak tũm xãta wýr ma pa. Nom Tĩrtũm arĩ kãm pika piitã hkôt mẽ papa xwýnhjê japê nẽ. Mẽ pahte amnhĩ tomnuj o papa tã nhũm kãm mẽ pahto mex prãm nẽ. Jakamã na pre mẽ pahwýr Kra Jejus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamexpẽr xwýnhjaja nhýrmã Tĩrtũm mẽ wa kuri pahťir tũm nẽ pa mex nẽ papa ho papa.

6

Mẽ kot mẽ pahkrã kumrã ã mẽ harênh

Sikũn Korĩt 5.17; Karatas 2.19-20, 5.24, 6.14; Epes 4.17-24; Korosẽ 3.1-11; Wam Pêtre 4.1-6

¹ Nẽ mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nẽ. Nẽ arĩ mẽ pakutã nojarêr rãhã nẽ. Jakamã xà kot kaj mẽ atõ ã harênh anhýrja ma nẽ atýx ri ã ajamexpẽr anẽ nẽ ajamexpẽr o:

—Nã Tĩrtũm kãm ijapê nẽ kot ixkutã nojarêr rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nã kot paj ho anhýr kêt nẽ. Anẽ.

Ka ã mẽ atõ atýx ri ajamexpẽr anhýr japêr. Kwa xà ajamexpêrja mex? Nã mex kêt.

² ã ajamexpẽr anhýrja mẽ hamaxpẽr mex xà hkôt kêt. Ra mẽ pahte Jejus kôt amnhĩ xunhwýr nẽ mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyrãk. Jakamã kot puj mẽ arĩ tanhmã amnhĩ tomnuj to ho ri papa hkêt nẽ.

³ Mẽmo kaxyw na htem Tĩrtũm mã mẽ pahkrã kumrã? Nã mẽ pahte ra Jejus kôt amnhĩ xunhwýr ã amnhĩ to amnhĩrĩt kaxyw. Te Jejus htyk nhũm mẽ pahte amnhĩ tomnujja haxwýja hkôt htyk nẽ hapêx par pyrãk o amnhĩrĩt kaxyw. Jakamã na pu htem pajamexpẽr o:

—Nã kot paj axte tanhmã amnhĩ tomnuj to ho ri ixpa hkêt nẽ. Anẽ.

⁴ Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũnja te mẽ kot Jejus kôt haxwýja haxãr pyrãk. Hãmri nhũm mẽ akupým mẽ pahto api. Te Tĩrtũm hihtýx o hihtýx o kot akupým Kra Jejus ho htĩr pyrãk. Te mẽ pahťyk tã nhũm akupým kot mẽ pahto mẽ pahťir pyrãk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw.

⁵ Nhũm mẽ pahte amnhĩ nhĩpêx tũnja te Jejus kôt htyk nẽ hapêx par pyrãk. Nẽ mẽ pahte amnhĩ nhĩpêx

nywja te Jejus akupÿm htîr pyrâk o amnhî nhîpêx.

⁶ Amnepê m na pu pre htem amnhî tomnuj râhã ho ri papa. Te mē kãm mē àpênh xwÿnhjaja kot mē õ patrãw mã àpênh râhãta pyrâk. Tã nhũm Kris mē panê ty. Kot mē panê mē pahte amnhî tomnuj pãnhã amnhîrer nê ho hapêx par kaxyw mē panê ty. Jakamã te mē pahte amnhî tomnuj mē pajamaxpêr punujja te pî kahpa hã Jejus kôt harir nê htyk nê hapêx par pyrâk. Pãnhã mē pahte amnhî nhîpêx nyw pix o amnhî nhîpêx kaxyw. Nê mē pajamaxpêr nyw pix o pajamaxpêr papa kaxyw.

⁷ Na hte mē htyk xwÿnhjaja axte tanhmã amnhî tomnuj to hkêt nê. Tã kêr pu mē urâk nê axte ã amnhî nhîpêx anhÿr kêt nê.

⁸ Na pu prem Jejus kot mē panê htyk ã harênh ma nê pajamaxpêr o:

—Nà ra Jejus kot mē panê htyk jakamã kot paj ixte amnhî nhîpêx tũm kaga hpa nê hpãnhã kot amnhî nhîpêx kôt pix mã ri amnhî nhîpêx o ri ixpa. Te ra ixtyk nê axte tanhmã ixte amnhî tomnuj to ho ri ixpa hkêt pyrâk. Jao amnhî nhîpêx nyw pix o amnhî nhîpêx o ri ixpa. Anê.

⁹ Nê Jejus htyk nhũm Tirtũm akupÿm ho htîr jakamã koja axte htyk kêt nê. Ra mē pahte ja mar mex.

¹⁰ Na pre ãm htyk tipxi htã htykja o mē pahpiitã mē pahte amnhî tomnuj pãnhã amnhîre. Tã ra akupÿm htîr o htîr nê kaxkwa kamã Tirtũm mã tanhmã amnhî nhîpêx to ho ri pa.

¹¹ Tã mē papajaja kot puj mē ã kot amnhî nhîpêx anhÿrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jejus pyrã nê ra ixtyk pyrâk jakamã kot paj axte amnhî tomnuj o ri ixpa hkêt nê. Te ixte Jejus pyrã nê akupÿm ixtîr nê ãm Tirtũm kôt pix mã amnhî nhîpêx o ri ixpata pyrâk o kot paj hpãnhã amnhî nhîpêx o ri ixpa. Anê.

¹² Jakamã kot ka mē atõ nhÿrmã tanhmã amnhî kukamã ajamaxpêr punuj to japêr hãmri nê ajamaxpêr o:

—Nà inhmã ã amnhî tomnuj anhÿr prãm nê. Omnuy tã kot paj ho anê. Nà ixte ho anhÿr mã kênã.

Anhÿr o ajamaxpêr japêr tã kwa mē ã ajamaxpêr anhÿr kêt nê.

¹³ Kêt Tirtũm mã mãn amnhî gõ nê hkôt amnhî nhîpêx o ri apa. Hãmri nê amnhî krã kamã mēmoj mex pix mã ajamaxpêr nê tãm akapêr. Nê mē kot amnhî to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mē kot amnhî tomnuj o mē pa xwÿnhjê hkôt ri apa.

Nê kagôxÿhti japrô nê ho akôm o ri mē hkôt apa.

Tã ra hpãnhã Tirtũm mã amnhî gõ nê axte ã amnhî nhîpêx anhÿr kêt nê.

¹⁴ Amnepê m na pu prem tanhmã mē pahte amnhî nhîpêx to ho papa hkukamã pajamaxpêr nê pajamaxpêr o:

—Nà kot paj Tirtũm kapêr kôt pix mã mãn ri amnhî nhîpêx o ri ixpa nê amnhî to mex o ri ixpa nhũm Tirtũm ja hã ixpumu nê amnhîm inhmex ã ijarê. Nà kot paj anê.

Anhÿr tã no ãm tee ri mē pamã hkôt amnhî nhîpêx o ri papa hprãm kaprÿ nê arî ri kapêr kwÿm tanhmã amnhî nhîpêx to ho ri papa. Tã ra hpãnhã axtem pajamaxpêr o:

—Nà Tirtũm kot ixkutã nojarêr râhã ho pa xwÿnh. Tã ra ixte hkôt amnhî xãm jakamã koja tanhmã ixto pa hkôt amnhî nhîpêx mex o ri ixpa. Nà koja ixto anê.

Anhÿr jakamã ra amnhî kaxyw kãm pajamaxpêr tÿx o mēmoj punuj kutã amnhî to htÿx nê.

Mē pahte Tirtũm mã tanhmã amnhî nhîpêx to hã mē pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamaxpêr to? Xà kot pu mē ã pajamaxpêr anê nê pajamaxpêr o:

—Nà na hte Tirtũmja ixte kapêr kôt amnhî nhîpêx o ixpa hã ixpumunh kôt amnhîm inhmex ã ijarênh kêt

ně. Ām kēp ixkutā nojarēt rāhā nē amarī amnhīm inhmex ā ijarēnh xwýnh jakamā kot paj arī amnhī tomnuj rāhā nē aa ja kaga hkēt nē.

Anhýr o kot puj mē pajamaxpēr? Nà kot puj mē ā pajamaxpēr anhýr kēt nē. Ā mē pajamaxpēr anhýrja mex kēt.

¹⁶ Koja mēhō nhýri kot amnhī tomnuj tỳx xwýnhjê hō pumu nē kām amnhī jarēnh japēr nē kām:

—E inhma. Kot paj ām akôt pix mā tanhmā amnhī nhīpêx to ho ri ixpa. Jakamā e inhmā mēmoj tā karō pa ama nē amā tanhmā ho ho ri ixpa.

Anhýr o kām kapēr japēr. Hāmri nē ā amnhī nhīpêx anhýr tā amnhī tomnuj pix o ri pa. Tā ā mē kot amnhī nhīpêx anhýr o mē pa xwýnhjaja koja nhýrmā ty hāmri mē kot amnhī xà htỳx kamā hamak tùm xàta wỳr ma hapêx.

No koja mēhō Tirtùm mā amnhī jarēnh nē kām:

—Pa Tirtùm. E kot paj ām akapēr kôt pix mā ri amnhī nhīpêx o ri ixpa.

Anhýr o kām amnhī jarē nē hkôt amnhī nhīpêx mex o pa. Nē tām amnhī nhīpêx o ri pa. Hāmri nē nhýrmā ty nē ma ō krī hwỳr api nē Jejus mē Tirtùm wa kuri htír tùm nē mex rāhā nē pa ho pa.

¹⁷ Tā mē kajaja na ka xep prem tee ri mē amā mē ate amnhī tomnuj mā anhūrer prām tā nhūm te tām kot amnhī tā mē ato htỳx pyrāk o mē anhīpêx ka mē tee ri kām anhūrer prām kaprỳ. Tā nhūm Tirtùm tanhmā mē akrā hto ka mē kapēr ma nē amnhī kaxyw hkôt ajamaxpēr tỳx nē ām hkôt pix mā amnhī nhīpêx. Pa ja hā mē ajarēnh ma nē mē anhý hā ixkīnh nē. Nē Tirtùm mā ixte mē ajarēnh mar nē mē anhý hā ixkīnh ā amnhī jarē.

¹⁸ Na pre Tirtùm tanhmā mē akrā hto ka mē amnhī tomnuj mā anhūrer pa nē hpānhā hkôt pix mā amnhī nhīpêx.

¹⁹ E kot paj ixprī hā tanhmā mē amā ja jarēnh to. Te ixte ixkrajē

jahkre pyrāk o kot paj mē amā awjarē. Nà amnepēm na ka prem ajamaxpēr punuj kôt amnhī tomnuj o ri apa. Nē gaa nē ra amnhī tomnuj pix kukamā ajamaxpēr. Tā kēr ka mē arī ā amnhī nhīpêx anhýr kēt nē. Pānhā tām ri ajamaxpēr o ri apa. Jao gaa nē ra Tirtùm kām hprām xà hkôt tām amnhī nhīpêx mex nē.

²⁰ Na ka prem tee ri amā amnhī tomnuj mā anhūrer prām kaprỳ. Te tām kot amnhī tā mē ato htỳx nē amnhī kôt mē ato pa pyrāk o mē anhīpêx.

²¹ Xàn ka prem ā amnhī tomnuj anhýr o apa nē akīnh nē ajamakêtkati nē ri apa? Nà na ka prem akīnh nē apa hkēt nē. Tā na ka prem Jejus kôt amnhī xunhwỳ nē tee ri ate tanhmā amnhī tomnuj to hā amnhī pumu nē akapri nē apijaam nē. Ā mē kot amnhī tomnuj anhýr o pa xwýnhjaja na htem ja mýrapê ty nē ma mē kot amnhī xà htỳx kamā hamak tùm xàta wỳr pa.

²² No na pre ra Tirtùm tanhmā mē akrā hto ka mē amnhī tomnuj kaga hpa. Te Tirtùm tām kot hpānhā amnhī tā mē ato htỳx nē amnhī kôt mē ato pa pyrāk ka mē ra ām hkôt pix mā amnhī nhīpêx mex o ri apa. Nē hpānhā amā kapēr kôt pix mā amnhī nhīpêx mex prām. Nē hkôt pix mā amnhī nhīpêx hprām. Jakamā kot kaj mē nhýrmā kuri amex kumrêx nē atír tùm nē ri apa ho apa.

²³ Na hte mē kām àpênh o ri mē pa xwýnhjaja mē kām mēmoj tā apê nē àpênh pa nē hpānhā amnhīrer xà jamỳ. Ja pyrā nē koja mē kot amnhī tomnuj xwýnhjaja nhýrmā ty hāmri nē ma mē kot amnhī xà htỳx kamā hamak tùm xàta wỳr ma pa.

No mē pahte amnhī kaxyw Jejus Kris kôt pajamaxpēr xwýnhjaja na hte Tirtùm ja hā mē pahpumu nē mē pajarēnh o:

—Nà ām hāmri. Jajaja koja nhýrmā Ixkra mē wa Ixkuri mex kumrêx nē htír tùm nē pa ho pa. Hêxta waa nē. Nà ām hāmri koja mē anē. Anē.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarênh anê? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarênh anê.

7

Mẽ pahte amnhĩ tomnuj kot axte amnhĩ tã mẽ pahto htÿx kêt ã harênh

Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nà Tĩrtũm kot mẽ pakaxyw tanhmã Mojes mã kapêr tota na ka mẽ ra mar tÿx nê. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nê axte hkôt amnhĩ nhĩpêx kêt nê. Ra mẽ ate ja mar tÿx. E pa mẽ amã ja hã ejêp jarê ka mẽ inhma.

² Nà finat Mojes kot Tĩrtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karôja. Koja mēhō ho mjên hãmri nê ãm kôt pix mã ri pa ho pa nê aa hkaga hkêt nê. No koja nhÿrmã mjên kêp ty nhũm ahte ri pa. Hãmri nê kãm axte mēhō ho mjên prãm nê mãmri axte mēhō ho mjên. Ja tanhmã kute hkêt.

³ Nom koja wam mjên arĩ htĩr japêr nhũm hprō tanhmã hamaxpêr to nê hkaga nê hpãnhã nhãm mēhō ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mÿrpê axte kãm mēhō ho mjên prãm nê mãmri ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojes mã mẽ pakaxyw mẽmoj tã karō kot anhÿr.

⁴ Tã ja pyrã nê na pu prem amnepêp pajamaxpêr o:

—Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nê amnhĩm inhmex ã ijarê. Anê.

Tã pu mẽ ra tanhmã pajamaxpêr to nê hpãnhã pajamaxpêr o ho pajamaxpêr o:

—Nà na xep hte Tĩrtũm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarênh kêt nê. Mẽ ixte

hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijamaxpêr nê hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarê. ãm ja pix ã mẽ ixpumunh kôt na hte mẽ ixto hkra nê mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anê.

ã mẽ pajamaxpêr nyw kot anhÿr. Jakamã te mẽ pahte mēhō kot mjên nyw xwÿnh gryk ã axte mjên htyk xwÿnh mã hamaxpêr kēeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tĩrtũm kapêr mar tÿx tã kuma nê ãm kuma nê ri papa nê ri hkôt amnhĩ nhĩpêx kêt nê. Mÿrapê nhũm Tĩrtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htÿx kamã hamak tũm xà hwÿr papa mã xwÿnhjê hã mẽ pajarê.

⁶ Nê amnepêp na pu pre htem ã pajamaxpêr anhÿr o:

—Nà kot paj Tĩrtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwÿnh ã ijarê.

Anhÿr o pajamaxpêr no ãm tee ri ã pajamaxpêr anhÿr kaprÿ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nê hpãnhã Karō nhÿ hã tãm amnhĩ nhĩpêx. Jao ra tee ri mẽ pamã Tĩrtũm kapêr kôt amnhĩ nhĩpêx prãm kaprÿ hkêt nê. Ra Tĩrtũm Karō nhÿ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kaga htũm kot tanhmã mẽ pajarênh to

Rômân 3.20, 5.20; Karatas 3.23-24

⁷ Tã Tĩrtũm mẽ pahte kapêr kôt ri amnhĩ nhĩpêx ã mẽ pahpumunh kôt

amnhîm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprî hã Tirtũm noo mã mẽ kot amnhî tomnuj xà jarênh mar nê omunh mex kaxyw na. Na hte mẽ pahkwýjê kukrêx kînh o pamã ho panhõ hprãm nê mẽ pamã karõ. Æ kot mẽmoj punuj piitã nê mẽ pamã karõ kot anhÿr. Tã mẽ pahte ja mar kêt ronhÿx pu mẽ Tirtũm kêp ja homnuj ã harênh mar kêt nê.

⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kînh o ho pamã panhõ hprãmja mãânên kêp ja homnuj ã harênh mar tã nom aa hkaga hkêt nê arî pamã axpên kukrêx kînh o pamã ho panhõ hprãm tÿx rãhã ho ri papa. Kop ãm Tirtũm kapêr kêt ronhÿx pu mẽ kot amnhî tomnuj xàja aa mar kêt kumrêx nhũm te mẽ pamã amrakati pyræk.

⁹ Amnepê mã ixte Tirtũm kapêr mar kêt ri na pa pre ixtÿx ri amnhî kukamã ijamaxpêr o ri ixpa nê ijamaxpêr o:

–E kot paj nhÿrmã Tirtũm ri ixtîr tũm nê inhmex nê ixpa ho ixpa.

Anhÿr tã hpãnhã pamã axpên kukrêx kînh o ho pamã panhõ hprãm nê kapêrta ma nê ja hã amnhî pumunh kurê kumrêx. Hãmri nê tee ri amnhî kukamã ijamaxpêr nê ijamaxpêr o:

–Hêxta waa nê. Nà ã ixte amnhî nhîpêx anhÿr o ixpa jakamã kot paj nhÿrmã ty nhũm Tirtũm akupÿm ixto ixtîr pa kuri ixtîr tũm nê ixpa ho ixpa hkêt nê. Hêxta waa nê. Ixte amnhî tomnuj xwÿnh na pa. Kot paj nhÿrmã ty nhũm Tirtũm ma mẽ kot amnhî xà htÿx kamã hamak tũm xàta wÿr amnhî nê inhmê. Anê.

Hãmri nê ixkaprî nê tee ri amnhî kukamã ijamaxpêr o ri ixpa.

¹⁰ Tã hpãnhã axtem ijamaxpêr o:

–Nà kot paj Tirtũm kapêr kêt pix mã mãn ri amnhî nhîpêx o ri ixpa hãmri nê nhÿrmã ixtyk tã hwÿr api nê kuri ixtîr tũm nê inhmex nê ixpa ho ixpa. Nà kot paj anê.

Anhÿr ã ijamaxpêr tã no ãm tee ri inhmã hkôt amnhî nhîpêx o ixpa hprãm kaprÿ. Na pa pre xatã kapêr nhîrõp ixkuhê nê tee ri ja hã amnhî pumu nê ijamaxpêr o:

–Kwa tanhmã kot pa amnhî nhîpêx to nê ãm Tirtũm kêt pix mã ri amnhî nhîpêx? Na pa hte tee ri inhmã ã amnhî nhîpêx anhÿr prãm tÿx kaprÿ. Æm ixte amnhî tomnuj pix o ri ixpa xwÿnh jakamã ãm hãmri koja amnhî nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mẽhõ koja Tirtũm kapêr kêt amnhî nhîpêx mex o ri pa? Na pu htem pahpiitã tee ri pamã ho anhÿr prãm kaprÿ. Mẽ pahpê hihtÿx kumrêx jakamã na pa pre ixtÿx ixte Tirtũm kuri ixtîr tũm nê ri ixpa hã amnhî kukamã amnhî jarênh kaprÿ. Æm xatã kapêr nhîrõp ixkuhê nê amnhî tomnuj pix o ri ixpaja mÿrapê koja mẽ kot amnhî xà htÿx kamã hamak tũm xàta wÿr amnhî nê inhmê.

¹² Kot anhÿr tã tanhmã kot puj mẽ Tirtũm kapêr ã kagà htũmta jarênh to? Nà kot mẽ pamã mẽ pahte amnhî nhîpêx ã karõta mex kumrêx. Mex o mex.

¹³ Mex kumrêx tã na htem kuma nê tee ri kãm hkôt amnhî nhîpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tã hkôt amnhî nhîpêx mex kêt nê. Jao ra ixte amnhî tomnuj xwÿnh ã amnhî pumu. Na pa pre tee ri inhmã hkôt amnhî nhîpêx o ri ixpa hprãm tã no ãm xatã kapêr nhîrõp ixkuhê nê hkwÿm ri amnhî nhîpêx rãhã ho ri ixpa. Tã ra tee ri ja hã amnhî pumu nê amnhî kukamã ijamaxpêr o:

–Nà na pa hte ãm tee ri inhmã Tirtũm kêt amnhî nhîpêx prãm kaprÿ no ãm ho anhÿr kêt nê. Æm ixte amnhî tomnuj pix o ixpa xwÿnh na pa. Ja mÿrapê koja Tirtũm amnhî nê ma kuwy hwÿr inhmê. Nà koja ixto anê. Anê.

Mê pahte mê pamã amnhĩ tomnuj kaga hprãm kaprÿ hã mê pajarênh

Karatas 5.17

¹⁴ Nê Tirtũm kapêr ã kagà htũmta Tirtũm kapêr na. Nê Tirtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa?

¹⁵ Inhmã tãm ixte amnhĩ nhĩpêx prãm tâ no ãm amnhĩ tomnuj pix o ri ixpa. Mëmoj ixpê omnuj tâ pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mëmoj ixpê omnuj nhũm inhmã ho anhÿr prãm kêt tâ ra ho anê. Nhũm mëmoj mex nhũm inhmã ho anhÿr prãm tâ ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

¹⁶ ã ixte amnhĩ nhĩpêx anhÿr o ri ixpa htã ra Tirtũm kapêr mexta ma hãmri nê ra ijamaxpêr o:

—Nà Tirtũm kapêrja mex kumrêx tâ pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêt tâ arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa.

¹⁸ Nê inhmã tãm amnhĩ nhĩpêx prãm tâ no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh.

¹⁹ Inhmã mëmoj mex kôt pix mã amnhĩ nhĩpêx prãm tâ no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mëmoj ixpê omnuj tâ pa hkôt amnhĩ nhĩpêx o ri ixpa.

²⁰ Ixte Tirtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mëmoj ixpê omnuj pa inhmã ho anhÿr prãm kêt tâ ra hkôt amnhĩ nhĩpêx. Ixte Tirtũm

kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa.

²¹ Nê mëmoj mex nhũm inhmã hkôt amnhĩ nhĩpêx prãm tâ ra hkwÿm ri amnhĩ nhĩpêx. ã ixte amnhĩ nhĩpêx anhÿr xwÿnh na pa.

²² Nê inhmã Tirtũm kapêr mar nê hkôt ri amnhĩ nhĩpêx prãm tâ

²³ nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tâ no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ.

²⁴ Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mê kot amnhĩ xã htÿx kamã hamak tũm xãta wÿr ma mō. Mëhō kot tanhmã ixkrã hto pa ã amnhĩ nhĩpêx anhÿrja kaga?

²⁵ Nà mê panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tirtũm mã kãm:

—Pa Tirtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tirtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhÿr xwÿnh na pa.

8

Tirtũm Karō kot mê pahto tãm mê pahte amnhĩ nhĩpêx xwÿnh ã harênh

Karatas 5.16-26

¹ Nê Jejus Kris kêp mëmoj punuj kutã mê pahto mê paxihtÿx xwÿnh jakamã mê pahte hkôt amnhĩ xunhwÿr xwÿnhjaja na pu htem ÿ hã

amnhĩ tomnuj o ri papa hkêt nê. Jao mẽ pahte kuwy hwÿr papa mã xwÿnh kêt.

² Te ra mẽ pahtyk nhũm Tĩrtũm kot akupÿm mẽ pahto mẽ pahĩr pyræk jakamã nhũm Karõja mẽ pahkarõ mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyræk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtÿx. Kêp mẽ pajamaxpêr punuj kutã mẽ pahto mẽ paxihtÿx xwÿnh jakamã kot puj mẽ nhÿrmã mẽ kot amnhĩ xà htÿx kamã hamak tũm xàta wÿr papa hkêt nê.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tĩrtũm amnhĩ to nê amnhĩ mã mẽ pamex xwÿnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwÿr Kraja mẽ nhũm man mẽ pahwÿr wrÿ nê mẽ pahpyrà nê ï ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtÿx xwÿnh. Na pu htem hkôt amnhĩ xunhwÿ hãmri nê kukwak ri amnhĩ tomnuj o ri papa hkêt nê.

⁴ Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karõ kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamaxpêr. Ja kaxyw na pre Tĩrtũm mẽ pahwÿr Kraja mẽ nhũm wrÿ nê mẽ pahpiitã mẽ panê ty.

⁵ Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwÿnhjaja na htem htÿx ri tanhmã hamaxpêr to xà hkôt amnhĩ nhĩpêx o ri pa. No kêt Tĩrtũm Karõ kot mẽ pahkarõ mã gjêx xwÿnhjaja na pu htem mẽ kurom te Jejus jamaxpêr

pyræk o pajamaxpêr o papa.

⁶ Nê mẽ kot amnhĩ krã hkôt amnhĩ nhĩpêx xwÿnhjaja koja mẽ nhÿrmã ty nê ma kuwy hwÿr pa nê kamã pa ho pa. No mẽ pahte Tĩrtũm Karõ hkôt amnhĩ nhĩpêx xwÿnhjaja kot puj mẽ pajamaxpêr nyw o pajamaxpêr nê amnhĩ nhĩpêx nyw o amnhĩ nhĩpêx. Jao paxãmnhĩx ri pajamakêtkati nê ri papa. Nê nhÿrmã ty hãmri nê Tĩrtũm mẽ Jejus wa kuri akupÿm pahĩr tũm nê pamex kumrêx nê papa ho papa.

⁷ Nê mẽ kot amnhĩ krã hkôt ri amnhĩ nhĩpêx xwÿnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx?

⁸ Koja mẽhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm Tĩrtũm tee ri ja hã omu nê hkĩnh kêt nê.

⁹ No mẽ papajaja na pu htem mẽ uræk nê ã amnhĩ nhĩpêx anhÿr kêt nê. Ra Tĩrtũm Karõ kot mẽ pahkarõ mã gjêx jakamã na pu htem hkôt pix mã amnhĩ nhĩpêx hprãm. No koja Tĩrtũm Karõ mẽhõ kaxwÿnh mã àr kêt nê nhũm kêp hkra hkêt nê.

¹⁰⁻¹¹ Tã mẽ papajaja. Mẽ pahte amnhĩ tomnuj mÿrapê koja mẽ pakrãhkàja nhÿrmã ty. No nhũm Tĩrtũm ra kot amnhĩm mẽ pahte amnhĩ to mex xwÿnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nê. Mẽ pakrãhkà pix koja ty nhũm mẽ pahkarõja ma kaxkwa hwÿr àpir kurê kumrêx. Tã nhũm nhÿrmã Tĩrtũm akupÿm mẽ pakrãhkà ho htĩr nê akupÿm mẽ pahkarõja mẽ pakrãhkàm hagjê pu mẽ wa kuri pahĩr tũm nê papa ho papa.

¹² Jakamã e kwa ixkwÿjaja. Kêr pu mẽ axte ri mẽ pajamaxpêr tũm kôt amnhĩ nhĩpêx o ri papa hkêt nê.

¹³ Kot puj mẽ arĩ ã amnhĩ nhĩpêx anhÿr o ri papa hãmri nê nhÿrmã ty nê ma mẽ kot amnhĩ xà htÿx kamã hamak tũm xàta wÿr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm

hãmri nê amnhĩ kukamã pajamaxpêr o:

—Nà inhmã ã amnhĩ nhĩpêx anhÿr prãm tâ kot paj Tĩrtũm Karõ nhÿ hã ja kutã amnhĩ to htÿx nê ho anhÿr kêt nê. Anê.

Kot puj mē ã pajamaxpêr anê hãmri nê nhÿrmã kuwy wÿr papa hkêt nê. Pãnhã Tĩrtũm mē Jesus wa kuri pamex nê pahpũr tũm nê ri papa ho papa.

¹⁴ Mē kot Tĩrtũm Karõ hkôt amnhĩ nhĩpêx xwÿnhjaja kêp Tĩrtũm kraa.

¹⁵ Nom amnepê mormã mē pahte hkôt amnhĩ xunhwÿr kêt ri. Nê kormã mē pamã kapêr mar prãm kêt ri nhũm kot amnhĩ tâ mē pahpũmunh nê tanhmã mē pahto pumaj na pu prem pamã uma ho ri papa. Tã hkôt amnhĩ xunhwÿ nhũm Karõja mē pahkarõ mã gjêx jakamã na pu htem ra pamã uma hkêt nê ri papa. Karõ kot mē pahpê Tĩrtũm kra hã mē pajarênh jakamã pu mē amnhĩ kamã kot tanhmã mē panhĩpêx to puma hkêt nê ri papa. Nê paxãmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêêxã maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anê.

Jao ra mē pamã uma hkêt nê ri papa.

¹⁶ Karõ kot mē pahkarõ mã gjêx nhũm mē pahte amnhĩ tâ omunh jakamã na pu htem pajamaxpêr o:

—Nà Tĩrtũm Karõ kot ixkarõ mã àr jakamã ixpê hkra na pa. Anê.

Nhÿrmã mēmoj piitã akupÿm mex par ã harênh

Sikũn Korĩt 4.16-18; Korosê 3.4; Wam Pêtre 4.13

¹⁷ Nê mē kãm Tĩrtũm prãm kêt xwÿnhjaja na htem te mē kot Tĩrtũm Kra Jesus nhĩpêx pyrãk o mē panhĩpêx pu mē pahpunuj nê ri papa. Nom kot puj mē nhÿrmã Tĩrtũm mex o mex xwÿnhja kuri pamex kumrêx nê papa. Mē pahpê hkra jakamã kot puj mē Kra Jesus pyrã nê õ krĩ kamã kuri pamex kumrêx nê ri papa ho papa.

¹⁸ Jar Jesus ã mē pahpunuj nê ri papa htã kot puj mē nhÿrmã kuri

pamex kumrêx nê papa ho papa. Hãmri nê mē pamex o pamex ã amnhĩ pumu nê jar pika ja kamã tanhmã mē pahpunuj toja mã axte pajamaxpêr kêt kumrêx.

¹⁹ Nê pika hkôt Tĩrtũm kot mēmoj ho kator xwÿnhjaja na htem Tĩrtũm kot mē pahto mex par jatur xãm mēnh ã arĩgro jamãr rãhã ho pa. àk nê mry nê pĩ nê gô nê mēmoj piitã mē pajamãr o pa. Te kot mē pakukamã hamaxpêr o:

—Kwa mēmo arĩgro hã koja Tĩrtũm hkrajê piitã ho amnhĩrit nê mē ho mex par jatur xãm kumê pu mē ja hã mē omu? Hêxta waa nê. Inhmã tokyx ja hã mē omunh prãm tÿx. Koja tokyx ã mē hipêx anê pa ixkĩnh tÿx kumrêx. Anhÿr o hamaxpêr pyrãk.

²⁰ Mēmo kaxyw na hte mryja ã mē pakukamã hamaxpêr anê? Nà amnepê mã Tĩrtũm kot mēmoj piitã ho katorta ã nhũm pre piitã mex o mex. Pĩ nê mry nê gô. Mēmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mēmoj piitã homnu par jakamã na hte mēmoj htĩr nê pa nê gaa nê ty nê hapêx. Nê mē pahpur kãm ahkagrõt punuj hapôj. Atãw kot amnhĩ tomnuj mÿrapê nhũm Tĩrtũm kapêr xã hkôt ã mēmoj omnu hpar anê.

²¹ Nom koja arĩ rãhã ho rãhã hkêt nê. Koja nhÿrmã Tĩrtũm akupÿm mēmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mē pahpyrã nê mex o mex. Jakamã na htem Tĩrtũm kot mē pahto mex par jatur xãm mēnh xã hã arĩgro jamãr rãhã ho pa.

²² Te mēhõ ni hpijagri kaxyw õhy xã htÿx nê tokyx kãm hpijagri hprãm xã àmra ho nõr pyrãk o amnhĩ nhĩpêx pē mē pahto mex jatur xãm mēnh ã arĩgrota jamãr o pa.

²³ Nê mē papajaja na pu htem tanhmã pahpunuj to nê jajê pyrã nê te amnhĩ kamnhêr o ri papa pyrãk. Rÿ tanhmã paxã kute nê ri papa. Rÿ pamã prãm nê paxã nê ri papa. Nê tanhmã mē pahpunuj to nê ri papa.

Jaο te pĩ nẽ gō nẽ mryja pyrà nẽ amnhĩ tã Tĩrtũm kot mẽ pahto mex par jatur xàm mẽn̄h ã arĩgro jamãr rãhã ho ri papa.

Na pre Tĩrtũm mẽ pahwỳr Karō rẽ nhũm mẽ pahkarō mã agjẽ nẽ mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrĩt nẽ mẽ pamã ho amnhĩrĩt o:

—Koja nhỹrmã Tĩrtũm mẽ ato mex par jatur xàm kumẽ nẽ mẽ piitã mẽ kãm mẽ apẽ hkra hã mẽ ato amnhĩrĩt. Hãmri nẽ mẽ amã mẽ anhĩ nyw gō ka mẽ axte axà nẽ ri apa nẽ atyk kêt nẽ. Hãmri nẽ Tĩrtũm ri amex kumrẽx nẽ ri apa ho apa. Nà kot kaj mẽ nhỹrmã ã amnhĩ nhĩpẽx anẽ. Anẽ.

Ã Tĩrtũm Karō kot mẽ pakukamã mẽ pajarẽnh anhỹr jakamã na pu htem amnhĩ tã kot mẽ pahto mex jatur xàm mẽn̄h pix jamãr o ri papa.

²⁴ Nom na kormã ã mẽ pahto mex anhỹr kêt nẽ. Kormã mẽ pamã mẽ panhĩ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhĩ pumu nẽ pajamaxpẽr o:

—Nà ra Tĩrtũm kot ixto hkra jakamã koja nhỹrmã mããnẽn̄ inhmã inhĩ nyw gō. Nà koja inhmã kugō.

²⁵ Anhỹr o pajamaxpẽr tã kormã. Na pu htem kormã amnhĩ tã hamãr rãhã ho ri papa nẽ aa hkaga hkêt nẽ papa.

Mẽ pahte Tĩrtũm Karō nhỹ hã Tĩrtũm mã amnhĩ jarẽnh

²⁶ Nẽ na pu htem Tĩrtũm mã amnhĩ jarẽnh kaxyw nhũm hte Karōja mẽ pahto ajuta pu mẽ ý hã pakatãt kôt kãm tanhmã amnhĩ jarẽnh to. No kot puj mẽ amnhĩ krã hkôt kãm amnhĩ jarẽnh mex kêt nẽ. Na pu htem ja kaxyw tee ri amnhĩ kukamã pajamaxpẽr o:

—Kwa tanhmã kot pa Tĩrtũm mã amnhĩ jarẽnh to? Tanhmã kot pa mẽmoj tã ixãhwỳr to rỳ amnhĩ to hwỳr to? Nà kot paj amnhĩ krã hkôt ja ho anhỹr mex kêt nẽ. Hẽxta waa nẽ. Anẽ.

No nhũm Tĩrtũm Karō ra kot mẽ pahkarō mã gjẽx jakamã na hte tanhmã mẽ pahkrã hto pu mẽ ý hã kãm amnhĩ jarẽnh mex nẽ pakatãt kôt

mẽmoj tã kuwỳ. Te Karōja tanhmã mẽ pakute hã mẽ pahpumunh nẽ mẽ pakamã ukaprĩ xàj tãm mẽ pahto hwỳr pyrãk.

²⁷ Jakamã pu mẽ ý hã tanhmã Tĩrtũm mã amnhĩ jarẽnh to nhũm mẽ pamar kurẽ kumrẽx. Ra kot mẽ pajamaxpẽr kôt mẽ pahpumunh par kẽnã. Nhũm ra Karō kot mẽ pahkarō mã gjẽx jakamã na pu htem kãm hprãm xà hkôt kãm amnhĩ jarẽ nẽ tanhmã amnhĩ to paxãhwỳr to.

Tĩrtũm kot mẽ pamã mẽmoj piitã ho mex ã harẽnh

Rômân 8.37; Piripos 1.12; Wam Pẽtre 5.10

²⁸ Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêr pu mẽ ãm ja hã amnhĩ pumu nẽ tee ri amnhĩ kukamã pajamaxpẽr kêt nẽ. Koja te mẽ pahpẽ omnuj pyrãk tã koja nhỹrmã hpãnhã mẽ pamã mex nẽ. Koja Tĩrtũm nhỹrmã tanhmã mẽ pamã mẽmojta o mex to.

²⁹ Amnepẽ mã mẽmoj piitã hkêt ri na pre Tĩrtũm mẽ pakukamã tanhmã mẽ pajarẽnh to nẽ mẽ pajarẽnh o:

—E kot paj nhỹrmã mẽ kot Ixkra Jejus kôt amnhĩ xunhwỳr xwỳnhjẽ ho ixkra jakamã nhũm mẽ Jejus pyrã nẽ kęp ixkraa. Nẽ urãk nẽ ixkapẽr kôt amnhĩ nhĩpẽx o pa. Jaο pa ra ixkra xohtõ nẽ. Nà ja na inhmã hprãm. Anẽ.

³⁰ Tã pu htem pajapõj nẽ ri papa. Hãmri nẽ kapẽr ma nẽ amnhĩ kaxyw Kra Jejus kôt pajamaxpẽr nẽ hkôt amnhĩ xunhwỳ. Hãmri nhũm Tĩrtũm ja hã mẽ pahpumu nẽ pahto hkra nẽ amnhĩm mẽ pamex xwỳnh ã mẽ pajarẽ nẽ mẽ pahto mex nẽ. Nẽ te ho Kra Jejus nhĩpẽx pyrãk o mẽ panhĩpẽx. Jaο nhỹrmã wa kuri mẽ pahĩr tũm nẽ papa ho papa mã xwỳnh ã mẽ pajarẽ.

Mẽhõ kot Tĩrtũm pẽ aa mẽ papytãr kêt ã harẽnh

Rômân 5.1

³¹ Tã ã Tĩrtũm kãm mẽ pajapẽ nẽ mẽ pahto mex kot anhỹr. ã kot mẽ panhĩpẽx mex anhỹr jakamã ra mẽ

pahkôt pa ho pa rãhãã. Jakamã mēhõ koja ĩhkra pê mē pahpytà? Nē mēhõ koja tanhmã ri kēp mē pahto? Nà koja kēp mē papytâr rÿ tanhmã kēp mē pahto hkêt nē.

³² Tĩrtũm kãm Kra Jejus japê htÿx tã na pre mē pahpê nē hkêt nē mē pahwÿr kumē. Te kot mē pamã õr pyrãk o hipêx nhũm mē pahwÿr wrÿ nē mē panê ty. Tã ra Tĩrtũm kot mē pamã õr jakamã koja mãânēn kãm mē pahte Kra hkôt amnhĩ xunhwÿr xwÿnhjê japê nē mē pahto mex rãhã ho ri pa. Nà koja ã mē pahto mex anē.

³³ Jakamã mēhõ koja kãm mē pahte amnhĩ tomnuj xwÿnh ã mē pajarē? Ra tãm kot mē pahto hkra nē mē pahte amnhĩ to mex xwÿnh ã mē pajarēnh kēnã kot kêt mēhõ kãm tanhmã mē pahto kapēr punuj to nhũm mē kuma. Koja mē tee ri kãm tanhmã mē pahto kapēr to kaprÿ.

³⁴ Na pre ra Jejus Kris mē pahte amnhĩ tomnuj pãnhã amnhĩrer kaxyw mē panê ty nhũm Tĩrtũm akupÿm ho htĩr. Hãmri nhũm ma akupÿm kaxkwa hwÿr api nē Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nē Tĩrtũm mã mē pakutã nojarêt rãhã ho kuri hkrĩ ho hkrĩ. Jakamã mēhõ koja kēp mē kot amnhĩ xà htÿx kamã hamak tũm xàta wÿr mē pajano? Nà amrakati kumrēx.

³⁵ Nē Krisja kaxkwa kamã Tĩrtũm nhĩhkô hã hkrĩ ho hkrĩ htã mãânēn jar mē pahkôt pa ho pa. Kãm mē pajapê htÿx jakamã kot puj mē tanhmã pahpunuj to htã nhũm arĩ kãm mē pajapê nē mē pahkôt pa ho pa.

Rÿ nhũm mē kot hkôt amnhĩ xunhwÿr kêt xwÿnhjaja tanhmã hã mē pahto htã nhũm arĩ kãm mē pajapê kamã mē pahkôt pa ho pa.

Rÿ mē pamã prãm nē ri papa. Rÿ mē paxê hkêt nē pamã kry nē ri papa htã nhũm arĩ kãm mē pajapê kamã mē pahkôt pa ho pa.

Rÿ ra mē kot hã mē panhĩmex kaxyw rÿ hã mē pahpar kumrēx. Tã

nhũm arĩ kãm mē pajapê kamã mē pahkôt pa ho pa rãhã nē.

Kãm mē pajapê kamã mē pahkôt pa ho pa rãhã jakamã pu mē tee ri amnhĩ kukamã pajamexpēr kêt nē. ãm hkôt paxãmnhĩx ri pajamakêtkati nē ri papa ho papa.

³⁶ Tĩrtũm kapēr ã kagà htũm te mē pajaja mē pahte kãm tanhmã amnhĩ jarēnh to pyrã nē mē pajarēnh kot:

Pa Tĩrtũm. Na htem atã mē ixtomnuj tÿx o pa.

Nē ra mē kot mē inhĩmex kaxyw.

Nē mē inhĩpêx o te mē kot ôwêhti ho mõr nē hpar kaxyw tanhmã hipêx to pyrãk.

Jakamã na pa mē ra ixtyk kaxyw.

Anhÿr o kot mē pajarēnh.

³⁷ Tã kwâr mē ã mē panhĩpêx anē. Arĩ Kris kãm mē pajapê kamã mē pahkôt pa ho pa rãhã jakamã mē kot tanhmã mē pahto htã pu mē arĩ amnhĩ kaxyw kãm pajamexpēr tÿx rãhã ho ri papa. Nhũm arĩ mē kutã mē pahto paxihtÿx pu mē arĩ mē kãm pakuhê.

³⁸ Mēmoj koja tanhmã mē pahto nhũm Tĩrtũm tee ri ja hã mē pahpumu nē kãm mē pajapê hkêt nē? Nà amrakati kumrēx. Koja mēhõ rÿ mēmoj mē pahpê àmnàr kêt nē. Na hte jar pika ja kamã Kris kãm mē pajapê kamã mē pahkôt pa ho pa. Nē kot puj mē nhÿrmã ty nhũm arĩ kãm mē pajapê kamã mē pahkôt pa ho pa rãhã nē. Jakamã koja mēkarõ rÿ mēkarõmnuti rÿ jar pika ja kamã mē kãm Tĩrtũm prãm kêt xwÿnhjaja mē pahpê àmnàr kêt nē. Rÿ mēmoj tanhmã kute. Rÿ kormã hapu hã mēmoj tanhmã kute. Koja mēmoj pitã tee ri tanhmã kēp mē pahto htã nhũm Kris arĩ kãm mē pajapê kamã mē pahkôt pa ho pa rãhã nē nhũm mēmoj tee ri mē pahpê àmnàr kaprÿ.

³⁹ Nē koja kÿj rũm mēmoj wrÿ nē tanhmã kēp mē pahto japêr. Rÿ pyka rũm mēmoj kato nē tanhmã kēp mē pahto japêr. Rÿ kuwy rÿ kôk xapêr tÿx tanhmã kēp mē pahto. Tã nhũm mē panhõ Pahihti Jejus Kris arĩ kãm mē pajapê kamã mē pahkôt pa ho pa

râhã nê. Te Tîrtûm kãm mẽ pajapê pyrâk o kãm mẽ pajapê htỳx kãm mẽ pahkôt pa ho pa rãhã jakamã nhũm mẽmoj tee ri mẽ pahpê àmnâr kaprỳ.

9

Ijaew jarênh

Atre 3.25; Rômân 3.1-2

¹⁻² Nê na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu nê ixkaprĩ nê. Ixpyrà nê mẽ kêp Ijaew tâ ixkĩnhã amnhĩ kaxyw Kris kôt hamaxpêr kêt jakamã nhũm Kris tee ri kãm mẽ hamakêtkati nê àmnhĩx ri mẽ pa hprãm kaprỳ. Pa tee ri mẽ hkukamã ijamaxpêr nê ixkaprĩ nê ri ixpa. Nê aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tâ ijarênh tâ inhmã mẽ hkĩnh kênã. ãm hãmri na pa ã amnhĩ jarênh anê. Tîrtûm Karô kot ja hã ixpumunh mex nê inhmã:

—Nà ãm hãmri na ka amã mẽ hkĩnh ã amnhĩ jarê. Anê.

³ Mẽ kêp ixkwỳ na mẽ. Mẽ ixpâr kraja ãm pixi mex. Tã nhũm mẽ ixkĩnhã amnhĩ kaxyw Kris kôt hamaxpêr kêt jakamã kop ãm Tîrtûm kot mẽ nê kuwy hwỳr pa inhmênh ronhỳx ja inhmã mex. Nhỳx pa kãm:

—Kwa Tîrtûm. Amnhĩ nê kuwy hwỳr ixkwỳjê rênh kêt nê. Inhmã mẽ hapê htỳx kumrêx. Mẽ hpãnhã pa mãn mẽ nê hwỳr inhmê nà.

Anhỳr o nhỳx pa kãm ixkapêr. Nom kot paj amnhĩ to ã ixàhwỳr anhỳr kaprỳ. Tîrtûm kot mẽ kamã ukaprĩ htã no nhũm mẽ amnhĩ kaxyw Kris mã hamaxpêr kêt jakamã tanhmã koja amnhĩ to nê mẽ hpãnhã pa mẽ nê kuwy wỳr inhmê nhũm mẽ ixrom kuri htĩr tũm nê pa ho pa? Mẽ kot hkôt amnhĩ xunhwỳyre hã.

⁴ Mẽ ixpê Ijaew nhĩgêjtaja na pre Tîrtûm amnepê mã mẽ ho mex rax nê. Nê kãm mẽ ho hkra hprãm nê. Nhũm prem tanhmã kot amnhĩ nhĩpêx mex to hã no ho omunh o pa. Nê hirã htỳx kãm ri pa hã omu nhũm mẽ kãm:

—E kot kaj mẽ ixkapêr ma nê ixkôt amnhĩ nhĩpêx o ri apa. Hã kot paj mẽ akôt ixpa ho ixpa nê mẽ ato mex

nê ka mẽ axpên kanrêhã axàmnâr rax nê. Hãmri pa mẽ amã pika mex gô ka mẽ kamã ajamakêtkati nê axàmnhĩx ri apa ho apa.

Anhỳr o mẽ kãm kapêr. Hãmri nê mẽ kaxyw Mojes mã tanhmã kapêr to nê mẽ kaxyw kãm mẽmoj piitã hã karô. Mẽ kot tanhmã amnhĩ tomu- nuj to hãmri nê tee ri ja hã amnhĩ pumunh nê tanhmã amnhĩ to Tîrtûm wỳr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xô ri mẽ kãm ujarênh nhũm mẽ kot mar nê hkôt amnhĩ nhĩpêx mex o ri pa kaxyw.

⁵ Mẽ ixkukamã mẽ ixpãmjaja. Apraãw nê Ijak nê Jako kanrêhã mẽ hkra nê mẽ htàmnhwỳjaja na pre mẽ. Mẽ hwỳr na pre Tîrtûmja Kra Jejus Kris mẽ nhũm mẽ hwỳr wrỳ nê mẽ kamã ì ho ì ho kator jakamã haxwỳja kêp Ijaew na pre. Kêp Mẽpahpãm nê mex o mex nê hihtỳx o hihtỳx tâ Ijaew wỳr wrỳ nê mẽ kamã kato. Hãmri nhũm Ijaew kêt xwỳnhjaja harênh ma nê tee ri hamaxpêr nê hamaxpêr o:

—Hêxta waa nê. Kêp ãm Jejus mẽ papa kamã mãn kator ronhỳx mẽ pamã mex kumrêx. Anê.

⁶ No nhũm kormã Ijaew hwỳr wrỳk kêt ri nhũm Tîrtûm ra kot mẽ ho hkra kaxyw mẽ hã amnhĩ jarê nhũm mẽ hkwyjaja kãm ja prãm kêt nê hkaga. Tã xà na pre Tîrtûm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tâ amnhĩ jarê nê hã amnhĩ to hêx. Jakamã na pre mẽ hkwyjaja hkwyjê rom hkaga hkêt nê nhũm amnhĩ tâ mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwyjaja kot hkaga jakamã nhũm ãm mẽ hkwyjê pix o hkra.

⁷ Nê finat Apraãwja na pre hkanrêhã hkra nê htàmnhwỳ xohtô nê. Tã xà na pre Tîrtûm htàmnhwỳ piitã mẽ ho hkra hã amnhĩ jarê? Nà mẽ piitã ã mẽ harênh anhỳr kêt nê. ãm mẽ hkwyjê pix na pre mẽ ho hkra hã mẽ harê. Apraãw kra Ijak kôt hkanrêhã htàmnhwỳ pixjaja nhũm kot mẽ ho hkra hã mẽ harê.

8-9 Nē Apraāw kormā hprō kamā hkra hkêt ri na pre kām àpênh xwÿnh kamā hkra nhùm kato nē myre nē hixi pê Ismael. Nom kēp Apraāw prō kumrēx kamā hkra hkêt. Prō kuprÿ kamā hkra na pre. Tā nhùm Tirtūm kām hkra kumrēx kukamā harē nē kām:

—E kot paj ma tē hāmri nē mēmo arīgro hā akupÿn awÿr tē nhùm ra aprō hpijagri nhùm war akra myre. Anē.

Tā nhùm hprō Saraja htujarō. Nē gaa nē hpijagri nhùm hkraja myre. Hixi pê Ijak. Kēp Apraāw prō kamā hkra jakamā Tirtūm nom kēp Apraāw kra kumrēx. Jakamā hkra Ijak kanrēhā htāmnhwÿjaja na pre Tirtūm kot mē ho hkra hā mē harē. Ra kot Apraāw mā ja hā amnhī jarēnh xā hkôt.

10 Tā nhùm Ijakja hprêk nē Repek o hprō. Nē gaa nē ra haxwÿja wa hkra nhùm hkraja wa ahpō nē kato nē wa hamē my. Kot wa pê Ejau nhùm kot hapu pê Jako.

11-12 Nom nhùm kormā wa kator kêt ri nhùm Tirtūm wa hkukamā tanhmā wa harēnh to. àhpumunh xā hkôt wa katorxā mā wa harē nē kām:

—E kot paj amā war akra wa hkukamā tanhmā wa harēnh to ka inhma. Nā koja wa kato nē gaa nē hprêk hāmri nhùm kot haputa amnhī to rax o kot wa jakre. Anē.

Kot wata koja kot hapu kīnhā amnhī to grire nē ri pa nhùm ā wa hkukamā wa harēnh anē. Kām wa kot tanhmā amnhī nhīpêx to hprām xā hkôt ā wa harēnh anē. Kormā wa kot tanhmā amnhī tomnuj to rÿ tanhmā amnhī to mex to hā kot wa omunh kêt tā kām hprām xā hkôt ā wa hkukamā wa harēnh anē.

13 Tirtūm kapēr ā kagà htūm kot wa harēnh nē wa hā kagà kot:

Ejau rom Jako kanrēhā hkra nē htāmnhwÿ pixjaja na pre Tirtūm amnhīm mē ho hkra. Anē.

14 Mān ka mē Tirtūm kot ā wa harēnh anhÿrja ma nē ajamaxpēr o:

—Tk. Kwa ja mexti hā. Mo na pre hamē wa hkanrēhā wa hkra nē wa htāmnhwÿ piitā ho hkra hkêt nē? Anē.

Kwa mē ā ajamaxpēr anhÿr kêt nē. Tirtūm na hte kām hprām xā hkôt tanhmā mē panhīpêx to ho pa pu mē kot tanhmā mē panhīpêx to hā omu nē ām omu nē amnhī tā tanhmā kām nē hkêt nē.

15 Na pre finat Mojes mā amnhī jarēnh o:

Inhmā hprām xā hkôt na pa hte mē omu nē tanhmā mē kamā ixukaprī hto ho ri ixpa.

Nē inhmā hprām xā hkôt na pa hte ahpÿnhā tanhmā mē hīpêx to ho ri ixpa.

Anhÿr o kām amnhī jarē.

16 Nom tanhmā mē pahte amnhī nhīpêx to hā mē pahpumunh kôt na hte mē pakamā ukaprī hkêt nē. Ām tām kām hprām xā hkôt na hte tanhmā mē pakamā ukaprī hto ho pa.

17 Amnepê mā Ejit kām mē ō pahīhti Paraohiti hwÿr na pre Mojes mē nhùm ma hwÿr mō nē kām tanhmā Tirtūm kapēr jarēnh to nē kām:

—E Tirtūm na awÿr inhmē pa mō. Tām na pre apê Ejit nhō xwÿnhjē nhō pahi kaxyw axām. Akrā hihtÿx tā nhùm mē kaxyw axām. Tā ra xatā àhpumunh tÿx o tanhmā anhīpêx to. Krī piitā hkôt ri mē pa xwÿnhjaja kot atā harēnh mar nē àhpumunh o àhpumunh ā omunh kaxyw. Tā ixte amā ja jarēnh kaxyw na pre awÿr inhmē pa man awÿr mō. Anē.

18 Ā na hte Tirtūm kām hprām xā hkôt tanhmā mē panhīpêx anhÿr to ho pa. Jao mē hkwÿjē kamā ukaprī ho pa. No mē hkwÿjaja nhùm tee ri mē hkrā hihtÿx ā mē omu nē ām mē omu nhùm mē amnhī krā hkôt ri tanhmā amnhī tomnuj to ho ri pa.

Tirtūm kēp mē pakamā ukaprī xwÿnh ā harēnh

19 Nē kot kaj mē atō Tirtūm kot ā mē hīpêx anhÿrja ā harēnh ma nē tanhmā hā ixkukjêr to nē inhmā:

—Kwa na xep hte Tirtūm ahpÿnhā tanhmā mē hīpêx to. Nē mē hkwÿjē kamā ukaprī ho pa nē mē hkwÿjaja

mê hkrâ hihtÿx ã mê omu nê ãm mê omu nê mê kamã ukaprî hkêt nê. Jakamã kwa mo na hte mê kot amnhî tomnuj xwÿnh ã mê harê? Tãm kot ã mê hipêx anhÿr kênã kot kêt mê kot amnhî tomnuj xwÿnh ã mê harê.

Anhÿr o ajamaxpêr japêr.

²⁰ Kwa mê ri ã atÿx Tîrtûm jarênh anhÿr kêt nê. E pa mê amã ejêp jarê ka mê inhma. Xà kot mēhō gyw kwÿ ho amnhîm poti nhîpêx nhûm tee ri amnhî tâ omu nê amnhî tâ tanhmã kãm kapêr to nê kãm: “Tk. Kwa mon ka ri ã inhîpêx anê?” Anhÿr o amnhî tâ kãm kapêr? Nà koja kãm tanhmã nê hkêt nê.

²¹ Hipêx xwÿnh kãm hprãm xà hkôt kot ã hipêx anhÿr kênã kot kêt amnhî tâ kãm akir. Koja amnhîm gyw kwÿ kakwÿ nê ho poti ho axkrut nê hipêx. Nê hō ho muxre. Ho mex kumrêx nhûm xa. Nhûm ihōja mã ho anê nê hipêx no ãm wamta kînhã ho hanhãjti nhûm omnajti nê xa. No ãm tãm kot hamê wa hipêx prãm xà hkôt wa hipêx kênã.

²² Tã na hte ã Tîrtûm mê panhîpêx anê. Te poti pynajre pyrã nê mê pahkwÿjê nhîpêx nhûm mê kãm kapêr mar prãm kêt nê htÿx ri tanhmã amnhî tomnuj to ho ri pa. Hãmri nhûm amnhî tâ mê omu nê te amnhî nê mê rênh kaxyw pyrãk o mê hipêx no ãm kormã hamaxpêr o:

—Nà kot paj nhÿrmã mê kot amnhî tomnuj mÿrapê mê ho ijaxpêx pa nhûm mê piitã ja hã ixpumu nê inhmã ixãhpumunh o ixãhpumunh ã ijarê. Nê inhmã mēmoj punuj piitã hkînh kêt kumrêx ã axpên mã ijarê. Anê.

²³ Nom na hte jajê rom mê pahkwÿjê nhîpêx o te poti mexta nhîpêx pyrã nê amnhî kaxyw mê paxunhwÿ nê mê pahto hkra kaxyw. Nê mê pajarênh o:

—Nà koja mê amnhî kaxyw Ixkra Jesus mã hamaxpêr nê hkôt amnhî xunhwÿ pa ja hã mê omu nê mê kamã ixukaprî ho ri ixpa. Nê mê ho mex pê mê kutã inhnojarêtrãhã ho ri ixpa. Hãmri nhûm mê nhÿrmã Ixkra mê wa ixri htîr tûm nê mex nê pa ho pa.

Kot paj ã mê ho mex anê nhûm mê amnhî tâ ixpumu nê inhmã inhmex o inhmex ã ijarênh o pa. Anê.

Ã na hte Tîrtûm ahpÿnhã mê pahpitiã mê panhîpêx anê.

²⁴ Nê na hte mê ixpê Ijaew pix o hkra hkêt nê. Na hte mãânên mê apê Ijaew kêt xwÿnhjê ho hkra.

²⁵ Amnepê mã mê kãm kapêr jarênh o ri mê pa xwÿnhjê hō pê finat Ojeja na pre te Tîrtûm tãm kot Ijaew kêt xwÿnhjê jarênh pyrã nê mê harênh o: Amnepê na pa pre mê ho ixkra hkêt tâ kot paj mê hkwyjê ho ixkra. Na pa pre mê kamã ixukaprî hkêt tâ pa ra inhmã mê hapê nê.

²⁶ Nê ixte mê kêp ixkra hkêt ã mê harênh tâ kot paj ra mê kêp ixkra hã mê harê. Ixpê mēō Tîrtûm kot paj ã mê harênh anê. Anê.

²⁷ Hãmri nhûm finat Ijais Ojej pãnhã tanhmã Ijaew jarênh to. Ijaisja Tîrtûm nhÿ hã kapêr jarênh o ri pa xwÿnhjê hō na pre. Jakamã nhûm Tîrtûm kãm tanhmã mê ijarênh to nhûm kuma nê ô ri mê ixkukamã mê inhîgêxjê mã ujarênh o pa nê hã kagã. Nê hã kagã ho: Ijaew na mê ohtô rax kumrêx.

Te gō xujanãr mÿri pykahti grã hkryre xohtô pyrãk.

Tã koja mê piitã ixkôt amnhî xunhwÿr kêt nê.

Koja mê ãm grêre nê amnhî kaxyw inhmã hamaxpêr nê ixkôt amnhî xunhwÿ.

Jakamã mê tapxipixjaja koja hkwyjê rom nhÿrmã inhō krî hwÿr api.

²⁸ No mê kot amnhî kaxyw inhmã mê hamaxpêr kêt xwÿnhjaja kot paj tokyx tanhmã mê harênh to.

Mê kot amnhî tomnuj mÿrapê tanhmã mê harênh to nhûm mê ma mê kot amnhî xà htÿx kamã hamak tûm xàta wÿr ma pa.

Nà kot paj tokyx ã mê hipêx anê.

Anhÿr o mê harê.

²⁹ Nom nhûm kormã ã mê harênh anhÿr kêt ri nhûm ra wam tanhmã mê harênh to nê mê harênh o:

Amnepê m Sotô mẽ Komo kamã mẽ
pa xwýnhjaja na prem amnhĩ
tomnuj tỳx rãhã ho ri pa.

Mýrapê nhũm Tĩrtũm xãhpumunh o
ãhpumunh xwýnhja tee ri ja hã
mẽ omu hãmri nẽ kaxkwa rũm
mẽ õ krĩ wa hipy mẽmoj põõta
rẽ.

Nhũm mẽ hã rôrõk nẽ mẽ ho hkaxàr
pa nhũm mẽ hapêx.

Tã na pu htem mẽ uràk nẽ amnhĩ
tomnuj o ri papa.

Jakamã kop ãm Tĩrtũm kot mẽ
pahkwýjê kamã ukapĩrĩ kêt
ronhỹx pu mẽ ra mẽ uràk nẽ
pahpiitã pajapêx pa. Anẽ.

*Ijaew kwý kot Jejus kõt amnhĩ xun-
hwýr kêt ã mẽ harênh*

Rômân 10.1-4

³⁰ Nẽ Ijaew kêt xwýnhjaja na prem
Ijaew pyrã nẽ kãm Tĩrtũm prãm kêt tã
Jejus jarênh ma nẽ Ijaew rom amnhĩ
kaxyw hkõt hamaxpêr nẽ hkõt amnhĩ
xunhwý. Hãmri nhũm Tĩrtũm ja hã
mẽ omu nẽ mẽ ho hkra nẽ mẽ kot
amnhĩ to mex xwýnhjê hã mẽ harê.

³¹⁻³² Hãmri nhũm Ijaew tee ri mẽ kot
Jejus kõt amnhĩ xunhwýr ã mẽ omu
nhũm ja mẽ kãm mex kêt nẽ. Hãmri
nhũm mẽ hamaxpêr o:

—Tk. Kwa ra mẽ ixte finat Mojes
kapêr kõt amnhĩ nhĩpêx mex o ri mẽ
ixpa xwýnh jakamã koja Tĩrtũm ja hã
mẽ ixpumu nẽ mẽ ixte amnhĩ to mex
xwýnhjê hã mẽ ijarê nẽ mẽ inhnê mẽ
ixte amnhĩ tomnuj rênh pa. No kot
paj mẽ Ijaew kêt xwýnhjê pyrã nẽ
Jejus kõt amnhĩ xunhwýr kêt nẽ. ãm
kwarĩ ho kwarĩ.

Anhỹr ã amnhĩ jarê. No ãm ã mẽ
hamaxpêr anhỹrja mex kêt. Na prem
htỳx Tĩrtũm noo mã kot amnhĩ to
mex ã amnhĩ jarênh kaprý nẽ arĩ ri
tanhmã amnhĩ tomnuj to ho ri pa.
Te pry kamã kên nõr nhũm mẽ kot
nhãm nê mênh kaxyw hkamnãr nẽ
ho amnhĩ par krã hi kukênh pyrãk o
na htem amnhĩ nhĩpêx. Jao amnhĩ
krã hkõt tanhmã amnhĩ nhĩpêx to ho
pa hprãm xàj te Jejus kapêrja nhãm
amnhĩ nê rênh pyrãk o hipêx. Jakamã

koja mẽ Tĩrtũm nhõ krĩ hwýr àpir kêt
nẽ.

³³ Tĩrtũm kapêr ã kagà htũm kot ja
jarênh kot:

E mẽ inhma. Kot paj nhỹrmã Ijaewjê
hwýr mẽhõ mẽ nhũm mẽ hkõt
kapêr o pa.

Nom koja mẽ kapêr mar kêt nẽ. Koja
mẽ kuma nẽ ãm kuma.

Te pry kamã kên nõr nhũm mẽ kot
nhãm pry nê mênh kaxyw
hkamnãr nẽ ho amnhĩ par krã
hi kukênh pyrãk o koja mẽ
amnhĩ nhĩpêx.

No te mẽ kot nhãm pry nê mênh
kaxyw hkamnãr kêt pyrãk
xwýnhjaja koja mẽ kurom
nhỹrmã ma Tĩrtũm nhõ krĩ
hwýr api.

Hãmri nẽ hkĩnh nẽ pa ho pa. Anẽ.

Nom kên kumrêx jarênh kêt nẽ. Na
prem Jejus ã kuxi nẽ ã harênh anẽ.
Ijaew te mẽ kot kên nhĩpêx pyrãk o
Jejus nhĩpêx nẽ amnhĩ kaxyw hkõt
hamaxpêr kêt nẽ axtem nẽ hkaga nẽ
ãm kamã gryk pix o ri pata ã nhũm mẽ
harê. No mẽ kot amnhĩ kaxyw hkõt
hamaxpêr ronhỹx Jejus te kên kot mẽ
kêp àmnãr pyrãk kêt nẽ. Jakamã ã mẽ
harênh kot anhỹr.

10

¹ Hêxta waa nẽ. Ijaxwýja ixpê Ijaew.
Mẽ kêp ixkwý jakamã kêp apu mẽ
kot amnhĩ kaxyw Jejus mã hamaxpêr
nẽ hkõt amnhĩ xunhwýr ronhỹx pa
ixkĩnh tỳx kumrêx. Inhmã mẽ kêp
Tĩrtũm kra hprãm tỳx kumrêx kênã.
Inhmã ja prãm xàj na pa hte mẽ ho
Tĩrtũm wýr rãhã ho ri ixpa.

² Ra ixte mẽ omunh mex. Mẽ kãm
Tĩrtũm mã tanhmã amnhĩ nhĩpêx to
hprãm tã no ãm mẽ kot hprĩ hã kapêr
mar kêt. Jakamã na htem tee ri
tanhmã kãm amnhĩ nhĩpêx to ho ri pa
hprãm kaprý.

³ Nhũm pre Tĩrtũm tee ri amnhĩ tã
mẽ omu nẽ hamaxpêr o:

—Koja mẽhõ amnhĩ kaxyw Ixkra
Kris kõt hamaxpêr nẽ hkõt amnhĩ
xãm pa ja hã omu nẽ kot amnhĩ to
mex xwýnh ã harê nẽ ho ixkra kurê

kumrêx. Nom na hte Ijaew ohtô nê ã amnhî nhîpêx anhÿr kêt nê.

Anhÿr o mē harē. Ām hāmri na ā mē harēnh anē. Na htem ām axtem nē hamaxpēr o:

—Tk. Kot paj amnhî kaxyw Kris kôt ijamaxpēr nē hkôt amnhî xām kêt nē. Kot paj ām pam amnhî krā hkôt tām ri amnhî nhîpêx o ri ixpa. Mē ixpê Ijaewjê mē ixte amnhî nhîpêx xā hkôt. Hāmri nhūm Tirtūm ja hā ixpumu nē amnhîm inhmex ā ijarē. Nom kot paj Kris kôt amnhî xām kêt nē. Ām kwarī ho kwarī.

Anhÿr ā amnhî jarē.

⁴ Nom na htem ām htÿx ri amnhî krā hkôt amnhî to mex o pa hā amnhî kamnhîx kaprÿ. Koja mē tee ri kām finat Mojes kapēr kôt amnhî nhîpêx o ri pa hprām kaprÿ. Jejus tapxipix na pre tām amnhî nhîpêx mex rāhā ho pa. Na pre Tirtūm kapēr kôt amnhî nhîpêx mex o ri pa nē aa kapēr ō nhîrōp ām nē hkwÿm ri tanhmā amnhî tomnuj to hkêt nē. Kot amnhî tomnuj kêt xwÿnh ā ām pixi mex na. Jakamā tapxipix kukwak ri na hte Tirtūm amnhîm mē pahte amnhî to mex xwÿnh ā mē pajarē.

Tirtūm kām mē pahpiitā mē pahto hkra hprām ā harēnh

⁵ Nē amnepēm na pre finat Mojes Tirtūm nhÿ hā Ijaew mā tanhmā ujarēnh to nē hā kagā. Nē mē kām ujarēnh o:

—E kot kaj mē atō Tirtūm nhÿ hā ixujarēnh ma nē hkôt amnhî nhîpêx mex o ri apa nē hkwÿm ri tanhmā amnhî nhîpêx to hkêt nē. Hā koja Tirtūm hā apumu nē amnhîm ate amnhî to mex xwÿnh ā ajarē ka nhÿrmā kuri atīr tūm nē amex nē apa ho apa. Anē.

⁶ Ā mē kām kapēr anhÿr tā mē pahte Mojes kapēr xā hkôt amnhî nhîpêx o papaja na mē pahpê hihtÿx kumrêx. Tirtūm kapēr tūm na. Kapēr ā kagā kamā kot mē pamā mē pahte tanhmā amnhî nhîpêx to hā karōja ohtô rax kumrêx jakamā pu mē tee ri pamā piitā hkôt amnhî nhîpêx prām

kaprÿ. Nhūm Tirtūm tee ri amnhî tā mē pajamā hāmri nē mē pahwÿr Kra Jejus mē. Jakamā na pu htem amnhî kaxyw hkôt pajamaxpēr nē hkôt amnhî xunhwÿ nhūm Tirtūm hā mē pahpumu nē kukwak ri mē pahto hkra kurê kumrêx. Kra kukwak ri kot mē pahto hkra kaxyw kot mē pahwÿr mēnh nhūm mē kot hpīr nhūm akupÿm ho htīr jakamā na pu htem harēnhja ma nē pajamaxpēr o:

—Nà na xep pre Jejus ixto ixpê Tirtūm kra. Anē.

Nom xā na hte Tirtūmja ā mē pamā kapēr anē nē mē pamā:

—E kot kaj mē ma kaxkwa hwÿr api nē Kris japrō nē man amnhî kôt akupÿn o wrÿ pa ja hā mē apumu nē mē ato ixkra.

Anhÿr o mē pamā kapēr? Nà na hte ā mē pamā kapēr anhÿr kêt nē. Tanhmā kot puj mē amnhî to nē ā amnhî nhîpêx anē?

⁷ Rÿ xā na hte ā mē pamā kapēr anē nē mē pamā:

—E na pre Krisja ty. Jakamā mē kam nē ma hwÿr mra nē akupÿm amnhîm ho htīr. Hāmri pa ja hā mē apumu nē mē ato ixkra.

Anhÿr o mē pamā kapēr? Nà na hte ā mē pamā kapēr anhÿr kêt nē. Tanhmā kot pu mē amnhî to nē akupÿm ho htīr? Ja pyrā nē na hte Tirtūm mē pamā mēmoj tā karō pu mē kām ho anhÿr nhūm ja hā mē pahpumunh kôt mē pahto hkra hkêt nē.

⁸ Ām mē pahte amnhî kaxyw Jejus kôt pajamaxpēr nē hkôt amnhî xunhwÿr ā mē pahpumunh kôt pix mā na hte mē pahto hkra. Hāmri nē mē pahwÿr Karō rē nhūm mē pahkarō mā gjêx jakamā mē pahte Tirtūm kām hprām xā hkôt amnhî nhîpêx o papaja na mē pahpê hihtÿx kêt. Te kapēr ra mē pahkrā hi kaxwÿnh kām hikwÿ pyrāk o pu mē piitā mē kām harēnh o ri mē hkôt papa. Jakamā na pa hte mē piitā mē kot amnhî kaxyw Jejus kôt hamaxpēr kaxyw tanhmā mē kām harēnh to ho ri mē hkôt ixpa nē mē kām:

9 –Kot ka mẽ atõ Jejus kêp anhõ Pahihti hã harẽ nẽ Tĩrtũm kot akupỹm ho htĩr kõt ajamaxpêr. Hã koja Tĩrtũm ja hã apumu nẽ anê ate amnhĩ tomnuj o hapêx nẽ ato hkra. Âm ja pix ã mẽ pahpumunh kõt na hte mẽ pahto hkra. Anẽ.

10 Nẽ na pu htem mẽ pahkrãhi kaxwỹnh kãm amnhĩ kaxyw Jejus mã pajamaxpêr. Nẽ mẽ pajakwa ho kêp mẽ panhõ Pahihti hã harẽ. Hãmri nhũm Tĩrtũm ja hã mẽ pahpumu nẽ amnhĩm mẽ pahte amnhĩ to mex xwỹnh ã mẽ pajarẽ nẽ mẽ pahto hkra.

11-13 Tã mẽ pahte amnhĩ kaxyw Jejus kõt pajamaxpêr nẽ hkõt amnhĩ xunhwỹr xwỹnhjaja kot puj mẽ pahkĩnh nẽ papa ho papa. Mẽ pahpiitã. Ijaew nẽ Ijaew kêt xwỹnhjaja. Mẽ pahpiitã mẽ panhõ Pahi Maati ja âm pyxi mex na. Jakamã koja Ijaewjê hõ rỹ Ijaew kêt xwỹnhjê hõ amnhĩ to kuwỹ nhũm kuma nẽ ho hkra. Kapêr ã kagà htũm kot ja jarênh kot:

Mẽ kãm kêp Tĩrtũm kra hprãm xwỹnhjaja koja mẽ amnhĩ to Tĩrtũm wỹ nhũm mẽ kuma nẽ Jejus kot mẽ nẽ htyk kukwak ri mẽ nẽ mẽ kot amnhĩ tomnuj o hapêx nẽ mẽ ho hkra nhũm mẽ hkĩnh nẽ pa. Anẽ.

14-15 Xà na htem kormã amnhĩ kaxyw Kris mã hamaxpêr kêt rãhã amnhĩ to Tĩrtũm wỹ nhũm mẽ kuma nẽ mẽ ho hkra? Nã tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỹ? Na hte Tĩrtũm ma mẽ hwỹr mẽ hkwyjê rẽ nhũm mẽ ma mẽ hwỹr mra nẽ Tĩrtũm kapêr o mẽ ahkre ho ri mẽ hkõt pa. Nhũm mẽ hkwyjaja mẽ kuma nẽ amnhĩ kaxyw Jejus kõt hamaxpêr nẽ amnhĩ to Tĩrtũm wỹ. Kapêr ã kagà htũm kot ja jarênh kot:

Koja mẽmoj mex jarênh xwỹnhjaja ma mẽ hwỹr mra.

Nẽ mẽ hwỹr hpôx o mō nhũm mẽ amỹm amnhĩ wỹr mẽ omu nẽ hkĩnh nẽ. Anẽ.

16 Tã ra mẽ piitã kot kapêr mar tã piitã amnhĩ kaxyw hkõt hamaxpêr kêt nẽ.

Jakamã nhũm finat Ijais tee ri ja hã mẽ omu nẽ Tĩrtũm mã mẽ harênh o:

Pa Pahi Maati. Kwa ra mẽ kot akapêr mar tỹx tã akõt amnhĩ nhĩpêx kêt nẽ. Mẽ kãm akapêr kõt amnhĩ nhĩpêx o pa hprãm kêt. Na htem âm grêre nẽ akõt amnhĩ xunhwỹr nẽ akõt amnhĩ nhĩpêx o ri pa. Anẽ.

17 Kot anhỹr tã âm mẽ kot Kris kapêr jarênh mar kõt pix mã na htem amnhĩ kaxyw hkõt hamaxpêr. Koja mẽ harênh mar kêt tã tanhmã koja wem amnhĩ to nẽ amnhĩ kaxyw hkõt hamaxpêr nẽ hkõt amnhĩ xunhwỹr?

18 Mãn ka mẽ atõ atỹx ã ajamaxpêr anhỹr o:

–Ko mãn Ijaew kormã Jejus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkõt amnhĩ xunhwỹr kêt nẽ.

Anhỹr o ajamaxpêr. Nom ja kot anhỹr kêt. Ijaew piitã ra mẽ kot harênh mar kênã. Tĩrtũm kapêr ã kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkõt pa nhũm mẽ piitã kuma. Anẽ.

19 Tã mãn ka prem ra ja ma nẽ atỹx ajamaxpêr o:

–Kot anhỹr tã no mãn kormã hprĩ hã Jejus jarênh mar kêt jakamã mẽ hkõt amnhĩ xunhwỹr kêt nẽ. Anẽ.

Nom ja haxwỹja kot anhỹr kêt. Ra mẽ kot hprĩ hã harênh mar mex tã kuma nẽ âm kuma nẽ amnhĩ kaxyw kãm hamaxpêr kêt nẽ. No mẽ apê Ijaew kêt xwỹnh kwỹjaja na ka mẽ kurom harênh ma nẽ amnhĩ kaxyw hkõt ajamaxpêr nẽ hkõt amnhĩ xunhwỹr kurê kumrêx. Hãmri nhũm Ijaew tee ri ja hã mẽ apumu nẽ mẽ akamã gryk tỹx nẽ. Nom ra Tĩrtũm kot ã mẽ hkukamã mẽ kot amnhĩ nhĩpêx anhỹr ã mẽ omunh nẽ mẽ harênh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrã nẽ kapêr ã kagà htũm kamã kot mẽ harênh kot:

Mẽ ate mẽ kamã mẽ akahak o apa xwỹnhjaja.

Mê kot htỳx ri amnhĩ nhĩpêx o mẽ pa hã mẽ ate mẽ harênh tâ no kot paj mẽ arom amnhĩm mẽ kot amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tỳx kumrêx.

Nê mãânên pa ixte mẽ ho mex ã ix-pumu nê mẽ hã ixkamã agryk nê. Anê.

²⁰ Nê finat Ijais na pre haxwỳja ã mẽ harênh anê. Na pre kãm amnhĩ kwỳ pê Ijaew pyma hkêt nê xatã Tĩrtũm nhỹ hã tanhmã mẽ kãm Ijaew kêt xwỳnhjê jarênh to ho pa. Te Tĩrtũm tãm kot mẽ harênh pyrãk o mẽ kãm:

Nà Ijaew kêt xwỳnhjaja kot Tĩrtũm japêr kêt tâ koja tãm mẽ kãm amnhĩ to amnhĩrĩt nhũm mẽ hkôt amnhĩ xunhwỳ.

Mê kot kormã amnhĩ kaxyw kãm hamaxpêr kêt tâ koja tãm mẽ kãm amnhĩ to amnhĩrĩt. Anê.

²¹ ã Ijaew kêt xwỳnhjê jarênh kot anhỹr. Nê axte mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyrãk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tâ no nhũm mẽ amnhĩ tâ kuma nê ãm kuma nê hkôt amnhĩ nhĩpêx kêt nê. Anê.

11

Tĩrtũm kot Ijaew kamã ukaprĩ hã harênh

Matêwre 13.10-17

¹ Tã ra Ijaew kot Tĩrtũm kaga jakamã mãn ka mẽ atõ mẽ harênh ma nê ajamaxpêr o:

–Mãn pre Tĩrtũm tee ri amnhĩ tâ mẽ omu nê amnhĩ pyrã nê mẽ hkaga.

Anhỹr o ajamaxpêr. Nom na pre mẽ hkaga hkêt nê. Ijaxwỳja ixpê Ijaew na pa. Mẽ uràk nê ixpê Ijaew pàr krax pê finat Apraãw kanrêhã htãmnhwỳ Pêjamĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt.

² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ

ixto hkra hã amnhĩ jarê. Tã nhũm amgrà xohtô nê hapêx nhũm mẽ hapôj hãmri nê Tĩrtũm kôt amnhĩ nhĩpêx o pa hkêt nê. Hãmri nhũm finat Êrisja tee ri mẽ kot amnhĩ nhĩpêx ã mẽ omunh o pa nê Tĩrtũm mã tanhmã mẽ harênh to nê mẽ hã kagã. Nê hã kagã ho:

³ Kwa Tĩrtũm. Mẽ ixte amã amnhĩ jarênh xà hã mēsti hkwy na prem ra hkrakrak pa. Nê anhỹ hã akapêr jarênh o ri mẽ pa xwỳnh kwỳ nhĩmex rax nê. ãm papxipix na pa arĩ ixtĩr nê ri ixpa nom nhũm mẽ ra kot ixpĩr kaxyw ixtã amnhĩ jarê. Anê.

⁴ Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nê. Arĩ mẽ ohtô nê apyrã nê amnhĩ kaxyw ixkôt hamaxpêr. Mẽ ohtôô. Arĩ mẽ kêp 7.000 nê akwỳjê rom ri sãnti Paaw kutã hkõnkrã ho hkrĩ nê kãm mex ã harênh kêt nê. Anê.

⁵ Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwyjaja mẽ pahpyrà nê amnhĩ kaxyw Kris kôt hamaxpêr nhũm Tĩrtũm mẽ ho hkra.

⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nê. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harênh prãm tâ no ãm mẽ grêre nê hamaxpêr xà hkôt Jesus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xà amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jesus kaga jakamã ã amnhĩ nhĩpêx anhỹr kaprỹ. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrã nê pa.

⁸ Tīrtūm kapēr ā kagà htūm kot mē harēnh kot:

Tīrtūm na hte mē kām kapēr mar prām kêt xwýnhjê pumu nē ām mē omu nhūm htem htýx ri pa ho pa. Nē Tīrtūm mā hamaxpēr kêt o ri pa. Mē kot kapēr mar tā hprī hā mar týt kêt nē. Nē mē kot kapēr ā kagà kamā harēnh tā hprī hā mar týt kêt nē. Jakamā na htem amnhī kaxyw hkôt hamaxpēr kêt o pa.

Tā na htem arī jarāhā ā amnhī nhīpêx anhýr o ri pa. Te mē nohkre nē mē hamak kro xwýnh kot amnhī nhīpêx pyrāk. Anē.

⁹ Nē amnepēm na pre pahi finat Taw-ija amnhī kwý Ijaew jarēnh o:

Na htem htýx ri hkīnh kām apkur o pa. Te tutre kām prām nē kot rapuuti hwýr àr nē tee ri kām kator prām kaprý pyrāk.

Ja pyrā nē mē kot Tīrtūm kapēr mar kêt mýrapê koja Tīrtūm tanhmā mē ho nhūm mē tee ri kām mex prām kaprý.

¹⁰ Te mē nohkre xwýnhjaja tee ri mē hpa nhīpêx o pa pyrāk.

Nē omnuj nē à nē ho gjêx o ri pa pyrāk o amnhī nhīpêx o ri pa.

Anhýr o mē harē.

¹¹ Tā arī Ijaew Jejus kaga nē kām kapēr mar prām kêt jakamā xà na Tīrtūm tee ri ja hā mē omu nē mē hkaga kumrêx? Nà kot mē hkaga hkêt. Ām mē tāmjaja kēp Jejus prām nōkati jakamā nhūm tee ri ja hā mē omu nē mē hpānhā Ijaew kêt xwýnhjê mā amnhī to amnhīrīt nē mē hkwyjê ho hkra. Jakamā koja Ijaew kwýjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kêt xwýnh kwýjaja Jejus kôt amnhī xunhwý nhūm Tīrtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkôt mǎn pajamaxpēr nē hkôt amnhī xunhwý kē Tīrtūm ja hā mē pahpumu nē Ijaew kêt xwýnhjê pyrā nē mē pahto hkra. Hāmri nē amnhī

mā mē pahte amnhī to mex xwýnh ā mē pajarē. Anē.

Ā Ijaewjaja hamaxpēr anhýr kaxyw na pre Tīrtūm Ijaew kêt xwýnhjê mā amnhī to amnhīrīt.

¹² Hāmri nhūm mē amnhī tā omu nē hkīnh nē pa. No nhūm Ijaew kwýjaja. Mē kām Jejus prām nōkati ho mē pa xwýnhjaja mē hkīnhā hkaprī nē pa. Tā koja mē nhýrmā amnhī kaprī hā amnhī pumu nē amnhī kīnh kêt ā amnhī pumu hāmri nē Tīrtūm kôt amnhī xunhwýr nē amnhī kaxyw Kra Jejus Kris mā hamaxpēr japêr. Koja mē ā amnhī nhīpêx anē hāmri nē Ijaew kêt xwýnhjê pyrā nē hkīnh nē ri pa. Hāmri nhūm Tīrtūm ja hā mē omu nē Ijaew kêt xwýnhjê mē mē ho hpimràatā mē ho mex rax nē nhūm mē hkīnh nē hamakêtkati nē pa ho pa.

Tīrtūm kot Ijaew kêt xwýnhjê ho hkra hā harēnh

¹³ E kot paj hpānhā mē apê Ijaew kêt xwýnhjê mā ixkapēr nē mē atā kagà. Na pre Jejus ma mē awýr inhmē. ý hā ixte mē ajahkre ho ri mē akôt ixpa kaxyw. Pa pre ma krī hkwy kamā mē akwyjê hwýr mō nē ixkīnh kām mē kām kapēr jarēnh o ri mē hkôt ixpa. Nhūm mē hkwyjaja inhma nē amnhī kaxyw Jejus kôt hamaxpēr nē hkôt amnhī xunhwý.

¹⁴ Tā koja apu ixkwýjaja mē harēnh mar japêr. Ijaew tee ri mē apê Ijaew kêt xwýnhjê jarēnhja ma hāmri nē ra amnhī kamā gryk japêr. Jao mē apyrā nē Jejus kôt amnhī xunhwý nē nhýrmā kuri htīr tūm nē mex nē pa ho pa.

¹⁵ Kormā mē kot amnhī kaxyw kām hamaxpēr kêt jakamā na pre Tīrtūm hpānhā mē apê Ijaew kêt xwýnhjê mā amnhī to amnhīrīt. Ka mē ra krī piitā hkôt axohtō nē hkôt amnhī xunhwý nē hkôt amnhī nhīpêx mex o ri apa. Tā koja Ijaewjaja nhýrmā amnhī kaxyw Tīrtūm mā hamaxpēr nē mē apyrā nē Jejus kôt amnhī xunhwýr japêr. Hāmri nē te mēhō hkra kēp htyk nhūm hkaprī htā nhūm hkraja tanhmā amnhī to nē akupým kām htīr nhūm kot omunh nē hkīnh týt

kumrêxta pyrâk o amnhî nhîpêx. Jao Tîrtûm mẽ kot hkôt amnhî xunhwÿr ã mẽ omu nê hkînh nê. Pu mẽ pahpim-ràatã urâk nê pahkînh nê ri papa.

¹⁶ E pa mẽ amã mẽ ujarênhja ã ejêp kwÿ jarê. Koja mẽmo pî hpâr jarê mex nê hã koja pâr mex nê xa. Ja pyrâ nê Ijaew pâr krax finat Apraãwja kumrêx na pre amnhî kaxyw Tîrtûm mã hamaxpêr nhûm ho hkra. Jakamã koja nhÿrmã hkanrêhã htãmnhwÿjaja urâk nê amnhî kaxyw kãm hamaxpêr nhûm mã mẽ ho anê nê mãânên mẽ ho hkra nhûm mẽ mex nê pa. Te kot mẽmo pî hpâr jarê mexja nhÿ hã pâr mexta pyrâk.

¹⁷ Nê na htem akunî kamã mẽmo pî hpa jakà nê hamÿ nê ma amnhî kôt o mra. Nê ixkre kapem ra mẽ kot mẽmo pî hkreja hpa jakà nê rênh xwÿnh xwakre kamã wam pî hpa jakà xwÿnhnta nhô nê axpên tâ hkaxpre nê gaa nê axpên jamÿnh mex nê grã hkêt nê. Nê arî htîr mex nê. Te kêp hpa kumrêx pyrâk. Tã Ijaew kwÿ kot amnhî kaxyw Jejus kôt hamaxpêr xwÿnhjaja te mẽ kêp ixkre kapem pî hpârta pyrâk. No mẽ hkwyjaja mẽ kot Jejus kaga xwÿnhjaja te mẽ kêp mẽ kot kêp hpa jakà nê rênhta pyrâk. Jakamã nhûm Tîrtûm te mẽ kot pâr pê hpa jakà nê rênhta pyrâk o mẽ hipêx nê mẽ hkaga. Nê axtem te mẽ kot mẽmoj pâr pa jakà nê hpãnhã kamã axtem pî hpa janhôr nê hã hkaxpreta pyrâk o mẽ apê Ijaew kêt xwÿnhjê nhîpêx nê mẽ amã amnhî to amnhîrît. Ka mẽ ra amnhî kaxyw Jejus mã ajamaxpêr nê hkôt amnhî xunhwÿ nhûm Tîrtûm mẽ ato mex nê.

¹⁸ Tã kêr ka mẽ arî Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rÿ ajamaxpêr o:

—Nã ãm hãmri na Tîrtûm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pî hpâr mexta pyrâk. No mẽ kajaja te mẽ ate akunî rûm pî hpa kot ixkre kapem pâr mex pix kukwak ri htîr nê hã harirta pyrâk. Kêt akunî rûm pî hpa jakà kukwak

ri na hte ixkre kapem pârta htîr nê kuhê hkêt nê. Kop apu pârta mex kêt ronhÿx ra akunî rûm hpaja grã pa. Ja pyrâ nê Ijaew kukwak ri kot kaj mẽ nhÿrmã Tîrtûm ri atîr tûm nê apa ho apa. Jakamã kwa kêr ka mẽ ate amnhî to rûnh o mẽ hakrenh ã amnhî to jarkrar kêt nê.

¹⁹ Mãn ka mẽ atõ ajamaxpêr o:

—Ra Tîrtûm kot Ijaew kaga nê hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anê.

²⁰ Nã ãm hãmri na pre Tîrtûm Ijaew kwÿ kaga. Mẽ kot Jejus kôt amnhî xunhwÿr kêt mÿrapê na pre te mẽmo pî hpa jakà nê rênhta pyrâk o mẽ hipêx. Ka mẽ ra mẽ kurom amnhî kaxyw hkôt ajamaxpêr jakamã nhûm Tîrtûm te kot akunî kamã pî hpa jakà nê ho htêm nê ixkre kapem pî hpâr mex ã hanhôr nê hã hkaxpre pyrâk o mẽ anhîpêx. Nom kwa kêr ka mẽ ja hã amnhî pumu nê ri hã Ijaewjê mã amnhî to jarkrar kêt nê. ãm amnhî to mex nê Tîrtûm kapêr kôt amnhî nhîpêx mex o ri apa. No kot kaj mẽ ã amnhî nhîpêx anhÿr kêt nhûm amnhî tâ mẽ apumu nê ra kot Ijaew kwÿ nhîpêxta pyrâ nê tanhmã mẽ ato nê mẽ akaga.

²¹ ã Ijaew jarênh kot anhÿr. Te mẽ kêp pâr mex pyrâk. Tã nhûm mẽ kot Jejus kôt amnhî xunhwÿr kêt jakamã nhûm Tîrtûm te kot pî hpa jakà nê rênhta pyrâk o mẽ hipêx nê mẽ homnuj nê. Kot kaj mẽ urâk nê ã amnhî nhîpêx anê nhûm mã mẽ ato anê nê.

²² Ijaew kot Jejus kôt amnhî xunhwÿr kêt jakamã nhûm Tîrtûm mẽ hpãnhã mẽ apê Ijaew kêt xwÿnhjê mã amnhî to amnhîrît. Tã ka mẽ Ijaew rom amã Jejus prãm nhûm Tîrtûm ja hã mẽ apumu nê amnhî pyrâ nê kãm mẽ aprãm nê mẽ akamã ukaprî rãhã nê pa ho pa. Tã kwa mẽ okora. Kêr ka mẽ hkôt pix mã amnhî nhîpêx o ri apa rãhã ty. Kot kaj mẽ hkaga nhûm amnhî tâ mẽ apumu nê te Ijaew kot hkaga xwÿnhjê nhîpêx pyrâk o mẽ anhîpêx nê mẽ akaga.

23 Koja Ijaew nhÿrmã Jejus kôt amnhĩ xunhwÿr japêr nhũm Tirtũm ja hã mẽ omu nẽ mẽ ho hkra. Te mẽ kot pàr pa jakàr nẽ rēnh nhũm grà par xwÿnh nhũm kot akupÿm amnhĩm hamÿnh nẽ ixkre kapem pàr wÿr o htēm nẽ akupÿm hã hanhōr nẽ hã hkaxpre ho htÿx nhũm kukwak ri akupÿm htirta pyrāk. Ja kēp tanhmã kute hkēt. Kot ã hipêx anhÿr kaxyw àhpumunh tÿx.

24 Mẽ apê Ijaew kêt xwÿnhjaja te mẽ ate akunĩ kamã pĩ hpa jakàr nẽ ixkre kapem pàr ã hanhōr nẽ hã kaxpreta pyrāk. Jao Jejus kôt amnhĩ xunhwÿ nhũm mẽ ato hkra kurê kumrēx. No Ijaew te mẽ kēp ixkre kapem pàrta pyrāk jakamã Tirtũm kot akupÿm hanhōrta tanhmã kēp kute hkēt. Kēp Tirtũm kēnã kot tanhmã kēp kute. Jakamã koja mẽ hkôt amnhĩ xunhwÿ nhũm amnhĩ tã mẽ omu nẽ mẽ ho hkra kurê kumrēx.

Tirtũm kot mẽ piitã mẽ kamã ukapri hã harēnh
Matêwre 23.37-39; Rukre 21.24; Juãw 10.16

25 E kot paj mẽ amã mẽmoj to amnhĩrit ka mẽ inhma. Nà na pa ra mẽ amã Ijaew krã xihtÿx xwÿnhjê jarē ka mẽ harēnh ma. Ra mẽ kot Jejus kaga hã mẽ harēnhja. Tã koja mẽ ã amnhĩ nhĩpêx anhÿr o pa rãhã hkēt nẽ. Na hte Tirtũm kormã amnhĩ tã mẽ apê Ijaew kêt xwÿnhjê jamār o pa. Amnepēm na pre amnhĩ kaxyw mẽ akukamã tanhmã mẽ akwÿjê jarēnh to. Tã kot kaj mẽ kot tanhmã mẽ ajarēnh to xwÿnh piitã Jejus kôt amnhĩ xunhwÿr pa nhũm rĩ Ijaew amnhĩ to hapu nẽ kormã hkôt amnhĩ xunhwÿ. ã mẽ kot amnhĩ nhĩpêx anhÿr kaxyw. Jakamã kwa kēr ka mẽ ri ja hã amnhĩ to jarkrar o ri mẽ hkôt apa hkēt nẽ. Mẽ pahpyrà nẽ mẽ kot Jejus kôt amnhĩ xunhwÿr mã xwÿnh kēnã.

26 Koja Tirtũm nhÿrmã Ijaew piitã ho hkra. Kapêr ã kagà htũm kot mẽ harēnh kot:

Nhÿrmã kot mẽ ate amnhĩ tomnuj pē mẽ apytàr mã xwÿnhja Ijaew ò koja.

Jako hkanrēhã htãmnhwÿjê hō koja.

Koja nhÿrmã wrÿ nẽ mẽ ate amnhĩ tomnuj pē mẽ apytà nẽ mẽ ate amnhĩ tomnuj o hapêx pa. Anē.

Anhÿr o kot harēnh.

27 Nẽ mãñnēn ja:

Kot paj mẽ nē mẽ kot amnhĩ tomnuj o ijpêx pa.

Amnepê mã ixte mẽ hkukamã mẽ hã amnhĩ jarēnh xà hkôt. Anē.

28 Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwÿr pyrāk o amnhĩ nhĩpêx. Tã ã mẽ kot amnhĩ nhĩpêx anhÿrja ri ka mẽ kamjaja mẽ hpãnhã mẽ apê Tirtũm kra. Nom nhũm Tirtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarēnh to. Mẽ hpàr kraxjê mã tanhmã mẽ hã amnhĩ jarēnh to. Finat Apraãw mẽ Ijak mẽ Jakoja mã mẽ hkanrēhã mẽ htãmnhwÿjê hã tanhmã amnhĩ jarēnh to.

29 Na hte Tirtũm mẽmoj tã tanhmã amnhĩ jarēnh to nẽ ãm hãmri hã amnhĩ jarē nẽ amnhĩ jarēnh xà hkôt tanhmã hipêx to. No na hte mẽmoj tã amnhĩ jarēnh tã gaa nẽ ho hamakêtkati hkēt nẽ. Rÿ hpãnhã axtem tanhmã hipêx to hkēt nẽ. Na hte mẽmoj tã amnhĩ jarēnh xà hkôt tanhmã hipêx to. Tã ra amnepê mã kot Ijaew o mex ã amnhĩ jarēnh jakamã koja nhÿrmã mẽ ho mex rax nẽ ã mẽ hipêx anhÿrja o hamakêtkati hkēt nẽ.

30 No mẽ kajaja mẽ apê Ijaew kêt xwÿnhjaja. Amnepēm na ka prem ajaxwÿja Tirtũm kôt amnhĩ nhĩpêx kêt nẽ. Tã nhũm mẽ akamã ukapri nẽ kãm mẽ ajapê nẽ. Ka mẽ ra harēnh ma nẽ hkôt amnhĩ xunhwÿ nẽ hkôt amnhĩ nhĩpêx mex nẽ. No ãm Ijaew kukwak ri. Mẽ kot kapêr kôt amnhĩ nhĩpêx o pa hkēt jakamã nhũm Tirtũm mẽ hpãnhã nhãm mẽ amã amnhĩ to amnhĩrit nẽ mẽ ato mex rax nẽ.

Jakamã te Ijaew kukwak ri mẽ amex nẽ ri mẽ apa pyræk.

³¹ Tã koja nhỹrmã kot mẽ anhĩpêxta pyrã nẽ Ijaew ho hkra. Nẽ mẽ apyrã nẽ mẽ kamã ukaprĩ nẽ. Mẽ kot mẽ apyrã nẽ amnhĩ kaxyw Kra hkôt hamaxpêr xwỳnhjaja nhũm mẽ apyrã nẽ mẽ ho hkra nẽ mẽ ho mex nẽ.

³² Mẽ apê Ijaew kêt xwỳnhjaja nẽ mẽ ixpê Ijaew mẽ pahte axpên pyræk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêt nẽ. Tã kot puj mẽ tee ri ja hã amnhĩ pumu nẽ amnhĩ to kuwỳ nhũm mẽ pama nẽ amarĩ mẽ pakamã ukaprĩ nẽ mẽ pahto mex nẽ.

Pawre kot Tĩrtũm mex o mex ã harênh

Epes 3.20; Korosê 1.16; Wam Korĩt 2.9, 2.16

³³ Tĩrtũmja àhpumunh tỳx o àhpumunh tỳx. Nẽ ukaprĩ ho ukaprĩ nẽ mẽ mex o mex. Mẽ pahtõ na pu uræk nẽ ã amnhĩ nhĩpêx anhỹr o papa? Nà amrakati kumrêx. Nẽ mẽ pahtõ na pahte Tĩrtũm jamaxpêr kôt omunh? Nà mẽ pahte hamaxpêr kôt omunh kêt.

³⁴ Kapêr ã kagà htũm kot ja jarênh kot:

Mẽ pahte Tĩrtũm jamaxpêr kôt omunh kêt.

Nẽ kot pu mẽ pahtõ mẽmoj tã hakre hkêt nẽ.

Mẽ parom àhpumunh o àhpumunh xwỳnh kênã.

³⁵ Nẽ mẽ pahtõ kot puj we kãm pakapêr nẽ kãm: “Kwa Tĩrtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anẽ.

Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anẽ. Anẽ.

³⁶ Tãm na pre amnhĩ kaxyw mẽmoj piitã ho kator pa. Nẽ ãm pix kukwak ri na mẽmoj piitã htĩr nẽ pa. Jakamã kwa pu mẽ kãm mex o mex ã mãn harênh rãhã ho ri papa.

12

Mẽ pahte Tĩrtũm mã amnhĩ nhõr ã mẽ pajarênh

Wam Korĩt 6.20; Epes 4.1; Piripos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jejus kôt ixkwỳjaja. Tĩrtũm na hte mẽ pahto mex nẽ mẽ pakamã ukaprĩ rãhã jakamã na pa ã mẽ amã ixkapêr anẽ. Kwa mẽ tokyx kãm amnhĩ jarê nẽ kãm amnhĩ gõ. Te mẽ ate kãm hkĩnh xà nhõr pyræk o amnhĩ nhĩpêx nẽ kãm amnhĩ gõ. Jao mẽ amã kapêr kôt pix mã amnhĩ nhĩpêx o ri apa hprãm ã kãm amnhĩ jarê. Nẽ kãm hprãm xà hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarê. Kot kaj mẽ ã kãm amnhĩ jarênh anẽ nhũm amnhĩ tã mẽ ama nẽ hkĩnh nẽ. ã mẽ pahte kãm amnhĩ jarênh anhỹrja na kãm mar prãm.

² Nẽ kêr ka mẽ kãm Tĩrtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nẽ. Nẽ mẽ amnhĩ to Tĩrtũm mãn wỳ kê mẽ amã mẽ ajamaxpêr mex jagjê. Koja mẽ ama nẽ mẽ amã hagjê ka mẽ ra aprĩ hã hamaxpêr xà hkôt mẽ pahte amnhĩ to mex xà pumunh mex nẽ. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwỳja ý hã pahkĩnh nẽ ri papa.

Kris kwỳjaja kot tanhmã axpên nhĩpêx to hã mẽ kãm karõ

Rômân 12.1-11; Epes 4.11-16; Wam Pêtre 4.10-11

³ Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harênh o ri mẽ akôt ixpa kaxyw. Tã na pa ã kagàja kamã mẽ amã harênh anẽ.

Jakamã kwa kêr ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rỳ atỳx ri ajamaxpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhÿr ã amnhĩ to jarkrar o ri mẽ hkôt apa hkêt nê. Kêt mẽ ãm amnhĩ jarênh o:

—Na pa pre amnhĩ kaxyw Jejus kôt ijamaxpêr nhũm Tĩrtũm ixpumu nê ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhÿr kêt nê. Anê.

⁴ E pa mẽ amã mẽmoj jarê ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nê mẽ pajakwa. Nê kamã mẽ pajamak nê mẽ pahte. Na pu htem mẽ pano ho rĩt nê mẽ pajakwa ho pakapêr. Nê mẽ pajamak o ri ama nê mẽ pahte ho ri mra.

⁵ Ja pyrã nê Kris kôt mẽ pahte amnhĩ xunhwÿr xwÿnhja ãm pyxi tã hkôt mẽ pahte amnhĩ xunhwÿr xwÿnhjaja mẽ paxohtôô. Jakamã na pu htem ahpÿnhã tanhmã axpên to mex to ho ri papa. Jao Kris kôt axpên to pahtô nê pahtôx o papa.

⁶ Tĩrtũm na hte mẽ pahpê hkwÿ hã ahpÿnhã mẽ pamã tanhmã mẽmoj tã karô to nê kaxyw mẽ pahto mẽ paxihtÿx. Tã kêr pu mẽ ra kot mẽ pamã mẽmoj tã karô xà hkôt kãm amnhĩ nhĩpêx rãhã ho ri papa. Jakamã koja mēhõ ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnàr rom mẽ kãm kapêr jarênh mex o ri mẽ hkôt apa.

⁷ Rÿ ate akwÿjê mã tanhmã axàpên to ho ri apa kaxyw axãm ka mẽ kãm axàpên mex o ri mẽ hkôt apa.

Rÿ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rÿ ate Tĩrtũm kapêr o ri Jejus kôt mẽ akwÿjê jamaxpêr o hihtÿx o ri apa kaxyw axãm ka mẽ kãm kapêr jarênh pē mẽ ho mẽ hihtÿx mex o ri mẽ hkôt apa.

Rÿ ka mẽ atõ akukrêx rax japêr nê ate mẽ kêp amrakati xwÿnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rÿ ate akwÿjê ho amnhĩptàr kaxyw axãm ka mẽ ho amnhĩptàr mex o ri apa.

Rÿ ate tanhmã mẽ akwÿjê ho mex to nê mẽmoj to mẽ kutã anojarêr o ri apa kaxyw axãm ka akĩnh kãm ã mẽ hipêx anhÿr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tÿx nê hkôt amnhĩ nhĩpêx rãhã ho ri apa.

¹⁰ Nê mẽ apê Kris kwÿ hã amã axpên kĩnh kãm tãm axpên nhĩpêx o ri apa. Nê mẽ akwÿjaja mẽ kot amnhĩ to mex xwÿnh ã mẽ harênh o ri mẽ hkôt apa. No mẽ ri atÿx ajamaxpêr o:

—Nà koja mēhõ ixkumrêx ixte tãm amnhĩ nhĩpêx xwÿnh ã ijarê pa rĩ kormã amnhĩ xwar tãm kot amnhĩ nhĩpêx xwÿnh ã harê.

Anhÿr o ajamaxpêr kêt nê. Kêr ka akumrêx tãm kot amnhĩ nhĩpêx xwÿnh ã harê.

¹¹ Nê kêr ka mẽ Tĩrtũm mã mẽmoj to anhÿr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhÿr mex nê.

¹² Nê mẽ nhÿrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhÿr o ri apa.

Nê kêr ka mẽ tanhmã amnhĩ to rÿ nhũm mēhõ tanhmã mẽ ato ka mẽ akapri nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwÿr rãhã ho ri apa.

¹³ Nê koja Kris kôt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwÿ gõ. Nê amnhĩ wÿr awÿ nê tanhmã ho mex to.

¹⁴ Nê mẽ kot tanhmã mẽ atomnuj to xwÿnhjaja kêr ka mẽ amnhĩ tã mẽ omu nê agryk nê wajaga kot tanhmã

amã ho kaxyw hwÿr atēm nē kãm tanhmã hã axãmnhēn to hkêt nē. Kêt ãm ho Tirtũm pix wÿ nē kãm:

–Pa mẽ ijamãr mex xwÿnh maati. Nà na ixkwÿjê hõja ã inhÿpêx anē. Tã nom kêr ka ixtã tanhmã homnuj to hkêt nē. ãm tanhmã ho mex to.

Anhÿr o mãn mẽ ho awÿ.

¹⁵ Nē koja akwÿjê hõ mẽmoj tã hkĩnh nē. Ka omu nē uràk nē ÿ hã akĩnh nē. No koja mẽmoj tã hkaprĩ nē mÿr o nhÿ ka omu nē ra uràk nē ÿ hã akaprĩ nē.

¹⁶ Nē kêr ka mẽ piitã mẽ hipêx o axpēn pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhÿpêx pyràk kêt nē. Nē axàhpumunh tÿx o ate mẽ piitã mẽ hakrenh par pyràk o ri amnhĩ nhÿpêx o ri apa hkêt nē.

¹⁷ Nē koja mẽhõ tanhmã ato htã ka ãm amnhĩ tã omu nē tanhmã amnhĩ tã ho hkêt nē. Nē mẽ piitã mẽ noo mã tãm ri amnhĩ nhÿpêx o ri apa.

¹⁸⁻¹⁹ Nē kêr ka mẽ tãm ri axpēn mã akapēr rãhã ho ri apa.

Nē kot kaj akrãmnhwÿ mẽ wa tanhmã axpēn nhÿpêx to. Hãmri ka wa akupÿm tãm axpēn xãm kaxyw kãm akapēr tã nhũm ama nē ãm ama nē akaga. Ka ãm amnhĩ tã omu nē kamã agryk kêt nē. Koja Tirtũm tãm tanhmã atã ho. Kapēr ã kagà htũm kot ja jarēnh kot:

Kêr ka mẽ amnhĩ tã tanhmã kot ato xwÿnh to hkêt nē. Pa kot paj mẽ atã tanhmã ho. Anē.

Nē harēnh kot:

²⁰ Kêr ka mẽ amã mẽ kãm mẽ akurē xwÿnhjê o mex pix o ri apa.

Kê mẽ kãm prãm ka ja hã mẽ omu nē mẽ kamã axukaprĩ nē mẽ kãm mẽmoj kwÿ gõ kê mẽ kuku.

Rÿ nhũm mẽ kãm kôr ka mẽ kãm gô hkwÿ kê mẽ ho ixkõ.

Kot kaj mẽ ã amnhĩ tã mẽ hipêx mex anē nhũm mẽ tee ri amnhĩ tã mẽ apumu nē amnhĩ kamã hpijaãm jao mẽ atã amnhĩ kamã gryk nē. Anē.

²¹ Nom kot kaj mẽ amnhĩ tã tanhmã mẽ homnuj to hãmri nē ajaxwÿja uràk nē amnhĩ tomnuj nē. Ja pymaj kêr ka mẽ amnhĩ rom tãm mẽ hipêx. Hãmri

nhũm mẽ amnhĩ tã mẽ apumu nē mẽ apyrà nē tãm mẽ anhÿpêx japēr.

E kêr ka mẽ ã axpēn nhÿpêx o ri apa anē.

13

Mẽ pahto amnhĩptàr xwÿnhjê jarēnh Matêwre 22.21; Xitre 3.1; Wam Pêtre 2.13-17

¹ Nē kêr ka mẽ kot mẽ ato amnhĩptàr xwÿnhjê kapēr ma nē kapēr kôt ri amnhĩ nhÿpêx rãhã ho ri apa. Tirtũm kot mẽ pakaxyw mẽ unhwÿr kênã. Mẽ kot mẽ pahto amnhĩptàr o pa kaxyw na hte mẽ unhwÿ.

² Jakamã koja mẽhõ mẽ kapēr ma nē ãm kuma nē hkôt amnhĩ nhÿpêx kêt nē hãmri nē te kot Tirtũm kapēr mar nē ãm mar pyràk o amnhĩ nhÿpêx. Hãmri nhũm Tirtũm tee ri ja hã omu nē nhÿrmã tanhmã hã ho.

³ Xà na hte tãm mẽ kot amnhĩ nhÿpêx xwÿnhjaja kãm mẽ kot mẽ ho amnhĩptàr xwÿnhjê puma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwÿnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwÿnhjê puma hprãm kêt xwÿnhjaja kêr ka mẽ kapēr ma nē hkôt amnhĩ nhÿpêx kê amnhĩ tã mẽ apumu nē hkĩnh nē. Nē amnhĩm mẽ ate amnhĩ to mex xwÿnh ã mẽ ajarē.

⁴ Tirtũm nhÿ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nē. Nē kot pu mẽ pahtõ axtem nē tanhmã amnhĩ tomnuj to hãmri nhũm tee ri ja hã pajarēnh ma nē tanhmã hã mẽ pahto. ãm hãmri na hte ã mẽ pahto amnhĩptàr xwÿnhjaja mẽ panhÿpêx anē. Tirtũm kãm hprãm xà hkôt.

⁵ Jakamã kwa mẽ kapēr ma nē hkôt ri amnhĩ nhÿpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhÿpêx kêt nē. Mãânēn ã amnhĩ kukamã ajamaxpēr anē nē ajamaxpēr o:

—Nà Tirtùm kot mẽ ixkaxyw unhwÿr jakamã na pa hte kapër ma nẽ hkôt amnhĩ nhĩpêx mex o ri ixpa.

Anhÿr o ajamaxpër.

⁶ Nẽ mẽ pahto amnhĩptàr xwÿnhjaja kot Tirtùm nhÿ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nẽ kugõ. Tanhmã kot ho mẽ pamã mẽmoj to mex to kaxyw.

⁷ Jakamã kêr ka mẽ hã apijaàm o ri apa kamã mãmri mẽ kãm kàxpore hkwÿ ho hkryre nẽ òr o ri apa. Mẽ kot hã àhwÿr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nẽ kêr ka mẽhõ ho tewên japêr nẽ tokyx kãm amnhĩre. Nẽ mẽ amã axpên kĩnh o aa ho ajamakêtkati hkêt nẽ. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anẽ nẽ Tirtùm kapër piitã hkôt amnhĩ nhĩpêx mex o ri apa.

⁹ Amnepê mã na pre finat Mojesja Tirtùm nhÿ hã ljaew mã mẽmoj tã karõ nẽ mẽ kãm:

Kêr ka mẽ aprõ pix tãnopxa nẽ nhãm mênijê hõ kamã ri akurê ho apijaàm kêt o apa hkêt nẽ.

Nẽ mẽ anijaja mẽ amjên pix tãnopxa nẽ nhãm ri mẽmyjê hõ kamã akurê ho apijaàm kêt o ri apa hkêt nẽ.

Nẽ mẽ ri axpên par kêt nẽ.

Nẽ mẽ ri axpên pê axàhkĩnh o ri apa hkêt nẽ.

Nẽ mẽ amã ri axpên kukrêx kĩnh o ri amã ho anhõ hprãm o ri apa hkêt nẽ. Anẽ.

Nẽ mãânên ja:

Kêr ka mẽ nhãm mẽ axpên nhĩpêx o te ka amã amnhĩ tã ma pyrãk. Jao tãm axpên nhĩpêx o ri apa. Anẽ.

Ã kot mẽ kãm hã karõ kot anhÿr. Kot puj mẽ ã pamã pahkwÿjê kĩnh anẽ nẽ mãânên wam finat Mojes kot mẽmoj tã mẽ panhĩgêjtê mã karõ hkôt amnhĩ nhĩpêx o ri papa rãhã nẽ. Jao axpên

par kêt nẽ. Nẽ axpên pê paxàhkĩnh kêt nẽ. Nẽ axpên kutã panojarêt rãhã nẽ.

¹⁰ Koja mẽhõ kãm amnhĩ tã ma pyrãk o hkwyjê nhĩpêx nẽ mẽ ho mex pix o pa. Jakamã kot kaj mẽ amã ri axpên kĩnh nẽ mẽmoj to axpên kutã anojarêt pix nẽ. Jao Tirtùm kapër piitã hkôt amnhĩ nhĩpêx mex o ri apa.

¹¹ Amnepê mã mẽ pahte amnhĩ kaxyw Jejus kôt pajamaxpër xà hã arĩgrota ã na pre kormã akupÿn mẽ pahwÿr hpôx xà hã arĩgro kormã hwÿr awry rax nẽ. Tã ra hwÿr ahtêp o mõ. Koja tokyx akupÿn mẽ pahwÿr wrÿ nẽ ma akupÿm kaxkwa hwÿr mẽ pahto api. Jakamã kwa kêr pu mẽ arĩ hamãr rãhã ho ri apa. Jao tanhmã amnhĩ tomnuj to kaxyw nẽ pajamaxpër o:

—Kwa koja Jejus tanhmã amnhĩ to nẽ jarãhã akupÿn wrÿk japêr. Tã kot pa ri ã amnhĩ nhĩpêx anẽ nhũm wrÿ nẽ tee ri ja hã ixpumu pa amnhĩ kamã ixpijaàm tÿx nẽ. Nà kot paj ã amnhĩ tomnuj anhÿr kêt nẽ. Anẽ.

Hãmri nẽ Jejus kamã ajamak pê kutêp Tirtùm kapër kôt pix mã ri amnhĩ nhĩpêx mex rãhã ho ri papa.

¹² Na pu htem kamãt kãm gõr nẽ arĩgro jamãr pê kamã pajamak o panhĩkwÿ. Arĩgro te kêp Jejus akupÿn wrÿk pyrãk. Jakamã kwa pu mẽ kamã pajamak pê kãm panojarêt rãhã ho ri papa nẽ amnhĩ nẽ tanhmã mẽ omnu xà kute pumunh mex o ri papa. Te ho pôristi kot amnhĩ nẽ mẽ kot kãm mẽ hkurê xwÿnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã hto pu mẽ ÿ hã tãm ri amnhĩ nhĩpêx. Tã kêr pu mẽ arĩ ã amnhĩ nhĩpêx anhÿr o ri papa nẽ te mẽ pahte arĩgro hã mẽ pa xwÿnhjê kot amnhĩ nhĩpêx pyrãk o amnhĩ nhĩpêx.

¹³ Kot puj mẽ ã amnhĩ nhĩpêx anẽ nẽ mẽ piitã mẽ noo mã tee ri tanhmã mẽ pahte amnhĩ tomnuj to mã pajamaxpër kêt nẽ. Jao amnhĩ kamã pahpijaàm nẽ ri papa hkêt nẽ. Nẽ pajamakêtkati nẽ paxàmnhix ri papa. Te ho hirã kamã ri mẽ pa xwÿnhjê

kot amnhĩ nhĩpêx pyrà nê ãm ri paxàmnhĩx tãm amnhĩ nhĩpêx o ri papa.

Nê mẽ pahprõ pix tânopxar o ri papa. Nê mẽ pahpipãnh nê ri papijapu ho ri papa hkêt nê.

Nê mẽmoj tâ axpên mã paxàkjêr hkêt nê.

Nê mẽmoj tâ axpên kãm pagryk kêt nê.

¹⁴ Nom kot puj mẽ axtem nê ã amnhĩ tomnuj anê nê mẽ pahte amnhĩ nhĩpêx tũm kôt pix mã amnhĩ nhĩpêx. Tã kêt pu mẽ ã amnhĩ nhĩpêx anhÿr pumaj hpãnhã amnhĩ to Pahihti Jejus Kris wÿ nê kãm:

—Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtÿx o axihtÿx nê aa tanhmã amnhĩ tomnuj to hkêt nê. Tã inhmã apyrà nê ixte amnhĩ tomnuj kutã ixihtÿx o ixihtÿx o ixpa hprãm. Anê.

Jao mẽ pajamaxpêr tũmja te ra kot amnhĩ tâ mẽ pahto htÿx kêt pyrak o pu mẽ amnhĩ nhĩpêx o ri papa.

14

Mẽ pahte Kris kôt pahkwÿjê mã paxàkjêr kêt ã mẽ pamã karõ

Matêwre 7.1-5; Rômân 2.1; Wam Korît 10.23-33; Xiakre 4.11

¹ Nê koja mēhõ kormã Jejus kôt amnhĩ xãm nyw ri kormã hkôt hamaxpêr tohtuj anê. Hãmri nê htÿx tanhmã hamaxpêr to nê mẽmoj mex kaga. Ka mẽ ja hã omu nê ãm omu nê hã tanhmã kãm nê hkêt nê. Kwãr mãmrĩ ã amnhĩ nhĩpêx anê. Koja gaa nê rĩ hprĩ hã Tĩrtũm kapêr mar tÿx nê hãmri nê hkôt mẽmojta pumunh mex nê.

² Jakamã koja Jejus kôt akwÿjê hõ mẽ apkur xà piitã hkur pymaj tanhmã hõ kute hã harê nê hkaga nê hamaxpêr o:

—Nà kot pa ja hkur kêt nê. Kot pa apu kuku nê hkur o amnhĩ tomnuj nê. Anê.

Kwãr mãmrĩ ã hamaxpêr anê nê hkur kêt nê. Nom mẽ pahte Jejus kôt amnhĩ xunhwÿr tÿx xwÿnhjaja na pu htem paxàmnhĩx Jejus kamnàr rom mẽmoj piitã kuku. Nom mẽ pahkĩnhã

ham mẽ kot hkôt amnhĩ xunhwÿr xwÿnhjaja kormã kapêr piitã mar kêt jakamã kwãr mẽ mãmrĩ anê nê mẽmoj kur kêt nê.

³ Nom kêt ka mẽ ri tanhmã hã mẽ kãm akapêr to hkêt nê. Rÿ mẽ kãm:

—Kwa mẽ ixpyrà nê mẽmoj piitã aku.

Anhÿr o mẽ kãm akapêr kêt nê. Ano ho ãm hã mẽ omu.

Nê mẽ ate mẽmoj piitã hkur kêt xwÿnhjaja kêt ka mẽ ajaxwÿja mẽ ixte mẽmoj piitã hkur ã tanhmã mẽ inhmã axàkjêr to hkêt nê. Mẽ ixte mẽmoj piitã hkur o ixpa hã mẽ ixpumu nê ãm hã mẽ ixpumu nê hã tanhmã mẽ inhmã axàkjêr to hkêt nê. Rÿ hã mẽ inhmã:

—Kwa nà kot kaj mẽ ja kur o amnhĩ tomnuj nê.

Anhÿr o hã mẽ inhmã akapêr kêt nê. Ano ho ãm ja hã mẽ ixpumu. Mẽ pahte ahpÿnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwÿr xwÿnh piitã mẽ pahto hkra kênã.

⁴ Jakamã kwa mẽmoj tâ tanhmã axpên mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rÿ ajamaxpêr o:

—Tk. Na hte ã ri amnhĩ nhĩpêx anhÿr o pa. Ja omnuj. Pa na pa hte ã amnhĩ nhĩpêx anhÿr kêt nê.

Anhÿr o ri axpên kukamã ajamaxpêr hkêt nê. Mẽ pahpê Tĩrtũm kêt kênã kot pu kêt mẽ ã ri axpên kukamã pajamaxpêr anê. Tĩrtũm pix na hte tanhmã mẽ pajarênh to xwÿnh. àhpumunh o àhpumunh xwÿnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atõjê hõ mẽmo arĩgromnu jarê nê hã àpênh kêt nê. Ka mẽ apê hkwyjaja tee ri ja hã omu nê ajamaxpêr o:

—Nà arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhÿr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpÿnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê.

⁶ Kêt mẽ kot arĩgromnu jarênh xwÿnhjê mẽ mẽ pahte arĩgro piitã mex ã harênh xwÿnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpêr o:

—Na pa hte Tĩrtũm kãm hprãm xà hkôt ã amnhĩ nhĩpêx anhÿr o ri ixpa. Anê.

Nê mẽ pahte mẽmoj piitã hkur xwÿnhjaja nê mẽ kot mẽmoj kwÿ hkur kêt xwÿnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tĩrtũm mã amnhĩ jarê nê kãm:

—Pa mẽ ijamãr mex xwÿnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm.

Anhÿr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku.

⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt.

⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupÿm htĩr. Kêp mẽ panhõ Pahihti hã akupÿm htĩr. Kêp mẽ pahte hkôt amnhĩ xunhwÿr xwÿnhjê nhõ Pahihti kaxyw. Jakamã kêp ra mẽ pahkwÿ htyk xwÿnhjê nhõ Pahihti nê mãânên kêp arĩ mẽ pahtĩr xwÿnhjê nhõ Pahihti.

¹⁰ No mẽ papajaja mẽ pahpê Kris kôt mẽ pahkwÿjê nhõ pahi hkêt jakamã kêr mẽ Kris kôt akwÿjê hõ tanhmã amnhĩ nhĩpêx to hã omu

hãmri nê tanhmã ho akapêr to hkêt nê. Rÿ ajamaxpêr o:

—Kwa na ã amnhĩ nhĩpêx anê. Inhmã ja mex kêt.

Anhÿr o ajamaxpêr kêt nê. Koja nhÿrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhÿr kêt nê.

¹¹⁻¹² Kot puj mẽ nhÿrmã pahpiitã Tĩrtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhÿrmã mẽ piitã ixpê mẽ õ pahi hã ixkutã hkõn krã ho rôrõk nê hkrĩ nê inhmã inhmex o inhmex ã ijarê.

Nê mẽ piitã ixpê Tĩrtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mẽ pahte Kris kôt pahkwÿjê ho mex ã mẽ pamã karõ

Wam Korĩt 8.9-13

¹³ Nê kwa kêr ka mẽ akwÿ kot Jejus kôt amnhĩ xunhwÿr tohtuj anhÿr xwÿnhjaja tanhmã mẽ kot amnhĩ nhĩpêx to ho pa hã mẽ omu nê ja nê tanhmã mẽ kãm akapêr to hkêt nê. ãm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nê mẽ akôt amnhĩ nhĩpêx kaxyw. No kot ka mẽ kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

¹⁴ E kot pa hpãnhã mẽ paxàpkur xà hã tanhmã mẽ panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatat kôt mẽ mã tanhmã mẽ panhõ jarênh to nê ãm hãmri harê. Nà mẽ paxàpkur xaja ãm pixi nê omnu hkêt. Piitã mex o mex. Nom koja mẽhõ tee ri mẽmo mẽ apkur xà hõ pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhî tomnuj nê. Anê.

Hâmri nê hkur kêt nê. Tã kwâr mãmri ã hamaxpêr anê nê hkur kêt nê. Nom na ãm amnhî krã hkôt Tirtûm kêp ja omnuj ã hkamnhîx. Kêp omnuj kêt. Ra kot mêmô mē paxàpkur xà piitã mex ã harênh.

¹⁵ Tã kot kaj mē kot mēmoj kur kêt xwýnhhta py nê o tē nê kot hkaga xwýnh noo mã hkur o xa nhûm apumu nê tee ri hamaxpêr nê hkaprî nê. Jakamã kot ka mē ã noo mã amnhî nhîpêx anhÿrja o ho mex kêt nê. Kwa mē ã ri axpên nhîpêx anhÿr hkêt nê. Kot ka mē ã axpên nhîpêx anê nê te amnhî pix kukamã ajamaxpêr pyrãk o amnhî nhîpêx. Jao akwýjê ho mex kukamã ajamaxpêr kêt nê. Kris kãm mē hapê htýx kôt mē kot amnhî tomnuj pãnhã amnhîrer kaxyw ra nê htyk kênã kot ka kêt mē axtem nê ri ã mē noo mã mē kot mēmoj kur kêeta kur anê. Rý koja apu tee ri kot mēmoj kur kêeta kur ã mē apumu nê tanhmã amnhî tomnuj to. Jao Kris kaga japêr. Jakamã kwa mē ã mē noo mã mēmojta kur kêt nê.

¹⁶ Mēmo mē apkur xàja mex tã nhûm mē akwýjê hõ kãm mex kêt japêr ka mē noo mã hkur kêt nê. Nê tanhmã hã kãm nê hkêt nê. Kot kaj mē anê nhûm Kris kra hkêt xwýnhjaja tee ri ja hã mē apumu nê tanhmã axpên mã mē apê Kris kwýjê ho kapêr punuj to.

¹⁷ Mē pahpê Tirtûm krajaja na pu htem paxàpkur xà nê pahkôm xà pix kukamã pajamaxpêr o ri papa hkêt nê. Na pu htem amnhî mē pahkwýjê mex kukamã pajamaxpêr. Nê mē pahte tãm amnhî nhîpêx kukamã pajamaxpêr. Nê tãm axpên nhîpêx kukamã pajamaxpêr. Kot puj mē ã amnhî nhîpêx anê nhûm Tirtûm Karõ ja hã mē pahpumu nê mē pahto mē pahkînh nê. Pu mē pahkînh nê pajamakêtkati nê ri axpên kôt papa.

¹⁸ Tã kot puj mē ã Kris mã tanhmã amnhî nhîpêx to ho ri papa anê nhûm Tirtûm ja hã mē pahpumu nhûm

ja kãm mex nê. Nê Kris kôt mē pahkwýjê mã haxwýja ja mex nê.

¹⁹ Jakamã kêr pu mē tãm axpên mã pakapêr o ri papa. Nê pajamakêtkati nê axpên kôt ri pajapôj. Nê Kris kôt tanhmã axpên to paxihtýx to ho ri papa.

²⁰ No kot ka mē axàpkur xà gryk ã akwý hkukamã ajamaxpêr kêt nê atýx ri mēhõ noo mã mēmoj kur japêr. Kêp omnuj tã ka mē ãm amnhî pix kukamã ajamaxpêr nê noo mã hkur japêr. Hâmri nhûm ja hã mē apumu nê ra kot Tirtûm kaga mã. Ra kêp hkra jakamã kwa mē noo mã mē kot mēmoj punuj ã harênh xwýnhhta kur kêt nê. Nom mē paxàpkur xàja piitã mex. Tirtûm kot mē pamã ôr jakamã piitã mē panhõ. Tã koja akwýjê hõ Tirtûm kêp mēmoj omnuj ã hkamnhîx tã ka mē noo mã aku nê ho amnhî tomnuj nê.

²¹ Kêr pu mē pahkwýjaja tanhmã kot amnhî tomnuj to pymaj pu mē pahte amnhî nhîpêx kukamã pajamaxpêr mex o papa. Mēmo mēo nê mēmo kagô pê wîhtija. Tirtûm kot mē pamã mēmoj piitã ôr tã no nhûm mē pahkwýjaja kêp ja omnuj nê pu mē noo mã hkur rý ho pahkôm kêt nê. Mēmo mry nê mēmo wîhti pu mē noo mã hkur rý ho pahkôm kêt nê.

²² Nê kêr ka mē atõ mēmoj krêr kaxyw nê hkukamã ajamaxpêr o:

—Nà kot paj ja krê. Tirtûm kãm ja mex kênã. Anê.

Hâmri nê mãmri Tirtûm kamnàr rom axàmnhîx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpêr nê hkaga.

²³ No kot kaj mē atõ mēmoj to anhÿr kaxyw nê tee ri amnhî kukamã ajamaxpêr nê ajamaxpêr o:

—Ko kot paj apu ja ho anê nhûm Tirtûm hã ixpumu nhûm ja kêp omnuj nê rý ko. Anê.

Hâmri nê tee ri amnhî kukamã ajamaxpêr. Tã ra ã amnhî nhîpêx anê nê akrê rý mēmoj to anê. Hâmri nhûm Tirtûm tee ri ã ate amnhî nhîpêx anhÿr ã apumu nhûm ja kêp omnuj nê. Ate hkamnàr rom mēmoj to

anhÿr kêt nê amarĩ amnhĩ krã hkôt ho anhÿr jakamã ho amnhĩ tomnuj nê.

15

Mê pahte amnhĩ pix kukamã pajamaxpêr kêt ã mẽ pamã karõ

Makre 10.45; Wam Korõt 10.24; Piripos 2.3-5

¹ Nê kêt pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamãr mex nê. Jao mẽ kamã pagryk tokyx anhÿr kêt nê. ãm mẽ kutã panojarêt pix o papa. Jao ra amnhĩ pix kukamã pajamaxpêr kêt nê.

² Mãânên amnhĩ mẽ Kris kôt mẽ pahkwÿjê hkukamã mãn mẽ pajamaxpêr. Jao mẽ kot tãm amnhĩ nhĩpêx kaxyw mẽ ho mex o ri papa.

³ Kris na pre jar pa ri amnhĩ pix kukamã hamaxpêr kêt nê. Na pre mãânên õ Papaj kukamã hamaxpêr. Jakamã Tirtũm kapêr ã kagà htũm kot kãm kapêr jarênh kot:

Pa Papaj. Na hte mẽ pahkurê xwÿnhjaja ixto kapêr punuj nê. Nom mãânên ã ato kapêr o pa anê. Anê.

⁴ Mẽ pakaxyw na Tirtũm kapêr ã kagàja. Mẽ pahte kamã harênh nê mar nê amnhĩ kaxyw hkôt pajamaxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nê. Jao tee ri amnhĩ kukamã pajamaxpêr o ri pahkaprĩ hkêt nê. ãm nhÿrmã Tirtũm kot mẽ pahto mex kukamã pajamaxpêr o akupÿm paxihtÿx nê pahkĩnh nê ri papa. Mẽ pahkĩnh nê ri papa kaxyw na Tirtũm kapêr ã kagàja.

⁵⁻⁶ Na pu htem Tirtũm kamnãrom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mẽ ato Tirtũm wÿr to nê kãm:

—Pa Tirtũm. Apê mẽ ijamãr xwÿnh maati na ka. Nê apê mẽ inhõ Pahihti Jejus Kris nhõ Papaj na ka. Nã xep ra Rõm nhõ xwÿnh kwÿjaja kãm akapêr kôt amnhĩ nhĩpêx prãm jakamã

kwa tanhmã mẽ hkrã ho mex to kêt mẽ hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mẽ amnhĩ tã apumu nê piitã amex o amex ã ajarê.

Anhÿr o pa hte mẽ ato kuwÿ.

Ijaew kêt xwÿnhjê jarênh

Atre 10.34; Rõmân 9.24; Karatas 3.28

⁷ Nê kwa kêt ka mẽ amã axpên tã ma ho ri apa. Te ho Kris kãm mẽ pahtã mata pyrãk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tã mẽ apumu nê mẽ anhÿ hã Tirtũm mã mex o mex ã harê.

⁸ Amnepêm Tirtũm Ijaew mã tanhmã Kris jarênh to. Kormã pika hwÿr wrÿk kêt ri nhũm hkukamã nhÿrmã mẽ hwÿr wrÿk nê mẽ kamã kator ã harê.

Tã nhũm mẽ hwÿr wrÿ nê mẽ kamã kato. Ijaew hkanrêhã htãmnhwÿjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpêr anhÿr kaxyw. Nê hamaxpêr o:

—Amnepêm Tirtũm kot mẽ panhigêt mã hkukamã harênh xã hkôt na mẽ ixwÿr Kraja mẽ nhũm wrÿ nê mẽ ixto mex o ri pa. Nã ãm hãmri na pre mẽ ixwÿr kumê.

Anhÿr o hamaxpêr kaxyw.

⁹ Nê mẽ apê Ijaew kêt xwÿnhjaja mẽ ajaxwÿja mẽ ate tanhmã kot amnhĩ nhĩpêx to hã harênh mar nê Tirtũm mã mex o mex ã harênh kaxyw. Nê Tirtũm kot mẽ akamã ukaprĩ hã mẽ ate amnhĩ tã omunh nê mex o mex ã harênh kaxyw na pre wrÿ. Tirtũm kapêr ã kagà htũm kot tanhmã mẽ ixpê Ijaew jarênh to nê mãânên tanhmã mẽ apê Ijaew kêt xwÿnhjê jarênh to nê mẽ pajarênh kot:

Kot paj Ijaew kêt xwÿnhjê jamak mã amã amex ã ajarênh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwÿnh mẽ mẽ apê Ijaew. Kêt ka mẽ apiitã

Tirtûm nhÿ hã akînh nê ri apa.
Anê.

¹¹ Nê mãânên ja:

E kêr ka mẽ apê Ijaew kêt xwÿnhjaja
nê krî piitã hkôt mẽ apa
xwÿnhjaja mẽ apiitã Tirtûm mã
mex o mex ã harênh o ri apa.

Anhÿr o kot harênh.

¹² Nê Tirtûm nhÿ hã kapêr o pa xwÿnh
finat Ijais haxwÿja Ijaew mã Jejus
jarênh o:

Koja nhÿrmã Jese kanrêhã htãmnhwÿjê
hõja mẽ pahwÿr kato.

Hãmri nê mẽ pahpê Ijaew mẽ Ijaew
kêt xwÿnhjê ho amnhÿptâr o pa.
Jakamã nhÿm mẽ amnhÿ kaxyw hkôt
hamaxpêr o pa. Anê.

¹³ Nê na pa hte tanhmã mẽ ato Tirtûm
wÿr to ho ri ixpa nê kãm:

—Pa Tirtûm. Kwa kêr ka Rôm nhõ
xwÿnhjê ho mex kê mẽ amnhÿ kaxyw
Akra hkôt hamaxpêr mex o ri pa.
Jao hkôt hkînh nê hamakêtkati nê ri
axpên to pa. Nê kê Akarõ mẽ ho mẽ
hihtÿx o pa kê mẽ amnhÿ kaxyw amã
mãn hamaxpêr tÿx rãhã ho ri pa. Anê.

Pawre kot hprî hã amnhÿ jarênh

Sikûn Pêtre 1.12-13

¹⁴ E Kris kôt ixkwÿjaja. Nà ra ixte
mẽ ajarênh mar mex. Na ka xep htem
amnhÿ to mex o ri apa. Nê mẽmoj to
axpên kutã anojarêr rãhã ho ri apa.
Nê mẽ kot tanhmã Tirtûm kapêr kôt
amnhÿ nhÿpêx to xàja ka mẽ omunh
mex nê ho axpên jahkre ho ri apa.

¹⁵ Tã ot pa kagà ja kamã mẽ amã
ixujarênh kãm ixihÿtÿx nê. Tirtûm nhÿ
hã. Ra mẽ ate mẽmoj mar mex tã pa
axte mẽ amã harê. Mẽ ate mar tÿx nê
hã anohtÿx kaxyw. Nà ã ixte amnhÿ
nhÿpêx anhÿr kaxyw na pre Tirtûm
mẽ akaxyw ixãm.

¹⁶ Ixte Jejus Kris mã mẽ apê Ijaew
kêt xwÿnhjê mã kapêr jarênh o ri mẽ
akôt ixpa kaxyw. Nê mẽ ato hwÿr o
ri ixpa kaxyw. Tã pa hte krî hkwÿ
kamã ã mẽ akwÿjê mã harênh anhÿr
o ri mẽ hkôt ixpa. Nê Jejus jarênhja pa
hte mẽ hkôt mẽ kãm harênh o ri ixpa.
Mẽ kot mar nê hkînh kãm hkôt amnhÿ
nhÿpêx mex kaxyw. Hãmri nhÿm
Tirtûm Karõ mẽ kãm mẽ hamaxpêr

nyw jagiê nhÿm Tirtûm hã mẽ omu
nhÿm ja kãm mex nê nhÿm hkînh nê
hamaxpêr o:

—Nà ãm hãmri. Koja mẽ nhÿrmã wa
ixri htîr tûm nê mex nê pa ho pa. Anê.

¹⁷ Tã na pa ixte Jejus Kris nhÿ hã
Tirtûm mã tanhmã amnhÿ nhÿpêx to
ho ixpa hã amnhÿ pumu nê ixkînh nê.

¹⁸⁻¹⁹ Na pa hte ÿ hã mẽ apê Ijaew
kêt xwÿnhjê mã Tirtûm kapêr jarênh
o ri mẽ akôt ixpa. Nê mẽ anoo mã
tanhmã ri Kris kot mẽ amã amnhÿ
nhÿpêx to hã harê. Nê mẽ amã aa mẽ
kot mẽmoj pumunh kêt kwÿ ho anhÿr
o ri mẽ akôt ixpa. Tirtûm Karõ nhÿ
hã. Nhÿm hte mẽ akwÿjaja amnhÿ jaêr
pê omu nê kamã no puma nê. Hãmri
nê mẽ pahpyrà nê Jejus kôt amnhÿ
xunhwÿ. Nom pa hte ã amnhÿ nhÿpêx
anhÿr ã amnhÿ pumu nê ri hã amnhÿ
to jarkrar kêt nê. ãm ixte Kris pix nhÿ
hã mẽ kãm ixkapêr ã mẽ kãm amnhÿ
jarênh o ri mẽ hkôt ixpa. Tã pa ra
Jerujarê rûm Irir wÿr krî piitã hkôt
mẽ kãm Kris kapêr jarê. Tirtûm Karõ
kot tanhmã ixto hihtÿx to jakamã pa
mẽ piitã mẽ kãm harênh mex nê.

²⁰ Na pa hte mẽ hwÿr inhnojarêr nê
ã ijamaxpêr anê nê ijamaxpêr o:

—Kormã mẽ kot Kris jarênh mar kêt
xwÿnhjê hwÿr kot paj mõi. Nom ra mẽ
kot harênh mar xwÿnhjê nhõ krî hwÿr
inhmôrja inhmã prãm kêt. Anê.

²¹ Tirtûm kapêr ã kagà htûm kot
kapêr mar kêt xwÿnhjê jarênh kot:

Kormã mẽ kot Tirtûm kapêr mar kêt
xwÿnhjaja koja mẽ kuma nê
hprî hã mar tÿx nê. Anê.

*Pawre kot Rôm wÿr hkrà hã amnhÿ
jarênh*

Rômân 1.8-15

²² Hêxta waa nê. Inhmã mẽ
apumunh prãm tÿx nê Rôm kãm Jejus
kôt ixkwÿjaja. Na pa hte xatã mẽ awÿr
ixkrà nom kormã mẽ awÿr inhmôr
kêt nê. Kormã ixte krî hkwÿ kamã
mẽ kãm Kris jarênh o ri ixpa jakamã
kormã mẽ awÿr inhmôr kêt nê.

²³ Na pa ra xatã mẽ awÿr ixkrà hã
ixtã amgrà xohtô nê. Tã ra jar mẽ

kâm Kris kot mẽ panê tanhmã amnhĩ nhĩpêx toja jarênh pa.

²⁴ Jakamã kot paj tokyx ma mẽ awÿr mō. Hãmri nê mẽ awÿr pōj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wÿr ma mō. Nê kot paj inhnojarê ka mẽ ixto Tĩrtũm wÿ nê inhmã ixàpkur xã hkwÿ gō pa ma mẽ hwÿr pry hã hkur o mō.

²⁵⁻²⁶ No na pa kormã mẽ awÿr inhnojarê kêt nê. Kot paj ja rũm awjanã nê akupÿm Jerujarê hwÿr mō. Kamã Kris kôt mẽ pahkwÿjaja kêp amrakati nê ri pa nhũm pika pê Gres mẽ Masetõn kamã Kris kôt mẽ pahkwÿjaja mẽ harênh ma nê mẽ kãm kàxpore hkwÿ ho akuprō nê mẽ kaxyw inhmã kugō. Tã kot paj ma mẽ hwÿr o mō nê mẽ kãm kure nê rĩ kormã ma mẽ awÿr mō.

²⁷ Jerujarê kamã Kris kôt mẽ pahkwÿjaja Ijaew na mẽ. Mẽ kumrêx na prem Kris kôt amnhĩ xunhwÿ. Hãmri nhũm mẽ hkwÿjaja ma mẽ apê Ijaew kêt xwÿnhjê mã kapêr jarênh o ri mẽ akwÿ hkôt pa. Hãmri nhũm pika pê Gres kamã mẽ pa xwÿnhjaja mẽ kapêr ma nê mẽ uràk nê Kris kôt amnhĩ xunhwÿr kurê kumrêx. Jakamã amnhĩ xwar kãm nhãm krĩ hō kamã Kris kôt mẽ pahkwÿjê ho mex prãm nê. Hãmri mẽ kãm kàxpore hkwÿ ho akuprō nê mẽ kaxyw inhmã kugō.

²⁸⁻²⁹ Tã kot paj ma Jerujarê hwÿr mẽ kãm o mō nê mẽ kãm kure hãmri nê awjanã nê rĩ kormã ma Rôm wÿr mẽ awÿr mō. Hãmri nê mẽ awÿr pōj pu mẽ axpên pumu nê pahkĩnh nê. Nê axpên mã Jejus Kris mex o mex ã harê nê kãm tanhmã amnhĩ jarênh to ho papa. Jao pahkĩnh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jejus Kris o panhō Pahihti. Jao te mẽ pahpê hkôt axpên to pahtō nê pahtōx pyràk o axpên nhĩpêx. Nê Karō nhỹ hã pamã axpên kĩnh nê. Jakamã kwa Jejus kôt ixkwÿjaja. Kêr ka mẽ ixpê mẽ atō hã ixto Tĩrtũm wÿr kãm axihtÿx nê.

³¹ Kêr pa ma pyka pê Jutej kamã Jerujarê kamã Kris kôt mẽ pahkwÿjê hwÿr mō nê mẽ kãm kàxporeta gō nhũm mẽ omu nê Ijaew kêt xwÿnhjê kot mẽ kãm òr ã mẽ omunh tã tee ri hamaxpêr kêt nê. ãm hkĩnh kãm mãmri ãmnhĩx hamÿ nê ho amnhĩm awjaprō.

Nê kêr ka mẽ ixto awÿ kê inhnê mẽ kêp mẽ pahkwÿ hkêt xwÿnhjê pumunh mex nê.

³² E kêr ka mẽ ã ixto Tĩrtũm wÿr anê. Kê ixte ma Jerujarê rũm ma Rôm wÿr pàr kãm inhmōrta ã kê ixpumunh mex nê. Pa inhmex pê mẽ kurũm ma mẽ awÿr mōn pōj pu mẽ tokyx axpên pumu nê pahkĩnh nê. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nê ixkĩnh nê.

³³ Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ÿ hã pajamakêtkati paxãmnhĩx ri pahkĩnh nê ri papa.

16

Pawre kot ahpÿnhã hkrãmnhwÿjê mã kapêr

¹ Ku nê mãânên ja. Ot pa mẽ awÿr Kris kôt pahtōx Pepreja mẽ awÿr kumê. Na hte krĩ pê Sênkrej kamã Kris kôt mẽ pahkwÿjê tanhmã mẽ ho mex to ho ri mẽ hkôt pa.

² Nê mãânên pa na hte tanhmã ixto mex to. Tã kê mẽmo arĩgro hã mẽ awÿr pōj ka mẽ kêp Kris kôt mẽ pahtōx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkrãmnhwÿjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprō Prisireta ka mẽ wa kãm ijarê. Na pre hte wa inhĩkô hã Jejus Kris mã tanhmã amnhĩ nhĩpêx mex to ho wa pa.

⁴ Jao wa amnhĩ grõnh kôt mẽ kãm ixkurê xwÿnhjê pê ixpytã. Pa amnhĩ tã wa omu nê inhmã wa hkĩnh nê. No ãm papxipix inhmã wa hkĩnh kêt nê. Na pre Ijaew kêt xwÿnh kwÿ pê Kris kwÿjaja ixtã wa harênh ma nê haxwÿja kãm wa hkĩnh nê.

5 Nê na hte Kris kwÿjaja wa òrkwÿ kamã axpên wÿr akuprõ. Mẽ kot Tirtũm mã amnhĩ jarênh nê kapêr ã kagã hkwÿ mar kaxyw axpên wÿr akuprõ. Tã kêr ka mẽ mẽ kãm ijarê.

Nê Kris kôt mẽ pahtõ Epênre mã ijarê. Kêp ixkrãmnhwÿ mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

6 Nê Kris kôt mẽ pahtõx Marir ka mẽ kãm ijarê. Na xep hte tanhmã mẽ ato mex to rũnh o pa.

7 Nê Kris kôt mẽ pahtõ ãrõhti mẽ Jũhti wa kãm ijarê. Ixpyrà nê wa kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhÿ hã mẽ ahkre ho mẽ pa xwÿnhjaja wa kot Kris kapêr jarênh mex ã wa harê. Tã ã amnhĩ nhĩpêx anhÿrja mÿrapê na pre mẽ hkwÿjaja wa unê nê wa haxã pa prem ixpimràatã ixpê prês nê mẽ hãgÿnh xã kamã ixkrĩ.

8 Nê Kris kôt mẽ pahtõ ãpritre mã ka mẽ ijarê. Kêp Kris kôt ixkrãmnhwÿ mex na.

9 Nê Kris kôt mẽ pahtõ Upãnre mã ijarê. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarê. Kêp ixkrãmnhwÿ mex na.

10 Nê Kris kôt mẽ pahtõ Apes ka mẽ kãm ijarê. Na prem ra Kris ã hipêx punuj nê no nhũm mẽ kutã amnhĩ to htÿx nê Kris kaga hkêt nê.

Nê Aristopti nhõrkwÿ kamã hkwÿjê mã ijarê.

11 Nê Kris kôt mẽ pahtõ Erojãwti mã ijarê. Ixpyrà nê kêp Ijaew na.

Nê Nasisti nhõrkwÿ kamã Kris kwÿjaja ka mẽ kãm ijarê.

12 Nê Kris kôt mẽ pahtõx Xiripêre mẽ Xiripos wa kãm ijarê. Wa kêp Pahihti Jejus mã tanhmã amnhĩ nhĩpêx mex to xwÿnh na wa.

Nê Kris kôt mẽ pahtõx Pesixti mã ijarê. Haxwÿja kêp ixkrãmnhwÿ na. Na hte Pahihti Jejus mã tanhmã amnhĩ nhĩpêx mex to ho ri pa.

13 Nê Kris kôt mẽ pahtõ Rupti mã ijarê. Na hte Kris kôt amnhĩ nhĩpêx

mex o ri pa. Nê katorxã mã ijarê. Na pre te ixpê hkra nhĩpêx pyrãk o inhĩpêx.

14 Nê Kris kôt mẽ pahtõ Asĩnre mã nê Prekõxti nê Emes nê Patopas nê Emas mẽ. Jajê piitã mẽ pahkwÿ kot mẽ hwÿr pikuprõnh xwÿnhjê mẽ mẽ ho apimràatã mẽ kãm ijarê.

15 Nê Kris kôt mẽ pahtõ Pirorti mã nê mẽ pahtõx Juure mẽ Nêrew wa nê htõxja nê mẽ pahtõ Orĩpti wa mẽ kãm ijarê. Nê mẽ pahkwÿ kot mẽ hwÿr pikuprõnh xwÿnhjê mẽ mẽ ho apimràatã mẽ kãm ijarê.

E kêr ka mẽ jajê piitã mẽ kãm ijarê. Na pa hte mẽ kãm ijamaxpêr rãhã ho ri ixpa.

16 Nom mẽ tapxipixjaja kêt. ã mẽ apiitã mã na pa hte ijamaxpêr rãhã ho ixpa.

Nê ota jar Kris kwÿjaja mẽ awÿr hpêr mẽ.

17 Kwa ixkrãmnhwÿjaja. Na ka mẽ ra aprĩ hã Tirtũm kapêr mar tÿx nê. Tã kêr ka mẽ amnhĩ nê mẽ kot Tirtũm kapêr o hêx xwÿnhjê pumunh mex o apa. Mẽ kãm axpên nê mẽ ato hpigrãnh par prãm. Nê mẽ ate Kris kaga nê hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nê mẽ omunh mex nê axkãm ajamak rom.

18 Na htem ã amnhĩ nhĩpêx anhÿr o Pahihti Kris mã tanhmã amnhĩ nhĩpêx to ho pa hkêt nê. ãm amnhĩ hkrã hkôt tanhmã ri hkwÿjê jahkre hto ho pa. Kot mẽ no kupyw kaxyw tanhmã mẽ kãm hêx to ho ri mẽ hkôt pa. Te mẽ ahkre mex pyrãk tã mẽ ahkre mex kêt nê. Jakamã nhũm htÿx ri mẽ pa xwÿnhjaja mẽ kot mẽ ahkreja ma nhũm te mẽ kãm mex pyrãk. Jakamã kwa mẽ okora mẽ amnhĩ nê mẽ omunh mex nê.

19 Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri

amnhĩ tomnuj o ri apa hkêt nê. Ā mẽ ate amnhĩ nhĩpêx anhỹrja na inhmã hprãm.

²⁰ Nê na hte Satanasti mẽ hkwỳjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyrak o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xãja gō. Tapxipix na kot mẽ pajamakêtkati xà nhõr kaxyw àhpumunh tỳx.

Nê na pa hte mẽ ato Pahihti Jejus wỳ nê kãm:

—Pa Pahihti. Kwa kêr ka Rõm kãm akwỳjê pumu nê mẽ ho mex nê mẽmoj to mẽ kutã anojarêt rãhã ho ri apa. Anê.

²¹ Nê ota mẽ pahtõ Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nê ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

²² Nê kot inhmã ixkapêr ã kagã xwỳnh Testi haxwỳja mẽ awỳr hpêr mẽ. Kêp Kris kôt mẽ pahtõ na.

²³ Nê Kris kôt mẽ pahtõ Gajre haxwỳja mẽ awỳr hpêr mẽ. Ōrkwỹ kamã na hte Kris kwỳjaja axpên wỳr akuprõ nê kamã Tĩrtũm mã amnhĩ jarê nê kapêr ã kagã kamã harê nê mar o hkrĩ. Ōrkwỹ kamã na pa pre pōj.

Nê mẽ pahtõ Eras haxwỳja mẽ awỳr pêr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhỹr o pa.

Nê Kris kôt pahtõ Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rê.

²⁴ E kê Pahihti Jejus Krisja mẽ akutã nojarêt rãhã ho pa.

Pawre kot Tĩrtũm mex o mex ã harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Nê kwa kêr pu mẽ Tĩrtũm mã mex ã harênh rãhã ho ri papa.

Nê ixte mẽ amã Jejus Kris jarênh ta ã ka prem ama nê hkôt amnhĩ xunhwỳ. Tã koja mẽ ato mẽ axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê.

²⁶ Tã ã mẽ anhĩpêx anhỹrja o amnhĩrĩt nê ÿ hã mẽ kapêr jarênh o ri pa xwỳnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harê nê kuma. Nom kê Ijaew pixjaja mar kêt nê. Kê pika piitã hkôt kamã harê nê kuma. Panhĩ nê kupê nê kupê hkà htykre nê mẽ hkà haka nê mẽ hkà kamrêkjaja. Kê mẽ piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwỳ. Hãmri nê hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma nê hã kagã.

²⁷ Nã Tĩrtũmja tapxipix na àhpumunh tỳx xwỳnh ã ãm pyxi mex. Nê tapxipix kêp mẽ pahpiitã Mèpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anê. Na hapêx.

**Wam Korît
Pawre kot Korît kãm
Jejus kôt hkwÿjê hwÿr
kagà nê mênh**

Pawre na pre kagàja nhîpêx. Jejus nhÿ hã kapêr jarênh o pa xwÿnhjê hõ na pre. Na pre hipêx nê ma krî pê Korît kãm Jejus krajê hwÿr kumê. Nê kagàja kamã mē kãm tanhmã mēmoj tã karõ hto. Na pre mē kot àhpumunh tÿx ã amnhî to jarkrar o pa nê mē kãm kapêr. Nê tanhmã amnhî tomnuj to nê mē kãm kapêr. Nê mē hprõ nê mē mjên xwÿnhjaja tanhmã wa kot axpên nhîpêx to hã mē kãm karõ. Nê mē kot Tirtûm mã mex o mex ã harênh kaxyw axpên wÿr mē pikuprõnh nê tanhmã amnhî nhîpêx to hã nhûm mē kãm karõ. ã na pre Pawre mē kãm mēmoj tã karõ nê hã kagà anê. Nê mē kãm:

¹ Pa Korît kãm Jejus kôt ixkwÿjaja. Xà mē amex? Ot pa mē awÿr kagàja nhîpêx nê kumê. Ixpê Pawre na pa Kris kôt mē pahtõ Sostenes mē wa awÿr ixpêr mē. Tã kagàja nhîpêx nê mē awÿr kumê. Tirtûm na pre ixte Jejus Kris nhÿ hã mē ajahkre ho ri ixpa kaxyw ixãm.

² Tã ot pa mē awÿr kagà nhîpêx nê mênh mã. Korît kãm ixpyrà nê mē apê Tirtûm krajê hwÿr.

Tirtûm kot amnhî kaxyw mē axunhwÿr jakamã na ka prem amnhî tomnuj kaga nê Kris kôt amnhî xunhwÿ nê hkôt amnhî nhîpêx mex o ri apa. Krî piitã hkôt mē kot amnhî to Jejus Kris wÿr o mē pa xwÿnhjê pyrà nê. Mē panhõ Pahihti Jejus Krisja ãm pixi mex na.

³ Nê Tirtûm kêp Mēpahpãm maati nê Jejus Kris kêp mē panhõ Pahihti jakamã na pa hte mē ato wa hwÿr rãhã o ri ixpa nê mē ato wa hwÿr o:

—Kwa Tirtûm mē Jejus wa. Kêr ka wa Korît nhõ xwÿnhjê kutã anojarêt rãhã ho wa ri apa. Nê mē ho mex rãhã nê. Kê mē amnhî tã war apumunh kôt ri hamakêtkati nê hkÿnh nê àmnhîx

tanhmã ri amnhî nhîpêx to ho ri pa. Anê.

Tirtûm kot Jejus Kris kukwak ri mē pahto mex ã harênh

Sikûn Pêtre 1.2; Wam Tesarõn 5.23-24

⁴ Nê mē ate amnhî kaxyw Jejus Kris kôt ajamaxpêr o ri apa jakamã na hte Tirtûm mē ato mex nê. Tã pa hte kãm amnhî jarênh kaxyw nê kãm mē ajarênh o:

—Pa Tirtûm. ãm hãmri na ka pre Korît nhõ xwÿnh kwÿjê ho akra. Nã ja mex o mex. Anê.

⁵ Nê ra mē ate Kris kôt amnhî xunhwÿr jakamã na ka mē ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwÿjê mã harênh o ri mē hkôt apa.

⁶ Na pa pre mē awÿr mō nê mē amã Kris kot amnhî nhîpêx ã harênh o ri mē akôt ixpa. Ka prem inhma nê hkôt amnhî xunhwÿr tÿx kurê kumrêx.

⁷ Jakamã nhûm Tirtûm mē ate kãm tanhmã amnhî nhîpêx to ho apa kaxyw mē ato mē axihtÿx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupÿn mē pahwÿr wrÿk jamâr pê hapêr arît o apa pê tanhmã kãm axpên nhîpêx to ho apa kaxyw.

⁸ Koja Tirtûm tanhmã mē akrã hto ka mē hkôt pix mã ri amnhî nhîpêx rãhã nhûm Pahihti Jejus Krisja akupÿn mē pahwÿr wrÿ. Hãmri nê mē ate amnhî nhîpêx ã mē apumu nê mē ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tirtûm ra kot amnhî jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhîm mē axunhwÿr jakamã koja ra kot amnhî jarênh xà hkôt mē ato mex rãhã nê.

Mē pahte mēmoj tã axpên pê pahpi-grànkh kêt ã mē pamã karõ

Rõmãn 15.5-6; Sikûn Korît 13.11; Epes 4.1-6; Piripos 2.1-4; Wam Pêtre 3.8

10-11 E Kris kôt ixkwỳjaja. Na ka xep htem mēmoj tā axpēn mā axàkjêr pix o ri apa nhũm pre Krojre hkwỳjaja amnē ixwỳr pōj nē inhmā mē ajarē. Kwa nà mē ā amnhī nhīpēx anhỹr kêt nē. Kêr ka mē axpēn kôt ri amnhī nhīpēx rāhā ho ri apa. Nē axpēn kôt ri ajamaxpēr rāhā nē. Te ixkre tipxi kamā mē ri apa pyrāk o mǎn kêt mē axpēn nhīpēx o ri axpēn kôt apa. Nē mē axpēn kutā anojarēt rāhā ho ri apa. No mēmoj tā axpēn mā axàkjêr pē axpēn pē apigràn h kêt nē. Na pa Pahihti Jejus Kris nhỹ hā mē amā ā ja hā karō anē.

12 Nē na ka xep htem ahpỹnhā ri mē apē mē ixkwỳ hā amnhī jarēnh o ri apa. Jao mē akwỳjaja pa ixkôt ri amnhī nhīpēx xwỳnh ā amnhī jarē. Nē mē akwỳjaja axtem Apor kôt ri amnhī nhīpēx xwỳnh ā amnhī jarē. Nē mē akwỳjaja axtem Simāw Pētre hkôt amnhī nhīpēx xwỳnh ā amnhī jarē. Nē mē akwỳjaja axtem Kris kôt amnhī nhīpēx o ri apa xwỳnh ā amnhī jarē. Ā na ka xep htem ahpỹnhā amnhī jarēnh anhỹr o ri pa.

13 Kwa nà ka mē ā ahpỹnhā amnhī jarēnh anē nē te mē ate Kris o apigràn h pyrāk o hipēx. Kwa mon ka hte mē akwỳjaja apē ixkwỳ hā amnhī jarē? Xà pa na pa pre pī kahpa hā ajēt nē mē anē ty? Nà Kris pix na pre mē panē hā ajēt nē ty. Xà mē apē pa ixkwỳ hā amnhī jarēnh kaxyw na prem mē akrā kumrā? Nà mē apē Kris kwỳ hā amnhī jarēnh kaxyw na prem ā mē anhīpēx anē. Mē kot ja hā mē apumunh xwỳnhjaja kot mē apē Kris kwỳ hā mē apumunh kaxyw. Tā na ka xep htem axtem nē ā ri ahpỹnhā mē kām amnhī jarēnh anhỹr o ri apa.

14-15 Kop ām ixte amnhī kôt mē axunhwỳr prām ronhỹx pa mē ato mē axohtō nē mē akrā kumrā nē mē amā: “E ra mē apē ixkwỳ na ka mē.” Anē. Nom na pa pre ā mē amā ixkapēr anhỹr kêt nē. Ām hāmri na pa pre ām mē ato grēre nē mē akrā kumrā. Ām Kripti mē Gajre wa pix.

16 Ku nē xep mǎnēn Estepti nē

kaxyw mē hkwỳjaja. Ām jajē pixjaja. Nom ko apu axte mē hkwỳ ko. Ixte mē hkrā kumrār xwỳnhjê mē ijamaxpēr tỳx kêt.

17 Na pre Kris ixte mē hkrā kumrār o ri ixpa kaxyw ixām kêt nē. Ām ixte mē kām kapēr jarēnh o ri mē hkôt ixpa pix kaxyw na pre ixām.

Nē na pa hte amnhī krā hkôt ri ixujarēnh o ri mē akôt ixpa hkêt nē. Kot pa ā amnhī nhīpēx anē nhũm mē ixkapēr mex ā inhma nē pa ixkôt amnhī xunhwỳ. Ja pymaj na pa hte amnhī krā hkôt ri tanhmā ixujarēnh to ho ri ixpa hkêt nē. Na pa hte ām ixprī hā Kris kot tanhmā mē panē amnhī nhīpēx to hā harēnh o ri mē hkôt ixpa. Mē pahpiitā mē panē htyk ā harēnhja pa hte mē kām harē. Mē kot hprī hā mar nē hkôt amnhī xunhwỳr kaxyw. Jao amnhī krām mē ujarēnh mexta jagjēnh nē hā no htỳx kaxyw. Pa ja hā mē omu nē ixkĩnh nē ijamaxpēr o:

—Na htem ixkapēr ma nē Jejus kôt amnhī xunhwỳr kurē kumrēx. Nà ām hāmri na pa hte mē kām ixkapēr kaprỳ ho ri ixpa hkêt nē. Anē.

18 No kêt mē pahte Tĩrtũm kot mē pahto hkra xwỳnhjaja ra mē pahte Kris pī kahpa hā mē panē htyk ā harēnh mar nē pahkĩnh nē papa xwỳnh na pu mē. Jakamā na pu htem pajamaxpēr o:

—Nà ām hāmri na Tĩrtũm Kraja htyk kukwak ri mē ixto mex nē mē ixto hkra. Mē ujarēnhja mex kumrēx. Anē.

No kêt mē kēp hkra hkêt xwỳnhjaja na htem tee ri Kris tyk ā harēnh ma nē hamaxpēr o:

—Tk. Tanhmā kot kêt we amnhī to nē mē panē ty? ām amarĩ mē kot amnhī krā hkôt pī kahpa hā nhôr nē hpĩr kēnā. Anē.

Tĩrtũm kra hkêt xwỳnhjê jarēnh

Matēwre 11.25-26; Wam Korîṭ 3.19

19 Nē Tĩrtũm kapēr ā kagà htũm kot mē kēp hkra hkêt xwỳnhjê jarēnh kot: Mē kot htỳx ri àhpumunh tỳx ā amnhī to jarkrar o pa htā kot paj mē kēp ja ho ijapēx pa nhũm mē

ã amnhĩ jarēnh anhÿr kaprÿ.
Anē.

²⁰ Jakamã mẽ àhpumunh tÿx ã mẽ kot amnhĩ to jarkrar xwÿnhjaja nē mẽ kot Mojes kapēr o mẽ ahkre ho ri mẽ pa xwÿnhjaja nē mẽ kapēr rÿnh xwÿnhjaja. Mē kot Tirtũm Kra hkôt amnhĩ xunhwÿr kêt jakamã te mẽ àhpumunh kêt pyræk. Tirtũm kra hkêt xwÿnhjaja kot mẽ àhpumunh tÿx ã mẽ harēnh tã no ãm Tirtũm noo mã te mẽ àhpumunh kêt pyræk. Nē te htÿx ri mẽ kot amnhĩ nhĩpêx o pa pyræk.

²¹ Tirtũm àhpumunh o àhpumunh jakamã na pre ra mẽ hkukamã hamaxpēr o:

–Nà kot paj mẽ àhpumunh tÿx ã mẽ omunh xà hkôt mẽ ho ixkra hkêt nē. ãm mẽ kot ixkra Jejus kot mẽ nē htyk ã harēnh mar nē amnhĩ kaxyw hkôt hamaxpēr pix ã mẽ omunh xà hkôt kot paj mẽ ho ixkra. Anē.

²²⁻²⁴ No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwÿjaja mẽ hwÿr mra nē mẽ kãm Kris kapēr jarēnh o ri ixpa nhũm mẽ inhma nē ãm mẽ inhma. Nē te mẽ kot mẽ inhmar kêt pyræk nē mẽ inhmã:

–Tk. Nà kot paj mẽ tokyx axujarēnh kôt amnhĩ nhĩpêx kêt nē. Kot kaj mẽ inhmã mẽ ixte aa mẽmoj pumunh kêt õ ho anē pa mẽ ja hã apumu nē axihtÿx ã apumu nē rĩ kormã hkôt amnhĩ nhĩpêx.

Anhÿr o inhmã kapēr. Tã no pa mẽ kãm ã amnhĩ nhĩpêx anhÿr kêt nē. ãm Kris kot mẽ panê pĩ kahpa hã htykja pix pa htem mẽ kãm harēnh o ri ixpa. Ja kamã nhũm mẽ hkwÿjaja mẽ inhma nē ãm mẽ inhma nē Kris xihitÿx kêt ã ãm amarĩ htyk ã harē. No mẽ hkwÿjaja. Tirtũm kot amnhĩ kaxyw mẽ unhwÿr xwÿnhjaja na htem mẽ kurom mẽ inhma nē ra mẽ inhmar tÿx kurê kumrêx. Nē mẽ inhmã kapēr o:

–Nà ãm hãmri na Krisja Tirtũm pyræk nē hihitÿx o hihitÿx. ãm hãmri na ka ã harēnh anē. Anē.

No Ijaew kêt xwÿnhjaja na Ijaew pyræk nē kãm amnhĩ krã hkôt amnhĩ

nhĩpêx o pa hprãm kêt nē. Nē mẽ kãm mẽ àhpumunh tÿx pix prãm o pa. Jakamã na pa htem mẽ kãm Kris kapēr jarēnh o ri mẽ hkôt ixpa nhũm mẽ hkwÿjaja mẽ inhma nē Ijaew kwÿjê pyræk nē ãm mẽ inhma nē mẽ inhmã:

–Tk. Nà na ka htem ãm ri axêx o ri apa. Kot pa mẽ akapēr mar kêt nē. Kot paj mẽ axàhpumunh tÿx ã mẽ apumu nē rĩ kormã mẽ ama nē mẽ akôt amnhĩ nhĩpêx.

Anhÿr tã pa mẽ ãm arĩ Kris kot mẽ panê htykja pix pa mẽ kãm harēnh o ri mẽ hkôt ixpa. Nhũm mẽ hkwÿjaja mẽ inhma nē mẽ inhmã:

–Nà mẽ axàhpumunh kêt jakamã na ka htem atÿx ri ã ja jarēnh anē.

Anhÿr tã no nhũm mẽ hkwÿjaja. Tirtũm kot amnhĩ kaxyw mẽ unhwÿr xwÿnhjaja na htem mẽ inhma nē mẽ inhmã kapēr o:

–Nà ãm hãmri na ka mẽ ã Krisja jarēnh anē. Tirtũm pyræk nē àhpumunh o àhpumunh kênã. Anē.

²⁵ Tirtũm mẽ Jejus wa mẽ pakurom àhpumunh o àhpumunh nē hihitÿx o hihitÿx.

Tirtũm mẽ parom hihitÿx o hihitÿx ã harēnh

Matêwre 11.25; Sikũn Korît 12.7-10; Xiakre 2.5

²⁶ E Kris kêt ixtõ nē ixtõxjaja. Amnepê mã Tirtũm kot amnhĩm mẽ axunhwÿrta ã tanhmã na ka prem amnhĩ nhĩpêx to ho ri apa? Nà na ka prem axohtõ nē jar mẽ noo mã axàhpumunh kêt nē ri apa. Nē mẽ apê pahi hkêt nē ri apa. Mē axohtõ nē amnhĩ to hkryre nē ri apa.

²⁷ Tã nhũm Tirtũm amnhĩ kêt mẽ ate amnhĩ to hkryre xwÿnhjê xunhwÿ. Kojã nhÿrmã kot tanhmã mẽ pahpiitã mẽ pajarēnh to xà hã arĩgrota kato hãmri nhũm mẽ àhpumunh tÿx ã amnhĩ to jarkrar xwÿnhjaja Tirtũm kot mẽ kurom mẽ pahto hkra hã mẽ pahpumu hãmri nē tee ri amnhĩ kukamã hamaxpēr nē amnhĩ kamã hpijaàm tÿx nē. Nē mẽ hihitÿx ã amnhĩ to jarkrar xwÿnhjaja haxwÿja. Nhũm Tirtũm kot mẽ kurom mẽ pahto hkra

hã mẽ pahpumu nẽ tee ri amnhĩ kukamã hamaxpẽr nẽ amnhĩ kamã hpijaam tỳx nẽ.

²⁸ Na hte Tirtũm amnhĩ kaxyw mẽ kot amnhĩ to hkryre xwýnhjê xunhwý. Nẽ mẽ kot mẽ kamã kahak o pa xwýnhjê xunhwý. Jar pyka ja kamã mẽ hkwy kot mẽ hkaga htã nhũm Tirtũm amnhĩ mã mẽ unhwý. Mẽmo kaxyw na hte ã amnhĩm mẽ unhwýr anẽ? Nà mẽ kot nhỹrmã tee ri mẽ àhpumunh tỳx ã amnhĩ jarẽnh xwýnhjê pumunh nẽ axpẽn mã mẽ harẽnh o:

–Kwa mẽ pahte mẽ àhpumunh tỳx ã mẽ harẽnh tã nhũm Tirtũm mẽ pahpyrà nẽ amnhĩ kaxyw mẽ unhwýr kêt nẽ. Nà te mẽ àhpumunh kêt pyràk.

Anhỹr o axpẽn mã mẽ harẽnh kaxyw na pre Tirtũm amnhĩm mẽ kot amnhĩ to hkryre xwýnhjê xunhwý.

²⁹ Jakamã kot puj mẽ nhỹrmã Tirtũm mã amnhĩ to jarkrar pẽ tanhmã kãm amnhĩ jarẽnh to hkêt nẽ. Rỳ kãm:

–Kwa ga ixpumu Tirtũm. Na pa hte ã amnhĩ nhĩpêx anẽ nẽ ã amnhĩ nhĩpêx anẽ. Kwa ja hã ixpumu nẽ ixto akra nà?

Anhỹr o amnhĩ to hwýr kêt nẽ.

³⁰ Æm Jejus pix kukwak ri na hte Tirtũm mẽ pahto hkra. Tãm na pre Tirtũm noo mã amnhĩm mẽ paxunhwý. Mẽ pahte uràk nẽ pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhũm mẽ pamã àhpumunh tỳx xà hkwy gõ. Tã ra kot mẽ pahte amnhĩ tomnuj pẽ mẽ papytãr jakamã kot puj mẽ nhỹrmã pahtyk tã no ãm akupỹm pahĩr nẽ Tirtũm mẽ wa kuri pahĩr tũm nẽ pamex kumrẽx nẽ papa ho papa.

³¹ Tã ã Jejus kot mẽ panhĩpêx kot anhỹr jakamã Tirtũm kapẽr ã kaga htũm kot ja jarẽnh kot:

Kot ka mẽ amã mẽmoj tã jarkrar prãm nom kær ka mẽ kamjaja amnhĩ to jarkrar kêt nẽ. Mẽ panhõ Pahшти ra kot mẽ panẽ tanhmã amnhĩ nhĩpêx toja pix ã tanhmã ho jarkrar to ho ri apa. Anẽ.

2

Pawre kot tanhmã Kris jarẽnh to hã harẽnh

Sikũn Korîit 4.1-7; Wam Pẽtre 3.15

¹⁻² E Kris kôt ixtõ nẽ ixtõxjaja. Amnepẽ mã ixte mẽ awýr inhmõrta ã na pa pre inhnojarêt nẽ ijamaxpẽr o:

–Kot paj ma mẽ hwýr mõ nẽ mẽ kãm Kris kapẽr jarẽ. Kot amnhĩ grõnh kôt mẽ inhnẽ htykja pa mẽ kãm harẽ. Æm ja pix jarẽnh o ri mẽ hkôt ixpa. Nom kot paj mẽ kapẽr japjê xwýnhjê pyrà nẽ mẽ kãm ixkapẽr japjê hkêt nẽ. Rỳ mẽ uràk nẽ te ixàhpumunh tỳx o ri ixkapẽr japjê pyràk o ri mẽ kãm ixkapẽr japjê hkêt nẽ. Kot paj ãm ixkatat kôt ri mẽ kãm tanhmã Jejus jarẽnh to pix o ri mẽ hkôt ixpa.

Anhỹr o mẽ akukamã ijamaxpẽr. Hãmri nẽ ma mẽ awýr mõ nẽ mẽ awýr pøj nẽ mẽ amã Jejus kot mẽ panẽ htyk nẽ akupỹm htĩrja pix jarẽnh rãhã ho ri ixpa.

³ Na pa pre tee ri amnhĩ kukamã ijamaxpẽr nẽ ijamaxpẽr o:

–Hẽxta waa nẽ. Tanhmã kot pa we mẽ kãm Tirtũm kapẽr jarẽnh to nhũm mẽ inhmar tỳx nẽ hkôt amnhĩ xunhwýr kurê kumrẽx wehe? Kot paj amnhĩ krã hkôt mẽ kãm harẽnh kêt nẽ. Ja kaxyw ijamaxpẽr tỳx kêt kẽnã. Kot paj amnhĩ krã hkôt mẽ kãm harẽ nhũm mẽ ãm inhma nẽ hkôt amnhĩ xunhwýr kêt nẽ. Nà kot paj Tirtũm nhỹ hã mẽ kãm tanhmã ixkapẽr to kê tãm tanhmã mẽ hkrã hto kê mẽ inhma nẽ hkôt amnhĩ xunhwýr japẽr.

Anhỹr o ijamaxpẽr.

⁴ Nẽ mẽ ate inhmar kaxyw na pa pre ixêx rom tanhmã mẽ ano kupyr to ho ri ixpa hkêt nẽ. Rỳ mẽ pajaja mẽ ixàhpumunh xà hkôt tanhmã mẽ amã ixkapẽr to hkêt nẽ. Na pa pre ãm Tirtũm Karõ nhỹ hã mẽ amã awjarẽ. Mẽ ate mar nẽ hihtỳx o hihtỳx ã omunh kaxyw.

⁵ Jakamã na ka prem Tirtũm xihtỳx ã omu nẽ amnhĩ kaxyw hkôt ajamaxpẽr kurê kumrẽx. No pa ixàhpumunh tỳx ã ixpumunh kôt ixkôt ajamaxpẽr kêt nẽ. Na ka prem ixkapẽr ma nẽ ajamaxpẽr o:

—Nà Tîrtûm na mẽ parom àhpumunh o àhpumunh nê hihtỳx o hihtỳx.

Anhỳr o ajamaxpêr kôt ajamaxpêr kurê kumrêx.

Tîrtûm Karô kot mẽ pamã àhpumunh xà nhôr ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tîrtûm kra hkwỳjaja Tîrtûm kot amnhĩ nhĩpêx ã omunh mex. Nê hamaxpêr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpêr tỳx xà ho mẽ ahkre hkêt nê. Rỳ pika piitã hkôt mẽ utàr xwỳnhjê jamaxpêr tỳx xà ho ri mẽ ahkre ho ri ixpa hkêt nê. Koja nhỳrmã mẽ àhpumunh xàja mẽ kêp hapêx pa.

⁷ Jakamã na pa hte ãm Tîrtûm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tîrtûm amnhĩ kukamã amnhĩ jarênh o:

—Mẽ kot amnhĩ kaxyw Ixkra hkôt mẽ hamaxpêr o mẽ pa xwỳnhjaja kot paj mẽ ho ixkra nhũm mẽ mex kumrêx nê pa ho pa.

Anhỳr o mẽ harê. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrît kêt nê. Tã ja na pa hte ra mẽ kãm harênh rãhã ho ri mẽ hkôt ixpa nhũm mẽ Tîrtûm kãm mẽ pahto hkra hprãm hã harênh ma.

⁸ Nom pika piitã hkôt mẽ ho amnhĩptàr xwỳnhjaja na mẽ kormã ja mar kêt nê. Kêp apu mẽ kot mar ronhỳx prem pĩ kahpa hã mẽ panhõ Pahшти nhôr nê hpĩr kêt nê. Mex o mex tã nhũm prem axtem nê ã hipêx anê.

⁹ Mẽ kot mẽmoj mex pumunh kêt tã Tîrtûm kapêr ã kagà htũm kot mẽmoj mex jarênh kot:

Na pre Tîrtûm mẽ kãm hkĩnh xwỳnhjê kutêp mẽmoj mex kwỳ jaxwỳ nhũm mex o mex nê mẽ ahã hikwỳ.

Aa mẽhõ kot mẽmoj mex o mexja pumunh kêt.

Nê aa mẽhõ kot ã mẽmoj kot anhỳr pumunh kêt.

Nê aa ã mẽmoj mex kot anhỳr kukamã hamaxpêr kêt.

Tã nhũm Tîrtûm mẽ kutêp hkwỳ jaxwỳ.

Anhỳr o kot harênh tã no nhũm mẽ kot hkôt amnhĩ xunhwỳr kêt xwỳnhjaja ã kapêr anhỳrja mar kêt nê.

¹⁰ Mẽ pamã na pre Tîrtûm ja ho amnhĩrît. Na pre ra mẽ pamã Karô gõ nhũm mẽ pamã gjêx o mẽ pamã mẽmoj to amnhĩrît mex nê. Tîrtûm Karôja àhpumunh tỳx o àhpumunh tỳx. Nê kot hprĩ hã Tîrtûm jamaxpêr pumunh par.

¹¹ No mẽ papajaja na pu htem axpên jamaxpêr kôt axpên pumunh kêt nê. Na pu htem papam amnhĩ jamaxpêr ã amnhĩ pumu. Ja pyrã nê Tîrtûm Karô pix na hte Tîrtûm jamaxpêr pumunh.

¹² No mẽ pahpê hkrajaja na hte mẽ pahkarôja pix mẽ pakamã pa hkêt nê. Na hte mãânên Tîrtûm Karôja mẽ pakamã pa nê mẽ pamã tanhmã mẽmoj to amnhĩrît to ho mẽ pahkôt pa. Nê Tîrtûm kot mẽ pakutêp mẽmoj mex jaxwỳrja nhũm ja kukamã mẽ pamã harênh o amnhĩrît.

¹³ Jakamã na pa htem amnhĩ krã hkôt ri mẽ kãm ixujarênh kêt nê. ãm Tîrtûm Karô nhỹ hã na pa hte ixprĩ hã mẽ kãm kapêr jarênh o ri mẽ hkôt ixpa. Ra Tîrtûm Karô kot mẽ amã gjêx xwỳnhjê mã pa ÿ hã ixkapêr.

¹⁴ No mẽ kãm Tîrtûm Karô kapêr mar prãm kêt xwỳnhjaja na htem Tîrtûm kot amnhĩ nhĩpêx pumu nê hprĩ hã omunh kêt nê. Mẽ kãm kapêr mar prãm kêt jakamã na htem ri kot tanhmã mẽ pahto mex to hã harênh ma nê hamaxpêr o:

—Tk. Kwa mo kaxyw na htem ri ã Tîrtûm jarênh anê? Tanhmã kot we amnhĩ to nê mẽ pahto mex? Nà kot anhỳr kêt. Anê.

¹⁵ Nom mẽ pahpê Tîrtûm kra hkwỳ hã mẽ pahte Karô kapêr mar mex xwỳnhjaja na pu hte mẽ kurom Tîrtûm kot amnhĩ nhĩpêx ã omunh mex nê.

Nê Karô xô ri mar mex nê nhũm mē kot Karô kapēr mar kêt xwýnhjaja tee ri ã mē pahte amnhĩ nhĩpêx anhÿr ã mē pahpumu. Nom hprĩ hã mē pahte Tĩrtũm kôt amnhĩ nhĩpêx pumunh kêt nê.

¹⁶ Tĩrtũm kapēr ã kagà htũm kot ja jarēnh kot:

Mēhō na kot Tĩrtũm jamaxpēr pumunh?

Nê mēhō na pre we kãm hamaxpēr gō?

Nà amrakati kumrēx. Tapxipix na àhpumunh tÿx o àhpumunh tÿx. Anē.

Tã mē papajaja mē pahte Tĩrtũm Karô kapēr mar tÿx xwýnhjaja na pu htem Kris xô ri pahprĩ hã hamaxpēr kôt omunh mex nê.

3

Mē kot Tĩrtũm mã tanhmã amnhĩ nhĩpêx to xwýnhjê jarēnh

Wam Korîit 14.20; Karatas 5.16-21; Epes 4.14; Eprêw 5.11

¹ E Kris kôt ixtō nê ixtōxjaja. Pa mē amã mēmoj jarē ka mē inhma nê kãm ajamaxpēr. Nà amnepê mã kormã mē ate Kris kôt amnhĩ nhĩpêx tohtuj anhÿrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpēr tũm kôt pix mã amnhĩ nhĩpêx. Kormã mē ate Tĩrtũm Karô hkôt amnhĩ nhĩpêx mex kêt jakamã na ka pre htem mēhprĩre kot amnhĩ nhĩpêx pyrāk o amnhĩ nhĩpêx. Nê mē urāk nê kormã mēmoj piitã omunh kêt nê. Jakamã na pa pre mē amã ixujarēnh kaxyw nê te mē ate kormã Tĩrtũm kapēr mar kêt xwýnhjê pyrāk o mē anhĩpêx nê mē amã tanhmã ixujarēnh to.

² Mē hkarāre na htem mē hkà kagō pix kaō nê kormã mē apkur xà mex kur kêt nê. Ja pyrā nê na pa pre te ixte mē ato hpijaōr pyrā nê mē amã Tĩrtũm kapēr piitã harēnh par kurē kumrēx kêt nê. Ām mē amã hkwÿ pix jarē ka prem ama nê Jejus kôt amnhĩ xunhwÿ. Tã na pa hte arĩ mē amã hkwÿ pix jarēnh o ri ixpa nê kormã

piitã ho mē ajahkre jatur xàm mēnh kêt nê.

³ Na ka htem arĩ te mē apê Kris kwÿ hkêt pyrāk o amnhĩ nhĩpêx o apa. Nê mēmoj kôt axpēn kãm agryk axpēn mã axàkjêr o apa. Ā amnhĩ nhĩpêx anhÿr jao arĩ mē ate amnhĩ nhĩpêx tũm kôt amnhĩ nhĩpêx rãhã nê.

⁴ Na hte mē akwÿjaja amnhĩ jarēnh o: “Ixpê Pawre hkwÿ na pa.” Anē. Nê mē akwÿjaja amnhĩ jarēnh o: “Pa na ixpê Apor kwÿ na pa.” Anē. Kwa na ka htem ã amnhĩ jarēnh anhÿr o te mē apê Kris kwÿ hkêt pyrāk.

⁵ Apor mē pa ãm wa ixte Tĩrtũm kapēr o mē ajahkre xwýnh pix na pa wa. Wa ixpê mē anhō pahihtti hkêt kēnã kot ka kêt mē axtem nê mē apê ahpÿnhã wa ixkwÿ hã amnhĩ jarē. Na pa pre wa mē amã Tĩrtũm kapēr jarēnh o ri mē akôt ixpa ka prem wa inhma nê amnhĩ kaxyw hkôt ajamaxpēr tÿx nê. Nê hkôt amnhĩ xunhwÿ nom wa pa wa ixkôt amnhĩ xunhwÿr kêt nê. Na pa wa ãm Tĩrtũm kapēr o mē ajahkre nom amnhĩ kôt mē axunhwÿr kêt nê.

⁶⁻⁹ E pa ixprĩ hã mē amã war amnhĩ jarē ka mē inhma. Te wa ixpê Tĩrtũm pur kãm wa ixàpēnh xwýnh pyrāk no mē kajaja te mē apê hpur pyrāk. Na htem hpur karē nhũm hirã nhũm mē kamã ahkre ho pa. Ja pyrā nê na pa pre ixkumrēx mē awÿr ixpa nê mē amã Tĩrtũm kapēr jarēnh o ri mē akôt ixpa. Te mē kot pur kãm ahkre ho ri pata pyrāk. Tã nhũm Apor ixpãnhã ma mē awÿr pa nê te mē kot pur karēta pyrāk o mē anhĩpêx nê mē amã Tĩrtũm kapēr o mē ajahkre mex o ri pa. Xà na hte pur karêr xwýnhja rÿ kamã ahkre xwýnhja tãm tanhmã mēmo hy hto nhũm ra higrōt nê hprêk nê ô? Nà na htem ãm ahkre hpa nhũm arĩ hikwÿ. Nhũm Tĩrtũm tãm tanhmã hyta to nhũm higrōt nê hprêk nê ô. Ja pyrā nê na hte Tĩrtũm mē ho hkra nê tanhmã mē ho nhũm mē amnhĩ kaxyw hkôt hamaxpēr tÿx nê hkôt amnhĩ nhĩpêx mex o pa. Nom mē kãm harēnh o pa xwýnhhta kôt amnhĩ xunhwÿr kêt nê.

Ně na hte pur karêr xwýnh rý kamã ahkre xwýnhja tãm tanhmã hyta to nê ho htîr kêt nê. Tîrtûm pix na hte tanhmã ho nhûm higrôt. Ja pyrã nê na pa hte Tîrtûm kapêr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tîrtûm kra nê ri apa hkêt nê. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nê tapxipix na hte tanhmã mẽ pahkrã hto pu mẽ kãm hprãm xà hkôt amnhî nhîpêx mex o ri papa.

Ně pur karêr xwýnh mẽ pur kãm ahkre xwýnhja wa. Hamě wa àpênh mex jakamã koja hamě wa kot pur kãm àpênh pãnhã amnhîm ujamýnh rax nê. Ja pyrã nê kot paj mẽ ixte Tîrtûm kapêr o mẽ ajahkre ho ri mẽ akôt ixpa xwýnhjaja nhûm Tîrtûm nhÿrmã mẽ ixàpênh pãnhã mẽ inhmã amnhîrer mex nê.

Ně te mẽ ate Tîrtûm nhõ ixkre pyrãk.

¹⁰ Ně pa te ixpê Tîrtûm mã ixkre hã ixàpênh xwýnh pyrãk jakamã na pre Tîrtûm mẽ akaxyw tanhmã ixto pa mẽ amã tanhmã kot amnhî nhîpêx to hã harênh o ri mẽ akôt ixpa. Te ixte õ ixkre kaxyw ãm xà maati xãm pyrãk o mẽ anhîpêx. Jao mẽ amã kapêr jarênh o ri mẽ akôt ixpa. Mě ate amnhî kaxyw hkôt ajamaxpêr nê hkôt amnhî xunhwÿr kaxyw. Tã na ka prem hkôt amnhî xunhwÿ nhûm ixpãnhã Tîrtûm kapêr o mẽ ahkre ho mẽ pa xwýnh kwÿjaja mẽ awÿr mra nê mẽ amã kapêr jarênh jatur xãm kurê. Nê hprî hã ho mẽ ajahkre ho ri mẽ akôt pa. Te ho mẽ kot ixkre krax nhîpêx pyrãk o mẽ anhîpêx.

Ně kwa mẽ ate mẽ ahkre o mẽ apa xwýnhjaja kër ka mẽ akatãt kôt mẽ ahkre mex rãhã ho ri mẽ hkôt apa.

¹¹ Nê Jejus Kris tapxipix na pu htem hkôt amnhî xunhwÿ nhûm mẽ panê mẽ pahte amnhî tomnuj o hapêx. Jakamã te kêp kÿxpê ixkre nhîmõk ã nõr xà maatita pyrãk.

¹² Ně na htem tõiã ixkre nhîpêx kaxyw nê pî htÿx jakã nê ho hipêx nhûm kritpêm mẽ kãm mex ry nê

kuhê. No na htem tõiã nojarêt kãm ixkre hã apê nê pî rerek o hipêx nhûm mẽ kãm mex ry hkêt nê. Koja rôr nhyre hwÿr mra nê mẽ kêp hapôk nê homnu. Ja pyrã nê na hte Tîrtûm kapêr o mẽ ahkre ho ri mẽ pa xwýnh kwÿjaja te mẽ kot katãt kôt pî htÿx o ixkre nhîpêx ta pyrã nê katãt kôt mẽ ahkre ho ri mẽ hkôt pa. No nhûm mẽ hkwyjaja axtem nê te mẽ kot pî rerek o ixkre nhîpêx ta pyrãk o amnhî nhîpêx nê htÿx ri Tîrtûm kapêr kwÿm ri tanhmã mẽ ahkre hto ho pa. Jao hkwyw ri amnhî nhîpêx rãhã ho ri pa.

¹³ Ně koja mēhõ pî htÿx pix o amnhîm òrkwÿ nhîpêx hãmri nhûm mẽmo arîgro hã tanhmã amnhî to nê kêp pôr. No ãm hã põiã pix xêt pa nhûm kãm hikwÿ xà nê õkwa êja arî piitã mex nhûm ixkre hpãm axte hã pô janhôr o nyw. No koja pî rerek o hipêx nhûm mẽmo arîgro hã kêp pôr hãmri nê piitã kêp kaxàr pa. Ja pyrã nê koja nhÿrmã Krisja akupÿn mẽ pahwÿr wrÿ hãmri nê mẽ pahte kãm tanhmã amnhî nhîpêx to ho pa-paja piitã hã mẽ pahpumunh kôt tanhmã mẽ pajarênh to. Koja mẽ pahkwÿjaja mẽ pahte mẽ kot pî htÿx o ixkre nhîpêx ta pyrã nê Tîrtûm mã mẽ pahte amnhî nhîpêx mex o mẽ papa xwýnhjê xàpênh pumu nê mẽ pahte amnhî to mex xwýnh ã mẽ pajarê. Hãmri nê hpãnhã mẽ kot pî rerek o ixkre nhîpêx ta pyrã nê mẽ kot kãm amnhî nhîpêx mex kêt xwýnhjê pumu nê mẽ kot amnhî to mex kêt xwýnh hã mẽ harê.

¹⁴ Ně pî htÿxja na hte tanhmã amnhî to nê hpôr no ãm arî mex nê kuhê nhûm mẽ piitã arî mex ã omu. Ja pyrã nê koja Krisja mẽ kot kãm tanhmã amnhî nhîpêx mex to ho mẽ pa xwýnhjê pumu nê mẽ kot tanhmã kãm amnhî nhîpêx to hpãnhã mẽ kãm amnhîre nhûm mẽ piitã mẽ kot amnhî to mex ã mẽ omu.

¹⁵ No pî rerekja na hte pôr nê kaxàr pa. Ja pyrã nê mẽ kot Kris mã amnhî nhîpêx mex hkêt xwýnhjaja koja Tîrtûm mẽ kãm amnhîrer kêt nê. Nom arî mẽ kêp hkra jakamã koja

mê arî kuri htîr tûm nê pa. No âm mê kot Tîrtûm mã amnhî nhîpêx mex kêt jakamã koja mê hkwýjê hkînh ã amnhîm mẽmoj mex kwý jamýnh kêt nê. Te mēhō nhōrkwý kēp hpōr nhūm mẽ hkukrêx kwý jamýnh kêt nê ý kamã kurūm hapōx pyrāk.

16-17 E pa mẽ amã mẽmoj jarē. Ra mẽ ate mar tã mǎn ka mẽ ra tanhmã amnhî to nê hã ano hkêt rý ko. Nà te mẽ pahpê Tîrtûm nhōrkwý pyrāk. Tîrtûm nhōrkwýja ò na. Tã mẽ pahpê hkra nhūm Karō kot mẽ pakaxwýnh mã gjêx jakamã te mẽ pahpê òrkwý pyrāk. Jakamã mẽ kot kapêr kwým ri mẽ ajahkre o ri mẽ pa xwýnhjaja te mẽ kot Tîrtûm nhōrkwý grǎnh xwýnh pyrāk. Koja mẽ nhýrmã amnhî xà htýx kamã hamak o pa.

Mê pahte amnhî to jarkrar kêt ã mẽ pamã karō

Wam Korîit 1.10-25

18 Nê kot kaj mẽ atō axàhpumunh týx o amnhî to jarkrar o ri apa japêr. Kwa mẽ jam anhûre nê axte ri ã amnhî nhîpêx anhýr kêt nê. Nê te mẽ ate amnhî nê axàhpumunh týx xàja nhām rēnh par pyrāk o amnhî nhîpêx. Mẽ paxàhpumunh xàja pika kamã mẽ àhpumunh pix jakamã kêr ka mẽ te amnhî nê nhām rēnh pyrã nê hpǎnhã Tîrtûm xàhpumunh xà hkôt pix mã amnhî nhîpêx o ri apa.

19 No pika kamã mẽ àhpumunh xwýnhjaja Tîrtûm noo mã te mẽ hkrã pipǎnh nê htýx ri pata pyrāk. Tîrtûm kapêr ã kagà htûm kot mẽ harēnh kot: Pika ja kamã mẽ àhpumunh týx ã mẽ kot amnhî to jarkrar xwýnhjaja Tîrtûm noo mã te mẽ kot amnhî to hêx o pa pyrāk. Anê.

20 Nê mãânēn mẽ harēnh kot:

Mẽ kot amnhî xàhpumunh týx ã amnhî to jarkrar o ri mẽ pa xwýnhjaja na hte Tîrtûm mẽ omu nê mẽ kot ã amnhî jarēnh anhýr kaprý hã mẽ harē. Anê.

21-22 Jakamã kwa kêr ka mẽ axte mẽ apê ixkwý rý mẽ apê Apor kwý hã amnhî jarēnh o ri apa hkêt nê. Mẽ apê wa ixkwý hkêt kēnã. Nê mẽ apê

nhām mēhō hkwý hkêt. Mẽ pahpiitã mẽ pahpê Kris kwý na pu mẽ.

Nê kot puj mẽ nhýrmã pahtyk tã akupým pahtîr nê Tîrtûm mẽ Jejus wa kuri pamex nê pahtîr tûm nê ri papa. Jakamã kwa mẽ tee ri amnhî kukamã ajamaxpêr kêt nê.

Nê jarãhã mẽmoj piitã mẽ panhōō. Nê kormã mẽmoj kot amnhîrît kêt xwýnhjaja haxwýja mẽ panhō na. Âm mẽmoj piitã mẽ panhō jakamã te mẽ pahpê mẽmoj piitã mẽõ pahi pyrāk.

23 No mẽ papajaja axtem Kris kēp mẽ panhō Pahîhti. Nê Tîrtûm kēp Kris nhō Pahîhti.

4

Tîrtûm pix kot tanhmã mẽ pajarēnh to xwýnh ã harēnh

Eprêw 13.17

1 Nê mẽ pajaja mẽ ixpê mẽ anhō pahi hkêt. Âm mẽ ixte Kris mã tanhmã amnhî nhîpêx to ho ixpa xwýnh pix jakamã Tîrtûm kormã kapêr kwý ho amnhîrît kêtja na pa htem mẽ amã ho amnhîrît o ri mẽ akôt ixpa. Ja kaxyw na pre mẽ ixunhwý.

2 Na pre Kris tanhmã mẽ inhmã kapêr to nê mẽ inhmã:

—E kêr ka mẽ ixkapêr pix o mǎn mẽ ahkre ho ri mẽ hkôt apa. Anê.

3-4 Kumã pix mã ixte amnhî nhîpêx o ri ixpa jakamã koja tapxipix ixte kãm amnhî nhîpêx ã ixpumunh kôt tanhmã ijarēnh to. Ixte kãm amnhî nhîpêx mex ã ijarē rý ixte kãm amnhî nhîpêx mex kêt ã ijarē. Âm tapxipix koja tanhmã ijarēnh to. No koja nhām mēhō rý mẽ atō ã ijarēnh anê pa ama nê âm ama. Rý papam tanhmã kãm ixte amnhî nhîpêx mex to hã kãm amnhî jarēnh japêr hāmri nê âm ixtýx kãm ã amnhî nhîpêx anhýr ã amnhî jarēnh kaprý. Pahîhti Kris pix kot hprî hã mẽ pahte amnhî nhîpêx kôt pahpumunh jakamã tapxipix koja tanhmã mẽ pajarēnh to.

5 Jakamã kwa kêr ka mẽ ri mẽ kot Tîrtûm mã tanhmã amnhî nhîpêx to hã mẽ omunh xà hkôt tanhmã mẽ

harênh to hkêt nê. Koja nhÿrmã Pahihiti Krisja akupÿn mẽ pahwÿr wrÿ nê rÿ tãm tanhmã mẽ pahte amnhÿ nhÿpêx to hã mẽ pahpumunh xà hkôt tanhmã mẽ pajarênh to. Nê mẽ kot hpimxur pê tanhmã amnhÿ tomnuj to ho mẽ pa xwÿnhjaja nhÿm mẽ piitã mẽ noo mã mẽ kãm ja ho amnhÿrÿt nhÿm mẽ ja hã mẽ omu. Nê mẽ pahpiitã mẽ pajamaxpêr xà ho amnhÿrÿt nhÿm mẽ piitã hprÿ hã ja hã axpên pumu. Hãmri nhÿm Tÿrtÿm rÿ kormã mẽ pahte kãm tanhmã amnhÿ nhÿpêx mex to ho pa xwÿnhjê jarê.

⁶ E Jejus kôt ixkwÿjaja. Nà na pa ã mẽ amã Apor mẽ wa amnhÿ jarênh anê. Mẽ ate inhmar nê Tÿrtÿm kapêr ã kagà hkôt tanhmã wa ijarênh to kaxyw. Kot kaj mẽ ã amnhÿ nhÿpêx anê hãmri nê ahpÿnhã tanhmã mẽ ixte Kris kapêr jarênh xwÿnhjê jarênh to hkêt nê. Nê axpên mã mẽ ijarênh o:

–Nà tãm kot Kris kapêr jarênh mex o kot hkwÿjê jakrenh jakamã kot paj hkôt pix mã mãn ri ixpa.

Anhÿr o axpên mã mẽ ixtô jarênh kêt nê. Kot kaj mẽ ã mẽ ixtô jarênh anê nê te mẽ ixtô jarkrar pyræk o amnhÿ nhÿpêx.

⁷ Kwa mêmhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nê mẽ ixkapêr mex ã mẽ ixkwÿjê jarê nê mẽ ixkapêr mex kêt ã mẽ ixkwÿjê jarê. Nà na ka mẽ ãm amnhÿ krã hkôt ã mẽ ijarênh anê nom Kris xàhpumunh xà ho ã mẽ ijarênh anhÿr kêt nê. ãm mẽ ixte Tÿrtÿm kapêr o mẽ ajahkre xwÿnhjaja na pa prem mẽ amã mẽmoj jarê ka mẽ ama nê mẽ inhÿ hã hkôt axàhpumunh mex nê. No amnhÿ krã hkôt mẽ axàhpumunh kêt kênã kot ka kêt mẽ ã ahpÿnhã tanhmã mẽ ixtô jarkrar anhÿr to ho ri apa.

⁸ Te mẽ ate Apor mẽ wa ixrom Tÿrtÿm kapêr mar par nê hkôt amnhÿ nhÿpêx mex pyræk. Te wa ixrom mẽ ate Jejus nhÿhkô hã mẽ ho amnhÿptàr pyræk. Hêxta waa nê. Kop apu ãm hãmri mẽ ate ïhkô hã mẽ ho amnhÿptàr ronhÿx pa ijaxwÿja mẽ

apyrà nê ã amnhÿ nhÿpêx anê. Hãmri nê ixkÿnh tÿx kumrêx.

⁹ Nom ja kot anhÿr kêt.

Jejus nhÿ hã mẽ ahkre xwÿnhjê jarênh

Sikÿn Korît 4.8-10; Eprêw 12.1

Nê mẽ ixpê Jejus nhÿ hã mẽ ajahkre ho mẽ ixpa xwÿnhjaja te Tÿrtÿmja axtem tanhmã mẽ inhÿpêx to pyræk pa mẽ inhmex kêt nê ixpa. Te mẽ ixte gyw kãm amnhÿ rênh nhÿm mẽ kot mẽ ixkamã ôkre kahak pyræk o na htem mẽ inhÿpêx. Jakamã na hte mẽ hkwÿjaja mẽ ixpumu nê mẽ ixkapêr ma nê ãm mẽ inhma nê axpên mã mẽ ijarênh o:

–Tk. Kot mẽ ahkreja mexti hã. Kwa pu mẽ himex ri.

Anhÿr jakamã te ra mẽ ixtyk nê mẽ inhÿkwÿ nhÿm mẽ piitã mẽ ixtã htu nê mẽ ixpumunh nê ma pa pyræk o amnhÿ nhÿpêx. Jakamã na htem mẽ ixte mẽ ahkre ma nê ãm kuma nê ma pa. Nom Tÿrtÿm kapêr o mẽ wrÿk xwÿnhjaja na htem ja hã mẽ pahpumu nê axpên mã mẽ pajarênh o:

–Kwa mẽ kot Jejus ã mẽ hipêx kati htã nhÿm mẽ arÿ hkôt amnhÿ nhÿpêx mex nê aa hkaga hkêt nê. Hêxta waa nê. Nà ãm hãmri na htem ã amnhÿ nhÿpêx anhÿr o pa. Anê.

¹⁰ Na hte mẽ kot mẽ ixkapêr mar xwÿnh kwÿjaja kãm mẽ ixkÿnh kêt nê tanhmã mẽ ixtô kapêr punuj to. No mẽ kajaja nhÿm mẽ ã mẽ ato kapêr anhÿr kêt nê. Na htem mẽ ixkrã pipãnh ã mẽ ijarê no mẽ kajaja nhÿm mẽ Kris nhÿ hã mẽ axàhpumunh tÿx ã mẽ ajarê. Nê mẽ ixte Tÿrtÿm kapêr kôt amnhÿ nhÿpêx mex kêt ã mẽ ijarê no mẽ kajaja na htem Tÿrtÿm kôt mẽ ate amnhÿ nhÿpêx mex ã mẽ ajarê. Nê mẽ kot mẽ ixkamã ôkre kahak tÿx tã mẽ akamã ôkre kahak kêt nê mẽ kãm mẽ akapêr mar prãm nê.

¹¹ Na pa htem arÿ Kris ã ixpunuj nê ixpa. Nê mẽ inhã prãm nê mẽ inhã kôr nê ri ixpa. Nê mẽ ixê pikaxônhre nê ri ixpa. Nhÿm htem Kris ã mẽ ixtak rÿnh nê. Pa mẽ inhörkwÿ hkêt nê nhãm ri ixpa nê

nhâm ri ixpa. Na pa htem arĩ ã amnhĩ nhĩpêx anhÿr o ri ixpa.

¹²⁻¹³ Nê ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwÿnhjaja mẽ ijapry ho pa htã pa mẽ amnhĩ kurom mẽ kãm ixkapêr mex mẽ mẽ kãm:

–E kê Tirtũm mẽ ato mex mẽ ka mẽ amex mẽ apa. Anê.

Nê mẽ kot mẽ inhĩpêx kati htã pa htem mẽ kutã amnhĩ to htÿx mẽ arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx mẽ mẽ ixwÿr mrar kêt mẽ. ã na htem mẽ ixte Jejus nhÿ hã mẽ ahkre o mẽ ixpa xwÿnhjê nhĩpêx anê.

Pawre te kêp mẽ hpãm pyrãk ã kot amnhĩ jarênh

Wam Tesarõn 2.11-12

¹⁴⁻¹⁵ E Kris kôt ixkwÿjaja. Na pa ã mẽ amã kagã mẽ mẽnh anê. Nom mẽ ate inhmar mẽ amnhĩ kamã apijaãm kaxyw kêt. Inhmã mẽ ajapê jakamã na pa ã mẽ amã ixkapêr mẽ hã kagã mẽ mẽnh anê. Na mẽ ra ohtô mẽ ixpãnhã mẽ awÿr pa mẽ mẽ amã Tirtũm kapêr o mẽ ajahkre. Nom ixkumrêx na pa pre mẽ amã kapêr jarê ka prem inhma mẽ Kris hkôt amnhĩ xunhwÿ mẽ amnhĩ kaxyw hkôt ajamaxpêr tÿx mẽ. Jakamã paxipix te ixpê mẽ apãm nhũm te mẽ apê ixkra pyrãk.

¹⁶ Jakamã kwa mẽ ixte amnhĩ nhĩpêx kôt ixpumu mẽ ixkôt mãn kêt mẽ amnhĩ nhĩpêx o ri apa.

¹⁷ ã mẽ ate amnhĩ nhĩpêx anhÿr kaxyw na pa pre ijamaxpêr mẽ ma mẽ awÿr Ximotre mẽ. Haxwÿja Kris kôt te kêp ixkra pyrãk. Nê inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awÿr kumê. Kojã ma mẽ awÿr mō mẽ pōj mẽ mẽ amã Kris kapêr jarênh o ri mẽ akôt pa. Nê mẽ amã tanhmã ijarênh to mẽ mẽ amã:

–Nã Pawre na hte Jejus Kris jamaxpêr kôt hamaxpêr o pa. Nê kot amnhĩ nhĩpêx kôt amnhĩ nhĩpêx o pa. Nê krĩ piitã hkôt mẽ kot urãk mẽ ã amnhĩ nhĩpêx o pa anhÿr kaxyw mẽ ahkre mex o pa. Anê.

¹⁸ Nê na xep mẽ akwÿjaja te ra àhpumunh tÿx pyrã nê tanhmã ijarênh to mẽ ijarênh o:

–Pawreja akupÿn mẽ pahwÿr mōr ã amnhĩ jarênh tã kojã akupÿn mōr kêt mẽ kãm ga. ãm kapêr kati xwÿnh na.

¹⁹ Anhÿr ã ijarênh tã kojã Tirtũm kãm tokyx ma mẽ awÿr inhmōr prãm hã kot pa ma mẽ awÿr inhmōr kurê kumrêx. Hãmri mẽ pōj mẽ ixprĩ hã ã mẽ kot ixto kapêr anhÿr xwÿnhjtajê pumu. Nê mẽhō kot ã mẽ kãm ijarênh anhÿr xwÿnhta ã ahkukja.

²⁰ Tirtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu mẽ rĩ kormã kêp hkra hã mẽ harê. Tã kot paj nhÿrmã mẽ awÿr pōj mẽ ã ixto kapêr anhÿr xwÿnhjê pumu mẽ ixprĩ hã mẽ kot amnhĩ nhĩpêx ã mẽ omu mẽ rĩ kormã tanhmã mẽ harênh to. Jao Tirtũm nhÿ hã mẽ kot mẽ ajahkre hã mẽ omu rÿ amnhĩ krã hkôt mẽ kot mẽ ajahkre hã mẽ omu mẽ rĩ kormã tanhmã mẽ harênh to.

²¹ Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō mẽ mẽ awÿr pōj mẽ mẽ ate tãm amnhĩ nhĩpêx ã mẽ apumu mẽ ixkĩnh mẽ. Nê mẽmoj tã mẽ amã ixàkjêr kêt mẽ. Nê mẽ amã ixkapêr mex pix o ri mẽ amã ixkapêr. Te mẽ hipêêxã kot hkrajê mã kapêr mex pyrãk o mẽ amã ixkapêr mex mẽ. Hãmri pu mẽ axpên pumu mẽ pahkĩnh mẽ.

5

Mêhō kot tanhmã amnhĩ tomnuj to hã harênh

Sikũn Korîť 2.5-11

¹ Nê kwa na pa pre tee ri mẽ anhĩõja jarênh ma mẽ ixkaprĩ htÿx mẽ. Na xep hte amnhĩ tomnuj tÿx pê nã puro hã hpijaãm kêt o pa. Kwa mẽ pahpê Kris kwÿjaja mẽ pahte ã amnhĩ nhĩpêx anhÿr kêt nhũm mẽ kot Kris kôt amnhĩ xunhwÿr kêt xwÿnhjaja haxwÿja ã amnhĩ nhĩpêx anhÿr kêt tã nhũm ra mẽ anhĩõja kot Kris kôt amnhĩ xãm tã ã amnhĩ nhĩpêx anê. Kwa ja omnuj tÿx kumrêx.

2 Na xep ri ã amnhĩ nhĩpêx anhÿr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tĩrtũm kôt axàhpumunh tÿx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhÿrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tĩrtũm mã amnhĩ jarênh xà hã ixkre hwÿr axte mrrar kêt nê.

3-5 Ixte mẽ apê awry htã ã kot amnhĩ nhĩpêx anhÿr ã harênh ma nê hkukamã tanhmã ijamaxpêr to. Nà ra ixte mẽ awÿr ixpôx ronhÿx pa mẽ ato akuprô. Pahihti Jejus nhÿ hã mẽ ato akuprô nê mẽ amã kot amnhĩ tomnuj xwÿnhhta jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhÿ hã amnhĩ nê hano nê te Satanasti mã rer pyrãk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihti akupÿn mẽ pahwÿr wrÿ nhũm ma mẽ pahkôt õ krĩ hwÿr api.

6 Mẽ ate Tĩrtũm kapêr jarênh mar mex ã amnhĩ jarênh tã kormã amnhĩ nê ã kot amnhĩ nhĩpêx anhÿr xwÿnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwÿnhhta janor kêt nê hãmri nê gaa nê ra urãk nê apiitã ã amnhĩ nhĩpêx anhÿr o ri apa.

7 Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty.

8 Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

9 Nê wam ixte mẽ awÿr kagã nê mênhta kamã na pa pre mẽ amã:

—Kêr ka mẽ nhãm mẽ kot mênijê kamã hpijaàm kêt o mẽ pa xwÿnhjê hkôt ri apa hkêt nê. ãm ri mẽ hkàx ã apa.

Anhÿr o mẽ amã hã karõ.

10-11 Nom na pa pre mẽ piitã ã mẽ nê mẽ akurê anhÿr kêt nê. ãm mẽ kêp Kris kwÿ hã amnhĩ jarênh tã ã ri amnhĩ tomnuj anhÿr xwÿnh pixjaja na pa pre mẽ nê mẽ akurê. Kojã mêmõ kêp Kris kôt mẽ pahtõ rÿ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwÿnhjaja.

Nê sãnti kutã hkõn krã ho rôrôk nê hkrĩ nê kãm mex ã harênh o ri mẽ pa xwÿnhjaja.

Nê mẽ kot axpên to kapêr punuj o ri mẽ pa xwÿnhjaja.

Nê mẽ pipãnh o ri mẽ pa xwÿnhjaja. Nê axpên pê ri mẽ àhkĩnh o mẽ pa xwÿnhjaja.

Kojã mêmõ kêp Kris kwÿ hã amnhĩ jarênh tã ã amnhĩ nhĩpêx anhÿr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axãpkur kêt nê. ãm mẽ hkàx ã ri mra.

No mẽ kêp Kris kwÿ hkêt xwÿnhjê nê na pa pre ã mẽ akurê anhÿr kêt nê. Mẽ piitã ã mẽ kot amnhĩ nhĩpêx anhÿr o pa kênã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrôk nê hkrĩ nê kãm amnhĩ jagrer pê amnhĩ to hwÿr o pa.

Nê mẽ axpên pê àhkĩnh pix o pa.

Kris kwÿ hkêt xwÿnhjaja na htem ã amnhĩ nhĩpêx anhÿr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhÿr kênã. Kot puj mẽ nhÿrmã Tĩrtũm nhõ krĩ mex wÿr api nê rĩ kormã mẽ hkàx ã ri papa.

12-13 Nê mẽ kêp Kris kwÿ hkêt xwÿnhjaja na pa hte mẽ kot amnhĩ

tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tirtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tirtũm kapêr ã kagà htũm kot ja jarênh kot:

Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. Æ harênh kot anhỹr.

6

Mẽ pahte Kris kwỳjê ho pakapêr kêt Matêwre 5.38-40

¹ Nê na ka xep htem Kris kôt atõ rỳ atõxjê hõ mẽ ka wa tanhmã axpên tomnuj to nê axtem nê juisti hwỳr axpên to mra. Mẽ apyrà nê kêp Kris kwỳ hkêt tã ka htem ma hwỳr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ã Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr mãn kêt mẽ amnhĩ to mra nê kumã mãn amnhĩ jarê kê axpên tã war ama nê axpên tã tanhmã war amã kapêr to.

² Ra mẽ ate ja mar tỳx tã hkôt amnhĩ nhĩpêx kêt nê. Mẽmoj ãm grire htã ka wa tokyx akupỹm hã tãm axpên xãm kêt nê. Rỳ Kris kôt war atõjê hõ hwỳr wa amnhĩ to atêm nhũm akupỹm tãm axpên tã war axãm kêt nê. Æm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỹr kêt nê. Mẽ pahpê Kris kwỳjê kot puj mẽ nhỹrmã Kris nhĩhkô hã mẽ kêp hkwỳ hkêt xwỳnhjê tanhmã mẽ harênh to.

³ Nê Tirtũm kapêr o mẽ wrỳk xwỳnhjaja kot puj mẽ mããnên nhỹrmã tanhmã mẽ harênh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhỹrja kukamã akupỹm tanhmã axpên xunhwỳr to ho apa. Mẽmoj tã mẽ atõjê hõ wa kot tanhmã axpên to hã wa omu nê tokyx akupỹm axpên tã wa kãm akapêr kê wa tokyx akupỹm tãm axpên nhĩpêx.

Æ mẽ kot axpên nhĩpêx anhỹr o paja na kêt mex.

⁴ No na ka xep htem arĩ Kris kôt mẽ akwỳ hkêt xwỳnhjê hwỳr axpên to mra nê mẽ kãm amnhĩ jarê. Kwa mẽ ri ã amnhĩ nhĩpêx anhỹr kêt nê.

⁵ Mẽ tokyx tee ri ja hã amnhĩ pumu nê amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire nê kot tãm akupỹm mẽ axunhwỳr kaxyw amrakati kumrêx?

⁶ Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nê ra mẽ kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

⁷ Mẽ apijapu ho apa jakamã na ka mẽ amnhĩ tomnuj tỳx nê. Hãmri nê te mẽ apê Kris kwỳ hkêt xwỳnh pyrà nê mẽ hwỳr amnhĩ to mra. Kwa kwãr Kris kôt anhĩõ mãmrĩ apê ahkĩ rỳ tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to.

⁸ Ja mex tã mẽ ate ã amnhĩ nhĩpêx anhỹr kêt. Na ka htem axpên pê ahkĩ. Mẽ ate Kris kôt axpên to atõ nê atõx tã axtem nê ã axpên nhĩpêx anê. Te mẽ apijaàm kêt pyræk o amnhĩ nhĩpêx o ri apa.

⁹⁻¹⁰ Mẽ kot tanhmã amnhĩ tomnuj to xwỳnhjaja koja mẽ nhỹrmã ma Tirtũm nhõ krĩ mex wỳr àpir kêt nê. Ra mẽ ate ja jarênh mar tỳx.

Mẽmyjê hõ kot nhãm mênijê hõ ho amnhĩ kati xwỳnhjaja.

Nê mênijê hõ kot nhãm mẽmyjê hõ ho amnhĩ kati xwỳnhjaja.

Nê mênijaja axtem nê mẽ kot amnhĩõ ho mjên o ri mẽ pa xwỳnhjaja.

Nê mẽmyjaja haxwỳja axtem nê amnhĩõ ho hprõ ho ri mẽ pa xwỳnhjaja.

Nê mẽ àhkĩnh o ri mẽ pa xwỳnhjaja.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê ri mẽ pipãnh o mẽ pa xwỳnhjaja.

Nê ri axpên to kapêr punuj o mẽ pa xwỳnhjaja.

Ně mẽ kot amnhĩ to sãnti hwÿr o mẽ pa xwÿnhjaja.

Ã mẽ kot amnhĩ nhĩpêx anhÿr xwÿnh piitã koja mẽ Tĩrtũm nhõ krĩ hwÿr àpir kêt nẽ.

¹¹ Kormã mẽ ate Kris kôt amnhĩ xunhwÿr kêt ri na ka pre mẽ akwÿjaja ã amnhĩ nhĩpêx anhÿr o ri apa. Tã amnhĩ kaxyw Jejus kôt ajamaxpêr nẽ hkôt amnhĩ xunhwÿ. Hãmri nhũm Tĩrtũm Karõ mẽ Pahihti Jejus Krisja wa mẽ anê mẽ ate amnhĩ tomnuj piitã rênh pa nẽ mẽ apê Tĩrtũm kra hã mẽ axunhwÿ nẽ amnhĩm mẽ ate amnhĩ to mex xwÿnh ã mẽ ajarẽ.

Mẽ pahte tãm amnhĩ nhĩpêx o papa hã mẽ pamã karõ

Matêwre 5.27; Rõmãn 12.1-2; Epes 5.3; Korosẽ 3.5; Wam Tesarõn 4.1-8

¹² Nẽ na ka hte mẽ akwÿjaja amnhĩ jarẽnh o:

–Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anẽ.

Mẽ ate ã amnhĩ jarẽnh anhÿr tã no ãm mẽ ate amnhĩ jarẽnhja mex kêt. Mẽmoj piitã mẽ pamã mex kêt. Na pu htem pamã hprãm xà hkôt mẽmoj to anẽ nẽ gaa nẽ ra ho amnhĩ pyrã nẽ ho anhÿr pix o papa. Nẽ gaa nẽ kãm panhũrer kêt kumrêx. Jao ra pahpipãnh pix o ri papa. Rÿ paxêx pix o ri papa. Rÿ paxàhkĩnh pix o ri papa. Jakamã kêt pu mẽ pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nẽ. ãm amnhĩ mẽ amnhĩ kaxyw Jejus mã pajamaxpêr pix nẽ.

¹³ Nẽ na htem amnhĩ jarẽnh o:

–Nà kot paj inhmã prãm nẽ mãmrĩ mẽmoj ku. Nẽ inhmã nhãm mẽhõ kamã ixpijaàm kêt prãm nẽ mãmrĩ ã amnhĩ nhĩpêx anẽ. Ja tanhmã inhmã kute hkêt. Anẽ.

Tã koja nhÿrmã Tĩrtũm mẽ panhĩja o hapêx pa. Na pre mẽ pahte nhãm mẽ kamã pahpijaàm kêt o papa kaxyw mẽ panhĩpêx kêt nẽ. ãm mẽ pahte mẽ panhĩpêx xwÿnh maatija mã tanhmã

amnhĩ nhĩpêx mex to ho papa pix kaxyw na pre mẽ panhĩpêx.

¹⁴ Nẽ na pre Pahihtija ty nhũm Tĩrtũm akupÿm ho htĩr. Ja pyrã nẽ kot puj mẽ nhÿrmã mẽ pajaxwÿja ty nhũm akupÿm mẽ pahto mẽ pahtĩr. Ja kaxyw tapxipix pix na àhpumunh tÿx o àhpumunh tÿx.

¹⁵ Na pu htem Kris kôt amnhĩ xunhwÿr kôt pahpê hwÿ nẽ te pahpê ì pyrãk. Jakamã kwa mẽ ja hã anohtÿx nẽ axte nhãm mẽ hkuprÿjê hwÿr amrar nẽ mẽ ho amnhĩkati hkêt nẽ. Tĩrtũm kêt ja omnuj. Te mẽ pahte Kris nhĩ pyrãk jakamã kot kaj mẽ ã amnhĩ nhĩpêx anhÿr jao te Kris tãm kot ã amnhĩ nhĩpêx anhÿr o pa pyrãk. Kwa ja mex kêt. Xà kot we Krisja ã amnhĩ nhĩpêx anẽ? Nà koja ã amnhĩ nhĩpêx anhÿr kêt nẽ.

¹⁶ Tĩrtũm kapêr ã kagà htũm kot ja jarẽnh kot:

Kot ka mẽ atõ mẽnijê hõ ho aprõ nhũm kêt aprõ kumrêx. Hãmri nẽ te ra war atipxi pyrãk o axpên nhĩpêx. Anẽ.

Ã kot aprõ mẽ wa ajarẽnh anhÿr jakamã kwa kêt ka mẽ atÿx ri nhãm mẽ hkuprÿjê hwÿr apa hkêt nẽ. Kot kaj mẽ ã amnhĩ nhĩpêx anẽ nẽ Tĩrtũm noo mã te ate aprõ kuhpa hã hkuprÿta o aprõ pyrãk. Te wam aprõta kuhpa hã war atipxi pyrãk.

¹⁷ Na pu htem Pahihti Jejus Kris kôt amnhĩ xunhwÿ nhũm amnhĩ tã mẽ pahpumu nẽ mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nẽ ri papa pyrãk o axpên nhĩpêx. Jao Kris jamaxpêr mẽ mẽ pajamaxpêrja te wa kot axpên pyrãk. Nẽ Kris kot amnhĩ nhĩpêx mẽ mẽ pahte amnhĩ nhĩpêxja te kot axpên pyrãk.

¹⁸ Jakamã kwa kêt ka mẽ amnhĩ prõ pix tãnopxar o ri apa. Nẽ mẽ anijaja amjên pix tãnopxar o ri apa. No mẽ nhãm mẽmyjê ho amnhĩkati ho ri apa hkêt nẽ. Nẽ mẽ amyjaja nhãm mẽnijê ho amnhĩkati ho ri apa hkêt nẽ. Kot ka mẽ nhãm mẽmoj tanhmã omnuj kute ho anẽ no ãm

amnhĩ nhĩ homnu hkêt nê. Nom kot kaj mẽ nhãm mênijê ho amnhĩkati rỳ nhãm mẽmyjê ho amnhĩkati hãmri nê ra amnhĩ nhĩ homnu hpa.

¹⁹ Mẽ panhĩ kamã na hte Tĩrtũm Karõ agjê nê kamã hkrĩ. Tĩrtũm na pre mẽ pahwỳr kurê nhũm mẽ pahkarõ mã agjê pu mẽ te mẽ pahpê òrkwỳ pyræk. Jakamã na pu htem amnhĩ krã hkôt pahtỳx ri mẽmoj tanhmã ho ho papa hkêt nê. Æm Tĩrtũm jamaxpêr xà hkôt pix mã na pu htem tanhmã mẽmoj nhĩpêx to ho papa.

²⁰ Na pre ra Jesus mẽ pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm mẽ pajapròr pyræk o mẽ panhĩpêx. Jakamã kwa kêr pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwỳjaja ja hã mẽ pahpumunh kôt Tĩrtũm mã mex o mex ã harênh o ri pa.

7

Mẽ mjên mẽ mẽ hprõ wa kot axpên to mex ã mẽ pamã karõ

Epes 5.22; Korosê 3.18; Eprêw 13.4

¹ Nê ota mẽ ate ixwỳr kagà nê mênhta na pre ixwỳr pøj pa omu. Nê kamã mẽ ate mẽ aprõ hã ixkukjêr xwỳnhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprõ hkêt nê ahte ri apa hprãm nê kam nê aprõ hkêt apa. Ja tanhmã kute hkêt. Nom kêr ka mẽ hkuprỳjê ho presija ho ri apa hkêt nê.

² Na htem tõhã kãm hprõ hprãm kêt nê ri pa nê gaa nê mẽ hkuprỳjê hõ pumu rỳ mẽ kêp mẽ hprõjê hõ pumu nê kamã hpijaàm kêt o ri pa. Ja pymaj kêr ka mẽ amyjaja mãmrĩ aprõ nê mẽ anijaja mãmrĩ amjên.

³ Nê mẽ anijaja. Koja mẽ amjên akamã hkurê ka mẽ mãmrĩ kãm amnhĩ gõ kê mẽ anĩ. Nê mẽ amyjaja mãänên. Koja mẽ aprõ mẽ akamã hkurê ka mẽ mãmrĩ mẽ anĩ.

⁴ Æm ka amã tanhmã amnhĩ nhĩpêx to hprãm xà hkôt pix mã amnhĩ

nhĩpêx kêt nê. Mãänên amã aprõ kot kãm tanhmã amnhĩ nhĩpêx to hprãm xà hkôt mãänên hkôt kãm amnhĩ nhĩpêx.

⁵ Nê kot kaj mẽ mẽmo arĩgro hã amã Tĩrtũm mã amnhĩ jarênh ryy hprãm japêr. Hãmri nê aprõ mã:

—E kot puj jarãhã axpên to amnhĩkati hkêt nê. Kot puj ãm Tĩrtũm pix mã amnhĩ jarênh o amỳkry. Anê.

Hãmri nê mãmrĩ ã amnhĩ nhĩpêx anê. No kwa kêr ka mẽ ãm ja ho anhỳr o apkati pixi nê kãm anhũre. Nhũm jãã ka mẽ amã axpên to amnhĩkati hprãm nê mãmrĩ tanhmã axpên nhĩpêx to. No kot kaj mẽ ã amnhĩ nhĩpêx anhỳr kêt o hã atã apkati xohtõ nê gaa nê ra akurê xàj axtem nê Satanasti jamaxpêr o ajamaxpêr. Jao nhãm mēhõ ni hwỳr mra nê aprõ kuhpa hã kamã akurê ho kamã apijaàm kêt. Rỳ nhũm mênijaja nhãm mẽmyjê hõ hwỳr mra nê mjên kuhpa hã kamã hkurê ho war axpên kamã hpijaàm kêt.

⁶ E mẽ ate ja hã ixkukjêr jakamã na pa ã ixprĩ hã mẽ amã ja jarênh anê. Ka mẽ akwỳjaja amã aprõ hprãm nê mãmrĩ aprõ nê ri apa. Nê mẽ akwỳjaja amã aprõ hprãm kêt nê mãmrĩ aprõ hkêt nê ri apa. Nom kot pa paa mẽ amã mẽ aprõ hã ixàmnênh kêt nê. Ka mẽ kam amnhĩ krã hkôt ajamaxpêr xà hkôt tanhmã amnhĩ nhĩpêx to.

⁷ Na pa hte ixprõ hkêt nê ri ixpa nom inhmã ja mex pa hte ahte ixpa.

Mẽ mjên kêt nê mẽ hprõ kêt xwỳnhjê jarênh

Nê kormã mẽ aprõ hkêt xwỳnhjaja. Ka mẽ ixpyrà nê aprõ hkêt nê ri apa ronhỳx inhmã ja mex nê. Na hte mẽmy hkwỳjaja hprõ kêt nê ri pa nhũm Tĩrtũm ja hã mẽ omu nê tanhmã mẽ ho nhũm mẽ mex nê ri pa nê mênijê kamã hkurê ho mẽ kamã hpijaàm kêt o ri pa hkêt nê. No na hte mẽ hkwỳjaja hprõ hkêt nê ri pa nê gaa nê ra hkurê xàj mênijê kamã hpijaàm kêt. Æ mẽ ate amnhĩ nhĩpêx anhỳr pymaj kêr ka mẽ amã aprõ hprãm nê mãmrĩ aprõ. Tĩrtũm mã ja mex kênã.

⁸ E mẽ aprõ hkêt nẽ mẽ amjên kêt xwýnhjaja. Nẽ ra mẽ apê mẽ aprõ htyk rý mẽ amjên htyk xwýnhjaja. Pa mẽ amã mẽmoj jarẽ. Nà kot kaj mẽ ixpyrà nẽ mẽ aprõ hkêt nẽ ri apa rý mẽ amjên kêt nẽ ri apa nhũm ja inhmã mex nẽ.

⁹ No kot ka mẽ atõ ra akurẽ japêr nẽ mãmrĩ aprõ rý mãmrĩ amjên. Ja mãânẽn tanhmã kute hkêt.

Mẽ pahte axpẽn kaga hkêt ã mẽ pamã karõ

Matêwre 5.31, 19.3-9; Makre 10.2

¹⁰ E kot paj hpãnhã ra mẽ ate axpẽn to amjên nẽ axpẽn to aprõ xwýnhjê mã ixkapêr. Nom kot paj amnhĩ krã hkôt tanhmã ixkapêr to hkêt nẽ. Pahihti Jejus Kris kapêr xà hkôt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nẽ.

¹¹ Nom kot kaj mẽ tanhmã ajamaxpêr to nẽ hkaga japêr hãmri nẽ ahte ri apa nẽ axte nhãm mẽhõ ho amjên kêt nẽ. Rý tee ri amnhĩ kukamã ajamaxpêr nẽ mãmrĩ akupỹm amjênta wýr tẽ nẽ akupỹm hkôt ri apa. No kêr ka mẽ axte nhãm mẽhõ ho amjên kêt nẽ.

Nẽ ra mẽ amyjaja kêr ka mẽ ajaxwýja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhýr o ri apa.

¹² Nẽ mẽ ate ixwýr kagã mẽnũ kamã axpẽn tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nẽ hkêt nẽ. ãm amnhĩ krã hkôt kot paj mẽ amã tanhmã harênh to ka mẽ inhma.

Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nẽ. Kê arĩ ri akôt pa.

¹³ Nẽ mẽ anijaja. Ka mẽ ajaxwýja ra apê Kris kwý hã ri apa nhũm amjên kêp hkwy hkêt tã arĩ ri akôt pa hprãm nẽ arĩ ri akôt pa ka hkaga hkêt nẽ.

¹⁴ Kêp Kris kwý hkêt tã koja akôt Kris kwýjê hkôt ri pa. Rý mẽ aprõ kêp Kris kwý hkêt tã koja akôt Kris kwýjê hkôt ri pa. Jao Tirtũm kapêr mar o pa nẽ gaa nẽ apyrà nẽ hkôt amnhĩ

xãm japêr. Nẽ mẽ akra kêp Kris kwý hkêt xwýnhjaja haxwýja mẽ akôt Kris kwýjê hkôt ri pa nẽ Tirtũm kapêr mar o pa nẽ gaa nẽ akôt Jejus kôt amnhĩ xunhwýr japêr.

¹⁵ Nom koja aprõ kêp Kris kwý hkêt ã kãm akaga hprãm nẽ rĩ tãm mãmrĩ akaga. Rý amjên kêp Kris kwý hkêt ã kãm akaga hprãm nẽ rĩ tãm mãmrĩ akaga. Kêr ka mẽ kot akaga nẽ tee ri kãm tanhmã akapêr to hkêt nẽ. Kwâr mãmrĩ akaga ka ahte ajamakêtkati nẽ axãmnhĩx ri apa. Mẽ pajamakêtkati nẽ mẽ pamex nẽ ri papaja na Tirtũm kãm hprãm.

¹⁶ No koja amjên kêp Kris kwý hkêt tã kãm mẽ akaga hprãm kêt nẽ ka mẽ hkaga hkêt nẽ. Rý aprõ kêp Kris kwý hkêt tã kamẽ kam hkaga hkêt nẽ. Koja arĩ ate amnhĩ nhĩpêx ã apumunh o ri akôt pa nẽ gaa nẽ rĩ apyrà nẽ Kris kôt amnhĩ xãm japêr.

¹⁷ Jakamã kot ka mẽ aprõ rý amjên ra Kris kôt ahte amnhĩ xãm. Hãmri nẽ wa arĩ ri axpẽn kôt ri apa ho apa. Na pa hte krĩ piitã hkôt Jejus kôt mẽ pahkwýjê mã ã ixujarênh anhýr o ri ixpa. Tã kêr ka mẽ ã amnhĩ nhĩpêx anhýr o ri apa.

Kris kôt amnhĩ xunhwýr kêt ri tanhmã mẽ pakute hã mẽ pajarênh

¹⁸ Ja pyrã nẽ kot kaj mẽ ra amy kwryt kã jakàr japêr. Tã ra Kris kôt amnhĩ xãm nẽ arĩ arãhã ri apa. Rý amnhĩ jakàr kêt rãhã hkôt amnhĩ xãm japêr nẽ arĩ arãhã ri apa. Mo kaxyw kot ka kêt amnhĩ jakà?

¹⁹ Tirtũm na hte mẽ pahte amnhĩ my kwryt kã jakàr ã mẽ pahpumunh kôt tanhmã mẽ pajarênh to hkêt nẽ. Rý mẽ pahte amnhĩ jakàr kêt ã mẽ pahpumunh kôt mãânẽn tanhmã mẽ pajarênh to hkêt nẽ. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to.

²⁰ Jakamã kêr pu mẽ pahte Kris kôt amnhĩ xunhwýr kêt ri tanhmã mẽ pakuteja arĩ rãhã ri papa.

²¹ Ka mẽ akwýjaja ate nhãm mẽ kãm mẽ axapênh o apa htã Jejus kôt amnhĩ

xunhwÿ. Tã kêr ka mẽ mãmrî mẽ kãm axàpênh o ri apa. Nom koja anhõ patrãwja amnhĩ nê mẽ ajano ka mẽ mãmrî ma mra nê amnhĩ mã tanhmã axàpênh to ho ri apa.

²² Nê koja mẽhõ Kris kôt amnhĩ xãm. Tanhmãn kêp mẽ õ patrãw rÿ kot mẽ kãm mẽ àpênh xwÿnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tùm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyrãk.

²³ Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mãânên Tirtùm kapêr kôt amnhĩ nhĩpêx o ri apa.

²⁴ Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rÿ mẽ pahte amnhĩ jakàr kêt.

Rÿ ra mẽ pahte nhãm mẽhõ mã paxàpênh o papa rÿ amnhĩ mã paxàpênh o papa.

Rÿ ra mẽ pahprõ nê ri papa rÿ mẽ pahprõ hkêt nê ri papa.

Pu mẽ pahte Kris kôt amnhĩ xunhwÿr kêt ri tanhmã mẽ pakuteta ãm arĩ rãhã hã ri papa. Jao Tirtùm kãm hprãm xà kôt pix mã amnhĩ nhĩpêx o ri papa.

Mẽ hprõ nê mẽ mjên kêt xwÿnhjê jarênh

Matêwre 19.10-12

²⁵ Nê mẽ ate ixwÿr kagà mênhta kamã na ka mẽ mãânên kormã mẽ hprõ hkêt xwÿnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhãm nê hkêt nê. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto

ho ri ixpa. Jakamã e mẽ inhma nê inhmar tÿx nê.

²⁶⁻²⁷ Nà ra mẽ kãm mẽ pahkurê xwÿnhjaja Kris ã mẽ pahtomnuj o pa jakamã koja ixpyrà nê mẽ hprõ hkêt rãhã mẽ pa xwÿnhjaja ahte ri pa nhũm ja mex nê. Nhũm mẽ umaj amnhĩ pix tânopxar o ri pa. Nê mẽ aprõ xwÿnhjaja kêr ka mẽ kãm mẽ pahkurê xwÿnhjê pymaj mẽ aprõ kaga hkêt nê. ãm pix tânopxar o ri apa.

²⁸ Tã kot ka mẽ atõ amã aprõ hprãm nê mãmrî aprõ. Ja mãânên tanhmã ixpê kute hkêt. Nê mẽ anijaja mẽ amã amjên prãm nê mãmrî amjên. Ja tanhmã ixpê kute hkêt. Nom kot ka mẽ akwÿjê pyrà nê aprõ rÿ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhĩ kukamã ri ajamaxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

²⁹ Nê Kris tokyx akupÿn mẽ pahwÿr wrÿk kaxyw jakamã kwa ra mẽ aprõ nê apa xwÿnhjaja. Kêr ka mẽ amnhĩ prõ nê amnhĩ kra pix kukamã ajamaxpêr o ri apa hkêt nê. Te ho mẽ hprõ hkêt nê mẽ pa xwÿnhjaja kot amnhĩ nhĩpêx pyrà nê Kris kutêp kumrêx mã ajamaxpêr pê tanhmã amnhĩ nhĩpêx to ho apa nê arĩ kormã aprõ nê akrajê ho hapu nê tanhmã mẽ kutã anojarêt to ho apa.

³⁰ Kris kot tokyx akupÿn mẽ pahwÿr wrÿk jakamã kwa mẽ ri amÿr o ri mẽ apa xwÿnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwÿnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprõr o ri mẽ apa xwÿnhjaja kêr ka mẽ Kris kutêp tanhmã axujaprõr to pix kukamã ri ajamaxpêr kêt nê.

³¹ Nê mẽ apê mẽ ate mẽmoj to wênê ho ri mẽ apa xwÿnhjaja Kris kutêp ãm ri mẽ akukrêx pix kukamã ajamaxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê.

³² Jakamã kot kaj mẽ akukrêx pix kukamã ajamxpêr nê amnhĩ pix kukamã ajamxpêr nhũm ja apê omnuj nê. Kris kwỳ pê mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa.

³³ No kêt ra mẽ hprõ nê mẽ pa xwỳnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa.

³⁴ Mẽ kãm Tĩrtũm kapêr kôt amnhĩ nhĩpêx prãm tã no ãm mããnên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mênijaja kot Jejus kôt amnhĩ nhĩpêx nê kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwỳnhjaja na htem arĩ ri mẽ hikukrêx tãnopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mēhõ ho aprõ nê mẽ akurê hkêt nê. ãm mẽ ate Tĩrtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwỳnhjê jarênh

³⁶ E kot paj hpãnhã mẽ ate mēhõ ho aprõ mã xwỳnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwỳnhhta kukamã ajamxpêr o:

—Nà kot paj ho ixprõ hkêt nê. Inhmã hkĩnh týx tã kot paj ho ixprõ

hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamxpêr o:

—Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwỳr tẽ nê kãm amnhĩ jarê nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã.

³⁷ Nom kot kaj ho aprõ hkêt ã amnhĩ jarê nê mããnên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mããnên tanhmã kute hkêt.

³⁸ Kot ka ho aprõ nê war amex nê apa. Rỳ kot ka ho aprõ kêt nê mããnên amex kumrêx nê ri apa. Ja na mex o ate mēhõ ho aprõ nê ho apata jakrenh.

Mẽ kệp mẽ mjên tyk xwỳnhjê jarênh

³⁹ E kot paj hpãnhã mẽ apê mẽ amjên tyk xwỳnhjê mã ixkapêr. Nà koja amjên arĩ htĩr ri ka ãm hkôt pix mã axkamẽ nê hkaga hkêt nê. No koja nhỹrmã apê ty hãmri ka tee ri amnhĩ kukamã ajamxpêr hãmri nê amã axte amjên prãm nê mãmrĩ axte amjên. Nom kwa kêt ka mẽ amnhĩ pyrã nê Kris kôt akwỳjê hõ pix o amjên. No mamrĩ nhãm mēhõ ho amjên kêt nê.

⁴⁰ No kot ka mẽ axte amjên kêt nê ahte ri apa hãmri nê axãmnhĩx ri ajamakêtkati nê apa. No na pa ãm amnhĩ krã hkôt mẽ amã ã ja jarênh anê. Mã Tĩrtũm Karõ mã mããnên ja mex nê.

8

Sãnti hã mẽ apkur xà jarênh

Rõmãn 14.13-23; Wam Korît 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nê mẽ ate ixwỳr kagã mēnhhta kamã na ka prem mããnên sãnti hã mẽ apkur xà hã ixkukja. Tã kot paj mẽ amã tanhmã ja jarênh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karõ ho sãnti nhĩpêx

mã mẽõ hkwỳ nhĩpêx nê hwỳr o mra. Hãmri nê hpar pê haxwỳn nê kutã hkôn krã ho rôrôk nê hkrĩ nê kãm mex o mex ã harê nê kãm amnhĩ jagrer pê amnhĩ to kuwỳ. Hãmri nê kãm amnhĩ jagrer pa nê akupỹm amnhĩm mẽõta jamỳ nê ma o mra nê hkwỳjê mã ho wênê. Na htem ã amnhĩ nhĩpêx anhỳr o pa. Tã na ka prem kagãta kamã mẽ ate mẽ kêp mẽõ japrôr nê hkur ã ixkukja. Nà ra mẽ ate sãnti pumunh mex. ãm mẽ kot ìhkra pix o hipêx ã omunh mex jakamã na pu htem hã pamã mẽ apkur xàta hkur prãm nê mãmri paxãmnhĩx ri kuku. Ja tanhmã Tĩrtũm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kôt mẽ pahkwỳjê mã amnhĩ to jarkrar o ri papa hkêt nê. Nê ja hã mẽ kurom paxàhpumunh tỳx ã mẽ kãm amnhĩ to jarkrar hkêt nê. Kot pu mẽ ã amnhĩ nhĩpêx anhỳr o mẽ hamaxpêr o hihtỳx hkêt nê. Kêr pu mẽ ãm mẽ kamã paxukapri pê tanhmã mẽ ho mex to ho papa. Nê Kris kôt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tĩrtũm kãm hprãm.

² No koja mẽhõ mẽmoj pumunh tỳx ã amnhĩ to jarkrar o ri pa nê ãm tee ri ã amnhĩ jarênh anhỳr kaprỳ.

³ No koja mẽhõ àhpumunh tỳx kêt tã kãm Tĩrtũm kĩnh nhũm amnhĩ tã omu nê kãm hapê nê ho hkra. Kêt ja na mex o mex.

⁴ E kot paj ixpri hã mẽ amã tanhmã sãnti hã mẽ apkur xàta jarênh to ka mẽ inhma. Nà Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ìhkra o hipêx jakamã htĩr kêt. Ra mẽ pahte ja jarênh mar tỳx nê omunh mex.

⁵ Na htem ohtô nê ri sãnti kêp Mẽpahpãm ã hkamnhĩx o pa. Kaxkwa kamã mẽmo karõ nhĩpêxja nê pika kamã mẽmo karõ nhĩpêxja nhũm htem kêp Mẽpahpãm ã harênh ho pa. Nom ja kot anhỳr kêt.

⁶ Mẽpahpãmja ãm pixi ho pixi mex. Mẽ panhõ Tĩrtũmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ

nhĩpêx o ri papa.

Nê mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkô hã mẽmoj piitã ho kator pa. Na pu htem ja hã omunh xà hkôt ri pamex nê ri papa. Ra mẽ pahte ja jarênh mar tỳx nê omunh mex. Jakamã na pu htem paxãmnhĩx ri mẽmoj piitã hkur o papa. Tĩrtũm kot mẽmoj piitã ho kator par kênã.

⁷ Tã no ãm ham mẽ kot Kris kôt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xà hkur puma nê. Ham mẽ kot sãnti kaga nê amnhĩ kaxyw Kris kôt amnhĩ xunhwỳr jakamã kormã Tĩrtũm kôt amnhĩ nhĩpêx tohtuj anê. Jakamã na htem tee ri sãnti hã mẽ apkur xàja pumu nê hamaxpêr o:

—Nà kot paj ja kur kêt nê. Kot paj anê nhũm apu Tĩrtũmja pê ja omnuj nê. Anê.

⁸ Nom na kêt hte Tĩrtũm mẽ paxàpkur xà hã mẽ pahpumunh kôt mẽ pahte amnhĩ to mex xwỳnh ã mẽ pajarênh kêt nê. Kot puj mẽ mẽmoj ku rỳ mẽmoj kur kêt nê nhũm ja hã mẽ pahpumunh kôt tanhmã mẽ pamex ã pajarênh to hkêt nê. Jakamã na pu htem mãmri paxãmnhĩx ri mẽmoj tã mẽ apkur xà hkur o papa nê tanhmã amnhĩ to hkêt nê.

⁹⁻¹⁰ Nom kwa mẽ okora. Kêr ka mẽ sãnti mã amnhĩ jarênh xà hã ixkre hwỳr agjêx nê kamã axàpkur hkêt nê. Kot kaj mẽ atõ ã amnhĩ nhĩpêx anê nhũm mẽhõ kormã kot Kris kôt amnhĩ xãm tohtuj anhỳr xwỳnhja ja hã mẽ apumu nê tee ri hamaxpêr. Axàhpumunh tỳx ã ate amnhĩ jarênh tã sãnti nhõrkwỹ kamã axàpkur o nhỹ nhũm ja hã apumu nê tanhmã amnhĩ nhĩpêx to wehe? Koja ja kêp omnuj tã apyrà nê tẽ nê axà nê mẽ kutã apku. Hãmri nê apkur pa nê tee ri amnhĩ kukamã hamaxpêr o:

—Hêxta waa nê. Kwa mon pa axtem nê ri ã mẽmojja kur anê? Nà na pa anê nê ra amnhĩ tomnuj tỳx nê. Anê.

Hãmri nê hkapri nê pa.

¹¹ Ate axàhpumunh tỳx ã amnhĩ jarênh tã amnhĩ kôt atõja mex kukamã ajamaxpêr kêt nê. Kris ra

mÿrapê htyk tâ nhũm ã ate sãnti hã mẽõ hkur ã apumu nẽ tee ri hamaxpêr o Jejus hkôt amnhĩ nhĩpêx mex kêt nẽ.

¹² Kormã kot Kris kôt amnhĩ xãm tÿx kêt tâ tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ.

¹³ Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoj kur puma nẽ. Nẽ htÿx ho Tirtũm kêp omnuj ã hkamnhĩx. Pa ja hã omu nẽ ijaxwÿja axte hkur kêt nẽ. Ixte mex ã omunh tâ no ãm kot tee ri ja hã ixpumunh nẽ hamaxpêr o:

–Kwa Tirtũm kêp ja mex kêt tâ nhũm Pawreja ri kuku. Jakamã kot paj ijaxwÿja urak nẽ kuku. Omnuj tãã.

Anhÿr o hamaxpêr pymaj kot paj urak nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarĩ Tirtũm kapêr o mẽ ahkre hã amnhĩ jarênh

Atre 9.1-18, 20.33-35; Sikũn Korît 11.7-9

¹ Nẽ ixte Jejus nhÿ hã mẽ ahkre ho mẽ pa xwÿnhjê hõ jakamã na pa hte Tirtũm kapêr o mẽ ajahkre ho ri ixpa. Na pa pre inhno ho mẽ panhõ Pahшти Jejus pumu nẽ mẽ amã harênh o ri mẽ akôt ixpa ka prem inhma nẽ hkôt amnhĩ xunhwÿ.

² Mẽ hkwÿjaja kot axpên mã ixpê Jejus nhÿ hã mẽ ahkre xwÿnh kêt ã ijarênh tâ mẽ kajaja mẽ ate ja hã ixpumunh mex. Ixte mẽ amã mẽ ujarênh mexja jarênh nhũm mẽ ate mar nẽ hkôt amnhĩ xunhwÿrja kukwak ri na ka mẽ apê Jejus kwÿy.

³ Jakamã koja mẽ atã ixto kapêr japêr kot paj ã mẽ kãm mẽ ajarênh anê.

⁴ Nẽ ixte Jejus nhÿ hã kapêr jahkre o ixpa xwÿnh jakamã kot paj inh mã Kris kwÿjê kutã amarĩ ixapkur prãm nẽ mãmrĩ mẽ kutã apku. Ja tanhmã kute hkêt tâ kot paj ã amnhĩ nhĩpêx anhÿr kêt nẽ. Kot paj ixapkur kaxyw nẽ amnhĩ pãnhã amnhĩre nẽ rĩ kormã

apku. Na pa hte ã amnhĩ nhĩpêx anhÿr o ri mẽ akôt ixpa.

⁵ Rÿ kot pa ixkwÿjê pyrã nẽ inhmã Kris kôt ixkwÿjê hõ ho ixprõ hprãm nẽ mãmrĩ ho ixprõ. Nẽ wa ma krĩ piitã hkôt Kris kwÿjê kukwak ri ixapkur o ixpa hprãm nẽ wa mãmrĩ ã amnhĩ nhĩpêx anhÿr o ixpa. Ja mex kênã. Na hte ã Simãw Pêtre mẽ Jejus tõ kot hapujaja amnhĩ nhĩpêx anhÿr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶ Nẽ ixkwÿjaja na htem apkur xà hpãnhã àpênh o pa hkêt nẽ. Na htem Jejus nhÿ hã kapêr jarênh o ri pa nhũm hte Jejus kwÿjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhÿr kêt nẽ. Na pa hte wa mry kã ho ixkre nhĩpêx nẽ mẽ kãm ho wênê nẽ hpãnhã amnhĩm awjaprõ. Na pa hte wa ã amnhĩ pa kukwak ri ixujaprõr nẽ ho ixapkur o ri ixpa anê.

⁷ Mẽ kãm pur kãm harõj jamÿnh o mẽ pa xwÿnhjaja na htem amarĩ hkwÿ jamÿ nẽ ho apkur o pa. Nẽ motre jamãr o mẽ pa xwÿnhjaja haxwÿja amarĩ hkã kagõ janê nẽ ho hkõm o pa. Nẽ pòristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nẽ te ixpê mẽ amã ixapênh o ixpa xwÿnh pyrãk jakamã ixte mẽ ajahkreta pãnhã kot ka mẽ inhmã inhõ ho apa nhũm ja mããnen mex nẽ.

⁸ No ãm papxipix na pa hte ja mex ã harênh kêt nẽ. Tirtũm kapêr ã kagã htũm haxwÿja kot ja mex ã harênh.

⁹ Kamã na pre finat Mojesja Tirtũm nhÿ hã harênh kot:

Koja akrit amã àpênh o pa ka omu nẽ ho mex nẽ. Kãm õ mex nẽ.

Anhÿr o kot harênh. Xà na pre Tirtũmja ãm mẽ pahkrit pix kukamã ukapri nẽ ã harênh anê nã? Nã kot anhÿr kêt.

¹⁰ Mããnen mẽ pahpê panhĩ kaxyw na pre ã ja jarênh anê. Mẽ pahte mẽ hpur kãm paxàhkre xwÿnhjaja nẽ mẽ pahte kamã paxujamÿnh o papa xwÿnhjaja.

Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarênh anê.

¹¹ Tã ja pyrã nê na pa hte mẽ awÿr mō nê mẽ amã Tĩrtũm kapêr jarênh o ri mẽ akôt ixpa. Nê mẽ akôt ho mẽ ajahkre ho ri ixpa ka htem inhmã ixàpênhta pãnhã amnhĩrer kêt nê. Ixkwÿjaja kot Tĩrtũm kapêr o mẽ ajahkre hpãnhã mẽ ate mẽ kãm amnhĩrer tã pa inhmã amnhĩrer kêt nê. Na pa pre mẽ ajahkreta pãnhã mẽmoj tã mẽ awÿr kêt nê. ãm nhãm ixàpênh õta kukwak ri na pa hte ixàpkur o ri ixpa.

¹² Nê na hte mẽ ixkwÿjaja mẽ awÿr mra nê Tĩrtũm kapêr o mẽ ajahkre o ri mẽ akôt pa. Hãmri nê hpãnhã mẽ apkur xà hã mẽ awÿ ka mẽ kãm mẽmoj gō. No kêt pa na pa hte mẽ urak nê ixàpkur xà hã mẽ awÿr kêt nê. Kot pa apu hã mẽ awÿ ka mẽ tanhmã ixto akapêr to nê axpên mã ijarênh o:

–Pêr ãm mẽ pahte kãm amnhĩrer pix kaxyw na hte Pawre mẽ pahwÿr mra nê mẽ pamã Jejus Kris kot tanhmã mẽ panê amnhĩ nhĩpêx to hã harênh o pa. Pêr ãm apkur xà pix prãm xaj ã kot mẽ pamã ujarênh anhÿr o pa. Jakamã kot puj mẽ kuma nê ãm kuma.

Anhÿr o axpên mã ijarênh pymaj na pa hte mẽ ajahkre hpãnhã mẽmoj tã mẽ awÿr kêt nê. Na pa hte ãm mry kà ho ixkre nhĩpêx nê ho wênê nê ja pix kukwak ri ixàpkur o ri ixpa. Nê amarĩ ri mẽ ajahkre ho ri mẽ akôt ixpa.

¹³ Nê Tĩrtũm mã amnhĩ jarênh xà hã ixkre kamã mẽ àpênh xwÿnhjaja na htem hwÿr mẽ mrar xwÿnhjaja mẽ àpênh pãnhã mẽ kãm amnhĩre. Nê mẽ kot mẽ kãm Tĩrtũm mã mẽmoj nhõr o kuhê xwÿnhjaja na htem mãânên mẽ àpênh pãnhã mẽ kãm amnhĩre.

¹⁴ Nê Pahihti Krisja na pre ja hã mẽ pakukamã pahtã karõ kot:

–Kêr ka mẽ kot tanhmã mẽ amã ijarênh to ho ri mẽ pa xwÿnhjê mã amnhĩrer o ri apa. Anê.

¹⁵ Tã no na pa hte aa mẽmoj tã ixàhwÿr kêt nê. Nê mẽ ate inhmã amnhĩrer kaxyw pa mẽ amã ja jarênh

kêt nê. Aa ixte mẽmoj tã mẽ awÿr kêt. Kot paj apu anê nê ixpijaàm nê. Rÿ kot pa apu anê nê mẽ akukwak ri ixàpkur o ri ixpa hãmri nhũm mẽ akwÿjaja ja hã ixpumu nê hã ijarênh o:

–Tk. Na hte amarĩ mẽ pajahkre o ri pa hkêt nê. ãm mẽ apkur xà pix prãm xaj na hte ã mẽ pajahkre ho pa anê. Anê.

Jakamã na pa hte mẽmoj tã mẽ awÿr kêt nê.

¹⁶ Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhÿr o ri ixpa. Kot paj kãm ho anhÿr kêt nê ixpunuj nê ri ixpa.

¹⁷ Kêp ãm amnhĩ krã hkôt mãn tanhmã mẽ amã ixujarênh to ho mẽ akôt ri ixpa ronhÿx pa hpãnhã ixàmnhĩx kàxpore hã mẽ awÿ. No ãm ã ixte amnhĩ nhĩpêx anhÿr kêt. Tĩrtũm tãm kot inhmã ja hã karõ jakamã na pa hte amarĩ ixàmnhĩx ri mẽ amã kapêr jarênh o mẽ ajahkre ho ri mẽ akôt ixpa nê mẽmoj tã ixàhwÿr o ri ixpa hkêt nê.

¹⁸ Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhÿr o ri ixpa nhũm ja inhmã mex pa ixkĩnh nê ri ixpa. Jakamã na pa hte hpãnhã ixàhwÿr kêt nê. Nê inhmã mẽmoj prãm o ri ixpa hkêt nê.

¹⁹ Nê nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtô nê ixujarênh ma nê amnhĩ kaxyw Jejus kôt hamaxpêr nê hkôt amnhĩ xunhwÿ.

Pawre kot tãm mẽ piitã mẽ hipêx o pa hã amnhĩ jarênh

Wam Korît 10.33

²⁰ Nê na pa hte Ijaewjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tã karõ hkôt amnhĩ nhĩpêx o

ixpa hkêt tā mẽ hkôt ri ixpa nẽ mẽ uràk nẽ hkôt amnhĩ nhĩpêx o ri ixpa. Mẽ kot ja hã ixpumunh nẽ ixte mẽ kãm Jejus jarênh mar nẽ ixpyrà nẽ amnhĩ kaxyw hkôt hamaxpêr kaxyw.

²¹ Tã pa hpãnhã mẽ kêp Ijaew kêt xwýnhjê hwýr ixpa nẽ mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapêr mar nẽ ixpyrà nẽ amnhĩ kaxyw Jejus kôt hamaxpêr kaxyw. Tĩrtũm mẽ Kris wa hamaxpêr xà hkôt na pa hte ahpýnhã mẽ kot amnhĩ nhĩpêx xwýnhjê hwýr mra nẽ ã amnhĩ nhĩpêx anhýr o ri mẽ hkôt ixpa.

²² Nẽ na pa hte kormã mẽ kot Kris kôt amnhĩ xunhwýr tohtuj anhýr xwýnhjê hkôt ri ixpa nẽ te ixte ho mẽ uràk nẽ kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapêr mar nẽ hkôt amnhĩ nhĩpêx mex kaxyw. Æ na pa hte mẽ piitã mẽ hkôt ri ixpa nẽ mẽ hkôt amnhĩ nhĩpêx o ri ixpa anẽ. Mẽ kot ja hã ixpumunh nẽ inhmar nẽ ixpyrà nẽ Kris kôt amnhĩ nhĩpêx tỳx kaxyw.

²³ Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhýr o ri ixpa. Tĩrtũm kot mẽ ho hkra nẽ mẽ ho mex kaxyw. Nẽ mãânên pa kot mẽ hã ixto mex kaxyw.

Pawre kot htỳx ri amnhĩ nhĩpêx kêt ã kot amnhĩ jarênh

Sikũn Ximotre 4.7; Eprêw 12.1-3

²⁴ Mẽ hprôt xwýnhjaja na htem hprôt tỳx no nhũm mēhõ pixi nẽ wam hkwyjê re nẽ wam tẽn pøj nhũm htem ja hã omu nẽ kãm mẽ hkĩnhxà gõ. Ja pyrà nẽ kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nẽ nhỹrmã ja pãnhã mẽ amã mẽmoj mex gõ.

²⁵ Nẽ mẽ hprôt xwýnhjaja na htem mẽ hkĩnhxà hpyr prãm xàj mẽ hprôt xà hã arĩgro hwýr apkati mẽ hprôt o kuhê. Prôt tỳx prãm xàj. Tã mẽ hprôt xà hã arĩgrota ã nhũm hkwyjê pẽ amnhĩ to wa nẽ amnhĩm hkĩnhxà py. Nom koja hkĩnhxàja kritpêm kãm mex

ry hkêt nẽ. Koja gaa nẽ hapêx tokyx anẽ. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nẽ mẽ hprôt xwýnhjê kot hkĩnhxà hpyr prãm xàj apkati mẽ hprôt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhỹrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Nẽ na hte mẽ hprôt xwýnhjaja htỳx ri tanhmã hprôt to ho pa hkêt nẽ. Na htem hkwyjê pẽ amnhĩ to wa kaxyw hprôt nẽ nhỹri mẽ àhuk xàta pix pumunh pẽ hwýr hprôt nẽ mra hãmri nẽ kamã ahtwý. Nẽ kamã àhuk pix kukamã hamaxpêr o hprôt tỳx nẽ mra. Ja pyrà nẽ na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Nẽ mẽ pijapu mex xwýnhjaja na htem htỳx ri nhỹhỹnh axpên tak kêt nẽ. Na htem nhỹhỹnh kot mẽ htak o mẽ rênh xà pix kamã mẽ htak o mẽ rênh kukamã hamaxpêr pẽ kamã mẽ htak. Ja pyrà nẽ na pa hte ixtỳx ri tanhmã amnhĩ nhĩpêx to ho ri ixpa hkêt nẽ. Na pa hte Tĩrtũm mã ijamaxpêr pẽ tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw.

²⁷ No na pa hte ixtỳx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jejus kapêr jarênh o ri ixpa htã ãm ri ixtỳx ri ã amnhĩ nhĩpêx anhýr kaprý nhũm Tĩrtũmja tee ri ja hã ixpumu nẽ inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harẽ. Mẽ pahte mẽ uràk

nē pahtỳx ri amnhĩ nhĩpêx pymaj kot paj mẽ amã tanhmã mẽ harēnh to ka mẽ inhma. Mãn ka mẽ arĩ mẽ harēnh ã anohtỳx japêr. Na prem piitã pika pē Ejit kamã pa htã kurũm kator pa. Hãmri nē ma kapôt ã kakrã pumunh o hkôt pa ho pa. Pry hkêt jakamã nhũm pre Tĩrtũm tanhmã kakrã hto nhũm ma mẽ hkukamã pa nhũm mẽ omu nē hkôt pa. Hãmri nē ra gô xujanãr mẽ kot kãm: “Gô kamrêk” anhỹr xwỳnhja wỳr pôi nē tee ri rêr prãm xàj amnhĩ kukamã hamaxpêr. Hãmri nhũm Tĩrtũm mẽ kãm hkôt ã ho amgrã nhũm mẽ hkôt mex pē rêr pa nē axte kakrã hkôt pa ho pa.

² Finat Mojes kot mẽ o pa jakamã nhũm prem kêp hkwȳ hã amnhĩ jarē nē kãm amnhĩ jarēnh o:

—Nà kot paj mẽ akapêr ma nē akôt ri amnhĩ nhĩpêx o ixpa. Anē.

Te mẽ pahpê Kris kwỳ hã amnhĩ jarēnh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarēnhhta pyrãk.

³ Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rē nhũm mẽ hkawrà nē ho apkur o pa.

⁴ Tã ra kôr xàj hirot nhũm Tĩrtũm tanhmã mẽ kãm kēn prêkja to nhũm kurũm mẽ kãm gô axkapĩ nhũm mẽ ho ixkô nē akupỹm hihtỳx. Æ Krisja mẽ hkôt mẽ ho mẽ hihtỳx o pa anē. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵ Tã no nhũm mẽ ohtô nē Tĩrtũm kôt amnhĩ nhĩpêx kêt nē. Kot mẽ ho mex kumrêx tã nhũm mẽ ãm amnhĩ tã omu nē ãm omu nē kapêr kôt amnhĩ nhĩpêx kêt nē. Æm kapêr kwỳm ri tanhmã amnhĩ tomnuj to ho pa nhũm tee ri amnhĩ tã mẽ omu nē tanhmã mẽ ho nhũm mẽ hkwȳja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hagjēnh pa nē axte ma pa.

⁶ Jakamã kwa kêr pu mẽ kot ã amnhĩ nhĩpêx anhỹr ã mẽ harēnh ma nē hã pano htỳx nē ho papa hãmri nē ho mẽ uràk kêt nē. Mẽ uràk nē pahtỳx ri tanhmã amnhĩ nhĩpêx to ho ri papa hkêt nē.

⁷ Nē na pre mẽ hkwȳjaja sãnti kutã hkôn krã ho rôrôk nē hkrĩ nē kãm amnhĩ jagrer pē amnhĩ to kuwỳ. Tĩrtũm kapêr ã kagà htũm kot mẽ kot amnhĩ nhĩpêx anhỹr ã mẽ harēnh kot: Na prem sãnti kutã apkur o hkrĩ nē kãm amnhĩ jagrer o hkrĩ nē gaa nē pipãnh pix o pa. Jao axpên kamã hpijaàm kêt o pa.

Anhỹr jakamã kwa kêr pu mẽ ã mẽ kot amnhĩ nhĩpêx anhỹrja ã pano htỳx nē ho mẽ uràk hkêt nē.

⁸ Nē na pre mẽ hkwȳjaja htỳx ri mjên nē hprô kuhpa hã nhãm ri mẽ kamã hpijaàm kêt o pa. Mỳrapê nhũm arĩgro pixi hã mẽ ohtô rax kumrêx nē axkaprã. Mẽ kêp 23.000 nē pikaprãr pa. Tã ã Tĩrtũm kot mẽ panhĩpêx anhỹr pymaj kêr pu mẽ ja hã pano htỳx nē ho mẽ uràk kêt nē. Æm kwarĩ ho kwarĩ.

⁹ Nē na pre mẽ hkwȳjaja axtem nē htỳx ri tanhmã axpên mã Tĩrtũm jarēnh to nē harēnh o:

—Nà Tĩrtũmja gryk tokyx anhỹr kêt jakamã kwa pu mẽ ã amnhĩ tomnuj anhỹr o papa. Kojã mẽ pahpumu nē tanhmã mẽ pahto hkêt nē.

Anhỹr tã nhũm tee ri ja hã mẽ kuma nē mẽ omu nhũm ja kãm mex kêt nē nhũm mẽ hwỳr kagã xoprê nhõ wenēn xihtỳx kwỳ rē nhũm mẽ hwỳr mra nē mẽ hkamnhar o mẽ hkwȳjê pa. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nē mẽ uràk nē amnhĩ tã Tĩrtũm kamã pajamak o papa hkêt nē. Kwarĩ ho kwarĩ.

¹⁰ Nē na pre mẽ hkwȳjaja axtem nē Tĩrtũm o kapêr punuj nē nhũm tee ri amnhĩ tã mẽ kuma nē mẽ hwỳr kapêr o wrỳk xwỳnh mẽ nhũm ma mẽ hwỳr wrỳ nē ý hã mẽ hkwȳjê nhĩmex. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nē ho mẽ uràk nē Tĩrtũm o pakapêr punuj kêt nē.

¹¹ Na pre mẽ ixpê Ijaew nhĩgêtjaja ã htỳx ri amnhĩ nhĩpêx o pa anē. Tĩrtũm kapêr ã kagà htũm kot ã mẽ kot amnhĩ nhĩpêx anhỹr piitã harēnh par. Mẽ panhõ ejêp kaxyw. Mẽ pahte kamã

harênh nê mē harênh mar tỳx nê mē uràk nê ã amnhĩ nhĩpêx anhỹr kêt kaxyw. Ra Jejus akupỹn mē pahwỳr wrỳk xà há arĩgro hkukamã grêre jakamã kwa kêr pu mē kutêp mē kurom kapêr kôt pix mã ri amnhĩ nhĩpêx mex rãhã ho ri papa.

Mē pahte mēmoj punuj nê amnhĩ to htỳx ã mē pamã karõ

Matêwre 4.1, 6.9-13; Wam Korîit 1.8; Sikũn Pêtre 2.9; Jutre 24

¹² Tã kêr ka mē ã Ijaew kot amnhĩ nhĩpêx anhỹr ã mē harênhja ma nê ã ajamaxpêr anhỹr kêt nê. Rỳ mē ajamaxpêr o:

—Nà mēmoj piitã kutã ixihitỳx kênã kot pa hkêt mē uràk nê ã amnhĩ nhĩpêx anhỹr o ri ixpa.

Anhỹr o mē ajamaxpêr kêt nê. Kot kaj mē ã amnhĩ jarênh anê nê ra mē uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mēkarõmnuti tanhmã mē hkrã hto nhũm mē tanhmã amnhĩ tomnuj to ho pa. Ja pyrã nê na hte arĩ mē pahte amnhĩ tomnuj hprãm xàj tanhmã mē pahkrã hto ho pa. Mē pahpiitã ã mē pahto anhỹr o ri mē pahkôt pa. Nom nhũm Tĩrtũm ra kot mē pamã amnhĩ jarênh xà hkôt mē panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja há mē pahpumu nê mē panê mēkarõmnuti mã kapêr. Nê kutã mē pahto paxihitỳx nê pu mē ý há amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mē kot sãnti mã mēmoj nhõr xwỳnhjê jarênh

Wam Korîit 8.1-13; Karatas 4.8; Apokarip 9.20

¹⁴ Jakamã e Kris kôt ixkwỳjaja. Kêr ka mē amnhĩ kaxyw sãnti hkôt ajamaxpêr o ri apa hkêt nê. Nê amnhĩ to hwỳr kêt nê. ãm kwarĩ ho kwarĩ.

¹⁵ E mē axàhpumunh tỳx ã amnhĩ jarênh jakamã kot paj mē amã mēmoj jarê ka mē aprĩ há inhmãr tỳx japêr.

¹⁶ Nà na pu htem tõhã Jejus kot mē panê htyk mã pajamaxpêr kaxyw

axpênh wỳr akuprõ. Hãmri nê mēmo kagõ hkwy ru nê Tĩrtũm mã mex ã harê nê mēmoj o pahkõm pê Jejus kot mē panê hkamrõ pikapĩr mã pajamaxpêr. Nê hpãnhã pãwti hõ py nê axpênh mã ho hkry nê mē kot Kris pĩr nê ĩ kamã hkamnhwỳr nhũm mē panê htykja mã pajamaxpêr pê kuku.

¹⁷ Pãwtita ãm pixire htã pu htem axpênh mã ho hkry nê pahpiitã kuku. Mē pahpê Kris kwỳ há mē pahte amnhĩ jarênh nhũm mē pahkwỳ kot ja há mē pahpumunh kaxyw. Te mē pahtipxi nê ri mē papa pyrãk nê pãwti pixire htã pu mē pahpiitã kuku.

¹⁸ E kot paj hpãnhã mē amã anepê mã Ijaew kot tanhmã amnhĩ nhĩpêx to jarê ka mē inhma. Na pre htem Tĩrtũm mã mex ã harênh nê kãm amnhĩ nhõr ã kot amnhĩ tã mē omunh kaxyw nhũm prem tanhmã amnhĩ nhĩpêx to. Jao kãm mē apkur xà hkwy gõ nê kãm mex o mex ã harê. Hãmri nê amnhĩ mã mēmojta kwỳ xà nê hkur o hkrĩ. Jao ra Tĩrtũm mã mex o mex ã harê nê kãm kêp hkra há amnhĩ jarê.

¹⁹ Nom mē kot sãnti mã mēmoj nhõr xwỳnhjaja na htem kãm mēmo mē apkur xà hkwy gõ nom ãm kãm õr kaprỳ. Tanhmã kot we amnhĩ to nê amnhĩ tã mē omu? Mo rĩt kaxyw no? ãm mē ĩhkra ho mē kot amnhĩm hipêx kênã. Jakamã na htem ãm kãm mē apkur xà hkwy nhõr kaprỳ.

²⁰ Mē kot sãnti mã mēmoj nhõr xwỳnhjaja na htem Tĩrtũm mã õr kêt nê. Mēkarõmnuti mã na htem kugõ. Jakamã kot kaj mē uràk nê sãnti mã mēmoj gõ nê apê mēkarõmnuti hkwy há amnhĩ to amnhĩrĩt nê apê hkwy há ri apa. Jakamã mē ate sãnti mã mēmoj nhõrta na inhmã hprãm kêt kumrêx.

²¹ Kot kaj mē panhõ Pahihti Jejus kot mē panê htyk ã mēmoj kagõ hkwy ho ixkõ hãmri nê ma mra nê hpãnhã sãnti pê mēkarõmnuti há mēmoj to ixkõ. Hãmri nhũm Tĩrtũmja tee ri ja há mē apumu nhũm ja kêp omnuj tỳx nê. Rỳ ka mē Pahihti Jejus kot mē panê htyk ã pãwti hkwy hku nê hpãnhã ma mra nê sãnti pê mēkarõmnuti há

mëmoj hku. Hämri nhüm Tirtüm kêp ja omnuj tÿx nê. Më pahte ã amnhî nhîpêx anhÿrja na axpên kuhpa hã.

²² Jakamã kot ka më ã amnhî nhîpêx anê nê te ra më amã mëkarömnuti hkînh nê mãânên amã Tirtüm kînh pyrãk o amnhî nhîpêx. Nê te Tirtüm kurom më kajaja më axàhpumunh tÿx pyrãk o amnhî nhîpêx. Nhüm tee ri amnhî tã më apumu nê më akamã gryk tÿx nê. Kwa më okora. Koja Tirtüm akamã gryk ka amex kêt kumrêx.

Më pamã Kris kôt më pahkwÿjê hkînh pê më ho mex ã më pamã karô Matêwre 20.28; Römãn 14.1-15.7; Piripos 2.1-4

²³ Nê na htem tōhã amnhî jarênh o: –Nà kot pa inhmã mëmoj to anhÿr prãm nê ixàmnhîx ã amnhî nhîpêx anhÿr o ri ixpa. Anê.

Tã no ãm mëmoj piitã më pamã mex kêt. Na htem kãm mëmoj to anhÿr prãm xà hkôt mëmoj piitã tanhmã ho ho ri pa nê tanhmã amnhî tomnuj to. Hämri nhüm më hkwÿjaja ja hã më omu nê më urãk nê tanhmã ri amnhî tomnuj to. Jao Kris kôt amnhî xunhwÿr tÿx kêt nê.

²⁴ Jakamã kwa kêr pu më amnhî pix kukamã pajamxpêr pê tanhmã amnhî nhîpêx to ho papa hkêt nê. Mãânên amnhî kwÿjê hkukamã pajamxpêr pê tanhmã më ho mex to ho ri papa pê tãm ri amnhî nhîpêx o papa.

²⁵ Nê kot kaj më amnhî xàpkur xà japrôr kaxyw ma nhÿhÿm mra nê mãmrî axàmnhîx ri amã mëmoj prãm xà hkôt mëmoj japrô. Nom kêr ka më axujaprôrja kêp sãnti xàpkur xà hã më hkukjêr kêt nê. ãm axàmnhîx ri më kêp mëmoj japrôr o ri apa.

²⁶ Tirtüm kapêr ã kagã htüm kot ja jarênh kot:

Pika piitã hkôt mëmoj piitã kêp Tirtüm nhõ na. Anê. Jakamã më mãmrî axàmnhîx ri mëmoj piitã haprô nê mëmoj piitã hkur o apa.

²⁷ Tã koja më kêp Kris kwÿ hkêt xwÿnhjê hõ ate kutã axàpkur kaxyw

amnhî wÿr awÿ ka amã hwÿr amör prãm nê mãmrî ma hwÿr mō. Nhüm mëmoj to amã anhõ ka axàmnhîx ri mãmrî aku. No ri tee ri amnhî kukamã ajamxpêr nê tanhmã hã hkukjêr to hkêt nê. Rÿ kãm:

–Kwa xà we mryja sãnti hã më apkur xà na nà?

Anhÿr o hã më hkukjêr kêt nê. ãm mãmrî axàmnhîx hkur o akrî.

²⁸⁻²⁹ Nom koja Kris kôt më kot amnhî xãm tohtuj anhÿr xwÿnhjê hõ më awÿr axà nê tee ri ja hã apumu nê amã:

–Kwa sãnti hã më apkur xà na ka ri më kutã hkur o akrî.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atōja kêp omnuj jakamã ka hkaga nê hkur kêt nê. No kot ka ãm ama nê arî hkur o anhÿr japêr. Kot amã harênh xwÿnhhta kêp omnuj tã ka arî noo mã hkur japêr. Nhüm ja hã apumu nê tee ri Tirtüm kapêr kukamã tanhmã hamxpêr to. Hämri nê apyrã nê kuku nê gaa nê tee ri amnhî kukamã hamxpêr nê amnhî mã:

–Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhî tomnuj nê. Hêxta waa nê. Anê.

Hämri nê tee ri amnhî kukamã hamxpêr o hkaprî nê. ã kot amnhî nhîpêx anhÿr pymaj koja mëhõ ã mëmo më apkur xà nê amã kapêr anê ka ama nê hkaga kurê kumrêx. Jao amnhî pix kukamã ajamxpêr kêt nê. Mãânên Kris kôt atō nê atōxjê mex kukamã ajamxpêr. Nom koja amã kêp sãnti hã më apkur xà hã harê ka ama nê ã ajamxpêr anhÿr japêr nê ajamxpêr o:

–Nà kêp omnuj tã kot paj mamrî kuku. Ja inhmã mex kênã.

³⁰ Ra ixte Tirtüm mã harênh nê ixàmnhîx hkur o inhÿr kênã kot kêt ã nê inhmã kapêr anê. Anê.

Kwa më ã ajamxpêr anhÿr kêt. Kot kaj më ã ajamxpêr anê hämri nê Kris kôt atō rÿ atōx mex kukamã ajamxpêr kêt nê.

³¹ Jakamã kêr ka më tãm tanhmã amnhî nhîpêx to ho ri apa. Nê

axâpênh mex nê. Kêr kê mẽ piitâ ja hã mẽ apumu nê mẽ apumunh kôt amnhîm Tîrtûm mex ã harê.

³² Nê kêr ka mẽ piitâ mẽ noo mã tãm ri amnhî nhîpêx o apa. Ijaew noo mã nê Ijaew kêt xwýnhjê noo mã. Nê Jesus kwýjê noo mã. Mẽ piitâ mẽ noo mã tãm ri amnhî nhîpêx rãhã ho ri apa. Mẽ kot tee ri mẽmoj tã mẽ apumunh nê hpijaàm pymaj ka mẽ tãm ri mẽ piitâ mẽ noo mã tanhmã amnhî nhîpêx mex to ho ri apa.

³³ Na pa hte ã amnhî nhîpêx anhÿr o ri ixpa. No na pa hte pa amnhî pix kukamã ijamaxpêr kêt nê. Mẽ piitâ mẽ mex kukamã na pa hte ijamaxpêr o ri ixpa. Pê tanhmã amnhî nhîpêx to ho ri ixpa. Mẽ kot ja hã ixpumunh nê ixpyrà nê Jesus kôt amnhî xunhwÿr nê ãm kôt pix mã ri amnhî nhîpêx o pa kaxyw.

11

¹ Na pre hte Kris ã ã amnhî nhîpêx anê nê mẽ piitâ mẽ mex kukamã hamaxpêr rãhã ho ri pa. Tã na pa hte uràk nê ã amnhî nhîpêx anê. Jakamã kwa kêr ka mẽ ixpyrà nê ã amnhî nhîpêx anhÿr o mãn ri apa.

Mênijaja mẽ mjên ã hpijaàm ã mẽ kãm karõ

Epes 5.22; Wam Pêtre 3.1-6

² Nê na ka xep htem arî ra ixte tanhmã mẽ amã ixkapêr toja mã ajamaxpêr tÿx o ri apa. Na pa pre Kris kôt mẽ pahtõ nê mẽ pahtõxjaja axpên wÿr pikuprõnh nê tanhmã amnhî nhîpêx to hã mẽ amã karõ ka prem inhma nê mẽ uràk nê ã amnhî nhîpêx anê. ãm hãmri na ka htem ã amnhî nhîpêx anhÿr o apa. Ja na inhmã mex.

³ Na pa pre krî hõ kamã mênijaja kot amnhî krã hpro hã mẽ amã mẽ harê. Ka prem inhma nhũm mẽ akwýjaja kãm ja mex nê nhũm mẽ akwýjaja tee ri ja kukamã ajamaxpêr. No mẽmo kaxyw na hte mênijaja amnhî krã hpro? E kot paj ixprî hã mẽ amã ja jarê ka mẽ inhma. Nà Tîrtûm kêp Kris jamãr xwýnh nhũm Kris kêp Tîrtûm mã mẽ inhmyjê jamãr xwýnh. No mẽ anijaja mẽ amjên kêp Kris mã mẽ

ajamãr xwýnh. Na hte mênijaja ohtõ nê ra mẽ mjên ã amnhî to amnhîrît kaxyw amnhî krã hpro nê ri pa. No mẽ inhmyjaja na pa htem ã amnhî nhîpêx anhÿr kêt nê. Na pa htem amarî ixkrã hkênh nê ixpa.

⁴ Jakamã na pa htem Tîrtûm kapêr mar xà hã ixkre hwÿr axpên wÿr akuprõ nê Tîrtûm nhÿ hã mẽ anijê mã kapêr jarênh o ixkuhê. Rÿ Tîrtûm mã tanhmã mẽ pajarênh to. No ãm amnhî krã hpro hkêt rãhã kãm mẽ ajahkre rÿ kãm mẽ pajarê. Kot pa mẽ amnhî krã hpro nê te mẽ apê ixprõjaja mẽ apê mẽ ijamãr xwýnh ã mẽ ajarênh pyrãk. Jao te mẽ ixte mẽ ijamãr xwýnh Kris ã ixpijaàm kêt pyrãk o amnhî nhîpêx.

⁵ No mẽ anijaja mẽ ixte Kris mã mẽ ajamãr xwýnh jakamã na ka htem Tîrtûm nhÿ hã mẽ inhmã kapêr jarênh rÿ kãm mẽ pajarênh kaxyw nê amnhî krã hpro. Mẽ ixte Kris mã mẽ ajamãr xwýnhjê hã apijaàm kaxyw ã amnhî nhîpêx anê nê mẽ amnhî krã hpro. Kot ka mẽ ã amnhî nhîpêx anhÿr kêt nê te mẽ ate mẽ ixtã apijaàm kêt pyrãk o amnhî nhîpêx nhũm mẽ amjên tee ri ja hã apumu nê hpijaàm nê. Te ate amnhî krã hkênh nê ri apa nhũm tee ri apumunh nê hpijaàm pyrãk.

⁶ Kot kaj mẽ amnhî krã hkênh nê ri apa nê amnhî kamã apijaàm nê ri apa. Mẽ anijaja na ka htem akrã hkî japjê nê kamã amex nê ri apa. No kot ka mẽ amnhîm akrã hkênh nê apunuj nê amnhî kamã apijaàm nê ri apa. Jakamã kêr ka mẽ Tîrtûm mã amnhî jarênh kaxyw nê amnhî krã hpro. Nom kot ka mẽ amjên ã apijaàm kêt nê ri apa hprãm japêr nê mamrî amnhîm akrã hkênh nê ri amnhî kuk ã apijaàm kêt nê ri apa.

⁷ No mẽ inhmyjaja na pa htem amnhî krã hpro hkêt nê. Te mẽ ixpê Tîrtûm pyrãk nhũm mẽ anijaja te mẽ apê Tîrtûm kra pyrãk o na pu htem axpên nhîpêx. Tîrtûm krajaja na htem mẽmoj tã Tîrtûm mã karõ hkêt nê. Ja pyrà nê mẽ anijaja na ka htem mẽ inhmyjê mã mẽmoj tã karõ kamã axihtÿx o apa hkêt nê. Na ka htem mẽ

ixtã apijaàm kãm mëmoj tã më ixwý.

⁸ Amnepê mã Tîrtũm kot mëmoj to kator krax rũm na pre myja kumrêx nhîpêx hãmri nê kêp ôkwa i hõ kapa nê ho kãm hprõ nhîpêx. No na pre nija kumrêx nhîpêx nê ôkwa i ho kãm mjên nhîpêx kêt nê.

⁹ Myja mã na pre hprõ nhîpêx. No nija mã mjên nhîpêx kêt nê.

¹⁰ Jakamã kêr ka më anijaja amjên ã apijaàm ã amnhî to amnhîrit kaxyw hãmri nê më inhmã Tîrtũm nhỹ hã tanhmã akapêr jarênh to kaxyw rý kãm amnhî jarênh kaxyw hãmri nê amnhî krã hpro nê akuhê. Hãmri nhũm Tîrtũm kapêr o më wrýk xwýnhjaja ja hã më apumu nê hkînh nê tee ri më akukamã hamaxpêr kêt nê.

¹¹⁻¹² Nê wam ni kator xwýnhhta na pre myja rũm kato. Tã na pa htem jarãhã më inhmyjaja hpãnhã më anijê rũm ijapõj. Tîrtũm jamaxpêr xà hkõt. Tãm na pre ã më pahte amnhî nhîpêx anhÿr kaxyw ã më panhîpêx anê. Tã më ixpê Pahihti Kris kwý hã më inhmyjaja nê më anijaja na pu htem ri ahte papa hkêt nê. Na pu htem axpên kutã pamã axpên hkînh o papa nê mëmoj to axpên kutã panojarêr o ri papa. Nê axpên to presija ho papa. Na hte më anijaja më amjên o presija ho apa. Nê më amyjaja na ka htem më aprõ ho presija ho apa. Tã kêr ka më anijaja më amjên ã apijaàm o ri hkõt apa.

¹³ Jakamã kwa më kot amnhî krã hproja kukamã ajamaxpêr tÿx nê. Xà më anhõ krî kamã mënijaja më mjên ã hpîjaàm ã amnhî to amnhîrit kaxyw amnhî krã hpro nà? Koja më ja kaxyw ã amnhî nhîpêx anhÿr japêr kê më rî më anoo mã Tîrtũm mã amnhî jarênh kaxyw nê kupê xê hkwý ho amnhî krã hprõ nê rî kãm amnhî jarê. Nom koja më ã amnhî nhîpêx anhÿr kêt nhũm mëmyjaja tee ri ja hã më omunh nê ho kapêr hkêt japêr hãmri kê më rî amnhî krã hpro hkêt nê ri pa.

¹⁴ Më kot më pahte amnhî nhîpêx ã më pahpumunh nê hkînh kaxyw na pu htem tanhmã amnhî nhîpêx

to ho ri papa. Na htem më pahkrã hkî jarênh o: “Koja mëmyjaja hkrã hkî japjê nê ri pa nê ra kamã omnajti.” Anhÿr jakamã na pa htem amnhî krã hkênh nê ri ixpa.

¹⁵ No më anijaja na htem më ajarênh o: “Mënijaja na htem hkrã hkî japjê nê ri pa nê kamã muxti.” Anhÿr jakamã na ka htem akrã hkî japjê nê ri apa. Më akî te kêp më akrã hpro xà pyrãk. Na ka htem ã amnhî nhîpêx anhÿr o apa.

¹⁶ E na pa ra më amã krî hkwý kamã Kris kwý nijaja kot mjên ã hpîjaàm ã amnhî to amnhîrit kaxyw tanhmã amnhî nhîpêx to hã më harê. Tã koja mëhõ nija tee ri ja ma nhũm ja kêp omnuj japêr. Nhũm amnhî jarênh o:

—Kêt. Kot paj tanhmã inhmã amnhî nhîpêx to hprãm xà hkõt tanhmã ri amnhî nhîpêx to ho ri ixpa. Koja inhmjên ja hã ixpumu nê hpîjaàm nê rî tãm.

Anhÿr ã amnhî jarê ka më tee ri ã kot amnhî jarênh anhÿrja ã ama nê kãm:

—Kwa nà ã ri ajamaxpêr anhÿr kêt nê. Na hte Kris kwýjaja ã hamaxpêr anhÿr kêt nê. Anê.

Jejus tyk mã më pajamaxpêr pê tanhmã më pahte amnhî to hã më pa-jarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tîrtũm mã amnhî jarênh xà hã ixkre hwýr axpên wýr akuprõ nê kamã amnhî to mex kêt nê. Na ka htem tanhmã amnhî tomnuj to pa tee ri më ajarênh ma nê ixkaprî nê. Nê amnhîm më amex ã më ajarênh kêt nê.

¹⁸ Na ka xep htem axpên wýr akuprõ nê mëmoj tã axpên mã akir nê axpên pê anhgrã. Nê ahpÿnhã mëmoj mã ajamaxpêr jao ra më amã axpên kînh kêt nê. Na pa tee ri ã më ajarênh anhÿrja ma nê ixkaprî htÿx nê.

¹⁹ Xà na hte Tîrtũm ahpÿnhã tanhmã më pahte amnhî anhîpêx to hã më pahpumunh kõt kãm më pajapê hkêt ã amnhî jarê? Nà na hte

ã amnhĩ nhĩpêx anhÿr kêt nê. Kãm mē pajapê ho axpên pyrâk kênã.

²⁰ Nê na hte Kris kwÿjê piitã tōhã axpên wÿr akuprō nê Jejus tyk mã hamaxpêr kaxyw pãwti hkwÿ hku. Tã mē kajaja na ka xep htem ja kaxyw axpên wÿr akuprō nom axtem nê Jejus tyk mã ajamaxpêr pē axâpkur kêt nê. ãm mē axâpkur pix kukamã ajamaxpêr nê axtem nê axâpkur rûnh o akrĩ.

²¹ Jao amnhĩ pix kukamã ajamaxpêr. Mē akwÿjaja wam mrar nê hpôx nê mē apkur xà hã mē hkrĩ xwÿnhjaja na xep htem hkwÿjê rom mēōta pinh pa. Nê wĩhtija nhũm mē mãânên hpenh pa nê axtem nê ho xpã. Jakamã nhũm mē akwÿjaja kot amnhĩ to hapu nê hpôx xwÿnhjaja mēmojta ã hprãr pa.

²² Kwa mon ka mē amã hprãm nê anhōrkwÿ kamã axâpkur kêt nê? Mē kot Tĩrtũm mã amnhĩ jarênh xà hã ixkre kamã na htem apkur rûnh hkêt nê. Ka mē ã amnhĩ nhĩpêx anê nhũm mēō hkêt xwÿnhjaja amnhĩ to hapu nê mra nê mēō hã prã nê amnhĩ kamã hpijaam nê. Kwa xà kot pa ã mē ate amnhĩ nhĩpêx anhÿr ã mē ajarênh ma nê ixkĩnh nê mē ate amnhĩ nhĩpêx mex ã mē ajarê? Nà kot paj ã mē ajarênh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

—Kêr ka mē tōhã axpên wÿr akuprō nê axâpkur pē ixtyk mã mãn mē ajamaxpêr pē ã amnhĩ nhĩpêx anê nê ã amnhĩ nhĩpêx anê. Anê.

Jakamã kot paj ixprĩ hã amnhĩ xō ri mē amã kot tanhmã inhmã kapêr tota jarê ka mē inhma. Nà Jejus kormã htyk kêt ri Jut Kariot ra kot pôristi mã hã àmnênh kaxyw nhũm kamãt nhũm Jejus mē ÿ hã mē ahkre xwÿnhjê mē apkur kaxyw hkrĩ hpa. Hãmri nhũm Jejus pãwti hō py nê o xa

²⁴ nê Tĩrtũm mã harê nê kãm:

—Pa Papaj. Nà ãm hãmri na ka hte mē inhmã mē inhō mex o apa. Anê.

Nê hpãnhã pãwja o hkry pa nê ho mē kot ÿ hã mē ahkre ho mē pa xwÿnhjê nhĩpêx pa nê mē kãm:

—E na pa ã pãwti ho hkry nê mē amã òr anê. Koja mē ã inhĩpêx anê nê te mē kot ixto hkry hpar pyrâk o inhĩpêx pa amnhĩ xà htÿx kamã ijamak kãm ty. Nom mē anê kot paj ty. Jakamã e kêr ka mē ixwakre kamã tōhã axpên wÿr akuprō nê ixte mē ate amnhĩ tomnuj pãnhã amnhĩrer kaxyw mē anê ixtyk mã ajamaxpêr pē akĩnh nê pãwta kur o akrĩ. E mē mãmrĩ axãmnhĩx aku. Anê.

²⁵ Hãmri nê hpãnhã kop kãm wĩhtita py nê o xa nê mē kãm:

—E kop kãm wĩhtija te kêp Tĩrtũm kot mē atã amnhĩ jarênh nyw xà jarênh pyrâk. Ixtyk kukwak ri koja mē ato hkra. Kot paj ty nhũm ixkamrō mē anê axkapĩ. Jakamã e. Mē kopja kamã wĩhti ho akôm o axpên nhĩpêx. Nê ho akôm pē ixte mē anê ixtyk mã ajamaxpêr. Anê.

²⁶ Tã ã kot amnhĩ jarênh anhÿr jakamã na pu htem axpên wÿr akuprō nê pãwti hkwÿ hku nê mēmo kagô hkwÿ o ixkō. Nê ho pahkôm pē axpên mã Jejus tyk jarênh o pahkrĩ. Tã kêr pu mē arĩ ã amnhĩ nhĩpêx anhÿr o ri papa rãhã nhũm Jejus akupÿn mē pahwÿr wrÿ.

²⁷ Jakamã kot kaj mē tōhã mēmo arĩgro hã kot mē panê htykja mã ajamaxpêr kaxyw axpên wÿr akuprō. Hãmri nhũm mē anhĩō mē awÿr axà nê nhÿ. Nom axtem nê Jejus tyk mã hamaxpêr kêt japêr. Nê htÿx pãwti kur o nhÿ. Nê hkôt amarĩ mēmo kagô ho hkôm o nhÿ. Koja ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyrâk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrō amarĩ hpikapĩr kênã. Na pre mē panê htyk kêt nê.

Anhÿr o ho kapêr pyrâk.

²⁸ Jakamã kwa kêr ka mē ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kôt amnhĩ nhĩpêx mex rãhã ho ri ixpa nà?

Anhÿr o mãn ajamaxpêr. Hãmri nê ate hkôt amnhĩ nhĩpêx mex ã amnhĩ

pumu nê amarĩ axàmnhĩx aku. No kot ka mẽ kormã mẽmoj punuj kaga hkêt nê arĩ ri ho anhÿr o pa hãmri nê kãm ajamaxpêr nê hkur kêt nê. Rÿ tanhmãn tee ri tanhmã ate amnhĩ tomnuj tota mã ajamaxpêr nê akapri nê. Hãmri nê tokyx Tirtũm mã amnhĩ jarê nê amnhĩ to mex prãm xaj amnhĩ to awÿ hãmri nê arĩ kormã axàmnhĩx pãwtita ku.

²⁹ Koja mẽhõ mẽ akõt axà nê mẽmoj kukamã hamaxpêr pê htÿx pãwti nhîrênhta õ py hkur o nhÿ. Hãmri nhũm Tirtũm tee ri ja hã omu nê hã tanhmã ho.

³⁰ Na ka mẽ ra axohtõ nê ã amnhĩ nhîpêx anê nê atÿx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atÿx tanhmã ajamaxpêr to pê hkwÿ hkur o akrĩ. Mÿrapê na ka mẽ ra ja hã axà nê ri apa. Nê mẽ akwÿjaja ra htyk rax nê.

³¹ Nom kot ka mẽ axpên wÿr akuprõ hãmri nê akupÿm tãm axpên kõt ajamaxpêr nê axpên kõt amnhĩ nhîpêx nê rĩ kormã pãwtita ku. Hãmri nhũm Tirtũm ja hã mẽ apumu nê tanhmã mẽ ato hkêt nê.

³² Na hte mẽ pahte tanhmã amnhĩ tomnuj to hã mẽ pahpumu nê hã tanhmã mẽ pahto. Mẽ pahte ja hã amnhĩ pumunh nê axte ã amnhĩ nhîpêx anhÿr kêt kaxyw na hte ã mẽ pahpê hkrajê nhîpêx anê. Jakamã kot puj mẽ nhÿrmã mẽ kêp hkra hkêt xwÿnhjê hkõt kuwyta wÿr ma papa hkêt nê.

³³ Jakamã e Kris kõt ixtõ nê ixtõxjaja. Kêr ka mẽ axte Pahihti Jejus tyk mã ajamaxpêr kaxyw axpên wÿr akuprõ. Hãmri nê ra axpên wÿr apikuprõnh pa hã axpên pumu nê rĩ kormã pãwti hkwÿ hku nê hkur pê Jejus kot mẽ panê htyk mã ajamaxpêr o akrĩ.

³⁴ Nê ka mẽ atõ ra amã prãm japêr nê anhõrkwÿ kamã apku nê rĩ kormã mẽ hkõt tẽ. Jao ra anhõhy htu nê ajamakêtkati nê akwÿjê jamãr o nhÿ. Kê mẽ hpõx pa ka mẽ atipxi nê Pahihti Jejus tyk mã ajamaxpêr pê hkur o akrĩ. Hãmri nhũm Tirtũm ja hã mẽ

apumu nê hkĩnh nê tanhmã mẽ ato hkêt nê.

Na ka prem mẽ ate inhmã kaga nê mênhta kamã mẽmoj tã ixkukjêr rax nê. Tã na pa ra kaga ja kamã mẽ amã hkwÿ jarênh rax nê. Nom kot paj piitã harênh par kêt nê. Kot paj ãm mẽ amã hkwÿ pix jarê. Hãmri nê nhÿrmã ma mẽ awÿr mõ nê mẽ apumu nê kormã axte mẽ amã harênh jatur xàm kumẽ.

12

Mẽ kot Tirtũm kapêr o hêx xwÿnhjê jarênh

Rõmãn 12.6-8; Wam Korît 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mẽ amã tanhmã Tirtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpÿnhã tanhmã kãm amnhĩ nhîpêx to ho papaja kot paj mẽ amã harê.

² Annepê mã kormã mẽ ate Kris kõt amnhĩ xunhwÿr kêt ri na ka prem sãnti hkõt ri amnhĩ nhîpêx o ri apa. Kapêr kêt tã ka prem hkõt ri amnhĩ nhîpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwÿr o ri apa. Æ na ka prem amnhĩ nhîpêx anhÿr o ri apa.

³ Tã ra hpãnhã Tirtũm kõt amnhĩ xunhwÿ.

Na htem ohtõ nê Tirtũm nhÿ hã kapêr jarênh o pa hã amnhĩ jarênh tã no ãm mẽ hkwÿjaja ja hã amnhĩ to hêx. Tã kot paj ixpri hã mẽ amã tanhmã mẽ harênh to. Koja mẽhõ mẽ kãm Tirtũm nhÿ hã kapêr jarênh o pa hã amnhĩ jarê hã koja Jejus o kapêr punuj o pa hkêt nê. Koja harênh o:

—Jejus kêp mẽ panhõ Pahihti jakamã kwa pu mẽ hkõt amnhĩ xunhwÿ nê hkõt amnhĩ nhîpêx o ri papa.

Anhÿr o harê. Koja mẽhõ ã mẽ amã kapêr anê ka mẽ ama nê mẽ kot Tirtũm nhÿ hã kapêr jarênh o pa xwÿnh ã omunh kurê kumrêx. No koja mẽ amã ã kapêr anhÿr kêt nê ka mẽ ama nê Tirtũm kapêr o hêx o pa hã omunh kurê kumrêx.

Tirtûm Karô kãm mē pahte axpēn to mex prām ā harēnh

Rômān 12.6; Epes 4.7; Wam Pêtre 4.10

⁴ Nē ahpÿnhā kot tanhmā mē panhîpêx to xwÿnhja ām pixii. Kêp Tirtûm Karô. Na hte mē pahkarô mā agjê nē ahpÿnhā tanhmā mē pahte axpēn to mex kaxyw tanhmā mē panhîpêx to. Kot tanhmā mē panhîpêx to xāja ohtôô. Mē pahte ahpÿnhā ri tanhmā kãm amnhî nhîpêx to nē tanhmā axpēn to mex to ho ri papa kaxyw na. Tirtûm Karô na hte ja kaxyw tanhmā mē pahkrā hto.

⁵ Nē mē pahte kãm tanhmā amnhî nhîpêx to ho papa xwÿnhja haxwÿja ām pixii. Kêp Pahihti Jejus. Tā na pu htem ahpÿnhā kãm tanhmā amnhî nhîpêx to ho ri papa.

⁶ Nē kot mē pahto ajuta nhûm mē pahte ahpÿnhā tanhmā axpēn to mex to ho papa xwÿnhja haxwÿja ām pyxii. Kêp Tirtûm. Na pu htem ahpÿnhā tanhmā hkôt axpēn xunhwÿr tÿx to kaxyw tanhmā axpēn to mex to ho papa.

⁷ Nē Karôja na hte ahpÿnhā tanhmā axpēn kaxyw mē panhîpêx to pu mē axpēn to ajuta mex o ri papa.

⁸ Jakamā na pu hte mē pahkwÿjaja Tirtûm Karô nhÿ hā ma mē pahkwÿjê mā Tirtûm kapêr jarēnh o ri mē hkôt papa.

Nē mē pahkwÿjaja ma ÿ hā paxâhpumunh mex pē ma ri kapêr o mē ahkre ho mē hkôt papa.

⁹ Nē mē pahkwÿjaja Karô nhÿ hā Tirtûm kot tanhmā mē pahto ajuta hto kaxyw hkôt pajamaxpêr tÿx nē.

Nē mē pahkwÿjaja akupÿm mē à xwÿnhjê ho mex o papa nhûm mē akupÿm mex nē pa.

¹⁰ Nē mē pahkwÿjaja aa mē kot mēmoj pumunh kêt kwÿ ho anhÿr o ri mē hkôt papa.

Nē mē pahkwÿjaja Tirtûm kapêr mar tÿx nē ô ri mē kãm harēnh o mē hkôt ri papa.

Nē mē pahkwÿjaja Tirtûm Karô nhÿ hā tanhmā mē kot amnhî nhîpêx to hā mē omunh o papa. Rÿ pahprî hā mēkarômnuti nhÿ hā mē kot amnhî nhîpêx ā mē omunh o papa.

Nē mē pahkwÿjaja nhām mē kapêr mar kêt tā ra mē kapêr o pakapêr.

Nē mē pahkwÿjaja mē kapêr o pakapêrja ma nē mē kot mar kêt xwÿnhjê mā harê. Kormā aa pahte mar kêt tā ra pahprî hā mar mex nē mē kãm harê.

¹¹ Ā na hte Tirtûm Karô kãm hprām xā hkôt tanhmā mē panhîpêx to pu mē ahpÿnhā ÿ hā ā axpēn nhîpêx anhÿr o ri axpēn kôt papa.

Te mē pahpê Kris nhî pyrāk ā mē pajarēnh

Rômān 12.3-8; Epes 1.22-23, 4.11-16; Korosê 3.15

¹² E pa hpānhā mē amā mē panhî kamā tanhmā mēmoj jarēnh to ka mē inhma nē hā anohtÿx nē. Mē panhîja ām pixi htā no ām kamā mēmoj xohtôô. Kamā mē pahte nē kamā mē pahpa nē kamā mē pajakwa. Nē mē panhînhu nē mē pano. Ā mē panhî kamā mēmoj xohtô kot anhÿr. Ja pyrā nē Kris nhîja ām pixi htā te mē pahpê ĩ kamā mēmoj xohtôta pyrāk. Mē pahkwÿjaja te mē pahpê hte pyrāk. Nē mē pahkwÿjaja te mē pahpê ĩhkra pyrāk. Nē mē pahkwÿjaja te mē pahpê no pyrāk.

¹³ Mē pahpê Kris kwÿjaja axpēn kaxyw mē paxohtôô. Mē ixpê Ijaewjaja nē mē apê Ijaew kêt xwÿnhjaja. Nē amarî ri mē kãm mē axâpēnh o mē apa xwÿnhjaja nē amnhî mā ri mē axâpēnh o mē apa xwÿnhjaja. Ā ahpÿnhā mē paxohtô kot anhÿr tā nhûm Tirtûm Karô te mē pahpê Kris nhî pixi pyrāk o mē panhîpêx. Nhûm Krisja mē pahpiitā mē pamā Karô gô nhûm mē pahkarô mā agjê. Pixi htā mē pahpiitā mē pahkarô mā agjê.

¹⁴ Nē mē panhîja pixi tā kamā tanhmā mē pakute xāja ohtôô. Tā Kris nhîja te kot mē panhîja pyrāk. Urāk nē kamā mē paxohtôô. Jakamā

na pu htem ahpÿnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkõt.

¹⁵ Nẽ kop ãm mẽ pahparja kapêr ronhÿx tee ri mẽ panhĩhkra pumu nẽ amnhĩ mã:

—Hêxta waa nẽ. Kêp ãm ixpê mẽ ïhkra ronhÿx pa inhmex nẽ ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwȳ hkêt ãm ixpê mẽ hatur xà pix na pa.

Anhÿr o amnhĩ jarênh japêr. Nom ja kot anhÿr kêt. Axtem nhÿhÿm kot mẽ pahto pa kaxyw na mẽ pahparja. Nẽ axtem mẽmoj tã mẽ paxapênh rÿ mẽmoj jamÿnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nẽ kot puj mẽ pahkwÿjê hõ mẽ parom Tirtũm Karõ nhÿ hã mẽmoj tã àpênh tÿx ã omu nẽ hkĩnhã mẽ pahte amnhĩ to warê hkêt ã amnhĩ jarênh o papa hkêt nẽ.

¹⁶ Nẽ mẽ pajamakja kapêr ronhÿx kapêr o:

—Hêxta waa nẽ. Kêp apu ixpê mẽ no ronhÿx pa inhmex nẽ ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhÿr o amnhĩ jarênh japêr. Nom ja kot anhÿr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parit kaxyw na mẽ panoja.

¹⁷ Kêp ãm mẽ pano pix ronhÿx pu mẽ parit pix nẽ paxumar kêt nẽ ri papa. Rÿ kêp ãm pajamak pix ronhÿx pu mẽ paxumar pix nẽ parit kêt nẽ mẽ paxupãr kêt nẽ ri papa.

¹⁸ Mẽ panhĩja pixi htã kamã hikukrêx xohtô. Na pre Tirtũm amnhĩ krã hkõt kamã mẽmoj piitã hipêx nẽ hanhõ.

¹⁹ Kêp ãm mẽ panhĩja kamã ãm mẽmoj pixi ronhÿx pu mẽ pamex kêt nẽ papa.

²⁰ Tã no ãm kot anhÿr kêt. Mẽ panhĩja ãm pixi htã kamã hikukrêx xohtô.

²¹ Jakamã na hte mẽ panoja amnhĩ nẽ mẽ panhĩhkra mã kãm:

—Tk kwa ma tẽ. Ixte ato presijare hã.

Anhÿr o kãm kapêr kêt nẽ. Rÿ mẽ pahkrãja amnhĩ nẽ mẽ pahpar mã kãm:

—Tk kwa ma tẽ. Na pa ato presija hkêt nẽ.

Anhÿr o kãm kapêr kêt nẽ. Ja pyrã nẽ kot puj mẽ nhÿri Kris kõt panhĩõ pumu nẽ pamex o pahte hakrenh ã amnhĩ jarênh kêt nẽ.

²² Nẽ mẽ panhĩ kamã mẽmoj kwÿ te hirerek pyrãk tã no pu mẽ arĩ pamã hapê nẽ. Ja pyrã nẽ kêr pu mẽ kormã mẽ kot Kris kõt amnhĩ xunhwÿr tohtuj anhÿr xwÿnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴ Nẽ na pu htem mẽ panhĩ kamã mẽ pakukrêx kwÿ hã pahpijaãm nẽ hpro nẽ ri ho papa. Nẽ hkwȳ hã pahpijaãm kêt nẽ hpro hkêt nẽ ho ri papa. Nẽ hkwȳ mẽ pahpê omnajti htã pu mẽ ho mex nẽ ri ho papa. Tirtũm kot ã mẽ panhĩpêx anhÿr jakamã na pu htem mẽ pakamã mẽ pakukrêx kwÿ mẽ pahpê omnajti htã pu mẽ ho mex nẽ ri ho papa. Ja pyrã nẽ kêr pu mẽ Tirtũm kõt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwÿjaja muxre nẽ mẽ pahkwÿjaja omnajti htãã. Tanhmã mẽ kute htã pu mẽ kêp mẽ Jesus kõt mẽ pahtõ nẽ mẽ pahtõx ã mẽ ho mex o ri apa.

²⁵ Nẽ na hte mẽ panhĩ kamã mẽ pahpar nẽ mẽ panhĩhkra nẽ piitã axpên kõt àpênh mex o pa. No na hte mẽ pahparja nhÿhÿm ma mra nhũm ihõja hkwȳm nhÿhÿm ma mrar kêt nẽ. Na hte wa axpên kõt àpênh mex o pa. Ja pyrã nẽ kêr pu mẽ pahpê Tirtũm krajaja axpên kõt amnhĩ nhĩpêx rãhã ho ri papa. Nẽ axpên to mex rãhã ho ri papa. No ri axpên kwÿm ri tanhmã amnhĩ nhĩpêx to ho ri papa hkêt nẽ.

²⁶ Na pu htem tõhã nhÿhÿnh panhĩ kamã paxà nẽ ri papa. Pahkrã tãtãk rÿ pakatut gêk. Jao te mẽ panhĩ piitã kamã mẽ paxà pyrãk. Nẽ nhÿhÿnh akupÿm pamex nẽ te panhĩ piitã hkõt akupÿm pamex pyrãk. Ja pyrã nẽ koja

Kris kôt panhiõ nhÿhÿnh à nê ri pa. Rÿ tanhmã amnhÿ to nê ra hkaprÿ nê ri pa pu mẽ ja hã omu nê ÿ hã pahkaprÿ nê papa. No koja mẽmoj tã hkÿnh nê pa pu mẽ ja hã omu nê ÿ hã pahkÿnh nê papa.

Te mẽ pahpê Kris nhÿ pixi pyrãk ã mẽ pa jarênh

²⁷ Nê mẽ pahpê Kris kwÿjaja te mẽ pahpê Kris nhÿ pixi pyrãk. Ahpÿnhã mẽ pahte tanhmã amnhÿ nhÿpêx to ho papa htã mẽ pahpê Kris kwÿ jakamã te mẽ pahpê ï pixi pyrãk.

²⁸ Nê mẽ pahte Kris kôt tanhmã pahkwÿjê ho ajuta hto ho papa kaxyw na pre Kris ahpÿnhã tanhmã mẽ paxunhwÿr to.

Mẽ pahkwÿjaja mẽ pahte ÿ hã nhãm mẽ kãm kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte ÿ hã tanhmã kapêr jarênh to ho ri papa kaxyw mẽ paxunhwÿ.

Nê mẽ pahkwÿjaja Tÿrtũm kapêr jarênh o mẽ ahkre ho ri mẽ papa kaxyw mẽ paxunhwÿ.

Nê mẽ pahkwÿjaja mẽ pahte aa mẽ kot mẽmoj pumunh kêt kwÿ ho anhÿr o ri papa kaxyw mẽ pa xunhwÿ.

Nê mẽ pahkwÿjaja akupÿm mẽ à xwÿnhjê ho mex o mẽ papa kaxyw mẽ pa xunhwÿ.

Nê mẽ pahkwÿjaja mẽ kapêr o mẽ hihtÿx o mẽ papa kaxyw mẽ pa xunhwÿ.

Nê mẽ pahkwÿjaja mẽ pahte tanhmã mẽ ho ajuta ho ho ri papa kaxyw mẽ pa xunhwÿ.

Nê mẽ pahkwÿjaja nhãm mẽ kapêr ò ho mẽ pakapêr o mẽ papa kaxyw mẽ pa xunhwÿ.

Ã na pre ahpÿnhã mẽ pahpê hkwÿjê piitã mẽ paxunhwÿr anê.

²⁹ No na pu htem pahpiitã axpên kôt Tÿrtũm kapêr o mẽ ahkre ho ri papa hkêt nê.

Nê mẽ pahpiitã ÿ hã tanhmã pakapêr to ho ri papa hkêt nê.

Nê mẽ pahpiitã kapêr jarênh o ri papa hkêt nê.

Nê mẽ pahpiitã aa mẽ kot mẽmoj pumunh kêt kwÿ ho anhÿr o ri papa hkêt nê.

³⁰ Nê mẽ pahpiitã akupÿm mẽ à xwÿnhjê ho mex o ri papa hkêt nê.

Nê mẽ pahpiitã mẽ kapêr ò ho ri pakapêr o ri papa hkêt nê.

Nê mẽ pahpiitã ri mẽ kapêrja ma mẽ pakapêr kãm pahkwÿjê mã harênh o ri papa hkêt nê.

Na pu htem ahpÿnhã tanhmã Kris kôt mẽ pahkwÿjê ho ajuta hto ho ri papa.

³¹ Tã kêr pu mẽ pahpiitã pamã axpên kÿnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprÿ hã tanhmã mẽ amã ja jarênh to ka mẽ inhma.

13

Mẽ pahte axpên kamã paxukaprÿ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

¹ Kot pa ma mẽ piitã ahpÿnhã mẽ kapêr kãm mẽ kãm Tÿrtũm kapêr jarênh o ri ixpa japêr. ãm mẽ piitã mẽ kapêr o ixkapêr mex o mẽ kãm harênh o ri ixpa japêr. Nê Tÿrtũm kapêr o mẽ wrÿk xwÿnhjê kapêr o mẽ ahkre ho ri ixkwÿjê hkôt ixpa japêr. Tã inhã mẽ hkÿnh kêt kãm ixte mẽ ahkre ho ri ixpa ronhÿx mẽ inhma nê ãm inhma. Nhũm ixkapêrja te ixte rat tatak pyrãk o pa tee ri Tÿrtũm kapêr o mẽ ahkre kaprÿ ho ri mẽ hkôt ixpa nhũm Tÿrtũm tee ri inhã mẽ hkÿnh kêt ã ixpumu nê inhã:

—Nà amã mẽ hkÿnh kêt jakamã na ka tee ri ixkapêr o mẽ ahkre kaprÿ. Anê.

² Rÿ kot paj Tÿrtũm xàhpumunh tÿx o mẽ kãm kapêr pimxur kwÿ jarênh o ri ixpa japêr. Rÿ Tÿrtũm mẽ kurom inhã mẽmoj to amnhÿrÿt pa omu nê mẽ kãm harênh o ri ixpa japêr. Rÿ pa Tÿrtũm kot amnhÿ nhÿpêx piitã omunh par japêr. Rÿ ixte amnhÿ kaxyw hkôt ijamaxpêr tÿx kôt ÿ hã kên krã hprêk ò mã ixkapêr nhũm kot inhmar nê inhmar xà hkôt nhãm pikamênh japêr. Tã inhã ixkwÿjê

hkînh kêt kãm ã amnhî nhîpêx anê nhûm Tîrtûm tee ri ja hã ixpumu nê inhmã:

—Nà amã mẽ hkînh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapêr jarênh anhÿr o ri apa kaprỳ. Anê.

³ Rỳ pa mẽ kêp amrakati xwỳnhjê mã ixkukrêx nhôr par japêr. Rỳ Kris ã mẽ kãm amnhî grôn timer kôt mẽ kãm xa nhûm mẽ hã ixpîr japêr. Tã inhmã mẽ hkînh kêt kãm ã amnhî nhîpêx anê nhûm Tîrtûm tee ri ja hã ixpumu nê inhmã:

—Nà ã ate mẽ kãm amnhî nhîpêx anhÿr o ri apa htã amã mẽ hkînh kêt jakamã na ka tee ri ã mẽ kãm amnhî nhîpêx anhÿr kaprỳ. Anê.

⁴ Kot puj mẽ pamã axpên kînh hã kot puj mẽ kritpêm mẽ piitã mẽ kãm pahprî ho papa.

Jao axpên kãm pagryk tokyx anhÿr kêt nê.

Nê pamã axpên to mex pix prãm.

Nê mẽmoj tã axpên kamã pagryk kurê kumrêx kêt nê.

Nê mẽmoj tã amnhî to jarkrar o ri papa hkêt nê.

Kot puj mẽ pamã axpên kînh hã kot puj mẽ ã amnhî nhîpêx anhÿr o ri papa hkêt nê.

⁵ Nê kot puj mẽ axpên kamã paxukapri ho papa hã kot puj mẽ tãm axpên nhîpêx rãhã ho papa. Jao amnhî pix kukamã pajamaxpêr o ri papa hkêt nê. Nê mẽ pagryk tokyx anhÿr kêt nê. Rỳ axpên kãm pagryk tokyx anhÿr hkêt nê. Rỳ koja mẽhõ tanhmã mẽ panhîpêx kati hto pu mẽ ãm amnhî tã omu nê axte kot tanhmã mẽ panhîpêx tota mã pajamaxpêr kêt nê.

⁶ Nê kot puj mẽ pamã axpên kînh o papa hã kot puj mẽ tee ri mẽhõ kot tanhmã amnhî tomnuj to hã omu nê pahkapri nê. Rỳ tanhmã kot amnhî to mex to hã omu nê pahkînh nê.

⁷ Nê kot puj mẽ pamã axpên kînh o papa hã kot puj mẽ arî Tîrtûm kot mẽ pahto mex par jatur xà mẽnh xà hã arîgro jamãr rãhã ho ri papa. Nê mẽ kot Kris ã tanhmã mẽ pahto htã pu mẽ tee ri amnhî kukamã tanhmã

pajamaxpêr to hkêt nê. ãm mẽ kutã amnhî to htỳx nê mẽ kãm pakuhê nê arî amnhî kaxyw Tîrtûm mã pajamaxpêr tỳx rãhã nê.

⁸ Nê kot puj mẽ pamã axpên kînh o papa hãmri nê aa mẽ pahte ã amnhî nhîpêx anhÿrja mã panhÿrer kêt nê. Nê arî mẽ pamã axpên kînh rãhã ho papa ho papa. Jar pika ja kamã mẽ pahte Tîrtûm nhÿ hã mẽ kãm kapêr jarênh o ri papa htã kot puj mẽ nhÿrmã ma õ krî hwÿr api hãmri nê kuri axte ã kãm amnhî nhîpêx anhÿr kêt nê. Mo kaxyw kot puj mẽ axte ri mẽhõ mã kapêr jarê? Kot puj mẽ õ krî hwÿr api nê ra mẽ pahpiitã paxàhpumunh o axpên pyræk.

Nê na pu htem tãhã mẽ kapêr õ ho pakapêr o ri papa. Nom kot puj mẽ nhÿrmã Tîrtûm nhõ krî hwÿr api hãmri nê kuri axte nhãm ri mẽ kapêr o pakapêr kêt nê.

Nê na pu htem jar mẽ pahkwỳjaja mẽ paxàhpumunh mex kôt Tîrtûm kapêr jarênh o ri papa. Tã kot puj mẽ nhÿrmã õ krî hwÿr api hãmri nê axte ã amnhî nhîpêx anhÿr kêt nê. ãm mẽ pamã axpên kînh pixja kot puj mẽ arî õ krî kamã mẽ pamã axpên kînh tũm rãhã papa ho papa.

⁹ Jar mẽ pahpiitã mẽ paxàhpumunh tohtuj anhÿr o pakapêr jakamã na pu htem kormã Tîrtûm kapêr jarênh tohtuj anhÿr o ri papa.

¹⁰ Tã kot puj mẽ nhÿrmã õ krî hwÿr api nê kuri paxàhpumunh jatur xàm mẽnh pa. Jakamã nhûm jar mẽ paxàhpumunh tohtuj anhÿr xwỳnhnta mẽ pahpê hapêx.

¹¹ E pa mẽ amã ja hã ejêp jarê ka mẽ inhma. Nà amnepê mã ixprîre ri na pa pre ixtỳx ri mẽhprîjê kot amnhî nhîpêx o amnhî nhîpêx nê mẽ hamaxpêr o ijamaxpêr. Nê mẽ kapêr mex kêt o ixkapêr o ri ixpa. Tã ra ixaptãr hãmri nê mẽ aptãrjê jamaxpêr o ijamaxpêr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyræk mẽ aptãrjê jamaxpêr o ijamaxpêr o ri ixpa.

12 Ja pyrâ nê na pu htem kormã Tirtûm kot amnhî nhîpêx ã omunh tohtuj anhÿr. Te mê pahte amnhî pumunh xà pynajre kamã pahprî hã amnhî pumunh mex kêeta pyrâk. Nom kot puj mê nhÿrmã ô krî hwÿr api hãmri nê pahprî hã paxâhpumunh jatur xàm kumê. Te Tirtûm kot hprî hã tanhmã mê pakute hã mê pahpumunh parja pyrâk.

13 E arî mê pahte Tirtûm kôt amnhî nhîpêx o papa xàja na axkrunêpxi. Mê pahte hkôt amnhî nhîpêx o papa rãhã ho papa kaxyw. Wamta na ja: Kêr pu mê arî amnhî kaxyw Tirtûm mã pajamxpêr mex rãhã ho ri papa. Nê hkôt ja: Kêr pu mê arî Tirtûm kot mê pahto mex par jatur xà mênh xà hã arîgro jamâr rãhã ho papa. Nê hkôt ja: Kêr pu mê arî pamã axpên kînh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mê ã amnhî nhîpêx anhÿr rãhã ho ri papa.

14

Tirtûm Karô kot mê pahto mê paxihtÿx ã harênh

Wam Korît 12.7-11, 12.27-31

1 E kêr ka mê arî amã axpên kînh pê axpên to mex rãhã ho ri apa nê aa jam anhÿrer nê ho ajamakêtkati hkêt nê. Nê amnhî to Tirtûm Karô mãn amnhî to awÿ kê mê amã tanhmã mê ajamxpêr to ka mê ahpÿnhã tanhmã axpên to mex to ho ri axpên kôt apa. Nê kêr ka mê ã ajamxpêr anê nê ajamxpêr o:

–Inhmã mê hkînh o ri ixpa hprãm tÿx. Nê Tirtûm Karô kot tanhmã ixto nhÿm ixte ahpÿnhã tanhmã mê ho ajuta hto ho ixpaja pa mãânên inhmã ho anhÿr prãm. Nê kot tanhmã ijakwa hto nhÿm ixte ahpÿnhã mê kapêr ô ho ixkapêrja pa mãânên inhmã ho anhÿr hprãm. No kêt ixte Tirtûm nhÿ hã mê kãm kapêr jarênhja na inhmã ho anhÿr prãm tÿx kumrêx. Anê.

2-4 Mê pakamã mê kapêr ô ho Tirtûm mã kapêr xwÿnhjaja na htem Tirtûm Karô nhÿ hã ãm kumã pix mã

kapêr ôta o kãm kapêr nhÿm tapxipix mê kuma. No mê papajaja na pu htem tee ri mar o pahkrî nom mar kêt nê. ãm kapêr xwÿnhhta pix koja mê pakurom amnhî ma. Nom koja mê pakapêr kãm Tirtûm mã amnhî jarê pu mê mar mex nê. Nhÿm mê pakapêr kãm Tirtûm nhÿ hã mê pamã kapêr jarê pu mê pahprî hã kuma. Jao mê pamã kapêr kôt amnhî nhîpêx prãm nê. Nê mêmoj tâ pahkaprî nê ri papa htã mê kuma nê amnhî kaxwÿnh kãm amnhî to paxihtÿx.

5 Mê apiitã mê ate nhãm mê kapêr ô ho Tirtûm mã amnhî jarênhja na mex. Nom mê ate mê akapêr o mê akwÿjê mã Tirtûm kapêr jarênh o ri mê apaja na mex o wamta jakre. Kot ka mê nhãm mê kapêr ô ho Tirtûm mã amnhî jarê nhÿm mê akwÿjaja mê amar kêt jakamã ka mê ã akapêr anhÿrja o Kris kôt mê ho mê hamaxpêr o hihtÿx kêt nê. ãm kapxipix amnhî ma. Rÿ koja kapêr ôja mar mex xwÿnhjê hõ amar japêr nê mê akapêr kãm akwÿjê mã harê. Hã koja ja mex nê. Nom kot kaj mê apiitã ma mê kapêr kãm mê kãm Tirtûm kapêr jarênh o ri apa nhÿm mê piitã hprî hã amar mex nê. Nê amar xà hkôt Tirtûm kapêr kôt amnhî nhîpêx mex nê.

6 Jakamã e Kris kôt ixtô nê ixtôxjaja. Kot paj apu nhÿrmã ma mê awÿr mō hãmri nê nhãm mê kapêr ô ho mê amã ixkapêr japêr ka mê inhmar kêt nê. Nom kot paj mê akapêr o mê amã ixkapêr ka mê apiitã aprî hã inhmar mex nê. Pa Tirtûm nhÿ hã mê amã mêmoj jarê rÿ tanhmã kot amnhî nhîpêx toja pa mê amã harê. Rÿ Karô nhÿ hã mê amã mêmoj jarênh o ã mê amã Tirtûm kapêr jarênh anê ka mê aprî hã inhmar mex nê.

7 Nom mê kapêr ô ho mê kapêr o mê akôt ri mê pa xwÿnhjaja te mêhõ kot htÿx ri wiorãwti kakrênh xwÿnh pyrâk. Koja htÿx ri hkakrênh o xa nhÿm mê tee ri kot grer mar mã. Rÿ nhÿm mêhõ htÿx ri pifti kakôr o xa nhÿm mê tee ri mêmo mê grer mar mã.

8 Pôristijaja na htem amarî ri tanhmã amnhî nhîpêx to ho pa nhûm mẽ hkrãhtûmjã mẽ kãm pifti kakô nhûm mẽ kuma nê mẽ pijapu mã hamaxpêr kurê kumrêx nê hwÿr hprôt. Nom koja kawax pê hkakô rÿ htÿx ri tanhmã hkakôr to nhûm mẽ kuma nê ãm kuma.

9 Ja pyrã nê kot kaj mẽ kapêr ô ho akwÿjê mã akapêr nhûm mẽ ama nê ãm mẽ ama. Ka te ãm mẽ kãm ajakwa momok pyrãk o axãm o amnhî nhîpêx.

10 Nê ahpÿnhã mẽ pakapêr xohtôô. Na htem ahpÿnhã mẽ kapêr o amnhî kwÿjê mã kapêr nê axpên mar mex nê.

11 Nom koja mēhō nhÿhÿnh pika hō rûm ixwÿr mō nê mẽ kapêr o inhmã kapêr pa mar kêt nê. Nê amnhî xwar kutã ixkapêr o kãm ixkapêr nhûm ixpyrã nê inhmar kêt nê.

12 Jakamã kot kaj mẽ amã Tirtûm Karô xihtÿx xã ho amã tanhmã kãm amnhî nhîpêx to ho apa hprãm hã kot kaj mẽ amnhî to awÿ nê kãm:

—Kwa amnhî kôt ijamaxpêr o axihtÿx Tirtûm. Pa anhÿ hã ixkapêr o ma Kris kôt ixkwÿjê ho mẽ hamaxpêr o ixihtÿx o ri mẽ hkôt ixpa. Kê mẽ akapêr ma nê Kris kôt amnhî xunhwÿr tÿx nê. Nê hkôt amnhî nhîpêx mex o ri pa. Anê.

13 Nê kêr ka mẽ nhãm mẽ kapêr ô ho Tirtûm mã amnhî jarênh xwÿnhjaja amnhî to Tirtûm Karô wÿ nê kãm:

—Ixte mẽ kapêr ô ho ixkapêr tã ixte amnhî mar kêt. Jakamã kwa tanhmã ixto ijamaxpêr mex to pa amnhî mar mex nê ixkapêr kãm ixprî hã Kris kôt ixkwÿjê mã ja jarê kê mẽ inhmar tÿx nê. Anê.

14 Nom kot paj nhãm mẽ kapêr ô ho Tirtûm mã mex ã harênh tã amnhî mar kêt nê. Te ixpimtir kãm ixkarô pix kapêr pyrãk. No kot paj pam amnhî krã hkôt ixkapêr o kãm mex ã harê hãmri nê ra amnhî mar mex nê.

15 Nã ja na inhmã mex jakamã kot paj nhãm mẽ kapêr ô ho Tirtûm mã mex ã harê nê kãm gre. Nê mãânên ijamaxpêr xã hkôt ixkapêr o mãânên

kãm mex ã harê nê kãm gre. Nã ja na inhmã mex.

16 Nom kot puj mẽ ma mẽ kot Tirtûm kapêr mar xã hã ixkre hwÿr mra nê kamã Tirtûm mã mex ã harê. Tã pa nhãm mẽ kapêr ô ho kãm ixkapêr japêr. Ka mẽ ate inhmar o akrî xwÿnhjaja tee ri inhma. Jakamã tee ri inhma nê ixkôt Tirtûm mã akapêr kêt nê. Rÿ kãm:

—Nã ãm hãmri na ã amex ã ajarênh anê Tirtûm.

Anhÿr o kãm akapêr kêt nê. Mẽ ate inhmaare hã kot ka mẽ ã kãm akapêr anê. Jakamã kot paj ri mẽ akamã mẽ kapêr ô ho ixkapêr kêt nê. ãm mẽ akapêr pix o mẽ anom Tirtûm mã mex ã harê.

17 Kot paj mẽ kapêr ô ho Tirtûm mã mex o mex ã harênh mex tã ka mẽ mẽmo mẽ kapêrja aprî hã mar kêt jakamã inhmar pê Tirtûm kôt amnhî xunhwÿr tÿx kêt nê.

18 Na pa hte tōhã mẽ arom nhãm mẽ kapêr ô ho Tirtûm mã amnhî jarê. Nom nhÿri ahte nhÿ nê ã kãm amnhî jarênh anê. ãm hãmri na pre Tirtûm ja kaxyw tanhmã ixto pa hte ã amnhî nhîpêx anhÿr o ri ixpa.

19 Tã na pu htem Tirtûm mã mex o mex ã harênh kaxyw nê ma mẽ kot kãm amnhî jarênh xã hã ixkreta wÿr axpên wÿr mra pa mẽ pikuprōnh xwÿnhjê kapêr o mẽ kãm ixkapêr. Nom kot paj nhãm mẽ kapêr ô ho mẽ kãm ixkapêr ry rax kumrêx tã no nhûm mẽ inhmar kêt nê. Nom kot paj mẽ kapêr o ãm ixkapêr krãnre htã no nhûm mẽ inhmar mex kurê kumrêx. Ja na inhmã mex.

20 Kwa mẽ ixkapêr ma nê mar tÿx nê. Nê mẽhprîrejê jamaxpêr o ajamaxpêr kêt nê. ãm Kris kôt mẽ àptâr tûmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprîjê jamaxpêr pyrãk o ajamaxpêr. Mẽhprîjaja na htem mẽmoj punuj kukamã hamaxpêr kêt nê. Na htem ãm htÿx pa. Tã kêr ka mẽ urãk nê mẽmoj punuj kukamã ajamaxpêr o ri apa hkêt nê.

21 Amnepêem na pre Tirtûm tanhmã Ijaewjê mã kapêr to. Mê kapêr o mê kãm kapêr tâ no nhûm mê kuma nê ãm kuma. Jakamã nhûm tee ri ja hã mê omu nê amnhî tâ tanhmã mê harênh to. Tanhmã mê harênh toja Tirtûm kapêr ã kagà htûm kamã na. Kot mê harênh kot:

E kot paj ma mê hwÿr axtem pika hõ rûm pôristi hkwÿ rê kê mê ma mê hwÿr mra nê mê unê. Hãmri nê amnhî kapêr o mê kãm kapêr nhûm mê tee ri mê kuma no ãm hkôt mẽmoj pumunh kêt nê.

Koja mê ã mê hipêx anhÿr tâ nhûm mẽ arî kãm ixkapêr mar nê amnhî kaxyw ixkôt hamaxpêr prãm kêt nê. Anê.

Tirtûm kapêr ã kagà htûm kot ã mê harênh kot anhÿr.

22 Jakamã kot kaj mê Tirtûm mã amnhî jarênh xà hã ixkre hwÿr akuprô nê mê kapêr ô ho Tirtûm mã amnhî jarênh japêr. Nhûm Kris kôt amnhî xunhwÿr kêt xwÿnhjaja mẽ akôt agjê nê hkrî nê tee ri mẽ akapêr ma nê Kris kôt amnhî xunhwÿr kêt nê. Tanhmã kot mê amnhî to nê hkôt amnhî xunhwÿ? Mê kot akapêrta maare hã. No kot ka mẽ akapêr o Tirtûm nhÿ hã mê kãm akapêr nhûm mẽhprî hã amar mex nê. Jao tanhmã hamaxpêr to nê mẽ apyrà nê Kris kôt amnhî xunhwÿr japêr.

23 Nom kot ka mẽ apiitã nhãm mẽ kapêr ô ho Tirtûm mã mex ã harê nhûm amarî ri mẽ pa xwÿnhjaja mẽ awÿr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê.

24 Nom koja mẽ awÿr agjê ka mẽ akatât kôt mê amnhî kapêr o Tirtûm kapêr jarênh o akuhê nhûm mẽhprî hã mẽ amar mex nê. Hãmri nê amnhî kapêr o akapêr ma nê hamaxpêr o:

—Hêxta waa nê. Xep ixte amnhî tomnuj xwÿnh na pa. Nà ãm hãmri na mẽ Tirtûm kapêr jarê. Nà ãm hãmri na kêt ja. Anê.

25 Hãmri nê mẽ amã tanhmã kot amnhî tomnuj to hã amnhî jarênh pa

hãmri nê hkaga nê Jejus kôt amnhî xunhwÿ. Nê hkônkrã ho htêm nê hkrî nê Tirtûm mã mex o mex ã harê. Hãmri nê mẽ amã:

—Nà ãm hãmri na hte Tirtûm mẽ akamã pa ho pa. Anê.

Tirtûm nhõrkwÿ kamã mẽ pahte tanhmã amnhî nhîpêx to hã mẽ pamã karô

Atre 2.42, 5.12-13; Eprêw 10.25

26 E Jejus kôt ixkwÿjaja. Kot paj hpãnhã axtem mẽ amã mẽmoj tâ karô. Mê kot Tirtûm mã amnhî jarênh xà hã ixkre kamã tanhmã mẽ ate amnhî nhîpêx to hã karô ka mẽ inhma.

Nà kêr ka mẽ axpên wÿr akuprô nê akrî ka mẽ atô amã Tirtûm mã mex ã harênh ã mẽ greo o agrer prãm hãmri nê mãmrî kãm ho gre. Hãmri nê agrer pa kê apãnhã mẽhõ kãnhmã xa nê Tirtûm kapêr kwÿ ho mẽ ajahkre. Nê ho anhÿr pa nhûm hpãnhã mẽhõ kãnhmã xa nê Tirtûm kot tanhmã ho mex to hã mẽ amã amnhî jarê. Nê amnhî jarênh pa hãmri nhûm mẽhõ nhãm mẽ kapêr ô ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprî hã mẽ amã kapêrta jarê.

E kêr ka mẽ axpên wÿr akuprô nê Kris kôt axpên to axihtÿx kaxyw ã axpên pãnhã amnhî nhîpêx anê.

27 Nê ka mẽ atô amã nhãm mẽ kapêr ô ho mẽ kãm akapêr prãm japêr. Nom kêr ka mẽ axohtô nê ã mẽ kãm amnhî nhîpêx anhÿr kêt nê. ãm mẽ atô wa axkrutre rÿ axkrunêpxire nê mẽ kapêr ô ho mẽ kãm akapêr. Hãmri nê axpên pãnhã akapêr pa kê mẽhõ kot hprî hã mẽ kapêr ôta mar japêr nê mẽ apãnhã xa nê mẽ akapêr o mẽ kãm harê kê mẽhprî hã mar mex nê.

28 Nom koja ja kaxyw mẽhõ amrakati japêr ka mẽ kapêr ô ho akapêr kêt nê. ãm kapxipix nhÿri ahte Tirtûm mã akapêr.

29 Nê kê Tirtûm nhÿ hã kapêr jarênh xwÿnhjê hõ wa axkrut rÿ axkrunêpxi nê mẽ ajahkre ka mẽ aprî hã mar o akrî. Hãmri nê mar pa nê tanhmã mẽ harênh to. ãm hãmri Tirtûm nhÿ hã kapêr ã mẽ harê rÿ ho hêx ã mẽ harê.

30 Nē koja mēhō Tirtūm nhỹ hā mēmoj jarēnh o xa. Rôm nhūm Tirtūm mē kaxyw mē atō mā ajamaxpēr kwỹ gō. Ka kapēr o ãm xwýnhhta mā kãnhmã anhĩhkra pē kē apumu nē anhĩkrē. Hāmri ka hpãnhã xa nē mē kãm tanhmã ajamaxpēr tota jarē.

31 Nom kêr ka mē anhĩpē mē kãm akapēr hkēt nē. ãm axpēn pãnhã Tirtūm kapēr o axpēn jahkre nē ho axpēn jamaxpēr o axihtýx. Ja mex.

32-34 Nom kêr ka mē axpēn wýr akuprō nē apiitã anhĩpē atýx ri akapēr kêt nē. Ja na Tirtūm kêp hprãm nõkati. Mē ate axpēn pãnhã axpēn mā akapērja na kãm hprãm. Jakamã kē mē kot Tirtūm nhỹ hā mē kapēr jarēnh o pa xwýnhjaja taxy axpēn jahkre hã axpēn jamã. Nhūm mēhō kumrēx kapēr pa hāmri ka hpãnhã mē kãm akapēr.

Nē kē mēnijaja amarĩ mē ahkreja mar o hkrĩ. Ijaew kot amnhĩ nhĩpēx xã hkôt. Jakamã kwa mē anijaja. Kêr ka mē amarĩ akryk mē mar o akrĩ nē axpēn mā akapēr o akrĩ hkēt nē.

35 No kot kaj mē tee ri mēmoj ma nē mar mex kêt japēr tã hã axpēn kukjēr kêt nē. ãm akryk arĩ mar o akrĩ. Hāmri nē akupým anhõrkwỹ hwýr tē nē rĩ kormã hã amjên kukja. Nom kot ka mē apikuprõnh xã hã ixkre kamã axpēn mā akapēr o akrĩ nhūm mē amjênjaja tee ri ja hã mē apumu nē hpijaam nē.

36 E na pa ã Tirtūm mā amnhĩ jarēnh xã hã ixkre kamã tanhmã mē pahte amnhĩ nhĩpēx to hã mē amã karō anē. Tã te mē apē ja mex kêt pyrãk. Kwa mon ka wem ja ma nhūm mē apē omnuj nē? Xã mē ate Tirtūm kapēr mar mex o ijakrenh kôt na ka mē ã ajamaxpēr anē? Xã na pre Tirtūm mē akumrēx mā kapēr? Hã na ka mē ã ajamaxpēr anē? Rý xã mē kapxipix mā na pre kapēr? Hã na ka mē ixkapēr ma nhūm mē apē omnuj nē? Nã ixkumrēx na pa pre mē awýr inhmõr nē mē amã Tirtūm kapēr jarēnh kēnã kot ka kêt mē axtem nē ã ajamaxpēr anē.

37 Kot kaj mē atō ã ajamaxpēr anhỹr japēr nē ajamaxpēr o:

—Nã na pre Tirtūm tanhmã inhmã kapēr to pa ô ri mē kãm ixujarēnh mex o ri ixpa.

Anhỹr o ajamaxpēr. Rý ajamaxpēr o:

—Nã na pre Tirtūm Karō mē kaxyw tanhmã ixto pa ý hã tanhmã mē ho mex to ho ri ixpa.

Anhỹr o ajamaxpēr. Kot kaj mē ã ajamaxpēr anē hāmri nē mããnēn pa ã ixte amnhĩ nhĩpēx anhỹr ã ixpumunh mex kurē kumrēx. Amnhĩ pyrã nē ixte Tirtūm nhỹ hã mē kãm ixkapēr xwýnh ã ixpumunh nē hã ijarēnh kurē kumrēx.

38 Nom koja ja hã ijarēnh kêt ka mē ja hã omu hāmri nē tanhmã kot mē amã kapēr toja ma nē ãm ama.

39 E Kris kôt ixtō nē ixtõxjaja. Kêr ka mē amnhĩ to Tirtūm Karō wý kē ma mē ate mē kãm Tirtūm kapēr jarēnh o ri apa kaxyw mē ato mē axihtýx.

Nē koja mēhō kãm nhãm mē kapēr õ ho kapēr prãm ka mē ja nē kãm akapēr kêt nē. Kwãr mãmrĩ ã amnhĩ nhĩpēx anē.

40 Nom kêr ka mē ate Tirtūm mã amnhĩ jarēnh xã hã ixkre kamã axpēn pãnhã axpēn mā akapēr nom anhĩpē kãm akapēr hkēt nē.

15

*Kris akupým htĩr kumrēx ã harēnh
Atre 2.23-36, 10.39-41; Wam Korīt
6.14*

1 E Kris kôt ixkwýjaja. Kot paj axte mē amã Jejus kot mē panē tanhmã amnhĩ nhĩpēx to hã harē ka mē inhma. Na pa pre ra mē amã ja jarē ka mē ama nē hkôt amnhĩ xunhwý. Nē hkôt amnhĩ nhĩpēx mex o ri apa.

2 Na pa pre mē amã harē ka mē amnhĩ kaxyw kãm ajamaxpēr týx nē nhūm Tirtūm mē ato hkra. Tã ka htem arĩ kapēr kôt amnhĩ nhĩpēx mex o ri apa. Koja mēhō kot Tirtūm kapēr mar tã amnhĩ kaxyw hkôt hamaxpēr kêt nē nhūm Tirtūm tee ri amnhĩ tã omu nē ho hkra hkēt nē.

3 Na pa pre amnhĩ krã hkôt mē amã tanhmã Kris jarēnh to hkēt nē.

Ixte kapêr mar xà hkôt na pa hte amnhî xô ri mē amā tanhmā harēnh to ho ri ixpa. Jejus jarēnhja na mex o kot mē ujarēnh piitā hakrenh par kumrēx. Tā tām kot paj mē amā harē. Na pre Krisja mē pahte amnhî tomnuj pānhā amnhîrer kaxyw mē panē ty. Tirtūm kapêr ā kagā htūm kot hkukamā harēnh xà hkôt.

⁴ Hāmri nhūm mē kēn kre kamā haxà nhūm kamā nōr o apkati. Nē axte hā apkati. Hāmri nhūm Tirtūm akupŷm ho htīr. Kapêr ā kagā htūm kot hkukamā harēnh xà hkôt.

⁵ Tā nhūm Simāw Pētre kumrēx akupŷm htīr ā omu nhūm hpānhā Jejus nhŷ hā mē ahkre ho mē pa xwŷnh maatijaja haxwŷja omu.

⁶ Hāmri nhūm mē kot hkôt mē pa xwŷnh pē 500 jakrenh xwŷnh piitā anhîpē haxwŷja akupŷm htīr kām omu. Na pre ra mē hkwŷjaja ty nhūm mē hkwŷjaja arī htīr nē pa.

⁷ Jakamā nhūm prem ra akupŷm htīr kām omu. Hāmri nhūm hpānhā Xiakreja omu. Nhūm hpānhā ŷ hā mē ahkre o mē pa xwŷnh piitā omu. Akupŷm htīr kām omu.

⁸ Tā pa na pa pre ijaxwŷja amnhî to hapu nē akupŷm htīr kām omu. Te ixpē mē hkra kot hapu pyrā nē amnhî to hapu nē omu. Na pre kaxkwa kamā inhmā kapêr o xa pa ixprī hā omu.

⁹ No mē kot ixpyrā nē Kris nhŷ hā mē ahkre ho mē pa xwŷnh maati hkwŷjaja na mē mex o kot ijakrenh. Na pa pre hte mē hkīnhā amnhî tomnuj tŷx nē. Jao Kris pē hkrajê homnuj tŷx o ri ixpa. Tā hkôt amnhî xām hāmri nē tee ri ā amnhî nhîpêx anhŷr ā amnhî pumu nē amnhî kamā ixpijaàm tŷx nē. Jakamā na pa hte Kris nhŷ hā kapêr jarēnh o ixpa hā amnhî pumu nē ixte hkôt amnhî xām kêt ri tanhmā ixte amnhî nhîpêx toja mā ijamaxpêr nē ixpijaàm nē.

¹⁰ Na pa pre amnhî tomnuj tŷx o ixpa htā nhūm Tirtūm arī kām ijapē nē. Nē ixkamā ukaprī nē. Pa pre hkôt amnhî xām nhūm ixto hkra pa ra kām tanhmā amnhî nhîpêx to mex rāhā ho ixpa. Jakamā na hte tee ri amnhî tā

ixpumu nē tanhmā hamaxpêr to hkêt nē. Rŷ hamaxpêr o:

—Hêxta waa nē. Inhmā Pawre japê nē ixte ho mex tā nhūm ixkôt amnhî nhîpêx kêt kumrēx.

Anhŷr o tee ri hamaxpêr kêt nē. Na pa hte kām tanhmā amnhî nhîpêx to ho ixpa rūnh o ŷ hā mē kapêr o pa xwŷnh kwŷjê jakre ho ixpa. Nom amnhî krā hkôt mē ahkre hkêt nē. Ja kaxyw na pre Tirtūmja ixto ixihtŷx pa ŷ hā kām tanhmā amnhî nhîpêx to ho ri ixpa nhūm ja hā ixpumu nē hkīnh nē.

¹¹ Nē Jejus jarēnhja ām pixii. Axtem hō hkêt. Nē ŷ hā mē ahkre ho mē pa xwŷnhjê kapêrja nē pa ixte mē amā harēnhja kot axpēn pyrāk. Harēnh tipxi. Kris kot mē pahte amnhî tomnuj mŷrapê mē panē htyk nhūm Tirtūm kot akupŷm ho htīr ā wa harēnhja na pa hte pix jarēnh o ri mē akôt ixpa. Ka prem inhma nē amnhî kaxyw hkôt ajamaxpêr tŷx nē.

Tirtūm kot akupŷm mē pahto mē pahitŷr ā harēnh

Rukre 20.37

¹² Nē kwa ra ixte mē amā Kris htyk nē akupŷm htīr ā harēnh tā ka xep mē akwŷjaja axtem nē mē htyk nē akupŷm mē htīr kêt ā mē hkamnhîx o ri apa.

¹³ Kwa mē ajamaxpêrja mex kêt. Kêp apu ām hāmri mē ate ā mē harēnh anhŷr ronhŷx pre Kris haxwŷja akupŷm htīr kêt nē. Nhŷx pre htyk o ty.

¹⁴ Nē kêp apu Kris akupŷm htīr kêt ronhŷx pa mē ām mē amā kapêr jarēnh o ixpa kaprŷ. Ka mē ajaxwŷja amnhî kaxyw hkôt ajamaxpêr kaprŷ.

¹⁵ Nē kêp ām akupŷm mē htīr kêt ronhŷx pa mē ixte mē amā Tirtūm kapêr jarēnh o ri ixpa xwŷnhjaja mē amā ho ixêx o ri ixpa. Na pa htem mē amā Tirtūm ra kot akupŷm Jejus o htīr ā harēnh o mē akôt ixpa. Tā kêp apu akupŷm mē htīr kêt ronhŷx pa mē ām mē amā harēnh o ixêx.

16 Nê kêp apu akupÿm mẽ htîr kêt ronhÿx pre Kris haxwÿja akupÿm htîr kêt nê. Nhÿx pre ãm amarî tyn hapêx.

17 Nê Kris amarî htyk nê hapêx ronhÿx kot pu mẽ ri amnhî kaxyw hkôt pajamaxpêr nê hkôt amnhî xunhwÿr kaprÿ.

Nê Kris amarî htyk nê hapêx ronhÿx pre Tîrtÿm Jejus kukwak ri mẽ panê mẽ pahte amnhî tomnuj o hapêx kêt nê. Nhÿx pu mẽ pahpiitã nhÿrmã ma kuwy hwÿr pajapêx pa.

18 Nê kêp apu Kris htyk nê hapêx ronhÿx ra mẽ kot amnhî kaxyw hkôt hamaxpêr tã ra htyk xwÿnhjaja ma mẽ kot amnhî tomnuj mÿrapê kuwyta wÿr hapêx.

19 Nê kêp apu Kris htyk kumrêx nê hapêx ronhÿx pu mẽ kormã pahtyk kêt xwÿnhjaja tee ri amnhî wÿr kamã pajamak o ri papa kaprÿ. Nê pahpê hkra hã amnhî jarênh kaprÿ. Jao pahkaprî htÿx o mẽmoj piitã hakrenh par kumrêx nê ri papa.

Kris kumrêx akupÿm htîr ã harênh Atre 26.23; Sikÿn Korîit 4.14; Piri-pos 3.10-11; Wam Tesarôn 4.15-18; Apokarip 20.1-15

²⁰ Nã mẽ htyk nê nhÿrmã akupÿm mẽ htîr kêt ã mẽ harênhja kot anhÿr kêt. Ra Tîrtÿm kot akupÿm Kris o htîr jakamã koja mãânên hkra htyk xwÿnhjaja nhÿm mẽ piitã Jejus pyrã nê nhÿrmã akupÿm mẽ ho htîr pa. Jakamã na pu htem Kris akupÿm htîrja mã pajamaxpêr nê amnhî kukamã pajamaxpêr o:

—Nã ra Tîrtÿm kot akupÿm Jejus o htîr jakamã koja urak nê nhÿrmã akupÿm mẽ pahte hkôt amnhî xunhwÿr xwÿnh piitã mẽ pahto mẽ pahtîr. Nã koja ã mẽ panhîpêx anê. Ja kaxyw àhpumunh tÿx kumrêx xwÿnh kênã. Anê.

²¹ Nê amnepêm na pre Tîrtÿm my kot waja nhîpêx. Hãmri nhÿm kot tanhmã amnhî tomnuj to ho ra mẽ

htykja o hkra. Tã nhÿm wamta kôt my hõta wamta rom amnhî to mex o mẽ htyk tã akupÿm mẽ ho htîr o hkra.

²²⁻²³ Tã mẽ pahpê wam my pê Atãw kanrêhã tàmnhwÿ jakamã kot puj mẽ urak nê nhÿrmã ty. No ãm mãânên mẽ pahpê Kris kraa. Kris kumrêx na pre akupÿm htîr. Tã koja nhÿrmã akupÿn mẽ pahwÿr wrÿ hãmri nhÿm Tîrtÿmja kot hipêx pyrã nê akupÿm mẽ pahto mẽ pahtîr. Mẽ pahte hkôt amnhî xunhwÿr ã mẽ pahpumunh kôt akupÿm mẽ pahto mẽ pahtîr pa. No ãm kormã.

Kris nhÿrmã kot mẽ htyk o hapêx ã harênh

Juãw 11.25; Rômãn 6.23; Wam Korîit 15.54; Sikÿn Ximotre 1.10; Eprêw 2.14; Apokarip 20.14

²⁴⁻²⁸ Nê koja Kris arî mẽ ho amnhîptâr rãhã nhÿm Tîrtÿm mẽ kot kutã amnhî xunhwÿr xwÿnhjê pê mẽ hihtÿx xà ho hapêx pa. Kapêr ã kagã htÿm kot ja jarênh kot:

Koja nhÿrmã Tîrtÿm Kris kot kãm mẽ ho amnhîptâr kaxyw ãm. Anê. Jakamã Jejus tapxipix koja mẽ ho amnhîptâr o pa. Koja Tîrtÿm pix mẽ ho amnhîptâr kêt nê. Nom koja pahi hkwyjê hõ axte nhãm mẽ ho amnhîptâr kêt kumrêx.

Tã mẽ kot mẽkarõmnuti hkôt kãm tanhmã amnhî to ho mẽ pa xwÿnhjaja koja Tîrtÿm ma amnhî nê kuwy hwÿr mẽ rênh pa. Nê mẽhtykja o hapêx nhÿm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mëpahpãm Tîrtÿm nhîhkram akupÿm mẽmoj piitã haxâr pa. Tîrtÿm jamaxpêr xà hkôt ã mẽmoj to anhÿr par anê hãmri nê îhkram mẽmoj jaxâr pa. Nê mãânên tãm kãm amnhî gõ. Jakamã nhÿm Tîrtÿm tapxipix mẽmoj piitã ho amnhîptâr pa.

Mẽ htyk xwÿnhjê jarênh

²⁹ Nê na hte mẽ pahkwÿjaja kormã kêp Tîrtÿm kra hkêt tã Jejus kôt mẽ kot amnhî xunhwÿr nê mẽ htyk xwÿnhjê mã hamaxpêr o pa. Hãmri nê mẽ kãm nhÿrmã axte mẽ omunh prãm xaj mẽ urak nê Jejus kôt amnhî xunhwÿ

nhũm mẽ hkrã kumrã. Tã akupỹm mẽ htĩr kêt ronhỹx mẽ ãm ã pajamaxpěr anhỹr kaprỳ.

³⁰ Nẽ paa. Na pa hte ma mẽ kãm Tĩrtũm kapěr jarėnh o ri mẽ hkõt ixpa. Nhũm mẽ hkwỳjaja ja hã inhma nẽ ixkamã gryk nẽ ixtã amỹnẽ pa mẽ mỳrapẽ ixpunuj nẽ ri ixpa. No ãm amnhĩ to htỳx nẽ arĩ ri mẽ kãm Kris kapěr jarėnh o ri mẽ hkõt ixpa. Tã kęp ãm nhỹrmã akupỹm ixtĩr mã kêt ronhỹx pa tee ri ã amnhĩ nhĩpẽx anhỹr o ri ixpa kaprỳ.

³¹ Na htem apkati mẽ ixtã tanhmã àmnėnh to ho ri pa. ãm hãmri na pa mẽ amã ã mẽ harėnh anẽ. Nom na pa hte tee ri amnhĩ kukamã ijamaxpěr o ri ixkaprĩ nẽ ixpa hkět nẽ. Mẽ kot ixpĩr mã tã pa hte mẽ ate Pahihtĩ Jejus Kris kõt amnhĩ nhĩpẽx mex ã mẽ apumunh kõt ixkĩnh nẽ ri ixpa. Nhũm te ixkamã mẽmoj kêt pyrãk pa hte ri ixpa.

³² Na pa hte jar Epes kamã mẽ oprẽ xwỳnhjẽ kutã amnhĩ to htỳx pẽ mẽ kãm Jejus kapěr jarėnh o ri mẽ hkõt ixpa nhũm mẽ kãm mar prãm kêt jakamã hã ixtomnuj tỳx nẽ. No nhỹrmã ixtyk nẽ akupỹm ixtĩr mã kêt ronhỹx pa mẽ kęp Kris kwỳ hkět xwỳnhjẽ jamaxpěr o ijamaxpěr nẽ mẽ urãk nẽ ijamaxpěr o:

Ixte ixtyk ã arĩgro pumunh kêt jakamã kot paj mãmri mẽmoj piitã hkur o ri ixpa.

Nẽ mãmri mẽmoj piitã ho ixkõm o ri ixpa.

Nẽ mãmri mẽmoj piitã ri tanhmã ho ho ri ixpa.

Ixtyk nẽ axte ixte ã amnhĩ nhĩpẽx anhỹr o ixpare kaxyw ã.

Anhỹr o nhỹx pa ijamaxpěr o ixpa. Kęp ãm Tĩrtũm kot akupỹm mẽ pahto mẽ pahtĩr mã kêt ronhỹx pu mẽ ã mẽ kęp Kris kwỳ hkět xwỳnhjẽ jamaxpěr anhỹrja kõt pajamaxpěr pix o ri papa. No ãm ja kot anhỹr kêt.

³³ Na htem mẽmoj jarėnh o:

—Mẽ kot htỳx ri amnhĩ tomnuj xwỳnhjẽ hkõt ri mẽ pa xwỳnhjaja koja

mẽ gaa nẽ mẽ kot amnhĩ nhĩpẽx kõt amnhĩ nhĩpẽx o ri pa. Anẽ.

ãm hãmri na ã mẽ harėnh anhỹrja. Jakamã kwa mẽ okora. Kěr ka mẽ ã amnhĩ nẽ mẽ kot amnhĩ nhĩpẽx anhỹr o mẽ pa xwỳnhjẽ pumunh mex o ri apa.

³⁴ Kwa mẽ tokyx mẽ ate tanhmã amnhĩ tomnuj to hã amnhĩ pumu nẽ axte ã amnhĩ nhĩpẽx anhỹr kêt nẽ. Nẽ mẽ ate Tĩrtũm kot akupỹm mẽ ho htĩr kêt ã harėnh xwỳnhjaja. Te mẽ ate Tĩrtũm kot amnhĩ nhĩpẽx ã omunh kêt pyrãk. Tã mẽ ate tokyx ja hã amnhĩ pumunh nẽ amnhĩ kamã api-jaam kaxyw na pa ã mẽ amã ixkapěr anẽ.

Mẽ panhĩ nyw jarėnh

Rukre 20.34-36; Rõmãn 8.10-11; Sikũn Korĩt 5.1; Piripos 3.20-21

³⁵ Nẽ mãn ka mẽ atõ akupỹm mẽ htĩr ã mẽ harėnh ma nẽ tee ri mẽ hkukamã ajamaxpěr nẽ hã ri tanhmã axpẽn kukjẽr to nẽ axpẽn mã:

—Kwa tanhmã koja we Tĩrtũm akupỹm hkra htyk xwỳnhjẽ ho htĩr to? Ra mẽ htyk nẽ mẽ ĩ katõk nẽ hapẽx par mã kėnã. Tanhmã kot wem amnhĩ to nẽ akupỹm htĩr? Nẽ tanhmã koja we mẽ ĩ nywja kute wehe? Anẽ.

³⁶ Nã na ka mẽ atỳx ri ã ajamaxpěr anẽ nẽ tee ri mẽ hkukamã ajamaxpěr. E kot paj ixprĩ hã ja hã ejẽp jarẽ ka mẽ inhma. Nã na htem mẽmo y hkre. Te mẽ kot mẽ htyk jaxàr pyrãk o hipẽx nẽ hkre nhũm hikwỳ nẽ gaa nẽ higrõt hapõj. Nom te kęp mẽmo yta pyrãk kêt.

³⁷ ãm hy pix na htem hkre. No higrõt kre hkět nẽ. Rỳ tanhmãn pàr nywja kre hkět nẽ. ãm hy pix na htem hkre. Tã nhũm higrõt hapõj nẽ hprẽk nẽ gaa nẽ ô.

³⁸ Tĩrtũm na hte hamaxpěr xà hkõt tanhmã ho nhũm higrõt hapõj nẽ hprẽk nẽ ô. Tã ja pyrã nẽ kot puj mẽ Tĩrtũm jamaxpěr xà hkõt pahtyk tã koja akupỹm mẽ pahto mẽ pahtĩr nẽ mẽ pamã mẽ panhĩ nyw gõ.

³⁹ Nẽ mẽmo hy piitã te kot axpẽn pyrãk kêt. Ahpỳnhã na. Ja pyrã nẽ

ahpÿnhã ri mẽmoj piitã ï. Na axtem mẽ panhĩ nẽ axtem mry nhĩ nẽ axtem àk nhĩ nẽ axtem tep nhĩ. Mẽmoj piitã ahpÿnhã ri ï.

⁴⁰⁻⁴¹ Nẽ kaxkwa kamã haxwÿja mẽmoj piitã ahpÿnhã no ãm muxre. Myytija mex. Nẽ mytwrÿreja axte mã no ãm haxwÿja mex. Nẽ kanhêti haxwÿja mex. Haxwÿja axte mã. Kamã hkwÿ hpôk kryre nẽ kamã hkwÿ hpôk rÿnhti no ãm piitã mex.

Nẽ jar pika ja kamã haxwÿja mẽmoj piitã mex. No ãm te kot kaxkwa kamã mẽmoj jarir xwÿnhja mex pyrãk kêt. Axtem na raa.

⁴² Tã koja mẽ panhĩ nywja haxwÿja axte mã. Te kot panhĩ htÿm pyrãk kêt. Na htem ty nhÿm mẽ ma mẽ o mra nẽ mẽ hagjê. Nhÿm mẽ hikwÿ nẽ gaa nẽ ï rerek nẽ hapêx. Tã koja Tÿrtÿm akupÿm tanhmã mẽ pahto mẽ pahtÿr to pu mẽ hpãnhã pamex kumrêx. Hãmri nẽ axte mã mẽ panhĩ nyw mex o mex jakamã koja axte htyk nẽ ï rerek kêt nẽ.

⁴³ Na htem ty nhÿm mẽ hagjê nhÿm htyk xwÿnhja tanhmã amnhĩ to hkêt nẽ amarĩ hikwÿ. Omnuj nẽ ï nhenhek nẽ hikwÿ. Tã koja Tÿrtÿm akupÿm mẽ ho mẽ htÿr nẽ mẽ kãm mẽ ï nyw gô nhÿm mẽ hpãnhã mex kumrêx nẽ hihtÿx nẽ Tÿrtÿm nhõ krĩ kamã pa ho pa.

⁴⁴ Mẽ htyk nhÿm mẽ kot mẽ hagjênh xwÿnhja na htem arĩ ï htÿm ã hikwÿ. ãm jar pika ja pix kãm ri mẽ papa kaxyw na mẽ panhĩ htÿmja. No mẽ panhĩ nywja axtem Tÿrtÿm nhõ krĩ kamã ri mẽ papa kaxyw jakamã koja mẽ panhĩ nywja axte mã. Tÿrtÿm Karõ koja mẽ pamã kugô.

Mẽ panhĩ nyw te kot Kris nhĩ pyrãk ã harênh

Rukre 20.34-36

⁴⁵⁻⁴⁶ Nẽ Tÿrtÿm kapêr ã kagã htÿm kot Atãw jarênh kot:

Na pre Tÿrtÿm my kot wa Atãwja nhÿpêx. Jakamã Atãw kêp pika nhõ xwÿnh na pre. Anẽ.

ã Atãw jarênh kot anhÿr. Ja pyrã nẽ na pu htem pakatorxã nhõhy rÿm pajapôj nẽ Atãw pyrã nẽ pahpê pika

nhõ xwÿnh. Tã nhÿm Atãwja pa nẽ gaa nẽ hpigêt nẽ ty. Jakamã kot puj mẽ urãk nẽ papa nẽ gaa nẽ ty. Nom nhÿm Krisja Atãw kurom kêp akupÿm mẽ ho mẽ htÿr xwÿnh jakamã kot puj mẽ pahpê hkwÿjaja Atãw pyrã nẽ nhÿrmã mẽ pahtyk tã nhÿm Kris akupÿm mẽ pahto mẽ pahtÿr. Hãmri nhÿm Tÿrtÿm Karõ mẽ pamã mẽ panhĩ nyw gô pu mẽ axte pahtyk kêt nẽ. Pãnhã axte mã mẽ pahpê kaxkwa nhõ xwÿnh.

⁴⁷ Nẽ Atãw na pre Tÿrtÿm pika ho hipêx nẽ ho htÿr nhÿm ri pa. Nom Kris na pre Atãw rom kaxkwa rÿm mẽ pahwÿr wrÿ.

⁴⁸ Tã mẽ pahpê pika nhõ xwÿnhjaja te mẽ pahpê Tÿrtÿm kot wam my nhÿpêx xwÿnhja pyrãk. No mẽ pahte kaxkwa hwÿr ma papa mã xwÿnhjaja te mẽ pahte kaxkwa rÿm my kot mẽ pahwÿr wrÿk xwÿnh Krista pyrãk.

⁴⁹ Tã kormã mẽ pahpê pika nhõ xwÿnh jakamã te mẽ pahpê my pika ho hipêx xwÿnhja nhĩ pyrãk. Nom kot puj mẽ nhÿrmã ty hãmri nẽ hpãnhã te pahpê kaxkwa rÿm my kot mẽ pahwÿr wrÿk xwÿnhja nhĩ pyrãk.

Axte mẽ pahtyk kêt kumrêx ã mẽ pajarênh

Juãw 11.25; Sikÿn Korît 5.4; Wam Tesarôn 4.13-18

⁵⁰ Nẽ kot puj mẽ panhĩ htÿm rãhã Tÿrtÿm nhõ krĩ hwÿr paxãpir kêt nẽ. Panhĩ htÿm na hte ty nẽ rerek nẽ hapêx. Jakamã koja Tÿrtÿm Karõ mẽ pamã mẽ panhĩ nyw gô pu mẽ rĩ kormã ma õ krĩ hwÿr pajapêx pa nẽ kamã papa ho papa.

⁵¹⁻⁵² E mẽ inhma. Na pre kormã Tÿrtÿm mẽ amã mẽmoj to amnhÿrÿt kêt tã ra inhmã ho amnhÿrÿt. Jakamã kot paj ÿ hã mẽ amã harê ka mẽ inhma. Nã kot puj mẽ pahpiitã mẽ pahtyk kêt nẽ. Koja nhÿrmã Tÿrtÿm kapêr o mẽ wrÿk xwÿnhjê hõja mẽ pamã pifti kakô. Mẽ pajaêr pê hkakô. Hãmri nhÿm Tÿrtÿm kra ra mẽ htyk nẽ mẽ hikwÿ xwÿnhjaja akupÿm ï nyw o htÿr kurê kumrêx. Nẽ kormã mẽ pahtyk kêt xwÿnhjaja kot pu mẽ mẽ pahtyk kêt ri mẽ urãk nẽ panhĩ nyw kurê

kumrēx. Hāmri pu mē pahpiitā pahtīr o pahtīr tūm nē papa.

⁵³ Koja Tīrtūm mē panhīpēx o te mē pahte paxē htūm o papinhīpanh nē hpānhā paxē nyw jagjēnh pyrāk. Jao mē panhī htūm o hapēx nē hpānhā mē pamā mē panhī nyw gō pu mē axte pahtyk kēt kumrēx nē ri papa ho papa.

⁵⁴ Tīrtūm kapēr ā kagà htūm kot ja jarēnh kot:

Na ra Tīrtūmja mēhtyk ho hapēx pa. Anē.

Te ra kot ho hapēx par pyrāk o ā harēnh kot anhūr. No ām kormā. Jakamā kot puj mē nhūr mā panhī nyw nē ri papa nē mē pahtō axte pahtyk kēt kumrēx.

⁵⁵ Mē pahtykja te mē kot makre par nhūm axte kot mē hkamnhwūr kētja pyrāk. Urā nē koja Tīrtūm akupēm mē pahto mē pahtīr pu mē axte pahtyk kēt nē. Nē axte ri pamā ma hkēt nē papa. Nē axte paxà hkēt nē.

⁵⁶ Tīrtūm kapēr ā kagà htūmja ā mē pakukamā mē pajarēnh kot anhūr. Mē pahte amnhī tomnuj xwūnhjē jakamā kot puj mē nhūr mā ty.

⁵⁷ Nom nhūm Tīrtūm àhpumunh tỳx o àhpumunh tỳx jakamā na hte Pahīhti Jejus Kris kukwak ri mē pahte hkôt amnhī xunhwūr xwūnhjē nē mē pahte amnhī tomnuj rēnh pa. Pu mē nhūr mā mē pahtyk tā nhūm akupēm mē pahto pahtīr.

Mē pahte Jejus mā tanhmā amnhī nhīpēx mex to hā mē pamā karō
Karatas 6.9; Korosē 1.10

⁵⁸ Jakamā e kwa Jejus kôt ixkwūnjaja. Kēr ka mē arī Pahīhti Jejus kôt mān amnhī xunhwūr tỳx rāhā ho ri apa. Nē kapēr kôt pix mā ri amnhī nhīpēx rāhā nē kām tanhmā amnhī nhīpēx mex to ho ri apa. Kot kaj mē ā amnhī nhīpēx anē hāmri nē kām tanhmā amnhī nhīpēx to kaprū ho ri apa hkēt nē. Ām hāmri kām mēmoj to anhūr mex rāhā ho ri apa.

16

Mē kēp amrakati xwūnhjē jarēnh
Atre 11.27-30; Rōmān 15.25-27;
Sikūn Korīt 8.1-24, 9.1-5; Wam Xi-
motre 6.18

¹ Nē na pa pre krī pē Karatas kamā tanhmā Jerujarē kamā Kris kwūjē jarēnh to. Ijaew kwū kot mē pahpyrā nē Jejus kôt amnhī xunhwūr ā mē harē nē mē kēp amrakati hā mē harē hāmri nē mē kām:

—E. Kwa kēr ka mē kām mē akàxpore hkwū ho akuprō nē ma mē hwūr amē.

Anhūr o mē kām ixkapēr. Jakamā kwa kēr ka mē urāk nē mē kaxyw mē kām kàxpore hkwū ho akuprō.

² Mē panhō arīgromnu pē sap ā hkwū ho akuprō. Kot kaj mē akàxpore rax japēr nē mē kaxyw hkwū ho rax nē axi. Nom kot kaj akàxpore grire japēr nē mē kaxyw mē kām ho grire nē agō. Kēr pa mēmo arīgro hā ma mē awūr mō ka mē ra mē kaxyw ho apikuprōnh rax nē.

³ Nē ma mē kot mē kām ho mōr mā xwūnhjaja ka mē ixkutēp mē akwūjē rē. Kēr pa pōj nē mē omu hāmri nē mē kaxyw kagà nhīpēx nē kamā mē harē. Nē mē kām kugō nhūm mē ma Jerujarē hwūr kàxpore mē ro hā amnhī kôt o mō nē mē kām kugō. Mē kot kamā harēnh nē mar hāmri nē mē kamjaja mē ate mē kaxyw mē rēnh ā mē ajarēnh ma.

⁴ Rū kot ka mē amā mē hkôt inhmēnh prām nē māmri mē hkôt inhmē pa ma mē hkôt mō.

Pawre kot amnhī kukamā amnhī jarēnh
Atre 19.21-22

⁵ Nom kot paj tokyx mē awūr inhmōr kēt nē. Kot paj ja rūm ixkato nē hpānhā ma pika pē Masetōn wūr mō. Hāmri nē mē hkôt ixpa grire nē ma kormā mē awūr Korīt wūr mō.

⁶ Hāmri nē pōj nē mē akôt ri ixpa ryy nē. Nē ixtā amgrā pixi nē hapēx nē rī kormā ma axte nhām krī hō hwūr mō. Nē inhnojarēt ka mē ixto Tīrtūm wū nē inhmā ixàpkur xà hkwū gō pa ma mē hwūr pry hā hkur o mō.

⁷ No ixte mẽ awÿr ixpôx nê tokyx mẽ akurũm ixkator nê hpãnhã ma nhãm krĩ hõ hwÿr inhmõrja na inhmã hprãm kêt. Jakamã koja Tirtũm kãm ja mex pa arĩ ri mẽ akôt ri ixpa hã ixtã mytwrÿ xohtô nê tokyx ma nhãm inhmõr kêt nê.

⁸ Kot paj kormã jar Epes kamã ri ixpa rãhã nhũm mẽ hkĩnh pê Pêtekos kato nê hapêx pa rĩ kormã ma Masetõn wÿr mõ.

⁹ Na pa hte jar kormã mẽ kãm Jejus kapêr jarênh o ri mẽ hkôt ixpa nhũm mẽ ohtô nê inhmar o pa. Mẽ kãm mar prãm. Tã no nhũm mẽ hkwÿjaja ohtô nê mẽ kêp ja omnuy nê nhũm mẽ hã ixkamã gryk nê ixtomnu o pa.

Mẽ kot Ximotre ho mex ã mẽ harênh Hapuhã Juãw 5

¹⁰ Nê kwa koja Ximotre mẽmo arĩgro hã mẽ awÿr pøj ka mẽ omu nê ho mex nê. Nê mẽ amnhĩ nhõrkwÿ hwÿr awÿ kê mẽ akutã apkur o pa. Na hte ixpyrà nê Pahihti Jejus mã tanhmã amnhĩ nhĩpêx to mex o pa.

¹¹ Kormã mẽ pahkĩnhã nyw tã kêr ka mẽ tee ri ja hã omu nê ri axpên mã tanhmã harênh to hkêt nê. Mẽ ãm akapêr mex pix o kãm akapêr. Nê koja akupÿn nojarêr ka mẽ pry hã kãm apkur xà hkwÿ gõ kê mex pê man akupÿn ixwÿr mõ pa tokyx omu. Kot paj jar mẽ pahkwÿjê mẽ akupÿn hpôx kamã ijamak o ixpa.

¹² Nê na pa hte xatã jar mẽ pahtõ Aporja ma mẽ awÿr mõr kaxyw mẽ awÿr hano. Kot jar mẽ pahtõ hkwÿjê mẽ ma mẽ awÿr mõr kaxyw. Nom kormã. Koja xep mẽ jar tanhmã amnhĩ to hpa nê rĩ kormã ma mẽ awÿr mõ.

Kagà jatur xà kamã Pawre kot mẽmoj tã karõ

Epes 6.10-12; Sikũn Ximotre 1.7; Wam Pêtre 5.8-9

¹³ E kwa kêr ka mẽ arĩ amnhĩ wÿr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt aja-maxpêr tÿx rãhã nê.

¹⁴ Nê mẽ amã axpên kĩnh pê tanhmã axpên to mex to.

¹⁵ Mãn ka mẽ ra Estepti mẽ hkwÿjê jarênh ma. Mẽ hkumrêxjaja na prem pika pê Gres kamã Kris kôt amnhĩ xunhwÿ. Tã xep mẽ ra Kris kôt hkwÿjê ho mex o ri mẽ hkôt pa.

¹⁶ Kêr ka mẽ ã mẽ kot amnhĩ nhĩpêx anhÿr xwÿnhjê kapêr ma nê hkôt ri amnhĩ nhĩpêx o ri apa. Mẽ kot Kris mã mẽ ajamãr xwÿnh piitã kêr ka mẽ kapêr ma nê mẽ hkôt ri amnhĩ nhĩpêx mex nê.

¹⁷ Nê ota Estepti nê Akajkre nê Putunatreta na mẽ ra jar pøj. Pa mẽ Sostenes mẽ wa mẽ omu nê wa ixkĩnh nê. Te ixte mẽ apumunh nê ixkĩnh tÿxta pyrãk.

¹⁸ Na xep prem ma mẽ awÿr mõ nê tanhmã mẽ amã kapêr to ka prem mẽ ama nê akĩnh nê. Tã mẽ ra amnê ixwÿr mõ nê tanhmã inhmã kapêr mex to pa mẽ kuma nê ijaxwÿja ixkĩnh nê. Kwa kêr pu mẽ ã mẽ kot mẽ panhĩpêx anhÿr xwÿnhjê ho mex o papa.

¹⁹⁻²⁰ Nê ota jar pika pê As kamã Kris kôt mẽ pahkwÿjaja piitã mẽ awÿr hpêr mẽ. Nê Akir mẽ hprõ Prisireja wa. Nê wa õrkwÿ kamã mẽ kot Tirtũm mã amnhĩ jarênh kaxyw mẽ pikuprõnh xwÿnh piitã mẽ awÿr hpêr mẽ.

Nê kêr ka mẽ nhÿri axpên pumu nê mẽ apê Kris kôt mẽ ate axpên to atõ nê atõx ã axpên mã akapêr mex nê akĩnh nê.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Koja inhmã ixkapêr ã kagà xwÿnhnta ja hã kagà hkêt nê. Pa kot paj hipêx. Ixpê Pawre na pa ã amnhĩ nhĩxi nhĩpêx anê ka mẽ omu.

²² Nê kwa kêr ka mẽ arĩ amã Pahihti Jejus kĩnh o ri apa. Koja mẽhõ kãm hkĩnh kêt hã koja Tirtũm ja hã homnuy tÿx kumrêx.

E “maranat.” Mẽ pakapêr kãm na htem maranat jarênh o: “Kwa tokyx akupÿn mẽ ixwÿr wrÿ Pahihti.” Anê.

²³ E kê Pahihti Jejus Krisja mẽ ato mex nê mẽ akutã nojarêr rãhã ho pa.

²⁴ Ixpyrà nê mẽ apê Jejus Kris kwÿ jakamã na pa hte inhmã mẽ akĩnh nê.

Tã ãm ja pix. Ixpê Pawre na pa ã mẽ
awỳr kagà nhĩpêx nẽ mẽnh anẽ.

Sikūn Korīt
Pawre wam Korīt kām
Jejus kôt hkwýjê hwýr
kagà nê mēnh kôt kagà hō
mēnh

Pawre na pre kagàja nhīpêx. Kêp mry hkà ho ixkre nhīpêx nê ho wēnê ho pa xwýnh na pre. Tã hpãnhã kêp Jejus nhỹ hã hkrajê jahkre ho pa xwýnh. Jakamã na pre kagàja nhīpêx nê Korīt kãm mē kot Jejus kôt amnhĩ xunhwýr xwýnhjê hwýr kumê. Na pre ra mē hwýr wamta nhīpêx nê kumê. Wam kagà nhĩxi pê Wam Korīt. Tã axte hkôt ja nhīpêx nê mē hwýr mēnh jakamã kagà nhĩxi pê Sikūn Korīt.

Na pre Korīt kãm Jejus kôt mē htōjê hō axtem nê nã puro kamã hpijaam kêt o pa nhũm Pawre tee ri harēnh ma nê mē hwýr wam kagàta mē nê kamã tanhmã mē kot hipêx to hã mē kãm karō. Tã kagà ja kamã axte tanhmã hã mē kãm karō hto.

Na pre ra Korīt wýr mē kêp Kris nhỹ hã mē ahkre hã amnhĩ to hêx xwýnhjaja mē hwýr pōj nê tanhmã mē kãm kapêr jarēnh to ho mē hkôt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã aprār to nê kãm mē hkĩnh tỳx ã amnhĩ jarê. ã na pre Pawre mē kãm mēmoj jarēnh nê hã kagà anê. Nê mē kãm hã kagà ho:

¹ Pa Korīt kãm Tirtūm krajaja. Xà mē apiitã mē amex na ka mē apa? E ot pa mē awýr kagà nhīpêx nê kumê. Mē amã nê mē anhō pika pê Gres kamã Tirtūm krajê mē mē ato xpim-ràatã mē awýr hipêx nê kumê. Ixpê Pawre na pa hte Tirtūm jamaxpêr xà hkôt ma Jejus Kris nhỹ hã krĩ piitã hkôt hkrajê jahkre ho ri ixpa. Tã Kris kôt mē pahtō Ximotre mē wa mē awýr hipêx nê kumê.

² E kê Mēpahpãm Tirtūm mē Pahihti Jejus Kris wa mē ato mex rãhã ho pa. Nê mēmoj to mē akutã nojarêt rãhã ho

pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harēnh

Rōmãn 1.11-12; Korosê 1.11; Sikūn Tesarōn 2.16

³⁻⁴ Nà Tirtūm kêp mē panhō Pahihti Jejus Kris nhīpêxà na. Nê kêp Mēpahpãm maati jakamã na hte mē pakamã ukaprĩ nê tanhmã mē pahto mex to ho pa. Kot puj mē mēmoj tã tanhmã amnhĩ to nê pahkaprĩ nê ri papa nhũm ja hã mē pahpumu hãmri nê hamaxpêr pix o akupým mē pahto mē paxihtỳx. Mēmo kaxyw na hte ã mē pahto mex anê? Nà mē pahte amnhĩ tã omunh nê amnhĩ pyrãk mē hkaprĩ nê ri mē pa xwýnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamã kwa pu mē kãm mex o mex ã mãn harēnh rãhã ho papa.

⁵ Na htem tōhã ixto Kris nhīpêx pyrã nê tanhmã ixto pa amnhĩ xà htỳx kamã ijamak o ri ixpa. Tã nhũm Tirtūm inhīpêx o te Kris nhīpêx pyrã nê hamaxpêr pix o tanhmã ixkrã hto pa mē kutã amnhĩ to htỳx nê arĩ mē hkôt ixpa.

⁶⁻⁷ Na pa hte mē amã Kris kapêr jarēnh o ixpa. Mē ate inhmar nê hkôt amnhĩ nhīpêx kaxyw. Jakamã na hte mē kãm Tirtūm kapêr mar prãm kêt xwýnhjaja tōhã mē atã ixtomnuj nê pa amnhĩ xà htỳx kamã ijamak o ri ixpa. Tã kwãr mē mãmri ã inhīpêx anê. Mē ate Jejus kôt amnhĩ xunhwýr tỳxja na inhmã hprãm. Na htem tanhmã Kris ã inhīpêx to nhũm Tirtūm mē hã ixpumu nê tanhmã ixkrã hto pa inhmã amnhĩ xà htỳx kamã ijamak pyma hkêt nê ixpa. Nê arĩ mē hkôt mē kãm kapêr jarēnh rãhã ho ri ixpa. Na hte Tirtūm amarĩ ã inhīpêx anhýr kêt nê. Mē ate ã kot inhīpêx anhýr ã ixpumunh nê ixpyrà nê amnhĩ kaxyw kãm ajamaxpêr tỳx kaxyw na hte ã inhīpêx anê. Mē ate ja hã ixpumunh nê ã ajamaxpêr anhýr kaxyw nê mē ajamaxpêr o:

—Nà kot pa nhÿrmã Pawre pyrã nê tōhã mẽ mÿrapê amnhĩ xà htÿx kamã ijamak o ixpa. Hãmri nhũm Tĩrtũm ja hã ixpumu nê te ho Pawre nhĩpêx pyrã nê tanhmã ixto pa inhmã amnhĩ xà htÿx kamã ijamak puma hkêt nê ixpa. Nà koja ã inhĩpêx anê.

Anhÿr o mẽ ajamexpêr kaxyw na hte Tĩrtũm mẽ kutã ixto ixihtÿx. Mẽ ate ja hã ixpumunh nê akupÿm tãm ajamexpêr pê Karõ nhÿ hã amnhĩ to axihtÿx kaxyw. Jakamã na pa tee ri mẽ akukamã ijamexpêr kêt nê.

Tĩrtũm kêp mẽ papytãr xwÿnh ã harênh

⁸ E Kris kôt ixkwÿjaja. Kot paj ixprĩ hã mẽ amã tanhmã amnhĩ jarênh to ka mẽ inhma. Na pa pre ma pika pê As wÿr mō nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwÿjaja ja hã ixtomnuj tÿx nê pa amnhĩ xà htÿx kamã ijamak pê mẽ hkôt ixpa. Kironhÿx pa pre mẽ kamã ty.

⁹ Na pa pre tee ri amnhĩ kukamã ijamexpêr o:

—Koja pêr mẽ ixpĩ. Tanhmã kot pa we amnhĩ to nê tokyx mẽ kêp amnhĩ pytã? Kot paj tee ri inhmã mẽ kêp amnhĩptãr prãm. Tĩrtũm pix na ja kaxyw mẽ kutã àhpumunh tÿx. Rÿ nhũm mẽ kot ixpĩr tã nhũm kot akupÿm ixto ixtĩr kaxyw tapxipix na àhpumunh tÿx. Nà kot paj amnhĩ kaxyw tapxipix mã mãn ijamexpêr o ri ixpa nhũm amnhĩ tã ixpumu nê hkĩnh nê. ã ixte amnhĩ nhĩpêx anhÿr o ixpaja na kãm hprãm. Anê.

¹⁰ Tã nhũm pre ã inhĩpêx anê nê xatã mẽ kêp ixpytãr o ixkôt pa. Koja ã mẽ kêp inhĩpêx anhÿr rãhã ho pa. Nà ã kot inhĩpêx anhÿr mã kênã.

¹¹ Nom kwa kêr ka mẽ apiitã arĩ ixto Tĩrtũm wÿr rãhã ho ri apa kê mẽ ama nê mẽ kãm ixkurê xwÿnhjê kutã ixto ixihtÿx rãhã ho pa. Nê ixto mex rãhã nê. Hãmri nhũm mẽ ohtô nê kot mẽ kêp tanhmã ixpytãr to hã ixtã omu nê ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korît 2.1-5

¹² Nê na xep pre atar Kris kôt mẽ pahkwÿjaja tanhmã ixto kapêr punuj to nê Jejus kot mẽ awÿr inhmênh kêt ã mẽ amã ixto hêx. Nê ijakwa nhĩkê ho inhmã mẽ akĩnh nê ijakwa nhĩkê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhÿr kêt. Aa ixte tanhmã mẽ ano kupyrr to hkêt. ãm hãmri na pa mẽ amã amnhĩ jarê nê tãm mẽ amã ixkapêr o ri ixpa nê tãm ri mẽ anhĩpêx o ri ixpa. No ijamexpêr tũm kôt tanhmã mẽ anhĩpêx to hkêt nê. ãm Tĩrtũm kot mẽmoj to mẽ pakutã nojarêr ã omunh xà hkôt pix mã na pa hte ÿ hã mẽ ato mex o ri ixpa. Ijamexpêr nyw o. Na pa hte Tĩrtũm pyrã nê mẽ piitã mẽ ho mex nê. No mẽ kajaja ixpyrãn mẽ apê hkra jakamã na pa hte mẽ ato mex kumrêx o ri ixpa.

¹³ Na pa hte mẽ amã kagã hkwy nhĩpêx nê ixprĩ hã mẽ amã tanhmã mẽmoj jarênh to. Mẽ ate kamã harênh nê mar mex kurê kumrêx kaxyw. No na pa hte mẽ amã tanhmã ixêx to rÿ tanhmã mẽ ano kupyrr to hkêt nê.

¹⁴ ã ixte amnhĩ nhĩpêx anhÿr o ri ixpa htã kormã mẽ apiitã ja hã ixpumunh mex kêt nê. Nê Jejus kot mẽ awÿr inhmênh ã ixpumunh mex kêt nê. Jakamã na hte mẽ akwÿjaja ixto akapêr punuj o pa. Tã kot kaj mẽ nhÿrmã ãm hãmri Jejus kot mẽ awÿr inhmênh ã axpên mã ijarê pa mẽ ama nê ixkĩnh nê. Hãmri nhũm nhÿrmã mẽ panhõ Pahihti Jejus mẽ pahwÿr akupÿn wrÿ pa kãm mẽ ajarê nê kãm: —E Pahihti. Jajê mã na pa pre akapêr jarênh o ixpa nhũm mẽ inhma nê akôt amnhĩ xunhwÿr kurê kumrêx nê tãm amnhĩ nhĩpêx mex o pa.

Anhÿr o kãm mẽ ajarê. Hãmri nê ã mẽ ate amnhĩ nhĩpêx anhÿr ã mẽ apumunh kôt ixkĩnh nê. Ka mẽ ajaxwÿja akĩnh pê tanhmã kãm ijarênh to ho akuhê.

Pawre hêx kêt ã kot amnhĩ jarênh
Wam Korît 16.5-6

15-16 Nê na pa pre ra mẽ awÿr ixkrà. Ixte ma mẽ awÿr inhmôr nhùm mẽ ate ixpumunh nê akĩnh ã mẽ akamnhĩx nê mẽ awÿr ixkrà nê ijamaxpêr o:

—Nà ma Masetôn wÿr inhmôr xwÿj ri kot paj ma Korîit kumrêx wÿr mō. Hāmri nê Kris kôt ixkwÿjê pumu nê rĩ kormã hamũ Masetôn wÿr mō. Nê mẽ kamã ri ixpa tãmtã awjanã nê akupÿn Korîit wÿr mō nê axte mẽ omu. Jao Tirtûm kapêr o mẽ ahkre ho axkrut nhùm mẽ amnhĩ tã ixpumu nê hkĩnh nê. Hāmri pa akupÿm Jutej wÿr inhnojarêt nhùm mẽ pry hã ixàpkur xà hã inhmã mẽmoj kwÿ nhôr japêr.

Anhÿr o ijamaxpêr.

17 Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wÿr ixkãm ama nê axpên mã ijarênh o:

—Kwa Pawre kot ra mẽ pahwÿr nojarêt ã amnhĩ jarênh tã amnhĩm nojarêt kêt kumrêx. Mãn pre ãm mẽ pamã amnhĩ to hêx nã? Ra kot mẽ pamã amnhĩ jarênh tã tokyx hpôx kêtêre hã. Anê.

18 Kwa mẽ ri ã inhmã ajamaxpêr anhÿr kêt nê. Na pa pre mẽ amã ixêx kêt nê. Na pa hte Tirtûm noo mã ãm hāmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nà ãm hāmri na pa pre ma mẽ awÿr inhmôr ã amnhĩ jarê.

19 Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tirtûm Kra hã harê nê kot amnhĩ nhĩpêx te kot Tirtûm kot amnhĩ nhĩpêx pyrãk ã harênh o ri ixpa. Jejus haxwÿja amnhĩ to hêx kêt. Kot mẽmoj tã amnhĩ jarênh xà hkôt na hte ãm hāmri tanhmã amnhĩ nhĩpêx to. Tã ã kot amnhĩ nhĩpêx anhÿrja kôt na pa inhmã ixte amnhĩ nhĩpêx o ixpa hprãm nê.

20 Ra Tirtûm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

—Koja Tirtûm Jejus kukwak ri mẽ pahto mex rax nê. Ra kot mẽ pahtã

amnhĩ jarênh xà hkôt. Nà Tirtûm mex o mex. Anê.

Tirtûm kot mẽ pa hwÿr Karõ rênh ã harênh

Rômãn 8.14; Epes 1.13

21 Nà Tirtûmja mex o mex. Kot mẽ pahpê hkra kaxyw amnhĩm mẽ paxunhwÿr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwÿ nhùm Tirtûm ja hã mẽ pahpumu nê mẽ pahwÿr Karõ rê nhùm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhùm mẽ kot kêp õ dôn ã omunhta pyrãk. Tã koja Tirtûm Karõ mẽ pakamã hkrĩ pu mẽ ja hã amnhĩ pumunh kôt Tirtûm kot nhÿrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhÿrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korîit 4.21; Sikûn Korîit 10.1-2

23 E Kris kôt ixtõ nê ixtõxjaja. Kot paj kormã ma mẽ awÿr inhmôr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tirtûm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awÿr inhnojarêt tã no ãm tee ri amnhĩ kukamã ijamaxpêr nê ijamaxpêr o:

—Nà kot paj taxy kormã ma mẽ hwÿr inhmôr kêt nê. Kot paj tokyx mẽ hwÿr mōn pōj nê kot amnhĩ tomnuj xwÿnhta ã mẽ kãm akir nê nê tanhmã mẽ kãm ixkapêr to. Hāmri nhùm mẽ amnhĩ tã inhma nê hkaprĩ nê tee ri amnhĩ kukamã hamaxpêr. ã mẽ kot amnhĩ nhĩpêx anhÿr pymaj kot paj kormã mẽ hwÿr inhmôr kêt nê.

Anhÿr o ijamaxpêr.

24 Inhmã ma mẽ awÿr inhmôr nê tanhmã mẽ ate amnhĩ nhĩpêx to hã

axte mẽ amã karõ kamã ixih̄t̄ȳx prãm kêt. Mẽ akw̄ȳjê rom ra mẽ ate Kris hkõt amnhĩ xunhw̄ȳr t̄ȳx kênã. Tã mẽ ate hkõt amnhĩ nhĩpêx mex o akĩnh nẽ apaja na inhmã hprãm.

2

¹ Na pa pre ma mẽ aw̄ȳr mõ nẽ mẽmoj tã mẽ amã akir nẽ nẽ tanhmã mẽ amã ixkapêr to ka prem inhma nẽ akaprĩ nẽ ri apa. Tã inhmã akup̄ȳm mẽ aw̄ȳr inhmõr nẽ axte mẽ amã ixàkjêr prãm kêt jakamã na pa kormã mẽ aw̄ȳr inhmõr kêt nẽ.

² Kot kaj mẽ akĩnh nẽ apa pa ijaxw̄ȳja ixkĩnh nẽ ixpa. No kot paj ma mẽ aw̄ȳr mõ nẽ mẽmoj tã mẽ amã akir ka mẽ tee ri inhma nẽ akaprĩ nẽ. Pa mẽ apumu nẽ ijaxw̄ȳja ixkaprĩ nẽ.

³ Ja pymaj na pa pre wam ixte mẽ aw̄ȳr kagã mênhta kamã mẽmoj nẽ tanhmã mẽ amã ixàkjêr to. Mẽ ate kamã harênh nẽ mar nẽ tokyx kormã mẽ aw̄ȳr inhmõr xw̄ȳj ri tanhmã mẽ ate amnhĩ tomnuj tota kaga nẽ tãm amnhĩ nhĩpêx kaxyw. Kêr pa mẽmo arĩgro hã ma mẽ aw̄ȳr mõn pøj nẽ mẽ ate tãm amnhĩ nhĩpêx o apa hã mẽ apumu nẽ ixkaprĩ hkêt nẽ ixkĩnh nẽ. Ka mẽ ajaxw̄ȳja ixpumu nẽ akĩnh nẽ.

⁴ Jakamã na pa pre ã mẽ amã kagãta nhĩpêx nẽ mẽ aw̄ȳr mênh anẽ. Nẽ kamã mẽmojta nẽ tanhmã mẽ amã ixàkjêr to. Na pa pre ixkaprĩ ht̄ȳx nẽ tee ri mẽ akukamã ijamaxpêr o inhm̄ȳr rax pê mẽ amã mẽmojta ã kagã. No ãm mẽ akaprĩ kaxyw na pa pre mẽ amã hipêx kêt nẽ. ãm mẽ ate kamã harênh nẽ inhmar nẽ ajamaxpêr o:

—Hêxta waa nẽ. Nà Pawre na kãm mẽ pahkĩnh t̄ȳx kumrêx. Hã na pre mẽ pahte tanhmã amnhĩ tomnuj to hã mẽ pajarênh ma nẽ tee ri mẽ pakukamã hamaxpêr pê kagãja kamã hã mẽ pamã akir nẽ mẽ pahw̄ȳr kumẽ. Nà kãm mẽ pahkĩnh t̄ȳx kãm na ã mẽ pamã kapêr kãm hiht̄ȳx anẽ.

Anh̄ȳr o ajamaxpêr kaxyw na pa pre hipêx nẽ mẽ aw̄ȳr kumẽ.

Mẽ kot axte amnhĩ tomnuj mã hamaxpêr kêt ã mẽ kãm karõ

Rukre 17.3-4; Wam Korî̄t 5.1-13; Karatas 6.1-2

⁵⁻⁹ Nẽ wam kagãta kamã na pa pre mẽ amã mẽ akw̄ȳjê hõ kot nã kaàkre kamã hpijaam kêeta pa mẽ amã tanhmã hã karõ hto. Ra mẽ ate harênh mar tã nẽ kãm akapêr kêt nẽ. Tã mẽ ate inhmar nẽ nẽ tanhmã kãm akapêr to nẽ amnhĩ nẽ hanor kaxyw na pa pre mẽ aw̄ȳr kagãja mẽ. Hãmri nẽ ijamaxpêr o:

—Ko. Koja mẽ ixkapêr mar xà hkõt amnhĩ nẽ hanor japêr. Anẽ.

Tã ka xep prem kamã harê nẽ ama nẽ tee ri ja hã amnhĩ pumu nẽ akaprĩ nẽ. Nẽ ixpyrà nẽ apijaam nẽ. Hãmri nẽ ijamaxpêr xà hkõt amnhĩ nẽ hanor kãm axih̄t̄ȳx nẽ. ãm hãmri na ka prem ã hipêx anẽ. Nhũm xep tee ri ja hã amnhĩ pumu nẽ hkaprĩ nẽ hkaprĩ xaj ri m̄ȳr o pa. Jao ra ã amnhĩ nhĩpêx anh̄ȳrta kaga nẽ akup̄ȳm tãm amnhĩ nhĩpêx. Tã ra ã kot amnhĩ nhĩpêx anh̄ȳr jakamã kwa mẽ tokyx akup̄ȳm amnhĩ w̄ȳr aw̄ȳr kê axte mẽ aw̄ȳr mra nẽ mẽ akõt pa. Ra kot amnhĩ tomnujta kaga jakamã kêr ka mẽ axte kãm ajamaxpêr kêt nẽ. Akup̄ȳm tãm kãm akapêr kê tokyx akup̄ȳm tãm hamaxpêr nẽ hkĩnh nẽ pa. Kot kaj mẽ tokyx ã hipêx anh̄ȳr kêt nẽ nhũm tee ri amnhĩ kukamã hamaxpêr nẽ hkaprĩ nẽ pa. Ja pymaj kwa mẽ amã hkĩnh ã kãm amnhĩ jarê nẽ akup̄ȳm tãm kãm akapêr pê tãm hipêx o ri apa. Kê amnhĩ tã mẽ apumu nẽ akup̄ȳm hkĩnh nẽ tãm hamaxpêr.

¹⁰ E kêr ka mẽ axte kot tanhmã amnhĩ tomnuj tota mã ajamaxpêr kêt nẽ. Kwarĩ ho kwarĩ. Kot kaj mẽ ã hipêx anẽ pa ijaxw̄ȳja ma hipêx anẽ. Nõ pa na pre tanhmã ixtomnuj to hkêt nẽ. ãm Jejus kapêr kw̄ȳm na pre ri ã amnhĩ nhĩpêx anẽ. Tã ra kot amnhĩ tomnujta kaga jakamã kot paj Jejus nh̄ȳ hã akup̄ȳm tãm hipêx nẽ kot amnhĩ tomnujta o ijamakêtkati tokyx anẽ nẽ axte kãm ijamaxpêr kêt nẽ. Mẽ apiitã mẽ amex nẽ ri mẽ apa kaxyw. Jakamã kêr ka mẽ ajaxw̄ȳja mẽ amex

nē apa kaxyw ã amnhĩ nhĩpêx anē nē axte kãm ajamexpêr kêt nē.

¹¹ Kwa mẽ tokyx ja ho ajamakêtkati. Kê Satanasti tee ri ja hã mẽ apumu nē mẽ amã mẽ ate tanhmã amnhĩ tonuj to hprãm xaj tee ri tanhmã ri mẽ ato ho pa kaprÿ. Kêr pu mẽ Satanasti kot amnhĩ nhĩpêx kôt amnhĩ nhĩpêx o ri papa hkêt nē. Ra mẽ pahte Tĩrtũm kapêr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harênh

¹² Nē na pa pre ja rũm ixkato nē ma Tôx wÿr mō. Ixte mẽ kãm Kris jarênh o mẽ hkôt ixpa kaxyw ma mẽ hwÿr mō. Nhũm Pahĩti Kris ixkukamã tanhmã mẽ hkrã hto jakamã pa pre mẽ hwÿr pōj nhũm mẽ piitã kãm ixujarênh mar prãm nē. Pa pre mẽ kãm Tĩrtũm kapêr jarênh ryy ho mẽ hkôt ixpa.

¹³ Na pa pre Xitre ra mẽ hwÿr ixkukamã hpôx ã hkamnhĩx tã nhÿri omunh kêt nē. Hãmri nē ijamexpêr o: —Hêxta waa nē. Inhmã Korît kãm Jejus kwÿjê jarênh mar prãm. Na pa tee ri mẽ hkukamã ijamexpêr o ixpa. Nom kormã Xitre mẽ kurũm akupÿn hpôx kêt. Mãn kormã Masetõn kamã pa.

Anhÿr o ijamexpêr hãmri nē mẽ kãm amnhĩ jarē nē ixkato nē ma Masetõn wÿr krĩ hkwȳ hkôt hapêr o mō. Tã ra hwÿr ixkato nē omu.

Te mẽ pahpê mẽhkuxwa xà pyræk ã mẽpajarênh

Epes 5.2; Piripos 4.18

¹⁴⁻¹⁶ Nã Tĩrtũmja mex o mex. Na hte mẽ pahto mex rãhã ho pa. Nē mẽ kot mẽ panē àmnàr xwÿnhjaja nhũm hte tanhmã mẽ ho pu mẽ ma paxamnhĩx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk. Mẽ pahte Kris kôt amnhĩ nhĩpêx jakamã Tĩrtũm mã te mẽ pahkuxware nē ri mẽ papa pyræk. Nē te mẽ kãm Kris jarênh o ri papa pē te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwȳjaja mẽ pama nē kãm mar prãm nē. Nē mẽ paxujarênhja haxwÿja te kot mẽ

hkuxwa xà kuxwa mex nhũm htem hpâr nē kãm ho amnhĩ kuxwa hprãm pyræk. Jao kãm mẽ pamar prãm nē Kris kôt amnhĩ xunhwÿ. No nhũm mẽ hkwȳjaja axtem nē mẽ kêp mẽ pamar prãm nõkati. Mẽ kumã Tĩrtũm kapêrja te kêp wenên kuxÿ htÿx nhũm mẽ kot hpâr nē htyk pymaj amÿm kuhê pyræk. Jao kapêr kaga nē kêp amÿm amnhĩ xunhwÿ.

Nē na pu htem amnhĩ krã hkôt mẽ kãm Kris kapêr jarênh o ri papa hkêt nē. Æm Tĩrtũm nhÿ hã pix mã tanhmã harênh to ho papa.

Pawre kot katàt kôt Tĩrtũm kapêr o mẽ ahkre hã harênh

¹⁷ Na hte mẽ kot mẽ kêp Kris nhÿ hã mẽ ahkre hã amnhĩ to hêx xwÿnhjaja te Tĩrtũm kapêr o wênê pyræk o mẽ hkôt pa. Jao kàxpore hprãm xaj amnhĩ krã hkôt tanhmã mẽ kãm harênh to nhũm htem mẽ kuma nē hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhÿr kêt nē. Nē mẽ uræk nē amnhĩ krã hkôt Tĩrtũm kapêr jahkre ho ixpa hkêt nē. Tĩrtũm kot mẽ akaxyw ixãm jakamã na pa hte ixkatàt kôt Kris nhÿ hã amarĩ mẽ amã kapêr jarênh o ri mẽ akôt ixpa. No mẽ uræk nē kàxpore prãm xaj mẽ amã harênh kêt nē. Tĩrtũm kot ja hã ixpumunh mex.

3

¹ Mẽ kêp Kris nhÿ hã mẽ ahkre hã amnhĩ to hêx xwÿnhjaja na htem nhÿhÿm nojarêt nē mẽ kot mar xwÿnhjê mã:

—E kot paj ma nhãm krĩ hō hwÿr mō nē Tĩrtũm kapêr o mẽ ahkre. Jakamã kwa mẽ kaxyw inhmã kagà nhĩpêx nē kamã ixte Tĩrtũm kapêr o mẽ ajahkre mex xwÿnh ã ijarē nē hã kagà. Hãmri nē inhmã agō pa ma amnhĩ kôt o mō nē mẽ kot inhmar mã xwÿnhjê mã kugō kê mẽ kamã harē nē ijarênh ma nē kãm ixkapêr mar prãm nē.

Anhÿr o na htem amnhĩ to mẽ hwÿr o pa. No pa na inhmã ã amnhĩ nhĩpêx anhÿr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã

mē kot ixkatàt kòt ixte Tirtūm kapēr jarēnh mex ā xpumunh mex jakamā mo kaxyw kot pa ri amnhī kòt kagà jamy nē ho ixpa? Nà kot pa amnhī kòt hō ho inhmōr kaxyw hā ixàhwyr kēt nē.

²⁻³ Mē kajaja te mē apē inhō kagà pyrāk. Na ka prem ixte mē ajahkre ma nē Jesus kòt amnhī xunhwyr kurē kumrēx. Hāmri nhūm Tirtūm mē amā amnhī Karō rē nhūm mē amā agjē ka mē ŷ hā amnhī nhīpēx nyw o amnhī nhīpēx o apa. Hāmri nhūm mē akwỳjaja amnhī jaēr pē mē ate amnhī nhīpēx nyw ā mē apumu nē mē atā xypēn mā ijarēnh o:

—Hēxta waa nē. Pēr ām hāmri na pre Kris mē hwyr Pawre mē. Na pre ma mē hwyr mō nē mē kām Tirtūm kapēr o mē ahkre nhūm mē kuma nē amnhī tomnuj kaga hpa nē hpānhā Tirtūm kapēr kòt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Hēxta waa nē.

Anhūr o mē atā ijarēnh jakamā mo kaxyw kot pa kagà hkwỳ jamy nē amnhī kòt ho ixpa? Nà mē kajaja te mē apē inhō kagà pyrāk.

⁴ Na pa pre Jesus kòt amnhī xām nhūm Tirtūm ja hā xpumū nē tanhmā inhmā kapēr o amnhīrīt to nē inhmā:

—E Pawre. Kēr ka ma mē kām ixkapēr jarēnh o ri mē hkòt apa.

Anhūr jakamā na pa hte Tirtūm kamnār rom ā amnhī nhīpēx anhūr o ri mē hkòt ixpa.

⁵ Nom amnhī krā hkòt mē ahkre hkēt nē. Tanhmā kot pa we amnhī to nē amnhī krā hkòt mē kām kapēr o mē ahkre mex nē? Nà Tirtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tirtūm kapēr nyw jarēnh

⁶ Nē Tirtūm na hte tanhmā ixkrā hto pa Karō nhī hā mē piitā mē kām kapēr nyw jarēnh o ri ixpa. Amnepēm Tirtūm kot Ijaew mā mēmoj tā karō xwỳnhta. Mojes kot kapēr tūm jarēnh o pa xwỳnhta mex tā no nhūm mē tee ri hkòt kām amnhī nhīpēx prām o pa.

Nē xatā kamā harē nē omunh tā tee ri kot hkòt kām amnhī nhīpēx prām. Tā mē kot hkòt amnhī nhīpēx kēt mýrapē na prem pikaprār pan hapēx. No kēt Tirtūm kapēr nywja. Jejus jarēnhja. Na hte Tirtūm Karō tanhmā mē pahkrā hto pu mē Jejus kòt amnhī nhīpēx o ri papa. Jao mē pahpē pahūr tūm nē papa mā xwỳnh. No na hte nhām mē hkwỳjaja kām harēnhja mar prām kēt nē amnhī jarēnh o:

—Nà kot paj amnhī krā hkòt ā amnhī nhīpēx anē nē ā amnhī nhīpēx anē nhūm Tirtūm ja hā xpumū nē ixtūr tūm nē ixpa mā xwỳnh ā ijarē.

Anhūr tā no ām ā amnhī jarēnh anhūr kaprỳ. Tirtūm Karō nhī hā mē kot amnhī to mex o mē pa xwỳnh pixjaja koja mē htūr tūm nē pa ho pa.

⁷ Nē Tirtūm kapēr tūmta na pre Mojes mē kām harēnh kaxyw nhūm mēmoj tanhmā amnhī nhīpēx to rax kumrēx. Naja hkrakrak nē haxēnh nē kamā kamàt kō htyk. Hāmri nhūm Tirtūm mē kot hkòt amnhī nhīpēx kaxyw kēn po hā mē kām mēmoj tā karō nhūm Mojes kumy nē mē hwyr o wry nē mē kām kamā harē. Tirtūm kot hirā htỳx kamā kām kapēr nhūm kuri mar o ām jakamā urāk nē ŷ hā hkuk nhīrā htỳx kumrēx nē mē kām kapēr jarēnh o xa. Jakamā nhūm mē tee ri kot hprī hā omunh mex kaxyw no ām nom gēk tỳx nē. Tā gaa nhūm hkuk kām hirāja amnhīm hprī nē hapēx o mō. Na pre ā Tirtūm Ijaewjē mā kapēr tūm nhōr anē. Hāmri nhūm Mojesja ô ri mē kām kamā harē nē harēnh pa hāmri nē mē kām:

—E kēr ka mē Tirtūm kapēr mar tỳx nē hkòt amnhī nhīpēx mex rāhā ho ri apa. Kēr ka mē nhūr mā atyk tā kē akupỳm mē ato mē atūr ka mē ô krī kamā kuri atūr tūm nē amex nē apa ho apa. Anē.

Hāmri nhūm mē kuma nē kām:

—Tōe. Nà kot paj mē hkòt pix mā ri amnhī nhīpēx mex rāhā ho ri ixpa.

Anhūr ā amnhī jarēnh tā no ām hkòt amnhī nhīpēx kēt nē nhūm Mojes tee ri mē kot amnhī nhīpēx ā mē omū nē mē kām:

—Nà mẽ ate Tirtûm kapêr kôt amnhî nhîpêx kêt jakamã kot kaj mẽ nhÿrmã ty nê Tirtûm pê awry rax kumrêx nê ri apa. Anê.

⁸ Tã na hte Tirtûm jarãhã axtem tanhmã mẽ pamã kapêr to. Pãnhã kapêr nyw o kapêr nê mẽ pamã:

—Kot kaj mẽ Ixkra Jejus kôt amnhî xunhwÿ pa hã mẽ apumu nê mẽ ato ixkra. Hãmri nhÿm Ixkarõ mẽ amã agjê. Anê.

Kapêr ja na mex kumrêx o kot kapêr tûm jakrenh.

⁹ Kapêr tûmja mex tã nhÿm htem hkôt amnhî nhîpêx kêt nê. Jakamã na htem ty nê Tirtûm pê awry rax ã ri pa. No kapêr nywja na tûmta rom mex o mex. Na hte Tirtûm mẽ pamã kapêr nywja jarênh o:

—Kot paj tanhmã mẽ akrã hto ka mẽ amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpôk kryre pyrãk. No kapêr nywja mex o kot tûm jakrenh jakamã te kot mẽmo hpôk rûnh o kanê hpôk kryre jakrenh pyrãk. Jakamã nhÿm mẽ kot hirã rax kãm ri mrar gryk ã hpôk grire nhîrã kamã mrar kêt pyrãk.

¹¹ Tirtûm kapêr tûm te kot Mojes kuk pyrãk. Na pre kamã hirã rax tã gaa nê amnhîm hprî nê kamã hirã hapêx o mõ. Nê gaa nê hapêx. No kêt Tirtûm kapêr nywja te kot Tirtûm nhîrã htÿx rãhã ho rãhãta pyrãk. Koja urãk nê aa hapêx kêt kumrêx.

*Ijaewjê jarênh
Rômãn 11.7-10*

¹² Nê Tirtûm kapêr nywja mex o mex jakamã na pa hte ixãmnhîx mẽ kãm harênh o ri ixpa.

¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã àmnhîx Ijaewjê mã Tirtûm kapêr jarênh o ri pa hkêt nê. Mẽ kot hkuk kãm hirãta ra hapêx o mõr ã omunh nhÿm hpijaam pymaj na pre kupêxê puroore ho amnhî kuk pro nê ri mẽ hkôt pa.

¹⁴ Jakamã nhÿm prem hprî hã hkuk kãm hirã pumunh mex kêt nê. Nê

Tirtûm kapêr ã kagã htÿmja nhÿm prem mãânên hprî hã mar mex kêt nê. Mẽ hkrã hihtÿx jakamã te mẽ kot amnhî jamak pro nê mẽmoj mar mex kêt pyrãk jakamã mẽ kot mar tã hprî hã mar kêt nê. Nê hkôt ri amnhî nhîpêx mex kêt nê. No mẽ kot Kris kôt amnhî xunhwÿr xwÿnhjaja na hte Tirtûm amnhî tã mẽ omu nê te mẽ nê mẽ hamak hpro xãta rênh par nê rênh pyrãk o mẽ hipêx nhÿm mẽhprî hã kapêr mar tÿx nê.

¹⁵ Tã na hte Ijaewjaja arî jarãhã Mojes kot Tirtûm kapêr ã kagã htÿm kamã harênh o pa. Nom arî mẽ hkrã hihtÿx jakamã te mẽ kot amnhî jamak pro nê kamã harênh o pa pyrãk o amnhî nhîpêx jakamã kormã hprî hã mar kêt nê.

¹⁶ Tã koja mẽ hkwyjaja Pahihti Jejus Kris kôt amnhî xunhwÿ nhÿm amnhî tã omu nê te kot mẽ hamak nê hpro xã hpyr nê mẽnh pyrãk o mẽ hipêx nhÿm mẽhprî hã kapêr nyw mar tÿx nê.

¹⁷ Pahihti mẽ Karõja wa htipxi jakamã na hte mẽ pakamã agjê nê hprî hã mẽ pamã kapêr o amnhîrît o pa.

¹⁸ Ra mẽ pahte Pahihti Kris kôt amnhî xunhwÿr jakamã te mẽ pahte mẽ kot amnhî jamak pro xwÿnh kot amnhî nhîpêx pyrãk kêt. Nhÿm Pahihti Karõja tanhmã mẽ panhîpêx to pu mẽ ra hkôt amnhî nhîpêx mex o mõ. Jakamã na htem mẽ pahte amnhî nhîpêx nyw pumunh kôt Tirtûm kot tãm amnhî nhîpêx ã omunh kurê kumrêx. Kormã mẽ pahte hkôt amnhî nhîpêx mex kumrêx kêt tã ra hkôt amnhî nhîpêx mex o mõ. Jao te tãm kot amnhî nhîpêx pyrãk o amnhî nhîpêx o mõ.

4

Jejus kapêr te kêp kanê pyrãk ã harênh

Wam Korî 2.1-5; Sikûn Korî 1.12; Wam Tesarôn 2.1

¹ Nê na pre Tirtûm ixto mex nê tanhmã kãm ixapênh to hã inhmã karõ. Ixte ma mẽ kãm kapêr jarênh o ri mẽ hkôt ixpa kaxyw. Jakamã na pa

hte ixàmnhîx mẽ hkôt mẽ kãm harênh o ri ixpa.

² Nhùm mẽ hkwýjaja axtem nê ixêx o ri ixpa hã ijarênh tã ixte ã amnhî nhîpêx anhÿr kêt. Na pa hte amnhî tomnuj o ri ixpa hkêt nê. Mẽ hkwýjaja kot mẽ no kupyw kaxyw mẽ kãm Tirtùm kapêr o hêx o pa htã pa na pa hte ã amnhî nhîpêx anhÿr kêt nê. Ixpri hã mẽ kãm harênh o ixpaja na inhmã hprãm jakamã na pa hte ixkatat kôt harênh o ri mẽ hkôt ixpa. Mẽ piitã mẽ kot ixêx kêt kôt ixpumunh mex kaxyw. Tirtùm kot ixêx kêt kôt ixpumunh mex.

³ No nhÿrmã mẽ htyk nê ma kuwy hwÿr mẽ pa mã xwýnh pixjaja na htem hprî hã ixkapêr mar mex kêt nê.

⁴⁻⁶ Satanasti tãm kêp mẽ hpãm. Kêp mẽ kãm Tirtùm kapêr mar prãm kêt xwýnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tirtùm Kra hã harê nê te kot Tirtùm kot amnhî nhîpêx pyrãk ã harênh o ri ixpa. Hãmri nhùm Satanasti tee ri ja hã ixpumu nhùm ja kêp omnuj nê. Jakamã nhùm tanhmã Tirtùm nê mẽ hkrã hto nê te mẽ hamak pro pyrãk o mẽ hipêx. Mẽ kot hprî hã Jejus jarênh mar nê hkôt amnhî xunhwÿr pymaj nhùm ã nê mẽ hipêx anê. Jejus jarênh te kêp kanê hpôk mex pyrãk jakamã mẽ kot mar kêt xwýnhjaja te kamãt kô kamã ri mẽ pa pyrãk. No nhùm Satanasti tãm kot nê mẽ no kupyw jakamã nhùm htem ã ri kamãt kô kamã mẽ pa pyrãk o amnhî nhîpêx anê.

Amnepê mã kormã mẽmoj kêt ri nhùm kamãt kô pix. Tã nhùm Tirtùm tanhmã kapêr to nê kapêr o:

—E kê hirã kato. Anê.

Hãmri nhùm ra kapêr xà hkôt hirã kator kurê kumrêx. Tã ja pyrã nê na pa pre kamãt kô kamã ixtýx ri ixpa pyrãk nhùm Tirtùm te kot inhmã kanê hpôk nhùm hirã pyrãk o inhîpêx pa mex o mex ã omunh kurê kumrêx. Hãmri nê Jejus Kris kot amnhî nhîpêx ã omu nê te Tirtùm kot amnhî nhîpêx ã omunh pyrãk. Wa kot amnhî nhîpêx te kot axpên pyrãk.

Nê na pa hte pam tanhmã amnhî jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihtî. Jakamã hkînhã te ixpê mẽ amã ixapênh xwýnh pyrãk o na pa hte mẽ amã kapêr jarênh o ri mẽ akôt ixpa.

Pawre te kêp poti grãre nhîpêx pyrãk ã harênh

Wam Korî 2.4-5; Sikùn Korî 11.23, 12.9

⁷ Nê Tirtùm ixrom hihtýx o hihtýx. No pa na hkînhã ixihtýx kêt. Te ixpê poti grãre nhîpêx pyrãk jakamã na pa hte Tirtùm xihtýx xwýnh pix nhÿ hã mẽ kãm kapêr jarênh o ri mẽ hkôt ixpa. Nhùm htem inhma nê ãm hãmri ixte ÿ hã ixkapêr ã ixpumunh kurê kumrêx. No pa ixte amnhî krã hkôt ixkapêr ã ijarênh kêt nê.

⁸ Na pa hte mẽ hkôt mẽ kãm Jejus jarênh o ri ixpa nhùm mẽ hkwýjaja tõiã inhma nê ja hã inhîpêx kati nê pa amnhî xà htýx kamã ama. Nom nhùm Tirtùm mẽ kutã tanhmã ixkrã hto pa inhmã amnhî xà kamã ijamak puma hkêt nê arî mẽ kãm kapêr jarênh o ri mẽ hkôt ixpa. Nê amnhî kaxyw Jejus kôt pix mã ijamaxpêr týx rãhã pê tee ri amnhî kukamã ijamaxpêr o ri ixpa hkêt nê.

⁹ Nê mẽ kãm ixkurê xwýnhjaja ohtô. Na htem xatã Jejus ã tanhmã ixtomnuj to htã pa kormã ixtýk kêt nê. Na pa hte Tirtùm kamnàr rom arî mẽ hkôt ixpa nhùm Tirtùm ixkôt pa ho pa.

¹⁰ Na htem Jejus pyrã nê ixpîr kaxyw tanhmã inhîpêx to. No ãm ko. Kojã mẽ nhÿrmã ixpî rý ko. Ixte amnhî kukamã ixãhpumunh kêt. Kot paj ãm arî ixtîr ri mẽ kãm Jejus jarênh o ri mẽ hkôt ixpa. Kêr kê mẽ hkwýjaja ixkapêr ma nê axpên mã tanhmã Jejus jarênh to nê harênh o:

—Nà pêr ãm hãmri na pre Jejus akupým htîr nê tanhmã hkwýjê ho mex to. ãm hãmri na hte Pawre ja hã harê. Anê.

¹¹ Mẽ kot Jejus ã ixpîr mã tã pa arî mẽ kãm akupým htîr ã harê. Tirtùm

na hte ja kaxyw tanhmã ixkrã hto pa arĩ mẽ kãm harẽnh o ri mẽ hkõt ixpa.

¹² Na pa pre ra mẽ amã harẽ ka prem inhma nẽ Jejus kõt amnhĩ xunhwÿr kurẽ kumrẽx nẽ amnhĩ nhĩpẽx nyw o amnhĩ nhĩpẽx o ri apa. Jakamã ixpyrà nẽ mẽ apẽ atĩr tũm nẽ apa mã xwÿnh. Nhũm htem piitã mẽ ate Jejus kõt amnhĩ xunhwÿr ã mẽ apumu. Tã nhũm mẽ kot Jejus ã xpĩr kaxyw. Nom kwãr mẽ mãmrĩ xpĩ. Ja inhmã tanhmã kute hkõt. Mẽ kot xpĩr mã tã kot paj arĩ Jejus kapẽr jarẽnh o ri ixpa rãhã ty. Ra mẽ kot ixkapẽr mar nẽ Jejus kõt amnhĩ xunhwÿr xwÿnhjaja mẽ pahpyrà nẽ kẽp htĩr tũm nẽ pa ho pa mã xwÿnh kẽnã.

¹³ Jakamã kwãr mẽ mãmrĩ xpĩ. Na pa hte arĩ amnhĩ kaxyw Tĩrtũm kõt ijamaxpẽr mex rãhã nẽ. Amnepẽ mã na pre Pahi finat Tawija tanhmã Tĩrtũm kapẽr jarẽnh to nẽ harẽnh o:

Ãm hãmri na Tĩrtũm kapẽrja. Hẽx kêt jakamã na pa hte mẽ kãm harẽnh rãhã ho ri ixpa. Anẽ.

Tã pa hte Tawi pyrà nẽ mẽ piitã mẽ kãm Tĩrtũm kapẽr jarẽnh o ri ixpa. Tĩrtũm kot mẽ pamã tanhmã mẽmoj to hẽx to hkõt.

¹⁴ Ra kot amnhĩ jarẽnh xà hkõt akupÿm Pahihti Jejus o htĩr jakamã kot puj mẽ nhÿrmã uràk nẽ ty nhũm akupÿm mẽ pahto mẽ pahtĩr nẽ ma war amnhĩ wÿr mẽ pahto api.

¹⁵ Amnepẽm na pa pre ma mẽ awÿr mō nẽ mẽ akõt mẽ amã Tĩrtũm kapẽr jarẽnh o ri ixpa. Ka prem inhma nẽ Jejus kõt amnhĩ xunhwÿ nẽ ixpyrà nẽ Tĩrtũm mã mex o mex ã harẽ. Jakamã kwãr mẽ mãmrĩ Jejus ã tanhmã inhĩpẽx to. Koja mẽ gaa nẽ rĩ mẽ hkwÿjaja mẽ pahpyrà nẽ Jejus kõt amnhĩ xunhwÿ nẽ Tĩrtũm mã mex o mex ã harẽ.

Pawre tee ri amnhĩ kukamã hamaxpẽr kêt ã kot amnhĩ jarẽnh

Rōmãn 8.17; Sikŭn Korŭt 1.7; Wam Pẽtre 1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpẽr o ixkaprĩ nẽ ixpa hkõt nẽ. Mẽ kot Jejus ã tanhmã ixtomnuj to htãã pa hte ixãmnhĩx

kapẽr jarẽnh o ri ixpa. Ra ixpigêt nẽ ixirerek o inhmōr tã inhōpinh xà kaxwÿnh kãm ijamaxpẽr o Jejus kõt amnhĩ nhĩpẽx mex o mō.

¹⁷ Mẽ kãm ixkurẽ xwÿnhjaja na htem Jejus ã inhĩpẽx kati htã ã inhĩpẽx anhÿr japjẽ hkõt nẽ. Nom kot paj nhÿrmã ty nhũm Jejus akupÿm ixto ixtĩr pa Tĩrtũm mẽ wa kuri inhmex kumrẽx nẽ ixpa ho ixpa. Mẽ kot ixtomnujja na mẽ ho apkati grẽre no kot paj nhÿrmã Tĩrtũm mẽ Krata wa kuri inhmex kumrẽx nẽ ixtĩr tũm nẽ ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpẽr o ri ixpa hkõt nẽ. Ja koja tokyx hapẽx. Na pa hte ãm nhÿrmã Tĩrtũm nhō krĩ kamã inhmex nẽ ixkĩnh rãhã ri ixpaja pix kukamã ijamaxpẽr o ri ixpa.

5

Mẽ panhĩ nyw jarẽnh

Piripos 3.21; Sikŭn Pẽtre 1.13-14

¹ Nẽ mẽ panhĩja te kot tyrti hō ho ixkre pyràk. Na htem tyrti hō ho ixkre nhĩpẽx nhũm gaa nẽ hapẽx. Tã mẽ panhĩja na hte uràk nẽ hapẽx tokyx anẽ. Na pu htem ri papa nẽ gaa nẽ pawej nẽ ty. Tã nhũm Tĩrtũm hpãnhã mẽ pahpẽ hkrajẽ mã mẽ panhĩ nyw gō pu mẽ kuri õ krĩ kamã pamex kumrẽx nẽ pahtĩr tũm nẽ papa ho papa.

²⁻³ Na pu htem jar pahpunuj nẽ papa. Nẽ mẽ paxà nhi nẽ mẽ pahkaprĩ nẽ. Mẽ panhĩ htũmja te kot mẽ paxê htũm pyràk jakamã na pu htem ty nẽ te paxê htũm kwÿnh nẽ hpãnhã nyw jagjẽnh pyràk o amnhĩ nhĩpẽx. Tã na pu htem amnhĩ kukamã panhĩ nywja mã pajamaxpẽr o ri papa. Kot pu mẽ kaxkwa kamã pahkarõ pix nẽ ri papa hkõt nẽ. Mẽ panhĩ nyw ã kot puj mẽ ri papa ho papa.

⁴ Nẽ na pu htem jar pahpunuj nẽ pamex kêt nẽ ri papa. Nẽ tokyx mẽ pahtyk nẽ panhĩ htũm o pajapẽx nẽ hpãnhã panhĩ nyw ã mẽ papa hprãm. Tã koja Jejus tokyx akupÿn wÿryk japẽr

pu mẽ pahtyk kêt rāhā tokyx panhī nywta o panhī nyw. Nom koja tokyx akupŷn wrŷk kêt japêr pu mẽ nhŷrmā ty nhūm Tirtūm akupŷm mẽ pahto mẽ pahtīr nē mẽ pamā mẽ panhī nyw gō pu mẽ ho panhī nyw.

⁵⁻⁶ Na pre ra Tirtūm mẽ panhī nyw kukamā hamaxpēr nē mẽ pahtā tanhmā amnhī jarēnh to. Nē mẽ pahwŷr Karō rē nhūm mẽ pahkarō mā agjē pu mẽ ja hā amnhī pumu nē pahkīnh nē pajamaxpēr o:

–Nā ra Tirtūm kot ixwŷr amnhī Karō mēnh nhūm ixkarō mā àr jakamā koja määnēn nhŷrmā inhmā inhī nyw gō. Kormā inhī htūm kamā ixpa nē Pahihti Jejus mẽ wa õ krī kamā ixpa hkêt tā koja nhŷrmā inhmā inhī nywja gō pa inhī nyw o wa kuri ixpa ho ixpa. Nā koja ā inhīpêx anē.

Anhŷr o pajamaxpēr pē pahkīnh nē papa.

⁷ Nē mẽ pahte jar pano ho nhŷri Jejus pumunh kêt tā no ām panhōpinh xā kaxwŷnh kām kām pajamaxpēr mex nē.

⁸ Jakamā na pu mẽ tee ri amnhī kukamā pajamaxpēr o papa hkêt nē. Na pu htem ām tokyx mẽ pahtyk nē ma Pahihti Jejus nhō krī hwŷr paxàpir jamār o papa. Ō krīja kēp mẽ papapxā kumrēx jakamā na pu htem ma hwŷr paxàpir pix kukamā pajamaxpēr rāhā nē.

⁹ No ām mẽ pamā ja pix prām kêt. Na pu htem määnēn pamā Jejus mā hprām xā hkôt nhŷri tanhmā kām amnhī nhīpêx to ho ri papa hprām o papa. Jar mẽ panhī htūm rāhā rŷ mŷtar kuri õ krī mex kām mẽ panhī nyw ā tanhmā kām amnhī nhīpêx to ho ri papaja na mẽ pamā hprām.

¹⁰ Nē na hte Krisja jar mẽ pahte tanhmā amnhī nhīpêx to hā mẽ pahpumunh o hkrī. Mē pahte tām amnhī nhīpêxja nē mẽ pahte amnhī tomnujja nhūm hte hā mẽ pahpumunh rāhā ho hkrī. Tā koja nhŷrmā kot mẽ pahte tanhmā amnhī nhīpêx to hā mẽ pahpumunh kôt tanhmā mẽ panhīpêx to. Mē pahte tām amnhī nhīpêx o ri papa

xwŷnhjaja koja ra mẽ panê htyk kukwak ri mẽ pahto mex nē. No mẽ kot amnhī tomnuj o mẽ pa xwŷnhjaja koja mẽ homnuj tŷx nē. Jakamā na pa inhmā kām hprām xā hkôt pix mā amnhī nhīpêx o ixpa hprām nē.

Mē pajamaxpēr nyw jarēnh

Rōmān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprī hā mẽ pahpumunh rāhā ho hkrī jakamā inhmā kām hprām xā hkôt pix mā amnhī nhīpêx o ri ixpa hprām. Mān ka mẽ ra ja hā ixpumunh mex nē rŷ ko. Mē pitā mẽ kot hkôt amnhī xunhwŷr prām xāj na pa hte mẽ kām kapēr jarēnh o ri ixpa.

¹² Nom ixte ja hā amnhī to jarkrar o ri ixpa hkêt. Ām mẽ ate inhmar nē mẽ kēp Kris nhŷ hā mẽ ahkre hā amnhī to hēx xwŷnhjē mā tanhmā ijarēnh to kaxyw na pa ā mẽ amā amnhī jarēnh anē. Mē kot Tirtūm kapēr jahkre mex kumrēx ā amnhī to jarkrar tā na htem hkôt amnhī nhīpêx kêt nē. Tā mẽ ate aprī hā ixte Tirtūm kapēr kôt amnhī nhīpêx mex ā ixpumunh nē tanhmā mẽ kām ijarēnh to kaxyw na pa ā te ixte amnhī to jarkrar pyrāk o mẽ amā amnhī jarēnh anē.

¹³⁻¹⁴ Mē kot ixkrā pipānh ā ijarēnh tā Tirtūm na mẽ akaxyw ixām pa hte mẽ amā kapēr jarēnh o ri mẽ akôt ixpa. Ixkrā pipānh kêt. Ixte Tirtūm kām hprām xā hkôt tanhmā amnhī nhīpêx to xwŷnh na pa. Tā mẽmo kaxyw na pa hte ā kapēr jarēnh rūnh anhŷr o ri mẽ akôt ixpa? Nā inhmā mẽ akīnh kēnā. Mē ate Tirtūm kôt tām amnhī nhīpêx prām xāj na pa hte ā mẽ amā kapēr jarēnh anhŷr rāhā nē. Kris na pre tanhmā ixto pa inhmā mẽ akīnh nē. Te tām kām mẽ ajapē pyrāk. Na pre Kris amnhī grōnh kôt mẽ pahpiitā mẽ nē ty. Tirtūm kot mẽ pahte amnhī tomnuj mŷrapē tanhmā mẽ pahto pymaj nhūm mẽ pahpiitā mẽ panê ty. Jakamā te mẽ pahpiitā Jejus kôt mẽ pahtyk pyrāk o na pu htem amnhī nhīpêx. Jao te mẽ pahte amnhī nhīpêx tūmja mẽ pahpê hapêx

par pyrâk o pu mê amnhî nhîpêx nyw o amnhî nhîpêx o ri papa.

¹⁵ Mê pajamaxpêr nyw o tãm mê pahte amnhî nhîpêx o papa kaxyw na pre Jejus mê panê ty. Jakamã na pu htem axte amnhî pix kukamã ri pamã mëmoj prãm o ri papa hkêt nê. Na pu htem mãânên Tîrtûm kãm hprãm xà hkôt tanhmã kãm amnhî nhîpêx to ho ri papa. Ja kaxyw na pre Tîrtûm akupyîm Kris o htîr pu mê kukwak ri pajamaxpêr nyw o amnhî nhîpêx o papa.

¹⁶ Jao mê piitã mê hkrã hkà hã mê omunh xà hkôt pix mã tanhmã mê harênh to hkêt nê. Mê kot amnhî tomnuj â mê harênh rÿ mê kot amnhî to mex â mê harênh kêt nê. Amnepê mã na pa pre â Kris jarênh anê nê harênh o:

—Nà Krisja na hte mê pahte amnhî nhîpêx kôt amnhî nhîpêx kêt nê. Âm ri kot mê pahte amnhî nhîpêx kwÿm ri amnhî nhîpêx jakamã kot amnhî tomnuj tÿx xwÿnh na.

Anhÿr â harênh o ixpa. Tã axte â harênh anhÿr hkêt nê. Kot amnhî tomnuj xwÿnh kêt jakamã na pa hte hpãnhã hkôt pix mã tanhmã kãm amnhî nhîpêx to ho ri ixpa.

Mê pahpê Tîrtûm kràmnhwÿ hã mê pajarênh

Rômãn 5.1, 5.10; Epes 6.20; Korosê 1.20

¹⁷ Nê koja mëhõ Kris kôt amnhî xãm nhũm kot amnhî nhîpêx tũmja kêp hapêx nhũm hpãnhã kot amnhî nhîpêx nyw pix o amnhî nhîpêx nê hamaxpêr nyw pix o hamaxpêr.

¹⁸ Tîrtûm na hte tanhmã mê pahto pu mê â amnhî nhîpêx anhÿr o ri papa. Na pu prem pamã hkurê htã nhũm Kris kukwak ri mê pahte hkôt amnhî nhîpêx xwÿnhjê ho hkràmnhwÿ. Hãmri nê tanhmã mê pahte amnhî nhîpêx to hã mê pamã karõ nê mê pamã:

—E kêr ka mê ma krî piitã hkôt ri mê kãm ixkapêr jarênh o ri apa kê mê ama nê mê apyrà nê Kris kôt amnhî xunhwÿ. Pa ja hã mê omu nê ixte mê

anhîpêx pyrà nê mê ho ixkràmnhwÿ. Anê.

¹⁹ Jakamã na pa hte ma mê kãm kapêr jarênh o ri mê hkôt ixpa nê mê kãm:

—E pa mê amã mëmoj mex jarê ka mê inhma. Nà na pre Krisja mê pahte amnhî tomnuj mÿrapê mê panê ty. Nê htyk o Tîrtûm mã mê pahpãnhã amnhîrer par kumrêx. Jakamã na ra Tîrtûmja Kris kukwak ri kãm mê pahpiitã mê pahto hkràmnhwÿ prãm. Koja kukwak ri mê pahte amnhî tomnuj piitã ho hamakêtkati nê axte kãm hamaxpêr kêt kumrêx. Kãm mê pahto hkràmnhwÿ hprãm jakamã koja â mê panhîpêx anê. Jakamã e kwa mê tokyx Kris kôt amnhî xunhwÿ kê Tîrtûm kot inhîpêx pyrà nê mê ato hkra nê mê ato hkràmnhwÿ.

Anhÿr o mê kãm harênh o ri mê hkôt ixpa.

²⁰ Kris kot mê apiitã mê awÿr inhmênh jakamã na pa hte ÿ hã mê amã kapêr jarênh o ri mê akôt ixpa nê mê amã:

—E Tîrtûm kãm mê ajapê jakamã na mê awÿr inhmê pa mō. Jakamã kwa mê tokyx amnhî tomnuj kaga nê hkôt amnhî xunhwÿ. Kê amnhî tã mê apumu nê mê ato hkràmnhwÿ. Anê.

²¹ Krisja aa kot tanhmã amnhî tomnuj to hkêt kumrêx tã nhũm pre Tîrtûmja te mê kot amnhî tomnuj tÿx kumrêx xwÿnh pyrâk o hipêx. Tã mëmo kaxyw na pre â hipêx anê? Nà mê panê kênã. Mê pahte hkôt amnhî xunhwÿr nhũm kot mê panhîpêx o te aa mê pahte amnhî tomnuj kêt kumrêx xwÿnh pyrâk o mê panhîpêx kaxyw na pre â mê panê Krata nhîpêx anê.

6

¹ Tã kot â Kra nhîpêx anhÿr jakamã kwa mê ixkapêr ma nê mar tÿx nê. No mê ama nê âm mar kêt nê. Tîrtûm kãm mê pajapê htÿx jakamã mê pakutã nojarêt rãhã ho pa. Kumã na pa hte â mê amã kapêr jarênh anhÿr o ri mê akôt ixpa.

² Amnepê mã na pre Ijaew mã kapêr nê mê kãm:

Na ka prem amex kêt nê ri apa nê amnhî to ixwÿ pa pre mē ama nê mēmojta pê mē apytà nê mē ato mex nê. Anê.

Jakamã kwa mē inhma. Tirtûm kãm mē ate amnhî tomnuj pê mē apytâr prãm tÿx jakamã kwa mē tokyx amnhî to awÿ kê ã kêp mē apytâr anê.

Mê kot Kris ã tanhmã Pawre nhîpêx to hã mē harênh

Sikûn Korîit 4.7, 11.23-33; Korosê 1.10

³⁻⁴ Nê mē kot Tirtûm kapêr mar nê hã ixtomnuj tã pa hte amnhî katut kôt mē kot tanhmã ixtomnuj toja rê nê ho ijamakêtkati tokyx anê. Nê arî mē kãm kapêr jarênh rãhã ho ri mē hkôt ixpa. Mē kot mar nê ãm mar nê hkaga pymaj na pa hte ã amnhî nhîpêx anhÿr rãhã nê. Mē kot ja hã inhîpêx punuj tã pa arî mē kãm harênh o ri mē hkôt ixpa.

⁵ Mē kot Kris ã ixtak nê ijagjênh nê tanhmã ixto kaxyw ixtã htu htã pa hte mē kutã amnhî to htÿx nê ixkuhê. Na pa pre hte Tirtûm mã mē kãm kapêr jarênh rax nê. Jao tãhã inhôt kêt nê inhôt xwa ho ri mē hkôt ixpa. Nê tãhã inhmã prãm tÿx nê ri ixpa. Tã no ãm arî mē kãm kapêr jarênh rãhã nê.

⁶ Inhmã tanhmã ixte amnhî tomnuj to hprãm kêt. Inhmã Tirtûm kot amnhî nhîpêx kôt pix mã amnhî nhîpêx prãm. Nê inhmã inhgryk tokyx anhÿr prãm kêt. ãm inhmã mē piitã mē hkînh kãm mē ho mex pix prãm. ã na pa hte Tirtûm Karõ nhÿ hã amnhî nhîpêx anhÿr o ri mē hkôt ixpa. Mē kot ja hã ixpumunh nê ra Tirtûm kapêr ma nê hkôt amnhî xunhwÿr kaxyw.

⁷ Na pa hte ixkatat kôt mē kãm ixkapêr mex pix nê. Tirtûm xihtÿx xwÿnhja nhÿ hã ri mē kãm kapêr jarênh jao tãm amnhî nhîpêx nê tãm ri ijamaxpêr o ri mē hkôt ixpa. Jakamã na htem ja hã ixpumu nê ixte Tirtûm kapêr jarênh ma nê hkôt amnhî xunhwÿ.

⁸ Na hte mē hkwÿjaja kãm ixkînh nê nhÿm mē hkwÿjaja axtem kãm

ixkurê nê. Nê mē hkwÿjaja amnhîm inhmex ã ijarê nhÿm mē hkwÿjaja axtem axpên mã tanhmã ixto kapêr punuj to. Mē kot ixêx nhi hã ijarênh tã pa hte ixkatat kôt mē kãm ixkapêr o ri ixpa. Nom kwâr mē mãmrî tanhmã ri ixto kapêr to. Ja tanhmã inhmã kute hkêt.

⁹ Na hte mē hkwÿjaja ixkamã ôkre kahak nê pika piitã hkôt axpên mã tanhmã ijarênh to ho pa. Mē kãm ixpîr prãm tã no pa arî ixtîr nê ixpa. Mē kot Jejus ã ixtomnuj tÿx tã kormã ixpîr kêt nê pa ri ixtîr nê ixpa.

¹⁰ Ixte Kris ã amnhî xà htÿx kamã ijamak o ri ixpa htã arî ixkînh nê ixpa. Nê ixkàxpore hkêt tã nhÿm mē ohtô nê ixte mē kãm Jejus kapêr jarênh kukwak ri mex nê pa. Nê ixkukrêx rax kêt tã nhÿm Tirtûm ixto mex nê pa inhmex nê ixpa. Tã kot paj nhÿrmã ô krî kamã kuri inhmex kumrêx nê ixtîr tûm nê ixpa ho ixpa. Jakamã na pa hte arî mē kãm Jejus kapêr jarênh o ri mē hkôt ixpa.

¹¹ E Korîit kãm ixkràmnhwÿjaja. Na pa ixprî hã mē amã amnhî nhîpêx jarênh par kumrêx.

¹² Inhmã mē akînh tÿx tã te mē amã ixkînh kêt pyræk.

¹³ Kwa te mē ate ixto mē akatut nê akuhê pyræk o inhîpêx kêt nê. Amnhî pyrã nê amã ixkînh nê hkêt wehe. Te mē apê ixkra pyræk o na pa ã mē amã ixkapêr anê.

Te mē pahpê Tirtûm nhôrkwÿ pyræk ã mē pajarênh

Wam Korîit 10.20-22, 15.33; Epes 5.3-14; Sikûn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nê kêr ka mē kot Kris kôt amnhî xunhwÿr kêt xwÿnhjê mē mē mēmoj tã tanhmã axpên mar to hkêt nê. Rÿ mēhõ ho amjên rÿ mēhõ ho aprõ hkêt nê. Ahpÿnhã mē pajamaxpêr kênã. Tanhmã kot we mē hamaxpêr nyw xwÿnhjaja nê mē hamaxpêr tûm xwÿnhjaja amnhî to nê axpên kôt hamaxpêr nê ri axpên kôt pa? Nã koja mē ã amnhî nhîpêx anhÿr kêt nê. Ahpÿnhã mē pajamaxpêr. Na hte hirã htÿxja kamàt kô mē pihkàr kêt nê.

15 Xà na hte Kris mẽ Satanasti wa xypên kôt hamaxpêr? Nà wa kot xypên kôt hamaxpêr kêt. Ahpÿnhã wa hamaxpêr nê ahpÿnhã wa kot amnhĩ nhĩpêx. Nê ahpÿnhã hirã nê ahpÿnhã kamàt kô. Nê mẽ pahpê Kris kwÿjaja nê mẽ kêp hkwÿ hkêt xwÿnhjaja ahpÿnhã mẽ pajamaxpêr nê ahpÿnhã mẽ pahte amnhĩ nhĩpêx.

16 Na pu htem Tirtûm mã amnhĩ jarênh xà hã ixkre kamã sãnti xunhwÿr nê amnhĩ to hwÿr pê kãm mex o mex ã harênh kêt nê. Axtem na sãntija. Mẽ panhõ Tirtûmja sãnti rom htir tûm rãhã nê pa ho pa xwÿnh. Nê mẽ papajaja te mẽ pahpê Tirtûm nhõrkwÿ pyrãk. Kapêr ã kagà htûm kot ja jarênh kot:

Ixkrajaja te kêp inhõrkwÿ nhûm ixpê õ dõn pyrãk. Te ixpê inhõrkwÿ kamã ixpa xwÿnh pyrãk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anê.

17-18 ã Tirtûm xihÿx xwÿnhja kot amnhĩ jarênh anhÿr jakamã na hte mẽ kot amnhĩ tomnuj xwÿnhjê nê mẽ pahkurê ho:

Kêr ka mẽ hkôt ri apa hkêt nê. Kwarĩ ho kwarĩ.

Nê mẽ hkôt ri amnhĩ nhĩpêx o apa hkêt nê.

Kot kaj mẽ ixkapêr ma nê ixkôt amnhĩ nhĩpêx hã kot paj amnhĩ wÿr mẽ awÿ nê mẽ ato ixkra.

Nê pa kot paj ixpê Mẽapãm maati. Anê.

7

1 Tã ã Tirtûm kot mẽ pahto hkra nê mẽ pahkôt pa ho pa hã amnhĩ jarênh kot anhÿr jakamã kwa ixkrãmnhwÿjaja. Kêr pu mẽ kapêr ma nê tanhmã amnhĩ tomnuj to hkêt nê. Nê mẽmoj punuj kukamã pajamaxpêr kêt nê. Nê ãm kapêr kôt pix mã amnhĩ nhĩpêx mex rãhã nê.

Pawre kot Korîť nhõ xwÿnhjê nhÿ hã hkĩnh ã harênh

2 Nê kwa Kris kôt ixtõ nê ixtõxjaja. Kêr ka mẽ tee ri amnhĩ tã tanhmã inhmã ajamaxpêr to hkêt nê. Na pa pre tanhmã mẽ atõ hto hkêt nê. Rÿ

tanhmã mẽ atõ hto ka mẽ ja hã ixpumu nê ixkôt tanhmã amnhĩ tomnuj to hkêt nê. Rÿ pa pre ixêx rom tanhmã mẽ anokupyr to ho ri ixpa hkêt nê. Kwa mẽ amã ixkĩnh nê tokyx ixkôt ajamaxpêr kêt wehe.

3 Mẽ ate inhmã nê amnhĩ tã apijaàm kaxyw na pa ã mẽ amã ixkapêr anhÿr kêt nê. Inhmã mẽ akĩnh kênã. Na pa pre inhmã mẽ akĩnh ã amnhĩ jarênh rax nê. Inhmã ri mẽ akôt ixpa rãhã ho ixpa hprãm. Rÿ ka mẽ nhÿrmã apiitã apikaprãr par japêr pa inhmã mẽ akôt ixtyk prãm nê.

4 Na pa hte ra mẽ amã ijamaxpêr pê ixkĩnh nê ixpa. Nà kot kaj mẽ ixkapêr ma nê Jejus kôt amnhĩ nhĩpêx mex nê. Tã kêr ka mẽ ã amnhĩ nhĩpêx anhÿr rãhã nê. Na pa hte jar ra amnhĩ xà htÿx kamã ijamak o ri ixpa htã no ãm mẽ amã ijamaxpêr nê ixkĩnh nê.

5 Nê na pa pre amnê Masetõn wÿr kormã Xitre japêr o mõ. Hãmri nê Masetõnja wÿr pøj nê hapêr pê mẽ kãm Jejus kapêr jarênh o ri mẽ hkôt ixpa. Hãmri nhûm mẽ kãm ixkurê xwÿnhjaja Kris ã inhĩpêx punuj nê hã inhmã àkjêr pix o pa. Hãmri nê ma Masetõn kamã krĩ piitã hkôt ri mẽ kãm ixto kapêr punuj nê pa amnhĩ tã mẽ mar o ri mẽ hkôt ixpa. Nê mẽ kajaja mẽ ate Kris kaga nê nhãm mẽ hamaxpêr kôt amnhĩ nhĩpêx py-maj na pa pre tee ri mẽ akukamã ijamaxpêr o ri mẽ hkôt ixkaprĩ nê ixpa.

6 Tã Tirtûm kêp mẽ hkaprĩ xwÿnhjê pumunh nê akupÿm mẽ ho mẽ hkĩnh xwÿnh jakamã na pre ixkaprĩ hã ixpumu nê ixwÿr Xitre mẽ. Pa pre omu nê akupÿm ixkĩnh nê tãm ijamaxpêr.

7 No ãm Xitre pumunh kôt pix mã ixkĩnh kêt. Na pre ixwÿr pøj nê tanhmã inhmã mẽ ajarênh to nê mẽ ate tanhmã ho mex to hã mẽ ajarê. Nê mẽ amã ixpumunh prãm tÿx ã mẽ ajarê. Nê Kris kôt mẽ atõta hpijaàm kêt o pa nhûm ixte kagà kamã hã mẽ amã ixàkjêr nhûm mẽ ate ja hã omunh nê ra amnhĩ kamã apijaàm o akaprĩ htÿx ã mẽ ajarê. Nhûm Tirtûm

kot inhnê mê kãm ixkurê xwÿnhjê pumunh mex kaxyw mê ate ixto hwÿr ã mê ajarê. Na pre ã inhmã mê ajarênh anê pa kuma nê mê anhyã hã ixkÿnh tÿx kumrêx.

8-9 Nê wam ixte mê amã kagàta nhîpêx kêt ri na pa pre tee ri mê ate amnhî nhîpêx ã mê ajarênh ma nê mê akaxyw hipêx. Nê kamã mê ate hpijaàm kêt xwÿnhhta kot tanhmã amnhî nhîpêx to hã omunh nê ãm omunh o arÿ hkôt apa hã kagàta kamã mê amã akir hãmri nê Xitre mã kugõ nhûm kupy nê ma mê awÿr o mô. Tã ka xep prem kamã harê nê ama nê amnhî kamã apijaàm nê. Nê akapri nê ajamaxpêr o:

—Hêxta waa nê. ãm hãmri na Pawre ã mê ijarênh anê. Na pa mê ã amnhî nhîpêx anê nê amnhî tomnuj tÿx nê. Anê.

Tã nhûm Xitre akupÿn ixwÿr pøj nê inhmã mê ajarê. Pa mê ajarênh ma nê tee ri ijamaxpêr nê ijamaxpêr o:

—Hêxta waa nê. Mon pa pre axtem nê ã ri mê kãm ixàkjêr anê? Nà na xep prem kagàta kamã harê nê kuma nê hkapri htÿx nê. Anê.

Tã ãm hãmri na pa pre ã mê akaxyw hipêx nê mêmojta ã mê amã ixàkjêr anê. Na ka xep prem kamã harê nê ama nê tee ri ajamaxpêr o ra akapri nê. Nom Tirtûm kãm hprãm xà hkôt na ka prem ja hã amnhî pumu nê ã akapri anê. Tã xep ra akupÿm tãm amnhî nhîpêx nê akupÿm Tirtûm kôt amnhî nhîpêx mex nê. Jao akupÿm akÿnh nê ri apa. Jakamã ãm hãmri na pa pre mê awÿr wam kagàta mênh nê mêmoj tã ã mê amã ixàkjêr anê.

10 Kojã Tirtûm krajê hõ tanhmã amnhî tomnuj to. Hãmri nê tee ri ja hã amnhî pumu nê amnhî kamã hpijaàm nê akupÿm Tirtûm kôt tãm amnhî nhîpêx. Hãmri nê akupÿm mex nê tãm hamaxpêr pê hkÿnh nê ri pa. Nê axte tee ri amnhî kukamã hamaxpêr hkêt nê. Ja na Tirtûm kãm hprãm. Tã kojã mê kêp hkra hkêt xwÿnhjê pyrã nê tanhmã amnhî tomnuj to nê ra hpijaàm japêr. Nom hkwyjaja kot ja hã omunh pix mÿrapê

hpijaàm nê arÿ Tirtûm kôt amnhî nhîpêx kêt japêr. Hã kojã nhÿrmã ty nê Tirtûm kra kot akupÿm hkôt tãm amnhî nhîpêx xwÿnhjê kÿnhã Tirtûm pê awry rax kumrêx nê ri pa.

11 Mê pahte Tirtûm kapêr kwÿm ri tanhmã amnhî nhîpêx to hã tee ri amnhî pumunh nê amnhî kamã hpijaàm nê akupÿm tãm amnhî nhîpêxja na Tirtûm kãm hprãm. Tã na ka xep ã amnhî nhîpêx anê. Wam ixte mê awÿr kagà mênhta na ka xep prem kamã tanhmã ixte nã puro kamã hpijaàm kêt xwÿnhhta ã mê amã ixàkjêr tota kamã akapêr nê ama. Hãmri nê tee ri mê ate kormã kot amnhî tomnuj ã kãm axàkjêr kêt ã amnhî kukamã ajamaxpêr nê amnhî kamã apijaàm nê. Nom Tirtûm kãm hprãm xà hkôt. Mê ate jam ajamaxpêr pê amnhî kamã apijaàmja na kãm hprãm. Tã ka mê hpijaàm xwÿnhhta kamã agryk nê kãm akapêr o:

—Kwa mê pahpê Jejus kwÿjaja mê pahte ã amnhî nhîpêx anhyr kêt tã ka ã amnhî nhîpêx anê. Nà na ka amnhî tomnuj tÿx kumrêx. Kot kaj ã amnhî nhîpêx anê pa mê hã apumu nê gaa nê apyrã nê ã amnhî tomnuj anê. Kwa ja kaga nê axte ã amnhî nhîpêx anhyr kêt nê. Nê akupÿm Tirtûm kôt amnhî xãm tÿx nê hkôt amnhî nhîpêx rãhã ho ri apa. Anê.

Hãmri nhûm krÿ nhõ xwÿnhjaja ja hã mê ajarênh ma nê mê apê jamnuj ã mê apumunh kurê kumrêx. ãm hãmri na ka prem ã kãm akapêr anê.

12 Nê ixte mê awÿr kagà nê mênhta kamã na pa pre nã puro kamã hpijaàm kêt xwÿnhhta mã tanhmã ixàkjêr to hkêt nê. Rÿ nã purota mã tanhmã ixàkjêr to hkêt nê. Na pa pre mê apê Kris kwÿjê hwÿr kagà nhîpêx nê kamã tanhmã mê amã hpijaàm xwÿnhhta ã karõ hto. Mê ate kamã harênh hãmri nê inhÿ hã amnhî nê hanor nhûm Korî nhõ xwÿnh piitã kot ã mê ate amnhî nhîpêx anhyr ã mê apumunh kaxyw. Nê mê ate Tirtûm nom ã hipêx anhyr jao mê amã ixkÿnh pê ixkapêr kôt ã hipêx anhyr ã amnhî pumunh kaxyw.

13 Tã nhũm Xitre ixwÿr pøj nê tanhmã inhmã mẽ ajarênh to. Na xep pre mẽ awÿr nojarêť nê tee ri amnhĩ kukamã hamaxpêr. Mẽ ate kagãta kamã harênh nê ijarênh mar nê kamã agryk pymaj tee ri amnhĩ kukamã hamaxpêr. Tã ma mẽ awÿr mõn pøj nê mã amã kugõ. Ka xep prem kamã harê nê ama nê hkõt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nê hkĩnh nê. Hãmri nê tãm hamaxpêr. Tã ra akupÿn ixwÿr mõ nê inhmã mẽ ajarê pa mẽ ajarênh ma nê ijaxwÿja ixkĩnh nê.

14 Na pre kormã mẽ awÿr nojarêť pa kãm tanhmã mẽ amex ã mẽ ajarênh to. Tã nhũm xep ma mẽ awÿr mõn pøj nê mẽ apumu nê hamaxpêr o:

—Nà pêr ãm hãmri na pre Pawre inhmã mẽ mex ã harê. Mẽ mex kênã. Anê.

15 Tã nhũm pre mẽ arũm kato nê ra man akupÿn ixwÿr mõn pøj nê inhmã mẽ ajarênh o:

—Na pa pre ma mẽ hwÿr mõ nê mẽ kãm ixkapêr o ri mẽ hkõt ixpa nhũm mẽ ixkapêr ma nê ixkõt amnhĩ nhĩpêx kurê kumrêx nê ixto mex nê. Kormã ixte mẽ hwÿr inhmõr kêt tã mẽ harênh ma nê inhmã mẽ hkĩnh nê. Tã pa ma mẽ hwÿr mõ nhũm mẽ ixto mex rax nê pa ra inhmã mẽ hkĩnh tÿx kumrêx. Anê.

16 Æ inhmã mẽ ajarênh anê pa mẽ ajarênh ma nê ixkĩnh tÿx nê. Æm hãmri na ka htem mẽmoj tã amnhĩ jarênh xà hkõt tanhmã amnhĩ nhĩpêx to ho apa.

8

Mẽ kot Kris kõt mẽ hkwÿjê pê õxÿ hkêt ã mẽ kãm karõ

Atre 11.27-30; Rõmãn 15.25-27; Wam Korî 16.1-4

1 E Kris kõt ixkwÿjaja. Kot paj hpãnhã mẽ amã jar Masetõn kamã tanhmã Jesus kwÿjaja kot amnhĩ nhĩpêx to hã mẽ harê ka mẽ harênh ma. Na hte Tĩrtũm mẽ kutã nojarêť nhũm mẽ mex nê pa.

2 Mẽ hkwÿjaja kot Kris ã mẽ hipêx kati nhũm mẽ kot amnhĩ xà htÿx kãm

hamak o pa htã hkĩnh nê hamakêtkati nê ri pa. Nê mẽ hkàxpore hkryre htã ho õxÿ hkêt nê pa. Na htem àmnhĩx ri mẽ kêp amrakati xwÿnhjê mã hkwÿ nhõr o pa.

3-4 Tã na prem Jerujarê kamã Kris kõt mẽ pahkwÿjê jarênh ma. Mẽ kêp amrakati hã mẽ harênh ma nê kãm mẽ hkaprĩ nê. Nê mẽ kãm mẽ hwÿr mẽmoj rênh nê mẽ ho ajuta hprãm nê. No ãm pa ixte mẽ kãm hã karõ xà hkõt kêt. Mẽ tãmjaja mẽ hamaxpêr xà hkõt na prem ã hamaxpêr anê nê mẽ kaxyw kàxpore ho pikuprõnh rax nê. Hãmri nê inhmã kugõ nê inhmã:

—Kwa na pa prem Jerujarê kamã Kris kõt mẽ pahkwÿjê jarênh ma nê mẽ inhmã mẽ hkaprĩ nê mẽ kãm mẽ ixkàxpore hkwÿ ho akuprõ. Jakamã e amÿ nê ma mẽ hwÿr o mõ nê mẽ kãm agõ kê mẽ tokyx ho amnhĩm awjaprõ nê kuku. Anê.

5 Pa mẽ kuma nê ixtÿx ho ãm kàxpore grire hã hkamnhĩx nê ijamaxpêr o:

—Kwa mo mẽ hikàxpore rax koja mẽ ri ho akuprõ nê mẽ kãm kugõ? ãm mẽ hikàxpore hkryre kênã.

Anhÿr o ijamaxpêr tã no nhũm mẽ kaxyw ho rax nê ho akuprõ. Mẽ hikàxpore hkryre htã mẽ kãm õr rax nê. Hãmri nê inhmã amnhĩ jarênh o:

—Na pa mẽ ra Pahiiti Jesus Kris mã amnhĩ gõ. Mẽ ixte tanhmã kãm amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tã karõ hto. Kot pa mẽ ama nê akapêr kõt amnhĩ nhĩpêx. Ja na pa mẽ inhmã hprãm nhũm Tĩrtũm haxwÿja kãm ja prãm. Anê.

6 Na pa pre ã mẽ kot amnhĩ nhĩpêx anhÿr ã mẽ omu nê mẽ apê Korî nhõ xwÿnhjê mã ijamaxpêr kurê kumrêx. Hãmri nê Xitre mã mẽ ajarê. Na pre mẽ awÿr mõ nê mẽ amã Jerujarê nhõ xwÿnhjê jarê. Mẽ ate mẽ kãm kàxpore hkwÿ ho apikuprõnh kaxyw. Tã pa pre jam ijamaxpêr nê ra akupÿm mẽ awÿr mẽnh mã nê kãm:

—Kwa ma akupÿm Korî wÿr mõ nê mẽ kãm anê kê mẽ ra kot amnhĩ jarênh xà hkõt Jerujarê nhõ xwÿnhjê

kaxyw kàxpore hkwỳ ho akuprō nē tokyx mẽ hwỳr kumẽ. Ra mẽ kãm Kris kôt mẽ hkwỳjê hkĩnh ã amnhĩ jarēnh kēnã. E kwa tokyj. Anẽ.

⁷ Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpēr tỳx nẽ. Nẽ ma mẽ kãm Tĩrtũm kapēr jarēnh mex o ri mẽ hkôt apa. Nẽ mẽ ajamaxpēr mex nẽ. Nẽ mẽ piitã mẽ ho mex o ri apa. Nẽ mẽ amã ixkĩnh o ri apa. Jakamã kwa kêr ka mẽ axàmnhĩx mẽ kêp amrakati xwỳnhjê mã mẽ akàxpore hkwỳnhõr o apa. Jao mẽ amã Tĩrtũm kĩnh tỳx ã amnhĩ to amnhĩrĩt.

⁸ Ixte ã mẽ amã ja hã karõ anhỹr tã hã mẽ atã ixihitỳx kêt nẽ. ãm mẽ kamã axukapri hkôt mẽ ate mẽ kãm axàmnhõr o apa kaxyw na pa ã mẽ amã ixkapēr anẽ. Masetõn kamã mẽ pahkwỳjaja kot amnhĩ nhĩpêxta pyrà nẽ.

⁹ Ra mẽ ate Jejus Kris kãm mẽ pajapê hã kot tanhmã amnhĩ nhĩpêx to hã mar mex. Amnepêm na pre kaxkwa kamã mex kumrêx nẽ ri pa ho pa nhũm mẽmoj piitã kêp õ htã nhũm rer pa nẽ mẽ pahwỳr wrỳ nẽ mẽ pakamã kêp amrakati nẽ ri pa. Hikàxpore hkêt nẽ ri pa. Tã mẽmo kaxyw na pre ã mẽmoj mex piitã rer par nẽ mẽ pahwỳr wrỳk anẽ? ãm kot mẽ pahto mex pix kaxyw. Kot mẽ pahto mex nhũm mẽ pahte kukwak ri mẽ paxàmnhĩx ri mẽ pajamakêtkati nẽ mẽ papa kaxyw na pre ã amnhĩ nhĩpêx anẽ. Mẽ pahte nhỹrmã uràk nẽ kaxkwa kamã pamex kumrêx nẽ ri papa ho papa kaxyw.

¹⁰ E kwa kêr ka mẽ tokyx kàxpore hkwỳ ho apikuprõnh pa nẽ Jeru-jarē nhõ xwỳnhjê hwỳr amẽ. Mẽ akumrêxjaja na ka prem ham am-grà hapêxta kamã ra mẽ kaxyw ho apikuprõnhja krax. Mẽ amã mẽ ho mex prãm xàj ham ho hkrax tã no ãm kormã hatur xàm mēnh nẽ mẽ hwỳr mēnh kêt nẽ.

¹¹ Kwa mẽ tokyx ja ho ajapêx nã. Na ka prem ate ho anhỹr krax ã akĩnh pē kàxpore hkwỳ ho apikuprõnh o apa. Tã kêr ka mẽ arĩ akĩnh rãhã ho

apikuprõnh par jatur xàm amẽ. No mẽ ri atỳx tanhmã ajamaxpēr to hkêt nẽ. Rỳ mẽ ajamaxpēr o:

—Nà kormã. Kot paj nhỹrmã ixkàxpore rax nẽ rĩ kormã mẽ hwỳr hkwỳ mẽ.

Anhỹr o mẽ ri ajamaxpēr hkêt nẽ. Mẽ ate tanhmã akàxpore hkre kamã kute hã omunh xà hkôt mẽ kãm hkwỳ pix gõ.

¹² Kêr ka mẽ axàmnhĩx akĩnh kãm mẽ kãm ho akuprõ. Ate amnhĩ kàxpore pumunh xà hkôt. Ka mẽ akàxpore rax nẽ mẽ kãm ho rax nẽ agõ. Rỳ mẽ akàxpore grire nẽ mẽ kãm ho grire nẽ agõ. Ja na kêt mex.

¹³ No mẽ ate mẽ kãm õr par nhũm mẽ arom mẽ hikàxpore rax nẽ ri paja mex kêt.

¹⁴ Nom ra mẽ akàxpore rũnh jakamã kwa mẽ amnhĩ kutã mẽ kãm hkwỳ ho hkryre nẽ ho akuprõ kê mẽ apyrã nẽ hikàxpore nẽ ri pa. Kêr ka mẽ nhỹrmã tanhmã amnhĩ to nẽ axà nẽ nhũm akàxpore apê hapêx nhũm mẽ ajarēnh ma nẽ amnhĩ kuxwar mẽ ato ajuta nẽ mẽ amã hkwỳ ho akuprõ nẽ mẽ awỳr kumẽ. Ka mẽ akàxpore ho axpēn pyrà nẽ ri apa.

¹⁵ Amnepêm Tĩrtũm kot kaxkwa rũm Ijaewjê hwỳr mẽõ rēnh nhũm mẽ kot apkati mẽ amnhĩm hkawrà nẽ ho apkur o pata ã na pre Tĩrtũm kapēr ã kagà htũmja ã mẽ harēnh anẽ nẽ mẽ harēnh kot:

Na pre mẽ hkra xohtõ xwỳnhjaja mẽ apkur xà hkawrà rũnh nẽ. Nẽ gõj kãm unhwỳ nẽ kuku nẽ piitã ho õhy htu. Nhũm mẽ hkra grēre xwỳnhjaja haxwỳja hkwỳ kawrà no ãm ho hkryre nẽ hkawrà. Nẽ gõj kãm unhwỳ nẽ kuku nẽ haxwỳja ho õhy htu hpa. Na pre htem apkati mẽ ã amnhĩ nhĩpêx anhỹr o pa. Anẽ. Ja pyrà nẽ kêr ka mẽ akàxpore ho axpēn pyrãk o ri ho apa.

Xitre mẽ hkràmnhwỳjê jarēnh

¹⁶ Nẽ Xitre na pre ixpyrà nẽ kãm mẽ ato ajuta hprãm nẽ. Na pre inhmã mẽ atã amnhĩ jarē pa pre kuma nhũm

ja inhmã mex nê pa ixkînh nê. Nê ijamaxpêr o:

—Nà ãm hãmri na Tîrtûm tanhmã Xitre hkrã hto nhûm ã hamaxpêr mex anê. Anê.

¹⁷ Tã pa ma akupÿm mẽ awÿr mör ã hkukja nhûm inhma nê hkînh nê mẽ awÿr nojarêr kurê kumrêx. Nom kormã ixte kãm mẽ ajarênh kêt ri nhûm tãm amnhî kukamã hamaxpêr nê mẽ awÿr hkrã.

¹⁸ Tã na ra nojarêr kaxyw. Kot paj ma hkôt Kris kôt mẽ pahtôjê hõ mẽ kê ma hkôt mõ. Kôt ixte mênh xwÿnhnta na hte mẽ kãm Tîrtûm kapêr jarênh mex nê nhûm htem amnhîm mex ã harê.

¹⁹ Na pre jar Jejus kwÿjaja kot ma ixkôt Jerujarê hwÿr kàxpore hkwÿ ho mör kaxyw nhûm prem amnhîm mẽ kurê. Tã koja Xitre mẽ wa mẽ awÿr mõn pøj ka mẽ kãm kàxporeta gõ nhûm man akupÿn o mõ pa wa rî kormã ma Jerujarê hwÿr mẽ kãm o mõ. Mẽ kot hamÿnh nê mẽ pamã mẽ hkînh ã kot amnhî tã mẽ pahpumunh kaxyw. Nê Tîrtûm mã mex o mex ã harênh kaxyw.

²⁰⁻²¹ Nom kàxpore rax nhûm ixte mẽ hwÿr o inhmör nhûm mẽ kot hã ixkamnhîx pymaj kot paj ma amnhî kôt Kris kôt mẽ pahtôta o mõ. Ixte Xitre hkôt mẽ awÿr mênh xwÿnhnta pa ma amnhî kôt o mõ. Nom ixàhkînh o ixpare hã. Tîrtûm kot ja kôt ixpumunh mex tã kot paj ma amnhî kôt o mõ.

²² Nê ot pa ma Xitre wa hkôt axte mẽ awÿr ja mẽ. Kêr kê mẽ axkrunêpxi nê ma ixkukamã mẽ awÿr mõ. Ixte wa hkôt mênh xwÿnhnta ixte kot amnhî nhîpêx ã omunh mex. Na hte kãm mẽ piitã mẽ ho ajuta ho pa hprãm nê. Tã mẽ ajarênh ma nê inhmã mẽ ajarênh o:

—Nà koja mẽ Jerujarê nhõ xwÿnhjê mã kàxpore nhör rax nê kãm ga. Mẽ kot amnhî to mex kênã. Anê.

Jakamã ra mẽ awÿr hkrã. Tã koja ma Xitre wa hkôt mõ nê mẽ ato ajuta ka mẽ tokyx kàxpore ho apikuprõnh pa.

²³ Nê koja mênhõ tanhmã Xitre hã mẽ akukjêr to ka mẽ kêp ixkràmnhwÿ mex ã harê. Nê kot inhîhkô hã mẽ ho ajuta mex o pa hã harê. Na pre ra jar Kris kwÿjaja mẽ akaxyw kuta nê ma mẽ awÿr kumê. Jakamã koja ma mẽ awÿr mõ nhûm Kris kôt mẽ pahtôjê hõ wa pijakrutja wa ma hkôt mõ. Na hte wa haxwÿja Kris kôt amnhî nhîpêx mex o pa.

²⁴ Koja mẽ awÿr pøj ka mẽ omu nê mẽ ho mex nê. Nê mẽ amã mẽ hkînh nê. Kê krî piitã hkôt Kris kôt mẽ pahkwÿjê piitã mẽ hã mẽ ajarênh ma nê axpên mã mẽ amex ã mẽ ajarê. Nê mẽ ajarênh o:

—Pêr ãm hãmri na pre Pawreja mẽ pamã Korîit kãm mẽ pahkwÿjê jarê. Na xep pre Xitre mẽ hkwÿta ma mẽ hwÿr mõ nhûm mẽ ho mex rax nê. Ra Pawre kot mẽ pamã mẽ harênh xà hkôt. Anê.

9

Mẽ kot kàxpore ho pikuprõnh ã mẽ harênh

¹⁻² Kwa ixkràmnhwÿjaja. Kot paj Jerujarê nhõ xwÿnhjê kaxyw mẽ atã ixihîtyx kêt nê. Ra mẽ amã mẽ ho ajuta hprãm jakamã na pa pre Masetõn kamã Kris kôt mẽ pahkwÿjê mã mẽ ajarênh o:

—Pika pê Gres kamã Kris kôt mẽ pahkwÿjaja na prem ham amgrã hapêxta kamã Jerujarê kamã mẽ pahkwÿjê jarênh ma nê kãm mẽ ho ajuta hprãm. Anê.

Hãmri nhûm mẽ ajarênh ma nê mẽ apyrã nê kãm tanhmã mẽ ho ajuta hto hprãm.

³⁻⁴ Tã ot pa mẽ awÿr Xitre mẽ hõta wa mẽ ho ixpimràatã wa mẽ kumê. Mẽ kot kàxpore hã mẽ akukjêr kaxyw. Kêr pa mytwrÿ hõ hã ma Masetõn nhõ xwÿnh kwÿjê mẽ mẽ awÿr mõ nê ra ixte mẽ kãm kàxpore hkwÿ ho mẽ apikuprõnh ã mẽ ajarênh kôt mẽ ate ho apikuprõnh rax ã mẽ apumu nê ixkînh nê. Nom kot pa mõ nê tee ri hapêr nê te ixte Masetõn nhõ xwÿnhjê mã mẽ ato ixêx pyrã nê ixpijaam nê.

Ka mẽ ajaxwỳja amnhĩ kamã apijaàm nẽ.

⁵ ã mẽ pahte amnhĩ nhĩpêx anhỹr pymaj na pa ã mẽ amã kagàja nhĩpêx nẽ Xitre mã òr nẽ ma amnhĩ kukamã mẽ awỳr mẽnh anẽ. Nẽ hkòt wa mõi mã xwỳnhhta mẽ ho ixpimràatã amnhĩ kukamã wa mẽ kumẽ. Tã kê mẽ awỳr pøj nẽ mẽ amã kagàja gõ ka mẽ kamã harẽ nẽ ama nẽ tokyx kàxpore ho apikuprõnh jatur xàm amẽ. Kêr pa mẽ hapu hã mẽ awỳr mõi ka mẽ ra mẽ ixkutêp ho apikuprõnh pa nẽ mẽ kãm agõ nẽ ajamakêtkati nẽ apa. No pa ixte mẽ amã mẽ ate ho apikuprõnh kaxyw mẽ atã ixihtỳx kêt.

⁶ Na htem piitã ã hamaxpêr anhỹr o pa nẽ hamaxpêr o:

—Kot ka apur rax nẽ kamã anhõ rax nẽ. Nom kot ka apur grire nẽ kamã anhõ grire.

Anhỹr o hamaxpêr jakamã kêr ka mẽ apiitã ajamakêtkati nẽ Jerujarẽ nhõ xwỳnhjê mã kàxpore nhõr mex nẽ. Kêr ka mẽ ho apikuprõnh pa nhũm rax nẽ. Te mẽhõ ihpur rax nẽ kamã õ raxta pyræk. Kê Tĩrtũm ã mẽ ate amnhĩ nhĩpêx anhỹr ã mẽ apumu nẽ nhỹmã mẽ ato mex nẽ.

⁷ Nom kêr ka mẽ anhõxỳ kamã mẽ kãm òr kêt nẽ. Mẽ pahte pahkĩnh kãm panhõxỳ hkêt kãm mẽ kêp amrakati xwỳnhjê mã mẽmoj nhõr o papaja na Tĩrtũm kãm hprãm.

⁸⁻⁹ Koja mẽ hã mẽ apumu hãmri nẽ amnhĩm mẽ amex ã mẽ ajarênh rãhã ho pa. Mẽ kãm Tĩrtũm kĩnh xwỳnhjaja na htem àmnhĩx ri mẽ kêp amrakati xwỳnhjê mã mẽmoj nhõr o pa. Te Tĩrtũm kot amnhĩ nhĩpêx pyræk. Na hte àmnhĩx ri mẽ pamã mẽmoj nhõr o pa. Mẽ pahwỳr na rẽ nhũm wrỳ. Nhũm mẽ pamã mẽ paxàpkur xà nhõr o pa. Nẽ tanhmã mẽ pahto pu mẽ paxà hkêt nẽ pajamakêtkati nẽ paxàpênh o papa. Nẽ pamex nẽ ri papa. Panhõ rũnh nẽ ri papa. Jakamã kwa pu mẽ uræk nẽ paxàmnhĩx ri mẽ kêp amrakati xwỳnhjê mã mẽmoj nhõr o papa.

¹⁰ E pa ixprĩ hã mẽ amã ja jarẽ ka mẽ inhma. Nà na hte ã Tĩrtũm mẽ pamã mẽ paxàpkur xà nhõr o pa anẽ. Kot kaj apur kãm ahkre nhũm tanhmã amã mẽmo hyta nhĩpêx to nhũm amã hapôx mex nẽ amã ô rũnh nẽ ka anhõ rax nẽ. Nẽ hkwy ho axàpkur o apa nẽ axte hkwy hkre. Tã kêr ka mẽ ã Tĩrtũm kot mẽ ato mex anhỹr ã amnhĩ pumu hãmri nẽ uræk nẽ axàmnhĩx ri mẽ kêp amrakati xwỳnhjê mã axàmnhõr pê mẽ ho mex o ri apa. Nhũm Tĩrtũm mẽ hã mẽ apumu nẽ mẽ amã mẽmoj nhõr rãhã nẽ. Ka mẽ amnhĩ pyrà nẽ mẽ kêp amrakati xwỳnhjê mã hkwy nhõr o apa.

¹¹ Koja Tĩrtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kêp amrakati xwỳnhjê kaxyw kàxpore hkwy jaxwỳ. Kêr pa mẽ amã hkwy jamỳ nẽ ma Tĩrtũm kòt mẽ pahkwỳjê mã o mõi nẽ mẽ kãm kugõ kê mẽ omu nẽ hkĩnh nẽ. Nẽ mẽ atã Tĩrtũm mã mex o mex ã harẽ.

¹² Hãmri nẽ mẽ akukwak ri mex nẽ ri pa. Nẽ axpên mã Tĩrtũm mex o mex ã harênh o ri pa.

¹³ Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarênh to nẽ kãm:

—Pa Tĩrtũm. Nà ãm hãmri na pre Korîit kãm akòt mẽ ixkwỳjaja amnhĩ jarẽ. Na htem akòt pix mã amnhĩ nhĩpêx mex o ri pa. Jao mẽ ixpê õxỳ hkêt nẽ mẽ inhã kàxpore hkwy nhõr rax nẽ. àmnhĩx ri hamakêtkati nẽ mẽ inhã hkwy nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

¹⁴ Hãmri nẽ mẽ ato hwỳr o:

—Pa Tĩrtũm. ãm hãmri na hte Korîit nhõ xwỳnhjaja amnhĩ pyrà nẽ mẽmoj to mẽ ixkutã nojarêt o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhã mẽ hkĩnh nẽ.

Kwa kêr ka mê ixtã mêmoj to mê kutã anojarêt rãhã ho apa Tîrtûm.

Anhÿr o mê ato kuwÿ.

¹⁵ Tîrtûmja mex o mex. Nom na hte mê pahto mex pê mê pamã kàxpore nhôr kêr nê. Kra Jejusja na pre mê pamã kugõ. Kãm mê pajapê ho mê pahwÿr kumê nhûm mê pahwÿr wrÿ nê mê pahpiitã mê pahte amnhÿ tomnuj pãnhã amnhÿrer kaxyw mê panê ty. Ja na mex o kot mê pamã kàxpore nhôr jakrenh. Mëhõ koja uràk nê ã mê panê htyk anê? Nà amrakati ho amrakati. ãm Jejus pix na pre ã amnhÿ nhÿpêx anê.

10

Pawre kêp Tîrtûm Karõ nhÿ hã kapêr xwÿnh ã harênh

Epes 6.10-20; Wam Tesarõn 5.8

¹ E Kris kôt ixkwÿjaja. Nà ixpê Pawre kot paj mê akwÿ kot tanhmã ixto kapêr to xwÿnhjê mã amnhÿ jarê ka mê apiitã inhma. Nà na hte Kris mê pakamã gryk tokyx anhÿr kêr nê. Na hte mê pahto mex japjê nê. Tã inhmã uràk nê ã mê anhÿpêx anhÿr prãm nê. No na hte mê akwÿjaja axpên mã tanhmã ixto kapêr punuj to nê ri axpên mã:

—Pawre na hte nhÿri krÿ kamã pa nê mê pamã kagã nhÿpêx nê mê pahwÿr kurê nê kamã mêmoj tã mê pamã kapêr kãm hihtÿx nê hã mê pamã akir. Tã amnê mê pahwÿr mō hãmri nê te kãm mê pahpyma pyrãk o mê pamã kapêr o pa.

Anhÿr o ijarê.

² Nom inhmã mê awÿr inhmōr nê mêmoj tã mê amã ixàkjêr prãm kêr tã kot paj nhÿrmã mê awÿr mō ka mê tanhmã amnhÿ tomnuj to ho apa japêr. Pa ja hã mê apumu nê hã mê amã akir kãm ga.

³ Na pa htem jar pika ja kamã Tîrtûm kwÿ hkêt xwÿnhjê kaêx ã ri ixpa nom mê uràk nê amnhÿ krã hkêt tanhmã amnhÿ nhÿpêx to ho ixpa hkêt nê. Nê mê uràk nê amnhÿ krã hkêt tanhmã ijamaxpêr to ho ixpa hkêt nê. Na pa htem Tîrtûm Karõ nhÿ hã

àhpumunh xà ho amnhÿ nhÿpêx o ri ixpa.

⁴ Nê Tîrtûm xàhpumunh tÿx xà ho mê kãm kapêr jarênh o ri ixpa. Mê kot mar nê hkôt amnhÿ nhÿpêx kaxyw. Nê àhpumunh tÿx o na pa htem mê kot Tîrtûm kôt amnhÿ xunhwÿr pymaj mê kêp àmnàr xwÿnhjaja tanhmã mê nê mê ho.

⁵ Na htem htÿx ri tanhmã Tîrtûm nê hkwyjê mã kapêr to ho pa. Amnhÿ kaxyw hkôt mê hamaxpêr kêr kaxyw tanhmã nê mê kãm kapêr to. Na pa htem ja hã mê omu nê Tîrtûm xàhpumunh tÿx xà ho tanhmã mê kãm ixkapêr to nhûm mê tee ri inhma nê axte mê kêp àmnàr kêr nê. Pa mê kãm Tîrtûm kapêr jarê nhûm mê ohtô nê kuma nê Kris kôt amnhÿ xunhwÿ nê hkôt amnhÿ nhÿpêx o pa.

⁶ Tã mê kajaja kot kaj mê Tîrtûm kôt amnhÿ nhÿpêx mex tã mê atō ra kapêr nhÿrōp xa nê tanhmã amnhÿ tomnuj to. Pa ja hã apumu rÿ hã ajarênh ma nê hã amã akir.

⁷ Mê ate Tîrtûm kot mê awÿr inhmênh kêr ã axpên mã ijarênh tã kot kaj mê atō ãm hãmri apê Kris kwÿ hã amnhÿ pumu nê ra mãânên pa ixpê hkwy hã ixpumunh kurê kumrêx. Mê apyrã nê ixpê hkwy kênã.

⁸ Na pa pre ma mê awÿr mō nê tanhmã mê amã amnhÿ jarênh to nê mê amã:

—Tîrtûm na pre mê awÿr inhmê pa mō. Ixte ÿ hã mê amã kapêr jarênh o ri mê akôt ixpa kaxyw. Anê.

Tã pa hte arÿ ã amnhÿ jarênh anhÿr o ri ixpa. ãm hãmri na pre Tîrtûm mê awÿr inhmê pa hte ãm hãmri mê amã kapêr jarênh o ri mê akôt ixpa. Na pa hte Tîrtûm nhÿ hã mê amã ixkapêr nê kapêr o ixêx o amnhÿ to jarkrar kêr nê. Ixte tanhmã mê atomnuj to ho ri ixpa kaxyw na pre Tîrtûm mê awÿr inhmênh kêr. Mê amã ixkapêr mex nhûm mê ate inhmar nê Kris kapêr kôt amnhÿ nhÿpêx mex o apa kaxyw na pre mê awÿr inhmê.

⁹ E kwa Kris kôt ixkwÿjaja. Na pa hte mê amã ixpuma kaxyw mê awÿr kagã rênh kêr nê. Mê ate kamã harênh

nē tee ri amnhī kukamā ajamaxpēr o amnhī kamā amā ma kaxyw kêt.

¹⁰ Mē akamā mē kām ixkīnh kêt xwýnhjaja na htem ijarēnh o:

–Pawre na hte awryr hã pa nē mē pahwýr kagà rēnh nē kamā te kēp pahi ho amnhī nhīpēx pyrà nē mēmoj tã mē pamā kapēr kām hihtýx nē. Tã mē pahwýr pōj hãmri nē kapēr kaxyw nom kapēr kām hihtýx o kapēr kêt nē. Jakamā mo kaxyw kot puj mē hwýr mra nē kapēr ma?

Anhýr o ijarē.

¹¹ Nom ã ixte anhýr kêt. Kwa mē inhma. Kot paj nhýrmã ma mē awýr mō hãmri nē te kagà ja kamā mē amā ixkapēr pyrāk o mē amā ixkapēr nē ixkapēr xihtýx o mē amā ixkapēr kām ga.

¹² Na hte mē akwýjaja kot amnhī to mex o mē ajakrenh ã amnhī to jarkrar o ri pa. No ãm amnhī krã hkôt pix mã na htem ã ri amnhī jarēnh anē. Na hte Tirtūm ã mē harēnh anhýr kêt nē.

¹³ Tã inhmã mē urāk nē ã amnhī jarēnh anhýr prãm kêt. ãm ixte Tirtūm kot tanhmã inhmã karō hto xà hkôt amnhī nhīpēx o ixpaja na inhmã hprãm. Tã mē kajaja mē awýr na pre inhmē.

¹⁴ Ra kot mē awýr inhmēnh jakamā ixkumrēx na pa pre mē awýr mō nē mē akôt ri mē amā tanhmã Kris jarēnh to ho ri ixpa. Tirtūm kām nhýhým ixpa hprãm xà pix wýr na inhmã ixpa hprãm.

¹⁵ No kêt mē kot amnhī krã hkôt htýx ri Tirtūm kapēr jahkre o mē pa xwýnhjaja na htem nhýri krī kamā mē kot Kris kôt amnhī xunhwýr ã mē harēnh ma nē mē hã amnhī to jarkrar o ri pa. Te tãm kot mē hwýr mōr nē mē kām ujarēnh nhūm mē kot mē mar xà hkôt Kris kôt amnhī xunhwýr pyrāk. Nē mē hã amnhī to jarkrar o:

–E na pa pre ma mē hwýr mō nē mē kām Tirtūm kapēr jarē nhūm mē inhma nē hkôt amnhī xunhwýr kurē kumrēx. Ixkukwak ri na prem ã amnhī nhīpēx anē. Anē.

Nom ã amnhī nhīpēx anhýrja ã amnhī to hēx. No pa na pa hte ho mē

urāk kêt nē. Koja Tirtūm ma nhýri krī hwýr ixkwýjê hō mē nhūm ma hwýr mō nē mē kām Kris kapēr jarē. Hãmri nhūm mē kuma nē Kris kôt amnhī xunhwý. Pa mē harēnh ma nē mē ý hã ixkīnh nē nom pa ixkukwak ri mē kot hkôt amnhī xunhwýr ã amnhī to jarkrar kêt nē. Ixte mē hwýr ixpa nē mē kām ixujarēnhre hã kot pa hkôt mē hã amnhī to jarkrar. ãm Tirtūm kām nhýhým ixpa hprãm xà pix wýr na pa hte ixpa nē mē kām kapēr jarē. Jakamā kot kaj mē nhýrmã Kris kôt amnhī nhīpēx mex o ri apa pa ja hã mē apumu nē mē are nē hpãnhã ma krī hō hwýr Kris kot mē hwýr inhmēnh xà hō hwýr mō. Ka mē ja hã ixto Tirtūm wýr o apa.

¹⁶ Kot paj mē anhō krī kamā mē piitã mē kām Jejus kapēr jarēnh pa hãmri nē hpãnhã ma krī hkwy hkôt ijapōx o ri ixpa nē kamā mē kām harēnh o ri mē hkôt ixpa. Kormã aa mē kot mar kêt kumrēx xwýnhjê mã harēnh o ri mē hkôt ixpa. Na pa hte ã mē hwýr ixpa nē mē kām ixujarēnh anē. Jakamā nhūm mē ja hã ixpumu nē mē kot Tirtūm kapēr mar xwýnhjê pix wýr ixpa hã ijarēnh kêt nē.

¹⁷ Nē Tirtūm kapēr ã kagà htūm kot mēmoj tã mē kot amnhī to jarkrar ã harēnh kot:

Kēr ka mē kamjaja amnhī mex ã amnhī to jarkrar kêt nē. ãm Tirtūm pix mã mãn mex o mex ã harēnh o ri ho jarkrar o ri apa. Anē.

¹⁸ Kot pu mē Tirtūm noo mã amnhī to mex ã amnhī to jarkrar nē ãm amnhī to jarkrar kaprý. Nom koja Tirtūm tãm ja hã mē pahto jarkrar nē ãm hãmri mē pahte amnhī to mex xwýnh ã pahto jarkrar.

11

Jejus kot mē hwýr mē rēnh ã amnhī to hēx xwýnhjê jarēnh

Matēwre 7.15; Rōmãn 16.17; Karatas 1.6-9; Korosē 2.8; Sikūn Pētre 2.1

¹ E kot paj te mē hkrã pipãnh xwýnh kot htýx ri amnhī jarēnh pyrāk o

tanhmã mê amã amnhĩ to jarkrar to. Kwa mê inhma nê ixkamã agryk kêt nê. No mê ixkapêr kumrêx mãn ma.

² Inhmã mê akĩnh. Te ho Mēpahpām Tĩrtũm kãm mê akĩnh ta pyrãk. Te mê apê mēhō kukrit kãm my hkĩnh nê kot ho mjên prãm xwỳnh ta pyrãk. Kãm mēmyjê piitã mê hkĩnh kêt ãm kãm pix kĩnh. Ja pyrã nê kêt ka mê amã Kris kĩnh o nhãm amã mê hkĩnh xwỳnhjê jakre. Te ho mēhō ni kot kãm myta pix kĩnh nê kãm ho mjên prãm xwỳnh ta pyrãk. Ja na pa inhmã hprãm.

³ Ra mê amã Kris kĩnh tỳx o apa nê hkôt amnhĩ nhĩpêx mex o ri apa htã nhũm mê kot amnhĩ krã hkôt htỳx ri Tĩrtũm kapêr jahkre ho mê pa xwỳnhjaja tee ri ja hã mê ajarênh ma nê axpên mã mê ajarênh o:

—Kwa nà ja mex kêt. Kojã mê Pawre kapêr ma nê ãm kuma nhũm ja mex nê. No mê pahkôt mê kot amnhĩ nhĩpêxja na mê pamã mex. Ja na kêt mê pamã mex o mex. Anê.

Hãmri nê ra kot Kris nê tanhmã mê amã hêx to kaxyw. Te amnepê mã kagã kot mê panã kot wa pê Ewa mã hêx nhũm kot mar nê hkôt amnhĩ nhĩpêx ta pyrãk.

⁴ Na pa pre ra mê awỳr mō nê mê amã tanhmã Jejus jarênh to. Nê tanhmã mê amã Tĩrtũm Karō jarênh to. Nê tanhmã wa kot mê pahto hkra hto hã mê amã wa harê ka prem inhma nê mar tỳx nê. Tã nhũm ra mê kot htỳx ri Tĩrtũm kapêr jahkre xwỳnhjaja ixpãnhã mê awỳr mō nê Jejus kapêr kwỳm ri tanhmã mê amã ujarênh to nê mê amã harênh o hêx rãhã ho pa. Nê Tĩrtũm Karōja nhũm mê amã tanhmã ho hêx to. Nê ixte mê amã Tĩrtũm kapêr jarênh kwỳm ri ixpãnhã tanhmã mê amã harênh to ho pa. Na ka prem mê ama nê ãm hãmri harênh ã hkamnhĩx. Kwa kêt ka mê ri mê ujarênh piitã mar nê hkôt amnhĩ nhĩpêx kêt nê. Mê kot Jejus jarênh tã no ãm katat kôt harênh kêt nê. ãm ri ho hêx o pa. Ka htem ama nê ãm hãmri harênh ã hkamnhĩx nê mê amã mê mar prãm nê. Mê kot mê amã harênh o hêx o pa htã ka mê ama nê ra

mê hkôt amnhĩ nhĩpêx kaxyw. Kwa mê ri ã amnhĩ nhĩpêx anhỳr hkêt nê.

⁵ Kris kot mê awỳr mê rênh ã mê kot amnhĩ jarênh tã amnhĩ to hêx. Ka prem ama nê ãm hãmri mê kot mê amã harênh ã mê hkamnhĩx. Nom na pre Krisja mê awỳr mê rênh kêt nê. Kêt pa na pre mê awỳr inhmê.

⁶ Mê hkĩnhã ixkapêr krór pyrãk tã no ãm ixte Tĩrtũm kapêr mar tỳx. Nê kot amnhĩ nhĩpêxja na ixte omunh par. Ra mê ate ja hã ixpumunh mex.

⁷ Na pa pre mê akôt ri mê amã Jejus jarênh o ri ixpa no ãm hpãnhã mēmoj tã mê awỳr o ri ixpa hkêt nê. Xà amarĩ ixte mê amã harênh nê hpãnhã mēmoj tã mê awỳr kêtja mê apê omnuj?

⁸⁻⁹ Kormã ixte mê amã Tĩrtũm kapêr jarênh o ri ixpata ã na pa pre hte tōhã kàxpore ho presija no ãm aa hã mê awỳr kêt nê. Jar Masetōn kamã Kris kôt mê pahkwỳjaja na prem ixwỳr hkwy rênh o pa pa ho ixàpkur xà japrōr o ri mê akôt ixpa. Mê kumã ixte Tĩrtũm kapêr jarênh o ri ixpa hkêt tã pa hte mê kukwak ri mê akôt ho ixàpkur o ri ixpa. Tã kot paj arĩ ã mê akôt ixpa nê ã amnhĩ nhĩpêx anê nê mēmoj tã mê awỳr o ri ixpa hkêt nê.

¹⁰ Ja inhmã mex. Jakamã kot paj amarĩ mê anhō pika pê Gres kãm ã mê amã Tĩrtũm kapêr jarênh o ixpa anê nê mēmoj tã mê awỳr kêt nê. ãm hãmri na pa ã mê amã amnhĩ jarênh anê. Kris pyrã nê ixêx kêt kênã.

¹¹ Xà we inhmã mê akĩnh kêt kôt na pa hte ã mê amã Tĩrtũm kapêr jarênh pãnhã mê awỳr kêt anê? Nà inhmã mê akĩnh jakamã na pa hte kapêr jarênh pãnhã mê awỳr o ri ixpa hkêt nê. Inhmã mê akĩnh tỳx kênã. Tĩrtũm kot ja hã ixpumunh mex.

¹² No mê kot amnhĩ krã hkôt htỳx ri Tĩrtũm kapêr jahkre xwỳnhjaja na htem mê ajahkre hpãnhã kàxpore hã mê awỳr pix o pa. Nê mê amã tanhmã amnhĩ to hêx to nê mê amã:

—Nà mê ixte Pawre kot amnhĩ nhĩpêx pyrãk. Mê ixte amnhĩ nhĩpêxja kot axpên pyrãk.

Anhỳr o mê amã amnhĩ to hêx. Nom ixte ho mê urãk kêt kumrêx. Mê

ixte amnhî nhîpêx kot axpên pyrâk ronhÿx pa mẽ urâk nê kàxpore hã mẽ awÿr o ri ixpa. Nom ixte ã amnhî nhîpêx anhÿr kêt. Kot paj aa ã amnhî nhîpêx anhÿr o ixpa hkêt nê.

¹³ Æ mẽ kot amnhî nhîpêx anhÿr xwÿnhjaja na pre Tirtûm mẽ awÿr mẽ rênh kêt nê. Mẽ kot Kris nhÿ hã mẽ ahkre xwÿnh ã amnhî jarênh tâ ãm amnhî to hêx.

¹⁴ Mẽ õ pahi Satanastija te mẽmoj mex jarênh pyrâk tâ no ãm na hte mẽ pano kupyw pê mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harênh pyrâk tâ no ãm ho hêx.

¹⁵ Tã hkôt mẽ kot amnhî nhîpêx xwÿnhjaja na htem urâk nê te tãm mẽ kot amnhî nhîpêx xwÿnhjê pyrâ nê mẽ pahwÿr mra nê tanhmã mẽ pamã hêx to. Satanasti pyrâ nê mẽ pano kupyw kaxyw tanhmã mẽ pamã hêx to. Nom koja Tirtûm nhÿrmã mẽ pahã mẽ homnuj tÿx kumrêx nhÿm mẽ rî amnhî pumu.

Tanhmã mẽ kot Kris ã Pawre nhîpêx to ã mẽ harênh Atre 9.23-25

¹⁶ E kot paj axte te ixtÿx ri amnhî to jarkrar pyrâk o mẽ amã tanhmã amnhî jarênh to ka mẽ inhma nê ixkamã agryk kêt nê.

¹⁷ Pahihti Kris nhÿ hã kot paj mẽ amã amnhî jarênh kêt ãm amnhî krã hkôt kot paj mẽ amã amnhî jarê.

¹⁸ Na htem ohtô nê mẽ ate mẽ hã apijaãm kaxyw tanhmã mẽ amã amnhî to jarkrar to ho pa. Tã kot paj mẽ urâk nê amnhî krã hkôt mẽ amã amnhî to jarkrar ka mẽ inhma.

¹⁹ Mẽ ate amnhî xàhpumunh tÿx ã amnhî jarênh tâ ka htem htÿx ri mẽ kot amnhî to jarkrar o ri mẽ pa xwÿnhjê kapêr ma nê mẽ hkôt ajamaxpêr nê mẽ hkôt amnhî nhîpêx kurê kumrêx.

²⁰ Mẽ kot Kris nhÿ hã mẽ ahkre hã amnhî to hêx xwÿnhjaja mẽ pakurom mẽ kot amnhî to rax xwÿnh ã amnhî jarênh jakamã na htem mẽmoj tâ mẽ amã karõ ho pa.

Nê mẽ kãm hprãm xà hkôt nhÿhÿm mẽ arê nê nhÿhÿm mẽ arê.

Nê mẽ apa pix kukwak ri apkur o pa.

Nê mẽmoj tâ mẽ ajakwap mẽ atak o pa.

Æ mẽ kot mẽ anhîpêx anhÿr tâ ka te mẽ ate atûm kêt pyrâ nê atÿx ri mẽ kapêr ma nê mẽ hkôt amnhî nhîpêx o ri apa.

²¹ Tã ixte mẽ urâk nê ã mẽ anhîpêx anhÿr kêt tâ kot paj mẽ urâk nê mẽ amã tanhmã amnhî to jarkrar to ka mẽ inhmar japêr. Te ixtÿx ri amnhî jarênh pyrâk o kot paj mẽ amã amnhî jarê nom ãm hãmri mẽ amã amnhî jarê.

²² Mẽ kot Jejus nhÿ hã mẽ ahkre hã amnhî to mẽ hêx xwÿnhjaja na htem mẽ amã tanhmã amnhî to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwÿ jakamã kwa mẽ ixkapêr ma nê mẽ ixkôt amnhî nhîpêx. Anê.

Nom ijaxwÿja ixpê Ijaew tâ pa hte mẽ urâk nê ja hã amnhî to jarkrar hkêt nê.

²³ Nê mẽ kot Kris kapêr jarênh mex o pa hã amnhî jarênh tâ pa na pa hte harênh mex o mẽ hakre. Te ixkrã pipãnh pyrâk o ã mẽ amã amnhî jarênh anhÿr tãã.

E pa mẽ amã tanhmã amnhî jarênh to ka mẽ inhma. Nà na pre Kris ã mẽ kãm ixkurê xwÿnhjaja mẽ kot amnhî to jarkrar xwÿnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tōhã ixtak rÿnh kumrêx. Pa mẽ hkĩnhã xatã mẽ kot tanhmã ixto hã kritpêm ronhÿx pa pre ty.

²⁴ Na pre Ijaew krãhtûmjaja Kris ã ixkatut kãm ixtak rÿnh nê. Nê ixtak xàja pî hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rÿnh o ixkatut kà rê. Ixtak o 39 hãmri nê rî kormã mẽ kot ixpîr pymaj inhmã ure. Na pre htem nhÿri ixpynê nê ã inhîpêx anê. Na prem ã inhîpêx anhÿr o 5 wês.

25 Nē na prem ra mẽ kot ixpîr kaxyw nē kēn rûnh kwỳ jamỳ nē ho ixtak o kuhê. Nē Rôm nhõ xwỳnhjaja haxwỳja pĩ ho ixtak rax kumrêx. Ā inhĩpêx anhỹr o axkrunêpxi.

Nē na pa pre hte gô xujanār kām nhỹhỹm Jejus jarēnh o ri ixpa kaxyw pâr kām mẽ hwỳr ixpa nhũm pârja tanhmã amnhĩ to nē agjê. Kritpēm nhỹx pre hte gôja ixpĩ. Pa pre Ā amnhĩ nhĩpêx anhỹr o axkrut. Tã arĩgro hõ hã kê axte pâr õ mã axà nē ma axte krĩ hõ hwỳr mō. Nhũm kê pârta axte mẽ ixpê axà nhũm gôja nhỹx kê axte ixpĩ. Pa pâr jakà hã kumỳ nē hã ijêt o amỹkry. Nē ho apkati. Tã nhũm nhỹhỹnh pâr õja mō nhũm kamã mẽ mōr xwỳnhjaja ixpumu nē ixwỳr pâr o mō nē amnhĩ wỳr ixto api nē ma amnhĩ kôt ixto mō.

26 Na pa pre amnhĩ xà htỳx kamã ijamak o ri Ā mẽ kām Kris kapêr jarēnh o ri ixpa anê. Kironhỹx pre gô tãmja ixpĩ. Nhũm mẽ àhkĩnh nhi xwỳnhjaja kironhỹx prem mãânēn ixpĩ. Nē Ijaew nē Ijaew kêt xwỳnhjaja tōhã tanhmã ixtomnuj to ho pa. Pa pre krĩ hkwyỳ hwỳr ixpa rỳ kapôt Ā ixpa nhũm mẽ ixtã amỹnê. Pa pre gô xujanār kām pâr kām ri ixpa nē nhỹx kamã ty. Nhũm mẽ kêp Kris kwỳ hã amnhĩ to hêx xwỳnhjaja haxwỳja tanhmã ixtomnuj to pa mẽ ý hã amnhĩ xà htỳx kamã ijamak o ri ixpa. Ā na prem Kris Ā inhĩpêx anhỹr o pa.

27 Nē na pa Jejus kapêr jarēnh o ri ixpa kurê ixkēngrà nē ri ixpa. Nē tōhã inhôt kêt Ā ixtã apkati. Nē tōhã inhmã prãm nē inhmã kôr nē ri ixpa. Nē tōhã ixê mex kêt nē inhmã kry nē ri ixpa.

28 Na pa hte Kris kapêr jarēnh o ri ixpa pê Ā amnhĩ nhĩpêx anê. Nom ja pix kêt. Na pa hte krĩ piitã hkôt Kris kwỳjê hkukamã tee ri ijamaxpêr nē ijamaxpêr o:

–Hêxta waa nē. Mãn mẽ arĩ Kris kôt amnhĩ nhĩpêx mex japêr rỳ ko. Mãn mẽ ra kapêr kwỳm ri tanhmã amnhĩ tomnuj tō rỳ ra hkaga.

Anhỹr o ijamaxpêr o ixpa.

29 Nē na hte mēhõ Tĩrtũm kapêr nhĩrôp xa nē tanhmã amnhĩ tomnuj to pa tee ri omu nē ixkaprĩ htỳx kumrêx. Koja mēhõ tanhmã Tĩrtũm nē mēhõ mã kapêr to nhũm kuma nē Tĩrtũm kôt amnhĩ nhĩpêx kêt pa tee ri ja hã omu nē nē kêp àmnâr xwỳnhnta kamã inhgryk tỳx kumrêx.

30 E Kris kôt ixkwỳjaja. Na pa Ā mẽ amã amnhĩ jarēnh anê. Te ixte amnhĩ to ijarkrar pyrāk no ãm mẽ ate ixirerek xwỳnh Ā ixpumunh pix kaxyw.

31 Ām hãmri na pa Ā mẽ amã amnhĩ jarēnh anê. Ixêx kêt. Pahihti Jejus nhĩpêxà Tĩrtũm kot ja hã ixpumunh mex. Tĩrtũmja mex o mex. Koja mex o mex tũm nē pa rãhã ho pa. Tãm kot ixirerek Ā ixpumunh mex.

32 Kormã krĩ pê Tamas kām ixpare ri na pre mẽ õ pahi Arêtja mẽ kām ixtã amỹnê nhũm pōristijaja krĩ hpu hã kahê xà nhõ hakwakre piitã kām hipôk pa nē ixkãm hamak o kuhê. Pa tee inhmã nhỹhỹnh ixkator nē ma mẽ umaj ixprôt nē ixtēm prãm nē ixirerek xwỳnh Ā amnhĩ pumunh kurê kumrêx.

33 Tã nhũm Kris kôt mẽ pahkwỳjaja hamaxpêr nē kawà rax mỳ nē o tē nē inhmã ãm pa hwỳr axà nē kamã nhỹ. Hãmri nhũm mẽ pâr nhõr o kahê nhĩrô pê ixto wrỳ pa ixkato nē mẽ kêp amũxu nē amnhĩm ixprĩ nē ma tē nē mẽ kêp akunok. Ā na pre Tĩrtũm ixirerek xwỳnh Ā inhmã ixto amnhĩrĩt anê.

12

Tĩrtũm kot Pawre mã mẽmoj to amnhĩrĩt Ā harēnh

1 E Kris kôt ixkwỳjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarēnh to ka mẽ inhma nē hã ixtã apijaam japêr. Na hte Tĩrtũm tōhã inhôt kām ixkarõ mã tanhmã kapêr to.

2-3 Amnepê mã amgrà hõ hã na pre tanhmã ixkrã hto nē õ krĩ hwỳr amnhĩ wỳr ixto api. Na pre ra hã amgrà pê 14 ãn. Apu inhĩ rãhã ixto api rỳ apu ãm ixkarõ pix o api rỳ ko. Ixte

ja hã amnhî pumunh mex kêt. Tîrtûm pix kot ja hã ixpumunh.

⁴ Na pre ixto api pa pøj nê ò krî kamã axtem tanhmã mê kapêr to hã mê kuma. Na prem mëmoj mex kumrêx jarê pa kuma nê ixkînh nê. Nê inhmã mar prãm nê. Hãmri nê ijamaxpêr o:

—Hêxta waa nê. Mëmoj jarênhja mex kumrêx. Nà kot paj akupÿm wrÿ nê ixkwÿjê mã harê kê mê ixpyrà nê kuma. Nà kot paj anê.

Anhÿr tã nhûm Tîrtûm Karô ja nê ixkurê nê inhmã:

—Nà kêr ka mê kãm ja jarênh kêt nê. ãm kapxipix kot kaj ama nê ri hã apa.

⁵ Anhÿr jakamã pa pre paxipix mê arom mëmoja pumu nê kuma nom kot paj ri hã amnhî to jarkrar kêt nê. Kot paj ãm Jesus pix tanhmã harênh to ho ri ixpa. Jao ixrom mex o mex ã harê. Nê ixrom hihtÿx o hihtÿx nê àhpumunh o àhpumunh ã harênh o ri ixpa.

⁶ Nê ixte Tîrtûm nhô krî hwÿr ixàpirja ãm hãmri ixte hã amnhî jarênh tã kot paj ja hã amnhî to jarkrar o ri ixpa hkêt nê. Mê ate ja hã inhmar kôt inhmex ã ijarênhja na inhmã hprãm kêt. Nom kot ka mê ixte tãm amnhî nhîpêx ã ixpumu nê tãm ixkapêr ã inhma hãmri nê rî kormã inhmã inhmex ã ijarê. ã mê ate amnhî nhîpêx anhÿrja na inhmã hprãm.

⁷ Na pre Tîrtûm inhôt kãm inhmã mëmoj mex kwÿ jarênh rax nê. Hãmri nê hpãnhã inhmã:

—E na ka akwÿjê rom inhô krî hwÿr api nê mê kurom mëmoj mex pumunh rax nê. Tã ate ja hã amnhî pumunh nê ma mê kãm hã amnhî to jarkrar o ri apa pymaj kot paj Satanasti mã anê nhûm inhma nê tanhmã atomnuj to ho pa. Nom ijaxmaxpêr xà hkôt koja ã anhîpêx anê.

Anhÿr jakamã nhûm tanhmã inhîpêx to pa inhmex kêt nê ixpa. Te mrônhi rax nhÿhÿnh kot ixkamnhwÿr nhûm inhmã tee ri hkaxàr prãm kaprÿ nê ÿ hã ho inhgîêx rãhã nê ixpaja pyræk.

⁸ Tã pa tee ri ja hã amnhî pumu nê amnhî to Jesus wÿ nê kãm:

—Kwa Pahihti. Na pa ra mëmoja nhÿ hã ixpunuj nê ixirerek nê ixpa. Kwa inhnê ata pa akupÿm ixihtÿx nê ijamakêtkati nê ri ixpa nà?

Anhÿr o amnhî to hwÿr o axkrunêpxi.

⁹ Hãmri nhûm inhmã:

—Nà kot paj anê hyr kêt nê. Kot paj ãm akutã inhnojarêr rãhã ho ri akôt ixpa. Ka axirerek nê apa htã ixihtÿx xwÿnh ã ixpumunh kôt ixkamnàr rom tanhmã inhÿ hã amnhî nhîpêx to ho ri apa. Anê.

ã inhmã kapêr anhÿr jakamã na pa ixpunuj nê ri inhîrot nê ixpa htã ixrom hihtÿx xwÿnhhta nhÿ hã ixkînh nê ixpa. Nê kurom ixirerek xwÿnh pix ã amnhî to jarkrar o ri ixpa.

¹⁰ Jakamã kot paj Kris ã ixpunuj nê ri ixpa htã ixkînh nê ijamakêtkati nê ri ixpa. Kwãr mê mãmrî hã tanhmã ixto kapêr to nê tanhmã hã inhîpêx to pa amnhî xà htÿx kamã ijamak o ri ixpa. Nê ixpê amrakati nê inhîrot nê ri ixpa htã Kris nhÿ hã tanhmã kãm amnhî nhîpêx mex to rãhã ho ri ixpa.

Pawre kot tee ri mê hkukamã hamaxpêr ã harênh

¹¹ Tã mëmo kaxyw na pa ã mê amã amnhî jarênh anê? Nà mê ate ixtã apijaàm kêt jakamã na pa ã mê amã amnhî jarênh anê. Mê kêp Kris nhÿ hã mê ajahkre xwÿnh ã amnhî to hêx xwÿnhjaja na ka htem ixrom kot amnhî to rûnh xwÿnh ã mê harê nê mê hã apijaàm o ri apa. Nom ixte amnhî to grire xwÿnh tã mê kot amnhî to rûnh o ijakrenh kêt.

¹² Na pa pre mê akamã ri ixpa nê Tîrtûm nhÿ hã aa mê ate mëmoj pumunh kêt kwÿ ho anhÿr rax o ri mê akôt ixpa. Nê ÿ hã akupÿm mê à xwÿnhjê ho mex. Nê mê nohkre xwÿnhjê no ho mex. Na pa pre hte ã mê amã mëmoj nhîpêx anhÿr o ri mê akôt ixpa. Amnhî xà htÿx kamã ijamak o ri ixpa htã Tîrtûm xihÿtÿx xà ho amnhî to htÿx nê ã mê amã mëmoj to anhÿr o ri mê akôt ixpa. Mê

ate omunh nê Tîrtûm àhpumunh tỳx ã omunh kurê kumrêx kaxyw. Nê ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa.

¹³ Xàn pa pre nhãm krĩ hkwỳ kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpên pyræk. ãm mẽmoj pixire na pa pre mẽ uræk nê mẽ awỳr kêt nê. Nhãm krĩ hkwỳ kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mō nê mẽ akôt ixpa nê mẽmoj to presija htã hã mẽ awỳr kêt nê. Kwa mẽ ã ixte amnhĩ jarênh anhỹrja ma nê ixkamã agryk kêt nê.

¹⁴ Tã ot pa ra akupỹm mẽ awỳr inhnojarêit kaxyw. Na pa pre ra mẽ awỳr inhmōr o axkrut. Tã ra axte mẽ awỳr inhnojarêit kaxyw. Kot paj mẽ awỳr mō nê mẽ akôt ixpa nom te wam ixtêmta pyrã nê mẽmoj tã ri mẽ awỳr kêt nê. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nê mẽ hipêêxà mã ujaarprô o pa hkêt nê. Mẽ hipêêxà nê mẽ katorxà na hte hkrare mã kot mẽmoj to presija xà hkôt kãm haprô o pa nom mẽmoj tã hwỳr kêt nê. Ja pyrã nê kot paj mẽ apê ixkra pyræk ã mẽmoj tã mẽ awỳr kêt nê.

¹⁵ Kot kaj mẽ mẽmoj to presija japêr nê inhmã harê pa ixãmnhĩx ixkĩnh kãm mẽ amã ixkãxpore piitã òr par pyræk o amnhĩ nhĩpêx. Nê mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwỳ jêt kêt kumrêx.

¹⁶ Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kêp amrakati xwỳnhjê mã kãxpore hã mẽ awỳr o ixpa hã ixkamnhĩx.

¹⁷ Kwa tanhmã na pa pre ri mẽ ano kupyrr to? Xà ja kaxyw na pa pre mẽ awỳr ixkrãmnhwỳta wa kumê?

¹⁸ Na pa pre Xitre hã ixihitỳx nê mẽ awỳr kumê. Nê Kris kôt mẽ pahtōja pa Xitre hkôt kumê nhũm wa ma mẽ awỳr mō. Tã xà na pa pre Xitre tanhmã mẽ ano kupyrr to? Nà na pre ã mẽ anhĩpêx anhỹr kêt nê. Tã wa ixte amnhĩ nhĩpêx nê wa ijamaxpêrja kot axpên pyræk. Nà na pa hte uræk nê mẽ ano kupyrr o ri ixpa hkêt nê.

¹⁹ Mãn ka mẽ axpên mã mẽ ijarênh o:

—Nà Pawre mẽ hkwỳjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprãr anê.

Anhỹr o mẽ ijarênh japêr nom mẽ inhmã amnhĩ tã tanhmã ixàprãr to hprãm kêt. ãm mẽ inhmã mẽ akĩnh nê mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tîrtûm noo mã Kris nhỹ hã ã mẽ amã mẽ amnhĩ jarênh anê.

²⁰ Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỹr o apa.

Rỳ axpên pê anhōxỳ.

Rỳ axpên to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỹr o ri apa pa ja hã mẽ apumu nê ixkaprĩ htỳx kumrêx ka mẽ tee ri amnhĩ tã ixpumu.

²¹ Xà kot paj mẽ awỳr mō nê mẽ apumu ka mẽ akwỳjaja arĩ mẽ aprō kuhpa hã nhãm mênijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anê pa ja hã mẽ apumu nê ixkaprĩ xàj inhmỳr rax nê. Nê mẽ anhỹ hã Tîrtûm noo mã ixpijaàm tỳx kumrêx.

13

Pawre kot tanhmã amnhĩ kukamã

mê kãm karõ hto

¹ Tîrtûm kapêr ã kagà htûm tanhmã mê kot amnhî tomnuj to xwýnhjê jarênh kot:

Koja mēhõ tanhmã amnhî tomnuj to nhûm mēhõ pyxi nê ã amnhî nhîpêx anhÿr ã omu nê awÿr tē nê amã harē ka mē ama nê âm ama nê hkôt ajamaxpêr kêt nê. No koja mēmojaja axkrut rÿ axkrunêpxi nê hã omu nê awÿr mra nê axpēn kôt amã harē ka mē ama nê mē hkôt ajamaxpêr kurê kumrêx. Anê.

Tã ra mē awÿr inhmõr o axkrut tã kot paj akupÿm mē awÿr mō nê mē apumu.

² Hapu hã mē awÿr inhmõrta ã na pa pre mē akwÿ kot tanhmã amnhî tomnuj to hã mē omu nê hã mē kãm akir nê mē kãm:

—Kot kaj mē amnhî tomnuj kaga nê tãm amnhî nhîpêx kêt kot paj nhÿrmã akupÿn mē awÿr mō nê ã mē ate amnhî nhîpêx anhÿr ã mē apumu nê hã mē atomnuj tÿx kumrêx kãm ga. Anê.

Jakamã kot paj mē ma mē awÿr mō nhûm mē akwÿjaja arî mē ate amnhî tomnuj o apa hã inhmã mē ajarē pa mē atã mē kuma nê tanhmã mē ato htÿx nê.

³ Kot kaj mē ja hã ixpumu nê aprî hã ixte Kris nhÿ hã ixkapêr xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mē ate amnhî tomnuj o apata mÿrapê tanhmã mē anhîpêx to. Tã kot kaj mē kormã ã ate amnhî nhîpêx anhÿrja kaga hkêt hã koja tee ri ja hã mē apumu nê mē anhîpêx kati nê.

⁴ Amnepê m na pre Krisja te hihtÿx kêt pyrã nê âm arî mē kãm xa nhûm mē unê nê pî kahpa ã kunhõ nê kupî. Tã nhûm Tîrtûmja àhpumunh tÿx o akupÿm ho htîr nhûm akupÿm htîr o htîr nê Tîrtûm nhÿ hã hihtÿx o hihtÿx ã amnhî to amnhîrît. Ja pyrã nê wam mē awÿr inhmõrta ã na pa pre hte mē akamã te Kris kormã htyk kêt ri hihtÿx kêeta pyrã nê mē akôt ixpa. Tã kot paj ma akupÿm mē awÿr mō hãmri nê te Kris ra akupÿm htîr

nê hihtÿx o hihtÿxta pyrã nê Tîrtûm xihtÿx xà ho tanhmã mē kot amnhî tomnuj xwÿnhjê nhîpêx to. Hãmri nhûm mē amnhî tã ixpumu nê Tîrtûm nhÿ hã ijamaxpêr tÿx ã ixpumunh kurê kumrêx.

⁵ Kwa mē aprî hã tanhmã mē ate amnhî nhîpêx to hã amnhî pumu. Xàn ka htem âm hãmri amnhî kaxyw Jejus Kris kôt ajamaxpêr o ri apa nà? Kot kaj mē apê hkwÿ hã koja mē akaxwÿnh kãm mē akamã hkrî rãhã nê. Nom koja mē akaxwÿnh kãm mē akamã hkrî hkêt ka mē âm apê hkwÿ hã amnhî jarênh kaprÿ.

⁶ No pa na ixte ja hã amnhî pumunh mex. Ixpê Jejus kwÿ na pa. Ra ixkamã hkrî nê ixkôt pa ho pa jakamã ixpê hkwÿ na pa. Tã mē ate ja hã ixpumunh mexja na inhmã hprãm. Na pa hte ixpê Jejus kwÿ hã amnhî jarênh kaprÿ hkêt nê.

⁷ Nê na pa hte mē ato tanhmã Tîrtûm wÿr to ho ri ixpa nê mē ato hwÿr o:

—Pa Tîrtûm. Kwa tanhmã Korîit nhõ xwÿnhjê hkrã hto kê mē tanhmã amnhî tomnuj to ho pa hkêt nê.

Anhÿr o mē ato kuwÿ. Mēmo kaxyw na pa hte ã mē ato hwÿr anê? Ixte mē ajahkre mex ã amnhî to amnhîrît kaxyw kêt. Âm mē ate amnhî to mex rãhã ho ri apa kaxyw. Kot kaj mē ã amnhî nhîpêx anhÿr o ri apa hãmri nhûm axtem mēhõ mē awÿr mōn pøj nê tanhmã mē amã mē ijarênh to nê mē ijarênh o:

—Kwa Pawre mē hkwÿjaja na htem Tîrtûm kapêr kwÿm ri Korîit nhõ xwÿnhjê jahkre ho pa.

Anhÿr tã pa amnhî tã mē kuma nê âm mē kuma.

⁸ Na pa hte Tîrtûm kapêr kutã amnhî xunhwÿr kêt nê. Na pa hte âm mē ate hkôt amnhî nhîpêx o ri apa hã mē amã karõ kamã ixihtÿx rãhã ho ri mē akôt ixpa.

⁹ Jakamã kot kaj mē hkôt amnhî nhîpêx mex o apa pa ja hã mē apumu nê ixkînh nê. Mē kot axpēn mã ixirerek ã ijarênh o pa htãã. ã mē ate amnhî nhîpêx anhÿr o apa kaxyw na

pa hte mẽ ato Tĩrtũm wỳr o ri ixpa nẽ kãm:

—Pa Tĩrtũm. Kwa tanhmã Korīt nhõ xwỳnhjẽ hkrã hto kê mẽ kot amnhĩ tomnuj kaga hpa nẽ hpãnhã akapẽr kõt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awỳr inhmõr xwỳj ri ã amnhĩ kukamã kagà nhĩpêx nẽ mẽnh anẽ. Mẽ ate kamã harẽnh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõi nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjẽr anhyr prãm kêt. ãm y hã kapẽr o mẽ ajahkre mex nhũm mẽ ate inhmar nẽ hkõt amnhĩ nhĩpêx rãhã ho apaja na inhmã hprãm.

¹¹ E Kris kõt ixkwỳjaja. ãm ja pix. Kwa kêr ka mẽ ixkapẽr mar tỳx nẽ hkõt amnhĩ nhĩpêx mex nẽ. Nẽ Tĩrtũm kõt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kõt ajamakêtkati nẽ akĩnh nẽ axãmnhĩx ri apa. Kot kaj mẽ ã amnhĩ nhĩpêx anhyr o apa nhũm Tĩrtũm mẽ akõt pa ho pa. Kãm mẽ pajapê htỳx kumrẽx. Kẽp mẽ pamã mẽ pahkĩnh nẽ mẽ pajamakêtkati jagjẽnh xwỳnh.

¹²⁻¹⁴ Nẽ ota jar Kris kõt mẽ pahkwỳjaja pa mẽ ixpimràatã mẽ awỳr ixpẽr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpẽr mẽ.

Nẽ kê Pahihti Jejus Kris mẽmoj to mẽ akutã nojarêt rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpẽn to mex pix kukamã mãn ajamaxpẽr o apa.

Tã e ixkwỳjaja. ãm ja pix. Ixpê Pawre na pa mẽ awỳr kagãja nhĩpêx nẽ ã mẽnh anẽ.

Karatas Pawre kot Karatas kamã Jejus kôt hkwýjê hwýr kagà nê mênh

Pawre na pre kagàja nhîpêx nê pika pê Karatas kamã Kris kwýjê hwýr kumê. Na pre ra Ijaew kwýjaja mē hwýr mra nê Tirtûm kapêr kwým ri mē ahkre ho pa nê mē kãm:

–Kot kaj mē amnhî kaxyw Jejus Kris kôt ajamaxpêr hãmri nê mãânên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã mē apumu nê mē ato hkra. Anê.

Nom ã mē kapêr anhýrja kot anhýr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwýr pix ã mē pahpumunh kôt na hte Tirtûm mē pahto hkra. Tã nhûm prem ã mē kãm ho hêx anhýr o pa nhûm Pawre tee ri ã mē kapêr anhýrja ã mē harênh ma nhûm ja kêp omnuj nê. Jakamã nhûm Karatas nhõ xwýnhjê mã kagàja nhîpêx nê mē hwýr kumê. Nê kamã hprî hã Tirtûm kot mē ho hkra kaxyw tanhmã amnhî nhîpêx to hã mē kãm harê nê hã kagà. Nê mē kãm:

1-2 Pa Karatas nhõ xwýnhjaja? Xà mē amex? Ixpê Pawre na pa mē awýr ixpêr mē nê mēmoj tã mē amã karõ.

Mêpahpãm Tirtûm mē Jejus Kris na pre wa mē akaxyw ixãm. Ixte wa ý hã ma ri mē akôt mē ajahkre o ri ixpa kaxyw. Na pre Jejus ty nhûm Tirtûm akupým ho htír. Hãmri nhûm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtûm mē Jejus Kris na pre wa ixãm. Jakamã na pa ã mē awýr kagà nhîpêx nê mênh anê. Mē apê Tirtûm krajê hwýr.

Nê ota jar krî ja kamã ixpyrà nê Kris kôt mē pahkwýjaja mē awýr hpêr mē.

³ E kê Mêpahpãm Tirtûm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ý hã akînh nê ajamakêtkati nê axãmnhîx ri apa.

⁴ Nà na pre Krisja amnhî grônh kôt mē pahwýr wrý nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtûm kãm hprãm xà hkôt. Tã mēmo kaxyw na pre ã mē panê amnhî nhîpêx anê? Nà pika ja kamã mē kot amnhî nhîpêxja omnuj týt jakamã nhûm amnhî grônh kôt te mē kot amnhî tomnuj pê mē papytãr pyrãk o mē panhîpêx nê ã mē panê htyk anê.

⁵ Jakamã kwa kêr pu mē Tirtûm mã mex o mex ã mãn harênh o ri papa. Nà kot puj mē ã amnhî nhîpêx anhýr rãhã ho ri papa.

Mê ujarênh pixi ãm hãmri hã harênh Rômãn 16.17; Sikûn Korît 11.3-4; Epes 4.14; Korosê 2.8; Sikûn Pêtre 2.1-3

⁶ Kwa ixkrãmnhwýjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijamaxpêr. Na pre Tirtûmja Kris kukwak ri mē ato mex nê. Nê mē ate hkôt amnhî nhîpêx o apa hprãm xà te kot amnhî wýr mē awýr pyrãk o mē anhîpêx ka mē hkôt amnhî xunhwý. Tã xep tanhmã mē ajamaxpêr to nê ra hkaga kaxyw. Ra axtem mē ujarênh ôja ma nê gryk ã Tirtûm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhýr mã?

⁷ Jejus jarênh pix na ãm hãmri. Mo mē ujarênh mex õ kot ka kêt mē ama nê hkôt amnhî nhîpêx? Nà amrakati kumrêx. ã mē amã ujarênh anhýr xwýnhjaja na htem Kris kapêr o pihkãr rûnh kumrêx o pa nê katãt kôt harênh kêt nê. Ka xep mē ama nê ajamaxpêr kati rûnh nê.

⁸ Na pa pre ma mē awýr mō nê ãm hãmri mē amã Jejus kot tanhmã mē panê amnhî nhîpêx to hã harê ka prem inhma. Tã koja mēhõ mē awýr mō nê mē amã nhãm mē ujarênh õ jarê nhûm Tirtûm ja hã omu nê nhýrmã ma mē kot amnhî xà htýt kamã hamak tûm xà hwýr kumê nhûm ma hwýr mō nê aa kator kêt nê. Mē pahtõ rý Tirtûm kapêr o wrýt xwýnhjê hõ koja ã amnhî nhîpêx anê

nhũm ja hã omu nẽ ma kuwy pẽ himõta wỳr amnhĩ nẽ kumẽ.

⁹ E kot paj axte mẽ amã ja jarẽ ka mẽ aprĩ hã inhma. Kojã mẽhõ mẽ awỳr mõ nẽ mẽ ate hkõt amnhĩ xunhwỳr xwỳnhĩa kwỳm ri tanhmã mẽ amã ujarẽnh to. Hã kojã Tĩrtũm omu nẽ nhỹrmã ma mẽ kot amnhĩ xà htỳx kamã hamak tũm xà hwỳr kumẽ nhũm ma hwỳr mõ nẽ kamã pa ho pa nẽ aa kator kêt kumrẽx.

Tĩrtũm pix kãm Pawre hkĩnh hprãm ã kot jarẽnh

Juãw 5.44; Atre 26.9-20; Karatas 2.6

¹⁰ Nẽ kojã mẽmojaja ixkapẽr ma nẽ kãm mar prãm kêt o kãm ixkĩnh kêt japẽr nẽ mãmri kãm ixkĩnh kêt. Tĩrtũm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhỹx pa Kris nhỹ hã kapẽr jarẽnh o ri ixpa hkêt nẽ.

Tĩrtũm kot Pawre mã Kra Jejus o amnhĩrit ã harẽnh

Sikũn Korõt 1.12; Wam Tesarõn 2.4

¹¹⁻¹² E Jejus kõt ixkrãmnhwỳjaja. Nà ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkõt inhmã harẽnh rỳ inhmã ahkre hkêt nẽ. Jejus Kris tãm na pre ixwỳr kato nẽ inhmã ho amnhĩrit. Jakamã mex o kot pika jakamã mẽ ujarẽnh piitã hakrenh par.

¹³⁻¹⁵ E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tĩrtũm kot amnhĩ kaxyw ixãm to hã pa mẽ amã amnhĩ jarẽ. Nà na pre kormã ixkêt ri ixkukamã hamaxpẽr nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixaptar nom kormã Jejus Kris kõt amnhĩ xãm kêt nẽ. Na pa pre axtem nẽ inhmã mẽ ixpẽ Ijaew kot amnhĩ nhĩpẽx kõt pix mã amnhĩ nhĩpẽx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwỳja kãm mẽ hkõt pix mã ri amnhĩ nhĩpẽx o pa hprãm nẽ. No inhmã mẽ hkõt amnhĩ nhĩpẽx mex o mẽ hakrenh par prãm jakamã na pa pre mẽ inhĩgêt kõt

amnhĩ nhĩpẽx mex kumrẽx o ri ixpa. Mẽ kapẽr piitãã hkõt amnhĩ nhĩpẽx mex nẽ. Tã ã amnhĩ nhĩpẽx anhỹr o ixpa kaprỳ. Na pa pre axtem nẽ mẽ kot Tĩrtũm Kra Jejus Kris kõt amnhĩ xunhwỳr xwỳnhjẽ nhĩpẽx kati ho ri mẽ hkõt ixpa nẽ inhmã mẽ himex prãm tỳx kumrẽx. ã na pa pre amnhĩ nhĩpẽx anhỹr o ri ixpa. Ra mẽ ate ja hã ixpumunh mex.

¹⁶⁻¹⁷ Tã pa pre ma Tamas wỳr mõ. Kamã tanhmã Kris kwỳjẽ nhĩpẽx to kaxyw ma mẽ hwỳr mõ. Hãmri nẽ kormã mẽ hwỳr ixàhtẽp o inhmõr mẽ nhũm Tĩrtũm tanhmã ixto nẽ inhmã Kra Jejus o amnhĩrit pa jatã omu. Kẽp Tĩrtũm Kra hã pa ixprĩ hã omu. Nhũm inhmã kapẽr nẽ ixte kãm tanhmã amnhĩ nhĩpẽx to ho ri ixpa kaxyw ixapẽnh ã inhmã karõ nẽ Ijaew kêt xwỳnhjẽ hwỳr inhmẽ. Ixkwỳ Ijaew wỳr inhmẽnh kêt nẽ. Na pre inhmã:

—E kêt ka ma Ijaew kêt xwỳnhjẽ hkõt ri mẽ kãm ixkapẽr jarẽnh o ri apa.

Anhỹr jakamã pa pre kuma nẽ hkõt amnhĩ xãm kurẽ kumrẽx nẽ ã amnhĩ nhĩpẽx anhỹr o ri ixpa. Jao tanhmã ixte kẽp hkwỳjẽ nhĩpẽx tota kaga nẽ ma pyka pẽ Arap wỳr mõ. Nom tanhmã amnhĩ tã Jejus kwỳjẽ kukjẽr to hkêt nẽ. Nẽ Jerujarẽ hwỳr inhmõr nẽ Jejus nhỹ hã mẽ ahkre xwỳnh maatijaja tanhmã amnhĩ tã mẽ kukjẽr to hkêt nẽ. ãm Tĩrtũm kot inhmã hã karõ xà hkõt ma Arap wỳr mõ nẽ kamã kapõt ã ri ixpa. Kamã na pre Tĩrtũmja inhmã Jejus Kris kot tanhmã amnhĩ nhĩpẽx to ho amnhĩrit o pa. Hãmri nẽ inhmã kapẽr pa amnhĩ tã kuma hãmri nẽ ma akupỳm Tamas wỳr mõ.

¹⁸ Tã nhũm ra amgrã axkrunẽpxi nẽ hapẽx pa Tamas rùm ixkato nẽ ma Jerujarẽ hwỳr Simãw Pẽtre hwỳr mõ. Hãmri nẽ kuri pøj nẽ hkõt ixpikamẽnh ã ixtã semãn axkrut.

¹⁹ Nom mẽ kot Jejus nhỹ hã hkwỳjẽ jahkre ho mẽ pa xwỳnh maati hkwỳjẽ hõ pumunh kêt kumrẽx. ãm Simãw Pẽtre mẽ Pahihti Jejus tõ Xiakreja pix wa omu.

20 ãm hãmri na pa ã amnhĩ jarēnh anē. Tĩrtũm kot ja hã ixpumunh mex.

21 Tã pa pre mẽ kurũm ixkato nē hpãnhã ma pika hkwỳ hkõt ijapôx o mẽ hkõt ixpa. Ma pika pē Sir mẽ Sirisja wa hwỳr mō.

Mẽ kot amnhĩ jaēr pē Pawre kot amnhĩ nhĩpêx nyw ã omunh ã mẽ harēnh

22 Nom Jutej kamã Kris kwỳjaja na prem kormã ixpumunh kêt nē. ãm Simãw Pētre mẽ Xiakre pix na pre wa ixpumu.

23 Na pre ra mẽ hkwỳjaja tanhmã hkwỳjê kot axpēn mã ijarēnh toja ma. Na prem ijarēnh o:

–Kwa Jejus ã mẽ panhĩpêx kati htỳx o pa xwỳnhta na pre tanhmã hamaxpēr to nē hpãnhã mẽ kãm Jejus kapēr jarēnh o ri mẽ hkõt pa. Mẽ kot amnhĩ kaxyw hkõt hamaxpēr kaxyw. Ra kot Jejus nē mẽ pahkurê htã hpãnhã mẽ kãm kapēr jarēnh o ri mẽ hkõt pa. Anē.

24 Hãmri nhũm Kris kwỳjaja amnhĩ jaēr pē ijarēnh ma nē inhỹ hã hkĩnh nē. Nē ixtã Tĩrtũm mã mex o mex ã harē.

2

Pawre kot Kris kwỳ hkrãhtũmjê mã amnhĩ jarēnh

Atre 15.1-11

1-2 Tã nhũm amgrã pē 14 nē hapêx nhũm Tĩrtũm akupỹm Jerujarē hwỳr inhmē pa ma akupỹm mō. Panãpe nē Xitre mẽ pa mẽ mō nē mẽ hwỳr pōj. Hãmri nē Kris kwỳ hkrãhtũmjê hwỳr mra nē mẽ kãm amnhĩ jarē. Mẽ tapxipixjê mã amnhĩ jarē nē ixte Ijaew kêt xwỳnhjê mã Jejus kapēr jarēnh o ixpa hã amnhĩ jarē. Na pa pre ra amnhĩ kukamã ijamaxpēr o:

–Koonēn. Kot pa apu mẽ kãm amnhĩ jarē nhũm mẽ inhma nē ixte Tĩrtũm kapēr kwỳm ri mẽ ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarēnh o ixpa no ãm mẽ ixpê Ijaew pyrà nē finat Mojes kapēr kêt mẽ kot amnhĩ my kwỳrýt kã jakàr ã mẽ kãm

karō hkêt nē. ãm mẽ kot Kris kêt amnhĩ xunhwỳr pix kaxyw na pa hte mẽ kãm hã karō ho ixpa. Tã kot paj Kris kêt mẽ ixkrãhtũmjê mã ja hã amnhĩ jarē nhũm mẽ inhma nē tanhmã hamaxpēr to nhũm ja mẽ kēp omnuj japēr nhũm mẽ tanhmã amnhĩ to nē ixte Kris kapēr jarēnh o ixpaja nē ixkurê. Jakamã nhũm ra ixte mẽ kãm Kris kapēr jarēnh o ixpa nhũm mẽ kot inhmar xwỳnhjaja ijarēnh ma nē tee amnhĩ kukamã hamaxpēr o ra hkaprĩ nē pa.

Anhỹr o ijamaxpēr.

3 Tã na prem ixte amnhĩ jarēnhja ma nē ja nē tanhmã inhmã nē hkêt nē. Pa mẽ kãm amnhĩ jarēnh pa nhũm mẽ inhma nhũm Ijaew kêt xwỳnhjaja kot amnhĩ jakàr kêtja nhũm mẽ kãm mex nē. Mẽ kēp tanhmã kute hkêt nē. Nhũm Ijaew kêt xwỳnh Xitre ixkõt pa nhũm mẽ kot omunh tã kot mẽ ixpyrà nē amnhĩ my kwỳrýt kã krãhyr ã kãm karō hkêt nē.

4 Tã nhũm mẽ kēp Jejus kwỳ hã amnhĩ jarēnh o hêx xwỳnhjaja mẽ ixtã akuprō. Nom hêx rom mẽ ixte Kris kêt amnhĩ nhĩpêx ã mẽ ixpumunh pix kaxyw. Hãmri nē ixkapēr ma nē Xitre hã inhmã akir nē inhmã:

–Kwa na pre Xitre Jejus kêt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karō hkõt amnhĩ nhĩpêx kêt nē. Kwa ja mex kêt. Na htem Jejus kêt amnhĩ xunhwỳ nē mããnēn finat Mojes kapēr kêt amnhĩ nhĩpêx. Jakamã kwa kãm anē kē amnhĩ my kwỳrýt kã krãhta. Finat Mojes kot mẽ panhĩgêjtê mã hã karō xà hkõt.

5 Anhỹr tã pa pre mẽ kuma nē ãm mẽ kuma. Kot pa ri mẽ kãm ja hã karō hkêt nē. ãm Jejus kapēr kêt pix mã kot puj mẽ amnhĩ nhĩpêx o papa nē finat Mojes kapēr mẽ Jejus kapēr o papihkàr kêt nē. Kot puj mẽ anhỹr o Jejus kapēr o ahkà nhũm ja mex kêt nē. Jejus kapēr kãm mo mẽ kot mẽmy kwỳrýt kã jakàr ã mẽ kãm karō? Amrakati. Jakamã na pa pre ãm mẽ pano kupyr o mẽ pa xwỳnhtajê kapēr ma nē ãm mẽ kuma.

⁶Tā pa pre ra Ijaew kwỳ pē Jejus kôt ixkwỳ hkrāhtūmjē mā amnhī jarēnh pa. Tanhmā ixte Ijaew kêt xwỳnhjē mā Jejus kapēr jarēnh to hā mẽ kām amnhī jarē nhūm mẽ inhma nhūm ja mẽ kām mex nē. Jakamā Ijaew kêt xwỳnhjaja kot mẽ ixpē Ijaew pyrā nē finat Mojes kapēr kôt amnhī nhīpēxja nhūm mẽ tanhmā mẽ kaxyw inhmā hā karō hto hkêt nē. Tīrtūm na hte mẽ kēp mẽ hkrāhtūm ā mẽ omunh xà hkôt mẽ hkwỳjē rom tanhmā mẽ ho mex to hkêt nē. Na hte mẽ pahpiitā mẽ panhīpēx o axpēn pyrāk. Jakamā na pa hte ijaxwỳja Jejus kôt mẽ ixkrāhtūmjaja kot amnhī to rax o ijakrenh ā tanhmā ijamaxpēr to hkêt nē.

⁷Na pa pre mẽ kām amnhī jarēnh pa nhūm mẽ inhma nē axpēn mā:

—Nā ām hāmri na pre Tīrtūm ahpỳnhā Pawre mẽ Simāw Pētre wa kām wa àpēnh ā karō nē Ijaewjē hwỳr Simāw Pētre mẽ nē axtem Ijaew kêt xwỳnhjē hwỳr Pawre mẽ. Wa kot ahpỳnhā mẽ hkôt mẽ kām Jejus kapēr jarēnh o ri pa kaxyw. Nā ām hāmri na hte wa ā amnhī nhīpēx anhỳr o pa. Nā ja mex. Anē.

⁸Ra Tīrtūm kot Ijaew wỳr Simāw Pētre mēnh tā hpānhā Ijaew kêt xwỳnhjē kaxyw pa ixām. ỹ hā wa ixte mẽ kām Jejus kapēr jarēnh o ri mẽ hkôt wa ixpa kaxyw.

⁹Jakamā nhūm mẽ ixkrāhtūm Xiakre mẽ Simāw Pētre mẽ Juāwja ixte mẽ kām amnhī jarēnh ma nē hkīnh nē. Tīrtūm kot ixto mex nē Ijaew kêt xwỳnhjē hwỳr inhmeñh ā ixte amnhī jarēnhja ma nē hkīnh nē. Hāmri nē Panāpe mẽ wa inhma kapēr nē wa inhma:

—Nā ām hāmri. Kot puj xep mẽ anē. Ka mẽ Panāpe wa kot kaj wa ma Ijaew kêt xwỳnhjē hkôt mẽ kām Jejus kapēr jarēnh o ri apa. No mẽ pajaja kot paj mẽ axtem mẽ pahkwỳ Ijaew kôt harēnh o ri ixpa. Ā kot puj mẽ ahpỳnhā mẽ hwỳr papa anē.

¹⁰Nom kêr ka wa inhmar kumrēx. Kêr ka wa mẽ ixpyrà nē Kris kôt mẽ pahkwỳjē pē amrakati xwỳnhjē ho

mex o ri apa. Mēmoj to mẽ kutā anojarēt rāhā ho ri apa.

Anhỳr o wa inhma kapēr pa wa mẽ kuma nē mẽ kām:

—Tôe. Nā kot paj wa anē. Ra ā wa ixte amnhī nhīpēx anhỳr kaxyw kēnā. Anē.

Pawre kot Simāw Pētre mā àkjēr ā harēnh

Atre 10; Rōmān 3.21-31, 6.1-14

¹¹⁻¹⁴Tā nhūm Simāw Pētreja man mẽ ixwỳr krī pē āxiok wỳr mō. Nē jar mẽ ixkôt ri pa. Ixpyrà nē kēp Ijaew tā Kris kôt Ijaew kêt xwỳnhjē hkôt pa nē mẽ kutā apkur o pa. Ixpyrà nē àmnhīx ri mẽ kutā apkur o ri mẽ hkôt pa. Ijaew kêt xwỳnhjaja kot amnhī my kwỳt kà jakār kêt jakamā na pa htem mẽ kutā ixàpkur kêt nē. Tā ra mẽ ixte Kris kôt amnhī xunhwỳr jakamā ja mẽ ixpē tanhmā kute hkêt. Na pa htem ixàmnhīx mẽ hkôt ixpa nē mẽ kutā apku. Ra mẽ ixte Kris kôt amnhī xunhwỳr kēnā kot pa hkêt ri mẽ hkôt ixpa hkêt. Na pa htem ixàmnhīx mẽ hkôt tanhmā amnhī nhīpēx to ho ri ixpa.

Tā nhūm Xiakre kot mẽ ixwỳr mẽ rēnh xwỳnhjaja haxwỳja mẽ ixwỳr mō. Mē ixpyrà nē mẽ kēp Ijaew tā mẽ ixpyrà nē Kris kôt amnhī xunhwỳ. Jakamā ra mō nē mẽ ixwỳr pōj. Hāmri nhūm Simāw Pētre mẽ omu nē mẽ umaj axte Ijaew kêt xwỳnhjē kutā apkur kêt nē. Axtem nē ōja py nē o tē nē mẽ hkàx ā ahte apkur o nhỹ. Hāmri nhūm ra mẽ ixri Ijaew kwỳ pē Kris kôt mẽ pahkwỳjaja ja hā omu nē piitā urāk nē ā amnhī nhīpēx anē nē Simāw Pētre ri Ijaew kêt xwỳnhjē hkàx ā apkur o hkrī. Nhūm ixkôt pa xwỳnh Panāpeja haxwỳja ja hā mẽ omu nē mẽ urāk nē ā amnhī nhīpēx anē nē mẽ hkàx ā apku. Hāmri pa tee ri ja hā mẽ omu nhūm ja inhma mex kêt nē. Na prem ā amnhī nhīpēx anhỳr o Tīrtūm kapēr ā kagà htūm kamā mẽ ujarēnh mex kwỳm ri amnhī nhīpēx. Jakamā pa ā mẽ kot amnhī nhīpēx anhỳrja nē Simāw Pētre mā ixkapēr. Mē piitā mẽ noo mā xa nē ā kot amnhī nhīpēx anhỳrja nē kām ixkapēr nē kām:

—Tk. Kwa nà Simāw Pêtre. Ri ā amnhī nhīpêx anhÿr kêt nê. Pahpê Ijaew tā kormā pahkwÿjaja hpôx kêt ri ka hte ixpyrà nê axàmnhÿx Ijaew kêt xwÿnhjê kutā axàpkur o ri apa. Tā amnhī wÿr mē pahkwÿjê pumu nê axtem nê mē hkàx ā axàpkur o akrī. Kwa nà na ka ā amnhī nhīpêx anê nê ra axtem amnhī nhīpêx. Te ate mē kām akapêr nê mē kām: “Kot kaj mē ixpyrà nê amnhī my kwryt kà jakà pa rī mē akôt ri ixpa nê mē akutā ixàpkur o ixpa.” Anhÿr pyràk. Kwa ja mex kêt.

15 —Mē pahpê Ijaew na pu htem mē kêp Ijaew kêt xwÿnhjê jarênh o: “Mē kot mē pahte amnhī nhīpêx kôt amnhī nhīpêx kêt xwÿnhjaja.” Anê.

16 Tā mē pahpê Ijaew tā na hte Tirtūmja mē pahte mē panhīgêr kot amnhī nhīpêx kôt mē pahte amnhī nhīpêx ā mē pahpumunh kôt mē pahto hkra hkêt nê. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpêr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpêr nhūm ja hā mē pahpumunh kôt pix mā mē pahto hkra.

17 —Mē pahpê Kris kwÿ jakamā na hte Tirtūm amnhīm mē pamex ā mē pajarê nê mē pahte amnhī tomnuj xwÿnh kêt ā mē pajarê. Jakamā na pu htem paxàmnhÿx ri Ijaew kêt xwÿnhjê kot Kris kôt amnhī xunhwÿr xwÿnhjê hkôt ri papa ho papa. Ra Tirtūm kot mē pahpyrà nê amnhīm mē mex ā mē harênh kênā. Tā koja mēhō kormā ja mar kêt nê tanhmā hā mē pajarênh to nê mē pajarênh o: “Tk. Ra mē kot amnhī kaxyw Kris kôt hamaxpêr tā axtem nê Ijaew kêt xwÿnhjê hkôt ri pa. Jakamā arī mē kot amnhī tomnuj xwÿnh kênā.” Anhÿr o mē pajarênh japêr. Nom ām mē pahte amnhī tomnuj xwÿnh ā mē pajarênh kapry. Na pu htem Kris kôt amnhī nhīpêx nê ra tām amnhī nhīpêx mex o papa.

18 No kot pu mē hkôt ri amnhī nhīpêx o papa htā tanhmā pajamxpêr to nê pahte amnhī nhīpêx

tūm o awjanā hāmri nê amnhī tomnuj tÿx kumrêx.

19 —Tā tanhmā kot puj wem amnhī to nê mē panhīgêr kot amnhī nhīpêx piitā hkôt amnhī nhīpêx mex o ri papa? Na pu htem pajamxpêr o: “Kot paj ā amnhī nhīpêx anê nê ā amnhī nhīpêx anê nhūm Tirtūm ja hā ixpumu nê amnhīm inhmex ā ijarê.” Anhÿr o pajamxpêr. Hāmri nê finat Mojes kot mē panhīgêrjê mā kapêr piitā hkôt ri mnhī nhīpêx o papa nom tōhā hkwyim ri tanhmā amnhī tomnuj to. Jakamā nhūm Tirtūm ja hā mē pahpumunh kôt mē pamex ā mē pajarênh kêt nê. Kapêr ā kagà htūm kot ā ja jarênh kot anhÿr. Nom kot puj mē amnhī kaxyw Kris kôt pajamxpêr nhūm ja hā mē pahpumunh kôt amnhīm mē pamex ā mē pajarê. Hāmri pu mē Tirtūm kôt amnhī nhīpêx o ri papa nê axte mē pahpê Ijaew nhīgêrjê kot amnhī nhīpêx kôt amnhī nhīpêx hkêt nê. Te ra mē pahtyk nê axte hkôt amnhī nhīpêx kêt pyrà nê pānhā Tirtūm kapêr kôt pix mā ri amnhī nhīpêx o ri papa.

20 —Nê na prem pī kahpa hā Kris nhō nê kupī nhūm mē pahte amnhī tomnuj te ĩhkō hā jêt nê haxwÿja htyk pyràk. Jakamā na pu htem amnhī tomnuj kaga nê Kris kôt amnhī xunhwÿ nhūm Karō mē pahkarōm agjê pu mē te Jejus Kris kot amnhī nhīpêx pyràk o amnhī nhīpêx o papa. Jao hpānhā mē pahte amnhī nhīpêx nyw pix o amnhī nhīpêx o ri papa. Kris kām hprām xà hkôt pix mā tanhmā ri amnhī nhīpêx to ho papa. Kris kêp Tirtūm Kra htā kām mē pajapê kamā mē panê htyk jakamā na pu htem amnhī kaxyw kôt pix mā pajamxpêr rāhā ho papa.

21 —Ām hāmri na pre Tirtūm mē pahto mex kumrêx nê mē pahwÿr Krisja mē nhūm mē pahwÿr wry nê mē panê ty. Tā na pa pre kapêrja ma nê mar tÿx nê hā ri ixpa nê ho ijamakêtkati hkêt nê. Tā kop apu Tirtūm kot mē pahte mē panhīgêrjê kot amnhī nhīpêx o amnhī nhīpêx ā

mē pahpumunh kôt mē pamex ā mē pajarēnh ronhỹx pre Krisja ām mē panē htyk kaprỳ. Mo kaxyw nhỹx pre mē panē ty? Anē.

Ā na pa Simāw Pētre mā ixkapēr anē nhūm mē piitā apkur pē hā inhmar o hkrī.

3

Mē pahte amnhĩ krā hkôt pahpē Tirtūm kra hkêt ā mē pajarēnh

Karatas 5.16-23; Epes 2.8; Piripos 3.9; Sikūn Ximotre 1.9; Xitre 3.4-7

¹ Kwa Karatas nhō xwỹnhjaja. Te ri mē ajamaxpēr kêt kumrēx pyrāk. Amnepē mā mē awyr inhmōrta ā na pa pre mē amā tanhmā Kris htykja jarēnh to. Pī kahpa hā mē panē htyk ā harē ka mē aprī hā inhma. Tā nhūm Tirtūm kapēr jarēnh o mē hēx xwỹnhjaja ixpānhā mē awyr mra nē tanhmā mē amā ujarēnh to ka mē ama nē mē ajamaxpēr o apihkār rax nē. Jao axte Kris tyk mā ajamaxpēr kêt nē.

² E mē inhmā mēmoj jarē. Mēmoj tā mē apumunh kôt na pre Tirtūm mē awyr amnhĩ Karō rē nhūm mē awyr agjē? Xà mē anhīgēt kot amnhĩ nhīpēx kôt mē ate amnhĩ nhīpēx ā mē apumunh kôt? Nà na pre ja hā mē apumunh kôt mē awyr rēnh kêt nē. Na ka prem Kris jarēnh ma nē amnhĩ kaxyw hkôt ajamaxpēr nhūm ja hā mē apumunh kôt mē awyr kurē nhūm mē awyr agjē.

³ Na pu htem amnhĩ krā hkôt tanhmā amnhĩ nhīpēx to ho pahpē Tirtūm kra hkêt nē. Tirtūm Karō pix kukwak ri na pu htem pahpē hkra. Tā ka mē axtem nē ajamaxpēr o:

—Nà Tirtūm ra kot ixto hkra jakamā kot paj arī ri mē inhīgēt kot amnhĩ nhīpēx kôt amnhĩ nhīpēx o ixpa rāhā nē inhmex kumrēx nē ri ixpa. Anē.

Kwa ā mē ajamaxpēr anhỹrja mex kêt.

⁴ Mē akwỳ kot Kris ā mē atomnuj tā ka mē amnhĩ xà htỹx kamā ajamak o ri apa htā Kris kaga hkêt nē. Tā ra axtem nē mē kapēr o mē hēx xwỹnhjē jamaxpēr kôt ajamaxpēr o te Kris ā

amnhĩ xà kamā ajamak kaprỳ pyrāk. Kwa nà mē ri mē hkôt ajamaxpēr kêt nē.

⁵ Na pre Tirtūm mē awyr amnhĩ Karō rē nhūm mē awyr agjē nē mē amā aa mē ate mēmoj pumunh kêt kwỳ ho anhỹr o ri mē akamā pa ho pa. Xà mē anhīgēt kot amnhĩ nhīpēx kôt mē ate amnhĩ nhīpēx ā mē apumunh kôt na pre ā mē amā amnhĩ nhīpēx anē? Nà ja kôt kêt. Ām mē ate Kris kapēr mar nē amnhĩ kaxyw hkôt ajamaxpēr ā mē apumunh kôt pix mā na pre ā mē amā amnhĩ nhīpēx anē.

Tirtūm kot amnhĩ tā finat Apraāw pumunh kôt mex ā harēnh

Rômān 4.1-25; Xiakre 2.23

⁶ Nē mē ixpē Ijaew pār krax finat Apraāw na pre amnhĩ kaxyw Tirtūm kôt hamaxpēr nhūm amnhĩ tā omu nē kām:

Nà ate amnhĩ kaxyw inhmā ajamaxpēr tỹx jakamā na pa amnhīm amex ā ajarē. Amex kumrēx Apraāw.

⁷ Anhỹr o kām kapēr jakamā mē pahte urāk nē amnhĩ kaxyw hkôt pajamaxpēr xwỹnhjaja te mē pahpē Apraāw tāmnhwỳ pyrāk.

⁸ Nē mē apē Ijaew kêt xwỹnhjaja. Na hte Tirtūm mē pahto hpimrāk tā mē pahte amnhĩ kaxyw kām pajamaxpēr ā mē pahpumunh kôt amnhīm mē pamex ā mē pajarē nē mē pahto hkra. Amnepēm na pre Apraāw mā kapēr nē kām:

E ate amnhĩ kaxyw ixkôt ajamaxpēr jakamā kot paj akukwak ri pyka piitā hkôt mē piitā mē ho mex nē.

Anhỹr o kām kapēr jao määnēn mē apē Ijaew kêt xwỹnhjē jarē.

⁹ Jakamā mē pahte Apraāw pyrā nē amnhĩ kaxyw Tirtūm kôt pajamaxpēr xwỹnhjaja kot puj mē pahpiitā urāk nē pamex kumrēx nē papa ho papa.

Tanhmā Tirtūm kot mē panē pī kahpa hā jēt xwỹnh nhīpēx to hā harēnh

Rômān 4.14, 7.10; Wam Korīt 15.56

¹⁰ Nē koja mēhō hamaxpēr o:

—E kot paj finat Mojes kapër kôt ri amnhî nhîpêx o ri ixpa nhûm Tirtûm ja hã ixpumu nê amnhîm inhmex ã ijarê nê ixto hkra. Anê.

No ãm ja kot anhÿr kêt. Tirtûm kapër ã kagà htûm kot ja jarênh kot:

Ixte amnhîm mẽ mex ã mẽ harênh kaxyw mẽ kot Mojes kapër kôt amnhî nhîpêx xwÿnhjaja koja mẽ ãm mẽmoj pixire nê hirôp kuhê. Rÿ mẽmoj pixire nê hkôt amnhî nhîpêx kêt pa ja hã mẽ omu nê hã mẽ homnuj tÿx kumrêx.

Anhÿr jakamã tanhmã kot pu mẽ amnhî to nê Mojes kapër piitã hkôt amnhî nhîpêx nê aa ho pixi nê hirôp pakuhê hkêt? Nà kot puj mẽ ho anhÿr kêt nê. Kot puj mẽ tee ri pamã ja ho anhÿr prãm kaprÿ. Jakamã Tirtûm kot amnhîm mẽ mex ã mẽ harênh kaxyw mẽ kot ã amnhî nhîpêx anhÿr mã xwÿnhjaja koja mẽ mex kêt nê.

¹¹ Na hte Tirtûm mẽ kot finat Mojes kapër kôt amnhî nhîpêx o mẽ pa hã mẽ omunh xà hkôt mẽ mex ã mẽ harênh kêt nê. ãm mẽ kot amnhî kaxyw hkôt hamaxpêr xwÿnh pixjaja na hte ã mẽ harênh anê. Kapêr ã kagà htûm kot mẽ harênh kot:

Mẽ kot amnhî kaxyw ixkôt hamaxpêr xwÿnhjaja na pa hte mẽ mex ã mẽ harênh o ixpa. Mẽ tapx-
ipixjaja koja mẽ nhÿrmã Ixkra mẽ wa ixri mex kumrêx nê htÿr tûm nê pa ho pa. Anê.

¹² Nom na htem amnhî kaxyw Tirtûm mã hamaxpêr pê finat Mojes kapêr kôt amnhî nhîpêx o pa hkêt nê. Mojes kapêr ã kagà kot ja jarênh kot:

Mẽ kot ixkapêr piitã hkôt amnhî nhîpêx mex o mẽ pa xwÿnh pix-
jaja koja mẽ htÿr tûm nê pa ho pa. Anê.

¹³ Tã kot pu mẽ ãm kapêr o pixire nê hirôp pakuhê hãmri nê mÿrapê pahÿr tûm nê papa hkêt nê. Nê hpãnhã mẽ kot amnhî xà htÿx kamã hamak tûm xàta hwÿr ma papa. Ja pymaj na pre Krisja ï ho mẽ pahwÿr wrÿ nê mẽ pahte amnhî tomnuj mÿrapê mẽ panê ty. Tirtûm kot mẽ pahte amnhî

tomnuj mÿrapê tanhmã mẽ pahto py-
maj ã mẽ panê htyk anê. Jakamã nhûm Tirtûm mẽ pahte amnhî tomnuj ã mẽ pahpumunh kôt mẽ pakuhpa hã Kraja homnuj nê. Kapêr ã kagà htûm kot ja jarênh kot:

Pÿ kahpa hã jêt xwÿnhhta na pre Tirtûm homnuj tÿx kumrêx. Anê.

Mẽ kot amnhî kaxyw Kris kôt mẽ hamaxpêr xwÿnhjê jarênh

¹⁴ Tã ã Jejus Kris kot mẽ panê amnhî nhîpêx anhÿr kukwak ri na pre Tirtûm kot Apraãw nhîpêx pyrã nê mẽ ixpê Ijaew pix o mex kêt nê. Mãânên mẽ apê Ijaew kêt xwÿnhjê ho mex nê. Jakamã koja mẽhõ. Ijaew õ rÿ Ijaew kêt xwÿnhjê hõ amnhî kaxyw Kris kôt hamaxpêr nhûm Tirtûm hã omu nê ho hkra nê hwÿr Karõ mẽ nhûm kãm axà.

Tirtûm kot finat Mojes kukamã mẽ pahto mex ã harênh

Rômãn 3.19-20, 5.20-21, 11.32; Eprêw 6.13-18

¹⁵ E ixkrãmnhwÿjaja. Kot paj ixprÿ hã mẽ amã ja jarê ka mẽ inhma. Nà koja mẽhõ wa hamêxkrut nê mẽmoj tã axpên ma. Pika hã war axpên ma rÿ mẽmoj tã war axpên ma. Hãmri nê wa hã axpên mar pa nhûm ja ãm hãmri nê ãm rãhãã. Koja nhãm mẽhõ tẽ nê axtem tanhmã harênh to hkêt nê.

¹⁶ Ja pyrã nê na hte ã Tirtûm mẽmoj tã amnhî jarênh anê. Na hte mẽmoj jarê nhûm arÿ rãhãã. Na hte jarãhã mẽmoj jarê nhûm jãã nhûm axtem hijuk ri mẽmoj jarênh kêt nê. Na hte ãm kapêr pÿnh nê. Tã na pre Apraãw mã hkanrêhã htãmnhwÿjê hõ kukwak ri Apraãw o mex ã amnhî jarê. Tãmnhwÿ piitã kukwak ri ho mex ã amnhî jarênh kêt nê. ãm kanrêhã htãmnhwÿ Krisja pix kukwak ri ã Apraãw o mex ã kãm amnhî jarênh anê.

¹⁷ E kot paj hpãnhã axtem tanhmã mẽ amã harênh to. Na hte Tirtûm kot mẽmoj tã amnhî jarênh xà hkôt tanhmã mẽmoj to ho pa rãhã nê. ã na pre finat Apraãw mã kot ho mex ã amnhî jarênh anê. Tã ra hã amgrã

pê 430 nê hapêx nhùm hpânã finat Mojes mã kapêr. Kot mar nê amnhĩ xô ri Ijaew mã harênh o ri mẽ hkôt pa kaxyw. Tã no nhùm ra kot Apraãw mã mẽmoj jarênhã arĩ hã no htýx rãhã nê aa ho hamakêtkati hkêt nê. Nê kot Mojes mã tanhmã kapêr toja nê Apraãw mã tanhmã kapêr toja nhùm hamê wa ho hamakêtkati hkêt nê. Nhùm wa hamê arĩ rãhã ho rãhã.

¹⁸ Tã mẽ ano kupyw o ri mẽ pa xwýnhjaja na htem htýx tanhmã mẽ amã harênh to nê mẽ amã harênh o:

—Kwa kot puj mẽ Mojes kapêr kôt amnhĩ nhĩpêx o papa hkêt nê nhùm Tĩrtũm tee ri ja hã mẽ pahpumu nê mẽ pahto mex kêt nê. Anê.

Nom ja kot anhýr kêt. Kop apu ã kot anhýr ronhýx Tĩrtũm ra wam kot tanhmã Apraãw mã kapêr tota ra ho hamakêtkati. Nom na hte arĩ kãm hamaxpêr rãhã nê ho pigrãnh nê ho hapêx kêt nê. Na pre Apraãw mã kãm: Kot kaj amnhĩ kaxyw ixkôt ajamaxpêr hã kot paj ato mex kumrêx. Anê.

Tã kot ho mex ã amnhĩ jarênhja arĩ rãhãã. Na hte arĩ mẽ kot amnhĩ kaxyw hkôt hamaxpêr xwýnhjê ho mex nê. Nom mẽ kot Mojes kapêr kôt amnhĩ nhĩpêx o pa hã mẽ omunh xà hkôt mẽ ho mex kêt nê. ãm mẽ kot amnhĩ kaxyw hkôt hamaxpêr xwýnhjê pixjaja na hte mẽ ho mex.

*Mo kaxyw na Mojes kapêr ã kagà?
Rõmãn 3.20, 5.20, 7.7*

¹⁹⁻²⁰ Tã mo kaxyw na Mojes kapêr ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhùm Tĩrtũm kot ã mẽ pahte amnhĩ nhĩpêx anhýrja nê mẽ pahkurê kaxyw. Na pre Mojes Tĩrtũm nhý hã mẽmoj nê mẽ pahkurê. Mẽ pahte axpên pê paxàhkĩnh nê mẽ pahkurê. Nê mẽ pahte axpên mã paxêx o ri papa nê mẽ pahkurê. ã mẽmoj nê mẽ pahkurê anê. Mẽ pahprĩ hã kapêr mar nê tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapêr gõ. Na pre kaxkwa rùm kapêr o wryk xwýnhjaja kumrêx kãm harê nhùm kuma nê

Ijaew mã hã kagà. Jakamã na htem harênh o: “Mojes kapêr” anhýr o harê.

Tã Apraãw kanrêhã htãmnhwý Krisja kormã kator kêt ri nhùm Ijaew Mojes kapêr ma nê hkôt ri amnhĩ nhĩpêx o pa. Tã nhùm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarênh xà hã arĩgrota kator mẽ nhùm Mojes kapêr hapêx.

No na pre Tĩrtũm Ijaew mã ujarênh kaxyw tãm mẽ kãm ujarênh kêt nê. Kapêr o wryk xwýnhjê mã na pre harê nhùm mẽ amnhĩ xô ri Mojes mã mẽ kaxyw kãm awjarê. Kot mẽ ô ri mẽ kãm harênh kaxyw. No Apraãw mã na pre Tĩrtũm tãm kapêr. Na pre hwýr kapêr o wryk xwýnhjê hõ mẽnh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tĩrtũm tanhmã mẽ pamã kapêr o amnhĩrit to nê mẽ pamã:

—E kot paj amnhĩ kaxyw ixkôt mẽ ajamaxpêr ã mẽ apumunh kôt pix mã mẽ amex ã mẽ ajarê.

Anhýr o mẽ pamã kapêr. Tã xà na pre kapêrja nhĩjuk ri axte amnhĩ jarê nê amnhĩ jarênh o:

—E kot paj mẽ ate Mojes kapêr kôt amnhĩ nhĩpêx mex o apa hã mẽ apumunh kôt mẽ amex ã mẽ ajarê.

Anhýr o mẽ pamã kapêr? Xà na hte mẽmoj jarê nhùm jãã nhùm ra hijuk ri axtem mẽmoj jarê? Nà Tĩrtũm kapêr ãm hpýnh kênã. Kop ãm mẽ pahte Mojes kapêr kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarênh ronhýx mẽ pamã:

—ãm ja pix ã mẽ apumunh kôt kot paj mẽ amex ã mẽ ajarê. Anê.

²² Nom na pre ã kapêr anhýr kêt nê. Kapêr ã kagà htũm kot ja jarênh o: Mẽ apiitã mẽ ate amnhĩ tomnuj o mẽ apa xwýnh na ka mẽ.

Anhýr jakamã tanhmã kot puj mẽ amnhĩ to nê Mojes kapêr kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwýnhjê kênã. Mẽ pahte kapêr piitã hkôt amnhĩ nhĩpêx

kêt jakamã koja Tĩrtũm ja hã mẽ pahpumunh kôt mẽ pamex ã mẽ pajarẽnh kêt nẽ. Koja ãm mẽ pamã kapẽr o:

–Kot kaj mẽ amnhĩ kaxyw Jejus Kris mã ajamaxpẽr pa ja hã mẽ apumunh kôt mẽ amex ã mẽ ajarẽ nẽ mẽ ato ixkra nẽ mẽ ato mex o ri ixpa. Anẽ.

Mojes kapẽr te kẽp Kris xwỳj ri mẽ hamãr xwỳnh pyrãk ã harẽnh

Rõmãn 10.4; Karatas 4.1

²³ Nẽ kormã Kris kot mẽ pahwỳr wrỳk nẽ mẽ panẽ htyk xwỳj ri na pre Ijaew Mojes kapẽr ma nẽ hkôt amnhĩ nhĩpẽx o ri pa. Nhũm kapẽrja te kot amnhĩm mẽ unẽnh nhũm mẽ kot hkôt pix mã amnhĩ nhĩpẽx o ri pa pyrãk. Na prem Tĩrtũm kot mẽ mex ã mẽ harẽnh prãm xàj ãm pix ma nẽ hkôt amnhĩ nhĩpẽx o pa. Nom kapẽr piitã hkôt amnhĩ nhĩpẽx mex kêt nẽ.

²⁴ Te mẽhprĩre nhũm Mojes kapẽr te kẽp mẽ hamãr xwỳnh pyrãk. Mẽhprĩ jamãr xwỳnhjaja na htem mẽhprĩjẽ pumu nẽ tãm mẽ kot amnhĩ nhĩpẽx kaxyw tanhmã mẽ ahkre hto ho mẽ hkôt pa. Ja pyrã nẽ na pre Ijaew tãm amnhĩ nhĩpẽx o pa kaxyw Mojes kapẽr ma nẽ hkôt amnhĩ nhĩpẽx o ri pa. Jejus Kris kutẽp ã amnhĩ nhĩpẽx anhỳr o ri pa. Tã nhũm Jejus tãm kaxkwa rũm wrỳ pa mẽ ixkwỳ pixjaja mẽ ixkwỳjẽ rom amnhĩ kaxyw hkôt ijamaxpẽr. Hãmri nhũm Tĩrtũm ja hã mẽ ixpumunh kôt mẽ inhmex ã mẽ ijarẽnh kurẽ kumrẽx.

Jejus kukwak ri mẽ pahpẽ Tĩrtũm kra ã mẽ pajarẽnh

Juãw 1.12; Rõmãn 8.14; Epes 1.5

²⁵⁻²⁶ Tã ra mẽ ixte amnhĩ kaxyw Kris kôt ijamaxpẽr jakamã na pre Tĩrtũm mẽ ixto hkra pa mẽ ra te ixpẽ hkra xàptàr pyrãk o amnhĩ nhĩpẽx nẽ kapẽr kôt amnhĩ nhĩpẽx mex o ri ixpa. Jaõ Mojes kapẽr kaga. Te mẽhprĩre ra mẽ ahkre kamã mẽ àptàr nẽ kot mẽ ahkre xwỳnh kaga pyrãk. Hãmri pa mẽ ixpẽ Tĩrtũm kra xàptàrjaja hãmri axte Mojes kapẽr kôt amnhĩ nhĩpẽx hkêt nẽ.

²⁷ Tã mẽ kajaja na ka pre mẽ ixpyrà nẽ amnhĩ kaxyw Kris kôt ajamaxpẽr nhũm mẽ akwỳ kot mẽ apẽ Jejus kwỳ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpẽx kôt pix mã amnhĩ nhĩpẽx o ri apa.

²⁸ Tã ra mẽ pahpẽ Jejus Kris kôt amnhĩ xunhwỳr xwỳnh jakamã na hte Tĩrtũm ahpỳnhã ri tanhmã mẽ pakute hkôt mẽ pahpumunh kêt nẽ. Mẽ pahpẽ Ijaew rỳ mẽ pahpẽ Ijaew kêt xwỳnhjaja. Rỳ mẽ pahpẽ nhãm mẽ kãm paxàpẽnh xwỳnh rỳ amnhĩ mã mẽ paxàpẽnh xwỳnh nhũm hte ja hã mẽ pahpumunh kôt tanhmã mẽ pajarẽnh to hkêt nẽ. Rỳ mẽ anijẽ hkôt rỳ mẽ inhmyjẽ hkôt mẽ pahpumunh kôt tanhmã mẽ pajarẽnh to kêt nẽ. ãm mẽ pahte Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pahpumunh o pa anẽ.

²⁹ Nẽ na pre Tĩrtũm Apraãw mã hkanrẽhã htãmnhwỳ Jejus Kris o mex ã amnhĩ jarẽ. Tã Kris kẽp mẽ panhõ Pahihti jakamã pu mẽ Tĩrtũm noo mã urãk nẽ te mẽ pahpẽ Apraãw tãmnhwỳ pyrãk. Jakamã koja Apraãw nhĩpẽxta pyrã nẽ mẽ pahto mex rax nẽ.

4

Mojes kapẽr te axte mẽ pahpynẽnh kêt pyrãk ã harẽnh

Rõmãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjẽ jarẽnh to ka mẽ inhma. Koja mẽhõ ra hkra mã mẽmo hikukrẽx nhõr kaxyw. Hikukrẽx nẽ õ pika. Õ mẽmoj piitã õr kaxyw. No nhũm hkraja kormã hprĩre nẽ hamaxpẽr mex kêt jakamã nhũm kormã hprẽk jamãr o pa. Nhũm hkraja arĩ te kãm àpẽnh o pa xwỳnh kot amnhĩ nhĩpẽx pyrã nẽ amnhĩ krã hkôt ri amnhĩ nhĩpẽx o pa hkêt nẽ. Kormã hipẽxã kapẽr kôt ri amnhĩ nhĩpẽx o pa. Nhũm hipẽxãja kot kãm õ mẽmoj piitã õr kaxyw no ãm kormã hprẽk jamã.

² Tã kormã hkraja hprĩre ri nhũm hipẽxã tanhmã amnhĩ to nẽ ty. Nom nhũm hkraja mỳr pẽ kormã õ mẽmoj

o amnhĩptàr kêt nê. Kormã hprĩre jakamã nhũm hipêêxà mỳr pê kot kãm hamãr o pa xwỳnhja kormã kãm hamãr o pa. Tã nhũm hipêêxà kot kãm amgrà jarênh xwỳnhhta kato nhũm tãm mêmoj piitã ho amnhĩptà. Ra àptàr mex nê hamaxpêr mex nê amnhĩm ho amnhĩptàr pa.

³ Tã Ijaew na prem ã amnhĩ nhĩpêx anê. Amnepê m kormã mẽ kot Mojes kapêr kôt ri amnhĩ nhĩpêx o pata ã na prem te mēhprĩre hamaxpêr kêeta pyrãk. Te kormã mẽ àptàr kêt pyrã nê jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nê mẽ kãm ê pyrãk o mẽ hipêx nhũm mẽ hkôt pix mã amnhĩ nhĩpêx o ri pa.

⁴ Tã nhũm Tĩrtũm kot Kra hkukamã mẽ pahwỳr mēnh xà hã arĩgrota kato hãmri nhũm mẽ pahwỳr kumē nhũm mẽ pahwỳr wrỳ nê mẽ pahpyrà nê mēhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa.

⁵ Jao te kot Mojes kapêr pê mẽ papytàr pyrãk o mẽ panhĩpêx pu mẽ hpãnhã pahpê Tĩrtũm kra kaxyw.

⁶ Tã mẽ ixpê Ijaew kwỳjaja nê mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rē nhũm mẽ pamã agjê. Hãmri nê mẽ pamã kapêr o:

—Ra mẽ apê Tĩrtũm kra jakamã kêr ka mẽ kãm amnhĩ jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwỳnh pyrãk kêt nê. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nê mẽ pahto mex nê.

Mojes kapêr kôt mẽ kot amnhĩ nhĩpêx xwỳnhjê jarênh

Sikũn Korõt 11.3-4; Korosê 2.16-19; Eprêw 6.1; Wam Pêtre 1.14

⁸ Nê amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar

kêt nê. ãm atỳx ri sãnti mã mex ã harê nê kãm amnhĩ jagrer o ri apa. Nê amã mêmoj kĩnh nê amã hprãm xà tanhmã amnhĩ to hwỳr to ho ri apa. Te mẽ kãm mẽ àpênh o mẽ pa xwỳnhjaja kot amnhĩ nhĩpêx pyrã nê sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarênh ma nê hkôt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nê akupỳm sãnti hkôt amnhĩ nhĩpêx kaxyw? Nà mẽ ajamaxpêrja mex kêt. Sãnti nhĩpêxta tanhmã koja amnhĩ to nê mẽ ato ajuta? ãm mẽ kot ãhkra ho hipêx pix jakamã hihtỳxti hã. Amarĩ kuhê xà kamã kuhê ho kuhê xwỳnh kênã. Tã te kot akupỳm amnhĩ kôt mẽ arênh kaxyw pyrãk o mẽ anhĩpêx ka mẽ ra axtem nê akupỳm hkôt amnhĩ nhĩpêx kaxyw. Kwa nà mẽ ã ri amnhĩ nhĩpêx anhỳr kêt nê.

¹⁰ Nê na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xà hkôt arĩgro hkwỳ hã axtem tanhmã amnhĩ nhĩpêx to nê mẽmo mytwrỳ hã tanhmã amnhĩ nhĩpêx to nê mẽmo amgrà hã tanhmã amnhĩ nhĩpêx to. Tã kot paj mẽ urãk nê ã amnhĩ nhĩpêx anhỳr o ixpa. Kê Tĩrtũm ja hã ixpumu nê inhmex ã ijarê. Anê.

Kwa mẽ ã ajamaxpêr anhỳr kêt nê. Mon ka htem axtem nê ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhỳr ã mẽ pahpumunh kôt mẽ pamex ã mẽ pajarênh kêt nê.

¹¹ Na pa ja hã mẽ ajarênh ma nê tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprỳ ho ri ixpa pyrãk.

Karatas nhõ xwỳnhjaja kot Pawre ho mex ã mẽ harênh

Wam Korõt 9.21-23

¹² Kwa ixkrãmnhwỳjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwỳnhjê hkôt ri ixpa. Jao Kris kapêr gryk ã mẽ inhĩgêttjaja kot amnhĩ nhĩpêx kaga

nē axte hkôt amnhĩ nhĩpêx kêt nē. Tã kwa mẽ ixpyrà nē ã amnhĩ nhĩpêx anē. Wem ma amnhĩ to amõr gri kêt wehe. Wam ixte mẽ awýr inhmõrta ã na pa pre mẽ amã Tirtũm kapêr jarênh o ri mẽ akôt ixpa ka prem inhma nhũm ja mẽ amã mex nē ka mẽ ja hã tanhmã ixto hkêt nē.

¹³ Na pa pre ixàà nē mẽ awýr mõ nhũm ixàja ixto htýx nē pa tokyx ixkator nē ma akupým mẽ arũm inhmõr kêt nē arĩ mẽ amã Tirtũm kapêr jarênh o ixpa.

¹⁴ Kormã ixà nē tanhmã ixkute htã ka prem ja hã ixpumu nē ixto mex nē ixkamã anhõkre kahak kêt nē. Na ka prem te ixto Jejus Kris nhĩpêx pyrãk o inhĩpêx. Nē te ixto Tirtũm kapêr o wrýk xwýnh nhĩpêx pyrãk o inhĩpêx.

¹⁵ Jao mẽ amã ixkĩnh nē ã inhĩpêx anē nē mẽ amã ixto mex pix prãm. Nē nhýri ixpumu nē ixkamã axukaprĩ nē inhmã akapêr o:

–Hêxta waa nē. Anopxàà. Inhmã amnhĩ no kaxàr nē amã õr prãm nom tanhmã kot pa mẽ amnhĩ to nē hkapa nē amã kugõ? Anē.

Nē mẽ amã inhmã mẽmoj mex pix nhõr prãm. Tã ra tanhmã ajamaxpêr to nē axtem nē te mẽ amã ixkĩnh kêt pyrãk o inhĩpêx.

Mẽ no kupyw xwýnhjaja kot mẽ hamaxpêr o pihkàr ã mẽ harênh

¹⁶ Nē na pa pre ãm hãmri mẽ amã Tirtũm kapêr jarênh o ri mẽ akôt ixpa. Nom ra mẽ amã mar prãm kêt jakamã na ka mẽ axtem nē inhĩpêx o te ixte mẽ akutã amnhĩ xãm pyrãk.

¹⁷ Mẽ amã Tirtũm kapêr o mẽ hêx xwýnhjaja te mẽ kãm mẽ akĩnh pyrãk o mẽ anhĩpêx no ãm mẽ kãm akĩnh kêt. Na htem mẽ amex kaxyw tanhmã mẽ amã kapêr to hkêt nē. ãm mẽ ate mẽ mar nē mẽ gryk ã ixkaga nē mẽ hkôt ri amnhĩ nhĩpêx o apa pix prãm xàj na htem mẽ akôt tanhmã mẽ amã hêx to ho pa.

¹⁸ Pa mẽ harênh ma hãmri nē mẽ kamã inhgryk o ã mẽ amã mẽ harênh anhýr kêt nē. Koja mẽhõ mẽ awýr mra nē ixwakre kamã rý inhnõo mã mẽ amã mẽmoj mex jarê nhũm ja

inhmã mex nē. No nhũm mẽ amã mẽ hêx xwýnhjaja axtem nē mẽ ajamaxpêr o pihkàr pix kaxyw na htem mẽ awýr mrrar nē mẽ amã ã ujarênh o pa anē.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyrãk jakamã na pa hte mẽ ate amnhĩ nhĩpêx ã mẽ apumu nē tee ri ijamaxpêr nē ixkaprĩ htýx nē. Te nhýhýnh ixà htýx nē ixte amnhĩ xà htýx kamã ijamak o ri ixpaja pyrãk. Rý te mẽ hpijagri ho mẽ hikwý xwýnh õhy xà htýxta pyrãk. Mẽ ate Kris kôt amnhĩ nhĩpêx mex o apa hprãm xàj na pa hte ã amnhĩ nhĩpêx anhýr o ri ixpa.

²⁰ Hêxta waa nē. Kop apu ra mẽ awýr ixpõx nē mẽ akôt ixpa ronhýx pa ixkĩnh týx kumrêx. Nhýx pa ra ixprĩ hã mẽ amã ixkapêr ka mẽ inhma. Nē amnhĩ tã inhmã mẽ akĩnh týx ã mẽ akamã inhgryk kêt ã ixpumunh kurê kumrêx. No kagà pix kãm ixkapêrja ka mẽ kamã harê nom aprĩ hã inhmar mex kêt nē. Na pa tee ri mẽ akukamã ijamaxpêr o ixkaprĩ htýx nē ixpa.

Mojes kapêr kôt mẽ kot amnhĩ nhĩpêx xwýnhjê jarênh

Eprêw 12.18-29

²¹ Kwa mẽ amã arĩ Mojes kapêr kôt amnhĩ nhĩpêx o ri mẽ apa hprãm xwýnhjaja. Mãn ka mẽ kormã aprĩ hã Mojes kapêr piitã mar par kêt jakamã na ka mẽ amã hkôt amnhĩ nhĩpêx prãm. E pa ixprĩ hã mẽ amã tanhmã harênh to ka mẽ inhma.

²² Nã Tirtũm kapêr ã kagà htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nē kot amnhĩm haprõr nhũm ri kãm àpênh o pa xwýnh Aga kamã ja.

²³ Kãm àpênh xwýnh kamã ja na pre mẽ pahpiitã mẽ pahpyrà nē amarĩ kato. No hprõ Sara kamã ja. Sara na pre ra hpigêx týx nē. Ra hkamrõ hkêt ryy nē pa htã nhũm Tirtũm kot wa hkra hkukamã wa kãm ujarênh xà hkôt nhũm Apraãwja htu nhũm wa hkrata kato. Tirtũm kot hkukamã wa

kām harēnh xà hkôt nhūm kamā hkra nhūm kato.

²⁴⁻²⁵ Tā wa nita ā wa harēnh kot anhÿr. Na pre Tirtūm mēmoj jarē. Te ho wa urāk o wa harē no ām hā kuxi nē ā wa harēnh anē. Jakamā ni wa harēnhja te kot Tirtūm kapēr pi-jakruuta pyrāk. Wam ni Agata te kot hixēt prēk pē Sinai nhīmōk ā Tirtūm kot Mojes mā kapērta pyrāk. Hixētja pika pē Arap kamā na pre. Jakamā nhūm Tirtūm Ijaew kaxyw Mojes mā kapēr nhūm kuma nē amnhī xō ri mē kām hā kagā. Tā na hte arī jarāhā mē hkwÿjaja hamaxpēr o:

–E kot paj mē panhīgēt finat Mojes kapēr kôt amnhī nhīpēx o ri ixpa nhūm Tirtūm ja hā ixpumu nē amnhīm inhmex ā ijarē nē ixto hkra.

Anhÿr o hamaxpēr no ām ā hamaxpēr anhÿr kaprÿ. Ā mē hamaxpēr anhÿr xwÿnhjaja te mē kēp Apraāw mā àpēnh xwÿnh Aga hkrata pyrāk. Nē krī pē Jerujarē kēp Ijaew nhō krī jakamā haxwÿja te kēp Agata pyrāk. Nhūm krī nhō xwÿnhjaja haxwÿja te mē kēp Aga hkrata pyrāk. Na htem htÿx Tirtūm kot mē omunh nē mē ho hkra hprām xàj Mojes kapēr kôt amnhī nhīpēx o pa hā amnhī jarēnh kaprÿ. Jakamā haxwÿja te mē kēp mē kām mē àpēnh o pa xwÿnh pyrāk.

Jejus kôt mē kot amnhī kaxyw hamaxpēr xwÿnhjê jarēnh

²⁶ Nē hapu hā Tirtūm kapērta. Apraāw prō kumrēx Saraja te kēp kaxkwa kamā Jerujarē ōja pyrāk. Krī ja kamā mē pa mā xwÿnhjaja te mē kēp mē kām mē àpēnh xwÿnhjê pyrāk kêt. Ra mē kot amnhī kaxyw Kris mā hamaxpēr nē hkôt amnhī xunhwÿr jakamā na htem hamaxpēr o:

–Ixte amnhī kaxyw Kris mā ijamaxpēr nē hkôt amnhī xām jakamā na Tirtūm ixpumu nē amnhīm inhmex ā ijarē nē ixto hkra. Anē.

Ām hāmri na mē ā wamtajē rom hamaxpēr anē. Tā ā mē hamaxpēr anhÿr xwÿnhjaja te mē kēp Sara hkra pyrāk.

²⁷ Tirtūm kapēr ā kagā htūm kot ja jarēnh kot:

E kormā akra hkêt nē apa htā kēr ka māmri akīnh nē ri apa.

Nē kormā apijagri hkêt tā kēr ka akīnh tÿx nē ri apa.

Kormā amjên kot akamā hkra hkêt nē te kot akaga pyrāk tā kot kaj akra nē akanrēhā atàmnhwÿ xohtô rax nē.

Mē ohtô rax o ra amjên kot nhām hprō hō kamā hkrata jakre. Anē.

Ā kapēr kot anhÿr o mē kot amnhī kaxyw Kris kôt hamaxpēr xwÿnhjê hkukamā mē ohtô hā mē harē.

²⁸ E ixkràmnhwÿjaja. Te mē apē Ijak kanrēhā htàmnhwÿ pyrāk. Kojā mēhō amnhī kaxyw Kris kôt hamaxpēr hāmri nē te kēp Apraāw mē hprō Sara wa hkra Ijak kanrēhā htàmnhwÿ pyrāk. Na pre Tirtūm amnepē mā kormā Ijak kator kêt ri ra hkukamā hamaxpēr nē Apraāw mā harē. Nē mē papajaja nhūm Tirtūm Ijak pyrā nē mē pakukamā mē pamā hamaxpēr nē amnhīm mē paxunhwÿr ā amnhī jarē. Tā ra mē ate amnhī kaxyw Kris kôt ajamaxpēr jakamā te mē apē Ijak kanrēhā htàmnhwÿ pyrāk.

²⁹ Nhūm Apraāw kot Aga kamā hkra Ismaewja na pre hprō kumrēx kamā hkrata pumu nē kām hkīnh kêt nē kamā gryk pix o pa. Nē tanhmā hipēx to pē ri haprÿ ho ri hkôt pa. Tā mē kot amnhī krā hkôt amnhī to Tirtūm kra hprām xwÿnhjaja na htem ā mē pahte Kris kôt amnhī xunhwÿr xwÿnhjê nhīpēx anhÿr o pa. Na htem Tirtūm kot mē pahto hkra hā mē pahpumu nē Ismaew kot Ijak nhīpēx pyrā nē mē pakamā gryk pix o pa. Nē tanhmā mē pahtomnuj to pē mē pahto kapēr o ri pa.

³⁰ Tā no ām kwār mē māmri ā mē panhīpēx anē. Kojā mē pahpyrā nē nhÿrmā Tirtūm nhō krī hwÿr àpir kêt nē. Tirtūm kapēr ā kagā htūm kot mē harēnh kot:

Na pre Tirtūm Apraāw mā kapēr nē kām: “E kēr ka amnhī nē ate haprōr nhūm kot amā àpēnh

o ri pa xwýnh mẽ hkrata wa hano. Koja hkrata amýr pë amnhĩm mẽmoj to àrĩk kêt nẽ. Ate aprõ kumrẽx kamã akrata pix koja hõja rom amýr pë mẽmoj piitã ho amnhĩptàr pa.” Anẽ.
 31 Tã te mẽ pahpê àpênh xwýnh kamã hkrata pyrãk kêt. Te mẽ pahpê Apraãw prõ kumrẽx kamã hkrata pyrãk. Te Tĩrtũm kot Ijak kukamã hamaxpër pyrãk o na pre mẽ pakukamã hamaxpër.

5

1 Nẽ Kris kot mẽ pahte amnhĩ nhĩpêx tũm pë mẽ papytãr jakamã kwa ixkrãmnhwýjaja. Kêr ka mẽ arĩ ate amnhĩ nhĩpêx tũm kôt amnhĩ nhĩpêx kêt nẽ. Ra Kris kot ja pë mẽ papytãr nhũm mẽ paxãmnhĩx ri papa kênã.

Mẽ pahpê Tĩrtũm kra hprãm xaj tanhmã mẽ pahte amnhĩ nhĩpêx to Juãw 8.32, 8.36; Korosẽ 2.20

2 E mẽ inhma. Kot kaj mẽ atõ Tĩrtũm kot ato hkra hprãm xaj amnhĩ my kwryt kã krãhta hã kot kaj mẽ am amari ã amnhĩ nhĩpêx anhýr kapry. Na hte Tĩrtũm ja hã mẽ omu nẽ am hã mẽ omu. Kot kaj ã amnhĩ nhĩpêx anẽ nhũm Krisja am ate amnhĩ tomnuj myrapê anẽ htyk kapry pyrãk o amnhĩ nhĩpêx.

3 Hãmri nhũm Tĩrtũm tee ri ja hã mẽ apumu nẽ te kot ã mẽ amã kapër anhýr pyrà nẽ mẽ amã kapër o:

—E ra amã apê Kris kwý hprãm xaj amnhĩ my kwryt kã krãhyr jakamã kot kaj mããnẽn Mojes kapër piitã hkôt amnhĩ nhĩpêx o ri apa.

Anhýr o mẽ amã kapër pyrãk.

4 Nom kot kaj mẽ atõ amnhĩ kukamã ajamaxpër o:

—Nã kot paj Mojes kapër piitã hkôt amnhĩ nhĩpêx o ri ixpa nhũm Tĩrtũm ja hã ixpumu nẽ inhmex ã ijarẽ nẽ ixto hkra kãm ga. Anẽ.

No am ja kot anhýr kêt. Na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pahto hkra hkêt nẽ. Jakamã kot kaj

mẽ ã amnhĩ nhĩpêx anẽ nẽ te ate Kris kutã amnhĩ xãm pyrãk nhũm Tĩrtũm ato mex kêt nẽ.

5 Nom kot ka mẽ axtem ajamaxpër o:

—Ra ixte amnhĩ kaxyw Kris kôt ijaxmaxpër nẽ hkôt amnhĩ xãm jakamã koja Tĩrtũm hã ixpumu nẽ inhmex ã ijarẽ. Karõ ra kot ã inhmã ja ho amnhĩrit anhýr kênã.

Anhýr o ajamaxpër. Am hãmri ã mẽ ajamaxpër anhýrja.

6 Jakamã mẽ pahpê Kris kôt amnhĩ xunhwýr xwýnhjê kamã ra mẽ kot amnhĩ my kwryt kã jakar xwýnhjaja nhũm mẽ pahkwýjaja ã amnhĩ nhĩpêx anhýr kêt nẽ. Tã nhũm Tĩrtũm ja hã mẽ pahpumu nhũm ja tanhmã kęp kute hkêt. Na hte mẽ pahte amnhĩ my kwryt kã jakar ã mẽ pahpumu nẽ am hã mẽ pahpumu. No kot pu mẽ Jejus Kris kôt amnhĩ nhĩpêx mex o ri papa. Nẽ amnhĩ kaxyw hkôt pajamaxpër týt o ri papa. Nẽ mẽ pamã axpẽn kĩnh pë tãm ri axpẽn nhĩpêx o ri papa. Ja na kêt Tĩrtũm kãm hprãm.

7 Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwýnhjaja mẽ awýr mra nẽ tee ri ã mẽ ate amnhĩ nhĩpêx anhýr ã mẽ apumu nẽ tanhmã mẽ amã Tĩrtũm kapër o hêx to. Ka mẽ ama nẽ axte Tĩrtũm kôt amnhĩ nhĩpêx mex hkêt nẽ.

8 No am ã mẽ kot mẽ amã mẽ ujarênh anhýr xwýnhjaja na pre Tĩrtũm mẽ awýr mẽ rênh kêt nẽ. Tĩrtũm kot amnhĩ wýr mẽ awýr xwýnh kênã kot kêt axtem nẽ mẽ awýr kapër o mẽ amã hêx o mẽ pa xwýnhjê rẽ.

9 Nẽ koja mẽhõ pixi nẽ tanhmã amnhĩ tomnuj to nhũm mẽ piitã ja hã omu nẽ urãk nẽ kãm tanhmã amnhĩ tomnuj to hprãm.

10 No kêt mẽ apê Kris kwý na ka mẽ. Ixte ja hã mẽ apumunh mex. Kot kaj mẽ axte ixkapër ma nẽ akupým Kris kôt amnhĩ nhĩpêx mex o ri apa. Nã kot kaj mẽ ã amnhĩ nhĩpêx anẽ nẽ axte mẽ kot mẽ apê amnãr xwýnhjê kapër mar nẽ mẽ hkôt amnhĩ nhĩpêx kêt nẽ. Koja Kris mẽ atã mẽ homnuj týt kumrẽx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harẽnh

¹¹ Nẽ na hte Tirtũm kapẽr o mẽ hẽx xwỳnhjaja tanhmã mẽ amã ixto hẽx to ho pa. Ixte mẽ kãm Tirtũm kot mẽ ho hkra kaxyw mẽ kot amnhĩ my kwrýt kà jakàr ã mẽ kãm karõ hã ixto ri hẽx o pa. Nom ixte anhỹr kêt ixkràmnhwỳjaja. Kop apu ixte mẽ kãm ja hã karõ ho ixpa ronhỹx Ijaew krãhtũmjaja ja hã ijarẽnh ma nhũm ja mẽ kãm mex nẽ nhũm mẽ axte Kris ã tanhmã inhĩpêx to hkêt nẽ. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarẽnh pix mỳrapê na htem ixkamã gryk nẽ.

¹² Hẽxta waa nẽ. Mẽ kot mẽ amã hẽx o pa pẽ mẽ ajamaxpẽr o pihkàr xwỳnhjaja kop mẽ ãm mẽ anhõ krĩ rũm hapôx nẽ ma nhỹhỹm hapêx ronhỹx pa ixkĩnh tỳx kumrẽx.

Mẽ pahte axpẽn to mex o papa hã mẽ pamã karõ

Wam Korõt 13; Eprẽw 13.3, 13.16; Wam Pẽtre 1.22; Wam Juãw 3.11

¹³⁻¹⁴ Kwa ixkràmnhwỳjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pẽ mẽ papytãr jakamã kêt ka mẽ amnhĩ tã ja ma nẽ axte atỳx ri amã hprãm xà hkôt tanhmã amnhĩ nhĩpêx to ho ri apa hkêt nẽ. Mẽ ãm amã axpẽn kĩnh pix o ri axpẽn kôt apa. Nẽ nhãm mẽ hipêx o te ka amã amnhĩ tã ma pyrãk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anẽ nẽ te mẽ ate wam Tirtũm kapẽr piitã hkôt amnhĩ nhĩpêx pyrãk.

¹⁵ No kot kaj mẽ axtem nẽ axpẽn kãm axoprê ho ri apa hãmri nẽ te ra mẽ ate axpẽn to ajapêx par o amõr pyrãk o amnhĩ nhĩpêx. Te mry xoprê kot axpẽn par o pata pyrãk. Kwa mẽ ã amnhĩ nhĩpêx anhỹr hkêt nẽ. Mẽ ãm axpẽn to mex pix nẽ mẽ axpẽn kãm axukapri ho ri axpẽn kôt apa.

Mẽ pahte amnhĩ nhĩpêx nyw jarẽnh Matẽwre 26.41; Rõmãn 8.1-11

¹⁶ Nẽ kwa kêt ka mẽ amnhĩ to Tirtũm Karõ wỳ kêt mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nẽ. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa.

¹⁷ Tirtũm Karõ kot amnhĩ nhĩpêxja nẽ mẽ pahte amnhĩ nhĩpêx tũmja wa kot axpẽn pyrãk kêt. Te wa kot axpẽn kutã amnhĩ xãm nẽ wa pijapu pyrãk. Jakamã kot puj mẽ pahte amnhĩ nhĩpêx tũm o amnhĩ nhĩpêx nẽ Tirtũm Karõ mã hprãm xà hkôt amnhĩ nhĩpêx hkêt nẽ.

¹⁸ No kot puj mẽ Tirtũm Karõ hkôt amnhĩ nhĩpêx nẽ ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nẽ. Ra axtem mẽ pahte amnhĩ nhĩpêx nyw o amnhĩ nhĩpêx.

¹⁹ Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htỳx ri hkwỳjê kamã hpijaam kêt o pa.

Jao mẽmyjaja hprõ kuhpa hã nhãm mẽnijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nẽ mẽmy hkwỳjaja axtem nẽ mẽmyjê hkwy ho amnhĩkati.

Nẽ mẽnĩ hkwy haxwỳja axtem nẽ mẽnijê hkwy ho amnhĩkati.

²⁰ Nẽ mẽ kãm mẽmoj mẽ hikukrêx japê htỳx o kãm Tirtũm kĩnh jakre. Nẽ mẽmoj kaxyw ma wajaga hwỳr amnhĩ to pa.

Nẽ hkwỳjê kamã oprê ho ri pa.

Nẽ mẽmoj tã axpẽn kãm gryk pix nẽ.

Nẽ mẽmoj to axpẽn pẽ õxỳ nẽ.

Nẽ mẽmo mỳrapê axpẽn pẽ anhgrã nẽ amỳm ahpỹnhã ri pa.

²¹ Nẽ mẽmoj tã axpẽn kamnhĩx rãhã ho ri pa.

Nẽ axpã nẽ mẽ grer kãm ri axpẽn kãm hpijaam kêt o ri pa.

ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwỳnhjaja amnhĩ nhĩpêx anẽ. ã mẽ kot amnhĩ nhĩpêx anhỹr xwỳnhjaja koja mẽ Tirtũm nhõ krĩ hwỳr gjêx kêt

nē. Ra ixte mē amā ja jarēnh tā pa axte mē amā harē. Mē ate hā ano htýx rāhā ho ri apa kaxyw.

²² No mē kot amnhī nhīpêx nywja axtem na.

Tīrtūm Karō hkôt mē kot amnhī nhīpêx nyw o amnhī nhīpêx xwýnhjaja na htem axtem kām axpēn kīnh nē.

Nē hkīnh nē ri hamakêtkati nē àmnhīx ri axpēn kôt pa.

Nē gryk tokyx anhýr hkêt nē. Ām axpēn to mex pix o ri axpēn kôt pa.

Nē tām axpēn nhīpêx.

Nē kot mēmoj tā amnhī jarēnh xā hkôt tanhmā mēmoj to.

²³ Nē axpēn mā kapēr mā hprī ho ri axpēn mā kapēr.

Nē mēmoj punuj piitā nē amnhī to htýx o ri pa.

Ā na hte mē kot Tīrtūm Karō hkôt amnhī nhīpêx o mē pa xwýnhjaja Karō nhý hā amnhī nhīpêx nyw o amnhī nhīpêx anhýr o pa. Jao määnēn Mojes kapēr kwým ri amnhī nhīpêx hkêt nē. Jakamā koja mēhō mē pahte amnhī nhīpêx nyw nē tanhmā mē pahkurê hto hkêt nē.

²⁴ Tā mē pahpê Jejus Kris kwý jakamā na pu mē pahte amnhī nhīpêx tūmja nhīpêx o te mē pahte amnhī nē hpīr pyrā nē axte hkôt amnhī nhīpêx kêt nē.

Tīrtūm Karō hkôt mē pahte amnhī nhīpêx ā mē pamā karō

Epes 4.23-24; Korosē 3.10

²⁵ Tā ra Tīrtūm Karō kot mē pahto hkra jakamā kwa kēr pu mē ām kôt pix mā amnhī nhīpêx nyw o amnhī nhīpêx o ri papa.

²⁶ Kot puj mē ā amnhī nhīpêx anē hāmri nē mēmoj tā mē pahkwýjē mā amnhī to jarkrar o ri papa hkêt nē. Kot puj mē ā amnhī nhīpêx anē nhūm mē pakamā gryk nē. Jakamā kēr pu mē ā amnhī nhīpêx anhýr o ri papa hkêt nē.

6

Mē pahte tanhmā axpēn to ajuta hto hā mē pamā karō

Matêwre 18.15-17; Rukre 17.3-4; Sikūn Tesarōn 3.14-15; Xiakre 5.19-20

¹⁻³ Kwa ixkràmnhwýjaja. Mē apê Tīrtūm Karō hkôt amnhī nhīpêx o ri mē apa xwýnhjaja. Kojā Kris kôt akwýjê hō tanhmā amnhī tomnuj to ka mē ja hā omu nē ā amnhī nhīpêx anhýrja nē kām akapēr. Nom kēr ka mē kamā agryk kamā kām tanhmā nē hkêt nē. Ām kām akapēr mā aprī ho kām akapēr nē akupým tām ām. Nom kwa kēr ka mē amnhī pumunh mex nē urāk nē ā amnhī tomnuj anhýr kêt nē.

Kot ka mē atō ā kot amnhī nhīpêx anhýr ā omu nē ām omu nē nē tanhmā kām akapēr to hkêt nē. Nē ajamaxpēr o:

—Tk. Kwār māmri ā amnhī nhīpêx anē. Pa ja nē tanhmā kām ixkapēr to hkêt nē. Kurom ixte amnhī nhīpêx mex o ri ixpa kēnā.

Anhýr o ajamaxpēr japēr. Kwa mē ā ajamaxpēr anhýr kêt nē. Kot kaj mē ā ajamaxpēr anē nē nē kām akapēr kêt nē hāmri nē te ate amnhī to mex ā amnhī jarēnh kaprý pyrāk.

Nē kēr ka mē axpēn to ajuta mex o ri axpēn kôt apa. Jao Kris kôt amnhī nhīpêx mex nē.

⁴⁻⁵ Nē na htem piitā amnhīm àpēnh pix tånopxar o pa. Jakamā kēr ka mē amnhī tånopxar pē tām amnhī nhīpêx rāhā ho ri apa. Hāmri nē ja hā amnhī pumu nē akīnh nē. Nom kwa kēr ka mē ate amnhī nhīpêx mex o akwýjê jakrenh ā mē kām amnhī to jarkrar o ri apa hkêt nē.

⁶ Nē kēr ka mē kot Tīrtūm kapēr o mē ajahkre xwýnhjê ho mex nē mē kām mēmoj nhōr o ri apa.

⁷ Kojā Tīrtūm nhýrmā mē pahtīr ri mē pahte amnhī nhīpêx ā mē pahpumunh kôt tanhmā mē pajarēnh to. Hāmri pu mē tee ri amnhī kukamā pajamaxpēr nom amnhī nē tanhmā kām paxêx to hkêt nē. Kojā mēhō kām amnhī to hêx nē te tām kot amnhī mā

hêx pyrək nom kot puj mē Tirtūm mā amnhī nē tanhmā paxêx to hkêt nē.

⁸ Jakamā kot kaj mē amnhī krā hkôt tanhmā ri amnhī nhīpêx to rāhā ho apa hāmri nē nhŷrmā ty nē Tirtūm pē awry rax ā ri apa. Nom kot kaj mē Tirtūm Karō mā hprām xā hkôt pix mā amnhī nhīpêx nē nhŷrmā ty nhŷm Tirtūm akupŷm ato atŷr ka kuri amex nē ajamakêtkati atŷr tūm nē ri apa ho apa.

Mē pahte axpēn to mex rāhā hā mē pamā karō

Atre 20.35; Wam Korīt 15.58; Xitre 3.14; Eprêw 13.3, 13.16; Xiakre 1.27

⁹ Jakamā kwa kêr ka mē arī tām ri amnhī nhīpêx nē tām axpēn nhīpêx o ri axpēn kôt apa nē jam anhŷrer kêt nē. Mē ā amnhī nhīpêx o ri apa anhŷr rāhā ty nhŷm Tirtūm nhŷrmā ja hā mē ato mex rax nē.

¹⁰ Tā kêr pu mē arī Kris kôt pahtōjê ho mex rāhā ho ri papa. Nom mē tapxipixjê ho mex kêt nē. Pu mē mē piitā mē ho mex o axpēn pyrək.

¹¹ E ixte mē amā kagā nhīpêx nē mēnh nhŷm mē ate ja hā ixpumunh kaxyw kot paj pam kagā jatur xā hā inhīhkra ho inhīxi nhīpêx ka mē ixte inhīxi hā kagā rŷnhtita pumu.

Jejus kot mē panê htyk ā Pawre kām harēnh prām ā harēnh

Wam Korīt 1.22-24, 2.1-2

¹² Nē mē amā Tirtūm kapēr o mē hêx xwŷnhjaja na htem hamaxpēr o:

—Nā kot paj Karatas nhō xwŷnhjê mā Kris pī kahpa hā htyk ā harēnh o ri ixpa hkêt nē. Kot pa anē nhŷm mē ixpê Ijaew kwŷjaja ja hā inhma nē hā tanhmā inhīpêx to. Ja pymaj kot paj mē kām tanhmā harēnh to hkêt nē. Kot paj ām mē kot amnhī my kwŷrŷt kà jakār pix ā mē kām karō kê mē ixkapēr xā hkôt ā amnhī nhīpêx anē. Pa hā mē omu nē ma ixkwŷjê mā mē hā amnhī to jarkrar o ri ixpa. Anē.

¹³ Te mē kot finat Mojes kapēr kôt ri amnhī nhīpêx pyrək tā no na htem ā amnhī nhīpêx anhŷr kêt nē. Ra mē kot amnhī jakār tā no ām Mojes kapēr piitā hkôt amnhī nhīpêx hkêt nē. Ām

hkwŷ hkôt pix mā amnhī nhīpêx o pa. Nom kot kaj mē ama nē mē urək nē amnhī jakā nhŷm mē ja hā mē apumu nē hkŷnh nē. Nē ma ri mē hkwŷjê mā mē atā amnhī to jarkrar o ri pa nē mē kām:

—E Karatas nhō xwŷnhjaja na pa prem mē kot amnhī my kwŷrŷt kà jakār ā mē kām karō nhŷm mē inhma nē mē pahpyrà nē ā amnhī nhīpêx anē. Anē.

¹⁴ No pa na pa hte ā mē kām mēmoj tā karō anhŷr o ri ixpa hkêt nē. Ām Tirtūm kot mē pahto hkra kaxyw mē panhō Pahihti Jejus Kris kot mē nē htykja pix na pa hte mē kām harē. Ra kot inhne htyk jakamā te pa ixte kuri ijêt nē ixtyk pyrək. Jakamā ra jar pika ja kamā mē kot amnhī nhīpêxja te ixpê htyk nē hapêx pyrək pa axte hkôt amnhī nhīpêx kêt pyrək.

¹⁵ No mē kot amnhī my kwŷrŷt kà jakār xwŷnhjaja nē mē kot amnhī jakār kêt xwŷnhjaja na hte Tirtūm ja hā mē omu nē ām mē omu. Ām mē pahte amnhī nhīpêx nyw o amnhī nhīpêx o ri papaja pix na kām hprām.

¹⁶ Kot kaj mē ā amnhī nhīpêx anhŷr o ri apa nē apê Tirtūm kra mex nhŷm mē ato mex rax nē. Nē mēmoj to mē akutā nojarêt rāhā nē. Ka mē axamnhix ajamakêtkati nē ri apa ho apa.

¹⁷ Nē na prem Kris ā ixtak rax nē nhŷm ixkatut ā ixtak xā arī rāhā nē pa hte hā ixpa. Ixte Jejus Kris mā tanhmā amnhī nhīpêx to xwŷnh ā ixto amnhirīt xā na. Jakamā kê mēhō axte Jejus kot mē awŷr inhmēnh ā tee ri ixpumu nē tanhmā hā ixkukjêr to hkêt nē.

¹⁸ E ixkrāmnhwŷjaja. Kê Pahihti Jejus Kris mēmoj to mē akutā nojarêt nē mē ato mex rāhā ho pa. Nā koja mē ato anē.

Ām ja pix na hapêx. Ixpê Pawre na pa ā mē amā kagā nhīpêx nē mē awŷr mēnh anē.

Epes

Pawre kot Epes kãm Jejus kôt hkwỳjê hwỳr kagà nẽ mẽn

Pawre na pre kagàja nhĩpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pẽ Epes kãm Kris kwỳjê hwỳr hipêx nẽ kumẽ. Epes nhõ xwỳnhjaja Ijaew kêt xwỳnh na pre mẽ. Nhũm pre ra Pawre ma mẽ hwỳr mõ nẽ mẽ kãm Tĩrtũm kapêr jarênh o ri mẽ hkôt pa nhũm mẽ hkwỳjaja kuma nẽ Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mẽ hkôt pa. Hãmri nhũm mẽ hkwỳjaja Jejus ã unê nẽ krĩ pẽ Rõm wỳr kumẽ nẽ kamã haxà nhũm arĩ hkrĩ ho hkrĩ. Nom amarĩ hkrĩ hkêt nẽ. Na pre hte mẽ kot hwỳr mrrar xwỳnhjê mã Tĩrtũm kapêr jarê. Nẽ krĩ hkwỳ hkôt Jejus kôt hkwỳjê mã kagà nhĩpêx nẽ mẽ hwỳr kurẽ. Jakamã na pre Epes kamã hkwỳjê hwỳr kagàja nhĩpêx nẽ mẽ hwỳr kumẽ.

Nẽ kagàja kamã hprĩ hã mẽ kot Jejus kôt amnhĩ xunhwỳr xwỳnhjê kot tanhmã amnhĩ nhĩpêx to ho pa hã mẽ kãm karõ. Ra mẽ kot hkôt amnhĩ xunhwỳr jakamã te mẽ htipxi nẽ ri mẽ pa xwỳnh kot amnhĩ nhĩpêx pyrãk o amnhĩ nhĩpêx o pa hã mẽ kãm hã karõ. Nẽ jar pika hkôt te mẽ kêp Kris nhĩ pyrã nẽ pa hã mẽ harẽ. ã na pre Pawre mẽ kãm mẽmoj jarẽ nẽ hã kagà anẽ nẽ mẽ kãm:

¹ Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Ixpê Pawre na pa hipêx nẽ mẽ awỳr kumẽ. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhĩpêx nẽ mẽ awỳr mẽn anẽ. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri

apa. ãm hãmri na ka htem ã amnhĩ nhĩpêx anẽ.

² E kê Mẽpahpãm Tĩrtũm mẽ Pahihti Jejus Kris wa mẽ ato mex nẽ mẽmoj to mẽ akutã nojarêr rãhã ho pa. Ka mẽ wa ý hã axãmnhĩx ajamakêtkati nẽ akĩnh pẽ tanhmã amnhĩ nhĩpêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mẽ panhõ Pahihti Jejus Kris nhĩpêxà Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kôt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nẽ mẽ papa pyrãk. Tã ra mẽ pahte jar pika ja kamã paxãmnhĩx pajamakêtkati mẽ pamex nẽ ri papa jakamã kwa kêr pu mẽ amnhĩm ãm mex o mex ã harênh rãhã nẽ.

⁴⁻⁵ Amnepê mã kormã mẽmoj kêt ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anẽ? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nẽ noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nẽ hamaxpêr o:

—Nà Ixkra Jejus Kris koja nhỹrmã ma mẽ hwỳr wrỳ nẽ mẽ nẽ ty. Tã mẽ kot mẽ nẽ htyk ã harênh mar nẽ amnhĩ kaxyw hkôt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anẽ. Anẽ.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhỹr kêt nẽ. ãm Kra Kris pix kukwak ri na pre ã mẽ pajarênh anẽ. Kãm Kra japê jakamã na hte mẽmoj to mẽ pahpê hkwỳ hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

7-8 Na pre Krisja mẽ panê htyk o Tirtũm mã mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhĩpêx anhỹr ã omunh xà hkõt mẽ pahte hkõt amnhĩ xunhwỳr xwỳnhjê nê mẽ pahte amnhĩ tomnuj rênh pa. Koja aa tanhmã mã mẽ pahto hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htyx kumrêx jakamã na pre ã mẽ pahto mex rax anê. Æm mex o mex nê àhpumunh o àhpumunh.

9-10 Amnepêm na pre hamaxpêr o:

—Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptàr o pa. Kaxkwa kamã nê pika piitã hkõt mẽmoj piitã ho amnhĩptã nê tapxipix inhỹ mã kêp mẽõ Pahihti. Koja ã amnhĩ nhĩpêx anhỹr xà mã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê.

Æ Tirtũm amnhĩ kukamã hamaxpêr anhỹrja kõt na pre Kris kêp mẽ panhõ Pahihti mã harê. Tã nhỹrmã mẽ pahto amnhĩptàr kaxyw koja mẽ pakaxyw ãm. Amnepêm ri mẽ pa xwỳnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

11 Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarênh xà hkõt.

12 Tã mẽ ixpê Ijaew kwỳ kumrêx mẽ ixte Kris kõt amnhĩ xunhwỳr jakamã koja mẽ piitã mẽ inhỹ mã Tirtũm mã mex o mex ã harênh o ri pa.

13 Nê mẽ kajaja na ka prem mẽ ixpyrà nê Tirtũm kapêr ma nê ajaxwỳja hkõt amnhĩ xunhwỳ. Æm hãmri na Tirtũm kapêrja. Tã ka prem ama nê hkõt amnhĩ xunhwỳ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awỳr Karõ rê nhũm mẽ awỳr wrỳ nê mẽ akarõ mã agjê nê mẽ akamã pa ho pa. Kris kukwak ri na pre mẽ awỳr kurê. Amnepê mã na pre mẽ pakukamã hamaxpêr o:

—Koja mẽ Ixkra hkõt amnhĩ xunhwỳ pa ja mã mẽ omu nê mẽ ho ixkra nê mẽ hwỳr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

14 Anhỹr jakamã na pre mẽ pahwỳr kurê nhũm mẽ pahwỳr wrỳ nê mẽ pahwỳr agjê nê mẽ pakamã hkrĩ ho hkrĩ. Pu mẽ ja mã amnhĩ pumu nê pajamaxpêr o:

—Nà ra Tirtũm kot ixwỳr Karõ mẽnh jakamã na ixkarõ hwỳr axà nê kamã hkrĩ ho hkrĩ. Tã koja ra kot mẽ ixtã amnhĩ jarênh xà hkõt ja mã ixto mex nê. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nê ixpa ho ixpa. Hãmri nê kukwak ri axte tanhmã amnhĩ tomnuj to ho ri ixpa hkêt nê. Anê.

Jakamã koja mẽ piitã ã kot mẽ ho mex anhỹr ã amnhĩ tã kamã ama nê amnhĩ tã omu nê kãm mex o mex ã harênh rãhã ho pa.

Pawre kot Epes nhõ xwỳnhjê ho Tirtũm wỳr ã harênh

Piripos 1.9; Korosê 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

15 Nê na ka xep htem amnhĩ kaxyw Kris kõt ajamaxpêr tỳx pê amã Tirtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nê ixkĩnh tỳx nê.

16-18 Nê xatã mẽ ato Tirtũm wỳr o ri ixpa nê mẽ ato hwỳr o:

—Pa Mẽinhĩpêxà maati Tirtũm. Nà amex o amex. Ka na ka pre mẽ ixwỳr mẽ inhõ Pahihti Jesus Krisja mẽ nhũm mẽ ixwỳr wrỳ nê hprĩ mã mẽ inhmã ate tanhmã amnhĩ nhĩpêx to ho apa mã ato amnhĩrĩt. Tã Epes kãm akrajaja na xep htem akõt pix mã ri amnhĩ nhĩpêx rãhã ho ri pa. Æm hãmri na htem ã amnhĩ nhĩpêx anê.

—Nê kwa Tirtũm. Kê Akarõ tanhmã mẽ hkrã hto kê mẽhprĩ mã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to mã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã

tanhmã mẽ ixto mex to jarēnhja kê mẽ kãm hamaxpēr tỳx pē hkĩnh rãhã ho pa ho pa.

19-20 —Nē kê mẽ axàhpumunh o axàhpumunh ã ate akupỹm Akra Kris o htĩr ã apumunh mex nē Tĩrtũm. Na ka pre axàhpumunh xà ho akupỹm ho htĩr nē ma akupỹm anhõ krĩ hwỳr ho api nē amnhĩ nhĩhkõ hã ỳr nhũm arĩ hkrĩ ho hkrĩ. Apyrà nē kot mẽ ixto amnhĩptàr kaxyw. ã axàhpumunh xà htỳx kot anhỳr. Tã kê akrajê piitã ja hã apumu nē axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ixa.

21 Nē Krisja àhpumunh tỳx o mẽkarõmnuti piitã hakrenh. Nē hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyrãk o na htem htỳx ri amnhĩ nhĩpêx o pa pyrãk. Nē Krisja hihtỳx o pika piitã hkõt pahi piitã mẽ hakrenh par kumrêx. Nē hihtỳx o kot pika piitã hkõt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpēr gõ? Nà amrakati kumrêx. Ra kot ã amnhĩ nhĩpêx anhỳr rãhã nē pa ho pa xwỳnh kẽnã. Nē hihtỳx o hihtỳx rãhã nē pa ho pa xwỳnh. Nē àhpumunh o àhpumunh rãhã nē pa ho pa xwỳnh. Nē hihtỳx o kot jar pika ja kõt mẽ pajakrenh par nē hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nē pa ho pa.

Kris te kêp mẽ pahkrã pyrãk ã harēnh

Rõmãn 12.4; Wam Korĩt 12.12; Epes 4.16; Korosẽ 3.25

22 Na pre Tĩrtũmja Kra Kris nhĩhkram mẽmoj piitã haxàr pa. ỳ hã kot nhỹrmã ho amnhĩptàr o pa kaxyw. Jakamã kot mẽ pahto amnhĩptàr xwỳnh ã kêp mẽ panhõ Pahihti. Nē te kêp mẽ pahkrã pyrãk. Nē mẽ papajaja te mẽ pahpê ì pyrãk jakamã na pu htem hkõt ri amnhĩ nhĩpêx o papa.

23 Na hte mẽ panhĩja mẽ pahkrã kamã mẽ pajamaxpēr xà hkõt tanhmã amnhĩ nhĩpêx to. Ja pyrã nē na pu htem mẽ pahkrã pyrãk xwỳnh Krisja kapēr ma nē hkõt tanhmã ri amnhĩ nhĩpêx to ho ri papa.

Koja mẽhõ ãm hkrã pix nē ì hkêt nē pa hãmri nē mex kêt nē. Na htem hkrã nē mãânēn ì nē pa nē mex nē. Ja pyrã nē na hte Kris mẽ pahte hkõt amnhĩ nhĩpêx o papa hã mẽ pahpumu nē hkĩnh nē mex nē pa. Pu mẽ pajaxwỳja hkõt ri amnhĩ nhĩpêx ã amnhĩ pumu nē pahkĩnh nē pamex nē papa ho papa.

2

Tanhmã Tĩrtũm kot mẽ pahto hkra hto ã harēnh

Wam Korĩt 6.11; Xitre 2.11-3.7

1 Nē amnepê mã na pu pre htem Tĩrtũm kàx ã tanhmã amnhĩ tomnuj to ho ri papa.

2 Nē jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nē mẽkarõmnuti nhõ pahi Satanasti kapēr kõt pix mã ri amnhĩ nhĩpêx rãhã nē. Na pre hte tanhmã mẽ pahkõt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpēr punuj jagjê. Pu mẽ amnhĩ tã omunh kêt tã ỳ hã amnhĩ tomnuj o papa. Satanastija kêp mẽ kot Tĩrtũm kapēr kwỳm ri amnhĩ nhĩpêx o mẽ pa xwỳnhjê nhõ pahihti na. Tã pu pre htem pahtỳx ri hkõt amnhĩ nhĩpêx pix o ri papa.

3 Mẽ pahpiitã tanhmã amnhĩ tomnuj to hprãm xà hkõt pix mã tanhmã amnhĩ nhĩpêx to. Nē mẽmoj punuj kukamã pajamaxpēr nē ra hkõt ã amnhĩ tomnuj anē. ã na pu prem mnhĩ nhĩpêx anē nhũm Tĩrtũm ja hã mẽ pahpumu nhũm ja kãm mex kêt nē. Jakamã nhũm tee ri mẽ pakukamã hamaxpēr nē hamaxpēr o:

—Hêxta waa nē. Na htem ixkapēr kwỳm ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhỳr o mẽ pa xwỳnhjaja koja mẽ nhỹrmã ixri htĩr tũm nē mex nē pa

ho pa hkêt nê. Ixkînhã mẽ kot amnhĩ tomnuj xwýnh jakamã tanhmã kot mẽ amnhĩ to nê ixri htĩr tũm nê pa ho pa? Nà mẽ kot amnhĩ tomnuj mýrapê koja mẽ nhỹrmã ma amnhĩ xà htýx kamã hamak tũm xàta wýr ma hapêx pa. Nà koja mẽ anê. Héxta waa nê. Inhmã ma hwýr mẽ pa prãm kêt tã ra ma hwýr mẽ pa kaxyw.

Anhỹr o hamaxpêr.

⁴⁻⁵ Nê amnepêm kormã mẽ pahte amnhĩ tomnuj o papata ã te mẽ pahte amnhĩ xà htýx kamã pajamak tũm xà hwýr pryta ã mẽ papa pyræk. Nom Tĩrtũm kãm mẽ pajapê nê mẽ pakamã ukaprĩ jakamã na pre mẽ pahto mex rax nê. Nê akupỹm Kris o htĩrja ri te ra mẽ pahte amnhĩ xà htýx kamã pajamak tũm xà hwýr pryta nê mẽ pahto ujanãr pyræk o mẽ panhĩpêx. Mẽ pakamã ukaprĩ nê kãm mẽ pajapê ho ã mẽ panhĩpêx anê. Amarĩ ã mẽ panhĩpêx anê nê mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwýr xwýnhjaja nhỹrmã amnhĩ xà htýx kamã mẽ hamak tũm xàta wýr papa hkêt nê.

⁶ Ra Tĩrtũm akupỹm Jejus Kris o htĩr jakamã te ra Jejus kôt akupỹm mẽ pahpê hkwýjê ho mẽ pahtĩr pyræk. Jakamã te ra õ krĩ kamã ãhkô hã mẽ pamex kumrêx nê pahkrĩ pyræk.

⁷ Mẽmo kaxyw na pre Tĩrtũm kãm mẽ pajapê hkôt ã mẽ pahwýr Jejus Kris mênh nhũm mẽ panê htyk anê? Nà kãm mẽ pajapê htýx ã mẽ pahte pahprĩ hã amnhĩ tã omunh kaxyw na pre ã mẽ pahwýr mênh anê. Tã kot puj mẽ nhỹrmã kaxkwa kamã hwýr pøj nhũm mẽ pamã amnhĩ jarênh o:

—E mẽ amnê ixpumu. Inhmã mẽ ajapê htýx jakamã na pa pre mẽ akamã ixukaprĩ xàj ma mẽ awýr Ixkra Jejus Krisja mẽ nhũm amnhĩ grônh kôt mẽ awýr wrý nê mẽ anê ty. Inhmã mẽ ajapê htýx jakamã na pa pre ã mẽ awýr mênh nhũm mẽ anê htyk anê. Inhmã mẽ apê ixkrajê japê xàj na pa pre ã mẽ ato mex rax anê.

Anhỹr o mẽ pamã kapêr hãmri nê

mẽ pahto mex rãhã ho pa.

⁸⁻⁹ Xà na pu prem pahpê hkra hprãm xàj amnhĩ krã hkôt mẽ papamjaja kãm tanhmã amnhĩ to mex to nê kãm:

—E kwa Tĩrtũm. Na pa ã amnhĩ to mex anê nê ã amnhĩ to mex anê. Jakamã kwa ja hã ixpumu nê ixto akra nà?

Anhỹr o na pu prem amnhĩ to kuwý? Nà na pu prem ã amnhĩ to hwýr anhỹr kêt nê. Na pu prem amnhĩ kaxyw hkôt pajamaxpêr nê hkôt amnhĩ xunhwý nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anê. Jakamã na pu htem amnhĩ tã omu nê pajamaxpêr o:

—Nà na xep hte Tĩrtũmja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nê. ãm mẽ pahte amnhĩ kaxyw kãm pajamaxpêr ã mẽ pahpumunh kôt pix mã na hte mẽ pahto hkra. Anê.

¹⁰ Nê Tĩrtũm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhỹr kêt nê. Tã Jejus Kris kôt amnhĩ xunhwý nhũm Tĩrtũm ja hã mẽ pahpumu nê mẽ pamã mẽ pahte amnhĩ nhĩpêx nyw jagjê pu mẽ ý hã tãm amnhĩ nhĩpêx o ri papa. Amnepêm tanhmã kot mẽ pakukamã hamaxpêr to xà hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nê.

Tĩrtũm krajaja te kot axpên to htõ nê htõx pyræk

Karatas 3.28; Korosê 1.21-23

¹¹ E mẽ apê Ijaew kêt xwýnhjaja. Na ka htem mẽ akatorxà nhõhy rũm ajapøj hãmri nê mẽ ixpê Ijaew pyrã nê amnhĩ my kwryt kã jakàr kêt nê. Jakamã na pre ixkwýjaja mẽ akurom amnhĩ jakàr ã amnhĩ to jarkrar o ri pa nê amnhĩ jarênh o:

—Ra mẽ ixte amnhĩ my kwryt kà jakàr ã mẽ ixpumunh kòt na hte Tirtũm mẽ ixto hkra. Tã Ijaew kêt xwýnhjaja kot mẽ ixkĩnhã amnhĩ jakàr kêt jakamã mẽ kèp hkra hkêt. Nẽ mãânẽn mẽ kèp mẽ pahkwý hkêt.

Anhỹr o mẽ ajarẽnh o pa.

¹² ãm hãmri na prem mẽ apê mẽ ixkwý hkêt ã mẽ ajarẽ. Na pa prem mẽ akurom amnhĩ my kwryt kà jakà mẽ mẽ akurom Kris kamã ijamak o ri ixpa. Jakamã nhũm Tirtũm kot mẽ ixto mex ã amnhĩ jarẽ pa mẽ mẽ apyrà mẽ tee ri amnhĩ kukamã ijamaxpẽr o ri ixpa hkêt mẽ. Nẽ mẽ akurom amnhĩ kaxyw Tirtũm mã ijamaxpẽr. Nã ãm hãmri na prem mẽ apê mẽ ixkwý hkêt ã mẽ ajarẽ.

¹³ Te Tirtũm kàx ã ri mẽ apa pyræk tã ka mẽ arĩ ã amnhĩ nhĩpêx anhỹr kêt mẽ. Jejus Kris kot mẽ panê htyk nhũm mẽ ate hkòt amnhĩ xunhwýr jakamã ra mẽ apê hkwyý. Jao arĩhkàx ã ri apa hkêt mẽ. Te mẽ ixpê Ijaew kwý pyrã mẽ hpãnhã kuri ra ri apa pyræk.

¹⁴ Jakamã na pu htem Kris kukwak ri ra axpẽn nhĩpêx nyw o axpẽn nhĩpêx o ri papa. Mẽ ixpê Ijaewjaja mẽ mẽ apê Ijaew kêt xwýnhjaja na pu htem te ra ixkre tipxi kamã ri papa pyræk. Nom amnepêm na pu prem ã axpẽn nhĩpêx anhỹr kêt mẽ. Mẽ pahte amnhĩ nhĩpêx tũmja ahpýnhã na pre. Na pu prem pamã axpẽn kurê mẽ axpẽn kàx ã ri papa. Nẽ nhỹri axpẽn pumu mẽ te pahte axpẽn pumunh kêt pyrã mẽ nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew mẽ mẽ apê Ijaew kêt xwýnhjaja. Nẽ htyk o te ra kot mẽ pahte axpẽn nhõrkwý hwýr axpẽn wýr o papa pyræk. Jao mẽ pamã axpẽn kurê ho hapêx mẽ hpãnhã tãm axpẽn kaxyw mẽ paxunhwý pu mẽ hpãnhã axpẽn to mex rãhã ho ri papa.

¹⁵ Amnepêm Mojes kot Tirtũm nhỹ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwýnhjaja mẽ ate Tirtũm kòt amnhĩ nhĩpêx kêt ã

mẽ apumu mẽ mẽ akamã inhgryk mẽ. Nẽ axpẽn mã mẽ ajarẽnh o:

—Nã mẽ pahkĩnhã mẽ kot Mojes kapẽr kòt amnhĩ nhĩpêx kêt jakamã koja Tirtũm mẽ ho hkra hkêt mẽ.

Anhỹr tã nhũm Kris mẽ pahwýr wrý mẽ mẽ pahpiitã mẽ panê htyk o mẽ pahte hkòt amnhĩ xunhwýr ã mẽ pahpumunh kòt pix mã mẽ pahto Tirtũm kra. Jakamã pa mẽ axte mẽ ate Mojes kapẽr kòt amnhĩ nhĩpêx kêt ã mẽ apumunh kòt mẽ apê Tirtũm kra hkêt ã mẽ ajarẽnh kêt mẽ. Hãmri mẽ mẽ ixpê Ijaew mẽ mẽ apê Ijaew kêt xwýnhjaja pu mẽ axte axpẽn kãm pagryk o ri papa hkêt mẽ. Ra te ixkre tipxi kamã mẽ pahte axpẽn kòt ri papa pyræk.

¹⁶ Kris na pre pĩ kahpa hã mẽ panê htyk o ã mẽ panhĩpêx anẽ mẽ mẽ pahte axpẽn kòt amnhĩ nhĩpêx o papa kaxyw mẽ paxunhwý. Nom Tirtũm jamaxpẽr xà hkòt ã mẽ panhĩpêx anẽ. Jakamã na pu htem arĩ pamã axpẽn kurê ho papa hkêt mẽ.

¹⁷ Na pre Kris mẽ pahwýr wrý mẽ ã mẽ panhĩpêx anẽ. Mẽ apê Ijaew kêt xwýnhjaja mẽ ate kormã Tirtũm kapẽr mar kêt xwýnhjaja mẽ mãânẽn mẽ ixpê Ijaew mẽ ixte kapẽr mar mex xwýnhjaja nhũm pre akupým tãm mẽ pahte axpẽn kòt amnhĩ nhĩpêx o papa kaxyw mẽ paxunhwý.

¹⁸ Hãmri nhũm Tirtũm mẽ pahwýr amnhĩ Karõ rẽ nhũm mẽ pahkarõ mã agjê. Kris kukwak ri pix mã mẽ pahwýr kurê pu mẽ ý hã paxãmnhix ri kãm tanhmã amnhĩ jarẽnh to ho ri papa.

¹⁹ Hãmri mẽ te mẽ pahpê nhãm axpẽn kaxyw mẽ urojê pyrã mẽ axpẽn kàx ã ri papa hkêt mẽ.

Te mẽ pahpê Tirtũm nhõrkwý pyræk ã mẽ pajarẽnh

Wam Korĩt 3.16; Sikũn Korĩt 6.16; Wam Pẽtre 2.5

²⁰ Nẽ mẽ pahpê Jejus kwý jakamã te mẽ pahte ixkre tipxikamã ri papa pyræk. Nẽ te mẽ pahpê ixkre nhĩpêx mex pyræk. Nẽ Kris te kèp ixkre hkrax mã kuhê xà mẽ kýxpê kãm nõr xà

maatija pyrək. Nē mē kot Jejus nhỹ hā mē ahkre xwýnhjaja nē mē kot Tirtũm nhỹ hā kapēr o ri mē pa xwýnhjaja te mē kēp ixkre nhõkwa éja pyrək. Nē mē papajaja te mē pahpē ixkre nhĩmõk ā põja pyrək.

²¹ Ixkre mā kuhê xà nē kýxpē kām nõr xà maati kukwak ri pix mā na hte õkwa ê nē hā põja kýxpē mex nē expēn tā harir. Ja pyrà nē ãm Kris kukwak ri pix mā na pu htem te ixkre tipxi kamā ri papa pyrək o expēn nhĩpēx mex o ri papa. Te mē pahpē mē kot ixkre rax kumrēx nhĩpēx o mõr nhũm muxre nē ãm xwýnhhta pyrək.

²² Na htem amnhĩm õrkwỹ nhĩpēx nē hipēx pa nē hwýr agjê nē kamā pa ho pa. Ja pyrà nē na hte Tirtũm Karõja mē pahpē hkrajê karõ mā agjê nē mē pakamā pa ho pa. Te mē pahpē Tirtũm nhõrkwỹ pyrək. Mē ixpē Ijaew nē mē apē Ijaew kêt xwýnhjaja Tirtũm mā te mē pahpē õrkwỹ pyrək.

3

Pawre kot Ijaew kêt xwýnhjê mā mẽmoj to amnhĩrĩt ã harēnh

Rõmãn 15.14-21; Korosē 1.24-29

¹ Tã te mē pahpē Tirtũm nhõrkwỹ pyrək jakamā na pa hte jar mē hagjēnh xà kamā mē ato hwýr rãhã ho ixkrĩ. Na pa pre hte ma mē apē Ijaew kêt xwýnhjê hwýr ixpa nē ixprĩ hā mē amã Jejus kapēr jarēnh o ri mē akõt ixpa. Mýrapē na prem ixpynē nē ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tirtũm mā ijamaxpēr tỳx pē mē ato hwýr rãhã ho ixkrĩ.

² Na pre kãm ijapê hā mē apē Ijaew kêt xwýnhjê kaxyw ixãm. Ma ixte ri mē akõt ixpa nē mē amã kapēr jarēnh o ri mē akõt ixpa kaxyw. Ra mē ate ja hā ijarēnh mar mex.

³ Na pre mē pahto hpimràatã tanhmã mē pahto mex to hā inhmã amnhĩ to amnhĩrĩt pa pre omu. Mē kajaja nē mē pajaja. Pika piitã hkõt mē piitãã tanhmã mē ho mex to. Na pre kormã kot mēhõ mã ja jarēnh kêt tã inhmã ho amnhĩrĩt pa pre omu. Tã kagà ja kamā kot paj mē amã hkwy

ho grêre nē ho amnhĩrĩt nē mē amã hā kagà ka mē ixpyrà nē kamā harē nē ama.

⁴ Jao aprĩ hā mar mex nē.

⁵ Amnepēm mē pahkêt ri mē pa xwýnhjê mã Tirtũm kot ja ho amnhĩrĩt kêt tã nhũm Karõ mē ixkwýjê kumrēx mã ho amnhĩrĩt. Ý hā kapēr o ri mē pa xwýnh mē mē ixpē Jejus nhỹ hā mē ajahkre o mē ixpa xwýnhjê kumrēx mã ho amnhĩrĩt. Mē ixte kãm tanhmã amnhĩ nhĩpēx to ho ixpa xwýnhjê mã ho amnhĩrĩt pa prem omu.

⁶ Na pre mē inhmã tanhmã mē ato amnhĩrĩt to pa prem ja hā mē apumu nē mē akukamã ijamaxpēr o:

—Nà ãm hãmri koja xep Ijaew kêt xwýnhjaja mē ixpē Ijaew pyrà nē Tirtũm kapēr ma nē Jejus Kris kõt amnhĩ xunhwý nhũm Tirtũm ã mē kot amnhĩ nhĩpēx anhýr ã mē omu nē mē ixpyrà nē mē ho hkra nē mē ho mex o pa. Anē.

⁷ Tã nhũm Tirtũmja mē awýr inhmē. Ixte mē amã ja jarēnh o ri mē akõt ixpa nhũm tokyx mē ate mar kaxyw. Na pre ixto mex nē kãm hprãm xà hkõt mē akaxyw ixãm nē ixte ý hā kãm tanhmã amnhĩ nhĩpēx to ho ixpa kaxyw ixto ixihtỳx nē mē awýr inhmē.

⁸ Tã mo kaxyw na pre mē akaxyw ixãm? Te ixte ja kaxyw inhmex kêt pyrək. Ixkwýjaja ja kaxyw mex o kot ijakrenh tã nhũm pre ixpumu nē tanhmã hamaxpēr to nē mē akaxyw ixãm nē mē awýr inhmē. Ixte mē amã mẽmoj mex kumrēx jarēnh o ri mē akõt ixpa kaxyw. Na pre inhmã:

—Kêr ka ma Ijaew kêt xwýnhjê hwýr mõ nē mē kãm Jejus Kris kapēr jarēnh o ri mē hkõt apa. Nē mē kãm: “Kot kaj mē Jejus Kris kõt amnhĩ xunhwý hãmri nē kukwak ri amex nē apa.” Anē.

⁹ Koja mē apē Ijaew kwýjê pyrà nē amnhĩ kaxyw Ixkra Kris kõt hamaxpēr nē hkõt amnhĩ xunhwý pa hā mē omu nē mē ho ixkra. Kormã aa ixte mē kãm ja hā amnhĩ to amnhĩrĩt kêt tã pa akumrēx mã harē. E ma mē

hkôt ri mẽ kãm ã ijarênh anhÿr o ri apa kê mẽ ijarênh ma.

Anhÿr o mẽ pahto kator xwÿnh maati ja inhmã kapêr.

10 Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrÿk xwÿnh pytàr xwÿnhjaja nê mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarênh to kaxyw. Nê harênh o:

—Kokÿÿ. Tĩrtũm àhpumunh tÿx o àhpumunh tÿx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nê hihtÿx o hihtÿx. Anê.

Koja mẽ ate amnhĩ to mex o apa hã mẽ apumu nê ã axpên mã Tĩrtũm jarênh anê.

11 Amnepêm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarênh to hãmri nê Jesus kukwak ri ã mẽ panhĩpêx anê. Jao mẽ piitã mẽ kãm àhpumunh o àhpumunh ã amnhĩ to amnhĩrĩt.

12 Tã pu mẽ ra Jesus kukwak ri amnhĩ kamã pamã Tĩrtũm puma hkêt nê. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarênh rãhã ho ri papa. Te ra pahte hwÿr paxàpir nê pano ho omunh nê kãm pakapêr o pakuhê pyræk.

13 Jakamã kwa kêr ka mẽ kot mẽ atã tanhmã ixtomnuj to hã ijarênhja ma nê tee ri ixkukamã ajamaxpêr hkêt nê. Kwâr mẽ mãmrĩ tanhmã inhĩpêx to. ãm ixte mẽ amã amnhĩ jarênh ma nê axpên mã ijarênh o:

—Hêxta waa nê. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwÿr mra nê mẽ pamã Tĩrtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nê. Anê.

*Kris kãm mẽ pajapê kamã tanhmã mẽ panê amnhĩ nhĩpêx to
Juãw 3.16; Wam Juãw 3.1*

14 Nê na pa hte mẽ ato Mẽpanhĩpêxã maati hwÿr kãm ixihitÿx o ixpa.

15 Kêp mẽ pahte hkôt amnhĩ xunhwÿr xwÿnhjê nhõ Pahi Maati mex kumrêx na. Kra hkwÿjaja ra kaxkwa kamã kuri htĩr tũm nê pa ho pa nê arĩ pyka ja kamã mẽ pahpê hkwÿjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyræk.

16 Jakamã na pa hte mẽ ato hwÿr o: —Pa Tĩrtũm. Nà amex o amex. E ot pa Epes nhõ xwÿnhjê ho awÿr o ixkrĩ. Kwa kê Akarõ mẽ kãm axàhpumunh xã hkwÿ gõ kê mẽ akôt ri amnhĩ nhĩpêx rãhã ho pa.

17 —Nê kê mẽ amnhĩ kaxyw Kris kôt hamaxpêr tÿx o pa. Te mẽmo pĩ hpàr jarê kot pika kaxwÿnh kãm pimãnh nê pika jamÿnh tÿxta pyræk. Nhũm kòk xàpêr tÿx tã tee kot kãm mẽnh prãmta pyræk. Kê mẽ pĩ hpàr jarê kot pika jamÿnh pyrã nê kãm axpên kĩnh o pa. Jao mẽmoj to axpên kutã nojarêt rãhã ho pa.

18-19 —Nê kê krĩ piitã hkôt mẽ akrajê pyrã nê amnhĩ tã Kris kãm mẽ hapê htÿx o mẽ hapê htÿx ã amnhĩ pumu. Jao uræk nê mẽ kãm axpên kĩnh tÿx o pa. Nê kê mẽ ate amnhĩ nhĩpêx pix o amnhĩ nhĩpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpàrta pyrã nê akôt hihtÿx nê. Anê.

20 Kot puj mẽ ã amnhĩ to Tĩrtũm wÿr anê nhũm mẽ pama nê ra àhpumunh tÿx xã ho ã mẽ panhĩpêx anê. Ra kot mẽ pakamã pa ho pa kênã.

21 ã Tĩrtũm Jesus Kris kukwak ri mẽ pahpê hkrajê nhĩpêx anhÿr jakamã kwa pu mẽ pahpê hkra xwÿnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhÿr o papa.

4

Te ixkre tipxi kamã axpên kôt ri mẽ papa pyræk

Rõmãn 15.5; Piripos 2.1-4; Korosẽ 3.12-17; Wam Pêtre 3.8

1 Nê ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ

amã ixkapêr nê hã kagà anhÿr o ixkrĩ. Kwa kêr ka mẽ Tĩrtũm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awÿ ka prem hkôt amnhĩ xunhwÿ.

² Nê kêr ka mẽ amã amnhĩ to rax o akwÿjê jakrenh prãm o ri apa hkêt nê. Nê mẽ agryk tokyx anhÿr kêt nê. ãm axpên kãm axukaprĩ pix o mãn ri axpên kôt apa. Kê mēhō tee tanhmã ri mẽ ato htã ka mẽ kamã agryk tokyx anhÿr kêt nê. ãm mẽ amã ri axpên hkĩnh pix o mãn ri axpên kôt apa.

³ Ra Tĩrtũm Karō kot mẽ pahkarō mã gjêx par jakamã te mẽ pahte ixkre tipxi kamã axpên kôt ri mẽ papa pyrãk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhĩpêx. Jao ajamakêtkati nê axãmnhĩx ri axpên kôt ri apa ho apa.

⁴ Te mẽ pahte ixkre tipxi kamã ri axpên kôt papa pyrãk jakamã mẽ pahpiitã mẽ pahkarō kamã Tĩrtũm Karōja hkrĩ ho hkrĩ. Jakamã kot puj mẽ nhÿrmã ma õ krĩ hwÿr api nê kamã mẽ pamex rãhã papa ho papa.

⁵ Nê mẽ panhō Pahihtija ãm pixii. Na pu prem pahpiitã amnhĩ kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwÿ hã amnhĩ to amnhĩrit kaxyw na prem Tĩrtũm mã mẽ pahkrã kumrã. ã mẽ panhĩpêx anhÿr o axpên pyrãk o mẽ panhĩpêx o pa anê.

⁶ Nê Tĩrtũm haxwÿja ãm pixii. Kêp mẽ pahpiitã mẽ panhĩpêxã maati na. Na hte mẽ pahpê hkrajê mã àhpumunh xà hkwy gō pu mẽ ÿ hã kãm tanhmã amnhĩ nhĩpêx to ho papa. Nhũm hte mẽ pahkarō kamã pa ho pa. Jakamã te mẽ pahte ixkre tipxi kamã ri axpên kôt papa pyrãk.

Kris kot ahpÿnhã tanhmã mẽ pahto mex to hã harênh

Rômãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nê Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwÿr xwÿnhjê pytãr pa nê ma akupÿm kaxkwa hwÿr api.

Tã arĩ jar pika hkôt mẽ pahpê hkwyjê mã tanhmã mẽ pahto paxihtÿx to ho pa.

Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw tanhmã mẽ pahto paxãhpumunh to. Kãm hprãm xà hkôt.

⁹ Tĩrtũm kapêr ã kagà htũm kot akupÿm kaxkwa hwÿr àpir ã harênh. ãm tapxipix na pre ã pika hwÿr wrÿk nê akupÿm kaxkwa hwÿr àpir anê. Na pre ty nhũm mẽ haxà. Hãmri nhũm akupÿm htĩr nê kato nê ma akupÿm api. Tapxipix na pre ã amnhĩ nhĩpêx anê.

¹⁰ Tã akupÿm kaxkwa hwÿr àpir xwÿnhnta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ.

¹¹ Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tĩrtũm nhÿ hã hkrajê jahkre ho ri mẽ hkôt papa kaxyw mẽ paxunhwÿ.

Nê mẽ pahkwÿjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jejus kôt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastô kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwÿ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pamar tÿx nê. Nê gaa nê mẽ pahpyrà nê Tĩrtũm mã amnhĩ nhĩpêx mex o pa. Pu mẽ

pahpiitā hkôt amnhĩ nhĩpêx mex o papā.

¹³ Nē gaa nē mē pahpiitā mē pahpê Tĩrtũm kra hã Jejus kot amnhĩ nhĩpêx kôt omunh mex nē. Nē amnhĩ kaxyw hkôt pajamaxpêr tỳx nē. Jao te ra hkôt mē paxàptār mex pyrāk. Nē te kot amnhĩ nhĩpêx pyrāk o amnhĩ nhĩpêx.

¹⁴ Mēhprĩrejaja na htem nhām hamaxpêr nē nhām hamaxpêr o pa. Te kôk xàpêr nē nhām mēmoj to mrar nē nhām mēmoj to mrar pyrāk. Nom kêr pu mē ho mē urāk kêt nē. Ām Kris kôt pix mǎ pajamaxpêr tỳx o papa. Jakamǎ nhũm mē tee ri mē pahte hkwȳm ri tanhmǎ amnhĩ tomnuj to hprām xàj tanhmǎ mē pahto kaprỳ. Nom kêr pu mē mē mar kêt nē. Ām pakatāt kôt mē àptār kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtỳx o papa.

¹⁵ Tām axpên mǎ pakapêr nē pamǎ axpên kĩnh o axpên mǎ paxêx kêt nē. Kwa kêr pu mē Ā amnhĩ nhĩpêx anhỹr o mǎn papa. Jao te mē pahkrǎ Kris kot amnhĩ nhĩpêx pyrāk o amnhĩ nhĩpêx mex o mō.

¹⁶ Nē mē panhĩ kamǎ tanhmǎ mē pakuteja piitā na hte mē pahkrǎ kamǎ mē pajamaxpêr xà hkôt axpên kôt ahpỹnhǎ tanhmǎ axpên to ajuta hto. Te ixkre pixi kamǎ mē pahte axpên kôt tanhmǎ axpên to ajuta hto ho ri papa pyrāk.

Kris kôt mē pahte amnhĩ nhĩpêx nyw ā mē pamǎ karō

Korosē 3.5-11; Wam Pêtre 4.7

¹⁷ E kot paj Pahihtĩ nhỹ hã mē amǎ mēmoj jarē nē nē mē amǎ ixkapêr kām ixihtỳx nē ka mē inhma. Nà kêr ka mē axte mē kêp Tĩrtũm kra hkôt xwỹnhjê kot amnhĩ nhĩpêx o amnhĩ nhĩpêx o ri apa hkêt nē. Na htem htỳx ri tanhmǎ hamaxpêr punuj to ho ri amnhĩ tomnuj o pa.

¹⁸ Jao Tĩrtũm mǎ hamaxpêr kêt nē pa. Kām hamaxpêr prām kêt kumrêx nē pa. Te mē kot omunh nē nhām hkrǎ pyrāk o amnhĩ nhĩpêx. Rỳ te mēhō wa kot axpên kām gryk kām axpên nhĩpêx pyrāk o hipêx. Jao te

kamāt kô kamǎ ri pa pyrā nē Tĩrtũm kot amnhĩ nhĩpêx pumunh kêt nē pa. Jakamǎ koja mē nhỹrmǎ kuri htĩr tũm nē pa hkêt nē.

¹⁹ Na htem tanhmǎ amnhĩ tomnuj to htā amnhĩ kamǎ hpijaàm kêt nē pa. Nē axpên kamǎ hpijaàm kêt rāhǎ ho pa. Ām amnhĩ pix kukamǎ hamaxpêr nē tanhmǎ amnhĩ tomnuj to ho ri pa.

²⁰⁻²¹ Nom Jejus Krisja ā kot amnhĩ nhĩpêx anhỹr kêt. Mē kurom tām kot amnhĩ nhĩpêx mex o pa xwỹnh nē tām kapêr o pa xwỹnh na. Na pa pre ma mē awỹr mō nē ixprĩ hã mē amǎ ja hã harē ka prem inhma nē inhmar tỳx nē.

²² Na pa pre mē amǎ:

—Kwa mē ri axte amnhĩ nhĩpêx tũm kôt amnhĩ nhĩpêx o ri apa hkêt nē. Ja na omnuj tỳx. Na ka prem ā amnhĩ nhĩpêx anē nē ajamaxpêr punuj pix o ri apa. Jao amnhĩ tomnuj rāhǎ nē. Tā kêr ka mē amnhĩ nē awry hã mēnh pyrā nē axte ā amnhĩ tomnuj anhỹr o ri apa hkêt nē.

²³ —Nē kêr ka mē axte mē ajamaxpêr tũm nē mē ate amnhĩ nhĩpêx tũm kôt ri amnhĩ nhĩpêx kêt nē. Nē mē ajamaxpêr nyw nē mē ate amnhĩ nhĩpêx nyw kôt pix mǎ ri amnhĩ nhĩpêx o ri apa. Te mē kot mē ê htũm kwrȳnh nē rēnh nē hpānhǎ nyw jagjêx nē ri hã pata pyrā nē ām amnhĩ nhĩpêx nyw kôt pix mǎ amnhĩ nhĩpêx o ri apa.

²⁴ Mē ajamaxpêr nyw nē mē ate amnhĩ nhĩpêx nywja axtem na. Te Tĩrtũm jamaxpêr nē kot amnhĩ nhĩpêxta pyrāk. Jakamǎ kwa kêr ka mē kām hprām xà hkôt pix mǎ tanhmǎ amnhĩ nhĩpêx to ho ri apa. Jao kām amnhĩ nhĩpêx mex o ri apa. Nē kapêr kôt ri amnhĩ nhĩpêx. Anē.

Na pa pre ā mē amǎ ixkapêr anē. Tā kêr ka mē arĩ ixkapêr kôt pix mǎ amnhĩ nhĩpêx.

²⁵ Mē pahpê Kris nhĩ jakamǎ te pahte ixkre htipxi kamǎ axpên kôt amnhĩ nhĩpêx pyrāk jakamǎ kwa mē axte axpên mǎ mēmoj to axêx kêt nē. Nē amarĩ axpên xō ri axpên mǎ

mëmoj to axêx kêt nê. Æm tãm axpên mã mëmoj jarênh o ri apa.

26 Nê kot kaj më mëmoj tã agryk japêr. Rỳ mëhõ kamã agryk rỳ amari agryk japêr. Tã kêr ka ho ajapêx tokyx anê agryk japjê hkêt nê. Kêr kê ko-rmã kamãt kêt ri ka akupÿm tãm akra nhũm ja amã mex nê.

27 Nom kot ka më arĩ kamã agryk o ri apa nhũm mëkarõmnuti nhõ pahi Satanastija ja hã më apumu nê te më ate amnhĩ tomnujta ã më apynênh pyrãk o më anhĩpêx. Ka më ra hkõt tanhmã amnhĩ tomnuj to. Ja pymaj kêr ka më agryk japjê hkêt nê. Satanasti kãm hprãm xà hkõt ã amnhĩ nhĩpêx anhÿr kêt nê.

28 Nê më axàhkĩnh o më apa xwÿnhjaja kêr ka më axte më kêp axàhkĩnh hkêt nê. Mëmoj tã apê nê hpãnhã kàxpore jamÿ nê ho amnhĩm awjaprõ. Nê më kêp amrakati xwÿnhjê mã mëmoj japrõr o ri apa. Kêr ka më ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhÿr o ri apa.

29 Nê kêr ka më amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. Æm axpên mã akapêr mã aprĩ ho axpên mã akapêr. Nê më amã axpên kĩnh nê më amã axpên to mex pix prãm xàj tãm axpên mã ri akapêr o ri apa.

30 Tĩrtũm na pre më pahwÿr amnhĩ Karõ rê nhũm më pahpê hkra hã më pahkarõ mã agjê nê më pakamã hkrĩ ho hkrĩ. Kojã më pakamã hkrĩ ho hkrĩ rãhã nhũm nhÿrmã Tĩrtũm amnhĩ wÿr më pahto api pu më kuri pahfĩr tũm nê papa ho papa. Jakamã kwa kêr ka më tanhmã amnhĩ tomnuj to ho amnhĩ kamã Tĩrtũm Karõ mã hkaprĩ jagjênh kêt nê. Nê kãm hpijaam jagjênh kêt nê. Kojã më pahte amnhĩ tomnuj ã më pahpumu nê më pahkaga hkêt tã tee ri ja hã më pahpumu nê hkaprĩ nê. Jakamã kêr pu më ãm kãm hprãm xà hkõt pix mã tanhmã ri amnhĩ nhĩpêx to ho ri papa.

31 Nê kêr ka më axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rỳ axpên japrÿ ho ri apa hkêt nê. Nê atÿx ri axpên tã apêr o apikênh kêt nê. Nê ri axpên tã më kãm axàmnênh kêt nê.

32 Kêt më ãm axpên to mex pix nê axpên kãm axukaprĩ ho ri apa. Nhũm mëhõ tanhmã më ato ka më ãm amnhĩ tã omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri më pahte amnhĩ tomnuj grãnh pa nê axte kãm hamaxpêr kêt nê. Tã kêr ka më urãk nê mëhõ kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5

1 Nê koja mëhõ kãm hkra japê nhũm amnhĩ tã omu nê hkĩnh nê. Hãmri nê nhÿrmã hkra nê amnhĩ pyrã nê kãm hapê nê. Ja pyrã nê Tĩrtũm kãm më pahpê hkwÿjê japê jakamã kêr pu më amnhĩ pyrã nê pamã pahkwÿjê hkĩnh tÿx o papa.

2 Kris haxwÿja kãm më pajapê jakamã na pre htyk o më panê më pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã më panê amnhĩ nhĩpêx anê. Tã ã kãm më pajapê anhÿr jakamã nhũm Tĩrtũm ja hã omu nhũm ja kãm mex nê. Te ho më hkuxwa xà mex kuxwa pyrãk. Jakamã kêr pu më amnhĩ tã omu nê urãk nê pamã axpên kĩnh o axpên to mex o mãn ri papa.

Më pahte amnhĩ tomnuj kaga hã kot më pamã karõ

Sikũn Korĩt 6.14-7.1; Korosê 3.16-17; Wam Juãw 1.5-10, 2.15

3 Nê më pahpê Tĩrtũm kra jakamã kêr pu më pahprõ pix tãnopxar o ri papa nê nhãm mênijê hõ kamã pahpijaam kêt o ri papa hkêt nê.

Nê kêr pu më amnhĩ pix kukamã pajamaxpêr kêt nê. Æm ja ho anhÿr hkêt kumrêx. Më pahpê Tĩrtũm kra kênã kot pu kêt axtem nê ã amnhĩ

nhîpêx anhÿr o ri papa. Tîrtûm kra-
jaja na htem ã amnhî nhîpêx anhÿr
kêt nê.

⁴ Nê mãânên mẽ pakapêrja. Kêr
pu mẽ ri tanhmã axpên mã pakapêr
punuj to hkêt nê. Nê ri axpên japry
hkêt nê. Nê amnhî krã hkôt pahtÿx ri
tanhmã pakapêr to hkêt nê. ãm tãm
axpên mã pakapêr mex nê axpên mã
Tîrtûm mex o mex ã harênh o ri papa.

⁵ Nê Tîrtûm kapêr kôt amnhî nhîpêx
kêt xwÿnhjaja nê axpên kãm mẽ
hpîjaàm kêt xwÿnhjaja nê amnhî
pix kukamã mẽ hamaxpêr o pa
xwÿnhjaja. ã mẽ kot amnhî nhîpêx
anhÿr xwÿnhjaja kêp Tîrtûm mẽ
Kris wa hkra hkêt. Na htem ã
amnhî nhîpêx anhÿrja gryk ã wa kãm
hamaxpêr kêt nê.

⁶ Nê koja nhÿrmã mēhō mẽ awÿr mō
nê mẽ ate tanhmã amnhî tomnuj to
prãm xàj hêx rom amã kapêr nê mẽ
amã:

—Kwa mon ka hte mẽ ixpyrà nê ã
amnhî nhîpêx anhÿr kêt nê? Ja mex
kênã. Anê.

Koja ã mẽ amã kapêr anê ka mẽ
ama nê ãm ama. ã mẽ kot amnhî
nhîpêx anhÿr xwÿnhjaja koja Tîrtûm
nhÿrmã ja hã mẽ homnuj tÿx kumrêx.

⁷ Jakamã kwa kêr ka mẽ ate ho mẽ
kot amnhî nhîpêx pyrãk pymaj mẽ
hkôt ri apa hkêt nê. Kwarĩ ho kwarĩ.

*Mê pahte amnhî nhîpêx nyw jarênh
Juãw 1.4, 3.19, 8.12, 12.35; Rõmãn
13.12; Wam Tesarõn 5.5; Wam Juãw
1.5*

⁸ Amnepêm kormã mẽ ate Tîrtûm
kôt amnhî xunhwÿr kêt ri na ka prem
te kamãt kô kamã ri apa pyrã nê atÿx
ri tanhmã amnhî tomnuj to ho ri apa.
Tã ra Jejus kôt amnhî xunhwÿ hãmri
nê te hirã kamã mẽ apa xwÿnh pyrãk.
Jakamã kwa kêr ka mẽ hpãnhã Tîrtûm
kãm hprãm xà hkôt pix mã mãn ri
amnhî nhîpêx o apa. Ra mẽ apê hirã
kamã mẽ apa xwÿnh kênã.

⁹ Kot kaj mẽ ã amnhî nhîpêx anê nê
tãm amnhî nhîpêx mex nê tãm akapêr
o apa.

¹⁰ Jao Tîrtûm kãm hprãm xà hkôt pix
mã amnhî nhîpêx o ri apa

¹¹⁻¹² nê te kamãt kô kamã ri mẽ
pa xwÿnhjaja kot amnhî nhîpêx pyrãk
o amnhî nhîpêx kêt nê. ã mẽ kot
amnhî nhîpêx anhÿr xwÿnhjaja na
htem hpimxur pê tanhmã amnhî
tomnuj tÿx to ho pa. Nom kot paj ixprĩ
hã mẽ amã tanhmã mẽ kot amnhî
tomnuj to hã mẽ harênh kêt nê. Kot pa
mẽ amã harê nê ixpîjaàm tÿx nê. Ixte
harênh mã xwÿnhja omnuju. Tã kêr
ka mẽ urãk nê ã amnhî nhîpêx anhÿr
kêt nê. ãm mẽ noo mã tãm ri amnhî
nhîpêx o ri apa.

¹³ Mẽ kot ja hã mẽ apumunh nê
tee ri tanhmã kot amnhî tomnuj
to hkukamã hamaxpêr kaxyw. Jao
amnhî tomnuj kaga japêr.

¹⁴ Te mẽ kot kanê hpôk rax kãm
mẽmoj piitã omunh mexta pyrãk.
Tîrtûm kapêr ã kagã htûm kot ja
jarênh kot:

Mẽ amã Tîrtûm prãm kêt xwÿnhjaja
te ra mẽ atÿk nê mẽ anhîkwÿ
pyrãk.

Nê te kamãt kô kamã mẽ anhôt nê mẽ
anhîkwÿ pyrãk.

Jakamã kwa te mẽ akrã hapôx nê
kãnhmã mẽ akrĩ pyrãk o amnhî
nhîpêx nê Tîrtûm kôt amnhî
xunhwÿ.

Kê Kris tanhmã mẽ akrã hto ka
mẽ te myt kato nhÿm mẽ ate
arĩgro hã ri apa pyrãk o amnhî
nhîpêx. Anê.

*Tîrtûm krajaja kot tanhmã amnhî
nhîpêx to hã mẽ kãm karõ*

Korosê 4.5; Sikÿn Ximotre 4.2

¹⁵ Nê kwa kêr ka mẽ amnhî
pumunh mex o ri apa. Nê mẽ ri htÿx
ri mẽ kot amnhî nhîpêx xwÿnhjê hkôt
amnhî nhîpêx kêt nê. Nê ãm amnhî to
mex pix o ri apa.

¹⁶ Na htem ra Kris ã mẽ pahtomnuj
o pa pu mẽ pamex kêt nê ri papa. Tã
nom kêr pu mẽ apkati mẽ arĩ Tîrtûm
mã tanhmã amnhî nhîpêx to ho papa
mã panhÿrer kêt nê.

¹⁷ Nê ãm Tîrtûm pix mã amnhî
jarênh o ri papa nê kãm:

—Pa Tîrtûm. Inhmã akôt pix mã
amnhî nhîpêx prãm jakamã kwa ixte
amã mẽmoj to anhÿr kaxyw ixkrãm

ijamaxpêr mex jagjê nê ho amnhĩrĩt mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mẽ pahtÿx ri pajamaxpêr kôt tanhmã kãm amnhĩ nhĩpêx to hkêt nê.

18 Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagôxyhti kot amnhĩ tã mẽ pahkaxpre pyræk o mẽ panhĩpêx pu mẽ tee ri pamã hkaga hprãm kaprÿ. Te kot amnhĩm mẽ pahto àrĩk pyræk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhÿr hkêt nê ãm Tĩrtũm Karõ pix hkôt mãn ri amnhĩ nhĩpêx o ri papa.

19 Nê kêr pu mẽ axpên wÿr akuprõ nê pahkĩnh kãm Tĩrtũm mã mex o mex ã harênh pê ho pagrer o pahkrĩ.

20 Nê mẽ pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Mẽpanhĩpêxã maati jakamã mẽ pahpê Pahĩti Jejus Kris kwÿ hã pu mẽ kãm mex ã harênh rãhã ho papa nê aa ho pajamakêtkati hkêt nê.

21 Nê kêr ka mẽ Kris ã apijaàm rãhã o ri apa. Jao axpên kôt ajamaxpêr nê axpên kôt ri amnhĩ nhĩpêx mex o ri apa.

Tanhmã mẽ hprõ nê mẽ mjên kot axpên nhĩpêx to hã mẽ kãm karõ

Wam Korĩt 11.3; Korosẽ 3.18-19; Wam Pêtre 3.1-7

22 Nê kêr ka mẽ anijaja mẽ amjên ã apijaàm o ri apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx o ri apa. Te mẽ ate Pahĩti Kris kapêr kôt amnhĩ nhĩpêx o ri apata pyræk.

23 Kris kêp mẽ pakamã ukapri xwÿnh nê kêp mẽ papytãr xwÿnh jakamã te kêp mẽ pahpiitã mẽ pahkrã pyræk. Nê mẽ papajaja te mẽ pahpê i pyræk. Jakamã na pu htem pahpê ija te mẽ pahkrã kot tanhmã hamaxpêr to xã hkôt amnhĩ nhĩpêx o papaja pyræk. Ja pyrã nê kêr ka mẽ anijaja

mẽ amjên jamaxpêr mex ã mẽ omu nê mẽ hkôt amnhĩ nhĩpêx mex nê.

24 Mẽ pahpê Kris kwÿ jakamã na pu htem hkôt amnhĩ nhĩpêx mex o ri papa. Ja pyrã nê kêr ka mẽ amjên kôt amnhĩ nhĩpêx mex o ri apa.

25 Nê mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xaj amnhĩ grõnh kôt mẽ pahwÿr wrÿ nê mẽ panê ty. Tã kêr ka mẽ uræk nê ã amã aprõ hã ma ho apa anê.

26 Na pre Kris kãm mẽ pajapê xaj mẽ pahte amnhĩ tomnuj pê mẽ pahpytã. Te mēhõ my kãm mēhõ ni hkĩnh nê mēmoj punuj pê utãr nê ho hprõta pyræk. Nhũm te mẽ kot axpên mã wa rer kaxyw nhũm nija ma gõx mã htēm nê wÿr nê amnhĩ to mex nhũm mẽ kot axpên kaxyw wa ho mexta pyræk. Hãmri nê te ra axpên mã wa rer nhũm wa kot axpên kôt pa ho pata pyræk.

Ja pyrã nê na pre Jejus kãm mẽ pajapê nê kãm amnhĩ kuri mẽ papa ho mẽ papa hprãm xaj mẽ pahwÿr wrÿ nê mẽ pahte amnhĩ tomnuj pê mẽ pahpytã nê mẽ pamã Tĩrtũm kapêr jarênh o pa. Tã mẽ pahpê hkraja na pu htem kapêr ma nê hkôt amnhĩ nhĩpêx o papa ho amnhĩ tomnuj kaga. Te gõx kãm mẽ paxwÿr nê mẽ pahte amnhĩ nê amnhĩ grã htyk kuhõnh par pyræk. Jao Tĩrtũm kapêr kôt pix mã amnhĩ nhĩpêx o ri papa. Te ra paxwÿr nê amnhĩ nê tanhmã mẽ pahte amnhĩ tomnuj to grãnh par pyræk. Nê te mjên mã xwÿnh wÿr nê amnhĩ to mex pyræk.

27 ã mẽ pahte amnhĩ nhĩpêx anhÿr jakamã te mẽ pamex nê ri papa pyræk. Hãmri nhũm Krisja ja hã mẽ pahpumu nê kãm mẽ pajapê htÿx nê. Jakamã koja nhÿrmã akupÿn wrÿ nê ma akupÿm amnhĩ kôt mẽ pahto api pu mẽ kuri pa htĩr tũm nê papa ho papa.

28 Nê xã mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ

hipêx o ri apa. Te war apixire nê war apa pyrâk o wa axpên nhîpêx. Kot kaj mẽ tanhmã hipêx to nê te ate amnhî nhî tanhmã hipêx to pyrâk.

²⁹⁻³⁰ Na htem amnhî nhî ho mex pix o pa nê kamã gryk kêt nê. Nê kãm prãm nê apku. Nê kãm kôr nê ixkô. Nê nhÿhÿnh à nê amnhî kane. Na pu htem ã amnhî to mex o ri papa anê. Ja pyrâ nê te mẽ pahpê Kris nhî pyrâk jakamã na hte mẽ pahto mex o pa. Te mẽ pamã mẽ papa mẽ pahte amnhî nhî hã mata pyrâk.

³¹ Tîrtûm kapêr ã kagà htûm kot ja jarênh kot:

Koja mêmÿjê hõ hprõ kaxyw hãmri nê hipêêxà nê katorxà wa òrkwÿ kaga nê ãm hprõ kôt pix mã hpãnhã ri pa ho pa. Te wa tipxi nê ri pa pyrâk o wa axpên nhîpêx o pa. Anê.

³² Na pre Tîrtûm ã ja jarênh anê. Kapêrja mex tã amnepê mã mẽ pa xwÿnhjaja na prem hprî hã mar tÿx kêt nê. Na prem htÿx mẽ mjên kot tanhmã mẽ hprõ nhîpêx to pix ã hkamnhîx no ãm ja pix kêt. Mãânên te mẽ pahpê Kris nhî pyrâ nê tãm mẽ pahte amnhî nhîpêx nê axpên nhîpêx o papa hã ã mẽ pajarênh kot anhÿr. Te ixkre tipxi kamã mẽ pahte Kris kôt mẽ papa pyrâk o ã mẽ pajarênh anê.

³³ Jakamã kwa kêt ka mẽ amyjaja mẽ amã mẽ aprõ japê ho ri apa. Te ka amã amnhî tã ma pyrâk o mẽ hipêx. Jao tãm mẽ hipêx. Nê mẽ anijaja kêt ka mẽ ajaxwÿja mẽ amjên ã apijaàm o ri apa.

6

Mê hkrajaja kot tanhmã hipêêxà nê katorxà nhîpêx to hã mẽ kãm karõ

Korosê 3.20-21

¹ Nê mẽ apê mẽ hkrajaja kêt ka mẽ anhîpêêxà nê mẽ akatorxà wa kapêr ma nê hã ano htÿx nê wa hkôt ri amnhî nhîpêx rãhã ho ri apa. Mẽ amã Pahihti Kris kôt amnhî nhîpêx prãm xàj ã amnhî nhîpêx anhÿr o ri apa. Kot kaj mẽ ã amnhî nhîpêx anhÿrja o amnhî nhîpêx mex o ri apa.

²⁻³ Tîrtûm kapêr ã kagà htûm kot ja jarênh kot:

Kêr ka mẽ anhîpêêxà nê mẽ akatorxà wa kapêr ma nê wa hkôt ri amnhî nhîpêx. Kot kaj mẽ ã amnhî nhîpêx anê nê amex nê kritpêm atîr nê ri apa ry nê.

Anhÿr jakamã kot kaj mẽ amã kritpêm atîr nê ri apa hprãm hã kêt ka mẽ ã amnhî nhîpêx anhÿr o ri apa. Kormã mẽ aprîre htã ã amnhî nhîpêx anê. E kêt ka mẽ ã mẽ anhîpêêxà nê mẽ akatorxà nhîpêx anhÿr o ri apa.

⁴ Nê mẽ apê mẽ hipêêxà nê mẽ katorxà kêt ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêt ka mẽ ã akrajê nhîpêx anhÿr o ri apa.

Mê pahte mẽ panhõ patrãw kapêr kôt amnhî nhîpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axàpênh o mẽ apa xwÿnhjaja kêt ka mẽ anhõ patrãw kapêr ma nê hkôt amnhî nhîpêx mex o ri apa. Te mẽ ate Kris kapêr mar nê hkôt amnhî nhîpêx pyrâk. Jao mẽ hã apijaàm rãhã nê.

⁶ Nom kêt ka mẽ ãm mẽ noo mã pix mã ri mẽ kãm axàpênh mex kêt nê. Mãânên mẽ wa kre kamã mẽ kãm axàpênh mex rãhã nê. Ja na Tîrtûm kãm hprãm. Mẽ apê Tîrtûm Kra Kris mã tanhmã amnhî nhîpêx to ho apa xwÿnh jakamã kêt ka mẽ anhõ patrãw mã axàpênh mex o ri apa.

⁷ Nê mẽ akînh kãm mẽ kãm axàpênh mex nê. Te mẽ ate Pahihti mã akînh kãm tanhmã kãm amnhî nhîpêx to pyrâ nê mẽ kãm tãm amnhî nhîpêx pè axàpênh mex o ri apa.

⁸ Kot puj mẽ amnhî kaxyw Tîrtûm mã pajamaxpêr pè pahkînh kãm tãm amnhî nhîpêx o ri papa nhûm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxàpênh xwÿnhjaja nê amnhî mã mẽ paxàpênh xwÿnhjaja nhûm nhÿrmã mẽ pahpiitã mẽ pahte tãm

amnhĩ nhĩpêx xwýnhjê ho mex rax nê.

Mêõ patrãwjaja kot tanhmã kãm mẽ àpênh xwýnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ àpênh xwýnhjê ho mex nê mẽ àpênh ã mẽ kãm axàkjêr o ri apa hkêr nê. Tãm mẽ hipêx. Kaxkwa kamã mẽ panhõ Pahi Maatija mãânên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrâk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htÿx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kêr ka mẽ Pahihti nhÿ hã kutã amnhĩ to htÿx rãhã nê apa. Ate tanhmã amnhĩ tomnuj to hprãm xàj tanhmã kot ato htã ka Tirtũm xihtÿx o anhõpinh xà kaxwýnh kãm kutã amnhĩ to htÿx nê. Rÿ koja ate mẽmoj mex o anhÿr nê tanhmã ato ka mẽ amnhĩ tã hamaxpêr ã omu nê ãm omu nê arĩ Tirtũm xihtÿx nhÿ hã tãm ajamaxpêr mex rãhã ho ri apa.

¹¹ Na hte põristijaja pijapu kaxyw hãmri nê amnhĩ nê kàx o mẽ ê jagjê nhũm mẽ tee ri kãm mẽ hkamnhwÿr prãm hkaprÿ. Tã ja pyrã nê koja Satanasti mẽ ate kapêr kôt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpêr ã omu hãmri nê Tirtũm xihtÿx nhÿ hã kutã amnhĩ to htÿx nê. Jao mẽ ate amnhĩ nhĩpêx nyw pix o amnhĩ nhĩpêx nê mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anê nhũm Satanasti tee ri tanhmã kãm mẽ ato hprãm hkaprÿ.

¹² Mẽ pahpê Tirtũm kra jakamã mẽ kot mẽ pakutã amnhĩ xunhwÿr xwýnh maatijaja axtem na mẽ. Mẽ kêp mẽkarõmnuti jakamã mẽ

pahkĩnhã mẽ ã hkêr. ãm mẽ hkarõ kaxkrit pix na mẽ. Na htem kòk kôt tanhmã amnhĩ tomnuj tÿx to ho pa. Nê mẽ hihtÿx. Na htem arĩ jar pika ja kamã mẽ kêp Tirtũm kra hkêr xwýnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nê.

¹³ Jakamã kwa kêr ka mẽ Tirtũm kot mẽ akarõ mã amnhĩ Karõ jagjênh xwýnhhta kôt pix mã amnhĩ nhĩpêx o apa. Jao mẽ ate amnhĩ nhĩpêx nyw kôt pix mã mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprÿ ka mẽ arĩ Tirtũm Karõ xihtÿx nhÿ hã kutã amnhĩ to htÿx rãhã ho apa.

¹⁴ Jakamã kwa kêr ka mẽ axkãm ajamak rom nê te ho sòrdat kot pijapu kaxyw ê jagjênh pyrâk o amnhĩ nhĩpêx. Na htem amnhĩ nê môx kà ho mẽ ê jagjê nê mẽ hpre xà ho amnhĩ pre hpa. Nê hipy kàx o mẽ hinõ kà jagjê. Hãmri nê rĩ kormã ma mẽ kãm mẽ hkurê xwýnhjê kutã mra nê axpu. No mẽ kajaja kêr ka mẽ kurom amnhĩ krãm Tirtũm kapêr jaxàr tÿx nê hkôt pix mã ri ajamaxpêr rãhã ho ri apa. Nê hkôt ri amnhĩ nhĩpêx mex nê. Jao te sòrdat pijapu kaxyw kot amnhĩ nhĩpêxta pyrâk.

¹⁵ Na hte sòrdatjaja hpar kà jagjê nê aa hopòx kêt nê. ãm rãhã gõr nê hikwÿ. Jao ra mẽ kutã pijapu kaxyw amnhĩ grõnh rãhã gõr nê hikwÿ. Tã kêr ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nê sòrdat pyrã nê amnhĩ grõnh kôt ma mẽ hwÿr apa nê amnhĩ kamã akahak kêt nê.

¹⁶ Nê sòrdatjaja na htem amnhĩ nê amnàr xà hã kàx po jamÿ nê ho kuhê nhũm mẽ tee ri kãm mẽ hkamnhwÿr prãm kaprÿ. Ja pyrã nê koja Satanasti tanhmã mẽ ato ka mẽ Tirtũm kêp mẽ anhõ pahi hã hihtÿx o kot Satanasti jakrenhja mã ajamaxpêr kurê kumrêx nê ãm hkôt pix mã amnhĩ nhĩpêx. Na hte Satanasti te kot mẽ pahwÿr krur rênh pyrâk o mẽ panhĩpêx. Jao xatã mẽ pahte Tirtũm

kaga hprām xàj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprỹ. Pu mẽ amnhĩ tã omu hãmri nẽ Tĩrtũm Karõ xihtỹx nhỹ hã Tĩrtũm kõt pix mã amnhĩ nhĩpêx.

¹⁷ Nẽ na hte sôrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ hkrã jayr prãm kaprỹ. Ja pyrã nẽ kër ka mẽ amnhĩ kaxyw Tĩrtũm kõt pix mã ajamexpêr rãhã ho ri apa. Nẽ ra kot mẽ ato hkra mã ajamexpêr rãhã nẽ. Kê Satanasti tee ri kãm mẽ akrã kamã mẽ amã mẽ ajamexpêr punuj jagjênh prãm hkaprỹ.

Nẽ sôrdatjaja na htem mẽ kutã wapo jamỹ nẽ ho kuhê. Nom mẽ papajaja mẽ panhõ wapoja na axtem kêp Tĩrtũm kapêr. Na hte Tĩrtũm Karõ mẽ pahkrã kamã kapêr o amnhĩrit pu htem pix mã pajamexpêr o papa nhũm Satanasti tee ri kãm mẽ pahkrãm mẽ pajamexpêr punuj jagjênh prãm kaprỹ. Te mẽ papijapu nhũm mẽ pahte amnhĩ nẽ ho pakrihkrit pyrãk o hipêx.

¹⁸ ã Satanasti pẽ mẽ pahte amnhĩ nẽ amnhĩ nhĩpêx kot anhỹr. Jakamã kër pu mẽ amnhĩ to Tĩrtũm pix wỳr o ri papa kê Satanasti kutã mẽ pahto paxihtỹx pu mẽ hkõt tanhmã amnhĩ tomnuj to hkêt nẽ.

Nẽ kër pu mẽ mẽmoj to anhỹr kaxyw nẽ ra Tĩrtũm Karõ nhỹ hã amnhĩ to Tĩrtũm wỳ. Nẽ kãm amnhĩ jarênh rãhã ho papa nẽ aa ja ho pajamakêtkati hkêt nẽ. Nẽ Tĩrtũm krajê piitã mẽ ho hwỳr rãhã ho ri papa.

¹⁹ Nẽ kwa kêr ka mẽ mãânên ixto Tĩrtũm wỳr rãhã nẽ. Kot tanhmã ixto nhũm ixãmnhĩx ixte mẽ kãm kapêr jarênh mex o ri mẽ hkõt ixpa kaxyw. Mẽ kot ja hã tanhmã ixto htã pa arĩ ixãmnhĩx mẽ kãm harênh mex o ri mẽ hkõt ixpa. Nẽ ixprĩ hã mẽ kãm Jesus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt.

²⁰ Tã ixte mẽ kãm ja jarênh kaxyw na pre Tĩrtũm mẽ hwỳr inhmẽ nhũm prem hã ijaxà pa arĩ mẽ hagjênh xà

kamã ixkrĩ ho ixkrĩ. Jakamã kwa mẽ ixto Tĩrtũm wỳ kê tanhmã ixto ixihtỹx to pa arĩ mẽ kãm kapêr jarênh o ixkrĩ. Ja na Tĩrtũm kãm hprãm nẽ ijaxwỳja inhmã ja prãm.

*Kagà jatur xà
Korosê 4.7-8*

²¹ Nẽ ot pa mẽ awỳr Xikitre mẽ. Kot paj mẽ amã kagàja nhĩpêx pa nẽ kãm kugõ nhũm kupy nẽ ma mẽ awỳr o mõ. Hãmri nẽ mẽ awỳr o pøj nẽ mẽ amã kugõ nẽ mẽ amã tanhmã ijarênh to ka mẽ ijarênh ma nẽ akĩnh nẽ. Xikitre na hte Pahihti mã tanhmã amnhĩ nhĩpêx mex to o pa. Kris kõt mẽ pahtõ na. Nẽ inhmã hapêê.

²² Tã ot pa mẽ awỳr kumẽ. Kê mẽ awỳr pøj nẽ mẽ amã ijarê ka mẽ kam ama nẽ akupỹm tãm akrã nẽ tee ri ixkukamã ajamexpêr kêt nẽ.

²³ E ixkrãmnhwỳjaja. Kê Mẽpahpãm Tĩrtũm mẽ Pahihti Jesus Krisja wa tanhmã mẽ akrã hto ka mẽ ajamakêtkati nẽ axãmnhĩx ri apa. Nẽ mẽ amã axpên kĩnh o ri axpên kõt apa. Nẽ mẽ apiitã wa hkõt ajamexpêr mex o ri apa.

²⁴ E mẽ amã mẽ panhõ Pahihti Jesus Kris kĩnh rãhã ho apa xwỳnhjaja. Kê Tĩrtũm mẽ ato mex nẽ mẽmoj to mẽ akutã nojarêt rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhípêx. Jejus nhý hã mẽ ahkre o mẽ pa xwýnhjê hõ na pre. Na pre Jejus ã mẽ kãm hkurê xwýnhjaja unê nê ma krĩ pê Rõm wýr kumê nê kamã haxà nhũm mẽ hagiênh xà kamã hkrĩ ho hkrĩ. Tã nhũm arĩ hkrĩ rãhã Piripos kamã Jejus kôt hkwýjê hwýr kagàja nhípêx nê kumê. Na prem Pawre jarênh ma nê kãm ukapĩ nê. Jakamã axpên kaxyw kàxpore hkwý ho akuprõ nê hwýr kumê. Hãmri nhũm omu nê hkĩnh nê amnhĩ tã kagàja nhípêx nê kamã mẽ kãm amnhĩ jarê nê mẽ hwýr kumê. Kot amnhĩ xà htýx kamã hamak o hkrĩ htã arĩ hwýr mẽ mrar xwýnhjê mã Tĩrtũm kapêr jarênh rãhã ho hkrĩ hã amnhĩ jarê. Nê kãm Jejus kot amnhĩ nhípêx kôt pix mã amnhĩ nhípêx o pa hprãm ã amnhĩ jarê. Nê kãm Jejus jamaxpêr kôt pix mã hamaxpêr prãm ã amnhĩ jarê. ã na pre Pawre kagàja kamã mẽ kãm amnhĩ jarênh anê. Nê mẽ kãm:

¹ Pa Piripos kamã Jejus Kris kôt ixkwýjaja. Xà mẽ amex na ka mẽ apa? E ixpê Pawre na pa mẽ amã kagàja nhípêx nê kamã mẽ amã amnhĩ jarê nê mẽ awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhĩ nhípêx to ho wa ixpa xwýnh jakamã na pa wa mẽ awýr hipêx nê kumê. Mẽ ate Tĩrtũm kapêr o mẽ ajahkre xwýnhjê hwýr nê mẽ kãm mẽ ate tanhmã amnhĩ to xwýnhjê hwýr nê mẽ ate mẽ mar o akrĩ xwýnhjê hwýr. Mẽ apê Kris kôt wa ixtõ nê wa ixtõxjê ho ixpimràatã mẽ awýr hipêx nê kumê.

² E kê Měpanhípêxã maati Tĩrtũm mẽ Pahihti Jejus Kris wa mẽmoj to mẽ akutã nojarêr rãhã nê ka mẽ axãmnhix ri ajamakêtkati nê ri apa ho apa.

Pawre kot Piripos nhõ xwýnhjê ho Tĩrtũm wýr ã harênh

Epes 1.15-19; Korosẽ 1.9-12

³ Na pa hte xatã mẽ amã ijamaxpêr o ixkrĩ nê mẽ panhõ Tĩrtũm kot tanhmã mẽ ato mex toja pa kãm ijamaxpêr nê ixkĩnh nê ixkrĩ.

⁴ Nê Tĩrtũm mã mẽ ajarênh nê mẽ ato kuwý. Ixkĩnh kãm mẽ ato kuwý.

⁵ Wam ixte mẽ awýr inhmõrta ã na pa pre mẽ amã Jejus kot mẽ panê tanhmã amnhĩ nhípêx to hã harênh o ri mẽ akôt ixpa. Ka prem inhma nê hkôt amnhĩ xunhwýr týt nê hkôt amnhĩ nhípêx o ri apa. Jakamã inhmã axpên kaxyw ri kàxpore hkwý nhõr o apa. Te ham mẽ ate ixwýr mênhta pyrãk pa pre mẽ akukwak ri amnhĩm ho ixujaprõr o ri ixpa pê nhãm ri mẽ kãm Jejus jarênh o ri mẽ hkôt ixpa. Na pa hte arĩ jam ijamaxpêr rãhã ho ixkĩnh nê ixkrĩ. Nê Tĩrtũm mã mẽ ate ixtõ mex ã kãm mẽ ajarênh o ixkrĩ.

⁶ Nê na pa pre ma mẽ awýr mõ nê mẽ amã Jejus jarê ka prem inhma nê hkôt amnhĩ xunhwý nhũm Tĩrtũm ja hã mẽ apumunh mex nê. Hãmri nê mẽ ate hkôt amnhĩ to htýx kaxyw tanhmã mẽ ato mẽ axihtýt to. Tã koja arĩ mẽ ato mẽ axihtýt rãhã nhũm Jejus Kris nhýrmã akupýn mẽ pahwýr wrý. Kõja ã mẽ ato mex anê.

⁷ Na hte tanhmã ixtõ mex tota pyrã nê tanhmã mẽ ato mex to ho pa nê mẽ akutã nojarêr rãhã ho pa.

Nê kormã mẽ kot ijaxàr kêt ri pa pre ma mẽ piitã mẽ kãm Jejus jarênh o ri ixpa. Nê ãm hãmri mẽ kãm harê. Mẽ kot mar nê hkôt amnhĩ xunhwýr týt kaxyw pa pre mẽ hkôt harênh rãhã ho ri ixpa. Ka prem ja kaxyw inhmã kàxpore hkwý gõ pa pre ho amnhĩm ixujaprõr pê mẽ hkôt ri mẽ kãm harênh o ri ixpa. Tã nhũm prem jar Rõm kamã ijaxà pa arĩ ixkrĩ htã ka mẽ axte ixwýr hkwý mẽ. Jakamã na pa hte mẽ amã ijamaxpêr rãhã ho ixkrĩ nê inhmã mẽ akĩnh týt nê.

⁸ Te Jejus Kris kãm mẽ ajapê htýt pyrãk. Tĩrtũm kot ja hã ixpumunh mex.

⁹⁻¹⁰ Na pa hte mẽ ato kuwý nê kãm:

—Pa Tirtūm. E Piripos nhõ xwýnhjê pumu. Na mẽ ra kãm axpẽn kĩnh o axpẽn kõt pa. Kwa tanhmã mẽ hipêx to kê mẽ arĩ kãm axpẽn kĩnh tỳx pix nê. Jao axpẽn to mex rãhã ho pa. Nê tanhmã mẽ hkrã hto kê mẽ amnhĩ krãm akapêr jaxàr tỳx nê. Jao tãm amnhĩ nhĩpêx mex nê hamaxpêr mex o ri pa. Nom kormã mẽ kot ja pumunh tohtuj anhỹr. Tã kêr ka tanhmã mẽ ho kê mẽ ã amnhĩ nhĩpêx anhỹr rãhã Jejus Kris akupýn mẽ ixwýr wrý.

Anhỹr pa hte mẽ ato hwýr o ixpa.

¹¹ Nà koja Jejus Kris mẽ akaxwýnh kãm mẽ ato mẽ axihtỳx ka mẽ ý hã axihtỳx pê tãm ri amnhĩ nhĩpêx nê tãm axpẽn nhĩpêx o ri axpẽn kõt apa. Nhũm mẽ piitã ja hã mẽ apumu nê axpẽn mã Tirtūm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

¹² E Kris kõt ixtõ nê ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tỳx nê hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỹr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nê tanhmã kot mẽ panê amnhĩ nhĩpêx to hã harênh ma.

¹³ Pôristi kot inhĩhkõ hã ixtãnopxar xwýnhjê mẽ ixwýr mẽ mrar xwýnh piitã ixte Kris kapêr jahkre ho ixpa pix ã mẽ kot ijaxàr ã ijarênh ma.

¹⁴ Nê jar Kris kõt mẽ pahtõ nê mẽ pahtõxjaja haxwýja ijarênh ma nê ohtõ nê ixpyrà nê Kris nhỹ hã amnhĩ to htỳx nê arĩ hkwýjê mã kapêr jarênh rãhã ho pa. Ixpyrà nê kãm mẽ uma hkêt nê mẽ kutã amnhĩ to htỳx pê mẽ kãm harênh rãhã ho pa.

¹⁵⁻¹⁸ Nê na pre mẽ hkwýjaja ixte mẽ amã Kris jarênh o ixpa hã ijarênh ma nê hã ixkamã gryk nê axtem hamaxpêr nê ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwýr mõi xwýnhjê hwýr mõi nê kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkõt ixpa. Hãmri nhũm mẽ inhma nê inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nê hkaprĩ nê rĩ amnhĩ pumu. Nà kot paj anê.

Anhỹr o hamaxpêr tã pa mẽ harênh ma nê ixkaprĩ hkêt nê. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nê ixkaprĩ. Kwãr mẽ mãmrĩ ri ixkamã gryk kãm kapêr jarênh o ri pa. Pa mẽ harênh ma nê ixkĩnh nê. Nom na hte mẽ hkwýjaja jajê rom kãm ixkĩnh kãm mẽ kãm Kris kapêr jarênh o pa. Nê tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tirtūm kot jar mẽ hwýr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpêr to xà hkõt mẽ ujarênh mexja jarênh o pa. Mẽ kãm ixkĩnh kãm harê rỳ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nê ixkĩnh nê.

¹⁹ Nê ra mẽ ate ixto Tirtūm wýr o apa jakamã koja Karõja ixkaxyw tanhmã jar Rõm kamã pahiti nhĩpêx to nhũm tokyx ixkator japêr. Pa ixãmnhĩx ijamakêtkati nê ri ma mẽ akõt ixpa.

²⁰ Nom inhmã Jejus kãm hprãm xà hkõt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nê arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nê ixpĩ pa mẽ kutã mẽ kãm amnhĩ to htỳx nê ixãm rãhã nhũm mẽ ixpĩ pa ijamakêtkati nê ty. Kê mẽ ja hã ixpumu nê ixtã Kris mex o mex ã harê. ãm Jejus kãm hprãm xà hkõt pix mã na inhmã amnhĩ nhĩpêx prãm.

²¹ Tã kot paj tanhmã amnhĩ to nê arĩ ixtĩr japêr hã kot paj ãm kõt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nê hã

ixpī pa ty nhūm Tirtūm ma kaxkwa hwȳr ixkarō ho àpir kurê kumrêx. Pa Tirtūm mẽ Krata wa kuri inhmex o inhmex nê wa kuri ixpa ho ixpa.

²²⁻²³ Tã nhỹ na we inhmã mex o hō jakrenh wehe? Na pa tee ri amnhĩ kukamã ijamaxpêr. Inhmã tokyx ixyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mãânên inhmã mex.

²⁴ No mẽ amã na arĩ ixtĩr nê ixpaja mẽ amã hprãm

²⁵ jakamã kot paj pêr tokyx ixyk kêt nê. Kot paj arĩ ri mẽ amã Kris kôt mẽ ato mẽ axihtȳx o ri mẽ akôt ixpa. Jao ãm ho hkrãnre ka mẽ ra amnhĩ kaxyw kãm ajamaxpêr nê hkôt amnhĩ xunhwȳr tȳx nê. Jao akĩnh nê apa.

²⁶ Tã kot paj nhỹrmã akupȳm ixtĩr rãhã mẽ awȳr mō ka mẽ ixpumu nê akĩnh nê. Jejus Kris kot akupȳm ixkator ã akĩnh nê. Hãmri nê ixtã Jejus mã mex o mex ã harê.

Mẽ pahte Jejus ã pahpunuj tã mẽ pahte amnhĩ to htȳx ã mẽ pamã karō

Rukre 6.22; Sikũn Korĩt 2.14-16; Xiakre 1.12; Jutre 3

²⁷ Jakamã e kêr ka mẽ Jejus Kris kapêr kôt pix mã amnhĩ nhĩpêx. Nê axpên kôt axpên to axihtȳx pê mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwȳr. E kêr ka mẽ ã amnhĩ nhĩpêx anhȳr o ri apa. Kêr pa nhỹrmã mẽ hagiênh xàja rùm ixkator japêr nê nhỹri ja hã mẽ ajarênh ma rȳ ma mẽ anhō krĩ hwȳr mō nê ja hã mẽ apumu nê ixkĩnh nê.

²⁸ Nom kwa kêr ka mẽ amã mẽ kot Kris ã tanhmã mẽ ato xwȳnhjê puma hkêt nê. Mẽ kot tanhmã mẽ anhĩpêx kati hto htã kêr ka mẽ kutã amnhĩ to htȳx nê mẽ hkôt apa. Kêr kê mẽ amnhĩ tã mẽ apumu nê tee ri hamaxpêr hãmri nê axpên mã:

—Kwa mẽ pahte Kris ã tanhmã mẽ hipêx to htã na htem amnhĩ to htȳx nê arĩ mẽ pamã harênh o ri pa. Pêr

mẽ kãm mẽ pahpuma hkêt. Mãn hte Tirtūm tanhmã mẽ ho nhūm mẽ ỹ hã kãm mẽ pahpuma hkêt nã? Kwa tanhmã kot puj mẽ ho nhūm mẽ Jejus kapêr jarênh o pata kaga? Nã kot puj mẽ ãm tee ri hã tanhmã mẽ ho kaprȳ. Mãn ãm hãmri na htem nhỹrmã Tirtūm kuri htĩr tũm nê pa ho pa hã amnhĩ jarênh o pa nã? Anê.

Koja mẽ ã mẽ ajarênh anê. Tirtūm kot mẽ ato mẽ axihtȳx ã mẽ apumunh kôt.

²⁹ Na pre tanhmã mẽ ato ka mẽ Kris kôt amnhĩ xunhwȳ. Tã mẽ kot tanhmã hã mẽ anhĩpêx to htã na hte Tirtūm mẽ kutã tanhmã mẽ ato ka mẽ ỹ hã amnhĩ to htȳx nê apa.

³⁰ Ijaxwȳja na pa hte amnhĩ xà htȳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nê hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htȳx kãm ijamak o ixkrĩ ka mẽ ijarênh ma. Tã xep mẽ ixpyrà nê Kris ã amnhĩ xà htȳx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê.

2

Jejus kãm mẽ pajapê xàj tanhmã kot amnhĩ nhĩpêx to hã harênh

Rômãn 15.5-6; Epes 4.1-6; Piripos 2.18

¹ Nê ra mẽ pahte Jejus kôt amnhĩ xunhwȳr jakamã pu mẽ tee ri amnhĩ kukamã pajamaxpêr o pahkaprĩ nê ri papa hkêt nê. ãm kãm mẽ pajapêja mã pajamaxpêr rãhã ho pahkĩnh nê pajamakêtkati nê ri papa. Nhūm Karō mẽ pahkarō mã agjê nê mẽ pahto mex nê mẽmoj to mẽ pakutã nojarêt o ri mẽ pakamã pa.

² Tã kêr ka mẽ axpên mar mex nê mẽmoj tã axpên mã axàkjêr o ri apa hkêt nê. Te ri ixkre pixi kamã mẽ atipxi nê axpên kôt amnhĩ nhĩpêx pyræk. Nê Tirtūm kãm hprãm xà hkôt pix mã ajamaxpêr o ri apa. Nê mẽ amã axpên kĩnh o ri apa. Kot kaj mẽ ã amnhĩ nhĩpêx anê pa ja hã mẽ apumu

rỳ hã mẽ ajarēnh ma nẽ ixkĩnh tỳx kumrēx.

³ Nẽ kwa kêr ka mẽ axpẽn pumu nẽ ã ajamaxpēr anhỹr kêt nẽ. Mẽ ajamaxpēr o:

–Tk. Kot pa ri tanhmã jahti ho ajuta hto ho ixpa hkêt nẽ. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhỹr o ajamaxpēr kêt nẽ. Kêt nhỹri mēhõ pumu nhũm tanhmã kute ka hã omu nẽ ajamaxpēr o:

–Hêxta waa nẽ. Kwa tanhmã kot pa we ho ajuta htoo?

Anhỹr o ajamaxpēr hãmri nẽ ajamaxpēr xà hkôt tanhmã ho ajuta hto.

⁴ Jao Jesus pyrà nẽ mẽmoj to axpẽn kutã anojarêt o ri apa. No ri amnhĩ pix kukamã ajamaxpēr o apa hkêt nẽ.

⁵ Kêr pu mẽ te Jesus tanhmã hamaxpēr toja pyràk o pajamaxpēr o ri papa.

⁶ Kêp Tĩrtũm Kra kumrēx jakamã te uràk tã xà na pre ja hã amnhĩ pumu nẽ amnhĩ pix kukamã ã hamaxpēr anẽ nẽ hamaxpēr o:

Te ixte Tĩrtũm pyràk jakamã mẽmoj piitã inhõ na. Jakamã kot paj jar kaxkwa kamã inhmex nẽ ixkĩnh nẽ ixpa ho ixpa nẽ aa rer nẽ nhỹhỹm inhmõr kêt kumrēx. Anhỹr o na pre hamaxpēr? Nà na pre ã hamaxpēr anhỹr kêt nẽ.

⁷⁻⁸ Kãm mẽ pajapê xàj na pre kaxkwa kamã mẽmoj mex piitã rer pa nẽ man mẽ pahwỳr wrỳ nẽ mẽ pahpyrà nẽ ì ho katorxà nhõhy rũm kato.

Kêp mẽ panhõ Pahihti htã te kêp mẽ panhõ nẽ te kot amnhĩ to grire pyràk o amnhĩ nhĩpêx o ri pa.

Nẽ Tĩrtũm kãm hprãm xà hkôt pix mã amnhĩ nhĩpêx o pa.

Nẽ ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mẽ kãm xa nẽ tanhmã amnhĩ tã mēhõ hto hkêt nẽ.

Na prem hipêx kati nẽ. Te kêp mẽ kot amnhĩ tomnuj tỳx xwỳnhjê

nhĩpêx pyràk o hipêx nẽ pĩ kahpa hã kunhõ nẽ kupĩ.

Tã no nhũm mẽ kêp tanhmã amnhĩmnuj to hkêt nẽ arĩ mẽ kãm xa. Mẽ panê na pre ã amnhĩ nhĩpêx anẽ.

⁹ Hãmri nhũm Tĩrtũm ã kot amnhĩ nhĩpêx anhỹr ã omu nẽ akupỹm ho htĩr nẽ akupỹm amnhĩ wỳr ho api.

Nẽ mex o mex ã harẽ.

Nẽ kot nhỹrmã mẽ pahpiitã mẽ pahto amnhĩptàr kaxyw mẽ pakaxyw ãm.

¹⁰ Jakamã kot puj mẽ nhỹrmã pahpiitã Jesus kutã pahkõnkrã ho rôrôk nẽ pahkrĩ hpa nẽ kàx pêê kãm mex o mex ã harẽ.

Mẽ pahpiitã. Kaxkwa kamã mẽ pa xwỳnhjaja nẽ pika piitã hkôt mẽ papa xwỳnhjaja.

Nẽ mẽ htyk xwỳnh piitã koja mẽ akupỹn htĩr pu mẽ pahpimràatã Jesus kutã pahkõnkrã ho parôrôk nẽ pahkrĩ hpa nẽ kãm mex o mex ã harẽ.

¹¹ Nẽ kãm:

Pa Pahihti Jesus. Nà ãm hãmri na apê mẽ inhõ Pahi Maati hã apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt nẽ. Anẽ.

Kot puj mẽ nhỹrmã ã Jesus mã pakapēr anẽ.

Jao mãânēn Tĩrtũm hihtỳx o hihtỳx nẽ àhpumunh o àhpumunh ã omu. Nẽ mex o mex ã omu.

Te mẽ pahpê kanhêti pyràk ã mẽ pajarēnh

Matêwre 5.14-16

¹²⁻¹³ Tã kwa ixkràmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kôt amnhĩ nhĩpêx mex rãhã nẽ. Te ixte mẽ akamã ixpare ri mẽ ate amnhĩ nhĩpêx mexta pyràk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê nẽ tanhmã mẽ pahto pu mẽ ý hã kapēr kôt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt nẽ. Nẽ mẽ pahte Tĩrtũm

kapër kwým ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nê kêr ka mē mēmoj to anhỹr kaxyw nê agryk kãm tanhmã ri ho hkêt nê. Nê mēmoj tã axapênh kaxyw nê ri hã axpên mã akapêr kati kamã ho anhỹr kêt nê.

¹⁵⁻¹⁶ Mē kot amnhĩ tomnuj xwýnhjaja na htem ã amnhĩ nhĩpêx anhỹr o pa. No kêt mē kajaja. Mē ate mē hkôt apa htã kêr ka mē hkôt amnhĩ nhĩpêx kêt nê. Mē kurom mē apê Tĩrtũm kra jakamã kêr ka mē hkôt pix mã amnhĩ nhĩpêx o ri apa. Nê tanhmã amnhĩ tomnuj to rý tanhmã ajamaxpêr punuj to hkêt nê. Mē kot amnhĩ tomnuj xwýnhjaja te ri kamãt kô kamã ri mē kêp àhkĩnh o ri mē pa xwýnhjê kot amnhĩ nhĩpêx pyrãk. Tã kot kaj mē hkôt tãm ri amnhĩ nhĩpêx o apa nê te ate kanhêtija kamãt kô kamã hirã ho harir pyrãk o amnhĩ nhĩpêx. Jao mē kãm Tĩrtũm kapêr jarênh o ri mē hkôt apa. Mē kot amar nê apyrã nê nhỹrmã kuri htĩr tũm nê pa ho pa kaxyw. Kot kaj mē ã amnhĩ nhĩpêx anê nhũm nhỹrmã Jejus Kris akupỹn mē pahwýr wrýk ã arĩgrota ã pa mē apumu nê ixkĩnh nê. Nê ixkĩnh kãm Jejus mã mē ajarê nê kãm mē ajarênh o:

—Kwa Pahihti. E jajê pumu. Na pa pre mē kãm akapêr jarênh o ri mē hkôt ixpa nhũm mē inhmar tỳx nê nê akapêr kôt amnhĩ nhĩpêx o ri pa. Jakamã na pa pre mē kãm akapêr jarênh kaprý hkêt nê.

Anhỹr o kãm mē ajarê.

¹⁷ Na pa pre mē akôt mē amã Tĩrtũm kapêr jarênh o ri ixpa ka prem inhma nê hkôt amnhĩ xunhwý. Jakamã te ixte Tĩrtũm mã mē ato ixkĩnh xà nê kãm mē anhõr pyrãk.

Nê koja jar Rõm nhõ pahihtija tanhmã ixto hkêt japêr. Rý tanhmã ixto. Nom kwãr mē mãmri tanhmã kãm ixto hprãm xà hkôt tanhmã ixto rý ixpĩ. Koja mē ã ixte mē anhĩpêx anhỹr ã ixpĩ pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mē kot inhĩpêx anhỹrja

kukamã mē amã amnhĩ kĩnh ã amnhĩ jarê ka mē inhma.

¹⁸ Tã kêr ka mē ixpyrà nê ajaxwýja ixtã akĩnh nê apa.

Ximotre mē Eparoxit wa harênh

¹⁹ Nê koja Pahihti Jejus kãm ja prãm hã kot paj ma mē awýr Ximotre mē nhũm ma mē awýr mō nê ri mē akôt pa nê tanhmã mē ate amnhĩ nhĩpêx to hã mē apumu. Hãmri nê man akupỹn ixwýr mō nê inhmã mē ajarê pa mē ajarênh ma nê ixkĩnh nê tee ri mē akukamã ijamaxpêr o ixkrĩ hkêt nê. ãm tãm mē akukamã ijamaxpêr o ixkrĩ.

²⁰ Ximotre tapxipix na ixpyrà nê kãm mē akĩnh nê kãm mē ato ajuta hprãm. Na hte mē ajarênh rãhã ho pa.

²¹ Nom jar mē piitã Ximotre kĩnhã amnhĩ mex pix kukamã hamaxpêr o pa nê kãm Jejus Kris kôt tanhmã amnhĩ nhĩpêx to ho pa hprãm kêt nê.

²² Ximotre te kêp ixkra pyrãk. Na hte ixkôt pa nê ixpyrà nê Jejus mã tanhmã amnhĩ nhĩpêx mex to ho pa. Pa pre wa ijamê mē kãm mē ujarênh mex jarênh o wa ri mē hkôt ixpa.

²³ Tã koja mē tanhmã ixtã axpên mar to. Apu mē kot ixpĩr ã amnhĩ jarê rý ixkator ã amnhĩ jarê. Pa tanhmã amnhĩ tã mē mar to nê rĩ kormã ma mē awýr Ximotre mē kê ma mē awýr mō nê mē amã tanhmã ijarênh to.

²⁴ Nê koja Pahihti Jejus kãm ja mex pa ijaxwýja ma mē awýr mō pu mē axte axpên pumu.

²⁵ Nê kot paj tokyx ma akupỹm mē awýr Kris kôt mē pahtõ Eparoxit mē. Na ka prem kãm kãxpore gõ nhũm man ixwýr o mō nê inhmã kugõ. Hãmri nê jar inhmã apênh rax nê ixpyrà nê mē ujarênh mexja jarênh o pa.

²⁶⁻²⁷ Tã ra à htỳx nê. Kironhỹx pre mē pahpê ty. Tã nhũm Tĩrtũm omu nê kamã ukapri nê. Nê mããnên pa ixkamã ukapri nê. Nê tee ri ixte à htỳx ã omunh nê ixkapri htỳx pymaj akupỹm inhmã ho mex nhũm ra akupỹm mex nê ri pa. Hãmri nê kãm mē apumunh prãm nê. Mē ate à htỳx ã harênh mar nê akapri hã mē

ajarēnh ma nē tee ri mē akukamā hamaxpēr.

²⁸ Jakamā inhmā akupŷm tokyx mē awŷr mēnh prām. Tā koja mēmo arīgro hā mē awŷr pōj ka mē omu nē akīnh nē tām ajamaxpēr. Pa ijaxwŷja jar ixkīnh nē tām ijamaxpēr.

²⁹⁻³⁰ Na ka prem ixwŷr amē nhūm man ixwŷr mō nē jar ixri mē kām Kris kapēr jarēnh o ri mē hkôt pa rāhā nhŷx hā ty nom kot amnhī kamā kahak kêt. Jakamā kê akupŷm mē awŷr pōj ka mē omu nē akīnh nē. Nē kahti hkôt amŷ nē ho mex nē. Kêp Kris kôt mē pahtō mex kēnā. Ā na htem Kris mā mē kot tanhmā amnhī nhīpêx to ho mē pa xwŷnhjê nhīpêx mex anhŷr o pa.

3

Mēmoj tā mē pahpumunh kôt Tirtūm kot tām mē paxunhwŷr ā harēnh Piripos 2.18, 4.4

¹ E Kris kôt ixtō nē ixtōxjaja. Kris kêp mē panhō Pahшти jakamā kwa mē jam ajamaxpēr nē akīnh rāhā ho ri apa.

Na pa ra mē amā mēmoj jarēnh rax nē. Nē hā kagà rax tā kormā inhmā ja ho anhŷr kaga hkêt nē. Kot paj axte mē amā hkwy hā kagà. Mē ate hā ano htŷx nē ho apa kaxyw.

² Jakamā e kwa mē okora. Kêr ka mē amnhī nē mē kot Tirtūm kapēr o hêx xwŷnhjê pumunh mex o ri apa. Na htem tanhmā mē amā kapēr ho pa nē mē amā:

–Kot kaj mē ixpê Ijaewjê pyrà nē amnhī my kwrŷt kà jakà hāmri nē apê Tirtūm kra. Anē.

³ Nom ja kot anhŷr kêt. Mē pahte amnhī jakàr kôt mē pahpê Tirtūm kra hkêt. Ā kot anhŷr ronhŷx pu mē amnhī krā hkôt tanhmā amnhī nhīpêx to ho pahpê hkra. Nom ja kot anhŷr kêt. Mē ate amnhī jakàr kêt tā mē ixpyrà nē amnhī kaxyw Jejus Kris mā ajamaxpēr jakamā mē ixpyrà nē mē apê Tirtūm kra na ka mē. Na ka htem mē ixpyrà nē Karō nhŷ hā kām mex o mex ā harēnh o ri apa nē mē ixpyrà nē Jejus kukwak ri akīnh nē

ri apa. Nom na pu htem pahpê hkra kaxyw amnhī jakàr kêt nē.

⁴ Kop ām amnhī krā hkôt mē pahte amnhī to Tirtūm kra ronhŷx pa ra amnepêem amnhī to hkra nē ri ixpa. Na pa pre ixpê hkra hprām xāj amnhī krā hkôt tanhmā ri amnhī nhīpêx to rax o ixpa nom ā amnhī nhīpêx anhŷr kaprŷ. E pa ja hā mē amā amnhī jarē ka mē ijarēnh ma.

⁵ Na pa pre ixkato nē kormā ixtā semān pixire nhūm mē ixpê Ijaew ā inhmy kwrŷt kà krāhta. Nom pa ā mē kot inhīpêx anhŷr kôt ixpê Tirtūm kra hkêt nē. Nē inhīpêxà hkôt ixpê finat Pējamī kanrēhā htāmnhwŷ jakamā ixpê Ijaew mex na pa. Nē Ijaew kapēr o ixkapēr o ri ixpa. Nom ja kôt ixpê Tirtūm kra hkêt. Nē määnēn ixpê Parijew nhō xwŷnh jakamā na pa pre Tirtūm kot finat Mojes mā mē pakaxyw mēmoj tā karō kôt pix mā amnhī nhīpêx o ixpa hprām.

⁶ Jao tee ri mē kot Jejus kôt amnhī nhīpêx xwŷnhjê pumu nē mē homnuj tŷx o ri ixpa. Na pa pre ijamaxpēr o: “Nà mŷjjaja na htem mē ixkwŷm ri amnhī nhīpêx o pa.” Anē nē mē hipêx kati ho ri ixpa. Nē ijamaxpēr o: “Ra ixte finat Mojes kot Tirtūm nhŷ hā kapēr piitā hkôt amnhī nhīpêx mex jakamā na pa hte tanhmā ri amnhī tomnuj to ho ri ixpa hkêt nē.” Anē.

⁷ ā na pa pre ixpê Tirtūm kra hprām xāj amnhī nhīpêx anhŷr o ixpa. Tā nom ām ā amnhī nhīpêx anhŷr hkaprŷ. Na htem ā ri amnhī nhīpêx anhŷr kôt kêp Tirtūm kra hkêt nē. Tā pa hpānhā amnhī kaxyw Kris kôt ijamaxpēr nhūm ixto hkra kurê kumrêx.

⁸ Ra ixte Jejus Kris kôt amnhī xām jakamā Jejus kêp inhō Pahшти pa inhmā kapēr kôt pix mā amnhī nhīpêx o ri prām. No hkrax rūm ixte amnhī nhīpêx tūmja na pa ra Jejus gryk ā hkaga hpa. Te ixte mēmoj punuj pyr nē amnhī katut kôt mēnh nē axte kām ijamaxpēr kêt pyrāk. Jao amnhī kaxyw Jejus kôt pix mā ijamaxpēr o ri ixpa.

⁹ Nom kormã ã ijamaxpêr anhÿr kêt ri na pa pre ixtÿx ri ijamaxpêr o:

–Nà ixte Mojes kot Tÿrtÿm nhÿ hã kapêr kôt amnhÿ nhÿpêx o ixpa jakamã koja Tÿrtÿm ja hã ixpumu nê ixto hkra.

Anhÿr tã nom ja kot anhÿr kêt. Na htem amnhÿ krã hkôt tanhmã ri amnhÿ nhÿpêx to ho pa nhÿm Tÿrtÿm ãm ja hã mē omu nē ãm hã mē omu nē mē ho hkra hkêt nē. Nom koja mē Kris kôt amnhÿ xunhwÿ nhÿm ja hã mē omu nē mē ho hkra kurê kumrêx. Jakamã ixte Kris kôt amnhÿ xãm ã ixpumunh kôt pix mã na pre ixto hkra nē inhmex ã ijarê.

¹⁰ Hãmri pa ra inhmã Kris kôt pix mã amnhÿ nhÿpêx o ri ixpa hprãm. Na pre ty tã akupÿm htÿr nê hihtÿx nê ãhpumunh tÿx o tanhmã amnhÿ nhÿpêx to ho pa. Tã ijaxwÿja inhmã uràn ã amnhÿ nhÿpêx anhÿr prãm. Nê inhmã urak nê amnhÿ xà htÿx kutã amnhÿ to htÿx nê ixpa hprãm. Mē kot hã ixpÿr mã tã pa urak nê Tÿrtÿm kapêr kaga hkêt nê ãm kôt pix mã amnhÿ nhÿpêx o ri ixpa rãhã urak nê hã ty. Ja na inhmã ho anhÿr prãm.

¹¹ Kê Tÿrtÿm kot hipêxta pyrã nê akupÿm ixto ixtÿr pa wa kuri ixtÿr tÿm nê ixpa ho ixpa.

¹² Inhmã Kris kôt pix mã amnhÿ nhÿpêx o ixpa hprãm tÿx kumrêx. Kormã ixte hkôt amnhÿ nhÿpêx o inhmôr nê kormã hatur xãm mēnh kêt tã inhmã tokyx hatur xãm mēnh prãm. Na pa ã inhmã amnhÿ nhÿpêx anhÿr prãm tÿx kumrêx.

Nê na pa hte ixte amnhÿ tomnuj kêt ã amnhÿ to jarkrar o ri ixpa hkêt nê. Na pa hte arÿ tōhã tanhmã amnhÿ tomnuj to nom inhmã ã amnhÿ nhÿpêx anhÿr prãm kêt. Nê na pa kormã ixprÿ hã Kris kot amnhÿ nhÿpêx mar o inhmôr nê hatur xãm mēnh kêt tã inhmã hkôt amnhÿ nhÿpêx o inhmôr nê tokyx hatur xãm mēnh prãm. Ja kaxyw na pre Jejus Kris amnhÿ kaxyw ixta.

¹³ Na pa hte mē akurom papxpix ixte Jejus kãm hprãm xà hkôt amnhÿ nhÿpêx o ixpa hã amnhÿ to jarkrar

kêt nê. Nom ra ixte tanhmã amnhÿ tomnuj to ho ixpata pa axte kãm ijamaxpêr kêt nê. Te amnhÿ katut kôt ixte rēnh par pyrak o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhÿ nhÿpêx prãm xàj amnhÿ kaxyw kãm ijamaxpêr o ri ixpa.

¹⁴ Koja nhÿrmã Tÿrtÿm ixpê Kris kwÿ hã amnhÿ wÿr ixwÿ nê inhmã:

–E amnê ixwÿr api Pawre. Kot kaj jarãhã amnê mē ixwÿr api.

Anhÿr o nhÿrmã inhmã kapêr jakamã na pa hte amnhÿ tã ãm pix jamãr rãhã ho ixpa. Pê ra Jejus kot amnhÿ nhÿpêx piitã omunh par o mō. Nà kot paj gaa nê hkôt pix mã amnhÿ nhÿpêx mex o ri ixpa.

¹⁵ Kwa kêr pu mē pahpiitã ã pajamaxpêr anê. Jao amnhÿ wÿr hamãr pê hkôt pix mã amnhÿ nhÿpêx o ri papa. Mē pahpiitã mē pahpê Kris kwÿ kēnã. Nom kot ka mē atō ja kaxyw tee ri amnhÿ kukamã ajamaxpêr nê ajamaxpêr o:

–Nà tanhmã kot paj we amnhÿ to nê Jejus kôt amnhÿ nhÿpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri nê ã ajamaxpêr anhÿr o apaja apê hihtÿx japêr. Hã koja Tÿrtÿm hprÿ hã tanhmã amã ja kukamã harēnh to nê kaxyw ato axihtÿx ka ixpyrà nê hkôt pix mã ri amnhÿ nhÿpêx o apa.

¹⁶ Jakamã kêr pu mē ãm Tÿrtÿm kãm hprãm xà hkôt pix mã tanhmã kãm amnhÿ nhÿpêx to ho papa. Ra mē pahte hkôt amnhÿ nhÿpêx o papa xàja kôt pix mã arÿ amnhÿ nhÿpêx rãhã ho papa.

¹⁷ E Kris kôt ixtō nê ixtōxjaja. Na pa ra mē anoo mã Jejus kôt tãm ri amnhÿ nhÿpêx o ri ixpa. Tã kêr ka mē ja hã ixpumu nê ixpyrà nê hkôt amnhÿ nhÿpêx o ri apa. Hãmri nê nhÿri mē kot ixpyrà nê ã amnhÿ nhÿpêx anhÿr xwÿnhjê hō pumu nê urak nê ã amnhÿ nhÿpêx anê.

¹⁸⁻¹⁹ Jejus kot mē pamã mē pahte amnhÿ tomnuj mÿrapê pÿ kahpa hã mē panê htykja nhÿm mē ra ohtō nê

hprĩ hã mar tã hkôt amnhĩ xunhwÿr kêt nê. Mẽ kãm ã kot amnhĩ nhĩpêx anhÿrja ã mar prãm nõkati. Jakamã te mẽ kãm Jejus kurê xwÿnh pyrãk. Na htem hã hpijaãm kêt kãm tanhmã ri amnhĩ tomnuj to ho pa. Nê kãm amnhĩ mex pix prãm. Nê tanhmã amnhĩ tomnuj to nê ja hã amnhĩ pumu nê hkĩnh nê. Nom tee ri ja hã amnhĩ pumu nê hkaprĩ nê ri pa hkêt nê. Tã ã mẽ kot amnhĩ nhĩpêx anhÿr jakamã koja mẽ nhÿrmã ma mẽ kot amnhĩ xà htÿx kamã hamak o pa tũm xàta wÿr hapêx. Nà koja mẽ ã amnhĩ nhĩpêx anê. Ra ixte mẽ amã ja hã mẽ harênh rax tã pa axte mẽ amã mẽ harê. Inhmã mẽ hkaprĩ hkôt na pa hte xatã mẽ amã ja hã mẽ harê.

²⁰ Kêt mẽ papajaja mẽ kurom mẽ pahpê kaxkwa nhõ xwÿnh nom kormã. Koja nhÿrmã Jejus Kris akupÿn mẽ pahwÿr kaxkwa rũm wrÿ. Mẽ papÿtar xwÿnh maati Pahihtija akupÿn wrÿ hãmri nê ma akupÿm amnhĩ kôt mẽ pahto api. Jakamã na pu htem arĩ pahkĩnh pê amnhĩ wÿr kamã pajamak rãhã ho ri papa.

²¹ Na pu htem jar pyka ja kamã Jejus kĩnhã paxirerek nê pahpunuj nê ri papa. Nom koja nhÿrmã akupÿn mẽ pahwÿr wrÿ hãmri nê amnhĩ pyrã nê mẽ pamã mẽ panhĩ nyw gõ pu mẽ urãk nê paxihtÿx kãm pahÿr tũm nê papa ho papa. ã kot mẽ panhĩpêx anhÿr kaxyw àhpumunh o àhpumunh. Tã koja àhpumunh tÿx kãm mẽmoj piitã ho amnhĩptar pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ nê ixtõxjaja. Inhmã mẽ ajapêê. Na pa hte mẽ ato ijamak o ixkrĩ nê mẽ amã ijamaxpêr nê ixkĩnh nê. Nê jar mẽ pahkwÿjê mã mẽ ajarênh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nê wa ka Ewox mẽ Sïxika wa. Na ka xep hte wa mẽmoj tã axpên kamã

agryk rãhã ho ri apa. Kwa wa ã amnhĩ nhĩpêx anhÿrja mã anhÿre nê tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nê mẽmoj tã axpên kamã agryk o ri apa.

³ Nê ka Xikitre. Apê ixkrãmnhwÿ mex jakamã kêr ka axpên tã wa nita wa kãm akapêr kãm axihtÿx nê kê war ama nê akupÿm tãm axpên nhĩpêx. Na pre wa ra Kremên mẽ hkwyjê mẽ hpimràatã ixpyrà nê Jejus kot tanhmã mẽ panê amnhĩ nhĩpêx to hã harênh o ri pa. Tĩrtũm nhõ kagã kamã mẽ hixi piitã hikwÿ. Mẽ pahÿr tũm nê mẽ papa mã xwÿnhjaja ra Tĩrtũm nhõ kagã kamã mẽ panhĩxi jaxwÿr par.

⁴ Nê kêr ka mẽ apê Pahihti hkwy hã akĩnh nê ri apa. Mẽ ate ã amnhĩ nhĩpêx anhÿr o apaja na pa inhmã hprãm tÿx jakamã kot paj axte mẽ amã harê. Kwa kêr ka mẽ akĩnh nê ri axpên kôt apa.

⁵ Pahihti Jejus ra akupÿn mẽ pahwÿr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nê kêr ka mẽ tee ri amnhĩ kukamã ajamxpêr o ri apa hkêt nê. Arĩ amnhĩ to Tĩrtũm wÿr rãhã nê. Kot ka mẽ mẽmo arĩgro hã apê amrakati japêr nê tee ri ja hã amnhĩ pumu nê amnhĩ to awÿ kê mẽ ama nê mẽ amã mẽmoj gõ. Rÿ mẽ ate mẽmoj tã hwÿr xwÿnhnta tanhmã mẽ amã hipêx to ka mẽ amnhĩ tã omu nê kãm:

—Nà ãm hãmri na ka ã inhĩpêx anê nê inhmã ja gõ Tĩrtũm. Amex o amex.

Anhÿr o kãm amnhĩ jarê.

⁷ Kot kaj mẽ ã amnhĩ to hwÿr anhÿr o ri apa nhũm tanhmã mẽ akrã hto ka mẽ mẽ apê Jejus Kris kwÿ hã ajamakêtkati nê axãmnhĩx ri apa. Hãmri nê mẽmoj tã tee ri amnhĩ kukamã ajamxpêr o ri akaprĩ nê apa hkêt nê. ãm akĩnh rãhã ri apa. Tĩrtũm kot tanhmã mẽ pahto nhũm mẽ pajamakêtkati nê ri mẽ papaja mẽ pahte amnhĩ tã omunh kêt. ãm tapxipix kot ã mẽ panhĩpêx anhÿr kukamã àhpumunh tÿx.

8 E Kris kôt ixtō nē ixtōxjaja. Nà ixkapēr ā kagà jatur xà na ja. Kwa kēr ka mē ixujarēnh mar tỳx nē hkôt amnhĩ nhĩpêx o apa.

Nē kēr ka mē axàpēnh mex pix kukamā ri ajamaxpēr o apa.

Nē mēmoj mex pix kukamā ri ajamaxpēr.

Nē axpēn mā akapēr mex pix kukamā ri ajamaxpēr.

Nē akatāt kôt akapēr xàptār pix o axpēn mā akapēr hkukamā ri ajamaxpēr o ri apa.

Nē tām ri amnhĩ nhĩpêx hkukamā mǎn ajamaxpēr o ri apa.

Nē mē piitā ri mē ho mex o apa hkukamā ajamaxpēr.

Nē mē akapēr mex pix kukamā mǎn ajamaxpēr o ri apa.

E kēr ka mē ā amnhĩ nhĩpêx anhỹrja kukamā ajamaxpēr rāhā ho ri apa.

9 Nē mē akôt ixpare ri na pa pre Kris kôt amnhĩ to mex pix nē tām ixkapēr o ri ixpa. Tā kēr ka mē ixpyrà nē ā amnhĩ nhĩpêx anē. Kojā Tĩrtũm ja hā mē apumu nē mē akôt ri pa ho pa. Kēp mē pamā mē paxàmnhĩx pajamakêtkati xà nhõr xwỳnh na.

Mē kot Pawre hwỳr mēmoj mēnh nhũm kot omunh nē hkĩnh ā harēnh Sikkũn Korĩt 11.7-9; Piripos 1.5

10 Nē amnepēm na ka prem xatā tanhmā ixto mex to ho ri apa. Tā axte ā inhĩpêx anhỹr prām nom mē apē awry nē ixpa jakamā ka xep prem tee ri tanhmā ixto mex to hkukamā ajamaxpēr kaprỳ. Tā jar mē kot ijaxàr ā ijarēnh ma nē ixwỳr Eparoxit mē nhũm man ixwỳr mō nē inhmā kàxporeta gō. Mē amā ijapē hā ixwỳr amē pa omu nē ixkĩnh tỳx nē. Nē ixkĩnh kām Tĩrtũm mā mē ajarē. Ām hāmri na ka prem ixwỳr amē.

11-12 Nē na pa hte tanhmā ixkute htā arĩ ixkĩnh nē ijamakêtkati nē ri ixpa. Jakamā kot pa mēmo arĩgro hā ixpē amrakati nē inhmā prām japēr tā no ām tee ri amnhĩ kukamā ijamaxpēr o ri ixkaprĩ hkêt nē. Arĩ ixkĩnh rāhā ixàmnhĩx ri ixpa. Rỳ pa inhõ mēmoj rax japēr nē mǎnēn

ixkĩnh nē ixàmnhĩx ri ixpa. Na pa pre tōhā inhõ rax nē ixpa. Nē tōhā inhõ hkêt nē ixpa. Tā arĩ ixkĩnh rāhā nē ixpa ho ixpa.

13 Na hte Kris mēmoj piitā hkukamā ixto ixihtỳx pa ỳ hā mēmoj kutā ixihtỳx nē ixpa. Jao mēmo arĩgro hā inhmā prām tỳx nē ri ixpa htā ỳ hā kutā ixihtỳx nē ixàmnhĩx ri ixpa.

14 Tā jar ixpunuj nē ixkrĩ ka mē ijarēnh ma nē ixwỳr kàxpore hkwy rē. Ām hāmri na ka prem ixwỳr arē.

15 Amnepēm na pa pre mē anhõ pika pē Masetõn rũm ixkato nē mē piitā mē kām Jejus kot tanhmā mē panē amnhĩ nhĩpêx to hā harēnh o ri ixpa ka mē xatā ixwỳr kàxpore hkwy rē pa ho amnhĩm ixujaprõr o ri mē hkôt ixpa. Mē apē Piripos kamā Kris kôt ixtō nē ixtōx pixjaja na ka prem ā inhĩpêx anē. Krĩ hkwy kamā Kris kôt mē pahkwỳjaja na mē akĩnhā ā inhĩpêx anhỹr kêt nē. Ām mē kapxipix na ka pre ā ixto mex anē.

16 Tesarõn kamā ixpare ri na pa pre ixpē amrakati kumrēx nē ri mē hkôt ixpa ka mē xatā ixwỳr kàxpore hkwy rē pa pre ho amnhĩm ixujaprõr rāhā ho ri mē hkôt ixpa.

17 Nom mē ate ixwỳr hkwy rēnh kaxyw mē akamā ijamak o ri ixpa hkêt nē. Rỳ ijamaxpēr o:

—Ko. Kojā Piripos nhõ xwỳnhjaja ijarēnh ma nē kām ixkaprĩ nē ixwỳr kàxpore hkwy rēnh japēr.

Anhỹr o mē akukamā ijamaxpēr kêt nē. Nom ra mē ate ixwỳr hkwy rēnh jakamā kojā Tĩrtũm ja hā mē apumu nē mē ato mex nē. Ā mē pahte axpēn kutā panojarēt anhỹrja na kām hprām.

18 Tā nhũm Eparoxitja ham mē arũm kato nē man ixwỳr mō nē inhmā kàxporeta gō. Kwa na ka mē inhmā õr rax nē. Kojā tokyx ixpē hapêx kêt pa kritpēm ho ixàpkur o ixkrĩ. Tā ot pa ho kōta nē tanhmā hkre kamā kute pumunh xà hkôt hā kagà nē mē awỳr kumē. Nà mē ate ixwỳr axàmnhõrta na Tĩrtũm omu nē ixtā mē apumu nhũm ja kām mex kumrēx. Te

mẽ kot mẽ hkuxwaxà hpār nhũm mẽ
kãm mexta pyràk nhũm ja kãm mex
nẽ.

¹⁹ Nà koja Tĩrtũm mẽ apê Jejus Kris
kwỳ hã mẽ amã mẽ ate mẽmoj to pre-
sija xà nhõr rãhã ho pa. Mẽmoj piitã
kêp õ kênã.

²⁰ E kêr pu mẽ Mẽpanhĩpêêxà maati
Tĩrtũm mã mex o mex ã harẽnh rãhã o
papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê
Jejus Kris kôt mẽ ixkwỳjê hwỳr kagàja
kamã mẽ ixpêr mẽ. Mẽ ixpyrà nẽ mẽ
apê Tĩrtũm kra hã. Pa nẽ Kris kôt mẽ
pahtõ nẽ mẽ pahtõxjaja. Nẽ Rõm nhõ
pahi mã mẽ àpênh xwỳnh kot Kris kôt
amnhĩ xunhwỳr xwỳnhjaja mããnẽn.
Ãm jar mẽ ixpê Tĩrtũm krajê piitã pa
mẽ awỳr ixpêr mẽ.

²³ E kê Pahĩti Jejus Kris mẽmoj to
mẽ akutã nojarêt rãhã nẽ. Jao mẽ ato
mex o pa.

Tã ãm ja pix. Ixpê Pawre na pa mẽ
awỳr kagàja nhĩpêx nẽ kumẽ.

Korosê Pawre kot Koros kamã Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã hkrajê jahkre o mẽ pa xwÿnhjê hõ na pre. Tã nhũm mẽ kêp Jejus kra hkêk xwÿnh kwÿjaja Jejus ã unê nê haxà nhũm arĩ hkrĩ ho hkrĩ. Hãmri nê krĩ pê Koros kamã Jejus krajê mã kagà nhîpêx nê mẽ hwÿr kumê. Koros kamã Jejus kwÿjê kamã Ijaew kwÿ nê kamã Ijaew kêt xwÿnh kwÿ nhũm Pawre mẽ ho hpimràatã mẽ hwÿr kumê. Kormã mẽ hwÿr mör nê mẽ omunh kêt tãã. Nê kagàja kamã mẽ kot tanhmã Jejus o hêx to ho pa xwÿnhjê jarênh to. Jejus kêp Tirtũm Kra hkêk ã mẽ kot ho hêx xwÿnhjê jarê nê mẽ nê mẽ kãm kapêr. Mẽ kot mẽ hkôt amnhĩ nhîpêx kêt kaxyw mẽ kãm kapêr nê hã kagà nê mẽ hwÿr kumê nê mẽ kãm:

¹ Pa Koros kamã Kris kôt ixkwÿjaja. Xà mẽ amex na ka mẽ apa? Ixpê Pawre na pa mẽ awÿr kagàja nhîpêx nê mẽ awÿr kumê. Kris kôt mẽ pahtõ Ximotre mẽ wa kumê. Ixte Jejus Kris nhÿ hã mẽ ahkre ho mẽ ixpa xwÿnhjê hõ na pa. Tirtũm kãm hprãm xà hkôt.

² Tã pa mẽ awÿr kagà nhîpêx nê kumê. Mẽ apê Kris kôt mẽ ixtõ nê ixtõx na ka mẽ. Na ka xep htem Kris kapêr kôt amnhĩ nhîpêx mex o ri apa. E kê Tirtũm mẽ apê hkra hã mẽ akutã nojarêk rãhã nê. Ka mẽ amex nê ajamakêtkati nê axãmnhix ri tanhmã amnhĩ nhîpêx ho ri apa.

*Koros nhõ xwÿnh kwÿjaja kot Jejus
kôt amnhĩ xunhwÿr ã mẽ harênh*

Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamxpêr tÿx nê hkôt amnhĩ nhîpêx mex o apa hã mẽ ajarênhja ma. Nê mẽ kot Tirtũm kôt amnhĩ xunhwÿr xwÿnh piitã mẽ amã mẽ hkĩnh ã mẽ ho mex o apa

hã mẽ ajarênhja ma nê wa ixkĩnh nê. Jakamã na pa wa Pahihti Jejus Nhîpêxà Tirtũm mã amnhĩ jarênh kaxyw nê kãm mẽ anhy hã wa ixkĩnh ã amnhĩ jarê.

⁵ Na pre Epas ma mẽ awÿr mō nê mẽ amã Jejus kot tanhmã mẽ panê amnhĩ nhîpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nê amnhĩ kaxyw hkôt ajamxpêr nê hkôt amnhĩ xunhwÿ. Hãmri nê amnhĩ wÿr Jejus jamãr o ri apa. Koja nhÿrmã akupÿn mẽ pahwÿr wrÿ nê amnhĩ pyrà nê ma akupÿm kaxkwa hwÿr mẽ pahto api nê mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamxpêr tÿx nê ã kot amnhĩ nhîpêx anhyr kutêp amnhĩ wÿr kamã ajamak rãhã nê. Nê mẽ amã mẽ kot Tirtũm kôt amnhĩ xunhwÿr xwÿnhjê hkĩnh tÿx nê.

⁶ Na hte Tirtũm ãm hãmri mẽ pahto mex pix rãhã ho pa. Nê mẽmoj to mẽ pakutã nojarêk rãhã nê. Tã wam mẽ ate harênh marta ã ka mẽ hkôt amnhĩ xunhwÿr kurê kumrêx nê ri kapêr kôt axpên kôt amnhĩ nhîpêx mex pix o ri apa. Jao hkôt pix mã amnhĩ nhîpêx mex nê. Tã na hte pika piitã hkôt ri mẽ pa xwÿnh kwÿjaja mẽ apyrã nê Jejus jarênh ma nê hkôt amnhĩ xunhwÿ. Nê mẽ apyrã nê axtem hkôt pix mã amnhĩ nhîpêx nê kapêr kôt amnhĩ nhîpêx mex o ri pa.

⁷ Nê mẽ awÿr mörta ã na pre Epasja mẽ amã Tirtũm kapêr jarênh o ri mẽ akôt pa ka prem ama nê amnhĩ kaxyw hkôt ajamxpêr nê hkôt amnhĩ xunhwÿ. Epasja wa ixpyrà nê kot Kris mã tanhmã amnhĩ nhîpêx to ho pa xwÿnh. Nê wa inhmã hapêê. Na pre katat kôt mẽ amã Tirtũm kapêr jarênh pa. Kot mẽmoj to mẽ pakutã nojarêk rãhã hã harênh o ri mẽ akôt pa.

⁸ Tã man akupÿn wa ixwÿr mōn pōj nê wa inhmã tanhmã mẽ ajarênh to. Tirtũm Karõ nhÿ hã mẽ amã Kris kôt atõ nê atõx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tÿx kumrêx.

Pawre mē Ximotre wa kot Koros kām hkwÿjê ho Tirtūm wÿr ā wa harēnh Epes 1.15-23, 3.14-21; Piripos 1.9; Wam Tesarōn 5.23-24; Sikūn Tesarōn 1.11, 2.16

⁹ Nē na pre Epas akupÿn wa ixwÿr pōj nē wa inhmā tanhmā mē ajarēnh to. Mē ate amnhī kaxyw Jejus kōt ajamaxpēr o apa nē mē amā Kris kōt akwÿjê piitā mē hkīnh o ri apaja nhūm wa inhmā mē ajarē. Pa wa mē ajarēnh ma nē mē ato Tirtūm wÿr rāhā o jar mē hagiēnh xā kamā ixkrī. Nē arī mē ato hwÿr rāhā ho ixkrī. Nē mē ato hwÿr o:

–Pa Tirtūm. Ot pa Ximotre mē wa Korosē nhō xwÿnhjê ho awÿr kaxyw amā mē harē. Kwa tanhmā mē hamaxpēr to kê mē amā hprām xā hkōt pix mā amā tanhmā amnhī nhīpêx to ho pa. Nē Akarō nhÿ hā hprī hā akapēr ma nē am hkōt pix mā tanhmā amnhī nhīpêx to ho pa. Anē.

¹⁰ Na pa hte wa ā mē ato Tirtūm wÿr anhÿr rāhā ho ixkrī. Kot kaj mē ā amnhī nhīpêx anhÿr o ri apa nē Jejus kot amnhī nhīpêx o amnhī nhīpêx mex o ri apa. Nē aprī hā Tirtūm kot amnhī nhīpêx ā omunh mex o mō. Jao mēmoj to axpēn kutā anojarēt pix o ri apa hprām. Hāmri nhūm Tirtūm ja hā mē apumu nē hkīnh nē.

¹¹ Tirtūmja mē pakurom mēmoj piitā kaxyw āhpumunh o āhpumunh. Nē mēmoj piitā kaxyw hihtÿx o hihtÿx. Jakamā na pa hte wa mē ato hwÿr o:

–Pa Tirtūm. Kwa tanhmā Koros nhō xwÿnhjê ho kê mē axihtÿx nhÿ hā mēmoj punuj kutā amnhī to htÿx nē. Mē kot Jejus ā tanhmā mē ho nhūm mē kot amnhī xā kamā hamak tā kê mē tee ri amnhī kukamā hamaxpēr o hkaprī nē ri pa hkēt nē. Am anhÿ hā mē hkurê xwÿnhjê kutā amnhī to htÿx nē hkīnh kām ri pa ho pa. Anē.

Na pa hte wa ā mē ato hwÿr anē.

¹² Na pre ra Tirtūm amnhī ri mē pakutêp mēmoj mex kwÿ jaxwÿ. Mē pahpê hkrajê mā haxwÿ. Tā ka mē ŷ hā tām amnhī nhīpêx o apa jao mē ate mēmoj mex jamÿnh mā tām. Ō krī nhīrā rax kumrêx kamā. Jakamā

kwa mē kot Jejus ā tanhmā mē pahto htā kêr pu mē arī Tirtūm mā mex o mex ā harēnh rāhā ho ri papa.

¹³ Nē Satanasti kêp kamāt kō kamā mē kot amnhī tomnuj ho mē pa xwÿnhjê pām. Tām na hte mē ho amnhīptār o pa nē hkōt na pu prem amnhī nhīpêx o papa rāhā nhūm Tirtūm tee ri ja hā mē pahpumu. Hāmri nē kām kêp mē papytār prām xāj mē pahwÿr Kra japê htÿx kumrêx xwÿnhja mē. Nhūm mē pahwÿr wrÿ nē mē panê htyk o mē pahte amnhī tomnuj pānhā kām amnhīre. Tā pu prem hkōt amnhī xunhwÿ nhūm Tirtūm hā mē pahpumu nē mē panê mē pahte amnhī tomnuj o hapêx pa. Te kot amnhī katut kōt rēnh par pyrāk. Jao Satanasti pê mē pahpytā nhūm hpānhā Jejusja tām kêp mē pahto amnhīptār o pa xwÿnh.

¹⁴ Ra htyk o mē pahte amnhī tomnuj piitā hpānhā amnhīrer jakamā na pu htem hkōt amnhī xunhwÿ nhūm mē pahte amnhī tomnuj o hapêx pu mē axte Satanasti hkōt ri amnhī nhīpêx kêt nē. Am Jejus kōt pix mā amnhī nhīpêx o ri papa.

Kris mē Tirtūm wa kot amnhī nhīpêx te wa kot axpēn pyrāk ā harēnh

Juāw 1.1-5; Korosê 2.9; Eprêw 1.1-14

¹⁵ Nē Krisja te kot Tirtūm pyrāk. Mē pahte pano ho Tirtūm pumunh kêt tā Kra Kris kot amnhī nhīpêx ā harēnh mar kōt määnēn Tirtūm kot amnhī nhīpêx ā omunh mex nē. Amnepê mā kormā mēmoj kêt ri nhūm Jejus pa ho pa rāhā nē. Jakamā kot amnhī to rax o Tirtūm kot mēmoj to katorja piitā hakrenh par kumrêx.

¹⁶ Na pre hipêêxā Tirtūm nhÿ hā mēmoj piitā ho kator pa. Kaxkwa kamā nē pika hkōt mēmoj piitā ho kator pa. Nē kaxkwa kamā mē pahte pano ho mēmoj pumunh par xwÿnhjaja nhūm pre ho kato. Nē kamā mē pahte pano ho mēmoj pumunh kêt xwÿnhjaja nhūm pre määnēn ho kato. Nē kapēr o wrÿk xwÿnhjaja nē mē hkrāhtūmjaja nhūm

pre mẽ ho kato. Nê pika kamã mẽ ho amnhĩptàr xwỳnhjaja nhũm pre mẽ piitã mẽ ho kator pa. Kãm hprãm xà hkôt Tĩrtũm nhỹ hã mẽmoj piitã ho kator pa.

¹⁷ Tã na hte arĩ kaxkwa kamã nê pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỹm hapêx pa.

¹⁸ Nê tãm na hte mẽ pahpê hkrajê ho amnhĩptàr o pa. Te kêp mẽ pahkrã nhũm te mẽ pahpê ĩ pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupỹm htĩr o htĩr jakamã kot amnhĩ to rax o mẽmoj piitã hakrenh par.

¹⁹ Nê na pre Tĩrtũm ã hamaxpêr anê nê hamaxpêr o: “Nà Ixkra mẽ wa ixte amnhĩ nhĩpêxja te kot axpên pyrãk. Nê wa ixihitỹx mããnên te kot axpên pyrãk. Nê wa inhmex xà mẽ wa ixãhpumunhja te kot axpên pyrãk. ã wa ixte amnhĩ nhĩpêx kot anhỹr. Wa ixte amnhĩ nhĩpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwỳr xwỳnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwỳr xwỳnhjaja na htem ã amnhĩ nhĩpêx mex anhỹr o pa. ã Jejus kot mẽ panê htyk anhỹr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỳr xwỳnh ã harênh

²¹ Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwỳ nê pajamaxpêr punuj nê tanhmã amnhĩ tomnuj to pix o ri papa.

²² Tã Jejus kôt amnhĩ xunhwỳ nhũm amnhĩ tã mẽ pahpumu. Hãmri nê ra mẽ panê htyk jakamã amnhĩ tã mẽ pahpumu nê Tĩrtũm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkôt pyrãk o mẽ panhĩpêx nê tãm mẽ paxunhwỳ. Pu mẽ arĩ pahpê Tĩrtũm kutã amnhĩ

xunhwỳr xwỳnh kêt nê hpãnhã pahpê hkrãmnhwỳy.

²³ Na pre Tĩrtũm mẽ pahte amnhĩ kaxyw Kra Kris kôt pajamaxpêr nê hkôt amnhĩ xunhwỳr ã mẽ pahpumunh kôt ã mẽ pahto mex anê. Tã kêr pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrã nê harênh ma nê hkôt amnhĩ xunhwỳ nê hkôt amnhĩ nhĩpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh
Epês 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htỹx nê pa amnhĩ xà htỹx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhỹr jakamã na pa ixkĩnh nê jar ixkrĩ. Ixte Kris kwỳjê kaxyw amnhĩ xà kamã ijamak tỹx o ixkrĩ. Te mẽ apê Kris nhĩ pyrãk xwỳnhjê mãã. Tã pa te ixpê Kris kot amnhĩ nhĩpêx pyrãk o mẽ akaxyw amnhĩ xà htỹx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhĩpêx mex o ri apa kaxyw.

²⁶ Na pre kormã mēhō mẽ awỳr mōr nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpên pyrãk. Nom na pre amnepêm ri mẽ pa xwỳnhjê mã kormã ja hã amnhĩ to amnhĩrĩt kêt nê. Tã ra jarãhã mẽ pahpê Kris kwỳjê mã ja ho amnhĩrĩt. Mããnên kãm mẽ apê Ijaew kêt xwỳnhjê japê hã amnhĩ to amnhĩrĩt.

27 Mē apê Ijaew kêt tâ na ka prem Kris kôt amnhî xunhwÿr nhũm Tĩrtũm Karõ mē akarõ mã agjê nē mē akamã pa ho pa. Ka mē ra hkôt amnhî nhĩpêx jakamã kot kaj mē ixpyrà nē nhỹrmã kuri atĩr tũm nē amex rãhã ho apa ho apa. Ja na mex kumrêx. Tã ja na Tĩrtũm kãm mē ate mar prãm nē mē akaxyw ixãm.

28 Jakamã na pa pre Ximotre mē wa mē apiitã mē amã Kris kot mē panê tanhmã amnhî nhĩpêx to hã harênh kãm ixihtÿx o ri mē akôt ixpa. Nē kapêr o mē ajahkre ho ri mē akôt wa ixpa. Nē jar mē hagjênh xà kamã krĩ piitã hwÿr kagã nhĩpêx nē mē hwÿr kurê. Mē kot kamã harênh nē mar nē amnhî tomnuj kaga nē hpãnhã Kris kôt amnhî xunhwÿr nē ãm kôt pix mã amnhî nhĩpêx o pa kaxyw. Kêr pa nhỹrmã kãm mē ate inhmar nē hkôt amnhî xunhwÿr xwÿnhjê jahkre nē kãm:

—E Pahihti. Ota akwÿjaja. Na htem akôt amnhî nhĩpêx mex rãhã ho ri pa. Anê.

29 ã ixte kãm mē piitã mē harênh anhÿrja na inhmã hprãm. Ja kaxyw na pre Jejus ixto ixihtÿx. Jakamã na pa hte Tĩrtũm nhỹ hã tanhmã kapêr o mē ahkre hto ho ri mē hkôt ixpa. Jao mē ho Tĩrtũm wÿr o ri ixpa nē mē kãm kagã nhĩpêx nē mē hwÿr kurê nē kamã kapêr o mē ahkre o ri ixpa.

2

Pawre kot Jejus kapêr o Koros nhõ xwÿnhjê o hihtÿx ã harênh

Epes 3.14-19; Piripos 1.9

1 E kot paj mē amã tanhmã amnhî jarênh to ka mē inhma. Na pa hte mē ato Tĩrtũm wÿr rãhã ho ixkrĩ. Mē kajaja nē krĩ pé Ratisej kamã Jejus kôt mē pahkwÿjaja. Kormã ixte mē apumunh kêt tâ pa hte mē ato Tĩrtũm wÿr kãm ixihtÿx ãhã ho ixkrĩ.

2 Mēmo kaxyw na pa hte ã mē ato hwÿr anê? Nē mēmo kaxyw na pa hte mē amã kagã nhĩpêx nē mē awÿr kurê? Nã ãm mē ate kamã harênh nē mar nē Jejus kapêr kôt axpên to axihtÿx o ri apa kaxyw. Nē

mē amã axpên kĩnh o ri apa kaxyw. Pê te mē ate ixkre tipxi kamã axpên kôt amnhî nhĩpêx o ri apa pyrãk. Jao aprĩ hã Tĩrtũm kot amnhî nhĩpêx pumunh mex nē amnhî kaxyw hkôt ajamaxpêr tÿx nê. Kot kaj mē ã amnhî nhĩpêx anê nē Kris kot amnhî nhĩpêxta pumunh pa. Na pre Tĩrtũm tokÿx mē kãm Kris o amnhĩrĩt kêt tâ ra mē pamã ho amnhĩrĩt.

3 Tĩrtũm kot amnhî nhĩpêx nē kapêrja na pu htem Kris nhỹ hã pahprĩ hã omunh nē mar mex nê.

4 Jakamã koja mēmojaja mē awÿr mra hãmri nē hêx rom Tĩrtũm kapêr kwÿm ri tanhmã mē amã mēmoj jarênh to. Te mē ãhpumunh tÿx pyrãk o mē amã harê no ãm mē ãhpumunh kêt. Ka mē ama nê ãm mē ama nê Kris kaga hkêt nê.

5 Nê kormã arĩ Jejus ã ijaxàr nê ixkrĩ nê kormã mē akôt ixpa hkêt tâ ot pa hte mē amã ijamaxpêr rãhã ho ixkrĩ. Nê ra tanhmã mē ajarênh mar to. Na ka xep htem Kris kôt amnhî nhĩpêx tÿx o ri apa. Te ahkrô pé kukryt mut kuxêêti kot pĩ kupu htÿxta pyrãk. Nê ka xep htem arĩ amnhî kaxyw Kris mã ajamaxpêr tÿx o ri apa. Pa mē ajarênh ma nê ixkĩnh tÿx nê.

6 Na ka prem Pahihti Jejus Kris kôt amnhî xunhwÿr pa. Tã kër ka mē arĩ hkôt amnhî nhĩpêx mex rãhã ho apa. Kêp mē panhõ Pahihti kênã.

7 Jakamã mē ãm kôt pix mã amnhî xunhwÿr tÿx nê aa hkaga hkêt nê. Te mēmo pĩ hpàr jarêja pika kaxwÿnh kãm pimãnh nê kot pika jamÿnh tÿxta pyrãk. Nhũm kók xápêr tÿx tâ tee kot mēnh kaxyw pyrãk. Tã kër ka mē pĩ hpàrta pyrã nê hkôt amnhî xunhwÿr tÿx nê hkôt amnhî nhĩpêx mex o ri apa. Ra Epas kot mē ajahkre ho pa xà hkôt. Nê amnhî krãm Kris kapêr jaxàr tÿx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

8 Nê kwa kêt ka mē kot hêx rom mē amã tanhmã kapêr to ho mē pa xwÿnhjaja ka mē amnhî nê mē omunh mex nê. Nê mē kapêr mar hkêt nê.

Mê ate Kris kaga hprâm xàj na htem tanhmã mẽ amã hêx to ho ri mẽ akôt pa. Te amnepêm mẽ kot Tirtũm kapêr kwým ri tanhmã mẽ ahkre hto xwýnhjê pyræk. Hinhu hikôôti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tirtũm wa kot amnhĩ nhĩpêx kot axpên pyræk. Nê wa hamaxpêr kot axpên pyræk.

¹⁰ Tã kêr pu mẽ pajaxwýja wa hamaxpêr o pajamaxpêr nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tirtũm kapêr kwým ri tanhmã mẽ kapêr to xwýnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê ãm mẽ ama. Kris na hihtýx o hihtýx o kot mẽkarõmnuti nhõ pahi piitã mẽ hakrenh par. Nê hihtýx o hihtýx o kot Tirtũm kapêr o mẽ wrýk xwýnhjê piitã mẽ hakrenh par. Nê ãhpumunh o ãhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhĩpêx o ri apa.

Mê pahte amnhĩ nhĩpêx nyw jarênh Rômãn 6.3; Karatas 5.24

¹¹ Nê na hte ixkwý Ijaewjaja mẽ hkra nhỹrmã hprêk nê Tirtũm kôt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwýnhjaja na pre Kris mẽ anhĩpêx o te mẽ kot amnhĩ jakarta pyræk. Jao te kot mẽ anê mẽ ate amnhĩ nhĩpêx tũm jakàr par pyræk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jejus kapêr kôt amnhĩ nhĩpêx ã mẽ apumunh kurê kumrêx.

¹² Tã na pu htem jarãhã mẽ pahte Tirtũm kôt amnhĩ nhĩpêx o papa hã amnhĩ jarênh kaxyw amnhĩ jakàr kêt nê. Na pu htem hpãnhã amnhĩ kaxyw Tirtũm xihtýx o hihtýx xwýnhjaja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ

pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jejus htyk nhũm mẽ kot haxàr nhũm nõr nhũm mẽ pahte amnhĩ tomnujja ãhkô hã nõr nê hapêx par pyræk. Tã pu htem ra gôj rũm pahkrã hapôj. Te Tirtũm kot akupým Kris o htír pyræk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrit.

¹³ Amnepêm kormã mẽ pahte Jejus kôt amnhĩ xunhwýr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tirtũm noo mã te ra mẽ pahtyk pyræk. Tã Tirtũm te akupým Kris kôt mẽ pahto pahtr pyræk o mẽ panhĩpêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx.

¹⁴ Te mẽ pahte tanhmã amnhĩ tomnuj to ho papa nhũm Tirtũm kot ja hã mẽ pahpumunh nê mẽ pahte amnhĩ tomnuj piitã hã kagà hpar pyræk. Nê kot kagàja pyr nê Kris nhĩhkô hã pĩ kahpa hã nhôr pyræk. Jao te kot mẽ pahte amnhĩ tomnuj ã kagàta hkaxônh nê rênh par pyræk o hipêx.

¹⁵ Hãmri nhũm Krisja pĩ kahpa hã htykja o mẽkarõmnuti mẽ mẽ õ pahi Satanasti wa mẽ ho hirerek pa. Jao hihtýx o kot mẽ hakrenh par ã amnhĩ to amnhĩrit. Te mẽ kot kutã amnhĩ xunhwýr xwýnh piitã mẽ noo mã mẽ ho krihkrit par nê ma akupým õ krĩ hwýr hkĩnh nê grer o môrta pyræk.

¹⁶ Nê koja mẽmojaja mẽ awýr mra nê tee ri mẽ ate mẽmoj kur o akrĩ hã mẽ apumu nê mẽ amã:

—Kwa na hte Tirtũm kôt mẽ kot amnhĩ xunhwýr xwýnhjaja ja kur kêt nê. Nê ja ho hkôm kêt nê. Nê mẽ panhõ arĩgromnu pê sap ã ri mẽmoj tã ãpênh kêt nê. Nê mytwry nyw ã mẽmoj tã ãpênh kêt nê. Na htem ã Tirtũm ã hkĩnh o pa anê. Tã ã mẽ ate mẽ ixkôt amnhĩ nhĩpêx anhýr kêt jakamã mãn mẽ apê Tirtũm kra hkêt nã. Anê.

Tã nom kêr ka mẽ kapêr ma nê ãm ama.

17 Amnepê m kormã mē pahte Kris kôt amnhĩ xunhwÿr kêt ri na pu prem ã amnhĩ nhĩpêx anhÿr o papa. Tã Jesus kôt amnhĩ xunhwÿr hãmri nē axte ã amnhĩ nhĩpêx anhÿr kêt nē. Pãnhã kapêr pix ma nē hkôt pix mã amnhĩ nhĩpêx o ri papa.

Mē pahte mē kot Tĩrtũm kapêr o mē hêx xwÿnhjê mar kêt ã mē pamã karõ

18 Nē koja mēmojaja mē awÿr mra nē hêx rom tanhmã mē amã amnhĩ jarênh to nē mē amã:

—Na pre Tĩrtũm ãm mē papxipix mē inhmã amnhĩ to amnhĩrĩt. Jakamã kwa mē ixkapêr ma. Kot kaj mē inhmar kêt nē hãmri nē mē amex kêt nē apa.

Anhÿr o mē amã kapêr japêr ka mē ama nē ãm mē ma. Rÿ nhũm mē amã:

—Tĩrtũm mē parom kot amnhĩ to rax o kot mē pahpiitã mē pajakrenh par jakamã kwa mē tanhmã amnhĩ to hwÿr to hkêt nē. Kot ka mē anē nhũm mē ama nē mē akamã gryk nē. No kêt mē amnhĩ to kapêr o wrÿk xwÿnhjê mãn wÿ. Koja mē ama nē mē akamã gryk kêt nē tanhmã mē amã mēmoj nhĩpêx to. Anē.

Koja mē ã mē amã kapêr anē ka mē ama nē ãm mē ama. Te ho mē àhpumunh tÿx kãm mē kot ã mē amã kapêr anhÿr pyrãk no ãm mē kapêrja mex kêt. Na htem amnhĩ krã hkôt te amnhĩ to rax pyrãk o ã mē amã kapêr jao mē hamaxpêr tũm o hamaxpêr o ri pa. No mē apyrã nē mē hamaxpêr nyw o hamaxpêr kêt nē.

19 ãm mē kot Tĩrtũm kapêr kwÿm ri mē ahkre jakamã mē kêp Jesus kwÿ hkêt. No mē papajaja mē pahpê Jesus kwÿ na pu mē. Nhũm Jesus kêp mē panhõ Pahihti jakamã na hte tanhmã mē pahto paxihtÿx to pu htem kukwak ri tanhmã axpên to ajuta hto ho ri papa. Nē hkôt axpên to paxihtÿx o ri papa. Mē pahpiitã mē pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mē pahte amnhĩ krã hkôt tãm amnhĩ nhĩpêx kêt ã mē pajarênh

Karatas 3.1-5, 5.1-9; Epes 2.8; Piri-pos 3.9

20-21 Nē wam mē pahte amnhĩ nhĩpêx tũm nē mē pajamaxpêr tũmta te kot Kris kôt htyk nē mē pahpê hapêx par pyrãk jakamã na pu htem arĩ hkôt amnhĩ nhĩpêx kêt nē. Nē mēkarõmnuti hkôt amnhĩ nhĩpêx kêt nē. Tã no nhũm xep ra mēhõja mē awÿr mō nē hêx rom mēmoj nē tanhmã mē amã kapêr to nē mē amã:

—Kwa mē ja jamÿnh kêt nē. Nē ja hkur kêt nē. Nē ja kupênh kêt nē.

Anhÿr o mēmoj nē mē akurê ho pa. Xep mē ã mēmoj nē mē akurê anē ka xep mē ama nē mē hkôt amnhĩ nhĩpêx. Kwa nã mon ka mē ri axtem nē mē hkôt amnhĩ nhĩpêx?

22 Tĩrtũm kot mēmojja nē tanhmã mē pahkurê htore hã. ãm mē kot amnhĩ krã hkôt mēmoj nē mē akurê ka mē ama nē mē hkôt amnhĩ nhĩpêx. Mēmoj kur nē mē akurê xwÿnhhta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nã ja kot anhÿr kêt kênã. Mē ãm amnhĩ krã hkôt mē kot ja nē mē akurê.

23 Tã ã mēmoj nē mē akurê anhÿr xwÿnhjaja na ka htem nhÿri mē omu nē mē kapêr ma nē atÿx ajamaxpêr o:

—Nã te Tĩrtũm kôt amnhĩ nhĩpêx mex o pa pyrãk. Te mē àhpumunh tÿx pyrãk o ã mē inhmã mēmoj jarênh anē. Anē.

No ãm mē kot mēmoj jarênhja kot anhÿr kêt. ã mē kot amnhĩ nhĩpêx anhÿr xwÿnhjaja kêp Tĩrtũm kra hkêt. Na htem ãm amnhĩ krã hkôt mēmoj nē mē akurê ho pa. Nē hã amnhĩ to jarkrar o ri pa. Mē ate ja hã mē mar nē mē kot amnhĩ to rũnh ã mē hkamnhix kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprÿ. Nē ãm htÿx Tĩrtũm kapêr o mē wrÿk xwÿnhjê hwÿr kaprÿ ho pa.

3

Mê pajamaxpêr nyw nê mê pahte amnhĩ nhĩpêx nyw jarênh

Rômân 6.4-11

¹ Nê na pre Tirtûm akupÿm Kris o htĩr nhũm mê pahte hkôt amnhĩ xunhwÿr jakamã te Tirtûm kot Kris nhĩpêx pyrã nê akupÿm mê pahto mê pahĩr pyrãk o mê panhĩpêx. Jakamã kwa kêr pu mê axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxãpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupÿm kaxkwa hwÿr api nê Tirtûm nhĩhkô hã mê ho amnhĩptãr xã kamã hkrĩ ho hkrĩ.

²⁻³ Nê ra mê pahte Kris kôt amnhĩ xunhwÿr jakamã te jar pika hkôt pajapêx par nê Tirtûm wa kuri kaxkwa kamã pamex nê papa ho papa pyrãk. Jakamã kwa kêr pu mê pahte amnhĩ nhĩpêx nyw mã mãn pajamaxpêr rãhã ho papa. Nê axte mê pahte amnhĩ nhĩpêx tũm mã pajamaxpêr kêt nê.

⁴ Kris kêp akupÿm mê pahto mê pahĩr xwÿnh. Kojã nhÿrmã akupÿn mê pahwÿr wrÿ hãmri nhũm Tirtûm te ho mex raxta pyrãk o mê panhĩpêx nê mê pahto mex rax kumrêx.

Mê pahte akupÿm amnhĩ nhĩpêx tũm o paxujanãr kêt ã mê pamã karõ

Epes 4.17-5.2

⁵ Jakamã kwa kêr ka mê axte ate amnhĩ nhĩpêx tũm kôt amnhĩ nhĩpêx kêt nê. Te ra mê apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prõ ho amnhĩkati hkêt nê.

Nê nhãm ri mêmÿjê hõ rÿ mênijê hõ ho amnhĩkati hkêt nê.

Nê mê amã tanhmã amnhĩ tomnuj to hprãm kêt nê.

Nê mê amã akukrêx rax prãm kêt nê. Kot ka mê ã amnhĩ nhĩpêx anê nê gaa nê akukrêx rax gryk ã axte Tirtûm mã ajamaxpêr kêt nê.

⁶ ã mê kot amnhĩ nhĩpêx anhÿr xwÿnhjaja Tirtûm kãm mê hprãm kêt. Kojã nhÿrmã tanhmã ja hã mê homnuj tÿx to.

⁷ Amnepêm kormã mê ate Kris kôt amnhĩ xunhwÿr kêt ri na ka prem ã amnhĩ nhĩpêx anhÿr o ri apa.

⁸⁻⁹ Tã kêr ka mê axte ã amnhĩ nhĩpêx anhÿr kêt nê.

Nê mê ri axpên kãm agryk o ano hkã karôt o axpên pumunh kêt nê.

Nê mê axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mêmoy ma nê ri axpên xõ ri tanhmã ri axpên mã ho axêx to ho ri apa hkêt nê.

Nê mê akapêr mã agêt o ri mê kãm akapêr kêt nê.

Nê mê ri mêmoy to axpên mã axêx hkêt nê.

Ã mê ate amnhĩ nhĩpêx anhÿr tũmta ra mê apê hapêx par kênã.

Mê pahte amnhĩ nhĩpêx nyw kôt amnhĩ nhĩpêx ã mê pamã karõ

Rômân 12.2; Epes 4.23; Wam Pêtre 2.11

¹⁰ Nê na ka mê ra mê ate amnhĩ nhĩpêx nyw o amnhĩ nhĩpêx o ri apa. Jao ra mê pahto kator xwÿnh maatija kôt amnhĩ nhĩpêx mex o mõ. Kot kaj mê gaa nê rĩ hkôt amnhĩ nhĩpêx mex kumrêx o ri apa. Kãm hprãm xã hkôt.

¹¹ Nê mê pahpê Kris kwÿjaja ahpÿnhã na pu mê. Na mê pakamã Ijaew nê Ijaew kêt xwÿnhjaja. Nê mê pakamã panhĩ nê kupê. Nê mê kãm àpênh xwÿnhjaja nê mê kot amnhĩ mã ri àpênh xwÿnhjaja. ãm ahpÿnhã mê pahpê Kris kwÿjaja mê pahte anhÿr tã na hte Tirtûm tanhmã mê pakute hkôt mê pahpumunh kêt nê. Na hte mê panhĩpêx o axpên pyrã nê mê pahpiitã mê pakamã pa ho pa pu htem pahpimràatã hkôt ri amnhĩ nhĩpêx o papa.

¹² Nê Tirtûm kãm mê pajapê nê kãm mê pajapê xàj mê pakukamã amnhĩm mê parê. Mê pahte kãm tanhmã amnhĩ nhĩpêx to ho ri papa kaxyw mê pakukamã mê parê.

Jakamã kêr ka mẽ axpên kamã axukapri ho ri axpên kôt apa.

Nê axpên to mex pix o ri axpên kôt apa.

Nê mẽ amã amnhĩ to rax o axpên jakrenh prãm kêt nê.

Nê mẽ am amnhĩ pix kukamã ri ajamaxpêr kêt nê. Amnhĩ mẽ nhãm mẽ hkukamã ajamaxpêr o ri apa.

Nê mẽ ri agryk tokyx anhÿr kêt nê.

¹³ Nê koja mēhō tanhmã mẽ ato ka mẽ amnhĩ tã omu nê tanhmã amnhĩ tã ho hkêt nê. Am ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jejus kot mẽ panê mẽ pahte amnhĩ tomnuj piitã rênh par kênã kot pu kêt mẽ amnhĩ tã tanhmã mēhō hto. Tã kêr ka mẽ axpên to mex o ri apa nê amnhĩ tã tanhmã axpên to ho ri apa hkêt nê.

¹⁴ E kêr ka mẽ ã axpên nhĩpêx anhÿr o ri apa. No am ja pix kêt. Nê mẽ mãânên amã axpên kĩnh pê axpên kutã anojarêt rãhã nê. Kot kaj mẽ ã amnhĩ nhĩpêx anê nê mãânên ra ixte mẽmoj tã mẽ amã karōta ka mẽ ho anhÿr mex kurê kumrêx. Mẽ pamã axpên kĩnhja na mex kumrêx o kot mẽmoj piitã hakrenh par.

¹⁵ Nê kêr ka mẽ Kris kukwak ri anhōxàhkre kaxwÿnh kãm akĩnh nê ajamakêtkati nê tãm ri axpên nhĩpêx o ri axpên kôt apa. Te ixkre tipxi kamã mẽ ate axpên kôt ri amnhĩ nhĩpêx pyrãk. ã mẽ pahte amnhĩ nhĩpêx anhÿr o papa kaxyw na pre Tirtũm amnhĩ wÿr mẽ pahwÿ. Mẽ pahte hkôt amnhĩ xunhwÿr kaxyw.

Nê kêr ka mẽ Tirtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mẽ pahte Tirtũm mã mex ã pagrer ã mẽ pamã karō

Epês 5.19

¹⁶ Nê kêr ka mẽ Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tirtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer

o ri axpên kôt apa. Nê kãm kukwak ri akĩnh ã amnhĩ jarênh o kãm gre.

¹⁷ Nê kêr ka mẽ Mēpahpãm Tirtũm mã amnhĩ jarênh o:

—Pa Tirtũm. Nà am hãmri na ka pre mẽ ixwÿr Akra Jejus mẽ nhũm mẽ ixwÿr wrÿ nê mẽ inhnê ty.

Anhÿr o kãm amnhĩ jarê. Hãmri nê am Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rÿ am kôt pix mã tanhmã akapêr to ho ri apa.

Tanhmã mẽ pahte axpên nhĩpêx to hã mẽ pamã karō

Epês 5.22-6.9

¹⁸ Nê mẽ anijaja. Tirtũm kot myja kumrêx nhĩpêx nê hkôt kãm hprō nhĩpêx jakamã kêr ka mẽ amjên ã apijaam o apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx mex nê. ã mẽ ate amnhĩ nhĩpêxja na Tirtũm kãm hprãm.

¹⁹ Nê mẽ amyjaja kêr ka mẽ amã mẽ aprō japê nê. Te amã amnhĩ tã ma pyrãk o mẽ hipêx o ri apa. Jao tanhmã mẽ homnuj to hkêt nê.

²⁰ Nê mẽ apê mẽ hkrajaja kêr ka mẽ anhĩpêxà nê akatorxà wa hã apijaam nê wa kapêr ma nê wa hkôt ri amnhĩ nhĩpêx. ã mẽ ate amnhĩ nhĩpêx anhÿrja na Tirtũm kãm hprãm. Kojã ã mẽ ate amnhĩ nhĩpêx anhÿr ã mẽ apumu nê hkĩnh nê.

²¹ Nê kêr ka mẽ apê mẽ hipêxà nê mẽ katorxà mẽ akra gryk kaxyw mẽ kãm apêr o apikênh kêt nê. Kot kaj mẽ ã mẽ hipêx anê nhũm mẽ tee ri amnhĩ tã mẽ ama nê hkapri nê.

²² Nê mẽ ate mẽ kãm tanhmã amnhĩ nhĩpêx to ho ri mẽ apa xwÿnhjaja kêr ka mẽ anhō patrãw kapêr ma nê hkôt amnhĩ nhĩpêx. Nê mẽ noo mã mẽ kãm tanhmã amnhĩ nhĩpêx mex to nê mãânên mẽ wa kre kamã mẽ kãm tanhmã amnhĩ nhĩpêx mex to. Nom mẽ kot axapênh ã apumunh nê hã kãm akĩnh pix kaxyw axapênh mex kêt nê. Mãânên mẽ amã Pahihti Kris kĩnh ã akatàt kôt mẽ kãm mẽmoj tã axapênh mex nê. Mẽ noo mã nê mãânên mẽ wakre kamã.

²³ Nê mẽ akĩnh kãm mẽ kãm axàpênh mex o ri apa. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nê tãm amnhĩ nhĩpêx o tãm mẽ kãm axàpênh mex o ri apa.

²⁴ Te mẽ anhõ patrãw pix mã axàpênh pyræk nom kumã pix mã hkêt. Mãänên mẽ panhõ Pahihti Krisja mã. Jakamã kot kaj mẽ ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mẽmoj tã apê nhũm Pahihtija ja hã mẽ apumu nê nhỹrmã mẽ ato mex rax nê.

²⁵ E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwým amnhĩ krã hkêt ri tanhmã amnhĩ nhĩpêx to nhũm Tĩrtũm tee ri ja hã mẽ apumu hãmri nê nhỹrmã tanhmã hã mẽ anhĩpêx to. Na hte ã mẽ kot amnhĩ tomnuj xwýnhjê piitã mẽ hipêx anê nê mẽ hipêx o axpên pyræk. Jakamã kwa kêr ka mẽ anhõ patrãw mã axàpênh mex rãhã ho ri apa.

4

¹ Nê mẽ apê mẽ õ patrãw kêr ka mẽ kot mẽ amã mẽ àpênh xwýnhjê ho mex nê tanhmã mẽ homnuj to hkêt nê. Mẽ uræk nê kaxkwa kamã mẽ anhõ Patrãw maatija hkrĩ. Kot mẽ pahte tanhmã amnhĩ nhĩpêx to nê tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhỹr o ri apa.

Mẽ pahte Tĩrtũm mã amnhĩ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

² Nê kêr ka mẽ xatã Tĩrtũm mã amnhĩ jarênh rãhã ho ri apa. Nê tanhmã mẽhõ kot amnhĩ nhĩpêx to hã harênh ma nê ho Tĩrtũm wý. Nê mẽ ate kãm amnhĩ jarênh kamã kãm mex o mex ã harê.

³⁻⁴ Nê mãänên ixto awý kê mẽ tokyx ixkator japêr. Pa ixàmnhĩx mẽ kot kormã Kris jarênh mar kêt xwýnhjê

mã harênh o ri mẽ hkôt ixpa. ã ixte amnhĩ nhĩpêx anhỹrta ã na prem ixpynê nê ijaxà pa kormã jar ixkrĩ. Jakamã kwa mẽ mãmrĩ ja hã ixto Tĩrtũm wýr o apa.

Mẽ pahte apkati mẽ mẽ pahkwýjê mã Jejus jarênh ã mẽ pamã karõ

Epes 5.16

⁵ Nê kêr ka mẽ kêp Kris kwý hkêt xwýnhjê hkôt nhỹhým ri apa nê tãm ri Tĩrtũm kapêr kôt amnhĩ nhĩpêx o mẽ hkôt ri apa.

⁶ Nê kê mẽhõ awýr tẽ nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpýnhã tanhmã mẽ kot hã akukjêr to xà hkôt tanhmã mẽ kãm harênh to kê mẽhprĩ hã mar mex nê.

Pawre kot Koros wýr Xikitre mẽ Ones wa mẽnh ã harênh

Epes 6.21-22

⁷⁻⁸ Nê ot pa mẽ awýr mẽ pahtõ Xikitre mẽnh mã. Kot ma mẽ awýr ixte mẽ amã ixkapêr ã kagà nhĩpêx o mõi kaxyw. Na hte ixkôt Tĩrtũm mã amnhĩ nhĩpêx o ri pa. Inhmã hapêê. Tã kot paj mẽ awýr kumê kê ma mẽ awýr mõi nê hprĩ hã mẽ amã ijarê. Mẽ ate ijarênh mar nê tãm ajamaxpêr nê akĩnh kaxyw.

⁹ Mẽ akwý Onesti hkôt koja ma mẽ awýr mõi. Mãänên Kris kôt kêp mẽ pahtõ hã mẽ pamã hapê xwýnh na. Na hte Tĩrtũm kapêr kôt amnhĩ nhĩpêx mex rãhã ho ri pa. Tã Xikitre mẽ koja wa ma mẽ awýr mõi. Hãmri nê mẽ awýr pøj nê jar tanhmã mẽ ixte amnhĩ nhĩpêx to hã mẽ ijarê ka mẽ ama.

Kris kôt mẽ hkwý kot mẽ hwýr hpêr mẽnh ã mẽ harênh

¹⁰ Nê ota Aristakja ixpyrà nê kêp prês nê hkrĩ. Tã mẽ awýr hpêr mẽ. Nê Panãpe htõ Juãw Makreja mãänên mẽ awýr hpêr mẽ. Na pa pre ra mẽ amã Juãw Makre jarê. Tã koja mẽmo arĩgro hã akupýn mẽ awýr mõi japêr ka mẽ omu nê ho mex nê.

¹¹ Nê Jejus Justija mãänên mẽ awýr hpêr mẽ. Jajaja mẽ ixpyrà nê kêp Ijaew. Tã mẽ tapxipixjaja na htem

ixpyrà nê mē ixpê Ijaew kwýjê rom mē kām Tirtūm kapēr nyw o mē ahkre ho ri mē hkôt pa. Tirtūm kot Kra Kris kôt mē kot amnhī xunhwýr xwýnhjê ho hkra hā harēnh nywja na htem mē kām harēnh o ri mē hkôt pa. Pa ja hā mē omu nē ixkīnh nē.

¹² Nê mē anhīō Epasja mǎānēn mē awýr hpēr mē. Na hte Jesus Kris mǎ tanhmǎ amnhī nhīpêx mex to ho pa. Nê mē ato Tirtūm wýr rāhā ho pa nê mē ato hwýr o:

–Pa Tirtūm. E kwa tanhmǎ Koros kamǎ akrajê ho kê mē akôt amnhī xunhwýr týx nē. Nê amǎ hprām xà hkôt pix mǎ amnhī nhīpêx o ri pa. Nê amnhī kaxyw Kris kôt pix mǎ hamaxpēr týx rāhā nē. Anē.

¹³ ām hāmri na hte mē ato hwýr o pa. Nom mē kapxipix o hwýr kêt nē. Mǎānēn krī pē Ratisej kamǎ nē krī pē Jerop kamǎ Kris kôt mē pahtōjê ho hwýr o ri pa. Mē ate Tirtūm kôt amnhī nhīpêx mex o apa kaxyw. Ixte ja hā omunh mex.

¹⁴ Nê jar mē pahtō tōtō Rukre mē Tēmtija wa mǎānēn mē awýr hpēr mē. Tōtō Rukreja kêp ixkrāmnhwý mex na.

¹⁵ Nê kêr ka mē krī pē Ratisej kamǎ Kris kôt mē pahkwýjê mǎ ijarē. Nê Nīpare mǎ nē ōrkwý hwýr mē pikuprōnh nē Tirtūm mǎ mex o mex ā harēnh o mē hkrī xwýnhjê mǎ mǎānēn ijarē.

¹⁶ Nê e kêr ka mē ixte mē awýr kagà mēnhja kamǎ harēnh pa nē hpānhā krī pē Ratisej kamǎ Kris kôt mē pahkwýjê hwýr amē kê mē apyrà nē kamǎ harē nē piitā kuma. Nê mē kām anē kê ra ixte mē hwýr kagà mēnh xwýnhta kê mē amǎ kugō ka mē kuxwar kamǎ harē nē ama.

¹⁷ Nê kêr ka mē Akip mǎ ijarē kê ra Tirtūm kot kām mēmoj tā karō xwýnhta kê ho anhýr jatur xàm kumē. Kêp hkra hā kê tām kām àpēnh jatur xàm kumē.

¹⁸ Tā ām ja pix. E paj pam amnhī nhīhkra ho hatur xà hā kagà. Mē ate ixte mēmoj tā kagà pumunh nē hkôt inhmǎ ajamaxpēr kaxyw. Nê ixte mē awýr mēnh ā ijarēnh mar kaxyw. Kwa

kêr ka mē arī ixpê prês ā ixto Tirtūm wýr rāhā ho ri apa.

E kê Tirtūmja mēmoj to mē akutā nojarêt nê mē ato mex nē ka mē amex nē ajamakêtkati nē apa ho apa. Tā ām ja pix. Ixpê Pawre na pa mē awýr kagàja nhīpêx nē ā mē awýr mēnh anē.

Wam Tesarõn Pawre kot Tesarõn kamã Jejus kõt hkwýjê hwýr kagà nê mênh

Pawre na pre kagàja nhîpêx. Kêp Jejus nhỹ hã mē ahkre ho pa xwýnhjê hõ na pre. Jakamã na pre kagàja nhîpêx nê ma krî pê Tesarõn kamã Jejus kõt hkwýjê hwýr kumê. Tesarõn kamã Jejus ã kãm mē hkurê xwýnhjaja na prem Jejus ã mē homnuj o pa nhũm mē amnhĩ xà htýx kamã hamak o pa. Hãmri nhũm Pawre mē harênh ma nê kagàja nhîpêx nê mē hwýr kumê. Kot mē kãm mē hamaxpêr o hihtýx kaxyw mē kot arĩ Jejus kõt amnhĩ nhîpêx mex o pa nê aa hkaga hkêt ã mē kãm karõ. Nê nhỹrmã Jejus akupÿn kaxkwa rũm mē pahpê hkwýjê hwýr wrýk nê ma akupÿm amnhĩ kõt mē pahto àpirja nhũm mē kãm harê. ã na pre mē kãm mēmoj jarê nê hã kagà anê nê mē kãm:

¹ Pa mē apê Tesarõn kamã Jejus kwý hã axpên wýr mē apikuprõnh xwýnhjaja? Xà mē amex na ka mē apa? Ixpê Pawre na pa mē awýr kagàja nhîpêx nê mē awýr kumê. Siras mē Ximotre mē pa mē awýr kumê. Mē pahpê Mēpanhîpêêxà maati Tirtũm mē Pahihti Jejus Kris wa hkwý jakamã na pa htem mē ato Tirtũm wýr rãhã ho ri ixpa. Kot mē akutã nojarêt rãhã nhũm mē ajamakêtkati nê axãmnhix mē apa kaxyw.

²⁻³ Nà mēmoj kêt. Na pa htem mē amã ijamaxpêr nê mē anhỹ hã ixkĩnh nê ixpa hãmri nê mē awýr kagàja mē. Na pa htem mē ato Tirtũm wýr rãhã ho ri ixpa nê kãm mē ajarênh o:

–Pa Tirtũm. E mãn ka Tesarõn kamã akrajê pumu. ãm hãmri na ka pre tanhmã mē hkrã hto nhũm mē akõt amnhĩ nhîpêx mex o pa. Na htem amnhĩ kaxyw akõt hamaxpêr týx nê. Jao mē piitã mē kamã ukapri kamã tanhmã mē ho ajuta hto ho pa.

Nhũm mē kãm mē ixkurê xwýnhjaja Pahihti Jejus Kris ã tanhmã mē ho ho pa htã nhũm mē tee ri amnhĩ kukamã hamaxpêr o hkaprĩ nê Jejus mē war akaga hkêt nê. Arĩ war anhỹ hã amnhĩ to htýx nê Pahihti Jejus kutêp tanhmã kãm amnhĩ nhîpêx to ho pa. ãm hãmri na htem ã amnhĩ nhîpêx anê Tirtũm. Na pa htem mē kot ã amnhĩ nhîpêx anhỹrja mã ijamaxpêr nê ixkĩnh nê.

Anhỹr o pa htem mē ato kuwý.

⁴ E Kris kõt ixkwýjaja. Nà Tirtũm kãm mē ajapê jakamã na pre amnhĩm mē arê. Kot mē ato hkra nhũm nhỹrmã kuri mē amex nê atĩr tũm nê apa ho apa kaxyw. Ra mē ixte ja hã mē ajarênh mar mex.

*Mē piitã mē kot Tesarõn nhõ
xwýnhjê jarênh mar ã mē harênh*

⁵ Nê na pa prem ma mē awýr mõ nê mē amã Jejus jarênh o mē akõt ixpa. Kot mē panê tanhmã amnhĩ nhîpêx to hã harênh o ri mē akõt ixpa. Nom pa mē amnhĩ krã hkõt mē amã ixujarênh kêt nê. ãm Tirtũm Karõ nhỹ hã na pa prem hihtýx xà ho tanhmã mē amã ixkapêr to ka prem mē inhma nê mē ixkõt ajamaxpêr kurê kumrêx. Na pa prem tãm amnhĩ nhîpêx o ri ixpa ka mē ja hã mē ixpumunh o ri mē ixkõt apa.

⁶ Tã Jejus kõt amnhĩ xunhwý nê hkõt amnhĩ nhîpêx mex nê. Nê mē ixkõt amnhĩ nhîpêx mex nê. Mē kot Jejus ã tanhmã mē ato htã ka htem Tirtũm Karõ nhỹ hã akĩnh nê hkõt amnhĩ nhîpêx mex rãhã ho ri apa.

⁷ Tã nhũm pika pê Masetõn mē Gres wa kamã Jejus kõt mē pahkwýjaja ã mē ate amnhĩ nhîpêx anhỹr ã mē ajarênh ma nê mē apyrã nê ã amnhĩ nhîpêx anhỹr o pa.

⁸ Na ka prem tanhmã Jejus kot mē panê amnhĩ nhîpêx to hã harênh o ri mē hkõt apa nhũm mē piitã mē akapêr ma. Nom mē tapxipixjaja mar kêt nê. Na mē ra ohtõ nê mē ajarênh ma nê mē apyrã nê ma mē kãm Jejus jarênh o pa. Ra mē ate Jejus kõt amnhĩ xunhwýr ã amnhĩ jarênh o ri apa

nhūm mẽ piitā kot mẽ amar jakamā mẽ pajaja na pa htem mẽ kām ā mẽ ajarēnh anhỹr kêt nē. Mo kaxyw? Ra mẽ kot mẽ ajarēnh mar mex kēnā.

⁹ Na pa htem nhỹri krī hō hwỹr pōj nhūm mẽ ixpumu nē ra mẽ tāmjaja mẽ inhmā mẽ ajarēnh kurê kumrēx. Nē mẽ ajarēnh o:

—Kwa Tesarōn kamā Kris kôt mẽ pahkwýjaja na xep kām mẽ akīnh nē. Amnepēm na pre htem amnhīm sānti nhīpēx nē kēp mēhpām ā harē nē amnhī to hwỹr o pa. Tā ka xep prem ma mẽ hwỹr mō nē mẽ kām Tirtūm kapēr jarē nhūm mẽ ama nē Tirtūmja sānti rom ām hāmri hā omunh kurê kumrēx. Hāmri nē gryk ā sānti kaga hpa nē Tirtūm kôt amnhī xunhwý nē hkôt pix mā amnhī nhīpēx mex o pa.

¹⁰ Nē amnhī wýr Tirtūm Kra kamā hamak rāhā ho ri pa. Anē.

Ām hāmri na ka htem amnhī wýr kamā hamak rāhā ho apa. Na pre ty nhūm Hipēēxā Tirtūm akupým ho htír. Tā koja nhỹrmā akupýn mẽ pahwýr kumē nhūm akupýn mẽ pahwýr wrý. Hāmri pu mẽ ām pix kukwak ri mẽ kot amnhī xà htýx kām hamak o pa htūm xāta wýr papa hkêt nē.

2

Pawre kot amnhī jarēnh Sikūn Korīt 1.12, 4.1-6

¹⁻² Nē kormā mẽ awýr mẽ inhmōr kêt ri na pa prem kormā Piripos nhō xwýnhjē mā Tirtūm kapēr jarēnh o ri mẽ hkôt ixpa. Nom nhūm mẽ hkwyjaja kām mẽ inhmar prām kêt nē. Na prem Jejus ā mẽ inhmā kapēr punuj nē mẽ inhīpēx kati pa prem amnhī xà htýx kamā ijamak o mẽ hkôt ixpa. Na ka prem ja hā mẽ ijarēnh ma. Ā mẽ kot mẽ inhīpēx anhỹr tā pa mẽ tee ri amnhī kukamā ijamaxpēr pē Tirtūm kapēr jarēnh kaga hkêt nē. Na pa prem arī mẽ kām Jejus kot tanhmā mẽ panē amnhī nhīpēx to hā harēnh o ri mẽ hkôt ixpa. Tā mẽ awýr inhnojarêt nē Tirtūm nhỹ hā amnhī to htýx nē ma mẽ awýr mō. Hāmri nē mẽ amā

tanhmā Jejus jarēnh to ho ri ixpa. Ka prem mẽ inhma hāmri nē axohtō nē hkôt amnhī xunhwý.

³ Nom pa prem ixēx rom tanhmā mẽ amā ixkapēr to hkêt nē. Rý mẽ inhmā mẽmoj prām xāj mẽ ano kupyri pē mẽ amā ixkapēr kêt nē.

⁴ Rý mẽ ate mẽ ixkapēr mar nē mẽ inhmex ā mẽ ijarēnh kaxyw pa tanhmā mẽ amā ixkapēr to hkêt nē. Ām Tirtūm kot mẽ inhmar nē tapxipix mẽ inhmex ā mẽ ijarēnh pix prām xāj na pa prem mẽ amā kapēr jarēnh o ri mẽ akôt ixpa. Tirtūm tapxipix na hte tanhmā mẽ pakute hkôt mẽ pahpumunh rāhā ho pa. Tām na pre mẽ ixte kapēr jarēnh o ri ixpa kaxyw mẽ ixunhwý.

⁵ Xàn pa prem mẽ iakwa nhīkjē ho mẽ ate tām amnhī nhīpēx ā mẽ ajarē hāmri nē mẽ iakwa nhīkjē ho mẽ ato ixkapēr punuj nē? Nà na pa prem ā amnhī nhīpēx anhỹr kêt nē. Na pa prem ixkatàt kôt mẽ ate amnhī nhīpēx ā mẽ apumunh kôt tanhmā mẽ ajarēnh to ho ri ixpa.

Nē xà mẽ ate mẽ ixkapēr mar nē akīnh nē hpānhā mẽ inhmā amnhīrer kaxyw na pa prem mẽ awýr mō nē mẽ amā Jejus kapēr o mẽ ajahkre? Nà na pa prem kàxpore prām xāj mẽ amā ixkapēr kêt nē. Tirtūm kot ja kôt mẽ ixpumunh mex.

⁶ Rý xà mẽ ate mẽ inhmex ā mẽ ixto jarkrar kaxyw na pa prem mẽ awýr mō? Nà mǎānēn ja kaxyw kêt. Ā mẽ ate mẽ ijarēnh anhỹr prām xāj na pa htem Tirtūm kapēr o mẽ ajahkre ho ri ixpa hkêt nē.

⁷ Rý xàn pa pre mẽ awýr mō nē mẽ amā amnhī jarēnh o:

—E mẽ ixte Jejus nhỹ hā ixkapēr o ixpa xwýnh jakamā kot paj mẽ amā tanhmā ixkapēr to ka mẽ inhma nē hpānhā mẽ inhmā amnhīre.

Anhỹr o mẽ amā ixkapēr? Nà na pa pre ā mẽ amā ixkapēr anhỹr kêt nē. Na pa prem te mẽ katorxà kot hkrajē nhīpēx pyrāk o mẽ anhīpēx nē amarī mẽ ajahkre ho ixpa nē mẽmoj tā mẽ awýr kêt nē.

⁸ Mē inhmā mē akīnh jakamā na pa prem mē amā ixprī hā Tīrtūm kapēr piitā harēnh par o mē akôt ixpa nē mē kot ja hā tanhmā mē ixto py-maj tee ri amnhī kukamā ijamaxpēr o ri ixkaprī hkēt nē. Ām ixāmnhīx ri tanhmā Jejus kot mē panē amnhī nhīpêx to hā harēnh o mē akôt ixpa.

⁹ Mē apê mē ixkwý jakamā na pa prem tanhmā mē amā ixkapēr to hpānhā mē ixàpkur xà rý mēmoj tā mē awýr kêt nē. Na pa prem mē pamjaja mēmoj tā ixàpēnh pē mē amā ixkapēr o ri ixpa. Nē ixàpēnh rūnh kumrêx, Arīgro hā nē kamāt kām. Mān arī mē ate ā mē ixte amnhī nhīpêx anhýrja ā anohtýx japēr ko.

¹⁰ Na pa prem tām amnhī nhīpêx o mē akôt ixpa. Tīrtūm kām hprām xà hkôt. Jao tanhmā amnhī to mex to rāhā ho ri ixpa ka prem amnhī tā mē ixpumu. Nhūm Tīrtūm haxwýja ja hā mē ixpumu.

¹¹ Na pa pre mē apê mē ixkra pyrāk mē anhīpêx o ri mē akôt ixpa.

¹² Jao mē amā ixkapēr mex nē. Nē mē akaprī nē apa xwýnhjaja pa prem akupým mē ajamaxpēr o mē axihtýx hāmri nē mē apiitā mē amā ixkapēr nē mē amā:

—Kwa kêr ka mē Tīrtūm kôt amnhī nhīpêx mex rāhā ho ri apa nē aa hk-aga hkēt nē. Anē.

Tīrtūm tām na pre amnhī wýr mē pahwý pu prem hkôt amnhī xunhwý. Tā koja nhýrmā amnhī wýr mē pahto api pu mē Kra Jejus kukwak ri wa kuri pamex kumrêx nē ri papa ho papa. Jakamā kwa kêr ka mē hkôt amnhī nhīpêx mex rāhā ho ri apa.

Jejus kwýjaja kām Jejus kôt amnhī xunhwýr hkēt xwýnhjê pýma hkēt

Atre 17.1-9

¹³ Nē ma mē awýr mē inhmōrta ā na pa prem mē amā Tīrtūm kapēr jarēnh o ri mē akôt ixpa ka prem mē inhma nē mē ixte amnhī krā hkôt mē ixkapēr ā mē ixkamnhīx kêt nē. Na ka prem ām hāmri mē ixte Tīrtūm kapēr jarēnh ā mē ixpumunh kurê kumrêx nē amnhī kaxyw hkôt ajamaxpēr nē Jejus mē Hipêxà wa hkôt

amnhī xunhwý. Jakamā na pa hte mē amā ijamaxpēr nē mē anhý hā ixkīnh nē. Hāmri nē Tīrtūm mē mē anhý hā ixkīnh jarēnh o ri ixpa. Nā na ka htem arī Tīrtūm kapēr kôt amnhī nhīpêx mex nē.

¹⁴ Nhūm hte mē akwýjaja tee ri ja hā mē apumu nē Jejus ā mē atom-nuj nē. Nom mē kapxipixjaja ā mē anhīpêx anhýr kêt nē. Jutej kamā Ijaew kwýjaja na prem mē apyrā nē Jejus kôt amnhī xunhwý nhūm mē hkwýjaja tee ri ja hā mē omu nē hā mē hipêx kati ho pa.

¹⁵ Amnepêm Ijaew na prem Tīrtūm nhý hā mē kām kapēr o mē pa xwýnhjê homnuj nē mē hkwýjê hpar o pa. Hāmri nhūm hpānhā mē hkanrêhā mē htāmnhwýjaja mē urāk nē Pahiti Jejusja pī. Tā jarāhā määnēn ā Jejus ā mē panhīpêx anē nhūm Tīrtūm tee ri mē pahtā mē omu nhūm ja kêp omnuj týx kumrêx nhūm mē pahtā mē kamā gryk nē.

Na hte mē apê Ijaew kêt xwýnhjê ho hkra nhūm Ijaew kām ja prām kêt

¹⁶ jakamā na htem mē akwý kot Tīrtūm kôt amnhī xunhwýr pymaj mē anē mē ixkurê nē mē inhmā:

—Kwa Ijaew kêt xwýnhjê mā Tīrtūm kapēr jarēnh kêt nē. Ja mex kêt. Anē.

Mē ate Jejus kôt amnhī xunhwýr nē nhýrmā Tīrtūm wa kuri atír tūm nē apaja mē kām hprām kêt jakamā na htem ā mē anē àmnàr o pa anhýrja o amnhī tomnuj nē. Mē kot amnhī tomnuj týx o mē pa xwýnh jakamā na Tīrtūm mē kamā gryk nē. Koja nhýrmā mē kot amnhī xà htýx kamā hamak tūm xà hwýr mē rēnh pa.

Pawre akupým Tesarōn nhō xwýnhjê hwýr hkrā hā harēnh

Atre 17.10-13

¹⁷ Nē ma mē awýr mē inhmōr tā mē anhō krī kamā mē kêp Kris kwý hkēt xwýnhjaja na pre mē ixpumu nē mē anē mē ijano pa prem ijapōj nē hpānhā ma nhýhým krī hō hwýr ixpa. Nom arī mē amā ijamaxpēr rāhā nē mē ato ijamak o ri ixpa nē xatā akupým mē awýr ixkrā.

18 Na pa prem inhmã akupÿm mẽ awÿr inhmõr prãm tÿx nẽ. Ixpê Pawre na pa pre xatã mẽ awÿr ixkrà htã nhũm Satanasti tanhmã mẽ anê ixpê amnàr to pa kormã mẽ awÿr inhmõr kêt nẽ. ãm tee ri inhmõr prãm kaprÿ.

19-20 Mẽ inhmã mẽ akĩnh tÿx. Mẽ ate Tirtũm kôt amnhĩ nhĩpêx mex jakamã koja nhÿrmã Pahihti Jejus akupÿn mẽ pahwÿr wrÿ pa mẽ akuri xa nẽ kãm mẽ ajarẽnh o:

–Pa Pahihti. E Tesarõn nhõ xwÿnhjê pumu. Na ka pre mẽ hwÿr inhmẽ pa mẽ hwÿr mõi nẽ mẽ kãm ajarẽ nhũm prem inhma nẽ amnhĩ kaxyw akôt hamaxpêr tÿx nẽ akôt amnhĩ xunhwÿ. Tã na htem akôt tãm amnhĩ nhĩpêx rãhã ho pa.

Anhÿr o kãm mẽ ajarẽ nẽ mẽ anhÿ hã ixkĩnh tÿx kumrêx.

3

Pawre kot Tesarõn wÿr Ximotre mẽnã ã harẽnh

Atre 17.14-15, 18.5

1-5 Nẽ kormã mẽ akôt ixpa ri na pa pre Kris kwÿ hkêt xwÿnhjaja kot Kris ã tanhmã mẽ atomnuj to hkukamã mẽ amã mẽ harẽ ka prem mẽ inhma. Na htem ã Kris ã mẽ pahkurê xwÿnhjaja mẽ panhĩpêx anhÿr o pa. Tã nhũm prem ã mẽ anhĩpêx anê pa mẽ ajarẽnh ma nẽ tee ri mẽ akukamã ijamaxpêr nẽ axpên mã mẽ ajarẽnh o:

–Hêxta waa nẽ. Kwa mẽ kot Jejus ã tanhmã mẽ homnuj toja mÿrapê mãn mẽ tee ri amnhĩ kukamã hamaxpêr nẽ Jejus kaga rÿ ko. Mãn ra Satanasti tanhmã mẽ kãm Jejus o hêx to nhũm mẽ kuma nẽ tanhmã hamaxpêr to nẽ hkaga. Kwa mãn pu prem ã mẽ kãm Tirtũm kapêr jarẽnh kaprÿ nã? Anê.

Hãmri nẽ tee ri mẽ akukamã ijamaxpêr nẽ mẽ awÿr Ximotre mẽnã kaxyw nẽ kãm:

–Mãn ra Tesarõn nhõ xwÿnhjaja Jejus ã tanhmã mẽ homnuj to nhũm mẽ amnhĩ xa htÿx kamã hamak o ra tee ri amnhĩ kukamã hamaxpêr. Kwa ma mẽ hwÿr mõi nẽ ja hã mẽ omu. Hãmri nẽ mẽ kot Kris kôt amnhĩ xunhwÿr tÿx kaxyw mẽ hamaxpêr o axihtÿx.

Hãmri nẽ akupÿn wa ixwÿr mõi nẽ wa inhmã tanhmã mẽ harẽnh to. Kot paj Siras mẽ wa akutêp jar Atenas kamã wa arĩk. Anê.

Hãmri nẽ mẽ awÿr kumê. Ximotre na hte Siras mẽ wa inhĩhkô hã mẽ kãm Tirtũm kapêr jarẽnh o pa. Nẽ Kris kot tanhmã mẽ panê amnhĩ nhĩpêx toja nhũm wa inhĩhkô hã mẽ kãm harẽnh o pa. Tã pa pre mẽ awÿr kumê nhũm ma mẽ awÿr mõi pa Siras mẽ wa Atenas kamã kutêp arĩk.

Ximotre akupÿn mõi nẽ Pawre mã mẽ harẽnh

6 Tã nhũm ra ham akupÿn mẽ arũm wa ixwÿr mõi nẽ wa inhmã tanhmã mẽ ajarẽnh to pa wa mẽ ajarẽnh ma nẽ ixkĩnh nẽ. Na ka xep htem arĩ amnhĩ kaxyw Kris kôt ajamaxpêr tÿx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpêr nẽ ixpyrà nẽ mẽ amã mẽ ixpumunh prãm o ri apa.

7 Nã ãm hãmri na ka htem ã amnhĩ nhĩpêx anê. Na pa wa ra jar ixpunuj nẽ ixpa nẽ Kris ã amnhĩ xa htÿx kamã ijamak tã mẽ ajarẽnh ma nẽ tãm ijamaxpêr.

8 Tesarõn nhõ xwÿnhjaja kot Kris ã tanhmã mẽ anhĩpêx to htã ka mẽ arĩ hkôt amnhĩ xunhwÿr tÿx rãhã nẽ. Pa wa mẽ ajarẽnh ma nẽ mẽ anhÿ hã ixkĩnh pẽ tanhmã Pahihti Jejus mã amnhĩ nhĩpêx to ho ri ixpa.

9 Nã na pa hte wa mẽ anhÿ hã ixkĩnh nẽ. Nẽ xatã Tirtũm mã mẽ ajarẽ nẽ kãm:

–Pa Tirtũm. Nã ãm hãmri na ka pre amnhĩ kôt Tesarõn kãm akwÿjê xunhwÿr tÿx nẽ nhũm htem akôt amnhĩ nhĩpêx mex rãhã ho pa. ãm hãmri na ka hte ã mẽ hipêx anê. Na pa hte mẽ kot amnhĩ nhĩpêx mã ijamaxpêr o ri ixpa nẽ ixkĩnh nẽ.

Anhÿr o kãm mẽ ajarẽ.

10-11 Nom kãm ja pix jarẽnh kêt nẽ. Na pa hte wa mãânên arĩgro hã nẽ kamàt kãm amnhĩ to Mẽpanhĩpêêxã Tirtũm mẽ Pahihti Jejus Kris wa hwÿr kãm ixihtÿx rãhã ho ixpa nẽ wa kãm:

—Kwa Tirtūm mẽ Jesus wa. Na pa wa ra inhmā Tesarōn wỳr inhmōr nẽ mẽ pahkwỳjê pumunh prām tỳx nẽ. Kormā mẽ kot akapēr jatur xà mar kêt. Tā wa inhmā akupỳm mẽ hwỳr wa inhmōr nẽ mẽ kām akapēr jatur xàm mēnh prām. Mẽ kot mar nẽ akôt amnhĩ nhĩpêx mex o pa kaxyw. Kwa xàt ka wa akupỳm mẽ hwỳr wa inhmẽ nà? Anẽ.

Na pa hte wa ã amnhĩ to wa hwỳr rāhā ho ixpa anẽ. Tā koja wa akupỳm mẽ awỳr wa inhmẽ pa wa ma mẽ awỳr inhmōr kurê kumrêx.

¹² Koja Tirtūm tanhmā mẽ akrā hto ka mẽ amā axpēn kīnh pē tanhmā axpēn to ajuta hto ho ri apa. Nẽ mẽ amā akwỳjê hā ma ho te mẽ kam amā amnhĩ tā ma pyrāk o ri apa. ã kot kaj mẽ apiitā axpēn nhĩpêx anẽ. Te wa inhmā mẽ akīnh pē tanhmā mẽ ato mex to pyrāk.

¹³ Koja Tirtūm ja kaxyw tanhmā mẽ akrā hto ka mẽ tām ajamaxpēr mex nẽ. Kêr kê Jesus nhỹrmā akupỳn wrỳ. Mẽ kot hkôt amnhĩ xunhwỳr xwỳnhjê mẽ ro hā akupỳn wrỳ. Hāmri ka mẽ Mēpanhĩpêxà Tirtūm kutā amnhĩ kukamā ajamaxpēr nẽ tām mẽ ate amnhĩ nhĩpêx ã amnhĩ pumunh kôt akīnh nẽ apikunhar o kuri akuhê. No ri tee ri amnhĩ kamā ajamaxpēr nẽ ajakwamnajre nẽ akuhê hkêt nẽ.

4

Tirtūm kām mẽmoj prām ã harēnh Rōmān 13.11-14; Epes 5.3-14

¹ E Jesus kôt ixkwỳjaja. Na pa prem ma mẽ awỳr mō nẽ Tirtūm kapēr o mẽ ajahkre ho ri mẽ akôt ixpa. Mẽ ate mar nẽ Tirtūm kām hprām xà hkôt tanhmā amnhĩ nhĩpêx to kaxyw. Ka prem mẽ inhma nẽ hkôt amnhĩ nhĩpêx mex o ri apa. Tā kot paj axte ja hā tanhmā mẽ amā karō hto. Pahihti Jesus nhỹ hā axte mẽmoj tā mẽ amā karō. Jakamā kwa kêr ka mẽ arĩ Tirtūm kapēr kôt pix mã ri amnhĩ nhĩpêx mex nẽ y hā amnhĩ to htỳx pē ã amnhĩ nhĩpêx anhỹr o ri apa.

² Na pa prem ra Jesus nhỹ hā mẽ amā mẽmoj tā karō. Mẽ ate hkôt amnhĩ nhĩpêx prām xàj mẽ amā hā karō ka prem mẽ inhma.

³ Nà mẽ pahte tām amnhĩ nhĩpêx o papaja na Tirtūm kām hprām. No kêt mẽ pahtỳx ri nhām mēnijê ho amnhĩkati o papaja na kām hprām kêt.

⁴ Jakamā kwa kêr ka mẽ amyjaja aprō pix tănopxar o ri apa. No mẽ ri nhām mēnijê ho amnhĩkati ho ri apa hkêt nẽ. Nẽ mẽ anijaja kêr ka mẽ amjên pix tănopxar o ri apa. No mẽ ri nhām mẽmyjê ho amnhĩkati ho ri apa hkêt nẽ.

⁵ Jesus kwỳ hkêt xwỳnhjaja kot htỳx ri kām hprām xà hkôt mēnijê hwỳr mrar nẽ mẽ ho amnhĩkati htā kêr ka mẽ ho mẽ urāk kêt nẽ. Kwarĩ ho kwarĩ.

⁶ ã mẽ kot amnhĩ nhĩpêx anhỹr xwỳnhjaja koja Tirtūm nhỹrmā mẽ homnuj tỳx kumrêx. Na pa prem ra mẽ amā ja jarē ka prem mẽ inhma. Jakamā kwa kêr ka mẽ ã amnhĩ nhĩpêx anhỹr o ri apa hkêt nẽ.

⁷ Xà na pre Tirtūm ã mẽ pahte amnhĩ nhĩpêx anhỹr kaxyw amnhĩ wỳr mẽ pahwỳ nẽ mẽ pahto hkra? Nà ja kaxyw na pre mẽ pahto hkra hkêt nẽ. ãm mẽ pahte tām amnhĩ nhĩpêx o ri papa kaxyw nẽ tām ri axpēn nhĩpêx o ri papa kaxyw na pre mẽ pahto hkra.

⁸ Jakamā kot kaj mẽ atō ja hā mẽ inhma nẽ ãm mẽ inhma nẽ arĩ ã amnhĩ nhĩpêx anẽ. Hāmri nẽ mẽ pajaja mẽ ixkapēr nhĩrôp axām kêt nẽ. Tirtūm kapēr nhĩrôp kot kaj xa. Nẽ mãănēn kot mẽ pahwỳr Karō mēnh xwỳnhja kapēr nhĩrôp kot kaj xa.

⁹ Nẽ mẽ amā axpēn kīnh pē axpēn to mex o apa hprām xàj na pre Tirtūm tanhmā mẽ amā kapēr o amnhĩrit to ka htem ã axpēn nhĩpêx anhỹr o ri apa. Jakamā kot paj mẽ axte ja hā tanhmā mẽ amā nẽ hkêt nẽ.

¹⁰ Na ka mẽ ra amā axpēn kīnh pē te mẽ kam amā amnhĩ tā ma pyrāk o axpēn nhĩpêx o ri apa. Nẽ pika pē Masetōn kamā Kris kôt mẽ akwỳjaja ka mẽ mãănēn amā mẽ hkīnh pē ã mẽ

hipêx anê. Tã kêr ka mẽ arĩ ã amnhĩ nhĩpêx anhÿr rãhã nê.

¹¹ Kot kaj mẽ ã amnhĩ nhĩpêx anê hãmri nê ajamakêtkati nê axãmnhĩx axápênh pix tânopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêr nê. Nê ãm amnhĩ pix tânopxar o ri apa. Nê amnhĩ pa kukwak ri axàpkur kaxyw amnhĩm axápênh mex o ri apa. Na pa prem ra ã ja hã mẽ amã karõ anê.

¹² Kot kaj mẽ ã amnhĩ nhĩpêx anê hãmri nê amã prãm xaj axàhwÿr o ri apa hkêr nê. Nhũm Kris kwÿ hkêr xwÿnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwÿnhjê hã mẽ ajarênh kurê kumrêx.

*Kris kwÿ htyk xwÿnhjê jarênh
Matêwre 24.29-31; Wam Korĩt
15.51-58*

¹³ E Kris kôt ixkwÿjaja. Na ka xep mẽ tee ri Kris kôt akwÿ htyk xwÿnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwÿ hkêr xwÿnhjaja na htem ty nhũm mẽ hkwyjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wÿr àpir kêt jakamã na htem mẽ mÿr pê hkaprĩ htÿx nê pa. No mẽ papajaja na pu htem ho mẽ urak kêt nê.

¹⁴ Jejus na pre ty nhũm Tĩrtũm akupÿm ho htĩr. Tã ra ã kot hipêx anhÿr jakamã koja nhÿrmã Jejus akupÿn wrÿ nê mẽ kot hkôt amnhĩ xunhwÿr nê htyk xwÿnhjê karõ nhũm mañ amnhĩ kôt kaxkwa rũm mẽ o wrÿ. Na pu htem ã ja kôt pajamaxpêr anê.

¹⁵⁻¹⁶ Na pre Pahiti Jejus inhãmã hkôt mẽ pahkwÿ htyk xwÿnhjê jarênh o:

—Kot paj nhÿrmã akupÿn mẽ awÿr wrÿ ka mẽ ate ixkôt amnhĩ nhĩpêx xwÿnh piitã ma ixkutã axàpir o mẽ. Nom kot kaj mẽ arĩ atĩr nê apa xwÿnhjaja akumrêx axàpir kêt nê. Kormã. Koja Tĩrtũm kapêr o mẽ wrÿk xwÿnh krãhtũmja Tĩrtũm mã pifti kakô. Kakôr tÿx pa ixkwÿ htyk nê hikwÿ xwÿnhjê mã ixkapêr nê ixãmra

kamã mẽ kumra. Nhũm mẽ hkarõ akupÿn mẽ hwÿr wrÿ nê mẽ kãm gjêx pa. Hãmri nhũm mẽ akupÿm htĩr nê kãnhmã hkrĩ hpa nê ma kumrêx ixkutã àpir o mẽ.

¹⁷ Hãmri ka mẽ ate ixkôt amnhĩ xunhwÿr xwÿnh arĩ mẽ atĩr nê apa xwÿnhjaja ka mẽ hã ajêt nê mẽ atipxi nê ma ixkutã axàpir o mẽ pu mẽ kakrã kamã axpên kaxpa. Hãmri nê mẽ pahpimràatã ma kaxkwam api nê inhõ krĩ hwÿr pøj. Kaj mẽ Tĩrtũm mẽ wa ixkuri amex kumrêx nê atĩr tũm nê apa ho apa. Anê.

¹⁸ ã Pahiti Jejus inhãmã mẽ pakukamã mẽ pajarênh anê. Jakamã kwa kêr ka mẽ tee ri mẽ pahkwÿ htyk xwÿnhjê hkukamã ajamaxpêr hkêr nê. ã ixujarênh anhÿrta ã anohtÿx pê axpên jamaxpêr o axihtÿx o ri axpên kôt apa.

5

Mẽ pahte akupÿn Jejus wrÿk xà hã arĩgro pumunh kêt ã harênh

Matêwre 24.32-25.13; Wam Pêtre 3.8-13

¹⁻² Nê mẽ pahte Jejus akupÿm wrÿk xà hã arĩgro pumunh kêt jakamã kot paj mẽ amã tanhmã hã kagà hto hkêr nê. Koja nhÿrmã akupÿn mẽ pahwÿr nojarêt hãmri nê te kot mẽ ahkĩnh xwÿnh kot amnhĩ nhĩpêx pyrã nê mẽ pajaêr pê mẽ pahwÿr wrÿ.

³ Jakamã koja kormã wrÿk kêt ri nhũm Kris kwÿ hkêr xwÿnh kot amnhĩ wÿr kamã hamak kêt xwÿnhjaja hãmri mex nê pa hã amnhĩ pumu nê hkĩnh nê pa. Nê axpên mã kapêr o:

—Nà koja Tĩrtũm tanhmã mẽ pahto hkêr nê. Arĩ mẽ pamex nê ri mẽ papa kênã. Nà kot puj mẽ paxãmnhĩx ri pajamakêtkati nê ri papa ho papa.

Anhÿr o axpên mã kapêr rôm nhũm puh Jejus mẽ haêr pê akupÿn wrÿ. Hãmri nê ma mẽ kot amnhĩ xà htÿx kamã hamak o pa htũm xà hwÿr mẽ rênh pa nhũm mẽ tee ri kêt hpimxur prãm kaprÿ. Te mẽ htujarô xwÿnh kot amnhĩ nhĩpêx pyrãk. Na htem mex nê pa htã hpijagri kaxyw ôhy xà

htỳx kumrẽx nẽ tee ri kãm õhy xà hkêt prãm kaprỳ ho hikwỳ.

⁴ Nom mẽ kajaja kot kaj mẽ urà nẽ amnhĩ jaer pẽ akupỳm wrỳk kãm omu nẽ tee ri amnhĩ kukamã ajamaxpẽr o akaprĩ hkêt nẽ.

⁵ Mẽ pahpẽ Jejus kwỳ jakamã na pu htem kapẽr kõt ri tãm amnhĩ nhĩpẽx o ri papa. Jao te mẽ pahte mẽ kẽp Jejus kwỳ hkêt xwỳnhjẽ kot amnhĩ nhĩpẽx pyræk kêt.

⁶ Na htem mẽ pahkĩnhã akupỳn wrỳk kukamã hamaxpẽr kêt nẽ. Te htỳx ri mẽ õt rãhã ho hikwỳ pyræk. Nom mẽ papajaja na pu htem akupỳn wrỳk kamã pajamak o papa pẽ kãm tanhmã amnhĩ nhĩpẽx mex to rãhã ho ri papa.

⁷ Te kot ja pyræk. Na htem kamàt kãm gõr nẽ mẽmoj mã hamaxpẽr kêt nẽ htỳx hikwỳ. Nẽ mẽ hkwỳjaja kamàt kãm axpã nẽ htỳx ri tanhmã amnhĩ tomnuj to ho pa. Jao hamaxpẽr mex kêt nẽ. Tã mẽ kẽp Jejus kwỳ hkêt xwỳnhjaja hte mẽ uræk nẽ htỳx ri tanhmã amnhĩ tomnuj to ho pa nẽ akupỳn Jejus wrỳk mã hamaxpẽr kêt nẽ.

⁸ No kêt mẽ papajaja. Mẽ pahte hkõt amnhĩ xunhwỳr xwỳnhjaja. Kẽr pu mẽ ho mẽ uræk kêt nẽ. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkõt amnhĩ nhĩpẽx pymaj kẽr pu mẽ mẽmoj punuj pẽ amnhĩ to htỳx rãhã ho ri papa.

Nẽ amnhĩ kaxyw Jejus kõt pajamaxpẽr tỳx rãhã nẽ.

Nẽ mẽ pamã mẽ piitã mẽ hkĩnh pẽ mẽ kutã panojarêt rãhã ho ri papa.

Nẽ nhỹrmã Tĩrtũm mẽ hkra Jejus wa kuri pahtĩr tũm nẽ papa ho papa hkukamã mãn pajamaxpẽr rãhã o ri papa.

Kot puj mẽ ã amnhĩ nhĩpẽx anẽ hãmri nhũm Satanasti tee ri mẽ pahte amnhĩ tomnuj prãm xàj mẽ pahkrãm pajamaxpẽr punuj jagjẽnh kaprỳ.

⁹ Xà na pre Tĩrtũm mẽ pakamã gryk kãm mẽ kot amnhĩ xà htỳx kamã hamak tũm xà hwỳr mẽ pa-janor kaxyw mẽ parê? Nà na pre ja

kaxyw mẽ parẽnh kêt nẽ. ãm Pahihiti Jejus Kris kukwak ri kot amnhĩ katut kõt mẽ pahte amnhĩ tomnuj rẽnh par nẽ mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nà nhỹrmã Tĩrtũm mẽ wa kuri mẽ pamex kumrẽx nẽ pahtĩr tũm nẽ papa ho papa hprãm xàj na pre mẽ panê ty. Jakamã koja nhỹrmã akupỳm amnhĩ kõt ma mẽ pahto àpir kaxyw akupỳn mẽ pahwỳr wrỳ pu mẽ amnhĩ kaxyw hkõt pajamaxpẽr xwỳnh piitã ma hkõt kaxkwa hwỳr api hãmri nẽ Tĩrtũm wa kuri pamex nẽ pahtĩr tũm nẽ papa ho papa. Kormã mẽ pahtĩr ri mẽ papa xwỳnhjaja nẽ ra mẽ htyk nẽ hikwỳ xwỳnhjaja nhũm akupỳm mẽ ho htĩr. Hãmri nẽ mẽ pahto hpimràatã amnhĩ kõt mẽ pahto àpir pa. Mẽ pahte hkõt amnhĩ xunhwỳr xwỳnh piitã koja Jejus nhỹrmã akupỳn wrỳ nẽ ã mẽ panhĩpẽx mex anẽ.

¹¹ Tã ã kot anhỹr jakamã kwa kër ka mẽ jam ajamaxpẽr o apa pẽ axpẽn jamaxpẽr o hihtỳx o ri axpẽn kõt apa. Nẽ Jejus kõt axpẽn jamaxpẽr o hihtỳx o ri axpẽn kõt apa. Ra ã mẽ ate axpẽn nhĩpẽx anhỹr tã kër ka mẽ arĩ ho anhỹr rãhã ho ri apa nẽ aa hkaga hkêt nẽ.

Tĩrtũm kapẽr o mẽ pajahkre xwỳnhjẽ jarẽnh

Karatas 6.6; Wam Ximotre 5.17-19

¹² Nẽ kwa Kris kõt ixkwỳjaja. Na hte mẽ kot Tĩrtũm kapẽr o mẽ ajahkre xwỳnhjaja mẽ ajahkre mex pẽ Tĩrtũm mã mẽ ajamãr mex o pa. Na htem ã mẽ anhĩpẽx mex anhỹr rãhã ho ri mẽ akõt pa. Tã kwa kër ka mẽ amnhĩ tã mẽ omu nẽ mẽ kapẽr mar tỳx nẽ.

¹³ Nẽ mẽ hã apijaam pẽ tanhmã mẽ ho mex to ho apa.

Nẽ kwa kër ka mẽ tãm axpẽn nhĩpẽx nẽ axamnhĩx ri ajamakêtkati nẽ axpẽn kõt ri apa ho apa.

Mẽ pahte tanhmã Kris kõt mẽ pahkwỳjẽ nhĩpẽx to hã mẽ pamã karõ
Epes 4.1-6

¹⁴ Nẽ koja Kris kõt mẽ anhĩõ kãm kaga nẽ pa ka mẽ ja hã omu nẽ kãm

anē kē ā amnhī nhīpêx anhÿr kêt nē. Kê hpānhā amnhī xàpkur xà kaxyw àpēnh o pa.

Nē mē kām ma ho mē pa xwÿnhjaja ka mē kām mē hamaxpēr o axihtÿx o ri mē hkôt apa.

Nē kormā amnhī kaxyw Jejus kôt mē hamaxpēr tohtuj anhÿr xwÿnhjaja ka mē tanhmā Jejus kôt mē ho mē axihtÿx to kē mē hkôt amnhī nhīpêx mex o pa.

E kēr ka mē ā mē axpēn nhīpêx anhÿr o ri apa nē axpēn kamā agryk tokyx anhÿr kêt nē.

¹⁵ Nē koja mēhō tanhmā atomnuj to ka mē ām omu nē amnhī tā tanhmā ho hkêt nē. Ām ho mex o ri apa. Nē mē piitā tanhmā mē ho mex to hpix kukamā ajamaxpēr rāhā nē.

¹⁶ Ā mē pahte amnhī nhīpêx anhÿr o papaja na Tirtūm kām hprām.

Mē pahpê hkra hā pahkīnh rāhā papaja na kām hprām.

¹⁷ Nē mē pahte Tirtūm mā amnhī jarēnh rāhā ho papaja na mǎānēn kām hprām.

¹⁸ Nē tanhmā mē pakute htā arī Tirtūm mā mex o mex ā harēnh o papaja na mǎānēn kām hprām. Mē pahkīnh nē papa kamā kām mex o mex ā harē. Rÿ mē pahpunuj nē papa htā arī kām mex o mex ā harē. Rÿ nhūm mēhō tanhmā mē panhīpêx to htā pu mē arī kām mex o mex ā harē.

Ā mē pahte amnhī nhīpêx anhÿr o papaja na Tirtūm kām hprām.

Mē pahte tanhmā Tirtūm Karō nhīpêx to hā mē pamā karō

¹⁹ Nē koja Tirtūm Karō mē amā mēmoj tā tanhmā kapēr o amnhīrīt to ka mē ama nē hkôt amnhī nhīpêx kurê kumrēx. Rÿ mēhō mā tanhmā akapēr to kurê kumrēx. No kēr ka mē ama nē ām ama nē atÿx ri hā apa hkêt nē.

²⁰ Rÿ nhūm mēhō Tirtūm Karō nhÿ hā tanhmā mē amā kapēr to ka mē ama nē agryk nē tanhmā ho akapēr punuj to hkêt nē.

²¹ Koja Tirtūm kapēr kôt tanhmā mē amā mēmoj jarēnh to nē ām hāmri

Tirtūm Karō nhÿ hā harēnh ā amnhī jarē. Ka mē ama nē hkôt amnhī nhīpêx.

²² No koja Tirtūm kapēr kwÿm ri tanhmā mēmoj jarēnh to hāmri nē Tirtūm Karō nhÿ hā ja jarēnh kêt nē. Ām amnhī krā hkôt harē. Ka mē tee ri ama nē amnhī krā kamā kapēr xir tÿx kêt nē. Jao hkôt amnhī nhīpêx kêt nē.

Tanhmā Pawre kot mē ho Tirtūm wÿr to hā harēnh

Wam Tesarōn 3.3, 16

²³ Nē na pa hte mē ato Tirtūm wÿr o ri ixpa nē kām:

—Pa Tirtūm. Nà ate mē inhmā mē ijamakêtkati xà nhōr jakamā na pa htem anhÿ hā ixāmnhīx ijamakêtkati nē ri ixpa. Jakamā kwa kēr ka tanhmā Tesarōn kamā akwÿjê ho kē mē amnhī to mex rāhā ri pa. Jao tām amnhī nhīpêx nē tām ri hamaxpēr rāhā nhūm Pahihti Jejus Kris akupÿn mē ixwÿr wrÿ.

Anhÿr o mē ato kuwÿ.

²⁴ Tā koja ā mē anhīpêx anē. Ra kot amnhī jarēnh xà hkôt. Ā mē anhīpêx anhÿr kaxyw na pre amnhīm mē arē.

Kagà jatur xà

²⁵ E Kris kôt ixkwÿjaja. Kwa kēr ka mē amnhī xwar ixto Tirtūm wÿr o apa.

²⁶ Nē kēr ka mē atar Kris kôt mē pahkwÿjê piitā mē kām mē ijarē.

²⁷⁻²⁸ Nē kē Pahihti Jejus Kris mē akutā nojarêt rāhā ho pa. Ixte Pahihti nhÿ hā ā mē amā ixkapēr nē hā kagà anhÿr jakamā kēr ka mē atar Kris kwÿjê piitā mē kām kamā harē kē mē piitā ixkapēr ma.

Tā ām ja pix na hapêx. Ixpê Pawre na pa ā mē amā kagà nhīpêx nē mē awÿr mēnh anē.

Sikũn Tesarõn
Pawre kot Tesarõn kamã
Jejus kõt kwýjê hwýr wam
kagà nê mênh kõt hõ kagà
nê mênh

Pawre na pre kagàja nhîpêx nê ma Tesarõn kamã Jejus kõt hkwýjê hwýr kumê. Na pre hte Tesarõn kamã mē kãm Jejus ã mē hkurê xwýnhjaja Jejus ã tanhmã mē homnuj to nhũm mē amnhĩ xà htýx kamã hamak o pa. Hãmri nhũm Pawre mē harênh ma nê kagàja nhîpêx nê mē hwýr kumê. Nê kamã mē kãm mē hamaxpêr o hihtýx. Nê mē kot arĩ Tirtũm kõt amnhĩ nhîpêx mex o pa nê hamaxpêr kõt hamaxpêr o pa hã mē kãm karõ. Nê nhýrmã Jejus akupýn kaxkwa rũm mē pahpê hkrajê hwýr wrýk nê pika ho hapêx par ã mē kãm harê. ã na pre Pawre mē kãm kagàja kamã mē kãm ujarênh anê. Nê mē kãm:

¹ Pa Tesarõn nhõ xwýnh kot Tirtũm kapêr mar kaxyw axpên wýr mē apikuprõnh xwýnhjaja? Xà mē amex na ka mē apa? Ixpê Pawre na pa axte mē awýr kagà nhîpêx nê kumê. Siras mē Ximotre mē pa mē awýr kumê. Nà mē pahpê Mēpanhîpêxà maati Tirtũm mē Kra Jejus Kris kwý na pu mē.

² Jakamã na pa htem mē ato wa hwýr rãhã ho ri ixpa. Wa kot mē akutã nojarêr rãhã ka mē ajamakêtkati nê apa kaxyw. Nê mēmoj to mē akutã wa nojarêr rãhã ho pa kaxyw.

Tirtũm kot nhýrmã hkrajê nhîpêx kati xwýnhjê homnuj týx ã harênh

Wam Pêtre 4.12-19

³ Nê na ka htem amnhĩ kaxyw Tirtũm mã ajamaxpêr týx mex o ri apa. Nê axpên kutã anojarêr rãhã nê. Na pa htem ã mē ate amnhĩ nhîpêx anhýrja mã ijamaxpêr nê mē anhý hã ixkĩnh nê Tirtũm mã mē anhý hã ixkĩnh ã amnhĩ jarê.

⁴ Nê nhýhým ixpa nê nhýri krĩm agjê nê kamã Tirtũm kõt mē pahkwýjê mã mē ato amýra nê mē kãm:

—E pa mē amã Tesarõn kamã Kris kwýjê jarê ka mē inhma. Nà mē õ krĩ kamã mē hkwýjaja na htem Kris ã mē hipêx kati ho pa nhũm htem amnhĩ xà htýx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkõt amnhĩ nhîpêx mex rãhã ho pa. Anê.

⁵ ã mē ate mē kutã amnhĩ nhîpêx anhýr o apaja na hte Tirtũm hã mē apumu nê hkĩnh nê pa. Nê mē akukamã hamaxpêr o:

—Mê kot Ixkra Jejus ã tanhmã mē hipêx to ho pa htã ãm hãmri na htem mē kutã amnhĩ to htýx o pa nê mē umaj wa ixkaga hkêt nê. Na htem ã amnhĩ nhîpêx anê nê mē kêp ixkra hã amnhĩ to amnhĩrĩt mex nê. Nà koja mē nhýrmã wa ixri mex kumrêx nê htĩr tũm nê pa ho pa.

Anhýr o hamaxpêr.

⁶ Nê mē kot Kris ã mē anhîpêx punuj xwýnhjaja koja Tirtũm nhýrmã mē atã mē homnuj týx nê nhũm mē amnhĩ xà htýx kamã hamak rãhã ho pa. ãm hãmri koja ã mē atã mē hipêx anê.

⁷⁻¹⁰ Koja Pahihti Jejusja nhýrmã man akupýn pika hwýr hirã htýx kãm wrý nhũm Tirtũm kapêr o mē wrýk xwýnh xihtýx xwýnhjaja man hkõt wrý. Koja mē wrý hãmri nê mē kot amnhĩ tomnuj xwýnhjê homnuj týx kumrêx. Jao ma mē kot amnhĩ xà htýx kamã hamak tũm xàta wýr mē rênh pa nhũm mē kamã htĩr tũm nê amnhĩ xà htýx kamã hamak rãhã ho pa ho pa. Koja ã Pahihtija amnhĩ nê mē kot hkõt amnhĩ xunhwýr kêt xwýnhjê rênh anê nhũm mē pahkĩnhã Tirtũm mē Krata wa kuri mex nê pa hkêt nê. Nê mē pahkĩnh ã wa mex o wa mex nê wa hihtýx o wa hihtýx ã wa omunh kêt nê. Koja Pahihti Jejus nhýrmã akupýn wrý nê ã mē panê mē hipêx anê. Koja wrý pu mē amnhĩ kaxyw hkõt pajamaxpêr xwýnhjaja amnhĩ wýr omu nê

pahkînh nê. Hâmri nê amnhî nhî nyw
ã amnhî pumu nê kãm:

—Hêxta waa nê. Amex o amex Pahihiti. Na ka pre mẽ inhnê ty hãmri nê mẽ inhmã mẽ inhî nyw gô. Kot paj mẽ Tirtûm mẽ war ari inhmex kumrêx nê ixtîr tûm nê ixpa ho ixpa. Âm hãmri na ka ã mẽ ixto mex anê. Nà amex kumrêx o amex kumrêx Pahihiti. Anê.

Ã kot puj mẽ pahpê hkwyjaja amnhî tã kãm mex o mex ã harênh anê. Ra mẽ ate mẽ ixkapêr mar nê hkôt amnhî xunhwÿr jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tirtûm wÿr ã harênh

11-12 Nê na pa htem mẽ ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akra-jaja na pa mẽ ho awÿ. Na ka hte Akra Pahihiti Jejus Kris mẽ wa mẽ ho mex rax o apa. Jao amnhîm mẽ arê nhûm mẽ ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mẽmoj to axpên kutã nojarêr o pa. Jakamã kwa tanhmã mẽ hkrã hto kê mẽ akôt ã amnhî nhîpêx anhÿr rãhã ho pa. Kêr ka mẽ kot akôt amnhî nhîpêx o pa hã mẽ omu nê akînh nê mẽ kãm mẽ mex ã mẽ harê. Nhûm mẽ ate tanhmã mẽ ho mex to hã amnhî tã apumu hãmri nê mẽ amnhî pyrà nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mẽ panhõ Pahihiti Jejus Kris akupÿn wÿr pu mẽ ma kutã api nê kakrã kamã hkaxpa. Jakamã kwa Jejus kôt ixkwÿjaja.

² Koja mēhõ mẽ awÿr mō nê mẽ amã Jejus ra akupÿn wÿr ã harênh japêr. Rÿ tanhmã mẽ amã Jejus hpôx xà hã arîgro jarênh o hêx to nê mẽ amã:

—Kwa na ra Jejus akupÿn nojarêr. Koja tokyx akupÿn mẽ pahwÿr wÿr.

Semãn ja kamã rÿ ko. Apu hõ hã koja apu wÿr rÿ ko.

Anhÿr o harê. Nê Tirtûm Karõ nhÿ hã ã kot mẽ amã harênh anhÿr ã amnhî jarê rÿ nhãm mēhõ kot ã kãm harênh anhÿr ã harê. Rÿ pa ixte harênh nê hã kagà hã ijarê. Nom kwa kêr ka mẽ kapêr ma nê âm ama nê hkôt ajamaxpêr kêr nê. Rÿ ama nê tee ri amnhî kukamã ajamaxpêr kêr nê. Koja mēhõ ã mẽ amã Jejus tokyx wÿr ã harênh anê nê âm amnhî krã hkôt ã harênh anhÿr o hêx. Nom Tirtûm Karõ nhÿ hã rÿ pa inhÿ hã rÿ nhãm Kris kôt mẽ panhõ nhÿ hã ã harênh anhÿr kêr nê.

³⁻⁴ Jakamã kêr ka mẽ âm mẽ kot harênh o hêxja ma nê hkôt ajamaxpêr kêr nê. Kormã Pahihiti Jejusja akupÿn nojarêr kêr. E kot paj ixprî hã mẽ amã ja jarê ka mẽ inhma. Nà kormã Pahihiti akupÿn nojarêr kêr ri koja mẽ ohtô rax kumrêx nê Tirtûm kutã amnhî xunhwÿr nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maatija amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mẽ kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihitija akupÿn wÿr nê ma hwÿr mēnh kêr ri koja mẽ piitã omu nê kēp Mēhpãm maati pixi hã harênh kaxyw mẽ kēp mẽ õ sãnti piitã hkrakrak pa. Nê mẽ kot mẽmo karõ ho amnhî pãm ã harênh xwÿnhja nhûm piitã hkrakrak pa. Hãmri nê axtem nê Tirtûm mã amnhî jarênh xà hã ixkre jatur xà kamã hitom wÿr axà nê kamã nhÿ nê hêx rom mẽ piitã mẽ kãm kēp Tirtûm ã amnhî to hêx nê mẽ kãm:

—E mẽ amnê ixpumu. Ixpê mẽ anhõ Tirtûm na pa. Pa kot kaj mẽ inhmã inhmex o inhmex ã ijarê. No kêr ka mẽ anhõ sãnti ho apãm o apa hkêr nê. Kwarĩ ho kwarĩ. Âm paxipix

ixpê Mēapām maati nē paxipix ixpê mē anhō Tirtūm.

Anhÿr o amnhĩ to hêx.

⁵ Na pa pre arĩ mē akôt ixpa ri ã mē amã harēnh anē. Mãn arĩ mē ate ja hã anohtÿx rÿ ko.

⁶ Nom kormã ã kot amnhĩ nhĩpêx anhÿr xã hã arĩgrota kormã kator kêt. Mēhō kormã kot kêp àmnâr jakamã nhũm kormã kator kêt nē. Ra mē ate kêp àmnâr xwÿnhja jarēnh mar. Tã koja hpôx xã hã arĩgro kato nhũm kêp àmnâr xwÿnhhta kãm pry kaprã nhũm rĩ kormã mō.

⁷ Nom na hte ra hpimxur pē Tirtūm nē mē piitã mē hkurê ho pa. Mē kot Tirtūm kôt amnhĩ xunhwÿr pymaj tanhmã nē mē ho ho pa. Nom kormã kêp àmnâr xwÿnhja kêp àmnâr jakamã nhũm hte mē noo mã tanhmã mē ho hkêt nē. Tã koja Tirtūm nhÿrmã kêp àmnâr xwÿnhja mã anē nhũm kuma nē kãm ure nhũm rĩ kormã amnhĩ to amnhĩrit nē mē piitã mē noo mã mō nē Tirtūm nē tanhmã mē kãm hêx to ho pa.

⁸⁻¹² Koja kato nē Satanasti mē wa mē piitã tanhmã mē nokupyr to ho ri mē hkôt pa. Nē hêx rom mē kãm aa mē kot mēmoj pumunh kêt kwÿ ho anhÿr o ri pa. Koja wa hêx rom te Tirtūm kot amnhĩ nhĩpêx pyrãk o ã amnhĩ nhĩpêx anē. Hãmri nhũm mē kot Jejus kôt amnhĩ xunhwÿr kêt xwÿnhjaja ja hã wa omu nē wa hkôt hamaxpêr kurê kumrêx. Nē ãm hãmri wa kapêr ã wa hkamnhĩx. Kop apu ra mē kot Tirtūm kapêr mar nē hkôt amnhĩ xunhwÿr ronhÿx ra Tirtūm amnhĩ tã mē omu nē mē ho hkra. Nom koja mē kãm kapêr mar prãm kêt nē. ãm wa kot amnhĩ to hêx o wa pa xwÿnhhta kôt pix mã koja mē kãm amnhĩ nhĩpêx prãm.

Ja mÿrapê koja Tirtūm tee ri ja hã mē omu hãmri nē mē nē wa kot amnhĩ tomnuj tÿx xwÿnhhta wa omunh kêt nhũm wa tanhmã mē kãm amnhĩ nhĩpêx to nhũm mē wa omu nē wa hkôt hamaxpêr kurê kumrêx. Hãmri nē wa gryk ã Tirtūm kaga jakamã nhũm nhÿrmã mē kot amnhĩ xã htÿx kamã hamak tũm xãja wÿr mē

rēnh pa.

Koja Satanasti mē kot amnhĩ tomnuj tÿx kumrêx xwÿnh maatita ã hêx rom tanhmã mē no kupyr to anhÿr o pa rãhã nhũm Pahihti Jejusja hirã rax kãm akupÿn mē pahwÿr wrÿ. Hãmri nē kot amnhĩ tomnuj tÿx kumrêx xwÿnh maatita ã amÿnê nhũm mē kãm hpĩr kurê kumrêx nhũm hapêx. Koja ã amnhĩ nhĩpêx anē.

Tirtūm kot tanhmã mē pahto mex to hã harēnh

Rômãn 8.28-30; Wam Tesarôn 2.13, 5.23-24

¹³ Nē amnepê m kormã mēmoj kêt ri na pre Tirtūm amnhĩm mē arê. Mē ate kapêr mar nē hkôt amnhĩ xunhwÿr nhũm kot mē ato hkra kaxyw mē arê. Kãm mē ajapêê. Na pre mē awÿr amnhĩ Karō rē nhũm mē akarō mã agjê nē tanhmã mē ajamxpêr to ka mē ÿ hã tãm amnhĩ nhĩpêx rãhã ho ri apa. Na pa htem ja hã mē amã ijamxpêr nē mē anhÿ hã ixkĩnh kãm Tirtūm mã mē ajarēnh o ri ixpa.

¹⁴ Na pre mē awÿr mē ixrê. Mē ixte mē awÿr ixpa nē mē amã tanhmã Jejus kot mē panê amnhĩ nhĩpêx to hã harēnh o ixpa kaxyw. Mē ate mē inhmar nē Jejus kôt amnhĩ xunhwÿr nhũm Tirtūm kot Pahihti Jejus Kris o mex pyrã nē tanhmã mē ato mex to kaxyw.

¹⁵ Jakamã kwa kêr ka mē ra mē ixte wam mē awÿr kagã mēnhhta kamã harē nē mar tÿx nē. Nē mē akôt mē ixpa ri tanhmã mē ixte mē ajahkre htoja mã ajamxpêr mex nē hã ano htÿx nē hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwÿjaja.

¹⁶ Mēpanhĩpêêxã maati mē Pahihti Jejus Kris wa kãm mē pajapê htÿx kumrêx. Na hte wa tanhmã mē pajamaxpêr o hihtÿx to ho pa pu mē wa ÿ hã tãm pajamaxpêr o ri papa. Nē wa ÿ hã nhÿrmã wa kuri pamex nē pahtĩr tũm nē papa hkukamã pajamaxpêr kaprÿ ho papa hkêt nē.

¹⁷ Na pa htem mē ato wa hwÿr o ixpa nē wa kãm:

—Pa Tirtûm mẽ Jejus wa? Kwa kêr ka wa tanhmã Tesarôn kamã akrajê mã mẽ hamaxpêr o hihtỳx to kê mẽ war anhỹ hã tãm amnhĩ nhĩpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mẽ pahte axpên to Tirtûm wỳr to hã kot mẽ pamã karõ

Korosê 4.2-4

¹ Nê kwa Kris kôt mẽ ixtõ nê ixtõxjaja. Kêr ka mẽ amnhĩ xwar mẽ ixto Tirtûm wỳr rãhã ho ri apa. Mẽ ixte krĩ piitã hkôt mẽ kãm Jejus jarênh o ri mẽ hkôt ixpa nhũm mẽ kot mẽ inhmar nê amnhĩ kaxyw Jejus kôt hamaxpêr kaxyw. Jao mẽ apyrã nê hkôt amnhĩ nhĩpêx mex o pa kaxyw.

² Nom koja mẽ piitã ã amnhĩ nhĩpêx anhỹr kêt nê. Mẽ hkwyjaja kãm Jejus jarênh mar prãm kêt jakamã kwa mẽ ixto Tirtûm wỳr kê mẽ inhnê mẽ omunh mex nê nhũm mẽ Jejus ã tanhmã mẽ ixto hkêt nê.

³ Nê koja Pahihti tanhmã mẽ akrã hto ka mẽ ajamaxpêr mex nê ỹ hã hkôt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xàj tee ri tanhmã mẽ anhĩpêx to kaprỹ nhũm Pahihti mẽ anê omunh mex nê. Ra kot mẽ atã amnhĩ jarênh xà hkôt.

⁴ Koja ã mẽ anê hipêx anê ka mẽ ỹ hã tanhmã mẽ ixte mẽmoj tã mẽ amã karõ xà hkôt amnhĩ nhĩpêx mex o ri apa.

⁵ Tã kê Pahihti tanhmã mẽ akrã hto ka mẽ Tirtûm pyrã nê mẽ piitã mẽ kamã axukaprĩ ho ri apa. Nê Pahihti Kris pyrã nê mẽmoj punuj kutã amnhĩ to htỳx nê. Jao hkôt amnhĩ nhĩpêx mex rãhã ho ri apa.

Mẽ kãm kaga xwỳnhjê jarênh

Wam Korõt 4.12; Epes 4.28; Wam Tesarôn 4.9-12

⁶ E kot paj hpãnhã Kris kôt mẽ pahkwỳ kãm kaga xwỳnhjê jarê ka mẽ inhma. Pahihti Jejus nhỹ hã kot paj mẽ amã tanhmã mẽ harênh to. Nà koja mẽ akwyjaja kãm kaga nê amnhĩm mẽmoj tã àpênh kêt japêr. Nê

mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêt japêr. Koja mẽ ã amnhĩ nhĩpêx anê ka mẽ ja hã mẽ omu hãmri nê mẽ hkôt ri apa hkêt nê.

⁷⁻⁸ Xà mẽ pajaja na pa prem ma mẽ awỳr mō nê mẽ akôt inhmã kaga nê mẽmoj tã ixàpênh kêt nê ri ixpa? Nà na pa prem mẽ apa kukwak ri ixàpkur pymaj ixàpênh rũnh nê amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamỳnh nê hkur kêt nê. Na pa prem hpãnhã mẽ amã amnhĩre nê kormã kuku. Tã kêr ka mẽ ã amnhĩ nhĩpêx anhỹr o ri axpên kôt apa nê amnhĩ pa pix kukwak ri apku. Nê mẽ amã kaga hã nhãm akwỳjê hpa kukwak ri axàpkur o ri apa kêt nê.

⁹ Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ xpumunh nê mẽ ixpyrã nê ã amnhĩ nhĩpêx anhỹr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nê hpãnhã mẽ inhmã mẽ ixàpkur xà nhõrja Jejus mã tanhmã kute hkêt tã pa prem ã amnhĩ nhĩpêx anhỹr kêt nê. Mẽ ate ja hã mẽ xpumunh nê mẽ ixpyrã nê ã amnhĩ nhĩpêx anhỹr kaxyw na pa prem amnhĩ pa pix kukwak ri ixàpkur o ri mẽ akôt ixpa.

¹⁰ Na pa prem mẽ amã ja hã karõ ho:

—Koja mẽhõ kãm kaga nê àpênh kêt nê ka mẽ ja hã omu nê kãm õ hkêt nê. Kwãr mãmri apkur kêt nê kãm prãm nê ri pa nê amnhĩ pumu. Anê.

¹¹ Tã xep ra mẽ akwyjaja ã amnhĩ nhĩpêx anê nê kãm kaga nê àpênh kêt nê amarĩ ri pa. Nê xep htỳx ri axpên jakwa kamã nhãm mẽ hixi ho rêr o ri pa.

¹² Kwa mẽ inhma Jejus kôt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarê ka mẽ inhma nê mẽ inhmar tỳx nê. Kêr ka mẽ kãm kaga xwỳnhjê mã anê kê mẽ jam ure nê hpãnhã àpênh mex o pa. Jao mẽ apyrã nê amnhĩ pa kukwak ri apkur o pa.

Kêr ka mẽ ã mẽ kãm ixkapêr jarênh anê.

¹³ Nê kwa kêr ka mẽ axpên to mex o apata kaga hkêt nê.

¹⁴ E na pa mẽ ã Tirtũm nhỹ hã mẽmoj tã mẽ amã karõ nê hã kagà anê. Tã koja mēhõ kamã harê nê kuma nê ãm kuma nê hkôt amnhĩ nhĩpêx kêt ka mẽ ja hã omu nê hkôt ri apa hkêt nê. Tokyx kot ja hã amnhĩ pumunh nê amnhĩ tã hpijaàm kaxyw.

¹⁵ Nom arĩ Kris kôt kêp mẽ akwỳ jakamã kêr ka mẽ arĩ kêp mẽ atõ rỳ atõx ã tãm hipêx nê kãm akapêr mex o ri apa. Nom te ho kêp mẽ akwỳ hkêt pyrãk o kãm akapêr kêt nê.

Tanhmã Pawre kot mẽ ho Jejus wỳr to hã harênh

¹⁶⁻¹⁸ Nê na pa hte mẽ ato Pahihti Jejus wỳr rãhã ho ixpa. Kot mẽ pamã mẽ pajamakêtkati xã nhõr jakamã na pa htem mẽ ato kuwỳ nê kãm:

—Pa Pahihti? Kwa kêr ka Tesarôn kamã akwỳjê pumu nê mẽmoj to mẽ kutã anojarêr rãhã ho ri mẽ hkôt apa. Kê mẽ hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagà jatur xã kamã inhĩhkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nê hã kagà hpa pa hpãnhã hatur xã kamã pam inhĩxi nhĩpêx. Tã na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwyjê jahkre ho pa. Hãmri nhûm Pawre krî hõ kamã pa nê kagàja nhîpêx nê hwÿr kumê. Nê kamã kãm mêmoy tã karõ. Na pre ra Epes kamã mê hkwyjêja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tirtûm kãm hprãm xà hkôt pix mã mê ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mê ahkre ho ixpa kaxyw na pre Mëpapytâr xwÿnh Tirtûm mê Jejus Kris wa ixta nê ixâm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mëpanhîpêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêt rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê amnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetôn wÿr panojarêt nê tee ri Epes kamã Tirtûm kapêr ho

hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetôn wÿr ixkôt amôr kêt nê. Æm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetôn wÿr ahte mõ.

⁴ Mê hêx xwÿnhjêja amnepêm panhîgêjtaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwyjê mã ujarênh anhÿr o pa. Jao axpên kwÿm ri mê ahkre nê mê hã axpên mã àkjêr o pa. Æ mê kot amnhî nhîpêx anhÿr jao Tirtûm nhÿ hã kãm hprãm xà hkôt mê ahkre hkêt nê. Kojã mêmõ Tirtûm nhÿ hã kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjêja Tirtûm nhÿ hã mê ahkre hkêt jakamã na pa pre inhnojarêt nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrãk o nhãm kãm mê hã ma ho pa.

⁶ Ixte amã mê hêx xwÿnh jarênh xwÿnhjêja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto.

⁷ Tirtûm kot finat Mojes mã mêmoy tã karõja mê kot mar tÿx ã amnhî kamnhîx nê ho mê ahkre hprãm tã no ãm hprî hã mar kêt nê htÿx ri ho mê ahkre ho pa.

⁸ Tirtûm kot Mojes mã mêmoy tã karõja mex. Mê kot mar nê hkôt amnhî nhîpêx o pa kaxyw na pre.

⁹ No na pre mê kot tãm amnhî nhîpêx xwÿnhjê mã ã hã karõ anhÿr

kêt nê. ãm mẽ kot amnhĩ tomnuj xwýnhjê mã na pre hã karõ.

Mẽ kot mẽ õ pahi kapêr mar kêt xwýnhjê mã.

Nê mẽ kot Tĩrtũm kapêr nhĩrõp kuhê ho mẽ pa xwýnhjê mã.

Nê Tĩrtũm ã mẽ hpijaam kêt xwýnhjê mã.

Nê mẽ kot mẽ hipêêxà nê mẽ katorxà hpar xwýnhjê mã.

10 Nê mẽ hprõ kuhpa hã nhãm mênijê ho amnhĩkati xwýnhjê mã.

Nê mẽ mjên kuhpa hã nhãm mẽmyjê ho amnhĩkati xwýnhjê mã.

Nê mẽmyjaja kot mẽnijê kuhpa hã kãm amnhĩ kwý myjê hkĩnh nê mẽ ho amnhĩkati xwýnhjê mã.

Nê mẽnijaja kot mẽmyjê kuhpa hã kãm amnhĩ kwý nijê hkĩnh nê mẽ ho amnhĩkati xwýnhjê mã.

Nê mẽ kot mẽmoj to àhkĩnh nê nhãm mẽ kãm ho wênê o mẽ pa xwýnhjê mã.

Nê ri mẽ hêx o mẽ pa xwýnhjê mã.

ã mẽ kot Tĩrtũm kapêr kwým ri amnhĩ nhĩpêx anhỹr o mẽ pa xwýnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwýnhjê mã. Mẽ kot mar nê tãm amnhĩ nhĩpêx kaxyw.

11 Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh Atre 26.9-18

12 Nê Pahihti Jejus Kris na hte ixto mex rãhã ho pa. Na hte tanhmã ixto pa ý hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkôt ixpa. Na pre ixte ã amnhĩ nhĩpêx anhỹrja kukamã inhmã ixàpênh ã karõ nê inhmã:

—E ate amnhĩ kaxyw ixkôt ajamaxpêr mex jakamã kêr ka ma mẽ piitã mẽ hkôt ri mẽ kãm ixkapêr jarênh o ri apa. Anê.

13 Nom amnepêem na pa pre hkôt ijamaxpêr kêt nê. ãm axtem nê hapry rũnh nê ho ixkapêr punuj o ri ixpa. Nê hkwyjê ho ixkrihkrit nê mẽ hapry nê mẽ htak. Nom kormã amnhĩ kaxyw Kris kôt ijamaxpêr kêt jakamã ixtýx ã mẽ hipêx anhỹr o ixpa nhũm Pahihti ja hã ixpumu nê ixkamã ukaprĩ nê mẽ hã tanhmã ixto hkêt nê.

14 Nê kãm ijapê xàj mẽmoj to ixkutã nojarêt rãhã ho pa nê tanhmã ixkrã hto pa ra amnhĩ kaxyw hkôt ijamaxpêr nê hkôt amnhĩ xãm. Hãmri nê kukwak ri ra inhmã hkwyjê hkĩnh nê hpãnhã mẽ ho mex o ri mẽ hkôt ixpa.

15 Nê Jejus Kris ra wrýk nê mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixpa. ã kot amnhĩ nhĩpêx anhỹrja na mex o mex. Kê mẽ piitã kuma nê hã nohtýx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj týx kumrêx o mẽ piitã mẽ hakrenh

16 nhũm Tĩrtũm ixpumu nê ixkamã ukaprĩ nê. Hãmri nê amnhĩ kaxyw ixãm. Mẽ piitã mẽ kot ja hã ixpumunh nê axpên mã ã ijarênh anhỹr kaxyw. Nê ijarênh o:

—Kwa Pawre na pre amnhĩ tomnuj týx kumrêx o pa nhũm Jejus Kris ja hã omu nê kamã gryk tokyx anhỹr kêt nê. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak nê amnhĩ kaxyw Jejus kôt pajamaxpêr nê hkôt amnhĩ xunhwý. Kêr pu mẽ Pawre pyrã nê nhỹrmã Tĩrtũm mẽ Kraja wa kuri pamex nê pahťir tũm nê papa ho papa.

Anhỹr o axpên mã ijarênh nê ixpyrã nê Jejus kôt amnhĩ xunhwýr kaxyw na pre Tĩrtũm ã ixto mex anê.

17 Jakamã na pa hte kãm amnhĩ jarênh kaxyw nê kãm:

—Pa Tĩrtũm? Nà kapxipix apê Pahi Maati. Nê arãhã ho arãhã nê amex o amex. Mẽ ixte inhno ho aa apumunh kêt tã kapxipix apê Měinhĩpêêxà maati. Tã koja nhỹrmã mẽ piitã ã amã amex o amex ã ajarênh anhỹr o pa. Anê.

*Ximotre kot tanhmã Epes nhõ
xwýnhjê jahkre hto hã kãm karõ*

Wam Korõt 5.1-5

¹⁸Ně te apê ixkra pyræk Ximotre. Tã kot paj mẽmoj tã amã karõ ka inhma ně inhmar týx ně. Nà Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapêr o mẽ pa xwýnhjaja axápênh kukamã amã kapêr ně amã:

—E ate ma mẽ kãm Pahihti Jejus jarênh o apa kaxyw Tĩrtũm kot axãm jakamã kêr ka ã amnhĩ nhĩpêx anhỹr o ri mẽ hkõt apa. Aně.

Tã kot paj ijaxwýja kagàja kamã amã ixkapêr ně mẽmoj tã amã karõ. Ka mar týx ně hkõt amnhĩ nhĩpêx mex pê Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarênh to ho ri mẽ hkõt apa.

¹⁹Ně amnhĩ kaxyw Jejus mã aja-maxpêr mex ně. Ně mẽmoj punuj pumu ně amã ho anhỹr prãm tã Jejus nhỹ hã nê amnhĩ to htýx ně ho anhỹr kêt ně. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nê amnhĩ to htýx kêt ně tanhmã amnhĩ tomnuj to hãmri ně te ate Pahihti Jejus kaga pyræk. Na pre pahkwýjaja ã amnhĩ nhĩpêx anhỹr o hkaga ně axte kãm hamaxpêr kêt ně.

²⁰Iměnew mẽ Aresãnja na pre wa ã amnhĩ nhĩpêx aně ně tanhmã Tĩrtũm o kapêr punuj to. Mýrapê na pa pre Satanasti nhĩhkram wa haxã. Kot tanhmã wa ho nhũm wa kot tee ri amnhĩ tomnujta ã amnhĩ pumunh ně tokyx tãm amnhĩ nhĩpêx ně axte ã amnhĩ nhĩpêx anhỹr kêt kaxyw.

2

*Tanhmã mẽ pahte Tĩrtũm mã
amnhĩ jarênh to hã mẽ pamã karõ*

Rukre 11.2-4; Atre 10.34-35; Epes 6.18

¹E kot paj hpãnhã tanhmã mẽ pahte Tĩrtũm mã amnhĩ jarênh to hã amã karõ Ximotre. Ka inhma ně ixõ ri ho mẽ pahkwýjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wýr ho ri pa. Ně kãm mẽ

harê ně mẽ kaxyw mẽmoj tã axàhwýr o ri apa. Kêr kê ama ně tanhmã mẽ ho mex to. Kê mẽ amnhĩ tã omu ně ã kãm kapêr aně ně kãm:

—Pa Tĩrtũm? Nà ãm hãmri na ka ã mẽ ixto mex aně. Amex o amex. Aně.

²Ně mẽ kãm aně kê mẽ õ pahi ně mẽ ho amnhĩptâr xwýnh piitã mẽ ho ahwýr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptâr xwýnh piitã tanhmã mẽ ho kê mẽ ixto mex o pa. Kêr pa mẽ ijamakêtkati ně ixãmnhĩx ixpa pê amã tanhmã amnhĩ nhĩpêx to ho ri ixpa. Ně ixãmnhĩx mẽ hkõt tãm amnhĩ nhĩpêx. Aně.

³Kot puj mẽ ã mẽ ho mẽ papytâr xwýnh Tĩrtũmja wýr o papa aně nhũm mẽ pama nhũm ja kãm mex ně.

E kêr ka ã mẽ kãm ja hã karõ aně Ximotre.

Tĩrtũm kãm mẽmoj prãm ã harênh

Sikũn Pêtre 3.9

⁴Ně mẽ piitã mẽ kot kapêr mar ně amnhĩ kaxyw Jejus kõt hamaxpêr ně hkõt amnhĩ xunhwýrja na Tĩrtũm kãm hprãm.

⁵Ja kaxyw na pre mẽ pahwýr Kra Jejus mẽ nhũm man mẽ pahwýr wrý. Tĩrtũmja tapxipix na kêp Měpahpãm. Ně Kra Jejusja tapxipix na kot Tĩrtũm mã tãm mẽ paxunhwýr mã xwýnh. Ja kaxyw na pre amnhĩ grõnh kõt wrý mẽ pahpyrà ně ĩ ho ĩ ně kato.

⁶Hãmri ně gaa ně àptâr hãmri ně mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỹr ã harênh mar ně tokyx hkõt amnhĩ xunhwýrja na Tĩrtũm kãm hprãm.

⁷Ja kaxyw na pre ixãm. Ixte Ijaew kêt xwýnhjê mã Tĩrtũm kapêr jarênh o ri mẽ hkõt ixpa kaxyw. Ně Jejus nhỹ hã tanhmã mẽ kãm ixkapêr to ho ri ixpa kaxyw. Ně tanhmã kot mẽ panê amnhĩ nhĩpêx to hã harênh kaxyw. ãm hãmri na pa ã amnhĩ jarênh aně. Ixêx kêt. Na pa hte Ijaew kêt xwýnhjê hkõt ixpa ně ã mẽ kãm ixkapêr aně ně mẽ kãm:

–E mẽ ate Tirtũm Kra Jejus kôt amnhĩ xunhwỳrja na Tirtũm kãm hprãm. Jakamã kwa mẽ tokyx amnhĩ kaxyw hkôt ajamaxpěr nẽ hkôt amnhĩ xunhwỳ. Anẽ.

Ikrẽsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nẽ kot kaj mẽ tõhã Tirtũm kapěr mar kaxyw axpẽn wỳr akuprõ. Hãmri nẽ Tirtũm mã amnhĩ jarẽ nom kêt ka mẽ mẽmoj tã axpẽn kamã agryk kamã kãm amnhĩ jarẽnh kêt nẽ. Rỳ mẽmoj tã axpẽn mã axàkjêr kamã kãm amnhĩ jarẽnh kêt nẽ. ãm tãm mẽ ajamaxpěr pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhmã hprãm. Tã kêt ka ã Epes nhõ xwỳnhjẽ mã ja hã akarõ anẽ Ximotre.

Mẽnijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nẽ kot paj hpãnhã Kris kôt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nẽ kãm mẽ hkĩnh prãm xaj kê mẽ htỳx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xaj tanhmã ê jagjênh to hkêt nẽ rỳ tanhmã ri mrar to hkêt nẽ. Rỳ mẽ kãm mẽ hkĩnh prãm xaj òkrexê mex jagjênh rỳ mẽ ìhkra kamã kax mex jagjênh nẽ ri hã mẽ hkôt pa kêt nẽ. Rỳ ja kaxyw tanhmã ri amnhĩ kĩ jaxwỳr to nẽ ri hã mẽ hkôt pa kêt nẽ. Rỳ mẽ ê mex jagjê nẽ mẽ noo mã htỳx ri hpijaàm kêt o pa hkêt nẽ. Kê mẽmyjaja kãm mẽ hkĩnh prãm xaj ã htỳx ri amnhĩ nhĩpêx anhỳr o pa hkêt nẽ.

¹⁰ Mẽ kãm anẽ kê mẽ kãm Tirtũm mãn kĩnh xaj mẽ piitã mẽ kutã mẽmoj to nojarêt o pa.

¹¹ Nẽ mẽ kãm anẽ kê mẽ Tirtũm kapěr mar kaxyw mẽ pikuprõnh xà hwỳr agjê nẽ akryk Tirtũm kapěr mar o hkrĩ nẽ htỳx ri axpẽn mã kapěr o hkrĩ kêt nẽ.

¹² Nẽ kê mẽ ikrẽsti kamã Tirtũm kapěr o mẽmyjê jahkre hkêt nẽ. Rỳ kamã mẽmoj tã tanhmã mẽ kãm karõ

hto hkêt nẽ. ãm akryk Tirtũm kapěr mar o hkrĩ.

¹³ Mẽmo mỳrapê koja mẽ ã amnhĩ nhĩpêx anẽ? Nà na pre Tirtũm my kot wa finat Atãwja kumrêx nhĩpêx nẽ kormã hprõ Ewa o hapu nẽ hipêx.

¹⁴ Nẽ Atãwja na pre kagã kapěr mar nẽ hkôt amnhĩ nhĩpêx kêt nẽ. Prõ na pre mar xà hkôt Tirtũm kapěr nhĩrõp xa nẽ tanhmã amnhĩ tomnuj to.

¹⁵ Mỳrapê na htem mẽnijaja hpijagri ho hikwỳ nhũm mẽ hkrajaja à htỳx kãm hapõj. Tã nom koja mẽ Jejus kôt amnhĩ xunhwỳ nẽ ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nẽ nhỹrmã mex kumrêx nẽ htĩr tũm nẽ pa ho pa. E kêr ka ã mẽnijê mã mẽmoj tã karõ anẽ Ximotre.

3

Pastõ kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastõ jarẽnh to. Koja mẽhõ kãm kêp Kris kwỳjê nhõ pastõ nẽ Tirtũm kapěr o mẽ ahkre hprãm nẽ ãm hãmri ã hamaxpěr anẽ. Ja mex.

² Jakamã koja mẽhõ kãm kêp pastõ hprãm hãmri nẽ ã amnhĩ nhĩpêx anhỳr o apa.

Koja mẽ piitã mẽ noo mã tãm ri amnhĩ nhĩpêx.

Nẽ hprõ pix tãnopxar o pa.

Nẽ mẽmoj punuj kutã amnhĩ to htỳx nẽ.

Nẽ tãm hamaxpěr.

Nẽ àmnhĩx amnhĩ wỳr mẽ piitã mẽ kuwỳ.

Nẽ Tirtũm kapěr o mẽ ahkre mex nẽ.

³ No kê mẽ kagõxỳhti japrõr nẽ ho pipãnh o pa hkêt nẽ.

Nẽ àhkurê ho pa hkêt nẽ.

Nẽ mẽ piitã mẽ kamã ukapri ho ri mẽ hkôt pa. Jao mẽ kutã nojarêt rãhã ho pa.

Nẽ amnhĩm kaxpore rax o pikuprõnh prãm xaj tanhmã amnhĩ nhĩpêx to hkêt nẽ.

4-5 Nē hkrajê jahkre mex o pa nhũm mē kapēr ma nē hkôt amnhĩ nhĩpêx. Nē hã hpijaàm kãm tãm amnhĩ nhĩpêx.

Koja mē hkrajê jahkre mex kêt nē hãmri nē mãânēn Kris kwỳjê jahkre mex kêt nē. Jakamã nhũm hkrajê mē Kris kwỳjaja tãm amnhĩ nhĩpêx kêt nē.

6-7 Nē kē mē kot Jejus kôt amnhĩ xunhwỳr kêt xwỳnhjê noo mã tãm amnhĩ nhĩpêx rãhã ho pa.

Mē kot ja hã mē omunh nē mē hã hpijaàm o pa kaxyw. Nom koja mē tanhmã amnhĩ tomnuj to nhũm mē tee ri ja hã mē omu nē mē ho kapēr punuj nē. Satanasti kãm hprãm xà hkôt.

Nē kē mē kot Kris kôt amnhĩ xunhwỳr nyw xwỳnhjaja kēp pastô hkêt nē.

Koja mē kēp pastô hãmri nē mēmo arĩgro hã tanhmã hamaxpēr to nē amnhĩ to rax prãm xàj tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nē te kot Satanasti nhĩpêx pyrãk o hipêx nē tanhmã homnuj to. Ja pymaj kē mē kot Kris kôt amnhĩ xunhwỳr nyw xwỳnhjaja kēp pastô hkêt nē.

E pastô na hte ã amnhĩ nhĩpêx anhỳr o pa kamã Jejus kwỳjê jahkre nē tanhmã mē ho ajuta hto ho mē hkôt pa Ximotre.

Mē kot Kris kôt hkwỳjê ho ajuta xwỳnhjê kaxyw mē hã kãm karõ Atre 6.1

8 Nē kot paj hpãnhã amã mē kot Kris kôt hkwỳjê ho ajuta xwỳnhjê jarē ka inhma Ximotre. Nã koja mēhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỳr o pa.

Koja mē htỳx ri mēmoj tã mē kãm hpēr o pikēnh o pa hkêt nē.

Nē tanhmã mēmoj to hêx to ho pa hkêt nē.

Nē kagôxỳhti japrôr nē ho pipãnh o pa hkêt nē.

Nē amnhĩm kàxpore ho pikuprõnh nē ho rax prãm xàj tanhmã amnhĩ nhĩpêx to hkêt nē.

9 Nē kē Tĩrtũm kapēr piitã hkôt hamaxpēr o pa. Ra Tĩrtũm kot mē pamã kapēr piitã ho amnhĩrĩt jakamã koja Kris kôt hkwỳjê ho ajuta xwỳnhjaja kapēr piitã hkôt hamaxpēr pē hkôt amnhĩ nhĩpêx mex rãhã ho pa.

10-13 Nē kē mē amnhĩ prõ pix tãnopxar o pa.

Nē pastô pyrã nē mē hkrajê jahkre mex nhũm mē hkôt ri amnhĩ nhĩpêx mex o pa.

Nē kē mē hprõjaja mjên pyrã nē mē piitã mē noo mã tãm ri amnhĩ nhĩpêx.

Nē hkwỳjê ho kapēr rỳ mē axpēn jakwa kamã ri axpēn mã mē hixi ho rēr o pa hkêt nē.

Nē mjên pyrã nē mēmoj punuj kutã amnhĩ to htỳx o ri pa. Nē amnhĩ to mex rãhã nē.

E koja mēhõ kãm Kris kwỳjê ho ajuta ho pa hprãm hã koja ã amnhĩ nhĩpêx anhỳr o pa. Nom kēr ka mē kot mē ho ajuta kaxyw mē unhwỳr tokyx anhỳr kêt nē Ximotre. Taxy mē kamã ama nē aprĩ hã mē kot ri tanhmã amnhĩ nhĩpêx to hã mē omu mãn. Hãmri nhũm mē piitã mē mex ã mē harē ka mē hã mē ama nē rĩ kormã mē kot mē ho ajuta ho pa kaxyw mē unhwỳ. Hãmri nhũm mē amnhĩ tã omu nē axpēn mã mex ã harē. Nē amnhĩ kaxyw Jejus Kris mã hamaxpēr mex o pa hã mē omu nē mē hã hpijaàm o pa.

Pawre kot Ximotre mã amnhĩ jarēnh

14 Nē inhmã awỳr inhmõr nē apumunh prãm Ximotre. Nom kot pa amnhĩ kukamã ã mēmoj tã amã karõ nē hã kagà anē.

15 Kēr pa tokyx awỳr inhmõr kêt japēr ka ixte amã mēmoj ã kagàta kamã harē nē ixkutēp ho mē ahkre ho ri apa. Mē kot mar nē hprĩ hã mē õ pastô nē mē kot mē ho ajuta ho mē pa xwỳnhjaja kot tanhmã amnhĩ nhĩpêx to hã mē harēnh mar kaxyw.

Mê pahpê Kris kwỳjaja mẽ pahpê Tirtũm kra jakamã na pu htem kapêr kôt ri amnhĩ nhĩpêx nê pakatàt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶ Nê Jejusja mex o mex. Amnepêm kormã mẽ pahte harênh mar kêt tâ pu prem harênh ma hãmri nê mex o mex ã pagrer o papa. Nê pagrer o:

Kris kêp Měpahpãm tâ na pre mẽ pahwỳr wrỳ nê mẽ pahpyrà nê ĩ ho ĩ nê kato.

Nhũm pre Tirtũm Karõja mex o mex ã harê.

Nhũm Tirtũm kapêr o mẽ wrỳk xwỳnhjaja omunh o pa.

Nhũm ahpỳnhã pika piitã hwỳr tanhmã kot mẽ panê amnhĩ nhĩpêx to hã harênhja anhrã.

Nhũm hte mẽ hkwỳjaja harênh ma nê amnhĩ kaxyw hkôt hamaxpêr nê hkôt amnhĩ xunhwỳ.

Tã nhũm pika kamã àpênh jatur xàm kumê nhũm Tirtũm akupỳm amnhĩ wỳr ho api.

Na pu htem ã Jejus mex o mex ã pagrer anê.

4

Mê kot Tirtũm kapêr kwỳm ri tanhmã Kris kwỳjê jahkre hto xwỳnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹ Nê nhỹrmã Jejus akupỳn mẽ pahwỳr wrỳk kaxyw koja pika nhõ xwỳnh kwỳjaja ma hkwỳjê mã tanhmã Tirtũm kapêr o hêx to ho pa. Na pre Tirtũm Karõ hprĩ hã mẽ hkukamã tanhmã mẽ harênh to. Koja xep Satanasti hkwỳjaja Jejus kwỳjê hwỳr mra nê hêx rom tanhmã mẽ kãm kapêr to. Satanasti nhỹ hã mẽ kãm hêx o pa nhũm mẽ hkwỳjaja mẽ kuma nê mẽ hkôt hamaxpêr nê Jejus kaga. ã koja mẽ Jejus akupỳn mẽ

pahwỳr wrỳk kukamã amnhĩ nhĩpêx anê.

² Nê Satanasti nhỹ hã mẽ kãm mẽmoj to hêx xwỳnhjaja ãm Satanasti pix mar o pa jakamã koja mẽ hamaxpêr mex kêt nê. Koja mẽ mẽmoj punuj pumu nê htỳx mex ã hkamnhĩx.

³ Tã koja mẽ Tirtũm kapêr kwỳm ri ã Jejus kwỳjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tirtũm kãm ja prãm kêt. ãm ahte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tirtũm pê omnuy kênã kot ka kêt ri aku.

Anhỹr o koja mẽ kãm kapêr o pa.

⁴ Nom Tirtũm na pre mẽ pamã mẽ apkur xà piitã ho kato. Mẽ paxàmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtũm mã harê hãmri nê paxàmnhĩx kuku.

⁵ Tirtũm kot mẽ paxàpkur xà piitã mex ã harênh jakamã na pu htem kãm harênh pê paxàmnhĩx piitã hkur o papa.

Pawre kot mẽmoj tâ Ximotre mã karõ

Sikũn Ximotre 1.6-14; Xitre 2.1-8

⁶ E Ximotre. Ixte mẽmoj tâ amã karõta kêr ka ho Kris kôt pahkwỳjê jahkre mex o ri mẽ hkôt apa. Kot kaj ã mẽ ahkre anhỹr jao ra Jejus Kris mã axàpênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhĩgêt xujarênh kamã mo Tirtũm jarênh? Amrakati kumrêx. Jakamã kêr ka mẽ hkôt ajamaxpêr o ri apa hkêt nê. ãm Tirtũm kapêr kôt pix mã ajamaxpêr tỳx rãhã ho ri apa. Tirtũm kapêrja ãm hãmri na.

⁸ Nē na htem amnhĩ karo hprām xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nē gaa nē ra hkarore nē pa. No kêt mẽ kot Tĩrtũm kapēr kôt ri amnhĩ nhĩpêx o paja na mex o mẽ hkarota jakre. Na htem Tĩrtũm kapēr kôt ri amnhĩ nhĩpêx hãmri nē mex nē hkĩnh nē pa ho pa. Hãmri nē nhỹrmã kaxkwa kamã Tĩrtũm mẽ Kra Jejus wa kuri mex nē htĩr tũm nē pa ho pa. Ja na mex o mex.

⁹ ãm hãmri ixte amã ja jarēnh jakamã kwa kêt ka ja hã anohtỳx nē ri ho apa Ximotre.

¹⁰ Nē Tĩrtũmja rãhã ho rãhã. Tã na pu pre amnhĩ kaxyw Kra Jejus kôt pajamaxpēr nē hkôt amnhĩ xãm nhũm Tĩrtũm pahto hkra. Kãm mẽ piitã mẽ ho hkra hprãm jakamã na htem pahpyrà nē amnhĩ kaxyw Kra hkôt hamaxpēr nē hkôt amnhĩ xunhwỳ nhũm amnhĩ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhĩ nhĩpêx to hã harēnh rãhã o ri mẽ hkôt papa. Jao Tĩrtũm mã paxapēnh mex nē.

¹¹ E kêt ka ã ja ho pahkwỳjê jahkre anhỹr ho ri mẽ hkôt apa. Mẽ kot amar nē akapēr kôt amnhĩ nhĩpêx mex ho pa kaxyw.

¹² Nē kormã anyw tã kêt ka mẽ piitã mẽ noo mã tãm ri akapēr nē tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamaxpēr tỳx nē. Nē mẽ piitã mẽ kutã anojarêt nē ajamaxpēr mex pix o ri apa. Kot kaj kormã anyw tã ã mẽ noo mã amnhĩ nhĩpêx anē nhũm mẽ hã apumu nē kãm akapēr mar prãm nē. Anyw ã apumunh tã kãm akapēr mar prãm nē.

¹³ Nē kêt ka mẽ ate Tĩrtũm kapēr mar kaxyw axpēn wỳr akuprõ ka arĩ ixkutēp mẽ kãm Tĩrtũm kapēr tũm ã kagã kamã akapēr rãhã ho apa. Nē aprĩ hã tanhmã ho mẽ ahkre hto nē ho mẽ ahkre mex nē Ximotre.

¹⁴⁻¹⁵ E kêt ka ã amnhĩ nhĩpêx anhỹr o ri mẽ hkôt apa nē amã ho anhỹr

kaga hkêt nē. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarēnh o apa hkêt ri na pre pastõ nhỹ hã mẽ kapēr xwỳnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nē anhĩmõk ã mẽ ìhkra jaxwỳ nē axapēnh kukamã tanhmã ajarēnh to nē ato Tĩrtũm wỳ. Hãmri nhũm ate mẽ kãm kapēr jarēnh o ri apa kaxyw amã ajamaxpēr o hihtỳx. Tã kêt ka ý hã ã kãm amnhĩ nhĩpêx anhỹr rãhã ho ri apa.

¹⁶ Nē kwa kêt ka amnhĩ pumunh mex nē Ximotre. Jao tãm ri amnhĩ nhĩpêx nē akatàt kôt Tĩrtũm kapēr o mẽ ahkre ho ri mẽ hkôt apa. Kot kaj ã amnhĩ nhĩpêx anē hãmri nhũm mẽ ama nē apyrã nē Jejus kôt amnhĩ xunhwỳ. Hãmri nē pahpyrà nē nhỹrmã Tĩrtũm wa kuri htĩr tũm nē pa ho pa.

5

Tanhmã mẽ pahte Kris kôt mẽ pahkwỳjê nhĩpêx to kaxyw mẽ pamã karõ

Sikũn Ximotre 2.24-25

¹⁻² E kot paj hpãnhã Kris kôt pahkwỳjê hõ kot tanhmã amnhĩ tomnuj to nhũm ate tanhmã ja nē kãm akapēr to hã amã karõ.

Nã koja mēhõ tanhmã ri amnhĩ tomnuj to ka harēnh ma hãmri nē ma hwỳr tē nē ja nē tanhmã kãm akapēr to. Nom kêt ka kãm akapēr mã agêt kêt nē.

Koja mēwejjê õ tanhmã amnhĩ tomnuj to ka te kēp anhĩpêxà rỳ akatorxà pyràk o kãm akapēr. Jao hã apijaàm o tanhmã kãm akapēr to.

Rỳ koja apyrã nē mẽ nywjê hõ tanhmã amnhĩ tomnuj to ka te kēp atõ pyràk o kãm akapēr.

Rỳ mēnijê nyw õ amnhĩ tomnuj japēr ka te kēp atõx pyràk o kãm akapēr. Jao hã apijaàm o kot amnhĩ tomnujja nē tanhmã kãm akapēr to.

E kêt ka mẽ kot amnhĩ tomnuj nē ã mẽ pahkwỳjê mã akapēr anhỹr o apa Ximotre.

*Mē kēp mē mjên htyk xwýnhjê jarēnh
Xiakre 1.27*

³ Nē kot paj hpānhā Kris kôt pahkwý pē mē mjên htyk xwýnhjê jarē. Nà koja mēhō nija hkra hkêt nē htāmnhwý hkêt nē pa nhūm mjên kēp ty ka mē apē Kris kôt hkwýjaja ja hā omu nē mēmoj to kutā anojarēt rāhā ho ri apa.

⁴ Nom koja ra hkra rý ra htāmnhwý japēr kē mē tāmjaja tanhmā ho ajuta hto ho pa. Kām ō nē kām mēmoj nhōr o pa. Kormā mēhprīre ri na pre mē ō wōwō nē mē katorxà nē mē hipêxà mē hamār mex pē mē kām ō ho pa. Tā ra mē àptār jakamā kē mē amnhī pyrā nē mē hamār mex pē mēmoj to mē kutā nojarēt rāhā ho pa. Ja na Tirtūm kām hprām. Ā mē kot hkwýjê kamā ukaprī ho pa jakamā te mē kot Tirtūm mā àpēnh pyrāk.

⁵ No koja mēhō ni ra wejre nē ahte ri pa. Nē hkra nē htāmnhwý hkêt nē ri pa. Tā kē ja hā amnhī pumu nē Tirtūm kamnār rom amnhī to hwýr o pa. Nē mē piitā mē ho hwýr o pa. Jao tām hamaxpēr. Ka mē apē Kris kôt hkwýjaja ja hā omu hāmri nē mē kam nē tanhmā kutā anojarēt to ho ri apa.

⁶ No koja mē ā amnhī nhīpêx anhýr kêt nē. Nē htýx ri mē grer wýr mra nē hpijaam kêt o ri mra ka mē ja hā mē omu nē mē ho ajuta hkêt nē. Na htem ā amnhī nhīpêx anhýr o pa nē arī htír tā te ra htyk nē hikwý pyrāk.

⁷ E kēr ka ā ja hā Kris kôt pahkwýjê mā karō anē. Kē mē ama nē ā mē mjên htyk xwýnhjê nhīpêx anhýr o pa.

⁸ Nom koja mēhō amnhī kwýjê ho mex kêt japēr. Nē ōrkwý kamā hprō nē hkrajaja nē hipêxà nē katorxà nhūm mē kām mē apkur xà nhōr kêt japēr. Koja mē ā amnhī nhīpêx anhýr jao Jejus kaga nē te mē kot hkôt amnhī xunhwýr kêt xwýnhjaja kot amnhī nhīpêx pyrāk o amnhī nhīpêx nom amnhī tomnuj týx o mē hakre.

⁹ Nē mē mjên htyk nē mē hkra nē mē htāmnhwý hkêt xwýnhjaja kēr ka mē tanhmā mē ho ajuta hto kaxyw hāmri nē mē hixi piitā hā kagà. Nom kwa kēr ka aprī hā tanhmā mē amnhī

nhīpêx to hā mē omu nē rī kormā mē hixi hā kagà.

Koja mēhō kormā mjên htír ri tām hipêx nē nhām mēmyjê ho amnhīkati hkêt nē.

Nē ra hā amgrà pē 60 rý ra hā 60 jakre.

¹⁰⁻¹¹ Nē tām mē piitā mē hipêx o pa. Nē hkrajaja kormā htír ri nhūm mē hamār mex nē mē ahkre mex o pa.

Nē nhām krī hō nhō xwýnhjaja ō krī hwýr pōj nhūm mē omu nē amnhī nhōrkwý hwýr mē kuwý.

Nē mē kēp amrakati xwýnhjê ho mex o pa.

Koja mē ā amnhī nhīpêx anē ka ja hā mē omu nē rī kormā mē ho ajuta kaxyw mē hixi hā kagà. Nom mē hixi hā kagà kaxyw nē mēmoj tā mē hkukja nē mē kām:

—E kot kaj ā amnhī nhīpêx anhýr o apa hā inhmā amnhī jarē pa ama nē rī kormā anhīxi hā kagà.

Kot kaj axte amjên kêt nē.

Nē tanhmā Kris kôt akwýjê ho mex to ho ri apa.

Nhūm mēhō mēmo mýrapê hkaprī nē pa ka ja hā omu nē tanhmā ho ajuta hto.

E kot kaj ā amnhī nhīpêx anhýr o apa hā amnhī jarē pa ama nē anhīxi hā kagà. Hāmri nhūm Kris kôt akwýjaja amā axàpkur xà nhōr o pa. Anē.

Ā mē kām akapēr anē nhūm mē ama nē amā:

—Ý. Ma kot paj ā amnhī nhīpêx anē.

Anhýr ā amnhī jarē ka mē ama nē mē hixi hā kagà. No kormā mē hā amgrà pē 60 kêt xwýnhjaja kēr ka kormā mē hixi hā kagà hkêt nē. Koja mē tanhmā mē kot amnhī nhīpêx to ho pa hā mē kām karōja ma nē wam tajé pyrā nē amā:

—Ý. Ma kot paj ā amnhī nhīpêx anē. Na pa Jejus Kris noo mā ā amnhī jarēnh anē.

Anhýr ā amnhī jarēnh tā gaa nē ra hkurē hapōj nē ra kot amnhī jarēnh ta kwým ri tanhmā amnhī nhīpêx to nē axte mjên.

¹² Ra amnhī jarēnh o:

—Ma kot paj âm Jejus mã pix mã tanhmã amnhĩ nhĩpêx to ho ri ixpa nê axte inhmjên kêt nê.

Anhỹr tâ tanhmã hamaxpêr to nê kot amnhĩ jarênh kwým ri axte mjên. Jao te Jejus mã amnhĩ to hêx pyrâk nhũm Tĩrtũm pê jamnuj. Ja pymaj kêr ka mẽ kormã mẽ hã amgrà pê 60 kêt xwýnhjê nhĩxi hã kagà hkêt nê. Kormã mẽ hã amgrà pê 60 kêt xwýnhjaja arĩ mẽ hkĩnh tỳx

¹³ jakamã kot kaj mẽ kãm mẽ apkur xà nhõr o apa nhũm mẽ ja hã amnhĩ tâ mẽ apumu nê axte amnhĩm àpênh kêt nê. Âm kãm kaga nê htỳx ri nhãm mẽ hwỳr mra nê nhãm mẽ hwỳr mra. Nê amnhĩ pumunh mex kêt nê htỳx ri axpên jakwa kamã ri mẽ hixi ho rêr o pa. Nê nhỹri mẽmoj pumu rỳ tanhmã mẽmoj jarênh mar to hãmri nê ma htỳx ri hkwyjê mã harênh o mra. Koja mẽ ã amnhĩ nhĩpêx anhỹr o pa hãmri nhũm mẽ kêp Kris kwỳ hkêt xwýnhjaja ja hã mẽ omu nê mẽ hkôt mẽ pahpê Kris kôt pahkwỳjê ho kapêr punuj nê.

¹⁴ ã mẽ kot amnhĩ nhĩpêx anhỹr o pa pymaj kêr ka kormã mẽ nyw xwýnhjê mã anê kê mẽ mãmri axte mjên nê o pa. Hãmri nê hkra nê hkrajê jamãr o pa. Ja na inhmã hprãm. Koja mẽ ã amnhĩ nhĩpêx anê hãmri nhũm mẽ kêp Kris kôt pahkwỳ hkêt xwýnhjaja mẽ hkôt tanhmã mẽ pahto kapêr punuj to hkêt nê.

¹⁵ Mãn ka ra Kris kôt pahkwỳjê nyw pê mẽ mjên htyk xwýnh kwỳjaja tanhmã amnhĩ tomnuj to hã mẽ harênh ma. Na prem Jejus kaga nê Satanasti hkôt amnhĩ nhĩpêx o pa.

¹⁶ E kêr ka mẽ ã Kris kwỳ pê mjên htyk xwýnhjê nhĩpêx o apa anê Ximotre. Nom koja mẽ akwỳ kamã mẽhõ nhõ wôwô mjên rỳ katorxà mjên kêp ty kê tãm kãm õ ho pa. Kêr kê Kris kôt pahkwỳjaja âm mẽ kêp mẽ mjên htyk xwýnh pê mẽ hkra nê mẽ htãmnhwỳ hkêt nê ahte ri mẽ pa xwýnh pixjaja tanhmã mẽ ho ajuta hto ho pa.

Mẽ pahpê Kris kôt pahkwỳjê

hkrãhtũm kaxyw mẽ pahtã kãm karõ Atre 14.23; Wam Korõt 9.7-14; Karatas 6.6; Wam Tesarôn 5.12; Wam Pêtre 5.1-4

¹⁷⁻¹⁸ Nê kot paj hpãnhã amã Kris kôt mẽ pahkrãhtũmjê jarê. Tĩrtũm kapêr ã kagà htũm kot mẽ harênh kot:

Kêr ka Tĩrtũm kapêr o mẽ ajahkre xwýnhjaja mẽ ahkre pãnhã mẽ kãm amnhĩre. Anê.

Nê mãânên mẽ harênh ã kuxi nê mẽ harênh o:

Koja akrit amã àpênh o pa ka ho mex nê kãm õ mex o apa. Anê.

Ã ja jarênh kot anhỹr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tâ kãm amnhĩrer mex o ri apa. Kot Tĩrtũm kapêr o mẽ ajahkre mex jakamã ka mẽ amnhĩ tâ kãm amnhĩrer mex nê.

¹⁹ Nê koja mẽhõ pixi nê mẽ awỳr tẽ nê amã Kris kôt mẽ akrãhtũm kot tanhmã amnhĩ tomnuj to hã harênh to ka ama nê âm ama. Nom koja wa hamêxkrut rỳ mẽ axkrunêpxi nê mẽ awỳr mra nê axpên kôt tanhmã harênh to ka mẽ ama nê âm hãmri mẽ kot tanhmã kot amnhĩ tomnuj tota kôt ajamaxpêr.

²⁰ Hãmri nê Kris kwỳjê piitã mẽ noo mã kot amnhĩ tomnuj xwýnhhta mã tanhmã kot amnhĩ tomnuj to nê kãm akapêr kê axte ã amnhĩ nhĩpêx anhỹr kêt nê. Mẽ piitã mẽ kot hã amar nê nhỹrmã tanhmã amnhĩ tomnuj to nhũm ate uràk nê hã tanhmã mẽ kãm axàkjêr to pymaj tanhmã amnhĩ tomnuj to hkêt nê.

²¹ E Tĩrtũm noo mã na pa ã amã mẽ kaxyw mẽmoj tâ karõ anê Ximotre. Nê Jejus Kris mẽ Tĩrtũm kapêr o mẽ wryk xwýnhjê noo mã pa ã amã karõ anê. Jakamã kêr ka inhmar tỳx nê hkôt amnhĩ nhĩpêx o ri apa. Jao mẽ piitã mẽ hipêx o axpên pyrâk. Nom kêr ka akrãmnhwỳ kot tanhmã amnhĩ tomnuj to hã omu nê axtem nê âm omu nê ajamaxpêr o:

—Nà kêp ixkrãmnhwỳ kênã kot paj kêt ja nê tanhmã kãm ixkapêr to. Pa ho anhỹr kêt nê.

Anhÿr o ajamaxpêr kêt nê. Mê piitã mê hipêx o axpên pyræk.

²² Nê kêr ka anojarêt kãm mê kot Tirtûm mã tanhmã amnhĩ nhĩpêx to ho mê pa kaxyw mê unhwÿr kêt nê. Aprĩ hã tanhmã mê kot amnhĩ nhĩpêx ã hã mê omu nê mê hkapi nê rĩ kormã mê unhwÿ rÿ tee ri mẽmoj tã mê omu nê mẽ hkaga.

Nê koja mẽhõ tanhmã amnhĩ tomnuj to ka ja hã omu rÿ harênh ma hãmri nê uræk nê ã amnhĩ nhĩpêx anhÿr kêt nê. Arĩ Tirtûm kôt amnhĩ nhĩpêx pê tãm ri amnhĩ nhĩpêx pix o apa.

²³⁻²⁵ Na htem tõiã tanhmã amnhĩ tomnuj to nhũm mẽhõ ja hã mê omu nê mẽ harênh kurê kumrêx. Kris kôt mẽ hkrãhtûm kormã kot tanhmã hã kãm nê hkêt ri nhũm mẽ ja hã mê omu nê tanhmã mẽ harênh to. Nom na htem tõiã hpimxur pê tanhmã amnhĩ tomnuj to nhũm Tirtûm pix ja hã mê omu. Tã koja nhÿrmã mẽ piitã mẽ kãm ja ho amnhĩrit nhũm mẽ piitã harênh ma nê hkôt omu.

Nê mẽ kot amnhĩ to mex xwÿnhjaja haxwÿja. Na htem tõiã mẽ noo mã tanhmã mẽhõ ho mex to nhũm hkwyjaja ja hã omu nê axpên mã mex ã mẽ harê. Nê tõiã hpimxur pê tanhmã mẽhõ ho mex to nhũm mẽhõ ja hã omunh kêt nê. Âm Tirtûm pix ã kot amnhĩ nhĩpêx anhÿr ã omu. Tã koja nhÿrmã mẽ piitã mẽ kãm ja ho amnhĩrit nhũm mẽ piitã harênh ma nê hkôt omu.

Nê kwa Ximotre. Axà nê anhõhymnuj nê ri apa jakamã kwa kêr ka gô pix o akôm o apa hkêt nê. Mãânên wĩhti hkwy ho ixkô kêr ka anhõhy mex japêr.

6

Mê kãm mẽ àpênh xwÿnhjê kaxyw mẽ hã kãm karõ

Epes 6.5-9; Korosê 3.22-4.1; Xitre 2.9-10; Wam Pêtre 2.18-25

¹ E kot paj mẽ akwÿjaja mẽ kãm mẽ àpênh o mẽ pa xwÿnhjê kaxyw mẽmoj tã amã karõ. Mê kãm anê kê mẽ õ patrãw ã hpijaam o ri pa. Jao mẽ kapêr ma nê hkôt kãm àpênh mex nê.

Koja mẽ ã amnhĩ nhĩpêx anê nhũm amnhĩ tã mẽ omu nê hamaxpêr o:

—Kwa pêr Tirtûm kapêr na mex kumrêx. Inhmã àpênh xwÿnhja na hte hkôt amnhĩ nhĩpêx pê amnhĩ to mex o pa. Pêr âm hãmri na hte Pawre ho mẽ ahkre ho pa.

Anhÿr o hamaxpêr.

² Nê koja mẽ õ patrãw ra Kris kôt amnhĩ xãm japêr ka kãm mẽ àpênh xwÿnhjê mã anê kê Kris kôt mẽ kêp mẽ htõ hã mẽ kãm àpênh mex o ri pa. Nom kê mẽ uræk nê kêp Kris kôt hkwy hã mẽ omu nê hamaxpêr o:

—Nà Kris kôt ixtõ kênã kot paj kêt ri kapêr kôt amnhĩ nhĩpêx nê kãm ixàpênh mex o ri ixpa.

Anhÿr o hamaxpêr kêt nê. Kê kêp Kris kôt htõ hã kãm ho mex prãm xaj kãm àpênh mex o pa.

E kêr ka mẽ kãm mẽ àpênh o mẽ pa xwÿnhjê mã ã tanhmã mẽ àpênh to ho pa hã karõ anê Ximotre.

Tirtûm kapêr kwÿm ri mẽ ahkre xwÿnhjê jarênh

Rukre 12.13-21; Xiakre 5.1-6

³ Nê na hte Kris kwÿ hkêt xwÿnh kwÿjaja Kris kwÿjê mã Tirtûm kapêr o hêx o pa. Nê htÿx ri Jejus kapêr kwÿm ri tanhmã harênh to ho pa. Âm hãmri na Tirtûm mẽ Pahiiti Jejus Kris wa kapêr tã nhũm htem htÿx ri tanhmã ho hêx to ho ri mẽ hkôt pa.

⁴ Mẽ kot amnhĩ to rÿnh xwÿnh ã amnhĩ to jarkrar tã mẽ àhpumunh tÿx kêt. Na htem tanhmã Tirtûm kapêr kute hã axpên mã akir nê mẽmoj tã axpên kãm gryk o pa. Nê axpên mã kapêr punuj nê mẽmoj tã axpên kamnhix o pa.

⁵ Nê hamaxpêr mex kêt jakamã mẽmoj tã axpên mã àkjêr pix o pa. Na htem ã amnhĩ nhĩpêx anhÿr o Tirtûm kapêr mar tÿx kêt nê. Hãmri nê htÿx ri hamaxpêr nê hamaxpêr o:

—Kot paj Tirtûm kapêr o mẽ ahkre ho ixpa nhũm mẽ inhma nê inhmã amnhĩrer mex nê pa ixkàxpore rax nê ri ixpa. Nà kot paj ã amnhĩ nhĩpêx anhÿr o ri ixpa. Ja inhma mex.

Anhÿrja o kãm hikàxpore rũnh prãm o amnhĩ to amnhĩrĩt o pa.

Kàxpore jarẽnh

6-8 E kot paj hpãnhã amã tanhmã kàxpore jarẽnh to ka inhma Ximotre. Xà na pu htem pakatorxà nhõhy rũm pajapôj nẽ amnhĩ kôt kàxpore hkwy jamý nẽ ho pajapôj? Nà na pu htem pahkẽnh nẽ panhÿ kamã pajapôj. Tã kot puj mẽ ja pyrã nẽ nhÿrmã ty nẽ mã ho anẽ nẽ panhÿ kamã ma papa. Jakamã kër pu mẽ kormã pika ja kamã pahÿr nẽ papa ri paxàpkur xà nẽ mẽ paxê pix tânopxar pê pahkĩnh nẽ ri papa. Pakàxpore rũnh kêt tã na pu htem Tĩrtũm kamnàr rom pahkĩnh nẽ pajamakêtkati nẽ papa. Jao pajamaxpẽr o:

—Nà ixkàxpore rax kêt nẽ ixkukrêx rax kêt tã na hte Jejus ixkôt pa ho pa nẽ mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nẽ ijamakêtkati nẽ ixãmnhĩx ixpa.

Anhÿr o pajamaxpẽr o papa.

9-10 Mẽ kot amnhĩm kàxpore o pikuprõnh rũnh xwÿnhjaja na htem kàxpore pix kukamã hamaxpẽr o pa nẽ gaa nẽ kàxpore rũnh gryk ã amnhĩ tomnuj o pa. Na pre mẽ pahkwÿjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nẽ hamakêtkati nẽ pa hkêt nẽ. Na htem omnuj nẽ hkaprĩ nẽ pa. ã na htem mẽ hikàxpore rũnh xwÿnh kwÿjaja amnhĩ nhĩpêx anhÿr o pa. Jao kàxpore pix kukamã hamaxpẽr nẽ gaa nẽ ra gryk ã mẽ kot amnhĩ to mex xà kaga hpa nẽ htÿx ri tanhmã amnhĩ tomnuj to ho pa. Nẽ tanhmã hkwyjê nhĩpêx punuj to. Te tutre kot harôj xành ã htÿx rapuuti hwÿr gjêx nẽ tee ri kãm kator prãm kaprÿ pyrãk. ã mẽ kot amnhĩ nhĩpêx anhÿr o pa jakamã koja nhÿrmã Tĩrtũm ma mẽ kot amnhĩ xà htÿx kamã hamak tũm xà hwÿr mẽ kurẽ.

Pawre kot Ximotre mã mẽmoj tã karõ

Korosẽ 4.17; Wam Ximotre 4.14; Sikũn Ximotre 2.1-7

11 Nẽ kwa Ximotre kër ka mẽ urãk nẽ kàxpore rax prãm xàj amnhĩ tomnuj o apa hkêt nẽ. Ate Tĩrtũm mã tanhmã amnhĩ nhĩpêx to ho apa xwÿnh jakamã kër ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrã nẽ ate amnhĩ jarẽnh xà hkôt amnhĩ nhĩpêx o ri apa. Nẽ amã Kris kôt akwÿjê hkĩnh pé mẽmoj to mẽ kutã anojarêt o ri apa. Nẽ Kris kôt mẽ hkwy hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nẽ mẽ piitã mẽ ho mex o ri mẽ hkôt apa.

12 Na ka pre Kris kôt mẽ pahkwÿjê noo mã tanhmã amnhĩ jarẽnh to. Tĩrtũm kot amnhĩ wÿr awÿr nhũm ate Jejus kôt amnhĩ xãm nẽ amã kãm tanhmã amnhĩ nhĩpêx to ho apa hprãm ã amnhĩ jarẽ nhũm ikrêsti kamã mẽ piitã ja hã ama. Jakamã kwa kër ka arĩ Jejus kôt amnhĩ nhĩpêx mex rãhã ho ri apa. Hãmri nẽ nhÿrmã Tĩrtũm mẽ Kra wa kuri amex kumrêx nẽ atĩr tũm nẽ apa ho apa.

13-14 E na pa mẽmoj tã amã karõ rax ka piitã kamã harẽ nẽ mar pa. Tã kër ka inhã ja hã tanhmã amnhĩ jarẽnh to. Mẽmoj piitã ho htĩr xwÿnh Tĩrtũm mẽ Jejus Kris wa noo mã tanhmã ja hã inhã amnhĩ jarẽnh to. Jejus htyk kaxyw nẽ àmnhĩx kot Pahi Põn Pirat mã amnhĩ jarẽnh xwÿnhhta noo mã amnhĩ jarẽ nẽ inhã amnhĩ jarẽnh o:

—Nà kot paj ate mẽmoj tã inhã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mẽ pahwÿr wrÿ. ãm hãmri na pa ã amã amnhĩ jarẽnh anẽ Pawre.

Anhÿr o inhã amnhĩ jarẽ.

Tĩrtũm mex o mex ã mẽ grer

15 Nẽ koja Tĩrtũm akupÿn mẽ pahwÿr Jejus mẽnh xà hã arĩgro jarẽ hãmri nhũm kot harẽnh xàta wÿr pøj nhũm akupÿn mẽ pahwÿr kumẽ. Tĩrtũmja mex o mex. Tapxipix kęp mẽmoj piitã ho amnhĩptar xwÿnh maati. Nẽ kęp jar mẽ ho amnhĩptar xwÿnh piitã mẽ õ Pahi Maati.

16 Nẽ tapxipix na rãhã ho rãhã nẽ mex o mex jakamã puhã hirã rax

kumrêx. Tã hkĩnhã mẽ pahte amnhĩ tomnuj xwýnh jakamã kot puj mẽ puhã hirã raxja kutã hkêt nê. Jao hwýr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêr pu mẽ pahpiitã kãm mex o mex nê hihtýx o hihtýx ã harênh rãhã ho papa.

Axte mẽ hikàxpore rũnh xwýnhjê jarênh

Rukre 16.9

¹⁷ Nê kêr ka Kris kwýjê kamã mẽ hikàxpore rũnh xwýnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpêr o pa hkêt nê. Kàxpore na hte hapêx tokyx anê. Mẽ kãm anê kê mẽ hpãnhã amnhĩ kaxyw Tĩrtũm kôt mãn hamaxpêr týx rãhã ho pa. Na hte àmnhĩx tanhmã mẽ pahto mex to ho pa nê mẽ pahpê õxý hkêt nê. Jao mẽ pahwýr na rê nhũm mẽ pahpur go mex nê pu mẽ kamã panhõ rũnh o papa. Nê mẽ pamã myyti ho hirã pu mẽ kukwak ri parĩt mex pê mẽmoj tã paxàpênh o papa. ã Tĩrtũm kot mẽ pahto mex kot anhýr pu mẽ kukwak ri pahkĩnh nê pajamakêtkati nê ri papa. Tã kêr ka mẽ hikàxpore rũnh xwýnhjê mã anê kê mẽ amnhĩ kaxyw kumã pix mã mãn hamaxpêr rãhã ho pa.

¹⁸ Nê mẽ kãm anê kê mẽ hikàxpore ho hkwýjê pê õxý hkêt nê ho tanhmã mẽ ho mex to ho pa. Nê àmnhĩx ho tanhmã mẽ kêp amrakati xwýnhjê ho ajuta hto ho pa.

¹⁹ Koja mẽ ã amnhĩ nhĩpêx anê nhũm Tĩrtũm ja hã mẽ omu nê hkĩnh nê õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nê pa ri mex nê pa nê mããnên nhýrmã kaxkwa kamã mex kumrêx o jar pika ja kamã mex nê pata jakre. E kêr ka ã mẽ hikàxpore rũnh xwýnhjê mã ja hã karõ anê Ximotre.

Pawre kot Ximotre mã mẽmoj tã karõ jatur xà

Korosê 4.17; Wam Ximotre 6.14; Sikũn Ximotre 1.13, 4.5

²⁰ Nê ra Tĩrtũm kot ate kapêr o mẽ ahkre ho apa kaxyw axãm jakamã kêr ka tãm amnhĩ nhĩpêx pê mẽ ahkre mex rãhã ho ri apa. Jao Tĩrtũm kapêr o hêx o ri mẽ ahkre xwýnhjê hkôt apa hkêt nê. Na htem mẽ kuma nê mẽ kapêr mex ã mẽ hkamnhĩx nom mẽ kapêr mex kêt. Jakamã kwa kêr ka mẽ kot tanhmã mẽ ahkre hto hã mẽ ama nê ãm mẽ ama.

²¹ Na pre ra mẽ pahkwýjaja mẽ kuma nê mẽ kapêr gryk ã Jejus kaga.

E ãm ja pix. Kê Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ã amã ixkapêr ã kaga anê.

Sikũn Ximotre Pawre kot Ximotre hwỳr wam kagà nẽ mẽn̄h kòt hõ mẽn̄h

Pawre na pre kagàja nhĩpêx. Na pre Jejus kwỳ hket xwỳnhjaja Jejus ã unẽ nẽ krĩ pẽ Rõm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwỳr kumẽ. Na pre Ximotre Pawre hkòt pa ho pa hã mytwrỳ xohtõ nẽ. Tã hpãnhã krĩ pẽ Epes kamã arĩk nẽ Tĩrtũm kapẽr o Jejus kòt hkwỳjẽ jahkre ho ri mẽ hkòt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwỳr kumẽ. Nẽ nhỹrmã mẽ kot Pawre pyrã nẽ Jejus ã hpĩr mã htã tee ri amnhĩ kukamã hamaxpẽr kêt ã kãm karõ.

Nẽ mẽ hkwỳjaja kęp Tĩrtũm kra hã amnhĩ jarẽnh tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harẽnh mar nẽ Jejus kwỳjẽ nẽ mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwỳr mẽn̄h anẽ. Nẽ kãm:

¹ Pa Ximotre? Xà amex? Ixpê Pawre na pa amã ixkapẽr nẽ hã kagà nẽ awỳr kumẽ. Ixpê Jejus nhỹ hã hkwỳjẽ jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpẽ hkwỳjaja nhỹrmã kukwak ri pamex kumrẽx nẽ pahĩr tũm nẽ ri papa ho papa.

Pawre kot Ximotre ho Tĩrtũm mẽ Jejus wa hwỳr ã harẽnh

Atre 16.1-2

²⁻³ Te apẽ ixkra pyrãk Ximotre. Jakamã na pa hte ato Mẽpanhĩpêxã maati Tĩrtũm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêt pyrã nẽ tãm ijamaxpẽr o ixpa pẽ Tĩrtũm mã

tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nẽ kamàt kãm amã ijamaxpẽr nẽ ato wa kuwỳ nẽ wa kãm:

—Pa Tĩrtũm mẽ Pahihti wa. E ixte ixkra puro Ximotre ho war awỳr kaxyw war amã ijamaxpẽr. Na ka hte wa ho mex nhũm war akòt amnhĩ nhĩpêx mex o pa. Te õ wõwõ mẽ katorxà wa kot amnhĩ nhĩpêx pyrãk. Na pa hte kot amnhĩ nhĩpêx o paja mã ijamaxpẽr nẽ ÿ hã ixkĩnh nẽ. War ate kamã axukaprĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtcati nẽ àmnhĩx ri pa ho pa kaxyw. Anẽ.

Pawre kot Ximotre nhỹ hã hkĩnh ã harẽnh

⁴ Nẽ na ka pre hte ixkòt ixto ajuta ho ri ixkòt apa htã pa pre nhỹhỹm inhnojarêt nẽ axtem axapênh õ hã amã karõ hãmri nẽ Epes kamã are nẽ ma mõ. Ka amã ijapê xaj tee ri ma inhmõr ã ixpumu nẽ amỳr rax nẽ. Na pa hte arĩ ja hã inhnohtỳx nẽ ri ho ixpa Ximotre. Jao ra ato ama nẽ. Tã kot puj nhỹrmã axte axpẽn pumu nẽ pahkĩnh tỳx nẽ.

⁵ Nẽ na pa hte akatorxà Enĩtre mẽ anhõ wõwõre Rojti wa kãm ijamaxpẽr rãhã ho ri ixpa. Na pre wa kumrẽx amnhĩ kaxyw Jejus kòt hamaxpẽr nẽ hkòt amnhĩ xãm. Tã ka wa hkanrẽhã wa urak nẽ ã amnhĩ nhĩpêx anẽ. Ixte ja hã apumunh mex.

⁶ Na pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nẽ ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kęp ka arĩ ã kãm amnhĩ nhĩpêx anhỹr rãhã ho ri apa.

⁷ Na pu htem Tĩrtũm Karõ nhỹ hã pamã ma ho papa hket nẽ. Na pu htem ÿ hã pamã mẽ piitã mẽ hkĩnh pẽ paxàmnhĩx tanhmã mẽ ho ajuta hto ho papa. Nẽ ÿ hã kapẽr o mẽ ahkre htỳx o ri mẽ hkòt papa. Nẽ mẽmoj

punuj kutā amnhī to ht̄yx rāhā nē. Jao amnhī to mex pix nē.

⁸ Jakamā kwa kēr ka amā mē kām Jejus jarēnh o apa pymaj tee ri amnhī kukamā ajamaxpēr kēt nē. Nē mē kot Jejus ā ijaxār nhūm arī ixkrī hā ijarēnh ma nē mē kot ixkuxwar ajaxār pymaj mē kām Tirtūm kapēr o mē ahkre hkukamā tee ri ajamaxpēr kēt nē. Mē kot ā anhīpēx anh̄yr mā tā kēr ka amnhī kamā akahak kēt nē. Ām Tirtūm nh̄y hā hiht̄yx xā ho amnhī to ht̄yx nē ixpyrā nē ma mē kām Jejus kot mē panē tanhmā amnhī nhīpēx to hā harēnh to rāhā ho ri mē hkôt apa. Mē kot tanhmā hā anhīpēx to ht̄ā.

⁹ Na pu htem Jejus kôt amnhī xunhw̄y nhūm Tirtūm ja hā mē pahpumu nē Jejus kukwak ri amnhī katut kôt mē pahte amnhī tomnuj piitā rēnh pa nē mē pahto hkra. Hāmri nē mē pahte hkôt pix mā amnhī nhīpēx o papa kaxyw mē paxunhw̄y. Ām Jejus pix kukwak ri na hte mē pahto hkra nē ā mēmoj to mē pakutā nojarēt rāhā ho pa anē. No na hte mē pahte amnhī to mex ā mē pahpumunh kôt mē pahto hkra hkēt nē. Amnepēm kormā mēmoj piitā hkēt ri na pre mē pakukamā hamaxpēr o:

—Koja mē nh̄yrmā Ixkra Jejus Kris kôt amnhī xunhw̄y pa ja hā mē omu nē Ixkra kukwak ri mē ho mex nē. Anē.

¹⁰ Tā kormā mē pahte amnhī tā ā kot mē pajarēnh anh̄yrja mar kēt jakamā na pre Jejus mē pahw̄yr wr̄y nē tanhmā mē pahto mex to. Na pre ty nhūm Tirtūm akup̄ym ho ht̄ir. Jakamā na pu htem ra amnhī kaxyw hkôt pajamaxpēr nē hkôt amnhī xunhw̄y hāmri nē nh̄yrmā mē pahtyk tā nhūm Tirtūm kot Kra Jejus nhīpēx pyrā nē akup̄ym mē pahto mē pah̄tir pu mē Jejus kukwak ri wa kuri pamex nē pah̄tir tūm nē papa ho papa. Jakamā na pu htem mē pamā pah̄tyk pyma ho papa hkēt nē.

¹¹ Amnepēm na pre Tirtūm ixām nē tanhmā inhmā ixāpēnh ā karō hto nē inhmā:

—E Pawre kēr ka Jejus nh̄y hā ma hkwȳjē jahkre ho ri mē hkôt apa. Nē ixkapēr o mē ahkre mex nē. Kēr ka ā amnhī nhīpēx anh̄yr rāhā ho ri mē hkôt apa. Anē.

¹² Tā ā kot inhmā kapēr anh̄yr nhūm ixte kapēr kôt amnhī nhīpēx o ixpaja m̄yrapē na htem Jejus ā tanhmā inhīpēx kati hto ho pa. Pa hte ixpunuj nē amnhī xā ht̄yx kamā ijamak o ri Jejus mā tanhmā amnhī nhīpēx to ho ri mē hkôt ixpa. Tā nom tee ri ja hā amnhī pumu nē amnhī kamā xpijaām nē ixkaprī hkēt nē. Ixte amnhī kaxyw hkôt ijamaxpēr xw̄ynhja na ixte tanhmā kot amnhī nhīpēx to hā omunh mex jakamā kot paj ty nhūm mē arī inhm̄yr pē Tirtūm kapēr mar o pa. Mē kot ja hā ixp̄ir tā koja mē apē Kris kôt ixkw̄yjaja inhm̄yr pē arī mē kām harēnh o apa. Kojā mē ā x̄pēn m̄yr pē amnhī nhīpēx anh̄yr o pa rāhā nhūm Pahihti Jejus akup̄yn mē pahw̄yr wr̄y.

¹³ Kwa Ximotre. Ra ixte amā mēmoj tā karō rax jakamā kēr ka mar t̄yx nē hkôt amnhī nhīpēx rāhā o ri apa. Jao Jejus Kris nh̄y hā mē piitā mē noo mā amnhī kaxyw kām ajamaxpēr t̄yx rāhā nē. Nē mē piitā mē ho mex o ri apa.

¹⁴ Ate mē kām tanhmā Jejus jarēnh to ho ri apaja ām hāmri na. Tā koja mēhō ht̄yx ri tanhmā ho kapēr punuj to r̄y axtem nē tanhmā harēnh to ka ja hā ama nē nē kām akapēr kām axiht̄yx nē. Tirtūm Karō ra kot akarō hw̄yr àr jakamā kēr ka ŷ hā ā Jejus jarēnhja jamār mex o ri apa anē.

Pawre kot tanhmā amnhī jarēnh to Sikūn Ximotre 4.16-18

¹⁵ Nē m̄an ka pre ra pika pē As kamā Kris kw̄y kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkēt nē.

¹⁶⁻¹⁸ ām Onēsipti pix na pre mē kurom ijarēnh ma nē man ixw̄yr Rōm w̄yr mō nē ijapēr o ri mē hkôt mra nē ixw̄yr kato. Hāmri nē xatā ixw̄yr mra nē tanhmā ixto mex to. Jao akup̄ym

ijamexpêr o hihtÿx. Ixpê prês nê ixkrî htâ kêp ixkràmnhwÿ hã amnhî jarênh ã hpijaàm kêt nê. Nê amnepêm kormã krî pê Epes kamã ixpa ri na pre mãânên tanhmã ixto mex to ho pa. Tã ã kot inhîpêx mex anhÿr o pa jakamã na pa hte ho Pahihti Jejus wÿ nê kãm:

—Pa Pahihti? Onësipti o na pa awÿ. Kot ixto mex rãhã ho pa jakamã kwa kêr ka ixtã omu nê kutã anojarêt rãhã ho apa. Nê ôrkwÿ kamã hkwÿjaja mãânên tanhmã mē ho mex to. Hãmri nê nhÿrmã akupÿn mē ixwÿr wrÿ nê ixtã kamã axukaprî hã tanhmã ho mex to. Anê.

2

Mê pahte Jejus kôt amnhî nhîpêx pix prãm ã mē pamã karô

Wam Ximotre 6.11-16

¹ E Ximotre. Jejus Kris kot mēmoj to mē pakutã nojarêt rãhã jakamã kwa kêr ka ÿ hã amnhî to htÿx nê kãm tanhmã amnhî nhîpêx to ho apa hã amnhî kamã akahak o ri apa hkêt nê.

² Ra ate pa tanhmã Tirtûm kapêr o mē ahkre htoja mar jakamã kêr ka amnhî xô ri ã Jejus kôt mē pahkwÿjê jahkre ho apa anê. Mē kot amar nê pahpyràn axpên xô ri ho axpên jahkre ho pa kaxyw.

³⁻⁴ Sôrdat na htem mē hkrãhtûm kãm prãm xà hkôt tanhmã amnhî nhîpêx to. Jao tanhmã kute htã kapêr ma nê hkôt amnhî nhîpêx. Tanhmã à rÿ kãm prãm rÿ tanhmã omnuj to htã kutã amnhî to htÿx nê mē hkrãhtûm kôt amnhî nhîpêx. Na htem amnhî xâpênh kukamã tee ri hamaxpêr o pa hkêt nê. ãm mē hkrãhtûm kapêr kôt pix mã amnhî nhîpêx o pa hprãm. Tã kêr ka mē uràk nê Pahihti Jejus kôt amnhî nhîpêx rãhã ho ri apa hprãm. Mē kot hã tanhmã atomnuj to htãã.

⁵ Nê mē hprôt tÿx xwÿnhjaja na htem hkwÿjê pê amnhî to wa hprãm xàj ãm ja pix kukamã hamaxpêr. Hãmri nê hprôt tÿx prãm xàj mēmoj kot mē ho hirerek kêt nê amnhî jagri htÿx nê. Hãmri nê hprôt tÿx o hkwÿjê jakre nê amnhî to wa nê pôj nê kot

amnhî to wa hã mēmoj to kãnja. Tã kêr ka mē uràk nê amã Pahihti Jejus kot amnhî nhîpêx kôt pix mã amã amnhî nhîpêx prãm.

⁶ Nê pur kãm mē àpênh xwÿnhjaja na htem mē hpur kãm àpênh pix tânopxar o pa nê àpênh rÿnh nê. Kãm kaga hkêt kãm àpênh o pa. Tã àpênh rÿnhja kukwak ri ihpur kãm ô rÿnh nê ho apkur mex o pa. Nom koja mē kãm kaga nê àpênh mex kêt nê hãmri nê ô grire nê apkur mex kêt nê. Tã kêr ka pur kãm mē àpênh rÿnh xwÿnhjê pyrà nê Pahihti Jejus mã amnhî nhîpêx mex o apa. Nê mē uràk nê amã kaga hkêt kãm axâpênh pix tânopxar o ri apa.

⁷ E na pa ã ajahkre anê Ximotre. Tã kêr ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprî hã mar tÿx nê.

⁸ Nê kêr ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htàmnhwÿ hã mē pahpyrà nê ï ho ï nê kato nê panhõ pika kamã pa ho pa. Tã nhùm prem kupî nhùm amnhî xà htÿx kamã hamak kãm ty. Hãmri nhùm Tirtûm akupÿm ho htîr nhùm akupÿm htîr o htîr. Á na pre hte harênh anhÿr rãhã ho ri mē hkôt ixpa.

⁹ Mÿrapê na prem ijaxà pa arî jar ixkrî ho ixkrî. Na htem ixte amnhî tomnuj xwÿnh pyràk o inhîpêx nê axte ixte Jejus kapêr jarênh o ixpa pymaj ijaxà. Tã ã mē kot inhîpêx anhÿr tâ na hte Kris kôt pahtôjaja arî ixpãnhã mē kãm harênh o ri pa. Koja mē tee ri kãm Jejus jarênh o hapêx prãm kaprÿ.

¹⁰ Jakamã kwâr mē mãmri ã inhîpêx anê. Koja mē arî Jejus kot tanhmã mē panê amnhî nhîpêx toja mar o pa nhùm mē hkwÿjaja hkôt amnhî xunhwÿ nê nhÿrmã pahpyrà nê kêp Jejus Kris kwÿ hã Tirtûm mē wa kuri mex nê htîr tûm nê pa ho pa.

Kris kwÿ kot tanhmã amnhî tâ grer to hã mē harênh

¹¹ Na pu htem mē pahpê Kris kwÿ hã ã amnhî tâ pagrer anê:

Mě kot Kris ã mẽ panhĩmex tã kot puj mẽ akupỹm pahtĩr nẽ kuri pamex nẽ pahtĩr tũm nẽ papa ho papa.

¹² Mẽ kot tanhmã Kris ã mẽ pah-tomnuj to htã kot puj mẽ arĩ hkõt amnhĩ nhĩpêx o papa rãhã ty nẽ nhỹrmã ãhkõ hã mẽ ho amnhĩptãr o papa.

Nom kot puj mẽ amnhĩ kamã pakahak pẽ mẽ pahpê Jejus kwỹ hkõt ã amnhĩ jarẽ hã koja Jejus amnhĩ xwar mẽ pahpê hkwỹ hkõt ã mẽ pajarẽ.

¹³ Nẽ mẽ pahte amnhĩ kaxyw Jejus kõt pajamaxpêr kêe tã tanhmã amnhĩ jarẽnh to xã hkõt tanhmã amnhĩ nhĩpêx to.

Aa kot mẽmoj tã amnhĩ jarẽnh kuhpa hã ri tanhmã amnhĩ nhĩpêx to hkõt. Anẽ.

Mẽ kot Tĩrtũm kapêr o mẽ ahkre mex xwỹnhjê jarẽnh

Wam Pêtre 3.15-16

¹⁴ E Ximotre. Ixte ã mẽmoj tã amã karõ anhỹrja kêr ka ho mẽ ahkre rãhã ho ri mẽ hkõt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tĩrtũm kapêr o mẽ ahkre mex o ri pa nẽ kapêr ã tanhmã axpên mã àkjêr to hkõt nẽ. Koja mẽ hã axpên mã akir hãmri nẽ amnhĩ to mex kêr nẽ. Hãmri nhũm mẽ kot mẽ kapêr mar xwỹnhjaja ja hã mẽ omu nẽ tee ri Tĩrtũm kapêr kukamã hamaxpêr nẽ hkõt amnhĩ nhĩpêx mex kêr nẽ.

¹⁵ Nẽ na htem mẽ kãm mẽ àpênh mex xwỹnhjaja mẽ õ patrãw kapêr ma nẽ hkõt mẽmoj tã àpênh mex nẽ. Nhũm õ patrãwja hwỹr mra nẽ àpênh ã omu. Hãmri nhũm amnhĩ wỹr omu nẽ àmnhĩx noo mã apê. Kãm àpênh mex jakamã amnhĩ kamã kãm uma hkõt nẽ. Ja pyrã nẽ kêr ka Tĩrtũm noo mã kãm amnhĩ nhĩpêx mex rãhã nẽ aprĩ hã kapêr o mẽ ahkre mex o ri mẽ hkõt apa. Kê ã ate amnhĩ nhĩpêx anhỹr ã apumu nẽ anhỹ hã hkĩnh nẽ. Ka àpênh xwỹnhhta pyrã nẽ amnhĩ kamã amã uma hkõt nẽ noo mã kãm amnhĩ nhĩpêx mex o ri apa.

¹⁶ No mẽ kot Tĩrtũm kapêr o hêx o mẽ pa xwỹnhjaja kêr ka mẽ hkõt ri apa hkõt nẽ. Nẽ mẽ kapêr mar nẽ ri mẽ hkõt axãm hkõt nẽ. Na htem mẽ kapêr ma nẽ mẽ hkõt amnhĩ nhĩpêx o pa nẽ kãm Tĩrtũm kapêr mar prãm kêr nẽ. Nẽ gaa nẽ te kêp mar pumaj amnhĩ jamak pro pyrãk o amnhĩ nhĩpêx.

¹⁷ Týx ri tanhmã mẽ ahkre hto xãja te kot mẽ hkãnhya aa mex kêr nẽ ra omnuj týx o mõrja pyrãk. Jao mẽ kot mẽ kapêr mar o mẽ pa xwỹnhjaja mẽ mar pẽ ra mẽ hkõt amnhĩ tomnuj týx o mõ. Na hte ra Imẽnew mẽ Pijertija wa ã htỹx ri amnhĩ krã hkõt mẽ ahkre anhỹr o pa.

¹⁸ Nẽ Tĩrtũm o hêx o mẽ hkõt pa nẽ nhỹrmã akupỹm mẽ pahto mẽ pahtĩr kêr ã harẽnh o pa. Hãmri nhũm mẽ amnhĩ tã wa kuma nẽ tee ri amnhĩ kukamã hamaxpêr pẽ Jejus kaga nẽ axte amnhĩ kaxyw hkõt hamaxpêr kêr nẽ. Nom wa kapêrja kot anhỹr kêr.

¹⁹ Kêr Tĩrtũm kapêrja ãm hãmri na. Kot mẽmoj to hêx kêr jakamã na pu htem amnhĩ kaxyw hkõt pajamaxpêr kaprỹ hkõt nẽ. Kapêr ã kagã htũm kot tanhmã mẽ pahpê hkrajê jarẽnh to nẽ harẽnh kot:

Tĩrtũm na kot hkrajê piitã omunh mex rãhã ho pa xwỹnh.

Anhỹr o mẽ pajarẽnh. Nẽ mẽ pamã mẽmoj tã karõ kot:

Kê mẽ kot Jejus kõt amnhĩ xunhwỹr xwỹnhjaja amnhĩ tomnuj o pa hkõt nẽ. Anẽ.

Tĩrtũm krajaja te kêp prat mex pyrãk ã mẽ harẽnh

²⁰ Nẽ mẽ hikãxpore rũnh xwỹnhjaja mẽ õ xijere nẽ mẽ õ prat xohtõ. Prat kwỹ muxre nẽ hkwỹ omnajre. Prat pynajre na htem mãmrĩ kamã apku no prat muxreja ãm mẽmoj mex pix kaxyw na htem mēsti hã haxwỹ nẽ kamã apku. Kasamēt ã rỹ mẽ hkra krã hkēnh ã mẽ hkĩnh nhũm htem mēsti hã haxwỹ nẽ kamã apku.

²¹ Tã mẽ kot Tĩrtũm kapêr o hêx o mẽ pa xwỹnhjê hkõt hamaxpêr kêr nẽ mẽ hkõt amnhĩ tomnuj kêr xwỹnhjaja te mẽ kot prat muxre pyrãk. Na htem tãm amnhĩ nhĩpêx nẽ tanhmã

hamaxpēr punuj to ho pa hkēt nē. Hāmri nhūm Tīrtūm ja hā mē omu nē mē ŷ hā hkīnh nē. Hāmri nē te mē kot prat muxre jaxwūr nē kamā apkur pyrā nē mē kot kām tanhmā amnhī nhīpēx to ho pa kaxyw mē unhwū.

Mē pahte tām amnhī nhīpēx ā mē pamā karō

²² Nē mē aptār nyw jamaxpēr punujja kēr ka te ate hamūnh nē amnhī katut kōt rēnh par pyrāk o hipēx Ximotre. Jao axte ho ajamaxpēr o ri apa hkēt nē. Nom mē hamaxpēr mexja kēr ka hamū nē amnhī krā him hagjē nē ho ajamaxpēr rāhā ho ri apa. Jao tām amnhī nhīpēx nē amnhī kaxyw Tīrtūm kōt ajamaxpēr rāhā nē. Nē amā mē kēp Kris kōt akwūjē hkīnh pē tanhmā mē ho ajuta hto ho ri mē hkōt apa. Jao mēmoj to mē kutā anojarēt rāhā nē. Na hte ā Pahīti Jejus kōt amnhī nhīpēx xwūnhjaja amnhī nhīpēx anhūr o pa.

²³ Nē kēr ka mē kot htūx ri amnhī krā hkōt mē ahkre ho mē pa xwūnhjē hkōt apa hkēt nē. Te ate mē kēp awry hā ri apa pyrā nē mē kapēr ma nē ām ama. Na htem mē kapēr mar o pa nē ra hā axpēn mā tanhmā àkjēr to ho pa. Jakamā kwarī mē hkōt ri apa hkēt nē.

²⁴ Mē pahte Tīrtūm mā amnhī nhīpēx o papa xwūnhjaja na pu htem mē kurom mēmoj tā axpēn mā paxàkjēr o ri papa hkēt nē. Na pu htem ām mē piitā mē kamā paxukaprī pē mē ho mex nē mē kamā pagryk tokyx anhūr kēt nē. Nē Tīrtūm kapēr o mē ahkre mex nē. Na hte ā mē pahte Tīrtūm mā tanhmā amnhī nhīpēx to xwūnhjaja amnhī nhīpēx o papa anē.

²⁵⁻²⁶ Jakamā koja mēhō ate Tīrtūm kapēr o mē ahkreja ma nē tanhmā ho amā kapēr to ka ama nē amnhī tā tanhmā kām akapēr punuj to hkēt nē. Ām kamā axukaprī ho tanhmā hā kām akapēr mex to. Na hte Satanasti te kot amnhīm mē unēnh pyrāk o mē hipēx nē tanhmā mē kām Tīrtūm kapēr o hēx to nhūm mē kuma nē hkōt hamaxpēr nē kapēr kōt amnhī

nhīpēx. Tā kot kaj mē kamā axukaprī ho mē kām akapēr mex nē nhūm Tīrtūm tanhmā mē hkrā hto nhūm mē ama nē hkōt amnhī xunhwūr japēr. Te Tīrtūm kot Satanasti pē amnhīm mē utār pyrāk. Jakamā nhūm mē hpānhā Tīrtūm kapēr mex ā harē nē harēnh o:

—Nà pēr ām hāmri na Tīrtūm kapērja. Ām mex o mex. Anē.

3

Jejus akupūn wrūk kukamā mē kot amnhī tomnuj xwūnhjē jarēnh

Matēwre 24.4-13; Korosē 2.16-19; Wam Ximotre 4.1-5; Sikūn Pētre 2.1-3; Jutre 3-16

¹ Nē Jejus akupūn mē pahwūr wrūk xwūj ri mē kot tanhmā amnhī nhīpēx toja kot paj hpānhā ixprī hā amā harē ka inhmar tūx nē Ximotre. Koja Jejus akupūn mē pahwūr nojarēt pu mē pahpē hkwūjaja pahpunuj nē papa.

² Nē Kris kwū hkēt xwūnhjaja koja mē amnhī pix kukamā hamaxpēr o pa.

Jao hikàxpore rax o pikuprōnh pix kukamā hamaxpēr pē hkwūjē pē ōxū htūx o pa.

Nē mēmoj tā amnhī to jarkrar o pa. Nē tanhmā hkwūjē japry hto ho pa. Nē mē hipēxā nē mē katorxā hā hpījaām kēt o pa.

Nē Tīrtūm ā hpījaām kēt o pa.

Nhūm mēhō tanhmā mē ho mex to nhūm mē amnhī tā mē omu nē ām mē omu nē amnhī tā tanhmā mē kām nē hkēt nē. Rū mē kām: “Nà ām hāmri na ka ā ixto mex anē. Nà ja mex.” Anhūr o mē kām kapēr kēt nē.

³ Mē ukaprī hkēt jakamā koja mēhō tanhmā mē homnuj to nhūm amnhī tā mē omu nē kamā gryk kurē kumrēx nē aa gryk o hapēx kēt nē.

Nē amnhī tā tanhmā hkwūjē ho hēx to ho pa.

Nē htūx ri kām hprām xā hkōt tanhmā amnhī tomnuj to.

Nē oprē ho pijapu pix kukamā hamaxpēr.

Ně axtem ně kām mẽmoj mex pumunh prām rỳ mẽmoj mex mar prām kêt nê.

⁴Ně mẽhõ ho hkràmnhwỳ htã axtem ně mẽ kām mẽ hkurê xwỳnhjê nhĩhkram haxà.

Ně hamaxpêr mex kêt o tanhmã amnhĩ tomnuj to rãhã ho ri pa.

Ně amnhĩ to rũnh o mẽ piitã mẽ hakrenh par ã amnhĩ to jarkrar o ri pa.

Ně amnhĩ krã hkôt kām amnhĩ nhĩpêx prãm xà hkôt amnhĩ nhĩpêx o pa ně kām Tĩrtũm kām prãm xà hkôt amnhĩ nhĩpêx prãm kêt nê.

⁵Hãmri ně mẽ kêp hkra hã amnhĩ jarênh o pa htã aa hkôt amnhĩ nhĩpêx kêt. ã Tĩrtũm kra hkêt xwỳnhjaja amnhĩ nhĩpêx kot anhỹr jakamã kwa kêr ka ã mẽ hkôt apa hkêt nê Ximotre.

⁶⁻⁷Na htem hêx rom hkwyjê nhõrkwỹ hwỳr agjê ně kamã tanhmã mẽnijê mã hêx to. Mẽ kot mẽ mar ně tanhmã amnhĩ tomnuj to hãmri ně ja hã amnhĩ pumu ně tee ri amnhĩ kukamã hamaxpêr kaxyw. Ně mẽ kām mẽ kapêr nyw mar prãm tã nhãm mẽ kapêr ma ně nhãm mẽ kapêr mar ně aa Tĩrtũm kapêr mar ně amnhĩ kaxyw hkôt hamaxpêr kêt nê. Jakamã nhũm mẽ kot amnhĩ tomnuj xwỳnhjaja hêx rom mẽ hwỳr mra ně mẽ õrkwỹ hwỳr agjê ně tanhmã mẽ kām mẽmoj to hêx to.

⁸Te kot amnepêr finat Jãnre mẽ finat Jãm̃tija wa kot amnhĩ nhĩpêxta pyrãk. Na pre finat Mojestija Tĩrtũm nhỹ hã tanhmã mẽ ahkre hto ho pa nhũm Jãnre mẽ Jãm̃ti wa kām mar prãm kêt nê. Ně tanhmã ja nê hkwyjê mã kapêr to ho pa. Tã ã mẽ kot amnhĩ tomnuj anhỹr o mẽ pa xwỳnhjaja na htem wa urãk ně kām Tĩrtũm kapêr mar prãm kêt nê kapêr nê tanhmã hkwyjê mã kapêr to ho pa. Nhũm mẽ hamaxpêr mex kêt jakamã ãm mẽmoj punuj pix kukamã hamaxpêr ně mẽ kuma ně amnhĩ kaxyw Jejus kôt hamaxpêr kêt nê.

⁹Tã nom koja mẽ hkwyjaja tokyx hprĩ hã mẽ kot mẽmoj to hêx ã

mẽ omu hãmri ně axte mẽ hkôt hamaxpêr kêt ně nhũm mẽ rĩ amnhĩ pumu. Te amnepêr mẽ kot hprĩ hã Jãnre mẽ Jãm̃ti wa kot tanhmã amnhĩ tomnuj to hã wa omunhta pyrãk.

Mẽ pahte Jejus ã pahpunuj tã hk-aga hkêt ã mẽ pamã karõ

Atre 13.50-14.7, 14.19-22

¹⁰E Ximotre. Ate ixkôt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex.

Ixte tanhmã Tĩrtũm kapêr o mẽ ahkre hto ho ixpaja.

Ně inhmã mẽmoj to anhỹr prãm xwỳnhja.

Ně ixte amnhĩ kaxyw Kris kôt ija-maxpêrja.

Ně inhgryk tokyx anhỹr kêtja.

Ně ixte tanhmã Kris kôt ixkwỳjê ho mex to ho ri ixpaja.

Ně ixpunuj ně ixpa htã arĩ Kris kôt amnhĩ nhĩpêx mex o ixpaja.

ã ixte amnhĩ nhĩpêx anhỹr o ixpaja ate ixpumunh mex.

¹¹Na pa pre krĩ pê ãxiok ně Ikõn ně Ristija kamã mẽ kām Jejus jarênh o ixpa nhũm mẽ hkwyjaja Jejus ã tanhmã inhĩpêx to pa amnhĩ xà htỳx kamã ijamak o ri mẽ hkôt ixpa. Tã nhũm Pahihti Kris xatã mẽ kêp ixpytã pa ixtĩr pê mẽ ãhkra rũm ijapõx o ixpa.

¹²Na hte Kris kwỳ hkêt xwỳnhjaja mẽ pahte Kris kôt amnhĩ nhĩpêx o papa hã mẽ pahtomnuj o pa.

¹³Ně mẽ kot Tĩrtũm kapêr o hêx o mẽ pa xwỳnhjaja koja arĩ mẽ kêp Kris kwỳ hã amnhĩ to hêx pê mẽ nokupyr. Ně mẽ kām Tĩrtũm kapêr o hêx o pa. Jao ra mẽ tãm̃jaja amnhĩ nokupyr o pa ně amnhĩ tomnuj tỳx kumrêx.

Pawre kot tanhmã Tĩrtũm kapêr ã kagã jarênh to

Rõmãn 15.4; Sikûn Pêtre 1.19-21

¹⁴⁻¹⁵No ka Ximotre. Amnepêr aprĩre rũm na pa pre mẽ ixohtõ ně Tĩrtũm kapêr o ajahkre ho ixpa. Aka-torxã ně anhõ wõwõre ně pa ně Kris kwỳjaja pa prem ho ajahkre rãhã ho akôt ixpa ka mẽ inhmãr tỳx ně amnhĩ kaxyw Jejus kôt ajamaxpêr. Jakamã kwa kêr ka arĩ hkôt ajamaxpêr mex

rāhā ho ri apa. Tīrtūm kapērja na htem mar pê amnhī kaxyw Jejus Kris kôt hamaxpēr nē hkôt amnhī xunhwý nhūm Tīrtūm ja hā mẽ omunh xà hkôt mẽ ho hkra.

¹⁶ Tīrtūm kapēr ā kagàja Tīrtūm kapēr na. Na htem ho mẽ ahkre ho pa. Koja mēhō hkwým ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rý tanhmā amnhī tomnuj to htā kapēr ā kagà kamā kapēr nē Tīrtūm kot ā kot amnhī tomnuj anhýrja nē mẽ pamā kapēr ā harēnh ma nē amnhī tomnujta kaga kurē kumrēx. Rý kamā kapēr nē Tīrtūm kot tanhmā mẽ pahte amnhī to mex to hā mẽ pamā karō kamā harē nē kuma. Hāmri nē ý hā hkôt amnhī nhīpēx mex rāhā nē. Ā na hte Tīrtūm kapēr kagàja mẽ kot mar nē hkôt amnhī nhīpēx xwýnhjē ho mex anē.

¹⁷ Na hte mẽ kot Tīrtūm mā amnhī nhīpēx o mẽ pa xwýnhjaja kamā harē nē hkôt amnhī nhīpēx mex pê mẽ piitā mẽ ho mex nē ho mẽ ahkre mex rāhā ho pa.

4

Pawre kot mẽmoj tā Ximotre mā karō

Korosē 4.5-6

¹ Nē koja nhýrmā Jejus Krisja akupýn mẽ pahwýr wrý hāmri nē mẽ pahpiitā tanhmā mẽ pajarēnh to. Ra mẽ htyk xwýnhjaja nē arī mẽ pahtír xwýnhjaja nhūm tanhmā mẽ pahte amnhī nhīpēx to ho papa hā mẽ pahpumunh kôt tanhmā mẽ pajarēnh to. Jao Tīrtūm mẽ wa kuri mẽ pahtír tūm nē papa ho papa hā mẽ pajarē rý wa kuri pahtír tūm nē papa hkêt ā mẽ pajarē. Jakamā kwa Ximotre kot paj Tīrtūm mẽ Jejus Krisja wa noo mā mẽmoj tā amā karō ka inhmar týx nē.

²⁻⁴ Koja nhýrmā mẽ kēp Tīrtūm kra hkêt xwýnhjaja axte kām Tīrtūm kapēr mar prām kêt nē nhām mẽ kapēr pix mar prām o ri pa. Jao amnhī kukamā hamaxpēr o:

—Nà inhmā Tīrtūm kapēr mar prām kêt. Kot mẽmoj piitā nē mẽ hkurē kēnā. Kot paj hpānhā mēhō kot mẽmoj nē mẽ hkurē hkêt xwýnhjē kapēr pix mar o ri ixpa. Nà kot paj anē. Ja na inhmā hprām. Nom kot paj axte Tīrtūm kapēr mar kêt nē.

Anhýr jao kapēr kaga nē hpānhā htýx ri nhām mẽ ujarēnh pix ma nē hkôt hamaxpēr. Koja mẽ ā amnhī nhīpēx anhýr o pa. Jakamā kwa kēr ka arī mẽ kām Jejus kot tanhmā mẽ panē amnhī nhīpēx to hā harēnh rāhā ho ri mẽ hkôt apa Ximotre. Mē kām mar prām kêt tā māmri ri mẽ kām harē. Nē nhýri mēhō pumu nē kām harē. Mē kām mar prām xwýnhjē mā harē nē mẽ kām mar prām kêt xwýnhjaja ka määnēn mẽ kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

—Ām hāmri na ka hte Tīrtūm kôt amnhī nhīpēx mex nē. Anē.

Hāmri nē anojarēt kêt kām mẽ kām Tīrtūm kapēr o mẽ ahkre rāhā ho ri apa.

⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ý hā amnhī to htýx nē arī mẽ kām kapēr jarēnh o ri mẽ hkôt apa. Jao Tīrtūm mā amnhī nhīpēx mex rāhā nē. Kēr ka ā mẽ hkôt amnhī nhīpēx anhýr o ri apa Ximotre.

Pawre kot ra htyk kaxyw ā amnhī jarēnh

Atre 20.17-35

⁶ Nē mẽ kot ixpír xà hā arīgroja ra hwýr ahtēp o mō. Kot paj pēr tokyx ty. Amnepēm na prem Tīrtūm mā mẽmoj nhōr kaxyw nē mẽ hkōm xà kamā mẽmo kagōja py nē mẽ kot Tīrtūm mā mẽmoj nhōr xà hā mēstija ā hkapír pa nhūm hapēx. Tā te ixpé mẽ hkōm xà kamā mẽmo kagō pikapírta pyrāk. Kot paj tokyx ty nē jar ijapēx.

⁷ Na pa ra Pahiiti Jejus mā amnhī nhīpēx mex o ri ixpa. Mē kot tanhmā hā ixtomnuj to htā pa hkaga hkêt nē

arī hkôt amnhī nhīpêx mex rāhā ra ixytk kaxyw.

⁸ Ixte Pahihti kām hprām xà hkôt amnhī nhīpêx mex o ri ixpa jakamā koja amnhī tā tanhmā ixto mex to. Nom papxipix ixto mex kêt nē. Na hte âm hāmri tām mē pahpiitā mē panhīpêx. Jakamā nhỹrmā kot mē piitā tanhmā mē harēnh to xà hā arīgrota ā koja mē pahkīnh pē mē pahte amnhī w̄yr kamā pajamak o papa xw̄ynh piitā mē pamā mā mēmoj mex gō.

Pawre kot amnhī w̄yr Ximotre hw̄yr

⁹ Kwa na pa ra ato ijamak t̄yx nē Ximotre. Kwa kêr ka amnhīm anojarêt nē tokyx tanhmā amnhī to hpa nē man ixw̄yr mō.

¹⁰ Na pre ra Kresêx ma Karatas w̄yr mō nhūm Xitre ma pika pē Tawmas w̄yr mō. Nhūm Tēmti ra tanhmā hamaxpēr to nē àpēnh gryk ā ixkaga nē ma akup̄ym Tesarōn w̄yr mō.

¹¹ âm Rukre pix na arī ixkôt pa jakamā kêr ka anojarêt hāmri nē ahte amōr kêt nē. Makre mā anē kê man akôt ixw̄yr mō nē tanhmā ixto ajuta hto ho pa.

¹² Nē Xikitre na pa pre ra Epes w̄yr kumē.

¹³ Nē Torôt kām Kapti nhōrkw̄y kamā ixte kry pē inhō kamīs pa hkā ryti rer jakamā kêr ka anojarêt nē inhmā apy nē man inhmā o mō. Nē inhō kagāta ka mǎānēn inhmā am̄y nē o mō. Nē mēmo mry kà hā ixte mēmoj tā kagāta ka mǎānēn apy nē mǎn inhmā o mō. E kêr ka anojarêt nē ixkukrêxja jam̄y nē ixw̄yr ho mō.

Tanhmā Aresānti kot Pawre nhīpêx to hā harēnh

¹⁴⁻¹⁵ Nē na pre kàx o mēmoj nhīpêx xw̄ynh Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkôt ixpa nhūm tee ri inhma nē kām mar prām kêt nē. Hāmri nē ixkutā amnhī xām nē inhīpêx kati nē. Nom koja Pahihti Jejus ixtā tanhmā ho. Kwa kêr ka amnhī nē omunh mex nē Ximotre.

Pahihti Jejus kot Pawre mā hamaxpēr o hiht̄yx ā harēnh

¹⁶ Nē pahi kot mē mar xà hā ixkre kamā wam ixte mē kām amnhī jarēnh̄ta ā na pre mēhō ixyr pē mē kām tanhmā ijarēnh to hkêt nē. Na prem piitā mē umaj ixkaga hpa. Nom kwār mē māmri ā amnhī nhīpêx anē. Tirtūm kot ixtā tanhmā mē hoja na inhmā hprām kêt.

¹⁷ âm Pahihti Jejusja pix na pre mē kurom ixkaga hkêt nē. Na pre ixto ixiht̄yx nē pa ŷ hā mē kām tanhmā mē panē kot amnhī nhīpêx to hā harēnh pa. Nhūm Ijaew kêt xw̄ynh kot inhmar o hkrī xw̄ynhjaja ixujarēnh mar o hkrī nhūm Tirtūm inhnē tanhmā mē ho nhūm mē ixp̄r kêt nē.

¹⁸ Koja Pahihti mē kutā ixto ixiht̄yx rāhā nē mēmo arīgro hā amnhī w̄yr ixto api. Pa Tirtūm mē wa kuri inhmex kumrēx nē ixt̄ir tūm nē ixpa ho ixpa. Pahihti mex o mex jakamā kêr pu mē kām mex o mex ā harēnh rāhā ho papa nē aa jam panhūrer kêt nē.

Pawre kot tanhmā hkrāmnhw̄yjē jarēnh to

¹⁹ Nē kêr ka Prisire mē mjên Akir wa kām ijarē. Nē Onēsipti hprō nē hkrajaja ka mǎānēn mē kām ijarē.

²⁰ No Eras kormā Korīt kām pa. Nē Toropti na pre à nē pa Mīrêt kām kure nhūm ixkôt mōr kêt nē.

²¹ Kwa kêr ka amnhīm anojarêt nē amgrà pē man tokyx ixw̄yr mō Ximotre.

Nē ota Epti mē Prutēhti mē Rīnre mē Krawreja aw̄yr hpēr mē. Nē jar Kris kôt pahkw̄yjē piitā aw̄yr hpēr mē.

²² E kê Pahihti Jejus ato mex rāhā nē mē apiitā mē akutā nojarêt rāhā ho pa.

Tā âm ja pix. Ixpê Pawre na pa aw̄yr kagāja nhīpêx nē kumē.

Xitre Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nê. Tã kêp Jejus kôt hkwÿjê nhõ pastô kaxyw gô hipôk pê Kret ã arîk nê Tirtÿm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nê kamã kãm mēmoj tã karô. Tirtÿm kapêr o mē hêx xwÿnhjaja tanhmã kot ja nê mē hkurê to hã kãm karô. Nê mē kot Tirtÿm kapêr o mē ahkre mex pix xwÿnhjaja Jejus kwÿjê kaxyw kot mē rênh ã kãm karô. Nê Jejus kwÿjaja kot axpên to mex o pa hã kot mē kãm karô kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karô nê hã kagà nê hwÿr mênh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtÿm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtÿm kapêr o mē ahkre mex nê.

² Mē kot inhmar nê nhÿrmã htyk nê ma Tirtÿm mē Jejus wa hwÿr àpir nê wa kuri htîr tÿm nê pa ho pa hã amnhî kukamã hamaxpêr kaxyw. Amnepêm na pre Tirtÿm ã mē pahpê hkrajê hkukamã mē pajarênh anê. Nê ãm hãmri ã mē pajarênh anê. Na hte mēmoj tã amnhî to hêx kêt nê.

³ Tã ra mē pakukamã mē pamã mēmoj to amnhîrît nê inhmã kapêr o:

—E Pawre kêr ka ma mē hpiitã mē hkôt ri apa nê mē kãm ixkapêr jarê nê mē kãm: “Kot kaj mē amnhî kaxyw Tirtÿm Kra hkôt ajamaxpêr nê hkôt amnhî xunhwÿ nhÿm Tirtÿm ja hã mē apumu nê mē ato hkra. Ka mē

nhÿrmã atyk tã nhÿm amnhî wÿr mē ato api ka mē wa kuri amex kumrêx nê atîr tÿm nê apa ho apa.” Anhÿr o mē kãm ixkapêr jarênh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mēpanhîpêêxà maati Tirtÿm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

—Pa Tirtÿm mē Pahihtî wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê amnhîx pa ho pa. Anê.

Kris kwÿ hkrãhtÿmjaja kot tanhmã amnhî nhîpêx to kaxyw mē hã kãm karô

Wam Ximotre 3.1-13

⁵ Nê na pa pre Kret rÿm inhnojarêt hãmri nê amã axápênh ã karô nê Kret kãm are nê man mō. Na pa pre amã:

—E kêr ka jar arîk nê mē kãm ixkapêr jarênh jatur xãm mênh o mē hkôt apa. Nê Kris kôt pahkwÿjê mã mē hkrãhtÿmjê xunhwÿ. Kret kãm krî piitã hkôt. Na pa pre ixprî hã tanhmã amã mē harênh to. Tã kêr ka ate inhmar xà hkôt mē hkwÿjê kapi nê mē unhwÿ. Koja mē ã amnhî nhîpêx anhÿr o pa ka ja hã mē omu nê mē unhwÿ.

⁶ Koja mē tãm amnhî nhîpêx o pa nhÿm mē piitã axpên mã mē mex ã mē harê.

Nê mē hprô pix tânopxar o pa nê kuhpa hã nhãm mēnijê ho amnhîkati hkêt nê.

Nê kê mē hkrajaja hipêêxà pyrâ nê amnhî kaxyw Jejus kôt hamaxpêr o pa. Jao hipêêxà nê katorxà wa kapêr ma nê wa hkôt amnhî nhîpêx. No ri htÿx ri amnhî tomnuj o pa hkêt nê.

Anhÿr o na pa pre mē hã amã karô.

⁷ Jejus kôt pahkwÿjê hkrãhtÿmjaja kot Tirtÿm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nē amnhī pix kukamā hamaxpēr o pa hkêt nē.
 Nē gryk tokyx anhÿr kêt nē.
 Nē kagôxyhti japrôr nē ho pipānh o pa hkêt nē.
 Nē oprê ho pa hkêt nē.
 Nē kàxpore rûnh prām xàj hêx rom tanhmā amnhī nhîpêx to hkêt nē.
 Na htem ã amnhī nhîpêx anhÿr hkêt nē.
 8 ãm àmnhîx amnhī nhôrkwÿ hwÿr mē hwÿr o pa.
 Nē mē piitā mē kutā nojarêt rāhā nē.
 Nē tām hamaxpēr nē tām mē piitā mē hipêx o pa.
 Nē amnhī tomnuj pymaj amnhī to htÿx pē Tirtûm kôt amnhī nhîpêx mex rāhā ho pa.
 9 Nē mē kot Tirtûm kapēr mar tÿx jakamā kē mē arī hā nohtÿx nē mar tÿx xà hkôt amnhī xô ri ho hkwÿjê jahkre mex o pa.
 Nē ho mē piitā mē hamaxpēr o hihtÿx o pa.
 Nhûm mēhō Tirtûm kapēr kwÿm ri tanhmā ujarēnh to nhûm hā kuma nē hprī hā kām tanhmā harēnh to kē mar mex nē.
 E Xitre. Na hte ã Jejus kwÿjê hkrāhtûmjaja amnhī nhîpêx anhÿr o pa. Jakamā kēr ka aprī hā Kret kām Jejus kôt pahkwÿjê kapi nē mē kot tanhmā amnhī nhîpêx to ho pa hā mē omu. Nhûm mēhō ã amnhī nhîpêx anē ka ja hā omu hāmri nē kēp Jejus kwÿjê hkrāhtûm kaxyw ãm.

Kret nhō xwÿnhjaja kot tanhmā amnhī tomnuj to hā mē harēnh Xitre 3.9-11

10 Nē atar Kret kām na hte mē ohtô nē kām mē ô pahî kapēr mar prām kêt nē htÿx ri tanhmā Kris kwÿjê mē kapēr to ho pa. Na hte Ijaew kwÿjjaja ã amnhī nhîpêx anhÿr o pa. Jao Ijaew kêt xwÿnh kot Jejus kôt amnhī xunhwÿr xwÿnhjê mē kām:

–Kwa mē ixpyrà nē mē ixpê Ijaewjê kot amnhī nhîpêx kôt măn amnhī nhîpêx kêt wehe.

11 Anhÿr o mē kām kapēr jakamā kwa kēr ka ã mē kapēr anhÿrja nē mē

kām akapēr kām axihtÿx nē. Na htem hpijaàm kêt o hikàxpore hprām xàj ã mē kām kapēr anhÿr o pa. Jao mē hamaxpēr o ahkà nhûm mē kuma nē tee ri hamaxpēr.

12 Na pre ra mē hkwÿjê hō tanhmā mē harēnh to. Mē ahkre xwÿnhjê hōja mē harēnh o:

–Kret nhō xwÿnhjaja na htem hêx pix o pa. Nē oprê nē kām kaga nē apkur xà pix kukamā hamaxpēr o pa. Anē.

13 ãm hāmri ã mē harēnh kot anhÿr. ã mē kot amnhī nhîpêx anhÿr jakamā kwa mē kot amnhī nhîpêxja nē mē kām akapēr kām axihtÿx o ri mē hkôt apa Xitre. Kē mē ã amnhī nhîpêx anhÿr kêt nē. Nē mē kām anē kē mē amnhī kaxyw Tirtûm kôt măn hamaxpēr tÿx nē.

14 Nē kē mē axte Ijaewjê xujarēnh nē mē kot amnhī nhîpêx kôt amnhī nhîpêx kêt nē. ã mē kot amnhī nhîpêx o pa hā mē kām karō xwÿnhjaja na prem Tirtûm kapēr kaga hpa.

15 Mē kot Jejus kôt amnhī xunhwÿr xwÿnhjaja tām mē hamaxpēr o pa jakamā na htem Tirtûm kot mēmoj piitā ho kator xwÿnh pumu nē piitā mex ã harē. No mē kēp Jejus kwÿ hkêt xwÿnhjaja na htem hamaxpēr punuj pix o pa. Nē mēmoj mex pumu nē mex kêt ã harē. Mex tã nhûm mex kêt ã harēnh o pa.

16 Nē mē kēp Tirtûm kra hā amnhī jarēnh tã amnhī tomnuj pix o pa. Jao kēp hkra hā amnhī jarēnh o hêx nē kapēr kwÿm ri amnhī nhîpêx pix o pa. Nhûm Tirtûm tee ri ja hā mē omu nē kām mē hkÿnh kêt nē. Tirtûm mē mē kot amnhī to mex kwÿ mē hā jêt kêt kumrêx.

2

1 E Xitre kot paj tanhmā ate mē ahkre hto hā amā karō ka inhma nē amnhī xô ri mē kām hā karō ho ri apa.

Mēmy wejjaja kot tanhmā amnhī nhîpêx to kaxyw mē hā kām karō

2 Nē kēr ka mēmy wejjê mē anē kē mē amnhī to àptàr mex nē pa.

Nē pipānh nē ri pa hkêt nē.

Ně mẽ gryk kaxyw htỳx ri hkwỳjê
hã hpêr o pikênh kêt nê.
Kê mẽ tãm hamaxpêr nê tãm amnhĩ
nhĩpêx o pa.
Ně amnhĩ kaxyw Jejus kôt
hamaxpêr tỳx rãhã nê.
Nhũm mẽ hkwỳjaja kot mẽmoj tã
tanhmã mẽ homnuj to htã kê mẽ
arĩ tãm amnhĩ nhĩpêx o pa nê
amnhĩ tã tanhmã mẽ ho hkêt nê.
E kêr ka ã mẽmy wejje mã ja hã akarõ
anê.

*Měni wejja kot tanhmã amnhĩ
nhĩpêx to kaxyw mẽ hã kãm karõ*

*Wam Korĩt 14.34-35; Wam Ximotre
2.9-15, 3.11; Wam Pêtre 3.1-6*

³⁻⁴ Ně mẽni wejje mã anê kê mẽ kãm
Jejus kĩnh xàj tãm ri amnhĩ nhĩpêx o
pa.

Ja xpên jakwa kamã nhãm mẽ
hixi ho rêr o pa hkêt nê.

Ně kagôxyhti ho pipãnh o pa hkêt
nê.

Ně mẽ kãm anê kê mẽni xaptàr ny-
wjê jahkre mex o pa. Mẽ kot mẽ
mar nê mẽ urak nê tãm amnhĩ
nhĩpêx kaxyw. Ja mẽ kãm mẽ
mjên nê mẽ hkrajê japê hã mẽ
kãm mẽmoj to anhỳr o mẽ kutã
nojarêt rãhã ho pa.

Kêr ka ã mẽni wejje mã akapêr anê.

*Měni xaptàr nywjaja kot tanhmã
amnhĩ nhĩpêx to kaxyw mẽ hã kãm
karõ*

⁵ Ně mẽni xaptàr nywjê mã anê
kê mẽ tãm hamaxpêr pê tãm amnhĩ
nhĩpêx o pa.

Ně mẽ òrkwỳ kamã àpênh mex o pa.

Ně mẽ mjên kapêr ma nê hkôt
amnhĩ nhĩpêx.

E. ã mẽni xaptàr nywjê mã karõ anê.
Koja mẽ ã amnhĩ nhĩpêx anhỳr o pa
hãmri nhũm mẽ piitã mẽ kot amnhĩ
nhĩpêx ã mẽ omu nê mẽ harênh o:

—Tĩrtũm kapêrja mex kumrêx. Mẽ
kot hkôt amnhĩ nhĩpêx o mẽ pa
xwỳnhjaja na htem tãm amnhĩ nhĩpêx
mex o pa. Anê.

*Měmy xaptàr nywjaja kot tanhmã
amnhĩ nhĩpêx to kaxyw mẽ hã kãm
karõ*

*Wam Ximotre 4.12; Sikũn Ximotre
2.22; Wam Pêtre 5.5*

⁶ Ně kêr ka mẽmy xaptàr nywjê mã
anê kê mẽ mẽmoj punuj pê amnhĩ to
htỳx o pa. Mẽ hamaxpêr punuj nê
mẽ kot tanhmã amnhĩ tomnuj to pê
amnhĩ to htỳx o pa.

⁷ Ně kêr ka ajaxwỳja tãm amnhĩ
nhĩpêx rãhã ho ri mẽ hkôt apa Xitre.
Mẽ kot ja hã apumunh nê akôt amnhĩ
nhĩpêx o pa kaxyw. Nom kêr ka
tanhmã mẽ ahkre hto hkwỳm ri
tanhmã amnhĩ nhĩpêx to hkêt nê.
ãm Tĩrtũm ã apijaàm o akatàt kôt mẽ
kãm kapêr o mẽ ahkre pê tãm amnhĩ
nhĩpêx o ri apa.

⁸ Ně kêr ka tãm akapêr rãhã ho ri
apa. Kêr kê mẽ kãm mẽ pahkurê
xwỳnhjaja ja hã ama nê amnhĩ kamã
hpijaàm hãmri nê apê Kris kwỳ hã
tanhmã ato kapêr punuj to hkêt japêr.

*Mẽ kãm mẽ àpênh xwỳnhjaja kot
tanhmã amnhĩ nhĩpêx to kaxyw mẽ hã
kãm karõ*

*Epes 6.5-8; Korosê 3.22-25; Wam
Ximotre 6.1-2; Wam Pêtre 2.18-25*

⁹ Ně kêr ka mẽ kãm mẽ àpênh o mẽ
pa xwỳnhjê mã anê kê mẽ ò patrãw
kãm hprãm xà hkôt amnhĩ nhĩpêx o
pa.

Ja mẽ kapêr ma nê hkôt amnhĩ
nhĩpêx mex nê.

Ně amnhĩ tã tanhmã mẽ kãm kapêr
punuj to hkêt nê.

¹⁰ Ně kê mẽ kêp mẽmoj to àhkĩnh kêt
nê.

Ně tãm mẽ hipêx rãhã nê.

Ně kãm hkukrêx jamãr mex o pa.

Koja mẽ ã amnhĩ nhĩpêx anhỳr o pa
nhũm mẽ ò patrãw amnhĩ tã mẽ omu
nê mẽ ÿ hã hkĩnh nê pa. Hãmri nê
hamaxpêr o:

—Hêxta waa nê. Inhmã àpênh
xwỳnhhta na hte inhmã àpênh mex o
pa. Na hte ixkukrêx nê ixkrit jamãr
mex nê ixpê mẽmoj to àhkĩnh kêt nê.
Nà mẽ kot Tĩrtũm kapêr kôt amnhĩ
nhĩpêx o mẽ pa xwỳnhjaja na htem
tãm amnhĩ nhĩpêx o pa. Pêr Tĩrtũm

kapër ãm hãmri na. Æm mex o mex. Anẽ.

E Xitre kêr ka mẽ kãm mẽ àpênh xwýnhjê mã ã mẽ kot amnhĩ nhĩpêx anhÿr ã karõ.

Tanhmã Jejus kãm mẽ pajapê xàj amnhĩ nhĩpêx to hã harênh

Epês 2.8-10; Wam Tesarõn 1.9-10

¹¹ Nẽ Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkõt amnhĩ xunhwÿr xwýnhjê ho hkra pu mẽ nhÿrmã wa kuri pahtĩr tũm nẽ papa ho papa.

¹² Na hte ã mẽ pamã kapër o amnhĩrit anẽ nẽ mẽ pamã:

–E kêr ka mẽ apê ixkra hã tãm amnhĩ nhĩpêx rãhã ho ri apa nẽ axte tanhmã amnhĩ tomnuj to nẽ tanhmã ajamaxpêr punuj to hkêr nẽ. Mẽ ate amnhĩ tomnuj pẽ amnhĩ to htÿx nẽ ixkapêr kõt pix mã ri amnhĩ nhĩpêx rãhã nẽ. Anẽ.

¹³ Na pu htem ã amnhĩ nhĩpêx anhÿr o papa jao pahkĩnh nẽ mẽ papytãr xwýnh Jejus Kris jamãr o papa. Kojã nhÿrmã mẽ panhõ Tĩrtũm xihtÿx xwýnhja akupÿn mẽ pahwÿr kumẽ pu mẽ mex o mex ã omu.

¹⁴ Na pre Jejus amnhĩ grõnh kõt mẽ pahwÿr wrÿ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panẽ amnhĩ nhĩpêx anẽ? Nã mẽ pahpê hkwyja na kãm hprãm. Nẽ mẽ pahte tãm ri Tĩrtũm kapêr kõt amnhĩ nhĩpêx o papaja na kãm hprãm. Nẽ mẽ pahte urak nẽ mẽ piitã mẽ kutã panojarêr rãhã ho papaja na kãm hprãm. Jakamã na pre ã mẽ panẽ amnhĩ nhĩpêx anẽ.

¹⁵ E Xitre. Ixte mẽmoj tã amã karõja kêr ka ho Kris kwÿjê jahkre mex o apa kê mẽ ama nẽ kapêr kõt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nẽ Tĩrtũm nhÿ hã tanhmã nẽ kãm akapêr to kê axte hkêr nẽ. Tã mãn ka inhma. Kêr ka ã Kris kwÿjê jahkre mex o apa anẽ.

3

Tanhmã Kris kwÿ kot amnhĩ nhĩpêx to hã mẽ kãm karõ

Rõmãn 13.1-10; Epês 2.1-10

¹ Nẽ kêr ka Kris kõt akwÿjê mã anẽ kê mẽ ho amnhĩptãr xwýnhjê kapêr ma nẽ mẽ hkõt amnhĩ nhĩpêx o pa. Nẽ mẽmoj to mẽ kutã nojarêr rãhã ho pa.

² Nẽ mẽ kãm anẽ kê mẽ tanhmã hkwyjê mã kapêr punuj to ho pa hkêr nẽ. Rÿ mẽmoj tã mẽ kãm àkjêr kêt nẽ. Kê mẽ tãm mẽ hipêx nẽ mẽ kamã ukapri pẽ mẽ ho mex rãhã ho pa. Na hte ã Kris kwÿjaja axpên nhĩpêx o pa anẽ.

³ Kormã mẽ pahte hkõt amnhĩ xunhwÿr kêt ri na pu prem ã amnhĩ nhĩpêx anhÿr kêt nẽ. Na pu prem Tĩrtũm mã pajamaxpêr kêt nẽ kapêr kõt ri amnhĩ nhĩpêx hkêr nẽ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kõt pix mã tanhmã amnhĩ nhĩpêx to ho ri papa. Nẽ axpên tomnuj nẽ. Nẽ axpên kãm pagryk rãhã ho papa. Æ mẽ pahte amnhĩ nhĩpêx anhÿr ho papa jakamã nhũm pre mẽ piitã kãm mẽ pahkĩnh kêt nẽ. Pu mẽ pajaxwÿja pamã mẽ hkĩnh kêt nẽ.

Tanhmã Tĩrtũm kot mẽ pahto mex to hã harênh

Rõmãn 5.6-8; Epês 2.4-10

⁴ Tã pu prem Tĩrtũm kêp mẽ papytãr xwýnh ã harênh ma. Kot tanhmã mẽ panẽ amnhĩ nhĩpêx to hã harênh ma nẽ mex o mex nẽ mẽ pakamã ukapri hã harênh ma.

⁵⁻⁶ Hãmri nẽ amnhĩ kaxyw hkõt pajamaxpêr nẽ hkõt amnhĩ xunhwÿ nhũm amnhĩ tã mẽ pahpumu nẽ mẽ pahto hkra. Nom mẽ pahte tanhmã amnhĩ to mex to hã mẽ pahpumunh kõt mẽ pahto hkra hkêr nẽ. Mẽ pahte tanhmã amnhĩ to mex tore hã. Na pre mẽ pakamã ukapri nẽ ã mẽ papytãr anẽ. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrak o mẽ panhĩpêx. Hãmri nẽ mẽ pahwÿr

amnhĩ Karõ rē nhũm mẽ pahwỳr agjē nē mẽ pamã mẽ pahte amnhĩ nhĩpêx nyw gō. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anē hãmri nē mẽ pahwỳr amnhĩ Karõ rēnh anē.

⁷Tã mẽmo kaxyw na pre ã mẽ pahto mex anē? Nà kãm mẽ pajapê jakamã na pre ã mẽ panhĩpêx anē. Mẽ pahte amnhĩ tomnuj xwỳnh tã kãm mẽ pajapê htyx nē kãm tanhmã mẽ pahto hprãm kêt nē. Nē mẽ pahwỳr Kra Jejus mẽ nhũm wrỳ nē mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nē hkôt amnhĩ xunhwỳr xwỳnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anē. Jakamã kot puj mẽ nhỹrmã Tĩrtũm mẽ wa kuri pahťir tũm nē pamex nē papa ho papa. Koja wa nhỹrmã ã mẽ pahto mex anē.

⁸ ãm hãmri na pa amã ã ja jarēnh anē Xitre. Jakamã kwa kêt ka inhma nē inhmar tỳx nē. Nē ho amnhĩ kaxyw Tĩrtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nē mẽ kot htyx ri mẽmoj tã axpēn mã àkjêr o mẽ pa xwỳnhjaja kêt ka mẽ hkôt apa hkêt nē. Nē mẽ hkukamã mẽ higêt kôt apa hkêt nē. Rỳ finat Mojes kot Tĩrtũm nhỹ hã kapêr ã axpēn mã mẽ àkjêr xwỳnhjê hkôt apa hkêt nē. Na htem ã ri axpēn mã àkjêr anhỹr o pa nē tãm amnhĩ nhĩpêx kêt nē.

¹⁰ Nē koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nē hã axpēn mã akir nē axpēn pē pikjêr kaxyw. Ka ja hã omu nē ã kapêr anhỹrja nē kãm akapêr kê axte hkêt nē. Hãmri nhũm ama nē ãm ama nē arĩ ã mẽ kãm kapêr anhỹr japêr ka axte nē kãm akapêr. Tã ra ate nē kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nē mẽ amnhĩ nē hano kê axte mẽ apê Kris kwỳjê hkôt ri pa hkêt nē.

¹¹ ã mẽ kot amnhĩ nhĩpêx anhỹr o

mẽ pa xwỳnhjaja na mẽ ra Jejus wỳr pry kaga nē htyx ri tanhmã amnhĩ tomnuj to ho pa. Nē ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapêr to

¹² Nē kot paj tokyx ma Nĩkop wỳr mō. Kêr pa tokyx hwỳr pōj nē amgrà pê krĩ nhõ xwỳnhjê hkôt ixpa. Jakamã kot paj tokyx ma awỳr Atēmti rỳ Xikitre mẽ. Kê mō nē awỳr pōj ka tokyx tanhmã amnhĩ to hpa nē man ixwỳr mō pu mẽ Nĩkop kamã axpēn pumu.

¹³ Nē ota mẽ akuri Apor mẽ axiwôkat Jēntija. Koja wa mẽmo arĩgro hã ma krĩ hõ hwỳr nojarêt ka wa kãm mẽ apkur xà hkwỳ gō kê wa ma ý kamã mōr kêt nē.

¹⁴ Nē kêt ka Kris kwỳjê mã anē kê mẽ arĩ ôrkwỳ pix kãm hkrĩ ho hkrĩ hkêt nē. Kê mẽ tanhmã axpēn to mex to ho axpēn kôt pa. Nhũm mẽhõ kêp amrakati kê mẽ tanhmã ho ajuta hto. Mẽ kãm anē kê mẽ ã axpēn nhĩpêx anhỹr o pa.

¹⁵ Nē ota jar Kris kôt pahkwỳjê piitã awỳr hpêr mẽ Xitre. Nē kêt ka atar Kris kôt mẽ pahkràmnhwỳjê mã mẽ ijarê.

E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapêr nē hã kagà nē awỳr mẽnh anē.

Piremõ Pawre kot Piremõ hwÿr kagà nê mênh

Pawre na pre kagàja nhîpêx nê hkràmnhwÿ Piremõ hwÿr kumê. Na pre Piremõja amnhîm kãm àpênh xwÿnh Onesti japrô. Kàxpore ho haprô nhûm amarî kãm àpênh o pa. Tã tanhmã hamaxpêr to nê hkaga nê ma umaj krî hõ hwÿr hprôt nê tèn amûxu nê kamã pa ho pa. Hãmri nê Pawre pumu nê kãm amnhî jarê. Pawre arî kêp prês nê hkrî ho hkrî nhûm Onesti omu nê kãm amnhî jarê. Hãmri nhûm Pawre kãm Jejus jarê nhûm kuma nê hkôt amnhî xãm kurê kumrêx. Hãmri nhûm Pawre ja hã omu nê hkràmnhwÿ Piremõ mã kagà nhîpêx nê kamã Onesti xyr pê kãm kapêr. Hãmri nê hipêx pa nê Onesti mã kugô nê ma akupÿm õ patrãw Piremõ wÿr kumê nhûm ma mõi. Nhûm Pawre kagàja kamã kãm kapêr nê kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nê kumê. Apê Kris kôt ixtõ hã inhmã akînh. Na ka hte ixpyrà nê Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mê.

² Amã nê anhörkwÿ kamã Tirtüm kapêr mar kaxyw mê kêp Jejus kwÿ hã mê pikuprôn h xwÿnhjê hwÿr. Nê Kris kôt pahõtõx Apti mê Akip wa hwÿr kumê. Akipja na hte mê pahpyrà nê Pahihti Jejus mã tanhmã amnhî nhîpêx to ho pa.

³ Na pa hte mê ato Mëpanhîpêêxà maati Tirtüm mê Pahihti Jejus Kris wa hwÿr rãhã ho ri ixpa. Kot mëmoj to mê akutã nojarêr rãhã nhûm wa ÿ hã mê ajamakêtkati nê axàmnhîx apa ho apa kaxyw.

Pawre kot Piremõ nhÿ hã hkînh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

—Hêxta waa nê. Piremõ na hte amnhî kaxyw Pahihti Jejus Kris kôt hamaxpêr tÿx nê kãm mê ixpê Kris kôt hkwyjê piitã hkînh pê tanhmã mê ixto mex to ho ri mê ixkôt pa.

Anhÿr o inhmã ajarê pa mê kuma nê anhÿ hã ixkînh nê ato Tirtüm wÿr rãhã ho ixpa nê ato hwÿr o:

—Pa Tirtüm. Na xep hte Piremõ kãm akînh tÿx nê akwyjê ho mex rãhã ho pa. ãm hãmri na hte ã mê hipêx anhÿr o pa.

⁶ Na xep mê piitã mê kãm tanhmã Jejus kot mê inhnê amnhî nhîpêx to hã harênh o ri mê hkôt pa. Jakamã kêr ka tanhmã mê kot mar xwÿnhjê hkrã hto kê mëhprî hã mar tÿx nê Kris kot tanhmã mê ho mex to hã amnhî tã omu.

Anhÿr o ato kuwÿ.

⁷ Ate Kris kwÿjê ho mex o apa jakamã te ate pa ixto mex pyrãk Piremõ. Na htem anhÿ hã hkînh nê pa. Pa ijaxwÿja ajarênh ma nê anhÿ hã ixkînh tÿx nê jar mê hãgînh xã kamã ixkrî.

Piremõ kot Onesti kamã ukapri hã Pawre kot kãm karõ

Römãn 15.7; Epes 4.31

⁸ Nã ixte amã mëmoj jarênhja tanhmã kute hkêr. Kot paj ãm amã mëmoj jarê nê hã awÿ. Nom kot paj Kris nhÿ hã amã tanhmã hã karõ hto hkêr nê.

⁹ Kot paj ãm pahte xpên to pahkràmnhwÿ hã hã awÿ. Ra ixwej tÿx nê Kris ã arî mê hãgînh xã kamã ixkrî htã mëmoj tã awÿ ka inhma nê inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mõi. Ixpê prês nê ixkrî nhûm ixwÿr mõi. Pa omu nê kãm Jejus jarê nhûm inhma nê pahpyrà nê amnhî kaxyw hkôt hamaxpêr nê hkôt amnhî xãm. Jakamã te kêp ixkra pyrãk. Hãmri nê ixto ajuta mex o pa.

¹¹ Xep kormã Jejus kôt amnhî xãm kêt ri na pre amã àpênh mex kêt nê. Nê kãm kaga nê htÿx ri tanhmã àpênh to ho pa. Tã ra Jejus kôt amnhî xãm hãmri nê katàt kôt inhmã àpênh mex

o pa. Nē ixto ajuta mex nē. Koja akupỹm amã apê hãmri nē amã àpênh mex nē.

¹² Jakamã ot pa akupỹm awỳr kumē ixkràmnhwỳ. Nom inhmã hapê jakamã koja ma akupỹm mō pa ho ama nē. Tã kot paj akupỹm awỳr kumē.

¹³ Kot jar ixri arĩk nē apãnhã tanhmã ixto ajuta hto ho paja na inhmã hprãm.

¹⁴ Jakamã kot kaj amã akupỹn ixwỳr mēnh prãm nē mãmri ixwỳr amē. Nom ixte ja pumunh kêt. Kam nē amã hprãm xà hkôt tanhmã kãm akapēr to. Kãm anē kê akuri arĩk nē amã àpênh o pa rỳ akupỹn ixwỳr amē.

¹⁵ Nom konēn. Mãn akupỹm awỳr mōr nē kệp Kris kôt akwỳ hã amã àpênh mex kaxyw na pre Tirtũm ixwỳr kumē nhũm ixwỳr mō nē ixri Jejus kôt amnhĩ xãm nē ixri pa hã mytwrỳ hkwy hapêx pa akupỹm awỳr kumē.

¹⁶ Nom ra kệp amã àpênh xwỳnh pix kêt mãânēn kệp Kris kôt atōō. Jakamã kot kaj wa atar axpēn kôt Pahihti Jejus kôt tãm amnhĩ nhĩpêx o ri apa. Nom mãânēn kệp ixkràmnhwỳ mex ã inhmã hapê.

¹⁷ Jakamã kot kaj ixpê Kris kôt akràmnhwỳ hã ijarē hã kot kaj mãânēn inhmã ho mex o apa.

¹⁸ Nē wam amã àpênh o pata ã mãn pre apê mēmoj to ahkĩ rỳ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarēnh to pa amã amnhĩre.

¹⁹ Ixpê Pawre kot paj tanhmã kot ato tewēn toja pãnhã amã amnhĩre. E pa amnhĩ nhĩhkra ho ã amã amnhĩ jarēnh ã kagà anē. Nom ajaxwỳja na ka tanhmã ixto tewēn to Piremõ. Na pa pre amã Jejus kot mē panê htyk ã harē ka pre inhmar xà hkôt hkôt amnhĩ xãm. Jao ixpyrà nē atĩr tũm nē apa ho apa mã xwỳnhhta pãnhã te ate ixto tewēn pyræk.

²⁰ E kwa ixkràmnhwỳ. Ixpyrà nē apê Kris kwỳ jakamã kêr ka ixkamã axukaprĩ hã inhmã Onesti ho mex nē.

Kêr pa ja hã ajarēnh ma nē ixkĩnh nē tãm ijamaxpêr.

²¹ Nà ra ixte apumunh mex kēnã. Kot kaj ixte hã awỳrta kôt hipêx. Ja kaxyw na pa amã kagàja nhĩpêx nē awỳr kumē. Nom kot kaj ãm ja pix ho anhỳr kêt nē. Kot kaj ixte hã awỳrja kôt amnhĩ krã hkôt tanhmã ho mex to. Nà kot kaj ho anē.

Pawre kãm Piremõ hwỳr mōr nē omunh prãm ã harēnh

²² Nē Tirtũm kot mē awỳr inhmēnh kaxyw mē ate ixto hwỳr o apa jakamã koja apu tokyx ma mē awỳr inhmē. Jakamã kwa kêr ka ixkutêp tanhmã mēmoj to mex to. Kêr pa mēmo arĩgro hã mōn awỳr pōj ka ra ixkutêp tanhmã amnhĩ to hpa nē ãm ixpix kãm ajamak o apa.

²³ Nē ota Epasja awỳr hpêr mē. Na hte ixpyrà nē Jejus Kris ã mē hagjēnh xà kamã kệp prēs nē hkrĩ ho hkrĩ.

²⁴ Nē Makre nē Aristak nē Tēmti nē Rukre mē awỳr hpêr mē. Na htem ixpyrà nē Kris mã tanhmã amnhĩ nhĩpêx to ho pa nom ixrom mē kệp prēs kêt.

²⁵ E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kagà nē awỳr kumē.

Eprêw Ijaew hwÿr kagà

Kagà ja na pre Ijaew ò amnhî kwÿjê mã hipêx nom mẽ pahte hipêx xwÿnh nhîxi mar kêt. Na pre tanhmã hamaxpêr to nê amnhî nhîxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhî xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pē Eprêw. Jakamã nhũm kagà nhîpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hk-aga nê mẽ kot amnhî nhîpêx tũm o ujanãr prãm xàj tanhmã mẽ homnuj to ho pa. Jakamã nhũm kagà nhîpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhōrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhî xà htÿx kamã hamak o pa htã mẽ kot tee ri ja hã amnhî pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

1 Pa Kris kôt ixkwÿjaja? Xà mẽ amex? E ot pa mẽ amã kagà nhîpêx nê mẽ awÿr kumê. Amnepê m Tirtũm na pre mẽ panhīgêjtjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã mẽ kãm kapêr jarēnh o ri mẽ hkôt pa. Ahpÿnhã tanhmã mẽ kãm kapêr to ho amnhîrīt o mẽ hkôt pa. Nhũm Tirtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarēnh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hkwÿ pix jarē. Tã nhũm hpãnhã mẽ hkwÿjaja wantajê mÿr pē mẽ hwÿr mra nê axte mẽ kãm hkwÿ

jarēnh o ri pa. Jao ra mẽ kãm harēnh jatur xãm mēnh o mō.

2-3 Tã nhũm Tirtũm Kraja mẽ pahwÿr wrÿ nê mẽ pamã kapêr jarēnh jatur xãm kumê. Kêp Tirtũm Kra jakamã te kot amnhî nhîpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânēn tipxi. Jakamã mẽ pahte pano ho Tirtũm pumunh kêt tã Jejus pumunh pē te mẽ pahte Tirtũm pumunh pyrãk. Uràk nê kot amnhî to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tirtũm kukwak ri mẽmoj piitã ho kator pa. Tã koja Tirtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arī rãhãã. Na pre mẽ panê mẽ pahte amnhî tomnuj piitã hpãnhã amnhîrer par kaxyw mẽ panê ty. Hãmri akupÿm htir hãmri nê ma akupÿm kaxkwa hwÿr api. Tirtũm xihtÿx o hihtÿx xwÿnhja wÿr akupÿm api. Nê ò krī kamã upòk rũm pahi maati hkrī xà hã kuri hkrī ho hkrī. Nê ìhkò hã mẽ pahto amnhîptar rãhã ho hkrī.

Jejus mẽ Tirtũm kapêr o mẽ wrÿk xwÿnhjê jarēnh

4-5 Nê Jejus kot amnhî to rax o Tirtũm kapêr o mẽ wrÿk xwÿnhjê jakrenh jakamã na pre ã Tirtũm kãm kapêr anê nê kãm:

Na ka amnhî to rax o mẽ kot ixkapêr o mẽ wrÿk xwÿnhjê jakre.

Mê kot inhmã tanhmã amnhî nhîpêx to ho mẽ pa xwÿnh na mẽ.

No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhō xwÿnhjê hwÿr ixte amēnh mã xwÿnh na ka. Nã apê Ixkra kumrēx.

Kot paj jarãhã ixpê anhîpêêxã hã mẽ piitã mẽ kãm amnhî to amnhîrīt. Pa na ixpê anhîpêêxã.

Anhÿr o Kra Jejus mã kapêr. Na pre kapêr o mẽ wryk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mẽnh kaxyw hãmri nê kapêr o mẽ wryk xwÿnhjê mã kãm:

E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhÿr o mẽ kãm kapêr.

⁷ Nê kapêr o mẽ wryk xwÿnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwÿnhjaja na pa hte nhÿhÿm mẽ kurê nhũm htem inhmar xà hkôt ma nhÿhÿm mra nê inhmã tanhmã amnhĩ nhĩpêx to.

Te ixte ma nhÿhÿm kôk nê kuwyja mẽnh nhũm ixkapêr kôt nhÿhÿm môrja pyrãk.

Anhÿr o mẽ harê.

⁸ No ã Krata jarênh anhÿr kêt nê. Na pre tanhmã kãm kapêr to nê amnhĩ pyrã nê kêp Tĩrtũm ã harê nê kãm:

Pa Tĩrtũm? E ka kot kaj mẽ ho amnhĩptãr rãhã ho akrĩ. Nê akatãt kôt mẽ ho amnhĩptã.

⁹ Koja mẽ tãm amnhĩ nhĩpêx ka ja hã mẽ omu nhũm ja amã mex nê.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nê. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptã.

Ixpê anhõ Tĩrtũm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nà amnepêm kormã mẽmoj kêt ri na ka pre ixkukwak ri pika nê kaxkwa ho akato. Âm hãmri na ka pre ã amnhĩ nhĩpêx anê.

¹¹ Tã nom koja nhÿrmã hamê wa hapêx pa. Âm kaxipix kot kaj

kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htũm kot amnhĩ nhĩpêx pyrãk.

¹² Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhôr pyrãk.

Jao pika nê kaxkwa htũm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrã nê aa awej nê axirerek kêt nê.

Kot kaj arĩ anyw nê axihtÿx rãhã apa ho apa nê aa ajapêx kêt nê. Arãhã atĩr tũm nê apa ho apa xwÿnh na ka.

¹³ E jar inhĩhkô hã nhÿ nê inhmã mẽ ho amnhĩptãr o akrĩ.

Kot paj mẽ kãm akurê xwÿnhjê pynênh pa nê man awÿr mẽ o mra nê anhĩhkram mẽ haxãr pa. Anê.

Ã na pre Tĩrtũmja Kra Jejus mã kapêr anê. No kapêr o mẽ wryk xwÿnhjê mã ã kapêr anhÿr kêt nê.

¹⁴ E kot paj hpãnhã ixprĩ hã mẽ amã Tĩrtũm kapêr o mẽ wryk xwÿnhjê jarê ka mẽ inhma. Tĩrtũm mã na htem tanhmã amnhĩ nhĩpêx to ho pa. Na hte nhÿrmã kuri mẽ htĩr tũm nê mẽ pa mã xwÿnhjê hwÿr mẽ kurê nhũm mẽ ma mẽ hwÿr wrÿ nê tanhmã mẽ ho ajuta hto ho pa. Na htem ã amnhĩ nhĩpêx anhÿr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tĩrtũmja Kra kot amnhĩ to rax o kapêr o mẽ wryk xwÿnhjê jakrenh ã harênh kot anhÿr jakamã kwa kêr pu mẽ kapêr mar tÿx rãhã nê hkôt pix mã amnhĩ nhĩpêx o papa. Kot pu mẽ ho anhÿr kêt hãmri nê gaa nê hkaga.

² Na pre Tĩrtũm kapêr o mẽ wryk xwÿnhjaja amnepê mã mẽ panhĩgêjtê hwÿr wrÿ nê Tĩrtũm nhÿ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupÿm api. Nê katãt

kôt ri mẽ kãm Tĩrtũm kapêr jarênh o pa. Hãmri nhũm mẽ kot hkôt amnhĩ nhĩpêx nê mar mex xwỳnhjaja nhũm mẽmoj mẽ kãm mex nê. No nhũm mẽ kot mar nê ãm mar xwỳnhjaja koja mẽmoj mẽ kêp omnuj nê.

³ Koja nhỹrmã mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee ri kêp amnhĩptàr prãm kaprỳ nê mex kêt nê pa. Nom mẽ kot Tĩrtũm kapêr mar tỳx xwỳnhjaja koja mẽmoj mẽ kãm mex o mex. Koja Tĩrtũm amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nhũm mẽ kuri htĩr tũm nê mex rãhã nê pa ho pa. Na pre Pahĩhti Jejus mẽ kot kapêr mar o kuhê xwỳnhjê kumrêx mã ã ja jarênh anê nê mẽ kãm:

–Nà kot kaj mẽ amnhĩ kaxyw inhmã ajamaxpêr nhũm Tĩrtũm ixtã mẽ apumu nê mẽ anê mẽ ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhũm mẽ kot kapêr mar nê hkôt mẽ pa ho mẽ pa nê xwỳnhjaja mar tỳx nê amnhĩ xô ri mẽ pamã harênh o ri pa. Nê mẽ pamã:

–Nà ãm hãmri. Nà ã ja jarênh kot anhỹr. Anê.

⁴ Hãmri nê mẽ pamã aa mẽ pahte mẽmoj pumunh kêt kwỳ ho anhỹr o ri mẽ pahkôt pa. Tĩrtũm Karô kot ja kaxyw mẽ ho mẽ àhpumunh tỳx jakamã nhũm mẽ ỹ hã àhpỹnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nê kamã pano pyma kaxyw. Nê ã mẽ pajamaxpêr anê nê pajamaxpêr o:

–Nà ãm hãmri na mẽ pamã ã Jejus jarênh anê nê ỹ hã ã amnhĩ nhĩpêx anhỹr o pa.

Anhỹr o pajamaxpêr kaxyw na prem ã mẽ pahkôt amnhĩ nhĩpêx anhỹr o pa.

Mẽ pahpê Jejus tõi nê htõx ã mẽ pajarênh

Juãw 1.14; Rômãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tĩrtũm amnhĩ kukamã tanhmã amnhĩ jarênh to nê nhỹrmã

kot akupỹm mẽmoj piitã ho nyw nê tãm mẽmoj piitã ho amnhĩptàr o pa hã amnhĩ jarê. No na pre kapêr o mẽ wrỳk xwỳnhjê mã ã mẽ kot amnhĩ nhĩpêx anhỹr ã mẽ kãm karô hkêt nê. Koja jajaja mẽ pahto amnhĩptàr o pa hkêt nê.

⁶ Tĩrtũm kapêr ã kagà htũm kot ja jarênh kot:

Kwa Tĩrtũm. Nà ãm hãmri na ka hte pika ja kamã ri mẽ ixpa xwỳnhjê jamãr mex rãhã ho apa.

Akĩnhã amarĩ ri mẽ ixpa xwỳnh tã amã mẽ ijapêê.

Nê mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wrỳk xwỳnhjê pyrãk.

Jao mẽ urãk nê akukwak ri mẽ inhmex nê ixpa ho ixpa.

Mẽ uràn mẽ ixàhpumunh nê ixĩhtỳx kêt tã mẽ inhmex nê ixpa.

⁸ Na ka pre ra ate mẽmoj to akator xwỳnh piitã mẽ inhĩhkram haxã.

Nà ãm hãmri na ka pre ã mẽ inhĩpêx anê Tĩrtũm. Amex o amex. Anê.

Na pre ra mẽmoj piitã mẽ panhĩhkram haxã. Pika nê kaxkwa nê kapêr o mẽ wrỳk xwỳnhjaja nê mẽkarõmnuti nê kot mẽmoj piitã hipêxja nhũm mẽ panhĩhkram haxàr pa. Mẽ pahte ìhkô hã ho amnhĩptàr o papa kaxyw. No na pu mẽ kormã piitã ho amnhĩptàr kêt nê.

⁹ No kêt Jejusja na Tĩrtũm mẽ pakurom ìhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nê Tĩrtũm kapêr o mẽ wrỳk xwỳnhjê hkĩnhã te amnhĩ to grire pyrã nê amnhĩ xà htỳx kamã hamak kãm ty. Tĩrtũm kãm mẽ pahto mex prãm xãy ã mẽ pahpiitã mẽ panê htyk anê. Tã nhũm Tĩrtũm akupỹm ho htĩr nê akupỹm amnhĩ wỳr ho api nê kêp Pahĩ Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tĩrtũm ja hã omu nê kukwak ri mẽ pahto mex nê.

10 Nê Tirtûm kot mēmoj piitā ho kator jakamā mēmoj piitā ō na. Na pre mē pakukamā hamaxpēr o:

—Inhmā ixkra xohtō hprām. Kot paj nhÿrmā man amnhÿ wÿr mē ho api kê mē ixri mex rāhā nē pa ho pa. Nà kot paj ā mē hipêx anē. Nê Ixkra Jejus koja kêp mē ō Pahihti. Koja mē urāk nē mēmoj punuj pumunh o pa hāmri nē à htÿx kamā hamak o kêp mē ō Pahihti mā tām. Anē.

11 Na hte Jejus mē panē mē pahte amnhÿ tomnuj rē nē hpānhā mē pamā mē pahte amnhÿ nhÿpêx nyw jagjē nhÿm Tirtûm ja hā mē pahpumunh kōt mē pahto hkra. Kêp Jejus Nhÿpêxà nē kêp Mēpanhÿpêxà maati jakamā nhÿm Jejusja mē pahpê htō nē mē pahpê htōx ā mē pajarē nē mē panhÿ hā hkÿnh nē.

12 Tirtûm kapēr ā kagà htÿm ā mē pajarēnh kot anhÿr. Kamā Jejusja Mēpanhÿpêxà maati mā mē pajarēnh kot:

Koja ixtō nē ixtōxjaja akapēr mar kaxyw axpēn wÿr akuprō pa ma mē hkōt mra nē mē kām akapēr jarē nē mē ïhkō hā amex ā gre. Anē.

13 Hāmri nē kām:

Kot paj amnhÿ kaxyw akōt pix mā ijamaxpēr mex o ri ixpa. Anē.

Hāmri nē hpānhā kām:

Ot pa akrajē hkōt ri ixpa ho ixpa.

Ka na ka pre mē kêp ixtō nē ixtōx kaxyw inhmā mē agō.

Koja mē ixpyrà nē amnhÿ kaxyw amā hamaxpēr rāhā ho pa Tirtûm. Anē.

14 Nê mē pahpê pika nhō xwÿnhjaja na pu htem âm ri panhÿ pix ā papa. Nê panhÿ kamā pahkamrō hā ri papa. Jakamā na pre Jejus kot mē panē htyk kaxyw mē pahwÿr wÿr nē mē pahpyrà nē ï ho mē pakamā kato. Tā mēmo kaxyw na pre ï ho ï nē mē pahkōt pa? Nà ï ho htyk o Satanasti pē hihtÿx xà ho hapêx par kaxyw na pre ā amnhÿ nhÿpêx anē. Satanasti kêp mē kot amnhÿ tomnuj xwÿnhjē hpām nē kêp mē htyk xwÿnhjē hpām.

15 Jakamā na hte kot mē pahtā ïhkra pikamÿr pyrāk o mē panhÿpêx pu mē ÿ hā pamā pahtyk pyma nē ri papa. Tā ra Jejus kot mē pahwÿr wÿr nē te kêp mē papytār pyrāk o mē panhÿpêx jakamā pu mē tee ri pahtyk kukamā pajamaxpēr o ri pamā ma ho papa hkēt nē.

16 Nê Tirtûm kapēr o mē wÿr kxwÿnhjē ho mex kaxyw na pre Jejus pika hwÿr wÿr kêt nē. Mē panhÿgēt finat Apraāw pyrā nē mē panhÿ ho panhÿ xwÿnhjē ho mex kaxyw na pre wÿr.

17 Ijaew nhō patrejaja na pre htem mē kot amnhÿ tomnuj mÿrapê mē hpānhā Tirtûm mā mry hkwy pa nē hkamrō kapÿ nē mē ho Tirtûm wÿ. Kot hā mē omunh nē mē mex ā mē harēnh kaxyw. Tā nhÿm Jejus wÿr nē mēmo mryta pyrā nē ā mē panē hkamrō pikapÿr anē. Kaxyw na pre mē pahtō maati mē pahwÿr ï ho ï nē wÿr nē mē pahpyrà nē ni nhōhy rÿm kato. Jao kêp mē pahto Tirtûm wÿr xwÿnh maati. Na pre Tirtûm kām hprām xà hkōt mē panē mē pahte amnhÿ tomnuj pānhā amnhÿrer pa. Tā kot mē pahpyrà nē mēmoj punuj pumunh nē amnhÿ xà htÿx kamā hamak o pa jakamā kêp mē pakamā ukapÿrÿ xwÿnh ā pixi mex na.

18 Kormā htyk kêt ri na pre mē pahpyrà nē omnuj nē ri pa. Nhÿm mēkarōmnuti nhō pahi kot tanhmā amnhÿ tomnuj to hprām xà tee ri hkōt kām ahkrox o pa hkapyrÿ nhÿm hkōt amnhÿ nhÿpêx kêt nē amnhÿ nē ho axtem nē. Jakamā koja Satanastija urāk nē tanhmā mē panhÿpêx to nhÿm Jejus mē pahtā omu nē amnhÿ pyrā nē tanhmā kêp mē panhÿpêx to pu mē ÿ hā kutā amnhÿ to htÿx nē papa.

3

Jejus kot amnhÿ to rax o Mojes jakrenh ā harēnh

Juāw 1.17-18

1 E ixkrāmnhwÿjaja. Ra Tirtûm kot mē pahte kapēr mar nē tām amnhÿ nhÿpêx o ri papa kaxyw mē pahto hkra jakamā kwa kêr ka mē Jejus kot

tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumẽ nhũm mẽ pahwỳr wrỳ nẽ Tĩrtũm kapêr o mẽ pajahkre ho ri mẽ pahkôt pa. Nẽ te kêp mẽ panhõ patre pyrã nẽ mẽ pahto Tĩrtũm wỳr o pa.

² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jesusja xãm nhũm Mojes pyrã nẽ Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nẽ hipêx pa nhũm hkwyjaja hwỳr mra nẽ omu nẽ mex kumrêx ã harẽ. Nom kot hipêx xwỳnhhta àhpumunh xà hkôt hipêx jakamã tãm na mex o kot ixkreta jakrenh. Ja pyrã nẽ finat Mojes kot amnhĩ to rax tã nhũm Jesus kot amnhĩ to rax o kot hakrenh. Mojes te kêp ixkre nhĩpêxta pyrãk no Jesus te kêp ixkre nhĩpêx xwỳnhhta pyrãk jakamã kot amnhĩ to rax o kot Mojes jakrenh.

⁴ Nẽ mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhhta na mex o ixkreja jakrenh. Tã ja pyrã nẽ Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

⁵ Nẽ finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nẽ ma kãm hkwyjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

⁶ Nẽ Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã

mẽ panhĩpêx to htã pu mẽ ÿ hã mẽ kutã amnhĩ to htỳx nẽ papa nẽ paja-maxpêr o:

—Nà ixpunuj nẽ ixpa htã kot paj ixpunuj rãhã ixpa ho ixpa hkêt nẽ. Koja nhỹrmã Tĩrtũm ixto mex kumrêx pa axte tanhmã ixpunuj to nẽ ixpa hkêt nẽ. Hêxta waa nẽ. Nà ja inhmã hprãm tỳx kumrêx.

Anhỹr o amnhĩ kukamã paja-maxpêr o papa.

Mẽ pahte Tĩrtũm kaga hkêt ã mẽ pamã karõ

Wam Korõt 10.1-11; Jutre 5

⁷⁻⁸ Amnepêm na pre mẽhõja tanhmã Tĩrtũm Karõ nhỹ hã kapêr to nẽ kapêr o:

E kêr ka mẽ Tĩrtũm kapêr mar tỳx o apa.

No ama nẽ ãm ama nẽ ri hã apa hkêt nẽ. Rỳ kapêr pê akrã hihtỳx o apa hkêt nẽ.

Mẽ akukamã mẽ anhĩgêtjaja na prem ã amnhĩ nhĩpêx anẽ nẽ Tĩrtũm kapêr pê hkrã hihtỳx o pa. Kapôt ã Mojes kôt mẽ pata ã na prem kãm Tĩrtũm kapêr mar prãm kêt nẽ. Nẽ tee ri amnhĩ kukamã hamaxpêr nẽ akupỹm Ejit wỳr hkrã nẽ axpên mã: “Kwa na pu mẽ ra pahpunuj tỳx nẽ papa nhũm Tĩrtũm ãm ja hã mẽ pahpumu nẽ tanhmã mẽ pahto mex to hkêt nẽ. Mãn ra mẽ pahkaga nà? E kwa pu mẽ awjanã nẽ ma akupỹm Ejit wỳr mãn papa.” Anẽ.

⁹⁻¹⁰ Na prem ã axpên mã kapêr anhỹr o ri pa hã amgrã pê 40.

Tĩrtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nẽ htỳx ri amnhĩ hkrã hkôt pa.

Nhũm tee ri amnhĩ tã mẽ omu nẽ mẽ kamã gryk nẽ.

Hãmri nẽ hamaxpêr o: “Nà pêr mẽ hamaxpêr kot mẽ hã hkwyjê kêt kumrêx. Te mẽ hamak kre hkêt pyrã nẽ ixkapêr mar kêt nẽ.” Anhỹr o hamaxpêr.

¹¹ Hãmri nẽ mẽ kãm: “E mẽ inhma. ã mẽ ate amnhĩ nhĩpêx anhỹrja

mÿrapê kot kaj mẽ ma ixte mẽ amã pika mex nhõr mã xwÿnhhta wÿr apa hkêt nẽ.” Anhÿr o mẽ kãm kapêr. Anẽ.

Ã mẽhõja Tirtũm Karõ nhÿ hã te Tirtũm tãm kot mẽ kãm kapêr pyrãk o mẽ harẽnh anẽ.

¹² Jakamã kwa mẽ okora ixkrãmnhwÿjaja. Kêr ka mẽ amnhĩ to mex o apa. Tirtũm kêp Mẽpahpãm ã pixi mex tã kot kaj mẽ tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nẽ te ate amnhĩ katut kôt ãm pyrãk o hipêx nẽ hkaga. Kwa mẽ ã amnhĩ nhĩpêx anhÿr kêt nẽ.

¹³ Kêt mẽ Kris kôt axpẽn to axihtÿx o ri apa. Nẽ apkati mẽ ã axpẽn nhĩpêx anhÿr rãhã nẽ. Kot kaj mẽ anhÿr kêt hãmri nẽ mẽ amã Tirtũm kapêr mar prãm kêt ã amnhĩ to amnhĩrit. Jao tanhmã amnhĩ tomnuj to ho ri apa nẽ atÿx ajamaxpêr o: —Nà ixte ã amnhĩ tomnuj anhÿr tã nhũm Tirtũm ja hã ixpumu nẽ ãm hã ixpumu.

Anhÿr o ajamaxpêr japêr. Rÿ mẽ ajamaxpêr o:

—Nà na pa hte ã amnhĩ tomnuj anẽ nhũm Tirtũm ja hã ixpumu nhũm ja kãm mex nẽ.

Anhÿr o ajamaxpêr japêr.

¹⁴ Kwa mẽ ri ã ajamaxpêr anhÿr kêt nẽ. Amnepê mã mẽ pahte Kris kôt amnhĩ xunhwÿr nhũm kot mẽ pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mẽ arĩ ã amnhĩ nhĩpêx anhÿr tÿx o papa rãhã ty.

¹⁵ Tirtũm kapêr ã kagà htũm kot ja jarẽnh kot:

E kêr ka mẽ Tirtũm kapêr ma nẽ mar tÿx nẽ.

No ama nẽ ãm mar nẽ ri hã apa hkêt nẽ.

Rÿ mẽ kot hkaga xwÿnhjê pyrã nẽ kêp akra hihtÿx kêt nẽ. Anẽ.

¹⁶ Mẽ panhĩgêtjaja na prem Mojes kôt pika pẽ Ejit rũm kato nẽ hkĩnh nẽ ma kapôt ã kormã pika mex wÿr pa. Nom Tirtũm kapêr mar nẽ hkôt amnhĩ nhĩpêx rãhã hkêt nẽ. Na prem kuma nẽ hkôt amnhĩ nhĩpêx o hã apkati grêre htã ra mẽmoj nhÿ hã omnuj

nẽ pa hã amnhĩ pumu nẽ tee ri amnhĩ kukamã hamaxpêr.

¹⁷ Jao xatã kapêr nhĩrõp kuhê nẽ amnhĩ hkrã hkôt pix mã amnhĩ nhĩpêx o pa ho ra hã amgrã pẽ 40. Hãmri nhũm tee ri amnhĩ tã mẽ omu nhũm ja kêp omnuj nẽ. Jakamã nhũm mẽ piitã kapôt ã ri pa nẽ gaa nẽ pikaprãr pa.

¹⁸ Mẽ kot kapêr mar kêt jakamã nhũm mẽ kãm:

—Nà ã mẽ ate amnhĩ nhĩpêx anhÿr o ri apaja mÿrapê kot kaj mẽ ixte mẽ amã mẽ amex nhõr mã xwÿnhhta wÿr apa hkêt nẽ. Anẽ.

¹⁹ Tã mẽ kot amnhĩ kaxyw Tirtũm kôt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm mẽ hkra nẽ mẽ htãmnhwÿjê pixjaja na prem mẽ mÿr pẽ hwÿr pøj nẽ kamã pa.

4

Mẽ pahte Tirtũm kukwak ri paja-makêtkati nẽ ri papa hã mẽ pajarẽnh

¹ Mẽ pahte Tirtũm kukwak ri paja-makêtkati nẽ ri papa ho papaja Tirtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tirtũm kapêr mar tÿx nẽ hkôt mãn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wÿr pøj.

² Mẽ kot mẽ pahpyrà nẽ Tirtũm kapêr mar mex tã na htem amnhĩ kaxyw hkôt hamaxpêr kêt nẽ. Te mẽ kot mar kêt pyrãk.

³ ãm mẽ kot amnhĩ kaxyw Kris mã hamaxpêr xwÿnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkêt ri na pre Tirtũm mẽmoj piitã ho kator pa hãmri nhũm apkati nhũm axte mẽmoj tã ãpênh kêt nẽ. ãm õ krĩ kamã arĩ hamakêtkati nẽ hkõkôt o hkrĩ. Tã mẽ pahte urãk nẽ pajamakêtkati nẽ papa ho papaja na kãm hprãm. No wam ri mẽ pa xwÿnhjaja mẽ kot amnhĩ tomnuj mÿrapê na pre Tirtũm mẽ kot urã nẽ hamakêtkati nẽ paja nẽ mẽ hkurê. Kapêr ã kagà htũm kot harẽnh kot:

Na pre Tirtûm tee ri amnhî tâ mẽ kot hipêx ã mẽ omu nhũm ja kêp omnuj nê. Hâmri nhũm mẽ kãm: “Nà kot kaj mẽ ixkukwak ri axàmnhîx ajamakêtkati nê apa hkêt nê.” Anê.

4 Nê kot harênh kot:

Na pre Tirtûm àpênh ã arïgro kêp 6 hãmri nhũm arïgro pê 7ta ã nhũm axte mẽmoj tâ àpênh kêt nê. Na pre arï hkôkôt o nhỹ.

Arïgro pê 7 ã arï hamakêtkati nê hkôkôt o nhỹ. Anê.

5 Nê mẽ kot kapêr mar nê ãm mar xwýnhjê jarênh kot:

Kot kaj mẽ aa ixkukwak ri axàmnhîx nê ajamakêtkati nê apa hkêt nê. Anê.

6 Mẽ panhîgêjtaja kot amnhî kaxyw Tirtûm kôt hamaxpêr kêt jakamã na prem hamakêtkati nê ri pa hkêt nê. Tã mẽ papajaja na Tirtûm arï kãm mẽ paxàmnhîx nê pajamakêtkati nê papa hprãm.

7 Amnepêm Ijaew Tirtûm kôt hamaxpêr kêt jakamã na prem kapôt ã pikaprâr pa. Hãmri nhũm amgrà xohtô nê hapêx nhũm Tirtûm mẽ hkanrêhã mẽ htàmnhwýjê hõ pê finat Tawija mã kapêr nhũm kuma nê mẽ pamã tanhmã kapêr tota ã kagã nê hã kagã kot:

Kwa kêr ka ixkapêr ma nê mar tỳx nê.

No mẽ anhîgêjtê pyrã nê akrã hihtỳx ho inhma nê ãm inhmar kêt nê. Anê.

Na pa pre ra mẽ amã ã ja jarênh anê.

8 Na pre finat Jojueja finat Mojes mỳr pê ma pika pê Kanaã hwỳr mẽ hkanrêhã mẽ hkrajê o pa nê hwỳr mẽ o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhî nhîpêx anhỹ ronhỹx Tirtûm axte mẽ kãm mẽ hamakêtkati nê mẽ hamak kãm amnhî krit nê mẽ pata hkukamã harênh kêt nê.

9 Nom mẽ pahte kukwak ri pajamakêtkati nê pajamak kãm amnhî krit nê ri papa ho papaja na Tirtûm arï kãm hprãm.

10 Na pre arïgro pê 6ja ã mẽmoj piitã ho kator pa nhũm apkati nhũm hamakêtkati nê hkôkôt o nhỹ. Tã kot puj mẽ pahpê hkrajaja amnhî to kuwỳ nhũm tanhmã mẽ pahkrã hto pu mẽ kukwak ri urak nê paxàmnhîx nê pajamakêtkati nê papa ho papa. Te Tirtûm àpênh pa nhũm apkati nhũm hamakêtkati nê hkôkôt o ýrta pyrãk.

11 Jakamã kwa kêr pu mẽ amnhî to kuwỳ kê ã mẽ panhîpêx anê pu mẽ urak nê ã amnhî nhîpêx anhỹr rãhã ho papa. Nom kot pu mẽ pahkwỳ Ijaewjê pyrã nê kapêr kwým amnhî nhîpêx o papa hãmri nê mẽ urã nê paxàmnhîx pajamakêtkati nê papa hkêt nê.

Tirtûm kapêr te kot wapo xwa gix pyrãk ã harênh

12 Nê Tirtûm kapêrja te ã ho tanhmã kot mẽmoj to kaxyw hihtỳx pyrãk. Nê te wapo xwa gix pyrãk. Koja mẽhõ õ wapo xwa mex nê ho mẽmoj jakãr mex nê. Ho mry hi jakãr mex pê kaxwýnh kãm hi kanhîn o amnhîrît. Ja pyrã nê na hte Tirtûm kapêr mẽ pajamaxpêr o amnhîrît nê mex ã harê rỳ omnuj ã harê.

13 Nê na htem Tirtûm pê mẽmoj to pimxur kêt nê. Na hte hprî hã mẽmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mẽmoj piitã omunh par anhỹr xwýnhja noo mã tanhmã amnhî nhîpêx to rãhã ho papa.

Jejus kêp mẽ panhõ patre maati hã harênh

Eprêw 10.19-25; Wam Juãw 2.1-2

14 Nê Ijaew nhõ patrejaja na pre htem Tirtûm mã amnhî jarênh xã hã ixkre hwỳr agjê nê kamã mẽ ho Tirtûm wỳr o pa. Ja pyrã nê na pre ra Jesus Tirtûm nhõ krî hwỳr api nê kamã mẽ pahto hwỳr o hkrî. Kêp Kra kumrêx jakamã kêp mẽ pahto Tirtûm wỳr xwýnh maati. Jakamã kwa kêr pu mẽ amnhî kaxyw hkôt pajamaxpêr tỳx rãhã ho papa.

15 Satanasti na pre te kot mẽ panhîpêx pyrãk o Jesus nhîpêx. Nê tee ri kot tanhmã kãm kapêr to nhũm

kot mar nê tanhmã amnhĩ tomnuj to hprãm xaj ãm ri kãm ahkrox kapry nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mē pahtānopxar mex o pa. Kot mē paxirerek kôt mē pahpumunh mex.

¹⁶ Jakamã kwa kêt pu mē amnhĩ tã kamã pahpijaam kêt kãm paxamnhĩx ri amnhĩ to hwỳr o papa. Kêp mē pakutã nojarêt xwỳnh nê kêp mē pakamã ukapri xwỳnh jakamã kêt pu mē tee ri mēmoj tã amnhĩ pumu nê amnhĩ to hwỳr kurê kumrêx. Hãmri nê ý hã paxamnhĩx nê pajamakêtkati nê ri papa.

5

¹ Nê mē panhõ patre maati Jejusja Tirtũm na pre mē pakaxyw ãm. Kêp mē pahkwỳ hã mē pakaxyw ãm nhũm hte mē pahto Tirtũm wỳr o pa. Nê kãm mē pahkĩnh xà nhõr o pa. Kot ja hã mē pahpumunh nê mē pahte kapêr kwỳm tanhmã amnhĩ nhĩpêx to ho papa hã mē pakamã gryk o hapêx tokyx anhỳr kaxyw.

² Mē panhĩgêjtjaja na pre htem mē õ patre maati hwỳr mra nê kãm tanhmã amnhĩ tomnuj to hã amnhĩ jarê nhũm mē kuma nê mē kamã ukapri nê. Mē urà nê kormã kot Tirtũm kôt amnhĩ nhĩpêx totuj anhỳr jakamã na pre mē kot tanhmã amnhĩ jarênh toja ma nê mē kamã ukapri nê.

³ Hãmri nê mē hpãnhã Tirtũm mã mēmoj gõ nê mããñen amnhĩ pãnhã kãm mēmoj gõ. Mē urak nê kot amnhĩ tomnuj o paja mỳrapê amnhĩ pãnhã kãm mēmoj gõ.

⁴ No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nê. Tirtũm kot mē kaxyw mē unhwỳr jakamã na pre mē kaxyw finat Arãwja xãm nhũm kêp mē õ patre maati hã mē ho Tirtũm wỳr o pa.

⁵ Nê Kris haxwỳja kêp mē panhõ pahi maati hã tãm kot amnhĩ xãm kêt. Tirtũm na pre mē pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhĩpêxã hã mē kãm amnhĩ jarê. Anê.

⁶ Nê hpãnhã kãm:

Kot kaj Mekijetek pyrã nê apê patre maati hã mē ho ixwỳr rãhã ho ri apa. Anê.

⁷ Jejus kormã pika ja kamã pa ri na pre amnhĩ to Tirtũm wỳr rãhã ho pa. Tõhã hkapri nê tee ri mēmoj tã amnhĩ pumu nê amnhĩ to kuwỳ. Nê tee ri mē kot hpĩrta kukamã hamaxpêr nê mỳr kãm amnhĩ to kuwỳ. Kõp apu Tirtũm kãm mē kot kêp hpĩr prãm kêt ronhỹx pre tanhmã nê mē kãm hkurê xwỳnhjê ho nhũm mē hpĩr kêt nê. Jakamã nhũm pre ã amnhĩ to hwỳr anê. No ãm Tirtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mē ho hkêt nhũm prem kupĩ.

⁸ Kêp Tirtũm Kra kumrêx tã amnhĩ xà htỳx kãm hamak kãm ty. Jao Tirtũm kãm hprãm xà hkôt amnhĩ nhĩpêx ã amnhĩ pumunh mex nê.

⁹ Na pre amnhĩ xà htỳx kãm hamak o amnhĩ mex o amnhĩ mex ã mē kãm amnhĩ to amnhĩrit. Jakamã na hte mē kot kapêr kôt ri amnhĩ nhĩpêx o mē pa xwỳnhjê mã mē kot amnhĩ nhĩpêx nyw jagjê nê nhỹrmã Tirtũm mē wa kuri mē htĩr tũm nê mē pa mã xwỳnhjê hã mē harê.

¹⁰ Jakamã na pre Tirtũm Mekijetek pyrã nê kêp patre maati kaxyw ãm.

Mē pahte Kris kaga nê mē pahkurê Wam Korĩt 3.1-2, 13.11, 14.20; Epes 4.11-16

¹¹ Nê Jejus kêp mē pahto Tirtũm wỳr xwỳnh maati hã harênhja inhmã ixpri hã mē amã harênh par prãm tã ka mē kormã inhmar tỳx kêt nê. Pa tee ri ixpri hã mē amã harênh kapry. Te mē amã mar prãm kêt o amõr pyrak.

¹² Amnepê mã mē ate Kris kôt amnhĩ xunhwỳr nê kapêr mar tỳx tã kormã nhãm amnhĩ xõ ri ho amnhĩ kwỳjê jahkre ho ri apa hkêt nê. Te mē ate hã ano hkêt pyrak jakamã na pa hte arĩ mē amã kapêr kot amnhĩrit mex xwỳnh kwỳ ho mē ajahkre ho pa. No kot amnhĩrit mex kêt xwỳnh

o mẽ ajahkre hkêt nê. Te mẽ hkaràre kot amnhĩ nhĩpêx pyræk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. Æm kormã katorxã hkà pix kaõ. Ja pyrã nê ãm Tĩrtũm kapêr kot amnhĩrĩt mex xwỳnhhta pix na ka mẽ mar tỳx o apa nom kapêr kot amnhĩrĩt mex kêt xwỳnhja ka mẽ mar mex kêt nê.

¹³ Nê mẽ hkaràre kormã Tĩrtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyræk.

¹⁴ Mẽ kot Tĩrtũm kapêr mar mex xwỳnhjaja na htem hprĩ hã kapêr piitã mar tỳx nê. Kot amnhĩrĩt mex xwỳnhhta mar tỳx nê mããnên kot amnhĩrĩt mex kêt xwỳnhja nhũm mẽhprĩ hã piitã mar tỳx nê. Te ho mẽ àptàr kot mẽõ mex kur o pata pyræk. Jao ra mẽ àptàr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

¹⁻² Na pu prem ra Tĩrtũm kapêr kot amnhĩrĩt mex xwỳnhhta kwỳ ma. Tãm na ja:

Kris kot mẽ panê tanhmã amnhĩ nhĩpêx to hã harênhja.

Nê mẽ pahte amnhĩ tomnuj kaga hã kot mẽ pamã karõja.

Nê amnhĩ kaxyw Tĩrtũm kôt mẽ pajamaxpêr ã mẽ pamã karõja.

Nê mẽ pahpê Tĩrtũm kra hã amnhĩ to amnhĩrĩt kaxyw mẽ kot mẽ pahkrã kumrãr ã pamã karõja.

Nê mẽ pahte Tĩrtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ãhkra jaxwỳr nê mẽ pahto Tĩrtũm wỳr ã mẽ pamã karõja.

Nê mẽ pahtyk nê akupỹm mẽ pahtĩr ã mẽ pajarênhja.

Nê Tĩrtũm kot nhỹrmã mẽ kot amnhĩ xã htỳx kãm hamak

tũm xã hwỳr mẽ kêp hkra hkêt xwỳnhjê janorja.

Mẽmojja piitã pu mẽ ra harênh mar tỳx nê. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwỳnh kwỳ ma. Jao mẽ pahpê Tĩrtũm kra xàptàr mex nê ri papa.

³ Jakamã kwa kêr pu mẽ kot amnhĩrĩt mex xwỳnh kumrêx kwỳ ma nê hpãnhã hijuk ri kot amnhĩrĩt mex kêt xwỳnh kwỳ ma. Nê axpên mã harênh rãhã ho ri papa. Nã koja Tĩrtũm kãm ja prãm pu mẽ ã amnhĩ nhĩpêx anhỹr rãhã o ri papa.

⁴⁻⁶ Na pre ra mẽ pahkwỳjaja Kris kaga nê htỳx ri amnhĩ nhĩpêx o pa. Mẽ kot kapêr mar tỳx tã axtem nê hkaga jakamã koja mẽ axte kapêr mar kêt nê. Ra mẽ kãm mar prãm kêt. Kot puj mẽ tee ri axte mẽ kãm harênh o papa kaprỳ. Na prem hprĩ hã kuma. Tĩrtũm kãm mẽ ho hkra hprãm ã harênhja nhũm prem hprĩ hã kuma nê kãm mar prãm nê hkôt amnhĩ xunhwỳ. Hãmri nhũm Tĩrtũm Karõ te mẽ panhĩpêx pyrã nê mẽ hkarõ mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ã hã tanhmã kãm amnhĩ nhĩpêx to ho pa. Nê kãm Tĩrtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwỳ pumu nê axpên mã harênh o:

—Nã Krisja ãm hãmri àhpumunh tỳx o àhpumunh tỳx. Koja nhỹrmã akupỹn mẽ pahwỳr wrỳ nê axte mẽ pamã àhpumunh tỳx o amnhĩrĩt pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tĩrtũm pê Krata pĩ hã nhôr nê hpĩr pyræk. Nê te mẽ piitã mẽ noo mã tanhmã haprỳ hto nê tanhmã kãm kapêr punuj to pyræk. Jakamã kot pu mẽ tee ri akupỹm tãm mẽ unhwỳr prãm kaprỳ.

⁷ Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwỳr prãm xwỳnhjaja te mẽ hpur mex nê

kamã mẽmoj ô rũnh pyræk. Nẽ uræk nõ amnhĩ to mex o pa.

⁸ Nom koja mẽ hpur kãm mẽmoj nhĩgrõt mex kêt japêr. Kamã mrõnhĩ nõ kahpare nõ mẽmoj punuj pix hapôj nhũm mẽ tee ri omu nõ hkaga kurê kumrêx. Tã mẽ kot Kris kaga xwýnhjaja te pur punuj kot amnhĩ nhĩpêxta pyræk nhũm Tĩrtũm te kêp pur nhõ dõn pyræk. Jao tee ri amnhĩ tã mẽ kot amnhĩ nhĩpêx ã mẽ omu nõ mẽ hkaga kurê kumrêx nõ ma mẽ kot amnhĩ xà htỳx kãm hamak tũm xà pê kuwyta wỳr mẽ rênh pa.

⁹ E ixkrãmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwýnhjê jarênh anê. Nom te mẽ ate mẽ uræk kêt. Kris kõt mẽ ate amnhĩ xunhwỳr xwýnh mex na ka mẽ. Ra mẽ ate hkõt amnhĩ xunhwỳr tỳx jakamã te mẽ apê pur mexta pyræk.

¹⁰ Na ka htem Kris kõt mẽ akwỳjê ho mex o ri apa. Te mẽ amã amnhĩ tã ma pyræk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

¹¹ Tã kêt ka mẽ arĩ ã axpên nhĩpêx anhỳr o ri apa rãhã ty kê nhỹrmã ja hã mẽ ato mex nõ. ã mẽ ate amnhĩ nhĩpêx anhỳr o apaja na inhmã hprãm tỳx kumrêx.

¹² Kot kaj mẽ ã amnhĩ nhĩpêx anê hãmri nõ amã kaga nõ apa hkêt nõ. Nẽ amnhĩ nhĩpêx o te Tĩrtũm kra hkwỳ htyk xwýnhjaja kormã htĩr ri kot amnhĩ nhĩpêxta pyræk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkõt mẽ ho mex nõ. Tã kêt ka mẽ uræk nõ ã amnhĩ nhĩpêx anhỳr o ri apa rãhã ty.

¹³⁻¹⁵ ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nõ kanrêhã

htãmnhwỳjê hkukamã tanhmã mẽ harênh to nõ kãm:

—Pa Apraãw. E inhma. Kot paj aprõ mẽ war ato mex nõ. Kot kaj war akra hãmri nõ gaa nhũm akanrêhã war atãmnhwỳjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkõt ã anhĩpêx anê. Ixpê mẽ anhĩpêx xwýnh na pa ã amã amnhĩ jarênh anê. Anê.

Tã ã kãm wa hkra jarênh anhỳr tã nhũm wa tokyx hkra hkêt nõ. Nom tee ri ja hã amnhĩ pumu nõ Tĩrtũm kot wa kãm hêx ã hkamnhĩx kêt nõ. ãm hkamnàr rom ã hamaxpêr anê nõ hamaxpêr o:

—Nà kot paj wa nhỹrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nõ hapêx nhũm wa hkra. Nhũm axte amgrà hkwỳ hapêx nhũm wa hkanrêhã htãmnhwỳ hkwỳ. Ra Tĩrtũm kot mẽ hkukamã Apraãw mã mẽ harênh xà hkõt. Tĩrtũmja hihtỳx o hihtỳx nõ àhpumunh o àhpumunh jakamã na pre amnhĩ jarênh xà hkõt ã wa kãm wa hkra nõ wa htãmnhwỳjê nhõr anê. Kot ra wa kãm hã amnhĩ jarênh xà hkõt. No ri nhãm mẽhõ nhĩxi jarênh kõt wa kãm wa hkra jarênh kêt nõ. Mẽhõ kot we hihtỳx o hihtỳx o Tĩrtũm jakre nhũm we ri hixi jarênh kõt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkõt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhỳr kêt nõ. Na htem mẽhõ mã tanhmã mẽmoj tã amnhĩ jarênh to kaxyw nõ mẽhõ hihtỳx o kot hakrenh xwýnh nhĩxi jarênh kõt amnhĩ jarê. Nẽ amnhĩ jarênh o:

—Nà ixte jahti noo mã ã amã amnhĩ jarênh anhỳr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtỳx o kot hakrenh xwýnhnta kot hã harênh mar nõ hã tanhmã homnuj to pymaj na htem ã mẽ hixi jarênh kõt mẽmoj

tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to.

¹⁷ Nom Tĩrtũm na hte uràk nê nhãm mēhō nhĩxi jarênh kôt ri mẽmoj tã amnhĩ jarênh kêt nê. Na hte tãm amnhĩ jarênh xà hkôt mẽmoj to anê nê aa hã amnhĩ to hêx kêt nê. Na pre mẽ pahpê hkrajê mã kãm:

–Kot paj nhỹrmã mẽ ato mex rax nê. ãm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mẽ pahte ãm hãmri kot amnhĩ jarênhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêt nê.

¹⁸ Jakamã koja nhỹrmã ma amnhĩ wýr mẽ pahto àpir ã amnhĩ jarê hãmri nê ãm hãmri amnhĩ jarê nê amnhĩ jarênh o:

–Nã ãm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mẽmoj jarênh to hkêt nê. Ra kot ã amnhĩ jarênh anhỹrja koja arĩ rãhã nê. Jakamã e kwa kër ka mẽ tee ri amnhĩ kukamã ajamaxpêr o ri apa hkêt nê. Ra mẽ pamex nê ri papa kaxyw Tĩrtũm kôt amnhĩ xunhwýr jakamã kër pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htýx xàja kanôre ho htýx nhũm ma gô hkôt pa hkêt nê. Ja pyrã nê kot puj mẽ Tĩrtũm kot mẽ pahto mex xà kamã pajamak o papa hãmri nê hkaga hkêt nê.

Amnepê mã na pre hte mẽ panhō patre maatija Tĩrtũm mã amnhĩ jarênh xà hã ixkre hwýr agjê nê hkôt ã kupêxê ho hitom maati hwýr agjê nê kamã mẽ ho Tĩrtũm wýr o kuhê. Tã nhũm Jesus akupým kaxkwa hwýr api nê Tĩrtũm ri hkrĩ hãmri nê patre maatita pãnhã tãm mẽ pahto hwýr o hkrĩ.

²⁰ Na pre ra mẽ pakukamã kaxkwa hwýr api nê kamã pa ho pa nê finat Mekijetekja pyrã nê kêp mẽ panhō patre maati. Tã koja mẽ pahto Tĩrtũm wýr rãhã nê pa ho pa.

7

Patre Mekijetek jarênh

¹⁻³ E kot paj ixprĩ hã mẽ amã tanhmã finat Mekijetekja jarênh to ka mẽ inhma. Krĩ pê Sarê kamã na pre kêp mẽ õ pahi nê mãânên kêp mẽõ patre. Sarêja mẽ pakapêr kãm kêp: “Mẽ hamakêtkati nê ri mẽ pa xwýnhjê nhō krĩ.” Jakamã Mekijetekja mẽ pakapêr kãm kêp: “Mẽ hamakêtkati nê ri mẽ pa xwýnhjê nhō pahi.” Nê mãânên kêp: “Pahi kot tãm amnhĩ nhĩpêx o pa xwýnh.” Nê Mekijetek nhĩpêêxã nê katorxã nê higêt nhĩxija mẽ pahte harênh mar kêt. Nê kator ã arĩgro nê htyk ã arĩgroja mãânên mẽ pahte harênh mar kêt. Tĩrtũm kapêr ã kaga htũm kot tanhmã ja jarênh to hkêt. ãm Jejus pyrã nê kêp patre hã mẽ ho Tĩrtũm wýr rãhã ho pa xwýnh pix ã kot harênh. ãm ja pix na mẽ pahte harênh mar. Nê kot amnhĩ to rax xwýnh jakamã na pre Apraãw nhỹri omu nê hã hpijaãm kaxyw kãm hikukrêx kwý gō. Na pre hkwyjê mẽ ra mẽ urojê kutã amnhĩ xunhwý nê pijapu nê mẽ kêp mẽ õ pahi ho 4 nê mẽ himex. Nê mẽ kêp mẽ hikukrêx kwýptã nê hamý nê ma õ krĩ hwýr o mō. Nê kormã pry hã mōr ri Mekijetek kaxpa nhũm amnhĩ wýr omu nê kãm:

–Pa Apraãw? E kê Tĩrtũm ato mex nê ka amex nê apa. Anê.

Nhũm amnhĩ tã kuma nê hkĩnh nê. Hãmri nê kãm mẽ hikukrêx kwýptãr xwýnhhta hkwy gō nhũm hamý nê ma amnhĩm o mō.

⁴ Na pre Apraãw kot amnhĩ to rax ã omu nê kãm mẽmojta kwý gō. Kêp mẽ pahpê Ijaew pãr krax jakamã mãânên kot amnhĩ to rax tã Mekijetekja uràk nê kot amnhĩ to rax ã omu nê kãm mẽmota kwý gō.

⁵ Finat Mojes kot Ijaew mã Tĩrtũm kapêr jarênh xà hkôt kãm kugō. Na pre mẽ kãm:

—Mê akwỳ pê finat Rewi hkanrêhã htàmnhwỳjaja kêp mẽ anhõ patre jakamã kêr ka mẽ kãm mẽ akukrêx kwỳ nhõr o ri apa. Kot kaj mẽ akrit kêp 10 nê kãm ho pixi nê agõ. Nê mẽ akàxpore kêp 10 nê kãm hõ gõ. Kêr ka mẽ ã mẽ kãm mẽ akukrêx nê mẽ akrit kwỳ nhõr o apa anê. Nê kêr ka mẽ kãm mẽmoj mex pix gõ. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htàmnhwỳ jakamã kêr ka mẽ ã mẽ hipêx anhỹr o apa. Anê.

⁶ Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anê nê kãm pahi htyk xwỳnhjê kukrêxta kwỳ gõ. Jao hikukrêxta kamã mẽmoj kêp 10 nhũm omu nê kamã kãm ho hpỳnh nê kugõ. Na pre ã kãm mẽmoj nhõr anê. Hãmri nhũm amnhĩm hamỳ nê kãm:

—Nã ãm hãmri koja Tĩrtũm ato mex rax nê. Anê.

Ra Tĩrtũm kot Apraãw kanrêhã kãm htàmnhwỳ ho ohtõ nê mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anê.

⁷ Mẽ kot amnhĩ to rũnh o mẽ hakrenh xwỳnh pixjaja Tĩrtũm kot mẽ ho mex kaxyw mẽ ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt.

⁸ Hãmri nê Rewi hkanrêhã htàmnhwỳ kot amnhĩ nhĩpêx pyrã nê Apraãw o Tĩrtũm wỳ nê kêp mẽmojta jamỳ. Mẽ urak nê mẽmoj kamã kêp 10ja rũm ho hpỳnh nê amnhĩm hamỳ. Nom kot amnhĩ to rax o Rewi hkanrêhã htàmnhwỳjê jakrenh. Tĩrtũm kapêr ã kagà htũm kot Rewi hkanrêhã htàmnhwỳjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwỳjê jakrenh.

⁹⁻¹⁰ Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwỳ mã xwỳnh. Jakamã nhũm Apraãwja Mekijetek mã mẽ hikukrêxta kwỳ nhõr jao te Rewi mã õr pyrak. Tã nhũm amgrã xohtõ nê hapêx nhũm Rewi hkanrêhã

htàmnhwỳjaja hapõj nê kêp mẽ õ patre nê ri pa. Jao Mekijetek pyrã nê mẽ kêp mẽ hikukrêx kwỳ jamỳnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htàmnhwỳjê jarênh to. Kormã mẽ hapõx kêt ri nhũm hkwỳjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapõj nê hprêk nê mẽ ho Tĩrtũm wỳr o ri mẽ hkõt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ hipêx anê? Jakamã nhũm Tĩrtũm mẽ hpãnhã mẽ pahwỳr kỳj rũm mẽhõja mẽ nhũm mẽ pahwỳr wrỳ. Nom kêp Rewi hkanrêhã htàmnhwỳ hkêt. Nê mãânên kêp Rewi hpãm Arãw kanrêhã htàmnhwỳ hkêt. Axtem te Mekijetek kot amnhĩ nhĩpêx pyrak xwỳnh na pre. Jejus Krisja. Tãm na pre mẽ pahwỳr wrỳ hãmri nê tanhmã mẽ pahkrã hto pu mẽ ÿ hã tãm amnhĩ nhĩpêx o papa.

¹² No Mojes kapêr kot Rewi hkanrêhã htàmnhwỳ pixjaja kêp mẽ ho Tĩrtũm wỳr xwỳnh ã mẽ harênh. Tã nhũm Krisja mẽ pahwỳr wrỳ nê mẽ hpãnhã kêp mẽ pahto àhwỳr o pa xwỳnh. Jakamã na pu htem axte Mojes kapêr kõt amnhĩ nhĩpêx kêt nê. Pãnhã Jejus kapêr kõt pix mã amnhĩ nhĩpêx o papa.

¹³⁻¹⁴ Nê Jejus kêp Rewi hkanrêhã htàmnhwỳ hkêt. Katorxã hkõt kêp Apraãw tàmnhwỳ Juta hkanrêhã htàmnhwỳ na pre. Ra mẽ pahte ja mar mex. Aa Juta hkanrêhã htàmnhwỳjaja kêp patre hkêt. Na pre Tĩrtũm jajê mã mẽ kot mẽmoj nhõr xã hã mести kunĩhtita ã kãm mẽmoj nhõr nê hkwỳjê ho hwỳr ã mẽ kãm karõ hkêt nê. ãm Apraãw tàmnhwỳ Rewi hkanrêhã htàmnhwỳjê mã pix mã na pre ã mẽ kãm ja hã karõ anê. Tã nhũm Jejus wrỳ nê mẽ hpãnhã mẽ pahto hwỳr o pa. Mẽ urak nê kêp Rewi hkanrêhã htàmnhwỳ hkêt axtem kêp Juta hkanrêhã htàmnhwỳ htã Rewi hkwỳjê hpãnhã mẽ pahto Tĩrtũm wỳr o pa.

Mekijetek pyrà nê mē pahto Tirtūm wūr xwýnh jarēnh

15-19 Nê Ijaewja na prem Mojes kapēr mar tỳx nê hkôt amnhĩ nhĩpêx tã aa amnhĩ to mex kêt nhũm Tirtūm tee ri ja hã mē omu nê hamaxpēr o:

—Nà Rewi hkanrēhã htàmnhwýjaja kēp mē õ patre nê mē ho ixwūr o pa htã nhũm mē arĩ htỳx ri amnhĩ tomnuj pix o pa. Jakamã koja mē axte ri mē ho ixwūr o pa hkêt nê. Anê.

Hãmri nê mē pakaxyw mē pahto àhwūr xwýnhja ta nê âm. Kra Jeusja nhũm kuta nê âm. Tãm na hte Rewi hkwýjê rom tanhmã mē pahkrã hto pu mē kukwak ri tãm amnhĩ nhĩpêx nê Tirtūm kôt amnhĩ nhĩpêx mex nê. Jao nhỹrmã ma mē pahte Tirtūm nhõ krĩ hwūr paxàpirja jamãr o papa.

Jeus na hte Mekijetek pyrà nê kēp mē panhõ patre maati nê mē pahto Tirtūm wūr rãhã ho pa. Kēp Rewi hkanrēhã htàmnhwý hkêt tã Tirtūm pyrà nê kēp htĩr tũm nê pa ho pa xwýnh jakamã na pre Tirtūmja mē pakaxyw kuta nê mē pahwūr kumê. Kapēr ã kagà htũm kot harēnh kot:

Kot kaj Mekijetek pyrà nê mē ho ixwūr rãhã ho ri apa. Anê.

20-21 No Rewi hkwýjê mã na pre ã kapēr anhỹr kêt nê. Âm Jeus pix mã ã kapēr anê nê kãm:

E kot kaj apê mē ho ixwūr rãhã o apa xwýnh. Kot paj nhỹrmã apãnhã axtem mēhõ xãm kêt nê. Âm kapxipix kot kaj mē ho ixwūr o apa rãhã ho rãhã. Âm hãmri na pa amã ã ixkapēr anê. Ixpê Pahi Maati hã ã ajarēnh anê.

22 Anhỹr jao Jeus kot amnhĩ to rax o Rewi hkwýjê jakrenh par ã ho amnhĩrĩt. Mē kot Ijaew mã Tirtūm kapēr jarēnh nhũm mē kot mar nom hkôt amnhĩ nhĩpêx kêt jakamã nhũm Tirtūm mē hpãnhã Jeus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa.

23 Rewi hkwýjaja na prem axpēn mỳr pē kēp mēõ patre nê ri pa htã htyk pa nê hapêx.

24 Nom Jeusja htĩr tũm nê pa ho pa xwýnh jakamã koja mē uràk nê aa

hapêx kêt. Koja mē pahto Tirtūm wūr rãhã ho pa nê aa jam urer kêt nê.

25 ã Jeus kot amnhĩ nhĩpêx anhỹr jakamã te kēp Tirtūm wūr mē panhõ pry pyràk. Na pu htem hkôt amnhĩ xunhwý nhũm mē panê mē pahte amnhĩ tomnuj piitã rēnh pa nê mē pahpê Tirtūm kra hã mē pajarē.

26 Nê âm hãmri kēp mē pahto Tirtūm wūr xwýnh maati mex na. Mē pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tirtūm kot amnhĩ wūr ho àpir jakamã nhũm ra kuri mē pahto hwūr rãhã ho pa.

27 Nê kot amnhĩ to rax o wam mēõ patre maati jê jakrenh. Wamtaja na prem hkwýjê pyrà nê amnhĩ tomnuj o pa. Jakamã na prem apkati mē amnhĩ tomnuj pãnhã Tirtūm mã mēmoj gõ nê kãm amnhĩ jarē nê amnhĩ to kuwý. Hãmri nê rĩ kormã kot nhãm mē hwūr mē mrar xwýnhjê mã mē ho anê nê mē hpãnhã Tirtūm mã mēmoj nhõr pē mē ho kuwý. No kêt Jeusja wam patre maati rom aa kot amnhĩ tomnuj kêt jakamã na pre hte mē uràk nê amnhĩ tomnuj pãnhã Tirtūm mã mēmoj nhõr o pa hkêt nê. Âm mē papajaja na pre mē pahte amnhĩ tomnuj pãnhã htyk o kãm amnhĩre. Âm htyk tipxi htã mē pahpiitã mē pahpãnhã amnhĩrer pa. Jakamã koja axte ã amnhĩ nhĩpêx anhỹr kêt nê. Mo kaxyw kot kêt axte mē panê ty?

28 Mojes kapēr kôt na pre Ijaew amnhĩm Rewi hkwýjê xunhwý nhũm mē kēp mē õ patre nê ri pa. Tã no nhũm mē uràk nê arĩ amnhĩ tomnuj o pa nhũm Tirtūm tee ri mē omu nê mē hpãnhã mē pakaxyw Krata xãm nê kãm:

—Nà kapxipix mē kurom ate tãm amnhĩ nhĩpêx o apa jakamã kapxipix kot kaj mē hpãnhã mē ho ixwūr o apa rãhã ho rãhã. Anê.

8

Jeus kēp mē pahto Tirtūm wūr xwýnh maati hã harēnh

Rukre 22.20; Sikũn Korĩt 3.6-11

1 E kot paj axtem tanhmã mẽ amã mẽ pahto Tirtũm wỳr xwỳnh maatita jarẽnh to ka mẽ inhma. Na hte kaxkwa kamã Tirtũm nhĩhkô hã hkrĩ, ãhkô hã kệp Pahi Maati hã hkrĩ xà hã upôk rũm hkrĩ ho hkrĩ.

2 Wam patre maatijaja na prem Tirtũm nhõrkwỹ kaàkre wỳr mra nẽ kamã hitom maati kamã mẽ ho Tirtũm wỳr o pa. Nom nhũm Jejus na hte mẽ kurom kaxkwa kamã Tirtũm nhõrkwỹ mex kãm mẽ pahto àhwỳr o hkrĩ. Õrkwỹ kaàkreja na prem ãhkra ho hipêx nom kaxkwa kamã òrkwỹ mexja na pre mẽhõ ãhkra ho hipêx kêt nẽ. Tirtũm na pre tanhmã hipêx to nhũm kamã Jejusja mẽ pahto hwỳr o hkrĩ.

3 Nẽ mẽ pahpê Ijaew nhõ patre maatijaja na prem mẽ ho hwỳr kaxyw nẽ mẽ kot amnhĩ tomnuj pãnhã Tirtũm mã mẽmoj nhõr kôt mẽ ho kuwỳ. No Kris na hte ã amnhĩ nhĩpêx anhỳr kêt nẽ. Ra htyk o kot kãm amnhĩ nhĩ nhõr jakamã na hte wam patre maati pyrã nẽ xatã kãm mẽmoj nhõr kêt nẽ.

4 Tã na hte arĩ Ijaew Mojes kapêr kôt amnhĩm Rewi hkwy kệp mẽ õ patre kaxyw mẽ unhwỳ nhũm mẽ ho Tirtũm wỳr o pa. No Jejus kệp Rewi hkanrẽhã htãmnhwỳ hkêt. Katorxà hkôt kệp Juta hkanrẽhã htãmnhwỳ jakamã kop apu arĩ jar pika ja kamã htĩr nẽ pa ronhỹx Ijaew nhõ patre pyrã nẽ kệp mẽ ho Tirtũm wỳr o pa xwỳnh kêt. ãm Rewi hkanrẽhã htãmnhwỳ pixjaja na htem mẽ kaxyw kãm mẽmoj gõ nẽ hkôt mẽ ho kuwỳ.

5 Jar na htem arĩ ã amnhĩ nhĩpêx anhỳr o pa nom kaxkwa kamã na htem ã amnhĩ nhĩpêx anhỳr hkêt nẽ.

Nẽ jar Tirtũm nhõrkwỹ kaàkreja te kot kaxkwa kamã òrkwỹ mexta pyrãk. Na pre Mojes òrkwỹ kaàkre nhĩpêx kaxyw nhũm Tirtũm tanhmã kãm hã karõ hto nẽ kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mẽ ate hipêx to hã amã karõ. Tã kêt ka ã hipêx anẽ. Anẽ.

Hãmri nhũm kuma nẽ kot kãm hã karõ xà hkôt hipêx. Hãmri nhũm mẽ õ patre maati ixkreja kamã mẽ ho Tirtũm wỳr o pa. Na prem ã amnhĩ nhĩpêx anhỳr o pa.

6 Tã nhũm ra Tirtũm axtem mẽ hpãnhã mẽ pakaxyw Kris xãm nhũm hte mẽ pahto hwỳr mex o wamtajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrĩ nẽ wamtajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tirtũm kot finat Mojes mã kapêrja mex nẽ nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahtĩr nẽ nhỹrmã Tirtũm mẽ Jejus wa kuri pamex nẽ pahtĩr tũm nẽ papa ho papa nẽ axte pahtyk kêt nẽ.

7 Kệp apu Tirtũm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tirtũm axte kapêr nyw ã kagã hkêt nẽ.

8 Nom wam kapêr tũmta na pre mẽ mar tỳx htã arĩ amnhĩ tomnuj rãhã ho pa nhũm tee ri ja hã mẽ omu nẽ mẽ kãm:

Nã kot paj axte nhỹrmã mẽ apê Ijaew mã axtem tanhmã ixkapêr to.

9 Amnepêm mẽ anhĩgêjtjê mã na pa pre ixkapêr.

Na pa pre Ejit pẽ mẽ kator nẽ mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma nẽ ãm kuma nẽ ixkôt amnhĩ nhĩpêx kêt nẽ. Pa tee ri ja hã mẽ omu hãmri nẽ mẽ hkaga.

10 Tã kot paj mẽ apê mẽ hkanrẽhã mẽ htãmnhwỳ nywjê mã axtem ixkapêr ka mẽ ixkapêr nywja ma.

Kot paj nhỹrmã tanhmã mẽ akrã hto ka mẽ ixkapêr nyw mar tỳx nẽ hã ano htỳx nẽ ho apa.

Nẽ akĩnh nẽ apa.

Nẽ ixkôt ri amnhĩ nhĩpêx mex o apa.

Nẽ axpên mã ijarẽnh o: “Nã ãm hãmri Tirtũm kệp mẽ panhõ Tirtũm na.” Anhỳr o ri axpên mã ijarẽnh o apa.

Pa amnhĩ tã mẽ ama nẽ mẽ apumu nẽ amnhĩ xwar mẽ apê ixkra hã amnhĩm mẽ ajarẽ.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwýnhjaja nẽ mẽ akàxpore hkryre xwýnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nẽ.

¹² Nẽ kot paj mẽ ato mex rax o ixpa. Nẽ axte tanhmã mẽ ate amnhĩ tomnu hto ho apaja mã ijamaxpêr kêt nẽ. Anẽ.

¹³ Nẽ koja mẽmoj ra htũm hãmri nẽ hapêx tokyx anẽ. Ja pyrã nẽ na pre Tĩrtũm mẽ pamã kapêr tũmta jarênh o: –E kêr ka mẽ axte ixkapêr tũm mar kêt nẽ. Pãnhã ixkapêr nyw pix mãn mar o apa nẽ ãm kôt pix mã mãn amnhĩ nhĩpêx rãhã ho ri apa. Anẽ.

9

Tĩrtũm nhõrkwỹ kaàkre jarênh

¹ Nẽ amnepêm na pre finat Mojesja mẽ panhĩgêt nẽ mẽ pahpãmjê mã tanhmã Tĩrtũm nhõrkwỹ kaàkre jarênh to. Tanhmã mẽ kot hipêx to nẽ kamã tanhmã amnhĩ nhĩpêx to hã mẽ kãm karõ. Nẽ kamã tanhmã mẽ kot amnhĩ to Tĩrtũm wýr to hã mẽ kãm karõ. Nẽ tanhmã mẽ hkwýjê ho hwýr toja nhũm pre mãânên mẽ kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mẽ kot omunh nẽ kaxkwa kamã õrkwỹ kumrêx mã hamaxpêr kaxyw na pre.

² Jakamã nhũm prem Mojes kapêr ma nẽ hipêx. Kamã hitom hamêxkrut. Wam hitom kamã na pre kanê hprêeti xãm nẽ kutã mêsti xãm. Nẽ mêsti nhĩmõk ã Tĩrtũm mã õ pãwti jaxwý. Mẽ panhõ patre na pre htem Tĩrtũm mã kugõ nẽ mêsti ã kãm haxwý hãmri nẽ hkwýjê ho kuwý. Tã hitom ja na prem kêp Tĩrtũm nhõ hitom mex ã harẽ.

³⁻⁴ Nẽ hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tĩrtũm nhõ hitom maati hã harẽ.

Tĩrtũm na pre te hirã htýx kãm hwýr wrý nẽ te kamã hkrĩ pyrãk. Nẽ kamã na pre Tĩrtũm mã mẽhkuxwa xà ho xêt xà hã mês kunĩhtija kuhê. Na prem ôr o hipêx nẽ kamã ãm nhũm kuhê. Nhũm pre hte mẽõ patre hwýr agjê nẽ kutã kuhê nẽ mẽ ho Tĩrtũm wý. Nẽ mês kunĩhti haxwýja hitom maati kamã kuhê. Na prem pĩ ho hipêx nẽ ôr o hpro nẽ kamã ãm. Mêstija kaxwýnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ nẽ kên po hã mẽ kãm hã kagàja nhũm prem kamã kuxà nhũm hikwỹ.

Nẽ mãânên ôr o xijereja xà nhũm hikwỹ. Nẽ xijere kamã amnepê mã Tĩrtũm kot kaxkwa rũm mẽ hwýr mẽõ rênh kwý hikwỹ. Mẽõja mẽ kot kãm: “Manã” anhyr xwýnhja na prem hkwý hkawrà nẽ xijere kamã kugjê hãmri nẽ mêsti kamã kuxà.

Nẽ finat Arãw nhõ kô kot ho amnhĩ kaxpar xà htũmta nhũm prem kamã kuxà. Tĩrtũm kot tanhmã ho nhũm kurũm pixõrã muxre hapôx xwýnhnta nhũm prem mãânên mês kunĩhti kamã kuxà nhũm hikwỹ.

⁵ Nẽ himõk ã Tĩrtũm kapêr o wrýk xwýnh wa hkarõ nhĩpêxja wa hamêxkrut nẽ axpên kutã wa hkõn krã ho hkrĩ. Axpên wýr hara koror nẽ wa hkrĩ. Patre maati kot omunh nẽ Tĩrtũm kot mẽ hkôt pa ho paja mã hamaxpêr kaxyw. Nẽ wa hkaêx kãm ahkaprýja Tĩrtũm kot mẽ nê mẽ kot amnhĩ tomnuj rênh mã hamaxpêr xà na pre.

Ã Tĩrtũm nhõrkwỹ kaàkre kot anhyr. No kot paj ixprĩ hã mẽ amã piitã harênh par kêt nẽ.

⁶ Na pre hte mẽõ patre apkati mẽ wam hitom wýr agjê nẽ kamã Ijaew ho Tĩrtũm wýr o pa.

⁷ No hitom maati ãm mẽ õ patre maati pix na pre hwýr agjê. Nom apkati mẽ hwýr pa nẽ gjêx kêt ãm amgrã pýnh kãm hwýr gjêx pýnh nẽ.

Nê hwÿr gjêx kaxyw nê mēmo mry pa nê hkamrô ru nê o pa nê hitom maati hwÿr ho agjê. Hāmri nê ho mēs kunīhti nhīmōk kamī nê Tirtūm mā kām:

—Pa Tirtūm. E ota mry kamrôta. Mē ixpê akwÿjaja mē ixte amnhī tomnuj jakamā na pa mē amnhī pānhā mēmo mry nhōkre jakà nê kupī nê hkamrô ru nê man awÿr o mra. Te kot mē ixte amnhī tomnuj mÿrapê htyk pyrāk. Jakamā kwa ā mē ixte amnhī nhīpêx anhÿrja ā mē ixpumunh hkôt mē inhnê mē ixte amnhī tomnuj rê.

Anhÿr o mē amnhī to kuwÿ.

⁸ Nê patre maati pix na pre hitom maati ja wÿr agjê nê mē ho Tirtūm wÿ. Ijaew na prem ixkre kapem hamār o kuhê nê hwÿr gjêx kêt nê. Tirtūm Karō kot hā mē kām karō xà hkôt. Te Tirtūm pê amÿm kuhê pyrāk. Tā na htem jarāhā arī Ijaew kanrēhā mē hkra nê mē htāmnhwÿjaja ā amnhī nhīpêx anhÿr o pa. Jao mē higêtjê pyrā nê Tirtūm pê amÿm kuhê.

⁹ Mē kot arī Tirtūm mā mry hpar nê hkamrô ho mēmoj kamīr nê amnhī to hwÿr o pa htā na htem arī hamaxpêr punuj pix o pa.

¹⁰ Tirtūm kapêr tūm kot tanhmā mēmoj tā mē kām karō hto.

Na pre tanhmā mē apkur xà hā mē kām karō hto nhūm htem pix kur o pa.

Nê tanhmā mē hkōm xà hā mē kām karō hto nhūm htem pix o hkōm o pa.

Nê tanhmā amnhīmnuj to hā tanhmā mē kot amnhī kuhōnh to hā karōja nhūm htem hkôt pix mā tanhmā amnhī kuhōnh to ho pa.

Nê tanhmā mē kot ri mē hikukrêx kuhōnh to hā mē kām karōja nhūm htem kôt pix mā tanhmā kuhōnh to ho pa.

Ā na pre Tirtūm Kris kukamā mē kām mēmoj tā karō rax anê. Kris kutêp pix mā ā mē kot amnhī nhīpêx anhÿr kaxyw. No mē pahte arī ā amnhī nhīpêx anhÿr kaxyw kêt. Na pre ra Kris mē pahwÿr wrÿ nê Tirtūm kapêr tūm o hapêx nê hpānhā mē pamā kapêr nyw jarê pu mē hpānhā nywta

kôt pix mā amnhī nhīpêx o papa. Kapêr nywja mex o mex. Nê mex o wamta jakrenh.

Kris htyk o mē pahte amnhī tomnuj pānhā amnhīrer ā harēnh

¹¹ Tā na pre Krisja tām mē pahwÿr wrÿ nê kēp mē pahto Tirtūm wÿr xwÿnh maati nê patre hpānhā mē pahto hwÿr o pa. Nom jar pika ja kamā mē kot mē ĩhkra ho Tirtūm nhōrkwÿ kaàkre nhīpêxta wÿr àr nê kamā mē pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamā ōrkwÿ mex wÿr axà nê kamā tanhmā mē pahto mex to nê tanhmā mē pahto Tirtūm wÿr to rāhā ho hkrī.

¹² ā kaxkwa kamā Tirtūm nhō hitom maati ja wÿr àr tipxi htā mē pahpiitā mē pahte amnhī tomnuj pānhā amnhīrer pa. Nom mēmo mry kamrô ho mē pahpānhā amnhīrer kêt nê. Mōx kamrô rÿ motre kamrô ho mē pahpānhā amnhīrer kêt nê. Amnhī kamrô ho na pre mē pahpānhā amnhīre. Tyk nê hkamrô pikapīrta o mē pahpiitā mē pahpānhā amnhīrer pa.

¹³ Nê amnepê m Ijaew kot Tirtūm kapêr tūm kôt amnhī nhīpêx mex o pa hkêt jakamā nhūm tee ri mē omu nê mē kot amnhī tomnuj o mē pa xwÿnh ā mē harê. Jakamā na pre mēo patre xatā mry kamrô ho mē hkamī. Mōx kamrô nê motre kamrô ho mē hkamī. Na pre mōx krare hkwy hpa nê ho hxêt nê hprā ho hkwyjê kamī. Ā na prem xatā mē hipêx anhÿr o pa. Tirtūm kot ja hā mē omunh nê mē mex ā mē harēnh kaxyw. Nom te mē krāhkà pix mex pyrā nê mē hkrā kaxwÿnh kām arī hamaxpêr punuj o pa.

¹⁴ ā na prem amnhī nhīpêx anhÿr o pa. Nom Krisja mē kurom aa tanhmā amnhī tomnuj to hkêt jakamā na pre mē pahte amnhī tomnuj xwÿnhjê nê ty. Te mē kot amnhī nê mōx rÿ motre hpar nê hkamrô runhta pyrāk o amnhī nhīpêx nê mē panê Tirtūm mā amnhī gō nhūm pre mē

kâm hkurê xwýnhjaja kupĩ. Na pre Tĩrtũm Karõja ã kot mẽ panê htyk anhÿr kaxyw tanhmã ho hihtÿx to. Karõja aa hapêx kêt kumrêx rãhã nê pa ho pa xwýnh jakamã na pre Kris tykja kukamã tanhmã ho hihtÿx to nhũm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwýnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprÿ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tÿx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwýnh jakamã kot paj nhÿrmã kuri urak nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrÿ nê mẽ pahte hkôt amnhĩ xunhwÿr mã xwýnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhÿrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty.

¹⁶⁻¹⁷ Te jar pika ja kamã mēhō htyk kukamã hkrajê mã tanhmã amnhĩ jarênh to pyrak. Na htem htyk kaxyw nê hkrajê mã:

—Nà kot paj mẽmo arĩgro hã ty ka mẽ inhmÿr pê ixpê ixkukrêx kwÿ o arĩk.

Anhÿr o na htem amnhĩ jarê. Hãmri nê ty nhũm hkrajaja amnhĩm õ mẽmoj to arĩk pa. Mẽ hipêxà kukwak ri mẽ hikukrêx mex nê mÿr pê o pa. No kormã htĩr ri nhũm mẽ kormã kêp hamÿnh kêt nê. Ja pyrã nê na pre

Tĩrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkĩnh nê ri papa.

¹⁸ Nê Tĩrtũm kapêr tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tĩrtũm wÿr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

¹⁹ Na pre finat Mojesja Ijaew mã Tĩrtũm kapêr tũm piitã harê nê harênh pa hãmri nê mōx õxpĩ nê kaxyw motre hōxpĩ. Hãmri nê xijere kamã hamê wa hkamrô runh pa nê kamã gō hkwÿ ru. Hãmri nê kaxyw mẽmo pĩ hpa hkryre pē “isop” jarênhja kwÿ kukê. Nê kaxyw ôwêhti hkĩ kamrêkre hkwÿ hpy nê isop mẽ ho pihkãr pa nê mry kamrô o go. Hãmri nê ho hkwÿjê kamĩ. Nê ho Tĩrtũm kapêr ã kagã tũmta kamĩ.

²⁰⁻²² Hãmri nê ho anhÿr pa nê mẽ kãm:

—Nà na Tĩrtũmja ixte mry kamrô ho mẽ akamĩr pumunh kôt mẽ pamã kapêr o: “E kot kaj mẽ ixkapêr kôt amnhĩ nhĩpêx o ri apa hã kot paj tanhmã mẽ ato mex to rãhã ho ri ixpa ka mẽ amex nê akĩnh nê ajamakêtkati nê ri apa. Jakamã kêr ka mẽ mry kamrô ho mẽmoj piitã hkamĩr pa. Nê ho amnhĩ kamĩ. Kêr pa ja hã mẽ apumu hãmri nê axte tanhmã mẽ ate amnhĩ tomnuj tota mã ijamaxpêr kêt nê.” Anê. ã na Tĩrtũm mẽ pamã kapêr anê. Anê.

Hãmri nê hpãnhã mry kamrôta o õrkwÿ kaàkre kamĩ. Nê hkre kamã mẽmoj kuhê xwýnh piitã nhũm ho hkamĩr pa. ã na pre mẽ õ patre mẽ mex kaxyw mẽ hipêx anhÿr o pa. Mẽ kot tōhã mẽmoj to hpÿnhre nê ho hkamĩr kêt jakamã kironhÿx pre mẽmoj piitã ã hipêx anhÿr o pa. Kop apu mẽ kot mry hpar nê hkamrô runh kêt ronhÿx pre Tĩrtũm arĩ mẽ kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwÿ kaàkre kamã mẽmoj kuhê xwýnh piitã mex kaxyw hipêx anê. Te Tĩrtũm kot mẽ pahto mex nhũm mẽ pahte nhÿrmã ma kaxkwa hwÿr õ krĩ hwÿr

paxàpirta pyrà nê. Nom mē kot mry hpar nê hkamrô runhta kukwak ri mē pamex nê papa hkêt. ãm mēhō kamrô kukwak ri mē pamex xwÿnhhta pix kukwak ri na mē pahpê pahtîr tûm nê papa mã xwÿnh. Ja na mex o mry kamrô piitã hakrenh pa.

²⁴ Jejus Krisja pix kukwak ri. Tãm na pre patre pyrà nê mē pahto Tîrtûm wÿr kaxyw mē ìhkra ho Tîrtûm nhōrkwÿ kaàkre nhîpêxta wÿr gjêx kêt nê. ãm ixkre kaàkre pix na pre. Na pre kaxkwa kamã Tîrtûm nhō krî hwÿr axà. Tã arî kamã Tîrtûm nhîhkô hã mē pahto hwÿr rãhã ho hkrî.

²⁵ Nê Ijaew nhō patre maati na hte amgrã mē ōrkwÿ kaàkre kamã hitom maati hwÿr gjêx tipxi. Nê amnhî kôt mry kamrô ru nê ho agjê. Tîrtûm kot hã omunh nê axte mē kot amnhî tomnuj mã hamaxpêr hkêt kaxyw. Nom Kris na pre mē urak nê mēmo mry pa nê Tîrtûm mã hkamrô kapîr kêt nê. Kamrô na pre mē panê axkapî. Nom patre pyrà nê amgrã mē ã amnhî nhîpêx anhÿr kêt nê. Na pre htyk o Tîrtûm mã amnhî nhōr tipxi.

²⁶ Kêp apu patre pyrà nê amgrã mē mē panê htyk o pa ronhÿx ra mē panê htyk xohtô rax kumrêx. Nhÿx pre amnepê mã Tîrtûm kot mēmoj piitã ho katorta rûm amgrã mē mē panê htyk o pa ho hkrax. Jao xatã htyk o amgrã xohtô rax kumrêx. Nom ja kot anhÿr kêt. Na pre mē pahwÿr wrÿ nê mē panê htyk tipxi htã htykja o mē pahte amnhî tomnuj piitã hpãnhã amnhîrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tîrtûm nhÿrmã akupÿm mē pahpiitã mē pahto pahtîr nê ahpÿnhã tanhmã mē pajarênh to nê ahpÿnhã tanhmã mē panhîpêx to. Kormã mē pahtîr ri mē pahte amnhî nhîpêx ã mē pahpumunh xà hkôt tanhmã mē panhîpêx to.

²⁸ Ja pyrà nê na pre Krisja ãm mē panê htyk tipxi htã mē pahto ohtô nê mē panê mē pahte amnhî tomnuj piitã rênh pa. Hãmri nhÿm Tîrtûm

akupÿm ho htîr nê akupÿm amnhî wÿr ho api. Tã koja nhÿrmã akupÿn mē pahwÿr wrÿ. Nom axte mē pahte amnhî tomnuj pãnhã amnhî rer kaxyw mē panê htyk kaxyw wrÿk kêt nê. Ra kot mē pahte amnhî tomnuj pãnhã amnhîrer kênã. Kojã akupÿn wrÿ nê mē pahte amnhî wÿr kamã pajamak o papa xwÿnhjaja ma akupÿm amnhî kôt kaxkwa hwÿr mē pahto àpir pa. Ra mē pahtyk tã nhÿm akupÿm mē pahto mē pahtîr nê ma amnhî kôt mē pahto àpir pa pu mē kuri pamex nê pahtîr tûm nê papa ho papa.

10

Kris kot mē panê htyk tipxi hã harênh

¹ Nê arî mē kot Tîrtûm kapêr tûm kôt amnhî nhîpêx o mē pa xwÿnhjaja kormã hprî hã Tîrtûm kot tanhmã mē pahto mex to hã harênh mar tÿx kêt. Na prem kormã hkwy pix ma. Na hte mē ō patreja amgrã mē kãnhmã kaxkwa hwÿr mry kamrôta pē nê mē amnhî to Tîrtûm wÿ. Kot ja hã mē omunh nê axte mē kot amnhî tomnuj mã hamaxpêr hkêt kaxyw. Tã ã mē kot amnhî nhîpêx anhÿr tã arî Tîrtûm kapêr kwÿm amnhî nhîpêx rãhã

² jakamã na prem xatã kãm mēmo mry kamrô runh o pa. Kêp apu tãm amnhî nhîpêx nê tãm ri hamaxpêr ronhÿx arî ã amnhî nhîpêx anhÿr o pa hkêt nê. Nê xatã amnhî pãnhã mry hpar nê hkamrô ho Tîrtûm nhōrkwÿ kaàkre kamã mēmoj kamîr kêt nê.

³ Nom na prem tãm amnhî nhîpêx o pa hkêt nê. Mē kot amgrã mē Tîrtûm kot mē nê mē kot amnhî tomnuj rênh kaxyw mē kot kãm mēmo mry hpar o pa htã no ãm hkôt amnhî nhîpêx xwÿnh ã amnhî jarênh kêt nê. Arî mē kot amnhî tomnuj o pa jakamã na prem mry hparta ã amnhî pumu nê tee ri amnhî kukamã hamaxpêr o hkaprî nê pa.

⁴ Nom na hte môx kamrô rÿ motre kamrôja mē panê mē pahte amnhî tomnuj rênh kêt nê.

5-8 Jakamã na pre Krisja mẽ pahwÿr nojarêt nê Tirtũm mã amnhĩ jarênh o: Pa Tirtũm? E kot paj ma mẽ hwÿr wrÿ. Mẽ kot amnhĩ pãnhã amã mry hparta apê hprãm nõkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhÿr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nê ixtyk nê ixkamrõ pikapĩr pyræk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhĩ gõ pa mẽ uræk nê inhĩ ho inhĩ.

Tã kot paj ma mẽ hwÿr wrÿ. Ixte amã hprãm xà hkõt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagà htũm kot tanhmã ixkukamã ijarênh to xà hkõt kot wrÿ nê ã amã amnhĩ nhĩpêx anê. Anê.

Hãmri nê man mẽ pahwÿr wrÿ.

9 Kot Tirtũm kapêr tũm o hapêx par nê hpãnhã tãm mẽ panê htyk kaxyw wrÿ. Jakamã na pre nojarêt nê Tirtũm mã amnhĩ jarênh o:

–E ixte amã hprãm xà hkõt amnhĩ nhĩpêx kaxyw kot paj ma mẽ hwÿr wrÿ.

10 Anhÿr jakamã wrÿ nê Tirtũm kãm hprãm xà hkõt mẽ panê ty. Na pre nhãm mēhõ mẽ kãm hkurê xwÿnhjê mã õr nhũm mẽ kot hpĩr nhũm amari htyk kêt nê. Na pre amnhĩ grõnh kõt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkõt amnhĩ xunhwÿr xwÿnhjê o Tirtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

11 Nê mẽ õ patrejaja na htem apkati mẽ Tirtũm nhõrkwÿ kaàkre kamã kãm tanhmã amnhĩ nhĩpêx to. Nê apkati mẽ hkwyjê hpãnhã mry hkwy hpa nê hkamrõ ru nê mẽ ho Tirtũm wÿ. Tã nom ja hã mẽ omunh xà hkõt mẽ nê mẽ kot amnhĩ tomnuj rênh kêt nê.

12 No kêt Kris na pre mẽ kot xatã mry hpar xwÿnhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupÿm kaxkwa hwÿr api nê Tirtũm nhĩhkõ hã Pahi Maati hkrĩ xà kamã upõk rũm hkrĩ ho hkrĩ.

13 Kojã kuri hkrĩ rãhã nhũm Tirtũmja ãhkram mẽ kot kutã amnhĩ xunhwÿr xwÿnhjê jaxàr pa. Ja kaxyw na kormã kuri hamãr o hkrĩ.

14 ãm htyk tipxi htã htykja o mẽ pahte hkõt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamxpêr mex o ri papa. Tirtũm kãm hprãm xà hkõt.

15 Amnepêm mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêttjê mã kapêr o pa. Tirtũm Karõ nhÿ hã mẽ kãm kapêr nê mẽ kãm:

16 –E na Tirtũm mẽ pamã amnhĩ jarê nê amnhĩ jarênh o: Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tÿx pê hã ano htÿx nê ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

17 Nê kot paj axte mẽ ate amnhĩ tomnuj mã ijamxpêr kêt nê.

Anhÿr o mẽ pamã amnhĩ jarênh. Anê.

18 Tã ra axte mẽ pahte amnhĩ tomnuj mã hamxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrõ runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karõ Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

19-20 E ixkrãmnhwÿjaja. Ra Jejus kot mẽ panê htyk o hkamrõ pikapĩr jakamã na pu htem arĩ tee ri amnhĩ kukamã pajamxpêr hkêt nê. Tirtũm axte kot mẽ pahte amnhĩ tomnuj mã

hamaxpêr kêt jakamã na pu htem paxàmnhĩx amnhĩ to hwÿr o papa. Te paxàmnhĩx òrkwÿ kaàkre kamã hitom maati hwÿr pagjêx nê kamã amnhĩ to hwÿrta pyræk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxà hã kupêxêja kôt ã ho axkjê. Jao mẽ paxàmnhĩx hwÿr mẽ pagjêx kaxyw mẽ pamã kahê xà mẽ.

²¹ Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhta jakrenh.

²² Jakamã e kwa kêr pu mẽ mãmri paxàmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyræk. Nê axte paxàmnhĩx amnhĩ to Tĩrtũm wÿr o papa.

²³ Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mẽ tee ri ã pajamaxpêr anhÿr hkêt nê. Pu kêt mẽ pajamaxpêr o:

—Nã mẽ kot Kris ã tanhmã ixto htã kot paj aa hkaga hkêt nê. Mẽ kot

hã ixpĩr mã tã kot paj hkaga hkêt kumrêx.

Anhÿr ã amnhĩ jarê.

²⁴ Nê kêr ka mẽ akwÿjê mã anê kê mẽ mẽmoj to axpên kutã nojarêr rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mẽ pahkwÿjaja tanhmã hamaxpêr to nê axte mẽ pahkôt pikuprõnh nê Tĩrtũm kapêr mar o hkrĩ hkêt nê. No kêr pu mẽ ho mẽ uræk kêt nê. Kêr pu mẽ arĩ xatã axpên wÿr akuprõ nê mẽ pahte tee ri amnhĩ kukamã pajamaxpêr nê axpên mã pakapêr o papa. Kêt mẽ panhõ Pahĩtija ra akupÿn mẽ pahwÿr wrÿk kaxyw jakamã kwa kêr pu mẽ kutêp arĩ axpên mã pajamaxpêr mex nhõr pê tãm axpên nhĩpêx mex rãhã ho i papa.

²⁶ Mẽ pahkwÿjaja kot Tĩrtũm kapêr mar mex tã na htem kuma nê ãm kuma. Kwa kêr ka mẽ ho mẽ uræk kêt nê. Kris kot mẽ panê htyk ã harênhja mẽ kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mẽ kot amnhĩ tomnuj pãnhã amnhĩre? Nã amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mẽ panê amnhĩ nhĩpêx anê. Tã nhũm mẽ kot hkagaja mÿrapê koja mẽ nhÿrmã mẽ tãmjaja mẽ kot amnhĩ tomnuj pãnhã amnhĩre.

²⁷ Mẽ kot Tĩrtũm kutã amnhĩ xunhwÿr xwÿnh na mẽ. Amnepêr na pre Tĩrtũm mẽ kot kutã amnhĩ xunhwÿr xwÿnhjê kaxyw mẽ kot amnhĩ xà htÿx kamã hamak tũm xàta nhĩpêx. Tã ra mẽ kot Jejus kaga jakamã koja nhÿrmã ma hwÿr mẽ rênh pa nhũm mẽ tee ri kãm hwÿr pa hprãm kêt kaprÿ.

²⁸ Amnepêr finat Mojesja kormã htĩr ri na pre hte mēhõ pixi nê kapêr kaga nê akupÿm kot amnhĩ nhĩpêx tũm o awjanã nê tanhmã amnhĩ tomnuj to nhũm hkwyjaja ja hã omu. Tanhmãn axkrut rÿ axkrunêpxi nê ja hã omu. Hãmri nê ma Mojes wÿr mra nê axpên kôt kãm tanhmã kot amnhĩ tomnuj to hã harê. Hãmri nhũm

harênh ma nê mē kām hā amÿnê nhûm tee ri kām htîr prām kaprÿ. Mē kot akupÿm amnhî nhîpêx tûm o ujanâr nê amnhî tomnuj o paja mÿrapê na prem mē kupa. Ā na pre htem mē hipêx anhÿr o pa.

²⁹ Nê koja mēhō tanhmā Tîrtûm Kra Jejus o kapêr punuj to. Tîrtûm kapêr ā kagà htûm kot ra mē kot kêp Tîrtûm Kra hā harênh mar mex tā axtem nê tanhmā ho kapêr punuj to ho pa. Kot mē panê htyk nê hkamrô pikapîr kôt kot mē pahte amnhî tomnuj pânâ amnhîrer ā harênh mar tā kuma nê âm kuma nê harênh o:

—Nà mē pahpyrà nê kot amnhî tomnuj xwÿnh nhûm mē kot hā hpîr kênâ. Na pre mē panê htyk kêt nê.

Anhÿr ā harê. Nê Tîrtûm Karōja nhûm määnen tanhmā ho kapêr punuj to. Kêp mē pakutâ nojarêt xwÿnh tā nhûm axtem nê tanhmā ho kapêr punuj to. Mÿrapê koja nhÿrmā Tîrtûm tanhmā homnuj tÿx to. Homnuj tÿx o mē kot Mojes kapêr kaga nhûm mÿrapê kot mē hparta jakre. Jakamā kwa kêr ka mē ā amnhî nhîpêx anhÿr hkêt nê.

³⁰ Tîrtûm kapêr ā kagà htûm kot ja jarênh kot:

Ixpê Tîrtûm kot paj mē kot amnhî tomnuj xwÿnhjê homnuj tÿx nê. Anê.

Nê mē kot tām amnhî nhîpêx xwÿnhjê jarênh kot:

Mē kot amnhî to mex o mē pa xwÿnhjaja kot paj nhÿrmā mē ho mex rax nê. No mē kot amnhî tomnuj o mē pa xwÿnhjaja kot paj nhÿrmā mē homnuj tÿx nê. Anê.

Ra mē pahte ā kapêr anhÿr xwÿnhja kot amnhî nhîpêx ā omunh mex.

³¹ Jakamā kwa mē okora. Kêr ka mē amnhî to mex rāhā ho ri apa. Tîrtûm rāhā ho rāhā nê hihtÿx o hihtÿx jakamā koja mēmoj tā akamā gryk ka amex kêt o amex kêt.

³² Nê amnepêm mē ate Jejus kôt amnhî xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nê. Tā kêr ka mē

arî ā amnhî nhîpêx anhÿrja kukamā măn ajamaxpêr nê hā anohtÿx rāhā ho apa. Jao arî ā amnhî nhîpêx anê nê mē umaj Jejus kaga hkêt nê.

³³ Na prem mē piitâ mē noo mē tanhmā mē amā kapêr punuj to nê tanhmā mē anhîpêx to. Nê tōhā tanhmā mē akwÿjê homnuj tÿx to ka mē tee ri ja hā mē omu nê mē kamā axukaprî nê. Nê mē hkôt axkamê nhûm prem mē mē ato anê nê.

³⁴ Na prem mē akwÿjê jagjê ka premja hā mē omu nê ma mē hagjênh xà hā ixkre hwÿr mē hwÿr mra nê tanhmā mē ho mex to. Nhûm prem mē apê mē akukrêx kwÿptâ nê ma amnhîm o pa ka mē âm amnhî tā mē omu nê ajamaxpêr o:

—Kwâr mē māmri ma amnhîm hamÿn o pa. Koja nhÿrmā Tîrtûm inhmā ixkukrêx mex o kot ja jakrenhta kwÿ nhôr rax nê pa amnhîm hamÿ nhûm aa ixpê hapêx kêt nê. Hāmri nhûm axte mēhō aa ixpê utâr kêt nê. Jar mē ixkukrêxta mexti hā. Anê.

Jao mē kot mē apê utâr tā ka mē akaprî nâ apa hkêt nê. Ā amnhî kukamā ajamaxpêr anhÿr pê akînh nê apa. Âm hāmri na ka prem ā amnhî kukamā ajamaxpêr anê.

³⁵ Na ka prem mē kutâ amnhî to htÿx kām ā apa anê. Tā kwa kêr ka mē arî ā amnhî nhîpêx anhÿr o ri apa. Kêr kê nhÿrmā Tîrtûm ja hā mē ato mex rax nê.

³⁶ Nê kêr ka mē arî amnhî kaxyw Tîrtûm mē ajamaxpêr rāhā ho ri apa. Mē kot Jejus ā tanhmā mē ato htâ ka mē hkaga hkêt nê. Kot kaj mē ā amnhî nhîpêx anhÿr o apa nhûm Tîrtûm ja hā mē apumu nhûm ja kām mex nê. Hāmri nhûm ra kot amnhî jarênh xà hkôt nhÿrmā amā mēmoj mex nhôr rax nê. Jakamā kwa mē kot tanhmā mē anhîpêx to hā amnhî pumu nê tee ri amnhî kukamā ajamaxpêr o ri akaprî hkêt nê. Kot kaj mē Kris ā apunuj rāhā apa hkêt nê.

³⁷ Tîrtûm kapêr ā kagà htûm kot Jejus jarênh kot:

Koja mē pahwÿr wrÿk mǎ xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ixxôt mē kot amnhî nhîpêx mex o mē pa xwÿnhjaja koja mē amnhî kaxyw ixkôt hamaxpêr tÿx rāhā nê. Jao nhÿrmǎ ixri htîr tÿm nê mex rāhā nê pa ho pa.

Nê koja mēhō ixkaga pa tee ri kām ixkînh kêt ā omu. Anê.

³⁹ No mē papajaja te mē pahte mē kot Jesus kaga nhÿm kot amnhî tā mē homnuj mǎ xwÿnhjê pyrāk kêt. Arî mē pahte amnhî kaxyw hkôt pajamaxpêr rāhā jakamǎ koja nhÿrmǎ amnhî wÿr mē pahto api.

11

Amnhî kaxyw Tîrtÿm kôt mē hamaxpêr mex xwÿnhjê jarênh

Sikûn Pêtre 3.5-7

¹ Nê na htem Kris ā mē panhîpêx kati ho pa pu mē pahpunuj rāhā nê ri papa. Te Kris kot mē pahto mex kêt pyrāk pu htem mēmoj punuj pix kām ri papa nê kormǎ Tîrtÿm kot mē pahto mex ā amnhî tā omunh kêt nê. Tā ā mē pahte anhÿr tā kwa kêt pu mē arî kapêr kôt amnhî nhîpêx rāhā ho papa. Mē pahte pano ho Tîrtÿm pumunh kêt tā kot mē pahkôt pa ho pa hā amnhî kaxyw kām pajamaxpêr tÿx rāhā ho papa. Jakamǎ na pu htem ām kapêr kôt pix mǎ amnhî nhîpêx o papa.

² Amnepê mǎ mē pakukamǎ mē panhîgêjtjaja na prem no ho Tîrtÿm pumunh kêt tā amnhî kaxyw kām hamaxpêr nê kapêr kôt amnhî nhîpêx o pa nhÿm amnhî tā mē omu nhÿm ja kām mex nê.

³ Nê mē papajaja na pu htem pajaxwÿja mē pano ho omunh kêt tā amnhîm harênh o:

—Nā amnepêm kormǎ mēmoj piitā amrakati ri nhÿm Tîrtÿm ām kapêr pix o mēmoj piitā ho kato. Ixte inhno ho ja hā omunh kêt tā kot ā amnhî nhîpêx anhÿr ā amnhî jarênhja jakamǎ kot paj hkôt ijamaxpêr tÿx rāhā ho ri ixpa. Anê.

⁴ Na pre finat Atāw nhîpêx nê kaxyw hprō Ewa nhîpêx. Hāmri nhÿm wa hkra Apewja htō Kaî rom amnhî kaxyw Tîrtÿm kôt hamaxpêr tÿx o pa. Jakamǎ nhÿm wa Tîrtÿm mǎ mēmoj gō. Nhÿm Apew kot Kaî rom Tîrtÿm kām hprām xā hkôt kām mēmoj nhōr jakamǎ nhÿm amnhî tā omu nê kot amnhî to mex xwÿnh ā harê nê kot kām ōr xwÿnhhta nhÿm mex ā harê. Tā Apew amnepêm htyk tā pu htem arî harênh mar rāhā ho papa nê kām pajamaxpêr o:

—Apew na pre hte amnhî kaxyw Tîrtÿm kôt hamaxpêr tÿx rāhā ho pa.

Anhÿr ā kām pajamaxpêr.

⁵ Nê Atāw kanrêhā htāmnhwÿ Enokja na pre haxwÿja amnhî kaxyw Tîrtÿm mǎ hamaxpêr tÿx o pa. Jao hkamnār rom kām hprām xā hkôt pix mǎ tanhmǎ kām amnhî nhîpêx to ho pa nhÿm amnhî tā omu nê amnhîm mex ā harê. Jakamǎ na pre htyk kêt nê. Na pre Tîrtÿm htîr rāhā ma amnhî wÿr ho api nhÿm hkwyjaja tee ri hapêr o pa. Jakamǎ na pu htem arî axpên mǎ Enok kot amnhî kaxyw Tîrtÿm kôt hamaxpêr mex o pa hā harênh o papa.

⁶ Mē kot amnhî kaxyw Tîrtÿm mǎ mē hamaxpêr kêt xwÿnhjaja na hte Tîrtÿm mē mex ā mē harênh kêt nê. Tā mē papajaja kêt pu mē Enok pyrā nê amnhî kaxyw kām pajamaxpêr tÿx rāhā ho papa. Nê pajamaxpêr o:

—Tîrtÿmja htîr rāhā ho rāhā. Koja nhÿrmǎ mē ixte amnhî kaxyw hkôt ijamaxpêr xwÿnhjê ho mex rax nê. Nā koja mē ixto anê.

Anhÿr o mē pajamaxpêr nhÿm Tîrtÿm amnhî tā mē pajamaxpêr ā mē pahpumu nê mē pahte amnhî to mex ā mē pajarê. No mē kot amnhî kaxyw kām hamaxpêr kêt xwÿnhjaja na hte ā mē harênh anhÿr kêt nê.

⁷ Nê Enok kanrêhā htāmnhwÿ Noehtija na pre haxwÿja amnhî kaxyw Tîrtÿm mǎ hamaxpêr tÿx o pa. Jao hkamnār rom amnhîm pâr raxja nhîpêx. Na pre ra Tîrtÿm na rax kukamǎ tanhmǎ kām ujarênh to. Kormǎ aa na wrÿk nhÿm Noehiti kot

omunh kêt tâ Tirtûm kapêr ma nê mar xà hkôt amnhîm pâr rax kumrêxta nhîpêx. Ôrkwÿ kamã hkwÿjê mê mê amnhîm hipêx. No mê kot Tirtûm kapêr mar nê âm mar xwÿnhjaja na pre Tirtûm gô tam o mê hanhi nê mê himex pa. Nom Noehtija nhûm kot amnhî to mex xwÿnh ã harê. Kot amnhî kaxyw hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Nohti kanrêhã htâmnhwÿ Apraãwja na pre haxwÿja amnhî kaxyw Tirtûm mã hamaxpêr tÿx o pa. Na pre Tirtûm kot kãm pika nhôr ã kãm amnhî jarê nê ra kot ma hwÿr mênh kaxyw. Hãmri nhûm Apraãw kuma nê hkamnâr rom ô pika kaga nê ma pika hõja wÿr pa. Aa kot ma hwÿr môr nê omunh kêt tâ Tirtûm kapêr mar xà hkôt ô pika kaga nê ma hwÿr pa ho pa.

⁹ Hãmri nê hwÿr pøj nê omu nhûm Tirtûm kãm:

—E pika ja kot paj nhÿrmã akanrêhã akra nê atâmnhwÿjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mê uro hkwÿjaja ri pa nhûm Tirtûm kormã mê kator kêt ri nhûm mê ô pika hwÿr pøj nê mê kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika kumrêx kêt ã hkamnhîx jakamã âm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tirtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htâmnhwÿ Jakoja wa Apraãw pyrã nê mry kà ho ôrkwÿ nê ma amnhî kôt o pa. Nhûm Tirtûm kot Apraãw mã kapêr pyrã nê wa kãm wa hkanrêhã wa hkra nê wa htâmnhwÿjê mã pika nhôr ã amnhî kukamã wa kãm amnhî jarê.

¹⁰ Jakamã nhûm Apraãw kormã Tirtûm nhô krî hwÿr àpir xa hã amnhî tâ hamãr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tirtûm kot hipêx jakamã koja mry kà ho

ixkre nhîpêxta rom aa hapêx kêt nê. Jakamã nhûm Apraãw mê pahpyrà nê ma kot hwÿr àpir xa hã amnhî tâ Tirtûm jamãr rãhã ho pa.

¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhûm wa aa hkra hkêt nê pa htã nhûm Tirtûm nhÿrmã wa hkra hã wa kãm awjarê nhûm wa kuma nê amnhî kaxyw hkôt hamaxpêr kurê kumrêx. Nom amnhî tâ kuma nê tee ri amnhî kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tâ pahkra. Tirtûm kot hã ã pajarênh anhÿr kênã. Anê.

Tã ã wa kot hkra kaxyw Tirtûm mã hamaxpêr anhÿr jakamã na pre Apraãwja hprô htu. Ra wa hamê hpigêt tÿx kumrêx tâ nhûm htu. Nhûm wa hkra Ijakja gaa nê wa kãm kato. Jakamã nhûm wa gaa nê rî wa hkanrêhã wa htâmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanâr mÿri pikahti grã hkryre jakre. Jakamã nhûm mê tee ri mê ho kôta hpar mã. Nhûm Apraãw kêp mê hpâr krax.

¹³ Tã nhûm Apraãw nê Ijak nê Jakoja mê ri pa tãmtã nê htyk pa nê hapêx. Tirtûm kormã kot mê kãm pika jarênhta nhôr xwÿj ri ra htyk pa. Nom kormã mê htîr ri tanhmã kãm hamaxpêr to nê hamaxpêr o:

—Nà kormã Tirtûm kot mê inhmã pika jarênhja nhôr kêt tâ koja nhÿrmã inhmÿr pé ixkanrêhã ixkra nê ixtâmnhwÿjê mã kugô. Nà koja mê kãm kugô. Ra kot hã inhmã amnhî jarênh kênã kot kêt mê kãm ôr kêt.

Anhÿr o kaxyw kãm hamaxpêr rãhã ho pa. Jao hkînh nê hamaxpêr o:

—Nà inhô krîja axtem na. Na pa hte jar pika ja kamã ri mê hkôt ri ixpa. Te ixpê mê uro pyrã nê ri mê hkôt ixpa nom jar inhô krî hkêt. Inhô krî na kêt axte mã. Anê.

¹⁴⁻¹⁵ Na prem ã ô krî hõ hkukamã hamaxpêr anhÿr o pa. No ô krî htûmta mê kot hkaga nê pika hõ hwÿr môr

xwÿnh̄ta na prem ã harênh̄ anhÿr kêt nê. Kop apu mē kot amnhĩm tãm mãn jarênh̄ ronhÿx prem awjanã nê ma akupÿm hwÿr pa. Na prem axtem krĩ hõ jarê nê kormã hwÿr mör kêt ã amnhĩ jarênh̄ o pa.

¹⁶Tã nhÿ krĩ na prem ã harênh̄ anê? Nà kaxkwa kamã Tĩrtũm nhõ krĩja. Tãm na mex kumrêx jakamã nhũm prem kormã hwÿr ma àpir xa hã mē pahpyrà nê amnhĩ tã Tĩrtũm jamãr rãhã ho pa nhũm amnhĩ tã mē omu nê hkĩnh̄ nê. Nê mē kot tãm amnhĩ nhĩpêx ã mē omu nê mē kêp hkra hã mē harênh̄ ã hpijaãm kêt nê. Hãmri nê mē kutêp tanhmã õ krĩ ho mex to ho pa.

¹⁷⁻¹⁸Na pre ra tanhmã Apraãw mã hkra Ijakja jarênh̄ to nê kãm:

—Akra Ijak kanrêhã hkra nê htãmnhwÿjaja koja mē kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh̄ tÿx kumrêx nê kãm ixkõt amnhĩ nhĩpêx rãhã ho pa hprãm nà? Xà we kãm ixkĩnh̄ tÿx o hkrata jakrenh̄? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm õr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh̄ mex jakamã hkamnàr rom kot kãm hpĩr kaxyw.

¹⁹Nê hamaxpêr o:

—Nà Tĩrtũm akupÿm kot mē ho htĩr xwÿnh̄ kênã.

Anhÿr jakamã kãm hkra hpĩr puma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupÿm õrkwÿ hwÿr mō. Tã ã kot hkra nhĩpêx anhÿr jakamã Apraãw mã te Ijak htyk nê akupÿm htĩr pyràk.

²⁰Nê Ijakja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnàr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhÿrmã Tĩrtũm inhmÿr pê war ato mex rãhã ho pa. Anê.

²¹Nê Jakoja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnàr rom hkra Juje mã Tĩrtũm kot mē ho mex kukamã harê. Na pre Jakoja hkra nê htãmnhwÿ mē hpimràatã hprãm xàj ma Ejit wÿr pa nê kamã pa ho pa. Tã nhũm Jako hpigêt tÿx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhĩ kamã ama. Na pa ra ixtyk kaxyw. Nom koja Tĩrtũm nhÿrmã inhmÿr pê mē ato mex rax nê. Anê.

Hãmri nê amnhĩ kaxpar xà hã pĩ hã amnhĩ kaxpa nê kãnhmã xa nê Tĩrtũm mã mex o mex ã harê. Hãmri nê akupÿm nör xà kamã nõn ty.

²²Nê Jujeja na pre haxwÿja amnhĩ kaxyw Tĩrtũm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhĩ jarênh̄ to. Ra hpigêt nê htyk kaxyw nê hkwyjê mã tanhmã amnhĩ tã karõ hto nê mē kãm:

—E na pa ra ixtyk kaxyw. Tã koja Tĩrtũm inhmÿr pê nhÿrmã Ejit rũm mē akator nê ma akupÿm mē panhõ pika hwÿr mē ato pa. Ra kot mē panhigêt Apraãw mã amnhĩ jarênh̄ xà hkõt. Jakamã kwa mē inhma. Kêr ka mē akupÿm anojarêt nê ma amnhĩ kõt ixtã kasãwja mÿ nê amnhĩ kõt ixto mō. Hãmri nê mÿtar mē panhõ pika kamã mē anhõ krĩ htã ijaxà pa jawÿ mē akuri ixtã pyka. Anê.

²³Nê Mojes katorxà mē hipêêxàja na pre wa haxwÿja jajê pyrà nê amnhĩ kaxyw Tĩrtũm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhũm Ejit nhõ pahija tee ri Ijaew xohtõ rax kumrêx ã mē omu nhũm ja kêp omnuj nê. Hãmri nhũm mē hkra myjaja mē hapõx kõt mē hamÿnh̄ xwÿnh̄jaja kot mē hpar ã mē kãm karõ. Tã nhũm Mojes kato nhũm hipêêxà mē katorxàja wa omu nhũm muxre nhũm wa tee ri hkukamã hamaxpêr. Hãmri nê pahi Paraohiti mã mē hkra jamÿnh̄ xwÿnh̄ kot wa kêp hpĩr pymaj ho pimxur o hã mytwrÿ axkrunêpxi. Tĩrtũm kamnàr

rom wa amnhî tâ kãm uma hkêt nê ã kêp hkra ho hpimxur anê.

²⁴ Nê Mojes na pre haxwýja amnhî kaxyw Tirtûm mã hamaxpêr tỳx o pa. Kormã karãre ri na pre Paraohti hkra nija omu nê amnhîm kumý nê ho hkra nê amnhî kôt o pa. Rãhã nhũm àptàr nhũm Ejit nhõ xwýnhjaja kêp pahi Paraohti htãmnhwý mã axpên mã harê. Hãmri nhũm tee ri amnhî tâ mẽ kuma nê amnhî tâ mẽ kãm aprã nê mẽ kãm:

—Kwa mẽ ã ijarênh anhÿr kêt nê. Ixpê mẽ akwý hkêt. Anê.

²⁵ ãm kãm Tirtûm kwýjê kôt pix mã ri pa ho pa hprãm. Nê kãm Ejit nhõ pahi hkôt amnhî tomnuj prãm kêt nê. ãm mẽ kot amnhî tomnuj pix o paja na mẽ kãm hprãm nhũm ja mã mẽ omu nê tee ri mẽ hkukamã hamaxpêr nê hamaxpêr o:

—Nà kot paj mẽ hkôt ri ixpa hkêt kumrêx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kêp hapêx. Nà kot paj Tirtûm kwýjê hkôt mãn ri ixpa ho ixpa. Mẽ kot Tirtûm ã mẽ inhîpêx kati htã pa arĩ mẽ hkôt ixpa ho ixpa.

²⁶ Inhmã Ejit nhõ xwýnhjê hkôt ixkukrêx rax nê ri ixpa hprãm kêt. Kwãr mẽ mãmrĩ Tirtûm ã tanhmã inhîpêx to. Koja mẽ ã inhîpêx anê pa ixpunuj nê ri ixpa htã koja Tirtûm nhÿrmã ixto mex rax nê. Nà kot paj Ejit nhõ pahiti hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga.

²⁷ Tã akupÿm mẽõ pika hwÿr Ijaewjê ho mõi kaxyw nhũm Ejit nhõ pahitija tee ri ja mã omu nê kamã gryk tỳx nê. No nhũm Mojesja amnhî kaxyw Tirtûm kôt hamaxpêr tỳx o hkamnàr rom kãm mẽ uma hkêt nê. Nê mẽ kêp hkwyjê kator pa nê ma akupÿm mẽõ pika hwÿr amnhî kôt mẽ o pa. Tirtûm kamnàr rom ã mẽ kêp mẽ ho kator anê. Aa kot no ho omunh kêt tâ amnhî kaxyw kãm hamaxpêr tỳx nê hkamnàr rom mẽ kator nê hamakêtkati nê mẽ o pa.

²⁸ Nê hkamnàr rom mẽ hkĩnh ã arĩgro mẽ kot kãm “Pas” anhÿr

xwýnhta ho hkra. Kormã Ejit rùm kator kêt ri. Nê kaxyw amnhî kwýjê mã mã karõ nê mẽ kãm:

—E pa mẽ amã Tirtûm kapêr jarê ka mẽ inhma. Nà kot puj xep mẽ jarãhã ôwêhti hkwy pa nê hkamrô ru. Nê hkamrô ho panhõrkwÿ jakwakre mã pĩ kukõ. Hãmri nê ã kuxôt nê kuku. Koja kamàt nhũm mẽ kot amnhî tomnuj xwýnhjê pê mẽ hkra my kot wa piitã mẽ hpar mã xwýnhja mã. Hãmri nê mẽ pamý ri mã nê ã mẽ pahte mẽ panhõrkwÿ nhîpêx anhÿrja ã omu nê tanhmã mẽ pahkrajê ho hkêt nê. Tirtûmja ã mẽ pahte amnhî nhîpêx anhÿr kaxyw ã inhmã karõ anê. Jakamã e pu mẽ hkamnàr rom ã amnhî nhîpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rùm kator xã mã arĩgrota ã mẽ hkĩnh o kator kra. Mẽ hkĩnhja na htem kãm “Pas” anê.

²⁹ Nê Ijaewjaja na prem haxwýja Ejit rùm kormã Mojes kôt mẽ pa ri urak nê amnhî kaxyw Tirtûm mã hamaxpêr. Jakamã na prem ra gô xujanàr pê “Gô Kamrêk” anhÿr xwýnhja mý ri kuhê nhũm Tirtûm mẽ kãm ho axkjê. Nê mẽ kãm hkôt ã ho amgrã nhũm mẽ mã hkamnàr rom mex nê rêr pa. No nhũm mẽ hkôt mẽ kot mẽ himex kaxyw mẽ mrar xwýnhjaja. Ejit nhõ pôristijaja nhũm gôja akupÿm mẽ mã axkamur nê mẽ himex pa.

³⁰⁻³¹ Nê Ijaew kot Mojes mÿr pê Jojue hkôt pa ri mẽ urak nê amnhî kaxyw Tirtûm kôt hamaxpêr o pa. Na prem ra Tirtûm kot mẽ kãm pika nhõr xwýnhta wÿr pøj nhũm Tirtûm krĩ pê Jeriko hwÿr mẽ kurê. Mẽ kot kamã mẽ pa xwýnh pê utàr kaxyw mẽ hwÿr mẽ kurê. Mẽõ krĩ pu mã kahêja kên tỳx pix o na pre. Nê hprêk rax kumrêx. Nê krĩ nhõ xwýnhjaja kãm Tirtûm kapêr mar prãm kêt. Hãmri nhũm Tirtûm mẽ mã Ijaewjê mã amÿnê nê mẽ kãm:

—E mẽõ krĩja kot paj mẽ amã kugõ nom kêr ka mẽ inhmar kumrêx. Kêr ka mẽ apkati mẽ mẽ õ krĩ hwÿr mra

nê kupu hpÿnh o atã apkati kêp 7 nê rĩ ma akupÿm mra. Anê.

Hãmri nhũm mẽ kuma nê mar xà hkôt ma Jeriko hwÿr mra. Hãmri nê hwÿr pøj nê Tĩrtũm kamnàr rom krĩ puhã kahêja kupu hpÿnh o hã apkati kêp 7. Hãmri nhũm apkati pê 7ta ã nhũm kên tÿx o kahêja mẽ kêp amnhĩ krakrak nê rôrôk pa. Nhũm mẽ mra nê hkôt krĩ hwÿr agjê nê krĩ nhõ xwÿnhjê nhĩmex pa. Nom krĩ kamã kuprÿ pê Raapja Ijaew pyrã nê amnhĩ kaxyw Tĩrtũm mã hamaxpêr o pa jakamã nhũm mẽ kormã mẽ himex kaxyw mẽ hwÿr mör kêt ri amnhĩ kukamã mẽ hkwÿjaja kot mẽ hã ukapi ho pa kaxyw mẽ hwÿr mẽ kurê. Hãmri nhũm Raapja mẽ kêp amnhĩ pyrã nê Tĩrtũm kôt hamaxpêr ã mẽ omu nê hkwÿ kot mẽ himex pymaj amnhĩ nhõrkwÿ kamã mẽ kêp mẽ ho amũxu nhũm mẽ hkà hkĩnh pê ma akupÿm hkwÿjê wÿr mō. Jakamã nhũm mẽ kot mẽ himex kaxyw mẽ hwÿr mra hãmri nê amnhĩ pyrã nê tanhmã Raap mẽ õ fãmii ho hkêt nhũm mẽ arĩ htĩr nê pa. Mẽ urak nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mẽ ho hkêt nê.

³² ã na pre mẽ kot amnhĩ kaxyw Tĩrtũm kôt mẽ hamaxpêr xwÿnhjaja Tĩrtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nê. Mãânên Giteãw nê Parak nê Sãsõ nê Jepte nê Tawi nê Sãmuew nê Tĩrtũm nhÿ hã mẽ kapêr o pa xwÿnhjaja. Jajê piitã na prem wamtajê pyrã nê amnhĩ kaxyw Tĩrtũm kôt hamaxpêr tÿx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mẽ ohtô rax kumrêx jakamã na pa ãm hkwÿ pix jarê nê hã kagà.

³³ Na prem hkwÿjaja Tĩrtũm kamnàr rom ma mẽ kot amnhĩ tomnuj xwÿnhjê nhõ krĩ hwÿr mra nê mẽ kêp mẽ õ pika pytà. Nê mẽ hkwÿjaja Tĩrtũm kamnàr rom mẽ ho amnhĩptàr mex o pa. Nhũm prem kãm Tĩrtũm

kurê xwÿnhjaja mẽ hkwÿjê pynê nê ahkrehti kamã mry xoprê hkwÿ nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamÿr tÿx pyrak o mẽ hipêx nhũm ãm mẽ omunh o kuhê nê tanhmã mẽ ho hkêt nê. ã na prem Tĩrtũm kamnàr rom amnhĩ nhĩpêx anhÿr o pa.

³⁴ Nhũm mẽ kot kuwy rax kãm mẽ hkwÿjê rênh tã nhũm mẽ kot amnhĩ kaxyw Tĩrtũm mã hamaxpêr tÿx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwÿjaja wapo ho mẽ hkamnhwÿr o mẽ hkwÿjê hpar kaxyw nhũm mẽ amnhĩ kaxyw Tĩrtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprôt nê ma mra. Mẽ hihtÿx kêt tã Tĩrtũm kamnàr rom ÿ hã hihtÿx nê mẽ kãm mẽ hkurê xwÿnhjê ho krihkrit pa nhũm mẽ ma akupÿm hapêx.

³⁵ Nê mēni hkwÿjaja na prem haxwÿja amnhĩ kaxyw Tĩrtũm mã hamaxpêr tÿx o pa. Jao mẽ hkrajaja mẽ kêp htyk tã nhũm prem Tĩrtũm kamnàr rom mẽ ho kuwy nhũm mẽ kuma nê akupÿm mẽ kãm mẽ ho htĩr.

ã na prem amnhĩ kaxyw Tĩrtũm mã hamaxpêr pê mex nê pa anê. No na pre mẽ hkwÿjaja mẽ urak nê amnhĩ kaxyw kãm hamaxpêr tÿx tã nhũm Tĩrtũm tokyx mẽ ho mex kêt nê. Na pre mẽ kãm mẽ hkurê xwÿnhjaja Tĩrtũm ã mẽ par kaxyw. Nê mẽ hkwÿjaja Tĩrtũm ã mẽ hipêx kati ho pa nhũm mẽ amnhĩ xà htÿx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nê mẽ anhĩmex kêt nê. Anê.

No nhũm mẽ kuma nê ãm mẽ kuma nê amnhĩ kaxyw kãm hamaxpêr tÿx pê mẽ kãm:

—Nà mẽ kam nê mãmri ixpĩ. Inhmã ixyk puma hkêt. Kot paj ty nhũm Tĩrtũm akupÿm ixto ixtĩr pa kuri

inhmex kumrêx nê ri ixtîr tûm nê ixa pa ho ixa pa.

Anhÿr o mē kām amnhî jarēnh jakamā hāmri Tîrtûm kaga hkêt rāhā nhûm mē himex.

³⁶ Nê mē kām mē hkurê xwÿnhjaja na prem Kris ā mē hkwÿjê mā hpêr o pikēnh pê mē htak xà ho mē htak rûnh o pa. Nê kàx o mē hkwÿjê hpa hpre nê mē hte hpre nhûm mē kêp prês nê hkrî ho hkrî.

³⁷⁻³⁸ Nhûm prem kēn rûnh o mē hkwÿjê htak o mē kupa. Nê mē hayr o mē hkwÿjê pa. Nê mē hkamnhwÿr o mē hkwÿjê pa. Ā na prem Kris kôt mē hamaxpêr ā mē omunh xà hkôt mē hipêx anhÿr o pa. Jakamā na pre mē hkwÿjaja mē umaj mēō krî rûm hapôj nê ma hprôt nê mra. Nê te mē ō krî hkêt pyrā nê kapôt ā kêp amrakati nê ri pa. Mē ê hkêt nê ôwêhti hkà ho ê nê ri hā pa. Nê motre kà ho amnhî pre nê ri hā pa. Nê kēn prêk ā api nê kre kamā hpimxur o pa. Nê pika hkre kamā hpimxur o pa. Nhûm mē kām mē hkurê xwÿnhjaja te mē kêp ahpunu nê mē kêp ahkro pyrāk o mē hipêx nê axpēn mā mē harēnh o:

—Nà mē mexti hā. Kwa pu mē piitā mē himex paa ri.

Anhÿr o mē harēnh tā nhûm Tîrtûm mē urāk nê ā mē harēnh anhÿr kêt nê. Na pre mē mex kumrêx ā mē harē. Nê nhÿrmā kuri mē mex nê pa ho pa hkukamā mē harē.

³⁹ ā na prem Tîrtûm kamnār rom mē kām mē hkurê xwÿnhjê kutā amnhî to htÿx kām htyk o pa anê. Nhûm Tîrtûm ja hā mē omu nê hkînh nê kām mē hapê htÿx nê. No nhûm mē kormā htîr ri amnhîm Tîrtûm kot mē ho mex xà jamÿnh kêt rāhā ty.

⁴⁰ Tā mo na pre Tîrtûm kormā mē htîr ri hkwÿjê pyrā nê mē ho mex kêt nê? Nà na pre kormā mē hkukamā hamaxpêr o:

—Nà kot paj kormā mē ho mex kêt nê. Kot pa mē mÿr pê mē kot ixkôt amnhî xunhwÿr mā xwÿnhjê jamār grire măn. Kêr pa inhō krî kamā mē ho ixpimràatā mē ho mex rax kumrêx. Nà kot paj ā mē ho mex anê.

Ja na kêt inhmā mex o kormā mē htîr ri ixte mē ho mexta jakrenh. Anê.

Ja o ra ā mē papajaja mē pakukamā hamaxpêr anê.

12

Mē pahte Jejus pyrā nê mēmoj kutā amnhî to htÿx ā mē pamā karō

Piripos 3.12-21

¹ Na pre mē pakukamā mē panhîgêt kwÿjaja amnhî kaxyw Tîrtûm mā hamaxpêr pê ā amnhî xà htÿx kamā hamak o pa anê. Tā te ra mē kot kÿj rûm kaxkwa rûm mē pahpumunh nê tanhmā mē pamā kapêr to pyrā nê mē pamā kapêr o:

—E mē inhma mē ixkanrêhā mē ixtāmnhwÿjaja. Na pa prem ā Tîrtûm kamnār rom amnhî nhîpêx o ixa anê. Mē kot ja hā mē inhîpêx kati htā pa prem Jejus kaga hkêt nê. Tā kêt ka mē ixpyrā nê ā mē kām mē akurê xwÿnhjê kutā amnhî to htÿx anê. Nê mē ixpyrā nê amnhî kaxyw Tîrtûm kôt pix mā ajamaxpêr tÿx rāhā ho ri apa. Anê.

Jakamā kwa kêt pu mē urāk nê ā amnhî nhîpêx anhÿr rāhā ho măn ri papa. Te mē hprôt xwÿnhjaja kot amnhî nhîpêx pyrāk o amnhî nhîpêx. Na htem hprôt tÿx kaxyw mēmoj pytî jamÿnh nê ho hprôt hkêt nê. Na htem ŷ kamā hprôt o hprôt tÿx nê wam hkwÿjê mā wa nê mra. Ja pyrā nê kêt pu mē pahte Tîrtûm kapêr kôt amnhî nhîpêx mex o papa kaxyw tanhmā mē pahte amnhî tomnuj to hā amnhî pumu nê hkaga kurê kumrêx. Mē pahte amnhî tomnuj o papa xàja te mex pyrāk no ām mex kêt. Te ho mē hprôt xwÿnh kot axtem nê mēmoj pytî mÿnh nê tee ri ho hprôt tÿxta pyrāk. Kot puj mē tanhmā amnhî tomnuj to ho papa nê Tîrtûm kapêr kôt amnhî nhîpêx mex kêt nê. Jakamā kwa kêt pu mē Tîrtûm kapêr gryk ā amnhî tomnuj nê amnhî to htÿx rāhā ho papa. Te ho mē hprôt nê nhÿri mē àhuk xà pix kukamā hamaxpêr rāhā hprôt tÿx xwÿnhhta pyrā nê ām Jejus mā pajamaxpêr tÿx rāhā ho papa.

² E kot paj mẽ amã Jesus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwýr jakamã na hte mẽ pamã pajamaxpêr nyw gõ pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwýnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htýx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

—Nà kwãr mẽ mãmrĩ ixpĩ. Kot paj ty nhũm Inhĩpêêxà akupým ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ.

³ Jakamã kwa kêr pu mẽ kot ã mẽ panê amnhĩ nhĩpêx anhýrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htýx nê xa. Tã kêr pu mẽ uràk nê mẽ kãm mẽ pahkurê xwýnhjê kutã amnhĩ to htýx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêt nê.

⁴ Na ka htem ma mẽ kot amnhĩ tomnuj xwýnhjê hwýr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwýjê nhĩpêxta pyrã nê kormã mẽ atõxpĩr kêt nê.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nê mãn ka mẽ arĩ Tĩrtũm kapêr ã kaga htũm kwý hã ano htýx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar týt nê mẽmojta kaga kurê kumrêx. No mẽ ama nê tee ri kot nê akurê

xwýnhta kukamã ajamaxpêr o ri akapri o axtem nê Tĩrtũm kaga hkêt nê. Ama nê kot amã mẽmoj nê kapêr xwýnhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mýrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêt nê. Kêt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhýr o mãn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ uràk nê ã mẽ panhĩpêx anê.

⁸ No koja mẽhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja hkraja te hipêêxà hkêt nê hã awrãre nê ri pa pyrãk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt xwýnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêt nê.

⁹ Nê na hte mẽ panhĩpêêxà mẽmoj tã mẽ pamã karõ pu htem kuma nê hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nê hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anê nê nhýrmã kuri pamex nê pahtĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rý hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê

axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tũhã tanhmã amnhĩ tomnuj to nhũm mẽ pahpumu nẽ tanhmã hã mẽ pahto. Mẽ pahte amnhĩ pumunh nẽ axte hkêt kaxyw. Urak nẽ amnhĩ to mex pix o papa kaxyw.

¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nẽ pahkaprĩ nẽ pahkĩnh kêt nẽ ri papa. Nom kot puj mẽ tokyx tanhmã amnhĩ tomnuj tota kaga nẽ akupỹm Tĩrtũm kôt tãm amnhĩ nhĩpêx o papa nẽ akupỹm pahkĩnh nẽ pajamakêtkati nẽ ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêr ka mẽ amnhĩ to htỳx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pẽ akĩnh nẽ apa.

¹³ Kêr kê Kris kôt atõjê hõ tee ri mẽmoj tã amnhĩ pumunh kôt ra Tĩrtũm kaga kaxyw tã ã mẽ ate amnhĩ nhĩpêx anhỹr ã mẽ apumu nẽ mẽ apyrã nẽ akupỹm hkôt amnhĩ xãm tỳx nẽ hkaga hkêt nẽ.

¹⁴ Nẽ kêr ka mẽ tãm ri axpẽn nhĩpêx o ri apa. Jao axpẽn kôt ajamakêtkati nẽ ri apa nẽ amnhĩ to mex pix kukamã ajamxpêr. No kot kaj mẽ anhỹr kêt nẽ nhỹrmã mẽ panhõ Pahi Maati hwỳr axàpir nẽ kuri amex nẽ apa hkêt nẽ.

¹⁵ Na hte Tĩrtũm mẽ pahto mex nẽ mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêt nẽ. Nẽ tanhmã ri ajamxpêr punuj to ho ri apa hkêt nẽ. Kot ka mẽ ã amnhĩ nhĩpêx anẽ nhũm Kris kôt mẽ pahkwỳjaja ja hã mẽ apumu nẽ mẽ apyrã nẽ tanhmã amnhĩ tomnuj.

¹⁶ Nẽ kêr ka mẽ axpẽn kãm apijaàm kêt o ri apa hkêt nẽ. Nẽ te finat Ejau kot amnhĩ nhĩpêx pyrak o ri apa hkêt nẽ. Na pre Tĩrtũm ã hpijaàm kêt nẽ hkwyjê kamã hpijaàm kêt o pa. Nẽ Tĩrtũm mã hamxpêr kêt kumrêx. Kêp Ijak kra kot wa jakamã koja nhỹrmã hipêêxà mỳr pẽ kêp hikukrêx nẽ õ pika piitã ho àrĩk pa. Hãmri nhũm

hipêêxà kot ho Tĩrtũm wỳr nhũm kot ho mex kaxyw mã tã nhũm axtem nẽ mẽmo arĩgro hã kãm prãm xaj kot kêp mẽmoj to àrĩk mã xwỳnhta htõ Jako mã hkaga hpa. Mankwỳrtre gõj kãm ãm prãm xaj kãm hkaga hpa. Jakamã nhũm Jako hpãnhã te kêp Ijak kra kot wa pyrã nẽ mỳr pẽ õ mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhỹrja mã hamxpêr o hkaprĩ nẽ. Nẽ tee ri kãm Jako kot akupỹm kãm mẽmojta nhõr prãm kaprỹ. Nẽ mur nẽ hã hipêêxà wỳ no nhũm axte kãm mẽmoj nhõr kêt nẽ. Nhũm kot ho Tĩrtũm wỳr kaxyw tee ri amnhĩ to kuwỳ no nhũm kuma nẽ ãm kuma nẽ kãm ho anhỹr kêt nẽ.

¹⁸ Nẽ amnepê mã Tĩrtũm kot mẽ panhĩgêxjê mã kapêr kaxyw na prem hixêt prêk pẽ Sinai jarênhja wỳr akuprõ nẽ hparpê kuhê. Hãmri nhũm hixêt nhĩmõk ã kuwy hpõk rax kumrêx. Nẽ kuwy mỳr ri kakrã htyk ajêt. Nẽ kòk àpêr tỳx nẽ. Nhũm Ijaewjaja hixêt krax ã omu nẽ kãm maa ho htertet o kuhê.

¹⁹⁻²¹ Hãmri nhũm mẽhõ pifti kakõ nhũm Tĩrtũm hixêt nẽ mẽ kãm kapêr nẽ mẽ kãm:

—E mẽ inhma. Kêr ka mẽ hixêt ã axàpir kêt nẽ. Kot kaj mẽ atõ hã api rỳ mẽ akrit õ hã api ka mẽ ja hã omu nẽ kaxyw kẽn rũnh kwỳ jamỳ nẽ ho htak o apĩ. Anẽ.

Hãmri nhũm mẽ piitã tee ri kuma nẽ kãm ma htỳx kumrêx nẽ amnhĩ nẽ kãm:

—Kwa hãmri Tĩrtũm. Axte mẽ inhmã mẽmoj jarênh kêt nẽ. Mojes pix mã mãn mẽ ixkaxyw tanhmã kãm akapêr to. Anẽ.

Jakamã nhũm Mojes Tĩrtũm mã amnhĩ jarênh nẽ kapêr mar kaxyw hixêtja ã api. Kãm ma nẽ htertet rãhã mõ nẽ hã api.

²² Nom mẽ kãm ma ho Tĩrtũm mã amnhĩ jarênh tã mẽ papajaja na pu htem mẽ kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nẽ hixêt prêk ã paxàpir kêt nẽ. Te ra mẽ pahte ma kaxkwa hwỳr õ krĩ hwỳr paxàpir

nê pano ho omunh pê kãm amnhî jarênh pyrâk. Õ krîja mex o mex. Kamã kapêr o mê wrÿk xwÿnhjaja ohtô o ohtô. Na htem kamã hkînh rãhã ho pa ho pa.

²³ Nê õ krî hwÿr na hte hkra xàpir xwÿnhjaja ri pa. Nê mê papajaja na pu htem kãm amnhî jarênh kaxyw nê te kaxkwa kamã kuri pakuhê nê kãm amnhî jarênh pyrâk o amnhî nhîpêx. Te mê pahpê hkra kot wa pyrâk jakamã mê pamã uma hkêt. Nhùm pre Tirtùm ra õ kagà kamã mê pakutêp amnhîm mê panhîxi hã kagà hpa. Na hte mêmoy piitã hamãr o hkrî. Nê krîja kamã amnepê m kormã Kris kot mê pahwÿr wrÿk kêt ri nhùm ra amnhî kaxyw Tirtùm kôt hamaxpêr mex xwÿnhjaja haxwÿja ra kamã ri pa. Ra Tirtùm kot mê ho hkra jakamã nhùm mê kuri ri pa ho pa.

²⁴ Nê Jejus haxwÿja kamã pa ho pa. Na pre mê panê htyk nê hkamrô pikapîrja o mê pahte amnhî tomnuj pãnhã amnhîre. Jakamã na pu htem hkôt amnhî xunhwÿ nhùm mê pahto hkra pu mê paxamnhîx ri Tirtùm mã amnhî jarênh nê amnhî to hwÿr o papa.

Amnepê m na pre Tirtùm tee ri Kaî kot htô Apew pîr nê hkamrô pikapîrja ã omu nê hamaxpêr o:

—Nà ã kot amnhî nhîpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mê panê htyk nê hkamrô pikapîrja ã omu nê ra axtem hamaxpêr o:

—Nà ãm hãmri na Ixkraja mê nê ty. Jakamã mê kot hkôt amnhî xunhwÿr xwÿnhjaja kot pa Ixkra kukwak ri mê kot amnhî tomnuj mÿrapê tanhmã mê ho hkêt nê.

Anhÿr o mê pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tirtùm nhÿ hã mê panhîgêxjê mã xatã mê kãm Tirtùm kapêr jarênh o ri pa nhùm mê kuma nê hkôt amnhî nhîpêx o pa. Tã gaa nê ra hã nohkêt pa nê akupÿm mê kot amnhî nhîpêx tùm o awjanã nhùm Tirtùm tee ri ja hã mê omu nê mÿrapê

tanhmã mê hipêx to. Tã nhùm Kraja kaxkwa rùm mê pahwÿr wrÿ nê mê pamã kapêr. Jakamã kwa mê okora kêr pu mê panhîgêtjê pyrã nê mê pahte amnhî nhîpêx tùm o paxujanãr kêt nê. Kot puj mê anê nhùm Tirtùm ja hã mê pahpumu nê mê urãk nê ja hã tanhmã mê panhîpêx to.

²⁶ Amnepê m Tirtùm kot hixêt prêk pê Sinai kamã mê kãm kapêrja. Na pre kapêr tÿx o pika ho àk nhùm htertê tÿx nê. Tã koja nhÿrmã axte pika ho àk nê kaxkwa ho àk nhùm wa hamê htertê tÿx kumrêx. Koja axte ho anhÿr ho pixi nê axte ho anhÿr kêt nê.

²⁷ Tã nhÿrmã axte mêmoy to àk ã amnhî jarênh jakamã koja mêmoy to kator xwÿnhta piitã ho àk. Nê mê pahte panhîhkra ho mêmoy nhîpêx xwÿnhja nhùm ho àk nhùm htertê tÿx kãm hpigrãnh pa nê hapêx. Nhùm mêmoy htertê nê hpigrãnh kêt xwÿnh pixjaja arî rãhã ho rãhã.

²⁸ No Tirtùm nhõ krî koja htertê nê hapêx kêt nê. Nê mê papajaja mê pahpê hkra jakamã te ra kuri õ krî kamã ri mê papa pyrâk. Jakamã kot puj mê mê urãk nê pajapêx kêt nê. Jakamã e kwa kêr pu mê amnhî tã Tirtùm mã mex o mex ã harênh nê hã pahpijaãm rãhã ho papa. Nê tanhmã amnhî tomnuj to hã amnhî pumu nê Tirtùm pumaj mêmoyta kaga kurê kumrêx. Æ mê pahte amnhî nhîpêx anhÿr o papaja na Tirtùm kãm hprãm.

²⁹ Hihtÿx o hihtÿx jakamã koja mêmoy tã akamã gryk kot kaj amex kêt o amex kêt.

13

Mê pahte Tirtùm kãm hprãm xà hkôt amnhî nhîpêx ã mê pamã karõ

Rõmãn 12.1-2; Epes 4.1-3; Korosê 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtô nê ixtôxjaja. Kêr pu mê arî Kris kôt pahkwÿjê ho mex o mãn axpên kôt ri papa. Nê kêr pu mê tanhmã pahpunuj to hã amnhî pumunh tã axpên to mex mã

panhûrer kêt nê. Æ axpên nhîpêx anhÿr rāhā ho papa.

² Nê amnepê mā na pre mẽmojaja nhÿhÿnh mra nê mẽ panhîgêjtê hō hwÿr pōj. Hāmri nhūm mẽ omu nê htÿx axtem krī hō nhō xwÿnh ã mẽ hkamnhix tā no nhūm mẽ kêp Tirtūm kapêr o mẽ wrÿk xwÿnh kwÿ na prem. Hāmri nhūm amnhī nhōrkwÿ hwÿr mẽ kuwÿ nhūm mẽ ma hkôt mra nê kuri pōj nê kutā apku. Jakamā kwa koja nhÿhÿnh krī hō rūm mẽmojaja ma mẽ awÿr mō ka mẽ omu nê axāmnhix amnhī nhōrkwÿ hwÿr mẽ hwÿr kurê kumrêx kê mẽ ari pōj. Æ mẽ hipêx anhÿr o apa hāmri nê nhÿrmā mẽ panhîgêjtja pyrā nê amnhī wÿr Tirtūm kapêr o mẽ wrÿk xwÿnhjê hō hwÿr japêr. Mẽ urāk nê ja hā mẽ omunh kêt tā atÿx amnhī wÿr mẽ awÿ nhūm ja mẽ amā mex o mex.

³ Nê kêr ka mẽ ra mẽ kot Jejus ã mẽ akwÿjê pynênh nê mẽ hagjênh xwÿnhjê mā ajamaxpêr rāhā ho ri apa nê mẽ ho ajamakêtkati hkêt nê. Te mẽ kajaja mẽ ïhkô hā mẽ hagjênh xā kamā apunuj nê akrī pyrāk o mẽ kām ajamaxpêr o ri apa. Jao mẽ kamā axukaprī ho mẽ hwÿr mra nê mẽ kām mẽmoj nhōr o ri apa.

⁴ Nê mẽ kot axpên to hprōja na mex. Nom kêr ka mẽ amyjaja ãm aprō pix tănopxar o ri apa. Nê mẽ anijaja mẽ ajaxwÿja amjên pix tănopxar o ri apa. No mẽ hkuprÿjê hwÿr mẽ mrar xwÿnhjaja nê nhām mẽ kêp mẽ hprō ho amnhīkati xwÿnhjaja nê nhām mẽ kêp mẽ mjên o amnhīkati xwÿnhjaja koja Tirtūm ja hā mẽ omu nê mẽ homnuj tÿx kumrêx.

⁵⁻⁶ Nê kêr ka mẽ akāxpore rūnh kêt ã amnhī pumu nê tee ri amnhī kukamā ajamaxpêr o akaprī hkêt nê. Na pre Tirtūm mẽ pamā kapêr o:

Kot paj akôt ri ixpa rāhā ho ixpa nê aa arer rÿ akaga hkêt kumrêx.

Anhÿr jakamā kot kaj mẽ akāxpore grire htā akaprī nê apa hkêt nê. Aa Tirtūm kot mẽ pahkaga hkêt ã amnhī jarênh jakamā mẽmoj kot pu wem omu nê pamā nhām ri mẽ uma ho papa? Tirtūm kot mẽ pahkôt pa ho

pa kênā. Jakamā na pu htem paja-maxpêr o:

Nà Pahi Maatija ra kot ixkôt pa ho pa xwÿnh jakamā mẽmo kot pa hkêt ri inhmā uma ho ixpa?

Mẽmo kot kêt ri tanhmā kêp ixto?

Anhÿr o pajamaxpêr o papa.

⁷ Nê mẽ kot Kris mā mẽ ajamār o mẽ pa xwÿnh ra mẽ htyk xwÿnhjaja ka mẽ arī mẽ kot tanhmā amnhī nhîpêx to ho paja mā ajamaxpêr rāhā ho ri apa. Na prem Tirtūm kapêr o mẽ ajahkre mex nê. Nê tām ri amnhī nhîpêx o ri mẽ akôt pa. Nê amnhī kaxyw Tirtūm kôt pix mā hamaxpêr rāhā ty. Tā kêr ka mẽ urāk nê ã amnhī nhîpêx anhÿr o ri apa rāhā ty.

⁸ Nê Jejus Krisja arī rāhāã. Nê amnepê mā kot amnhī nhîpêxja määnên arī rāhāã. Aa kot amnhī nhîpêxja nhijuk ri axtem tanhmā amnhī nhîpêx to hkêt.

⁹ Nê kwa kêr ka mẽ Tirtūm kôt amnhī nhîpêx rāhā ho ri apa. Na hte kapêr o hêx xwÿnhjaja mẽ awÿr mra nê mẽ amā:

—Amnepê mẽ ate Tirtūm kot mẽ amex ã mẽ ajarênh kaxyw mẽ ate kām mẽmo mry nhōr nê akupÿm hamÿnh nê hkur o apa htā ra ja ho anhÿr kaga. Kwa mẽ ja ho awjanā nê axte ã amnhī nhîpêx anhÿr o ri apa. Kê Tirtūm ja hā mẽ apumunh kôt mẽ amex ã mẽ ajarê.

Anhÿr o mẽ amā kapêr. Nom xā na hte Tirtūm ã mẽ pahte amnhī nhîpêx anhÿr ã mẽ pahpumunh kôt mẽ pamex ã mẽ pajarê? Xā na htem mẽmo mẽ apkur xā hkur pê amnhī kaxyw Jejus kôt hamaxpêr tÿx o pa? Nà na htem anhÿr kêt nê. Na pu htem mẽmoj kur kôt pamā Tirtūm kīnh kêt nê. Kêt mẽ paxàpkur xāja mẽ panhī pix o hihtÿx kaxyw na. Na hte Jejus kôt mẽ pahto paxihtÿx kêt nê. Æm Tirtūm kot amarī kām mẽ pajapê nê mẽmoj to mẽ pakutā nojarêt jakamā na pu htem ja hā amnhī pumu nê amnhī kaxyw hkôt pajamaxpêr tÿx o papa.

¹⁰ Tirtūmja Jejus kot mẽ panê htyk ã omunh xā hkôt ra kot mẽ pamex

ã mē pajarēnh jakamã mo kaxyw kot pu mē axte kot mē pamex ã mē pajarēnh kaxyw kãm mēmo mry gō nē hkwý hku? Koja mēhō akupým Tirtüm kapēr tùm o ujanâr jao Jejus kot nē htyk nē hkamrô pikapîrja kaga.

¹¹ Amnepēm na pre patre maatijaja tōhã mē kãm mēmo mry hpar xwýnh hkamrô ru nē guhkrax kãm kuru nē hamý nē ma o mra nē Tirtüm nhōrkwý kaàkre hwýr hitom maati hwýr ho agjê. Tirtüm kot mē omunh nē axte mē kot amnhĩ tomnuj mã hamaxpēr kêt kaxyw. Hãmri nhũm hpãnhã ï my nē krĩ pê ho kato nē ma o mra nē nhýri amým hkwýjê hkàx ã ho hxêt pa. Tirtüm kapēr tùm kôt na prem ã amnhĩ nhĩpêx anhýr o pa.

¹² Tã ja pyrã nē na prem ma krĩ pê amým Jejus o tē nē kupĩ nhũm hkamrô axkapĩ. Kot mē pahte amnhĩ tomnuj pãnhã amnhĩrer nē mē pahto mē pahpê Tirtüm kra kaxyw ã htyk nē hkamrô pikapîr anê.

¹³ Na prem Tirtüm kapēr tùm gryk ã Jejus kaga nē pôristijê mã anê nhũm mē ma krĩ pê ho kato nē o tē nē kupĩ. Tã kêr pu mē jajê rom Jejus gryk ã mãn Tirtüm kapēr tùm kaga. Kwâr mē mãmri Jejus pyrã nē Tirtüm ã tanhmã mē pahto nē amnhĩ nê nhýhým mē pajano.

¹⁴ Kêt jar mē papapxàja kêp mē papaxà kumrêx kêt. Nê jar mē panhō krĩja kêp mē panhō krĩ kumrêx kêt. Mē pamã te kot pô nhĩrõnh o ixkre pix pyrãk. No kêt mē panhō krĩ kumrêx koja jar mē panhō krĩ rom aa hapêx kêt nê. Tã tãm na pu mē kormã ma hwýr papa kaxyw arĩ amnhĩ tã Tirtüm jamâr o papa.

¹⁵ Nê na htem Ijaew arĩ ohtô nê amnhĩ pãnhã Tirtüm mã mry hpar ho pa. Nom mē papajaja kot puj mē axte ã amnhĩ nhĩpêx anhýr hkêt nê. Kot puj mē ãm Jejus kukwak ri Tirtüm mã mex o mex ã harēnh rãhã ho mãn papa. Jao te mē pahte kãm hkĩnh xà nhõr pyrãk o amnhĩ nhĩpêx.

¹⁶ Nê kêr pu mē arĩ axpên to mex o ri axpên kôt papa. Nê kê mēhō kêp amrakati japêr ka ja hã omu nê

amnhĩ kutã kãm anhõ mēmoj kwý. Æ kot puj mē axpên nhĩpêx anhýr rãhã ho ri axpên kôt papa. Kot puj mē anê nê te mē pahte Tirtüm mã hkĩnh xà nhõr pyrãk o amnhĩ nhĩpêx. Æ mē pahte amnhĩ nhĩpêx anhýrja na mex o mex.

¹⁷ Nê kêr ka mē Kris kôt mē akrãhtümjê kapēr ma nê mē hkôt amnhĩ nhĩpêx mex nê. Na htem Tirtüm mã mē ajamâr o ri mē akôt pa. Koja mē nhýrmã mē kot tanhmã mē anhĩpêx to hã Tirtüm mã amnhĩ jarê. Jakamã mē kãm mē ato ajuta prãm. Tã kêr ka mē kapēr ma nê mē hkôt ri amnhĩ nhĩpêx mex o ri apa. Kêr kê mē amnhĩ tã mē apumu nê hkĩnh nê. No kot kaj mē ama nê ãm mē ama nhũm mē tee ri amnhĩ tã mē apumu nê hkaprĩ nê. Jao tee ri kot tanhmã mē ato ajuta mex to hkukamã hamaxpêr.

¹⁸ Nê kwa kêr ka mē ixto Tirtüm wýr rãhã ho apa. Inhmã Tirtüm noo mã tanhmã amnhĩ tomnuj to hprãm kêt. Æm inhmã amnhĩ to mex pix o ri ixpa hprãm.

¹⁹ Nê kêr ka mē ixto awý kê tokyx akupým mē awýr inhmê. Na pa ra inhmã mē apumunh prãm tỳx nê.

Kagã nhĩpêx xwýnh kot tanhmã mē ho Tirtüm wýr to hã harēnh

Epes 3.14-19; Piripos 1.0-11; Wam Tesarõn 3.9-13, 5.23; Sikün Tesarõn 1.11-12, 2.16-17

²⁰ Nê mē panhō Pahihti Jejus Krisja na hte mē panhĩpêx o te ôwêhti jamâr xwýnh kot hkrit jamâr pyrãk o pa. Jakamã kêp mē pajamâr xwýnh maati mex na. Na pre mē panê ty nhũm Tirtüm akupým mē pamã ho htĩr nê mē pamã harēnh o:

—E ra Ixkra kot mē anê htyk jakamã kêr ka mē ãm ixkapêr nyw kôt pix mã ri amnhĩ nhĩpêx o ri apa. Kot kaj mē ã amnhĩ nhĩpêx anê hãmri nê nhýrmã ty pa akupým mē ato mē atĩr ka mē ixri atĩr tùm nê apa ho apa. Anê.

Tirtüm kêp mē pahto mē paja-makêtkati nê ri mē papa xwýnh na.

²¹ Tã na pa hte tanhmã mē ato hwýr to ho ixpa nê mē ato hwýr o:

—Pa Tirtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xà kamã mẽmoj jarênh

²² E Kris kôt ixkrãmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mō nê hpōx japêr kot paj ma amnhĩ kôt mẽ awỳr o mō ka mẽ omu.

²⁴ Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tirtũm krajê piitã mẽ kãm ijarê.

Nê ota jar Tirtũm kra hkwỳja piitã mẽ awỳr hpêr mẽ.

²⁵ E kê Tirtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre Xiakre kot Jejus kôt hkwýjê piitã hwýr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamã mē kot Jejus kôt amnhî xunhwýr xwýnhjê nhõ pastô na pre. Nê kêp Ijaew. Jakamã na pre hkwýjê mã kagàja nhîpêx nê krî piitã hkôt urak nê Jejus kôt mē kot amnhî xunhwýr xwýnhjê hwýr kurê. Jejus ã mē kãm mē hkurê xwýnhjaja na prem mē hipêx kati nhũm mē amnhî xà htýx kamã hamak o pa. Jakamã nhũm Xiakre kot mē hamaxpêr o mē hihtýx kaxyw kagàja nhîpêx nê mē hwýr kurê nê mē kãm:

1 Pa ixkwýjaja. Xà mē amex? E ixpê Xiakre na pa. Ixte Tirtũm mē Pahihtî Jejus Kris wa kãm tanhmã amnhî nhîpêx to xwýnh na pa. Jakamã kot paj kagàja nhîpêx nê pika piitã hkôt mē apiitã mē awýr kurê. Mē apê Tirtũm krajê hwýr.

Mê pahpunuj tã mê pahte amnhî kaxyw Tirtũm kôt pajamxpêr

Rukre 6.20-23; Rômãn 5.3-5; Korosê 1.11; Wam Pêtre 4.12-19

2-3 E ixkwýjaja. Kêr ka mē atõ tanhmã amnhî to rý tanhmã apunuj to. Rý mēhõ tanhmã Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akînh kãm amnhî kaxyw Tirtũm kôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pê Jejus kôt amnhî xunhwýr týx nê. Jakamã kwa kêr ka mē tanhmã apunuj to hã amnhî pumu nê ã mē ate amnhî nhîpêx anhýrja kukamã ajamaxpêr pê akînh nê ri apa.

4 Nom kêr ka mē tee ri tanhmã apunuj to hã amnhî pumu nê akaprî xàj Tirtũm kaga hkêt nê. ãm amnhî kaxyw hkôt ajamaxpêr týx rãhã ho ri

apa. Kot kaj mē ã amnhî nhîpêx anê nê gaa nê Tirtũm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mê pahte tanhmã amnhî kute hã amnhî pumunh kôt amnhî to Tirtũm wýr ã mê pamã karõ

Matêwre 21.18-22

5 Nê kêr ka mē mēmoj mýrapê tanhmã apunuj to hãmri nê tee ri ja hã amã Tirtũm mã ajamaxpêr týx prãm nhũm apê ja hihtýx japêr. Rý mēmoj tanhmã apê amnhî nhîpêx to ka tee ri hkukamã ajamaxpêr japêr. Kêr ka mē ã ajamaxpêr anhýr japêr hãmri nê amnhî to Tirtũm wýr kurê kumrêx. Kot amã ajamaxpêr mex nhõr nhũm ate ý hã tãm ajamaxpêr kaxyw amnhî to awý. Kot kaj mē ã amnhî to hwýr anê nhũm amnhî tã mē ama nê mēmojta kutã tanhmã ato axihtýx to kurê kumrêx ka ý hã hkôt ajamaxpêr týx mex o ri apa. Jao tanhmã akute htã akînh nê ajamakêtkati nê ri apa. Koja Tirtũm tee ri amã mēmoj kôt ajamaxpêr týx prãm kaprý hã apumu nê hã amã àkjêr kêt nê. Koja ate amnhî to hwýrta ma nê tanhmã ato mex to.

6 Nom kêr ka mē amnhî to hwýr kãm tee ri amnhî kukamã ajamaxpêr kati hkêt nê. Rý ajamaxpêr o:

—Koonên. Koja apu Tirtũm inhmã ja ho anhýr japêr.

Anhýr o tee ri amnhî kukamã ajamaxpêr kati hkêt nê. ãm akînh kãm tanhmã ate amnhî to hwýr toja kukamã ajamaxpêr o:

—Nà koja inhmã ho anê. Ixte amnhî kaxyw kãm ijamaxpêr nê amnhî to hwýr xà hkôt koja inhmã tanhmã amnhî nhîpêx to.

Anhýr o hkamnàr rom ã amnhî kukamã ajamaxpêr anê.

Nom kot kaj mē tanhmã amnhî to hwýr to nê tee ri amnhî kukamã ajamaxpêr kati nê hkôt ajamaxpêr týx kêt nê. Nê te kôk nhãm àpêr nê nhãm àpêrta pyrã nê nhãm rî ajamaxpêr nê nhãm rî ajamaxpêrja o hkôt ajamaxpêr kêt nê. Kot kaj mē ã amnhî

nhîpêx anê nhûm Tîrtûm tee ri ja hã mẽ apumu nhûm ja kãm mex kêt nê.

⁷⁻⁸ ã mẽ hamaxpêr anhÿr xwÿnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhÿr o amnhĩ to Tîrtûm wÿ hãmri nê ãm amnhĩ to hwÿr kaprÿ. Kojã ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tÿx pê amnhĩ to awÿ. Nê tee ri amnhĩ kukamã ajamaxpêr kati hkôt kãm tanhmã amnhĩ to hwÿr to nhûm amnhĩ tã ama nê hkĩnh nê tanhmã amã mẽmoj nhîpêx to. Mẽ ate hã axàhwÿr xà hkôt tanhmã mẽ amã mẽmoj nhîpêx to.

Mẽ kêp amrakati xwÿnh mẽ mẽ kot amnhĩ to rûnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkôt xwÿnhjaja. Jar mẽ apê amrakati htã mẽ apê Tîrtûm kra na ka mẽ. Jakamã kêr ka mẽ akàxpore rûnh kêt tã mẽ apê Tîrtûm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rûnh xwÿnhjaja. Mẽ akàxpore rûnh nê mẽ akukrêx rûnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tîrtûm kuri akrĩ nhûm tanhmã mẽ ajarênh to. Te mẽ apê mẽmo pixôrà kot amnhĩ nhîpêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhûm ra nhôore. Nê gaa nê ra grã pa nê rôrôk nê hapêx. Tã kot kaj mẽ nhÿrmã urak nê ty nê akukrêx rer pa. Jakamã kwa kêr ka mẽ akàxpore rûnh pumunh kôt akĩnh nê ri apa hkôt nê. Kêt ãm mẽ apê Tîrtûm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tîrtûm mã ajamaxpêr tÿx rãhã ho ri apa. No tanhmã apunuj to hã amnhĩ pumu nê hkaga hkôt nê. Rÿ kot tanhmã ato xwÿnhhta kêr ka mẽ amnhĩ tã kamã

agryk nê tanhmã ho hkôt nê. ãm Jejus kôt pix mã amnhĩ nhîpêx rãhã ho ri apa. Kêr kê Tîrtûm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atîr tûm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhÿr pê akĩnh nê apa.

¹³ Nê Tîrtûm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rÿ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tîrtûm tãm kot ja kaxyw mẽ akrãm mẽ ajamaxpêr punuj jagjênh to hã hkamnhix kêt nê.

¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tîrtûm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhîpêx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja kojã mẽ nhÿrmã ty hãmri nê Tîrtûm mẽ Kra wa kuri htîr tûm nê pa ho pa hkôt nê.

Tîrtûm kot tanhmã mẽ pahto mex to hã harênh

Xiakre 3.17-18; Sikûn Pêtre 1.3-4

¹⁶ Nê e ixkwÿjaja. Tîrtûm kot mẽ pahte amnhĩ tomnuj prãm xaj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhÿr kêt nê.

¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhûm mẽ pamã hirã mex o harir. Na hte mytwrÿre tôhã hirã mex o pa. Nê gaa nê nyw kaxyw nê kamàt kô. Nê gaa nê nyw mẽ nhûm akupÿm hirã. ã na hte amnhĩ nhîpêx anhÿr o pa. No Tîrtûmja ã kot anhÿr kêt. Kot amnhĩ nhîpêxja ãm rãhã ho rãhã. Na hte

mē pahto mex pix o pa. No tōhā tanhmā mē pahto mex to nhūm jāā nhūm tanhmā mē pahtomnuj to hkēt nē.

¹⁸ Tā kapēr pix o kot ā mēmoj to kator kot anhȳr. Nē mē pamā kapēr o amnhīrīt. Kām mē pahto hkra hprām xāj mē pamā Jejus kot tanhmā mē panē amnhī nhīpēx toja nhūm pre mē pamā ho amnhīrīt. Na pu prem kuma nē hkôt amnhī xunhwȳ nhūm amnhī tā mē pahpumu nē mē pahto hkra. Mē pahpē Ijaew kumrēxjaja na pre mē pahto hkra.

Mē pagryk o papa nē mē pahkurē Rōmān 12.17-21; Epes 4.25-5.2

¹⁹ E ixkwȳjaja. Kwa mē ixkapēr ma nē hā anohtȳx nē ho apa. Koja mēhō Tīrtūm kapēr o mē ajahkre kaxyw mē awȳr mō nē mē amā kapēr jarē ka mē mar tȳx nē. Koja mē ate tanhmā amnhī tomnuj to nē mē amā kapēr ka mē amnhī tā ama nē kamā agryk kēt nē.

²⁰ Mē gryk o mē pa xwȳnhjaja na htem Tīrtūm kapēr kôt ri amnhī nhīpēx kēt nē.

²¹ Jakamā kwa kēr ka mē axte amnhī tomnuj rȳ ajamaxpēr punuj o ri apa hkēt nē. Na htem ohtō nē ā amnhī nhīpēx anhȳr o pa nom kēr ka mē kurom Tīrtūm kapēr mān amnhī krā him haxār tȳx nē. Kapēr o mē ajahkre xwȳnhjaja na htem ho mē ajahkre mex o pa. Tā kēr ka mē ama nē amā hkôt amnhī nhīpēx prām rāhā ho ri apa. Na pu htem Tīrtūm kapēr ma nē hkôt amnhī nhīpēx o papa hāmri nē nhȳrmā Tīrtūm mē Kra wa kuri pahtīr tūm nē pa mex nē papa ho papa.

Mē pahte Tīrtūm kapēr kôt amnhī nhīpēx ā mē pamā karō

Matēwre 7.24-27; Wam Juāw 2.3-6

²² Nē kwa mē okora. Kēr ka mē ām Tīrtūm kapēr ma nē ām mar kēt nē. Māānēn hkôt amnhī nhīpēx rāhā ho ri apa. Kot kaj mē ama nē ām ama nē hkôt amnhī nhīpēx kēt nē hāmri nē apē Tīrtūm kra hā amnhī jarēnh

kaprȳ. Jao nhȳrmā Tīrtūm mē Kra wa kuri atīr tūm nē apa hkēt nē.

²³⁻²⁴ Te ho mēhō kot amnhī pumunh xā hpyr nē kamā amnhī pumunh nē amnhī krā hkī jaē rȳ amnhī kuk tyk pumunh pyrāk. Tā te kot ām ja hā amnhī pumunh nē kot amnhī to mex kēt rāhā akupȳm amnhī pumunh xā xir nē ma htēm nē axte amnhī kuk tyk rȳ amnhī krā kī jaēta mā hamaxpēr kēt pyrāk. Mē kot Tīrtūm kapēr mar nē ām mar nē hkôt amnhī nhīpēx kēt xwȳnhjaja te kot ja jarēnh pyrāk.

²⁵ Tā kēr ka mē ā amnhī nhīpēx anhȳr kēt nē. Mē ate Tīrtūm kapēr kôt amnhī nhīpēx o apa kaxyw xatā kamā harē nē mar tȳx o apa. Jao hkôt amnhī nhīpēx mex o apa. Tīrtūm kot mē pahte tanhmā amnhī nhīpēx to ho papa hā mē pamā karō xāja ām hāmri na. Na htem hkôt amnhī nhīpēx nhūm Tīrtūm ja hā mē omu nē mē ho mex nē nhūm mē amnhīx hamakētkati nē hkôt amnhī nhīpēx o pa.

²⁶ Nom koja mēhō kēp Tīrtūm kra hā amnhī jarēnh tā htȳx ri kapēr punuj o ri pa hāmri nē ām kēp hkra hā amnhī jarēnh kaprȳ. Mē pahpē Tīrtūm kra-jaja na pu htem ā pakapēr anhȳr kēt nē.

²⁷ Axtem mē pahte amnhī nhīpēx. Na pu htem mē hā awrā rȳ mē kēp mē mjēn tyk xwȳnhjē ho mex nē mē hā pahpēr o pahpikēnh o papa hkēt nē. Nē tanhmā mē kute hā mē omu nē mē ho ajuta ho papa. Ā na pu htem pahpē Tīrtūm krajaja amnhī nhīpēx anhȳr o papa nhūm Mēpanhīpēxā Maati Tīrtūm ja hā mē pahpumu nē hkīnh nē. No na pu htem mē kot amnhī tomnuj o mē pa xwȳnhjē hkôt ri amnhī nhīpēx kēt nē ām Tīrtūm kapēr xā kôt pix mā amnhī nhīpēx nhūm amnhī tā mē pahpumu nē hkīnh nē.

2

Mē pahte mē piitā mē hipēx o axpēn pyrāk ā mē pamā karō

Rōmān 2.11; Korosē 3.25

¹ E ixkwỳjaja. Pahihti Jejus Krisja mex o mex. Tã ra mẽ ate hkôt amnhĩ xunhwỳr jakamã kwa kêr ka mẽ apê hkwỳ hã mẽ piitã tãm mẽ hipêx o apa. Nẽ mẽ hipêx o axpên pyræk.

² Jakamã kot kaj mẽ nhỹrmã Tĩrtũm kapêr mar kaxyw axpên wỳr akuprõ nhũm hikàxpore rax xwỳnhhta mẽ akôt axà. ê mex nẽ ôr o ìhkra kamã kàx hãmri nẽ mẽ akôt axà. Nhũm hkôt mēhõ pē amrakati xwỳnhja tē nē axà. Nom wamta kĩnhã kêp amrakati nē ê omnajti nē pikaxônhti. Hãmri nē hikàxpore rax xwỳnhhta hkôt mẽ awỳr tēn axà.

³ Tã tanhmã kot kaj wem ri wa hipêx to? Xà kot kaj mẽ wa hipêx o axpên pyræk nà? Nà xà kot kaj mẽ ã wa hipêx anē nē wam àr xwỳnhhta ê mex ã omunh xà hkôt kãm kadêre hõ gõ nē kãm:

–E ota kadêre. Mãmri hã nhỹ. Anē.

Hãmri nē ê pynajti xwỳnhhta pumu nē axtem nē kãm:

–E atar pikap nhỹ.

Anhỹr o ahpỹnhã wa kãm akapêr?

⁴ Kot kaj mẽ ahpỹnhã ã wa hipêx anē nē amnhĩ tomnuj nē. Wam àr xwỳnhhta ka kãm akapêr mex nē tanhmã ho mex to. Nõ hkôt hõta omnajti hã omunh xà hkôt te kamã anhõkre kahak pyræk o hipêx. Kot kaj mẽ ã ahpỹnhã wa hipêx anē nhũm Tĩrtũm tee ri ja hã mẽ apumu nhũm ja kêp omnuj nē.

⁵ Kwa mẽ inhma ixkwỳjaja. Mẽ kêp amrakati xwỳnhjaja mẽ hikàxpore hkêt tã na hte mẽ hkwỳjaja amnhĩ kaxyw Tĩrtũm kôt hamaxpêr nē hkôt amnhĩ xunhwỳ nhũm amnhĩ tã mẽ omu nē kot mẽ panhĩpêx pyrã nē mẽ ho hkra. Jakamã jar mẽ kêp amrakati htã na htem amnhĩ kaxyw Tĩrtũm kôt hamaxpêr tỳx rãhã ho pa. Jakamã koja mẽ nhỹrmã kuri htĩr tũm nē mex kumrêx nē pa ho pa. Mẽ kãm Tĩrtũm kĩnh o mẽ pa xwỳnh piitã koja mẽ nhỹrmã ã mex nē ri pa anē.

⁶ Nom kot kaj mẽ ahpỹnhã mẽ hipêx nē amnhĩ tomnuj nē. E pa mẽmoj tã mẽ akukja. Mẽmojaja na htem tanhmã mẽ ato hêx to? Nẽ mẽmojaja na htem juisti mã tanhmã mẽ ato

kapêr punuj to? Xà mẽ kêp amrakati xwỳnhjaja? Nà mẽ tãm kêt. Mẽ hikàxpore rũnh xwỳnhjaja na htem ã mẽ anhĩpêx anhỹr o pa.

⁷ Nẽ ra mẽ ate hkôt amnhĩ xunhwỳr xwỳnhja nhũm mẽ axtem nē tanhmã mẽ apê ho kapêr to ho pa. Tã ka htem mẽ kêp amrakati xwỳnhjê rom mẽ kãm akapêr mex nē mẽ kãm kadêre mex gõ nhũm mẽ hã hkrĩ.

⁸ Tĩrtũm kapêr ã kagà htũm kot ja jarēnh kot:

Kêr ka mẽ piitã mẽ hipêx o te ka amã amnhĩ tã ma pyræk. Anē.

Ã kot mẽ pamã karõ kot anhỹr. Kapêrja mex kumrêx. Kot puj mẽ ã axpên nhĩpêx anhỹr jao Tĩrtũm kãm hprãm xà hkôt amnhĩ nhĩpêx mex nē.

⁹ Nom kot puj mẽ ã amnhĩ nhĩpêx anhỹr kêt nē ahpỹnhã tanhmã mẽ hikàxpore rũnh xwỳnhjê ho mex to nē ahpỹnhã tanhmã mẽ kêp amrakati xwỳnhjê nhĩpêx to japêr. Hã kot puj mẽ Tĩrtũm kapêr htũmta nhĩrõp pakuhê nē amnhĩ tomnuj nē.

¹⁰ Kot pu mẽ kapêr tũm piitã hkôt ri amnhĩ nhĩpêx mex o ri papa htã ãm pixire nē hirõp pakuhê. Jao te pahte kapêr piitã hirõp pakuhê pyræk.

¹¹ Na pre Tĩrtũm mẽ pahte mẽ pahprõ pix tãnopxar o papa hã mẽ pamã karõ. Nẽ mẽ pamjên pix tãnopxar o papa hã mẽ pamã karõ. Nẽ mẽ pahte axpên par nē mẽ pahkurê. Jakamã kot puj mẽ pahprõ pix tãnopxar mex o ri papa japêr. Nẽ mẽ pamjên pix tãnopxar mex o ri papa japêr tã tanhmã pajamaxpêr to nē pahkwỳjê hõxpĩ. Jao te Tĩrtũm kapêr tũm piitã hirõp pakuhê hpar pyræk o amnhĩ nhĩpêx.

¹²⁻¹³ Koja nhỹrmã Tĩrtũm mẽ pahĩr ri tanhmã axpên nhĩpêx to ho papa hã mẽ pahpumunh kôt tanhmã mẽ pajarēnh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rỳ mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukapri kêt xwỳnhjaja koja nhỹrmã ja hã mẽ omu nē mẽ uræk nē mẽ kamã ukapri hkêt

ně. Nom mẽ kamã mẽ ukaprĩ ho mẽ pa xwỳnhjaja koja ja hã mẽ omu mẽ mẽ uràk mẽ mẽ kamã ukaprĩ mẽ mẽ mẽ mẽ kot amnhĩ tomnuj piitã rênh pa. Jakamã kwa kêt ka mẽ amnhĩ to mex mẽ tãm axpên nhĩpêx o ri axpên kôt apa. Nẽ axpên mã akapêr mex mẽ axpên kamã axukaprĩ pix kukamã ajamaxpêr o apa.

Amnhĩ kaxyw Tĩrtũm kôt mẽ hamaxpêr xwỳnhjê jarênh

Rukre 3.8-14

¹⁴ Nẽ kwa ixkwỳjaja. Koja mẽhõ kot amnhĩ kaxyw Jejus kôt hamaxpêr mẽ hkôt amnhĩ xãm ã amnhĩ jarênh tã hkôt ri amnhĩ nhĩpêx kêt mẽ. Hã koja nhỹrmã ty hãmri mẽ tanhmã kot we amnhĩ to mẽ Tĩrtũm mẽ Jejus wa kuri htĩr tũm mẽ pa ho pa? Nã koja anhỹr kêt mẽ. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhỹrmã wa hwỳr àpir kêt mẽ.

¹⁵ Nẽ xà koja mẽhõ kêp amrakati mẽ ri pa. Nẽ ê pynajre pix jagjê mẽ ri hã pa. Nẽ õ hkêt mẽ ri kãm prãm mẽ pa.

¹⁶ Ka mẽ ja hã omu mẽ tanhmã kãm akapêr to mẽ kãm:

—Kwa ã amnhĩ nhĩpêx anhỹr kêt mẽ. Anhõrkwỹ hwỳr tẽn axê mex japêr mẽ axà mẽ amnhĩm mẽmoj japêr mẽ aku. Koja Tĩrtũm ato mex rax mẽ.

Anhỹr o kãm akapêr tã kãm mẽmoj nhõr kêt mẽ. Tã xà koja we ama mẽ amar xà hkôt ê mex jagjê mẽ apkur mex o ri pa? Nã kot ka mẽ ã kãm akapêr anẽ mẽ ho ajuta hkêt mẽ nhũm arĩ kãm prãm mẽ ê hkêt mẽ omnuj mẽ ri pa. Nã htem mẽ kapêr pix o mẽ ho mex kêt mẽ. Kot kaj mẽ ã kãm akapêr anẽ mẽ ãm kãm mẽmoj tã karõ kaprỳ.

¹⁷ Ja pyrã mẽ koja mẽhõ ra amnhĩ kaxyw Jejus kôt hamaxpêr mẽ hkôt amnhĩ xãm ã amnhĩ jarênh tã kapêr kôt ri amnhĩ nhĩpêx kêt japêr. Hã koja ãm kêp hkra hã amnhĩ jarênh kaprỳ.

¹⁸ Nẽ kot kaj mẽ atõ ã ajamaxpêr anẽ mẽ ajamaxpêr o:

—Nã Jejus kwỳjaja na htem ahpỳnhã tanhmã amnhĩ nhĩpêx to ho pa. Na hte mẽ hkwỳjaja amnhĩ kaxyw Jejus kôt hamaxpêr tỳx pix o ri pa. Nẽ mẽ

hwỳjaja tanhmã hkwỳjê ho mex to ho ri pa. ã na htem ahpỳnhã tanhmã amnhĩ nhĩpêx anhỹr to ho pa. Anẽ.

Kwa mẽ ri ã ajamaxpêr anhỹr kêt mẽ. Mẽ hkwỳjê ho mex o mẽ pa xwỳnhjaja na htem Tĩrtũm hkôt hamaxpêr pẽ mããnên hkôt amnhĩ nhĩpêx mẽ hkwỳjê ho mex o pa. Koja mẽhõ amnhĩ kaxyw Jejus kôt hamaxpêr hã koja mããnên hkôt amnhĩ nhĩpêx pẽ tanhmã hkwỳjê ho mex to ho pa. Na htem amnhĩ kaxyw hkôt hamaxpêr pix o pa hkêt mẽ. Na htem mããnên hkôt mẽ piitã mẽ ho mex o ri pa.

¹⁹ Na ka hte mẽ akwỳjaja ã ajamaxpêr anẽ mẽ ajamaxpêr o:

—Nã Tĩrtũmja pyxi mex o pyxi mex. Tã kot paj jam ijamaxpêr rãhã ho ri ixpa mẽ ra ixpê hkra hã ri ixpa. Nom kot paj kapêr kôt amnhĩ nhĩpêx o ri ixpa hkêt mẽ.

Anhỹr o ajamaxpêr mẽ ã ajamaxpêr anhỹr kaprỳ.

Nẽ ãm hãmri na ka htem Tĩrtũm pyxi mex o pyxi mex ã harẽ. Nom na htem jam hamaxpêr kôt pix mã kêp hkra hkêt mẽ. Mẽkarõmnutijaja na htem haxwỳja Tĩrtũm pyxi mex o pyxi mex kôt hamaxpêr tã mẽ kêp hkra hkêt. Na htem ã hamaxpêr anhỹr pẽ kãm uma ho pa.

²⁰ ã mẽ ajamaxpêr anhỹrja mex kêt. Koja mẽhõ amnhĩ kaxyw Tĩrtũm kôt hamaxpêr ã amnhĩ jarênh tã hkôt amnhĩ nhĩpêx o pa hkêt japêr. Hãmri mẽ ãm amnhĩ kaxyw hkôt hamaxpêr ã amnhĩ jarênh hkaprỳ. E kot paj ixprĩ hã mẽ amã ja jarê ka mẽ inhma.

²¹ Mẽ panhĩgêt finat Apraãw na pre amnhĩ kaxyw Tĩrtũm mã hamaxpêr mẽ hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwỳ nhũm kuma mẽ ra kot kãm hpĩr mẽ õr kaxyw nhũm Tĩrtũm amnhĩ tã omu mẽ amnhĩm mex ã harẽ. Hãmri mẽ kot hkra hpĩr mẽ kãm kapêr.

²² Ra kot amnhĩ kaxyw hkôt hamaxpêr mẽ hkôt amnhĩ xãm jakamã mããnên hkôt amnhĩ nhĩpêx mẽ ra kot kãm hkra nhõr kaxyw

Tirtūm amnhī tā omu nē amnhīm mex ā harē. Na pre ā finat Apraāw Tirtūm kapēr kôt amnhī nhīpêx mex anhÿr o pa. Jao amnhī kaxyw hkôt hamaxpēr mex ā amnhī to amnhīrīt.

²³ Nē kormā Apraāw wa hkra hkêt ri nhūm Tirtūm wa kām hkra jarē nhūm kuma nē hkra hkukamā amnhī kaxyw Tirtūm kôt hamaxpēr tÿx o pa nhūm amnhī tā omu nē mex ā harē. Nē kēp hkràmnhwÿ hā harē. Kapēr ā kagà htūm kot ja jarēnh kot:

Na pre Apraāw hkra hkukamā amnhī kaxyw Tirtūm kôt hamaxpēr tÿx nhūm amnhī tā omu nē amnhīm mex ā harē. Anē.

²⁴ ā na pre finat Apraāwja hkra kaxyw Tirtūm kôt hamaxpēr anhÿrja o ra hkôt amnhī nhīpêx nē ra kot kām hpīr kaxyw. Nom kop apu amnhī kaxyw hkôt hamaxpēr pix nē hkôt amnhī nhīpêx kêt ronhÿx pre Tirtūm tee ri amnhī tā omu nē amnhīm mex ā harēnh kêt nē. Na htem amnhī kaxyw Tirtūm mā hamaxpēr nē määnēn hkôt ri amnhī nhīpêx mex o pa nhūm amnhī tā mē omu nē amnhīm mē mex ā mē harē.

²⁵ Mēhō ni kuprÿ finat Raapja na pre ā amnhī nhīpêx anē nē amnhī kaxyw Tirtūm kôt hamaxpēr pē tanhmā hkôt amnhī nhīpêx to ho pa. Na pre Ijaew myja wa hamēxkrut nē ma Raap nhō krī hwÿr wa tē. Mē hā ukapi nē kot mē hkurē kaxàr kaxyw mē hwÿr wa tē. Hāmri nhūm Raap Tirtūm kot wa mēnh ā wa omunh kurē kumrēx nē pōristi kot tanhmā wa ho pymaj amnhī nhōrkwÿ kamā mē kēp wa ho amūxu nē wa nē mē kām tanhmā hēx to. Nē hpānhā nhām pry hō hkôt akupÿm wa kumē nhūm wa hkà hkīnh pē ma akupÿm mex nē tē. Hāmri nhūm Tirtūm wa hā Raap pumu nē amnhīm mex ā harē.

²⁶ Tā kot kaj mē atō amnhī kaxyw Tirtūm kôt ajamaxpēr ā amnhī jarēnh tā hkôt amnhī nhīpêx kêt japēr. Hāmri nē apē hkra hā amnhī jarēnh kaprÿ. Te ra mēhō htyk nē nōr tā nhūm mē kot arī htīr ā harēnh kaprÿta pyrāk.

3

Mē kot Tirtūm kapēr o mē ahkre xwÿnhjē jarēnh

¹ Nē kwa Kris kôt ixkwÿjaja. Mē axohtō nē mē amā Tirtūm kapēr o mē ahkre hprām tā kormā ja kaxyw mē apiitā mē amex kêt. Mē ixte Tirtūm kapēr o mē ajahkre xwÿnhjaja kot paj mē tanhmā amnhī tomnuj to japēr nhūm Tirtūm ja hā mē ixpumu nhūm ja kēp omnuj nē. Mē ixte kapēr o mē ajahkre ho mē ixpa kēnā kot pa hkêt mē ri tanhmā amnhī tomnuj to ho ri ixpa. Jakamā kot kaj mē Tirtūm kapēr piitā hkôt ri amnhī nhīpêx mex nē rī kormā ho akwÿjē jahkre ho ri apa.

² Nē mē pahpiitā na pu htem tōhā mē pajakwa hō tanhmā amnhī tomnuj to. Mēmoj tā xapēn kām pagryk nē tanhmā mē kām pakapēr punuj to. Nom koja mēhō tanhmā kapēr punuj toja nē amnhī to htÿx nē hāmri nē tām amnhī nhīpêx o pa.

*Mē pajakwa jarēnh
Epes 4.29*

³ Na htem nhÿhÿm kawar o juk kaxyw hakwam kàx jagjē nē kām nhÿhÿm o htēm prām xà hkôt ma nhÿhÿm ho juk o tē. Kàxja hkryre nhūm kawar rūnh tā no nhūm kām ma nhÿhÿm ho mrar prām xà hkôt ho juk o mra.

⁴ Nē gō xujanār kām pàr rūnhhta rūnh tā na hte kōk àpēr tÿx nē ma nhÿhÿm o pa. Nē pī ho pàr o juk xàta hkryre htā ma nhÿhÿm ho juk o mō. Nhÿhÿm pàr o mrar xwÿnh kām o mōr prām xà hkôt o mō.

⁵ Ja pyrā nē mē pajakwaja hkryre htā na htem ho kapēr o tanhmā mē hipêx to ho pa. Tōhā ho kapēr mex nē nhūm mē kuma nē hkīnh nē. Nē tōhā ho kapēr punuj nē nhūm mē tee ri mē kapēr ā mē kuma nē hkaprī nē rÿ kapēr xwÿnhhta kamā gryk nē. Mē pajakwa hkryreja te kot kuwy jakrax kryre pyrāk. Kot ka kuwy jakrax grire ho tē nē nhÿri pōti kamā amē nhūm kōk ho apē nhūm hpōk rax tokyx anē. Hāmri nē ma pà ho hkaxàr par o mō nē ho hkaxàr pa.

⁶ Mē pajakwaja mā kot anhÿr. Kot kaj atÿx ri tanhmā ho akapēr punuj

to nhũm mẽ ama nẽ axpẽn mã anhĩxi ho krĩ nhĩpêx ka amex kêt nẽ apa. Rỳ ka atỳx ri ajakwa ho tanhmã akwỳjê ho akapêr to nhũm mẽ tee ri amnhĩ tã ama nẽ hkaprĩ nẽ rỳ akamã gryk nẽ. Satanasti nhỹ hã na htem ã mẽ hakwa ho kapêr punuj anẽ.

⁷ Na htem tōhã mẽmo mry xoprê pynê nẽ tanhmã ho nẽ ra ho kãm ma hkêt. Kagã rỳ hagrôre rỳ ààti rỳ gôx kãm mẽmo mryja nhũm htem unê nẽ tanhmã ho nhũm kãm ma hkêt nẽ mẽ hkôt pa ho pa. Nom na htem mry piitã ã hipêx anhỹr kêt nẽ.

⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnhhta pyræk. Na pu htem amnhĩ krã hkôt pajakwa ho pakapêr mex pix kêt nẽ. Tanhmã kot puj mẽ pakapêr punuj kêt kaxyw amnhĩ jakwa hto? Mẽ pakapêr punuj te kot kagã xoprê kot mẽ hkamnhar nẽ ò wenên o mẽ hparta pyræk.

⁹⁻¹⁰ Na pu htem tōhã pajakwa ho tãm pakapêr nẽ tōhã pakapêr punuj nẽ. Nẽ tōhã Pahi Maati Tirtũm mã mex o mex ã harênh tã ra axtem nẽ tanhmã mēhō japrỳ hto. Tirtũm kot mẽ pahto amnhĩ pyrã nẽ mẽ panhĩpêx tã pu htem axtem nẽ tanhmã axpẽn japrỳ hto ho ri papa. Jao te pahte Tirtũm japrỳ pyræk. Kwa ixkwỳjaja. Kêr pu mẽ pahpê Tirtũm krajaja ã pakapêr punuj anhỹr hkêt nẽ. ãm mẽ pajakwa ho mẽmoj mex pix jarênh o ri papa.

¹¹⁻¹² Xà koja pà kamã hinore pyxi htã kamã gô xành nẽ mãânên kamã gô xenh nōkati? Nà koja anhỹr kêt nẽ. Na hte kamã gô mex pix nẽ rỳ kamã gô xenh nōkati pix nẽ.

Nẽ xà koja jààxô hpàr ã rãrãj harir? Rỳ ahkrô xô hã mánkwrýtire harir? Nà na hte ahpỳnhã hpàr ã harir. Ja pyrã nẽ kêr pu mẽ pahpê Tirtũm krajaja pajakwa ho pakapêr punuj pê ho papikamỳr tỳx nẽ. Nẽ te hinore kamã gô mex pixta pyrã nẽ ãmoj mex pix jarênh o ri papa. No mẽ pajakwa nhĩkjê ho tãm pakapêr nẽ hikjê ho pakapêr punuj kêt nẽ. ãm pakapêr mex pix o pakapêr o ri papa. Kwa kêr

pu mẽ ã amnhĩ nhĩpêx anhỹr rãhã ho papa.

Tirtũm kôt mẽ àhpumunh xwỳnhjê jarênh

Wam Korõt 2.6-16

¹³ Nẽ kwa mẽ axàhpumunh tỳx xwỳnhjaja kêr ka mẽ amnhĩ to mex o ri apa. Nẽ mẽ piitã tãm mẽ hipêx mex nẽ mẽ amã axpẽn japê hã axpẽn to ajuta mex o ri apa. Tirtũm kapêr xà hkôt. Kot kaj mẽ ã amnhĩ nhĩpêx anẽ nẽ axàhpumunh mex ã amnhĩ to amnhĩrít.

¹⁴ Nom kot ka mẽ mẽmoj tã axpẽn kamã agryk o ri apa. Rỳ amnhĩ pix kukamã ajamaxpêr o ri apa hãmri nẽ ãm ate Tirtũm kapêr kôt amnhĩ nhĩpêx ã amnhĩ jarênh kaprỳ.

¹⁵ ã mẽ kot amnhĩ nhĩpêx anhỹr xwỳnhjaja na htem Tirtũm kôt amnhĩ nhĩpêx kêt nẽ. Mẽ kêp Tirtũm kra hkêt xwỳnh pixjaja na htem ã amnhĩ nhĩpêx anhỹr o pa. Jao mẽkarõmnuti kot amnhĩ nhĩpêx kôt pix mã amnhĩ nhĩpêx o pa.

¹⁶ Axpẽn kamã mẽ gryk o mẽ pa xwỳnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nẽ amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhĩpêx anhỹr pumaj kwa kêr pu mẽ mẽmoj tã axpẽn kamã pagryk o ri papa hkêt nẽ.

¹⁷ Mẽ kot Tirtũm kôt amnhĩ nhĩpêx xwỳnhjaja na htem jajê rom tãm axpẽn nhĩpêx rãhã o pa.

Nẽ axpẽn kamã ukaprĩ pix o ri axpẽn kôt pa.

Nẽ tãm hamaxpêr o pa.

Nẽ mẽ piitã mẽ hipêx o axpẽn pyræk.

Nẽ axpẽn tã hpijaàm o ri pa.

Nẽ tanhmã ri axpẽn no kupyrt to hkêt nẽ.

Nẽ ri oprê ho pa hkêt nẽ.

Nẽ mẽ axpẽn kamã òkre kahak kêt nẽ.

Nẽ mẽ piitã mẽ ho mex o axpẽn pyræk.

Nẽ tãm mẽ piitã mẽ hipêx rãhã nẽ.

Ā na htem Tirtūm kôt mẽ kot amnhĩ nhĩpêx xwýnhjaja amnhĩ nhĩpêx anhỹr o pa.

¹⁸ Kot puj mẽ ã amnhĩ nhĩpêx anẽ nẽ pajamakêtkati nẽ paxàmnhĩx pahkĩnh nẽ ri papa. Nhũm nhỹri mẽhõ wa axpên kãm gryk pu mẽ wa omu rỳ wa harênh ma hãmri nẽ mẽ pahtõ ma wa hwýr tẽ nẽ wa kãm pakapêr nẽ tãm akupým wa ãm. Hãmri nhũm wa ra mẽ pahpyrà nẽ tãm amnhĩ nhĩpêx pê hamakêtkati nẽ wa ri pa. àmnhĩx ri hkĩnh nẽ wa ri pa.

4

Mẽ kot amnhĩ pix kukamã mẽ hamaxpêr xwýnhjê jarênh

Matêwre 20.20-28; Juãw 16.24

¹ Nẽ kwa mon ka hte mẽ akwýjaja axpên mã akapêr mã agêt o axpên kãm agryk pix o apa? Na ka htem ã amnhĩ nhĩpêx anhỹr o amnhĩ pix kukamã ajamaxpêr. Nẽ mẽ amã amnhĩ jamaxpêr kôt pix mã ri amnhĩ nhĩpêx prãm. No Tirtūm kãm hprãm xà hkôt amnhĩ nhĩpêx prãm kêt nẽ.

² Na ka htem nhỹri mẽmoj pumu nẽ tee ri ho amã anhõ hprãm kaprỳ. Nẽ amã ho anhõ hprãm xaj õ xwýnhta pĩr nẽ kêp utàr mã.

Nẽ na ka htem tanhmã axpên kukrêx kute hã omu nẽ amã ho anhõ hprãm nẽ hã õ xwýnhta mẽ wa axpu. No mẽ amã hprãm xwýnhta mẽ ate hõ hã Tirtūm wýr ronhỹx ra mẽ ama nẽ mẽ amã hõ gõ. Tã mẽ ate hã axàhwýr kêt jakamã nhũm mẽ amã õr kêt nẽ.

³ Rỳ ka mẽ tõhã mẽmoj tã awý nhũm kot mẽ amar tã mẽ amã õr kêt nẽ. Kot mẽ amã õr nhũm mẽ ate ho anhõxỳ ho apa pymaj na hte tõhã mẽ amã mẽ ate hã axàhwýr xwýnhta nhõr kêt nẽ.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tirtūm kra hprãm tã axtem nẽ mẽ kãm hprãm kêt xwýnhjê hkôt amnhĩ nhĩpêx o ri apa nẽ mẽ uræk nẽ tanhmã amnhĩ tomnuj to ho ri apa. Nẽ mẽ ate amnhĩ tomnuj gryk

ã mẽ amã Tirtūm prãm kêt ã amnhĩ to amnhĩrĩt.

⁵ Tirtūm kapêr ã kagà htũm kot tanhmã Karõ jarênh to nẽ harênh kot:

Na pre Tirtūm mẽ pahwýr amnhĩ Karõ rẽ nhũm mẽ pahwýr wrý nẽ mẽ pakamã agjê nẽ mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anẽ.

Ām hãmri ã harênh kot anhỹr jakamã kwa kêr ka mẽ harênh ma nẽ kãm ajamaxpêr tỳx rãhã ho ri apa.

⁶ Na hte Tirtūm mẽmoj to mẽ pakutã nojarêt rãhã pu mẽ ý hã tãm amnhĩ nhĩpêx o ri papa. Kapêr ã kagà kot ja jarênh kot:

Mẽ kãm Tirtūm kôt amnhĩ nhĩpêx prãm kêt xwýnhjaja na hte Tirtūm amnhĩ tã mẽ omu nẽ mẽ kutã amnhĩ xunhwý.

No mẽ kãm hkôt ri amnhĩ nhĩpêx prãm xwýnhjaja na hte amnhĩ tã mẽ omu nẽ mẽ ho mex o pa nhũm htem hihtỳx xà nhỹ hã mẽ kãm hprãm kêt xwýnhjê hkôt ri amnhĩ nhĩpêx kêt nẽ. Anẽ.

⁷ Jakamã kwa kêr ka mẽ Tirtūm kapêr kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xaj tanhmã mẽ ato ka mẽ Tirtūm Karõ nhỹ hã ãm ama nẽ hkôt amnhĩ nhĩpêx kêt nẽ. Nhũm tee ri amã àhkrox kaprỳ nẽ akaga nẽ ma tẽ.

⁸ Nẽ kot kaj mẽ Tirtūm kapêr kôt pix mã ri amnhĩ nhĩpêx o apa nhũm amnhĩ tã mẽ apumu nẽ te kot mẽ apa hã mẽ ajamýnh nẽ mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nẽ mẽ atãnopxar rãhã ka mẽ ajamakêtkati nẽ akĩnh nẽ ri apa.

Nẽ kêr ka mẽ tanhmã amnhĩ tomnuj to hãmri nẽ tee ri ja hã amnhĩ pumu nẽ hkaga kurê kumrêx nẽ axte ã amnhĩ nhĩpêx anhỹr kêt nẽ. Rỳ ka mẽ tanhmã ajamaxpêr punuj to hãmri nẽ ja hã amnhĩ pumu nẽ hkaga nẽ hpãnhã tãm ajamaxpêr pix o ri apa. Mẽ apê Tirtūm kra hã kêr ka mẽ

ãm hkôt pix mã ri tãm amnhĩ nhĩpêx o ri apa.

Mê pahte amnhĩ tomnuj ã tanhmã amnhĩ nhĩpêx to hã mẽ pamã karõ

Wam Juãw 1.5-10

⁹ Nê kêr ka mẽ tee ri ate tanhmã amnhĩ tomnuj to hã amnhĩ pumu nê akaprĩ xàj mur nê akĩnh kêt nê. Nê akaprĩ xàj amÿr rax nê.

¹⁰ Hãmri nê Tĩrtũm mã amnhĩ jarênh o:

—Pa Tĩrtũm. Na pa ã amnhĩ tomnuj anê. Nom kot paj axte hkêt nê. ãm inhmã akapêr kôt pix mã ri amnhĩ nhĩpêx prãm.

Anhÿr o kãm akapêr kê mẽ ama nê mẽ ate amnhĩ tomnujta ã tanhmã mẽ ato hkêt nê. ãm mẽ ato mex nê ka mẽ akupÿm ajamakêtkati nê axãmnhĩx akĩnh nê ri apa.

Mê pahte axpên to pakapêr nê mẽ pahkurê

Matêwre 7.1-5; Rõmãn 2.1-3, 14.10-13; Wam Korõt 4.5

¹¹ E ixkwÿjaja. Kwa kêr ka mẽ anhĩõ kot tanhmã amnhĩ tomnuj to hã omu nê tanhmã ho akapêr punuj to hkêt nê. Tĩrtũm kapêr ã kagà htũm kot ja nê mẽ pahkurê kamã hihtÿx jakamã kot ka mẽ ri ã amnhĩ nhĩpêx anê nê te ate Tĩrtũm kapêr tũm kwÿ omnuj ã harênh pyræk. Rÿ te axàhpumunh tÿx o ate Tĩrtũm jakrenh ã amnhĩ to jarkrar pyræk. Jao kapêr kôt amnhĩ nhĩpêx kêt nê. Na htem Tĩrtũm kapêr ã kagà htũm kwÿ mex ã harê nê hkwy omnuj ã harênh kêt nê. Piitã mex kênã.

¹² Nê Tĩrtũmja tapxipix na kêp mẽ pahto amnhĩptàr xwÿnh maati. Nê tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwÿnh ã mẽ pajarê rÿ mẽ pahte amnhĩ tomnuj xwÿnh ã mẽ pajarê. ãm tapxipix kot ã mẽ pajarênh kot anhÿr xwÿnh. Tã ka mẽ axtem nê kapêr kwÿm ri tanhmã akwÿjê ho akapêr punuj to ho ri apa.

Mê pahte Tĩrtũm mã pajamaxpêr pê kãm amnhĩ jarênh ã mẽ pamã karõ
Rukre 12.13-21

¹³ E kwa mẽ inhma ixkwÿjaja. Na ka hte mẽ akwÿjaja tanhmã amnhĩ kukamã ajamaxpêr to nê akwÿjê mã amnhĩ jarênh o:

—Koja apkati pa ma krĩ hõ hwÿr mõi nê kamã mẽ kãm ixàpênh o ixpa hã ixtã amgrà pyxi nê hpãnhã kàxpore jamÿnh rax nê man akupÿn mõi.

Anhÿr o amnhĩ jarê.

¹⁴ Kwa mẽ ã amnhĩ kukamã amnhĩ jarênh anhÿr kêt nê. Mẽ pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhÿr tã kormã ã amnhĩ nhĩpêx anhÿr kêt ri tanhmã amnhĩ to nê ty. Rÿ tanhmã amnhĩ to nê axà hãmri nê nhÿhÿm amõi kêt nê. Te mẽ pahpê namê pyræk na pu htem ri papa nê tanhmã amnhĩ to nê ty nê pajapêx tokyx anê.

¹⁵ Jakamã mẽ ã amnhĩ kukamã amnhĩ jarênh anhÿr kêt nê. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anê nê ã amnhĩ nhĩpêx anê.

Anhÿr o Tĩrtũm kamnàr o tanhmã amnhĩ kukamã amnhĩ jarênh to.

¹⁶ No mẽ ate amnhĩ krã hkôt amnhĩ kukamã amnhĩ jarênh ta Tĩrtũm jamaxpêr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhÿrja mex kêt.

¹⁷ Nê mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nê amnhĩ tomnuj o apa.

5

Mê hikàxpore rũnh xwÿnhjê jarênh
Rukre 12.13-21; Wam Ximotre 6.9-10; Apokarip 18.14

¹ Nê kwa mẽ akàxpore rũnh xwÿnhjaja. Mẽ inhma nê inhmar tÿx nê. Nhÿrmã mẽ amex kêt jakamã kwa mẽ tee ri amnhĩ kukamã ajamaxpêr o ra akaprĩ nê amÿr o apa kurê kumrêx.

² Tĩrtũm noo mã mẽ akàxpore te ra mẽ apê hapêx par pyræk. Te ra mẽ anhÿ kamã mẽ ate amnhĩ tomnuj xwÿnh ã kutã akrĩ pyræk.

³ Mē ate mē akukrêx nē mē akâxpore ho apikuprôn̄h rûnh tâ ka htem mē akwÿjê pê ho anhõxÿ ho ri apa. Mÿrapê koja nhÿrmã tanhmã mē apê amnhÿ to nē omnu pa ka mē ho apikuprôn̄h rax kaprÿ. Hâmri nē mē ate amnhÿ tomnuj mÿrapê Tÿrtûm mē Kra wa kuri atÿr tûm nē apa ho apa hkêt nē. Âm kuwy kamã mē amnhÿ xà htÿx kamã ajamak rãhã ho ri apa.

⁴ Na ka htem apur kãm mē àpên̄h xwÿnhjê mã amnhÿrer kêt nē. Nhÿm mē tee ri amnhÿ tâ mē ajamã hãmri nē mē atã amnhÿ to Pahi Maati Tÿrtûm xihtÿx xwÿnh̄ta wÿr o pa nhÿm mē atã mē kuma.

⁵ Mē akÿnhã mē kêp amrakati htã ka htem âm ja hã mē omu nē mē àpên̄h pãnhã mē kãm amnhÿrer kêt nē amnhÿ pix kukamã ajamaxpêr. Nē amã prãm xà hpix kukamã amnhÿm mēmoj japrôr pê akÿnh o ri apa. Jao te mē apê môx htwÿm nhÿm mē kot hpÿr nē hkrêr mã mex ã harên̄h xwÿnh̄ta pyrãk. Mÿrapê kot kaj mē môxta pyrã nē nhÿrmã ty hãmri nē Tÿrtûm mē Kra wa kuri atÿr tûm nē apa ho apa hkêt nē.

⁶ Nom ja pix kêt. Na ka htem mē anhõ krÿ kamã mē anhõ pahi mã tanhmã akwÿjê ho axêx to ho ri apa. Mē kot tanhmã atomnuj to hkêt tâ ka mē kãm mē ho axêx rûnh nē. Tã koja nhÿrmã Tÿrtûm mē hã tanhmã mē ato rax kumrêx ka mē rÿ amnhÿ pumu.

Mē pahte Jejus kutêp amnhÿ kaxyw kãm pajamaxpêr o papa hã mē pamã karõ

Sikûn Pêtre 3.1-13

⁷ E ixkwÿjaja. Koja mēhõ tanhmã mē atomnuj to htã ka mē arÿ amnhÿ kaxyw Jejus mã ajamaxpêr rãhã ho ri apa. Pê akupÿn hpôx xà hã arÿgro jamãr rãhã nē. Te pur nhõ dôn kot amnhÿ nhÿpêx pyrãk. Koja hpur kãm ahkre nē ahkre hpa hãmri nē arÿ hamãr o pa nē kãm nojarêt kêt nē hã na wrÿk jamãr o pa. Jao hamakêtkati nē ô jamãr rãhã ho pa.

⁸ Tã kêr ka mē urak nē arÿ Pahihti akupÿn hpôx xà hã arÿgro jamãr rãhã ho ri apa. Koja tokyx akupÿn

mē pahwÿr wrÿ. Jakamã kêr ka mē kutêp mē kot mē atomnuj xwÿnhjê kutã amnhÿ to htÿx nē ri apa. Nom tee ri amnhÿ kukamã ajamaxpêr o Jejus kaga hkêt nē. Arÿ hamãr pê akÿnh nē ajamakêtkati nē ri apa. Koja akupÿn mē pahwÿr wrÿ nē mē pahto mex rax kumrêx.

⁹ Nē kêr ka mē axpên to akapêr o ri apa hkêt nē. Kot ka mē ã amnhÿ nhÿpêx anê nhÿm Tÿrtûm mē ama nē tanhmã mē ajarên̄h to. Kot mē pahpumunh xà hkôt tanhmã mē pajarên̄h to xwÿnh na. Tã ra tanhmã kot mē pahpiitã mē pajarên̄h to xà hã arÿgroja ra ahtêp o mō.

¹⁰ E ixkwÿjaja. Kêr ka mē wam mē kot Tÿrtûm nhÿ hã kapêr jarên̄h xwÿnhjaja kot amnhÿ nhÿpêx mã ajamaxpêr rãhã nē. Na prem Tÿrtûm nhÿ hã mē kãm kapêr o ri mē hkôt pa nhÿm mē hkwÿjaja ja hã tanhmã mē hipêx to nhÿm mē amnhÿ xà htÿx kamã hamak rãhã ho pa. Tã tee ri amnhÿ kukamã hamaxpêr pê Tÿrtûm kaga hkêt nē. Na prem arÿ ÿ hã kapêr jarên̄h rãhã ho ri mē hkôt pa. Tã kêr ka mē kot amnhÿ nhÿpêx pyrãk o amnhÿ nhÿpêx nē Tÿrtûm kaga hkêt nē.

¹¹ Na prem amnhÿ xà htÿx kamã hamak o pa rãhã ty hãmri nē Tÿrtûm kuri mex nē hkÿnh nē pa ho pa. Ra mē ate finat Johti jarên̄h mar mex. Na pre omnuj tÿx nē pa htã amnhÿ tâ Pahi Maati Tÿrtûm kamã gryk nē hkaga hkêt nē. Hãmri nhÿm amnhÿ tâ omu nē gaa nē ho mex rax nē nhÿm akupÿm mex kumrêx nē pa. Pahi Maatija ukapÿrÿ ho ukapÿrÿ nē mex o mex jakamã na pre ã Johti ho mex anê. Tã koja ho mexta pyrã nē ã mē pahto mex anê.

Mē pahte tanhmã amnhÿ nhÿpêx to hã mē pamã karõ

Matêwre 5.33-37, 18.15; Rômãn 12.15; Karatas 6.1-2; Jutre 22-23

¹² E ixkwÿjaja. Pa mē amã mēmoj jarê ka mē inhma nē inhmar tÿx nē. Kêr ka mē mēmoj tâ amnhÿ jarên̄h kaxyw hãmri nē akatàt kôt amnhÿ jarên̄h kurê kumrêx. Nē amnhÿ

jarēnh o: “Nà kot paj ja ho anē.” Anē. Rỳ amnhĩ jarēnh o: “Nà kwarĩ pa ja ho anhỹr kêt nē.” Anhỹr o amnhĩ jarēnh kurē kumrēx. Kê mẽ akwỳjaja ãm hãmri mẽ ate amnhĩ jarēnh ã mẽ apumunh kurē kumrēx nē axêx ã mẽ akamnhĩx kêt nē. Mẽ apê Tĩrtũm kra kênã kot ka kêt mẽ ri axtem nē amnhĩ jarēnh o axêx.

13 Nē koja mẽ anhĩõ mẽmoj tã tanhmã amnhĩ to nē omnuj nē. Ka mẽ ja hã omu nē kãm anē kê amnhĩ kaxyw Tĩrtũm mã hamaxpêr pê amnhĩ to hwỳr rãhã ho pa. Rỳ koja hkĩnh nē ri pa ka mẽ ja hã omu nē kãm anē kê hkĩnh kãm mex o mex ã grer o pa.

14 Rỳ koja à nē nõ ka mẽ ja hã omu nē kãm anē kê amnhĩ wỳr pastô nhỹ hã mẽ kapêr xwỳnh kwỳjê hã karõ. Kê mẽ hwỳr mra nē Jejus nhỹ hã mẽmo twỳm kwỳ ho hkukõ nē ho Tĩrtũm wỳ.

15 Kê mẽ ã mẽ à xwỳnhjê hwỳr mrrar nē mẽ ho Tĩrtũm wỳr o pa anē. Koja mẽ ho kuwỳ nhũm mẽ kuma nē akupỹm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarē kê Tĩrtũm mẽ kuma nē ja hã tanhmã mẽ ho hkêt nē.

16 Jakamã kêr ka mẽ atõ tanhmã amnhĩ tomnuj to nē tee ri ja hã amnhĩ pumu hãmri nē tokyx akwỳjê mã amnhĩ jarē kê mẽ tokyx ato Tĩrtũm wỳ. Kê atã mẽ kuma nē tanhmã akrã hto ka axte ã amnhĩ nhĩpêx anhỹr kêt nē. Nē ra amex nē apa.

Nē koja mẽhõ Tĩrtũm kôt pix mã amnhĩ nhĩpêx mex rãhã ho pa. Hãmri nē mẽmoj tã kuwỳ nhũm kuma nē kãm tanhmã mẽmoj to.

17 Te finat Eris kot mẽmoj tã hwỳr nhũm kot mar nē kãm ho anhỹrta pyrãk. Erisja kêp mẽ panhĩõ na pre. Tã na pre hkwỳjaja amnhĩ tomnuj pix o pa nhũm tee ri mẽ omu nē mẽ hã na wrỳk kêt kaxyw ho Tĩrtũm wỳr kãm hihtỳx nē. Hãmri nhũm kuma nē kãm ho anē nhũm na wrỳk kêt ry rax kumrēx. Hã amgrã axkrunêpxi nē hkôt mytwrỳ kêp 6. Mẽ kot amnhĩ tomnuj tỳx o paja mỳrapê.

18 Tã nhũm Eris axte mẽ ho kuwỳ nhũm axte mẽ hwỳr na rē nhũm akupỹm katat kôt wrỳk mex nē. Nhũm akupỹm mẽ hpur kãm mẽ õja mẽ kãm mex nē akupỹm mẽ kãm ô rũnh nē. Tã ã Tĩrtũm kot Eris mar nē kãm mẽmoj nhĩpêx anhỹrja pyrã nē koja mẽ pama nē mẽ pamã mẽmoj tanhmã ho.

19 Nē e mẽ inhma ixkwỳjaja. Koja mẽhõ Tĩrtũm kapêr mar tỳx nē te kêp hkra pyrãk o amnhĩ nhĩpêx. Tã tanhmã hamaxpêr to nē kapêr kaga nē htỳx ri amnhĩ tomnuj pix o pa. Ka mẽ ja hã omu nē hwỳr mra nē kot amnhĩ tomnuj nē kãm akapêr kãm axihtỳx kê tokyx hkaga nē akupỹm Tĩrtũm kôt amnhĩ xãm tỳx nē ãm hkôt pix mã amnhĩ nhĩpêx.

20 Koja amnhĩ tã mẽ ama nē Tĩrtũm kôt amnhĩ xãm tỳx nhũm amnhĩ tã omu nē kot tanhmã amnhĩ tomnuj tota ho hamakêtkati nē amnhĩ katut kôt kurē nhũm nhỹrmã kuri htĩr tũm nē mex nē pa ho pa. Koja amnhĩ tomnuj tỳx o pa htã hkaga hpa nhũm Tĩrtũm ja hã omu nē hã tanhmã ho hkêt nē axte tanhmã kot amnhĩ tomnuj tota mã hamaxpêr kêt nē.

Tã ãm ja pix. Ixpê Xiakre na pa ã mẽ awỳr kagã nhĩpêx nē mẽnh anē.

Wam Pêtre Simãw Pêtre kot Jejus kôt hkwýjê hwýr kagà nê mênh

Simãw Pêtre na pre kagàja nhîpêx. Kêp tep pynênh o pa xwýnh tâ hpânã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mê kãm mê hkurê xwýnhjaja tanhmã hã mê hipêx to nhùm Pêtre mê harênh ma nê mê hamaxpêr o hihtýx kaxyw mê kãm kagàja nhîpêx nê krî piitã hkôt mê hwýr kurê. Mê kot kamã harênh nê mar nê amnhî kamã kahak kêt nê arî Tirtùm kôt amnhî nhîpêx mex o pa kaxyw. Nê Jejus ã mê kot amnhî xà htýx kamã hamak tâ nhýrmã kaxkwa kamã mex nê pa ho pa hã mê kãm awjarê. Æ mê kãm mêmoj jarê nê hã kagà anê. Nê mê kãm:

¹ Pa mê ate Jejus kôt amnhî xunhwýr nhùm Tirtùm kot mê ato hkra xwýnhjaja. Xà mê amex? Ot pa mê awýr kagà nhîpêx nê kumê. Ixpê Simãw Pêtre na pa. Ixte Jejus nhý hã hkrajê jahkre ho mê ixpa xwýnhjê hõ na pa mê awýr kagà nê kumê.

Na xep pre Kris ã mê kãm mê pahkurê xwýnhjaja tanhmã mê anhîpêx to ka mê panhõ pika rûm mê umaj anhrà nê ma ahpýnhã krî hkôt ri apa.

Jao mê akwýjaja ma pika pê Põt kamã krî hkwý hkôt apa.

Nê mê akwýjaja pika pê Karatas wýr apa.

Nê mê akwýjaja pika pê Kapatos wýr apa.

Nê mê akwýjaja pika pê As wýr apa.

Nê mê akwýjaja Pitîn wýr apa.

Æ ahpýnhã pika hkôt mê apigranh par anê. Tã ot pa mê awýr kagà nhîpêx nê mê apiitã mê awýr kurê. Mê apýnh nê mê ate kamã harênh nê ixkapêr mar kaxyw.

² Na pre Mëpahpãm Tirtùmja amnhîm mê pahte amnhî kaxyw kãm pajamaxpêr xwýnhjê rê nê mê pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mê nê ty nê htyk o hkamrô axkapî nhùm mê harênh ma nê hkôt amnhî xunhwý. Tã nhùm Ixkarõ mê hkarõ mã agjê nhùm mê ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhýr o mê pahtã amnhî jarênh. Tã kê mê akutã nojarêr rãhã ho ri mê akôt pa ka mê ý hã axàmnhîx ajamakêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mê pamã karô

Rukre 12.32-34; Rômãn 8.18-25; Sikûn Korît 4.16-18

³ Nê na pre mê panhõ Pahihti Jejus Krisja ty nhùm Hipêêxà Tirtùm akupým ho htîr. Tã kot mê pakutã nojarêr rãhã ho pa jakamã na pre mê pahpê hkrajê mã mê pajamaxpêr nyw jagjê pu mê ý hã pahte amnhî nhîpêx nyw o amnhî nhîpêx o papa. Hãmri nê Jejus akupým htîrja mã pajamaxpêr nê amnhî kukamã pajamaxpêr o:

—Kot paj nhýrmã ty nhùm Tirtùm kot Jejus nhîpêx pyrà nê akupým ixto ixhtîr pa wa kuri ixhtîr tùm nê inhmex kumrêx rãhã ixpa ho ixpa. Nà koja Æ inhîpêx anê.

Anhýr o pajamaxpêr jakamã kwa kêr pu mê Tirtùm mã mex o mex Æ mãn harênh rãhã ho papa.

⁴ Na ra mê pakutêp õ krî kamã mêmoj piitã ho mex nê. Õ krî kamã mêmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mê kot Kris ã mê atomnuj mýrapê na ka mê amnhî xà htýx kamã ajamak o ri apa nom arî amnhî kaxyw Tirtùm mã ajamaxpêr rãhã ho ri apa. Hihtýx o hihtýx jakamã koja mê pahkôt pa ho pa nê mê pamã pajamaxpêr o hihtýx rãhã nhùm nhýrmã Jejus akupým mê pahwýr wrý. Hãmri pu mê hkôt ri amnhî nhîpêx mex

râhã ho ri papa. Ra Tirtûm kot mē pakukamã mē pajarēnh xà hkôt.

⁶ Jar mē pahte arī amnhĩ xà htỳx kãm pajamak o papa htã na pu htem Tirtûm nhỹrmã kot mē pahto mexta kukamã pajamxpēr hãmri nē tee ri amnhĩ kukamã pajamxpēr kêt nē. Mē pahpê mē pahpunuj tũm nē ri papa ho papa mã xwỳnh kêt.

⁷ Na hte Tirtûm mē panhĩpêx o te mē kot ôr nhĩpêx pyrãk. Na htem hprĩ hã tanhmã ôr kute hã omu. Kêp ôr kumrêx ã omu rỳ mēmoj mē ho pihkàr ã omunh kaxyw kuwy kamã kurê. Nhũm piitã ôr nē pigãnh pa japêr nhũm mē omu nē harēnh o:

—Nà ãm hãmri. Kêp ôr kumrêx nē mēmoj mē ho pihkàr kêt. Anê.

Na hte Tirtûm ã mē panhĩpêx anê. Jakamã mē pahpê Jejus kôt amnhĩ nhĩpêx o mē papa xwỳnhjaja mē pahte tũhã tanhmã pahpunuj to htã no nhũm mē panê ja rēnh kêt nē. Na hte amnhĩ tã mē pahpumu nē hamaxpēr o:

—Kot paj kormã ja hã mē hamã nē tokyx akupỳm mē ho mex kêt nē. Koja mē omnuj nē pa htã tee ri amnhĩ kukamã hamaxpēr nē ixkaga hkêt nē arī amnhĩ kaxyw ixkôt hamaxpēr rãhã ho pa. Hãmri nhũm mē hkwyjaja ja hã mē omu nē mē kêp ixkra hã mē omunh kurê kumrêx. Te mē kot hprĩ hã ôr pumunh nē kêp ôr kumrêx ã omunhta pyrãk. Anê.

Jakamã kêr pu mē arī amnhĩ kaxyw hkôt pajamxpēr rãhã ho papa. Mēmo myrapê mē pahpunuj nē ri papa htã arī hkôt pajamxpēr rãhã nhũm Jejus nhỹrmã akupỳn mē pahwỳr wrỳ. Hãmri nhũm Tirtûm mē pahpumu nē mē pamã:

—Nà ãm hãmri na ka prem amnhĩ kaxyw ixpix mã ajamxpēr rãhã ho ri apa. Mē kot ixtã tanhmã mē atomnuj to nhũm mē ate amnhĩ xà htỳx kamã ajamak o apa htã aa ixkaga hkêt nē arī amnhĩ kaxyw inhmã ajamxpēr rãhã ho ri apa. Nà ãm hãmri mē ate amnhĩ to mex kumrêx xwỳnh na ka mē. Kot paj mē piitã mē kãm ja hã mē ajarê.

Anhỹr o mē pamã kapêr.

Nê ôr o mē hikukrêxja mex tã koja arī mex rãhã hkêt nē. Koja mēhõ kãm tanhmã homnu hto hprãm nē homnu hpa. No mē papajaja kot puj mē arī amnhĩ kaxyw Tirtûm mã pajamxpēr rãhã ho papa hãmri nē ôrta pyrã nē pajapêx kêt nē. Kurom mē pamex tũm nē aa pajapêx kêt nē papa ho papa.

⁸⁻⁹ Nê Jejusja aa mē ate ano ho omunh kêt tã na ka htem kãm mē ajapê htỳx nē kot mē panê tanhmã amnhĩ nhĩpêx to hã harēnh ma nē mē amã hkĩnh nē. Nê amnhĩ kaxyw hkôt ajamxpēr mex rãhã ho ri apa. Jakamã na pre Tirtûm ja hã mē apumu nē mē ato hkra nē mē apê ô krĩ kamã wa kuri amex nē apa mã xwỳnh ã mē ajarê. Ja kaxyw na pu prem amnhĩ kaxyw hkôt pajamxpēr rãhã jao pahkĩnh nē ri papa. Nê tee ri tanhmã amnhĩ kĩnh tỳx ã amnhĩ jarēnh to hkukamã pajamxpēr. Kormã aa ã mē pahkĩnh anhỹr kêt tã mē pahkĩnh tỳx nē ri papa.

¹⁰ Nê Tirtûm kot mē pahto mex pê mē panê mē pahte amnhĩ tomnuj rēnh par nhũm kuri mē pahtĩr tũm nē mē papa hã mē pajarēnhja. Amnepê mã Tirtûm nhỹ hã kapêr jarēnh o ri mē pa xwỳnhjaja na pre mē pakukamã ã mē pajarēnh anhỹrja ma nē tee ri hamaxpēr nē tee ri hã axpên kukjêr o ri axpên kôt pa. Nom hprĩ hã mar mex kêt nē. Tã arī ri mē pakukamã hkwyjê mã ja hã mē pajarēnh o ri pa.

¹¹ Na pre Tirtûm Karõja Kris tyk kukamã mē kãm ã mē pajarēnh anhỹr o amnhĩrĩt. Kormã Kris kaxkwa kamã pa ri. Kormã wrỳk nē katorxà nhõxàhkre rũm kator kêt ri nhũm pre hkukamã mē kãm tanhmã ho amnhĩrĩt to. Mē kot hpĩr nhũm kot amnhĩ xà htỳx kãm hamak kãm mē panê htykja ã hkukamã mē kãm harēnh o amnhĩrĩt. Nhũm Tirtûm kot akupỳm ho htĩr nē kãm mex o mex ã harēnhja nhũm hkukamã mē kãm harēnh o amnhĩrĩt. No ãm hprĩ hã mē kãm mēhõ nhĩxi hkôt harēnh kêt jakamã nhũm prem harēnh ma nē tee

ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mēhō koja we ã amnhĩ nhĩpêx anê? Xà koja tokyx ã amnhĩ nhĩpêx anê nà kormã?

Anhÿr o hã axpên kukjêr o ri pa.

¹² Hãmri nhũm Tĩrtũm axte mē kãm Jejus jarēnh kwÿ ho amnhĩrĩt nê mē kãm:

—Nà mē anoo mã koja ã amnhĩ nhĩpêx anhÿr hkêt nê. Mē amÿr pê mē akanrēhã mē akra nê mē atàmnhwÿjê noo mã koja kato nê mē hkôt ã amnhĩ nhĩpêx anhÿr o pa. Anê.

Mē papamjaja mē panoo mã kator nê ã kot amnhĩ nhĩpêx anhÿr o paja o ã mē kãm ho amnhĩrĩt anê.

Amnepê mē Tĩrtũm nhÿ hã kapêr o ri mē pa xwÿnhjaja nê jarãhã mē ixte Jejus nhÿ hã mē ahkre ho ri ixpa xwÿnhjaja mē ixkapêr ãm pixii. Na pa htem wamtajê pyrã nê Tĩrtũm Karō nhÿ hã ãhpumunh tÿx xà ho mē amã tanhmã Jejus jarēnh to ho ri mē akôt ixpa. Nhũm hte Tĩrtũm kapêr o mē wrÿk xwÿnhjaja mē ixkapêr ma nê tee ri hamaxpêr o mē pahpyrã nê kãm hprĩ hã harēnh mar par prãm nê.

Mē pahte Tĩrtũm pyrã nê tãm amnhĩ nhĩpêx ã mē pamã karō

Epes 4.1-3; Korosē 1.10-12; Sikũn Pêtre 3.10-13; Wam Juãw 3.1-6

¹³ E kwa Kris kôt ixtō nê ixtōxjaja. Kêr ka mē Jejus kutêp mēmoj punuj kutã amnhĩ to htÿx rãhã ho ri apa. Nê Tĩrtũm mã amnhĩ nhĩpêx mex rãhã nê. Pê tãm ajamaxpêr nê tãm amnhĩ nhĩpêx o apa. Nê mē ã ajamaxpêr anhÿr o:

—Nà koja nhÿrmã Jejus akupÿn mē ixwÿr wrÿ hãmri nhũm Tĩrtũm ixto mex rax nê. Nà koja ã inhĩpêx anê. Anê.

¹⁴ Nê kêr ka mē Tĩrtũm kapêr kôt pix mã mãn ri amnhĩ nhĩpêx mex rãhã ho ri apa. Te mēhprĩre kot mē hipêêxã kapêr mar nê hkôt amnhĩ nhĩpêx pyrãk. Kormã mē ate Kris kôt amnhĩ xunhwÿr kêt ri na ka prem ate amnhĩ nhĩpêx tũm kôt ri tanhmã amnhĩ tomnuj to ho ri apa.

¹⁵ Tã kêr ka mē hpãnhã amnhĩ to mex o mãn ajamaxpêr o apa nê Tĩrtũm pyrã nê amnhĩ tomnuj o apa hkêt nê. Tĩrtũmja kot amnhĩ to mex pix o pa xwÿnh na.

¹⁶ Kapêr ã kagã htũm kot ja jarēnh kot:

Kêr ka mē ixpyrã nê amnhĩ to mex pix o ri apa. Anê.

¹⁷ Tã koja nhÿrmã kêp Mēpahpãm maati hã hprĩ hã mē pahte amnhĩ nhĩpêx ã mē pahpumunh hkôt tanhmã mē pajarēnh to. Tãm mē pahte amnhĩ nhĩpêx kôt mē pajarē rÿ mē pahte amnhĩ tomnuj kôt mē pajarē. Hãmri nê ahpÿnhã mē panhĩpêx. Mē pahto mex nê rÿ mē pahtomnuj nê. Jakamã kwa pu mē nhÿrmã kot tanhmã mē pahtomnuj to pymaj hkôt pix mã amnhĩ nhĩpêx o ri papa rãhã nê.

¹⁸ Nê kormã mē pahte Jejus kôt amnhĩ xunhwÿr kêt ri na pu prem mē panhĩgêt pyrã nê pahtÿx ri amnhĩ tomnuj o ri papa. Tã nhũm Krisja te amnhĩm mē pajaprôr pyrãk o mē panhĩpêx. Mē pahte hpãnhã kapêr kôt pix mã amnhĩ nhĩpêx o papa kaxyw. No mēmoj to na pre mē pahpãnhã amnhĩre? Nà ra mē pahte ja jarēnh mar tÿx. Na pre kãxpore ho mē pahpãnhã amnhĩrer kêt nê. Rÿ ôr o mē hikukrêx ã ohtô ho mē pahpãnhã amnhĩrer kêt nê. Rÿ prat o mē hikukrêx ã ohtô ho mē pahpãnhã amnhĩrer kêt nê. Jajaja hapêx tokyx anhÿr mã xwÿnh na.

¹⁹ Na pre ã mē hpãnhã amnhĩrer anê nê tãm mē panê ty nê htyk o amnhĩ nhĩ ho mē pahpãnhã amnhĩrer pa. Nhũm hkamrô axkapĩ. Te amnepê mã mē panhĩgêt kot amnhĩ pãnhã Tĩrtũm mã ôwêhti hkrare hpar nhũm hkamrô pikapĩrta pyrãk. ôwêhti krare mexre pix na prem kãm kupa. Mex nê tanhmã kute hkêt xwÿnh pix. Tã Krisja aa tanhmã amnhĩ tomnuj to hkêt kumrêx nê mē panê ty nê htyk o Tĩrtũm mã mē pahte amnhĩ tomnuj piitã hpãnhã amnhĩrer pa.

²⁰ Amnepê mã kormã mēmoj kêt ri na pre Tĩrtũm kot ã mē

pahpânhã amnhîrer anhÿr kaxyw mẽ pakukamã kuta nẽ ãm. Tã nhũm amgrà ohtô nẽ hapêx nhũm mẽ pahwÿr kumẽ nhũm man mẽ pahwÿr wrÿ. Kot ã mẽ pahpânhã amnhî nhîpêx anhÿr kaxyw.

²¹ Tã nhũm prem kupî nhũm Tirtũm akupÿm ho htîr nẽ mex o mex ã harẽ. Mẽ pahte ja hã harênh mar kôt amnhî kaxyw Tirtũm pix mã pajamaxpêr o ri papa kaxyw. Nẽ mẽ pahte amnhî wÿr Jejus jamâr rãhã ho ri papa kaxyw.

²² Tã pu prem ra kot ã mẽ panê amnhî nhîpêx anhÿr ã harênh ma nẽ mẽ pahte amnhî tomnuj kaga nẽ hkôt amnhî xunhwÿ. Jao amnhî to mex pix o ri papa. Nẽ mẽ pamã Kris kôt mẽ pahkwÿjê hkînh o papa. Tã kwa kêr pu mẽ arî pamã axpên kînh tÿx rãhã ho papa.

Te mẽ pakatorxà rũm mẽ pajapôx pyrãk o axte mẽ pajapôx ã mẽ pajarênh Juãw 3.1-21

²³ Nẽ na pu prem mẽ pakatorxà nhõxàhkre rũm mẽ pajapôx pyrã nẽ axte mẽ pajapôx pyrãk o amnhî nhîpêx. Jao ra mẽ pahpê Tirtũm kra nẽ ri papa. Na hte mẽ pakatorxà nẽ mẽ panhîpêxàja wa ri pa nẽ gaa nẽ mẽ pahpê ty. No kêt Mẽpanhîpêxà maati Tirtũmja wa kurom rãhã ho rãhã. Tã ra mẽ pahte amnhî kaxyw kapêr kôt pajamaxpêr o pahpê hkra jakamã kot puj mẽ urãk nẽ nhÿrmã pahtîr tũm nẽ papa rãhã ho papa.

Nẽ Tirtũm kapêrja Tirtũm pyrã nẽ rãhãã. Koja aa hapêx kêt nẽ.

²⁴ Kapêr ã kagà htũm kot ja jarênh kot:

Pika piitã hkôt mẽ pa xwÿnhjaja te mẽ kot põtî grà pyrãk.

Nẽ mẽ kot amnhî to mex xàja te kot kapôt ã pixôrã pyrãk.

Na hte põtî tokyx grà nẽ hapêx.

Nẽ pixôrãja haxwÿja arîgro htÿx mẽ nhũm grà tokyx anẽ nẽ rarak pa nẽ hapêx.

²⁵ No Tirtũm kapêr koja põtî mẽ pixôrãta wa kurom aa hapêx kêt nẽ. Koja arî rãhã ho rãhã. Anẽ.

Tã kapêrja tãm na htem mẽ pamã kamã harẽ pu mẽ pahpiitã mar o papa.

2

Mẽ pahte Tirtũm kot amnhî nhîpêx kôt amnhî nhîpêx ã mẽ pamã karõ Rômãn 12.2; Wam Korî 3.16-17; Epes 2.19-22

¹ Nẽ kwa kêr pu mẽ axte tanhmã amnhî tomnuj to ho ri papa hkêt nẽ.

Rÿ tanhmã axpên mã paxêx to hkêt nẽ.

Nẽ paxêx rom tanhmã ri axpên nokupyr to hkêt nẽ.

Nẽ mẽmoj tã axpên kãm pagryk kêt nẽ.

Nẽ tanhmã axpên japrÿ hto hkêt nẽ. Kêr pu mẽ ã amnhî nhîpêx anhÿr o papa hkêt kumrêx.

² Mẽ hkaràre na htem ãm kãm pijaôr pix prãm. Nẽ gaa nẽ htÿxre nẽ ra hprêk o mõi. Tã kêr ka mẽ pijaôr pix prãm xwÿnhjê pyrã nẽ amã Tirtũm kapêr mar nẽ hkôt pix mã amnhî nhîpêx o apa hprãm. Jao mar tÿx pê ra hkôt amnhî nhîpêx mex o mõi nẽ gaa nẽ hkôt amnhî nhîpêx mex o apa. Te mẽ karàre pijaôr nẽ gaa nẽ ra hprêk o mõi pyrãk.

³ Ra mẽ ate Jejus kot mẽ pahto mex ã omunh mex kênã.

⁴ Nẽ na htem kên o ixkre nhîpêx kaxyw hãmri nẽ hkwy kawrà nẽ ri hkapi. Nhũm hõ mex kêt nhũm mẽ tee ri omu nẽ nhãm kumẽ. Tã ja pyrã nẽ na pre mẽ pahkwÿjaja tee ri Kris pumu nẽ htÿx mex kêt ã hkamnhîx nẽ te mẽ kot kên mênhta pyrãk o hipêx nẽ hkaga. No nhũm Tirtũmja amnhîm Kris mex o mex ã harẽ. Te ho mêmõ kot kên mex kêt ã hkamnhîx nẽ mênh nhũm mêmõ kot mex ã omunh nẽ amnhîm mÿnhta pyrãk. Nom Krisja kên rom kêp htîr tũm nẽ pa xwÿnh jakamã nhũm pre Tirtũm mẽ pakaxyw ãm pu prem hkôt amnhî xunhwÿ.

⁵ Nẽ Tirtũm na hte nhÿrmã mẽ pahtîr tũm nẽ wa kuri mẽ papa mã xwÿnh ã mẽ pajarê. Te mẽ pahpê kên nhũm Tirtũm te kot amnhî Karõ mã mẽ pahto ixkre nhîpêx pyrãk. Jakamã

na hte Jejus Kris tanhmã mẽ pahkrã hto pu mẽ Tirtũm kôt amnhĩ nhĩpêx mex rãhã ho ri papa. Nẽ tanhmã kãm amnhĩ nhĩpêx mex to nhũm ja hã mẽ pahpumu nẽ hkĩnh nẽ.

⁶ Tirtũm kapêr ã kagà htũm kot tanhmã Kris jarênh to. Nẽ hã kuxi nẽ tanhmã harênh to. Te kêp kên pyrãk ã harẽ nẽ harênh kot:

Kot paj nhỹrmã Ijaew wỳr mẽhõ mẽ nhũm mẽ hkôt pa ho pa.

Koja te kêp kên o inhõrkwỹ nhĩpêx kaxyw kên maati mex kumrêxta pyrãk.

Koja amnhĩ kaxyw hkôt mẽ hamaxpêr xwỳnhjaja nhỹrmã ma inhõ krĩ hwỳr api nẽ hkĩnh nẽ mex rãhã nẽ pa ho pa. Anẽ.

⁷ Tã ra amnhĩ kaxyw hkôt mẽ pajamaxpêr xwỳnhjaja. Kên pyrãk xwỳnh pẽ Jejusja na mẽ pamã mex o mex. No mẽ kot hkaga xwỳnhjaja na htem hamaxpêr punuj xwỳnh ã hkamnhĩx nẽ hkaga nẽ kãm hkĩnh kêt nẽ. Tirtũm kapêr ã kagà htũm kot mẽ harênh kot: Na prem kên o amnhĩm õrkwỹ nhĩpêx kaxyw hkawrà ho pa nẽ kên maatija pumu nẽ htỳx omnuj ã hkamnhĩx nẽ hkaga.

Mẽ kot hkaga htã nhũm Tirtũm mẽ kurom mex o kot kên piitã hakrenh par ã omunh kurê kumrêx. Anẽ.

⁸ Nẽ mãanên harênh kot:

Koja mẽ kapêr mar kêt kumrêx.

Te pry kamã kên nõi nhũm mẽ kot nhãm pry nẽ mẽnh kaxyw hkamnãr o amnhĩ par krã hi kukênh pyrãk o koja mẽ amnhĩ nhĩpêx. Anẽ.

Mẽ kot Kris kapêr mar tã hkôt amnhĩ xunhwỳr kêt jakamã te ho mẽ kot amnhĩ nẽ kên kamnãr o amnhĩ par krã hi kukênh pyrãk o koja mẽ amnhĩ nhĩpêx. Jakamã koja nhỹrmã Tirtũmjaja hã tanhmã mẽ ho htỳx kumrêx. Ra kot amnhĩ kukamã mẽ kãm amnhĩ jarênh xà hkôt.

⁹ No mẽ papajaja na pre Tirtũm jajê rom amnhĩ kôt mẽ paxunhwỳ. Nhỹrmã õ krĩ kamã mẽ papa ho papa kaxyw. Nẽ mẽ pahte mex o mex ã

harênh kaxyw. Na pu htem Ijaew nhõ patre pyrã nẽ Pahi Maati Tirtũm mã tanhmã amnhĩ nhĩpêx to ho papa. Nom kormã mẽ pahte Kris kôt amnhĩ xunhwỳr kêt ri te mẽ pahpê kamãt kô kamã mẽ pahtỳx ri mẽ papa xwỳnh pyrãk. Tã Jejus kôt amnhĩ xunhwỳ nẽ hpãnhã te mẽ pahpê hirã mex kãm ri mẽ papa xwỳnh pyrã nẽ tãm amnhĩ nhĩpêx rãhã ho papa. Ra mẽ pahpê Tirtũm kra jakamã na pu htem amnhĩ to mex rãhã ho ri papa. Nẽ Mẽpahpãm maati Tirtũm mã tanhmã amnhĩ nhĩpêx to ho ri papa. Te mẽ kot mẽ ho àhwỳr xwỳnhjaja kot kãm amnhĩ nhĩpêx o pata pyrãk. ã na pre Tirtũm mẽ pahte amnhĩ nhĩpêx anhỳr o papa kaxyw mẽ panhĩpêx.

¹⁰ Amnepê m kormã mẽ pahpê hkra hkêt ri na pre mẽhõ mẽ pakamã ukaprĩ hkêt kumrêx pu htem pahpunuj nẽ ri papa. Tã Jejus kôt amnhĩ xunhwỳ nhũm Tirtũm mẽ pahto hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mẽ pahpê Tirtũm mã tanhmã amnhĩ nhĩpêx to xwỳnh ã mẽ pajarênh Rõmãn 13.1-7; Xitre 3.1

¹¹ E ixkrãmnhwỳjaja. Ra mẽ pahpê Tirtũm kra jakamã mẽ pahpê õ krĩ nhõ xwỳnh. Te mẽ pahpê jar pika nhõ xwỳnh kêt pyrãk jakamã kwa kêr pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nẽ. Nẽ mẽ pajamaxpêr tũm o pajamaxpêr kêt nẽ. Ra axtem mẽ pajamaxpêr nyw nẽ axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupỹm mẽ pahte hkôt amnhĩ to paxujanãr prãm pyrãk. Mẽ pahte axte hkôt amnhĩ nhĩpêx o ri papa kaxyw. Tã nom kêr pu mẽ anhỳr kêt nẽ.

¹² E kwa kêr ka mẽ anhõ krĩ kamã akwỹ kot Kris kôt amnhĩ xunhwỳr kêt xwỳnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rỳ tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhỳr o ri apa

hāmri nhūm mē tee ri mē apumu nē hamaxpēr o:

—Kwa mē ixte mē kot amnhī tomnuj xwýnh ã mē harēnh tā mē kot amnhī to mex pix xwýnh na mē. Anē.

Hāmri nē nhýrmã mē pahpyrà nē Tirtūm kôt amnhī xunhwý nē kãm mex o mex ã harē nē kãm:

—Kwa Tirtūm. Na pre hte akrajaja anhý hã amnhī to mex rãhã nē pa ho pa pa ja hã mē omu. Nà xep amex o amex Tirtūm. Anē.

13 Nē mē apē Pahiti Jejus Kris kôt amnhī nhīpêx xwýnh jakamã kêr ka mē anhõ krī kamã mē anhõ pahiti kapēr ma nē kapēr kôt mãn amnhī nhīpêx mex o ri apa. Nē mē anhõ pika kamã mē anhõ prējitēnja ka mē kapēr ma nē hkôt amnhī nhīpêx. Mē kot mē ato amnhīptàr xwýnhjaja ka mē piitã mē kapēr ma nē mē kapēr kôt pix mã amnhī nhīpêx rãhã ho ri apa.

14 Nē mē anhõ pahi nhý hã mē kapēr o mē pa xwýnhjaja na htem mē akaxyw mē unhwý. Mē kot amnhī tomnuj xwýnhjaja nhūm tanhmã mē kot mē ho kaxyw. Nē tãm mē kot amnhī nhīpêx o ri mē pa xwýnhjaja nhūm mē kot mē õ pahi mã mex ã mē harēnh kaxyw.

15 Tã kêr ka mē kapēr ma nē mē hkôt tãm amnhī nhīpêx rãhã ho ri apa. Hāmri nhūm mē ato kapēr punuj xwýnhjaja ja hã mē apumu nē axte tanhmã mē ato kapēr to hkêt nē. ã mē ate amnhī nhīpêx anhýr o apaja na Tirtūm kãm hprãm.

16 Nē mē pahpê Tirtūm kra jakamã na pu htem paxãmnhix kãm tanhmã amnhī nhīpêx to ho ri papa. Nom kêr pu mē pahpê hkra hã pahtýx ri amnhī nhīpêx kêt nē.

17 Nē kêr ka mē piitã mē ho mex o ri apa.

Nē mē ato amnhīptàr xwýnhjê ho mex nē mē hã apijaàm rãhã ho ri apa.

Nē mē apê Kris kôt mē ate axpên to mē atõ nē mē atõxjê hã amã axpên kñnh pê axpên to mex nē.

Nē Tirtūm ã apijaàm rãhã nē.

Mē kãm mē apênh xwýnhjaja kot tanhmã amnhī nhīpêx to hã mē kãm karõ

Epes 6.5-8; Korosë 3.22-25; Wam Ximotre 6.1-2; Xitre 2.9-10

18 Nē mē apê mē kãm mē axapênh xwýnhjaja kêr ka mē anhõ patrãw kapēr ma nē hkôt ri amnhī nhīpêx. Kot mē ato mex o pa rý mē atomnuj o pa htã ka mē arī mē hã apijaàm pê hkôt ri amnhī nhīpêx.

19 Tanhmã kot mē anhīpêx punuj to htã ka mē arī kãm axapênh mex rãhã nē. Kêr kê Tirtūm ja hã mē apumu nē mē ato mex nē ka mē ajamakêtkati nē axãmnhix ri kãm axapênh o apa.

20 Nom kot kaj tanhmã amnhī tomnuj to nhūm anhõ patrãw ja hã apumu nē hã atak ka amnhī xà htýx kamã ama nē rī amnhī pumu. No kot kaj akatàt kôt kãm axapênh mex tã nhūm amarī atak japêr tã kêr ka amnhī tã kamã agryk kêt nē. Arī kãm amnhī to htýx kamã kãm xa nē amnhī tã tanhmã ho hkêt nē. Hāmri nhūm Tirtūm ja hã apumu nē ato mex nē.

21 Amnepêm na pre mē pahte hkôt amnhī xunhwýr xwýnhjaja Kris pyrà nē mē paxà htýx kamã pajamak o papa hkukamã ja hã mē pahpumunh mex. Na pre Kris mē pakaxyw amnhī xà htýx kãm hamak týx tã amnhī to htýx nē mē kãm xa. Tã kêr pu amnhī xà htýx kamã pajamak tã ý hã uràk nē amnhī to htýx nē papa.

22 Krisja aa tanhmã amnhī tomnuj to hkêt nē pa ho pa. Nē aa mēmoj tã amnhī to hêx o pa hkêt.

23 Mē kot kãm kapēr punuj tã nhūm amnhī tã tanhmã mē kãm nē hkêt nē. Nē mē kãm kapēr punuj kêt nē. Nhūm prem homnuj týx kumrêx nhūm amnhī xà htýx kamã hamak tã amnhī tã mē kãm àkjêr nē tanhmã mē haprý hto hkêt nē. Na pre ãm hamaxpēr o: “Nà Tirtūm kot ixtã mē omunh mex kênã. Koja nhýrmã mē piitã tanhmã mē kot amnhī nhīpêx to hã mē omunh xà hkôt tanhmã mē hipêx to. Tãm koja àhpumunh týx xà hkôt tanhmã ixtã mē harēnh to. Mē kurom àhpumunh týx o àhpumunh týx

xwÿnh kênã." Anê.

²⁴ Kris na pre te kawà kamã mẽ pahte amnhĩ tomnuj piitã gjênh nê ho nÿt nê htur rãhã pĩ kahpa hã mẽ panê htyk pyrãk o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xàj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htÿx kãm hamak anhÿr o jêt jakamã kot puj mẽ pahte hkôt amnhĩ xunhwÿr xwÿnhjaja aa mẽ pahte amnhĩ tomnuj pãnhã amnhĩrer kêt nê. Ra Jesus htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrã nê pahtÿx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mẽ panhĩpêx. Pu mẽ hkôt amnhĩ xunhwÿ nê hkôt amnhĩ nhĩpêx mex o ri papa. Jao hkôt papa ho papa.

3

Mẽ mjên mẽ mẽ hprô kot tanhmã axpên nhĩpêx to hã mẽ kãm karô

Wam Korõt 7; Epes 5.22-25; Korosê 3.18-19; Wam Ximotre 2.9-15

¹ Nê kër ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrã nê Kris kôt amnhĩ xunhwÿr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhÿr ã mẽ apumunh kôt mẽ apyrã nê amnhĩ kaxyw hkôt hamaxpêr japêr.

² Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³ Jakamã kêt ka mẽ anijaja amnhĩ mex pix kukamã ajamaxpêr o ri apa hkêt nê. Rÿ ajamaxpêr o:

—Ma kot paj mẽ hkuxwaxà ho amnhĩ krã hkĩ kuxwa mex nê inhôkrexê mex jagjê nê ri hã mra. Nê kupêxê mex kwÿ japrô nê ho amnhĩm ixê mex nhĩpêx hãmri nê hagjê nê ri

hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê.

⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxà kaxwÿnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nê.

⁵ Amnepê mã mẽ pakukamã mẽ panhõ wôwô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê.

⁶ Mẽ panhõ wôwô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahi hã harê nê hkôt pix mã amnhĩ nhĩpêx o ri pa. Tã kot kaj mẽ urãk nê amnhĩ to htÿx nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyrãk.

⁷ Nê mẽ amyjaja kêt ka mẽ tãm mẽ aprô nhĩpêx o ri mẽ hkôt apa. Mẽ akĩnhã mẽ hihtÿx kêt jakamã mẽ kamã axukaprĩ rãhã ho ri mẽ hkôt apa. War ajamê war apê Jesus kukwak ri war atĩr tũm nê apa mã xwÿnh jakamã kêt ka mẽ ho mex rãhã ho ri mẽ hkôt apa. Tĩrtũm kãm war ajamê war ajapê jakamã kot kaj mẽ ã mẽ hipêx anhÿr o ri apa hãmri nê ra axãmnhix mẽmoj tã amnhĩ to Tĩrtũm wÿ nhũm mẽ amar kurê kumrêx.

Tĩrtũm krajaja kot amnhĩ xà htÿx kamã hamak ã mẽ harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkrãmnhwÿjaja. Nà ixkapêr jatur xà na ja. Kêt ka mẽ ri axpên kôt ajamaxpêr mex pê axpên to mex rãhã ho ri apa. Nê mẽ ate Kris kôt

axpën to atõ nê atõx ã amã axpën kïnh o ri apa. Jao axpën kamã axukapri nê mẽmoj to axpën kutã anojarêt rãhã nê.

⁹ Na pu prem Jejus kôt amnhĩ xunhwỳ nhũm Tirtũm mẽ pahto hkra nê mẽ pahto mex ã amnhĩ jarẽ. Tã koja mẽhõ tanhmã mẽ anhĩpêx to rỳ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rỳ tanhmã ho akapêr punuj to hkêt nê. ãm te Tirtũm kot mẽ panhĩpêx pyrãk o mẽ hipêx nê mẽ ho mex pix o ri mẽ hkôt apa. Ja na Tirtũm kãm hprãm.

¹⁰ Kapêr ã kagà htũm kot ja jarênh kot:

Kot kaj mẽ amã amex nê akïnh nê ri apa hprãm hã kot kaj mẽ ã amnhĩ nhĩpêx anê:

Kot kaj mẽ ri akapêr punuj o ri apa hkêt nê.

Nê mẽmoj tã amnhĩ to axêx o ri apa hkêt nê.

¹¹ Nê te mẽ ate amnhĩ katut kôt ate amnhĩ tomnuj rênh o apa pyrã nê hpãnhã amnhĩ to mex pix o ri apa.

Nê mẽ amã tãm axpën nhĩpêx pix prãm o ri axpën kôt apa.

Nê mẽ amã ajamakêtkati nê axpën kôt apa hprãm rãhã ho ri apa.

¹² Na hte Tirtũmja ã mẽ kot amnhĩ nhĩpêx anhỹr o pa xwỳnhjê jamãr mex rãhã ho pa.

Nhũm mẽ tanhmã amnhĩ to hwỳr to nhũm mẽ mar kurê kumrêx.

No mẽ kot amnhĩ tomnuj o mẽ pa xwỳnhjaja na hte mẽ kutã amnhĩ xãm nê ãm mẽ omu nê mẽ ho mex kêt nê. Anê.

Tirtũm kapêr ã kagà htũm kot ã mẽ harênh kot anhỹr.

¹³ Nê kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nê.

¹⁴ No kot kaj mẽ amnhĩ to mex pix o apa htã nhũm mẽhõ ja hã apumu nê tanhmã hamaxpêr to nê atomnuj ka amnhĩ xà htỳx kamã ajamak japêr. Tã koja Tirtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to

hkukamã ajamaxpêr pê amã mẽ uma ho ri apa hkêt nê. Nê tee ri amnhĩ kukamã ajamaxpêr o akapri nê ri apa hkêt nê.

¹⁵ ãm amnhĩ kaxyw Kris mã mãn ajamaxpêr tỳx rãhã nê mẽ panhõ Pahшти hã apijaãm rãhã ho ri apa. Nhũm mẽhõ ja hã mẽ apumu nê tanhmã hã mẽ akukjêr to nê mẽ amã:

—Kwa mẽmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mẽ ama hãmri nê aprĩ hã kãm amnhĩ jarênh kurê kumrêx.

¹⁶ Nom kêr ka mẽ akapêr mã aprĩ kamã kãm amnhĩ jarẽ. Tirtũm kapêr kôt amnhĩ nhĩpêx o apa hã mẽ kãm amnhĩ jarẽ. Koja mẽ Kris ã mẽ ato kapêr punuj rỳ hã mẽ atã hpêr o axkê nê pikunhar japêr ka mẽ ãm amnhĩ tã mẽ ama nê ãm mẽ ama. Kwãr mẽ mãmri ã mẽ anhĩpêx anê. Kêr ka mẽ amnhĩ tã mẽ omu nê arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nê hpijaãm nê.

¹⁷ Nê koja mẽ akwỳjaja mẽ ate Tirtũm kapêr kôt amnhĩ nhĩpêx mex o apa hã mẽ apumu nê hã tanhmã mẽ anhĩpêx to htã kêr ka mẽ arĩ Tirtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nê pahшти mã mẽ ajarê nhũm kuma nê ja hã tanhmã mẽ amã àkjêr to ka mẽ ra apijaãm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwỳr nê nhỹrmã ma Tirtũm nhõ krĩ hwỳr paxàpir nê kamã pahtir tũm nê papa ho papa kaxyw. Mẽ kot hpĩr tã nhũm Tirtũm akupỳm ho htĩr nhũm htĩr o htĩr.

¹⁹⁻²⁰ Nom kormã akupỳm htĩr kêt ri na pre hkarõ pix o mẽ htyk xwỳnhjê hwỳr mõ. Ahpunu kamã mẽ hkarõ kêp prês nê hkrĩ xwỳnhjê hwỳr mõ nê mẽ kot Nohti kapêr mar nê hkôt amnhĩ nhĩpêx kêt nhũm gô htãm kot

mê hanhir par xwýnhjê mã kapêr. Tirtũm kot nhýrmã mê kot amnhĩ tomnuj mýrapê kuwy maati wýr mê rênh ã mê hkukamã mê kãm aw-jarê. Amnepêmkormã Noehti kot pàr raxta nhĩpêx o kuhê ri na prem kãm Tirtũm kapêr mar prãm kêt nê. Nhũm amnhĩ tâ mê omu nê mê kamã gryk tokyx anhýr kêt nê. Arĩ amnhĩ tâ mê hamãr o pa. Mê kot hkôt amnhĩ xunhwýr nê hkôt amnhĩ nhĩpêx prãm xàj arĩ mê hamãr ry ho pa. No ãm tee ri mê hamãr kaprý nhũm mê amnhĩ kaxyw hkôt hamaxpêr kêt nê htýx ri amnhĩ tomnuj o pa. Mê ãm grêre nê Noehti kapêr ma nê gô htàm pymaj hkôt pàr raxta wýr agjê. ãm mê kêp 8 pix nê hwýr agjê nhũm gô htàm mê hanhir kêt nê. Tirtũm na pre mê nê omunh mex nê. No mê kot amnhĩ tomnuj xwýnhjaja nhũm gô htàmja mê hanhir o mê himex pa. Nhũm mê kêp 8ja pix arĩ htĩr nê mex nê pàr raxta kamã gô krãhkã hã mex rãhã pa.

²¹ Gô támja kêp hprĩ hã mê pahte Jejus kôt amnhĩ xunhwýr ã mê pahto amnhĩrit xà na. Mê pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mê pahto amnhĩrit xà. Jakamã na htem mê pahkrã kumrã. Nom mê kot mê panê mê pagrã kugrãnh kaxyw kêt ra mê pahte Jejus kôt amnhĩ xunhwýr ã amnhĩ to amnhĩrit kaxyw na htem mê pahkrã kumrã. Ra mê pahte Tirtũm kapêr kôt amnhĩ nhĩpêx o papa hã amnhĩ to amnhĩrit kaxyw. Pu mê ra mê pahte amnhĩ nhĩpêx nyw o amnhĩ nhĩpêx ã amnhĩ to amnhĩrit. Te mê pahte gôx kãm mê pahte amnhĩ tomnuj rer par pyrã nê hpãnhã amnhĩ nhĩpêx nyw o amnhĩ nhĩpêx o papa.

²² Nê na pre Jejus akupým htĩr nê ma akupým Tirtũm nhõ krĩ hwýr api nê Tirtũm nhĩhkô hã pahiti hã mê hkrĩ xà kamã hkrĩ ho hkrĩ. Hãmri nê ra Tirtũm kapêr o mê wrýk xwýnh nê pahi piitã mê ho amnhĩptàr o hkrĩ.

4

Mê pahte amnhĩ nhĩpêx nyw o

*amnhĩ nhĩpêx ã mê pamã karõ
Epes 4.17-24; Korosê 3.1-11*

¹ Nê na prem Kris pĩ nhũm amnhĩ xà htýx kãm hamak kãm htyk kaxyw tâ arĩ mê kãm xa. Ra kot amnhĩ xà hkukamã amnhĩ tâ mê omunh tâ tee ri amnhĩ kukamã hamaxpêr o amnhĩ tâ tanhmã ri mê kot hpĩr mã xwýnhjê homnuj to hkêt nê. Arĩ mê kãm xa nhũm prem kupĩ. Tã kêr pu mê uràk nê ã amnhĩ nhĩpêx anhýr o ri papa. Mê kot hã tanhmã mê panhĩpêx to htã pu mê uràk nê amnhĩ xà htýx kãm pajamak tâ tanhmã amnhĩ tâ mê ho hkêt nê. Na hte ra mê htyk nê mê hikwý xwýnhjaja axte amnhĩ tomnuj kêt nê. Tã kêr pu mê uràk nê axte tanhmã amnhĩ tomnuj to ho ri papa hkêt nê.

² Jakamã kêr pu mê axte mê pahte amnhĩ nhĩpêx tũm kôt amnhĩ nhĩpêx o papa hkêt nê. Nê mê pajamaxpêr tũm kôt axte pajamaxpêr o papa hkêt nê. ãm Tirtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³ Amnepêmkormã mê pahte Jejus kôt amnhĩ xunhwýr kêt ri na pu prem mê kêp Tirtũm kra hkêt xwýnhjê hkôt amnhĩ nhĩpêx.

Jao nhãm mênijê pumu nê mê kamã pahpijaàm kêt hprãm.

Nê pahpipãnh o ri papa.

Nê mê pahpipãnh kaxyw axpên wýr akuprõ nê mênijê kamã pahpijaàm kêt.

Nê sãnti hwýr pahkõnkrã ho pahkrĩ nê kãm amnhĩ jagrer.

⁴ Tã Kris kôt amnhĩ xunhwý hãmri nê mê pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mê kot amnhĩ nhĩpêx tũm o amnhĩ nhĩpêx xwýnhjaja tee ri ja hã mê pahpumu nê hêx rom amnhĩ kôt mê pamã tanhmã ri àhkrox to ho pa. Pu mê axte mê hkôt amnhĩ nhĩpêx kêt nhũm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to.

⁵ Tã koja Tirtũm nhýrmã amnhĩ wýr mê hã karõ nhũm mê ma hwýr mra nê kutã hkrĩ. Nê kormã mê htĩr ri

tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mẽ htyk xwýnhjaja nê kormã mẽ pahtĩr nê mẽ papa xwýnhjaja nhũm mẽ pahpiitã tanhmã mẽ pajarênh to.

⁶ Na pre Jejus ty hãmri nê kormã akupým htĩr kêt rãhã hkarõ pix o ma amex wýr tẽ nê kamã mẽ htĩr ri amnhĩ kaxyw Tĩrtũm mã hamaxpêr xwýnhjê mã awjarê. Na prem mẽ kot amnhĩ tomnuj mýrapê ra wej nê ty nê arĩ amex kãm ri pa. Jakamã nhũm Jejusja hkarõ ho ma mẽ hwýr tẽ nê mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpêr jakamã kot kaj mẽ ma hwýr api nê wa ixkuri wa ixpyrà nê atĩr tũm nê amex nê apa ho apa. Anê.

Mẽ pahpê Kris kwý hã tanhmã mẽ pahte axpên nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Nê koja tokyx mẽ panhõ pikaja mẽ pahpê hapêx nê kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Nê mẽ atýx ri ajamaxpêr ri apa hkêt nê.

Nê mẽmoj punuj nê amnhĩ to htýx o ri apa ho ajamaxpêr nyw pix o amnhĩ to Tĩrtũm wýr rãhã ho ri apa.

⁸ Nê kwa kêt ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã axpên nhĩpêx anê nhũm Kris kôt atõ rý atõxjê hõ tanhmã atomnuj to japêr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nê.

⁹ Nê kêt ka mẽ axãmnhĩx aja-makêtkati nê amnhĩ nhõrkwý hwýr axpên wý nê axpên to mex o ri apa. Nom kêt ka mẽ agryk kãm amnhĩ wýr mẽ hwýr kêt nê.

¹⁰ Na pre ra Tĩrtũm mẽ pahpê hkra hã ahpýnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhýr o papa kaxyw mẽ pahto mẽ paxihtýx. Mẽ pahte ahpýnhã tanhmã axpên to mex to ho ri axpên kôt papa kaxyw. Tã kêt ka mẽ ra kot mẽmoj tã mẽ amã karõ hkôt axpên nhĩpêx o ri axpên kôt apa.

¹¹ Koja ma mẽ ate akwýjê mã kapêr jarênh o ri apa kaxyw mẽ amã karõ ka mẽ ama nê akatát kôt ý hã mẽ kãm harênh mex o ri mẽ hkôt apa. Rý tanhmã axpên to ajuta hto ho ri apa kaxyw mẽ axunhwýr japêr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhý hã ã amnhĩ nhĩpêx anhýr o ri apa. Kêt kêt Jejus kôt mẽ akwýjjaja amnhĩ tã mẽ apumu nê mẽ anhý hã Tĩrtũm mã mex o mex ã harê.

Jejus kwýjjaja kot amnhĩ xà htýx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kôt ixkrãmnhwýjjaja. Koja Kris kwý kêt xwýnhjaja Kris ã tanhmã mẽ anhĩpêx to nom kwa kêt ka mẽ tee ri amnhĩ kukamã ajamaxpêr o akaprĩ nê apa hkêt nê. Kêt mẽ akĩnh rãhã axpên kôt ri apa. Na htem ã mẽ pahpê Kris kwýjê nhĩpêx anhýr o pa. Jakamã kwa mẽ amnhĩ tã mẽ omu nê tee ri amnhĩ kukamã ajamaxpêr kêt nê.

¹³ Mẽ arĩ akĩnh nê ri apa. Mẽ kot Kris pyrã nê mẽ panhĩpêx punuj tãã. Kêt kêt Jejus nhýrmã akupýn mẽ pahwýr wrý pu mẽ omu nê pahkĩnh týx o pahkĩnh týx.

¹⁴ Kwãr mẽ mãmrĩ mẽ pahpê Kris kwý hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwýnhjê nhĩpêx o pa anê.

¹⁵ Nê mẽ apê Kris kwý jakamã kwa kêt ka mẽ amnhĩ to mex rãhã o ri apa. Jao mẽ hpar o ri apa hkêt nê.

Nê ri axàhkĩnh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhĩ nhĩpêx anhÿr o ri apa nhũm mẽ anhõ pahшти ja hã tanhmã mẽ ato ka mẽ amnhĩ kamã apijaam tÿx nẽ.

¹⁶ Nom koja mẽ apê Kris kwÿ hã tanhmã mẽ anhĩpêx to ka mẽ ja hã amnhĩ tã mẽ omu nẽ amnhĩ kamã apijaam kêt nẽ. ãm Tĩrtũm pix mã amnhĩ jarẽ nẽ kãm:

—Pa Tĩrtũm. Ixpê akra Kris kwÿ hã na mẽ ã ixtomnuj anẽ. Nom ixpê akra jakamã kwãr mẽ mãmrĩ tanhmã inhĩpêx to. Amex o amex o ate ixto akra jakamã kwãr mẽ mãmrĩ ã inhĩpêx anhÿr o pa. Anẽ.

¹⁷ Nẽ koja Tĩrtũm tokyx mẽ pahpita tanhmã mẽ pahte amnhĩ nhĩpêx to hã mẽ pahpumu nẽ tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nẽ hpãnhã mẽ kêp hkra hkêt xwÿnhjê ho hapu nẽ tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj tÿx to.

¹⁸ Kapêr ã kagà htũm kot ja hã mẽ pajarênh kot:

Mẽ kot Tĩrtũm kapêr kôt amnhĩ to mex xwÿnhjaja na htem àmnhĩx amnhĩ xà htÿx kamã hamak o pa kamã ty nhũm Tĩrtũm ma õ krĩ hwÿr amnhĩ wÿr mẽ ho àpir kurê kumrêx.

Nom mẽ kot amnhĩ tomnuj xwÿnhjaja koja mẽ hkĩnhã amnhĩ xà htÿx kamã hamak rãhã nẽ pa ho pa nẽ aa mex kêt nẽ. Anẽ.

¹⁹ Tã koja Tĩrtũm kãm ja prãm japêr kwãr mẽ mãmrĩ Kris ã tanhmã mẽ pahptomnuj to. Nom kêr pu mẽ Tĩrtũm kannar rom amnhĩ to mex pix o ri papa. Kêp mẽ panhĩpêx xwÿnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

*Tĩrtũm krajaja kot tanhmã amnhĩ nhĩpêx to hã mẽ kãm karõ
Atre 20.28-31*

¹ E kot paj hpãnhã mẽ apê Kris kwÿ hkrãhtũmjê mã ixkapêr ka mẽ inhma. Ijaxwÿja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhÿrmã pahpimràatã mex o mex ã omu nẽ urak nẽ mẽ pamex nẽ ri papa ho papa.

²⁻³ Jakamã e Kris kôt mẽ hkrãhtũmjaja kêr ka mẽ atar Kris kôt pahkwÿjê jamãr mex nẽ. Ra Tĩrtũm kot mẽ ate kãm hkwyjê jamãr kaxyw mẽ axunhwÿr jakamã kêr ka mẽ omunh mex rãhã ho mẽ hkôt ri apa. Te ho ôwêhti jamãr xwÿnh kot ôwêhti jamãr mexta pyrak. Te mẽ kêp Tĩrtũm krit ôwêhti nhũm mẽ ate kãm mẽ hamãr o apa xwÿnh pyrã nẽ kãm mẽ omunh mex rãhã ho ri mẽ hkôt apa. Nẽ akĩnh pê tanhmã ri mẽ ho ajuta hto ho ri mẽ hkôt apa. Ja na Tĩrtũm kãm hprãm. Nom kêr ka mẽ ano hkà karôt kãm mẽ ho ajuta hkêt nẽ. Rÿ kãxpore hprãm xaj mẽ kãm tanhmã amnhĩ nhĩpêx to hkêt nẽ. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nẽ kêr ka mẽ kãm mẽmoj tã karõ kamã axihtÿx kêt nẽ. Mẽ akapêr mã aprĩ kamã mẽ kãm mẽmoj jarẽ kê mẽ amnhĩ tã mẽ apumu nẽ mẽ apyrã nẽ ã axpên nhĩpêx anhÿr o pa.

⁴ E kêr ka mẽ ã Kris kôt mẽ akwÿjê jamãr mex pê mẽ hipêx o apa anẽ. Hãmri nhũm mẽ pajamãr xwÿnh maati ja hã mẽ apumu nẽ nhÿrmã akupÿn mẽ pahwÿr wrÿ nẽ mẽ ato mex rax nẽ.

⁵ Nẽ e mẽ amy xaptar nywjaja. Kêr ka mẽ Kris kôt mẽ akrãhtũmjê kapêr ma nẽ mẽ hkôt ri amnhĩ nhĩpêx mex o ri apa.

Nẽ kwa kêr ka mẽ apiitã axpên nhĩpêx o te anhiõ kot amnhĩ to rax o ajakrenh pyrak. Tĩrtũm kapêr ã kagà htũm kot ja jarênh kot:

Mẽ kot amnhĩ to jarkrar o ri mẽ pa xwÿnhjaja na hte Tĩrtũm mẽ kutã amnhĩ xunhwÿ.

No mẽ kot amnhĩ to hkryre nẽ axpên tã hpijaam o mẽ pa xwÿnhjaja na hte mẽ ho mex o pa.

⁶ Anhÿr ã mē harēnh jakamã kwa kêr ka mē Tirtũm ã apijaam rãhã ho ri apa ixkwÿjaja. Nē axpēn mã ri amnhĩ to jarkrar o ri apa hkēt nē. Kêr kê Tirtũm xihtÿx xwÿnhja ja hã mē apumu hãmri nē nhÿrmã kot mē pahto mex xà hã arĩgroja kato nhũm mē ate amnhĩ to mex xwÿnh ã mē ajarē nē mē ato mex rax nē.

⁷ Nē kêr ka mē tee ri amnhĩ kukamã ajamaxpēr pê akaprĩ ho ri apa hkēt nē. ãm te mē ate Tirtũm mã akaprĩ nhõr pyrãk o amnhĩ nhĩpêx nē axãmnhĩx akĩnh nē akaprĩ hkēt nē apa. Tirtũm kêp mē pajamãr xwÿnh maati kēnã kot ka kêt mē ri akaprĩ nē ri apa.

⁸ Nē kwa mē okora. Kêr ka mē amnhĩ nē kot mē pakutã amnhĩ xunhwÿr xwÿnh maati Satanastija pumunh mex rãhã ho ri apa. Na hte mē panhĩpêx o te ropkror kot akunĩ kamã mry ho krihkrit o ri mrar pyrãk o mē panhĩpêx. Jao mē pahte Kris kaga hprãm xaj apkati mē tanhmã nē mē pahto ho ri mē pahkõt pa.

⁹ Na hte ã pika piitã hkõt Kris kõt mē pahtõ nē mē pahtõxjê nhĩpêx anhÿr o pa nhũm mē pahpyrà nē amnhĩ xà htÿx kamã hamak o pa pê omnuy nē pa. Jakamã kwa kêr ka mē Kris kõt amnhĩ xunhwÿr tÿx nē kutã amnhĩ to htÿx rãhã ho ri apa.

¹⁰ Tirtũm kãm mē pajapê jakamã na hte mēmoj to mē pakutã nojarêt rãhã ho ri pa. Na pre mē pamex nē nhÿrmã mē pahte kuri tãm amnhĩ nhĩpêx o papa mã xwÿnh ã mē pajarē. Kris kukwak ri ã mē pajarēnh anhÿr jakamã mē ate jar Kris ã apunuj nē ri apa htã kot kaj mē kritpēm ã amnhĩ nhĩpêx anhÿr ry hkēt nē. Koja Tirtũm mē akrã kamã mē ajamaxpēr xihtÿx jagjê ka mē akupÿm amex nē axihtÿx pê ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tirtũmja hihtÿx o hihtÿx nē àhpumunh o àhpumunh. Nē hihtÿx xà nē àhpumunh xà koja aa kêp hirerek nē hapêx kêt kumrêx. ãm hãmri na mē kot harēnh kot anhÿrja.

Pêtre kapêr jatur xà

¹² Nē ota Kris kõt mē pahtõ Sirastija na inhmã mē akaxyw kagàja nhĩpêx pa mē awÿr mēnh kaxyw. Na pa hte kãm ixkapêr nhũm inhma nē inhmã hã kagà. Na hte Kris kapêr kõt amnhĩ nhĩpêx rãhã ho ri pa. Tã inhmã kagàja nhĩpêx. Mē ate kamã harēnh nē mar nē tãm ajamaxpēr kaxyw. Nē Tirtũm kãm mē ajapê nē kot mēmoj to mē akutã nojarêt ã mē ate kamã harēnh kaxyw. Tã kêr ka mē kãm mē ajapê hã amnhĩ tã harēnh ma nē kapêr kõt pix mã amnhĩ nhĩpêx mex rãhã ho ri apa. Mē akwÿjaja kot tanhmã hã mē ato htãã.

¹³ Nē ota jar Papirõn kamã Kris kõt mē pahtõ nē mē pahtõxjaja mē awÿr hpêr mē. Tirtũm kot mē pahpyrà nē mē ho hkra jakamã mē kêp mē atõ nē mē atõx ã mē awÿr hpêr mē. Nē Xiakre mãänēn mē awÿr hpêr mē. Te kêp ixkra pyrãk.

¹⁴ Nē kêr ka mē nhÿri apê Kris kwÿ hã axpēn pumu nē mē axpēn to atõ nē atõx ã axpēn mã akapêr mex kurê kumrêx.

E kê Tirtũm mē apê Kris kwÿ hã mē amã mē ajamakêtkati nē mē apa xà gõ ka mē axãmnhĩx ajamakêtkati nē amex nē ri apa ho apa.

Tã ãm ja pix. Ixpê Simãw Pêtre na pa ã mē awÿr kagà nē mēnh anē.

Sikûn Pêtre
Simãw Pêtre kot Jejus kôt
hkwýjê hwýr wam kagà
nê mênh kôt hõ mênh

Simãw Pêtre na pre kagàja nhîpêx. Jejus nhÿ hã hkrajê jahkre ho mē pa xwýnhjê hõ na pre. Mē kēp Jejus kra hkêt xwýnhjaja ra kot Jejus ã hpîr kaxyw nhûm pre kagàja nhîpêx nê krî piitã hkôt Jejus kwýjê hwýr kurê nê kamã hprî hã mē kãm mēmoj tã karõ. Mē kot arî Tirtûm kot amnhî nhîpêx kôt amnhî nhîpêx rãhã ho pa hã mē kãm karõ. Nê hamaxpêr o mē hamaxpêr rãhã ho pa hã mē kãm karõ.

Nê mē hkwý kot Tirtûm kôt amnhî nhîpêx ã amnhî jarênh tã hkôt amnhî nhîpêx kêt xwýnhjaja nhûm pre tanhmã mē harênh to. ã na pre mē kãm mēmoj jarênh nê hã kagà nê krî piitã hkôt mē hwýr rênh anê. Nê mē kãm:

¹ Pa Kris kôt ixtõ nê ixtõxjaja. Xà mē amex? Ot pa mē awýr kagà nhîpêx nê krî piitã hkôt mē awýr kurê. Ixpê Simãw Pêtre na pa wam ixte kagà nhîpêx nê mē awýr mênh tã axte hõ nhîpêx. Ixte Jejus Kris nhÿ hã mē ajahkre ho ixpa xwýnh ã mē amã hipêx nê kumê. Na pa hte Jejus mã amnhî nhîpêx mex o ri ixpa.

Nê mē papytâr xwýnh Jejus Krisja Tirtûm pyrã nê mex o mex. Nê wa kot amnhî nhîpêxja mex o mex. Jakamã na pre wa tanhmã mē pahkrã hto pu mē amnhî kaxyw wa hkôt pajamaxpêr tÿx rãhã ho ri papa. Na ka htem ixpyrà nê ã amnhî nhîpêx anê. Tã pa mē amã kagàja nhîpêx.

² Nã Tirtûm mē mē panhõ Pahihti Jejus wa kot amnhî nhîpêxja na ka mē ra harênh mar tÿx nê. Wa kot tanhmã amnhî nhîpêx to nê tanhmã wa hamaxpêr toja ka mē mar tÿx nê wa hkôt pix mã amnhî nhîpêx. Tã kêr ka mē arî ã amnhî nhîpêx anhÿr rãhã ho ri apa. Jao axãmnhîx ajamakêtkati nê akînh nê apa ho apa. Na pa hte ã

mē ato Tirtûm mē Pahihti Jejus Kris wa hwýr o ri ixpa anê. Na hte Tirtûm mē ato mex nê mē akutã nojarêr rãhã ho pa.

Tirtûm kot mē pahto mex o pa hã harênh

Epes 2.12-13; Wam Tesarõn 1.2-4; Sikûn Pêtre 3.18

³ Nê Tirtûmja àhpumunh tÿx o àhpumunh tÿx jakamã na pu htem hkôt amnhî xunhwý nhûm amnhî tã mē pahpumu nê mē pamã àhpumunh tÿx xà hkwý gõ. Hãmri pu mē ra uràk nê amnhî to mex nê tãm amnhî nhîpêx o ri papa. Tã kot puj mē nhÿrmã ma õ krî hwýr api.

⁴ Na pre mē pakukamã amnhî jarênh o:

–Kot paj nhÿrmã ixkrajê mã ixte amnhî nhîpêx mex kwý gõ nhûm mē inhÿ hã ho tãm ri amnhî nhîpêx mex o pa. Nê ixpyrà nê hamaxpêr mex o pa.

Anhÿr jao te ra mē pamã hkînh xà mex kwý nhõr pyrãk o mē panhîpêx. Nê te ra kot mē pahkrãm hamaxpêr mex jagjênh nê mē pamã kot amnhî nhîpêx mex jagjênh pyrãk. Mēmo kaxyw na pre ã mē panhîpêx mex anê? Nã uràk nê tãm mē pahte amnhî nhîpêx mex rãhã o ri papa kaxyw. Jao mē pahte mē kēp hkwý hkêt xwýnhjê hkôt amnhî nhîpêx kêt nê. Nê mē hamaxpêr punuj o pajamaxpêr kêt nê. Nê hpãnhã mē pahte Tirtûm kôt pix mã amnhî nhîpêx rãhã ho papa. ã mē pahte amnhî nhîpêx anhÿrja na mex o mex.

⁵ Tã ã Tirtûm kot mē panhîpêx mex anhÿr jakamã kwa kêr ka mē kapêr mar tÿx nê hkôt pix mã amnhî nhîpêx mex o ri apa. Jao amnhî kaxyw hkôt ajamaxpêr rãhã nê. Kot kaj mē ã amã amnhî nhîpêx anhÿr o apa hprãm hã kot kaj mē mãânên amã tãm amnhî nhîpêx o apa hprãm. Nê mē amã Tirtûm kapêr piitã mar prãm o ri apa.

⁶ Hãmri nê piitã mar pa nê mēmoj punuj piitã nê amnhî to htÿx nê. Nhûm mē kēp Kris kwý hkêt xwýnhjaja Kris ã tanhmã mē anhîpêx to htã ka mē ãm amnhî tã mē omu nê

mê umaj mê amã Kris kaga hprãm kêt nê.

Nê mê amã Tirtûm mã amnhĩ jarênh rãhã ho apa hprãm.

Nê mê amã kapêr mar rãhã ho apa hprãm.

⁷ Nê mê amã Kris kôt mê atõ nê mê atõxjê ho mex pix o ri apa hprãm. Jao te mê amã amnhĩ tã ma pyrãk o mê piitã mê hipêx o ri mê hkôt apa.

⁸ E kêr ka mê ã amnhĩ nhĩpêx anhÿr o ri apa. Kot ka mê ã amnhĩ nhĩpêx anê nê mê panhõ Pahihti Jejus Kris kôt amnhĩ nhĩpêx mex o mõi. Hãmri nhũm mê akwÿjaja mê apumu nê mê apê Kris kwÿ hã mê ajarênh kurê kumrêx.

⁹ No kot ka mê atõ ixkapêr mar tã hkôt amnhĩ nhĩpêx kêt nê hãmri te Tirtûm kot anê ate amnhĩ tomnuj rênh par mã ajamaxpêr kêt pyrãk.

¹⁰⁻¹¹ No na ka htem ã amnhĩ nhĩpêx anhÿr kêt nê. Ra mê ate Pahihti Jejus Kris kôt amnhĩ nhĩpêx mex jakamã na htem ja hã mê apumu nê Tirtûm kot mê ato hkra hã mê ajarênh kurê kumrêx. Kot kaj mê ã hkôt amnhĩ nhĩpêx anhÿr o apa nê mêmoo arĩgro hã apunuj nê apa htã Jejus kaga hkêt nê. Hãmri nê nhÿrmã ma Tirtûm nhõ krĩ hwÿr api nhũm mê apumu nê mê ato mex rax nê. Hãmri ka mê õ krĩ kamã mê panhõ Pahihti Jejus Kris wa kuri atĩr tũm nê amex nê apa ho apa.

¹² Nê na ka mê ra Tirtûm kot amnhĩ nhĩpêx mar tÿx nê amnhĩ krã kamã kot amnhĩ nhĩpêx mã ajamaxpêr tÿx o ri apa. Tã nom kot paj arĩ mê amã ja jarênh rãhã ho ri ixpa.

¹³ Kormã ixtĩr ri kot paj xatã mê amã harênh o amnhĩrĩt. Ja na kêt inhmã hprãm. Mê ate nhÿrmã tanhmã ri ajamaxpêr to nê hkaga pumaj.

¹⁴ Na pre mê panhõ Pahihti Jejus Krisja inhmã tokyx ixtyk ã ijarê. Kot paj xep kritpêm ri ixtĩr nê ixpa hkêt nê.

¹⁵ Jakamã na pa kormã ixtĩr ri ã mê amã kagã nhĩpêx anê. Mê ate inhmÿr pê arĩ omunh nê kamã harênh nê

Tirtûm kot amnhĩ nhĩpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matêwre 17.1-5; Makre 9.1-8; Sikûn Ximotre 3.16-17

¹⁶ Nê na pa pre ra tanhmã mê amã mê panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mê pahwÿr wrÿk ã harê. No na pa pre amnhĩ krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xã hkôt ã mê amã harênh anê.

¹⁷⁻¹⁸ Amnepê mã kormã ixkwÿjê mê mê ixte arĩ hkôt ixpa ri pa prem hkôt hixêt prêk nhĩmõk wÿr api. Pa nê kaxyw Xiakre nê Juãw mê pa mê hkôt ixpimràatã hixêt ã api nê himõk ã ixkuhê. Hãmri nhũm Tirtûm tanhmã Jejus to nhũm hirã htÿx kãm xa. Hãmri nhũm Mëpahpãm Tirtûmja mê inhmã kapêr. Kaxkwa kamã hirã htÿx rax rũm mê inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xã hkôt pa amnhĩ xõ ri mê amã harê nê hã kagã.

¹⁹ Na pa prem ã hixêt prêk nhĩmõk ã Jejus pumunh nê Tirtûm kot tanhmã harênh to hã mar anê. Hãmri nê ija-maxpêr o:

—Nã ãm hãmri na pre amnepêm Tirtûm nhÿ hã kapêr jarênh o mê pa xwÿnhjaja Jejus kukamã ã harênh anhÿr o pa. Anê.

Mê kot tanhmã Jejus kukamã harênh toja te kot kamãt kô kamã kanê hpõk nhĩrã hkryre pyrãk. Tã koja nhÿrmã akupÿn wrÿ hãmri nê te myt kator nê hirã mex nhũm mê pahte mêmooj pumunh mex pyrãk. Jakamã kwa kêr pu mê kot tanhmã Jejus kukamã harênh toja mar tÿx rãhã nhũm nhÿrmã te myt kator pyrã nê akupÿn mê pahwÿr wrÿ.

²⁰ Tirtûm kapêr ã kagã htũm kot tanhmã ÿ hã kapêr jarênh xwÿnhjê jarênh to. Mê kot mêmooj kukamã ujarênh ã mê harê. Nê Jejus kukamã

tanhmã ujarênh to hã mẽ harê. Æ mẽ kot mẽmoj kukamã harênh kot anhÿr. Nom na pu htem amnhĩ krã hkôt ã mẽ ujarênh anhÿrja mar tÿx kêt nê. Koja Tirtũm Karõ hprĩ hã mẽ pamã ho amnhĩrit pu mẽ rĩ kormã pahprĩ hã mar tÿx nê.

²¹ Na pre ÿ hã kapêr jarênh o mẽ pa xwÿnhjaja amnhĩ krã hkôt hkwyjê mã ujarênh o pa hkêt nê. Tirtũm Karõ na pre tanhmã mẽ hkrã hto nhũm mẽ ÿ hã hkwyjê mã tanhmã harênh to ho pa nê ÿ hã mẽ pamã hã kagà.

2

Tirtũm kapêr jarênh o hêx xwÿnhjê jarênh

Korosê 2.16-17; Wam Ximotre 4.1-5; Sikün Ximotre 3.1-9; Jutre 3-16

¹ Nê amnepêm na pre Ijaew kwÿjaja te mẽ kêp Tirtũm nhÿ hã kapêr jarênh xwÿnh pyrãk. Nom Tirtũm kapêr kwÿm ri hkwyjê mã tanhmã ho hêx to ho pa. Tã koja nhÿrmã mẽmojaja mẽ urãk nê mẽ awÿr mra nê ã mẽ amã Tirtũm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xaj nhũm mẽ hêx rom tanhmã mẽ ajahkre hto ho pa. Pahihti Jesus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mÿrapê koja Tirtũm tokyx mẽ kot amnhĩ xà htÿx kamã hamak tũm xà hwÿr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htÿx ri tanhmã amnhĩ tomnuj to ho ri pa. Tã ã mẽ kot Tirtũm kapêr o mẽ hêx xwÿnhjê mar nê mẽ hkôt amnhĩ nhĩpêx anhÿr jakamã koja mẽ kãm Tirtũm kapêr mar prãm xwÿnhjaja mẽ kot amnhĩ nhĩpêx ã mẽ omu nê Tirtũm kapêrja mex kêt ã harênh japêr.

³ Tirtũm kapêr o mẽ hêx o mẽ pa xwÿnhjaja na htem kàxpore pix prãm xaj mẽ awÿr mra nê tanhmã mẽ amã

kapêr jarênh o hêx to ho pa nhũm Tirtũm ja hã mẽ omunh rãhã ho hkrĩ. Na hte nhÿhÿm mrrar kêt nê rÿ htÿx ôt o hikwÿ hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhÿrmã ma mẽ kot amnhĩ xà htÿx kamã hamak tũm xàta hwÿr mẽ kurê nhũm mẽ ma hwÿr hapêx pa.

⁴ Nê amnepê mã kaxkwa kamã Tirtũm kapêr o mẽ wrÿk xwÿnh kwÿjaja na prem axtem nê Tirtũm kapêr nhĩrôp kuhê nhũm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukaprĩ hkêt nê amnhĩ nê mẽ kator pa hãmri nê mẽ kot amnhĩ xà htÿx kamã hamak tũm xàta wÿr mẽ hano. Nhũm prem ma hwÿr pa nê ahkre xupÿm kãm kamãt kô kamã arĩ hkrĩ ho hkrĩ. Tirtũm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprÿ ho hkrĩ.

⁵ Nê amnepêm pika kamã ri mẽ pa xwÿnhjaja na prem haxwÿja piitã amnhĩ tomnuj pix o ri pa. Jakamã nhũm Tirtũm ja hã mẽ omu nê mẽ kamã ukaprĩ hkêt nê. Nê mẽ hwÿr na rax mẽ. Mẽ kãm kapêr mar prãm kêt jakamã nhũm mẽ hwÿr kumê nhũm wrÿk rax kumrêx nê mẽ hanhir pa nê mẽ himex. Æm Noehti mẽ hkwy pê 7 pixjaja nhũm mẽ kurom htĩr nê hkà hkĩnh nê mex nê pa. Noehti kormã na xwÿj ri kot mẽ kãm Tirtũm kapêr jarênh o ri mẽ hkôt pa htã nhũm mẽ kuma nê ãm kuma. Mÿrapê na prem piitã pikaprãr pa.

⁶ Nê Sotõ mẽ Gomo wa kamã mẽ pa xwÿnhjaja haxwÿja na prem amnhĩ tomnuj tÿx kumrêx o pa nhũm Tirtũm wamtajê pyrã nê mẽ kamã ukaprĩ hkêt nê. Na pre kaxkwa rũm mẽ hipÿ mẽmo hpôk kwÿ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nã mẽ piitã mẽ kot mẽ harênh mar nê hamaxpêr o:

—Na hte ã Tirtũm mẽ kot amnhĩ tomnuj xwÿnhjê nhĩpêx anê.

Anhÿr o hamaxpêr kaxyw na pre ã mẽ hipêx anê.

7-8 Nom Rohtija na pre Tirtûm Sotô nê kator jakamã nhûm htyk kêt nê. Na pre hkwyjê rom tãm amnhî nhîpêx tã mê kot amnhî tomnuj tÿx xwÿnhjê nhô krî kamã ôrkwÿ nê ri pa. Nê apkati mê tee ri mê kot amnhî nhîpêx ã mê omu nê mê ÿ hã hkaprî nê tee ri mê hkukamã hamaxpêr o pa. No nhûm mê amnhî tomnuj ã amnhî pumunh nê tokyx tãm amnhî nhîpêx kêt nê. Nê apkati mê tanhmã amnhî tomnuj to nê kapêr punuj o pa nhûm Rohti tee ri mê omu nê hkaprî htÿx nê pa.

9 Tã nhûm Tirtûm mê himex kaxyw nê mê nê kator nê mê himex pa. Na hte ã Tirtûm mêmoy punuj pê mê kot amnhî kaxyw kãm hamaxpêr nê hkôt amnhî nhîpêx xwÿnhjê pytâr anê. No mê kot amnhî tomnuj xwÿnhjaja na hte axtem mê hipêx. Tã koja nhÿrmã mê pahpiitã tanhmã mê pajarênh to xà hã arîgro kato nhûm ma mê kot amnhî xà htÿx kamã hamak tûm xà wÿr mê rênh pa. ãm tapxipix kot ã mê hipêx anhÿr kaxyw àhpumunh tÿx.

10 Tã mê hpijaàm kêt kãm amnhî tomnuj o mê pa xwÿnhjaja nê mê kot Tirtûm kapêr mar nê ãm mar xwÿnhjaja koja nhÿrmã mê homnuj tÿx nê.

Nê Tirtûm kapêr o hêx o ri mê pa xwÿnhjaja na htem amnhî to jarkrar pix o pa. Nê Tirtûm kapêr o mê wrÿk xwÿnhjê hã hpijaàm kêt nê. Nê axtem nê mê ho kapêr punuj pê tanhmã mê haprÿ hto ho pa.

11 Tã nhûm htem amnhî tã mê kuma nê ãm mê kuma. Mê kurom mê hihtÿx kumrêx tã no ãm amnhî tã Tirtûm mã tanhmã mê ho kapêr to hkêt nê.

12 Nê mry xoprê na hte htÿx ri pa ho pa. Tã Tirtûm kapêr o mê hêx o mê pa xwÿnhjaja htem mry xoprêta pyrã nê htÿx ri hamaxpêr mex kêt o pa. Jao hprî hã mêmoy mar kêt tã htÿx ri hijuk ri tanhmã mêmoy jarênh to.

Nê mry xoprêja htÿx pa nhûm mê kot hparja pyrã nê mê kot Tirtûm kapêr o hêx o mê pa xwÿnhjaja koja

Tirtûm nhÿrmã kuwy hwÿr mê ho hapêx nê kamã mê rênh pa.

13 Nê koja nhÿrmã Tirtûm mê kot tanhmã mê ama hêx to ho pa hã mê omunh xà hkôt mê homnuj tÿx nê. Na htem hpijaàm kêt nê mê piitã mê noo mã tanhmã amnhî tomnuj to ho pa. Kamãt kãm nê arîgro hã. Nê mê kãm tanhmã amnhî nhîpêx to hprãm xà hkôt pix mã amnhî tomnuj o pa.

Na htem te mê kêp Kris kôt mê atôjê pyrã nê mê akôt Tirtûm kapêr mar xà hã ixkre hwÿr agjê nê mê anhîhkô hã mê kot Jesus tyk mã hamaxpêr kaxyw pãwti hkwy hku. Nom htÿx hkur o hkrî nê htyk mã hamaxpêr kêt nê. Kãm Jesus kînh kêt tã hêx rom hpijaàm kêt kãm mê anhîhkô hã htÿx ri hkur o hkrî.

14 Nê nhÿri krî hwÿr pôj nê mênijê pumu nê kãm mê hkînh nê. Ra mê mjên ri pa htã nhûm mê kãm mê ho amnhîkati hprãm nê mê kamã hpijaàm kêt o ri pa.

Nê kormã mê kot Kris kôt amnhî xunhwÿr tohtuj anhÿr xwÿnhjê hwÿr mra nê hêx rom tanhmã mê kãm kapêr to pê mê no kupyr o ri mê hkôt pa. Mê kot mê mar nê Kris kaga nê mê hkôt ri amnhî nhîpêx prãm xaj ã mê hipêx anhÿr o pa.

Na htem hikàxpore rûnh o pikuprôn h pix kukamã hamaxpêr o ra ho ôxÿ nê.

ã na htem amnhî nhîpêx anhÿr o pa. Tã ra Tirtûm kot mê homnuj tÿx kaxyw mê hã amnhî jarê.

15-16 Te mê kot kamãt kô kamã pry juk ã hpikunor nê htÿx ri pa pyrãk o na htem amnhî nhîpêx nê kãm Tirtûm kapêr mar prãm kêt nê amnhî tomnuj pix o pa.

Amnepêm Peo hkra Paraãwta kêp Tirtûm nhÿ hã kapêr jarênh o pa xwÿnh tã axtem nê kàxpore rax prãm xaj tanhmã amnhî tomnuj to kaxyw. Nhûm Tirtûm tee ri ja hã omu nê Paraãw krit jumênreja tanhmã hakwa hto nhûm kãm kapêr. Jumênre kapêr kêt tã nhûm Tirtûm tanhmã hakwa hto nhûm kãm kapêr nê tanhmã kot amnhî tomnuj to kaxywta ã kãm akir

nhũm amnhĩ tã kuma hãmri nê ã amnhĩ nhĩpêx anhÿr kêt nê. Tã mẽ kot Tĩrtũm kapêr o mẽ hêx ho mẽ pa xwÿnhjaja na htem Paraãw pyrã nê kãxpore rax prãm xàj tanhmã amnhĩ tomnuj to pix prãm.

17 Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rÿ te kakrã hapôx nhũm mẽ kot omunh nê na wrÿk ã hkamnhĩx kaprÿ pyrãk. Tã ra Tĩrtũm mẽ kaxyw kamãt kô htÿx pê mẽ kot amnhĩ xà htÿx kamã hamak tũm xàta o mẽ nê.

18 Na htem htÿx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mēhō ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhÿr pymaj tanhmã nê kãm kapêr to nê mẽ kãm:

–Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkuprÿjê hwÿr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrã nê arĩ ã amnhĩ nhĩpêx anhÿr o ri apa. Koja Tĩrtũm tanhmã hã ato hkêt nê. Anê.

Hãmri nhũm mẽ tee ri kuma nê ra hamaxpêr kati nê.

19 Na htem mẽ kãm kapêr o:

–Kwa mẽ ixpyrã nê mãmri amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mēhō kot kêt ja nê tanhmã amã kapêr to? Anê.

Mẽ kot amnhĩ tomnuj xàja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nê gaa nê axte. Nê gaa nê ra ho amnhĩ pyrãk. Hãmri nê tee ri pamã hkaga hprãm kaprÿ nhũm te kêp mẽ panhō patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

20 Nê koja mēhō ra Tĩrtũm kapêr ma. Nê mẽ panhō Pahihti Jejus Kris jarēnhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwÿnh ã harēnh ma. Tã nhũm mẽ kot Tĩrtũm kapêr o mẽ hêx xwÿnhjaja

hwÿr mra nê tanhmã kãm ho hêx to nhũm mẽ kuma nê kot amnhĩ nhĩpêx tũm o awjanã. Jao amnhĩ tomnuj tÿx o kormã kot Tĩrtũm kapêr mar kêt ri kot amnhĩ tomnujta jakre.

21 Kêp ãm aa kot Tĩrtũm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx.

22 Mẽ kot ã mẽ kot amnhĩ nhĩpêx anhÿr ã mẽ harēnh kot:

Rop na hte õjaĩr nê akupÿm õjaĩrta ku. Nê hagrō na htem unê nê hkumrã nhũm muxre. Tã nhũm mẽ kãm ure nhũm akupÿm hprōt nê mra nê akupÿm gyw o amnhĩ tomnu pa. Anê.

Tã mẽ kot Tĩrtũm kapêr o mẽ hêx xwÿnhjê mar nê mẽ hkôt amnhĩ nhĩpêx xwÿnhjaja te mẽ kot rop mẽ hagrō wa kot amnhĩ nhĩpêxta pyrã nê Tĩrtũm kapêr kaga nê akupÿm mẽ kot amnhĩ nhĩpêx tũm o awjanã nê htÿx ri amnhĩ nhĩpêx o pa.

3

Tĩrtũm kot pika ho hapêx kaxyw kormã amnhĩ tã mẽ pajamãr ã harēnh

Matêwre 24.29-31; Xiakre 5.7-11; Apokarip 19.11-16, 21.1-8

1 E Kris kôt ixkrãmnhwÿjaja. Na pa pre ra wam kagãta nhĩpêx nê mẽ awÿr kurê. Tã ra axte hkôt ja nhĩpêx. Hamê wa kamã na pa mẽ amã Tĩrtũm kot tanhmã amnhĩ nhĩpêx to hã harê. Nê Jejus Kris nhÿrmã akupÿn mẽ pahwÿr wrÿk ã harê. Mẽ ate mar nê tãm amnhĩ nhĩpêx nê tãm ajamaxpêr o kutêp mẽ apa kaxyw.

2 Amnepê mã Tĩrtũm nhÿ hã kapêr jarēnh o ri mẽ pa xwÿnhjaja na prem Tĩrtũm kot nhÿrmã mẽ pahwÿr mēhō mēnh mã xwÿnhnta jarēnh o pa. Kot nhÿrmã mẽ pahwÿr wrÿk nê mẽ pahto amnhĩptãr o pa hã harēnh o pa. Tã kêt ka mẽ kapêr ma nê hã ano htÿx nê hkôt ajamaxpêr tÿx rãhã ho ri apa. Nê Jejus kot mẽ awÿr mẽ rēnh xwÿnhjaja ka mẽ kapêr ma. Mẽ kot mẽ amã mēmoj jarēnh o mẽ pa xwÿnhjaja na htem tanhmã mẽ amã Pahihti Kris jarēnh to ho ri mẽ akôt pa. Nê tanhmã

kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htỳx nê kãm ajamaxpêr tỳx rãhã ho ri apa.

³ Nê kwa mẽ inhma. Nhỹrmã Kris akupỳn mẽ pahwỳr wrỳk xwỳj ri koja mẽ kot amnhĩ tomnuj tỳx xwỳnhjaja mẽ awỳr mra. Mẽ hpijaàm kêt o pa xwỳnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwỳ hã mẽ apumu nê mẽ atã hpêr o pikênh o pa.

⁴ Nê htỳx ri Kris ã mẽ akukja nê mẽ amã:

–Kwa no Krisja? Amnepêm akupỳn wrỳk nê mẽmoj piitã tanhmã hipêx to hã amnhĩ jarênh tã arĩ Tĩrtũm kot mẽmoj to kator krax rũm mẽmoj amarĩ rãhãã. Ra mẽ panhĩgêjtaja pikaprãr par tã nhũm kormã akupỳn wrỳk kêt nê. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anê.

⁵⁻⁶ Nom ã mẽ kot harênh anhỹrja kot anhỹr kêt. Tĩrtũm kot mẽmoj to kator krax rũm mẽmoj amarĩ rãhã hã mẽ kot harênhja kot anhỹr kêt. Na pre Tĩrtũm kapêr pix o kaxkwa nê pika ho kato. Nhũm gô hkwyja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nê mẽ kot amnhĩ tomnuj tỳx mỳrapê na pre Tĩrtũm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jesus wrỳk ã hpêr o pikênh xwỳnhjtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa.

⁷ Pika nê kaxkwaja arĩ rãhã htã koja Tĩrtũm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỳnhjê rênh pa. Hãmri nhũm rĩ kormã kaxkwa nê pikaja wa pôr nhũm himök ã mẽmoj piitã hkaxàr pa nê hapêx.

⁸ Nê amgrà pê 1.000ja mẽ pamã amgrà xohtô rax kumrêx no Tĩrtũm

mã te arĩgro pixire pyræk.

⁹ Tã ra kot mẽ pamã tokyx Jesus akupỳn wrỳk ã harênh tã nhũm kormã wrỳk kêt jakamã nhũm htem tōhã tee ri hamãr o pa nê hamaxpêr o:

–Hêxta waa nê. Tĩrtũm kot tokyx akupỳn mẽ pahwỳr Jesus mẽnh ã amnhĩ jarênh tã tokyx mẽnh kêt nê.

Anhỹr o harênh tã no ãm kot anhỹr kêt. Na kormã amnhĩ tã mẽ kot amnhĩ tomnuj xwỳnhjê jamãr o pa. Mẽ kot amnhĩ tomnuj kaga nê hkôt amnhĩ xunhwỳr prãm xàj kormã amnhĩ tã mẽ hamã. Kãm mẽ kot amnhĩ xà htỳx kamã hamak tũm xàta wỳr mẽhō ho pixire nê mōr prãm kêt jakamã na kormã amnhĩ tã mẽ hamã.

¹⁰ Tã koja nhỹrmã mẽ panhō Pahihtija akupỳn mẽ pahwỳr wrỳ. Te mẽ àhkĩnh xwỳnh kot amnhĩ nhĩpêx pyræk o mẽ pajaêr pê akupỳn wrỳ. Pu mẽ pahtỳx ri tanhmã paxàpênh to ho ri papa nê akupỳn wrỳk ã hkamnhĩx kêt rãhã nhũm mẽ pajaêr pê akupỳn wrỳ. Hãmri nê ma akupỳm amnhĩ kôt mẽ pahte hkôt amnhĩ xunhwỳr xwỳnhjê ho àpir par kurê kumrêx. Hãmri nhũm rĩ kormã kaxkwa kaxàr o hkrihkrit tỳx kãm hapêx pa. Nê kanhêti mẽ myt nê mytwrỳre kaxàr pa. Nê pikaja nê mãânên kamã mẽmoj piitã kaxàr pa.

¹¹⁻¹² Koja nhỹrmã ã mẽmoj hapêx par anê. Jakamã kwa kêr pu mẽ Jesus kutêp tãm ri amnhĩ nhĩpêx rãhã ho ri papa. Nê Tĩrtũm kapêr kôt pix mã amnhĩ nhĩpêx rãhã nê. Nê kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jesus akupỳn wrỳ nê ã mẽ pahte amnhĩ nhĩpêx anhỹr ã mẽ pahpumu. Koja wrỳ nhũm rĩ kormã kaxkwa nê pikaja wa kaxàr pa. Nhũm kuwy mỳri kaxkwa kamã mẽmoj harir xwỳnhja xêr nê ôr pa nê hapêx.

¹³ Tã kwār mãmri mẽmoj ã amnhĩ nhĩpêx anê. Koja Tĩrtũm axte mẽmoj mex nhĩpêx. Na pre amnhĩ kukamã ja jarênh o:

Kot paj axte pika nê kaxkwa hō nhĩpêx nhũm mex o mex. Nhũm mẽ kot amnhĩ kaxyw

Jejus mā hamaxpēr nē hkôt amnhī xunhwȳr nhūm ixte mē mex ā mē harēnh xwȳnh pixjaja koja mē pika nywja kamā mex nē pa ho pa. Anē.

¹⁴ Jakamā kwa ixkràmnhwȳjaja. Kêr ka mē Kris kutêp kapêr kôt amnhī nhîpêx mex rāhā ho ri apa. Jao kutêp ajamakêtkati nē axàmnhīx axpēn kôt apa. Kêr ka mē nhȳrmā amnhī wȳr omu nē tee ri amnhī kukamā ajamaxpēr kêt nē. Ate tām amnhī nhîpêx o apa hā amnhī pumu nē akīnh nē amnhī wȳr omunh o akuhê.

¹⁵ Nom arī Jejus kām mē pahkwȳjê ho hkra hprām jakamā na kormā amnhī tā mē hamā nē tokyx akupȳn wrȳk kêt nē. Na pre Jejus kôt mē pahtō Pawre Tirtūm nhȳ hā ā mē pamā ja hā kagà anē. Pawreja ixkràmnhwȳ mex na.

¹⁶ Na hte mē pakaxyw kagà nhîpêx nē kamā mē pahte Jejus kutêp tām amnhī nhîpêx o papa hā mē pamā karō. Na hte tōhā mēmoj tā kagà pu mē kamā harē nē tee ri pahprī hā mar mā no ām mar mex kêt nē. Hāmri nhūm Tirtūm kapêr o mē hêx o mē pa xwȳnhtaja haxwȳja kuma hāmri nē amnhī krā hkôt hijuk ri tanhmā ho hêx to. Te mē kot hprī hā mar nē harēnh pyrāk nom hprī hā mar kêt nē. Ā na htem Tirtūm kapêr ā kagà piitā ho hêx o pa anē. Mȳrapê koja mē nhȳrmā amnhī xā kamā hamak tȳx kumrêx.

¹⁷ Tā e Kris kôt ixkràmnhwȳjaja. Ra mē ate mē harēnh mar jakamā kwa mē okora. Mē amnhī nē mē omunh mex nē mē hkôt amnhī nhîpêx kêt nē. Kot kaj mē anē nē Tirtūm kôt amnhī nhîpêx mex kêt nē.

¹⁸ Na ka htem mē papytār xwȳnh Pahihti Jejus Kris kôt ri amnhī nhîpêx o apa. Tā kêr ka mē arī hkôt amnhī nhîpêx mex rāhā ho ri apa. Nē hkôt amnhī xunhwȳr tȳx nē. Kêr kê amnhī tā mē apumu nē mēmoj to mē akutā nojarêt nē. Krisja mex o mex nē hihtȳx o hihtȳx. Tā kêr pu mē kām mex o mex ā mām harēnh rāhā ho ri papa.

Tā ām ja pix. Ixpê Simāw Pêtre na pa ā mē amā ja hā kagà nē mē awȳr mēnh anē.

Wam Juãw Juãw kot Jejus kôt hkwyjê hwÿr kagà nê mênh

Juãw na pre kagàja nhîpêx. Na pre kagà hkwy nhîpêx rax nê. Na pre määnên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikün Juãw nê Hapuhã Juãw nhüm pre ja piitã Tirtüm nhÿ hã hã kagà.

Juãwja Jejus nhÿ hã hkrajê jahkre ho mē pa xwÿnhjê hō na pre. Nê kēp Xiakre htō na pre. Tã ra hpigêt tÿx nê kagàja nhîpêx. Urak nê mē kot Tirtüm kôt amnhî xunhwÿr xwÿnhjê mã hipêx. Mē kot kamã harēnh nē mar nē kãm axpēn kīnh o pa kaxyw. Nē mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karō nē hã kagà. ã na pre Juãw mē kãm mēmoj jarēnh nē hã kagà anē nē mē hwÿr kumē. Nē mē kãm:

*Jejus kēp Tirtüm kapēr o amnhîrît
xwÿnh ã harēnh*

Juãw 1.1-4; Eprêw 1.1-4

¹ Pa ixpyrà nē mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nē mē awÿr kumē. Ixte mē amã Tirtüm kapēr o amnhîrît xwÿnh jarēnh kaxyw. Amnepê mã kormã mēmoj amrakati ri nhüm pre ra rãhã ri pa ho pa. ãm kukwak ri pix mã na pu htem Tirtüm mē wa kuri pahÿtîr tÿm nē papa ho papa mã xwÿnh. Tã ÿ hã mē ixte kapēr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nē mē ijamak o kapēr mar o ri hkôt ixpa. Nē mē inhîhkra ho hkupēnh o ri hkôt ixpa.

² Na pre kaxkwa kamã Hipêêxà hkôt ri pa ho pa htã amnē pika hwÿr mē pahwÿr wrÿ. Hãmri nē jar mē pakamã kato pa pre mē ixkwÿjaja omu. Tã mē ixte omunh xà hkôt na

pa htem amnhî xô ri tanhmã mē amã harēnh to. Kojã nhÿrmã akupÿm mē pahÿto mē pahÿtîr pu mē kuri pahÿtîr tÿm nē pamex nē papa ho papa.

³ Na pa prem tanhmã kapēr to hã mar o ri hkôt ixpa. Nē kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xô ri ixprî hã mē amã harē nē hã kagà. Mē ate ixpyrà nē aprî hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyrãk o amnhî nhîpêx o papa nē axpēn kôt pajamaxpēr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa.

⁴ Tã pa mē amã kagàja nhîpêx nē mē awÿr kumē. Mē ate kamã harēnh nē mar hãmri nē mē ixpyrà nē aja-makêtkati nē akīnh nē ri apa kaxyw.

*Tirtüm mex o mex ã harēnh
Juãw 8.12; Epes 5.3-21; Wam
Tesarôn 5.5; Eprêw 4.14-16, 9.11-14*

⁵ Nē Jejus kot tanhmã mē inhmã Tirtüm jarēnh toja kot paj amnhî xô ri mē amã hã kagà. Nà Tirtüm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî tomnuj to mã amnhî jagjênh kêt. ãm kot amnhî to mex o kot amnhî to mex rãhã nē pa ho pa xwÿnh na.

⁶ Kot mē pahte amnhî tomnuj kêt ã mē pamã karō jakamã kot puj mē pahpê hkra hã amnhî jarēnh tã amnhî tomnuj pix o ri papa nē ãm pahpê hkra hã amnhî jarēnh kapry nē amnhî to paxêx. Tirtüm krajaja na htem amnhî tomnuj o pa hkêt nê.

⁷ Nom kot puj mē hkôt amnhî nhîpêx nē urak nē tãm ri amnhî nhîpêx o papa. Nē kapēr kôt ri amnhî nhîpêx. Hãmri nē te ixkre tipxi kamã ri Tirtüm mē Kra Jejus Kris wa hkôt axpēn to papa pyrãk o amnhî nhîpêx. Na pre Jejus mē panê ty nē hkamrô axkapî. Jao mē pahte hkôt amnhî xunhwÿr xwÿnhjaja mē panê mē pahte amnhî tomnuj piitã hpãnhã amnhîrer pa. Jakamã ãm kukwak ri

pix mã na pu htem tãm amnhĩ nhĩpêx o ri papa.

Mê pahpiitã mê pahte amnhĩ tomnuj xwýnh ã mê pajarênh

⁸ Nê mê pahte tōhã tanhmã amnhĩ tomnuj to jakamã kot puj mê aa pahte amnhĩ tomnuj kêt ã amnhĩ jarê hãmri nê ã amnhĩ jarênh anhÿr o paxêx. Tĩrtũm kot mê pahpiitã mê pahte amnhĩ tomnuj ã mê pahpumunh xwýnh kênã.

Mê pahte amnhĩ tomnuj nê tanhmã amnhĩ nhĩpêx to hã mê pamã karõ

Xiakre 4.9-10

⁹ Nê mê pahpê Tĩrtũm krajaja na pu htem tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ nê. Nê tokyx amnhĩ to Tĩrtũm wý. Hãmri nhũm mê pama nê Jejus kukwak ri tanhmã hã mê pahto hkêt nê. ãm amnhĩ katut kôt tanhmã mê pahte amnhĩ tomnuj tota rê nê axte kãm hamaxpêr kêt nê. Ra kot mê pahtã amnhĩ jarênh xà hkôt. Na hte Tĩrtũm amnhĩ jarênh xà hkôt tanhmã amnhĩ nhĩpêx to. Tã ra kot mê pahpê hkrajaja mê pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mê panhĩpêx anê. Na hte mêmoy tã tanhmã amnhĩ jarênh to hãmri nhũm apkati nhũm ihkjê ho kumê nê axtem tanhmã mêmoy jarênh to hkêt nê.

¹⁰ Ra kot mê pahpiitã mê pahte amnhĩ tomnuj xwýnh ã mê pajarênh jakamã kot puj mê pahtõ ã mê pajarênh anhÿrja ma nê hkôt pajamaxpêr kêt japêr. Rý kuma nê ãm kuma nê pajamaxpêr o:

–Nà ixte tanhmã amnhĩ tomnuj tore hã.

Anhÿr o amnhĩ jarê. Hãmri nê te ate Tĩrtũm hêx xwýnh ã harênh pyræk. Jao amã kapêr mar prãm kêt ã amnhĩ to amnhĩrit.

2

Jejus kêp mê paxyr pê Tĩrtũm mã kapêr xwýnh ã harênh

Wam Ximotre 2.5; Eprêw 9.11-14

¹⁻² E mê ate amnhĩ tomnuj o apa hkêt kaxyw na pa ã mê amã ixkapêr nê hã kagà anê. Mê ate kamã harênh nê mar hãmri nê tanhmã amnhĩ tomnuj to hkêt kaxyw. Jejus Kris na pre mê pahpiitã mê pahte amnhĩ tomnuj pãnhã amnhĩrer kaxyw mê panê ty. Jakamã kot puj mê pahpê hkrajaja tanhmã amnhĩ tomnuj to nhũm ja hã mê pahpumu nê te kêp mê paxyr pê Tĩrtũm mã kapêr xwýnh pyræk o amnhĩ nhĩpêx. Mê pakurom aa kot amnhĩ tomnuj kêt jakamã na hte mê paxyr pê Tĩrtũm mã kapêr nhũm kuma. Hãmri nê kukwak ri pix mã mê pahte tanhmã amnhĩ tomnuj to piitã amnhĩ katut kôt rênh pa nê axte kãm hamaxpêr kêt nê.

Tĩrtũm krajaja kot Tĩrtũm kôt amnhĩ nhĩpêx ã mê kãm karõ

³ Nê na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nê.

⁴ Nom koja mêmõ kêp hkra hã amnhĩ jarênh tã hkôt amnhĩ nhĩpêx kêt nê ãm kêp hkra hã amnhĩ to hêx.

⁵ Na htem Tĩrtũm kapêr kôt amnhĩ nhĩpêx o pa pê kãm hkĩnh tÿx ã amnhĩ to amnhĩrit. Nê kêp hkra hã amnhĩ to amnhĩrit mex o pa.

⁶ Jakamã kêr ka mê apê Jejus Kris kwý hã amnhĩ jarênh xwýnhjaja hkôt pix mã amnhĩ nhĩpêx mex o ri apa.

Mê pamã axpên kĩnh ã mê pamã karõ

Juãw 13.34-35; Wam Juãw 3.14-18

⁷ E Kris kôt ixkràmnhwýjaja. Inhmã mê akĩnh jakamã na pa ã mê amã mêmoy jarênh nê hã kagà anê. Kot paj mê amã mêmoy nyw jarênh kêt nê. Ra mê ate mêmoy mar xwýnhhta kot paj axte mê amã harê. Mê pamã axpên kĩnh nê tãm axpên nhĩpêx o papa hã Tĩrtũm kot mê pamã karõta. Ra mê ate mar tã kot paj axte mê amã harê nê hã kagà.

⁸ Wam Tĩrtũm kot mê pamã axpên kĩnh ã mê pamã karõja kormã Jejus kot mê panê htykhkêt ri kot mê pamã hã karõta na. Tã ra Jejus kãm mê

pajapê xàj mẽ panê htyk jakamã na pa axte ã mẽ ate axpên nhĩpêx anhÿr o apa hã mẽ amã karõ nê hã kagà. Mẽ ate Kris pyrã nê amã axpên kĩnh xàj tanhmã axpên kutã anojarêto to ho ri apa kaxyw. Nom kormã mẽ pahte Jesus kôt amnhĩ xunhwÿr kêt ri na pu prem ã axpên nhĩpêx anhÿr kêt nê. Tã hkôt amnhĩ xunhwÿ hãmri nê ã axpên to mex o papa anê.

9-11 Tã koja mēhō kot Jesus kôt amnhĩ nhĩpêx ã amnhĩ jarēnh tã kām hkwÿjê hkĩnh kām àmnhĩx ri mẽ kutã nojarêto o pa hkêt nê. Hãmri nê kot Jesus kôt amnhĩ nhĩpêx ã amnhĩ jarēnh ã amnhĩ to hêx. Jao te htÿx ri kamàt kô kamã pa pyrãk. No koja mēhō kām hkwÿjê hkĩnh kām mẽ kutã nojarêto o pa nê määnēn Jesus kôt amnhĩ nhĩpêx mex o pa. Jao te hirã kamã ri pa pyrãk. Jakamã tanhmã hkwÿjê homnuj to ho pa hkêt nê mẽ piitã mẽ ho mex o axpên pyrãk o pa.

Juãw kot mẽ piitã ahpÿnhã tanhmã mẽ kãm kapêr to

12-14 E kot pa ahpÿnhã tanhmã mẽ amã ixkapêr to nê hã kagà. Mẽ apiitã te mẽ apê ixkra pyrãk. Na ka prem Jesus kôt amnhĩ xunhwÿ nhũm Tĩrtũm ja hã mẽ apumu nê Kra kukwak ri mẽ ate amnhĩ tomnuj piitã amnhĩ katut kôt rēnh pa nê axte kãm hamaxpêr kêt nê. Jakamã ra mẽ ate Tĩrtũm kēp Mēpanhĩpêxà Maati hã omunh mex.

Nê mẽ ate Jesus kôt amnhĩ xunhwÿr ã amgrã xohtō xwÿnhjaja. Amnepēm amrakati ri Jesus ra rãhã ri pa ho pa xwÿnhja kôt mẽ ate amnhĩ xunhwÿr xwÿnhjaja kot paj mẽ amã tanhmã ixkapêr to nê hã kagà.

Nê mẽ akwÿjaja ham Jesus kôt mẽ ate amnhĩ xunhwÿr xwÿnhjaja ra mẽ ate Tĩrtũm kapêr mã ajamaxpêr rãhã ho ri apa. Jakamã na hte Satanasti mẽ ate amnhĩ tomnuj prãm xàj tee ri tanhmã mẽ akrã hto ka mẽ Jesus nhÿ hã kutã amnhĩ to htÿx pē hkôt amnhĩ nhĩpêx kêt nê.

Mẽ kot amnhĩ tomnuj xwÿnhjaja tanhmã kot amnhĩ nhĩpêx to

Matêwre 6.24; Eprêw 11.24-26; Xiakre 4.4

15 Nê kêr ka mẽ amã Tĩrtũm kôt amnhĩ nhĩpêx prãm xàj mẽ kot amnhĩ tomnuj xwÿnhjê hkôt amnhĩ nhĩpêx kêt nê. Nê mẽ hamaxpêr punuj xwÿnhjê hkôt ri amnhĩ nhĩpêx kêt nê. Kot kaj mẽ hkôt amnhĩ nhĩpêx hãmri nê amã Tĩrtũm kĩnh kêt ã amnhĩ to amnhĩrīt.

16 Mẽ kot amnhĩ tomnuj xwÿnhjaja na htem mẽmoj punuj mã hamaxpêr nê hkôt tanhmã amnhĩ tomnuj to. Nê mẽmoj pumu nê ra kãm ho õ hprãm nom Tĩrtũm pē ja omnuj ã hkamnhĩx kêt nê. Rÿ tanhmã mēhō kot amnhĩ tomnuj to hã omu nê hkôt kãm amnhĩ nhĩpêx prãm. Nê tanhmã amnhĩ to jarkrar to ho ri pa. ã na hte mẽ kot amnhĩ tomnuj xwÿnhjaja amnhĩ nhĩpêx anhÿr o pa. Mẽ kot amnhĩ nhĩpêxja Mēpanhĩpêxà Tĩrtũm kãm hprãm kêt.

17 Koja nhÿrmã mẽ kot tanhmã amnhĩ tomnuj toja piitã hapêx pa. Nê mẽ hamaxpêr punujja määnēn nhÿrmã hapêx pa. Nê mẽ kot amnhĩ tomnuj o mẽ pa xwÿnhjaja koja mẽ amnhĩ xà htÿx kamã hamak rãhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwÿnhjaja koja mẽ kurom kuri htĩr tũm nê mex nê hkĩnh nê pa ho pa.

Kãm Kris kurê xwÿnh maati jarēnh Wam Juãw 4.1-6; Sikũn Juãw 7-11

18 E Kris kôt ixkwÿjaja. Kris akupÿn mẽ pahwÿr wrÿk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩōja mẽ pamã ã harēnh anē nê harēnh o:

—Koja mẽ panhō Pahihti Kris akupÿn mẽ pahwÿr wrÿk kaxyw hãmri nhũm kēp Kris ã amnhĩ to hêx xwÿnh maati kumrēx nhÿhÿnh kato. Hãmri nê hêx rom te Kris pyrã nê tanhmã mẽ kãm kapêr to nê tanhmã mẽ hipêx to ho pa nhũm rĩ kormã Kris akupÿn mẽ pahwÿr wrÿ. Anê.

Na pre hkukamã ã harēnh anē ka mẽ harēnh ma. Tã ra mẽ kēp Kris

ã amnhĩ to hêx xwýnhjaja ohtô nê mra nê kãm hkurê xwýnh maatita kukamã tanhmã amnhĩ nhĩpêx to pê mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harênh to. Koja tokyx kêp Kris ã amnhĩ to hêx xwýnh maatita nhỹhỹnh mẽ pahwýr kato.

¹⁹ Na pre hkwyjaja mẽ pahpê Kris kwýjê hkôt ri pa htã mẽ pahkĩnhã kêp Kris kwý hkêt. Kêp hkwy ronhỹx arĩ mẽ pahkôt Kris kôt amnhĩ nhĩpêx o pa. Nom axtem nê àhpumunh tỳx pyrà nê mẽ pahkaga nê htỳx tanhmã amnhĩ tomnuj to ho pa. Jao kêp Jejus kwý hkêt ã amnhĩ to amnhĩrĩt.

²⁰ No kêt mẽ pahpê Tĩrtũm krajaja na pre Jejus mẽ pahwýr Karõ rê nhũm mẽ pahkarõ mã agjê nê mẽ pahkrãm kapêr mex jagjê. Jakamã na pu mẽ mẽ kêp Kris kwý hkêt xwýnhjê rom Tĩrtũm kapêr mar mex nê.

²¹ Xà mẽ ate Tĩrtũm kapêr ã kaga pumunh kêt kôt na pa ã mẽ amã ixkapêr nê hã kaga anê? Nà ra mẽ ate omunh nê mar mex kênã. Tã mẽ ate mẽ kot tanhmã Jejus o hêx to xwýnhjê pumunh mex nê mẽ harênh mar mex kaxyw na pa ã mẽ awýr kaga nhĩpêx nê mênh anê. Kêr kê mẽ mẽmo arĩgro hã mẽ awýr agjê nê tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx.

²² Tanhmã na htem Jejus o hêx to? E kot paj ixprĩ hã mẽ amã tanhmã mẽ harênh to ka mẽ inhma. Nà koja mẽhõ mẽ amã tanhmã harênh to nê harênh o:

–Nà Jejus kêp Tĩrtũm Kra hkêt. Tĩrtũm kot mẽ pahwýr mênh kêt tã ka htem atỳx kapêr kôt ri amnhĩ nhĩpêx o ri apa. Kwa kêt mẽ ixkapêr kôt mãn ri amnhĩ nhĩpêx o ri apa.

Anhỹr o mẽ amã kapêr ka mẽ ama nê kãm Kris mẽ Tĩrtũm wa hkĩnh kêt xwýnh ã omunh kurê kumrêx.

²³ Koja mẽhõ Tĩrtũm Kra Jejus kaga nê mãânên Hipêêxà kaga. No koja mẽhõ Tĩrtũm Kra hkôt amnhĩ xãm nê mãânên Hipêêxà hkôt amnhĩ xãm.

Mẽ pahte Kris kaga pymaj tanhmã amnhĩ nhĩpêx to hã mẽ pamã karõ

²⁴ Amnepêm mẽ ate Jejus kôt amnhĩ xunhwýrta ã na ka prem kêp Tĩrtũm Kra hã Tĩrtũm kot mẽ pahwýr mênh xwýnh ã harênh ma. Tã kêr ka mẽ arĩ amnhĩ kaxyw hkôt ajamaxpêr nê hkôt pix mã amnhĩ nhĩpêx o ri apa. Kot kaj mẽ anê nê Mẽpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty.

²⁵ Hãmri nê wa kuri atĩr tũm nê amex kumrêx nê apa ho apa. Ra Jejus kot ja jarênh xà hkôt.

²⁶ Na pa ã mẽ amã ixkapêr nê hã kaga anê. Mẽ aprĩ hã mẽ amã Jejus o hêx xwýnhjê kapêr mar nê mẽ kot mẽ amã hêx kôt mẽ omunh mex kaxyw.

²⁷ Tĩrtũm Karõ na pre mẽ akarõ mã gjêx pa nê mẽ amã Tĩrtũm kapêr piitã o amnhĩrĩt mex o mẽ akôt pa. Jakamã mẽmo kaxyw kot kaj mẽ Tĩrtũm kapêr o hêx xwýnhjaja kot tanhmã harênh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tĩrtũm Karõja mẽ urã nê Tĩrtũm kapêr ho hêx kêt nê. ãm katat kôt kot ho amnhĩrĩt mex jakamã kwa kêr ka mẽ mar tỳx nê hkôt ri amnhĩ nhĩpêx mex rãhã ho ri apa.

Mẽ pahte tãm ri amnhĩ nhĩpêx ã mẽ pamã karõ

Juãw 14.25-26, 15.1-8

²⁸ E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa. Kê nhỹrmã akupỹn mẽ pahwýr wrỳk o tẽ ka mẽ amnhĩ wýr omu nê akĩnh nê. Nê akĩnh kãm axãmnhĩx kutã mra nê hkaxpa nê amnhĩ kamã amã uma hkêt nê. Rỳ mẽmoj tã amnhĩ tã apijaàm kêt nê. ãm axãmnhĩx akĩnh nê ma kutã mra.

²⁹ Krisja mex o mex jakamã na pu htem uræk nê amnhĩ to mex o ri papa. Mẽ pahte amnhĩ to mex o papa xwýnhjaja uræk nê mẽ pahpê Tĩrtũm kra na pu mẽ.

3

Tĩrtũm krajê hkukamã tanhmã mẽ harênh to

Rõmãn 8.18; Sikũn Korĩt 3.18; Sikũn

Pêtre 3.11-14

¹ Nē Mēpanhîpêxà Maati kām mē pajapê htýx kumrêx jakamã na pre mē pahte hkôt amnhî xunhwýr ã mē pahpumunh kôt mē pahpê hkra hã mē pajarê pu mē pahpê hkra nê ri papa. Ja na mē pamã mex o mex. Nom mē kot hkôt amnhî xunhwýr kêt xwýnhjaja kot hprî hã ja hã mē pahpumunh kêt jakamã na htem mē pahte tãm amnhî nhîpêx ã mē pahpumu nê tee ri hamaxpêr.

² E Kris kôt ixkwýjaja. Ra mē pahpê Tirtûm kra htã kormã mē pahte amnhî kukamã mē pahprî hã ja hã amnhî pumunh mex kêt. Koja nhýrmã Jejus akupýn mē pahwýr wrý pu mē pano ho tanhmã kute hã omunh mex nê. Hãmri nê tã te kot amnhî nhîpêx pyrãk o amnhî nhîpêx mex o papa. Ra mē pahte ja mar mex.

³ ã mē pahte amnhî kukamã pajamaxpêr anhýr o papa xwýnhjaja na pu htem kormã amnhî wýr Jejus kamã pajamak o papa. Pé urãk nê mēmoj punuj mã pajamaxpêr kêt o papa. Nê urãk nê tanhmã amnhî tomnuj to hkêt nê.

Tirtûm krajaja kot amnhî tomnuj o pa hkêt ã mē kãm karõ

⁴ Nê mē kot amnhî tomnuj o mē pa xwýnhjaja na htem Tirtûm kapêr kwým ri amnhî nhîpêx o pa. Tã kot puj mē tanhmã amnhî tomnuj to hãmri nê mē urãk nê kapêr kwým ri amnhî nhîpêx.

⁵ No Jejus na pre mē pahte amnhî tomnuj pãnhã amnhîrer kaxyw mē pahwýr wrý. Aa kot amnhî tomnuj kêt jakamã tapxipix kot mē pahpãnhã amnhîrer mã tãm. Ra mē pahte ja jarênh mar mex.

⁶ Jakamã mē pahpê hkwýjaja na pu htem ri pahtýx tanhmã amnhî tomnuj to ho papa hkêt nê. ã mē kot amnhî nhîpêx anhýr xwýnhjaja kêp hkwý hkêt.

⁷ Nom koja mēhõ Kris pyrã nê tãm amnhî nhîpêx o pa hãmri nê kêp Tirtûm kraa. Jakamã kwa koja mēhõ

Tirtûm kapêr kwým ri tanhmã mē amã kapêr to ka mē ama nê ãm ama.

⁸ Mē kot amnhî tomnuj o mē pa xwýnhjaja na htem Satanasti hkôt ã amnhî nhîpêx anhýr o pa. Satanastija Tirtûm kot mēmoj to kator krax rûm nhûm ã kot amnhî tomnuj anhýr o pa xwýnh na. Tã ã kot amnhî nhîpêx anhýr o paja o hapêx par kaxyw na pre Tirtûm Kra Jejusja amné pika hwýr wrý.

⁹ Nom mē papajaja mē pahpê Tirtûm kra na pu mē. Na pre mē pahwýr amnhî Karõ rê nhûm mē pahkarõ mã gjêx pa nê mē pahkôt pa ho pa. Jakamã tanhmã kot puj wem amnhî to nê Satanasti pyrã nê pahtýx ri amnhî tomnuj o papa? Nã kot puj mē ã amnhî nhîpêx anhýr kêt nê.

¹⁰ Koja mēhõ tãm amnhî nhîpêx kêt nê hãmri nê mããnhn hkwýjê kamã ukaprî hkêt nê. Hãmri nê ã amnhî nhîpêx anhýr o kêp Tirtûm kra hkêt ã amnhî to amnhîrît. ãm kêp Satanasti hkra hã amnhî to amnhîrît kurê kumrêx.

Mê pamã axpên kînh o te Jejus kãm mē pahkînh pyrãk ã mē pamã karõ

Matêwre 22.39; Rukre 10.25-37; Juāw 13.31-35

¹¹ Nê kêr ka mē arî amã axpên kînh pê tãm axpên nhîpêx o ri apa rãhã nê. Te amnepê mã mē ate Jejus kôt amnhî xunhwýr ã arîgrota ã mē kot mē amã ja hã karõ pyrã nê.

¹² No mē ri finat Kaï kot amnhî nhîpêx pyrãk o amnhî nhîpêx kêt nê. Kêp Satanasti hkra jakamã na pre htõja pî. Kurom kot tãm amnhî nhîpêx ã omu nê kamã gryk nê kupî.

¹³ Tã koja mē kêp Tirtûm kra hkêt xwýnhjaja Kaï pyrã nê kêp mē aprãm nõkati nom kêr ka mē amnhî tã mē omu nê tee ri amnhî kukamã ajamaxpêr kêt nê.

¹⁴ Kormã mē pahte Jejus kôt amnhî xunhwýr kêt ri na pu prem mē urãk nê amnhî tomnuj o papa. Jao mē pahpê kuwy hwýr papa mã xwýnh. Tã mē pahte Jejus kôt amnhî xunhwýr jakamã ra pahpê Tirtûm mē Kra wa kuri pahtîr tûm nê papa mã

xwÿnh. Jakamã na pu htem mẽ kêp hkra hkêt xwÿnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwÿjê hkĩnh kêt xwÿnhjaja arĩ mẽ kêp kuwy hwÿr mẽ pa mã xwÿnh na mẽ. Ra mẽ pahte ja jarênh mar mex.

¹⁵ Mẽ kãm mẽ hpar prãm o mẽ pa xwÿnhjaja koja nhÿrmã Tĩrtũm mẽ Kra wa kuri hfĩr tũm nẽ pa ho pa hkêt nẽ. Ra mẽ pahte mãânẽn ja mar mex. Jakamã kwa mẽ amã akwÿjê hprãm nõkati ho ri mẽ apa xwÿnhjaja. Tĩrtũm noo mã te ra mẽ ate mẽ hpar pyrãk jakamã kot kaj mẽ arĩ ã amnhĩ nhĩpêx anhÿr o ri apa hãmri nẽ nhÿrmã Tĩrtũm nhõ krĩ hwÿr axàpir kêt nẽ.

¹⁶⁻¹⁸ E ixkwÿjaja. Kwa kêt pu mẽ pajakwa pix o pamã axpẽn kĩnh ã amnhĩ jarênh kêt nẽ. Mãânẽn axpẽn kutã panojarêt o ri papa. Nẽ tanhmã axpẽn to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukapri xàj mẽ panê ty. Tã kêt pu mẽ urãk nẽ pahkwÿjê kamã paxukapri ho mẽ kutã panojarêt rãhã ho papa. Jao mẽ paxàpkur xà hã panhõ pumu nẽ nhÿri pahkwÿjê hõ pumu nhũm kêp amrakati. Pu mẽ tee ri ja hã omu hãmri nẽ kãm mẽ panhõta kwÿ gõ. Kot pu mẽ ã amnhĩ nhĩpêx anhÿr kêt nẽ hãmri nẽ pamã Tĩrtũm kĩnh ã amnhĩ jarênh kaprÿ.

¹⁹ Nẽ kot puj mẽ ã axpẽn to mex o papa anẽ nẽ ra pahte Tĩrtũm kôt amnhĩ nhĩpêx mex ã amnhĩ to amnhĩrit. Hãmri nẽ ra paxàmnhĩx kãm tanhmã amnhĩ jarênh to ho papa. Amnhĩ kamã pamã uma hkêt nẽ paxàmnhĩx pajamakêtkati nẽ kãm tanhmã amnhĩ jarênh to.

Mẽ paxàmnhĩx amnhĩ to Tĩrtũm wÿr ã mẽ pamã karõ

²⁰ Nẽ kot puj mẽ mẽmo arĩgro hã tanhmã amnhĩ tomnuj to hãmri nẽ tee ri ja hã amnhĩ pumu nẽ amnhĩ kamã pagryk nẽ. Na hte Tĩrtũm tanhmã mẽ pahte amnhĩ

tomnuj to hã mẽ pahpumu nom arĩ kãm mẽ pajapêê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex.

²¹ Jakamã puj mẽ ã kãm pajamaxpêr anẽ nẽ amnhĩ kamã pamã uma hkêt kãm paxàmnhĩx tanhmã ri amnhĩ to hwÿr to ho ri papa.

²² Kot puj mẽ hkôt amnhĩ nhĩpêx o papa rãhã nẽ mẽmoj tã kuwÿ. Nẽ kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwÿ. Hãmri nhũm mẽ pama nẽ tanhmã mẽ pamã mẽmoj to rÿ mẽ pamã mẽmoj gõ.

Te ixkre pixi kamã mẽ pahtipxi pyrãk ã mẽ pamã karõ

²³ Nẽ tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nà mẽ pahte amnhĩ kaxyw Kra Jejus Kris kôt pajamaxpêr nẽ hkôt amnhĩ nhĩpêx o papa hã na hte mẽ pamã karõ. Nẽ kapêr xà hkôt pamã axpẽn kĩnh o mẽmoj to axpẽn kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhÿr ã mẽ pamã karõ anẽ.

²⁴ Jakamã kot puj mẽ kapêr xà hkôt axpẽn nhĩpêx o papa nẽ te ixkre tipxi kamã mẽ pahte axpẽn kôt Tĩrtũm kôt ri papa pyrãk. Ra kot mẽ pahwÿr Karõ rênh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrit.

4

Mẽ kot Kris kapêr jarênh ã amnhĩ to hêx xwÿnhjê jarênh

Wam Korĩt 12.1-3; Wam Juãw 2.18-26; Sikũn Juãw 7-11

¹⁻³ Nẽ koja mẽhõ Tĩrtũm kapêr o mẽ ajahkre kaxyw mẽ amã tanhmã Jejus Kris jarênh to nẽ ãm hãmri harẽ nẽ harênh o:

—Na pre Tĩrtũm Kra Jejus mẽ pahwÿr wrÿ nẽ ĩ ho ĩ ho mẽ pakamã kato. Tĩrtũm tãm na pre mẽ pahwÿr kumẽ nhũm wrÿ.

Anhÿr o mẽ amã harẽ ka mẽ ama nẽ kapêr kôt ajamaxpêr kurê kumrêx.

Ãm hãmri na hte Tirtũm Karõ nhỹ ã harẽnh anẽ. No koja Jejus kęp Tirtũm Kra hkêt ã harẽ ka mẽ ama nẽ ãm ama nẽ hkõt ajamaxpěr kêt nẽ. Kãm Kris kurê xwýnh maati nhỹ hã kapěr xwýnhjaja na hte ã harẽnh anhỹr o pa. Na ka prem ra kãm Kris kurê xwýnh maati tokyx hpõx ã harẽnh ma. Tã na ra ý hã kapěr xwýnhjaja ohtõ nẽ pika piitã hkõt mẽ hkõt pa nẽ te Tirtũm Karõ nhỹ hã mẽ kãm kapěr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwýjaja. Koja mẽhõ mẽ awýr mra nẽ tanhmã mẽ amã Tirtũm kapěr jarẽnh to ka mẽ aprĩ hã ama nẽ rĩ kormã kęp Tirtũm nhỹ hã kapěr jarẽnh xwýnh ã harẽ rý kot amnhĩ to hêx xwýnh ã harẽ.

⁴ Kêt mẽ papajaja jajê rom mẽ pahpê Tirtũm kra na pu mẽ. Nẽ Tirtũm Karõ kot ra mẽ pahkarõ mã gjêx xwýnhhta hihtýx o jajê piitã mẽ hakrenh. Jakamã na pu htem ý hã mẽ kutã amnhĩ to htýx o papa nhũm mẽ tee ri tanhmã mẽ pamã Jejus o hêx to kaprý. Pu mẽ kuma nẽ ãm mẽ kuma.

⁵ Mẽ kęp Tirtũm kra hkêt jakamã na htem hkõt amnhĩ nhĩpêx kêt nẽ. Mẽ kot amnhĩ nhĩpêxja axtem na. Jakamã na htem Tirtũm kapěr kwým ri tanhmã hkra hkêt xwýnhjê mã kapěr to ho pa nhũm mẽ kuma nẽ kãm mẽ mar prãm nẽ.

⁶ Nom mẽ ixte Tirtũm kapěr o mẽ ajahkre xwýnhjaja na pa htem mẽ kurom Tirtũm nhỹ hã ixkatãt kõt ãm hãmri mẽ amã kapěr jarẽnh o ri ixpa. Jakamã ka mẽ apê hkra hã mẽ amã mẽ inhmar prãm nẽ. No mẽ kęp hkra hkêt xwýnhjaja kãm mẽ inhmar prãm kêt.

Na pu htem pahprĩ hã mẽ kapěr ã mẽ kuma nẽ rĩ kormã tanhmã mẽ harẽnh to. Tirtũm nhỹ hã kapěr ã mẽ harẽ rý kãm hkurê xwýnh maati nhỹ hã kapěr ã mẽ harẽ.

Tirtũm kãm mẽ pajapê hã tanhmã amnhĩ nhĩpêx to hã harẽnh

Juãw 3.16-21; Rõmãn 5.5-9, 8.35-37

⁷ E ixkwýjaja. Na hte Tirtũm tanhmã mẽ pahpê hkrajê ho pu mẽ pamã

axpẽn kĩnh nẽ. Jakamã kър pu mẽ ã axpẽn nhĩpêx anhỹr jao axpẽn to mex pix nẽ. Æ Tirtũm kot mẽ panhĩpêx anhỹr jakamã kър pu mẽ pahpê hkra-jaja ý hã ã axpẽn nhĩpêx anhỹr o ri papa.

⁸ Koja mẽhõ Tirtũm kĩnhã kãm mẽ hkwyjê hkĩnh kêt hãmri nẽ mẽ kamã ukaprĩ hkêt o pa. Hãmri nẽ kęp Tirtũm kra hkêt ã amnhĩ to amnhĩrit mex nẽ.

⁹⁻¹⁰ Tirtũm kãm mẽ pajapê htýx kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nẽ kãm mẽ pajapê xaj mẽ pahwýr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nẽ nhỹrmã wa kuri pahtĩr tũm nẽ pamex nẽ papa ho papa kaxyw. Æ na pre Tirtũm mẽ pahwýr Kra mẽn anhỹr o kãm mẽ pajapê hã amnhĩ to amnhĩrit.

¹¹ E ixkwýjaja. Tirtũm kãm mẽ pajapê htýx jakamã kwa kър pu mẽ urãk nẽ pamã axpẽn kĩnh o papa. Nẽ axpẽn kamã paxukaprĩ nẽ.

¹² Aa mẽ pahtõ pahte pano ho Tirtũm pumunh kêt tã na hte mẽ pakamã pa ho pa. Pu mẽ kãm mẽ pajapêta pyrã nẽ ý hã pamã axpẽn kĩnh o papa.

¹³ Na pre mẽ pahwýr Karõ rẽ nhũm mẽ pahkarõ mã agjê pu mẽ ý hã kot amnhĩ nhĩpêx o amnhĩ nhĩpêx o papa.

¹⁴ Nẽ mẽ ixpê Jejus nhỹ hã mẽ ajahkre xwýnhjaja. Mẽ ixte kot amnhĩ nhĩpêx nẽ kot mẽmoj tanhmã ho hã omunh o ri hkõt ixpa jakamã na pa htem ma mẽ piitã mẽ kãm harẽnh o ri mẽ hkõt ixpa. Nẽ mẽ kãm harẽnh o:

—Tirtũm na pre mẽ pahwýr Kraja mẽ. Kot mẽ pahpiitã mẽ panê htyk kaxyw mẽ pahwýr kumê. Anẽ.

¹⁵ Mẽ kot Jejus kęp Tirtũm Kra hã harẽnh o pa xwýnhjaja na hte Tirtũm mẽ kamã pa ho pa nhũm htem ý hã ã Kra jarẽnh anhỹr o pa.

¹⁶ Na pu mẽ ra pahprĩ hã Tirtũm kãm mẽ pajapê hã amnhĩ tã omu. Kãm mẽ pajapê htýx kumrêx ã amnhĩ tã omu. Jakamã kot puj mẽ urãk nẽ ý hã pamã mẽ piitã mẽ hkĩnh o papa.

Tĩrtũm mẽ mẽ pahtipxi nẽ ri papa kẽnã.

Mẽ kãm axpẽn kĩnh xwỳnhjaja kãm Tĩrtũm puma hkêt ã mẽ harẽn

¹⁷ Nẽ kot puj mẽ pamã axpẽn kĩnh o papa nẽ mãnẽn Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩrtũm nẽ mẽ pa ho mẽ pa mã xwỳnhjẽ nhĩxi jarẽn kaxyw pu mẽ tee ri amnhĩ kukamã pajamaxpẽr kêt nẽ. Ra amnhĩ nhĩxi jarẽn ma nẽ pahkĩnh nẽ.

¹⁸ Nẽ koja mẽhõ kãm hkwỳjẽ hkĩnh kêt nẽ tanhmã hõ homnuj to. Hãmri nẽ kot amnhĩ tã tanhmã ho pymaj kãm uma ho hwỳr mrar kêt nẽ. No koja kãm hkwỳjẽ hkĩnh nẽ tanhmã mẽ ho mex to ho pa nẽ kãm mẽ uma hkêt nẽ.

¹⁹ Tĩrtũm kumrẽx na pre kãm mẽ pajapê nẽ mẽ pakukamã tanhmã mẽ pahto mex to. Tã pu mẽ ra amnhĩ pyrã nẽ pamã hkĩnh o papa. Nẽ pamã mẽ piitã mẽ hkĩnh o papa.

²⁰ Nẽ koja mẽhõ kãm Tĩrtũm kĩnh ã amnhĩ jarẽn tã kãm hkwỳjẽ hõ hprãm nõkati hãmri nẽ ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwỳjẽ pumunh o apa xwỳnhhta amã hkĩnh kêẽ tã tanhmã kot ka we amnhĩ to nẽ ate ano ho Tĩrtũm pumunh kêẽta amã hkĩnh ã amnhĩ jarẽ? Nà ka ã amnhĩ jarẽn anhỹr o amnhĩ to axêx.

²¹ Na pre Tĩrtũm mẽ pamã kapẽr o amnhĩrĩt o:
Kot kaj mẽ amã ixkĩnh hã kot kaj mẽ mãnẽn amã akwỳjẽ hkĩnh o mẽ ho mex o ri apa. Anẽ.

5

Tĩrtũm nhỹ hã mẽ pamã axpẽn kĩnh ã mẽ pamã karõ

¹ Nẽ Tĩrtũm kot mẽ pahwỳr Jejus mẽnh ã harẽnhja. Koja mẽhõ kuma nẽ amnhĩ kaxyw hkôt hamaxpẽr nẽ Jejus kôt amnhĩ xãm hã koja Tĩrtũm ja hã omu nẽ ho hkra.

Nẽ koja mẽhõ kãm Tĩrtũm kĩnh hã koja mãnẽn kãm hkwỳjẽ hkĩnh o pa.

² Ja pyrã nẽ kot puj mẽ pamã Tĩrtũm kĩnh nẽ kapẽr kôt amnhĩ nhĩpêx. Hãmri nẽ mãnẽn pamã krajẽ piitã mẽ hkĩnh ho papa.

³ Nẽ kot puj mẽ pamã Tĩrtũm kĩnh nẽ nhũm kapẽrja mẽ pahpê hihtỳx kêt nẽ. Pu mẽ pamã Tĩrtũm kĩnh ã kapẽr kôt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamaxpẽr nẽ hkôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra pu mẽ y hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nẽ.

*Mẽmoj axkrunẽpxi nẽ kot Jejus kęp Tĩrtũm Kra hã ho amnhĩrĩt
Juãw 1.32-34, 3.36, 5.31, 15.26*

⁶ Nẽ Jejus pix na pre Tĩrtũm mẽ pakaxyw ãm nhũm kęp Kra hã mẽ pahwỳr wrỳ. Hãmri nhũm Juãw Paxisja pyhti kamã hkrã kumrã. Kęp Tĩrtũm Kra hã hkrã kumrã. Tã nhũm Tĩrtũm kapẽr kôt ma tanhmã amnhĩ nhĩpêx to ho pa. Nẽ ri hkwỳjẽ mã kapẽr jarẽn o ri mẽ hkôt pa. Tã nhũm mẽ kupĩ nhũm kęp Tĩrtũm Kra hã pĩ kahpa hã ajêt nẽ ty nẽ hkamrõ axkapĩ. ã mẽ panê amnhĩ nhĩpêx anẽ nhũm Tĩrtũm Karõja kęp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anẽ. Mẽmoj to hêx kêt jakamã na pre Jejus kęp Tĩrtũm Kra hã mẽ pamã ho amnhĩrĩt.

⁷ Nẽ kęp Tĩrtũm Kra hã mẽ pamã mẽmoj to axkrunẽpxi nẽ ho amnhĩrĩt.

⁸ Tĩrtũm Karõ na pre kęp Kra hã mẽ pamã ho amnhĩrĩt pu prem kęp Kra hã omu. Nẽ Juãw Paxis kot hkrã kumrãrta ã pu mẽ mãnẽn kęp Tĩrtũm Kra hã kot ho amnhĩrĩtja ã omu. Nẽ mãnẽn kęp Tĩrtũm Kra hã pĩ kahpa hã jêt nẽ htyk nẽ hkamrõ pikapĩrta ã mẽ pamã ho amnhĩrĩt pu mẽ kęp Kra hã omu. E mẽ pamã mẽmoj to axkrunẽpxi nẽ Jejus kęp Tĩrtũm Kra hã kot ho amnhĩrĩt xwỳnh na jajaja.

⁹ Nẽ na pu htem jar pahkwỳjaja kot axpẽn mar xà hã ixkre kamã mẽ kapẽr ma nẽ mẽ hkôt pajamaxpẽr.

Tā koja Tirtūm tanhmā mẽ pamā mẽmoj to amnhĩrīt to pu mẽ hkôt pajamxpēr kurê kumrêx. Kêp Tirtūm kênã kot pu kêt mẽ kapēr prã nê hkôt pajamxpēr kêt. Tãm na pre mẽ pamã Jejus kêp Kra hã ã ho amnhĩrīt anê.

¹⁰ Jakamã mẽ pahte Tirtūm Kra hkôt amnhĩ xunhwÿr xwÿnhjaja na pu prem Jejus kêp Kra hã harênh ma nê hkôt pajamxpēr kurê kumrêx. No mẽ kêp hkra hkêt xwÿnhjaja na htem Tirtūm kot kêp Kra hã harênh ma nê ãm kuma nê amnhĩ kaxyw hkôt hamaxpēr kêt nê. Jao te Tirtūm kêp Hipêêxã hã amnhĩ to hêx pyrãk ã harê.

¹¹ E kot paj ixprĩ hã mẽ amã tanhmã ja jarênh to ka mẽ inhma. Nã na pre Tirtūm Krata mẽ pahpiitã panê ty. Jakamã kot puj mẽ pahte hkôt amnhĩ xunhwÿr xwÿnhjaja nhÿrmã ty nhũm Tirtūm akupÿm mẽ pahto mẽ pahťir. Pu mẽ wa kuri pamex nê pahťir tũm nê papa ho papa.

¹² Mẽ pahpê Jejus kwÿjaja kot puj mẽ ã pahťir tũm nê papa anê. No mẽ kêp hkwy hkêt xwÿnhjaja koja mẽ nhÿrmã ty nê mẽ pahpyrà nê wa hwÿr àpir kêt nê.

¹³ Na ka prem ixpyrà nê amnhĩ kaxyw Tirtūm Kra hkôt ajamxpēr nê hkôt amnhĩ xunhwÿ. Tã pa ã mẽ amã kagãja nhĩpêx anê. Mẽ ate kamã harênh nê mẽ pahte nhÿrmã Tirtūm mẽ Kra wa hwÿr mẽ paxàpir ã mẽ pajarênhja mar nê amnhĩ kaxyw hkôt ajamxpēr o ri apa kaxyw nê kapēr prãr o ri apa hkêt nê.

Mẽ pahte paxãmnhĩx mẽmoj tã Tirtūm wÿr ã mẽ pajarênh Juāw 14.13-14

¹⁴ Nê mẽ pahpê Tirtūm krajaja na pu htem paxãmnhĩx pajamakêtkati nê mẽmoj tã tanhmã hwÿr to ho papa. Kot puj mẽ kãm hprãm xà hkôt mẽmoj tã kuwÿ nhũm mẽ pama.

¹⁵ Na pu htem mẽmoj tã kuwÿ nhũm mẽ pamar mex nê mẽ pahte mẽmoj tã hwÿr xà hkôt tanhmã mẽ pamã mẽmoj nhõr to rÿ tanhmã mẽmoj to. Ra mẽ pahte ja mar mex.

Tirtūm kot tanhmã hkra hkêt xwÿnhjê nhĩpêx to hã harênh

Rukre 22.31-32

¹⁶⁻¹⁷ Nê koja Kris kôt mẽ anhiõ tanhmã amnhĩ tomnuj to ka mẽ atõ tee ri ja hã omu nê ho Tirtūm wÿ. Ho awÿ kê nê tanhmã kot amnhĩ tomnuj tota o hapêx nê ja nê ho htÿx kê axte ã amnhĩ nhĩpêx anhÿr kêt nê. Kot puj mẽ pahťo tanhmã amnhĩ tomnuj to nhũm Tirtūm tee ri ja hã mẽ pahpumu nhũm ja kêp omnuj nê. Tã kot puj mẽ amnhĩ tomnujta kaga nhũm ja hã mẽ pahpumunh kôt tanhmã hã mẽ pahto hkêt nê. ãm mẽ kot amnhĩ nhĩpêx pixi koja ho hamakêtkati hkêt nê. Koja mēhõ Tirtūm kaga ho hkaga nê aa hkôt amnhĩ xãm kêt nê. Hãmri nhũm tee ri amnhĩ tã omu nhũm ja kêp omnuj tÿx kumrêx. Jakamã koja aa ho hkra hkêt nê. Nê aa kot hkaga ho hamakêtkati hkêt nê pa ho pa. Jakamã koja hkaga xwÿnhhta nhÿrmã ty nê kuri htĩr tũm nê pa ho pa hkêt nê.

¹⁸ Nê mẽ pahpê Tirtūm krajaja na pu htem amnhĩ tomnuj o papa hkêt nê. Tirtūm Kra Jejus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xàj mẽ pano kupyr kaprÿ ho ri pa. Ra mẽ pahte ja mar mex.

¹⁹ Mẽ pahpê Tirtūm kra na pu mẽ. No mẽ kêp hkra hkêt xwÿnhjaja Satanasti kot amnhĩ tã mẽ ho htÿx pyrãk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

²⁰ Nê mãânên ja mẽ pahte mar mex. Na pre Tirtūm Kra mẽ pahwÿr wrÿ nê mẽ pamã tanhmã Tirtūm o amnhĩrīt to ho pa. Tapxipix kêp Mẽpahpãm ã mẽ pamã ho amnhĩrīt. Tã Jejus kukwak ri mẽ pahpê Tirtūm kra jakamã kot puj mẽ nhÿrmã wa kuri pahťir tũm nê pa mex nê papa ho papa.

²¹ E Kris kôt ixkwÿjaja. Kêr ka mẽ Tirtūm kapēr kôt pix mã mãn ri amnhĩ nhĩpêx o ri apa rãhã nê. No nhãm mẽ kot Tirtūm kapēr kwÿm ri mẽ amã kapēr o hêx xwÿnhjê kapēr ma nê ãm

mẽ ama nẽ mẽ hkôt amnhĩ nhĩpêx
hkêt nẽ.

Tã ãm ja pix. Ixpê Juãw na pa krĩ
piitã hkôt mẽ amã kagà nhĩpêx nẽ
kurẽ.

Sikûn Juãw Juãw kot Jejus kôt hkwýjê hwýr wam kagà nê mênh kôt hõ mênh

Juãw na pre kagàja nhípêx. Jejus nhý hã hkrajê jahkre ho ri pa xwýnhjê hõ na pre. Jakamã na pre hkrî hõ kamã Kris kôt htõx mẽ õ fãmii mã kagàja nhípêx nê mẽ hwýr kumê. Na pre hte Tirtûm kapêr o mẽ hêx o pa xwýnhjê hõ mẽ õ krî hwýr mra nhûm Juãw kràmnhwý nita omu nê htýx kot mẽ ahkre mex ã hkamnhîx. Hãmri nê kot Tirtûm kapêr o hkwýjê jahkre kaxyw amnhî nhõrkwý hwýr kuwý. Hãmri nhûm Juãw tee ri harênh ma nê kãm kagàja nhípêx nê kamã kot amnhî wýr hwýr nê kãm kapêr nê hprî hã kãm tanhmã mẽ kot Tirtûm o hêx to ho pa hã tanhmã mẽ harênh to. Kot kamã harênh nê mẽ harênh mar hãmri nê mẽ axkãm hamak rom nê ri pa kaxyw. ã na pre Juãwja hkràmnhwý ni mẽ hkwýjê mã mẽmoj jarênh nê hã kagà nê mẽ hwýr mênh anê. Nê mẽ kãm:

¹ Pa Jejus kôt ixtõx. Xà mẽ amex? E ot pa mẽ amã kagà nhípêx nê mẽ awýr kumê. Akrajaja nê apê mẽ hkatorxà mẽ mẽ ato ixpimràatã mẽ awýr kumê. Ixpê Juãw pigêtre na pa. Inhmã mẽ akînh nom papxpix inhmã mẽ akînh kêt. Mẽ pahpyrà nê mẽ kot Tirtûm kôt amnhî xunhwýr xwýnhjaja haxwýja kãm mẽ akînh.

² Mẽ pahte Tirtûm kapêr kôt ri amnhî nhípêx rãhã ho ri papa jakamã na pu htem pamã axpên kînh o ri papa.

³ Na pa hte mẽ pahto Mëpanhîpêxà maati Tirtûm wýr o ixpa nê kãm:

—Pa Tirtûm. Ot pa mẽ amnhî to awý. Akra Jejus Kris mẽ mẽ amnhî to war awý. Kêr ka wa mẽ ixkamã axukaprî nê mẽ ixkutã war anojarêr rãhã ho ri apa. Nê tanhmã mẽ ixkrã hto pa mẽ ixãmnhîx ijamakêtkati nê ixkînh nê mẽ inhmã axpên kînh nê

axpên to mex o ri axpên kôt ixpa. Nê tãm ri amnhî nhípêx. Anê.

Mẽ pamã axpên kînh kãm axpên to mex ã mẽ pamã karõ

Juãw 13.34-35; Wam Juãw 2.7-9, 3.14-18

⁴ Nê na pa pre akra hkwýjê pumu nhûm mẽ inhmã amnhî jarê pa mẽ kuma nê mẽ ý hã ixkînh nê. Na xep prem Tirtûm kôt amnhî xunhwý nê hkôt ri amnhî nhípêx mex o pa. Mẽ kot Mëpanhîpêxà Maati Tirtûm kapêr ã kagà hkôt amnhî nhípêx ã inhmã amnhî jarê pa mẽ kuma nê ixkînh nê.

⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtõx. Kêr pu mẽ pamã axpên kînh o ri papa hã mẽmoj to axpên kutã panojarêr rãhã ho ri papa. ã ixujarênh anhýrja nyw kêt. Amnepê mã mẽ ate Jejus kôt amnhî xunhwýr ã arîgrota ã na prem ã mẽ amã karõ anê. Tã kêr pu mẽ arî pamã axpên kînh pê Tirtûm kapêr piitã hkôt amnhî nhípêx mex o ri papa. Kapêr ã kagà kot ã mẽ pahte amnhî nhípêx anhýr ã mẽ pamã karõ.

Tirtûm kapêr o mẽ hêx xwýnhjê jarênh

Rõmãn 16.17-18; Wam Ximotre 5.22; Wam Juãw 2.18-26, 4.1

⁷ Nê mẽ kot Tirtûm kapêr o hêx o ri mẽ pa xwýnhjaja na mẽ ra ma krî piitã hkôt mẽ kãm tanhmã ho hêx to ho pa nê mẽ kãm:

—Jesús kêp Tirtûm Kra hkêt ãm mẽ panhîõ na pre. Na pre Tirtûm mẽ pahwýr mênh kêt nê. ãm mẽ panhîõ rûm na pre kato.

Anhýr o mẽ kãm ho hêx o pa. Kãm Kris kurê xwýnh maati ja nhý hã na htem ã ri ho hêx o pa anê.

⁸ Jakamã kwa mẽ amnhî nê mẽ omunh mex nê mẽ ama nê ãm mẽ ama. Kot kaj mẽ kapêr ma nê mẽ hkôt ajamxpêr hãmri nê mẽ ixte Tirtûm kapêr o mẽ ajahkreta kaga. Kwa mẽ arî mẽ ate amnhî nhípêx nyw pix o mãn amnhî nhípêx rãhã o ri apa. Nê arî mẽ amã axpên kînh kãm tanhmã axpên to ajuta hto rãhã ho ri apa. Kêr

kê Tĩrtũm ja hã mẽ apumu nẽ nhỹrmã mẽ ato mex nẽ.

⁹ Nom kot kaj mẽ nhãm mẽ kapẽr punujja kôt amnhĩ nhĩpêx nẽ Kris kôt amnhĩ nhĩpêx kêt nẽ nhũm Tĩrtũm mẽ akôt pa hkêt nẽ. Nom kot ka mẽ arĩ Kris kôt amnhĩ nhĩpêx mex nẽ hãmri nhũm Tĩrtũm mẽ Kra Jesusja wa mẽ akôt ri pa ho pa rãhã nẽ.

¹⁰ Jakamã koja ã Tĩrtũm kapẽr ã kagà kuhpa hã Jesus o hêx xwỳnhjaja mẽmo arĩgro hã mẽ anhõ krĩ hwỳr pøj ka mẽ omu nẽ amnhĩ nhõrkwỹ hwỳr mẽ hwỳr kêt nẽ. Nẽ tanhmã mẽ kãm akapẽr to hkêt nẽ. ãm ri mẽ hkàx ã ri mra.

¹¹ No kot kaj mẽ ã mẽ hipêx anhỹr kêt nẽ mẽ hwỳr mra nẽ mẽ mar o akuhê hãmri nẽ te mẽ ate mẽ hkôt amnhĩ nhĩpêx o amnhĩ nhĩpêx pyrãk. Ja pumaj kêr ka mẽ nhỹri mẽ omu nẽ mẽ htêp kêt kumrêx.

*Kagà jatur xà
Hapuhã Juãw 13-15*

¹² E Kris kôt ixtõx. Ixkapẽr jatur xà na ja. Ixkapẽr ã kagàja ãm hakotre nom inhmã mẽ amã ixkapẽr ry hprãm. Jakamã kot paj mẽmo arĩgro hã ma mẽ awỳr mõi pu mẽ axpẽn pumu nẽ pahkĩnh nẽ. Pa rĩ kormã mẽ amã ixkapẽr jatur xãm kumẽ ka mẽ aprĩ hã inhma.

¹³ Nẽ ota jar Kris kôt atõx krajaja awỳr hpẽr mẽ.

E ixpê Juãw pigêtre na pa ã awỳr kagàja nhĩpêx nẽ mẽnh anẽ.

Hapuhã Juãw Juãw kot Jejus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhîpêx. Jejus nhỹ hã hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhîpêx nê hwýr kumê. Na pre Jejus kwýjaja ma krî piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krî hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krî hwýr pa hãmri nê kuri pøj. Nhũm Juãw ã Gajore kot amnhĩ nhîpêx anhýr ã harênh ma nê hkĩnh nê hwýr kagàja nhîpêx nê kumê. Nê kamã kãm mênhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwýr mênh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhîpêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tĩrtũm kôt amnhĩ nhîpêx mex rãhã ho ri apa. Pa ajarênh ma nê anhỹ hã ixkĩnh nê. Nê ato Tĩrtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhîpêx to ho apa hã ajarênh ma nê ixkĩnh nê.

*Gajore kot tanhmã Jejus kôt hkwýjê
ho mex to hã harênh
Wam Korĩt 16.10-11*

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krî hwýr pa ka mẽ omu nê apê Jejus kôt mẽ htõ hã mẽ ho mex nê. ãm hãmri

na ka hte ã mẽ hipêx anhýr o ri apa Gajore.

⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarê ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarê. Nà ãm hãmri na ka hte ã mẽ ho mex o apa anê. ã ate mẽ hipêx anhýr o apata ã na hte Tĩrtũm apumu nê hkĩnh nê.

⁷ Na htem krî piitã hkôt mẽ kãm Kris kot tanhmã mẽ panê amnhĩ nhîpêx to hã harênh kaxyw ma mẽ hwýr pa. Nom mẽ apkur xà hprãm xàj mẽ kot Kris kôt amnhĩ xunhwýr kêt xwýnhjê hwýr pa hkêt nê.

⁸ Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ãhkõ hã ri mẽ kãm Kris jarênh o ri papa pyrãk.

*Xotre kãm Juãw kapêr mar prãm kêt
ã harênh*

Matêwre 20.25-28, 23.1-12

⁹ Nê ra ixte anhõ krî kamã mẽ apê Kris kwýjê mã kagà nê mênh nhũm mẽ ate kamã harênhta. Na xep pre Xotreja kuma nê ãm kuma. Kêp mẽ akrãhtũm prãm xàj kãm ixkapêr mar prãm kêt nê.

¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhỹhýnh krî hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tĩrtũm mã amnhĩ jarênh xà hã ixkre nê mẽ ajano. Na xep hte ã amnhĩ nhîpêx anhýr o pa. Jakamã kot paj nhỹrmã ma mẽ awýr mõi hãmri nê mẽ apiitã mẽ anoo mã hã kãm akir. Tanhmã kot mẽ ixto hêx to nê tanhmã kot amnhĩ tomnuj to hã kãm akir ka mẽ apiitã hã inhma.

*Mê pahte mê kot amnhĩ tomnuj
xwýnhjê hkôt amnhĩ nhĩpêx kêt ã mê
pamã karõ*

Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kôt amnhĩ nhĩpêx kêt nê. Mê kot amnhĩ tomnuj o mê pa xwýnhjaja na htem Tĩrtũm kôt amnhĩ nhĩpêx kêt nê. No kêt mê kot amnhĩ to mex o ri mê pa xwýnhjaja na mê kêp Tĩrtũm kra jakamã kêr ka mê ã mê kot amnhĩ nhĩpêx anhýr xwýnhjê kôt pix mã amnhĩ nhĩpêx.

Temêtre jarênh

¹² Nê Temêtre na hte tãm ri amnhĩ nhĩpêx nê ãm hãmri Tĩrtũm kapêr o mê ahkre mex nê nhũm mê piitã axpên mã mex ã harê. Pa hte ijaxwýja mê kãm mex ã harênh o ri mê hkôt ixpa ka htem inhma. ãm hãmri na pa hte tanhmã harênh to ho ri ixpa.

Kagà jatur xà

Sikũn Juãw 12-13

¹³ E kagàja kamã na pa ãm ja pix jarê nê hã kagà nê awýr kumê Gajore. Na pa kormã harênh jatur xà mênh kêt nê.

¹⁴ Nom kot paj tokyx ma awýr mõi hãmri nê rĩ kormã amã hatur xàm kumê.

E kê Tĩrtũm akutã nojarêr rãhã ho pa.

Nê ota jar Kris kôt akràmnhwýjaja awýr hpêr mê. Nê kêr ka atar Kris kôt ixkràmnhwýjê mã ijarê.

Tã ãm ja pix. Ixpê Juãw pigêtre na pa ã awýr kagà nhĩpêx nê mênh anê.

Jutre

Jutre kot Jejus kôt hkwýjê piitã hwýr kagà nê mênh

Jutre na pre kagàja nhípêx. Xiakre pyrã nê kêp Jejus tō na pre. Tã kagàja nhípêx nê krī piitã hkôt Jejus kôt hkwýjê hwýr kurê. Na pre mē hkwýjaja kêp Jejus kwý hã amnhī jarēnh tã axtem nê tanhmã amnhī tomnuj to ho pa. Jakamã nhūm Jutre kagàja kamã Jejus kwýjê mã hprī hã tanhmã mē harēnh to nê mē kot mē hkôt amnhī nhípêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagà nhípêx nê mē awýr kurê. Tirtūm kot ixpyrã nê amnhī kaxyw mē axunhwýr xwýnhjê hwýr. Mēpanhīpêxã Maati Tirtūm kãm mē pahpiitã mē pajapê jakamã na hte Kra Jejus Kris mē wa mē pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhī nhípêx to ho ri ixpa. Nê ixpê Xiakre htō na pa.

² Na pa hte mē ato Tirtūm wýr ho ixpa nê kãm:

—Pa Tirtūm. Kwa mē kot Akra Jejus kôt amnhī xunhwýr xwýnhjê pumu nê amã mē hapê hã mē kamã axukaprī rãhã ho apa. Kê mē kamã amnhī krit nê àmnhīx hamakêtkati nê ri tanhmã amnhī nhípêx to ho pa. Nê mē kãm axpên kīnh o ri axpên kôt pa. Anê.

Mē kot Tirtūm kapêr o hêx xwýnhjê jarēnh

Wam Ximotre 1.18-20, 6.12

³ E ixkrãmnhwýjaja. Nã inhã mē akīnh. Na pa pre jãã mē amã kagà hkwý nhípêx kaxyw. Mē pahte Jejus Kris kukwak ri amnhī nhípêx nyw ã tanhmã mē pajarēnh to nê hã kagà kaxyw tã kormã harēnh kêt nê. Kot paj axtem mēmoj jarê. Na pre Tirtūm mē pamã kot amnhī nhípêx o amnhīrit pa. Nê kapêr o amnhīrit pa. Mē pahte mar nê hkôt amnhī nhípêx

kaxyw. Jakamã kêr pu mē kapêr mar týx nê amnhī krã hī kamã haxàr týx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê ãm ama.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhī xunhwýr ã amnhī jarê nom amnhī to hêx. Ka xep mē aprī hã mē hêx ã mē omunh kêt nê mē kêp Jejus kôt mē atō hã mē hkamnhīx nê atýx amnhī nhōrkwý hwýr mē awý. Nom mē kot Tirtūm kapêr o hêx pix kaxyw na htem mē akôt pa nê mē amã kapêr o:

—Tirtūm kãm mē pajapê htýx kumrêx nê mē pakutã nojarêt ho pa jakamã kwa kêr pu mē mãmrī nhãm mēnijê ho amnhīkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihtī hã harê nom kêp mē panhō patrãw rý kêp mē panhō Pahihtī hkêt. Anê.

Ã Tirtūm kapêr kuhpa hã mē amã harēnh anhýr o pa. Tirtūm kapêr ã kagà htūm kot amnepê mē hkukamã tanhmã mē harēnh to nê mē harēnh kot:

Ã mē kapêr anhýr o paja mýrapê koja mē mex kêt nê pa. Koja Tirtūm mē homnuj týx kumrêx.

Anhýr o kot mē harēnh. Tã pa mē amã ixprī hã mē harê nê hã kagà. Mē ate inhmar nê amnhī nê mē omunh mex kaxyw.

Tirtūm kot tanhmã mē kot amnhī tomnuj xwýnhjê nhípêx to hã harēnh

Sikūn Pêtre 2.1-17; Sikūn Ximotre 3.1-9

⁵ Nê amnepê mã mē panhīgêjtjaja kormã Ejit kamã mē pa ri nhūm Tirtūm Ejit nhō xwýnhjê rūm mē kator pa. Hãmri nhūm mē hkwýjaja tanhmã hamaxpêr to nê axtem nê amnhī kaxyw hkôt hamaxpêr kêt nê. Nhūm tee ri amnhī tã mē omu nê ã mē kot amnhī nhípêx anhýr xwýnhjê nhīmex pa. Ra mē ate mē harēnh mar mex tã pa axte mē amã mē harê.

⁶ Nē Tirtūm kapēr o mē wryk xwýnh kwýjaja. Na prem Tirtūm nhý hã kapēr o pa htã tanhmã hamaxpēr punuj to nē ra kãm ja ho anhýr prãm nõkati nē Tirtūm kaga. Jakamã nhũm mē hã amýné nhũm mē unē nē kàx o mē hkaxpre pa. Nē nhýri pika kaxwýnh kãm kamàt kô htyk kãm mē kurē nhũm mē arĩ kamã hkrĩ ho hkrĩ. Nom koja nhýrmã Tirtūm kot tanhmã mē pahpiitã mē pajarēnh to xà hã arĩgro kato nhũm mē rĩ kormã hapôx pa. Hãmri nē kot amnhĩ tomnuj mýrapê ma mē kot amnhĩ xà htýx kamã hamak tũm xàta wýr ma hapêx.

⁷ Nē krĩ pē Sotō nē Komo nhõ xwýnhjaja na prem haxwýja kãm Tirtūm kapēr kôt amnhĩ nhĩpêx prãm kêt nē. Nē krĩja wa hpuhã krĩ hkwý kamã ri mē pa xwýnhjaja haxwýja mē urak nē nē kãm kapēr mar prãm kêt nē. Na prem amnhĩ tomnuj týt rãhã ho pa. Nē axtem nē axpēn pē ri mē hprō ho amnhĩkati ho pa. Nē mēmy hkwýjaja ri axtem nē axpēn to amnhĩkati ho pa. Hãmri nhũm Tirtūm tee ri mē kot amnhĩ nhĩpêxja ã omu nē mē hipy kuwy hpôk kwý rē nhũm mē amnhĩ wýr omu nē kãm ma xàj tee ri hprôt kaprý. Nē hprôt kaxyw òrkwý rũm hapôj nē hxêt pa nē hapêx. Na hte ã Tirtūm mē kot amnhĩ tomnuj o mē pa xwýnhjê nhĩpêx anē. Jakamã koja nhýrmã kuwy hpôk rãhã xwýnhhta wýr mē piitã mē rēnh pa nhũm mē kamã amnhĩ xà htýx kamã hamak rãhã ho pa ho pa nē aa à hapêx kêt nē. Nē à htýx rãhã papa ho pa. Tã mē pahte Sotō mē Komo nhõ xwýnhjê jarēnh mar nē mē pahte amnhĩ tomnuj kaga kurē kumrêx kaxyw na pre Tirtūm ã mē pamã mē harēnh o amnhĩrĩt anē.

*Mē hpijaàm kêt xwýnhjê jarēnh
Sikũn Pêtre 2.10*

⁸ Nē mē kot Tirtūm kapēr o pihkàr xwýnhjaja na htem ã mē kot amnhĩ nhĩpêx anhýr xwýnhjê pyrã nē amnhĩ tomnuj týt pix o ri pa. Jakamã na htem tanhmã hpimtir punuj to hãmri nē hkrã hapôj nē hpimtir xà hkôt tanhmã amnhĩ tomnuj to. Jao hkwýjê

kamã hpijaàm kêt o pa. Rý mēnijê hõ rý mēmyjê hõ nhũm mē axpēn kãm hpijaàm kêt o pa. Rý Tirtūm kapēr o mē wryk xwýnhjê ho kapēr punuj nē. Kapēr mã gêt o tanhmã mē ho kapēr punuj to. ã na htem hpimtir punuj xà hkôt amnhĩ tomnuj o pa anē.

⁹ Tirtūm kapēr o mē wryk xwýnh krãhtũm Mikewja. Kêp mē hkrãhtũm tã aa mē kãm kapēr mã gêt kêt nē. Na pre Mojes ty nhũm Mikew ra ma hwýr tēn wry. Nē kuri Satanasti pumu hãmri nē Mojes nhĩ nē tanhmã kãm kapēr to. Nom kapēr mã gêt o kãm kapēr kêt nē. ãm kapēr mã hprĩ ho kãm kapēr nē kãm:

–Kwa ãm omu kê nõ. Kot kaj tanhmã ho nhũm Tirtūm apumu nē hã tanhmã hã ato. Anē.

¹⁰⁻¹¹ Nom ixte mē amã mē hpimtir punuj jarēnh xwýnhjaja. Mē kot Tirtūm kapēr o pihkàr xwýnhjaja kot hprĩ hã Tirtūm kot amnhĩ nhĩpêx ã harēnh mar kêt jakamã na htem htýx ri ho kapēr o haprý ho pa. Te ho mry xoprêja hamaxpēr kêt nē htýx ri amnhĩ nhĩpêx o pa pyrãk. Nom koja nhýrmã Tirtūm mē homnuj týt nē.

Te mē kot finat Kaĩ kot amnhĩ tō hpĩr xwýnh kot amnhĩ nhĩpêxta pyrãk. Nē te mē kot finat Paraãw kot amnhĩ nhĩpêx pyrã nē kãxpore rũnh prãm xàj Tirtūm kapēr kuhpa hã tanhmã amnhĩ nhĩpêx to ho pa. Nē te mē kot finat Kore kot amnhĩ nhĩpêx pyrã nē Tirtūm kot mē kaxyw mē õ pahi xãm xwýnhhta kutã amnhĩ xunhwý. Mýrapê koja mē jajê pyrã nē kuwy hpôk rãhã xwýnhhta wýr ma hapêx pa.

¹² Na ka htem apê Jejus kwý hã axpēn wýr akuprō. Nē tōhã mē apê hkwý hã amã axpēn kĩnh ã axàpkur kaxyw axpēn wýr akuprō. Nhũm ixte mē amã mē harēnh xwýnhjaja mē akôt agjê nē mē akutã apku. Jakamã kwa mē o kora mē amnhĩ nē mē omunh mex nē. Mē hipêx o te mē ate mē axàpkur xà hã mē anhõ kamã kēnre pumunh nē hanhir nē rēnh pyrã nē amnhĩ nhĩhkô hã mē pumu nē amnhĩ nē hanor kurē kumrêx. Na htem

hpijaam kêt kãm amnhĩ pix kukamã hamaxpêr pê apkur rũnh o pa.

Te na wrÿk kaxyw htyk rax nê môr nhũm mẽ kot omunh nê wrÿk ã hkamnhĩx tã nhũm kôk kot nhãm mênh nhũm wrÿk kêeta pyrãk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapêr jarênh mex pyrãk tã mẽ amã ho hêx.

Nê te mẽ kêp mẽmo pĩ hpàr ra ô mã tãm tã ãm htÿx rã nê aa ô hkêt nhũm mẽ kot krãhÿr nê mênh nhũm grã parta pyrãk.

¹³ Nê te mẽ kêp gô xujanãr kot amnhĩ nhĩpêx pyrãk. Na hte gô xujanãrja hakàx wÿr kapê nê mra nhũm hamrô kýxpê amgrã kamã arĩk nhũm gô awjanã nê ma akupÿm hipôk wÿr mra. Ja pyrãk na htem ma nhÿhÿm mra nê mẽ kãm mẽmojarê nê nhãm mra nê mẽ kãm mẽmojarê nê ma akupÿm mẽ kurũm mra. Nhũm mẽ mar xà hkôt amnhĩ tomnuj rãhã ho pa.

Nê te mẽ kot kaxkwa hã kanhêre nhÿhÿm htêm nhũm mẽ kot nhÿhÿm htêm xà hkôt omunh kêeta pyrãk. Jakamã koja Tĩrtũm nhÿrmã kamãt kô kamã mẽ rênh pa nhũm mẽ aa hapôx kêt nê.

*Mẽ kot amnhĩ tomnuj xwÿnhjê hkukamã mẽ harênh
Apokarip 20.11-15*

¹⁴ Nê na pre finat Enokja anepê mã ã mẽ kot amnhĩ tomnuj anhÿr xwÿnhjê hkukamã tanhmã mẽ harênh to. Mẽ kot Tĩrtũm kapêr o pihkàr o ri mẽ pa xwÿnhjaja nhũm mẽ hkukamã mẽ harê. Enokja finat Atãw kanrêhã htãmnhwÿ na pre. Tã ã mẽ kot amnhĩ tomnuj anhÿr xwÿnhjê hkukamã mẽ harênh o:

Koja nhÿrmã Pahihtija man pika hwÿr akupÿn wrÿ. Kapêr o mẽ wrÿk xwÿnh xohtô rax mẽ mẽ hpimràatã akupÿn wrÿ.

¹⁵ Hãmri nê mẽ pahpiitã kormã mẽ pahitir ri mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarênh to. Hãmri nê mẽ kot Tĩrtũm kapêr o hêx o pa xwÿnhjê pumu nê tanhmã mẽ

harênh to nê mẽ harênh o: “Jajaja na pre mẽ kãm Inhĩpêxà Tĩrtũm prãm kêt nê ri kapêr kwÿm pix mã amnhĩ nhĩpêx o pa. Nê kapêr punuj o pa. ã na prem amnhĩ nhĩpêx anhÿr rãhã ho pa.” Anhÿr o mẽ harê nê amnhĩ nê kuwy hwÿr mẽ kurê nhũm mẽ amnhĩ xà htÿx kãm hamak o pa rãhã nê pa ho pa. Anê.

ã na pre finat Enokja mẽ hkukamã mẽ harênh anê.

¹⁶ ãm hãmri na mẽ harê. Tã na hte arĩ mẽ hkwyjaja ã amnhĩ nhĩpêx anê. Nê hamaxpêr mex kêt nê. Na htem nhãm tanhmã mẽ ho kapêr punuj to pix kukamã hamaxpêr. Nê amnhĩ krã hkôt htÿx ri tanhmã amnhĩ tomnuj to ho pa. Nê amnhĩ to jarkrar rãhã nê. Nê hêx rom mẽ kêp mẽmojarê jamÿnh kaxyw tanhmã mẽ kãm hêx to.

¹⁷ E Kris kôt ixkrãmnhwÿjaja. Koja mẽ ã mẽ amã Tĩrtũm kapêr o hêx anhÿr o mẽ akôt pa ka mẽ ama nê ãm mẽ ama nê mẽ kapêr mar kêt nê. ãm mẽ panhõ Pahihti Jejus Kris nhÿ hã mẽ ajahkre o mẽ pa xwÿnhjaja kot tanhmã mẽ amã mẽ harênh toja mã mãn kêt ajamaxpêr tÿx rãhã o ri apa.

¹⁸ Na prem mẽ amã mẽ harênh o:

—Jesús akupÿn wrÿk xwÿj ri koja mẽmojaja mẽ awÿr mran pôj. Nom mẽ kot Jejus kapêr kwÿm amnhĩ krã hkôt tanhmã amnhĩ nhĩpêx to xwÿnhjaja koja mẽ. Hãmri nê mẽ apê Jejus kwÿ hã mẽ apumu nê mẽ atã akunha nê mẽ atã hpêr o axkê nê Tĩrtũm ã hpêr o axkê nê kapêr ã kagã hã hpêr o axkê. Anê.

¹⁹ ã mẽ kot amnhĩ nhĩpêx anhÿr xwÿnhjaja mẽ pahpê Jejus kwÿjaja mẽ pahte axpên kutã amnhĩ xunhwÿrja na mẽ kãm hprãm. Mẽ kamã Tĩrtũm Karô gjêx kêt jakamã mẽ kãm amnhĩ krã hkôt pix mã tanhmã amnhĩ tomnuj to ho pa hprãm.

Mẽ pahte Kris akupÿn wrÿk jamãr pê tanhmã amnhĩ nhĩpêx to hã mẽ pamã karô

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikũn Pêtre 3.12-15

20 Kwa mẽ apê Jejus kôt ixtõ nê ixtõxjaja kêr ka mẽ ã mẽ kot amnhĩ nhĩpêx anhỹr o mẽ pa xwýnhjê rom apkati mẽ amnhĩ kaxyw Jejus pix mã mân ajamxpêr rãhã ho ri apa. Te mẽ kot mẽ hakre hã ra àptàr nê amnhĩ krãm mẽ hakre xà jagjênh tỳxta pyràk.

Jao Tĩrtũm kapêr mar tỳx nê hkôt amnhĩ nhĩpêx mex o ri apa.

Nê Karõ nhỹ hã amnhĩ to hwỳr rãhã nê.

21 Nê Tĩrtũm kãm mẽ pajapê hã kãm ajamxpêr rãhã ho ri apa.

Nê Pahihti Jejus Kris kãm mẽ pajapê hã kãm ajamxpêr tỳx rãhã ho apa.

Koja nhỹrmã kãm mẽ pajapê hã akupỹn mẽ pahwỳr wrỳ nê tanhmã mẽ pahto mex to pu mẽ kuri pahĩr tũm nê pahkĩnh nê papa ho papa. Tã kêr pu mẽ arĩ akupỹn mẽ pahwỳr wrỳk xà hã arĩgro jamãr rãhã ho papa.

22 Nê mẽ pahkwỳjaja kormã mẽ kot Jejus kôt amnhĩ xunhwỳr tỳx kêt xwýnhjaja kêr ka mẽ kamã axukapĩ nê aprĩ hã mẽ kãm Tĩrtũm kapêr jarênh o ri mẽ hkôt apa.

23 Na pre ra mẽ hkwỳjaja mẽ kot Tĩrtũm kapêr o pihkàr xwýnhjê kapêr ma nê mẽ hkôt amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpôk rũnh nê mẽ hpa hã mẽ hamýnh nê nhãm mẽ rênh pyràk o mẽ hipêx. Jao mẽ kot nhỹrmã Tĩrtũm kapêr o pihkàr xwýnhjê hkôt kuwy hpôk rũnhhta wỳr pa pymaj mẽ nê mẽ kãm akapêr kãm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwýnhjaja kêr ka mẽ kamã axukapĩ ho ri apa nê mẽ kamã agryk tokyx anhỹr kêt nê. Xatã mẽ kãm Tĩrtũm kapêr jarênh rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nê. Kwarĩ ho kwarĩ.

*Jutre kot Tĩrtũm mã mex o mex ã harênh
Wam Pêtre 1.5-7*

24 Nê kêr pu mẽ Tĩrtũm mã amnhĩ jarênh kaxyw nê ã kãm amnhĩ jarênh anê nê kãm:

—Pa Tĩrtũm. Nà ãm hãmri na ka hte amnhĩ kôt mẽ ixunhwỳr tỳx nê pa mẽ akaga hkêt nê akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nê. Nê amnhĩ to mex pê anhĩrã htỳx rax kãm ixpa. Jao ixkĩnh tỳx nê ixpa ho ixpa.

25 —Apê mẽ inhõ Tĩrtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nê na ka hte anhĩrã htỳx rax rãhã ri apa. Nê amex o amex nê axihtỳx o axihtỳx nê axàhpumunh o axàhpumunh. Nê apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nê. Tã arĩ ã ate amnhĩ nhĩpêx anhỹr ho apa ho rãhãã. Nê kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anê.

E kêr pu mẽ ã Tĩrtũm mã mex o mex ã harênh anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nê kumê.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pè Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pè Patos wýr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwýjê to ho pa nhũm mẽ hkwýjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnen hã kagà. Hãmri nê mẽ pamã hã kagà o:

1-2 E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarênh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nê kot amnhĩ xô ri inhmã ujarênh kaxyw man ixwýr kapêr o wrýk xwýnh mẽ nhũm man ixwýr wrý nê ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwýnhjê mã harẽ nê hã kagà. Mẽ ate

mar nê axkãm ajamak rom nê ri apa kaxyw. Nà ixte hã kagà mã xwýnhja koja tanhmã amnhĩ to nê tokyx mẽ pahwýr wrý.

³ Jakamã kwa kêr ka mẽ aprĩ hã kagàja kamã harẽ nê ama nê hkôt pix mã amnhĩ nhĩpêx nê mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarênh mar nê hkôt amnhĩ nhĩpêx xwýnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

*Juãw kot krĩ pè 7 kôt Jejus kwýjê
hwýr kagà rẽnh*

⁴ E ixpê Juãw kot paj atar pika pè As kamã krĩ pè 7 piitã hkôt mẽ apê Jejus kwý hã axpên wýr mẽ apikuprõnh xwýnhjê hwýr kagà nê kurê ka mẽ kamã harẽ nê ama.

Na pa hte mẽ ato Tĩrtũm wýr rãhã ho ri ixpa. Nê mẽ ato hwýr o:

—Pa Tĩrtũm. Kwa kêr ka pika pè As kamã akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê àmnhĩx ri pa ho pa. Ja na inhmã hprãm. Anê.

Tĩrtũmja rãhã ho rãhã. Annepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptar ã hkrĩ xà kamã mẽ papytar rãhã ho hkrĩ.

Nê Tĩrtũm Karõ te kot Tĩrtũm kot mẽ pahto amnhĩptar xà hã hkrĩ xà kapem kanê maati pixi kamã kwryt pè 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵ Nê Jejusja na pre hte Tĩrtũm kapêr o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte

amnhĩ tomnuj pānhā amnhĩre. Jao te mẽ pahte amnhĩ tomnuj pē mẽ papytār par pyrāk o mẽ panhĩpêx.

⁶ Nē na pre mẽ pahpē patre nē mẽ piitā mẽ ho Hipêêxà Tĩrtũm wỳr o papa kaxyw mẽ paxunhwỳ. Nē kēp mẽ panhō Pahi Maati hā kām hprām xà hkôt mẽ pahte kām tanhmā amnhĩ nhĩpêx to ho papa kaxyw mẽ paxunhwỳ. Jakamā kwa kēr pu mẽ kām mex o mex nē hihtỳx o hihtỳx ā mǎn harēnh rāhā ho papa.

⁷ Nē koja tokyx akupỹn mẽ pahwỳr kakrā kamā wrỳ pu mẽ pahpiitā wrỳk kām omu. Nhũm mẽ kot hpĩr xwỳnhjaja tee ri amnhĩ wỳr omu. Nē pika piitā hkôt ri mẽ pa xwỳnhjaja omu nē mẽ kot amnhĩ tomnuj jakamā tee ri amnhĩ kukamā hamaxpēr o kām ma htỳx kumrēx. Hāmri nē kām ma xàj mur nē htertet o kuhê. Koja nhỹrmā Jejus akupỹn wrỳ nhũm mẽ amnhĩ wỳr omu nē ā amnhĩ nhĩpêx anē.

⁸ Nē Tĩrtũm na hihtỳx o hihtỳx nē àhpumunh o àhpumunh. Nē aa kot mēhō ni rũm kator kêt. Na hte amnhĩ jarēnh o:

—Ixrāhā ixpa xwỳnh na pa. Amnepê mã kormā mẽmoj piitā hkêt ri pa pre ra ixrāhā ri ixpa ho ixpa. Nē koja nhỹrmā mẽmoj akupỹm hapêx tǎ pa arĩ ixrāhāã. Anē.

Juāw kot Jejus akupỹm htĩr ā omunh

⁹ Nē ixpē Jejus kôt mẽ atō Juāw na pa hte mẽ apyrà nē Jejus kôt amnhĩ nhĩpêx nhũm hte mẽ kām Jejus kurê xwỳnhjaja mẽ apyrà nē hā inhĩpêx kati ho pa. Mē pahte hkôt ri amnhĩ nhĩpêx o papa jakamā na htem hā mẽ pahtomnuj tỳx rāhā ho pa. Tǎ pu htem y hā mẽ kutā amnhĩ to htỳx nē arĩ hkôt amnhĩ nhĩpêx. Jakamā na pa pre Tĩrtũm kapēr o mẽ ajahkre rāhā ho ri mẽ akôt ixpa. Nē Jejus kēp mẽ panhō Pahihti hā mẽ amā harē. Mỳrapê na prem hā ixpynê nē man amnē ixto tē nē jar gō hipōk pē Patos kām inhmē pa kamā ixpē prēs nē ixpa ho ixpa.

¹⁰ Tǎ nhũm tōmĩk pa Tĩrtũm mã amnhĩ jarēnh o nhỹ. Hāmri nhũm Karō tanhmā ixkrā hto pa te ixpimtir kām mẽmoj pumunh pyrà nē amnhĩ katut kôt mēhō kapēr ma. Te kot pifti kakōr tỳx pyrāk pa kuma.

¹¹ Hāmri nhũm inhmā kapēr nē inhmā:

—Pa Juāw? E kot paj amā mẽmoj to amnhĩrĩt ka omu nē akwỳjê mã hā kagà. Nē hā kagà hpa hāmri nē ahpỹnhā krĩ hkwỳ hkôt mẽ kēp ixkwỳ hā axpēn wỳr mẽ pikuprōnh xwỳnhjê hwỳr arē. Mē kot kamā harēnh nē mar nē axkām hamak rom nē ri pa kaxyw. Epes wỳr nē Emĩnā hwỳr nē Pekamō hwỳr nē Xijaxir wỳr nē Satre hwỳr nē Pirate hwỳr nē Raxisej wỳr. Krĩ pē 7ja piitā hwỳr ixkapēr ā kagà nē mẽ hwỳr arē kē mẽ apyrà nē mẽmoj jarēnhja ma. Anē.

¹² Hāmri pa ixte mēhōja pumunh kaxyw ho ijakēx nē kanē hkwỳ pumu. Kanē kēp 7 nē piitā ôr o.

¹³ Nē kanē nhĩpōk ri mēhōja te panhĩ pyrà nē pahi hā ê mex kām xa. Éja hpar kōn kôt hitep nhũm xa. Nē pahi hā mẽ hinō hpre xà ho amnhĩ nhĩnō hpre nē xa. Hinō pre xàja ôr pix o.

¹⁴ Nē hkrā hkĩ te kaxàt nhĩ jaka pyrà nē hakaajre. Nē no te kuwy hpōk pyrà nē hkarỳr tỳx nē.

¹⁵ Nē hpar te mẽmo kàx karỳr tỳx pyrāk. Nē kapēr te gō hprōt tỳx koko pyrāk.

¹⁶ Na pre upōk rũm kanhêti ho 7 nē hamỳ nē o xa. Nē hakwa rũm wapo pōm kato nē akutā wa gixre nē ajêt. Nē hkuk kamā hirā htỳx kumrēx. Te myt kot mẽ pano hā harir nhũm gêk tỳx pyrāk. Ā mēhōja kot anhỹr.

¹⁷ Pa tee ri tanhmā kute hā omu nē inhmā ma htỳx kumrēx nē umaj tēm nē hpar pē te ixtyk pyrà nē nō. Hāmri nhũm ixtā upōk rũm ĩhkraja xi nē inhmā kapēr nē inhmā:

—Kwa amā ixpuma hkêt nē. Pa na pa. Amnepê mã kormā mẽmoj kator kêt ri pa pre raa. Nē ixrāhāã. Koja nhỹrmā mẽmoj akupỹm hapêx pa arĩ ixrāhā ixpa ho ixpa.

18 —Na pa pre ty tā akupŷm ixtīr. Nē ixtīr o ixtīr. Kam ixpumu. Kot paj axte ixtyk kêt nē. Ixpê mēhtykjê hpâm jakamã papxipix na pa hte mē htyk ã arĩgro jarê nhũm mē hã ty nē ma mēhtykjê papxà hwŷr ma pa.

19 —E kêr ka ate mēmoj pumunh xwŷnhhta pumunh tŷx nē akwŷjê mã hã kagà. Nē mēmoj kormã kot amnhĩ nhĩpêx kêt nhũm ate omunh mã xwŷnhhta ka inhŷ hã mē kãm hã kagà. Mē kot kamã harênh nē mar tŷx kaxyw.

20 —Nē kot paj axte ixprĩ hã ate mēmoj pumunh xwŷnhhta jarê ka inhma. Nã kanê pê 7ta te mē kot krĩ hkwy pê 7 kamã mē kêp ixkwŷ hã axpên wŷr mē pikuprõnh xwŷnhjê pyrãk. Nē inhĩhkra kamã kanhêti pê 7ta te kêp inhmã mē kot mē hamãr xwŷnhjê pyrãk. Anê.

2

Epes kamã Jejus kwŷjê hwŷr kagà

1 Nhũm Jejus arĩ inhmã kapêr nē inhmã:

—E kêr ka krĩ pê Epes kamã ixkwŷjê jamãr xwŷnh wŷr kagà nē amê. Nē kagàja kamã mē kãm ixkapêr jarê nē mē kãm:

Pa Epes kamã ixkapêr mar kaxyw axpên wŷr apikuprõnh xwŷnhjaja. Ot pa mē awŷr ixpêr mē. Ixpê ixupôk o kanhêti ho 7 nē hamŷnh nē ho ixãm xwŷnhhta na pa. Nē ixpê ôr o kanê pê 7 nhĩpôk ri ixpa xwŷnhhta na pa ã mē awŷr ixpêr mēnh anê.

2 Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nē pa ja hã mē apumu. Mē kot ixtã mē anhĩpêx kati htã ka mē kutã amnhĩ to htŷx nē ixkaga hkêt nē. Nē mē kot amnhĩ tomnuj xwŷnhjê hkôt amnhĩ nhĩpêx o ri apa hkêt nē. Nhũm ixte mē awŷr mē rênh ã amnhĩ to hêx xwŷnhjaja mē awŷr pan pôj ka mē aprĩ hã mē kot amnhĩ to hêx ã mē omu. Hãmri nē tee ri mē kot amnhĩ nhĩpêx ã mē omu nē amnhĩ nē mē

hanor kurê kumrêx. ãm hãmri na ka htem ã mē hipêx anê.

3 Nē mē kãm ixkurê xwŷnhjaja kot tanhmã ixtã mē atomnuj tŷx to htã ka mē kutã amnhĩ to htŷx nē aa ixkaga hkêt nē. Nē ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhŷr o ri apa.

4 ãm mēmoj pixi na ixpê omnuj. Amnepê mã kormã mē ate ixkôt amnhĩ xunhwŷr nyw ri na ka prem amã axpên kĩnh nē axpên to mex o ri apa. Nē mē amã axpên mã ho te mē amã amnhĩ mã ma pyrãk o axpên nhĩpêx. Tã tanhmã ajamaxpêr to nē axte ã axpên nhĩpêx anhŷr kêt nē. Jao te mē amã ixkĩnh kêt pyrãk o amnhĩ nhĩpêx. Pa tee ri ja hã mē apumu nhũm ja inhmã mex kêt nē.

5 Kwa mē tokyx ja hã amnhĩ pumu nē akupŷm mē ate ixkôt amnhĩ xunhwŷr nyw ri mē ate axpên nhĩpêxta o akupŷm axpên nhĩpêx o apa. Kot kaj mē anhŷr kêt kot paj te mē apê mē anhõ kanê hpyr nē kapôt ã mēnh pyrãk o mē anhĩpêx ka mē ri apa nē gaa nē apikaprãr pa. Tã mēhõ koja mē amŷr pê mē anhõ krĩ kamã mē kãm ijarênh o pa?

6 Nē mē kêp Nikoraw nhõ xwŷnhjaja na ka htem mē kot tanhmã amnhĩ tomnuj to hã mē omu nē ixpyrà nē apê ja hprãm nõkati nē mē hkôt ri amnhĩ nhĩpêx kêt nē. Pa ja hã mē apumu nē ixkĩnh nē.

7 Tã ixte mē amã ixkapêr jatur xà na ja. Kot kaj mē amã ixkapêr mar prãm hã kot kaj mē ã Tĩrtũm mē wa Ixkarõ nhŷ hã ixte mē amã ixkapêr anhŷrja ma nē kãm ajamaxpêr tŷx rãhã ho ri apa.

Tĩrtũm nhõ krĩ kamã mēmo pĩ hpãr kuhê xwŷnh. Mē kot ô hkur nē axte htyk kêt nē pa ho pa mã xwŷnhhta. Kot kaj mē ate amnhĩ tomnuj nê amnhĩ to htŷx nē arĩ inhmã hprãm xà hkôt amnhĩ nhĩpêx rãhã ty pa akupŷm mē ato

mē atīr nē ma pī hpārta wūr mē arē.
Ka mē ma hwūr mra nē ô hō hta
nē akrē nē axte atyk kêt kumrēx nē
apa ho apa.

E ām ja pix na hapêx. Anē.

—E Juāw. Kêr ka Epes kamā ixkwỳjê
jamār o pa xwỳnhhta wūr ā ixkapēr ā
kagà anē nē mē hwūr amē. Anē.

Hāmri pa kuma nē ô ri mē kām hā
kagà hpa.

Emīnā kamā Jejus kwỳjê hwūr kagà

⁸ Hāmri nhūm hpānhā Emīnā nhō
xwỳnhjê kaxyw inhmā kapēr nē
inhmā:

—Nē hpānhā Emīnā kamā ixkwỳjê
jamār xwỳnh wūr kagà nē mē hwūr
amē. Nē mē kām ixkapēr jarē nē nē
mē kām:

Pa Emīnā kamā ixkapēr mar
kaxyw axpēn wūr mē apikuprōnh
xwỳnhjaja. Ot pa mē awūr ixpēr mē.
Ixrāhā ho ixrāhā ixpa xwỳnhhta na
pa. Amnepēm kormā mēmoj piitā
hkêt ri na pa pre ixrāhā nē ri ixpa.
Koja nhỹrmā mēmoj akupỹm hapêx
pa arī ixrāhā ho ixrāhā nē ri ixpa.
Na pa pre ty no ām akupỹm ixtīr o
ixtīr. Tā pa ā mē awūr ixpēr mēnh
anē.

⁹ Nā na pa hte mē ate tanhmā
amnhī nhīpêx to ho apa hā mē
apumunh rāhā ho ixpa. Na hte
mē kām ixkurê xwỳnhjaja ixtā mē
atomnuj to ka mē apê amrakati
nē ri apa. Nom mē ate tām amnhī
nhīpêx jakamā te mē apê mē
hikukrêx rūnh kumrēx xwỳnhjê kot
amnhī nhīpêx pyrā nē ixkukwak ri
akīnh rāhā ri apa. Na hte mē kēp
Ijaew ā amnhī to hêx xwỳnhjaja mē
ato kapēr punuj rūnh o pa. Mē kot
Tīrtūm kôt amnhī nhīpêx ā amnhī
jarēnh tā no ām hkôt amnhī nhīpêx
kêt nē. Ām Satanasti kôt pix mā na
htem amnhī nhīpêx o pa.

¹⁰ Tā mē kām ixkurê xwỳnhjaja
kot ixtā mē atomnuj tỳx o pa htā kêr
ka mē amnhī tā mē omu nē tee ri
amnhī kukamā ajamaxpēr kêt nē.
Nē arī mē kutā amnhī to htỳx nē.
Koja Satanasti mē akwỳjê pynê nē
mē ajagjê. Hāmri nē mē ate ixkaga

hprām xāj tanhmā mē anhīpêx kati
hto ka mē hagjênh xā kamā amnhī
xā htỳx kamā ajamak o atā arīgro
pê 10. Nom kêr ka mē kutā amnhī
to htỳx nē ixkaga hkêt nē. Mē kot
mē apar mā tā ka mē kutā amnhī
to htỳx nē. Kot kaj mē aa ixkaga
hkêt nē ixkôt ri amnhī nhīpêx rāhā
ty pa akupỹm mē ato mē atīr nē ma
amnhī wūr mē ato api. Hāmri ka mē
Tīrtūm mē wa ixri amex nē atīr tūm
nē apa ho apa nē axte atyk kêt nē
apa.

¹¹ E ixkrajaja. Kot kaj mē amā
ixkapēr mar prām hā kot kaj mē ā
Tīrtūm mē wa Ixkarō nhỹ hā ixte
mē amā ixkapērja anhỹr ma nē kām
ajamaxpēr tỳx rāhā ho ri apa. Kot
kaj mē ate amnhī tomnuj nē amnhī
to htỳx nē inhmā hprām xā hkôt pix
mā amnhī nhīpêx rāhā ty. Hā kot
paj akupỹm mē ato mē atīr ka mē
ma kuwyta wūr apa hkêt nē.

E. Ām ja pix. Na hapêx. Anē.

—E Juāw. Kêr ka Emīnā kamā ā ixkrajê
mā ixkapēr ā kagà anē. Anē.

Hāmri pa kuma nē ô ri mē kām hā
kagà.

*Pekamō kamā Jejus kwỳjê hwūr
kagà*

Sikūn Korīt 6.14-7.1

¹² Nhūm Jejus arī inhmā kapēr nē
hpānhā inhmā:

—E hpānhā Pekamō kamā ixkrajê
jamār o pa xwỳnhja wūr kagà nē mē
hwūr amē. Nē mē kām ixkapēr jarē nē
mē kām:

Pa Pekamō kamā ixkapēr mar
kaxyw axpēn wūr mē apikuprōnh
xwỳnhjaja. Ot pa mē awūr ixpēr mē.
Ixpê ijakwa rūm pōm wapo akutā
wa gix nē kator nē ām xwỳnhhta na
pa mē awūr ixpēr mē.

¹³ Na pa hte mē anhō krī nhō
xwỳnhjaja kot tanhmā amnhī tom-
nuj to ho pa hā mē omunh mex
nē. Mē kot Satanasti kôt pix mā
ri amnhī nhīpêx o pa jakamā mē
anhō krī te kēp Satanasti nhō krī
pyrāk. Āxipas kot mē hkôt mē kām
ixkapēr o mē ahkre ho pa nē aa
hkaga hkêt tā nhūm prem axtem nē

ixtã kupĩ. Ka mẽ ja hã mẽ omunh tã mẽ umaj ixkaga hkêt nẽ arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anẽ.

¹⁴ Mẽmoj pixi na ixpê omnuj. Na hte mẽ akwỳjaja axtem nẽ Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nẽ amnhĩ xô ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nẽ mẽ kãm: “Mẽ mãmrĩ ma sãnti hã mẽ hkĩnh mã xwỳnhjê hkôt mra nẽ sãnti hã apku nẽ hã akĩnh. Nẽ mẽ urak nẽ axpên pê axpên prô ho amnhĩkati nẽ axpên pê ri axpên mjên o amnhĩkati nẽ mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã kapêr o pa nhũm mẽ kuma nẽ mẽ hkôt amnhĩ nhĩpêx. Tã ka mẽ akwỳjaja mẽ urak nẽ ã amnhĩ nhĩpêx anhỹr o apa. Kwa ja mex kêt.

¹⁵ Na hte mẽ akwỳjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnen mex kêt.

¹⁶ Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nẽ ãm mẽ omu nẽ nẽ tanhmã mẽ kãm akapêr to hkêt nẽ. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nẽ akupỹm ixkôt ri amnhĩ nhĩpêx mex nẽ. Kot kaj mẽ anhỹr kêt kot paj tokyx mẽ awỳr wrỳ nẽ te ijakwa rũm pôm wapo kator xwỳnhta o mẽ hkanhwỳr pyrak o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarô nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Nẽ kot kaj mẽ ate amnhĩ tomnuj nẽ amnhĩ to htỳx nẽ inhmã hprãm xã hkôt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm

Ijaew kapôt ã pa nhũm ixte mẽ hwỳr “manã” anhỹr xwỳnhta rênh nhũm mẽ kot hkur o pata pyrak. Nom ixte mẽ amã mẽ anhõja na hpimxur. ãm papxipix na pa hte mẽ kãm ôr o ixpa.

Nẽ kot paj mẽ atã mẽ anhĩxi nyw rẽ. Jao kên jakare hkwy hã ahpỹnhã mẽ anhĩxi nyw jaxwỳ nẽ mẽ amã kugô. Ka mẽ hamỳ nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Anẽ.

—E Juãw. Kêr ka Pekamõ kamã ixkrajê hwỳr ã ixkapêr anhỹr ã kaga nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kaga.

Xijaxir kamã Jejus kwỳjê hwỳr kagà

Jutre 3-23

¹⁸ Nhũm Jejus arĩ inhmã kapêr nẽ inhmã:

—E hpãnhã Xijaxir kamã ixkwỳjê jamãr xwỳnh wỳr kaga nẽ amẽ nẽ mẽ kãm ixkapêr jarẽ nẽ mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpôk karỳr tỳx pyrak xwỳnhta na pa. Nẽ ixpê ixpar te kot kax karỳr tỳx pyrak xwỳnhta na pa mẽ awỳr ixpêr mẽ.

¹⁹ Na pa hte mẽ ate amnhĩ nhĩpêx kôt mẽ apumunh mex o ri ixpa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tỳx kãm tanhmã amnhĩ nhĩpêx to ho ri apa. Nẽ axpên to mex nẽ ixkôt pix mã amnhĩ nhĩpêx o ri apa. Jao ra ixkôt amnhĩ nhĩpêx mex o wam mẽ ate ixkôt amnhĩ nhĩpêxta jakre. Nã ja inhmã mex kumrêx.

²⁰ ãm mẽmoj pixi na ixpê omnuj. Mẽ akôt niti ri pa xwỳnh Jejapewtita. Kêp Tĩrtũm nhỹ hã kapêr jarênh o pa xwỳnh ã amnhĩ to hêx xwỳnhntita. Na hte ixkapêr

kupa hã tanhmã mẽ ajahkre hto ka htem ama nẽ nẽ tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprýjê hwýr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjên o amnhĩkati. Nẽ mẽ kot sãnti hã mẽ hkĩnh nẽ hã apkur xwýnhjê hkôt mra nẽ mẽ hkôt amnhĩ nhĩpêx. Tĩrtũm kãm ja mex kênã.” Anhýr o mẽ amã kapêr o pa. Nẽ inhmã ja mex ã ijarẽ nom inhmã ja mex kêt. Tã ra mẽ akwýjaja kapêr ma nẽ hkôt amnhĩ nhĩpêx ka mẽ ja hã mẽ omunh tã amnhĩ nẽ nitita janor kêt nẽ nhũm arĩ ri mẽ amã hêx o ri mẽ akôt pa.

²¹ Ra kot ã amnhĩ nhĩpêx anhýr o mẽ akôt pa ry rax kumrêx tã pa kormã ja hã tanhmã ho hkêt nẽ kormã amnhĩ tã hamã. Kot ã amnhĩ nhĩpêx anhýr kaga kaxyw na pa kormã hamãr o ri ixpa. No nhũm aa hkaga hkêt nẽ.

²² Mýrapê kot paj tokyx tanhmã ho nhũm amnhĩ xà htýx kamã hamak o hikwý. Tã mẽ kot kapêr mar nẽ hkôt amnhĩ nhĩpêx xwýnhjaja kot amnhĩ tomnuj ã amnhĩ pumu nẽ hkaga hkêt hã kot paj mã mẽ ho anẽ nẽ. Mããnẽn tanhmã mẽ homnuj to nhũm mẽ nitita pyrã nẽ amnhĩ xà htýx kamã hamak o hikwý.

²³ Nẽ nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nẽ ixte mẽ apiitã ahpýnhã tanhmã mẽ ajamaxpêr to hkôt mẽ apumunh ã ixpumu. Nẽ ixte ahpýnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkôt tanhmã mẽ anhĩpêx to hã ixpumu.

²⁴ Na hte mẽ akwýjaja akwýjê rom nita kapêr ma nẽ ãm kuma nẽ hkôt amnhĩ nhĩpêx kêt nẽ. Nẽ mẽ kapêrja mẽ kot kãm: “Satanasti kapêr pimxur” anhýr xwýnhhta kôt nhũm mẽ amnhĩ nhĩpêx kêt nẽ. Na htem ixkôt pix mã amnhĩ nhĩpêx mex o ri pa. Tã ã mẽ ate ixkôt amnhĩ nhĩpêx anhýr o apa xwýnhjaja kot paj mẽ amã ja pix ã

karõ ka mẽ inhma.

²⁵ Kêr ka mẽ arĩ ixkôt pix mã amnhĩ nhĩpêx o ri apa rãhã pa akupýn mẽ awýr wrý. ãm ja pix ã kot paj mẽ amã karõ.

²⁶ Nẽ kot kaj mẽ ate amnhĩ tomnuj nẽ amnhĩ to htýx nẽ arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nẽ nhýrmã mẽ ate krĩ hkwý hkôt mẽ pa xwýnhjê ho amnhĩptàr o apa kaxyw mẽ axunhwý. Ka mẽ apê mẽ õ pahшти nẽ inhmã mẽ ho amnhĩptàr o ri apa.

²⁷ Na pre Inhĩpêxà ixte pika piitã hkôt ri mẽ pa xwýnhjê ho amnhĩptàr kaxyw ixãm.

Tã kot paj nhýrmã amnhĩ pyrã nẽ mẽ kaxyw mẽ axunhwý ka mẽ inhmã mẽ hamãr o apa.

Nhũm mēhõ ixkapêr kwým ri tanhmã amnhĩ nhĩpêx to ka mẽ ja hã omu nẽ hã tanhmã ho. Te mẽ kot poti punuj mýnh nẽ mēnh nẽ hkrakrak pyrãk.

²⁸ Kot paj ã mẽ ate mẽ hipêx anhýr o apa kaxyw mẽ axunhwý. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkôt kanhêti no hpõk rax japõx xwýnhhta kot paj te ixte mẽ amã õr pyrãk ka mẽ ixri atĩr tũm nẽ apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhý hã ixte mẽ amã ixkapêr anhýrja ma nẽ kãm ajamaxpêr týx rãhã ho ri apa. Anẽ. –E Juãw. Kêr ka ã Xijaxir kamã ixkrajê kaxyw ixkapêr ã kagã nẽ mẽ hwýr mēnh anẽ. Anẽ.

Hãmri pa kuma nẽ ô ri mẽ kãm hipêx nẽ mẽ hwýr kumẽ.

3

Satre kamã Jejus kwýjê hwýr kagã Rukre 12.35-40

¹ Nhũm Jejus arĩ inhmã kapêr nẽ inhmã:

–E hpãnhã Satre kamã ixkwýjê jamãr xwýnh wýr kagã nẽ mẽ kãm ixkapêr jarẽ nẽ mẽ kãm:

Pa Satre kamã ixkrajaja. E ot pa mẽ awÿr ixpër mẽ. Ixpê inhĩkra ho kanhêti pê 7 jamÿnh nê xãm xwÿnhhta na pa. Nê ixpê inhĩkra ho Tĩrtũm Karõ ãm pyxi htã te kamã kêp 7 jamÿnh nê ho ixãm xwÿnhhta na pa mẽ amã ixkapër.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpên mã mẽ ate ixkõt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhÿr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwÿ pyrãk.

² Na ka htem ãm akrãnh mã ixkõt ri amnhĩ nhĩpêx nom Tĩrtũm mẽ wa ixkõt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã anhũre nê wa ixkõt amnhĩ xunhwÿr tÿx nê.

³ Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapër o tanhmã mẽ ajahkre htoja mã ajamexpër nê amnhĩ tomnuj mã anhũre. Nê ixkapër kõt pix mã mãn amnhĩ nhĩpêx o ri apa. Kot kaj mẽ anhÿr kêt kot paj nhÿrmã mẽ ajaêr pê akupÿn mẽ awÿr wrÿ nê ja hã tanhmã mẽ ato.

⁴ ãm mẽ agrêre nê amã ixkõt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwÿnhjê hkõt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrãk. Tã kot kaj mẽ nhÿrmã ixri mẽ axê jakare kamã apa ho apa. Ra mẽ ate ja ho anhÿr mã tãm kênã. Ja na Tĩrtũm kãm hprãm.

⁵ Nê krĩ piitã hkõt mẽ ate amnhĩ tomnuj nê amnhĩ to htÿx nê inhmã hprãm xã hkõt amnhĩ nhĩpêx rãhã atyk xwÿnh piitã kot ka mẽ nhÿrmã Tĩrtũm mẽ wa ixri amex nê atĩr

tũm nê apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwÿnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt nê. Hãmri nê Inhĩpêxã mẽ kapër o mẽ wrÿk xwÿnhjê mã mẽ ajarênh o: “E mẽ jajê pumu. Ixkwÿ na mẽ.” Anhÿr o mẽ kãm mẽ ajarê.

⁶ E ixkwÿjaja. Kot kaj mẽ amã ixkapër mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapër anhÿrja ma nê kãm ajamexpër tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka ã Satrejê mã ixkapër ã kagà nê mẽ hwÿr mênh anê. Anê.

Hãmri pa kuma nê ô ri mẽ kãm hã kagà.

Pirate kamã Jejus kwÿjê hwÿr kagà Wam Tesarõn 2.13-16

⁷ Nhũm Jejus arĩ inhmã kapër nê inhmã:

—E hpãnhã Pirate kamã ixkwÿjê jamãr xwÿnh hwÿr kagà nhĩpêx nê amê nê mẽ kãm ixkapër jarê nê mẽ kãm kãm:

Pa Pirate kamã mẽ ate ixkapër mar kaxyw mẽ apikuprõnh xwÿnhjaja. E ot pa mẽ awÿr ixpër mẽ. Inhmex o inhmex xwÿnh na pa. Aa ixêx kêt nê ixpa xwÿnh. Amnepê mã na pre mẽhõja pahi Tawi mã òrkwÿ mex ã saf jamãr o pa. Tã pa hte urãk nê Inhĩpêxã Tĩrtũm nhõ krĩ hwÿr mẽ gjêx xã hã saf jamÿ nê ho ixpa. ãm papxipix inhõ saf jakamã papxipix na pa hte mẽ ate ixkõt amnhĩ xunhwÿr xwÿnhjaja mẽ agjêx kaxyw mẽ amã kahê xã rê nê ixkra hkêt xwÿnhjê pê kahê. Kot paj mẽ apê ixkrajê mã kahê xã rê ka mẽ hwÿr agjê. Hãmri pa mẽ atã kahê nhũm ixkra hkêt xwÿnhjaja tee ri kãm mẽ akõt gjêx prãm kaprÿ.

⁸ Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapër kõt amnhĩ nhĩpêx mex nê aa ixkaga hkêt nê. Jakamã kot paj te ixte mẽ amã Tĩrtũm nhõ

hakwakre kahê xà mēnh pyrək o mē anhîpêx ka mē axàmnhîx aja-makêtkati nê ma mē kām Tîrtûm kapêr o mē ahkre ho ri mē hkôt apa. Nhûm mē hkwÿjaja tee ri ã mē ate amnhî nhîpêx anhÿrja nê mē amã kapêr kaprÿ ka mē arî ho mē ahkre ho ri mē hkôt apa.

⁹ Nê mē anhõ krî kamã mē akwÿjaja na prem ra Satanasti hkôt amnhî xunhwÿ nê hêx rom mē amã amnhî to hêx nê mē amã: “E mē ixpê Ijaew mex jakamã kwa mē ixkapêr ma nê mē ixkôt amnhî nhîpêx.” Anhÿr o mē amã karõ htã no ãm mē kot Satanasti hkôt amnhî nhîpêx xwÿnh na mē. Tã kot paj nhÿrmã tanhmã mē homnuj to nhûm mē tee ri amnhî pumu nê akupÿm mē awÿr mra nê mē akutã hkõnkrã ho rôrøk nê hkrî nê mē amã: “Nã mē kajaja na ka pêr mē ixrom Jesus kôt amnhî nhîpêx. Mãn kãm mē ajapêê.” Anê.

¹⁰ Mē kot ixtã mē atomnuj tÿx nhûm mē ate amnhî xà htÿx kamã ajamak tã aa mē umaj ixkaga hkêt nê. Nê arî ixte mē amã mēmoj tã karõ xà hkôt mē kutã amnhî to htÿx rãhã arî ixkôt ri amnhî nhîpêx o apa. Jakamã mē kot nhÿrmã mē kãm ixkurê xwÿnhjaja pika pi-itã hkôt tanhmã mē homnuj tÿx to nhûm mē amnhî xà htÿx kamã ama. Tã kot paj mē anê mē omunh mex nê nhûm mē tanhmã mē ato hkêt nê ka mē amex nê ri apa ho apa.

¹¹ E kot paj tokyx akupÿn mē awÿr wrÿ nê mē ate ixkôt pix mã amnhî nhîpêx ã mē ato mex rax kumrêx. Jakamã kwa mē mãmri ã amnhî nhîpêx anhÿr o inhmã hprãm xà hkôt pix mã amnhî nhîpêx rãhã ty. Kot ka mē anhÿr kêt kot pa mē amã mēmoj mex nhõr kêt nê.

¹² Nê kot kaj mē kot amnhî tomnuj xwÿnhjê kutã amnhî to htÿx nê inhmã hprãm xà hkôt pix mã amnhî nhîpêx rãhã ty. Hã kot paj amnhî kôt mē ato mē axi-htÿx nê ka mē aa ixkaga hkêt nê.

Nê kot paj nhÿhÿnh mē atã mē inhîxi ho axkrunêpxi nê haxwÿ. Inhîpêêxã nhîxi nê inhîxi nyw nê Inhîpêêxã nhõ krî nhîxija kot paj nhÿhÿnh mē atã haxwÿ. Tîrtûm nhõ krî mē kot kãm: “Jerujarê nyw” anhÿr xwÿnhnta koja nhÿrmã tanhmã amnhî to nê ra kaxkwa rûm pika wÿr wrÿ.

¹³ E ixkwÿjaja. Kot kaj mē amã ixkapêr mar prãm hã kot kaj mē ã Tîrtûm mē wa Ixkarõ nhÿ hã ixte mē amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na ra hapêx. Anê.
—E Juãw. Kêr ka ã Pirate kamã ixkrajê mã ixkapêr ã kagã anê. Anê.

Hãmri pa kuma nê ô ri mē kãm hã kagã.

Raxisej kamã Jesus kwÿjê hwÿr kagã

¹⁴ Nhûm pre Jesus arî inhmã kapêr nê inhmã:

—E hpãnhã krî pê Raxisej kamã ixkrajê jamãr xwÿnh wÿr kagã nhîpêx nê amê. Nê mē kãm ixkapêr jarênh o:

Pa Raxisej kamã ixkrajaja. Ot pa mē awÿr ixpêr mē. ãm hãmri ixkapêr o ixpa nê aa ixêx kêt xwÿnhnta na pa. Jakamã ãm hãmri na pa hte Tîrtûm kapêr o mē ajahkre o ixpa nê aa ja kaga hkêt nê. Pa na ixpê mēmoj piitã hpãr krax.

¹⁵⁻¹⁶ Na pa hte mē ate tanhmã amnhî nhîpêx to ho apa hã mē apumunh rãhã ho ixpa. Kop apu mē ate ixkôt amnhî nhîpêx mex ronhÿx pa ja hã mē apumu nê ixkînh nê. Nom mē ate ã amnhî nhîpêx anhÿr kêt. No mãânên aa ixkaga hkêt nê. Na ka htem ri atÿx amnhî krã hkôt pix mã tanhmã amnhî nhîpêx to ho apa nhûm ja ixpê omnuj nê. Kot kaj mē arî ã amnhî nhîpêx anhÿr o apa pa hpãnhã amnhî nê mē akurê. Te mē kot gô xenh nõkati janhir nê tee hkakinh nê akupÿm hkapîr pyrək.

¹⁷ Mē ate inhmã hprãm xà hkôt amnhî nhîpêx ã amnhî jarênh tã ã amnhî nhîpêx anhÿr kêt nê. Nê

ixkapēr mar tỳx nē amnhĩ kaxyw inhmã ajamaxpēr mex kêt nē.

¹⁸ Kwa mẽ tokyx ja hã amnhĩ pumu nē akupỹm ixkôt amnhĩ xunhwỳr tỳx nē. Kêr pa ja hã mẽ apumu nē amnhĩ katut kôt mẽ ate amnhĩ tomnuj rē nē tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrīt to ka mẽ aprĩ hã ixte amnhĩ nhĩpêx ã ixpumunh mex nē ixkôt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapēr anē? Nà inhmã mẽ apiitã mẽ ajapê htỳx kênã. Nom inhmã mẽ ajapê htã ka htem ixkôt amnhĩ nhĩpêx kêt nē. Na pa tee ri amnhĩ tã mẽ apumu nē ja hã tanhmã mẽ atomnuj tỳx to. Tokyx mẽ ate amnhĩ tomnuj mã anhũrer nē hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nē akupỹm amnhĩ kaxyw inhmã ajamaxpēr ho ri apa.

²⁰ Na htem hkwỳjê nhõrkwỹ hwỳr gjêx kaxyw hakwa krem kãm àkjêr o kuhê nhũm mẽ kuma nē mẽ kãm anē nhũm mẽ hwỳr agjê. Nē mẽ ixkre hkre kamã axpên mã kapēr o hkrĩ rỳ axpên mã kapēr pê mẽmoj to hkôm o hkrĩ. Ja pyrã nē ot pa mẽ ajamãr o ixpa. Mẽ ate inhmã anhỳr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

²¹ Kormã mẽ kot ixpĩr kêt ri na pa pre mẽ kot amnhĩ tomnuj xwỳnhjê kutã amnhĩ to htỳx o ixpa. Amnhĩ to htỳx nē ri ixpa kamã ixtyk jakamã nhũm Inhĩpêêxà akupỹm ixto ixtĩr nē akupỹm amnhĩ wỳr ixto api. Hãmri nē amnhĩ nhĩhkô hã mẽ ho amnhĩptàr ã hkrĩ xà kamã inhỳr pa ixkrĩ ho ixkrĩ nē ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nē ate amnhĩ tomnuj nē amnhĩ to htỳx nē. Nē inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nē wa ixte mẽ

ato amnhĩptàr ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

²² E ixkwỳjaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỳrja ma nē kãm ajamaxpēr tỳx rãhã ho ri apa.

Tã ãm ja pix. Na hapêx. Anē. —E Juãw. Kêr ka Raxisej kamã ixkrajê mã ixkapēr ã kagà nē mẽ hwỳr amẽ. Nē kagàja piitã krĩ hkwỳ kamã ahpỹnhã ixkwỳjê hwỳr arẽ kê mẽ kamã harẽ nē ixkapēr ma. Anē.

Nhũm pre ã Jejus inhmã kapēr anē. Pa kuma nē ô ri mẽ piitã mẽ kãm hã kagà hpa.

4

Tĩrtũm kot mẽ ho amnhĩptàr ã hkrĩ xà jarênh

¹ Tã pa axte mẽmoj pumu nhũm kaxkwa hwỳr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mẽhõ kapēr tỳx xwỳnhta. Te kot pifti kakõr tỳx pyrãk xwỳnhta axte inhmã kapēr nē inhmã:

—E amnẽ ixwỳr api pa mẽmoj nhỹrmã kot tanhmã amnhĩ nhĩpêx to hkukamã amã ho amnhĩrīt ka omu. Anē.

² Hãmri nhũm Tĩrtũm Karõ tanhmã ixto nē ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptàr ã hkrĩ xà maatita pa pre omu. Nhũm kamã mẽhõja nhỹ.

³ Kuk kamã hirã htỳx kumrêx. Te mẽmo kên kamrêk karỳr jaxênh tỳx pyrãk. Nē kot mẽ ho amnhĩptàr ã hkrĩ xà puhã màxwỳxti grãgrãreja kãm hipôk nē harir pa omunh o xa.

⁴ Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkà htu nē ê jakare nē hkrĩ.

⁵ Nē Tĩrtũm hkrĩ xà maati rũm na katõtõk nē hkrakrak nē haxênh japã nē hikwỹ. Nē hkrĩ xà kapem kanê maati pixi kamã kwryt pê 7ja pòk rãhã ho kuhê. Kanêja te Tĩrtũm Karõ pyrãk.

⁶ Nē hkrī xà kapem mēmo te gô rax pyrākja hkarÿr jaxênh tÿx kumrêx nē nō. Te ho kàx karÿr jaxênh tÿx pyrà nē hkarÿy're. Nē hkrī xà puhã mēmoj tÿr nē kuhê pê kwat kuhê. Nē ôkwa nē katut piitã hkôt no. ãm no xohtô rax kumrêx. Na pre ã mēmoj kêp kwatja no xohtô anê pa omu.

⁷ Wamta te kot mry pê rêãwti pyrāk. Nē hkôt ja te kot môx myti pyrāk. Nē hapu hã hkuk te panhĩ hkuk pyrāk. No hapu hã ja te kot àanhãhti htor kaxyw hara koror pyrāk.

⁸ Nē piitã hara kêp 6. Nē ï piitã kamã no. Nhũm prem Tÿrtũm mã mex o mex ã grer rãhã ho kuhê nē aa pinhkrênh kêt nē. Nē kãm grer o:

Amex o amex Tÿrtũm.

Nē axihtÿx o axihtÿx.

Nē aa ate amnhĩ tomnuj kêt kumrêx.

Amnepê mã kormã mēmoj kêt ri ka ra arãhã ri apa. Tã arĩ arãhã ri apa xwÿnh na ka. Kot kaj aa ajapêx kêt nē.

ãm hãmri na ka hte mē ixto mex rãhã ho apa.

Nē amex o amex Tÿrtũm. Anê.

⁹⁻¹⁰ Nhũm prem xatã mē ho amnhĩptàr hkrī xà kamã hkrī xwÿnhja mē kot kãm "Rãhã pa xwÿnh" anhÿr xwÿnhhta mã ã grer anhÿr o kuhê. Kãm mex o mex ã grer pê tanhmã kot mē ho mex to hã harê. Hãmri nhũm mē àptàr tũm pê 24jaja mãânên kutã hkôn krã ho rôrôk nē hipô hpa nē hkrī. Nē amnhĩ krã rũm ôr o mē ahkàja kwry nē hpar pê haxwÿ. Kêp mē ô Pahi Maati hã hã hpijaàm kaxyw wantajê pyrã nē mex o mex ã harênh o hkrī nē kãm:

¹¹ ãm hãmri na pa htem amex o amex ã ajarê Tÿrtũm

Apê mē inhõ Pahi Maati na ka.

Nē apê mē inhõ Tÿrtũm na ka.

Na ka pre mēmoj piitã ho akato. Axàhpumunh tÿx nē ajamxpêr tÿx o mēmoj piitã amã hprãm xã hkôt ho akator pa.

Jakamã na pa htem ã amex o amex ã ajarênh anê. Mē ixrom axihtÿx mex kumrêx na ka hte apa Tÿrtũm. Anê.

5

Mē pahte amnhĩ tomnuj pãnhã amnhĩrer xwÿnh jarênh

Juãw 1.29; Piripos 2.5-11

¹ Tã pa pre arĩ te kaxkwa kamã mēmoj pumu. Mē ho amnhĩptàr ã hkrī xà maatita kamã hkrī xwÿnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nē akutã hã kagà nē menh ê ho ho htÿx xàja kêp 7.

² Hãmri nhũm Tÿrtũm kapêr o wryk xwÿnh xihtÿx xwÿnhja kapêr tÿx kãm kapêr o:

—E mē atõ na ate kagà mÿj pyr nē ho htÿx xà hpôt mã tãm? Anê.

³ Hãmri nē tee ri mē piitã mē hkapi nom nhũm ja kaxyw mēhõ amrakati kumrêx. Kaxkwa kamã amrakati nē pika kamã mãânên amrakati nē pika hkrak ri amrakati. Nhÿri mēhõ kot kagà kaxkepta pyr nē hpôt nē omunh mã tãm xwÿnhja amrakati ho amrakati.

⁴ Nhũm tee ri mēhõ japêr nom mēhõ pumunh kêt nē. Pa tee ri ja hã omu nē ixkaprĩ htÿx nē inhmÿr o xa.

⁵ Hãmri nhũm pahi hõja ixpumu nē inhmã:

—Kwa amÿr kêt nē. E mēhõ mÿj pumu. Juta kanrêhã htãmnhwÿ xihtÿx xwÿnhhta. Pahi Tawi kanrêhã htãmnhwÿ te kêp mry pê rêãw xihtÿx pyrāk o hihtÿx xwÿnh mÿj pumu. Kot mē kãm hkurê xwÿnhjê kutã amnhĩ to htÿx nē mēmoj punuj piitã ho hapêx kaxyw mã xwÿnh jakamã tapxipix na kot kagàta hpyr nē ho htÿx xà hpôt par mã tãm. E ka omu. Anê.

⁶ Hãmri pa kuma nē hwÿr rÿt nē Jesusja pumu. Kot mē pahte amnhĩ tomnuj pãnhã amnhĩrer xwÿnhhta mē ho amnhĩptàr o hkrī xà maati kapem xa. Mēmoj htÿr pê kwat mē àptàr tũm pê 24jê nhĩpôk ri xa. Mē kãm hkurê xwÿnhjaja kot hpÿr nhũm ra akupÿm htÿr nē xa. Nôm ra axtem nē xa. àhpumunh tÿxja te kot pahi xàhpumunh pyrāk. Nē hpàr kêp 7. Nē no mãânên kêp 7. Noja te Tÿrtũm Karõ pyrã nē kêp pika piitã hkôt pa xwÿnh. ã Jesusja axtem nē ãm anê pa omu.

7 Hāmri nhūm mē pahto amnhīptār o hkrī xwýnhhta wýr tē nē ĩhkra kamā kēp kagà kaxkepta py.

8 Hāmri nhūm mē htír pē kwat mē mē àptār tūmjaja hpar pē hkōn krā ho rōrōk nē hkrī hpa nē hipō nē hkrī. Piitā wiorāwti jamý nē ôr o xijere kamā mēhkuxwa xà jamý nē o hkrī. Nhūm Tirtūm krajaja Tirtūm mā tanhmā amnhī jarēnh to nhūm mē mar o hkrī. Te xijere kamā mēhkuxwa xà hpār o hkrī pyrā nē mē kuma.

9-10 Jakamā nhūm mē hkōn krā ho hkrī xwýnhjaja mē pahte amnhī tomnuj pānhā amnhīrer xwýnhhta kutā kām grer o hkrī. Mē grer nyw o kām gre nē kām:

Na prem apī ka atyk o mē piitā mē kot amnhī tomnuj pānhā amnhīrer pa.

Ahpýnhā pika piitā hkôt mē urojē piitā hpānhā amnhīrer pa.

Nē ahpýnhā ri mē kapēr xwýnh kwýjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwýr xwýnhjaja kēp Tirtūm kra nē ri pa.

Ka ra mē panhō Tirtūm mā mē kēp patre kaxyw mē unhwý nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagàta pyr nē ho htýx xà hpôt mā tām. Anē.

11 Hāmri nhūm Tirtūm kapēr o mē wrýk xwýnhjaja nhýhýnh hapôj nē kuhê. Mē ohtô rax o ohtô rax. Ohtô rax o mē pajamaxpēr jakrenh. Hāmri nē Tirtūm kot mē ho amnhīptār ā hkrī xà maatija wýr mra nē kām hipôk pa. Nē mēmoj tír nē kuhê xwýnhjê mē mē àptār tūmjê mā hipôk pa nē mē pahte amnhī tomnuj pānhā amnhīrer xwýnhhta mā kapēr.

12 Kax pē kām kapēr nē kām:

Ām hāmri na pa htem amex o amex ā inhgrer o ixkuhê.

Mē ixrom axihtýx o axihtýx.

Nē mēmoj piitā anhō.

Nē ate mēmoj piitā hkukamā axàhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

13 Tā nhūm mēmoj piitā Tirtūm mē Jejus wa kām wa mex o wa mex ā harê. Pika hkôt panhī nē mry nē àk nē mēmoj piitā. Nē pika hkrak ri nē gô hkrak ri mēmoj piitā. Nē mē htykjaja. Nhūm mē piitā wa kām wa mex o wa mex ā wa harê nē wa kām: E ate mē ixto amnhīptār ā akrī xà kamā akrī xwýnh mē kot mē ixte amnhī tomnuj pānhā amnhīrer xwýnh mē war amex o wa amex.

Nē war axihtýx o war axihtýx.

Nē war axàhpumunh o war axàhpumunh.

Na pa htem ā war ajarēnh anhýr rāhā ixpa ho ixpa. Anē.

14 Hāmri nhūm mēmoj tír pē kwatjaja mē kuma nē mē kām:

—Nā ām hāmri na ka mē ā wa harēnh anē.

Wa mex o wa mex kumrêx. Anē.

Hāmri nhūm mē àptār tūmjaja Tirtūm mē Jejus wa hpar pē hkōn krā ho rōrōk nē hkrī hpa nē haxwýja wa kām wa mex o wa mex ā wa harê.

6

Kagà ho htýx xà pē 7 jarēnh

Matêwre 24.3-14; Sikün Tesarôn 2.3; Wam Juãw 2.18

1 Tā pa arī kaxkwa kamā mē pahte amnhī tomnuj pānhā amnhīrer xwýnh kot tanhmā amnhī nhīpêx to hā omunh o xa. Nhūm kagà kaxkepta py nē wam ho htýx xà pôt. Hāmri nhūm mēmo tír pē kwatjê hōja kapēr týx kumrêx. Te na katôtók týx pyrāk o mēhōj mā kapēr nē kām:

—E amnē mē ixwýr tē. Anē.

2 Hāmri nhūm kawar jakajre nhýhýnh hwýr hpôx o tē. Nhūm mēhōja ô kuxê mý nē hā nhý nē tē. Hāmri nhūm nhām mēhōja hwýr tē nē kām pahi hā mē ahkà htu. Hāmri nē kām tanhmā kapēr to nhūm kuma nē mē kot kām Tirtūm mē Jejus wa kurê xwýnhjê nhímex par kaxyw hakêx nē ma pika hwýr tēn wrý.

³ Hāmri nhūm mē pahte amnhī tomnuj pānhā amnhīrer xwýnhja wam kagà ho htýx xàta kôt axte ja pôt. Hāmri nhūm mēmoj tīr pē kwatjê hōja axtem mēhōj mā kapēr nē kām:

—E amnē mē ixwýr tē. Anē.

⁴ Hāmri nhūm kawar kamrêk mē hwýr hpôx o tē. Nhūm mēhō hā nhý nē tē. Nhūm nhām mēhōja kām wapo gō nē ma pika hwýr htēm nē wrýk kaxyw hano. Kot hwýr wrýk nē pikap mē pa xwýnhjê kurê huk kaxyw. Mē kot axpēn par kaxyw ma mē hwýr kumē. Hāmri nhūm kuma nē wapota py nē hakēx nē ma mē hwýr tēn wrý.

⁵ Hāmri nhūm mē pahte amnhī tomnuj pānhā amnhīrer xwýnhja kagà ho htýx xà hō pôt. Na pre ra ho axkrut nē hpôt tā hpānhā axte hkôt ja pôt. Hāmri nhūm mēmoj tīr pē 4jê hōta mēhōj mā kapēr nē kām:

—E amnē mē ixwýr tē. Anē

Hāmri nhūm kawar tykre mē hwýr hpôx o tē. Nhūm hā ýr xwýnhja mēmoj to peja xà hā parās mý nē o tē.

⁶ Hāmri nhūm mē htīr pē kwatjê rūm mēhōja kām kapēr nē kām:

—E kêr ka ma pika hwýr mē hwýr tēn wrý nē mē kām myt pyxi kamā mē àpēnh pānhā mē kām mēmoj to hkryre nē anhō parāsta kamā ho peja nē mē kām ōr o apa. Nom mē apkur xà hā orti nē wīhti ka mē kêp tanhmā ho hkêt nē. Anē.

Hāmri nhūm kuma nē hakēx nē ma tēn mē hwýr wrý.

⁷ Tā nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt. Na pre ra ho axkrunēpxi nē hpôt tā hpānhā axte hkôt ja pôt. Hāmri nhūm mēmoj tīr pē kwat kot hitep xwýnhja mēhōj mā kām:

—E amnē mē ixwýr tē. Anē.

⁸ Hāmri nhūm kawar rārààre mē hwýr hpôx o tē. Nhūm mēhō hā nhý nē tē. Hā ýr xwýnh nhīxi na pre kêp “Mēhtyk” anē. Hāmri nhūm mēhōja kām kapēr nē kām:

—E ma pika hwýr wrý nē tanhmā mē ho kê mē ohtô nē tanhmā amnhī to nē axkaprā. Kê mē hkwýjaja pijapu

kamā axpēn pa nē mē hkwýjaja prām xà ty nē mē hkwýjaja tanhmā à htýx kute kamā ty. Nē mēmo mry xoprēja mē hkwýjê pa. E ma mē hwýr wrý nē tanhmā mē ho ho apa. Anē.

Hāmri nhūm kuma nē hakēx nē ma pika hwýr tēn wrý. Hāmri nhūm mē htykjê papxàja tanhmā amnhī to nē te kot hā jêt nē ma hkôt mōr nē pika hwýr wrýk pyrāk pa pre arī omunh o xa.

⁹ Hāmri nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt. Na pre ra ho kwat nē hpôt tā hpānhā axte ja pôt. Hāmri nē hpôtja kôt pa ra mē kot Tīrtūm mā mēmoj nhōr xà hā mēsti pumu. Nē hkrak ri mē hkarōjê pumu. Mē kot hkwýjê hkôt ri mē kām Tīrtūm kapēr jarēnh nē Jejus kêp mē ō Pahihtī hā harēnh o pa nhūm mē kot hā mē hpar xwýnhjê karōja pa pre mē omu. Nhūm mē mēsti hkrak ri amnhī to Tīrtūm wýr o hkrī.

¹⁰ Kýx pē kām kapēr nē kām:

—Ām hāmri amex o amex Pahi Maati. Aa ate mēmoj tā tanhmā amnhī to axêx to hkêt kumrêx. Kwa xà kot kaj tokyx pika hkôt mē kot mē inhīmex xwýnhjaja tanhmā mē ixtā mē ho nà? Anē.

¹¹ Hāmri nhūm mēhōja mē hwýr tē nē mē kām mē ê jakajre gō nhūm mē hagjê. Hāmri nhūm mē kām:

—E mē mamrī atar akôkôt o akrī. Kojā Tīrtūm kormā tanhmā mē kot mē atomnuj xwýnhjê ho hkêt nē. Kê mē axte mē apyrā nē mē akwýjê nhīmex măn. Kojā mē Tīrtūm jamaxpēr xà hkôt axte mē akwýjê pa nhūm rī kormā mē ato hpimràatā tanhmā mē atā mē hipêx to. Jakamā e mē atar kutêp māmri akôkôt o akrī. Anē.

¹² Hāmri nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt pa omu. Na pre ra ho 5 nē hpôt tā hpānhā hkôt axte ja pôt. Hāmri nhūm pika htertēt týx kumrêx. Nē myyti ahtyk nē mytwrýre te kêp mē hkamrô kamrêk týx pyrā nē ajêt.

¹³ Nē kanhēti tanhmā amnhī to nē axrē nē pikap rôrôk pa. Te kôk xâpêr tỳx nē kot pàrerekre kormā ràx tâ kot kām hikranh par pyrà nē piitā rēnh pa nhūm rôrôk.

¹⁴ Hāmri nhūm kaxkwaja te kagà kaxkep pyrà nē amnhī to kaxkep o tē. Nē pika piitā hkôt kēn prēk nē hixēt prēk maati piitā te hkrī xà rūm hapôx nē mrar nē nhām hkrī pyrāk. Nhūm gô hipôk piitā haxwỳja te hikwỳ xà rūm hapôx nē mrar nē nhām hikwỳ pyrāk. Pika htertēt tỳx nhỹ hã ã mēmoj amnhī nhĩpêx anē.

¹⁵ Hāmri nhūm pika hkôt mē piitā tee ri mēmoj ã amnhī nhĩpêx anhỹr ã omu nē kām ma nē htertēt tỳx kumrēx. Mē ho amnhĩptār xwỳnhjaja nē pōristi krāhtūmjaja nē mē kot amnhī to rūnh xwỳnhjaja nē mē hihtỳx xwỳnhjaja nē mē kām mē àpēnh xwỳnhjaja nē amnhī mã mē àpēnh xwỳnhjaja. ãm piitā mēmoj ã kot amnhī nhĩpêx anhỹr ã omu nē tee ri amnhī kukamã hamaxpēr nē kām ma ho kām ma. Hāmri nē hpimxur kaxyw ma kēn prēk kre japêr o hprôt nē mra.

¹⁶⁻¹⁷ Hāmri nē amnhī to kēn prēk wỳ nē kām:

—Kwa na ra mē ixto amnhĩptār ã hkrī xà maati kamã hkrī xwỳnh mē kot mē ixte amnhī tomnuj pãnhã amnhĩrer xwỳnhhta wa mē ixkamã gryk tỳx kumrēx. Ra wa kot tanhmã mē ixtomnuj to xà hã arĩgrota kato. Koja wa mē ixtomnuj tỳx nē pa mē kutã hkêt nē. Kwa tokyx mē inhĩpy arôrôk nē wa kēp mē ixto amũxu. Anē.

7

Mē kot Tĩrtũm mã hkrajê kagà Apokarip 9.4

¹ Tã pa arĩ kaxkwa kamã mēmoj pumu. Nhūm Tĩrtũm kapēr o mē wrỳk xwỳnh pē kwatja piitã ahpỹnhã pika nhĩtep xà hkôt kôk jatur xà hã hamỳ nē ho kuhê. Pika piitã hkôt kôk hpinhkrēnh par nē àpêr kêt nē gô xujanār kôt àpêr kêt kaxyw hatur xà hã hamỳ nē ho kuhê. Nē pà piitã hkôt àpêr nē tanhmã pĩ hkwỳ ho pymaj

nhūm mē ã amnhī nhĩpêx anē nē nē hatur xà hã hamỳ nē ho kuhê.

² Na pre ra Tĩrtũm ja hã mē kām karō nē mē kām:

—E kēr ka mē ma pika hwỳr wrỳ nē pika nē gô xujanārja tanhmã wa homnu hto. Anē.

Hāmri nhūm mē kuma nē hwỳr wrỳ nē kormã nē kôk ho htỳx. Hāmri nhūm Tĩrtũm kapēr o wrỳk xwỳnhjê hōja myt japôx xà rūm mē hwỳr hpôx o tē. Nē ìhkra kamã mē kot Tĩrtũm kra hã mē hixi jarēnh xà hã kagàta py nē o tē. Hāmri nē kàx pē mē kot pika mē gô xujanār homnu mã xwỳnhjê mã kapēr nē mē kām:

³—Kwa taxy pa Tĩrtũm krajê nhōkrã kagà hpa mãn. Kēr ka mē omu nē mē tapxipixjaja tanhmã mē ho hkêt nē. Anē.

⁴⁻⁸ Hāmri nē mē hkagà pa. Ahpỹnhã Ijaew pigràn xwỳnhjaja mē ho ohtô rax kumrēx nē tanhmã mē hkagà hto. Pa tanhmã mē kute hã mē harēnh ma nhūm xep mē ohtô rax kumrēx.

Juta kamã mē kēp 12.000.

Nē Rupē kamã mē kēp 12.000.

Nē Gax kamã mē kēp 12.000.

Nē As kamã mē kēp 12.000.

Nē Natari kamã mē kēp 12.000.

Nē Manase kamã mē kēp 12.000.

Nē Simeãw kamã mē kēp 12.000.

Nē Rewi kamã mē kēp 12.000.

Nē Isaka kamã mē kēp 12.000.

Nē Jepurō kamã mē kēp 12.000.

Nē Juje kamã mē kēp 12.000.

Nē Pējamĩ kamã mē kēp 12.000.

ã mē ohtô rax kot anhỹr. Hāmri nē mē piitã mē pikamỳr par kām mē kēp 144.000. Piitã kēp Apraãw kanrēhã htãmnhwỳ na pre mē. Tã ã axpēn kaxyw mē ohtô rax kumrēx kot anhỹr tã nhūm mē hkagà pa.

Tĩrtũm kra hkwỳjê jarēnh Apokarip 14.1-5

⁹ Tã pa axtem mēmoj pumu. Nhūm mē ohtô rax nē Tĩrtũm nhō krĩ kamã kuhê. Ahpỹnhã ri pika piitã hkôt mē urojaja. Nē ahpỹnhã ri mē kapēr xwỳnhjaja nhūm prem pika piitã kurũm kot mē ho amnhĩptār ã hkrī xà maati kamã hkrī xwỳnh pē Tĩrtũm

mē mē pahte amnhĩ tomnuj pānhā amnhĩrer xwýnhja wa kutā kuhê. Mē ohtô rax kumrêx jakamā pa tee ri mē piitā mē ho kōta hpar prām kaprý. Nē piitā ê jakare kamā kuhê. Nē hkĩnh nē hkĩnh xàj pô hkwý jamý nē ho àpêr o kuhê.

¹⁰ Hāmri nē kýx pēê Tĩrtũm mē Jejus wa kām kapêr nē wa kām:

Hêxta waa nē. War amex o war amex Pahi Maati.

Na ka pre Akra Jejus kukwak ri mē ixte amnhĩ tomnuj ā tanhmā mē ixto hkêt nē.

War ajamē mē ixkamā axukaprĩ rāhā ho apa xwýnh na ka wa.

Jakamā pa mē inhmex nē war awýr api nē war akuri inhmex nē ijamakêtkati nē ixpa ho ixpa.

Ām hāmri na ka hte wa mē ixto mex rax kumrêx o apa. War amex o war amex. Anē.

¹¹ Hāmri nhũm Tĩrtũm kapêr o mē wrýk xwýnhjaja Tĩrtũm krĩ xà mā hipòk nē hkõn krā ho rôròk nē hkrĩ hpa. Nē mē àptār tũmjê mē mē htĩr nē kuhê xwýnhjaja mē ĩhkô hā kām hipòk nē wam tajê pyrāk nē hkõn krā ho rôròk nē hkrĩ. Hāmri nē mē ohtô kot Tĩrtũm mē Jejus wa kām kapêr ā mē kuma hāmri nē Tĩrtũm ā hpijaàm kaxyw hpar pē htu mýr pē hikwý hpa nē kām mex o mex ā harē nē kām:

¹² “Ām hāmri na mē ā ajarēnh anē Tĩrtũm. Amex o amex.

Na ka hte mē ixto mex o apa.

Mē ixrom axàhpumunh o axàhpumunh.

Nē mē ixrom axihtýx o axihtýx.

Jakamā na ka hte mē ixpiitā mē ixto mex kumrêx rāhā ho apa.

Ā ate anhýr rāhā o rāhā jakamā na pa htem amā amex o amex ā ajarēnh rāhā ho ixpa.” Anē.

¹³ Hāmri pa mē omunh o ixām rôm nhũm mē àptār tũmjê hōja ixwýr tē nē mē ê jaka kamā mē hkĩnh xàj pô jamýnh nē ho kuhê xwýnhjê hā ixkukja nē inhmā:

—E mǎn ate mē ê jakare kamā mē kuhê xwýnh mǔjjê pumunh nà? Tanhmā na prem amnhĩ nhĩpêx to nē amnē api? Xà ate mē omunh? Anē.

¹⁴ Hāmri pa kuma nē kām:

—Nà ixte mē omunh kêt. Kêt ka na ixrom ate mē omunh. Anē.

Hāmri nhũm inhmā mē harēnh o:

—Nà na pre mē hkwýjaja Jejus ā mē homnuj týx kumrêx nē mē kupa. Tā mē kêp Jejus kwý jakamā na pre mē nē mē kot amnhĩ tomnuj o hapêx nē te amnhĩ kamrô ho mē nē mē kot amnhĩ tomnuj piitā kuhõnh par pyrāk o mē hipêx. Jakamā nhũm mē ê jaka kamā mex nē hkĩnh týx nē pa.

¹⁵ Nē Tĩrtũm kot mē pahto amnhĩptār ā hkrĩ xà maati kutā kām mex o mex ā harēnh rāhā ho kuhê. Na hte mē ho mex rāhā ho pa. Mē hkôt pa ho pa jakamā koja mēmoj tanhmā kêp mē ho hkêt nē.

¹⁶⁻¹⁷ Nē mē pahte amnhĩ tomnuj pānhā amnhĩrer xwýnh kot Tĩrtũm krĩ xà maati kamā ām xwýnhhta na hte mē hamār mex rāhā ho mē hkôt pa.

Te mē kot mē hkrit jamār mex pyrāk. Nē te mē kot mē hkrit kôm o pa nhũm htĩr nē pa pyrāk.

Koja mē kuri htĩr tũm nē hkôt pa ho pa.

Nē axte kām prām kêt nē.

Nē axte kām kôr kêt nē.

Nhũm arĩgro htýxja axte mē hkà ho hxêt kêt nē.

Koja Tĩrtũm te mē kot mē hkra no kagô nhĩnhĩnh par pyrāk o mē hipêx nhũm mē axte hkaprĩ nē mýr o pa hkêt nē.

Pānhā hkĩnh nē mex rāhā kuri pa ho pa. Anē.

8

Kagà kaxkep o htýx xà kot hitep jarēnh

¹ Tā pa arĩ kaxkwa kamā mēmoj pumu nhũm mē pahte amnhĩ tomnuj pānhā amnhĩrer xwýnhja kagà kaxkep o htýx xà kot hitepta pôt. Hāmri nhũm kaxkwa kamā mēmoj piitā hpinkrênh pa nhũm mēhō kapêr kêt kumrêx. Nē hpinkrênh par o ra hā ahtũm ry mex nē.

² Hāmri nhũm Tĩrtũm kutā kapêr o wrýk xwýnh pē 7 nē mē kuhê xwýnhjaja. Nhũm kapêr o wrýk

xwýnhjê hōja mē hwýr tē nē mē piitā mē kām pifti gō.

³⁻⁴ Hāmri nhūm kapēr o wrýk xwýnhjê hōja ôr o xijere py nē Tirtūm mā mēhkuxwa xà ho xēt xà hā mēs kunīhti hwýr o tē. Mē ho amnhīptār ā hkrī xà maati kutā ôr o mēstija wýr o tē nē kuri o xa. Hāmri nhūm mē kām kamā mēhkuxwa xà hkwý runh rax nē nhūm mēsti hā ho xēt o xa. Rôm nhūm Tirtūm krajaja Tirtūm mā tanhmā amnhī jarēnh to. Jakamā nhūm mēhkuxwa xà xēt kūm mē mē kot Tirtūm mā amnhī jarēnh xāja mē nhūm ahkà nē Tirtūm kapēr o wrýk xwýnh nhīhkra kamā xijere rūm Tirtūm kutā kàx mā àpir o pa.

⁵ Hāmri nhūm kapēr o wrýk xwýnhja xijere kamā kuwy hpôk kwý ho nýt nē ahpar mā pika hwýr kumē nhūm ma tē nē pikap tēm nhūm pika htertēt tỳx nē kamā na katôtōk nē haxēnh nē hkrakrak.

Mē kot pifti kakôr ā mē harēnh

⁶ Hāmri nhūm Tirtūm kapēr o wrýk xwýnh pē ⁷ kot pifti jamýnh xwýnhjaja ra kot pafti kakôr mā.

⁷ Jakamā nhūm wamta ô pifti kakô nhūm na mē te kot jēr krā jakot pyrāk xwýnh mē kuwy te kot mēmo kamrô kamrēk pyrāk xwýnhja pikap rôrôk pa. Nē nhýhýnh pika hkwý ho rax nē ho kaxàr pa. Nē pōti nē akunī hkwý ho rax kumrēx nē ho kaxàr pa.

⁸ Hāmri nhūm wam ām xwýnh nhījuk ri ām xwýnhja ô pifti kakô nhūm mēmoj te kēn krā hprēk pôk pyrā nē kaxkwa rūm ahpar mā tē nē gô xujanār nhīkjê kamā hpôk rāhā tēn mrō. Hāmri nhūm gô nhīkjê kamā gōja mēmo hkamrô hā amnhī jahkre hpa.

⁹ Jakamā nhūm gôx kām mēmoj htīr nē ri mrar xwýnhjaja pikaprār pa. Nē gôx kām pàr gô krāhkà hā pa xwýnhja haxwýja gjēx pa. Nē pàr kām mē pa xwýnhjaja haxwýja hājê nē pikaprār pa. No nhūm gô mex kām pàr kām mē pa xwýnhjaja mē kurom arī htīr nē.

¹⁰ Tā nhūm wam ām xwýnhja wa hi-juk ri ām xwýnhja ô pifti kakô. Hāmri nhūm kanhēti rax kumrēxja axta nē hpôk o ma ahpar mā tēn pikap tēm

nē pyhti nē hino hkwý ho ohtô nē homnu hpa.

¹¹ Kanhēti nhīxi pē na pre “mēmoj xý xà” anhýr jakamā nhūm tēm nē pyhti nē hino hkwý ho ohtô nē homnu pa. Nhūm prem hwýr mra nē hkwý janhi nē ho ixkō nhūm ý nē nhūm mē ohtô nē ho ixkō nē axkaprā.

¹² Hāmri nhūm hpānhā Tirtūm kapēr o wrýk xwýnhjê hōja ô pifti kakô. Na pre ra ho axkrunēpxi nē hkakôr tā hpānhā ra axte hō ja kakô. Hāmri nhūm mēhōja tē nē myyti kura nhūm hkwý ahtyk nē hirā hkēt nē. Nhūm mytwýre nē kanhēti mā ho anē nē myyti pyrā nē hkwý ahtyk nē hirā hkēt nē harir. Jakamā nhūm kamāt kām hirā mex kēt nē. Nē arīgro hā myytija haxwýja hirā mex kēt nē.

¹³ Hāmri pa kaxkwa kamā àanhāhti pumu nhūm kỳx pē ri htor o pa pē tanhmā kapēr to nē kapēr o:

—Hēxta waa nē. Kormā kot pifti kakôr xwýnhjaja axkrunēpxi nē kormā hkakôr kēt nē. Koja mē tokyx hkakô nhūm pika hkôt ri mē pa xwýnhjaja amnhī xà htỳx kamā hamak tỳx o pa. Na pa tee ri mē hkukamā ijamaxpēr nē inhmā mē hkaprī htỳx nē. Hēxta waa nē. Koja mē omnuj tỳx kumrēx. Anē.

9

¹ Tā pa axte mēmoj pumu. Nhūm Tirtūm kapēr o wrýk xwýnhjê hō ô pifti kakô. Na prem ra ho kwat nē hkakôr tā hpānhā axte hōja ja kakô. Hāmri nhūm kanhēti hō axta nē pikap tēm kurê kumrēx nhūm mēhōja omu nē hwýr tē nē kām mēmoj tā saf gō. Satanasti jagjēnh xà hā ahkre xupým o htỳx xà hā safja nhūm kanhēti mā kugō.

² Hāmri nhūm kupy nē ahkrehtita wýr o tē nē kahē xà mē nhūm kurūm kuwy hkūm hapôx rax nē. Nē ma kàx mā àpir o pa nē myyti hpro hpa nhūm kamāt kô rax kumrēx.

³⁻¹¹ Nē kuwy hkūmja rūm mēmoj te krit pyrāk xwýnh kwýjaja pikap rôrôk nē kuhê. Te kot krit pyrāk tā mē hkuk te panhī hkuk pyrāk. Nē mē hkrā hkī

te mēnijê hkrā hkī jappjê pyrāk. Nē ôr o mē ahkà jagjê. Nē mē wa jappjê htỳx kumrēx. Te rêãwti xwa jappjê pyrāk. Nē kàx o mē hinô hkà. Nhũm mē htor o hara hkoko htỳx o mra. Te ho kawar xohtô pijapu kaxyw kot mē hkjênh xà kamā mē htur nē mē hkjênh o hprôt nhũm hkoko htỳx pyrāk. Nē mē hkamnhwỳr o pa kaxyw mē hanhyja te kot makre janhy pyrāk. Ā kriitija kot anhỳr. Nē te nhỹhỹm oprê kaxyw nojarêt nē mē hkrit kawar hã hikukrēx mex rēnh pyrāk. Mēõ pahija ahkre xupỳmta kamā kēp mē hkrãhtũm. Ijaew kapēr kãm hixi pē “Apatõ.” No Gres kapēr kãm kēp “Aporiãw.” No mē pakapēr kãm kēp “mē hpar o pa xwỳnh.” Hãmri nhũm Tĩrtũm kriiti mã kapēr nē mē kãm:

—E kēr ka mē ma pika piitã hkôt te makre kot amnhĩ nhĩpêx pyrã nē ri mē hkôt mē hkamnhwỳr o apa. Ā amnhĩ nhĩpêx anhỳr o mē atã mytwrỳ pē sĩk. No ãm kēr ka mē hpar kumrēx kêt nē. Ām mē kot amnhĩ xà htỳx kãm hamak pix kaxyw tanhmã mē ho ho apa. Te makre kot mē hkamnhwỳr nhũm à htỳx kumrēxta pyrāk. No mē ate mē hkamnhwỳr nhũm mē hkamnhwỳr xàja koja à htỳx o makre kot mē hkamnhwỳr jakre. Nom ra mē kot Tĩrtũm kra hã mē hkagã xwỳnhjaja kēr ka mē omu nē ãm mē omu nē tanhmã mē ho hkêt nē. Mē kēp ixkwỳ na mē. Nē pō nē prãt ka mē ãm omu nē tanhmã ho hkêt nē. Ām mē kot panhĩ nhõkrã kagã hkêt xwỳnh pixjaja ka ã mē hipêx anhỳr o ri mē hkôt apa. Nom kēr ka mē hpar kêt nē. Kē mē tee ri amnhĩ xà hã maj kãm tokyx htyk nē hapêx prãm hkaprỳ ho pa. E ma mē hwỳr mra nē ã mē hipêx anhỳr o ri apa. Anē.

Hãmri nhũm mē kuma nē ma mē hwỳr mra.

¹² Na ra pika hkôt wam mē homnu xà pyxi nē hapêx. No ãm arĩ hamẽxkrut.

¹³ Jakamã nhũm Tĩrtũm kapēr o wrỳk xwỳnhjê hõja axte õ pifti kakô. Na prem ra ho sĩk nē hkakôr tã axte hkôt hõja hkakô. Nhũm Tĩrtũm kutã ôr

o mēsti rũm mēhõja tanhmã kapēr to. Mēsti janhã rũm kapēr.

¹⁴ Pifti kakôr xwỳnhhta mã kapēr nē kãm:

—E na ra mē kot mē hkwỳjê nhĩmex ã arĩgrota kato. Jakamã kēr ka ma pyhti pē Erax wỳr wrỳ nē gô mỳ ri Satanasti mã mē àpênh xwỳnh pē kwatja pumu. Na prem ra mē hpa hpre nhũm mē gô mỳr ri arĩ hkrĩ ho hkrĩ. Ka mē omu nē mē kãm mē hpa hpre xà hpôt pa kē mē ma mē hkôt ri mē hpar o pa. Anē.

¹⁵ Na pre ra Tĩrtũm mē kot mē hkwỳjê nhĩmex o pa kaxyw mē kurê nē gô mỳ ri mē unhwỳ nhũm mē kormã mē hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mē harēnh anē nhũm kuma nē ma tē nē mē hwỳr wrỳ nē mē kãm mē hpa hpre xà hpôt pa. Hãmri nhũm mē ma pika piitã hkôt ri mē hpar o mē hkôt pa. Nē mē ho ohtô rax kumrēx nē mē himex.

¹⁶ Nē ma amnhĩ kôt pôristi ho ohtô rax nē o pa. Piitã kawar ã hkrĩ nē mē hkôt hprôt nē hkoko ho mra. Mē kēp 200.000.000 hã mē harē pa mē harēnh ma. Mē ohtô rax o mē ohtô rax.

¹⁷ Na pa pre arĩ te ixpimtir kãm mē omunh pyrāk. Nhũm kawar ã mē hkrĩ xwỳnhjaja. Mē hinô kàja axtem kàx o. Nē hkamrêkja te kuwy hpôk kamrêk pyrāk. Nē rãrãrja te mē hkurôt kane xà pē êsôf rãrãr pyrāk. Nē kakrã htyk. Ā kàx o mē hinô hkà kot anhỳr. Nē mē hkrit kawarti hkrãja te rêãwti krã pyrāk. Nē mē hakwa rũm kuwy hpôk mē êsôfti mē kuwy hkũm axpēn kôt hapôx o pa.

¹⁸⁻¹⁹ Nē kawarti jamy axtem te kēp kagã xoprê hkrã pyrāk nhũm mē hamy ho mē hkamnhar o mē kupa. Nē mē hakwa rũm kuwy hkũm mē kuwy hpôk mē êsôfti hapôx xwỳnhhta mã mē ho anē nē. Jakamã nhũm kawartijaja mē hkôt ri hamy mē hakwa ho mē hpar o pa nē mē ohtô rax kumrēx nē mē himex.

²⁰⁻²¹ Tã nom nhũm arĩ mē htĩr nē ri mē pa xwỳnhjaja. Mē kot mē hkwỳjê hpar kêt xwỳnhjaja hãmri ja hã mē

omunh tã arĩ amnhĩ tomnuj o pa nê kãm urer kêt nê. Arĩ tanhmã amnhĩ tomnuj to ho pa. Axpên pê hprõ nê mjên o amnhĩkati nê axpên pê ahkĩ. Nê axpên par o ri pa nê tanhmã axpên xy hto ho pa. ã htỳx ri amnhĩ nhĩpêx anhỹr o pa nê kãm urer kêt nê. ãm Satanasti hkôt pix mã ri amnhĩ nhĩpêx o pa. Nê amnhĩm sãnti hkwỳ nhĩpêx. Pĩ ho hipêx nê kàx o hipêx nê kên o hipêx. Nê hipêx pa nê amnhĩ to hwỳr o pa. Nom mo kot mẽ mar kaxyw sãnti jamak kre? Nê kot mẽ omunh kaxyw mo no? Nê ri mrar nê mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỹr o pa.

10

Kagà kaxkep grire jarênh

¹ Tã pa arĩ mẽmoj pumu. Nhũm axte Tĩrtũm kapêr o wrỳk xwỳnh xihtỳxjê hõja pika hwỳr wrỳk o tẽ. Nê êja kakrã ho na pre. Nê hkrã mỳ ri màxwỳxti ajêt. Nê hkuk te myt no kamã hirã htỳx pyrãk. Nê akutã hte kamã te kuwy hpòk pyrãk.

² Nê ìhkra kamã kagà kaxkep grire ra pipôt nhũm ma o tẽ nê o wrỳ nê o xa. Nê gô xujanãr kãm upòk rũm hte xãm nê kỳx pê amgrà kamã apke rũm hte xãm nê o xa pa ixprĩ hã omu.

³ Hãmri nhũm kàx pêê amỹra. Te rêãw hkàr tỳx pyrãk. Nhũm hpãnhã kaxkwa kamã mẽhõja kãm kapêr. Te na katõtòk o 7 wês pyrãk pa ixprĩ hã tanhmã kapêr to hã kuma.

⁴ Hãmri nê ra mẽ amã ã kagà kaxyw nhũm mẽ ja nê inhmã kapêr nê inhmã:

—Kwa nà kwarĩ ja kot kaj hã kagà hkêt nê. ãm ja pix kot kaj akwỳjê mã hã kagà hkêt nê. ãm kapxipix mãn ama nê ri hã apa.

Anhỹr jakamã pa mẽ amã hã kagà hkêt nê. ãm papxipix kuma nê ri hã ixpa.

⁵ Tã nhũm Tĩrtũm kapêr o wrỳk xwỳnh kot gô xujanãr kãm upòk rũm hte xãm nê apke amgrà kamã ãm xwỳnhta hãmri Tĩrtũm nhỹ hã kapêr kaxyw nê kànhmã ìhkra pê.

⁶⁻⁷ Tĩrtũm pê kaxkwa nê pika nê gô xujanãr o kator nê kamã kot mẽmoj piitã ho kator xwỳnhja. Nê htĩr rãhã nê pa ho pa xwỳnhja. Nhũm ÿ hã kapêr nê kapêr o:

—E hãmri. Amnepê mã na pre Tĩrtũm ÿ hã mẽ kãm kapêr o ri mẽ pa xwỳnhjê mã tanhmã amnhĩ kukamã amnhĩ jarênh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarê. Nê mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarê. Tã ra ã mẽ hipêx anhỹr xà hã arĩgro kato. Jakamã koja kapêr o wrỳk xwỳnh kot hitepta ò pifti kakò hãmri nhũm mẽmojja ã amnhĩ nhĩpêx anhỹr kurê kumrêx. ãm hãmri na pa mẽ amã ja jarê. Anê.

⁸ Pa mar o ixãm rôm nhũm wam inhmã kapêr xwỳnhta axte inhmã kapêr nê inhmã:

—E ma pika hwỳr wrỳ nê gô xujanãr kãm upòk rũm hte xãm nê amgrà kamã apke rũm hte xãm xwỳnhta wỳr tẽ nê kêp kagà kaxkep grire pipôt xwỳnhta py. Anê.

⁹ Hãmri pa kuma nê ma hwỳr wrỳ nê hã kuwỳ nhũm inhmã kugõ nê inhmã:

—E mĩ. Apy nê akrê. ànhre. Te kot menh xành pyrãk. Nom kot kaj akrê nê anhõhy xà. Nom mãmrĩ apy nê akrê. E mĩ. Anê.

¹⁰ Hãmri pa kêp kupy nê hkaki nhũm ànhre. Pa hkrêr pa hãmri nê inhõhy xà kurê kumrêx.

¹¹ Hãmri nhũm kot inhmã òr xwỳnhta inhmã:

—Nà ãm hãmri na ka apy nê akrê. Jakamã kêt ka ano ho ate mẽmoj piitã omunh xwỳnhja nê ajamak o ate mẽmoj mar xwỳnhja nê ate tanhmã Tĩrtũm kapêr mar toja ka piitã hã kagà hpa. Hãmri nê ate omunh xà hkôt akwỳjê mã piitã harênh o apa. Mẽ kot nhỹrmã Tĩrtũm kot tanhmã mẽ piitã mẽ hipêx to hã harênh mar kaxyw. Ahpỹnhã ri pika piitã hkôt mẽ urojê piitã koja nhỹrmã ã mẽ hipêx anê. Ahpỹnhã ri mẽ kapêr xwỳnh

piitã. Nê mē õ pahijaja. Ām mē piitã
koja nhÿrmã ã mē hipêx anê. Anê.

11

*Tÿrtũm nhÿ hã kapêr xwÿnh pijakrut
wa harênh*

¹ Tã nhũm mēhõj inhmã mēmoj to
mïdi xà hã pÿ ryre gõ nê inhmã:

–E ja py nê Jerujarê hwÿr wrÿ nê
kamã Tÿrtũm mã amnhÿ jarênh xà hã
ixkreja o mïdi. Nê ixkre kamã am-
nepê mē kot amnhÿ tomnuj pãnhã
Tÿrtũm mã ôwêhti nhõr xà hã mēstita
mã ho anê nê ho mïdi. Nê ixkre kamã
mē kot Tÿrtũm mã amnhÿ jarênh o mē
hkrÿ xwÿnhjaja ka aprÿ hã mē ho kõta.

² –No ixkre kapem pikaja ka ho
mïdi hkê t nê. Ra Tÿrtũm kot mē
kot amnhÿ tomnuj xwÿnhjê mã hkaga
jakamã koja mē htÿx ri kãm hprãm
xà hkôt tanhmã homnu hto ho pa.
Nê Jerujarê piitã hkôt ri homnu ho
paja ã hã amgrã axkrunêpxi nê hkôt
mytwrÿ kêp 6.

³ –Koja Tÿrtũm ma ÿ hã kapêr
xwÿnh ho hamêxkrut nê mē hwÿr wa
kumê nhũm wa ma mē hwÿr wrÿ
nê mē kãm Tÿrtũm kapêr jarênh o ri
mē hkôt pa. Hãmri nê tee ri mē kot
tanhmã amnhÿ tomnuj to hã mē omu
nê hkaprÿ nê. Hãmri nê wa hkaprÿ
xàj xak punure kaxô nê haxà nê mē
kãm Tÿrtũm kapêr jarênh o ri wa pa hã
amgrã axkrunêpxi nê hkôt mytwrÿ
kêp 6. Jakamã e. Pÿja py nê ma mē
hwÿr wrÿ nê ixkreta o mïdi. Anê.

⁴ Wa pijakrut wa kot Tÿrtũm nhÿ
hã kapêr jarênh o wa pa xwÿnhhta
wa. Na htem wa kot amnhÿ nhÿpêx
ã wa harênh ma nê mēmo pÿ hpàr pê
oriwêhti kot tanhmã amnhÿ nhÿpêx
toja mã hamaxpêr kurê kumrêx.
Nê amnepê mē Tÿrtũm nhÿ hã kapêr
o pa xwÿnh pê Jakaris kot kanê
hpòk xãmta mã mãânên hamaxpêr.
Oriwêhti xõja htwÿm rax kumrêx
nhũm htem htwÿm opôj nê ho kanê
ho nyt nê hpòk nê kýx pê unhwÿ
nhũm mē piitã hirã kamã rÿt mex o
ri mra. Nê kanê hpòk mexja te kot
Tÿrtũm kapêr pyrãk. Nê kanê xãm xàja
te kot Tÿrtũm nhÿ hã kapêr jarênh o

wa pa xwÿnhhta wa uràk. Nê oriwêhtija
haxwÿja te kot wa uràk. Ra Tÿrtũm
Karõ kot wa hkarõ mã àr jakamã
na hte wa hprÿ hã mē kãm Tÿrtũm
kapêr jarênh o pa nhũm mē kot mar
xwÿnhjaja te kanê nhÿrã kamã ri rÿt
mex nê ri pa pyrã nê hprÿ hã mar tÿx
nê.

⁵ Tã koja mēhõ tanhmã wa hipêx to
kaxyw wa hwÿr tē nhũm wa hakwa
rũm kuwy hpòk kato nê kot tanhmã
wa ho mã xwÿnhhta o hxê t o kupÿ.

⁶ Nê koja wa Tÿrtũm xàhpumunh tÿx
xà ho tanhmã ri mē hã mēmoj nhÿpêx
to pê mē kãm kapêr jarênh o ri mē
hkôt pa. Jao tanhmã na hto nhũm mē
hã wrÿk kêt ry nê. Rÿ tanhmã mē kêp
gõ hto nhũm mē hkamrô hã mē kêp
amnhÿ jahkre. Koja wa ã Tÿrtũm nhÿ
hã mē kêp mēmoj nhÿpêx anhÿr ho wa
pa. Nê xatã wa kãm hprãm xà hkôt
tanhmã mēmoj tomnu hto.

⁷ Nê mē kãm kapêr o pa pê ã
mē hipêx anhÿr o wa hã amgrã
axkrunêpxi nê hkôt mytwrÿ kêp 6
nê rÿ kormã ho hapêx. Hãmri nhũm
ahkre xupÿm rũm Satanasti nhõ
kôwenatõja kato nê ma wa hwÿr tē nê
nhÿri pry kahti ri wa unê nê wa kupÿ
nhũm wa pry kamã ty nê nõ.

⁸ Hãmri nhũm mē wa haxàr kêt
nê nhũm wa arÿ pry kamã nõ. Krÿ
kapem na prem pÿ kahpa hã Jejus
nhõ nê kupÿ. Krÿ nhõ xwÿnhjaja mē
kot amnhÿ tomnuj tÿx xwÿnh na mē.
Te ho amnepê mē krÿ pê Sotõ mē pika
pê Ejit kamã mē kot amnhÿ tomnuj
xwÿnhjê kot amnhÿ nhÿpêx pyrãk.

⁹ Jakamã nhũm mē kot wa haxàr nê
axpên kurê nhũm wa pry kamã arÿ ty
nê nõ nhũm mē piitã wa hwÿr mra nê
wa omu. Nê ahpÿnhã krÿ piitã hkôt
mē pa xwÿnhjaja tanhmã amnhÿ to nê
ja hã wa omu. Ahpÿnhã ri pika piitã
hkôt mē urojaja. Nê ahpÿnhã ri mē
kapêr xwÿnh piitã. Hãmri arÿ ahpÿnhã
mē õ krÿ kamã pa htã tanhmã amnhÿ
to nê wa htyk ã wa omunh ã hã apkati
axkrunêpxi nê hkôt hã myt apha.

¹⁰ Koja mē wa htyk ã wa omu hãmri
nê hkÿnh nê. Nê hkÿnh xàj axpên mã
hkÿnh xà nhõr o pa. Wa kot kormã

htîr ri tanhmã mẽ homnuj to ho ri mẽ hkôt paja mã hamaxpêr nê wa htyk ã wa omu nê hkînh tỳx nê.

11 Tã koja wa htyk ã apkati axkrunêpxi nê hkôt hã myt apha hãmri nhũm Tirtũm wa kamã htyyxã rê nê akupỹm wa ho wa htîr nhũm wa kãnhmã xa nê ri mra. Hãmri nhũm mẽ kot wa omunh xwỳnhjaja tee ri hã wa omu nê kãm wa uma htỳx kumrêx. ãm kãm wa uma ho kãm wa uma.

12 Hãmri nhũm kaxkwa kamã mêhõja wa kãm kapêr nê wa kãm:

–E war amnê mẽ ixwỳr war api. Anê.

Hãmri nhũm wa kuma nê ma kakrã kamã àpir o mõi. Nhũm mẽ kãm wa hkurê xwỳnhjaja tee ri wa àpir ã wa omu.

13 Hãmri nhũm pika htertet tỳx nê. Nê krĩ kamã ixkre ohtô nê grành pa nê mẽ hkwy nhĩmex rax nê nhũm mẽ ohtô rax kumrêx nê axkaprã. Mẽ kêp 7.000 nê pikaprãr pa. Hãmri nhũm arĩ mẽ htîr nê ri mẽ pa xwỳnhjaja tee ri mẽ omu nê kãm ma xàj htertet tỳx nê axpên mã:

–Kwa Tirtũm mãn ã mẽ panhĩpêx anê. Hihtỳx o hihtỳx jakamã kaxkwa rũm ã mẽ panhĩpêx anê pu mẽ pahpi-itã pano ho ixkre pigrành ã omu. Anê.

14 E na ra amnhĩ xà htỳx kamã hamak xàja hamêxkrut nê hapêx. Tã no ãm arĩ mẽ kaxyw pyxi nê arĩk.

Mẽ kot pifti kot hitep kakôr ã harênh

Apokarip 4.8, 5.9-14, 7.9-12, 14.2-5, 15.3-4, 19.1-2

15 Tã nhũm Tirtũm kapêr o wryk xwỳnh kot hitepja õ pifti kakô nhũm kaxkwa kamã mẽ pa xwỳnhjaja kàx pê kapêr o:

E ãm hãmri. Na ra Mêpahpãm Maati mẽ Jesus Krisja wa kêp krĩ piitã hkôt mẽ piitã mẽ õ Pahihti na wa.

Koja Mêpahpãm Maatija kêp Pahi Maati rãhã nê pa ho pa xwỳnh. Anê.

16 Hãmri nhũm mẽ àptàr tũm pê 24jaja. Tirtũm kot mẽ pahto amnhĩptàr o hkrĩ xà mã hipòk nê mẽ hkrĩ xwỳnhjaja. Hãmri ã mẽ kapêr anhỳrja ma nê

Tirtũm ã hpijaàm kaxyw hpar pê rôròk pa nê htu myr pê hikwỹ. Hãmri nê kãm mex o mex ã harê nê kãm:

17 Pa Pahi Maati Tirtũm. Nà ãm hãmri mẽ ixrom axàhpumunh o axàhpumunh nê axihtỳx o axihtỳx.

Amnepê mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

ãm hãmri apê mẽ ixpiitã mẽ ixto amnhĩptàr xwỳnh. Nà ãm hãmri amex o amex.

18 Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to.

Nê ra mẽ htyk xwỳnhjaja kot kaj mẽ piitã akupỹm mẽ ho mẽ htîr pa nhũm mẽ pika rũm hapôx pa nê ma mra nê arĩ mẽ htîr xwỳnhjê nhĩhkô hã akutã hkrĩ pa.

Ka mẽ piitã mẽ omu nê tanhmã mẽ kot amnhĩ nhĩpêx to ho pa hã mẽ omunh hkôt tanhmã mẽ harênh to.

Mẽ kot amnhĩ tomnuj xwỳnhjaja kot kaj ma mẽ kot amnhĩ xà htỳx kamã hamak o pa htũm xà hwỳr amnhĩ nê mẽ arê nhũm mẽ ma hwỳr hapêx. Hãmri nê tee ri amnhĩ kukamã hamaxpêr nê gryk tỳx kumrêx.

Ka hpãnhã mẽ kot akôt amnhĩ xunhwỳr nê akapêr kôt amnhĩ nhĩpêx o mẽ pa xwỳnh piitã mẽ omu nê tanhmã mẽ ho mex to.

Mẽ kot amnhĩ to rũnh xwỳnhjaja nê mẽ kot amnhĩ to hkrye xwỳnhjaja.

Nê amnepêm mẽ kot anhỹ hã mẽ kapêr o mẽ pa xwỳnhjaja.

Akrajê piitã kot atã hpijaàm xwỳnhjaja kot kaj kormã mẽ htîr ri tanhmã amnhĩ to mex hã mẽ omunh xà hkôt tanhmã mẽ ho mex to.

ã kot kaj tokyx mẽ piitã ahpỹnhã mẽ omunh xà hkôt mẽ hipêx anê. Anê.

19 Hãmri nhũm kaxkwa kamã Tirtũm nhõrkwỹ hã hakwakre kahê xà amnhĩ mẽ pa kamã ôr o mês kunĩhtita pumu. Pu nhũm na hkatõtòk nê haxênh nê

hkrakrak nē na mē te kot jēr krā hakotre pyrāk xwýnhja pikap rôrôk rax nē. Nē pika htertēt tỳx o htertēt tỳx pa arī omunh o xa.

12

Mēhō ni mē kagāmnuti wa harēnh

¹ Tā pa axte mēmoj pumu. Kaxkwa kamā aa mē pahte mēmoj pumunh kēt xwýnhja pa omu. Nhūm mēhō nija xē te myt no mā hirā htỳx pyrāk. Nē hpar nhōkwa kamā mytwrýre ajēt. Nē kanhēti ho 12 o mē ahkà tu nē o xa.

² Na ra htujarō nē hpijagri kaxyw ōhy xà nē amnhī kamnhēr o xa.

³ Tā pa axte mēmoj pumu. Aa mē pahte mēmoj ā kot anhýr pumunh kēt xwýnh ōja pa omu. Kagāmnuti nom ām axtem hkà kamrēk tỳx kumrēx. Nē rax kumrēx. Nē hkrā kēp 7. Nē hkrā piitā kamā ōr o pahi hā mē ahkà htu nē o nō. Nē hkrā kamā pàr kēp 10.

⁴ Tā nhūm hamy ho apēr o kaxkwa kamā kanhēti ho ohtō nē pikap kurē. Hāmri nē ōhy xà nē amnhī kamnhēr o ām xwýnhhta wýr tē nē hkra kator nhūm kot kēp krēr kaxyw kutā hamār o nō.

⁵ Hāmri nhūm hkra kato nē myre. Hihtỳx o hihtỳx ā kot pika piitā hkôt mē piitā mē ho amnhīptār mā xwýnh na pre. Nhūm kagāmnutija kot kēp utār nē hkrēr mā tā nhūm Tirtūm kapēr o wryk xwýnhjē hōja hwýr wry nē kēp kumý nē ma Tirtūm wýr kaxkwa kamā kot mē pahto amnhīptār ā hkrī xà maatija wýr ho api.

⁶ Hāmri nhūm kagāmnuti tee ri ma kot kēp o mōr ā omu nē hpānhā nita o apkjē nē kot tanhmā ho kaxyw nhūm amnhī tā omu nē umaj hprōt nē ma tē nē nhýri kapôt ā amūxu. Ra Tirtūm kot hkukamā kām hpimxur xà nhīpēx xà hwýr hprōt nē ma tē nē kamā kēp amūxu. Nhūm Tirtūmjā nē kagā pumunh mex nhūm kēp hpimxur mex ā amgrā axkrunēpxi nē hkôt hā mytwrý kēp 6.

Mē kot kaxkwa kamā mēkarōmnuti kurē kaxār ā mē harēnh

⁷ Tā nhūm mē ra kaxkwa kamā kurē kaxār kaxyw. Kagāmnuti mē hkwyjaja nhūm mē ra Tirtūm kurē kaxār kaxyw kutā amnhī xunhwý. Jakamā nhūm Tirtūm kapēr o mē wryk xwýnhjē hkrāhtūm Mikewja ma mē hwýr amnhī kôt hkwyjē o mra nē mē pijapu ho kuhē.

⁸ Hāmri nhūm kagāmnuti tee mē kutā amnhī to htỳx kaprý nhūm Tirtūm kapēr o mē wryk xwýnhjaja amnhī nē mē ho axtem nē kaxkwa rūm mē kator o mē kator.

⁹ Satanasti pē kagāmnutita kagā kot ni kator ewa mā hēx xwýnh na pre. Nē hēx rom tanhmā hēx to ho pa xwýnh. Jakamā nhūm Mikew mē hkwyjaja hkwyjē mē mē ho hpim-ràatā amnhī nē pikap mē rēnh pa.

¹⁰ Hāmri nhūm kaxkwa kamā mēhōja axte kàxpē kapēr nē kapēr o: E ām hāmri. Na ra Tirtūm hihtỳx o hihtỳx o mē panē mēmoj punuj piitā ho hapēx par kumrēx.

Na pre hte Satanasti pē mēkarōmnutija xatā hwýr mra nē kām tanhmā Jesus kwýjē ho kapēr punuj to ho pa.

Tā koja axte mē ho kapēr kēt kumrēx. Ra Tirtūm kot amnhī nē kator o kator nhūm ra ma mōr o mōr kēnā.

Koja Tirtūm pika piitā hkôt mē ho amnhīptār xwýnhjē japōx pa nē hpānhā mē kaxyw Kra Krisja xām nhūm pika piitā hkôt mē ho amnhīptār rāhā ho pa.

Nà ām hāmri. Ja mex o mex.

¹¹ Na pre Jesus kôt mē pahtō nē mē pahtōxjaja mēkarōmnuti kutā amnhī to htỳx nē pa. No ām amnhī nhý hā ā kutā amnhī nhīpēx anhýr kēt.

Mē pahte amnhī tomnuj pānhā amnhīrer xwýnhhta na pre ty nē hkamrō ho mē kuhō nē mē nē mē kot amnhī tomnuj o hapēx.

Jakamā nhūm prem kukwak ri Satanasti kutā amnhī to htỳx rāhā pa.

Nhūm mē kot Jesus ā mē himex par kaxyw tā nhūm mē kām htyk

pyma hkêt nê. Ām Jejus kôt arī amnhī to htỳx nê mẽ hkôt pa rāhā nê.

Jao arī mẽ kām Jejus kot mẽ panê tanhmā amnhī nhīpêx to hā harênh o ri mẽ hkôt pa.

12 Tā Tīrtūm ra kot mẽ panê mẽmoj punuj o hapêx par jakamā kwa kaxkwa kamā mẽ apa xwỳnhjaja kêr ka mẽ akīnh nê apa.

Nom gô xujanār kām nê pika kamā mẽ pa xwỳnhjaja hêxta waa nê. Kojā mẽ mex kêt nê.

Nê ra Mikew mẽ hkwỳjaja kot amnhī nê kaxkwa rŭm mẽkarōmnuti mẽ hkwỳjê kator nê pikap mẽ rênh par jakamā nhŭm Satanastija gryk tỳx kumrêx.

Tīrtūm kot ma mẽ kot amnhī xà htỳx kamā hamak o pa tŭm xàta wỳr mênh xà hā arīgro hwỳr amgrà grêre nhŭm tee ri amnhī kukamā hamaxpêr nê gryk tỳx o gryk tỳx. Anê.

13 Hāmri nhŭm kagāmnutija mẽ kot amnhī nê kaxkwa rŭm kator ã amnhī pumu nê gryk tỳx nê. Nê gryk xà ma akupỳm ni kot hkra myre ho pijagri xwỳnhta wỳr tē nê tanhmā ho kaxyw hkôt ho krihkrit.

14-16 Hāmri nhŭm Tīrtūm kapêr o mẽ wrỳk xwỳnhjê hōja omu nê nija mǎ àanhàhti jara gō. Kot kagāmnuti pē ho htor nê ma nhỳri hpimxur xà wỳr htēm kaxyw. Nê kormā htor kaxyw nhŭm kagāmnuti omu nê kot gô ho hanhir kaxyw hkôt hakwa rŭm gô kapī nhŭm hpikapīr rax kumrêx. Te pyhti hprôt tỳx pyrāk. Hāmri nhŭm Tīrtūm omu nê nija nê tanhmā pika hto nhŭm kām axkjê nhŭm gô hprôt nê kamā pikapīr pa. Jakamā nhŭm mex pē àanhàhti jara ho to nê ma kapôt ã pimxur xà hwỳr ma tē. Nê kamā pa hā amgrà axkrunēpxi nê hkôt mytwrỳ kēp 6 nhŭm prem hamār mex rāhā ho pa.

17 Hāmri nhŭm kagāmnuti tee ri kām hpīr prām kaprỳ nê gryk tỳx kumrêx. Hāmri nê ma ni hkwỳjê hwỳr mō. Mẽ kot Tīrtūm mẽ Jejus wa hkôt

amnhī nhīpêx o mẽ pa xwỳnhjê hwỳr tanhmā mẽ homnuj to kaxyw ma mẽ hwỳr mō. Hāmri nê tanhmā kot mẽ ho kaxyw gô xujanār mỳ ri nō.

13

Satanasti nhō kōwenatō wa kot gô xujanār rŭm kator ã wa harênh

Sikŭn Tesarōn 2.3-5

1 Tā pa axte mẽmoj pumu. Nhŭm gô xujanār rŭm Satanasti nhō kōwenatōjê hōja te mrymnuti pyrā nê àpir o mō. Kagāmnuti pyrā nê hkrā kēp 7. Nê urāk nê hpār kēp 10. Nê hpār piitā kamā pahi hā mẽ ahkà. Nê ahkà piitā hā axtem tanhmā Tīrtūm o kapêr punuj to nê tanhmā haprỳ hto hā kagàja hikwỳ.

2 Nê hkà te kēp ropkrorti kà pyrāk. Nê hakwa te kot rēãwti jakwa pyrāk. Nê ìhkra te kot pàati nhīhkra pyrāk. Jakamā na pre kagāmnuti nhỳ hā hihtỳx o kēp pahi hā pika nhō xwỳnhjê ho amnhīptār o pa.

3 Nê hkrā hō te mẽ kot hayr o hpīr nhŭm ra akupỳm htīr nê arī hayr xà wakre rā nyw pyrāk. Jakamā nhŭm pika kamā mẽ pa xwỳnhjaja amnhī jaêr pē omu nê kamā no pyma nê. Hāmri nê hkôt amnhī nhīpêx o pa.

4 Hāmri nê kagāmnuti kot tanhmā mrymnuti ho nhŭm ÿ hā mẽ ho amnhīptār jakamā nhŭm mẽ piitā hamē wa hā hpijaàm kaxyw wa kām wa mex o wa mex ã wa harênh o pa. Nê mrymnuti hā axpên mǎ:

—Hêxta waa nê. Mẽ pahtō na mẽ pahte mrymnutita pyrā nê ã mẽ pahte amnhī nhīpêx kot anhỳr? Mẽ pahtō kot pu kutā xa nê paxihtỳx o hkurê kapa? Nà amrakati kumrêx. Anê.

5-6 Hāmri nhŭm Satanasti tanhmā mrymnuti ho nhŭm kapêr o ri mẽ hkôt pa nê mẽ ho amnhīptār o hā amgrà axkrunēpxi nê hkôt mytwrỳ kēp 6. No ãm axtem nê Tīrtūm o kapêr punuj o ri mẽ hkôt pa. Nê ri tanhmā haprỳ hto nê ò krīja mex kêt ã harênh o ri mẽ hkôt pa.

7 Hāmri nhŭm Satanasti ra kot mẽ hkurê kaxār kaxyw kām anê

nhũm axtem nê Tĩrtũm pê hkrajê kutã amnhĩ xãm nê mẽ hwỳr hprôt nê tanhmã hpijapu hto ho pa nê mẽ ho axtem nê mẽ ho krihkrit pa nê ahpỳnhã ri pika piitã hkôt mẽ uro hkwỳjê ho amnhĩptãr o pa. Nê ahpỳnhã mẽ kapêr xwỳnh piitã mẽ ho amnhĩptã.

⁸ Jakamã nhũm mẽ ohtô rax kumrêx nê mrymnuti hkôt amnhĩ nhĩpêx. Nê kutã hkôn krã ho rôrôk nê hkrĩ nê kãm mex o mex ã harê. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt nê. Amnepê mã kormã amrakati ri Tĩrtũm mẽ Jesus wa ô kagã kamã mẽ htĩr tũm nê mẽ pa mã xwỳnh nhĩxi xwỳnh pixjaja na prem mrymnuti pumu nê hkwỳjê rom hprĩ hã kot amnhĩ nhĩpêx ã omunh kurê kumrêx nê hkôt amnhĩ nhĩpêx kêt nê.

⁹ E ka mẽ atõ axumar kaxyw ajamak kre hã kot kaj ixujarênh piitã ama nê kãm ajamaxpêr tỳx rãhã ho apa.

¹⁰ Jakamã kwa Tĩrtũm kôt ixkwỳjaja. Kwãr mẽ mãmrĩ mẽ apynê nê mẽ ajagiê.

Nê kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpàr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

¹² Gô xujanãr rũm mrymnuti xàpir xwỳnhhta nhỹ hã pika nhõ xwỳnhjê mã kapêr tỳx nê mẽ kãm:

—E pika piitã hkôt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhhta kôt pix mã amnhĩ nhĩpêx

rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr.

¹³ Hãmri nê Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wryk to nhũm pikap rôrôk nhũm mẽ amnhĩ jaêr pê omu nê kamã no puma nê.

¹⁴ ã ri mẽ noo mã mẽ kãm amnhĩ nhĩpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhĩpêx anhỹr o mẽ no kupy r o pa nhũm mẽ omu nê hkôt amnhĩ nhĩpêx. Hãmri nhũm mẽ kãm mẽmoj tã karõ nê mẽ kãm:

—E wam mrymnutita. Mẽ kot hkrã hõ jayr o hpĩr nhũm akupỹm htĩr xwỳnhhta kêr ka mẽ kãm hkarõ nhĩpêx nê ho mẽ anhõ sãnti. Kê mẽ piitã hwỳr mra nê kutã hkôn krã ho rôrôk nê hkrĩ nê amnhĩ to kuwy nê kãm mex o mex ã harê.

Anhỹr o mẽ kãm hã karõ.

¹⁵ Hãmri nhũm mẽ kuma nê mar xã hkôt hipêx nê ãm nhũm xa. Hãmri nhũm mrymnuti kot hitepta omu nê hwỳr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwỳnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwỳnhhta haxwỳja mẽ kãm kapêr nê mẽ kãm:

—E koja ixkwỳjaja inhỹ hã mẽ apitã mẽ apê ixkwỳ hã mẽ akagã. Mẽ ate amnhĩ to rũnh xwỳnhjaja nê mẽ ate amnhĩ to hkryre xwỳnhjaja. Nê amarĩ mẽ kãm mẽ axàpênh xwỳnhjaja nê amnhĩ mã mẽ axàpênh xwỳnhjaja. Nê mẽ akàxpore rũnh xwỳnhjaja nê mẽ apê amrakati xwỳnhjaja. Kojã mẽ apiitã mẽ akagã hpa. Mẽ akwỳ nhõkrã kagã nê mẽ akwỳ xupôk rũm mẽ anhĩkra katut kagã.

¹⁷ —Gô xujanãr rũm mrymnutita nhĩxi kot paj mẽ atã hipêx. Rỳ hixi hã nũm nhĩpêx. Hãmri ka mẽ axàpkur xã japrôr kaxyw nhỹhỹm mra nhũm mẽ atã hixita pumu nê rĩ kormã mẽ amã mẽmoj kwỳ ho wênê ka mẽ amnhĩm haprô nê ho axàpkur o ri apa. Nê

mê ate mêmoj to wênê xwÿnhjaja koja
mê apê mêmoj japrôr kaxyw mê awÿr
mra ka mê tee ri nhÿhÿnh mê hã hixi
japêr hãmri nê mê kãm mêmoj to wênê
hkêt nê. ãm nhÿhÿnh mê atã hixi hã
kagàta pumunh pix kukwak ri kot kaj
mê awjaprô rÿ mêmoj to wênê. Anê.

¹⁸ E kwa kêr ka mê ixte mêmoj
pumunh nê mê amã hã kagàta pumu
nê ama nê kãm ajamaxpêr tÿx o apa.
Mrymnutita nhÿxi na kêp nÿm. Nÿmjja
kêp 666. E kaj mê akrã hi mex
xwÿnhjaja kot kaj mê aprÿ hã ja mar
tÿx kurê kumrêx.

14

Tÿrtÿm mex ã mê grer Apokarip 7.1-8

¹ Tã pa axte mêmoj pumu. Nhÿm mê
pahte amnhÿ tomnuj pãnhã amnhÿrer
xwÿnhjaja hixêt pê Siãwja nhÿmôk ã xa.
Nê puhã mê ohtô rax kumrêx nê
kuhê. Mê ohtô ho mê ohtô. Piitã
kamã mê kêp 144.000. Nê piitã ôkrã
hã mê pahte amnhÿ tomnuj pãnhã
amnhÿrer xwÿnh mê Hipêêxã wa hixi
jaxwÿr pa mê omu.

² Nhÿm mê kaxkwa kamã grer o
kuhê. Mê grerja mex o mex. Te kot gô
hprôt tÿx hkoko htÿx pyrãk. Nê te na
katôtök tÿx pyrãk. Nê te wiorãw môr
xwÿnhjaja kot hkakrênh mex pyrãk pa
mê mar o xa.

³ Nê mê grer xwÿnhjaja. Jejus puhã
mê ohtô rax kumrêx nê mê kuhê
xwÿnhjaja na prem Tÿrtÿm kot mê ho
amnhÿptãr ã hkrÿ xãta kuri grer o
kuhê. Nê mêmoj tÿr pê kwat xwÿnhjê
mê mê àptãr tÿm pê 24jê kuri grer o
kuhê. Mê grer nyw o gre. ãm mê
tapxipixjaja mê kot mê grer nywja
mar. Ra mê kêp Tÿrtÿm kra hã mê
kot mê ôkrã hã Tÿrtÿm mê Kra Jejus
wa hixi ã kagã nhÿm Tÿrtÿm kot ra
mrymnuti mê hõta wa kêp mê utãr
nê amnhÿ wÿr mê ho àpir xwÿnh na
pre mê. ãm mê tapxipixjaja mê grer
nywja ma nê wa kãm ho grer o kuhê.

⁴⁻⁵ Na prem tãm amnhÿ nhÿpêx nê
Tÿrtÿm kôt amnhÿ nhÿpêx rãhã ho pa.
Te mê kot amnhÿ prõ pix tãnopxar

rãhã ho pata pyrãk. Nê ri tanhmã hêx
to rÿ tanhmã ri amnhÿ tomnuj to ho
pa hkêt nê. ãm tãm ri amnhÿ nhÿpêx
mex o pa. Mê kêp Tÿrtÿm mê mê
pahte amnhÿ tomnuj pãnhã amnhÿrer
xwÿnh kwÿ jakamã na prem mê
pahte amnhÿ tomnuj pãnhã amnhÿrer
xwÿnhnta kôt pix mã amnhÿ nhÿpêx o
pa. Jakamã na prem mrymnuti kutã
rôrök nê kãm mex o mex ã harênh kêt
nê. Tã mê kumrêxjaja Tÿrtÿm mê Kra
wa kuri wa kãm grer o kuhê.

Tÿrtÿm kapêr o wrÿk xwÿnh pi- jakrunêpxi jarênh

⁶ Tã pa axte Tÿrtÿm kapêr o wrÿk
xwÿnhjê hõ pumu nhÿm kÿx pê ri htor
o pa. Ahpÿnhã ri pika piitã hkôt mê
uro hkwyjê hkôt. Na ahpÿnhã ri mê
kapêr xwÿnhjê piitã mê hkôt mê kãm
Tÿrtÿm kot tanhmã mê hipêx to hã
harênh kaxyw. Ahpÿnhã mê kapêr
xwÿnh piitã mê kãm harênh o pa. Nê
htor o pa pê kÿx pê mê kãm kapêr nê
mê kãm:

⁷ “E na ra Tÿrtÿm mê ate amnhÿ tom-
nuj mÿrapê tanhmã mê ato kaxyw.
Jakamã kwa mê tokyx hã apijaãm
kaxyw akõn krã ho arôrök nê akrÿ nê
kãm mex o mex ã harê. Kêp mêmoj
piitã ho kator xwÿnh na. Na pre
kaxkwa ho kato nê pika ho kato nê
gô xujanãr o kato nê hino ho kato nê
mêmoj piitã ho kator pa. Jakamã kwa
kêr ka mê tapxipix ã mãn apijaãm nê
kãm mex o mex hã harênh rãhã ho
apa.”

Anhÿr o mê kãm kapêr.

⁸ Hãmri nhÿm hõja wamta kôt tẽ nê
urãk nê kÿx pê mê kãm kapêr o:

—Koja Tÿrtÿm tokyx Papirõn grãnh
pa. Na hte krÿ nhõ xwÿnhjaja amnhÿ
tomnuj pix rãhã ho pa. Mê kot
amnhÿ nhÿpêx te mê kot kagôxyhti
ho hkõm nê amnhÿ mê mê piitã mê
kãm ôr nê ho mê ho pipãnh pyrãk.
Na htem mênijê piitã ho amnhÿkati o
pa. Nê amnhÿ kwÿjê pê mê hprõ ho
amnhÿkati. Nê amnhÿ mê pika piitã
hkôt mê pa xwÿnhjê mã anhÿr o pa.
Mê kot mê urãk nê ã amnhÿ nhÿpêx
anhÿr o pa kaxyw mê kãm anhÿr o pa.

Ja mÿrapê na ra Tirtûm kot tanhmã mē ho kaxyw mē hã amnhĩ jarē. Anē.

⁹ Tã nhũm wa hkôt hõja tē nē wa urak nē kax pē pika nhõ xwÿnhjê mã kapēr nē mē kãm:

—E mē ate mrymnuti kutã akõn krã ho arôrök nē akrĩ nē kãm mex ã harēnh xwÿnhjaja. Nē mē ate karõ nhĩpêx nē kutã akõn krã ho akrĩ nē kãm mex ã harēnh xwÿnhjaja. Nē mē anhõkrã nē mē anhĩhkra hã hixi hã kagã xwÿnhjaja.

¹⁰⁻¹¹ —Tirtûm na tee ja hã mē apumu nē mē akamã gryk tÿx kumrêx. Mē ate kapēr kuhpa hã mrymnuti hkôt amnhĩ xunhwÿr jakamã nhũm mē akamã gryk tÿx o mē akamã gryk tÿx. Jakamã koja kuwy hpõk rãhã ho rãhã xwÿnhjaja mã mē arēnh pa ka mē amnhĩ xà htÿx kamã ajamak rãhã apa ho apa. Koja kuwy hpõkja aa hapêx kêt nē kurũm kax mã hkũm àpir o pa rãhã nē. Koja ã mē ate amnhĩ tomnuj o mē apa xwÿnhjê nhĩpêx anē ka mē kamã apa ho apa nē aa kurũm ajapõx kêt nē kamã amnhĩ xà htÿx kãm ajamak rãhã apa ho apa. Arĩgro hãhãn kamãt kãm arĩ ã amnhĩ nhĩpêx anhÿr rãhã apa ho apa. Mē ate gõj rũm mrymnuti mē hkarõ ho sãnti wa kutã akõn krã ho arôrök nē akrĩ nē wa kãm wa mex ã wa harēnhja mÿrapê kot kaj mē ã amnhĩ nhĩpêx anē. Kot mē pahte amnhĩ tomnuj pãnhã amnhĩrer xwÿnhjê mē Tirtûm kapēr o mē wrÿk xwÿnhjê noo mã kot kaj mē ã amnhĩ nhĩpêx anhÿr o apa.

¹² Anhÿr o mē kãm kapēr jakamã kwa kêr pu mē pahte Tirtûm kôt amnhĩ xunhwÿr xwÿnhjaja mē hkukamã mē harēnhja ma nē Tirtûm kapēr kôt pix mã amnhĩ nhĩpêx rãhã ho ri papa. Mē kot tanhmã hã mē pahto htã pu mē hkaga hkêt nē amnhĩ kaxyw Jejus kôt pajamaxpêr tÿx rãhã nē. Hãmri nē nhÿrmã mē kurom ma õ krĩ hwÿr api nē kamã pamex kumrêx nē papa ho papa.

Mē kêp Jejus kwÿ hã mē htyk xwÿnhjê jarēnh

Wam Tesarõn 4.16

¹³ Tã nhũm kaxkwa kamã mēhõja axte inhmã kapēr nē inhmã:

E Juãw. Kêr ka ã akwÿjê mã mēmoj tã kagã anē nē mē kãm hã kagã ho: “E mē ate Tirtûm kôt ri amnhĩ nhĩpêx xwÿnhjaja. Mē kot Tirtûm ã mē apar nhũm mē atyk tã koja amnhĩ tã mē ato mex rax kumrêx.” Anhÿr o mē kãm hã kagã.

Anhÿr o inhmã kapēr. Hãmri nhũm Tirtûm Karõja kuma nē kãm:

—Nã ãm hãmri na ka ã mē harēnh anē. Ra Tirtûm kot amnhĩ tã mē omunh rãhã ho pa. Mē kot kôt pix mã amnhĩ nhĩpêx o pa pē mē kãm mē hkurê xwÿnhjê kutã amnhĩ to htÿx rãhã htykja nhũm Tirtûm kot amnhĩ tã mē omunh mex. Koja mē ho mex kumrêx. Mē kot Jejus ã mē hpar tã koja mē ho mex rax nē nhũm mē kuri mex rãhã nē pa ho pa nhũm mēhõ axte tanhmã mē ho hkêt nē. Anē.

Tirtûm kot tanhmã mē kãm hkĩnh xwÿnhjê nhĩpêx to

¹⁴ Tã pa axte mēmoj pumu. Kaxkwa kamã kakrã jakajre pumu. Nē kamã mēhõj te panhĩ pyrã nē nhÿ. Nhũm õr o pahi hã mē ahkã htu nē kuteere xwagixre py nē o nhÿ.

¹⁵ Hãmri nhũm kaxkwa kamã Tirtûm kapēr o mē wrÿk xwÿnhjê hõja Tirtûm mã amnhĩ jarēnh xà hã ixkre rũm kato nē kakrã jaka kamã ÿr xwÿnhjaja mã kapēr. Kax pē kãm kapēr nē kãm:

—E pika nhõ xwÿnhjaja te mē hpur kãm mēmo hy ra hkamrêk nē hikēnh mã mex pyrãk. Jakamã anhõ kuteere ata py nē ma mē hkôt tanhmã ri mē ho ho ri mē hkôt apa. Te mē kot mēmo hy nhĩkēnh o ri pa pyrãk o mē hipêx nē ma ho mē himex o ri apa. Anē.

¹⁶ Hãmri nhũm kuma nē pika piitã mÿri õ kuteere ho apê nē te mēmo hy jakar pyrãk o mē hipêx.

¹⁷ Hãmri nhũm axte Tirtûm mã amnhĩ jarēnh xà hã ixkre rũm kapēr o mē wrÿkjê hõja kato. ĩhkra kamã kuteere xwa gixre py nē o xa.

¹⁸ Hãmri nhũm axte hõja ixkre rũm kê hkôt kato nē hkukamã kator

xwÿnhhta mã kapër. Kàx pê kãm kapër nê kãm:

—E na ra Tirtùm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xô pê uwa ra hkamrêk nê rênh mã tãm pyræk. Jakamã ma pika hwÿr mẽ hwÿr wrÿ nê mẽ hkôt ri anhõ kuteere ho mẽ himex o ri apa. Anê.

¹⁹ Hãmri nhũm kuma nê ma pika hwÿr wrÿ nê mẽ hipêx o te mẽ kot uwa xô rênh nê prês kãm hkapĩr nê kagô janênh pyrã nê mẽ hkôt ri kuteere ho mẽ hpar o pa. Tirtùm ra mẽ kamã gryk tÿx o mẽ kamã gryk tÿx jakamã nhũm ã mẽ hkôt mẽ hipêx anhÿr o ri pa.

²⁰ Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nôr pyræk. Jao upÿm o 2 met nê hkôt ho mẽj met. Nom hprôt xà hkôt ry rax o ry rax. Ho 300 kirôm. Nhũm ã mẽ kamrô hprôt rax anê.

15

Tirtùm mex ã mẽ grer

¹ Tã pa axte kaxkwa kamã mẽmoj pumu. Hãmri nê amnhĩ jaêr pê omu nê tee ri hkukamã ijamaxpêr. Aa mẽ pahte mẽmoj ã kot anhÿr pumunh kêt xwÿnh pa pre omu. Nhũm Tirtùm kapër o mẽ wrÿk xwÿnh pê 7jaja ahpÿnhã pika hkôt mẽ kot amnhĩ tomnuj xwÿnhjê homnuj kaxyw akuprô nê kuhê. ãm jajê pixjaja koja Tirtùm nhÿ hã axte tanhmã mẽ homnuj to nê ho anhÿr pa hãmri nhũm ra ja hapêx o hapêx.

² Jakamã pa axte Tirtùm kapem gô rax pumu. Te kot kàx karÿr jaxênh mẽ kuwy hpôk o pihkàr pyræk xwÿnhja hprôt o nô. Nhũm Tirtùm kra hkwÿjaja gô mÿ ri ohtô rax kumrêx nê kuhê. Na pre ra mrymnutija tee ri amnhĩ kôt mẽ rênh mã nê tee ri mẽ hã amnhĩ nhÿxi hã kagà hprãm kaprÿ nom nhũm mẽ hkaga nê Jesus kôt amnhĩ nhÿpêx rãhã ho pa. Nê mrymnuti karô ho sãnti mã mex ã harênh kêt rãhã ty nê kaxkwa hwÿr

api. Jakamã nhũm Tirtùm amnhĩ tã mẽ omu nê mẽ kãm wiorãwti hkwÿ gô nhũm mẽ piitã hamÿ nê gô rax mÿ ri ho kuhê.

³ Hãmri nê Tirtùm mã tanhmã amnhĩ to ho pa xwÿnh pê Mojes mẽ mẽ pahte amnhĩ tomnuj pãnhã amnhÿrer xwÿnhhta wa kot Tirtùm mã grerta nhũm mẽ Tirtùm mã ho grer o kuhê nê grer o:

E Pahi Maati Tirtùm. Na pa mẽ ra inhmex pê awÿr ixàpir pa.

ãm hãmri na ka hte tanhmã amnhĩ nhÿpêx to ho ri apa.

Aa tanhmã axêx to hkêt.

Nê mẽ ixrom axihtÿx o axihtÿx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwÿ ho anhÿr o apa.

Pika piitã hkôt ahpÿnhã mẽ ho amnhÿptàr xwÿnhjê nhõ Pahi Maati na ka.

Nê ate tãm amnhĩ nhÿpêx xwÿnh na ka.

⁴ Jakamã na htem piitã atã hpijaàm o pa.

Nê amã mẽ kapër xàptàr pix o amã kapër.

Nê amã amex o amex ã ajarênh rãhã nê. ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhÿpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkôn krã ho rôrôk nê hkrÿ nê amã amex o amex ã ajarê. Anê.

Mê homnu xà hã xijere jamÿnh xwÿnhjarênh

⁵ Tã na pa axte mẽmoj pumu. Kaxkwa kamã Tirtùm nhôrkwÿ hã hitom xà piitã amnhĩ kahê xà rê nê kuhê pa omu. Nê ixkre kamã ô hitom mex maati haxwÿja amnhĩ kahê xà mẽ nê xa.

⁶ Hãmri nhũm ixkreja rÿm Tirtùm kapër o mẽ wrÿk xwÿnh pê 7jaja hapôj nê kuhê. Mẽ ê hakajre nê hirã htÿx kumrêx. Nê mẽ hinô pre xàja

ôr pix o. Nê piitã Tirtũm mã tanhmã kot mē homnuj to xà hã xijere pê 7ta jamýnh kaxyw kuhê.

⁷ Hãmri nhũm mēmoj tĩr pê kwatjê ôja mē kãm xijere hkwý jamý nê mē hwýr o tē. Xijere kêp 7 nê piitã ôr o. Nhũm hamý nê Tirtũm kapêr o mē wrýk xwýnh tajê hwýr o tē nê ho mē hipêx nhũm mē ahpýnhã hamý. Xijere kamã Tirtũm gryk xà jamý nê o kuhê.

⁸ Pu nhũm Tirtũm rũm kuwy hkũm hapôj. Tirtũm mex nê hihtýx xwýnh ta rũm hapôx rax o ixkreta kunor pa nhũm mē tee ri hwýr gjêx prãm kaprý.

16

Xijere kamã mē homnu xà pê 7 jarênh

¹ Tã pa arĩ mēmoj pumu nhũm Tirtũm nhõrkwý kamã mēhõja kapêr o wrýk xwýnh pê 7jê mã kàx pê kapêr nê mē kãm:

—E na pa ra mē kot ixkapêr kwým ri amnhĩ nhĩpêx xwýnhjê pumu nhũm ixpê ja omnuj týx o ixpê omnuj týx. Jakamã e mē anhõ xijereta jamý nê ma pika hwýr mē hwýr wrý nê axpên pãnhã mē hã xijere kamã mē homnu xà kapĩ. E mē tokyx ma mē hwýr wrý. Anê.

² Hãmri nhũm mē kuma nê axpên pãnhã mē hwýr wrý. Nhũm wamta kumrêx pika piitã hkôt mē homnu xàta kapĩ. Pu nhũm mē kot mrymnuti mē õ sãnti wa kãm mex ã harênh nê amnhĩ tã wa hixi jaxwýr xwýnh piitã hkãnhy hpa nê à htýx kumrêx nê ri pa.

³ Hãmri nhũm wamta kôt hõja õ xijere py nê gô xujanãr kãm hkapĩr pa nhũm gô te mē htykjê kamrô pyrã nê kamã mēmo mry htyyxà rênh xwýnh piitã pikaprãr pa.

⁴ Tã ra xijere kapĩr xwýnh o axkrut nê õ xijere kapĩ hãmri nhũm hkôt hõta õ xijere py nê hpãnhã gô hkryre piitã hkôt hkapĩr pa. Pyhti nê ri hino piitã hkôt hkapĩr pa nhũm piitã gô xujanãr pyrã nê mē hkamrô hã amnhĩ jahkre hpa.

⁵ Hãmri nhũm axtem Tirtũm kapêr o mē wrýk xwýnhjê hõ kot kãm gô piitã

hamãr xwýnh ta ja hã omu nê Tirtũm mã kãm:

Pa amex rãhã apa ho apa xwýnh. Nê arãhã apa ho apa xwýnh.

Nà ãm hãmri na ka ã mē kêp gôta nhĩpêx anê.

⁶ Na prem mē kot akôt amnhĩ nhĩpêx xwýnhjê mē mē kãm ri akapêr jarênh xwýnhjê hpar o pa nhũm mē hkamrô hpikapĩr rax nê.

Tã ka ra mē hã mē kêp mē hkôm xà homnu hpa nhũm mē kêp mē hkamrô ã amnhĩ jahkre nhũm mē tee ri ho hkôm mã. Nà ãm hãmri na ka ã mē kêp gô nhĩpêx anê Tirtũm. Anê.

⁷ Hãmri nhũm mē kot Tirtũm mã mēmoj nhõr xà hã mēsti hpar pê hkrĩ xwýnhjê hõja kuma nê kãm:

Nà ãm hãmri na ã ajarênh anê Tirtũm. ãm hãmri na ka ã akrajê hã mē hipêx anê.

Ra ate mē hã amnhĩ jarênh xà hkôt na ka hte tanhmã mē hipêx to.

Nà apê mē inhõ Tirtũm Maati na ka. Mē ixrom axihtýx o axihtýx nê axãhpumunh o axãhpumunh. Anê.

⁸ Tã ra axkrunêpxi nê õ xijere kapĩ. Jakamã nhũm mē hpãnhã hõja õ xijere o tē nê myyti hã hkapĩr pa nhũm hkagro htýx nê pika hkôt mē pa xwýnhjê hkà ho hxêt o pa.

⁹ Kagro htýx o hkagro htýx jakamã mē hkà ho hxêt nhũm mē kamã hkà kajê hpa. Hãmri nê tee ri amnhĩ pumu nê hamaxpêr o:

—Nà Tirtũmtija na ã mē pahtomnuj týx anê. Anê.

Hãmri nê kamã gryk týx nê haprý nê tanhmã ho kapêr punuj to ho pa. Nom mē kot amnhĩ tomnuj kaga nê kãm mex o mex ã harênh kêt nê arĩ tanhmã amnhĩ tomnuj to ho pa.

¹⁰ Nhũm ra kêp kwat nê õ xijere kamã mēmojja kapĩ. Jakamã nhũm ra hpãnhã hõja õ xijere o tē nê gôj rũm mrymnuti kot mē ho amnhĩptãr xà hã hkrĩ xà hã hkapĩr pa. Jakamã nhũm ra kot mē ho amnhĩptãr xà hã pikaja kamã kamàt kô htyk par kumrêx. Hãmri nhũm mrymnuti mē hkôt mē

kot amnhĩ nhĩpêx xwýnhjê hã kamàt kô hpa nhũm mẽ amnhĩ xà htỳx ã maj amnhĩ nham o axpên kamnhar tỳx kumrêx.

¹¹ Nê ã Tĩrtũm kot mẽ hipêx anhỹr ã amnhĩ tã omu nê kamã gryk tỳx nê tanhmã ho kapêr punuj to ho pa. No ãm kot amnhĩ tomnuj xwýnh ã amnhĩ pumunh nê kot amnhĩ tomnuj kaga hkêt nê.

¹² Nhũm prem ra kêp sĩk nê ò xi-jere kamã mẽmoj kapĩ. Jakamã nhũm hpãnhã hõja ò xijere kamã mẽmojta o tẽ nê pyhti pê Erax kamã hkapĩr pa nhũm gôja grà pa nê te kêp pry pyrà nê nõ. Jakamã nhũm myt japôx xà rũm mẽ ho amnhĩptàr xwýnhjaja nê pôristijaja hãmri pijapu kaxyw Jeru-jarê hwýr nojarêr nê hã hwýr pa.

¹³ Tã nhũm kagãmnuti mẽ ý hã mẽ kãm hêx o pa xwýnh mẽ mrymnutita wa mẽ hakwa rũm mẽmoj te priti pyrà nê hapôx o pa. No ãm priti hkêt mẽ kêp Satanasti mã mẽ ãpênh xwýnh kwýy.

¹⁴ Jakamã na prem pika piitã hkôt mẽ kot aa mẽmoj pumunh kêt kwý ho anhỹr o hêx rom mẽ no kupyr o mẽ hkôt pa. Tã pika piitã hkôt mẽ ho amnhĩptàr xwýnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwýjê mã kapêr ã harênh

¹⁵ Tã nhũm Jejus pika hkôt hkrajaja arĩ mẽ htĩr nê pa xwýnhjê mã kapêr nê mẽ kãm:

E mẽ inhma ixkwýjaja. Akupỹm ixte mẽ awýr ixwrýk xà hã arĩgroja ã kot paj te mẽ àhkĩnh xwýnh kot amnhĩ nhĩpêx pyrà nê mẽ ajaêr pê mẽ awýr wrý. Jakamã kêr ka mẽ amnhĩ wýr ijamãr rãhã ho apa. Kêr pa akupỹn wrý ka mẽ amnhĩ wýr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxàr kaxyw mẽ pikuprõnh ã mẽ harênh

¹⁶ Tã nhũm Satanasti hkwyjaja pika piitã hkôt mẽ ho amnhĩptàr xwýnhjê ho pikuprõnh pa nê mẽ hkurê kaxàr kaxyw ma Ijaew kot kãm “Amaketõ” jarênhja wýr mra.

¹⁷ Hãmri nhũm Tĩrtũm kapêr o mẽ wrýk xwýnh pê 7 kot hitepta ò xi-jere py nê kàx mã kamã mẽmoj kapĩr pa. Jakamã nhũm Tĩrtũm nhõrkwý kamã mẽ ho amnhĩptàr ã hkrĩ xà rũm Tĩrtũm kàx pê kapêr o:

—E hãmri. Na pa ra mẽ kot amnhĩ tomnuj mýrapê tanhmã mẽ ho jatur xàm mênh kaxyw. Anê.

¹⁸ Pu nhũm na hkatõtök nê hkrakrak nê haxênh nhũm pika htertet tỳx nê. Aa mẽ kot pika htertet tỳx kot anhỹr ã omunh kêt kumrêx.

¹⁹ Jakamã nhũm Papirõnja kajê axkrunêpxi. Papirõn nhõ xwýnhjaja kot amnhĩ tomnuj tỳx o paja mýrapê nhũm Tĩrtũm ã mẽ hipêx anê. Nê pika htertet o pika piitã hkôt krĩ grành pa.

²⁰ Nhũm gô hipök piitã gôja hã axkamur nhũm hapêx pa. Nê kên prêk nê hkrã hixêt rôrök nê hpigrành pa. Pika htertet tỳx kumrêx jakamã ã mẽmoj amnhĩ nhĩpêx anê.

²¹ Nê na mê pê jêr krã jakootija mẽ piitã mẽ hipy rôrök. No ãm hkrã hkryre hkêt hkrã rũnh kumrêx. ãm hpýnh nê kamã kêp 40 kir nê mẽ hã rôrök nhũm mẽ tee ri amnhĩ tã ã omu nê Tĩrtũm kamã gryk tỳx nê hapry nê ho kapêr punuj nê.

17

Tĩrtũm kra hkêt xwýnhjê jarênh

¹ Tã pa pre kê axte mẽmoj pumu. Nhũm kot xijere jamýnh xwýnhjê hõja ixwýr tẽ nê inhmã:

—E ma ixkôt tẽ nê mẽmoj pumu. Anê.

Hãmri pa kuma nê ma hkôt tẽ nhũm inhmã:

—Nà ahpýnhã gô rax mýri krĩ nhõ xwýnhjaja te ho ni hkupry gô mý ri ýr nê kãm mẽmyjê piitã hkĩnh o ýr xwýnhhta pyræk. Na htem uræk nê Tĩrtũm kapêr kôt ri amnhĩ nhĩpêx kêt nê. ãm htỳx ri tanhmã amnhĩ tomnuj

to ho pa. Jakamã koja Tirtũm tanhmã mẽ homnuj tỳx to nẽ mẽ ho hapêx.

² Krĩ piitã hkõt mẽ ho amnhĩptàr xwỳnhjaja na hte ma mẽ õ krĩ hwỳr mra nẽ te mẽ kot mẽ hkuprỳjê ho amnhĩkati pyrãk o amnhĩ nhĩpêx. Nẽ te pipãnh nẽ htỳx ri amnhĩ nhĩpêx pyrãk o amnhĩ nhĩpêx o pa. Nhũm krĩ nhõ xwỳnhjaja mẽ urãk nẽ amnhĩ krã hkõt pix mã tanhmã amnhĩ tomnuj to ho ri pa. E ma ixkõt tẽ nẽ ja hã mẽ omu. Anẽ.

³⁻⁴ Hãmri nhũm Tirtũm Karõ tanhmã ixto nhũm kapêr o wrỳk xwỳnhja ma kapõt wỳr ixto mõ pa kapõt ã mrymnuti hkrã kêp 7 nẽ kamã hpàr kêp 10 xwỳnhta pumu nhũm hkamrêeti nẽ xa. Nẽ ì piitã hã tanhmã Tirtũm o kapêr punuj to hã kagà. Nhũm katut ã mẽhõ ni kuprỳta nhỹ. Mẽ ho amnhĩptàr xwỳnh ã mẽ ê kakrã htyk nẽ hkamrêk o hkukàr jaxà nẽ hã nhỹ. Nẽ ôr o ôkrexê. Nẽ ôr o hinwỳyxê nẽ ìhkra kamã kàx. ãm ôr pix o hikukrêx. Nẽ kên mex karỳr pix o amnhĩ jamrêx. Nẽ ôr o kopti hõ py nẽ hã nhỹ. Kopti kamã ni kuprỳ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nẽ o nhỹ.

⁵ Nẽ ôkrã hã amnhĩ nhĩxi hã kagà kot:

Inhĩxi pimxur pẽ PAPIRÕN RAXTI.

Nẽ ixpê mẽ kêp mẽ mjênjê ho amnhĩkati ho mẽ pa xwỳnhjê nã na pa.

Nẽ ixpê mẽ kot axpên prõ ho amnhĩkati o mẽ pa xwỳnhjê nã na pa.

Nẽ ixpê mẽ kot Tirtũm nẽ mẽ kãm hêx o ri mẽ pa xwỳnhjê nã na pa.

Nẽ ixpê mẽ kot Tirtũm kapêr kõt amnhĩ nhĩpêx o pa hkêt xwỳnhjê nã na pa.

Anhỹr o ôkrã hã amnhĩ nhĩxi hã kagà kot anhỹr.

⁶ Nhũm axpã nẽ nhỹ pa omu. No ãm kagôxyhti ho hpipãnh kêt. Mẽ kot Jejus kõt amnhĩ xunhwỳr nẽ ri mẽ kãm Jejus kêp mẽ õ pahшти hã harênh xwỳnhjê kamnhwỳr o mẽ hpar nhũm mẽ hkamrô pikapĩr xwỳnhjê kamrô

ho na pre axpã nẽ nhỹ. Pa ã kot amnhĩ nhĩpêx anhỹr ã omu nẽ tee ri ijamaxpêr.

⁷ Hãmri nhũm Tirtũm kapêr o wrỳk xwỳnhja inhmã:

—Kwa mon ka ri ja pumu nẽ tee ri ajamaxpêr? E kot paj ixprĩ hã amã harê ka inhma. Niti mẽ hã ÿr xwỳnh pẽ mrymnutita. Krã pẽ 7 nẽ kamã hpàr pẽ 10 xwỳnhta kot paj ixprĩ hã amã hamẽ wa harê ka wa harênh ma.

⁸ —Nã mrymnutija na pre htĩr nẽ ri pa tã ty nẽ ahkre xupỳmti kamã hikwỳ. Nom koja akupỳm htĩr nẽ kurũm kato nhũm mẽ piitã omu nẽ ahpỳnhã tanhmã hamaxpêr to. Amnepêm kormã amrakati ri Tirtũm kot õ kagà kamã mẽ htĩr tũm nẽ mẽ pa mã xwỳnhjê nhĩxi jaxwỳr xwỳnhjaja koja kator ã omu nẽ ãm omu nẽ tanhmã hamaxpêr to hkêt nẽ. No mẽ kot Jejus kõt amnhĩ xunhwỳr kêt xwỳnhjaja koja mẽ amnhĩ jaer pẽ akupỳm kator ã omu nẽ tee ri hkukamã hamaxpêr. Hãmri nẽ axpên mã: “Kwa amnepêm htyk tã ra tanhmã amnhĩ to nẽ akupỳm htĩr nẽ api nẽ mõ.” Anhỹr o axpên mã harê. Hãmri nhũm kato nẽ ma tẽ nhũm Tirtũm tã ho hapêx kumrêx nhũm hapêx o hapêx.

⁹ —Kwa inhma nẽ jam ajamaxpêr tỳx nẽ. Mrymnuti krã pẽ 7ta te kêp hixêt prêk pẽ 7 pyrã nẽ hã ÿr xwỳnh ni kuprỳta te hixêt prêk pẽ 7ta ã ÿr pyrãk.

¹⁰ —Nẽ mrymnuti hkrã pẽ 7ja te kêp mẽ ho amnhĩptàr xwỳnh pẽ 7 pyrãk. Nhũm mẽ ho amnhĩptàr xwỳnhjaja te mẽ kêp 5 nẽ ra htyk pyrãk nhũm hkõt hõja arĩ mẽ ho amnhĩptàr o pa. No kot hitepta kormã. Nom koja mẽ ho amnhĩptàr ry hkêt nẽ.

¹¹ —Mrymnuti htĩr nẽ pa htã htyk nẽ ra akupỳm htĩr nẽ àpir xwỳnhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwỳnh pẽ 7jê hõ pyrãk. Koja hkrã pẽ 7ja mẽ ho amnhĩptã nẽ gaa nẽ htyk mẽ nhũm hpãnhã mrymnutita hpãnhã mẽ ho amnhĩptã. Hãmri nhũm rĩ kormã Tirtũm tã mẽ ho hapêx par kumrêx.

12 —Ně ate mrymnuti hkrā kamā pàr pē 10 pumunh xwýnh̄ta te mē kēp mē ho amnhīptār xwýnh̄ pē 10 pyrāk. No ãm jaja na kormā mē ho amnhīptār kēt nē. Koja mē nhýrmā anhīpē mrymnuti nhý hā ahpýnhā ri mē ho amnhīptār o pa nom mē ho amnhīptār japjē hkēt nē.

13 Koja mē tanhmā ja hā axpēn mar to hāmri nē mrymnuti mā anē nhūm mē hpānhā mē piitā mē ho amnhīptā.

14 —Ně mē ho amnhīptār xwýnh̄ pē 10jaja koja mē pahte amnhī tomnuj pānhā amnhīrer xwýnh̄ kurē kaxār kaxyw hwýr mra nē kutā pijapu ho kuhē. No ãm tee ri kām tanhmā ho hprām hkaprý nhūm mē ho axtem nē amnhī tā mē himex pa. Hihtýx o hihtýx o kot mē ho hpimràatā mē hakrenh par. Nē kēp pika piitā hkôt mē ho amnhīptār xwýnh̄jē nhō Pahihti. Tām na pre amnhī wýr mē kot hkôt amnhī nhīpēx o mē pa xwýnh̄jē wý nhūm htem amnhī kaxyw hkôt hamaxpēr mex rāhā ho pa.

15 —Ně krī pē Papirōn kapem gō xohtō mý ri ni kuprý hkrī xwýnh̄ta. Gō xohtōja te kēp ahpýnhā ri pika piitā hkôt mē uro hkwý pyrāk. Nē te ahpýnhā ri mē kapēr xwýnh̄ kwý pyrāk.

16 —Ně mrymnuti hpār pē 10ta kēp mē ho amnhīptār xwýnh̄ pē 10 pyrāk. Jakamā koja mē kām ni kuprýta prām nōkati nē kamā gryk týx kumrēx. Hāmri nē hwýr mra nē kēp hikukrēx piitā utā nē kēp ē hkwrýnh̄ pa nhūm hkēnh mex nē xa. Hāmri nhūm mē kupī nē ĩ hkrēr pa nē kuwy kamā hi rē nhūm kaxār pa nē hapēx.

17 —Na pre pahi pē 10jaja mrymnuti hkôt amnhī xunhwý nhūm Tirtūm ãm ja hā mē omu nē tanhmā nē mē kām nē hkēt nē. Jakamā koja mē ãm hkôt pix mā amnhī nhīpēx o pa rāhā nhūm Tirtūm mē ho hapēx. Nē mē ō krī mē mē ho hpimràatā mē ho hapēx pa. Hāmri nē mē ho hapēx o mē ho hapēx.

18 —Ně ate mēhō ni kuprý pumunh xwýnh̄ta te kēp krī rax pē Papirōn nhō xwýnh̄jē pyrāk. Nē mē ho

amnhīptār xwýnh̄ja pika piitā hkôt mē ho amnhīptār xwýnh̄jē hkrāhtūm na. Anē.

Ā Tirtūm kapēr o mē wrýk xwýnh̄ja inh̄mā mē harēnh̄ anē. Pa kuma nē ō ri mē amā hā kagà. Mē ate kamā harēnh̄ nē aprī hā mar týx kaxyw.

18

Tirtūm kot Papirōn grānh̄ par ā harēnh̄

1 Tā pa kē axte mēmoj pumu. Nhūm axte Tirtūm kapēr o mē wrýk xwýnh̄jē hōja kaxkwa rūm ahpār mā wrýk o tē. Tirtūm nhý hā hihtýx nē kamā hirā rax kumrēx o pika piitā hkôt mē kām hirā pa.

2 Nē ahpār mā tēn wrý nē kàx pē kapēr o:

E koja Papirōnja pigrānh̄ pa nē hpānhā kēp Satanasti mā mē àpēnh̄ xwýnh̄jē papxà nē kēp nhōnhti papxà. Hāmri nē aa kamā mēmoj mex kēt kumrēx.

3 Krī nhō xwýnh̄jaja na htem Tirtūm kapēr kôt amnhī nhīpēx kēt nē amnhī krā hkôt kām prām xà hkôt pix mā tanhmā amnhī tomnuj to ho pa. Te mēhō pipānh̄ nē htýx ri amnhī nhīpēx o pa pyrāk.

Nhūm krī piitā hkôt mē ho amnhīptār xwýnh̄jaja mē hwýr mra nē mēnijē ho amnhīkati ho pa.

Nē krī nhō xwýnh̄jaja mēmoj pumu nē kām hkīnh̄ nē haprōr kurē kumrēx o pa nē aa uaprōr o hapēx kēt nē.

Jakamā na hte krī hkwý nhō xwýnh̄jaja mē hwýr mēmoj to pa nē xatā mē kām ho wēnē nē mē kukwak ri mē hikàxpore rūnh̄ nē pa.

Anhýr o kapēr.

4 Hāmri nhūm Tirtūm Papirōn kamā hkrajē mā kapēr nē mē kām:

E mē tokyx mē kot ri htýx amnhī nhīpēx xwýnh̄jē nhō krīta rūm ajapōj ixkrajaja.

Kot kaj mẽ anhỹr kêt nẽ ra mẽ hkôt amnhĩ nhĩpêx pa mẽ ato apim-ràatã mẽ ate amnhĩ tomnuj ã mẽ atomnuj tỳx nẽ.

⁵ Krĩ nhõ xwỳnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kẽn katutxô nhũm hprêk rax o kot kaxkwa kanhwỳr kaxyw pyræk.

Na pa hte ã mẽ kot amnhĩ nhĩpêx anhỹr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapôj.

Anhỹr o hkrajê mã kapêr. Hãmri nẽ kapêr o mẽ wrỳk xwỳnhjê mã kãm:

⁶ E kwa mẽ ma mẽ hwỳr wrỳ nẽ tanhmã ixkrajê hã mẽ ho.

No ãm kêr ka mẽ tanhmã mẽ ho htỳx o mẽ kot ra tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx kumrêx o mẽ kot mẽ hipêxta jakre.

⁷ Krĩ nhõ xwỳnhjaja na prem mex nẽ pa.

Nẽ mẽ hikukrêx rũnh nẽ hkĩnh nẽ pa. Nẽ tanhmã amnhĩ to jarkrar to ho ri pa nẽ amnhĩ jarênh o:

“Ot pa mẽ te pahi ni kot amnhĩ nhĩpêxta pyrã nẽ ixkrĩ xà mex pix kãm ixkrĩ pyræk.

Nẽ te Tĩrtũm kot amnhĩ nhĩpêx pyræk o na pa htem amnhĩ nhĩpêx o ri ixpa.

Nẽ mẽ ixkĩnh nẽ mẽ inhmex rãhã ri ixpa.

Ã mẽ ixte amnhĩ nhĩpêx anhỹr xwỳnh na pa mẽ.”

Anhỹr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj tỳx nẽ pa.

Nẽ kê mẽ hkaprĩ nẽ amnhĩ xà htỳx kãm hamak rãhã nẽ pa ho pa.

⁸ E kê mẽ ã amnhĩ nhĩpêx anhỹr o pa. Jakamã koja mẽ arĩgro hpỹnh kãm mẽ hkwyjaja hpikaprãr rũnh nẽ nhũm arĩ mẽ htĩr xwỳnhjaja omnuj nẽ pa.

Nẽ tee ri amnhĩ pumu nẽ hkaprĩ xà mỳr o pa.

Nẽ amnhĩ xà htỳx kãm hamak o pa.

Nẽ tee ri amnhĩ nhĩpêx o pa.

Nẽ kãm prãm nẽ pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ hipêx anẽ. Anẽ.

⁹ Hãmri nhũm krĩ piitã kurũm mẽ ho amnhĩptar xwỳnhjaja. Mẽ kot mẽ hwỳr mrrar nẽ mẽ hkuprỳjê ho amnhĩkati nẽ mẽ uræk nẽ mẽmoj pumunh nẽ haprôr rãhã ho pa xwỳnhjaja tee ri krĩ kaxàr nẽ kàx mã kuwy hkũm àpir o paja pumu nẽ hkaprĩ nẽ mỳr o kuhê.

¹⁰ Nẽ Tĩrtũm kot mẽ ho hapêx par ã mẽ omu nẽ kãm ma htỳx kumrêx. Amỳm mẽ omunh o kuhê nẽ tee ri amnhĩ kukamã hamaxpêr nẽ htetet tỳx nẽ. Nẽ mỳr kãm kapêr o:

Hêxta waa nẽ Papirõn nhõ xwỳnhjaja. Mẽ amex nẽ axihtỳx mex nẽ apa htã nhũm Tĩrtũm mẽ anhĩmex pa. Hêxta waa nẽ. Anẽ.

¹¹ Nẽ mẽ hwỳr mrrar nẽ mẽ kãm mẽmoj to wẽnê ho mẽ pa xwỳnhjaja haxwỳja krĩ pumu nẽ tee ri amnhĩ kukamã hamaxpêr nẽ hkaprĩ nẽ mỳr o kuhê. Nhỹri koja mẽ tokyx axte mẽmoj to wẽnê? Mẽ kêp mẽmoj japrôr rũnh xwỳnhjaja hkaxàr par kumrêx kênã.

¹² Na prem mẽmoj piitã ho pa nẽ mẽ kãm ho wẽnê. Mẽmoj mex piitã. ôr o mẽ hkukrêx nẽ prat o mẽ hkukrêx nẽ kẽn jaxênh ã kàxpore xohtôô. Nẽ kupêxê mex. Kakrã htyk nẽ hkamrêk nẽ hkroore nẽ hã hapjê. Nẽ mẽmo pĩ kuxware nẽ pĩ htỳx nẽ kẽn jakàr nẽ kàx o ri mẽmo nhĩpêxja nhũm prem mẽ kãm ho wẽnê ho pa.

¹³ Nẽ mẽmo htwym nẽ mẽ hkuxwa xà. Nẽ mẽ ô ho ành xà nẽ mẽ ô kuxwa xà nẽ xwỳgrà nẽ harôj. Nẽ môx nẽ ôwêhti nẽ kawar nẽ kaxyw kawarti hkjênh xà hã karrotre. Nẽ nhỹhỹnh krĩ hõ kamã panhĩ hkwy pynê nẽ mẽ hwỳr mẽ o pa nẽ mẽ kãm mẽ ho wẽnê nhũm mẽ amarĩ mẽ hkôt ri àpênh rũnh o pa. Na prem ã mẽ kãm mẽmoj to wẽnê anhỹr o pa. Tã ra mẽ kot mẽ

haprôr xwÿnh mẽ mẽ pimràatã hapêx pa.

14 Jakamã nhũm mẽ tee ri mẽ hkukamã hamaxpêr nê te kot mẽ kãm kapêr pyrã nê mẽ kãm:

Hêxta waa nê. Mẽ amã mẽmoj prãm nê amnhĩm haprôr xwÿnhhta na mẽ apê hapêx par kumrêx.

Nê mẽ akàxpore rũnh nê mẽ akukrêx rũnhhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

15 Hãmri nê amÿm ri Tĩrtũm kot tanhmã mẽ hipêx to hã mẽ omu nê kãm ma xàj mur nê htertet o kuhê.

16 Nê mÿr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mẽ hikukrêx mex o amnhĩ jamrêx nê ri hã mra.

Nê ôr nê kên mex ã ohtô xwÿnh o amnhĩ jamrêx nê ri hã mra.

17 Tã ra hapêx par kumrêx. Anê.

Hãmri nhũm gô xujanãr kãm pãr nhõ dõn nê mẽ kot mẽ kãm pãr o ri mra xwÿnhjaja nê mẽ kot kamã tep pynênh xà ho tep pynênh o ri mẽ pa xwÿnhjaja nê pãr kãm amarĩ mẽ pa xwÿnhjaja hãmri mẽ hwÿr mra nê wamtajê pyrã nê tee ri amÿm ri mẽ õ krĩ pumu nê mÿr o kuhê.

18 Nê kurũm kuwy hkũm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

19 Hãmri nê mur nê hkaprĩ xàj pika hkwy jamÿ nê ho amnhĩ kamĩ nê mÿr kãm kapêr o:

Hêxta waa nê. Krĩ mũj na pre rax o rax.

Nhũm pre nhÿhÿnh pãr kãm mẽmoj to wênê ho pa xwÿnhjaja mẽ hwÿr mẽmoj to pa nê mẽ kãm ho wênê nê mẽ hkukwak ri hikàxpore rũnh nê ri pa.

Tã hãmri mẽ hapêx pa. Anê.

20 Hãmri nhũm Tĩrtũmja krajê piitã mẽ kãm kapêr nê mẽ kãm:

E ixpê Tĩrtũm na pa ã mẽ hipêx anê.

Mẽ kot mẽ apê ixkrajaja tanhmã mẽ atomnuj to ho paja mÿrapê na pa mẽ atã ã mẽ hipêx anê.

Jakamã e kaxkwa kamã mẽ apê ixri mẽ apa xwÿnhjaja.

Nê mẽ ate inhÿ hã ri mẽ kãm ixkapêr jarênh o mẽ apa xwÿnhjaja.

Nê Jejus nhÿ hã mẽ akapêr o ri mẽ apa xwÿnhjaja. Mẽ apiitã mẽ apê ixkra na ka mẽ.

E mẽ amnhĩ tã ja pumu nê akĩnh nê axpên mã apikunhar o akuhê. Pa na pa mẽ atã ã mẽ ho ijpapêx anê. Anê.

21 Tã nhũm kapêr o mẽ wrÿk xwÿnhjê hõja hihtÿx o kên rax kumrêxja mÿ nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krĩta koja Tĩrtũm te ho ixte gôx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

22-24 Na pre hte krĩja kamã mẽ kot ri mẽ kãm mẽmoj to wênê xwÿnhjaja amnhĩ to rũnh o krĩ piitã hkôt mẽ hakrenh pa.

Nê krĩ nhõ xwÿnhjaja na prem pika piitã hkôt hêx rom tanhmã mẽ no kupyri to ho ri pa. Jakamã ra mẽmoj to wênê xwÿnhjê pyrã nê mẽ hikukrêx rũnh gryk ã Tĩrtũm kaga.

No ãm ja pix kêt. Tĩrtũm krajê mẽ Tĩrtũm nhÿ hã kapêr o mẽ pa xwÿnhjaja na prem mẽ himex rax nê. Hãmri nhũm krĩ piitã kamã mẽ pa xwÿnhjaja mẽ kot mẽ hipêx ã mẽ omu nê mẽ urak nê ã mẽ hipêx anhÿr o pa.

Tã Papirõn nhõ xwÿnhjaja kot mẽ hipêx anhÿrja mÿrapê koja Tĩrtũm mẽ himex par kumrêx.

Jakamã koja mẽ axte hkĩnh nê hkĩnh xàj ri grer kêt nê.

Nê axte hkĩnh nê grer kãm hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawà hyr o hkrĩ hkêt nê.

Nê axte harôj kahuk o kuhê hkêt nê.

Nē axte mẽ õrkwỹ kamã kanê hpõk kêt nê.

Nē axte axpẽn mã ri hkrajê rer o ri pa hkêt nê. Koja ã mẽmoj kot anhỹr piitã hapêx pa. Anê.

19

Mẽ kot Tirtũm mex ã mẽ harênh

¹ Tã pa kê axte mẽmoj pumu. Nê kaxkwa kamã mẽ kapêr ma nhũm mẽ ohtô rax kumrêx nê tanhmã axpẽn mã kapêr to. Nê anhĩpê kàx pê kapêr tỳx nê kapêr o:

E pu mẽ pahpiitã Tirtũm mã mex o mex ã harê.

Tapxipix na hihtỳx o hihtỳx.

Nê tapxipix na àhpumunh o àhpumunh.

Nê tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytãr par jakamã kếp mẽ papytãr xwỳnh ã pixi mex na.

² Na hte amnhĩ jarênh xà hkôt tanhmã mẽmoj to ho pa.

Nê amnhĩ to hêx kêt nê.

Tã ãm hãmri na ã Papirõn nhõ xwỳnhjê nhĩpêx anê.

Na prem mẽ kãm Tirtũm kapêr jarênh o mẽ pa xwỳnhjê nhĩmex rax kumrêx.

Nê krĩ piitã hkôt ri pa nê amnhĩ kôt mẽ kurê nhũm mẽ kuma nê mẽ hkôt amnhĩ tomnuj o pa.

Nhũm Tirtũm tee ri hã mẽ omu nê ã hkrajê hã mẽ hipêx kati anê.

Ãm hãmri na ã mẽ hipêx anê.

Anhỹr o axpẽn mã harê.

³ Hãmri nê xatã axpẽn mã:

Nà ãm hãmri na ã mẽ panhõ Tirtũmja mẽ hipêx anê nhũm mẽ kurũm kuwy hkũm kàx mã àpir o pa.

Koja krĩ nhõ xwỳnhjaja amnhĩ xà htỳx kamã hamak rãhã ho pa nê aa à htỳx hapêx kêt.

E pu mẽ hã Tirtũm mã mex o mex ã harê. Anê.

⁴ Hãmri nhũm mẽ àptãr tũm pê 24 mẽ mẽmoj tĩr pê kwatjaja hãmri Tirtũm kot mẽ ho amnhĩptãr ã hkrĩ xà maati kutã rôrõk nê kãm hipô hpa. Hãmri nê ã mẽ kapêr anhỹr xwỳnhjê mã kapêr nê kãm:

Nà ãm hãmri na ka mẽ ã Tirtũm mex ã harênh anê. E pu mẽ pahpiitã kãm mex o mex ã harê. Anê.

⁵ Hãmri nhũm mẽhõja Tirtũm krĩ xà maati kamã kapêr o:

E mẽ axte Tirtũm mã mex o mex ã harê.

Mẽ ate Mẽpahpãm kôt amnhĩ nhĩpêx o mẽ apa xwỳnhjaja.

Nê mẽ apê mẽ ho amnhĩptãr xwỳnhjaja nê amarĩ ri mẽ apa xwỳnhjaja nê mẽ apiitã mẽ ate Tirtũm ã apijaãm o mẽ apa xwỳnhjaja kãm mex o mex ã harê. Anê.

Kot mẽ pahpãnhã amnhĩrer xwỳnh mẽ hkwỳjê jarênh

⁶ Tã pa tanhmã mẽ kapêr to hã mẽ kuma nhũm mẽ kàx pê kapêr tỳx nê. Te mẽ ohtô rax kumrêx kapêr pyrãk. Nê te gô koko htỳx rỳ na katõtõk tỳx pyrãk. Hãmri nê mẽ kapêr o:

E na ra Tirtũm kếp mẽmoj piitã ho amnhĩptãr xwỳnh.

Nê kếp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

⁷⁻⁸ Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpẽn mã mẽ rer xwỳnh kot amnhĩ nhĩpêx pyrãk.

Jao mẽ pahte amnhĩ tomnuj pãnhã amnhĩrer xwỳnhhta te kếp myja pyrãk.

Nê mẽ kot hkôt amnhĩ nhĩpêx xwỳnh piitã te mẽ kếp nija pyrãk.

Nê te mẽ kot axpẽn mã wa rer nhũm wa kot axpẽn kôt pa ho pa pyrãk o koja mẽ amnhĩ nhĩpêx.

Nê te mẽ kot mjên mã xwỳnh mã ê mex jakare nhõr nhũm kot hagjênh pyrãk. Nê ê mexja te mẽ kot tãm amnhĩ nhĩpêx xà pyrãk. Anê.

⁹ Hãmri nhũm Tirtũm kapêr o wryk xwỳnhja inhmã:

—E Juãw. Pa amã mẽmoj jarê ka mar tỳx nê akwỳjê mã hã kagà. Tirtũm kapêr kwỳ kot paj amã harê. Kếp Tirtũm kapêr jakamã ãm hãmri na. Na

hte mẽmoj jarēnh o hēx kêt nē. E kapēr ã kagà ho:

Na htem axpēn mã mẽ rer kaxyw nē amnhĩ wỳr hkwỳjē wỳ nhũm mẽ hwỳr mra nē wa hã hkĩnh nē apkur mex nē.

Ja pyrà nē Tĩrtũm kot amnhĩ wỳr mẽ hwỳr xwỳnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỳnhhta wỳr api nē ã amnhĩ nhĩpēx anē nē hkĩnh nē apkur mex nē.

Hãmri nhũm Tĩrtũm mẽ ho mex rax kumrēx. Anē.

–E kêt ka ã akwỳjē mã ja hã kagà anē Juãw. Anē.

Hãmri pa kuma nē kagà ja kamã mẽ amã hã kagà.

¹⁰ Hãmri nē hã kagà hpa nē ra ixte kãm mex o mex ã harēnh kaxyw kutã ixkõn krã ho tēm nē nhỹ nhũm tee ri amnhĩ tã ixpumu nē inhmã:

–Kwa ã ri inhĩpēx anhỹr kêt nē. Apyrà nē ixte Jejus mã tanhmã amnhĩ nhĩpēx to xwỳnh kēnã. Jejusja apyrà nē kēp inhõ pahшти na. Jejus kapēr na prem hkukamã mẽ kot Tĩrtũm nhỹ hã kapēr o mẽ pa xwỳnhjaja hã kagà nē mẽ kãm harēnh o pa. Jakamã kwa pu mẽ Tĩrtũm pix kutã mãn pahkõn krã ho parõrõk nē pahkrĩ nē kãm mex o mex ã harē. Anē.

Kawar jaka hã ỹr xwỳnh jarēnh

¹¹⁻¹⁶ Tã pa kē axte mẽmoj pumu. Nhũm kaxkwa axkjē nhũm kamã kawar jakajre xa nhũm mēhõja hã nhỹ. Hixi na pre kēp “Aa kot Tĩrtũm kaga hkêt xwỳnh.” Anē nē hixi hõ na pre kēp: “Tĩrtũm kôt pix mã amnhĩ nhĩpēx o pa xwỳnh.” Anē. ã hixi kot anhỹr jakamã na hte katàt kôt ahpỹnhã mẽ kot amnhĩ nhĩpēx ã mẽ omunh xà hkôt tanhmã mẽ harēnh to. Mẽ kot amnhĩ to mex ã mẽ omunh xà hkôt tanhmã mẽ hkwỳjē jarēnh to nē mẽ kot amnhĩ tomnuj ã mẽ omunh xà hkôt ahpỹnhã tanhmã hkwỳjē jarēnh to. Na pre mẽ kot tanhmã hkwỳjē nhĩpēx to ho pa xwỳnhjē kutã amnhĩ xunhwỳ nē mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpēx anhỹr o pa.

Nē no te kot kuwy hpõk pyræk jakamã hprĩ hã mẽmoj piitã omu nhũm mẽmoj kēp hpimxur kêt nē. Nē kēp pahi hã mẽ ahkà ho ohtõ nē kutu. Nē nhỹhỹnh ì hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrõ ho ê xy hpa nē xa. Nē hixi hõ pē:

TĨRTŪM KAPĒR O AMNHĨRĪT XWỠNH Nē ê ryti hã hixi hõ hã kagà. Nē ihkjē hã ãm tãm. Hã kagà jarēnh kot:

Ixpē mẽ ho amnhĩptàr xwỳnh piitã mẽ õ Pahi Maati na pa.

Nē hakwa rũm wapo xwa gixre põm katon ajēt. Kot ho tanhmã mẽ kot Tĩrtũm mẽ wa kutã amnhĩ xunhwỳr xwỳnhjē nhĩpēx to kaxyw. Jakamã ra mẽ piitã mẽ ho pikuprõnh pa nē mẽ hipēx o te mẽ kot prēs kãm uwa xõ kagõ janēnh pyræk nhũm mẽ hkamrõ hpikapĩr rax kumrēx. Tĩrtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipēx anē. Mẽ kot amnhĩ tomnuj o paja mỳrapē.

Nhũm õ põristi piitã uræk nē kawar jakare hã hkrĩ nē hkôt ri pa. Mẽ ê jaka muxre jagjē nē hã ma hkôt ri pa.

¹⁷⁻¹⁸ Tã pa axte Tĩrtũm kapēr o mẽ wrỳk xwỳnh õja pumu nhũm myyti kutã xa nē kàx pē nhõnhti mã kapēr nē mẽ kãm:

–E mẽ amnē mẽ ixwỳr wrỳ nē Tĩrtũm ã akĩnh nē mẽ htyk nē mẽ hikwỳ xwỳnhjē hã atu nē aku. Mẽ ho amnhĩptàr xwỳnhjaja nē põristijaja nē mẽ hkrãhtũm nē kawar nē kawar ã mẽ hkrĩ nē ri mrar xwỳnhjaja nē mẽ kot amnhĩ to rũnh xwỳnhjaja nē mẽ kot amnhĩ to hkryre xwỳnhjaja. Nē mẽ kãm mẽ àpēnh xwỳnhjaja nē amnhĩ mã ri mẽ àpēnh xwỳnhjaja. ãm mẽ htyk nē mẽ hikwỳ xwỳnh mũj piitã mãmrĩ mẽ hwỳr wrỳ nē mẽ hã atu nē mẽ aku. E mẽ tokyx nhõnhti. Anē.

¹⁹ Tã nhũm mrymnuti nē krĩ piitã hkôt mẽ õ pahi nē mẽ õ põristijaja piitã axpēn wỳr akuprõ. Wam kawar jakare hã ỹr nē htēm xwỳnh mẽ õ põristijē hwỳr hprõt nē mẽ hkurē kaxàr kaxyw axpēn mar kaxyw akuprõ.

20-21 Hāmri nē mẽ hwỳr mra nē mẽ hkurê kapa. No âm tee ri amnhĩ nhĩpêx nē tee ri kām tanhmã mẽ ho hprãm hkaprỳ nhũm wam kawar jakare hã ỹr nē htēm xwỳnhta hakwa rũm wapo xwagixre kator o mẽ himex pa. Hāmri nhũm mẽ hkwỳjê pyràn htyk pa nē hikwỹ. Nhũm nhônhti mẽ omu nē mẽ hwỳr wrỳk o mra nē mẽ kuku hāmri nē kām mẽ hkur kaga nē mẽ hkaga. No nhũm mrymnuti nē ỹ hã mẽ kām hêx o pa xwỳnhta wa nhũm mẽ axtem nē htĩr rãhã wa unê nē ma wa o tẽ nē êsôf o kuwy maati kamã wa kumê. Hāmri nhũm wa kamã htĩr tũm nē hxêt rãhã nē pa ho pa nē aa htyk kêt nê.

20

Mẽ kot Satanasti hpa hpre hã mẽ harênh

Wam Korĩt 15.20-28

¹ Tã pa kê axte mẽmoj pumu. Nhũm Tĩrtũm kapêr o mẽ wrỳk xwỳnhjê hõja kaxkwa rũm wrỳ nē ahkre xupỳmti hpro xà ho htỳx xà hã safja py nê kàx pytĩhti ho mẽ hpre xàja õ py.

²⁻³ Hāmri nē kagãmnuti pê hêx xwỳnh maati Satanastija pynê. Amnepêm Atãw mẽ Ewa wa kãm hêx xwỳnhta pynê nê kàx pytĩ o hpa hpre nê hte hpre hāmri nē ahkre xupỳmti nhĩtom xà mẽ nê kamã kumê. Hāmri nê akupỹm hpro xà ho hpro nê saf o hã ho htỳx. Kot pika piitã hkôt mẽ kãm hêx o pa pymaj ã hipêx anê. Koja tokyx kator kêt ry rax kumrêx. Koja kamã arĩ hkrĩ hã amgrà xohtô nê. Hã amgrà pê 1.000 nhũm rĩ kormã Tĩrtũm akupỹm kator nhũm kato nê ri pa. Nom pa hkrãnre.

⁴ Tã pa mẽ htyk nê akupỹm mẽ htĩr xwỳnh kwỳjê pumu. Kormã mẽ htĩr ri na prem Tĩrtũm kapêr kôt pix mã amnhĩ nhĩpêx o pa. Nê Jejus kêp mẽ õ pahĩhti hã harênh rãhã ho pa. Aa mẽ kot mrymnuti kutã hkõnkrã ho rôrôk nê kãm mex ã harênh kêt. Nhũm prem tee mẽ õkrã hã nê mẽ ãhkra katut ã mrymnuti nhĩxi nhĩpêx kaxyw nom nhũm prem hkaga kamã hihtỳx nhũm prem kãm mẽ hkurê xwỳnhjaja tee ri

ja hã mẽ omu nê mẽ mut jakar o mẽ kupa. Hāmri nhũm Tĩrtũm akupỹm mẽ ho mẽ htĩr nê mẽ kot mẽ ho amnhĩptar ã hkrĩ xà kamã mẽ hkrĩ. Jejus nhĩhkô hã mẽ hkrĩ hã amgrà pê 1.000 kaxyw.

⁵ Mẽ kumrêx na pre Tĩrtũm akupỹm mẽ ho mẽ htĩr nhũm mẽ hkwỳjaja mẽ hkĩnh ã arĩ ty nê hikwỹ hã amgrà pê 1.000 jakre nhũm rĩ kormã akupỹm mẽ ho mẽ htĩr.

⁶ Wam akupỹm mẽ htĩr xwỳnhjaja kêp Tĩrtũm kra jakamã koja mẽ Tĩrtũm kra hkêt xwỳnhjê kurom hkĩnh nê pa ho pa. Nê mẽ kurom mẽ kot amnhĩ xà htỳx kamã hamak o pa htũm xà wỳr pa hkêt nê. Nê mẽ kurom Tĩrtũm mẽ Kra Jejus Kris wa kuri mex kumrêx nê wa kãm tanhmã ri amnhĩ nhĩpêx to ho pa. Nê Jejus nhĩhkô hã mẽ ho amnhĩptar o pa hã amgrà pê 1.000.

Tĩrtũm kot kuwy hwỳr Satanasti mẽnh ã harênh

⁷ Tã koja amgrà pê 1.000 hapêx nhũm rĩ kormã Tĩrtũm kapêr o wrỳk xwỳnhja akupỹm ahkre xupỹm wỳr tẽ nê Satanasti mã kahê xà mẽ nhũm kato.

⁸ Hāmri nê kê axte pika piitã hkôt tanhmã mẽ kãm hêx to ho ri pa. Gorti nhõ xwỳnhjê mã nê Makok nhõ xwỳnhjê mã nê krĩ piitã hkôt Tĩrtũm nê tanhmã mẽ kãm hêx to ho mẽ hkôt pa. Hāmri nê mẽ kot Tĩrtũm krajê kutã amnhĩ xunhwỳr nê mẽ hkurê kaxar kaxyw amnhĩ kwỳjê ho akuprõ nhũm mẽ ohtô rax kumrêx nê axpên wỳr akuprõ. Te pikahti grã xohtô pyrãk.

⁹ Hāmri nê ma Tĩrtũm krajê nhĩmex par kaxyw mẽ hwỳr mra nê mẽ õ krĩ mã hipôk pa nê kuhê. Mẽ õ krĩja Tĩrtũm mã mex tã nhũm mẽ kot kêp grãnh par kaxyw ma hwỳr mra. Hāmri nhũm kaxkwa rũm kuwy hpôkja mẽ haêr pê mẽ hã rôrôk nê mẽ ho hxêt pa.

¹⁰ No mẽ kãm hêx xwỳnh maati Satanastita nhũm Tĩrtũm kapêr o wrỳk xwỳnhja axte unê nê ma êsôf o kuwy maatita wỳr o tẽ nê kamã kumê. Ra mẽ kot kamã mrymnuti wa kot

Tirtūm nê mẽ nokupyr o pa xwỳnh wa mẽnh tã wa hkôt Satanasti mã ho anê nê kamã kumẽ nhũm kamã pa ho pa. Kojã mẽ aa kator kêt kumrêx. Nê arĩ kamã amnhĩ xà htỳx kamã hamak rãhã nê pa ho pa.

Tirtūm kot ahpỳnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

¹¹ Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tirtūm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tirtūm kamã nhỹ.

¹²⁻¹³ Hãmri nhũm ra mẽ htyk nê mẽ hikwỳ xwỳnh piitã akupỳm hapôx pa nê Tirtūm kot tanhmã mẽ harênh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja nê mẽ ho amnhĩptàr xwỳnhjaja nê gô xujanãr kãm mẽ mrôr nê mẽ htyk xwỳnhjaja. Ra mẽ htyk nhũm mẽ kot mẽ hagjênh xwỳnhjaja piitã mẽ htykjê papxà rũm hapôx pa nê Tirtūm kutã ohtô ho ohtô nê hkrĩ. Hãmri nhũm Tirtūm ô kagà py nê kamã mẽ piitã mẽ hixi japêr. Kagà kamã ra mẽ hkukamã mẽ htĩr tũm nê mẽ pa ho mẽ pa mã xwỳnhjê nhĩxi japêr. Nê kagà hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagàja. Nhũm kupy nê kamã tanhmã mẽ harênh to nê hkôt hprĩ hã mẽ piitã mẽ omunh pa nê rĩ kormã ahpỳnhã tanhmã mẽ harênh to.

¹⁴⁻¹⁵ Hãmri nê mẽ htĩr tũm nê mẽ pa mã xwỳnhjê nhĩxi hã kagàja kamã tee ri mẽ hkwỳjê nhĩxi japêr nhũm kamã amrakati. Jakamã nhũm mẽ ma kuwy maatita wỳr mẽ o mra nê kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyrãk nhũm mẽ kamã rôrôk nê tee ri amnhĩ xà htỳx kamã hamak rãhã nê pa ho pa nê aa kator kêt kumrêx.

21

Pika mẽ kaxkwa wa nyw jarênh Sikũn Pêtre 3.8-13

¹ Tã pa axte mẽmoj pumu. Nhũm Tirtūm ra pika mẽ kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nê.

² Hãmri nhũm Tirtūm nhõ krĩ mex pê Jerujarê nywja tanhmã amnhĩ to nê pika nyw wỳr wryk o mō. Krĩja mex kumrêx. Mex o mex. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê pika nyw wỳr mex kumrêx nê wryk o mō.

³ Hãmri nhũm Tirtūm kot mẽ ho amnhĩptàr ã hkrĩ xà maatija kamã mẽhõja kapêr o:

—Nà ãm hãmri. Na ra Tirtūm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Kojã hkrajaja hkôt pa ho pa nê axte htyk kêt kumrêx. Nhũm Tirtūm mẽ nê mẽ no kagô nhĩnhĩnh pa nhũm mẽ axte hkaprĩ nê mỳr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra mẽ hkaprĩ nê à nê mỳr o pata hapêx par kumrêx nhũm hpãnhã mẽmoj nyw pix. Anê.

⁵ Hãmri nhũm Tirtūm tãm tanhmã inhmã kapêr to. Krĩ xà maati kamã ỳr xwỳnhhta tãm inhmã kapêr o:

—E na pa ra akupỳm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarênh anê. Ixêx kêt. Jakamã kêt ka akwỳjê mã piitã hã kagà hpa. Kê mẽ kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mẽmoj mã ijamaxpêr xwỳnhja na pa ra ho anhỳr pa. Ixpê mẽmoj piitã ho anhỳr o hkrax xwỳnh nê mããnên ixpê mẽmoj piitã ho ijapêx par xwỳnh. Nê ixrãhã ixpa xwỳnh. Amnepêm kormã mẽmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã mẽ kãm kôr nê kãm gô hkwỳ ho hkôm hprãm xwỳnhjê pyrã nê mẽ kãm ixpix prãm xwỳnhjaja kot paj te mẽ kãm inhõ hino rũm gô hkwỳ nhõr nhũm mẽ kot ho

hkôm pyrâk o mē hipêx. Hāmri nhūm mē htīr tūm nē ixri pa ho pa nē axte htyk kêt nē. Kot paj ā mē hipêx mex anē.

⁷ —Mē ate tanhmā amnhī tomnuj to nē amnhī to htýx nē ixkôt pix mā amnhī nhīpêx o mē apa rāhā mē atyk xwýnhjaja kot paj ā mē anhīpêx mex anē. Ka mē apē ixkra hā amex nē ixkôt ri apa rāhā ho apa. Pa ixpê mē anhō Tīrtūm ā tanhmā mē ato mex to rāhā ho ixpa.

⁸ —No mē kot amnhī kaxyw ixkôt hamaxpēr kêt xwýnhjaja. Nē mē kot amnhī tomnuj xwýnhjaja nē mē kot ri mē hpar prām xwýnhjaja. Nē mē kot nhām ri mēnijē ho amnhīkati xwýnhjaja. Nē wajagajaja. Nē mē kot amnhī to sānti hwýr o pa xwýnhjaja. Nē ri mē hēx nhi xwýnhjaja. Ā mē kot amnhī nhīpêx anhýr xwýnh piitā koja mē apē ixkrajē hkīnhā ma kuwy maati wýr hapêx par kumrêx. Te axte mē htyk pyrâk nom koja mē axte htyk kêt nē. Anē.

Jerujarē nyw jarēnh

Sikūn Korīt 6.16; Karatas 4.26; Eprêw 12.22-24

⁹ Tā nhūm mē kot xijere pē 7 kamā Tīrtūm gryk xā jamýnh xwýnhjē hōja hāmri ixwýr tē nē inhmā:

—E ma ixkôt tē nē mēmoj pumu. Na ra krī nywja pika nyw wýr wrýk o mō. Te mjên mā xwýnh ē mex jaxàr nē amnhī to muxre nē mjên wýr htēm pyrā nē mex kumrêx nē kaxkwa rūm pika nyw wýr wrýk o mō. Nē kot ho mjên mā xwýnhhta te mē pahte amnhī tomnuj pānhā amnhīrer xwýnhhta pyrâk. E tokyx tē nē omu. Anē.

¹⁰ Hāmri nhūm Tīrtūm Karō tanhmā ixto pa ma kot inhmā kapēr xwýnhhta kôt tē nhūm ma ixto mō nē kēn krā hprêeti hwýr ixto api nē himōk ā ixām. Pa Tīrtūm nhō krī mex pē Jerujarē nywja pumunh o xa. Nhūm mex o mex. Ām hāmri te mjên mā xwýnh kot ē mex jaxàr nē amnhī to muxre nē mjên wýr htēm pyrā nē ahpar mā wrýk o mō pa ixprī hā omu.

¹¹ Na pre rax o rax nē mex o mex. Tīrtūm kamā pa ho pa jakamā nhūm kamā hirā htýx kumrêx. Te kēn mex ā kàxpore xohtō jaxēnh mex týx pyrâk.

¹²⁻¹³ Nē krī puhā kahēja hprêk rax nē. Nē hwýr mē gjêx xā kēp 12. Na pre myt japôx xā rūm axkrunēpxi. Nē myt gjêx xā rūm haxwýja axkrunēpxi. Nē akutā kahpa hkôt haxwýja axkrunēpxi. Nē ahpýnhā hakwakre hā Tīrtūm kapēr o wrýk xwýnhjaja hamār o kuhē. Nē hakwa kre piitā hā Ijaew pē ahpýnhā mē pikjêr kām mē kēp 12jaja mē hixi hā kagā.

¹⁴ Nē kahē xunhwýr xā hkukamā kēn pytyrja ahpýnhā kēp 12. Kēn pytyrta ā na mē kot Jesus nhý hā mē ahkre o mē pa xwýnh maati pē 12jē nhīxi hikwý.

¹⁵ Tā nhūm kot ixto mōr nē inhmā mēmoj jahkre xwýnhhta ôr o mēmo pī py nē kot ho krī ho mīdi kaxyw xa. Nē ho kahē piitā ho mīdi kaxyw. Nē mē gjêx xāja ho mīdi kaxyw.

¹⁶⁻¹⁷ Hāmri nē ho mīdi hpa. Krīja ry nē kahpa piitā axpēn pyrâk. Nē hprêk piitā määnēn axpēn pyrâk. Kamā mēmoj piitā ahpýnhā kēp 2.200 kirōm. No puhā kahēja hprêk o 64 met pix nē.

¹⁸ Nē kahēja kēn jaxēnh pix o kot amnhī nhīpêx jakamā mex o mex. Nē hkarýr týx kumrêx. Nē kahē hkre kamā krī kamā ahpýnhā ri ixkreja ôr pix o kot amnhī nhīpêx. Nē piitā hkarýr týx.

¹⁹⁻²⁰ Nē kahē xunhwýr xā hkukamā kēn pytyrta ahpýnhā ri kēn mex pix o kot amnhī nhīpêx. Piitā mex kumrêx nē hkarýrti.

Wamta kawax pē grāgrāre.

Nē hkôt ja kawax pē grāgrā kakrā htyk.

Nē hkôt ja kakrā htyk.

Nē hkôt hōja grāgrā karýr.

Nē hkôt ja hkamrêk pihkarti.

Nē hkôt ja grāgrā kakrā htyk.

Nē hkôt ja hkamrêk týx kumrêx.

Nē hkôt ja rārààre.

Nē hkôt ja grāgrā mē pihkàr.

Nē hkôt ja rāràr mē pihkàr.

Nē hkôt ja grāgrā karýyre.

Ně hkôt ja kakrã htyk pihkàr.
 ã kën pytyr mex kot anhÿr.

21 Ně mẽ gjêx xà hã hakwakre kahê xà pê 12ja mẽmo kën jakooti rûnh kumrêx pix o. Ně krĩ kahti hkôt pry nhĩkwÿ xwÿnhja ãm ôr pix o. Ně hkarÿÿre.

22 Pa pre tee ri krĩ kamã Tĩrtũm mã amnhĩ jarênh xà hã ixkre japêr nhũm amrakati. Mo kaxyw koja mẽ axte ixkreja hwÿr mra? Ra Pahi Maati Tĩrtũm xihtÿx xwÿnh mẽ mẽ pahte amnhĩ tomnuj pãnhã amnhĩrer xwÿnhhta ra hkrajê kamã pa ho pa kênã kot kêt mẽ axte ri ixkreta o presija. Koja mẽ kãm wa mex ã wa kãm harênh prãm nê nhÿri tãm wa hwÿr mra nê ã wa kãm kapêr anê. Te mẽ pahte pahi hwÿr pamrar nê kãm pakapêrta pyrã nê wa hwÿr mra nê wa kãm kapêr.

23 Ně koja krĩja kamã myyti nê mytwrÿre hkêt. Mo kaxyw kot kêt myyti nê mytwrÿreja arĩ ri hirã ho pa? Krĩ kamã Tĩrtũm pa ho pa jakamã kamã hirã mex kumrêx. Ně mẽ pahte amnhĩ tomnuj pãnhã amnhĩrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nê hirã mex o pa. Kot hirã mex o kot myyti jakrenh. ã Tĩrtũm mẽ Kra wa krĩja kamã pa ho pa jakamã nhũm mẽ axte myyti ho presija hkêt nê.

24 Koja krĩ nhõ xwÿnhjaja hirã mex pix kãm ri pa ho pa nê tãm ri amnhĩ nhĩpêx o ri pa. Tã koja mẽ ho amnhĩptãr xwÿnhjaja Tĩrtũm wÿr mra nê amnhĩ rom kãm mex o mex ã harê nê kãm:

—Na pre mẽ ixkwÿjaja mẽ ixpê mẽ ho amnhĩptãr xwÿnh ã axpên mã mẽ inhmex nê mẽ ixãhpumunh ã ri axpên mã mẽ ijarê. Nom mẽ ixrom amex o amex nê axãhpumunh o axãhpumunh. Jakamã ãm hãmri na htem amã amex o amex ã ajarê Tĩrtũm. Anê.

25 Ně krĩ hwÿr hakwakre koja amnhĩ kahê xà rênh rãhã kuhê nê aa amnhĩ kahê hkêt nê. Jar mẽ panhõ pika kamã na hte kamãt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika

nywja kamã ã amnhĩ nhĩpêx anê? Koja kamãt kêt nê hirã rãhã ho rãhã jakamã nhũm mẽ amnhĩ tã kahê hkêt rãhã nê pa ho pa.

26 Ně koja mẽ piitã Tĩrtũm wÿr mra nê kãm mex o mex ã harê nê kãm:

—Pa Tĩrtũm. Hêxta waa nê. Anhõ krĩja mex kumrêx. Mex o mex. Ně mẽ ixrom amex o amex nê axihtÿx o axihtÿx. Ně mẽ ixrom axãhpumunh o axãhpumunh. ãm hãmri na ka ra mẽ ixpê akrajê kamã apa ho apa Tĩrtũm. Anê.

27 Ně koja mẽmoj punuj krĩja wÿr gjêx kêt kumrêx. Mẽ hpijaãm kêt xwÿnhjaja nê ri mẽ hêx xwÿnhjaja hwÿr gjêx kêt nê. ãm mẽ pahte amnhĩ tomnuj pãnhã amnhĩrer xwÿnhhta nhõ kagã kamã Tĩrtũm ri mẽ htĩr tũm nê mẽ pa mã xwÿnhjê nhĩxi nhĩpêx xwÿnh pixjaja koja mẽ hwÿr agjê nê kamã pa ho pa.

22

1-2 Tã pa pre axte mẽmoj pumu. Nhũm Tĩrtũm kapêr o wrÿk xwÿnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwÿnhja wa kot mẽ ho amnhĩptãr ã hkrĩ xà maati rũm pyhti hprôt. Krĩ kahti hkôt pry pohti nõr xwÿnhhta kahti hkôt hprôt o nõ. Pyhti kamã gôja na htem ho ixkõ nê htĩr tũm nê pa ho pa. Gô karÿÿre. Nhũm mẽmo pĩ hpãr muxre xwÿnhja akutã hijê nê xa. Pĩ xôja na htem kuwô nê htĩr tũm nê pa ho pa. Na hte apkati mẽ ô rãhã nê kuhê. Nê axtem hõja mẽ piitã mẽ mex nê à hkêt kaxyw na hõja.

3 Amnepêm na pre Tĩrtũm Atãw mã kapêr nê kãm:

—Ate amnhĩ tomnuj mÿrapê kot paj tanhmã pika homnu hto nhũm apê mex kêt nê. Ka kamã apur nê kamã axãpênh rûnh o apa rãhã nê rĩ kormã kamã axãpkur o ri apa. Apê jamnuj tã kot kaj mẽ ã amnhĩ nhĩpêx anhÿr o apa rãhã ty. Anê.

Tã ra Tĩrtũm nhõ krĩ nyw kamã mẽ omnuj xàja amrakati kumrêx. Nê Tĩrtũm mẽ kot mẽ pahpãnhã amnhĩrer xwÿnhhta wa õ krĩ kamã pa ho pa

jakamã mẽ pahte kamã mẽ papa xwýnhjaja kot puj mẽ wa kãm tanhmã amnhĩ nhĩpêx to ho ri papa.

⁴ Kot puj mẽ tâ pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpêx pyrãk o mẽ panhĩpêx.

⁵ Nẽ kot puj mẽ Pahi Maati Tĩrtũm nhĩrã kamã ri papa nẽ axte myyti nhĩrã ho presija hkêt nẽ. Koja kamãt hapêx pa pu mẽ axte kanê ho presija hkêt nẽ. Nẽ Jejus nhĩhkõ hã hirã kamã mẽmoj to amnhĩptãr rãhã ho papa.

*Jejus tokyx akupýn wrýk ã harẽnh
Apokarip 1.1-3*

⁶ Tã nhũm Tĩrtũm kapêr o mẽ wrýk xwýnh kot ixto mõr xwýnhhta axte inhmã kapêr nẽ inhmã:

—E nã ãm hãmri na ixte amã mẽmoj piitã harẽnh xwýnhja. ãm hãmri na. Jakamã kwa kêr ka arĩ hã ano htýx rãhã ho apa. Amnepêm Tĩrtũmja ý hã mẽ kapêr o pa xwýnhjê mã tanhmã kapêr o amnhĩrĩt to. Kot tanhmã amnhĩ nhĩpêx to hkukamã mẽ kãm ho amnhĩrĩt nhũm prem kuma nẽ ô ri ma hkwyjê mã harẽnh o ri mẽ hkõt pa. Tã ra mẽ hpãnhã pa mẽ awýr inhmẽ. Mẽ ate Tĩrtũm mã tanhmã amnhĩ to ho apa xwýnhjê mã ixte ja jarẽnh kaxyw Pahihti Tĩrtũmja mẽ awýr inhmẽ pa wrý. Nã koja mẽmoj tokyx ã amnhĩ nhĩpêx anẽ.

⁷ Na pre Jejus mẽ amã amnhĩ jarẽnh o: “Kot paj tokyx akupým mẽ awýr wrý. Tã mẽ ate ijarẽnh ã kagã kamã harẽnh nẽ mar nẽ amnhĩ kaxyw hkõt ajamaxpêr nẽ hkõt amnhĩ nhĩpêx xwýnhjaja kot kaj mẽ akĩnh nẽ ri apa.” Anhýr o amnhĩ jarẽ. Anẽ.

⁸ Nã ixpê Juãw na pa pre ã inhno ho mẽmoj pumunh anẽ. Hãmri nẽ omunh pa nẽ Tĩrtũm kapêr o wrýk xwýnh kot inhmã harẽnh xwýnhhta kutã ixkõn krã ho ixtẽm nẽ inhýr kaxyw. Nom nhũm amnhĩ nẽ inhmã kapêr kãm hihtýx nẽ inhmã:

⁹ —Kwa nã ri ã inhĩpêx anhýr kêt nẽ. ãm Tĩrtũm pix kutã na pu htem ã amnhĩ nhĩpêx anẽ. Apyrà nẽ ixpê Jejus kwý kãnã. Na pa hte apyrã nẽ ý

hã tanhmã amnhĩ nhĩpêx to ho ixpa. Nẽ mẽ apyrã nẽ kapêr ã kagã hkõt pix mã amnhĩ nhĩpêx. Na pu htem axpên kutã pahkõn krã ho parõrõk kêt nẽ. ãm Tĩrtũm pix kutã na pu htem ã amnhĩ nhĩpêx anẽ.

¹⁰ —E ã ate mẽmoj pumunh nẽ mar anhýr xwýnhja koja tokyx ã amnhĩ nhĩpêx anẽ. Jakamã kwa kêr ka akwyjê pê ho apimxur kêt nẽ. Piitã hã kagã hpa kê mẽ kamã harẽ nẽ kuma nẽ mẽmoj kot ã amnhĩ nhĩpêx anhýr mã xwýnhhta piitã hkukamã harẽnh ma. Koja tokyx mẽmoj ã amnhĩ nhĩpêx anẽ.

¹¹ —Jakamã kwãr mẽ mãmrĩ piitã tanhmã kãm amnhĩ nhĩpêx to ho pa hprãm xã hkõt amnhĩ nhĩpêx o pa. Kwãr mẽ mẽ kot amnhĩ tomnuj xwýnhjaja ã amnhĩ anhĩpêx anhýr o pa. Nẽ kwãr mẽ kot tanhmã kapêr punuj to xwýnhjaja mãmrĩ ã amnhĩ nhĩpêx anhýr o pa. Nẽ kwãr mẽ kot tãm amnhĩ nhĩpêx o ri mẽ pa xwýnhjaja mãmrĩ Tĩrtũm kõt pix mã ri tãm amnhĩ nhĩpêx o pa. Anẽ.

Nhũm pre ã kaxkwa hwýr ixto àpir xwýnhhta inhmã kapêr anẽ.

¹² Hãmri nhũm hpãnhã Jejus tãm inhmã kapêr nẽ inhmã:

—E kot paj tokyx akupým mẽ awýr wrý. Nẽ akupým pøj hãmri nẽ mẽ kot amnhĩ tomnuj o mẽ pa xwýnhjaja pa ja mýrapê ma mẽ kot amnhĩ xã htýx kamã hamak tũm xãta wýr mẽ rẽnh pa. No mẽ kot ixkõt amnhĩ nhĩpêx xwýnhjaja kot paj akupýn inhõ krĩ hwýr amnhĩ kõt mẽ ho api.

¹³ —Nẽ ixrãhãã xwýnh na pa. Amnepê mã kormã mẽmoj kêt ri na pa pre ra ixrãhãã. Nẽ koja nhýrmã mẽmoj piitã akupým hapêx pa arĩ ixrãhã nẽ ixpa ho ixpa.

¹⁴ —Nẽ Tĩrtũm kot mẽ anê mẽ ate amnhĩ tomnuj kuhõnh par xwýnhjaja kot kaj mẽ amex kumrêx nẽ apa ho apa. Nẽ akĩnh nẽ ajamakêtkati nẽ ri atýx apa ho apa. Te ho mẽ kot amnhĩ xê kahõnh nẽ mex jagjênh nẽ ri hã pata pyrãk. Koja Tĩrtũm mẽ amã anê ka mẽ ajamakêtkati nẽ õ krĩ hwýr agjê

ně kamã ri amex kumrêx në ri apa ho apa. Ně kamã mẽmo pĩ xô mẽ kot kur në htĩr tũm në pa mã xwỳnhhta wỳr mra në amnhĩm ô rê në hkur o ri apa. Ra mẽ ate Jejus kôt amnhĩ xunhwỳr jakamã kot kaj mẽ axãmnhĩx hwỳr mra në amnhĩm hkwỳ rê në hkur o ri apa. Kot kaj mẽ ã amnhĩ nhĩpêx anê.

15 –Nom mẽ kot amnhĩ tomnuj o mẽ pa xwỳnhjaja koja mẽ akĩnhã inhõ krĩ hwỳr gjêx kêt në. Mẽ kot ri mẽ y ho mẽ pa xwỳnhjaja. Ně mẽ kot nhãm ri mẽnijê ho amnhĩkati ho mẽ pa xwỳnhjaja. Ně mẽ kot ri mẽ hpar o mẽ pa xwỳnhjaja. Ně mẽ kot ri sãnti nhĩpêx o te Tĩrtũm nhĩpêx pyrãk o mẽ pa xwỳnhjaja. Ně mẽ kãm ri hêx prãm o ri mẽ pa xwỳnhjaja. Koja mẽ akĩnhã inhõ krĩ hwỳr pa hkêt në.

16 –E Juãw. Nà ixpê Jejus na pa awỳr ixkapêr o mẽ wrỳk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpôk rax kot arĩgro ho mõi ã ho amnhĩrĩt xwỳnhhta pyrãk. Anê.

Nhũm pre ã Jejus inhmã kapêr anê.

17 Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỳrja ma në hkĩnh në. Ně kãm kapêr o:

–Hêxta waa në. Kwa amnhĩm anojarêr në tokyx akupỳn mẽ ixwỳr wrỳ Pahĩti. Pa mẽ tokyx ã amnhĩ nhĩpêx anhỳr o ri war akôt ixpa. Anê.

Ně mẽ ate ja mar xwỳnhjaja kêr ka mẽ urãk në ã kãm akapêr anê.

Ně te mẽ amã kôr në ri mẽ apa pyrãk xwỳnhjaja kêr ka mẽ te Jejus wỳr amrar në õ gô ho akôm pyrãk në hkôt amnhĩ xunhwỳ. Te Jejus amarĩ mẽ pamã õ gô nhõr pyrãk o mẽ panhĩpêx pu mẽ hkôt amnhĩ xunhwỳ në ra pahpê pahtĩr tũm në papa mã xwỳnh. Hãmri në amnhĩ pãnhã tanhmã kãm amnhĩrer to hkêt në.

Nhỹrmã mẽmoj nyw par ã harênh jatur xà

18 E ixpê Juãw na pa Jejus nhỹ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anê. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrãk në hijuk ri axte mẽmoj nhĩpêx kêt në. ãm kwarĩ ho kwarĩ. Kot ka mẽ atõ anê nhũm Tĩrtũm ja hã apumu në kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

19 Rỳ ka mẽ atõ kagà kamã harê në ama në tanhmã ajamaxpêr to në ajamaxpêr o:

–Nà ja kot anhỳr kêt. Na mẽ ãm harênh o hêx. Kot paj kuma në ãm kuma.

Anhỳr o ajamaxpêr japêr. Hãmri nhũm Tĩrtũm amnhĩ tã ama në kagà mexta kamã kot tanhmã mẽ ho mex toja o ato mex kêt në. Ka õ krĩ hwỳr axàpir në mẽmo pĩ xô mẽ kot hkur në htĩr tũm në pa kaxyw mã xwỳnhhta ka amnhĩm hõ hyr në hkrêr kêt në. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhỳr mã xwỳnhhta jarênh ma në aprĩ hã piitã hkôt ajamaxpêr tỳx rãhã ho ri apa.

20 E Jejus kot inhmã mẽmoj kukamã tanhmã ujarênh to xwỳnhhta na pre inhmã amnhĩ jarênh o: “Kot paj tokyx akupỳn mẽ awỳr wrỳ.” Anê. ãm hãmri na pre ã amnhĩ jarênh anê. Koja tokyx akupỳn mẽ pahwỳr wrỳ hãmri nhũm mẽmoj piitã mex o mex.

Jakamã kwa kêr ka amnhĩm anojarêr mẽ tokyx akupỳn mẽ ixwỳr wrỳ Pahĩti Jejus.

21 Ně ixpyrà në mẽ apê Tĩrtũm krajaja na pa hte mẽ ato Pahĩti Jejus wỳr rãhã ho ri ixpa në kãm:

–Kwa akwỳjê pumu në mẽ kutã anojarêr rãhã ho ri apa Pahĩti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xô ri mẽ amã hã kagà hpa. E na hapêx.